

诗经世本古义

何楷

文硕阁

wenshuoge.com

目录

关于我们	4
御题何楷诗经世本古义	6
提要	7
序	8
卷首	9
卷一	24
卷二	65
卷三	74
卷四	86
卷五	91
卷六	102
卷七	118
卷八	130
卷九	163
卷十之上	218
卷十之中	269
卷十之下	316
卷十一	368
卷十二	382
卷十三	390
卷十四	392
卷十五	394
卷十六	399
卷十七	432
卷十八之上	505
卷十八之下	552
卷十九之上	596
卷十九之下	647
卷二十	663
卷二十一	715
卷二十二	729
卷二十三之上	732
卷二十三之下	744
卷二十四之上	758
卷二十四之下	768
卷二十五	796

卷二十六		798
卷二十七		808
卷二十八		811
卷后		815

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

御题何楷诗经世本古义

御题何楷诗经世本古义

明何楷闽人着诗经世本古义凡二十八卷依时代为次名曰世本古义以公刘七月大田甫田诸篇为首而殿以曹风下泉计三代有诗之世始夏少康终周敬王凡二十八王因配以二十八宿各为序目虽其书於名物训诂考证详明而钩?字句牵合史传强附名姓时代以舒窈窕兮?为夏徵舒硕鼠?为魏壽余又以草虫为南陔菁莪为由仪缙蚩为崇邱穿凿傅会不可枚举且以孔子删定之三百篇敢於任意颠倒不师古训妄兴异议实索隐行怪之徒不可为训徒供考证正宜束之高阁耳

弗遵孔子所删诗叙世传经自出奇割裂雅风畏忘彼差排星宿巧符其楷而失则何之谓撰以成乖杜岂辞可惜用功无用地束诸高阁合於斯

提要

钦定四库全书 经部三

诗经世本古义 诗类

提要

【臣】等谨案诗经世本古义二十八卷明何楷撰楷有古周易订诂已着録其论诗专主孟子知人论世之旨依时代为次故名曰世本古义始於夏少康之世以公刘七月大田甫田诸篇为首终於周敬王之世以曹风下泉之诗殿焉计三代有诗之世二十八王各为序目於前又於卷末仿序卦传例作属引一篇用韵语排比成文着所以论列之意考诗序之传最古已不尽得作者名氏故郑氏诗谱缺有间焉三家所述如关雎出毕公?离出伯封之类茫昧无据儒者犹疑之弗传楷乃於三千年後鉤?字句牵合史传以定其名姓时代如月出篇有舒窈窕兮舒慍受兮之文即指以为夏徵舒此犹有一字之近也硕鼠一诗茫无指实而指以为左传之魏寿余此孰见之而孰传之以大田为豳雅丰年良耜为豳颂即属之於公刘之世此犹有先儒之旧说也以草虫为南陔以菁菁者莪为由仪以缙蛮为崇邱人孰传之而孰受之大惑不解楷之谓乎然楷学问博通引援赅洽凡名物训诂一一考证详明典据精?实非宋以来诸儒所可及譬诸蒐罗七宝造一不中规矩之巨器虽百无所用而毁以取材则火齐木难片片皆为珍物百余年来人人嗤点其书而究不能废其书职是故矣乾隆四十六年六月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

序

诗经世本古义序

昔者孔子之教天下道不外乎六经而礼乐为王者之事当世必皆各有成书如周礼仪礼之类不容以意为之损益其所手定惟易书诗春秋四者易衍十翼春秋修旧史皆述也而有作焉若书诗第以弃取见义而已易春秋之为书一明理一纪事各自一行而书诗则兼礼乐而有之是故易体也春秋用也垂书诗以礼乐圣人治世之迹所以流露于体用之间者也然以理言则礼乐仍与易为类物之有本末也以事言则书诗又与春秋为类道之有升降也不明乎此亦未有能读书诵诗者也夫以书为兼乎礼乐类乎春秋人犹信之若诗则第以道性情一语蔽之足矣将安取此嗟乎诗教失传莫大于是今夫诗在书中不过诸制之一若五子之歌是也诸制各因一事而作宜不能多而诗则上播诸声律下形诸讽咏无地而不有诗无人而不可以作诗当孔子之世而古诗存者至三千余亦云夥矣而所删存者厘厘止此其所以存之者必有故也繇其所从来者异故於一体中自以风雅颂为之标别然亦必皆因一事而作则其世固可知也夏商之文献皆不足矣宋犹存商颂五篇杞无一焉惟周室先祖之诗藏在故府幸不放失圣人以为此二代文献之犹存者也故取公刘幽诸诗以续五子之後取王季文王诸咏以广商颂之遗其於二代盖彬彬矣书断於穆春秋始於平中间若厉宣幽三王之际皆周室改革之大者而其事迹杳如也舍诗将安所徵之故诗者联属书与春秋之隙者也孟子曰王者之迹熄而诗亡诗亡然後春秋作诸儒推测未有得其解者也今以世考之诗亡于下泉正当敬王之时春秋之作适有感是时耳盖至是而周不复兴矣乎王城敬下都愈趋愈下圣人所以投笔而自废也圣人之删书也其心犹以王为未足也曰必如帝者斯可矣删诗则不及帝矣而其大指所在特惓惓属望于中兴曰孰能如夏之少康殷之盘庚武丁者乎故於二代之诗独有取于三君之世此尤足以见春秋托始平王之意也若夫典章文物声容数之盛散见于诗中者犁然明备至纖而不可遗至繁而不可乱按之三礼无一不合有王者起特举而措之耳是又圣人之借诗以存礼乐也盖昔孔子雅言诗书执礼而不及乐他日又言兴于诗立于礼成于乐而不及书明乎举诗足以兼书犹之举礼足以兼乐也其言诗书恒在礼乐之先者以礼乐取诸诗书中而足也後儒视诗太浅索诗太易盍亦思圣人所以广收约取着之为经与易书春秋并垂者其立教宜何如精严而可轻以里巷讴吟文人词曲例之乎凡余说诗是不一术先循之行墨以研其义既证之他经以求其验既又考之山川谱系以摭其实既又寻之鸟兽草木以通其意既又订之点画形声以正其误既又杂引赋诗断章以尽其变诸说兼详而诗中之为世为人若礼若乐俱一一跃出於是喜斯文之在兹叹絶学之未坠也当其沉思莫解寢食都忘疑竅将开鬼神如牖亦閱七载手不停披斯已勤矣书成悉依时代为次名曰世本古义伸子輿氏诵诗论世之指也卷凡二十八与经宿配每篇仿古序体更定小引以冠其前其诸义未安者则附见之章句之後欲使观者了其巔末有所考镜焉挂漏之病知不能无紕繆拾遗以俟来哲崇禎十有四年岁次辛巳夏四月丁卯古闽何楷书

卷首

钦定四库全书

诗经世本古义卷首

明何楷撰

原引

古文诗作□【从言从之】心有所之形而为言斯其义也【说文云诗志也志发于言释名云诗之也志之所之也诗序云在心为志发言为诗班固云诵其言谓之诗咏其诗谓之歌】太师采之【食货志云孟春之月羣居者将散行人振木铎徇于路以采诗献之太师比其音律以闻于天子礼记云天子五年一巡狩命太师陈诗以观民风文中子云薛收问曰今之民胡无诗子曰诗者民之情性也情性能亡乎非民无诗职诗者之罪也陈傅良云春秋之衰以礼废秦之亡以诗废尝观之诗刑政之苛赋役之重天子诸侯朝廷之严而后妃夫妇衽席之秘圣人为诗而使天下匹夫匹妇之微皆得以言其上宜若啓天下轻君之心然亟谏而不悟显戮而不戾相与携持去之而不忍是故汤武之兴其民急而不敢去周之衰其民哀而不敢离盖其抑郁之气纾而无聊之意不蓄也呜呼诗不敢作天下怨极矣卒不能胜共起而亡秦秦亡而後快於是始有匹夫匹妇存亡天下之权呜呼春秋之衰以礼废秦之亡以诗废吾固知公卿大夫之祸速而小民之祸迟而大而诗者正所以维持君臣之道其功用深矣】别其美恶以资教化【诗序云正得失动天地感鬼神莫近于诗先王以是经夫妇成孝敬厚人伦美教化移风俗朱子云诗者人心之感物而形于言之余也心之所感有邪正故言之所形有是非唯圣人在上则其所感者无不正而其言皆足以为教其或感之之裸而所发不能无可择者则上之人必思所以自反而因有以劝惩之是亦所以为教也】弃取之间官实为政改变文施寺【古文□右施之今文诗右施寺】寺者法度之廷也【说文云寺廷也有法度者也】或曰寺之为言侍也【周礼天官寺人注云寺之言侍也诗寺人孟子疏云言寺者欲取亲近侍御之义】取其可以侍御于君也【虞书舜曰予欲闻六律五声八音在治忽以出纳五言汝听左传云瞽诵诗谏此以诗侍御于君之义也又孔颖达云名为诗者内则说负子之礼曰诗负之注谓诗之言承也春秋说题辞曰在事为诗未发为谋恬澹为心思虑为志诗之为言志也诗纬含神雾曰诗者持也然则诗有三训承也志也持也作者承君志之善恶述己志而作诗为诗所以持人之行使不失坠故一名而三训也今按言志为诗自是本训更取持义已属迂远若内则诗负之云直是缘诗持相近而误但当通作持耳强训为承支离斯甚】上古质朴靡得而称肇舜命夔诗名方显【郑玄诗谱序云诗之兴也谅不于上皇之世大庭轩辕逮于高辛其时有亡载籍亦蔑云焉虞书曰诗言志歌永言声依永律和声然则诗之道放於此乎孔颖达云哀乐之起冥於自然喜怒之端非繇人事故燕雀表啁噍之感鸾凤有歌舞之容然则诗理之先同夫开辟诗迹所用随运而移上皇道质故讽谕之情寡中古政繁亦讴歌之理切唐虞乃见其初牺轩莫测其始又云上古之时徒有讴歌吟呼纵令土鼓苇龠必无文字雅颂之声故伏羲作瑟女娲笙簧及蕢桴土鼓必不因诗咏如此则时虽有乐容或无

诗】迨乎孔子之世古诗存者三千余篇於是去其繁复録其止于礼义厘得十之一【司马迁云古者诗三千余篇及至孔子去其重取可施于礼义上采契后稷中述殷周之盛至幽厉之缺始于衽席故曰关雎之乱以为风始鹿鸣为小雅始文王为大雅始清庙为颂始三百五篇孔子皆弦歌之以求合韶武雅颂之音礼乐自此可得而述以备王道成六艺朱子云昔周盛时上自郊庙朝廷而下达於乡党闾巷其言粹然无不出于正者圣人固已协之声律而用之乡人用之邦国以化天下至於列国之诗则天子巡守亦必陈而观之以行黜陟之典降自昭穆而後寢以陵夷至於东迁而遂废不讲矣孔子生於其时既不得位无以行劝惩黜陟之政於是特举其籍而讨论之去其重复正其纷乱而其善之不足以为法恶之不足以为戒者则亦刊而去之以从简约示久远程子云虞之君臣迭相赓和见於书夏殷之世虽有作者其传鲜矣至周而世益文人之怨乐必形於言政之善恶必见刺美至夫子之时所传者多矣夫子删之得三百篇皆止於礼义可以垂世立教古之人幼而闻歌颂之声长而识刺美之意故人之学繇诗而兴後世老师宿儒尚不知诗义後学岂能兴起也】着以为经【王应麟云二帝之世工以纳言时而扬之其施之学校以教士与礼乐书相参谓之四术至孔子始删取着以为经】猗欤伟矣【韩诗外传云子夏读诗已毕夫子问曰尔亦可言於诗矣子夏对曰诗之於事也昭昭乎若日月之光明燎燎乎如星辰之错行上有尧舜之道下有三王之义弟子不敢忘虽居蓬户之中弹琴以咏先王之风有人亦乐之无人亦乐之亦可发愤忘食矣诗曰衡门之下可以栖迟泌之洋洋可以疗饥夫子造然变容曰噫吾子始可以言诗已矣然子以见其表未见其里顔渊曰其表已见其里又何有哉孔子曰闚其门不入其中安知其奥藏之所在乎然藏又非难也丘常悉心尽志已入其中前有高岸後有深谷冷冷然如此既立而已矣不能见其里盖谓精微者也论语子曰诗三百一言以蔽之曰思无邪又曰小子何莫学夫诗诗可以兴可以观可以羣可以怨迩之事父远之事君多识於鸟兽草木之名又曰不学诗无以言又曰诵诗三百授之以政不达使于四方不能专对虽多亦奚以为】及门之士能言诗者惟商赐二贤尝蒙许可【论语子曰起予者商也始可与言诗已矣又曰赐也始可与言诗已矣告诸往而知来者】其後孟子说诗独精【孟子曰故说诗者不以文害辞不以辞害志以意逆志是为得之】秦燔灭文章而诗以播在讽诵?全【班固云孔子纯取周诗上取殷下取鲁凡三百五篇遭秦而全者以其讽诵不独在竹帛故也按周礼太师教六诗曰风曰赋曰比曰兴曰雅曰颂以六德为之本以六律为之音瞽蒙掌九德六诗之歌以役太师论语子曰吾自卫反鲁然後乐正雅颂各得其所又曰师摯之始关雎之乱洋洋乎盈耳哉乐记子赣见师乙而问焉曰赐闻声歌各有宜也如赐者宜何歌也师乙曰寛而静柔而正者宜歌颂广大而静疏达而信者宜歌大雅?俭而好礼者宜歌小雅正直而静廉而谦者宜歌风】汉兴有鲁齐燕三家之学皆列学官【司马迁云言诗於鲁则申培公於齐则轅固生於燕则韩太傅班固云鲁申公为诗训故而齐轅固燕韩生皆为之传按鲁诗弟子显者为孔安国韦玄成王式龚遂齐诗弟子显者为萧望之匡衡翼奉师丹韩生即韩太傅名婴】鲁最先显【当汉高祖过鲁申公以弟子从师入见于鲁南宫韩婴为孝文时博士轅固为孝景时博士】齐最先亡【隋志云齐诗魏代已亡鲁诗亡於西晋韩诗虽存无传之者按今韩诗所传唯有外传十卷】鲁诗出于浮丘伯浮丘伯者荀卿门人也齐燕不知所从受而韩氏之学乃自谓其诗不如易深【班固艺文志云婴推诗人之意而作内外传数万言其语颇与齐鲁间殊然归一也孝宣时涿郡韩生以易徵曰尝受韩诗不如韩氏易深】孟坚扬扞三家独许鲁为近之【固云齐燕鲁或取春秋采襍说咸非其本义与不得已鲁最为近之】最後毛公诗出称得传于

子夏不与三家同以授毛萇然其本亦出荀卿云【毛公名亨或云鲁人或云河间人序錄徐整云子夏授高行子高行子授薛仓子薛仓子授帛妙子帛妙子授河间大毛公陆玑云子夏传鲁人曾申申传魏人李克克传鲁人孟仲子孟仲子传根牟子根牟子传赵人孙卿子孙卿子传鲁人大毛公初学记云荀卿授鲁国毛亨作诂训传以授赵国毛萇时人谓亨为大毛公萇为小毛公】传至卫敬仲有序行世【後汉儒林传云卫宏字敬仲东海人初九江谢曼卿善毛诗宏从受学作毛诗序善得风雅之旨于今传于世郑樵云汉兴四家之诗毛诗未有序惟韩诗以序传于世齐诗无序鲁诗之序有无未可知诗之序大槩与今序异韩诗得序而益明汉儒多宗之如司马迁扬雄范曄之徒皆以二南作于周衰之时此韩学也毛诗至卫宏为之序郑玄为之注而毛序之学盛行又非韩所敢望也或者谓大序作于子夏小序作于毛公此说非也序有郑注而无郑笺其不作于子夏明矣毛公於诗第为之传其不作序又明矣又谓大序作于圣人小序作于卫宏谓小序作於卫宏是也谓大序作于圣人非也命篇大字盖出於当时采诗太师之所题而题下之序则卫宏从谢曼卿受师说而为之也或者又曰序之文辞委曲明白非宏所能为曰使宏凿空为之虽孔子亦不能使宏诵师说为之则虽宏有余矣意者毛氏之诗历代讲师之说至宏而悉加詮次焉今观宏之序有专取诸书之文至数句者有?取诸家之说而辞不坚决者有委曲宛转附经以成其义者宏序作于东汉故汉世文字未有引诗序者惟黄初四年有曹共公远君子近小人之语盖魏後于汉而宏之序至是而始行也朱子云儒林传以为卫宏作毛诗序然郑序又以为诸序本自合为一编毛公始分以置诸篇之首则是毛公之前其传已久宏特增广而润色之耳程大昌云古序之与大序今混并无别然有可考者凡诗发序雨语如关雎后妃之德也世人之谓小序者古序也雨语以外续而申之世谓大序者宏语也今其续序之指事喻意也凡左传国语所尝登载则深切着明历历如见苟二书之所不言而古诗又无明证则第能和附诗词顺畅其意未有一序而能指言其人其事也此又有以见序之所起非亲生作诗之世目击赋诗之事自可以审定不疑也然则曄谓续序之为宏作真实錄矣】郑康成氏遵畅毛旨特为之笺【郑樵云笺之为言魏晋间所以致辞于皇太子诸王者也郑以君师之礼待毛故特称笺】又申明毛义以难三家三家遂废矣【吕祖谦云左氏所引诗多与毛氏合欧阳修云毛氏序与孟子说诗多合】郑又着有诗谱【谱序云夷厉已上岁数不明太史年表自共和始历宣幽平王而得春秋次第以立斯谱欲知源流清浊之处则循其上下而省之欲知风化芳臭气泽之所及则傍行而观之此诗之大纲也举一纲而万目张解一卷而衆篇明于力则鲜于思则寡其诸君子亦有乐于是欤】自後言诗者不越毛郑为宗至宋诸儒间用已意有所发明而朱子集传多不取小序及二氏之说其书简径易晓读者便之於是古学益微近世又有伪为鲁诗而托之子贡传者意覬与毛传并行然掇拾浅陋有识哂焉楷家世受诗【先曾大父志齐府君讳良绍处士先大父印海府君讳湛郡别驾】先君【即印海府君】每举孟子论世一法【孟子曰诵其诗读其书不知其人可乎是以论其世也】以为诗学要领谓不能论其世以知其人则不能知其诗之从何而作不能知其诗之从何而作则所以说之者皆呖语耳又引文中子圣人述史三焉之说【文中子谓薛收曰昔圣人述史三焉其述书也帝王之制备矣故索焉而皆获其述诗也兴废之繇显故究焉而皆得其述春秋也邪正之迹明故考焉而皆当】谓书诗春秋原相首尾诗即史也小子受而识之不自揣量旁稽力索积以岁月始成诗经世本古义一书【按古有世本十五篇司马迁采世本为史记刘向云世本古史官明于古事者所記錄黄帝以来帝王诸侯及卿大夫系谥名号又皇甫谧顔之推皆谓世本左丘明所书今不传故家

大人窃取其名而复系古义二字于下者所以示别也】每篇各为小引以识其世【计三代有诗之世共二十八王】具有依据亦多旧所未发非敢求多前贤聊以仰承先志云尔若夫榘训诂则郑【汉郑玄字康成】孔【唐孔颖达字仲达着正义】之功决不可诬【古诗有云读诗不到康成处不敢高声论圣贤】课进修则朱子之言深得其要【朱子云诗之为经人事浹于下天道备于上无一理之不具其学之也当奈何曰本之二南以求其端参之列国以尽其变正之於雅以大其规和之於颂以要其止此学诗之大旨也於是乎章句以纲之训诂以纪之讽咏以昌之涵濡以体之察之情性隐微之间审之言行枢机之始则修身及家平均天下之道其亦不待他求而得之於此矣】尊闻行知【曾子云尊其所闻则高明矣行其所知则光大矣】愿与诵诗者共勗诸【郑夹漈有言善观诗者当推诗外之意如孔子子思善论诗者当达诗中之理如子贡子夏善学诗者当取一二言为立身之本如子路南容是之谓读诗法蒙虽不敏请终身诵之】

附錄

论十五国风

【朱子云国者诸侯所封之域而风者民俗歌謠之诗也共十五国其次第先後传者亦各不同周南召南邶鄘卫王郑齐豳秦魏唐陈曹此周太师乐歌之次第也周召邶鄘卫王郑齐魏唐秦陈桧曹豳此毛氏诗诂训传之次第也周召邶鄘卫桧郑齐魏唐秦陈曹豳王此郑玄诗谱之次第也周南召南邶鄘卫王齐魏唐曹邶郑陈秦豳此子贡传申培说之次第也周乐次第在孔子未删诗之前子贡申培其书新出近世郑玄诗谱特以己意次其先後皆不足据先儒相传一依毛传间有推测亦或可观然未必圣人之意也至若诗之名风厥有三义其一者系乎土天有八风以宣其气人资五土以命其质故五方有性而百里殊风善者矫其偏而归之中不善者循其流习而莫之止也记曰郑声好滥淫志卫音促数烦志齐音傲僻骄志是列国之音亦不同天子巡狩列国太师陈诗以观民风者此也其一者本乎上风殊习异而上之人身先之淑慝政教之隆污感焉渐焉其风动于人犹风之吹物入物于是乎雅俗乖和哀乐淫思之效具形于谣咏而成风大序谓一国之事系一人之本谓之风古太师陈诗而天子躬于明堂临观考政治焉盖其重也其一者辨乎体列国之风化不齐声气虽不类而体则一是故风之体轻扬和婉托物而不着于物指事而不滞于事义虽寓于音律之间意尝超于言辞之表大序所云上以风化下下以风刺上主文而谲谏言之者无罪闻之者足以戒故曰风是也又史记云诗记山川谿谷禽兽⁴⁴木牝牡雌雄故长于风乐记云正直而静廉而让者宜歌风左传襄二十九年吴公子札来聘请观於周乐使工为之歌周南召南曰美哉始基之矣犹未也然勤而不怨矣为之歌邶鄘卫曰美哉渊乎忧而不困者也吾闻卫康叔武公之德如是是其卫风乎为之歌王曰美哉思而不惧其周之东乎为之歌郑曰美哉其细已甚民弗堪也是其先亡乎为之歌齐曰美哉泱泱乎大风也哉表东海者其太公乎国未可量也为之歌豳曰美哉荡乎乐而不淫其周公之东乎为之歌秦曰此之谓夏声夫能夏则大大之至也其周之旧乎为之歌魏曰美哉颯颯乎大而婉俭而易行以德辅此则明主也为之歌唐曰思深哉其有陶唐氏之遗民乎不然何忧之远也非令德之後谁能若是为之歌陈曰国无主其能久乎自邶以下无讥焉朱子引旧说二南为正风所以用之闺门乡党邦国而化天下也十三国为

变风则亦领在乐官以时存肄备观省而垂监戒耳然仅止于十五国何也周衰诗亡删订止此以十五国槩方内风俗大略可覩矣诗序云国史明乎得失之迹伤人伦之废哀刑政之苛吟咏性情以风其上達于事变而怀其旧俗者也故变风发乎情止乎礼义发乎情民之性也止乎礼义先王之泽也文中子云列国之风深以固其人笃曰我君不卒求我也其上下相安乎及其变也劳而散其人盖伤君恩之薄也而不敢怨曰犹吾君也吾得逃乎何敢怨故曰三代之末尚有仁义存焉其在雅颂前何也邓元锡云风自下起故诗莫先于风家人风所自出故风莫大于闺门言天下之事形四方之风谓之雅雅亦风也同风之道也颂者美盛德告成功于神明风者神明之道也明乎风而三经三纬之旨具达之矣陈际泰云国有风而天下无风风者立於外而观之因以名之者也人有谓晋之俗俭吴之俗佻楚之俗慄者矣未闻有曰天下之俗或俭或佻或慄者天下未尝外此而合而归之则其途褊既不可专指以为名且皆立於天下之中又谁从其外而观之而因以名也哉故欲名天下之风者必其与我异又立於其外者也故殷立於夏之外则曰夏尚忠周立於殷之外则曰商尚质後世立於周之外则曰周尚文而中国立於蛮獠之外则曰蛮獠之俗贵壮而贱老何者以专指之以外名之势固然也故诸侯之诗名之为风而天子之诗名之为雅为颂然而周颂郁而奥即周之政事好尚见焉鲁颂从而肆即鲁之政事好尚见焉商颂简而明即商之政事好尚见焉独非风欤曰此所谓以专指之以外名之者也雅之正变可以观世焉然不列於风者各有统焉耳雅与风其为世孰先幽先二南其先诸侯之时乎正大小雅则天子之乐章多周公所定变大小雅与?鄘以下之时参褊断自幽平之世乃国风则已有入春秋者矣风者出於雅之前後者也又程大昌云诗有南雅颂无国风其曰国风者非古也夫子尝曰雅颂各得其所又曰人而不为周南召南未尝有言国风者子於是疑此时无国风一名然犹恐夫子偶不及之未敢自主执也左氏记季札观乐历叙周南召南小雅大雅颂凡其名称与今无异至列叙诸国自?至幽其类凡十有三率皆单纪国土无今国风品目吾是以知古固如此非夫子偶於国风有遗也盖南雅颂乐名也若今乐曲之在某官者也南有周召颂有周鲁商本其所从得而还以系其国土也二雅均之为雅音类相同又自别为大小则声度必有丰杀廉肉亦如十二律然既有大吕又有小吕也若夫?至幽此十三国者诗皆可采而声不入乐则直以徒诗着之本土故季札所见与夫周工所歌单举国名更无附语知本无国风也又云春秋战国以来诸侯卿大夫士赋诗道志者凡诗褊取无择至考其入乐则自?至幽无一诗在数享之用鹿鸣乡饮酒之笙瑟庚鹄巢射之奏驺虞采芣诸如此类未有或出南雅之外者然後知南雅颂之为乐诗而诸国之为徒诗也今按程氏谓自?至幽皆不入乐以为徒诗是已若谓诗无风名则不必然乐记师乙告子贡明有歌风之语即季札亦曰是其卫风乎又曰泱泱乎大风也哉左传曰风有采繁采芣至周礼大师教六诗以风为首则风名非出于古而何】

论二雅

【按左传襄二十九年吴季札观周乐歌大雅小雅是雅有大小已见于夫子未删之前矣雅本鸟名说文以为楚鸟也一名卑一召鷖居即小弁篇之鷖也取以名诗不知何义或谓诗有咏叹如鸟之吁呼似矣然尔雅亦以雅名非诗也将安取乎又说文有疋字本训为足而别引一说曰记也且曰古文以为诗大疋字按古文大小雅尔雅字本皆作疋若以记解疋於命书之意良顺而疋之为字上象脐肠下从止只宜训为足何缘有记之义疑疋与书同音通用作

书耳乃书之音去雅又远读者不应遂讹至此展转推求终不可解愚意乐器中有所谓雅者周礼笙师职云舂牍应雅以教衽乐衽夏之乐先王所以示戒也舂牍应雅四者所以节之也陈阳云雅者法度之器所以正乐者也宾出以雅欲其醉不失正也工舞以雅欲其讯疾不失正也宾出以雅用衽夏以示戒则工舞以雅可知先儒谓状如漆桶而鼻口大二围长五尺六寸以羊韦□之旁有两纽疏画武舞工人所执所以节舞也一曰中有椎髻尽为云气窃疑雅之取义盖本於此故旧说相传皆以正训雅子夏云雅者正也程子云雅者正言其事又云雅者陈其正理张子厚亦云雅之体直言之比兴差少无隐讽谏之巧而朱子则以为正雅之歌也愚按雅题不曰周者以所载皆周室之诗絶无异代相涉故不言周也若夫分为大小其故难明古今相传有四说焉或主政或主理或主辞或主声子夏云言天下之事形四方之风谓之雅言王政之所繇废兴也政有大小故有小雅焉有大雅焉季氏云小雅则主一事而言大雅则泛言天下之事如鹿鸣之燕嘉宾四牡之劳使臣皇皇者华之遣使臣是主一事而言之也至於大雅则泛言天下之事如文王之诗言文王受命作周大明之诗言文王有明德之类朱子云小雅施之君臣之间大雅则止人君可歌冯时可云小雅者天子逮下之诗大雅者天子述祖之诗小雅之变者哀怨刺讥之意多大雅之变者忧悯规正之词切此以上皆主政为说者也苏辙云小雅之所以为小大雅之所以为大何也小雅言政事之得失而大雅言道德之存亡政事虽大形也道德无小不可以形尽也盖其所谓小者谓其可得而知量尽于所知而无余也其所谓大者谓其不可得而知沛然其无涯者也故虽爵命诸侯征伐四国事之大者而在小雅行苇言燕兄弟耆老灵台言麋鹿鱼鼈荡刺饮酒号呼韩奕歌韩侯取妻皆事之小者而在大雅夫政之得失利害止於其事而道德之存亡所指虽小而其所及者大矣陆九渊云小雅主事言大雅主理言谓之小者诗虽典正未至於浑厚大醇也谓之大则浑厚大醇矣邓元锡云小雅王事大雅天道小雅情丽乎则大雅性通乎命小雅亲臣大雅格君此大小之所以别也此以上皆主理为说者也苏轼云季札观周乐以为大雅曲而有直体小雅思而不貳怨而不言夫曲而有直体者寬而不流也思而不貳怨而不言者狭而不迫也繇此观之则大雅小雅之所以异者取其辞之广狭非取其事之小大也严粲云雅之大小特以体之不同尔盖优柔委曲意在言外风之体也明白正大直言其事雅之体也纯乎雅之体者为雅之大褻乎风之体者为雅之小离骚出於国风言多比兴意亦微婉世以风骚并称谓其体之同也太史公称离骚曰国风好色而不淫小雅怨诽而不乱若离骚者可谓兼之矣言离骚兼国风小雅而不言其兼大雅见小雅与风骚相类而大雅不可与风骚并言也咏呦呦鹿鸣食野之苹便识得小雅兴趣诵文王在上於昭于天便识得大雅气象小雅大雅之别昭昭矣此以上皆主辞为说者也孔颖达云有大雅小雅之声乐记曰广大而静疏达而信者宜歌大雅恭俭而好礼者宜歌小雅郑樵云小雅大雅特随其音而写之律耳律有小吕大吕则歌小雅大雅宜其有别也程大昌亦云南雅颂乐名也若今乐曲之在某宫者也南有周召颂有周鲁商本其所从得而还以系其国土也二雅独无所系以其纯当周世无用标别均之为雅音类既同又自别为大小则声度必有丰杀廉肉亦如十二律然既有大吕又有小吕也陆深云大雅小雅犹今言大乐小乐云尝见古器物铭识有筦曰小雅筦有钟曰颂钟乃知诗之篇名各以声音为类而所被之器亦有不同後人失之声而以名义求非诗之全体也此以上皆主声为说者也之四说者分则各成一是执则必至难通在主政与主理者颇相彷彿彼以小雅如燕飧遣劳南征北伐之类固为小矣而常武之兴师何以大于六月卷阿之求贤何以大于鹿鸣乎在主辞与主声者颇相彷彿彼不外借风雅之纯褻以别大小矣然衽朴旱麓灵台鳧鷖

非襍乎风者耶何以载于大天保六月车攻吉日非纯乎雅者耶何以载于小乎郝敬于是櫟括而合言之曰小雅大雅皆王朝之诗小雅多言政事而兼风大雅多言君德而兼颂故小雅之声飘飏和动大雅之声庄严典则小大之义尽此矣而二雅之中又有正变之说其篇次依子夏序为据郑玄云大雅之初起自文王至于文王有声据盛隆而推原天命上述祖考之美小雅自鹿鸣至于鱼丽先其文所以治内後其武所以治外此二雅逆顺之次要於极贤圣之情着天道之助如此而已矣大雅生民下及卷阿小雅南有嘉鱼下及菁菁者莪周公成王之时诗也传曰文王基之武王凿之周公内之谓其道同终始相成比而合之故大雅十八篇小雅十六篇为正经其用於乐国君以小雅天子以大雅然而飨宾或上取燕或下就何者天子飨元侯歌肆夏合文王诸侯歌文王合鹿鸣诸侯於邻国之君与天子於诸侯同天子诸侯燕羣臣及聘问之宾皆歌鹿鸣合乡乐此其着略大较见在书籍礼乐崩坏不可得详大雅民劳小雅六月之後皆谓变雅美恶各以其时亦显善惩过正之次也苏氏云昔周之兴也积仁行义凡数百年至於文武风俗纯备是以其诗发而为正诗自成康以後周室不竞至幽厉而大坏其败亦数百年其蓄之也亦厚矣是以其诗不复其旧而谓之变邓云古后王会朝受厘若燕飨皆有乐尚矣周公相成王定乐乃制为宾师友燕兄弟洽羣下劳使臣以至于兴贤育士遣将命戍毕各因其尊亲之义上下之等敬爱之则具次为燕飨乐歌奏之时摭而旁用焉命之曰小雅其祭讫受厘会朝陈戒又原天命之明赫扬祖德之盛隆为乐歌以格王正事命之曰大雅故雅者正也正者政也会朝政所自出燕飨政所自行曰正也风者风也风本於家而化成於国故端起於夫妇雅者正也政发於朝廷而达之天下故纲始於君臣风始於夫妇故二南风本也情而惟则乐而不淫则风移而俗易政始於君臣故二雅政本也君燕飨以慈惠尽下情臣会朝以道德襄上志则政善而民安君不尽下下不匡上则雅道废而政为不举诗人伤之而有作依大小雅以为文刺失导嫩而变雅作焉故上感下下格上莫大於二雅二雅政本也风先雅何也曰有夫妇然後有父子有父子然後有君臣有君臣上下然後礼义有所错夫夫人道之始政之根也小雅先大雅何也曰君先逮下则下忠报上天先乎地君先乎臣其义一也故通乎雅而政立政立而天下定矣朱子云正小雅燕飨之乐也正大雅会朝之乐受厘陈戒之辞也故或欢欣和说以尽羣下之情或恭敬齐庄以发先王之德词气不同音节亦异多周公制作时所定也及其变也则事未必同而各以其声附之冯时可云大雅正经所言受命配天继代守成而小雅正经治内则惟燕劳羣臣朋友治外则惟命将出征以此律彼其体异矣故小雅为诸侯之乐大雅为天子之乐太师审其所述自不容紊也至於二雅之变大雅则宏远而疏朗弘大体以明责小雅则踰急而局促多忧伤而怨诽读者当自得之矣邓云易传曰卦有小大辞有险易维诗也亦然正雅辞多易变雅辞多险其易易知可服存其险难知多复隐情性之理也苏子瞻云大雅之变作於大臣召穆公卫武公之类是也其言天人之际婉曲之中直体存焉故其辞广小雅之变作於羣臣家父孟子之类是也其言天人之际虽若迫切而犹雍容何者士大夫言词气象终与凡民异尔风之变也匹夫匹妇皆得以风刺清议在下而世道益降矣朱子云雅之变者亦皆一时贤人君子悯时病俗之所为而圣人取之其忠厚惻怛之心陈善闭邪之意尤非後世能言之士所能及之孔仲达云王政既衰变雅兼作取大雅之音歌其政事之变者谓之变大雅取小雅之音歌其政事之变者谓之变小雅又云变者虽亦播於乐或无算之节所用或随事类而歌又在制礼之後乐不常用按以上皆本郑笺正变之论而夹漈郑氏独以为不然其言曰正变之言不出於夫子未可信也小雅节南山之刺大雅民劳之刺谓之变雅可也鸿雁庭燎之美宣王崧高烝民之美宣王亦可谓之

变乎诗之次第皆以先後为序文武成康其诗最在前故二雅首之厉王继成王之後宣王继厉王之後幽王继宣王之後故二雅皆顺其序国风亦然则无有正变之说断断乎不可易也乃近代相传有托为子贡诗传申培诗说者取小雅大雅而各三分之其一曰小雅其二曰小雅续其三曰小雅传大雅亦然盖本于夹漈雅非有正变之辨而暗取东莱吕氏衍郑孔之说按郑康成谓小雅十六篇大雅十八篇为正经唐孔氏以己意广之曰凡书非正经者谓之传未知此传在何书也吕氏谓按楚辞屈原离骚谓之经自宋玉九辨以下皆谓之传以此例考之鹿鸣以下小雅之经也六月以下小雅之传也文王以下大雅之经也民劳以下大雅之传也孔氏以凡书非正经谓之传善矣又谓未知此传在何书则非也今详诗传诗说之意以诗之美者分为正续皆谓之经而其余诗之刺者皆归之传於旧所列宣王诗于变雅内者另摘出为续而其不以续名者即正雅也其以传名者即变雅也既铲去正变之名以合于樵并铲去经之字以别于玄又独存传之目以符于吕彼自谓其偷之巧而不觉其欲盖弥章也真贗书也如愚之意则并正变经传之名皆去之可矣小雅八十篇内笙诗六篇亡实七十四篇大雅三十一篇故张揖云诗小雅之材七十四人大雅之材三十一人愚按六笙诗非真亡也本俱在小雅诸诗之中以其用为乐章特於篇中摘一字二字以异其名而读者不觉耳南陔即草虫也束皙补亡诗注云陔陇也陇者大坂也篇中言陟彼南山故曰南陔也白华即采薇也其第四章曰彼尔维何维常之华以常棣华白故曰白华也华黍即出车也其第四章曰昔我往矣黍稷方华是华黍也由庚即吉日也篇中有吉日庚午之语崇丘即緜蛮也曰丘阿曰丘隅曰丘侧是崇丘也由仪即菁菁者莪也其首章曰乐且有仪且夫诗中此例非乏也姑举汉广亦摘篇中二字常武亦摘篇中一字不于此六诗舛也史记言古诗三千余篇及至孔子去其重取可施於礼义者三百五篇龚遂谓昌邑王曰大王诵诗三百五篇王式曰臣以三百五篇諫及讖纬之书如乐纬诗纬尚书璿玑铃其作於汉世者皆以三百五篇为夫子删采定数正与今诗见在篇数相合则六笙诗篇目其为衍无疑也又按郑玄谓小雅大雅皆周室居西都丰镐时之诗盖泥于王者之迹熄而诗亡之说谓平世东迁则雅诗亡而降为王风矣愚考订世次雅诗实有在东迁之後者陈际泰谓王风指王城而言之王城自有风何与天子之雅也哉其论可信他如最难详者又有四始五际之说诗纬泛历枢云大明在亥水始也四牡在寅木始也嘉鱼在巳火始也鸿雁在申金始也又云午亥之际为革命卯酉之际为改正亥者天门出入候聽卯天保也酉析父也午采芑也亥大明也然则亥为革命一际也亥又为天门出入候听二际也卯为陰阳交际三际也午为阳谢陰兴四际也酉为陰盛阳微五际也不知作何挨排而大雅得其一小雅得其四然必非圣人精蘊所在也】

论三颂

【刘勰云四始之至颂居其极昔帝尝之世咸墨为颂以歌九韶自商以下文理允备风雅序人事兼变正颂主告神义必纯美斯乃宗庙之正歌非燕飨之常咏也按颂有二义其本义则字从页页者首也故说文以为貌也其借音则通作诵诵者讽也背文曰讽以声节之曰诵也故周礼太师教六诗六曰颂注云颂之言诵也容也子夏序亦曰颂者美盛德之形容以其成功告于神明者也美盛德之形容则貌之义也告成功于神明则诵之义也乐记师乙云寬而静柔而正者宜歌颂左传吴公子札来聘请观于周乐为之歌颂曰至矣哉直而不倨曲而不屈迺而不偪远而不攜迁而不淫复而不厌哀而不愁乐而不荒用而不匮广而不宣施而不

费取而不贪处而不?行而不流五声和八风平节有度守有序盛德之所同也 颂有三曰周曰鲁曰商季札皆以为盛德之所同而孔颖达谓太平德洽始报神功颂诗直述祭祀之状不言得神之力但美其祭祀是报德可知此惟周颂耳其商鲁之颂则异乎是商颂虽是祭祀之歌祭其先王之庙述其生时之功正是死後颂德非以成功告神其体异于周颂也鲁颂主咏僖公功德才如变风之美者耳又与商颂异也子夏序诗次三颂于二雅之後次鲁颂于周颂次商颂于鲁颂陈傅良谓别以尊卑之礼故鲁颂以诸侯而後于周间以亲疎之义故商颂以先代而後于鲁是也孔颖达云雅不言周颂言周者以别商鲁也周盖孔子所加也先代之颂必是独行为一代之法孔子论诗乃次鲁商於下以示三代之法既有商鲁须题周以别之故知孔子加周也或有问于愚曰鲁列国也何得有颂有颂是僭也商则先代矣而録其颂何为必欲备三恪则何以不及虞夏乎曰此孔子之所私也以是为孔氏所删之诗云尔盖孔子初删不出周诗虽公刘诸篇作于夏世关雎诸篇着在殷年而是周之先也孔子鲁人也而其先则殷之子孙也吾而既删诗矣则吾父母之国与吾先世之有天下者奈何使其诗阙而不录泯而失传故存鲁颂之四于周後而又缀商颂之五于鲁後是孔子之所以自着也主人习其读而问其传则知是删之出于孔子也使删诗非孔子或孔子非鲁人又或其先非殷之子孙则必不录此二颂也乃子贡传但有周商二颂而取鲁颂之诗襍豳诗为鲁风夫风颂异体颂何得为风此後世浅儒所伪托岂足信哉 邓元锡云夫周尚文雅文乎文矣故反本而受之颂风主情足以兴雅主性足以正颂通神明则至于命极矣故诗以颂终焉不其深乎陈际泰云颂于诗为最尊事神之道视燕飧受厘陈戒有加焉其後之何也风而雅雅而颂递而尊之已焉且人事终而鬼事始微风以德化感氓庶雅之君臣以慈惠尽下情道德襄上志欲其祀夏配天收天下之豫以荐帝享祖蔑繇也颂之语视雅庄视风尤庄何也事神之道加肃焉尔也风一事也而叠言之即雅亦多有此风主咏叹雅主歌咏而颂则无是也事神之道加肃焉尔也欧阳修云古诗之作有天下焉有一国焉有神明焉观天下而成者人不得而私也体一国而成者衆不得而违也会神明而成者物不得而欺也不私焉雅着矣不违焉风一矣不欺焉颂明矣 又按雅颂篇次颇有淆乱不依其世疑非孔子之旧然孔子所云吾自卫反鲁然後乐正雅颂各得其所者亦但据正乐而言谓某礼当奏某乐某乐之章当取之小雅或取之大雅某乐之章当取之颂皆各得其所耳非为序诗发也】

篇次

角部

公刘 七月 甫田 大田

丰年 良耜 载芟 行苇

亢部

长发

氏部

那烈祖玄鸟

房部

殷武

心部

关雎 鹊巢 桃夭 螽斯

葛覃

尾部

采薇 卷耳 鹿鸣 南山有台

伐木

箕部

草虫 出车 四牡 杕杜

皇皇者华

斗部

采芣 兔置 樛木 南有嘉鱼 羔羊 小星 江有泛 標有梅

汉广 芣苢 野有死麇 麟之趾

殷其雷 驹虞 行露 菁菁者莪 汝坟 鱼丽 采芣 鳧鷖

牛部

鱼藻 緜 旱麓 皇矣

天作 既醉 離 思齐

棫朴 灵台 臣工 白驹

小宛

女部

闵予小子 匏有苦叶 ?鸛 狼跋

伐柯 九罍 假乐 载见

烈文 访落 小毖 敬之

东山 破斧 泮水 常棣

大明 文王有声 思文 生民

我将 丝衣 楚茨 信南山

潛 桑扈 蓼萧 湛露

彤弓 縣蛮 吉日 振鹭

有瞽 武 酌 賚

般 时迈 桓 有客

文王 蟋蟀 天保 清庙

维天之命 维清 斯干 洞酌

卷阿 凯风

虚部

采芣 昊天有成命 下武

噫嘻 甘棠

危部

执竞 鼓钟

室部

绸缪

壁部

还

奎部

柏舟 北门

娄部

渐渐之石 桑柔 四月 采绿

民劳 板荡 宛丘

东门之枌 衡门

胃部

都人士 鸿雁 韩奕 六月

采芣 常武 江汉 无衣

崧高 黍苗 烝民 无羊

车攻 泛彼柏舟 庭燎 云汉

祈父 沔水 黄鸟 鹤鸣

昴部

无将大车 隰桑 大东 巷伯

鸳鸯 白华 车辇 角弓

頍弁 瓠叶 小戎 正月

瞻卬 召旻 小旻 青蝇

我行其野 小弁 蓼莪 十月之交 雨无正 北山 何草不黄 小明

匪风 素冠 逍遥 丘中有麻 隰有萋楚 菀柳 巧言 苕之华

毕部

瞻彼洛矣 缁衣 车邻 裳裳者华 溱洧 东门之墉 女曰鸡鸣 出其东门

駉 宾之初筵 抑 淇奥

终南 蒹葭 黍离 中谷有蓷 硕人 绿衣 终风 日月

简兮 考盘 采芣 遵大路

白石 山有枢 椒聊 戊申

君子于役 葛藟 叔于田 大叔于田 将仲子 野有蔓草

觜部

燕燕 击鼓 节南山 雄雉

新台 蟋蟀 君子偕老 静女

相鼠 谷风 氓 何人斯

着 敝笱 葛屦 墓门

习习谷风 伯兮 兔爰 有女同车 鸛羽 山有扶苏 狡童 蘼兮

褰裳 二子乘舟 芄兰 墙有茨

鶉之奔奔 桑中 东方未明 卢令

参部

扬之水 风雨 南山 东方之日猗嗟 无田 载驱 何彼穠矣鸡鸣

井部

大车 无衣七兮

鬼部

君子阳阳 防有鹊巢 伐檀 园有桃

河广 干旄 竹竿 载驰

泉水 有狐 清人 木瓜

定之方中 采芣 陟岵 葛生

柳部

有杕 权舆 十亩之间 蜉蝣

候人 渭阳 羔裘豹祛 有杕之杜 鳴鳩 羔裘 閼宫 有駉

駒 晨风 交交黄鸟

星部

硕鼠

张部

汾沮洳 株林 东门之杨 东门之池

月出 泽陂 旌丘 式微

翼部

子衿 丰

軫部

下泉

诗经世本古义卷首

卷一

钦定四库全书

诗经世本古义卷一

明 何楷 撰

夏少康之世诗八篇

公刘始迁豳也夏道衰公刘变于西戎邑于豳自漆沮度渭取材用行者有资居者有畜积民赖其庆百姓怀之多徙而保归焉故诗人歌乐思其德【自夏道衰下俱出史记匈奴列传及周本纪索隐云即诗大雅篇笃公刘是也按史记后稷封于邰后稷卒子不窋立不窋末年夏后政衰去稷不务不窋以失其官而犇戎狄之间不窋卒子鞠立鞠卒子公刘立故旧说皆谓公刘后稷之曾孙自周语载太子晋谏灵王有自后稷始基靖民十五王而文始平之之语而周本纪亦叙稷至文王为十五世故孔颖达疑之谓计虞及夏殷周有千二百岁每世在位必皆八十许年乃可充其数子必将老始生不近人情之甚罗泌亦云史载契十世而至成汤厥次仅是叙后稷十有五世而至文王中间乃闕夏商二代所较者三十余世踈脱甚矣又引夏氏之书记帝王之世云帝俊生稷稷生台台生叔均叔均为田祖谓稷之後世多矣不窋不得为稷子而杨慎尝见吕梁碑所载其世次亦与此同及史记载刘敬说汉高帝有云周之先自后稷尧封之邰积德累善十有余世公刘避桀居豳夫公刘居豳既当夏桀之时则其非后稷曾孙明矣然愚考竹书载夏少康三年复田稷沈约注谓后稷之後不窋失官至是而复则公刘之兴当在此时而诗中如行苇甫田大田诸篇宜皆为公刘之诗其诗中皆有曾孙之语则公刘之为后稷曾孙似无可疑史迁之叙世次未必无本然不应与刘敬传相???蓋大抵传述每多譌异史泛采而不能精不然据诗咏迁豳乃公刘事史记於刘敬匈奴二传亦以迁豳属之公刘而周本纪乃云公刘卒子庆节立国于豳何也又本纪祖周语祭公谋父之说谓夏之衰弃稷弗务我先王不窋用失其官而匈奴传乃直云夏道衰而公刘失其稷官又何也若诸儒于十五王世次之疑固不为无理金履祥谓以有德之宗数之犹殷言贤圣之君六七汉言七制之主此论盖近之矣稗官小说所传出于经史之外者固不足深信又按邰在今武功县邠在今邠州皆属陕西西安府相去特百余里然自不窋已自窜于戎翟之间不居邰矣程泰之谓庆州南三里有不窋城是也是则公刘迁豳乃自不窋城迁非自邰迁也至匈奴传所言公刘变于西戎者盖谓公刘居戎地而能振奋以自变异耳非谓其变于夷也乃金氏则以七月及笃公刘皆豳之遗诗其说曰笃公刘之诗下视商颂诸作同一蹈厉七月之诗上视五子之歌夏小正之属与夏令时儆之辞皆同一文轨也岂至周召之时而後始有如此之文哉且周诗固有追述先公之事者然皆明着其为後人之辞生民之诗述后稷之事也而终之曰以迄于今豳之诗述古公之事也而系之以文王之事此皆後人之作也若笃公刘之诗极道冈阜佩服物用里居之详七月之诗上至天文气候下至草木昆虫其声音名物图画所不能及安有去之七百岁而言情状物如此之详若身亲见之者又其末无一语追述之意吾是以知其决为豳之旧诗也况史氏已明言诗人歌乐思其德乎噫自载籍之不传後世槩以先

公之事为朴野不文之俗胡不即近世而观之乎两汉文物之久而白狼之诗译于朝李唐词章乐府之行而凉州之遍甘伊之声列于乐况幽俗居雍土之中岐梁之虚而公刘接闻文教流传之後又当变戎为华之初为诸夏方新之邦乎故笃公刘七月之诗端为幽公当时之诗无疑也今按此说深为有理故从之】

笃公刘匪居匪康【阳韵】乃场乃疆【阳韵丰氏本作疆】乃积乃仓【阳韵】乃裹餼【陆德明本作糒】粮【阳韵陆本作粮】于橐于囊【阳韵】思辑【孟子作戢】用光【阳韵】弓矢斯张【阳韵】干戈戚扬【阳韵】爰方啓行【叶阳韵户郎翻赋也笃徐锴云本作竺假借作笃说文云厚也周书武成篇王若曰惟先王建邦啓土公刘克笃前烈所谓克笃即积功累仁之意又祭公谋父云我先王不窋自窜于豳翟之间不敢怠业时序其德纂修其绪修其训典朝夕恪勤守以惇笃奉以忠信奕世载德不忝前人此亦可识笃字之义然则笃之一字固周之先公相传家法也每章皆以此起语赞之之辞也王肃云公号也刘名也孔安国云公爵也王基云周人以讳事神公刘必字也孔颖达云公刘之後有公非公祖之类知公是爵虞夏之时世代尚质名字之别难得而知世本史记不应皆没其名而尽书其字以之为名未必非矣郑以姜嫄为名诗人亦得称之何独公刘不可言其名也周人自以讳事神于时未有讳法季云公者侯国尊君之通称刘名亦如古公之称亶父也匪通作非居通作尻说文云处也康尔雅云安也匪居匪康言不以戎翟之间为可以居处之地而遂安寧也辅广云公刘失职而自窜于西戎固安能郁郁久居此乎是宜其匪居匪康也乃惊辞也解见緜篇场疆与信南山篇不同此以边境言左传云疆场之邑一彼一此又云疆场无主则民生心皆谓国之边境非指田也又云疆场之事慎守其一而备其不虞姑尽所备焉正此乃场乃疆之义但说文训疆为界训场为疆既以疆场并言不应义都无别愚意场是防之于外如远斥堠固封守之事以地至此易主故名场也疆是备之于内如严于扞诘奸慝之事观孟子言入其疆则知疆是指境内言也若田之疆场则以八家之田各有其主已田之外即属易主故旧说以场为小界一井之田统为一疆故旧说以疆为大界所取不同当以意通之时公刘将有迁都之举故先于疆场致其警备所以防外侮而固人心也积说文云聚也朱子云露积也按露积之禾曰庾甫田篇所谓曾孙之庾如坻如京是也仓说文云谷藏也解见楚茨篇按史记云公刘虽在戎狄之间复修后稷之业务耕种行地宜陈际泰云西夷当黄河之曲土地肥美宜稻盖黄河在天下皆害而在河西独利积仓固然耳乃裹二句相联说与上文积仓对看孟子解甚明裹说文云纏也韵会云包也餼说文云乾食也徐云今人谓饭乾为餼粮说文云谷也毛传云小曰橐大曰囊孔云囊橐俱用裹粮食而异其文明有小大之别宣二年左传称赵盾见灵辄饿食之又为箪食与肉寘诸橐以与之橐唯盛食而已是其小也哀六年公羊传称陈乞欲立公子阳生盛之巨囊内可以容人是其大也徐云按字书有底曰囊无底曰橐然则橐今纏腰下者严粲云东方朔传云奉一囊粟是粮米盛于囊也乾餼盛于小橐粮米盛于大囊思辑以下专承乃裹二句言思念也辑说文云车和辑也故以为相和辑之义用犹以也光毛云显也当其在戎狄中民之疮痍惊扰曾无宁日安所得辑公刘所以汲汲欲迁都者乃思令其民脱侵侮横加之苦享生息保聚之乐以此光显其国不奄奄于荒凉险僻之地也又辑字若依孟子作戢则戢乃藏兵之义公刘迁都正思弭干戈之患亦通弓矢斯张解同宾之初筵篇于通作□说文云盾也尔雅云扞也孙炎云干楯自蔽扞也戈说文云平头戟也徐云小支向上则为戟平之则为戈戚通作鉞说文云钺也钺者大斧也今文作钺钺大而斧小太公六韬云

大阿斧重八斤一名天钺毛以戚为斧扬为钺非是扬之训钺其义无所出也扬说文云飞举也字从手盖谓以手举之其运用之妙则如飞也此总上干戈戚三者言与上文张字对看孔云以弓矢言张故知干戈戚扬为人秉之也爰说文云引也谓引辞也方者方向之义因以为未至之辞故或训且或训始其义一也啓通作启说文云开也从户从口开之义也启行郑云开道而行也整戎器以行欲使翟人知有备而畏威也按皇王大纪云公刘遭夏氏之乱勤劳于民民用富厚和协辑睦备其戎器抗中华之难要知公刘居戎翟间非武备修饬不足以销外患而固吾圉故篇中言之不一而足首章曰乃场乃疆又曰弓矢斯张干戈戚扬次章曰鞞琫容刀五章曰其军三单末章曰取厉取锻可见公刘固惓惓以此为事矣然迁国乃重大之役必待斯民富足之後而後敢议岂易言哉故孟子引此诗而释之曰居者有积仓行者有裹粮也然後可以爰方啓行然後可三字最得公刘之心即经文方字之义又观居者二字则知旧国所在其民犹有居者盖新都止基未定自无一时席卷其民空国而去之理观末章止基乃理爰衆爰有乃是就续至者言故知章首言乃场乃疆亦所以为居者设卫使敌国外患无繇乘虚而入也吕祖谦云毛郑以公刘居于郃而遭夏人乱避难迁于豳且以为在郃有疆场积仓为夏人迫逐乃弃而去考之是章意象整暇不见迫逐之事以国语史记参之盖自不窋己窜于西戎至公刘而後兴疆场积仓内治既备然後裹粮治兵拓大境土而迁都于豳焉国都虽迁向之疆场积仓固在其境内也陈际泰云太王之迁也以迫逐公刘之迁非以迫逐也择而处之也富庶之後而迁都故其後遂大】笃公刘于胥斯原【元韵亦叶真韵虞灵翻又叶寒韵五官翻】既庶既繁【元韵亦叶真韵微云翻又叶寒韵蒲官翻又叶先韵汾沿翻】既顺乃宣【先韵亦叶元韵况袁翻又叶真韵斯人翻】而无永叹【叶寒韵他干翻亦叶先韵他涓翻陆本作叹】陟则在巘【叶元韵鱼轩翻陆本作献】复降在原【韵见上】何以舟【叶萧韵陟遥翻】之维玉及瑶【萧韵】鞞琫容刀【叶萧韵丁聊翻 赋也胥通作疋说文云足也上象腓肠下从止弟子职云问疋何止是也字形与足相似斯此也原即下章之溥原公刘所迁之地所谓豳也何以知之以斯原斯字知之于胥斯原言公刘足迹至于此原也一说胥相也公羊传以胥盟为相盟言相与同来而至于此原也亦通既庶二句乃公刘自道其相度之意庶说文云屋下衆也此但取衆义繁通作烦说文云热头痛也此但取热义人衆则热也亦如烝本火气上行之意转训为衆其义正同严云言庶而又言繁见归者愈多也按毛传谓公刘去豳诸侯之从者十有八国焉孔谓不知出何文愚意毛去古未远定有所本据此推之则既庶指本国之衆既繁指他国之衆也顺说文云理也地与人相宜之谓宣尔雅云徧也永长也自後日言之故曰永叹说文云吟也即太息也公刘既至此原矣因念此日从迁者既衆且繁必此地果既顺适而相安乃可以居之徧而不至有後日之嘅叹耳是胡可以不慎故一陟一降相视之极其周如下文所记是也陟说文云登也说文无巘字通作巘尔雅云重巘隙郭璞云谓山形如累两巘巘甌也山状似之上大下小因以为名愚按如郭所解自是解重巘之隙耳诗单云巘则非重者但其山形如甌而已此即下章所谓乃陟南冈者复说文云往来也言往而复来故尔雅以为返也降说文云下也原即上文之原初已至原矣既又升巘以观而复下来以见其相度周详虽劳不恤也邓云陟则在巘相山之宗也复降在原察土之冲也舟说文云船也毛训为带未见所出且亦难通下章言逝彼百泉则有用舟处可知已此于胥斯原以前事盖追述之下章则顺言之也云何以者诗人言公刘之在舟中其容饰何如乎自问之辞也维玉二句答词瑶说文云玉之美者季云瑶亦玉但光之摇动者则为瑶耳孔云鞞者刀鞘之名琫者鞘之上饰愚按三朝礼言天子玉琫而珣珉诸侯荡琫而璆璆则琫

字虽从玉而非玉名乃刀鞘受饰之处名之为琫耳容刀孔云容饰之刀按刀无受饰之处当是指其柄而言饰之所以为刀之容即所谓琕也玉瑶两物或饰之鞘上或饰之刀柄此公刘所佩也公刘乃诸侯而刀之鞘柄皆得用玉者夏礼无考旧说谓带玉佩以上下山原迂远殊甚】 笃公刘逝彼百泉【叶真韵从伦翻】瞻彼溥原【叶真韵见上章按上章以繁巘叶原而巘只有元韵一叶则上章二原字但当只用元韵今此章以泉叶原意泉亦宜有元叶而韵书不载乃二字并叶真韵则何以通于上章之巘乎当俟再考】乃陟南冈【阳韵】乃覲于京【叶阳韵居良翻】京师之野【叶语韵余吕翻】于时处处【叶语韵敝吕翻】于时庐旅【语韵】于时言言于时语语【韵 赋也逝郑玄云往也此指百泉言张子厚谓只看百泉之往处便知地形是也然此百泉乃有所在非泛指衆泉之谓广輿记云平凉府泾州有泉眼百余大旱不竭即百泉也杜佑云百泉在汉为朝那县属安定郡在唐为百泉县属平凉郡魏于其地置原州唐因之季云百泉者平凉府北地所出之水皆流入泾至邠州愚按详此则上文所谓舟者亦泛于泾水之舟耳盖自不窋窜于西戎其地即今庆阳府是也广輿记载府境古蹟有不窋城又有不窋塚在府城东碑久剥落上有片石大书周祖不窋氏陵再传至公刘则居宁州亦今庆阳府所辖古蹟所谓公刘邑也春秋时为义渠戎国其踪迹甚明厥後公刘往迁于豳盖道繇庆阳经平凉而後达于今西安府之邠州邠州乃泾水所经而百泉则入于泾水自平凉而来者也故诗人咏及之旧说相传但谓公刘自郃迁豳而百泉遂茫然不知其处矣诵古人之诗而不审其遗蹟亦何以论世乎瞻说文云临视也溥说文云大也李巡云土地寛博而平正名之曰原溥原即豳地以其地形广平则曰原状其大则曰溥非先有此地名也何以知之以第二章但言斯原第五章分言既溥知之邓云逝泉瞻原观水之锤也冈尔雅说文皆云山脊也南冈冈之在南者季云谓面山也乃者曳辞也覲毛云见也京公羊传云大也与溥义同即溥原也盖见其原地广大故赞之以溥又呼之以京耳固非地名亦非高丘之谓果京为高丘何必陟南冈以覲之乎陟而後覲明是自上俯视之意师易传云衆也京师之野郑云京地乃衆民所宜居之野也按此用京师字与天子所居称京师虽字义同而语意不同彼京师联文公羊传谓天子之居必以大眾言之其解自确此京师句京字略断是顶上乃覲于京京字而言郑解是也董氏谓京师之称起于此其後世因以所都为京师殊属附会时通作是音之近也蒙上文言处说文云止也上处字谓作宅舍以居处之下处字谓民之当居处於是者盖指本国之人言也庾毛传说文皆云寄也孔云地官遗人治国野之道以待宾客十里有庐庐有饮食则庐是居舍之名宾客寄舍其中卫戴公庐于曹亦谓寄在曹地也旅郑云宾旅也按旅本军五百人之名而借为宾旅之称者徐云衆出为旅寓故谓在外为旅也于时庐旅言于此作客舍以庐其旅者指外国之人言与末章止旅乃密相应毛云直言曰言论难曰语苏辙云言施教令语议政事重言言言语语者以所言所语非一端故也上文言处处庐旅则从迁之人既皆得所居矣然不可无君以统摄之故于此营建宫室设立官府以听政出治焉】 笃公刘于京斯依【叶纸韵读如倚隐绮翻】跼跼济济【俱上声】俾筵俾几【纸韵】既登乃依【见上】乃造其曹【叶尤韵徂侯翻】执豕于牢【叶尤韵落侯翻】酌之用匏【叶尤韵蒲侯翻】食之饮之君之宗之【饮宗无叶大全云就用之字为韵 赋也京即上章乃覲于京之京依谓依之以居也总上于时处处四句而言人既依乎此则宗庙之神亦依乎此矣故营建甫毕即首举迁庙之礼跼动也济之为言齐也凡有事于新庙中者其人不一而趋跼之际无不整齐如下文设筵几之人亦其类也俾使也筵几解见行苇篇但此筵几乃供神者按周礼春官司几筵职云王设莞筵纷纯加黼席画纯加次席黼纯左右玉几祀

先王亦如之诸侯祭祀席蒲筵纁纯加莞席纷纯右雕几周祀礼之筵几如此公刘夏世其礼无考登谓登进神之衣服于坐也依神所依也祭统篇有云铺筵设同几为依神也正此诗义疏考妣共几谓之同几按大戴礼记诸侯迁庙之礼奉衣服者至於新庙筵于户牖间有司皆先入如朝位祝导奉衣服者乃入君从入奉衣服者升堂君从升奠衣服于席上祝奠币于几东君北向祝在左赞者盥升适房荐脯醢君盥酌奠于荐西反位君及祝再拜兴祝声三曰孝嗣侯某敢用嘉币告于皇考某侯今月吉日可以徙于新庙敢告再拜事毕乃日而祭盖其礼之大略如此祭俟择日惟奠衣服于席上奠币于几东以徙庙告而礼已毕故诗所叙述亦仅止此孰谓古礼遂无徵乎乃造其曹以下则郑玄所谓宫室既成与羣臣饮酒以落之之事也造说文云就也蔡先生毅中云即盘庚有衆咸造之造愚按此字有去来二义主我言则为往就彼主彼言则为来就我也若此造字乃使彼就我者也曹本作说文谓狱之两曹在廷东治事者也愚按今治事之官皆呼为曹盖本于此如六曹是也此曹字正指羣臣凡同姓异姓皆在乃造其曹谓进其羣臣于公所将与之燕饮也执者执而杀之牢说文以为闲养牛马关也愚按养豕之处亦名为牢晋语大任洩于豕牢是也酌说文云盛酒行觴也匏解见匏有苦叶篇字从包说文云取其可包藏物也罗愿云瓠与匏以大小长短甘苦为间然古今亦通言瓠陆佃云以瓠盛酒冬则煖夏则冷毛云执豕于牢新国则杀礼也酌之用匏俭以质也孔云执其豕于牢中以为饮酒之馥惟用豕者秋官掌客曰凡礼宾客国新杀礼公刘新至豳地杀礼也其饮此酒酌之用匏匏是自然之物故云俭且质也食之蒙上执豕句饮之蒙上用匏句君之宗之者毛云为之君为之大宗也朱子云宗尊也主也嫡子孙主祭祀而族人尊之以为主也按君宗即燕饮中事公刘自以一身为羣臣之君宗也对异姓之臣称君对同姓之臣称宗合上四之字俱指羣臣言徐光啓云大凡创业君臣与守成异承平既久阶陛森严君臣之分不患不明特廉远堂高九阍万里上德下情不相谄悉故燕饮之设主于导和勩业之君与其臣披榛斩棘沐雨栉风奚啻家人父子上下之情不患不通特患分义未明粗率简易如汉初饮酒争功醉或拔剑擊柱故燕饮之设主于辨分周之诗一则曰嘉宾式燕一则曰不醉无归而此诗独言君之宗之时各有所重也又吕祖谦云食之饮之君之宗之谓既飧燕而定经制使上下相维也公刘整属其民上则皆统于君下则各统于宗古者建国立宗其事相须春秋之末晋执蛮子以畀楚楚司马致邑立宗焉以诱其遗民而尽俘以归当典刑废坏殆尽之时暂为诈援之计犹必立宗焉前乎此者可知矣愚按周礼太宰以九两系邦国之民二曰长以贵得民五曰宗以族得民自宗法不行民遂涣散东莱此论甚有关系然此第言其一时燕飧恐未说及立宗事朱子之駁固自中理】 笃公刘既溥既长【阳韵】既景乃冈【阳韵】相【去声】其阴阳【韵】观其流泉【先韵亦叶真韵见第三章】其军三单【叶先韵时连翻】度【音铎】其隰原【叶真韵见第三章】彻田为粮【阳韵】度其夕阳【韵】豳【丰本作邠】居允荒【阳韵 赋也民居既定宫室既成於是亟亟授田制赋此立国之本事也溥指原言长指泉言瞻彼溥原其地则既溥矣逝彼百泉其流则既长矣既已考之日景以正其四方之位矣而复登高冈以望其形势者何哉盖所以相视陰阳之向背以识寒煖使种植各适土之宜如黍宜高燥稌宜下湿之类又观其流泉之所经以定沟洫使灌溉各尽水之利如水东亩南水南亩东之类其军三单初从公刘往迁者也周礼凡起徒役无过家一人以其余为羨羨者副丁也意古法亦当如是大国诸侯则有三军公刘迁国当在道时具三军以行首章所谓张弓矢扬干戈戚者皆此辈也计每家当出军一人而副丁老弱不与焉故谓之三单单之为言只也独也观此则公刘初迁其非空国俱行益明矣郑云后稷上公之封大国之

制三军公刘迁于豳民始从之丁夫适满三军之数单者无羨卒也孔云夏殷大国百里为方一里者万为田九万夫田有不易一易再易通率二而当一半之得四万五千家以三万七千五百家为三军尚余七千五百举大数故得为三军也又毛传训三单为相袭孔云重衣谓之袭谓三行皆单而相重为军也此谓始发在道及初至之时以未得安居虑有寇钞故三重为军使强壮在外所以备御之也王肃云三单相袭止居则妇女在内老弱次之强壮在外今按三重皆单之说固似可通但妇女老弱何得以军名且至豳之日军即应罢而无端附见一语于此殊属疣赘诗之言此正所以为下文度隰原二句张本以一家止一夫受田其余非老幼则余夫也古者寓兵于农有事则农即为兵无事则兵还归农此三军之衆既已先随公刘至豳而解严矣宜有分田以授之度者计料之意下湿曰隰高平曰原乃周礼五地之一按禹贡雍州有原隰底绩之文豳在雍州正原隰之地其地或有上中下不同故必量度其等则而均授之也详见信南山篇彻说文云通也曰彻田者通力而耕之谓即孟子所谓方里而井井九百亩其中为公田八家皆私百亩而同养公田者粮谷也谷出于田田之所入则为粮兼君与民皆有之一井之入公取其一民取其八也而入之公者军赋皆出于此按甫田之诗愚以为豳雅其曰倬彼甫田岁取十千者正是周人百亩而彻之法公刘为夏诸侯何得不遵五十而贡之制岂亦夏道衰微公刘固得于其国中自以其意变而通之而其後子孙遂仍之而不敢改与然井田之法实起自黄帝则又非公刘创为之者商人行助实原于此及周公始改名为彻盖有味于通力合作之义以取此名也又先儒考周之彻法惟都鄙用助而乡遂仍用贡然则公刘虽变夏法盖亦有不尽变者特其详不可考耳邹忠胤云周礼大司徒以土会之法辨五地之物生以土宜之法辨十有二土之名物以相民宅而知其利害以土均之法辨五物九等制天下之地征以土圭之法测土深正日景以求地中小司徒会万民之卒伍而用之五人为伍五伍为两四两为卒五卒为旅五旅为师五师为军夏官凡制军万有二千五百人王六军大国三军次国二军小国一军小司徒经土地而井牧其田野九夫为井四井为邑四邑为丘四丘为甸四甸为县四县为都以任地事而令贡赋是其典章周密固肇自周公然大略已具于公刘一诗矣度其夕阳之度与上文度意同尔雅云山西曰夕阳孔云阳即日也夕始得阳故名夕阳总言豳人一国之处其界在山之西不知是何山也谱谓豳在岐山之北书传说太王去豳踰梁山注谓梁山在岐山东北然则豳国之东有大山者其为梁山乎愚按此言夕阳盖指田地之近梁山者孔谓总一国而言则非也此以待夫三单之外续至而受田者黄佐云夕始得阳之田必不甚宜于民惟以生齿日繁归附日衆每夫百亩非旧田之所能容故又度此以广之耳前章言斯原言溥原言京总是豳地但未露其名至此始指出豳字豳亦作邠允信也荒者荒芜而不明之貌故借为远大之义朱子云又度山西之田以广之而豳人之居于此益大矣】笃公刘于豳【白虎通丰本俱作邠】斯馆【叶翰韵古玩翻白虎通作观】涉渭为乱【翰韵】取厉【陆本作砺】取锻【翰韵陆本作礲】止基乃理【纸韵】爰衆爰有【叶纸韵羽轨翻】夹其皇涧遯其过涧【涧涧为韵】止旅乃密【质韵】芮【周礼注陆本丰本俱作汭】鞠【汉书注作?周礼注作?】之即【叶质韵子悉翻赋也雍土记云豳谷在邠州东北三十里旧三水县公刘立国处馆说文云客舍也孔云礼有公馆私馆馆者宫室之名所以止舍其中愚按观下文言取厉取锻则此馆非以居民乃官府造作之处百工来者不必皆本国之人故为馆以居之白虎通云后稷封于邠公刘去邠之邠诗云即有邠家室又曰笃公刘于邠斯馆周家五迁其意一也皆欲成其道也涉说文云徒行厉水也然下文言为乱则是用舟此盖水旁之不可舟行者故用涉耳张守节云公刘从漆县漆水南渡渭

水至南山郡县志云邠州公刘所居之地州治新平县即汉漆县按漆县即今永寿县阡驷十三州志云漆水出漆县西北岐山东入渭尔雅云正絕流曰乱孙炎云直横渡也孔云乘舟絕水为乱而过也水以流为顺横渡则絕其流故为乱厉说文云旱石也徐云麤悍石锻说文云小冶也苍頡篇云椎也徐锴云椎之而已不消故曰小冶严云今考锻打铁也其字从金嵇康好锻是也粗厉之石可以磨兵器经锻之铁可以治戎具皆涉渭以取之思患预防所以卫民也陈际泰云夫定军赋也取厉锻也为政有三取材有五谁能去之公刘始迁之时即治及此有备也夫止居止也基本墙始之义尔雅以为谋也邢昺云基者作事谋始也理本治玉之义故亦以为治也止基乃理言公刘所以为居止之始谋者已无不治犹云美哉始基之矣此总绌前文所言相宅授田经武三者皆乃理之事也衆指初来者言上章言度彼隰原度彼夕阳以授之者是也有指续来者言谓相续而愈有故下文又言夹皇涧遡过涧以居之也夹说文云持也字从大左右两又有夹持之象孔云夹者在其两旁皇说文云大也涧说文云山夹水也按考工记云凡天下之地势两山之间必有川焉大川之上必有涂焉皇涧两旁皆平广可居故民居相向夹之遡字本作?说文毛传皆云向也按逆流而上顺流而下皆曰?特以洄游为异说见兼葭篇过涧谓涧之横过者孔云遡其过涧而处谓开门向涧也大率民居以南门为正此盖皇涧纵在两傍而夹之过涧横故在北而向之王肃云或夹或向所以利民也今按二涧不详所在为二为一未可知也此皆指本国之民言以下文有止旅句隔之彼旅字乃指十八国之人耳密字从山本山如堂者之名或又训稠对踈字言当是以山木茂盛故有稠密之义又通作宓说文云安也二义皆通但详语意只当以稠密言芮水名或通作汭何景明云芮水出邠州西北东入泾汭水在陇州城西北源出弦蒲葦入渭不入泾公刘芮鞠之即言邠也非陇也愚按禹贡雍州有泾属渭汭之文说者谓泾水居中上属于汭下属于渭则汭渭相去殊远原不相涉而其後又言会于渭汭则不得不以水北解汭如汭汭雒汭之例今观何说则芮汭固有二水泾属渭汭之汭正当作芮而会于渭汭乃谓会于渭与汭合流之处耳但地理志明载芮水出右扶风汧县吴山西北东入泾注引此诗为证汧县今为凤翔府陇州而郡县志亦云泾州良原县有汭水一名宜禄川西自陇州华亭县流入则与何言汭水入渭不入泾殊异川涂辽邈足迹未到奚繇能得其实以何固秦人所记必或无爽故存之又按芮亦国名地理志谓在冯翊临晋县即今西安府之高陵县是其地也疑当时豳地竟辖至此亦未可知非虞芮之芮也鞠毛云究也按尔雅鞠究皆训为穷孔云鞠是水厓之名言其曲水穷尽之处也愚按若以芮为地名则芮鞠亦地尽之处即徐锴云犹就也严云来止之旅日以益密於是又就芮水之外而居之吕云风气日开民编日衆规模日广有方兴未艾之象焉周之王业既兆于此矣黄佐云利用迁国易固有之虞夏之世代有屡迁者然盘庚之迁耿也以浑鹵執隘之地而有荡析离居之忧固宜一举而从之观其巨室胥动浮言小民不适有居而为臣者傲上从康乃伏小人之攸箴内外不和吉言于百姓衆戚之吁矢言之出始告之中威之既迁而绥爰之若不克举焉而公刘长西戎之衆裹粮之行不俟再讯斯原之相十八国从迁下无永叹之赤子上有踰济之羣臣富庶之效不日臻焉动民而民不惧劳民而民不怨圣人举事如此而已虽其忧国爱民之心两君如一而民情之顺逆天地悬殊则亦其平日之所感有异耳故曰君子信而後劳其民後之迁国者要当以公刘为法可矣然怨诽逆命之民而以口舌代斧钺以至诚摛忠信不怒而不譴焉後世厉民自养者其毋以盘庚为口实哉】公刘六章章十句【序云召康公戒成王也成王将蒞政戒以民事美公刘之厚于民而献是诗也朱子亦仍其说王安石云周之有公刘言乎其时则甚微言乎其事则甚勤称时之甚微以戒其盈

称事之甚勤以惩其逸盖召公之志也而申培说则云周报公刘召公述其事以训嗣王使知民事之诗子贡传亦以为训成王但作者之人阙今按此诗谓作于召公固无所据详观诗意皆陈公刘迁豳之事而略不及文武继述之言又文词奇古与文王大明诸篇体制不同则似豳人本有此诗以咏公刘如七月亦豳人自述豳风而周公举以告成王後人遂谓周公所作然则公刘之诗得无亦周召之辈举以告成王者与】

七月豳风也【孔丛子载孔子曰于七月见豳公之所以造周也按豳公者公刘也造周者周家王业自是而起也旧说皆本序谓周公陈此诗以告成王与书无逸篇同意子贡传申培说亦皆以为周公陈农政之诗金履祥云读七月之诗可以见豳民因天力本孝慈忠爱之俗焉意者豳之遗诗周公陈之以为蒙工之颂使成王知故国衣食之原然不居二南之前而居变风之末何也曰诗皆采之当世而前世之诗存者不可泯也故豳七月附于十五国风之後犹商那附于三颂之末也宋张栻入侍经筵言周公之告成王见于诗有如七月见于书有如无逸欲其知稼穡之艰难与小人之依帝王所传心法之要端在于此夫治常生于敬畏而乱常起于骄肆使为国者每念乎农亩之劳则心不存焉者寡矣何者其必严恭朝夕而不敢怠也其必怀保小民而不敢康也其必思天下之饥寒若己饥寒之也是心常存则骄肆何自而生岂非治之所繇兴也与刘安世云公刘豳国之君七月公刘之诗也何不编之雅与公刘相伦公刘之诗言其政事七月之诗言其风俗既曰风矣不得编于雅矣彭执中云七月公刘皆言民事其为诗一也然七月之诗微而及于昆虫草木衣服饮食之末较之公刘莫非兴王气象其体固不同也郑樵云七月者西周之风黍离者东周之风邓元锡云豳七月其帝化乎进于王矣百姓日用饮食而质矣是天德也又云盖于七月涣然于天人之合也靡人非天人靡事非若天也无思无为终守淳固顺帝则而无庸识知也古德之盛风化之本也徐光启云周之兴也十六王而武始居之考其积基本非有殊尤絶迹震炫来世者也今读其文想其先公之所以为教不过若世间一勤俭忠厚之家而已然一家如此其家必兴一国如此其国必昌至于和气浹洽根干纏绵基厚而难倾本深而不拔卒受代商之命享过历之祚昔人有言太和在成周宇宙又曰王道本乎人情於乎信其然矣三辅黄图云秦有四塞之固昔后稷封豳公刘处豳太王徙岐文王作丰武王治镐其民有先王遗风好稼穡本业故豳诗言农桑衣食之业甚备秦都咸阳徙天下富豪十二万户汉高帝都长安徙诸齐田楚屈昭景及诸功臣于长陵後世徙吏二千石高赀富人及豪杰兼并之家于诸陵强本弱末以制天下是故五方错襟风俗不一贵者从侈靡贱者薄仁义故汉之京辅号为难理范景文云读豳风一篇何意遐荒苦寒之地緑华芳草蔚为文明今齐鲁燕晋之区多有越数百里无炊烟者又何也】

七月流火【叶尾韵栩鬼翻】九月授衣【叶尾韵隐岂翻】一之日觶【说文丰氏本俱作?释文作毕】发【叶质韵非律翻说文丰氏本俱作爰】二之日栗【陆德明本引说文作?丰作?】烈【叶质韵力质翻释文引说文作颺崔灵恩注丰本俱作列】无衣无褐【叶霁韵许颺翻亦叶屑韵胡结翻】何以卒岁【霁韵亦叶屑韵相絶翻】三之日于耜【纸韵】四之日举趾【纸韵汉书丰本俱作止】同我妇子【纸韵】饁彼南亩【叶纸韵母鄙翻汉书作晦】田畯至喜【纸韵郑玄云本作饁赋也首章总以衣食发端先言衣而後言食自二章至五章所以终前六句之意自六章至八章所以终後五句之意七月斗建申之月也张子厚云七月之诗皆以夏正为断曹氏云公刘正当夏时所用者夏正也流毛传云下也火大火心星

即大辰也解见小星篇左昭三年张趯曰火星中而寒暑退孔颖达云季冬十二月平旦正中在南方大寒季夏六月黄昏火星中大暑退是火为寒暑之候事也知此两月昏旦火星中者月令季夏昏火星中六月既昏中以冲反之故十二月旦而中也若然六月之昏火星始中尧典曰永星火以正仲夏所以五月得火星中者吴志孙皓问郑玄火星季夏中心也不知夏至中星名答曰曰永星火此谓大火也大火次名东方之次有壽星大火析木三者大火为中故尚书举中以言焉又每三十度有奇非特一宿者也季夏中火犹谓指心火也如此言中则曰永星火谓大火之次非心星也尧典四时言中星者春夏交举其次言星鸟星心秋冬举其宿言星虚星?故注云星鸟鹑火之方星火大火之属虚玄武中虚宿也昂白虎中昂宿也其东方南方皆三次鹑火大火居其中西方北方俱七宿虚星?星居其中每时总举一方故指中宿与次而互言之耳是郑以曰永星火为大火之次与此火之心星别也又按周洪谟云尧时仲夏日在鹑火大火昏中至周公时岁差既多则六月日在鹑火大火昏中并録以俟考朱子云心火以六月之昏加于地之南方至七月之昏则下而西流矣左传哀十二年冬十二月螽季孙问诸仲尼仲尼曰丘闻之火伏而後蛰者毕今火犹西流司历过也按周十二月夏十月也火犹西流者以此时火未尽没尚是九月历官失一闰故也是可见火自六月昏中之後下而过西皆称流也亦以天倾西北故云然程子云岁过中而行暮矣当有卒岁之具御冬之备故以七月流火为首张子厚云周人虑事有豫七月之诗常于半年前提掇又按发端先以秋冬为言者以幽地多寒故豫先为御寒之计耳九月斗建戌之月授说文云予也授衣家长授于家衆也以下文云无衣无褐褐乃贱者之服故知之且家事听于长故也朱子云九月霜降始寒而蚕绩之功亦成故授人以衣使御寒也一之日四句原其所以授衣之故也一之日谓斗建子一阳之月二之日谓斗建丑二阳之月也变月言日者毛云十之余也孔云谓数从一起而终于十更有余月还以一二纪之也此篇自立一体从夏之十一月至夏之二月皆以数配日而言之从夏之四月至于十一月皆以数配月而称之盖以日月相对日阳月陰月陰月陰月則成物建子之月纯陰已過阳气初动物以牙蘖将生故以日称之建巳之月纯阳用事陰气已萌物有秀实成者故以月称之若然一之日二之日言十之余则可矣而三之日四之日者乃是正月二月十数之初始不以为一二而谓之三四者作者理有不通辞无所寄若云一月二月则羣生物未成更言一之二之则与前无别以其俱是阳月物皆未成故因乘上数谓之三四明其气相类也愚按以三四继一二总是蒙上之文故有以正月为十三月者春秋元命苞曰周人以十一月为正殷人以十二月为正夏人以十三月为正後汉书陈宠传云十三月阳气已至天地已交物皆出蛰虫始振人以为正夏以为春隋书牛弘传云今十一月不以黄鍾为室十三月不以太族为室便是春木不旺夏土不相建寅之月乃是十月之初亦乘上以为十三与此同也朱子以为变月言日言是月之日也张子亦云言月又言日别无义例只是文顺愚按二说俱于理未安总之本天而言则主日以冬至为日长一线之始也本历而言则主月以孟春为夏正建寅之始也因思易复卦有七日来复之文旧解亦属未确以此诗一二三四之日例之易之七日正谓五月耳五月一阴初生而羣阳以次剥尽今则一阳复来故曰反复其道七日来复也霽发毛云风寒也按霽说文云羌人所吹角屠霽以惊马也徐锴云今之霽栗杨慎云霽发之为风其义隐而难知谚云三九二十七篙头吹霽栗正谓风吹篙落声似霽栗与诗意合霽栗今乐书名风管又可证焉其声悲惨冬日寒风骤发其声似之发疾貌栗烈毛云寒气也按栗木名其实下垂至罅发之时将坠不坠有战栗之象人遇寒而肤栗类此烈火猛也本无寒义但以其为严猛之貌取以象寒威耳孔云仲冬之月待风乃寒季冬之

月无风亦寒故异其文愚按霽栗羌胡龟兹之乐古乐未闻杨说虽有理未敢深信疑古文音同者字得通用故说文霽发作?浹?风寒也浹寒也先言?而後言浹者孔所谓仲冬待风乃寒是也栗当通作凜说文云寒也烈当通作飈说文云烈风也既言凜而又言飈者季冬寒既甚矣更重之以朔风则愈寒也范祖禹云先王教民农桑以为衣食非以充欲所以备患也是故将言衣之本则着寒之候褐毛布也织毛为之上只言衣而此兼言褐者九月衣已足矣十一月以後非衣而加之以褐则不能煖也卒通作𠂔说文云终也范云言何以卒岁则又见二之日为岁之终也此所谓夏正也以上言衣之为急也三之日斗建寅之月正月也于者口气之舒故又训为往也犹云往于彼也耜说文云耒也释文云耒下耜也易曰斲木为耜揉木为耒耜者耒之首斲木使锐而为之所以入土俗呼犁壁今又加以铁铧谓之犁头耒者耜之柄揉木使曲而为之所以运耜俗呼犁冲总呼之则为犁也考工记云耜广五寸二耜为耦注云古者耜一金两人并发之今耜岐头两金象古之耦黄佐云于耜谓昔改岁时入此室处今则往中田之庑而修田器钱鏹之属然独以耜言者所谓矍矍良耜有略其耜诗人以此为重而言之将以起土而耕必资于耜也孔云月令季冬命农计耦耕事修耒耜具田器然则修治耒耜当季冬之月今豳人正月修耒耜二月始耕者豳土晚寒郑志答张逸谓寒晚温亦晚故修耒耜始耕皆较中国迟一月也四之日斗建卯之月二月也举说文云对举也趾足也耕以足推故须用足二耜为耦故云对举也月令仲春之月云耕者少舍邓元锡云少舍言无或舍息急农之至也此言举趾所谓少舍者也同我妇子程子云我妇我子同来致饷也我农夫自我也饷杜预云野馈也所谓饷也李氏云郤缺耕于野其妻饷之是妻饷其夫也有童子以黍肉饷是子饷其父也王安石云亩大抵以南为正故每曰南亩补传云田事喜阳而恶阴南东向阳则茂遂西北傍阴则不实孔云周先公在豳教民周备使衣食充足寒暑及时民奉上教知其早晚各自劝勉以勤事业故同我妇子饷彼南亩及嗟我妇子曰为改岁此述民人之志非叙先公号令之辞田峻典田之官尔雅说文皆以峻为农夫郑玄郭璞皆谓今之耆夫是也邢昺云田峻在田司主稼穡故谓之司耆汉及东晋亦有此官谓之耆夫故郑郭皆云今之耆夫愚按夏书胤征篇有耆夫驰之语则夏时已有此官非始汉晋矣周礼无田峻之职益知此诗及甫田大田皆非周诗也至喜者田官巡行阡陌来至而见其民之勤于农事则喜也刘公瑾云二月而即举趾治田早也壮则在田妇人则致饷用力齐也劝农之道无非欲其不後于时不懈于力豳人乃不待劝而能此田峻所以喜也辅广云妇子饷彼见家人之心一田峻至喜见上下之志通以上言食之为急也衣则言其授衣之後而未及其初食则言其耕田之初而未及其後此古人行文变化之妙而自七月以至四之日循序敷衍更复浑成此所以为化工之笔也朱善云三阴之月阴气始盛故于是而豫为御寒之备三阳之月阳气始盛故于是而豫为治田之备先衣而後食故以七月为首也大寒之候在于丑月而图之于建申之时收成之候在于酉月而虑之于建寅之日其为豫备可知若寒至而後索衣饥至而後索食则其为计亦晚矣】七月流火九月授衣【二韵见首章】春日载阳【韵丰本作易】有鸣仓庚【叶阳韵居郎翻】女执懿筐【阳韵丰本作仁】遵彼微行【叶阳韵户郎翻】爰求柔桑【阳韵】春日迟迟【支韵】采芣苢【支韵】女心伤悲【支韵】殆【释文一作迨】及公子同归【叶支韵渠为翻赋也严云二章三章皆终首章无衣之意再言流火授衣者郑云将言女工之始故又本于此愚按九月授】

【衣主今年而言以其序求之则春日载阳以下皆明年事也第三章仿此盖思此衣之所从

来则图之不得力耳春日孔以为建辰之月亦未是按月令云仲春之月仓庚鸣夏小正云二月采繁则此章两春日皆谓二月也载始阳温也尔雅四时春为青阳注云气清而温阳又刘熙释名云阳扬也阳气在外发扬也仓庚黄鸟而黑章即葛覃黄鸟也解见葛覃篇陆佃云凡诗言黄鸟者兴也言仓庚者赋也汲冢周书云惊蛰之日仓庚鸣盖蚕生之时也妇人未嫁称女懿尔雅说文皆以为美也愚按犹言精致也筐本作匡徐锴云受物之器象形正三方也遵说文云循也微行小径也柔桑穉桑也初生桑始发也迟迟日行舒缓也孔云计春秋漏刻多少正等而秋言凄凄春言迟迟者阴阳之气感人不同张衡西京赋云人在阳则舒在阴则惨然则人遇春暄则四体舒泰觉画景之稍长故以迟迟言之及遇秋景四体褊躁不见日行急促惟觉寒气袭人故以凄凄言之凄凄是凉迟迟非暄二者观文似同本意实异也愚按孔说固是然迟迟在载阳之后自是画刻较长非但画夜平分时节矣繁解见采繁篇徐光启云蚕之未出者鬻繁沃之则易出今养蚕者皆然故毛传云所以生蚕朱子谓蚕生未齐未可食桑故以繁啖之盖未尝目覩此事以意解之耳祁本邑名故字从邑或训为大或训为徐或训为众总不能明其义愚意当通作岐凡山之旁出路之二达者皆谓之岐此於众多之意为近诗其祁孔有兴雨祁祁祁如云皆同斯义若以采繁篇被之祁祁通之则此篇采繁祁祁概幽公宫中之人亦在其中矣故下文有及公子同归之语也女即执懿筐之女女心伤悲犹云惻然动念也殆将也其殆庶乎之殆诸侯之子凡男女皆得称公子左传云凡公女嫁于敌国姊妹则上卿送之公子则下卿送之于大国虽公子亦上卿送之昭三年公孙蚕为少姜之有宠也以其子更公女而嫁公子又公羊传说筑王姬之馆云于羣公子之舍则已卑矣是诸侯之女亦称公子也同归即素冠篇聊与子同归之义言其趋向亦欲与之同也幽公之化自家而国春日迟迟之时公子亦出而与之采繁此执懿筐之女见之不觉悲伤感念诚见民生在勤虽贵介公子犹不敢自暇逸如此相与则而象之所谓上有好者下必有甚焉者也毛郑以为春女悲秋士悲春女感阳气而思男秋士感阴气而思女是其物化所以悲也悲则始有欲嫁之志信如所言以处子而作嫁想岂幽风敦龐之俗哉或谓时偶值有于归之事或又谓豫有离亲之感均属附会】七月流火【见上】八月萑苇【尾韵】蚕月条桑【阳韵】取彼斧斨【阳韵】以伐远扬【阳韵】猗【齐诗作猗】彼女桑【阳韵】七月鸣鵙【锡韵孟子注作馱升庵外集作雒】八月载绩【锡韵】载玄载黄【阳韵】我朱孔阳【韵】为公子裳【阳韵 赋也孔颖达云衣之所用非丝即麻春既养蚕秋当缉绩丝帛染为玄黄乃堪衣用故三章又陈女功自始至成也八月斗建酉之月萑苇解见蒹葭篇毛云豫蓄萑苇可以为曲按月令季春之月命野虞母伐桑柘鸣鵙拂其羽戴胜降于桑具曲植蕿筐后妃齐戒亲东乡躬桑禁妇女毋观省妇使以劝蚕事注云曲薄也植槌也所以架曲与蕿筐者孔云薄用萑苇为之以下句言蚕事则萑苇为蚕之用故传云豫蓄以为曲也蚕月治蚕之月以月令祭义考之正谓三月也月令之说见前祭义云大昕之朝君卜三宫之夫人世妇之吉者使入蚕室奉种浴于川郑氏谓大昕者季春朔日之朝也此诗自建寅之月以至建丑之月皆有独少建辰之月有其事不纪其月亦古人行文变幻处条长也厥木维条之条言三月之时桑枝方条达也斨说文云方鍬斧也孔云隋鍬曰斧方鍬曰斨斨即斧也惟鍬孔异也按隋谓孔形狭而长也鍬斧空也刘熙云斨之言戕也所伐皆戕毁也远扬朱子云远枝扬起者也孔云长条扬起手所不及故枝落之而采其叶严云桑性以斩伐而始茂取斧斨以伐其条又豫为明年之计也程大昌云今浙桑则然岁生岁伐率皆稠行低干无有高及二丈者猗通作倚严云犹依也不斩其条但就树以采其叶也又齐诗作猗故毛传谓角而束之曰猗盖取此猗义也女桑尔

雅云桺桑也郭璞云今俗呼桑树小而条长者为女桑树严云物之小者称女犹今称女墙也上章柔桑乃桑叶之嫩者嫩叶始生未多故以筐箱求之养新出之蚕耳蚕有新出者又有未出者故同采繁言之皆言蚕事之始也此章女桑乃桑树之小者大树既条取之小树又猗取之蚕已大食故桑之大小取之无遗盖言蚕事之成也鵙尔雅云伯劳也郭璞云似鸛鵙而大杨慎云形似鸛鵙鸛鵙喙黄伯劳喙黑以此别之曹植云伯劳以五月鸣应陰气之动阳为仁养陰为残贼伯劳盖贼害之鸟也其声鵙故以其音名云性亦能击搏鷹集于林则盘旋鸣聒候鷹飞辄击之五更辄鸣不止至曙乃息又名博劳又名伯赵赵者疾也左传云伯赵氏司至也通卦验云博劳性好单栖其飞翾夏至应陰而鸣冬至而止故帝少皞以为司至之官陆佃云说文以为翾斂足也今鵙飞斂足腹下罗愿云按时训云鵙不始鸣号令壅偪高诱以为夏至後应陰而杀蛇乃磔之棘上而始鸣今俗云鵙在林间鸣蛇于其下蟠结不动飞去则伸其所踏枝可鞭儿令速语以其当万物不鸣时而能鸣故以类求之或见夏小正讹鵙作𪔐而孟子注以𪔐为鵙遂以两字通用按𪔐名鸛𪔐巧妇也与鵙无涉陆佃云仓庚知分鸣鵙知至故阳气分而仓庚鸣可蚕之候也陰气至而鵙鸣可绩之候也严云五月伯劳始鸣应一陰之气至七月犹鸣则三陰之候而寒将至矣故七月闻鵙之鸣先时感事也载之言则盖音近也绩说文云缉也孔云陈风不绩其麻绩缉麻之名八月丝事毕而麻事起也玄黄朱皆色之正者于是始染以献总上丝织而成帛麻织而成布言吕祖谦云古者冕用麻而服用丝一说春帛是寒服秋布是暑服亦通玄毛云黑而有赤也按考工记锤人说染法云三入为纁五入为緌七入为緇郑注云染黑者三入而成纁又再染以黑则为緌緌今礼记作爵言如爵弁色也又复再染以黑乃成緇矣凡玄色者在緌緇之间其六入者欵孔云玄色染法互入数礼无明文故郑约之以为六入谓三入赤三入黑是黑而有赤也易下系云黄帝尧舜垂衣裳盖取诸乾坤注云乾为天坤为地天色玄地色黄故玄以为衣黄以为裳象天在上地在下也朱毛云深纁也士冠礼爵弁服纁裳郑注云凡染绦一入谓之縗再入谓之纁三入谓之纁朱则四入矣孔云染朱入数书传无文故约之以为四入也三则为纁四入乃成朱色深于纁故云深纁也孔甚也阳毛云明也孔云陰阳相对则陰闇而阳明矣朱色无陰阳之义故以阳为明谓朱为光明也按周官染人秋染夏夏五色也谓之夏者夏翟毛羽五色皆备成章于斯时也天朗气清五色皆可以染故系之八月之下也公子与上章公子同玄黄以献之君其朱色之鲜明者妇人女子尤爱之故取以献为公子裳非徒表蕩然家人一体之意诚见采繁之公子能勤妇功而此丝麻乃妇功所成亦犹之称丝効功之意耳章中言七月八月蚕月皆是逐年如此作去岁看亦可作今岁明岁看亦不必拘拘分疏朱子云以上二章专言蚕绩之事以终首章前段无衣之意】四月秀蓂【萧韵】五月鸣蜩【萧韵】八月其获【药韵】十月陨穠【药韵】一之日于貉【药韵】取彼狐狸【支韵】为公子裘【叶支韵渠之翻丰本作求】二之日其同【东韵】载缵武功【东韵】言私其豸【东韵】献豸【周礼注作肩】于公【东韵赋也四月斗建巳之月王安石云阳生则言日陰生则言月然四月正阳而言月何也四月陰生气之先至】

【者也严云五行皆胎养在长生之前五月一陰生则亦四月陰胎萌也曹氏云首举四月者言陰气之来从微至着盖有渐也尔雅云木谓之华^𣎵谓之荣不荣而实者谓之秀孔云分别异名以晓人故以秀为不荣然出车云黍稷方华生民说黍稷云实发实秀是黍稷有华亦称秀也蓂草名郑疑为王荇非也刘向说此味苦苦蓂也按尔雅云蓂绕棘菟郭璞云今远志也

似麻黄赤华叶锐而黄其上谓之小草本草云远志一名棘菟一名绕蔓一名细草广雅云一名王连一名棘苑图经云根色黄形如蒿根苗名小草似麻黄而青又如华豆叶亦有似大青而小者三月开华白色根长及一尺严云今远志苦澁之甚医家以甘草熟煮之乃可用又丘光庭云月令孟夏苦菜秀孔颖达云菜似马薤而花白其味极苦今验四月秀者野人呼为苦蔓春初取煮去苦味和米粉作饼食之四月中茎如蓬艾花如牛蒡花四月秋气生故苦蔓秀则一岁物成自苦蔓始月令所书皆应时之物其言苦菜即苦蔓也颖达所见别是一物不可引以解此五月斗建午之月蝓蝗蝓也夏小正作良蝓传云良蝓者五采具按尔雅蝓种不一有蝗蝓有蝓蝓据小正良蝓蝓蝓皆以五月鸣扬雄方言云楚谓之蝓宋卫之间谓之蝓蝓陈郑之间谓之蝗蝓秦晋之间谓之蝉果如所言蝗蝓蝉通是一物夏小正不应别而言之而荡诗云如蝓如蝓则蝓自蝓蝓自蝓其非一物明甚毛氏于彼传云蝓蝉也蝓蝓也当以此说为正蝓蝓改名蝓则蝗蝓得专名蝓矣陆佃云蝓亦蝉之一种形大而黑昔人啖之礼有雀鷄蝓范是也一名蝉为其变蛻而禅故曰蝉又小正月令七月寒蝉鸣寒蝉似蝉而小一名寒蝓即今哑蝉非此蝓也钱天锡云因天时之变而物化随之寒于冬而萌于夏豳民早计如此盖不止履霜而知坚冰矣此与下章覩昆虫之变化者不同获说文云刈谷也孔云八月其获者惟有禾耳十月斗建亥之月陨说文云从高下也又云凡草木皮叶落堕地为穽徐锴云此言草木而从草者木穽与草同也又说文有𠂔字其义则木叶堕地徐以为陨穽当用此𠂔字但古今字异此字今所难行也以上四句言阴气之繇萌而盛而极见于物者如此以起裘褐不可缓之意于貉往祭貉也按周礼大司马之职中冬教大閱羣吏以旗物鼓铎镯铙各率其民而致之大司马质明弊旗诛後至者有司表貉于陈前旧说云貉师祭也立表以祭故谓之表貉古人祭貉于立表之处无坛壝置甲冑弓矢于前置稍其後以依神祷气势壮而多获罗愿云貉善睡之兽似狐畜而养之扣之即悟已而复寐周人将猎则先祭貉故谓猎为貉周礼曰祭表貉则为位盖獾之将出貉为先导表貉之所在知兽之所聚故祭而取之穆天子传曰天子猎于漆泽于是得白狐玄貉焉以祭于河宗此周礼猎祭貉之验也狸者狐之类狐口锐而尾大狸口方而身文黄黑彬彬盖次于豹故称圣人虎变君子豹变辨人狸别狸善搏者也为小步以拟度焉其发必获谓之狸步量侯道法之古者王大射则射人以狸步张三侯陆佃云狐善疑狸善拟不可以有为故古者以为燕居之裘诗曰一之日于貉取彼狐狸为公子裘言往祭表貉因取狐狸之皮为裘也孔云礼言狐裘多矣左传称齐大夫东郭书衣狸制服谓狸制狸裘也陈祥道云夫公子无豫于事而狸裘东郭即戎而狸制则狸裘非礼服之裘也传又曰臧之狐裘败我于狐貍则春秋之时戎服亦以狐裘也此公子谓豳公之子与上二章女公子不同蚕绩者妇人之事则我朱孔阳以献公之女狩猎者男子之事则取彼狐狸以献公之子亦各从其类也闵光德云蚕绩狩猎不专为君但于勤生之中有先公後私之义耳其同者郑云君臣及民因习兵俱出田也或引周礼小司徒职云凡起徒役毋过家一人以其余为羨惟田与追胥竭作注谓竭作者正卒羨卒尽出也一之日只正卒往二之日则正卒羨卒俱往故曰同愚按此说绝无稽据今以下文献辨于公观之则公固在田所矣郑解为是又一之日行表貉之祭似与周礼中冬大閱之典相合而此更言二之日载缵武功者旧说谓豳地晚寒故习兵晚亦属附会此诗自说豳俗在周礼未作之先原不宜律以周礼或祇是一之日听民相与祭貉以猎取禽兽而君未同往至二之日君方帅有司致民于田以讲武故曰其同也毛云缵继功事也孔云既言捕取狐狸因说田猎之事至二之日之时君臣及其民俱出田猎则继续武事年常习之使不忘战也愚按此时始习兵出田一年仅止一次耳与周礼蒐苗獮狩之

典殊异谓之纼者言纼续上年之事盖岁以为常非谓继前日之于貉也獾豸皆豕名说文以豚生六月为獾毛传以豕生一岁为獾未详孰是尔雅豕生三子曰獾注云猪生子常多故别其少者之名说文以豕生二岁肩相及者谓豸周礼注以四岁为豸亦未详孰是然总之豕之大者也小兽私之为已有大兽献之于公所薄于己而厚于君也朱子云此章专言狩猎以终首章前段无褐之意愚按裘褐有别贵者衣裘贱者衣褐通章只重在取彼狐狸为公子裘二语盖幽民因己之资褐以御寒而重为贵者之虑下文二之日一段则又因言于貉而并及之耳语意自有轻重又按礼射义诸侯以狸首为节疑即歌此章也一之日取彼狐狸故曰狸首又幽公之诗也是故诸侯之射以之为节】五月斯螽动股【夔韵】六月莎【释文作沙】鸡振羽【夔韵】七月在野【叶夔韵王矩翻】八月在宇【夔韵】九月在户【夔韵】十月蟋蟀入我牀下【八言为句叶夔韵後五翻】穹窒熏鼠【叶夔韵此主翻】塞向【仪礼疏作乡】墐户【夔韵】嗟我妇子【叶夔韵兹五翻】曰【汉书丰氏本俱作聿】为改岁入此室处【叶夔韵此主翻 赋也斯螽解见螽斯篇尔雅以为蜚螽陆玑云蝗类也长而青长角长股青色黑斑其股似玳瑁文五月中以两股相搓作声闻数十步幽州人谓之春箕亦谓之春黍江东人谓之蚱蜢亦谓之蚳陆佃云五月斯螽动股言螽斯股成而奋迅之也尔雅云螽丑奋盖于是时股成而奋迅之则方春尚弱也故列子以为臣力折春蚕之股搃秋蝉之翼六月斗建未之月莎鸡虫名振羽者毛云羽成而振迅之丘光庭云按诸虫之鸣出于口喙者多矣有脇鸣者有脰鸣者有股鸣者有羽鸣者脇鸣者蜩蝉也脰鸣者蝼蛄也股鸣者斯螽也羽鸣者莎鸡也若以飞而有声为羽鸣者则蝇蚊之类皆是何独莎鸡也且幽风所言非偶然也以莎鸡斯螽之事皆阳虫也阳气出则此虫鸣阳气入则此虫尽着其将寒之有渐劝人早备于寒也今验莎鸡状如蚱蜢头小而身大色青而有须其羽画合不鸣夜则气从背出吹其羽振振然其声有上有下正似纬车故今人呼为络纬者是也如或不信可取树枝之上候其鸣者把火燃看即知斯言之不谬或云飞而振羽索索作声是其不识莎鸡妄为臆说罗愿云莎鸡振羽作声其状头小而羽大有青褐两种率以六月振羽作声连夜札札不止其声如纺丝之声故一名莎鸡一名络纬今俗人谓之络丝娘盖其鸣时又正当络丝之候故幽诗云六月莎鸡振羽七月在野八月在宇九月在户也寒则渐近人今小儿夜亦养之听其声能食瓜蒌之属崔豹古今注云莎鸡一名促织一名络纬一名蟋蟀促织谓鸣声如急织也络纬谓其鸣声如纺纬也又曰促织一名促机络纬一名纺纬其言促织如急织络纬如纺纬是矣但蟋蟀与促织是一物莎鸡与络纬是一物不当合而言之尔诗称六月莎鸡振羽以至九月在户十月蟋蟀入我牀下一章而别言莎鸡与蟋蟀可知其非一物也盖二虫皆似机杼之声可以趣妇功故易以紊乱孙炎解尔雅翰天鸡以为小虫黑身赤头一名莎鸡郭氏又云一名樛鸡陆玑则云莎鸡如蝗而斑色毛翅数重下翅正赤或谓之天鸡六月中飞而振羽索索作声幽州人谓之蒲错广志云莎鸡似蚕娥而五色亦曰犇鸡盖皆非其类今莎鸡之鸣乃止而振羽不待飞也一名马 陆佃云盖其名以时故有鸡之号范祖禹云五月日短至而陰生斯螽动股莎鸡振羽气使之然也陰阳之气积微而为寒暑君子之戒民也蚤矣七月在野以下蒙上文皆谓莎鸡也旧说以为属下文指蟋蟀不特文理未顺且周书云小暑之日温风至又五日而蟋蟀居壁易通卦验亦云立秋蜻蛚鸣白露下蜻蛚上堂蜻蛚即蟋蟀也安所覩七月在野乎宇韩诗云屋溜也陆德明云屋四垂为宇说文以为屋边也释名云宇羽也如鸟羽翼自覆蔽也户说文云护也半门曰户象形又外曰门内曰户易节卦初九曰不出户庭九二曰不出门庭是也蟋蟀解见唐风林兆珂云蟋蟀有三尾者雌也二尾者雄也吴人取其雄而趨健

者驯养以鬪其鸣在股间非口也亦作悉?陆佃云陰阳率万物以出入至于悉?能帅陰阳之悉者也诗云十月蟋蟀入我牀下言蟋蟀微物也犹知随时可以人而不知乎故曰物有微而志信人有贱而志忠也牀说文云安身之坐也从木从月月象人斜身有所倚着郑玄云言此三物之如此者着将寒有渐非卒来也穹朱子云空隙也通作空考工记穹者三之一郑司农云穹读为空谓鼓木穹窿者居鼓三之一也又吕览伊尹生于穹桑字或作空室说文云塞也室中空隙者塞之熏说文云火烟上出也熏鼠令出其窟使不得穴于其中也孔云月令孟冬命有司闭塞而成冬此经穹室墐户文在十月之下亦当以十月塞涂之矣塞说文云室也本作塞从宀屋也从升捧也从?从土?音展象叠物捧而塞于屋中也向说文毛传皆云北出牖也从宀从口徐云牖所以通人气故从口会意孔云士虞礼云祝啓牖向注谓向牖一名也塞向避北风也孔云为寒之备不塞南窗墐毛云涂也孔云所以须涂者庶人箠户箠户以荆竹织门荆竹通风故泥之使令室无隙孔寒气不入钱天锡云向可暂塞户则人所出入不可塞但墐之而已陆燧云隙能生寒而鼠又能生隙故室熏之使寒不得自内出塞墐之使寒不得自外入王安石云嗟者悯怜之辞曰为改岁者黄佐云言时至冬岁事将改亦犹尧典称冬为朔易之义吕氏不察其说而谓三正通于民俗尚矣周特举而迭用之耳朱子亦谓周历夏商其未有天下之时固用夏商之正朔然其国僻远无纯臣之义又自有私记其时月者故三正皆曾用也是谓周之先公私有纪候之法故云十月改岁然既以十月为改岁则又何以云二之日为卒岁乎是其一篇之中自相矛盾而不可通矣愚按改岁原不正指十月乃豫计之词玩本文语意自明室者邑中之室处止也言于此而止息也自田庐而止之故曰入顔师古云去田中入室处也孔云虫既近人大寒将至故涂塞其室又告妻子言我所以为此者为改岁大寒当入此居处也班固云春令民毕出在桼冬则毕入于邑其诗曰四之日举趾同我妇子饁彼南亩又曰十月蟋蟀入我牀下嗟我妇子聿为改岁入此室处所以顺陰阳备寇赋习礼文也黄子道周云明堂礼曰仲秋农隙民毕入于室曰时杀将至母罹其灾此托于护民者也则不如豳风之情也豳风至十月塞向墐户曰入室处是亥月也此章亦以终首章前段卒岁之意既言有衣有褐矣复及室处者豳地寒总是御寒事也】六月食郁及薁【屋韵说文尔雅疏作藿】七月亨【音烹丰氏本作烹】葵及菽【屋韵释文丰氏本俱作未】八月剥枣【皓韵】十月获稻【皓韵】为此春酒【有韵】以介眉寿【有韵】七月食瓜【叶虞韵攻乎翻】八月断壶【虞韵】九月叔苴【叶虞韵庄俱翻】采荼薪【丰本作新】樗【叶虞韵他胡翻】食【音嗣】我农夫【虞韵 赋也朱子云自此至卒章皆言农圃饮食祭祀燕乐以终首章後段之意苏辙云春夏食去岁之蓄至于六月始有果实成而可食郁唐棣之类刘桢毛诗义问云其树高五六尺其实大如李正赤食之甜本草云一名雀李一名车下李生高山川谷或平田中五月时实薁毛云薁薁也亦作薁郁诗疏云一名车鞅藤戴侗云蔓生类蒲萄六月熟瓠越谚云薁薁熟食新粥正诗六月所食也花木志云燕薁实如龙眼黑色说文谓之薁薁广志云燕薁似梨早熟旧说皆以为即唐棣而沈括又以为唐棣即郁棠棣即薁此皆非也按郁乃车下李薁乃薁薁唐棣乃薁李本是三物何得相混又按本草注云蒲萄即薁薁生陇西五原山谷未详孰是亨煮也葵菜名本草云葵为百菜之主按葵之种类不一有丘葵广雅所谓藟者是也有胡葵广志所谓其花紫赤者是也有冬葵崔寔谓中伏後所种陶隐居曰以秋种葵覆养经冬至春作子管子所谓桓公北伐山戎得冬葵布之天下者是也有蜀葵一名卫足葵孔子以比鲍庄子智不如葵葵犹能卫其足者郭璞云如木槿花一名戎葵尔雅所云葍戎葵者是也又有黄蜀葵与蜀葵颇相似而各别种有锦葵花小叶员有终葵一名

繁露尔雅谓蔊葵繁露者是也亦名落葵又名天葵又名承露又名藤葵郭璞云大茎小叶华紫黄色可茹味甘滑图经云蔓生叶员厚如杏叶子如五味子生青熟黑所在有之有龙葵本草注云即关河间谓之苦菜者叶员花白子若牛李子生青熟黑但堪煮食不任生噉图经云惟北方有之有菟葵本草注云苗如龙芮叶光泽花白似梅茎紫色煮汁可食尔雅所谓蓊菟葵者是也有荆葵一名茈苳陆机云似茺菁华紫绿色可食微苦诗及尔雅所谓苳者是也有钱葵丛低又一种鲜妍可爱有蒲葵可食其叶大者中作扇晋人所捉者是也有露葵宋玉讽赋曹植七启中皆及之未详其状颜氏家训载蔡朗以父讳纯遂呼蓊菜为露葵而露葵实非蓊菜也有楚葵即水中芹也有泽葵即莓苔鲍昭芜城赋所谓泽葵依井是也有鳧葵叶员似蓊生水中马融传谓桂荏鳧葵者是也一名水葵茎甚淡三月至八月细如钗股名悬葵九月至十月渐粗在泥中者曰菟葵春末夏初有茎未叶名雉蓊一名茆又有吴葵鸭脚葵春葵秋葵紫茎葵白茎葵葵类虽多鲜不堪茹故古人重之周礼醯人饌食之豆其实葵菹仪礼赞者一人执葵菹以授之主妇繆裘祭仪云夏祀和羹苳以葵公仪休相鲁食于舍而茹葵愠而拔之不欲夺园夫之利鲁监门女婴谓马佚食园葵岁利亡半鲁漆女谓马佚践园葵使终岁不厌葵味潘岳闲居赋云菜则绿葵含露齐周顒答王俭云绿葵紫蓊繇斯以观葵之为尚久矣齐民要术云种葵三十亩胜作十顷谷罗愿云葵子虽经岁不涸微炒令煇炸散着湿地遍踏之朝种暮生远不过宿早种者十月末地将冻散子劳之正月末亦可五月初更种之以春者既老秋菜未生种此相接六月一日种白茎秋葵白茎者宜乾九月作葵菹乾葵盖一岁凡得三辈士虞礼夏秋用生葵冬春用乾豆皆滑物道家之法十日一食葵菜所以调和五臟菽大豆也按张揖广雅云大豆菽也小豆荅也是则菽为大豆之专名汜胜之云高田可种大豆保岁易为宜古之所以备凶年也谨计家口数种大豆率人五亩此田之本也罗云菽类最多故九谷之中居其二然菽于用甚多故羞筴之实?餌粉餐皆稻米黍米所为合蒸则曰餌饼之则曰餐以其粘着故捣粉熬大豆以为表餌言?餐言粉盖互相足陆佃云王公熬豆而食曰啜菽又毛传以为藿也孔云大豆叶谓之藿仪礼公食礼云鉶羹牛藿采其叶也未详孰是枣果名按尔雅枣有十一种夏小正云八月剥枣栗零盖于是时枣栗熟也剥落也毛以为击也陆佃云枣实未熟虽击不落已熟则烂不击自堕盖收枣击而落之故齐民要术所谓全赤则收收法撼而落之为上是也且枣全赤即收故乾则红皱复无鸟鸟之费半赤而收者肉未充满乾复黄皱将赤味亦不佳故於全赤之时剥而落之罗云古者八月剥枣大戴礼曰剥者取也其修治则曰新之曰寔之以以为馈食之筴又以为妇赞其事父母舅姑者枣栗饴密以甘之凶岁亦仰焉宋王安石初解剥枣不用毛注曰剥者剥其皮而进之所以养老也後从蒋山郊步至民家问其翁安在曰去扑枣始悟前非即具奏乞除前说稻解见鸛羽篇蔡邕月令章句云十月获稻人君尝其先熟故在季秋九月熟者谓之半夏稻稻米粒如霜性尤宜水其黏者为糯一名秬可以酿酒其不黏者为秔可以作饭二月种秬稻有芒者为秔不芒者为糯通称秬也故周颂曰丰年多黍多秬为酒为醴月令曰乃命大酋秬稻必齐大酋酒官之长也春酒毛云冻醪也冬酿春熟月令注云古者获稻而渍米面至春而为酒介取摈介之义故古人训介为助史记注曰相佐助曰介是也眉寿毛云毫眉也孔云年老者必有毫毛秀出王安石云眉寿衰矣养气体以助之也邵氏云古人以酒为养老之具余人不得饮焉曰介眉寿盖酿酒之意如此自章首至此郁蓂佳果也葵嘉蔬也菽与枣俱可供筴实皆羞耆之具不特酿稻为酒足以养老而已七月食瓜以下则农夫之所以自养也按夏小正五月乃瓜乃瓜者治瓜之辞也八月剥瓜谓蓄瓜时也此七月瓜正盛则食之而已壶瓠属陆佃云似瓠而员曰壶壶圆器也

故谓之壶亦曰壶卢古今注曰壶卢瓠之无柄者也玄蜂若壶盖取诸此壶性善浮要之可以涉水南人谓之要舟鷁冠子曰贱生于无所用中流失船一壶千金以此故也诗曰八月断壶壶性蔓生披蔓斩之故曰断也今其收法八月冷露降辄生断其根刈彛云壶枯者可为壶嫩者可供茹八月宜断其梢令勿复花实所以坚其壶而大其茹今民尚尔亦通作瓠陆云风俗通云八月秋穰可以杀瓠取其色泽而坚类从以为瓠死烧穰瓜亡煮漆即此是也今俗畜瓠之家不烧穰种瓜之家不焚漆崔寔云正月可种瓠六月可蓄瓠八月可断壶罗愿云诗断壶瓠中白肤所谓张苍肥白如瓠者也可以饲豕致肥其瓣可以作烛致明其叶又可为菜叔说文云拾也按叔未菽三字古文多混用今别其义季父之称当作未唐孔氏以为字从小言尊行之小是也说文训为豆谓象豆生有岐枝之形恐未然也拾取之义当作叔此未为声从又定意又者手也其从艹者乃豆名之菽菽叶可食亦菜之类故从草也苴麻之有实者亦名蕢其无实者曰牡麻亦名枲按尔雅云麋枲实注引仪礼注云苴麻之有蕢者又曰苴麻母疏云苴麻盛子者盖谓此有实之麻其子名苴名蕢其母名苴也孔云叔苴谓拾取麻实以供食也九月初熟拾取以供羹菜其在田收获者纳取以供常食也罗云麻实有文理故属金为西方之谷明堂月令秋则食麻与犬而至仲秋则又以犬尝麻先荐寝庙若豳风九月叔苴盖食农夫者不嫌于晚耳茶解见谷风篇此草凌冬不凋故一名游冬生山田及泽中得霜脆而美大木可折曰薪樗毛云恶木也说文作𣎵陆玕云樗树及皮皆似漆青色耳其叶臭通志云樗似椿北人呼山椿江东呼虎目叶脱处有痕如樗蒲子又如眼目故名材易大而不中器用庄子云吾有大树人谓之樗其大本臃肿而不中绳墨其小枝卷曲而不中规矩立之涂匠者不顾孔云樗唯堪为薪故云恶木黄佐云采茶以上皆食物也薪樗直以熟此物焉耳郑云瓜瓠之畜麻实之粢乾茶之采恶木之薪皆所以助养农夫之具严云优老而薄壮豳俗之厚也陈鸟飞云取糴以为私取豨以献公上下之分着矣以美者养老以恶者自养长幼之义明矣】九月筑场【释文又作塲】圃【夔韵】十月纳【丰氏本作内】禾稼【叶夔韵古五翻】黍稷重【周礼注作種释文说文俱作种陆德明云说文禾边作重是重稷之字禾边作童是種艺之字今人乱之已久】稷【叶职韵录直翻周礼注释文说文俱作稷】禾麻菽【丰本作未】麦【叶职韵纪力翻】嗟我农夫我稼既同【东韵】上入执宫【丰氏本作公】功【东韵】昼尔于茅【叶尤韵迷侯翻】宵尔索綯【叶尤韵徒侯翻】亟其乘屋【韵】其始播【丰本作□】百谷【屋韵 赋也严云此章述农事终而复始其勤劳未尝息也筑说文云捣也周礼场人掌国之场圃而树之果蓏珍异之物以时斂而藏之注云除地曰墀筑坚始得为场树果蓏曰圃园其樊也毛云春夏为圃秋冬为场郑云场圃同地自物生之时耕治之以种菜茹至物尽成熟筑坚以为场孔云蹂践禾稼谓之场九月之时筑场于圃之中以治谷也纳通作内释名云入内也谓治于场而内之困仓也一说王雪山以纳禾稼并後章纳凌陰皆谓纳之公家云豳民遇事先公後私亦通禾仪礼聘礼门外米禾皆一十车之禾注云藁实并刈者也朱子云禾之秀实而在野曰稼重本作种说文云先種後熟也左传余髮如此种种犹言此晚禾之短也稷亦作稷说文云疾熟也周礼内宰上春诏王后生種稷之种郑衆云先種後熟曰重後種先熟曰稷贾公彦云先郑直云先種後種不见谷名後郑意黍稷皆有種稷孔云再言禾者以禾是大名非徒黍稷重稷四种而已其余稻秫苽粱之辈皆名为禾麻与菽麦则无禾称故于麻菽麦之上更言禾字以总诸禾也按月令注云麦实有苳甲属木黍秀舒散属大麻实有文理属金菽实有苳甲坚合属水稷五谷之长属土据此则黍稷麻菽麦所属以五行相生为序故立言云尔也重稷与禾则其类尚多故包括于其中也严云广举禾稼之

类以见其多谓至十月则此等诸种皆成熟矣不专是十月纳之也月令五月登黍四月登麦非十月也嗟我农夫乃同侪自相警戒之辞辅广云黍稷重穋禾麻菽麦则凡一岁所种者先後大小皆举之矣故复总言之曰我稼既同谓毕聚也毛云入为上出为下李氏曰自田野入都邑故谓之上愚按以下而供上之事亦曰上执治也宫功范氏董氏皆以为公室官府之役朱子云古者用民之力岁不过三日是也严云农事了毕农夫自相告戒云嗟我农夫稼穡收获既齐矣野中无事我当上入都邑执公室之役不待督责而从见幽人尊君亲上礼义之俗也尔汝也亦幽人自相戒之辞于茅往取茅也宵说文云夜也索说文云“有茎叶可作绳索也”綯尔雅云绞也按说文无綯字当通作绹云编绪也广韵以为编丝绳是绞之义也宵尔索綯言夜则尔当绳是绞也严云茅不可索綯昼取茅草将以盖屋宵作索綯将以缚屋亟说文云敏疾也乘说文云覆也徐云从上覆之也屋邑居之宅也朱子云古者民受五亩之宅二亩半为庐在田春夏居之二亩半为宅在邑秋冬居之辅广云幽民于田亩则曰雨我公田遂及我私于居室则曰上入执宫功然後索綯以乘屋其忠君亲上发于真诚不待使之而然也七月之民其事则不外于农桑其心则不忘乎君上治天下未能使民至于如此则皆苟道也播布种也严云谓之始播终而复始也范祖禹云天运而不息人动而不已故我稼既同则又将始播植也王安石云如易所谓终则有始也罗云古人说百谷以为粱者黍稷之总名稻者漑种之总名菽者衆豆之总名三谷各二十种为六十蔬果之实助谷各二十凡为百谷然予以为谷之种类每物不下十数亦何假蔬果而後为百耶辅广云诗言民之趋于农功自然如此其亟故孟子引之以证其民事不可缓之说邓元锡云六章秋衆物成主食飧七章冬农功毕主宫功愚按此章只重农事不重治室稼既同而始乘屋为农也稼既同而亟乘屋亦为农也正如秀蓂章终首章衣褐之意只重于貉一段耳】二之日凿冰【丰氏本作爰】冲冲【东韵】三之日纳于凌【说文作滕】陰【叶东韵余中翻】四之日其蚤【叶筱韵子小翻礼记注丰氏本俱作早】献羔祭韭【叶筱韵已小翻】九月肃霜【阳韵】十月淅场【阳韵】朋酒斯飧【叶阳韵虚良翻】曰杀羔羊【阳韵】跻彼公堂【阳韵】称彼兕觥【叶阳韵姑黄翻释文礼记注丰本俱作觥】万寿无疆【阳韵 赋也此章言藏冰宴飧等事以终言食之意亦犹四章五章言为公子裘言曰为改岁以终衣褐卒岁之意也冰说文云水冻也韩诗传云冰者穷谷陰气所聚不泄则结为伏陰凿冰谓凿而取之月令季冬之月冰方盛水泽腹坚命取冰冰以入是也冲本作冲说文云涌摇也或以为和也严云季冬阳气尚微盛陰固闭不能自达乃豫于深山穷谷凿取其冰以达之阳气达而冲冲然和也纳解见前章凌说文云冰出也郑衆以为冰室按风俗通云积冰曰凌冰壮曰冻冰流曰澌冰解曰泮以字义求之凌从冫从夊正谓积冰之处其冰之多如山陵然耳陰闇处也周礼凌人掌冰正岁十有二月令斩冰三其凌注谓三其凌者三倍其冰备消释也取冰藏冰在十二月此言纳于凌陰在正月者此时东方解冻冰渐消释故取冰室所藏更贮于内之陰处令不复释周礼斩冰三倍正为此也旧说郑玄答孙皓谓幽土晚寒故可正月纳冰殊属附会以愚观此书所陈无不与夏小正月令相应者其蚤孔云其早朝也愚按即二月朔也月令仲春天子乃鲜羔开冰先荐寝庙注云鲜当为献韭菜名说文云一种而久故云韭谚曰韭懒人菜以不须岁种也又利病人可久食字象形在一之上一地也齐民要术云韭性内生根喜上跳故种与葵同法而畦欲极深礼祭宗庙韭曰丰本按夏小正正月囿有见韭韭乃阳菜春始发露故纪之旧传以为即此四之日祭韭非也陆佃云开冰春祭也故献羔祭韭礼曰春行羔豚又曰春荐韭是也孔云祭韭者盖以时韭新出故用之王制云庶人春荐韭亦以新物故荐之也罗云韭首春色黄未出

土时最美故云春初早韭冬末晚菘详庶人四时之荐夏及秋冬乃荐麦黍与稻而春乃荐菜茹之物又三时用鱼豚鴈为配而韭独以卵岂春物未成可荐者少故耶曹氏云献羔祭司寒也祭韭荐清庙也宋淳化中李至上言按诗四之日献羔祭韭即今之二月也又月令开冰之祭当在春分非四月所当行也帝览奏曰韭长可以苫屋矣何谓荐新令春分开冰祭司寒卜日荐冰于太庙左传申丰曰古者日在北陆而藏冰西陆朝觐而出之其藏冰也深山穷谷固阴沍寒于是乎取之其出之也朝之禄位宾食丧祭于是乎用之其藏之也黑牡秬黍以享司寒其出之也桃弧棘矢以除其灾其出入也时食肉之禄冰皆与焉大夫命妇丧浴用冰祭寒而藏之献羔而啓之公始用之火出而毕赋自命夫命妇至于老疾无不受冰山人取之县人传之与人纳之隶人藏之夫冰以风壮而以风出其藏之也周其用之也徧则冬无愆阳夏无伏阴春无凄风秋无苦雨雷出不震无灾霜雹疠疾不降民不夭札七月之卒章藏冰之道也按尔雅云北陆虚也西陆昴也杜预云陆道也十二月日在虚危三月日在毕三月中火星昏见东方郑玄以西陆朝觐为四月立夏之时周礼曰夏班冰是也服虔则以为二月日在娄四度春分之中奎始晨见东方蛰虫出矣故以是时出之给宾客丧祭之用今按左传本文西陆朝觐而出之在火出毕赋之先服虔之解是也尔雅以西陆为昴未足信周礼凌人职云春始治监凡内外饔之膳羞监焉凡酒浆之酒醴亦如之祭祀共冰监宾客共冰大丧共夷盘冰夏颁冰掌事秋刷注云监如甄大口以盛冰置食物于中以御温气春始治为二月将献羔而启冰也醴酒见温气亦失味故亦监焉夷之言尸也尸之盘曰夷盘欲以寒尸也夏暑气盛王以冰颁赐羣臣则凌人主其事刷清也秋凉冰不用可以清除其室曹氏云十二月阳气尚微于是凿冰以达之至二月四阳大壮恐其太过则微阴几于失灭于是开冰而颁之迨火出而毕赋所以节其过也圣人裁成天地之道有在于此而宾食丧祭因以致其用焉耳苏辙云古者藏冰发冰以节阳气之盛阳气之在天地譬犹火之着于物也故常有以解之十二月阳气蕴伏而未发其盛在下则纳冰于地中故曰日在北陆而藏冰至于二月四阳作蛰虫起阳始用事则亦始启冰而庙荐之故曰仲春献羔开冰先荐寝庙至于四月阳气毕达阴气将绝则冰于是大发食肉之禄老疾丧浴冰无不及故曰火出而毕赋人之居大冬也血气收缩阳处于内于是厚衣而寒食及其居大夏也血气发越阳散于外于是薄衣而温食不然尽者将过而为厉藏冰发冰亦犹是也黄子道周云冰火之剂天地之大用也先王虑人之有疾疢阴阳人事丛于肉食肉食而内热天地之大戒也曰二月火犹未觐而公用之不已蚤乎曰卯者火之所生也火生而冰剂之既济之义也以上言藏冰备暑之事肃霜朱子云气肃而霜降也涤说文云洒也孔云洗器谓之涤则是净义在场之功早已入仓故涤埽其场毛云两尊曰朋斯飨者郑云国君闲于政事而飨羣臣月令孟冬云是月也大饮烝注云十月农功毕天子诸侯与羣臣饮酒于太学以正齿位谓之大饮别之于燕其礼云烝引此诗十月涤场以下云是大饮之诗烝升也升牲体于俎上所谓房烝也孔云言朋酒者设尊之法每两尊并设故云朋耳非谓国君大饮惟两尊也燕礼公尊两瓦大卿大夫尊两方壶士尊两圆壶是尊皆两两对设之也瓦大者有虞氏尊名也曰杀羔羊者孔云案燕礼记云其牲狗此大饮大于燕礼故用羊也跻升也公堂孔云谓太学也谓之公堂者以公法为学故称公耳称举也孔云兕觥者罚爵此无过可罚而云称彼故知举之以警戒众人使之不违礼疆是境之别名言年寿长远无疆畔也郑云饮酒既乐欲大寿无竟愚按称彼兕觥盖司正之事万寿无疆则羣臣祝君之辞也先儒皆谓豳之先公国容未备无君民之间故国人以羔羊朋酒自诣公堂其礼甚简其意甚真然愚终不能无疑使人人皆欲跻堂以致敬无论其奔走烦苦不堪言即豳之君亦琐屑应

接不暇且尊卑有体名分脱略至此有是理否若以上文献羔祭韭之礼推之则此章所言大率皆君事也矧十月大饮月令所载正与此合断当以郑说为正又按月令是月亦有劳农以休息之文不知其礼如何旧说以为即周礼党正属民饮酒之礼毛传解此亦主此说所谓朋酒即乡饮酒礼所云尊两壶于房户间者但万寿无疆明是祝君之语故定主郑义以上言农隙燕飧之事邓元锡云卒章咏藏冰咏庆成何也藏冰赞化育也君人之大德庆成祝万寿也臣民之至情故以是终焉王符云明王之爱民也忧之劳之教之诲之慎微防萌以断其邪故易美节以制度不伤财不害民七月诗大小教之终而复始繇此观之民固不可恣也王安石云仰观星日霜露之变俯察昆虫草木之化以知天时以授民事女服事乎内男服事乎外上以诚爱下下以忠利上父父子子夫夫妇妇养老而慈幼食力而助弱其祭祀也时其燕飧也节此七月之义也真德秀云夫农者衣食之本一日无农则天地之所以养人几乎熄矣惟其关生人之大命是以服天下之至劳今以此诗考之日月星辰之运行昆虫草木之变化凡感乎耳目者皆有以触其兴作之思是其心无一念不在乎农也自于耜而举趾自播谷而涤场所治非一器所业非一端私事方毕而公宫之役无敢稽岁功方成而嗣岁之图不敢後是一岁之间无一日不专乎农也惟夫与妇惟妇与子各共乃事各任乃役是一家之内无一人不力乎农也织薄于秋求桑于春躬蚕绩之劳以为衣服之计者无所不至犹恐其未足也于貉为裘又有以相之食郁及羹烹葵及菽备果蔬之美以充耆老之养者无所不至犹恐其未足也获稻为酒又有以介之当是时农之所耕者自有之田也而上之人又从而崇奖劝励之故斯人亦以为生之乐而勤敏和悦之气浹于上下不见其有劳苦愁叹之状朋酒羔羊升堂称寿君民相与献酬忘其为尊卑贵贱之殊後世之农则异乎此矣己无田可耕而所耕者他人之田为有司者得无殃害之足矣岂复有崇奖劝励之意故数米而炊并日而食者乃其常也田事既起丁夫之粮饷与牛之刍藁无所从给预指收敛之入以为称贷之资粝饭藜羹犹不克饱敢望有盐酪之味乎晓霜未释忍饥扶犁冻皴不可忍则燎草火以自温此始耕之苦也燠气将炎晨兴以出伛偻如啄至夕乃休泥涂被体热燠湿蒸百亩告青而形容变化不可复识矣此立苗之苦也暑日如金田水若沸耘耔是力稂莠是除爬沙而指为之戾伛偻而腰为之折此耘苗之苦也迨垂颖而坚栗惧人畜之伤残缚草田中以为守舍数尺容膝仅足蔽雨寒夜无眠风霜砭骨此守禾之苦也刈获而归妇子咸喜舂揄簸蹂竞敏其事若可乐矣而一饱之懽曾无旬日谷入主家之廩利归质贷之人则室又垂罄矣自此之外惟采薪于茅贩鬻易粟以苟活而已若夫桑麻种艺蚕绩织衽劳苦称是而敝衣故絮曾不得以卒岁岂不重可哀怜也哉杨氏云先王之政使民终岁男女勤动未尝休也虽淫僻之心何自萌蘖哉而献享之礼孝爱之诚隆于自然此所以皞皞莫知为之者也补传云君民之间上下相亲不啻如家人父子周之王业繇于得民世三十年八百其基于此与刘彝云此诗所记苟非井邑其民乡党其教各有正长部分司其岁功未易集也万尚烈云每章之首必系之以月每章之中又或月或日必纪载详明谆谆然不厌繁复者示人以趋时也惟恐人之失时而失事也盖周之王业起于其勤勤者兢兢业业能不失时而已苟一失其时物候随变即有人力将安用之故曰虽有鎡基不如待时况帝王之治敬天勤民未有勤民而不本乎敬天者苟于天时漫不加意玩愒优游孟浪虚掷敬天之谓何而勤安从生故又曰敬授人时】

七月八章章十一句【序云七月陈王业也周公遭变故陈后稷先公风化之所繇致王业之艰难也以此诗为周公遭变後之作殊无稽据故朱子不取至周家虽以农事开国然此诗自

是言豳地风俗与后稷无预乃朱传亦颇习用其语何也又郑玄云七月言寒暑之事迎气歌其类也豳雅亦谓七月也七月又有于耜举趾饁彼南亩之事是亦歌其类豳颂亦七月也七月又有获稻作酒跻彼公堂称彼兕觥万寿无疆之事是亦歌其类又诗笺以首二章为豳风自七月流火八月萑苇至以介眉寿为豳雅七月食瓜至未为豳颂孔颖达云诗始为风中为雅成为颂言其自始至成别故为三体豳公之教亦自始至成述其政教之始则为豳风述其政教之中则为豳雅述其政教之成则为豳颂故今一篇之内备有风雅颂也朱子云先儒因此说而谓风中自有雅自有颂虽程子亦谓然似都坏了诗之六义郝敬则谓此诗歌于朝廷可为雅歌于祭祀可为颂亦皆臆度之词又欧阳修云七月之诗燕齐鲁三家皆无之】

甫田豳雅也豳侯夏省耘因而雩祭社方及田祖之神以祈雨也【周礼春官龠章职云凡国祈年于田祖龠豳雅击土鼓以乐田畯朱子引或者之说疑谓楚茨信南山甫田大田四诗当之以其所言皆农事而篇次在小雅之中故谓之豳雅今按楚茨信南山所言乃天子秋尝冬烝之事其推本于黍稷者特谓品物成则可以祭耳非为劝农发也若此诗及大田二篇其当为豳雅无疑何以知之以二诗篇中皆言田祖故礼用以迎年于田祖也又皆言田畯故礼龠之于龠以乐田畯也且七月之诗纪饁彼南亩田畯至喜今二诗中亦具举之何其相脗合也岂公刘时固有此诗周公追述以告王与王安石云王业之起本于豳而乐之作始于土鼓本于龠逆暑逆寒祈年皆本始民事息老物则息使复本反始故所击者土鼓所吹者苇龠其章用豳诗焉邓元锡云七月主陈民俗故曰风甫田主上农政故曰雅盖各有当也小雅以燕飧逮下示慈惠乐田畯劳农公为制豳雅将之慈惠下下之尽也又云读豳七月民忠敬事上之道毕具而上子惠下下之事不稍槩见也疑之及读甫田而後知君民之交爱至是也愚按此诗记邠侯夏省耕因而雩祭月令孟夏之月命野虞出行田原为天子劳农劝民毋或失时命司徒循行县鄙命农勉作毋休于都皆省耘类也夏耘候也故其诗曰或耘或耔且又曰黍稷薿薿明乎其为夏景也曾孙亲行不命人者重田功之至也左传曰启蛰而郊龙见而雩雩者吁嗟求雨之祭也龙见建巳之月苍龙宿之体昏见东方万物始盛待雨而大圣人之心切欲为百谷祈膏雨与启蛰之郊其意同故曰大雩犹之言大旅大飨礼之盛也或又曰建巳阳充之时陰气难建故雩祭作焉此诗言以祈甘雨以介我稷黍正孟夏雩祭事也乃月令又言仲夏大雩帝用盛乐命百县雩祀百辟卿士有益于民者以祈谷实何也四月雩礼之正也若仲夏而不雨则犹可以雩过是而不雨则无及矣又月令注疏云百县谓诸侯也百辟卿士古者上公若句龙后稷之类也故左氏于社稷五官云封为上公祀为贵神天子雩上帝诸侯以下雩上公是诗止言以社以方以御田祖者以公刘固邠侯耳亦可知其非天子之诗矣】

倬【韩诗作𪔐云卓也】彼甫【尔雅疏作圃】田【先韵亦叶真韵他因翻】岁取十千【先韵亦叶真韵雌人翻】我取其陈【真韵亦叶先韵陈延翻】食我农人【真韵亦叶先韵如延翻】自古有年【先韵亦叶真韵奴因翻】今适南亩【叶纸韵母鄙翻】或耘【前汉书释文俱作芸】或耔【纸韵前汉书作芋】黍稷薿薿【纸韵前汉书作猗猗】攸介攸止【纸韵】烝我髦士【纸韵 赋也倬毛传云明貌说文云着大也徐铉云卓然高明也甫通作誦说文云大也一曰人相助也愚按誦字从言兼前说文二义当是为事既重大须谋人以相助今田大亦应通力合作故以誦名後人传写因省言为甫也岁为一岁之定额取十千者万夫之数也丘井之法昉于黄帝彻田为粮粃于公刘其制一夫受田百亩亩起于步六尺为步

长寛各百步为方百亩三其夫为屋三其屋为井井方一里九夫之地也於其中以一夫之地为公田其外八家皆私其所受之百亩而同养公田自後皆以十起数井十为通通十为成方十里为田九万亩计百井九百夫之地公田取百夫焉成十为终终十为同同方百里为田九百万亩计万井九万夫之地公田取万夫焉此诗言岁取万夫之入乃百里侯国之制也陈祥道云王制言古者以周尺八尺为步今以周六尺四寸为步古者百亩当今东田百四十六亩三十步古者百里当今百二十一里六十步四尺二寸二分然六尺四寸者十寸之尺也十寸之尺六尺四寸乃八寸之尺八尺也一说季本云千与阡同十阡指公田百亩言每十亩千步为阡故百亩为十阡也亦通篇中称我者诗人代为公刘叙述之辞陈通作鬴列也谓布列于仓廩者即所云旧粟也农人朱子云私百亩而养公田者也加之以我亲之也取陈粟以食之者亦省耕补不足省歛助不给之意禾谷未登农或有困乏者则以此赙给之也周礼遗人掌邦之委积以待施惠法亦同此委积者谓九谷之所余少曰委多曰积古之为言故也自古犹云昔日有年者丰年也上之人勤于恤民如此是以民皆力于农事而追思往昔亦皆幸而得享有年之乐也此承上起下之语谢枋得云民生于三代之前其命制乎君民生于三代之後其命制乎天吾求其所以制命之道矣取民常少与民常多从古以来岂无水旱霜蝗吾民常如有年者上之人歛散得其道也马端临云三代之时田赋之外未尝他取于民虽有补助之制然未闻责其偿也春秋时始有施舍已责之说家量贷而公量收之说管子言耕耨者有时而泽不必足则民倍贷以取庸矣今日也南亩解见七月篇言今日之适南亩何为乎专为省耘来耳耘本作𦵏说文云除苗间秽也刘章耕田歌云深耕溉种立苗欲疏非其类者锄而去之𦵏本作𦵏说文云壅禾本也愚按此代田之法疑说文云茂也以黍稷并言故重曰𦵏𦵏前汉书云赵过为搜粟都尉过能为代田一亩三 岁代处故曰代田古法也后稷始 田以二耜为耦广尺深尺曰 长终亩一亩三 一夫三百 而播种于三 中苗生叶以上稍耨陇草因隤其上以附苗根故其诗曰或芸或茅黍稷𦵏𦵏芸除 也𦵏附根也言苗稍壮每耨辄附根比盛暑隤尽而根深能风与旱故𦵏𦵏而盛也据此可见黍稷𦵏𦵏在夏时也一亩三 之 即𦵏字能风与旱之能读曰耐攸介承黍稷言介助也以介我黍稷之介说见下章止息也曾孙来止之止烝毛云进也按烝者火气上行之名故有进义髮至眉为髦礼记注云幼时剪髮为之至年长垂着两边髦然也髦士尔雅云官也注云取俊士令居官也士中之俊如毛中之髦愚按此句当连下章看盖供事于祭祀者言我往南亩见农夫之勤于耘耔而黍稷亦有方长之势若此於焉思所以介助之惟在得时雨为急於焉暂憩于田所进诸髦士之在官者而告之将躬行雩祭之礼以祈雨也】以我齐【释文作𦵏云又作𦵏】明【叶阳韵谟郎翻】与我牺羊【阳韵】以社【丰氏本作𦵏】以方【阳韵】我田既臧【阳韵】农夫之庆【叶阳韵虚良翻】琴瑟击鼓【麇韵】以御【音迓】田祖【麇韵】以祈甘雨【麇韵】以介我稷黍【语韵】以谷我士女【语韵赋也此章皆进我髦士而告之之辞也毛云器实曰齐当通作𦵏说文云黍稷在器以祀者周礼小宗伯辨六𦵏之名物与其用注以为六谷谓黍稷稻粱麦苽也六谷实之於器皆名为𦵏此言齐明者谓六𦵏中之明指稷也按曲礼云黍曰苽合粱曰苽其稷曰明粢稻曰嘉蔬是可见谷以明为名者惟稷耳观大田篇言与其黍稷则祭兼用黍此独言稷者以稷为五谷之长故首举以兼之古者号稷为首种考灵曜曰日中星鸟可以种稷是一岁之中所先种者惟稷陶唐之世以后稷名农官而历代祀谷神与社相配亦以稷为名皆取稷以该五谷也郊特牲云惟社丘乘共粢盛所以报本反始也宗庙之牲色纯曰牺王制云天子社稷皆大牢诸侯社稷皆少牢按牛羊豕具曰大牢但有羊豕无

牛曰少牢此社祭独言羊者举羊以该豕亦明其为邠侯之祭也又周礼少司徒职云小祭祀共牛牲则四方之祭亦得用牛但彼乃天子之礼耳社毛云后土也孔云后土者地之大名郑駁异义以为社者五土之神能生万物者以古之有大功者配之按祭法左传皆言共工之霸九州也有子曰句龙职主土地故谓其官为后土死以配社神而祭之然则毛所云后土自是句龙所居官职之名非与皇天对言之后土也方谓四方之神曲礼云天子祭四方岁徧诸侯方祀岁徧注云祭四方谓祭五方之神于四郊也句芒在东后土祝融在南蓐收在西玄冥在北疏云诸侯不得总祭四方之神唯祀当方故云方祀愚按诗每以方社对举以后土乃中央土之神既立为社自不当在五祀之列故礼止言四方注增为五方而疏又增置后土于南皆臆说也然四方之解又自不一周礼大宗伯以醯醢祭四方百物旧说谓磔禴及蜡祭也舞师教羽舞帅而舞四方之祭祀旧以为四望又祭法云四坎坛祭四方旧以为山林川谷丘陵之神也今按周礼鼓人职云凡祭祀百物之神鼓兵舞帔舞者则与四方之祭用舞羽异可知四方与百物不同必非磔禴蜡祭之类也大司乐祀四望在天神地示之下山川之上而鬯人掌供秬鬯凡山川四方用蜃则又列四方于山川之下可知四方别是一祭既不同于山川亦断非祭日月星海之四望也参互衆说惟以祭句芒等神为允此祭社方及下文御田祖皆孟夏雩祭祈雨之礼详已见小引下又证于云汉之诗曰祈年孔夙方社不莫明前此冬春既行祈年之礼及已月又行雩祭方社之礼而卒过时不雨故闵之也旧说皆以此为秋报误矣我田既臧二句祈之之辞也臧善也庆之为言福也必有余庆之庆言诚使我田既善则是农夫之有福庆盖国以民为天民以食为天欲为民祈福非自为也必得雨而後田乃善故为此祭以求之也琴瑟击鼓作乐以娱神也击鼓据周礼为击土鼓杜子春云土鼓以瓦为匡以革为两面可击又按月令仲夏命乐师修鞀鞀鼓均琴瑟管箫执干戚戈羽调竽笙篳簧飡钟磬祝敔命有司为民祈祀山川百源大雩帝用盛乐先儒谓雩以乐为主乐用盛乐与它祭独不同声音之号所以诏告于天地之间以达神明也此独言琴瑟击鼓者约略言之或诸侯礼稍杀耳乃陈阳为之说曰离音丝而琴瑟以之南方之乐也坎音革而击鼓以之北方之乐也南方至阳用事而陰萌焉故万物自是而之死北方至陰用事而阳萌焉故万物自是而之生甫田之御田祖必琴瑟击鼓者以自冬徂春农事则终而复始百谷则死而复生故作是乐以御之各有度数存焉用是以祈甘雨则陰阳和五谷生其於介稷黍谷士女也何有御郑云迎也愚谓若御车以迎之也田祖毛云先嗇也周礼注云祖者始也始教造田谓之田祖先见稼穡谓之先嗇神其农业谓之神农名殊而实同也今按以神农为田祖经传无明文王安石谓生为田正死为田祖犹乐官之死而为乐祖也以乐祖例田祖於理近之又雩祭社方田祖之神当皆在月令所称百辟卿士之列不应以古帝禘于其内而古人祭社必以稷窃意此田祖即稷如列山氏之子柱未可知也列山即神农氏柱为农官自夏以上祀以为稷至商始以周弃代之公刘为夏世诸侯所祀稷神仍应是柱耳旧谓于社方言齐明牺羊於田祖言琴瑟击鼓互相备也然观大田来方禋祀騂黑黍稷之文则非因方社以见田祖明矣观周礼祈年田祖击土鼓之文则非举田祖以见方社又明矣意二礼各不同陈阳云古者有事於释奠祭先师有事於瞽宗祭乐祖养老祭先老执鬯祭先炊马祭先牧食祭先饭然则于田祭田祖亦示不忘本始而已祈尔雅云告也叫也郭璞云祭者叫呼而请事也曰甘雨者孔云以长物则为甘害物则为苦左传曰秋无苦雨服?谓害物之雨民所苦是也以介我稷黍者当薺薺之时得雨助之则秀实在望所谓时雨化之也谷毛云善也朱子云言仓廩实而知礼节也郑云养也按国策求百姓之饥寒者收谷之以谷为养人之物故谷有养义焉二说皆通毛理为长士女通指百

姓士者男子之称】曾孙来止【纸韵】以其妇子【纸韵】饁彼南亩【叶纸韵见首章】田峻【陆德】

【明本作峻】至喜【纸韵】攘其左右【叶纸韵羽轨翻】尝其旨否【叶纸韵补美翻丰本作不】禾易长亩【见上】终善且有【叶纸韵羽轨翻】曾孙不怒农夫克敏【叶纸韵母鄙翻 赋也此章皆纪事之辞邓云幽公后稷之曾孙故具以曾孙称邹忠胤云甫田大田不系庙祭何以亦称曾孙盖周人世事农视农事如其家事服先畴之畎亩故自号曰曾孙当时邠民自少至老狎习其上无以异于家人故目其君亦曰曾孙若曰此吾家曾孙云尔又朱子云曾孙主祭者之称非独宗庙为然曲礼外事曰曾孙某侯某武王祷名山大川曰有道曾孙周王发是也皆通来止来至此而止息也春秋传云能左右之曰以妇子农夫之妇子也饁说文云饁田也又杜预云野饁也自家之野也言曾孙之为此行也先省耘随雩祭又复举补助之典提挈农人之妇子俾得备酒食以饁饩于南亩前章所云我取其陈食我农人此物此志也田峻田官解见七月篇至者至田所也喜者喜农夫之有饁得以毕力于南亩也攘说文云推也左右田峻之从者尝徐铉云口试其味也旨甘美也否不也旨之反也田峻自推却其从者而亲尝饁之旨否饁必无不旨者然必攘而尝之上下相亲之甚且尝而後知其旨亦益以见君恩之不可忘也孙鑛云尝其旨否是偶然事亦是偶然句凑合来情景却妙绝禾易长亩所谓代田也顔师古云代易也何谓易一亩三 前岁之 今岁易其处今岁之 明岁易其处以休地力而用之每 之长各尽其亩於中种禾焉曰禾易长亩也详见首章汉赵过精于其法一岁之收尝过缦田亩一斛以上缦田谓不为 者也其善为 者且倍之过使教太常三辅及边郡民皆便代田以为用力少而得谷多也终竟也预期之辞善者实颖实粟之美有者万亿及秭之饶敏说文云疾也田峻尝饁之後巡行阡陌见禾之易 而居者其长终亩预知其收获终当美而且多也不觉心口相语曰曾孙其庶几不怒欤以农夫之能力于耘耔不敢泄泄从事也不然其何以副来止至意哉吕祖谦云不曰喜而曰不怒者若不敏于农则怒矣盖其喜怒欣戚专在于农也雒人称张全义曰张公他无所好见嘉谷大莝则喜耳正此意也】曾孙之稼如茨如梁【阳韵】曾孙之庾如坻如京【叶阳韵居良翻】乃求千斯仓【阳韵】乃求万斯箱【阳韵】黍稷稻粱【阳韵】农夫之庆【叶阳韵见次章】报以介福万寿无疆【阳韵赋也此章皆预期之辞承上章言农夫克敏如此行见秋成在即大有可期万情胥悦归恩于上如下文所云也说文云禾之秀实为稼莖节为禾严云种之曰稼歛之曰穡散则相通此以稼对庾先言稼後言庾是稼为在田未割之禾庾为已刈未入仓而露积之禾也茨郑云屋盖也梁毛云车梁也孔云墨子称茅茨不剪谓以茅覆屋孟子十二月兴梁成梁谓水上横桥桥有广狭得容车渡则高广者也朱子云如茨言密比也如梁言穹窿也庾解见楚茨篇坻郑云水中高地也尔雅云水中可居曰洲小洲曰渚小渚曰沚小沚曰坻京尔雅说文皆以为绝高丘也张揖云四起曰京按绝即四起之意董氏云如坻则鳞比而出也如京则绝高者亦非一矣仓解见楚茨篇箱解见大东篇严云时和年丰禾谷充积农民喜悦以为皆吾君之稼吾君之庾谓秋毫皆君赐也其稼在田繇高处视之则稼在下而见其密故如屋茅繇平处视之则稼在上而见其高故如桥梁若使高处见其踈平处见其?则禾薄收矣露积之禾曰庾其庾在野随意堆积有平而高者如水中高地之坻有卓绝而高者如高丘之京始言稼则未刈也继言庾则已刈而未入仓也於是求千仓以贮之求万车箱以载之先治仓而後箱载以输之故先言仓後言箱也首章第言黍稷薿薿而已此复加以稻粱见种类之繁

夥也稻粱解见鸛羽篇曰农夫之庆者吕云农夫视黍稷稻粱之丰以为天下之美尽在此矣不知其他也季云前章言农夫之庆曾孙期望其民之辞也此章言农夫之庆农夫喜慰其君之辞也言福必曰介者凡人获福若冥冥中有以陰助而默相之农夫喜庆之极不忘君恩故欲报以陰助默相之福而祝其寿考万年无疆竟也】甫田四章章十句【序云刺幽王也君子伤今而思古焉朱子谓此序专以自古有年一句生说而不察其下文今适南亩以下亦未尝不有年也其论当矣然谓此诗亦述公卿有田禄者力于农事以奉方社田祖之祭则政未必然彼盖未详晰此祭之为雩而岁取十千乃百里万夫之数也且茨梁坻京千仓万箱公卿之富何遽至是明属有国者视君民之田犹一体故有此比拟耳子贡传以为劝农盖亦近之然犹未知其为雩祭而作申培说误认为农事既成祀田祖而并犒农夫之诗总之未离乎影响也】

大田幽雅也幽侯秋省歛因而报祭于方也【详见甫田篇甫田祭兼方社此报赛农功之成第言方而不及社者以周颂良耜为报社之诗所谓幽颂也】

大田多稼既种既戒【叶寘韵居吏翻】既备乃事【寘韵】以我覃【尔雅注作剡】耜【纸韵】俶载南亩【叶纸韵母鄙翻】播厥百谷【叶药韵工络翻】既庭且硕【叶药韵实若翻】曾孙是若【药韵 赋也大田与甫田同义万井之田也周礼注云种谷曰稼如嫁女有所生也以多言者曹氏曰或利先种或利後种或宜高燥或宜下湿也种朱子云择其种也孔颖达云以下始说耕事则此未得下种故知既种为相地之宜而择其种也戒通作诫说文云敕也朱子云飭其具也按月令季冬令民出五种所谓既种也又命农计耦耕事修耒耜其田器所谓既戒也备说文云具也总上二者言谷种与田器咸具也此指去冬言事田事下文俶载播谷是也孔云民已受地相地求种既已择其种矣又号令下民豫具田器此受地择种戒敕具器既已周备矣至孟春之月乃耕而事之矣严粲云或说既备乃事者备其事也亦通但诗中既顺乃宣既登乃依皆二事也覃当依尔雅注作剡张衡东京赋介馭间以剡耜是也覃剡以音同通用说文云剡銳利也耜所以发土解见七月篇俶说文云善也载通作絳说文云事也唐史天载作天絳可证言以我銳利之耜往善其事于南亩也按农书云土长冒櫛陈根可拔耕者急发齐民要术详载其法以为春侯地气始通櫛木长尺二寸埋尺见其二寸立春後土块散上没櫛陈根可拔以此时耕一而当四二十日以後和气去即土刚耕四不当一七月之诗言三之日于耜然则用剡耜以发田土在孟春之时所谓俶载也播说文云种也百谷解见七月篇四之日举趾在此时也庭毛传云直也解见斯干篇硕大也庭言不卷曲硕言不低小皆指始生时言曹云苗生叶以上皆条直而茂大也按月令季春之月生气方盛阳气发泄句者毕出萌者尽达则既庭且硕在此时也以我覃耜二句应既戒言播厥百谷二句应既种言曾孙解见甫田篇若尔雅云顺也解见烝民篇李氏云民之所以勤于农功如是者期以曾孙是若故也言民皆顺曾孙之意邓元锡云种戒耕播曰曾孙是若大顺之实也已则何心以上之心为心斯王民之心哉自首章至第三章皆代为农夫之词】既方既皂【叶有韵此苟翻】既坚既好【叶有韵许厚翻】不稂不莠【有韵】去其螟螣【职韵说文作螾陆德明本作貪】及其蟊【陆本作蛄】贼【职韵丰氏本作□】无害我田穡【叶纸韵读如雉丈几翻】田祖有神秉【韩诗作卜云报也】畀炎火【叶纸韵虎洧翻 赋也既之言已也方即第四章来方禋祀之方解见甫田篇谓龙见而雩祭也与生民篇实方实苞之方各自取

义郑笺训方为房谓孚甲始生而未合时也殆属臆说上章言播厥百谷既庭且硕已尽乎三春之事至建巳之月则得雨为急故方祭以求雨也早据说文即草字从草早声云斗栌实也俗讹以为艸木之艸而别作早字为栌实之早然古文原无早字毛传谓谷未坚曰早此但据上下文义而强为之解殊无据此早字当通作早字谓谷之早种者也与下文穉字对看齐民要术云凡田欲早晚相杂然大率欲早早田倍多于晚注云早晚相杂者防岁道有所宜然早谷皮薄米实而多晚谷皮厚米少而虚也坚者充实之义兼茎与穗而言吕氏春秋云后稷曰子能使稊数节而茎坚乎子能使穗大而坚均乎又云其施土也均均者其生也必坚又云得时之稼与失时之稼约茎相若稼之得时者重粟之多量粟相若而舂之得时者多米是皆坚之义也好郑云齐好也孔云衆穗皆熟并无死伤严云禾虽已坚实或大风所偃或淫雨所腐或早霜所杀之类则损坏而不好粮解见下泉篇莠解见国风甫田篇粮乃禾粟之穗不能成实者莠禾粟下生似稷无实以上皆主早种之谷言盖自己行方祭之礼而後而其谷之已经早种者亦已坚实亦已齐好尽皆成熟无有秀而不实而为粮者而亦无似是而非之莠以窃其地力也螟螣螽蟴旧说以为四虫名皆害稼者尔雅云食苗心曰螟食叶螽食节蟴食根螽郭璞云分别虫啖食禾所在之名邢昺云旧说螟螣螽蟴一种虫也如言寇贼奸宄内外言之耳故韞为文学曰此四种虫皆蝗也李巡云食禾心为螟言其奸冥冥难知也食禾叶者言假贷无厌也食禾节者言贪狠故曰蟴也食禾根者言其税取万民财货故曰螽也王安石字说云螽食苗叶无伤於实若螽可贷也蟴食苗节蟴苗者也螽食根如矛所植螟食心不可见诸家以为四种虫陆玕云螟似好蛲而头不赤诗诂云今禾始发有虫生苗心中如蚕而细仍能吐丝包纏其心使不生穗罗愿云今食苗心者乃无足小青虫既食其叶又以丝纏集衆叶使穗不得展江东谓之螽虫音若横逆之横言其横生又能为横灾也汉孔臧赋云爰有蠕虫厥状似螟是螟为无足虫也人说文云螟虫食谷叶者未详孰是春秋含元莦云螟应苛剋螽陆玕云蝗也说文作螽云食苗叶者诗诂云春秋谓之螽其子谓之螽蟴亦音腾谓其飞也蔡邕云螽水处泽中数百或数十里一朝蔽地而食禾粟苗尽复移虽自有种其为灾云是鱼子中化为之螽说文云虫食草根者本作螽从虫象其形徐锴云唯此一字象虫形不从矛书者多误愚按螽字不从矛何得有矛音或以字形相似故耳陆玕云或说螽即蝼蛄食苗根为人害也蟴似非虫名玕以为桃李中蠹虫赤头身长而细愚按桃李中蠹虫於苗何与此不足信且诸经传中未有单名蟴为虫者以螽连言意即指螽耳故桑柔之诗曰降此螽蟴以食叶食心苗本犹在今下食其根则无苗矣命之为蟴深恶之也又瞻卬之诗曰螽蟴螽疾既拟之于蟴矣又丑之以疾蟴言其自外至疾言其自内生皆恶之之辞也是则螽蟴止是一螽其文理甚明或分螟螣螽蟴为四种或云一种皆非也陆佃云许慎说文以为吏冥冥犯法即生螟乞贷则生螽抵冒取民财则生螽然则灵芝朱草秬秠之鍾其美与螟螽之鍾其恶虽不同其系王者之政一也淮南子曰枉法令即多虫螟其以此乎罗云京房易传曰臣安禄兹谓贪厥灾虫食根德无常兹谓烦虫食叶不继无德虫食本与东作争兹谓不时虫食节蔽恶生孽虫食心王充论衡曰变复之家谓虫食谷者吏贪狠所致也虫头赤者武官黑者文吏按虫头赤身白头黑身黄复应何官耶又按月令孟夏行春令则蝗虫为灾仲夏行春令则百螽时起以螽之种类不一故曰百螽然则此数物大抵盛于夏时也孔云四者所谓昆虫得阴而藏得阳而生阳盛则虫起释说文云幼禾也晚种後熟者齐民要术云二月三月种者为植禾四月五月种者为穉禾二月上旬及麻苧杨生种者为上时三月上旬及清明节桃始华为中时四月上旬及枣叶生桑花落为下时岁道宜晚者五月六月初亦得孔云虫灾之甚植者亦食以穉者偏

甚故举以言之田祖解见甫田篇孔云以田祖主田之神托而言耳钱天锡云田祖之去田害根君御田祖来秉陆德明云执持也按秉字从又持禾又者手也故有持义界说文云相付与也炎说文云火光上也朱子云持此四虫而付之炎火之中也姚崇遣使捕蝗引此为证夜中设火火边掘坑且焚且瘞盖古之遗法如此按唐开元间山东大蝗姚崇奏议云秉畀炎火此除蝗之义也乃出御史为捕蝗使分道杀蝗?若水上言除天灾者当以德昔刘聪除蝗不克而害愈甚崇移书诮之曰聪伪主德不胜妖今妖不胜德若水惧乃纵捕得蝗十四万石蝗害訖息】有澶【汉书作𦵏韩诗陆本俱作𦵏吕氏春秋作𦵏】萋萋【叶支韵此移翻吕氏春秋汉书俱作】

【凄凄】兴雨【吕氏春秋韩诗外传汉书颜氏家训汉无极山碑俱作云】祁祁【支韵毛郑注疏作祈祈严云监本作祁俗本作祈误也韩诗外传亦作祈祈】雨我公田遂及我私【支韵】彼有不获穧【寘韵】此有不斂穧【叶寘韵资四翻定本集注作积】彼有遗秉此有滞穗【寘韵礼记括此四句作二句云彼有遗秉此有不斂穧】伊寡妇之利【寘韵赋也澶说文云云雨貌陆佃云澶水气之云也传曰雨云水气刘氏云天将降雨则地气上腾薰蒸为湿润萋通作凄说文云云雨起也愚按据说文澶凄之解皆兼云雨而言以其字皆从水毛传专以澶为云兴貌萋萋为云行貌似无据祁祁当指云言韩奕之诗曰祁祁如云可证有澶萋萋虽兼象云而意专在雨言随云之雨萋萋然兴雨祁祁虽专指雨而意独在云言兴雨之云祁祁然也祁通作岐山之旁出者谓之岐流云在天卷舒多态故亦以祁祁拟之所谓夏云多奇峰也孟子曰七八月之间旱则苗槁矣天油然作云沛然下雨则苗浡然兴之矣周七八月夏五六月也云浓即雨云散即止惟此时为然故言雨必兼云矣孟子云方里而井井九百亩其中为公田八家皆私百亩同养公田公事毕然後敢治私事又云惟助为有公田虽周亦助也愚按周之彻法创于公刘公刘尚在夏世而所创彻法已开助法之先是为殷所袭者也非袭殷者也班固云先王制土处民富而教之故民皆劝功乐业先公而後私其诗曰雨我公田遂及我私孔云民见云行雨降归之于君云此雨本主为雨我公田耳因遂及我私田范景文云先公後私非拟之後言言者不觉听者绎之萧望之云古者臧于民诗曰爰及矜人哀此鰥寡上惠下也又曰雨我公田遂及我私下急上也彼有不获穧以下言秋收事也按月令于季夏之月曰水潦盛昌神农将持功土润溽暑大雨时行烧薶行水利以杀草如以热汤可以粪田畴可以美土疆孝经说亦云地顺受泽谦虚开张含泉任萌滋物归中谓此时也故自夏雨溥遍而後而农功渐且告成矣孟秋农乃登谷仲秋命有司趣民收斂季秋命豕宰农事备收则一岁之田事于此究也获说文云刈谷也穧即无害我田穧之穧斂说文云收也穧尔雅说文皆云获也孔云禾之铺而未束者遗礼记注云犹脱也秉即秉畀炎火之秉滞说文云积也一云留也穗本作?说文云禾成秀也人所以收字从瓜禾寡释名云倮也谓人之单独者妇匹妇也不必无夫者皆力量孱微不足以任田事故须有以存恤之周书曰至于敬寡至于属妇亦言比两色人最足动上人之怜念也此与上章去其螟螣以下五句遥相应盖谷之晚种者每至于薄收虫之为害者或难以尽毙故言设若彼人有不堪获刈之穧禾则我此处有收敛不尽之穧束足以济之彼人或虫灾偶遗于秉畀则我此处有刈余滞留之禾穗足以济之是皆伊寡妇匹夫之利其在彼也犹其在此也彼彼寡妇也此此我也或疑大有之时似无不获穧与遗秉之事夫地力参差人事不齐理之所有且明王之时秋助不给不然胡为而有寡妇哉旧说以不获穧四句皆一意谓穧乃穗之低小刈获之所不及者秉乃束而輶载之所不

尽者百谷既多种同齐熟收刈促遽力皆不足故听矜寡取之以为利亦通邓云天泽先之公也不必先已地利公之人也不必在己非甚盛德孰能与于此矣又坊记子云君子不尽利以遗民诗云彼有遗秉此有不斂穧伊寡妇之利故君子仕则不稼田则不渔食时不力珍大夫不坐羊士不坐犬盐铁论亦云古之仕者不穡田者不渔抱关击柝皆有常秩不得兼利尽物如此则愚知同功不相倾也诗云彼有遗秉此有滞穗伊寡妇之利言不尽物也皆断章取义无关诗旨】曾孙来止【纸韵】以其妇子【纸韵】饁彼南亩【叶纸韵见首章】田峻至喜【纸韵】来方禋祀【纸韵】以其騂黑【职韵】与其黍稷【职韵】以享以祀以介景福【叶职韵笔力翻 赋也此章皆纪事之辞来止来于田所而止息也刘彝云时当西成乃出郊省民之斂也以其妇子解同甫田篇郑云出观农事馈食耕者以劝之也田峻解见七月篇至喜者至田所而喜也王安石云喜其趋获事也来方禋祀报成之祭也言曾孙之为此来也非特省斂而已又举行禋祀于方之礼曰方禋祀者倒文也方者木火金水四方之神其祭之各有所为以下騂黑之牲推之则但祭南北二方而已禋说文云洁祀也周语内史过云精意以享禋也又按月令季秋之月天子乃厉饰执弓挟矢以猎命主祠祭禽于囚方此秋獮之祭未必与此同也周礼大司马职云罗帀致禽以祀祊先儒破祊为方亦本于此騂南方色黑北方色孔云知方祀各以其方色牲者大宗伯云青圭礼东方赤璋礼南方白琥礼西方玄璜礼北方皆有牲帀各放其器之色注以为礼五天帝人帝而句芒等食焉是五官之神其牲各从其方色也愚按牧人职云凡望祀各以其方之色牲毛之意亦同此所以取騂色者以螟螣蠹贼秉畀炎火故报祝融所以取黑色者以雨我公田遂及我私故报玄冥也祝融主火玄冥主水孔谓略举二方以为韵句非是据甫田方祭礼同于社则牲亦当具羊豕也与其黍稷告黍稷之成也景福解见小明篇以此享祀则鬼神将助之以昭明可见之福亦如万寿无疆是也此二句乃农人祝愿之辞】

大田四章二章章八句二章章九句【序云刺幽王也言矜寡不能自存焉朱子谓此序专以寡妇之利一句生说其驳之是矣惟以此诗乃农夫所以答甫田则未知彼为雩祭此为报祭彼为省耘此为省斂二事判不相及何答之有子贡传申培说亦皆谓农夫报上之诗明是剽袭朱传而伪为之适足彰其无识耳】

丰年孟冬祭八蜡也是为豳颂【周礼龠章职云国祭蜡则歛豳颂击土鼓以息老物郑玄云万物助天成岁事至比为其老而劳乃祀而休息之於是国亦养老焉月令孟冬劳农以休息之是也按孟冬者建亥之月在周为十二月礼郊特牲篇云天子大蜡八伊耆氏始为蜡蜡也者索也岁十二月合聚万物而索飧之也蜡之祭也主先嗇而祭司嗇也祭百种以报嗇也飧农及邮表畷禽兽仁之至义之尽也古之君子使之必报之迎猫为其食田鼠也迎虎为其食田豕也迎而祭之也祭坊与水庸事也曰土反其宅水归其壑昆虫毋作草木归其泽皮弁素服而祭素服以送终也葛带榛杖丧杀也蜡之祭仁之至义之尽也陈祥道云蜡之为祭所以报本反始息老送终也其所致者川泽山林以至地示天神莫不与焉则合聚万物而飧之者非特八神也而所重者八以其尤有功于田故也八神先嗇也司嗇也百种也农也邮表畷也禽兽也坊也水庸也郑云先嗇若神农者司嗇后稷是也农田峻也邮表畷谓田峻所以督约百姓子井间之处也水庸沟也贾公彦云禽兽者即猫虎之属坊者所以蓄水亦以鄣水庸者所以受水亦以泄水祝辞言此神繇有此功故今得报非祈祷也程迥云八蜡之祭为民设教

也厚矣方里而井八家共焉吾食其一仰事俯育资焉而无憾者可不知所本乎古有始为稼穡以易佃渔俾吾卒岁无饥不与禽兽争一旦之命者繄先嗇是德故祭先嗇焉曰司嗇者谓修明其政而润色之者也曰农者谓传是业以授之於我者也曰邮表畷者畷井田间道也邮表也者谓画疆分理以是为准者也昔之人为是而劳今我蒙之而逸盖不得不报也曰猫虎者谓能除鼠豕之害吾稼者也曰坊者谓昔为堤防之人使吾御木患者也曰木庸者谓昔为畎浍沟洫使吾为备者也吾不敢忘皆得以上配先嗇司嗇之享其民劝于功利推而广之等而上之视君亲如天地而不敢慢也後世农田之利夺於兼并之蒙虽天下之用举仰于农而农不蒙其利大抵一岁之入兼并袖手什取之五假之牛种则什之七又乘其乏举贷以倍称之息虽八九可也是故乐岁先饥凶年多死者莫农人若也何以致然繇邮表畷之失职也邮表畷之失职则先嗇司嗇与夫农者其德不白虽有坊庸必私其利是生民之害不在鼠豕螟螣也?记篇云子贡观于蜡孔子曰赐也乐乎对曰一国之人皆若狂赐未知其乐也子曰百日之蜡一日之泽非尔所知也张而不弛文武弗能也弛而不张文武弗为也一张一弛文武之道也今按丰年之诗旧亦知为报赛而作然无有知其专为蜡祭者愚益即以丰年一语知之郊特牲云八蜡以记四方四方年不顺成八蜡不通以谨民财也顺成之方其蜡乃通以移民也贾疏谓蜡祭八神因以明记四方之国记其有丰稔凶荒之异四方之内年谷不得和顺成熟则当方八蜡之神不得与诸方通祭欲使不熟之方万民谨慎财物也四方之内有顺成之方其蜡之八神乃与诸方通祭所以然者以其蜡祭丰饶皆醉饱酒食使民歆美也蜡祭惟年丰有之非若他祭不问丰凶其礼不废此诗特以年丰降福为言非报赛八蜡而何天子大蜡八诸侯之蜡未闻然礼运言仲尼与于蜡宾则可见诸侯之国有蜡矣所以知此诗为豳颂者以其事与周礼合而诗又在颂中其为豳颂明矣】

丰年多黍多稌【麇韵】亦有高廩【丰氏本作稟】万亿及秭【纸韵亦叶荠韵獎礼翻陆德明本作数今按依本字作纸韵则章首二句俱无韵依陆本作万亿及数则数乃麇韵与秭字叶未知是否】为酒为醴【荠韵亦叶纸韵力纸翻】烝【韩诗外传作蒸】畀祖妣【纸韵】以洽【陆本作裕】百礼【荠韵亦叶纸韵力纸翻】降福孔皆【叶纸韵举里翻左传作偕赋也豆之满者曰丰岁大熟则五谷多有故以丰命年郑玄以为大有之年是也黍解见黍离下泉诸篇徐尔雅说文皆云稻也孝经援神契云污泉宜稻罗愿云稻米粒如霜性尤宜水故五谷外别设稻人之官掌稼下地以猪畜水以防止水以沟荡水以遂均水以列舍水以浍泻水一名稌然有黏有不黏者今人以黏者为糯不黏者为秔秔或作粳然在古则通得稻稌之名若诗书之文自依所用而解之如论语食夫稻则稻是粳月令秔稻必齐则稻是糯周礼牛宜稌则稌是秔丰年多黍多稌则稌是糯也朱子云黍宜高燥而寒稌宜下湿而暑黍稌皆熟则百谷无不熟矣李氏云职方氏谓雍冀高燥其谷宜黍荆扬下湿其谷宜稻是黍利高燥稌利下湿也丰年之时或高或下无所不熟陆化熙云年若不丰非旱即涝旱不宜稌涝不宜黍多黍多稌可例其余所以为丰年亦有者兼举非一之辞孔颖达云既黍稌之多复有高大之廩於中盛五谷矣廩尔雅云廩也孔云对则藏米曰廩藏粟曰仓其散即通也按明堂位云米廩有虞氏之庠又注云鲁谓之米廩此则廩为米藏之称明矣周礼地官有廩人之职以下大夫掌之而仓人则廩人之属其位不过中士下士耳明米精而粟粗且粟多而米约当其为粟则先入之于仓及其为米而後实之于廩故廩人之职大于仓人也若此诗高廩即是仓之通名不必专以米言也陈际泰云西戎之俗藏粟于窖积年不贼然公刘有仓丰年有廩固

已备其制矣万本虫名赵颐光云万虫类多借十千名数之终也左传云万盈数也亿本作亿通作意与意字不同说文云满也一曰十万曰𠂔赵云因满义借训十万黄公绍云十万曰亿古数也秦时改制始以万万为亿及犹至也秭博雅云积也韩诗云陈谷曰秭又按秭之义不一郭璞谓十亿曰秭十亿者百万也风俗通则谓千生万万生亿亿生兆兆生京京生秭各以十数推之则秭者万万也定本集注又谓数亿至万曰秭是以秭为十万万毛传更谓数万至万曰亿数亿至亿曰秭则亿之为数愈多而秭之为数愈不可殚究矣说文则以五稷为秭韦昭谓一纓六百四十斛五纓则三千二百斛斛容一石一秭之数计三千二百石也繇前之说则秭可以包万亿既举秭矣似不必赘言万亿繇後之说则一秭之数固自无几若加万亿于秭之上又不应当太侈是皆不足信宜从博雅为顺曰万曰亿即甫田所谓乃求万斯箱楚茨所谓我庾维亿者高廩之中本有旧积而今以新岁之收与之相及古者三年耕必余一年九年耕必余三年陈陈相因可谓盛矣醴解见吉日篇季本云酒酒味之厚者即周礼三酒所以待宾客也醴酒味之薄者即周礼五齐所以供祭祀也烝者火气上行之义故尔雅训进也畀说文云相付与之约在阁上也徐锴云阁所以承物也愚按此亦与奠同意严云百物皆所以为礼而行礼以酒为主祖孔云先祖也尔雅云妣之言嬖也愚按嬖匹于祖者谓之祖妣非专为母称也周人以姜嫄为妣以后稷为祖故周礼大司乐文享先祖妣在享先祖之上斯干之诗亦曰似续妣祖是也蜡腊之祭据月令惟及先祖耳不及姜嫄则此妣乃祖之妣耳故系妣于祖之下左襄二年齐姜薨初穆姜使择美嫗以自为棗季文子取以葬君子曰非礼也礼无所逆妇养姑者也亏姑以成妇逆莫大焉且姜氏君之妣也诗曰为酒为醴烝畀祖妣洽通作合百礼如祠公社门闾腊五祀养老劳农等事皆于蜡祭时合而举之也又范景文云礼之精意虽不藉物以存然必民力普存备物咸有始发皇莫御盘际不穷此洽字之义亦通降说文云下也福指丰登之福言孔正义云甚也皆毛云徧也随事赖丰年之利用则随处徵神惠之普存而其降福殆甚徧矣归功于八蜡之辞】

丰年一章七句【序以为秋冬报也但纪其报之时而不实其所报之神郑玄申其说云谓烝也烝也蔡邕独断亦云烝尝秋冬之所歌也孔颖达云不言祈而言报者所以追养继孝义不祈于父祖至秋冬物成以为鬼神之助故归功于报亦孝子之情也刘安成但以荐新于宗庙之诗此皆泥篇中有烝畀祖妣一语然烝尝荐新宗庙之礼时享月祀典有正经不必其丰年也假使当大禋之时行享祀之礼而告神登歌乃首举丰年为辞母乃不类之甚即祖妣独无恫乎朱传初本亦以为谷始登而荐于宗庙之乐歌与濮氏说同其後改本作秋冬报赛田事之乐歌盖祀田祖先农方社之属伪申培说袭之苏辙则以为秋祭四方冬祭八蜡王安石则以为祭上帝曹氏兼取苏王之说谓秋季大祭于明堂秋祭四方冬祭八蜡天地百神无所不报而同歌是诗故序不言其所祭耳今按颂载祭祀乐歌俱未有通用者以数说考之除八蜡外固各有诗矣楚茨祭尝也信南山祭烝也大田报方也良耜报社也我将大亨也是皆无藉於此诗若田祖之神据毛传以为八蜡中之先嗇则即先农耳他祭有诗唯蜡祭无诗此诗首以丰年发端正礼言顺成通蜡之意则其为孟冬报蜡而作无可疑者苏朱亦知牵引及之而特不敢专主大抵为序中秋冬二字所误耳若邹忠胤则云此诗摘载芟中四句成文而小异其首尾既有载芟此诗似可无作然而另为一篇者与报赛异用也尝观楚语观射父曰先王日祭月享时类岁祀诸侯舍日卿大夫舍月士庶人舍时天子徧祀羣神品物诸侯祀天地三辰及其土之山川卿大夫祀其礼士庶人不过其祖日月会於龙 九气含收天明昌作

百嘉备舍羣神频行国於是乎烝尝家於是乎尝祀百姓夫妇择其令辰奉其牺牲敬其盥盛洁其糞除慎其采服禋其酒醴帅其子孙从其时享其宗祀道其顺辞以昭祀其先祖肃肃济济如或临之於是乎合其州乡朋友婚姻比其兄弟亲戚於是乎弭其百苛矜其谗慝合其嘉好结其亲昵亿其上下以申固其姓此即诗丰年注脚也丰年之歌虽或上下所通用而於士庶尤较切盖舍日者有月享舍月者有时类而舍时者岁乃祭所谓士庶不过其祖家於是乎尝祀是也以洽百礼则弭苛矜慝合好固姓兼举之矣今按以楚语解此诗固亦近似但如所云大段为士庶发耳载之天子之颂何居】

良耜蜡祭报社也是为豳颂【礼月令孟冬天子乃祈来年於天宗大割祠於公社及门闾郑玄注云此周礼所谓蜡祭也按周礼国祭蜡则歛豳颂击土鼓以息老物此固颂诗也而所言者蜡祭之事是以知其为豳颂也蜡祭在建亥之月此诗所陈报赛之事而有百室盈止妇子宁止之文孔穎达谓此乃是场功毕入当十月之後则正与月令合矣是以知其为蜡祭也蜡之为言索也谓合祭万物之神而索飧之也天子大蜡八而又有天宗之祈公社门闾之祠周礼党正职亦云国索鬼神而祭祀若然则凡为神者莫不与矣而独谓是诗为报社者何也礼祭陰祀用黝牲陰祀者先儒谓祭地北郊及社稷也黝也者黑也杀时牲牲固黑唇也祭地北郊天子之礼诸侯惟祭社稷祭社必及稷也是以知其为报社也社祭一岁凡有三月令仲春择元日命民社一也雩祭以社以方二也孟冬大割祠於公社三也与祈年天宗并举者周礼肆师之职所谓社之日涖卜来岁之稼即此时事也若门闾之祀不知何神如以为五祀中之门则既蜡而腊复又及五祀矣似不应瀆祭也且既非陰祀即不用黝牲以是知此诗之作专为报社也天子诸侯礼数虽不无差殊又三代礼文或损或益然大端要不甚相远若八蜡之祭则已见於丰年之篇矣邓元锡云或疑思文臣工噫嘻丰年皆豳颂非也思文颂配天臣工噫嘻言王厘言成王皆王事载芟良耜言质淳於周颂殊音殆其豳乎岂亦公所陈豳诗後制乐因定以祈报与】

矍矍良耜【纸韵】俶载南亩【叶纸韵母鄙翻】播厥百谷【屋韵】实函斯活【叶屋韵呼酷翻】○赋也矍说文云治稼矍矍进也字从田从人谓治田之人也下从又说文云象人两胫有所躡也良耜郑玄云利善之耜也俶载三句解俱见载芟篇耜惟良故可以俶载南亩所谓欲善其事必利其器也此第一节言其既耕而播种也良耜载芟皆报赛之诗故备陈农功本末】或来瞻女【音汝语韵】载筐【丰氏本作仁】及筥【语韵】其饌伊黍【语韵 赋也瞻说文云临视也钱氏云犹省也郑云有来视女谓妇子来饌者也载犹运也筐筥解见采芣篇方曰筐圆曰筥郑云筐筥所以盛黍也愚按或载筐或载筥见耕者之多故饌者衆也说文云周人谓饌曰饌邢昺云食人曰饌自家之野也郑云丰年之时虽贱者犹食黍孔云少牢特牲大夫士之祭礼食有黍明黍是贵也玉藻言子卯稷食菜羹为忌日贬而用稷是为贱也贱者当食稷耳故云丰年之时虽贱者犹食黍此第二节言饌田也】其笠伊纠【有韵亦叶筱韵举天翻丰本作卩】其耨斯【丰本作伊】赵【筱韵周礼注集韵俱作?】以【说文作既】薅【尔雅说文俱作苽】荼【尔雅作荼】蓼【筱韵亦叶有韵力久翻】荼蓼朽【有韵】止黍稷茂【叶有韵莫後翻】止【赋也笠说文云笠无柄也孔云笠之为器暑雨皆得御之伊语词纠说文云绳三合也严粲云纠结其缘也季本云结於颌下使不动也耨耨也所以耘苗也解见臣工篇赵说文云趋也耨耨疾趋将往耘草如下文所云也薅说文云拔去田

草也经有三茶一曰苦菜尔雅所谓荼苦菜者也一曰英茶尔雅所谓藁荼茶者也一曰委叶尔雅所谓蒨委叶者也据尔雅注引此诗以解委叶故唐孔氏以此茶为委叶也然委叶之形状注疏无文古今莫晓但指为稂草耳愚考尔雅於苦菜藁荼字皆作荼而所谓委叶者字乃作蒨又於别条有蒨虎杖之目则虎杖名蒨疑此即委叶也疏於本条下引陶注本草云此物田野甚多状如大马蓼茎班而叶圆因悟此诗以茶蓼并言当是其形相近而朱子亦云茶陆草蓼水草一物而有水陆之异也今南方人犹谓蓼为辣茶二者盖相脗合然则此茶之为虎杖明矣说文有荼字无蒨字或尔雅故异其字以为识别抑或本有此字而说文偶遗之皆不可知蒨既名虎杖又名委叶者盖以此物委叶田中为田之害故与皇守田并称皇亦生废田中者故别号之为守田也请与博雅君子详之又张萱云虎杖一名班杖秋有花直出作赤子与蒨相似本草入木部云作木高丈余非也衍义曰似寒菊惟花叶茎蕊差小耳当以草部为正蓼解见小豉篇生水泽中白居易诗水蓼冷花红簇簇是也王肃云茶陆稂水草孔云所繇田有原有隰故并举水陆稂草也朽说文云腐也止通作只语已辞也後仿此茂丰盛也按月令季夏是月也土润溽暑大雨时行烧薙行水利以杀草如以热汤可以粪田畴可以美土疆当即於斯时也此第三节言耘苗而苗盛也】获之掞掞【质韵】积【说文作?】之栗栗【质韵说文作秩秩】其崇如墉其比如栝【质韵】以开百室【质韵】百室盈【叶阳韵余章翻】止妇子宁【叶阳韵尼良翻】止【赋也获说文云刈谷也掞掞毛传说文尔雅注皆以为获声也又小尔雅云截颠谓之掞盖谓截禾颠之声也积之栗栗三句一连说积说文云聚也栗即实颖实栗之栗左传所谓嘉栗孔氏谓栗是禾之坚熟诗诂谓禾之孚甲缜密如栗是其义也重言栗栗者有颗粒均匀之意崇说文云嵬高也墉毛云城也孔云城之与墙俱得为墉但此比高大故为城比说文云密也栝朱子云理髮器说文云梳篦之总名也孔云所积聚者其高大如城雉之峻壮其比迫如栝齿之相次愚按如墉分所积之一堆而言如栝合所积之衆堆而言以开百室者郑云其已治之则百家开户纳之又云千耦其耘辈作尚衆也一族同时纳谷亲亲也百室者出必共洫间而耕入必共族中而居又有祭酺合醴之欢孔云周礼五家为比五比为闾四闾为族是百室为一族於六乡则一族於六室则一鄩遂人职云百夫有洫故知百室共洫间而耕也族在六乡而引彼者郷之田制与遂同故得举鄩之制以言族也愚按郑孔所引皆周礼未必公刘时有此法曰千耦曰百室大抵皆约略之辞强为之说则凿矣万尚烈云方春在田邑室皆闭田事既毕则邑中之百室皆开以其所获所积者入之于室也钱天锡云计亩均分故各开其室百室盈止者孔云百室皆盈满而多谷粟也崔寔四民月令云十月农事毕五谷既登家家储蓄乃顺时令也初言获是获之于野既言积是积之于场此言开言盈则入之于室矣妇子谓耕者之妻与子也宁通作寔说文云安也向者终岁田间勤动至此百室既开始得入邑中而安处也七月之诗曰嗟我妇子曰为改岁入此室处正此诗所云宁止者彼为豳风此为豳颂又当孟冬之时其为周礼蜡祭所献无可疑矣此第四章言收获之多而丰稔足乐也】

杀时牂【陆德明本作□】牡有捋其角以似以续续古之人【四句俱无韵未详 赋也牂牛之黑唇者按尔雅云黑唇牂黑眦轴黑耳犴黑腹牧黑脚卷但别牛黑所在之名而不显其身之色毛传及说文则皆谓黄牛黑唇曰牂孔云牛之黄者衆故知黄牛也社稷用黝牛当以黑而用黄者盖正礼用黝至於报功以社是土神故用黄色仍用黑唇也曹氏云古之人享其人必思其所自以为百室盈而妇子宁者社稷之功故於是而报焉地之色以黑为正以黄为美故陰祀用黝牲正其义也社稷用牂美其功也牡说文云畜父也愚按诸侯祭社稷用少牢少

牢者羊豕也此诗为豳颂则是诸侯之祭而得用牡牛者以田功告成教民美报故隆其礼月令言大割祠于公社郑玄谓大割者大杀羣牲割之也天子祭社不过以太牢为常礼而此特变云大割则必有奢于太牢之外者诸侯之礼虽杀于天子改少牢而进用特牛不为泰矣揅通作觥本作斛说文云角貌朱子云角上曲貌按王制云祭天地之牛角茧栗宗庙之牛角握宾客之牛角尺无社稷之文礼纬稽命徵则云社稷宗庙角握毛传则云社稷之牛角尺今以有揅其角之语推之揅觥通用据诗言兕觥其觥角弓其觥必非角握当从毛说为长毛去古未远定有所据也以似二句祭毕而祈神之辞也以似者欲来岁之有年亦如今岁也续说文云连也以续者稼穡之事国家根本所在欲世世相承勿絶也毛云续往事也郑云嗣前岁者後求有丰年也续往事者复以养人也古之人谓后稷也后稷以农事开国自今以往庶藉神庥以永续其事于不替是则我君民之所深愿耳一说报赛之礼有其举之莫敢废也今日奉行故事庶几不替其先耳何足答神贶于万一乎亦通苏辙云圣人之为诗道其畊耨播种之勤而述其终岁仓廩丰实妇子喜乐之际以感动其意夫诗之可以兴者所以感发人之善志也先言勤劳後言逸乐使勤者可以自忘其劳而怠者亦知以自奋也】

良耜五章二章章四句一章三句一章五句一章七句【旧作一章二十三句序及蔡邕独断皆云秋报社稷之所歌也以为报社稷者得之独系之於秋则与百室盈妇子寧之语不合严氏乃谓此诗为报社稷必陈农功之本末故当秋时而追述春耕预言冬获唐孔氏意亦如此亦可谓强为之辞者矣朱传了无所主申培说则云载芟亦丰年之意良耜与载芟同意其不知所适从犹朱传也子贡传阙文】

载芟孟冬腊先祖五祀以礼属民饮酒正其齿位亦豳颂也【月令孟冬之月天子乃祈来年于天宗大割祠于公社及门闾腊先祖五祀郊特牲云黄衣黄冠而祭息田夫也野夫黄冠黄冠草服也先儒谓此既蜡後腊先祖五祀之祭也对文蜡腊有别总其义俱名蜡也陈祥道云先儒以郊特牲言皮弁素服而祭又言黄衣黄冠而祭则二祭之服不同月令言祈来年于天宗割祠于公社又言腊先祖五祀则祈腊之名不同於是谓皮弁素服而祭与祈来年于天宗蜡也黄衣黄冠而祭与腊先祖五祀腊也周蜡于十有二月秦腊於孟冬皆建亥之月也晋侯以十二月灭虢遂袭虞宫之奇曰虞不腊则腊在蜡月可知矣唐孔氏云月令腊在祈天宗之下但不知腊与蜡祭相去几日准隋礼及今礼皆蜡之後日又周礼党正职云国索鬼神而祭祀则以礼属民而饮酒于序以正齿位注谓此大蜡之时建亥之月也必正齿位者为民三时务农行阙于礼至此农隙而教之尊长养老见孝悌之道也按月令於腊先祖五祀之下文曰劳农以休息之先儒谓此即党正属民饮酒正齿位是也礼运篇载仲尼与于蜡宾事毕出游于观之上是有主宾饮酒之礼而杂记篇又载子贡观蜡曰一国之人皆若狂者以蜡礼同乡饮酒其初立宾行礼至礼终脱屣升堂而燕行无算爵然则初时正齿位至其後则若狂也郑玄周礼注云万物助天成岁事至此为其老而劳乃祀而休息之於是国亦养老焉今按此诗言有实其积正孟冬谨盖藏之时而又言烝畀祖妣以是知其为腊祭先祖也其曰胡考之宁则所谓养老而正齿位者也蜡而腊腊而养老至养老而蜡之事始毕周礼蜡必歛豳颂若此诗非豳颂则何所取之故知为公刘时腊祭之诗无疑也又按腊之义训有二徐锴云腊合也合祭诸神也应劭亦云腊者接也新故交接狎腊大祭以报功也愚谓此义得之狎腊者重接之貌西京赋披红葩之狎腊是也乃先儒相传皆谓腊者猎也谓以田猎所得禽祭也夫郊特

牲篇有曰大罗氏天子之掌鸟兽者也诸侯贡属焉草笠而至尊野服也罗氏致鹿与女而诏客告也曰好田好女者亡其国是则好田之戒正申飭于腊月来贡之时而谓其猎禽以祭乎必不然矣或又疑周礼罗氏职有蜡则作罗襦之语谓将以罗网围取禽也夫野虞教道田猎实在仲冬此时作罗襦亦以备用也即周礼中冬狩田献禽享烝非腊月也宜乎此诗之言烝祖妣洽百礼第举酒醴而不及禽兽也愚于雅之甫田大田颂之丰年良耜载芟与风之七月皆定为豳诗虽以周礼为据而其辞之相为出入亦确有可信者七月曰同彼妇子饁彼南亩田峻至喜而甫田大田亦皆曰以其妇子饁彼南亩田峻至喜也七月曰嗟我妇子曰为改岁入此室处而良耜亦曰以开百室百室盈止妇子宁止也甫田累言曾孙以公刘为后稷之曾孙而大田亦言曾孙也大田言以我覃耜俶载南亩而良耜亦言矍矍良耜俶载南亩载芟亦言有略其耜俶载南亩也七月言其始播百谷而良耜载芟皆言播厥百谷实函斯活也丰年言万亿及秭为酒为醴烝畀祖妣以洽百礼而载芟于此四句全文皆同也至于甫田曰自古有年良耜曰续古之人载芟曰振古如兹所谓古皆指后稷而言有惓惓率祖之思焉诗三百篇未有辞意脗合之多若是者斯亦可以见其制于一时出于一手而使朱子闻此定当涣然冰释不复曰未知是否矣】

载芟载柞【叶陌韵侧格翻】其耕泽泽【陌韵尔雅作郝郝】千耦其耘【陆德明严粲本俱作耘】徂隰徂畛侯主侯伯【陌韵】侯亚侯旅侯强侯以【纸韵】有嘏其饁思媚其妇有依其士【纸韵】有略【字书作?】其耜【纸韵】俶载南亩【叶纸韵母鄙翻 赋也载郑云始也当通作才芟说文云刈草也毛传云除木曰柞孔颖达云秋官柞氏掌攻木及林麓是除木曰柞也曹氏云除草木是初垦辟而为田者也季本云以芟柞之语观之则似公刘始荒豳地之言也泽通作释说文云解也郭璞云言土解也草木既去则其土无复胶结凝滞始解释而可以耕未谓其已耕也耦解见噫嘻篇千耦不必有所指严粲云耦以言并作千以言其多孔云为耦者千是二千人为千耦与十千维耦异也耘说文云除苗间秽也蒋悌生云去草皆可训为耘非必为去苗间草也若以为去苗间草则始耕之时未曾播种何从有苗曹氏云反土之後草木根株有芟柞所不尽者则复耘之其多至于千耦也黄佐云此耘在未种前縣縣其廩则耘在既种後盖耘有二等其辨如此徂说文云往也隰说文云阪下陞也朱子云为田之处也畛说文云井田间陌也周礼十夫有沟沟上有畛郑云辈作者千耦或往之隰或往之畛严云言遍于原野无旷土也侯发语辞如伊维之类後放此主毛云家长也孔云坊记曰家无二主主是一家之尊也伯毛云长子也班固云子最长迫近父也适长称伯庶长称孟亚尔雅云次也李氏云伯之次也愚按凡仲叔季皆是也旅说文云俱也强说文云弓有力也人之有力似之故以为壮盛之称以说文云用也左传云能左右之曰以言一人为家之主受田以耕而其子之伯若亚皆与之俱为其伯亚之中有强壮多力者则提挈而指麾之俾之尽力於农亩也按周礼小司徒均土地以稽人民而周知其数上地家七人中地家六人下地家五人注谓一家男女七人以上则授之上地所养者衆也男女五人以下则授之下地所养者寡也是则一夫之子若伯若亚自非本身受田之後总仰给于彼父所受百亩之中其旅俱耕作有固然者嘏说文云声也毛传云衆貌盖衆多之声也饁说文云饷田也杜预云野馈也媚说文云悦也妇田夫之妇来饷饷也左传冀缺耨其妻饁之是也依说文云倚也亲近之意故郑云依之言爱也士者男子之称妇人亦称夫为士易老妇得其士夫是也思媚其妇与思媚周姜文法相似当主妇言言思媚悦乎田中之夫者其妇也有依其士与有嘏其饁有略其

耜语皆相类当主土言言有亲近乎饔飩之妇者其土也陈际泰云农之为事苦矣先王有道焉使之而忘其劳人情莫不乐其羣主伯亚旅皆在焉均劳又聚语也人情莫不乐所昵妇女自饔飩气体为契又相慰藉也严云夫耕妇饔飩驩然相爱见治世和乐之气象焉季云一家亲爱同力一心农夫之所以有年者盖本於此有略其耜饔毕而後耕也是主伯亚之事与妇无涉略当依字书通作?说文云刀剑刃也尔雅云利也耜者耒首斲木为之解见七月篇曹氏云利则入土也深俶说文云善也载通作絳说文云事也南亩解见七月篇言有锐利如刀剑刃之耜以善其事于南亩也】播厥百谷【屋韵】实函斯活【曷韵亦叶屋韵呼酷翻又叶屑韵胡决翻】驿驿【尔雅作绎绎】其达【曷韵亦叶屑韵陀悦翻】有厌其杰【屑韵】厌厌其苗【萧韵】縣縣【韩诗作民民云衆貌】其廩【叶萧韵蒲娇翻说文作穰】载获济济【叶荠韵子礼翻】有实其积万亿及秭【纸韵亦叶荠韵獎里翻】为酒为醴【荠韵亦叶纸韵力纸翻】烝畀祖妣【纸韵】以洽百礼【荠韵亦叶纸韵力纸翻 赋也播说文云种也百谷解见七月篇曹氏云百谷之性其寒暑湿燥高下早晚各有所宜而水旱丰凶不可预料故悉种之所以为备也实郑云种子也孔云此说初种故知实为种子函通作含孔云函者容藏之意故转为含犹人口含之也活郑云生也按活者水流声物之生意流动亦谓之活实函斯活者孔云言种子内函生气也绎说文云置骑也曰驿驿者象其出土之速孟子所谓速于置邮也或依尔雅通作绎绎为抽丝之义言百谷次第而生连续不断也亦通达者自此而忽适彼之名故毛传以为射也郑云出地也孔云苗生达也则射而出厌通作猷说文云饱也朱子云受气足也杰说文云傲也按才过人者谓之杰故郑亦以苗先长者杰言其异于衆苗也孔云苗之杰者亦是苗也而与其苗异文杰谓其中特美者苗谓其余齐等者二者皆美茂故俱称厌但以齐等苗多重言厌厌耳黄佐云夫百谷之生始焉固有受气之足而先长者矣及其既也皆受气之足而同一茂盛矣何者而非厌厌之苗乎縣说文云联微也孙炎云縣縣言详密也廩通作穰说文云耕禾间也徐锴云禾已长大复鉏其间^廿也万时华云苗已同时皆长故不可不耘严云芟耘廩皆除^廿也芟与柞并言是新开为田先除其地上之^廿木也既耕而言耘是反土之後除其土中之^廿木根株也既苗而言廩是除其苗间之草也王安石云耘以縣縣为善恐伤苗也徐光啓云庄子灭裂而耘之则亦灭裂而报余详密正与灭裂相反获说文云刈谷也济之为言齐也朱子训济济为人衆貌盖谓人衆而齐力也实严云谷实也按上文实函斯活虽亦谷实但彼乃种子此则种子所生而成熟者义自不同积说文云聚也据公刘篇以积与仓对言朱子以为露积是也万亿及秭解见丰年篇当始获之时但见刈谷之人济济衆多所有之谷实露积甚盛其贮之於廩则数或以万计或以亿计与前岁之陈谷因仍相及也获言在野积言在场万亿及秭言在廩自有次第为酒为醴烝畀祖妣解亦见丰年篇惟以洽百礼义与彼不同此特谓祭五祀及劳农养老等事也】有飴【陆德明本作苾】其香【阳韵】邦家之光【阳韵】有椒【陆云沈本作俶云作椒者误】其馨【青韵】胡考之宁【青韵】匪且有且匪今斯今振古如兹【三句无韵 赋也飴说文云食之香也香本作□说文云芳也徐云按尚书稼穡作甘黍甘为香会意曰邦家之光者以大有之年行祭祀之礼左传所云奉盛以告谓三时不害而民和年丰奉酒醴以告谓上下皆有嘉德而无违心者其邦家之光显孰如之若凶荒杀用气象荼然何光之有椒本作茱本名解见椒聊东门之枌篇孔云椒是木名非香气也但椒木气香作者以椒言香诗诂云椒之气烈故古者谓椒酒取其香且烈也史?祖云杜牧之阿房宫赋所用事不出于秦时只烟斜雾横焚椒兰也两句尤不可及六经只以椒兰为香如有椒其馨其臭如兰兰有国香是也楚词亦只以椒兰为香

如椒浆兰膏是也沉檀龙麝等字皆出于汉西京以後词人方引用至唐人诗文则盛引沉檀龙麝为香而不及椒兰矣曹氏云餼椒皆酒醴芬芳之气胡说文云生颌垂也毛云寿也解颐新语云老狼亦垂胡今老者或有此状故诗人取之又士冠礼祝云永享胡考注胡为遐盖音相近考说文云老也毛云成也孔云老而有成德也宁通作寔说文云安也严云以养耆老则老人之安宁也愚按此即属民饮酒而正齿位之事正齿位者乡饮义谓六十者坐五十者立侍六十者三豆七十者四豆八十者五豆九十者六豆是也详见小引下匪通作非且者聊且之义今今日也匪且有且言非曰聊且为之而姑有如此聊且之事匪今斯今言非自今日偶一为之而乃谓此特今日之事也振古谓振起于古昔之人即后稷也自我后稷以农事开国而其垂教于稼穡美报于蜡腊者已如此矣我今日者不过举行故事循而勿失云尔曰且曰今亦似初迁都时语】载芟三章二章章十二句一章七句【旧作一章三十一句序及蔡邕独断皆以为春籍田而祈社稷之所歌也今细玩诗辞无耕籍之事亦与祈社稷无涉朱子云此诗未详所用然辞义与丰年相似其用应亦不殊申培说祖之遂云亦丰年之意彼但见万亿四语二诗相类耳而究竟其所用之地莫能明也刘公瑾疑为秋成之祭荐新于宗庙而歌此则亦依附于烝畀祖妣一语较为近之若胡一桂之论曰载芟良耜二诗诚不见其所报之意不过闵其耕种之劳序其馈饷之情论其禾黍茂盛收获之富或为酒醴以祀祖妣或杀牲牲以续古人此皆田家勤劳安逸之事而非告神之乐歌也信若尔则何以入此诗于颂乎子贡传阙文】

行苇美公刘也公刘有仁厚之德行燕射之礼以笃同姓诗人美之【何以知其为公刘之诗也一徵之吴越春秋曰公刘慈仁行不履生草运车以避葭苇再徵之列女传晋弓工妻谒于平公曰君闻昔者公刘之行乎羊牛践葭苇惻然为痛之恩及草木仁着于天下三徵之汉王符潜夫论特引章首四句而释之曰公刘厚德恩及草木牛羊六畜且犹感德消息于心又曰仁不忍践履生草则又况于民萌而有不化者乎四徵之後汉书桓荣曰昔文王葬枯骨公刘敦行苇世称其仁是何其说之凿凿也彼去古未甚远夫有所受之也故汉章帝勅侍御史司空曰方春所过无得有所杀伐车可以引避引避之駢马可辍解辍解之诗云敦彼行苇牛羊勿践履礼人君伐一草木不时谓之不孝俗知顺人莫知顺天其明称朕意亦用此事所谓公刘有仁厚之德者也愚故以为公刘之诗焉又按公刘初迁豳而即于同姓异姓行燕饮之礼所谓食之饮之君之宗之是也此诗之作其在迁都以後乎邹忠胤云周礼锺师九夏有族夏杜子春谓族人侍奏族夏此僭是也耶】

敦彼行苇牛羊勿践履【叶荠韵卢启翻】方苞方体【荠韵】维叶泥泥【叶荠韵乃礼翻张揖作萑萑文选注作柅柅郑本以章首至此为第一章】戚戚兄弟【叶纸韵荡以翻】莫远具尔【纸韵丰氏本作迓毛本以章首至此为第一章】或肆之筵或授之几【纸韵郑本以戚戚至此为第二章今从朱传改正兴也敦通作悖说文云厚也言族生厚盛也与豳诗有敦瓜苦义同行毛传云道也苇说文云大葭也详见蒹葭篇勿通作毋禁止辞践说文云蹋也释名云残也使残坏也履亦有践之义以愚臆之蹋之重者名践蹋之轻者名履郝敬云古路在井间旁近沟洫多生芦苇牛羊往来践踏孔颖达云苇之初生其名为葭稍大为芦长成乃名为苇八月萑苇是也此禁牛羊勿践则是春夏时事而言苇者先王爱其为人用之所用在於成苇故名之苇季本云牛羊勿践履者喻兄弟相亲而不可为贱物所伤也方且也苞以

根之丛生而盘结言体钱氏云成茎也毛云叶初生泥泥严粲云蓼萧零露泥泥为沾濡貌则此言泥泥是润泽之意盖泥泥是湿也戚本钺类当通作憾赵颐光云戚溷憾之憾因作休憾转训亲属戚戚毛云内相亲也孔颖达云亲亲起于心内故言内相亲莫亦通作母钱天锡云兴意重一勿字设燕重一莫字殷懃笃厚之意於此已蔼然可掬下皆本此意发出具通作俱说文云偕也尔通作迓说文云近也郑云谓进之也孔云谓揖而进之令自近也按仪礼燕礼云公降立于阼阶之东南南乡尔卿卿西面北上尔大夫大夫皆少进所谓尔卿尔大夫即此所云具尔也具尔正以行礼之初言凡同姓之亲皆揖而进之将与之饮燕以浹洽其情欲使其不疎远于我也旧说谓具尔即申上莫远之意一反言一正言耳殊无味吕祖谦云敦彼行苇方苞方体维叶泥泥其可使牛羊践履之乎戚戚兄弟其可疎远而不亲爱之乎忠厚之意蔼然盖见于言语之外矣下章之燕乐皆所以乐乎此也毛氏以戚戚为内相亲惟体之深者为能识之真德秀云祖谦之说善矣使人主能深体此章之指则虽一草一木且不敢轻於摧折也况骨肉之戚而纵寻害乎此诗二章以下皆言燕乐兄弟之事然必有此心为之本而後燕乐不为虚文不然非所知也孔云礼有族食族燕是燕族人为常臣则有功乃燕是燕臣为非常严云此诗以行苇兴兄弟泥泥戚戚之辞体察精微恳款亲切惻然惟恐伤之千载之下犹能使人兴起也愚按时公刘迁国方新同姓微弱犹繇诗之咏瓜瓞者故以方苞方体维叶泥泥起兴正言其当勤于保护急于培植耳肆陈也筵说文云竹席也引周礼度堂以筵筵一丈授说文云子也几说文云踞几也象形徐锴云人所凭坐也阮谿云几长五尺高广二尺又马融云几长三尺礼图云几两端赤中央黑陈祥道云席常设于宾未至之前几常授于行礼之际其将援也必拂其授之也必拜送其受也必拜答愚按或授或设俱以执事之人言卑幼者为设筵而已尊长者则加之以几按仪礼聘公食大夫皆有几冠礼醴宾乡饮乡射及燕宾皆无几此亦燕礼而有授几者疑古礼与周异也】肆筵设席【楚辞章句作机】授几有緝御【叶禡韵五驾翻毛本以上章或肆至此为第二章】或献或酢洗爵奠斚【叶禡韵居訝翻郑氏以肆筵至此为第三章】醢醢以荐或燔或炙【叶禡韵之夜翻亦叶药韵即墨翻】嘉【董氏云旧书作加定本作嘉唐改从定本】殽【丰本作肴】脾臠【药韵陆德明本作醢】或歌或嘏【药韵说文作毛本以或献至此为第三章郑本以醢醢至此为第四章今从朱传改正】赋也设说文云施陈也从言从殳徐云殳所以驱遣使人也席与筵虽非一物而文可通称或谓重曰筵单曰席或谓在下铺陈者曰筵加之于上为人所蹈藉者曰席今按小雅言宾之初筵是举筵以该席也周礼司几筵序天子三重之席有莞席乃铺陈之在下者是即所谓筵也其加于上者有蒲席有次席则在上之重席耳莞席以小蒲为之蒲席以蒲翦为之次席以桃枝竹为之礼天子诸侯席有黼黻纯故字从巾巾即纯也纯者缘也其上从庶省席以待宾客之礼宾客非一人故从庶也又曲礼席间函丈孔疏云席制三尺三寸三分寸之一远近间三席是一丈郑云緝犹续也御侍也孔云緝绩者连续之故緝犹续也凡御者皆侍其侧故御为侍也愚按肆筵授几蒙上文言所以待同姓之兄弟肆筵之外又别有设席授几之外又更有继续而趋侍者则主待异姓之宾言旧说但以设席为重席按仪礼燕礼无加席况上章但言兄弟下章忽言宾宾非兄弟也文王世子有云公与族人燕则异姓为宾膳宰为主人公与父兄齿然则此言设席緝御乃所以为後章序宾立案无可疑矣进酒於客曰献客报主人曰酢洗洒奠置也斚说文云玉爵也或说斚受六升按明堂位云爵夏后氏以琖商以斚周以爵据此则斚为商爵然周亦用之春秋传有瓘斚郊特牲云举斚角诏妥尸礼运云醑斚及尸君非礼也是谓僭君周礼鬱人职云大祭祀与量人受举斚之卒爵而饮之量人职云凡

宰祭与郁人受铎历而皆饮之此周人用铎之证也璚铎爵疑三代皆有之特所贵重异耳又灌尊夏后氏以鸡彝商以斚周以黄目则尊亦有名铎者然此诗所咏是爵非尊也孔云所洗所奠犹一物也而云洗爵奠铎爵酒器之大名故仪礼饮觶者亦云卒爵是爵为总称作者因洗奠之别更变其文耳愚按孔说依文作解未足深信考燕礼射礼无用铎者疑当作觶郑玄周礼注读铎为受福之嘏谓声之误是则铎有嘏音嘏觶声近因讹觶为铎耳考工记梓人云献以爵而酬以觶一献而三酬则一豆矣食一豆肉斂一豆酒中人之食也爵受一升觶受三升豆受四升一献三酬者言献以一升之爵酬以三升之觶也合之则为四升是谓一豆此诗言洗爵奠铎乃括乎首尾之辞洗爵蒙上献酢之文主人洗爵酌酒以献宾宾既受卒爵即洗主人所献之爵以酢答主人主人卒饮又献公公酢亦如之主人卒饮乃更酌觶而自饮以酬宾宾受之奠而不举以俟旅酬此所谓奠铎者也楚茨言献酬以该酢此既言献酢而兼言奠铎乃正以表酬耳醢本作胾说文云血醢也郑云肉汁也贾公彦云醢者以肉为之醢汁即是肉汁醢说文云肉酱也释名云海也冥也封涂使密冥乃成也孔云用肉为醢特有多汁故以醢为名其无汁者自以所用之肉鱼雁之属为之名也郑云荐之礼韭菹则醢醢也按周礼朝事之豆其实韭菹醢醢昌本麋麇菁菹鹿麇茆菹麋麇馈食之豆其实葵菹羸醢脾析麇醢蜃蜃醢豚拍鱼醢加豆之实芹菹兔醢深蒲醢醢箬菹雁醢笋菹鱼醢王举则共醢六十饔以五齏七醢七菹三饔实之宾客之礼共醢五十饔郑注谓凡菹醢皆以味相成饔亦醢也有骨为饔无骨为醢作醢及饔者必先膊乾其肉乃後莖之裸以梁麴及盐渍以美酒涂置瓶中百日则成矣又仪礼聘礼云堂上八豆设于户西西陈皆二以并东上韭菹其南醢醢屈西夹六豆设于西墉下北上韭菹其东醢醢屈注谓屈犹错也言交错陈之也公食大夫礼云宰夫自东房荐豆六设于酱东西上韭菹以东醢醢昌本昌本南麋麇以西菁菹鹿麇据此言诸醢者皆以醢醢为首可知此举醢醢亦以该诸醢耳定非止此一醢也有醢必有菹故郑兼言韭菹也荐音同进因训为进以音通也列子王荐而问之是也郑云燔用肉炙用肝嘉美也穀通作肴国语周定王云王公立饔则有房烝亲戚宴飧则有穀烝烝者升也切肉为穀升俎谓之穀烝即左传所谓宴有折俎也公侯来朝王为设享则有体荐荐其半体谓之房烝又乡饮酒记云宾俎脊胁肩肺脾说文云土藏也臠本作谷说文云口上阿也按服?通俗文云口上为臠口下为阿毛传训臠为函殊混嘉穀之外有脾有臠其所用何牲未之详也以上醢醢三句即燕礼所载荐脯醢设折俎羞庶羞之事醢醢醢也燔炙脯也嘉穀折俎也脾臠庶羞也或歌或嘏据旅酬之後以及乐射之时而言包下章敦弓两段事于内见诗人错综变化处或歌者按仪礼燕礼载旅酬之後小臣纳工以瑟授工歌鹿鸣四牡皇皇者华及笙入奏南陔白华华黍乃间歌鱼丽笙由庚歌南有嘉鱼笙崇丘歌南山有台笙繇仪遂歌乡乐周南关雎葛覃卷耳召南鹊巢采芣采芣太师告乐正曰正歌备即其事也此诗若作于公刘时则所歌必别有古诗要之周公制礼监于二代其仪节当不异耳尔雅云徒击鼓谓之嘏按仪礼乡射礼第二番射释获之後司射请以乐乐宾适阶间堂下北面命曰不鼓不释於是乐正奏驺虞以射鼓与歌相和射与鼓相应以八音之中惟独奏鼓别无他音如前瑟笙之类裸之故谓之徒击鼓是则此诗所谓或嘏者也章末缀此一句乃是为下章张本与献酬时无涉读者详之】敦【丰本作雕後同】弓既坚【叶真韵古因翻】四鍬既钩【真韵神庙诋列女传引诗无此句】舍【上声】矢既均【真韵列女传作钩】序宾以贤【叶真韵下缙翻毛以敦弓至此为第四章郑以为五章】敦弓既句【叶宥韵居候翻说文作穀】既挾四鍬【叶宥韵胡茂翻】四鍬如树【遇韵亦叶麇韵上主翻】序宾以不侮【麇韵亦叶遇韵亡遇翻毛以敦弓既句至此

为第五章郑以为第六章今从朱传改正 赋也按燕礼燕末若射则大射正为司射如乡射之礼此章即其事也燕射与大射不同者燕射主于饮酒故于大夫士俱旅之后行之取其足以劝酒合欢而已大射主于射故在未为大夫举旅之前行之则为将祭择士故也宾之初筵篇大射也何以知之以烝衍烈祖之语知之此诗燕射也何以知之以发首即言戚戚兄弟莫远具尔是其意专为藉燕乐以笃亲故知其非大射也敦通作𢇛说文云画弓也毛传云天子敦弓亦作雕弓荀子云天子雕弓诸侯彤弓大夫黑弓何休公羊注亦云天子雕弓诸侯彤弓大夫婴弓士卢弓今按荀何之说虽与毛传合但雕弓乃天子所用无宾得并用之理愚意敦雕异文此敦弓当如鲁大弓公羊传以为弓绣质者是也绣质陈氏礼书谓绣其附也考工记画绩之事五采备谓之绣附者把中也然则天子雕弓盖竟弓体画之非天子之弓但绣画其附而已亦谓之画弓也坚说文云刚也按考工记工人言为弓之法桥干欲孰于火而无羸桥角欲孰于火而无𤑔引筋欲尽而无伤其力鬻胶欲角而水火相得然则居旱亦不动居湿亦不动是所谓既坚也鍬鍬矢也尔雅云金鍬翦羽谓之锥骨鍬不翦羽谓之志顏师古云陶家名转者为钩盖取调均之义此既钩亦谓调均毛传训为参亭是也按考工记矢人为鍬矢参分一在前二在後注谓参订之而平者前有?重也孔云鍬者?鍬之矢名轻重钩亭四矢皆然故言四鍬既钩案周礼司弓矢鍬矢杀矢用诸近射田猎恒矢痺矢用诸散射郑注散射谓礼乐之射此是礼射而用鍬矢者先王用先代法不用周礼愚按既坚既钩二语即乡射礼初纳射器之事郑云舍之言释也孔云谓既射放矢也均说文云平徧也乡射之礼初比三耦但诱射不释算至第二番射乃比衆耦於是三耦与衆耦俱射始释算较胜负据下文言序宾以贤则此舍矢既均指三耦与衆耦俱射而言乃第二番事其第一番射不言者以其事但止于诱射故略之也序通作叙说文云次第也宾兼宾与衆宾而言季云同宗无相为宾客之道故为之立宾也仪礼注云贤犹胜也郑云序宾以贤谓以射中多少为次第按乡射礼释获者设中受八算射若中每一个释一算上射于右下射于左若有余算则反委之继射释获皆如初卒射视算释获者于中西坐先数右获二算为纯一算为奇兴自前适左东面坐歛算如右获遂进取贤获告于宾若右胜则曰右贤于左若左胜则曰左贤于右以纯数告若有奇者亦曰奇若左右鈎则左右皆执一算以告曰左右鈎此所谓序宾以贤者也其事大约与大射礼同详见宾之初筵篇句本鈎曲之义但周以句弓为弊弓此既句当依旧说通作𢇛说文云引满也此序贤饮觶之后合三耦衆耦胜与不胜者皆再张弓以待第三番复射上章或罍正在此时既者已事之辞仪礼云凡挟矢於二指之间横之郑玄注云方持弦矢曰挟严云弦纵而矢横为方凡挟矢於二指之间横之谓左手执弓把见矢鍬於把外右手大指鈎弦二指挟持其矢故弦纵而矢横弦与矢作十字故方也凡两物夹一物曰挟此矢在弦之外二指之内故曰挟郑云射礼搯三挟一今言已挟四鍬则已徧释之孔云搯也插也射用四矢故插三於带间挟一以扣弦而射也射礼每挟一个今言挟四鍬故知已徧释之也树植也孔云四鍬皆中于质如手就树之然按大射燕射之礼司射皆命曰不贯不释此如树即所谓贯也燕射用兽侯大射用皮侯俱以布为之特有画兽栖皮之异而皆主于贯先儒误解射不主皮谓但主于中而不主于贯革此说非也乡射礼文云礼射不主皮主皮之射者胜者又射不胜者降此言礼射与主皮之射之异也大射宾射燕射乡射皆礼射也蒐狩获禽天子取三十焉其余以陈于泽宫卿大夫相与张兽皮而射之其射无侯此主皮之射也礼射前後有三番虽此番不胜仍待後番复升射盖以礼让相先不欲以不能愧人也主皮之射但主兽皮一时之中否苟一射不胜即不得复升射其所尚者但较胜负于力而已此其所以异也孔子曰射不主皮为力不同科

古之道也言古礼有射不主皮之文者为主皮之射乃尚力与礼射尚礼其科条自不同于以见古人贵德贱力之意也旧说皆不明附记于此侮孔云慢也愚按此第三番之射或前已中而今复中则易侮其不中者或前不中而今获中则易侮其前中者故设丰饮觶之礼虽第二番已有之而序宾不侮必於此言之也按乡射礼视算告算之後司射命弟子设丰胜者之弟子洗觶奠于丰上胜者执张弓不胜者执弛弓进立于射位耦揖及阶胜者先升堂少右不胜者进北面坐取丰上之觶兴少退立卒觶进坐奠于丰下兴揖不胜者先降与升饮者相左交于阶前相揖出此所谓不侮者也吕祖谦云舍矢既均泛言射者也故继之曰序宾以贤四鍤如树专言胜者也故继之曰序宾以不侮子曰君子无所争必也射乎揖让而升下而饮其争也君子】曾孙维主【夔韵亦叶有韵当口翻】酒醴维醕【夔韵亦叶有韵奴口翻】酌以大斗【有韵亦叶夔韵肿腴翻陆本作料石经作□】以祈黄耆【有韵亦叶夔韵读如古果五翻毛本以曾孙至此为第六章郑本作第七章】黄耆台【尔雅作鲐】背以引以翼【职韵】寿考维祺以介景福【叶职韵笔力翻毛本以黄耆至此为第七章郑本作第八章今从朱传改正 赋也按仪礼燕射毕後有宾降洗升媵觶于公之礼及行无算爵之时士执膳爵酌以进公此章所咏即其事也曾孙指公刘也按史记后稷卒子不窋立不窋卒子鞠立鞠卒子公刘立是公刘者后稷之曾孙也故豳雅若甫田大田皆称之为曾孙焉又礼凡主祭者皆得称曾孙但此诗无言祭祀之事其为以世次称公刘明矣主之言君也曾孙为一国之主故曰维主非主人之谓主人乃膳宰为之臣莫敢与君抗礼何曾孙为主之有乎酒字从水从酉酉八月也八月黍成以水酿之为酒醴甜酒也解见吉日篇醕说文云酒厚也酌说文云盛酒行觴也斗当依陆本通作料说文云勺也徐锴云按字书料木有柄所以斟水毛云大斗长三尺孔云长三尺谓其柄也汉礼器制度注勺五升径六寸长三尺是也此盖从大器挹之于樽用此勺耳其在樽中不当用如此之长勺也陈祥道云勺非斗也勺挹于尊彝而注诸爵瓚斗挹于大器而注诸尊彝以祈黄耆以下举酒而祝之如此祈犹祝也黄耆解见南山有台篇台通作鲐说文云海鱼名台背毛云大老也郑云大老则背有鲐文按刘熙释名云七十曰耄头髮白耄耄然也八十曰耄耄铁也皮肤变黑色如铁也九十曰鲐背今言黄耆谓髮白复黄则已过于耄言耆者谓皮有班黑如冻梨色则已过于耄然不但黄耆而已又且进而至于鲐背则老之极也郑云在前曰引在旁曰翼说文云考老祺吉也介郑云助也景福谓彰明可见之福凡人老则志昏气衰往往昧於所适怠于所行故愿冥冥之中若或引之谓引其志使不昏也若或翼之谓翼其气使不衰也盖不特享永年之寿而且有惠迪之吉所谓助之以景福也公刘既能笃同姓之爱又能推之以及于异姓极其恩义于燕饮之际故一时与燕者咸相与祝愿之如此左传云雅有行苇昭忠信也其亦为上下交相爱而言与】

行苇四章章八句【朱子云毛七章二章章六句五章章四句郑八章章四句毛首章以四句兴二句不成文理二章又不叶韵郑首章有起兴而无所兴皆误今正之如此 序云行苇忠厚也周家忠厚仁及草木故能内睦九族外尊事黄耆养老乞言以成其福禄焉按养老乞言无射礼郑玄引乡射礼文告于乡先生君子者当之此乃乡射次日劳司正之礼宾不与徵惟所欲故有乡先生君子与焉燕射礼同乡射特谓射礼如之非谓所行之礼皆如之也可比而一之耶朱子诋序谓随文生意无复伦理是矣然疑此诗为祭毕而燕父兄耆老之诗则又未免为末章曾孙二字所误燕毛之礼在祭毕宾兴之後如楚茨之燕不及异姓而况篇中又有舍矢序宾之事其非燕毛之礼甚明申培伪说剿袭朱传而子贡传又并以为训成王之诗亦未

有以见其诚然序较近右但言周家而不斥言其世岂亦知其为周先世之诗耶】

诗经世本古义卷一

卷二

<经部,诗类,诗经世本古义>

钦定四库全书

诗经世本古义卷二

明 何楷 撰

殷盘庚之世诗一篇

长发大禘也【出序及子贡传申培说俱同】盘庚时之诗【苏辙云大禘之祭所及者远故其诗历言商之先后又及其卿士伊尹盖与祭于禘者也今按禘之名义有三一曰时禘祭义言春祭曰禘夏祭曰禘秋祭曰尝冬祭曰烝旧说以为此夏殷之礼也故王制曰天子犴禘禘尝禘烝诸侯禘一犴一禘一尝一烝其所谓禘即夏禘也及周祭改春曰祠夏曰禘惟烝尝如旧而以禘为殷祭则时禘之名至周而废一曰吉禘谓丧毕即吉而致新死者之主于太庙若竹书之吉禘于先王左襄十六年晋人言寡君之未禘祀是也一曰大禘尔雅以为大祭礼大传篇谓不王不禘王者禘其祖之所自出以其祖配之所谓祖之所自出者如商周以稷契为始祖而稷契之所自出则啻也郑康成见祭法禘文皆在郊上遂以大祭圆丘谓之禘而不知祭法所以先禘于郊者谓郊只及其始祖而禘则上及其始祖之所自出以其所祀之祖最远故耳於祀天无预也及其解祖之所自出则谓王者之先祖皆感太微五帝之精以生苍则威灵仰赤则赤熛怒黄则含枢组白则白招拒黑则汁光纪皆用正岁之正月郊祭之尧赤精舜黄禹白汤黑文王苍皆本於讖纬之说尤为支离妖妄先儒多攻之自赵伯循及杨氏伸大传之旨而大禘之义始明惟汉儒皆以大禘为合祭羣庙程子胡致堂皆从其说而赵杨泥大传中以其祖配之一语谓禘祭推始祖之所自出其配之者惟始祖一人而已朱子亦以为然故疑长发之诗广及羣庙宜为禘祭之诗今即据大传本文观之其首曰礼不王不禘王者禘其祖之所自出以其祖配之而即继之曰诸侯及其太祖大夫士有大事省于其君于禘及其高祖马端临谓玩其文意亦似共只说一祭天子则谓之禘所谓不王不禘而禘则及其祖之所自出诸侯则不可以言禘而所祭止太祖大夫士又不可以言禘必有功劳见知于君许之禘则于禘可及高祖盖共是合祭祖宗而以君臣之故所及有远近故异其名也此可谓深得书意者矣盖禘之为言谛也谛者审也所以取名为禘者一则如宋神宗谓审谛其祖之所自出自秦汉以来谱牒不明其禘礼固可废者是也一则如许慎说文谓审谛昭穆张纯谓谛諝昭穆尊卑之义是也然则夏祭之名禘者以禘乃禘为禘尝禘烝之始有三昭三穆在焉而吉禘之名禘者亦为初入庙之主将以其班祔二者之义皆取辨其昭穆斯则大禘之礼祭其祖之所自出於始祖之庙而七庙之主皆在亦以明矣可无疑於长发之为大禘矣然则大禘配食固兼及毁庙欤曰以大传文观之则不及毁庙也彼谓诸侯及其太祖大夫士于禘及其高祖则是但据见在五庙三庙而言以此例天子禘其祖之所自出亦惟以见在七庙之主配耳何得及毁庙乎若夫合毁庙未毁庙之主而皆祭于太庙则谓之大禘然大禘虽大

而不及于太祖之所自出则其礼差小于大禘大禘与郊并重国语谓禘郊之事则有全烝又谓禘郊不过茧栗是也大禘虽及于毁庙之主而不过始于太祖则其所始者亦与诸侯同而已故曰禘大而禘小也禘又有小禘谓之时禘其所合祭者惟及未毁庙之主则时禘亦在其内即王制所谓禘祫禘尝禘烝是也从来诸儒论禘祫者纷纷愚推?其实不过禘二祫二而已大禘之礼重于大禘追远祖也大禘之礼别于吉禘隆合祀也吉禘之礼广于小禘叙新主也小禘之礼异于植祐嫌黜祭也吉禘独新主为然小禘则每岁皆有其大禘大禘行礼之岁数则经传无文惟春秋文二年大事于太庙公羊传曰大事者何大禘也大禘者何合祭也其合祭奈何毁庙之主陈于太祖未毁庙之主皆升合食于太祖五年而再殷祭何休张纯郑玄皆谓五年而再殷祭者三年而禘五年而禘也此盖本纬书之说所以取三年五年者谓三年一闰天气小备五年再闰天气大备耳而杨氏辟之以为公羊所言殷祭指大禘也五年再举谓三年一禘五年再禘也於禘祭乎何与今据公羊本文则杨说为正然则当以何时禘也愚独有取于刘歆之说也谓礼去事有杀故春秋外传曰日祭月祀时享岁贡终王祖祢则日祭曾高则月祀二祧则时享坛墠则岁贡大禘则终王德盛而游广亲亲之杀也弥远则弥尊故禘为重矣歆所谓大禘则终王者谓每一王终新王即位则行大禘之礼蛮夷各以其珍贡来助祭也如此则不失之忘亦不失之黜欲行大禘者惟此为允矣若大禘之月崔灵恩谓祭以秋张纯谓祭以冬愚未知孰是乃纯议大禘以夏四月阳气在上陰气在下为正尊卑之义则愚亦有取焉凡礼之行也必追其本禘夏祭也然则大禘之当用夏月亦断断无疑也盖古礼之无徵久矣虽孔子且苦文献之不足而吾乌从正之要以殷实因夏周实因殷其大致所在固有可类推而得者又按此诗末章举及阿衡正配享太庙之事则固大禘之一证也何以明之书盘庚篇告有位之辞云古我先王暨乃祖乃父胥及逸勤兹予大享于先王尔祖其从与享之孔安国谓大享者烝尝也於礼无据周礼司尊彝职云凡四时之间祀追享朝享先儒谓禘追祭其所自出故为追享禘羣主皆朝于太祖而合食故为朝享皆在四时之间故曰间祀此其说与盘庚之言大享者合禘祫皆以享名而禘尤大于祫故以大享名也享亦通作飨礼器言大飨其王事与乐记言大飨之?尚玄酒而俎腥鱼大羹不和有遗味者矣大戴礼亦云大飨尚玄尊俎生鱼先大羹贵饮食之本也大飨尚玄尊而用酒食先黍稷而饭稻粱祭啖大羹而饱乎庶羞贵本而亲用贵本之谓文亲用之谓理两者合而成文以归太一夫是谓大隆盖大禘追及远祖有冥漠之思焉故其礼意与郊同如此今盘庚言功臣配享正在大享之时则序以长发为大禘信非妄矣何休亦云禘所以异于祫者功臣皆祭也是诗也当作于盘庚之世观其以兹予大享为言则知功臣配祭其礼自盘庚始矣先是竹书载沃丁八年祠保衡如使早有配祭之礼则亦安用专祀为哉】

濬哲【陆德明本作愬】维商【阳韵】长发其祥【阳韵】洪【丰氏本作浚】水芒芒【阳韵丰本作汭汭】禹敷下土方【阳韵】外大国是疆【阳韵】幅隕【华氏本丰本俱作员】既长【阳韵】有域方将【叶阳韵资良翻】帝【列女传无帝字】立子生商【见前赋也濬本深通川之义尔雅以为幽深也哲说文云知也濬哲维商赞商家能推其祖之所自出以制大禘之礼也乐记曰作者之谓圣述者之谓明孔子曰明乎郊社之礼禘尝之义治国其如示诸掌乎即此诗赞濬哲之意论语云或问禘之说子曰不知也知其说者之於天下也其如示诸斯乎指其掌朱子云禘之意最深长如祖考与自家身未相辽絶祭祀之理亦自易理会即如郊天祀地犹有天地之显然者不敢不尽其心至祭其始祖己自大段濶远难尽其

感格之道今又推其始祖之所自出而祀之苟非察理之精微诚意之极至安能与于此哉故知此则治天下不难也愚按诸侯不得祖天子大夫不得祖诸侯分有所限也稷契皆旁支宜不得祖帝嗇然其子孙既有天下而为天子矣彼为嗇嫡传而主嗇祀者则皆其臣也即越常格以祭之其谁曰不宜故大传曰礼不王不禘而孔子谓知禘说则明于天下皆谓惟天子始足以为此非诸侯大夫所可例也推此意也人所生有本焉有本之本焉极其本之本而不以本支之分为限则人物可以同原而至于天矣故大禘之礼与郊同意者也烝皆以全牲皆以蜚栗则以所自出之帝尊而且远故亦以天道事之也虽然周人立庙惟及姜嫄不敢及嗇仅于大禘一祀之而已圣人制礼之严固如此长发其祥邇开商兴王之祥繇于帝嗇也祥者吉之先见者也商家之发见其祲祥者已久实自帝嗇之世矣微帝嗇则契安从生故今日於大禘祀之也洪水孟子说文皆以为洚水也洚者水不遵道也芒通作荒说文以草淹地为荒故借为水淹地之义敷说文云布也犹分也书曰禹敷土蔡沈谓分别土地以为九州是也方四方也尚书序曰帝厘下土方楚辞天问曰禹之力献功降省下土方语法同此毛传云诸夏为外孔颖达云对京师为内也疆说文云界也当洚水淹地芒芒之时下土之方几莫得而辨禹治水之後乃始分别土地定其方域自京师之外凡可以建为大国者则从而区昼其疆界以待新封之用此大禹弼成五服至于五千之事言此所以为封契发端也今按禹贡纪锡土正在治水成功之後幅说文云布帛广也陨通作圆说文云圜全也统计舜时五服之广如布帛之幅然四面圆全而无欠缺又长远而无涯际也有娥契母家所封国也契母为嗇次妃史记言桀败于有娥之墟国名记谓其地在陕虢间盖汤先败桀师于此也将通作壮说文云大也有娥以契之故当时方且昌大其国也帝者天之主宰篇中三举帝皆指天言子谓有娥氏之女子即契母也子生二字连读不与下商字相连谓其女子之所生者正指契也金履祥云生犹甥也谓帝立有娥氏女所生者为商也史记云契长而佐禹治水有功帝舜乃命契为司徒封于商赐姓子氏愚按契之封商虽帝舜命之而皆本于天意以契能敬敷五教有可封之功故归之于帝立焉此章言商之受命基于契而契则帝嗇之所生所以着禘祭之繇也】玄王桓拨【曷韵亦叶屑韵笔别翻韩诗作发】受小国是达【曷韵亦叶屑韵陀悦翻】受大国是达【同上】率【汉书作帅】履【外传说苑汉书俱作礼】不越【月韵亦叶曷韵户括翻】遂视【丰本作眎】既发【月韵亦叶曷韵北末翻】相【去声】土烈烈【屑韵】海外有截【屑韵丰本此下又有一章云冥勤于官水国载安有易凶顽仆牛是践帝命式甄上甲桓桓孝思孔宣注引路史谓仆牛者河伯名也盖因礼记有冥勤其官国语有报上甲微之文诗不应舍此二君而不之及故依附而益之赋也玄王毛传云契也按玄者幽远之义称契为玄王亦犹曾孙之下为玄孙盖以其为远祖而名之或谓】

【其生因玄鸟降得名而郑又谓黑帝所感生故以玄称皆不可信孔云国语曰玄王勤商十四世而兴玄王为契明矣又云昔我先王后稷我先王不窋韦昭谓周之禘祫文武不先不窋故通谓之王商颂亦以契为玄王是其为王之祖故呼王非追号为王也桓通作和酈道元读尚书桓夷底绩桓作和汉书注云陈宋之间言桓声如和今犹谓桓表为和表拨说文云治也钱天锡云当时混沌之窍未凿而颛蒙之性亦未开非拨之不可拨昏而使之明拨乱而使之治皆拨也愚按桓拨谓和以拨之即舜所云敷教在宽也孟子载放勳命契之辞曰劳之来之匡之直之辅之翼之使自得之又从而振德之此可谓之桓拨矣受小国是达受大国是达者郑玄云始尧封之商为小国舜之末年乃益其土地为大国言能达其教令孔云中候握河纪

说尧云封稷契皋陶赐姓号是尧封之也考河命说舜之事云褒赐羣臣赏爵有功稷契皋陶益土地是舜益地为大国也陆化熙云达即百姓亲五品逊教化无窒碍之意率通作□循也履说文云足所依也越说文云度也犹言踰也契能以身教故其国中之民皆□循契身之所践履如亲义序别信之类无踰越者视说文云瞻也发者奋起之意金履祥云遂视既发其观瞻之者皆感发也愚按此泛指天下人而言不在契本国之内者曰遂曰既皆速化之辞相土契之孙昭明之子郑玄谓相土承契之业入为王官之伯出长诸侯王肃谓相土在夏为司马之职掌征伐要皆以诗辞想像之殊无明据竹书载帝相十五年商侯相土作乘马遂迁于商丘与左传言陶唐氏火正阍伯居商丘相土因之者合其曰作乘马则此诗所咏也乘马即甸赋也班固汉志谓殷周以兵定天下立司马之官设六军之衆因井田而制军赋四井为邑四邑为丘丘十六井也有戎马一匹牛三头四丘为甸甸六十四井也有戎马四匹兵车一乘牛十二头甲士三人卒七十二人干戈备具是为乘马之法今据竹书所载则乘马之法夏后之世相土固先为之矣烈说文云火猛也烈烈状其威也海外之与海内华夷之界也截说文云断也乘马之法行则兵威大振方行天下至于海表罔有不服彼海外蛮夷之国截然守其界限母敢窥伺内地实偏处此者故曰有截也刘敞云夷狄於中国无事焉其於天子世一见则诸侯虽善其交际不得而通也是以春秋亦不与其朝不与其朝者惩淫慝一内外也周公致太平越裳氏重九译而献其白雉公曰君子德不及焉不享其贄愚按观此可以得海外有截之义契始封商至相土迁于阍伯之墟以主大火厥後汤以亳兴其地即在商丘东南是开商基者契而开兴王之基者相土故商人祀契为始祖而其次即祀相土为不迁之宗焉】帝命不违至于汤齐【韵韩诗外传作跻】汤降不迟圣敬日跻【齐韵礼记作齐】昭假【丰本作格】迟迟【支韵】上帝是祇【支韵】帝命式于九围【叶支韵盈之翻 赋也此下四章皆述成汤之事帝命不违言契与相土能顺承天之命令不敢违背凡其兢业小心尽职于侯国者皆是也齐等也按说文训齐为禾麦吐穗上平也故有平等之义至于汤齐者言汤之不违帝命亦能与契相土等埒也韩诗外传云孔子曰先圣後圣其揆一也因引此诗又云圣人以己度人者也以心度心以情度情以类度类古今一也类不悖虽久同理故性缘理而不迷也诗曰帝命不违至于汤齐言古今一也降说文云下也不遲毛云言疾也愚按汤降不遲即书所谓疾敬德也此但以敬畏天命言晋语宋公孙固欲襄公礼晋公子重耳而引此诗谓汤降不遲者降有礼之谓特断章取义耳圣者造极之名辅广云圣敬云者言汤之敬乃圣人之敬也无一毫亏缺无一息间断朱子云汤工夫全在敬字上看来大段是一个修饬底人跻尔雅公羊传皆以为陞也日跻者文选注云言汤圣敬之道上闻于天也愚按跻而曰日有至诚无息之意韩诗外传云孔子曰德行寛裕者守之以恭土地广大者守之以俭禄位尊盛者守之以卑人衆兵强者守之以畏聪明睿知者守之以愚博闻强记者守之以浅夫是之谓抑而损之诗曰汤降不遲圣敬日跻又云周公曰易有一道大足以守天下中足以守其国家近足以守其身谦之谓也夫天道亏盈而益谦地道变盈而流谦鬼神害盈而福谦人道恶盈而好谦是以衣成则必缺衽宫成则必缺隅屋成则必加拙示不成者天道然也易曰谦亨君子有终吉诗曰汤降不遲圣敬日跻昭明也假通作假至也昭假者明其敬之所至欲使天知之也遲遲不屑屑系念也祇敬式法也俱见说文九围毛云九州也孔云九分天下各为九处若规围然故谓之九围也严粲云敬为圣人之敬言至诚也日跻言至诚无息也其昭假于天遲遲甚缓言汤无心于得天付之悠悠也汤无所觊幸故惟上帝是敬其诚专一然天自命之以为法于天下也钱云式九围有表正万邦之意未便是为天子下二章正式于九围之事礼孔子

闲居篇子夏曰三王之德參於天地敢问何如斯可谓参天地矣孔子曰奉三无私以劳天下天无私覆地无私载日月无私炤此之谓三无私其在诗曰帝命不违至于汤齐汤降不遲圣敬日齐昭假遲遲上帝是祇帝命式于九围是汤之德也引诗之意但取成汤能敬天命盖能敬天命则自能奉三无私矣】受小球大球【尤韵】为下国綴【齐鲁韩诗礼记注俱作啜】旒【尤韵齐鲁韩诗礼记注俱作卹】何【丰本作荷後同】天之休【尤韵】不竞不綌【尤韵】不刚不柔【尤韵】敷【左传後汉书俱作布】政优优【尤韵说文作忧忧】百禄是遒【尤韵说文作摯 赋也球孔安国云玉名禹贡雍州厥贡球琳虞书曰戛击鸣球球者玉磬之名而礼玉藻篇云笏天子以球玉则球可以为磬亦可为笏说文专以玉磬解球误矣小球大球朱子金氏皆谓小国大国所贄之玉也按聘义云天子制诸侯比年小聘三年大聘相厉以礼此天子之所以养诸侯兵不用而诸侯自为正之具也以圭璋聘重礼也已聘而还圭璋此轻财而重礼之义也周礼小行人合六币圭以马璋以皮璧以帛琮以锦琥以绣璜以黼此六物者以和诸侯之好故夏殷之世聘礼所用经无明文据此言受球则亦圭璋璧琮琥璜之类矣左传孟献子曰小国之免于大国也聘而献物於是有庭实旅百事亦同此刘向新序载汤出田见人张网四面而祝之曰从天坠者从地出者从四方来者皆罹吾网汤曰嘻尽之矣乃解其三面止置一面改祝曰欲左者左欲右者右欲高者高欲下者下不用命者乃入吾网汉南诸侯闻之曰汤德至矣及禽兽归之者四十余国竹书亦载夏桀二十三年释商侯履於夏台诸侯遂宾于商此诗言受球受共大抵皆此後事也下国郑云诸侯也綴说文云合箸也郑云犹结也孔云内则言衣裳绽裂纫箴请补綴是綴为连结之义也旒毛云章也按说文无旒字本作瑩云垂玉也冕饰周礼弁师职云王冕五彩纁十有二就皆五彩玉十有二徐锴云瑩之言流也自上而下动则逶迤若流水也陈氏云或谓之繁露其势然也若旌旗之流则名为游其後字改作旒而以为冕之所垂及旌旗之饰之通称故秋官大行人及考工记说旌旗之事皆云九旒七旒尔雅说旌旗之练旒九郑笺解此诗亦以旒为旌旗之垂者也夫以旒从?则是旌旗之属固不可通於冕饰然?下旒?殆不成字故知非古文也毛传解旒为章与说文合当从之襄十六年公羊曰君若贅旒然言诸侯反系属于大夫也此言綴旒与彼意相似而词有正反之异汤为冕下国诸侯为瑩綴之取其相系属之义也又荀子云夺然後义杀然後仁上下易位然後贞功参天地泽被生民夫是之谓权险之平汤武是也传曰斩而齐枉而顺不同而一诗曰受小球大球为下国綴旒此之谓也按荀子引诗之意政从伐桀後贊之非本义也又按礼八蜡之一曰卹表啜郑注礼记引此诗作为下国啜卹以古者井畔相连处谓之啜卹若卹亭乃田畷处此以督约百姓者成汤施布仁政为下国诸侯所会集亦如啜卹然其义似有据疑古文或如此并存之何说文云儋也犹言承任也休郑云美也言承任天之嘉美于我故为衆诸侯所归乡也竟说文云强语也一曰逐也郑亦云不逐者不与人争前後也綌说文毛传皆云急也不兢不綌以交邻国言今即汤事葛一节观之以大事小是不竞也葛伯放而不祀汤使遗之牛羊又使亳衆往为之耕是不綌也不刚不柔二句以布政于本国言刚则易失之猛柔则易失之纵不刚不柔寬严相济仁义不偏以此布政则可谓至和矣优通作忧按说文?忧忧三字义各不同?从心从页愁也心?则形于顔面故从心又从页页者首也忧从?从攴行之和也人有?行国则可以解之故从?又从攴攴所以行也忧从人定意从忧得声其义则饶裕也後人混?愁之?作忧变忧和之忧作□又通作优饶之优皆失本义又朱传解此优优如字以为寬裕之意亦通但据左传孔子引此诗有政是以和之言故宜通作忧耳百禄犹云多福迫说文云迫也言多福来迫近之如富贵逼人之意毛传训遒为聚则当通

作摯其义则收束也承上文言汤所以何天之休而受小大聘问之贄者何修得此哉汤之待小大诸侯未尝竞而欲驾其上也未尝絀而急须其来也其日所布政于本国者不一于刚不一于柔迭运并行而有优优和调之美故天下诸侯闻风心服而自不能已于玉帛之将直以缀旒奉之所谓百禄是遒者此也伊尹告太甲曰先王子惠困穷民服厥命罔有不悦并其有邦厥邻乃曰侯我后后来无罚当日诸侯咸宾于商其故实繇于此左成二年齐国佐对晋人曰四王之王也树德而济同欲焉五伯之霸也勤而抚之以役王命今吾子求合诸侯以逞无疆之欲诗曰布政优优百禄是遒子实不优而弃百禄诸侯何害焉韩诗外传云王者之等赋正事田野什一关市讥而不征山林泽梁以时入而不禁相地而正壤理道而致贡万物羣来无有流滞以相通移近者不隐其能远者不疾其劳虽幽闲僻陋之国莫不趋使而安乐之夫是之谓王者之等赋正事皆可与此诗互看又左传载仲尼曰政宽则民慢慢则纠之以猛猛则民残残则施之以宽宽以济猛猛以济宽政是以和诗曰不竞不絀不刚不柔布政优优百禄是遒和之至也韩诗外传亦云诗曰不竞不絀不刚不柔中庸和通之谓也又云言当之为贵也又云圣人养一性而御大气持一命而节滋味奄治天下不遗其小存其精神以补其中谓之志诗曰不兢不絀不刚不柔言得中也皆见兢絀刚柔二句文法相类故并引之不必与诗旨合也】受小共【丰本作贡下同】大共【叶冬韵居容翻亦叶肿韵居勇翻】为下国骏【大戴礼作恂】彪【叶董韵莫孔翻齐诗丰本俱作驪荀子大戴礼俱作蒙】何天之龙【冬韵亦叶肿韵丑勇翻大戴礼丰本俱作宠】敷【大戴礼陆德明本俱作傅】奏其勇【肿韵】不震不动【董韵】不難不竦【肿韵】百禄是总【董韵陆本作𩇑丰本作𠂔按此章以肿董二韵互叶盖音相近 赋也上章言诸侯通聘问此章言诸侯从征伐皆所谓帝命式于九围者也史记云汤征诸侯曰汝不能敬命予大罚殛之无有攸赦孟子云汤十一征而无敌于天下孔安国云汤为夏方伯得专征伐共通作供说文云设也谓陈设以给用也左传君谓许不供义正同此受小共大共者汤将征伐四方受小大诸侯供给如卒乘器具糗糒刍秣之类也以下文敷奏等语推之可见骏通作峻说文云高也彪说文云石大貌为下国骏彪者下国诸侯恃汤以安如倚赖于磐石然也齐诗以骏彪作骏驪谓马也然马岂所以比先祖亦不伦甚矣陶逸则云古人取喻恰当上言政事文也故以缀旒喻下言武功武也故以骏彪喻又荀子云从人之欲则势不能容物不能赡也故先王为之制礼义以分之使有贵贱之等长幼之差知贤愚能不能之分皆使人载其事而各得其宜故仁人在上则农以力尽田贾以察尽财百工以察尽器械士大夫以上至于公侯莫不以仁厚知能尽官职夫是之谓至平故或禄天下而不自以为多或监门御旅抱关击柝而不自以为寡故曰斩而齐枉而顺不同而一夫是之谓人伦诗曰受小共大共为下国骏蒙此之谓也引诗之意谓下之奉上名分当然於诗指亦近但以骏彪作骏蒙则殊不可解龙通作宠说文云尊居也因以为宠异之义言承任天之宠异乎我故小大诸侯皆奔命恐後如此也郝敬云人心所属即是天休人心所奉即是天宠敷奏与敷政之敷义同奏说文云进也敷奏其勇者布散而日进其勇言其武功之广也大戴礼云孔子曰不畏强御不侮矜寡是仲由之行也诗云受小共大共为下国恂蒙何天之龙傅奏其勇夫强乎武哉文不胜其质震如易震不于其躬于其邻之震动说文云作也不震不动者言师出于不得已非人心忧惧之深国势摇动之极则兵不轻动也難竦据说文皆训敬於义难通難当通作赧面慙而赤也尔雅疏谓面慙曰難是也竦当通作悚说文云惧也总说文云聚束也成汤师出有名故无愧怍亦无恐惧于是小大诸侯皆倚之以为安各出所有以供其用而为百禄之所总聚也书仲虺之诰曰初征自葛东征西夷怨南征北狄怨曰奚独

後予攸徂之民室家是庆曰俟予后后来其苏汤之行师如是亦何難惧之有百禄是適与何天之休应百禄是总与何天之龙应天休天龙与第三章帝命应】武王载旆【叶曷韵蒲拔翻韩诗外传荀子俱作发说文作𣎵】有?秉钺如火

烈烈【屑韵】则莫我敢曷【韵亦叶屑韵阿竭翻汉书丰本俱作遏】苞【汉书注作包】有三蘖【屑韵亦叶曷韵牙葛翻汉书注作栝】莫遂莫达【曷韵亦叶屑韵陀悦翻】九有九截【屑韵】韦顾【汉书作鼓】既伐【月韵亦叶屑韵读如穴胡决翻】昆吾夏桀【屑韵亦叶月韵居竭翻 赋也此章述成汤伐桀之事盖至是始为天子也武王汤也解见玄鸟篇旆说文云继旆之旗沛然而垂解见出车篇所谓续旆末为燕尾者也载旆者载之於车上也礼曰德车结旌武车绥旌绥谓垂舒之也垂旌所以为战昔晋治兵建而不旆已而旆之诸侯畏之此诗言汤之载旆尚未及战也第载之於车以待将战而建耳?说文云虎行貌或以为敬也徐锴云虎之行兢兢然有威故谓敬为?秉持也钺本作钺说文云大斧也周礼注云秉钺所以为将威也有?秉钺朱子云言恭行天罚也顔师古云汤虽秉钺以敬为先辅广云载旆秉钺不敢不?即所谓临事而惧也愚按此亦与第三章圣敬相应史记称夏桀为虐政淫荒而诸侯昆吾氏为乱汤乃兴师率诸侯伊尹从汤汤自把钺以伐昆吾遂伐桀然则此章言载旆秉钺专为伐昆吾夏桀纪事韦顾既伐特追数之耳上章言敷奏其勇则皆伐韦顾之类也如火烈烈者郑云兴师出伐志在诛有罪其威势如猛火之炎炽也莫之为无音之转也曷说文云何也朱子云谁何也按谁何者诘问谁何之辞然此亦谓昆吾夏桀不敢诘成汤耳钱天锡云如火二句以戒惧为奋杨理直气壮故威灵如此一说曷通作遏说文云微止也谓缴绕使止也亦通荀子云仁人之兵聚则成卒散则成列延则若莫邪之长刃婴之者断兑则若莫邪之利锋当之者溃圜居而方正则若盘石然触之者角摧且夫暴国之君将谁与至哉彼其所与至者必其民也而其民之亲我欢若父母其好我芬若椒兰彼反顾其上则若灼鲸若仇讐人之情虽桀跖岂又肯为其所恶贼其所好者哉是犹使人之子孙自贼其父母也彼必将来告之夫又何可诈也诗曰武王载发有?秉钺如火烈烈则莫我敢遏此之谓也以草包裹物曰苞即苞苴之苞也蘖说文云伐木余也欧阳修云韦也顾也昆吾也所谓三蘖也按汤十一征其见于尚书及竹书者如葛如有雒如荆如温皆次第夷灭独韦顾昆吾三国後亡故以蘖称桀树此三国为私党如以草苞裹余蘖故曰苞有三蘖也遂即遂生复性之遂达即驿驿其达之达遂达皆从蘖字生出勾则能遂萌则能达非三蘖所可望也九有九州也解见玄鸟篇有截与海外有截义同九州诸侯截然判断不与三蘖相通故桀虽有意包畜之而终至於局促莫能申遂穷窘莫能通达也刘向说苑载汤欲伐桀伊尹曰请阻之贡职以观其动桀怒起九夷之师以伐之伊尹曰未可彼尚能起九夷之师是罪在我也汤乃谢罪请服明年又不贡职桀怒起九夷之师不起伊尹曰可矣汤乃兴师此所谓九有有截者也又书伊尹曰惟尹躬暨汤咸有一德克享天心受天明命以有九有之师爰革夏正夫九有既联属於汤则其判断于夏可知已既者已事之辞朱子云韦顾既伐而昆吾夏桀次之此纪当时用师之序也郑云三国党于桀恶汤先伐韦顾克之昆吾夏桀则同时诛也按竹书桀二十八年昆吾氏伐商商会诸侯于景亳遂征韦商师取韦遂征顾二十九年商师取顾三十年商师取昆吾三十一年商自陟征夏邑克昆吾大雷雨战于鸣条夏师败绩桀出奔三腰战于郟获桀于焦门放之于南巢而王应麟引郡国志云汤伐桀桀与韦顾之君拒汤于莘之墟遂战於鸣条之野此与诗辞不合殆不足信又郑语史伯云祝融其後八姓己姓昆吾顾则夏灭之彭姓豕韦则商灭之昆吾

顾既灭于夏而此有昆吾顾者盖既灭而复立之亦犹豕韦为商所灭而其後世仍为商伯古五伯数中所谓商豕韦是也一统志云直隶大名府滑县古豕韦氏之国顾城在山东东昌府濮州范县东南五十三里濮州古颛顼之墟曰帝丘夏为昆吾氏所居桀都安邑即今山西平阳府解州安邑县北二十里有鸣条冈郡国志云安邑有昆吾亭汤伐桀战处寰宇记云昆吾亭盖汤伐桀之时昆吾以兵助桀同时而灭故有亭非国于此也左昭十八年二月乙卯周毛得杀毛伯过而代之苾弘曰毛得必亡是昆吾稔之日也孔云昆吾以乙卯日亡也桀亦以乙卯日亡故檀弓注云桀以乙卯亡未知何月也黄佐云初伐韦次伐顾庶几夏桀知所改图也及其终不悛也然後兴南巢之师以快人神之愤苟徒以为治乱者必先其党剪其枝叶而後除其本根则是後世以计取天下之为而非圣人恭行天讨之意矣陈际泰云三蘖不数葛何也葛非桀党也葛非桀党而随以兵何也肘腋之祸不先剪之而虞後顾也韦顾昆吾夏桀平叙之而不殊何也不正其为天子也不正其为天子而汤之师始不负於天下矣自帝命不违至此皆纪汤事汤繇七十里诸侯起而为天子故叙述特详或问先君商先如冥如微皆有功德可称而诗自契外独举相土以及于汤其他皆不之及何也曰此祭法所谓二祧者也祭法云王立七庙一坛一墀曰考庙曰王考庙曰皇考庙曰显考庙曰祖考庙皆月祭之远庙为祧有二祧享尝乃止去祧为坛去坛为墀坛墀有祷焉祭之无祷乃止去墀为鬼按考庙者父庙也王考庙者祖庙也皇考庙为曾祖显考庙为高祖其曰祖庙则始祖也始祖而下四亲而上於庙当毁而择其中之有功德者以为二祧旧说谓祧之言超也超然上去也特为有功德而留故谓之祧也外此若高祖之父则去祧为坛高祖之祖则去坛为墀此後又有从坛迁来墀者则此前在墀者迁入石函为鬼皆以其无功德故也合始祖二祧与四亲共为七庙故伊尹告太甲曰七世之庙可以观德所谓观德则专指二祧而言也先儒皆疑此礼与王制三昭三穆并太祖庙为七之说不合今以此诗观之祭法所传不为无据大抵前代礼耳自汤而下至于盘庚凡传十八君即以父子相传为一世推之亦有十世除盘庚四亲庙外自第六世太戊而上已皆在应毁之列而汤身翦王业及上世相土肇基王迹俱无毁理故特立为二祧後世如周文武立二世室亦以其应毁故为之则犹之二祧之意但殷合二祧为七庙而周则除二世室为七庙耳若太甲为太宗太戊为中宗则其庙又在七庙之外是诗前惟颂相土後惟颂汤而已此又可证为二祧之最确者自二祧而外邇及玄王则以其为始祖又邇及长发其祥则以啻为始祖之所自出故愚谓大禘之礼七庙之主皆在既非广及毁庙亦非专以始祖配盖窃有窥于此也】昔在中叶【韵丰本作桀】有震且业【叶韵】允也天子【纸韵】降于卿士【纸韵】实维阿【丰本作伊】衡【叶阳韵户郎翻】实左右商王【阳韵 赋也 禘于太庙则功臣与祭与祭必非一臣而此章独言伊尹者以伊尹为开国元勳故特举之也朱子云承上文而言昔在则前乎此矣叶毛云世也按叶文从世而来故训叶为世此诗前言相土後言成汤则所谓中叶者其世数居于相土成汤之中者也震孔云惧也以国势不定言业毛云危也以人心不安言如振之为有易所杀微之恢复居殷未久而复返商丘皆震且业象也不然何至汤而仅仅有七十里乎允信也天子指汤也允也天子讚汤有圣德信乎其为真主也降下也卿士指伊尹也称其位曰卿称其德曰士周官称六卿亦曰戒尔卿士降于卿士言汤屈己以下伊尹不敢自高也孟子曰故将大有为之君必有所不召之臣欲有谋焉则就之其尊德乐道不如是不足以有为也故汤之于伊尹学焉而後臣之故不劳而王此即降于卿士之说也亦与第三章汤降不迟相应一说苏辙云信矣天之子商也降之卿士而後商室以兴亦通阿衡官名郑云阿倚也衡平也伊尹汤所依倚而取平故以为官名郝敬云如太

公之号尚父也愚按此宰相之位上卿之职至太甲改官名为保衡故书君奭篇云成汤既受命时则有若伊尹格于皇天在太甲时则有若保衡以伊尹保衡止是一人故一称其名一称其官也上实维指其人下实维指其功左右者谓佐佑之以敷政奏勇伐夏救民也汤受命仍旧国号曰商王孟子云伊尹耕于有莘之野而乐尧舜之道焉非其义也非其道也禄之以天下弗顾也系马千驷弗视也非其义也非其道也一介不以与人一介不以取诸人汤使人以币聘之嚚嚚然曰我何以汤之聘币为哉吾岂若处畎亩之中繇是以乐尧舜之道哉汤三使往聘之既而幡然改曰与我处畎亩之中繇是以乐尧舜之道吾岂若使是君为尧舜之君哉吾岂若使是民为尧舜之民哉吾岂若于吾身亲见之哉天之生此民也使先觉觉後知使先觉觉後觉也予天民之先觉者也予将以斯道觉斯民也非予觉之而谁也思天下之民匹夫匹妇有不与被尧舜之泽者若已推而内之沟中其自任以天下之重如此故就汤而说之以伐夏救民沈约云汤在亳能修其德伊摯将应汤命梦乘船过日月之旁吕氏春秋云桀为无道暴戾顽贪天下颤恐而患之言者不同纷纷分分其情难得于辛任威凌轹诸侯以及兆民贤良鬱怨杀彼龙逢以服群凶衆庶泯泯皆有远志莫敢直言其生若惊大臣同患弗周而畔桀愈自贤矜过善非生道重塞国人大崩汤乃惕惧忧天下之不寧欲令伊尹往视旷夏恐其不信汤繇亲自射伊尹伊尹奔夏三年反报於亳曰桀迷惑于末嬉好彼琬琰不恤其衆衆志不堪上下相疾民心积怨皆曰上天弗恤夏命其卒汤谓伊尹曰若告我旷夏尽如诗汤与伊尹盟以示必灭夏伊尹又复往视旷夏听於末嬉末嬉言曰今昔天子梦西方有日东方有日两日相与鬬西方日胜东方日不胜伊尹以告汤商涸旱汤犹发师以信伊尹之盟故令师从东方出於国西以进未接刃而桀走逐之至太沙身体离散为天下戮不可正谏虽後悔之将可奈何汤立为天子夏民大悦如得慈亲朝不易位农不去畴商不变肆亲鄣如夏此之谓至公此之谓至安此之谓至信尽行伊尹之盟不避旱殃祖伊尹世世享商今按伊尹身为元功世享盛祭专美有商及周公时命成王记功宗以功作元祀其典实□于此】长发七章一章八句四章章七句一章九句一章六句【杨氏云诗颂长发大禘但述玄王以下而不及於所自出之帝则安得谓之禘诗乎朱子亦疑大禘不及羣庙之主此宜为祫祭之篇今按篇首即以长发其祥一语开端明是指帝嘗而言未尝不及於所自出之帝也岂必举嘗之名而後谓之及嘗耶昔朱子疑为祫祭则天子夏秋冬三时之祭皆祫其以功臣配享惟当在祫烝耳月令十月有大饮烝之文指祫烝也周礼夏官司勲职云王功曰勲国功曰功民功曰庸事功曰劳治功曰力战功曰多凡有功者铭书于王之太常祭於大烝司勲诏之烝冬祭也谓之大者物成衆多之时具祭比三时为大也方是时百物皆报焉祭有功宜矣礼记祭统卫孔悝之鼎铭曰勤大命施于烝彝鼎亦谓配享于烝祭也此诗如以为祫烝亦无不可但彼乃周礼而殷礼别无所考愚但以盘庚大享之言与诗序大禘之说合故从之】

诗经世本古义卷二

卷三

钦定四库全书

诗经世本古义卷三

明 何楷 撰

殷高宗之世诗三篇

那祀成汤也【出序子贡传申培说朱传俱同 序云微子至于戴公其间礼乐废坏有正考甫者得商颂十二篇於周太师以那为首鲁语闵马父亦云昔正考父较商名颂十二篇於周太师以那为首按正考父孔子之先也世本云宋湣公生弗甫何弗甫何生宋父宋父生正考甫正考甫生孔父嘉为宋司马华督杀之而絶其世其子木金父降为土木金父生祁父祁父生防叔为华氏所偪奔鲁为防大夫故曰防叔防叔生伯夏伯夏生叔梁纥叔梁纥生仲尼则正考甫是孔子七世祖也自微子至戴公据宋世家凡十君七世周宣王以戴公十八年崩幽王於戴公二十九年为犬戎所杀则戴公及正考甫皆当宣幽时也名颂韦昭以为颂之美者也序谓得之於周太师而鲁语但谓较之於周太师者孔颖达谓宋之礼乐虽则亡散犹有此诗之本考甫恐其舛谬故就太师较之然则较之而得其初本故亦谓之得也及孔子录诗之时又已亡其七篇惟存五篇而已其以那为首者从太师之初本商自成汤始有天下以那为祀成汤之诗故也愚所以定此诗作于高宗武丁之世者遍考经传惟高宗武丁祭成汤见于尚书序及史记即谓祀乃常事不能偏书然观高宗免丧弗言作书诰羣臣自谓恭默思道梦帝赉予良弼此诗及烈祖二篇皆祀成汤之诗而一则曰绥我思成一则曰赉我思成颇与思道赉予之言相合盖高宗深于思者也礼记亦云武丁者殷之贤王当此之时殷衰而复兴礼废而复起故高而宗之谓之高宗武丁勤于祭祀固亦起废中之一事又按高宗祭成汤于彤日有雉雉之异书序及史记皆言飞雉升鼎耳而雉先儒谓雉乃野鸟不应入室故为妖异然鲜有能测其事应者孔安国以雉鸣在鼎耳为耳不聪之异刘歆以为鼎三足三公象也而以耳行野鸟居鼎耳是小人将居公位败宗庙之祀也今观高宗恐德弗类恭默思道固非耳不聪者且其先後辅之者甘盘傅说皆贤臣也则又乌有小人将居公位之事而至于将败宗庙之祀乎展转推寻始悟灾异之所自来政就此诗可见礼郊特牲篇云飨禘有乐而食尝无乐陰阳之义也凡饮养阳气也凡食养陰气也故春禘而秋尝春飨孤子秋食耆老其义一也而食尝无乐饮养阳气也故有乐食养陰气也故无声凡祭阳也祭义篇云君子合诸天道春禘秋尝霜露既降君子履之必有凄怆之心非其寒之谓也春雨露既濡君子履之必有忧惕之心如将见之乐以迎来哀以送往故禘有乐而尝无乐此诗明言顾予烝尝矣而乐音甚备此则高宗失礼之大者也言雉雉所以别于雉鸣也月令季冬雉雉说文解雉谓雄雌鸣也雷始动雉鸣而雉其颈罗愿谓雉鹄以足相勾雉以颈相勾故雉鹄从句雉雉亦从句非特鸣而已然易通卦验又云雉雉鸡乳在立春节立春者或在冬或在春总之为春之首故夏小正纪雉震响在正月也响雉同字戴德解雉震响云震也者鸣也响也者鼓其翼也正月必雷雷不必闻惟雉为必闻之何以谓之雷则雉震响相识以雷今高宗于秋烝冬尝之时而奏大乐此时雉未

应雒雉闻乐声而以为雷鸣故雒也乐之为雷者何也易曰雷出地奋豫先王以作乐崇德殷荐之上帝以配祖考是乐本象雷又雒闻声似雷者亦从而应齐景公作为路寝之台族铸大钟撞之庭下郊雒皆响许氏曰大钟声似雷震雒应而响鸣也天水冀南山有石鼓长丈三尺广厚略等汉成帝时有声如雷闻二百四十里野鸡皆鸣盖以为雷也然则此诗政当与书高宗彤日篇合看以乐不当作而作故雒不当雒而雒耳升于鼎耳则高宗行礼之处盖直指其事以变异告也先儒不达此义而欲和合诗与礼记之说则但曰礼谓食尝无乐者恐殷礼不如是而已亦鹵莽甚矣金嫌作诸史会编系那及烈祖二诗于武丁之四祀愚以为可信】

猗与【音余下同】那与置我鞀【丰氏本作鼗後同】鼓【麋韵】奏鼓简简衍我烈祖【麋韵 赋也猗之为咦与之为欬那之为雒皆音近也说文云南阳谓太呼曰咦欬安气也雒行有节也按安气者即助语之谓行有节则赞美庙中执事之人也置通作植郑玄云置读曰植按植本户植之名故以为树立之义鞀鼓曰植者以皆植木楹于其中故谓之植也鞀解见有磬篇鼓楹鼓也礼明堂位篇云夏后氏足鼓殷楹鼓周县鼓足鼓者加四足楹鼓者贯之以柱县鼓则县而击之也於八音中惟举鞀鼓者以楹鼓为殷之新制而鞀乃兆奏鼓者故首举之以该其余也奏者动作之义谓动作以出其声也简通作束说文云分别之也荀卿谓鼓其乐之君耶学记谓鼓无当于五声五声弗得不和盖鼓于宫商角徵羽之五声虽无所属然五声必得之而後和以此见奏鼓之人为最重故必先分别其能者而後使之奏也衍说文云行喜貌尔雅毛传皆以为乐也烈祖孔云正谓成汤是殷家有功烈之祖也具乐器选乐工将以乐我有功烈之祖此皆未作乐以前事至下章乃言作乐】 汤孙奏假【尔雅作嘏郑玄本作格】绥我思成【庚韵】鞀【说文作鼗】鼓渊渊【先韵说文丰本俱作鼗鼗】嘒嘒管声【庚韵】既和且平【庚韵亦叶先韵毗连翻】依我磬声【见上】於【音乌】赫汤孙【叶先韵荀缘翻】穆穆厥声【见上刘公瑾云连叶三声字见商人之质也愚按三声虽连用而本句上各用先韵一句间之亦似後人所谓辘轳体】庸【丰本作镛】鼓有斲【陌韵】万舞有奕【陌韵】我有嘉客【陌韵】亦不夷【尔雅注作怡】恻【陌韵陆德明本作绎 赋也汤孙欧阳修云斥主祀之时王尔自太甲以下皆可称汤孙愚按此指高宗也奏即奏鼓之奏然此则兼诸乐器而言下文鞀鼓管磬之属是也假通作假说文云至也谓奏乐以通之于烈祖也礼郊特牲篇云殷人尚声臭味未成涤荡其声乐三阋然後出迎牲声音之号所以诏告于天地之间陈阳云凡声阳也商人之祭先求诸阳而已日三成朏月三成时岁三成闰然则乐不三阋何以成乐哉今夫礼减而退以进为文乐盈而反以退为文涤荡其声则盈矣必继以三阋者以反为文也乐三阋则减矣然後出迎牲者以进为文也然明则有礼乐幽则有鬼神鬼者归也归之以从地神者申也申之以从天诏告鬼神于天地之间舍声音之号何以哉凡乐皆文之以五声播之以八音禽兽知声而不知音衆庶知音而不知乐通声音之号而知乐者其惟鬼神之灵乎如之何不诏告以此陈澧云鬼神在天地间与陰阳合散同一理而声音之感无间显幽故殷人之祭必先作乐三终然後出而迎牲于庙门之外欲以此乐之声音号呼而诏告于两间庶几其闻之而来格来享也黄佐云商人未祭之先而作乐如周人取萧祭脂亦於未祭之先以此求神於阳也绥郑云安也安我心所思而成之谓神明来格也礼记云齐之日思其居处思其笑语思其志意思其所乐思其所嗜齐三日乃见其所为齐者祭之日入室僂然必有见乎其位周旋出户肃然必有闻乎其容声出户而听忼然必有闻乎其叹息之声此之谓思成苏辙云凡此皆非有也而生於其思故谓之思成朱子云盖齐而思之

祭而如有见闻则成此人矣周昌年云我所思者成而心安是以思成而绥我也徐光启云古人之祭非是具文直是祖孙一气如将见之陈际泰云商人尊鬼而尚声声召风风召气气召神然神惧其褻而集焉则有汤孙之思矣思者气之精者也鬼神非其类也不至心有精气而借声以召之神无不格格者又烈祖已焉绥我思成信哉其绥也与黄佐云观思成之说可以见祭祀之理鞀鼓以下七句皆言汤孙当日所奏者陈阳云鼓所以作乐者也鼗所以兆奏鼓者也言奏鼓则鼗从之矣书曰下管鼗鼓合止祝敌记曰赐诸侯乐以祝将之赐子男以鼗将之盖祝以合乐鼗则兆鼓而已故其赐所以不同也孔颖达云祝所以节一曲之始其事宽故以将诸侯之命鼗所以节一唱之终其事狭故以将伯子男之命黄佐云乐记曰圣人作为鼗鼓柷敔圉箎此六者德音之音也然後钟磬竽瑟以和之干戚旄狄以舞之此所以祭于先王之庙也据此可证此诗首言鼗鼓之意而鞀与鼓为二物也渊通作鼗说文云鼓声也嘒说文云小声也管竹音也尔雅谓大管名箛其中名篴小者名篴郭璞谓管长尺围寸并漆之有底郑司农谓管如箎六孔其大中小之制无传郑康成谓如笛而小并两而吹之乃汉大予乐所用广雅则云管象箫长尺围寸八孔无底盖亦後世之制未必与古制合不足信也欧阳修云书曰下管鼗鼓盖自虞夏以来旧物常用者陈阳云郊特牲曰歌者在上方匏竹在下贵人声也仲尼燕居曰升歌清庙示德也下而管象示事也德成而上歌以咏之于堂上事成而下管以吹之于堂下岂非以无所因者为上有所待者为下耶又云言鞀鼓继之以渊渊言管声先之以嘒嘒何也盖鞀鼓必待奏之然後闻其声管声与鞀鼓合奏闻其嘒嘒之声知为管声而已此细大不踰无相夺伦之意也疏义云鼓为众音之主管则乐之小者举此二者则余乐在其中矣既和且平兼堂上堂下八音诸器言周语单穆公云声应相保曰和细大不踰曰平依说文云倚也犹言相附也磬郑云玉磬也朱子云堂上升歌之乐非石磬也孔云知是玉磬者以钟鼓磬管同为乐器磬非乐之主而云和平来依磬声明此异于常磬非石磬也陈阳云春秋之时齐侯以玉磬赂晋师止兵臧文仲以玉磬如齐告余郊特牲言诸侯宫架而击玉磬明堂位言四代乐器而拊搏玉磬玉之於石类也玉磬则出乎其类矣书言天球在东序诗言受小球大球盖物之美者莫如玉而球又玉之美出于自然者也先王因天球以为磬以其为堂上首乐之器其声清彻有隆而无杀众声所求而依之者也商颂曰依我磬声本诸此欤又云商乐以磬为主故言依我磬声舜乐以箫为主故言箫韶九成张子厚云玉磬声之最和平者可以养心其声一定始终如一邹忠胤云磬声非如诸声可以人力高下故依之则为和平又韩诗外传云居处齐则色姝食饮齐则气珍言语齐则信听思齐则成志齐则盈五者齐斯神居之诗曰既和且平依我磬声按此传虽於诗义无涉然寓意閎眇矣於叹美辞赫炽盛之意歌者赞汤孙所奏穆穆之声非赞汤孙也赫义本火赤貌五事言属火声音之盛亦如火性之上腾然故以赫象之欧阳云於赫者盛美之辞也不应自称盛美之孙以夸其先祖黄震云乐以悦神故曰於赫汤孙穆穆厥声以侈言其乐之美如饮食云苾苾芬芬以侈言其饮食之美凡以悦神非自夸也穆通作嘒说文云细文也声何以细文称乐记曰声成文谓之音通志载汤命伊尹作乐曰大濩修九韶六律闻宫声使人温良而宽大闻商声使人方廉而好义闻角声使人恻隐而仁爱闻徵声使人乐养而好施闻羽声使人恭谨而好礼此非穆穆而何庸通作镛陈暘云大钟谓之镛以能考大功也解见灵台篇前言鼓至此始言镛则镛之奏似在鼓之後然既言镛即继之以鼓则鼓之奏又在镛之後一篇之乐以鼓始终倘亦所谓鼓为乐之君而五声不得之则不和者欤陈暘云那祀成汤之乐堂上言依我磬声则戛击鸣球搏拊琴瑟之类举矣堂下言鞀鼓管镛则祝敌笙箫之类举矣详于乐而略于礼者以其祖有功而乐象

功故也斲说文云解也钟鼓有斲谓乐阕时也万舞名三代之舞皆名万夏小正曰丁亥万用入学商颂曰万舞有斲逸周书曰万献明明三终孔谓禹以万人以上治水汤以万人得天下何休亦谓武王以万人服天下故其乐舞皆称万也按书传及春秋传疏皆言汤因大旱祷于桑林之社而雨遂作桑林之乐名曰大濩左襄十年宋公享晋侯于楚丘请以桑林舞师题以旌夏而庄子亦言合于桑林之舞或即此万舞也奕说文云大也陈阳云美其缀兆之衆大也在商为大濩在周为大武周官皆以大司乐掌之其为衆大可知愚按此时乐已阕而将迎牲矣故舞者皆立其行列以待行礼而舞也嘉说文云美也郑云嘉客谓二王後及诸侯来助祭者蔡汝楠云於虞曰虞宾在位於商曰我有嘉客於周曰我客戾止圣人御世皆考宾国之化夷说文云平也恠说文云悦也亦不夷恠者言不敢视祭祀为平常之事徒取悦耳悦目以为娱乐而忘敬谨之意也下章言温恭有恪正与此互相发又按易有匪夷所思之文疑此不夷与彼匪夷相类谓嘉客闻乐而悦其悦至甚非比平常之悦也人悦如此神悦可知隐然含有先祖是听之意此烈祖之所以来假而能绥我思成也是义亦通学者详之】自古在昔【陌韵亦叶药韵息约翻】先民有作【药韵】温恭朝【丰本作皐】夕【陌韵亦叶药韵祥龠翻】执事有恪【药韵】顾予烝尝【阳韵】汤孙之将【叶阳韵资良翻赋也自从也对今皆谓古在说文存也进古言昔则昔又在古之前礼运篇孔子言後圣有作然後陈其牺】

【牲备其鼎俎列其琴瑟管磬钟鼓修其祝嘏以降上神与其先祖然在在昔之时已是中古之世未为上古而自古之古则不过下古而已先民先辈之人谓圣人也有作陆化熙云作为祭礼也是述作之作温恭者温温其恭盖安行而有常非勉强也朝夕自朝至夕也执事执庙中之事也恪本作憲说文云敬也恭敬之至如见大宾故字于心上施客也言尊祖敬宗万世通谊从我以前之古人存留往昔先圣人所剏造祭祀之礼其于将祭之前期虑事必豫具物必备自朝至夕常存其恭但见其温温然和柔及祭而行礼则一人各执一事致其恪慎不敢懈怠忽略凡以礼当如是今日汤孙之祭亦犹行古之道耳黄佐云商人尚声牲犹未入乐三阕然後备礼物盖时制也故此诗以乐舞悉数於前而温恭有恪之言始见焉盖亦因其所尚而然耳是岂後于礼哉鲁语云齐闻丘来盟子服景伯戒宰人曰陷而入于恭闵马父笑景伯问之对曰笑吾子之太满也昔正考甫较商之名颂十二篇於周大师以那为首其辑之乱曰自古在昔先民有作温恭朝夕执事有恪先圣王之传恭犹不敢专称曰自古古曰在昔昔曰先民今吾子之戒吏人曰陷而入于恭其满之甚也陷而後恭道将何为按马父之意谓以恭立教者犹将令其学古先民之恭而为之今乃以恭为陷于非道然则将以何者为得道乎顾说文云还视也季本云尝秋祭烝冬祭祭以秋冬为备故言祭者必举烝尝以见其余焉愚按曰烝尝者谓烝继尝而举知此乃冬祭也既言予又变称汤孙者意重在一孙字见一气流通不为非类之祀也将朱子云奉也苏云言汤其尚顾予烝尝哉此汤孙之所奉者庶几其顾之也钱天锡云音乐虽盛传恭虽远先祖虽格而孝子之心犹若有不敢必者至以祖孙一体望之商人之绥我思成即此可想见】

那三章一章四句一章十二句一章六句【旧作一章二十二句今按闵马父引自古四句为辑之乱则非止作一章明矣故正之韦昭云辑成也凡作篇章义既成撮其大要以为乱辞诗者歌也所以节舞者也曲终乃更变章乱节故谓之乱也郑笺以汤孙为太甲孔云殷本纪汤生太丁太丁生太甲太甲成汤适长孙也孙之为言虽可以关之後世以其追述成汤当在初

崩之後太甲是殷之賢主湯之親孫故知為指太甲也那祀成湯經稱湯孫則那之作當太甲時也按此義亦通并存之又韓詩序以此詩為美宋襄公也其說與史記宋世家謂宋大夫正考甫作商頌以美宋襄公者合即云宋得用天子禮樂以祀成湯然我有嘉客果宋所宜有乎】

烈祖彤祭成湯也書高宗彤日篇之所為作【朱傳以為亦祀成湯之樂與子貢傳申培說俱同愚所以定為彤祭者以那已為祀成湯之詩一祭固不容有二詩耳彤者祭明日又祭之名爾雅云周曰绎商曰彤夏曰復胙孫炎謂绎者祭之明日尋绎復祭也彤者相尋不絕之意邢昺謂復胙者胙是祭日以祭之旦日复陳其祭肉以賓尸也按說文彤字从舟其義則舟行也與祭事無涉古讀彤有融音故或通作融左傳其樂也融融其樂也泄泄而張衡思玄賦則曰展泄泄以彤彤是也又馬融廣成頌云丰彤對蔚彤亦通作融說文訓融云炊氣上出也炊氣上出綸綸不絕之義也但彤本音琛韻書收入侵韻不知何因改讀曰融殊不可曉知此詩為高宗詩者以那詩例之其稱烈祖同其末章言願予烝嘗湯孫之將同則其為一時之作明矣又知為彤祭事者以申錫無疆一語知之篇中娓娓但以降福為言則高宗勤祀之本意殆可想見當其亮陰三年之後雖既免喪而猶恐德不類不敢發言誠未知致治之方將安所出因而致孝于鬼神以祈福耳此亦商人尚鬼之習則然故于彤祭之日而有雉雛之異其臣祖己曰惟先格王正厥事乃訓于王曰惟天監下民典厥義降年有永有不永非天天民民中絕命民有不若德不聿罪天既孚命正厥德乃曰其如台嗚呼王司敬民罔非天胤典祀無丰于昵大意謂民受生于天乃天之胤嗣王之所司者在于敬民而已所謂敬民者惟在務民之義而已此享年有永之道毋徒丰于祭祀而欲邀福于昵近之祖宗為也他日傳說之進王也亦曰黷于祭祀時謂弗欽禮煩則亂事神則難合此二書及那烈祖二詩以觀則高宗早年之失端有在矣竹書載武丁二十九年彤祭太廟有雉來皇王大紀載高宗祭于成湯有飛雉之異王使以雉為扇曰以彰吾過而通志稱祖己訓王後武丁又責躬思道三年編髮重譯來朝者六國孔子曰吾於高宗彤日見修德而報之疾也苟繇其道致其仁則遠方歸德焉史記亦載武丁修政行德天下咸驩殷道復興帝武丁崩子帝祖庚立祖己嘉武丁之以祥雉為德立其廟為高宗】

嗟嗟烈祖【夔韻】有秩斯祜【夔韻】申錫無疆及爾斯所【叶夔韻讀如數爽主翻 賦也嗟嘆聲鄭玄云重言嗟嗟美嘆之深補傳云言烈祖而云嗟嗟以簡朴故也若周頌則言於穆於皇乃近于文矣烈祖湯也義見那篇秩積祜福也俱見說文有秩斯福即下文言申錫無疆是也惟有無疆之申錫則福斯積矣冀望之辭也申者申束之意故毛傳以為重也錫通作賜說文云予也無疆鄭云無竟界之期也爾指烈祖也蔣悌生云爾汝其辭如事生親省相語此質實之至也斯之為此所之為處皆音近也斯所謂烈祖神之所在當指祊而言說文謂門內祭先祖所以彷徨是也蓋正祭事畢則神可以歸矣孝孫孝子猶未忍其遽歸也故於明日又設祭然不知神之所在於彼乎於此乎則於門內以求之亦意神之尚依依於門內而未遽去也孔子謂周禮绎祭于祊祊在廟門之西其商彤所在雖無明文但以說文字義求之則門內之祭自古同之也申錫二句是倒文法曰庶其及爾神之尚在此處而重賜我湯孫以無界限之福乎向日正祭固已受厘矣今日又祭則神又當重降之福是所謂申錫也此章蓋初求神于祊之辭也】 既載清酤賚我思成【庚韻亦叶陽韻辰羊翻】亦有和【說文通釋作盃】

羹【庚韵亦叶阳韵卢当翻说文丰氏本俱作鬻】既戒既【申鉴作且】平【庚韵亦叶阳韵皮阳翻】醴【中庸申鉴丰本俱作奏】假【左传作嘏】无言时靡有争【庚韵亦叶阳韵诸良翻】绥我眉壽黄耆无疆【阳韵 赋也此章言彤祭行礼之事既者已事之辞载谓载之于尊清者清洁之义酤说文云一宿酒也徐锴云谓造之一夜而熟若今鸡鸣酒也愚按酒只用一宿而成者亦见商人尚质处仪礼有司彻篇是周大夫又祭之礼首言司宫掇酒注谓掇酒者撝益整顿之与此首言载清酤同也賚说文云赐也思成义与那篇同祭义云祭之明日明发不寐飧而致之又从而思之是也賚我思成者王肃云先祖赐我思之所欲成也孔穎达云神灵来至我孝子所思得成也蔡汝楠云賚我思成所谓有其诚则有其神谢显道云祖考之精神只聚於己之精神朱善云酒之清者方载而在樽则未献之时也而烈祖之神已与我以所思而成之人言应之疾也和羹者郑云五味调腥熟得节食之于人性安和荀悦云酸咸甘苦不同嘉味以济谓之和羹曹氏云鉶羹也按鉶羹肉味之有菜和者以其盛之鉶器谓之鉶羹有司彻篇所云羊鉶豕鉶即所以盛羊豕肉之羹者也朱子云仪礼於祭祀燕享之始每言羹定盖以羹熟为节然後行礼辅广云先酒而後羹亦其序也既戒既平者严粲云其事既戒谨而不苟其味既和平而适宜?说文云釜属假通作假说文云至也愚按此即雍人陈鼎之事也中庸误引作奏与汤孙奏假同文朱子遂谓古声奏族相近族声转平而为醴此恐不然二诗皆同时作也彼言奏假此言醴假明是异字何得混醴为奏乎凡祭则雍人必先陈鼎所以为烹牲体之用也今自鼎初至之时而即皆能秉其肃敬靡有諠譁又各执其事不相夺伦絶无彼此交侵职位以有纷争者此非主祭者之精专于假庙何能使助祭者人人顾化若此故中庸引此诗而申之曰君子不赏而民劝不怒而民威于鈇钺也又左昭二十年齐侯至自田晏子侍于遄台子犹驰而造焉公曰惟据与我和夫晏子对曰据亦同也焉得为和公曰和与同异乎对曰异和如羹焉水火醯醢盐梅以烹鱼肉燀之以薪宰夫和之齐之以味济其不及以泄其过君子食之以平其心君臣亦然君所谓可而有否焉臣献其否以成其可君所谓否而有可焉臣献其可以去其否是以政平而不干民无争心此借辞立义全非诗旨而郑笺泥此亦以和羹为喻助祭诸侯有和顺之德误矣眉壽以眉言黄以发言耆以面言是三者皆壽徵也解俱见南山有台篇言庙中之人既皆能致其诚敬举动得礼如此庶乎烈祖绥我汤孙以眉壽黄耆之福至于无有疆竟也】约軹错衡【叶阳韵户郎翻】八鸾鸛鸛【阳韵陆德明本作鏐】以假以享【叶阳韵虚良翻】我受命溥将【叶阳韵资良翻】自天降康【阳韵】丰年穰穰【阳韵】来假来飧【叶阳韵虚良翻】降福无疆【阳韵 赋也此章言今者之祭非偶然也实繇得人得天故使汤孙得尽其孝耳约軹二句解见采芑篇但鸛鸛彼作璫璫当从之軹衡以诸侯所乘之车言八鸾以诸侯所驾之马言假通作假至也享献也欧阳修云以假以享者诸侯既至而助享也我指汤孙也刘公瑾云歌工导达主祭者之意自先祖之身而指主祭者则曰汤孙自主祭者之身而言则曰我曰予立言虽殊所指之人则一溥说文云大也将奉也繇我汤孙受天春命故溥天下之诸侯皆乘其车马以来奉祭事也郑云祭祀溥助我言得万国之欢心也自从降下康安也岁大熟而五穀多有曰丰年穰穰穀茂盛之貌解见执竞篇孔云从天下平安之福故获得丰年穰穰吕祖谦云言时和岁丰祭礼得成所谓可以备物者也曹氏云得万国之欢心以事其先王所谓得人也降康丰年所谓得天也来假来飧指烈祖言飧之为言向也欧阳修云上言以享者谓诸侯来助祭致享于神也下云来飧者谓神来至而歆飧也承上言汤孙之得人得天如此庶乎烈祖之来至其坐来享其祭而下之以无界限之福也邹忠胤云那以管声磬声厥声相叶烈祖以申锡无疆黄耆无疆降

福无疆为节何商文之简质乃尔】顾予烝尝【阳韵】汤孙之将【叶阳韵资良翻赋也黄佐云上既曰赉我思成矣曰绥我眉寿黄耆无疆矣曰降福无疆矣此又曰顾我烝尝何也盖祖考】

【虽享而孝孙之心未敢必其享也故又致其丁宁之意如此苏辙云言其尚顾予烝尝哉此汤孙之所奉也愚按此二语虽与那篇结语相同而意微有别彼重在孙之一字谓以一气感通也此重在烝尝二字谓我於烝尝之礼相继举行其时时勤于祭祀如此当为烈祖之所鉴念也】

烈祖四章一章四句二章章八句一章二句【旧作一章二十二句今按朱子分为四节於语意血脉甚明故即依之以定章数辅广云那与烈祖皆祀成汤之乐然那诗则专言乐声至烈祖则及夫酒饌焉商人尚声岂始作乐之时则歌那既祭而後歌烈祖欤季本以为此必祭成汤而受厘降福之诗按此二说亦皆可通然果祭日所歌似不应有申锡之语序则云祀中宗也朱子谓此诗未见其为祀中宗序但不欲连篇重出又以中宗商之贤君不欲遗之耳邹亦云那烈祖两篇结语皆曰汤孙之将其均为祀成汤明甚商家贤圣代作不止中宗安知不皆有颂但正考父所得仅仅十二篇况至孔子删诗日乎】

玄鸟高宗报上甲微也【孔丛子论书篇云书曰维高宗报上甲微定公问曰此何谓也孔子对曰此谓亲尽庙毁有功而不及祖有德而不及宗故于每岁之大尝而报祭焉所以昭其功德也公曰先君僖公功德前行可以与于报乎孔子曰丘闻昔虞夏商周以帝王行此礼者则有矣自此以下未之知也鲁语展禽云有虞氏禘黄帝而祖顓頊郊尧而宗舜夏后氏禘黄帝而祖顓頊郊鲧而宗禹商人禘舜而祖契郊冥而宗汤周人禘嚳而郊稷祖文王而宗武王幕能帅顓頊者也有虞氏报焉杼能帅禹者也夏后氏报焉上甲微乃帅契者也商人报焉高圉大王能帅稷者也周人报焉几郊禘宗祖报此五者国之典祀也按竹书夏帝桀三十九年商侯迁于殷帝泄十二年殷侯子亥宾于有易有易杀而放之十六年殷侯微以河伯之师伐有易杀其君绵臣至殷武丁十二年报祀上甲微沈约注云殷侯子亥宾于有易而淫焉有易之君绵臣杀而放之故殷上甲微假师于河伯以伐有易灭之遂杀其君绵臣中叶衰而上甲微复兴故殷人报焉所以知此诗为报上甲微之乐歌者以宅殷土芒芒殷受命咸宜二语知之自契初封商鲁连子云在大华之阳皇甫谧云今上雒商是也即今陕西西安府之商州以地有商山故得商名契生昭明迁砥石事见世本其地不知所在昭明生相土迁商丘竹书载夏帝相十五年商侯相土作乘马遂迁於商丘左传所云陶唐氏之火正阍伯居商丘相土因之是也唐为宋州宋为睢阳郡在今为河南归德府商丘县季本云地称商丘者其亦因契本封而以名丘坎相土生昌若昌若生曹圉曹圉生冥竹书载夏少康十一年使商侯冥治河至帝杼十三年商侯冥死于河中间计三十四年鲁语及祭法所谓冥勤其官而水死者冥生振竹书以为殷侯子亥盖振名而子亥其字也实始迁殷计三十七年而为有易之君绵臣所杀国统几绝振生微字上甲乃杀绵臣而以殷兴仍居殷地是则殷之迁虽在子亥而昌殷绪以基王业者乃在上甲故殷人报之也皇甫谧谓微字上甲其母以甲日生故也商家生子以日为名盖自微始白虎通亦云殷道尚质故直以生日名子而谯周则谓死称庙主曰甲盖谓生称其名死则以其生之名为庙主也于理或然微生报丁报丁生报乙报乙生报丙报丙生主壬

主壬生主癸主癸生天乙是为成汤竹书载帝孔甲九年殷侯复归于商丘上距微杀绵臣之岁凡一百单三年不知所谓殷侯者何名也自归商丘之後又二十五年则为桀在位之十五年实成汤为商侯之元年於是复自商丘迁于亳书序谓自契至于成汤八迁汤始居亳从先王居作帝告厘沃今按所谓八迁者契始居商一也昭明居砥石二也相土居商丘三也冥离商丘往河治水四也子亥迁殷五也孔甲之时复归商丘六也及汤自商丘迁亳不过七迁耳然古今相传皆谓偃师谷熟皆汤所都而景亳则汤会诸侯之处是谓三亳皇甫谧云蒙北亳也谷熟南亳也偃师西亳也蒙即景亳与谷熟相近果汤曾都二亳则信有八迁矣然二亳迁居之先後则经传无文严粲谓汤自南亳迁西亳似为可信盖三亳中南亳北亳相去甚近北亳在今商丘北五十里地有景山故谓之景亳南亳在今商丘东南四十五里竹书载汤于桀十五年迁亳又书二十八年昆吾氏伐商商会诸侯于景亳则知景亳实在商封内不然国既被伐何得越境以会诸侯乎水经注云阚駰曰汤都偃师皇甫谧以为考之事实学者失之如孟子之言汤居亳与葛为邻是即亳与葛比也汤地七十里葛又伯耳封域有限而宁陵去偃师八百里不得童子馈饷而为之耕今梁国自有二亳南亳在谷熟北亳在蒙非偃师也愚谓宁陵与商丘接壤皇甫解汤居亳之义是矣若谓汤未尝都偃师则又不然以书序从先王居之文观之先王孔安国以为指帝喾也今按其书篇名曰帝告厘沃告当是通作喾厘之言来盖谓从帝喾而来居于沃土云耳孔说非谬而水经注言帝喾之墟在禹贡豫州河雒之间今河南偃师城西二十里尸乡亭是也使汤不都偃师何得云从先王居又孔颖达引中候格予命云天乙在亳东观在雒郑玄亦云今河南偃师县有汤亭地理志又谓尸乡殷汤所都然则汤之居偃师明矣偃师乃周名以周武王克商偃息师徒于此其初名为西亳当是成汤命之汤之创业实始于亳故曰朕哉自亳後虽迁居啻墟而不忘其所自始故亦呼之为亳耳三亳惟亳为本名地在商丘故汤有天下尚仍商旧号若景亳则本名殷地在北蒙特以其近亳故曰景亳又曰北亳当上甲父子之世所谓迁于殷者即景亳也以竹书证之自成汤居亳之後历外丙仲壬太甲沃丁小庚小甲雍己大戊八君皆仍居亳至仲丁始迁于囂历外壬而河亶甲自囂迁于相继之祖乙元年自相迁于耿二年圮于耿自耿迁于庇历祖辛开甲祖丁皆居庇及南庚二年迁于奄历阳甲而盘庚至十四年自奄迁于北蒙曰殷书盘庚篇所谓先王恪谨天命不常厥邑于今五邦者合囂相耿庇奄而言也自相以下疑皆在河北至盘庚始迁河南书所谓惟涉河以民迁者史记惟言仲丁迁囂河亶甲居相祖乙迁邢与竹书小异然要之竹书为核矣竹书称北蒙曰殷于此始知殷之所在殷又名北亳故书序言盘庚五迁将治亳殷孔安国谓殷者亳之别名是也而後人皆言盘庚所迁在河南偃师误矣汤在殷以会诸侯而不都殷故不更国号盘庚迁都殷实上甲微旧蹟因而更号曰殷其後历小辛小乙以及武丁又传四世至庚丁皆居殷及庚丁之子武乙始去殷迁河北也武丁修政行德天下咸驩殷道复兴故于斯时追上甲絶而复续之功而行报祭之礼斯则玄鸟之诗之所为作故晰乎商殷变更之故则经传史书若合符节古人重稽古之力矢岂诬乎又补传谓殷之得名以澉水按说文无澉字乃灇水耳灇水今在河南开封府鄆城县与殷无涉此不可信】

天命玄鸟降而生商【阳韵】宅殷土芒芒【阳韵三代世表作殷社芒芒】古帝命武汤【阳韵】正域彼四方【阳韵】方命厥后【有韵】奄有九有【韵文选注作域 赋也玄鸟毛传云黿也春分玄鸟降汤之先祖有娥氏女简狄配高辛氏帝帝率与之祈于郊禘而生契故本其为天所命以玄鸟至而生焉孔颖达云毛氏不信?纬以天无命鸟生人之理而月令仲春

云是月也玄鸟至之日以太牢祀于高禘天子亲往则是以玄鸟至日祈而得之也玄鸟以春分而至气候之常非天命之使生契但天之生契将令王有天下故本其欲为天所命以玄鸟至而生焉记其祈福之时美其得天之命故玄鸟之来非从天至而谓之降者重之若自天来然月令季春戴胜降于桑注谓言降者若始自天来重之故称降也按玄鸟生商其语近奇而事甚无怪毛孔之说正矣乃诗纬含神雾则云契母有娥浴于玄丘之水睇玄鸟衔卵过而坠之契母得而吞之遂生契中候契握则云玄鸟翔水遗卵流娥简吞之生契封礼纬则云契姓子氏以其母吞黿子而生纷纷语怪遁相祖述总不外吞卵一说而甚且以契为无父娥非啻妃如刘向列女传曰契母简狄者有娥氏之长女也当尧之时与其姊姊浴于玄丘之水有玄鸟衔卵过而坠之五色甚好简狄与其姊姊竞往取之简狄得而含之误而吞之遂生契焉王嘉拾遗记曰商之始也有神女简狄游于桑野见黑鸟遗卵于地有五色文作八百字简狄拾之贮以玉筐覆以朱紱夜梦神母谓之曰尔怀此卵即生圣子以继金德狄乃怀卵一年而有娠经十四月而生契祚以八百叶卵之文也虽遭旱厄後嗣兴焉谯周则谓契生尧代舜始举之必非啻子以其父微故不着名罗泌辟之云世本大戴之书言昔帝啻卜四妃之子皆有天下而稷之後为周周人既上推后稷为啻子矣何所疑耶昔有娥氏有二女长曰棗逖次曰建庇棗逖为啻次妃是为简翟故屈原云简翟在台啻何宜乙鸟致贻女何喜又云高辛之灵盛兮遭乙鸟而致贻夫古书之存者其言简翟未尝不及於啻也若司马迁王逸亦既以简翟为啻妃矣而一则曰三人行浴因吞坠卵一则曰侍帝啻台上嘉坠卵而吞之总无以异于?纬之说乃吕氏春秋更有异焉谓有娥氏有二佚女为之九成之台饮食必以鼓帝令燕往视之鸣若谥谥二女爱而争持之覆以玉筐少选发而视之燕遗二卵北飞遂不反善乎苏洵之言曰史载简狄吞卵生契为商始祖神奇妖滥不亦甚乎使圣人而有异於衆庶也天地必将储陰阳之和积元气之英以生又安用此微禽之卵哉燕坠卵于前取而吞之简狄其丧心乎欧阳修亦云秦汉之间学者喜为异说谓高辛氏之妃陈锋氏女感赤龙精而生尧简狄吞黿卵而生契姜嫄履大人迹而生后稷高辛四妃其三皆以神异而生子盖尧有盛德稷契後世皆王天下数百年学者喜为之称述欲神其事故务为奇说也至帝摯无所称故独无说又蔡邕月令章句曰玄鸟感阳而至其来主为孚乳蕃滋故重其至日因以用事契母简狄盖以玄鸟至日有事高禘而生契焉故诗曰天命玄鸟降而生商其说独与毛传合当汉之世而有能持正论如两人者正不多得若褚先生谓诗言契生于卵后稷人迹者欲见其有天命精诚之意耳鬼神不能自成须人而生奈何无父而生乎褚虽疑无父之说之非而未免惑于神怪感通之事未足称达识也虽然以朱子之素持正论而犹以吞卵为可信况其他哉契为商开基之祖故谓生契为生商宅尔雅云居也商殷解俱见本篇小引下宅殷指上甲微也自微时已改称殷侯其後世反于商丘乃复称商侯耳土土地也芒通作荒尔雅云奄也毛以芒芒为大貌孔云左传称芒芒禹迹画为九州是芒芒为大貌也微既灭有易至帝不降三十五年复灭皮氏事见竹书则殷土地之大可知古朱子云犹昔也程子云天以形体言帝以主宰言武汤朱子云以其有武德号之也曹氏云书曰惟我商王布昭圣武长发曰武王载旆有?秉钺故此称为武汤也正犹定也域说文云邦也陆燧云正域言四方之封域自我正之使人不得割据而纷扰也黄光昇云维时夏桀昏虐诸侯不服相为侵乱汤始正之此商之王业所繇始也方即东西南北之四方厥后谓其方之诸侯也与书舜典篇班瑞于羣后大禹谟篇禹乃会羣后武成篇王若曰羣后义同严粲云汤承帝之命乃随其方以施命令于诸侯朱子云四方诸侯无不受命也愚按此以景亳之命言景亳即殷地自上甲微居殷而国始大其後汤复即其地以命

诸侯而王业肇基於此故诗人详述之非徒阐扬祖功亦以讚美今日都殷之得地耳竹书载桀二十八年商会诸侯于景亳遂征韦取韦征顾取顾左昭四年楚子合诸侯于申椒举言於楚子曰臣闻诸侯无归礼以为归今君始得诸侯其慎礼矣霸之济否在此会也夏启有钧台之享商汤有景亳之命谓此命也奄说文云覆也大有余也九有毛云九州也郑云覆有九州为之主也孔云九有是同有天下之辞言分天下以为九分皆为己有也又杨慎云春秋命历叙人皇氏依山川土地之势度为九州谓之九圉圉古文省作有易氏云殷人九州之制不见于经传是以後世莫详焉尔雅曰两河间曰冀州河南曰豫州河西曰鹑州汉南曰荊州江南曰扬州济河间曰兖州济东曰徐州燕曰幽州齐曰营州其九州之名与夫疆域所至与舜典异又与禹贡异後世皆莫得其说先儒以为殷制其说诚然繇今考之有舜之幽营徐而无舜之青梁并是青入于徐梁入于雍并入于冀也既分禹贡冀州之境而复舜之幽州又并青于徐而复舜之营州殷之九州灿然可考而其山川道里亦以类举至周人则又分冀为并而并营于幽复禹之青州而省徐以入于青王制注云殷汤更制中国方三千里之界分为九州而建千七百七十三国】商之先后受命不殆【叶纸韵养里翻】在武丁孙子【纸韵】武丁孙子武王靡不胜【叶蒸韵书蒸翻】龙旗十乘【蒸韵】大糝是承【蒸韵 赋也商之先后指上甲微也微为诸侯故但称先后不称先王以方命厥后例之可见殆说文云危也微父振为有易氏所杀国已危矣微能受天眷命以复旧物不至危殆故使汤得有所承藉以成一统之业至于今传在武丁方且延及子後之孙孙後之子世数莫可限量皆先后微所貽也使尔时中絶而不复续即汤且无繇以兴而又何余庥及于後人之有武丁名昭武丁其字也歌工于祖考之前直呼其字盖古人之尚质如此武王谓汤也史记云汤曰吾甚武号曰武王胜说文云任也此又归美于成汤之辞也凡德厚者流光德薄者流卑故曰君子之泽五世而斩夫泽斩而子孙不蒙其庥者则其精神力量至此而尽也商家之命延至武丁孙子未有穷期虽曰先后之垂裕亦繇成汤之丰功厚德足以堪之故曰武王靡不胜云靡不者对孙子而言龙旗二句指诸侯来助祭也周觐礼侯载龙旗交龙为旗一升一降升象其升朝降象其下复乃建之车上者今按此诗则商礼亦不异耳十乘者郑云二王後八州之大国严云举诸侯之尊者言之顾大韶云若作衆诸侯解则不应止十乘也糝本作饔说文云酒食也大糝韩诗云大祭也承说文云奉也夫商祚尚且延及于武丁之孙子则当武丁之时诸侯谁敢不服从所以当时有建龙旂者十乘来助殷祭以为诸侯之领袖於祭之时皆有事庙中以奉进其酒食焉假使王灵衰替安能得此故孟子曰自汤至于武丁贤圣之君六七作民之归殷久矣久则难变也武丁朝诸侯有天下犹运之掌也】邦畿千里【纸韵】维【大学作惟】民所止【纸韵】肇域彼四海【叶纸韵虎洧翻】四海来假【丰氏本作遐後同】来假祈祈【支韵】景员【古文作云】维河【歌韵陆德明云或作何】殷受命咸宜【支韵】百禄是何【歌韵左传丰本俱作荷 赋也此章言都殷之得地所以益追思上甲之功也畿毛云疆也虞夏称服殷周称畿王氏云畿言其有界画服言其服王事邦畿天子之都也王制注云天子所居州界之名殷曰畿汉志殷周因井田而制军赋地方一里为井井十为通通十为成成方十里成十为终终十为同同方百里同十为封封十为畿畿方千里封乃诸侯之大者天子所居则谓之畿所谓邦畿千里也必以千里为畿者见居重驭轻宅中图大之意此指殷都而言止郑云犹居也大学引此而先之曰君子无所不用其极即殷武篇所谓四方之极也肇通作肇说文云始开也尔雅以为始也四海海内之地也严云邦畿之内地方千里维是民之所安止也言民志定也京都诸夏之根本王畿之内人心安定则四海之大皆在统理之内汤本以四方为

域今言始以四海为域者殷道中微侯国有畔者故疆土非先王之旧至高宗中兴始复之也王肃云殷道衰四夷来侵至高宗然後以四海为境域也陈际泰云商世以兵起武汤之後而有武丁光复旧物祀夏配天中兴之运若自彼手创之矣虽然武丁所以能此者先据山河之险沃野千里握势重以临诸侯故中兴之业烂焉岂苟而已哉假通作假说文云至也四海来假谓诸侯也即上章龙旗十乘大饗是承者是也祈通作跂方言云登也重言之者见下国非一也苏辙云夫天子所居畿内千里自足以疆域四方四方诸侯赖以安故其至者祈祈其多也景山名即今殷所都也以殷武篇陟彼景山证之可见括地志云宋州比五十里大蒙城为景亳汤所盟地因景山而名寰宇记云景山在应天府楚丘县北三十八里玉海云高四文今属拱州按宋之应天府即今归德府也府城东南有亳城即景亳也拱州今为睢州员朱子云与幅陨义同盖言周也言景山四周皆大河也补传云殷都带河盘庚所谓惟涉河以民迁是也辅广云四周皆大河其形势之盛而居之安如此愚盖尝综商殷先後迁都之故而观之先是仲康时遭后羿之乱命世子相出居商丘依邳侯及相即帝位元年居商而其时为商侯者相土也国既为帝所居则不能有其国而相土又有作乘马之功故帝以前所居之商丘与之再传而使冥治河久于其职不能复居商丘竟以勤事死故又复迁殷此皆奉帝命而迁者也观其前称商侯後称殷侯盖帝悯冥以死勤事故录其後人而续封焉殷地负山带河足以有为迁殷之後即能灭有易灭皮氏商业自是复兴故展禽谓上甲微能帅契言其能率循契之功是也然则微之子孙即宜长守此地可矣而何为乎复迁嗟嗟殷于此时固有不得不迁者也其时帝孔甲即位废豕韦迁刘累为诸侯者必皆蹙蹙不安而殷负方张之势当尤为帝所忌故不得已而复归于商丘亦姑以避祸耳至汤而势又浸盛矣然仅能迁于亳未敢问及故封及夏台既释之後诸侯皆宾克有雒灭温势日以大因是会诸侯于旧国而此时桀亦无如之何也然汤终不复迁者以载亳而兴方规进取故不急急于迁都及王业已成则又从先王居而于偃师定鼎焉数传而仲丁迁囂岂无故而去祖都哉当雍已之时商道衰微诸侯不至大戊在位七十五年殷复兴诸侯归之仲丁大戊子也意必大戊为之经略以囂当四方道里之中朝覲会同最为便利又荥阳在成臯岩险之地依山避水故于此图迁焉诚远计也然无如河决为患何自是而相而耿而庇而奄总受河之虐于是盘庚复迁殷其事载尚书中甚具迁殷之後武丁祖甲复兴七传至武乙徙河北为雷震死自是之後又复居殷迄纣亡乃在朝歌季本谓意必为离宫于此而居之盖乱世之君所为耳殷受命咸宜统前後而赞之也咸皆也宜所安也俱见说文自上甲微以殷兴而能安受不殆之命成汤虽不都殷而曾会诸侯于此用能安受正域之命今盘庚迁殷传至武丁复能安受四海来假之命故曰咸宜也百禄泛言福之多也何说文云儋也徐铉云即负何也殷土之於受命其相宜如此继此以往百禄是何端有可为武丁必者盖祝愿之辞也然实自上甲开其先如之何不报或问武丁都殷繇盘庚之迁而无祀盘庚乐歌何也盘庚世数未尽尚列祀于太庙自与上甲之专报祭者不同然商颂所传仅五篇耳亦乌知非本有诗而後乃散轶乎】

玄鸟三章二章章七句一章八句【旧皆作一章二十二句序以为祀高宗也然殷武之诗序亦曰祀高宗疑不应有两诗故郑玄谓祀当为祫祫合也高宗崩始合祭于契之庙歌是诗焉古者君丧三年既毕禘於其庙而後祫祭于太祖明年春禘於羣庙自此之後五年而再殷祭一禘一祫春秋谓之大事按郑据春秋之礼以解殷礼已不足信况其所援引者率多附会不经杨氏已辟其有四妄矣朱子谓诗有武丁孙子之句故序得以为据虽未必然然必是高宗

以後之诗至其集传但云此亦祭祀宗庙之乐而追叙商人之所繇生以及其有天下之初盖不能知此诗所用之地也亦泛斯甚矣申培说则云此亦禘祀之诗其意盖如春秋所云吉禘者此即丧毕之祭与郑玄言祫意同但其名异耳殷礼已亡孔子尚苦无徵谁能以意定之愚特因诗中言商又言殷颇测其微指所在初疑为高宗祀盘庚而於诸书无所据不敢自信既而思高宗曾报上甲微复参考竹书则知兴殷者实上甲与周家之公刘太王同功而此诗为报祭而作其立言之意涣然可寻无复疑义因遂笔之又按上甲为汤之祖大禘追其祖之所自出则此诗及长发篇次皆当居商颂之先而正考父较商颂于周大师乃以那为首何也汤为商室开基之祖四时有祭上甲报于每岁之大尝及大禘之礼终王而一举皆以义起者耳乌得先】

诗经世本古义卷三

卷四

钦定四库全书

诗经世本古义卷四

明 何楷 撰

殷祖庚之世诗一篇

殷武立高宗庙也武丁修政行德天下咸驩殷道复兴武丁崩子祖庚立祖已嘉武丁之以祥雉为德立其庙为高宗【自武丁修政下俱出史记】庙既成始祔而祭之之诗【出朱传 武丁祥雉事详见那烈祖二篇小引下沈约云王殷之大仁也力行王道不敢荒宁嘉靖殷邦至于小大无时或怨是时舆地东不过江黄西不过氐羌南不过荆蛮北不过朔方而颂声作礼废而复起庙号高宗刘歆云天子三昭三穆与太祖之庙而七七者其正法数可常数者也宗不在此数中宗变也苟有功德则宗之不可预为设数故於殷太甲为太宗大戊曰中宗武丁曰高宗周公为无逸之戒举殷三宗以劝成王繇是言之宗无数也然则所以劝帝者之功德博矣或又说中宗高宗者宗其道而毁其庙名与实异非尊德贵功之意也诗云蔽芾甘棠勿剪勿伐召伯所茇思其人犹爱其树况宗其道而毁其庙乎迭毁之礼自有常法无殊功异德固以亲疎相推朱子云刘歆说宗不在七庙数中此说是又云商之三宗若不是别立庙只是亲庙时何不胡乱将三个来立如何恰限取祖甲太戊高宗为之那个祖有功宗有德天下後世自有公论不以揀择为嫌所以名之曰幽厉虽孝子慈孙百世不能改那个好底自是合当宗祀如何毁得愚按当祖庚时武宗于七庙中正为考庙今如为武丁别立一庙则是考庙虚主也抑岂向之居考庙者尚仍旧而不迁耶然无此理矣若谓祀武丁于考庙又别为武丁自立庙则是武丁有二主尤无此理以愚意之武丁虽自立庙然当世数未尽时必仍居七庙中而虚其新庙及夫亲尽应毁之日乃始迁其主于新庙与七庙同享祀为百世不迁之宗而不与羣祧等列耳又按先儒谓远庙为祧迁主藏焉周之祧法先公之迁主藏于后稷之庙先王之迁主藏于文武之庙羣穆则藏于文羣昭则藏于武故或谓宗曰世室亦曰祧以此法例之如商之三宗为宗则三宗以下之子孙凡自七庙而祧者必各依其昭穆而分藏其主于三宗之庙亦礼之可行者也若西汉每帝即位辄立一庙不止于七不列昭穆迭毁东汉宗庙之制代代称宗未尝有祧迁之法此皆失礼之大者刘公瑾云三宗之庙未知立于何所窃意中宗当穆高宗祖甲当昭各随昭穆之位特列其庙於太祖庙之两旁三昭三穆之上如周文武世室之位也】

挾【说文作𢇛】彼殷武奋伐荆楚【语韵】采【说文作𢇛】入其阻【语韵】裒荆之旅【语韵】有截其所【语韵】汤孙之绪【语韵旧自章首起至此为第一章】维女【音汝】荆楚【见上】居国南乡【阳韵】昔有【丰氏本作在】成汤【阳韵】自彼氐羌【阳韵】莫敢不来享【叶阳韵虚良翻】莫敢不来王【阳韵】曰商是常【阳韵旧自维汝至此为第二章 赋也挾说文作𢇛赵颐光云从虍达声从虍何威之也今文改作挾殷武毛传云殷

王武丁也钱氏云谓殷之有武者莫高宗若也按商自盘庚迁殷始改国号曰殷武丁名昭小乙之子成汤十世孙庙号高宗邹忠胤云商家贤圣之君惟载旆之汤及奋伐之丁以武特闻其他固有不甚武者夫服叛招携非大武不克大振此殷武所以为赫濯而守文之主不与焉奋说文云翬也从奋在田上鸟鼓翅翬翬然疾也兵兴之迅疾似之伐说文云击也徐光启云奋伐二字有卓然果断人不及谋发不及距意此时积衰之後稍着一分因仍姑待之意便凌夷而不振矣荆楚毛传云荆州之楚国也春秋正义云楚荆一木二名故以为国号亦得二名孔穎达云荆是州名楚是国名周有天下始封熊绎为楚子於武丁之世不知楚君何人也解颐新语云或谓成王始封熊绎於荆至鲁僖公元年始有楚号遂疑商时未有荆楚乃欲假此以实韩诗宋襄公时作商颂之说殊不思自帝啻九州已有荆州之名至禹贡有荆州即荆楚也又有荆岐则雍州之荆也诗人以有二荆故以荆楚别荆岐耳孰谓周始有荆楚哉按沈括谓扬州宜杨荆州宜荆地名因此楚乃荆之别名故二字通用春秋贾氏训诂谓秦始皇父讳楚因亦变楚为荆此通用之证也徐光启云荆楚左控江陵右控黔中南负苍梧北依泾塞险阻之国司马迁云夫荆楚僥勇轻悍好作乱乃自古记之矣李本云诗中称商邑称景山皆北亳也盖盘庚既没而殷道日衰楚人叛之其患之所及必常在淮北如春秋时楚之凌虐陈宋也北亳即宋也王慎中云方城汉水之间地大人衆形阻而俗褊介错於商邑之吭而近不一於夏而非纯於夷未能以为内而不可以为外先王固欲梁圉其山川井邑其人民以固威严之势而立长久之安非如氐羌之荒忽惟其来享来王而已公羊传云楚有王者则後服无王者则先叛夷狄也而亟病中国采本作?说文云周也阻说文云险也增韵云山巘曰险水隔曰阻若泛言则山水通用愚按采入其阻当是指鬼方之地易既济九三爻云高宗伐鬼方三年克之未济九四爻云震用伐鬼方三年有赏于大国朱子疑荆楚即鬼方谓荆楚地好鬼自古而然以三苗复九黎之德家为巫祝民神杂糅是以荆楚旧多淫祠下至战国之际犹尔验诸屈原九歌可见也然竹书载武丁三十二年伐鬼方次于荆至三十四年王师克鬼方则鬼方与荆楚明非一国大抵鬼方在荆州之地其所居者必山水险阻之处能乘间出没为中国患而荆楚僥轻辄附之以俱动故世治则後服世乱则先叛高宗兴兵本为伐鬼方而特扬言以伐荆楚为名一则使鬼方恬然不复措意而我可以攻其无备一则?荆楚俾自为守而不暇与鬼方结连此固已得用兵胜算矣所以能直捣长驱如入无人之境也至是师据腹中地利在我则鬼方与荆楚不复相顾而二丑之势俱孤是故荆楚必服而鬼方必克也易言震用伐鬼方知此举非高宗自行震是臣名于传无考或以震者长子之象借为大将之称如师卦九五言长子帅师之意耳哀尔雅毛传皆云聚也按说文无哀字本作褻通作褻说文云衣袂也褻荆之旅者犹言收拾荆楚之衆不使其纷出而为鬼方所用亦聚意也盖此时荆楚已听命矣又吕祖谦云褻荆之旅谓入巢穴其衆无所遁逃穷而保聚如句践栖于会稽之类也亦通徐云汉书严助疏云臣闻长老言秦之时尝使尉佗徒睢击越又使监禄凿渠通道越人逃入深山林丛不可攻留军屯守空地旷日持久士卒劳倦越乃出击之秦兵大败荆楚以南高山深谷藂林密菁夷人据险负阻鸟举鳞聚不可方物至今犹然高宗伐楚独能褻荆之旅可谓神于用兵矣截说文云断也言截断鬼方与荆楚为二不敢出而相应也一说曹氏云王师所在截然无敢犯之者犹常武所谓截彼淮浦王师之所也亦通汤孙朱子云谓高宗按那及烈祖篇亦皆称高宗为汤孙绪本?端之名事业之有条理亦如之故尔雅训为事又为业也承上文言此非好大喜功乃为汤孙者事业当然必如此而後无愧於为汤之孙也下文言昔有成汤曰商是常意实本此又按竹书载夏桀二十一年商师征有雒克之遂征荆荆降是则奋伐荆

楚固成汤已事耳维女荆楚以下纪高宗因荆旅听命而谕告之辞也乡毛云所也郑云楚国近在荆州之域居中国之南方陆化熙云见为声教所加正朔所及也郝敬云三代以前王都多在西北楚地据东南半天下王者南面出治失楚则如面墙故曰维女荆楚居国南乡言至近而要也金履祥云商周中叶荆楚每为中国大患盖自豫南偏即踰重山而至邓号为山南而又渡汉水控引云梦江沱是为重险荆楚在其间为九州内之夷狄一出凭陵则北撼中州东矚陈蔡此所以易为中国患也商都河南北周迁雒阳视荆楚为国南而负固若此其为大患宜矣然自文王兴于岐周而其风化行於江汉秦人恃力亦足以制楚盖自雍南出即山水皆东南趋其下荆楚亦犹建瓴水尔然则荆可以捣豫阨扬徐而雍梁又足以制荆设险虽守国之末务而亦不可不知也氏羌郑云夷狄国在西方者也山海经云伯夷父生西岳西岳生先龙先龙是始生氏羌氏羌乞姓孔云氏羌之种汉世仍存在秦陇之西地理志云陇西郡有氏道羌道按一统志以陕西临洮府宁夏岷州靖虜卫文县所四川龙州松潘叠溪皆为羌地曰自彼者举絶远以例其余见不止于氏羌观下文莫敢字可见竹书载汤即位之次年氏羌来宾又八年初巡狩定献令则氏羌其先至者而其後四方诸夷始相继而来故特举氏羌也威之所制者广故曰莫敢享说文云献也逸周书王会解云汤问伊尹曰诸侯来献或无马牛之所生而献远方之物事实相反不利今吾欲因其地势所有献之必易得而不贵其为四方献令伊尹受命於是為四方令曰臣请正东符娄仇州伊虑沕深九夷十蛮越沕鬻文身请令以鱼支之鞞鯁之鬻鯁□利剑为献正南瓠邓桂国损子产里百濮九困请令以珠玕璆璅象齿文犀翠羽菌鹤短狗为献正西崑仑狗国鬼亲枳已闕耳贯胸雕题离丘漆齿请令以丹青白旄纁罽江历龙角神龟为献正北空同大夏莎车沽他旦略貌胡戎翟匈奴楼烦月氏犂其龙东胡请令以橐駝白玉野马騊駼騊駼良弓为献汤曰善按观此则氏羌鬼方荆楚之类各依其方所有之物为贡皆在其中矣郑云世见曰王孔云谓其国父死子继及嗣王即位乃来朝也荀子云诸夏之国同服同仪蛮夷戎狄之国同服不同制封内甸服封外侯服侯卫宾服蛮夷要服戎狄荒服甸服者祭侯服者祀宾服者享要服者贡荒服者终王日祭月祀时享岁贡终王夫是之谓视形势而制械用称远近而等贡献是王者之至也彼楚越者且时享岁贡终王之属也必齐之日祭月祀之属然後曰受制也则未足与及王者之制也季本云曹氏以为氏羌之国近者以时聘享远者亦来终王以享与王为远近之差今详诗意则似戎狄之在荒服者世一见王而非来朝之日凡遇岁贡之时则有贡献故以献先于王盖待戎狄之道礼当如此不必以宾荒分二等也曰述高宗之言也常犹云故事也商之故事则然尔荆楚所稔知今日者我叨为汤之孙安得不纘承先绪而容尔国与鬼方相煽以叛使成汤时来享来王之典遂废耶此章颂高宗之能攘外也贾捐之云武丁成王殷周之大仁也然地东不过江黄西不过氏羌南不过蛮荆北不过朔方是以颂声并作又後汉书云后桀之乱畎夷入居邠岐之间成汤既兴伐而攘之及殷室中衰诸夷皆叛至于武丁征西戎鬼方三年乃克故其诗曰自彼氏羌莫敢不来王而竹书亦载武丁三十四年王师克鬼方氏羌来宾然则武丁固亦有平氏羌之事而此诗乃为欲往平氏羌发与】天命多辟【叶锡韵普击翻】设都于禹之绩【锡韵】岁事来辟【见上】勿予祸【丰本作过】适【叶锡韵丁历翻丰本作谪】稼穡匪解【旧自天命起至此为第三章丰本匪解下有祀事孔力一句按朱子云颂中有全篇句句是韵如殷武之类无两句不是韵到稼穡匪解自是欠了一句丰之增补盖原于此庸妄极矣】天命降监【叶勘韵苦紺翻亦叶陷韵居忤翻朱子云下与滥叶】下民有严【叶阳韵五刚翻】不僭不滥【勘韵亦叶陷韵胡懣翻】不敢怠遑【阳韵左传作皇】命于下国

【职韵亦叶屋韵古六翻左传引诗无此句】封建厥福【屋韵亦叶职韵笔力翻左传作命以多福旧自降监起至此为第四章】商邑翼翼【职韵】四方之【後汉书作是】极【职韵後汉书商邑二句作京师翼翼四方是则注云此韩诗之文赋也自章首至封建厥福皆纪高宗戒勅诸侯之辞与上章荆楚事无涉多郑云衆也辟毛云君也多辟谓衆诸侯也传说告高宗曰明王奉君天道建邦设都树后王君公不惟逸豫惟以乱民是则诸侯分封虽命于天子而实皆天之所命矣设都犹言建国绩说文云缉也九州平治皆禹所积累而成犹之缉麻然也设都于禹之绩者曹氏云诸侯设都之地皆禹之功也郑云禹平水土弼成五服而诸侯之国定是以云然岁事如周礼春朝夏宗秋覲冬遇之类其来以时故曰岁事即朝覲述职也与来享来王不同辟与多辟之辟同勿之言母亦音近也予通作余尔雅云我也高宗自谓也祸说文云害也刘熙云毁也言毁灭也适通作谪说文云罚也祸重而谪轻鍾惺云以祸适为言商道先罚後赏也种之曰稼斂之曰穡匪通作非解通作懈说文云怠也言尔为岁事而来之诸侯其必母为我所祸谪如能勤于民事使民稼穡不怠则祸谪可免矣李氏云观孟子载天子巡守惟以土地田野为庆让之主诚以农事为重也天命即上文之天命降下监临也严教命急也俱见说文言天既命尔为诸侯则时时下而临视之而下民之督责更有严于天之降监者臯陶所谓天聪明自我民聪明天明畏自我民明威达于上下敬哉有土即此意也不僭不滥二句高宗自表其待诸侯之法也僭说文云假也徐锴云按左传惟名与器不可以假人是僭也滥说文云汜也愚按左传云淫刑以逞淫即滥之义也左襄二十六年蔡声子引此诗曰善为国者赏不僭而刑不滥赏僭则惧及淫人刑滥则惧及善人按观此可得僭滥二字之义入其疆土地辟田野治则有庆何僭之有入其疆土地荒芜则有让何滥之有怠说文云慢也遑说文云急也不敢怠遑者言不敢过寛而失之慢若僭于赏而无罚是怠也不敢过急而失之猛若滥于罚而无赏是遑也或赏或罚总之以民事为主而已下国与长发篇之下国义同指衆诸侯也我以此命尔下国之诸侯诚欲凡在封建之列者其皆有福慎毋废朕命哉一说林尧叟云封建厥福者福祿巩固如封建之永世也亦通又左哀五年郑驷秦富而侈嬖大夫也而常陈卿之车服於其庭郑人恶而杀之子思曰不守其位而能久者鲜矣商颂曰不僭不滥不敢怠皇命以多福此以不僭二句指有位者言其解又异商邑二句合成汤与高宗而共赞美之也翼翼两羽也汤都南亳其後屡迁至盘庚迁殷改都北亳即高宗所都也以其地在商丘故统曰商邑二亳对峙如鸟之有两羽故曰翼翼也极说文云栋也按极者屋脊之栋屋脊居屋之中故郑训为中也昔成汤所居乃四方诸侯之所取中今高宗所居亦能与之媲美则以其赏不僭而罚不滥故也史记载成汤既绌夏命还亳作汤诰其文曰维三月王自至於东郊告诸侯羣后母不有功于民勤力廼事予乃大罚殛女母予怨曰古禹臯陶久劳于外其有功乎民民乃有安东为江北为济西为河南为淮四渎已修万民乃有居后稷降播农殖百谷三公咸有功于民故后有立昔蚩尤与其大夫作乱百姓帝乃弗予有状先王言不可不勉曰不道母之在国女母我怨以令诸侯此诰辞与高宗之命下国先後一揆故书无逸篇曰其在高宗时旧劳于外爰暨小人作其即位乃或亮陰三年不言其惟不言言乃雍不敢荒宁嘉靖殷邦至于小大无时或怨所谓言乃雍者当即此命下国之言而小大之国无时或怨者亦即不怨其不僭不滥欤孟子有言武丁朝诸侯有天下犹运之掌也非无故也此章颂高宗之能安内也】赫赫厥声【庚韵】濯濯厥灵【青韵】寿考且寧【青韵】以保我後生【庚韵此四句用韵法与车攻篇决拾四句同旧自商邑起至此为第五章】陟彼景山【叶先韵翰旃翻】松柏丸丸【叶先韵胡圆翻】是断是迁【先韵】方斲是?【先韵尔雅作榑

】松桷有梲【先韵】旅楹有闲【叶先韵向甄翻】寢成孔安【叶先韵於?翻旧自陟彼起至此为第六章 赋也赫火盛貌厥声承上章命于下国言五事言属火故曰赫赫濯说文云澣也灵孔云尊敬为神灵也毛萇云神之精明称灵厥灵承首章奋伐荆楚言中衰之後气象更新如新沐新浴者然故曰濯濯郑云赫赫乎其出政教也濯濯乎其见尊敬也壽久考老也俱见说文书无逸篇曰肆高宗之享国五十有九年可谓壽考矣寧通作寔说文云安也季本云天下治安也我後生主时王作寢庙者而言谓後高宗而生者也身壽考则经营必周世治安则灵长未艾此高宗之中兴所以为烈而子孙崇报之所以不容己与陟彼景山以下言作庙事也陟说文云登也景山解见玄鸟篇括地志云宋州北五十里大蒙城为景亳汤所盟地因景山为名按据此则高宗所都在景亳明矣景亳者北亳也丸说文云圜倾侧而转者字从反仄徐锴云仄者一面欹而不可回也是故仄而可反为丸丸可左可右也按毛传训丸丸为易直孔谓言其滑易而调直意亦同此盖指松栢之本身言也下文为桷为楹皆取诸松栢也义亦见閼宫篇断说文云截也迂尔雅云徙也截之所生之地徙之造作之处方朱子云正也正以绳墨也斲说文云斲也削以斧斤也方斲联下松桷言尚书大传云其桷天子斲之大夫达陵士首本庶人到加谷梁传云天子之桷斲之砮之加密石焉诸侯之桷斲之砮之大夫之桷斲之士斲本?毛云敬也解见长发篇孔云工匠皆敬其事不惰慢也松桷解见閼宫篇梲说文云长木也孔云桷者椽也椽以长为善旅毛云陈也朱子云衆也二义皆通楹说文广雅皆云柱也闲说文云阑也陈列衆柱似处处皆有闲阑也一说闲者不过其度之意亦通寢毛云路寢也孔云王之所居路寢是寢之尊者故知谓路寢也按閼宫篇咏新庙亦但举路寢则此可例推矣朱子云此盖特为百世不迁之庙不在三昭三穆之数寢成孔安者高宗功德盛大今特为别设寢庙与太宗太甲中宗太戊号为三宗既成则人心甚安也犹閼宫篇言万民时若之意万尚烈云高宗之寢庙其成与不成关系非小倘不成则一切俱不相安今寢成如是乃甚相安也见得此寢庙之作乃报功追远之典万万非不得已者也诗言微婉深厚如此一说孔安就百世不迁言之亦通又罗苹云孔子删诗録商颂五章岂无意哉景山商坟墓之所在也商邑之大岂无贤材哉松栢丸丸在於断而迁之方斲而敬承之以用之耳松栢小材有抱而整布衆楹大材有闲而静别既各得施则寢成而孔安矣抚成羣材而任以成国则人君高拱仰成矣是绸繆牖户之义也此似借题立论要非诗旨】

殷武三章二章章十三句一章十一句【旧作六章三章章六句二章章七句一章五句 序及子贡传皆云祀高宗也今按此诗明为立高宗新庙而作或于祭祀时仍歌此诗则不可知耳申培说则云帝乙之时武丁亲尽当祧以其中兴功高存而不毁特新其庙称为高宗而祀之故作此歌此盖掇袭疏义之说愚初亦以为然及诵史记武丁之庙已立于其子祖庚之时此昭然有据者何得以臆揣易之乎又古文引此诗皆以为咏成汤左襄二十六年蔡声子曰商颂有之曰不僭不滥不敢怠皇命于下国封建厥福此汤所以获天福也前汉书匡衡曰道德之行繇内及外自近者始然後民知所法迁善日进而不自知是以百姓安陰阳和神灵应而嘉祥见诗曰商邑翼翼四方之极寿考且寧以保我後生此成汤所以建至治保子孙化异俗而怀鬼方也皆为昔有成汤之一句所误】

卷五

<经部,诗类,诗经世本古义>

钦定四库全书

诗经世本古义卷五

明 何楷 撰

殷武乙之世诗五篇

关雎太姒之德也太姒将归文王思得淑女爲媵故作此诗【胡安国云诸侯有三归嫡夫人行则以侄娣从三国来媵亦以侄娣从凡一娶九女所以广继嗣左传云凡诸侯嫁女同姓媵之异姓则否愚按关雎之诗太姒思求媵于他国之辞也求媵之事自有主之者太姒特思之如是耳于以见赋性之能不妬也故序云关雎后妃之德也忧在进贤不淫其色哀窈窕思贤才而无伤善之心焉是关雎之义也大戴礼云春秋之元诗之关雎礼之冠婚易之乾《》皆慎始敬止云尔韩诗外传子夏问于孔子曰关雎何以爲国风之始也孔子曰关雎之大仰则天俯则地幽幽冥冥德之所藏纷纷沸沸道之所行如神龙变化斐斐文章大哉关雎之道也万物之所系羣生之所悬命也子其勉之思服之天地之间生民之属王道之原不外此矣子夏喟然叹曰大哉关雎天地之基也又论语子曰关雎乐而不淫哀而不伤或问朱子是诗人性情如此抑诗之词意如此朱子云是有那性情方有那词气声音郑樵云人之情乐者闻歌则感而爲淫哀者闻歌则感而爲伤惟关雎之声和而平乐者闻之其乐不至于淫哀者闻之其哀不至于伤此关雎所以爲美也又云夫子喜鲁太师之乐音节中度故曰乐矣而不及于淫哀矣而不及于伤皆从乐奏中言之非以别其文义按序云关雎风之始也所以风天下而正夫妇也故用之乡人焉用之邦国焉所谓用之乡人者乡饮酒礼是乡大夫三年宾贤能之礼其经云乃合乐周南关雎是也燕礼是诸侯饮燕其臣子及宾客之礼其经云遂歌合乐周南关雎是也黄佐云燕礼乡饮升歌三终笙入三终间歌三终乃合乐三终以爲乱乱者乐之末章也关雎虽爲风始以合乐在升歌间歌之後则末也是以孔子曰师挚之始关雎之乱洋洋乎盈耳哉刘会孟云尝谓今世所存之诗特其辞与义耳诗之词未尝亡也其声亡也】

关关雎【韩诗尔雅左传俱作鵽】鵽【尤韵】在河之洲【尤韵说文丰氏本俱作州】窈窕淑【丰本作叔】女君子好逑【尤韵礼记缁衣陆德明释文前汉书俱作仇丰本作求兴也关通作?说文云织绢以丝贯杼也盖象衆鸟飞翔往来之状如穿梭之形也雎鵽尔雅云王雎也郭璞云雕类也今江东呼之爲鸚好在江边沚中亦食鱼陆玕云雎鵽大小如鸚深目目上露骨幽州人谓之鸚左传郟子云少皞氏以鸟名官鵽氏司马也杜预云以其鸚而有别故爲司马主法制俗云雎鵽交则双翔别则立而异处是爲鸚而有别列女传曲沃负云妾闻男女之别国之大节夫雎鵽之鸟人未尝见其乘居而匹处也又阴阳自然变化论云雎鵽不再匹刘昼云关雎兴于鸟而爲风之首美其鸚而有别也鹿鸣兴于兽而爲雅之端嘉其得食

而自呼也以夫鸟兽之丑苟有一善诗人歌咏以爲美谈矣况人之有善而可弃乎河季本云大河之近治阳者冯复京云太姒生于治阳正在河西临河之境洲本作州水中高土也尔雅云水中可居者曰洲刘熙云洲聚也人及鸟物所聚息之处也徐铉云睢鸠常在河洲之上爲俦偶更不移处盖鸛性好峙故每立更不移处所谓鸛立义取诸此严粲云雕鸛皆抃击之鸟故曰鸛或见经有河洲之言遂以爲疑今大雕翱翔水上扇鱼令出沸波攫而食之一名沸河淮南子所谓鸟有沸波是也以此言之不可谓鸛鸟不近河洲也然此诗不取其鸛取其别窈窕深远也窈深肆极也俱见说文指女子之所居也孔颖达云淑女已爲善称则窈窕宜爲居处杨雄王肃谓善心曰窈善容曰窕者非也按楚辞云眇兮窈窕孔静幽墨鲁灵光殿赋云旋室便娟以窈窕诸葛颖诗云窈窕神居远乔知之诗云窈窕九重闺皆此义也淑通作倬说文云善也女者未嫁之称君子谓文王好美也述通作仇匹也怨耦曰仇反言之也与公侯好仇同义汉书杜钦说王凤云礼壹娶九女所以极阳数广嗣重祖也必乡举求窈窕不问华色所以助德理内也娣侄虽缺不复补所以养寿塞争也今圣主富于春秋宜因始初之隆建九女之制详择有行义之家求淑女之质爲万世大法匡衡云闻之师曰妃匹之际生民之始万福之原婚姻之礼正然後品物遂而天命全孔子论诗以关雎爲始言太上者民之父母后夫人之行不侔乎天地则无以奉神灵之统而理万物之宜故诗曰窈窕淑女君子好仇言能致其贞淑不贰其操情欲之感无介乎容仪宴私之意不形乎动静夫然後可以配至尊而爲宗庙主此纪纲之首王教之端也邓元锡云后妃广于求助情在得贤忘身之爲述也若曰之淑女也慎固幽深是君子之好述也吾何德以配君子也云尔後汉书应奉以田贵人微贱不宜超登后位上书曰臣闻周纳翟女襄王出居于郑汉立飞燕成帝嗣绪泯絶宜思关雎之所求以远五禁之所忌】参【说文作蓂】差荇【陆德明本作?尔雅说文同】菜左右流【尤韵】之窈窕淑女寤寐求【尤韵】之求之不得寤寐思服【叶职韵鼻墨翻】悠哉悠哉辗【释文丰本俱作展】转反侧【职韵楚辞章句作则丰本作仄兴也参者二十八宿之一其宿有三星故借用爲参伍之义差说文云贰也差不相值也陆佃云三相参爲参两相差爲差荇说文作?云蓂余也亦作接余尔雅云荇接余其叶荇陆玕云莖白叶紫赤色正圆径寸余浮在水上根在水底与水深浅等大如钗股上青下白鬻其白莖以苦酒浸之肥美可案酒顔氏家训云今是水悉有之黄华似蓂莖根极长江南人亦呼爲猪蓂罗愿云猪蓂与?蓂并一种春夏细长肥滑爲?蓂至冬短爲猪蓂此与鳧葵殊不相似叶卷渐开虽圆而稍美不若蓂之极圆也叶皆随水高低平浮水上花则出水黄色六出今宛陵陂湖中弥覆顷亩日出炤之如金俗名金莲子状既似蓂又猪好食或因是得猪蓂之名但非蓂菜耳郑樵云今谓之水荇蔓铺水上故杜诗水荇牵风翠带长凡草之可食者皆以菜名之故荇亦名菜严粲云参差训不齐凡菜皆不齐何独荇也今池州人称荇爲荇公须盖细荇乱生有若须然诗人之词不苟矣程大昌云蓂余拟淑女也予於是疑汉之婕妤取此义以名也左右言非一方也流尔雅云求也荇菜丛生水中盖顺水之流而求之也案天官醢人陈四豆之实无荇菜意必别有所宜及或爲芼羹之用耳季云荇可爲茹其性柔顺故以起兴寤觉寐寢或寤或寐言无时也后妃寢兴之间无时不思求淑女与之供己职也祭统曰官备则具备蚕缁衣服酒醴粢盛荐豆和羹之事皆后妃主之而内官左右相之也服郑玄云事也求贤女而不得则思己职事当谁与共之乎悠说文云忧也尔雅云思也辗本作展说文云转也转说文云运也愚按展转并言义当有别展之爲言舒也转则运动之义反覆也侧旁也俱见说文因展转而至于反至于侧也总之卧不安席之意后妃自述其未得淑女则内职乏人而宾祭无所托故忧劳之甚至于如此其辗转反

侧乃以思服之故所谓得性情之正者也】参差荇菜左右采【叶有韵此苟翻】之窈窕淑女琴瑟友【有韵】之参差荇菜左右芣【叶药韵慕谷翻】之窈窕淑女钟鼓乐【叶药韵历谷翻】之【兴也采说文云捋取也求而得之於是采之也琴瑟皆音吕氏春秋云朱襄氏之王天下王建作五弦之琴高诱云王建朱襄臣也又琴操云伏羲作琴世本说文皆云神农所作未详孰是广雅云神农氏琴长三尺六寸六分伏羲氏琴长七尺二寸上有五弦曰宫商角徵羽文王增二弦曰少宫少商琴论云伏羲氏削桐爲琴面圆法天底方象地龙池八寸通八风凤池四寸合四气琴长三尺六寸象三百六十日广六寸象六合前广後狭象尊卑也五弦象五行大弦爲宫小弦爲臣加二弦以合君臣之恩又尔雅大琴谓之离郭璞云二十七弦白虎通云琴者禁也以禁制淫邪正人心山海经云晏龙始爲瑟世本云伏羲作瑟五十弦或云四十五弦後黄帝使素女鼓瑟哀不自胜破爲二十五弦又乐书云朱襄氏使士达制五弦之瑟後瞽瞍判五弦瑟爲十五弦舜复益以八弦爲二十三弦礼图书云雅瑟长八尺一寸广二尺八寸二十三弦其常用者十九弦其余四弦谓之番番羸也颂瑟长七尺二寸广一尺八寸二十五弦尽用又尔雅大瑟谓之洒郭璞云长八尺一寸广一尺八寸二十七弦应劭云今瑟长五尺五寸非正器也释名云瑟施弦张之瑟瑟然也张萱云郭注瑟二十七弦邢疏据礼图二十三弦此二少三变之说误之也夫五爲中声三于五爲不足七于五爲有余中声何繇得乎世或言朱襄氏使士达爲瑟五弦瞽瞍判之爲十五弦夫五弦十五弦小瑟也二十五弦中瑟也五十弦大瑟也多与寡皆不失五也汉武帝祠太乙作二十五弦之瑟宋太常乐瑟亦二十五弦其有意复古乎故余因瑟而知舜之琴五弦者亦其正也世传伏羲蔡邕以九孙登以一郭注以二十二颂琴十三今世所用以七亦二变二少之说误之耳先儒谓七弦之琴存之则有害古制削之而可白虎通云瑟者嗇也闲也所以惩忿窒欲正人之德也孔云性情之和上下相亲与琴瑟之音宫商相应无异若与琴瑟爲友然故曰琴瑟友之芣说文云草覆蔓也徐锴云犹冒也盖得之之多则以草覆冒而藏之犹包裹之意又尔雅云摯也邢昺云择菜也谓求而得之多则可以择而用之也二义皆通钟金音山海经云炎帝之孙鼓延始爲钟许慎云古者垂作钟吕氏春秋云黄帝命伶伦铸十二钟和五音又传云黄帝命伶伦与营援作十二钟鼓革音乐书云鼓之制始于伊耆氏少昊氏夏后氏加四足谓之足鼓商人贯之以柱谓之楹鼓周人县而击之谓之县鼓周礼鼓人职云掌教六鼓而辨其声用以雷鼓鼓神祀以灵鼓鼓社祭以路鼓鼓鬼享以鼉鼓鼓军事以鼗鼓鼓役事以晋鼓鼓金奏陈祥道云郑氏谓房中之乐不用钟磬关雎之诗曰钟鼓乐之而周礼教燕乐以鼗师则房中之乐非不用钟磬也风俗通云钟秋分之音鼓春分之音琴瑟之声有婉婉媚顺意则云友钟鼓之声有宣扬蹈厉意则云乐言各有当也荀子曰国风之好色也盈其欲而不愆其止其诚可比于金石其声可纳于宗庙其是之谓与冯时可云庸人好贤则志有懈倦中道而废兹能寤寐而求之反侧而思之不得已至于既得则先以瑟琴继以钟鼓有加而无倦其好贤切矣其性情正矣张纲云求而後采采而後择者共荇菜之序也寤寐求之然後琴瑟友之钟鼓乐之者得淑女之序也琴瑟常御之乐也故鹿鸣燕羣臣则曰鼓瑟鼓琴钟鼓至大之乐也故彤弓飨诸侯则曰钟鼓既设此盖燕礼小而飨礼大所用之乐亦从以异今后妃之待淑女始则欲以常御之乐友之而通其交际之心终则欲以至大之乐乐之而极其欢欣之意此所谓至诚有加而无已也陈阳云古者后妃有房中之乐是诗特取琴瑟钟鼓者得无意乎曰虞书以琴瑟爲堂上之乐以鼓镛爲堂下之乐后妃之于淑女不无上下之分焉故诗人取之所以寓名分也荀卿谓君子以琴瑟乐心以钟鼓道志后妃之于淑女不无心志之交焉故诗人取之所以寓交际也后

妃之于淑女至诚乐与以共图职业忧勤以始之不倦以终之内则心志交而不疑外则上下辨而不越夫然虽友以敬之而不敢慢乐以爱之而不敢恶而淑女终不失事后妃之道此所以爲乐而不淫其于配文王之孝也何有崔铄云美哉周之后妃广于求助精在得媛未得而求之已得而乐之协彼衆善以事一人志在相夫尔忘其躬也乐乃未与尔略于色也夫公其心则合异以爲同诗曰白华菅兮白茅束兮心苟私则判戚而爲敌易曰列其夤厉薰心古帝之圣曰尧舜事咨岳牧好察迩言比其化也岳孙帝位九官让能及乎主泽大熄燭存秦穆悔过求臣犹称一介是则一言而治者其好善乎一言而亡者其妬才乎是关雎之义也张纲又云关雎所言乃后妃求淑女以配君子之事而说者止称其无妬忌之行此未足以尽关雎之义盖治外者莫急于人材治内者求淑女以爲助固其理也文王之所以兴周诗称棫朴之官人书美五臣之迪教济济多士并列于疏附先後奔走御侮之职固未始不以人材爲先务是以其化刑于寡妻而后妃于是乎有关雎之德观其求淑女也寤寐反侧而不能自己盖以爲不如是不足以配文王而成内外之治夫惟文王得多士而立政于外后妃得淑女而辅佐于内则自闺门而达之朝廷宜无一事之不理所以协济大业而卜世卜年之永者其本实基於此】

关雎三章一章四句二章章八句【毛郑本作五章章四句今从朱传 子贡传云文王之妃太姒氏思得淑女以共内职赋关雎子曰关雎哀而不伤乐而不淫能正其心则无怨嫉邪辟之思心正而身修身修而家齐家齐而国治国治而天下平故用之乡人用之邦国其奏乐也必歌关雎以乱之所以风天下也按传谓此诗太姒所作爲得之其依附拟托孔子数言反觉其鄙申培说谓文王之妃太姒思得淑女以充嫔御之职而供祭祀宾客之事故作是诗则似惑于毛郑共荇菜爲菹之说亦可谓不识比兴之义者矣若诸书引关雎者多以爲讽刺之诗列女传曲沃负云周之康王夫人晏出朝关雎起兴思得淑女以配君子路史云康王一晏朝而暴公作关雎之诗以讽鲁诗亦云后夫人鸡鸣佩玉去君所周康王后不然故诗人叹而伤之後汉书皇后纪序康王晏朝关雎作讽盖用此也及前汉书杜钦云佩玉晏鸣关雎叹之知好色之伐性短年故咏淑女几以配上忠孝之笃仁厚之作也後汉书明帝诏云应门失守关雎刺世注引春秋说题辞曰人主不正应门失守关雎故歌以感之宋均云应门听政之处也言不以政事爲务则有宣淫之心关雎乐而不淫思得贤人与之共代修应门之政者也杨赐传云昔周王承文王之盛一朝晏起夫人不鸣璜宫门不击柝关雎之人见几而作薛君云诗人言关雎贞洁慎匹以声相求隐蔽乎无人之处故人君退朝入于私宫后妃御见有度应门击柝鼓人上堂退反燕处体安志明今时大人内倾于色贤人见其萌故咏关雎说淑女正容仪以刺时而司马迁亦云周道缺诗人本之衽席关雎作杨雄云周康之时颂声作于下关雎作乎上习治也故习治则伤始乱也冯衍显志赋云美关雎之识微兮愍王道之将崩此其说必有所本朱子非之据仪礼以关雎爲乡乐又爲房中之乐谓周公制作之时已有此诗其非出于康王明甚又无故而播其先祖之失于天下不可以爲风化之首于论正矣愚又读後汉书注云康王晚朝内人诵关雎诗以刺王郑樵奥论亦云古人以声诗奏之乐後世有不能法祖怠于政者则取是诗而奏之以申警讽故曰作非谓其始作于衰世也是说盖近之而朱子直以爲文王求得圣女爲配宫中之人于其始至见其有幽闲贞静之德而作是诗则愚不能无疑夫所谓宫中之人者果何人欤考大纪称昌爲世子娶于有莘曰太姒则太姒至时王季故在如以爲王季之宫人则古者命士父子皆异宫彼淑女之得与否亦何预于王季宫人之忧乐

也如以爲文王之宫人则古者诸侯一娶九女格之同时者盖必嫡夫人至而侄娣从之未有夫人未至而先有宫人者也且大明之诗曰文王初载天作之合文王嘉止大邦有子何待宫人寤寐求之展转反侧而後得耶至于琴瑟友钟鼓乐若指文王则近于妩若指宫人则近于媚又何以风耶朱说既无据而又不可以爲文王之作则非归之太姒安属乎愚之从序传说者以此他若张超蔡邕又以爲毕公作要皆传讹不足信程子谓序言后妃之德非指人而言凡爲王后妃者当如是冯元成亦以爲周公制房中之乐追称后妃思得淑女以共理内治所谓忧乐皆设言其事播诸管弦以代箴铭者於理亦近似并存之】

鹊巢亦太姒之德也太姒来嫁於同与媵俱来诗人美之【序云关雎后妃之德也又云鹊巢夫人之德也郑玄云初古公亶父聿来胥宇爰及姜女其後太任思媚太姒嗣徽历世有贤妃之助文王刑寡妻至兄弟以御于家邦故二国之诗以后夫人之爲首称孔颖达云后妃夫人皆太姒也一人而二名各随其事立称以周南王者之化故称后妃召南诸侯之化故称夫人愚于此诗主其说与关雎同意关雎在未嫁之时志在广求淑女共事君子鹊巢在方嫁之时将侄娣以俱来其不妬忌已早见于此非太姒之德而何诗之二南似易之乾坤系关雎于周南者以其主君子以立言若鹊巢则第咏之子而已故系之召南也二诗皆咏鸛意亦相类雎鸛以有别爲德此鸛以壹宿爲德又按禽经云一鸟曰佳二鸟曰雝三鸟曰朋四鸟曰乘五鸟曰雇六鸟曰鷦七鸟曰□八鸟曰鸛九鸟曰鸛十鸟曰?鸛字从九其以是与诸侯一娶九女文王位当爲诸侯故有取于鸛也旧说皆以鸛比国君鸛比夫人若然则末章维鸛盈之一句爲不通矣又按文王以中身受命以初载作合今姑即竹书年数定之计其娶太姒当在武乙之世】

维鸛有巢维鸛居【鱼韵亦叶御韵居御翻】之之子于归百两御【韵亦叶鱼韵语居翻陆本作訝又作迓】之【兴也郑玄云鸛之作巢冬至架之至春乃成孔颖达云推度灾曰鸛以复至之月始作室家复于消息十一月卦故知冬至加功也月令十二月鸛始巢则季冬犹未成也故云至春乃成也顾起元云冬至天元之始至後二阳已得来年之节气鸛遂可爲巢知所向也陆佃云鸛知人喜作巢取在木杪枝不取墮地者皆传枝受卵故一曰乾鸛而庄子云鸟鸛孺鸛以传枝少欲故曰孺也淮南子谓太陰所建蛰虫首穴而处鸛巢向而爲户又云蛰虫鸛巢皆向太乙盖鸛巢开户向太乙而背岁故博物志云鸛背太岁也先儒以爲鸛巢居而知风蚁穴居而知雨鸛岁多风则去乔木巢傍枝故能高而不危也然则疆而不淫又能知风之自知岁之所在盖鸛之爲德与才如此俗说鸛巢中必有梁见鸛上梁者必贵今二鸛共衔一木置巢中谓之上梁又旧说云鸛巢中必有棘盖棘性煖故也鸛拙鸟也直谓之鸛者即雛也今之鶉鴒方言云鸛自关而西秦汉之间谓之鶉鴒其大者谓之鶉鴒其小者谓之?鸛或谓之?鸛或谓之?鸛梁宋之间谓之雛一名荆鸛一名楚鸛一名乳鸛尔雅以爲鶉□壹宿鸟也壹宿者壹于所宿之木又名夫不陆佃云壹宿妇之正也夫或不然故孔子欲多识鸟兽草木之名一曰祝鸛或曰雛与尸鸛皆壹鸟也故有尸祝之号尸鸛性壹而慈祝鸛性壹而孝故一名尸一名祝也按周礼罗氏中春献鸛以养国老不噎之鸟也古之养老祝鰥在前祝噎在後欲老人不噎赐杖以鸛爲饰故名爲祝鸛也亦曰孝鸟杜预云雛鸛孝故曰司徒禽经云拙者莫如鸛巧者莫如鸛今鸛累巢止于数枝才能载身而已天将雨则逐其雌霁则呼而反之人常闻其声故谓之鸣鸛欧阳修云鸛不能作巢多在屋瓦间或于木上架结木枝初不成巢便

以生子往往坠雏今鹊作巢甚坚既生雏散飞则弃而去容有鸠来处彼空巢方宏静云间居数年墙之东嘉树如盖有鹊巢焉每年修巢必以小雪日其梁之上必吉日也门之向岁必更四月中雏能飞矣鸠则逐而居之五六月鸠将雏去小雪鹊乃复来略无爽也夫巢居知风穴处知雨自古志之良知良能乃不假卜筮不俟推测也神妙物耶物自妙耶五行家言所谓虽小道有可观者耶邹忠胤云鹊鸠殊种喻二姓之好族类名位之相称欧阳云诗人取鹊之成巢以比夫人起家来居已成之周室尔愚按如欧阳说则鹊乃比王季而鸠则以比太姒及媵也意者太姒嫁时适当方春鸟兽孳尾之候诗人偶见鹊巢鸠居遂即之以起咏与之子谓太姒也百两百乘也汉书注云车一乘曰一两言其轮辕两两而偶也风俗通云车有两轮马有四匹故车称两马称匹御迎也言夫家以百两之车往迎之大明之诗曰亲迎于渭是也孔颖达云士昏礼从车二乘其天子与大夫送迎则无文朱公迁云百两不过极其盛而言之诸侯迎送车数未必如是之多士从车二乘等而上之亦恐不及百乘左传赵孟入于郑郑伯享之穆叔赋鹊巢赵孟曰武不堪也是盖以鹊有巢而鸠居之喻晋君有国而赵孟治之】维鹊有巢维鸠方【阳韵】之之子于归百两将【叶阳韵资良翻】之

【兴也方郑玄云犹向也正义云诸言方者皆谓居在他所人向望之故云犹向也上章主迎之而言故曰居之此章主送之而言故曰方之言向其巢之所在而将往居之也将送也孔云左传曰凡公女嫁于敌国姊妹则上卿送之公子则下卿送之于大国虽公子亦上卿送之太姒自莘适周必上卿送之又云夫人之嫁自乘家车宣五年齐高固及子叔姬来反马何彼穠矣美王姬之车郑箴膏肓谓礼虽散亡以诗义论之天子以至大夫皆有留车反马之礼故泉水云还车言迈笈谓还车者嫁时乘来今思乘以归是其义也知夫人自乘家车也言迓之者夫自以其车迎之送之则其家以车送之故知壻车在百两迎之中妇车在百两将之中矣】维鹊有巢维鸠盈【庚韵】之之子于归百两成【庚韵】之【兴也盈满也维鸠盈之喻衆媵侄娣之多孔云诸侯一娶九女二国往媵之以侄娣从凡有八人是其多也胡安国云古者诸侯一娶九女必格之同时者所以定名分窒乱源也首章亲迎之礼男先女也次章同归之礼女从男也在夫家则以百两迓在父母家则以百两将而婚礼于是乎成故总之曰百两成之】

鹊巢三章章四句【子贡传以爲公子归于诸侯国人观焉申培说亦云诸侯嫁女其民观焉不斥言其爲太姒也今按序以鹊巢爲夫人之德与以关雎爲后妃之德同意明乎其指太姒矣然继之曰国君积行累功以致爵位夫人起家而居有之德如鸣鸠乃可以配焉则于诗人寄兴之意全无所发明若陈阳乐书引古琴曲以爲邵国男悦正女而作殊鄙浅无义齐鲁韩三家又以爲康王时诗皆不足信】

桃夭美太姒能修妇道也【申培说以爲此周人美后妃终始妇道之诗盖始于宜夫妇终于宜一家之人所谓始终妇道也知爲美太姒诗者以大学引此释齐治知之】

桃之夭夭【说文作夭又作夭】灼灼其华【麻韵】之子于归宜其室家【麻韵 兴也桃木名春秋运斗枢曰玉衡星散爲桃祧者五木之精仙木也而家语则曰六果桃爲下祭祀时不用不登郊庙案周官饮食之笱曰其实枣栗桃乾?榛实则桃仅祭祀不用而已陆佃云桃有?

之盛者其性早?又华于仲春故周南以兴女之年时俱当谚曰白头种桃又曰桃三李四梅子十二言桃生三岁便放?果早于梅李故首虽已白其?子之利可待也然皮束茎干颇急四年以上宜以刀 其皮不然皮急则死故周南复取少桃以兴所谓桃之夭夭是也夭通作祲说文云木少盛貌徐锴谓草木始生未几得地力而能先长大也灼说文云炙也曰灼灼者盖言其?色盛如火炎也?江东呼爲萼俗作花亦作蔕尔雅木谓之?草谓之荣然此对文尔若散文则草亦名?也严粲云夭夭以桃言指桃之木也灼灼以?言指桃之?也孔颖达云桃或少而未?或?而不少此诗夭夭灼灼并言则是少而有?者故辨之木少壮则其?盛譬妇人盛年则容色丽故此以兴后妃始嫁之时也又按周礼仲春会男女郑玄云仲春阴阳交以成昏礼顺天之时也意古制如此后妃始嫁时或当桃始?故诗人本而咏之也尔雅云之子者是子也孔云之爲语助桃夭爲嫁者之子汉广则贞洁者之子东山言其妻白?斥幽王各随事而名之愚按此诗言之子两字最有力他人于归者未必皆然此以知其专指后妃也邹忠胤云以之子目后妃或嫌于褻然是固风体也即周公作爲大雅以述先德而緜之篇曰爰及姜女大明之篇曰长子维行亦未有訾其褻者何疑于桃夭归说文云女嫁也字从止从妇省妇人谓嫁曰归于归犹言于其来归也室家谓夫妇也男以女爲室女以男爲家左传谓女有家男有室孟子谓丈夫生而愿爲之有室女子生而愿爲之有家是也方来归而夫妇即相宜同心一德不特容色之美而已文王以肃肃雝雝之德刑于寡妻向使太姒之德不能与文王相配何宜之有】桃之夭夭有蕢【丰稷云一作蕃不知何据】其实【质韵】之子于归宜其家室【质韵兴也罗愿云麻实谓之蕢故古者朝事之笱熬麻麦以实之谓之饔蕢麻于植物中最爲多子诗言桃?色】

【既盛又结子之多如麻子然说文亦云葩臬实或作□音虽异而意同实者富实之义故以爲虚之对凡草木之结子皆曰实也取蕢实以兴后妃者毛传言非但有?色又有妇德是也首章先言室後言家易恒卦之义也次章先言家後言室易泰卦之义也至是而夫妇之相宜爲益深矣又陆云桃性更七八年便老老则子细此言少桃故曰有蕢其实言非但有?色又嫁而有子夫妇之道成焉亦通】

桃之夭夭其叶蓁蓁【真韵通典作溱丰本作□】之子于归宜其家人【真韵兴也蔡说文云草盛貌故毛传训蓁蓁爲至盛貌李氏云桃之少壮则结实必大其叶亦蓁蓁然盛若非少壮则虽结实不复大虽有叶不复蓁蓁矣陆云桃性?叶齐生至于有蕢其实然後其叶蓁蓁故其序如此抑阴青繁合休息者赖之又在夏之时也家人谓一家之人上而舅姑中而妯娌下至媵妾童竖之属皆处之得其道故不特夫妇相宜而一家之人尽以爲宜也取兴于其叶蓁蓁者陆谓能成其家又以芘其所赖是也大学引此章而申之曰宜其家人而後可以教国人夫文王不出家而成教于国实太姒之贤内助有以成之味此则非泛咏民间之女而爲美后妃之德抑又明矣又锤惺云三宜字妙只是停当相安意女子无非无仪一停当相安便是求加焉遂失之矣】

桃夭三章章四句【子贡传云周人美后妃之德终始妇道赋桃夭子曰宜其家人而後可以教国人见君子之修其身矣此於诗意得之其綴以夫子之言则贗也圣言而可贗将何所不贗耶序则谓桃夭后妃之所致也不妬忌则男女以正婚姻以时国无鰥民也朱子讥其意狭而说疎是矣然据集传谓诗人因婚姻之得时而叹其女子之贤知必有以宜其室家则何所

许之易也岂凡女及时而嫁者皆足称贤耶】

螽斯祝太姒子孙衆多也【序云后妃子孙衆多也言若螽斯不妬忌则子孙衆多也愚按后妃子孙衆多也言若螽斯宜絶句读谓后妃之子孙有如螽斯之衆多耳郑玄读连下文云凡物有阴阳情慾者莫不妬忌惟蚣蝮不尔抑凿矣通篇皆祝愿之辞以子孙二字知之时太姒尚未有孙安得径指其多故知爲祝辞也朱子以爲衆妾所作亦通】

螽【尔雅作蜚丰氏本作 】斯羽诜诜【真韵陆德明云说文作 今按说文无 字】兮宜尔子孙振振【叶真韵之人翻】兮【兴也毛传云螽斯蚣蝮也朱子云诗中固有以斯爲语辞者如鹿斯露斯之类然七月诗乃云斯螽动股则恐螽斯是名也孔颖达云螽斯斯螽文虽颠倒其实一也一名春黍幽州人谓之春箕愚谓螽斯蚣蝮春黍春箕音皆相似直转而讹耳益知螽斯是名也蔡邕月令云其类乳于土中深埋其卵陆佃云字盖从冬冬终也至冬而终故谓之螽鲁十月而有螽孔子曰火伏而後蛰者毕今火犹西流再失闰也朱子谓一生九十九子苏辙谓一生八十一子未知孰是陈少南云言羽者螽斯羽虫也无羊之诗羊言角牛言耳状物多如此严粲云螽生信宿即羣飞因飞而见其多故以羽言之喻子孙之衆多也愚按蕃育之最多者莫如螽斯故诗借以兴子孙非咏其母或以螽斯比后妃不伦甚矣戴岷隐亦如此说诜通作牲孔云诜即牲字说文云衆生并立之貌宜犹当也祝愿之辞言宜乎其如此也尔指后妃也絺后妃不妬故衆妾得以生子子多则孙亦多矣故兼言子孙也振奋也谓奋起也重言之者见子孙衆多也风人赞美后妃意在言外但言宜其子孙如此使人自思其所以宜者何故而不明言之谓由后妃不妬忌而致此也】螽斯羽薨薨【蒸韵丰本作 】兮宜尔子孙绳绳【蒸韵】兮【兴也薨薨博雅】

【云飞声按赵颐光云薨当通作轰说文云羣车声也韩愈诗云丝竹徒轰轰绳说文云索也绳绳者言如绳索之相续不断也一说韵会云绳绳有纪貌盖状子孙之长幼森然各得其序亦如螽斯之羣飞行列不乱也又按韩诗外传引此皆曰言贤母能使子贤也】螽斯羽揖揖【缉韵丰氏石经本作揖】兮宜尔子孙蛰蛰【缉韵】兮【兴也揖通作辑晋语君辑大夫就车辑或爲揖故知二字通也车和辑曰辑故爲和集之义三章亦有次第诜诜自未飞之时言也薨薨自方飞之时言也揖揖自飞而下集之时言也张氏云物生而後有象象而後有滋滋而後有数螽斯形仅寸余而滋数之多凡物皆不能及有亲见其子之类聚者大小不一与他类不乱亦不相轧且有大小依大之状蛰说文云藏也物伏藏则安静故尔雅又训爲静也曰蛰蛰者安静而各得其所也振振但言其奋起而已绳绳则有继续未艾之意蛰蛰则又见其安静以处式相好无相犹也胡宏曰深远哉周南之义后妃之能助其夫者事亦多矣圣人惟取不妬忌之诗至于四五者何欤愚读史至隋文帝独孤后然後知妇人之恶以妬忌爲大也自汉而下后妃之妬忌者有矣何独至于独孤后而知之吁妇人之妬妬其夫已爲非义独孤后肆其妬心不独妬文帝使不得有异生子又妬及其子焉太子勇有宠妾曰云昭训独孤怒曰覲地伐渐不可耐专宠阿云有如许豚犬遂内啓贼子广行篡夺东宫之谋外赂奸臣素造反黜储君之事而文帝亦不得其死曰独孤误我卒至宗祀絶灭生灵涂炭开皇之中天下户八百九十万唐兴抚绥三十余年至永徽初始及三百八十万户耳吁独孤一行妬忌于宫闈之间而灭天下之户五六百万圣人删诗立周南之义教训万世后妃专以无妬忌为

大美也意深且远矣夫专以无妬忌爲大美则必以妬忌爲大恶矣考诸独孤后其爲大恶岂不深切着明也哉愚是以知王者欲齐其家措之天下而周南不可不学也】

螽斯三章章四句【子贡传及申培诗说皆谓周人庆文王之多男而赋螽斯理亦无害然咏子及母更爲亲切故思齐之诗曰太姒嗣徽音则百斯男不以美文王也】

葛覃太姒自叙治葛毕而欲归省其亲见其能勤俭孝敬也【出季本诗说解颐 此诗盖专爲归宁而作太姒在父母家所习者惟女功之事今虽已出嫁犹不变其素履不如是则不敢归见父母盖所得于家教者居多故序谓葛覃后妃之本也本之于其父母也申培说云此诗亦太姒所自作】

葛之覃【陆德明本作蕈】兮施于中谷【丰氏本作逵】维叶萋萋【叶支韵此移翻与下啾啾隔三句爲韵】黄鸟于飞集于灌木其鸣啾啾【叶支韵坚夷翻 赋也葛^廿名罗愿云生山泽间其蔓延盛者牵其首以至根可二十步毛传云葛所以爲絺綌女功之事烦辱者覃毛传云延也施本训爲旗逶迤之貌借以爲附丽纏绕之义中谷谷中倒其言者古人语多有之如螽斯曰斯螽苦瓜曰瓜苦之类萋说文云^廿盛也故毛传以萋萋爲茂盛之貌黄鸟黄鹂留也或谓之黄栗留又作黄栗流尔雅名皇诗又名仓庚一名商庚一名鷩黄一名楚雀幽州人谓之黄鷩齐人谓之抔黍亦或谓之黄袍秦人谓之黄流离常甚熟时来在桑间故里语曰黄栗留看我麦黄甚熟否亦是应节趋时之鸟也格物总论莺大胜鸂鶒黑眉嘴尖红脚青遍身黄色羽及尾又有黑毛相间三四月间鸣声音圆滑集说文云鸟在木上也灌木尔雅云丛木又云木族生爲灌族即丛也未详其义啾说文云鸟鸣声徐锴云声衆且和也今曰啾啾者言不一鸣也言葛而及黄鸟者状初夏之景此时葛方盛而未可刈也然已足见其动女红之思而有念念不忘之意矣万时?云首章要体认初夏光景人到意念难忘处时过景销耳目经历似意中眼中一一活现此便是服之无斃根子】葛之覃兮施于中谷【首二句不用韵如上章例下一句一韵】维叶莫莫【药韵】是刈【陆本作艾丰本作义】是漙【药韵】爲絺爲綌【陌韵亦叶药韵去略翻】服之无斃【陌韵亦叶药韵弋灼翻礼记尔雅丰本俱作射赋也莫本古文暮字今曰莫莫者盖取稠密陰暗之义刈芟取也漙说文云雨流需下貌释文以爲澣也按澣者治也盖以水治之也絺綌皆葛之成布者曲礼云爲天子削瓜巾以絺诸侯巾以綌玉藻云浴用二巾上絺下綌以絺精而綌麤故贵絺而贱綌也刈漙理之有序絺綌成之有等皆亲董其事如三纁之类服之者以之爲服也斃说文云解也毛云厌也此言盛夏之时葛既成矣于是治以爲布而服之无厌盖预道其心之所期如此虽异日垢弊不忍废弃也夫知稼穡之勤者饮食则念农功知?麻之勤者衣服则思女功然亦后妃淑性自尔非徒惜劳惜福念使之然也缁衣记云苟有衣必见其敝而引葛覃服之无射爲言要以古之人无斃尽如此服矣张纲云后妃之于女功志焉而不敢忘故往来于中谷以观葛之渐长而采之方其初往也葛茂盛而未成但见黄鸟飞鸣于灌木之上顔色之美声音之好有可以悦其耳目及其继往也葛成就而可采矣于此无暇及于耳目之所闻见惟知刈葛而漙之以爲絺綌专心致志服之而无厌斃焉陆佃云夫礼后织玄纁今乃亲葛事如此者亲蚕以劝女功之正事亲葛以劝女功之余事?麻者本事也?葛者余事也张敬夫云周自后稷以农事爲务迄于今其君子则重稼穡之事其室家则重织紵之勤相与服习其艰难咏歌其劳苦此实王业之根本

也夫治常生于敬畏而乱常起于骄肆使爲国者每念稼穡之劳而其后妃又不忘织紵之事则心之不存者寡矣此心常存则骄矜放恣何自而生故诵服之无斲之章则知周之所以兴诵休其蚕织之章知周之所以衰】言告师氏言告言归【微韵】薄污我私薄澣我衣【微韵】害【音曷】

【丰本作曷下同】澣害否【有韵丰本作不】归宁【丰本作寔】父母【有韵 赋也古者诸侯之女嫁于诸侯父母在则岁一归宁此章乃言将归宁之事盖女功成矣时已暇矣言辞也如言采言念薄言驾言之类皆语辞也师氏者女师也礼记云古者女师教以妇德妇言妇容妇功白虎通云国君取大夫之妾士之妻老无子者而明于妇道又禄之使教宗室五属之女何休云选老夫爲傅老夫妻爲姆昏礼注云妇人五十无子出而不复嫁能以妇道教人者爲姆女出嫁姆随之故有女师内则云大夫以上立师慈保三姆言告师氏是自己告于师氏也言告言归使师氏以己欲归宁之意转告于舅姑与夫子也白虎通云妇人所以有师何学事人之道也张敬夫云后妃之贵亦必立师傅以训之法家拂土非惟人主不可一日无后妃亦然也王安石云有天地此有男女岂以女子而可无教乎古者设师傅保姆之官以教王六宫故葛覃之有师氏宋姬之待傅姆民间之有女师主女教也以今观祭祀宾客之礼琴瑟钟鼓之乐房中之诗彤史之书非学何以能之此古者后妃夫人所以能上奉神灵之统下理万物之宜也後世之君既无修身齐家之学而吕武之使监宫中者遂使人疑而不复信可哀也夫薄季云不敢大肆之辞犹楚辞言蹇言羌之类污毛传云烦也郑玄云烦擗之用功深阮孝绪云烦擗犹撝撝也朱子云烦擗之以去其污犹治乱而曰乱也私燕服也妇人有副褱盛饰以朝事舅姑接见于家庭进见于君子其余则私也澣说文云濯衣垢也衣谓褱衣以下至褱衣礼服也薄污以下皆后妃自审之辞非告师氏之语污私服者以服之常而垢多也澣褱衣者以服之少而垢少也盖因女工暇而归因归而治服本与絺綌无关非服既成而即澣濯之也此后妃之俭德而服之无斲之意亦即于此处可想见矣害通作曷音之近也说文云何也害澣害否蒙上文而言何者已澣何者未澣也朱子谓审其何者当澣何者可以未澣亦通白虎通云父矩也以度教子也广雅云母牧也育养子也释名云父甫也始生己也母冒也含生己也宁通作寔说文云安也归宁者归而问安之义吕大圭云父母在则归宁葛覃称归宁父母是也歿则使卿宁楚子庚聘于秦爲夫人宁是也周昌年云此治葛後事与七月之亟乘屋同意趣治葛之暇亟爲归宁计见过此而萋萋喈喈之景又催人矣孔穎达云在家本有此性出嫁修而不改妇礼无愆当于夫氏可以归问安否于父母张子厚诗云葛蔓青长谷鸟迁女功兴念忆归安不将贵盛骄门族容使亲心得尽欢张纲云斯干之卒章祝其女子无诒罹于父母观后妃之归宁然後知其父母免于忧也】

葛覃三章章六句【序云葛覃后妃之本也后妃在父母家则志在于女功之事躬俭节用服澣濯之衣尊敬师传则可以归安父母化天下以妇道也朱子谓此诗之序首尾皆是但所谓在父母家者一句爲未安若谓未嫁之时即诗中不应以归宁爲言况未嫁时自当服勤女功不足称述爲盛美子贡传则云太姒将归宁而赋葛覃子曰贵而能勤富而能俭疏而能孝可以观化矣按传谓将归宁而赋者得之惟僞增夫子之言爲狂妄可厌耳若朱传第谓此诗后妃既成絺綌而赋其事虽亦无害但言告师氏一节反无着落恐非诗意齐鲁韩三家又以爲康王时诗皆不足信】

诗经世本古义卷五

卷六

钦定四库全书

诗经世本古义卷六

明 何楷 撰

殷文丁之世诗五篇

采薇劳戍役也周公季历以戍役伐戎获捷而归代为述征之辞以劳之【据诗中有一月三捷之语以竹书考之文丁十一年周公季历伐翳徒之戎获其三大夫来献捷其事与三捷合即此诗之所为作也翳徒当是猗狁别号或其君长之名汉书匈奴传云匈奴其先夏后氏之苗裔曰淳维唐虞以上有山戎猗狁薰粥居于北边随草畜牧而转移顔师古谓山戎猗狁薰粥皆匈奴别号然则翳徒以戎名正所谓山戎耳又竹书於季历献捷之後即书王杀季历沈约注云王嘉季历之功锡之圭瓚秬鬯九命为伯既而执诸塞库季历困而死因谓文丁杀季历竹书小注亦云执王季于塞库羈文王於玉门鬱尼之情辞以作歌其来久矣季历有劳而不见察鬱邑不得志而死非文丁杀之也而曰王杀者所以深着文丁之失耳虽于他书无所见而此事或者不诬季历死于文丁十一年则文王嗣位当即在文丁之世而孔丛子载子思述子夏之言谓殷王帝乙之时王季以九命作伯于西受圭瓚秬鬯之锡故文王因之得专征伐後之编史者如皇王人纪通监前编诸史会编之类因孔丛之言谓王季於帝乙时尚在遂系文王嗣位於帝乙之世今以意会之正谓帝乙命文王为西伯实仍王季九命作伯之旧耳非指王季为帝乙所命也古人文字质直不善读者鲜不以疑似失之往往类此】

采薇采薇【微韵与下曰归以隔句为韵】薇亦作【叶遇韵臧祚翻】止【丰氏本作只下同】曰归曰归【微韵】岁亦莫【叶遇韵莫故翻陆德明本作暮】止靡室靡家【叶遇韵古慕翻】玁狁【汉书申培说丰本俱作猗下同】猗【汉书作允】之故【遇韵】不遑启居【叶遇韵读如自俱遇翻】玁狁之故【同上 赋也薇解见草虫篇重言采薇者不一采也作起也犹言怒生也止通作只说文云语已词也後仿此曰者预计之词莫晚也此代为将士追述之言曰我向从戍临行正是春月采取薇菜之时其薇菜已生而出地矣斯时心口相语当何时归乎何时归乎连言之者念归之切虑其当在岁晚也靡通作无盖音近也男有室女有家今男不得以室为室女不得以家为家所谓靡室靡家也玁狁毛传云北狄也郑玄云今匈奴也按说文玁作猗长喙犬也猗据前汉书本作允说文无猗字意即左传所谓允姓之奸居于瓜州者因其为狄故以犬呼之曰玁猗耳遑说文云急也启尔雅云跪也按启之训跪其义难通展转推寻当是启音同踞通作踞耳踞说文云长跪也谓伸两足两膝着地而立身也凡有所献于尊者必拜跪而进之此盖指将父将母之事也以玁猗侵陵之故身当出戍不能急急为启居之计启所以求父母之欢居所以图栖止之逸也朱子云叙其勤苦悲伤之情而又风以义也】采薇采薇薇亦柔【尤韵】止曰归曰归心亦忧【尤韵】止忧心烈烈【屑韵】载饥载渴【叶屑韵巨列翻】我戍未定【叶青韵唐丁翻】靡使归聘【叶青韵读如俦

滂丁翻 赋也柔郑云谓脆晚之时朱子云始生而弱也心亦忧止忧归期之远也烈说文云火猛也严云如火烈烈言内热也载之言则亦音近也辅广云此章言其在路之情故曰忧心烈烈载饥载渴凡人在道路时饥渴固有所不免故卒章言其归路之情亦曰载饥载渴苏辙云内忧归期之远而外为饥渴之所困亦甚病矣我托为戍役之自我也後仿此定说文云安也郑云止也我戍未定谓未至戍所而安止也使指同戍者言聘毛云问也徐锴云字久耳访问之以耳也孔颖达云谓问安否之义靡使归聘同行无归人谁可使问其家之安否也】采薇采薇薇亦刚【阳韵】止曰归曰归岁亦阳【韵】止王事靡盬【麌韵】不遑启处【叶麌韵读如取此主翻】忧心孔疚【叶职韵讫力翻】我行不来【叶职韵六直翻 赋也刚朱子云既成而刚也三山李氏云始遣戍时薇始生其後薇长而柔又其後薇壮而刚以见天时之变尔戴侗云薇即苦益菜生山中冬晚抽牙至春柔矣夏而刚宜芼豕诗曰薇亦刚止岁亦阳止薇盖至夏而刚也愚按据戴说以阳为夏则此云阳者谓正阳之月乃巳月也与日月阳止之解不同首章言岁亦暮止预期之辞也此言岁亦阳止即景之辞也虽均以曰归发端而命意各别王事谓封疆守御之事盬毛云不坚固也按盬乃河东盐池之名盐最易消故为不坚固之义王事靡盬者谓王事不可使之不坚固故当竭力以图之也愚意此说亦迂以音求之直是盬固音近通作固耳言王事无可恃以为固者故外侮来侵如此也不遑启处与首章不遑启居义同但彼就初上道言此则已至戍所而复兴内顾之思耳忧心孔疚与次章忧心意亦有异彼忧归期之远此则根王事靡盬生来愤激国难以成败利钝未可逆知故忧之而至于甚病也行是戍已定而复他有所行意当时必有趋利捣巢之事故下章以戎车既驾一月三捷言也来郑云犹反也据家曰来朱子云此见士之竭力致死无还心也凌蒙初云我行不来奋然自誓壮气凛凛自与不我活兮不同沈莲冈云言情处委曲悲伤言义处慷慨激烈自是动人】彼尔【尔雅注说文俱作萋】维何维常之华【麻韵】彼路斯何君子之车【麻韵】戎车既驾四牡业业【叶韵】岂敢定居一月三捷【叶韵 兴也尔说文云丽尔也犹靡丽也从门从?尔声与爽同意徐锴云犹历历然希疏点缀见明也说文又引此诗句作薺云华盛貌二义俱通常常棣也解见常棣篇常棣之华甚盛秦子所谓作人当如常棣灼然光发是也路戎路斯此也君子谓主帅则季历是也戎路乃主帅所乘若下文所谓戎车则总括五戎而言路车亦在其内朱子即以路当戎车非是按周礼车仆所掌有戎路广车阙车革车轻车五者戎路即革路王在军所乘也广车横陈之车备更迭战者阙车游军乘以补阙者革车革读为屏所用对敌以自蔽隐者轻车所以驰敌致师者此五者皆兵车所谓五戎也不独天子有之巾车职云革路以即戎以封四卫故春秋传曰公丧戎路又王赐晋侯戎路之服又襄十四年栾鍼曰吾有二位于戎路是则侯国亦有戎路也邲之战楚君之戎分为二广是侯国亦有广车也又邲之战楚使潘党率游阙四十乘是侯国亦有阙车也孙子八陈有革车之陈又曰驰车千乘是革车轻车侯国皆有也殷车制无考但即周礼例之内之卿大夫士视外之侯伯子男命数相等固知所乘为戎路而自广车以下四等之车其皆为行间所必备明矣诗之兴意以棣华之盛况兵车之盛非但为一君子之车言也又陆佃云常棣华萼上承下覆甚相亲尔此以尔通作迹取义以兴将帅士卒互相亲尔亦自可通但此诗只言华不曾及萼未可与鄂韡之诗同论耳驾说文云马在轭中也业所以饰悬钟鼓者诗簨业维枹是也借为动而不息之貌故曰业业也岂敢定居郑云岂敢止而居处自安也陆化熙云岂敢定居内有工夫如坐则运筹行则决战退则坚壁进则攻取是也岂敢在心上看捷说文云军获得也春秋传齐人来献戎捷之捷一月三捷当时适有此事即竹书所谓获三大夫来献捷是也三捷之事

别无所见故知此诗为王季伐翳徒之役无疑也以常华推之其时正在夏间故於师既还而述其功以劳之耳旧说泥于小序歌遣之说乃以为预期之词正与说梦何异又郑孔谓遣戍有三时故所遣有先中後三辈陆佃因之遂谓其到有先後各能获捷故曰一月三捷皆迂滯附会不成义理左文十三年郑伯会公于棐请平于晋郑大夫子家赋载驰之四章鲁季文子赋采芣之四章郑伯拜公荅拜】驾彼四牡四牡騤騤【叶微韵读如颀渠希翻】君子所依【微韵】小人所腓【微韵】四牡翼翼【职韵】象弭鱼服【叶职韵鼻墨翻】岂不日【陆德明云日音越又人栗反今按日音越则是作曰字】戒玁狁孔棘【职韵 赋也三捷既奏可以归矣然戍事未毕犹未敢弛备遽归昔人言北狄畏暑耐寒又秋气折胶则弓弩可用故秋冬尤易为侵暴必留屯以防之此章所述正其事也騤说文云马行威仪也重言騤騤者非一马也此归而屯戍非趋利进战之时故与上章业业之象不同但见羣马之行动有威仪而已君子即上章君子依凭依也小人托为戍士自称之辞腓说文云胫腓也程子云腓有从动之义人之腓身行则从动刘彝云君子则依之以为御备也小人则腓之以为进退也愚按腓本实字今借作虚字解终觉牵强凡古文音同及偏傍同者多通用此腓字当即是扉字扉说文尔雅皆云隐也楚辞隐思君兮扉侧礼记取庙之西北扉薪用之皆训作隐此曰小人所腓者言戍士亦藉是车以自隐蔽也陈祥道云古之用兵也险野人为主易野车为主险野非不用车而主于人易野非不用人而主于车车之於战动则足以冲突止则足以营卫将卒有所芘兵械衣装有所齎昔周伐郑为鱼丽之陈先偏後伍伍承弥缝邲之战楚君之戎分为二广广有一卒卒偏之两先偏後伍伍从其偏也卒偏之两两从其偏也先其车足以当敌後其人足以待变则古者车战之法略可知也按曰伍曰两曰卒皆以人言曰偏曰广皆以车言周礼五人为伍五伍为两四两为卒即司马法所谓二十五人为两百人为卒也左传杜注车十五乘为大偏九乘为小偏其尤大者又有二十五乘之偏周鱼丽之偏二十五乘之偏也楚二广之偏十五乘之偏也广即广车说见上章楚以十五乘为一广亦用旧偏法西麓周氏云古者战陈士卒必与车乘相丽故左传曰卒乘辑睦章氏云车战之法每车用甲士三人步卒七十二人行则以车为卫居则以车为营顾起元云古者以马驾车秦晋韩原之战惠公乘小驷昭公元年晋荀吴败狄于大卤始毁车崇卒而单骑自此始或问六韬有骑战何言古无单骑曰六韬伪文非太公着杜牧之注孙子曰黄帝险于蚩尤以中夏车徒制夷虜骑士此乃弧矢之利也牧之此言必有所据徐光启云读君子所依二句想见古人用车之法今宜模仿此意变通其制度极是国家根本之策若以房琯为口实几於惩噎废飧矣岂古无以步骑败者乎翼鸟羽也翼翼程子云行列整治之状又季本云言马之欲行如鸟舒翼也象兽名此谓象牙也弭说文云弓无缘可以解辔纷者毛云弓反末也所以解紒也亦名别埤苍云别弓反末戾也孔云尔雅弓有缘者谓之弓谓缴束而漆之无缘者谓之弭不以缴束骨饰两头者也紒与结义同?束有结用以解之故曰所以解结也兵车三人同载左人持弓中人御车御人自当佩觿不专待射者解结弭之用骨自是弓之所宜亦不为解辔而设但巧者作器因物取用若辔或有紒可以助解之耳一说李巡谓骨饰两头曰弓不以骨饰曰弭郭璞毛诗拾遗云毛训象弭谓弓反末以象骨为之盖俗说之误弭者弓之别名谓以象牙为之今西方有以犀角及器角为弓者鱼服以鱼皮为矢服陆玑云鱼兽之皮也鱼兽似猪东海有之一名鱼狸其皮背上斑文腹下纯青今以为弓□步义者也其皮虽乾燥以为弓□矢服经年海水将潮及天将雨其毛皆起水潮退及天晴其毛复如故虽在数千里外可以知海水之潮气自相感也按左传夫人鱼轩服虔亦云鱼兽也服盛矢器周礼仲秋献矢服国语檠弧箕服是也本作箛初学记云

织竹曰箛以皮曰箠箠者柔服之义者相迫之名陈祥道云周礼田弋用箠箠以竹为之则凡非箠箠皆皮也中秋献矢箠盖皮以秋坚也然所谓鱼服者鱼皮之坚者皆可为之不必鱼兽而已弓与弩有三等矢箠亦三等则箠之长短视矢为之也戒说文云警也棘郑云急也当通作承上文言行间之人整肃器械何日不然虽无事之时凛如大敌将至者以玃狁往来飘忽至如风雨诚不可以忘备也蔡汝楠云岂敢定居繇君子有不测之略岂不日戒繇君子有不懈之心采薇虽咏戍役之情而将道亦自可见一说日戒就心言亦通钱天锡云怠惰偷安无果敢之气则谓之定居疎忽慢敌无敬谨之心则谓之不戒丰道生云上章既叙其战捷此又述其日警之志则所以美其忧国之诚终始不忘而劳之也】昔我往矣杨柳依依【微韵】今我来思雨雪霏霏【微韵丰氏本作??】行道迟迟【支韵】载渴载饥【支韵盐铁论作饥】我心伤悲【支韵】莫知【盐铁论作之】我哀【叶支韵鱼羈翻赋也昔我往矣即首章所言采薇之时也杨柳木二种然相似而称之易混尔雅云杨蒲柳即本草之水杨也陆玑云有两种皮正青者曰小杨其一种皮红者曰大杨皆长广于柳叶皆可为箭筈左传所谓董泽之蒲是也亦名杨柳柳说文云小杨也本草注云柳叶狭长青绿枝条长软草木志略云柳曰天棘斩其枝横倒曲直插之皆生其华谓之絮随风如飞雪夏小正云正月柳稊稊者发孚也注云稊芽也衍义云柳华即初生有黄蘗者及其华乾絮方出谓之柳絮陆云柳柔脆易生之木与杨同类陈藏器云江东通名杨柳北人都不言杨杨树叶短柳树叶长旧说顺插为柳倒插为杨朱子云柳杨之下垂者杨柳之扬起者依依者初抽条时嫋嫋不定如欲依倚他物也思语辞雨雪解见北风篇霏霏朱子云雪甚貌按二十四气十月立冬之後为小雪至大雪则为十一月节气此言霏霏当在十一月以後也白虎通云古者师出不踰时者为怨思也天道一时生一时养人者天之贵物也踰时则内有怨女外有旷夫故诗曰昔我往矣杨柳依依今我来思雨雪霏霏迟迟毛云长远也程子云言行道迟迟则见归思之切郑云行反在於道路犹饥渴言至苦也莫疑词犹论语文莫吾犹人之莫哀即伤悲言或有知我之情者否乎严云言莫知其劳苦乃所以深知之也范景文云去日则盼前期归日则感往事怀此凄惻不啻在己也范祖禹云予於采薇见先王以人道使人後世则牛羊而已毛云君子能尽人之情故人忘其死朱子云首章言征夫之出盖以玃狁不可不征故舍其室家而不遑宁处二章则既出而不能不念其家三章则竭力致死而无还心盖不复念家矣四章五章则唯勉于王事而欲成战伐之功也卒章则言事成之後极陈其劳苦忧伤之情也其序如此程子云上能察其情则虽劳而不怨虽忧而能励矣】

采薇六章章八句【序云遣戍役也文王之时西有昆夷之患北有玃狁之难以天子之命命将率遣戍役以守卫中国故歌采薇以遣之出车以劳逯杖杜以勤归也毛公云遣将率及戍役同歌同时欲其同心也季本辨之云古者出师以丧礼处之则无宴乐故无遣诗及其献捷代还则歌凯以归故极美其功而曲叙其情以为劳诗也邹忠胤亦云序以采薇为遣戍夫杨柳依依则正薇柔时也雨雪霏霏则正岁暮时也抚今追昔道其实历之景如此若云预道归时之景岂有方遣之日而遂以为昔往是庄子所谓今日适越而昔日至矣今按一月三捷自是纪述实事之语若遣行时安得有此子贡传以为劳师之诗是已而但系之宣王之世申培说亦以为宣王之世既驱玃狁劳其还师之诗此盖惑于汉书匈奴传之说谓懿王时王室遂衰戎狄交侵暴虐中国中国被其苦诗人始作疾而歌之曰靡室靡家玃狁之故岂不日戒玃狁孔棘至懿王曾孙宣王兴师命将以征伐之诗人美大其功而或又泥采薇出车篇中昔我

往矣四语文气相类则谓二诗果皆同时之作今第思薇作薇柔杨柳依依与黍稷方华迥不相及且彼归于春日迟迟此归于雨雪霏霏冬春了然乌可混也又况采薇三捷正值常华而出车获丑乃在二月其奏功之期尤相去之远乎赖有竹书为据则知此诗实作于王季之时不属之文王亦不属之宣王矣】

卷耳太姒欲文王求贤审官也【序云卷耳后妃之志也又当辅佐君子求贤审官知臣下之勤劳内有进贤之志而无险詖私谒之心朝夕思念至於忧勤也按史记称文王立为西伯礼下贤者日中不暇食以待士士以此多归之太顛闲天散宜生鬻子辛甲大夫之徒皆往归之是诗也其作于文王初即位之时多贤未来归之日乎刘敞云后妃但主内事所职陰教善不出闔壺之中业不过筮馈之事何得知天下之贤而思进之乎且令自古妇人欲干预政事故引此为证初虽以进贤审官为号已而晨鸣便无可奈何矣盖后妃於君子有夙夜警戒相成之道此诗言警戒人君之意不谓自己求贤审官也郝敬云或者谓妇人勿与外事然则鷄鸣之解佩十乱之邑姜非乎不越酒食不及爵赏借中馈以効箴故谓之志而已岂妇无公事休其蚕织之谓哉】

采采卷【尔雅作菴】耳不盈顷筐【阳韵丰氏本作𠂔】嗟我怀人寘彼周行【叶阳韵户郎翻 赋也采说文云捋取也重言采采非一采也卷耳^𠂔名尔雅以为苓耳广雅以为臬耳幽州人谓之爵耳以其形似鼠耳故有耳之号江东呼常臬郭璞云亦曰胡臬陆玕云叶青白色似胡葵白华细茎蔓生可煮为茹滑而少味四月中生子如妇人耳璫故又谓之耳璫^𠂔也罗愿云幽冀谓之?菜或又谓之常思菜一名施一名羊负来博物志曰昔中国无此言从外国逐羊毛中来此物既称胡臬必是胡物但其名出後代耳卷耳野中所多日夕羊下来多负以归以此得名未可知也本^𠂔云即今苍耳多刺丛生如盘飹藁中多用之按张敬夫诗采耳元因备酒浆其说本此后妃之贵必不自采卷耳淮南子称瞽师庶女位贱尚藁许叔重曰尚主也藁者藁耳菜名也主是官者至微贱也瞽师庶女复贱于主藁之官故云观此则主臬之官位之微者周礼顾不可考或成周以前有之如醢人酒人之属也郝云妇人以缝衣裳冪酒浆为事葛覃衣裳也卷耳酒浆也顷本头不正之义通作倾说文云仄也韩诗云欹也筐竹器欧阳修云卷耳易得顷筐小器也然采采而不能顿盈后妃以采卷耳之不盈而知求贤之难得因物托意讽其君子嗟说文云咨也易注云佐也言之不足以尽意故发此声以自佐我后妃自谓怀后妃自思也人谓贤人之未用者寘置周密也俱见说文行毛传云列也师师济济密布朝列曰周行左襄十五年君子谓楚于是乎能官人官人礼之急也能官人则民无觖心诗曰嗟我怀人寘彼周行能官人也王及公侯伯子男甸采卫大夫各居其列所谓周行也后妃言嗟我思欲君子敷求哲人布满有位亦惟恐朝之不盈也张纲云夫易得之菜以实易盈之器又采采而不已然且不能顿盈况贤才之士为难得百官之位为至衆欲求难得之材以实至衆之位可不思念之乎又荀子云卷耳易得也倾筐易盈也而不可以贰周行故曰心枝则无知倾则不精贰则疑惑刘敞本荀子之意以说此诗云采卷耳者欲求盈筐今不得盈心不在故无获也以言治国当求贤耳亦以心不专故贤不来矣如是顷筐无所获则失其所愿周行无所寘则失其所治此为后妃警戒求贤审官也亦通】陟彼崔嵬【灰韵】我马虺【九经考异作?丰本作虫】隤【灰韵尔雅作𡗗说文作𡗗】我姑【说文作𡗗音同云秦以市买多得为𡗗】酌【丰本作勺】彼金罍【汉书注作 𡗗】维以不永怀【叶灰韵乎乖翻 比而赋

也陟说文云登也崔说文云大高也崑说文云高不平也又尔雅云石山戴土谓之崔崑马比在位诸臣易曰用拯马壮吉亦以马比臣也虺似蛇而小解见斯干篇隤说文云下坠也按孙炎解虺隤为马退不能升高之病愚意犹今人言蛇倒退是也姑且也酌说文云盛酒行觞也后妃饮酒而以酌言则是与文王对酌也罍酒尊也顾起元云梁孝王有罍尊直千金戒後世善宝之古之酌酒皆取罍故庙堂之上罍尊在阼牺尊在西字本作罍形似壶龟目刻木作云雷象名罍取於云雷故也大者受一斛韩诗言天子以玉饰诸侯大夫皆以黄金饰士以梓孔穎達谓天子以玉经无明文士无饰言其木体则以上同用梓而加饰耳所以刻云雷者以盛酒故取其阳气发達又象云雷博施如人君下及诸臣也沈括云余尝得一古铜罍环其腹皆有画正是人间屋梁所画曲水细观之乃是云雷相间为饰如□者古云字也象云气之形如□者雷字也象回旋之声皆一□一□相间永毛云长也怀说文云念思也后妃言文王以身任国家之重当忧患之时犹之登崔崑者然惟此二三在位戮力公家譬马之虺隤其力亦孔殫矣而所欲求之贤人未知尚在何所微独我忧念之文王亦当忧念之人亦有言惟酒可以忘忧我姑且飭治中馈与文王对酌以相宽解庶不至长介怀而不释也盖无所聊赖之辞後章放此】陟彼高冈【阳韵】我马玄黄【阳韵】我姑酌彼兕觥【叶阳韵姑黄翻陆德明本丰本俱作觥】维以不永伤【阳韵比而赋也尔雅云山脊曰冈玄黄者毛云玄马病则黄朱子云病极而变色也兕兽名解见吉日篇其角可以为爵即兕觥也觥亦罚爵韩诗云觥受五升觥廓也所以着明之貌君子有过廓然着明陆佃云兕善抵触故先王之制罚爵以兕角为之酒阳物也而善发人之刚其过则在抵触故先王制此以为酒戒既言金罍又言兕觥者金罍所以盛酒及其注之兕觥然後饮之酌酒行觞须此二器故两言酌彼也伤说文云创也创者痛也盖忧思之极也苏辙云此章意不尽申殷勤也凡诗之重复类此】陟彼砠【说文作岵陆本作□集韵作□】矣我马瘠【虞韵陆云一作屠非】矣我仆痡【虞韵陆本作铺】矣云何吁【虞韵尔雅注作吁丰本作于】矣【比而赋也砠本作岵说文云石戴土也毛亦云石山戴土曰砠瘠痛说文皆云病也孙炎云瘠马疲不能进之病痡人疲不能行之病云何者自问之辞也吁说文云惊也升高必资马馭马必资仆马以比宣力四方之臣仆以比倡率羣僚之臣石山戴土既已不良于行而我又马瘠仆痡安能有济计无所出惟有深怀惊怛而已始而怀继而伤终而吁一节深一节王闻而求贤审官之念不勃然生哉又尔雅注引此句吁作吁长目远望也盖望贤者之来而解吾思也尤有味范景文云四矣字亦是乱辞其音方终不更迟之又久也晋束皙读书赋云读卷耳则忠臣喜诵蓼莪则孝子悲】

卷耳四章章四句【子贡传谓文王遣使求贤而闵行役之艱也劳之以卷耳申培说亦云文王遣使求贤而劳之以诗今观章首二句采耳乃中馈之业懿筐亦女执之器其必非文王语明矣朱子则以此诗亦后妃所自作后妃以君子不在而思念之可以见其贞静专一之至意谓当文王朝会征伐之时羣里拘幽之日而有此诗则恐鄙事非后妃所执大路非后妃所遵而更复登山饮酒乘马携仆何其言之不伦一至于此纵极赞为增伉俪之重得性情之正而其为义亦小矣若山王氏直以为劳媵妾之归宁而作无稽斯甚又齐鲁韩三家皆以为康王时诗亦不足信】

鹿鸣文王燕羣臣嘉宾之诗【出陈阳乐书按史记周本纪云公季卒子昌立是为文王笃仁敬老礼下贤者日中不暇食以待士士以此多归之意即鹿鸣南山有台诸诗之所为作也序

云鹿鸣燕羣臣嘉宾也既饮食之又实币帛筐篚以将其厚意然後忠臣嘉宾乃得尽其心矣孔丛子引孔子之言曰於鹿鸣见君臣之有礼也而仪礼注则云鹿鸣者君与臣下及四方之宾燕讲道修德之乐歌左传叔孙豹如晋晋悼公享之工歌鹿鸣之三三拜晋侯使行人问焉对曰鹿鸣君之所以嘉先君之好也敢不拜嘉又仪礼于燕礼乡饮酒礼皆歌鹿鸣四牡皇皇者华注谓歌鹿鸣取嘉宾示善道又乐其明昭之德可则傲也四牡取其勤劳王事忠孝之至以劳宾皇华取自以不及欲谘谋贤知自光明谓之升歌三终大射礼亦歌鹿鸣三终大戴记投壶篇云凡雅二十六篇共八篇可歌鹿鸣猗首鹊巢采芣采芣伐檀白驹驹虞刘公瑾云凡上下通用之乐止是小雅二南诸诗而无歌大雅者可见大雅独为天子之乐此二雅大小所以分也朱传因之以为此燕飨宾客之诗郝敬云此诗初本燕羣臣嘉宾作犹关雎本后妃之德虽乡射燕礼用之未可遂为乡射燕礼之乐歌也又按学记云大学始教皮弁祭菜示敬道也宵雅□三官其始也郑氏云宵之言小也□习也习小雅之三谓鹿鸣四牡皇皇者华也此皆君臣宴乐相劳苦之诗盖以居官受任之美诱谕其初志故曰官其始也章潢云观鹿鸣之诗後世燕射上下通用无非示人尊贤求教之意】

呦呦鹿鸣【庚韵以下二章例之则此句非韵】食野之苹【庚韵】我有嘉宾鼓瑟吹笙【庚韵】吹笙鼓簧【阳韵】承筐【丰氏本作匱】是将【叶阳韵资良翻】人之好【去声】我示【郑玄本作寘】我周行【叶阳韵户郎翻 兴也呦说文云鹿鸣声也鸣非一鹿故曰呦呦许慎云鹿之性见食急则必旅行陆佃云鹿性警防分背而食以备人物之害盖鹿苹善走者分背而食食则相呼羣居则环其角外向以防物之害己而毛诗草虫经曰鹿欲食皆鸣相召志不忌也周官曰视朝则皮弁服皮弁正以鹿皮为之盖取诸此易林云白鹿鸣呦呼其老少喜彼茂草乐我君子苹尔雅云藾萧也郭璞云今藾蒿也陆玕云叶青白色茎似箸而轻脆始生香可生食又可蒸食毛传说文皆以为萍按萍乃水中所浮者非野所生非鹿所食故郑笺不从而罗愿驳之以为古人以水草之交为麋则麋鹿亦食水草今鹿豕多就水傍食又人家养豕皆以萍食之何嫌于鹿不食乎愚谓罗说非也考尔雅先云萍萍又云苹藾萧萍苹字异实非一物安得混苹为萍乎又唐德宗聽政暇博览羣书一日问宰臣诗食野之苹苹是何草杨珣以尔雅藾萧为对上曰诗疏叶圆而花白丛生野中似非藾萧今按诗疏中都无此语不知何出野有苹而羣鹿相呼以食之以兴君有礼而衆嘉宾相率以趋之古语谓桃李不言下自成蹊即此意也旧说以鹿呼同类如君呼臣子似不成义理家语孔子曰关雎兴于鸟而君子美之取其雌雄之有别鹿鸣兴于兽而君子大之取其得食而相呼若以鸟兽之名嫌之固不可行也陆贾云鹿鸣以仁求其羣关雎以义鸣其雄刘昼云夫鸟兽之丑苟有一善诗人歌咏以为美谈奚况人之有善而可弃乎按昔裴安祖讲鹿鸣而兄弟同食诗之可以兴如此我主人自谓也嘉善也嘉宾谓所燕之客孔穎達云燕礼于客之内立一人为宾使宰夫为主与之对行礼其实君设酒殽羣臣皆在君为之主羣臣总为宾也燕礼云若与四方之宾燕则迎之于大门内四方之宾惟迎之为异其燕皆与臣同按序以羣臣嘉宾对言则似谓羣臣为本国之臣嘉宾为四方之宾然诗不言羣臣惟言嘉宾则总谓羣臣为嘉宾待臣之厚也朱子曰于朝曰君臣焉于燕曰宾主焉先王以礼使臣之厚于此见矣鼓严粲云动也谓动其声也陈阳云尔雅曰所以鼓祝谓之止所以鼓敌谓之鼙徒鼓钲谓之修徒鼓磬谓之蹇繇是观之凡所以作乐者古人皆以为鼓则所以作琴瑟笙簧谓之鼓不亦可乎又按易亦以击缶为鼓缶瑟解见关雎篇笙说文云正月之音物生故谓之笙又刘熙云笙生也象物贯地而生也

世本云随作笙未详何代人礼记云女娲之笙簧张揖云以匏为之十三管宫管在左方尔雅云大笙谓之巢小者谓之和巢风俗通作郭云列管匏中施簧管端大者十九簧小者十三簧乡射记云三笙一和而成声言三人吹笙一人吹和也许氏云古者造笙以曲沃之匏汶阳之筱有长短之制法象凤皇其形凤翼其声凤鸣大者名巢以衆管在匏有凤巢之象小者名和以大者倡则小者和也按笙以匏竹合而成声而在八音中独以匏称者盖所重在匏也唐協律郎刘颉作大乐令壁记谓女娲氏列管于匏以应立春今以木易匏而漆之无匏音矣惟荆梁之南尚仍古制鼓瑟吹笙即燕乐也瑟在堂上笙在堂下古者主人三献礼成之後而乐作记所谓凡举爵三作而不徒爵故作乐以乐之燕礼篇云小臣纳工工四人二瑟小臣左何瑟面鼓执越内弦右手相入升自西阶北面东上坐小臣坐授瑟乃工歌鹿鸣四牡皇皇者华卒歌笙入立于县中奏南陔白华华黍乃间歌鱼丽笙繇庚歌南有嘉鱼笙崇丘歌南山有台笙繇仪遂歌乡乐周南关雎葛覃卷耳召南鹊巢采芣采芣大师告乐正曰正歌备按小臣相工者也工四人谓二瑟二歌也左何瑟以左肩担瑟也面鼓谓可鼓者在前面也越瑟底孔也内弦以瑟弦侧向身也右手相以右手扶髻也授瑟相者以瑟授髻工也间歌者谓堂上堂下一歌一吹更迭而作也笙以笙吹诗也先鼓瑟而後吹笙故诗言之序云尔重言吹笙者引下鼓簧之文也簧笙中之簧解见君子阳阳篇严云吹笙则动其簧而发声承藉也筐篚属承之以筐指帛言书曰筐厥玄黄是也将奉也孔云饮有酬宾送酒之帛食有侑宾劝饱之帛或疑燕礼无用帛之文儿焘谓周语云先王之燕体解节折而共饮食之於是乎有折俎加豆酬币宴货以示容合好则燕未尝不用酬币也朱子云君臣之分以严为主朝廷之礼以敬为主然一于严敬则情或不通而无以尽其忠告之益故先王因其饮食聚会制为燕飨之礼以通上下之情而言其礼意之厚如此人指嘉宾也好犹爱也人之好我指平日言示垂示也垂象示人之示孔云古字以目视物以物示人同作视字後世作字目视物从示傍见示人物作单示字周说文云密也行毛传云列也与卷耳篇同解以衆宾与燕者森然在列亦谓之周行言我之於嘉宾既有琴瑟以乐之又有帛帑以将之矣彼嘉宾固素爱我者庶乎当此时而有以示我于济济行列之中乎万时华云嘉宾素有忠爱之心而情适于燕乐之时庶几志意舒展言语得尽若君以燕享结其臣之欢心则非所以为君臣因君之燕享而后输好我之恍亦非所以为臣矣严云以告我者为相爱盖道之使言也礼记子曰私惠不归德君子不自留焉引此诗言人有私惠于我而不合于德义之公君子决不留之于己也朱子云盖所求于羣臣嘉宾者如此夫如是是以君臣上下诚意交孚而莫不一出于正所以和乐而不淫也】呦呦鹿鸣食野之蒿【豪韵】我有嘉宾德音孔昭【叶豪韵则豪翻】视【丰氏本作示】民不佻【叶豪韵鲁刀翻左传说文中论丰本俱作佻】君子是则是傚【叶豪韵何高翻中论作效】我有旨酒嘉宾式燕以敖【豪叶兴也蒿尔雅说文皆云蒿也郭璞云今人呼为青蒿香中炙啖者为蒿陆玑云青蒿荆豫之间汝南汝陰皆云蒿也本或云牡蒿者牡衍字牡蒿乃是蔚非蒿也陆佃云蒿之类至多如青蒿一类自有两种有黄色者有青色者本草谓之青蒿亦恐有别也陕西绥德之间有青蒿在蒿丛之间时有一两株迥然青色土人谓之香蒿茎与常蒿悉同但比常蒿色青翠一如松桧之色至深秋余蒿并黄此蒿犹青气稍芬香恐古人所用以此为胜又尔雅云繁之丑秋为蒿则繁萧莪之类至秋老成通名为蒿德音善言也与上章示我周行相应孔甚昭明也此言嘉宾教益于我皆有德之言甚昭明也焘谓此作乐坐燕之後而复行旅酬之礼时也乡射礼云古者于旅也语疏义云宾筵之初礼乐方盛言语则慢矣迨至旅酬则礼已成乐已备于是而语乃无嫌也视民曹氏云与视民如伤同义佻轻薄也其视民

也不敢以轻薄之意视之故其所言无非造福民生之言君子赞美嘉宾也则法倣学也言嘉宾以不佻之德而形为孔昭之音信乎其为君子而我当尊所闻而师法之也此二句解依左传昭十年季平子伐莒取郕献俘始用人于亳社臧武仲在齐闻之曰周公其不飨鲁祭乎周公飨义鲁无义诗曰德音孔昭视民不佻佻之谓甚矣而壹用之将谁福哉又昭七年公至自楚孟僖子病不能相礼乃讲学之苟能礼者从之仲尼曰能补过者君子也诗曰君子是则是倣孟僖子可则倣已矣式用也燕通作宴说文云安也按贾逵曰不脱履升堂曰宴安之意也左传云享以训共俭宴以示慈惠敖毛云游也严云言其礼之从容也我与之燕饮而敖游庶乎从容欵洽而有磨砢浸润之益非徒游燕而已】呦呦鹿鸣食野之芩【侵韵】我有嘉宾鼓瑟鼓琴【侵韵】鼓瑟鼓琴【同上】和乐【音络後同】且湛【叶侵韵持林翻楷家君讳也说文本作嫔释文作耽】我有旨酒以燕乐嘉宾之心【侵韵兴也芩草名陆玕云茎如钗股叶如竹蔓生泽中下地咸处牛马亦喜食之罗愿云鹿鸣所食三物一曰芩】

【今藹蒿始生香可食二曰藹蒿甚香三曰芩芩亦香草盖草木之臭味相同有同类食之义琴解见关雎篇陈阳云颐天下之和者乐也穷乐之趣者琴也八音以丝为君丝又以琴为君此尔雅既释五音即次以琴而必先言瑟者瑟与琴相须为用异于琴者以丝分而音细耳故四代之乐大琴必配以大瑟中琴必配以小瑟又礼瞽蒙掌鼓琴瑟诗鼓瑟鼓琴书琴瑟以咏大传大琴大瑟皆并言之盖古制也然乡饮酒礼二人皆左何瑟燕礼小臣左何瑟乐记清庙之瑟诗并坐鼓瑟何不日鼓瑟皆不及琴者以瑟见琴也又云文王之燕羣臣嘉宾始则鼓瑟吹笙吹笙鼓簧者以其乐主盈遇之之诚有加而无已也终则鼓瑟鼓琴先瑟而後琴者以反为文示其有常而无变也煮谓首章言鼓瑟吹笙至此复言鼓瑟鼓琴者盖旅酬将终作无算乐之时也先是作乐乐宾之後君命曰以我安言以我故安坐也皆对曰诺敢不安既而君曰无不醉命尽醉也皆兴对曰诺敢不醉于是旅酬礼毕无筭爵言以醉为节不限数也公有命彻幕公尊有幕今彻之示欲罄此尊意勤厚也然後皆升堂反坐无筭乐向者献酬有节笙歌间合皆三终今日无筭不拘三也此诗鼓瑟鼓琴重言义或因此及宵执烛奏陔夏而後出邓元锡云终之以乐成之以礼爱敬交通拜坐互起既腴厥终复惟其始此古者君礼臣臣事君一体相待而成之道也耽通作嫔说文云乐也愚按字久甚盖言乐之甚也燕乐燕而乐也严云言非徒养其气体也偕之燕饮以乐其心庶其罄竭而无隐耳盖上下之情不通则忠臣嘉宾虽欲尽心以告君而其势分隔絶有不可得者非为必待燕而後尽其心也毛云夫不能致其乐则不能得其志不能得其志则嘉宾不能竭其力陆化熙云心字最重盛世所以地天交泰堂帘不隔而絶无忌讳者正为君心与臣心合而为一耳冯时可云但欲燕乐其心而不敢为再三之瀆其尊之也至矣又范祖禹云食之以礼乐之以乐将之以实求之以诚此所以得其心也贤者岂以饮食币帛为悦哉夫昏姻不备则贞女不行也礼乐不备则贤者不处也贤者不处则岂得乐而尽其心乎】

鹿鸣三章章八句【子贡传云伐木菁莪隰桑白驹皆所以燕贤也申培说则云鹿鸣天子燕宾师之歌盖鹿鸣伐木菁莪隰桑皆燕贤者而词有重轻敬有隆杀所谓尊贤之等也愚按以此诗专为燕宾师作亦臆度之说又王应麟云太史公谓仁义陵迟鹿鸣刺焉蔡邕琴操云鹿鸣周大臣所作也王道衰大臣知贤者幽隐弹弦风谏陈阳乐书引古琴曲谓周大臣伤时在位而作王符云忽养贤而鹿鸣思又或谓鹿鸣四牡皇皇者华之类皆为康王时诗盖齐鲁韩

三家之说犹关雎刺时作讽也 又按汉太乐食举十三曲一曰鹿鸣杜夔传旧雅乐四曲一曰鹿鸣二曰驹虞三曰伐檀四曰文王皆古声辞琴操云古琴有诗歌五曲曰鹿鸣伐檀驹虞鹊巢白驹黄佐云礼乐相须以为用礼非乐不行乐非礼不举自后夔以来乐以诗为本诗以声为用八音六律为之羽翼耳仲尼编诗为燕享祀之时用以歌而非用以说义也古之诗今之词曲也若不能歌之但能诵其文而说其义可乎不幸腐儒竞起齐鲁韩毛四家各为序训而以说相高汉朝又立之学官以义理相授遂使声歌之音湮没无闻然当汉之初去三代未远虽经生学者不识诗而太乐氏以声歌肄业往往仲尼三百篇瞽史之徒例能歌也奈义理之说既胜则声歌之乐日微东汉之末礼乐萧条虽东观石渠议论纷纭无补于事曹孟德平刘表得汉雅乐郎杜夔夔老矣又不肄习所得于三百篇者惟鹿鸣驹虞伐檀文王四篇而已余声不传大和末又失其三左延年所得惟鹿鸣一篇每正旦大会太尉奉命羣臣行礼东厢雅乐常作者是也古者歌鹿鸣必歌四牡皇皇者华三诗同节故曰工歌鹿鸣之三而用笙入三终以赞之然後间歌合乐首尾相承节奏有属今得一诗而无所用可乎应知古诗之声为可贵也至晋鹿鸣一篇又絶无传後世不复闻诗矣】

南山有台文王养老之诗【尚书大传云齐宣王问于子春曰寡人欲行孝弟之义为之有道乎子春曰昔者卫闻之乐正子曰文王之治岐也五十者杖于家六十者杖于乡七十者杖于朝见君揖杖八十者杖于朝见君揖杖君曰趋见客无俟朝以朝乘车輶轮御为仆送至于家而孝弟之义達於诸侯九十杖而朝见君建杖君曰趋见母俟朝以朝车送之舍太子重乡养卜筮巫医御于前祝咽祝哽以食乘车輶轮胥与就膳彻送至于家君如有欲问明日就其室以珍从而孝弟之义達于四海此文王之治岐也君如欲行孝弟之大义盍反文王之治岐按文王立教最重养老礼文王世子篇云凡大合乐必遂养老郑玄谓春入学舍菜合舞秋颁学合声於是时也视学则遂养老又孔穎達谓月令季春大合乐亦在其中此皆因视学而养老者也至其教世子也亦然曰凡祭与养老乞言合语之礼皆小乐正诏之於东序大乐正学舞干戚语说命乞言皆大乐正授数故孟子曰伯夷辟纣居北海之滨闻文王作兴曰盍归乎来吾闻西伯善养老者太公辟纣居东海之滨闻文王作兴曰盍归乎来吾闻西伯善养老者天下有善养老则仁人以为已归矣文王之善养老其见于经传者如此南山有台之篇据乡饮酒礼燕礼笙入而後皆间歌此诗则周公未作仪礼之前已有之故朱子以为燕飧通用之乐歌而其首二章则祝君子曰万壽无期万壽无疆末二章则又赞之曰遐不作眉壽遐不作耄此非为养老发咏而何】

南山有台【叶支韵田饴翻穆天子传作□子贡传申培说丰氏本俱作臺】北山有莱【叶支韵陵之翻】乐【音络後同】只【左传作旨】君子邦家之基【支韵】乐只君子万壽无期【支韵兴也南山北山皆据周地而言左右前後之况也台莱皆^叶名尔雅云台夫须陆玑云旧说夫须莎草也有皮坚细滑致可为簦笠都人士诗云台笠是也陆佃云又可以为蓑疏而无温故莎从沙与内司服所谓沙同意严粲云以莎^叶为衣则谓之蓑莎为^叶名蓑为衣名罗愿以台与莎为两物云台者沙^叶可为衣以御雨编之若甲襍襍而垂故雨顺注而下然或藉而卧则不能隔雨名曰夫须盖匹夫所须也莎茎叶都似三棱根若附子周匝多毛人谓之香附子一名雀头香招隐云青莎杂树兮蘋草蘼蘼蘋与莎相似但以大小为异陶隐居以为古人诗多用之而无识者河中府有绿莎厅晏元献公庭莎记曰是^叶耐水旱乐延蔓虽拔

心陨叶弗之絶也按尔雅云台夫须又云藹侯莎疏云藹即莎别名侯维也犹语辞也说文又训莎云藹侯也据此则台与莎自是两物罗说是也朱子以台为即莎草而大全又引本草曰其实名香附子又似此台即罗氏之所谓莎者但未知罗氏所言沙^廿其形状何似一说台一名山莎而夏小正曰藹也者莎^也通作沙^口亦名地毛见广雅则尔雅之所云藹侯莎者乃以莎^二字为名不单名莎且得地毛之名疑罗所云根若附子周而多毛者形若近之而台既一名山莎故旧说谓之莎草或即青莎绿莎之类耳莱说文云蔓华也通作厘尔雅所谓厘蔓华是也郭璞云一名蒙华又朱子云其叶香可食陆玑云今兖州人蒸以为茹谓之莱蒸按朱陆所云未审即蔓华否然以意类之莎既乐延蔓而莱亦名蔓华则二草皆蔓生属也又原始云莱即梨也一名落帚初生叶可食大则为树可为杖未知是否欧阳修云高山多草木如周多贤才殷大白云山以草木为毛髮国以贤才为羽仪乐只君子言君子有令德可令人爱乐也郑玄云只之言是也君子通羣老之为宾客者言之以此诗五章各举南北山草木起兴可知其非一老也基说文云墙始也基固则墙安邦家之基即邦家赖以巩固之谓以台莱为兴者取其附地而生蔓延愈远或又可以为杖有得其基藉之象焉又罗云诗雅言得贤为邦家立太平之基凡咏八物以台为首盖御雨之具虽至微然非平日预知其所在蓄以待之则一旦欲用索之而不得故特宜先备亦犹贤者之不可不先蓄也越王句践栖于会稽之上求谋士退吴者大夫种进对曰臣闻贾人夏则资皮冬则资絺旱则资车水则资舟以待乏也夫虽无四方之忧然谋臣与爪牙之士不可不养而择也譬如蓑笠时雨既至必求之今君王既栖于会稽之上然後乃求谋臣无乃後乎是古者蓄蓑笠以备患比之贤者之待难矣陆佃云莱可食台可覆贤者之类也故曰邦家之基又云台可覆以象底下之臣莱可食以象济难之臣左襄二十四年郑子产寓书于韩宣子曰夫令名德之舆也德国家之基也有基无坏无亦是务乎有德则乐乐则能久诗云乐只君子邦家之基有令德也夫昭十三年同盟于平丘子产争承自日中以争至于昏晋人许之仲尼谓子产于是行也足以为国基矣诗曰乐旨君子邦家之基子产君子之求乐者也愚按传意以国安则可乐故曰求乐此与诗解异期限也万壽无期言壽自此至于万年尚未有期限也严云有期则有时而止刘公瑾云或疑宾客不足以当万壽之语愚谓当时宾客容有爵齿俱尊足当之者盖古人简质如士冠礼祝辞亦云眉壽万年又况古器物铭所谓用薪万壽用薪眉壽万年无疆 其眉壽万年无疆之类皆为自祝之辞则此诗以万壽祝宾庸何伤乎愚按此诗为养老作先美其德而後祝其壽期

其老而益老也次章放此】南山有桑【阳韵】北山有杨【阳韵】乐只君子邦家之光【阳韵】乐只君子万壽无疆【阳韵兴也典述云桑木者箕星之精神木也虫食叶为文章格物论云桑树大者数围高一二丈许皮麤枝干条竦春正二月抽条发叶大者盈尺有刻缺面深绿而光杨解见采薇篇与柳相似枝条扬起者曰杨陆佃云郁彼之杨沃若之桑以贲乎山则有光之象故曰乐只君子邦家之光基所以安也光所以荣也辅广云首章美其可以为邦家之基本所谓治生乎君子贤者为国之桢干也次章美其可以为邦家之显荣所谓儒者在朝则美政在位则美俗也陆化熙云邦家之基之光直指其德非言德足以基之显之也疆界也期以时言疆以地言总是言其未有限量之意】南山有杞【纸韵】北山有李【纸韵】乐只君子民之父母【叶纸韵母鄙翻】乐只君子德音不已【纸韵兴也王应麟以为梓祀之杞解见在彼杞棘下愚以陟彼北山言采其^例之则此^当即是枸櫞也根叶茎子皆可食令人轻身益气解见四牡篇李木之多子者解见何彼穠矣篇陆佃云李性颇难老老虽枝枯子亦不细其品处桃上故诗曰投我以桃报之以李杞李皆可食取其养人故以兴民之父

母父母子之所赖以养者也大学云民之所好好之民之所恶恶之此之谓民之父母前言邦家之基邦家之光犹虚虚赞美之词此正指其德之实足为人所利赖耳有德之言曰德音鹿鸣篇德音孔昭是也後放此已说文云止也古者养老有乞言合语之礼内则篇云凡养老五帝宪三王有乞言五帝宪养气体而不乞言有善则记之为惇史三王亦宪既养老而後乞言亦微其礼皆有惇史文王世子篇云始之养也适东序释奠於先老遂设三老五更羣老之席位焉适馔省醴养老之珍具遂发咏焉退修之以孝养也反登歌清庙既歌而语以成之也言父子君臣长幼之道合德音之致礼之大者也按乞言者从之求善言合语者旅酬而合语君子有蘊藉足以父母斯民当其就养之时亶亶谈说曾无解倦故曰德音不已】南山有栲【叶有韵去九翻】北山有杻【有韵】乐只君子遐不眉寿【有韵】乐只君子德音是茂【叶有韵莫口翻】兴也栲杻解俱见山有枢篇栲全天年杻号万岁故取以兴眉寿又陆佃云杻可为弓干栲可为车辐有久之道故曰遐不眉寿亦通遐之言何盖音近也眉寿毛传云秀眉也刘公瑾云医书以眉毛过垂眼下者为寿长严云秀眉寿证也愚按万寿无期万寿无疆愿其後日之辞也遐不眉寿遐不黄耆美其今日之辞也茂者^廿丰盛之义德音之多亦如之故曰是茂盖期望过此以往愈得闻君子之善言也】南山有枸【麋韵】北山有桺【叶麋韵勇主翻】乐只君子遐不黄耆

【叶麋韵读如古果五翻】乐只君子保艾尔後【叶麋韵後五翻】兴也枸毛传云枳枸也陆玑云其状如栌一名枸骨高大如白杨所在山中皆有理白可为函板枝柯不直子着枝端大如指长数寸噉之甘美如饴八九月熟江南特美今官园种之谓之木蜜古语云枳枸来巢言其味甘故飞鸟慕而巢之本从南方来能令酒味薄若以为屋柱则一屋之酒皆薄本草注云其树径尺叶如桑柘其子作房似珊瑚核在其端人皆食之诗诂云枸木在处有之其子生枝端横析岐出状如枅拱土人谓枅拱木此木误入酒能使酒化如水味本草云木蜜树生南方枝叶俱可噉如饴古今注云一名树蜜一名木锡实形卷曲核在实外亦名白石白实木实木石一名机枸子朱子云建阳谓之皆拱子吾乡呼为兼勾味甘而解酒毒李善注宋玉风赋枳枸来巢云橘踰淮为枳句曲也以旧说考之句当通作枸李解似误孔云枸木多枝而曲所以来巢枸又通作枅广韵云枳枅实如珊瑚是白石木之子古者人君燕食所加庶羞凡三十一物其果则有菱枅曲礼云妇人之挚枅榛疏云枅即今之白石李也郑玄云今邳郯之间食其实亦名支枸又名厉汉脚指戴侗云以其实似指也人亦取以代饴作餐枅尔雅云鼠梓也郭璞云楸属今江东有虎梓陆玑云其树叶木理如楸山楸之异者今人谓之苦楸湿时脆燥时坚集韵云似山楸而黑曹居贞云枅宫室之良材也严云台莱桑杨[?]李栲杻枸枅多其名者喻贤之多而皆有用也陆佃云得贤之盛若栲杻枸枅高大以不朽成乎山则至矣愚按此章所以取兴枸枅者不徒取高大坚久之义枸可代饴所以为养枅可构宫室所以为安末句云保艾尔後保之为义则安也艾之为义则养也诗之兴意殆兼为是与黄毛云黄髮也舍人云老人髮白复黄也耆说文云老人面冻黎色若浮垢者方言云汝颍梁宋之间谓养为艾後後日也自此以後寿尚未有穷期故曰保艾尔後盖申祝之辞】

南山有台五章章六句【穆天子传庚寅天子西游乃宿于祭壬辰祭公饮天子酒乃歌□天之诗天子命歌南山有□乃绍宴旧说疑为即南山有台之篇但古字难晓耳左襄三十年季武子如宋报向戌之聘归复命公享之赋鱼丽之卒章公赋南山有台武子去所曰臣不堪也

按燕礼既间歌此二诗而鲁之君臣复举此二诗为赋何也岂礼之行亦有异耶序以为乐得贤也得贤则能为邦家立太平之基矣邹忠胤駭之云序以南有嘉鱼为乐与贤此篇为乐得贤不过更一字以为异其实无甚意义朱子亦谓看诗便有感发人意思今读之无所感发者正是被时儒解杀了如南山有台之序盖见诗中有邦家之基故如此说才如此说定便局了一诗之意至若子贡传以为大臣所以报王申培说以为大臣颂美天子之诗此不过因诗中有万寿二语疑谓非颂祝臣下之词耳果尔则周穆鲁襄之飨臣皆不宜赋此诗矣】

伐木文王季冬大饮三族也【月令季冬之月命乐师大合吹而罢郑玄注云岁将终与族人大饮作乐于大寝以缀恩也言罢者此用礼乐於族人最盛後年若时乃复然也凡用乐必有礼用礼则有不用乐者王居明堂礼季冬命国为酒以合三族君子说小人乐唐礼志贞观中顔师古议明堂曰文王居明堂之礼国有酒以合三族推其事与月令合黄子道周云夫是季冬之月不言合族也而於合吹言合族者盖合族在於是矣诗曰坎坎鼓我蹲蹲舞我迨我暇矣饮此湑矣谓岁暮礼阕王者乃暇也愚按先是仲冬之月日短至则伐木取竹箭季冬命四监牧秩薪柴所谓草木黄落然後斧斤入山林者合之岁暮饮湑之说伐木之诗信为此事咏矣郑注摭王居明堂礼而师古指王为文王必有所据玉海引逸周书云文王召发于明堂而淮南子亦云文王周观得失徧览是非尧舜所以昌桀纣所以亡者皆着於明堂是则文王果尝居明堂益徵顔监之不妄也礼有飨有食有燕飨礼烹太牢以饮宾体荐而不食爵盈而不饮几设而不倚依尊卑为献数毕而止食礼无乐有饭有殽虽设酒而不饮其礼以食为主燕礼牲用狗一献之礼既毕皆坐而饮酒其爵无筭也其乐无筭也此诗言有肥牡有肥羜是用太牢则同于飨言陈馈八簋笾豆有践是有饭有殽则同于食言有酒湑我无酒酤我是无筭爵言坎坎鼓我蹲蹲舞我是无筭乐则同于燕兼是三者而有之盖礼之盛也故月令谓之大合吹而郑注谓之大饮至其末章曰民之失德乾餱以愆则又命国人皆合三族之事也三族有二义其一谓父子及身则小记云以三为五以五为九是也其一谓父族及母族妻族也是诗有以速诸舅之言则当从後义国君行此礼则君子说国人皆行此礼则小人乐故序以此诗为燕朋友故旧也而复申之曰自天子以至庶人未有不须友以成者亲亲以睦友贤不弃不遗故旧则民德归厚矣盖其意似亦有窥于此】

伐木丁丁【叶庚韵中茎翻】鸟鸣嚶嚶【庚韵】出自幽谷【屋韵】迁于乔木【屋韵】嚶其鸣【庚韵】矣求其友声【庚韵】相【去声】彼鸟矣犹求友声【同上】矧伊人矣不求友生【庚韵】神之听之终和且平【庚韵兴也伐斫也丁之言当盖音近也谓施斧与木相当也重言丁丁者见其非一伐也嚶说文云鸟鸣也重言嚶嚶者郑玄云两鸟声也幽说文云隐也谷两山间流水之道也迁说文云登也尔雅云木上勾曰乔欧阳修云考诗之义是为鸟在木上闻伐木之声则惊鸣而飞迁于他木方其惊飞仓卒之际犹不忘其类相呼而去其在人也可不求其友乎张氏云诗人多相因之辞如伐木而感鸟鸣盖因此以兴焉者也愚按此总即一时所见以起兴首章取鸟鸣後二章取伐木寓意则一徐干云小人尚明鉴君子尚至言至言也非贤友则无取之故君子必求贤友也诗曰伐木丁丁鸟鸣嚶嚶出自幽谷迁于乔木言朋友之义务在切直以升于善道者也孟子云吾闻出自幽谷迁于乔木者未闻下乔木而入于幽谷者嚶其鸣矣专指求友之鸟而言此嚶然而鸣者乃是求其友之声若此鸟鸣而又有彼鸟以应之则为嚶嚶也矧说文云况也字从矢从引取词之所之如矢也求友生

者求友以生迫切之辞也羽族微类犹必呼其羣以择所安况人有知而可不取资于朋友以期生全乎友之於人德业相劝过失相规患难相救皆胥匡以生之道也神谓鬼神听犹鑒也终者久要之意程子云和谓相好平谓不变神之听之终和且平乃誓神明心之语承上文言人不可不求友故盟之于神愿终久相与和好而不变也范祖禹云质诸鬼神而无疑亦可以为不欺矣真德秀云玩其诗只见为人之求友而不为君之求臣盖先王乐道忘势但知有朋友相须之义而不见有君臣相临之分故也此章首提朋友之当笃後第二章举朋友中之尊者为言第三章举朋友中之卑者为言】伐木许许【语韵说文丰氏本俱作所所】酺酒有蕝【语韵】既有肥羜【语韵】以速诸父【叶语韵读如许喜与翻】寧适不来微我弗顾【叶语韵读如巨臼许翻】於【音乌】粢酒埽【叶有韵苏后翻】陈馈八簋【叶有韵已有翻说文云古作甌徐锴云九声也】既有肥牡【有韵】以速诸舅【有韵】寧适不来微我有咎【有韵兴也此下二章皆以伐木起兴程子云山伐木非一人能独为必与同志者共之既同其事则相亲好成朋友之义伐木之人必有此义况士君子乎故赋伐木之人叙其情推其义以劝朋友之道刘敞云伐木必求助于人况任天下之事多重于伐木者乎许许朱子云衆人共力之声淮南子翟煎对梁王曰举良木者前呼邪许後亦应之此举重劝力之歌也按邪许吕览又作輿□盖其声相近耳说文作所所云伐木声也酺说文云下酒也徐锴云犹簍也簍取之也章怀太子云犹滤也陆德明云谓以筐?酒朱子云沛之而去其糟也毛传云以筐曰酺以藪曰湑孔穎達云筐竹器也藪草也酺酒者或用筐或用草用草者用茅也左传尔贡苞茅不入王祭不供无以缩酒是也说文无蕝字当通作与党与也此句属伐木之衆人言盖伐木必须力故人皆酺酒以助力各有党与也亦借以兴燕饮之意苏辙云伐木至小矣而犹须友故君子于其闲暇而饮食以燕乐之所以求其驩心也尔雅云未成羊曰羜说文云五月成羔也罗愿云说文称五月生似谓仲夏所生按齐民要术五月六月七月生者两热相仍恶中之甚以速诸父不应用此当是生及五月者尔陆佃云字从宁伋也伋其美成而後足用速尔雅云徵也易不速之客仪礼乃速客皆谓相呼召也亦欲其亟来之意毛云天子谓同姓诸侯诸侯谓同姓大夫皆曰父异姓则称舅曰寧曰微皆意中猜忖之辞寧犹岂也寧适不来虑其适然有故而不来也微之言无亦音近也顾念也微我弗顾虑其无乃不我肯顾也於朱子云叹辞粢通作灿说文云灿烂明滯貌洒淅埽弃也俱见说文谓以水湿地而拚除之也陈通作嗽说文云列也周礼注云进食于尊曰馈孔云粢然洒埽其室庭陈饮食之馈八簋朱子云器之盛也明堂位云有虞氏之两敦夏后氏之四琖殷之六瑚周之八簋又按祭统云三牲之俎八簋之实美物备矣是则八簋乃国家祭礼而今用以陈馈盖尊敬之至也牡说文云畜父也孔穎達以为肥羜之牡者罗愿则云诸父用羜羜则小羊诸舅用牡牡乃大牛礼隆杀不同者羜乃食礼义亲而礼数牡乃享礼意重而礼厚所以待诸父与诸舅各有所宜也礼记曰羔豚而祭百官皆足太牢而祭不必有余礼之称者皆如此陆佃云既有肥羜而後言既有肥牡则其礼有加而无己愚按酺酒洒埽陈馈羜牡皆一时事互文以相通耳先言诸父後言诸舅亲疎之序也咎毛传云过也邓元锡云以速诸父舅而不来也寧其适然他有故而不来乎将无我弗顾我有咎而不来也自反深而望切矣旧说谓但欲尽其在我若彼之来不来於我无与则是假一速以塞责而已诗中肫切之意恐不若是】伐木于阪【叶铕韵孚旁翻】酺酒有衍【铕韵亦叶先韵夷然翻】笱豆有践【铕韵】兄弟无远【叶铕韵读如輶於殄翻亦叶先韵於圆翻】民之失德乾餱以愆【先韵亦叶铕韵以浅翻】有酒湑【叶麋韵读如数爽主翻释文作醕】我无酒酤【叶麋韵果五翻】我坎坎【说文作鞮】鼓【麋韵

说文作舞】我蹲蹲【释文说文俱作樽】舞【麋韵】我迨我暇矣饮此湑【见上】矣【兴也说文云坡者曰坂析木已毕而置之从高临卑之地将有所移而用之也衍严粲云水溢也言酺酒之多也工竣则相与饮酒以乐之与次章之以酒助力者不同矣迨暇饮湑意亦如是笱豆有践解见伐柯篇兄弟朱子云朋友之同侪者兼同姓异姓言先诸父诸舅而後言兄弟者尊卑之序也无远欲其无相远也即不我遐弃之谓真德秀云尊其友曰父曰舅亲其友曰弟曰兄此其为尊德乐道之至也夫民之失德二句是比方之词盖即常情之小失以唤起上当笃友也失德只就自处言顔师古云言人无恩德不相饮食乾餼二物皆食之薄者也王制乾豆注云乾谓腊之以为豆实疏云豆实非脯而云乾者谓作醢及鬻先乾其肉徐锴云今人谓饭乾为餼诗乃裹餼粮是也愆说文云过也即失德之愆程子云民之失德故不能修亲睦之道厚朋友故旧之礼至乾餼不相及邓云乾餼之愆也非薄物细故之失已也礼无不体失礼是失德也德何敢失也汉书宣帝诏曰夫酒食之会所以行礼乐也今郡国或擅为苛禁禁民不得具酒食相贺召繇是废乡党之礼令民亡所乐非所以导民也诗不云乎民之失德乾餼以愆薛宣疏亦引此云乡党阙于嘉宾之懽九族忘其亲亲之恩饮食周急之厚弥衰送往劳来之礼不行夫人道不通则陰阳否隔和气不兴未必不繇此也有酒以下六句极言礼意之真切友情之亲厚如此不出上三段设燕意而写情更为亲切湑说文毛传皆云茜酒也茜音缩陆云与左传缩酒同义谓以茅泝之而去其糟也酤说文毛传皆云一宿酒也徐云谓造之一夜而熟若今鷄鸣酒是也言或储之平日或造之近时母使其或不足于供也或通作局局者买也亦通作沽论语沽酒市脯不食尸子云沽者知酒之多少是也黄佐云汉食货志曰诗云无酒酤我而论语云沽酒不食二者似相反也夫诗处承平之世酒酤在官和旨使人可以相御也论语孔子当衰周之世酒酤在民薄恶不诚是以疑而不食愚详诗之所云特设言之以见其相爱之情耳非必无酒纵使无酒犹当为我酤买之笃于朋友不以有无为辞也下文言饮此湑知不待酤也坎通作龔说文云舞也解见宛丘篇重言坎坎者舞之不已也击鼓以为舞节故陈风曰坎其击鼓而此亦曰坎坎鼓我也蹲通作樽偏旁从土说文云土舞也重言蹲蹲者见非一人之舞也苏云奏之以鼓重之以舞尽其有以乐之也陈阳云易曰鼓之舞之以尽神古者作乐始於鼓以作其声终於舞以动其容坎坎鼓我则发诸声音而以反为文也蹲蹲舞我则形诸动静而蹈厉有节也人道性术之变尽于此矣文王燕朋友故旧而为乐至此亦仁之至义之尽也通章言我皆主人自我旧说谓湑我酤我鼓我舞我为古人倒句文法非也读者当于湑酤鼓舞字略断言有酒而令人湑之者我也无酒而令人酤之者我也命人坎坎而鼓之者我也命人蹲蹲而舞之者我也孔云礼记天子食三老五更于大学冕而总干亲在舞位知此非自舞者食三老五更重礼示敬故王亲舞之此与故旧燕乐不当亲舞也若言亲舞岂亦亲击鼓乎以此知使人为之迨本作逮说文云及也有汲汲皇皇之意暇说文云闲也岁终而事闲也饮此湑者饮此所湑之酒也邓云鹿鸣之辞笃而敬伐木之辞和而亲】

伐木三章章十二句【毛郑本作伐木六章章六句刘氏云此诗每章首辄云伐木凡三云伐木故知当为三章旧作六章误矣朱子从之丰氏本亦同朱传以为燕朋友故旧子贡传以为燕贤申培说以为天子燕友之歌皆不能知此诗所用之地若蔡邕正交论云周德始衰颂声既寢伐木有鸟鸣之刺盖因诗中有矧伊人矣不求友生之语遂以为刺诗耳细玩诗中无刺意也而太平御览初学记古乐志及文选注皆云饥者歌食劳者歌事诗人伐木自苦其事故

以为文此本韩诗之说然其义小矣】

诗经世本古义卷六

卷七

<经部,诗类,诗经世本古义>

钦定四库全书

诗经世本古义卷七

明 何楷 撰

殷帝乙之世诗五篇

草虫思南仲也南仲以王命城朔方遂伐西戎其室家思念之而作此诗【篇中嚶嚶六语与出车篇全同以是知为南仲之室家思南仲也愚又疑此诗谓即六笙诗中之南陔按仪礼燕礼篇大夫皆就席後席工于西阶上少东小臣纳工工四人二瑟小臣坐授瑟乃降工歌鹿鸣四牡皇皇者华卒歌主人洗升献工笙入立于县中奏南陔白华华黍主人洗升献笙乃间歌鱼丽笙由庚歌南有嘉鱼笙崇丘歌南山有台笙由仪遂歌乡乐周南关雎葛覃卷耳召南鹊巢采芣采芣大师告乐正曰正歌备乃降复位乡饮酒礼篇奠觶後设席于堂廉东上工四人二瑟瑟先相者二人授瑟乃降工歌鹿鸣四牡皇皇者华卒歌主人献工笙入堂下磬南北面立乐南陔白华华黍主人献工于西阶上乃间歌鱼丽笙由庚歌南有嘉鱼笙崇丘歌南山有台笙由仪乃合乐周南关雎葛覃卷耳召南鹊巢采芣采芣工告于乐正曰正歌备乐正告于宾乃降此二礼作乐乐宾之仪节大略也其南陔白华华黍由庚崇丘由仪六篇序皆以为有其义而亡其辞所谓有其义者序谓南陔孝子相戒以养也白华孝子之洁白也华黍时和岁丰宜黍稷也由庚万物得絺其道也崇丘万物得极其高大也由仪万物之生各得其仪也又云南陔废则孝友缺矣白华废则廉耻缺矣华黍废则蓄积缺矣由庚废则陰阳失其道理矣崇丘废则万物不遂矣由仪废则万物失其道理矣所谓亡其辞则诸儒说各不同郑玄谓遭战国及秦之世而亡之朱子谓南陔以下今无以考其名篇之义然曰笙曰乐曰奏而不言歌则有声而无辞明矣意古经篇题之下必有谱焉如投壶鲁鼓薛鼓之节而亡之耳商份亦云所谓亡其辞今论语亡字皆读为无字谓此六诗於笙奏之虽有其声举无辞句不若鱼丽南有嘉鱼南山有台於歌奏之歌人声也故有辞耳此歌与笙之异也董氏之说亦然吕祖谦严粲颇不然其说吕之言云笙入有声无诗其说不为无理然国语叔孙穆子聘晋伶箫咏歌鹿鸣之三鹿鸣三篇既可与箫相和而歌则南陔以下岂不可与笙相和而歌乎严之言云乐以人声为主人声即所歌之诗也若本无其辞则无絺有其义矣序本因其辞以知其义後亡其辞则惟有序所言之义存耳黄震两辨之其辨吕云国语言歌则鹿鸣三篇有辞之可歌也仪礼不言歌则南陔六诗无辞之可歌也此不足疑也其辨严云古之乐章今之琴谱类也琴谱有操辞具存者鹿鸣之诗之歌也有徒存其谱而无辞曲之可歌者如长清短清与长侧短侧之类虽无其辞未尝无其义也此亦不足疑也又王质云唐有上柱凤雏平调清调瑟调平折命喙七曲亦有声无辞其说皆与朱子合而顾起元说略则又云笙诗有辞有声如其有声无辞宜曰笙调不云笙诗燕礼升歌鹿鸣下管新宫新宫今亡宋公享公孙昭子赋新宫将谓管

亦有声无辞耶笙诗之亡犹管诗之亡也书曰琴瑟以咏笙鏞以间诗曰我有嘉宾鼓瑟吹笙皆有诗也歌咏之声依之律和之自后夔以来未之有改也是故升歌三终鹿鸣三诗也笙入三终南陔三诗也间歌三终鱼丽由庚六诗也合乐终则二南六诗衆声偕作矣於是工告乐正曰正乐备皆谓之歌而可谓之有声无辞耶凡乐四节首节歌也比歌以瑟也二节笙也辅笙以磬也三节歌笙相禅也四节乡乐也凡乐四节为诗十八篇皆有声有辞鼓瑟鼓琴笙磬同音以雅以南此之谓也以上诸家持论翻駁各有义理惟是果无其辞则序不应知其义既云有其义则又岂无一二传其辞此终是可疑窃谓诗辞纵遂亡序义未必真也及晋时束皙与同业畴人肄修乡饮之礼於是依附序义补着其文以缀旧制而郑樵刘辰翁辈皆非之以以为无谓云间窃以愚意测之诗序所次篇目合六笙诗共三百一十一篇後人相传以为定本而史记言古诗三千余篇及至孔子去其重取可施於礼义者三百五篇龚遂谓昌邑王曰大王诵诗三百五篇王式曰臣以三百五篇谏及?纬之书如乐纬诗纬尚书璿玑铃其传自汉世者皆以三百五篇为夫子删存定数未尝有三百一十一篇也抑微独史记诸书而已当孔子未录商颂之时所删周家之诗篇始于周南而以鲁颂为殿亦只有三百篇耳故曰诗三百一言以蔽之曰思无邪诗三百者全诗之数思无邪者殿卷之语也其後以己为殷人复录商颂五篇缀于鲁颂之後合之始有三百五篇然则三百五篇之为夫子删存定数审矣乌自而虚悬有六笙诗之名以为三百一十一篇乎盖缘汉儒见仪礼有此篇名谓诸诗皆已见经不应此六诗独无辄便搀入于鱼丽南有嘉鱼南山有台之间俾以类相从而又复窜弃序语俾与诸诗一例大抵皆贗托非初本也若夫仪礼所取断不为夫子所删而经夫子删後之诗其存者惟有三百五篇而已则六笙诗何得不在其内故愚谓六诗具存特因笙奏曲名与诗篇互异遂致此误亦犹斯干之诗以管奏之则别名新宫时迈離诸诗以钟鼓奏之则别名九夏也六诗伊何南陔即草虫也二章三章皆有陟彼南山之语故曰南陔陔者陇也谓南山之陇也白华即采薇也其四章曰彼尔维何维常之华常者常棣也常棣者白棣也隐常棣之名而着其色曰白华也华黍即出车也其四章曰昔我往矣黍稷方华此则摘字为名如汉广之类其尤昭晰者也三诗皆言为君宣力之事故於燕礼乡饮酒礼奏之使凡在席之臣闻而知劝亦与歌四牲皇皇者华同意者也由庚即吉日也以吉日庚午取之礼歌鱼丽则笙由庚谓燕飧之物无所不备水产有鱼陆产有麋鹿有貍兕竭诚尽礼之至也崇丘即縣蛮也以丘阿丘隅丘侧取之礼歌南有嘉鱼则笙崇丘谓上之人志在得贤必有後车之载而後足慰翩離之思望诸侯贡士宾王也由仪即菁菁者莪也以乐且有仪取之礼歌南山有台则笙由仪古者养老必于太学凡视学必养老一以崇宪乞一以储俊造是教化之大者也夫故燕礼乡饮酒礼均有取焉尔也】

嘒嘒草【丰氏本作𦉳】虫【东韵释文云或作虫非】趨趨阜【尔雅注作𧈧丰本作𧈧】
𧈧【东韵】未见君子忧心忡忡【东韵丰本作𧈧】亦既见止【丰本作只下同】亦既覯
【尔雅作邁】止【丰本作只下同後汉书改此二句作既见君子】我心则降【叶东韵胡
公翻 兴也说文无嘒字当通作要要本身腰之腰借为约束之义徐锴云腰为中关所以自臼
持是也此草虫言要者盖象其结束精悍之形不然则疑嘒字之误嘒之为言疾也与趨同意
重言之者非一之辞趨趨仿此草虫郭璞云常羊也陆玑云大小长短如蝗奇音青色好在茅
𦉳中作声趨说文云踊也阜𧈧李巡云蝗子也陆玑云今人谓蝗子为𧈧子兖州人谓之𧈧陆
佃云今谓之??示跳示飞飞不能远许慎以为蝗𧈧蔡邕以为𧈧蝗明是一物方言云宋魏之

召南以立说要无稽据申培说则云南国大夫夏聘于周次于终南睹王室之多贤相率以归心焉其泛斯甚观篇中云未见君子岂博及多贤之辞哉】

出车劳还率也【出序】文王之时西有昆夷之患北有玁狁之难以殷王帝乙之命命南仲城朔方因伐西戎於其还也作此诗以劳之【竹书纪帝乙三年王命南仲西拒昆夷城朔方即此诗事也按史记称公季卒子昌立是为西伯西伯曰文王汲冢周书序云文王立西距昆夷北备玁狁谋武以昭威怀则此诗之为文王诗明矣文王作此诗以慰劳南仲故篇中曰自天子所曰天子命我可知非帝乙劳之也】

我出我车【荀子作輿】于彼牧【叶职韵读如墨密北翻】矣自天子所谓我来【叶职韵六直翻】矣召彼仆夫谓之载【叶职韵节力翻】矣王事多难【去声】维其棘【职韵】矣【赋也此诗言我者不一首二章言我者文王之辞中二章言我者代为南仲之辞其第五章言我者则代为南仲室家之辞分别观之乃得我车我所统之戎车也文王时为西伯则西方诸侯之戎车皆其所统非必尽周车也彼主殷都而言尔雅郊外谓之牧周语国有郊牧注云放牧之地言我令人驾出我所统之戎车已至于殷都郊外之牧地盖谓前军之先行者也李氏云荀子曰天子召诸侯诸侯辇輿就马礼也遂举此诗云我出我輿于彼牧矣毛氏本荀子之说以为出车就马于牧地然未必得诗人之意马端临云古人用兵必以车战意在声罪致讨其坐作进退整暇有法未尝掩人之不备而以奇取胜也故韩厥遇齐侯则奉觴加璧郤至遇楚子则免胄趋风可以死则为于犇之请矢可以无死则为庾公之叩轮所谓杀人之中又有礼焉至塞外之侵中国则云合鸟散轻进易退于是车之雍容不足当其徒之慄疾遂至舍车而用徒然彼长於徒我长于车舍我之长技而与角是以兵予敌也故必设伏以诱之未陈而薄之然後可以取胜而车战之法废矣秦汉以後之用兵其战胜攻取者大槩皆如郑之御戎晋之败狄耳何尝有堂堂正正之举乎自从也天子指帝乙也谓命也下同谓我来者命我来简发此戎车也召说文云呼也仆夫毛传云御夫也载说文云乘也文王既承王命呼召己之御夫命之载已而归将以料简车徒使之尅期上道也王事王室封疆之事也时玁狁昆夷并起为患故曰多难棘通作?说文云急也或通作亟说文云疾也戎狄秋高马肥易于南牧速则边防可固缓则边警可虞故曰维其棘矣观後章城方之命则此行专以筑城为事与六月出征不同然必成师以出者盖不如是则恐玁狁闻知必来挠我之筑而方不可得而城也】我出我车于彼郊【叶豪韵居劳翻】矣设此旄矣建彼旒【豪韵】矣彼旃旒斯胡不旆旆【叶寘韵蒲寐翻】忧心悄悄仆夫况【丰氏本作况】瘁【寘韵陆德明本作萃 赋也韦昭云国外曰郊徐锴云按尔雅注百里之国十里为郊王畿千里郊当百里司马法云王国百里为郊五十里为近郊百里为远郊白虎通云王及公侯必有郊者上则郊接天神下则郊接诸侯郊接邻国朱子云郊在牧内盖前军已至牧而後军犹在郊也设陈也毛传云龟蛇曰旐考工记云龟蛇四旂以象营室疏云龟有甲象其扞难蛇无甲见人避之象其避害也营室北方七宿也其星象龟形又尔雅云缙广充辐长寻曰旐注谓以黑色之帛广全幅长八尺属於杠名旐盖其制如此建立也旐注旐于旗干之首解见于旐篇郑云设旐者属之於干旐而建之戎车孔云此旐彼旐一言彼一言此便文耳于彼新田于此菑亩皆此类也毛云鸟隼曰旟谓画朱雀及隼考工记云鸟旟七旂以象鹑火也说文云错革画鸟其上所以进士衆孙炎云错置也革急也画急疾之鸟於繆也有旐有旟礼所谓前朱雀而後玄武也称龟蛇为玄武者

朱子云位在北方故曰玄身有鳞甲故曰武陆化熙云出车在郊视前在牧之车为後军则所见止是设旆建旄而设旃建旄已在彼牧故亟接之曰彼旃旄斯盖因言表章而兼举前後军言之也胡不犹言岂不也旆旆毛云旆垂貌董氏云礼曰德车结旆武车绥旆绥谓垂舒之也昔晋治兵建而不旆壬申复旆诸侯畏之则知垂旆所以为战也按旆惟旄有之说文云继旆之旗沛然而垂名旆此云旆旆者合旃旆飞扬之象而言与荏菹旆旆同意传所谓旆即四旂七旂之旂乃旆旗之末垂者严云继旆曰旆旆以全帛为之续旆末为燕尾者名之为旆言旆之本体也此胡不旆旆乃飞扬之貌愚按至此则文王出车之事已竣可以还报天子矣然兵凶器危事目击丑虏凭陵未知荡平何日所以思之而忧心至于悄悄也悄悄徐锴云忧思低小也其思多端故重言悄悄况说文云寒水也荒凉之意说文无瘁字当通作顙谓形容顙顙也仆夫况瘁则亦文王忧国之诚有以感之而然耳吕祖谦云古者出师以丧礼处之命下之日士皆涕泣皆此意也以上二章皆文王自为叙述也】王命南仲往城于方【阳韵】出车【史记作輿】彭彭【叶阳韵通旁翻】旃旆央央【阳韵陆本作英英】天子命我城彼朔方【同上】赫赫南仲玁狁【丰本作殄】玁于襄【阳韵赋也首二章止言出车勤王耳未明言其何所命也此方以承命出车之故言之王天子也苏辙谓王当为文王按文王未受命安得称王乎南仲此时承王命为将者即常武诗所称也又春秋隐九年天王使南季来聘杜注谓南氏季字意即南仲後也城筑城也方毛云朔方近玁狁之国也朱子云今灵夏等州之地曹氏云即六月所谓侵镐及方郡县志夏州朔方县什赍故城在县治北即汉朔方县之故城也诗所谓王命南仲城彼朔方是也汉武帝元朔二年收河南地置朔方五原郡使苏建筑朔方什赍之号盖蕃语也郑云往筑城于朔方为军垒以御北狄之难按朔方即今陕西北部在固原西南五百余里有待于南仲之城者必翟患未肆之前常倚山河为固不待设险及玁狁内侵则将有决藩之势其地始为华夷要区故不得不为城以守耳严云朔方之地为玁狁所侵轶今王命南仲驱去玁狁以城之而已不事穷蹙之也彭通作騁说文云马盛也毛云交龙为旗尔雅注云悬铃于竿头画龙于旗上刘熙云旗倚也画作两龙相依倚也通以赤色为之无文采诸侯所建也郑云两龙一象其升朝一象其下复也孔云旗盖南仲所建以下或载旆或载旃此经所陈唯旃旆旃三物而已愚按所以不再举旃者旃为前军已往前进发南仲大将当居中军王国大夫视外诸侯分得建旃此时统後军继进故但言旃旆也央央通作英英鲜明之貌天子命我二句述南仲称王命以令衆也吕云大将传天子之命以令军衆於是彭彭然张其车乘央央然旆其旃旆威灵焰赫赫然动人兵事以崇敬为本而所尚则威也赫赫南仲乃文王赞叹之词後仿此赫说文云火赤貌以南仲之威焰如之故曰赫赫襄与怀山襄陵之襄同蔡沈云驾出其上也按襄字训驾当是通作骧汉书云起龙襄又交龙襄首奋翼皆取襄骧通用季本云城朔方所以断戎狄往来之路西戎道絶而不相犄角则可以驾玁狁而出其上故曰于襄程子云此章指元帅之名以显其功也】昔我往矣黍稷方华【麻韵亦叶虞韵芳芜翻】今我来思雨【去声】雪载涂【虞韵亦叶麻韵宅加翻丰本作涂】王事多难【去声】不遑啓居【鱼韵】岂不怀归畏此简书【鱼韵赋也第三章惟天子命我二句述南仲之语此章则全是南仲语矣昔我往矣南仲就道时也黍稷方华方生华也郑孔皆以为六月中时按考灵曜云春鸟星昏中可以种稷夏火星昏中可以种黍汜胜之云黍者暑也种者必待暑罗愿云稷为首种孟春正稷之时又贾思勰云凡黍稷三月上旬种者为上时四月上旬为中时五月上旬为下时夏种黍稷与植谷同时非夏者率以耨赤为候大抵植种有早晚则华实之早晚随之非必定在六月中时方生华也孔氏但据月令有孟秋农乃登谷之

文郑解所登之谷为黍稷故以为六月华不知月令仲夏之月农既登黍矣岂尽俟孟秋乎今我来思归而在道时也雪春雪也陆佃云腊雪握之辄聚立春以後不复可抔以微温搏之故也涂毛云冻释也夏小正云春正月寒日淅冻涂农及雪泽孔云雪落而释为涂泥是春冻始释也郑云因伐西戎至春冻始释而来反也王事多难与首章语意正同而此更为伐西戎起语所以至于雨雪载涂之时而後来归者以西戎助玁狁为虐复承王命徂征自北而西归计转缓故不遑啓居也畏者凛凛钦承之意与畏罪不同简书策命之词也孔云古者无纸有事书之於简谓之简书当时命南仲城方因见西戎窃发故并命之竣事後移师往伐西戎耳左闵元年狄人伐邢管敬仲言於齐侯曰戎狄豺狼不可厌也诸夏亲昵不可弃也宴安鸩毒不可怀也诗云岂不怀归畏此简书简书同恶相恤之谓也请救邢以从简书同恶相恤意简书中旧有此语乃诸侯所受之于天子者故敬仲引及之旧说不达谓邻国有急以简书相告误矣自王事多难而下四语其事在黍稷方华之後雨雪载涂之前城方已毕似可归而犹不得归者为将伐西戎故耳诗之叙事变幻错综若此以後章臆之其在徂秋涉冬之间乎】 嘒嘒草【丰本作𦵏】虫【东韵】趯趯阜【丰本作𦵏】螽【东韵丰本作𦵏】未见君子忧心忡忡【东韵丰本作𦵏】既见君子我心则降【叶东韵胡公翻】赫赫南仲薄伐西戎【东韵兴而赋也嘒嘒而下六语义俱同草虫篇以时序考之张衡谓大火流草虫鸣正深秋候耳草虫鸣则阜螽跃而从之以兴夫唱妇随其象亦如此也孔云此明在冬前晚秋之时因有草虫而为兴冬则虫死不得过於晚秋也君子室家斥南仲之辞我则室家自我也朱子云室家感时物之变而念之以为未见而忧之如此必既见而後心可降耳愚按草虫诗全同此六语岂其诗早已间于上而文王采之以入诗乎薄发语辞西戎昆夷也逸周书言文王西距昆夷是也亦曰犬戎伐西戎所以剪玁狁之羽翼也此时室家虽思南仲而赫赫南仲方且薄伐西戎若不知有其家者妇义臣忠两得之矣曹氏云西北二虜相犄角为寇故征玁狁则西戎作伐西戎则玁狁平】 春日迟迟【支韵】卉木萋萋【叶支韵此移翻】仓庚喈喈【叶支韵坚夷翻】采芣苢【支韵】执讯获丑薄言还归【叶支韵渠为翻】赫赫南仲玁狁于夷【支韵 赋也春日以夏小正及七月诗推之知为二月也迟迟解见七月篇卉说文云草之总名也萋说文云草盛也通木言之者以叶盛而言诗咏梧桐亦曰萋萋又毛传解蒹葭萋萋云犹言苍苍也仓庚解见七月篇喈喈解见葛覃篇祈通作祁与七月篇采芣苢解同执生擒也讯问也程子云其魁首当讯问者获得也丑说文云可恶也谓其徒党也此讯丑皆西戎之讯丑若玁狁则第城方以备之耳未尝有交战之事但既城朔方则玁狁不能乘虚为害而西戎可伐西戎既伐则有以剪玁狁之羽翼而玁狁可平事实相因也郑云称美时物以及其事喜而详之也欧阳修云述其归时春日暄妍草木荣茂而禽鸟和鸣於此之时执讯获丑而归岂不乐哉夷毛云平也陆云末二句全是归功南仲前言于襄是在朔方时不敢凭陵此言于夷则以去朔方後言便有几世平定意辅云曰玁狁于夷而已则固不贵乎略地屠城輿尸蹀血之事也郑云独言平玁狁者玁狁大故以为始以为终】

出车六章章八句【子贡传亦云劳将率也而但以为宣王之诗申培说谓宣王再命南仲伐玁狁遂平西戎劳其还师史籀美之班固汉书古今人表南仲作南中亦系之宣王时人又云宣王兴师命将征伐玁狁诗人美大其功曰出车彭彭城彼朔方总之因常武篇有王命卿士南仲大祖之语遂致误耳或又疑竹书纪宣王三年命大夫仲伐西戎谓即此南仲考史记彼乃秦仲也何得相混】

四牡文王劳使臣之诗【出陈阳乐书序云劳使臣之来也有功而见知则说矣左襄四年穆叔如晋晋侯享之工歌鹿鸣之三三拜韩献子使行人子员问之对曰四牡君所以劳使臣也敢不重拜鲁语则云叔孙穆子聘于晋晋悼公享之乐及鹿鸣之三而後拜乐三晋侯使行人问焉对曰四牡君之所以章使臣之勤也敢不拜章子贡传袭其说亦云章使臣之勤也疏义云歌于使来之时则劳其来也而极言在外之情如此则章其勤也劳其来者此诗之用章其勤者此诗之意按采薇序云文王之时西有昆夷之患北有玁狁之难以天子之命命将率遣戍役以守卫中国意是诗之作即在此时篇中曰王事靡盬我心伤悲曰岂不怀归不遑啓处曰不遑将父不遑将母与出车杕杜二诗语意相为出入然则此诗倘亦即为南仲而作但彼全为叙述之辞此则代为南仲之辞以南仲此行城朔方伐西戎树功既懋经时颇久故所以劳之者亦不一而足欤又考旧史惟王命南仲西拒昆夷城朔方见于竹书而此外寂寂无闻焉故知是诗断为南仲作也】

四【仪礼疏作驪】牡駉駉周道倭【文选注作威释文作委丰氏本作透】迟【支韵韩诗文选注丰本俱作夷又汉书地理志注倭迟作郁夷右扶风有郁夷县顔师古注云言使臣乘马行于此道】岂不怀归【叶支韵渠为翻】王事靡盬我心伤悲【支韵赋也牡牡马也駉说文云驂旁马礼记疏云车有一辕四马中两马夹辕名服马两边名駉马亦名驂马今日駉駉则于四牡之中特指两驂马而言也周道自周适他处之道路主周而言故曰周道倭通作透说文云透迤亶去貌迟说文云徐行也程子云倭迟回远也王事靡盬义与采薇篇同伤创悲痛也俱见说文心有所思而不得遂起居不宁如身之遭创痛然也言我岂不思归特以王事尚未坚固不敢顾私图而忘国恤徒自心怀伤悲而已孔穎达云我心伤悲正谓念忆父母下章云将父母是也毛传云思归者私恩也靡盬者公义也伤悲者情思也郑玄云无私恩非孝子也无公义非忠臣也君子不以私害公不以家事辞王事范祖禹云臣之事上也必先公而後私君之劳臣也必先恩而後义朱子云夫君之使臣臣之事君礼也故为臣者奔走于王事特以尽其职分之所当为而已何敢自以为劳哉然君之心则不敢以是而自安也故燕飧之际叙其情而悯其劳臣劳于事而不自言君探其情而代之言上下之间可谓各尽其道矣程子云上不知下之劳则下不自尽其力故四牡之义废则君臣缺矣】四牡駉駉嘽嘽【说文作𨔵𨔵汉书注作驪驪】骆马【叶麋韵满补翻】岂不怀归王事靡盬【麋韵】不遑啓处【叶麋韵此主翻赋也嘽说文云喘息也毛云马劳则喘息骆马名详见駟篇陆佃云骆马善奈劳苦诗曰嘽嘽骆马言骆性善劳而今喘息不平如此则以甚苦故也不遑啓处解见采薇篇上言我心伤悲其故正在于此啓者谓长跪而进食于父母处则居处而已辅广云我心伤悲既述其私恩之不能忘不遑啓处又述其公义之不可已所谓天理人情之至也左襄二十九年葬灵王郑上卿有事子展使印段往伯有曰弱不可子展曰与其莫往弱不犹愈乎诗云王事靡盬不遑啓处东西南北谁敢宁处坚事晋楚以蕃王室也王事无旷何常之有遂使印段如周】翩翩者鷖【说文释文俱作佳】载飞载下【叶麋韵後五翻】集于苞栩【麋韵】王事靡盬【麋韵】不遑将父【麋韵兴也翩说文云疾飞也以非一飞故曰翩翩鷖鷖类详见鹊巢篇陆佃云鷖性慈孝慤谨盖孝所以致私恩谨所以致公义故四牡劳使臣之诗而其托况如此罗愿云佳鷖孝鸟故少皞氏以为司徒一名祝鷖似斑鷖而臆无绣采又头有赘鷖既孝鸟故养老之杖仿之汉仲秋之月县道皆案户比民年始七十者授之以玉杖餽之糜粥八十九十礼有加赐玉杖长尺端以鷖鸟为饰鷖者不噎之鸟也欲老人不噎古之养老

祝哽在前祝噎在後以为养老之备此所以取鳩而又名鳩为祝鳩也严粲云雛一鸟而十四名雛也佳其也鶉鳩也祝鳩也鳩也鶉也鶉鳩也楚鳩也鶉鳩也荆鳩也乳鳩也鶉鳩也鶉也鶉也载之言则盖音近也载飞载下言虽飞而尚下也後放此集于苞栩解见鶉羽篇将奉也戴岷隐云扶持奉侍之谓苏辙云祝鳩孝鸟是以孝子不获养而称焉雛之飞也则亦下而集于栩不若使者之行久不返不获养父母也罗云禽经曰雛上无寻鸚上无常言二鸟之起不过寻丈不远而复而王事靡盬之臣则征役不得暂息也范祖禹云忠臣孝子之行役未尝不念其亲君之使臣岂待其劳苦而自伤哉亦忧其忧如已而已矣此圣人所以感人心也又韩诗外传云齐宣王谓田过曰吾闻儒者亲丧三年君与父孰重过对曰殆不如父重王忿然曰曷为士去亲而事君对曰非君之土地无以处吾亲非君之禄无以养吾亲非君之爵无以尊显吾亲受之于君致之于亲凡事君以为亲也宣王悒然无以应之诗曰王事靡盬不遑将父】

翩翩者雛载飞载止【纸韵】集于苞杞【纸韵】王事靡盬不遑将母【叶纸韵母鄙翻兴也杞尔雅毛传皆云枸檮说文云枸也陆玕云其树如樗一名苦一名地骨春生作羹茹微苦其茎如莓子秋熟正赤茎叶及子服之轻身益气广雅名□乳又名地筋本草云一名枸根一名枸忌一名地辅一名羊乳一名仙人杖一名西王母杖朱子云一名狗骨抱朴子云家菜一名托庐清冷真君外诀以枸为三青蔓其苗为换骨菜图经云枸春生苗叶如石榴叶而软薄堪食俗呼为甜菜其茎干高三五尺作丛六月七月生小红紫华随便结红实形微长如枣核其根名地骨春夏采叶秋采茎实冬采根广韵云春名天精子夏名枸叶秋名郤老枝冬名地骨根今人相传谓枸杞与枸棘二种相类其实形长而枝无刺者真枸也圆而有刺者枸棘也沈括云陕西极边生者高丈余大可作柱叶长数寸无刺根皮似厚朴其美异他处大体出河东诸郡其次江淮间实如樱桃暴乾为饼膏润有味按诗有三详见将仲子篇上两章为奉使初发之词此两章以翩翩起兴又为久役未返之词物犹得所止而人子乃缺乎孝养其感深矣集栩兴将父集兴将母第取叶韵未必有义观鶉羽篇亦咏集于苞栩而统言父母何怙可见】驾彼四骆载骖騶【侵韵亦叶寢韵初朕韵】岂不怀归是用作歌将母来谗【寢韵亦叶侵韵式针翻赋也按第二章云四牡騑騑嘽嘽骆马则知四牡皆骆故名四骆陆佃云古者天子之卿纯駟故诗曰驾彼四骆又曰乘其四骆若诸侯之卿则不能具纯駟矣骖说文云马疾步也严云走马曰驰不驰而步疾为骖騶说文云马行疾也以非一騶故曰騶騶载骖騶则其尚在行役而未能遽归可见矣是用作歌者朱子云非使臣作是歌也设言其情而劳之耳谗郑云告也左传辛伯谗周桓公是也将母来谗者言以己思欲将母之情来告于其母也盖父母爱子之情虽一而父或犹知大义母未必不牵于私情故思所以慰其意者如此陈际泰云先日将父而後曰将母者尊父也既曰将母而又曰将母者亲母也此孝子之志人情之实也辅广云详于私情而略于公义君之劳臣当然也】

四牡五章章五句【申培说以为天子劳使臣之诗今繫此诗于文王则非天子之诗矣或问何以知其非帝乙作也曰以周道倭迟之语知之仪礼於燕礼乡饮酒礼皆歌此诗盖其初本为劳使臣作後乃移以他用耳大学始教则肄此诗义见鹿鸣篇小引下又诗纬泛历枢推四始之说以四牡在寅为木始未详其义齐鲁韩三家又以此诗为康王时诗似不足信】

杕杜劳还役也【出序愚按此与出车同为一时之作以次章卉木萋止一语知之郑玄云异

歌异日殊尊卑也礼记曰赐君子小人不同日此其义也范祖禹云出车劳帅故美其功杕杜劳衆故极其情先王以己之心为人之心故能曲尽其词使民忘其死以忠于上也王安石云上之人能知其下中心委曲之情而形於歌咏则下悦之出车杕杜是也上之人不能知而其下自陈其劳苦之状悲伤之情则怨也扬之水鸛羽是也】

有杕之杜有睆其实【质韵】王事靡盬继嗣我日【质韵】日月阳【韵】止【丰氏本作只】女心伤【阳韵】止征夫遑【阳韵】止【兴也有杕之杜解见唐风杕杜篇树之特生者为杕陆化熙云杕杜虽以识时序之变而取义于杕亦因征夫在外而伤其孤特无依也杜与棠相似白者名棠赤者名杜又按说文云牡曰棠牝曰杜赵颐光云牡棠牝杜与杨柳同义又言阴阳也此诗代为室家思夫之辞故以杜寄兴睆明貌檀弓华而睆之睆树果曰实吕氏云杜之有实秋冬之交也毛传云杕杜犹得其时蕃滋役夫劳苦不得尽其天性孔穎達云特生之杜犹睆然其实我君子独行役劳苦不得安於室家以尽天性而生子孙乃杕杜之不如也嗣续也我我君子也继嗣我日追往役之始至此日而言日以继日不得休息也十月为阳兼言日者阳月之日也此即杕杜有实之候止通作只语已辞也後仿此遑说文云急也征夫随南仲往城于方事竣可以归矣至于十月而犹未归则以其时有伐西戎之事故征夫方遑急于征役也辅广云述其室家之情不直言其思之而必曰王事靡盬焉则虽其室家亦知义也】有杕之杜其叶萋萋【叶支韵此移翻】王事靡盬我心伤悲【支韵】卉木萋【同上】止【丰本作只】女心悲【同上】止征夫归【叶支韵渠为翻】止【兴也萋萋丘氏云新叶也承上章言杕杜睆实是去年十月间物色于今杜叶萋萋则实落而又生叶为今年之二月矣以杕杜逢春而生意改观如此闺中思妇其何以堪我女自我也卉木萋止复从杖杜而推广之见萋萋者不独一杕杜含悲更深所以踰期未至者因南仲伐西戎故迁延至此出车末章所谓春日迟迟卉木萋萋即是时也然曰执讯获丑薄言还归则已归在道特尚未至家故其室人不知而思念之耳王者之体悉如此辅云王事靡盬者公义也我心伤悲者私情也虽其室家亦情义并行而不相悖也】陟彼南山言采其?【纸韵】王事靡盬忧我父母【叶纸韵母鄙翻】檀车幪幪【铣韵韩诗作??石经作??释文作张张】四牡瘠瘠【叶铣韵古转翻】征夫不远【叶铣韵读如蠓於殄翻赋也登山采?以望其君子郝敬云北山幽方忧思之北严云郑孔皆不明言杞为何物以采言之当是枸??之可食者惟枸?也解见四牡篇按图经云枸杞春生苗叶如石榴叶而软薄堪食俗呼为甜菜陆玕云春生作羹茹微苦计此云采?当即在卉木萋止之时特期而未至故借此以致其想望耳以出车末章推之可见说者泥朱注春暮而?可食之语遂谓采?又过于木萋之时恐未然也又枸?甜菜味苦亦夫妇同甘共苦之况父母谓夫之父母即舅姑也忧我父母言诒我父母之忧严云盖谓父母思之当早归也徐光啓云及期而望曰女心伤悲过期而不至则曰忧我父母其忧有进焉者矣可见古人立言之法蒋悌生云此四句见于北山诗其词同其义同杕杜之诗为正雅北山为变雅何也杕杜之诗在上之人叙戍役之劳以闵之也北山之诗役者自言其劳而有怨怼之心也词义虽同而苦乐之意异矣檀车毛云役车也孔云伐檀曰坎坎伐檀又曰伐轮伐辐是檀可为车之轮辐又大明云檀车煌煌檀之所施于车广矣幪说文云车弊貌徐锴云车弊则木连及韦革金鐻起皆起若败巾故字从巾曰幪幪者行役既久凡车皆弊也孔云役夫以从征之故其甲士三人所乘之车而备四马故曰四牡非庶人寻常得乘四马也瘠尔雅云病也按说文无瘠字当通作蹇跛也檀车耐用而亦敝牡马有力而亦跛以见其久且劳也愚按车敝马罢

非目所见以行役之久料之征夫不远又於车敝马罢料之皆意度之辞见在边之久当归非谓以幘瘡之故不得不归也又陈际泰云车之坚者敝师老矣卒遇寇不可用也向者悲伤私情也至此多此忧焉其曲而中也夫】匪载匪来【叶职韵六直翻】忧心孔疚【叶职韵迄刀翻】期逝不至【叶质韵职日翻】而多为恤【质韵】卜筮偕【叶纸韵苟起翻】止会言近【叶纸韵巨椅翻】止征夫还【纸韵】止【赋也匪通作非载郑云装载也疚当作尔雅云病也严云心甚病也期归期也逝往也犹适也恤忧也期逝不至指萋止时言忧心孔疚女心伤悲也而多为恤忧我父母也不独我忧之父母亦忧所谓多恤也一说谓前已期征夫不远矣既而匪载匪来所以忧心孔疚曰而多为恤者饥渴与疾病与死伤与皆忧中事也于义亦通但归期太賒语意转缓且於当日情事不合耳李氏云观此诗言王事靡盬忧我父母何以异於鸛羽王事靡盬不能艺稷黍父母何怙言期逝不至何以异於采芣五日为期六日不詹然鸛羽采芣下之人自诉其劳苦此则下之人劳苦而上知之也灼龟曰卜揲蓍曰筮偕俱也礼大事先筮而後卜小事则龟筮不相袭今相袭俱作以心之惶惑不定故至于无所不为也会聚也合也会言毛谓会聚卜人筮人之言郑谓卜之筮之合言于兆卦之繇二义皆通既讯之卜筮而皆曰近矣则征夫其亦还而将至矣辅云征夫不远想料之辞也征夫还止决定之辞也还字如即刻到家之说严云此诗四章皆不言戍役来归之事唯述其未归之时室家思望之切如此则今日之归其喜乐为何如也所以慰劳之也辅云劳帅劳役体悉其情无所不至而略不及论功行赏之事者何哉盖古者竭诚尽瘁以勤王之事者人臣之义也君臣各行其事而已下不以赏而望乎上上不以赏而夸乎下此君臣相与之至情也岂後世所能及哉】

杕杜四章章七句【子贡传申培说皆以为劳还戍也但系之宣王时耳辨已在出车下邹忠胤云诗传以此列于体君臣内则戍乃戍臣也旧以出车为劳还率杕杜为劳还役出车明言赫赫南仲详见本篇若杕杜之檀车四牡岂所繫於卒伍其为先王劳戍臣可知已愚按檀车四牡唐孔氏之解自明若以戍为戍臣则何以别於将率岂谓戍守与征战异乎果尔则檀车何以幘幘四牡何以瘡瘡也且篇中所叙述者不过室家私情视出车篇迥异正与东山劳归士诗同一声口耳从叙何疑】

皇皇者华文王遣使臣之诗【出陈阳乐书序云君遣使臣也送之以礼乐言远而有光华也曹氏云燕以遣之所谓礼也歌以乐之所谓乐也欧阳修云称美其能将君命为国尤华于外耳子贡传朱传皆云遣使臣也而春秋内外传则云君教使臣愚谓遣者其事也教者其意也所以定此诗为文王诗者晋语胥臣言文王之即位也询于八虞而咨于二虢度于閼夭而谋于南宫諏于蔡原而访于辛尹是诗亦以咨諏咨谋咨度咨询为言明是数事者皆将于使臣乎取之则奉使者其即八虞二虢之流乎又按通志云文王即位之八年六月寢疾五日而地震东西南北不出郊圻有司曰地震为人主也羣臣皆恐欲移之文王曰天之见妖以罚有罪我若有罪若何逃罚率德改行其可免乎於是谨其礼秩皮革以交诸侯饬其辞令帛以礼俊士未几疾愈意皇华之遣当在此时也考竹书周地震在帝乙三年夏六月因系此诗于帝乙之世】

皇皇【丰氏本作煌煌】者华于彼原隰【缉韵】駉駉【国语说文说苑俱作莘莘楚辞章

句作僉僉】征夫每怀靡及【緝韵 兴也皇通作煌说文云輝也輝之为言明也毛传云皇皇犹煌煌也华朱子云草木之华也尔雅云广平曰原下湿曰隰严粲云言皇皇然光明者草木之华于彼原隰之间犹使臣能将命为国光华於远近也一说毛云忠臣奉使能光君命无远无近如华不以高下易其色亦通駉说文云马衆多貌征夫毛云行人也时文王所遣必非一使则衆多并行正谓同时出使之臣耳观後章或乘骐或乘骆或乘駟可见怀思也衆征夫皆同此怀故曰每怀言无一人而不然即春秋外传所谓怀和为每怀者也靡及者如恐不及事也朱子云此诗若以戒夫使臣者而托于其自道之词以发之诗之忠厚如此晋语齐姜谓公子重耳曰周诗曰莘莘征夫每怀靡及夙夜征行不遑啓处犹惧无及况其顺身纵欲怀安将何及矣人不求及其能及乎日月不处人谁获安】我马维驹【虞韵亦叶尤韵居侯翻说文释文俱作骄】六轡如濡【虞韵亦叶尤韵如絲翻】载驰载驱【虞韵亦叶尤韵祛尤翻但四章同用此句则此字非韵】周爰咨【释文忠经俱作谏】諏【虞韵亦叶尤韵将侯翻赋也说文云马二岁曰驹一云六尺以上马五尺以上驹陆佃云传曰大夫乘驹血气未定则有蹄啮之虞故大夫乘之荀子曰大路之马必倍至于教顺然後乘之所以养安也倍言年长以倍今羣牧选马十六岁以上乃以进御曲礼曰齿路马有诛路马之齿高矣故齿路马有诛所以广敬也诗曰我马维驹而後言维骐维骆维駟则骐也骆也駟也蒙上之文宜皆为驹文从句字音拘则以驹血气未定宜拘执之焉尔诗曰縶之维之盖取此陈祥道云马八尺以上为龙七尺以上为騊六尺以上为马六尺以下为驹天子所驾下止于马诸侯所畜上止于騊则大夫乘驹可知矣六轡解见驷铁篇濡者沾湿之义如濡言柔忍也又郑玄云言鲜泽也周依左氏作忠信解书太甲篇自周有终之周解亦同此又欧阳修云周为周徧之周虽有驰驱之劳不忘国事周详访问因以博广闻也愚按为国事而周详访问即忠信之意苟非实心体国则必濶略而不周矣此一字着落在使臣身上说爰说文云引辞也尔雅以为于也咨访问也諏说文云聚谋也此诗虽赋乘马出使之事而亦有比意寓其中言我马维驹虽苦于血气之未定而赖有善执轡者于此则可以使之进退合节不至于泛驾而旁逸矣今使臣既以每怀靡及为心凡征途采访所及必极周详以待上之人将於焉访问而与之聚谋庶乎作用有可观也咨字虚諏字实諏正其所咨者非泛泛访问而已後俱仿此諏谋度询俱就君咨使臣说旧解未是左传鲁穆叔如晋晋侯享之歌鹿鸣之三三拜韩献子使行人子员问之对曰皇皇者华君教使臣曰必咨于周臣闻之访问于善为咨咨亲为询咨礼为度咨事为諏咨难为谋臣获五善敢不重拜而外传则云皇皇者华君教使臣曰每怀靡及諏谋度询必咨于周敢不拜教臣闻之曰怀和为每怀咨才为諏咨事为谋咨义为度咨亲为询忠信为周君贶使臣以大礼重之以六德敢不重拜二传微有异同而諏之为义具谋事谋才二训愚按才犹言作用盖相与互参其说以订此事之作用当何如耳马融忠经云出于四方以观风听不可以不聪视不可以不明聪则审于事明则辨于理诗云载驰载驱周爰咨諏】我马维骐【支韵】六轡如【墨子作若】丝【支韵】载驰载驱周爰咨【淮南子作谏】谋【叶支韵谟悲翻淮南子作谟 赋也骐解见小戎篇按骐非上驷陆佃云诗曰骐骝是中騊𧈧是骖盖骐骝中驷騊𧈧上驷故服以骐骝骖以騊𧈧如丝言条直也咨难为谋杜预云问患难也又咨事为谋盖问其事中之患难】

我马维骆【药韵】六轡沃若【药韵】载驰载驱周爰咨度【叶药韵达各翻墨子作及 赋也骆解见四牡篇沃说文云溉灌也沃若言润泽也咨义为度又咨礼为度毛传总之云咨礼义所宜为度墨子云助之视听者衆则其所闻见者远矣助之言谈者衆则其德音之所抚循

者博矣助之思慮者衆則其談謀度速得矣故古者聖人之所以濟事成功垂名於後世者無他故異物焉曰惟能以尚同爲政者也詩曰我馬維駉六轡沃若載馳載驅周爰咨及又曰我馬維駒六轡若絲載馳載驅周爰咨謀即此語也】

我馬維駉【真韻】六轡既均【真韻】載馳載驅周爰咨詢【真韻 賦也駉解見駉篇陸佃云今之泥驄也詩曰我馬維駒我馬維駉我馬維駉其先後與駉之序合則駉不如駉駉不如駒矣然乃卒言駉者以明馬雖彌劣所以御之滋善既均言和調也咨親爲詢舊說謂親戚之謀爲詢非也兩意相親促膝籌畫言無不盡如舜之詢于四岳即此詢也諷有參伍意謀有瞻顧意度有折衷意詢有詳究意各以先後爲序非徒取叶韻而已參伍則其志遜故與如濡之柔忍相應瞻顧則其慮審故與如絲之條直相應折衷則其機活故與沃若之潤澤相應詳究則其事妥故與既均之和調相應】

皇皇者華五章章四句【子貢傳申培說丰氏本篇名俱作煌華莊子云大聲不入于里耳折揚皇華則嗑然而笑陸佃云折楊逸詩皇華即詩所謂皇皇者華是也 申培說以爲天子遣使于四方歌此餞之今按此詩既系之文王之世則非天子之詩矣然其後爲遣使通用之詩至燕禮鄉飲酒禮亦皆用之而大學始教亦以此先焉又齊魯韓三家皆以此詩爲康王時詩不足信】

詩經世本古義卷七

卷八

钦定四库全书

诗经世本古义卷八

明 何楷 撰

殷帝辛之世诗二十篇

采蘩美太姒亲蚕也【朱子云古者后夫人有亲蚕之礼此诗亦犹周南之有葛覃也子贡传亦以为诸侯之夫人勤于亲蚕国人美之申培说同愚谓夫人即太姒也何以证之以诗称公侯之事与兔置咏公侯干城同皆指文王周自王季始受命为侯伯至纣以文王为三公故得称公侯也又射义云士以采蘩为节乐不失职也取末章被之僮僮夙夜在公为三宫夫人世妇有事于蚕者皆不失其职故士射以之为节云】

于以采蘩【释文作繁】于沼于沚【纸韵】于以用之公侯之事【叶纸韵鉏里翻 赋也于说文云於也象气之舒繁^二名本^二云蓬蒿也似青蒿而叶麤上有白毛从初生至枯白于衆蒿颇似细艾三月采尔雅所谓幡蒿也一名兔葵一名由胡又名游胡夏小正传云蘩游胡游胡旁勃也北海人谓之滂勃广雅谓之旁勃或云蘩有二种一曰白蒿陆^二也可以生蚕一曰芣蒿水^二也可以为菹此蘩当为白蒿耳陆佃云蒿青而高蘩白而繁七月之诗曰春日迟迟采蘩祁祁采蘩所以生蚕也今覆蚕种尚用蒿云季本云蚕之未出者采蘩以洗之令其易出邹忠胤云蘩之生先于桑或者狃于所见不信蘩可生蚕然尔雅有螻蛄蝻繇繇各种而以桑茧樗茧萧茧别之疏云此皆蚕类因所食叶而异其名尔雅又云蘩萧莪之类则萧茧或即蘩茧之类况止云生蚕未必即以啖蚕乎沼广雅云池也圆曰池曲曰沼尔雅云小洲曰渚小渚曰沚释名云沚止也可以止息其上蘩非水产言于沼于沚者沚即沼中之沚犹云采蘩于沼之沚也刘汝楨云池曲遶乎沚故曰沼蘩生沚上四面有水鸟牧不到此蘩最洁故往沚取焉于以用之言采此蘩将有所用之也事谓成君服之事礼记祭义云古者天子诸侯必有公桑蚕室近川而为之筑宫仞有三尺棘墙而外闭之及大昕之朝君皮弁素积卜三宫之夫人世妇之吉者使入蚕于蚕室奉种浴于川桑于公桑风戾以食之岁既单矣世妇卒蚕奉茧以示于君遂献茧于夫人夫人曰此所以为君服与遂副禕而受之因少牢以礼之古之献茧者其率用此与及良日夫人纁三盆手遂布于三宫夫人世妇之吉者使纁遂朱绿之玄黄之以为黼黻文章服既成君服以祀先王先公敬之至也月令云季春之月命野虞母伐桑柘鸣鸠拂其羽戴胜降于桑具曲植蓬筐后妃斋戒亲东乡躬桑禁妇女毋观省妇使以劝蚕事蚕事既登分茧称丝效功以供郊庙之服毋有敢惰黄子道周云周礼内宰以仲春率命妇躬桑浴种此言大昕郑氏疑再浴蚕王后乃涖之也国语云王后亲织玄紵公侯之夫人加之以紃紵卿之内子为大带命妇成祭服列士之妻加之以朝服自庶士以下皆衣其夫社而赋事烝而献功所谓公侯之事此可以见矣左文三年秦伯伐晋遂霸西戎用孟明也君子是以知秦穆公之为君也举人之周也与人之壹也诗曰于以采蘩于沼于沚于以用之公侯之事秦穆有焉喻

不遗小善又昭元年赵孟入于郑乃宴穆叔赋采蘩曰小国为蘩大国省穡而用之其何实非命杜预云穆叔言小国微薄犹蘩菜大国能省爱用之而不弃则何敢不从命穡爱也以上皆断章取义】于以采蘩于涧之中【东韵】于以用之公侯之宫【东韵 赋也尔雅云山夹水曰涧释名云涧间也言在两山之间也孔颖达云于涧之中亦谓于曲内非水中也陆佃云先言于沼于沚後言于涧之中言夫人于事有进而无退愚按古者蚕室必近川以便浴蚕故有于沼于涧之采宫即记所谓筑宫之宫蚕室是也上曰于以用之公侯之事第有其意此曰于以用之公侯之宫则已亲其事矣邹忠胤云不言采桑而言采蘩何也盖蘩之生常先于桑古者王亲耕三推而止后亲蚕三洒而止纁二十七日而老三俯三起事乃大已在三宫夫人世妇登其事而后夫人特躬为之帅赋事而不献功故於蚕未出时第采蘩洗之而事讫矣】被之僮僮【东韵】夙夜在公【东韵】被之祁祁【支韵】薄言还归【叶支韵读如龟居遼翻 赋也按周礼天官内司服后六服褱衣揄翟阙翟谓之三翟与鞠衣展衣褱衣为六也首飾则有副编次三者郑玄谓三翟为祭祀之服褱衣从君见太祖揄翟从君祭羣庙阙翟从君祭羣小祀首皆服副副之言覆所以覆首为之饰其遗像若汉之步摇也鞠衣色如鞠尘象桑叶始生之色告桑之服展衣以礼见君及见宾客之服首皆服编编列髮为之其遗像若汉之假紒假紒者编列他发为之假作紒形加于首上也褱衣以接御首则服次次次第发长短为之髣他髮与己发相合为紒所谓髮髣也知三翟之首服副者王之祭服有六首服皆冕则后之祭服有三首服皆副可知知褱衣首服次者昏礼云女次纯衣纯衣者褱衣也据士服爵弁亲迎摄盛则士之妻服褱衣亦摄盛又明言女次则褱衣首服次可知三翟服副褱衣服次则其中有鞠衣展衣当是服编可知凡诸侯夫人於其国衣服与王后同其燕居则并纁笄绡衣也又少牢礼云主妇被锡主妇赞者一人亦被锡注云被锡读为髮髣古者或剔贱者刑者之髮以被妇人之紒为饰因名髮髣焉孔云此言被与被锡之文同故知被是少牢之髮髣剔髮以被首也髣亦作髣今按郑说则夫人告桑宜服编又据祭义文则受蜚宜服副无服次之礼此云被之僮僮者盖指三宫夫人世妇之服耳观少牢乃卿大夫祭祀之礼而主妇从祭服髮髣可见僮通作瞳说文云日瞳矐欲明也即下文夙字意夙毛云早也公公所即所谓公桑也当日欲明之时夫人世妇即起趋事自夙至夜竟日之长皆在公所也重言僮僮者见其无日不然也被之祁祁与祁祁如云义同言服被者之人多也还说文云复也夙而趋事至夜则可以还归矣非君夫人之重蚕事而勤于倡率安能恪共无怠如此】

采蘩三章章四句【序云采蘩夫人不失职也夫人可以奉祭祀则不失职也按蘩春始生可鬻秋香美可生食又可烝为菹左传谓苹蘩蕒藻之菜可荐鬼神可羞王公是也郑玄以意言豆荐蘩菹盖牵于毛传公侯夫人执蘩菜助祭之说於礼未有所据又埤雅云蘩有二种一曰白蒿陆草也可以生蚕一曰萝蒿水草也可以为菹此诗所采乃白蒿耳朱子云从来说蘩可以生蚕可以供蚕事何必抵死说道只在奉祭祀不为蚕事邹忠胤云或疑夙夜在公即特牲所言视饔饔于夙兴而旋归则郑氏所云释祭服而去者然特牲之视濯宗人职之少牢之溉鼎溉甑饔人廩人职之以至王之正祭视涤濯逆齐省饔则大小宗伯职之俱於妇职无与楚茨曰执饔蹕蹕为俎孔硕而君妇则止於为豆而已即如特牲所言视饔饔亦安得谓之在公况诗人若美夫人奉祭不应舍其祭时之敬恪而但述其祭前祭毕戴被之景是以诸说虽极意揣摩终龃齬而难合愚按被非祭祀之服只此一语便足以破之又何必更论其余乎又王符云背宗族而采蘩怨殆不知所谓】

兔置美周才多也【子贡传谓文王得良臣于野周人美之而申培说则直谓文王闻太颠闳夭散宜生皆贤人而举之国史咏其事而美之盖依附墨子之说墨子云古者圣王列德而尚贤虽在农旅工肆有能则举之故尧举舜于服泽之中授之政天下平禹举益于阴方之中九州成汤举伊尹于庖厨之中其谋得文王举闳夭太颠于置网之中西土服金履祥云此事於兔置之诗辞意最为脗合此诗必为此事而作也肃肃敬也赳赳约也夫置兔而体貌有肃敬之容武夫而步武有约束之度此闳夭太颠之所以为贤而文王所以取之也曰季之取冀缺郭泰之取茅容皆以是观之况文王之取人乎闳夭太颠为文王奔走疏附御侮之友後为武王将威刘敌之人信哉其公侯之干城好仇腹心者欤愚按诗专以武夫为言墨子之说似若可信若胡毋辅之谓闳夭樵于山与猎者争路被执纒以兔网文王救而得解则鄙俚无稽甚矣篇中咏公侯当在为三公之後史记曰纣以西伯九侯鄂侯为三公而竹书纪殷帝辛元年命九侯周侯邰侯则文王之为殷三公在此时也】

肃肃兔【陆德明本作菟】置之丁丁【叶庚韵中茎翻】赳赳【後汉书注作纠纠】武夫公侯干城【庚韵 赋也肃说文云持事振敬也肃肃朱子云整饬貌兔解见巧言篇尔雅云兔罟谓之置李巡云兔自作径路张置捕之也欧阳修云捕兔之人布网罟于道路林木之下肃然严整使兔不能越逸桷通作?说文云击也丁之言当盖音近也解见伐木篇先击桷于地中然後张置其上其用物以击之适当其桷也重言丁丁者连桷也刘向云肃肃兔置桷之丁丁言不怠于道也焦氏易林云兔置之容不失其恭陆化熙云兔置即是莘野之耕渭滨之钓岂是贱业古人出为名世处即守其常大率类此诗故云文治于岐四方无侮武夫无所効其用相与从事置网以销磨其壮心焉耳赳说文云轻劲有材力也重言赳赳者见其非一人也苏辙云置兔之人则赳赳之武夫也世未尝患无武夫独患其不知敬而不可近今武而知敬故可以为公侯干城也邓元锡云兔置之武夫肃肃其敬亲鄙事而无鄙心于文王同心同德矣辅广云文王之时固多贤者此特言武夫者见其无所不备也且文王于武事尚矣三分天下有其二虽是德化之盛而天下归之然遏密侵阮伐崇戡黎之後其于武事大约可观矣朱子云此文王时周人之诗极其尊称不过曰公侯而已亦文王未尝称王之一验也凡雅颂称王者皆追王後所作耳干通作□说文云盾也孙炎云干盾自蔽扞也城说文云以盛民也一说城成也一成而不可毁也孔穎达云公侯以武夫自固为扞蔽若盾为防守如城然愚按为干则一身赖以无虞为城则一国赖以无恐托重恃力有余赖矣严粲谓此言其勇而忠是也吕氏春秋云宣孟德一士犹活其身而况德万人乎故诗曰赳赳武夫公侯干城】肃肃兔置施于中逵【支韵亦叶尤韵渠尤翻薛君章句作馗】赳赳武夫公侯好仇【尤韵亦叶支韵渠之翻 赋也施者旗逶迤之貌故借为敷张之义逵徐锴云高土也或通作馗说文云九达道也尔雅云一达谓之道二达谓之岐旁三达谓之剧旁四达谓之衢五达谓之康六达谓之庄七达谓之剧驂八达谓之崇期九达谓之逵郭璞云四道交出复有旁通者中逵谓九道适中之处好仇犹言善匹左传云嘉耦曰妃怨耦曰仇反妃而言仇犹以洁为污以治为乱也朱子云公侯善匹犹曰圣人之耦则非特干城而已叹美之无已也严云此言其勇而良也】肃肃兔置施于中林【侵韵】赳赳武夫公侯腹心【侵韵 赋也中林林中犹中谷中阿之类皆颠倒成文也陆佃云桷之丁丁以有所闻施于中逵以有所见施于中林则无所闻无所见于是焉尔则好德之至也故诗以此为後罗泌云中逵之德显中林之德晦徐干云人性之所简也存乎幽微人情之所忽也存乎孤独夫幽微者显之原也孤独者见之端也胡可简也胡

可忽也是故君子敬孤独而慎幽微虽在隐蔽鬼神不得见其隙也诗云肃肃兔置施于中林处独之谓也称腹心者郑玄云可用为策谋之臣使之虑事严云谓机密之事可与之谋虑言其勇而智也按书言武王率惟谋从容德此腹心之武夫其即文王之谋臣乎左传郤至答子反之言曰诸侯间于天子之事则相朝也于是乎有享宴之礼享以训共俭宴以示慈惠共俭以行礼而慈惠以布政政以礼成民是以息百官承事朝而不夕此公侯所以干城其民也故其诗曰赳赳武夫公侯干城及其乱也诸侯贪冒侵欲不忌争寻常以尽其民略其武夫以为己腹心股肱爪牙故诗曰赳赳武夫公侯腹心天下有道则公侯能为民干城而制其腹心乱则反之古人之说诗如此虽于诗旨不尽合然亦可见腹心之云为运筹帷幄之事矣西伯阴行善未容遂无密谋也叶氏云在野之凡夫逐兔之细事即可以知其才正如日磾之馭马甯戚之饭牛陈平之宰社识者已知其可大用矣鍾惺云武夫为周之干城好仇腹心固是周之多才亦是古人看人才特达精细处具此心眼有才何患不知知之何患不用用之何患不尽】

兔置三章章四句【序谓兔置后妃之化也关雎之化行则莫不好德贤人衆多也朱子谓此序首句非是但为化行俗美贤才衆多而已岂知当时固有得贤于兔置之事而化行俗美又与武夫之咏殊不相肖乎】

樛木南国诸侯归心文王也【诗以南有樛木发端与南有乔木南有嘉鱼一例自是南国之人咏其所见子贡传申培说皆以为南国诸侯慕文王之德而归心焉是也竹书纪帝辛二十一年春正月诸侯朝周意此诗当于此时而作郑玄谓纣命文王典治南国江汉汝旁之诸侯其事史无所载当即以汉广汝坟江沱诸诗臆之然孔子尝言文王三分天下有其二以服事殷而逸周书程典解亦云文王合六州之侯奉勤于商则所谓诸侯归心文王者此自是确据严粲以为文王之国东北近纣都西北近犬戎故化独南行可谓得其理矣】

南有樛【马融韩诗本俱作杓】木葛藟【陆德明本作累】累【支韵楚辞章句陆本俱作藟】之乐【音络下同】只君子福履绥【支韵】之【兴之比又赋也南毛传云南土也郑玄云谓荆扬之域樛木喻文王也说文云下句曰樛尔雅疏云树枝下垂而曲也孔颖达云此南与南有乔木同南方之木美或下垂或上竦也葛解见葛覃篇藟徐锴云葛蔓也又陆玕云藟一名巨瓜似燕薹亦延蔓生叶艾白色其子赤亦可食酢而不美又作苕苕亦名藟芜本^十注云蔓延木上叶如葡卜而小四月摘其根汁白而甘五月开花七月结实八月结青黑微赤冬惟凋叶而根不死即诗云藟也此藤大者盘薄又名千岁藟韵会注云千岁藟即今言万岁藤大者如盃冬夏不凋故从木其形蔓似^十故从^十在^十木之间也愚按易诗左传皆以葛藟二字连言未必两物皆生一处况藟藟异字葛蔓之藟从^十似藟之藟从木乌可援彼藟以解此藟乎严粲云南土木美葛藟亦茂故以南言之累说文云缀得理也陆元朗云纏绕也张纲云木上竦曰乔下曲曰樛乔则与物絶故曰南有乔木不可休息樛则与物接故曰南有樛木葛藟藟之葛藟在下之物也以木之樛故得附丽以上孔云只之言是犹言乐是君子矣所谓君子指文王也严云动罔不吉谓之福履盖履即践履之履视履考祥自然行与吉会故不曰禄而曰履也绥安也言福履安于其身也雅曰弗禄尔康矣是也此言文王之德远及南方如樛木之荫下而凡弱小之国有所依归如葛藟之得所繫也于是以福履祝之书曰文王诞膺

天命以抚方夏大邦畏其力小邦怀其德正谓此也又旱麓诗云莫莫葛藟施于条枚岂弟君子求福不回属辞相类而取义有别彼以葛藟兴福此则南国诸侯以葛藟自比而又祝其获福耳】南有樛木葛藟荒【阳韵】之乐只君子福履将【叶阳韵资良翻】之【兴之比又赋也荒说文云芜也蔓延广远之意将犹扶助也易曰天之所助者顺是也】南有樛木葛藟萦【庚韵说文作□陆本丰氏本俱作□】之乐只君子福履成【庚韵】之【兴之比又赋也萦通作□说文云𠂔旋貌成说文云就也兼全与久二义又丰熙云愿其早成王业亦通三章一节深一节累系也荒则奄之也萦旋则奄之周也绥者安也将者助之不已也成者福於是大成也层叠歌咏蔼然见无己之愿】樛【韩诗作杓】木三章章四句【序谓后妃逮下也言能逮下而无嫉妬之心焉朱子从之然后妃不可称君子其谬明矣朱子又云夫人称小君大夫妻称内子妾谓嫡曰女君则后妃有君子之德固可以君子目之其牵强如此】

南有嘉鱼文王燕南国宾客也【朱子云此亦燕飧通用之乐歌愚按此必文王时诗文王承紂命典治南国江汉汝旁之诸侯诸侯咸归心焉周南所咏南有樛木南有乔木皆南国事也此诗亦以南有嘉鱼南有樛木起兴其为燕南国宾客无疑後世因此遂通用之燕飧耳】

南有嘉鱼烝然罩罩【叶药韵王雪山云胡郭翻说文作□□】君子有酒嘉宾式燕以乐【叶药韵历各翻兴也以鱼起兴与鱼丽同意南朱子云谓江汉之间毛传云江汉之间鱼所产也嘉鱼鱼名蜀都赋云嘉鱼出於丙穴益州记云蜀山谓之拙鱼杂俎云丙穴鱼食乳水食之甚温陆佃云鲤质鱗鳞肌肉甚美先儒言丙穴在沔阳县北有乱穴二水经注云丙水上承丙穴穴出嘉鱼常以三月出十月入穴穴口广五六尺去平地七八尺泉悬注鱼自穴下透入水穴口向丙故曰丙穴方輿胜览云丙穴在巴郡井峡中其穴凡十其中产嘉鱼其出也止于巴渠龙脊滩首有黑点谓照映星象相感而成长身细鳞肉白如玉其味自咸盖食盐象也本草陈藏器云李善注蜀都赋嘉鱼丙日出穴今则不然丙者向阳穴也阳穴多生此鱼鱼复何能择丙日耶陆云旧言鱼尾象篆文丙字故曰丙穴盖尔雅鱼枕谓之丁鱼肠谓之乙鱼尾谓之丙则鱼尾象丙岂特嘉鱼而已又王质云今辰州鄂州皆有此鱼鄂州取以名县然不必泥其名但取其美恐或是因诗取号也黄震云周都西北以南方之鱼为美故云南有嘉鱼未必独指丙穴之鱼也丙穴之鱼饮乳泉而美亦未必原名嘉鱼也自诗传引丙穴之鱼以释嘉鱼之诗世遂名其鱼为嘉鱼好诗者遂又名其县为嘉鱼县皆以其有经目托之为美谈耳严粲云下文樛木非木名则嘉鱼亦非鱼名要之诗人以鱼之嘉者瓠之甘者喻贤耳亦通烝王肃云衆也解见东山篇尔雅云篚谓之罩郭璞云捕鱼笼也李巡云编细竹以为罩无竹则以荆谓之楚篚诗诂云鱼罩有自上而下者有自下而上者今人谓自上罩下为罩则罩之自上而下者今提罟也自下而上者谓撩罟即罾类淮南子云罩者抑之罾者举之为之虽异得鱼一也朱子云重言罩罩非一之词也吕祖谦云嘉鱼羣然入于网罩之又罩取之不竭愚按此以兴嘉宾非一之意取物必以其具燕宾必以其礼君子有酒与鱼丽篇同式燕解见鹿鸣篇此燕礼即唐孔氏所谓燕聘问之宾之礼式燕以乐用是燕以乐此嘉宾也】

南有嘉鱼烝然汕汕【叶翰韵读如散先吁翻】君子有酒嘉宾式燕以衍【叶翰韵苦旦翻兴也汕说文云鱼游水貌徐锴云舒散貌又尔雅云翼谓之汕郭璞云今之撩罟也陆佃云鱼欲逸则罩之使入鱼欲伏则汕之使出愚按汕乃虚字似非器名当从说文义为长曰汕汕者王雪山以为羣行自得之意是也衍说文云行喜貌又尔雅疏云饮食之乐也易云饮食衍衍

愚按行喜曰衍与式燕以敖同意取兴汕汕正在于此乐者情意之欢洽也衍者形神之舒畅也】南有樛木甘瓠累之【支韵释文作藂】之君子有酒嘉宾式燕绥【支韵】之【兴也樛木解见周南罗愿云瓠状要类於首尾类於要微锐缘蔓而生长而瘦上曰瓠短项大腹曰匏传曰匏谓之瓠误矣盖匏苦瓠甘复有长短之殊定非一物也累解亦见周南樛木篇樛木兴君子甘瓠兴嘉宾吕云樛木下垂而美实累之言相与固结而不可解也绥安也纏绵周至以安嘉宾之心亦犹樛木之下垂而使其系心于我也】翩翩者騅【支韵丰氏本作佳】烝然来【叶支韵陵之翻】思君子有酒嘉宾式燕又【叶支韵盈之翻】思【兴也騅壹宿之鸟解见四牡篇郑玄云壹宿者壹於其所宿之木也此兴嘉宾有专壹之意于我烝然来思者见嘉宾不一其人羣然而来如騅之飞集也又郑云复也以其壹意欲复与燕加厚之孔云频与之燕言亲之甚也又按礼上公三燕侯伯再燕是燕而又燕固有之矣两思皆语辞】

南有嘉鱼四章章四句【序云乐与贤也太平君子至诚乐与贤者共之也苏穎滨严华谷皆祖其说而敷衍之其词甚美今録于此苏云鱼之在水至深远矣然人未尝以深远为辞而不求虽不可得犹久伺而多罩之是以鱼无有不得也苟君子之求贤心诚好之而不倦如是人之於鱼则亦岂有不可得者哉又云鱼非有求于人而人则取之以为贤者亦如是而吾则强求之坎非也瓜蔓于地是岂可强使从人哉然其遇樛木也未尝不累之而上物之相从物之性也岂有贤者而不愿从人者哉独患不之求耳孔子曰未之思也夫何远之有又云父子之相亲物无不然者故择木之鸟常怀其亲来而不去君子之事君如子之养父母义有不可已者故曰长幼之节不可废也君臣之义如之何其废之孔子历聘於诸侯老而不厌乃所谓烝然来思者惟莫之用是以终舍而去古之君子於士之至也则酒食以燕乐之故士可得而留也既燕矣而又未厌安之也严云成周太平持守之时所用之人必先有德立政之书卷阿之诗皆曰用吉士此诗鱼曰嘉则味之美瓠曰甘则可以养人騅为孝鸟皆喻吉士也未至则勤求之已至则燕饮之是乐与贤也又云南方有樛然下曲之木故瓠之甘而可食者得上而纏绵之兴成王屈己下贤则贤者得以上进固结而不可解也绥之谓燕饮以安之醴酒不设而穆生去盖礼貌衰则不能安贤者之心也又云人君之於贤始则多方勤求之继则礼貌以招延之其後则贤者闻风自至如翩翩然飞者是孝鸟鵲鳩羣然而自来也卷阿言吉士以有孝有德称之故此诗以孝鸟喻贤也又思者燕而又燕见交际之欵洽所谓至诚乐与也朱子不从序说谓序得诗意而不明其用其曰太平之君子者本无谓而说者又以专指成王皆失之矣子贡传则谓鱼丽嘉鱼瓠叶皆所以燕大臣既无明据申培说不能知其所作之繇但云全篇皆赋也而已又诗纬含神雾推度灾泛历枢等书及郎顗传四始之说推嘉鱼在己为火始更不可晓】

羔羊南国化文王之政在位皆节俭正直故诗人美其衣服有常而从容自得如此【出朱传孔丛子载孔子曰于羔羊见善政之有应也徐光啓云书毕命曰兹殷庶士席宠惟旧怙侈灭义服美于人骄淫矜夸将繇恶终俗之不良乃尔文王一先以卑服道以懿恭而过化存神一至于此自非上圣其能若是又云读羔羊而不游心于无声无臭者不可与言诗也至德之世上下相忘衣衣食而已】

羔羊之皮【叶歌韵蒲波翻】素丝五紵【歌韵毛诗作它陆德明本作佗】退食自公委蛇

委蛇【叶歌韵汤何翻毛诗作委蛇韩诗作逶迤外传作褱□石经作□迤又後汉书作委陀李铉字辨作?□沈重读作委委蛇蛇 赋也小曰羔大曰羊孔颖达云此说大夫之裘宜直言羔而已兼言羊者以羔亦是羊故连言以协句剥取兽革谓之皮按生曰皮理之曰革对文则皮革异故掌皮云秋敛皮冬敛革也皮所以为裘大夫为裘用羔羊之皮周礼注谓取其羣而不失其类仪礼注谓取其羣而不党公羊传注谓取其执之不鸣杀之不号乳必跪而受之死义生礼者此羔羊之德也毛传云古者素丝以英裘薛君章句云素喻洁白丝喻屈柔说文无蛇字当通作绦说文云扁绪也孔云织素丝为组紃以英饰裘之缝中素丝为饰维组紃耳若为线则所以缝裘非饰也故干旄曰素丝组之紃亦组之类杂记注曰紃施诸缝若今之绦是有组紃而施于缝中之验钱氏云两皮之缝不易合故织白丝为紃施之缝中连属两皮因以为饰所以言五蛇者补传云合五羊之皮为一裘也百里奚衣五羊之皮盖仿古制又姚旅云皮小则合缝多而用丝烦五蛇见其皮之大只用五蛇耳皮大则贱正言其俭也按羔裘大夫趋朝之服严粲云缁衣羔裘诸侯日视朝之服卿大夫朝服亦服之其所异者君则纯色臣则以他物饰其裘所谓羔裘豹褰羔裘豹祛是也又按论语曰狐貉之厚以居注谓在家所以接宾客则在家不服羔裘矣朱子以为大夫燕居之服非是退食者退朝而食于家也自从也犹言往也公公所也退食自公言退食已毕从而之于公所也旧说谓自公退朝食于私家三章皆一意未是邹忠胤云玉藻君日出视朝退适路寝听政使人视大夫大夫退然後适小寝释服盖视朝之後君适路寝臣亦视其治事之馆馆乃所直之庐谓公馆非私家也此大夫盖公尔忘私日恪位箴以勤其官每宵衣而旰食其自公所服此羔裘故即所见称之又颜师古以为卿大夫履行清洁减退膳食率从公道殊无意义委蛇毛云委曲自得之貌孔云心志既定举无不中神气自若事事皆然故云委蛇陆佃云鱼属连行蛇属纡行诗曰委蛇盖取诸此张敬夫云重言委蛇舒泰而有余裕也严云服饰有常俯仰无愧节俭正直之意隐然可见矣左襄七年卫孙文子来聘公登亦登叔孙穆子相趋进曰诸侯之会寡君未尝後卫君今吾子不後寡君寡君未知所过吾子其少安孙子无辞亦无悛容穆叔曰孙子必亡为臣而君过而不悛亡之本也诗曰退食自公委蛇委蛇谓从者也衡而委蛇必折】羔羊之革【叶职韵訖力翻】素丝五緇【职韵说文作□齐诗作縵】委蛇委蛇自公退食【职韵 赋也说文云革兽皮治去其毛革更之上章言皮以有毛故称皮盖将以为裘则不得去其毛此章言革则毛已脱去而裘将敝矣緇说文云羔裘之缝也孙炎云缝之界域孔云缝合羔羊皮为裘缝即皮之界域因名裘缝云緇又西京杂记云五丝为?倍?为升倍升为緇倍緇为纪倍纪为纓倍纓为褱此以丝言非羔裘之緇也自公退食者言自公之後退而食于私家也唐人诗曰侍臣缓步归青琐退食从容出每迟可想是诗景况矣】羔羊之缝【叶东韵读如逢蒲蒙翻】素丝五总【叶东韵祖丛翻】委蛇委蛇退食自公【东韵赋也缝说文云以緇紩衣也次章言革毛去而革存也此章言缝革敝而缝见也如晏子一狐裘三十年必】

【希革而缝见可知总说文云聚束也胡一桂云窃意缝之突兀谓之蛇有界限谓之緇合二为一谓之总又陆佃云羔羊之皮素丝五蛇蛇所以英裘其制然也此言其节羔羊之革素丝五緇革者言敝而因故以改造也此言其俭羔羊之缝素丝五总革而又敝则补缉以缝之此言其俭之至礼记缁衣篇曰苟有衣必见其敝而引葛覃服之无斲为言亦此意也退食自公同首章之文王氏云朝夕往来出公门入私门出私门入公门而已终无私交之行也】

羔羊三章章四句【序云羔羊鹄巢之功致也召南之国化文王之政在位皆节俭正直德如羔羊也按所谓德如羔羊已无义理至归功于鹄巢所致则迂甚矣申培说但以美大夫之诗子贡传则云大夫贞而能俭忠乎公室国史美之总之随文生义无所发明】

小星南国夫人承后妃之化能不妬忌以惠其下故其衆妾美之如此【出朱传 序云惠及下也夫人无妬忌之行惠及贱妾进御于君知其命有贵贱能尽其心矣按礼内则云夫妇之礼惟及七十同藏无间故妾虽老年未满五十必与五日之御将御者齐漱澣慎衣服栉緹笄总角拂髦衿纓綦屨虽婢妾衣服饮食必後长者妻不在妾御莫敢当夕旧说谓天子之御妻八十一人当九夕世妇二十七人当三夕九嫔九人当一夕三夫人当一夕后当一夕凡十五日而徧望前先辈象月初生渐进至盛法阴道也望後先尊意可互观每月十五六日月相对故后独当此二夕罗氏颇不然其说谓内宠无并后岂有王后之尊下与庶妾更进迭退一月仅再见者以礼言之天子之后每夕皆进于王所以正内治五日一休以休沐为义则一嫔与其御进又五日一休则一嫔与其御进凡四十五日而九嫔毕见凡一时而再见一岁而八见此嫔御进见之大数也若内则所谓五日之御则诸侯制也诸侯一娶九女夫人及二媵各有侄娣此六人当三夕次二媵当一夕次夫人专一夕凡五日而徧其御亦望前先辈望後先尊虽女君不在而其御日衆妾莫敢当之故曰莫敢当夕也味此诗有实命不犹之语仅能追承君惠而已视螽斯之咏有间故知为南国诸侯媵妾所作】

嘒【丰氏本作嘒】彼小星三五在东【韵】肃肃宵征夙夜在公【东韵】寔【韩诗作实】命不同【东韵 兴也嘒本小声之义故毛传训为微貌云汉之诗曰有嘒其星是也孔子曰日者天之明月者地之理阴契制故月上属于天妇从夫放月纪也月为后夫人之象妾特借其余光以自耀故取兴于星下文三五在东维参与昴正其所指之小星也毛传云三心五嘒洪范五行传云心三星大星天王前星太子後星庶子尔雅云昧谓之柳昧即嘒天文志云柳谓鸟喙南方宿有七共为朱鸟形柳朱鸟口也故名昧按孔颖达谓心在东方三月时嘒在东方正月时而陆佃谓三心以春见于东方最先见者五嘒以冬见于东方最後见者盖心之见在正春而嘒之见在冬春之交故二家之言云尔然可知其不同时而见也又天文志星经皆以柳为八星则不得以五属嘒明甚愚谓三五在东不兼言心乃专指嘒也步天歌云柳八星曲头垂似柳近上三星号为酒享宴大酺五星守此诗之作盖在冬春之时故道其所见如此至其所以取象于三五者亦自有意陆佃谓诸侯一娶九女侄娣与媵而八故诗正以三五况之是也肃说文云持事振敬也通衆妾言之故重曰肃肃宵夜征行夙早也公公所也衆妾进御于君初昏见星而往将旦见星而还往来总在暗中虽夙亦是夜故曰宵征古者后夫人将侍君前息烛後举烛至于房中释朝服袭燕服然後入御于房鸡鸣太师奏鸡鸣于阶下然後夫人鸣佩玉于房中告去是夙夜往来皆在暗中也况衆妾乎其所谓在公者何所也古者王立六宫正寝一燕寝五皆王后之所治也九嫔居于九室掌妇学之法以教九御各帅其属而以其时叙御于王所女御掌御叙于王之燕寝然则正寝为王后所专而燕寝虽嫔御皆得入矣诸侯之宫半于天子故礼曰卜三宫夫人世妇之吉者其御叙于燕寝之制亦宜同也实尔雅云是也说文云止也徐锴云寔如此止如此也命朱子云谓天所赋之分也言其所以如此者繇其所赋之分不同于贵者是以得御于君为夫人之惠而不敢致怨于往来之勤也安命见诸妾感恩深处非自诿咎于命味一寔字有贴然尊奉毫无勉强之意吕大临云夫人无妬

忌之行而贱妾安于其命所谓上好仁而下必好义者也】 嚶彼小星维参与昴【叶尤韵力求翻史记律书云北至于留留者言阳气之稽留也索隐云留即昴也元命苞云昴之为言留言物成就系留是也丰本作□】 肃肃宵征抱衾与裯【叶尤韵陈留翻尔雅作憯】寔命不犹【尤韵尔雅注作猷 兴也刘熙云参谓之实沈昴谓之旄头天文志云参为白虎三星直者是谓衡石下有三星兑曰罚为斩艾事其外四星左右肩股也罚即伐孔颖达云伐与参连体参为列宿统名之若同一宿然但伐亦为大星与参互见皆得相统故周礼熊旗六旒以象伐注谓伐属白虎宿与参连体而六星言六旒以象伐明伐得统参也是以演孔图云参以斩伐公羊传曰伐为大辰皆互举相见之文也故言参伐也尔雅云大梁昴也西陆昴也正义云昴为胡星亦为狱事晋志云昴七星天之耳也北六星曰卷舌主察知佞谗也曲吉直而动天下有口舌之害中一星曰天谗主巫医其所以取象参昴者陆佃谓进御之法侄娣两两当夕故诗又以参昴况之参昴二星也而又皆西方之星其在于冬则以夕并见是也愚按月令孟春之月昏参中尚书曰短星昴以正仲冬皆谓见于南方作诗者所见盖在冬春之交柳在冬参昴在南皆一时事也衾说文云大被也孔云今名曰被古者曰衾论语谓之寝衣也裯说文云衣袂祗裯按方言汗襦自关而西谓之祗裯後汉书羊续传唯有布衾敝祗裯是也曰衣袂祗裯者言有衣袂之祗裯也一说郑玄云牀帐也汉世名帐为裯抱衾与裯即掌御叙于燕寝之事犹朱子云亦同也按犹本兽名性多疑虑故借为恍惚相若之义邓元锡云诗之安命如此诚味之天下安有不尽分之人哉知命则无怨尤无怨尤则能安土能安土则能乐天抱衾裯而宵征宵征而肃肃安也】

小星二章章五句【子贡传云小臣奉使而勤劳于公赋小星申培说亦云小臣奉使行役之诗然抱衾与裯正所谓粲兮烂兮者岂使臣语哉如泥夙夜在公之云为勤于王事则采芣之诗亦当属之使臣矣】

江有汜文王之时江沱之间有嫡不以其媵备数媵遇劳而无怨嫡亦自悔也【出序 申培说亦云诸侯之媵始不容于嫡终而进之故作是诗孔颖达云嫡谓妻也媵谓妾也谓之媵者以其从嫡以送为名胡安国云诸侯有三归嫡夫人行则侄娣从二国来媵亦以侄娣从凡一娶九女左传云凡诸侯嫁女同姓媵之异姓则否按白虎通及春秋释例公羊传注云备侄娣从者谓其必不相嫉妬也侄者何兄之子也娣者何弟也一人有子三人共之若己生之不娶两娣何传异气也娶三国女何广异类也侄娣年虽少犹从适人者明人君无再娶之义也二国来媵谁为尊者大国为尊国等以德德同以色质家法天尊左文家法地尊右所以不聘妾何人有子孙欲尊之义义不可求人以为贱也又云古者女嫁必侄娣从谓之媵独言二国者异国主为媵故持名之其实虽夫人娣侄亦为媵也又云诸侯之娶凡九女参骨肉至亲所以息阴讼阴讼息所以广继嗣又云夫人无子立右媵之子右媵无子立左媵之子参前数说盖所以广胤嗣之道养寿命之源其义远矣此诗前二章为二国媵女之辞後一章为嫡之辞盖嫡媵和睦後所作序所谓媵遇劳而无怨者谓前此遭苦虐而无怨耳非真有勤劳之事也】

江有汜【纸韵养里翻石经说文俱作沔贵竹本作泚】之子【凌氏子贡传本作子之後同】归不我以【纸韵】不我以其後也悔【叶纸韵虎洧翻 兴之比也此与下章皆媵辞也时二国之媵皆不得备数偕行故各述其一章江解见汉广篇汜说文云水别复入水也尔雅云

水决复入为汜疏云凡水决之岐流复还本水者为泛刘熙云汜已也如出有所为毕已而复入也朱子云今江陵汉阳安复之间盖多有之又云夏水自江而别以通于汉复还入江冬竭夏流故谓之夏而其入江处今名夏口即诗所谓江有泛也郝敬云以泛自比以江比嫡贤女恭顺之辞小星自托以日月之光比夫人江汜自况以洪流之量比正嫡知命守分所以为贤女之子是子也谓嫡也妇人谓嫁曰归之子归者追数昔日之辞我媵自我也能左右之曰以朱子云谓挟已而偕行也一说以用也不我以者言弃我不用于君所也皆通悔说文云恨也言自恨其前日之非而改过也此非感被文王后妃不妬忌之化何以至是蔡汝楠云风之江沱雅之宾筵皆取於悔繇变之趋于正也故曰震无咎者存乎悔】

江有渚【语韵】之子归不我与【语谓】不我与其後也处【语韵 兴之比也右媵尊于左媵上章当为右媵之辞此当为左媵之辞尔雅云小洲曰渚毛传云水岐成渚刘熙云渚遮也体高能遮水使从旁回也与说文云党与也不我与者犹言不与之为俦侣也处说文云止也请得其所而安止也其後也悔其後也处皆庆幸之辞】江有沱【歌韵】之子归不我过【歌韵】不我过其啸【丰氏本作歔】也歌【韵兴之比也此嫡辞也尚书云岷山导江东别为沱尔雅云水自河出为灊汉为潜江为沱孔颖达云皆大水分出别为小水之名也张萱云江贡也以贡于海为义别而为沱者为有它焉蔡沈云南郡枝江县有沱水然其流入江而非出于江也华容县有夏水首出于江尾入于沔亦谓之沱愚按上二章为媵辞曰汜曰渚皆取合流于江之义喻已之归依于嫡也此章为嫡辞曰沱取江别为沱之义喻媵分虽卑不妨与己并进也兴意各异达者详之之子指媵也归谓今日来归也媵向者不得备数偕行至今日始归也亦与上二章之子归不同过犹失也按过者越度之义如贤者过之之过故谓过为失不我过者喜二媵之不念旧恶不以我为过也啸说文云吹声也郑玄云蹙口而出声也歌说文云咏也徐锴云长引其声以诵之也刘熙云人声曰歌歌柯也所歌之言是其质也以声吟咏有上下如草木之有柯叶也故充冀言柯声如歌也既啸复歌见二媵之恬然自得絶无怨恨尤之意盖至是而嫡媵之所以自处可谓各得其道矣】

江有汜三章章五句【朱子以为是时汜水之旁媵有待年于国而嫡不与之偕行其後嫡被后妃夫人之化乃能自悔而迎之故媵作此诗今按待年不行於礼有之公羊传注云诸侯之媵八岁备数十五从嫡二十承事君子未任承事还待年父母之国白虎通亦云还待年父母之国未任答君子也若此媵为待年之故而不与嫡偕行岂得怨嫡乎又子贡传云诸侯之夫人终容其媵也赋江有泛则以此诗为专美嫡序则云美媵也动而无怨嫡能悔过也云云则似专美媵今按是诗两述媵嫡之辞盖兼美之至推本其所以然则当归之文王太姒之化耳】

標有梅及时择壻也【序云男女及时也召南之国被文王之化男女得以及时也戴岷隐云此择壻之辞父母之心也申培说亦云女父择壻之诗】

標【赵岐孟子注作孳】有梅【韩诗作媒】其实七【质韵】兮求我庶士迨其吉【质韵】兮【兴而赋也標击也落也盖击而落之也梅木名华白实似杏而酢陆佃云子赤者材坚子白者材脆华在果子华中尤香俗云梅华优于香桃华优于色故天下之美有不得而兼者多矣若荔枝无好叶牡丹无美实亦其类也梅先桃李而华女失婚姻之时则感己之不如亦

梅华虽先桃李然其着实乃更在後则婚姻之年或未嫌也按梅冬而华春而实实常多而易落曰七兮者孔颖达云十分之中尚七未落已三分落矣愚按此及下章其实三兮顷筐暨之皆未然事特借以形容时晚耳非真历尽而始咏也求有选择之意庶者未定之词士者礼义之人也曰我庶士盖女父言云尔迨及也有皇皇惟恐其晚之意吉吉日也及此吉日而定其人非谓便于归也後放此孟子曰丈夫生而愿为之有室女子生而愿为之有家父母之心人皆有之女子盛年难久譬梅实之易落故为父母者惟恐得婿之过时而不觉其词之棘如此按孙卿曰霜降逆女冰泮杀止霜降九月也冰泮正月也家语曰羣生闭藏乎阴而为化育之始故圣人以合男女穷天数也霜降而妇功成嫁娶者行焉冰泮而农桑起昏礼杀于此而夏小正二月则又云绥多士女据周礼媒氏以仲春之月令会男女之无夫家者于斯时也相奔者不禁盖嫁娶自季秋至于孟春惟其所用不拘其月此常礼也及至仲春而犹有男女之无夫家者谓若男三十女二十为期尽蕃育则以媒氏会之使各尽所欲虽奔犹不禁奔非淫奔也以事迫而礼简不能如常昏焉故曰奔也郑玄所谓女年二十而无嫁端则有勤望之忧是也黄佐云圣人之虑天下也血气既壮难尽自简情窦既开奚顾礼义故昏欲及时者所以全节行于未破之日也故男子十六而娶不踰三十女子十四而嫁不踰二十使不至有过时之悔然则男女得及时其亦周之礼化与徐光啓云標有梅说者以为仲夏之时非也仲夏之时则梅已将熟矣安得而有標落又安得有顷筐之多也梅花繁初结实时常多而易落故如此尝试验之亦稍後于桃天时耳左传襄八年晋范宣子来聘告将用师于郑公享之宣子赋標有梅季武子曰谁敢哉今譬于草木寡君在君君之臭味也欢以承命何时之有杜预谓宣子欲鲁及时共讨郑取其汲汲相赴】標有梅其实三【叶侵韵疏簪翻】兮求我庶士迨其今【侵韵】兮【兴而赋也其实三兮者承上章言过此以往梅之堕落又将多其在者余三耳今急辞也谓今日也】標有梅顷筐【丰氏本作匡】暨【叶未韵於既翻吕氏读诗记作暨】之求我庶士迨其谓【未韵】之【兴而赋也顷筐解见卷耳暨毛传云取也按暨字从土说文云仰涂也书所谓涂暨茨是也原无取义据郑玄谓顷筐取之于地严粲谓取之于地沾地湿也亦属强解以意推之当是槃量之槃传写譌也槃平斗斛木也此又承上章言过此以往梅实当尽落顷筐贮之过盈故以木槃之也胡胤嘉云一时也而七而三而顷筐所尽即年华瞥尔何言之太迅也欧阳永叔曰梅实有七至于落尽不出一月之间故前世学者多云诗人不以梅实纪时早晚独郑玄以为过春及夏晚皆非诗人本义周礼仲春奔者不禁何待初夏方为过时诗人咏此以兴物之盛时不可久言召南之人顾其男女方盛之年懼其过时而至衰落乃期于庶士以相婚姻也谓者父母遣媒妁通言姑先定约徐俟礼行也语云走兔在野人竞逐之积兔在市人不敢动在女父母自为其子计不得不切然始终必以求为言不肯苟且迁就非文王之教而何】

標有梅三章章四句【按郑笺之解求我庶士云我我当嫁者谓求女之当嫁者之衆士孔氏正义云言此者以女被文王之化贞信之教兴必不自呼其夫令及时之取已郑恐有女自我之嫌故辨之言我者诗人我此女之当嫁者亦非女自我味其语意殊费干旋朱传径以为女子所作则岂有女思求男而为圣人之化者乎子贡传有阙文今不録】

汉广文王化行南国男女知礼诗人美之【出子贡传申培说同序以为德广所及也文王之道被于南国美化行乎江汉之域无思犯礼求而不可得也邹忠胤云南】

【有乔木题曰汉广亦犹定之方中之为楚宫有饁簋飧之为小东也】

南有乔【陆德明本作桥】木不可【丰氏本不可作可以】休【尤韵】息【孔颖达云诗之大体韵在辞上疑休求字为韵二字俱作思韩诗外传丰氏本俱作思】汉有游【孔颖达本作游】女不可求思汉之广矣不可泳【叶漾韵丁放翻】思江之永【薛君章句作漾说文作漾今按从此则广泳漾方四字皆成韵广古旷翻】矣不可方【叶漾韵甫妄翻】思【兴而比也南方之木美作诗者自咏其土之所有也乔说文云高而曲也尔雅云句如羽乔下句曰杻上句曰乔又云小枝上繚为乔注云树枝曲卷似鸟毛羽细枝皆翹繚上句者名为乔木木枝下蟠则阴广上繚则阴少南有高竦之木其阴不下及故不可休息兴女之高洁而不可求也经文息字当依韩诗作思思者语辞胡胤嘉云樛木下垂则附之者易乔木上竦则依之者难此兴之有义者也汉水名出嶓冢山至大别入江此汉上有游女者薛君章句云谓汉神也言汉神时见不可求而得之愚按据此则二句乃是比体盖如雒神宓妃之类耳以比贞静之女可望而不可即也泳说文云潜行水中也江水名出岷山东流与汉水合东北入海释名云江公也小水流入其中公共也永说文云长也方说文云并舩也尔雅以为汭也方言曰汭谓之??谓之筏筏秦晋通语也郭璞云木曰?竹曰筏小筏曰汭亦作?又作桴或作柎泳以絶流横度言故属广方以顺流上下言故属永严粲云江水尤深濶于汉故汉止言不可泳而江言不可方此四句转言女自可求但须媒妁通言六礼俱备不可以非礼而求犹江汉未尝不可渡然须假舟楫以济不可凌忽泳方之耳季本云汉水合江则濶故言泳江则其流本长故言方本咏汉而并及于江者地近人远咫尺千里语其地则如汉之不可泳语其远则如江之不可方盖即女所近之水远不可从者以为比】翹翹错薪【丰本作新下同】言刈【丰本作又下同】其楚【叶麋韵读如取此主翻】之子于归言秣其马【叶麋韵满补翻】汉之广矣不可泳【韵见首章】思江之永矣不可方【韵见首章】思【兴而比也翹说文云尾长毛也错薪中之高者亦如之故云翹翹错毛传云襍也薪说文云莠也月令收秩薪柴注云大者可析谓之薪小者合束谓之柴左传言其父析薪其子弗克负荷以此证薪是麤大可析之物也丰道生云新古文作𣎵从木定意而以辛谐声小篆加斤以斧析木也隶借为新旧字而加艹为薪谓或艹或木皆可以析为薪也然古新旧字本从见而以亲谐声親戚字从家省而从亲会意言一家之親常见如新无厌憎也自借新为亲旧字不知有親为七斤切新亲皆柴薪字六义遂晦楚木名一名荆广志云牡荆蔓荆也图经云牡荆即作垂杖者枝茎坚劲作科不为蔓生故曰牡实细而黄如麻子大蔓荆茎高四尺对节生枝秋结实斑黑如梧子大而轻虚沈括云扬州宜杨荆州宜荆地名因此荆或为楚楚亦荆木之别名也荆在襍薪之中尤为翹翹故析薪者欲刈之以喻此女在衆女中尤为高洁人宁不思欲娶之乎之子此女子也秣食马谷也马所以驾车士昏礼壻亲迎至妇家妇升车则壻授绥御轮以行今日秣马谓亲迎也然非必作诗者自欲娶此女盖谓其不可以非礼干设言人若欲娶之者必待秣马以行亲迎之礼而後可娶耳邹忠胤云翹薪四语似与章首四句遥对盖乔木不可休错薪则有可刈也游女不可求于归则有可效也末又重述汉之广矣四句以咏叹之】翹翹错薪言刈其蔹【虞韵】之子于归言秣其驹【虞韵】汉之广矣不可泳【韵见首章】思江之永矣不可方【韵见首章】思【兴而比也蔹蔹蔹也一名购故尔雅曰购蔹蔹郭璞云蔹蒿也生下田初生可啖江东用羹鱼也陆玕云其叶似艾白色长数寸高丈余好生水边及泽中正月根牙生旁茎正白生食之香而脆美其叶又可蒸为茹罗愿云令古以为珍菜按蔹亦艹中之翹

翹者许慎云马二岁曰驹三岁曰騊孔穎达云八尺以上为龙七尺以上为騋六尺以上为马五尺以上六尺以下曰驹古者驾车两服两骖服必壮马骖可用其次者前言秣马衡外夹辕之服也此言秣驹衡下襄驾之骖也范景文云王者不易民而治此类是也望见端庄静一之女而嗟叹之不足其人亦贤者也】

汉广三章章八句【朱传谓文王之化自近而远先及於江汉之间而有以变其淫乱之俗今按此诗具见女慕贞洁男知礼义以此归本于文王之化渐被致然可耳未必江汉之俗有淫乱之事大约因旧说解汉有游女为游荡之女故致此误若韩诗以为悦人也其意亦谓之子守礼之可悦耳不善会之鲜不以辞害义】

采芣苢蔡人之妻伤夫也【韩婴诗序以为伤夫也刘向列女传云蔡人之妻者宋人之女也既嫁于蔡而夫有恶疾其母将改嫁之女曰夫之不幸乃妾之不幸也奈何去之适人之道一与之醮终身不改不幸遇恶疾不改其意且夫采采芣苢之草虽其臭恶犹始于捋采之终于怀襁之浸以益亲况于夫妇之道乎彼无大故又不遣妾何以得去终不听其母乃作芣苢之诗君子曰宋女之意甚贞而一也愚按此亦后妃之化也冉伯牛有恶疾故文选用其事而曰冉耕歌其芣苢盖相传旧矣或疑蔡宋非古国名按国语云文王之即位也谡于蔡原韦昭注谓蔡蔡公也罗泌路史国名记蔡黄帝後结姓国蕲春汪中有蔡山又乐记云武王下车而投殷之後于宋则蔡宋非旧名而何】

采采芣苢【纸韵释文作苢】薄言采【叶纸韵此礼翻亦叶有韵此苟翻】之采采芣苢【见上】薄言有【韵亦叶纸韵羽轨翻】之【兴而比也采捋取也重言采采非一采也陆佃云他草所在或无唯车前苍耳所在有之故芣苢卷耳之诗正言此二物芣苢一名马舄一名车前一名当道大叶长穗好生道边及牛马迹中故曰马舄车前当道也一名牛遗陆玕云幽州人谓之牛舌草可鬻作茹大滑其子治妇人产难本草云生平泽丘陵阪道中一名胜舄亦或谓之陵舄列子云若?为鹑得水为?得水土之际则为蛄蟪之衣生于陵屯则为陵舄屯阜也故或谓之虾蟆衣韩诗外传云直曰车前瞿曰芣苢盖生于两旁谓之瞿图经云春初生苗布地如匙面累年者长及尺余如鼠尾花甚细青色微赤结实如葶苈赤黑色今人五月采苗七八月采实程子云薄言发语辞严粲云薄言震之薄言追之薄言采芣凡薄言二字皆辞也朱子云采始求之也有既得之也薛君章句云芣苢臭恶之菜诗人伤其君子有恶疾人道不通求己不得发愤而作以事兴芣苢虽臭恶乎我犹采取而不已者以兴君子虽有恶疾我犹守而不离去也】采采芣苢薄言掇【曷韵】之采采芣苢薄言捋【曷韵】之【兴而比也掇说文云拾取也捋说文云取易也诗诂云以指历取也陆燾云旧说掇拾其穗也芣苢无取穗者子之在地者拾之未落者捋之也孔穎达以为此章言采时之状是也】采采芣苢薄言袪【叶屑韵吉屑翻】之采采芣苢薄言褊【屑韵陆德明本作褊】之【兴而比也尔雅说文皆云执衽谓之袪孙炎云执衽者持衣上衽徐锴云举衣?之一角也说文云以衣衽扱物谓之褊李巡云扱衣上衽于带衽者裳之下也置袪谓手执之而不扱褊则扱于带中矣陈祥道云郑氏释丧服传曰妇人不殊裳其服如深衣而无衽按诗言妇人之采芣苢或袪衽或褊衽是妇人之服未尝无衽也辅广云曰采曰有则始求而既得之辞曰掇曰捋则正采而拾取其子之辞曰袪曰褊则既采而携以归之辞】

芣苢三章章四句【子贡传以为文王之诗万民和乐童儿歌謡赋芣苢申培说亦谓童儿鬪草嬉戏之词然不识何以专采芣苢岂以其多生道旁故耶味亦短矣序则谓芣苢后妃之美也和平则妇人乐有子矣按神仙服食法曰车前之实雷之精也善疗孕妇难产盖以其性大滑毛苕陆玑皆取之以此为乐有子之证尤属鄙浅不经或又引本草云强阴益精令人有子今考神农本经之语第云车前子味甘寒无毒主气癰上痛利水道小便除湿痹久服轻身耐老初无宜怀妊之说至唐本余等始增入此语盖因毛说而附会之也滑伯仁云车前性寒利水男子多服则精滑而易痿妇人多服则破血而墮胎岂宜子乎又周书王会篇芣苢本作桴□及山海经虽云芣苢食之宜子然谓其出于西戎又指为木名纵使果有之亦别是一种未可便指为此之芣苢也冯时可云吾独取韩诗之言恶疾不相弃则有得乎性情之正且不失风人之旨以意逆志者当自得之矣】

野有死麕南国被文王之化女子有贞洁自守不为强暴所污者诗人因所见而美之【出朱传序云恶无礼也天下大乱强暴相陵遂成淫风被文王之化虽当乱世犹恶无礼也郝敬云纣时淫昏成俗而羞恶之心人所自有文王化行皆知无礼之可恶故诗不贵其贞洁而贵其知耻知耻自不屑不洁此导民之本格心之化也】

野【凌氏子贡传本作埜】有死麕【真韵此章隔句用韵陆德明本丰氏本俱作?陆又云一作麕】白茅包【叶有韵补苟翻路史作苞】之有女怀春【真韵】吉士诱【有韵丰本作求】之【比而赋也说文毛传皆谓郊外曰野麕麕也鹿属无角本草注云麕类甚多麕其总名也陆佃云麕性善聚善散故从困困聚也亦散也齐人谓麕为麕或谓麕性善惊故从章吴越春秋谓章者獐□也盖麕鹿皆健骇而麕性胆尤怯饮水见影辄奔道书谓麕鹿无魂又谓麕鹿白胆善怖为是故也尔雅麕曰其迹躔麕曰其迹解盖麕性迷惑故其迹躔而不解麕性散惊故其迹解而不躔郝云麕鹿比奔也死麕死鹿如恶恶臭丑诋之辞茅郭璞云菅属说文训菅为茅训茅为菅非是通志云茅类甚多惟白茅擅名陆佃云茅体柔而理直又洁白故先王用之以藉亦以缩酒包毛云裹也通作苞礼注疏解苞苴云苞者以草包裹苴者以草藉器贮物罗泌云先王之治先其礼而後其乐乐者溷濶之意而礼者人之城也礼胜则愚故乐以生之乐胜则流故礼以守之礼也者所以严分而防佚者也苟严矣何慢之足忧苟防矣何乱之足病诗云野有死麕白茅包之夫麕既已死矣在所可弃矣而犹苞以白茅何耶死恶其洿于地也夫茅之为物薄而用可重也易曰藉用白茅无咎苟厝诸地而可矣藉之用茅何咎之有此礼之所以不可以已而流遁者之所以获罪于圣人也愚按诗之兴意谓野有死麕人恶其臭犹或以白茅包裹之此强暴之男何止如死麕之可恶乃任其狂逸而莫之制使其秽德彰闻何邪有女者诗人美此女也怀春者郑玄孔颖达皆云仲春为昏时故贞女思仲春之月以礼与男会也吉士美士也诱仪礼诱射论语善诱人之诱尔雅云进也毛传云道也此女非不怀婚姻然必待吉士以礼进而道之如媒妁之言是也诗咏此女有三善焉曰怀春则必依其时曰吉士则必得其人曰诱之则必合其礼非圣化所被而何】林有朴【屋韵】野有死鹿【屋韵】白茅纯束【沃韵】有女如玉【沃韵上章麕春包诱隔句两韵此变体以上二句下二句分为两韵比而赋也朴说文云小木诗诂云孔疏引尔雅朴一名心江河间以作柱案小木通呼朴即非木名云可作柱则大木也孔疏引朴以为朴误矣林有朴以野中之所见言继之曰野有死鹿言有死鹿在野外之林中也鹿兽名有角纯通作全亦

音近也全用白茅裹束此死鹿亦恶其臭也如玉郑玄云取其坚而洁白不以色言此强暴之男譬如野外林中之死鹿徒足啓人畏恶厌絶耳其能凜如玉之女乎】舒而脱脱【叶队韵徒对翻】兮无【丰本作母下同】感我帨兮无使彪【说文作彪】也吠【队韵 赋也舒说文云缓也脱通作帨说文云好也舒而脱脱者言此女举止舒迟而容貌又姣好也即上章美其如玉之意无通作母下同戒强暴之辞也感尔雅云动也我我女子也诗人敬爱之至故以我称之若托于女子之自道然者帨拭物之巾女子所佩也内则云女子生设帨于门右感我帨者女子自动其帨盖见此强暴之男来则女子必奔走失度而避之至动其佩饰也彪通作彪说文云犬之多毛者字从犬从彡吠说文云犬鸣也孔颖达云非礼相陵主不迎客则有狗吠郝敬云此章述女子羞恶之情言彪吠则狗彘恶之矣左昭元年郑伯享赵孟子皮赋野有死麋之末章杜预注谓喻赵孟以义抚诸侯无以非礼相加陵赵孟赋常棣且曰吾兄弟比以安彪也可使无吠子皮兴拜举兕爵曰小国赖子知免于戾矣范景文曰通篇皆诗人美贞女刺狂夫若作女子拒之之辞终乏风霜之气】

野有死麋三章二章章四句一章三句【丰本篇名作野麋毛郑解野有死麋白茅包之野有死鹿白茅纯束皆谓四荒则杀礼贞女之情欲令以白茅裹束野中田者所分麋肉鹿肉为礼而来诸家及朱子皆因之案昏礼五礼用鴈唯纳徵用币无麋鹿之肉旧注殊属不经且思下一死字岂佳语耶子贡传谓楚人求昏而不能其礼女氏拒之然不能其礼似不应丑诋如是之甚申培说谓婚媾恶无礼之诗玩此诗实未尝为昏媾也若季本直目为淫诗则冤甚矣】

麟之趾美文王子多贤也周家世有圣母故其子孙之盛且贤如此【所以知为赞圣母者以言麟不兼麒麟知之麟乃麒之牝者也三章皆咏麟而一则美公子一则美公姓一则美公族固知非专指太姒何者武王周公皆晚得子安得此时遂咏公姓至公族则愈远矣主太任以称文王之子则为公姓故美公姓知其为赞太任主太姜以称文王之子则为公族故美公族知其为赞太姜诗三咏麟盖分拟三母也】

麟【齐诗作麇】之趾【纸韵释文丰氏本俱作止】振振公子【纸韵】于嗟麟兮【三章俱用此一句结不用韵 比中有赋也按说文云麇仁兽也麇牝麒也麟大牝鹿也则字当作麇经传中麟麇通用陆佃云不践生草不食生物有爱吝之意故麇从吝一说麇不世出世衰则麇死故从吝吝惜也京房易传云麇麇身牛尾狼额马蹄有五采腹下黄高丈二何法盛云麒仁兽也牝曰麟牡鸣曰游圣牝鸣曰归和春鸣曰扶幼夏鸣曰养绥秋鸣曰藏嘉各鸣曰思边张揖云麟者含仁怀义行步中规折旋中矩游必择土翔必复处不羣居不旅行不犯陷穿不罹罟?文章彬彬瑞应图云麟王者嘉祥食嘉禾之实饮珠玉之英大戴礼云毛虫三百六十而麟为之长礼运云麟以为畜则兽不狘孔子云刳胎伐夭则麟不至罗泌云蔡邕以为中央轩辕大角之信诗含神雾以为木之精鷩冠子以为北方玄枵之兽或云阳气所孕又云纯阴之精保乾图以为岁星之散运斗枢以为机星得则生陈钦以为西方之毛虫广雅以为寿一千抱朴以为寿三千自汉而来为祥说者咸谓麟生于火而游于土王者视明礼修好生恶杀动有仪容贤者在位不肖者退则见郊野礼斗威仪谓君垂金而王政太平则在郊而春秋考异卹以为王者功平则至孝经纬亦言德至鸟兽则凤凰翔麒麟臻遂使庸君想致学士妄谈按罗愿谓麟只如?麋之属後世言麇者皆妄果尔则何以称四灵陆玑谓今并州界有麟大小如

鹿乃司马相如赋所言射麋脚麟者非瑞兽也然则罗氏所指殆即此物欤趾本作止说文云下基也象^艸木出有止故以止为足麟之趾赞太姒也孝经曰亲生之膝下因下文言振振公子故以趾咏麟之为趾生^艸不践生虫不履是其仁之见于趾者也举一趾以见其仁而旧说谓以趾比公子非也振说文云奋也季本云振振者振动之意文王之德繇亲亲而达于仁民爱物故其公子皆振动其良心莫不兴起于仁可以任民物之责也所以知此诗为美文王之子者以公子二字知之文王时尚未王也文王诸子除三叔不足道若武王周公皆圣人其余伯邑考康叔封邶叔武曹叔振铎[?]季载皆出自太姒以贤仁着称至于衆妾所生则武王之异母弟又有毛郤雍滕毕原丰郇之属所谓则百斯男者非太姒有仁厚之德何能孕样鍾美如是故诗人复叹息而称之曰信哉太姒之为麟也太姒之仁如麟也于者舒气嗟者叹声】麟之定【径韵字书丰本俱作頔】振振公姓【叶径韵苏佞翻】于嗟麟兮【比中有赋也定尔雅作頔云题也按说文无頔字当通作顶顶者顛也所谓额也麟之定赞太任也太任者王季之妃朱子谓麟有额而不以抵是其仁之见于定者也因下文言公姓则太任为祖母居上临下为定之象公姓朱子云公孙也姓之为言生也按礼记玉藻云子姓之冠也注谓孙是子之所生故曰子姓一说孙传姓者亦通公姓主文王之子言之于嗟麟兮复叹息言太任之仁亦如麟故有此贤孙也大雅云思齐太任又云摯仲氏任来嫁于周乃及王季维德之行列女传云太任之性端一诚庄皇王大纪云太任有贤德目不视窃色耳不听淫声口不出恶言】麟之角【叶屋韵卢谷翻】振振公族【屋韵】于嗟麟兮【比中有赋也按麋汉石刻全似鹿但一角直卓如浮图其端有肉圆如柿实孝经右契春秋感精符皆言麒麟一角明海内之共一也陆佃云麋似麋圆顶一角故西狩获麋曰有麋而角也传曰麒麟似麋而无角按尔雅曰驪如马一角不角者骐然则麒麟从骐省不角故也汉终军传云麋角戴肉设武备而不为害所以为仁或曰麋肉角凤肉珠皆示有武而不用也麟之仁见于角所以赞太姜也太姜者太王之妃于文王之子则为曾祖母所处益高故取象于角孔頴达云先言趾次定次角者麋是走兽以足而至故先言趾因从下而上次见其额次见其角也陆佃云始于趾终于角每况愈上族谓三族也三族者父子孙三辈之亲则三代矣自太王而下为王季为文王为文王之子是三辈之族皆自太姜传之故主太姜而呼文王之子为公族也罗泌云礼小记曰亲亲者以三为五以五为九是所谓九族者夫人生则有父壮则有于父子与己此小宗伯三族之别也父者子之祖因上推之以及於己之祖子者父之孙因下推之以及於己之孙此礼传之以三为五也己之祖自己子视之则为曾祖王父自己孙视之则为高祖王父己之孙自己父视之则为曾孙自己祖视之则为玄孙故又上推以及己之曾高下推以及己之曾玄是所谓以五为九也而或者谓高非己之所逮事玄非己之所及见且出一族则其所睦为不广於是执为异姓之说以为父母妻之族合则为三别则为九父之族别而四母之族别而三妻之族别而二是不然在尔雅内宗曰族母妻之族曰党父可以为党而妻与母不得谓之族也白虎通云族者凑也聚也恩爱相流凑也生相亲爱死相哀痛有会聚之道故谓之族于嗟麟兮叹息言太姜之仁亦如麟故能传世衍族皆贤如此也列女传云太姜贞顺率道靡有过失广于德教而谋事次之】

麟之趾三章章三句【陆元朗云序本或直云麟趾无之字子贡传申培说俱作麟止序云关雎之应也关雎之化行则天下无犯非礼虽衰世之公子皆信厚如麟趾之时也愚按所谓关雎之应者谓后妃有关雎之德故有振振公子之应此但以诤首章之义可耳其谓衰世公子

皆信厚如麟趾之时者郑玄谓当文王与纣之时乃是衰世而关雎化行公子皆信厚与礼合古太平致麟之时不能过也此则指麟为瑞应而以公子当麟瑞于义迂矣朱传谓文王后妃德修于身而子孙宗族皆化于善故诗人以麟性仁厚其趾亦仁厚兴文王后妃仁厚故其子亦仁厚曰定曰角放此夫一麟耳而兴文王又兴后妃殊乖体物之义子贡传但云周人美公子之多仁也申培说亦云文王之子多仁贤美之则第赞公子为麟足矣分之趾为定为角何居昧诗人立言之意矣】

殷其雷忧文王也文王囚於羑里其臣相与救之室家明於大义从而思之【何以知为忧文王也以殷其雷在南山二语知之雷者纣威也南山者周地也是诗也其閼夭太颠辈室家为之欤按竹书帝辛二十三年囚西伯于羑里桓谭新论云文王修德百姓亲附是时崇侯虎与文王列为诸侯德不及文王常嫉妬之乃谮文王於纣曰西伯昌圣人也长子发中子旦皆圣人也三圣合谋君其虑之乃囚文王于羑里史记云纣以西伯昌九侯鄂侯为三公九侯有好女入之纣九侯女不熹淫纣怒杀之而醢九侯鄂侯争之强辨之疾并脯鄂侯西伯昌闻之窃笑崇侯虎知之以告纣纣囚西伯羑里又云崇侯虎谮西伯於殷纣曰西伯积善累德诸侯皆向之将不利於帝帝纣乃囚西伯帝王世纪云纣囚文王文王之长子曰伯邑考质於殷为纣御纣烹为羹赐文王曰圣人当不食其子羹文王食之纣曰谁谓西伯圣者食其子羹尚不知也皇王大纪云周之臣子日夜忧惧谋所以救其君父者无所不至竭国中珍宝良马使閼夭太颠来献遣使四出谋於牧伯及合诸侯诸侯忧惧愤惋入见请从昌囚乃召昌释之史记云纣囚西伯於羑里閼夭之徒患之乃求有莘氏美女骊戎之文马有熊九驂他奇怪物因殷嬖臣费仲而献之纣纣大说曰此一物足以释西伯况其多乎乃赦西伯赐之弓矢斧钺使西伯得专征伐曰谮西伯者崇侯虎也太平御览云文王四臣散宜生等周流海内经历丰土得美女二人白马朱鼠以献於纣陈於中庭纣立出西伯文王在羑里时演易八卦为六十四作郁尼之辞困于石据于蒺藜乃申愤以作歌曰殷道溷溷漫浊烦兮朱紫相合不别分兮迷乱声色信谗言兮炎炎之虐使我愆兮幽闭率奔繇其言兮遘我四人忧勤勤兮又古今乐录炎炎之虐二句作閼閼之虎使我褰兮盖谓崇侯虎也四人旧注谓太颠閼夭散宜生南宫适也王世贞云内文明外柔顺俟命正志生死不易文王之德也委曲万变以出其主而任其过颠夭之德也文王之德臣德也身谋之也颠夭之德亦臣德也为君谋之者也巽之九二曰巽在牀下用史巫纷若吉夫子赞之曰巽以行权呜呼至哉陈氏云或曰为人臣者亡道以免其君之危则苟而可欤曰人臣以忠为其道夫能忠以免其君而何苟欤吾闻之也人臣之事君也犹子之事其父也为人子者不幸而其父之有过苟可以全吾父何弗用也为人臣者不幸而其君之有患苟可以免吾君则何弗用也瞽瞍杀人臯陶执之夫臯陶之执之也则既已离於天子之司败矣而舜且勿恤也窃负而逃窃负而逃非天子所以事其父而舜为之以救败也閼夭散宜生之间以行其赂而免文王於桎也是亦窃负而逃之譬也或曰文王乃幸以免难欤曰文王何知焉閼夭散宜生之为之而纣之出之也其为之不知所以为而其出之不知所以出幸而出之而文王固且曰天王之圣明也又何怨焉且吾闻之也人臣之事君也犹子之事其父也昔者舜之只载瞽瞍也起居饮食未尝不在侧也索而杀之则不可得故曰小杖则受大杖则走孝也文王之幸免患於纣而受成於二三子之计也是亦大杖则走之譬也】

殷其雷【灰韵首末句相应为韵陆德明本作雷】在南山之阳【韵】何斯违斯莫敢或遑

【阳韵】振振君子归哉归哉【灰韵 兴之比又赋也殷者作乐之盛称故有盛大之义张子厚云天地之气阴因阳阳在内者不得出则奋击而为雷郝敬云比殷商也南山周终南山山南曰阳雷发声不在他处而独于南山之前後左右施其搏击之威以喻纣之偏与周为难也时文王有羑里之厄而其臣若闾夭辈相与奔走出力以救之其为之室家者偶闻雷声殷殷然感风雨将作而念其君子故即其事以起兴张敬夫云如鸛鸣妇叹之义将风雨则思念行者也何者疑念之辞何斯之斯斯此人谓君子也违说文云离也违斯之斯斯此所谓室家也莫之言无盖音近也遑说文云急也我君子辞室家而远出将以脱主於难莫敢或急求毕事也振说文云举救也所救之方不一故曰振振张子厚云劝使勉也或用权或用术然後可以出文王而使之归周而我之君子亦可与之俱归矣故曰归哉归哉凝望之辞也上归哉谓文王也下归哉谓君子也严粲云冀其毕事来归而不敢为决辞知其未可以归也】殷其雷【见上】在南山之侧【职韵丰氏本作仄】何斯违斯莫敢遑息【职韵】振振君子归哉归哉【见上 兴之比又赋也孔颖达云上阳直云山南此云侧不复为山南三方皆是毛传云在其阴与左右也郝云在南山之侧天威不测也息本喘息之义人一呼一吸为息故谓息为止莫敢遑息者莫敢求止息也】殷其雷【见上】在南山之下【叶震韵後五翻】何斯违斯莫敢遑处【叶震韵读如取此主翻】振振君子归哉归哉【见上 兴之比又赋也郑玄云下谓山足陆佃云语曰雷高弗雨雷在南山之下则雨矣愚按此以比纣怒将解也处说文云止也谓至家而安止也首章言莫敢或遑谓当宛转相机以图之次章言莫敢遑息谓当竭蹶趋事以图之此章言莫敢遑处则纣怒已可挽回归期行且不远特不敢急遽求归耳文王之时不独为之臣者能笃忠贞而其妇人亦能明于大义若此】

殷其雷三章章六句【子贡传谓召公宣布王命诸侯服焉赋殷其雷申培说谓武王克商诸侯受命于周庙出就终南之馆故作此诗然何斯违斯二语终非踊跃受命气象序以为召南之大夫远行从政不遑宁处其室家能闵其勤劳劝以义也其於经之大义固无所害而所谓召南之大夫远行从政者则亦不过因此诗在召南中遂从而附会之耳郝敬则云西伯率南国大夫以服事殷故妇人以天威比王命托咏殷雷亦犹汝坟之王室如毁也语意差近并存之】

驹虞美文王蒐田也【何以知其为蒐也礼四时之田春曰蒐夏日苗秋曰獮冬曰狩彼茁者葭则春之时也左传曰密须之鼓与其大路文所以大蒐也此诗所言者春蒐之事意其即为彼之蒐与若六韬言文王斋三日乘田车驾马田于渭阳见太公载与俱归史记亦言周西伯将出猎卜之曰所获非龙非鬻非虎非罴所获伯王之辅於是西伯猎遇太公于渭之阳据书无逸篇称文王不敢盘于游田其见于传记者惟此二役而已然此诗唯咏获玃豸不侈得贤则必非渭阳之田也又周礼射人以射法治射仪王以六耦射三侯三获三容乐以驹虞九节五正礼记射义为闡其说曰天子以驹虞为节乐备官也倘亦以驹御虞人无不在列以充任使故谓之备官欤然此诗若咏文王则固诸侯也而天子用之为射节何居盖文王既追王则亦天子矣不然如文王之辟雍亦何以为天子之学乎】

彼茁者葭【麻韵】壹【诗缉丰氏本俱作一下同】发五豝【麻韵】于【贾谊新书作吁】嗟乎【虞韵三字句】驹【丰氏石经本作邹】虞【韵二字句旧叶麻韵云即东方朔所

谓驹牙者也次章又叶东韵同一虞字而两其读不通甚矣刘芳诗疏作吾 赋也彼者徐锴云据此之称谓彼之也指葭言茁说文云草初生出地貌葭芦苇又名华一物四名郑玄云记芦始生者着春田之早晚说文亦以葭为苇之未秀者发发矢尔雅云豕牝为豮一曰豕二岁能相把拏也见周礼注小尔雅云大者谓之豮按广雅凡兽二岁通名为豮据杜预解春猎为蒐谓蒐索择取不孕者若云豕牝则有孕道当从二岁名也礼曰无事而不田曰不敬白虎通云王者诸侯所以田猎上以共宗庙下以简集士衆也公羊传则以春猎为蒐旧说谓择取不孕任者若治苗去不秀实者所以专取豮豮以豮豮独害稼郊特性迎虎为其食田豕所以除春农之害也一发五豮者毛传云虞人翼五豮以待公之发郑玄云君射一发而翼五豮者战禽兽之命必战之者仁心之至孔颖达云田猎有使人驱禽之义周礼田仆设驱逆之车驱之逆之皆为杀也不尽杀之犹如战然故云战禽兽之命也按易王用三驱褚氏诸儒皆以为三面着人驱禽必知三面者禽惟有背己向己趣己故左右及于後皆有驱之即毛传之所谓翼也苏辙云于君之射也一发而虞人翼五豮以待之此蕃之至也然犹不敢尽取之一发而已王应麟云言私其豮献豮于公致禽之礼也悉率左右以燕天子奉上之诚也彼茁者葭一发五豮爱物之仁也严粲云止于一发仁心之至不忍尽杀故也驹说文云廐御也按月令季秋天子乃教于田猎命仆及七驹咸驾郑氏云七驹为趣马主为诸官驾说者也左成十八年晋悼公使程郑为乘马御六驹属焉使训羣驹知礼是驹为驹御也虞者掌山泽之官周礼有山虞泽虞左传周辛甲之为太史也命百官官箴王阙有虞人之箴即此虞也君田猎则驹御及虞人咸在故作诗者呼驹虞之官而叹美之冯时可云美公之仁而及于掌鸟兽之官犹咏王德而及于武夫言非但其主仁即其下亦能体上意而仁及于物故吁嗟以叹之耳朱善云先儒所谓举一世而言固无一人之不仁举一人而言又无一事之不仁者惟此诗为然又周礼疏引韩鲁说驹虞天子掌鸟兽官贾谊新书云礼者臣下所以承其上也故诗云一发五豮吁嗟乎驹虞驹者天子之圉也虞者圉之司兽者也天子佐舆十乘以明贵也二牲而食以优饱也虞人翼五豮以待一发所以复中也人臣于是所尊敬不敢以节待敬之至也甚尊其主敬慎其所掌职而志厚尽矣作此诗者以其事深见良臣顺下之志也者可以义矣故其叹之也长曰吁嗟乎虽古之善为人臣者亦若此而已愚按驹为天子之圉别无明文据皇氏谓天子马有六种种别有驹又有总主之人并六驹为七故云七驹即趣马之类是也所以咏及于驹者为其御马以田车攻之诗言四黄既驾两骖不倚不失其驰皆驹之能事故及之耳又此诗咏爱物之仁而贾说专言事上之敬其指颇异】

彼茁者蓬【东韵】壹发五豮【东韵】于嗟乎【虞韵】驹虞【韵 赋也蓬陆佃云蒿属草之不理者也其叶散生如蓬末大于本故遇风辄拔而旋虽转徙无常其相遇往往而有故字从逢说苑云秋蓬恶于根本而美于枝叶秋风一起根且拔矣是以君子务本也豮说文云生六月豚一曰一岁豮尚褰聚也见周礼夏官注小尔雅云豕之大者谓之豮小者谓之豮孔颖达云七月云言私其豮献豮于公周礼大司马职谓大兽公之小禽私之豮言私明其小也又按尔雅豕生三豮二师一特郭璞云猪生子常多故别其小者郑志张逸问豕生三曰豮不知母豕也豚也答曰豚也过三以往犹谓之豮以自三以上更无名也故知过三亦为豮然则豮盖豕之小而多者也季本云豮大故藏于葭豮小故藏于蓬陆佃云葭泽草蓬陆草豮把拏豮褰聚皆蕃之意也葭茁于下蓬茁于上豮获于前豮获于後以言上卜草木鸟兽繁殖吕祖谦云彼茁者葭彼茁者蓬记蒐田之时盖曹子桓所谓句芒司节和风扇物草浅兽肥之时也一发五豮一发五豮兽之多而取之鲜也反三隅而观之则天壤之间和气充塞庶类繁殖交于

万物有道而恩足以及禽兽者皆可见矣冯时可云兽五惟一发者不忍尽杀仁心如是而宋儒以为中必叠双是後世之巧射穷兵黷武者所为非三代之礼射矣至以谓四矢为一发偶一矢叠双乃得五尤附会可笑】驺虞二章章四句【旧皆作章三句序以为鹄巢之应也鹄巢之化行人伦既正朝廷既治天下能被文王之化则庶类蕃殖蒐田以时仁如驺虞则王道成也先儒泥仁如驺虞之说遂凿空指一兽名之驺虞以为国君如之又泥于麟趾为关雎之应驺虞为鹄巢之应则曰意者文王之时二物应感而至故诗人以发兴益无稽甚矣按驺虞为兽名见于周书王会毛氏以驺虞为义兽白虎黑文不食生物後世皆祖其说如司马相如封禅文云囿驺虞于珍羣其颂曰般般之兽乐我君囿白质黑章其仪可喜皎皎穆穆君子之态吴薛综颂曰婉婉白虎优仁是崇饥不侵暴困不改容敛威扬德君子之风陆机云驺虞尾长于躯不食生物不履生草应信而至陆佃云驺虞西方之兽其色见于白其文见于黑又名之曰虎则宜正以杀为事今反不履生草食至死之肉盖仁之至也诸家考较形似别白声象若真见其物然者愚独有以断其不然盖尔雅乃诗诂其释兽中无驺虞也又汉武帝时建章宫後有异物出焉其状如麋东方朔云此驺牙也或以为即驺虞既属附会而淮南子言散宜生得驺虞鸡斯之乘献纣尚书大传云散宜生等之於陵取怪兽尾倍其身名曰虞盖驺虞也山海经云林氏有珍兽大若虎五采毕具尾长于身其名驺吾乘之日行千里六韬云纣囚文王闕夭之徒诣林氏国求得此兽献之纣大悦乃释之张华亦云驺虞具五采乘之日行千里详上数说则驺虞乃马类是皆不足信墨子谓成王之乐命曰驺吾或疑为即此诗驺虞然别无所见琴操则云驺虞邵国之女所作也古者役不踰时不失嘉会邵国之大夫久于行役故作是诗也陈阳乐书亦载古琴曲谓驺虞召国女怨失嘉会而作审尔不过闺门怨诗耳有何关系】

行露召伯听讼也衰乱之俗微贞信之教兴强暴之男不能侵袭贞女也【出序刘向列女传云召南申女者申人之女也既许嫁于酆夫家礼不备而欲迎之女与其人言以为夫妇者人伦之始也不可不正传曰正其本则万物理失之毫厘差之千里是以本立而道生源洁而流清故嫁娶者所以传重承业继续先祖为宗庙主也夫家轻礼违制不可以行遂不肯往夫家讼之于理致之于狱女终以一物不具一礼不备守节持义必死不往而作诗曰虽速我狱室家不足言夫家之礼不备足也君子以为得妇道之仪故举而扬之传而法之以絶无礼之求防淫慾之行焉又曰虽速我讼亦不女从此之谓也韩诗外传同按文王既灭崇後始作邑于酆酆本崇地此女为酆人所讼意者在文王初作邑之时而文王使召伯听之乎黄氏云周家贞信之教兴而商人衰乱之俗未殄此如一阳来复之时而五阴犹未逊阳而却退也申培说亦以为强委禽而不受至于兴讼大夫以礼断之而国史美之】

厌浥【陆德明本作挹】行露【遇韵易林作路】岂不夙夜谓【丰氏本作畏】行多露【露露相应为韵比也厌浥毛传云湿意也愚按说文厌竿也竿者压也浥湿也言压此湿于道上行露者道上之露也夙早也谓行多露畏其沾濡也苏辙云二南当文王与纣之世淫风之被天下如露之濡物召南之女被文王之化能以礼自保故其称曰行者未尝不欲夙夜也谓道之多露是以不敢女子未尝不欲从人也谓世之多强暴是以不可女子之所以自保如此左僖二十年楚鬬谷於菟帅师伐随取成而还君子曰随之见伐不量力也量力而动其过鲜矣善败繇已而出人乎哉诗曰岂不夙夜谓行多露自守之谓也襄七年晋韩献子告老公族

穆子有废疾将立之辞曰诗曰岂不夙夜谓行多露杜预注云言岂不欲早暮而行惧多露之濡己以喻违礼而行必有污辱】谁谓雀无角【觉韵亦叶屋韵卢谷翻】何以穿我屋【韵亦叶觉韵乙角翻】谁谓女【音汝下同】无家何以速我狱【沃韵】虽速我狱室家不足【沃韵比而赋也谓犹言也雀小鸟陆佃云雀物之淫者鼠物之贪窃者故诗言雀角鼠牙以譬强暴师旷禽经云雀交不一雉交不再穿说文云通也其字从牙在穴中屋说文云居也家即室家之家夫妇合则成家速尔雅云徵也狱毛传说文皆云确也字从?从言二犬所以守也孔颖达云囚证于角核之处周礼谓之圜土然则狱者核实道理之名皋陶造狱谓此也此女言谁敢谓雀但有味而无角果尔何故能穿我之屋也见雀之穿屋则信为有角矣谁敢谓汝与我无室家之道果尔何故而致我于狱也见汝之致我于狱则信为家汝所应有矣下章放此然虽致我于狱而室家之礼实有未备者不可掩也韩诗外传谓行露之女许嫁矣然见一物不具一礼不备则不肯往以着其守贞之至观室家不足之言可见非谓全无媒聘也或云角乃嘴之锐而鈎者凡鸷鸟皆有之未详所出室家不足即亦不女从之意言欲求与我为室家恐未能也亦通】谁谓鼠无牙【麻韵】何以穿我墉【冬韵】谁谓女无家【麻韵按前章上二句自为韵此则取牙与家墉与讼隔句为韵朱传以前章家字叶音谷此章家字叶各空反一字两读恐无此理】何以速我讼【叶冬韵祥容翻】虽速我讼亦不女从【冬韵比而赋也鼠穴虫也牙说文云牡齿也徐锴云比于齿为牡也按鼠有齿而无牙尔雅云墙谓之墉讼说文云争也字从言从公言之于公也按周礼司寇职两造禁民讼两剂禁民狱对文注谓讼以财货相告者狱相告以罪名此诗无财罪之异重章变其文先狱後讼者谓先系之于狱而後寘对也陆佃云雀角鼠牙皆言以无为有似是而非也从说文云相听也苏辙云知其室家之道不足而终不之从者召公明于听讼也刘公瑾云此诗贞女乃讼之初六强暴之男则讼之九四也初六阴柔不终于讼而九四以刚不中正应之贞女自守非所以召讼而男子以强暴凌之然曰室家不足则初六之辨明矣曰亦不女从则九四不克讼矣所以能然者以有召伯为九五之大人也】

行露三章一章三句二章章六句【王雪山谓暴男侵贞女女固可尚男为何人岂王化独及女而不及男耶意此必衰世之诗録其女之不苟随耳按王之疑亦是顾不知酆乃崇侯虎之地盖染于崇侯之恶而然也若朱传但谓南国之人遵召伯之教服文王之化有以革其前日淫乱之俗则此女性本守贞而非淫乱者乃谓因文王召伯之教化而始变其旧习冤矣子贡传有阙文今不録】

菁菁者莪乐育材也【出序】其作于文王初立辟雍之日乎【竹书纪帝辛三十七年周作辟雍按周自文王都丰之後始建辟雍其後武王仿之故镐京亦有辟雍焉诗之作必美其所自始故知菁菁者莪为文王咏也序以为乐育材者得之而更衍之曰君子能长育人材则天下喜乐之矣愚谓天下二字似泛此诗盖作于入学鼓篋者非作于圜桥观听者耳又邹忠胤因诗中乐且有仪之句疑笙诗由仪即此】

菁菁【文选注作蓁蓁集韵作葦葦丰氏本作青青下同】者莪【歌韵】在彼中阿【歌韵】既见君子乐【音络】且有仪【叶歌韵牛何翻兴也陆佃云艸之初生其色玄盛则乃青霜死而後黄落故菁之文从青诗曰何草不玄以言其生何草不黄以言其死也重言菁菁者

不一蒿也莪草名尔雅云萝也说文云萝莪也蒿属郭璞云今莪蒿也亦曰?蒿?之为言高也舍人云一名萝蒿一名角蒿陆玑云生泽田渐洳之处叶似邪蒿而细科生三月中茎可生食亦可蒸香美味颇似菱蒿本^廿注云茎叶如蒿蒿开淡红紫花结角子长二寸许微弯陈藏器云生高冈宿根先于百草冯振宗云陆以为生泽田陈藏器以为生高冈今以诗文证之陵阿则高地也沚则水中也然则泽田高冈俱有莪矣郝敬云蒿易长俄然而成故名莪小曰莪大曰蒿谚云三月茵陈四月蒿言易长也故比育材严粲云莪虽微物美而可食故以喻人材中阿毛云阿中也中沚中陵放此阿有二义说文云大陵也一曰曲阜也按阿既陵之大者不应至第三章始言在彼中陵似非立言之序宜依後说为正大陵曰阜其曲处名曰阿及至大阜始曰陵耳诗绵蛮篇以丘阿与丘隅丘侧并称解者亦谓是丘之曲中也可知曲乃阿之本义罗愿云莪水中所生陵阿亦通有之此虽可食之菜然彼中阿沚陵有在者焉而未采盖育之而使成也亦地之良者善养物君之仁者善养士故以为能长育人材焉邓元锡云天之生材也实难羣之师儒教之学育之俾自得其性成之也中阿长莪蒿蒿然似之故以起兴愚按中阿为人所不见之地兴士之藏修于国学无慕人知也既见幸辞也丰熙云始未见而今见之也君子指文王也後放此邓云学不乐不安仪不度不成逊业乐羣亲师而安友乐学也容貌比礼动作卒度有仪也其中心和乐外貌庄敬而严威者与其成也悖矣然非良师儒不任施悖求拂将苦其难不知其益隐其学且疾其师岂有育哉按诗小序云蒿蒿者莪废则无礼仪矣吕氏云长育人材之道固多术矣而莫先于礼仪礼仪者内外兼养非心过行无所从入此人材所以成也徐干云先王之欲人之为君子也故立保氏掌教六艺一曰五礼二曰六乐三曰五射四曰五御五曰六书六曰九数教六仪一曰祭祀之容二曰宾客之容三曰朝廷之容四曰丧纪之容五曰军旅之容六曰车马之容大胥掌学士之版春入学舍菜学万舞秋班学合声讽诵讲习不解於时故诗曰蒿蒿者莪在彼中阿既见君子乐且有仪既修其质且加其文文质着然後体全体全然後可登乎清庙而可羞乎王公君子者表里称而本末度者也故言貌称乎心志艺行度乎德行美在其中而畅於四支纯粹内实光辉内着故宾玉之山土木必润盛德之士文艺必衆又左文三年公如晋及晋侯盟晋侯飧公赋蒿蒿者莪庄叔以公降拜曰小国受命于大国敢不慎仪君赋之以大礼何乐如之抑小国之乐大国之惠也昭十七年小邾穆公来朝公与之燕季平子赋采芣穆公赋蒿蒿者莪皆断章取义无与诗旨】蒿蒿者莪在彼中沚【纸韵】既见君子我心则喜【纸韵兴也沚解见采芣篇罗愿云莪即古之芣释^廿曰芣之丑秋为蒿以丑言之则其类多矣春时虽各有种名至秋老成皆通呼为蒿今莪谓之莪蒿又谓之萝蒿又谓之?蒿然则可谓芣之丑矣又莪在中沚即与于沼于沚涧谿沼沚之毛所在符合释^廿曰莪萝释虫又曰?罗字异而音皆同谓蚕?也莪岂有用於蚕故同其两名耶古芣皤蒿以为可以生蚕莪亦当尔故曰莪即芣也孔穎达云养莪者以沚则有水之润得于中而长遂也郝云蒿蒿者莪在彼小渚之沚多土洒濯亦犹此也愚按辟雍之制以水环之其形似沚故以中沚为兴喜说文云乐也徐锴云口豈为喜豈者陈乐立而上见人心之悦则其面目料然而变知其喜也我心则喜者因育材之有地喜已材之得成也】蒿蒿者莪在彼中陵【蒸韵】既见君子锡我百朋【蒸韵兴也大阜曰陵莪在中陵则人皆得见之矣士之材已成就而为人所共瞻仰者其象如之故以为兴锡通作赐说文云予也朋即朋友之朋周礼注云同师曰朋同志曰友按说文朋本古风字象形凤飞羣鸟随以万数故以为朋党字锡我百朋者辟雍之中人材所聚新至者得于斯取友焉喜其受益之多故本其所自而以为君子之锡我也百者举成数之大名言其多耳王制云乐正崇四术立四教顺先

王诗书礼乐以造士春秋教以礼乐冬夏教以诗书王太子王子羣后之太子卿大夫元士之适子国之俊士皆造焉凡入学以齿所谓百朋也又按诗之朋尊以两尊为朋易之十朋以两贝为朋皆取两两相偶之义旧说解百朋但放十朋之说而郑笺且以五贝为朋今按汉书食货志有五种之贝大贝四寸八分二枚为一朋直二百一十六壮贝三寸六分以上二枚为一朋直五十么贝二寸四分二枚为一朋直三十小贝寸二分以上二枚为一朋直十不成贝不盈寸二分漏度不得为朋率枚直钱三是为贝货五品贝虽五品惟大贝壮贝么贝小贝四品各以二枚相与为朋其不成贝者但数枚而用郑混谓五贝为朋非也然五贝乃王莽所制据盐铁论谓用贝起于夏后氏又周亦有泉贝未知其法何如贝中肉如科斗而有首尾以其背用故谓之贝今如依旧说则锡我百朋者直谓羣贤丽泽所益实多如获贝朋之衆耳亦通】
泛泛杨舟【尤韵】载沉载浮【尤韵】既见君子我心则休【尤韵 兴而比也泛说文云浮貌以下文观之浮而沉沉而复浮故曰泛泛杨舟以杨木为舟也杨性坚劲故可为舟载之言则盖音近也黄震云载沉载浮者言舟泛泛水中或上或下不定之貌吴师道云沉者持扬之势非没溺也杨舟以比贤士书曰若济巨川用汝作舟楫虚舟泛泛则沉则浮将以待问渡者即贤士待用之况也休从人依木朱子云言安定也既见君子则将论定而官任官而爵不患成材而不见用我心於是乎安定也按文王世子篇云凡语于郊者必取贤斂材焉或以德进或以事举或以言扬当时文王作人之法如此先儒谓辟雍尚仍殷制在郊于此论课学士材能故曰语于郊云】

菁菁者莪四章章四句【朱传以为燕饮宾客之诗子贡传则云所以燕贤也申培说谓天子燕宾兴之士则歌此诗陈氏疑为天子行礼于学校燕饮而歌此诗今按诗中殊无言及燕饮之事但以有归美君子之辞则虽燕飨通用无不可者非为燕饮作也】

汝坟商人苦纣之虐归心文王而作是诗【出申培说子贡传亦云受辛无道商人慕文王而归之赋汝坟按汝旁去纣都朝歌不远至是皆归心于文王则不止三分有二而已王弼易注曰周室陶复而有汝坟足为此诗明据邹忠胤云竹书纪帝辛三十九年大夫辛甲出奔周汲冢周书曰殷内史挚见纣之愈乱迷惑也於是载其图法归之周此与夏癸之世太史令终古出奔商费伯昌出奔商者如同一辙即是推之奔周奚止一辛甲一内史挚哉】

遵彼汝坟【汉书注尔雅注丰氏本俱作瀆按尔雅江有沱河有澗汝有瀆瀆者汝别也水经注云汝水又东南迳奇雒城西北今南颍川郡治也瀆水出焉世亦谓之大水其下夹水之邑犹流汝阳之名是或瀆?之声相近矣孔颖达云彼瀆从水此坟从土伐薪宜于厓岸大防之上不宜在瀆汝之间】伐其条枚【叶支韵谟悲翻】未见君子怒【韩诗作恚陆德明本作□】如调【说文丰氏本俱作輶韩诗作朝】饥【支韵说文作饥 兴而赋也遵说文云循也汝水名说文云在弘农卢氏水经以为出河南梁县勉乡西天息山至原鹿县南入于淮地理志以为出高陵山酈道元云即猛山也亦言出南阳鲁阳县之大孟山又言出卢氏县还归山博物志云汝出燕泉山并异名也余以方志参差遂令寻其源流今汝水出大孟山黄栢谷岩嶂深高山岫邃密石径崎岖人蹟裁交西即卢氏界也朱子云汝出天息迳蔡颍州入淮尔雅云坟大防李巡云谓崖岸状如坟墓名大防也周礼注云水厓曰坟故楚辞云登大坟以远望则此汝坟谓汝水厓之高土或谓即陶丘乡是也一统志云汝坟城在河南南阳府叶县境内条

小枝也枚干也俱见说文戴侗云条枝之修达者也枚条之抐直者也徐锴云条自枝而出枚自条而出愚按条枚谓条之枚条以况诸侯枚以况诸侯之臣如都大夫邑宰之属时商纣暴虐臣下化之亦相与为暴虐汝旁之民不胜其长吏之苦故欲遵汝坟以伐去其条枚盖寓言也商颂言苞有三蘖曰苞曰蘖亦与言条枚同意君子指文王也怒据尔雅说文兼饥饿忧思二义孔颖达云怒之为训本为思耳但饥之思食意又怒然故又以为饥怒是饥之意非饥之状故舍人云恚而不得之思也调说文云和也人饥饿最难忍思之之切如急欲和解其饥有不能须臾待者盖归心文王之甚如此】

遵彼汝坟伐其条肄【真韵】既见君子不我遐弃【真韵 兴而赋也肆毛传云余也斩而复生曰肆诗诂云栢也孔云左传晋国不恤宗周之阙而夏肆是屏又曰?夏余也是肆为复生之余也伐其条肄谓伐去其条枚之已斩而复生者以时长吏不恤其民前人虽去后人复然故以条肄拟之既者已事之辞遐说文云远也弃说文云捐也言文王不以我所居远于周地而有弃我不恤之意也时盖文王以修职贡之故往来于商汝坟之人得见而喜之如此】 鲋鱼赮【说文作?】尾王室如毁【叶纸韵虎委翻字书薛君章句俱作 列女传作毁下同】虽则如毁父母孔还【纸韵 兴之比又赋也鲋鱼名解见鱼丽篇赮本作?说文云赤色也尔雅云再染谓之赮郭璞以为浅赤也养生经云鱼劳则尾赤人劳则发白张子云谓水浅鱼摇尾多则血流注尾故尾赤也孔颖达云鲋鱼之尾不赤故知劳则尾赤左传如鱼赮尾衡流而方羊裔焉郑氏谓鱼肥则尾赤以喻蒯聩淫纵不同者此自鲋鱼尾本不赤赤故为劳也罗愿云二说虽不同然鱼肥则不耐劳不耐劳则尾易赤以鲋言之其体博大而肥不能运其尾加之以衡流则其劳甚矣宜其尾之赮也盖诗之赮尾以喻周臣下之劳左氏之赮尾则有志大心劳之象说文以鲋为赤尾鱼非是王室指纣毁尔雅说文皆云火也以物入火中即毁坏故言毁也又按齐人谓火曰毁楚人名曰燥吴人曰 此方语各不同如毁言纣政酷烈如火焚物也潘岳赋有云环四海以为鼎跨九垓以为鑪爨以毒燎煽以虐焰如毁之谓也父母亦指文王孔甚也按孔本训通相传训甚者以大通之极则有甚之意也还说文云近也汝旁去周殊远而云孔还者人远而泽近也石介云言王室虽酷烈民不堪其苦文王之化行乎汝坟之国被文王之德厚戴之如父母也诗曰恺悌君子民之父母春秋传曰爱之如父母苏辙云文王三分天下有其二以事纣周德虽广而纣之虐如将焚焉民之被其害者如鱼之劳于水也然而有文王以为之父母可以无久病矣张氏云劳苦之极从而宽之曰王室虽如毁而文王在还有以恤我也玩此诗则民心虽怨乎纣而尚以周之故未至于泮散也是文王以盛德为商之方伯与商室系民心而维宗社者也其德可不谓至乎】

汝坟三章章四句【序谓道化行也文王之化行乎汝坟之国妇人能闵其君子犹勉之以正也朱传从之韩诗则以为辞家也而刘向列女传则云周南之妻周南大夫之妻也大夫受命平治水土过时不来妻恐其懈于王事盖与其隣人陈素所与大夫言国家多难惟勉强之无有谴怒遗父母忧昔舜耕于历山渔于雷泽陶于河滨非舜之事而舜为之者为养父母也家贫亲老不择官而事亲操井臼不择妻而娶故父母在当与时小同无亏大义不罹患害而已夫凤凰不罹于蔚罗麒麟不入于陷穽蛟龙不及于枯泽鸟兽之智犹知避害而况于人乎生於乱世不得道理而迫于暴虐不得行义然而仕者为父母在故也乃作诗曰鲋鱼赮尾王室如毁虽则如毁父母孔还盖不得已也君子于是知周南之妻而能匡夫也薛君章句亦云鲋鱼劳则尾赤君子之劳苦则颜色变以王室政教如烈火矣犹触冒而仕者以父母甚追近饥

寒之忧为此禄仕後汉周磐诵诗至汝坟之卒章慨然而叹乃解韦带就孝廉之举诸说虽不同总之皆以为妇人诗耳细玩诗词终觉蒙绕不象且於父母孔迹一句尤自难通今但以君子父母皆属文王则前後文义畅然明白不劳辞费况是诗本载周南中其为文王而作复何疑乎】

鱼丽万物盛多能备礼也【出序】文王暮年三分有二国家富极之时无事而饮酒则歌此诗【出方回续古今考 饮宾客而赋多鱼当是据沼上所见竹书纪文王四十年作灵台而囿沼亦同时并作故其诗曰王在灵沼於物鱼跃孟子曰文王以民力为台为沼而民欢乐之乐其有麋鹿鱼鳖而楚语伍举曰先王之为台榭也官寮之暇於是乎临之意鱼丽之诗其即作於此时与又按颂潜之诗曰猗猗漆沮潜有多鱼有鱣有鲔有鰪有鰌此诗言鰪鰌与彼同而不及鱣鲔者鱣鲔大鱼惟漆沮大水有之非寡妇之笱所能容可知此诗为灵沼咏不为漆沮咏也仪礼乡饮酒及燕礼於笙入奏南陔白华华黍之後间歌此诗而笙由庚间者代也言一歌一吹也朱子本此故以为燕飧通用之乐歌】

鱼丽于罍【有韵朱子云罍酒鲨多隔句协韵後仿此】鰪鲨【叶歌韵桑何翻】君子有酒【有韵】旨且多【歌韵 兴也鱼以兴宾客丽毛传云历也按易云离丽也此丽当即是离义如小过卦飞鸟离之之离罍说文云曲梁寡妇之笱鱼所留也从网留留亦声尔雅云凡曲者为罍又云嫠妇之笱谓之罍按曲蚕薄也通作簿所以养蚕器郭璞云凡以薄取鱼者名为罍孔颖达云以簿为鱼笱其功易故号之寡妇笱耳非寡妇所作也一说诗诂云罍乃曲梁之笱非曲梁也古者獮祭鱼然後虞人入泽梁川泽之利不使人得专之惟寡妇家上所矜闵使得织曲薄絶水为梁以笱承之以时得鱼若遗秉滞穗之意黄震云王雪山谓後世有鱼丽之阵阵凡五每阵又各有五敌入其中者无有不着然则罍者曲薄也虽不尽与阵法相似而曲薄周匝鱼之入其中者亦无得而脱也为鱼丽之阵其殆取鱼丽之诗之义乎冯时可云此以兴主人礼意绸缪曲折不疎薄也鰪鲨鰪鰌鰪皆鱼名孙鑛云两字承四字句法同九罍鰪鱼之大者说文毛传皆以为扬也孔云徐州人谓之扬陆佃云今黄鰪鱼是也性浮而善飞跃故曰扬一名黄扬旧说其胆春夏近下秋冬近上陆玠云似燕头鱼身形厚而长大颊骨正黄鱼之大而有力解飞者今江东呼为鰪鱼一名黄颊鱼尾微黄大者长尺七八寸按家语宓子贱仕鲁为单父宰孔子使巫马期往观政焉见 得鱼辄舍之期间焉 者曰鱼之大者名为鰪鰪吾大夫爱之其小者名鰪吾大夫欲长之是以得二者辄舍之以此证鰪为大鱼之名也鲨鱼之小者尔雅以为鮐陆玠云吹沙也似鲫鱼狭而小体圆而有黑点常张口吹沙陆佃云鲨性善沈大如指狭圆而长常沙中行亦与沙中乳子故张衡云悬渊沈之魛鰪也鰪亦魛属俗言魛性沙抱异物志曰吹沙长三寸许背上有刺蜚人罗愿云鲨非特吹沙亦止食细沙其味甚美大者不过二斤然不若小者之佳今人呼为重唇厚特甚有若鼃龟故以为名今江南小谿中每春鲨至甚多土人珍之夏则随水下自是以後时亦有之然亦罕矣春来复来大抵正月辄至鱼之最先至者戴侗云鲨生淡水中者附沙而游噉啜辄吹沙小鱼也海中所产以其皮加沙而得名哆口无鳞胎生其类尤多大者伐之盈舟按鲨不一种有虎头鲨能化虎有蛟鲨似蛟而鼻长皮可饰劒有湖鲨背上有沙炮去髻鬣外皮有丝可作脍莹若银丝皆所谓海鲨非此鲨也準尔雅之文知此鲨乃小鱼耳燕飧之礼卿大夫士皆得与位有大小故以鰪鲨起兴君子指主人旨美也酒味既旨而又多可以遍及与燕之人矣刘公瑾云乐工极道主人

所荐之物如此以见优宾之意朱子云道主人意以答宾如今宴饮致语之类旧说不达兴意直以鱼为燕飧所荐之羞且云古人以鱼为重又云北方牛羊多而鱼少故举其贵者言之其迂鄙可笑有如此者】鱼丽于罍魴鰈【叶纸韵读如履两几翻】君子有酒多且旨【纸韵兴也魴鰈皆鱼之美者陆佃云魴一名魴比今之青鳊也郊居赋曰赤鲤青魴细鳞缩项濶腹盖弱鱼也其广方其厚故一曰魴鱼二曰鳊鱼魴方鳊扁也陆玠云今伊雒济潁魴鱼也广而薄肥恬而少力罗愿云缩头空脊博腹色青白而味美按说苑云魴博而味厚大雅美韩国曰魴鰈甫甫陈风曰岂其食鱼必河之魴里语曰雒鲤伊魴贵于牛羊又曰居就粮梁水魴埤雅亦曰魴出汉水中者尤美常以槎断水用禁人捕谓之槎头鳊是所在之魴皆以美着也鰈本草作蠹毛传郭璞皆云鰈也本草云鰈味甘无毒邢昺云今?鱼也鰈与?音义同戴侗云鱼之挚者鳞墨驳首左右各有窍如七星雌雄相随将子啖食衆鱼罗云鱼圆长而斑点有七点作北斗之象夜则仰首向北而拱焉有自然之礼故从礼胆独甘也故从醴鰈者古人所重今道家忌之以其首戴斗也又指为厌故有天厌鴈地厌犬水厌鰈之说皆禁不食陆佃云今玄鰈是也诸鱼中惟此鱼胆甘可食有舌鳞细有花文一名文鱼与蛇通气旧云鰈是公砺蛇所化至难死犹有蛇性故或谓之鰈也按尔雅云鰈大鰈小者鰈大者名鰈即鰈也小者名鰈一说即鰈也许慎以为鰈舍人以为鰈皆非是陆玠所云似鲤颊狭而厚者乃鰈也鰈既味甘无毒至其胆亦甘可食则其美可知以美鱼兴嘉宾故有取于魴鰈也多且旨者言不徒以其多而已惟其多而皆旨乃为可贵以所享皆贤故以旨言之非旨亦不足以享此嘉宾也】

鱼丽于罍鰋【丰氏本作□】鲤【纸韵】君子有酒旨且有【叶纸韵羽已翻 兴也鰋郭璞云今偃额白鱼也潜确类书云鰋身圆性偃说文以为鮐毛茌孙炎以为鮐皆非是鲤郭璞云今赤鲤鱼也陆佃云鰋鱼黄魴鱼青鰈鱼玄鰋鱼白鲤鱼赤则五色之鱼具备罗愿云今人但谓赤鲤然按之古种类至多崔豹言兖州人谓赤鲤为赤骥青鲤为青马黑鲤为黑驹白鲤为白骐黄鲤为黄骝皆取马之名以其灵仙所乘能飞越江湖故也其种易繁陶朱公养鱼所以养鲤者鲤不相食易长故鱼丽美万物盛多终之以鲤盛之极也陆佃云一章曰鰋鰋长鱼也二章曰魴鰈鰈鱼圆魴鱼方言其鱼一方一圆三章曰鰋鲤鰋鱼偃鲤鱼俯言其鱼一偃一俯愚按此章所以取鰋鲤者正是取一偃一俯为义以酒酣之後宾既醉止有若偃若俯之象故寄兴于鰋鲤也又陆佃云鰋鰋之美不若魴鰈魴鰈之美不若鰋鲤故其序如此今鱼品齐鲁之间魴为下色鰋为中色鲤为上色衡门之诗先魴後鲤亦以此故也此与前五色之说皆非确义并存之以资多识耳有曹氏云言用之而愈有也余欢未殫爵 更陈见主人爱客之无已也故以旨且有终焉黄佐云或曰樽酒簋贰可以用飧鱼丽之燕毋乃过于侈乎噫是未知道者也夫养贤所以养天下也故圣王重之燕飧所以致其交也故贤士观之俭岂其所先哉燕之于寝则称之曰宾燕之于庙则躬为献酬礼以食之乐以乐之实以将之犹汲汲然若有所不及也然则损也者其圣人不得已之世乎不然北门夏屋又何以为衰世之风乎】物其多【歌韵】矣维其嘉【叶歌韵居何翻】矣【赋也前三章所言者礼文也後三章所言者礼意也物指殽言多即承首章多字不特酒多而诸殽之物亦多也嘉美也嘉宾之嘉维其嘉美此宾客故备物之多如此】物其旨【纸韵荀子作指】矣维【荀子作唯】其偕【叶纸韵荀起翻】矣【赋也旨即承次章旨字不特酒美而诸殽之物亦美也偕俱也言有恭敬之意与之俱非徒物之旨而已荀子云王者先仁而後礼天施然也聘礼志曰币厚则伤德财侈则殄礼礼云礼云玉帛云乎哉诗曰物其指矣唯其偕矣不时宜不敬交不驩欣虽指非礼也指通作旨】物其有【叶纸韵】矣维其时【叶纸韵上纸翻】矣【赋也有即承上章有字

不特酒有而不竭穀亦有而不竭也时谓可以燕飧之时荀子注云虽有物亦须得其时苏辙云古之仁人交万物有道取之有时用之有节则草木鸟兽蕃殖无有求而不得君子於是及其间暇而为酒醴以燕乐之吕祖谦云所谓时者不专为用之之时也苟非国家闲暇内外无故则物虽盛不能全其乐矣又刘向说苑云天子南面视四星之中知民之缓急急则不赋藉不举力役书曰敬授民时诗曰物其有矣维其时矣物之所以有而不絶以其动之时也此与本序美万物盛多能备礼也意合亦通左传季武子赋鱼丽之卒章杜预注以为喻聘宋得其时】

鱼丽六章三章章四句三章章二句【序云文武以天保以上治内采薇以下治外始於忧勤终於逸乐故美万物盛多可以告於神明矣说者遂谓物之生育最多者莫如鱼如牧人之梦亦以衆维鱼矣为丰年之兆似此说诗皆所谓以辞害意者也按毛诗鱼丽篇次在杕杜後以终鹿鸣之什故晁景迂序论云序驹虞王道成也风其为雅欤序鱼丽可以告神明雅其为颂欤解颐新语亦云文王之风终於驹虞序以为王道成则近于雅矣文武之雅终於鱼丽序以为可告神明则近于颂矣皆沿毛传次第立论以曲合序文非事实也而终於逸乐之说程子及严氏亦皆不取谓开人主怠政之渐邹忠胤亦云治内治外及可告神明等语何关诗旨真衍说也子贡传谓鱼丽所以燕大臣亦未有以见其然申培说谓此诗全篇皆赋则以鱣鲨等鱼即为燕飧所进之羞亦所谓以辞害意固之乎言诗者也】

采苹美邑姜也古者妇人将嫁教于宗庙教成有苹藻之祭武王元妃邑姜教成能修此礼诗人美之【礼记昏义云古者妇人先嫁三月祖庙未毁教于公宫祖庙既毁教于宗室教以妇德妇言妇容妇功教成祭之牲用鱼芼之以苹藻所以成妇顺也注云祖庙未毁言此女犹於此祖有服于君为亲故使女师教之于公宫公宫祖庙也既毁谓无服也则于君为疏故教之于宗子之家白虎通云国君取大夫之妾士之妻老无子者而明于妇道又禄之使教宗室五属之女大夫士皆有宗族自於宗子之室学事人也孔颖达云必先嫁三月教之三月一时天气变女德大成也祖庙女所出之祖也祭无牲牢告事耳非正祭也法度莫大于四教四德既就祭以成之故诗人举以言焉胡嘉云教成之祭考之於礼与诗甚合芼用苹藻此一合也礼正祭在奥西南隅而此在牖下孔氏以为外成之义据昏礼纳采以至请期主人皆筵于户西西上右几是其礼皆户外设此二合也不言妇而言女女又言季孔氏谓将嫁故以少言之以女尸祭郑氏所谓成其妇礼也此三合也愚所以知为美邑姜诗者以有齐季女之语知之罗泌云齐伯陵之故国以天齐渊名伯益书炎帝生器器生伯陵周语谓天鼋之分我之皇妣大姜之侄伯陵之後逢公之所凭神伯陵太姜之祖逢公伯陵之後为商侯伯封于齐地而太公其继焉者也左传晏子云昔?鸠氏始居此地季荝因之有逢伯陵因之蒲姑氏因之而後太公因之按太公本齐後仍封于齐当武王为西伯时以女邑姜妻武王计其时太公年已老则邑姜之为季女夫复何疑又左襄二十八年公过郑郑伯不在伯有廷劳于黄崖不敬穆叔曰伯有无戾于郑郑必有大咎敬民之主也而弃之何以承守郑人不讨必受其辜济泽之阿行潦之苹藻寘诸宗室季兰尸之敬也敬可弃乎所谓季兰意即邑姜之名不可知而其言济泽之阿则尤齐地之证据旧说相传皆读齐为斋误矣时武王未为天子太公尚为周大夫虽未封齐而以其系出伯陵之後故得仍以故国称不然二南之诗其累累为太妣咏者不一而足至如太姜太任亦再见于大雅之赞诵以邑姜开国圣配独无一诗及之乎皇王大纪云西伯纳

吕尚之女曰邑姜为妃邑姜贤立未尝倚坐未尝倨怒未尝厉是年生子诵金履祥云自史记世家称吕尚穷困年老後世遂有太公八十归周之说观其以邑姜妻武王则八十之说殆或不然又射义云卿大夫以采苹为节乐循法也取义之意以季女乃卿大夫之女既教之以四德而後使之尸祭总之欲其能事人是之谓循法耳】

于以采苹【真韵】南涧之滨【真韵】于以采藻【皓韵说文尔雅疏俱作藻】于彼行潦【皓韵 赋也尔雅云萍薢其大者苹严粲云今考本草水萍有三种其大者曰苹叶圆濶寸许季春始生可糝蒸以为茹其中者曰苳菜其小者曰水上浮萍江东谓之藻毛氏以苹为大萍是也郭璞以苹为今水上浮萍即江东谓之藻是以小萍为大萍误矣苹可茹而藻不可茹岂有不可茹之藻而乃用之以祭祀乎今藻止可养鱼项氏云柳恽所谓江洲采白苹者水生而似萍者也宋玉所谓起于青苹之末者陆生而似莎者也月令通考云苹叶下有一点如水沫一名苳菜陆佃云吕览曰菜之美者崑仑之苹高诱谓苹大萍水藻也据此苹即所谓藻水深絜处乃有故曰于以采苹南涧之滨也南郝敬云南山也涧说文云山夹水也滨本作濒说文云水厓也藻毛传云聚藻也按尔雅云苳牛藻疏引诗于以采藻左传苹蘩蕓藻之菜以此^廿好聚生故言蕓藻蕓训聚也江东亦呼马藻陆玕云藻水^廿也生水底有二种其一种叶如鸡苏茎大如箸长四五尺其一种茎大如钗股叶如蓬蒿谓之聚藻又扶风人谓之藻聚为发声也此二藻皆可食煮熟按去腥气采而糝蒸为茹嘉美扬州饥荒可以当谷食也陆佃云藻水^廿之有文者生乎水下而不能出水之上其字从澡言自絜如藻也书曰藻火粉米藻取其清火取其明也又云韩诗曰沈者曰苹浮者曰藻盖藻萍类也似槐叶而连生生道旁浅水中与萍襍至秋则紫今俗谓之马藻亦呼紫藻故曰于以采藻于彼行潦淮南子容华生蘩蘩生萍藻萍藻生浮草谓是欵盖非蒲藻之藻萍藻之藻浮蒲藻之藻沉郭璞注三苍亦云蕓藻之类则明非蕓藻也藻出乎水之上苹出乎水之下故大夫采之愚按韩诗虽言苹沉藻浮然萍藻之藻恐不可食当依尔雅毛传为蕓藻也行流也潦说文云雨水也罗愿云藻于流水之中随波衍漾茎叶条畅尤为可喜故采藻于行潦又郝云行路也潦积水也古者井田路在井上其傍沟洫积水古人五祀祭井亦谓之祭行也孔颖达云南涧言滨行潦言彼互言也又云苹之言宾宾服也欲使妇人柔顺服从藻之言澡澡浴也欲使妇人自洁清故取名以为戒左传女贄不过榛栗枣修以告言取早起战栗修治法度敬之义也则此亦取名为戒明矣又昏义注云鱼苹藻皆水物阴类者义得两通陆佃云鱼亦柔巽隐伏故此三者昏礼以成妇顺】于以盛【音成】之维筐【丰氏本作匡】及筥【叶麋韵读如矩果羽翻】于以湘【韩诗作觶】之维绮及釜【麋韵 赋也受物曰盛盛之湘之奠之皆谓苹藻也筐筥皆竹器筐说文本作匡徐锴云受物之器象形正三方也筥说文云箱也陈祥道云宋魏之间谓箸筥为笱则其制圆而长矣或作^一方言云江沔之间谓之簠南楚谓之簠自关而西秦晋之间谓之算亦作簠月令具曲植簠簠是也湘之训烹似无其义韩诗作觶说文本作^口汉志觶享上帝史记武纪禹铸九鼎皆尝觶烹顔师古云觶烹一也古人音同者字得通用许慎云江淮之间谓釜曰錡陆德明云三足釜也毛传云无足曰釜古作觶郑玄云烹苹藻者于鱼涪之中是錡羹之芼又云鱼为俎实苹藻为羹菜按涪汁也錡盛和羹器凡肉味之有菜和者则为錡盛之故谓之錡羹芼者用菜襍肉为羹之名先将苹藻烹于鱼汁之中始盛之錡器所谓芼以苹藻者也】于以奠之宗室牖下【叶麋韵後五翻】谁其尸之有齐【如字】季女【叶麋韵读如弩暖五翻 赋也奠说文云致祭也采而盛盛而湘湘而奠先後之序也蔡汝楠云既采之又盛之

既湘之又奠之即事不倦也胡云自采而盛而湘而奠地以纪之器以别之叙以次之物曲尽人事飭亦似教女以妇道循循可守也宗室大宗之庙也按大宗大夫之始祖盖诸侯自嫡子以外皆为别子别子始为大夫继别子之嫡子世为大夫则立庙以祀之是为宗室若诸侯则祭于都官大夫之别子则但为继祢之小宗不得祀于宗室矣孔颖达云知非宗子之女自祭家庙者若宗子之女自祭家庙何须言于宗室乎牖下郑玄云户牖间之前按古人庙堂南向室在其北东户西牖皆南面孔云以其正祭在奥西南隅不宜继牖言之今此云牖下故为户牖间之前户西牖东去牖近故云牖下所以不于室中者凡昏事皆为于女行礼设几筵于户外取外成之义昏礼纳采主人筵于户西西上右几问名纳吉纳徵请期皆如初是其礼皆户外设几筵也今教成之祭於户外设奠此外成之义尸说文云陈也齐国名太公之先所封国也解见小引下季少也郑玄云祭事主妇设羹教成之祭更使季女者成其妇礼也季女不主鱼鱼俎实男子设之孔云以三月以来教之以法度故为此祭所以教成其妇礼故使季女自设其羹也云鱼俎实男子设之者以特性少牢俎皆男子主之故也陆瑛云诸家以季女为士大夫之妻然已嫁曰妇安得复称女也】

采苹三章章四句【序以为大夫妻能循法度也能循法度则可以承先祖共祭禋矣按此序於经无所发明所谓循法大抵掇拾射义语耳王肃谓此篇所陈皆是大夫妻助夫氏之祭采苹藻以为菹设之于奥奥即牖下孔颖达云按宗室大祭之庙若非教成之祭则大夫之妻自祭夫氏何故云大宗之庙又经典未有以奥为牖下者孙毓以王为长误矣朱传谓南国被文王之化大夫妻能奉祭祀其家人叙其事以美之盖祖述序说子贡传谓内子勤于祭祀国史美之申培说谓内子敬祀诗人赋之邹忠胤阐之云诗不言妇而言季女愚意此内子必初嫁者礼记曾子问云三月而庙见称季妇也择日而祭于祢成妇之义也当其未庙见则犹称女女而尸祭其为庙见之初祭可知按仪礼士昏礼云若舅姑既没则妇入三月乃奠菜席于庙奥东面右几席于北方南面祝盥妇盥于门外妇执笄菜祝帅妇以入祝告称妇之姓曰某氏来妇敢奠嘉菜于皇舅某子妇拜扱插地坐奠菜于几东席上还又拜如初妇降堂取笄菜入祝曰某氏来妇敢告于皇姑某氏奠菜于席如初礼妇出祝阖牖户老醴妇于房中南面如舅姑醴妇之礼按此即所谓于以奠之宗室牖下也昏礼下达自天子至庶人皆然不专为士设耳其说亦近似然终不如昏礼芣用苹藻之说较为有据又晁氏谓齐鲁韩三义皆以此诗为康王时诗今据仪礼乡饮酒乡射燕礼合乐三终周南关雎葛覃卷耳召南鹊巢采芣采芣工告于乐正曰正歌备周礼乐师凡射王以驹虞为节诸侯以狸首为节大夫以采芣为节士以采芣为节周礼仪礼皆周公所作已有此诗则其非康王之诗甚明】

鳧鷖武王为诸侯绎祭五庙礼毕因而享尸之乐【公羊传云绎者何祭之明日也孔颖达云燕尸之礼大夫谓之宾尸即用其祭之日今有司彻是其事也天子诸侯则谓之绎以祭之明日春秋宣八年书辛巳有事于大庙壬午犹绎是谓在明日也尔雅云绎又祭也周曰绎商曰彤夏曰复昨何休云礼继昨日事但不灌地降神尔天子诸侯曰绎大夫曰宾尸士曰宴尸去事之杀也必绎者尸属昨日配先祖食不忍辄忘故因以复祭邢昺云绎祭之礼主为宾事此尸但天子诸侯礼大异日为之别为立名谓之为绎言其寻绎昨日卿大夫礼小同日为之不别立名直指其事谓之宾尸耳又祭之名三代各异详见烈祖篇小引下家语云卫庄公改旧制变宗庙高子宰问於孔子曰周礼绎祭于祊祊在庙门之西今卫君更之如之何孔子曰绎

之於库门内祔之于东方失之矣陈祥道云祔其位也绎其祭也宾尸其事也郑氏以卿大夫宾尸在堂故谓祔於门外之西室绎又於其堂孔颖达申之云求神在室接尸在堂於义或然别见楚茨篇所以知为祭五庙者以此诗言公尸凡五知之如谓辞烦而不杀何必至五且何以竟止于五乎王制云诸侯五庙二昭二穆与太祖之庙而五祭法云诸侯五庙曰考庙曰王考庙曰皇考庙皆月祭之显考庙祖考庙享尝乃止疏云曰考庙者父庙考成也谓父有成德之美也曰王考者祖庙王君也祖尊于父故加君名曰皇考庙者曾祖也皇大也君也曾祖转尊又加大君之称也曰显考庙者高祖也显明高祖居四庙最上故以高祖目之曰祖考庙者太祖也祖始也此庙为王家之始故云祖考也天子月祭五诸侯卑故惟得月祭三也太祖为不迁而与高祖并不得月祭止预四时也今按此诗言鳧鷖在泾泾为水名而其後沙渚潋澶皆非水名乃蒙乎泾之辞泾水居中有太祖之象沙渚皆在水旁有高曾一昭一穆之象潋澶居泾水下流又为祖考在高曾下一昭一穆之象其为诸侯之五庙明矣尸称公尸亦周家未为天子时之称然愚初犹意其为文王之诗以祭义引诗云明发不寐有怀二人文王之诗也祭之明日明发不寐飧而致之又从而思之正言绎祭之事後又思诗人凡言景物必据所见文王居岐周而祭宗庙当言岐水或已迁于丰而祭宗庙当言丰水是皆非泾经流之地安得远及泾水乎及观华谷严氏絜之说而意始豁然直断其为武王未有天下时之诗焉严云渭水东流先会丰而後会泾丰水自南而入渭泾水自西北而入渭文王居丰在丰水之西则越丰而後至泾武王居镐在丰水之东则去泾近矣张衡西京赋云欲沔吐镐据渭踞泾见泾水近镐也】

鳧鷖在泾【青韵】公尸来燕来宁【青韵丰氏本作宁】尔酒既清【叶青韵读如青仓经翻】尔殽【丰本作□後同】既馨【青韵】公尸燕饮福禄来成【本庚韵当叶青韵翻未详按说文成从戊丁声丁属青韵则成当有青叶兴而赋也鳧鷖也解见女曰鸡鸣篇易林云鳧舞鼓翼嘉乐克德陆佃云楚辞曰汜汜若水中之鳧盖沈浮善没而又容与与波上下罗愿云今江东有小鳧其多无数俗谓之冠鳧善飞王充论衡曰日月一日一夜行二万六千里与鳧飞相类故王乔以上方所赐舄假形於鳧自叶朝京师焉方言曰野鳧甚小而好没水中者南楚之外谓之鷖鷖毛云鳧属苍颡解诂云鷖也陆佃云鷖一名沔列子曰沔鸟之至者百住而不止今字从鸟後人加之也孔云一名水鷖格物论云鷖鷖鸭也以名自呼大如水鸡生於荷叶之上海物异名记云鷖之别类羣鸣喈喈随潮往来谓之信鳧南越记云水鷖色白数百为羣多在涨海中随潮上下常以三月风至乃还洲屿颇知风云若羣飞至岸必风渡海者以此为候郝敬云鳧善没鷖善浮有变化出没之象以比鬼神愚按郝说是矣礼谓索祭於祔不知神之所在於彼乎於此乎意亦近是然诗之兴义必有所取旧说皆谓兴公尸则公尸只一人耳而以二鸟兴之何居礼夫妇一体昏则同牢合巹终则同穴祭则同几同祝故礼记曰铺筵设同几为依神也疏谓人生时体异故夫妇别几死则魂气同归于此故夫妇同几唐博士陈正节议曰臣闻于礼宗庙父昭子穆皆有配座每室一帝一后礼之正仪自夏殷而来无易兹典陈祥道曰祭祀同几则一尸仪礼男男尸女女尸谓虞祭也又曰按少牢馈食藏岁事于皇祖必以某妃配某氏故同几共牢一尸而俎豆不两陈以其夫妇一体故也然则鳧鷖乃以兴祖考妣非兴公尸也後仿此盖是日先行绎祭之礼而後享尸诗既不言绎祭之事而特寄兴于鳧鷖一语以致其恍忽想像之意此诗笔之幻处又取兴之变体或问鳧鷖兴考妣亦有分属否曰说诗固不必拘拘如此然据本文先言鳧後言鷖则鳧当兴考鷖当兴妣也盖鳧

虽善没尤善飞其飞必于晨说苑魏文侯嗜晨鳧是也周书王会篇鳧羽为旌亦取其能远飞耳鳧虽善浮然不过游戏水上故忘机之人得与之游虽复有时飞而不下要非高飞远举者比也周礼王后五路安车用鳧总所谓总者以繒为之着马勒直两耳与两鑣其色青黑如鳧而名之为安车者盖亦有取于安乐自得若鳧然也今即以鳧旌与鳧总对观之鳧旌男子所执鳧总王后所用则鳧谓兴考鳧谓兴妣可矣或乃大笑泾水名解见械朴篇今按武王都镐则有镐水乃何以不言镐而言泾诗人於此亦有深意玉海载泾水出原州百泉县泾谷东南流至泾州临泾保定二县又东南流至邠州之宜禄新平永寿三县又东北流至京兆之醴泉高陵云阳三县以入渭班固地理志谓泾水行千六百里周之先祖居邠其後再迁至武王而始居镐泾水经流亦从邠界来而迤邐近镐故覩泾水而兴祖功宗德之思焉诗对祖庙而作所以有取于泾也若镐水则其来不远矣公尸解见既醉篇何休云诸侯以大夫为尸此章首公尸乃后稷之尸也燕通作宴安也飧之所以安之也後仿此孔云言公尸来燕则是祭後燕尸非祭时也黄佐云礼祭统曰尸在庙门外则疑于臣在庙中则全乎君为其近于祖也祭之明日不忍辄忘也是故以宾礼燕之也故曰读鳧鳧而益知周人仁义之兼至矣宁通作□说文云安也黄云为尸之时未免有象神之劳而拘束不安今则登筵依几而安矣尔朱子云自歌工而指主人也清孔云洁也穀通作肴广韵云凡非谷而食曰肴馨毛传说文皆云香之远闻也愚按太祖距今远矣远则以气通之故对其尸以清以馨言燕而专言饮者举饮以该食也福洪范所谓五福祿说文亦训为福义似无别愚按福字从畐当是取其与德相副耳孝经援神契云祿者録也徐锴云若言省録之也然则福本於天之所予谓之祿也来者云若随公尸而来也成说文云就也尊尸所以尊神尸安则神悦庶乎以福祿来成就尔矣亦祝辞也闵光德云此绎祭燕尸之乐到此祭事才完备故谓以公尸而燕饮于斯则昔日所降之福祿自今日而成就也易林云鳧鳧游泾君子以宁复德不愆福祿来成按易林所谓复德其即夏人名绎祭为复胙之义乎】鳧鳧在沙【叶支韵山宜翻亦叶歌韵桑荷翻】公尸来燕来宜【支韵亦叶歌韵牛何翻】尔酒既多【歌韵亦叶支韵章移翻】尔殽既嘉【叶歌韵居何翻亦当叶支韵居之翻】公尸燕饮福祿来为【支韵亦叶歌韵吾何翻兴而赋也沙说文云水中散石也孔云水少则沙见故字从水少耳易需卦九二需于沙注谓沙接水者上言在泾此云在沙则在泾水之傍沙也此章公尸以世次推之为古公之父太公之尸也名公祖皇甫谧云公祖一名组绀诸璽字叔类号曰太公太公位次在后稷之傍最近故取沙象宜亦安也顺适之意严云来而宜之谓乐之也多毛云酒品齐多孔云於周礼差之惟大事於太庙备五齐三酒此虽为宗庙之祭其大事与时祭不明但言品齐多耳未必五齐三酒皆具也嘉说文云美也高祖于玄孙相去犹远恐人疑待尸之礼或有濶略故特言多与嘉以表其内尽志而外尽物也为郑云犹助也言有福祿来扶助之也】鳧鳧在渚【语韵】公尸来燕来处【叶语韵敞吕翻】尔酒既湑【语韵艺文类聚作滑】尔殽伊脯【麌韵】公尸燕饮福祿来下【叶麌韵後五翻兴而赋也尔雅云小洲曰渚即渚字释名云渚遮也能遮水使回也此章公尸谓古公之尸也鳧鳧舍水而就渚犹古公去邠而迁岐故以为兴处毛云止也黄云安乐也与蓼萧誉处之处同湑说文云茜酒也郑云酒之沛者也释文云谓以茅沛之而去其糟也脯说文云乾肉也释名云搏也乾燥相搏着也周礼腊人掌乾肉凡祭祀共豆脯苾脯注云薄析曰脯曾祖亲而尊者曰湑曰脯盖质言之不敢文饰对其尸如对曾祖也来下者辅广云自上而下易辞也按周之王瑞自太王兴故直云来下】鳧鳧在淥【东韵】公尸来燕来宗【叶东韵读如?租丛翻】既燕于宗【见上】福祿攸降【叶东韵胡公翻】公尸燕饮福祿来崇【

东韵 兴而赋也濞毛云水会也说文云小水入大水也孔云濞音如丛则丛是聚义且字从水衆知是水会聚之处此章公尸谓公季也公季以小宗而继大宗有以小水入大水之象故取兴于在濞宗郑樵云宗庙也来燕来宗言来燕于宗庙也按礼绎祭于庙门之西享尸在堂故云然既燕于宗二句指前三章公尸言不言酒殽者前言已备变文互见之也降说文云下也崇说文云嵬高也朱子云积而高大也后稷太公古公三尸既皆来燕于宗庙宗庙之神已将降下孝孙以福祿矣今王季之尸亦来燕饮则福祿之来於是积而益高也】鳧鷖在臚【音门】公尸来止熏熏【文韵说文作醺醺】旨酒欣欣【文韵亦叶先韵翰旃翻】燔炙芬芬【支韵亦叶先韵孚焉翻】公尸燕饮无有後艰【叶先韵经天翻 兴而赋也臚毛云山絶水也孔云谓山当水路令水势断絶也郑云臚之言门也西汉地理志金城郡有浩臚县注云浩水名也臚者水流峡山间两岸深若门也按说文无臚字不知其所从今姑依旧说解之此章公尸则文王之尸也周自文王始大有水出峡口而流益大之象焉故以在臚为兴不言来燕者蒙上章之文略之也言来止犹之言来处也熏熏当依说文作醺醺谓尸醉也徐锴云饮有酒气熏熏然此两字意连下文旨酒句看以其酒美而可悦故至于醉因摹尸饮酒之喜容曰欣欣也欣说文以为喜笑也燔燔肉炙炙肝芬说文云艸初生其香分布燔炙之气其馨香散布亦似之故曰芬芬也陈祥道云楚茨先言执爨而继之以或燔或炙鳧鷖先言尔殽而终之以燔炙芬芬礼运亦先言熟其殽然後继之以荐其燔炙周礼量人制从献脯醢之数量特性主人献尸宾长以肝从主妇献尸宾长以燔从是燔以肉炙以肝燔炙在血腥燂熟之後非祭之所先也谓之从献非献之正味也愚按前章第言酒殽而已此并表尸之喜乐异于前文者以文王为显考精气尤亲孝子对其尸如见先人然致其喜乐之气以迎之故尸之喜乐有如此也祭义云孝子之祭可知也其立之也敬以出其进之也敬以愉其荐之也敬以欲退而立如将受命已彻而退敬齐之色不絶于面孝子之祭也孝子之有深爱者必有和气有和气者必有愉色有愉色者必有婉容严威俨恪非所以事亲也成人之道也夫观孝子之祀亲如此则其飨尸可知宜其尸之喜悦也无有後艰者闵云谓祭事已成昔之享福者克保其後而永无艰难矣孙鑛云满篇欢宴喜乐而以无有後艰句收可见古人兢兢戒慎意】

鳧鷖五章章六句【序云守成也太平之君子能持盈守成神祇祖考安乐之也此於经义全不相涉郑玄亦知为祭祀既毕明日又设礼而与尸燕之诗而於首章在涇则云水鸟居水中犹人为公尸在宗庙次章在沙则云鸟以居水中为常今出在水旁喻祭四方百物之尸三章在渚则云水中有渚犹平地之有丘喻祭天地之尸四章在濞则云濞水外之高者也有瘞埋之象喻祭社稷山川之尸五章在臚则云臚之为言门也燕七祀之尸於门户之外不敢当燕礼故变言来止陆佃祖述其意而异其说云来成以祖言福祿来为以考言福祿曰既清既馨既多既嘉则以宗庙尚文故也来下以天神言福祿来崇以地示言福祿盖天故自上来下地故自卑来崇亦其天道主贵高地事主富崇故也其卒章则又总上四章之词故曰公尸燕饮无有後艰无有後艰者道也盖道之至可以佑神非有资于物也孰能福祿之哉故於福祿为不足道也郝敬又异其说谓首章鳧鷖在涇动而浮象天神之尸也天主气故曰清曰馨天生故曰成二章在沙静而宿象地祇之尸也地主形故曰多曰嘉地作故曰为三章在渚渚小丘象山山川社稷之尸也主蓄储故曰湑脯礼卑天地故曰下四章在濞衆也象羣主几庙之尸也故曰宗烝尝备礼故不言酒殽上祀礼尊故曰崇五章在臚门也凡绎皆于门每岁春夏门户有专祭是五祀之尸也小祀尚饮食故曰欣曰芬礼尤卑故曰後不言福祿天子之福祿非尸

竈門行所得司也无艰而已以上三说皆穿凿附会絶无稽据坐繇求所以五章之故而不得其说耳夫既谓周得祀天地则俨然天子矣而尸尚称公尸何与若宗庙之称公尸则谓自组紃以上第祀以天子之礼而不追王服尸以先公之服则其称公尸焉宜也严谓五章皆言公尸又四章言既燕于宗皆祭宗庙是也然此章言公尸尚是诸侯之尸与既醉公尸不同朱传亦以为此祭之明日绎而宾尸之乐其言绎得之但复称宾尸则与大夫之礼混耳申培说稍变其文谓祭之明日绎公尸之乐夫绎乃祭名而谓之绎公尸亦属未妥若子贡传亦以此为训成王之诗尤为无当】

诗经世本古义卷八

卷九

<经部,诗类,诗经世本古义>

钦定四库全书

诗经世本古义卷九

明 何楷 撰

周武王之世诗十三篇

鱼藻武王克商饮至也【按大雅云考卜维王宅是镐京维龟正之武王成之经有王在在镐之文此以知其为武王也礼君行反必告庙告庙则饮至经有岂乐饮酒之文此以知其为饮至也详味诗意是克商时所作】

鱼在在藻【皓韵】有颁其首【有韵】王在在镐【皓韵】岂【陆德明本作恺】乐【音络後同】饮酒【有韵隔句各韵藻镐相叶首酒相叶兴也两言在字者作诗者自为详审之辞言鱼河在乎在於藻也王在在镐放此鱼兴王藻兴镐藻解见采苹篇颁说文云大头也刘彝云鱼出游水面则露其首故见其头大也愚按游藻之鱼当自不一其中有首大而特出者故举以兴王耳王武王也镐地名在长安西上林苑中丰东二十五里武王所都也详见文王有声篇岂说文云还师振旅乐也周礼作恺後汉志黄帝使岐伯劝战士作军乐即周恺乐汉短箫铙歌乐有朱鹭等二十二曲是其遗也魏晋而下各易其名周礼大司乐职云王师大献令奏恺乐乐师职云凡军大献教恺歌遂倡之胙了职云宾射奏钟鼓鼈恺献亦如之罇师职云军大献则鼓其恺乐大司马职云师有功则左执律右秉钺以先恺乐献于社注谓兵乐曰恺献者献捷也鼓恺乐以晋鼓鼓之律所以听军声钺所以为将威郑志答赵商问云司马以军之功故献于社大司乐宗伯之属宗伯主宗庙之乐故献于祖又文选注引乐稽耀嘉云武王兴师诛商万国咸喜前歌後舞此恺乐之所繇昉也左传城濮之战晋文公振旅岂以入于晋献俘授馘饮至大赏事亦同此司马法云天下既平天子大恺又云得意则恺乐恺歌示喜也岂乐者奏岂而乐也饮酒即饮至也先儒谓饮至在庙以桓二年公至自唐左传云告于庙也凡公行告于宗庙反行饮至舍爵策勲焉礼也彼饮至在庙故知饮于庙也孔穎达云曾子问曰凡告用制币反亦如之则出入皆以币告也但出则告而遂行反则告讫又饮至以见至有饮而行无饮也饮至者嘉其行至故因在庙中饮酒为乐也】

鱼在在藻【皓韵】有莘其尾【韵】王在在镐【皓韵】饮酒乐岂【尾韵 赋也莘毛传训为长貌今按说文无莘字不知其义据国语以駉駉征夫作莘莘征夫则莘当通作駉说文云马衆多貌以鱼之衆多似之故借言駉上章言有颁其首盖以兴王此言有莘其尾则以兴行间诸臣之从王者今奏恺班师皆得与于饮至之列观下文变言饮酒乐岂可见数鱼以尾故指尾言乐岂言与诸臣共乐此岂也】鱼在在藻【皓韵】依于其蒲【虞韵】王在在镐【皓韵】有那其居【叶虞韵读如拘恭于翻兴也此章言封建事也左传言礼饮至之後舍爵

策勲舍者置也古者军赏不踰时欲民速得为善之利也饮至礼毕置爵之时即书勲劳于策言速纪有功也武王胜殷下车即行封建意亦如此蒲解见泽陂篇名物解云蒲生于春盛于夏愚按周书武王来自伐商至丰祀庙在夏正二月望後正藻蒲方生之时故诗人因以起兴藻生於水中横陈水上为镐京之况则蒲生于水涯乃缘边所有即六服羣辟之况也那字从邑说文训西夷国名郑笺训为安貌殊不可解陆云丞相谏有玠裘阿那之句解者以阿那为垂也训那以垂较为近之盖那字右旁施冉又古文那聃冉皆通用冉乃细毛下垂之貌而垂字之解亦远边之义正如毛髮之丽于肤体者然王所居在镐京而于九畿之内封建六服羣辟环拱而拥卫之所谓有那其居也周礼言九畿尚书言六服九畿方千里曰国畿其外方五百里曰侯畿又其外方五百里曰甸畿又其外方五百里曰男畿又其外方五百里曰采畿又其外方五百里曰卫畿又其外方五百里曰蛮畿又其外方五百里曰镇畿又其外方五百里曰蕃畿六服谓国侯甸男采卫不及蛮镇蕃者王者之於夷狄羈縻而已不可同于华夏故惟云六服也此诗先言王因岂乐而饮酒故取兴于有颁其首为首出庶物之义次言王以饮酒与羣臣共乐岂故取兴于有莘其尾犹楚辞鱼鳞鳞兮媵予之意末言王封建而有那其居故取兴鱼依于蒲鱼虽以藻为乐而所据必在于蒲鱼之潜于蒲犹鸟之集于菀蒲者鱼所以藏身之固也亦以策勲在饮至後故立言之序如此又大戴礼用兵篇云公问于孔子曰古之戎兵何世安起子曰伤害之世久矣与民偕生公曰蚩尤作兵与子曰否蚩尤庶人之贪者也及利无义不顾厥亲以丧厥身蚩尤愾欲而无厌者也何器之能作蜂蛰挟螫而生见害而较以卫厥身者也人生有喜怒故兵之作与民偕生圣人利用而弥之乱人兴之丧厥身诗云鱼在在藻厥志在饵鲜民之生矣不如死之久矣较德不塞嗣武孙武子诗意谓鱼性惟食藻不宜贪饵鱼志在饵此贪人之土地而妄用兵者使民困于兵革无生之乐若此较争之事不速遏絶则子孙继而效之将无所底极也据逸诗意反观则此但言鱼在在藻亦见武王非富天下之意】

鱼藻三章章四句【序云刺幽王也言万物失其性王居镐京将不能以自乐故君子思古之武王焉宗序说者其解有二一谓鱼之依水草犹人之依明王也有颁其首者言鱼乐而出游于藻之外有莘其尾者言鱼乐复乐而又戏于藻之内依于其蒲者言鱼乐于蒲安于蒲盖乐而不知反则乐有穷故有静而止息之地则时出而乐有余矣正言鱼者以潜逃之类信其着见毛传郑笺陆氏埤雅罗氏尔雅翼解皆如此意主思武王也一谓水深则鱼乐所谓跃渊纵壑相忘于江湖者也今鱼何在乎浅水生藻而鱼在焉露其颁然之大首复惊逝而露其莘然之长尾盖在浅水之处故逃窜窘迫首尾俱见也然藻犹在水之中若蒲生近岸则水又浅矣依于其蒲愈更窘促也严氏诗缉之解如此意主刺幽王也愚所以不取其说者以鱼在在藻王在在镐两句炤映甚明鱼兴王藻兴镐若如前二说则以鱼训民反于王之外别生兴意于诗吻不肖矣又苏氏传云鱼何在在藻耳其所依者至薄也然其首颁然而大自以为安不知人得而取之也今王亦在镐耳寡恩无助天下将有图之者而饮酒自乐恬于危亡之祸亦如是鱼也如此以鱼兴王亦顺但篇中有岂乐之语明是因奏岂而作抑亦幽王之世有大閱之事而作此诗与按克捷还师之乐名岂大閱振旅之乐亦名岂左传云春蒐夏苗秋獮冬狩皆于农隙以讲事也三年而治兵入而振旅归而饮至以数军实昭文章明贵贱辨等列顺少长习威仪也依此说则次章有莘其尾当通作駢赤色也鱼劳则尾赤置首言尾者兴饮酒沈湎之容易所谓饮酒濡首亦不知节也三章依于其蒲兴有那其君言饮酒毕而归休于深宫也

惟玩诗词有盛世发扬之象非衰世愁叹之音故定从今说若子贡传谓诸侯所以报天子申培说及朱子集传皆谓诸侯所以美天子而皆未明於岂乐之义则所以报王美王者亦仅述其饮酒之乐而已不似谐媚之称万年觴者乎乃唐诗有云镐饮周文乐又云欲笑周文歌燕镐则以此诗为文王诗岂知文王未尝称王亦未尝都镐抑失之远矣】

縣周公追述大王始迁岐周以开王业而文王因之以受天命也【出朱传 序亦云文王之兴本繇大王也孔穎达云叙以诗为文王而作故先言文王之兴而又追而本之各自为势故文倒也愚按所以疑此诗为周公作者以书载周公告君奭之言曰惟文王尚克修和我有夏亦惟有若虢叔有若閼夭有若散宜生有若泰颠有若南宫适与此诗末章四子曰语意颇相类而太史公亦云天下称颂周公言其能论歌文武之德达太王王季之思虑但朱子以为戒成王则未必然耳孙鑛云此诗不但称古公且仍出其名乃後又称文王岂武王初克商甫尊文王尚未追王大王是彼时作耶又云武成已称大王若周公戒成王诗岂应复称古公耶】

縣縣瓜瓞【屑韵】民之初生自土【汉书齐诗作杜】沮漆【质韵亦叶屑韵于结翻水经注作漆沮】古公亶父【陆德明本作甫】陶复【说文丰氏本俱作 陶穴【叶质韵户橘翻】未有家室【质韵 比也縣说文云联微也縣縣孔云微细之辞毛传云不絶貌瓜瓞也字象形中象瓜实外象瓜蔓瓞是瓜之小者孔以为瓜蔓近本之瓜是也按尔雅云瓞瓞其绍瓞旧解多不明说文瓞作瓞云小瓜名也尔雅又云瓞九叶绍者继也瓜有小大二种大者名瓜小者名瓞瓞之种本非瓞以其小似之故云瓞瓞也凡瓜实近本则小瓞实大瓜之种特以近本故小因别呼之为瓞故云其绍瓞也縣縣瓜瓞主大王与文王相首尾而言立乎文王以指大王正如瓜之有瓞然其後连縣不断皆本于此至文王之世则俨然大瓜矣朱子云瓜之近本初生者常小其蔓不絶至末而後大以比古公之时其国甚小至文王而後大也民毛云周民也初生言始有生意也周自后稷始基靖民以为生民之初其後居邠困于狄难生意槁矣至于大王自邠迁岐而民如槁得苏是人一初也邠通作豳自朱子云从也土当依汉书作杜水名班固地理志云古扶风杜阳县有杜水南入渭酈道元水经注云杜水出杜阳山其水南流谓之杜阳川东南流左会漆水何景明雍大记云杜水在麟游县源出旧普润县东南沮漆与禹贡及吉日潛篇之漆沮不同沮水诸家以为未详季本疑为大栾水非是按大栾水乃岐水之别名康海武功志云浴水乾州西夹道水也亦从豳西梁山来意此或即沮水关西人读浴若于于沮固易讹尔按志浴水南入漆水山海经云嶓次之山漆水出焉北流注于渭桑钦水经云漆水出扶风杜阳县俞山东北入于渭阡駟十三州志云漆水出漆县西北岐山东入渭按杜阳即今陕西凤翔府麟游县古岐周地漆县即今陕西西安府永寿县古豳国酈道元云今有水出杜阳县岐山北漆谿谓之漆岐故徐广曰漆水出杜阳之岐山者是也但川土奇异今说互出考之经史各有所据识浅见浮无以辨之矣漆渠水南流大栾水注之即岐水也二川洋逝俱为一水南与杜水合浴谓之小黄水亦或名之米流川南迤美阳县西南流注于渭雍大记云漆水在武功县东门外康海云漆水今谬为武水者也自豳岐之间来武功县北受浴水南受漳水入渭郑渔仲序地理略谓天下如指诸掌而信漆繇富平入渭之说盖括地志未审豳岐泾渭脉络所在富平在泾东漆在泾西安有岐梁之水越泾而东再至富平始入渭也渔仲误且如此况其余乎诗曰自土沮漆今郃封里有漆村是也按武功古有郃国今隶西安府乾州美阳今凤翔府扶风县严粲云扶风之漆水至岐山入渭在泂之上游而书言

渭水会泂会泾之後乃过漆沮则漆沮在泂水泾水之下游故以书之漆沮与诗扶风之漆别也季本云雍州之域有二漆沮而皆入渭其一在汉冯翊之地泾之下游也其一在汉扶风之地泂之上游也禹贡导渭东过漆沮则冯翊之漆沮也意者扶风漆沮小而可略而冯翊漆沮大而详欤冯翊之漆沮即潜猗欤漆沮者是也扶风之漆沮即繇自土沮漆者是也何以别其如此耶盖不窋之徙居戎翟也在今庆阳府公刘自不窋故地而迁豳在今邠州淳化县西废三泉县界当泾水之西其道甚便而沮在泾之东漆又在沮之东俱隔大山公刘初迁必不至冯翊之漆沮也自土沮漆言大王始避狄难来居杜与沮漆之地盖去邠踰梁山後事三水皆在岐梁间于时尚未至岐下故未定周原之居旧说以此句为指豳言非也毛云古言久也亶父字或殷以名言质也父通作甫说文云男子美称也孔云谓之古公言其年世久古後世称前世曰古公犹云先王先公也太王追号为王不称王而称公者此本其生时之事故言生存之称也土冠礼为冠者制字云伯某甫亶亦称父故知字也以周制论之甫必是字但时当殷代质文不同故或以亶父为名名终当讳而得言之者以其时质故也又中候注云亶父以字为号愚按父有制名者春秋齐侯禄父季孙行父是也殷或尚质但诗作周世不应名其先王陶本作甸说文云瓦器也盖瓠鬯之属复当依说文作 云地室也穴说文云土室也今按地室土室有何分别愚意地乃地上土则土中耳贾公彦云古者窟居随地而造若平地则不凿但累土为之谓之复言于地上重复为之也若高地则凿为坎谓之穴也曰陶复陶穴者复穴虽皆土所为而以瓠鬯之类甃之欲其坚固亦所以隔土气防土处之病也王质云陶今之土壑也以陶为盖于其上谓之复以陶为基于其下谓之穴此言以土壑为居也尔雅宫谓之室其内谓之室未有家室与第五章俾立室家相炤季本云大王自豳迁岐踰梁山而始至岐山梁山在今西安府乾州城西北五里当豳之西南太王初至於此时尚未有室家也故陶复陶穴而先於杜漆沮三水之间野处焉当其在豳则公刘时先已有馆况至太王时在豳既久岂得复言陶复陶穴哉但其地水源所出俱在岐周之北扶风之地非豳也顔师古谓自土沮漆齐诗作自杜公刘避地而来居杜与漆沮之地其谓杜与漆沮为三水则是而曰公刘来居盖本郑玄之说则失之矣愚按太王所以不兴土木为营建室家计但陶复陶穴而已者亦以卜居未定姑取其便于人力之速成耳】古公亶父【麌韵】来朝【丰本作鼂】走【顾野王本作趣丰本作趋】马【叶麌韵满补翻】率西水浒【麌韵】至于岐【丰本作?】下【叶麌韵後五翻】爰及姜女聿来胥【新序作斯】宇【麌韵 赋也季云来者自土沮漆而来也朝早也严云太王图事敏疾其来之朝疾走其马吕祖谦云形容其初迁之时略地相宅精神风采也范景文云观其匹马经度计不反顾惟有德足以自恃故往而不疑耳率通作卫字从行故有循行之义浒本作许说文云水厓也循西方之水涯指渭水也杜水沮水合漆水流入于渭雍録云邠在岐西北二百五十里自邠而南一百三十里为奉天县有梁山即所谓踰梁山也渭水在梁山之南循水西上可以达岐诗所谓率西水浒至于岐下也奉天今西安府之乾州又史记云太王居豳渡漆沮世纪亦云太王避狄循漆水并存之一统志云岐山在凤翔府岐山县东北十里山有两岐故名亦曰天柱山其峰高峻状若柱然禹贡导汧及岐大王邑于岐山之下文王时凤鸣岐山皆此也俗名凤皇堆河图括地象云岐山在崑仑东南为地乳上为天廔星季云岐周在后稷邠城西八十里间盖复其旧封地也按古公亶父复修后稷公刘之业积德行义国人皆戴之薰育戎狄攻之事之以皮币珠玉犬马皆不得免焉乃召耆老而问曰狄人何欲耆老对曰欲得菽粟财货亶父曰与之已复攻欲得地民皆怒欲战亶父曰有民立君将以利之今戎狄所为攻战其所欲者吾土地也民欲以我故战与人之

兄居而杀其弟与人之父居而杀其子吾不忍也请免吾乎为吾臣与狄人臣奚以异也吾闻之也君子不以其所养人者害人我将去之耆老曰君不为社稷乎曰社稷所以为民者不可以所为民亡民也耆老曰君纵不为社稷不为宗庙乎曰宗庙吾私也不可以私害民遂杖策而去踰梁山止于岐下其事襍见孟子史记庄子吕氏春秋书传略说而互有出入今并综而録之于此孟子云昔者大王居邠狄人侵之去之岐山之下居焉非择而取之不得已也苟为善後世子孙必有王者矣君子创业垂统为可继也若夫成功则天也孔云公刘遭夏人之乱而被迫逐若顾恋疆宇或至灭亡所以避诸夏而入戎狄也大王为狄人所攻必求土地不得其地攻将不止战以求胜则人多杀伤故又弃戎狄而适岐阳所以成三分之业建七百之基王制称古者量地制邑故无旷土而公刘大王得择地而迁又无天子之命诸侯得举国擅徙者王制所云平世大法法不恒定世有盛衰王政既乱威不肃下迫逐良善无所控告戎狄内侵莫之抗御故不待天子之命可以权宜避之以其政乱故有空土公刘太王得择地而迁焉既往迁之人居成国後有明主因而听之也按夏衰弃稷弗务不窋失官自窜于戎翟之间厥孙公刘始迁居邠世本所载历十二传始至亶父竹书商纪祖乙十五年命邠侯高圉盘庚十九年命邠侯亚圉祖甲十三年西戎来宾命邠侯祖緄至武乙三年命周公亶父赐以岐邑谓斯时也先是但称邠侯今则进而称公此其所以号古公与国名既改王业没昌谓之肇基王迹宜矣爰说文云引也谓引辞也及尔雅云与也姜女太王妃也号曰大姜韦昭云有逢伯陵之後也皇王大纪云亶父娶于齐有台氏女曰大姜美而贤列女传有台作有吕云太姜者有吕氏之女太王娶以为妃生太伯仲雍王季贞顺率道靡有过失太王谋事迁徙必与太姜太姜渊智非常虽太王之贤圣亦与之谋新序云大王爱厥妃出入必与之偕季云但言及姜女者未敢期幽民之必从已也陆化熙云爰及姜女不止是与妃同行还重在资其谋议此章点内助与末章推功四反俱是开创大关系须知作者用意之密聿通作吹词也来与来朝走马之来相应古公先来而邠人後来也胥尔雅云皆也方言云东齐谓皆曰胥按胥疏皆者以胥疏同音疏之为言通也通之为言皆也韩诗云屋溜为宇言民见古公止于岐下相率而来皆将於此而建屋宇也孟子谓太王至于岐山之下居焉邠人曰仁人也不可失也从之者如归市书传谓太王邑岐山周人束修奔而从之者二千乘一止而成三千户之邑史记谓幽人举国扶老携弱尽复归古公于岐下及他旁国闻古公仁亦多归之皆所谓聿来胥宇者也刘昼云昔大王居邠而人随之仁爱有余也夙沙之君而人背之仁爱不足也仁爱附人坚于金石金石可销而人不可离故君者壤地人者卉木也未闻壤肥而卉木不茂君仁而万民不盛矣孟子引此诗以告齐宣王而解之曰当是时也内无怨女外无旷夫正聿来胥宇义疏而旧说但以为与姜女来相视所居谬矣然此胥宇亦第民情决计奠居于此尚未及筑室之事张子厚云书称大王肇基王迹盖见得民心之始也方其去邠民皆携持而随之固未尝率之也王迹之始莫大於此盖民归之则天命之矣】周原膠膠【文选注作腍腍】萑茶如飴【支韵】爰始爰谋【叶支韵谋悲翻】爰契【陆本汉书注俱作挈】我龟【支韵】曰止曰时【支韵演繁露作形】筑室于兹【支韵 赋也朱子云周地名罗泌云邠故国黄帝後封在岐山之阳所谓周原膠膠者郑云广平曰原周之原地在岐山之南酈道元云历周原下北则中水乡成周聚故曰有周也周城在岐山之阳而近西所谓居岐之阳也山海经云其上多白金其下多铁皇甫谧云邑於周地始改国为周按今凤翔府岐山县是其地膠本无骨腊之名故朱子训膠膠为肥美貌杨慎谓土膏如无骨肥肉也萑菜名说文云根如荠叶如细柳蒸食之甘尔雅啮苦萑郭璞云今萑葵也叶似柳子如米肉食之滑者一曰黄土子唐本草注云此菜野

生非人所种俗谓之葍菜叶似葍花紫色茎汁味甘而言苦者古人语侧犹甘草谓之大苦也礼祀内则葍苴粉榆即此又公食礼錡苴皆有滑注云滑葍苴之属茶解见谷风篇饴说文云米蘖煎也释文云乾糖也方言云饴谓之?谓之饴礼记疏谓之????按说文云????饴和皼者然则饴非????也严云内则言妇养舅姑公食礼言君待其臣皆以葍则葍是美菜也七月言食农夫以茶则茶非美菜也雨露所濡甘苦齐实周之原地臚臚然肥美所生葍茶皆甘如饴言美恶皆宜也孔氏谓葍即乌头且引晋语骊姬寘酖於酒寘葍於肉以为证盖以此葍为尔雅葍之葍也说者皆祖之若为骊姬寘肉之葍则与酖毒同类与茶菜可食之物非其类矣且诗人称周原之美当言宜稼宜蔬不应言其宜毒物也茶虽苦得霜而甜脆故可言如饴乌头毒物不可食何繇知其如饴乎愚按刘勰有云鶡音之丑岂有泮林而变好茶味之苦宁以周原而成饴并意深褒讚故义成矫饰寻勰此论抑亦轻于疑古人者然但举茶而不及葍亦可以见葍为美菜不与茶苦类耳爰始之始对後契龟看以先事言国语云咨事为谋契毛云开也按契之训开当通作契说文云刻也左定九年尽借邑人之车契其轴杜注亦训契为刻郭璞云今江东呼刻断物为契断是也契我龟者当如朱子云或人之说谓以刀刻龟甲欲鑽之处前汉书注亦云言刻开之灼而卜之旧说因周礼葍氏职有掌共燂契之文而士丧礼有楚燂置于燂在龟东之语遂谓楚燂即契非也无论楚燂名契於义无取即据以解此诗曰楚燂我龟有此文理否今按葍氏职云掌共燂契以待卜事凡卜以明火爇燂遂歛其燂契以授卜师所谓葍者荆葍也即楚燂也必取荆木者凡木心圆荆心方卦之德方以知故于荆焉取之也燂郑玄谓炬也所用以然楚燂者契杜子春谓契龟之凿也盖刮其外甲以视兆者既契而後用楚燂以灼之也曰供燂契者灼契之火得之于燂故得以燂言不及楚燂者略之也又官既以葍为名则楚燂不言可也明火以阳燧取火于日以爇燂贵阳明之义也燂既然以荆葍柱燂火吹之於是向龟甲所刻之处灼之谓之燂契燂说文以为然火也其契处既燂则有墨可验故以授卜师使辨之卜师掌开龟之四兆一曰方兆二曰功兆三曰义兆四曰弓兆凡卜事眝高扬火以作龟致其墨注谓墨大坼明则逢吉是也其四兆之义未详又占人职云凡卜簪君占体大夫占色史占墨卜人占拆体有吉凶色有善恶墨有大小拆有微明以此辨之若大卜掌三兆之法一曰玉兆二曰瓦兆三曰原兆意即所谓占体者也然燂契之事属之葍氏而契龟又非葍氏之事盖契龟即周礼所谓作龟也大卜职云凡国大贞卜立君卜大封则眝高作龟郑司农解作龟谓凿龟令可爇也视龟腹骨近足处其部高可灼者先作其墨俟既灼观食不食为兆也又卜师职云凡卜辨龟之上下左右阳阴以授命龟者而诏相之盖龟首尾两旁阴腹阳背各有高应灼处辨之者如春灼後左夏灼前左秋灼前右冬灼後右是也国大贞则大卜亲作龟大祭祀则眝高命龟以祭祀乃常礼但告龟以所卜之事而已不亲作龟至小事则涖卜第临视之耳不但不作亦不命盖皆遣其属为之惟国大迁大师则贞龟贞即大贞之贞说文云卜问也以其事非常亦与立君大封等故贞龟也曰贞龟则大卜必亲作龟可知已今古公将迁岐周而卜则所谓大迁之贞也又大卜职云以邦事作龟之八命一曰征二曰象三曰与四曰谋五曰果六曰至七曰雨八曰廖迁都重事古公始既谋之於从行之人而後决之於神所谓四曰谋者也一说契合也古公谋之人而从矣谋之龟则又曰吉与人谋契也程大昌云古卜卜人令龟已遂预取吉兆墨画其上然後灼之灼文适顺其画是为食墨者吉其兆不应墨则云不食不食则龟不从也故雒诰曰我卜河朔黎水我乃卜涧水东瀍水西惟雒食是龟之所食者画雒之兆而河朔黎水之兆不食也古公之改居经始而谋度之未敢以为可居也以墨合龟而兆与墨同故曰契契者合也人谋与龟协合也亦通龟者国之守器

故以我称周礼龟人职云掌六龟之属各有名物天龟曰灵属地龟曰绎属东龟曰果属西龟曰蠃属南龟曰猎属北龟曰若属各以其方之色与其体辨之凡取龟用秋时攻龟用春时各以其物入于龟室上春衅龟太史公云略闻夏殷欲卜者乃取着龟已则弃去之以为龟藏则不灵蕃久则不神至周室之卜官常宝藏蓍龟又其大小先後各有所尚要其归等耳或以为圣王遭事无不定决疑不见其设稽神求问之道者以为後世衰微愚不师智人各自安化分为百室道散而无垠故推归之至微要洁於精神也或以为昆虫之所长圣人不能与争其处吉凶别然否多中於人林之奇云大王迁岐卫文迁楚丘未尝不卜然君臣既有定议乃卜洪范所以先乃心卿士庶人而後卜筮也左哀二年齐人输范氏粟赵鞅御之卜战龟焦乐丁曰诗曰爰始爰谋爰契我龟谋协以故兆询可也李氏云古之建国必相土地之宜土地既善矣然後稽之於卜筮卫文公迁于楚丘始曰升彼虚矣以望楚矣望楚与堂景山与京降观於桑则是其既有以相土地之宜矣其後乃曰卜云其吉终焉允臧也曰者严云龟告之兆也曰止言止居已得其地曰时言可以兴土功之时筑室於兹无容再计矣蒋悌生云诗中凡言龟卜下文必见卜吉之义如尔卜尔筮体无咎言上句言卜下句言吉卜云其吉亦然考卜维王卜也维龟正之亦叶吉之义如不吉之类亦曰我龟既厌不我告犹未有但言灼龟而卜不言兆之吉凶者故知曰止曰时筑室於兹当为龟兆之繇辞也】乃慰乃止【纸韵】乃左乃右【叶纸韵羽轨翻】乃疆【陆本作强云一作疆】乃理【纸韵】乃宣乃亩【叶纸韵母鄙翻】自西徂东周爰执事【叶纸韵鉏里翻 赋也自此至第七章先民事而次宗庙首宗庙而及官室门社此经纶之次第也乃古作□读若仍说文云惊声也慰说文云安也止即上章曰止之止乃慰乃止者慰安新从迁之衆俾之止居於是也严云上文曰止则龟告以宜居於此此言乃止则遂安居於此成龟告之意也左右苏辙云东西列之也孔云慰止左右文在筑室之下明其皆是作邑之事乃左右而处之据公宫在中民居左右故王肃云乃左右开地置邑以居其民也疆理解见信南山篇此又因定民居而及授田之事宣朱子云布散而居也按宣之训布解见江汉篇黄佐云此在野之居如中田有庐以便民事所谓二亩半在田者盖彻法自公刘已有矣亩是分授以田亩既各授有定分而後可以随人用其芟夷垦辟也陆云宣者随田而居以便田事也亩者随居而田以服田业也连言乃字者有惊骇耳目一新之意第七章同自西徂东者郑云据至时从水汧言也季云言西自漆沮之水汧而东往岐山之下也周即周原之周举新迁之地也与皇皇者华篇周爰不同执事如制室治田凡所当为者皆是郑云从西方而往东之人皆於周执事竞出力也孔云民性安土重迁离居或有所悔人竞出力明其劝乐於是皆无悔心也一说朱子云周徧也言靡事不为也亦通国以民为本民居殷奠之後方事营建先王之重民如此吴越春秋云古公去邠处岐周居三月

成城郭一年成邑二年成都而民五倍其初】乃召司空乃召司徒【虞韵】俾【释文作卑】立室家【叶虞韵攻乎翻】其绳【陆德明云或作乘误】则直【职韵】缩版以载【叶职韵节力翻】作庙翼翼【职韵 赋也王安石云乃者继事之辞言毕民事而始及之也召说文云呼也王逸云以手曰招以言曰召郑云司空司徒卿官也两言乃召者皆一时事无先後按史记云古公贬戎狄之俗营筑城郭室屋而邑别居之作五官有司民皆歌乐之颂其德孔云后稷封邰为上公孟子称文王以百里而王则大王之时以殷之大国当立三卿其一盖司马乎时不召者司马於营国之事无所掌故也俾尔雅云使也立建也勑造之谓第七章同郑云司空掌营国邑司徒掌徒役之事故召之使立室家之位处孔云司空之属有匠人其职有营国广狭之度庙社朝市之位是司空掌营国邑也司徒之属有小司徒其职云凡用衆庶则

掌其政教是司徒掌徒役之事也以此二卿各有所掌故召之召司空之卿令之营度广轮召司徒之卿令之兴聚徒役室家之位处则匠人所谓左祖右社面朝後市之类是也朱子云人君国都如井田様画为九区面朝背市左祖右社中间一区则君之宫室宫室前一区为外朝凡朝会藏库之属皆在焉後一区为市市四面有门左右各三区皆民所居而外朝一区左则宗庙右则社稷焉此国君都邑规模之大槩也黄佐云俾立室家一句含宗庙宫室门社皆在其中对上未有家室而言绳说文云索也郑云绳者营其广轮方制之正也朱子云绳所以为直营度位处皆先以绳正之陆云如分别何处是庙何处是廡库何处是宫社皆引绳以取直也缩版以载专属下文作庙言尔雅云绳谓之缩郭璞云缩者缚束之也孔云缩者束物之名用绳束版故谓之缩版说文云判也谓木片也李氏云左传凡言兴土功则言版干盖立木两傍所以障土载郑云上下相承也孔云以绳缩束其板板满筑讫则升下於上以相承载作起也亦剏造之谓庙宗庙也说文云尊先祖貌也徐锴云所以彷彿先人之容貌也礼记云君子将营宫室宗庙为先廡库为次居室为後曹氏云此章俾立室家则定其规模面向若其营作则先於庙故其序如此翼如跂斯翼之翼通左右言曰翼翼盖象其轩翥方严之貌疏义云易萃及涣之彖皆曰亨王假有庙者萃因民之聚立庙以坚其归向之心所以为怀保之道涣忧民之散立庙以收拾其荡析之心所以为招携之述皆所以统摄民心而坚凝之也大王迁岐与公刘迁豳之事大槩同公刘相土以山川大王相土以生物公刘之止基其民即大王慰止左右也公刘之乃理其民即大王疆理宣亩也但彼则处处庐旅言言语语其规模小此篇乃召司空以下其规模大盖世时有先後土地有广狭故不同耳】 掬之陲陲【蒸韵】度之薨薨【蒸韵】筑之登登【蒸韵】削屡冯冯【蒸韵】百堵皆兴【蒸韵】鼙鼓弗胜【叶蒸韵书蒸翻 赋也严云述遂作宫室也掬说文云盛土於裡中也郑云筑墙者掬聚壤土盛之以薨孔云掬字从手谓以手取土也薨裡皆盛土之器陲说文云筑墙声也引此诗今按陲为筑声於义无取正因此诗而附会之耳毛传解陲陲为衆以字形求之左施 土山曰 者厚也右施奕说文云稍前大也合二义解之当为取土衆多之义度通作劇说文云判也谓分判所聚之土纳之于版中也薨通作轰羣车声也分土之声其嘈襍亦如之螽斯羽薨薨兮虫飞薨薨皆以声言也筑说文云捣也登登陈氏云渐高也严云既取得土送之墙上墙上之人受而投之版中薨薨然其声之衆既投之版中筑之者登登然积累而上则墙渐高矣削增韵云刮削也刘彝云谓墙成脱版削其坚凸以就平直屡说文云数也苏云重复削治也冯说文云马行疾也冯冯状其运腕敏疾之貌百堵解见鸿雁斯干篇堵垣也百者非一之辞兴起也百堵皆兴谓所治非一室而羣力一集垣墙并举也辅广云独详於版筑之事者盖垣墙所以围乎外举此则其中衆役可知鼙解见鼓锺篇孔云鞀人为鼙鼓正谓壹鼓耳鼙亦作皐陈祥道云周礼鼓人以鼙鼓鼓役事春秋传鲁人之皐盖皐者缓也役事以弗亟为义故以皐鼓节之古者上之使下以仁常欲缓而不迫故名鼓以皐下之事上以义常欲敏而有功以鼓节之而弗止故曰鼙鼓弗胜按鼙鼓为鼓役事而设非欲止人之力作但人心竞劝鼓自不胜其击且如有不能相赴者然此句只就掬度筑削之时见之孔云民皆乐事劝功竞欲出力言大王之得人心也】 乃立皐门皐门有伉【叶阳韵苦郎翻韩诗作闕陆本作亢】 乃立应门应门将将【叶阳韵资良翻】 乃立冢土戎丑【丰本作醜】 攸行【叶阳韵户郎翻赋也毛传谓王之郭门曰皐门王之正门曰应门郑玄谓诸侯之宫外门曰皐门庙门曰应门内有路门天子之宫加以库雉孔颖达引明堂位云库门天子皐门雉门天子应门鲁以诸侯而作库雉则诸侯无皐应故以皐应为王门之名也以实毛之说又引左襄十七年宋人称皐门之暂是诸侯

有臯门也诸侯法有臯应大王自为诸侯之制非作天子之门矣以实郑之说二义相反未详孰是今考左襄十七年宋筑者讴曰泽门之皙实兴我役杜注泽门宋东城南门也古文多以泽为臯为其字形相混其实宋有泽门无臯门孔之援引於斯误矣周书康王之诰篇王出在应门之内大保率西方诸侯入应门左毕公率东方诸侯入应门右逸周书作雒篇云应门库台元阍明堂位云九采之国应门之外北面东上後汉纪明帝诏曰昔应门失守关雎刺世薛君章句曰人君退朝入于私宫后妃御见有度应门击柝鼓人上堂退反宴处体安志明是则应门为天子之制诸侯之有臯应于书无所经见明堂位所云乃谓鲁以周公之故雉门兼天子应门之制库门兼天子臯门之制耳然虽制兼臯应而名仍库雉亦可见诸侯有库雉无臯应也檀弓记鲁庄公之丧既葬而經不入库门春秋定二年雉门反两观灾此鲁之库雉也又家语云卫庄公易朝市孔子曰绎之於库门内失之矣是卫亦有库门此皆诸侯称库雉之证毛传所言为得其实然独恠大王时尚为殷诸侯何以使用天子之制唐孔氏以为殷代尚质未必曲有等级朱子以为大王之时未有制度特作二门其名如此及周有天下遂尊以为天子之门而诸侯不得立焉其论确矣又按王者五门之说本於郑司农外曰臯门二曰雉门三曰库门四曰应门五曰路门郊特牲云卜之日王立于泽亲听誓命受教谏之义也献命库门之内戒百官也是王有库门路门一曰毕门谓从外而入至路门为终毕也书顾命篇所谓二人雀弁执惠立于毕门之内者春秋传疏则谓雉门为中门外有臯库内有应路於内外为中今以明堂位文证之库门向外兼臯门雉门向内兼应门则库门在雉门外明矣雉门设两观所谓象魏又应门亦名朝门路门亦名寝门以朝位在应门内路寝在路门内故名之若周礼师氏居虎门之左司王朝注谓虎门即路寝门也画虎所以明勇猛於守宜也盖诸儒之说五门如此然经皆无明文惟月令云季春之月田猎置罟罗罔毕翳餒兽之药毋出九门是月也命国难九门 攘说者谓天子九门法阳九之义宫门有五法五行外门有四法四时合为九门一曰关门二曰远郊门三曰近郊门四曰国门及五臯六库七雉八应九路也皆从外而数诸侯七门则以内五门少其二故耳刘敞则云天子诸侯皆三门而名不同以诗书礼春秋考之天子有臯应毕诸侯有库雉路天子外朝在臯门之内诸侯外朝在库门之内天子治朝在应门之内诸侯治朝在雉门之内天子内朝在毕门之内诸侯内朝在路门之内又曰何谓毕门毕者?也王出至于此则?也师氏掌焉何谓应门应应也王居治朝正天下之政四海之内莫不敬应也何谓臯门臯告也王者外朝播告万民谋大事也是则五门三门说各不同要之天子门制自当与诸侯异则五门之说固自可信今制亦有五门外曰大明门二曰承天之门三曰端门四曰午门五曰皇极门皇极门内正殿曰皇极殿则古之路寝也又考索云天子五门臯者远也明最在外故曰臯库门则有藏於此故也雉门者取其文明也?门者则居此以应治也路门则取其大也此五门各有其义然书又有南门则路门之别名也周礼又有中门则雉门之别名也尔雅有正门则应门之别名也今按臯者引声之言引声者长声也故以为取缓远之名又以为取播告之义皆通伉当依韩诗作阅说文云阅闾高门也又说文解闾亦云门高也将如鲜我方将之将当通作壮美其闾敞壮观也两户为门故重言将将山顶之高肿起者曰冢故以为高大之义社说文云地主也郊特牲云家主中溜而国主社孔云冢土训为大社未即名为大社祭法王为羣姓立社曰大社郊特牲云天子大社必受霜露风雨之气以为大社之名唯施於天子诸侯虽不可名大社可以言冢土矣乃立冢土正是诸侯之法按泰誓言类于上帝宜于冢土则犹仍大王旧称以未为天子故也戎说文云兵也丑说文云可恶也小丑之隗攸行者言将加兵于所可丑恶之国则必告于社而後行也又按征

伐必载社主以行则以攸行为载社主亦可邹忠胤云臯门应门之设前此未有也有之自古公始其视皇过之夹遯芮鞠之止基庐处之苟简固已不侔而立冢土以利攸行则隐然顺治威严之梗槩矣故遂以昆夷之駉接之鍾惺云不读此数章不知周家经制多出古公其才何必减周公也】肆不殄厥愠【问韵】亦不隕【孟子作殒】厥问【韵丰本作闻】柞械拔【叶队韵蒲妹翻】矣行道兑【叶队韵徒对翻陆本作脱】矣混【左传注作畎赵岐孟子注作昆说文作犬】夷駉【叶队韵徒对翻说文作哂左传注作喙赵岐孟子注作兑】矣维其喙【队韵】矣【说文引此二句作犬夷哂矣昆夷駉矣 赋也肆说文云极陈也极陈我周王业积累之难如下文所云也殄说文云尽也尔雅云絶也愠说文云怒也此主昆夷之怒我言观孟子引诗意可见隕毛云坠也仪礼云小聘曰问周礼曰时聘曰问此二句自大王迁岐之时中历王季及文王受命之初皆是如此言昆夷愠怒于我不惟不遽殄灭之而且不失坠其往来聘问之礼孟子所谓以大事小者乐天者也严云大王始居於豳则北有獯鬻之侵既迁於岐则西有昆夷之扰北狄大而西戎小豳地迫近强狄若以力争伤人必多大王所不忍也故去豳而迁岐至若昆夷惟不殄不隕内备外和彼自不能为患矣按孟子言文王之始犹事昆夷正所谓不隕厥问者又貉稽有不理於口之疑而孟子曰无伤也士憎兹多口因引此诗以咏叹文王意谓士惟急于修德虽有多口所憎固不必介介于胸而遂踈其相与之迹试观文王之待昆夷何如乎柞栩也即所谓柞栎也解见鸛羽晨风车鞅篇械尔雅云白桺也陆玑云三苍说械即柞也其材理全白无赤心者为白桺直理易破可为犖车轴又可为矛戟矜今人谓之白掬或曰白栢按旱麓之诗曰瑟彼柞械民所燎矣则柞械皆木之大者郭璞注尔雅以桺为小木丛生有刺实如耳璫紫赤可食必非此诗之所谓械也如玑说械材理全白则是白桺何疑但柞别名栩而械又混名柞往往致误不可不辨拔说文云擢也增韵云攻而举之也柞械拔矣如左传言筓路蓝缕以启山林之意行道行人往来之路也兑朱子云通也按兑字下从人中从口上从人象人口气之分散故有通义混夷即昆夷又作緄夷又作畎夷皆犬声之转也书大传云文王四年伐犬夷注犬夷昆夷也亦称犬戎山海经云黄帝生苗龙苗龙生融吾融吾生弄明弄明生白犬白犬有牝牡是为犬戎韦昭云犬戎昆夷之别名史记称自陇以西有緄戎今按其地当在豳岐之西在今巩昌泰州之地駉说文云马行疾来貌混夷突来之状似之喙说文云口也吕大临云张喙而息也奔趋者其状如此昆夷所以敢於为患者持其深林大麓之中路岐阻塞而人不易入耳今柞械拔去而道可通行则生齿渐繁归附日衆昆夷时或突来但见其抱头窜伏喘息不暇而已愚按以皇矣篇观之则柞械拔矣而下皆指文王时言其曰昆夷駉喙意即四年伐犬夷事下章所谓蹶厥生者也又按帝王世纪云文王受命四年周正丙子混夷伐周一日三至周之东门文王闭门修德而不与战与大传史记诸书所载异者或昆夷先伐周然後文王从而伐之耳】虞芮质厥成【庚韵】文王蹶厥生【庚韵】予曰有疏【孔丛子作胥】附【宥韵亦叶虞韵芳武翻】予曰【楚辞章句作聿】有先【尚书大传作前】後【叶宥韵胡茂翻亦叶虞韵後五翻】予曰【楚辞章句作聿】有奔【陆本作本丰本作犇】奏【宥韵亦叶虞韵宗五翻孔丛子作奏尚书大传陆本俱作走】予曰有御【尚书大传陆本俱作御】侮【麋韵亦叶宥韵莫候翻丰本以此章为思齐篇之第六章 赋也虞芮二国名皆殷诸侯质说文云以物相赘也徐锴云质之为言实也事疑虚以人物实之也今按讼者言其曲直必有物以为徵验故亦云质谓质其实也成苏云献成也王安石云与周官所谓书其刑杀之成同史记云西伯陰行善诸侯皆来决平於是虞芮之人有狱不能决乃如周入界耕者皆让畔民俗皆让长虞芮之人未见西伯皆慙相谓曰

吾所争周人所耻何往为祇取辱耳遂还俱让而去诸侯闻之曰西伯盖受命之君毛传云虞芮之君相与争田久而不平乃相谓曰西伯仁人也盍往质焉乃相与朝周入其竟则耕者让畔行者让路入其邑男女异路斑白不提挈入其朝士让为大夫大夫让为卿二国之君感而相谓曰我等小人不可以履君子之庭乃相让以其所争田为闲田而退天下关之而归者四十余国刘向说苑云虞人与芮人质其成於文王入文王之境则见其人民之让为士大夫入其国则见其士大夫让为公卿二国者相谓曰其人民让为士大夫其士大夫让为公卿然则此其君亦让以天下而不居矣二国者未见文王之神而让其所争以为闲田而反孔子曰大哉文王之道乎其不可加矣不动而变无为而成敬慎恭己而虞芮自平三书所载大同小异今俱録之郡县志故虞城在陕州平陆县东北五十里虞山之上古虞国芮城在陕州芮城县西二十里古芮国间原在平陆县西六十五里即虞芮争田让为间田之所今按平陆芮城俱属山西平阳府解州在河东间原与虞芮相接俗呼让畔城史记注引地理志谓芮在冯翊临晋县杜氏通典从之非也冯翊故城在陕西西安府高陵县南二里乃河西地与平陆迥不相及史记正义亦辨其踈矣路史引六韬云文王质虞芮之讼暨师武伐纣乃收虞师芮师蹶朱子云动而疾也生犹起也与民之初生生字同义朱子云生是兴起之意其势张盛忽然见之如跳起也万时叶云文王蹶蹶生王气勃然奋起如蕨之未拳如竹之初擢怒生之象从笔端描出正与瓜瓞光景关照可味可思周昌年云初生只是初起至是则向之所起者蹶然兴盛非复初生微弱之象矣朱善云文王之德其孚於人也久矣至是而始动其兴起之势者譬如弩机之既张是惟无发发则沛然而不可御矣按孟子言文王紂方百里起其始尚仍大王旧封于岐山之下其地甚狭及虞芮质成之後而归附者始衆史记称明年伐犬戎明年伐密须明年败耆国竹书亦纪帝辛三十六年春正月诸侯朝于周遂伐昆夷凡此皆所谓蹶蹶生者也周之中叶自窜于戎狄之间其後困于獯鬻之侵及大王迁岐犹未能殄昆夷之愠至蹶蹶生有文王而累世之所郁结始大为发舒故以此与肇基王迹之大王相首尾苏氏严氏皆以蹶蹶生为动虞芮之君使其礼义廉耻之心油然而生於理尽佳然不过指一事而言其为义小矣予曰以下作诗者之辞也归功四友为章末余波若曰非特文王圣也亦其臣与有助焉济济多士文王以宁岂不信夫疏附以布德言疏通德泽使民亲附也先後以纳忠言先君之意而启之後君之意而成之也奔走以任事言周旋竭力不避险阻奔君之命而进其所为于君也御侮以扬威言敌未来而能折其气敌突至而能折其冲也孔云以此四行徧该羣臣虽有贤圣不过此矣王符云夫士者贵其用也不必求备故四友虽美能不相兼郝敬云言虽本文王之圣亦必资羣臣之助而况为後王者乎陆化熙云试看十月之交一诗其言羣小用事于外妖艳蛊惑于内成何国家景象则知此诗之言姜女言四臣岂不可想见老臣之用心又云周家起初基业极微而卒开王业其为国为民累仁积功历历可见者如此即此可以思仁可以思孝可以见创业之难可以见祖宗贻谋之远非如他诗言以德受命直须推原到精神感应之微妙处也愚又有一说焉按史记以虞芮质成为西伯出羑里得专征伐後事而诗正义褊引书传所载谓纣闻文王断虞芮之讼後又伐邶伐密须伐犬夷三伐皆胜而始畏恶之拘于羑里纣得散宜生等所献宝而释文王文王释而伐黎明年伐崇又云西伯得四友献宝免于虎口而克耆耆即黎也果如所说则文王政以虞芮质成取忌几缘履虎遭啗为蹶蹶生耳蹶之为言僵也与死为隣之谓也而书传又云宜生南宫括闾夭三子学颂于太公遂与三子见文王于羑里献宝以免文王乃云则予曰有疏附四言乃文王当日之语而太公散宜生南宫括闾夭四人又适符四友之数故孔丛子云孟懿子问书曰钦四隣何谓也孔子曰王者前有

疑後有丞左有辅右有弼谓之四近言前後左右近臣当畏敬之不可以非其人也周文王胥附奔辵先後御侮谓之四隣以免乎美里之害懿子曰夫子亦有四隣矣孔子曰吾有四友焉自吾得回也门人加亲是非胥附乎自吾得赐也远方之士日至是非奔辵乎自吾得师也前有光後有辉是非先後乎自吾得仲由也恶言不至於门是非御侮乎尚书大传载孔子语亦同而足之曰文王有四臣以免虎口丘亦有四友以御侮然则此章之意乃是咏文王所遭之不幸与前所言古公避狄迁国总见周家创邺艰难以动嗣世者之警念噫作诗者其有忧患乎】

縣九章章六句【申培说丰本皆作八章章六句以去末一章故也子贡传以为训成王之诗辨已在小引下申培说则直谓周报大王周公述其事以训嗣王之诗盖因削去末章则篇中无复咏文王之语故但以报大王耳是其说亦有所本先是季彭山氏谓第九章与上文似不相属窃意或是错简惟以属于思齐誉髦斯士之後庶几理顺于是作伪说者遂从而剿袭之而不知其鄙闇之甚也按左昭二年晋侯使韩宣子来聘公享之季武子赋縣之卒章杜预注谓义取以晋侯比文王以韩子比四辅然则虞芮六句为縣之卒章其来古矣此而不知乃敢为伪岂非不辨菽麦者乎若史记谓诗人道西伯盖受命之年称王而断虞芮之讼观于此诗古公尚称公而文王已称王则称王之事疑或有之所以终不敢信其然者赖泰誓篇中但称文考而不称文王为证佐耳诗述先王积累德业之盛故朝见燕享必歌奏之以致警此叔孙穆子所以与文王大明皆称为两君相见之乐与】

旱麓武王追王三后也牧之野既事而退遂率天下诸侯执豆笚逡奔走追王太王亶父王季历文王昌不以卑临尊也【自牧之野下俱出礼大传篇】此诗盖追王之时祭而受厘之乐歌【序云受祖也周之先祖世修后稷公刘之业大王王季申以百福干禄焉申培说朱传皆以为咏歌文王之德今按诗意实次第三后而兼叹美之前三章三言岂弟君子是也自第四章而下皆为武王祀周庙而发所以知然者以駉牡既载当自武王为天子尚赤之後言耳朱子又云诗中有享祀神劳等语或亦受厘之乐厘义见既醉篇】

瞻彼旱麓【国语陆德明本俱作鹿】榛楛济济【叶荠韵子礼翻】岂【国语陆本俱作恺下同陆云一作凯】弟【国语陆本俱作悌下同】君子干禄岂弟【荠韵赋之兴也瞻说文云临视也旱毛传云山名也汉书地理志云汉中郡南郑县旱山沱水所出东北入汉寰宇记云在南郑县西南二十里按今陕西汉中府本禹贡梁州之域周合梁于雍义属雍州其地与凤翔府接壤凤翔即古岐周地也昔周之兴鸛鷥常鸣於岐翱翔至于南而集焉是以西岐曰凤翔南岐曰凤州凤州今凤县汉中所辖也故何景明云余至凤县观凤鸣之山曰南岐至成县询古西康州有凤鸣处凤县今属汉中南郑县今属巩昌各去数百里间於羌戎则文王治岐地盖广远矣诗人托山川以起兴皆指其在境内者此举旱麓乃主大王迁岐而言尔雅云山足曰麓应劭云林属於山者也榛解见简兮篇罗愿云榛似栗而小关中鄜坊甚多然则其字从秦盖此意也楛木名陆玑云其形似荆而赤茎似蓍上党人织以为斗筭箱器又槲以为钗故上党人调问妇人欲买楛不曰竈下自有黄土问买钗不曰山中自有楛顏监云楛木堪为箭筈今幽以北皆用之土俗呼其木为楛子郝敬云榛可以供筮楛可以为矢文武之材以比圣德济之为言齐也曰济济者茂盛而整齐之貌岂通作恺说文云康也弟顺也说文解为韦

束之次第言如积压柔韦顺後前不相戾也严粲云岂弟者德盛仁熟和顺充积之谓也君子谓大王也大王心存爱民其将去邠而之岐也曰君子不以其所养人者害人又曰与人之兄居而杀其弟与人之父居而杀其子吾不忍也是皆所谓岂弟者也干尔雅云求也禄即福也徐锴云禄之言録也若言省録之也按周之王瑞自大王兴此天之所録也季本云君子有岂弟之德则福禄随之是以岂弟而干禄也君子本无干禄之心犹所谓以尧舜之道要汤云尔钱天锡云通诗岂弟君子一句最重盖天地福禄种种不过和顺之气所凝成故严厉乖戾便有许多愁惨出来温良易简便有许多太和凝聚此岂弟也在天则和风庆云在人则心安体豫在家则雍雍穆穆在国则怙冒咸若在万世则太和常在宇宙不期福禄而福禄归之自是实理严云诗人言干禄者谓在我有以致之犹曰自求多福耳周语景王将铸大钟单穆公曰不可诗有之曰瞻彼旱麓榛楛济济恺悌君子干禄恺悌夫旱麓之榛楛殖故君子得以易乐干禄焉若夫山林匱竭林鹿散亡藪泽肆既民力雕尽田畴荒芜资用乏匱君子将险哀之不暇而何易乐之有哉且絶民用以实王府犹塞川原而为潢污也其竭也无日矣王应麟云诵险哀二字此文中子所以有帝省其山之叹也天地变化草木蕃况贤者而不乐其生乎天地闭贤人隐况草木而得遂其性乎吕祖谦云繇之八章曰柞械拔矣行道兑矣皇矣之三章曰帝省其山柞械斯拔松柏斯兑皆以山林之茂见王业之盛然则所谓榛楛济济者盖当时所见之实也愚按旱麓济济正如所纪周原膃膃者以见大王当时新迁国邑民安物阜之盛此所谓赋也然不言山而言麓又言其所生榛楛之多足资民用则亦有深意存焉易剥之象曰山附于地剥上以厚下安宅此殆诗人言旱麓之义也人君不以高危峻絶自处而以谦抑卑下为心人人得而亲近之无所县隔亦人人得而取给之无所禁限此其为岂弟孰加焉和气致祥干禄百福固其宜矣此则赋中有兴也】瑟【说文陆本俱作璚周礼注疏作恤广苍作琤丰氏本作□】彼玉璚黄流在中【东韵】岂弟君子福禄攸降【叶东韵胡公翻 赋之兴也瑟说文作璚云玉英叶相带如瑟弦也然第五章瑟彼柞械之瑟当作何解或谓瑟弦密因训瑟为密似矣而以玉璚之瑟为缜密以柞械之瑟为茂密分别两义亦觉有不可通者郑衆贾公彦於周礼注疏引此皆作恤彼玉璚董氏谓古文以瑟谓恤此较可信恤字本义训忧愚意当是爱惜之义左传君命寡君同恤社稷是也又曲礼以策彗恤勿注训恤勿为搔摩之状意亦同此恤彼玉璚犹云可爱惜哉彼玉璚也玉璚毛云圭璚也郑云圭璚之状以圭为柄黄金为勺青金为外朱中央矣孔云璚者器名以圭为柄圭以玉为之指其体谓之玉璚据成器谓之圭璚详见械朴篇黄流有二义毛谓黄金所以饰流鬯以璚者盛鬯酒之器用黄为勺而有鼻口鬯酒从中流出器是黄金照酒亦黄故谓之黄流也郑但以黄流为柞鬯以柞鬯者酿柞为酒以鬱金之草和之使之芬香条鬯故谓之柞鬯草名鬱金则黄如金色酒在器流动故谓之黄流郑所以易传者以言黄流在中当谓在璚之中不谓流出之时而璚既以朱为中央则其中亦朱而不黄矣明酒不得黄故知非言黄金也据此当从郑义郊特牲云灌以圭璋用玉气也毛云九命然後锡以柞鬯圭璚白虎通云圭璚柞鬯宗庙之盛礼故孝道备而赐之柞鬯所以极着孝道孝道纯备故内和外荣玉以象德金以配情芬香条畅以通神灵玉饰其本君子之性金饰其中君子之道金者精和之至也玉者德美之至也鬯者芬香之至也合天下之极美以通其志也其惟玉璚柞鬯乎郑云殷王帝乙之时王季为西伯以功德受此赐按孔丛子云羊容问子思曰古之帝王中分天下而二公治之谓之二伯周自后稷封为王者之後至大王王季文王此为诸侯矣奚得为西伯乎子思曰吾闻诸子夏曰殷王帝乙之时王季以九命作伯于西受圭璚柞鬯之赐故文王因之得专征伐沈约注竹书纪年亦云周公季历伐

翳徒之戎获其三大夫来献捷殷王文丁嘉季历之功赐之圭瓚秬鬯九命为伯今考文丁之後为帝乙二书所载虽世次不同然其事相合辨在采薇篇小引下此诗咏玉瓚黄流正指王季事也岂弟君子谓王季也按皇王大纪云季历守正而和照临无蔽勤施无私教诲不倦顺以事上比以亲民以此观之其称恺悌宜矣郑云攸所降下也言王季有乐易之德故福禄所以降下而与之周之进爵为西伯自王季受圭瓚之赐始所谓福禄攸降者也诗虽赋其事而中亦有兴意朱子所谓宝器不荐于味而黄流不注于瓦缶则知盛德必享于禄寿而福泽不降于淫人是也故曰赋之兴也】鸛【丰本作?】飞戾天【先韵亦叶真韵汀因翻】鱼跃于渊【先韵亦叶真韵一均翻丰本作 】岂【左传潜夫论俱作恺】弟【左传潜夫论俱作悌】君子遐【潜夫论作胡】不作人【真韵亦叶先韵如延翻 兴之比也鸛解见四月篇戾通作丽附着之意渊说文云回水也管子云水出不流曰渊岂弟君子指文王也韩诗外传云度地图居以立国崇恩博利以怀衆明好恶以正法度率民力稼以重农学较庠序以立教事老养孤以化民升贤赏功以劝善禁奸止邪以除害接贤连友以广智宗亲族附以益强诗曰岂弟君子文王之谓也愚按棫櫟之诗为文王而作其第四章曰周王壽考遐不作人与此文同故知谓文王也言文王有岂弟之德何人不在所作之中乎文王作人之妙不过兴起之使各自率其性而已能尽其性则能尽人之性能尽人之性则能尽物之性鸛且以之飞于上鱼且以之跃于下而况于人故子思子作中庸引此而以为言共上下察也李氏云抱朴子曰鸛之在下无力及至乎上耸身直翅而已然後知鸛飞更不用力亦如鱼跃怡然自得而不知其所以然而然王者之作人鼓之舞之使各尽其材亦不知其所以然而然也钱云全重岂弟上雷霆一发港底震动此之作未免动乎气者也君子独以天性相感发使之手舞足蹈而不知易曰易简而天下之理得此之谓也冯时可云岂弟者乐易之谓也乐天则外无艷居易则中无险文王以此盛德作兴人才而士皆象德从化上者安於上而尽其大不为府权下者安於下而务其小不为希高如鸛飞鱼跃各适其性此作人之极致也又苏辙引或人之说云天之高也以为不可及矣然鸛则至焉渊之深也以为不可入矣然鱼则跃焉夫鸛鱼之能至此也必有道矣岂可以我之不能不信哉君子推其诚心以御万物虽幽明上下无不能格小人不能知而或疑之何以异不信鸛鱼之能飞跃哉按此意似从中庸所言夫妇可以与知与能圣人有所不知不能生出亦是一理但比前说较浅耳辅广云洪范有曰皇建其有极歛时五福用敷锡厥庶民圣人之得名位者岂以其身自歛其福禄哉必使天下之人各羞其行而邦其昌然後为福也又左成八年晋栾书侵蔡遂侵楚获申骀楚师之还也晋侵沈获沈子揖初从知范韩也君子曰从善如流宜哉诗曰恺悌君子遐不作人求善也夫作人斯有功绩矣此但以作人为登进善人而用之似与诗意无涉愚按此诗三章所言只及三后不及公刘以上者以周之追王止于此故也】清酒既载【叶质韵子悉翻亦叶职韵节力翻】騂牡既备【叶质韵笔栗翻亦叶职韵朱子云蒲北翻】以享以祀【叶职韵逸职翻】以介景福【叶职韵笔力翻 赋也此言武王祀三后之事清酒騂牡解见信南山篇既载郑云谓已在尊中也备朱子云全具也按维诰成王在新邑烝祭岁文王騂牛一武王騂牛一据此文武之前既各用騂牛则武王致祭三后亦必皆各用騂牛故云騂牡既备也牲用赤色周所尚也享说文云献也以享献行祭祀之礼曰以享以祀介郑云助也景说文云光也言神助之以彰明可见之福也祭统云贤者之祭也必受其福非世所谓福也福者备也备者百顺之名也无所不顺者之谓备言内尽於己而外顺於道也程子云此章言子孙承受其业致其诚孝之报载酒备牲以享祀其先君祖先飨报而子孙受福也】瑟【丰本作□】彼柞械民所燎【叶萧韵力昭翻】

说文作𣎵】矣岂弟【左传作恺悌】君子神所劳【叶萧韵怜萧翻诗维其劳矣郑笺训为劳劳广濶正义云广濶辽辽之字当从辽远之辽而作劳字者字义同】矣【兴而赋也瑟解见第二章柞械解见縣篇燎说文云放火也朱子以为爨也岂弟君子指武王也後章同神指三后也劳慰抚也杜预云劳者叙其勤以答也郑云犹言佑助也此下二章皆受厘之辞勉武王亦修岂弟之德以致福也恺悌生云诗人前篇以玉瓚黄流兴岂弟宜也柞械微贱之物乃托兴而取义何哉柞械之为物丛生蒙密人得而取之无有禁限时时而薪之无时或穷借使松柏樟楠之高大民欲薪之固不可得苟得伐而薪之则今日之斧斤而明日牛山之濯濯矣又安能资民用哉惟薪燎之不时而柞械之生继续而不絶犹民情之多欲而岂弟之泽溥博而不穷得夫民所以得夫神也观民之所资足用而无阙则神之所念亦眷顾而不忘矣愚按取兴柞械与首章咏榛楸同意又左僖十二年齐侯使管夷吾平戎于王王以上卿之礼飨管仲管仲受下卿之礼而还君子曰管氏之世祀也宜哉让不忘其上诗曰恺悌君子神所劳矣断章取义非诗本旨】莫莫葛藟【後汉书作累晏子春秋作藟】施【韩诗外传吕氏春秋俱作延】于条枚【灰韵】岂【礼记吕氏春秋俱作凯国语晏子新序俱作恺】弟【国语晏子新序俱作悌】君子求福不回【灰韵兴也莫莫以葛叶之陰森言葛覃篇维叶莫莫是也藟徐锴云葛蔓也解见樛木篇施者纏绕之义解见葛覃篇毛传云枝曰条干曰枚言此莫莫然叶盛之葛其蔓或施于枝或施于干也郑云葛藟延蔓於木之枝本而茂盛喻子孙依缘先人之功而起回说文云转也其字象回转型勉武王当修先人岂弟之德以求福禄之来不可生回转之念也易所谓受兹介福以中正也求福与干禄例看李氏云君子承其先祖之道以求福禄其求福也无所回邪惟承其先祖之道而已黄震云古说回者邪也愚谓回非邪也回乃入於邪之所自始也人心初何尝不正不直一旦祸福在前计较之念一萌即为回转若自谓枉尺直寻以苟济目前者不知一有回转即入於邪不可复还自昔丧名败节之士如此类多矣学者读求福不回之诗可以铭心而誓之终身也一说葛藟以喻福条枚以喻德条枚无意于葛藟而葛藟自施之犹君子无意于获福而福自集之亦通礼表記篇子曰下之事上也虽有庇民之大德不敢有君民之心仁之厚也是故君子恭俭以求役仁信让以求役礼不自尚其事不自尊其身俭於位而寡於欲让於贤卑己而尊人小心而畏义求以事君得之自是不得自是以听天命诗云莫莫葛藟延于条枚凯弟君子求福不回其舜禹文王周公之谓与按孔子虽借此诗以赞舜禹文王周公之能尽臣节而其言得之自是不得自是以听天命於以发明求福不回之旨可谓至亲切矣又晏子春秋云崔杼既弑庄公而立景公刼诸将军大夫令无得不盟者次及晏子晏子曰刼吾以刃而失其志非勇也回吾以利而倍其君非义也崔子独不为天讨乎诗云莫莫葛藟施于条枚恺悌君子求福不回今嬰且可以回而求福乎曲刃鉤之直兵推之嬰不革矣崔子遂舍之噫必若晏子而後可谓之不回矣抑愚因左传礼记引诗之言而别有说也駢牡一章虽言武王祭祀之事而柞械二章或者仍是申赞三后之语盖周家世载明德济以忠贞故咏柞械之为民所燎者兴?功累仁之深厚也然惟守其乐易以与上下相安故神益眷之即左传美管仲之让不忘其上为神所劳者也若夫葛藟之施于条枚亦犹臣子之托命于上故于篇末特表三后之求福不回以见周家始终无国度天命之意则於表記孔子之言更有合焉敢并存此说以质高明又周语单襄公讥郤至之不让而引谚曰兽恶其网民恶其上及此诗曰恺悌君子求福不回其意亦颇与孔子之言不自尚其事不自尊其身者同】

旱麓六章章四句【子贡传以此为训成王之诗非也果训成王何为独遗武王乎】

皇矣美周也天监代殷莫若周周世世修德莫若文王【出序 此诗疑亦周公所作太史公云夫天下称颂周公言其能论歌文武之德达太王王季之思虑孔穎达云天监视善恶于下就诸国之内求可以代殷为天子者莫若周周所以善者以天下诸国世世修德莫有若文王者也故作此诗以美之汤以孤圣特兴禹则父无令问文王之德不劣禹汤而以承藉父祖始当天意者欲见尊祖之心美其世世修德不必实繇之也万时叶云前縣縣章意在叙王业艰难之繇故详在大王迁岐而以文王为余波此章意在叙王业盛大之繇故详在文王伐密伐崇二事而以大王王季为缘起凡读书须看古人下笔意思所在如此着眼便叙文王处亦是叙周业之兴原不为文王但诗人语气却倒注在文王上】

皇矣上帝临下有【潜夫论作以】赫【陌韵亦叶药韵閱各翻】监【汉书作鉴】观四方求民之莫【药韵亦叶陌韵莫白翻汉书作瘼】维【左传潜夫论俱作惟下同】此【左传作彼】二国其政【郑笺作正】不获【陌韵亦叶药韵黄郭翻】维彼【左传潜夫论俱作此】四国爰究爰度【叶药韵达各翻亦叶陌韵直格翻按虞书宅西曰昧谷周礼注作度西曰柳谷汉书注云古文宅度同】上帝耆【潜夫论作指】之憎【丰氏本作增】其式廓【药韵亦叶陌韵读如虢古获翻陆德明本作郭】乃眷【潜夫论陆本俱作睠陆又云一作券】西顾此维【汉书论衡潜夫论俱作惟】与【汉书论衡潜夫论俱作予】宅【陌韵亦叶药韵他各翻论衡作度 赋也皇毛传说文皆云大也帝者天之主宰也从高视下曰临与监同意赫说文云火赤貌程子以为兼威明二义是也观说文云谛视也莫当依汉书通作瘼说文云病也大哉上帝其照临于下赫然可畏而甚明白此以帝之体言也曰监察谛审于四方惟欲求民之所病苦者安在又以见帝心之至仁也二国毛朱二传皆以为夏商也其政谓所行之政事不获孔以为不得于民心朱以为失其道皆通孔云此诗之意主於紂耳以紂恶同桀故配而言之愚按朱传以此章为咏大王今考大王之世商道犹未衰何至与夏之末季并称其指文王之时明矣四国无所指如诗言四国顺之正是四国之类毛朱以为四方之国是也究说文云穷也谓穷其究竟度广韵云度量也按度以度长短量以量多少故皆借以为揆测之义言商末失政与夏季同四方诸侯於是预忧其终又於是度其所当向往者何在盖有舍商他适之意矣左文四年楚人灭江秦伯为之降服出次不举大夫諫公曰同盟灭虽不能救敢不矜乎吾自惧也君子曰诗云惟彼二国其政不获惟此四国爰究爰度其秦穆之谓矣按观此可以得诗人立言之意耆当依潜夫论作指按耆字训老而有指之义其字从老从指省故曲礼云六十曰耆指使释名云耆指也不从力役指事使人也憎说文云恶也式毛郑皆云用也按式字从工工制器以利用故有用之义廓毛郑皆云大也说文有郭字无廓字城外为郭亦濶大之称故释名云郭廓也廓落在城外也承上文言四方诸侯方踣蹢於去留之间未能自决上帝乃指示之以紂不恤民瘼侈于用大以自快意为帝心所憎恶也眷顾同义谓回首而视也岐周在西方故曰西严粲云大东刺乱而思周道小明悔仕而思共人皆以回顾言之此言天回其首以西视背商而向周也孔云天气清虚本无首目而云西顾者作者假为与夺之势托而言之耳邓元锡云天靡不欲安定其邦家而用大所憎也小心翼翼所眷也郑樵云天憎其用大而为虐者乃眷然西顾范景文云周德默与天往来故天眷之又王符云太古之时烝黎初载未有上下而自顺序天未事焉君未设焉後稍矫?或相凌虐侵渔不止为萌巨

害於是天命圣人使司牧之使不失性四海蒙利莫不被德金共奉戴谓之天子故天子立君非私此人也以役民盖以诛暴除害利黎元也是以神谋鬼谋能者处之诗云皇矣上帝临下以赫监观四方求民之莫惟此二国其政不获惟彼四国爰究爰度上帝指之憎其式廓乃瞻西顾此惟与宅盖此言也言夏殷二国之政不得乃用奢夸廓人上帝憎之更求民之瘼圣人与天下四国究度而使居之也前招良人疾奢夸廓无纪极也乃惟度法象明着礼秩为优宪艺县之无穷按此虽主用人立法发论而其意亦相近此维与宅乃追溯昔日而言以起下节之意宅尔雅云居也释名云择也拣择吉处而营之也言此岐周之地乃天昔日与大王使之迁居于此以肇基王迹天之眷周非一日矣又汉书谷永云天生烝民不能相治为立王者以统理之方制海内非为天子列土封疆非为诸侯皆以为民也垂三统列三正去无道开有德不私一姓明天下乃天下之天下非一人之天下也王者躬行道德承顺天地博爱仁怒恩及行苇籍税取民不过常法宫室车服不踰制度事节财足黎庶和睦则卦气理效五徵时序符瑞并降以昭保右失道忘行逆天暴物穷奢极欲沈湎荒淫妇言是从诛逐仁贤离逃骨肉羣小用事峻刑重赋百姓愁怒则卦气悖乱咎徵着邮上天震怒灾异屡降终不改寤恶治变备不复谴告更命有德诗云乃眷西顾此惟予宅夫去恶夺弱迁命贤圣天地之常经百王之所同也】作之屏之其菑【尔雅注作樛陆本作亩】其翳【霁韵亦叶屑韵一结翻韩诗作殪】修【丰本作修】之乎之其灌其桺【屑韵亦叶霁韵力制翻】启之辟之【音辟】其桎其梏【叶遇韵读如句俱遇翻】攘之剔【陆云或作翳又作□】之其槩其柘【叶遇韵都故翻】帝迁明德串【陆本作患丰本作串】夷载路【遇韵】天立厥配【尔雅注作妃】受命既固【遇韵赋也作朱云拔起也屏本屏蔽之义释文以为除也谓除之使不见王制屏之远方是也菑尔雅释木云立死菑毙者翳孔云以立死之木妨他木生长为木之害故曰菑也自毙者生木自倒枝叶覆地为?翳故曰翳也按荀子云周公之状身如断菑即此菑义陆佃云木卧死为翳一说小木蒙密蔽翳者也亦通修之平之者修则攻治之谓平则芟夷之谓皆使其不至于碍行也尔雅云木族生为灌或作权程子云行生曰桺按桺本木名尔雅释木有桺桺郭璞谓桺树似榦而痺小子如细栗今江东呼为桺栗陆玕谓叶如榆木理坚韧而赤可为车辕又礼记内则有芝桺说者谓在地曰芝在木曰桺盖木耳也非木之类今按灌桺并言灌非木名则桺亦非木名可知字右施列或取行列之义程解可信愚又疑当通作遯说文云遮也启通作启辟通作辟说文皆训为开也林木荟蔚人迹不通至此始开辟之左传所谓芟路蓝缕以启山林是也怪尔雅说文皆云河柳郭璞云今河傍赤茎小杨陆玕云生水旁皮正赤如绦一名雨师枝叶似松罗愿云天之将雨怪先起气以应之故一名雨师而字从圣字说曰知雨而应与于天道怪非独能知雨亦能负霜雪大寒不雕有异余柳南都赋注云怪似栢而香草木志云本^廿谓之赤怪木以其材赤故也大槩松杉之类而意态似柳故谓之怪柳其材可卷为盘又可为柘器衍义云即今之三春柳以一年三秀也三月开浅红花成细穗河西诸戎人取滑枝为靶段成式云赤白怪出凉州大者为炭复入灰汁可以煮铜桧尔雅说文皆云櫟也陆玕云节中肿似扶老即今灵壽是也今人以为马鞭及杖弘农共北山甚有之顔师古云似竹有枝节长不过八九尺围三四寸自然有合杖制不须削治也攘说文云推也剔本解骨之义以解析木之枝节如之亦谓之剔程子谓穿剔去其繁冗是也槩尔雅说文皆云山桑也管子云五粟之土其槩其桑罗云顔师古以为山桑之有点文者其叶可以食蚕而材尤有用古者青州以?为贡以槩?为筐盖食槩之蚕其?中琴瑟弦盛之箱筐贵之也其材可以为车辕又可以为弓弓人取干之道七柘为上櫟次之槩桑次之橘次之木瓜次之荆次之竹

为下苏轼云山桑之?惟东莱有之以之为繒其坚韧异常莱人谓之山茧柘亦桑类埤雅云柘宜山谷林兆珂云柘树高大如桑然枝条婀娜叶大仅如掌耳周礼季夏取桑柘之火礼记投壶篇矢以柘若棘无去其皮又古史考云乌号弓以柘枝为也蚕书云柘桑饲蚕其?作琴瑟弦清鸣响亮胜於凡?远矣本?云柘木里有纹亦可旋为器严云此章述大王迁岐也岐地险阻尤多林木民归之者衆乃竟刊除以立室家以治田亩陆佃云其始作之屏之者菑翳而已既又就者衆民无所居焉则其修之平之也及于灌桷其启之辟之也及于怪楮至其尤衆也无以处之则攘之剔之至於槩柘槩柘材之美者不得已而去之罗愿亦云始而屏除之也於已死之菑翳而及于龐裸之灌桷又及於怪楮之小材又不得已而及于槩柘之良木以明草木逾茂则始之所爱者不能并育以渐去焉故其卒至於柞械斯拔松柏斯兑也一说严云作屏修平启辟则皆除去其木攘剔则成长其木也桑柘之性以芟剔而後茂非除之也亦通迂尔雅云徙也明德朱子云谓明德之君即大王也愚按此明德但以光辉发越言不就心体上说德即仁民之德串当依陆元朗本作患诸家经本传写讹耳按说文有患字无串字患忧也从心上贯叩叩亦声叩音謹患之从串与忠之从中同意中从丨贯口盖取口如其心之义串从丨贯叩以二中定意以从叩得声二中犹言二心也心忧疑而不一是之谓患叩字本两口并列今变作两口相连以谐叩故有患音乃知串非字也董仲舒亦云持二中者谓之患患人之忠不一者也不一者故患之所繇生也据此患之字形字义皆恍然可识世俗传讹皆以串为贯串之义谬矣夷昆夷也载路与生民篇厥声载路解同朱子训载为满盖取满载之义立者建置之谓配通作妃即下章所谓对尔雅以对训妃是也厥配指文王也文王有王者之德可与天配故云然固说文云四塞也坚固而不可拔之意言帝虽迁明德之大王使居岐周之地而犹患昆夷满布道路时为周患及再传至文王天乃建之为己之配而於是乎我周所受于天之眷命从兹既已坚固也按天即帝也自形体言之为天自主宰言之为帝书益稷篇先言昭受上帝而後言天其申命用休康诰篇先言帝休而後言天乃大命文王与此诗先言帝後言天皆错综成文非有异义】帝省其山柞械斯拔【叶队韵蒲妹翻】松柏斯兑【叶队韵徒对翻】帝作邦作对【队韵】自大【音泰】伯王季【叶队韵陈第古音考云鱼对翻】维此王季【见上】因心则友则友其兄【叶阳韵虚王翻】则笃其庆【叶阳韵虚羊翻】载锡之光【阳韵】受禄无丧【阳韵】奄有四方【阳韵 赋也帝省以下四句承上文属文王言省说文云视也其山谓岐山也拔兑解见緜篇柞械可以资薪燎则拔而起之松柏虽稍有删剪然但求其可以通道而已故以斯兑言岐山之地本皆深林险阻无人之境先此大王虽曾用作屏修平启辟攘剔之力必至文王之世而生齿益盛往来大通故上帝省视其山而见其景象有如此也作郑云为也为邦谓兴周国也愚按周至此而始成其为邦故曰作邦即所谓周虽旧邦其命维新者作对即上章所云天立厥配也对本训应答以有问方有答故有相偶之义自从也追遡之辞大伯大王之长子王季大王之少子繇大伯让于王季而文王起故曰自大伯王季史记云古公有长子曰大伯次曰虞仲大姜生少子季历季历娶大任皆贤妇人生昌有圣瑞古公曰我世当有兴者其在昌乎大伯虞仲知古公欲立季以传昌乃二人亡如荆蛮文身断髮以让季历古公卒季历立是为公季孔子曰泰伯其可谓至德也已矣三以天下让民无得而称焉朱子云太王欲立贤子圣孙为其道足以济天下而非有爱憎之间利欲之私也是以大伯知之而不为狗王季受之而不为贪盖处君臣父子之变而不失乎中庸此所以为至德也刘汝楨云仲雍不去则季历不王此诗独言大伯而不及仲雍何欤大伯让固有之天下仲雍让本无之天下而难易分焉轻重判焉故但以嫡长言之孔子至德之称

其有味乎此诗耶邹忠胤云按古乐录称大王寢疾欲传李历於是大伯与虞仲去被髮文身托为王采药後闻大王卒还奔丧哭于门示夷狄之人不得入王庭季历垂涕而留之终不肯止适于吴是後季历作哀慕之歌曰先王既殂长寔异都哀丧腹心未写中怀追念伯仲我季如何梧桐萋萋生于道周宫馆徘徊台阁既除何为远去使此空虚支骨离别垂思南隅瞻望荆越涕泪交流伯兮仲兮逝肯来游自非二人谁诉此忧按此歌盖後人拟托然亦善为王季传心矣所云奔丧既毕不肯止适于吴当是实录盖至德如大伯必无父没不奔丧之理伯既坚意于让必不复踵采药衡山之故辙令人得以物色故知适吴在奔丧後也史记乃云大伯犇荆蛮自号勾吴荆蛮义之从而归之千余家立为吴大伯若荆即为吴者遂滋後人臆附後汉赵晔云殷末世衰中国侯王数用兵大伯恐及于荆蛮起城周三百里在西北隅名曰故吴卒葬于梅里平墟则又若吴即为荆者夫荆之为吴辽矣固若是乎无辨乎焦氏笔乘又云何谓荆蛮古者多有徙戎之事蛮之处于荆者或尝徙于吴大伯至其所徙之地焉尔此皆知其一未知其二也孔子称大伯三让必有所指夫适荆适吴亦云再而已矣按韩诗外传云大王贤昌而欲季为後也大伯去之吴大王将死谓曰我死汝往让两兄彼即不来汝有义而安大王薨季之吴告伯仲伯仲从季而归羣臣欲伯之立季季又让伯谓仲曰今羣臣欲我立季季又让何以处之仲曰要于扶微者可以立季季遂立而养文王文王果受命而王孔子曰大伯独见王季独知伯见父志季知父心故大王大伯王季可谓见始知终而能承志矣丰坊又云史记周本纪谓古公长子大伯次曰虞仲大姜生少子季历则大伯乃庶长而季历为嫡出也大伯庶出则国非其有季历固当立何以夫子谓之让殊不知夏商尚质之世其传惟在立长而未有嫡庶之辨至周始定立嫡之法盖自大伯不以长自居而以嫡推季历遂为万世之準则夫子据商礼而称之也观汤崩大丁先卒而立仲壬仲壬崩而立外丙微子薨而立微仲可见商礼如此若周制则汤崩之後即立大甲微子之薨即立膺矣陆燧云大伯王季两人皆可继世一逃一嗣有莫之为而为者诗人借此一段形容天命耳因心朱子云非勉强也周礼注云善於兄弟曰友李氏云孝悌之道岂可以伪为哉因其心而然耳其兄朱子云谓大伯也因心则友以平日言则友其兄以受让言陆化熙云兄让亦让此特友之形迹而已须知王季信得大伯心事过此是兄弟间所难万云圣贤作事可让则让可受则受无意无必无尔无我无假讹无避忌其於天亲之爱鞠子之哀分毫无损推而论之尧舜禹之授受不过如是个中父子兄弟相知相成深处当时人不能知後世人不能到使王季稍以形迹自疑逊而不居反不是因心反是不友胡安国云昔泰伯奔吴而不反季历嗣位而不辞武王继统受命作周亦不以配天之业让伯邑考官天下也笃通作竺说文云厚也庆福也此下四句不但言文王直主武王得天下言诗虽为文王咏而实作于武王之世观篇中无颂武王之事可见矣载之言则也锡通作赐说文云予也光字从火在人上说文云明也季本云王季友爱切至因於本心能体其兄大伯之意遂受而不辞故周家之庆益笃虽其功业非大伯所为而亦锡之以光如书所谓於汤有光也旧说以为与其兄以让德之光则与孔子民无得而称者有戾矣盖大伯之让止是家庭常事有何异焉而王季受之亦不以为将得天下也但原周所以得天下之繇则自王季受大伯之让始故推及大伯言之自史迁以来言此事者多失本意受禄谓王季受大伯之让而为诸侯也丧说文云亡也言能守先业不亡失也大伯既让国而逃使王季不受则周家之禄丧矣奄说文云覆也大有余也从大从申申展也孔云繇王季受此福祿无所丧亡故至其子孙而大有天下之四方也朱善云王业之成虽在於武王得天下之时而天命之定已见於大伯让王季之日大伯让焉而无迹王季受之而无愧此王业之所繇基也文王创造

於前武王继续於後此王业之所繇成也大伯当立而不立文王可为而不为故皆谓之至德非王季之友无以成大伯之志非武王之孝无以成文王之功武王之孝易知也王季之友难知也此诗人所以再三叹咏於王季也又真德秀云王季之友大伯也盖其因心之本然非以其逊已而後友之也昆弟至情出于天性岂有所为而为之乎使大伯未尝有逊国之事王季之所以友之者亦若是而已夫王季之友不过尽其事兄之道耳岂有心于求福哉闺门之内敬顺休洽固产祥之基也故厚其庆而锡之光受天之禄而有天下天之报施其亦明矣後世如汉显宗以东海王疆逊已而友之唐明皇以宋王成器逊已而友之其友虽同而所以友之则异盖王季之心无所为而然者也显宗明皇之心有所为而然者也此天理人欲之分而汉唐之治所以不若周之盛欤】维【左传作唯】此王季【左传韩诗王肃本俱作文王孔云此云维此王季彼言维此文王者经涉乱离师有异读後人因即存之不敢追改】帝度【音铎】其心【侵韵】貊【左传史记丰本俱作莫陆本作貉】其德音【侵韵】其德克明【叶先韵弥延翻】克明克类克长【上声】克君【叶先韵姑员翻】王此大邦【左传作国】克顺克比【纸韵乐记史记俱作俾下同】比于文王其德靡悔【叶纸韵虎洧翻】既受帝祉【纸韵】施于孙子【纸韵 赋也孙鑛云此度貊仍承上受国来度通作劇说文云判也剖析之义帝度其心与帝省其山同一文法承上章言王季虽受大伯之让而实无利于得国之心是心也惟上帝能剖析之耳或谓心即因心则友之心亦通貊据左传礼记皆作莫当通作嘆说文云口嘆也乃无声之义今文作寂寞严云天监知王季之心能以静养其令名非有心于干誉者愚按王季重在宗社见国之不得不受则默然而受之不计较于形迹以博交让之美名正是貊其德音处其德指因心则友之德克能也明亦光辉发越之谓曰其德克明则不惟帝能度之即人亦能亮之矣类似也说文云种类相似唯犬为甚故其字从犬克明克类言其德之明着与大王相似也类指明言不指德言诗意咏大王王季之德各有所指非混而一之也此结上王季受让之案克长克君又自其得国後而重叹美之克长言能为诸侯之长克君言能为一国之君孔丛子言周自王季始命为西伯是克长也旱麓篇以岂弟咏王季是克君也大邦指周也王此大邦是据理之辞言王季之克长克君如此虽进而兴王业于此大邦之地无所难者旧说谓自追王後言之故以王称王季非也邹云纬书纪季历十年飞龙盈於殷之牧野盖圣人在下位将起之符也乃诗不屑道第言其克长克君足王大邦而已上凝既固之命下衍笃庆之传岂偶哉顺者顺以事上所谓地道也臣道也比犹并也比肩事主之比言相聯比也其德谓克顺克比之德靡悔指文王言悔通作?字从卜易以变卦为?故?有变义今文皆作悔言王季之德足以化侯为王然终恪守臣节既能尽其柔顺之道又能聯比四方之诸侯以効力于上及其继世传至文王此四方之诸侯仍与文王相比以服事殷而文王亦于王季克顺克比之德踵而行之不少变焉盖我周之世笃忠贞如此祉说文云福也徐锴云祉之言止也福所止不移也施旗逶迤之貌故以为延引附着之义孙指武王以主王季言之孙之後又有子则武王之後人也文王之德自王季开之故帝祉之来亦自王季受之积厚流光时至事起延及武王遂有天下卜世三十卜年八百皆王季之祉所始也猗欤盛哉又左昭二十八年魏子谓成鑄吾与戊也县人其以我为党乎对曰何也夫举无他唯善所在亲疏一也诗曰唯此文王帝度其心莫其德音其德克明克明克类克长克君王此大国克顺克比比于文王其德靡悔既受帝祉施于孙子心能制义曰度德正应和曰莫照临四方曰明勤施无私曰类教诲不倦曰长赏庆刑威曰君慈和徧服曰顺择善而从之曰比经纬天地曰文九德不愆作事无悔故褒天禄子孙赖之主之举也近文德矣所及其远哉乐记子夏对魏文侯

曰君之所问者乐也所好者音也夫乐者与音相近而不同文侯曰敢问何如子夏对曰夫古者天地顺而四时当民有德而五谷昌疾疢不作而无妖祥此之谓大当然後圣人作为父子君臣以为纪纲纪纲既正天下大定然後正六律和五声弦歌诗颂此之谓德音德音之谓乐诗云莫其德音其德克明克明克类克长克君王此大邦克顺克俾俾于文王其德靡悔既受帝祉施于孙子此之谓也按成鑄以文王方魏斯既大不伦且误以诗言王季为文王又妄以文王之文为九德之一其余亦皆牵强铺排不成文理从来左传中解诗未有拙滞若斯者是固不足信若乐记以诗中有德音二字便取以证乐浅率殊甚俱无取焉】帝谓文王无然畔援【叶霰韵于眷翻汉书注作换】无然歆美【霰韵】诞先登于岸【叶霰韵鱼战翻】密人不恭【冬韵亦叶东韵读如弓居雄翻】敢距大邦【叶东韵悲工翻】侵阮徂共【叶冬韵居容翻亦叶东韵户工翻】王赫斯怒【叶麋韵暖五翻】爰整其旅【叶麋韵读如缕陇主翻】以按【孟子作遏】徂旅【见上孟子作莒】以笃于【孟子朱传丰本俱无于字】周祜【麋韵】以对于【丰本作乎】天下【叶麋韵後五翻 赋也五章六章述文王伐密之事朱子云帝谓文王设为天命文王之词如下所言也又云天岂谆谆然命之只是文王要恁地便是理合恁地便是天命之也无通作母禁止辞然通作嘽说文云语声也犹云如此也无然言母容诸侯之或如此也畔通作叛徐锴云离叛也援说文云引也此言与国也隣邦与国可以牵引相助谓之援歆说文云神食气也鬼神不能食物但食其气而已人之感物而动亦如之故程子以为欲之动也美本贪欲之义但既言歆又言美于义似复以上文畔援例之当通作衍衍者水有余而溢也周礼小司徒凡起徒役毋过家一人以其余为美孟子以美补不足皆同此解畔援谓自离叛其与国歆美谓规得他人之土地以自有余若下文密人之侵阮即其事也词放曰诞此则谓大言之也先犹亟也登尔雅云陞也岸崖之高者欧阳修云天谓文王无信纵诸侯之跋扈贪美者宜先居可胜以临之无信而纵之也岸高也当先据高以制下谓诸侯有为暴乱者先修威德以待之也按先儒皆谓无然畔援三句为赞美文王之德今玩无然两字明是戒词岂文王先有畔援歆美之事乎又以先登于岸为先登道岸更不知其所本当亦如佛家之云彼岸耶断不可从密王肃云密须氏姁姓之国也地理志云安定郡陰密县诗密人国括地志云陰密故城在鹑觚县西其东接县城按鹑觚故城在今平凉府泾州灵台县西五十里与邠州西界相接盖亦戎翟间之国隋取文王伐密而民始附之意以灵台名县距逆貌以鷄距之状取之大邦与上章大邦同敢逆大邦谓不遵方伯之约束此密人不恭之实即下文侵阮是也侵说文云渐进也左传云凡师有锺鼓曰伐无曰侵胡安国云潜师掠境曰侵又谷梁传云苞人民毆牛马曰侵季云阮在密之南界亦近邠之国徂说文云往也张氏云共阮国之地名阮共皆在今泾州今有共池即共也王文王也赫兼威明二义此专以威言斯语辞怒韵会云努也若强弩之发人怒则面目张起也整说文云齐也旅衆也师之通称按说文云下也广韵云抑止也徂即上文徂共之徂季云殷政不纲故诸侯放恣而密人敢侵小国然文王已为西伯则其所专征之地也於是整我之旅以遏密人徂共之旅整旅之旅文王之旅也徂旅之旅密人之旅也徂旅孟子作徂莒疏谓春秋书莒子盟于密则莒密之近地韩非亦云文王克莒今按古莒国即今山东青州府莒州其地去密须殊远孟子文以旅莒音近致误耳疏与韩说皆不足信笃解见第三章祜说文云福也周自大王王季积累以来获福旧矣今文王能遏密以安民则帝迁之命至是而益巩帝祉之受至是而益固故曰以笃于周佑对郑云答也孔云以天下心皆向己举兵所以答之严云天下之望在周所救者一阮而为乱者惧小国皆安故天下之心以慰也书传云文王受命三年伐密须今考史记伐密伐崇

事俱在伐昆夷之後竹书所载又俱在伐昆夷之先未详孰是皇甫谧云文王问大公吾欲用兵孰可大公曰密须氏疑於我我可先伐之管叔曰不可其君天下之明君伐之不义大公曰臣闻先王之伐也伐逆不伐顺伐险不伐易文王曰善遂侵阮徂共而伐密须密须之人自缚其君而归文王今按侵阮徂共乃密人事谧传误也齐宣谓孟子曰寡人有疾寡人好勇对曰王请无好小勇夫抚劒疾视曰彼恶敢当我哉此匹夫之勇敌一人者也王请大之诗云王赫斯怒爰整其旅以遏徂莒以笃周祜以对于天下此文王之勇也文王一怒而安天下之民又左文二年箕之役先軫黜狼瞫狼瞫怒其友曰盍死之瞫曰吾未获死所及彭衙既陈以其属驰秦师死焉晋师从之大败秦师君子谓狼瞫於是乎君子诗曰王赫斯怒爰整其旅怒不作乱而以从师可谓君子矣按如此引诗亦殊不伦】依其在京【叶阳韵居良翻】侵自阮疆【丰本作疆】陟我高冈【阳韵】无矢我陵我陵我阿【歌韵】无饮我泉我泉我池【叶歌韵唐何翻】度其鲜原居岐之阳【韵】在渭之将【叶阳韵资良翻】万邦之方【阳韵】下民之王【阳韵 赋也上 章言密人侵阮之後继以徂共则阮已被侵而共方告急文王整旅以按徂共之衆此章前七句皆咏救共时事依说文云倚也犹凭附也京周京也共告急而文王兴周师救之共地之民皆凭恃在京之衆以为安也自从疆界陟登也凡称我者皆指共地而言以文王师至其地故内之而称我也严云文王兴问罪之师视阮之地如己之地可谓公天下以为心矣阮不幸而与密为隣幸而遇文王为伯也尔雅云山脊曰冈文王师既至共而密人之从阮界来侵者不敢与文王争锋羣然陟于高冈之上盖据险以自固也旧说以侵自阮疆为文王从阮侵密则王者之师声罪致讨不应若寇盗然於理踈矣矢指也高平地曰陆大陆曰阜大阜曰陵大陵曰阿皆见说文易云山下有泉孔安国云停水曰池此四句乃文王为持久之计以困密人盖密人既先据高冈此难与争地利惟令其求下不得则彼将坐困故遥为语以告之曰吾大军四集汝已自投死地虽急而欲逸无望指我之陵与我之阿也虽渴而欲水无望饮我之泉与我之池也中间我陵我泉各叠二字亦自有意陵或山腰不可得矢况阿尤夷於陵乎泉出山下不可得饮况池尤卑於泉乎按孙子军争篇云用兵之法高陵勿向背丘勿逆地形篇云险形者我先居之必居高阳以待敌若敌先居之引而去之勿从也故赵奢救阨与许历曰先据北山者胜奢从之秦师後至争山不得上大败而还然则密人先陟高冈已为得地难以速胜此文王之所以不与争利也行军篇云凡处军相敌絶山依谷又六韬太公云凡三军处山之高则为敌所栖故武都羌在氐道山上马援军据便地夺其水草不与战羌遂穷困亡走出塞马谡依阻南山不下据城张合絶其汲道而击之又如刘先主升马鞍山陈兵自绕陆逊四面蹙之土崩瓦解死者数万然则密人虽据高冈实为絶地围则受困此文王之所以一于持久也考竹书纪商纣三十二年密人侵阮西伯帅师伐密三十三年密人降于周师计伐密距密降之时尚隔一年其为持久以困之明甚吕氏春秋言密须之民自缚其主而与文王当繇势蹙力穷故尔罪魁既得长围遂解则又文王之仁也度犹过也借渡水之渡为义尔雅云小山别大山曰鲜孙炎云别不相连也按逸周书和寤解云王乃出图商至于鲜原竹书纣五十二年周始伐殷师次于鲜原孔晁以鲜原为近岐周之地据此则鲜原乃岐周往来所必经者度其鲜原文王因密人既服班师而归道经于此居岐之阳仍是归于岐周鲁颂实维大王居岐之阳与此语同可证将毛云侧也按将有左右扶持之义故因训为侧方说文云并舡也礼大夫方舟徐锴云方舟今之舫竝两舡也因上有在渭之文故云然言文王归居岐周其地在渭水之侧但见万邦诸侯遣其大夫乘方舟渡渭而来聘问者相属不絶文王虽未为王而天下之民皆以王尊之其得人心如此此伐密以对于天下之效也自

郑玄以度鲜原居岐阳为迁都之事孔颖达遂引周书称文王在程作程寤程典及皇甫谧言文王徙都於程以实其说先儒皆从之季本谓考史记无迁程之事又观文王有声之诗历叙文武丰镐之迁而不及於程则迁程之事本不经见今按竹书周自季历之世已作程邑文王释羑里之囚诸侯尝逆之归程及降密之年又书遂迁於程其後周大饥复自程迁于丰与逸周书大匡解称王宅程三年遭天大荒之语殊合国名记亦云程在今咸阳亦在岐南与毕陌接所谓毕程孟子言文王卒於毕郢是也文王伐密而迁程其事或有之不可知但此诗所咏止言其班师归岐耳了无及迁都之事读者详之】帝谓文王予怀【墨子怀下有而字】明德【职韵】不【墨子作毋下句同】大声以色【职韵】不长【上声】夏以革【叶职韵乞力翻】不【淮南子新书俱作弗】识不【淮南子新书俱作弗】知顺帝之则【职韵】帝谓文王【阳韵】询尔仇方【阳韵】同尔兄弟【後汉书作弟兄当从之叶阳韵】以尔钩援与尔临【韩诗作隆】冲【冬韵後汉书作冲说文作𡗗】以伐崇墉【冬韵後汉书作庸赋也七章八章述文王伐崇之事苏辙云凡言帝谓文王以意推天也朱子云予说为上帝之自称也怀眷念也明德文王之明德也按篇中三言明德皆主发用言与尧典康诰言明德皆同下文不大声四句正文王明德之实大声与以色对看以说文云用也不大声谓不夸耀其音闻如条教号令之类不以色谓不粉饰于迹象如弛张因革之类长即第四章克长之长夏说文云中国之人也郑云诸夏也以革之以与上句以色之以不同尔雅疏谓以者因前起後之语是也革毛云更也说文谓兽皮治去其毛更之义也不长夏以革者言不必临长诸夏而诸夏已无不变革见圣德之神于化也文王位为西伯其所长者仅西方之诸侯此以夏言是槩指中国惟天子乃可称长夏耳程子云天谓文王予怀尔之明德不大其声色而人化夫圣人之诚感无不通所过者化所存者神岂暴着其形迹也哉故孔子曰声色之於以化民末也愚按孔子言化字正解革字不大声以色所谓闇然也不长夏以革所谓日章也识知二字从来俱无明解说文解识为常解知为词茫然莫晓以愚意分别之识者得之於外当是闻人所常言而後识之故其字左从言右施哉赵颐光谓哉即帜字默传军令故从音盖会意也知者得之於内既我有真知乃出而与人道之故其字右从口左施矢其从口也说文所以训之为词其施矢也徐锴解以为知理之速如矢之疾是也知比识为深故乐记曰知礼乐之情者能作识礼乐之文者能述而陈阳解之曰识之外矣知之内矣识之浅矣知之深矣顺犹循也说文云理也从页从川会意按页者首也首者人之百脉所会血气顺行如川水顺下故从川此所谓会意也则者裁制之谓说文云等画物也从刀从贝古之物货也徐锴云则者节也取用有节刀所以裁制之也苏云文王之德不以识识不以知知漠然无心而与天为徒严云天理之自然谓之则即有物有则乃见天则谓理之不可踰也文王无一毫人伪之私油然大顺安行乎天理所谓顺者繇仁义行非行仁义也程子云不识不知顺帝之则不作聪明顺天理也墨子云此语文王之以天志为法也又云帝善其顺法则也故举殷以赏之文中子云温彦博问知子曰无知问识子曰无识彦博曰何谓其然子曰是究是图亶其然乎彦博退告董常常曰深乎哉此文王所以顺帝之则也又左僖九年齐隰朋帅师会秦师纳晋惠公秦伯谓公孙枝曰夷吾其定乎对曰臣闻之唯则定国诗曰不识不知顺帝之则文王之谓也今其言多忌克艰哉襄三十一年北宫文子曰君有君之威仪其臣畏而爱之则而象之故能有其国家令闻长世周书数文王之德曰大邦畏其力小邦怀其德言畏而爱之也诗云不识不知顺帝之则言则而象之也又荀子云礼者所以正身也师者所以正礼也无礼何以正身无师吾安知礼之为是也礼然而然则是情安礼也师云而云则是知若师也夫师以身为正仪而贵自安

者也诗曰不识不知顺帝之则此之谓也亦断章取义非诗正旨愚按惟不识不知所以能顺帝则惟顺帝则而一举一动无不合乎天理当乎人心所以不大声色而人自化之夫至于人化则德之光显孰加焉故曰明德言此以起下文伐崇含有二义一则承不大声二句见崇之可伐程子所谓圣人之化如此而天下有昏恶之甚不能化者谋而伐之则天下皆然而王业成一则承不识不知二句见惟文王乃可以伐崇吕氏所谓文王德不形而功无迹与天同体而已虽兴兵以伐崇莫非顺帝之则而非我也冯时可云心不物役常在事外则虽文王伐崇伐密钩援临冲执讯攸馘扰攘仓猝而依依安安未尝不恬退也故诗曰不识不知顺帝之则文王但知密人不恭於天则不可不伐顺天则行之而已何尝有利土地耀甲兵之意诗人盖深知文王者矣欧阳云诗人上述侵密伐崇皆先言帝谓者古人举事必称天於兴师讨伐犹托天命如天讨有罪肃将天威恭行天罚之类是也询说文云谋也郑云诸侯为暴乱大恶者汝当谋征讨之仇说文云讐也方即上章所云万邦之方仇方指崇侯虎也万邦皆方舟以归心于文王崇侯恶之独与万邦为讐故曰仇方犹书言葛伯仇饷也按史记云崇侯虎譖西伯於殷纣曰西伯积善累德诸侯皆向之将不利於帝纣乃囚西伯於羑里此即所谓仇方者也囚羑里据诸书在伐密之前然竹书纪商纣二十一年春正月诸侯朝周至二十三年始囚西伯於羑里则先此固有渡渭朝周之事矣又旧说谓方者居一方之辞仇方指仇讐之国言亦通虎导纣为无道其譖周也盖欲剪其所忌以悉其殃民之毒故文王奉天伐之非为报私怨也同说文云合会也兄弟朱子云与国也彭执中云以诸侯之国为兄弟亦未尝称王一验钩毛云钩梯也孔云钩援一物正谓梯也以梯倚城相钩引而上援即引也墨子称公输般作云梯以攻宋盖此之谓临毛云临车也冲毛云冲车也孔云临者在上临下之名冲者从旁冲突之称故知二车不同并书有作临车冲车之法墨子有备冲之篇知临冲俱是车也陈祥道云临车高冲车大高则可以临下大则可以突前楚子使解扬登楼车以告宋人盖临车之类也孙武子曰攻城之法修其辳輶盖冲车之类也荀子曰渠冲入穴而求利杨子曰冲不芥皆言冲车之大也又冲说文作𡗗云𡗗陈车也季云临冲皆临时所制非田赋所出之革车也然古者寓兵於农所赋惟以兵数而车皆官所自造故能合辙临冲之直则亦取於赋兵常数之中非使民另为此车以供军用也崇国名在今陕西西安府鄠县夏时扈国殷为崇国路史以为夏后氏後盖据鯀封崇伯而云也墉说文云城垣也徐云筑土垒壁曰墉通呼曰城李云备钩援临冲以为攻城之具亦可见崇之负固矣】临冲闲闲【叶先韵何甄翻】崇墉言言执讯【释文云字又作讯又作谄】连连【先韵】攸馘【陆本作馘】安安【叶先韵於?翻】是类【释文云或依说文作𡗗尔雅同】是禡是致是附【宥韵亦叶夔韵宗五翻】四方以无侮【夔韵叶宥韵莫候翻】临冲茀茀【勿韵】崇墉屹屹【勿韵说文作屹屹】是伐是肆【丰本作是肆是伐】是絶【丰本作?】是忽【叶勿韵卢屈翻】四方以无拂【勿韵 赋也闲通作闲安暇之意兼临与冲二者言之曰闲闲严云文王之问罪于崇其始未忍攻城故临冲之车闲闲而不用言谓以言语相通时必有遣使先入崇墉谕降之事我以言往彼以言来曰言言执捕罪人也讯问也俱见说文意崇侯负固倔强所遣先後传言之人必变诈不一故捕执而讯问之又左文十七年晋侯不见郑伯以为贰於楚也郑子家使执讯而与之书以告赵宣子杜预注云执讯通讯问之官程大昌云兵交使在其间故诗亦曰执讯也按执讯即如左传解亦可但玩上下文语意从前义为长连说文云员连也从辵从车会意盖状其接属而来如转毂然攸尔雅云所也馘馘说文原有二字而义同谓军战断耳之名孔引玉藻云聼向任左故不服者杀而献其左耳曰馘罪其不聼命服罪故取其耳以计功也今按陆元朗引字

林云截耳则作耳傍献首则作首傍此解较确安安指崇侯虎言执讯之後有所斩馘要以宣示威灵动其警悟而崇侯恬然安静绝不介意其为肆无忌惮不可教诲明矣按左僖十九年宋人围曹司马子鱼言于宋公曰文王闻崇德乱而伐之军三旬而不降退修教而复伐之因垒而降今君德无乃犹有所阙而以伐人若之何盍姑内省德乎襄三十一年卫北宫文子亦云文王伐崇再驾而降为臣蛮夷率服及後汉书伏讳疏云崇国城守先退後伐所以重人命俟时而动故参分天下而有其二此章首四句即三句不降之事自是类而下皆再驾复伐时事也尔雅云是类是禡师祭也类者类於上帝尚书周礼说皆谓其礼依郊祀而为之故曰类字本作灋又周礼小宗伯职云凡大裁类社稷宗庙或者遂谓类乃类聚羣神之当祭者不必祭天今按棫朴之诗董仲舒以为咏伐崇事明有薪粦之语非类上帝而何但此乃复伐之祭其始伐之祭何以不言愚意当与棫朴之诗互相备彼纪其先此纪其後又或者始伐第命将以行至复伐乃文王亲征故有类祭与棫朴之薪粦同为事皆不可知禡者禡於所征之地埤苍云马上祭也杨慎云马上祭曰禡其字从马犹车下祭曰輶其字从车也按郑氏於王制注谓禡祭礼亡而於周礼肆师注又云祭造军法者其神盖蚩尤或曰黄帝季本不然其蚩尤之说谓黄帝圣人也蚩尤敢与黄帝拒战逆臣也何得与于祭此其理亦正然上古之事荒忽莫能明也又详见吉日篇程子云古者出征类禡所以暴明其罪告之神明伐而告之神明其伐合神明之道也王安石云致致其至也附使之内附也严云致以招其来附以纳其降愚按是致是附当作一直说兵威既临而於是乎广布仁恩以招致是归附之衆俾敌之党益孤而我亦不至多有杀戮此伐国之道也四方者广指之非以在行间之与国言郑云文王伐崇而无复敢侮慢周者孔云竟文王之世不复伐国是繇无悔故也弗即易既济卦妇丧其茀之茀尔雅輿革前谓之鞬後谓之茀名茀取蔽之义草木翳荟为茀临冲皆攻城之车其前面向城自不容有蔽但见二车後之茀茀而已亦以防矢石之自後至也仡本勇壮之义秦誓仡仡勇夫是也似於言城墉无当宜依说文作圻云墙高貌伐说文云击也字从人持戈又伐与侵异义见第五章肆本训极故为放恣之义絶说文云断刀也此谓断其宗祀忽本训忘亦为轻忽之义肆忽皆指崇侯失德言拂通作拂说文云违也文王所伐者乃是恣肆无道之崇侯所絶者乃是轻忽无礼之崇侯四方闻之皆谓诛当其罪无有违拂也说苑云文王欲伐崇先宣言曰余闻崇侯蔑侮父兄不敬长老聽讼不中分财不均百姓力尽不得衣食余将来征唯为民乃伐崇令母杀人母坏室母填井母伐树木母动六畜有不如令者死无赦崇人闻之因请降今按令母杀人母坏室等事则此诗所谓是致是附者也曰聽狱不中分财不均百姓力尽不得衣食即此诗所谓是肆者也曰蔑侮父兄不敬长老即此诗所谓是忽者也诗与说苑之相合如此竹书以为商纣三十四年事又史记载九侯有女入之纣女不喜淫纣怒杀之而醢九侯鄂侯争之强辨之疾并脯鄂侯西伯闻之窃叹崇侯虎知之以告纣纣囚西伯羑里西伯之臣閎夭之徒求美女奇物善马以献纣纣乃赦西伯赐之弓矢鈇钺得专征伐曰諧西伯者崇侯虎也西伯归三年伐崇侯虎而作丰邑方孝孺云崇侯之事远不可知其详矣吾意其人必比凶党恶不供职于天子而侵害其与国故西伯伐之必不以其諧已也不然西伯尝伐犬戎密及耆矣则此四国者又岂皆諧西伯者耶邹云按竹书商纪武乙二十四年周师伐程战于毕克之正当季历之初服又尝伐义渠伐西落鬼戎伐余无之戎始呼之戎翳徒之戎而诗不一及之独侈言文王之遏徂旅伐仇方岂所重在此不在彼耶】

皇矣八章章十二句【陆德明云一本无矣字 朱子以为此诗叙大王大伯王季之德以及文

王伐密伐崇之事云一章二章言天命大王三章四章言天命王季五章六章言天命文王伐密七章八章言天命文王伐崇夫一章言文王起之二章言文王终之三章又言文王起之四章又言文王终之意皆为文王发也今乃截然分作四柱可谓得诗意否欤申培说剽朱子其陋斯甚子贡传又以此为训成王之诗按三章之末言奄有四方四章之末言施于孙子皆指武王言疑此诗定作于武王之世果若作在成王时亦必兼扬厉武王功德矣】

天作祀岐山之乐歌【出季本诗说解颐 按易升卦六四之爻曰王用享于岐山吉则岐山之祭周固有之矣此诗所颂止及太王文王而末系子孙保之一语先言子而後言孙定是武王时所作岂亦在柴望大告武成之日与邹忠胤云天子为百神主岐山王气攸鍾岂容无祭祭岂容无乐章不言及王季者以所重在岐山故止挈首尾二君言之也】

天作高山大【音泰】王荒【阳韵】之彼作矣文王康【阳韵】之彼徂【沈括笔谈作岨朱传从之王应麟云笔谈引朱浮传作彼岨者岐今按後汉朱浮传无此语西南夷传朱辅上疏曰诗云彼岨者岐有夷之行注引韩诗薛君传曰徂往也盖误以朱辅为朱浮亦无岨字朱子云韩子亦云彼岐有岨疑或别有所据丰氏本亦作岨】矣【句朱传连下岐字读为句黄震云上云彼作矣下云彼徂矣自相对今以岐字缀徂矣之下恐惊俗也後汉书矣作者】岐【韩诗外传作歧】有夷之行【叶阳韵户郎翻】子孙【说苑孙下有其字】保之【章末不用韵亦变体 赋也作说文云起也高山以下文证之谓岐山也高山起于平地之上若天所締构然故曰天作张叔翹云周家王业实始于岐故大雅歌其帝省周颂谓之天作大王古公亶父也荒尔雅云奄也按荒者草淹地也故有奄义奄之为言覆也大王荒之者言此岐山之地大王一旦奄而有之也又晋语郑叔詹谓郑文公曰臣闻之亲有天在周颂曰天作高山大王荒之荒大之也大天所作可谓亲有天矣此训荒为大然于文气欠顺彼承上文谓大王也作亦训起但语意与天作之作不同言大王始起而居此地也文王大王之孙康尔雅云安也大王迁都岐下文王嗣兴惠鲜怀保从而安康之使其民有固志孟子言文王之治岐耕者九一仕者世禄关市讥而不征泽梁无禁罪人不孥发政施仁必先鰥寡孤独即其事也荀子云王者之等赋政事财万物所以养万民也田野什一关市几而不征山林泽梁以时禁法而不税相地而衰政理道之远近而致贡通流财物粟米无滯留使相归移也四海之内若一家故近者不隐其能远者不疾其劳无幽闲隐僻之国莫不趋使而安乐之故泽人足乎木山人足乎鱼农夫不断削不陶冶而足械用工贾不耕田而足菽粟天之所覆地之所载莫不尽其美致其用上以饰贤良下以养百姓而安乐之夫是之谓大神诗曰天作高山大王荒之彼作矣文王康之此之谓也又云治乱天耶曰日月星辰瑞历是禹桀之所同也禹以治桀以乱治乱非天也时耶曰繁启蕃长於春夏畜积收藏於秋冬是又禹桀之所同也禹以治桀以乱治乱非时也地耶曰得地则生失地则死是又禹桀之所同也禹以治桀以乱治乱非地也诗曰天作高山大王荒之彼作矣文王康之此之谓也彼承上文谓文王也徂说文云往也夷说文云平也行朱子云路也保者抱持不失之义孝经注以为安镇是也文王虽往矣而此岐山之地为万邦之所归往至今有平夷之道路焉子孙当世世保守而不失也邓元锡云曰荒括诸疆理宣亩揀度筑削作庙立门之事曰岐有夷行括拔兑夷喙之事盖绵皇矣数十百言括之数言中而足也陈际泰云祖宗之建国也据形势之便有天意焉有地利焉周大王於岐山用是道矣文王奄有天下三分之二几于改物然先定根本而後能有所立以徐候乎天下之自集

至子孙始用汧渭之地捐以予秦及诗人有作而已知秦之履奄及终南駸駸乎吞八州而朝同列嗟嗟使子孙诚能保之即何以有秦哉黄佐云春秋公入祊郑伯假许圣人讥其有无亲之心谓其与人以先祖所受之邑也岐周之地荒之者大王康之者文王创立之难有如此者後世子孙懦弱举而弃之如敝屣然无亲之心孰甚耶又薛君云夷易也行道也彼百姓归文王者皆曰岐有易道可往归矣易道谓仁义之道而易行故岐道阻险而人不难刘向说苑云齐宣王谓尹文曰人君之事何如尹文对曰人君之事无为而能容下夫事寡易从法省易因故民不以政获罪也大道容衆大德容下圣人寡为而天下理矣诗人曰岐有夷之行子孙其保之宣王曰善韩诗外传云昔者舜甑盆无臚而下不以余获罪饭乎土簋啜乎土型而农不以力获罪麤衣而整领而女不以巧获罪法下易繇事寡易为功而民不以政获罪故大道多容大德衆下圣人寡为故用物常壮也传曰易简而天下之理得矣忠易为礼诚易为辞贤人易为民工巧易为材诗曰岐有夷之行子孙保之以上数条皆同毛郑之说然恐非诗意】

天作一章七句【序云祀先王先公也蔡邕独断亦然夫祀先王先公而止及大王文王彼大王之前有后稷文王之前有王季何不一齿及坎礼经中曾有此祀典否坎朱子止以为祭大王之诗亦疑其不应独遗王季故耳然篇中何以兼颂文王邹駁之云夫序增入诗中所无之先公而朱子又偏遗诗中所有之文王均之莽矣申培说则曰周祭岐山配以大王文王之诗夫以二王配岐山于礼无所载皆臆说也子贡传阙文】

既醉神嘏也武王大祀宗庙礼成受厘宗祝传公尸之辞以致告【嘏者祝为尸致告于主之辞郊特牲云嘏长也大也礼运云嘏以慈告按竹书载武王?商之次年荐殷于太庙遂大封诸侯此诗之作或在是时于何知之以令终有俶之语知之俶者始也武王即位之始也然则文王武王亦皆有始矣何以知其非文王成王之诗也愚又以君子有孝子之语知之文王受命惟中身而考其生武王亦适在五十岁成王年十三践天子位而康王犹未生是二王初嗣服时皆未有胤子可从祭也唯武王?商之年成王已九岁自是之後诸弟以次受封计成王必早正胤嗣之位则餽献受爵固能之矣谓非武王之诗而何邓元锡云既醉神答君乡之斯飧之飧之斯答之矣嘉与显相嗣子竭诚尽慎以事其先王故神锡祚胤永永焉微积诚也能致然乎】

既醉以酒既饱以德【职韵亦叶屋韵都木翻】君子万年介尔景福【屋韵亦叶职韵笔力翻 赋也毛传云既者尽其礼终其事醉饱谓尸醉饱也此以馈食之时言杨氏云按仪礼特牲馈食士礼也少牢馈食大夫礼也大夫士之祭不裸不荐血牲惟行馈食礼天子诸侯馈食之前堂上设南面位行裸鬯荐腥之礼而後延尸入室东西位行馈食礼愚按此时尸始饮食及告饱主人酹尸尸遂嘏主人此诗通篇皆尸嘏王之语故但据馈食时为言所饱者黍稷也而曰饱以德者即周书黍稷非馨明德惟馨之意德谓仁孝之德郑玄云在意曰满谓之饱德孟子见世人之欲贵因引此诗而释之曰言饱乎仁义也所以不愿人之膏粱之味也识己之仁义足以饱人则人世之膏粱俱属无味矣今尸之告饱亦饱于王仁孝之德耳如徒恃黍稷以荐馨亦何足饱之有又坊记子云敬则用祭器故君子不以菲废礼不以美没礼故食礼主人亲馈则客祭主人不亲馈则客不祭故君子苟无礼虽美不食焉易曰东隣杀牛不如西隣之禴祭实受其福诗云既醉以酒既饱以德以此示民民犹争利而忘义引此亦借以明行礼重

诚敬不重仪物之意与诗旨正足相发君子谓主祭者指王也後仿此万年祝其壽考介助也尔朱子云亦指王也景福谓昭明可见之福此尚虚言之後章乃历道其实左襄二十七年楚蕩罢如晋涖盟晋侯享之将出赋既醉叔向曰蕩氏之有後于楚国也宜哉承君命不忘敏】既醉以酒尔殽【丰氏本作肴】既将【叶阳韵资良翻】君子万年介尔昭明【叶阳韵谟郎翻 赋也殽通作肴朱子云俎实也愚按此即仪礼所称脊干觶肩及折俎庶羞兽鱼之类皆侑食时所用者天子祭祀之俎实未闻据此对酒言殽则前章称饱属黍稷可知矣昭说文云日明也昭明同义然此既以昭明对言则昭当为小明明当为大明中庸斯昭昭之多是也介尔昭明者为助发其智虑小事大事皆无不明也孔颖达云与之以昭明之道谓使之政教常善永作明君也曹居贞云老将智而耄及之古人所病天既锡之以壽考又大之以昭明则受福无穷也或以昭明为明德亦通但上章言既饱以德则德已无不明不应至此始言助之明德耳】昭明有融【东韵】高朗令终【东韵】令终有俶【屋韵】公尸嘉告【叶屋韵居六翻 赋也融说文云炊气上出也服?云高也左传云明而未融其当旦乎昭明有融兼位言之言其明高出足以照临四方所谓居上克明也下文言高即有融也言朗即昭明也徐锴以月之明为朗高朗者明之盛也令终朱子云善终也万年皆此高朗则能善其终矣俶尔雅云始也又云作也邢昺云动作之始也朱子云欲善其终者必善其始今固未终也而已有其始矣愚按时武王新即位故以有俶言吕祖谦云周之追王止于太王则宗庙之祭尸之尊者乃公尸也陈祥道云父为士子为大夫葬以士礼而祭之尸则服士服父为大夫子为士葬以大夫礼而祭之尸则服大夫服故周官司服享先公则鹭冕以为祭则各以其服授尸尸服鹭冕而王服衮以临之则非所以致敬故不敢也愚按如前说则此公尸当是於诸祖中举其最尊者乃后稷之尸也周旅酬六尸先儒谓后稷之尸发爵不受旅是也朱子援引秦已称皇帝而其男女犹称公子公主谓周称王而尸但曰公尸盖因其旧殊属臆说又何休谓天子以卿为尸诸侯以大夫为尸卿大夫以下以孙为尸毛传同其说谓天子之卿盖诸侯也未详何据郑玄则谓诸侯有功德者入为天子卿大夫故云公尸公君也孔颖达引曾子曰王者宗庙以卿为尸射以公为耦不以公为尸避嫌也此言公者卿六命出封则为侯伯故得以公言之又引石渠论云周公祭天用太公为尸白虎通云周公祭太山用召公为尸谓天地山川得用公皆牵强附会絶非事实嘉告郑云以善言告之谓嘏辞也通篇皆宗祝传公尸之意所谓工祝致告者】

其告【音鞫】维何筮豆静嘉【叶歌韵居何翻】朋友攸掇掇以威仪【叶歌韵牛荷翻 赋也自此章已後首尾相衔亦剡体维何问辞也推其故也筮说文云竹豆也面径尺柄尺尔雅云木豆谓之豆崇尺厚半寸其实皆容四升周礼筮人掌四筮之实朝事之筮其实糒蕡白黑形鹽臠鮑鱼鱠馈食之筮其实枣?桃乾?榛实加筮之实菱芡?脯羞筮之实糗餌粉餼人掌四豆之实朝事之豆其实韭菹醯醢昌本麋饔菁菹鹿饔?菹麋饔馈食之豆其实葵菹羶醢脾析麋醢蜃蜃醢豚拍鱼醢加豆之实芹菹兔醢深蒲醢醢箬菹雁醢笋菹鱼醢羞豆之实醢食糝食滌濯之治曰静新美之荐曰嘉朋友朱子云指宾客助祭者刘公瑾云将祭之先筮其臣之吉者使之助祭谓之宾客谓之朋友皆尊之之词所以重祭祀也攸尔雅云所也掇说文云引持也犹言简束也威仪谓进退趋跄之节以主祭者言左传北宫文子云有威可畏谓之威有仪可象谓之仪周诗曰朋友攸掇掇以威仪言朋友之道必相教训以威仪也孔云公尸以善言告者是何故乎繇祭饌则洁清而美助祭者又相歛掇以威仪当神之意也黄氏云祭不在物而在诚诚之所可见者寓于威仪之间愚按唯助祭者皆敬则主祭者之威仪自莫不敬

矣即谓本于朋友之摄之可也緇衣篇子曰轻絶贫贱而重絶富贵则好贤不坚而恶恶不着也人虽曰不利吾不信也诗云朋友攸摄摄以威仪家语荀子皆云子贡问于孔子曰赐倦于学矣愿息于朋友孔子曰诗云朋友攸摄摄以威仪朋友难朋友焉可息哉此虽断章取义然可以得摄威仪之说知非指朋友之自摄言也】威仪孔时【叶纸韵上纸翻亦叶寘韵时吏翻】君子有孝子【纸韵亦叶寘韵资四翻】孝子不匮【寘韵】永锡尔类【寘韵赋也威仪孔时承上文指王言也孔郑云甚也陆化熙云礼有先後节次如始而求神终而献尸威仪不一】

【而悉如其节故曰孔时孝子谓主祭者之嗣子文王世子篇云其登餽献受爵则以上嗣陈皓云登自堂下而升堂上也以特牲礼次序言之先时祝酌爵觶奠于鉶南俟主人献内兄弟毕长兄弟及衆宾长为加爵之後宗人使嗣子饮鉶南之奠爵嗣子盥而入拜尸执此奠爵嗣子进受复位而拜尸答拜嗣子饮毕拜尸尸又答拜所谓受爵也嗣子又举所奠爵洗而酌之以入献尸尸拜而受嗣子答拜所谓献也无算爵之後礼毕尸出乃餽餽食尸之余也宗人使嗣子及长兄弟升堂相对而餽也此三事者受爵在先献次之餽最後今逆言之上嗣适子之长子为最上也吕大钧云孝子饮奠所以致其传付祖考德泽之意深矣自孝子不匮至末皆预祝其後日之词匱说文云匣也毛训为竭者当是匣中空之义言不独今日之君子能率其嗣子有诚敬以事宗庙之孝又祝其异日嗣子更有不匮之孝也祭义曾子曰孝有三小孝用力中孝用劳大孝不匮思慈爱忘劳可谓用力矣尊仁安义可谓用劳矣博施备物可谓不匮矣观此则博施备物乃不匮之明训一说只就祭祀时言当旅酬告利成之後而其诚不少衰竭于祀祭迎尸之始故曰不匮亦通又坊记子云从命不忿微谏不倦劳而不怨可谓孝矣诗云孝子不匮此亦言孝诚不衰竭之意永锡尔类郑云长以与尔之旅类谓广之以教道天下也严云圣人之於民类也同此类则同此心孝者人心之同然以心感心放之四海而準是锡类也洪范锡福之意亦如此左隐元年郑伯克段于鄢遂寘姜氏于城潁潁考叔闻之有献于公公赐之食食舍肉曰小人有母亦尝君之食矣未尝君之羹请以遗之公曰尔有母遗繫我独无遂为母子如初君子曰潁考叔纯孝也爱其母施及庄公诗曰孝子不匮永锡而类其是之谓乎成二年晋侯与齐侯战于鞏齐人致赂晋人不可曰必以萧同叔子为质对曰萧同叔子非他寡君之母也若以匹敌则亦晋公之母也吾子布大信于诸侯而曰必质其母以为信其若王命何且是以不孝令也诗曰孝子不匮永锡尔类若以不孝令于诸侯其无乃非德类乎家语荀子皆云子贡问于孔子曰赐倦于学矣愿息事亲孔子曰诗云孝子不匮永锡尔类事亲难事亲焉可息哉合观此可以得锡类之义一说彭执中云孝子之後必有孝子继之盖天之锡君以类相从必然之理也後汉杨氏事姑孝姑曰我老无以报妇愿尔生孝子即此意也亦通】其类维何室家之壺【叶震韵困闰翻】君子万年永锡祚胤【震韵赋也其类维何者犹云所言锡尔类者云何乎下句乃指其实壺本作𩚑今文作壺与壶尊之壺以一下多一画为异尔雅云宫中巷说文云宫中道字象宫垣道上之形室家之壺言其事只在家庭间谓感上不匮之孝皆能兴起乎孝道也祚说文云福也後二章是也胤毛云嗣也即上章所云孝子也君子固已享万年之壽考矣而其胤子有不匮之孝天又将长与之以福也周语晋叔向聘于周单靖公享之俭而敬叔向曰周其兴乎其有单子也单若不兴子孙必蕃後世不忘诗曰其类维何室家之壺君子万年永锡祚胤类也者不忝前哲之谓也壺也者广裕人民之谓也万年也者令闻不忘之谓也祚胤也者子孙蕃育之谓也解亦近似一说永锡尔类以己

之子孙继孝言则室家之壺只就己之室家言亦通】其胤维何天被尔禄【屋韵亦叶沃韵力玉翻】君子万年景命有仆【沃韵亦叶屋韵步木翻 赋也其胤维何犹云所言锡祚胤者云何乎下文言天被尔禄言景命有仆皆所谓祚也被者寝衣之名故有蒙覆在躬之义尔仍指王言禄即天禄言天锡祚于尔之胤子还被覆以尔所膺之天禄也景说文云光也景命谓明命也仆犹属也毛云附也孔云以仆御必附近于人故以仆为附君子万年其享此天禄亦已久矣乃万年之後帝眷之明命依然附属于我周而未已周书所谓惟王子子子孙孙永保民者也天被尔禄主胤子之身言景命有仆主胤子之後人言下章言从以孙子是也】

其仆维何厘尔女士【纸韵】厘尔女士【见上列女传作士女】从以孙子【纸韵 赋也厘即受厘之厘说文云家福也应劭云祭余肉也顏师古云字本作禧假借用耳女士郑云女而有士行者按礼祭必夫妇亲之君致齐于外夫人散齐于内君纯冕立于阼夫人副褱立于东房及迎牺君执紉夫人荐说君执鸾刀羞哂夫人荐豆君西酌牺尊夫人东酌鬯尊卿大夫相君命妇相夫人君与夫人交献以嘉魂魄是谓合莫周礼内小臣若有祭祀则摈诏后之礼事外宗佐王后荐玉豆眡豆筮王后以乐羞盥则赞内宰赞瑶爵此女士指王后也前皆以嘏予玉此特以厘予王后王后无饮福受胙之礼而嘏辞及之所以为周备也今安邑姜为十乱之一是女而有士行者也从郑云随也前三章既皆言孝子矣故此厘王后不言子而但祝其子之生孙以世子诵时尚幼孙犹未生故预祝之孙之後又有子则无穷之辞也子复有子孙复有孙景命有仆长远不替嘏于是乎大备】

既醉八章章四句【序云既醉太平也醉酒饱德人有士君子之行焉与诗义全不相涉其失明矣申培说以为王族与燕畚行苇之诗盖亦袭朱传父兄所以答行苇之说然诗中既明言公尸嘉告矣谓之父兄谢燕之辞可乎又苏子胆有既醉备五福论其说出于郑笺以景福为五福也唐孔氏为分属之云君子万年壽也天被尔禄富也室家之壺康宁也昭明有融攸好德也高朗令终景命有仆考终命也附会割裂不成文理岂此诗乃洪范注疏乎若邹忠胤谓周礼鍾师奏九夏杜子春释云客醉而出奏陔夏疑即此要亦为旧说所误子贡传以为训成王之诗辨已在小引下】

雝【论语礼记周礼注俱作雍】武王祭文王之庙喜诸侯来助祭及彻歌此在九夏中疑即昭夏亦名为繁【朱传以为武王祭文王之诗盖彻祭所歌胡一桂云以文母证之则烈考为文王无疑此诗为武王祭文王之诗无疑按周礼乐师职云及彻帅学士而歌彻小师职云下管击应鼓彻歌郑玄谓彻者歌雍陈阳云大祭祀告利成之後彻必歌雍古之祭祀有乐以迎来必有乐以彻食黄佐云此诗但为武王祭文王而彻俎之诗而後通用于他庙耳论语三家者以雍彻子曰相维辟公天子穆穆奚取于三家之堂贾公彦云有辟公助祭并天子之容穆穆乃可用雍诗彻祭器大夫及诸侯皆不得用雍也昭夏者九夏之一国语别名为繁愚疑谓即此诗者以篇中有介以繁祉之语耳左传谓三夏天子所以享元侯路史亦云雝天子所以享元侯而周礼称牲出入奏昭夏今按相维辟公既与享元侯意合於荐广牡又与牲出入事合则其为昭夏之章审矣详见时迈篇小引下】

有来雝雝【冬韵汉书作雍雍】至止肃肃【屋韵】相【去声後同】维辟公【叶冬韵诸容翻】天子穆穆【屋韵通篇俱隔句用韵 赋也有者非一之辞指下文辟公言来者孔穎达

云从彼本国而来也雝和也解见有瞽篇至者至于周庙也止语辞肃说文云持事振敬也以非一人故重言雝雝肃肃辅广云来而不和则有勉强不得已之心至而不敬则有怠缓不敬事之意相者省视之义故尔雅云导也毛传云助也孔云助祭事也维字重看闵光德云有字正与维字相应便见非复大夫助祭意辟公诸侯也解见烈文篇天子以位言武王自谓也穆通作?说文云细文也重言之者见其文章之非一也言助祭者维有肃肃之诸侯奔走将事是以主祭之天子进退周旋皆中礼节穆穆然有文之可观如所云威仪孔时是也汉书韦玄成云唯圣人为能飨亲立庙京师之居躬亲承事四海之内各以其职来助祭尊亲之大义五帝三王所共不易之道也诗云有来雍雍至止肃肃相维辟公天子穆穆】於荐广牡【有韵】相予肆祀【纸韵】假【音格】哉皇考【叶有韵去九翻】绥予孝子【纸韵 赋也荐之为进音之近也广毛云大也按横量曰广博硕肥腩之谓也牡说文云畜父也广牡即雝诰所云騂牛一者易所云大牲也予武王自谓也後放此肆郑玄云陈也严粲云言於我荐进大牡牲之时其辟公助我肆陈祭祀之饌也假通作假说文云至也皇尔雅云君也父亡称考孔云考者成德之名按闵予小子以皇考与皇祖相对则知皇考谓父也家人有严君焉父母之谓故考以皇称郑云皇考谓文王也绥尔雅云安也按绥本车中靶之名升车执绥所以安也朱子云孝子武王自称也上对辟公言故曰天子此对皇考言故曰孝子我合辟公以肆祀此时皇考之神灵至止庶其有以安佑我孝子乎于彻祭时歌此故作冀望之辞末章眉壽繁祉绥予之实也孝经子曰昔者明王之以孝治天下也不敢遗小国之臣而况于公侯伯子男乎故得万国之欢心以事其先生夫然故生则亲安之祭则鬼享之是以天下和平灾害不生祸乱不作故明王之以孝治天下如此正与此诗意相发】宣哲【陆德明本作哲】维人【真韵亦叶先韵如延翻】文武维后【有韵】燕及皇天【先韵亦叶真韵丁因翻】克昌【去声陆德明云周人以诤事神不应犯诤当音处亮反】厥後【有韵 赋也上二章美诸侯之来助祭此则追述其旧功而重赞美之也宣布也解见江汉篇哲说文云知也文王能周知天下之事理故以哲称所谓知之曰明哲也人谓文王之旧人也文武维后美文王也书无逸篇云自殷王中宗及高宗及祖甲及我周文王兹四人迪哲君奭篇云惟文王尚克修和我有夏亦惟有若虢叔有若閼夭有若散宜生有若泰颠有若南宫适亦惟纯佑秉德迪知天威乃惟时昭文王迪见冒闻于上帝夫文王有明哲之德而所以宣布其明哲之作用者惟赖有文王之诸臣在故於其纲纪四方则见文王之文於其有此武功则见文王之武君道克尽如此天下人皆乐得之以为君也燕通作宴说文云安也加皇于天尊称之辞夫皇矣上帝临下有赫其监观四方惟求民之莫耳文王能尽文武之道则能安民而天之心亦与俱安矣此谓其所安者上及于天也克能也昌通作倡说文云导也以开基创业言所谓佑启我後人也陈际泰云武成曰皇天震怒命我文考肃将天威夫纣不能安人皇天所为怒也而文王安之皇天所为燕也在平宁之世文德即能安人在乱离之世非文德而兼武德不能安人故曰文王一怒而安天下之民此岂拘拘之小智所能辨拘拘之小智则以文德终矣其燕皇天而昌厥後以享有广牡之荐岂虚也哉愚按武时去文未远此助祭诸侯文王之旧臣必尚有在者故叙述及此书立政篇曰亦越武王率惟敕功不敢替厥义德率惟谋从容德以并受此丕丕基其明据也一说苏辙云先王之臣有与祭者故於是称宣哲维人焉】绥我眉壽【有韵】介以繁祉【纸韵】既右烈考【叶有韵见第二章】亦右文母【叶纸韵母鄙翻徐光启云此篇句句隔韵而第五七韵又承第三韵第六八韵又承第四韵宛转相关音律嫋嫋用韵之变殆极于此 赋也眉壽解见南山有台篇武王末受命故言福以眉壽为先孔云上言绥予孝子是皇考绥之

今言绥我眉壽亦是皇考绥之以覆成上意也介释文云副也古者主有摈客有介故谓副为介繁者盛多之意当通作蕃说文云草茂也祉徐锴云福所止也繁祉凡诸福之物可致之祥皆是盐铁论云刑锴不用黎民若四时各终其序而天下不孤颂曰介以繁祉右朱子云尊也周礼所谓享右祭祀是也周礼春官大祝辨九?以享右祭祀解见我将篇烈考即文王也朱子云犹皇考也文母毛云太妣也烈以功称文从夫谥承上章言文王藉诸臣之力既能受天明命以倡道厥後矣今日辟公助祭大礼告成我文王庶其安佑我以秀眉之壽使享年有永又副益之以衆多之福则自今以往得以享右乎烈考文母愈久而不替也此非合衆辟公之精神以邀皇考之感格不至此我不敢忘皇考其敢忘辟公哉】

離四章章四句【旧作一章十六句 序及蔡邕独断皆云禘大祖之所歌也朱子谓祭法周人禘嘗又曰天子七庙三昭三穆及大祖之庙而七周之太祖即后稷也禘嘗于后稷之庙而以后稷配之所谓禘其祖之所自出以其祖配之者也今熟味诗词无及于嘗稷者且篇末以文母为言於禘何与吕祖谦强为之说谓周所以王天下得行禘礼于大祖者皆文王武王之功故成王於禘之时推其得禘之繇播之乐歌以告大祖要之迂回难通李氏以皇考烈考皆称其祖严粲引祭法父曰考祖曰王考曾祖田皇考高祖曰显考谓考者祖父之通称就如所云惟曾祖称皇考而嘗稷非曾祖也且皇考果为祖即当以孝孙对言而下文明言绥予孝子则皇考即父明矣或又谓禘乃吉禘若竹书之吉禘于先王春秋之吉禘于庄公是也夫丧毕即吉而致新死者之主于庙谓之吉禘武王以嗣位之十二年伐纣克殷而後为天子今诗称天子穆穆其非免丧之初又明甚安在其为吉禘也汉书刘向上封事曰文王既没周公武王继政朝臣和于内万国驩于外故尽得其驩心以事其先祖其诗曰有来雍雍至止肃肃相维辟公天子穆穆言四方皆以和来也向以此诗作于武王之世固为得之然谓事其先祖则亦袭经师相传之误申培说因篇中有文武维后一语遂以此为成王祀文武之诗今按郑笺据雒诰称武王为烈考而严氏据闵予小子及访落二诗又称武王为皇考然则此诗果兼祀武王乎夫烈考与文母相配而言非文王无足以当之未闻子之称可加于母之上也烈考既为文王则诗中言孝子者乃武王自称是则皇考烈考俱为一人较然可知其非成王之诗明矣】

思齐文王所以圣也【出序】繇大任能教文王故文王能刑大妣疑即九夏中之齐夏【朱子以为此诗亦歌文王之德而推本言之中培说同季本云此章为文王刑于寡妻而发故推本大任闺门之教以见大妣之贤有自也孔穎达云圣人稟性自天而归德于母者以其母实贤遂致歌咏见其叹美之深録之以爲後法耳陆燾云文王性生处自多根本处自足而推本所生犹云生来有圣德如此邹中胤云周礼春官锺师奏九夏其六曰齐夏杜子春谓夫人祭奏齐夏倘即此诗】

思齐【音斋】大【音泰】任文王之母【有韵亦叶纸韵母鄙翻又叶麋韵蒲补翻】思媚周姜京室之妇【有韵亦叶纸韵房轨翻又叶麋韵奉甫翻】大【音泰】妣【荀子注作妣】嗣徽音【侵韵】则百斯男【叶侵韵尼心翻 赋也思念也齐通作斋说文云戒洁也礼记云斋之为言齐也齐不齐以致其齐也毛传以为庄也大任王季之妃大明之诗所云挚仲氏任者也皇王大纪云大任有贤德目不视窃色耳不聽淫声口不出恶言容貌恭肃齐如也以来嫁之年生子古公亶父视之曰我世当有兴者其在斯乎名之曰昌即文王也媚说文云悦

也周姜毛云大姜也朱子云大王之妃也按周自大王始迁故系姜于周京室毛云王室也孔云京者京师故言王室王季未为天子而言京者以其追号为王故以京师言之大妣史记云文王正妃也详见大明篇嗣继也徽毛云美也按徽本三纠?之名琴节亦曰徽则以琴弦是?为之故淮南子云鼓琴循弦谓之徽也文选五臣注亦云调也此以徽音连言当即取琴节之义以其音调和可听谓之美音犹云令闻也则百斯男者毛云大妣十子衆妾则宜百子也按左传祝鮀曰武王之母弟八人是通武王伯邑考为十子也其名则史记云长伯邑考次武王发次管叔鲜次周公旦次蔡叔度次曹叔振铎次郕叔武次霍叔处次康叔封次聃叔季载皇甫谧则次周公于管蔡郕霍之下次曹叔振铎而康聃二叔居其後不知何据又左传富辰云管蔡郕霍鲁卫毛聃雍曹滕毕原丰郇文之昭也则武王异母弟又有毛郇雍滕毕原丰郇八人其他无考襄楷云文王一妻诞致十子钱天锡云百男以验其贤不主效言一说季云并子孙言之也亦通此诗以发端齐之一字贯串後章咏文王之德曰肃肃曰临保皆本於此其气稟有自来矣然此等家法不始自大任在大姜时已自如是皇王大纪谓大姜美而贤生三子泰伯仲雍季历能化导之皆成贤德列女传谓大姜贞顺率道靡有过失广于德教而谋事次之则大姜之为人可知故诗言此存心庄敬之大任乃我文王之母也彼知太姜以庄敬为悦故其所思念惟是谨持妇德以得姑之欢心而称其为新造周室之妇乃大妣又能继大任之令闻其庄敬之德亦如之故无险詖私谒之心有不妬忌之美而子孙至于衆多也夫多男繇于不妬忌而不妬忌繇于克敬如汉匡衡所云故其贞淑不贰其操情欲之感无介乎容仪宴私之意不形于动静者则妬忌之念何自而生周家世有圣妃而一脉相传其造诣之邃如此猗欤盛矣後汉书梁皇后云夫阳以博施为德陰以不专为义螽斯则百福之所繇兴也又按古者亲迎之礼父南向子北向而跪醺而命之曰往迎尔相承我宗事勗率以敬先妣之嗣若则有常夫为人妇而能敬继先妣之事此贤妇也鲁公父文伯之母孔子亟称之而其言必曰吾闻诸先姑子夏闻之曰善哉商闻之曰古之嫁者不反舅姑谓之不幸夫妇学于舅姑者也】惠于宗公【东韵】神罔时怨【国语引无此一句】神罔时恫【东韵说文作恫】刑于【後汉书作於】寡妻至于兄弟【後汉书引无此一句】以御于【後汉书作於】家邦【叶东韵悲工翻 赋也惠于宗公三句蒙上章大妣而言惠尔雅云顺也钱云惠有藹然相浹意宗公毛云宗神也孔云书序云班宗彝中庸云陈其宗器皆以宗庙为宗又下频言神罔则宗公是宗庙先公故云宗庙也罔通作亡亡之言无故尔雅训罔为无怨说文云恚也恫毛传说文皆云痛也先怨後恫谓恚之极而痛也邹忠胤云礼国君娶夫人之辞曰请君之玉女与寡人共有敝邑事宗庙社稷此求助之本也祭必夫妇亲之所以备外内之官也妇顺章而宗公惠故曰罔怨罔恫刑于寡妻以下咏文王之辞也刑毛传训为法当通作从井之?易所谓井者法也寡妻郑玄云寡有之妻言贤也愚按大妣能取法文王故其德为世所鲜有称为寡妻宜矣真德秀云说者谓文王有贤妃之助故能成其圣德然后妃之所以贤则又本于文王之躬化故诗人歌之曰刑于寡妻言文王之德仪于闺门吕祖谦云毫髮不愧于隐微然後近者孚严粲云刑于寡妻美文王能仪刑之非美寡妻也关雎美后妃之德所以见文王之德亦此意也至者自此及彼之谓兄弟泛言兄弟之国与皇矣之诗言同尔兄弟义同御即御车之御说文云使马也家指门内蒙上寡妻言邦指友邦蒙上兄弟言文王之化自门内而达于友邦了无扞格如驾轻车就熟路六轡在手故曰御于家邦真云闺门正矣次及于兄弟以至于国家无不正焉其本皆自文王之身始孟子举此诗以告齐王而断之曰言举斯心加诸彼而已文王非人人化之也修吾身于此而其效自形于彼锺离意云春秋先内後外诗曰刑於寡妻

以御于家邦明政化之本县近及远季云此章要旨在于刑寡妻而已又周子云治天下有本身之谓也治天下有则家之谓也家难而天下易家亲而天下疎家人离必起于妇人故睽次家人以二女同居而志不同行也尧所以厘降二女于汭汭舜可禅乎吾兹试矣是治天下观于家治家观身已矣身端心诚之谓也真氏为之衍其义云夫治家之难所以甚于治国者门内尚恩易于掩义故也世之人固有勉於治外者也至其处家则或徇于妻妾之私或牵于骨肉之爱鲜克以正自简者而人君尤甚焉汉高帝能诛秦灭项而不能割戚姬如意之宠唐太宗能取孤隋攘羣盗而闺门慙德顾不免焉盖疎则公道易行亲则私情易溺此其所以难也不先其难未有能其易者汉唐之君立本作则既已如此何恠其治天下不及三代哉夫女子陰柔之性鲜不妬忌而险詖者故二女同居则猜间易生尧欲试舜必降以二女也能处二女则能处天下矣舜之身正而刑家如此故尧禅以天下而不疑也身之所以正者繇其心之诚妄去则诚存矣诚存则身正身正则家治推之天下犹运之掌也愚按从来言齐治相因之理未有亲切如斯者观此诗後章亦以临保为言即存诚之谓与家语荀子俱载子贡问於孔子曰赐倦于学困于道矣愿息于妻子孔子曰诗云刑于寡妻至于兄弟以御于家邦妻子之难也焉可以息哉又按晋语胥臣曰文王敬友二虢而惠慈二蔡刑于大姒比于诸弟诗云刑于寡妻至于兄弟以御于家邦於是乎用四方之贤良及其即位也询于八虞而咨于二虢度于閼夭而谋于南宫諏于蔡原而访于辛尹重之以周召毕荣亿宁百神而柔和万民故诗曰惠于宗公神罔时恟似皆依附诗词未得立言本旨】 雝雝【汉书注作雍雍】在宫肃肃在庙【叶效韵眉教翻】不显亦临无射亦保【叶效韵彼教翻 赋也此章发明刑于寡妻之实雝雝毛传云和也按雝乃鸟名所谓雝渠也亦名脊令其鸟共母生者飞鸣不相离取其音声之和故借为和义诸书多作雍尔雅又加口作嘒今考说文都无此两字或又作痛乃辟痛也亦或作邕乃四方有水自邕城池之名俱与和义无涉夫倡妇随比之兄弟故亦曰雝雝凡室皆名宫此宫谓宫中也朱子云闺门之内也肃说文云持事振敬也敬之至曰肃肃庙孔云先祖之庙也此二句非以宫庙对言文王在宫之时虽不废雝雝矣而其肃肃之心亦与在庙等盖心纯于敬直合宫庙而一之下文言不显无射皆所以形在宫也言亦临亦保正所以形肃肃也季云在宫和之处也在庙敬之处也在宫而和常恐其?故在宫雝雝之时必有在庙肃肃之敬然後为不欺鬼神也不显言人所不见也临者俯视之谓徐锴云与监同意真云其所处虽非显明之地常若天地神明之在其上也父母师保之在其前也射旧说皆通作斲谓厌也今按末章有无斲之文彼斲既用本字则此射但当如字解凡指物而取皆曰射言为人所指亦如为弓弩所中也闺门之内乃弹射所不及故曰无射保者抱持之义毛晃云篆文从人从子从八象人抱子形真云严於自保常恐燕安怠惰之私萌于中邪辟嫚易之气设於体也愚按不显而常若十目所视曰亦临无射而常若十手所指曰亦保临者自外临之保者已自保也万时叶云文王之心只自临保若说因不显而加临因无射而加保蚤已加一番提省岂所语于文王之德之纯不显句是戒慎不睹恐惧不闻无射句是不动而敬不言而信季云此可见其心之严于隐微而闺门之内所以为寡妻之法者在是矣】 肆戎疾不殄【朱子云此与下章用韵未详】烈【郑笺作厉】假不瑕【郑笺系此二句於第三章之後为一章】不闻亦式不谏亦入【郑笺系此二句于肆成人有德之上为第四章今从毛传及朱传改正 赋也此章发明至于兄弟之事肆解见縣篇戎谓西戎指昆夷也疾病也西戎为周之患如人之有疾病也殄絶也戎疾不殄与縣之不殄厥愠义同烈光也按火猛曰烈故有光义假通作假从彳说文云至也烈假连文犹书言光被也瑕说文云玉小赤也礼记注云玉之病也言文王之时

虽西戎之患犹未殄绝而其德之光辉所被人皆瞻仰无有指斥其瑕玷者泰誓所谓光于四方显于西土是也黄佐云前此颂太王曰肆不殄厥愠亦不殄厥问後此颂周公曰公孙硕肤德音不瑕家法之相承有如此者式说文云法也谏说文云证也广韵云诤也直言以悟人也白虎通云闲也更也是非相闲革更其行也徐锴云於文言束为谏束者分别善恶之谓入说文云内也言文王不必有号令条教以闻于人而人皆以文王为法文王见人之不善不必以言语谏诤之而人自油然潜入其范围所谓不大声色而人胥化也盖德盛则化自神其至于兄弟之国有如此按朱子云文王之化始於关雎而至於麟趾则其化之入人者深矣形於鹄巢而及於驹虞则其泽之及物者广矣盖意诚心正之功不息而久则其薰蒸透彻融液周遍自有不能已者】肆成人有德小子有造古之人无斁【韩诗郑笺丰氏本俱作择】誉髦斯士【赋也此章与首章相照应肆成人二句指大任言见文王之所以圣古之人以下则言文王亦能如大任之教子以完则百斯男之意朱子云冠以上为成人有德谓文王纯亦不已之德小子朱子云童子也造说文云就也有造言涵养启迪之使其有所成就也欧阳修云诗人既述文王修身之善然後本其所以圣者繇生於贤母幼被养育而至成人也故曰肆成人有德小子有造言文王有成人之德自其幼小为之子而养育成其性也按列女传称大任娠文王寝不侧坐不边立不跣不食邪味割不正不食席不正不坐目不视恶色耳不聒淫声口不出敖言夜则令瞽诵诗道正事君子谓大任为能胎教文王生而明圣大任教之以一而识百胥臣亦谓文王在母不忧在传弗勤处师弗烦事主不怒是皆大任教诲之力所谓有造者也旧说皆以有德有造为文王作人之事故刘向说苑亦谓此两句乃大学之教虽於理亦通而於章旨未合故定从欧说古之人谓古老之人指文王也周书无逸篇言小人侮厥父母曰昔之人无闻知是亦以昔人称父母矣况此诗作于文王既没之後乎吕氏典谟作于虞夏其称尧舜禹皋陶已曰若稽古则此诗追述文王以为古之人复何疑哉斁说文云解也厌倦之意誉说文云称也毛云有名誉也发至眉为髦孔云士者男子行成之大称又人未有生而贵者其初皆士虽天子之子亦不过比于元士而已言文王教育诸子亦如大任无少厌倦故皆能有声誉当其发至眉之时而德行已成俨然有士之称矣螽斯之绳绳麟趾之振振誉髦斯士之谓也然而有管蔡者何也刘向谓人才质不同有不可以少加重任者易曰力小而任重鲜不及矣反思其受教之时未必至於是也按武周灭殷管蔡兴殷各行其志虽不可以管蔡为是要之彼亦自有所见後之论者且有以殷之忠臣目之矣】

思齐五章二章章六句三章章四句【故言如此朱子从之按故言即毛氏传也郑笺分为四章章各六句丰氏本移縣之虞芮章为此诗末章辨见縣篇子贡传亦以为训成王之诗未有所据】

棫朴咏文王祭告伐崇之事而有羣髦为之用又以见文王之能官人也疑即九夏中之章夏【吴志注云棫朴之作有积燎之薪文王郊鄆经有明文董仲舒春秋繁露云已受命而王必先祭天乃行王事文王之伐崇是也诗云济济辟王左右奉璋奉璋戕戕髦士攸宜此文王之效也其下之辞曰淠彼泾舟烝徒楫之周王于迈六师及之此文王之伐崇也上言奉璋下言伐崇以是见文王之先郊而後伐也文王受命则郊郊乃伐崇崇国之民方困于暴乱之君未得被圣人德泽而文王已郊矣安在德泽未洽者不可以郊乎又云为人子而不事父者天下莫能以为可今为天子而不事天何以异是故天子每至岁首必先郊祭以享天行子礼也每

将兴事必先郊祭以告天行子道也文王受天命而王天下先郊乃敢行事而兴师伐崇其诗曰芄芃械朴云云至髦士攸宜此郊辞也其下曰淠彼泾舟云云至六师及之此伐辞也今按以文王为受天命而王天下先儒多疑之若纣尚存而文王俨然行郊天之礼是二天子也且文王伐崇之後始作邑于丰无缘当伐崇时遂有郊酆之事惟皇矣之诗所云是类是禡者固自可信类禡皆师祭文王既受命得专征伐故得行类祭之礼亦如舜之居摄而类于上帝耳其礼仿郊祀为之非正祭天也中候我应云玄阳伐乱崇孽首王曰於戏斯在伐崇谢告注云斯此也天命此在伐崇侯虎谢百姓且告天是祭天而伐主为崇也次章以造乎祢宜乎社言与祭天无预若篇中所举髦士乃四友之伦其能獎率六师以从文王于迈固所谓有御侮者而其他亦皆能分猷宣力以闰色休明如云汉之为章于天则所谓疏附奔奏先後者也济济多士文王以宁故序则又以为文王能官人也愚疑此诗即九夏中之章夏说见时迈篇小引下又但咏歌文王而不及武王疑是诗必作于武王之世】

芃芃械朴薪【丰氏本作新】之樵【宥韵亦叶有韵以九翻陆德明本作□】之济济辟王左右趣【叶宥韵于候翻亦叶有韵此苟翻晏子贾谊新书俱作趋】之【赋之兴也芃芃孔颖达云枝叶茂盛也械白桺也解见緜篇朴当别是一木名毛传训为枹木盖本之尔雅谓朴属丛生者为枹乃根枝迫迤相附着之貌诗所谓械朴枹□是也枹栎秦风作苞栎愚按尔雅有云 朴心注谓 朴乃櫟 之别名有心能湿江河间以作柱一名心安知此朴非 朴乎又櫟与栎相类亦有斗栎即柞也大雅以柞械连言者三而旱麓篇直曰瑟彼柞械民所燎矣此诗亦有薪樵之语言械朴正犹之乎言械柞耳孔云伐木析之谓之薪按礼记月令注云太者可析名薪小者合东名柴据郭璞尔雅注谓械乃小木丛生者今观此诗械以薪言则郭注之谬明矣樵说文云积火燎之也按月令季冬乃命四监收秩薪柴以供郊庙及百祀之薪燎周礼大宗伯以禋祀祀昊天上帝以实柴祀日月星辰以樵燎祀司中司命飏师雨师注谓禋之言烟周人尚臭烟气之臭闻者也樵者积也三祀皆积柴实牲体焉燔燎而升烟所以报阳也孔云三者皆祭天神之礼俱是燎柴升烟但神有尊卑异其文耳下文言奉璋毚是祭时之事则此亦祭事愚按所以知此为祭天者以皇矣篇是类之语知之盖为将出师伐崇而类于上帝也济之为言齐也曰济济者威仪整齐之貌辟尔雅云君也按辟本训法而转训为君者以君为人所取法也郑玄云君王谓文王也君王临祭祀其容济济然敬严粲云辟王从後尊称之辞左右谓诸臣从王左右者趣说文云疾也言诸臣皆疾速趋事以助祭也薪樵械朴本赋其事而中含兴意山善养木资薪樵焉国善养士称任使焉是立言之义也又晏子春秋云晏子聘于鲁鲁昭公问焉吾闻之莫三人而迷今吾以鲁一国迷虑之不免于乱何也晏子对曰君之所尊举而富贵入所以与图身出所以与图君及左右偪迤皆同于君之心者也犒鲁国化而为一心鲁无与二其何暇有三夫偪迤于君之侧者距本朝之势国之所以治也左右谗譖相与塞善行之所以衰也士者持禄游者养交身之所以危也诗曰芃芃械朴薪之樵之济济辟王左右趋之此言古者明君之使以善也故外知事之情而内得心之诚是以不迷也贾谊新书云上主者可引而上不可引而下下主者可以引而下不可引而上中主者可以引而上可以引而下故其可忧也惟中主尔又似练染之蓝则青染之缁则黑无善佐则亡此其不可不忧者耳故曰芃芃械朴薪之樵之济济辟王左右趋之此言左右日以善趋也又云古者年九岁入就小学踰小节焉业小道焉束髮就大学踰大节焉业大道焉是以邪放非辟无因入之焉谚曰君子重裘小人无繇入正人十倍邪辟无繇来古之人其谨於所近乎诗曰

芃芃棫朴薪之爇之济济辟王左右趋之此言左右日以善趋也皆断章取义非诗正旨】济济辟王【阳韵】左右奉璋【阳韵】奉璋峨峨【歌韵亦叶支韵鱼羈翻陆本作俄今本皆书作𦣻】髦士攸宜【支韵亦叶歌韵牛何翻 赋也奉说文云承也言以两手承之毛云半圭曰璋郑云璋瓚也祭祀之礼王裸以圭瓚诸臣助之亚裸以璋瓚孔云臣行礼亦执圭璧无专以璋者冬官玉人所云大璋中璋边璋皆璋瓚也祭之用瓚唯裸为然郊特性曰裸以圭璋故知璋为璋瓚矣按考工记玉人云裸圭尺有二寸有瓚以祀庙大璋中璋九寸边璋七寸射四寸厚寸黄金勺青金外朱中鼻寸衡四寸有缫裸之言灌也瓚如盘其柄用圭有流前注汉礼瓚盘大五升口径八寸下有盘口径一尺三璋之勺形如圭瓚勺即瓚也璋其柄也头如矢锐而穿物曰射其勺以金为之鼻者勺流也流者所以流鬯也衡者勺径也据周礼内宰职云大祭祀后裸献则赞先儒谓王行初裸后行亚裸其或后有故不与则大宗伯摄之故祭统云君执圭瓚裸尸大宗执圭瓚亚裸是也而诸臣则又有助裸将之事者观小宰职云凡祭祀赞裸将之事是可见助行裸事不独一人矣沈括云璋圭之半体也合之则成圭王左右之臣合体一心趣乎王者也疏义云圭首锐一圭中分为二璋奉於王前则其中分处向王类乎人之鞠躬内向而归心也又按周礼注云唯人道宗庙有裸天地大神至尊不裸故孔氏以为此言裸事祭宗庙也峨说文云嵯峨也饶氏云衣冠壮伟之貌髦士俊士之居官者解见小雅甫田篇宜祭社之名孔云兵凶战危虑有负败祭之以求其福宜故谓之宜或云起大事动大衆必先有事于社令诛罚得宜言此奉璋峨峨之髦士庙祭之礼既毕则又于宜社之所而助祭也按王制云天子将出征类于上帝宜乎社造乎祢受命于祖泰誓云受命文考类于上帝宜于冢土周礼大祝职云大师宜于社造于祖设军社类上帝数者言行礼先後俱各不同按此诗先言祭天以天最尊故先之与王制合也次祭祖庙然後祭社以出征必载迁庙之祖主及社主以行故左传云帅师者受命于庙受赉于社甘誓亦云用命赏于祖不用命戮于社皆言祖在社先疑行礼次第当是如此文王行此三礼盖皆以伐崇告也又受赉亦作受蜃郑玄引春秋传云蜃宜社之肉今按三传皆无此文孔颖达解之云蜃大蛤也可以白器令色白然则器以蜃饰之故谓之蜃以祭祀之肉盛之蜃器而赐之故曰受蜃也】淠彼泾舟烝徒楫【叶缉韵秦入即入二翻春秋繁露作楫】之周王于迈

六师及【缉韵】之【赋之兴也淠集韵云动也字从水如水之动诗萑苇淠淠其旗淠淠皆言动也泾水名山海经云泾谷之山泾水出焉东南流注于渭说文云泾水出安定泾阳井头山东南入渭雠州之川也雍大记云泾水自平凉府城西南自岩发源至泾州又东南至邠州界又东北至西安府泾阳县界繇泾阳东流至高陵县会于渭文王自岐伐崇道必涉泾按岐即今岐山县与泾州连界崇即今鄠县与泾阳高陵俱隶陕西西安府烝衆也解见东山篇徒谓从行者即舩人是也楫说文云舟櫂也释名云在傍拨水曰櫂又谓之楫楫捷也拨水舟行捷疾也周王文王也亦从後追称之辞于郑云往也迈说文云远行也周礼五师为军二千五百人为师万二千五百人为军天子六军则当用三十师而书言张皇六师诗言以作六师整我六师孟子言六师移之皆谓天子之六军也不言军而言师者先儒谓多以军为名次以师为名少以旅为名师者举中之言以愚意度之天子六军不必尽行每军之中各取其一师其余则以备更番之用故谓之六师耳文王为西伯奉王命得专征伐故亦得抽调六师也及毛云与也此指统师之将言诗于赋中有兴言彼泾水之舟淠淠然顺流而行者为有衆徒在傍以楫拨之盖心力既齐则舟行自疾也周王以西伯奉命徂征则诸臣之有事行间者皆能提

挈六帅同心協力与之俱进此文王得诸臣之助也欧阳修云文王养育贤才助祭皆髦俊之士有所征伐则六师皆从以见王所官之人入宗庙居军旅皆可用言文武之材各任其事也】倬彼云汉为章于天【先韵亦叶真韵汀因翻】周王寿考遐不作人【真韵亦叶先韵如延翻兴也倬说文云着大也徐锴云卓然高明也云说文云山川气也汉天河也解见大东篇或谓汉之在天似云非云故曰云汉今按诗言维天有汉夏小正言汉案户皆单举汉字未有连云汉为文者知当指云及汉也丰道生云旧说云汉为一物则未必有文必曰云曰汉二物而後成文盖云之变态不常光采非一点缀天河而相映发故曰为章于天也章通作彰说文云文章也苏辙云天之苍苍岂自有章哉则亦有云汉以为之章耳欧阳云云汉在上为天之文章犹贤才在朝为国之光采壽说文云久也考说文云老也郑云文王是时九十余矣故云壽考遐之言胡胡之言何音之转也易云鼓之舞之之谓作孔云作人者变旧造新之辞曹氏云商之末世士气卑弱甚矣非鼓舞振动之乌能自奋而有成哉郝敬云文王圣德在位五十年培植薰育久免置野人皆为干城辅广云作人非一日偶然之可为也必积累渐渍之久乃底于成愚按恒之彖曰圣人久于其道而天下化成其文王之谓乎】追【荀子作雕说文苑作雕】琢其章【阳韵周礼注作璋】金玉其相【阳韵】勉勉【荀子韩诗外传白虎通俱作𡔷𡔷】我【韩诗外传作文】王【阳韵】纲纪四方【阳韵比而赋也按夏后氏冠名母追礼记疏云母发语辞追犹堆也夏后氏质以其形名之此追字当亦如此解盖於器物上为堆起之形照下文当属金言赵希鹄云追即追蠡之追三代钟鼎尊彝等器为云雷饗饗之文曰追琢说文云治玉也尔雅亦云玉谓之琢相说文云省视也从木目会意引易纬文地可观者莫可观于木金玉其相者谓观其本质乃是金玉故毛传亦训相为质盖会意也王安石云文王作人外则使有文内则使有质董鼎云玉不琢不成器作人犹追琢使之就器也然非养成其质则文其得有傳哉邓元锡云四友具矣而原本於壽考之作人追琢其章教化之益也金玉其相髦俊之质也学为文益其质作之之力也与云汉为章同义金玉微追琢不章髦俊微教化不成夫有疏附有先後有奔奏御侮有人矣惟其作之是以有之是棫朴之义也愚按二句聯言犹云必追琢之以焕发其章而後显其为良金美玉云尔徐轩云夫珠之含砾瑾之挟瑕斯其性与良工为之以纯其性若夫素然故观二物之既纯而知仁德之可粹也优者取多焉劣者取少焉在人而已孰禁我哉乘扁舟而济者其身也安粹大道而动者其业也美故诗曰追琢其章金玉其相勉犹勤也勉勉朱子云犹言不已也郑云我王谓文王也按韩诗外传作𡔷𡔷文王说文云纲网紘也纪别也孔云纲者网之大绳故盘庚云若网在纲有条而不紊是其事也纪者别理缕以喻为政有举大纲者有理微细者白虎通云纲者张也纪者理也大者为网小者为纪所以疆理上下整齐人道也吕氏云所以纲纪四方维持而不坠者皆官人之効虽文王无为犹勉勉于斯而不已也愚按文王劳于作人勉于任人书曰文王罔攸兼于庶言庶狱庶慎惟有司之牧夫是训用违庶狱庶慎文王罔敢知于兹文王得人以任四方之事而已不必与特总其大纲而巳是纲四方也四方之事有羣才以分理之故无渗漏而不周坠废而不举者是纪四方也又说苑云三王术如循环故夏后氏教以忠而君子忠矣小人之失野救野莫如敬故殷人教以敬而君子敬矣小人之失鬼救鬼莫如文故周人教以文而君子文矣小人之失薄救薄莫如忠故圣人之与圣也如矩之三褊规之三褊周则又始穷则反本也诗曰雕琢其章金玉其相言文质美也韩诗外传云夫五色虽明有时而渝丰交之木有时而落物有成衰不得自若故三王之道周则复始穷则反本非务变而已将以正恶扶微绌缪沦非调和陰阳顺万物之宜诗曰𡔷𡔷文王纲纪四方荀子云人之生不能无羣羣而无分

别则争争则乱乱则穷矣故无分者人之大害也有分者天下之大利也而人君者所以管分之枢要也故美之者是美天下之本也安之者是安天下之本也贵之者是贵天下之本也古者先王分割而等异之也故使或美或恶或厚或薄或佚或乐或劬或劳非特以为淫泰夸丽之声将以明仁之文通仁之顺也故为之雕琢刻镂黼黻文章使足以辨贵贱而已不求其观为之钟鼓管磬琴瑟笙簧使足以辨吉凶合欢定和而已不求其余为之宫室台榭使足以避燥湿养德辨轻重而已不求其外诗曰雕琢其章金玉其相亶亶我王纲纪四方此之谓也皆非此诗正旨】

棫朴五章章四句【朱子谓此诗亦以咏歌文王之德而疑其作于周公申培说则直谓周公咏歌文王之德以训嗣王皆未知此诗立言之意者使其见春秋繁露所云则豁然矣子贡传但存以训成王四字而余皆阙文今按如传说则末章乃属望嗣王之语故称我王耳亦通】

灵台化成也文王立灵台而知民之归附作灵囿灵沼而知鸟兽之得其所以为音声之道与政通故合乐以详之合乐於辟雍育才之地也是王道之终也【自文王下至合乐以详之出郑笺黄图按竹书商纣三十七年周作辟雍四十年周作灵台四十一年春三月西伯昌薨故知是文王末年事邓元锡云文王久道成化虞芮平而方国毕至天下三分有二矣於是乎作灵台庶攻子来人和己人和化本也囿沼以育物濯鬻於物则泽及蠕动也在辟雍而於谕於乐论无患而後乐乐行而伦清教化流焉德天则神化久乃洽故曰王道之终也蔡汝楠云若後世台沼之乐必非子来矣钟鼓之乐必不及辟雍矣季本云文王存日未尝称王曰王在见其为武王时诗矣按贾逵服注左传谓天子灵台在太庙之中壅之灵沼谓之辟雍大戴礼盛德篇谓明堂者所以明诸侯尊卑也外水名曰辟雍政穆篇谓大学明堂之东序也卢植礼记注谓明堂即太庙也天子太庙上可以望气故谓之灵台中可以序昭穆故谓之太庙圜之以水似璧故谓之辟雍古法皆同一处近世殊异分为三耳蔡邕月令谕谓取其宗庙之清貌则曰清庙取其正室之貌则曰大庙取其堂则曰明堂取其四门之学则曰大学取其周水圆如璧则曰辟雍异名而实一也颍子容春秋释例谓大庙有八名肃然清静谓之清庙行禘祫序昭穆谓之太庙告朔行政谓之明堂行飨射养国老谓之辟雍占云物望气祥谓之灵台其四门之学谓之大学其中室谓之太室总谓之宫此等诸儒皆以庙学明堂灵台为一袁準正论云明堂宗庙大学礼之大物也事义不同各有所为而世之论者合以为一体取诗书放逸之文经典相似之语而致之不复考之人情验之道理失之远矣夫宗庙之中人所致敬幽隐清静鬼神所居而使衆学处焉飨射其中人鬼慢黷死生交错囚俘截耳疮痍流血以干犯鬼神非其理矣且夫茅茨采椽至质之物建日月乘玉辂以处其中象箸玉杯而食於土簋非其类也如礼记先儒之言明堂之制四面东西八丈南北六丈礼天子七庙左昭右穆又有祖宗不在数中以明堂之制言之昭穆安在若又区别非一体也夫宗庙鬼神之居祭天而於人鬼之室非其处也且明堂法天之宫非鬼神常处故可以祭天而以其祖配之配其父於天位可也事天而就人鬼则非义也自古帝王必立大小之学以教天下有虞氏谓之上庠下庠夏后氏谓之东序西序殷谓之右学左学周谓之东胶虞庠皆以养老之言明堂位曰瞽宗殷学也文王世子曰春夏学干戈秋冬学习射皆於东序又曰秋学礼冬学书礼在瞽宗书在上庠此周立三代之学也可谓立其学不可谓立其庙然则大学非宗庙也又曰世子齿於学国人观之宗庙之中非百姓所观也是故明堂者大朝诸侯讲礼之处宗庙享鬼神岁覲之宫辟雍大射

养孤之处大学衆学之居灵台望气之观各有所为非一体也古有王居明堂之礼月令则其事也天子居其中学士处其内君臣同处非其义也明堂以祭鬼神故亦谓之庙明堂大庙者明堂之内大室非宗庙之太庙也於辟雍献捷者谓鬼神恶之也王制释奠於学以讯馘告其上句曰小学在公宫之左大学在郊明大学非庙也】

经始灵台经之营【庚韵亦叶阳韵于方翻】之【贾谊引诗无此一句】庶民【史记注作人】攻【叶阳韵姑黄翻】之不日成【庚韵亦叶阳韵辰羊翻】之经始勿亟【职韵亦叶支韵去奇翻尔雅作愬】庶民子来【叶支韵陆之翻亦叶职韵六直翻毛郑本只以经始灵台四句为第一章今从朱传改正三辅黄图引此诗云经始灵台庶民子来经之营之不日成之赋也经毛传云度之也按经本织?之经纵曰经横曰纬故取为纵横量度之义始说文云女之初也今但训为初严粲云经度而始为之言翔建也灵字或从巫或从玉说文云灵巫以玉事神也大戴礼云阳气为精陰气为灵孔穎达云灵是神之别名毛云神之精明者称灵尔雅云四方而高曰台易类谋云文王伐崇作灵台含神雾云作邑于丰起灵台周本记云文王立灵台於时年九十六也又周易乾凿度云昌二十九年伐崇侯作灵台淮南子云文王为玉门筑灵台以待紂之失六韬云文王既出羑里周公但筑为灵台高诱云文王为紂拘于羑里得归乃作灵台作王门相女童钟鼓示不与紂同也按文王年九十七而终享国五十年据竹书纪作灵台之次年西伯薨与周本纪合凿度所云二十九年之说或未足信文王伐崇而作丰邑其事在囚羑里之後谓周公旦所筑固未测其信否至谓筑此以待紂之失示不与紂同则皆陋之乎观圣者矣又陈际泰云文王卑服即康功田功能恶衣服不能卑宫室乎其以灵台为也则又文王所以诡为穷奢以自玷之微权也汤之不免於桀也其以身为莠稗也至穷其所以则仲虺之言曰惟王不迹声色不殖货利而後汤之贤适以见忌耳文王伐崇而取之紂之疑周必自此始矣为台为沼关中弹丸地已自安之岂有志天下哉或谓圣人当无此夫求美女而进之献雒西之地而後始脱身虎口也则孰谓圣人无机权也关中记云灵台在长安西北四十里三辅故事云在丰水北经灵台西文王又引水为辟雍灵沼括地志云今悉无复处所惟灵台孤立台基犹高二丈周回一百二十步五经通义云灵台在於野中国之南附近辟雍积土增崇其高九仞极阳之数上平无屋望气显着按台之所以名灵者其说有三含文嘉白虎通皆云天子灵台所以观天人之际察陰阳之会揆星度之验徵六气之端为万物获福之元此一说也三辅黄图云灵者言文王之有灵德也刘向云积恩为爱积爱为仁积仁为灵灵台之所以为灵者积仁也郑玄亦云台而曰灵者文王化行似神之精明故以名焉此又一说也朱子云谓之灵者言其倏然而成如神灵之所为也此又一说也繇前一说於以解台似矣然囿沼何以亦称灵不可通也谓文王积仁而化行若神故呼之以灵此出於民之名之则可而人君台囿沼之名民果得而命之乎此正坐读孟子误耳孟子云文王以民力为台为沼而民欢乐之谓其台曰灵台谓其沼曰灵沼盖言文王因民之欢乐而工速成也以为非神工不至此故於台囿沼皆标之为灵以纪异正如後说所云乃文王之自名之也朱子既晰灵之义而于孟子集注反云民欢乐之加以美名何哉又公羊说云天子有三台灵台以观天文时台以观四时施化囿台以观鸟兽鱼鼈诸侯卑不得观天文无灵台但有时台囿台皆在国之东南二十五里东南少阳用事万物着见用二十五里者吉行五十里朝行暮返也今按灵台既为天子制则文王尚为西伯安得有之凡灵台辟雍之类皆文王以意为之不必有所沿袭其後周有天下周公制礼遂因以为天子之制而诸侯不敢同其名故服?左传注言天子

曰灵台诸侯曰观台王制言天子曰辟雍诸侯曰顿宫皆所以示别也又前汉书地理志云济陰郡成阳有尧灵台後汉书章帝纪云祠唐尧於成阳灵台是则灵台之名尧亦有之岂文王慕其德因而踵袭之与而康志贺述礼统则云夏为清台商为神台周为灵台名清台何明明相承太平相续故为清台名神台灵台何质者具天而王天者称神文者具地而王地者称灵是皆竞出新意以为之说古文散軼谁使正之哉若旧说谓灵台固以望氛祲而亦因以疏瀹精神宣节劳逸则意已具是自此之外有求言于其上者管子谓武王有灵台之复而贤者进与尧有衢室之问汤有总街之庭并称是也复谓白也有偃武于其下者司马法谓偃伯灵台答民之劳示休是也偃伯或曰偃武也然则灵台之为用亦博矣孔云左僖十五年秦伯获晋侯以归乃舍诸灵台秦是诸侯而得有灵台者杜预谓在京兆鄠县周之故台也哀二十五年卫侯为灵台於藉圃言为则是新造其时僭名之也营者周匝之义当以图回于心言不然则与上文经之之义相类攻毛云作也韦昭云治也不日郑云不说期日韦云不程课以时日也成说文云就也言文王之经度始为灵台也当其经度已定此心犹在迟回就虑间而衆民则共协力攻作之曾未设为之期限而台功倏已告成矣才度即成何其速也郑云说文王之德观其事忘己劳也勿通作毋禁止辞亟说文云敏疾也文王以为此台也乃经度而始为之者心恐烦民戒令勿亟而民心乐为之如子来趋父事无所勉强故其成之速有如此也此两句申说上四句意陈栌云不欲其急而過於来者爱民之仁子来而忘其劳者事君之义未有上好仁而下不好义也张栻云文王则勿亟庶民则子来君民之相与如此贾谊云文王志之所在意之所欲百姓不爱其死不憚其劳从之如集诗曰经始灵台庶民攻之不日成之经始勿亟庶民子来文王有志为台令近规之民闻之麇裹而至闲业而作之日日以衆故民趋而疾弗期而成桓寛云夫牧民之道除其所疾适其所安安而不扰使而不劳故取而民不厌役而民不苦灵台之诗非或使之民自为之楚语云灵王为章华之台与伍举升焉曰台美夫对曰先王之台榭也榭不过讲军实台不过望氛祥故榭度於大卒之居台度於临观之高其所不夺穡地其为不匮财用其事不烦官业其日不废时务瘠硤之地于是乎为之城守之木於是乎用之官寮之暇於是乎临之四时之隙於是乎成之故周诗曰经始灵台经之营之庶民攻之不日成之经始勿亟庶民子来王在灵囿麇鹿攸伏夫为台榭将以教民利也不知其以匮之也若君谓此台美楚其殆矣左昭九年筑郎囿季平子欲其速成也叔孙昭子曰诗曰经始勿亟庶民子来焉用速成其以剿民也无囿犹可无民其可乎孔丛子云陈侯起凌阳之台未终而坐法死者数十人夫子适陈陈侯问曰昔周作灵台亦戮人乎答曰文王之兴附者六州六州之衆各以子道来故区区之台未及期日而成矣何戮之有乎夫以少少之衆能立大大之功唯君尔刘陶云圣王承天制物与人行止建功则衆悦其事兴戎而帅乐其旅是故灵台有子来之人武旅有鳧藻之士】王在灵囿【宥韵丰氏本作□】麇【丰本作□下同】鹿攸伏【叶宥韵扶富翻毛郑本以王在灵囿二句系于经始勿亟二句之後为第二章吕祖谦云今观楚椒举引诗止於麇鹿攸伏盖全举前二章之文也若以首章为章六句则椒举所引诗末二句在他章矣然则章句其传甚远未易以意改也愚按朱传分前二章为章六句文义甚顺如毛郑分作三章章四句反隔断语气且古人引诗何常之有椒举所论乃兼台榭二者自当引灵囿二句以足论榭之意必以引诗为分章之证则贾谊引此乃至子来而止是非与朱传脗合者耶又按依毛郑分章则伏当叶职韵弼力翻】麇鹿濯濯【叶药韵书药翻】白鸟翯翯【叶药韵下各翻孟子丰本俱作鹤鹤贾谊新书作皛皛】王在灵沼於物鱼跃【药韵 赋也严云此诗谓文王为王者皆非作于文王之时囿说文云苑有垣也孔云囿者筑

墙为界域而禽兽在其中所以域养禽兽也淮南子云汤始作囿以奉宗庙桥鲜之具周礼圉人职云禁牧百兽祭祀丧纪宾客共其生兽死兽之物郑云囿也沼也同言灵於台下为囿为沼可知按三辅黄图载灵台在长安西北四十里灵囿在长安西四十二里灵沼在长安西三十里明有三处但其地相近耳朱子谓台下有囿囿中有沼非也孟子云文王之囿方七十里刳茅者往焉雉兔者往焉与民同之民以为小不亦宜乎班固东都赋云因原野以作苑义合乎灵囿鹿者彼类牝牡之总名麋则专举牝而言解见吉日篇攸说文云行水也伏说文云伺也然则攸有行义伏有止义言其行止皆自得也古说皆以攸为所伏为伏子之义故赵岐注孟子谓文王在此囿中麋鹿怀任安其所而伏韦昭注国语谓牝鹿所伏息爱特任之类此皆从麋字生解盖但以麋鹿为指麋耳然乐记云羽者姬伏毛者孕鬻不应以伏咏麋且於下文濯濯不甚联贯故不从濯本训澣取以拟鲜泽之貌如言新沐新浴是也重言者非一之辞翯翯仿此白鸟谓鸟羽色白者偶举所见而言陆佃以为鹭也翯说文云鸟白肥泽貌陆云淮南子曰的的者获提提者射故诗正言麋鹿濯濯白鸟翯翯以美文王之德沼者池之别名圆曰池曲曰沼雍大记云灵沼按旧图记在上长安城西四十里丰水之西真花碓北今为水泊刘向新序云周文王作灵台及为池沼掘得死人之骨吏以闻于文王文王更葬之吏曰此无主矣文王曰有天下者天下之主有一国者一国之主寡人者死人之主又何求主遂令吏以衣棺更葬之天下闻之皆曰文王贤矣泽及枯骨又况于人乎於朱子云叹美辞物说文云满也字从牛者牛大物故为满也郑云灵沼之水鱼盈满其中皆跳跃言得其所刘彝云鱼惊则潜今物而跃者习於仁而自遂也愚按孟子解此诗云乐其有麋鹿鱼鼈古之人与民偕乐故能乐也麋鹿鱼鼈之乐正主文王者所谓古之人能乐者观此诗以王在起语可见深探其本则以为繇与民偕乐而然耳旧说不达孟子立言之意而并以此诗为民欢乐之之辞其亦误矣贾?云此言德至也圣主所在鱼鼈禽兽犹得其所况於人民乎故仁人行其礼则天下安而万里得矣逮至德渥泽洽调和大畅则天清彻地富媪物时熟民心不挟诈贼气脉淳化攫啮搏击之兽鲜毒蠹猛虻之?密毒山不蕃草木少薄矣铄乎大仁之化也真德秀云鹿之在囿如在山林鱼之在沼如在江湖文王之德及飞潜各安其处此所谓不扰也汉儒作赋铺陈弋猎之盛至曰风毛雨血洒野蔽天吁物生斯时与灵台之世为何如耶又按周书言文王不敢盘于游田自朝至于日中昃不遑暇食而此诗言其在囿在沼者何哉顺时伴涣以节劳逸虽圣王不能废然亦偶一涉之耳若夫囿沼之设以习武事以供祭祀丧纪宾客各有所为初不为游观设也】?【说文作巨】业维枏【冬韵】贲【陆德明本作鼗】鼓维鏞【冬韵】於论鼓钟【冬韵】於乐【音酪】辟雍【冬韵丰本作雝後同 赋也此章述文王既游囿沼之後遂於辟雍作乐之事郑云?所以悬钟鼓也说文云钟鼓之柎也饰为猛兽本作虞从虍异象其下足今文作?顔师古以?为神兽名又云猛兽名上林赋獬豸?是也凌蒙初云木刻?兽之形遂借以为名如掩兔之毕祭器之毕皆象毕星之形而俱名之以毕也礼记云夏后氏勾龙作箒?按考工记梓人为箒?天下之大兽五脂者膏者以为牲羴者羽者鳞者以为箒?厚唇弇口出目短耳大胷燿後大体短脰若是者谓之羴属常有力而不能走则於任重宜大声而宏则於钟宜若是者以为钟?是故击其所县而繇其?鸣鋭喙决吻数目顚脰小体骞腹若是者谓之羽属常无力而轻其声清扬而远闻无力而轻则於任轻宜其声清扬而远闻则於磬直若是者以为磬?故击其所县而繇其?鸣小首而长?身而鸿若是者鳞属以为箒自孙炎郭璞据此文以?为悬钟磬之用俗说相因皆谓此但悬编钟编磬之类耳岂知编钟编磬乃乐之小者若下文贲鼓维鏞各自有?此诗二句连言故知所指者乃贲鏞之?亦举大以该小也何以明之

明堂位云夏后氏之足鼓殷楹鼓周县鼓此三鼓即建鼓也建鼓乃少昊氏所作之大鼓夏加四足故以足名殷人柱贯之故以楹名周人县之故以县名是则周大鼓用县之明据矣故刘熙释名云所以悬鼓者横曰簨簣峻也在上高峻也从曰??举也在傍举?也又广韵云飞?天上神兽鹿头龙身凡钟之附饰为此兽故谓之?陈祥道云十二辰之钟以应十二月之律十二辰之钟大钟也大钟特悬诗书尔雅所谓镛是也非十二辰之钟则编焉周礼所谓编钟是也管子霸形篇云桓公起行筭?之间管子从至大钟之西大钟鸣是又大钟用县之明据矣然则考工记所云钟?磬?者何居愚意大钟大鼓之?皆任重之类当用钟?编钟编磬之?皆任轻之类当用磬?於钟?不言大鼓於磬?不言编钟者互见之也又按鬻子云大禹铭於筭?教寡人以道者击鼓以义者击钟是又非钟鼓有?之证乎尔雅云大版谓之业说文云筭?大版也所以饰县钟鼓捷业如锯齿以白画之象其齟齬相承也筭亦作枸孔云县钟磬者两端有植木其上有横木谓直立者为?谓横牵者为枸枸上加大版为之饰谓之业其县钟磬之处又以彩色为大牙其状隆然谓之崇牙枘本木名尸子所谓松柏之鼠不知堂密之有美枘者字说云桧枘叶松身则叶与身皆曲枘松叶栢身则叶与身皆直枘以直从桧以曲会陈祥道云诗曰?业维枘枘身叶皆直则?业者皆以直木为之也汉武帝时乐?铜人生毛董卓坏铜人铜?以充铸则汉时以铜为之与古异耳又乐书别有枘图其形圆首长柄乃所以撞钟鼓者陈阳云撞钟鼓谓之枘汉书司马相如传谓枘金鼓古乐歌所谓曼玉枘金岂谓是耶其说亦可从賁通作鼗说文云大鼓也尔雅云大鼓谓之鼗小者谓之应考工记云鼓长八尺鼓四尺中围加三之一谓之鼗剡舜云鼗鼓身高八尺而其鼓之面皮所冒者径四尺也中围者谓鼓腹也鼓而径四尺则其围十二尺鼓腹之围加以三之一则其围十六尺而径五尺三寸三分寸之一也周书顾命篇云鼗鼓在西序周官鼓人职云以鼗鼓鼓军事司马法云中春振旅诸侯执鼗鼓陈阳云所谓鼗鼓者大鼓而已鼗鼓鼓军事则昼作衆之鼓非夜以警衆之鼗也郑氏以鼗为鼗误矣凡此非特用之以和军旅虽节声乐亦用之故诗言賁鼓维镛以文王能作大事考大功作乐以象其成也鼗鼓路鼓皆谓之大者路者人道之大鼗者人事之大国之大事在祀与戎故鬼享以路军事以鼗愚按此賁鼓奏于辟雍即射宫也射乃军事故特用鼗耳镛说文云大钟也尔雅云大钟谓之镛其中谓之剡小者谓之栈张萱云镛庸也故亦作庸庸用也用以民功为大也故古人有大功者必铭於钟以此陈阳云莫非钟也大者谓之镛以民功为大也钟师掌金奏大钟也鐸师掌金奏小钟也许慎曰鐸鐸于之属所以应钟磬也於理或然郑康成谓鐸如钟而大孙炎郭璞释大钟之镛亦名为鐸不亦失小大之辨欤以经考之自虞至周镛大而钟小自周公制礼钟大而鐸小虽有改制之名无变大小之实也又云乐之作也先鼓以警戒後钟以应之故虞书论堂下之乐以鼗鼓为先笙镛次之商诗以置我鞀鼓为先镛鼓次之周诗以鼗鼓为先维镛次之是鼓大丽而象天钟统实而象地天先而地从之鼓先而庸从之先王立乐之方也愚按大射仪云建鼓在阼阶西南鼓西阶之西其南钟南陈一建鼓在其南东鼓一建鼓在西阶之东南面所谓建鼓宜即此诗之賁也所谓钟旧阶谓即此之镛也言鼓在镛之先者礼视学必先奏鼓文王世子曰天子视学大昕鼓徵所以警衆是也於亦叹美辞下同论说文云议也苏辙云讲也因民之乐而讲求钟鼓之度以作辟雍之乐也钟鼓蒙上文言乐有八音专言论鼓钟者亦举大以该小也陈阳云钟鼓乐之器而乐非器也有精微之义存焉钟鼓不论吾无以知其义矣古之论乐者论伦无患则论其情而已非论其义也其文足论而不息则论其文而已亦非论其义也论其义则得之於耳而心喻之得之於心而神受之岂特聽其监鐸而已苟卿曰钟鼓以道志莫非鼓也而大者谓之賁莫非钟也而大者谓之

鑪於论賁鼓其义见於作大事也於谓维鑪其义见于考大功也又云鍾陰声也鼓阳声也在天则陰阳和然後万物得在乐则鍾鼓应然後八音谐故独鍾不能以和声独鼓不能以成乐是以鍾师掌金奏必以鼓倡之鼓人掌六鼓必以四金和之然则於论鍾鼓其义岂不深且远哉又云鍾鼓之於乐犹君之於国父之於家也又云仲尼曰乐云乐云鍾鼓云乎哉以为乐在於鍾鼓则鍾鼓乐之器而器非乐也以为不在于鍾鼓则鍾鼓不殞吾无以见圣人矣又云雷积阳气而後成声虫待雷声而後启蛰先王之为鼓其冒之也必以启蛰之日其声象雷其形象天其於乐象君鼓无当于五声五声不得和传曰鼓所以撿乐为羣音之长是鼓为五声之君五声又以中声为君故鼓大而短则其声疾而短闻小而长则其声舒而远闻然则大而不短小而不长则其声必适舒疾之节其闻必适短远之衷一会归中声而已鼓之为用岂不大矣哉又云先王之制鍾也大不出钧重不过石律度量衡於是乎出所制有齐而无高下厚薄之偏所容有量而无违回侈弇之过一归正缓之中声而已国语曰古者神瞽考中声而量之以制度律均鍾则鍾以中声为本矣昔齐景公为大鍾鍾大悬下其气不上薄仲尼讥之周景王将铸无射而为之大林单穆公非之鲁庄公铸大鍾而国小鍾大曹刿讥之皆失中声故也周语伶州𪔐云闻之琴瑟尚宫鍾尚羽石尚角匏竹利制大不踰宫细不过羽夫宫音之主也第以及羽圣人保乐而爱财财以备器乐以殖财故乐器重者从细轻者从大是以金尚羽石尚角瓦?尚宫匏竹尚议革木一声夫政象乐乐从和和从平声以龠乐律以平声金石以动之?竹以行之诗以道之歌以咏之匏以宣之瓦以赞之革木以节之物得其常曰乐极极之所集曰声声应相保曰龠细大不踰曰平如是而铸之金磨之石系之?木越之匏竹节之鼓而行之以遂八风於是乎气无滞陰亦无散阳陰阳次序风雨时至嘉生繁祉人民龠利物备而乐上下不罢故曰乐正按参上诸说亦可以得论乐之概矣辟通作璧痾说文谓天子飧饮之地即辟痾也字从广𪔐声按痾字当从广下邕广读若俨象对刺高屋之形四方有水曰邕辟痾之制四面有水环之正合邕义从邕为意兼声今不谐邕而谐𪔐殊不可解𪔐者鸟名也汉书又通作雍考说文乃无雍字三辅黄图云周文王辟痾在长安西北四十里亦曰璧痾如璧之圆壅之以水象教化流行也蔡邕云水广二十四丈四周于外礼统曰内如覆外如偃盘毛云水旋丘如璧曰璧痾以节观者孔云璧体圆而内有孔此水亦圆而内有地犹如璧然土之高者曰丘此水内之地未必高於水外正谓水下而地高故以丘言之以水绕丘所以节约观者令在外而观也陈祥道云辟雍外圆内方明德当圆行当方考之於礼鬴簋钱之类皆外圆内方圆而函方陰阳之义也汉明帝视辟痾人圆桥门而观周制宜亦然也今按据此则辟痾之说本自明白绎其字义即其制度亦可想见後人纷纷妄生异论白虎通谓辟之为言积也积天下之道德也雍之为言壅也雍天下之残贱故谓之辟雍也韩诗说谓言辟取辟有德不言辟水言辟痾者取其痾和也礼记注疏谓辟明也於此乐中习学道艺欲使天下之人悉皆明达和谐乐书谓夏后氏以序名学则主以礼射而略於乐商人以瞽宗名学则主以乐教而略於礼周人兼而用之而名其学以辟痾辟者法之所自出本之以为礼痾者和之所自生本之以为乐辟痾以本之则礼乐之教足以同人心出治道胡致堂谓灵台诗言鸟兽昆虫各得其所鼓鍾虞业莫不均调於此所乐之德惟辟雍而已辟君也雍和也文王有声所谓镐京辟雍义亦若此皆以己意穿凿附会最误学者故详辟之郑云辟痾三灵皆同处在郊今按黄图载灵台辟痾皆在长安西北四十里则同处之说不为无据颂振鹭於飞于彼西痾先儒亦谓辟痾在西郊故曰西痾也韩诗说谓辟痾在南方七里之内此不足信孙鑛云东汉左辟痾右灵台正是法周盖二地相近又按王制云诸侯天子命之教然後为学小学在公宫南之左大学

在郊天子曰辟雍诸侯曰頤宫此辟雍在郊之明证汉郑氏以此为殷制非周制者以篇内言有虞氏养国老於上庠养庶老於下庠夏后氏养国老於东序养庶老於西序殷人养国老於右学养庶老於左学周人养国老於东郊养庶老於虞庠虞庠在国之西郊郑氏之意以为养国老当在大学养庶老当在小学殷人於左学养庶老正与小学在公宫之左句相合故断以为小学既左学为小学则右学是大学其地当在郊矣周人则不然以虞庠养庶老而其地在国之西郊则与小学在公宫之左者异虞庠既在郊则东胶当在国故有殷大学在郊周大学在国之说又有四代相变虞殷贵在郊夏周贵在国之说而陈氏礼书则又合王制先後二义而参订之谓此天子与诸侯之异也诸侯之学小学在内大学在外取其选士必繇内以升於外故言小学在公宫之左又郊特牲言鲁人将有事于上帝必先有事于頤宫頤宫者鲁之大学其地在郊是其证也天子之学小学居外大学居内取其选士必繇外以升于内故文王世子言凡语于郊者必取贤歛才焉乃进其等以其序于成均以及取爵于上尊是其证也此其说良辨今言文王辟雍在郊者文王时为殷诸侯尚仍殷制耳前此未有名学为辟雍者自文王始其後周有天下遂尊以为天子之学名王制襍引三代制度故合记之又陈祥道云四代之学虞则上庠下庠夏则东序西序商则右学左学周则东胶虞庠而周则又有辟雍成均瞽宗之名记曰天子设四学盖周之制也辟雍即成均也东胶即东序也瞽宗即右学也盖以成其亏均其过不及则曰成均以习射事则曰序以纠德行则曰胶以乐祖在焉则曰瞽宗以居右焉则曰右学成均居中其左东序其右瞽宗此大学也虞庠在国之西郊则小学也记曰天子视学命有司行事祭先师先圣焉卒事遂适东序设三老五更之席又曰祀三老五更於大学所以教诸侯之弟祀先贤於西学所以教诸侯之德夫天子视学则成均也祭先师先圣即祀先贤于西学祭于瞽宗也适东序设三老五更之席即养国老於东胶祀三老五更於大学也然则商之右学在周谓之西学亦谓之瞽宗夏之东序在周谓之东胶亦谓之大学盖夏学上东而下西商学上右而下左周之所存特其王者耳则右学东序盖与成均并建于一丘之上而已繇是观之成均颁学政右学祀乐祖东序养老更右学东序不特存其制而已又因其所上之方而位之也按文王世子云春夏学干戈秋冬学羽龠皆於东序春诵夏弦大师诏之瞽宗秋学礼执礼者诏之冬读书典书者诏之礼在瞽宗书在上庠览陈氏所论其位置亦自皙然先儒谓周但立三代之大学而不立三代之小学也於乐辟雍者辟雍兴贤育才之地今文王讨论乐之理数于此使贤才日以向化洵可乐哉此辟雍也孟子曰得天下英才而教育之三乐也诗人言乐意亦如此或引庄子言历代之乐黄帝有咸池尧有大章舜有大韶禹有大夏汤有大濩文王有辟雍之乐武王周公作武遂以辟雍为乐名按乐苑言文王乐名巨业固未足信周礼大司乐舞六代之乐无所谓辟雍者尚书大传引乐经云舟张辟雍鷁鷁相从八风回回凤凰喈喈则辟雍乃奏乐之所上言舟张可知其为璧水也庄子谓文王有辟雍之乐正据此诗而言或又以辟雍别有所在乃文王宫名其地近水作乐宜空虚故於是奏合其乐尤堪捧腹】於论鼓锺【韵见上】於乐辟雍【韵见上】鼙鼓逢逢【冬韵亦叶东韵蒲蒙翻】蒙瞍【丰本作□】奏公【东韵亦叶冬韵诸容翻楚辞章句作工丰本于此章之後又有二章其第五章云舟张辟雍踔踔相从八风回回皇皇喈喈其第六章云有昭辟雍率尔衆工无怠无訥肃肃雍雍按前章出尚书大传後章出周官注而文尚多旧分为二章其一云有昭辟雍有贤泮宫田里周行济济锵锵相从执质有族以文其一云敕尔瞽率尔衆工奏尔悲诵肃肃雍雍无怠无凶此乃合而隐括为四语只因有辟雍二字相类遂窃取以眩衆然絶无意义可味真续貂耳 赋也按竹书文王未作灵台时已有辟雍至此乃讲究作乐之事故诗

先言於论鼓鍾而後言於乐辟雍使辟雍虽设而无所以为育材之具亦安见其可乐乎诗人所以嗟叹而不已也鼉说文云水虫也陆玑云形似蜥蜴四足长丈余生卵大如鷲卵甲如铠甲今合药鼉鱼甲是也其皮坚可以冒鼓陆佃云鼉具十二肖肉蛇肉最後在尾其枕莹净鱼枕弗如欲雨则鸣故里俗以鼉雨鳞甲黑色能横飞不能上腾罗愿云鼉能吐雾致雨力尤酋健善攻崎岸夜则出边岸人甚畏之声亦可畏晋安海物记云鼉宵鸣如桴鼓今江淮之间谓鼉鼓亦或谓鼉更以善夜鸣其数应更故也又乐书云诗人托之其鸣更更为灵德之应非实鼓也如箫音以凤故谓之凤箫即此类今按月令季夏命渔师取鼉注云皮可冒鼓李斯亦云树灵鼉之鼓又司马相如上林赋云建灵鼉之鼓是则古人固以鼉皮冒鼓矣陆佃谓鼉鼓非特有取于皮亦其声象鼉之鸣故谓之鼉鼓此论为允逢逢埤苍云鼓声也此鼉鼓非上章贡鼓周礼鼓人所谓以晋鼓鼓金奏者是也陈阳云其制大以短所以鼓金奏非所以节乐鼓人掌六鼓四金之音声而晋鼓居一焉鑄师掌金奏之乐岂晋鼓欤按上章贡鼓举其最大者言之此章鼉鼓则以始作者言之盖自鼉鼓鼓衆而後蒙?始作乐也毛云有眸子而无见曰蒙无眸子曰?孔云蒙?皆无目之名就无目之中以为等级蒙者言其蒙蒙然无所见即今之青盲者也朦有眸子则?当无蒙之小别也故春官瞽蒙注郑司农云无目朕谓之瞽有目朕而无见谓之蒙有目而无眸子谓之?亦与此同此则对而为名其总则皆谓之瞽又文选注云无珠子曰蒙珠子具而无见曰?愚按前说皆未尽蒙右施蒙童蒙也是幼而无见者?右施叟长老之称是老而无见者总谓之瞽耳礼云御瞽几声之上下国语云蒙?修声奏说文云进也严粲云乐之更端曰奏故九成谓之九奏官所曰公即夙夜在公之公言奏乐於公所也古奏乐皆以瞽以其善聽而审於音也】

灵台四章二章章六句二章章四句【毛郑作五章章四句今从朱传丰氏本有六章详见第四章下序云民始附也文王受命而民乐其有灵德以及鸟兽昆虫焉按如此说将置後二章于何地且民之归周久矣谓至此而始附何欤东策吕氏谓前二章乐文王有台池鸟兽之乐也後二章乐文王有鍾鼓之乐也皆述民乐之词也朱子从之似已然辟雍作人论乐兴化乃文王制作之大者诗人於於乐二句特叠言之其郑重之意殆可想见而仅以为如寻常之奏乐娱耳云乎孟子所谓与民偕乐同乐者乃引君之词其实圣人无皇 乐也子贡传以为训成王之诗既未有以信其然申培说从而衍之谓文王迁都于丰作灵台以齐七政奏辟離周公述之以训嗣王所谓奏辟雍者盖误袭庄子之说其陋斯甚】

臣工耕藉也【乐记言武王祀乎明堂而民知孝朝覲然後诸侯知所以敬然則此诗其武王之诗欤籍本作藉说文云帝藉千亩也古者使民如借故谓之藉通作藉祭义云天子为藉千亩冕而朱紘躬秉耒诸侯为藉百亩冕不青紘躬秉耒以事天地山川社稷先古以为醴酪齐盛於是乎取之敬之至也又云耕籍所以教诸侯之养也邹忠胤云夫明堂朝覲则我将载见诸诗是已至耕籍岂容无诗此诗嗟臣工正指公卿大夫之属至嗟保介则义益显然其为耕籍而戒农官益可据矣】

嗟嗟臣工【东韵】敬尔在公【东韵】王厘尔成【自此以下俱无韵未详】来咨来茹【赋也嗟嗟孔穎达云叹声嗟而又嗟重叹以呼之按篇中言嗟嗟者二而意各别此为叹而美之下则叹而勅之也工毛传云官也臣工通三公九卿诸侯大夫百吏而言公朱子云公家也

敬尔在公言能恪供于在公家之事即从王耕藉之礼也厘说文云家福也尔指臣工也成说文云就也邓元锡云王厘尔成者言王受厘尔实成之则敬之效也来来诸臣也咨说文以为谋事也茹尔雅云啜也方言云食也王与诸臣躬耕帝藉祭于先农事竣受厘而归美于臣工之克敬故大礼告成於是进而与之谋事且进而与之饮食也来咨即下章勅保介命衆人之事来茹则受厘之余共分神惠耳礼月令篇孟春之月乃择元辰天子亲载耒耜措之于参保介之御间师三公九卿诸侯大夫躬耕帝籍天子三推三公五推卿诸侯九推反执爵于大寝三公九卿诸侯大夫皆御命曰劳酒周语虢文公曰农祥辰正日月底于天庙土乃脉发先时九日稷告王曰距今九日土其俱动王其祗祓监农不易王乃使司徒咸戒公卿百吏庶民司空除坛于藉命农大夫咸戒农用先时五日警告有协风至王即齐宫百官御事各即其齐三日王乃淳濯飧醴及期鬱人荐鬯牺人荐醴王裸鬯飧醴乃行百吏庶民毕从及藉后稷监之膳夫农正陈藉礼太史赞玉王敬从之王耕一墦班三之庶人终于千亩其后稷省功大史监之司徒省民大师监之毕宰夫陈飧膳宰监之膳夫赞王王歆大牢班尝之庶人终食今按五推九推省功省民即此诗所云敬尔在公者膳夫农正陈藉礼则祭先农之事其反执爵于大寝及膳夫赞王歆大牢所谓王厘者也酒则公卿诸侯大夫皆御太牢则班共尝之所谓来茹者也】嗟嗟保介维莫【陆德明本作暮】之春【丰氏本作维春之莫】亦又何求如何新【丰本作来】畲於【音乌】皇来牟将受厥明明昭上帝迄用康年【丰本作年康】命我衆【丰本作烝】人庾乃钱鎛奄观銍艾【丰本作获 赋也此下皆勅农官之辞嗟嗟解见上章朱子云保介见月令吕览其说不同然皆为藉田而言按月令天子亲载耒耜措之于参保介之御间郑玄注保介以为车右也保犹衣也介甲也人君之车必使勇士衣甲居右而参乘备非常也孔颖达云车右及御人皆是参乘於时天子在左御者在中车右在右言置此耒器於参乘保介及御者之间也保即襁保保谓小被所以衣覆小儿故云保犹衣也今按以衣训保义已难通就如所云车右置勇士以备非常固非农官也而使之劝农于理疎矣高诱注吕览惟云保介副也朱子增其义曰盖农官之副也夫以介为副似矣然保字当作何解且以保介为农官之副则以何者为农官之正乎愚意保介即周礼遂人之官介当通作界田有经界保护其经界不使相混谓之保介遂人职所云以土地之图经田野造县鄙形体之法皆有地域沟树之而月令亦云王命布农事命田舍东郊皆修封疆审端径术是皆保介之义也以韩诗外传明之楚庄王寝疾卜之曰河为祟大夫曰请用牲庄王曰止古者圣王之祭不过望濞漳江汉楚之望也寡人虽不德河非所获罪也遂不祭三日而疾有廖孔子闻之曰楚庄王之霸其有方矣制节守职反身不贰其霸不亦宜乎诗曰嗟嗟保介庄王之谓也传意以庄王能自守其疆界不越境以求福故引此诗然则介之通作界其义亦昭然矣维莫之春二句反语也如何新畲问辞也莫春朱子云斗柄建辰夏正之三月也新新田也畲孙炎云和也田舒缓也按尔雅说文皆谓田三岁曰畲而尔雅又谓田二岁曰新田惟郑玄坊记注云二岁曰畲三岁曰新田诗诂深然其说今从之详见采芑篇王於耕籍礼毕嗟呼保介之官而告之曰时不可失也土不可荒也孟仲二春正田工毕举之时倘过此而春莫则时已过矣尔为农夫者将何所求乎欲其不违农时也田之甫垦者有三岁之新焉有二岁之畲焉虽已成田而未能与久垦之田埒也尔农夫之有新畲者今亦曾如何加功否乎欲其无旷地利也於亦叹声皇通作煌光华之貌故尔雅训为华郑笺训为美也来牟解见思文篇於皇来牟据耕藉时所见而言也将受厥明者言将享受此来牟之获其事明明可必无差爽也邹云或疑寅月安得有来牟然麦种在南方下於亥月其在北方则下於酉月金王而生火王而死备四时之气谓之首

种而此但云将受则亦未遽受也明昭上帝本祈谷上帝而言迄说文云至也康毛传云乐也康年即孟子所云乐岁也言自郊而祈谷之後不独来牟之熟可必而已此上帝之意甚昭然至于西成之时又将用此丰年之庆以赐我故宜亟勉力于农事如下文所云也罗愿云郑司农注稻人称今时谓禾下麦为萁下麦言芟夷其禾於下种麦又注雍氏云俗间谓麦下为萁言芟夷其麦以其下种禾豆则是卒岁之间无旷土闲民矣衆人郑云庶民也命我衆人使保介转命之也庾说文云储置屋下也尔雅云具也钱说文云铤也古田器世本云垂作铤季本云钱之为铤说者不详宋仲子注铤为刈则鋌本刈器而刈器又有一铤不知其为何物矣据孔氏以铤为七遥反即今之锹一谓之锄所以起土可用于耕盖耜类耳尔雅铤作 云 谓之铤方言云燕之东北朝鲜洌水之间谓之 宋魏谓之铤或谓之铤江淮南楚谓之亩赵魏谓之桑东齐谓之耨毛云耨也耨亦作耨世本云垂作耨韦昭李巡皆云锄也郭璞云锄属广雅云定谓之耨尔雅云斲斲谓之定吕氏春秋云耨柄尺此其度也其耨六寸所以间稼也字诂云头长六寸柄长一尺高诱云耨芸苗也六寸所以入苗间也考工记云攻金之工段氏为耨器又云粤之无耨也非无耨也夫人而能为耨也钱耕时所用耨耘时所用庄子所云春雨日时草木怒生铤耨於是乎始修是也奄者徧覆之义奄观者徧观之也銓刘熙云获铁也说文云获禾短鎌也艾通作刈郑云芟末曰艾銓艾者用銓以刈禾也孔颖达引管子云一农之事必有一銓一耨一铤然後成农盖此三器者分耕耘刈三用阙一不可故云然承上言天既将赐我以康年矣凡我衆人可不尽人事以承天意乎必具其铤耨以待用及至秋成则尔农官又当徧观之以验其銓获之多少书曰惰农自安不昏作劳不服田亩越其罔有黍稷此始之所以不能已于命而卒之所以不能已于观也周语虢文公曰古者大史顺时覩土阳瘳愤盈土气震发太史告稷曰自今至于初吉阳气俱烝土膏其动弗震弗渝脉其满眚谷乃不殖稷则徧戒百姓纪农协功曰陰阳分布震雷出滞土不备垦辟在司寇乃命其旅曰徇农师一之农正再之后稷三之司空四之司徒五之大保六之大师七之太史八之宗伯九之王则大狗耨获亦如之民用莫不震动恪恭于农修其疆畔曰服其耨不解于时财用不乏民用和同按虢公之言与此章语意一一脗合亦可以见此诗为耕耨而作彰彰无疑矣】

臣工二章一章四句一章十一句【旧作一章十五句 序及蔡邕独断皆云诸侯助祭遣於庙之所歌也邓元锡为之说曰王祭郊社宗庙亲耕耨百工终亩供明粢焉敬之矣祭讫受厘臣工来助祭者於庙临遣之又申助以豫农谷受明康之赐为後祀端焉於是知先工事鬼神之忠也靡时怠忘也慎终如始慎始於终也教之至也礼尝之日卜来岁之芟猕之日卜来岁之戎社之日卜来岁之稼其豫一也祭先裸鬯先黍稷清酒故重之呜呼於受厘之终惟受明之始於受明之始惟銓艾之终终始不失於敬其惟臣工乎次之颂以为是交神明之本也其论信美矣顾不知保介之说乃天子耕耨所用载在月令吕览甚明若遣诸侯而自呼保介何不相蒙之甚抑岂诸侯亦有保介也而郝敬又强解之谓天子于诸侯将行而呼其车右亦犹敢告仆夫之意善乎邹忠胤之闻之也曰以卑告尊不敢斥言故虞箴有敢告仆夫之说若以君训臣何必尔止有因卑以达尊者岂有因卑以达卑者乎申培说则以为祭先农之诗今按祭先农亦耕耨中之一事然此诗意重在劝农不专为祭咏耳朱子但以爲戒农官之诗果尔当与劳使臣遣戍役诸篇同在小雅不应列颂中矣子贡传阙文】

白驹饯箕子也【出邹忠胤诗传闕 陈际泰谓白宋色客宋号言授之紮以紮其马颂之有客

已言之矣其诸留微子与其子孙之诗欤邹氏直以为饒箕子也其说云殷人尚白至周犹仍其色乘彼白驹非殷士而何受之以紮维隆之为嘉客至公侯不足挽空谷之轍而尚冀其无金玉尔音此其意何笃摯然卒不强留者以贤者固各有志无苦相逼也尝观肤敏之亿丽侯服周京者不为少矣且以不如夏迪简在王庭服在大僚为憾所谓伊人何独可近不可攀如此则予又意非它人必箕子也盖周人诚不吝公侯之爵以宠殷献臣而箕子自靖罔为臣仆岂肯变其初志武王亦不敢强臣之故访范之後即封之朝鲜雅譌白驹颂譌有客要之皆此志也夫殷有三仁微箕犹并在而予独以如玉目箕子者盖微子向已行遯矣若如抱器奔周之妄说则必非倏来而忽去今朝今夕何烦紮焉若既就封则固已膺桓圭而为上公矣尔公尔侯又何劝焉即返旆宋都亦未可云遁思也夫维箕子释囚而陈范陈范而又不为臣是以有朝鲜之长往在彼空谷此行是已无金玉尔音其有味乎洪范之言而更祈嗣音乎予故曰白驹饒箕子也按书序云武王胜殷杀受以箕子归作洪范书洪范篇云惟十有三祀王访于箕子王乃言曰呜呼箕子惟天陰隲下民相协厥居我不知其彝伦攸叙箕子乃言曰我闻在昔鯀陞洪水汨陈其五行帝乃震怒不畀洪范九畴彝伦攸斁鯀则殛死禹乃嗣兴天乃锡禹洪范九畴彝伦攸叙初一日五行次二曰敬用五事次三曰农用八政次四曰协用五纪次五曰建用皇极次六曰乂用三德次七曰明用稽疑次八曰念用庶徵次九曰向用五福威用六极苏轼云箕子之不臣周也而曷为为武王陈洪范也天以是道畀之禹传至於我不可使自我而絕以武王而不传则天下无可传者矣故为箕子者传道则可仕则不可史记云武王既克殷访问箕子乃封於朝鲜而不臣也洪范大传云武王胜殷继公子禄父释箕子囚箕子不忍周之释走之朝鲜武王闻之因以朝鲜封之班固汉书云昔殷道衰箕子去之朝鲜教其民以礼义田蚕织作为民设禁八条相杀以当时偿杀相伤以谷偿相盗者男没入为其家奴女为婢欲自赎者人五十万虽免为民俗犹羞之嫁娶无所讐是以其民终不相盗无门户之闭妇人贞信不淫辟可贵哉仁贤之化也范曄後汉书云昔箕子违衰殷之运辟地朝鲜回顽薄之俗就寬略之法行数百千年故东夷通以柔谨为风异乎三方若箕子之省简文条而用信义其得圣贤作法之原矣竹书云武王十六年箕子来朝史记云箕子朝周过故殷墟伤故都宫室毁圯禾黍生焉欲哭不可欲泣则为近妇人故作麦秀之歌曰麦秀渐渐兮禾黍由由兮彼狡童兮不与我好兮殷之遗民闻之莫不流涕盖箕子自入周後其出处之见于传记者如此当释囚之後因而陈范其时箕子已不肯仕周而周人亦不忍违其意聽其行遯不问所往厥後避地朝鲜渐渐有闻乃始从而封之箕子见周之所以待已者能尽其道故又复朝周诵麦秀之歌其情甚悲故国而其心实公天下斯固周人之所恋慕而不能已已者也是诗若为箕子作定在陈范後逊荒之时决不在封朝鲜来朝之日观勉尔遁思语可见】

皎皎白驹【音钩後同】食我场苗【萧韵】紮之维之以永今朝【萧韵丰氏本作皐】所谓伊人於焉道【丰本作消】遥【萧韵 赋也月白曰皎借以形马色之白陆德明以为洁白也重言之者驾车非一马也驹解见皇皇者华篇白驹箕子所乘按公羊注云礼天子马曰龙高七尺以上诸侯曰马高六尺以上卿大夫曰驹高五尺以上箕子若已受五等之封即宜乘六尺以上之马今乃乘驹者不受周爵故退而就卿大夫之服白者殷所尚之色与振鹭有客义同我诗人自谓也场说文云田不耕者苗说文云艸生于田者又严粲云谷之始生曰苗艸之类始生亦曰苗本草多言春夏采苗是也若以纳稼在场则不名苗矣紮说文亦作𦍋云絆马足也维毛传云系也公羊传云牛马维娄旧说系马曰维系牛曰娄也孔颖达云谓系靽也在

胸曰鞠永长朝旦也得贤人与之话言则觉此朝旦为久语所谓共君一夜话胜读十年书也以永今夕放此伊郑云当作繫繫犹是也伊人严云犹言彼人也不斥言之以致其叹想之意焉何也与焉有之焉同郑云语助之焉假借为焉有之焉因借而借也逍字说文无解与遥联文第云犹翱翔也今按遥本训远逍虽无解以字形求之当与赵同意赵者趋也然则逍遥乃是趋而至远犹言远游也我欲留伊人而伊人若不可留者不知彼将欲於何处而逍遥乎盖既不敢问其所往而思慕之意又不能忘周人之爱敬箕子可谓至矣】皎皎白驹食我场藿【药韵】繫之维之以永今夕【叶药韵祥龠翻】所谓伊人於焉嘉客【叶药韵克各翻 赋也藿本作?说文云禾之少也或以为豆叶又尔雅云藿鹿?其实菰郭璞云今鹿豆也叶似大豆根黄而香蔓延生本草云味苦苗似豌豆人取以为菜亦微有豆气又原始云香草也未详孰是夕暮嘉美也嘉客犹云嘉宾言是人也也将欲於何处为嘉宾而使我不得亲就乎】皎皎白驹【叶尤韵居侯翻此章六句驹侯游三字一韵思期思三字一韵各隔句为韵亦奇体也】赅然来思【支韵】尔公尔侯【尤韵】逸豫无期【支韵】慎【丰本作眷】尔优游【尤韵】勉尔遁【陆德明丰本俱作????陆本又作遯】思【见上赋也赅易说文皆云饰也曰赅然者朱子云光采之貌谢枋得云贤人所过之地山川草木皆有精采思语】

【辞赅然来思望其既去而复来也尔指箕子也前二章因其欲别去而不知所适则想像之曰伊人末章因其既别去而终不可留则摹拟之曰其人唯此章乃对语丁宁之辞故称尔也公侯爵之贵者逸通作佚安佚不劳也豫刘熙云舒也通作预说文云安也期说文云会也言尔若为公为侯则将勤劳国事无有逸豫之期时盖箕子决意不肯臣周而周人亦不敢拂其意也宋人经义云以尔为公则夙夜在公以尔为侯则谨尔侯度劳於王事逸无期矣职思其忧豫无期矣盖为国家计则深惜贤者之去为贤者计则又深体其情之不容不去此颇得诗人微旨慎说文云谨也优游旧统训为自如貌若逐字释之则各有本义优通作优本即忧字说文云行之和也今误作?愁之?游服?云犹流也尔雅顺流而下曰汭游步行为獮舟行为游皆借以象其出入自得之意慎尔优游者言尔既无公侯之责可以优游适志矣犹当慎自保护母或有乖卫生之节盖将以期後会也勉说文云强也遁本作遯易云退也说文云逃也思亦语辞如上文来思之例勉尔遁思言尔虽决意行遯犹望其时时勉图一来不以既遁而遂已也语意与赅然来思相应】皎皎白驹在彼空【文选注作穹】谷【叶沃韵俞玉翻】生刍一束【沃韵】其人如玉【沃韵】毋【陆本作无】金玉尔音【侵韵】而有遐心【侵韵 赋也此章人已别矣因极赞其人之美而仍致其拳拳思慕之意谷书注以为两山间流水之道也刍刈草也解见绸缪篇生刍杜诗所谓青刍也乘马而行于空谷其地寂寞无人往来但见行李萧然惟有新刈生草一束以供秣马之用高风盖可挹矣其人如玉以象其品之贵亦自其出处之节见之坚不可磷洁不可淄堪比德于玉也此四语目极行晖隐然丰采在望汉邹长倩与公孙弘书云夫人无幽显道在则为尊虽生刍之贱也不能脱落君子故赠君生刍一束诗人所谓生刍一束其人如玉也郭泰以丧归徐穉来吊以生刍一束顿泰庐前而去泰曰此必南州高士徐孺子也诗不云乎生刍一束其人如玉吾不堪此喻耳毋金玉尔音者言毋得自爱音声贵如金玉盖终望其来而有以教诲我也旧说但以传书相问讯似未切遐说文云远也行遯之後若终靳一来则是有远心于我矣是诗也倘亦武王所作其醉心于洪范之训者深乎曹氏学侄云诫其遁思之慎勉而勿怀金玉之遐心盖今日以嘉客留之者实他日以公侯期之也噫孰知箕子之适于东方哉】

白驹四章章六句【子贡传以为周公制作礼乐用之燕享此诗所以燕贤也玩诗中絜维空谷等语明是贤者不肯仕于其国而以为燕贤之诗可乎申培说则谓贤者将隐去王者留之而作是诗夫杲留之自上贤者亦不应决去若是是惟若箕子者乃不可留耳序以为大夫刺宣王郑玄云刺其不能留贤也宣王之末不能用贤贤者有乘白驹而去者而文昌化书亦云宣王以四方无虞于心少怠一曰师氏韦仲将谏章方上天威肃震置韦于理于是道德之士老成之人有翻然而去者予心忧焉乃作白驹之诗以为讥刺劝王留意贤才宽容受谏使有位者无去志已去者冀其来归隐迹者期于愿仕诗闻于上上意感焉於是诏告在庭责躬悔过复韦之职束帛弓旌日遣无虚未几清议归美士风蔼盛天下复见成康化矣序因篇次与宣王诸诗相错遂以为宣王事文昌化书则好事者因序说而附益之要未足信陈阳乐书则引古琴曲谓衰世失朋友而作亦影响之辞若仪礼投壶篇云凡雅二十六篇共八篇可歌歌鹿鸣猗猗采芣伐檀白驹驹虞八篇废不可歌七篇商齐可歌也三篇间歌按投壶所以歌此者当是以其出处有合于君子之道故以之娱宾耳】

小宛教康叔毖酒也商受酗酒天下化之妹土商之都邑染恶尤甚武王以其地封康叔故作此诗以诫之与周书酒诰相表里【康叔名封文王子武王弟汉儒惑康诰篇首四十八字有周公作雒之语遂谓康叔受封在成王世今按篇中曰孟侯朕其弟小子封又曰乃寡兄勗肆汝小子封在兹东土其为武王之辞明甚篇首四十八字宋儒定以为雒诰脱简是也蔡沉云或谓康叔在武王时尚幼故不得封按汲冢周书克殷篇言王即位於社南羣臣毕从毛叔郑奉明水卫叔封传礼召公奭赞采师尚父牵牲史记亦言卫康叔封布兹与汲书大同小异康叔在武王时非幼亦明矣且康叔文王之子叔虞成王之弟周公东征叔虞已封於唐岂有康叔得封反在叔虞之後必无是理也吴氏云先儒谓康叔受封时尚幼者以此书称小子之故康叔与武王周公皆太姒之子安得为尚幼今陕西之俗凡尊命卑贵命贱虽长且老者亦以小子呼之此所谓小子亦然按康诰酒诰二篇皆同时之作紂以酒亡国余习犹存康叔所封在殷故墟故武王深诫之欲其刚制于酒为臣民倡其後周公作无逸以训成王亦曰无若殷王受之迷乱酗于酒德哉盖惕心于坠命之故者深矣今节録酒诰之文于此以表此诗立言之意王若曰明大命于妹邦乃穆考文王肇国在西土厥诰毖庶邦庶士越少正御事朝夕曰祀兹酒惟天降命肇我民惟元祀天降威我民用大乱丧德亦罔非酒惟行越小大邦用丧亦罔非酒惟辜文王诰教小子有正有事无彝酒越庶国饮惟祀德将无醉惟曰我民迪小子惟土物爱厥心臧聪聽祖考之彝训越小大德小子惟一王曰封我西土棐徂邦君御事小子尚克用文王教不腆于酒故我至于今克受殷之命王曰封我闻惟曰在昔殷先哲王不敢自暇自逸矧曰其敢崇饮在今後嗣王酣身厥命罔显于民祇保越怨不易诞惟厥纵淫佚于非彝用燕丧威仪民罔不尽伤心惟荒腆于酒不惟自息乃逸厥心疾狠不克畏死辜在商邑越殷国灭无罹弗惟德馨香祀登闻于天诞惟民怨庶羣自酒腥闻在上故天降丧于殷罔爱于殷惟逸天非虐惟民自速辜王曰封子不惟若兹多诰古人有言曰人无於水监当於民监今惟殷坠厥命我其可不大监抚于时予惟曰汝劓毖殷献臣侯甸男卫矧太史爰内史爰越献臣百宗工矧惟尔事服休服采矧惟若畴圻父薄违农父若保宏父定辟矧汝刚制于酒厥或诰曰羣饮汝勿佚尽执拘以归于周予其杀又惟殷之迪诸臣惟工乃湏于酒勿庸杀之姑惟教之有斯明享乃不用我教辞惟我一人弗恤弗蠲乃事时同于杀王曰封汝典聽朕毖勿辨乃司民湏于酒】

宛【释文作菀】彼鸣鵒翰飞戾【文选注作厉】天【先韵亦叶真韵汀因翻】我心忧伤念昔【春秋繁露作彼】先人【真韵亦叶先韵如延翻】明发不寐有怀二人【见上兴而比也宛毛传云小貌按说文宛或从心作窻考工记函人云凡察革之道眡其鑽空欲其窻也注亦解窻谓孔小貌则宛义训小明矣鸣鵒毛传云鵒鵒也尔雅以为鵒鵒郭璞云似山鵒而小短尾青黑色多声今江东亦呼为鵒鵒字林作骨鵒云小种鵒也罗愿云鵒鵒春来冬去备四时之事故少皞以为司事之官陆佃云一名鸣鵒月令所谓鸣鵒拂其羽者是也一名鸞鵒庄子所谓蜩与鸞鵒笑之者是也盖此似山鵒而小释鸟曰鸞山鵒故此一名鸞鵒又其多声故一名鸣鵒也性食桑葚然过则醉而伤其性而陆玕云鵒鵒一名斑鵒盖斑鵒似鵒鵒而大鵒鵒灰色无绣项陰则屏逐其匹晴则呼天语曰天将雨鵒逐妇者是也斑鵒项有绣文斑然故曰斑鵒则与此鵒鵒全异玕之言非今此鸟喜朝鸣故一曰鵒嘲也凡鸟朝鸣曰嘲夜鸣曰鵒翰广韵云鸟羽也戾通作丽附着之意许慎云鸣鵒迅其羽直刺上飞数千丈入云中其勉而飞如此陆云鸣鵒小鸟决起而飞抢榆枋时则不至而控于地而已矣今飞鸣戾天则其声亦远闻其势亦高至惟勉强故也愚按诗兴鸣鵒亦就醉酒取义鵒耽桑葚过醉则伤其性今高飞远举则不至伤醉矣可以人而不如鸟乎我心忧伤武王忧康叔染于纣俗不知毖酒则必有丧亡之祸也念昔先人以下戒勉康叔之辞也念说文云常思也先人指文考也明发朱子云谓将旦而光明开发也怀说文云念思也二人文王之父母也念昔文王以父母之心为心当明发之时辄思亲而不能寢寐其孝如此康叔当追文王之孝则自不至丧德丧命以辱吾亲也礼祭义篇云文王之祭也事死者如事生思死者如不欲生忌日必哀称讳如见亲祀之忠也如见亲之所爱如欲色然其文王与诗云明发不寐有怀二人文王之诗也按观此可以得诗意】人之齐圣饮酒温克【职韵】彼昏不知壹【列女传丰氏本俱作一】醉日富【叶职韵笔力翻】各敬尔仪【支韵】天命不又【叶支韵盈支翻 赋也齐说文云禾麦吐穗上平也象形按生而齐者莫若禾麦故借以为整肃之义圣朱子云通明也洪迈云自孔子赞易孟子论善信之前未甚以圣为尊崇人之齐圣不过饮酒温克而已左传八恺齐圣广渊明允笃诚周官六德智仁圣义中和皆混於诸字中了无所异以故鲁以臧武仲为圣人伯夷伊尹柳下惠皆曰圣朱善云整肃者必不以酒而丧仪通明者必不以酒而败德温和克胜也以温和自胜不止能胜乎酒而已郝敬云醉人多怒故不醉而怒曰罍酒诰曰厥心疾狠不克畏死惟齐圣之人醉能温克也昏闇也彼昏指纣也壹说文云专壹也字从壶徐锴云取其不泄也富备也言彼昏昧之人不知酒之为害专一惟取醉是务且日备酒食以资沈湎也一说万尚烈云壹醉日富者言能谨之于初饮不至醉则末路可持惟一醉焉则其继也遂日甚一日有不能自禁者酒使之也今俗所云入惯场走熟路是也亦通四句一法一戒而意重在戒敬主心言仪主貌言仪本于敬则仪非外也凡丧仪之事非一而湎酒为甚故酒诰曰天降威我民用大乱丧德亦罔非酒惟行言各则不独戒康叔并欲转戒其臣若民所谓明大命于妹邦者此也天命与天威对看凡诸侯之得有其国卿大夫之得有其家士庶人之得有其身皆本于天之眷命而然也又毛云复也沈湎则天命将改一去不复来也或疑饮酒小节未必系天命之去留殊不知荡心败德纵欲荒政疎君子而狎近幸玩寇讐而忘忧患皆自饮酒后之禹恶旨酒曰後世必有以酒亡国者历观前史其事可监晋元帝以王导一言而覆杯其能植立江左宜哉一说民受天地之中以生所谓命也於是有动作威仪之节以定命也无时无处可萌一懈心才有懈心则命已弃我而去不复存矣此主义理言命较细但于戒意未切左昭元年楚公子围为令尹享赵孟赋大明之首章赵孟赋小宛之二章义盖取天命不又也】中原

有菽【丰本作未】庶民采【叶纸韵此礼翻】之螟蛉【说文丰本俱作蠕】有子【纸韵】蜾【丰本作果说文作 𧈧】羸负【叶纸韵蒲美翻】之教诲尔子【纸韵】式谷似【纸韵丰本作倡】之【比也中原毛云原中也季本云中原旷地非八家所受之田也菽朱子云大豈也尔雅谓之戎菽戎者大也张揖云大豆菽也小豆荅也采说文云捋取也毛郑以为采藿藿者菽叶也孔云以言采之明采取其叶故言藿也今按诗言采芑采麦芑麦亦谷也安在藿可言采菽不可言采乎邓元锡云中原有菽非适有主也采者得之乃善何适主之有能者从之矣螟蛉犍为文学云桑上小青虫也似步屈其色青而细小或在草叶上郭璞云俗谓之桑螵亦曰戎女蜾羸说文作 羸尔雅云蒲芦也郭云即细腰蜂也俗呼为蠛蠓方言云蠛燕赵之间谓之蠛蠓其小者谓之蠛蠓许慎云土蠛也天地之性纯雄无子列子云纯雌者其名大腰纯雄者其名穉蠛陆玑云取桑虫负之于木空中或书简笔筒中七日而化为其子里语曰咒云象我象我法言亦云螟蛉之子殪而逢果羸祝之曰类我类我久则肖之矣化书云蠛蠓之虫孕螟蛉之子传其情交其精混其气和其神随物小大皆得其真蠢动无定精万物无定形按旧说相传皆如此惟陶隐居云今一种黑色腰甚小衔泥於人壁及器物边作房如并竹管其生子如粟米大置中乃捕取草上青蜘蛛十余枚满中仍塞口以拟其子大为粮也其一种入芦竹管中者一名果羸亦取草上青虫或言细腰无雌皆取青虫教祝便变成己子斯为谬矣程良孺云余乃见细腰黑蜂在竹木缝上作巢七孔以次封之孔皆衔青黄蜘蛛未半孔时即生子如粟大於蜘蛛之背仍用蜘蛛置满以泥封之数日子渐大如青屈蠃形蚀完蜘蛛乃成蛹蛹枯内出蜂啮泥口而出声与大蜂祝声无异解颐新语云近世诗人取蜾羸之巢毁而视之乃自有细卵如粟寄螟蛉之身以养之其螟蛉不生不死蠢然在穴中久则螟蛉尽枯其卵日益长火乃为蜾羸之形穴窍而出盖此物不独取螟蛉亦取小蜘蛛置穴中寄卵於蜘蛛腹胁之间其蜘蛛亦不生不死久之蜘蛛尽枯其子乃成今人养晚蚕者苍蝇亦寄卵于蚕之身久之其卵为蝇穴茧而出殆物类之相似者董叶翁云蜾羸负螟蛉埋土中而寄子其身如鸡抱子暖之而使生然其子即蜾□之子非以螟蛉之子为子载侗云尝亲见蠛蠓负螟蛉入笔管有两蠛蠓互飞而共营之非独阳无子而外取螟蛉之子为子也如腐草化萤亦萤宿其子于腐草既成形则自腐草而出杜诗有云幸因腐草出最精于物理杨慎云露蜂悬其巢每穴各缀一卵如粟不知用何物养之久乃渐大成蜂或谓细腰有术能禁物其祝声可听乃其禁术也庄子曰细腰者化彼之所不可知者正谓其能禁螟蛉蜘蛛不生不死以化物身之膏润滋养其卵而成其形列子以为纯雄殆未可信置初于背曰负螟蛉之背有子乃蜾羸之子蜾羸使之负之正借之以孚化其子耳教子之道日渐月俟之自化何以异是说文云上所施下所效曰教诲晓也徐锴云丁宁海之若决晦昧也式用谷善也式谷者沉湎之反似之言子克肖也教尔子必用善道而以身教如庶民之采菽不遗余力而让人如螟蛉之负子优游以听其自化则庶乎可与尔相似矣上章危以命此章感以子盖身者亲之枝子者身之枝敬威仪以善吾身所以继先人也式谷以教吾子所以继吾身亦所以继先人也】 题【中论作相潜夫论作顾】彼?【潜夫论丰本俱作鹄】令【叶庚韵离贞翻潜夫论释文丰本俱作鹄】载飞载鸣【庚韵】我日斯迈而月斯征【庚韵】夙兴夜寐母【大戴礼韩诗外传潜夫论诗大全颍滨集传朱传读诗记严氏诗缉俱作无】忝尔所生【庚韵 兴而比也题通作睇郑笺云题之为言视睇也按说文睇目小视也?令详见常棣篇载之言则也禽经注云?令共母者飞鸣不相离故取为兄弟之比旧皆谓?令且飞且鸣口翼俱劳无有止息以兴进修不得暇逸故毛云?令不能自舍君子有取节尔东方朔亦云士所以日夜孳孳敏行而不敢怠

也譬若?鵠飞且鸣矣皆附会曲解非诗本意我武王自我也迈犹过也日月逾迈之迈武王未受命故言我日斯迈犹云日薄西山也而汝也指康叔也征犹进也汝之春秋方进未艾当勉于自修如下文所云也日月对看互举见义一说朱子云我既日斯迈则汝亦月斯征矣言当各务努力不可暇逸徐干云有进业无退功我日斯迈而月斯征迁善不懈之谓也亦通自朝至暮为夙夜兴起寐卧也大戴礼云言不自舍也母禁止辞忝说文云辱也所生谓父母也敬慎其身无时不然以求无辱于父母正与首章念昔先人句相应斯言也天显之哀切于中心康叔者闻之有不戚戚然动乎韩婴云昨日何生今日何成必念归厚必念治生日慎一日完如金城诗曰夙兴夜寐无忝尔所生又孝经引此诗而足之曰用天之道因地之利谨身节用以养父母此庶人之孝也按孝经引诗姑断章比类云耳若论谨身之为孝岂特庶人事哉】交交桑扈【丰本作鴈】率场啄粟【沃韵】哀我填【韩诗作疹】寡宜岸【韩诗盐铁论丰本俱作犴】宜狱【沃韵】握粟出卜【屋韵】自何能谷【屋韵比也此章因民多以酒酒罹罪故举以为戒为末章发端也交交欧阳修云参襍相乱之谓桑扈鸟名尔雅云窃脂也郭云俗呼青雀觜曲食肉喜盗脂膏食之因以名云淮南子云马不食脂桑扈不啄粟非廉也陆佃云桑扈盖一名而二种若鲁有两曾参也尔雅释鸟谓桑扈窃脂鵠鹑剖苇此桑扈之一种也又云桑扈窃脂棘扈窃丹此桑扈之一种也盖对部苇言之则窃脂者所谓青质觜曲食肉好盗脂膏者是也对窃丹者言之则窃脂者所谓素质其翅与领皆有文章者是也率场啄粟正以其性之窃脂者言之也色之窃脂言浅白也又补传云或指其色或指其性实一物耳率通作卫循也场谷场也解见七月篇啄说文云鸟食也桑扈本食肉之物而今乃循谷场以啄粟喻人不宜耽面黻而今反沉湎也填本寘字通作闾汉西域于闾国或作寘是也闾衆盛貌岸当依韩诗作犴野狗也犬所以守故谓狱为犴本作犴狱说文云确也从言谓讼言也从?二犬所以守也韩诗传云乡亭之系曰犴朝廷曰狱言哀我人斯或衆或寡鲜不罹于在外之犴在内之狱者推其所以皆酒之为也两言宜字悲惨可掬握说文云搯持也陆佃云持五指也在外为持在内为握严云史日者传曰卜而有不审不见夺糈见古以粟问卜也自从也谷善也握粟出卜盖欲求所以禳灾祈福者亦商人尚鬼之遗习则然但其所为如此亦从何能善乎妹土染纣恶已深其时以酒获罪者必比比而是故武王云然酒诰曰羣饮女勿佚尽执拘以归于周予其杀此之谓也乐记云夫豢豕为酒非以为祸也而狱讼益繁则酒之流生祸也又桓寛云方今律令百有余篇文章繁罪名重郡国用之疑惑或浅或深自吏明习者不知所处而况愚民乎此断狱所以滋衆而民犯禁也诗云宜犴宜狱握粟出卜自何能谷刺刑法繁也虽非诗意亦恍惚相近】温温恭人如集于木【屋韵】惴惴小心如临于【中说作空丰本作深】谷战战兢兢【蒸韵韩诗外传此句下有如临深渊四字】如履薄冰【蒸韵丰本作夬 赋也承上章言民酒酒之生祸如此康叔身居民上可不益知所以自愍乎酒语言矧汝刚制于酒意正如此温温毛六和柔貌恭人谦恭之人鸟栖曰集如集于木旁徨踟蹰不敢自安盖状其温恭之容如此即第二章言温克之意荀子云行而拱翼非渍淖也立而俯项非系戾也偶视而先俯非恐惧也然夫士欲独修其身不以得罪于比俗之人也惴说文云忧惧也主心言惴惴以状小心如临于谷恐其陨越以状惴惴即第二章言敬仪之意温温恭人惴惴小心皆指好修君子而言欲康叔取法也韩诗外传孙叔敖遇狐丘丈人狐丘丈人曰仆闻之有三利必有三患子知之乎孙叔敖蹙然易容曰小子不敏何足以知之敢问何谓三利何谓三患狐丘丈人曰夫爵高者人妬之官大者主恶之禄厚者怨归之此之谓也孙叔敖曰不然吾爵益高吾志益下吾官益大吾心益小吾禄益厚吾施益博可以免于患乎狐丘丈人

曰善哉言乎尧舜其犹病诸诗曰温温恭人如集于木惴惴小心如临于谷按此于诗旨不甚合然亦格言也战战二句勉励康叔之辞解见小旻篇康叔取法于温温惴惴之贤者当益战兢自持时时如履薄冰而恐?者然则自不敢湎酒而不至以先父母之遗体行殆矣今按孝经论语所引战战兢兢之诗皆有如临深渊之句味其语意正与此诗之言有怀二人毋忝所生互相脗合非小旻诗也孝经云非先王之法服不敢服非先王之法言不敢道非先王之德行不敢行是故非法不言非道不行口无择言身无择行言满天下无口过行满天下无怨恶三者备矣然後能守其宗庙盖卿大夫之孝也论语云曾子有疾召门弟子曰启予足启予手诗云战战兢兢如临深渊如履薄冰韩诗外传引此章全文亦有七句当是二诗文法相类因而相混耳刘向云存亡祸福其要在身圣人重诫敬慎所忽谚曰诫无垢思无辱夫不诫不思而以存身全国者亦难矣诗曰战战兢兢如临深渊如履薄冰此之谓也董鼎云古之为酒本以供祭祀灌地降神取其馨香下达求诸陰之义也後以其能养阳也故用之以奉亲养老又以其能合欢也故用之冠婚宾客然曰宾主百拜而酒三行人曰终日饮酒而不得醉焉未尝过也自禹饮仪狄之旨酒而疏之宁不谓其太甚已而亡国之君败家之子接踵於後世何莫繇斯然则文王之教不惟当明於妹邦家写一通犹恐覆车之不戒也又按武王觴豆铭曰食自杖食自杖戒之儆儆则逃又觴铭曰乐极则悲沈湎致行社稷为危可与此诗及酒诰互相发】

小宛六章章六句【小宛之义解见小旻篇子贡传申培说丰氏本篇名俱作鸣鳩今按左传赵孟赋小宛则小宛之名旧矣子贡传诸书所以变称鸣鳩者以国语秦伯燕公子重耳赋鳩飞遂妄意此名非古耳岂知国语所载秦伯赋鳩飞公子赋河水原非篇名第摘本章中二字自是文家变体其实鳩飞之篇仍名小宛犹之河水之篇仍名硕人也序云大夫刺宣王也郑玄以当为刺厉王之诗要皆无所据唐孔氏又径改为刺幽王而郝敬且从而曼衍其说谓鸣鳩即雉鳩引本草食布谷佩其骨令夫妇和以刺幽王之黜申后又解二人为宣王与姜后引礼鸡初鸣适父母舅姑所为明发不寐刺幽王夫妇乖离中原采菽比太子见黜在外螟蛉负子比申侯扶太子召犬戎诲子式谷刺王?庶夺嫡眷令刺伯服兄弟乱伦附会如此亦不根甚矣朱子则以为此大夫遭时之乱而兄弟相戒以免祸之诗申培说袭朱传而不显其世要亦依附文义而想像为之辞者不必有所根着也】

诗经世本古义卷九

卷十之上

<经部,诗类,诗经世本古义>

钦定四库全书

诗经世本古义卷十之上

明 何楷 撰

周成王之世诗五十篇

闵予小子武王既葬而祔主于庙【出殷大白诗经副墨】嗣王朝于庙也【出序 嗣王者成王也朝于庙者朝于武王所祔之庙则王季庙是也左传云凡君薨卒哭而祔祔而作主礼檀弓篇云卒哭曰成事是日也以吉祭易丧祭明日祔于祖文殷练而祔周卒哭而祔仪礼士虞礼篇云将旦而祔则荐卒辞曰哀子某来日某躋祔尔于尔皇祖某甫尚飨明日以其班祔曰孝子某孝显相夙兴夜处小心畏忌不惰其身不宁用尹祭嘉荐普淖普荐澋酒适尔皇祖某甫以躋祔尔孙某甫尚飨贾公彦云欲使死者祔於皇祖又使皇祖与死者合食故须两告之尹祭者脯也嘉荐者醑醢也普淖者黍稷也普荐者鉶羹也澋酒者酿酒也此诗首三句明在丧中之辞又有皇祖夙夜之语大都与仪礼合其为既葬卒哭躋祔于庙之祭无可疑矣】

闵予小子遭家不造【皓韵叶宥韵徂候翻】嬛嬛【石经丰氏本俱作??汉书崔灵恩本俱作𦉰𦉰文选注俱作惓惓】在疚【宥韵说文陆德明本俱作?】於【音乌後同】乎皇考【皓韵】永世克孝【叶宥韵许候翻】念兹皇祖陟【山堂诗考作徙】降【山堂诗考作肇】庭【叶经韵他定翻汉书作廷】止维予小子夙夜敬【叶经韵读如径吉定翻】止於乎皇王【阳韵】继【丰本作?】序思不忘【阳韵 赋也闵通作愍说文云痛也郑玄云悼伤之言也李氏云左传言寡君少遭闵凶予不能文是闵者居丧之称曲礼云天子未除丧曰予小子遭说文云遇也造说文云就也郑云犹成也嬛本作嬛说文云材紧也字从女乃女之轻便者故取以为渺小纖弱之名此成王自称也疚尔雅云病也按说文无疚字当作?李氏云左传有在疚之文亦是居丧之称也言遭逢此时我家父子不为造物所成就大统方集武王遽崩使我渺小之身失所依怙正在忧病之中未知攸济也於乎叹声如乌之吁呼也皇考解见離篇郑云武王也永世克孝苏辙云终身能孝也愚按时武王将祔祖庙故特举其孝而言世德作求善继善述皆武王克孝之实念兹皇祖四句告皇祖之辞也念者成王思念之也兹此也皇祖以昭穆之序推之则王季也按古者祔庙之礼孙必祔于祖以孙与祖昭穆之位同所谓以其班祔也自太祖而下昭穆相间祖为昭则父为穆而已身复为昭祖为穆则父为昭而已身复为穆周之世次太王文王皆穆王季武王皆昭书称文王为穆考诗称武王为昭考是也太王文王之子为昭王季武王之子为穆左传曰太王之昭王季之穆文之昭武之穆是也祔之为言附也祔祭者告其祖父当逋迁于向上之庙而新死之主当入此庙也仪礼祝辞称死者之祖父为皇祖故知为王季也陟升降下也庭说文云宫中也止通作只说文云语已辞

也後同陟降庭止者顏師古謂鬼神上下臨其廷朱子引楚辭三公穆穆登降堂只與此文勢正相似夙夜敬止即儀禮祝辭言夙興夜處小心畏忌之意成王于祔祭之日祇告王季之廟言我思念皇祖之神靈時時往來于此廟廷之中如在其上如在其左右今我小子將以皇考濟祔于廟夙夜畏忌不敢寧居蓋愛敬交至之辭也於乎皇王二句成王自鳴其思慕也皇王武王也文王有聲篇稱武王為皇王可據以武王自居王位故稱皇王若大王王季文王乃追王耳繼序指祔廟言繼昭穆之序也思不忘者言武王功德盛大天下人思慕之皆不能忘也書曰七世之廟可以觀德武王永世克孝身剏鴻業異日者將為我周世世不祧之主豈徒如今日之繼序以其班祔已乎烈文之詩曰無競維人四方其訓之不顯維德百辟其刑之於乎前王不忘大學曰君子賢其賢而親其親小人樂其樂而利其利此以沒世不忘也是皆思不忘之義疏也徐光啓云凡子孫不類者統承大業使謂可以佚蕩自恣觀此詩何等悲愴怨慕即此便是守成之本】

閔予小子一章十一句【前漢書元帝時匡衡上疏曰昔者成王之嗣位思述文武之道以養其心休烈盛美皆歸之二后而不敢專其名是以上天歆享鬼神佑焉其詩曰念我皇祖陟降庭止言成王常思祖考之業而鬼神佑助其治也元帝崩成帝即位衡復上疏曰陛下秉至孝哀傷思慕不絕於心未有游虞弋射之燕誠隆於慎終追遠無窮已也竊願陛下雖聖性得之猶復加聖心焉詩云煢煢在疚言成王喪畢思慕意氣未能平也蓋所以就文武之業崇大化之本也此說流傳遁相祖述鄭玄蔡邕皆云成王除武王之喪將始即政朝于廟也申培說則云成王免喪始朝先王之廟作詩以自警朱子則云成王免武王之喪而朝于廟玩其辭知其哀未忘也又說者亦皆以皇祖指文王謂念茲皇祖者言武王能念文王即上文所謂克孝者也惟武王能念文王故成王今日亦不忍忘武王其曰夙夜敬止者即文王之敬止武王之敬勝以心法為家法也繼序者繼其一統相承之次序而為天子也似此鋪叙其於文理亦順惟發首三句終非免喪之語禮居喪不祭既未免喪則必無朝廟之事而此詩亦不宜載之頌中矣愚故以儀禮皇祖夙夜等語為據而斷以為卒哭祔祭之詩讀者試一諷咏定知不妄子貢傳闕文】

匏有苦葉邶人刺管叔之詩【出申培說鄭玄云邶殷紂畿內地名范曄云朝歌紂所都居南有牧野北有邶國羅泌云邶武庚之封漕是也今滑之白馬有鄆水孟子云周公使管叔監殷管叔以殷畔子貢傳云管叔以殷畔邶人風之賦匏有苦葉今按子貢傳申培說二書皆後人贗托而愚獨于是詩有取者以其語意較序旨為近且是詩固邶詩也通章皆寓言與枚乘諫吳王書相類】

匏【周禮注作苞】有苦葉【韻】濟有深涉【叶韻】深則厲【霽韻亦叶屑韻力薛翻說文丰氏本俱作砮】淺則揭【霽韻亦叶屑韻丘杰翻比也匏者苦匏也陸佃云長而瘦上曰瓠短頸大腹曰匏傳曰匏謂之瓠誤矣蓋匏苦瓠甘復有長短之殊定非一物也子曰吾豈匏瓜也哉焉能系而不食系而不食苦故也魯語諸侯伐秦及涇不濟叔向見叔孫穆子穆子曰豹之業及匏有苦葉矣叔向曰苦匏不材於人共濟而已魯叔孫賦匏有苦業必將涉矣韋昭注謂匏不可食但佩之可以渡水是也詩義疏云匏叶小時可以為羹又可淹煮極美河東及播州常食之八月中堅強不可食故云苦葉嚴粲云苦匏經霜其叶枯落然後乾之腰以渡水

今匏尚有苦叶则其匏未坚不可用也济朱子云渡处也深者浅之对朱子云行渡水曰涉又陆佃云匏记时也言匏有苦叶则济有深涉矣庄子以为秋水时至百川灌河秋水涨之时也冬水缩之时也匏亦可以济水故诗以纪济有深涉之时厉通作礪说文云履石渡水也字从水从石会意浅说文云不深也揭说文云高举也褰裳渡水之称诗人之意言匏未可用而渡处之水方深则尚难以徒行而涉也有人焉曰我于深处则累石以涉之我于浅处则褰裳以涉之不问水之浅深惟期于渡而已则亦冥行不顾之甚矣以比殷无复兴之理周无可图之机管叔以殷畔亦如无匏而涉深者然不自致殒身不止也论语荷蓐之讥孔子曰莫己知也斯己而已矣深则厉浅则揭意亦同此盖讥其可已而不已非度量浅深之说也】有弥济盈【庚韵】有鷺雉鸣【庚韵】济盈不濡轨【叶有韵已有翻】雉鸣求其牡【有韵比也弥本作瀾说文云满也济即上章济有深涉之济盈满也鷺说文云雌雉声字从鸟唯赵颐光云唯者膺声也雄唱雌赀故从唯雉野鸡也徐锴曰雉豸然介直貌春秋运斗枢云玗星散为雉罗愿云雉耿介之禽应义气其鸣以颈相勾沈万钶云雉火畜也感于阳而有声先鸣而後鼓翼化书云雉不再合信也详见雄雉篇濡毛传云渍也轨说文云车辙也辙者车迹也车轮所辗迹也又诗诂云辘也车轴之端贯毂者名为辘毂末之小穿容辘者名为轂少仪注谓轨与轂于车同谓辘考工记注谓轂辘二名俱非轨皆非也罗中行云车轮广狭高下皆定于轨轨同则辙迹亦同後人因谓车辙亦曰轨曲礼尘不出轨以高下言中庸车同轨以广狭言盖车轮崇六尺六寸轨居轮中若濡轨则水深三尺三寸也毛传则谓繇辘以上为轨按说文轨从车九声軌音范车轼前也从车凡声经文轨牡相叶非凡声也然轨有二义当以说文之解为正牡说文云畜父也尔雅云飞曰雌雄走曰牝牡济盈无不濡之理而涉者贪于必进谬谓不能濡辙以比不义之人自以其所行为无伤而为之也雌雉喻管叔管叔为周同姓当忠于周今乃挟武庚以叛是求其异类之牡也张学龙云诸家以牡鸡雄狐为证言飞走通也殊不识诗人之意曰当濡其辙今乃不濡其辙迹是大可怪也当求其雄今乃求其牡兽是大异常也如此寻之则得诗人之意矣】雝雝【尔雅埤雅作雍雍今石经作雍雍】鸣鴈【叶翰韵鱼肝翻开元五经文字音岸史记鴈门正义云鴈当为岸声之误也说文本作雁从佳从人厂声其从鸟作鴈者鵞也徐锴云从雁省声伪物也鵞鵠似雁而德不然故凡以伪乱真者曰鴈韩非子齐伐鲁索谗鼎鲁人以其鴈往齐人曰鴈鲁人曰真今文以鴈为鴈而以雁为鴈盐铁论作□】旭【易释文引诗作吁埤雅作朝】日始旦【翰韵】士如归妻迨冰未泮【翰韵比也雝本鸟名即雝渠也其鸣声和故谓和鸣为雝雝鴈本作雁鸟名畏寒秋南春北谓之阳鸟又名朱鸟其飞翔有次序记谓兄弟之齿鴈行是也羊祜赋云排云墟以颀颀汰弱波以容与进凌厉乎太清退嬉游乎玄渚鸣则相和行则接武前不絶贯後不越序齐力不期而并至同趣不要而自聚愚按此以比周公于武王有兄弟之亲尽忠王室其和声远闻管叔亦武王之弟而图为不轨则是鴈之不若也旭说文云日旦出貌孔颖达云旭者明着之名故为日出旦字从日见一上一地也徐锴云日出于地也此以比周室方兴之象又盐铁论引诗云雍雍鸣□旭日始旦登得前利不念後咎故吴王知伐齐之便而不知干遂之患秦知进取之利而不知鴈门之难是以知一而不知十也愚按依此则为嘲刺管叔之辞亦通归妻者谓使之来归于己丰坊云古人诗文多倒句法妇人谓嫁曰归娶妻而曰归妻言使之嫁我亦倒意也迨本作逮尔雅云及也泮通作判说文云分也郑玄云冰未散正月中以前也荀卿云霜降逆女冰泮杀止家语云霜降而妇功成嫁娶者行焉冰泮农业起昏礼杀于此言士之娶妻当及九月霜降之後正月冰未泮散之前以比武庚如欲兴复当及周室王业未固之时今天下事已

定矣管叔欲何为哉书所谓殷小腆诞敢纪其叙正此意也】招招舟子【叶有韵济口翻】人涉卬【陆德明云或作仰音同】否【有韵丰本作不】人涉卬否【同上】卬须【尔雅作?】我友【有韵比也招说文云手呼也招之不一而足曰招招也舟子舟人主济渡者人指管叔卬尔雅云我也否说文云不也须通作?说文云待也张衡应间云虽有犀舟劲楫犹人涉卬否有须者也此言人皆徒涉我独招舟子而不徒涉则与履险冥行者异矣然所以如此者我意更有所为欲须待我友而同济也盖审择所从必在忠于王室者其肯与乱贼为党乎然则此诗之作其亦民献十夫之徒与郝敬云通篇意似不属而联络如贯珠首言深涉次章即接以济盈次言雉鸣三章即接以鸣鴈而末章舟子仍归利涉须友仍是择偶迨冰未泮语亦於济涉晦映有情且舟则不需匏矣犹然慎重如此彼厉揭者可苟焉已哉回合纵横隐隐跃跃待闻者自喻】

匏有苦叶四章章四句【序以为刺卫宣公也公与夫人并为淫乱胡胤嘉云刺淫之诗未有若苦叶之辞微矣岂有所避而然欤序言刺宣公也夫人当为宣姜宣姜适汲子公要之公无人道矣姜亦从乱也何得无刺焉前二章指其淫则痛恶之意不必极言矣後二章导以正则我之不然因彼而自显也一章不可涉而涉刺公要汲妻也苦匏供济而渡处方深难以济矣妄行者若曰深则厉浅则揭何待匏焉此盖有无畏忌之意焉二章非其妃而求刺姜从公也弥然济盈鷺然雉鸣其淫佚之意於此可想见矣济盈而曰不濡轨雉鸣而反求其牡其悍然不顾犯礼相从何所不至哉三章求之有礼刺公无礼也鴈取其匹曰取其明冰未泮以言其及时朱子所谓求之不暴而节之以礼也曰士如归妻自士而上更不可苟矣於此见其为刺宣公诗也四章卬须我友刺姜不须汲也济渡之细犹择而从邂逅仓皇不忘气类况匹妃之际可苟合乎哉按此说亦通但於鸣鴈一章颇觉附会难解故不从】

鸛鳴周公救乱也成王未知周公之志公乃为诗以遗王名之曰鸛鳴焉【出序 救乱者救管蔡之乱未知周公之志者未知周公安王室之志也按尚书金縢篇曰武王既丧管叔及其羣弟乃流言於国曰公将不利于孺子周公乃告二公曰我之弗辟我无以告我先王周公居东二年则罪人斯得于後公乃为诗以贻王名之曰鸛鳴王亦未敢诮公汉孔氏解辟为法以居东为东征谓致辟法于管叔而诛杀之也郑玄读辟为避以居东为避居东都黄氏辨之谓管蔡流言之时尚未有东都也王应麟以为居国之东似得其实今考书成王感风雷之变出郊以迎意当时必如今之大臣释位待罪出国之东郊以居耳朱子云弗辟之说只从郑氏为是三叔方流言周公处骨肉之间岂应以片言半语遽然兴师以征之圣人气象大不如此又成王方疑周公周公固不应不请而自诛之若请之于王亦未必见从虽曰圣人之心公平正大区区嫌疑似不必避但舜避尧之子禹避舜之子自是合如此若居尧之宫逼尧之子即为篡矣或谓周公居东不幸成王终不悟不知周公又如何处愚谓公亦惟尽其忠诚而已矣问鸛鳴诗其词艰苦深奥不知当时成王如何便理会得曰当时事变在眼前故读其诗者便知其用意所在自今读之既不及见当时事所以谓其诗难晓然成王虽得此诗亦只是未敢诮公其心未必能遂无疑及至风雷之变啓金縢之书後方始释然开悟刘公瑾云流言之兴而公弗避居以待成王之察则其心虽无私而义有未尽故曰我无以告我先王是以避居二年之後成王既知流言之罪人而疑虑未释乃作鸛鳴以喻之观其告鸛鳴以无毁我室可见其诗作于武庚未诛之先自雷风之变而周公既归乃承王命作大诰东征一书之中首言王若曰

继而屡言王曰又言冲人又曰寧考皆自成王而言可见公之东征王实命之当在王既感悟而迎公以归之後也黄佐云鸛鵒之诗乃周公居东之时预见二叔武庚将有溃乱之势而作一以释罪而明吾之心一则劝王为先事之备】

鸛鵒鸛鵒既取我子【叶寘韵资四翻亦叶质韵职日翻】无毁我室【质韵亦叶寘韵式吏翻】恩斯勤【叶真韵读如槿渠斤翻】斯鬻【丰氏本作育】子之闵【叶真韵眉贫翻】斯【比而赋也托为鸟之爱巢者呼鸛鵒而告之鸛鵒尔雅云鸛鵒也郭璞以为鸛类而陆玑则云鸛鵒似黄雀而小其喙尖如锥取茅莠为窠以麻紩之如刺袜然县着树枝或一房或二房幽州人谓之鸛鵒或曰巧妇或曰女匠关东谓之工雀或谓之过羸关西谓之桑飞或谓之袜雀或曰巧女陆佃邢昺丘光庭辈皆非之谓当从璞义今据尔雅本文鸛鵒鸛鵒之下又有狂茅鸛怪鸛泉鸛等名则此自应同是鸛属无缘得为巧妇小雀也或以鸛与鵒为二物贾谊赋云鸾凤伏窜兮鸛鵒翱翔颜师古注云鸛鸛鵒怪鸟也鵒恶声鸟也或以为鸛鵒即鸛鵒按鸛鵒即怪鸛一名鸛鵒未闻有鸛鵒之名况尔雅明别鸛鵒与怪鵒为二物无容混而为一也愚考鸛鵒单言之即鵒是也解见墓门篇魏志云鵒天下贱鸟也及其在林食椹则怀我好音以其为恶声之鸟故周公取以比夫流言者取犹致也君子以货取之取子比成王也呼成王为子者亲之之意观洛诰朕复子明辟之语可见成王惑于流言而不加觉察是隳二叔之术中而为其所召致也故曰既取我子是时王犹未悟故公直发此一语以唤醒之书所谓王亦未敢诮公正指此也毁坏也室鸟巢也以比王室曹氏云雀以巢为室如称雀入燕室是也通章主意只在无毁我室一语范祖禹云成王幼弱未足以及天基命定命周公苟不摄政则祸乱将作而毁周室矣恩爱勤劳也斯语辞鬻毛云稚也鬻子稚子指成王也按鬻何以训稚鬻之为义据说文云?也字亦作粥即糜是也糜性淖弱故借为幼稚之义礼记粥粥若无能也义亦同此闵伤也言我之所以恩爱结于中心念兹在兹日劳劳焉而不释者以成王年方幼冲而为浮言所摇动孤立于上其势甚危诚可闵伤故也承上文无毁我室正指遭流言变後而言以起下章思患预防之意】迨【家语作殆说文作隶】天之未陰雨【寘韵】彻彼桑土【寘韵】石经韩诗尔雅注丰氏本俱作杜字林作? 绸繆牖户【寘韵】今女【音汝孟子严氏丰氏本俱作此】下民或敢侮予【叶寘韵读如雨王矩翻 比之赋也迨及也天将雨必先陰故曰陰雨彻毛云剥也本通彻之彻借为彻去之彻此训剥者以剥而脱之亦有去义桑土毛云桑根也通作杜方言云东齐谓根曰杜又字林作?云桑皮也孔穎達云取彼桑土用为鸟巢明是桑根在上剥取其皮或欲读土如字谓取桑和土胶结成巢于理亦通但桑乃全树之名今但云彻桑而已未辨所彻者是枝是叶不如作桑杜之为确也绸繆解见唐风朱子云牖巢之通气处户其出入处也愚按诗言牖户二字有味此巢之通隙虚处正足以窥伺祸患之来而预为之地陆佃云迨天之未陰雨及其间暇之譬也彻彼桑土绸繆牖户明其政刑之譬也盖寤生于陰雨而户牖所以取明故是诗托况如此文子曰百星之明不如一月之光十牖毕开不如一户之明是也下民郑玄云巢下之民侮说文云伤也予代鸟自谓也言今女巢下之民得母或敢有伤害我者乎或字有味与莫敢谁敢自别或敢者正恐犹有侮者在所以宜绸繆也孔子读此诗而赞之曰为此诗者其知道乎能治其国家谁敢侮之此承上章毁室言而深以绸繆牖户为成王望一段恩勤悲闵至心正在于此见今日武庚之毒虽未发然终必有溃决之时庶几王之一悟而思保其国家也旧说谓周公自述其缔造周密则于末章予室翺翺句如何可通且维音晓晓但祈汲汲自明于忠浅矣前以毁室属鸛鵒而此以侮予属下

民者盖室一毁则探赜取卵之事必有起而乘之者犹之管叔武庚蠢动而顽民亦遂汹汹不静也】予手拮据【叶麋韵读如拘恭于翻】予所捋荼【虞韵】予所蓄【释文作畜】租【虞韵】予口卒瘁【虞韵释文作屠】曰予未有室家【叶虞韵攻乎翻比之赋也此下予字代鸟自谓而周公以自况也拮据毛云戢局也按拮之训戢据之训局当是以音相近取义说文则云拮手口共有所作也据戟局也徐锴云谓手执臂曲局如戟不可转也盖拮言其作之物据言其作之状当从说文解为长武王未受命而周公欲以一手之烈成文武之德苦可知矣捋说文毛传皆云取也荼依郑注周礼及诗皆云茅秀也蓄说文云积也租通作菑说文云茅藉也礼封诸侯以土菑以白茅周礼音义亦作租上文绸缪牖户必取桑根之皮此但纳茅秀于窠中以为之藉盖作窠之始事也旧解殊混捋荼手之为也手之用不足因以口继之租而曰蓄盖有资于口者矣故即承之曰予口卒瘁卒通作□尽也瘁说文云病也室家朱子云巢也郑云我作之至苦如是者曰我未有室家之故钱天锡云当初不利孺子之谤必以周公止为身谋今特表出未有室家见得我平日之吐哺握髮固结人心祈求天命祇以王室之未集岂为身谋而顾云不利也徐光啓云五个予字可玩劳亦予也病亦予也惟予而已无可他诿者为予室故也上四予字匪躬之义下一予字体国之忠愚按此周公自追其前日摄政之事而言】予羽谯谯【叶萧韵慈焦翻释文作焦】予尾傴傴【叶萧韵思邀翻孔氏载经文及毛传皆作消消云定本作修修丰氏本同】予室翘翘【萧韵】风雨所漂摇【萧韵】予维音哓哓【萧韵尔雅作憭憭说文作唯予音之哓哓比之赋也谯说文云饶譏也增韵云以辞相责也说文无傴字当通作消据正义疑古本是如此说文云尽也承上文言我虽勤于为臬如此而不如恶我之成者何也羽翮所至辄被谯让而予终不能自舍至于尾毛之长者亦已消尽盖其瘁如此翘翘毛云危也按说文云翘尾长毛也借为竦起之义以其托巢于高枝而结构犹尚未成故危之也漂浮摇动也俱见说文漂属雨摇属风乃未然事与第二章未陰雨相应今虽未至于此而後来将必至於此也然则彻彼桑土绸缪牖户以成完巢其可缓乎哓说文云惧也维音哓哓者郑云恐惧告愬之意正指迨天之未陰雨五句言而所云思斯勤斯鬻子之闵斯者其大指毕露乎此周昌年云要见多难将毁我室故已作诗以喻王使之知保其室家有不容不汲汲意非公只明己之见诬而已王樵云鸛鵒四章盖极道武庚之情武庚之情既明则成王之疑自释大诰曰殷小腆诞敢纪其序曰予复反鄙我周邦此武庚之情而诗所谓毁我室与侮予者皆谓此也武庚虽包藏此心而王室未有衅则亦安从而发哉不幸而三监者入其机械之中为所扇惑欲动摇周室而不间周公则不可动于是流言曰公将不利于孺子此其谋欲使周室先自生衅而後起而图之也而成王果不能无疑周公于是而不退去以待王心之察不惟非大臣自处之义其不反实奸人之口乎于是告二公而避位以去项氏所谓既不居中则不利之谤自息者既去而公亦不汲汲于自明又居东二年而罪人之主名王自得之盖奸人虽能为幻于一时而徐之未有不情见计露者也周公于是究其本谋之所自而直以武庚之情陈之于王王可悟矣然而武庚之叛未形也故未能决然遂以公为是而亦未敢谓公为非周公陈武庚之情而一己之心迹不足复言乃若武庚之志欲纪亡殷之绪复其旧物而覆我周室其祸不在周公之身已也王虽或已知周公之无他而或未足以及此故周公曰予羽谯谯予尾傴傴予室翘翘风雨所漂摇予维音哓哓言忧在王室而已之鸣不得不急也武庚若起王室安危有未可知者此感喻王之深也鸛鵒之诗断在管蔡未诛之前若既诛而成王尚未知周公之意则王心之蔽深矣岂区区之诗所能回岂自述其勤劳所能感动哉】

鷖鷖四章章五句【子贡传以为周公孙于鲁殷人畔公忧王室劝王修政以备之赋鷖鷖申培说亦云管叔及其羣弟流言于国周公避居于鲁殷王禄父遂与十七国作乱周公忧之作此诗以贻成王欲王省悟以备殷全篇以鸟之育子成巢者比先王之创业而代之为言也皆附会不足信周公原未尝有居鲁之事且使此诗作于殷人畔後则所云未雨绸缪者谓何而奈何犹以无毁我室致戒乎朱子又谓周公东征二年得管叔武庚而诛之而成王犹未知周公之意乃作此诗以贻王盖惑于孔安国之说後来与蔡九峯辨其不然乃以为当从郑氏云又赵岐谓鷖鷖之诗刺邠君盖汉儒言诗多异说要无据不足信】

狼跋美周公也周公虽遭疑谤然所以处之不失其常故诗人美之【出朱传序云美周公也周公摄政远则四国流言近则王不知周大夫美其不失其圣也孔丛子载孔子曰于狼跋见周公之远志所以为圣也】

狼跋【陆德明云或作拔】其胡【虞韵】载蹇【说文作蹇陆本作走】其尾【叶纸韵读如鲋羽轨翻】公孙【音逊後同】硕肤【虞韵】赤舄几几【纸韵说文崔灵恩集注俱作擊擊董氏云一作已已比而赋也狼解见还篇罗愿云股中有筋如鸡子又筋满身如织络之状跋说文云蹇跋也尔雅云躓也李巡云前行曰躓胡说文云牛颌垂也今狼亦称胡者以其颌下垂皮亦如牛然孔颖达云狼之老者则颌下垂胡载之言则盖音近也蹇说文云碍不行也从夷引而止之也夷者如穿马之鼻从此与牵同意尔雅云跲也李巡云却顿曰蹇孔云跋与蹇皆是颠倒之类进则躓其胡谓躓胡而前倒也退则跲其尾谓却顿而倒于尾上也毛诗草虫经云老狼项下有袋求食满腹向前行乃触之退後又自踏践上蹇其尾进退有患周公也孙郑玄云读当如公孙于齐之孙孙之言孙遁也孔云古之逊字借孙为之按春秋夫人孙于邾公孙于齐论语孙以出之皆以省文通用周公避位居东所谓孙也硕大肤皮也硕肤与跋胡蹇尾对看礼记云四体既正肤革充盈人之肥也所谓硕肤也按革肤内薄皮肤革内厚皮故其字从肉旧说训肤为美难通赤舄周礼注云冕服之舄也王吉服有九舄有三等赤舄为上下有白舄黑舄孔云上公九命得服衮冕故履赤舄又按诗云王锡韩侯玄衮赤舄则诸侯亦得用赤舄也李如圭云天子诸侯冕服用舄他服用履解见南山篇几几朱子云安重貌王安石云几人所冯以为安故几几安也苏辙云周公之辅成王亦多故矣二叔流言以病其外成王不信以忧其内人之视周公如视狼然前忧其躓胡而後忧其跲尾也然周公居之从容自得而二患皆释人徒见其履赤舄几几然安且闲而不知其解患释难之方也愚按跋胡比公之进而立朝遭流言之变蹇尾比公之退而居东至二年之久诗人略假荒迫之状为喻如易所称羝羊触藩云者非以狼为公比也然此章先言跋其胡而後言蹇其尾则意专重在蹇尾盖主公居东而言公虽逊而肤自硕若了无所患苦者然赤舄几几正想其居东时意象耳所以然者以公之纯忠仰可对皇天幽可质先王则其几几自得也固宜又朱子云公遭流言之变而其安肆自得乃如此盖其道隆德盛而安土乐天有不足言者所以遭大变而不失其常也程子云周公至公无私进退以道无利欲之蔽故虽危疑之地安于舒泰范祖禹云其德备者其容亦盛赤舄几几则其余可见矣夫神龙或潜或飞能大能小其变化不测然得而畜之若犬羊然有欲故也惟其可以畜之者是以亦得醢而食之凡有欲之类莫不可制焉惟圣人无欲故天地万物不能易也富贵贫贱死生如寒暑昼夜相代乎前吾岂有二其心乎哉亦顺受之而已矣舜受尧之天下而不以为泰孔子厄于陈蔡而不以为戚周公远则四国

流言近则王不知而赤舄几几德音不瑕其致一也邹忠胤云易明夷之象传曰内文明而外柔顺以蒙大难文王以之内难而能正其志箕子以之甚矣彖传之言似周公也繇今观公之事冲虽不若文箕之事暴厄亦未至于羑里辱亦未至于囚奴顾当时流言鼎沸王心怀疑豕涂鬼车祸且不测斯亦多凶多惧之时矣昔人谓为箕子更难於为文王以其属尊而最亲尤为纣所忌耳公内凭叔父之尊外总冢宰之任负斧戣而履乘石木秀风摧石峻流湍不利之谤所从来矣即其精诚可以告先王而不能显白之幼主且天下之人何可门到户说使皆坦然邪逊而居东公所为善用晦固即柔顺蒙难之家法处明夷以艰贞者也岂与夫以自我之重挟非常之勲身危繇於势过而不知去势以求安者等哉文中子云美哉公旦之为周也外不屑天下之谤而私其迹曰必使我子孙相承而宗祀不絶也内实达天下之道而公其心曰必使我君臣相安而祸乱不作深乎深乎安家者所以宁天下也存我者所以厚苍生也】狼蹙其尾载跋其胡【虞韵】公孙硕肤【虞韵】德音不瑕【叶虞韵洪孤翻比而赋也有德之言谓之德音瑕广韵云玉之病也狼既退而蹙其尾矣于是复进则又跋其胡此章之意重在跋胡也公之居东二年可谓蹙尾矣罪人斯得之後而又作诗以贻王独不虑其跋胡乎而公不然也身尚孙而肤仍硕凡所矢口莫非有德之言终无得而瑕疵之者王亦未敢谓公不瑕之谓也杜预云心平则德音无瑕阙一说朱子云德音犹令闻也亦通又左昭二十年晏子曰先王之济五味和五声以平其心成其政也声亦如味一气二体三类四物五声六律七音八风九歌以相成也清浊大小短长疾徐哀乐刚柔迟速高下出入周疏以相济也君子听之以平其心心平德和故诗曰德音不瑕此直借语立义非诗本旨】

狼跋二章章四句【子贡传云周公居子鲁鲁人观焉赋狼跋申培说以为鲁人覩周公德容而作是诗今按书言周公居东非居鲁也】

伐柯周人商迎周公也【子贡传云周人思周公而赋伐柯序于此诗及九罍篇皆云美周公也周大夫刺朝廷之不知也愚按序所云刺朝廷之不知者盖追刺雷风未作以前成王及二公皆不知周公之忠耳考之书金縢篇云秋大熟未获天大雷电以风禾尽偃大木斯拔邦人大恐王与大夫尽弁以啓金縢之书乃得周公所自以为功代武王之说二公及王乃问诸史与百执事对曰信噫公命我勿敢言王执书以泣曰其勿穆卜昔公勤劳王家惟予冲人弗及知今天动威以彰周公之德惟朕小子其新逆我国家礼亦宜之王出郊天乃雨反风禾则尽起二公命邦人凡大木所偃尽起而筑之岁则大熟新逆马融本作亲迎我国家礼亦宜之者孔颖达云国家尊崇有德宜用厚礼诗称衮衣笾豆是也王出郊者金履祥云意成王俟于郊而以使者先之愚详绎金縢篇文先言二公及王则啓王之问诸史百执事以知周公请命之忠者二公也未言二公命邦人凡大木所偃尽起而筑之则成王特出待周公于郊而迺迺郊外往见周公以将成王之命者亦二公也二公汉孔氏以为召公太公也此诗盖当王议迎公之时为王商遣使必无踰二公者而因及所以待公之礼耳】

伐柯如何匪斧不克【职韵】取【释文作娶】妻如何匪媒不得【职韵比也柯毛传说文皆云斧柄也太公六韬有大柯斧考工记车人云柯长三尺博三寸厚一寸有半五分其长以其一为之首注云首六寸谓门头斧也柯其柄也是斧柄大小之度匪斧不克与齐风析薪如之何匪斧不克语意不同柯者斧之柄操斧以伐之即所操之柄以得其所伐之度若非有所

操之斧可据则所伐者亦不能成其为柯也下二句即申上二句意盖触类广譬以明之柯与妻以喻周公伐柯取妻以喻迎周公斧与媒则以喻二公也郑玄云伐柯之道惟斧乃能之此以类求其类也以喻成王欲迎周公当使贤者先往媒者能通二姓之言定人室家之道以喻王欲迎周公当先使晓王与周公之意者先往愚按贤而晓王与周公之意者惟二公耳】伐柯伐柯【孔丛子作操斧伐柯】其则不远【叶铎韵读如兗以转翻】我覲之子笱豆有践【铎韵比而赋也迎周公者当遣召公太公二人故重言伐柯则犹言法则也即大小长短之度是也所伐者柯伐之者斧此斧之柯与新伐之柯其大小长短当亦无以异者孔丛子作操斧伐柯於义更明以比二公周公同此忠爱之心观武王有疾而二公即欲为王穆卜其休戚相关与周公之心岂有异哉周公不听穆卜而自以为功者孔颖达谓公位居冢宰地则近亲脱或卜之不善不可使外人知悉亦不可苟让故自以为功也是则迎周公者必非二公不可以二公忠爱之心为周公所素鉴耳然心虽无二而迹则稍殊故诗人但以不远想像之而中庸引此诗亦云执柯以伐柯睨而视之犹以为远也此言外之意而诗人亦可谓善为说辞者矣称我者诗人代成王筹度之辞覲说文云遇见也诗诂云泛见曰见接见曰覲之子郑云是子也斥周公也尔雅云竹豆谓之笱木豆谓之豆郑氏云笱豆其容实皆四升践原训履毛传训为行列貌郑云王欲迎周公当以飨燕之饌行至则欢乐以悦之孔云饮食之事圣人以之为礼今劝迎周公而言陈列笱豆是令王以此笱豆与公飨燕也郝敬云设其笱豆践然陈列君臣相与燕笑一见而往事释然矣圣人岂有成心乎】

伐柯二章章四句【申培说云管叔以殷围卫大夫议迎周公乃作此诗解者谓伐柯匪斧则无以取木比武庚管叔之乱非周公不能平则次章其则不远当作何解于文义不可通矣朱子以为周公居东之时东人言此首章比平日欲见周公之难次章比今日得见周公之易牵强附会尤为无理】

九罍迎周公归自东也【郝敬云前篇讽成王以飨礼迎公此篇讽王以冕服迎公愚按此当是使者将命而至东之作】

九罍之鱼鰋魴【阳韵】我覲之子衮衣綉【读诗记作綉】裳【阳韵兴而比也九罍鱼网也尔雅云纓罍谓之九罍孙炎云谓鱼之所入有九囊也陆德明云今江南呼纓罍为白囊纲郝云九罍以比天子罗致大臣鰋鱼名一名魴尔雅曰魴鰋是也陆玕云似鯢鱼而鳞细于鯢也赤眼多细文鯢亦作鰋罗愿云目中赤色一道横贯瞳鱼之美者食螺蚌孙炎正义云鰋好独行制字从尊殆以此也魴解见鱼丽篇罗云诗称九罍之鱼鰋魴鰋多独行亦有两三头同行者极难取见网辄遁魴则说苑所谓若存若亡若食若不食者也周公有圣德遭时之未信退避于东有难进易退之操故以鰋魴言之又陆佃云鰋鱼圆魴鱼方君子道以圆内义以方外而周公之德具焉故是诗主以言之然则鰋象公之圆而衮衣者道也魴象公之方而綉裳者义也玄衮纁綉而後可以见周公犹之九罍之取鰋魴也我覲之子解见伐柯篇代为成王筹度之辞也衮龙衣也陆德明云天子画升龙于衣上公但画降龙解见采菽篇綉说文云五采备也程子云鰋魴鱼之美者施九罍之网则得鰋魴之鱼用隆厚之礼则得圣贤我欲覲之子当用上公礼服往逆之严粲云服其服则居其位矣欲朝廷复相之也】鸿飞遵渚【语韵】公归【朱子云此章飞归字是句腰亦用韵诗中亦有此体】无所【语韵】於女【音汝

後同】信处【叶语韵敞吕翻兴也鸿鴈皆水鸟也知避陰阳寒暑者春则避暑而北秋则避寒而南所谓木落南翔冰泮北徂者也陶隐居云大曰鸿小曰鴈或云鴈多羣而鸿寡侶遵说文云循也渚小洲也释名云渚遮也能遮水使回也鸿飞遵渚盖自北而南之时以况公之避京师而居东也归归周也女者对东人之辞左传云再宿曰信彼一时也冲人之疑未释公虽欲归周而无安身之所故不得不暂于汝地焉信处耳然谓之信也而岂可久哉所以然者以公之精忠感格必有悟主之期故也此一章追前日居东时而言】

鸿飞遵陆【屋韵】公归不复【屋韵】於女信宿【屋韵 兴也陆说文云高平地鸿飞遵陆盖自南归北之时不复为渚上之游以况公之自东而还归于周亦将留相王室而不复来东也故易渐卦九二之象曰鸿渐于陆夫征不复公之归以之上九之象曰鸿渐于陆其羽可用为仪公之不复以之宿说文云止也信宿即信处也此一时也王既悟而遣余輩銜命以迎公公之留于女地不过信宿间耳归不久矣此一章据见在迎公而言】是以有袞衣【叶支韵读如伊么夷翻】兮无以我公归【叶支韵渠为翻】兮无使我心悲【支韵】兮【赋也是以有袞衣者得请之辞向之筹於王前者曰我覲之子袞衣绣裳王不以其言为非所以今日有袞衣之命而使人賚之以予公也无以我公归兮一句作一气读上无字略断亲之故曰我言今日袞衣来而我公固将归矣然使风雷不作则公安有今日公之得有今日也幸也君臣相遇自古称难况公以元勳叔父而犹遭此患则忠而被谤信而见疑者可胜道哉俯仰之间感慨系之无谓以我公今日获归而遂无可使我心怅然含悲者在也忠厚悱惻溢于言表所谓言之无罪闻之足以戒是诗也其亦二公所作与】九罍四章一章四句三章章三句【序见伐柯篇子贡传申培说皆云周公归于周鲁人欲留之弗克赋九罍朱子亦以为周公居东东人喜之而作今按本文有於女信处於女信宿之语其为使者所作而非出于东人之口可知已且公天下之公也居东公之不幸也不以朝廷失公为忧而以东土得公为喜何所见之昧而所爱之细乎】

假乐赞美武王之德为祭武王之诗【所以知为美武王者何也有三徵焉大明之诗曰笃生武王保右命尔变伐大商今此诗亦有保右命之之语一也中庸子曰舜其大孝也与德为圣人尊为天子富有四海之内宗庙飨之子孙保之故大德必得其位必得其禄必得其名必得其壽故天之生物必因其材而笃焉故裁者培之倾者覆之诗曰嘉乐君子宪宪令德宜民宜人受禄于天保佑命之自天申之故大德者必受命夫舜起匹夫为天子武王自诸侯有天下其事相类故孔子合言之知此诗非咏守成之诗二也又篇中云穆穆皇皇宜君宜王按礼云天子穆穆诸侯皇皇旧说亦皆以君为诸侯王为天子夫以一身而兼历诸侯天子者惟汤武而已三也所以知为祭诗者以子孙千亿一语知之凡诗中言子孙多是对祖考而言纪述庙中所见也大雅咏文王诗最多其专为武王咏者唯此一诗而已疑亦周公所作太史公云夫天下称颂周公言其能论歌文武之德】

假【左传中庸丰氏本俱作嘉】乐【音酪】君子【叶寘韵资四翻诗既取我子无毁我室旧皆谓叶职韵音则今按子则相去甚远未足信也】显显【中庸作宪宪】令德【本职韵当叶寘韵丁?翻】宜民宜人【真韵】受禄于天【叶真韵汀因翻严粲以自章首至此为第一章】保右【中庸作佑】命【叶真韵眉辛翻】之自天申【真韵】之【毛郑及诸家本皆以自章首至此为第一章】干禄百福【叶职韵笔力翻】子孙千亿【职韵严以自保右

至此为第二章赋也假当依左传中庸通作嘉美也辅广云假乐君子是作诗者美而乐之也唯其美之故乐之显说文云头明饰也显显令德者郑玄云有光光之善德愚按下章言不愆不忘率繇旧章无怨无恶率繇羣匹正令德之实明着而可见者宜说文云所安也辅云谓心愜之朱子云民庶民也人在位者也孔颖达云民人散虽义通对宜有别臯陶谟能安民能官人其文与此相类受说文云上下相付也禄之为言録也天録其德而与之以福则曰禄其实禄即福也董仲舒对策引此而衍之云为政而宜于民者固当受禄于天深得此诗之旨通篇骨子只宜民宜人一句耳保者扶持之意右者赞助之义命者命之为天子也自从也申者申束之义故毛传以为重也天眷有德久而不替之谓干禄二句申结上文干禄与旱麓篇解同有显显之令德是以宜其民人故能受天之禄所谓自求多福也百福言衆也曰保曰右曰命皆是也此已然之事子孙据时王而言不泛言孙子而顺数子孙知此诗作于成王之世矣十百为千自一万而十万以至万万皆曰亿承上文百福而极言之旧说以为子孙衆多非也子孙之获福多于前王所谓自天申之者也此句乃祝辞】穆穆皇皇【阳韵班固传注作煌煌】宜【陆德明本作且】君宜【陆本作且】王【阳韵】不愆【春秋繁露作骞文选注作???】不忘【阳韵说苑作亡】率由旧章【阳韵毛郑诸本自干禄至此为第二章严以穆穆至此为第三章】威仪抑抑德音秩秩【质韵】无怨无恶【去声】率由羣【春秋繁露作仇】匹【质韵严以威仪至此为第四章 赋也此章赞武王之德穆通作?説文云细文也皇通作煌说文云輝也此以法制之明备言与下文率繇旧章作照自其曲折备具曰穆穆自其光采发越曰皇皇宜君宜王之宜亦谓与其位相愜解见小引下言武王先既宜于为一国之君矣而後又宜于为天下之王也愆者谬戾之谓忘者疎略之谓率通作卫循也由旧说多训为从按说文有粤字无由字其义则木生条也然说文中字谐由声者颇多疑古本有由字但许叔重偶遗耳经书用此字通训为从不知何据或谓其字从田上出指所从之道也因忆仲由字子路而韩诗注有云东西耕曰横南北耕曰由则由之从田其义明矣或又疑由实非字仍当作粤远其本训凡说文中字谐由声者皆是从粤省又古文由繇通用如由余之为繇余许由之为许繇是也繇本作?乃随从之义则通用之说较为可信但繇乃音謡由则音犹其音不叶如何可通今考说文有邈字以行邈径为义音与由同然则凡用由字者大抵从邈通之耳此字犯上讳已通行天下改由为繇惜当时议者考不及此旧章杜钦云先王法度郑云旧典之文章愚按如文王治岐之政是也孟子云今有仁心仁闻而民不被其泽不可法于後世者不行先王之道故也故曰徒善不足以为政徒法不能以自行诗曰不愆不忘率由旧章遵先王之法而过者未之有也此武王之所以宜民也威仪以接下之礼言抑自按抑也解见宾之初筵篇德音严云有德之声音也言语教令声名皆可称德音此德音指言语也秩本训积徐锴以为有序之貌苏辙云无所不容故无怨无所不矜故无恶羣羣臣也匹通作妃羣臣之才品高下其等第不同各循从其匹耦而衡量之絶不以一己爱憎之私意参预其间盖大以成大小以成小武成所谓建官惟贤位事惟能事正如此此又武王之所以宜人也董仲舒论春秋云吾以其近近而远远亲亲而疎疎也亦知其贵贵而贱贱重重而轻轻也有知其厚厚而薄薄善善而恶恶也有知其阳阳而陰陰白白而黑黑也百物皆有合偶偶之合之仇之匹之善也诗云威仪抑抑德音秩秩无怨无恶率由羣匹此之谓也严云穆穆皇皇与抑抑秩秩一体率由旧章与率繇羣匹相对】受福无疆【阳韵】四方之纲【阳韵毛郑诸本自威仪至此为第三章】之纲之纪【纸韵】燕及朋友【有韵亦叶纸韵羽轨翻严本以受福至此为第五章】百辟卿士【纸韵】媚于天子【纸韵亦叶有韵济口翻】不【释文作匪】解

【汉书作懈】于位【寘韵】民之攸暨【寘韵毛郑诸本自之纲至此为第四章严本以百辟至此为第六章 赋也此章着民人之皆宜于武王而复交互言之受福无疆四方之纲宜民也之纲之纪燕及朋友则宜民之所以宜人也百辟卿士媚于天子宜人也不解于位民之攸暨则宜人之所以宜民也武王之所得于民人者如此受禄于天不亦宜乎无疆言无有畔界纲纪解见棫朴篇燕通作宴说文云安也朋友吕祖谦云合百辟卿士言之也泰誓曰友邦冢君酒诰曰太史友内史友承上章言不愆不忘率繇旧章则典则昭垂後人可守成业而治受福无疆实自此始所以然者其统领既挈四方皆于是系属焉且不特挈其纲领而已至于节目所在亦皆犁然分别井井有条如是纲举目张四方昇平则辅治之朋友亦赖以安矣按棫朴咏文王之诗也曰勉勉我王纲纪四方然则此诗言纲纪固即文王旧章之纲纪也黄樵云元气不存虽盛且壮不足为一身之福纲纪不立虽强且富不足为人君之福辅云人君能纲纪四方则臣下自然赖之若在上者管束不来则臣下何恃以为安也辟尔雅云君也百辟谓诸侯也卿士王朝之羣臣郑云卿之有事也此即前所云朋友也媚说文云悦也解犹脱也位即公侯伯子男公卿大夫士之位不解于位者人各守其位以尽其职无侵官无旷官也攸所也暨通作臬说文云衆辞与也引虞书稷契臬臬陶又史记夏本记璜珠臬鱼今尚书文皆作暨言外而百辟内而卿士皆爱悦武王各尽其职而为民之所与也左成二年盟于蜀蔡侯许男不书乘楚车也谓之失位君子曰位其不可不慎也乎蔡许之君一失其位不得列于诸侯况其下乎诗曰不解于位民之攸暨其是之谓矣昭二十一年葬蔡平公蔡太子朱失位位在卑大夫送葬者归见昭子昭子问蔡故以告昭子叹曰蔡其亡乎若不亡是君也必不终诗曰不解于位民之攸暨今蔡侯始即位而适卑身将从之哀五年郑驷泰富而侈嬖大夫也而常陈卿之车服于其庭郑人恶而杀之子思曰诗曰不解于位民之攸暨不守其位而能久者鲜矣按观此可以得不解于位之义】

假乐三章章八句【毛郑及诸家本皆作四章章六句严本依陈氏分为六章章四句惟季彭山氏更定作三章章八句今从之 序以为嘉成王也不知果何据而云然朱子疑为公尸之所以答鳧鷖申培说剽之云公尸美王者之诗尤为不根子贡传漫以为训成王而诗之用于何地殊不能知要之影响耳又按左文四年公如晋及晋侯盟晋侯享公赋菁菁者莪公赋嘉乐襄二十六年齐侯郑伯为卫侯故如晋晋侯兼享之赋嘉乐国景子相齐侯赋蓼萧子展相郑伯赋缁衣附録于此】

载见成王免丧朝诸侯率以见于武王庙【出郝敬毛诗原解】助祭既毕而慰劳之诗【出季本诗说解颐 序及蔡邕独断皆以为诸侯始见于武王庙之所歌也朱传申培说亦以为诸侯助祭于武王庙之诗按竹书成王四年春正月初朝于庙是诗之作当在此时盖免丧始朝庙也诗专为助祭诸侯而发或即疑为献助祭诸侯之乐歌然於礼文无所出惟祭後有归俎餽余二礼因作此诗以致其赞劳之意则不可知耳邹子静云此篇诸侯之来本为来朝而是诗之作则为助祭如车攻诗东都之行本为会同而是诗之作则重田猎】

载【墨子载下有来字】见辟【墨子作彼】王【阳韵】曰求厥章【阳韵】龙旗阳阳【韵】和铃【丰氏本作棖】央央【阳韵】儻革有鹄【阳韵说文作璫陆德明本作枪】休有烈光【阳韵】率见昭考以孝以享【叶阳韵虚良翻】以介眉寿永言保之思皇多祐【

【夔韵】烈文辟公绥以多福俾【陆文作卑】缉熙于纯嘏【叶夔韵果五翻徐光启云以介眉壽而下三句一韵秦人功德碑本此 赋也载毛传云始也载之所以训始者以字从 从才才者草木之初也古字音同形近者皆得通用故载与哉皆训为始也郑玄云诸侯始见君王谓见成王也曰求其章者求车服礼仪之文章制度也孔颖达云将自说其事故言曰以目之作者所称曰非诸侯自言曰也诸侯谨慎奉法即是自求其章愚按下文龙旗和铃儵革等物皆等威所系故以章言诸侯将入朝天子故求其所自有之章一以重王事一以昭君赐也又墨子云先王之书周颂之道之曰载来见彼王曰求厥章则此语古者国君诸侯之以春秋来朝聘天子之廷受天子之严教退而治国政之所加莫敢不宾当此之时本无有敢纷天下之教者按旧说求章亦多同斯义然似非诗旨龙旗者交龙为旗详见庭燎篇阳即我朱孔阳之阳曹氏云色之鲜明也和者车轼上之铃铃说文以为令丁也和亦铃也而叠云和铃者车中之铃有二在轼者名和在衡或在镳者皆名鸾言和铃所以别于鸾铃也干宝云和鸾皆以金为铃马动则鸾鸣鸾鸣则和应央说文云中央也颜师古云半也车前後皆有马和铃设在轼上当车之半故以央言之重言阳阳央央者见其非一旗非一车也毛孔主尔雅有铃曰旗之说谓以铃着旒端亦自有据但文理欠顺又於央义不合故不从儵革解见蓼萧篇鷩当依说文通作瑒玉声也儵革安得有瑒音惟纒搯其上者以金为之谓之金厄则其声所触亦往往能如王之鸣然则有鷩盖指金厄言也详见韩奕篇休说文云止息也烈者火猛之义光之貌也诸侯盛其仪卫从本国而来以至止于此则见其丰采赫奕足以殿天子之邦而有烈烈然之光辉也率者统领之义昭考毛云武王也朱子云此乃言王率诸侯以祭武王庙也庙制太祖居中左昭右穆周庙文王当穆武王当昭故书称穆考文王而此诗及访落皆谓武王为昭考又云昭穆之分是始封以下入庙之时便有定次後虽百世不复移易而其尊卑则不以是而可紊也故成王之世文王为穆而不害其尊於武武王为昭而不害其尊於文又云迁毁之序则昭常为昭穆常为穆假令新死者当祔昭庙则毁其高祖之庙而祔其主于左祧迁其祖之主于高祖之故庙而祔新死者于祖之故庙即当祔於穆者其序亦然盖祔昭则羣昭皆动而穆不移祔穆则羣穆皆移而昭不动故虞之明日祔于祖父盖将代居其处故为之祭以告新旧之神也昭穆之次既定则其子孙亦以为序礼所谓昭与昭齿穆与穆齿传所谓太王之昭王季之穆文王之昭武王之穆者是也章氏云凡庙主在本庙之室中皆东向及祫于太庙之室中惟太祖东自如而为最尊之位羣昭入此者皆列北牖下而南向羣穆入此者皆列南牖下而北向盖羣庙之列左为昭而右为穆祫祭之位北为昭而南为穆也又云二世祧则四世迁穆之北庙六世祔昭之南庙矣三世祧则五世迁穆之北庙七世祔穆之南庙矣昭者祔则穆者不迁穆者祔则昭者不动此所以祔必以班尸必以孙而子孙之列亦以为序也又云宗庙之制但以左右为昭穆而不以昭穆为尊卑故五庙同为都宫则昭常在左穆常在右而外有以不失其序一世自为一庙则昭不见穆穆不见昭而内有以各全其尊也以者承上之辞後仿此孝者孝思内尽志也享者献享外尽物也邹子静云以孝以享者合天下之孝享以为一人之孝享也大抵宗庙祭祀多以诸侯助祭为重观此及清庙雍诗可见扬子云有曰孝莫大於寧亲寧亲莫大於寧神寧神莫大乎四表之懽心介郑云助祭也按古者主有宾客有介故介亦有助意眉壽解见南山有台篇以介眉壽主诸侯言孔云谓助行具礼使孝子得壽考之福也愚按此已结助祭之事自永言保之而下则又属望于後日之辞永言长言也书曰歌永言保者抱持不失之义思发语辞皇通作煌徐锴云皇之为言煌煌然也祜说文云福也尔雅云福厚也多祜以己然之福言尊为天子富有四海是也烈即休有烈光之烈以丰

采言文即曰求厥章之文以仪卫言辟公朱子云诸侯也王炎云为国君故称辟举五等之贵故称公荀子云论礼乐正身行广教化美风俗兼覆而调一之辟公之事也绥安也多福即上文之多祐俾说文云益也缉熙解见文王篇纯之为全音之近也嘏说文云大远也徐锴云大远之福也作此诗者咏歌以申其意言欲保守此今日煌煌之多福必尔有烈光文章之诸侯实有以安镇此多福使永固而不移则自今以往庶益继续其光明于纯全之嘏福也陆化熙云福本昭明不继则晦矣愚按绥以多福即烈文篇惠我无疆之意纯嘏以未然之福言邓元锡云永言保之思皇多祐言大福难保也曰俾缉熙于纯嘏言大嘏不易也陈戒于德也古君臣上下无时而戒于德也】

载见一章十四句【孔穎達谓周公居摄七年而归政成王成王即政诸侯来朝於是率之以祭武王之庙诗人述其事而为此歌焉郝敬辨之云按成王立年十有三非甚童?也世儒惑于明堂位云周公负扆践阼七年而後致政并强此诗为七年後王亲政作盖据雒诰云周公诞保文武受命惟七年彼谓成王七年周公留雒耳非谓七年前成王未亲政也十三岁天子尸居而又七年则二十矣乃始见诸侯乎初年以流言疑忌叔父岂幼冲无知者之所为乎邓元锡则以为诸侯殷见朝庙也周官以宾礼亲邦国朝宗覲遇各以其方岁至会以发禁至皆主於来王其殷见曰同则五年而禘五服羣后毕具至故殷见曰载见又殷同以发政故载见曰求厥章今按大禘之礼禘其祖之所自出而以其祖配之於昭考何与斯其论疏矣邹忠胤又云竹书纪成王元年丁酉春正月王即位命冢宰周文公总百官庚午周公诰诸侯于皇门夏六月葬武王於毕夫天子七月而葬同轨毕至一则送故主之终一则覲新君之始於义何疑逸周书皇门解述昔之萧臣助王恭明祀敷明刑用能承天嘏命万子孙用永被先王之灵光此即介壽保祐缉熙纯嘏意也而先之以命我辟王小至於大其与是诗同作可知已按礼居丧不祭若此诗为诸侯会葬而作则成王未终丧也未终丧而为诗以作乐可乎且以介眉壽缉熙纯嘏岂居丧时语乎如谓周公总百官亦可率之以见于庙则武王周公兄也率见昭考之云何以称焉愚皆不取】

烈文成王初见于武王庙诸侯来助祭事毕将归国君臣交相勅戒之辞【序及蔡邕独断皆以为成王即政诸侯助祭之所歌欧阳修以为成王初见于庙诸侯来助祭既祭而君臣受福自相勅戒之辞愚按此与载见篇同为一时之作观二诗皆称烈文辟公可据彼为庙中赞劳之语此则诸侯事毕将行当陞辞之时因而交相勅戒也】

烈文辟公【叶阳韵始黄翻】锡兹祉福惠我无疆【阳韵按此诗公疆乃皆於单句用韵而双句不用韵亦变体也】子孙保之无【白虎通作毋】封靡于尔邦【叶束韵悲工翻】维王其崇【东韵亦叶阳韵仕庄翻】之念兹戎功【叶阳韵姑黄翻】继【丰氏本作?】序其皇【阳韵】之【赋也欧阳修云此君勅其臣之辞也严粲云成王即政之初周兴未久也其助祭诸侯往往身佐文武以定天下者故先称美之乃告戒之烈文辟公解与载见篇同锡通作赐说文云予也兹此也指下文祉福言祉说文亦以为福也尔雅疏云繁多之福也按祉之言止诸福所止繁多之义也福之言祐祐之言厚也言为天所加厚也锡兹祉福主武王克商之後封建诸侯而言既列之爵复胙之土其为祉福孰大焉一说白虎通云周颂曰烈文辟公锡兹祉福言武王伐纣定天下诸侯来会聚于京师受法度也以受法度为锡祉福亦即下文

戒封靡之意书曰各守尔典以承天休此之谓也惠犹貽也与分人以财谓之惠义同无疆孔云无有疆畔谓长远无期也子孙辟公之子孙也保者抱持勿失之义孝经注以为安镇是也成王呼助祭之诸侯而告之曰尔有光烈文章之辟公我先王既赐汝以建邦啓宇之祉福矣尔其思所以屏翰王家果能惠我以无疆之休则女之子孙亦庶乎其永保此爵土也左襄二十一年晋侯问叔向之罪於乐王鲋於是祁奚老矣闻之乘駟而见宣子曰诗曰惠我无疆子孙保之夫谋而鲜过惠训不倦者叔向有焉社稷之固也犹将十世宥之以劝能者今壹不免其身以弃社稷不亦惑乎宣子说与之乘以言诸公而免之按味此可以得释诗之意下文无封靡四句正申上惠我无疆二句而言无母通戒辞也土陪益曰封与礼檀弓封之崇四尺义同靡说文云披靡也字从非徐锴云披靡分也故从非取相违之义尔邦尔所有之国也五等之爵分土惟三受之天子传之先君不可益也不可损也戒以无封欲其无吞并人之上地以自益也戒以无靡欲其土地无为人所吞并而致损也按白虎通云诗云毋封靡于尔邦此言追诛大罪也或盗天子土地自立为诸侯絶之而已意与此合崇尔雅云高也尊尚之意上凜王章而不敢踰下守成业而不敢失大不役小强不陵弱夫如是则能各安其分共享和平而天子亦尊尚之矣上文所谓惠我无疆者其故全繇于此陆机云先王知帝业至重天下至旷旷不可以偏制重不可以独任任重必于借力制旷终乎因人於是乎立其封疆之典财其亲疎之宜使万国相维以成磐石之固宗庶襍居而定维城之业南面之君各务其治九服之民知有定主上之子爱於是乎生下之体信於是乎结世治足以敦风道衰足以御暴故疆毅之国不能擅一时之势雄俊之士无所寄霸王之志然後国安繇万邦之思治主尊赖羣后之图身譬犹衆目营方则天纲自昶四体辞难而心膂获义三代所以直道四王所以垂业也陈际泰云读烈文而知周之君臣相爱无己也念其助祭之劳遂欲其世世子孙与周相始终而益昌大特戒其封靡盖驾馭之权亦隱隱寓焉以为苟有犯此者王法无私恩不尔贷也嗟嗟谁谓周独忠厚欤哉念说文云常思也戎说文云兵也戎功武功闕宫言教商之旅克咸厥功是也继说文云续也序通作叙说文云次第也子孙继世以叙相及故曰继序也皇说文云大也徐云皇之为言煌煌然也我念尔辟公夹辅先王用武功平定天下以有今日自今以後凡汝之子孙继汝为诸侯者其亦能张皇威武以消四方窥觎不轨之心而壮王室之势不徒保守其爵土而已是则我之所深致望者也严云说者多以辟公为称诸侯之祖父念兹戎功为勉之以念祖父之功今考本纪注徐广云武王克商二年而崩皇甫谧云武王定位元年岁在乙酉六年庚寅崩正如谧之言武王克殷才六年耳烈文作于成王即政之初孟津诸侯固多存者不应专戒其子孙也】无竞【五经文字作倥】维【左传作惟】人【真韵】四方其训【叶真韵详遵翻左传作顺】之不显维【中庸作惟】德百辟其刑【叶阳韵胡光翻】之於【音乌】乎【大学作戏】前王【阳韵】不忘【阳韵 赋也欧阳修云此臣戒其君之辞也竞尔雅云强也说文云强语也无竞维人与无竞维烈语气相类言宣力四方者皆得其人莫与之争强也训通作驯说文云马顺也左昭元年莒展舆奔吴於是莒务娄瞽胡及公子灭明奔齐君子曰莒展之不立弃人也夫人可弃乎诗曰无竞维人善矣哀二十六年卫出公以弓问子赣曰吾其入乎子赣稽首受弓对曰臣不识也私於使者曰昔成公孙於陈甯武子孙庄子为宛濮之盟而君入献公孙於齐子鲜子展为仪之盟而君入今君再在孙矣内不闻献之亲外不闻成之卿则赐不识所繇入也诗曰无竞维人四方其顺之若得其人四方以为主而国於何有不通作丕大也德者君人之大德以丕显赞德亦主发用而言百辟诸侯也刑通作?复古编云刑从刀斤声到也从刀从井法也於乎叹声前王前乎此之为王者谓武王也

忘说文以为不识也王往矣而功烈德泽如在其训之刑之者至今犹尚可记识於人心故曰不忘也此章乃助祭诸侯因王上章有戎功其皇之语不欲王之徒以力服人也因於庙中叹美前王用人修德之事以进之曰前王虽不得已用戎功以得天下而所以使天下人不能忘者其故全不在此王今日者欲皇戎功臣以为不如法前王之用人修德而戎功亦可不用也中庸引不显维德二句而足之曰是故君子笃恭而天下平笃恭者恭己正南面之谓如武成所云垂拱而天下治者盖言德惟丕显则自足以致天下之平他无所事矣而旧说皆以笃恭释不显非也若大学之释於乎前王不忘尤为明白曰君子贤其贤而亲其亲小人乐其乐而利其利此以没世不忘也夫无竞维人即封建千八百固之事异姓以贤同姓以亲此所谓贤君子之贤亲君子之亲也不显维德凡发政施仁皆是此所谓乐小人之乐利小人之利也一说万尚烈云与人无兢故四方其训德维不显故百辟其刑前王之所以人不能忘者全在於此若稍与人兢必不能训四方稍自显露必不能刑百辟前王不如是也中庸引此正以发明闇然之意故曰後其身而身先外其身而身存惟无以天下为者乃可托於天下为此诗者其知道乎亦通】

烈文二章一章八句一章六句【旧只作一章十三句 朱传及申培说皆以为成王祭宗庙而献助祭诸侯之乐歌今按次章言四方训百辟刑似非天子告诸侯之语或有谓赞美前王之德以感动诸侯者亦自可通然语意觉散缓不如欧阳说为长子贡传关文】

访落成王除武王之丧将始即政而朝於庙与羣臣谋於庙也【序云嗣王朝于庙也蔡邕独断亦云成王谋政于庙之所歌也按庙者武王庙以诗辞昭考皇考等语知之逸周书序云成王既即政因尝麦以语羣臣而求助作尝麦而竹书亦载成王四年春正月初朝于庙夏四月初尝麦与书序言尝麦求助者合此诗之作在此时也与小毖敬之二诗当合为一篇孔颖达云成王既朝庙而与羣臣谋事诗人述之而为此歌邓元锡云丧三年不言至是始庙见羣臣访焉又家语孔子曰成王年十有三而嗣立明年夏六月冠而朝于祖以见诸侯未详孰是愚但以逸书序有即政求助之语因摭为据耳】

访予落止【丰氏本作只】率时昭考於【音乌】乎悠哉朕未有艾将予就之继犹判涣维予小子未堪家多难绍庭上下陟降厥家休矣皇考以保明其身【通篇俱无韵 赋也说文云泛谋曰访徐锴云谓广问於人也予成王自谓也落木叶陨坠也说文云凡草曰零木曰落成王即位之初武庚蠱动王室几摇故以落言止通作只说文云语已辞也率尔雅云循也当通作卫时之言是音之近也昭考武王也解在载见篇邓云免丧之思惟考也武王在庙中访问诸臣言自武庚倡乱後我国家已有陨落之势今将思其所以救是者惟在循是武王治天下之道而行之庶可转危为安也於乎叹声如乌之吁呼也悠说文云忧也朕万尚烈云朕兆之朕解见抑篇艾犹尽也朱子云如夜末艾之艾解见庭燎篇将如无将大车之将郑玄云犹扶进也就说文云就高也从京从尤尤异于凡也徐锴云语曰就之如日日高人就之会意继续判分也涣流散也俱见说文成王欲率循武王之道既又叹而忧思之谓武王之道甚大虽颇知其端绪朕兆而未能测其究竟赖尔诸臣扶将我以就之然尚恐继其道而判焉不合涣焉不属也辅广云味此意则成王固已默识夫武王之道若不曾用工夫则便以为易矣岂识此味哉三山李氏云自访予落止至继犹判涣皆是仰先王之盛德叹眇躬之凉薄苦前哲之高

远也胡一桂云自维予小子而下则焄蒿凄怆如或见之也愚按此下皆属望先王陰助默相之辞未堪家多难者追指前日三叔挾股以叛之事而言堪通作戡尔雅云胜也曰家多难者武庚之变三叔寔为之书大诰篇所谓民不静亦惟在王宫邦君室是也绍庭二句犹昔人言舜见尧于羹墙之意与陟降庭止义同绍说文云继也谓往来不絕也庭以庙庭言上下即陟降也家谓家庭也武王与成王亲则父子曰厥家者亲之也休说文云息止也孔云上言昭考此言皇考皆斥武王也变称皇者尊之也王安石云保其身无危亡之忧明其身无昏塞之患成王既虑率循昭考之难因自言予幼稚小子向者遭王室多难变生肘腋力量固有所难胜矣自今以往其庶几我昭考之灵往来不絕於庙庭之中或上而陟或下而降皆在我家止息未尝少离于以翼我之行使身有所凭藉而不陷于危啓我之思使身有所开悟而不迷于往也按太甲成王皆再世守成之主太甲复辟而伊尹所以训之者一則曰率祖攸行再則曰奉先思孝成王免丧即政而首惓惓以率时昭考为言可谓知本矣】

访落一章十二句【朱传云成王既朝于庙因作此诗以道延访羣臣之意申培说袭之按此诗虽对羣臣而作以延访发端而意皆属望昭考至小毖篇始道其延访羣臣之意耳子贡传阙文】

小毖嗣王求忠臣助己之所歌也【出蔡邕独断】为访落之第二章【序亦以为嗣王求助也何以知其为访落之第二章也彼曰维予小子未堪家多难此曰未堪家多难予又集于蓼苦愈甚而意愈迫矣将望皇考之绍庭上下陟降厥家以陰佑已而冥冥之中不可必也非资藉明保于臣其曷克有济愚以为此成王自怨自艾之辞以归诚于周公亦如太甲复辟而致辞伊尹者焉即下篇敬之敬之数言所进戒于王者未必非周公之语而说者已久失其传矣孔穎達云颂之大列皆繇神明而兴於访落言谋于庙则进戒求助亦在庙中与上一时之事史记乐书太史公曰余每读虞书至于君臣相勅惟是几安而股肱不良万事堕坏未尝不流涕也成王作颂推己惩艾悲彼家难可不谓战战恐惧善守善终哉君子不为约则修德满则弃礼佚能思初安能惟始沐浴膏泽而歌咏勤苦非大德谁能如斯篇名小毖者郑玄云天下之事当慎其小时而不慎後为祸大故成王求忠臣早辅助己为政以救患难刘公瑾云不以蜂为小则其後无辛螫之患矣不信其为桃虫之小则其後无拚飞之患矣名篇者特于毖字上加一小字其意深矣又云朱子以此诗作于成王免丧之际则是武王崩後之三年也按书曰周公位冢宰正百工羣叔流言则是武王方崩流言即兴周公避而居东二年之秋天有雷风之变於是王迎公归明年免丧朝庙而此诗继作故此篇深惩管蔡之事也】

予其惩而毖後患莫予弇【尔雅作粤潜夫论作并】蜂【叶东韵读如洪胡公翻尔雅作牟潜夫论作蠱丰氏本作蠱】自求辛螫【韩诗作赦】肇允彼桃虫【东韵】拚【文选注作翻】飞维鸟【筱韵】未堪家多难【去声】予又集【丰本作彙】于蓼【筱韵赋中有比也予成王自谓也惩说文云忘也朱子云有所伤而知戒也毖说文毛传皆云慎也徐锴云慎密也惩以已然言毖以未然言後後日也患说文云忧也从心上串徐云串之言贯也贯於心也初武王既丧管叔及羣弟流言于国曰公将不利于孺子成王信之而疑周公其後三监挾股以叛成王至是始白周公之忠而悔己之轻信三叔以致祸乱也曰予其惩创往日之失从今以往与廷臣更始以毖後日之患乎尔廷臣其毋以予往日者为昏为愎而弃我也孔云我

今欲慎小防患故须汝等助我言已求助之意也自莫予弄蜂以下皆追数往日之失予之所以其惩者此也莫之为无音之近也弄通作迸斥逐散走也解见桑柔篇蜂以比武庚蜂本作蠹说文云飞虫螫人者尔雅别土蠹木蠹二种在地中作房者名土蠹其形大在树上作房者名木蠹其形差小又曰蠹丑蛭谓垂其腴腴即腹下螫毒也罗愿云蠹种类至多土蠹黑色最大者螫人至死能食蜘蛛楚辞谓玄蠹若壶壶形圆大故蠹似之蜜蜂螫人芒入人肉不可复出蠹亦寻死陆佃云其毒在尾垂穎如锋故谓之蜂传曰蜂蛰垂芒此之谓也一名万其字象形盖蜂类衆多动以万计故借为万亿之万旧说数人以千数物以万庄子所谓号物之数谓之万也愚按汉书中山靖王传云谗言之徒蠹生顔师古注以为衆多也此诗比意与彼同当管叔流言与羣叔嚣然更进迭和如蜂起然而成王不察其奸故言当时无有人为我进逐此蜂者使我自以为是而终罗於螫毒之苦即谓之自求辛螫可也辛属全金刚味辛辛痛即泣出故以为痛苦之义肇通作雇始也允信也俱见说文桃虫小鸟尔雅云桃虫鷦鷯其雌鷦按鷦即鷦鷯也鷦一作□又名鷦鷯江东呼布母陆佃云说苑曰鷦鷯巢於苇苕系之以髮鷽性拙鷽性巧故鷽俗呼巧妇一名工雀一名女匠其喙尖利如锥取茅秀为巢巢至精密以麻紩之如刺韞然故又名韞雀扬雄方言云自关而东谓之工爵或谓之过羸或谓之女?自关而东谓之鷽鷽自关而西谓之桑飞或谓之韞爵拊说文云拊手也鷽鷽巢於深林以一技为安苟以手拊之使飞则彼固羽族之鸟也其远举别适何所不至以比武庚受封于殷其始帖然臣服亦可以相信矣而三叔煽之使动遂至悍然称兵欲反鄙我周邦不复肯守其侯封之旧耳又郭璞谓鷽?小鸟而生鷽鷽陆玕亦谓鷽鷽微小于黄雀其鷽化而为鷽故俗语鷽鷽生鷽及甄焦氏易林亦有桃虫生鷽之语毛传解此以为鸟之始小终大者义实本此若以比武庚则郝敬所云方武王诛纣宥其子人以为孤雏耳未几挟徐奄诸国叛周公东征三年而後定此桃虫之为大鸟也理亦可通然鷽化而为鷽目所未见世多疑之又经文俱言鸟耳未尝言大鸟也岂谓鷽鷽非鸟必待变而後为鸟乎愚故定主前说未堪家多难解见访落篇集者栖止之义蓼说文云辛菜薺□也按尔雅薺□蓼即此郭璞以为泽蓼也陆佃云蓼生水泽者茎赤味辛罗愿云越王苦思报吴卧则以蓼楚辞曰蓼虫不知徙乎葵菜言蓼辛葵甘虫各安其故不知迁也而魏子曰蓼虫在蓼则生在芥则死非蓼仁而芥贼也本不可失也毛传云集于蓼言辛苦也季本云多难谓管蔡之乱蓼以喻武王之丧也言己方幼冲不堪国之多难而又适当大丧之苦故曰又集于蓼也此以流言疑周公之事自惩见己德之不及武王而欲羣臣之助也陈际泰云夫物有大甘也必有大苦随之成王之克成令主也则集蓼之故也夫张文潜云成王惩周公之事将毖後患使後之知人不复如前日之惑而首之以求助何也盖昔之不知周公之圣出于无助故也何以知其然耶夫成王在廷之臣圣莫如周公而贤莫如召公周公之为师召公固不说之矣召公且不说则在廷之臣岂复有能辨而言之者也此成王所以惩前日之事出于左右无有助之者则其惩後患而首之以求助不亦宜乎破斧刺朝廷之不知盖举朝廷而刺之举朝廷之不知则孰为成王之助哉按逸周书尝麦解云维四年孟春王初祈祷于宗庙乃尝麦于太祖是月王命大正正刑书王若曰呜呼敬之哉如木既颠厥巢其犹有枝叶作休尔弗敬恤尔执以屏助予一人集天之显亦尔子孙其能常忧恤乃事衆臣咸兴受大正书盖即与此诗同意疑亦同时作也】小毖一章六句【申培说丰氏本篇名俱无小字朱传云此亦访落之意申培说袭之今按二诗命意各有所主原不相混一属望皇考一属望羣臣也特谓其皆一时庙中之作则可耳子贡传阙文】

敬之访落之第三四章也羣臣进戒成王王乃答羣臣见戒之意【自羣臣下俱出欧阳修毛诗本义何以知其为访落之第三四章也访落日陟降厥家而此曰陟降厥士访落日将予就之而此曰日就月将盖相为首尾之辞也陈氏云嗣王於祭之明日绎祭宾尸而羣臣与焉既作谋政之诗以发羣臣之志而作颂者又设羣臣进戒之诗以答之又形容嗣王虚己求言之意为羣臣者当何如哉邓元锡云王朝庙羣臣戒王皆不言而将之以乐宣其所欲言其斯为不言之教不肃之严乎故父子君臣天人上下仁孝忠敬之道咸在王周公朝庙间故乐其深也】

敬之敬之【支韵】天维【左传贾谊新书俱作惟】显思【支韵】命不易【音异】哉【叶支韵将其翻】无【汉书新书俱作毋】曰高高在上陟降厥士日监在兹【支韵赋也此羣臣因王之求助而进戒也敬说文云肃也礼记注云在貌为恭在心为敬周昌年云敬非敬天乃】

【心存戒慎重言敬之者无时无事而不敬也贾谊云志敬而怠人必乘之真德秀云重言以求其听也天维显思二句称天命以耸动之正见所以当敬也显明也思朱子云语辞也天维显思者顔师古云言天甚明察也按大雅曰皇矣上帝临下有赫维显之谓也命者有天下之命也不易者言保之不易也杜预云奉承其命甚难愚按此亦承上章多难而言左僖二十二年邾人以须句故出师公卑邾不设备而御之臧文仲曰国无小不可易也诗曰敬之敬之天惟显思命不易哉先王之明德犹无不难也无不惧也况我小国乎成四年公如晋晋侯见公不敬季文子曰晋侯必不免诗曰敬之敬之天惟显思命不易哉夫晋侯之命在诸侯矣可不敬乎无曰以下主先王而言也无毋通禁止辞也曰者代为成王意中之语也高高在上指先王也语意与文王在上一例因首章访落之诗以乞灵皇考为言故特破其所恃言天甚难堪命实靡常王母谓先王之灵在天或能陰为王地也重言高高者兼指文武之辞也周书召诰篇曰天既遐终大邦殷之命兹殷多先哲王在天又曰相古先民有夏天迪从子保面稽天若今时既坠厥命今相有殷天迪格保面稽天若今时既坠厥命即此意也陟降与闵予访落篇义同士说文毛传皆云事也按事乃士之本训其字从一从十数始于一终于十故说文引孔子曰推十合一为士也以其士为人品之称者则谓其人足任事故亦以士名之或当通作仕耳监说文云临下也兹之言此音之近也先王之心与天之心一也其神灵恒上下往来于王之所为而无日不监视于王之所处王固欲皇考陟降厥家而岂知其日所监之家中者实陟降厥事乎所事善则许之不善则怒之先王当无所私也抑又无小大无衆寡无精麤之不体也夫上天之命既不易保而先王之监又不少疎然则王可有一时一事之不敬哉真德秀云当时羣臣之学以格心为主故其言纯粹如此人主宜深味之王应麟云荀子曰天子即位上卿进曰能除患则为福中卿进曰先事虑事先患後患下卿进曰敬戒无怠羣臣进戒始以敬三卿授策终以敬此心学之原也伊尹训太甲曰祗厥身召毕告康王曰今王敬之哉皆以此为告君第一义陆化熙云周公之戒王曰皇自敬德召公之诰王曰王其疾敬德曰王敬作所不可不敬德曰惟不敬厥德乃早坠厥命即是此诗首章之旨】维予小子【纸韵】不聪敬止【纸韵】日就月将【叶阳韵资良翻】学有缉熙于【韩诗外传作於】光明【叶阳韵谟郎翻】佛【韩诗外传说苑俱作弗】时仔肩示【新书作视】我显德行【叶阳韵户郎翻赋也胡一桂云自维予小子以下则嗣王先自述而後求羣臣之助也聪说文云察也不聪

以质言郑玄云承之以谦也止通作只说文云语已辞也不聪敬止犹顔渊言回虽不敏请事斯语之意言我虽不聪而闻羣臣之陈戒警切如此诚不敢以不敬也然徒敬而不学则于先王之道茫无入门虽尸居寂守何益于治故仍以将予就之为诸臣望焉就将解见访落篇就言日将言月者学者工夫无可间断故日必有就教者第条示其纲领啓发其关键而已故但须计月也韩诗外传云劒虽利不厉不断材虽美不学不高虽有旨酒嘉穀不尝不知其旨虽有善道不学不達其功故学然後知不足教然後知不究不足故自坏而勉不究故尽师而熟繇此观之则教学相长也诗曰日就月将又云孟尝君请学于闵子使车往迎闵子闵子曰礼有来学无往教致师而学不能礼往教则不能化君也君所谓不能学者也臣所谓不能化者也於是孟尝君曰敬闻命矣明日祛衣请受业诗曰日就月将又云孔子燕居子贡摄齐而前曰弟子事夫子有年矣才竭而智罢振於学问不能复进请一休焉孔子曰阖棺兮乃止播兮不知其时之易迁兮此之谓君子所休也故学而不已阖棺乃止诗曰日就月将言学者也緝熙解见文王篇緝字从日月推出熙者光明之谓成王言我于先王之道欲日有所就必赖尔诸臣之月有所将诚如是以为学积渐不已则于事物之理无不洞彻而此心之光明者益继续其光明矣是之谓緝熙于光明也光明二字意虽无异而义当有辨晋语郭偃以光为明之耀朱子谓明者光之体光者明之用是也成汤有言曰去圣人之道而独居以思犹之去日于庭就火于室也刘向亦曰少而好学如日出之阳壮而好学如日出之光老而好学如秉烛之游繇是以观有求光明之志者断不能舍学矣钱天锡云緝熙二字与文王不同乃勉然工夫从一隙之明而聯緝不已到那万理明净地位徐干云学也者所以疏神達思怡情理性圣人之上务也民之初载其蒙未知譬如宝在于玄室有所求而不见白日照焉则羣物斯辨矣学者心之白日也又云大乐之成非取乎一音佳膳之和非取乎一味圣人之德非取乎一道故曰学者所以总羣道也羣道统乎己心羣言一乎己口惟所用之述千载之上若其一时论殊俗之类若与同室度幽明之故若见其情原治乱之故若见己效故曰学有緝熙于光明王符云人之情性未能相百而其明智有相万也此非其真性之材也必有假以致之也君子之性未必尽照及学也聪明无蔽心智无滞前纪帝王顾定百世比则道之明也而君子能假之以自彰尔夫如是道之於心也犹火光於人目也中弃深室幽黑不见及设盛烛则百物彰矣此则火之耀也非目之光也而目假之则为明矣天地之道神明之为不可见也学问圣典心思道术则皆来覩矣此则道之材也非心之明也而人假之则为已知矣诗曰日就月将学有緝熙于光明是故凡欲扬光烈者莫良于学矣淮南子云知人无务不若愚而好学自人君公卿至於庶人不自强而功成者天下未之有也诗云日就月将学有緝熙于光明此之谓也又云生木之长莫见其益有时而修砥砺?监莫见其损有时而薄君子修美虽未有利福将在後至故诗云日就月将学有緝熙于光明此之谓也韩诗外传云凡学之道严师为难师严然後道尊道尊然後民知敬学故大学之礼虽诏于天子无北面尊师尚道也故不言而信不怒而威师之谓也诗曰日就月将学有緝熙于光明佛时二句申言其望助之切也佛说文云见不审也愚按此与髣髴之髴同义即谦言不聪之意时之言是音之近也仔说文云克也肩郑玄云任也按人肩能胜重任故有任之义示者天垂象以示人之示顔师古云君子以目视物以物示人同作视字後世作字异目示物从示傍见示人物作单示字德行谓德之见于行者先王已然之成迹皆明德所流露故曰德行也成王既以月将之助望羣臣而自期于緝熙光明之效矣又恐不得其所以将之之术而终无受益之可望也复申恳之曰以我之见理不明若是而欲克胜天下之重任其必示我以显明可见之德行庶乎启发有机日不迷於所事而

天命可保乎盖示之不显则恐有似是之讹而亦非见地未明者所能骤领此成王之所深虑非徒承之以谦而已佛显二字对看张文潜云夫德行固道之显者也而成王尚欲使示之以显德行者盖学之始其道当然也以其德行之幽者未足以知之故曰示我显德行非独成王为然伊尹之告太甲明言烈祖之成德夫以言为未足而明言之则亦以太甲始进於学故也韩诗外传云宋大水鲁人吊之宋人应之曰寡人不仁斋戒不修使民不时天加以灾又遗君忧拜命之辱孔子闻之曰宋国其庶几乎昔桀纣不任其过其亡也忽焉成汤文王知任其过其兴也勃焉过而改之是不过也宋人闻之乃夙兴夜寐吊死问疾戮力宇内三岁年丰政平乡使宋人不闻孔子之言则年谷未丰而国家未宁诗曰弗时仔肩示我显德行一说佛者矫戾之意曲礼云献鸟者佛其首学记云其求之也佛扬子法言云荒乎淫佛乎正刘熙释名云牵引佛戾以制马是也愚按此当通作拂说文云违也或通作拂说文云过击也二义相近严粲云我负荷天下其任甚重尔羣臣当有以正救之无为面从容说必示我以显然之德行使我有所则效也亦通又韩诗外传云诗曰示我显德行故道义不易民不繇也礼乐不明民不见也此借语立义非诗本旨陈际泰云吾读成王之诗深有味乎其人也而又思周公之教之深也抗世子法於伯禽於兹验焉蒋悌生云成王自为谦退之辞愿加不息之功使学进于光明之地盖成王悔悟之後深服周公之训虽曰困知勉行而学亦渐进于精密矣】敬之二章章六句【序及蔡邕独断皆云羣臣进戒嗣王之所歌也此但据上章为说耳朱传以为成王受羣臣之戒而述其言申培说因之然此诗自是作颂者纪述之辞亦不得以上章进戒之语谓述自成王也子贡传阙文】

东山周公伐武庚既克而归劳其从行之士故作此诗【出申培说子贡传云周公帅师征殷三年克之劳其归士赋东山序云一章言其完也二章言其思也三章言其室家之望女也四章言男女之得及时也君子之于人序其情而闵其劳所以悦也悦以使民民忘其死其惟东山乎孔叢子载孔子曰于东山见周公之先公而後私也所谓先公後私者谓公事既毕便恤其私耳郝敬云周公避谤居东二年成王诛管叔得鸛鵒之诗感风雷之变始悔悟迎公公归大诰天下奉王东征武庚伐奄孟子所谓三年讨其君灭国五十即此行也】

我徂东山惓惓不归【朱子云无韵未详】我来自东【韵】零【说文丰氏本俱作霏後同】雨其蒙【东韵又丰本叶支韵谟悲翻按据此则不归之归亦叶支韵渠为翻楚辞章句作蒙】我东曰归【见上】我心西悲【支韵】制彼裳衣勿士【丰本作事】行枚【叶支韵谟悲翻】蜎蜎者蠋【说文丰本俱作蜀】烝在桑野【马韵】敦彼独宿亦在车下【马韵赋也凡言我者皆设为军士自道之词但说文云往也李氏云周在丰镐三监叛其地在王室之东周公自东征之是自西而东故谓东征严粲云军屯必依山为固故以东山言之王应麟云今按商故都在河北唐杜牧以河北为山东秦汉谓山东山西者皆指太行山东山即商地惓说文云水漫漫大貌今日惓惓者借为悠缓之意言其久也朱善云文武深仁厚泽其浸渍於西土者虽深而渐濡於殷邦者犹浅其顽民染于商辛之旧俗未尽变其贤士怀于先王之遗泽者未尽泯一旦改商而为周其眷眷思念之意固未遽释然也况又益之以管蔡之流言在我有衅之可乘乎故周公之东征也衮衣绣裳舒徐容与于东山之下谆谆乎友邦之训诲恳恳乎警民之戒饬使人心晓然知逆之不可以犯顺邪之不可以干正则自然有以剪其羽翼而披其枝叶将不必斧钺干戚之用而罪人斯得矣则周公之於庶殷非以力胜之也以德

化之也惟其以德照人也故军士之从公而东者虽有别离之若而无死亡之患则周公此举可谓仁之至而义之尽矣来即归也我来自东言从东方而归也零说文云余雨也蒙说文云微雨也行役最以雨为苦骤雨犹可立待微雨若断若续其苦不堪言零雨其蒙形容得羁旅愁惨之象此四句即景纪事故每章皆以之为起语我东曰归以下四句又追其将归之始而言曰字可味向未言归乃心敌忾才提起归之一字便有无限感怆故身虽在东而心已念西而悲此羁旅之情也西者家室所在万时华云东归极快活事悲却在此时可思可思才说起便悲曰字更有味少陵诗喜心翻倒极呜咽泪沾巾後山诗住远犹相忘归近不可忍人情类然制说文云裁也裳衣朱子云平居之服也与素裳白舄韎衣韎弁对看勿郑玄云犹无也士说文云事也数始于一终于十孔子曰推十合一为士愚按士原训事其称人为士者迹以其能任事故名之耳今人多昧此义行枚者行而用枚所以止语军中之制也顔师古云枚状如箸横衔之繡挈于项繡结碍也挈绕也盖征事既毕将归有期可释介冑不用于是新制裳衣以为在途之服而此行与出师时不同故亦无事于衔枚而行也蝟蝟者蝟四句亦归途所见与零雨其蒙同一时事蝟本井中虫之名蝟之动亦如之故曰蝟蝟考工记刺兵欲无蝟注云掉也疏云凡兵欲坚劲不欲柔软谓若虫之蝟蝟扰扰然蝟虫名尔雅云蝟鸟蝟疏云蝟一名鸟蝟亦专名蝟字本作蜀毛晃云蜀本从?而又加?焉俗也郭璞云虫大如指似蚕韩非子云蠶似蛇蚕似蝟人见蛇则惊骇见蝟则毛起然妇人拾蚕而渔者握蠶故利之所在皆为贲育罗愿云蜀葵中蚕也从虫上目象蜀头形中象其身蝟蝟葵者菜之甘者也古人有言蓼虫不知徙乎葵菜今蜀食葵之甘故其体肥大亦食于藿庚桑子曰奔桑不能化藿蝟言大小不同量也烝尔雅云衆也按烝本热义转训为衆者人衆则气热罗云蝟虽蚕类而不食桑诗乃称烝在桑野者葵藿之下亦桑野之地也蚕致养于人万百为族蜀则独行故以此敦然独宿者于文独字从蜀则蜀当独处尔又蜀亦或作鸟名师旷禽经曰蜀不独宿不知何物也蜀不独宿故以叹独宿者愚按罗前说是後说非也据尔雅云鷦鷯山鸟又南康记石室山有鸟亦曰鷦鷯形色鲜洁自爱毛羽若只者则照水悲鸣此或即禽经之所谓蜀耳蝟既禽名不应以蝟蝟状之又蜀有独义故管子云抱蜀不言而庙堂既修学者多不识抱蜀之义以今思之即抱独也敦通作惇说文云厚也厚重不移之貌彼檠指军士也曰独宿者对离室家而言亦在车下者王安石云古用战车则将卒有所蔽倚止则为营卫与塹栅无以异言彼衆多之蝟皆独行而散处于桑野此离家之军士亦敦然不动而独宿于车下与蝟蝟者蝟无以异也殷大白云看亦字正匪兕匪虎之意以其语出于上人则为体其情耳序以此章为言其完也古全师为上盖师全而後公喜可知也】我徂东山惓惓不归我来自东零雨其蒙果羸之实【质韵】亦施【音异】于宇【麋韵丰本作?】伊【尔雅作蚺】威在室【质韵陆德明云或作堂误】蠪【说文作蠪】蛸在户【麋韵实宇室户隔句二韵】町【陆本作圻】唾【陆本作唾又作唾】鹿塲【阳韵】熠燿【说文作熠熠云盛光也】宵行【叶阳韵户郎翻】不可畏【叶微韵於非翻亦叶灰韵乌回翻】也伊可怀【叶微韵胡威翻亦叶灰韵胡隈翻】也【赋也果羸之实尔雅云栝楼也郭璞云今齐人呼之为天瓜邢昺云实即子也叶似瓜叶形两两相值蔓延青黑色六月华七月实如瓜瓣本草云一名地楼一名泽姑图经云栝楼生山谷实名黄瓜根亦名白药皮黄肉白三四月生苗引藤蔓叶如甜瓜叶作又有细毛七月开花似葫芦华浅黄色实在华下大如拳生青至九月熟赤黄色其实有正圆者有锐而长者施朱子云延也蔓生延施于宇下也伊威虫名尔雅云蚺威委黍又云蟠鼠负即一物也陆玕云在壁根下瓮底土中生似白鱼者是也本草云所谓湿生虫也多足其色如蚓背有横文一名负蟠

多在下湿处及土坎中常惹着鼠背故名鼠负今误作妇字或作?一云食之令人善淫术曰鼠妇淫妇是也陆佃云一名鼠姑亦或谓之鼠黏鼠妇犹鼠姑也鼠黏犹鼠负也蠪蛸虫名尔雅云长跚也郭璞云小鼃鼃长脚者俗呼为喜予亦作蟪子陆佃云萧梢长跚之貌因以名云陆玠云一名长脚荆州河内人谓之喜母此虫来着人衣当有亲客至有喜也幽州人谓之亲客亦如蜘蛛为网罗居之在户言为网于户也町疃程子云庐傍畦壠说文云田践处曰町董氏云区种法曰伊尹作为区田一亩之中地长十八丈分十八丈作十五町町间分十四道通人行杨慎云左传町原防井衍沃干宝注平川广泽可井者则井之原阜堤防不可井者则町之町小顷也张平子西京赋徧町成篁注町为畎亩疃本作疃说文云禽兽所践处也杨云庄子舜举于童土之地其疏云童土疃也塲本作场说文云田不耕者杨云原诗人之意谓征夫久不归家町疃之地践为鹿塲非为町疃即鹿塲也熠燿萤火孔颖达云即夜飞有火虫也本草萤火一名夜光一名熠燿曹植萤火论云熠燿宵行章句以为鬼火或谓之磷未为得也天陰沈数雨在于秋日萤火夜飞之时也故云宵行陆佃云一说萤非熠燿熠燿行虫耳今卑湿处有虫如蚕蠋尾後载火行而有光俗谓之熠燿未详孰是朱子因第四章有熠燿其羽之句因解熠燿为明不定貌而以宵行为虫名杨慎驳之云古人用字有虚有实熠燿之为萤火实也熠燿为仓庚之羽虚也有一明证可以决其疑小雅交交桑扈有莺其领与此句法相似此言桑扈之领如莺之文非谓莺即桑扈也彼谓仓庚之羽如熠燿之明非谓熠燿即仓庚也上章述初发时事此章则渐抵家矣因感念丁夫于役室庐就荒想像有果羸以下五者其景象如许焉怀思也有系恋在抱之意陆燧云言家中光景如此难得便畏而不归但出外已久种种意念排遣不开转念之而释然喜也严粲云室庐将近则家事纖悉一一上心此人之情也盖别家之情于久住之处犹或相忘至于归心已动行而未至则思家之情最切故序其在途之情以慰劳之】我徂东山惓惓不归我来自东零雨其蒙鹳【说文陆本丰本俱作鹳】鸣于垤【叶质韵徒吉翻】妇叹于室【质韵亦叶寘韵式吏翻】洒扫穹窒【质韵】我征聿至【寘韵亦叶质韵职日翻】有敦瓜苦烝在栗【韩诗作□云衆薪也丰本同】薪【真韵丰本作新】自我不见于今三年【叶真韵奴因翻赋也鹳鸟名陆玠云似鸿而大长颈赤喙白身黑尾翅一名负釜一名黑尻一名背鼃一名皂裙本草注云头无丹项无乌带身似鹤不善喉但以喙相击而鸣亦有二种白鹳鸟鹳垤说文云螳封也亦名蚁冢陆玠云蚁将雨则出而壅土成峰鹳鸟见之长鸣而喜今蚁取小虫入穴辄坏垤窒穴盖防其逸亦以窒雨易占所谓蚁封其穴大雨将至是也今朔地蚁封其高大有如冢者所谓蚁冢盖出于此禽经云鹳俯鸣则陰仰鸣则晴愚按鹳好水之鸟也亦善羣飞薄霄激雨雨为之散旧说皆以鹳鸣于垤为将雨之徵将雨则征夫之至不必如期故妇叹于室然上文明言零雨其蒙则非将雨矣下文洒扫穹窒推之此鹳之鸣即禽经所谓仰鸣则晴者也晴则征夫将至故洒扫穹窒以待之然则其叹者何也以其宜至而犹未至望之之切故叹也罗愿云易之中孚九二鸣鹤在陰上九翰音登于天说者以为鹳者别于鹤也震为鹤阳鸟也巽为鹳陰鸟也鹤感于阳故知夜半鹳感于陰故知风雨洒扫穹窒与上章伊威蠪蛸等语相应穹窒解见七月篇严云此皆想其妇在家之叹望盖行人念家之情如白居易诗云想得家中夜深生还应说着远行人也我代军士自谓也征行也聿通作吹说文云诳辞也敦烝解俱同首章瓜苦瓜之苦者栗薪栗树之为薪者盖取以制棚架之类行者至家因见苦瓜累累系于栗薪之上而曰自我之不见此亦已三年矣濶别许久见故国风物依然如旧似喜似惊有无限感慨况其室家乎唐诗始怜幽竹山牕下不改清陰待我归意与此同又苦瓜以况其妇栗薪枯槁取以自况苦瓜延蔓于栗薪

之上以况夫妇纏綿不解亦犹芎蓂施于松柏之意朱子云东山之诗言自我不见于今三年则居东之非东证明甚盖周公居东二年成王因风雷之变既亲迎以归三叔怀流言之罪遂胁武庚以叛成王命周公征之其东征往返首尾又自三年也按逸周书作雒解云师旅临卫攻殷殷大震潰降辟三叔禄父者奔管叔经而卒所征熊盈族十有七国俘维九邑俘殷献民迁于九毕竹书成王三年王师灭殷杀武庚禄父迁殷民于卫遂伐奄灭蒲姑四年王师伐淮夷遂入奄五年王在奄迁其君於蒲姑夏五月王至自奄此则东征之役斧斨破缺盖历三年也自此及下章乃已归至家而夫妇相见之语】我徂东山惓惓不归我来自东零雨其蒙仓庚于飞【微韵】熠燿其羽【麋韵】之子于归【微韵】皇【尔雅作驪】驳其马【叶麋韵满补翻按飞归羽马亦隔句二韵】亲【丰本作親】结其褵【支韵韩诗外传作縢】九十其仪【支韵亦叶歌韵牛河翻】其新【丰本作亲】孔嘉【叶歌韵居何翻】其旧如何【歌韵亦叶支韵于离翻 赋也序以此章为乐男女之及时细味乃追述昔日之语非此时方谐婚娶也仓庚即黄鸟解见葛覃篇郑云仓庚仲春而鸣嫁娶之候也熠说文云盛光也燿说文云照也状其羽色之鲜明如可照也之子即其妇也于归谓始嫁时也皇尔雅作驪云黄白曰驪駟白曰驳孙炎云駟赤色也孔颖达云黄白谓马色有黄处有白处駟白谓马色有駟处有白处是子往嫁之时所乘者皇其马驳其马言其车服盛也亲是子之亲即其母也结说文云缔也褵本作縢有二义说文云以丝介履也尔雅云妇人之褱谓之縢縢綏也郭璞以为即今之香缨邪交络带系于体因名为褱陈祥道云缨带曰衿婚礼所谓施衿是也带结而垂曰縢尔雅所谓縢綏是也按士昏礼母戒女施衿结帨曰勉之敬之夙夜无违宫事庶母申之曰夙夜无愆施诸衿鞶考尔雅衿谓之游郭璞解游为衣小带也然则衿者纓之带縢者衿之綏先施衿而後结其縢总是一事而孙炎孔颖达泥礼文径以结縢为结帨误矣愚按说文尔雅二义皆可通并列之九者数之盛十者数之终举九与十喻其多也仪谓昏礼之仪韩诗外传云嫁女之家三夜不息烛思相离也取妇之家三日不举乐思嗣亲也是故昏礼不贺人之序也三月而庙见称来妇也厥明见舅姑舅姑降于西阶妇升自阼阶授之室也故礼者因人情为文诗曰九十其仪言多仪也嘉说文云美也按昏礼名嘉礼以陰阳际会谓之嘉旧对新之称郑云其新来时甚善至今则久矣不知其如何也又极序其情乐而戏之一说上章咏旧有室家者此章咏新有室家者理亦可通但以前章果羸施宇熠燿宵行及有敦瓜苦等语思之彼皆夏末秋初所有而仓庚之鸣正在仲春之月时不相值则于飞结褵其为追述之语无可疑者故当以郑笺之解为正朱子云古之劳诗皆知此其上下之际情志交孚虽家人父子之相语无以过之此其所以维持巩固数千百年而无一旦土崩之患也真德秀云周公述归士之辞士之蘊于其心而不能言者周公尽发之于言遐想其时上下交孚欢欣感激有不能自己者後世征戍频繁民病于役则有为诗以刺者如陟岵鸛羽此以父子不相保而怨也葛生采葭此以夫妇不相保而怨也渐渐之石何草不黄此将率戍役以劳苦而怨也与采薇东山之辞大抵略同然采薇东山上序戍者之情也陟岵诸诗戍者或其家人自感其情也得失相去顾不远哉】

东山四章章十二句【序以为周公东征三年而归劳归士大夫美之故作是诗按此诗既为劳归士而作自当是周公语属之大夫似未足信朱子以为成王既得鸛鵒之诗又感风雷之变始悟而迎周公于是周公东征已三年矣既归因作此诗以劳归士今考东征断是亲迎以後事朱子亦自知其误矣说见鸛鵒篇】

破斧美周公也【出序】从军之士以前篇周公劳己之勤故言此以答其意【出朱传 辅广云东山之诗周公能得归士之心也破斧之诗归士能得周公之心也所谓上下交而其志同者也章潢云易曰刚中而应行险而顺以此毒天下而民从之破斧之谓也焦氏易林云鸛鵒破斧邦人危殆赖旦忠德转祸为福倾危复立扬子法言或问为政有几曰思斲昔在周公征于东方四国是王其思矣夫齐桓公欲径陈陈不果纳执轅涛涂其斲矣夫公羊传云古者周公东征则西国怨西征则东国怨】

既破我斧又缺我斨【阳韵】周公东征四国是皇【阳韵齐诗丰民本俱作匡法言作王】哀我人斯亦孔之将【叶阳韵资良翻 赋也破者石碎之义缺者器破之义皆毁也斧斨解见七月篇司马法輶辇载一斧一斤一凿一耜一鋤二版二筑皆军中樵苏筑垒用之易旅卦得其资斧注亦谓斧所以斫除荆棘是也斨亦伐木用之非指兵器严粲云周公奉王命以讨罪有征无战四国闻王师之至即穷蹙自守周公又迟之三年不为急攻之计故未尝从事于战陈惟行师有除道樵苏之事斧斨之用为多历时之久则必敝观尚书所载周公化商之事勤拳恳恻如父兄之爱其子弟若以为杀戮之多至于破斧缺斨则是与之血战而仅胜之亦疲敝甚矣愚按周公虽无急于战胜攻取之心然武庚之乱挟三监并奄与淮徐之地几半天下差与汉七国之变无异周公居东三年始平之其事势亦有然者破斧缺斨正三年从征内事盖亦举劳苦而极言之也昔人诗有云从军有苦乐但问所从谁所从神且武焉得久劳师若嫌公之一徂辄三龄为久暴师顿兵于外彼未覩乎当日之情形耳万尚烈云东山之师非周公不可盖周公之教化在西土者虽深在东方者尚浅商之世德其斲丧者固甚其固结者亦存况武王一崩公即摄政而王方幼冲三叔流言尽可借为摇动之隙孰谓顽民义士遂无夷齐在乎万一山东诸国有仗义而起者不可谓非周之难此周公之所哀也当时劳心焦思鞠躬尽瘁不知何如而安用矩步雅歌之士迂谈濶论为耶四国金履祥云三监武庚国内臣民也书传云武王杀纣继公子禄父及管蔡流言奄君薄姑谓禄父曰武王死成王幼周公见疑矣此百世之时也请举事然後禄父及三监叛愚按朱子以四国为四方之国然观书多方篇曰告而四国多方既于四国之下复言多方则四国之非泛指四方明矣毛孔皆以四国为管蔡商奄盖以霍叔之罪比二叔差轻故除霍不言而取奄以足其数然观书多士篇曰昔朕来自奄予大降尔四国民命既于奄之外复言四国则奄不在四国数内明矣断当从金氏解皇通作遑说文云急也尚书无皇曰今日耽乐汉书谦逊未皇夙夜不皇康宁皆用此皇字言周公东征岂得已哉祇为四国不静天下将危故皇皇如斯耳旧说训皇为正然皇无正义或引齐诗改作匡字恐非经文之旧故不敢从哀犹言怜爱也我人通言天下之人将通作壮字之近也毛训为大也言是举也非以勤劳我军士实哀怜我天下之人而欲永措之生全之地盖仁者爱人故恶人之乱之也今蠹靖而民生自是无虞其为德不亦大乎苏辙云使周公嫌于救其身洁身而退以避二叔之难则其乱将及于四方如是而周公亦清矣然而未免于小也维不嫌于自救哀人之不治以诛管蔡而後可以为大朱子云夫管蔡流言以谤周公而公以六军之衆往而征之使其心一有出于自私而不在于天下则抚之虽勤劳之虽至而从役之士岂能不怨也哉今观此诗固足以见周公之心大公至正天下信其无有一毫自爱之私抑又以见当是之时虽披坚执锐之人亦皆能以周公之心为心而不自为一身一家之计朱善云是诗虽作于军士然亦可谓知圣人者矣徐光啓云周公之心归士能知之司马昭之心路人能知之故曰鹤鸣于九皋声闻于天金履祥云君臣之际天下之大戒昔者成汤伐桀则放

之武王克殷而紂死矣武王为天下除残而已固不必加兵于其身也圣人恶恶止其身而已固不必诛絕其子孙也于是立武庚以存其祀以常情论之诛其父而立其子安知武庚之不复反乎虑其反而立与立之而不能保其不反是不得以存之也于是分殷之故都使管叔蔡叔霍叔为之监以监之夫天子使其大夫为三监监于方伯之国国三人亦殷礼也况所使为监者又吾之懿亲介弟也武庚何得为乱于其国假使管叔非至不肖何至挟武庚以叛哉圣人于此亦仁之至义之尽矣不幸武王则既丧成王则尚幼而天下之政则周公摄之是岂其得已也彼管叔者国家之谓何又因以为利彼固以为周之天下或者周公可以取之己为之兄而不得与也此管叔不肖之心也而况武庚实嚆之于是唱为流言以撼周公既而成王悟周公归而遂挟武庚以叛彼武庚者睚周室之内难亦固以为商之天下或者己可以复取之三叔之愚可因使也此武庚至愚之心也而况三叔实藉之于是始为浮言以诱三叔既而三叔与之连遂挟三监淮奄以叛夫三叔武庚之叛同于叛而不同于情武庚之叛意在于复商三叔之叛意在于得周也至于奄之叛意不过助商而淮夷之叛则外乘应商之声内撼周公之子其意又在于得鲁三叔非武庚不足以动衆武庚非三叔不足以间周公淮夷非乘此声势又不能以得鲁此所以相挺而起同归于乱周也抑当是时乱周之祸亦烈矣武庚挟殷畿之顽民而三监又各挟其国之衆东至于奄南及于淮夷徐戎自秦汉之世言之所谓山东大抵皆反者也然大诰之书曰殷小腆曰殷逋播臣于三监则略而不详何也盖不忍言也不忍言则亲亲也其卒诛之何也曰亲亲尊尊并行不悖周道然也故于家曰亲亲焉于国曰君臣焉象之欲杀舜止于乱家故舜得以全之管叔之欲杀周公至于乱国故成王得以诛之周公不得以全之也传曰管蔡为戮周公右王书序曰成王伐管叔蔡叔则管蔡之诛是成王之意使管叔而可以无诛则天下後世之为王懿亲者皆可以乱天下而无死也可以乱天下而无死则天下之乱相寻於後世矣而可乎故黜殷天下之公义诛管蔡亦天下之公义也夫苟天下之公义圣人不得而私亦不得而避也吁是亦成王周公之不幸也】既破我斧又缺我錡【叶歌韵于何翻陆德明云或作奇】周公东征四国是吡【歌韵尔雅注陆本俱作讹】哀我人斯亦孔之嘉【叶歌韵居何翻 赋也錡有二义说文云鉏?止徐锴云鉏?犹犬牙也立罇所用按司马法輶载有一鋤疑即此又说文云江淮之间谓釜曰錡召南维錡及釜是也依此则錡乃军中所以鑿者亦非兵器吡说文云动也徐云卧既觉必有声气诗尚寐无吡或寢或吡训皆同或引尔雅注改作讹云化也恐非经文之旧亦不敢从言周公东征祇为四国倡乱故寢寐不安耳嘉郑玄云善也严云言德之甚善也】既破我斧又缺我録【尤韵】周公东征四国是遄【尤韵董氏云集本作摯丰本同】哀我人斯亦孔之休【尤韵 赋也毛云木属曰録韩诗云凿属也今按说文无録字惟木部有楸字楸有二义一曰栎实说者以为有毛散裹之如裘故从求一曰凿首盖以木为之加于凿之首即凿柄是也用之既久其木亦茸茸如毛之散裹者然故名为楸其说与毛韩合即此録也司马法輶载中亦有一凿或指为今之独头斧未确又按此诗三言破斧者盖以形武庚分言斨錡録者亦以形三叔耳遄说文云迫也吡深于皇皇犹画时情事吡则夜以继日矣遄又深于吡吡仅思虑不安遄则迫而心应矣或据别本改作摯云是收斂之义恐非经文之旧亦不敢从休毛云美也按休字从人依木所以安也前言将嘉皆就周公之德言周公既有此哀我人之德使天下咸受其生全之庇故曰休】

破斧三章章四句【子贡传阙文序谓周大夫美周公以恶四国申培说为周公至自征殷周

人美之今按篇中斧曰我斧斨曰我斨其为从军之士所作无疑】

泮水颂伯禽允文允武也伯禽就封于鲁初作泮宫遂服淮夷鲁人为之颂【许衡云此颂伯禽之诗盖伯禽时始有征淮夷之役愚按经言既作泮宫淮夷攸服此二事者皆在伯禽之世所以益断其为颂伯禽也何以徵之明堂位云米廩有虞氏之庠也序夏后氏之序也瞽宗股学也頖宫周学也凡四代之服器官鲁兼用之是故鲁王礼也成王以周公有大勲劳故使鲁得为此斯则伯禽作泮宫之证也史记云伯禽即位之後有管蔡等反也淮夷徐戎亦并兴反於是伯禽率师伐之於盼盼即费也书费誓序云鲁侯伯禽宅曲阜徐夷并兴东郊不开作费誓其辞曰嗟人无譱听命徂兹淮夷徐戎并兴言往巴中淮夷之难矣而今徐戎又蠢动也斯则伯禽征淮夷之证也夫王制之言诸侯也曰天子命之教然後为学伯禽受命于天子备四代之学躬蒞泮宫以修其教大本端矣内顺治则外威严淮夷徐戎相次帖伏固其宜也淮夷之征在泮献功事在作泮宫之後费誓之作惟征徐戎事在服淮夷之後诗书相辅而往蹟了然读史者当以是订之】

思乐【音络後同】泮【陆德明本作頖】水【纸韵後同】薄采其芹【文韵亦叶微韵渠希翻白虎通作苢】鲁侯戾止【纸韵後同】言观其旗【微韵亦叶文韵巨斤翻】其旗茷茷【月韵亦叶泰韵蒲盖翻又叶坠韵房废翻陆本羣经音辨俱作伐朱传及大全俱作筏】鸾声哕哕【月韵亦叶霁韵呼惠翻又叶泰韵呼外翻又叶队韵许穆翻】无小无大【叶霁韵徒帝翻】从公于迈【叶霁韵力制翻 兴也思乐泮水者思我国有泮水之可乐也泮水孔穎達云泮宫之外水也於文半水为泮据说文云诸侯乡射之宫也西南为水东北为墙徐锴云天子辟雍水周之诸侯泮宫水才其半此会意也郑玄则云泮之言半也半水者盖东西门以南通水北无也孔申郑义云辟雍者筑土为堤以壅水之外使圆如璧令四方来观者均故谓之辟雍也辟雍之宫内有馆舍外无墙院故得圆观之也天子宫形既如璧则诸侯宫制当异矣而泮为名则泮是其制必疑南有水者以行礼当南面而观者宜北面畜水本以节观宜其先节南方故知南有水而北无也北无水者下天子耳亦当为其限禁故云东西门以南通水明门北亦有沟堑但水不通耳今按许郑二说規制互异然白虎通有云泮宫者半于天子宫也半者象璜也独南面礼仪之方有水其余壅之以垣与郑说合三人占吾将从二人矣泮宫今或称作黉宫当是璜宫之误半水为泮字义甚明或通作頖亦字讹也乃郑注礼记又谓頖之言班也所以班政教也因声附会殆不足信至戴埴则直疑泮宫非学名而引通典言鲁郡乃古鲁国郡有泗水县泮水出焉建宫于上名为泮宫与楚之渚宫晋虎祁之宫无以异杨慎深然其说愚考一统志泮水一名雩水源出曲阜县县治西南西流至兗州府城东入泗水即诗所云泮水也雩乃此水本名以其为泮宫池又称为泮耳水因宫得名而谓宫以水得名乎戴杨可谓喜於立异而不顾泮字之所从来者矣酈道元水经注云灵光殿之东南即泮宫也在高门直北道西宫中有台高八十尺台南水东西一百步南北六十步台西水南北四百步东西六十步台池咸结石为之诗所谓思乐泮水也黄氏云鲁人非乐乎泮水也乐乎人才所赖以长育成就也薄者发语辞采说文云将取也後放此芹解见采菽篇陆佃云芹取有香土之於学也揽其芳臭而至则采芹之譬也愚按兴意在大小从公二句教不择人苟有其材皆可以取而成就之犹采菜者之不废夫芹也後章采藻采?各有取义而或泥古之入学者有释菜之礼以菜为贄故即水中采三品之水^廿以荐之今释奠先圣犹用芹云如此学诗亦固

斯甚矣鲁侯伯禽也是时新就封国故以爵称戾说文云曲也身曲戾也愚按此当为鞠躬之意状鲁侯谦虚之容也止者孔云至而止住也其旗孔云其车所建之旗也周礼交龙曰旗解见庭燎篇茝说文云^叶多也曰茝茝者取飞扬之貌鸾车中八鸾铃也解见蓼萧采芑篇呦说文云气悟也毛云徐行有节也车行则旗建马动则鸾鸣观其旗茝茝而有容听其鸾呦呦而有节以之视学若增而华矣严粲云称其仪物之美者喜其来至之辞如所谓闻车马之音见羽旄之美举欣欣然有喜色也无犹云不论也小小子也大成人者从说文云随行也公谓鲁侯伯禽迈说文云远行也孔云从公往行而至泮宫也愚按行至泮宫不足为远而云于迈者有踊跃奋迅不能自止之意李氏云如汉明帝开辟痈冠带缙绅之人圜桥门而观听者盖亿万计】思乐泮水薄采其藻【叶巧韵侧绞翻】鲁侯戾止其马蹻蹻【叶巧韵读如巧告绞翻】其马蹻蹻【见上】其音昭昭【萧韵亦叶巧韵读如爪则绞翻】载色载笑【叶萧韵思邀翻】匪怒伊教【列女传作匪】教【叶萧韵读如骄居祆翻兴也藻水^叶之有文者其字下施澡言自洁如澡也详见采芣篇兴意取受教之义人受教则能洒濯自新而有文采也蹻说文云举足行高也其马蹻蹻见鲁侯急于临泮水而施教也音谓涖学时讲艺论道之音其音昭昭者严云其声音昭昭然明亮也载之言则也色者颜之和笑者声之和论语所谓即之也温洪范所谓而康而色也匪通作非怒说文云恚也伊语辞後放此教说文云上所施下所效也载色载笑则未尝有所怒也唯教之而已契之敷教在宽夫子之循循善诱鲁侯以之又韩诗外传云孔子曰不戒责成害也慢令致期暴也不教而诛贼也君子为政避此三者又子贡曰赐闻之托法而治谓之暴不戒致期谓之虐不教而诛谓之贼以身胜人谓之责责者失身贼者失臣虐者失政暴者失民居上位行此四者而不亡者未之有也皆引诗曰载色载笑匪怒伊教又云当舜之时有苗不服其不服者衡山在南岐山在北左洞庭之陂右彭泽之水繇此险也以其不服禹请伐之而舜不许曰吾喻教犹未竭也久喻教而有苗民请服天下闻之皆薄禹之义而美舜之德诗曰载色载笑匪怒伊教舜之谓也此皆借诗立论无关本旨】思乐泮水薄【说文作言】采其^叶【有韵罗愿云杜子春读为卯说文作力久切以泮宫诗读之说文音为叶】鲁侯戾止在泮饮酒【有韵】既饮旨酒【见上】永锡难老【叶有韵朗口翻】顺彼长道【叶有韵他口翻】屈【尔雅作渥】此羣丑【有韵兴也李氏云一章言至泮水二章言教人三章言与贤者饮酒也毛传说文皆云鳧葵也干宝云今之^叶蹻^叶江东有之何承天云此菜出东海堪为菹酱也郑小同云江南人名之蓴菜生陂泽中或名水葵一曰今之浮菜即猪蓴也陆玕云与苡菜相似菜大如手赤圆有肥者着手中滑不能停茎大如匕柄叶可以生食又可齏滑美罗云蓴小於苡陆所说蓴则大於苡今蓴菜自三月至八月茎细如钗股黄赤色短长随水深浅名为丝蓴九月十月渐羸硬十一月萌在泥中羸短名瑰蓴味苦体澁取以为羹犹胜襍菜宜襍鮓鲤为羹又宜老人今吴人嗜蓴菜鲈鱼盖鱼之美者复因水菜以蓴之两物相宜独为珍味然既为蓴後郑及许叔重皆云鳧葵而蜀本图经称蓴叶似鳧葵本草有蓴又有鳧葵者盖本草以苡为鳧葵也齐民要术云蓴性易生种以深浅为候水深则茎肥而叶小水浅则叶多而茎瘦亦逐水而性滑故谓之淳菜周礼醢人有苡菹鹿齏以为朝事之豆陆佃云取有味知道之味又嗜而学焉则采之譬也愚按既有味而为羹又独宜于老人鲁侯在泮养老故兴意取此古者视学必养老文王世子云天子视学衆至然後天子至乃命有司行事兴秩节祭先圣先师焉有司卒事反命始之养也适东序释奠于先老遂设三老五更羣老之席位焉适馔省体养老之珍具遂发咏焉退修之以孝养也反登歌清庙既歌而语以成之也言父子君臣长幼之道合德音之致礼之大者也乐阒王乃命公侯

伯子男及羣吏曰反养老幼於东序终之以仁也乐记云食三老五更於太学天子袒而割牲执酱而馈执爵而醕冕而总干所以教诸侯之弟也王制云五十养于乡六十养於国七十养於学達於诸侯愚按天子视学之礼如是而其礼達於诸侯又有养老东序之命此鲁侯之所以在泮饮酒者亦为养老而饮也黄子道周云养老之礼废则子弟易其父兄庶姓慢其长上骄奢荐出而叛乱滋起章服不足以劝刑戮不足以威而天下乃乱矣有王者作必重养老之令养老必自七十而上不服官政春秋吉日毕在庠序王者而下亲为馈醕乡里贵人不先耆老行之信久而後劝威可効也郑云在泮饮酒者徵先生君子与之行饮酒之礼而因以谋事也孔云王制云天子将出征受成于学注谓定兵谋也天子之礼如是则知诸侯亦然下章言淮夷攸服明当於是谋之也既者已事之辞旨说文云美也永长也锡通作赐予也曰难老者孔云言其身力康强难使之老郑云已饮美酒而长赐其难使老难使老者最壽考也愚按此鲁侯养老而致其祝愿之意也孔云顺者随从之义长道谓道之可久者即泮宫中所修明之礼教是也屈韩诗毛传皆云收也按屈者无毛之义故为收歛之貌羣说文云羣也徐锴云羊性好羣故从羊丑说文云可恶也羣丑谓成羣之小丑指淮夷也顺从彼先生君子所训之长道则可以收伏羣丑不使其有窃发之患也孔云将伐淮夷於泮宫谋之未是兵已行也下云淮夷攸服乃是伐而服之】穆穆鲁侯敬明其德【職韵】敬慎威仪维民之则【职韵】允文允武【虞韵】昭假【音格】烈祖【虞韵】靡有不孝自求伊祜【虞韵 赋也穆通作？说文云细文也此主威仪言盖文章之见于外者上章言戾止泮宫色笑饮酒皆所谓穆穆也明者光辉发越之谓敬以明其德于外德不可见第见其所为敬者惟致其恪慎于威仪之间此皆其德体之所流露有威则人望而畏之有仪则人仿而象之故能为维民之所法则也泮宫之设礼让相先明君臣父子长幼之道此威仪之大者也允信也文文德武功允文结上在泮之事允武起下征夷之事昭明也假通作假说文云至也烈祖有功烈之祖谓文王也祜福也伯禽既信有文德矣又信有武功其精神所仰对明明至于烈祖文王之前而於文武二事无有一之不能继述者孝孰加焉伯禽之孝如此故福祿自来归之以内则顺治以外则格心是之谓自求伊祜也韩诗外传云魏文侯问狐卷子曰父贤足恃乎对曰不足子贤足恃乎对曰不足兄贤足恃乎对曰不足弟贤足恃乎对曰不足臣贤足恃乎对曰不足文侯勃然作色而怒曰寡人问此五者於子一一以为不足者何也对曰父贤不过尧而丹朱放子贤不过舜而瞽瞍顽兄贤不过舜而象傲弟贤不过周公而管叔诛臣贤不过汤武而桀纣伐望人者不至恃人者不久君欲治从身始人何可恃乎诗曰自求伊祜】明明鲁侯克明其德【职韵】既作泮宫淮夷攸服【叶职韵鼻墨翻】矫矫【陆德明本作嶢嶢又云亦作蹻蹻】虎臣在泮【礼记注作頼】猷猷【叶职韵古或翻】淑问如臯陶【叶尤韵夷周翻】在泮猷囚【尤韵 赋也季本云明明即穆穆之着见也克能也明其德解见上章有威可畏有仪可象则信能着见其德于外而使人共见之矣所谓抑抑威仪维德之隅也凡诗书言明德者皆就发见上说旧解多谓自明其德於内未得其意创起曰作王制云天子曰辟雍诸侯曰頼宫周官注载古逸诗云有昭辟雍有贤泮宫田里周行济济锵锵相从执质有族以文辟雍泮宫皆所谓太学也特因天子诸侯而其名异耳王制又云诸侯天子命之教然後为学小学在公宫南之左太学在郊礼器云鲁人将有事于上帝必先有事於頼宫按頼宫鲁之太学也鲁太学在郊故将有事上帝则於此有事焉孔云泮宫泮水正是一物诗言采芹藻之菜则云泮水说行礼谋猷之事则云泮宫鲁有四代之学此诗主颂泮宫者先代之学尊鲁侯得立之示存古法而已其行礼之饮酒养老兵事之受成告克当於周世之学在泮宫也淮夷居淮水之上在禹

贡徐州之界最近於鲁每为鲁患世本云嬴姓攸者语辞受事于我曰服攸服者非谓淮夷遂已来服谓此时泮宫已作则受成有地献功有地因而往称兵于彼以服之耳矫通作挢说文云举手也下文言献馘知所献之馘不一皆当举手以献之故曰挢挢臣之有勇力如虎者曰虎臣万尚烈谓虎臣与臯陶对看言臣之如召穆公虎者以昔召虎平淮故云然其说亦新巧然常武篇有进厥虎臣之语又何以称焉孔云泮宫之名既定亦可单名为泮此经四言在泮及泮林皆谓泮宫也献进也凡进物下之於上皆曰献馘解见皇矣篇淑通作倬说文云善也问说文云讯也臯陶虞臣书舜典篇云帝曰臯陶蛮夷猾夏寇贼奸宄汝作士五刑有服五服三就五流有宅五宅三居惟明克允此臯陶之淑问也囚朱子云所虏获者孔云王制云出征执有罪反释奠于学以讯馘告注谓释菜奠币礼先师以告克故既伐淮夷而反在泮宫也所馘者是不服之人须武臣之力当杀其人而取其耳故使武臣如虎者献之所囚者服罪之人察狱之吏当受其辞而断其罪故使善听狱如臯陶者献之司马光云受成献馘莫不在学所以然者欲其先礼仪而後勇力也君子有勇而无义为乱小人有勇而无义为盗若专训之以勇力而不使之知礼义奚所不为矣陈祥道云诸侯视学之礼盖有同于天子诗曰鲁侯戾止在泮饮酒既饮旨酒永锡难老此养老也在泮献馘此以讯馘告也】济济多士克广德心【侵韵】桓桓于征狄【丰氏本作逖】彼东南【叶侵韵乃林翻】烝烝皇皇【阳韵】不吴【陆云一作?】不扬【阳韵】不告于讟【叶东韵读如烘呼公翻】在泮献功【东韵 赋也上章言献馘献囚则已征淮夷而告克矣此章则美将士之献功有礼也济通作齐重言济济者整齐如一之意多士以行间之将帅言上章献馘之虎臣亦在其内下章徒御方指士卒殿之大屋曰广故为濶大之义德藏于心故曰德心此止照不吴不扬二句而言孔云谓心德寛弘并无褊躁李氏云夫人心可谓广矣以其无所不至无所不有也为血气所使一有毫厘之利则忿而争其心于是乎隘惟其寛厚未尝褊躁此其心所以广也桓桓三句追言其深入建功之事桓桓尔雅云武也解见桓篇于往也孟子云征之为言正也狄通作逖说文云远也东南郑云斥淮夷孔云淮夷之国在鲁之东南狄彼东南者言所征之国远在彼东南也烝说文云火气上行也皇通作煌煌然有光革也烝烝皇皇以成功言言其功烈炽盛又明着也吴说文云大言也解见丝衣篇扬说文云飞举也严云争其功者战士之常也侥幸一胜万死一生之间惟图厚赏而已则其争功无所不至告通作诰相晓语之谓讟陆元朗云讼也严云衆语也解见节南山篇按说文无讟字或偶遗耳言多士克敌而後虽各有大功可称而皆能恬以居之不喧哗不矜躁从不闻有以彼此相争竞之语为鲁侯告者第见其济济然皆于泮宫而自献其功焉非其从公于迈受教有素于以涵养气质薰陶德性安能有此学之不可以已也如是夫蔡汝楠云古人劳农讯狱献馘饮至皆於学宫示学政之出於一也】角弓其觶【尤韵】束矢其搜【尤韵说文丰本俱作□】戎车孔博【药韵】徒御无斃【陌韵亦叶药韵弋灼翻陆本作绎又作射又作悻】既克淮夷孔淑不逆【陌韵亦叶药韵逆约翻】式固尔犹淮夷卒获【陌韵亦叶药韵黄郭翻赋也角弓四句言班师之事弓饰以角曰角弓解见小雅角弓篇觶本作斛说文云角貌毛传以为弛貌与】

【丝衣篇兕觥其觶同意盖师凯旋在道弓弛而反徒见其觶然上曲而已束矢毛茕谓五十矢为束郑玄谓百矢为束均无正文毛主五十矢者盖本其师荀卿云魏氏武卒衣三属之甲操十二石之弩负矢五十个是一弩用五十矢然此特配弩之矢耳郑主百个者则以尚书及左传所言赐诸侯以弓矢者皆云彤弓一彤矢百是束矢当百个然左传下文又曰卢弓矢千

则百个一束之说亦未为定也搜说文同毛传以为衆意也又以为求也盖遍求而聚之一处所谓无亡矢遗鏃之费也戎车兵车也孔甚也博说文云大通也谓道涂之上驰驱自如无所阻也徒徒行者御御车者斲说文云解也厌倦之意战胜而归士气百倍故其徒御在途皆勤於所事无厌倦也克胜也淑通作倬善也逆通作莠说文云不顺也王肃云言弓弛而不张矢衆而不用兵车甚博大徒行御车无厌其事者已克淮夷淮夷甚化於善不逆道也孔云不复为逆乱也式固尔犹推原昔日之辞与下文卒字对看式发语声固者固守之义犹谋获得也固守尔之所谋即第三章所谓顺彼长道者季氏谓敷教泮宫使人知义是也卒通作□终也获得也惟伯禽能固其谋故能终致淮夷为我所得也至是而所谓屈羣丑者非虚语矣陈暘云隆礼乐之教于西雝而自西自东自南自北无思不服者近者悦之远者怀之大学之道也隆礼乐之教于泮水不过屈此羣丑淮夷攸服而已以道有远近德有大小故也】翩彼飞鹄集于泮林【侵韵】食我桑黹【说文字林皆作甚丰本作榘】怀我好音【侵韵】憬【说文作𢇛韩诗作犷】彼淮夷来献其琛【侵韵】元龟象齿大赂南金【侵韵 兴而比也此章言淮夷归化也上章曰既克淮夷犹以兵服之至此则闻风兴起已囿于大化之中矣翩说文云疾飞也鹄解见墓门鵙鵙篇集本作𪖇说文云羣鸟在木上也泮林泮宫外水畔之林也桑解见氓篇黹说文云桑甚之黑也旧说皆混黹作甚非是甚有白黑二种以黑者为美又王盘桑书云桑种甚多世所名者荆与鲁也荆桑多甚鲁桑少甚然则泮林之有桑黹亦可贵之物矣怀郑云归也按怀有依就怀抱之义故训怀为归鹄本恶声之鸟今改其鸣而归我以美善之声也世说张天锡为孝武所器颇有嫉己者於坐问张北方何物可贵张曰桑甚甘香鵙鵙革响淳酪养性人无嫉心尹焞云周原膾膾堇荼如飴美土可以变恶味食我桑黹怀我好音美味可以变恶声季云鹄集泮林食桑黹而怀好音可见讲学之功格乎禽鸟矣矧淮夷虽逆亦人类也其不悔悟而贡献其所有耶憬说文云觉悟也舍人云美宝曰琛淮夷心慕泮宫之化而自悟其昔日作梗之非於是来献其国所有之琛宝以自明其悔罪输诚之意上章所言孔淑不逆於此见之矣元龟孔云龟之大者汉书云龟不盈尺不得为宝按书大禹谟篇昆命于元龟禹贡篇九江纳锡大龟即此龟也毛云元龟尺二寸象南方兽之大者禹贡荆扬二州皆有之陆佃云其牙生花必因雷声故古者以为器饰左传曰象有齿以焚其身贿也罗愿云其齿虽脱犹爱惜之或削木为伪齿潜往易之觉则不藏故处赂说文云遗也徐锴云以财与人也曰大赂者郑云犹广赂也按左襄二十五年晋帅诸侯伐齐齐人赂晋侯自六正五吏三十帅及处守者皆有赂此所谓大赂也南金南方之金禹贡荆扬之州厥贡惟金三品王肃以为金银铜郑以为铜三色盖青白赤也郑所以异于王者以禹贡梁州有厥贡鏐银之文据尔雅鏐乃黄金之美者而白金谓之银夫黄金银既以鏐银为名则知金三品者其中不得有金银此说较王为允孔云左僖十八年郑伯始朝于楚楚子暘之金既而悔之与之盟曰无以铸兵故以铸三锺考工记六分其金而锡居一谓之锺鼎之齐是谓铜为金也禹贡于徐州纪淮夷土产惟蠙珠暨鱼至如象齿与金乃荆扬所有而元龟则独荆有之兹附言於献琛之後者据閼宫篇咏鲁侯之功曰淮夷来同及彼南夷莫不率从然则此数物皆南夷所贡乃继献琛而来者明泮宫之化所及之远也旧说谓淮夷旁求以为献赂盖以非其土产为贵金仁山则谓周无徐州故淮夷为荆州之界苏辙则谓荆扬之货其至於齐鲁也自淮而上皆附会不可从项安世云古之为泮宫者其条理不见於经而有诗在焉予尝反覆而推之其首三章则言其羣臣之相与乐此而已自四章以下始尽得其学法自敬其德而至於明其德明其德而至於广其心广其心而至於固其道终焉此则学之本也自威仪孝弟之自修而達於师旅狱讼

之讲习自师旅狱讼之讲习而极於车马器械之精能此则学之事也自烈祖之鉴其诚而至於多士之化其德自多士之化其德而至於远夷之服其道此则学之功也】泮水八章章八句【序以为僖公能修泮宫也今按经明言作泮宫而序独以为修何欤即如序云修泮宫矣戴氏谓春秋二百四十二年所书莫大於复古僖公登台望气小事也左氏犹详书学较久废而乍复盖阙吾道之盛衰何经传略不一书也杨慎云近世曲为说者曰春秋经也鲁颂亦经也鲁颂既载春秋可略此说又滞矣高克一事诗咏清人春秋书郑弃共师他如泸漕城楚丘木瓜硕人无衣诗与春秋互见不厌其复安有诗载而春秋可略乎或又曰事亦有特载而不见于经传者季氏伐颛臾之类也曰颛臾之事将然而未举也故论语载之而经传略焉泮宫已成之迹春秋岂容不书哉乃苏辙则谓泮宫鲁之学也自鲁先君而有之矣僖公因其旧而修之是以不见於春秋种种诸说无非为序回护然经之所言不特戾止泮宫而已又有服淮夷一事夫僖公则何尝服淮夷也考僖公十三年尝从齐桓会于咸为淮夷之病?继而十六年又从齐桓会于淮为淮夷之病鄙然且因此而见止于齐矣黄震所谓其可羞之甚者也鲁人不以其从齐为讳而妄以本无有之事为夸何与朱子初以为燕饮落成之诗则直以僖公为作泮宫者乃求服淮夷之说而不得则以为饮于泮宫而颂祷之词诸如献馘献囚献功献琛皆羣臣祝愿之语不必其有是事也幻想所成铺张满楮无乃说梦申培说袭之直谓僖公作泮宫而落其成太史克颂祷之词且云前三章皆赋其事以起兴也盖全抄朱传之语而彼乃伪称汉代之书则反似朱子窃抄于彼者有是理否亦伪书之至庸妄者矣子贡传有僖公献捷于太庙史克赋泮水之语而史克下阙二字盖泥篇中有昭假烈祖一语然而泮宫可谓太庙乎邹忠胤祖戴仲培杨用修之说疑泮宫乃泮水上之宫非学宫也然鲁之太庙在泮水上有所载乎又引蔡邕月令论谓明堂者天子太庙朝诸侯选造士於其中生者乘其能而至死者论其功而祭故为大教之宫而四学具焉取其堂则曰明堂取其正室之貌则曰太庙取其宗祀之清则曰清庙取其尊崇则曰太室取其四门之学则曰太学取其四面周水圆如璧则曰辟雍故曰异名而同事盖欲以此附会诸侯泮宫亦即太庙然蔡之说实为不根先儒駁之详具载清庙小引下是岂足为定证乎】

常棣周公作也管蔡失道周公於合宗族之时作此诗以闵之【序云燕兄弟也闵管蔡之失道故作常棣焉按左传周襄王以狄伐郑富辰諫曰不可昔周公吊二叔之不咸故封建亲戚以藩屏周召穆公思周德之不类故纠合宗族于成周而作诗曰常棣之华鄂不韡韡凡今之人莫如兄弟其四章曰兄弟?于墙外御其侮如是则兄弟虽有小忿不废懿亲周之有懿德也犹曰莫如兄弟故封建之其怀柔天下也犹惧有外侮扞御侮者莫如亲亲故以亲屏周召穆公亦云今周德既衰於是乎又渝周召以从诸奸无乃不可乎国语记此事其文微异并载于此王将以狄伐郑富辰諫曰不可人有言曰兄弟谗?侮人百里周文公之诗曰兄弟?于墙外御其侮若是则?乃内侮而虽侮不败亲也参详左国所引既云周之有懿德也曰莫如兄弟犹惧有外侮又以?墙御侮为周文公之诗则此诗为周公所作明甚毛传泥于左传有召穆公纠合宗族于成周而作诗之说遂谓周公吊二叔之不咸而使兄弟之恩疏召公为作此诗而歌之以亲之及史记淮南周皆以召公为周公之庶兄韦昭云穆公召康公之後穆公虎也去周公历九王矣周公作唐棣之篇以闵管蔡而亲兄弟其後周室既衰厉王无道骨肉恩阙亲亲礼废宴兄弟之乐絶故召穆公思周德之不类而合其宗族于成周复修作常棣之歌以亲之郑唐二君以为穆公所作失之矣唯贾君得之】

常【左传路史子贡传俱作棠】棣【成庙诔艺文类聚常棣作夫移】之华【丰氏本作】鄂【说文艺文谢灵运集路史俱作萼丰本作蘼】不【丰本作柎】韡韡【叶纸韵读如鮐羽轨翻说文丰本俱作□□艺文路史俱作炜炜】凡今之人莫如兄弟【叶纸韵荡以翻兴也常棣与唐棣异木尔雅云唐棣移常棣棣按此则惟常棣得以棣名戴侗谓常棣唐棣棠棣特一物以棠唐常声相迓故通用非也郭璞云今关西有棣树子如樱桃可食陆玕引许慎云白棣树也如李而小子如樱桃正白今官园种之又有赤棣树亦如白棣叶如刺榆叶而微圆子正赤如郁李而小五月始熟自关西天水陇西多有之戴侗云棣实小木丛生高不过五六尺其种不一其华或红或白或单或重出红而重出者园圃多植之亦名锦带白而单出者结实如小李与李同时熟程子云今玉李也华鄂相承甚力陆化熙云江南呼为麦李一跗辄生二萼两两相丽如垂丝海棠一般陆佃云移从移棣从隶唐棣之华反而後合常棣华鄂上承下覆甚相亲尔从隶言华萼相承辉荣相隶也隶仁也移义也兄弟尚亲亲仁也故常棣以燕兄弟宋祁云世人多误以常棣为唐棣於兄弟用之唐棣移也移开而反合者也此两物不相亲鄂当作萼曹宪云花苞也唐明皇以华萼交辉名楼正取此诗义今按说文引此诗亦作萼字盖偶漏耳不郑玄云当作柎鄂足也孔颖达云华下有鄂鄂下有柎韵会小补云萼花蕊也不花蒂也草木下房柎一作不篆文不字即象柎形今注以不为不然之不误矣又古声不与柎同不有方于芳浮二音读如缶者芳浮之转声也读如柎者方于之转声以俯切不则平声当是夫音故云不柎同音今俗皆通骨切宜无古音也程良孺云湖州有余英溪余不溪盖此地有梅溪苕溪其流相通故曰余英余不义自可见左传华不注山人皆读入声误也惟伏琛齐记引虞挚畿服经作柎言此山孤秀如花跗之注于水深得之矣太白诗昔我游齐都登华不注峰兹山何峻秀彩翠如芙蓉亦可证也柎字又作跋作跗杨慎云束皙诗曰白华朱萼被于幽薄白华条趺在陵之陬唐人亦有红萼青趺之句皆可证诗意来斯行云郤至衣赭韦之跗注襍问志作赭韦之不注可见柎跗不三字皆作通用韡说文云盛也重言韡韡者以其一跗辄生二萼两两相丽故称韡韡兴取兄弟同生之意郑孔旧说谓华以覆萼萼以承华喻弟以敬事兄兄以荣覆弟华鄂相覆而光明犹兄弟相顺而荣显似附会难通一鄂止是一华安得为兄弟之况一跗丽有两萼乃可为兄弟之况耳诗意若曰常棣有华其萼之着于柎者两两交相映发且见其韡韡然而盛人之兄弟连枝同气何独不然凡今之人莫如兄弟者唤醒世人之言与篇末俛尔笱豆三章相应盖公感于往昔管蔡之事骨肉相残有余恫焉故指兄弟之情谊以告人欲今世之为兄弟者皆相亲也范氏以今人为泛言举世之人莫有如兄弟至亲者而严氏则以为总括下文朋友妻子而言皆非是左昭元年赵孟入于郑郑伯享之子皮赋野有死麇之卒章赵孟赋常棣且曰吾兄弟比以安厯也可使无吠】死丧之威【叶灰韵鸟恢翻丰本作畏】兄弟孔怀【叶灰韵胡隈翻】原隰裒【尤韵】矣兄弟求【尤韵】矣【赋也威畏怀思也郑云死丧可畏怖之事维兄弟之亲甚相思念万时华云死丧下一威字何等惨恶兄弟下一怀字何等纏绵他人见威则避兄弟见威愈怀高平曰原下湿曰隰说文无裒字疑即裒字衣袂也求矣毛云言求兄弟也苏辙云人失其常居而播越于原隰之间在他人皆裒手而去而兄弟则未有不相求者此就常情而言上章所谓莫如兄弟者于此两者验之最为亲切庄子所云以利合者迫穷祸患害相弃也以天属者迫穷祸患害相收也朱子以原隰裒矣为尸裒聚于原野之间然观本文威与裒下各以兄弟承接明是两事非蒙上文也】脊【尔雅作即左传丰本俱作?韩诗作鵠释文作即】令【尔雅左传韩诗释文丰本俱作鵠】在原兄弟急难【叶翰韵乃旦翻】每有良朋况【丰本作况】也【丰本作

兮】永叹【翰韵比也此下二章皆承上章而言兄弟情谊深重如此而深追恨于二叔之不然尔雅云脊令雝渠义训云钱母也郭璞云雀属陆玕云大如鸚雀长脚长尾尖喙背上青灰色腹下白颈下黑如连钱故杜阳人谓之连钱物类志云俗呼为雪姑其色苍白似雪鸣则天当大雪禽经云脊令友悌张华注云脊令共母者飞鸣不相离故取以喻兄弟按唐明皇时有脊令数十集麟德殿廷木翔栖浹日魏光乘作颂以为天子友悌之祥毛谓?鵒飞则鸣行则摇不能自舍以喻兄弟相救于急难殊属附会郑谓脊令水鸟而今在原失其原处故为兄弟遭急难而失其常处之比然脊令实非水中之鸟严氏驳之矣兄弟急难者言兄弟当相急于患难谓相救也春秋传急病让夷战国策以公子高义能急人之困字法同此武庚不靖王室几摇其为难何如每有犹言多有也良朋好友也况通作悦说文云狂之貌永叹者长太息也人遇患难之时每有善良之朋尚有相怜而惊况长叹者况在同父能忽然而无悼痛耶左昭七年卫襄公卒晋大夫言于范献子曰卫事晋为睦晋不礼焉庇其贼人而取其地故诸侯贰诗曰?鵒在原兄弟急难又曰死丧之威兄弟孔怀兄弟之不睦于是乎不吊况远人谁敢归之】兄弟阋于墙【释文作廛】外御【正义丰本俱作御】其务【叶麋韵罔甫翻左传国语丰本俱作侮亦叶东韵汉蓬翻杨慎云古尚书雨霖蒙之蒙作雾以下从务也】每有良朋【叶东韵蒲蒙翻】烝也无戎【东韵亦叶麋韵读如乳櫟主翻丰本作?赋也阅毛传云狠也孔云狠者忿争之名说文云恒讼也其字以斗以儿斗音鬪盖取儿曹争辨之义此暗指流言之变而言墙与外对看御通作圉拒守之义务通作侮谓外人之侮我兄弟者也此暗指武庚叛周而言兄弟虽有小忿不废懿亲即其偶不相得鬪狠于内倘遇外侮之来则亦竭力以拒守矣故周语曰兄弟谗阅侮人百里言禁外人侵侮己者百里喻远也此与上章兄弟急难皆责望之辞旧以实在语解未得此旨一说务如字事也言当以外御为其事亦通烝衆也解见东山篇戎兵也每有以良朋之衆相助而免于兵戈之害者矣何兄弟之不然乎按书曰今蠢今翼日民献有十夫予翼以于救宁武图功即永叹无戎之事固知公非无所据而云然也】丧乱既平既安且宁【青韵】虽有兄弟不如友生【叶青韵桑经翻赋也丧死亡也锋鏑不静则有死亡之忧故以丧言乱即武庚之乱既平者止事之词安谓国祚安也宁通作寔其字从心在皿上说文云皿人之饮食器所以安人也周室之国祚既安则公之心亦可以释然而自宁矣乃回想兄弟之间辟者辟囚者囚生死升沉迴不相及曾不如一时友生戮力王室者今日得以偕享富贵也饮恨满怀声泪俱咽郝敬云二叔得罪王室与天下虽有可杀之罪而公终无杀兄之心天下以讨罪人为大义而公终以不能全兄为不仁故于康诰曰弟弗克恭厥兄兄亦不念鞠子哀大不友于弟此诗亦云虽有兄弟不如友生其自怨之情惨然长歌代泣使工瞽讽诵愬诸同父千载之下犹堪挥泪愚按旧说以脊令而下三章皆模写世情之语谓遇患难则朋友不如兄弟值安乐则兄弟不如朋友其于朋友兄弟之间风斯下矣总之于此诗旨趣全未梦见】宾尔筵豆饮酒之饫【叶遇韵威遇翻说文作𩚑】兄弟既具【遇韵】和乐【音络後同】且孺【遇韵释文作𩚑赋也此下三章正提醒凡今之人莫如兄弟之意盖既历变故之後益信兄弟当亲耳宾说文云导也毛云陈也饫说文云燕食也又朱子苏氏皆云厌也是诗为燕兄弟而作故即以饮酒发论具朱子云俱也兼无故与俱来二意和在心乐主发散在外孺说文云乳子也尔雅云属也李巡云骨肉相亲属也程子云孺者亲慕之义小儿亲慕父母谓之孺子谢枋得云会集兄弟不维和乐其情亲义厚无异于孺子相慕也孺子无不爱其亲无不敬其兄者人欲未萌天理昭着也愚按中庸引此诗下章而赞之曰父母其顺矣乎盖得于且孺之感者深矣苏辙云患世之疏远其兄弟故教之陈其筵豆饮酒之

饫使兄弟具来以觀其乐否苟乐也则其疏之者过矣】妻子好【去声】合如鼓瑟琴【侵韵】兄弟既翕和乐且湛【先君讳叶侵韵持林翻中庸韩诗俱作眈尔雅作妯 赋也此又因兄弟之和乐而更进之旧说皆以妻子为己之妻子非也妻谓兄弟之妻即娣姒是也子谓兄弟之子即从父昆弟是也好式相好矣之好合之言和盖音近也好合者谓以美意相和合也孔云志意和合如鼓瑟琴相应和董鼎云鼓宫宫动鼓角角应琴瑟尚宫其合也无间矣史承祖云世本伏羲作瑟黄帝作琴琴之作後于瑟又尔雅注疏瑟者登歌所用之乐器故先释之琴为乐器通见诗书故後释之详此则先後之序见矣陈阳云是诗先瑟後琴者以弦多寡序之与鹿鸣鼓钟同意关雎先琴後瑟者以音大细序之与女曰鸡鸣同意愚按诗人惟取叶韵耳若以制之先後纽之多寡为序则瑟乃比妻琴乃比子亦可通也诗意言非特兄弟当相相爱而已虽我之妻与兄弟之妻我之子与兄弟之子亦当使之和好而无间也所以必及之妻子者顏之推家训云兄弟者分形连气之人也方其幼也父母左提右挈前襟後裾食则同案衣则传服学则连业游则共方虽有悖乱之人不能不相爱也及其壮也各妻其妻各子其子虽有笃厚之人不能不少衰也娣姒之比兄弟则疎薄矣今使疎薄之人而节量亲厚之恩犹方底而圆盖必不合矣惟友悌深至不为傍人之所移者免夫又云兄弟相顾当如形之与影声之与响爱先人之遗体惜己身之分气非兄弟何念哉兄弟之际异于他人望深则易怨地亲则易弭譬犹居室一穴则塞之一隙则涂之则无頽毁之虑如雀鼠之不恤如风雨之不防壁?楹沦无可救矣仆妾之为雀鼠妻子之为风雨甚哉又云娣姒者多争之地也使骨肉居之亦不若各归四海感霜露而相思伫日月之相望也况其行路之人处多争之地能无间者鲜矣所以然者以其当公务而执私情处重责而怀薄义也若能恕己而行换子而抚则此患不生矣又云兄弟不睦则子侄不爱子侄不爱则羣从疎薄羣从疎薄则僮仆为讐敌矣如此而行路皆踏其面而蹈其心谁救之哉人或交天下之士皆有欢爱而失敬于兄者何其能多而不能少也人或将数万之师得其死力而失恩于弟者何其能疎而不能亲也翕说文云起也兄弟既翕者兄弟同心如鸟之合两羽而齐奋起也眈通作嫫说文云乐也字右施甚故韩诗云乐之甚也此妻子相合如鼓瑟琴之效读者其尚三复于斯言韩诗外传云孔子燕居子贡摄齐而前曰弟子事夫子有年矣才竭而力罢振于学问不能复进请一休焉孔子曰赐也欲焉休乎曰赐欲休于事兄弟孔子曰诗云妻子好合如鼓瑟琴兄弟既翕和乐且耽为之若此其不易也如之何其休也可以得此诗之意矣】宜尔家室【此注疏本如此当是古文严粲本亦然後儒多依中庸作室家】乐尔【贾公彦周礼注作女】妻帑【虞韵贾公彦周礼注作奴董氏云奴即子盖唐人犹作奴字丰氏作?】是究是图【虞韵】亶其然乎【虞韵 赋也上章言妻子繫指兄弟之妻子此言尔家室尔妻帑则谓在我之家室妻帑也家室即夫妇也帑通作孥子也陆德明云帑本帑藏今经典通为妻帑字中庸注云古者谓子孙曰帑书曰予则帑戮汝汉景帝诏云罪人不帑又鸟尾曰帑左传裨竈曰岁弃其次而旅于明年之次以害鸟帑注南方朱鸟之宿帑者细弱之名于人则妻子为帑妻子为人之後鸟尾亦鸟之後故俱以帑为言妻则上文所云家室兼言妻帑者繇妻而推之子也孔穎達云宗族同心人无侵侮然後宜汝之室家保乐汝之妻子矣若族人不和忿?自起外见侵侮内不相救则不能保其大小家室危焉谢枋得云兄弟不和则家庭之间无非乖气虽有妻子之乐亦不安其乐矣惟兄弟和乐则一家之情无不相宜妻子之乐乃为可久中庸云君子之道辟如行远必自迺辟如登高必自卑诗曰妻子好合如鼓瑟琴兄弟既翕和乐且耽宜尔室家乐尔妻帑子曰父母其顺矣乎按一家之内以兄弟则翕以妻帑则乐以父母则顺虽天地位万物育景象不是过

也此非所谓卑迹而高远者耶王安石云人情皆知保其室家私其妻子而罕知厚其兄弟然兄弟不和以至毁其室家危其妻子者有之矣管蔡是也是指章首二句究说文云穷也图说文云画计难也究有推极到底意图有揆度拟议意亶实也案说文云多谷也谷多则实故当训实然是也当作𡗗从犬从肉古人以犬肉为美味故以心之所美者为𡗗下加火字乃训为烧孟子若火之始然是也乎说文云语之余也亶其然乎问辞也辅广云不自以为然而使之仄求诸心以见其真情实理之所在周公亦可谓善教人者也苏辙云小人思虑不能及远常以兄弟之于我无所损益不知兄弟之相亲亦所以宜其室家乐其妻帑者患其浅陋而不信故使之深思而远图之以信其然否吕祖谦云告人以兄弟之当亲未有不以为然者也苟非是究是图实从事于此则亦未有诚知其然者也不诚知其然则所知者特其名而已矣左襄二十年季武子如宋褚师段逆之以受享赋常棣之七章以卒卒尽也谓赋上章及此章也取相亲如兄弟之意】

常棣八章章四句【子贡传篇名作棠棣韩诗作夫移 朱传子贡传申培说皆以为燕兄弟之歌今按此诗乃周公所作其後因以为燕兄弟之诗耳郑玄答周商云凡赋诗者或造篇或诵古】

大明言周家世有贤圣之君德合乎天天予以贤圣之配生圣子而成伐功也【出大学衍义孙鏞云此诗似专为颂两母而作故叙其来历特详真德秀云始则太任繇摯国而来配王季相与修德於是乎生文王继则太姒繇莘国而来配文王相与修德於是乎生武王有文王以兴周室有莘女以继太任天实命之非人能为也厚周室而生武王顺天命而伐大商天实祐之亦非人能为也原周之成伐功者以其有圣子原周之生圣子者以其有圣后而圣后之生又以王季文王修德格天之故则周家之兴岂偶然哉王通云愚读大明之诗而知人之求配不可不慎择也盖虽大圣贤而配非其所生之子必不能全类其父若不幸而遇妖妬悍陋之女则其家之败也忽诸后夔以玄女而絶其祀叔向以夏姬之女而灭其族是可鉴也诗称文武之兴必各本其母而言有旨哉篇名大明者郑氏以为二圣相承其明德日以广大故曰大明先儒或谓在小雅曰小明在大雅曰大明二义皆通後说尤妥子贡传以为训成王之诗申培说亦以为周公述文武受命之功以训嗣王与朱传同按太史公云夫天下称颂周公言其能论歌文武之德達太王王季之思虑则谓此诗作于周公亦或可信】

明明在下赫赫在上【叶阳韵辰羊翻】天难忱【说文春秋繁露汉书并作谌韩诗外传作訖】斯【说文作思】不易【音异】维【汉书作惟】王【阳韵】天位【外传作谓】殷适【音嫡】使不挾【外传作侠】四方【阳韵 赋也严粲云首章先泛言天人之理然後及殷亡之繇为美文武张本重言明者至着也曰赫赫显而可畏之意明明在下君之善恶不可掩也赫赫在上天之予夺为甚严也愚按如此说则下文承接甚省转语一说万尚烈云明明在下即小雅明明上天照临下土之云自其监察于下而莫能逃者言之则谓之明明在下自其威严在上而甚可畏者言之则谓之赫赫在上其实一也总是天之难忱也亦通又荀子云上宣明则下治辨矣上端诚则下原慤矣上周密则下疑玄矣上幽显则下渐诈矣故主道利明不利幽利宣不利周诗曰明明在下故先王明之岂特玄之耳哉又云周而成泄而败明君无之有也宣而成隐而败闇君无之有也故君人者周则谗言至矣而直言反矣小人迹而君

子远矣诗曰墨以为明狐狸其苍此言上幽而下险也君人者宣则直言至矣而谗言仄矣君子迹而小人远矣诗曰明明在下赫赫在上此言上明而下化也按此乃断章取义恐非正解忱通作谏尔雅云信也说文云诚谛也按谛者审也审其为诚实而信之也斯语辞天难忱斯以命之去留言言不可信其终眷我而不弃我也有德则眷之矣无德则弃之矣有赫在上欲信而恃之焉得乎易通作?说文云轻也不易惟王即在难忱上见出惟天命不可恃故居此王者之位甚不轻?如书言惟天无亲天位艰哉之意为下文叹紂发端非泛以为君难之理言也贡禹云天生圣人盖为万民非独使自娱乐而已也故诗曰天难谏斯不易惟王韩诗外传云言为王之不易也大命之至其太宗太史太祝斯素服执策北面而吊乎天子曰大命既至矣如之何忧之长也授天子策一矣曰敬享以祭永主天命畏之无疆厥躬无敢宁授天子策二矣曰敬之夙夜伊祝厥躬无怠万民望之授天子策三矣曰天子南面授於帝位以治为忧未以位为乐也诗曰天难忱斯不易惟王天位之天亦指上天言位位之也言位之以天子之位殷适指紂也适通作嫡正室曰嫡正室所出之子亦曰嫡妾出之子曰庶公羊传云立嫡以长不以贤左传云王后无嫡则择立长毛传云紂殷之正适也史记云帝乙长子曰微子啓啓母贱不得嗣少子辛母正后立为嗣按紂名受辛受紂以音同通用外纪云帝乙妾生微子中衍为后而生紂乙及后以啓贤欲立为太子太史据法争曰有妻之子不可立妾之子故紂为後孔穎達云微子之命及左传皆谓微子为帝乙之元子而紂得为正适者郑注书序谓微子紂同母庶兄紂之母本帝乙之妾生啓及衍後立为后生受然则以为后乃生受故为正适也胡宏云尧舜与贤三王与适二帝三王同道惟所遇之时不同也尧舜之时中夏初开辟制度草创自非以圣继圣则不能成功以貽万世使丹朱若为中材之君犹不与也故商均无大过亦不得为天子而大禹以有天下及其末年制度已成虽中材之君辅之以贤者亦可以守矣圣人不世出德贤无以大相过则定於与嫡所以一民心重天下也虽然大君人命所系兴亡之本圣人有权焉未尝执一也是以太甲虽嫡又有成汤之命而几不免於废武王虽弟上承文考之命而终不释为君帝乙亦贤君也泥於立嫡而不知紂之足以亡天下也亦不慎不知变之过矣孔子作春秋监观前代贤可与则以天下为官嫡可与则以天下为家此万世无弊之法也使帝乙而知道商之卜世犹未可知也使天使之也挟说文云俾持也朱子云挟而有之也天既位置殷之正适矣而竟使之不能提挈四方以保有其位则是天有权而人主不得专其权甚哉王之不易而天下难谏亦可知矣天问曰授殷天下其位安施反成乃亡其罪伊何易明夷上九曰初登于天後入于地此之谓也说一使字便凜然可畏真氏云此与召诰皇天改厥元子之命同意愚按以殷适为言者欲与後章言生此文王言笃生武王相形犹昔人所谓生子当如孙仲谋若刘景升儿子豚犬耳孔云帝王神器实有大期殷之存亡非无定算但兴在圣君灭繇愚主应使周兴故诞兹睿圣应使殷灭故生此愚主斯则受之於自然定之於冥运韩诗外传云紂之为主劳民力冤酷之令加於百姓慴凄之恶施於大臣羣下不信百姓疾怨故天下叛而愿为文武臣紂自取之也夫贵为天子富有天下及周师至而令不行乎左右悲夫当是之时索为匹夫不可得也诗曰天位殷适使不挟四方左昭元年楚令尹围享赵孟赋大明之首章事毕赵孟谓叔向曰令尹自以为王矣何如对曰王弱令尹强其可哉虽可不终】摯仲【丰氏本作中】氏任自彼殷商【阳韵】来嫁于周曰【尔雅注作聿】嫔于京【叶阳韵居良翻】乃及王季维德之行【叶阳韵户郎翻】大【音泰】任有身生此文王【阳韵注疏本以此二句冠下维此文王六句为第三章朱传吕严诸本俱移系于第二章之後按系二章有韵冠三章无韵当从後定 赋也摯毛云国也国名记云蔡之平舆有摯亭一

统志云平輿故城在河南汝宁府东仲者中也谓中女也氏任者其氏所自出之姓曰任按唐世系表祖己七世孙曰成徙国于摯祖己者仲虺後世周语摯畴之国繇大任摯畴二国名其源出于黄帝国语司空季子云黄帝之子十二人姬酉祁己滕葢任荀僖姁依是也王符云黄帝之子二十五人班为十二夏之兴有任奚为夏车正以封于薛後迁于邾其嗣仲虺居薛为汤左相王季之妃大任及谢章昌采祝结泉卑遇狂大氏皆任姓也孔云此言仲任下言大任者此本其未嫁故详言其国及姓字下言已嫁以常称言之邹忠胤云汉儒谓礼惟嫁长女余皆为媵自殷以前皆然然则摯任非耶殷商详见玄鸟篇孔云成汤之初以商为号及盘庚後为殷取前後二号而言之黄佐云都殷因称殷商亦犹刘备都蜀因称蜀汉耳自彼殷商者繇今日追溯前日之辞言当彼殷商有天下之时也或以摯为殷商畿内国故曰自彼殷商亦通严云将述商亡而周兴故以摯系商与周对言之也来者内辞也对彼称来说文云女适人曰嫁从女从家妇人内夫家以嫁为归言归其家也又郭璞云自家而出谓之嫁周国名後以为有天下之号曰发语辞宾尔雅云妇也曲礼疏云妇之美称可宾敬也孔云曲礼生曰妻死曰嫔此生而言嫔者周礼立九嫔之官妇人有德之称妻死其夫以美号名之故称嫔若非夫於妻傍称女妇有德虽生亦曰嫔故书曰嫔于虞亦是生称之也按就夫家言之曰来嫁自夫家言之曰嫔互文也京周京也严云大雅作於成王之时皆用王者之礼从後称周京耳及郑玄云与也王季太王之子文王之父名季历後追王称王季德即乾健坤顺之德行音杭犹列也言其德与王季相颉颃也又列女传云太任之性端一诚庄惟德之行则行当如字解言於其所行而徵其有德在王季则名类长君在太任则思齐思媚是也皇王大纪云季历有谋能断守正而和照临无蔽勤施无私敦诲不倦顺以事上比以亲民庆赏刑威政自己出四隣服焉娶於摯曰太任亦有贤德目不视窃色耳不听淫声口不出恶言容貌恭肃齐如也孔云礼妇人从夫之諡故颂称大妣为文母大任非諡也以其尊加于妇尊而称之故谓之大姜大任大妣惟武王妃之称左传谓之邑姜不称大盖避大姜故也身毛传云重也郑玄谓怀孕也孔云以身中复有身故言重生文王之岁大纪谓在祖甲三十一祀即娶大任之年金氏通监前编则谓在祖甲二十八祀未知其审晋语胥臣云昔者大任娠文王不变少 于豕牢而得文王不加疾焉豕牢厠也少 便也沈约云生季历之十年飞龙盈於殷之牧野此盖圣人在下位将起之符也季历之妃曰大任梦长人感已 于豕牢而生昌是为周文王龙颜虎肩身长十尺胸有四乳大王曰吾世当有兴者其在昌乎列女传云文王生而明圣大任教之以一而识百君子谓大任为能胎教古者妇人妊子寝不侧坐不边立不踣不食邪味割不正不食席不正不坐目不视于邪色耳不听于淫声夜则令瞽诵诗道正事如此则生子形容端正才德必过人矣故妊子之时必慎所感感于善则善感于恶则恶人生而肖父母者皆其母感于物故形意肖之文王母可谓知肖化矣陈栌云圣贤之生不偶然也有配偶之贤而後有嗣续之贤故诗推本圣贤之生往往自其所从来如生民言稷而及姜嫄比言文王而及大任下章言武王而及大妣皆是也其意深矣】维【礼记左传吕觉俱作惟春秋繁露作唯】此文王小心翼翼【职韵】昭事上帝聿【繁露作允】怀多福【叶职韵笔力翻】厥德不回以受方国【职韵 赋也维发语辞此章指文王继王季为诸侯後克尽臣职而言为君者心欲大主于仁也为臣者心欲小主于敬也翼即辅翼之翼以其无念不在于羽翼商室故曰翼翼与厥犹翼翼义同昭明也上帝即天也帝者谛也谛者审也言能审察其下故谓之帝程子以为天之主宰是也後汉书斥帝欲不谛义亦本此昭事上帝者承上文言文王事殷之诚明白显着可与上帝相对越也聿通作吹语辞也怀说文云念思也多福者爵土不替与国同休自文王

视此其为福已多矣吾师蔡先生毅中云圣人视现在之福恒恐不足以保其有故曰怀解来非也吕氏春秋云文王处岐事纣冤侮雅逊朝夕必时上贡必适祭祀必敬又云昔者纣为无道杀梅伯而醢之杀鬼侯而脯之以礼诸侯於庙文王流涕而咨之纣恐其叛欲杀文王而灭周文王曰父虽无道子敢不事父平君虽不惠臣敢不事君乎孰王而可叛也纣乃赦之天下闻之以文王为畏上而哀下也诗曰维此文王小心翼翼昭事上帝聿怀多福厥德即小心翼翼之德回说文云转也文王为臣敬止始终以之絶无一毫觊幸图度之私所谓不回也受方国者孔云四方之国来附之愚按主我言故曰受论语曰三分天下有其二周书武王曰王季其勤王家我文考文王克成厥勲诞膺天命以抚方夏大邦畏其力小邦怀其德非文王之小心翼翼足以感动人心不至此所谓以受方国者也表记篇子曰下之事上也虽有庇民之大德不敢有君民之心仁之厚也是故君子恭俭以求役仁信让以求役礼不自尚其事不自尊其身俭於位而寡於欲让於贤卑己而尊人小心而畏义求以事君得之自是不得自是以听天命诗云莫莫葛藟施于条枚凯弟君子求福不回其舜禹周公之谓与有君民之大德有事君之小心诗云惟此文王小心翼翼昭事上帝聿怀多福厥德不回以受方国左昭二十六年齐有彗星齐侯使禳之晏子曰无益也祇取诬焉天道不谄不贰其命诗曰惟此文王小心翼翼昭事上帝聿怀多福厥德不回以受方国君无违德方国将至何患于彗诗曰我无所监夏后及商用乱之故民辛流亡若德回乱民将流亡祝史之为无能补也公说乃止】天监在下有命既集【辑韵亦叶合韵昨合翻】文王初载天作之合【韵亦叶辑韵胡急翻】在洽【说文水经注俱作合】之阳在渭之涘【纸韵】文王嘉止【纸韵】大邦有子【纸韵注疏本以此二句冠下大邦有子六句为第五章朱传吕严诸本俱移系于第四章之後今按系四章有韵冠五章无韵当从後定 赋也朱子云将言武王伐商之事故此又推其本而言监说文云临下也有居高监察之意在下即首章所谓明明在下者命谓君天下之命集如翔而後集之集天命必有所厌後有所集以六百年之商将欲革其命而新之非监观之久而眷顾之深固不轻集也既者已事之辞鸟止为集有审择而就之之意初始也载尔雅云岁也唐虞曰载取物终更始以年运而往为义作者造立之名合说文云合口也取其上下相合故汉书注云合者相配耦之言止惟命既集于周不可无承命之人故武王不可不生惟生圣不可无圣德之母故天於文王之早年而默定其配在洽之阳以大妣所居言洽当依说文作合谷梁传云水北曰阳今陕西西安同州有合阳县水经云河水又迳合阳城东酈道元云周威烈王之十七年魏文侯伐秦至郑还筑汾陰合县即此城也故有莘邑矣为太妣之国城南有瀆水东流东注于河水南犹有文母庙前有碑去城一十五里水即洽水也又有一瀆水出汾陰县南四十里平地开源溃泉上涌大几如轮深则不测俗呼之为瀆魁古人壅其流以为陂水种稻东西二百步南北一百余步与合阳瀆水夹河中渚上皆相潜通故吕忱曰尔雅异出同流为瀆水愚按据此则合乃邑名原非水名其邑中之水名为瀆水又两瀆合流故其字从邑从合义或取此郑云天於文王为之生配于气势之处孔云名山大川皆有灵气崧高曰惟岳降神生甫及申水亦灵物气与山同诗人述其所居明是美其气势在渭之涘以文王所居言今陕西凤翔府即古岐周地寰宇记云汧渭岐漆雍五水皆会于郡界酈云岐水与杜水合迳岐山而又屈迳周城南又南迳美阳县南流注于渭涘说文云水厓也其一在洽之阳其一在渭之涘两地睽隔适成佳偶此所谓天作之合也旧说谓此二句皆指大妣所居今考洽水入河不入渭则与渭涘无涉故正之嘉朱子云昏礼也按周礼大宗伯以嘉礼亲万民昏礼其一也易随卦九五孚于嘉亦取陰阳配偶之义止语词大邦谓莘国也以其系本夏啓为天子之後故称

大邦犹书召诰言大邦殷之命以殷为天子称大邦也子谓大妣也按子者男女之通称论语以其子妻之是女亦称子也文王嘉止谓初行纳采之嘉礼大邦有子盖使者致命问名之辞仪礼所谓敢请女为谁氏者也孔云案昏礼纳采问名同日行事是其礼相因遣纳采即问名也宋元佑中上将大昏范祖禹言于宣仁太后曰臣闻古之帝王所与为昏姻者必大国诸侯先圣王之後勲贤之裔不然则甥舅之国也不以微贱上敌至尊故其福祚盛大子孙繁昌昔黄帝娶于西陵之女是为螺祖为帝正妃其子孙皆有天下五帝三王皆黄帝之後也舜娶帝尧之二女厘降于汭汭遂有天下大禹娶涂山是生夏啓天下归之子孙享国四百七十余年成汤娶于有莘氏子孙有天下六百余年周之先祖后稷生于姜嫄世有贤妃大王娶大姜是生王季王季娶大任是生文王文王娶大妣其礼尤盛大姜炎帝之後也大任太昊之後也大妣大禹之後也大妣生十子武王周公皆圣人也其余皆为显诸侯周之子孙徧于天下大妣之德也武王亦娶于姜是生成王周有天下二十余世八百余年其基本盖繇此也故族姓不可不贵秦汉以後昏姻多不正无足取法惟後汉显宗明德马后唐太宗文德长孙后皆有后德出于勲贤之家其余败乱足以戒而已惟陛下远观上古近监後世上思天地祖宗之奉下为万世子孙之计选卜窈窕以母仪万国表正六宫非有德孰可以当之然闺门之德不可着见必视其世族观其祖考察其家风参以世事亦可知也昔汉之初大臣议欲立高帝子齐王皆曰王母家驺钩恶戾虎而冠者也代王母家薄氏君子长者乃立代王是为文帝文帝为汉之贤主亦繇其母家仁善也故女德不可不先白虎通云王者之娶必先选于大国之女礼仪备所见多诗云大邦有子明王者必娶大国也】大邦有子倪【韩诗作譬云譬也孔云如今俗语譬喻物云譬作然也】天之妹【叶寘韵读如媚明秘翻】文定厥祥亲【丰氏本作親】迎【去声】于渭【叶寘韵读如伪于睡翻】造【广韵作舳】舟为梁【阳韵】不【丰本作丕】显其光【阳韵 赋也倪说文云譬喻也一曰闻见从人从见徐锴云会意愚按说文解倪具有二义而絶无解者今以意通之字从人见盖人之所见非我见也以其闻之于人而得之故曰闻见原非目见特于耳闻後因而想像之故又会其意曰譬喻也又尔雅训间为倪间者军中间谍也是亦谓使人见之也此大邦有子二司盖使者既得请而还报命之辞大妣深居闺中非使者所得见但得之耳闻谓其德之美足以为天之配也云尔天拟文王夫妇之道取象乾坤易言坤为妻道明夫道得拟乾矣况文王又与天合德者乎妹说文云女弟也尔雅云男子谓女子先生为姊後生为妹孔云初嫁必幼故以妹言之愚按此对文王称之则文王似兄而大妣似妹耳陆化熙云文王之德与天为一譬则天矣而大妣配以幽闲贞静之德譬则天之妹也文礼文也定者成其事也祥吉祥也郑云问名之後卜而得吉则文士以礼定其吉祥谓纳币也孔云使人纳币则礼成昏定也昏以纳币为定币繇卜吉行之故昏礼谓之纳徵徵者成也是亦为卜吉而言与此祥意协也案昏有六礼先纳采而後问名次纳吉次纳徵次请期次亲迎其礼尊卑皆同纳采问名纳吉请期亲迎俱用鴈惟纳徵用玄纁束帛俚皮不用鴈贾公彦云用鴈取顺陰阳往来也鴈木落南翔冰泮北徂夫为阳妇为陰今用鴈者亦取妇人从夫之义惟纳徵不用鴈以其自有帛可执也言纳者恐女氏不受若春秋内纳之义问名不言纳者女氏已许故不言纳也请期亲迎不言纳者纳币则昏礼已成女家不得遗改故皆不言纳也按周礼媒氏职云凡嫁子娶妻入币纯帛无过五两郑读纯为缁云纳币用缁者以妇人陰也褻记又云纳币一束束五两两五寻八尺为寻五寻者四大也五两为十端每端各二丈乃仪礼有玄纁之文郑为彼庶人用缁士大夫以玄纁象陰阳备也阳奇陰偶五两当三玄二纁也又周礼玉人职云谷圭天子以?女大璋诸侯以?女郑谓玄纁束帛之外天

子加以谷圭诸侯加以大璋也此诗文定厥祥一语櫟括纳吉纳徵二礼而统言之犹云以纳徵之文完纳吉之事也亲迎二字略断谓文王亲往迎大妣也昏义云父亲醮子而命之迎男先於女也子承命以迎主人筵几於庙而拜迎于门外壻执鴈入揖让升堂再拜奠鴈盖受之於父母也降出御妇车而壻授绥御轮三周先俟於门外妇至壻揖妇以入共牢而食合卺而醕所以合体同尊卑以亲之也白虎通云天子下至士必亲迎授绥者何以阳下陰也欲得其欢心示亲之心也必亲迎轮三周下车曲顾者防淫佚也诗曰文定厥祥亲迎于渭程子云文王亲迎时乃为公子未为君也孔云此篇主美文王虽王季尚存皆以文王为主又云请期之文不见者既亲迎明请之可知也于渭二字语意带下读言文王行亲迎之礼其往来所经必济渡于渭水则造舟为梁以俟之也造舟孙炎云比舟为梁也梁说文云水桥也尔雅云天子造舟诸侯维舟大夫方舟士特舟李巡云比其舟而渡曰造舟中央左右相维持曰维舟并而舩曰方舟一舟曰特舟孔云造舟者比舩于水加板於上即今之浮桥故杜预云造舟为梁则河桥之谓也维舟以下则水上浮而行之但舩有多少有等差耳礼天子乃得造舟殷时未有等制文王敬重昏事始作而用之後世以文王所用故制为天子法耳故王基云自殷以前质略未有造维方特之差周公制礼因文王敬大妣重初昏行造舟遂即制之以为天子礼着尊卑之差记以为後世法是也不通作丕大也丕显其光者承上句以礼文之盛言毛云造舟然後可以显其光辉郑云迎大妣而更为梁者欲其昭着示後世敬昏礼也范云自古昏礼未有如文王之盛也真云其礼盛故其光显】有命自天命此文王【阳韵】于周于京【叶阳韵见第二章】缵女维莘【叶阳韵尸羊翻】长【上声】子维行【叶阳韵见第二章】笃生武王【阳韵】保右【陆德明本作佑】命尔燮伐大商【阳韵赋也命即王天下之命天命文王不必于其身但使其生圣子以有天下亦所谓有命既集也下文笃生武】

【王正天命之可见处于周于京蒙第二章之文与缵女维莘句联说缵说文云继也此一字略断读系女于莘是倒文法言昔者太任来嫁于周曰嫔于京今继之者则维此莘国之女也又按昏礼父醮子亲迎之辞曰往迎尔相承我宗事勗帅以敬先妣之嗣若则有常正此诗言缵之意说文无莘字当作辛唐世系表云啓封支子于莘辛声相近遂为辛氏路史云莘辛之转或云辛莘之转非也其地即今合阳县春秋时属晋汉书云县西南有梁山公羊传以为合阳之山尔雅称为晋望故左僖二十八年城濮之战晋侯登有莘之墟以望楚师即此莘也一统志云县东四十里有夏阳城内有周文王妃大妣墓夏阳一作下阳罗莘谓下夏字通乃虢地故周语有神降于莘内史过以为在虢受之即此莘也至姜里之厄散宜生求有莘氏美女献紂则以其为文王外族故耳又齐蔡管城大名陈留俱有莘与此无预长子文王之长子伯邑考也行犹逝也如天子新不讳曰大行韦昭云大行者不在之辞是也伯邑考早卒故曰长子维行旧说以大妣为莘国之长女称长子如大任之称摯仲行即女子有行之行亦通但古未有号长女为长子者以此疑之耳笃说文云马行顿迟也邑考既没之後又迟久之而复生武王也昔孟子有言尽信书则不如无书大戴礼称文王十三生伯邑考十五生武王小戴礼载文王谓武王曰女何梦矣武王对曰梦帝与我九龄文王曰女以为何也武王曰西方有九国焉君王其终抚诸文王曰非也古者谓年龄齿亦龄也我百尔九十吾与尔三焉文王九十七乃终武王九十三而终竹书纪年记武王十七年陟年五十四数说相距悬絶未有确然能信其孰然者也乃周书无逸篇周公所言文王受命惟中身厥享国五十年者当是实录与小戴所称文王九十七乃终者彷彿相近今即以此数上下推之既十五生武王则距文王没时

武王年已八十二岁此时方嗣诸侯之位距其为天子而崩仅十一年而书明言惟十有三年春大会于孟津又言既克商二年王有疾弗豫且已而复瘳则其享国实不止于十一年此何以解也武王崩成王幼相传成王时方十三岁距其生时武王年已八十一又有小弱弟叔虞亦邑姜所出子产所云邑姜方震大叔是也世即有八旬外生子之父安得有八旬外生子之母乎此其诞妄明甚若夫九龄之说数之修短定自有生文王岂能损己龄以益其子尤不足置辨者如依竹书武王享年五十四之说则於生成王生叔虞之驳或无可疑但既称武王嗣位十七年陟则推其未嗣位尚有三十七年皆文王享国之岁也计文王当於六十岁生武王自武王而下如管鲁蔡曹郕霍卫聃诸弟皆同母而生何大姒前此壮年惟有伯邑考一人他无闻者自耆年而後乃生子累累如许乎此又可疑也邹忠胤求而不得其说则意大姒为文王继妃故有纘女维莘之语谓诸侯不再娶或周制非殷制而关雎篇之寤寐淑女求之如彼其迫倘亦以文王年已中身後嗣未广故耶此亦臆揣之言要非至理惟汲冢周书度殷解有云王剋殷告叔旦曰唯天不享于殷发之末生至于今六十年史记亦采用其语此其说可信武王以即位十三年剋殷而其时年已六十则其未即位之年当四十七计文王享年九十七除其四十七为武王已生之年则文王以五十一生武王也武王在诸侯天子之位则十七年而崩则六十岁剋殷之後享国尚有四年其时成王已十三岁於武王享年六十四岁之中除其十三为成王已生之年则武王以五十二生成王也夫五十一二岁上下生子世多有之不为希濶虽圣人亦与人同耳或者竹书误以六十四纪为五十四一字之讹亦不可知若戴记所载武王九龄之梦要自灵验特记者不悟其占而妄为之敷衍盖此段实在记文王有疾武王不说冠带而养一饭亦一饭再饭亦再饭旬有二日乃间之後文王欲自测其壽数若何因以何梦询武王亦以孝子之精神必能有朕兆与天通也乃帝与九龄之梦何为来哉盖文王以身膺大邦小邦之归业已九年而大统犹未集今帝以九龄与武王者若谓文王九年後之事业当属之武王耳故文王自知其当死若曰人生以百岁为期我之事业仅止于九年则计享壽但当九十七而止所余三年吾不能有以与尔可也武能梦之文能知之二圣一天也又罗泌亦谓吾与汝三者岂非谓于吾没之後与汝三年而成之乎未可知也此说亦通世人不察遂真谓文王能以年岁畀武王又妄以九龄为九十正所谓痴人说梦者三王之事若存若亡信哉保右皆指革命之事言保者扶持之意周书言天迪格保是也右者赞助之义思若啓行若翼也命谓下文燹伐之命天非谆谆然命之但理所当然即天命之所在也尔诗人代为天命武王之辞也燹说文云和也和人心以伐大商也左传云师克在和三千一心八百咸会和之象也王安石云言大商则乃所以大文武之德以商大矣非德大则不能燹伐也又刘辰翁云古人厚故称大商】殷商之旅其会【说文作旂云建大木置石其上发以机以追敌也引左传旂动而鼓】如林【侵韵】矢于牧野【丰本作桡後同】维予侯兴【叶侵韵虚音翻】上帝临女【音汝吕览春秋繁露俱作汝】无【汉书丰本俱作毋】贰尔【繁露作汝】心【侵韵 赋也旅毛云衆也会说文云合也又云平地有丛木曰林孔云殷商之兵衆其会聚之时如林木之盛也书武成篇云甲子昧爽受率其旅若林会于牧野鬻子云武王率兵车以伐纣纣虎旅百万陈于商郊起自黄鸟至于赤斧三军之士莫不失色史记亦云纣发兵七十万人拒武王矢尔雅云誓也按矢之训誓与训陈同意刘熙释名谓矢指也有所指而迅疾盖直莫如矢誓者直指而言之故亦借曰矢诗之死矢靡他论语夫子矢之是也牧当依古文作毋说文云朝歌南七十里地孔云战在平野故言野耳括地志云今卫州地即牧野之地武王至牧野乃筑此城一统志云河南卫辉府汲县本殷牧野地牧野在府城南陵西社朝歌之

南武王伐纣陈师于此按书牧誓篇云时甲子昧爽王朝至于商郊牧野乃誓即此诗所谓矢于牧野也维予侯兴以下誓衆之词也予我也侯诸侯也先是大会于孟渚诸侯不期而至者八百及戊午次于河朔羣后以师毕会咸曰孳孳无怠迨陈师牧野诸侯兵会者车四千乘事襍见泰誓史记曰予侯者亲之也牧誓篇云王曰嗟我友邦冢君是也兴说文云起也警共起而听誓命也上帝天之主宰临说文云监临也尔雅云视也犹言眷顾也女尔皆谓诸侯也无通作母戒之也貳通作二不一之谓纣以如林之衆来战恐诸侯计及衆寡强弱不无胜败莫知之虑武王灼见天意所在纣师虽衆固不足畏故称上帝临女以鼓其鋭而一其志观泰誓一则云商罪贯盈天命诛之再则云朕梦协朕卜袭于休祥戎商必克又说苑称武王伐纣至有戎之隧大风折旆散宜生諫曰此其妖欤武王曰非也天落兵也风霁而乘以大雨水平地而嗇散宜生又諫曰此其妖欤武王曰非也天漉兵也卜而龟燭散宜生又諫曰此其妖欤武王曰不利以祷祠利以系衆是?之已故武王顺天地犯三妖而擒纣于牧野荀子亦云武王之诛纣也行之日以兵忌东面而迎太岁至汜而汜至怀而怀至共头而山隧霍叔惧曰出三日而五灾至无乃不可乎周公曰剗比干而囚箕子飞廉恶来知政夫又恶有不可焉遂选马而进朝食于戚暮宿于百泉厌旦于牧之野鼓之而纣卒易乡遂乘殷人而进诛纣此非皆真有见于临女之天心而能若是乎史记载武王誓师之言曰今予发惟共行天罚勉哉夫子不可再不可三所谓无貳尔心者也鲁颂亦云致天之届于牧之野无貳无虞上帝临女义正同此观彼下文即继之曰敦商之旅克咸厥功则无貳二句其为牧野誓师之语明矣金履祥云牧野之誓将战之时也故自诸侯三卿大夫师卒之长夷狄之酋豪而咸誓戒之荀卿氏谓桓文之节制不足以包汤武之仁义然而汤武之仁义则有以该桓文之节制吾於牧野之事见之矣又董仲舒云一而不二者天之行也反天之道无成者是以目不能二视耳不能二听一手不能二事一手画方一手画圆莫能成是故古之人物而书文正於一者谓之忠持二中者谓之患患人之忠不一者也不一者故患之所繇生也是故君子贱二而贵一人孰无善善不一故不足以立身治孰无常常不一故不足以致力诗曰上帝临汝无貳尔心知天道者之言也吕不韦云古之事君者必先服能然後任必反情然後受主虽过与臣不徒取大雅曰上帝临汝无貳尔心以言忠臣之行也皆断章取义非诗正旨旧说皆以此章为殷商之衆向周而劝战之语故毛传解无貳尔心谓言无敢有怀貳於尔之心者左襄二十四年范宣子为政诸侯之币重郑人病之子产寓书於宣子曰侨闻君子长国家者非无贿之患而无令名之难夫诸侯之贿聚于公室则诸侯貳若吾子赖之则晋国貳诸侯貳则晋国坏晋国貳则子之家坏何没没也将焉用贿夫令名德之舆也德国家之基也诗曰乐只君子邦家之基有令德也夫上帝临女无貳尔心有令名也夫恕思以明德则令名载而行之是以远至迓安子产之解貳心与毛义同郑笺则谓此劝戒武王言天护视女伐纣必克无有疑心先儒皆从之今按二义亦通愚详绎鲁颂立言之意定从今说】牧【水经注作姆】野洋洋【阳韵】檀车煌煌【阳韵韩诗外传作皇皇】駟【公羊疏石经作四】駟彭彭【叶阳韵蒲光翻】维【汉书】师尚父【上声】时维鹰扬【阳韵】凉【汉书韩诗及外传风俗通丰本俱作亮陆德明本一作凉】彼武王【阳韵】肆【风俗通作袭】伐大商【阳韵】会朝【丰本作鼂】清明【叶阳韵谟朗翻 赋也洋洋毛云广也酈道元云自朝歌以南南暨清水土地平衍据臯跨泽悉姆野之地故诗称姆野洋洋郑云言其战地寛广明不用权诈也檀坚韧之木材可为车解见将仲子杖杜篇煌煌毛云明也郑云兵车鲜明也四马曰駟说文云一乘也尔雅云駟马白腹駟按赤马黑鬣曰駟此则赤色黑鬣而白其腹也陆佃云駟从𧰨省礼曰练而𧰨𧰨浅赤也一

染谓之縹再染谓之?三染谓之纁檀弓云夏后氏戎事乘骊殷人戎事乘翰周人戎事乘駟毛云言上周下殷也孔云檀弓说三代乘马各从正色而周不纯赤明其有义故知白腹为上周下殷战为二代革易故见此义戎事乘駟明非戎事不然因武王所乘遂为一代常法彭通作騊说文云马胜也极言其盛故重曰騊騊陈祥道云乐记夹振之而騊伐诗所谓騊騊彭彭是也魏浣初云武王革车三百两虎贲三千人诗言师衆之盛将帅之强只在一片人心上看出维语辞下同师毛云太师也尚父太公也姜姓吕氏名尚孔云父男子之美号文王得吕尚立以为太师号曰尚父尊之为作此号故雒师谋云号曰师尚父是也愚按古人尚质呼尚之名为尚父亦犹周公呼奭为君奭也史记云吕尚盖尝穷困年老矣以渔钓奸周西伯西伯将出猎卜之曰所获非龙非麇非虎非罴所获霸王之辅於是周西伯猎果遇太公於渭之阳与语大悦曰自吾先君太公曰当有圣人适周周以兴子真是耶吾太公望子久矣故号之曰太公望载与俱归立为师或曰太公博闻尝事纣纣无道去之西归周西伯或曰吕尚处士隐海滨周西伯拘羑里散宜生闚天素知而招吕尚吕尚亦曰吾闻西伯贤又善养老盍往焉三人为西伯求美女奇物献之於纣以赎西伯西伯得以出反国言吕尚所以事周虽异然要之为文武师後世之言兵皆宗太公为本谋韩诗外传云武王伐纣到于邢丘楯折为三天雨三日不休武王心惧召太公而问曰意者纣未可伐乎太公对曰不然折为三者军当分为三也天雨三日不休欲漉吾兵也武王曰然乃修武勒兵于甯行克纣于牧之野李靖云昔太公佐武王至牧野遇雷雨旗鼓毁折散宜生欲卜吉而後行此则因军中疑惧必假卜以问神焉太公以谓腐骨无足问且以臣伐君岂可再乎时通作是鷹尔雅云鷩鷩也郭璞云鷩当为鷩字之误耳罗愿云鸟之鷩者雄大雌小少皞氏以名司寇之官盖鷩正月则化为鷩秋则鷩化为鷩故鷩通有鷩名在五鷩之数禽经云鷩不击伏裴氏新书云鷩在衆鸟之间若睡梦然故积怒而後全刚生焉扬说文云飞举也时维鷩扬者孔云是维勇略如鷩之飞扬罗云鷩好扬隼好翔故以比尚父之武陆佃云言其武之奋扬如此乐记所谓发扬蹈厉太公之志也陆化熙云要见义气激烈直欲夷大难以快人心意後汉高彪作幽州督箴云吕尚七十气冠三军诗人作歌如鷩如鷩世纪云商容与殷民观周师之入见太公至民曰是吾新君也容曰非也视其为人虎踞而鷩趾当敌将衆威怒自倍见利即前不顾其後按史记陈师牧野武王使师尚父与百夫致师以大卒驰帝纣师纣师虽衆皆倒兵以战以开武王武王驰之纣兵皆崩畔纣纣走登鹿台自燔于火而死於是封功臣谋士而师尚父为首封即此诗所言鷩扬事也凉说文云薄也万尚烈云凉对炎字看名虽为伐而惟以三千人举事牧野之中惟檀车尔惟騊騊尔惟师尚父若此其凉凉然未尝若凡征伐者威灵焰炎炎然不可当也何也殷商之不敌已久此惟一决焉耳故上曰變而此又曰凉也肆通作四会朝朱子云会战之旦也清明以治象言之言凉薄彼武王之师虽不能与纣衆絜盛而与四方诸侯共伐大商计其会合兵衆不过一朝旦之顷而除去纣之秽浊宇宙便见清明泰誓所期永清四海于兹始克慰矣夫帝乙以受辛为适而殷以亡文王以武王为子而周以兴虽曰人事亦有天意存焉诗人所以推原于发祥之所自也沈万钶云诗咏一代之德夫孰备于大明乎观其铺张世家溯流穷源粤自王季而大任而文王而大姒而武王而尚父见其夫妻之同德焉见其父子之同德焉见其妇姑之同德焉见其祖孙之同德焉见其君臣之同德焉见其天人之同德焉呜呼具此六同而八百年之基业不待卜而已定矣】

大明八章四章章六句四章章八句【朱子云其章以六句八句相间序云文王有明德故天

复命武王也今玩诗词固颂文武然实因文武而扬厉及二母也盖不啻详哉其言之矣是果专为颂文武而发者欤若叔孙穆子以为此两君相见之乐则特举其所用之一处而言诗固不为两君相见作也又诗纬泛历枢有五际之说以大明在亥为水始理则未详】

文王有声咏文武迁都丰镐之事而重叹美之以戒成王【邓元锡云前三章陈文王之伐後六章皆武作镐成文卒其伐功之事故以王后皇王变文目之郝敬云诗首尾四章称文武者文始之武终之也中四章称王后皇王者继诸侯而为天子也作丰而王业始作镐而王业成文王求宁以始武也武王诒孙以终文也愚按此诗言以燕翼子当是作于成王之世子贡传谓以训成王者是也申培说以为作于周公】

文王有声【庚韵】遹骏【丰氏本作俊】有声【见上】遹【说文孙毓本俱作吹】求厥宁遹观厥成【庚韵】文王烝哉【每章各用烝哉一句结不用韵亦变体 赋也有声言有声誉也歌功颂德之谓孔颖达云孔子闲居曰三代之王必先其令闻是为有声矣篇中四遹字俱当依说文作吹云诤辞也字从欠从曰曰亦声徐锴云诤理其事之词也骏通作俊礼记疏谓倍人曰茂十人曰选倍选曰俊说文谓材千人也北史谓万人之秀曰俊其说不一要之皆贤人之称也特举遹骏有声者立言之意与末章武王岂不仕相应言文王固有声矣而又有俊杰之臣与之共事故益使之有声繇诗所谓予曰有疏附先後奔奏御侮者也遹求厥宁自文王之心言之也文王之心惟期望天下之安宁下文言有此武功正除残去暴求为宁民计非为私也成说文云就也遹观厥成兼武王言自後人观之也残暴去而民安其後终于武王代纣而有天下文王之汲汲求宁者至是果有成功矣是虽文王以圣谟开先而中间诸臣左右赞襄之力自不可少故诗人不徒曰文王有声而必足之曰遹俊有声也烝说文云火气上行也字从火盖炽盛升进之意後仿此】 文王受命有此武功【东韵】既伐于崇【东韵书大传作密】作邑于丰【东韵】文王烝哉【赋也命者天讨有罪之命左传云戡定祸乱为武功说文云以劳定国也周礼云国功曰功崇国名伐崇事详皇矣篇孔云经别言既伐于崇则武功之言非独伐崇而已所伐邠耆密须混夷之属皆是也而别言既伐于崇者以其功最大其伐最後故特言之为作邑张本言功成乃作都也作者创起之辞邑说文云国也又左传都邑互称都亦通名邑丰通作酆说文云周文王所都在京兆杜陵西南通典云酆在今长安县西北灵台乡丰水上括地志云丰宫在酆县东三十五里韩非子云文王侵孟克莒举酆三举而纣恶之邹忠胤云文王以伐密之明年代崇越三年自程迁丰丰即崇国之地故言作邑于丰而先之以代崇季本云文王既灭崇则拓地渐广而其民未驯宜亲抚治之故徒居焉张子厚云文王邑于岐山之下既基王迹矣文王又迁于丰武王又迁于镐者当是时民归之者日衆无地以容之必至于迁也愚按二意皆有】 筑城伊瀋【叶质韵于笔翻韩诗陆德明本俱作洧】作丰伊匹【质韵亦叶屋韵莫卜翻】匪棘【礼记作革尔雅作憾陆本作亟】其欲【依礼记通作犹尤韵亦叶宥韵余救翻陆本作慾丰本作猷】遹【礼记作聿】迨来孝【叶尤韵呼侯翻亦叶宥韵许候翻又叶屋韵计六翻礼记云孝者畜也】王后烝哉【贼也筑说文云捣也筑室百堵之筑谓筑城墙也古今注云城盛也以受人物伊语辞後同瀋说文云疾流也毛郑作洧字解非是筑城于水所疾流之处指城镐也雍大记云镐水在长安县西北十八里水经注云镐水上承镐池於昆明池北周武王之所都也自汉帝迁昆明池於是地基构沦漚今无可究镐水又北流西北注与滌池合文北迺于渭庙记云长安城西有镐池在

昆明池北周匝二十一里溉池二十三顷帝王世纪云今镐池即周之故都也按竹书商帝辛三十五年西伯自程迁于丰三十六年西伯使世子发营镐其事尚在文王作辟雍灵台之前即此章所咏也匹耦也按布帛长四丈为匹其字从八从亠八揲为一匹亠者盛布帛之器也诗书多用为配偶之义当是以音同妃说文训妃为匹亦以此尔作丰伊匹与周书雒诰篇作周匹休语意正同成王命周公营洛与周对峙为周之匹今文王命武王营镐与丰对峙亦为丰之匹也此下三章皆言营镐事而诗人隐镐字不出乃文笔之幻处棘通作亟郑云急也欲说文云贪欲也若依礼记通作犹则谓谋虑也意亦相通輿图渐拓营建日广似乎逼上而有急于取天下之意是之谓棘其欲也邓云作丰伊匹两都相望如作之耦也文作丰矣武复作镐宜若已棘然然匪棘欲也追孝也追犹逐也是追而及之之意来孝指文王言来者自岐之程而又来丰也上体先志改建都邑于以安民使世业不坠後昆永保孝孰如之武王竭蹶营镐其心亦惟欲追及文王来丰之孝而已礼器篇云礼时为大顺次之体次之宜次之称次之尧授舜舜授禹汤放桀武王伐纣时也诗曰匪革其犹聿追来孝按观此可以明此诗之义刘公瑾云孝者善继志善述事者也文王所求乎子即文王所以事父者也故曰父作之子述之朱善云文王之孝有以追先人之志武王之孝有以成文王之功此周之王业所以盛也万时华云周家父子兄弟之间王季与夷齐分让不让两局王季不让便是友让便不友君臣之间武王与舜禹分征诛禅受两局征诛便是孝不征诛反是不孝武王化家为国化侯为王全是曲体先人至孝处夫子達孝之称正本于此王后指武王也後仿此自今日言之为王自昔日言之则但为后后者君之通称此以武王未有天下之时言故其称与後章皇王异又按武王迁都于镐史不载其何时沈约谓有天下後始都镐殊无所据以此诗观之疑武王嗣位为诸侯便都镐也郑玄亦谓居镐之後始伐纣】王公伊濯维丰之垣【叶寒韵胡官翻】四方攸同王后维翰【叶寒韵河干翻】王后烝哉【赋也王公指文王也自今日追王称之为王自昔日为西伯时称之其爵则上公也考竹书邠侯组紃称侯至周公亶父周公季历已进爵称公矣又凡国人称本国之君皆曰公以王公称文王亦文王未尝称王之一证濯说文云澣也取洒濯更新之意垣说文云墙也文王始迁于丰重新气象复命武王营镐邑以为丰之藩篱故以垣称邓云维丰之垣声灵罗络如作之蔽也四方攸同者郑云天下同心归之翰鸟羽也吾师蔡先生穀中云翰即羽翰之翰鸟以翰蔽身王以德蔽天下言文王营镐但欲固丰邑之藩及武王居之而大邦小邦咸倚赖焉则直可为四方之屏蔽以其时尚未有天下故仍以王后称之】丰水东注维禹之绩【叶陌韵读如积资昔翻】四方攸同皇王维辟【陌韵】皇王烝哉【兴也雍大记云丰水出长安县西南五十里终南山泮谷其源濶一十五步其下濶六十步水深三尺自鄠县界来入咸阳合渭水尚书作泮文子云老子曰泮水之深十仞而不受尘垢金铁在中形见于外矣帝王世纪云丰镐皆在长安之西南後汉书注云丰镐相去二十五里郑云丰邑在丰水之西镐京在丰水之东董鼎云周之建都在丰镐丰水正居其中严云禹贡东会于泮注云泮水自南而合盖泮水自南而北流入渭故丰在其西镐在其东经言东注者是会渭之後乃东注入河也水经注云渭水东与丰水会矩陰山无他高山异峦惟原阜石微而已绩说文云缉也人之功业必繇积累而成如缉绩然故尔雅转训绩为功为业也皇说文云大也白虎通云君也美也大也号之为皇者煌煌人莫违也按王已为天子之称今又加皇者大之也孔云此与下章俱言皇王而下有镐京之事知此皇王为武王也辟说文云法也尔雅转训为君者以君为人所取法也严云丰镐在丰水之东西二都皆可言丰水此章皇王称武王则丰水东注指镐京所见而言也言丰水之所以会渭而东注于河者是禹之功

也武王作邑于丰水之东而四方之所以同归周者以武王为天下之君也盖以武王之功配禹皆除害济民也武王诚得人君之道也变王后言皇王一统天下其事又大也愚按诗以丰水兴四方以东注兴攸同以武王之能君天下兴神禹之能治洪水意正赞武王不在思禹功故知是兴非赋也】镐京辟雍【冬韵说苑作雍】自西自东【叶冬韵读如冬都宗翻】自南自北【叶韵】无思不服【叶叶韵鼻墨翻】皇王烝哉【赋也镐通作漹地以水得名史记沔漹荀子武王以漹是也後汉地理志云镐在京兆尹上林苑中古史考云武王迁镐长安丰亨镐池也辟雍解见灵台篇张子厚云灵台辟雍文王之学也镐京辟雍武王之学也至此始立为天子之学矣愚按武王之迁镐已久及有天下镐始称京辟雍在镐京中所以教天下春射秋飨尊事三老五更之处武王所首重故特举而言之乐记子曰武王克殷反商散军而郊射左射狸首右射驹虞而贯革之射息也裨冕指笏而虎贲之士说剑也食三老五更于太学天子袒而割牲执酱而馈执爵而酹冕而总干所以教诸侯之弟也若此则周道四达礼乐交通愚按此诗首咏辟雍即武王散军而郊射之事所谓偃武修文者也郊射者习射於郊学之中其地在西郊所谓右学之谓之射宫射则歌驹虞之诗以为节左学在国中之左谓之泽宫射则歌狸首之诗以为节先儒谓在国中为大学在西郊者为小学然总之皆名辟雍也袒而割牲者袒衣而割制牲体为俎实也馈进食也酹食毕而以酒虚口也总干者总持干盾以立于舞位也郑云自繇也武王于镐京行辟雍之礼自四方来观者皆感化其德心无不服者孔云既言辟雍即云四方皆服明繇在辟雍行礼见其行礼感其德化故无不归服也辟雍之礼谓养老以教孝弟也或谓东西南北四自字皆泛言之不必当时观礼者以武王教化大行故闻风心服亦通左传周景王曰我自夏以后稷魏郃芮岐毕吾西土也及武王克商蒲姑商奄吾东土也巴濮楚邓吾南土也肃慎燕亳吾北土也其数四方之次第正与此同周自西土兴近者先被其化其後乃渐及于东故曰自西自东周自文王化已南行于江汉其後乃渐及于北故曰自南自北皆对举之辞亦立言之序也张子厚云无思不服心服也天下不心服而王者未之有也刘向云孔子曰移风易俗莫善於乐安上治民莫善於礼是故圣王修礼文设庠序陈钟鼓天子辟雍诸侯泮宫所以行德化诗云镐京辟雍自西自东自南自北无思不服此之谓也礼文王世子篇云天子视学大昕鼓徵所以警衆也衆至然後天子至乃命有司行事兴秋节祭先师先圣焉有司卒事反命始之养也适东序释奠于先老遂设三老五更羣老之席位焉适馔省醴养老之珍具遂发咏焉退修之以孝养也反登歌清庙既歌而语以成之也言父子君臣长幼之道合德音之致礼之大者也下管象舞大武大合衆以事達有神兴有德也正君臣之位贵贱之等焉而上下之义行矣有司告以乐阋王乃命公侯伯子男及羣吏曰反养老幼于东序终之以仁也是故圣人之记事也虑之以大爱之以敬行之以礼修之以孝养纪之以义终之以仁是故古之人一举事而衆皆知其德之备也古之君子举大事必慎其终始而衆安得不喻焉祭义篇云祀先贤于西学所以教诸侯之德也食三老五更於太学所以教诸侯之弟也是故乡里有齿而老穷不遗强不犯弱衆不暴寡此繇大学来者也又孝经子曰昔者明王事父孝故事天明事母孝故事地察长幼顺故上下治天地明察神明彰矣故虽天子必有尊也言有父也必有先也言有兄也孝弟之至通於神明光於四海无所不通诗云自西自东自南自北无思不服祭义篇曾子曰夫孝置之而塞乎天地溥之而横乎四海施诸後世而无朝夕推而放诸东海而準推而放诸西海而準推而放诸南海而準推而放诸北海而準诗云自西自东自南自北无思不服此之谓也孟子云以力服人者非心服也力不赡也以德服人者中心悦而诚服也如七十子之服孔子也诗云自西自东自南自北无思不

服此之谓也荀子云志意定乎内礼节修乎朝法则度量正乎官忠信爱利形乎下故近者歌讴而乐之远者竭蹶而趋之四海之内若一家通達之属莫不从服夫是之谓人师诗云自西自东自南自北无思不服此之谓也愚按辟雍之说莫重于养老养老本于天子之孝悌而因以教天下之孝悌此以善养人之大者故圣王尽心焉】考卜维【礼记作惟下同】王【阳韵】宅【礼记作度】是镐京【庚韵亦叶阳韵居良翻】维龟正之武王成【庚韵亦叶阳韵辰羊翻】之武王烝哉【赋也考说文云老也父之称也礼父亡称考仪礼卜葬其父某甫考是也或引书言奔走事厥考厥长又苍颉篇曰考妣延年则明非死生之异称矣镐虽武王所都而实营於文王之世故曰考卜盖卜云其吉而後营之按逸周书文王受命之九年时维暮春在酈谓太子发曰吾语汝则文王固尝居镐矣特不尝居耳曰维王者言至今日遂为兴王之地也宅是镐京维龟正之二句相聯看宅尔雅云居也正犹定也郑云谓得吉兆言武王所以居是镐京者以文王当日契龟之时龟已出吉兆以正告之故武王遂决意往迁于彼也然则文王何以不迁也曰时之未至文王犹可以无迁可以无迁而遽迁焉则为棘其欲矣故文王留之以有待也听後人之为之也成说文云就也郑云武王伐纣定天下成龟兆之占也孔云龟正定其吉云此地可居居之而得天下是为成龟兆之占也坊记子云善则称人过则称己则民让善诗云考卜惟王度是镐京惟龟正之武王成之前称武王为王后已而为天子则称皇王至此举諡者诗作于武王既丧之後故述其事而叹美之也言成之正与首章言聿观厥成相应】丰水有芑【纸韵】武王岂不仕【纸韵晏子春秋作事】诒【晏子春秋作贻】厥孙谋以燕【後汉书作宴】翼子【纸韵】武王烝哉【兴也前言武王受命之事已毕至此又举其为子孙计深远者言之为篇末余波而实训嗣王图任旧人以申章首发端即言通骏有声之意芑严以为维糜维芑之芑按经言丰水有芑恐非指嘉谷言孔以丰水之傍有芑菜者近之陆玕云芑菜似苦菜茎青白色摘其叶白汁出脆可生食亦可蒸为茹青州人谓之芑西河雁门芑尤美胡人恋之不出塞服官曰仕丰水兴武王芑兴仕者丰水润泽之地则芑菜丛生焉武王圣仁之君则仕者凑集焉凡生於武王之时岂有抱德怀才而不仕者乎是虽仕者之归心于武王亦繇武王汲汲旁求一念有以召致之武成言成王建官维贤位事维能论语言武王修废官四方之政行焉举逸民天下之民归心焉此士之所以愿立於朝而乐为之用也又晏子春秋云景公与晏子登寝而望国公愀然而叹曰使後嗣世世有此岂不可哉晏子曰臣闻明君必务正其治以事利民然後子孙享之诗云武王岂不仕诒厥孙谋以燕翼子今君处佚怠逆政害民有日矣而犹出若言不亦甚乎此解与毛郑同朱传所谓丰水犹有芑武王岂无所事乎诒厥孙谋以燕翼子则武王之事也於理亦通并存之诒说文云遗也当通作贻郑云犹传也说文云虑难曰谋燕通作晏说文云安也翼即羽翼之翼孙所该者远子则指成王也严云人材武王无不用之盖欲传其孙之谋而燕安翼辅其子耳曾孙玄孙以下皆孙也谋及於孙之远则其子可知矣圣人於子孙之计莫大於遗之以人材所谓敷求哲人俾辅于尔後嗣也班彪云昔成王之为孺子出则周公召公太史佚入则太颠闳夭南宫括散宜生左右前後礼无违者故成王一日即位天下旷然太平左文三年秦伯伐晋遂霸西戎用孟明也君子是以知秦穆公之为君也举人之周也与人之壹也子桑之忠也其知人也能举善也诗曰诒厥孙谋以燕翼子子桑有焉子桑公孙枝字举孟明者观此可以得诗意矣表记云子言之仁有数中心憺怛爱人之仁也诗云丰水有芑武王岂不仕诒厥孙谋以燕翼子数世之仁也徐光啓云帝王之视天下也重为万世之子孙谋即为万世之天下谋也】文王有声八章章五句【序云继伐也武王能广文王之声卒其伐功也愚按此特因既伐于崇

一语而敷衍之其实诗为迁都咏不为伐功咏也朱子谓此诗言文王迁丰武王迁镐之事是已而从孔氏之说谓上四章言文王後四章言武王然於文王则先称文王後称王后於武王则先称皇王後称武王错互不伦难为解说苏辙谓文王其正号於文王後言王后者以老而称王於武王先言皇王者以即位而称王故也夫文王既皆称王矣何得有王后皇王之异且商命未革文武果曾称王否乎观泰誓武王称文王止曰文考至大诰武成追王始称文王此文王生前不称王之验武王牧野誓师所告者不过司徒司马司空犹未备天子六卿之制则亦武王为诸侯时不称王之验也是皆关系名教之大者故不可以不辨又前五章既皆以为都丰之事至六章始言镐京而辟雍之美反在宅镐之前其於先後更失伦次唯潜谷邓氏以後六章皆言武王深得其解今从之先儒又谓维清奏象舞合此诗为九德之歌所谓颂合大雅例如此未知何据】

思文郊祀后稷以配天之乐歌【出申培说】周公所作也【孔穎達云孝经云昔者周公郊祀后稷以配天是后稷配天周公为之又国语云周文公之为颂曰思文后稷克配彼天是此诗周公所作也按祭法云周人禘尝而郊稷公羊传云郊则曷为必祭稷王者必以其祖配王者则曷为必以其祖配自内出者无匹不行自外至者无主不止史记云王者天太祖郊特牲云万物本乎天本乎祖此所以配上帝也郊之祭也大报本反始也然郊礼有二而皆配以后稷家语定公问于孔子曰寡人闻郊而莫同何也孔子曰郊之祭也迎长日之至也大报天而主日配以月故周之始郊其月以日至其日用上辛至於啓蛰之月则又祈谷于上帝此二者天子之礼也公曰郊之牲若何孔子曰上帝之牛角蜚栗必在涤三月后稷之牛惟具今思文之诗据序及蔡邕独断皆以为祀后稷配天矣然未知其为迎长日之郊与抑为祈谷之郊与曰此迎长日之郊也于何知之曰于贻我来牟一语知之郝敬云冬至郊祀惟二麦生易所谓复见天地之心者也或又问此郊也即圜丘之郊乎曰即圜丘之郊也祭法历叙四代禘郊之礼禘文皆在郊上郑玄不察疑禘更大于郊於是以前祭法之禘为祀天圜丘以尝配之而於稷之配禘则直以为正月配祀感生帝于南郊而已感生帝者东方青帝灵威仰周为木德威仰木帝言以后稷配苍龙精也王肃駁之谓汉世英儒自董仲舒刘向马融之伦皆言周人祀昊天于郊以后稷配无如玄说配苍帝也且诗云克配彼天苍龙不过天之司吏而稷所作合仅仅如是耶若祭法先言禘後言郊者杨氏引大传云礼不王不禘王者禘其祖之所自出诸侯只及其太祖大夫惟有功始禘其高祖所论宗庙之祭隆杀远近尔於祀天乎何与郊止于稷而禘上及乎尝禘之所及者最远故先言之尔此其论确矣愚于天与上帝之辨亦兼取郑氏六天之说然五帝即五行谓是天之一体则可祀天而兼及五帝礼之所有也若谓一代必各祀其感生帝则纬之陋说虽秦汉多祖述之明礼之君子所不敢信也又周礼夏官节服氏郊祀裘冕二人执戈送逆尸从车罗泌云舜入唐郊丹朱为尸晋祀夏郊董伯为尸则祭天有尸矣而公羊白虎通五经异义俱以为祭天无尸则似失之按张子厚云天地山川之类非人鬼者恐皆难有尸节服氏言郊祀有尸不害后稷配天而有尸也张说似近理灵星之尸亦同此意但未知於古制有合否耳】

思文后稷【职韵】克配彼天立我烝民莫匪尔极【职韵】贻【汉书作飴陆德明本作诒】我来【汉书作厘文选注作嘉】牟【汉书字书俱作麋文选注陆本俱作 】帝命率育无此疆【丰氏本作疆】尔界【叶职韵讫力翻】陈常于时夏【此篇但用稷极界三字为

韵亦变体 赋也严粲云后稷人臣而周人推以配天疑於追崇之过此诗发明之思文郑玄云周公思先祖有文德者孔云后稷有此文德故周公思之韦昭云经纬天地曰文万时华云后稷教稼本是小民本分中极质极朴之事然经天纬地俱从艰食中出天下文章孰大于是故曰思文一说万尚烈云史讚尧而曰文思稷曰思文一也特字之上下不同尔彼注文思者曰道德纯备曰文諡法谋虑不愆曰思则以此二义加于后稷岂不当乎亦通后稷解见生民篇克能也配通作妃说文云匹也曹氏云天地能生之而不能养之苟不得其养则亦弗克遂其生矣惟后稷能养人故其功足以配天矣刘公瑾云真可配天故谓之克配如文王之克明德也立我烝民二句正克配之实立即为生民立命之立张文潜云免於仆之谓立立我烝民者食而後免于颠仆之患也烝衆也按火气上行为烝人衆则气热故烝有衆义莫通为无音之转也匪通作非字之近也极徐锴云屋脊之栋也旧注训极为中义盖本此郑云天下之人无不於尔时得其中者言反其性严云民心莫不有是中而阻饥则失其常心自后稷播时百谷存立衆民之命而後各复其受中之性是民之中皆是后稷之中也天能予民以中后稷能全民之中天以徧覆为德后稷则達天之德推后稷以配天信无慊矣又云中者民心所自有特因后稷有以养之而勿丧耳非后稷以己之中予之而曰莫匪尔极何也后稷之心与斯民之心同此一中非二物也斯民既全其中则斯民与后稷同此心亦同此理更无差别民之中即后稷之中故曰莫匪尔极康衢所咏尔极洪范所谓汝极天保所谓尔德君牙所谓惟尔之中其意一也左成十六年申叔时曰德以施惠刑以正邪祥以事神义以建利礼以顺时信以守物民生厚而德正用利而事节时顺而物成上下和睦周旋不逆求无不具各知其极故诗曰立我烝民莫匪尔极是以神降之福时无灾害民生敦龐和同以听莫不尽力以从上命周语芮良夫曰夫王人者将导利而布之上下者也使神人百物无不得其极故颂曰思文后稷克配彼天立我烝民莫匪尔极杨观光云禹平水土易巢窟为庐舍凡万世之民免鱼龙之患者皆禹安之通计得什之五契制人伦以仁义还心性凡万世之民免禽兽之忧者皆契成之通计得什之七稷教稼穡以饮食通天地之和凡万世之民具饥渴之质者稷生之通计得什之十故禹之功多于南而少于北契之泽深于贤而浅于愚稷之德无贵贱贫富山泽高下羣蠢飞走粒食罔不赖天美报之或身或子孙皆有天下而微具分别夏四百殷六百周八百是也貽我来牟据冬至郊祀时所见之物言之也说见本篇小引下貽尔雅说文皆云遗也遗犹与也来牟麦名说文云来者周所受瑞麦一来二缝其字象芒束之形又云天所来也故为行来之来牟通作麤孟子云今夫麤麦播种而耰之其地同树之时又同淳然而生至于日至之时皆熟矣谓此牟也但来牟二字说文每合言之不别其为一物二物张揖广雅以麤为大麦来为小麦而罗愿则引吕氏春秋曰孟夏之昔杀三叶而获大麦注昔终也三叶荠苎苎?冥也牟之始盖后稷受之于天故诗曰貽我来牟又曰於皇来牟刘向以为厘麤麦也始自天降此皆以和致和获天助也然则来麤一物明矣愚按孟子言麤麦以麦种非一故系麤于麦上所以别异于他麦也麤既得专名矣更加以来之名无乃贅累疑从广雅为允不然孟子何以云麤麦不云来麤乎来牟之始虽或为天所赐而此诗则第言后稷教民树艺至今人传习之谓之貽我耳非真如刘向所云武王周公继政诸侯和于下天应报于上有若後世雨粟之事也而郑笺乃更过信伪泰誓之言谓武王渡孟津白鱼跃入舟出涘以燎後五日火流为乌五至以谷俱来且引诗说谓乌以谷俱来者所以纪后稷之德其荒唐不根甚矣帝命率育二句祈祷之辞也以形体言之谓之天以主宰言之谓之帝命犹使也率通作卫循也徧历之意育尔雅说文皆云养也对彼为此对我为尔皆互文也疆本作畺说文云界也从畺三其界画也界说

文云境也按疆既训界则二义无别以字求之疆从二田是总彼此之田界而言界从田从介介者画也则但主言一田之界耳言此时也我民既传后稷之教以艺此来牟矣帝其使三时不害普天之下各得其养而无此疆尔界之殊乎孟子曰其有不同则地有肥饶雨露之养人事之不齐也是则此疆尔界之所为异而诗之所深虑也大戴礼载古祝辞曰皇皇上天照临下土集地之灵降甘风雨庶物羣生各得其所靡今靡古维予一人某敬拜皇天之佑正与此诗同意段氏云诗言来牟者二盖麦者五谷成熟之最先一岁丰稔之占故养民者以此为善罗云麦者接絶续乏之谷夏之时旧谷已絶新谷未登民於此时乏食而麦最先故以为重董仲舒曰春秋於他谷不书至无麦禾则书之以此见圣人於五谷最重麦与禾也因说武帝劝关中种麦而明堂月令亦有仲秋劝种麦之文其有失时行罪无疑凡以接续所赖惧民不以为意耳麦比他谷独隔岁种故号宿麦说者或以为首种陈常于时夏指今日所行郊祀之礼而言冬至郊祀岁一举行以此为常故曰陈常时之言是亦音通也夏即九夏之夏按周礼太司乐职云凡乐事大祭祀宿县遂以声展之王出入则令奏王夏尸出入则令奏肆夏牲出入则令奏昭夏郊祀大祭祀也循常礼而行当奏此三夏故曰陈常于是夏所以着其为盛礼也】

思文一章八句【吕叔玉谓此诗即国语金奏之三所称渠者而郑玄为之说曰渠者大也美稷配天王道之大也其说固已迂谬难通韦昭谓即九夏中之纳夏而朱子又引或曰此所谓纳夏者亦以其有时夏之语而命之也然於纳之义何取要皆影响不足信详见时迈篇小引下子贡传阙文】

诗经世本古义卷十之上

卷十之中

<经部,诗类,诗经世本古义>

钦定四库全书

诗经世本古义卷十之中

明 何楷 撰

生民郊祀后稷以祈谷也礼启蛰之月上辛之日祈谷於上帝以后稷配为田功所自始也【夏小正云正月启蛰月令云孟春之月天子乃以元日祈谷於上帝左襄七年孟献子曰郊祀后稷以祈农事也是故启蛰而郊郊而後耕家语孔子曰郊之祭也迎长日之至也周之始郊其月以日至其日用上辛至於启蛰之月则又祈谷於上帝马端临云古者一岁郊祀凡再杨氏云冬至之郊为大报天正月之郊为祈谷二郊不同而皆配以后稷按周礼祀天与祀上帝异称各有所谓孝经言周公郊祀后稷以配天宗祀文王於明堂以配上帝亦各异文若祈谷之郊据月令与家语皆以为事上帝而此诗末章亦曰上帝居歆此以知其为祈谷也其上章曰以与嗣岁益以明末章所言豆登之祀在正月也因祈谷而详述后稷之农事人因述后稷之农事而推本於所自生见天为粒食烝民而生后稷此其所以配也后稷於长至配天其乐歌则思文之诗於元日配上帝其乐歌则生民之诗思文简而生民繁者配天止浑然一天而已故以简质为尚配上帝则兼天与五帝其礼繁故其辞亦繁也罗泌谓日至天帝用事之始故事天帝孟春五帝用事之始故祀五帝郊之必用上辛者何也取其新洁莫先也祈谷之郊称元日者何也元之为言善也甲乙丙丁等谓之日以用辛故称元日犹下文言乃择吉辰天子亲载耒耜则以子丑寅卯等谓之辰耕用亥日故称元辰也祈谷与长至两郊冬至日初长故云迎长日之至而郑玄以二祭为一且引易纬谓三王之郊一用夏正又以为春分日渐长曰长至於论疎矣祭天而必以祖配者孔颖达谓天无形象推人道以事之当得人为之主是也郊特牲则云万物本乎天人本乎祖此所以配上帝也郊之祭也大报本反始也愚谓长至之郊稷固以祖配若祈谷之郊稷寔以功配无教民稼穡之功安得祈谷配帝乎又鲁郊以夏正孟春家语载孔子谓鲁无冬至大郊之事降杀於天子是以不同叶适云鲁虽得郊不得同於天子故使因周郊之日以次上辛三卜不从至建寅之月而止乃不郊书於春秋者甚明则鲁郊殆周祈谷之郊而已此诗疑亦周公所作太史公云夫天下称颂周公言其能论歌文武之德达大王王季之思虑爰及公刘以尊后稷也】

厥初生民【真韵】时维姜嫄【叶真韵鱼伦翻】生民如何克禋克祀【纸韵】以弗【丰氏本作祓】无子【纸韵】履帝武敏歆【句朱子以歆字属下句读无此文法】攸介攸止【纸韵】载震载夙【屋韵亦叶职韵相即翻】载生载育【屋韵亦叶职韵曰逼翻】时维后稷【职韵 赋也厥乃发石当通作歆从欠从苐欠说文云张口气聅也苐音逆说文云不顺也盖初张口而气未顺故以为发语辞初说文云始也民泛指天下之人也郑樵云民赖五谷以生其初生此民者谁与是维姜嫄也以后稷生於姜嫄故也张文潜云姜嫄生后稷而谓之

生民者盖后稷教民食食者民待之以生故也故思文祀后稷之诗曰立我烝民莫非尔极盖免於死之谓生免於仆之谓立食而後免於死亡颠仆之患则后稷之於民寔生之者也时之言是也姜姓也炎帝之後晋语云黄帝以姬水成炎帝以姜水成成而异德故黄帝为姬炎帝为姜也嫫说文以为周弃母字郑笺以为名未知其审列女传云郤侯之女也诸载记俱作郤惟说文吴越春秋作台罗泌路史云后稷母有骀氏鲁东郤地今沂之费县南故骀亭是世地接齐邾亦作台故越使鲁还邾田封境至於骀上莒人伐我围台泊哀公时齐乱景公子荼迁於骀则入齐矣非武功之郤也毛传云后稷之母配高辛氏帝焉郑玄云姜嫫当尧之时为高辛氏世妃按高辛者帝啻之号吴越春秋史记皆以姜嫫为帝啻元妃大戴礼云帝啻卜其四妃之子皆有天下上妃有郤氏之女曰姜嫫生后稷次妃有娥氏之女曰简狄生契次妃陈锋氏之女曰庆都生帝尧下妃姬訾之女曰常仪生摯孔颖達云家语世本其文亦然其後刘歆班固贾逵马融服王肃皇甫谧等皆以为然郑信纬以命历序云少昊传八世颛顼传九世帝啻传十世则尧非啻子稷年又小於尧则姜嫫不得为啻妃谓为其後世子孙之妃也张融云若使稷契必啻子如史记是尧之兄弟也尧有贤弟七十不用须舜举之此不然明矣啻为稷契之父帝啻圣夫姜嫫正妃配合生子人之常道则诗何故但叹其母不美其父罗泌驳之云传称尧以契为司徒弃为农师及得舜为司徒然後以契为司马则尧非不用之也特至舜始大任焉故太史公以为尧皆举用而未有分职传记之说略可见矣又世本大戴之书言昔帝啻卜四妃之子皆有天下而稷之後为周周人既上推后稷为啻子矣何所疑耶罗革亦云王充每言稷仕尧为司马而伏氏书及吕氏春秋皆云尧使弃爲田田乃古农字见亢仓子故文子淮南子皆云尧之治也舜为司徒契为司马禹为司空稷为大田师乃大农师也愚按罗氏父子所言稷契用於尧朝既有验矣若啻之後摯嗣为帝摯立九年而废诸侯共尊尧为帝亦以摯尧之年长子稷契论长幼不论嫡庶或古道固然尧既嗣啻为帝则为啻後者当属尧之子孙稷不得为啻後此周人所以特立姜嫫之庙而咏歌亦止及嫫彼有为尔也然祭法言周人禘啻而郊稷所谓禘者乃推其始祖之所自出而以始祖配之也则周人亦何尝不祀啻乎又嫫若非啻妃则何得行郊禘之礼此理甚明无容曲说生民如何问辞也此通篇之起语言所谓姜嫫之能生天下之民者何也严粲云生后稷所以生此民也下说姜嫫生后稷之事克能也能尽其礼也周礼大宗伯职云以禋祀祀昊天上帝郑玄云禋之言烟周人尚臭烟气之臭闻者也袁准云禋者烟气烟煴也天之体远不可得就圣人思尽其心而不知所繇故因烟气之上以致其诚外传曰精意以享禋此之谓也孔云郑以禋者惟祭天之名故书称禋於六宗郑皆以为天神此下说郊禘之祀郊必祭天则此禋为祭天也郑云弗之言祓也禋祀上帝於郊禘以祓除其无子之疾而得其福也毛云古者必立郊禘焉玄鸟至之日以太牢祠於郊禘天子亲往后妃率九嫔御乃礼天子所御带以弓韉受以弓矢於郊禘之前孔云经言禋祀未知所祀之神以妇人无外事不因求子之祭无有出国之理又禋祀以求子惟禘为然故知禘祀是祀禘也自玄鸟至之日以下皆月令文惟彼郊作高耳玄鸟燕也燕至在春分二月之中以此时感阳气来集人堂宇其来主为产乳蕃滋故王者重其初至之日用牛羊豕之太牢祀於郊禘之神盖祭天而以先禘配之其祭之时天子亲身往敬其事故亲祭之於时后妃率九嫔从之未有孕而往者求其早有孕也乃礼天子所御谓已被幸者使大祝酌酒饮之於郊禘之庭以神之惠光显之也又带以弓之韉衣以授弓矢使执之於郊禘之前弓矢者男子之事冀其所生为男也郊天用特牲而此祭天用太牢者以兼祭先禘之神异於常郊故也祀天而以先禘配之义如后土祀以为社月令注云燕以施生时来巢人堂宇而孚乳嫁娶之

象也媒氏之官以为候变媒言祿神之也曹植云玄鸟至时陰阳中万物生故於是时以三牲请於高祿之神居高明之处故谓之高因其求子故谓之祿黄子道周云高祿或曰高辛氏或曰有娀氏郑氏曰礼於高祿之下其子必得天材盖古云然也又蔡邕束皙皆云高祿人之先也陈际泰云祿祿除之义所以禱於郊以祿除不祥故用弓矢後世射弧星即其遗也履足所踐也帝毛云高辛氏之帝也孔云以二章卒章皆言上帝此独言帝不言上故以为高辛氏帝也武尔雅云迹也按武何以训迹武字从戈从止当是谓兵戈所止故借以为足迹所止之义左氏言止戈为武乃有为之言未必是武之本训也敏说文云疾也毛云从於帝而见於天将事齐敏也歆说文云神食气也殷大白云敏即肤敏之敏歆即居歆之歆孔云解姜嫄得踐帝迹所繇以高辛之帝亲行禋祀姜嫄行在後而踐帝之迹即上传所云后妃率九嫔御是也踐足者直谓隨後行耳非必以足躡其踐地之处也将事齐敏者谓行祀天之事齐敬而速疾也鬼神食气谓之歆谓祭而神飨之也文献通考载宋高宗十六年礼部言窃详生民之诗言履帝武敏歆先儒以敏为拇谓姜嫄履巨迹之拇以歆郊媒之神是生后稷以为从帝嘗祀祿神之应其说颇附会玄鸟生契之意如诗言绳其祖武传言夫子步亦步趋亦趋皆继踵相因循之意帝嘗行祿祀之礼姜嫄踵而行之疾而不迟故上帝所歆居然生子以见视履考祥其应亦速而後世弗深考经旨传注怪诡禰祥并为一谈至北齐妃嫔参飡黷而不蠲去礼逾远历世非之攸尔雅云所也孙炎云介者相助之义攸介以姜嫄助祭言攸止则谓祭毕之时也此起下之语当连载震载夙一气说震说文云劈历震物者尔雅以为动也按左传云邑姜方震又云后婚方震与此震不同彼震通作娠此但当如字解以震而生乃见其异郑云夙之言肃也按说文训夙为早敬也早敬亦有肃义盖状其战凛不安之意言姜嫄助祭甫毕而身如有所感如为雷所震动而肃肃然不安此盖上帝歆飡后稷将生故显其灵异使之然也胡宏着皇王大纪谓姜嫄与帝嘗禋祀上帝步从帝而归忽然心动是也又云天地之间有气化有形化人之生虽以形相禪固天地之精也姜嫄志之所至气亦至焉气之所至精亦至焉於是有子不可谓怪生产育养也既生而育养之及其长也则为后稷以封为诸侯故称后以为稷官故称稷周语云稷为大官名官以稷者以其职在教稼稷为五谷之长因以命官孔云稷字度辰今按严氏谓古无巨迹之说特列子异端司马迁好奇郑氏信?纬以帝武疑似之辞藉口而为是说耳列子云后稷生乎巨迹河图云姜嫄履大人迹生后稷中候稷起云苍耀稷生感迹礼纬云后稷以履大迹而生史记云姜嫄出野见巨人蹟心欣然说欲踐之踐之而身动如孕者吴越春秋亦云姜嫄为帝嘗元妃年少未孕出游於野见大人迹而观之中心欢然喜其形像因履而踐之身动意若为人所感後妊娠恐被淫佚之祸遂祭祀以求无子竹书注则云姜嫄助祭郊祿见大人迹履之当时歆如有人道感已遂有身而生男是其说大都相类而列女传之说又较异传云姜嫄者郤侯之女也当尧之时行见巨人迹好而履之归而有娠浸以益大心怪恶之卜筮禋祀以求无子邓元錫祖之谓有郤女未有适也故稷生长有郤因即家室焉其後禘所自出之帝莫可名命之曰感生帝已焉晋世张华亦有是论谓思女不夫而孕后稷生乎巨迹伊尹生乎空桑是也果如所言则嫄为处子而以淫佚闻悖於理而妨於教其谬明矣惟是履迹之说相传已久为有为无讫无定论韩诗说谓圣人皆无父感天而生郑玄云诸言感生得无父有父则不感生此皆偏见之说也商颂曰天命玄鸟降而生商谓娥简吞黿子生契是圣人感见於经之明文刘媪是汉太上皇之妻感赤龙而生高祖是非有父感神而生者也且夫蒲卢之气姬煦桑虫成为已子观乎天气因人之精就而神之反不使子贤圣乎是则然矣又何多怪张子厚云天地之始固未尝先有人也则人固有化而生者矣盖天地之

气生之也苏子繇云凡物之异於常物者其取天地之气常多故其生也或异麒麟之生异於犬羊蛟龙之生异於鱼鼈物固有然者矣神人之生而有以异於人何足怪哉此皆信履迹之事为有者也王充谓太史公三代世表言三王五帝皆黄帝子孙自黄帝转相生不更稟气於天作殷本纪言契母简狄浴於川遇玄鸟坠卵吞之遂生契焉及周本纪言后稷之母姜嫄野出见大人迹履之则妊身生后稷焉夫观世表则契与后稷黄帝之子孙也读殷周本纪则玄鸟大人之精气也二者不可两传而太史公兼纪不别按帝王之妃不宜野出浴於川水今言浴於川吞玄鸟之卵出於野履大人之迹违尊贵之节误是非之言也欧阳修云所谓天生圣贤者其人必因父母而生非天自生之也诗曰维岳降神生甫及申申甫皆父母所生也且天既自感姜嫄以生后稷不王其身而王具一千岁後之子孙天意果如是乎无人道而生子与天自感於人而生之在於人理亦必无之事可谓诬天也严云神怪之事圣人所不语若诗言巨迹圣人删之久矣毛之不信神怪其说甚正天地固有化生者此可以言鸿荒之始不可以言稷或又以为神人之生必有异於人辞则美矣非事实也古今大圣人莫如帝舜文王孔子其生不闻有异於人也此皆决履迹之事为无者也愚谓以履迹为有则稷之生涉怪以履迹为无则稷之弃无因姜嫄於从高辛郊禘之时偶缘心动而有孕事诚有之惊疑过甚辄弃所生祇因向来不察履帝武三字之义谬以履大人迹附会之遂使异论纷然徒为图?家嚆矢耳】

诞弥厥月先生如达【曷韵说文丰本俱作本】不拆【依注疏本今按说文无拆字诸本皆作坼说文丰本俱作坼】不副【说文丰本俱作副】无菑【丰本作咎】无害【叶曷韵何葛翻】以赫厥灵【青韵】上帝不【丰本作丕】宁【青韵丰本作□】不【丰本作丕】康禋祀【纸韵】居然生子【纸韵 赋也大言曰诞谓大其事而言之也後仿此弥尔雅云终也按说文无弥字当作𢇛说文云弛弓也射既毕则弛弓故有终竟之义弥厥月者郑云终人道十月而生也大戴礼易本命篇子曰夫易之生人禽兽万物昆虫各有以生或奇或偶或飞或行而莫知其情惟达道德者能原本之矣天一地二人三三三而九九九八十一一主日日数十故人十月而生八九七十二偶以承奇奇主辰辰主月月主马故马十二月而生七九六十三三主斗斗主狗故狗三月而生六九五十四四主时时主豕故豕四月而生五九四十五五主音音主猿故猿五月而生四九三十六六主律律主禽鹿故禽鹿六月而生也三九二十七七主星星主虎故虎七月而生二九一十八八主风风主虫故虫八月化也其余各以其类也按史记谓姜嫄孕居期而生子以为不祥今观上章言禋祀下章言置之寒冰则稷以春分之月孕以冰坚之候生正足十月之数未见其周一年也或又沿古注以下文先生如达之达为小羊因有谓五月生之羔为羴六月生之羔为𦍋七月生之羔为𦍋曰如?者疑稷在孕止七月生也为其胎气未足恐难长养是以见弃今观七月生子世多有之未闻有虑其难养而弃之者况经文明曰弥月则七月之说尤可无疑矣先生者先乎后稷之生谓未生时也达通也以言语相通也旧说训达为羊子按羊子名牵经文乃达字非牵也姜嫄孕后稷已终十月之期此时后稷未生而如有神焉告语之者或闻之空中或得之梦寐皆是所以着其灵异也下文不坼四句正所达之语坼说文云裂也副本作副说文云判也愚按坼副即周礼所谓副辜大宗伯职云以副辜祭四方百物鬯人职云凡副辜用散小子职云凡沈辜候禋饰其牲羊人职云凡沈辜候禋衅积共其羊牲郑注谓副者副牲胷也辜之为言磔也磔者裂也与坼同义今支解人亦曰磔贾公彦云磔牲体者皆从胷臆解析之礼记月令曰九门磔禋是磔牲禋去恶气之礼也菑当依鲁颂作灾尔雅云危也按天火为灾当以降於天者言害说文云伤也天灾降则身与子或受其伤也赫火明盛之貌毛云神之精明称灵以赫厥灵者孔云天意以

此显明其有神灵也上帝以统乎天者言之宁说文云愿词也愚按丁宁以致其愿受之意谓之愿辞也神传上帝之意以达姜嫄谓尔孕期已足更不必虑恶气相侵而复有事於祓除为也虽磔禳之礼不行而可保尔之无灾无害以此显着上帝之灵异特传其保佑之意於尔不别有丁宁矣上章言载震载夙则姜嫄虽怀孕而心抱忧疑故神以此慰解之閼宫之诗云赫赫姜嫄其德不回上帝是依无灾无害弥月不迟是生后稷事正如此旧说以为姜嫄首生之易而比先祖於羊子既属不伦又谓圻副乃产妇身体割裂且别引帝王世纪言简狄剖背生契史记言陆终娶女湫孕三年不乳乃剖其左右脇各获三人之类罗泌引或者之言云后稷之生不圻不羴夏后辟背禹逆生故刑背稷顺生故不圻羴逆生者子孙逆死故桀王讨顺生者子孙顺亡故懿夺邑而已罗愿亦云感异而孕者其生亦异故禹母修己感石而生禹拆胷而出契母简狄吞燕卵而生契副背而出姜嫄履武其事类此宜乎有圻副灾害而今也生乃如羊子之易所以尊而颂之也皆荒唐不经岂可使上帝先祖闻之?斯甚矣康安也解见宾之初筵篇不康禋祀追王之典春秋所载亦是如此褚先生云弃之道中羊牛避不践也抱之山中山者养之又捐之大泽鸟覆席食之姜嫄怪之於是乃取长之尧知其贤才立以为大农姓之曰姬氏姬者本也诗人美而颂之曰厥初生民深修益成而道后稷之始也邹忠胤云尝历观传记齐顷公无野之弃野狸姬之卒有齐国楚若敖之弃也於菟乳之卒为令尹昆莫之弃也野马衔肉饲之卒王乌孙橐东明弃溷而豕呕之弃廋而马嘘之卒王扶余是皆有天意默宰於其间岂人所得而弃又何疑於生民之圣祖哉又按马融王肃皆以臆说谓后稷乃帝啻遗腹子姜嫄以寡居生子为衆所疑不可申说故弃之絶迂谬不成义理】**诞实匍**【陆本作扶】**匍**【职韵陆本作服】**岐**【叶职韵鄂力翻说文作?】**以就口食**【职韵】**艺之荏菹**【陆本作叔丰本作禾下同】**荏菹**【叶寘韵蒲寐翻】**禾役**【说文丰本俱作颖】**稷**【寘韵】**麻麦幪幪**【叶董韵母总翻】**瓜瓞嗶嗶**【董韵崔灵恩集注作萑萑集韵作□□ 赋也诞实解俱见前匍说文云手行也匍说文云伏地也克能也岐通作跂方言云登也梁益之间曰跂疑当依说文作?云小儿有知也克岐承上匍匍克疑起下以就口食言后稷稍长其始寔以手伏地而行已复能跂足而登既又能有知识明乎树艺之理以成就己之口食如下文所云是也一说岐疑为立而竦峻之貌亦通執本作執说文云种也尔雅云戎菽谓之荏菹孙炎云大豆也按齐民要术云凡区种大豆令相去一尺二寸区种荏令相去三尺则荏与大豆异樊光李巡郭璞皆云今胡豆崔寔云二月昏参夕杏花盛桑椹赤可种大豆罗愿云大豆以二月中旬种者为上时至三四月则费子吕氏春秋云得时之菽长茎而短口其叶二七以为族多枝数节兢叶蕃实大菽则圆小菽则博泛胜之云大豆生戴甲而出种土不可厚厚则项折不能长逵旆旆如旃旆之扬起也解见出车篇禾说文云嘉谷也二月而生八月而熟得时之中故谓之禾愚按此指稻黍稷言豳诗言禾麻菽麦孔谓麻与菽麦则无禾称故於麻菽麦之上更言禾字以总诸禾是也役毛云列也孔云人供役者在於行列禾无在役之义故知役为列言其行相当也按说文引此作禾颖於义较顺颖解见後章稷说文云禾采之貌采即穗字稷稷诗诂云禾多穗也麻子可食皮可绩为衣罗云麻之属总名麻别而言之则有实者别名苴而无实者别名枲贾思勰云夏至前十日为上时至日为中时至後十日为下时说文云麦芒谷秋穰厚穰故谓之麦麦金王而生火王而死月令云仲秋之月乃劝人种麦无或失时其有失时行罪无疑贾云八月中戊社前种者为上时下戊前为中时八月末九月初为下时小麦宜下种八月上戊社前为上时中戊前为中时下戊前为下时罗云麦者接絶续乏之谷夏之时旧谷已絶新谷未登民於此时乏食而麦最先熟故以为重幪当通作蒙茂

密之貌经先言荏菽次言禾次言麻麦者以种植之先後为次大豆最宜早种稻黍稷之类期不甚相远麻在夏至次之麦在仲秋最居後又或云麻与麦互相为候故齐民要术注谓麦黄种麻麻黄种麦亦良候也然则诗以麻麦连言者以此菽麻之利人不及禾麦故言艺菽即亟继以禾言艺麻即亟继以麦董仲舒云春秋於它谷不书至无麦禾则书之以此见圣人於五谷最重麦与禾也罗云郑司农注稻人称今时谓禾下麦为黄下麦言芟夷其禾於下种麦又注雍氏云俗间谓麦下为夷言芟夷其麦以其下种禾豆则是卒岁之间无旷土闲民矣瓜瓞解见縣篇嗥通作葦茂盛之貌瓜□所以佐食故附於五谷之後旆旆穠穠幪幪嗥嗥为其种植繁多故皆重言之荏菽等虽是嘉种而洪荒初辟尚襍草莱中稷儿时即能简而植之自有天后其聪明者史记言弃为儿时忆如巨人之志其游戏好种树麻菽麻菽美正谓此而列女传又称姜嫄之性清静专一好种稼穡及弃长而教之种树桑麻弃之性明而仁能育其教卒致其名则稷之树艺五谷寔本於姜嫄之教然诗中都无此意未足信也】 诞后稷之穡有相【去声】之道【皓韵亦叶有韵他口翻又叶宥韵徒候翻】萐【韩诗作拂】厥丰草【皓韵亦叶有韵此苟翻丰本作^廿】种之黄茂【宥韵亦叶有韵莫後翻】实方实苞【叶有韵补苟翻】实种实褰【宥韵亦叶有韵徐九翻】实发实秀【宥韵亦叶有韵忽久翻】实坚实好【叶有韵许厚翻】实颖实栗【质韵丰本作?】即有郇【白虎通作台】家室【质韵赋也此章是后稷已为农师而教民之事说文云谷可收曰穡但举穡者要其成而言也相毛云助也与洪范相協厥居之相义同上章言以就口食乃是成就己之口食此言有相之道则谓有相助小民之道孟子所谓后稷教民稼穡树艺五谷是也下文第萐丰草四句是言有相之道实发实秀三句则正与首句后稷之穡相应天下之人赖后稷教之而後有谷可收是天下人之穡即后稷之穡也故大言之而系其穡於后稷马邹云国语展禽曰昔烈山氏之有天下也其子曰柱能植百谷百蔬夏之兴也周弃继之故祀以为稷然则穡事非昉於稷而曲尽其道者则於稷乎昉吕氏春秋云后稷曰子能以窰为突乎子能藏其恶而揖之以陰乎子能使吾土靖而畎浴土乎子能使保湿安地而处乎子能使灌夷无淫乎子能使子之野尽为冷风乎子能使藁数节而茎坚乎子能使穗大而坚均乎子能使粟圆而薄糠乎子能使米多沃而食之强乎无之若何凡耕之大方力者欲柔柔者欲力息者欲劳劳者欲息棘者欲肥肥者欲棘急者欲缓缓者欲急湿者欲燥燥者欲湿上田弃亩下田弃畎五耕五耨必审以尽其深殖之度陰土必得大草不生又无螟蜮今兹美禾来兹美麦是以六尺之耜所以成亩也其博八寸所以成畎也耨柄尺此其度也其耨六寸所以间稼也地可使肥又可使棘人肥必以泽使苗坚而地隙人耨必以旱使地肥而土缓按繇此观之然则后稷相穡信自有道也又相亦训视史记云后稷成人好耕农相地之宜宜谷者稼穡焉民皆法则之吴越春秋亦云相五土之宜青赤黄黑陵水高下粢稷黍禾藁麦豆稻各得其理此以相作相地解亦通萐说文云道多草不可行也丰通作丰说文云草盛丰丰也种本作种说文云執也徐锴云布之也黄土色洪范曰土爰稼穡故五谷色多黄茂者美盛之貌苏辙云后稷之为稷官也虽萐稷丰草之地皆能以生嘉谷严云择其种之黄色而茂盛者种之按齐民要术云粟黍□梁 常岁岁别牧选好穗絕色者劓割高悬之即此所谓黄茂也方毛云极亩也孔云方者正方之义地皆方正有苗故以方为极亩据地满耳苞即集於苞栩之苞李巡云物丛生曰苞吕氏春秋云凡苗之患不俱生而俱死虚稼先死衆盜乃窃望之似有余就之则虚农夫知其田之易也不知其稼之疏而不适也知其田之际也不知其稼居地之虚也不除则芜除之则虚此事之伤也故亩欲广以平 欲小以深慎其种勿使数亦无使疏晦广以平则不丧本茎生有行故邀长弱不

相害故邀大衡行必得纵行必术正其行通其风苗其弱也欲孤长也欲相与居其熟也欲相扶是故三以为族乃多粟按观此可以明寔方实苞之说方以垄亩之地形言苞以播种之位置言种郑云生不褫也孔云不褫谓不稂不莠也严云大田言既种既戒在未耕之前故为择其种此诗前言种之黄茂已是择种继言实种在方苞之後故为生不褫也褫即袖字从采从衣言衣袂之长如禾穗之垂也制字者以袖拟穗今作诗者又以穗拟袖故毛郑训此字皆以为枝叶长也发郑云发管时也孔云苗之将秀心如竹管穗发中而出故言发管也秀徐锴云禾实也字象有实下垂之形即穗也毛传及张衡乃云不华而实曰秀今按论语言秀而不实则秀与实有异论语所谓实即下文所谓坚故此秀字朱子解以为始穗是也坚孔云实皆坚成也好解见大田篇颖说文云禾末也孔云颖是禾穗之挺王安石云颖者垂末也寔繁硕故垂末也栗说文作𣎵木名也从木其实下垂故从 音调草木实垂 然象形栗字亦从此徐云栗实彙亦有芒颖与栗相类也按说文鹵部中只有此两字此诗言栗则直状禾实下垂之貌如栗耳左传嘉栗旨酒其义亦出於此实方实苞指始种之时言实种实褫以後则言禾生之次序始而苗实种实褫也中而秀实发实秀也末而实实坚实好实颖实栗也至颖栗则可以穡之时矣然节节皆有道存乎其中严云所以详言其成熟之次序者见稼穡之艰难非一日所能致或苗而不秀或秀而不实灭裂耕者报之亦灭裂鹵莽耘者报之亦鹵莽今后稷能教民以尽人事故其穡如此即说文云即食也从𠂔𠂔声徐云犹就食也按𠂔音香谷之馨香也故训即为即食又赵颐光谓从𠂔者寓戒也𠂔音节食欲有节故从𠂔声兼意今人皆不晓即义即有郃家室者谓就食於有郃盖享其土地之所入而於是建家室於此言始建国也郃在今陕西西安府乾州武功县亦作𡇗括地志云故𡇗城在武功县西二十二里古郃国也有后稷及姜嫄祠亦作𡇗左传魏𡇗芮岐毕吾西土也杜预注云后稷受此五国中候握河纪云尧即政七十年受河图封稷契臯陶赐姓号吴越春秋云尧遭洪水人民泛滥逐高而居尧聘弃使教民山居随地造区妍营种之术三年余行人无饥乏之色乃拜弃为农师封之台号为后稷姓姬氏列女传云尧使弃居稷官更国郃地遂封弃於郃号曰后稷及尧崩舜即位乃命之曰弃黎民阻饥汝后稷播时百谷其後世世居稷愚按详前数说则张融谓尧不用稷其疑可豁然矣孔云郃国当自有君所以得封后稷者或时君絶灭或迁之他所也旧说相传皆以有郃为后稷母家故毛传谓尧见天因郃而生后稷乃国后稷於郃命使事天以显神顺天命耳李氏云以郃为姜嫄父母之国於经无所考据罗泌云昔者帝尝取於有郃氏曰姜嫄生后稷而后稷之封亦曰𡇗说者咸谓帝尧以其母国封之然及太王复娶於有郃氏曰太姜是姜姓之𡇗至周犹在岂得云以是而封稷哉不知稷封之𡇗在於武功而姜姓之𡇗在於琅邪固不同也然则前事之缺失可胜悼哉愚按琅邪之𡇗固齐地乃有逢伯陵所居太姜祖也然太姜之有台据列女传作有吕台吕相似疑但当作吕耳吕姜姓也国语云尧胙四岳国命为侯伯赐姓曰姜氏曰有吕嫄固姜姓或是讹有吕为有台转讹为有郃未可知也】 诞降嘉种【说文作谷】维【说文作惟下同】秬维秠【叶纸韵普鄙翻】维糜【尔雅作𦉰】维芑【纸韵】恒【崔集注顔氏家训陆本丰本俱作亘下同】之秬秠【见上】是获是亩【叶纸韵母鄙翻】恒之糜芑【见上】是任【丰本作壬】是负【叶纸韵蒲美翻】以归肇祀【纸韵 赋也此章述后稷封郃之後教民播种嘉谷以供祭祀也降说文云下也朱子云降是种於民也严云后稷择嘉种而降於民以教其耕种孔丛子云魏王问子顺曰寡人闻昔者上天神异后稷而为之下嘉谷周以遂兴往中山之地无故有谷非人所为云天雨之反亡国何故也答曰天虽至神自古及今未闻下谷与人也诗美后稷能大教民种嘉谷以利天下故诗

曰诞降嘉种犹书所谓稷降播种农殖嘉谷皆说种之其义一也若中山之谷妖怪之事非所谓天祥也嘉说文云美也嘉种谓嘉谷之可种艺者下文秬秠麩芑是也上章言有相之道则已教民播种矣然所播者不过寻常荏菽黍稷麻麦之类此特举种之嘉者言之以其可以供祭祀故重之也閼宫之诗亦两言之其曰黍稷重穋植穉菽麦奄有下国俾民稼穡则前二章所言是也其曰有稷有黍有稻有秬奄有下土纘禹之绪则此章所言是也盖至此而修六府之事乃终也又金履祥谓秬秠麩芑自后稷始知种之故曰诞降嘉种亦通秬说文云黑黍也一糗二米以酿也按糗尔雅云谷皮也字书云麩糠也周礼鬯人郑氏注云酿秬为酒秬如黑黍一秬二米又答张逸云秠即皮糗亦皮也孔云言如者以黑黍一米者多一米亦可为酒鬯人之注必言二米者以宗庙之祭惟秬为重二米嘉异之物鬯酒宜当用之罗云古者荐筮有白黑形盐白为熬稻黑即秬也至藏冰则用黑牡秬黍以享司寒盖仿其方之色汉书律历志云度者分寸尺文引所以度长短也本起黄钟之长以子谷秬黍中者一黍之广度之九十分孟康云子北方北方黑谓黑黍也颜师古云子谷犹言谷子耳中者不大不小也言取黑黍谷子大小中者率为分寸也林兆珂云古之定律以上党所出秬黍之中者累之以生律度量衡後之人取此黍定之终不能协律或说秬黍之中者乃一糗二米之黍也此黍得天地中和之气乃生盖不常有有则一穗皆同二米米粒皆匀无大小得此然後可以定钟律古今所以不能协声律者以无此黍也他黍则不然地有腴瘠岁有凶穰则米之大小不同何繇如其中者此说为信然矣郭璞云汉和帝时任城生黑黍或三四实实二米得黍三斛八斗秠说文云一糗二米解已见前按尔雅释草云秬黑黍秠一糗二米郭云秠亦黑黍孔云秬是黑黍之大名秠是黑黍之中有二米者别名之为秠故此经异其文而尔雅释之若然秬秠皆黑黍矣罗駁之云秬与秠之所以异秠必不黑秬必不一糗二米也而郑民释鬯人既云秬如黑黍一秠二米则是以秠之状?之於秬郭氏解释草又曰秠亦黑黍则是又以秬之色?之於秠秬既欲兼秠之状秠又欲兼秬之色所以紊乱不复可推究者繇此故也又引汉和帝时任城生黑黍实二米以显二米耆为黑黍且任城所生汉之异事历世所未有诗歌后稷降播乃民事之常如必待任城所生而後降之则没世不可得矣至唐说者又言今上党民间黑黍或值丰岁往往得二米者但稀阔而得之不以充贡耳以此附成郭氏之说夫后稷所降既谓之种何得以丰岁偶有一二为说若皆以丰岁言之则禾有同颖麦有两岐又可待以为种耶今百谷之中一糗二米者唯麦为然舍麦未有二米者周所受瑞麦来麤一来二缝则秠者正此来麤尔但生氏臣工所称不同来麤又为?麤古者耒?丕三字相通故方言貔陈楚江淮之间谓之狹北燕朝鲜之间谓之?关西谓之狸彼虽说兽亦以一名通三音然则此禾亦然来犹狹也秠犹?也?犹狸也要是一物郑答张逸并以秠糗皆解为皮转失实矣予故详而论之愚按如罗说甚为近理常棣之华一跗辄生二萼江南呼为麦李者以此然则林言必一糗二米之黍方可定钟律又不足信矣麩本作藁尔雅说文皆云赤苗也郭云今之赤粱粟沈括云毳衣如璚璚赭色也稷之璚色者谓之麩麩色在朱黄之间似乎赭而极光?掬之粲泽熠熠如赤珠此自是一色似赭非赭又云麩乃黍属以色别之丹黍谓之麩罗云黍有赤黍黑黍黑黍已别见藁称赤苗恐是赤者其类有黏不黏如稻之有粳糯其不黏者以为饭黏者别名秠以为酒说文秠黍之黏者即谓此也黍之为物黏而香故馨馥黏?皆从之古人雪桃用黍以黍黏去桃毛也广志云有?东赤粱魏武帝常以作粥芑尔雅说文皆云白苗也郭云今之白粱粟罗云粱今之粟类古不以粟为谷之名但米之有孚殼者皆称粟今人以谷之最细而圆者为粟则粱是其类详见采芑篇季本云黍为总名分而言之则麩芑为粱粱似粟而大即今之膏粱也五谷中黍为最

美故言谷者常以黍为先恒说文云常也季云言他谷有时而可阙惟此四谷则当徧值岁以为常也获说文云刈谷也亩田亩也任朱子云肩任也苏云担也周伯琦谓字当作壬前後器物而中以横木壬之盖指事也负之为言背也按?有背音当是以音通故有背义旧说皆以为背负之也释名亦云置项背也朱子云既成则获而栖之於亩任负而归以供祭祀秬秠言获亩靡芑言任负互文耳肇尔雅云始也按肇本训肇原无始义当通作厘说文云始开也祀说文云祭无已也秬秠靡芑可以充酒醴粢盛之用前此祀典所未有至后稷诞降嘉种於是内外百神之祀始用之以祭明此礼始於唐虞而实后稷开之也毛郑谓后稷以此郊祀既重迺后稷先儒但主稷自祭其郤国之宗庙而言固亦甚矣季云祭祀之礼虽上古有之然当其初明水大羹荐血脾豚而已为饁之礼未备也至是既有嘉谷则为酒食而牲穀则加燔炙礼於是大成焉此盖自后稷始故云肇祀言其起事神之礼也殷大白云以上结束后稷功案】诞我祀如何或春【丰本作□】或掄【叶尤韵以周翻韩诗周礼注仪礼注俱作扰】或簸【丰本作□】或蹂【叶尤韵而猷翻说文作𡗗丰本作□】释【尔雅音义作淅】之叟叟【叶尤韵疎鳩翻尔雅音义丰本俱作漚漚陆本作漚漚】烝之浮浮【尤韵尔雅说文俱作燂燂】载谋载惟【支韵】取萧祭脂【支韵】取羝【陆本作抵】以軋【叶秦韵蒲盖翻】载燔载烈【叶霁韵力制翻】以兴嗣岁【霁韵亦叶泰韵与艾翻 赋也殷云我祀不承上说后稷乃诗人自我在时主之时矣如何问辞也自后稷始以嘉谷供祀我子孙今日踵而行之其制以为饁之法则如下文所云也孔云美而将说其事意欲说之故设辞自问上生民如何亦如此也春本作□说文云搗粟也从升持杵临臼上午杵省也古者黄帝臣豷父初作春孔云桓十四年谷梁传说宗庙之事夫人亲春楚语说天子禘郊之事王后必自春其粢诸侯宗庙之事夫人必自春其盛韦昭谓粢盛互文也言春不过如天子躬耕三推而已楚语又云天子亲春禘之盛韦昭亦云率后春之故言或不斥后夫人也掄说文云引也依毛传训抒臼则当作𡗗字古文通也𡗗从爪从臼徐云抒而下取之也会意簸说文云扬糠也从箕从皮指事皮亦声蹂本作□说文云复也徐云谓往来蹂践之也春掄簸蹂以事之次言之先搗之於臼中搗毕引之出臼扬去其米皮则成粢矣复言蹂者朱子谓蹂禾取谷以继之是也蹂最居先既蹂而後春之诗不言之春先而转缀之於末亦行文变幻处释通作释从米不从采说文云漬米也与接淅之淅义颇异彼乃汰米也漬者浸润之汰则但淘洗而已叟叟旧说依毛传皆以为释之声於义无据按叟与簸同音当通作簸说文云炊?也广韵云漉米器也释米於簸接续释之曰簸簸也烝说文云火气上行也浮浮当依尔雅说文作燂燂徐云烝气上出也孔云炊之於甑饔而烝之其气浮浮然言升盛也郑云释之烝之以为酒及簠簋之实谋朱子云卜日择士也刘公瑾云周礼太宰及仪礼少牢馈食皆前期十日帅执事而卜祭日之吉凶又按射义将祭必先习射以择士射中者得与於祭所择之士谓诸侯诸臣及所贡士也惟说文云凡思也凡者非一之辞祭义所谓思其居处思其笑语思其志意思其所乐思其所嗜是也此合下句皆指宗庙之祭言萧尔雅云荻也毛公李巡皆以为蒿今按尔雅又释蒿为藪则萧非蒿严云蒿者总名也曰萧者蒿之香者也故疏以为香蒿也陆玕云今人所谓荻蒿者是也或云牛尾蒿似白蒿白叶茎羸科生多者数十茎可作烛有香气故祭祀以脂熬之为香许慎以为艾蒿非也罗云萧盖甸师所供周礼甸师祭祀共萧茅先郑但作缩茅解之杜子春始读为萧祭脂郑谓祭牲之脂即信南山篇所谓膋也膋者牛肠脂也说文云戴角者脂无角者膏取萧祭脂者取香蒿及祭牲之脂襍烧之所以达其馨香之气使神歆飨之也其烧此二物又必合黍稷按礼记疏云一祭之中再度炳萧故郊特牲云取腍膋升首报阳也祭义亦云建设朝

事燔燎羶芎见以萧光以报气也此朝践炳萧也郊特牲又云萧合黍稷既奠然後炳萧合羶芎此馈熟炳萧也朝践即朝事谓荐血腥时也馈熟则荐黍稷时也羶者脂膋之别名芎香同字指黍稷也曲礼云黍曰芎合是也此宗庙之祭所用观祭义言设为宗祧及报气报魄等语可见灌鬯求诸陰炳萧求诸阳奏乐求诸天地之间罗云昔有虞氏尚气血腥燔祭用气商人尚声以声音之号诏告天地之间周人尚臭以郁合鬯灌以圭璋而使臭陰達於渊泉既奠然後炳萧合黍稷羶芎熟之而使臭阳达於牆屋臭陰以水而报魄臭阳以火而报气古人以神之道微不可执故求万物之理以为同声相应同气相求水流湿火就燥故用百物之英华庶几丽而留之此萧之气遶於牆屋则牆内乃熟萧之地故曰萧牆之内王应麟云古所谓香者如此韦雕五礼精义谓祭祀用香今古之礼并无其文梁天监初何佟之议郁鬯萧光所以达神与其用香其义一也考之殊无依据开元开宝礼不用羝说文毛传皆云牡羊也尔雅云羊牡羝牝羝郭云羝谓吴羊白羝者也博雅云吴羊牡一岁曰牡三岁曰羝罗云羝是牡羊之总名而羝乃吴羊之羝者古者大率多只言羝易曰羝羊触藩汉书匈奴徙苏武北海上无人处使牧羝羝乳乃得归专牧羝而望其乳犹秦要燕丹以乌白头马生角也羝性好抵触齐民要术畜牧之法大率十羊二羝以为羝少则不孕多则乱羣軼者祭道神之名其祭有二周礼夏官大驭职云掌驭玉路以祀及犯軼王自左驭下祝登受轡犯軼遂驱之及祭酌仆仆左执轡右祭两轂祭軼乃饮郑注云行山曰軼犯之者封土为山象以菩葛棘栢为神主既祭之以车轹之而去喻无险难也按王路所以祀故郑笺解祭軼谓自此而往郊以祭天盖本於此菩葛棘栢孔谓三者之中但用其一以为神主则可也又戎仆职云掌驭戎车犯軼如玉路之仪犯軼说文作范軼云出将有事於道必先告其神立坛四通树茅以依神为軼既祭軼轹於牲而行为范軼孔氏谓軼祭卿大夫用酒脯天子以犬诸侯以羊又名祖聘礼及诗云出祖是也又名道曾子问云道而出是也此出行之軼也月令中央土其祀中溜春祀户夏祀竈秋祀门冬祀行即周礼仪礼所谓五祀也郑注云冬陰盛祀之於行从辟除之类也行在庙门外之西为軼壤厚二寸广五尺轮四尺祀行之礼北面设主於軼上孔疏云按郑注聘礼云礼毕乘车轹而遂行惟车之一轮轹耳所以然者以两轮相去八尺今軼惟广五尺故知不两轮俱轹云北面设主軼上者以主须南向故人北面设之其主则郑注大驭云盖以菩葛棘栢为神主也此祭行之軼也据此诗下文有以兴嗣岁之语当主冬祭行言又祭法王立七祀曰司命曰中溜曰国门曰国行曰泰厉曰户曰竈诸侯立五祀曰司命曰中溜曰国门曰国行曰公厉大夫立三祀曰族厉曰门曰行庶人立一祀或立户或立竈郑氏以王立七祀为周制月令五祀为商制陈祥道駁之谓周官虽天子亦止於五祀仪礼虽士亦得五祀今祭法自七祀推而下之至於适士二祀庶人一祀非周礼也白虎通刘昭范曄高堂隆之徒又以五祀为门井户竈中溜春夏秋及中央之祀皆同月令惟冬祭井而不祭行不知何所据要之与经义不合隋唐参用月令之说五祀祭行及李林甫之徒复修月令冬亦祀井而不祀行林甫何人斯无足道者又周礼犬人职云凡祭祀供犬牲用牲物伏瘞亦如之注云伏谓伏犬以王车轹之故孔氏有軼祭天子以犬之说与此诗言取羝不合惟小子职云掌祭祀羞羊肆羊殽肉豆而掌珥於社稷祈於五祀羊人职云凡祈珥供其羊牲此为祭五祀用羊之明证益知取羝以軼为祭行非出行之軼也载之言则也言则有此物也毛传云傳火曰燔烈说文云火猛也盖谓以猛火炙之按周礼量人职云凡祭祀制其从献脯燔之数量燔即楚茨篇或燔或炙之燔祭礼献以燔从脯说文以为乾肉疑即此所谓烈也从献者谓从於献酒之肉炙也数谓多少量谓长短如仪礼脯十脰各长尺二寸之类季云燔烈兼宗庙軼祭而言盖庙与軼皆有尸所以为尸羞

也按曾子问云既殡而祭五祀尸入三饭是五祀有尸之证也严云上自宗庙下至輶祭羣祀该举之矣愚按此承上章秋牧之後而言一岁之中四时有祭然秋物告成始备祀事在宗庙则为秋烝冬尝至於冬祀行则祀无不举而今岁之事终矣故继之曰以兴嗣岁兴起也嗣岁郑谓今新岁也兴起新岁之事谓孟春祈谷之祭即下章所称是也孔云新岁而谓之嗣者使之继嗣往年犹嗣子之继父】印盛【平声】于豆于豆于登【蒸韵】其香【陆本作馨】始升【蒸韵】上帝居歆【侵韵大全云下与今叶】胡臭亶时【叶纸韵上纸翻】后稷肇【礼记集韵俱作兆】祀【纸韵】庶无罪【丰本作臯】悔【叶纸韵虎洧翻】以迄于今【大全云上与歆叶按一章八句之中各隔四句为叶又一变体也 赋也此章言祈谷郊天而以后稷配诗正为此而作印尔雅云我也郭云犹殃也女人称我曰殃其语转故曰印按此主时王而言故曰印盛犹上章之言我祀者非必身亲执其劳也又古文俯仰之仰或作邛诗瞻印昊天荀子上足印则下可用汉书偃印诘信皆通仰字则此印盛谓仰而以物盛之亦通盛广韵云受也字从皿谓受物於器中也豆登皆礼器豆字象形登兼指事本作𣎵从升持肉在豆上隶登遂与上车之登混彼字上从𣎵音拔足刺𣎵也下从豆象登车之形非用俎豆字尔雅云木豆谓之豆瓦豆谓之登毛传云豆荐菹醢也登大羹也孔云经维言盛传辨其所盛之物天官醢人掌四豆之实皆有菹醢是豆为荐羞菹醢也公食大夫礼大羹涪不和实于登是登为盛大羹也太古之羹不调以盐菜涪者肉汁也按郊特牲言器用陶匏礼器言大羹不和正祀天之礼惟豆之所盛礼无明文然豆有加豆有恒豆又有醢食糝食之豆故楚茨之诗言为豆孔庶据此诗于豆重言于登惟一举之而已亦可以见豆多而登少也王安石云释之烝之簠簋尊爵之实也羝俎实也豆登则实以菹醢大羹之器也或言其器或言其实互相备也香豆登内所盛物之香也始初也升上进也当通作昇说文云日上也孔云荐祭此豆登所盛之物其馨香之气始上行也合天与五帝谓之上帝说见小引下罗泌云周礼或言天或言帝或曰上帝曰五帝曰昊天上帝大宗伯以禋祀昊天上帝以苍璧礼天有大故则旅上帝及四望典瑞四圭有邸以祀天旅上帝上帝非天而天非昊天上帝矣掌次大旅上帝张璠案设皇邸朝日祀五帝则张大次小次而司服祀昊天上帝大裘而冕五帝如之则五帝非上帝而昊天上帝非五帝矣然则天帝果不同欤天者元气之统称而帝者德之见乎用者也及因其气之颢淑高广而言则又谓之昊天上帝而水火木金土之帝居於五方佐而迭王者则谓之五帝此皆分统别号而言之者至於合昊天若五帝羣然而祀列位乎上而非可一名者夫然後总而称之曰上帝也昔虞肆类上帝而大师亦类上帝肆师类造上帝曰类曰旅则上帝果非一帝矣然司裘为大裘以共王祀天之服而司服王祀昊天上帝大裘而冕则天宜为昊天上帝也以司服昊天上帝与五帝之祀服有所不殊则五帝於昊天疑不降矣然以掌次祀旅所张之次乃不同焉则五帝顾得合昊帝而同称乎祀帝圆丘牲玉以苍兆五帝於四郊玉以珪璋琥璜琮牲币色从其方而迎之各以其气之日则五帝岂得同帝哉虽然昊帝统五精而运化五帝佐昊帝而毓物犹之子父非可离也是故昊天五帝六神之辨俱以禋祀司服大裘而皆用圭邸则知有所分又有所合矣类称上帝孰不可哉康成以上帝为五帝而不及天王肃以上帝为天而不及五帝抑未之悉耳陈祥道云上帝之文既不主於天与昊天上帝又不主於五帝而典瑞旅上帝对旅四望言之旅者会而祭之之名则上帝非一帝也上帝非一帝而周礼所称帝者昊天上帝与五帝而已则上帝为昊天上帝及五帝明矣又云五帝与昊天同称帝不与昊天同称天犹诸侯与天子同称君不与天子同称王周官祀五帝之礼有与天同以极其隆有与天异以致其辨居郑云安也歆说文云神食气也朱子云其香始升而上帝已

安而享之言应之疾也谢枋得云天地间惟理与气有此理则有此气有此气则有此理鬼神无形无声惟有理有气在冥漠之间耳凡祭皆以心感神以气合神者也陆燧云独言天不言稷者天之感格以稷配祭而然也胡臭亶时一句转语也郑云胡之言何也臭即上文所谓香也亶说文云多谷也谷多则实故转为实之义谓品物多也时朱子云言得其时也此与周书言黍稷非馨明德惟馨语意相类言上帝之所以居歆者岂为芳臭之充实而得其时哉盖自有克当天心者在如下文所云也肇祀即第六章之以归肇祀此主教民稼穡言惟后稷能教民稼穡故诞降嘉种而祭祀之有洁粢丰盛於是始也庶者喜幸之辞获戾於天曰罪己心自恨曰悔因得罪而後悔也迄说文云至也庶无罪悔以至於今皆后稷所贻也只重在讚叹后稷上诗为后稷配帝咏耳严云天生后稷以养民后稷能教民稼穡以相天天心眷之久矣自后稷肇祀以来子孙世修其业不敢失坠以获罪於天遂至今日得以成王业而郊天天之歆飨盖在此耳周之郊也因稷而致所谓文武之功起於后稷尊后稷以配天不亦宜乎表記子曰后稷之祀易富也其辞恭其欲俭其禄及子孙诗曰后稷兆祀庶无罪悔以迄於今邓元锡云天有元德民有大命土谷修唐稼穡啓周香始升而居歆之於是知天人之一体无间也古诗大篇叙事首尾具始此美哉乎尽质而尽文】

生民八章四章章十句四章章八句【朱子云旧说第三章八句第四章十句今按第三章当为十句第四章当为八句则去呱訏路音韵谐协呱声载路文势通贯而此诗八章皆以十句八句相间为次又二章已後七章已前每章章之首皆有诞字序云尊祖也后稷生於姜嫄文武之功起於后稷故推以配天焉愚按序言后稷配天良是然是祈谷之郊非冬至之郊序无明言何也申培说同朱子谓周公制礼作乐尊后稷以配天故作此诗以推本其始命之祥明其受命於天者其原如此则但泥滞此诗前半篇以立说而不能知其所用之地朱子又疑以为郊祀之後有受厘颁胙之礼则用此诗盖因思文之诗已是郊祀配天所用不应复有二诗不得不揣摩及此若子贡传以此为训成王之诗今按孝经言郊祀配天之礼制於周公则此诗或作於成王时但未必是训成王耳】

我将宗祀文王於明堂以配上帝之乐歌【出朱传序及蔡邕独断皆云祀文王於明堂之所歌也按孝经子曰孝莫大於严父严父莫大於配天则周公其人也昔者周公郊祀后稷以配天宗祀文王於明堂以配上帝是以四海之内各以其职来祭今观此诗以天与文王并言则所云祀文王明堂者其为祀上帝明矣上帝者兼昊天上帝与五帝之称也虽兼祀五帝而以天为主故篇中但言天孝经言宗祀配帝而首曰严父配天亦其义也罗泌云郊一明堂六尊祖而亲考也详见生民篇陈祥道云先王之於天尊而远之故祀於郊而配以祖亲而近之故祀於明堂而配以父孝经曰郊祀后稷以配天宗祀文王於明堂以配上帝天则昊天上帝也上帝则五帝与天也以上帝为昊天上帝耶而周礼以旅上帝对旅四望言之则上帝非一帝也以明堂特祀昊天上帝耶而考工记明堂有五室则五室非一位也又云易曰先王以作乐崇德殷荐之上帝以配祖考以配祖者天也以配考者兼五帝也合天与五帝而谓之上帝则易孝经之於周礼其义一矣周礼明其祀之大小轻重故天帝之辨如此诗书之文未尝有称五帝而书亦未尝有称昊天上帝者其称天及上帝者类皆泛言之而已此固不可援之以议周礼也苏辙云古之论郊祀者莫密於郑氏然世或以其怪而不信予为之辨曰天一而已然而天有五行五行之神而尊之曰五帝不可谓无六天也史称秦襄公居西方自以为主少皞

之神故作西時以祀白帝其後宣公作密時以祀青帝灵公作吴阳上時以祀黄帝下時以祀炎帝汉高帝曰吾闻天有五帝而不足一何也於是复作北時以祀黑帝其说与郑氏合故郑氏之说古矣若夫王肃之学有昊天而无五行予窃非之朱子云上帝即天也聚天之神而言之则曰上帝又云凡说上帝者总昊天上帝与五帝言之皆称上帝也如周礼岁有九祭其四为祭天其五为祭五帝其礼若不同矣易则但说享上帝未尝分别如曰圣人享以享上帝殷荐之上帝以配祖考以此观之凡说上帝者是总说帝也林之奇云岁之祭天者四郊於冬至一也明堂於季秋一也祈谷於孟春一也大雩於龙见一也孔颖达云此言祀文王於明堂谓大享也按月令季秋大享帝盖以兼昊天上帝与五帝而祭之故曰大享郊祈谷之祭以后稷配雩之祭以五人帝配皆与文王无预此以知其为大享也其曰宗祀者何也程子谓以宗庙之礼享之朱子亦谓祭於屋下而以神祇祭之此其义也程子云万物本乎天人本乎祖故冬至祭天而以祖配之以冬至气之始也万物成形於帝而人成形於父故季秋享帝而以父配之以季秋成物之时也胡致堂云文王已有庙矣以季秋享帝而奉文王配焉不可於七庙中独举大礼於一庙故迎主致之明堂以配帝也祭帝必於明堂者帝出震而宰万物犹向明而治天下也武王即位追王文王周公制礼推本王功故以文王配帝而祀於明堂此义类也陈氏云郊者古礼而明堂者周制也周公以义起之也又孔云月令季秋有总祭五帝之礼但郑以月令为秦世之书秦法自季秋周法不必然故襍问志云不审周以何月乐记云祀乎明堂而民知孝祭义云祀乎明堂所以教诸侯之孝也】

我将我享维羊维牛【尤韵】维天其右【叶尤韵夷周翻陆德明本作佑】之仪式刑文王之典【左传作德】日靖四方【阳韵】伊嘏文王【阳韵】既右享【叶阳韵虚良翻】之我其夙夜畏天之威于时保之【此三句俱无韵或云此诗以三之字为韵 赋也将郑玄云犹奉也按将字从寸寸者手也故有奉持之义享尔雅说文皆云献也曰我将我享者陆化熙云明堂之礼自我义起二我字最有深意羊季本云实柴之羊也按祭法云燔柴於泰坛用騂犝则明堂祭天当用特牛而有羊者周礼羊人曰积共羊牲谓积柴祭天则用羊实柴也先柴而後献故维羊文在维牛之上将者奉羊以共柴也享者献牛以共祀也孔氏以为祭天贵诚用犝其配之人当用太牢则天与文王异饌矣以父配帝牲牢自宜如一不得异施如召诰用牲於郊以稷配而曰牛二也况牛羊之下但曰维天其右之则首举羊牛专为天言而不及配帝之文王矣又云周礼羊人凡积共其羊牲郑氏谓积为积柴疏谓积柴实牲币烟气上闻也又谓祭天用犝日月以下有用羊者故云维羊维牛而郑司农於大宗伯实柴注又直云实牛柴则其说不同矣今详此诗本祭上帝其牲用犝者也而维羊之文在其上牛人不言积共牛牲而独羊人於积言羊则可见实柴当以羊矣实柴之羊非大牢之羊也右则左右之右黄佐云明堂之位帝居中文王居西南主皆西坐东向东左西右则饌在左而神在右矣郑笺解右为助朱子駁之云方说维羊维牛如何便说保佑到伊嘏文王既右享之也说未得佑助之佑依周礼有享右祭祀之文诗中此例亦多如既右烈考亦右文母之类维天其右之言天庶几其临之於右犹云如在其上也其者不敢遽必之辞严粲云夫天之所飨不在於物维自托於文王庶几可以格天乎仪有仪可象之仪声名文物之类若仪礼所载是也式说文云法也纪纲制度之类若周礼所载是也刑通作?义亦训法但仪式皆实字刑是虚字典庄都云大册也字从册在丌上尊阁之也孔子曰文武之政布在方策所谓典也日字与圣敬日跻日字同意靖说文云立𡵓也𡵓者亭安也文王自朝至於日中昃不遑暇食用咸和万民今法其旧典所以

日求安乎四方也左昭六年郑人铸刑书叔向使诒子产书曰昔先王议事以制不为刑辟惧民之有争心也犹不可禁御是故闲之以义纠之以政行之以礼守之以信奉之以仁制为禄位以劝其从严断刑罚以威其淫惧其未也故诲之以忠耸之以行教之以务使之以和临之以敬莅之以强断之以刚民於是乎可任使而不生祸乱今吾子相郑国作封洫立谤政制参辟铸刑书将以靖民不亦难乎诗曰仪式刑文王之德日靖四方如是何辟之有伊发语声嘏礼记云长也大也说文云大远也徐锴云谓大远之福也右解见前享本训献然神歆其献亦曰享孝经祭则鬼享之是也伊嘏文王二句俱主天言天意不过欲四方安靖而我凡议礼制度无一不取法於文王之旧典日日施之以安四方惟天惠民惟文王之典足以安民是天所大福也天苟大福我文王则必歆文王所配之祭其临之在右而享我之祭也必矣曰既右享之者自必之辞也必之以理也蔡汝楠云我将之诗以文王配帝曰天其右之既右享之明堂之乐其词婉亲之也思文之诗以后稷配天曰克配彼天圜丘之乐其词简尊之也我其夙夜为祭後言之也上文既投诚於天而冀天之来享我矣而今而後苟我不能法文王之典则天将变其享我者而威我我其敢不夙夜畏天之威於以时时保此右享之意使天永眷我而不替乎时字正与夙夜字相应陆云夙夜畏威只是常法文典以靖四方耳保之亦不敢恃为可保是心上思想如此按左传曰畏天之威于时保之敬主之谓也君以天为主故曰敬主通篇俱主天言则以天为主文王为配耳严云明堂之礼天与文王在焉成王写其中心之诚以对越而言之也真德秀云後世人主一行郊祀明堂之礼类哆然有矜大之心如汉武诸诏是也其视我将之颂可愧多矣又孟子言畏天者保其国而引此诗左文十五年齐侯侵我西鄙遂伐曹季文子曰齐侯其不免乎礼以顺天天之道也已则反天而又以计人难以免矣在周颂曰畏天之威于时保之不畏於天将何能保前汉书孔光曰天右与王者故灾异数见以谴告欲其改更若不畏惧有以塞除而轻忽简诬则凶罚加焉其至可必诗曰畏天之威于时保之谓不惧者凶惧之则吉也及韩诗外传记汤时谷生大拱文王寝疾地动之事俱引此诗皆断章取义非诗正旨】

我将一章十句【申培说以为季秋禘上帝於明堂而配以文王之乐歌按禘乃宗庙之祭名未闻明堂大享亦名曰禘也季彭山氏谓此盖朝诸侯於方岳时事以文王为方伯有功於方岳故时巡则以配帝盖天之主宰一方者曰帝唐虞巡狩而以燔柴祭天即此礼也而配文王以严父则周公为之故宗祀明堂非季秋大享之谓也今按孟子书载齐人欲毁明堂则明堂之设在方岳诚有之而篇中亦有日靖四方之语则以为时巡祭天之诗亦若可信但古者天子巡狩以迁主行载於齐车言必有尊也此载在曾子问中甚明文王乃不迁之主何得有时巡配帝之事故知古礼甚不可妄臆也子贡传阙文】

丝衣祭灵星也灵星农祥也先王祀之而配以后稷歌丝衣之诗以乐之【自灵星农祥下出陈祥道礼书此诗有二说序初云绎宾尸也又引高子曰灵星之尸也愚以本文丝衣其紃载弁毳毼自羊徂牛三语定之当从高子之说陈祥道亦云高子以丝衣之尸为灵星之尸是也灵星者农祥也东方苍龙七宿房心通有农祥之称周语虢文公曰农祥晨正土乃脉发韦昭以为房星也立春之日晨中於午农事之候故曰农祥又伶州鸠曰昔武王伐殷月在天驷月之所在辰马农祥也我太祖后稷之所经纬也晋语董因曰大火阍伯之星也是谓大辰辰以成善后稷是相韦昭谓心星所在大辰之次为天驷驷马也故曰辰马辰为农祥周先后稷之

所以成善道戒农事也合前二说则房心皆为农祥亦以二星相近故也而应劭则引贾逵说以为龙第三有天田星灵者神也故祀以报功辰之星为灵星故以壬辰日祀灵星於东南金胜木为土相也张晏亦曰龙星左角曰天田则农祥也晨见而祭之范晔亦引旧说以龙左角为天田官主谷祀用壬辰位祠之壬为水辰为龙从其类也据此则灵星乃专指天田而为之名考星经则天田二星在角北者是也故服虔以灵星为角星又有天田九星在牛东南非此天田也唐志云岁星主农祥后稷冯焉故周人常闋其禋祥以观善败其始王也次於鶉火以达天鼃其衰也淫於玄枵以害鸟帑逸周书作雒篇云周公作大邑成周於土中乃设丘兆於南郊以祀上帝配以后稷日月农星先王皆与食是则农星有祭自周公时已然以周家农事开基而此星独主农祥故特着之祀典不与凡星同所谓后稷之所经纬者也杜佑通典载周制仲秋之月祭灵星於国之东南以为东南祭之就岁星之位也岁星五星之始最尊故就其位王充论衡亦云今灵星秋雩也而汉旧仪则谓古时岁再祭灵星春秋用太牢要之古礼无文俱莫能定其是否愚以是诗证之则正孟冬蜡祭时事其谓祭於仲秋谓春秋再祭者误也何者蜡祭之礼皮弁素服他祭不然据此诗曰丝衣曰载弁此足表明其为蜡祭矣丝衣之为蜡祭者何也礼月令篇孟冬之月天子祈来年於天宗与祭八蜡祠大社门闾同时而举即此祭也灵星之为天宗者何也祭法曰幽宗祭星也是星有宗之名虞书禋於六宗贾逵谓天宗三日月星地宗三河海岱是星又有天宗之名然星与日月虽并称天宗而日月及他星皆无关农事其晨见之时当岁功之始而独主谷者惟灵星耳故周公郊祀特举与日月并列固以重民事亦以彰祖德美其名则曰灵星尊其神则曰天宗也汉兴高祖五年或言周与而邑立后稷之祠至今血食天下於是制诏御史其令天下立灵星祠言祀后稷而谓之灵星者以后稷配食星也亦名赤星祠龙左角色赤也牲用太牢县邑令长侍祠舞者用童男十六人舞者象教田初为芟除次耕种耘耨驱爵及获刈春簸之形象其功也孝武游登五岳尊祠灵星建武二年立灵星祠有司掌之晋令县祀灵星唐以立秋後辰日祠灵星祝曰九谷方成三时不害冯兹多祐介其农嗇开元祀於国城东南天宝四载升中祠宋皇佑中立灵星坛东西丈三尺南北亦如之盖历代灵星之见於祀典者如此是祠之设专为祈田每隶郡邑惟周之肇祀反其所自始与后稷比隆制固渊乎远矣风俗通载俗说县令问主簿灵星在城东南何法主簿仰答曰惟灵星所以在东南者亦不知也每思其诙谐哑然失笑呜呼以高子笔之於诗序之後而先儒犹未能明其制而信其是且诋以为误彼县令主簿皆俗吏其能知之也哉罗泌云於祭有尸见君子氤氲事神之尽也宗庙有尸以尽孝也而自天地社稷山川羣小祀一皆有尸则亦以事父母之心事之也大氏神鬼陰属非附阳体则不可以见是故尸以托之绎宾之尸高子以为灵星是三辰亦有尸矣後世礼阙尸不复见而今巫童方士亦有凭身附体之法其所以交神明犹有圣人之遗意孔云高子与孟子同时赵岐以为齐人王应麟云高子郎高行子徐整云毛公之学自谓子夏所传子夏授高行子高行子授薛苍子薛苍子授帛妙子帛妙子授河间大毛公苏辙云毛氏襍取衆说以解经非皆子夏之言凡类此耳】

丝【说文作素】衣其紵【尤韵】载【尔雅注作戴】弁【说文载弁作弁服】袂袂【尤韵说文作袂袂】自堂徂基【支韵】自羊徂【韩诗外传作来】牛【尤韵】鼐鼎及鼐【支韵说文作鎡史记作戟】兕【陆德明本作□】觥【陆本丰氏本俱作觥】其觥【尤韵陆本作斛】旨酒思柔【尤韵】不吴【说文汉书俱作?]不敖【陆本作傲史记作骜】胡考之休【尤韵 赋也丝衣说文作素衣即郊特牲言素服蜡祭之礼也紵说文云白鲜衣貌邹

忠胤云祭服鲜不用丝而五冕之服各有章采此专言丝衣则以素别於绘耳载郑玄云犹戴也孔颖达云载者在上之名故经称载弁愚按此当通作戴以首荷物谓之戴也弁即郊特牲所云皮弁也解见頍弁篇俛说文云冠饰貌按诗言会弁如星则其饰也字从人毛传以为恭顺貌亦通郊特牲云皮弁素服而祭素服以送终也蜡之祭仁之至义之尽也孔云天宗公社门闾谓之蜡其祭则皮弁素服腊先祖五祀谓之息民之祭其服则黄衣黄冠自从也堂庙堂也徂往也基说文以为墙始此则庙堂下之阶基也天子之祭礼无闻以特牲士礼准之先夕陈事设洗於阼阶东南壶禁在东序笾豆鉶在东房几席两敦在西堂主人及子姓兄弟即位於堂下之东北面东上宾及衆宾即位於堂下之西东面北上宗人升自西阶视壶濯及豆笾反降东北面告主人及宾於壶及笾豆之属凡有洗濯者告濯几席不洗者告具而已是则自堂徂基乃自堂上而往於堂下之阶基当亦如特牲礼告濯具之事也自羊徂牛者先省视羊以备燔燎复往省视乎牛以供享献也羊文在牛之上与我将篇维羊维牛义同羊者实柴之羊周礼大宗伯职云以实柴祀日月星辰是祭星用柴羊人职云凡沈辜侯禴衅积共其羊牲郑玄谓积者积柴禋祀燔燎实柴是实柴以羊也公羊传注谓祭天牲角茧栗社稷宗庙角握六宗五岳四渎角尺灵星者六宗之一亦得用牛其不与天同者以角尺茧栗为别汉高时去古未远祠灵星以太牢其礼当有所据此独言牛者举大以该小耳又韩诗外传及说苑云东野鄙人有以九九之术见齐桓公者公曰九九何足以见乎对曰臣非以九九为足以见也夫九九薄能耳而君犹礼之况贤於九九乎太山不让砾石江海不逆小流所以成大也桓公曰善乃因礼之朞月四方之士相携而并至诗曰自堂徂基自牛徂羊言以内及外以小及大也按此特借譬之语与诗旨无涉然亦可谓善引诗者矣鼐尔雅说文皆云鼎之絶大者鼎说文云三足两耳和五味之宝器也尔雅云鬯尊上谓之鼐孙炎云鼎斂上而小口者陈祥道云士虞礼有上鼎中鼎下鼎有司彻司马举羊鼎司士举豕鼎鱼鼎则鼎之体有大小侈弇之别而其用有牛羊豕鱼之异天子诸侯有牛鼎大夫有羊鼎士豕鼎鱼鼎而已上得兼下下不得兼上则鼐鼎特王有之也按特牲礼宗人告濯具之後宾出主人出皆复外位宗人视牲告充举鼎冪告洁孔云彼先视濯笾豆次视牲次举鼎先後与此次第正同以此知从羊之牛是告充鼐鼎及鼐是举冪告洁也愚按自此以上将祭时事兕觥以下则方祭时事乃主人与尸宾献酢旅酬之礼也小雅楚茨曰为宾为客献酬文错礼仪卒度笑语卒获即此时也兕觥二句与桑扈篇同而语意小异觥乃罚爵非祭所用曹氏谓旅酬之後恐有失礼者则以此罚之是也其觥者孔云觥然徒设无所用之吴毛传云譱也说文云大言也字从口从夬夬音仄徐锴云大言故口以出声也又释文引说文作?且引何承天云吴字误当作?从口下大鱼之大口者曰?呼化切今按说文只有吴字无?字徐氏深辟改吴为?之谬何陆所云不足信也敖通作傲说文云倨也解见桑扈篇胡考解见载芟篇休美也言献酢旅酬之时虽有觥然上曲之罚爵在旁而此与祭者皆人人饮美酒而思和乘不謹譱不倨慢无所用罚饮酒时之恭顺如此其能恭顺以交於神明可知矣如此则神降之福宜乎其必有壽考永年之休美也又顔师古读胡为何曰何壽之美者叹之之言也亦通】

丝衣一章九句【序先以为绎宾尸蔡邕独断亦仍之曰绎宾尸之所歌也郑康成从其说而不取序後所引高子之说谓载弁者戴爵弁也爵弁而祭於王士服也绎礼轻使士升门堂视壶濯及笾豆之属降往於基告濯具又视牲告充已乃举鼎冪告洁礼之次也按大夫以上祭服谓之冕士祭服谓之弁禼记云大夫冕而祭於公弁而祭於己士弁而祭於公冠而祭於己

故唐孔氏申郑之义云礼有冠弁韦弁皮弁皆不以丝为衣且非祭祀之服襍记谓士弁而祭於公士冠礼有爵弁?衣与此丝衣相当故知此弁是爵弁士服之以助君祭也邹忠胤駁之云士冠礼丝衣爵弁原不言助祭襍记士弁而祭於公亦未闻服?衣且果如序所云绎宾尸则牲器以何时省若是周礼王者正祭则视涤濯逆齐省饗告皆告备者有宗伯在不必使士若仪礼特牲祭之前夕宗人视濯视牲厥明乃祭此则士祭於己之礼非祭於公之礼康成种种牵合又曲为之说曰绎礼轻故用士以实其所谓绎宾尸谬矣郝敬亦主绎义而第不从其所云告濯具告充告洁者谓绎礼杀於正祭牲牢器血皆用祭之余有司彻云扫堂燂尸俎行礼非别杀牲先夕省视也诗言自堂徂基者即少牢云祭毕户出庙门外俟俟天子明日俟则昨日堂上之尸今往俟於门基也言自羊徂牛鼐鼎及鼐者牲鼎皆自堂往门始祭牲入先太牢後少牢彻故羊先出而牛从之鼐鼎大以烹牲体鼐小以盛和羹羹近尸牲近外故鼐先出而鼐从之犹士虞礼牝者进退复位之类皆自堂徂基之序也今按周礼牛人职云祭祀共其享牛求牛郑玄谓享牛者献神之牛所以祭者也求牛者终事之牛所以绎者也宗庙有绎者孝子求神非一处故以绎牛为求牛也此则绎礼别杀牲之明据且谓彻牲自堂往於门基则似当日不彻至绎之日而後彻者其於废彻不迟之义又何居焉郑之失在於以此诗为绎其言省视未有失也若郝则两失之者也又张横渠以丝衣载弁为绎祭之尸服谓天子既以臣为尸不可祭罢便使出门而就臣位故其退尸也皆有渐言?衣已是不着冕服言弁已是不冠冕也要是凭臆立说无所稽据愚以序言绎宾尸三字自是可疑天子诸侯曰绎大夫曰宾尸此郑康成之说见於尔雅春秋三传及仪礼甚明二祭之名各别何得并举成文即孔氏谓绎者此祭之名宾尸是此祭之事总属附会窃意绎是恻字之讹恻者悦也祭祀尽礼则宾与尸皆悦而第未明其所祭之为何尸故又继之以高子之言曰灵星之尸也斯序未尝不明特以亥豕为累遂误後学耳郝人泥丝之一字以此诗为祈蚕之绎祭谓灵星者龙星蚕为龙精凡尸象神神象物丝衣戴弁者尸服也蚕为丝故衣丝紵洁也象蚕色球球下曲貌弁无曲者象蚕形也此似戏论其舛陋固无烦辨且绎祭惟宗庙有之即有和合序及高子之说谓是绎灵星之尸者愚尚不敢从也而况於妄指为祈蚕之绎乎朱子但以祭而饮酒之诗固亦近之而其祭於何地饮以何时总莫能明申培说以为士执事於王祭而饮以旅酬之乐歌季本亦云此祭统所谓尸饮九而君以散爵献士者要皆惑於郑氏爵弁助祭之说与朱传同子贡传阙文】

楚茨秋祫尝之礼也疑即九夏中之禘夏又名采芡【申培说以为农事既成乃祭宗庙燕及王族之诗吕氏云楚茨极言祭祀所以事神受福之节致详致备所以推明先王致力於民者尽则致力於神者详观其威仪之盛物品之丰所以交神明逮羣下至於受福无疆者非德盛政修何以致之愚按此与信南山皆为祭祀之诗而指各有异彼乃冬祭故其辞曰是烝是享若此则秋祭也何以知之以祝祭于祊一语知之周礼大司马春蒐献禽以祭社夏苗献禽以享礻秋柝致禽以祀祊冬狩献禽以享烝旧说以祊当为方谓秋田主祭四方报成万物按方祭在夏雩秋报俱有之原不专於秋且夏礻冬烝皆宗庙之祀何独於秋祊而疑之其所以不言春祠者亦自有说四时之祭春为小礼夏秋冬为大礼王制曰天子植礻祫禘祫尝祫烝诸侯礻则不禘禘则不尝尝则不烝烝则不礻又曰诸侯礻植禘一植一祫尝祫烝祫植之为言特也祫之为言合也天子之礼春则特祭夏秋冬则合享特祭各於其庙合享同於太庙诸侯春祭亦植而秋与冬皆祫其异於天子者惟夏禘之礼一年行植一年行祫而已若夫天子言

植禴诸侯言禴植天子言禴禴尝禴烝诸侯言尝禴烝禴此特变文非有异义然禴禴乃虞夏祭名殷人改禴名为禴周人又以禴禴名夏祭而更春祭名祠升禴名为五年之大祭若尝烝之名四代无改至於植禴之礼想亦皆同陈祥道礼书辨之甚悉此周礼之所以言禴禴烝而不及春祠也礼书云楚茨之诗始言以往烝尝终言神具醉止仪礼大夫三庙筮止丁亥之一日而言荐岁事於皇祖礼记亦云尝禴之礼所以仁昭穆则会羣神於烝尝而具醉者禴也合三庙於一日而荐於皇祖者亦禴也尝禴所以仁昭穆亦禴也禴有三年之禴有时祭之禴时祭小禴也三年之禴大禴也公羊传曰大事者何大禴也则明时祭之禴为小禴矣礼记曰大尝周礼曰大烝则春祀为小礼矣盖小禴止於未毁庙之主大禴已及於毁庙之主礼记曰周旅酬六尸又曰禴於太庙祝迎四庙之主夫天子旅酬止於六尸诸侯迎主止於四庙非小禴而何宋神宗时详定郊庙奉祀礼文议者谓祠禴烝尝之名春夏则物未成而祭薄秋冬则物盛而祭备故许慎以品物少文词多为祠而王弼以禴为祭之薄何休谓秋谷成者非一黍先熟可得荐故曰尝冬万物毕成所荐衆多故曰烝故礼记以尝为大尝周礼以烝为大烝孔安国亦以烝尝为大享又按禴为秋祭周礼固有明文然窃尝以义求之而深觉其可信盖禴祭在庙门之内与他祭不同其字从示从方有索求诸四方之义旧说谓禴有二种一是正祭之时既设祭於庙又求神於禴此诗所云是也一是祭之明日绎祭之时行礼於禴若礼器所云是也又谓正祭之禴在庙门内之西绎祭之禴在庙门外之西今按尔雅禴作鬯云鬯谓之门说文禴一作?云门内祭先祖所以旁徨是则禴祭自在门内原无二禴礼器所谓设祭於堂为禴乎外盖对堂而言则门为外非谓禴在门外也家语卫庄公改旧制变宗庙高子宰问於孔子曰周礼绎祭於禴禴在庙门之西今卫君更之如之何孔子曰绎之於库门内禴之於东方失之矣是可见绎祭当在禴禴自当在庙门内之西今卫君既改禴之所於东而行绎礼又不於禴乃於库门之内皆所谓失礼也然绎之所以必於禴者以绎为明日之又祭盖正祭事毕则神可以归矣孝孙孝子犹未忍其遽归也故於明日又设绎祭而於门以求之秋祭於禴意亦同此祭义谓霜露既降君子履之必有凄怆之心非其寒之谓也春雨露既濡君子履之必有怵怛之心如将见之乐以迎来哀以送往故禴有乐而尝无乐是则秋祭绎祭同有送往之意故皆求之於禴也又祭统云禴禴阳义也尝烝陰义也禴者阳之盛也尝者陰之盛也故曰莫重於禴尝古者於禴也发爵赐服顺阳义也於尝也出田邑发秋政顺陰义也未发秋政则民弗敢草也观此诗首以楚茨抽棘为言亦秋政已发之明据至诸儒诠释大抵引仪礼为证然仪礼之言祭礼者不过特牲馈食少牢馈食及有司彻三篇而旧说谓特牲馈食乃诸侯之士祭祖祢之礼少牢馈食乃诸侯之卿大夫祭祖祢之礼有司彻为少牢下篇所载乃上大夫祭毕而饔餼於堂及下大夫祭毕而礼尸於室之事其礼皆非天子诸侯所用故此诗如祝祭於禴在仪礼中絶无道及而献酬笑语一节据仪礼其事本在祭末及执爨蹠蹠等事皆当处嘏辞工祝致告之後今诗文反在先者则以天子诸侯之礼自当与卿大夫士不同固无足怪即天子诸侯祭礼亦当有别特古礼久亡其襍见於周礼礼记诸书者虽略可考见而参错涣散不相连属愚解此诗第取其相似者引用之要之据诗以明礼不敢泥礼以疑诗若诸儒所言祭祀之节皆多以意推测支离附会终未必与古礼相合不足信也愚又疑此诗为九夏中之祫夏说见时迈篇小引下】

楚楚者茨【礼记注作荠楚辞章句作蕓】言抽其棘【职韵】自昔何为我艺【说文作𦵏】黍稷【职韵】我黍与与我稷翼翼【职韵】我仓既盈我庾维亿【职韵】以为酒食【

职韵】以享以祀【叶职韵逸职翻韩诗外传作配】以妥以侑【宥韵韩诗外传引诗无此句】以介景福【叶宥韵敷救翻亦叶职韵笔力翻 赋也楚楚朱子云盛密貌按楚字义说文以为丛木谢眺诗云平楚正苍然以丛木广远谓之平楚今茨之盛密似之故亦云楚楚也茨尔雅云蒺藜也陆佃云蒺藜布地蔓生子有三角刺人状如菱而小蒺之言疾也一名茨可以茨墙故谓之茨墙有茨序曰国人疾之而不可道也正言蒺藜以此又吕祖谦云说文曰蒺藜也而茨则以茅葺覆屋之名郑康成谓趋以采蒺当为楚蒺之蒺然则当康成世字犹为蒺其为茨者後人误也抽拔也毛传云除也棘指蒺藜也蒺藜能刺人故以棘称杨雄方言云凡草木刺人北燕朝鲜之间谓之策自关以西谓之刺江淮之间谓之棘黄震云言抽其棘与言刈其楚语意正同昔古也抽除茨棘以利农事从古而然我代为王者之自我也艺种也解见南山篇郑玄云自古之人何乃勤苦为此事乎我将得黍稷焉与说文云党与也曰与与者黍稷相并如人之有俦侣也翼翼也曰翼翼者稷稷相辅如鸟布翅相接也吕氏春秋云苗其弱也欲孤其长也欲相与俱其熟也欲相扶是故三以为族乃多粟与与翼翼之谓也仓说文云谷藏也战国策注云圆曰囷方曰仓盈说文云满器也庾说文云仓无屋者毛云露积曰庾孔颖达云甫田言曾孙之稼如茨如梁此聚稼也又曰曾孙之庾如坻如京是积粟也下言乃求千斯仓乃求万斯箱欲以万箱载稼千仓纳庾是庾未入仓矣故曰露积言露地积聚之九章算术平地委粟是也周语野有庾积言野有则非仓之类亦露积之验也韦昭云十万曰亿古数也秦时改制始以万万为亿孔云既言露积为庾则庾在於空非有可满之期举亿为多以至亿为满也仓无一亿者假令一亿十万斛依九章算术古粟斛方一尺长二尺七寸是一亿之积方一尺而长二十七万尺也立方开之几六十五尺虽则高大之仓未有能容此者知其不相通也王安石云我仓既盈无所藏之露积为庾其数至亿此以上述祭之酒食所从出始而种继而收连用五我字见一粒皆我精神则皆我孝思也凡祭以酒食为主而牛羊俎豆佐之以为酒食以字指黍稷言孔云月令命大酋为酒云秫稻必齐则为酒非直黍也又天子之祭当用黍稷稻粱然则为酒食者非独黍稷而已以黍稷为谷之主故举黍稷以总衆谷以享而下四以字俱指酒食言享说文云献也祀说文云祭无已也妥毛云安坐也按说文无妥字当是绥省文耳侑说文云耦也毛云劝也盖有人耦之於旁以劝之也郑云以黍稷为酒食献之以祀先祖既又迎尸使处神坐而食之为其嫌不饱祝以主人之辞劝之也苏辙云主人拜尸而安之祝劝尸而食之按礼记郊特牲云举鬯角诏妥尸古者尸无事则立有事而後坐也注云尸始入举奠鬯若奠角将祭之祝则诏主人拜安尸使之坐尸即至尊之坐或时不自安则以拜安之也天子奠鬯诸侯奠角仪礼特牲篇略云祝延尸入尸即席坐主人拜妥尸尸答拜祝命按祭尸左执觶佐食取黍稷授尸尸祭之主人拜尸奠觶答拜少牢篇略云祝延尸入主人从尸升筵祝主人皆拜妥尸尸不言尸答拜遂坐上佐食取黍稷授尸尸受祭於豆注云黍稷之祭为墮祭将食神余尊之而祭之周礼曰既祭则藏其墮墮与掞读同此妥尸之礼也礼器云夏立尸而卒祭殷坐尸周坐尸诏侑武方其礼亦然注云武当为无声之误也特牲篇云尸三饭告饱祝侑主人拜尸又三饭告饱祝侑之如初又三饭告饱祝侑之如初少牢篇云尸告饱祝西面於主人之南独侑不拜侑曰皇尸未实侑尸又食尸不饭告饱祝西面於主人之南主人不言拜侑尸又三饭注云祝言而不拜主人不言而拜亲疎之宜此侑尸之礼也妥侑相继其礼皆在迎尸初入之时献尸即所以献神也以介景福承上二句言介助景光也解见小明篇言助之以彰明可见之福也】济济跄跄【阳韵】絜【丰氏本作洁】尔牛羊【阳韵】以往烝尝【阳韵】或剥或亨【叶阳韵铺郎翻】或肆或将【叶阳韵资良翻】

祝祭于祊【叶阳韵分房翻说文作?】祀事孔明【叶阳韵谟郎翻】先祖是皇【阳韵】神保是飨【叶阳韵虚良翻丰本作富】孝孙有庆【叶阳韵虚良翻】报以介福万寿无疆【阳韵赋也济之为言齐也亦音齐济济行列整齐之貌踰说文云动也虞书鸟兽踰踰解正同此愚按此以下文牛羊之盛言旧说谓与祭者有容仪亦通祭义云仲尼尝奉荐而进其视也愬其行也趋趋以数已祭子赣问曰子之言祭济济漆漆然今子之祭无济济漆漆何也子曰济济者容也远也漆漆者容也自反也容以远若容以自反也夫何神明之及交夫何济济漆漆之有乎夫言岂一端而已夫各有所当也孔云曲礼曰大夫济济士踰踰祭祀之礼主人自愬而趋其宾客则有容仪故济济踰踰也絜通作洁说文云灋也刘彝云在涤而刲之也尔指典司其事者言周礼小宗伯毛六牲颁於五官使共奉之充人掌系祭祀之牲牲於牢刲之三月观下文言以往烝尝则此第鲜洁储之以备用与省牲迎牲不同以往犹言後日也烝尝解见天保篇言过此以往将有事於烝尝也庙事莫重於烝尝田功成而品物备也或剥二句承牛羊言剥裂烹煮肆陈将奉也剥烹治牲肆将献牲四或字兼事与人言郑云祭祀之礼各有其事有鲜剥其皮者有煮熟之者有肆其骨体於俎者有奉持而进之者孔云於周礼则内饗云凡宗庙之祭祀掌割烹之事则解剥其肉是内饗也亨人云掌供鼎饔以给水火之齐职外内饗之饔亨煮则煮熟之者是亨人也外饗掌外祭祀之割烹陈其鼎俎实之牲体则肆其骨体於俎是外饗也大司徒云祀五帝奉牛牲羞其肆亨先王亦如之注云肆进所解骨体又小子职云掌祭祀羞羊肆羊骹肉豆则奉持进之是司徒小子之类也既解剥则当亨煮之於饔既煮熟当陈其骨体於俎然後奉持而进之为尸羞也自首章至此皆预言祭祀之事未及行礼观烝尝二字连言可见左桓六年隋季梁曰夫民神之主也是以圣王先成民而後致力於神故奉牲以告曰博硕肥腍谓民力之普存也谓其畜之硕大蕃滋也谓其不疾疫蠹也谓其备腍咸有也奉盛以告曰絜粢丰盛谓其三时不害而民和年丰也奉酒醴以告曰嘉栗旨酒谓其上下皆有嘉德而无违心也所谓馨香无谗慝也故务其三时修其五教亲其九族以致其禋祀於是乎民和而神降之福故动则有成祭义云君子仄古复始不忘其所繇生也是以致其敬发其情竭力从事以报其亲不敢弗尽也是故昔者天子为籍千亩冕而朱紘躬秉耒诸侯为籍百亩冕而青紘躬秉耒以事天地山川社稷先古以为醴酪齐盛於是乎取之敬之至也古者天子诸侯必有养兽之官及岁时齐戒沐浴而躬朝之牺牲祭牲必於是取之敬之至也君召牛纳而视之择其毛而卜之吉然後养之君皮弁素积朔月月半君巡牲所以致力孝之至也祝说文云祭主赞词者祊解见前祝祭于祊为行礼之始略如迎神之类虽其礼不传然愚以祭统之文知之祭统称祭有十伦首言铺筵设同几为依神也诏祝於室而出於祊此交神明之道也是则祭祊为行礼之始之明据也辅广云凡祀裸鬯则求诸陰炳萧则求诸阳索祭祀于祊则求之陰阳之间盖魂无不之神无不在求之之备如此祀事祭祀之事孔甚明着也盖谓祭祊以前尚有灌地迎牲告幽全升臭等事其祀礼甚明着也不详悉言之者与信南山篇互见故略之也何以知诸礼在祭祊之前尝参绎郊特牲礼器之言祊者而得之郊特牲云诏祝於室坐尸於堂用牲於庭升首於室直祭祝於主索祭祀於祊不知神之所在於彼乎於此乎或诸远人乎祭于祊尚曰求诸远者与人云祊之为言倮也首也者直也而礼器则云纳牲诏於庭血毛诏於室羹定诏於堂三诏皆不同位盖道求而未之得也设祭於堂为祊乎外故曰於彼乎於此乎二礼所记略同今按信南山所言祭以騂牡即纳牲诏於庭及用牲於庭也啓毛取血即血毛诏於室也腍膋燔燎先儒皆以为诏祝於室之事在取血膋之後即朝践时也室之内有主在焉因而升牲首於室郊特牲所谓直祭祝於主而自解之曰首也

者直也是可见升首之为直祭也此时尸坐於堂亦设有腥爛之祭焉所谓设坐於堂也犹恐神之或不在求而未之得也因于祊以求之郊特牲於直祭祝於主之下即继之曰索祭祝於祊礼器于设祭於堂之下即继之曰为祊乎外互相备也皆曰於彼乎於此乎盖汲汲於求神也自是而神若或至矣始行荐熟之礼以尸人也必荐熟而後尸可飨也则执爨以下事也朝踐以前皆交於神明之道其意在於求神荐熟以後始兼用人道其事在於飨尸信南山纪朝踐以前事楚茨纪荐熟以後事愚於是而悟二诗之相为首尾也或问祊祭亦有牲否曰有即求牛是也周礼牛人职云凡祭祀共其享牛求牛正祭之牛谓之享牛索祭之牛谓之求牛求即索也若祭之明日绎祭於祊其牲当亦求牛也先祖通七庙而言则以其为小祫故耳孔云烝尝时祭也时祭当自祊以上而言先祖者据远可以兼近皇通作煌徐铉云皇之为言煌煌然也按煌者輝也光明之意洋洋乎如在其上也神先祖之神也孔云本其生存谓之祖言其精气谓之神保毛云安也飨歆也祭义云飨者乡也乡之然後能飨焉神保是飨者言先祖之神安之於是飨其祭祀也朱子谓神保盖尸之嘉号犹楚辞所云灵保者按楚辞云思灵保兮贤姱乃谓神安附於巫身以贤姱目巫非以灵保目巫也若以神保名尸则於第三章神保是格固自难通而第五章神保聿归之前不应变言皇尸载起矣对先祖称孝孙乃主祭之人谓天子也庆福也贺也言有福而可贺也介福即上章所介之景福疆郑云境界也孝孙能尽力於祭祀故先祖报以所助之景福使之得万年之壽无有尽界也万壽无疆正介福之实所谓有庆者也】执爨蹠蹠【陌韵亦叶药韵七约翻】为俎孔硕【陌韵亦叶药韵实若翻】或燔或炙【陌韵亦叶药韵职略翻】君妇莫莫【药韵亦叶陌韵莫白翻通作貊】为豆孔庶【叶药韵职略翻亦叶陌韵之石翻读如摭释名云庶摭也拾摭之也】为宾为客【陌韵亦叶药韵克各翻】献醕【陆德明本大全朱传丰本俱作酬】交错【药韵】礼仪【韩诗外传作义】卒度【叶药韵达各翻】笑语卒获【陌韵亦叶药韵黄郭翻】神保是格【陌韵亦叶药韵葛鹤翻】报以介福万壽攸酢【药韵 赋也祭以馈熟为正故此章专就荐熟时言之执即执事之执谓供事也爨贾公彦云今之竈也周公制礼之时谓之爨至孔子时则谓之竈按少牢礼有雍爨有廩爨雍爨以炙肉雍人掌之廩爨以炊米廩人掌之特牲礼有牲爨有鱼腊爨即雍爨也然无廩爨而有饔爨主妇视之旧说炊黍稷曰饔饔廩所爨同物而廩比饔为大则行礼之人异耳此诗言为俎言燔炙则所执者乃雍爨也蹠说文云长胫行也重言蹠蹠尔雅云敏也郭璞云便速敏捷也俎说文云礼俎也字从半肉在且上指事且即荐肉之器字从几足有二横一其下地也象形为俎谓载牲体於俎硕大也孔云其为俎之牲体甚博大言肥腍而得礼也按特牲记俎之类不一有肝俎有折俎有尸俎有胾俎有主妇俎有祝俎有佐食俎有宾俎肝俎载牢心舌於上设於尸饌之北尸每食牲体反着於肝俎是主人敬尸之俎郊特牲所谓肝之为言敬也折俎谓节解者旅酬时所设也尸俎事尸之俎牲体有九曰肩曰臂曰肱曰肫曰胈曰正脊二骨曰横胁二骨曰长胁二骨曰短胁凡九体皆尚右周道也所以尊尸也体贵奇者何阳数也骨者何以致敬也又有肤三焉以致爱也爱敬交致孝之至也又有离肺一刲肺三焉所以贵肺者何气主也又鱼十有五鱼陰物也取诸月十有五而盈之义也腊如牲骨则犹是贵奇之意也胾俎者主人之俎自胾俎而下亦总名为执事之俎而物薄矣据此诗以孔硕言俎盖专指尸俎毛云加火曰燔炕火曰炙严粲云汉志言秦燔灭文章顔氏注谓燔烧也然则燔是近火烧之如今之烧肉火焰所及也炕举也以物贯之而举於火上以炙之也郑云燔燔肉也炙肝炙也皆从献之俎也孔云夏官量人凡祭祀制其从献脯燔之数量言从献者既献酒即以此燔肉从之也知炙肝者特牲主人献尸宾长以肝从主

妇献尸兄弟以燔从彼燔与此燔同则彼肝与此炙同故云肝炙也然燔者火烧之名炙者远火之称以难熟者近火易熟者远之故肝炙而肉燔也吕祖谦云为俎孔硕谓荐熟也或燔或炙谓从献也郑氏以为一事误矣燔肉与肝炙岂得谓之孔硕乎君妇意如九宾世妇女御之属尔雅解宾为妇而郑氏亦以女御为御妻是皆可以君妇名观第五章次君妇於诸宰之下则其非王后可知按周礼九宾凡祭祀赞玉盥赞后荐彻豆筵世妇掌祭祀之事帅女宫而濯漑为盥盛及祭之日莅陈女宫之具凡内羞之物女御凡祭祀赞世妇夫九宾之职在赞后荐彻豆筵即第五章所云君妇废彻也世妇之职在莅陈内羞之物而女御又赞世妇者即下文所云为豆孔庶也君妇之称断属之此莫通作寔说文作𠬞云𠬞𠬞也𠬞𠬞今文作寂寞谓寂寞无声也与奏假无言同意君妇非一人故重言莫莫耳豆荐菹醢之器后夫人大夫妻皆得荐之周礼外宗佐王后荐玉豆此后荐豆也祭义云君献尸夫人荐豆祭统云君执鸾刀羞哂夫人荐豆又云夫人荐豆执较执醴授之执铎较谓豆之中央直者铎谓豆下跗执醴之人以豆授夫人之时则执铎夫人受而荐之则执较也此夫人荐豆也少牢礼云主妇荐韭菹醢醢有司彻篇云主妇荐韭菹此大夫妻荐豆也孔甚庶衆也毛以为兼内羞庶羞而言孔云以言孔庶则非一故为兼二羞也有司彻云宰夫羞房中之羞於尸侑主人主妇皆右之司士羞庶羞於尸侑主人皆左之注云二羞所以尽欢心房中之羞其筵则糗餌粉饘其豆则醢食糝食庶羞羊臠豕臠皆有馘醢房中之羞内羞也内羞在右陰也庶羞在左阳也是有二羞之事也彼大夫宾尸尚有二羞明天子之正祭有二羞矣天子庶羞百有二十品明内羞亦多矣愚按此承上文君妇而言明豆中之实乃君妇所为据周礼世妇职所莅陈者惟内羞之物似不必兼言庶羞也内羞共於筵人醢人筵人掌四筵之实醢人掌四豆之实而世妇莅陈之四豆一曰朝事之豆其实韭菹醢醢昌本麋麇菁菹鹿麇茆菹麋麇饘食之豆其实葵菹羸醢脾析麋醢蜃蜃醢豚拍鱼醢加豆之实芹菹兔醢深蒲醢醢落菹鴈醢笋菹鱼醢羞豆之实醢食糝食古者祭祀宗庙有九献之礼一献王裸二献后裸三献王荐腥四献后亚献於是荐朝事之豆筵各八五献王荐熟六献后亚献於是荐饘食之豆筵各八七献王醑尸八献后醑尸於是荐加事之豆筵各八既醑尸毕后又献羞筵羞豆各二而诸臣进以醑尸焉是为九献凡四豆之实其不同有如此者非孔庶而何宾客谓四方来助祭者散文则宾客通今既对举则当有异周礼大行人掌大宾之礼及大客之仪以亲诸侯注谓大宾要服以内诸侯大客谓其孤卿推此以观客小於宾意即所谓衆宾耳此下言旅酬之礼旅酬有长兄弟衆兄弟而此不及者举宾客以例见之也郑云始主人酌宾为献宾既酌主人主人又自饮酌宾曰醑至旅而爵交错以徧毛云东西为交邪行为错按特牲礼主人醑尸主妇亚献宾三献毕主人遂酌以献宾宾饮献爵主人自饮酢爵遂献衆宾立饮复洗觶酌於西方之尊以酬宾主人又自饮以导宾饮宾卒觶复洗觶酌宾宾奠觶於尊南不敢饮以俟主人献长兄弟如宾仪又献衆兄弟如衆宾仪又献内兄弟如衆兄弟之仪遂行旅醑之礼宾举前尊南所奠觶酬长兄弟遂自饮卒觶更酌於东方之尊以饮长兄弟长兄弟卒觶酌於西方之尊以饮初受旅者初受旅者止一人乃衆宾中之长也於是衆宾及衆兄弟交错以徧皆如初仪已而长兄弟酬宾亦如宾酬兄弟之仪最後宾弟子及兄弟弟子各举觶於其长而互相酬皆无算爵此所谓献醑交错也东西互对饮为交东西邪行错综互饮为错甘泉先生有言予於旅酬之礼而知上下之易达也主先饮而酬宾宾奠觶以俟献礼毕於下然後取觶卒以酬长兄弟长兄弟卒觶以酬衆宾长其奠仁也其饮礼也衆宾及衆兄弟交错杀於其长义也不劳而以辨智也长兄弟酬宾长宾长以酬衆兄弟衆兄弟以酬衆宾以徧焉是仁义礼智之周流无穷交相感应者也及宾弟子兄弟

弟子卒觶举觶於其长而交酬无算焉上下交和气浹而庶事成矣然此亦士礼如此若天子诸侯之礼则如祭统所云尸饮五君洗玉爵献卿尸饮七以瑶爵献大夫尸饮九以散爵献士及羣有司皆以齿明尊卑之等也又云凡赐爵昭为一穆为一昭与昭齿穆与穆齿凡羣有司皆以齿此之谓长幼有序意其旅酬仪节必自有异然而其详不可得闻矣礼仪笑语即献酬交错中之礼仪笑语也统言之曰礼其中之揖让进退有仪可象者谓之仪仪者容也卒郑云尽也度法也言礼仪尽合法度也祭饮而曰笑语者古者于旅也语礼也获得也卒获言尽得其时宜也坊记子云七日戒三日斋承一人焉以为尸过之者趋走以致敬也醴酒在室醕酒在堂澄酒在下示民不淫也尸饮三衆宾饮一示民有上下也因其酒肉聚其宗族以教民睦也故堂上观乎室堂下观乎上诗云礼仪卒度笑语卒获又按礼器云周旅酬六尸曾子曰周礼其犹醕与注云使之相酌也后稷之尸发爵不受旅疏云旅酬六尸谓禘祭时聚羣庙之主於太祖后稷庙中后稷在室西壁东向为发爵之主尊不与子孙为酬酢余庙尸凡六在后稷之东南北对为昭穆更相次序以酬也周礼其犹醕与者醕斂钱共饮酒也凡相敌斂钱饮酒必非忘怀之酌得而遽饮必令平徧不偏颇与周礼次序旅酬相似也是则旅酬之礼在尸亦有之但以章中有为宾为客一语故知非言尸旅酬也格通作假说文云至也按假字从彳故有至义以与假形相似遂通作假说文引易王假有庙今文作假是也假音又与格同遂通作格说文引书假於上下今文作格是也再变而讹几忘其本神保是格言其礼节之备而情意欢洽如此故神安之而来至也上章既言是飨矣至此始言是格者前犹自孝孙之心想像之此则合庙中与祭者皆想像之亦如在之意客酌主人曰酢主人有献客必有酢理之当然神报孝孙以万寿之福亦孝孙之所自致耳神何私厚於其间哉】我孔熯矣式礼莫愆【先韵亦叶真韵起巾翻丰本作誓】工祝致告徂赉孝孙【叶先韵苟缘翻亦叶真韵须伦翻】苾苾芬孝祀【文选注作馥】芬孝祀【叶职韵见首章】神嗜【释文丰本俱作耆】饮食【职韵】卜尔百福【叶职韵见首章】如几如式【职韵】既齐既稷【职韵丰本作粢】既匡【陆德明本作筐丰本作仁】既勑【职韵苏子繇本大全朱传丰本俱作敕按勑本音赉世讹与敕同音久矣】永锡尔极【职韵】时万时亿【职韵 赋也我郑云我孝孙也孔甚也熯说文云乾貌朱子云竭也陈氏云按左传云外强中乾马劳如是人亦如之久劳而乾竭也式说文云法也式礼与礼仪卒度同意莫通作无音之近也愆说文云过也言礼行既久孝孙之筋力宜甚竭矣而取法於礼终无有过差敬之至也工官也百工之工凡能其事者皆称工故官以工称今日工祝盖周礼大祝之官也又有小祝然其职止於佐大祝凡大祭祀皆大祝主之郊特牲云尸神像也祝将命也言设祝以传达尸之辞命也致告者致尸意以告主人使受嘏也按主人受祭福其名曰嘏徂往赉赐也祝承尸命以嘏之物往予主人即下文言既齐既稷是也按少牢礼略云佐食取黍抔之以授尸尸执以命祝祝受以嘏於主人特牲礼略云佐食抔黍授祝祝受尸尸受以菹豆执以亲嘏主人夫特牲乃士礼而尸亲嘏少牢为卿大夫礼而尸命祝嘏当是以尸之尊卑不同若天子之尸其尊更甚则其命工祝徂赉焉宜也苾苾芬孝祀以下皆祝所传嘏辞也苾说文云馨香也芬说文云艸初生其香分布荀子注云花草气香也愚按此当指黍稷言书曰黍稷非馨明德惟馨明黍稷有馨颂所谓有飴其香有椒其馨者也祭以酒食为主而此诗又为农事既成而作故云然嗜喜也郑云女以孝敬享祀神乃歆嗜女之饮食也卜者前知之谓尔尔孝孙也几者数问多少之辞如几犹言如干也即所云百福之数也如式之如如之也式法也福以配德其多寡大小若有法式存焉尔之孝德盛则福亦自然盛故先知尔之膺受百福其繁骈之数如许必皆如其法式也言其福与其德相当也齐即周礼

五齐之齐一曰泛齐二曰醴齐三曰盎齐四曰緹齐五曰沈齐谓之齐者郑玄谓每有祭祀以度量节作之若祫祭备五齐禘祭备四齐时祭备二齐也既齐如後世之饮福酒周礼郁人大祭祀受举斚之卒爵而饮之注云斚受福之嘏声之误也王酹尸尸嘏王比其卒爵也郁人受之稷即黍稷之稷按郊特牲云祭黍稷加肺祭齐加明水报阴也以黍稷与齐对举与此诗言既齐既稷同但此止言稷不言黍者以稷为五谷之长稷所以为五谷之长者罗愿谓稷中央之谷月令中央土食稷与牛五行土为尊故五谷稷为长也陶唐之世名农官为后稷其祀五谷之神与社相配亦以稷为名以为五谷不可偏祭祭其长以该之程大昌云职方氏并州宜五稷郑玄谓黍稷麦稻菽后稷社稷皆取此以其该五种名之也匡说文云饭器簠也象形後人加竹作筐既匡者郑云天子使宰夫受之以匡愚按此连上文既稷言即所以盛稷也又按少牢礼略云尸又三饭主人洗爵酌酒酹尸尸卒爵酌醋主人主人拜受爵尸执黍命祝嘏於主人主人坐奠爵受黍啐之诗怀之实於左袂执爵以兴卒爵出宰夫以筯受啗黍主人尝之纳诸内酹之为言美也既食之而又饮之所以乐之也醋酢同字啐之为言尝也诗之为言承也曰啗黍者收敛曰啗明丰年乃有黍稷也特牲礼略云尸又三饭主人洗角升酌酹尸尸卒角酌以醋主人主人拜受角进听嘏尸执黍亲嘏主人诗怀之实於左袂卒角出写啗於房祝以筯受二礼略同惟用爵与用角异祝嘏与尸嘏异而嘏皆用黍今此用稷者明天子之礼亦当与卿大夫异也先受酌而後受黍亦与此先既齐而後既稷同勅当作敕说文云诫也既勑者郑云祝则释嘏辞以勑之也永长也锡通作赐说文云予也极者至善之称徐铉云极者屋脊之栋也今人谓高及甚为极义出於此愚按此尔极当与思文之诗立我烝民莫匪尔极同解王者重民之事使民皆有以遂其生复其性善莫至焉时万时亿仍以稼穡所获言时万犹言万斯箱也时亿犹言我庾维亿也言尔孝孙既饮我所賚之齐矣既受我所賚之稷而既盛之以筐矣既又听我所勑之嘏辞矣自今而後其长俾尔务农重本有极至之盛德而岁岁所获或以万计或以亿计无少歉焉周王业起於农诗咏飧祀丰洁又皆本於农故其言如此天子嘏辞无所见惟天保之诗云君曰卜尔万寿无疆及此诗皆天子嘏辞也若少牢嘏辞云皇尸命工祝承致多福无疆於汝孝孙来汝孝孙使汝受禄於天宜稼於田眉寿万年勿替引之则卿大夫嘏辞也田乃粢盛之所自出故卿大夫嘏辞亦以宜稼於田为言则此章嘏辞之旨可知矣周语虢文公云夫民之大事在农上帝之粢盛於是乎出民之蕃庶於是乎生事之供给於是乎在和协辑睦於是乎兴财用蕃殖於是乎始敦龐纯固於是乎成王事惟农是务乃能媚於神而和於民矣则享祀时至而布施优裕也此可与永锡尔极互相发祝嘏为行礼终事疑天子之礼或当如此礼运孔子曰後圣有作作其祝号玄酒以祭荐其血毛腥其俎孰其殽与其越席疏布以幂衣其澣帛醴醑以献荐其燔炙君与夫人交献以嘉魂魄是谓合莫然後退而合享体其犬豕牛羊实其簠簋笾豆籩羹祝以孝告嘏以慈告是谓大祥此礼之大成也据此所言行礼次序与此诗雅相彷彿不必泥於特牲少牢之文耳】礼仪既备【寘韵】钟鼓既戒【叶寘韵居吏翻】孝孙徂位【寘韵】工祝致告神具醉止【纸韵丰本作只】皇尸载起【纸韵】鼓钟送尸【支韵】神保聿归【叶支韵读如妨俱为翻】诸宰君妇废彻不迟【支韵】诸父兄弟备言燕私【支韵赋也备本作葡说文云具也礼仪既备者言祭礼中之仪节无不具举也戒通作诫说文云敕也谓警敕也钟鼓既戒者孔云谓击钟鼓以告戒庙中之人言祭毕也徂位郑云往位堂下西面位也孔云特牲告利成之位云主人出立於户外西面少牢告利成之位云主人出立於阼阶上西面特牲少牢皆西面故知天子之位亦西面也致告朱子云祝传神意告利成於主人按少牢礼於主人出之下云祝出立於西阶上

东面告曰利成祝入尸谡特性礼於主人出之下云祝东面告利成尸谡注云利犹养也成毕也言孝子之养礼毕也谡起也二礼之告利成皆在祝与主人同出之後祝以利成告主人非告尸也孔云孝子之事尸有尊亲及宾客之义命当繇尊者出让当从宾客来礼毕义繇於尸非主人所当先发故二礼皆言祝告主人以利成也此下文神具醉止正致告之辞即告利成之意具通作俱偕也孔云言皆醉者所祭羣庙非止一神故也愚按此小祫之祭也解已见前朱子云鬼神无形言其醉者诚敬之至如见之也皇大也君也加尸以皇尊称之也古者祭必立尸所以象神特性是士礼少牢是大夫礼并皆有尸又祭统云君执圭瓚裸尸是诸侯有尸也又周礼守祧职云若将祭祀则各以其服受尸是天子有尸也天子以下宗庙之祭皆用同姓之嫡故祭统云夫祭之道孙为王父尸所使为尸者於祭者子行也父北面而事之所以明子事父之道也注云子行犹子列也祭祖则用孙列皆取於同姓之嫡孙也疏云主人为欲孝敬已父不计已尊而北面事子行则凡为子者岂得不自尊事其父乎是见子事父之道也而仪礼疏则云大夫士以孙之伦为尸皆取无爵者无问成人与幼皆得为之若天子诸侯虽用孙取卿大夫有爵者为之故鳧鷖祭尸之等皆言公尸是已又何休公羊注云礼天子以卿为尸诸侯以大夫为尸卿大夫以下以孙为尸坊记子云祭祀之有尸也宗庙之有主也示民有事也以此坊民民犹忘其亲郑云载之言则也尸节神者也神醉而尸谡鼓钟之鼓从支与钟鼓之鼓从支不同彼二器并作此则以击钟为主所谓金奏也周礼大司乐凡乐事大祭祀宿县遂以声展之尸出入则令奏肆夏钟师掌金奏以钟鼓奏九夏肆夏其一也九夏掌於钟师先击钟次擊鼓以金为奏乐之节故但言鼓钟耳李如圭云尸在庙门外则疑於臣故送迎尸皆以庙门为断郑云神安归者归於天也孔云神尸相将神无形故尸象焉罗泌云夫神犹火也火生无形因物显照物尽而火熄神本无方因物显用物尽而神藏是故火非可尽也而在物者为可尽神非可尽也以其在物者有可尽之理也白虎义曰祭之所以尸以其虚无而寂寞也视之无形听之无声升自阼阶仰视榑桷俯察几筵其器存而人亡思慕哀伤无所写泄故坐尸而食之毁损其饌欣然若亲之饱其醉若神之醉也诗云神具醉止皇尸载起鼓钟送尸是故侑神尸入举角妥尸食为之节及乎酌盎醉尸有至沾醉旅酬降冕则尸弁而舞之以尽神也陈阳云祭之日乐与哀半飨之必乐已至必哀乐以迎来哀以送往也然则鼓钟送尸神保聿归则反乐而不哀者岂孝子之情也哉哀以送往孝子之心也鼓钟送尸先王之礼也以礼废心则不仁以心忘礼则不智二者并行夫然後全之尽之也诸宰谓宰夫之属孔云周礼宰夫无彻饌之文惟膳夫云凡王祭祀则彻王之胾俎注谓膳夫亲彻胾俎胾俎最尊也其余则其属彻之然则彻饌者膳夫也言诸宰者以膳夫是宰之属官宰膳皆食官之名故系之宰言诸者序官膳夫上士二人中士四人下士八人故言诸也周礼九嫔凡祭祀赞后荐彻豆笾知君妇彻笾豆耳余饌诸宰彻之又按特性礼云宗妇彻祝豆笾入於房彻主妇荐俎则君妇所彻亦可例推废郑云去也彻本训通以除去其碍乃得开通又训为去迟徐缓也不迟有二义朱子云以疾为敬亦不留神惠之意也严云不以礼终而惰也皆通诸父伯父叔父也言者语辞燕通作宴宴之为言安也饮以合欢安之意也对异姓言则同姓为私孔云诸父兄弟留之使皆备具我当与之燕而尽其私恩也郑云祭祀毕归宾客豆俎同姓则留与之燕所以尊宾客亲骨肉也今按归宾客豆俎礼无明文惟孔子世家云鲁郊不致燔肉於大夫孔子不脱冕而行是亦归俎之一证至祭未有餽古之君子以为惠术祭统所称尸谡君与卿四人餽君起大夫六人餽大夫起士八人餽士起各执其具以出陈於堂下百官进彻之凡餽之道每变以衆其礼何彬彬也即少牢礼亦以四人餽特性礼亦以二人餽而此独不之及抑略之与

若中庸以燕毛序齿列於旅酬建戺之後以为武王周公所作自是此诗燕私之礼然窃怪祭以当日燕亦以当日而又有餽之一节襍於其间即穷日之力将不暇给甚矣古人之勤於行礼也尚书传云宗室有事族人皆侍终日大宗已侍於宾奠然後燕私燕私者何也已而与族人饮也陈祥道云先王之於同姓有时燕焉有因祭而燕焉国语曰时燕不淫此时燕也诗曰备言燕私坊记曰因其酒肉聚其宗族以教民睦此因祭而燕也其礼之详虽不可考要之服皮弁服宰夫为主异姓为宾其物殽烝所以合好也其食世降一等所以辨亲疏也昭穆以序之所以明世次也夜饮以成之所以别异姓也若夫几席之位升降之仪脱屣而坐立监相礼羞庶羞以尽爱爵乐无算以尽驩其大率盖与诸侯燕礼不异诸侯燕族人与父兄齿虽王之尊盖亦不以至尊废至亲也特牲馈食礼祝告利成彻庶羞设於西序下郑氏谓彻庶羞置西序下者为将以燕饮与繇是观之燕族之礼不特天子诸侯而已又特牲礼注云自尸祝至於兄弟之庶羞宗子以与族人燕饮於堂内宾宗妇之庶羞主妇以饮於房】乐具入奏【叶屋韵昨木翻】以绥後禄【屋韵】尔殽【丰本作肴】既将【叶阳韵见二章】莫怨具庆【叶阳韵见二章】既醉既饱【叶有韵补苟翻】小大稽首【有韵】神嗜【丰本作耆】饮食使君壽考【叶有韵去九翻】孔惠孔时维其尽【軫韵】之子子孙孙勿替引【軫韵】之【赋也孔云以上章云备言燕私故此即陈燕私之事以祭时在庙燕当在寝故言祭时之乐皆复来入於寝而奏之燕祭不得同乐而云皆入者歌咏虽异乐器则同故皆入也朱子云凡庙之制前庙後寝祭於庙而燕於寝具备也奏者上进之义凡乐一更端为一奏进而动其声也绥安也後後日也禄说文云福也此主君言孔云宗族不亲则公室倾危故骨肉欢而君之福禄安钱天锡云诸父兄弟昔本一身假庙之典所谓尊祖敬宗亦以展亲睦族也燕私一举至恩旁洽太和流行实为受福之本非僭慢也殽当作肴徐铉云谓肉已修庖之可食者黄佐云即祭祀所彻之殽也将奉持而进之也尔殽既进神惠均皇恩洽与祭之人无有怨者中庸所谓亲亲则诸父昆弟不怨也具通作俱偕也庆贺也欢洽而相庆贺也莫怨具庆一反言一正说非有二义醉说文云卒也各卒其度量不至於乱也饱说文云厌也小大谓辈行之尊卑年齿之长幼即诸父兄弟也稽首头拜至地也孔云神嗜饮食以下即庆辞也愚按此亦名为嘏少牢云上簋亲嘏曰主人受祭之福胡壽保建家室即此类也簋餽同宇神嗜饮食以祭时言朱子云向者之祭神既嗜君之饮食矣是以使君壽考也孔惠孔时复赞其祭之美孔甚惠顺也时谓春祠夏禴秋尝冬烝之时郑云甚顺於理甚得其时祭统云贤者之祭也必受其福非世所谓福也福者备也备者百顺之名也无所不顺者之谓备言内尽於己而外顺於道也忠臣以事其君孝子以事其亲其本一也上则顺於鬼神外则顺於君长内则以孝於亲如此之谓备唯贤者能备能备然後能祭又云夫祭之为物大矣其兴物备矣顺以备者也其教之本与是故君子之教也外则教之以尊其君长内则教之以孝於其亲是故明君在上则诸臣服从崇事宗庙社稷则子孙顺孝尽其道端其义而教生焉君子之教也必繇其本顺之至也祭其是与又云孝子之事亲也祭则观其敬而时也祭义云祭不欲数数则烦烦则不敬祭不欲疏疏则怠怠则忘是故君子合诸天道春禘秋尝维其尽之指此祭毕而燕见其礼无所不尽也子子孙子子复生子子孙复生孙也替尔雅云废也引尔雅云长也谓伸之而使长也郑云谓子孙勿废而长行之按尔雅云子子子孙引无极也舍人云子孙长行美道引无极也】楚茨六章章十二句【辅广云或谓采荠即楚茨也今按楚茨在郑玄时本尚为楚荠而言抽其棘亦采之义周礼乐师之教乐仪大馭之馭王路皆言行以肆夏趋以采荠先儒以时迈之诗为肆夏为其中有肆於时夏之语而周礼载尸出入奏肆夏则肆夏采荠皆祭祀时所奏祭

祀乃礼之大者故车步皆视之为节惜古文散逸无可考据若序所云刺幽王也政烦赋重田莱多荒饥馑降丧民卒流亡祭祀不飨故君子思古焉今观此诗与信南山等篇始终皆称美丰登祭祀之盛无一毫几微不满之意其非衰世之诗甚明子贡传谓所以劝农也似亦惑於幽雅之说朱子直以为述公卿有田禄者力於农事以奉其宗庙之诗则祭礼之见於少牢馈食者初无钟鼓送尸之礼即此已可证其非矣又况滌牛燕毛皆天子之礼乎】

信南山冬祫烝之礼也【左成二年晋师及齐战於宰齐师败绩齐侯使宾媚人致赂晋人不可曰必使齐之封内尽东其亩对曰先王疆理天下物土之宜而布其利故诗曰我疆我理南东其亩今吾子疆理诸侯而曰尽东其亩而已唯吾子戎车是利无顾土宜其无乃非先王之命也乎愚按左传既以此为先王之命则此诗之作於周初无可疑者大指与楚茨略同盖为冬祭而作篇中既言献之皇祖又言享於祖考所谓祫烝者也赵汭云烝尝皆祫与祠祫不同烝尝盖丰於祠祫烝又丰於尝尝以尝新为名烝衆也可以荐者衆也详见楚茨篇】

信彼南山维禹甸【叶先韵亭年翻亦叶真韵他邻翻周礼注云四丘为甸甸读与维禹隤之之隤同疏云甸作隤出韩诗】之畇畇【陆德明本作??周礼注作??杨慎本作均均】原隰会孙田【先韵亦叶真韵他因翻】之我疆我理【纸韵】南东其亩【叶纸韵母鄙翻赋也信彼南山与节彼南山文法正同信通作伸蜿蜒之貌与引而伸之同义指山之左右前後所绵亘也】

【易屈信相感周礼侯执信圭俱与伸通用南山终南山也禹贡所云荆岐既旅终南惇物即此王制天子之田方千里周礼职方氏辨九服之邦国方千里曰王畿周都镐京终南山在王畿之内所谓天子之田也诗所言乃天子祀事而推本於重农咏南山即咏畿内之地云耳非以山言也治田出谷税曰甸王畿名甸禹贡五百里甸服是也若此甸乃丘甸之甸与上文二甸不同周礼少司徒职云九夫为井四井为邑四邑为丘四丘为甸四甸为县四县为都以任地事而令贡赋旧说谓以孟子方里为井计之则邑方二里丘方四里甸方八里甸之言乘也以其於车赋出长轂一乘也赋者出车徒给繇役之名以甸为赋兵车一乘之始故此诗以甸言於甸之外四旁各加一里除以为治沟洫之用而不出税则为方十里之成也县都就四层累起数亦如之县方四十里都方八十里旁各加十里则是方百里名为一同孔颖达云论语注引司马法云井十为通通十为成成出革车一乘是据成方十里出车一乘也左传服注引司马法云四邑为丘有戎马一匹牛三头是曰匹马丘牛四丘为甸甸六十四井出长轂一乘马四匹牛十二头甲士三人步卒七十二人戈楯具备谓之乘马是据甸方八里出车一乘也二者事得相通故各据一焉且井邑丘甸出於周法今谓禹亦丘甸之者礼运说大道既隐而曰以立田里是则三王之初而有井甸田里之法也论语说禹尽力乎沟洫与匠人井间有洫同也皐陶谟畎浍距川与匠人同间有浍专达於川同也是则丘甸之法禹之所为左传少康之在虞思有田一成有衆一旅则十里为成非周之赋法也李氏云老苏亦谓井田之兴其始於唐虞之世非唐虞之世则周之世无以成唐虞啓之以至夏商之世稍稍葺治至周而大备孟子言夏后氏五十而贡殷人七十而助周人百亩而彻其实皆什一也以贡助彻皆本於什一若非丘甸之法何以能行什一之法也刘公瑾云禹平水土大舜美其功曰地平天成万世永赖今考於诗尤信也其见於小雅则有此诗大雅则曰丰水东注维禹之绩又曰奕奕梁山

维禹甸之鲁颂则曰纘禹之绪商颂则曰禹敷下土方又曰设都於禹之绩可以见禹力之存人心可以见人心之知所本也邓元锡云首章慕稷功也禹暨稷奏平成之烈烝民粒焉言禹甸稷功於禹时成也不斥言稷言曾孙着之矣又吴越春秋称禹乘四载以行川始於霍山集五岳因引此诗其意谓南岳一名霍山即此诗所云南山者也今按禹治水功首冀无始於南岳之事此说妄也昀昀尔雅云田也毛传云垦闢貌愚按说文无昀字疑当作均字或匀字因其言田事遂加田於其旁未必真古文也均者平也匀亦均也周礼少师徒职云乃均土地以稽其人民而周知其数上地家七人中地家六人下地家五人言一家男女七人以上则授之上地所养者衆也若五人以下则授之以下地所养者寡也又大司徒职云不易之地家百畹一易之地家二百畹再易之地家三百畹言不易之地岁种之地美故家百畹一易之地休一岁乃复种地薄故倍之也再易之地亦以类推凡此皆均之意也均於原又均於隰曰昀昀也必以原隰为言者大司徒职云以土会之法辨五地之物生一曰山林二曰川泽三曰丘陵四曰坟衍五曰原隰五地之内可为田者惟坟衍原隰耳尔雅云高平曰陆可食者曰原释名云下湿曰隰隰蛰也蛰隰意也春秋传云井衍沃牧隰皋衍沃即坟衍地之美者九夫为一井下隰高皋之地即原隰乃地之不美者郑玄谓九夫二牧二牧而当一井也均及於此而後井地始均故但指言原隰也黄子道周云地不中於绳墨则漆林柘材兴焉丘陵险阨则厄塞牢瀦成焉原隰可垦则阡陌畎亩形焉三易再易之田定其准直则民志平焉曾孙承宗庙者谓天子也孔云曾者重也自曾祖以至无穷皆得称曾孙是为远辞郊特牲云称曾孙某谓国家也郝敬云曾孙虽事神之通称实莫大乎天子故武王自称有道曾孙在诸侯如狸首之曾孙侯氏春秋传之曾孙蒯瞶周礼考工记之祝侯曰诒女曾孙诸侯百福自诸侯以下礼卑名小分轻不足举矣吕祖谦云周自后稷教民播种於诗言後王务农者皆本之后稷而谓之曾孙也曰田之者井牧相兼以成田田尽乎原隰则无遗田可知故但据原隰而言也我指曾孙也玩我疆我理二句则知此诗所言曾孙乃立法定制者序传以为成王理盖近之刘彝云田法成於禹稷久矣文武既有天下而周公辅弼成王广五服为九服推后稷之法以践禹功遂成畎浍於天下陈祥道云禹贡於九州之地或言土或言作或言义盖禹平水土之後有土焉而未作有作焉而未又则於是时人工未足以尽地力故家五十亩而已沿历商周则田寝开而法备矣故商七十而助周百亩而彻观此诗所言则法略於夏备於周可知季本云按縣之诗太王迁岐之初已疆理矣然太王所疆理者殷人七十亩之助周既有天下则复开拓核定之而为百亩之彻也疆说文云界也曰我疆者疆之也毛云画经界也愚按後章言疆场疆为大界场为小界此可以明疆之义谓八家同井之疆也大司徒职云辨其邦国都鄙之数制其畿疆而沟封之疆以沟为限同井有沟亦其证也我理毛云分地理也按下文言南东即地之理亩势宜南则同井皆南亩势宜东则同井皆东也田寬一步长百步为亩本作亩从田从十久声徐铉云十四方也韦昭云下曰畎高曰亩亩陇也按畎乃陇中水道古作 六畎为一亩对亩则畎为下对畎则亩为高亩即田身是也刘公瑾云地之势东南下水势皆趋之故顺其势以为遂为沟而或南其亩东其亩也按遂横则沟从遂从则沟横刘彝所云其遂东入於沟则其亩南矣其遂南入於沟则其亩东矣是也遂乃百亩之遂沟乃同井之沟而周礼考工记所载其制各别周礼遂人职云凡治野夫间有遂遂上有径十夫有沟沟上有畛百夫有洫洫上有涂千夫有浍浍上有道万夫有川川上有路以达於畿郑注以为此乡遂用沟洫之法也考工记云匠人为沟洫耜广五寸二耜为耦一耦之伐广尺深尺谓之 田首倍之广二尺深二尺谓之遂九夫为井井间广四尺深四尺谓之沟方十里为成成间广八尺深八尺谓之洫方

百里为同同间广二寻深二仞谓之浚专达於川郑注以为此都鄙用井田之法也陈及之驳之云周制井田之法通行於天下安有内外之异哉遂人言千夫有沟以一直度之也凡十夫之田之首必有一沟以泻水以方度之则方一里之地所容者九夫其间广四尺深四尺谓之沟则方一里之内凡四沟矣两旁各一沟中间二沟至於沟洫亦然若川则非人力所能为故匠人不为川而云两山之间必有川焉遂人万夫有川亦大约言之耳大概 水泻於沟沟水泻於洫洫水泻於浚浚水泻於川其纵横因地势之便利遂人匠人皆以大意言之遂人以长言之故曰以达於畿匠人以方言之故止於同耳又云遂人所言者积数也匠人所言者方法也积数则计其所有者言之方法则积其所圆之内名之其实一制也又按风俗通云南北曰阡东西曰陌或云河南以东西为阡南北为陌愚谓二说皆有之繇亩之南东无定故阡陌之为南为东亦无定但陌之名从於遂洫阡之名从於沟浚盖陌之为言百也遂洫之或南或东而径涂因之则遂间百亩洫间百夫而径涂为陌矣阡之为言千也沟浚之或南或东而畛道亦因之则沟间千亩浚间千夫而畛道为阡矣孟子以沟浚皆盈连言亦形势相合之验也又虞书云濬畎浚距川始於濬畎終於濬浚其制亦与考工记合一说田事喜阳而恶陰东南向阳则茂盛西北傍陰则不实亦通又郝云南东其亩者概率土而言也周京偏据西北天地之势西北高而东南下故其田之膏沃与疆理之功莫远於南而极於东文王化行亦止南国王制云东田大雅江汉云于疆于理至於南海成王时周公东征至於海隅奄徐淮夷之土始归版图故曰南东其亩是说亦自新创但左传南东之解甚明不必从自首章至黍稷彧彧先从田事说起为祭祀张本与楚茨前八句同意】上天同云【文韵】雨雪雰雰【文韵】益之以霡【丰本作霡】霡【屋韵】既优【说文作漙】既渥【叶屋韵乌谷翻】既沾既足【叶屋韵读如祝子六翻】生我百谷【屋韵 赋也尔雅冬为上天朱子云同云云一色也将雪之候如此陆佃云夏则天降而下冬则天升而上燠则云阳而异寒则云陰而同雨雪解见北风篇雰雰毛传云雪貌按说文雰即氛字云祥也与雪无涉当通作纷纷之为言乱也世说谢太傅於雪日内集谓儿女曰白雪纷纷同此彭执中云蝗产子於地至春夏而出地若冬有雪寒气逼之深入於地春夏不能出矣一雪入地三尺三雪则入地九尺故三白为丰年之兆也谚云要宜麦见三白孔云积雪是年之前冬以此章言谷之生下章言其成熟举一年之生成以为首尾之次非复言岁初岁末限以同年耳愚按此诗作於冬祭之时因纪述旧冬之事见一岁之田功所自始也益又加也尔雅云小雨谓之霡霂陆云霡者膏润入土如人之脉霡者霂历沾渍如人沐头惟及其上枝而已根不濡也霡言其上霂言其下董子云太平之世雨不破块润叶津茎而已矣优通作漙说文云泽多也渥韵会云厚渍貌此指雪言以泽之漙而渍者渥也沾说文云雨□也□者濡也足满足也此指雨言以其仅止於微濡而用已足也陆云三农之事雪则欲盛而遍也雨则欲微而润也盖丰年之冬必有积雪其春必有小雨故是诗雨言小雪言盛也雪则欲其盛矣然又欲其润泽之甚周也故继之曰既优既渥雨则欲其微矣然又欲其膏润之仅足也故继之曰既沾既足盖骤雨不如久雪之入土深且无泛溺又可以覆阳於根簪也愚按天泽既充斯土膏饶洽故能生我衆谷也】疆场翼翼【职韵】黍稷彧彧【叶职韵越逼翻】曾孙之穡【职韵】以为酒食【职韵】畀我尸宾【真韵亦叶先韵畀眠翻】壽考万年【先韵亦叶真韵奴因翻赋也疆场皆田界之名疆乃八家同井之界畔场乃一夫百亩之界畔场通作易张晏云田至此易主故曰易翼翼者言疆之左右又有疆之左右又有如鸟之有两翼也彧说文云有文章也或种黍或种稷交错成文曰彧彧疆场翼翼承首章】

【我疆我理言黍稷彧彧承次章生我百谷言而意重在黍稷谓可取以奉祭祀也孔云上言百谷此独言黍稷者黍稷为谷之长故特言之也说文云谷可收曰穡同井之中有公田其稼皆天子所有故曰曾孙之穡界说文云相付与也与尸谓酌齐献尸及献熟食是也与宾谓助祭之宾於祭末行献酬之礼是也郑云尊尸与宾所以敬神也敬神则得壽考万年此章及下章皆先事拟议之辞至五六章方言祭时事】中田有庐【鱼韵】疆【外传作墻】场有瓜【本麻韵当叶鱼韵读如居斤於翻】是剥是菹【虞韵】献之皇祖【夔韵】曾孙壽考【叶夔韵讀如苦孔五翻】受天之祜【夔韵 赋也中田公田也一井九百亩其中百亩为公田也庐说文云寄也秋冬去春夏居孔云古者宅在都邑田於外野农时则出而就田须有庐舍以便其农事食货志云理民之道地着为本故必建步立晦正其疆界六尺为步步百为晦晦百为夫夫三为屋屋三为井井方一里是为九夫八家共之各受私田百晦公田十晦是为八百八十晦余二十晦以为庐舍谷梁传云古者公田为居井竈葱韭尽取焉韩诗外传云公田余二十亩共为庐舍各得二亩半八家相保出入更守疾病相忧患难相救有无相贷饮食相召嫁娶相谋渔猎分得仁恩施行是以其民和亲而相好後汉书注云井田法庐舍在内贵人也公田次之重公也私田在外贱私也陈祥道云孟子曰五亩之宅树墙下以桑庐舍二亩半田中之居也廛亦二亩半国中之居也其在邑则春出於野其在野则冬入於邑考之於礼乡师巡国及野以施惠乡大夫辨国中之可任舍者乡士掌国中之狱则六乡之民莫不廛里於国中矣廛里所以奠居而庐舍特其宿息之地而已观遗人言十里有庐诗言庐旅庄周言遽庐则田之有庐亦若此耳疆场有瓜者郑云於畔上种瓜按篇中三疆字其义皆同惟两场字微有分别上章场字分指九夫之场此场字则专主公田之场也盖八家各私其场以种果窳惟井畔之疆与公田之场理当属之於公故於此种植以尽地利所藉以献皇祖者皆是之自出於民无与也周礼甸师掌帅其属而耕耨王籍以供齎盛祭祀共萧茅共野果窳之属场人掌国之场圃而树之果窳珍异之物以时敛而藏之凡祭祀宾客共其果窳果者枣李之类窳者瓜瓠之类春夏於疆场之地种植诸品则名为圃秋冬诸品成熟筑之以蹂践禾稼则名为场也若去郊百里外曰甸天子籍田在焉则又特命甸师掌之也郊特性云天子树瓜华不敛藏之种言瓜叶祇供一时之食非收敛久藏之种明不与民争利亦天子圃树瓜之证又食货志云田中不得有树用妨五谷还庐树桑菜茹有畦瓜瓠果蓏殖於疆场此则通指井九百亩之疆场耳陆佃云场言至此而易主矣至此易主今种瓜於其上者以明百姓亲睦利与同井共之也盖古之人礼有让畔者义有灌瓜者繇是而已按礼云瓜祭上环是则瓜为祭品所有故诗并及之环谓瓜之脱华处也是剥言枣也剥之言击豳风八月剥枣是也特以枣为言者周礼笱人掌四笱之实唯馈食之笱属果品其实仅五物耳曰枣曰?曰桃曰乾?曰榛实以枣居五物之首故第举剥枣以该之也菹说文云酢菜也徐铉云以米粒和酢以渍菜也周礼豆人掌四豆之实朝事之豆其实韭菹菁菹苽菹馈食之豆其实葵菹加豆之实芹菹落菹苟菹凡七菹其羞豆之实则无菹也诗言疆场所植非特有瓜可以祭而已又有於是而剥以用之者於是而菹以用之者但言剥菹而不言其物以惟枣用剥言剥则知其为枣菹惟七种言菹则知其为七菹也旧说以剥菹皆主瓜言按礼为天子削瓜者副之为国君削瓜者华之副言析也既削又四析之也华若草木之华中裂之不四析也是皆有剥削之义惟菹无用瓜者仅见於齐民要术载瓜菹之法云瓜淨洗令燥盐揩之以盐和酒糟令有盐味不须多合藏之蜜泥?口软而黄便可食大者六破小者四破五寸断之广狭尽瓜之形又云长四寸广一寸但此瓜菹乃後世所用以供口体之奉非古祭礼所有故知菹断非指瓜也菹非指瓜则剥亦非指

爪矣祭统云水草之菹陆产之醢小物备矣三牲之菹八簋之实美物备矣昆虫之异草木之实陰阳之物备矣凡天之所生地之所长苟可荐者莫不咸在示尽物也外则尽物内则尽志此祭之心也郊特牲云恒豆之菹水草之和气也其醢陆产之物也加豆陆产也其醢水物也笱豆之荐水土之品也不敢用常味而贵多品所以交於神明之义也非食味之道也仪礼注云凡进物曰献皇君也加祖称皇尊之也除祢而上皆称祖时祭当及祢而第言祖者孔谓据远可以兼近是也祢说文云福也尔雅云厚也使曾孙得壽考之福而为天所加厚也】祭以清酒【有韵亦叶麋韵兹五翻】从以騂牡【有韵亦叶麋韵满补翻】享于祖考【叶有韵去九翻亦叶麋韵见第四章】执其鸾刀【豪韵】以啓其毛【豪韵】取其血膋【叶豪韵鲁刀翻说文作膋赋也清酒朱子云清洁之酒郁鬯之属也郊特牲云周人尚臭灌用鬯臭郁合鬯臭陰达於渊泉灌以圭璋用玉气也既灌然後迎牲致陰气也孔云祭之礼先以郁鬯降神然後迎牲此下有鸾刀谓杀牲祭时则騂牡在其上据迎牲时清酒又在其上明据灌时春官鬱人掌裸器凡祭祀之裸事和鬱鬯以实彝而陈之裸者灌祭之名是祀裸用郁鬯也天官酒正辨五齐之名一曰泛齐二曰醴齐三曰盎齐四曰缇齐五曰沈齐辨三酒之物一曰事酒二曰昔酒三曰清酒清酒今之中山冬酿接夏而成者也何知诗清酒非三酒之清酒者以言祭以清酒则以清酒祭神也三酒卑於五齐非裸献所用故司尊彝凡六尊之酌郁齐献酌醴齐缩酌盎齐说酌凡酒修酌郑注差次之云四者裸用郁齐朝用醴齐馈用盎齐诸臣自酢用凡酒然则三酒乃是诸臣之所酢用之以献神故知诗之清酒非三酒之清酒也又郑以清为玄酒愚按礼运玄酒在室醴醑在户粢醑在堂澄酒在下盖第设之而不用与此无涉也马赤色曰騂以牲色赤亦名騂牡说文云畜父也郊特牲云牲用騂尚赤也又周礼牧人职云凡阳祀用騂牲毛之陰祀用黝牲毛之望祀各以其方之色牲毛之旧说谓阳祀祭天及宗庙陰祀祭地及社稷望祀祭五岳四镇四渎也凡三代各尊其所尚之色周人尚赤而惟阳祀用騂盖重其礼以别於凡祭也然此所言从以騂牡及下文启其毛取血膋亦第以牛为主盖牛乃牲之大者周礼大司徒奉牛牲羞其肆祭义谓卿大夫毛牛而说文亦解膋为牛肠脂是也享者祭宗庙之名周礼大宗伯以吉礼事天神地示人鬼人鬼者宗庙也於天神曰祀於地示曰祭於人鬼曰享享有六以肆献裸享先王谓大禘也以馈食享先王谓禘也以祠春享以禴夏享以尝秋享以烝冬享若此诗所言则冬享耳考谓祢也礼记云生曰父死曰考白虎通云考成也言有成德也冬烝合祭七庙自始祖而下以至於祢故以祖考并言郑云享于祖考纳亨时也孔云周礼太宰云及纳亨赞王牲事纳亨者谓牵牲入庙将杀授亨人故谓之纳亨也纳亨而谓之献於祖考者地官充人云硕牲则赞注云赞助也助君牵牲入告肥是献之也鸾刀毛云刀有鸾者孔云鸾即铃也谓刀环有铃其声中节郊特牲云割刀之用而鸾刀之贵贵其义也声和而後断也言取其鸾铃之声宫商调和而後断割其肉也陈祥道云夫和非断则牵断非和则别故天以秋肃物而和之以兑圣人以义制物而和之以仁鸾刀以和济割亦此意也按执其鸾刀有二祭义云祭之日君牵牲穆答君卿大夫序从既入庙门丽於碑卿大夫袒而毛牛尚耳鸾刀以割取腍膋乃退注疏谓将杀牲故袒然则此卿大夫执之也祭统云及迎牲君执紼卿大夫从士执刍宗妇执盎从夫人荐浣水君执鸾刀羞哂夫人荐豆此之谓夫妇亲之注疏谓哂者哂肺也馈熟之时君以鸾刀割制所羞进哂肺横切之使不絕奠於俎上尸哂之故云羞哂又礼器云太庙之内敬矣君亲牵牲大夫赞币而从君亲制祭夫人荐盎君亲割牲夫人荐酒注疏谓亲制祭者杀牲已毕进血腥之时断制牲肝洗於郁鬯入以祭神於室亲割牲者荐熟时君亲割牲体也以上三事曰羞哂曰制祭曰割牲皆君执之也此下文言启毛

取血膋与祭义合知是卿大夫执鸾刀也后告也楚语观射父云毛以示物韦昭云物色也后其毛者取毛之色以告於祖考郑笺所谓以告纯是也孔疏谓开其毛似难通所取之毛以耳毛为上所谓毛牛尚耳是也其色则赤色所谓从以騂牡者也取血以祭即所谓腍也观射父云血以告杀韦昭云明不因故也孔云若不杀则无血故以血告杀也又郊特牲云血祭盛气也疏谓血是气之所含故云盛气也愚按二义兼之始备郊特牲又云毛血告幽全之物也告幽全之物者贵纯之道也疏云血是告幽之物毛是告全之物告幽者言牲体肉里美善告全者牲体外色完具贵其牲之纯善之道也中善则血好外善则毛好也又血亦所用以燎也膋解见前取膋为备燔燎之用以告臭也先儒皆谓当朝践时祝取腍膋燎於炉入以告神於室始升牲首於室故郊特牲云取腍膋燔燎升首报阳也以升首在燔燎之後故知当朝践时也朝践之礼行於灌後亦谓之朝事谓早朝祭事也故祭义云建设朝事燔燎羶芎见以萧光以报气也羶即血膋芎即黍稷先儒又谓此朝践时之燎及荐熟时又有燎故郊特牲云萧合黍稷臭阳达於墙屋故既奠然後炳萧合羶芎奠谓熟荐时也据此则一祭而前後有二燎未知然否】是烝是享【叶阳韵虚良翻】苾苾芬芬祀事孔明【叶阳韵谟郎翻】先祖是皇【阳韵】报以介福万壽无疆【阳韵 赋也烝冬祭名牲既杀矣臭既升矣於是行烝祭中享献之礼谓荐熟也荐熟之礼周礼谓之馈献亦谓之馈食此时始荐黍稷故以苾苾芬芬言苾芬解见楚茨篇馈食之荐不止於黍稷而独言苾芬者祭以黍稷为主也祀事孔明言自是而後所行祀礼又甚明备如执爨蹠蹠以至鼓钟送尸等事是也楚茨信南山同为一时之作楚茨详於後而略於前自祭祔以前但以祀事孔明一语该之信南山详於前而略於後自荐熟以後亦但以祀事孔明一语该之古人文字互见之妙如此先祖是皇解亦见楚茨篇福受於天而实先祖之所介助惟曾孙能致孝如此故先祖报以己所介助之福俾其万壽无疆而向所预拟为壽考万年受天之祐者皆非虚语矣张文潜云受莫大之福而其君有安宁壽考之乐此天下之至美极治之际也而其本出於仓廩之盈原隰之治田庐之修盖衣食不足於下则礼乐不备於上礼乐废则乱随之而起惟田事备而衣食丰衣食丰而礼乐备礼乐备而和平兴和平兴而人君有安宁壽考之盛此诗人深探其本要其终而言之序如此也邓云楚茨信南山二诗言天佑皇福万壽不一而足歆王也不知稼穡艰难不念小民之依亦罔或克壽周书戒之矣】

信南山六章章六句【子贡传申培说篇名作南山序以为刺幽王也不能修成王之业疆理天下以奉禹功故君子思古焉此不过为毛传篇次所误其谬不待言矣子贡传以南山楚茨皆所以劝农而申培说亦以此为王者劝农而祷祝之诗皆似惑於朱子豳雅之说益信二书之为伪书也朱子云或疑楚茨信南山甫田大田四篇即为豳雅未知是否愚按此诗有从以騂牡之语明是周有天下所尚豈豳侯所有而楚茨辞指与此诗略同亦皆一时所作特一言秋祔一言冬烝耳且我疆我理王事也鸾刀啓毛王礼也观其以曾孙田之配维禹甸之此其为曾孙何如者即诸侯不敢当而朱子乃以为公卿奉宗庙之诗何也】

潜荐鱼於寝庙之乐歌【出申培说】与月令季冬渔人始渔同【出贾公彦周礼疏 月令季冬之月命渔师始渔天子亲往乃尝鱼先荐寝庙黄子道周云是荐鲔之终事也郑玄云天子必亲往视渔明渔非常事重之也孔颖達云按仲秋以犬尝麻季秋以犬尝稻皆不云天子亲往今此亲往以四时荐新是其尝事鱼则非常祭之物故云重之也又云白虎通云王者不亲

取鱼以荐庙故亲行非此则不可故隐五年公矢鱼於棠春秋讥之是也应氏云尝者试而验之也将荐於所尊故不敢轻也药必先尝膳必品尝此致敬於君与亲也大享帝则尝牺牲荐寝庙则尝鱼此致敬於天与亲也秋尝曰尝亦谓物已备成尝而後祭以致其孝也吕氏春秋所载与月令同惟淮南子尝鱼作射鱼似不足信鲁语宣公夏濫於泗渊里革断其罟而弃之曰古者大寒降土蛰发水虞於是乎讲罟罾取名鱼登川禽而尝之寝庙行诸国人助宣气也鸟兽孕水虫成兽虞於是乎禁罟罗罾鱼鼈以为夏槁助生阜也鸟兽成水虫孕水虞於是乎禁罟罾设罝罟以实庙庖畜功用也今鱼方别孕不教鱼长又行网罟贪无艺也贾公彦云取鱼之法岁有五月令孟春獺祭鱼此时得取矣一也季春荐鮓於寝庙即献人春献王鮓二也鼈人秋献鼈鱼三也王制云獺祭鱼然後虞人入泽梁与孝经援神契云陰用事木葉落獺祭鱼同时是十月取鱼四也潜诗季冬荐鱼与月令季冬渔人始渔同五也是一岁三时五取鱼惟夏不取宣公夏濫於泗渊以其非时里革諫之愚按是诗以潜有多鱼为言明谓天寒鱼多潜藏其为月令季冬之荐鲁语大寒之取已无可疑但未详其作於何世孔谓周公成王太平泽及潜逃鱼皆肥美献之先祖神明降福作者述其事而为此歌亦无明据今姑从之】

猗与【平声】漆沮【鱼韵】潜【正义释文薛君章句俱作涔小尔雅作櫓】有多鱼【韵】有鱣有鮓【纸韵】鰪鰌鰋【丰氏本作□】鲤【纸韵】以享以祀【叶职韵逸职翻】以介景福【叶职韵笔力翻 赋也猗通作欵叹声也与通作欵说文云安气也徐锴云气缓而安也俗以为语末之辞猗与漆沮孔云可猗嗟而叹美欵此漆沮之二水也漆水一名同川水经谓之柴水云即浊水也雍大记云自同官县西境来经华原县合沮水华原今省入耀州沮水一名同官川水经云出北地直路县东过冯翊祲县北东入於雒一统志云在中部县南门外发源陕西通志云合慈马诸川经同官县北子午岭南流入耀州岔口与漆水合流按耀州即汉之祲县也以漆沮二水合流於此故通名为漆沮水水经注以为柴沮水也但据注合流之後仍分为二其一水东南出者即此之漆沮水故柴水也絶白渠东迳万年县故城北又南屈更名石川水又南入於渭禹贡所谓导渭东过漆沮及此诗猗欵漆沮皆此水也其一水东出者仍名为沮循郑渠东迳当道莲芍栗邑等处又东北流注於雒则水经所谓入於雒者即此故先儒误传以为漆沮水一名雒水周礼职方氏雍州其浸渭雒正指此雒非河南之雒也然谓沮水因入雒而概名雒则可谓入渭之漆沮水混名雒则不可若大雅縣自土沮漆乃扶风之水与此无涉曹氏云漆沮之水上接泾渭下与河通所以多鱼潜朱子云藏之深也解颐新语云鱼喜潜郑云冬鱼之性定孔云冬月既寒鱼不行孕性定而肥充故冬荐之毛传解潜为潜谓积柴水中令鱼依之止息因而取之按此则潜当通作櫓小尔雅云鱼之所息谓之櫓是也邓元锡駁之云猗其多也潜其深也取以时用有礼故足乐也於以祭受福矣柴而涔之薄围而取之是尽物之心也非王心也有鱣二句多鱼之实也鱣鮓详见硕人篇罗愿云鱣盖鮓之类常三月中从河上於孟津捕之淮水亦有之鮓出海三月从河上来许慎谓遡河而上能度龙门之浪则得为龙今巩县东雒度北崖上山腹穴旧说此穴与江湖通鱣鮓从此穴而来入河又云孔子曰食水者善游而耐寒谓鱼类也鱣鮓之类虽食於水而不正食水淮南子曰鵜胡饮水数斗而不足鱣鮓入口若露而死故鱣鮓不善游冬乃岫居入河而眩浮亦其验也水经注云巩县北有山临城谓之釜丘其下有穴谓之巩穴直穴有渚谓之鮓渚成公子安大河赋曰鱣鲤王鮓暮来游周礼春荐鮓然非时及它处则无故河自鮓穴已上又兼鮓称吕氏春秋称武王伐纣至鮓水纣使胶鬲候周师即是也按周礼天官献人职云春献王鮓月

令季春之月命舟牧覆舟五覆五反乃告舟备具於天子焉天子始乘舟荐鮓於寢庙夏小正则以二月祭鮓戴德为之传云祭不必记记鮓何也鮓之至有时美物也鮓者鱼之先至者也而其至有时谨记其时陆佃亦云鮓岫居至春始出而浮阳北入河西上龙门入漆沮见日而目眩故诗言漆沮及河通道此鱼今详鮓既以三月问来鱣为鮓之类而来时又同於鮓且冬皆岫居则其非季冬所有明矣诗於下文诸鱼不言有而独於此二鱼言有者正以其从它处而来非漆沮所本有抑亦追昔日之辞不为此时季冬咏耳鮓说文云白鮓也其形纤长而白故曰白鮓又谓白儵江东呼为鮓释鱼鮓黑鮓是也此鱼好游水上故庄子观於濠梁称儵鱼出游从容以为鱼乐明遂其性也淮南子曰不得其道若观儵鱼望之可见即之不可得此鱼好游也陆云鮓鱼形狭而长若条然故曰鮓也今江淮之间谓之□鱼性浮似鱣而白盖鱣从尝□谓之飡其义一也鱣鰻鲤解俱见鱼丽篇漆沮之鱼多矣於鱣鮓外独举四鱼者盖鮓善游鱣善飞其性浮鰻性偃鲤性俯其性沉今至冬而皆潜则凡为鱼之类者无所不潜矣又陆云先鮓後鱣先鰻後鲤者鱣大於鮓鲤大於鰻亦其美之递不如也享说文云献也祀说文云祭无已也以享指今日言以祀指後日言以介景福与楚茨篇义同诗言漆沮所有之鱼不独春时从河来者有鱣有鮓而已若鮓鱣鰻鲤之类皆二水所素饶兹於季冬之时取之以献寢庙继此以往祀典之修复无岁而不然以此邀祖考之佑则将助之以彰明可见之福也又按周礼献人凡祭祀共其鱼之鼈槁曲礼曰藁鱼曰商祭鲜鱼曰脰祭则王於凡祭祀其登俎者奚适而不用鱼哉特季冬纯用鱼而春荐新则专用鮓耳】潜一章六句【序及蔡邕独断皆以为季冬荐鱼春献鮓之所歌也按孟春而鱼陟负冰若以此诗为兼用之献鮓则据夏小正已在二月据月令且在三月於时鱼已不潜与诗语齟矣子贡传只存寢庙二字而其余阙文当亦同子夏之说以礼记荐鱼荐鮓皆在寢庙故也乃邹忠胤又引或者之说疑为祭漆沮之诗谓瓜瓞所兴开源自本岂容无祭祭则岂无乐歌夫漆沮有二此近镐之漆沮非彼漆沮也乌得同之天作之篇与祀岐山一例哉】

桑扈飧诸侯之礼也诸侯春见曰朝天子飧之疑即九夏中之鹜夏【左传成二十三年卫侯飧苦成叔甯惠子相苦成叔傲甯子曰苦成家其亡乎古之为飧食也以观威仪省祸福也故诗曰兕觥其觶旨酒思柔彼交匪傲万福来求今夫子傲取祸之道也按礼有飧食燕三者其详已见鹿鸣彤弓蓼萧露斯诸篇飧食比燕礼为大周礼大行人以九仪之礼待宾客上公飧礼九献食礼九举侯伯飧礼七献食礼七举子男飧礼五献食礼五举大国之孤眡小国之君诸侯之卿其礼各下其君二等以下及其大夫士皆如之疏谓飧礼九献者王酌献宾宾酢主人主人酬宾酬後更八献是为九献也食礼九举者亦烹大牢以食宾无酒行食礼之时九举牲体而食毕也後放此仪礼传云飧礼敬之至也食礼爱之至也飧为爱弗胜其敬食为敬弗胜其爱文质之辨也飧食之礼俱於庙行之燕则在寢而已然食礼虽大而无献酢之法又差异於飧燕故大宗伯职但云以飧燕之礼亲四方之宾客周语晋随会聘於周定王飧之穀烝范子私於原公曰此何礼也王召士季曰子弗闻乎禘郊之事则有全烝王公立饫则有房烝亲戚燕飧则有穀烝而左传亦载宣十六年冬士会问穀烝王曰王享有体荐宴有折俎公当享卿当宴王室之礼也飧通作享宴通作燕礼升穀於俎皆谓之烝烝者升也凡禘郊皆血腥全其牲体而升之谓之全烝公侯来朝王为设享则有体荐荐其半体谓之房烝切肉为穀升俎谓之穀烝又飧礼亨大牢以饮宾献依命数燕者其牲狗行一献四举旅降脱屣升坐无算爵以醉为度盖飧燕之异如此故左传晋郤至曰世之治也诸侯间於天子之事则相朝也

於是乎有享宴之礼享以训共俭宴以示慈惠共俭以行礼而慈惠以布政政以礼成民是以息古者於飨食燕三礼之中特以飨礼为盛礼唐贾公彦谓飨有食有酒兼燕於食故云盛礼也据甯惠子引此诗为咏飨食之事则既与燕礼无涉而诗中有旨酒思柔之云则其为飨礼而非食礼甚明特以飨中有食故兼言享食耳愚又意此必诸侯春来朝於天子而天子飨之之诗周礼大行人职云春朝诸侯而图天下之事此诗咏桑扈黄鸟俱春时所有非朝而何飨礼之见於诗者惟有此篇又按周礼九夏鹖夏居其一杜子春谓公出入奏鹖夏贾氏疏云按大射公入奏鹖夏是诸侯射於西郊自外入时奏之出入礼同故兼云出也今按鹖敖古俱通作傲庄子惠以欢为敖前汉书窦婴传诸公稍自引而怠鹖皆傲字也射之奏鹖意亦取无怵无敖之义此诗咏飨诸侯而未有彼交匪敖之语正与夏名相合则飨礼时出入所奏其即此诗乎】

交交桑扈【麋韵尔雅子贡传申培说丰氏本俱作扈後同说文作扈】有莺其羽【麋韵】君子乐【音络後同】胥受天之祜【麋韵兴也交交郑玄云飞往来貌邹忠胤云周之盛世有宾礼以亲邦国固交而为泰之时也以桑扈交交起兴正与末章彼交相映桑扈解见小宛篇丘光庭云尔雅桑扈窃脂窃之言浅也窃脂者浅白色也今三四月间采桑之时见有小鸟灰色眼下正白俗呼白鸕鸟是也以其采桑时来故谓之桑扈按左传剡子云我高祖少皞摯之立也凤鸟适至故纪於鸟为鸟师而鸟名九扈为九农正扈民无淫者也杜预引尔雅解之云扈有九种也春扈鵙鵙夏扈窃玄秋扈窃蓝冬扈窃黄棘扈窃丹行扈啗啗宵扈嘒嘒桑扈窃脂老扈鷦鷯以九扈为九农之号各随其宜以教民事陆佃云贾逵樊光以为春扈趣民耕种夏扈趣民耘耔秋扈趣民收敛冬扈趣民盖藏棘扈为果驱鸟桑扈为蚕驱雀行扈啗啗画为民驱鸟宵扈嘒嘒夜为农驱兽老扈鷦鷯则趣民刈麦令起不得晏者也说者非之以为入林为果驱鸟入室为蚕驱雀昼驱鸟夜驱兽穷日通宵常在田野非先王所以建官之意则亦以误矣盖九扈农桑候鸟扈民无淫者也故先王名官以主农桑之事取其意云尔非谓依此诸扈使之动作也盖如棘扈则主园事尔桑扈则主蚕事尔驱鸟驱雀非所以为难也又扈字说文本作扈从佳户声徐铉云扈扈也扈止也姪者过时也扈民不姪为止民使无过时也今按扈乃邑名原无止义当是因扈鸟能止民不淫通用作扈故又因训扈为止也莺鸟名即黄鸟也一名仓庚月令以仲春之月鸣亦名黄鹂鸣则蚕生陆玕云幽州人谓之黄鸟详见葛覃篇罗愿云仓庚者蚕之候故诗称仓庚啗啗采繁祁祁後人皆以鷦名之此鸟之性好双飞故鹂字从丽又曰鹂必匹飞也有莺其羽谓振羽而羣飞也与桑扈并言者以兴春朝之时爵有尊卑姓有同异皆在班列亦如鸟之不一其族者然又小雅两咏桑扈皆曰交交而秦风之咏黄鸟亦曰交交意其参襍往来之状殆是相类故此诗於桑扈之下连言莺羽似亦以交交象之俗所云莺梭织柳是也且桑扈既能扈民无淫而酒以成礼不继以淫末章所云彼交匪傲者虽在乐胥之时未尝忘扈止之戒而鹂必匹飞於同时来朝之义尤有合焉诗人所以取兴於二鸟者意固在是君子朱子云指诸侯也贾谊云胥者相也尔雅云皆也郭璞云方言东齐谓皆曰胥乐胥犹古乐府云今日乐相乐也杨慎云古人倒句法类如此愚按此以献酬款洽言乐胥之度正匪傲所形惟敬故能和也祜说文云福也地天交泰使天子之宠眷不衰即所谓受天之福也】交交桑扈有莺其领【梗韵】君子乐胥万邦之屏【梗韵兴也领毛传云颈也鸟将飞则先奋其颈屏小墙当门中者所以御外而蔽内尔雅屏谓之树是也君子能循礼以尽其事上之敬则名分辨纪网正外侮不侵天下和平信乎其足为万邦之屏蔽也曹氏

云鲁乘周礼而齐不敢图何屏如之有礼则安无礼则危秦襄公未能用周礼则无以固其国【叶元韵读如繁符袁翻】百辟为宪【叶元韵虚元翻】不戢不难【叶歌韵囊何翻】受【说文长笺作述】福不那【歌韵说文长笺作雉非也上文不难之难当作雉赋也二之犹是也之屏承上章言翰鸟羽也与屏字皆借字取义言是君子也不特可为万邦之藩屏亦可为天朝之羽翼也百辟泛指其余诸侯也宪毛云法也愚按宪字从心从目故有取法之义言此来朝之君子能循礼则四方诸侯之闻风者皆将以之为法式而谨於礼矣戢说文云藏兵也收敛之义难通作雉说文云行有节也按难雉古文通用周礼方相氏率百隶时难以索室驱疫礼记月令季冬之月命有司大难论语史记俱作雉是其证也那之为言彼也按说文训那为西夷国故字从邑凡经传语辞用那者皆借声无义故尔雅以为於也杜预以为犹何也郭璞以为语之韵絶也愚谓不那即俗所云不那个也下足以屏万邦上足以翰天朝远足以宪百辟则受天之祐自是无戮福孰如之使其中不以礼自戢而矜肆未除外不以礼自持而行动无节乃妄欲冀其受福恐亦不足以受彼矣不能受福则那而彼之那者外之之辞也能受福则来而纳之来者内之之辞下章云万福来求是也孝经言诸侯之孝云高而不危所以长守贵也满而不溢所以长守富也此可以通戢难受福之义矣】兕觥【左传说文丰本俱作觥】其觥【尤韵说文陆德明本丰本俱作觥】旨酒思柔【尤韵】彼【左传前汉书俱作匪】交【前汉书作徼】匪敖【左传前汉书中说俱作傲】万福来求【尤韵 赋也兕觥郑云罚爵也解见卷耳篇吕祖谦云如卷耳罍觥并陈则不必指为罚爵若此诗则罚爵也觥朱子云角上曲貌本作觥旨徐铉云甘也旨酒者以酒为旨而嗜之犹书云甘酒也柔说文云木曲直也其字从木与刚对看礼记疏云谓情性和柔也此二句解先王制兕觥之意言先王於燕飨之礼所以有觥觥然兕觥之设者何哉以酒为阳物能发人之刚其过在抵触故制兕觥为罚爵以寓戒兕善触者也取其角为觥欲人顾此物则虽以酒之旨美为可嗜而必思所以和柔其性情不敢失礼过饮而为酒所困也况飨又与燕不同设几而不倚爵盈而不饮则酒之设亦徒取具文以成礼而非宾主之所酣用者乎彼彼诸侯也交者交接於一堂之谓升降酬酢皆其事也敖当依左传作傲倨也按礼记敖不可长及母怵母敖皆通作傲匪敖兼戢难言左传云万盈数也求本古衣裘字象形後人加衣作裘实一字也此当通作述说文云聚敛也凡经书中言求者皆是述字彼君子於行礼交际之间谨守侯度絶无傲侮之形位虽高而不骄情虽通而不肆是虽非有意於敛福而万福皆来就而聚之也易曰德言盛礼言恭谦也者致恭以存其位者也正谓此也上章末句自我受福言此自福就我言犹云富贵逼人耳中说云文中子曰命之立也其称人事乎故君子畏之无远近高深而不应也无洪纖曲直而不当也故归之於天易曰乾道变化各正性命魏徵曰书云惠迪吉从逆凶惟影响诗云不戢不难受福不那彼交匪傲万福来求其是之谓乎子曰徼其能自取矣左襄二十七年郑伯享赵孟子垂陇公孙段赋桑扈赵孟曰匪交匪敖福将焉往若保是言也欲辞福禄得乎以彼交为匪交字之讹也而前汉书五行志亦云匪徼匪傲万福来求注谓饮酒者不徼幸不傲慢则福禄就而求之古文传写互异如此】

桑扈四章章四句【子贡传来子皆谓天子燕诸侯之诗然此飨诗非燕诗也如蓼萧露斯乃燕诸侯诗耳申培说则以为天子燕方伯之诗盖从万邦之屏百辟为宪二句生说其意见亦出於□子邹云夫以桑扈为燕方伯则亦当以彤弓为燕连帅此等总不必臆为之说古者方伯连帅亦未必有专职观所云百辟为宪则文武总在其中如後世六月之吉甫崧高之申伯

可见已序则以为刺幽王也君臣上下动无礼文焉范甯序谷梁亦云君臣之礼废则桑扈之讽兴今按诗中原无刺意说者谓盛陈古之君子乐循礼文如此所以刺今之不然殊属附会总之为篇次所惑耳】

蓼萧诸侯继世嗣封天子与之燕而歌此【左传襄二十六年卫侯如晋晋人执而囚之於士弱氏秋七月齐侯郑伯为卫侯故如晋晋侯兼享之晋侯赋嘉乐国景子相齐侯赋蓼萧子展相郑伯赋缁衣叔向命晋侯拜二君曰寡君敢拜齐君之安我先君之宗祧也敢拜郑君之不貳也又昭十二年宋华定来聘通嗣君也享之为赋蓼萧弗知又不答赋昭子曰必亡宴语之不怀宠光之不宣令德之不知同福之不受将何以在据二传其一以赋此诗为安先君之宗祧其一以通嗣君之故赋此诗则其为继世嗣封之诗明矣故序云蓼萧泽及四海也岂亦以天子能怀四方之诸侯为泽及四海耶】

蓼彼萧斯零【丰氏本作霏後同】露漙【语韵】兮既见君子我心写【叶语韵洗与翻】兮燕笑语【韵】兮是以有誉处【叶语韵敞吕翻】兮【兴也蓼戴侗云草苍蒨貌盖蓼本辛菜名故以苍蒨象其色毛传以为长大貌似无据萧香蒿也解见生民篇斯语辞如露斯鸛斯鹿斯柳斯是也零露解见野有蔓草篇郑玄云露天所以润万物喻王者恩泽漙毛云漙然萧上露貌按说文训漙为茜酒伐木所云有酒漙我者是也今以萧上露貌为漙者萧之受露其状沾濡有似於茅之沛酒也萧既受露则色愈苍蒨故以蓼言之也陆佃云萧微物也而其香能上达故诗以况四海之诸侯疏义云露零於蓼萧天子以心写於诸侯如天道之下济然而语又相应也故为兴君子指此继世之诸侯也我天子自我也写毛云输写也今作泻严云心有忧则郁而不泄如倾写器中之物则舒快矣燕谓设燕笑语是燕时君臣相悦豫之情按答述曰语语者午也言交午也誉朱子云善声也处止也留也誉处犹言为声誉之所归也上下交而泰道成则君臣皆有美誉也辅广云诸侯象贤嗣封天子见之得以输写其心因与之燕饮语笑和悦盖爱念其先人美其有後也国以永存爰及苗裔繇是则君无寡恩之嫌臣有同休之庆皆得以保有其声誉也蓼萧裳华皆为继世诸侯而作故其首章之语略同】蓼彼萧斯零露漙漙【阳韵】既见君子为龙【左传作宠】为光【阳韵】其德不爽【叶阳韵师庄翻】壽考不忘【阳韵兴也起兴与上章同皆上交於下之意漙漙毛传云露蕃貌邓元锡云龙象德之灵变光美德之昭明一云为龙见能膏泽下民为光见能照临下国亦通其德即龙光之德爽尔雅云差也欲其德常如此而不至於有差爽也一云为龙为光用之有变化其德不爽存之无改移亦通考说文云老也不忘谓无忘今日规劝之言即其德不爽一语是也祝其壽考而勉其不忘主情之肫切如此朱子云褒美而祝颂之又因以劝戒之也】蓼彼萧斯零露泥泥【叶荠韵乃礼翻】既见君子孔燕岂【音与下壽岂同陆德明本作恺】弟【荠韵陆本作悌】宜兄宜弟【同上】令德壽岂【叶荠韵去礼翻左传杜注作凯兴也泥泥露盛而凝洽之貌兴下文孔燕岂弟孔甚岂乐也弟顺也易也说文云弟韦束之次第也徐锴云积之而顺不相戾者莫近於韦故取名於韦束之次第孔燕岂弟孔字略断燕字义略断犹言甚哉燕时如此乎岂弟也宜兄宜弟因其德之形於燕而知其必宜於家朱子云以宜兄宜弟美之亦所以警戒之也盖诸侯继世而立多疑忌其兄弟如晋诅无畜羣公子秦鍼俱选之类黄佐云疑忌兄弟薄世之常情春秋或出奔而书弟或盗杀而书兄皆正人伦而存天理为後世训也大学云宜兄宜弟而後可以教国人令德即宜兄弟之令德壽岂壽而且乐也有

此令德则自今以後壽考之年皆优游顺适之境盖乐以天者也邹忠?云王者建国亲侯欲其光昭令德翼戴王室与国咸休永世无穷故褒之以龙光祈之以不爽美之以宜兄宜弟祈之以壽考壽岂意何殷殷也古亲贤之典其相勉以正如此岂徒以私惠自留哉】蓼彼萧斯零露浓浓【叶束韵奴同翻】既见君子儻【丰本作鎗】革【丰本作勒】忡忡【束韵毛传陆德明本皆从心作忡直弓勅弓二翻自唐孔氏而下诸本皆从水作冲冲误】和鸾【丰氏本作鎗】雝雝【叶东韵读如翁乌公翻贾谊新书作囡囡左传注後汉志注俱作雍雍】万福攸同【东韵兴也浓说文云露多也蓼萧承露之厚兴诸侯受福之多诸侯之福皆天子所赐也毛传训儻为轡革为轡首按诗言儻革有三处而郑笺解各不同钩膺儻革云轡首垂也儻革金厄云轡也惟本传为得之诗诂云轡御者所执也从丝曰轡从革曰儻尔雅云轡首谓之革郭璞云轡靶也以马轡所把之外有余而垂者谓之革然则儻即轡之别名革乃轡首之垂者郑氏於两处分而解之则各缺其一也忡忡轡垂貌草虫传谓犹冲冲是也和鸾皆铃也抱璞子云鸾闻乐而舞至则团安乐其雌曰和禽经云雌曰和雄曰鸾陆佃云礼在舆则闻鸾和之音盖取诸此毛以为和在轼鸾在镡郑以为戎车鸾在镡乘车鸾在衡按衡是车前衡木驾马者即轭也轼是车上横板手所凭伏以致敬者镡则马衔也以驷铁诗观之輶车置鸾於镡明其异於乘车则谓戎车鸾在镡乘车鸾在衡者似若可信崔豹云鎗轂衡上金爵者朱鸟也朱鸟鸾也鸾口衔铃故谓之鸾或谓为鎗事一而异义也于宝周礼注云和鸾皆以金为铃鸾者在衡和者在轼马动则鸾鸣鸾鸣则和应舒则不鸣疾则失音故诗云和鸾雝雝言得其和也又京山程氏云和金口木舌鸾金口金舌雝通作囡尔雅云音声和也和鸾相应故曰雝雝儻革和鸾皆诸侯车马之饰既受命於天子则当备此仪物矣又王介甫吕伯恭皆谓乘马路车天子所以好诸侯也有车马则有儻革和鸾矣韩奕之二章曰王錫韩侯儻革金厄三章曰其赠维何乘马路车即其事也万福所该者广享壽考保禄位皆在其中攸所同聚也去後祝愿之词又贾谊云声曰和和则敬故诗曰和鸾雝雝万福攸同言动以纪度则万福之所聚也此以雝雝象其德亦通殷大白云篇中颂美处俱含训诫意此王言也】

蓼萧四章章六句【子贡传申培说朱传皆以为诸侯来朝天子燕之而歌此诗按来朝燕诗则露斯篇是矣此故不应复出】

湛露诸侯朝正于王王行飧礼毕而燕之於寢於是赋此【序及子贡传皆云天子燕诸侯也郑玄云诸侯朝覲会同天子与之燕所以示慈惠左传文四年卫甯武子来聘公与之宴为赋湛露不辞又不答赋使行人私焉对曰臣以为肄业及之也昔诸侯朝正於王王宴乐之於是乎赋湛露则天子当阳诸侯用命也今陪臣来继旧好君辱贶之其敢干大礼以自取戾杜预注云朝正者朝而受政教也邹忠胤云古者封建之法诸侯各据其土而有其民其势易分而难合天子独立於上千里之畿岂足制万邦之命惟是有道以怀之周礼大宗伯以宾礼亲邦国春见曰朝夏见曰宗秋见曰覲冬见曰遇时见曰会殷见曰同是也以飧燕之礼亲四方之宾客上公三飧三食三燕侯伯二飧再食再燕子男一飧一食一燕职在掌客者是也】

湛【先君印海先生讳】湛露斯匪阳【丰氏本作易】不曦【微韵】厌厌【说文作慇慇韩诗作悵悵云和悦之貌】夜饮不醉无归【微韵兴也湛增韵云澄也澹也重言之者毛传云露茂盛貌斯语辞以天泽厚被於物兴君恩厚及於臣与蓼萧同意又欧阳修云天之润泽

於物者若雨若雪若水泉之浸其类非一而独以露为言者露以夜降者也因其夜饮故近取以为比厌厌当依说文作慇慇安也郭璞云安祥之容盖心安之也小戍厌厌良人解亦同此夜饮毛云私燕也孔颖达云楚茨备言燕私传谓燕而尽其私恩明夜饮者亦君留而尽私恩之义按仪礼燕礼云宵则庶子执烛於阼阶上司宫执烛於西阶上甸人执大烛於庭阍人为大烛於门外燕礼轻无庭燎设大烛而已是夜饮之礼古诚有之其礼一献四举酬降脱屣升坐无算爵无算乐君曰无不醉宾及卿大夫皆对曰诺敢不醉非若飨礼之设几而不倚爵盈而不饮故曰不醉无归也郝敬云朝以朝旦礼主於辨也饮以昏夜情主於合也朱子云湛湛露斯非日则不曦以兴厌厌夜饮不醉则不归】

湛湛露斯在彼丰草【皓韵丰本作^廿】厌厌夜饮在宗载考【皓韵兴也丰毛云茂也愚按以丰言草当是通作丰说文云草盛丰丰也从生上下达也徐锴云察草之生上盛者其下必深根也欧阳云言在彼丰草杞棘者以露之被草木如王恩被诸侯尔宗祖庙也载音义俱与再同唐虞以年为载尔雅注谓取物终更始是也考成也按仪礼受宾聘享则於太庙享食则於祔庙惟燕行於寝故燕礼云膳宰具官饌於寝东此云在宗载考者盖飨毕而燕言既在宗庙行飨礼矣更在路寝成此燕礼也毛传漫以宗为宗室而朱子以为即路寝之属俱与宗字义未合露在丰草则膏泽深以兴飨而又燕则恩意厚】

湛湛露斯在彼杞棘【职韵】显允君子莫不令德【职韵兴也杞王应麟以为梓杞盖大木也其状未详或引陆玕云山木也一名狗骨其树如樗理白而滑可以为函及简板其子为木蠹可合药今按枸杞一名狗骨其树亦如樗陆所云或即枸杞也然简陆疏中无此条当俟再考棘解见凯风篇戴侗云并束为棘象其丛生棘有二槲棘之棘其实似枣而多酸荆棘之棘裸生荆中木小而尤多束此棘乃槲棘之棘也愚按诗以杞棘竝言棘木低小则杞非大木可知且以後章桐椅例之桐椅相类杞棘亦当相类此杞即枸杞也又枸杞之类亦有枸棘形长而枝无刺者为枸杞圆而有刺者为枸棘杞棘桐椅皆以兴同类之诸侯以此时来朝者非一人也观下文莫不字可见谢枋得云显者其心明白洞达允者其心忠信诚慤君子朱子云指诸侯为宾者也令善也饮酒之盛而不困於酒则可谓令德矣苏辙云露之在草也如将不胜其在木也则能任之矣将言其无不醉也故以丰草兴之将言其醉而不能乱故以杞棘言之邹云杞棘中坚承露虽厚而不屈有强干意故以兴显允之令德即酒诰所云刚制也】其桐其椅【吕祖谦欧阳修本俱作如】椅【支韵】其实离离【支韵】岂弟君子莫不令仪【支韵兴也桐椅解俱见定之方中篇桐罗愿谓其子可以取油者陆佃以为冈桐是也生於高冈亦谓之冈梧盖梧性便湿不生於冈故此桐有冈之号椅梓实桐皮与桐相类故郑笺云桐也椅也同类而异名离离毛云垂也孔云言二树当秋成之时其子实离离然垂而蕃多岂弟解见蓼萧篇左传云有仪可象谓之仪郑云谓陔节也孔云当奏陔夏之节犹善威仪以其美人必举其终故知当陔之节也燕礼宾北面坐取其荐脯以降奏陔夏取所执脯以赐鍾人於門内溜遂出是也天子燕诸侯之礼亡故据燕礼以况之辅广云显允明信也岂弟乐易也明信者固宜其有德矣乐易者则恐其或略於威仪也乐易君子而威仪无不令焉此其所以为成德也邹云桐椅高竦其实离离而下垂有恭顺意故以兴岂弟之令仪即宛鸠所云温克也要以威仪即令德之符所谓饮酒孔嘉者也或谓丰草有露露始降杞棘有露夜渐久见椅桐之垂实离离为天向明而醉归之候则是君臣相与长夜而饮岂所语天子当阳诸侯用命之义夫露待阳而曦宾乃待露曦而後言归与愚按先言丰草取类於卑下之物为君尊臣卑之况次言杞棘则高於丰草矣杞棘中实故取以象其德然亦以其德盛而心下故仅取於杞棘也

末言桐椅又高於杞棘則象其威儀可為人所瞻仰每況愈上以致其贊美之意又按丰草似興子男杞棘似興侯伯桐椅似興上公二說俱可通張叔翹云君之燕臣第曰不醉無歸曰在宗載考期於情之洽禮之成而已非沉湎無度也乃其臣令德令儀罔不祗畏又有以善其燕豈與後世長夜之飲同乎哉左氏稱酒以成禮不繼以淫周王有焉以君成禮不納於淫諸侯有焉季本云此詩前二章以君之勸飲者言欲其盡歡也後二章以臣之承恩者言喜其盡敬也樂而不淫此所以懷諸侯而天下畏之鄧云燕主示慈惠蓼蕭之燕笑語也露斯之厭厭飲也慈惠至矣而卒歸之德不爽沖沖離離也德顯允莫不令儀也和而節美夫黃佐云記曰朝覲之禮所以明君臣之義也周室之盛諸侯之朝也有常期天子之禮遇也有常典夫何周室既衰其禮遂廢春秋二百四十二年之間公如京師者一見而已可嘆也夫】

湛露四章章四句【中培說以為天子燕同姓諸侯之詩此蓋泥於在宗載考一語耳毛傳因天子燕諸侯之禮亡故假宗子與族人燕為說云宗子將有事則族人皆侍不醉而出是不親也醉而不出是渫宗也而鄭箋又引陳敬仲飲桓公酒欲以火繼敬仲辭以卜昼未卜夜乃止謂夜飲之禮在宗室同姓則成之其庶姓讓之則止要亦揣摩之說不必有所據且毛鄭既皆知燕飲有宵而設燭之禮何謂止可行於同姓乎即據左傳稱諸侯朝正於王主宴樂之賦此是可知概指凡諸侯而言未嘗分同姓庶姓也】

彤弓諸侯敵王所忼而獻其功王賜之彤弓而歌此詩以飡之【序云天子錫有功諸侯也孔叢子載孔子曰於彤弓見有功之必報也按左傳文四年衛甯武子來聘公與之宴為賦彤弓不辭又不答賦使行人私焉對曰臣以為肄業及之也昔諸侯敵王所忼而獻其功王於是乎賜之彤弓一彤矢百旅弓矢千以覺報宴今陪臣來繼旧好君辱賜之其敢干大礼以自取戾杜預注云言諸侯盡力以當王所狠怒之人而獻其成功王賜之弓矢又為歌彤弓以明報功宴樂申培說與左傳同胡安國云諸侯終喪入見則有錫歲時來朝則有錫能敵王所忼則有錫載冕圭璧因其終喪入見而錫之者也禮所謂喪畢以士服見天子已見賜之黻冕圭璧然後歸是已車馬袞黻因其歲時來朝而錫之者也詩所謂君子來朝何錫予之路車乘馬玄袞及黼是已彤弓旅矢因其敵忼獻功而錫之者也詩所謂彤弓召兮是已】

彤弓召兮受言藏【陽韻】之我有嘉賓中心貺【叶陽韻虛王翻】之鐘鼓既設一朝【丰氏本作鼂下同】飡【叶陽韻虛良翻丰氏本作宮】之【賦也彤說文云丹飾也从丹彡彡其画也按周禮夏官司弓矢掌六弓之法王弓弧弓以授射甲革楯質者夾弓庾弓以授射豸侯鳥獸者唐弓大弓以授學射者使者勞者注往體寡來體多曰王弓弧弓皆遠射強弓也往體多來體寡曰夾弓庾弓皆近射弱弓也往體來體若一曰唐弓大弓也勞者勤勞王事若晉文侯文公受彤弓旅矢之賜是也考工記亦云王弓之屬利射革與質夾庾之屬利射侯與弋唐弓之屬利射深孔穎達云周禮無彤弓之名此彤弓必當唐大二者之中有之耳唐大者是其體強弱之名彤旅者為弓色之異稱為弓者皆漆之以御後霜露漆之為色赤黑而已彤既為赤則知旅者為黑也色以赤者周之所尚故賜弓以赤為重人按荀子云天子雕弓諸侯彤弓大夫黑弓周禮疏亦云天子之弓王弧諸侯之弓唐大夫之弓夾庾尚書大傳云三適謂之有功賜以車服弓矢王制云諸侯賜弓矢然後征賜鈇鉞然後殺韓詩外傳云諸侯之有德天子錫之一錫車馬再錫衣服三錫虎賁四錫樂器五錫納陛六錫朱戶七錫弓矢八錫鈇鉞

九锡钅鬯谓之九锡也山海经云帝俊赐羿彤弓素缯以扶下国汉韦孟诗云肃肃我祖国自豕韦彤弓斯征抚宁遐荒总齐羣邦以翼大商书文侯之命云父义和其归视尔师宁尔邦用赉尔钅鬯一卣彤弓一彤矢百卢弓一卢矢百卢旅通史记云齐桓公三十五年夏会诸侯於葵丘周襄王使宰孔赐文武胙彤弓矢大路下拜受赐左传僖二十八年晋文公献楚俘於王己酉王享醴命晋侯宥王命尹氏及王子虎内史叔兴父策命晋侯为侯伯赐之彤弓一彤矢百旅弓矢千曰王谓叔父敬服王命以绥四国纠逖王慝晋侯三辞从命受策以出出入三觐邹忠胤云古者诸侯有大功天子赐弓矢及圭瓚其赐之圭瓚使得为鬯以祭先也其赐之弓矢使得待王命以征不庭也故王制曰诸侯赐弓矢而後征伐典綦重矣後儒遂以为得专征伐毛萇释诗孔安国释书郑康成释礼社预释春秋左氏皆有是说彼特因王制之语而误增一字失之远矣夫以胤后之征义和也必曰承王命徂征南仲之伐玃狁也必曰自天子所谓我来矣今以为赐弓矢者即得专征伐是作威不必维辟而春秋之战皆义战矣岂彤弓之设端使然哉孔云甯武子所言及晋文侯文公所受皆必有旅弓此诗独言彤弓者以二文皆先彤後旅彤少旅多举重可以包轻故直言彤弓也有弓则有矢言弓则矢可知故亦不言矢也昭说文云弓反也毛传云弛貌徐锴云弛弦而体反也严粲云赐弓不张受谓诸侯受之言命也郑玄云谓王策命也藏之者孔云藏之於其家以示子孙言诸侯既受此弓因命之曰汝得此弓以归尚其宝藏之以示珍重之意左襄八年晋范宣子来聘公享之季武子赋彤弓宣子曰城濮之役我先君文公献功於衡雍受彤弓於襄王以为子孙藏也先君守官之嗣也敢不承命所谓以为子孙藏即此诗云藏之也我天子自谓也称受赐诸侯曰嘉宾我有嘉宾以下郑笺谓受出藏之乃反入正义引晋文公出入三觐之事为证非也出入三觐纪其先後觐王凡有三次无受赐後复受飧之事考文公飧赐正同日传先言飧而後言赐诗先言赐而後言飧行文异耳孔云飧之日先受弓矢之赐後受献酬之礼左传曰将赏则加膳加膳则飧飧将欲赏人尚加穀膳况弓矢之赐赏之大者焉得无其礼也祝说文云赐也蒙上文而言即以彤弓赐之也曰中心者言中心实欲祝之非有所勉强而然如内疑其臣而外牵於其功内忌其臣而外迫於其势则虽祝而非本於中心矣钟鼓既设谓设陈钟鼓之乐以乐宾也郑云大饮宾曰飧陈阳云周官乐师飧食诸侯序其乐事令奏鍾鼓鐸师凡飧祀鼓其金奏之乐典庸器帅其属而设筯簋飧食亦如之繇是观之飧礼不终朝以训恭俭要之宾主百拜而酒三行其乐未尝不令奏钟鼓也然锡彤弓必因飧礼笙师飧射共笙钟之意也孔云飧者烹大牢以饮宾是礼之大者献如命数设牲俎豆盛於食燕周语曰王飧有体荐燕有析俎公当飧卿当燕是其礼盛也言一朝者言王殷勤於宾早朝而即行礼故云一朝燕或至夜飧则如其献数礼成而罢故以朝言之左传郑飧赵孟礼终乃燕是飧不终日也邹云周礼大行人上公飧礼九献侯伯七献子男五献大国之孤视小国之君掌客上公三飧侯伯二飧子男一飧其牲则体荐体荐则房烝其礼亦有饭食春人云凡飧食共其食米是飧礼亦兼燕与食矣但燕或至夜而飧则於朝立成不坐设几不倚爵盈不饮献如其命数而止不必於时之久故一朝可以成礼然亦见王者勤於待宾赏不踰时如是严云彤弓非常赐也钟鼓大乐也飧盛礼也设盛所以重彤弓之赐也朱子云後之赏赐非出於利诱则迫於事势至有朝赐铁券而暮屠戮者则与中心祝之者异矣屯膏吝赏功臣解体至有印刳而不忍予者则与一朝飧之者异矣】彤弓昭兮受言载【叶寘韵子利翻】之我有嘉宾中心喜【叶寘韵许既翻】之钟鼓既设一朝右【叶寘韵於记翻韩本作佑】之【赋也载毛云载以归也郑云出载之车也喜悦也悦其有功也诗诂云古者飧燕有物以章其意谓之右严云右与宥侑通皆助也庄十八年左

传王飧醴命之宥注谓以币物助欢也僖二十五年二十八年皆云飧醴命宥是飧礼必有赐以为宥】彤弓弘弓受言囊【叶号韵右号翻亦叶宥韵疾救翻】之我有嘉宾中心好【叶号韵呼报翻亦叶宥韵许救翻】之钟鼓既设一朝醺【叶号韵大到翻亦叶宥韵承咒翻陆德明本作酬】之【赋也囊毛云韬也陆德明云弓衣也说文云车上大囊引诗载囊弓矢又按乐记倒载干戈包之以虎皮名曰建囊注谓兵甲之衣曰囊盖兵甲弓矢皆以皮为之衣故皆以囊名据说文言囊在车上则上章所云受言载之为载之於车明矣好亦悦也喜好皆悦但喜浅而好深醺郑云犹厚也劝也说文或从州作酬仪礼士冠礼主人酬宾注谓饮宾客而从之以财货曰酬所以申畅厚意也愚按礼於食有侑宾劝饱之币上章言右是也於饮有酬宾送酒之币此章言醺是也饮为飧礼兼言右酬者以飧亦兼食故也孔云饮食必酬侑之者按公食大夫礼宾三饭之後公授宰夫束帛以侑注谓君以为食宾殷勤之意未至复发币以劝之欲其深安宾也又聘礼云若不亲食使大夫朝服致之以侑币注谓君有疾病及他故必致之者不废其礼又曰致飧以酬币亦如之然则不亲飧以酬币致之明亲飧有酬币矣侑币公食大夫用束帛其酬币则无文聘礼注又引礼器曰琥璜爵盖天子酬诸侯也必疑琥璜为天子酬诸侯之币以琥璜非爵名而云爵明以送酒也食礼无爵可送则琥璜飧酬所用也谓飧时酬宾以琥璜将币耳小行人合六币琥以绣璜以黼则天子酬诸侯以黼绣而琥璜将之严云郑以醺为献醺但酬酢是燕礼其飧礼为训共俭爵盈而不饮未必有酬酢也愚按此诗三章所言虽无浅深而未尝无条理首章其总也其言彤弓当先言囊之既乃载以归後始藏於家以示子孙此先言藏者以藏为重故致意言之因藏而推始於载又因载而推始於囊皆丁宁郑重意也先言觐之者实指其事次乃推言其喜之又推言其好之正发明中心二字意以见其觐之之有所自来也先言飧之是大礼之总名後言右之醺之皆飧中事必至右醺兼举而飧礼斯毕亦见其爱宾之无已也言醺於右後飧以饮为主故结言之也】彤弓二章章六句【左传之说甚明子贡传但谓天子之燕诸侯混矣】

縣蛮诸侯贡士也疑即崇丘【说见草虫篇小引下崇丘为六笙诗之一见於仪礼此诗又为诸侯贡士於天子之诗当作於成王之世】

縣蛮黄鸟止于【注疏作於恐误】丘阿【歌韵】道之云远我劳如何【歌韵】饮之食【音嗣後同】之教之诲【队韵】之命彼後车谓之载【队韵】之【兴也縣说文云聯微也从系从帛盖紆之精者蛮即南蛮之蛮縣蛮连文朱传以为鸟声甚是以其声之微细相连不絕如縣而鸟语不可与人解又似蛮也孟子拟南蛮为馱舌同此黄鸟解见葛覃篇亦名仓庚陆佃云凡诗言黄鸟者兴也言仓庚者赋也仓庚鸣於仲春其羽之鲜明在夏又名鷦格物总论云鷦三四月鸣音声圆滑此诗特取兴黄鸟者按月令季春勉诸侯聘名士礼贤者孟夏命太尉赞杰雋遂贤良举长大黄鸟善鸣正在斯时故观之而起兴止郑玄云谓飞行所止托也丘说文云土之高也尔雅云非人为之丘李巡云谓非人力所为自然生为丘也阿非大陵之阿与菁莪在彼中阿同义谓曲也孔颖达云以下丘侧丘隅类之则丘阿非二物也卷阿曰有卷者阿知丘阿是丘之曲中也取兴丘阿者士声誉着闻超出齐民之上则止于丘之况然尚未离臭溲则又止於丘阿之况也道之云远者谓自侯国而升之王朝其道路甚远也我代为诸侯自我也劳犹烦也因远道而欲资遣其行故筹度之至於烦劳为下文命彼後车发端也饮之食之教之诲之追言其平日尽心教养之事也渴则予之饮饥则予之食养之义也说文

云教上所施下所效也海晓教也徐锴云丁宁海之若决晦昧也又郑云事未至则豫教之临事则海之荀子云治国者不富无以养民情不教无以理民性故家五亩宅百亩使田务其业而勿夺其时所以富之也立大学设庠序修六礼明十教所以导之也诗曰饮之食之教之海之王事具矣春秋繁露云君子内治反理以正身据祉以劝福外治推恩以广施宽制以容众孔子谓冉子治民者先富之而後加教语樊迟曰治身者先难後获以此之谓治身之与治民所先後者不同焉矣诗云饮之食之教之海之先饮食而後教诲谓治人也又曰坎坎伐辐彼君子兮不素餐兮先其事後其食谓之治身也按王制云凡居民量地以制邑度地以居民地邑民居必参相得也无旷土无游民食节事时民咸安其居乐事劝功尊君亲上然後兴学司徒修六礼以节民性明七教以兴民德齐八政以防淫一道德以同俗养耆老以致孝恤孤独以逮不足上贤以崇德简不肖以诎恶六礼冠婚丧祭乡相见也七教父子兄弟夫妇君臣长幼朋友宾客也八政饮食衣服事为异别度量数制也凡此皆先饮食而後教诲之事意侯国制亦同此也命诸侯命之也後车郑云倅车也按周礼王之五路皆有副车谓之倅五路之中金路以封同姓象路以封异姓革路以封四卫然则诸侯之乘此路者亦必皆有倅车矣谓即命也载说文云乘也诸侯将贡士於天子命彼典车者以己所有之倅车与之乘之敬爱之至也又按彭更言孟子後车数十乘则凡从君行之车皆名後车不必路车之倅矣汉书高帝下诏求贤令御史中执法下郡守其有意称明德者必身劝为之驾注谓郡守身自往劝勉令至京师又驾车遣之是则後车载士之风汉世犹存益信此诗为诸侯贡士咏也孔安国书传云古者诸侯之於天子也三年一贡士一适谓之好德再适谓之贤贤三适谓之有功有功者天子赐以衣服弓矢再赐以钜鬯三赐以虎贲百人一不适谓之过再不适谓之敖三不适谓之诬一诎以爵再诎以地三诎而地毕汉志云先王之制里有序而乡有庠序以明教庠以行礼而视化焉八岁入小学学六甲五方书计之事始知室家长幼之节十五岁入大学学先圣礼乐而知朝廷君臣之礼其有秀异者移乡学於庠序庠序之异者移国学於少学诸侯岁贡少学之异者於天子学於太学命曰造士行同能偶则别之以射然後爵命焉】 縣【大学作缙】 蜚黄鸟止于丘隅【虞韵】 岂敢惮行畏不能趋【虞韵】 饮之食之教之海【韵见前】 之命彼後车谓之载【韵见前】 之【兴也隅说文云陬也郑云丘隅丘角也大学引诗云邦畿千里惟民所止诗云缙蜚黄鸟止于丘隅子曰於止知其所止可以人而不如鸟乎今按此诗皆以丘为言盖取高复之义鸟置身於高复之地则患害莫之能及故谓之其所止大学引此与邦畿对言正以邦畿为四方之极丘隅为至高之处俱是欲人止于至善影子善而曰至所谓至精至粹无以复加如仁敬孝慈信各造其极之类乃絶顶之名人能止於此亦如黄鸟之止丘隅可望而不可即旧说以丘隅为岑蔚安闲之地鸟择此地而止处之为得所止则与止至善之义漠不相涉故知非诗意也惮说文云忌难也行指後车载之言畏犹虑也刘熙云疾行曰趋我岂敢惮命後车一行乎诚虑贤人在道不能疾行以至王国故此命不容已耳韩诗外传云客有见周公者应之於门曰何以道旦也客曰在外即言外在内即言内入乎将母周公曰请入客曰立即言义坐即言仁坐乎将母周公曰请坐客曰疾言则翕翕徐言则不闻言乎将母周公唯唯旦也喻明日兴师而诛管蔡故客善以不言之说周公善听不言之说若周公可谓能听微言矣故君子之告人也微其救人之急也诗曰岂敢惮行畏不能趋按此虽非本文正解然摹写殷勤之意若有合焉饮之食之以下解已见前上章言命彼後车尚未就道此则行而在道矣又上兴丘阿此兴丘隅者丘阿为人所不见之地进而丘隅则人咸得见之喻士之离衡茅而至止於射宫也射义云古者天子之制诸侯岁献贡士於天子天子试之

於射宫又云天子将祭必先习射於泽宫泽者所以择士也已射於泽而後射於射宫按射宫乃王国之小学即虞庠是也在西郊泽宫在近水泽之地皆非当国之中此其为丘隅之况与云岁贡者郑氏亦以为三岁一贡大国三人次国二人小国一人】 縣蛮黄鸟止於丘侧【职韵丰氏本作仄】岂敢憚行畏不能极【职韵】饮之食之教之诲【韵见上】之命彼後车谓之载【韵见上】之【兴也侧说文云旁也射宫试士之後得与於祭者有庆谓之庆则当授以爵禄矣王制所谓司马辨论官材论进士之贤者以告於王而定其论论定然後官之任官然後爵之位定然後禄之此时在王左右故以丘侧起兴与丘隅不同隅是丘之一角进而丘侧则在丘当中之侧矣极之为言至也国语云齐朝驾则夕极於鲁国道之云远恐不能至其所故不得不命後车以载之也当周盛时诸侯贡士之典如此】

縣蛮三章章八句【朱子云此微贱劳苦而思有所托者为鸟言以自比细按饮之食之以下语气如何可通五之字皆自我施人而言岂人来施我之谓乎申培说云大夫适位他国其遏宾之主人闵之而作是诗盖彷彿诗辞而为之说然殊鄙迂不成义理子贡传则但存王之时大夫避六字而上下俱缺文邹忠胤云夫以王朝大夫踉跄出奔而乞怜於人如此圣人奚取而録之如谓其能见几而作则宜超然高举以保贞而哓哓然饮食是冀似不辞雁鹜之余粒者志何惫也岐路堪悲导迷登觉诚不无需於教诲乃以坠风之羽思振翮轩翥之间辄希後车命载愿又何奢也岂其从大夫之後不可徒行故耶然易不云舍车而徒义弗乘乎剥之上九硕果不食君子得輿此则出於衆心之愿载若夫俛仰号呼如战国歌长铗者流斯亦鄙矣序以为微臣刺乱也大臣不用仁心遗忘微贱不肯饮食教载之故作是诗也愚按序说於诗意较近所谓大臣即指诸侯也不能饮食之所谓不用仁心也不能教诲而荐扬之所谓遗忘微贱也但诗无刺意序以为刺乱者直以其篇次在白华後并系之幽王耳必谓追述往时盛事以伤今之不然亦属附会又王符云行人定而縣蛮讽其意亦与序同】

吉日成王蒐岐阳也【竹书纪成王六年大蒐於岐阳左传昭四年楚椒举言於楚子曰臣闻诸侯无归礼以为归夏启有钧台之享商有景亳之命周武有孟津之誓成有岐阳之蒐杜预云成王归自奄大蒐於岐山之阳按晋语叔向曰昔成王盟诸侯於岐阳楚为荆蛮置茅蕝设望表与鲜牟守燎故不与盟即此时事也所以知此诗为蒐岐阳者以漆沮之从一语知之诗言田猎不及会盟之事盖成王於此时先蒐而後盟是诗之作但为大蒐咏耳周礼中春教振旅遂以蒐公羊谷梁皆谓夏曰蒐当以周礼之义为正愚又疑此诗即六笙诗中之由庚说见草虫篇小引下】

吉日维戊【叶有韵莫後翻风俗通维戊作庚午】既伯【音禡说文作禡】既祷【叶有韵当口翻说文丰氏本俱作禡】田车既好【叶有韵许厚翻】四牡孔阜【有韵丰本作□】升彼大阜【同上丰本作 】从其羣丑【有韵丰本作醜 赋也吉善也楚辞云吉日兮辰良天干为日地支为辰日干五刚五柔甲丙戊庚壬五奇为刚乙丁己辛癸五偶为柔十二支六阳六陰子寅辰午申戌为阳丑卯巳未酉亥为陰对月言日以日统辰故此章单言戊称吉日而後章兼言庚午亦称吉日也曲礼云外事以刚日内事以柔日郑玄皆主祭祀言而以出郊之祭为外事郊内之祭为内事孔颖达駁之谓郊天是国外之事应用刚日而郊特性云郊之用辛非刚也社稷是郊内应用柔日而郊特性云祀社日用甲非柔也崔灵恩则谓外事指用

兵之事内事指宗庙之祭所以不及郊社者以郊社之礼尊不可以外事内事律之崔说比郑为允孔丛子云凡类禘皆用甲丙戊庚壬之刚日此诗所咏既伯既祷禘祭之礼也然则吉日维戊即田猎之日以次章庚午推之後於庚午八日於辰属寅朱子以为戊辰非也何以知之以後章既差我马之句知之若果此日为戊辰则既言四牡孔阜从其羣丑矣何待閼二日後始行差择其马乎又按寅午同气孟康云南方火火生於寅盛於午火性炎猛其气精专严整故为廉贞是也详见次章既伯既祷田祭也伯通作貉亦作貉郑司农读为禘王制云天子将出征类於上帝宜乎社造乎祔禘於所征之地孔丛子云已克敌使择吉日复禘於所征之地柴於上帝祭社奠祖以告克郑云禘师祭也为兵祷其礼亡其田猎之祭则名之为貉周礼蒐苗獮狩有司皆表貉於陈前又肆师职云凡四时之大田猎祭表貉则为位甸祝职云掌四时之田表貉之祝号郑注谓貉读为千百之百於立表处为师祭祭造军法者祷气势之增倍也其神盖蚩尤或曰黄帝杜子春读亦同云貉兵祭也田以讲武治兵故有兵祭习兵之礼故貉祭祷气势之十百而多获邢昺云貉之言百祭祀此神求获百倍也愚按貉貉本是一字以百解貉无乃强解读貉为百亦未必然又有言祭貉以导兽者要皆附会之说以愚意揣之政繇古人读貉与禘同音遂讹禘为貉耳禘祭名也故字从示其以马谐声义必有取或杀马为牲或以马者国之大事克敌必藉马故为马祈福亦未可知师田皆行军之事其同有禘祭焉宜也观说文既伯作既禘可证今韵会中伯字亦有禘音盖繇伯貉相讹而然无足疑者此既伯即田猎之日表貉之祭也毛传以伯为马祖按周礼较人职云春祭马祖执驹夏祭先牧颁马攻特秋祭马社臧仆冬祭马步献马讲御夫马祖郑以为天驷天驷房也晋天文志云天驷为天马主车驾南星曰左骖次左服次右服次右骖亦曰天廐孔云马与人异无先祖可寻故取孝经说房为龙马是马之祖先牧始养马者马社旧说谓始乘马者或云廐中土神也马步旧谓神为灾害马者一云行神四时之祭各有所为未闻田猎有马祖之祭亦从未闻马祖有伯之称也祖者始也伯者长也二义悬殊何得以伯当祖乎祈福曰祷毛以为祷获是也战必祷克田必祷获说文作禘云祷牲马祭也按祷牲马祭分为二事周礼甸祝职云禘牲禘马皆掌其祝号杜子春注云为田祷多获禽牲为马禘无疾观此禘牲即貉祭所祷禘马即较人四时之祭所祷皆名为禘也此诗既伯既祷乃甸祝所职也尔雅以为马祭似误以禘牲为禘马耳又小宗伯职云凡王之会同军旅田役之祷祠肆仪为位则以伯为小宗伯亦通惟於既字文理似不甚顺田车二句解见车攻篇周礼田仆职云掌馭田路以田掌佐车之政设驱逆之车田路王所乘即此田车是也驱逆之车谓之佐车下章既差我马皆用之於驱逆者阜说文云山无石者尔雅高平曰陆大陆曰阜大阜曰陵今日大阜正当名陵耳从从禽也以追逐其後故曰从丑郑云衆也谓禽兽之羣衆也孔云车牢马健故得历险从禽严粲以田车四语皆祷辞言告神以将田猎其实戊日未田也亦似可通但以车攻篇田车既好四牡孔阜二语例之明是纪事语耳左昭三年郑伯如楚子产相楚子享之赋吉日既享子产乃具田备王以田江南之梦楚灵赋诗自拟天子其汰如此】吉日庚午【虞韵】既差我马【叶语韵满补翻】兽之所同廐【丰本作 廐】鹿麋麋【韵说文作麋麋】漆沮之从天子之所【叶麋韵读如数爽主翻麋赋也庚刚日也外事以刚日择马以田亦外事也孔云必用午日者盖於辰午为马故也邢凯云古今涓吉外事用刚日内事用柔日如甲子为刚乙丑为柔至为简易甲午治兵壬午大閱吉日庚午既差我马皆外事也故用刚日丁丑燕之乙亥尝之凡祭之用丁用辛内事也故用柔日社祭用甲郊以日至亦不拘也後世术家既多互相矛盾褚先生云武帝聚会占家问某日可娶妇乎五行家曰可堪輿家曰不可又有建除丛辰天人太乙历家凡七种

所言吉凶相半制曰避诸死亡以五行为主今观诸历一日之内有吉有凶当如武帝主一家可也郑鲜之启宋武帝明旦见蛮人是四废日答曰吾初不择日此亦可法又翼奉云北方之情好也好行贪狼申子主之东方之情怒也怒行陰贼亥卯主之贪狼必待陰贼而後动陰贼必待贪狼而後用二陰并行是以王者忌子卯也礼经避之春秋讳焉南方之情恶也恶行廉贞寅午主之西方之情喜也喜行寬大己酉主之二阳并行是以王者吉午酉也诗曰吉日庚午上方之情乐也乐行奸邪辰未主之下方之情哀也哀行公正戌丑主之辰未属陰戌丑属阳万物各以其类应差广韵云次也不齐等也按尔雅云田猎齐足即差等其足力之谓也此以给从王於田者吉日庚午乃追述之辞言先此已差马以待矣见戒备有索也凡四足而毛者谓之兽总名也礼记注云兽者守也言力多不易可擒先须围守然後可获同合会也尔雅云鹿牡麋牝麇严云言牝鹿则见蕃息之意又罗愿云鹿自有无角者名为麇鹿麇当依说文作麇云麇鹿羣口相聚也若如字解则麇牡曰麇尔雅麇牡麇牝麇是也郑云麇复麇言多也於鹿则举牝於麇则举牡足尽乎麇鹿之类矣二说皆通漆沮二水名即縣篇之沮漆是也在汉扶风之地漆水出杜阳县岐山北沮水与漆水合流至岐山入渭详见縣篇与潜之猗欽漆沮不同愚所以定此诗为成王大蒐岐阳之诗者正以此一语定之从犹循也言循漆沮之滨以行也漆沮与岐阳相近故云然天子谓成王也岐阳之地为天子大蒐之所在也】瞻彼中原其祁【尔雅作麇】孔有【韵亦叶纸韵羽轨翻】儻儻【说文丰本俱作伾伾陆德明本作麇麇一作麇麇後汉书注韩诗俱作駘駘】俟俟【纸韵文选注薛君章句俱作駘韩诗作駘駘】或羣或友【有韵亦叶纸韵羽轨翻】悉率左右【叶有韵云九翻亦叶纸韵羽轨翻】以燕天子【纸韵亦叶有韵济口翻 赋也仰视曰瞻中原朱子云原中也祁通作岐谓山道之旁出者愚意当即指岐山也山有两岐故名孔有甚有也指兽言儻说文云行貌俟说文云大也言儻然而来者皆兽之大者也又薛君章句及毛传云趋则儻儻行则俟俟则此俟当通作俟言相待而缓行也周语云兽三为羣毛传云兽二曰友孔云或三三为羣或二二为友是其甚有也自三以上皆称羣不必要三也悉尽率循燕安也郑云悉驱禽顺其左右之宜以安待王之射也孔云趋逆之车驱而至於彼防虞人乃悉驱之循其左右之宜以禽必在左射之或令左驱令右皆使天子得其左廂之便也】既张我弓既挟我矢【纸韵】发彼小豝殪【丰本作壹】此大兕【纸韵】以御宾客且以酌醴【叶纸韵力纸翻赋也张说文云施弓弦也我主天子而言仪礼注云方持弦矢曰挟郝敬云挟夹同两物夹一曰挟矢在弦上以大二指夹而引之也发发矢豝解见驹虞篇严云传言百发百中则发有中否今日发彼小豝言发则中豝矢无虚发不待言中也殪毛云壹发而死也兕兽名罗愿云重千斤或曰即犀之?者兕似牛犀似豕兕青而犀黑兕一角而犀二角以此为异然兕之革坚故犀甲只壽百年而兕甲壽二百年射以得兕为雋故周时美殪此大兕唐叔虞射兕於徒林殪以为大甲为是武也以享晋封其後世之臣相与传道之而楚人招魂称君王亲发兮耽青兕以为物之伟观可以娱魂而来之云尔孔云虞人既驱禽待天子故言既张我天子所射之弓既挟我天子所发之矢发而中彼小豝亦人殪此大兕也小豝大兕俱是发矢杀之但小者射中必死苦於不能射中大者射则易中惟不能即死小豝云发言发则中之大兕言殪言射着即死异其文者言中微而制大也或云发见其巧殪见其力劝侑曰御宾客谓从王大蒐之诸侯也孔云周礼六服之内其君为大宾其臣为大客彼对文则君为大宾臣为大客若散则宾亦客也故此宾客并言之刘公瑾云此言进禽於宾客亦犹车攻言大庖不盈之意酌说文云盛酒行觴也醴说文云酒一宿熟也文选注云甜而不泔也周礼酒正职云辨五齐之名一曰泛齐二曰醴齐三曰盎

齐四曰缇齐五曰沈齐注云泛者成而滓浮泛泛然醴犹体也成而滓汁相将盎犹翁也成而翁翁然葱白色缇者成而红赤沈者成而滓沈自醴以上尤浊盎以下差清谓之齐者每有祭祀以度量节作之也且以酌醴者郑云酌而饮羣臣以为俎实孔云左传天子飨诸侯每云总醴命之宥是飨有醴也杜预云先置醴酒示不忘古也严云周官五齐味薄所以祭也三酒味厚人所饮也坊记醴酒在室醕酒在堂则五齐亦曰酒醴味甜於余齐与酒味殊穆生不嗜酒故元王每置酒常为穆生设醴见醴与酒味异也飨为盛礼惟王飨诸侯则设醴示不忘古礼之重也既得禽兽则以为俎实进於宾客又且以酌醴而飨举行盛礼也吕祖谦云车攻吉日皆以蒐狩为言何也盖蒐狩之礼所以见王赋之复焉所以见军实之盛焉所以见师律之严焉所以见上下之情焉所以见综理之周焉欲明文武之功业者观诸此足矣马融云夫乐而不荒忧而不困先王所以平和府藏颐养精神致之无疆故戛击鸣球载於虞谟吉日车攻序於周诗圣主贤君以增盛美岂徒为奢淫而已哉】

吉日四章章六句【序云美宣王田也能慎微接下无不自尽以奉其上焉朱子谓慎微以下非诗本意或曰篇中两诹吉日所谓慎微也既差我马所谓接下也若悉率左右以燕天子则所谓无不自尽以奉其上者也以此解序得矣然究於诗义何涉申培说谓宣王畋猎复古史籀美之焦氏易林亦云吉日车攻田弋获禽宣王饮酒以告嘉功总之因毛传篇次以类系此诗於车攻之後遂并属之宣王耳然宣王自圃田一狩之外其他皆不见於史即岐阳石鼓旧相传为宣王猎碣而杨慎援据左传且疑为成王时诗矣若子贡传以为宣王閱武其谬益甚愚疑此诗为即由庚盖以吉日庚午之句取之篇末曰以御宾客且以酌醴故燕飨通用果尔则是诗在周公作仪礼时已有之其为成王之诗明矣】

诗经世本古义卷十之中

卷十之下

<经部,诗类,诗经世本古义>

钦定四库全书

诗经世本古义卷十之下

明 何楷 撰

周成王之世诗

振鹭【礼记作振羽】周成王时微子来助祭于祖庙先习射于泽宫周人作诗以美之【此与有瞽有客皆一时之诗为微子作也何以知其为微子也微子之封宋也统承先王修其礼物作宾于王家故有客之诗曰亦白其马商尚白也鹭乃白鸟而我客之容似之意者其衣服车旗之类皆用白与此以知其为微子也何以知其成王时来助祭也书序云成王既黜殷命杀武庚命微子启作微子之命是则微子之封宋也自成王始命之而诗大雅文王篇乃周公所作以训成王者其曰商之孙子侯服于周厥作裸将常服黼黻白虎通谓言微子服殷之冠助祭于周此以知微子在成王时来助祭也何以知其习射于泽宫也礼天子将祭必习射于泽泽者所以择士也已射于泽而後射于射宫射中者得与于祭不中者不得与于祭此诗言西雝雝者天子之辟雝正泽宫也此以知其为将祭而先习射也泽宫自习射而外亦有以他事至者与曰有之其一为郊祀家语及郊特牲皆云卜郊之日王亲立于泽官以听誓命受教谏之义也其一为养老乐记云食三老五更于太学天子袒而割牲执酱而馈执爵而酹冕而总干所以教诸侯之弟也然则此客之在西雝也何以知其不为彼二者而至与曰以有瞽之诗例之彼祭祖庙之诗也而曰我客戾止此亦曰我客戾止大抵同时咏耳故知其为助祭祖庙也】

振鹭于飞于彼西雝【冬韵薛君章句作雍】我客戾止亦有斯容【冬韵兴中有比也振钱氏云自振其羽也鹭毛传云白鸟也陆玑云水鸟也好而洁白故谓之白鸟齐鲁之间谓】

【之春锄辽东乐浪吴杨人皆谓之白鹭大小如鸱青脚高尺七八寸尾如鹰尾喙长三寸陆佃云鹭步于浅水好自低昂故曰春锄色雪白顶上有丝毳毳然长尺余欲取鱼则弭之亦或谓之白露今人畜之极有驯扰者每至白露降日则定飞扬而去不可复畜矣俗说雌雄相眄则产罗愿云鹭洁白而善为容其集必飞舞而下其翅背上皆有长翰毛江东人取为接离海録云一名带丝禽格物论云一名属玉雝当通作雍王氏云辟雍也辟雍有水鹭所集也辟雍解见灵台篇朱子云先儒多谓辟雍在西郊故曰西雝王应麟云即旋丘之水其学即所谓泽宫也郑玄云白鸟集于西雝之泽言所集得其处也我客微子也尊之曰客亲之曰我客爱敬兼至也按有客之诗序以为微子来见祖庙左昭二十五年宋乐大心曰我于周为客然则此客之为称微子明矣孔穎達云客者敌主之言诸侯之于天子虽皆有宾客之义但先代之後

时王偏所尊敬特谓之客戾通作丽说文云旗行也止息也戾止据西雝而言我客与衆诸侯来助祭者偕行而止息於此将习射以与祭也斯指鹭也容自礼物言之如车旗服御之类从其先代所尚亦如鹭色之洁白然也孔云受命之祖皆圣哲之君故能克成王业功济天下後世子孙无道丧其国家遂令宗庙絶享非仁者之意也故王者既行天罚封其支子爵为上公使得行其正朔用其礼乐所以尊贤德崇三统明王位非一家之有也】在彼无恶【叶遇韵乌故翻】在此无斃【叶遇韵都故翻中庸及薛君章句俱作射】庶几夙夜以永终誉【叶遇韵读如裕俞戍翻 赋也彼此主客相对之辞恶犹怨也斃说文云解也谓恩礼衰替也钱天锡云为胜国之遗易起猜嫉在革命之际易生厌薄陈氏云在彼不以我革其命而有恶于我知天命无常惟德是与其心服也在我不以彼坠其命而有厌于彼崇德象贤统承先王忠厚之至也辅广云在彼无恶其心公也在此无斃其心厚也公则顺天厚则尽道万尚烈云说者於有客章以白其马追琢其旅为在彼无恶以去而留追而绥为在此无斃曰庶几者期望之也夙夜乃循环无穷之意永说文云长也终者对今之辞誉说文云称也此日彼此各尽其道固为人所称誉矣自今以往庶几时时如此而後可以终有此誉成王告微子曰与国咸休永世无穷又曰以蕃王室毗予一人俾我有周无斃皆比意也中庸云君子动而世为天下道言而世为天下法行而世为天下则远之则有望近之则不厌诗曰在彼无恶在此无射庶几夙夜以永终誉君子未有不如此而蚤有誉於天下者也引诗之意谓君子与天下精神意虑两两绾结无时不然故能终誉亦与此诗意彷彿相近陈际泰云仍以国制而不改周以後无此也待以客礼而不臣周以後无此也微子之命犹有戒勅之辞至振鹭而益浑融矣无恶无斃夙夜终誉之语抑何爱而婉也若恶伤其意者然噫嘻後世无望此矣当涂之待山阳典午之待归命始终保全其去古犹近乃刘豫独何心也哉罗泌云武王既胜商杀纣即武庚而立之夫吊其民诛其君而乃立其子独不以其他日之将不利而废之此周之至德也及武庚之作难三监淮夷并起应之当此之时周之事亦汹矣周公于是焉濯征兗代至久而後克之兹宜深监武庚之事而乃更立商王之元子微子启夫以微子之贤吾君之子顾乃使之代商後而邦之宋宋为故亳商之旧都民之被其泽者固未忘也使微子而非人少异其志则全商之地确非周矣而成王周公方且晏然命之统承先王修其礼物不少为疑而宋之臣人卒以安堵非圣人之盛德能如是乎于是知立国惟在于贤而不在于疑之多也秦汉而下不原仁义而徒汲汲以防虞天下为心岂不大可惭哉礼仲尼燕居篇子曰礼有九焉大飨有四焉苟知此矣虽在畎亩之中事之圣人已两君相见揖让而入门入门而县兴揖让而升堂升堂而乐阼下管象武夏龠序兴陈其荐俎序其礼乐备其百官如此而后君子知仁焉行中规还中矩和鸾中采齐客止以雍彻以振羽是故君子无物而不在礼矣注谓振羽即振鹭彻以振羽者言礼毕彻器之时歌振鹭也在彼无恶在此无斃主宾欢洽於斯为盛故歌之】

振鹭二章章四句【旧作一章八句 序及蔡邕独断朱传皆以为二王之後来助祭之诗郑玄云二王夏殷也其後杞也宋也按书传云天子存二代之後与己三所以通夫三统立三正郊特牲亦云天子存二代之後犹尊贤也尊贤不过二代而已然又有所谓三恪者何郑駁异义曰三恪尊于诸侯卑于二王之後则杞宋以外别有三恪乐记曰武王克商未及下车而封黄帝之後于蓟帝尧之後于祝帝舜之後于陈所谓三恪者其是乎惟杜预云周封夏殷二王後又封舜後谓之恪并二王之後为三国其礼转降示敬而已此解未确陵川郝氏曰三皇始制封建着为令诸侯有罪方伯连帅请于天子而征之天子无道三恪之国徧告方伯连帅率天

下诸侯而伐之此三恪所从来矣左传曰武王以元女大姬配胡公而封诸陈以备三恪盖蒯祝待陈而备非祀宋待陈而备也若夫二王之後亦有隆杀左传皇武子曰宋先代之後也于周为客天子有事膳焉有丧拜焉女叔侯曰夏余也子太叔曰夏肄是屏此虽以其後世即东夷故然周之尊不及其尊宋明矣此诗以振鹭发咏明是以宋从殷尚为言固非兼杞申培说但以为先代之後助祭于周而劳之之歌混称先代了无主名要是梦论朱子又云看此文意都无告神之语恐是献助祭之臣古者祭每一受胙主与宾尸皆有献酬之礼既毕然後亚献至献毕复受胙如此礼意甚好有接续意思到唐时尚然今并受胙于诸献既毕之後主与宾意思皆隔了黄光昇駁之云按正祭时未有献助祭之臣之乐歌者统於尊也祭後归诸侯宾客之俎独留同姓燕饮亦未见二王之後在此想别日燕饮故歌此诗耳濮一之亦谓疑此微子来朝始至而王燕劳之所奏之乐歌今按果如所说则此诗当班在雅中不得列之于颂且西雝二字竟无着落季本又谓此诗必专为武庚而发盖武庚庸愚不知天命故欲使之观乐辟雝以养德庶几其能忠顺耳邹忠胤亦以为周之嘉客孰先武庚作宾王家岂微子哉是皆凿空无据之谈不足信也】

有瞽成王大禘也合诸乐于太庙奏之微子以客礼来助祭诗人纪述其事【序云始作乐而合乎祖也朱传及申培说因之愚按序意谓成王至是始行合祖之礼大奏诸乐云尔非谓以新乐始成之故合乎祖也合祖者禘祭之谓其礼有二曰时禘曰大禘王制曰天子禘祫禘祫尝禘烝四时之祭惟春祫不禘夏禘秋尝冬烝皆禘此时禘也对大禘而言亦曰小禘春秋文二年八月大事于太庙公羊传曰大事者何大禘也大禘者何合祭也其合祭奈何毁庙之主陈于太祖未毁庙之主皆升合祭于太祖此所谓大禘也小禘止及未毁庙之主大禘则并及于毁庙之主以礼文徵之礼器曰周旅酬六尸此天子之礼也曾子问曰禘于太庙祝迎四庙之主此诸侯之礼也夫天子旅酬止于六尸诸侯迎主止于四庙则小禘之仅及于未毁庙之主明矣杜预曰逸礼记禘于太庙之礼云毁庙之主升合食而立二尸此则大禘并及于毁庙之主与公羊说昭合者也但大禘年月经无明文郑玄谓鲁礼三年丧毕而禘于太庙明年春禘于羣庙自尔以後五年而再盛祭一禘一祫杜佑阐其说谓古者天子诸侯三年丧毕皆合先祖之神而享之以生有庆集之欢死亦应备合食之礼缘生以事死因天道之成而设禘祫之享皆合先祖之神而享之按丧毕而致新主于庙谓之吉禘公羊解大事为大禘即吉禘也虽其以新主合于旧主不妨得禘之名而大禘自有大禘之礼未容以吉禘当之至郑氏所谓禘祫相因盖本于公羊传五年而再殷祭之说杨氏辟之谓殷祭乃大禘之祭也五年而再殷祭即三年一祫五年再祫犹天道三岁一闰五岁再闰耳于禘祭手何与此其说殊朗然可信乃大禘之月崔灵恩则谓祭以秋以合聚羣主其礼最大必秋时万物成熟大合而祭之东汉张纯则谓禘以冬十月五谷成熟物备礼成故合聚饮食二说意颇相近而未知孰是至此诗之所以定为大禘者以楚茨禘尝之诗也则有祝祭于祫之语信南山禘烝之诗也则有是烝是享之语而此诗但浑言先祖是听而已非大禘而何尝考竹书成王九年春正月有事于太庙初用勺意者其即此时乎抑又有疑焉王制所谓禘祫者夏祭也自周公升禘为大祭更名夏祭为禘先儒谓禘祭以乐为主故其字从龠龠者乐之竹管三孔以和衆声也是诗所举不及品物惟悉数乐器而已则谓即禘祫之祭亦无不可请以俟知者】

有瞽有瞽【麋韵】在周之庭【丰氏本作廷】设业设虞【叶麋韵读如枸果羽翻】崇牙

树【乐书作植】羽【麋韵】应田【尔雅周礼注丰本俱作棘】县鼓【麋韵】鞀【陆德明本丰本俱本鼗】磬祝圉【叶麋韵读如麋鱼矩翻丰本作敌】既备乃奏箫管备举【叶麋韵读如踽果羽翻】喤喤厥声【庚韵】肃雝【礼记作雍尔雅注作隤】和【去声】鸣【庚韵】先祖是听【丰本作聒】我客戾止永观厥成【庚韵 赋也磬说文云目但有联也徐锴云按书说言漫若鼓皮也联但有黑子外微黑影而已此有磬毛传以为乐官也重言有磬者见所有者非一磬也郑玄云磬蒙也目无所见于音声审也周礼上磬四十人中磬百人下磬百六十人有眡了者相之陈阳云耳目形也聪明神也聾瞶者其神在目不在耳故以之司视而掌火磬蒙者其神在耳不在目故以之司听而鼓乐其使人也可谓器之矣传曰黄帝使神磬考中声夏书曰磬奏鼓礼曰御磬几声之上下诗曰蒙磬奏公国语曰蒙瞍修声则磬蒙之职自古以固然非特周也在周之庭孔颖达云皆在周之庙庭也黄佐云曰周庭则非复商之庭矣陈阳云有磬有磬兼上中下磬而言之也其来则大司乐诏之其歌则太师帅之相之则在眡了焉孔子言相师之道岂非眡了之职与在周之庭盖有眡了相之不特及阶及席而已又韩诗外传云太平之时无瘠 跛眇眚蹇侏儒折短父不哭子兄不哭弟道无襁负之遗育然各以序终者贤医之用也故安止平正除疾之道无他焉用贤而已矣诗曰有磬有磬在周之庭紂之余民也此全非诗旨设说文云施陈也从言从殳殳所以驱遣使人也业虞解见灵台篇毛云植者为虞横者为枸业大版也所以饰枸为县也捷业如锯齿孔云虞者立于两端枸则横入于虞其枸之上加以业所以饰此枸而为悬设也枸亦作簨又作笋按考工记有钟虞磬虞而说文解虞为钟鼓之柎则钟鼓磬皆有虞也其所以悬则在于业也设业设虞乃谓设业于所设之虞耳崇牙业上之饰毛云卷然可以县也孔云枸之上加以大板侧着于枸其上刻为崇牙似锯齿捷业然故谓之业牙即业之上齿也以其形卷然得挂绳于上故言可以为悬也树羽毛云置羽也朱子云置五采羽孔云置之于笋虞之上角按礼明堂位篇云夏后氏之龙簨虞殷之崇牙周之璧琫据考工记笋饰以鳞属故曰龙簨虞也殷又于龙上刻画之为重牙以挂悬统名曰崇牙者以牙为业之上齿所处者高故也璧琫者注谓周人画绘为琫树于琫之角上载以璧垂五采羽其下也陈阳云笋之上有业业之上有崇牙笋之两端又有璧琫郑氏谓载璧垂羽是也盖笋虞所以架钟磬崇牙璧琫所以饰笋虞夏后氏饰以龙而无崇牙商饰以崇牙而无璧琫至周则极文而三者具矣故周颂曰设业设虞崇牙植羽是也尔雅云大鼓谓之鼗小者谓之应毛传训应为小鞀孔云此大射礼应鞀也田通作?郑云应鞀之属也声转字误变而作田孔云?字以束为声声既转去束惟有申在申字又误去其上下故变作田也愚按书君奭篇申劝文王之德礼记亦讹作田观文王之德申田相混郑孔之说可信陈祥道云大射有朔鼗应鼗诗又以应配鞀则朔鼗乃鞀鼓也以其引鼓焉故曰鞀以其始鼓焉故曰朔是以仪礼有朔无鞀周礼有鞀无朔犹仪礼之玄酒周礼之明水其实一也郑氏以应与?及朔为三鼓恐不然也大射建鼓南鼓应鼗亦南鼓而居其东建鼓东鼓朔鼗亦东鼓而居其北则鼗与鼓皆建而鼗常在其左矣朔作而应之朔在西应在东则凡乐之奏常先西矣按周礼太师职云大祭祀帅鼗登歌令奏击拊下管播乐器令奏鼓鞀大飨亦如之小师职云大祭祀登歌击拊下管击应鼓彻歌大飨亦如之是则鼓?击应皆在堂上击拊之时而鼓鞀职于太师击应职于小师则应比鞀为贱矣仪礼应鼗朔鼗旧说谓应鼗者应朔鼗也朔者始也先击朔鼗次击应鼗然则堂下鼓?与堂上之击拊同时而击应继鼓?而起亦取其与?相应故名应耳陈阳云於歌言登则知管之为降於管言下则知歌之为上堂上之乐衆矣其所待以作者在乎奏击拊堂下之乐衆矣其所待以作者在乎奏鼓鞀舜之作乐言拊咏於

上言鼗鼓於下乐记亦曰会守拊鼓盖拊为衆器之父鼓鞀为衆声之君以拊为父凡乐待此而作者有子道焉以鼓为君凡乐待此而作者有臣道焉又云堂下之乐以管为本器之尤小者也应之为鼓鞀之尤小者也礼器曰县鼓在西应鼓在东作乐及其小者乃所以为备也太师大祭祀击拊鼓鞀亦此意欤当堂上击拊之时则堂下击应鼓以应之然後播鼗而鼓矣应施于击拊又施于歌彻其乐之终始欤县鼓毛云周鼓也明堂位云夏后氏之足鼓殷人楹鼓周人县鼓陈阳云昔少昊氏造建鼓夏后氏加四足商人贯之以柱周人县而击之县鼓本出于建鼓则县鼓大鼓也应田县鼓先小後大所以为备乐也愚按路鼓鼗鼓皆为大鼓以周礼考之则此县鼓乃路鼓陈祥道以为晋鼓非也周礼鼓人职云以雷鼓鼓神祀以灵鼓鼓社祭以路鼓鼓鬼享此祭宗庙故知为路鼓也鞀郑玄云如鼓而小持其柄摇之旁耳还自击刘熙云鞀导也所以导乐作亦作鼗尔雅云大鼗谓之麻小者谓之料又作鞀月令云修鞀鞀先儒谓小鼓有柄曰鞀大鞀谓鞀愚按此鼗即路鼗也周礼大司乐职云鼗鼓鼗鼓冬日至於地上之圜丘奏之若乐六变则天神皆降可得而礼矣灵鼓灵鼗夏日至於泽上之方丘奏之若乐八变则地只皆出可得而礼矣路鼓路鼗於宗庙之中奏之若乐九变则人鬼可得而礼矣陈阳云鼗於鼓为小所以兆奏鼓者也鼓以节之鼗以兆之作乐之道也鼓则击而不播鼗则播而不击鼗鼓鼗六面而工十有二以二人各直一面左播鼗右击鼓故也灵鼓灵鼗八面而工十有六路鼓路鼗四面而工八人亦若是欤商颂言置我鞀鼓则鞀与鼓同植非有播击之异与周制差殊矣鬻子曰禹之治天下也县五声以听曰语寡人以狱讼者挥鞀吕氏春秋曰武王有戒谨之诏繇是观之欲诫者必播鞀鼓矣盖鞀鼗奏鼓者也作堂下之乐必先鼗鼓者岂非乐记所谓先鼓以警戒之意欤又云鞀鼓二者以同声相应故祀天神以鼗鼓鼗鼓祭地只以灵鼓灵鼗享人鬼以路鼓路鼗乐记亦以鞀鼓合而为德音周官少师亦以鞀鼓并而鼓之也磬颂磬笙磬也陈阳云大射之仪乐人宿县于阼阶东笙磬西面西阶之西颂磬东面盖应笙之磬谓之笙磬应歌之磬谓之颂磬笙磬在东而面西颂磬在西而面东颂磬歌于西是南向北向以西方为上所以贵人声也笙磬吹于东是以东方为下所以贱匏竹也大射鼗倚于颂磬西紃颂磬在西而有紃是编磬在西而以颂磬名之特磬在东而以笙磬名之又云鼗堂下之乐也磬堂上之乐也堂下之鼗播则堂上之磬作矣故眡了以播鼗为先而击颂磬笙磬次之商颂言鞀鼓渊渊继之依我磬声亦是意也祝毛云木柷也郭璞云柷如漆箛方二尺四寸深一尺八寸中有椎柄连底掎之令左右击圉通作敌毛云楬也郭云形如伏虎背上有二十七鉏鋸刻以木长尺栝之虞书云合止柷敌蔡沈云始作也则击柷以合之及其将终也则栝敌以止之盖节乐之器也陈祥道云柷方二尺四寸陰也敌二十七鉏鋸阳也乐作阳也以陰数成之乐止陰也以阳数成之固天地自然之理徐光启云柷之制中空盖声之所出以虚为本也敌之制中实盖声之所止则归实也王邦直云乐记曰圣人作为柷楬祝敌柷楬皆一物而异名不言柷敌而言柷楬者柷以中虚为用而声出焉故又谓之柷敌以伏虎为形而声伏焉故又谓之楬盖声之出也乐繇之合声之伏也乐繇之止焉亦陰阳之义也陈阳云鞀所以兆奏鼓堂下之乐也磬则上声而远闻堂上之乐也堂上堂下之乐备奏其合止有时制命于柷敌而已既备者郑云悬也陈也皆已毕也奏者动作之义此则指金奏而言凡乐必先奏钟以均诸乐所谓钟即十二律之钟也以周礼大司乐考之奏黄钟歌大吕舞云门以祀天神奏太簇歌应钟舞咸池以祭地只奏姑洗歌南吕舞大磬以祀四望奏蕤宾歌函钟舞大夏以祭山川奏夷则歌小吕舞大濩以享先妣奏无射歌夹钟舞大武以享先祖此诗言先祖是听则其所奏可知也贾公彦云奏者奏击以出声故据钟而言歌者发声出音故据声而说亦

互而通也欲作乐先击此二者之钟以均诸乐是以钟师云以钟鼓奏九夏郑云先击钟次击鼓论语云始作翕如郑云始作谓金奏也陈阳云言奏则堂下之乐言歌则堂上之乐春秋传曰晋侯飧穆叔奏肆夏歌文王大明絃又曰晋侯歌钟二肆取半以赐魏绛则奏之与歌虽有堂上下之辨其实不离于六律六同也按六同即六吕也乐叶图徵有云撞钟以知君钟调则君道得得非谓钟所以均乐故以为诸乐之君与又按周礼钟师掌金奏凡乐事以钟鼓奏九夏大司乐职亦云凡大祭祀王出入则令奏王夏尸出入则令奏肆夏牲出入则令奏昭夏彼所谓奏虽兼用钟鼓而以金为主故名金奏则此诗云乃奏或即指三夏之奏亦未可知要之当据钟而言也箫郭璞云大者编二十三管长尺四寸小者十六管长尺二寸一名籁尔雅云大箫谓之言小者谓之箛陈阳云谓之言以其管二十四无底而善应故也谓之箛以其管十六有底而交鸣故也孔云易通卦验云箫长尺四寸风俗通云箫参差象凤翼十管长二尺其言管数长短不同盖有大小故也要是编小竹管为之耳管以笙言与商颂嘒嘒管声不同笙之为物列管匏中施簧管端以管为用者也观执竞篇言磬筦将将明管与磬之相应也磬管之相应者惟笙磬耳笙磬者应笙之磬鼓钟之诗曰笙磬同音盖亦指此益可以明此管为笙之管也又按陰竹之管用於宗庙周礼固有明文愚独以此诗备举衆音不应缺匏故定主前说举说文云对举也箫管之乐俱在堂下备举而作之则堂下之器无或遗者矣上文但述乐器之名而已此或言奏或言举互相备也陈阳云周官眡了掌凡乐事播鼗击颂磬笙磬小师掌教鼓鼗祝敔塤箫管簫蒙掌播鼗祝敔塤箫管是皆先鼗而磬次之先祝敔而箫管次之是诗言鞀磬祝敔继之箫管备举固作乐之序也论备乐而不及舞者舞所以节八音也言八音则舞举矣喤喤厥声二句以堂上之乐言喤说文云小儿声诗其泣喤喤是也毛传解钟鼓喤喤为和也按老子云含德之厚比于赤子终日号而嗑不嗄和之至也正喤字义疏厥声人声谓登歌也周礼大司乐职云九德之歌于宗庙之中奏之太师职云大祭祀帅簫登歌簫蒙职云掌九德六诗之歌以役太师陈阳云声乐之象也金石丝竹乐之器也象形而上器形而下故郊特牲曰歌者在上匏竹在下贵人声也肃雍雍和也旧解如此但雍字说文不载其训为和义亦未详如通作飡则取煎和五味之和或通作離则取離渠音声之和耳和说文云相膺也作去声读乃唱和之和增韵云凡出声者皆曰鸣和鸣指琴瑟言琴瑟之声与人之声相应而鸣肃肃然使人敬雍雍然使人和也记曰乐在宗庙之中上下同听之莫不和敬于此见矣按周礼小师掌教弦歌郑云弦谓琴瑟也歌依咏诗也贾云工歌诗依琴瑟而咏之诗即诗传云曲合乐曰歌也故乡饮酒之属升歌皆有琴瑟也若不依琴瑟即尔雅徒歌曰謡也陈阳云尝考之虞书琴瑟以咏则琴瑟之声所以应歌者也歌者在堂则琴瑟亦宜施之堂上矣又云古之君子反情以和其志比类以成其行然後发以声音文以琴瑟而堂上之乐作矣动以干戚饰以羽旄从以箫管而堂下之乐作矣琴瑟作于堂上象庙朝之治箫管作于堂下象万物之治或问子何据而以肃雍和鸣指弦歌也曰吾有所本之也周礼郑司农注引古乐诗曰勅尔簫率尔衆工奏尔悲诵肃肃離離无怠无凶所谓悲指琴瑟也乐记曰丝声哀哀以立廉悲之义也所谓诵即歌也文王世子春诵注谓歌乐以配乐而歌故云歌乐也合悲与诵并奏而期之以肃肃離離则是诗之所指肃雍其为堂上之弦歌明矣乐记篇子夏曰郑音好滥淫志宋音燕女溺志卫音趋数烦志齐音敖辟乔志此四者淫于色而害于德是以祭祀弗用也诗云肃雍和鸣先祖是听夫肃肃敬也雍雍和也夫敬以和何事不行愚按此诗所纪大合诸乐唯有七音应田县鼓鞀革也磬石也祝敔木也乃奏金也箫竹也管匏也和鸣琴瑟也但不及土陈阳云八音以土为主故虞书乐记之论八音皆不言土又云左氏传曰为之七音以奉五

声左氏为七音之说盖八音耳八音以土为主而七音非土不和故书之益稷礼之乐记其言八音皆虚其土犹大衍之数虚其一也大衍之数虚其一无害为五十七音之数虚其土无害为八音也又云诗书不言土音易于比离坎独言缶不及七音者盖八音以土为主犹五事以思为主也故七音非土不和土非七音不备诗书举七音以见土推用以见体也易举缶以见七音明体以见用也自先祖是听以下蒙上文亦皆主堂上而言观书益稷篇言琴瑟以咏而属以祖考来格虞宾在位羣后德让等语可见若鸟兽跄跄凤凰来仪则繫之堂下之乐矣先祖谓后稷也周官大司乐先妣文在先祖之上此但言先祖不及先妣故知断自后稷也后稷而下毁庙未毁庙之主皆得合食于庙谓之祫祭成王之祢武王亦当与焉而但以先祖总之者统于尊也我客戾止与振鹭篇义同刘公瑾云虞宾在位则舜之作乐以此为盛我有嘉宾则商人作乐以此为盛我客戾止则周人作乐以此为盛也永说文云长也乐有声有形先祖神也神以声感故曰听我客人也人以形感故曰观此皆兼及衆乐非止弦歌特以尊神贵人故言之于堂上耳成朱子云乐之一终也按乐以象成故曰成舜乐九成武乐六成永观厥成犹云自今以往我客来助祭观乐于周末之有艾焉而已陈阳云武乐六成周始作备乐而合乎祖不过主大武而已记曰武始而北出再成而灭商三成而南四成而南国是疆五成而分周公左召公右六成复缀以崇天子武乐之成终于崇天子戾止而观成得非所以崇天子之意欤商颂我有嘉宾亦不夷怪同义】

有瞽一章十三句【蔡邕独断云始作乐合诸乐而奏之所歌也诗固不为始合乐作果为始合乐作也则无助祭之事我客何以来欤邓元锡又引或人之说曰序所云合于祖者谓合于乐祖祭瞽宗乐歌也夫然则篇中明有先祖是听之语将何以称焉子贡传但存瞽合二字而其余阙文】

武大武一成之歌【出申培说】首纪北出伐商之事为武乐六成之始故专得武名在九夏中疑即纳夏亦名为遏【序云奏大武也唐孔氏及朱子皆谓周公象武王之功作大武之乐盖本于明堂位篇言周公摄政六年制礼作乐之说武王以武功定天下故乐以武名四代之乐如大?大夏大濩大武皆称大者以功成作乐为一代大事故耳乐记子曰夫乐者象成者也且夫武始而北出再成而灭商三成而南四成而南国是疆五成而分周公左召公右六成复缀以崇天子郑玄云成犹奏也每奏武曲一终为一成贾公彦云舞人须有限约立四表以与舞人为曲别也舞人从南表向第二表为一成从第二至第三为二成从第三至北头第四表为三成舞人各转身南向于北表之北还从第一至第二为四成从第二至第三为五成从第三至南头第一表为六成陈祥道云周都商之西南商都周之东北故舞始而北出则出表之东北以商居东北故也三成而南则入表之西南以周居西南故也疆南国然後可得而分治分治然後可得而复缀分治系于臣故散而为二复缀统於君故合而为一陈阳云文舞九成武舞六成何也曰二与四为六而坤用之两地之数也一三五为九而乾用之参天之数也文乐阳也其成以参天之数武乐陰也其成以两地之数亦节奏自然之符也又云周官大司乐奏无射歌夹钟舞大武以享先祖然则武奏大武歌是诗而舞之可知矣记有言八佾以舞大武语其数也朱干玉戚以舞大武语其器也冕而舞大武语其服也周官乐记皆先大夏後大武以世次先後言之祭义明堂位皆先大武後大夏者尊时王之制故也古者帝王之于天下入则揖逊出则征诛其义一也然以文得之者必先乎文以武得之者必先乎武各适其时故

也又季本云天子庙乐礼宜九成意必尚有文舞九成如礼记所谓八佾以舞大夏者不在此武舞六成之数欤愚按声以节舞唐贾氏谓诗为乐章与舞人为节是也序于象舞大武皆言奏然象舞管奏也大武疑即纳夏乃九夏之一则金奏也大武之所以疑为纳夏者以国语别名为遏而篇中有胜殷遏刘之语知之详见时迈篇小引下】

於【音乌】皇武王无竞维【左传作惟】烈【通篇俱无韵 赋也於叹辞皇君也武王为天下君之称即所谓皇王也无竞维烈义与执竞同愚按此二句乃櫟括武乐六成之起语旧说专主克商言亦通左宣十二年晋师救郑随武子曰兼弱攻昧武之善经也仲虺有言曰取乱侮亡兼弱也洵曰於铎王师遵养时晦耆昧也武曰无竞维烈抚弱耆昧以务烈所可也一说季本云无竞者不争而不见其强也言大哉武王之功不以力争天下维以德服之执竞而无竞者也万尚烈云人知武王之烈而不知武王之烈以无竞也皆通】允文允武克开厥後嗣武受之胜殷遏刘耆定尔功

【赋也此推言武王之善继述也黄佐云文王之在周也功德最盛故天作颂太王而下及文王武颂武王而上及文王盖太王之功非文王无以底于成武王之功非文王无以肇其始允说文云信也允文文王言信哉有文德之文王也文王之文德于爱民而不忍残民上见之惠鲜怀保视民如伤文王之所以为文也克能开启也後後人也克开厥後郑玄云能开其子孙之基绪也与下文尔功对看三分有二肇造区夏是也嗣说文云诸侯嗣国也字从册从口司声徐锴云按尚书史祝册谓册必于庙史读其册故从口会意嗣武受之郑云嗣子武王受文王之业也孔云既言文王开後即云嗣武受之其文相承故以为嗣子武王也胜殷遏刘拟议之辞必胜商而後可以遏刘武王之北出伐商为是故也殷指纣也商自盘庚後改称殷遏尔雅云止也说文云微止也徐云缴统使止也刘本作镠说文云杀也遏刘有以止纣杀言者有以武王自止其杀言者其实二意皆有纣之作威杀戮毒痛四海固为杀机纣既播虐则武之干戈必不可戢弓矢必不可囊亦杀机也独夫一殄而杀机杜矣此胜殷之所以不容已也武成曰予小子敢祗承上意以遏乱略孟子曰救民于水火之中取其残而已矣皆此意也李氏云大武之意在于止戈大武之诗在于止杀耆郑云老也按曲礼云六十曰耆汲冢周书及史记皆载武王告叔旦曰惟天不享于殷发之未生至于今六十年此则武王以耆岁伐殷之明据也定即天下大定之定尔功者克开厥後之功对上文文王言故称文王为尔郑云年老乃定汝之大功言不汲汲于诛纣按书武成篇王若曰惟先王建邦启土公刘克笃前烈至于太王肇基王迹王季其勤王家我文考文王克成厥勲诞膺天命以抚方夏大邦畏其力小邦怀其德惟九年大统未集予小子其承厥志此所谓定尔功者也然以除暴救民安定天下则武之为武亦不出于文之外矣徐光启云文王事殷守其常也武王伐纣通其变也纣恶已稔天下归心武王于此势不得以已也不得已而为之乃所以善承其变之节也二圣于此易地皆然故曰圣達节夫子为之广其说曰善继善述曰践其位行其礼奏其乐而子思子引之以明中庸之道中者随时处中之谓也严云殷虐未除则文王之文德未能尽達于天下非武王之武无以成文王之文也武颂言文王之德不可无武王之功为奏大武而言之维清言周之成功皆本于文王之德为奏象舞而言之各有攸当也】

武二章一章二句一章五句【旧只作一章七句按左传引耆定尔功一语为武之卒章故知

当分二章也朱子误引传以此为大武之首章今考传文乃卒字非首字 蔡邕独断云周武所定一代之乐之所歌也按左宣十二年楚庄王曰武王克商作颂曰载戢干戈载橐弓矢又作武其卒章曰耆定尔功其三曰铺时绎思我徂惟求定其六曰绥万邦屡丰年竹书载武王十二年作大武乐吕氏春秋云武王即位以六师伐殷六师未至以锐兵克之于牧野归乃荐俘馘于京太室乃合周公为作大武墨子亦云武王因先王之乐又自作乐命曰象武象武即大武也诸说俱相脗合朱子谓篇内已有武王之謚则其说误矣愚按周礼言舞大武意者大武之舞已作于武王之世特其诗未备及周公时乃始成之耳愚于武赉桓三诗外更定勺为大武之再成般为大武之四成时迈即肆夏为大武之五成合此六诗而大武六成之乐章俱无欠缺真千古快事然亦非强为之附会牵合也或又因左传以耆定一语为武之卒章则所引其三其六当在共前何以缀之于後斯可以见此语但是武诗一篇之卒章而非大武全乐之卒章了然无疑矣子贡传阙文】

酌【仪礼礼记汉书风俗通乐书申培说丰氏本俱作勺左传荀子俱作沟白虎通作酌合】告成大武也【出序】周公所作言能斟勺先祖之道也【出应劭风俗通又班固汉书同但勺上无斟字颜师古云勺读曰酌酌取也】是为大武之再成象武王灭商之事亦名武宿夜【大武之舞作于武王之世而乐章未备周公先後襍取诸诗可与舞容相附者以为之节至最後酌诗作而六成之乐章始完故序曰告成大武也竹书成王九年春正月有事于太庙初用勺其即告成之日乎张子谓勺是周公制礼乐时于大武有所增添其说是也乃朱传谓此诗与赉般皆不用诗中字名篇疑取乐节之名今按勺字说文训为挹取则固有其义矣酌只当依仪礼礼记诸书通作勺先祖则指文王也周公何以称文王为先祖以此诗作于成王之世主成王而言耳其曰斟勺先祖之道者以末二句取之诗意与武篇文义相属彼曰嗣武受之胜殷遏刘此曰载用有嗣实惟尔公武王胜殷遏刘乃以嗣文王至公为民之心非富天下也所谓挹取先祖之道者如此礼祭统篇云夫祭有三重焉献之属莫重于裸声莫重于升歌舞莫重于武宿夜此周道也孔颖达云武宿夜是武曲之名皇氏云师说书传云武王伐纣至于商郊停止宿夜士卒皆欢乐歌舞以待旦因名焉熊氏云此即大武之乐也今按诗中言遵养时晦即宿夜之说也至纯熙而大介则甲子昧爽之事也戎衣一着而遂灭商自是周有天下故诸舞之中莫重于此或引左传随武子曰沟曰於铄王师武曰无竞维烈以沟与武并言疑沟不在武乐六成之数不知武沟俱是乐章之名其全乐则名大武非谓武之一章可以尽之不然何以三章别名赉六章别名桓也】

於【音乌】铄王师【支韵】遵养时【丰氏本作耑後同】晦时纯熙【支韵】矣是用大介我龙【丰本作宠】受之【支韵】蹻蹻王之造【丰本造下有耑字】载用有嗣【叶支韵祥慈翻】实惟尔公【句】允师【见上 赋也於叹辞铄即非繇外铄之铄朱子云以火销金之名自外以至内也王师武王伐商之衆也八百诸侯皆已从周纣所有者惟畿内耳武王一旦称兵临之外援已絶内势将溃其象犹之铄也遵说文云循也循道而行以達于商郊也养谓养威蓄锐不遽战也晦尔雅云冥也时晦谓时当晦冥即停止宿夜之事也书武成篇言癸亥陈于商郊俟天休命周语伶州鸠言王以二月癸亥夜陈者指此乐记孔子曰总干而山立武王之事也又曰久立于缀以待诸侯之至也皆谓是时故舞象之也又左宣十二年晋师救郑随武子曰兼弱攻昧武之善经也仲虺有言曰取乱侮亡兼弱也沟曰於铄王师遵养时

晦耆昧也其解诗书俱误纯之言全音之近也熙尔雅云光也时纯熙矣谓辨色大明之时诗之所谓会朝书之所谓甲子昧爽者也介之言甲亦音近也是用大介朱子云所谓一戎衣也我龙指武王也龙能变化武王变侯为王故以龙称受之者受天命而有商之天下也蹻说文云举足行高也造说文云就也言卓越哉武王之所成就谓为天子也吾师蔡中山先生云遵养时晦龙跃在渊也蹻蹻则飞龙在天矣此易所谓大人之造也载始也当通作才嗣继也即嗣武受之之嗣谓嗣文王也尔指武王也公者无私之名字从八从厶八犹背也厶音私韩非子云自营为私背私为公允说文云信也师即王师之师言推原武王用兵之始有所以继嗣文王者实惟尔武王得文王至公无私之心第欲除暴安民非以富天下为念信乎其为王者之师也使有一毫闇干天命之意襍于其间则人之称是师也其谓之何而慙德于文王多矣欧阳修云武王用师实天下之至公信可为王师矣】

酌【白虎通篇名作酌合】一章九句【毛郑严本皆如此读诸本但作八句序云告成大武也复继之曰言能酌先王之道以养天下也蔡邕独断因之韩诗外传三条意亦本此其一曰太平之时民行役者不踰时男女不失时以偶孝子不失时以养外无旷夫内无怨女上无不慈之父下无不孝之子父子相成夫妇相保天下和平国家安宁大事备乎下天道应乎上故天不变经地不易形日月昭明列宿有常天施地化陰阳和合动以雷电润以风雨节以山川均以寒暑万民欲生各得其所而制国用故国有所安地有所主圣人剡木为舟剡木为楫以通四方之物使泽人足乎水山人足乎鱼余衍之财有所流故丰膏不独乐饶确不独苦虽遭凶年饥岁禹汤之水旱而民无冻饥之色故生不乏用死不转壑夫是之谓乐诗曰於铎王师遵养时晦其一曰能治天下必能养其民也能养民者为自养也饮食适乎藏滋味适乎气劳佚适乎筋骨寒煖适乎肌肤然後气藏平心术治思虑得喜怒起居而游乐事时而用足夫是之谓能自养者也故圣人不淫佚侈靡者非鄙夫色而爱财用也养有适过则不乐故不为也是以冬不数浴非爱水也夏不频汤非爱火也不高台榭非无土木也不大钟鼎非无金锡也不沉于酒不贪于色非辟丑也直行性情之所安而制度可以为天下法矣故用不靡则足以养其生而天下称其仁也养不害性足以成教而天下称其义也适情辟余不求非其肴而天下称其廉也行成不可掩息刑不可犯执一道而轻万物天下称其勇也四行在乎民居则婉孌怒则胜敌故审其所以养而治道具矣治道具而远近畜矣诗曰於铎王师遵养时晦言相养者之至于晦也其一曰夫百姓内不乏食外不患寒则可教御以礼义矣诗曰蒸畀祖妣以洽百礼百礼洽则百意遂百意遂则陰阳调陰阳调则寒暑均寒暑均则三光清三光清则风雨时风雨时则羣生宁诗曰於铎王师遵养时晦言相养之至于晦也总为经文养之一字所误在经中实无此意至其解晦字更不可晓朱传但以颂武王之诗而不知其即为大武之乐申培说知其为大武矣而谓盖大武之五成夫分周公左召公右此大武五成之乐也酌诗中曾有分周召之意否若白虎通之说更异矣云周公之乐曰酌合言周公辅成王能斟酌文武之道而成之也张子厚亦云周公没嗣王以武功之成繇周公告其成于宗庙之歌也然则所谓尔公者岂即指周公耶夫周公安得有乐耶至于陈阳不知勺之即武宿夜而妄为之辨曰燕礼言若舞则勺记言十有三年舞勺成童舞象皆小舞也朱干玉戚冕而舞大武则大舞也周官大舞以大司乐掌之小舞以乐师掌之然则周之舞岂不重于武宿夜乎此勺象所以不言大异乎大武配六乐而谓之大也今按古人舞勺舞象之意诚不测其云何愚意或祇欲其知祖宗之德耳传有曰舜乐莫盛于韶周乐莫盛于勺勺岂小舞之谓耶子贡传阙文】

賚武王灭殷南还于周遍封诸侯命之大賚是为大武之三成【乐记所谓三成而南者也殷在河北周在河南既渡河灭殷至是始南旋也序云賚大封于庙也賚予也言所以锡予善人也愚按论语曰周有大賚善人是富序之所谓锡予善人者本此其实发政施仁统名大賚论语之意特谓於衆民之中有善人焉则又别有以加厚之非谓必待善人方以賚及之也书武成篇曰大賚于四海而万姓悦服观其言四海言万姓则周之所谓賚者其非专指善人可知已或者又因上文言散鹿台之财发钜桥之粟以为此即大賚之事又非也散财发粟不过一时矫革之政所及几何必藉衆诸侯之来旬来宣而後天子之德泽始遍是则賚之诗所为作而賚之所繇名也序首以大封于庙为言者盖叙述当时告庙封诸侯之後即以大賚之意告之乃纪事之辞全与此诗立言之指无涉而旧说相沿皆以封当賚误矣篇中无武王字疑如左传言此诗乃武王所自作意即在封建策遣之际乎皇甫谧云武王伐纣之年夏四月乙卯祀于周庙将率之士皆封诸侯国四百人孔穎達云乐记说武王克殷未及下车而封蓊祝陈下车而封杞宋左传曰武王克商光有天下其兄弟之国者十五人姬姓之国者四十人古文尚书武成篇说武王克殷而反祀于周庙列爵惟五分土惟三皆是武王大封之事也荀子则云周公立七十一国姬姓独居五十三人周之子孙苟不狂惑者莫不为天下之显诸侯】

文王既勤【叶支韵渠羈翻】止我应受之【支韵】敷【左传作铺】时绎思【支韵】我徂维【左传作惟】求定时【丰氏本作皆】周之命於【音乌】绎思【见上 赋也勤尔雅说文皆云劳也止通作只说文云已辞也文王陈锡哉周乃既勤之实当日自朝至昃食之不遑遹求厥宁心之无逸其勤可知左宣十一年晋郤成子求成于衆狄衆狄疾赤狄之役遂服于晋是役也诸大夫欲召狄郤成子曰吾闻之非德莫如勤非勤何以求人能勤有继其从之也诗曰文王既勤止文王犹勤况寡德乎我武王自我也应尔雅说文皆云当也受之受天命也苏辙云文王之勤劳天下至矣其子孙应受而有之孔云我当受之谓受其位为天子也愚按首章言允文文王克开厥後次章言我龙受之至此复合言之所以归受命之自于文王而不敢自以为功也敷时以下勅勉诸侯就国之辞欲其皆师文王也敷说文云施也孔云敷者分散之言杜预云布政陈教也时绎二字连文绎说文以为抽丝也联接不絶之义时绎者民遭纣虐久矣今新政始更当以布德施仁为先又当时时联接之勿以一敷而遽止是所谓大賚也思杜预苏辙皆云辞也愚按此与风之不可求思雅之式燕又思一例後放此徂往定安也俱见说文我自今日以往维欲求天下之安定所以深属望于诸侯之敷而时绎也命即上文敷绎求定之命曰时周之命者言是我周新命非殷之旧政尔诸侯当时以此命自为提撕不可忘也既又叹而勅之仍於时绎惓惓焉武王安民之心与文王之既勤後先同揆矣】

賚一章六句【蔡邕独断以为大封于庙赐有德之所歌也徐干中论亦云先王将建诸侯而锡爵禄也必于清庙之中陈金石之乐宴赐之礼宗人宾相内史作策也其颂曰文王既勤止我应受之敷时绎思我徂维求定时周之命於绎思繇此观之爵禄者先王之所重也朱传亦以为颂文武之功而言其大封功臣之意皆为序之首句所误无论以肇造区夏为文王之勤劳既非终身服事之心而所谓绎思者只是欲羣臣知今日大封皆是文武之恩泽则浅陋甚矣陈际泰乃为之说曰文王既勤止我应受之似数其祖父之勤劳以告天下若曰我当受天命久矣天下之人亦可以自靖而相安矣舜禹以匹夫受唐虞之天下嘿无一言若以为固然而天下亦遂安之至武周之际岌岌也世变也夫圣人因世变不得已而为此圣人为之风俗

于是乎遂成後世循焉而又为其每下者噫圣人之心戚矣敷时绎思可绎而思者何物大封同姓大封异姓神明之後或在畎亩夏商未有三恪之备也至周亦求诸民间而胙之以土夫以文之勤而及诸人人人得以自利欲人绎思而不明告其所以若曰我周无所私利如此是亦足以荅天下矣此正所以慰安天下之人之心以求天下之安定而又恐天下之不吾以也复曰时周之命不可不绎思也使商不亡周不兴彼南面而称寡者不几以窳人子终是可不深思以无忘其勤劳也哉噫其意抑何含蓄而不露也盖其事难言之姑微示其意焉耳愚按此近于以市心窥圣人者子瞻持论往往若此政恐武周闻之必大捧腹申培说沿袭旧义既以为武王大封于庙之诗而又以为大武之二成夫武再成而灭商大封于庙于灭商何预且左传明以此为武之三章又何以称焉子贡传阙文】

般述武王巡守之事为大武之四成【出申培说】所谓南国是疆者也【商在河北周在河南曰南国是疆者言自南国之周而疆理及于天下也按竹书武王嗣位之十五年初狩方岳诰于沫邑即灭殷之四年也武乐于四成之时舞以象之其诗篇名般者曹氏引说文云般旋也象舟之旋从舟从殳殳所以旋也巡守而遍乎四岳所谓盘旋也郝敬云槃姗勃窳行路之貌天子巡守按节徐行故谓之般】

於【音乌】皇时【白虎通作明】周陟其高山墮【陆德明本作堕】山乔岳【丰氏本作岳】允犹翕河敷天之下裒时【丰本作岥下同】之对时周之命【通篇俱无韵齐鲁韩三家诗篇末有於绎思句崔灵思集注同 赋也於叹声皇君也於皇时周叹言君天下者此时之周天子也陟说文云登也陟其高山燔柴以祭天也郊特牲云天子适四方先柴礼器云因名山升中于天陈澧云中者平也巡守而祭方岳之下必因此有名之大山升进此方诸侯治功平成之事以告于天也愚按此高山即下文所云乔岳观舜典篇纪舜东巡守至于岱宗而即继之以柴望则其于岱宗之上行礼可知已墮山二句望秩以祀山川也尔雅云岱山曰墮说文云山之墮墮者郭璞云山狭而长也按月令疏云似方非方似圆非圆是也祭法谓山林川谷丘陵能出云雨见怪物者皆曰神公羊传谓山川有能润于百里者天子秩而祭之此望祀之所以及于墮山也乔通作峤说文云山锐而高也岳五岳也详见崧高篇白虎通云岳之为言垵也垵功德也按乔岳与高山文异而实则一尊之为岳所以别异于诸山也允信犹似翕合也墮山与乔岳并祭信乎其似诸川之合流于河者亦并河而望祭之也书传云五岳视三公四渎视诸侯其余山川视伯小者视子男刘向说苑云五岳者何谓也泰山东岳也霍山南岳也华山西岳也常山北岳也嵩高山中岳也五岳何以视三公能大布云雨焉能大敛云雨焉云触石而出肤寸而合不崇朝而雨天下施德博大故视三公也四渎者何谓也江淮河济也四渎何以视诸侯能荡涤垢浊焉能通百川于海焉能出云雨千里焉为施甚大故视诸侯也山川何以视子男也能出物焉能润泽物焉能生云雨为恩多然品类以百数故视子男也此诗言武王先于乔岳之上祭天又旁及诸山川皆在乔岳之上望而祭之无所不徧盖天子省方告祭所以承天命而荅人心礼当如此而白虎通乃云陟其高山言周太平封泰山也或云以此诗为颂成王而作而引管子言周成王封泰山禪社首为据然经传无文孔子不道殆不足信文中子曰封禪非古也其秦汉之侈心乎斯论正矣敷天以下则孟子所谓巡所守者也敷即敷时绎思之敷曰天之下者总四方而言裒尔雅训衆多又训聚也按说文有裒字无裒字衣之博裾者名裒故顔师古训裒衣为裒大之衣以其广大有余裕所以尔雅转训衆多

又转训为聚然则褒字乃褒字之讹也褒又对贬之称因褒有饶益之义贬乃损乏之名故褒人名褒谪人名贬若此诗之意正主褒奖诸侯而言对者应荅之义言能与上命相应也时周之命解与赉同亦丁宁之语武王巡行方岳当祭告之时其方之诸侯毕至武王欲使仁政之施徧于天下无处不然于是褒奖其一时之能奉宣德意以应上命者为诸侯劝如王制所谓有功德于民者加地进律是也且嘱之曰自今以往尔其时时念我周向者敷时绎思徂维求定之命毋或忘也言褒而不及贬者一王更始宪度惟新有土之君固宜人怀警省未敢越轶时迈篇所谓薄言震之莫不震叠者其谓是与篇中曰敷天之下曰时周之命皆承上章赉之语曰隳山乔岳允犹翕河又起下章及河乔岳之语然则次此诗为大武之四成或不诬矣】

般一章七句【朱子云般义未详序云巡守而祀四岳河海也蔡邕独断同孔颖达云岳实有五而称四者天子巡守远适四方至于其方之岳有此祭礼于中岳无事故序不言焉经无海而序言海者海是衆川所归经虽不说祭之可知故序特言之愚按祭祀特巡守中之首事诸侯各朝于方岳尚有考制度明黜陟等事则篇中後三句是也记所谓南国是疆者指此而序不之及何也若般之名不离般旋者近是郑玄注云般乐也固甚谬而崔灵恩集注乃用此注句为序文误矣子贡传阙文又邹忠胤云史记武王忧天保之未定谓周公曰自雒汭延于伊汭居易无固其有夏之居我南望三涂北望岳鄙顾瞻有河粤瞻伊雒母远天室将营周居于雒邑夫三涂岳鄙之望高山是陟矣有河伊雒之瞻翕河是繇矣雒居中土可以隆上都而观万国为朝覲者所走集故是冬遂迁鼎焉按骤观此论亦似近于乐记所云南国是疆者及细味诗中语意原与前後章为关合此毕竟不类故不敢从】

时迈一名肆夏为大武之五成巡行方岳後分周公左召公右之事也【孔颖达云宣十二年左传云昔武王克商作颂曰载戢干戈明此篇武王事也国语称周文公之颂曰载戢干戈明此诗周公作也刘勰云时迈一篇周公所制哲人之颂规式存焉按所以知为大武之五成者以般篇有隳山乔岳允犹翕河之语而此诗亦言怀柔百神及河乔岳明是次般之後而申言之所云式序在位则正指分陕事也白虎通云春秋公羊传曰自陕已东周公主之自陕已西召公主之不分南北何东方被圣人化日久故分东西使圣人主其难者贤者主其易者乃俱致太平也时迈亦名肆夏按周礼钟师凡乐事以钟鼓奏九夏王夏肆夏昭夏纳夏章夏齐夏族夏械夏鼙夏夏之为言大也盖歌之大者杜子春曰王出入奏王夏尸出入奏肆夏牲出入奏昭夏四方宾来奏纳夏臣有功奏章夏夫人祭奏齐夏族人侍奏族夏客醉而出奏械夏公出入奏鼙夏郑司农谓九夏皆篇名颂之类也载在乐章乐崩亦从而亡是以颂不能具左襄四年穆叔如晋晋侯享之金奏肆夏之三不拜工歌文王之三又不拜韩献子使行人子员问之对曰三夏天子所以享元侯也使臣弗敢与闻文王两君相见之乐也臣不敢及鲁语亦载叔孙穆子聘于晋晋悼公飨之乐及鹿鸣之三而後拜乐三晋侯使行人问焉对曰夫先乐金奏肆夏繁遏渠天子所以享元侯也夫歌文王大明緜则两君相见之乐也皆非使臣之所敢当也臣以为肆业及之故不敢拜今伶箫咏歌及鹿鸣之三君之所以况使臣臣敢不拜杜预韦昭皆谓肆夏一名樊樊即繁也韶夏一名遏韶夏即昭夏也纳夏一名渠击钟而奏此三夏曲吕叔玉则云肆夏繁遏渠皆周颂也肆夏时迈也繁遏执竞也渠思文也杜韦之说三夏盖牵于周礼九夏序次而吕之说三诗又惑于毛传篇次意谓文王之三鹿鸣之三传既明指为文王大明緜及鹿鸣四牡皇皇者华则肆夏之三必为时迈执竞思文矣

刘公瑾駁之云时迈思文皆周公所作而周礼九夏亦制作于周公固可以时迈为肆夏思文为纳夏矣至于执竞则昭王以後之诗而乃以为韶夏左传国语之注恐难尽信乃愚所尤疑者繁遏二字杜韦既分为二叔玉乃合为一殊不可晓再四寻绎始恍然悟国语句读误也夫先乐金奏肆夏繁遏九字当自为絶句肆夏也繁也遏也正左传所谓金奏肆夏之三者以诗语求之时迈之诗曰肆于时夏则肆夏也離之诗曰介以繁祉疑即繁也武之诗曰胜殷遏刘疑即遏也渠字带下读古以为呼彼之称杜诗只有不关渠是也言此肆夏繁遏三诗渠乃天子所用以享元侯者岂使臣所敢闻乎与下文则两君相见之乐则字对看更以诗意求之时迈言莫不震叠式序在位離言相维辟公相子肆祀俱指诸侯而言而武则追述其胜殷遏刘以有天下而为共主故宜皆为享元侯所用若合之周礼九夏序次则肆夏之後繁当为韶夏遏当为纳夏时迈言昊天其子怀柔百神及河乔岳乃柴望祭告之事故于尸出入奏之也繁言於荐广牡乃用大牲之事故于牲出入奏之也遏言胜商遏刘耆定尔功则我周得统受命之事故于四方宾来奏之亦与享元侯同意者也是则子春之说不为无据而于左国二书俱可以涣然矣若夫三夏之外愚疑王夏即文王在上之诗以皆陈戒修德之言故于王出入奏之而传称两君相见亦用此乐则意者金奏与工歌异耳章夏即械朴之诗其四章曰倬彼云汉为章于天以其纪六师伐崇之事故于臣有功奏之齐夏即思齐之诗以文王圣德繇于母教太任太姒两世踵美故于夫人祭奏之族夏邹忠胤以为行苇之诗其首章曰戚戚兄弟莫远具尔是族燕也故于族人侍奏之械夏周礼所谓械乐笙师职云舂牒应雅以教械乐意即楚茨之诗按说文训械字云宗庙奏械乐故字从示是则械夏本宗庙所用楚茨之诗祭宗庙之诗也械夏又名陔夏徐锴谓击鼓为登阶之节而郑玄则谓陔之言戒也盖以陔械通用而械偏旁作戒故即以戒为义楚茨之五章曰礼仪既备钟鼓既戒是即其所以名械者而又曰神具醉止皇尸载起鼓钟送尸神保聿归诸宰君妇废彻不迟夫神以既醉而言归则宾醉之当出可知矣故于客醉而出奏之以神道尊人致敬之至仪礼乡射宾兴乐正命奏陔燕礼大射礼宾降俱奏陔即其事也螽夏即桑扈之诗其四章曰彼交匪敖万福来求古文敖螽字皆通作傲礼记敖不可长母怵母敖庄子惠以欢为螽前汉书窦婴传诸公稍自引而怠螽皆傲字也此诗咏飨诸侯故于公出入时奏之公者诸侯之称又仪礼大射公入奏螽则意亦取母怵母敖之义耳然则九夏之篇犁然具在刘敞郑樵谓九夏有声无辞既属臆说唐皮日休作补九夏歌义殊浅陋不作可也又周礼乐师教乐仪行以肆夏趋以采齐车亦如之按肆夏既为金奏则采齐当亦是金奏疑即械夏也械夏乃楚茨之诗在郑玄时本尚作楚齐国风墙有茨说文亦作墙有荠可知古文茨荠通用而言抽其棘亦采之义行以肆夏取其言柴望祭告之事趋以采齐取其言祭宗庙之事古人心存恭敬一行一趋欲其如承大祭云尔乃仪礼大射公即席奏肆夏燕礼宾及庭奏肆夏郊特牲记曰宾入大门而奏肆夏示易以敬也其义不知何所取之意者欲四方之诸侯皆震叠于王灵与郊特牲又云大夫之奏肆夏自赵文子始也则越礼无章犹之鲁三家以雍彻而已】

时迈其邦昊天其子之实右序有周薄言震【後汉书作振】之莫不震叠【尔雅作愬】怀柔【陆德明本作濡】百神及河乔【淮南子作峤】岳【陆本作岳】允王维后【赋也时迈其邦即於皇时周篇事也迈说文云远行也钱天锡云应天时行故曰时迈邦朱子云诸侯之国也万尚烈云古之得天下者必告于名山大川礼也舜受尧之天下望于山川徧于羣神盖受命之始不得不尔故武王革命之始凯歌方终天下初定遂有方岳之行告以革命之事

时迈其邦言以此时而往诸侯之邦乃时之不得不然也非周十二年王巡守殷之常制也昊天其子之二句赞辞也吕祖谦云人之宗子主一家者也天之子主天下者也严粲云有天下曰天子子之谓使之为王也右郑玄云助也序郑云次序也曹氏云帝王之传序也钱氏云谓以周继夏商也季本云实右序有周犹曰历数在尔躬也盖天命所右次序及之之意言天以武王为子实扶助之使膺历数而为人神主下文震叠怀柔正其实也薄发语辞震易及尔雅皆以为动也钱云震之只是朝会举而示以更始之意如颁正朔一律度修五礼如五器是也按王制云天子五年一巡守柴而望祀山川覲诸侯问百年者就见之命太师陈诗以观民风命市纳贾以观民所好恶命典礼考时月定日同律礼乐制度衣服正之山川神只有不举者为不敬君削以地宗庙有不顺者为不孝君绌以爵变礼易乐者为不从君流革制度衣服者为叛君讨有功德于民者加地进律莫通作无音之转也叠毛传云惧也按叠字本作叠从三日从宜扬雄说古理官决罪三日得其宜乃行之王莽嫌三日太盛改为三田今训为惧者以罪既定则将施刑故有恐惧之义或通作懼尔雅说文皆云惧也莫不震叠者言有邦诸侯莫不因王之震动而各怀恐惧也後汉书李固云夫表曲者景必邪源清者流必洁犹叩树本百枝皆动也周颂曰薄言震之莫不震叠此言动之于内而应于外者也怀者招来使就已之义柔者和顺不相拂之义曹云祭法曰山林川谷丘陵能出云雨见怪物皆曰神有天下者祭百神诸侯在其地则祭之溥天之下莫非王土故巡守所至者神皆祭焉杨氏曰所谓怀柔百神者言合祭四方山川之神故云百神非必兼上下之神也愚按殷诗所云隳山之附于乔岳者川之翕于河者皆百神也河乔岳解见殷篇河水之大者乔岳山之高者皆望而祭之胡氏云望祭各设于巡守之方具位茅以辨之而植表于中周礼所谓旁招以茅晋语所谓置茅蒹设表望是也钱云河无泛滥岳无蹇崩便是怀柔处河岳感格百神可知淮南子云圣人者怀天心声然能动化天下者也故精神感于内形气动于天则景星见黄龙下祥凤至醴泉出嘉谷生河不满溢海不扬波故诗云怀柔百神及河乔岳荀子云天能生物不能辨物也地能载人不能治人也宇中万物生人之属待圣人然後分也诗曰怀柔百神及河乔岳此之谓也蔡汝楠云诸侯所怀也而曰震叠仁义之尽也百神所钦也而曰怀柔和敬相生也愚按薄言震之莫不震叠正承殷篇敷天之下三句而言怀柔百神及河乔岳正承殷篇陟其高山三句而言人神受职而时巡之事终矣允王维后亦赞辞也诸侯服之鬼神享之信哉王者之为天下君皆本于天心右序之而然也对天言则为子对神人言则为后以位言则为王】明昭有周式序在位载戢干戈载櫜弓矢我求懿德肆于【盐铁论作於】时夏允王保之【赋也昭者光明着见之意明昭有周言天表扬我周宜为共主如书武成篇所云昭我周王天休震动者上文人神受职则其事也式发语声武王身任历数之重以天下不能独理巡行既毕乃次序诸侯之在位者立周召为东西二伯使之分陕而治其余五等诸侯各依其方而听命焉乐记言大武之乐五成而分周公左召公右正是诗之所为作然但言式序在位而已略不及分陕之文者以是诗作于周公嫌自夸张故浑之也旧说谓式序指庆让黜陟言理亦可通但上章云薄言震之莫不震叠则此等事已包其内不应复说郑笺以为用俊乂次第处位韩诗外传有数条引此其意亦同以非作诗之意今皆不取载戢干戈以下言偃武修文之事武王所以式序在位者其注意全在于此载之言则也戢说文云藏兵也干戈解见公刘篇櫜毛云韬也详见彤弓篇陈祥道云鞬鞬鞬皆弓衣也亦曰弓室以皮为之按櫜为弓衣而下文以矢并言者乐记言包干戈以虎皮名曰鞬鞬则鞬之为用不独施于弓可知矣弓矢字皆象形史记云挥作弓陈云弓以木为身以角为面筋所以为深丝所以为固说文云古者夷牟初作矢刘

熙云矢指也有所指而迅疾也班固云出军行师把旄仗钺誓士衆抗威武所以征叛逆止暴乱也诗云有?秉钺如火烈烈又曰载戢干戈载橐弓矢动静应谊说以犯难民忘其死我代为武王自我也求者讲求之义懿尔雅说文皆云美也美德即文德凡可以绥太平者皆是李氏云文犹膏粱武犹药石药石可以治病而不可以养生武王取天下矣必求文德而施之也肆说文云极陈也时通作是郑云乐歌大者称夏肆于时夏言以武王偃武修文之意陈于是夏而歌之也保之以保在位言文德诞敷兵端不起则凡列爵分土者可永无变置之虞故曰信哉王者之能保此有位也言此以起桓篇保有厥土之意吕氏春秋云武王以武得之以文持之倒戈弛弓示天下不用兵所以守之也盐铁论云兵者凶器也甲坚兵利为天下殃以母制子故能久长圣人法之厌而不扬诗云载戢干戈载橐弓矢我求懿德肆于时夏周语穆王将征犬戎祭公谋父谏曰不可先王耀德不观兵夫兵戢而时动动则威观则玩玩则无震是故周文公之颂曰载戢干戈载橐弓矢我求懿德肆于时夏允王保之先王之于民也茂正其德而厚其性阜其财求而利其器用明利害之乡以文修之使务利而避害怀德而畏威故能保世以滋大】

时迈二章一章八句一章七句【旧作一章十五句序及蔡邕独断皆云巡守告祭柴望也朱子以为巡守而朝会祭告之乐歌今按诗不专述祭告兼朝会言之是已然此诗实不为巡守发因巡守事毕後式序在位也先举朝会祭告等事者蒙般篇之文耳申培说同朱传且亦知为大武之乐而但以三成之歌夫记言三成而南也与是诗之义何涉乎子贡传阙文】

桓武志也【出序】是为大武之六成【申培说同】复缀以崇天子之所歌也武乱皆坐周召之治也【出乐记 郝敬云言其志在安民保土定家非利天下也故曰武志黄佐云周公作大武以象武王之功不盛陈其杀伐之功而独叙其用贤图治之事若不称其名者何哉曰此圣人之所以谓武也噫武一也而古今异焉此择术者之所当知也按此诗当次在时迈之後是谓大武之六成其曰保有厥土于以四方即时迈所云式序在位者复缀以崇天子则其舞之容也缀者连络之义郑玄以为鄼也孔颖达谓鄼者鄼聚也舞人行位之处立表鄼以识之也陈阳谓位则鄼也所以为缀列则佾也所以为行先是舞者在南头第一位所谓缀也已而北出则已离乎缀又继而?商又继而南又继而南国是疆又继而分周公左召公右皆未复乎缀也及夫六成而舞事将终矣然後复其本位乐记所谓复乱以飭归是也乐卒曰乱故曰复乱也其所谓崇天子者何也则武乱皆坐是也乐记宾牟贾侍坐于孔子孔子与之坐及乐曰夫乐之备戒之已久何也对曰病不得其衆也咏叹之淫佚之何也对曰恐不逮事也发扬蹈厉之已蚤何也对曰及时事也武坐致右宪左何也对曰非武坐也子曰惟丘之闻诸苌弘亦若吾子之言是也夫乐者象成者也总干而山立武王之事也发扬蹈厉太公之志也武乱皆坐周召之治也按坐者跪也致谓至也宪通作轩谓起也致右宪左者王肃谓右膝至地左膝去地也若夫皆坐则是俱跪也致右宪左似将复起而有所事者然故曰非大武之坐也武王一怒而安天下之民固将与天下相安于无事矣而致右宪左何为乎然则所谓武坐者何也曰武乱皆坐是武坐也舞者既象周召之分陕以分左右矣既乃复缀而俱跪不复如向之回移转动者所以致敬乎天子亦偃武修文之意也唐孔氏谓以文止武象周召之治是也详见武篇小引下左宣十二年楚师败晋师于郟潘党曰臣闻克敌必示子孙以无忘武功楚子曰非尔所知也夫文止戈为武武王克商作颂曰载戢干戈载橐弓矢我求懿德肆于时夏允王保

之又作武其卒章曰耆定尔功其三曰铺时绎思我徂维求定其六曰绥万邦屡丰年夫武禁暴戢兵保大定功安民和衆丰财者也故使子孙无忘其章今我使二国暴骨暴矣观兵以威诸侯兵不戢矣暴而不戢安能保大犹有晋在焉得定功所违民欲犹多民何安焉无德而疆争诸侯何以和衆利人之几而安人之乱以为己荣何以丰财武有七德我无一焉何以示子孙今按楚子所引四诗虽篇名错褫然皆以为武之乐章则愚所定六诗皆大武或亦不妄】

绥万邦娄【毛郑严本皆此字音屡左传作屡今诸本俱从之】丰年天命匪解【音懈】桓桓武王【阳韵】保有厥土于以四方【阳韵】克定厥家於【音乌】昭于天【先韵】皇以间【叶先韵居贤翻】之【赋也绥尔雅云安也按绥本车中靶之名人升车所以安者故谓之安也万邦诸侯之国也此克商以後事万邦之安实繇懿德之求娄说文云数也丰年大有之年也解见多黍多稌篇左僖十九年卫大旱甯庄子曰昔周饥克殷而年丰竹书纪武王克商之明年其秋大有年旧说皆引老子言大军之後必有凶年谓武王诛无道以安天下故能召天地至和之气而获丰年之报此于理诚有之然此娄丰乃在周召分陕之後诗特以此表天眷周之笃非就克商时言也天命谓天眷也匪通作非解通作懈说文云怠也天命之于周久而不倦于娄丰年见之桓桓以下则着天命所繇此诗家倒插体也桓桓尔雅云威也书勗哉夫子尚桓桓义与此同按桓本亭邮表之名以其杰构竦峙足以耸人观望故以状威武之貌諡法辟土服远曰桓亦取此也保承时迈篇允王保之而言能保而後能有之也厥土谓昔与武王共定天下者凡分封为诸侯者皆是书康王之诰篇曰则亦有熊罴之士不二心之臣是也此不专指周召言周召为东西二伯乃其统领之人耳按时迈篇言戴戢载橐以求懿德则兵革不试带砺晏如故能保有厥土左传云能左右之曰以于以四方者犹言使之宰制运量乎四方也按书武成篇言列爵惟五分土惟三建官惟贤位事惟能此皆可以厥土称然建官位事乃王朝之职此举于以四方为言其为特指列爵分土者可知矣克能也克定厥家者朱善云天子以天下为家者也必四方安定而後克定乎厥家也夫武王之得天下虽以桓桓而其究也能保有厥土以绥万邦如此此天命之所以不解而有娄丰年之应也於昭于天指文王也皇指武王也间韵会云厠也犹言裸厠于其间也文王在上於昭于天今武王能定文王之功其灵爽在天亦与文王相为间裸也因武乐告终而极致其颂美之意乐记所谓乐终而德尊也首章曰允文文王克开厥後此曰於昭于天首章曰於皇武王无竞无烈此曰皇以间之盖相为首尾之辞】

桓一章九句【序以桓为武志而先之云讲武类禡也蔡邕独断因之亦云师祭讲武类禡之所歌也今按诗中语意絶与师祭不类朱子但以颂武王之功而疑序之所谓讲武类禡者或後世取其义而用之于其事似犹可信子贡传阙文又按左传以赉为大武之三章此诗为大武之六章深为得之赖传有此条启其端遂使武乐六成之诗篇复明今日杜预拘泥毛诗篇次以此三六之数为楚乐歌之次第误矣】

有客微子助祭于周毕事而归王使人燕饯之而作此诗【诗小序蔡邕独断及朱传皆以为微子来见祖庙之诗按微子名启纣同母庶兄也当殷之世封于微而爵为子微盖殷畿内国名及武王克商改封微子于宋乐记所谓未及下车而投殷之後于宋是也其时武庚尚在故不得为殷後及武庚叛成王诛之而汤祀斩矣于是即微子始封之宋国进爵上公命为殷後

以主汤祀史记世家言周公既承王命诛武庚乃命微子代殷後奉其先祀作微子之命以申之是也黄佐云微子之命一篇乃申命之书凡策命诸侯必有初封之辞如蔡仲之命乃命诸王邦之蔡之类此篇初无此等语也则史记申命之言信不诬矣且武王犹封箕子于朝鲜岂有舍微子不封待成王而後封乎孔穎達云序言见于祖庙必是助祭知非此时召来受命见祖庙者以经言亦白其马敦琢其旅是自国而来之辞若未受命不得已乘白马明是受命而後乃来与上有瞽振鹭或亦一时事也白虎通云有客有客亦白其马谓微子来周也尚书大传云微子朝周过殷故墟见麦秀之萋萋兮禾黍之茀茀也曰此故父母之国乃为麦秀之歌歌曰麦秀渐兮禾黍油油彼狡童兮不与我仇】

有客有客亦白其马【叶麋韵满补翻】有萋有且【丰氏本作苴】敦琢其旅【叶麋韵读如缕陇主翻 赋也篇中言有客者不一而足有欣然创见之意客指微子也左传云宋先代之後于周为客朱子云以客礼待之不敢臣也白虎通云王者有不臣者三二王之後妻之父母夷狄也重言有客者上有客据下文亦白其马而言在道时所见也下有客据下文有萋二句而言陈玉帛时所见也其实止一人耳亦苏辙云仍也言仍殷之旧也亦白其马者毛传云殷尚白也檀弓云殷人尚白戎事乘翰注云以建丑之月为正物牙色白翰白色马也易曰白马翰如明堂位云殷人白马黑首愚按此亦修先王礼物中之一事李氏云殷士裸将常服黼黻微子助祭乘其白马盖其一代之所尚虽已易代矣而其臣犹服其冠乘其马也一说郑玄云亦武庚也武庚为二王後乘殷之马乃叛而诛不肖之甚也今微子代之亦乘殷之马独贤而见尊异故言亦駁而美之也有萋二句微子至周所献之礼也上言帛下言玉萋即萋兮斐兮之萋当通作缕说文云白文貌殷尚白故所执之帛亦以白此又萋当作缕之明据且即筵豆有且之且说文云荐也字从几足有二横一其下地也且乃荐帛之具荐缕于且故曰有萋有且也敦通作琯讹作雕孔云敦雕古今字琯琢说文皆云治玉也尔雅疏以治其璞未成器者为雕以治器加工而成之者为琢旅陈也军之五百人为旅以其陈而成列故旧说亦训旅为陈庭实旅百即此旅也按礼器篇云三牲鱼腊四海九州之美味也筵豆之荐四时之和气也内金示和也束帛加璧尊德也龟为前列先知也金次之见情也丹漆丝纁竹箭与衆共财也其余无常货各以其国之所有则致远物也郊特牲篇云旅币无方所以别土地之宜而节远迩之期也龟为前列先知也以钟次之以和居参之也虎豹之皮示服猛也束帛加璧往德也夫礼器言诸侯助祭之事郊特牲言诸侯朝享之事而皆有束帛加璧之礼则此诗言有萋有且之即为束帛敦琢其旅之即为加璧明矣万时笔云微子受封于宋以存先王之祀殆如虞宾之类彼视天下非吾家物而恶得专之此正尧舜揖让公天下之心在夷齐两贤之上第难向三代以下人说耳朱子云此一节言其始至也】有客宿宿有客信信言授之絜以絜其马【此章无韵殊不可晓赋也宿说文云止也左传云再宿为信有客来此已一宿矣复又一宿是宿宿有客宿宿则已经一信矣又复经一信则共为四宿是信信也言者发语辞授说文云予也絜本作𦍋说文云绊马足也孔云至已多日可以去矣我周人授之絜绊以绊其马爱而留之不欲使去也古之朝聘停留日数不可得而详易丰卦初九遇其配主虽旬无咎注谓初修礼上朝四四以匹敌恩厚待之虽留十旬不为咎正以十日者朝聘之礼止于主国以为限又聘礼记云既致饗旬而稍于大礼之後每旬而稍稍者供其刍秣亦非一旬即归且诸侯朝王必待助祭祭前斋斋犹十日明非一旬而反不知于信信之後几日乃可去也徐光启云微子尹兹东夏本不可留留之只是爱之无已朱子云此一节言其将去也】

薄言追【支韵】之左右绥【支韵】之既【丰本作无】有淫威降福孔夷【支韵 赋也薄言发语辞追郑云送也孔云谓已发上道逐而送之左右郑云左右之臣也绥安也孔云左右之臣从而安乐之亦犹显父饯之与之欢燕以安乐其心是厚之无已愚按追绥总是一事微子礼毕当去本不可留王乃遣左右之臣尾追其後而饯送之以尽其礼非微子不告而去亦非有去而复还之事也辅广云萋且敦琢其始至也慎重其事如此非以媚乎周也诚之至也所谓在彼无恶也宿宿信信不欲其去去而追之殷懃之意如此非以私商也厚之至也所谓在此无斁也淫之为义放也过也即淫人惧焉之淫威即天降威之威郝敬云淫凶淫指纣与武庚也威谓诛纣讨武庚也降说文云下也刘氏云有德而神降之福故以降福终焉夷尔雅毛传皆云易也降福孔夷者郑云神与之福亦甚易也按夷本训平惟平则易故又训为易天道福善祸淫纣亡未几而武庚以淫德继之既有诛灭之威及之矣今日能反武庚之所为则变降威为降福亦甚易易盖勉之也亦祝之也书微子之命篇王若曰猷殷王元子惟稽古崇德象贤统承先王修其礼物作宾于王家与国咸休永世无穷钦哉往敷乃训慎乃服命率繇典常以藩王室弘乃烈祖律乃有民永绥厥位毗子一人世世享德万邦作式俾我有周无斁凡此正降福孔夷之实也郝云成王诛武庚遂命微子後殷故举武庚事以讽之曰威曰福寻常祭享不及此辞虽颂客而亦告于庙故皆为颂王樵云自後世论之惩管蔡事鲜不疑同姓惩武庚事少有能善处前代後者周家则不然管蔡败而并建亲贤以藩屏周者为益盛武庚败而建微子于上公其待遇为益加此周德之为至也罗泌云武王既胜商杀纣即武庚而立之夫吊其民诛其君而乃立其後独不以其他日之将不利而废之此周之至德也至于周公则使管蔡二叔监商监之云者所以制止其沉湎淫奔之俗而纳之道耳土地人民皆我之有固非利其国而欲之如宇文之于萧氏也及武庚作难三监淮夷并起应之当此之时周之事亦汹矣周公于是征伐至久而後克之兹宜深监武庚之事而乃更立商王之元子启夫以微子之贤吾君之子而商人父师之顾乃使之代商後而邦之宋宋为故亳商之旧都民之被其泽者固未忘也使微子而非人少异其志则全商之地确非周矣而成王周公方且晏然命之统承先王修其礼物不少为疑而宋之臣人卒以安堵非圣人之盛德能如是乎于是知立国惟在于贤而不在于疑之多也秦汉而下不原仁义而徒汲汲以防虞天下为心岂不大可慙哉】

有客一章十二句【白虎通云诗有客有客亦白其马谓周子朝周也按朝周实为助祭振鹭之言西雝有瞽之言先祖皆助祭事也或谓微子始封必受命于周之祖庙于是朝周误矣申培说则云成王既诛武庚封微子启于宋来朝于周见于祖庙此其燕乐之歌今详诗中有薄言追之之语则此诗乃微子宾行燕饯时所作不得以为燕乐也子贡传阙文】

文王周公陈文王受命作周以告成王也疑即九夏中之王夏【诗本序云文王受命作周也吕氏春秋云周文王处岐诸侯去殷之淫而翼文王散宜生曰殷可伐也文王弗许周公旦乃作诗曰文王在上於昭于天周虽旧邦其命维新以绳文王之德按绳之为言誉也左传蔡侯绳息妫以语楚子是也世说新语戴荀慈明云公旦文王之诗不论尧舜之德而颂文武者亲亲之义也朱子则以为周公追述文王之德明周家所以受命而代商者皆繇于此以戒成王子贡传亦以为训成王之诗申培说与朱传同而云作诗歌奏于清庙受厘陈戒之时今按所以知为戒成王诗者以篇中有无念尔祖之语若吕氏春秋所言文王不许伐殷正以见其无

图度天命之意所谓至德莫着于此其後周公追感往事因而作诗耳荀言公旦作此诗与吕合然以为颂文武则篇中无及武王之事申以为奏于受厘之时朱子亦有此说观篇首在上於昭二语及篇中叙述祿将于京之事殆若可信朱又以为天子诸侯朝会之乐歌则因左国有两君相见之乐一语而臆之耳严粲云序言受命作周者推本之辞也作造也造周之王业犹康诰言肇造区夏也天命归于文王而文王退然不敢当故在文王时无受命之说泰誓牧誓犹皆不言文王受命至大诰武成乃曰我文考文王诞膺天命盖武王既得天下之後推本言之凡经中称文王受命皆谓天命归之而已文王未尝当而受之也中庸记孔子之言曰武王未受命武王末年方受命文王何尝受命乎史迁因诗书有受命之语因谓文王受命称王而断虞芮之讼汉儒又襍以讖纬之说则亦诬矣游氏云君臣之分犹天地尊卑紂在上而文王称王是二大子也服事殷之道固如是耶观武王于泰誓三篇称文王为文考至武成而柴望然後称文考为文王则可知矣孰谓至德如文王一言一动顺帝之则乃盗虚名而拂天理乎欧阳修云文王之甚盛德所以贤于汤武者事殷之大节尔而後或诬其与紂并立而称王然而学者可以断然而不惑者以孔子之言为信也孔子曰三分天下有其二以服事殷此一言者扬子所谓衆言淆乱则折诸圣者也至于虞芮质成毛郑之说虽疑过实然考传及笈初无改元称王之事未害文王之为文王也惟雅之序言文王受命毛以为受天命而王天下郑又谓天命之以为王云者惑後世之尤甚者也诗人之意以为周自上世以来积功累仁至于文王攻伐诸国威德并着周国自此盛大至武王因之遂伐紂灭商而有天下然以圣人为天所相而兴周者自文王始也其义如此而已故序但言受命作周不言受命称王也且诗述新周之业归功于其父而言国之兴也有命自天此古今之常理初无怪妄之说也书曰天之历数在尔躬又曰天既訖殷命又曰剿絶天命之类其言甚多盖古人于兴亡之际必推天以为言者尊天命也如毛郑之注文王则是天谆谆命西伯称王尔此所以失诗本义而使诸家得肆其怪妄也胡宏云君子小人之不可相处如水火也况文王大圣受辛下愚乎惟文王致紂敬信得专征伐紂虽名为天子其实与天下诸侯及万民均入化育之中矣此文王受命之实也先儒不识天道乃以改元称王为受命陋之甚也文王得征伐之柄九年而薨故泰誓曰皇天震怒命我文考肃将天威惟九年大统未集既曰大统未集则安有改元称王之事先儒不本经文推原义理而妄生此论是以文王为曹操司马懿之流矣吁操与懿尚不改元称帝而谓文王为之甚哉朱子云文王之德上当天心下为天下所归往三分天下而有其二则已受命而作周矣武王继之遂有天下亦率文王之功而已然汉儒惑于讖纬始有赤雀丹书之说又谓文王因此遂称王而改元殊不知天之所以为天者理而已矣理之所在衆人之心而已矣衆人之心是非向背若出于一而无一毫私意襍于其间则是理之自然而天之所以为天者不外是矣今天下之心既以文王为归矣则天命将安往哉书所谓天视自我民视天听自我民听所谓天聪明自我民聪明天明威自我民明威皆谓此尔岂必赤雀丹书而称王改元哉张子厚云文王之于天下都无所与惟正已而已後世多疑文王行善以倾紂之天下正犹曹丕语禅让之事曰舜禹之事吾知之矣观文王一篇便知文王之德性文王之德业固美更得诗人能道之真德秀云文王之诗七章盖周公亲笔後之王者欲保天命所宜列之屏幃书之简牘昼读而夜思之则将若上帝之实临其上虽欲斯须之自放有不可得愚疑此诗即九夏中之王夏说见时迈篇小引下】

文王在上於【音乌】昭于天【先韵亦叶真韵汀因翻】周虽旧邦其命维【礼记作惟】

新【真韵亦叶先韵萧□翻丰氏本作亲】有周不显帝命不时【叶尤韵时流翻亦叶纸韵上纸翻】文王陟降在帝左右【叶尤韵夷周翻亦叶纸韵羽轨翻 赋也文王在上二句为告王唱首之语尊瞻之辞也只以文王之神言疑于祭祀受厘之後因而陈戒者文王商西伯名昌严云文王未尝称王曰文王者追称之也董鼎云人之死各返其根体魄陰也故降而在下魂气阳也故升而在上况圣人清明在躬志气如神故其没也精神在天与天为一於本鸟名古文乌字陆佃云乌又为叹辞佳见虎则鸣乌贝异则噪故以为乌喙叹所异也昭说文云日明也我周一代王叶始自文王文王往矣而其神赫然临之在上於哉如日之明于天嗣王所当仰观而敬念也钱天锡云生□为德死後为神神之昭即德之显处也德若有愧于天其神必且磨灭矣万尚烈云圣人之学本诸天儒者本天自生而死不能与天为一非圣人之学也非儒者也维天之命於穆不已文王之德之纯与天为一乃古帝王学脉本自如是而成王未必知之故首揭而言之使之闻之而知帝王祈天永命求福成孚之道尽在于比庶几日用凜然一出入一起居一食息斯须顷刻无敢与天相违也自周虽旧邦以下始追述文王之所以造周而受命者皆繇于德郑玄云太王聿来胥宇而国于周孔穎達云言太王已来居此地是周虽旧邦也命说见本篇小引下朱子云命如何受于天只是人与天同周自后稷以来积仁累义到此时人心奔趋自有不容已新说文云取木也字从斤按新以取术为义则是除旧之意而今皆以为反旧之名者盖除旧则新矣大学引此而足之曰是故君子无所不用其极夫用其极乃所以为新命之本则止於至善之谓也止至善所以自新即所以新民无所不者兼该散见之辞若下文以仁敬孝慈信释文王敬止之类其後孟子对滕文公为国之问亦引此诗且云子力行之亦以新子之国然滕岂能师文王者乎毛传云有周周也孔云以周文单故言有以助之烝民曰天监有周时迈曰昭明有周皆同也犹左传谓济为有济也不杨慎陆深皆读作丕谓古通用当从之今按书言丕显哉文王谟即此之言不显也又言在让後人于丕时即此之言不时也不说文云大也显说文云头明饰也借用以为光明之义帝朱子云上帝也程子云天以形体言帝以主宰言时者方应其期之谓天运肇启旺气大来所谓丕时也陟登降下也俱见说文毛云言文王上接天下接人也郑云在察也文王能观知天意顺其所为察而行之孔云文王升则以道接事于天下则以德接治于人常观察天帝之意随其左右之宜顺其所为从而行之愚按书曰予欲左右有民易曰后以财成天地之道辅相天地之宜以左右民此云左右即其义也尔雅云左右导也又云助也诗言文王所褒者虽太王岐封之旧而天之眷命周家则始自文王而新因赞之曰有周何其丕显乎以新之象言也帝命何其丕时乎以新之机言也又推其故谓文王何以能致此哉繇其平日注精凝神陟观于天降观于民知天之与民为一必察帝则之所在奉而行之以左右民民心既合天意斯得命之维新固其所也昔孟子之赞文王也曰望道而未之见在帝之谓也曰视民如伤左右之谓也篇中言命而本之德言德而本之敬非欲嗣王求之杳冥玄默而已敬者敬天也勤民乃所以敬天也曰左右曰陈锡正文王敬德之实文惟得民用能得天殷以丧师遂致丧命此是通篇骨子故末章结之曰仪刑文王万邦作孚亦以为必孚万邦之民心而後可以徵德耳又程子云文王陟降在帝左右不识不知顺帝之则不作聪明顺天理也此意甚佳愚取以为在帝二字训释若亢仓子引此诗而释之云文王坐作进退天必赞之故纣不能害此则是帝在左右非在帝左右矣而墨子则云若鬼神无有则文王既死彼岂能在帝之左右哉此吾所以知周书之鬼也旧说多与墨同然于发首二语殊复故不从又左襄三十年为宋灾故诸侯之大夫会以谋归宋财冬十月叔孙豹会大夫于澶既而无归于宋故不书其人君子曰信其不可不慎乎澶

淵之會卿不書不信也故曰文王陟降在帝左右信之謂也此會與詩旨無涉】 𡩺𡩺【崔靈恩集注本俱作媿媿宋氏國語補音云說文無𡩺字徐鉉以爲字當從女從尾改之驚俗墨子作穆穆】文王令聞【音問】不已【紙韻】陳錫哉【左傳國語史記陸德明本俱作載】周侯文王孫子【紙韻】文王孫子本支【左傳作枝】百世【叶寘韻讀如翅施智翻】凡【後魏禮志作惟】周之士【叶寘韻側吏翻】不【本本作丕】顯亦【左傳後魏禮志本俱作奕】世【見上 賦也𡩺𡩺文王申上章陟降二句言爾雅訓𡩺爲勉鄭云勉勉乎不倦文王之勤用明德也或謂說文無𡩺字通作媿其義訓順乃順帝則之意二訓皆通令聞善譽也鄭云其善聲聞日見稱歌無止時也此以文王當日言康誥所謂庸庸祗祗威威顯民我西土惟時怙冒聞于上帝者陳韋昭云布也按陳當通作𡩺說文云列也因行列为名故有敷布之義錫通作賜上予下也哉爾雅云始也按哉字从口而諧𠂔聲𠂔字从戈而諧才聲以始訓哉當通作才尚書往哉汝諧古文作往才汝諧此見哉才通也邢昺云說文才草木之初也聲相近借哉亦爲才也陳錫哉周者王肅云文王能布陳大利以錫予人鄭云繇能敷恩惠之施以受命造始周國也嚴云陳錫敷施也推懷保惠鮮之澤也言𡩺𡩺而繼以陳錫繇精神心術而達于政事設施同此一誠之運不誠則不溥也周語厲王說榮夷公芮良夫曰王室其將卑乎夫榮公好專利而不知大難夫利百物之所生也天地之所載也而或專之其害多矣天地百物皆將取焉胡可專也所怒甚多而不備大難以是教王王能久乎夫玉人者將利導而布之上下者也使神人百物无不得其極猶日?惕懼怨之來大雅曰陳錫載周是不布利而懼難乎故能載周以至于今今王學專利其可乎左宣十五年晉侯賞桓子狄臣于室羊舌職說是賞也曰周書所謂庸庸祗祗者謂此物也夫文王所以造周不是過也故詩曰陳錫哉周能施也率是道也其何不濟又昭十年齊樂施高強來奔陳鮑分其室晏子謂桓子必致諸公凡有血氣皆有爭心故利不可強思義爲愈義利之本也蘊利生孽姑使无蘊乎可以滋長桓子盡致諸公而請老于莒凡公子公孫之无祿者私分之邑國之貧約孤寡者私与之粟曰詩云陳錫哉周能施也愚按上章言其命維新所謂哉周也侯毛云維也爾雅亦訓維爲侯蓋互相訓侯維皆發語辭詩侯誰在矣是也嚴云不曰子孫而曰孫子謂孫又生子言其遠也愚按此對成王言故首稱孫系子于孫後則謂成王及其後人耳以第五章无念爾祖句形之可見侯文王孫子者言文王造周維文王之孫子能膺此方新之天命非他人所能與也毛云本本宗也支支子也支依左傳通作枝孔云適譬本干庶譬其支本支百世者嚴云其本宗百世爲天子其支庶百世爲諸侯盛德必百世祀也愚按本支二字亦當玩殊本于支則名分明以支扶本則氣勢厚有本有支此其所以能百世大學所謂君子親其親也非徒贊其慶澤之長而已左傳衛左公子泄右公子職立公子黔牟惠公奔齊莊六年衛侯入放公子黔牟于周殺左公子泄右公子職乃即位君子以二公子之立黔牟爲不度矣夫能固位者必度于本末而後立衷焉不知其本不謀知本之不枝弗強詩云本支百世又陸云照後命不于常何能保得百世只就文王以不已之德流不已之聞理當如此耳隱隱諷王修德凡周之士孔云凡于周爲臣之士以士者男子成名之大号下至諸侯及王朝公卿大夫總稱亦可以兼士也凡爲總辭不顯亦世是倒句文法言周士之子孫世世亦丕顯也長享祿位謂之丕顯孔云前本支百世謂繼世在位知此亦世世在位也王制言大夫不世爵公羊傳曰世卿非禮左氏說卿大夫得世祿不得世位父爲大夫死子得食其故采而有賢才則復升父故位故傳曰官有世功則有官族也白虎通曰諸侯繼世者南面之君體陽而行陽道不絕大夫人臣北面體陰而行陰道有絕故也此托之陰陽之義其實諸侯以大功而封故也卿大夫本以佐君行令非賢不可所以

不世也其得世者又违常法以大功而许之耳严云文王惟知锡民而锡民者乃所以锡孙子也不特孙子之盛如此凡周之士亦世世相传与周匹休焉】世之不【丰本作丕】显厥犹【丰本作猷】翼翼【职韵】思皇多士生此王国【职韵】王国克生【庚韵】维周之桢【庚韵】济【上声下同】济多士文王以宁【叶庚韵读如蓁泥耕翻丰本作窳 赋也厥发语辞解见生民篇犹郑云谋也翼即羽翼之翼书曰庶明励翼左传曰翼戴王室皆其义也言此周士所以能光显其後人世世勿絶者繇其当日所谋无一不以辅翼文王为事繇之诗云子曰有疏附予曰有先後予曰有奔奏予曰有御侮周书君奭篇云惟文王尚克修和我有夏亦惟有若虢叔有若闕夭有若散宜生有若泰颠有若南宫括又曰无能往来兹迪彝教文王蔑德降于国人晋语胥臣云文王之即位也询于八虞而咨于二虢度于闕夭而谋于南宫諏于蔡原而访于辛尹重之以周召毕荣即此所云厥犹翼翼者也思发语辞皇通作煌光明之义徐锴云皇之为言煌煌然也毛传解皇皇者华亦云犹煌煌也多士衆多之士上章所云凡周之士也王国我周王之国文王时尚为诸侯而国以称王者追尊之辞也春秋繁露云周国多贤至于四产而得八男皆君子俊雄也此天之所以兴周国也王国克生者严云惟周王之国能生此衆士也生此王国天生之也王国克生文王教化作成之也朱善云繇天命之保佑而多士以生繇圣化之造就而王国克生史记云文王笃仁敬老慈少礼下贤者日中不暇食以待士士以此多归之伯夷叔齐在孤竹闻西伯善养老往归之太颠闕夭散宜生鬻子辛甲大夫之徒皆往归之王褒云世必有圣智之君而後有贤明之臣故虎啸而风烈龙兴而致云蟋蟀俟秋吟蜉蝣出以陰易曰飞龙在天利见大人诗曰思皇多士生此王国故世平主圣俊父将自至张耒云思皇多士何也皇美且大者也美且大者非一二而已故也夫士之美者常难致也而得一二焉亦足以为善矣而况于多士皆美乎故士之美者可致也至于多士皆美所以为难也然则文王之能养士作人以招纳天下之俊父可知矣虽然文王岂有他术哉致礼以来其所已成勤教以养其所未就而已敦养老之礼则太公伯夷欣然而归之天下之贤者盖未有不能致者也此之谓致礼以来其所已成示之以法象如云汉之文章以道艺如金玉之文质此之谓勤教以养其所未就也桢尔雅毛传皆云干也邢昺云筑墙所立两木也所以当墙两边障土者也按桢干相似而实有异费誓峙乃桢干两举之知其非一物也书传谓题曰桢旁曰干疏谓桢当墙两端者干在墙两边者其说确矣桢干皆四旁障土之具以国桢目多士亦取辅翼之义济之为言齐也曰济济者班列整齐之貌宁通作窳说文云安也严云墙恃干而立国恃人而立故济济然衆盛之多士文王赖之以为安也王吉云谨选左右审择所使左右所以正身也所使所以宣德也诗云济济多士文王以宁此其本也黄佐云书曰自朝至于日中昃不遑暇食用咸和万民言文王心在乎民不自知其勤劳如此立政言罔攸兼于庶言庶狱庶慎则文王又若无所事者不读无逸无以知文王之勤不读立政无以知文王之逸合而观之则文王以宁从可知矣上必无为而用天下执其要也下必有为而为天下用执其职也君得臣而万化行左成二年楚令尹子重曰君弱羣臣不如先大夫师衆而後可诗曰济济多士文王以宁夫文王犹用衆况吾侪乎荀子云墙之外目不见也里之前耳不闻也而人主之守司远者天下近者境内不可不略知也天下之变境内之事有弛易齟差者矣而人主无繇知之则是拘胁蔽塞之端也耳目之明如是其狭也人主之守司如是其广也其不可以不知也如是其危也然则人主将何如知之曰便嬖左右者人主之所以窥远收衆之门户牖向也不可不早具也故人主必将有便嬖左右足信者然後可其知惠足使亲物其端诚足使定物然後可夫是之谓国具人主不能不有游观安燕之时则不得不有疾病物故之变

焉如是国者事物之至也如泉源一物不应乱之端也故曰人主不可以独也卿相辅佐人主之基杖也不可不早具也故人主必将有卿相辅佐足任者然後可其德音足以镇抚百姓其智虑足以应待万变然後可夫是之谓国具四隣诸侯之相与不可以不相接也然而不必相亲也故人主必将有足使喻志决疑于远方者然後可其辨说足以解烦其智虑足以决疑其齐断足以距难不还秩不反君然而应薄扞患足以持社稷然後可夫是之谓国具故人主无便嬖左右足信者谓之闇无卿相辅佐足任者谓之独所使於四隣诸侯非其人者谓之孤孤独而?谓之危国虽若存古之人曰亡矣诗曰济济多士文王以宁此之谓也梅福云士者国之重器得士则重失士则轻诗云济济多士文王以宁王褒云圣主必待贤臣而弘功业後士亦俟明主以显其德上下俱欲驩然交欣千载壹合论说无疑翼乎如鸿毛遇顺风沛乎如巨鱼纵大壑其得意若此则胡禁不止曷令不行化溢四表横被无穷遐夷贡献万祥毕臻是以圣主不徧窥望而视已明不单倾耳而听已聪恩从祥风翱德与和气游太平之责塞优游之望得遵游自然之势恬淡无为之场休徵自至壽考无疆诗云济济多士文王以宁盖信乎其以宁也刘彝云济济多士本繇文王教化陶范而後生也而文王又待多士之济济以为安宁焉犹人勤于菑田反以自养乐于植材反以自庇钱云反覆言多士之为周桢见修德不可无辅也有欲当时君臣交儆意又管子云济济者诚庄事断也多士者多长者也周文王诚庄事断故国治其羣臣明理以佐主故主明主明而国治境内被其利泽殷民举首而望戈王愿为文王臣此以济济指文王言其解特异】穆穆文王於【音乌】缉熙敬止【纸韵】假【丰本作格】哉天命有商孙子【纸韵】商之孙子其丽不亿【职韵】上帝既命侯于周服【叶职韵畀墨翻 赋也穆据说文训禾于义无取当是通作?说文云细文也字从彡从 省彡者文之义 者细之义盖谓文理之细密者加禾为穆因而通用故諡法布德执义中情见貌并曰穆中情见貌其文可知布德执义其细可知於叹辞缉说文云绩也绩麻者缕缕而分之又因而连续之谓之缉也熙字从火光明之义敬止者敬于其所当止之地大学所谓至善是也至善者事理当然之极止者依据之谓此承上章言文王既得多士之助疑若可以端拱而少休矣然文王在帝之心终不敢以自己于凡事事事物物之理必穷极其精微至当之处但见其穆穆然文则极文细则极细故又叹息而美之文王心通夫理随处露其光明而皆积累而联接之以会于一盖事物有异而至善无异缉熙之後自见有一境焉为我所当止之处而不容少出入者一念兢兢惟期合乎是而已穆穆以文王之成德言缉熙敬止以文王之用心言大学深探此理故为之条析以着其类曰为人君止于仁为人臣止于敬为人子止于孝为人父止于慈与国人交止于信分之则为仁敬孝慈信合之则总是一至善格物致知缉熙也诚意正心敬止也繇缉熙而知止则自然能敬止大学所以先格致而後诚正也格者格式之格有一物必有一格不可移易大学所谓矩孔子所谓不踰矩诗所谓天生烝民有物有则是也统之有宗会之有元易所谓继之者善是也悟此则诗人以穆穆咏文王乃尽乎精微之辞而以为虚摹其深远之意者谬矣又緇衣篇子曰君子道人以言而禁人以行故言必虑其所终而行必稽其所敝则民谨于言而慎于行大雅曰穆穆文王於缉熙敬止味此君子于一言一行无所不究心焉则缉之为义可识而穆穆之义亦可识矣假通作假说文云至也天命舍商而集于周如自外而至也有商孙子郑云天命之使臣有商之子孙按商者契所封之地汤取契之所封以为代号不曰子孙而曰孙子者以主孙为言其系于孙後者则谓孙之子耳严云文王之时未能有商之孙子盖推原周之代商繇于文王故以为文王能有之也丽说文云旅行也古数以十万为亿严云商之孙子其附丽之者实繁有徒不止于一亿也上帝既命者既

命周也与假哉天命相应侯亦维也服周礼注云属也按车衡下夹辕两马曰服人之受制于人亦如马之受制于衡故谓之服也天命归周商孙子维于周而臣服焉其徒党虽衆不能胜天也故孔子云仁不可为衆也】侯于周服天命靡常【阳韵】殷士肤敏裸将于京【叶阳韵居良翻春秋繁露引此以殷士二句系于侯服二句之前】厥作裸将常服黼黻【虞韵】王之荇臣无念尔祖【虞韵赋也陆云侯服于周句叠上起下盖自周以命之集致商之服在商则岂非以命之去致服于周故遂揭出命之靡常语极感慨靡无也按尔雅训靡罔皆为无张萱云靡者非而靡焉罔者亡而罔之愚意靡之训无当是古读如?音与无同耳莫之训无亦以音通也常者旗名日月为常谓昼日月于其端天子所建言常明也故为常久之义书云盘庚迁于殷张守节云自汤已下号商至盘庚改号曰殷上章言商此变言殷者彼主孙子之世系言则溯其开基之始此主国亡而臣服于周言则但以亡时所称之国号称之各有攸当也朱子云诸侯之大夫入于天子之国曰某士则殷士者商孙子之臣属也叶氏云春秋传晋士起是也肤本肱字当通作旅言衆也解见六月篇敏说文云疾也殷士衆多皆疾行从商之孙子以助祭也裸将于京二句一气读下不接殷士句言当王行裸礼之时而殷士之助祭者皆服常服以趋事有如此也裸说文云灌祭也周礼大宗伯以肆献裸享先王注裸之言灌灌以郁鬯谓始献尸求神时也郊特牲云魂气归于天形魄归于地故祭所以求诸陰阳之义也殷人先求诸阳周人先求诸陰灌是也祭必先灌乃後献腥献熟贾公彦云凡宗庙之祭迎尸入户坐于主北王以圭瓚酌郁鬯以献尸尸得之沥地祭讫啐之奠之不饮尸为神象灌地所以求神也祭统云祭有三重焉献之属莫重于裸周礼注云将送也按将字从寸寸者手也谓以手送之也孔云宗庙之祭以裸为主于礼王正裸而后亚裸则裸将主人之事矣周人尚臭举裸将以表祭事见殷士助祭耳不必专助行裸也愚按裸将与将裸不同周礼天官小宰凡祭祀赞裸将之事小宗伯辨六彝之名物以待裸将郁人诏裸将之仪与其节此裸将皆指王言谓王行裸礼以圭瓚酌酒送与尸也小宗伯职又云凡祭祀宾客以时将瓚裸此将裸指小宗伯言谓送瓚于王以行裸礼也今此诗明言裸将非言将裸正如孔氏举裸将以表祭事之说其非指殷士助送裸明矣京周京也按说文人所为絶高丘曰京故天子所居亦以京名孟子引孔子读诗至此而曰仁不可为衆也夫国君好仁天下无敌刘向云王者必通三统明天命所授者博非独一姓也孔子论诗至于殷士肤敏裸将于京喟然叹曰大哉天命善不可不传于子孙是以富贵无常不如是则王公其何以戒慎民氓何以劝勉盖伤微子之事周而痛殷之亡也厥作裸将指王也作犹行也常服犹云旧服即下文黼黻是也朱子云先代之後统承先王修其礼物作宾于王家时王不敢变焉而亦所以为戒也黼绣于裳解见采菽篇于章服之中专举黼者未知何意殷制无考髡殷冠名说文无髡字按髡字从曰吁声与冕同意古必有其字但说文偶遗之耳礼记云周弁殷髡夏收又云有虞氏皇而祭夏后氏收而祭殷人髡而祭周人冕而祭又云周人弁而葬殷人髡而葬蔡邕云冕冠周曰爵弁殷曰髡夏曰收皆以三十升漆布为帔广八寸长尺二寸加爵冕其上周黑而赤如爵头之色前小後大殷黑而微白前大後小夏纯黑而赤前小後大皆有收以持笄礼记注云髡名出于幬幬覆也言所以自覆饰也白虎通云殷髡谓之诘者十二月之时施气受化诘张而後得牙故谓之诘又云厥作裸将常服黼黻言微子服殷之冠助祭于周也熊禾云此见周家忠厚之至一代之兴虽改正朔易服衣以示作新之政然考之诗书则一代之礼乐固未尝废也常服黼黻犹用商之衣冠也王访于箕子称十有三祀奔走臣我监称五祀犹用商之纪年也一则曰商王士二则曰殷多士何尝敢有一毫鄙夷之心其视後世亡人之国则絶人之祀衣冠礼乐能存先代之旧亦

鲜也此皆出于疑虑之过而不知以公天下为心者周家忠厚之泽所以为不可及也草本草名尔雅训进未详其义旧说相传皆训为忠苾絕无稽据按方言子苾皆余也周郑之间曰苾或曰子青徐楚间曰子自关而西秦晋之间炊薪不尽曰苾此其说可信上施草下施尽薪者草之类也尽与烜通火之余也又按桑柔篇具祸以烜陆德明本烜作苾则古文烜苾通用益知苾之即为烜也王之苾臣以目商孙子及殷士乃胜国余烜云耳自裸将于京至此五句是一气语言王方举裸将之礼于周京凡助祭者毕至故当王行裸将之时而此商之孙子率其臣属皆服其故国黼黻之常服助祭于庙为王之苾臣也上言商之孙子与文王孙子相照此言殷士与凡周之士相照疑周公因成王祭文王庙遂陈及此非文王时事也无念朱子云犹言岂得无念也尔祖指文王也殷灭而周兴非文王之德不至此尔得无念尔祖文王之德乎此与上章皆归重文王得天不重商家命去凄惻上其监殷之意尚留在下章】无【孝经左传俱作毋】念尔祖聿【汉书作述】修厥德【职韵亦叶屋韵都木翻】永言配命自求多福【屋韵亦叶职韵笔力翻】殷之未丧【去声】师克配上帝【叶寘韵丁异翻】宜【大学作仪】鉴【大学作监】于殷骏【大学作峻丰本作俊】命不易【叶寘韵羊吏翻 赋也聿通作吹说文云诰辞也徐锴云诰理也理其事之辞也修通作修说文云饰也聿修厥德三句俱主文王言德字从彳谓惠之见于行者内得于心曰惠外见于行曰德承上章言成王得无念尔祖文王之能修饰其德乎曰左右曰陈锡文王修德之实也所以得民心而受天命者其原正在于此汉元帝时颇改宣帝之政言事者多进见人人自以为得上意匡衡上疏曰陛下圣德天覆子爱海内然陰阳未和奸邪未禁者殆议论者未丕扬先帝之盛功争言制度不可用也务变更之所更或不可用而复复之是以臣下更相是非吏民无所信臣窃恨国家释乐成之业而虚为此纷纷也愿陛下详覽统业之事留神于遵制扬功以定羣下之心太雅曰无念尔祖聿修厥德孔子着之孝经首章盖至德之本也按汉宣之德无足言者而匡之说诗则可谓深得其意矣左昭二十三年楚囊瓦为令尹城郢沈尹戌曰古者天子守在四夷天子卑守在诸侯诸侯守在四隣诸侯卑守在四境诗曰无念尔祖聿修厥德无亦监乎若敖蚡冒至于武王土不过同慎其四境犹不城郢今土数圻而郢是城不亦难乎引诗之意亦以修德属尔祖时说皆指为劝王之辞非是又孝经子曰爱亲者不敢恶于人敬亲者不敢慢于人爱敬尽于事亲而德教加于百姓刑于四海盖天子之孝也章首引此诗其意以爱亲敬亲解念祖以不敢恶人不敢慢人解修德则修德乃自修其德亦断章取义永言者谓长言之即歌是也虞书曰诗言志歌永言乐记曰言之不足故长言之长言之不足故嗟叹之盖作此诗者欲王闻而警念故自言其歌咏于王侧以动王听犹上言於昭言於緝熙亦裸用嗟叹之声于句中也配匹也命即假哉天命之命文王有左右陈锡之德足与天命相匹敌故多福归之是其致福之繇皆自实有以求之非幸致也文王无求福之心然修德而福来应即谓之自求可矣与旱麓篇之干禄求福义同多福如上言福及子孙多士皆是孟子引此诗及太甲自作孽不可活之语而总断之曰祸福无不自己求之者又云爱人不亲反其仁治人不治反其智礼人不答反其敬行有不得者皆反求诸己其身正而天下归之亦引此诗左昭二十八年晋魏献子为政以贾辛为祁大夫将适其县见于魏子魏子曰辛来今汝有力于王室吾是以举汝行乎敬之哉毋堕乃力仲尼闻魏子之举也以为义又闻其命贾辛也以为忠诗曰永言配命自求多福忠也魏子之举也义其命也忠其长有後于晋国乎观此可以得诗人立言之意又桓六年郑太子忽辞齐昏曰人各有耦齐大非吾耦也诗云自求多福在我而已大国何为则尤明于自之解者丧失师衆也未丧师三字最重命之去留只视师之丧与否耳朱子云上帝天

之主宰也克配者殷先王之德能与之相匹敌也周书多士篇云自成汤至于帝乙罔不明德恤祀亦惟天丕建保乂有殷殷王亦罔敢失帝罔不配天其泽此所谓殷之未丧师克配上帝也今其後人何如哉诗人于此处偏含蓄不忍说出益觉其辞凛凛宜犹当也鉴孔云镜也镜照物知善恶故以殷为镜知存亡言尔不可不鉴于有殷盖近事不远周所代也骏当依大学通作峻说文云高也莫高非天峻命即天命也易通作?说文云轻也不易者得之不轻?守之亦不当轻?也大学平天下章引殷之未丧师四语而解之云道得衆则得国失衆则失国孟子云桀纣之失天下也失其民也失其民者失其心也汉翼奉上元帝疏云臣闻三代之祖积德以王然皆不过数百年而絶周至成王有上贤之材因文武之叶以周召为辅有司各敬其事在位莫非正人天下甫二世耳然周公犹作诗书深戒成王以恐失天下书则曰王母若殷王纣其诗则曰殷之未丧师克配上帝宜鉴于殷骏命不易邹忠胤云周室方新之命即商邑已陈之命而今日天所降丧之殷即异时天所保乂之殷殷礼陟配天多历年所久矣其在于今丽亿在廷何如本支之奕叶肤敏在庙何如周桢之赞襄黼黻裸将见为假哉可见为靡常亦可倘未能亶亶如文缉熙敬止如文厥德既坠尔躬是遏其为丧师之续不难耳】命之不易【音异】无遏【陆云或作谒】尔躬【叶先韵居员翻】宣昭义问【丰本作闻】有【丰本作又】虞殷自天【先韵亦叶真韵见首章】上天之载无声无臭【宥韵亦叶尤韵初尤翻】仪刑【潜夫论作形】文王万邦【礼记作国】作孚【叶尤韵敷救翻亦叶尤韵芳尤翻】赋也遏尔雅云止也郭璞云今以逆相止为遏徐锴云徼绕使止也躬说文云身也欧阳修云知天命之不易无使天命至尔躬而止真德秀云周至成王再世耳周公已忧其命之不延读无遏尔躬之一语至今犹使人凛然震惧况周公亲言之而成王亲听之乎亦犹尧之告舜曰天禄永终也以後世言之必且谓此不祥之语而古者君臣更相告戒不讳危亡如此斯其所以不危亡也宣字下从亘象回转周匝之形故尔雅以为徧也昭明也宣昭者徧求此理之明彻与缉熙同义昭即熙也宣即缉也义问以义理相询问也吕祖谦云宣昭义问所谓辟四门明四目達四聪盖天命之大非小智偏学所能与也有通作又郑训有为又孔云以上已有所行之事下复言之故知宜为又也虞尔雅云度也按古者山泽之官名曰虞以其能相度山泽故又训虞为度周官出入自尔师虞是也又其字形声皆与虑字相近疑古文虑虞通用殷专指已亡之殷不兼指未丧师之殷以上既言宜鉴于殷又言命在尔躬则意主于鉴其亡可知自天与周书召诰矧曰其有能稽谋自天语气正同严云以义理询问于人而又虞度殷之所以自天者殷之亡也实自于天天命无私可以为鉴也鉴殷之所以失必法文王之所以得愚按殷之所以见弃于天不过在失民心耳蔡汝楠云宣昭义问有虞殷自天盖体文王翼翼之心法也德之显可继命之时可久总在敬不惟问察之广而又虞度于心其敬也至矣曰上天者见其高高在上与人相隔絶非人意所能测也载者乘车之名唐虞号岁为载取物终更始以年运而往为义此言载者亦谓天意转运无常其予其夺不可控揣故以无声无臭形容之臭者气之总名天地间惟声传于虚臭達于微已非有形之物此并声臭而亦无则窈冥之极也中庸因之以精拟至德之合天曰诗云予怀明德不大声以色子曰声色之于以化民末也诗云德輶如毛毛犹有伦上天之载无声无臭至矣仪朱子云象也按左传有仪可象之谓仪刑毛云法也按训法之刑当作?字从井易曰井法也复古编云今经史皆通作刑而从井从刀之?字不复用矣万邦谓万国之民也作说文云起也孚毛云信也按孚之为义卵孚也从瓜从子徐锴云鸟之乳卵皆如其期不失信也鸟抱恒以瓜反覆其卵故从瓜也象法文王如其陟降在帝缉熙敬止以左右陈锡乎斯民则万邦起而信我亦如文王矣人归之外岂别有天

与哉左襄十三年晋诸卿让晋国之民是以大和诸侯遂睦君子曰让礼之主也晋国以平数世赖之刑善也夫一人刑善百姓休和可不务乎周之兴也其诗曰仪刑文王万邦作孚言刑善也昭六年郑人铸刑书叔向使贻子产书曰昔先王议事以制不为刑辟诗曰仪刑文王万邦作孚如是何辟之有缙衣篇子曰好贤如缙衣恶恶如巷伯则爵不渎而民作愿刑不试而民咸服大雅曰仪刑文王万邦作孚按二书所引总借仪刑一语以明当取法前修之意于经旨无涉凌蒙初云此篇诗体自二章以下首尾相衔王元美谓曹子建白马篇祖此】

文王七章章八句【左襄四年穆叔如晋晋侯享之工歌文王之三不拜韩献子使行人子员问之对曰文王两君相见之乐也臣不敢及鲁语亦云叔孙穆子聘于晋晋悼公飨之乐及鹿鸣之三而後拜乐三晋侯使行人问焉对曰夫歌文王大明縣则两君相见之乐也皆昭令德以合好也非使臣之所敢闻也臣以为肄业及之故不敢拜朱子云今按此诗一章言文王有显德而上帝有成命也二章言天命集于文王则不惟尊荣其身又使其子孙百世为天子诸侯也三章言命周之福不惟及其子孙而又及其羣臣之後嗣也四章言天命既絕于商则不惟诛罰其身又使其子孙亦来臣服于周也五章言絕商之祸不惟絕其子孙而又及其羣臣之後嗣也六章言周之子孙臣庶当以文王为法而以商为监也七章又言当以商为监而以文王为法也其于天人之际兴亡之理丁宁反覆至深切矣故立之乐而因以为天子诸侯朝会之乐盖将以戒乎後世之君臣而又以昭先王之德于天下也国语以为两君相见之乐特举其一端而言耳】

蟋蟀唐风也成王十年封弟叔虞于唐其国风如此【班固地理志云河东土地平易有盐铁之饶本唐尧所居诗风唐魏之国也周至成王灭唐而封夷叔虞于唐其民有先王遗教君子深思小人俭陋故唐诗皆思奢俭之中念死生之虑吴札闻唐之歌曰思深哉其有陶唐氏之遗民乎孔丛子载孔子曰于蟋蟀见陶唐俭德之大也左襄二十七年郑伯享赵孟于垂陇印段赋蟋蟀赵孟曰善哉保家之主也吾有望矣愚按此诗乃班书所谓深思之君子所作盖唐叔虞始封时之风也】

蟋蟀【说文作𧈧】在堂岁聿其【丰氏本作云】莫【叶遇韵莫故翻】今我不乐【音络後同】日月其除【叶遇韵读如戌春遇翻】无已【杜预左传注作以】大【音泰後同】康职思其居【叶遇韵读如履俱遇翻】好【去声後同】乐【音络後同】无荒良士瞿瞿【遇韵丰本作𧈧 赋也蟋蟀说文作蟋 毛传云蜚也九月在堂陆玕云蟋蟀似蝗而小正黑有光泽如漆有角翅一名蜚一名蜻 楚人谓之蛙孙或作王孙广雅一名起织幽州人谓之趋织督促之言也里语曰趋织鸣懒妇惊是也蜻 一作青 又名吟蜚亦作吟蛩罗愿云其声如急织故幽州谓之促织又其鸣时正织之候故以戒妇功春秋说题辞曰趋织为言趋织也织兴事遽故趋织鸣女作兼而崔豹云济南人谓蟋蟀为懒妇非也许叔重谓蟋蟀为即且亦非也以夏生秋始鸣周书小暑之日温风至又五日而蟋蟀居壁淮南则云蟋蟀居奥奥者西南隅也比寒则渐近人易通卦验曰立秋蜻 鸣白露下蜻 上堂按据此则蟋蟀在堂盖自七月已然矣毛以为九月在堂者以豳风有十月蟋蟀入我牀下之言可知九月尚在堂也聿通作吹说文云诂词也引诗吹求厥宁今文亦作聿徐锴云诂理也理其事之词也莫晚也岁将尽如日且冥也孔云时当九月则岁未为暮而言岁聿其暮者言其过此月後则岁遂将暮耳

谓十月以後为岁暮也此月末为暮也小明云岁聿云暮采萧获菽采获是九月之事也云岁聿云暮其意与此同也除去也郑玄云今不自乐日月且过去不复暇为之也首二句言物不能安其常时不能限其去有无限咨嗟及时为乐正见过时则职业复生矣有不尽惊慌非泛泛言日月逝矣之谓已过大极也康本作糠从禾从米庚声今文作糠省作康徐锴云康空也米皮去其内以空之也诗酌彼康爵亦取空义又按史记前诸侯王表有中山糠王师古注糠恶諛也好乐怠政曰糠盖以其萧然自放无所用心如米皮之空其内而从风簸扬者然糠康字义俱同故後人因又转训康为安乐也职尔雅云主也居张子厚云谓其位也言心中之所专主者惟在思其见在所居之位各有当尽之业也好犹爱也乐即今我不乐之乐荒者广远之义好乐过甚其情荡然无复简制也愚按此诗原不为及时行乐发论正意止在好乐无荒四字耳却从今我不乐倒翻来而急以正意唤醒唐中宗引羣臣宴集令各献伎为乐张锡为谈客娘舞宗晋卿舞浑脱张洽舞黄顰杜元琰诵波罗门呪李行言唱驾车西河卢藏用效道士上章郭山恹诵古诗两篇诵鹿鸣蟋蟀未毕李峤以诗有好乐无荒之语止之唐之君臣狂纵乃尔如之何不启乱也瞿瞿解见东方未明篇有左顾右盼计後思前之意所谓良士即于瞿瞿见之虚慕赞叹祇为思居者加鞭非必真有此人而欲其就彼取法也】蟋蟀在堂岁聿其逝【霁韵】今我不乐日月其迈【叶霁韵力制翻】无已大康职思其外【叶霁韵以计翻】好乐无荒良士蹶蹶【叶霁韵姑卫翻 赋也逝往也迈远行也岁聿其暮可惊也未几而暮者又将逝矣日月其除可惜也未几而除者又已迈矣职思其外者欧阳修云广周虑也严粲云前言思所居之位则在内之事皆入于念虑矣至于在外之事皆不可不虑朱子云盖其事变或出于平常思虑之所不及故当过而备之也蹶有僵与跳二义吕氏春秋云此蹶痿之机僵也狐援闻而蹶往过之跳也此当从跳义蹶蹶毛云动而敏于事也上章瞿瞿第写其顾虑周旋之状未见于为也至此则亟见于为矣辅广云思之虽周而为之不敏则亦无益矣】蟋蟀在堂役车其休【尤韵】今我不乐日月其慆【叶尤韵他侯翻】无已大康职思其忧【尤韵】好乐无荒良士休休【尤韵 赋也前章其暮其逝皆豫拟之辞此役车其休但据即境而言周礼春官巾车职云庶人乘役车注云有方箱载任器供役者孔云收纳禾稼亦用此车陈祥道云牛车也郑玄云役车休农功毕无事也辅广云庶人之役车犹休矣则君子可无一日之乐乎慆久也诗慆慆不归之慆言今我不乐则日月其尚肯久留而待我耶徐光启云唐诗言今我不乐日月其除今我不乐日月其慆有忧深思远之意秦诗言今者不乐逝者其耄今者不乐逝者其亡有叹老拊髀之风读此二诗可见风俗之异职思其忧即思其居其外之所可忧者不然思居思外所思何事惟专主于思忧而後忧庶乎可免也休说文云息止也从人依木休休者休而又休尔雅以为俭也乐而不淫不愿乎外皆俭意也此瞿瞿蹶蹶之根本旧以安闲自得解之未是鍾惺云出其东门以乐止思蟋蟀以思止乐极善居心人也】

蟋蟀三章章八句【序云刺晋僖公也俭不中礼故作是诗以闵之欲其及时以礼自虞乐也马融亦云孔子曰奢则不孙俭则固奢俭之中以礼为界是以蟋蟀山枢之人并刺国君讽以大康驰驱之节郝敬为之说云国奢济之以俭国俭济之以礼晋自僖公之世俗尚固陋俭不中礼以蟋蟀比讽其终岁废礼也蟋蟀十月在堂周以十一月为岁首十月岁毕是大蜡之时终岁礼乐不止十月而岁暮犹寥寥则礼坏乐崩矣是诗不必即作于十月一岁之中朝廷有食飧宗庙有献酬邦国有宾兴乡有射里有社食以时用以礼乌可无财废礼当时而废乐也礼乐先王所以和上下调人情劳身焦思以天下为桎梏是墨道也故诗人借为乐以广其俭

即致大康之戒所谓礼减而能进乐盈而能反中和之道忠臣弼谐之语里巷歌曲焉得有此愚按此说敷衍序义虽极濶大然所谓劝君行乐终非格训且一章之中既劝于前复戒于後依文铺叙觉费周旋朱子谓序与诗意正自相反其见确矣但以民间岁晚燕饮之作则似未然绎思居思外及良士瞿瞿等语自是士大夫声口又申培说但云唐人相戒之诗不详作者何人子贡传阙文】

天保祝王也成王遣周召二公营雒邑既成报命因致其祝愿之意【于贡传云大臣所以报王也邹忠胤云史记武王克商忧天保之未定于是有营雒之意此诗之作盖在东都既成後矣传以为大臣报上其即周召之徒与按史记所载与逸周书及随巢子微有同异今摘録于此武王至于周自夜不寐周公旦即王所曰曷为不寐王曰告女维天不飨殷自发未生于今六十年麋鹿在牧飞拾满野天不飨殷乃今有成今我未定天保何暇寐又曰定天保依天室自雒汭延于伊汭居易毋固其有夏之居我南望三涂北望岳鄙顾詹有河粤詹雒伊母远天室盖意欲营雒也及成王即位追武王之意使召公相宅周公复卜申视卒营筑居九鼎焉书召诰雒诰之所为作此诗前三章俱以天保定尔一句发端通章语意亦与三诰相出入其为营雒後报命而致其祝愿之辞无可疑者】

天保【潜夫论作禄】定尔亦孔之固【叶遇韵读如倨居御翻】俾尔单【潜夫论作亶】厚何【潜夫论作胡】福不除【叶御韵迟据翻】俾尔多益以莫不庶【御韵赋也保者抱持爱护之义曰天保者召诰云相古先民有夏天迪从子保今相有殷天迪格保与此义同以】

【受命于天故曰天保也定者不移之谓尔指王也欧阳修云诗人尔其君者盖称天以为言又刘辰翁云诗人尔君虽古人尔汝之常抑非此无以着其亲爱淳至之情也孔甚固坚也雒邑既成基命始定卜世三十卜年八百固孰如之又韩诗解云言天以仁义礼智保定人之甚固也义与此异俾尔以下望之也俾使也孰使之天使之思若启行若翼是也君子谓之善颂善祷曰俾尔者犹卷阿言俾尔弥尔性单郑玄云尽也即礼记惟为社事单出里之单与殫通用厚谓忠厚俾尔单厚讽以仁也周家以忠厚开基今厚而益尽其厚书所谓乃单文祖德也除沈括云犹易也以新易旧曰除如新旧岁之交谓之岁除易除戎器戒不虞以新易敝也程子云除有消去之义福祉之来不问多寡其受之也皆若消去而常有者多益多受益也惟虚能受俾尔多益讽以虚也庶尔雅云侈也邓元锡云天下之益无方俾王弘受而何益不庶也易损之六五曰或益之十朋之龟弗克违莫不庶之谓也夫单厚自尽也多益尽人也内尽于己外尽夫物然後善美尽而大备下章所谓戡谷也诗人诵福必本德言之】天保定尔俾尔戡谷【屋韵】罄无不宜受天百禄【屋韵】降尔遐福【屋韵】维日不足【叶屋韵读如祝之六翻赋也自俾尔戡谷以下亦以未然言与首章同意戡说文训灭尔雅训福今按戡字从戈似无福义当以说文之训为正引诗实始戡商今文作剪谓剪灭也然此戡字训灭则非诗意当通作晋晋进也谷善也言日进于善而不已也罄尔雅云尽也尽无不宜所谓宜民宜人也是也百禄谓多禄遐说文云远也不但受天之百禄而已天又将下与尔以广远之福百以盛言遐以久言维日不足亦规劝之辞严粲云满招损谦受益故福禄虽盛而不自止足所谓吉人为善维日不足也天下无德外之福诗人归美之中有贵难者寓若尽以为言福禄则全

篇皆容悦之辞矣】天保定尔以莫不兴【蒸韵】如山如阜【丰本作 】如冈如陵【蒸韵】

如川之方至以莫不增【蒸韵 赋也自以莫不兴而下即上章所谓降尔遐福者兴说文云起也郑玄云盛也尔雅云高平曰陆大陆曰阜大阜曰陵李巡云谓土地丰正名为陆土地独高大名曰阜最大名为陵应劭云阜者茂也言平地隆踊不属于山陵也冈尔雅说文皆云山脊也陵释文云隆也体隆高也川之方至郑玄云谓其水纵长之时也严云如山之高矣又复如山脊之冈则愈高矣如阜之大矣又复如大阜之陵则愈大矣此所谓兴也山阜冈陵犹有定体故又欲其福之增增言加益也川本源深流长而方至则又盛长之初其增不可量也邹忠胤云古人文字不拘拘板对有一勺而参错者如论语迅雷风烈楚辞吉日兮辰良是也有两句而参错者如楚辞蕙肴蒸兮兰藉奠桂酒兮椒浆及韩退之春与猿唼兮秋鹤与飞是也有一章而参错以成文者天保之三章是也以山川为祝者盖亦赋景以见志逸周书所谓作大邑成周于土中南系于雒水北因干鄴山以为天下之大凑者也】吉【周礼疏大戴礼注俱作絜】黝【韩诗仪礼注丰本俱作圭】为【韩诗作惟】饔是用孝享【叶阳韵虚良翻】禴【礼记注释文俱作禴】祠烝尝【阳韵丰本作祠禴尝烝】于公先王【阳韵】君曰卜尔万寿无疆【阳韵赋也吉谓諏吉日刘公瑾云君臣諏谋祭日于旬有一日之先至次日乃卜所諏之日吉否如少牢馈食大夫先与有司諏丁巳之日至明日乃筮其日之吉凶也黝通作涓涓者小流有洁之义樊光谓黝除垢秽使令清明盖以意通之也朱子云言斋戒涤濯之洁按斋戒谓七日斋三日戒之类致洁于内也涤濯谓溉濯祭器扫除宗庙之类致洁于外也为犹备也饔说文云酒食也方言以为熟食仪礼有饔饔注炊黍稷曰饔按饔字从食当只作食解兼酒言非也享说文云献也孝以尽志享以尽物尔雅云春祭曰祠夏祭曰禴秋祭曰尝冬祭曰烝孙炎云祠之言食禴新菜可禴尝尝新谷烝进品物也董仲舒云春上豆实夏上尊实秋上机实冬上敦实豆实韭也春之始所生也尊实面也夏之所受初也机实黍也秋之所先成也敦实稻也冬之所毕实也始生故曰祠善其可也夏约故曰禴贵所初禴也先成故曰尝尝言甘也毕熟故曰烝烝言衆也奉四时所受于天者而上之为上祭贵天赐且尊宗庙也一年之中天赐四至至则上之此宗庙所以岁四祭也禴即禴一说夏祭以乐为主故曰禴祠之为义谓品物少多文词也按仲春之月祠不用牺牲圭璧及皮币但多其文词而已孔颖达云若以四时当云祠禴尝烝诗以便文故不依先後自殷以上则春曰禴夏曰禘秋曰尝冬曰烝王制文也至周公去夏禘之名以春禴当之更名春为祠以禘为大祭公郑玄云先公也孔云周之所追太王以下其太王之前皆为先公朱子云谓后稷以下至公叔祖类也按史记公叔祖类生古公亶父世本作组绀郑笺作诸暨世表作叔类先王太王以下也武王以王基肇于太王王季文王故追王三王孔云经于公上不言先者以先王在公後王上言先则公为先可知周礼祀先王以衮冕祀先公以鷩冕朱子云文王时周末有曰先王者此诗必武王以後所作也君毛传云先君也朱子云通谓先公先王也君曰者皇尸传先君之意以嘏主人之辞尸以象神少牢礼云皇尸命工祝承致多福无疆于汝孝孙之等是传神辞嘏主人也卜者前知之谓前知尔万年之寿无有疆畔境界使其长为天地山川之王华夏民物之君盖极其盛而言雒诰所谓万年厌于乃德王伋殷乃承叙万年皆此意也黄佐云礼有五经莫重于祭此天保臣子所以欲人君奉祭而获福也春秋之时有世室屋坏者有四不视朔者有烝以廩之余者不敬孰甚焉惜无以是诗告之邹云按雒诰周公曰王肇称殷礼祀于新邑咸秩无文竹

书成王七年王归自东都立高圉庙此诗吉蠲孝享虽备举四者之祭然亦因祀新邑而述之也】神之吊【丰本作逖】矣诒尔多福【叶职韵笔力翻】民之质矣日用饮食【职韵】羣黎百姓【丰本作百姓羣黎】徧为尔德【职韵赋也承上章祭祀言神即上先公先王是也吊本作□说文云至也朱子云神之至矣犹言祖考来格也一说吊恤也犹不吊昊天之日义虽可通而词颇不伦诒通作贻说文云赠遗也多福即下文所称是也质本以物相赘之义徐锴云实也事疑虚以人物实之也朱子云言其质实无伪日用饮食而已日是日日之日用者转字如易利用享祀之用李廷机云饮食质也质即平也今人但肯耕食凿饮朝饔夕飧此外无事岂不是唐虞世界蒋悌生云此诗不以福言福而以德为福不以德言德而以质实为德可谓知所本矣人君茅茨土阶菲衣恶食躬行于上正欲导天下之人去奢而即俭禁伪以存诚也今也斯民惟事乎耕田凿井乐其日用之常无慕乎浮华侈靡之习无事乎虚妄谲诈之风如是则民物安阜于下人君端拱于上所谓多福孰有加于此哉又云周尚文今诗人不以文称周民而以质言何哉周之文所以美者以其有质为之本也文灭其质又恶足称乎论周之文当参考于此羣说文云羣也徐锴云羊性好羣故从羊黎通作骊说文马深黑色为骊故黎有黑义禹贡厥土青黎史记作青骊是也朱子云犹秦言黔首也百姓毛云百官族姓也繇羣黎而推之百姓盖繇民而推之于臣故下文以徧言之为尔德者郑云言则而象之徧臣民之所为皆尔之德尧典所谓百姓昭明黎民於变时雍是也夫允升大猷成王自谓膺受多福道洽政治康王自谓膺受多福使民若臣皆徧为尔德非多福之实而何味尔德二字亦含规讽邹云召诰曰其惟王位在德元小民乃惟刑用于天下越王显又曰予小臣敢以王之讎民百君子越友民保受王威命明德皆所谓羣黎百姓徧为尔德者也】如月之恒【蒸韵释文作繩韵同】如日之升【蒸韵】如南山之壽不騫不崩【蒸韵】如松柏之茂无不尔或承【蒸韵 赋也此一章俱承上章徧为尔德一句而言恒毛云弦也古本亦作繩繩大索也有弦之义当从之郑云月上弦而就盈孔云弦有上下知上弦者以对如日之升是益进之义故知上弦矣日月在朔交会俱右行于天日迟月疾从朔而分至三日月去日已当二次始死魄而出渐渐远日而月光稍长八日九日大率月体正半昏而中似弓之张而弦直谓之上弦也後渐至十五十六日月体满与日正相当谓之望云体满而相望也从此後渐亏至二十三日二十四日亦正半在谓之下弦于後亦渐亏至晦而尽也以取渐进之义故言上弦不用望升通作昇说文云日上也郑云日始出而就明面所向之山谓南山非谓终南山也壽以坚固言騫毛云亏也闵损字子騫取亏损之义按騫字从马说文云马腹繁也徐锴云马腹病也今训为亏者当是马腹以被繁而致亏损故徐又解为马腹病也崩说文云山坏也曲礼疏云自上坠下曰崩不騫是无亏损指山之一处言不崩是无倾覆指山之全体言松解见竹竿篇栢解见栢舟篇茂尔雅注云枝叶婆娑也王逸子谓木有扶桑梧桐松柏皆受气淳异于羣类者也庄子谓受命于地惟松柏独也在冬夏青青故独举松柏之茂言之恒升壽茂皆以王者之遐福言年壽悠长运祚绵远皆是也或者不知其谁何之辞曰无不曰或皆指羣黎百姓言也承说文云奉也受也臣民承奉上德从今依始未有穷极亦更无亏减雜诰所谓其永观朕子怀德是也一说无不尔或承即蒙上松柏言亦通言无不凭藉尔之大德而受其庇?也】

天保六章章六句【序云下报上也君能下下以成其政臣能归美以报其上焉朱子谓人君以鹿鸣以下五诗燕其臣臣受赐者歌此诗以荅其君与古注意同是则羣臣嘉宾使臣兄弟朋友凡有燕者皆歌此诗不几于雷同虚文乎善乎苏子由之言曰古礼废矣不可得而知也

愚不敢信又按翼奉学齐诗闻五际之要郎顗曰四始之缺五际之厄应劭以五际为君臣父子兄弟夫妇朋友也孟康则引诗内传曰五际卯酉午戌亥也陰阳终始际会之岁於此则有变改之政又泛历枢云午亥之际为革命卯酉之际为改正辰在天门出入候听卯天保也酉祈父也午采芑也亥大明也亥为革命一际也辰为天门出入候听二际也卯为陰阳交际三际也午为阳谢陰兴四际也酉为陰盛阳微五际也又云大明在亥水始也四牡在寅木始也嘉鱼在巳火始也鸿鴈在申金始也四始之说与毛诗序异其理更不可晓以俟知者】

清庙雒邑既成诸侯朝见宗祀文王之所歌也【出蔡邕独断 王褒云周公咏文王之德而作清庙申培说云周公成雒也奉成王见诸侯作明堂宗祀文王以配昊天上帝率诸侯祀之而作此乐歌按尚书大传云周公将作礼乐优游之三年不能作君子耻其言而不见从耻其行而不见随将大作恐天下莫我知将小作恐不能扬父祖功烈德泽然後营雒以观天下之心于是四方诸侯率其羣党各攻位于其庭周公曰示之以力役且犹至况导之以礼乐乎然後敢作礼乐又云卜雒邑营成周改正朔立宗庙序祭祀易牺牲制礼乐一统天下合和四海而致诸侯皆莫不依绅端冕以奉祭祀者太庙之中缤乎其犹模绣也天下诸侯之悉来进受命于周公而退见文武之尸者千七百七十三诸侯皆莫不磬折玉音金声玉色然後周公与升歌而弦文武诸侯在庙中者汲然渊其志和其情愀然若见文武之身然後曰嗟子乎此盖吾先君文武之风也夫郑玄云文王迁豐镐作灵台辟雍而已其余犹诸侯制度焉周公摄政制礼作乐乃立明堂于王城又赵商问云说者谓天子庙制如明堂是谓明堂即文庙耶郑荅曰明堂主祭上帝以文王配耳愚谓明堂之作不始于周公自武王之时业已有之乐记曰武王克殷祀于明堂而民知孝是也然亦不独武王有之淮南子言神农之世祀以明堂新论亦云神农氏祀明堂有盖而无四方又通典曰黄帝拜祀上帝于明堂则明堂为祭祀之所自上古而已然矣诸儒皆言周公营雒邑始立明堂当自是雒邑之明堂惟宗祀文王以配上帝之礼本昉于周公孝经以此赞周公之孝而曰孝莫大于严父严父莫大于配天所云严父盖主周公尊文王而言也文王有盛德宜享此盛礼武王末受命一切制度俱所未遑至周公始能成之假使文王无周公则虽有盛德亦遏佚而不彰矣以此论孝孝孰加焉後世不達此义但误执严父二字以为凡为人子而有天下者必尊崇其父以配天而後为孝西汉孝武始建明堂固以高帝配矣其後又以景帝配唐初以元帝配其後以高祖太宗配及孝和时以高宗配明皇时以睿宗配永泰时以肃宗配元和时以顺宗配穆宗即位以宪宗配宋初以宣祖配後以太祖配既而真仁英神徽诸宗皆相继而配莫有能正其失者惟东汉明帝时以光武配飨明堂迄章安而後不变识者称为近古善乎司马光之推言之也曰孝子之心谁不欲尊其父者圣人制礼以为之极不敢踰也故祖己训高宗曰祀无丰于昵孔子与孟懿子论孝亦曰祭之以礼然则事亲者不以数祭为孝贵于得礼而已孝经曰严父莫大于配天孔子以周公有圣人之德成太平之业制礼作乐而文王适其父也故引之以证圣人之德莫大于孝荅曾子之问而已非谓凡有天下者皆当以父配天然後为孝也朱子亦曰此是周公创立一个法如此将文王配明堂永为定例以后稷配郊推之自可见後來妄将严父之说乱了或又泥严父二字谓此礼自周公言之固为严父若以成王言之则是严祖何得云严父乎又祭法有祖文王宗武王之语注疏谓祭五帝五神于明堂以文王配五天帝则谓之祖以武王配五人神则谓之宗文王为父配祭于上武王为子配祭于下何佟之议曰孝经是周公居摄时礼祭法是成王反位後所行故孝经以文王为父祭法以文王为祖也此盖惑于郑氏诸儒之说王肃駁郑

义曰古者祖有功而宗有德祖宗自是不祧之名非谓配食于明堂者也审如郑言则经当言祖祀文王于明堂不得言宗祀也宗者尊也周人既祖其庙又尊其祀孰谓祖于明堂者乎郑引孝经以解祭法而不晓周公本意殊非仲尼之义旨也斯其论确矣然清庙我将同为宗祀文王之诗岂祭时俱歌此二诗乎今以小序及独断之说考之我将是季秋大飨帝时所用清庙乃雒邑初成特奉文王以配帝之乐歌观篇中秉文之德对越在天二语固自可见即雒诰所谓王肇称殷礼祀于新邑者非季秋大飨所用也周公于雒邑宗祀制此诗其季秋配帝别有我蒋之篇而此诗因移之以他用盖有五处焉其一祭统曰夫大尝禘升歌清庙下而管象天子之乐也周祖文王故大尝禘歌之也其一文王世子曰天子释奠于先老遂设三老五更羣老之席位焉适饌省醴养老之珍具遂发咏焉反登歌清庙既歌而语以成之也下管象舞大武大合衆以事達有神兴有德也陈阳谓养老必歌清庙下管象者以文王善养老故也其二仲尼燕居曰大飨两君相见升歌清庙示德也下而管象示事也夫君燕其臣与四方之宾第升歌鹿鸣下管新宫而已大飨及两君相见皆歌清庙管象者以开国之诸侯得与于配帝之祭肃雍显相之赞播之声诗荣莫大焉故于盛礼用之也其一明堂位曰以禘礼祀周公于太庙登歌清庙下管象夫周公之庙何以得用此诗以此礼实始作于周公故追思而报之以重祭所以康周公非以赐鲁也達此五者而升歌清庙之义明矣季本云自此至维清似宜合为一篇是说也愚有取焉夫维清之诗序所谓奏象舞也凡礼之言歌清庙者未尝与管象相离斯其证也然而章分为三者以登降时所奏各有节序亦如古乐府一篇之中分为数解耳而後人不察乃真谓各自为一篇者误矣试观首章言於穆而次章亦言於穆首章言不显而次章亦言不显首章言秉文之德对越在天而次章即以维天之命与文王之德并言又首章言清庙而三章亦曰维清其前後呼应井然可数此非同为一篇而何特以古文章句相沿已久姑仍其分篇之旧耳至孝经明言郊祀后稷以配天宗祀文王于明堂以配上帝而此诗及我蒋之篇乃但以天为言者盖上帝原兼昊天及五帝而言以昊天尊于五帝故特举天以该之详见生民篇又按乐记云乐之隆非极音也食飨之礼非致味也清庙之瑟朱弦而疏越一唱而三叹有遗音者矣大飨之礼尚玄酒而俎腥鱼太羹不和有遗味者矣郑玄云朱弦练则声浊越瑟底孔也疏之使声迟也唱发歌句也三叹三人从叹之耳孔穎達云乐歌文王之德不极音声故但以熟弦广孔少唱寡和程大昌云凡瑟之弦练而朱之则其声浊底窍洪疏则其声迟用丝本以取声而时贵其迟浊者正与玄酒太羹荐味而弃味者同一意度故曰遗音遗味也遗味遗音即与上文之谓非极音非致味者相发相应也郑氏释遗为余失其旨矣至于一唱三叹则郑谓三人从而叹之大戴礼传亦曰清庙之瑟一唱而三叹之也汉去古未远一唱三叹其言如此必有所受也陈僧匠智叙古今乐録引尚书大传云古者帝王升歌清庙之乐大琴练弦達越大瑟朱弦達越以韦为鼓谓之拊何也以君子有大人声不以钟鼓竽瑟之声乱人声清庙升歌者歌先人之功烈德泽也故欲其清也其歌之呼也曰於穆清庙於者叹之也穆者敬之也清者欲其在位者徧闻之也故周公升歌文王之功烈德泽苟在庙中见文王者愀然如见文王故书曰拊琴瑟以咏祖考来格此之谓也据此而言其三人从旁叹之者从於穆等语申以嗟叹至于三人也邓元锡云郊之用蜚栗也庙之用犊牲也颂之歌清庙也一也清庙之歌一唱而三叹悬一钟尚拊膈朱弦而通越皆交于神明之道也朱子云汉因秦乐乾豆上奏登歌独上歌不以管弦乱人声欲在位者徧闻之犹古清庙之歌也】

於【音乌】穆清庙肃雝显相【去声】济济多士秉文之德对越在天骏【礼记注作逯】

奔【丰氏本作犇】走在庙不【丰本作丕】显不【丰本作丕】承无射【礼记作斲】于人斯【倪氏云诗传谓周颂多不叶韵未详其说然朱子又言一唱三叹者一人唱之三人和之如今人换歌之类盖每句而四人歌之则成四句已似一章而句末一字自然成韵 赋也於毛传云叹辞也穆通作?说文云细文也尔雅训穆为美义盖取此清庙即明堂之太庙月令所谓中央土天子居太庙太室者是也何以知之以茅屋之制知之左传言清庙茅屋而大戴礼亦言明堂以茅盖屋上圆下方所以明诸侯尊卑汉济南公玉带上黄帝时明堂图其制中有一殿四面无壁覆之以茅环之以水斯知清庙即明堂矣蔡邕月令论谓明堂者天子太庙所以宗祀夏世室商重屋周谓明堂东曰青阳南曰明堂西曰总章北曰玄堂中曰太室人君南面故主以明堂为名在其五室之中央皆曰太庙飨射养老教学选士皆于其中故取其宗祀之清貌则曰清庙取其正室之貌则曰太庙取其尊崇则曰太室取其堂则曰明堂取其四门之学则曰太学取其周水圆如璧则曰辟雍虽各异名而事实一也晋袁準非之谓明堂宗庙太学事义不同各有所为而世之儒者合为一体取诗书放逸之文经典相似之语推而致之考之人情失之远矣宗庙之中人所致谨幽隐清静鬼神所居而使衆学处焉飨射于中人鬼慢黷死生交错囚俘截耳疮痍流血以干犯鬼神非其理也茅茨采椽至质之物建日月乘玉辂以处其中非其类也夫宗庙鬼神之居而祭天于鬼神之室非其处也王者五门宗庙在一门之内若在庙而张三侯又辟雍在内人物衆多非宗庙之中所能容也明堂太庙者明堂之内太室非宗庙之太庙也明堂法天之宫故可以祭天而以祖配之按邕所言明堂为五室之一自不可易其以明堂之太庙为宗庙则非也如準所论故为得之而汉儒相传或以明堂为文王庙谬矣又或谓文王庙如明堂制亦属附会陈祥道云明堂之中堂曰太庙以其大享在焉故也古者鬼神所在皆谓之庙书与土虞以殡宫为庙则大享在焉谓之太庙可也杨氏云明堂者王者所居以出教令之堂非王者之常居也疏家谓明堂在国之南丙巳之地三里之外七里之内此言虽未可以为据然其制必凜然森严肃然清静王者朝诸侯出教令之时而後居焉而亦可以事天地交鬼神于此地而无愧焉周人祀上帝于明堂而以文王配之者此也说者乃以明堂为宗庙又为大寝又为太学则不待辨说而知其谬矣惟考工记谓明堂五室大戴礼谓明堂九室二说不同前代欲建明堂者往往惑于二说莫知所决而遂止愚谓五室取五方之义也九室则五方之外而必备四隅也九室之制视五室为尤备然王者居明堂必顺月令信如月令之说则为十二室可乎此又不通之论也汉承秦後礼经无全姑以考工记观之亦粗可见考工记曰周人明堂度九尺之筵东西九筵为八丈一尺言明堂之广也南北七筵为六丈三尺言明堂之修也五室象五行之方位有五方则有四隅不言可知也夫有五方四隅则一堂之地裂而为九室矣又安得通而为一复有九筵之广七筵之修乎盖明堂云者通明之堂也所以朝诸侯行王政者在是所以享上帝配祖考者在是非七筵九筵之修广不能行也五方四隅亦惟辨其方正其位随王者所居之月掌次以帷幕幄帟为之以诏王居以顺月令以奉天道耳亦如所谓随其时之方位开门是也此其大略也庙以清名独见于此贾逵杜预皆以为肃然清静之称孔谓庙者人所不居虽非文王孰不清静何独文庙显清静之名郑以为祭有清明之德者之宫谓祭文王也愚按说文训清为明郑说近之而义有未尽此当合天与文王而言以文王在此配帝故周公剏为之名孔所谓天德清明文能象天清明故乐记曰清明象天是天德清明孔子闲居曰清明在躬是圣人之德亦清明此其义也肃雝二句相连说肃说文云持事振敬也雝毛云和也解见思齐篇孔云既内敬于心且外和于色显明相助也郑云有光明着见之德者来助祭也吕祖谦云士虞礼祝辞曰孝子某孝显相

夙兴夜处然则自主人之外余皆显相也成王祭主也周公及助祭之诸侯皆显相也严粲云称助祭之人曰显相者谓其有显着之德美称之也济济多士解见文王篇吕云广言助祭之人凡执事者皆在也秉文之德二句亦相连说秉持也手持禾为秉也文之德即所谓文王之德之纯者对犹配也帝作邦作对之对解见皇矣篇越郑训为於盖音之转也在天之在指昊天上帝及五帝而言文王与天合德故此显相多士辈皆持举文王之德谓可以配于在天之帝周公因之举行宗祀明堂配帝之礼见其出于天下之公议而非周公以己意私为之也骏当依礼记注作逡说文云复也凡有事于庙中者往复行礼必非一次故曰逡奔走也奔尔雅疏云大走也走说文云趋也郑玄云行而张拱曰趋又刘熙云疾行曰趋疾趋曰走在庙之在指助祭者言庙即清庙也不通作丕说文云大也解见文王篇承说文云奉也不显即书之言不显哉文王谟也不承即书之言丕承哉武王烈也想穆王命君牙之辞必本诸此射弹射也解见思齐篇人泛指天下人言奉祭之显相多士亦在其中斯语辞言文王有大明之德而武王能遵奉而大承之此其所以使天下人心悦诚服不起弹射之端假使丕显不若文王则无以为後人丕承之地而指摘之来亦将有所不免矣语意只归重文王上泰誓曰维我文考若日月之照临光于四方显于西土惟我有周诞受多方此之谓也又礼记大传篇云自仁率亲等而上之至于祖自义率祖顺而下之至于祢是故人道亲亲也亲亲故尊祖尊祖故敬宗敬宗故收族收族故宗庙严宗庙严故重社稷重社稷故爱百姓爱百姓故刑罫中刑罫中故庶民安庶民安故财用足财用足故百志成百志成故礼俗刑礼俗刑然後乐诗云不显不承无斁于人斯此之谓也按此文引诗之意盖主文王为周公之祢而言亦如孝经严父之说耳】

清庙一章八句【序云祀文王也周公既成雒邑朝诸侯率以祀文王焉朱传从之郑云成雒邑居摄五年时李氏云周公之营雒邑见于召诰雒诰按召诰曰周公乃朝用书命庶殷侯甸男邦伯则是周公营雒邑之时诸侯在也至于雒邑以朝诸侯则于书无所见吕云朝诸侯者特相成王以朝诸侯而已周公非自居南面而受诸侯之朝也愚按朝诸侯率以祀文王之说盖本于明堂位所云周公践天子之位以治天下六年朝诸侯于明堂者其诬妄不经不待言矣或又谓此诗即雒诰所云王在新邑烝祭岁者然彼言文王騂牛一武王騂牛一则是文武并祭此独言秉文之德对越在天既非兼武而言又武王亦无配天之事乌可强合也子贡传阙文】

维天之命清庙之第二章也【说见清庙篇】以太平告【序云太平告文王也蔡邕独断亦云告太平于文王之所歌也苏辙云文王受命未终而没成王周公继之天下太平以为文王之德之致也故以告之郝敬云颂告成功者也成王周公之世天下和平制礼作乐皆文德所贻故以告庙愚按观篇中有假以溢我二语则所谓告太平者固亦近之但章首以天与文王对言明是宗祀配帝之语而篇末亦有冀望于天之意则此颂非但告文王乃所以告天耳善哉毛传引孟仲子之言曰大哉天命之无极而美周之礼也夫所谓天命之无极即此诗所云假以溢我也其所谓美周之礼者则美周公宗祀文王于明堂以配帝之礼也孟仲子亲受学于孟子彼所得于诗深矣後人自不解其义耳】

维天之命於【音乌下同】穆不已【孟仲子本作似郑谱云子思论诗於穆不已仲子曰於穆不似】於乎不显文王之德之纯假【左传作何说文作讹云嘉善也】以溢【左传作恤

广韵作謚】我其收之骏惠我文王曾孙笃之【通章俱无韵 赋也维发语辞命郑玄云犹道也程子云天命即天道也以其用言之则曰命造化之谓也又云言天之自然者曰天道言天之赋与万物者曰天命於穆赞辞解见清庙篇笺训为於乎美哉是也不已严粲云天之行不已也造化之机或息则其赋物者穷矣礼记哀公问于孔子曰敢问君子何贵乎天道也孔子对曰贵其不已如日月东西相从而不已也是天道也不闭其久是天道也无为而物成是天道也成已而明是天道也於乎不显亦赞辞也於乎者叹美之声若乌之吁乎也不显即丕显也黄佐云在天为命即所谓元亨利贞在人为德即所谓仁义礼智纯本训丝以音同全亦通作全礼记投壶二算为纯一算为奇是也愚按大学解文王之缉熙敬止曰为人君止于仁为人臣止于敬为人子止于孝为人父止于慈与国人交止于信此所谓文王之德之全也中庸论至诚无息而引此诗曰维天之命於穆不已盖曰天之所以为天也於乎不显文王之德之纯盖曰文王之所以为文也纯亦不已世之说者谓纯释至诚不已释无息愚以为非也夫纯与不已对言皆无息之谓非谓纯然後能不已也纯者全也德既无不全矣夫何止息间断之有谓文王之纯即天之不已可也若推其所以能纯能不已者则诚实为之故曰诚者天之道也又曰诚者不勉而中不思而得从容中道圣人也此中庸之义亦此诗之义也大学之言缉熙则纯之谓也言敬止则诚之谓也程子云天道不已文王纯于天道亦不已纯则无二无襍不已则无间断先後范景文云大雅於昭于天在帝左右已见文王与天合德此两句咏叹深长更不若他处赞圣者言配言如分明文王一天矣邹忠胤云此之谓配帝之乐歌乎假通作格升闻之义按假与假字形相似而假或作 因讹作格古文易王假有庙今文作王假有庙是假与假通也方言云梁益之间谓登曰 而礼记曰天王登假是假与格通也尔雅训格为陞即 字义是 与格通也古文书假于上下今文作格于上下是格与假通也溢郑云盈溢之言也朱子云盈而被于物也我周公代成王自谓也严云其者自期之辞收尔雅毛传皆云聚也孔颖达云收者敛聚之义故为聚也郝云文王以圣德格天其余泽波及我後人我当收之不敢失坠也愚按序以此诗为告太平者其意本此天休滋至惟敬德誠民以祈天永命则所谓我其收之者也又左襄二十七年宋左师请赏公与之邑六十以示子罕子罕曰以诬道蔽诸侯罪莫大焉纵无大讨而又求赏无厌之甚也左师辞邑向氏欲攻司城左师曰我将亡夫子存我德莫大焉又可攻乎君子曰彼其之子邦之司直乐喜之谓乎何以恤我我其收之向戌之谓乎杜预注谓何以恤我二句为逸诗今按假字同遐而遐通作何故朱子以为声之转也溢字近恤故朱子以为字之讹也似乎宜即此诗矣然如此说则是望天与文王之有以恤我既于上下文气不甚浹洽又不见序中告太平之意故定主前说骏通作峻大学引骏命不易作峻命不易可证峻说文云高也莫高非天故以峻言惠说文云仁也曾郑云犹重也自孙之子而下事先祖皆称曾孙孔云哀二年左传云曾孙蒯瞶敢告皇祖文王烈祖康叔是虽历多世亦称曾孙也笃即中庸必因其材而笃焉之笃通作竺说文云厚也此属望于天之辞言我于文王为孙既幸藉文王以受天之佑矣今日高穹之上庶其爱念我文王自我而後凡为曾孙者皆益笃厚之而不替也前以天与文王对言既又承言文王以德格天故福及于我末复欲天念文王之德而益厚其福于後人盖交互言之以足其意】

维天之命一章八句【朱传申培说皆但以为祭文王之诗而不能明其所用之地子贡传阙文】

维清清庙之第三章【说见清庙篇】奏象舞时之所歌也【序云奏象舞也蔡邕独断云奏象武之所歌也申培说以为亦祭文王于明堂而奏象舞之诗按乐有歌有舞歌以为声舞以为容声容备谓之奏容所以象也故谓之象象舞者郑玄以为象用兵时刺伐之舞武王制焉春秋繁露云武王作象乐继文以奉天墨子亦云武王胜殷杀纣环天下自立以为王事成功立无大後患因先王之乐又自作乐命曰象也孔穎達谓文王时有击刺之法武王作乐象而为舞至周公成王之时用而奏之于庙诗人以今太平繇彼五伐覩其奏而思其本故述之而为此歌也象舞亦名象武礼仲尼燕居篇所谓下管象武是也或分象为维清武为大武者非是而孔又谓象舞之乐象文王之事大武之乐象武王之事二者俱是为象尤属臆说推原其故以郑于礼记文王世子明堂位祭统诸篇所言升歌清庙下管象者彼皆解象为武王之舞其意盖谓清庙与象若皆是文王之事不容一升一下耳故孔申其义谓周推文德以先文王则武王为子道子道在堂下者上下之义也其迂滞不经至于如此严粲駁之云古乐歌者在上以人歌者皆曰升歌亦曰登歌匏竹在下以管奏者皆曰下管春官太师帅瞽登歌下管奏乐器益稷下管鼗鼓是也清庙以人歌之自宜升象以管奏之自宜下凡乐皆有堂上堂下之奏也季本亦云升歌在堂上所贵人声象管在堂下则合乐而舞矣此其说良是所以知象舞为武舞者以左传言舞象箠南龠知之襄二十九年吴公子札来聘见舞象箠南龠者曰美哉犹有憾杜预注云文王乐也又见舞韶箠者杜云舜乐也曹氏云象有箠韶亦有箠说者谓以竿击人曰箠然则执箠以舞即干舞也执龠以舞即龠舞也愚按舞象箠而歌维清贾氏谓诗为乐章与舞人为节殆近之若舞龠则歌二南鼓钟之诗所谓以龠以南是也武舞左执朱干右秉玉戚文舞则左执龠右秉翟故知象箠之舞原系武舞康成之解非无据而云然也苏辙云文王之舞谓之象武王之舞谓之武记曰十三舞勺勺大武也十五舞象象箠也孔云春官大司乐六代之乐此象舞不列于六乐盖大合诸乐乃为此舞或祈告所用周礼无之愚按此诗因雒邑成而宗祀正所谓告成事之祭耳又竹书成王八年作象舞吕氏春秋云民反王命周公伐之商人服象为虐子东夷周公遂以帅逐之至于江南乃作三象以嘉其德淮南子亦云周乐大武三象棘下今按三象之乐无可考据要是成王所作固非武王之大武亦非文王之象舞也】

维清【二字为句庚韵】缉熙文王之典【六字为句】肇禋【二字为句】迄用有成【庚韵】维周之祜【庚韵陆德明本作祺按清庙维天之命二章以唱叹故皆不用韵而此章独用韵者时当合乐而舞非唱叹之时也 赋也维发语辞清即清庙也缉熙解见文王篇朱子云缉继续也熙光明也典庄都云大册也字从册在丌上尊阁之也曰文王之典者犹云文王的故事也此盖据象舞而言文王当时有七年五伐之事即尚书传所云二年伐?三年伐密须四年伐犬夷五年伐耆六年伐崇者今悉以其功次第象之为舞而奏之于清庙之中则文王所行之往事明白如见故曰维此清庙之中所继续而重为阐扬者乃文王之典故也然文乐有文武二舞而此独奏武舞者何大雅曰文王受命有此武功故大其事而于配帝之祀特奏之也礼祭统篇亦云及入舞君执干戚就舞位君为东上冕而总干率其羣臣以乐皇尸是故天子之祭也与天下乐之诸侯之祭也与境内乐之冕而总干率其羣臣以乐皇尸此与境内乐之之义也是则祭礼之用武舞经有明文诗礼所载若合符节又按礼仲尼燕居篇云孔子曰升歌清庙示德也下而管象示事也陈祥道云德莫盛于文王之清庙事莫先于文王之象白虎通云歌在堂上舞在堂下歌者象德舞者象功君子上德而下功也繇此以观是则管与舞

皆在堂下于以示事于以象功则此诗所言文王之典其为指文王征伐之事明矣文王有此大功宜王而不王此季札所以曰美哉犹有憾也肇尔雅云始也当通作屮解见生民篇禋孔云祭天之名周礼大宗伯职云以禋祀祀昊天上帝郑玄云禋之言烟周人尚臭烟气之臭闻者也郑玄云文王始祭天而枝伐也孔云中候我应云枝伐弱勢注谓先伐纣之枝党以弱其势若崇侯之属是也皇矣说伐崇之事云是类是禡类即祭天也愚按棫朴之诗曰芾芾棫朴薪之爓之亦言文王将伐崇而先祭天之事迺尔雅说文皆云至也用犹以也黄佐云如小旻是用不集是用不得于道是用不溃于成用字同迺用有成者谓至今日用能成此王业也祲说文云祥也孔云祥者徵兆之先见者也周家有天下之祥早已见于文王肇禋之日其感格天心旧矣然则今日明堂之祀举以配帝不亦宜乎一说周公始翬宗祀之礼所谓肇禋以文王配帝始于此也曰迺用有成者言举行此礼至九献之後此礼已告成也祭则受福故曰维周之祲周祲自鬼神享配上见犹礼运所言修其祝嘏以降上神与其先祖以正君臣以笃父子以睦兄弟以齐上下夫妇有所谓承天之祜者亦通并存之邓元锡云曰迺有成岂送神乐与推之岂清庙登歌乐维天之命将飨乐与】

维清一章五句【朱子以为亦祭文王之诗而谓诗中未见奏象舞之意且疑其有阙文皆繇不深考诗义故也子贡传阙】

斯干落新宫也诗作于肇建雒邑之时亦名新宫【子贡传以为落窋宫也申培说云王者落其新宫史佚美之愚按此即古新宫诗也仪礼大射之仪云乃歌鹿鸣三终乃管新宫三终燕礼公与客燕仪云升歌鹿鸣下管新宫郑注云新宫小雅逸篇也贾公彦云知在小雅者以配鹿鸣而言鹿鸣是小雅明新宫小雅可知朱子亦疑为此篇但谓未有明证愚以左传宋元公赋新宫事绎之断其为此篇无疑也左昭二十五年宋元夫人生子以妻季平子叔孙昭子如宋聘且逆之宋公享昭子赋新宫昭子赋车辖车辖即车輶篇杜注谓小雅周人思得贤女以配君子昭子将为季孙迎宋公女故赋之然则宋公所赋必是此诗之末章咏乃生女子事正为婚□发耳若大射燕礼下管俱用此诗所以答鹿鸣而寓祝颂之意其云三终者当以首章发端语先为一终似续以下四章言宫室为二终下莞以下四章言生育为三终如谓此诗非新宫而新宫之诗果亡则後汉明帝永平二年诏亦曰升歌鹿鸣下管新宫是新宫诗至後汉尚在何云亡也新宫之诗不亡则非此诗无以当之其不取诗中字为篇名而特以其事名篇者亦如常武之例仪礼定于周公此诗在仪礼中已有意必作于成王营雒之时所以知非迁丰时作者以文王时尚未有子文王身为西伯不应生男章言君而兼及王也所以知非都镐时作者沈约谓武王既有天下始都于镐今考武王在位六年而崩成王即位年已十三则当武王为西伯时成王已生无缘此时方祝武王生子为王也所以断为成王营雒时诗者以召诰中有庶殷攻位于雒汭之语旧说谓位乃左祖右社前朝後市之位正与此诗言筑室百堵相合又考营雒事在成王七年其时成王年甫二十春秋方壮正生子之时故并祝其生育之蕃而所生元子钊果能守文武之业继统之後天下安宁刑错不用号为贤王终周之世成康并称差于熊黑之梦无忝且首章即以兄弟式相好无相犹为言盖感管蔡之事恫乎有余悲焉此诗殆必周公所作申说归之史佚或未足信】

秩秩斯干【叶先韵经天翻】幽幽南山【叶先韵翰旃翻】如竹苞【叶有韵补苟翻】矣

如松茂【叶有韵莫口翻】矣兄及弟矣式相好【叶宥韵许候翻】矣无相犹【叶宥韵余救翻丰氏本作猷】矣【赋也毛晃云秩本再生稻之名借为秩序字重言秩秩者毛传云流行也徐锴云有序之貌兼此二义方明言其流行之有序也斯此也干毛云涧也按干通作涧韩诗考盘在涧作考盘在干可证山夹水曰涧又此叙雒邑风景则指涧水东之涧亦未可知幽者深隐之义春秋元命苞云幽之为言窃也深而又深故曰幽幽南面所对之山曰南山非终南山也天保篇亦雒邑既成之诗所云如南山之寿即此陆佃云干言源流之长也山言基址之固也竹言根本丛致松言枝叶繁衍苞言其本茂言其末孔颖达云竹言苞而松言茂明各取一喻以竹笋丛生而本概松叶隆冬而不凋也愚按竹苞松茂皆表此地地色之美乃枚举之辞其云如者孰如之主下文兄及弟矣为言兄弟相好则其根本坚固而不可摇其枝叶茂盛而不可替所以拟之竹苞松茂也兄及弟矣谓同姓兄弟之国邲霍?晋之属皆是式发语辞相好言相亲爱也无与母异乃见成语非禁止之辞犹朱子云谋也言此时兄弟幸皆和好无有如昔日管蔡之相图谋者故可以肇建新邑为四方朝会之地而巩万世子孙不拔之业也】似【丰本作侶】续妣祖【虞韵】筑室百堵【虞韵】西南其户【虞韵】爰居爰处【叶语韵敞吕翻】爰笑爰语【韵赋也曲礼云君子将营宫室宗庙为先廡库为次居室为後此章言宗庙也似说文云象也按古今注庙之为言貌也所以彷彿先人之容貌即此似字意也续说文云连也自妣而下祖庙不一连续而立之谓之为续即天子七庙是也又郑玄读似如己午之己孔氏解之谓周礼左宗庙在雉门外之左门当午地则庙当己地此其说不经甚矣妣郑云先妣姜嫄也孔云知妣是姜嫄者以特牲少牢祭祀之礼皆以其妃配夫而食无特立妣之庙者春官大司乐职舞大濩以享先妣舞大武以享先祖妣先于祖用乐别祭则周之先妣有不系于夫而特立庙矣閼宫生民说姜嫄生后稷以配天为周之王业则周之先妣特立庙者惟姜嫄耳此妣文亦在祖上故知是姜嫄也祖先祖不斥号諡则后稷文武兼亲庙亦在其中司乐七庙同用乐言先祖以总之明先祖之文兼通诸庙也按古乐祀姜嫄为先妣尊之也今乐祀后稷以下之先祖亲之也又周礼春官守祧职下奄八人注疏以为天子七庙通姜嫄为八庙庙一人故奄八人筑说文云捣也主下文百堵而言室者总名对堂则自半已前虚之谓堂自半已後实之为室通举则与宫皆为所居之通称尔雅宫谓之室室谓之宫是也尔雅又云室有东西厢曰庙无东西厢有室曰寝百堵解见鸿鴈篇堵高广各一丈百者非一之辞槩举之也以其为宫室之堵墙故曰筑室百堵下文西南其户则又特于百堵内首指宗庙而言考工记云匠人营国方九里左祖右社前朝後市周礼小宗伯职云掌建国之神位右社稷左宗庙注以为在库门内雉门外之左右皆夹治朝何休云质家右宗庙尚亲亲文家左宗庙尚尊尊半门曰户单举之也合二户则为门矣庙在朝之左与朝皆南向其内则南其户其外之通于朝者适在庙之西故曰西其户如今之朝内太庙制可想见自外以及内故先言西而後言南古人立言各有依据或谓举西南以该东北非是爰尔雅云于也宗庙非居处笑语之地此皆主妣祖而言礼曰思其居处思其笑语盖事死如事生事亡如事存故庙貌之中恍若妣祖于焉陟降于焉优游上文之所谓似意正如此观下三章皆言君子而此章独无之则可以悟诗人之意之所属矣】约之阁阁【药韵周礼注作格格】榑之橐橐【药韵陆德明本作柝柝】风雨攸除【叶御韵迟据翻】鸟鼠攸去【御韵】君子攸芋【叶御韵读如豫羊茹翻陆本作吁 赋也此章言廡库也首二句主垣墙言中二句兼栋宇言约说文云纏束也郑云谓缩板也孔云若今之墙衽尔雅云檣谓之杙大者谓之棋长者谓之阁按今筑墙者每束一版必以二长杙贯其两端使不动摇所谓阁阁也榑通作?说文云击也孔云如榑杙

之椽正谓以杵筑之也橐所以盛土徐锴云字书有底曰囊无底曰橐以非一橐故曰橐橐按郑以椽为?土孔谓?者以手平物之名取壤土投之版中?使平均然後椽之此所以有资于橐也易云上古穴居而野处後世圣人易之以宫室上栋下宇以待风雨除朱子云亦去也郑云其墙屋弘杀则风雨之所除其坚致则鸟鼠之所去朱子云言其上下四旁皆牢密也君子谓王者也後放此芋毛训为大郑训为怵陆改为吁义俱难通按戴侗云芋噂鵀也古通作预别作蕢然则芋即是预盖取预备之义知其主廩库而言也廩乃畜牧之所库则财用攸藏若风雨鸟鼠最为廩库之害故特言之古人云壮哉鼠雀亦库中之事也】如跂斯翼【职韵】如矢斯棘【职韵韩诗作枋云隅也丰本同】如鸟斯革【叶职韵乞力翻韩诗丰本俱作□云翹也】如翬斯飞【叶支韵读如牺虚宜翻】君子攸跻【叶支韵读如脂蒸夷翻 赋也此下三章始言所居之宫室何休云天子诸侯皆有三寢曰高寢路寢小寢今按高寢之制未详路寢亦名大寢所以听政制如明堂三礼义宗云天子宫方一千二百步三分四为路寢之前一为路寢之後此章所言则路寢也跂通作企释文云脚跟不着地也翼严粲云如论语翼如也之翼人举踵则竦臂翼然如鸟舒翼也盖堂既高而体势又方严故其象如此棘通作亟欧阳修云急也矢行缓则枉急则直谓廉隅绳直如矢行也陆佃云自其四中视之则如跂斯翼自其四角视之则如矢斯棘革本作?说文云急也徐锴云束物之急莫如?今省文作革按鸟隼之属古谓之革鸟言其急疾也此以檐阿轩翥之势言檐是屋之前後正檐阿是栋边飘出之侧檐翬雉名尔雅云伊雉而南素质五采皆备成章曰翬吕大临云覆以瓦而加丹雘有文采而势蹇举也陆云左传曰五雉为五工正翬其一也翬盖中央之雉南方曰鷩东方曰鷩北方曰鷩西方曰鷩如鸟斯革以言其势之蹇扬如翬斯飞以言其文之涣散跻尔雅云陞也君子陞之以视朝听政事也按周制天子之堂九尺以堂高言故曰陞】殖殖其庭有觉其楹【庚韵】吟吟其正【叶庚韵诸盈翻】嘒嘒其冥【青韵丰氏本作□】君子攸宁【青韵丰本作寔 赋也此章言小寢也在路寢之後亦名燕寢殖通作直按自堂下至门谓之庭庭与门相直故或又训庭为直曰殖殖者合路寢燕寢之庭而通言之也逸周书大正解云王乃召冢卿三老三吏大夫百执事之人朝于大庭盖谓路寢之庭又酆保解云王在酆昧爽立于少庭则燕寢之庭耳觉通作桮礼记缁衣引诗有觉德行作有桮德行可证桮者械也广雅云楹谓之柱说文云楹之言盈盈然对立之状释名云楹亭也亭亭然孤立旁无所依也齐鲁读曰轻轻胜也孤立独处能胜任上重也今按柱之上有横木承栋者其形似笄因名为栿亦名为櫨又名栿栿梁台诗所谓柱栿櫨栿相支持是也刻栿为坎传于柱端有械之象故曰有桮其楹吟说文云咽也重言吟吟人衆而声气襍也正谓正朝之所在指路寢也嘒说文云气牀也重言嘒嘒屋深而响逆也冥说文云幽也尔雅云幼也幼通作窈李巡曰深间之窈也指燕寢也其地渊邃故以冥称宁通作寔安也庭之直楹之桮路寢燕寢同之而路寢则百官聚会之所但闻人声气嘒嘒然君子于此听政而出治燕寢则人迹不容易至间有至者则其声必嘒嘒然乃君子之所以休息而安身也攸宁专承其冥一句言】下莞上簟【叶寢韵徒锦翻亦叶琰韵徒点翻】乃安斯寝【韵亦叶琰韵于俭翻】乃寝乃兴【蒸韵亦叶东韵火宫翻又叶阳韵虚良翻】乃占我梦【东韵亦叶蒸韵莫滕翻又叶阳韵谟郎翻丰本作?】吉梦维何维【潜夫论作惟下同】熊维罴【支韵】维虺维蛇【叶支韵余支翻丰本作它後同 赋也莞草色尔雅云苻蓐也顔师古云今谓葱蒲本草云楚谓之莞蒲陆德明云草藂生水中茎圆江南以为席形似小蒲而实非也濮氏云莞又名灯心草下莞是铺席其上则竹苇之簟所以覆席孔云以常铺在上宜用坚物故知竹簟也郑以为寢既成乃铺席与羣臣安燕为欢以乐

之董氏駁之云按几筵莞筵蒲筵则有之而苇竹无施于席则知所以为寝也此承上章君子攸宁而言因纪当日获梦之奇乃安斯寝乃寝乃兴二寝字与燕寝之寝不同皆谓卧也兴夙兴也我代为成王之自我也乃占我梦询之人也占说文云视兆问也从卜从口会意问卜曰占今据梦而问其吉凶亦同于卜故曰占也吉梦维何占者问也维熊二语成王自述其梦也熊黑皆兽名罗愿云熊类犬豕人足黑色春出冬蛰轻捷好缘高木见人自投而下亦以革厚而筋弩用此自快故称熊经尔雅云黑如熊黄白文郭璞云似熊而长头似马有髦高脚猛憨多力能拔树木关西呼曰貘黑蛇虺虫名张奐云蛇能屈伸配龙腾蛰陆佃云虺状似蛇而小语曰为虺弗推为蛇奈何以此故也或以为蝮蛇者非果蝮蛇入梦将惧有凶徵而何吉之与有钱天锡云熊黑虺蛇俱耳目心思不及则朕兆之异可知王符云凡梦有直有象有精有想有人有感有时有反有病有性诗云维熊维黑维虺维蛇衆维鱼矣旄维旃矣此谓象之梦也】太人占之【支韵之黑蛇三字叶】维熊维黑【见上】男子之祥【祥祥相应为韵亦与下章叶】维虺维蛇【见上】女子之祥【赋也太人之称非王莫当之所以知非指王者以前章皆称王为君子故此太人朱子以为太卜之属是也按周礼太卜职云掌三梦之灋一曰致梦二曰觭梦三曰咸陟其经运十其别九十致梦盖谓有所以致是梦者觭梦异梦盖谓非意所及者咸陟盖谓无心之感神魄升游所至有见者其属有占梦之官掌其岁时观天地之会辨陰阳之气以日月星辰占六梦之吉凶一曰正梦二曰噩梦三曰思梦四曰寤梦五曰喜梦六曰惧梦季冬聘王梦献吉梦于王王拜而受之乃舍萌于四方以赠恶梦愚按此六梦者以三梦之别取之则正梦思梦即致梦也噩梦寤梦即觭梦也喜梦惧梦即咸陟也若此诗所梦熊黑虺蛇当属噩梦噩者惊愕之义祥犹兆也徐锴云祥之为言详也天欲降以祸福先以吉凶之兆详审告悟之也陆云熊黑阳物也强力壮毅故为男子之祥虺蛇陰物也柔弱隐伏故为女子之祥盖人之精神与天地陰阳流通故梦之吉凶各以其类至严云心清神定则有开必先博物通達则占事知来熊黑猛兽为男之祥虺蛇陰类为女之祥昔人谓占梦无书以意言之殆近是矣辅广云详占梦之意则先王致察于天人之际可谓密矣惜哉其法之不传也然後世之人情性不治尽之所为犹且昏迷迷乱而不自知觉则其见于梦寐者率多纷纭乖戾未必与天地之气相流通其间纵有徵召之可验者亦须迂回隐约必待其既验而後可知想古占法虽存亦未必能尽信也】乃生男子载寝之牀【阳韵】载衣【去声後同】之裳【阳韵】载弄之璋【阳韵】其泣喤喤【阳韵】朱芾【丰本作市】斯皇【阳韵丰本作煌】室家君王【阳韵赋也此下二章皆未然事盖因梦兆而预卜其将然亦颂祷之意也乃者将然之辞古者男女初生即表异】

【之载之言则盖音近也後俱放此牀说文云安身之座也莞簟所施之处寝之以牀贵之也裳者下之饰衣之以裳臣道也孔云王子孙当为君而言臣者王肃谓无生而贵之也明欲为君父当先知为臣子也或云以他日袞绣之荣贵之亦通弄说文云玩也从升持玉弄之璋者以玉为戲具也毛云半珪曰璋孔云知璋半圭者以典瑞云四圭有邸以祀天两圭有邸以祀地圭璧以祀日月璋邸射以祀山川从上而下递减其半故知半圭也玉不用圭而以璋者明成人之有渐璋是圭之半故言渐也严云今考大宗伯以赤璋礼南方注谓圭锐象春物初生半圭曰璋象夏物半死然则圭之首锐璋则圭体之半也一圭中分则为二璋也璚有圭璚璋璚璚勺也以圭璋为璚之柄以裸于宗庙也又有璋玉以礼神及朝聘以为瑞此生男弄璋必不用祭器之璋璚当止是璋玉也又诗故云赤璋以礼南方弄璋南面之象也亦通此上三句

俱见古人早豫教之法後章放此喤说文云小儿声孔云其泣声大喤喤然按喤字右施皇皇者大义知为大声也后稷之?实覃实訏杨食我之生也闻其声知其必灭羊舌氏则其泣喤喤其为吉祥可知东坡贺人生子诗云试教啼看定何如严云今人以儿初生啼声长而大为福壽朱芾斯皇解见采芑篇朱芾二字略断所谓天子之芾纯朱也斯皇者朱色而襍之以黄所谓诸侯之芾黄朱也室家者国与天下之通称如瞻彼洛矣所谓保其室家胡安国亦曰王者以京师为室天下为家是也衆子为诸侯以君称嫡长为天子以王称言生子衆多他曰者必将服朱赤之芾以保有其室家而或为一国之君或为天下之王也先君子于王取叶韵】乃生女子载寝之地【寘韵】载衣之裼【叶寘韵徒四翻说文丰本俱作?韩诗作褻】载弄之瓦【叶寘韵鱼贵翻】无非无仪【支韵亦叶寘韵宜寄翻】唯酒食是议【寘韵亦叶支韵疑鞞翻】无父母诒【陆德明作贻】罹【支韵亦叶寘韵力置翻陆本作离赋也寝之于地卑之也女人法地以示天尊地卑之意非谓贱之也裼通作褻说文云緇也孔云缚儿被也诗故云男子裳之出其手示有志于四方女子裼之并手足而裹之示无外务也瓦毛云纺砖也孔云以璋是全器则瓦非瓦砾故云纺砖妇人所用瓦唯纺砖而已黄震云今所见纺无用砖者而瓦亦与砖为二物恐风俗古今不同尔尝见湖州风俗妇人皆以麻线为业人各一瓦覆膝而索麻线于其上岁久瓦率成坎古亦岂有此事而诗人因指之与郝敬云纺用砖以镇车朱子云弄之以瓦习其所有事也曹大家云古者生女三日卧之牀下弄之瓦砖卧之牀下明其卑弱主下人也弄之瓦砖明其习劳主执勤也非通作诽訾议也左传云有仪可象谓之仪孔云以妇人少所交接无如丈夫折旋揖让棣栢之多丘氏云妇人尚静默不当有所是非尚质慤不当为威仪又郑云仪善也妇人无所专于家事有非非妇人也有善亦非妇人也鍾惺云无非易知无仪难见赵母勅其女慎勿为好好尚不可为而况恶乎即此意也亦通议说文云语也一曰谋也诒通作贻说文云赠遗也罹说文云心忧也惟酒食之事是谋而无遗父母之忧则可矣朱子云易曰无攸遂在中馈贞吉而孟子之母亦曰妇人之礼精五饭晷酒浆养姑舅缝衣裳而已矣故有闺门之修而无境外之志此之谓也自无非无仪以下预期其长大有家之後其行如此】

斯干九章四章章七句五章章五句【仪礼左传皆以为新宫序云宣王考室也刘向亦云周德既衰而奢侈宣王贤而中兴更为俭宫室小寝庙诗人美之斯干之诗是也上章道宫室之如制下章言子孙之衆多也盖本序说云尔愚独断其不然者以宣王既熊罴入梦则所生必是贤子乃继宣者幽至于身之不保周室遂东则此梦亦不灵甚矣不灵之梦是梦幻也圣人何録焉旧所以相传为宣诗者意无羊之诗是宣王时事篇中亦有太人占梦之语因遂彙作一处而并属之宣耳又按礼成庙则衅之路寝成则考之而不衅考也衅也总名为落落者乐也此诗不独营宫室亦立宗庙而独以考之一字该之于义亦未为允】

洞酌召康公教成王以岂弟化庶殷也岂以强教之弟以悦安之【序以此诗为召康公所作申培说及朱传因之皆以为召康公戒成王之诗郑玄云成王始幼少周公居摄政及归之成王将莅政召公与周公相成王为左右书序云周公为师召公为保公名奭康其諡也所以知为教成王化庶殷者以尚书召诰知之其文曰太保入锡周公曰拜手稽首旅王若公诰告庶殷越自乃御事王先服殷御事比介于我有周御事节性惟日其迈其惟王勿以小民淫用匪彝亦敢殄戮用乂民若有功其惟王位在德元小民乃惟刑用于天下越王显盖召公倦倦欲

王以德化庶殷若此玩诗意殊似而古说又以为召康公之作其与召诰相表里明矣强教悦安则孔子之释岂弟也与兴意合定是正解】

洞酌彼行潦【旧皆为句】挹彼注兹【支韵摯虞云古诗九言者洞酌彼行潦挹彼注兹之属是也读与旧异】可以饘【陆德明本作饘丰氏本作□】饘【叶支韵许羈翻亦叶纸韵昌里翻】岂【家语荀子吕览韩诗外传俱作恺礼记作凯】弟【荀子吕览韩诗外传俱作悌】君子【纸韵亦叶有韵济口翻】民之父母【有韵亦叶纸韵姆鄙翻 兴也洞说文云沧也沧之为言寒也尔雅云远也按洞字从同同者野外也赵颐光谓洞有远义远有寒旷义酌通作勺说文云挹取也行潦毛传云流潦也孔颖达云行者道也潦者雨水也行道上雨水流聚故云流潦也挹说文云抒也徐锴云从上酌之也彼彼大器也注说文云灌也兹此也此小器也孔云远酌取置之大器挹来乃注于小器以潦水泥浊置之大器以澄之注小器而用之所以转经二器也饘说文云?饭也?者久泔也泔者潘也潘者淅米汁也淅者汰也字书云一蒸米也朱子云蒸米一熟而以水汰之乃再蒸也饘说文云酒食也可以饘饘者严粲云言可灌沃饘米以为酒食也岂通作恺说文云康也弟者次第之义顺之意也君子朱子云指王也孔云一人之云父母有父之尊有母之亲也逸周书云周公曰生之乐之则母之礼也政之教之遂以成之则父之礼也父母之礼以加于民苏辙云流潦水之薄也然苟挹而注之则可以饘饘言物无不可用者是以君子之于人未尝有所弃犹父母之无弃子也或曰虽行潦污贱之水苟挹之于彼而注之于此则遂可以饘饘孟子曰虽有恶人斋戒沐浴则可以祀上帝季本云盖欲人君舍短取长不录人过也如此则中养不中才养不才而可以为民父母矣表記云子言之君子之所谓仁者其难乎诗云岂弟君子民之父母岂以强教之弟以悦安之乐而无荒有礼而亲戚庄而安孝慈而敬使民有父之尊有母之亲如此而後可以为民父母矣非至德其孰能如此乎韩诗外传云诗曰恺悌君子民之父母君子为民父母何如曰君子者貌?而行肆身俭而施博故不肖者不能逮也殂尽于己而区略于人故可尽身而事也笃爱而不夺厚施而不伐见人有善欣然乐之见人不善惕然掩之有其过而兼包之授衣以最授食以多法下易繇事寡易为是以中立而为人父母也筑城而居之别田而养之立学以教之使人知亲尊故父服斩纁三年为君亦服斩纁三年为民父母之谓也又云度地图居以立国崇恩博利以怀衆明好恶以正法度率民力稼学校庠序以立教事老养孤以化民升贤赏功以劝善惩奸绌失以丑恶讲御习射以防患禁奸止邪以除害接贤连友以广智宗亲族附以益强诗曰恺悌君子荀子云彼君子者固为民父母之说焉父能生之不能养之母能食之不能教诲之君者已能食之矣又善教诲之者也以上数则俱是此诗本意又吕氏春秋云恺者大也悌者长也君子之德长且大者则为民父母按以长大解恺悌于字义无据孔子闲居篇云子夏曰敢问诗云恺悌君子民之父母何如斯可谓民之父母矣孔子曰夫民之父母乎必达于礼乐之原以致五至而行三无以横于天下四方有败必先知之此之谓民之父母矣家语云美功不伐贵位不喜不侮不佚不傲无告是顓孙师之行也孔子言之曰其不伐则犹可能也其不弊百姓则仁也诗云恺悌君子民之父母皆借辞立义非为诗作解也】

洞酌彼行潦挹彼注兹可以濯罍【灰韵】岂弟君子民之攸归【叶灰韵古回翻 兴也濯说文云澣也毛云涤也义同罍本作櫪解见卷阿篇孔云春官司尊彝云四时之祭皆有罍是罍为祭器也卷耳云我姑酌彼金罍则燕飧亦有罍愚按罍者贵器可以濯罍言其可以贵用之也上章言可以饘饘但譬养成其材此则材既成而将见之用矣攸所也归犹依投也君子以

岂弟为德于天下之人教之则无类立之则无方宜其为民之所归心也邓元锡云岂弟大德也王者以无怨怒为大德行潦耳而洞酌之而挹之又从而注之虽濯鬻以祀可也率斯术也以往强教悦安有一毫疾顽亟成心哉是岂弟之德也】洞酌彼行潦挹彼注兹可以灌溉【队韵亦叶寘韵巨至翻又叶未韵居气翻】岂弟君子民之攸暨【寘韵亦叶未韵於既翻又叶队韵古代翻兴也溉本水名毛传以为清也孔云特性注云灌溉也则溉亦是洗名谓洗之使清洁也季云可以灌溉则无物不可濯非但一鬻而已以喻人才养成无所用而不可也暨通作衆与也义与假乐篇同攸暨犹攸归也非君子有岂弟之德能为民父母其何以致之孟子曰河海之于行潦类也圣人之于民亦类也故行潦所以比民也虽然未尽也夫行道上之流潦其秽浊必与凡水不同愚以是知诗意为殷之遗民染纣污俗者之况也而旧说皆以行潦兴岂弟君子不伦甚矣自召康公于诗书以此义告成王与周公申诰多士多方同一意绪厥後周公既没王命君陈尹兹东郊亦曰尔无忿疾于顽无求备于一夫必有忍其乃有济有容德乃大简厥修亦简其或不修进厥良以率其或不良盖所得于周召之训者深矣金履祥云殷自中叶以来士大夫世家巨室殖货慢令风俗浸不美盘庚一尝正之历高宗诸贤君风俗固尝正矣至纣又以沈酗骄奢倡之一时风靡而又为天下逋逃主聚诸亡命是崇是长凡亿兆之心如林之旅计皆是物荡无廉耻一旦周师至则倒戈迎降之不暇尔武王入殷固已虑之曰若殷之大衆何太公亦已有诛斥之意矣独周公不然而兼包并容之然商民之意得气满终不若在纣之日故其後从武庚以叛于是分迁畿甸而处之而诱之亦殊劳矣迹商民之所为自秦汉言之坑戮诛夷之而已矣而乃待之如此此乃周公之德而所以为周家之忠厚也王应麟云殷民既化其效见于东迁之後盟向之民不肯归郑阳樊之民不肯从晋及其末也周民东亡而不背事秦王化之入人深矣】

洞酌三章章四句【旧本皆作章五句序云召康公戒成王也言皇天亲有德飨有道也按左隐三年周郑交质君子曰信不由申质无益也明恕而行要之以礼虽无有质谁能间之苟有明信涧谿沼沚之毛苹蘩蕰藻之菜筐筥錡釜之器潢污行潦之水可荐于鬼神可羞于王公风有采蘩采苹雅有行苇洞酌昭忠信也序说本此岂知左氏特断章取义耳而援以释经可乎朱子诋其疎是也然朱子于取兴之意亦自未解其云行潦尚可饘饔岂弟君子岂不为民之父母乎或为之畅其说谓行潦无本岂弟有源饘饔濯鬻之用可数父母斯民之德无量是皆牵强附会不成义理子贡传阙文】

卷阿召康公戒成王任贤保治也成王三十三年游于卷阿召康公从【自三十三年至此出竹书纪年文】因王之歌作此以为戒【出自朱传申培说同愚按周公之戒成王也于无逸则曰继自今嗣王则其无淫于观于逸于游于田于立政则曰继自今立政其勿用儉人其惟吉士是诗为游观而作而篇中又惓惓以吉士吉人为言其为告成王之诗明矣况又有竹书足据乎黄佐云卷阿之乐固召公之所深虑也然召公之作旅獒恐武王之玩物而丧志也其词直者何也以武王大圣人也而又当君臣同心之际故直也卷阿之作盖恐成王之逸游或至于流连也其词婉者何也以成王中材之主也而又当君臣危疑之後故不得不婉也要之各有攸当焉耳】

有卷者阿【歌韵】飘【陆德明本作票】风自南【叶侵韵乃林翻】岂弟君子来游【列

女传作游】来歌【韵】以矢其音【侵韵阿歌南音隔句各韵兴而赋也卷说文云膝曲也故毛传训曲也阿说文云曲阜也按曲阜名卷阿则其曲之貌也飘尔雅说文皆云回风也孔颖达云阿之曲者风无去路郑玄云有大陵卷然而曲回风从长养之方来入之兴者喻王当屈体以待贤者贤者则猥来就之如飘风之入曲阜然其来也为长养民王安石云有卷者阿则虚中屈体之大陆飘风自南则化养万物之回风不虚中则风无自而入不屈体则风无自而留愚按此兴意但讽王受言未及求贤之事盖召公将有所进戒于王虑其扞格不入故即所见以起兴有卷者阿兴下文岂弟君子飘风自南兴下文以矢其音岂通作恺说文云康也故晋世顾恺字长康弟说文以为韦束之次第顺之意也君子指成王也曹居贞云岂弟君子乐于循理而已故诗人美人君之德必以岂弟言之游本旌旗之旒借以为飘扬自得之意来游来歌谓王来游而歌也未章惟以遂歌之歌指此矢音康公自言赓歌也矢者直指之意臣以诗陈于君前故曰矢其音则此诗所言是也辅广云有卷者阿言其地也飘风自南言其时也岂弟君子来游来歌以矢其音言其事也召公从成王来游于卷阿之上时有飘风自南而来成王乐而歌之故公因陈此诗以为戒】伴【丰氏本作泮】奂【丰本作涣】尔游【尤韵】矣优游尔休【尤韵】矣岂弟君子俾尔弥尔性似【尔雅注作嗣】先公【尔雅注公下有尔字】酋【尤韵】矣【赋也伴说文云大貌奂说文云取奂也字从升从夨省升音拱竦手也徐锴云夨营求也取之义也尔指王也後放此伴奂尔游者言大取此地而游之以为王所游故大之也优通作口说文云行之和也休说文云息止也字从人依木优游尔休者言王以神情和豫而来游遂止息于此也俾使也此与下二章言俾字词虽若祝而意实主讽说文无弥字本作𢇛弓也性字从心从生人受仁义礼智之德于天以生而此四德皆藏于心谓之性也弥性与周书召诰言节性反看心放则性失必时时检束之勿使放逸节之义也养定则性恬纵任之而已不事矜持弥之义也然此亦只在游豫上说按郑笺解伴奂为自纵之意王肃非之云周公着书名曰无逸而云自纵也不亦违理哉孙毓亦云忠臣戒君而发章令自纵非直方之义也唐孔氏为申郑意云周公之言无逸者心也召公之言优游者事也心常战兢无时可逸事若无为自然逸矣子之燕居申申如也是纵之状无为而治其舜也与是自逸之事召公教其求逸劝使任贤此则达者之格言万世所不易何以为违理之谈非直方之义也愚按孔说辨矣然召公实非教王以纵其曰俾尔弥尔性者微词也正意乃在似先公酋一语若曰使王若能勤于政事如当日之先公则亦可以久享此逸矣似说文云象也吕祖谦云似先公者召公周之尊老故其祝成王远本先公不忘旧也祝之所以戒之也酋久也按酋本绎酒之名其字以酉水半见于上酉者酒也酒久则水上见而糟少也故周礼注云酋者久远之称酒以久熟者为善因名酒官为大酋方言亦云久熟曰酋似先公酋以壽考言不曰先王而曰先公者周之先公多壽王季壽百岁文王壽九十七岁至武王为天子而壽乃不及故但言先公也言外欲王思先公所以居此久者其必非以逸游为事可知矣又刘敞云召康公何以不欲成王似先王而独曰似先公乎曰周王之时周之先王惟有文武文武皆圣人不可似也是以欲成王似其可及者则莫若似先公也然则圣人不可及而大贤有可到非其不欲其似先王也智不能也黄樵云汉文之时贾谊为之痛哭流涕如祸患之迫乎其後谊之忧国诚深矣然其言太过而无优游不迫之意帝退而观天下之势不至于此则一不之信然後知康公之戒君其言亦有法也】尔土宇畷章亦孔之厚【有韵亦叶虞韵後五翻】矣岂弟君子俾尔弥尔性百神尔主【虞韵亦叶有韵当口翻】矣【赋也土土地也宇本屋边之名此当以边垂言左传在君之宇下是为边垂也畷说文云大也章通作彰明也畷章二字对言苏氏

谓大而且着是也。畝属土，谓混一无外。章属宇，谓疆界划然孔甚也。曰厚者有基，图巩固不可动摇之意。百神以土宇内之衆神言之。祭法云：有天下者，祭百神，主犹依也。周昌年云：主字内便有常字意。凡不常者，只如过客一般，不得为主。必常而後可以言主。吕云：天子者，百神之主也。苟以逸欲亏其性，则天位难保，将无以主百神矣。愚按：天子统临万方，诸侯咸视徼焉。故皋陶戒舜曰：无教逸欲，有邦兢兢业业，王诚念及主万方之百神也。将勤于政事，之不暇而何弥尔性之为乎？劝一讽百，召公之谓与？尔受命长【阳韵】矣。弗【尔雅注作祓】禄尔【尔雅注无此字】康【阳韵】矣。岂弟君子，俾尔弥尔性，纯嘏尔常【阳韵】矣。【赋也。受命谓受天命而为天子也。长以历年多言。黄佐云：成王即位共三十有七年，无逸谓自三宗后人君类皆短折，或十年或七八年或五六年或四三年，其称祖甲享年之永亦惟曰三十有三年。然则成王即位十年以後三十七年以前皆可谓之长无疑也。况其初即位为三叔武庚所扰，首尾凡六年矣。其时必不暇为卷阿之游也。今得游卷阿矣，而曰伴奭优游。曰土宇畝章曰弗禄尔康，此亦可以见其历年之久，非复小愆访落旁徨恐坠之时比矣。弗，草本蔽盛之貌。禄，即福也。弗禄言福禄之来亦如草木之盛蔽无欠阙也。康安矣，安于王身也。纯，通作全。嘏，说文云：大远也。郊特牲亦云：长也大也。皆指福言。纯主言其备嘏，主言其久。尔常二字相连，说言尔常常享此纯嘏之福也。先言似先公既又进之于主百神，至此更推极之于天命王而历历思及此也。虽欲弥尔性而自暇自逸亦有所不能矣。辅云：三章皆极言壽考福禄以广王心而歆动之。然後五章以下乃告以所以致此之繇，则其言入之易而感之深也。召公可谓能尽师保之道者矣。朱子云：康公戒王其始只说个好意思告人，法当如此。】有冯【陆本作凭】有翼【职韵】有孝有德【职韵】以引以翼【见上】。岂弟君子，四方为则【职韵。赋也。人君能用贤然後可以优游而享盛治，故自此章以下皆以用贤之事言之。冯，通作凭。说文云：依几也。翼，通作翊。说文云：辅也。有冯有翼指大臣言。苏辙云：在前则有冯，在侧则有翼。愚按：此与下文引翼相照。大臣曰在王侧能引君，故君以之为冯；能翼君，故君以之为翼。汉世三辅郡其左名冯翊，取义本此。孝者百行之本，德者及物之源。苏云：孝致于内，德施于外。谢枋得云：求贤不取非常之才而止，曰有孝有德何也？曰孝于亲者必忠于君，取其孝正求其忠也。唐虞以上取人以德，无才德之分。如皋陶九德皆才也，舜举八元八恺之才皆德也。有德则才在其中矣。引本关弓之名，借以为牵引之义。以引者为引导，其前使不迷于所往，即孟子引君当道之引。以翼者谓翼赞其左右，使不怠于所行，即虞书子欲左右有民，汝翼之翼皆主啓沃言，则法也。王能得贤臣之引翼，则其德日修而可以为四方之法，则也。昔召公诰王：惓惓以无遗壽考为言。此诗作时虽周公已丧，而芮伯彤伯毕公卫侯毛公之属尚在所云孝德意，即其人与吕云是诗虽戒求贤，然咏歌以道之，故其辞从容不迫。至此章始明言贤者之益焉。有冯有翼，自成王言之也。以引以翼，自贤者言之也。有孝有德之人在王左右，以引以翼，然後王德罔愆，可以为四方之法也。贤者之行非一端，必曰有孝有德何也？盖人主常与慈祥笃实之人处，其所以兴起善端涵养德性镇其躁而消其邪，日改月化有不在言语之间者矣。故宣王之在内者，唯云张仲孝友而萧望之亦谓张敞材轻非师傅之器，皆此意也。】顙顙卬卬【阳韵】如圭【荀子中论俱作珪】如璋【阳韵】令闻【陆本作问】令望

【叶阳韵。武方翻】岂【中论作恺】弟【中论作悌】君子四方为纲【阳韵。赋也。顙，说文云：头大也。易有孚顙若之。顙，主君言。卬，徐锴云：倾首望也。说文引诗：高山仰止，主臣言承上章言君臣相与于一堂之上，君端拱以仰临其象，则顙顙然臣精白以仰对其象，则卬卬然犹书

言穆穆在上明明在下也圭者君所执璋者臣所执详见械朴篇两璋之合则为一圭王有冯有翼与左右诸臣合为一体如圭之象左右诸臣以引以翼亦协心内向以趣乎王如璋之象也令善也纲者网之大绳君明臣良同心同德则令闻令望皆归于王远者传其声誉近者挹其丰采如此则岂弟君子信乎可以制命于上而为四方之纲也上章为则以德言此为纲以位言】凤皇【大全朱传苏传读诗记俱作凰後同】于飞翩翩【说苑作啾啾】其羽亦集【丰本作隳】爰止【纸韵】藹藹王多吉士【纸韵】维君子使【纸韵】媚于天子【纸韵】赋之兴也吕氏自此以下广言人材之盛也凤皇毛传云灵鸟仁瑞也雄曰凤雌曰皇尔雅云鷟凤其雌皇禽经皇作□云□以鸣鸣凤凤以仪仪□周书王会篇云西申以凤鸟方扬以皇鸟大戴礼云羽虫三百六十而凤为之长诗义疏云凤在天为朱雀陆佃云凤鸟之美者能君其类而知时雌则美而不大按京房易传谓凤皇高丈二而郭璞则云高六尺许岂亦雌雄之异与又按凤皇之象其说不一韩诗外传及说苑皆载黄帝召天老而问之曰凤象何如天老对曰夫凤象鸿前麟後蛇颈而鱼尾鸛颡而鸳腮龙文而龟身燕颌而鷄喙骈翼而中注首戴德顶揭义背负仁心信智翼挟义衷抱忠足履正尾系武延颈奋翼五彩备明光兴八风气降时雨食有质饮有仪往即文始来即嘉成惟凤为能通天祉应地灵律五音览九德去则有灾见则有福严照四方仁圣皆伏天下有道得凤象之一则凤过之得二者则凤下之得三者则春秋下之得四者则四时下之得五者则没身居之罗愿云鸿前者轩也麟後者丰也蛇颈者宛也鱼尾者岐也鸛颡者椎也鸳腮者张也龙文者致也龟身者隆也燕颌者方也鷄喙者鈎也又说者曰出东方君子之国翱翔四海之外过崑仑饮砥柱濯羽弱水暮宿风穴见则天下大安宁山海经云丹穴之山有鸟焉其状如鹤五采而文名曰凤首文曰德翼文曰顺背文曰义膺文曰仁腹文曰信是鸟也饮食自歌自舞论语摘衰圣云凤有六像九苞六像者一曰头像天二曰目像日三曰背像月四曰翼像风五曰足像地六曰尾像纬九苞者一曰口包命二曰心合度三曰耳听達四曰舌拙伸五曰彩色光六曰冠矩朱七曰距锐鈎八曰音激扬九曰腹文户孝经援神契云王者德至鸟兽则凤皇翔乐动声仪云镇星不逆行则凤皇至乐叶图云五音克谐各得其伦则凤皇至又禽经云青凤谓之鷟赤凤谓之鹑黄凤谓之鸾白凤谓之鸑紫凤谓之鸞乐叶图徵云五凤皆五色为瑞者一为孽者四其四皆似凤并为妖一曰鸑鸑圆目至则疫之感也二曰发明鸟喙大颈至则丧之感也三曰焦明长喙疏翼圆尾至则水之感也四曰幽昌兑目小头大身细足胫若鳞叶至则旱之感也人镜经云凡五方之鸟皆似凤而非也东方发明全身总青西方鸑鸑全身总白南方焦明全身总赤北方幽昌亦曰退居全身总黑中央鸟名玉雀亦曰凤皇全身总黄以上诸说纷纷诡异罗氏谓其至盖罕故孔子称之而世好事者喜为之传道务奇怪其章故千世而不合焉既夸为希世之瑞夸而无验极而必反则又推之以为孽皆不足取其论達矣竹书纪成王十八年凤凰见沈约注及古乐府皆言成王时凤皇翔舞于庭王援琴而歌作神凤操曰凤皇翔兮于紫庭予何德兮以感灵赖先人兮恩泽臻于胥乐兮民以宁今按操辞固疑假托然观书周公留君奭篇曰耆造德不降我则鸣鸟不闻耆指召公鸣鸟指凤也则前此召公未求去之时凤固尝至矣周公以鸣鸟之闻为耆德之应故此以凤皇至止兴大臣在朝即前章所言有孝有德而居辅弼之位者也翮说文云飞声也翩翩其羽言衆鸟也说文云凤飞羣鸟从之以万数陆佃云夫文凡鸟为凤凤总衆鸟者也古文作朋盖四灵惟凤能鳩其类故以为朋党之字同门曰朋其类不一所从者一而已亦指衆鸟也对凤皇故言亦集说文云羣鸟在木上也爰于也集于其所止之地其即後章所云高冈乎郑云衆鸟慕凤皇而来喻贤者所在羣士皆慕而往仕也因时凤鸟至

因以喻焉严粲云凤皇飞衆羽亦集犹大贤用而善类乐附之从其类也旧说多以翩翩爰集为凤鸟衆多曹居贞谓凤皇希见之鸟不应羣飞之衆若此此自是正理若唐孔氏引中侯握河纪云凤皇巢阿阁謹树言謹謹在树是凤必羣飞白虎通亦云黄帝之时凤皇蔽日而至是来必衆多要皆茫昧不足信藹说文云臣尽力之美也与尔雅解合字从言葛声非从艸谒声也或以为艸木之盛多误矣王郑云王朝也吉说文云善也从士从口徐锴云口无择言也会意愚按易云吉人之辞寡正与制字意合大约有德者必简于言臯陶论人有九德寛而栗柔而立愿而恭乱而敬扰而毅直而温简而廉刚而塞强而义彰厥有常吉哉周公言立政惟用吉士而复申之曰继自今後王立政其惟克用常人可知吉士即常人也身无择行则口无择言此吉士义疏也士者任事之称君子即前数章所称岂弟君子指王也使谓任用之媚说文云悦也吉士虽多惟在王之任用之则必能各修其职以博王之欢悦也朱子云既曰君子又曰天子犹曰王于出征以佐天子云尔黄佐云按书成王命君陈曰尔有嘉谋嘉猷则入告尔后于内尔乃顺之于外曰斯谋斯猷惟我后之德欲其媚于天子也成王中材之主而其言若此召公以老臣将顺其亦有讽谏之意乎守成之世喜承顺而恶忌讳唐虞言事君则曰汝无面从此岂成王之所能及哉】凤皇于飞翩翩其羽亦傳于天【叶寘韵汀因翻】藹藹王多吉人【真韵】维君子命【叶真韵眉辛翻】媚于庶人【见上 赋之兴也傳通作附取附丽之义天以兴王朝吉人即吉士也就其人言则但曰人自其効用于王朝言则变称士命即使也命之以所居之职所为之事也媚于庶人言有以得民之欢心也上章言媚于天子嫌其类于以邪媚为悦也故此章质言之若曰媚庶人乃所以媚天子耳黄佐云成王之时泰之时也尝读易而得其说矣泰之为卦虽吉且亨然圣人惧焉故谓无平不陂又虑陰皆失实者盖变二四则至于丰可忧变上下则又于否不利圣人深恤将来而预图保之其设戒深矣惟九二一爻乃人臣之正位上应六五之贤君为得其中周公立爻辞曰包荒用冯河不遐遗朋亡以四者为治泰之道盖世道久安则法度弛而习成诞慢欺蔽矣骤然改图近患先起不可不包以大量也人情久逸则纪纲纵而下趋委靡陵替矣恬然安之将又愈甚不可不革以猛力也衆志久宁则变故少而无复深谋矣远而虑之必周庶事不可以遐遗也时势久顺则人情肆而至于私昵恶德矣约而正之必絶党与不可以私朋比也召公欲用冯翼孝德之贤以成君德而为四方之纲是则慈祥者进而有所谓包荒者矣笃实者进而有所谓冯河者矣上而媚君下而媚民则遐遗无不周矣吉人彙征儉壬自远则朋比无所私矣召公立意盖与易合其得保泰之道哉】凤皇鸣【庚韵】矣于彼高冈【阳韵】梧桐生【庚韵】矣于彼朝阳【丰本作鼂】阳【韵王充论衡作梧桐生矣于彼高冈凤皇鸣矣于彼朝阳】萋萋萋萋【叶支韵此移翻】離離【论衡作嚙嚙丰本作邕邕】喈喈【叶支韵坚夷翻又丰本于此章之上增入一章六句凤皇于飞其鸣将将其翼若干其音若箫有凤有皇乐帝之心云石经有之赋之比也此与下章较上三章又深一意此章专言凤皇所集之处欲王优礼大臣有加而无已则有孝有德之大臣可以常留而不去也先是周公有明农之语而召公亦有求去之思意成王所以待大臣必有未尽其道者故惓惓及此高冈高山之脊也梧桐本二木名尔雅云檟梧又云荣桐木郭璞皆以为梧桐後人遂混而一之非也罗愿云梧者植物之多陰最可玩者青皮而白骨似青桐而多子盖桐有青赤白而青桐又有有实无实之辨今人以梧之青亦曰青桐云其生莢如箕之相对綴箕上多者至五六成材之後树可得实一石食之味如茭古今方书称丸药如梧桐子者盖仿此也庄子曰空闕来风桐乳致巢盖子生累累然似乳鸟悦于得食因巢其上亦犹枳棋之来巢以味致之也此木易生鸟銜坠者辄随生殖其畦种者是岁可

高一丈古称凤皇集于朝阳梧桐之上岂亦食其实耶梧亦良木孟子谓场师舍梧櫨而养棘棘则为贱场师明梧者场中所贵也此木虽不中乐器然堪车板盘合木牒等用桐名荣者桐以三月华盖自春首东风解冻蛰虫鱼獭鸿雁皆应阳而作惟桃桐之作华乃在衆木之先其荣可纪故名桐为荣也周书时训曰清明之日桐始华桐不华岁有大寒盖不华则阳气微阳气微则寒可知已又易纬曰桐枝濡毳而空中难成易伤须盛气而後华盖以经言始华有迟之义桐与梧既异而桐之中又有数种陆佃亦云梧一名櫨即梧桐也今人以其皮青号曰青桐华净妍雅极为可爱故多近斋阁种之梧橐鄂皆五焉其子如乳缀其橐鄂生多或五六少或二三故飞鸟喜巢其中桐木华而不实即白桐也白桐无子冬结似子者乃是明年之华房尔雅曰荣桐木即此是也贾又曰华而不实者曰白桐实而青皮者曰梧桐今炒其实噉之味似菱芡桐有三辈青白之外复有冈桐即油桐也陶氏曰桐有四种青桐叶皮青似梧而无子梧桐色白叶似青桐而有子白桐与冈桐无异唯有华子尔冈桐无子是作琴瑟者皆不足据青桐即今梧桐白桐又与冈桐全异白桐无子材中琴瑟冈桐子大有油与陶氏之说正反今按详观诸说则此诗所云梧桐乃尔雅所云櫨梧者絶与荣桐木无预櫨梧生实故鸟喜栖之庄子桐乳致巢之说可据若桐有三种其白桐与冈桐或当如陆氏之说惟青桐与櫨梧相似而櫨梧有子青桐无子此其所以为别櫨梧相似故亦号之为桐然不欲没其本名因又名之为梧桐也陶隐居之说青桐梧桐得之然不宜以梧桐混于诸桐之中若陆氏谓青桐即今梧桐则尤混矣遁甲书言梧桐不生则九州异主注云梧桐以知日月正闰生十二叶一边有六叶从下数一叶为一月至上十二叶有闰则十三叶视叶小者则知闰何月也尔雅云山东曰朝阳孙炎云朝先见日也毛传云梧桐不生山冈太平而後生朝阳陆云梧性便湿不生于冈邵博云梧桐百鸟不敢栖止逊凤皇也古语云尔验之果然旧说皆以凤皇比臣梧桐比君愚谓阳乃君象若梧桐为凤皇所栖在高冈朝阳之地亦犹辅弼大臣所居乃近君之位耳高冈者朝廷之比梧桐者大臣爵位之比按白虎通云黄帝之时凤皇止于东园食常竹实栖常梧桐终身不去萋萋说文皆云草盛也此则借以状枝叶茂密之貌雖本鸟名即鵲鵲也其同产者飞鸣不相离故状声之和者取之喈说文云鸟鸣声徐锴云声衆且和也凤虽希有之物然经合雌雄而言明非一凤比立朝之大臣亦非一人也按王充云礼说瑞命篇云凤鸣曰即皇鸣曰足足诗云離離喈喈此声异也使声审则形不同也使审同诗与礼异世传凤皇之鸣故将疑焉按黄帝使伶伦制十二箫听凤鸣其雄鸣为六雌鸣亦六比黄钟之宫而皆可以生之是为律本少皞氏以其鸣不十二律故设凤鸟氏之官以为历正旧谓凤鸣若箫故帝舜之世作箫以象之及箫韶九成而凤皇来仪大老云晨鸣曰发明昼鸣曰保长飞鸣曰上翔集鸣曰归昌小音金大音鼓而论语摘衰圣则云行鸣曰归嬉止鸣曰提扶夜鸣曰善哉晨鸣曰贺世飞鸣曰郎都知我惟黄持竹实来罗愿以为译者即其音而附之声也盖其说之不一如此苏云凤皇鸣于高冈将欲得而畜之则植梧桐于朝阳以待之使梧桐之盛至于萋萋萋萋也则凤皇鸣于其上離離喈喈矣郑云喻贤者待礼乃行翔而後集刘公瑾云梧之萋萋萋萋者人君待贤之盛礼也凤之離離喈喈者羣贤和集之德音也比意盖如此愚按中庸言官盛任使所以劝大臣孟子言与共天位与治天职与食天禄即此诗托喻萋萋萋萋之意】君子之车既庶且多【歌韵亦叶支韵章移翻】君子之马既闲且驰【支韵亦叶歌韵唐何翻】矢诗不多【见上】维以遂歌【韵亦叶支韵居支翻 赋也此章言王朝虽多吉士而犹恐野有遗贤欲王之旁求之也车马皆所以待徵聘锡予之用者庶衆也多说文云重也字从重夕夕者相绎也徐锴云绎之言寻也今日复寻前日之事是为多也故重日则为疊重夕则为多

且多云者犹言不止于衆而已且重一倍也闲当通作嫺尔雅云习也驰说文云大驱也既闲且驰者言不徒闲习法度能鸣和銮清节奏而已且可以疾驱直骋无不如意真良马也辅广云王今既有车马衆多而且闲习将安所用乎亦惟招延礼待贤者于无穷可也不明言其事盖欲王自得之也矢诗即首章所云矢音彭执中云诗所以言其志而音则声之成文者其实一也曰不多者见中心所欲言非矢音所能尽不然此诗以章计者十以句计者五十四不为不多矣遂礼记疏云谓申也朱子云犹书所谓赧载歌也王来游而作歌计此时事亦甚快臣之夫诗维以申遂王之所歌欲王长享此乐耳此诗虽以戒成王还为赧歌而发故语多讽而无规切之词】

卷阿十章六章章五句四章章六句【序云召康公戒成王也言求贤用吉士也毛郑泥其说谓吉士必贤者而後能用因解岂弟君子为贤者然篇中如四方为则四方为纲明是赞天子之语岂人臣所敢当且通篇惟赞美贤臣亦非赧歌王前之体严氏则以为召公欲王留周公而作谓周公有明农之请将释天下之重负以听王之所自为康公虑周公归政之後成王涉历尚浅任用非人故作卷阿之诗反覆歌咏欲以动悟成王若曰是岂弟君子也可以辅君德可以仪百辟可以总衆职可以司进退人物之权今欲归政矣王所倚仗者谁欤以诗语印之颇属近似然于末节言车之庶多马之闲驰终属难解及考竹书成王十八年凤凰见二十一年周文公薨于丰至三十三年方有卷阿之游则此诗之作乃在周公薨後当成王初政固未尝游卷阿而亦未尝有凤鸣之事严之臆说不足信也子贡传阙文】

凯风卫七子自责也能尽孝道以慰母心焉【季本云卫有七子不能安其母之心故作此诗以自责无怨言也孟子曰凯风亲之过小者也亲之过小而怨是不可矶也所谓过小必奉养有阙而其母愤怒诸子欲自劳苦耳非谓卫之淫风盛行而其母欲嫁也如此尚得为小过哉愚按武王之诰康叔曰子弗祗服厥父事大伤厥考心于父不能字厥子乃疾厥子汝乃其速繇文王作罚刑兹无赦所云作罚者谓罚其子繇子不孝故致父不慈也又曰矧今民罔迪不适不迪则罔政在厥邦盖欲康叔以教化先之也此诗?人所作以不能得母欢心而负罪引慝若此其所感于康叔之化者深矣昔者季札观乐于鲁为之歌?鄘卫曰吾闻卫康叔武公之德如是是其卫风乎今观三国之诗絶无有言及康叔之事者愚特举是诗以当之又按康叔封卫在武王时书康诰篇言孟侯朕其弟小子封是也其兼有?鄘二国在成王时逸周书作雒篇言俾康叔宇于殷史记言周公旦以成王命兴师伐殷以武庚殷余民封康叔居河淇间故商墟是也是诗乃?风故宜系之成王之世】

凯风自南【叶侵韵女今翻】吹彼棘心【侵韵】棘心夭夭【叶萧韵於乔翻】母氏劬劳【叶萧韵怜萧翻 兴也凯本作愷说文云康也尔雅云南风谓之凯风东风谓之谷风北风谓之凉风西风谓之泰风陆佃云凯风言其情谷风言其自凉风言其德泰风言其交李巡云南风长养万物万物喜乐故曰凯风自南者从南方而来也棘说文云小棘丛生从并束徐锴云小棘故从并束低小也诗诂云棘如枣而多刺木坚色赤丛生人多取以为藩岁久无刺亦能高大如枣木色白者为白棘实酸者为棫棘亦名酸枣按传云豫章以木称郡酸枣以棘名邦是酸枣即棘也沈括云枣独生高而少横枝棘列生卑而成林以此为别其文皆从束束音刺木芒刺也束而相戴立生者枣相并横生者棘也不识二物观文可辨陆佃云棘性坚强费风

之长养者其心之生更难于干四时纂要云四月枣叶生凯风之时也孔穎達云母性寬仁似凯风已难长养似棘罗愿云八风南曰景风凯风既曰自南乃当景风白虎通曰景风至棘造实盖吹彼棘心者将以趣其造实郝敬云棘小枣丛生以比七子也夭通作杻说文云木少盛貌徐锴云谓草木始生未几而先长大也劬勤劳剧也其劳频数谓之劬劳严粲云凯风自彼南方长养之方而来吹彼穉弱之棘心至于夭夭然少长则风之为力多矣兴母以慈爱之情养我七子之身至于少长则母亦病若矣母之养子于少时最劳苦故于夭夭言劬劳朱子云本其始而言以起自责之端也】

凯风自南吹彼棘薪【真韵丰氏本作新】母氏圣善我无令人【真韵兴也月令注云大者可析之谓薪孔穎達云上章言棘心夭夭是棘之初生风长之也此不言长之状而言棘薪则棘长已成薪矣鍾惺云棘心棘薪易一字而意各入妙严粲云棘心喻子之幼少棘薪喻子之成立朱子云棘可以为薪则成矣然非美材故以兴子之壮大而无善也圣者明達之称善者贤淑之称郑玄以为有睿智之善德孔云此母氏圣善人之齐圣皆以明智言之非必要如周孔也令善也朱子云以圣善称其母而自谓无令人其自责也深矣愚按韩退之作文王拘幽操云臣罪当诛兮天王圣明与此同意】

爰有寒泉在浚之下【叶震韵後五翻】有子七人母氏劳苦【震韵兴也通典云寒泉在濮州濮阳县东南浚城水经注云濮水枝津东迳浚城南而北去濮阳三十五里城侧有寒泉罔即诗爰有寒泉在浚之下世谓之高下渠非也言子赖母以有生犹浚民赖寒泉以为养旧以寒泉兴七子浚民兴母难通我七子向当幼小之时固赖母氏劬劳以有今日即今成立之後而母氏之劳苦尚无时不然所谓欲报之德昊天罔极爱慕之情何能已已乎】睍睍【太平御览作简简】黄鸟载好其音【侵韵】有子七人莫慰母

心【侵韵兴也睍说文云出目也一云好视也睍本作睍说文云大目也赵颐光云从完何犹言目全体也睍以视言睍以目言乃注视凝眸之貌俗讹以为黄鸟之声非也黄鸟解见葛覃篇载之言则盖音近也好其音者兴其辞令顺也慰说文云安也孔穎達云论语曰色难又内则云父母之所下气怡声是孝子当和顏色顺辞令也今有子七人皆莫能慰母之心繇顏色不悦辞令不顺故也自责言黄鸟之不如也愚按七子怨艾之深全在一莫字见其中亦宜有一人能养且悦者而今无有也不独引为己非亦寬为母地矣】凯风四章章四句【序云美孝子也卫之淫风流行虽有七子之母犹不能安其室故美七子能尽其孝道以慰其母心而成其志尔朱子则谓此乃七子自责之辞非美七子之作然此亦序錄诗者之意耳固未为甚谬乃集传亦取其淫风流行不能安室之说则恐未必然夫有子七人既皆成立母年亦当迈矣而尚欲嫁耶子贡传亦云寡母欲去而子自讼焉赋凯风申培说则云?人母不安其室七子自咎而作总之剿袭序义固不如季氏之说较为近于人情乃自孟子解此诗而引孔子舜其至孝矣五十而慕之言以明之汉儒熊氏遂以舜弹琴歌南风为即此诗则纰缪甚矣】

诗经世本古义卷十之下

卷十一

<经部,诗类,诗经世本古义>

钦定四库全书

诗经世本古义卷十一

明 何楷 撰

周康王之世诗五篇

采菽康王即位召公毕公爲东西二伯率诸侯来朝王锡命之【书康王之诰篇云王出在应门之内太保率西方诸侯入应门左毕公率东方诸侯入应门右此诗第四章有平平左右亦是率从之语故知爲朝康王诗也乐记云武王克商分周公左召公右班固云自陕以东周公主之自陕以西召公主之王肃云毕公代周公爲东伯孔颖達云二公率领诸侯知其爲二伯各率其所掌诸侯曲礼所谓职方者此之义也又按仪礼觐礼篇云天子衮冕负斧依侯氏入门右坐奠圭再拜稽首摈者谒侯氏坐取圭升致命王受之玉侯氏降阶东北面再拜稽首摈者延之曰升升成拜乃出四享皆束帛加璧庭实惟国所有及事毕天子赐侯氏以车服迎于外门外再拜重赐无数今据康王之诰篇所载诸侯布乘黄朱宾称奉圭兼币曰一二臣卫敢执壤奠皆再拜稽首则所谓圭币庭实之献固有之矣而天子之赐泯焉无闻深属可疑此诗言何锡予之路车乘马玄衮及黼则正赐以车服之礼谓诗足补书之阙可也又觐礼事毕赐车服之时诸公奉篚服加命书于其上升自西阶东面大史是右侯氏升西面立大史述命侯氏降西阶之间北面再拜稽首升成拜大史加书于服上侯氏受是诗言天子命之则正其事也其第四章殿天子之邦云云是命中语而康王之诰篇记王报诰庶邦侯甸男卫之辞有曰乃命建侯树屏在我後之人虽尔身在外乃心罔不在王室则亦于殿邦之旨深有合焉愚所以定爲康王之诗者以此孔丛子载孔子曰於采菽见古之明王所以敬诸侯也】

采菽【左传国语陆德明本子贡传申培说俱作叔丰氏本作𦵏】采菽筐【丰本作𦵏】之筥【语韵】之君子来朝【音潮後同】何锡予【语韵白虎通作与後同】之虽无予之路车乘马【叶夔韵满补翻】又何【白虎通何下有以字】予之玄衮及黼【夔韵兴也采说文云捋取也菽大豆也又罗愿云菽者衆豆之总名其类最多故九谷之中居其二於用甚多羞筴之实?餌粉餐皆搗粉熬大豆以爲表也又以爲鼓又以爲粥筐筥解见采苹篇陈祥道云聘礼君使卿归饗饔宾与上介皆米百筥筥半斛夫人使大夫归饗饔宾上介米八筐士介六筐筥五斛夫百筥以多爲荣而所实少八筐六筐以少爲贵而所实多则筐大而筥小矣於文筐正而筥围之则筐方而筥员矣诗意以菽兴车马衣服采菽而贮以筐筥将以待不时之需诸侯来朝有锡予之礼而可不亟储其具乎君子谓五等之诸侯也後同凡诸侯见于天子曰朝此则因康王初即位而来朝也锡通作赐说文云予也予说文云推予也字象上下相予之形愚按予字乃以上与下之义观字形下引可见何锡予之心口相问之辞言将赐何物以予

之乎旋即自计曰虽无他可以予之然如下文车马之赐不可阙也路即周礼五路之路杜预谓行於道路故以路名郑玄云王在焉曰路贾公彦云谓若路门路寝路车路马皆称路故广言之邓元锡云周礼车直名路於路切也五路惟玉路不以赐其余金路以封同姓象路以封异姓革路以封四卫木路以封蕃国四马爲乘乘马所以驾路车者按韩奕之诗曰其赠维何乘马路车即诸侯来朝而锡予之事也又何予之言车马之外于礼又当有所予也玄衮郑云玄衣而画以卷龙也凡冕服皆玄衣纁裳按古者天子服十二章虞书舜曰予欲观古人之象日月星辰山龙华虫作会宗彝藻火粉米黼黻絺绣是也绘绣各六衣用绘裳用绣共爲十二象天数也公则自山而下以次递减故臯陶谟曰五服五章哉郑注以爲十二也九也七也五也三也是其递减之数理或然也至周以日月星辰画於旌旗爲大常服止九章而稍变其序登龙於山登火於宗彝尊其神明也九章初一日龙次日山三华虫四火五宗彝六藻七粉米八黼九黻龙取其变山取其镇华虫取其文火取其明宗彝取其孝藻取其洁粉米取其养黼取其断黻取其别公之服与王同衣五章自龙至宗彝裳四章自藻至黼侯伯则衣三章自华虫至宗彝裳四章与公同凡七子男亦衣三章起宗彝而升藻粉米于衣其裳止黼黻二章耳凡五以上衣皆用绘裳皆用绣降是孤衣止一章刺粉米无画裳二章同子男凡三又降是卿大夫衣无文裳刺黻而已盖郑康成说如此郑所以云然者以周礼推之周礼司服职云王祀昊天上帝则服大裘而冕祀五帝亦如之享先王则衮冕享先公飨射则鷩冕祀四望山川则毳冕祭社稷五祀则希冕祭羣小祀则玄冕凡兵事韦弁服眡朝则皮弁服凡甸冠弁服凡凶事服弁服凡吊事弁絰服公之服自衮冕而下如王之服侯伯之服自鷩冕而下如公之服子男之服自毳冕而下如侯伯之服孤之服自希冕而下如子男之服卿大夫之服自玄冕而下如孤之服士之服自皮弁而下如大夫之服配冕之服五通大裘而六配弁之服则止于五大裘之制未详司裘职云掌爲大裘以共王祀天之服郑司农以爲黑羔裘也服以祀天示质也然郊特牲云祭之日王被裘以象天若与周礼不同者家语云郊之日天子大裘以黼之被裘象天既至泰坛王脱裘矣服裘以临燔柴据此家语之说最爲明白曰大裘以黼之者言先服大裘而後服黼衣黼衣即裘衣也若玉藻所谓被裘象天则谓以大裘被于裘之上正指大裘也及燔柴之时始去大裘而露其裘若宗庙之祭则惟用裘而已羔裘色玄与天同色故曰象天必取裘者裘外服裘犹裳有韍示不忘古不然则如祭羣小祀之玄衣足矣固知古人制礼自有深意公自衮以下皆如王服惟不敢服大裘以此爲异故玉藻云唯君有黼裘以誓省大裘非古也白黑谓黼谓狐白与黑羔合爲黼文惟诸侯得服之以誓衆田猎其後皆僭用天子之大裘矣故议之云非古也衮郑玄云卷龙衣也孔云衮之言卷也谓龙首卷然玉藻曰龙卷以祭知爲龙首卷也说文云天子享先王卷龙绣於下幅一龙蟠阿上向按龙本衣之章而说文谓绣於下幅似未爲允此四字当是指裳言一龙蟠阿上向乃是正解衮义阿曲也谓龙蟠曲之状其首上向即卷意也又王制云三公一命卷若有加则赐也不过九命考周礼云三公八命其出封加一等然则所谓一命卷者谓进八命而九命始服卷龙耳但王服卷公亦服卷王九章公亦九章将何所别终不能无疑按白虎通引传曰天子升龙诸侯降龙贾公彦以爲据衣服而言郑玄注覲礼谓上公衮无升龙盖本於此此其说可信天子之龙蟠阿上向故名爲卷此即升龙也衮字从衣从公可知衮但爲上公之服必与天子有异卷衮同是画龙而升降有别以声音相邻传讹遂混其实天子之服当名卷上公之服则名衮也请以侯伯知者自衮以下皆名裨衣礼记曾子问云诸侯裨冕覲礼侯氏裨冕郑玄谓裨之言埤也天子大裘爲上其余爲裨也所以知侯伯之章始於华虫者以侯伯服鷩冕鷩者赤雉也雉又名华虫以其

有文采故称华以其颈毛及尾似蛇兼有细毛似兽故以虫名考工记谓之鸟兽蛇言鸟之似兽似蛇者即雉也侯伯服以鷩冕故知始华虫也所以知子男之章始于宗彝者以子男服毳冕兽之细毛名毳郑玄以毳画虎雌谓宗彝也宗彝者宗庙彝尊之饰彝与爵相似周礼六彝有鸡彝鸟彝斚彝黄彝虎彝雉彝其序以远代者在後如六尊之次曰牺象着壶大山大者虞氏之尊也山者夏后之尊也明堂位云夏后氏鸡彝殷以斚周以黄鸟彝序在鸡斚之间知必皆三代之彝而宗彝之会于衣自舜已有之其非三代之彝可知故郑断其爲虎雌雉形如母猴与虎皆浅毛细毳又与周礼毳冕之义合也子男服以毳冕故知始宗彝也所以知孤绣粉米者以孤服希冕希与絺同本作黼说文云箴缕所紩衣也紩者缝也即刺绣也章在裳者刺绣其在衣者绘画而已今升粉米于衣粉米不可画之物虽在衣亦刺之不变故得希名粉米而下唯有黼黻二章乃在裳者故知孤章始粉米也孔又谓以此推毳冕之粉米当亦刺之也卿大夫知衣无文者以卿大夫服玄冕祭服衣本是玄今但言玄知其无文又自九章而下降杀以两至此当得一章则所余者惟黻而已故知但裳刺黻也易云黄帝尧舜垂衣裳而天下治盖取诸乾坤衣法天故章数奇裳法地故章数偶七章以下其数渐少则裳上之章亦渐胜于衣也所以知凡冕服皆玄衣纁裳者亦以衣法天天色玄裳法地地色黄但土无正位托於南方火色赤与黄相兼即纁色也凡此皆郑孔诸儒以意推之而着其说如此虽未足尽信然亦仿佛近之今据此诗玄衮明上公之衣亦玄色周礼言玄冕谓衣之无文者其本色是玄然则凡冕服之皆玄衣其说确矣郑又知登龙于山者若如舜时山在龙上则衮冕不爲最尊故知登龙于山也知登火于宗彝者若不登火则五章之服自藻而下不得称爲毳冕故知当登火以间于华虫之下宗彝之上也然宗彝之下有藻火两章知不登藻而登火者以火有光明之盛春秋传云火龙黼黻礼记殷火周龙章是火贵于藻故知登火不登藻也备録于此或疑自古衣裳十二章周道尚文不应遂简其三按左传子大叔曰爲九文六采五章以奉五色所谓九文即九章也九文之说自左传已着之其非汉儒臆揣明甚又臧哀伯曰三辰旗旗昭其明也是又汉儒所云日月星辰画于旌旗之证也或又举郊特牲云祭之日王被衮以象天戴冕璫十有二旒则天数也谓衮备十二章所以象天以此破九章之说岂知被衮戴冕原分二事大裘色玄被于衮上象天之色冕璫十有二旒法天之数何相涉之有又按五服虽异而冕则一周礼弁师职云掌王之五冕皆玄冕朱里延纽五采璫十有二就皆五采玉十有二玉笋朱紘诸侯之纁旒九就璫玉三采其余如王之事又云诸侯及孤卿大夫之冕各以其等爲之注谓诸侯之纁旒九就侯当爲公之误也旒即旒也天子前後十二旒诸公九命故九旒侯伯七命七旒子男五命五旒王之三公八命其卿六命其大夫四命公之孤四命其大夫再命子男之卿再命其大夫一命凡旒数各视其命数爲差郑又谓一命之大夫冕而无旒未知然否自天子之下皆以一冕冠数服服之章极于九从九而遞杀冕之旒极于十二从十二而遞杀各不相同士则无冕黼有二义考工记说文皆谓白与黑相次谓之黼旧说又谓黼作斧形周礼注疏云斧之谓黼盖半白半黑似斧刃白而身黑又云近刃白近上黑取断割焉公衣五章裳四章而衣以衮爲首子男衣三章裳二章而裳以黼爲首此言玄衮及黼者举公及子男以该侯伯也又诗若概举九章当始于衮终于黻古尔雅训衮爲黻黻者衮之尽也此不言黻者以卿大夫止有裳一章刺黻无黼故但言黼以别于卿大夫明此所锡予者止於来朝之诸侯不爲卿大夫设也凡此皆先王待诸侯之常制是时诸侯尚未来朝而王者已预爲之储具如此国语秦穆公燕公子重耳赋采菽子余使公子降拜秦伯降辞子余曰公以天子之命服命重耳重耳敢有安志敢不降拜左昭十七年小邾穆公来朝公与之宴季平子赋采菽穆公赋

菁菁者莪昭子曰不有以国其能久乎秦穆公季平子皆僭歌天子之诗以自夸大其失礼均矣】 薺【说文作毕丰本作澤】 沸檻【说文作濫】 泉言采其芹【文韵亦叶微韵渠希翻罗愿云芹今蕝多有之蕝之爲蕝以有芹也蕝即芹亦有祈音】 君子来朝言观其旗【微韵亦叶文韵巨斤翻】 其旗淠淠【霁韵】 鸾【丰本作銮】 声嘒嘒【霁韵】 载骖载駟【寘韵】 君子所届【叶寘韵居吏翻亦叶霁韵居例翻晏子春秋作诫 兴也薺字本作薺羌人所吹以惊马也此状水喷出之貌与薺发同意沸说文云水腾涌也檻泉尔雅云正出正出者涌出也李巡云水泉从下上出曰涌泉愚按檻当依说文作濫云汜也芹尔雅说文皆云楚葵也陆佃云水菜也一名水英洁白而有节其气芬芳罗云二月三月作英时可作菹及熟爇食之叶似芎藭花白色而无实根赤白色周礼醯人加豆之实用水草则有芹菹深蒲本草注云芹有两种荻芹取根白色赤芹取茎叶并堪作菹及生菜诗意以檻泉自下上出兴君子自下国而朝于王朝檻泉之旁有芹可采兴君子之来朝亦有仪从可观也旗建在车上解见庭燎篇淠淠毛云动也字从水如水之动也鸾解见蓼萧采芑篇嘒说文云小声也王安石云言其声之细则无敢驰驱故也车行在道旗不一其动鸾不一其声故连言之载则也骖有三义礼记注外駟曰骖谓服外两马诗駟骖是骖是也说文谓驾三马王肃云夏驾两谓之丽殷益一駟谓之骖周又益一駟谓之駟是也此以骖駟并言四马爲駟则两服两駟兼举之不应重言两駟当是骖乘之骖顔师古云乘车之法尊者居左御者居中又一人处右以备倾侧是以戎车则曰居右余曰骖乘骖者三也盖取三人爲义届说文云极也徐锴云极即至也见旗闻鸾渐来渐近至此而见其车上之人又见其驾车之马则君子於是至矣又晏子春秋云翟王子姜臣于景公以重驾公观之而不说也嬖人嬖子说之因爲之请曰厚禄之公许诺晏子曰诗曰载骖载駟君子所届夫驾八固非制也今又重此其爲非制也不滋甚乎田猎则不便道行致远则不可然而用马数倍此非御下之道也淫于耳目不当民务此圣王之所禁也】 赤芾【白虎通作紕丰本作市】 在股【夬韵】 邪幅在下【叶夬韵後五翻】 彼【荀子作匪】 交匪【韩诗外传作庶】 紓【叶语韵神与翻】 天子所予【语韵】 乐【音雒後同】 只君子天子命【叶真韵眉辛翻】 之乐只君子福禄申【真韵】 之【赋也赤芾解见侯人车攻采芑素冠诸篇芾本作市通作韍毛传云诸侯赤芾郑玄云冕服谓之芾其他服谓之鞞孔云士之有爵弁犹大夫以上有冕也士有鞞鞞犹大夫以上有芾也士冠礼陈服於房中爵升鞞鞞皮弁素鞞玄端爵鞞褱记谓士弁而祭于公即爵弁也士服爵弁以鞞鞞配之则服冕者以芾配之故知冕服谓之芾士服皮弁玄端皆服鞞是他服谓之鞞以冕爲主非冕谓之他也鞞鞞俱是蔽膝之象其制则同但尊祭服异其名耳愚按芾韍通称说文解韍爲鞞解鞞爲韍随便言之必以祭服名芾则采芑乃大閱之礼车攻乃大田之礼何以云朱芾赤芾乎股说文云鞞也郑云胫本曰股邪通作袞不正之谓幅即左传带裳幅舄之幅毛云偃也所以自偃束也郑云如今行膝也偃束其胫自足至膝故曰在下孔云邪纏于足谓之邪幅刘熙云言以裹脚可以跳腾轻便也按内则子事父母有偃即此或云今之布袜是邪幅之遗制此两句纪诸侯入朝之礼芾爲膝卫谨拜跪也幅以束胫利趋跲也彼彼诸侯也交谓上交于天子匪通作非紓毛传说文皆云缓也新君嗣位相率趋朝不敢紓缓也予首章锡予之予即车服是也向所储以待其来者而今始可以予之矣朱善云彼交匪敖则万福之所求彼交匪紓则天子之所予邹忠胤云孔子谓於采菽见明王所以敬诸侯夫非独君敬其臣亦繇臣自爲敬则彼交匪紓尽之矣乐喜好也只助语词命之谓天子有言以褒勉之下章殿天子之邦等语是也申者申束坚固之意律历志云坚于申说文云七月阴气成自申束此申之义也福禄申之有加无已

即下章言万福攸同也郑云天子赐之神则以福禄申重之所谓人谋鬼谋也孔云祭统曰古者明君爵有德而禄有功必赐爵禄于太庙示不敢专也则赐或在庙故神得福之】维柞之枝其叶蓬蓬【东韵】乐只【左传作旨】君子殿天子之邦【叶东韵悲工翻】乐只【左传作旨】君子万福【左传万福作福禄】攸同【东韵】平平【韩诗作便便左传作便蕃】左右亦是率【左传作帅】从【叶东韵麤丛翻兴也柞解见车輦篇蓬乃草之不理者叶散生遇风辄拔而旋今以柞叶之涣然似之故曰蓬蓬诗意以柞兴朝廷枝兴召毕二公叶兴东西二方之诸侯刘彝云柞之所以有枝以卫其株枝之所以有叶以庇其干者皆繇根本坚固气脉盛大俾之然根本天子也枝叶者诸侯也气脉者朝廷之宠命也故叶之蓬蓬者根本气脉之所及反以卫其根株而爲之坚固也又郑云以柞爲兴者柞之叶新将生故乃落于地喻继世相承以德亦通乐只君子殿天子之邦此天子褒勉之辞上章所谓命之者也殿毛云鎮也孔云军行在後曰殿取其鎮重之义愚按说文殿乃击声然古者以屋之高严通呼爲殿及军後名殿皆不详其说意此殿当通作奠奠之爲言置也定也与奠高山大川之奠同意即四方无虞一人以宁是也万福极言其福之盛攸同者同于天子所谓君臣并受其福也平平率从预期後日之辞平平依韩诗通作便便史记平章平秩平在之平皆作便盖以音取之便说文云安也便便韩诗云闲雅之貌赞辞也左右指应门左右而言时东西方诸侯俱分列左右故云然率通作□统领之义从说文云随也言继此以往凡此娴习礼仪之诸侯自应门左右而入者亦如今日之统率而相从以修职贡於天子永永勿替可也左襄十一年晋侯以乐赐魏绛曰子教寡人和诸戎狄以正诸华八年之中九合诸侯如乐之和无所不谐请与子乐之辞曰夫和戎狄国之福也臣何力之有焉抑臣愿君安其乐而思其终也诗曰乐旨君子殿天子之邦乐旨君子福禄攸同便蕃左右亦是帅从夫乐以安德义以处之礼以行之信以守之仁以厉之而後可以殿邦国同福禄来远人所谓乐也】泛泛杨舟緇纆【尔雅作縶】维【支韵】之乐只君子天子葵【支韵】之乐只君子福禄臄【支韵韩诗作肱】之优哉游哉【韩诗外传作游哉优哉】亦是戾【叶支韵郎之翻】矣【兴也泛泛杨舟解见菁莪篇緇说文云乱丝也尔雅毛传皆云縶也孙炎云大索也盖以乱丝爲大索也纆当依尔雅通作縶说文云以丝介履也尔雅注云介犹阂也孙炎云舟止系之於树木也凡四角系之爲维尔雅天子方舟诸侯维舟注谓方舟比舩爲桥也维舟连四舩也杨木之舟浮于水上泛泛然将逐流而去舟人以大索罍之於树且并其四舩而同聯絡之使不得他适兴诸侯朝事已毕行当辞归而欲致其挽留之意也葵菜名详见七月篇其性向日曹植云若葵藿之倾叶太阳虽不爲回光然向之者诚也淮南子云圣人之於道犹葵之与日也虽不能以终始其乡之诚也罗云夫天有十日葵与之终始故葵从癸陆佃云左传云鲍庄子之智不及葵葵犹能卫其足今葵心随日光所转辄低覆其根故葵揆也能揆日向焉本草曰葵爲百菜之主岂亦以此乎天子葵之言天子鉴其忠于王朝亦如葵之向日故即以葵拟之也臄说文云牛百叶也周礼醢人脾析即此析者言其状分析也此言福禄之多不可数纪亦如牛肚之有百叶然也葵臄皆实字活用见诗人用字之奇三章言福禄申之乃属望其後而期之之辞此章言福禄臄之则俯鉴其忠而必之之辞语意自别优通作优说文云行之和也水行曰游优哉游哉从容和缓之貌欲其不急于行也一说万时华云优游忠爱自然之意君尊而臣卑者固有局迫疑畏之形君弱而臣强者亦有飞扬跋扈之色如何说得优游亦通戾鸢飞戾天之戾通作丽言附着于此而不去也盖锡予之不足而眷留之无已如此】

采菽五章章八句【韦昭但谓玉锡诸侯命服之乐而不能知其世序则以爲刺幽王也侮慢诸侯诸侯来朝不能锡命以礼数徵会之而无信义君子见微而思古焉旧说皆谓此幽王举火戏诸侯以悦褒姒之事今按通篇皆交泰懽悦之辞絕无几微讽刺之意其爲盛世诗无疑况又有孔丛子一言可证据乎序之所云大抵爲毛传篇次惑耳若申培说以爲诸侯免丧入朝天子锡賚之诗邹忠胤驳之谓此不过从韩奕篇窃仿其意然彼云韩侯受命此云君子来朝语意固自不类且来朝者岂必终王世告至耶其论核矣子贡传谓天子燕诸侯之作玩本文何曾涉燕字一语朱子谓天子所以答鱼藻则彼言岂乐此言来朝絕不相蒙皆不足信】

昊天有成命祀成王之诗【出朱传】道成王之德也成王能明文昭能定武烈者也【出国语朱子云此康王以後之诗邹忠胤云竹书纪康王三年吉禘於先王更定乐章此类是已此诗爲颂成虽微国语亦自晓然而证之国语尤信黄佐云此爲祀成王之颂大雅下武篇爲此颂受厘之雅其爲一时之乐无疑也按穆天子传祭公饮天子酒乃歌□天之诗旧注谓□天即昊天也篇中有成王不敢康之语疑祭公以此规諫也】

昊【穆天子传作□】天有成命二后受之成王不敢康夙夜基【礼记陆德明本俱作其】命宥密【贾谊新书作谧】於【音乌国语无此字】缉熙单【国语作亶】厥心肆其靖之【通章俱无韵赋也昊本作界孔安国云元气昊然广大也成命季本云谓不易之定命也二后毛公贾谊皆云文武也受说文云相付也徐锴云取上下相受也成王名诵康尔雅云安也夙夜谓朝夕也基者朱子云积累乎下以承藉乎上者也命即有成命之命陆化熙云德立于此命承于彼如有凭藉者然故曰基命宥说文云寬也密当依新书作谧说文云静语也一曰无声也万时华云继世之君多以成命可徼于是心安逸豫无以爲承藉天命之基如筑室者基址不固虽栋宇巍然已有土崩之势矣成王以不敢康爲心故其所以基命于夙夜者如是宥如是密郑玄云寬仁所以止苛刻也安静所以止暴乱也礼仲尼燕居篇孔子曰夙夜其命宥密无声之乐也今按密通爲谧乃无声之义人君以寬大之德爲本而安静以行之则其施之民者既无所苛又无所扰自然欢欣和悦各得其所乐孰加焉是之谓无声之乐也又贾谊云夫昊天有成命颂之盛德也其诗曰昊天有成命二后受之成王不敢康夙夜基命宥谧谧者宁也亿也命者制令也基者经也势也夙早也康安也后王也二后文王武王成王者武王之子文王之孙也文王有大德而功未就武王有大功而治未成及成王承嗣仁以临民故称昊天焉不敢怠安蚤兴夜寐以继文王之业布文陈纪经制度设牺牲使四海之内懿然葆德各遵其道故曰有成承顺武王之功奉扬武王之德九州之民四荒之国謠謠文武之烈絜九译而请朝致贡职以供祀故曰二后受之方是时也天地调和神民顺亿鬼不厉崇民不谤怨故曰宥谧此其解颇异要从前说爲顺於叹美辞缉朱子云继续也熙者光明之义主二后之业言书顾命篇所谓昔君文王武王宣重光是也曰缉熙者笃前人成烈之谓单通作殫说文云极尽也礼语岁既单矣惟爲社事单出里庄子单千金之家义并与殫同单厥心者凡可以继续二后光明之业者无所不尽其心也前言宥密体也此言单厥心用也周昌年云单字作完满看与尽性之尽一般肆说文云极陈也犹云畅言之也靖说文云立埴也埴者亭安之义肆其靖之主天命而言谓天之眷周安固而不移也与首句及基命句相应徐光啓云武王未受命故武王之後不可无成王历观三代以至今日继世而後必有变更天心人事其势自尔寻其所以殆未易言独周家不然以此知成王之功大矣一说闵光德云肆其靖之还指祭时

说言时王之能靖正见成王保命之悠久也亦通又周语晋羊舌肸聘于周单靖公享之俭而敬语说昊天有成命单之老送叔向叔向告之曰昔史佚有言曰动莫若敬居莫若俭德莫若让事莫若咨单子之况我礼也皆有焉且其语说昊天有成命其诗曰昊天有成命二后受之成王不敢康夙夜基命宥密缉熙亶厥心肆其靖之是道成王之德也成王能明文昭能定武烈者也夫道成命者而称昊天翼其上也二后受之让于德也成王不敢康敬百姓也夙夜恭也基始也命信也宥宽也密宁也缉明也熙广也亶厚也肆固也靖肅也其始也翼上德让而敬百姓其中也恭俭信宽帅归于宁其终也广厚其心以固肅之始於德让中於信宽终於固肅故曰成此与贾说虽於诗意未必尽合然亦可以证是诗爲祀成王之诗矣】

昊天有成命一章七句【序及蔡邕独断皆云郊祀天地之所歌也汉儒惑其说至苏子瞻辈犹引之以爲古者合祀天地之证夫郊社之分合代有不同纷如聚讼乃此诗止举天命而已何尝有一语言及于地而郝敬强爲之说曰古者冬至合祀天地于郊此诗颂昊天而不及地如人称父而不及母统于尊也是则然矣然篇中成王二字当作何解岂成王可配天而郊祀之诗至康王时始有乎求其说而难通则不得不仍从贾郑唐韦之说谓成王云者言文武成此王功犹书言成王畏相者尔就如所云则郊祀天地之乐歌而盛称二后之功已自不伦若云以配祭故及之则惟文王有季秋大飨之配未闻武王曾配帝也推原其故皆繇毛郑辈定以颂爲成王之时周公所作康王而後不容有颂然则执竞篇以不显成康并言非明指成王诵康王钊而何善乎范蜀公之言曰扬雄所谓康王之时颂夸作于下班固亦谓成康没而颂声寢言自成康之後不复有见于颂也此可以破从前诸儒之瞽说矣朱子云昊天有成命之类便是康王诗而今却要解那成王做成王业费尽气力要从王业上说去不知怎生地乃申培说则以爲康王禘成王于明堂之诗即子贡传有缺文亦于祀成王下空二字而尚存一堂字盖亦同申培说之意不知其所谓禘者大禘乎吉禘乎大禘则成王无独配始祖所自出之理吉禘则于大庙不宜于明堂倘谓亦如严父配天之说乎果此礼世世可以通行则若厉若幽将何以处之愚已详晰此礼于清庙我将二小引之下有以深着其不然矣鄙儒无识僞作古书多见其不知量耳】

下武康王祭成王庙受厘陈戒之诗【朱子云此诗有成王字当爲康王以後之诗愚按此与昊天有成命篇同爲一时之作知爲受厘陈戒诗者以昭兹来许二章知之】

下【丰氏本作文】武维周世有哲【陆德明本作慤云又作喆】王【阳韵】三后在天王配于京【叶阳韵居良翻 赋也下堂下也武大武也周公作大武之乐象伐纣之事以管播其声又於庭中爲大武之舞皆在堂下故云下武文王世子云下管象舞大武大合衆以事達有神兴有德也祭统曰夫大尝禘升歌清庙下而管象朱干玉戚以舞大武八佾以舞大夏此天子之乐也是皆所谓下武者也周礼大司乐职云舞大武以享先祖孔穎达谓七庙同用乐言先祖以总之不斥号諡则后稷文武兼亲庙亦在其中明先祖之文兼通诸庙也下武维周者言堂下奏大武之乐维我周有之也此大武之乐虽爲武王而作而积累有自因推原于世有哲王指下文三后也以追王故称王一说万尚烈云自古开国之君未有不以武者故汤必曰武汤亦曰武王高宗中兴亦必曰殷武亦曰武王是武之于君尚矣然武者未必能下也武而能下者周乎故曰下武维周其语意犹濬哲维商之云也何以言周之下武如太王来朝走马

武也始而事狄既而避狄亦何下乎如王季其勤王家武也而王此大邦克顺克比亦何下乎如文王赫怒整兵武也而小心翼翼昭事上帝亦何下乎所谓下武维周此类是已虽近牵强理亦可通哲说文云知也上知天意之所向下知民心之所归惟德而已此其哲之实也三后毛传云大王王季文王也周自大王迁居周原国势渐盛其後虽有天下犹仍迁国之号邇肇基王迹者必自大王焉在天与周书兹殷多先哲王在天相类朱子云既没而其精神上与天合也王毛云武王也配者对立之义京郑玄云谓镐京也愚按周以京言则见其有天下矣周之当王已久至武王而後终其业故此在镐京者足以配彼在天者据时位而言也此章专美武王钱天锡云武王恢大统基而曰克配其义可想陆燾云京字重看见化国爲天下有极难配处】王配于京世德作求【尤韵亦叶虞韵举朱翻】永言配命成王之孚【虞韵亦叶尤韵芳尤翻 赋也世德谓先世之德依本篇经文但指三后言作说文云起也求犹索也当通作述按康诰云我时其维殷先哲王德用康又民作求与此语意正相类严粲云武王所以能配三后于京者以其於先世之德能起而求之善继述也愚按三后之德积累已深酝酿已厚至于武王益加振扬而光大之天命之集自有不容己者此其所以称克配若使德不至而遏佚前光宜王而不王或图度天命不当王而王其负愧于三后多矣何配之有徐光启云三后事殷武王代纣功业不同顺逆相反然迹逆而理顺事异而心通三后而在牧野之举必不得已也故诗颂武王曾无一语道其翦基立业恢拓前功而但曰配京求德见武王此举无非曲体先人克全孝道虽化家爲国变侯爲王实无分毫与前人谬戾孔子所称善继述意本此皆所以白圣人之心迹扶万世之名教周昌年云求有参经权通常变无方以求之意永言配命解见文王篇成王武王之子名诵鸟抱子曰孚取抱持不失之义武王受命繇于作求三后之德此武王之孝也再传成王克配天命与之相副则以成王亦潜孚于武王之德故耳武王述三后成王又能述武王故诗人长言以美之此章兼美武王成王按昊天有成命篇有成王不敢康之句朱子以爲康王以後祀成王之诗此诗明称成王其爲祀成王而作无可疑者与周书言维助成王德显及成王畏相等语不同】

成王之孚下土之式【职韵】永言孝思孝思维则【职韵 赋也下土兼臣民而言君尊如天故目四方之人爲下土式说文云法也成王潜孚于武王之德抱持不失故下土之人咸归心于成王而以之爲法谓遵其命服其化也韩诗外传云上不知顺孝则民不知返本君不知敬长则民不知贵亲禘祭不敬山川失时则民无所畏矣不教而诛则民不识劝也故君子修身及孝则民不倍矣敬孝达乎下则民知慈爱矣好恶喻乎百姓则下应其上如影响矣是以兼制天下定海内臣万姓之要法也明王圣主之所不能须臾而舍也诗曰成王之孚下土之式礼记缁衣篇子曰禹立三年百姓以仁遂焉岂必尽仁大雅曰成王之孚下土之式按二书引诗之意皆谓上当以身教民之所取法者惟上耳然尚非此诗正旨此诗通章只宜以德之一字贯三后之所以造周武王之所以受命後嗣之所以守成皆此具也孝根於思谓之孝思即孚字意书曰奉先思孝则者裁制之义故亦训法维则属康王言诗人长言此成王之孝一本於其真切之思如此孝思乃後王之所当取法也与下土之式句判不相涉旧说合看甚误孟子赞舜孝而引此诗乃是就孝发论谓凡爲人子者所当取法耳此章专美成王】媚兹一人应侯顺【家语淮南子定本俱作慎丰本作眷】德【职韵亦叶屋韵都木翻】永言孝思昭哉嗣服【屋韵亦叶职韵鼻墨翻 赋也媚说文云悦也一人毛云天子也孔云曲礼天子自称曰予一人言其天下之贵唯一人而已愚按观下文应侯二字则此指武王也应通作膺以言相答故爲感应之义侯诸侯也指武王昔日爲诸侯也左传云慈和徧服曰顺德即世德作求

之德言天下之所以悦服武王当其爲诸侯之日即相与起而应之者亦顺其有作求三后之德耳此二句申美武王昭明嗣继服事也长言此成王之孝思与武王之德相爲孚契显明哉其能继续武王之事也此二句申美成王皆所以歆动康王也又大戴礼将军文子篇美顔渊荀子仲尼篇美吉人悉引此诗以其迂远太甚故置不録】昭兹【汉碑丰本俱作哉】来许【叶麋韵火五翻後汉书注作慎】绳【後汉书注作慎】其祖武【麋韵後汉书注作父】於【音乌後同】万斯年受天之祜【麋韵 赋也此下二章以孝思勉康王而致其期望之意昭即上章昭哉嗣服之昭指成王也兹此也谓今日也来来康王也许说文云听也绳如绳索之相续不断故朱子以爲继也武指武王也武王乃康王之祖故称祖武按周颂武篇云嗣武受之亦单称武王爲武也於叹美辞受说文云相付也徐锴云取上下相受也祜说文云福也言成王嗣服之德於今爲昭我言及此康王尚来而听之当以成王爲法而继尔祖武王之德又叹而美之言果能如此则庶乎自今以往至于万年受天之福无有纪极矣篇中所举有三后有成王此独言绳其祖武者三后之德总会于武王即成王亦不过嗣武王之德耳绳武王则三后与成王悉包括其中矣周有天下自武至康已历三世而积德不替如一日基厚则难倾根深则不拔万年子子孙孙永保民固其所也】受天之祜四方来贺【个韵】於万斯年不遐有佐【叶个韵子贺翻赋也受天之祜语联上章当主後日子孙言贺说文云以礼相奉庆也朱子云朝贺也周末秦强天子致胙诸侯皆贺即此贺也四方来贺所谓四海之内悉主悉臣莫敢不来享莫敢不来王也遐说文云远也指万年言佐孔云助也谓助子孙说文无佐字本作左上从 音左左手也谓以手相助下从工其所作爲也会意今文书 皆作左书左皆作佐言王诚能绳祖德而使後人蒙业而安则自今日而遥计及万年吾王之於子孙不亦远有所佐助乎一说遐即指四方有佐即指来贺言四方之远皆爲我周之屏翰也亦通韩诗外传云成王之时有三苗贯桑而生同爲一秀大几满车长几充箱成王问周公曰此何物也周公曰三苗同一秀意者天下殆同一也比期三年果有越裳氏重九译而止献白雉於周公道路悠远山川幽深恐使人之未达也故重译而来周公曰吾何以见赐也译曰吾受命国之黄髮日久矣天之不迅风疾雨也海不波溢也三年於兹矣意者中国殆有圣人盍往朝之於是来也周公乃敬求其所以来诗曰於万斯年不遐有佐黄佐云武王之道继述而已然应侯顺德大着於当时受祜有佐可及于後世效验之文如此能配三后有以哉後之谓汉家自有制度者守汉法也喜观贞观政要者守唐法也惜乎汉唐之非法也大甲视乃烈祖而诸侯咸归武丁监于成宪而编髮来朝孝思维则也陆燧云孝者通乎天人贯乎今古在武王爲求德在子孙爲绳武在今日爲媚兹在万年爲有佐分量岂小哉】

下武六章章四句【子贡传申培说丰氏本篇名俱作大武 申培说以爲康王大禘报祀成王奏大武六成既毕受厘陈戒之诗今按申说近之然祭礼有五禘郊祖宗报既曰大禘矣又曰报祀何也且大禘之礼禘其祖之所自出而以其祖配此诗所称无及帝嘗之事恶在具爲大禘乎序则云继文也武王有圣德复受天命能昭先人之功焉专主武王言已不得诗意况继文二字尤无义味不过以此诗篇次系灵台後灵台爲文王诗而此诗继之谓之继文耳後人或从而爲之说谓周家世崇文德今言下武者武王之贱武也贱武所以继文也夫武王以武得天下且制爲大武之乐以示子孙而乃谓其贱武何欵又子贡传及申培说俱以下武作大武邹忠胤谀之谓此即大武之乐章则武賚桓诸篇将安所置之二书皆僞出其以下武爲大武犹之朱子以下武爲文武也皆求下之解而不得者也乃传又以此爲训成王之诗则愚将

执祖武二字正之知此诗作于康世不作于成世明矣】

噫嘻康王春祈谷也既得卜于祫庙因戒农官【家语定公问于孔子曰寡人闻郊而莫同何也孔子曰郊之祭也迎长日之至也大报天而主日配以月故周之始郊其月以日至其日用上辛至於启蛰之月则又祈谷于上帝此二者天子之礼也鲁无冬至大郊之事降杀于天子是以不同也公曰天子之郊其礼何可得闻乎孔子对曰臣闻天子卜郊则受命于祖庙而作龟于祫宫尊祖亲考之义也卜之日王亲立于泽宫以听誓命受教谏之义也既卜献命库门之内所以戒百官也太庙之命戒百姓也郊特牲疏云作龟于祫宫者作灼也祫宫祫庙也先告祖受命又至祫庙卜之也考亦祫也尊祖故受之命命宜繇尊者出亲祫故作龟是事事宜就亲近之也左襄七年夏四月三卜郊不从孟献子曰吾乃今而后知有卜筮夫郊祀后稷以祈农事也是故启蛰而郊郊而后耕今既耕而卜郊宜其不从也谷梁传云自正月至于三月郊之时也我以十二月下辛卜正月上辛如不从则以正月下辛卜二月上辛如不从则以二月下辛卜三月上辛如不从则不郊矣郊三卜礼也四卜非礼也五卜强也陈祥道云考之於礼卜筮不过三则僖襄之四卜郊成之五卜郊其爲非礼与强可知也然明堂位曰孟春乘大路祀帝于郊配以后稷左氏曰启蛰而郊郊而后耕则鲁郊固在夏之孟春矣啖助曰以周二月卜三月上辛不吉则卜中辛又不吉则卜下辛此说是也谷梁谓自夏至三月郊之时也皆卜上辛然考之仪礼少牢馈食筮甸有一日若不吉则及远日又筮日如初曲礼曰甸之外曰远日是古人踰甸则卜未闻踰月乃卜也愚按左传谷梁及陈氏礼书所云正月二月三月四月皆主周正而言古者一岁郊祀凡再冬至之郊爲报本也建寅之郊爲祈谷也建寅之郊用卜而冬至之郊不用卜盖以礼文徵之郊特牲云郊之用辛也周之始郊日以至家语亦云周之始郊其月以日至其日用上辛所谓始郊者对建寅之郊而言日不取至日而定用上辛此以知冬至之郊不用卜也月令云孟春之月天子乃以元日祈谷于上帝乃择元辰天子亲载耒耜躬耕帝籍甲乙丙丁等谓之日子丑寅卯等谓之辰元之爲言善也日必须十辰必须择据春秋言卜郊者皆祈谷之郊此以知惟建寅之郊用卜也然祈谷卜郊仍以辛日爲主则啖助之说较之谷梁爲近三辛推移要不出建寅一月若三卜不从则孟献子所云既耕之後亦可无用郊爲矣日所以必取辛者郑玄谓取人君斋戒自新之义陈祥道则谓社用甲者日之始郊用辛者乾之方生物者社也故用甲成功者天也故用辛理皆可通若元辰之择旧说谓用亥日以陰阳式法正月亥爲天仓合于耕事皇氏又云正月建寅日月会辰在亥俱未知然否愚所以定噫嘻之诗爲咏祈谷卜郊之事者以篇中专言劝农而章首有成王昭假之语明此诗作于康王之世乃主作龟祫宫而言不然周自后稷以农事开国即欲勅农官何不于始祖之庙举始祖爲辞而顾于成王何取乎序及蔡邕独断亦皆云春夏祈谷于上帝之所歌也此说相传必非无本今观诗中虽言耕事而絕无一语及祈谷者惟章首二语以爲作龟祫宫乃与孟春祈谷相涉耳然孟春仲夏虽皆有祈谷而礼各不同仲夏大雩帝用盛乐以祈谷实无作龟祫宫之事序不应兼夏而言疑传说之误或夏字衍也又竹书载康王三年申戒农官告于庙是诗之作其在此时乎】

噫嘻成王既昭假【丰氏本作格】尔【纸韵】率【韩诗作帅】时农夫播厥百谷【叶宥韵居侯翻】骏【陆德明本作浚】发尔私终三十里【纸韵】亦服尔耕十千维耦【叶宥韵牛遘翻里与尔叶耦与谷叶盖轡轡体赋也噫说文云饱食息也嘻本作譔说文云痛也今

皆以爲叹声郑玄云噫嘻有所多大之声也孔颖达云孔子见顔渊死曰噫天丧予成汤见四面罗者曰嘻尽之矣则噫嘻皆是叹声作者有所褒多美大而爲声以叹之也成王名诵康王父也既者已事之辞昭明也假通作假说文云至也尔尔农官也以率时农夫之语推之可见与下文尔私尔耕两尔字不同彼尔谓农夫也康王将祈谷于上帝先灼龟称官既得吉卜郊且有日乃召农官叹息而告之曰祈谷而郊重事也顷者卜日于我成王受命如响是我成王于冥冥之中其神灵贯彻已昭昭至于尔之所事矣尔农官可不思所以副成王之意乎率是农夫以下勅勉农官之辞也率通作𠂔说文云将𠂔也盖统领士卒以行者故有统领之义时之言是音之近也农夫耕𠂔也郑氏以尔雅训田畯爲农夫谓是主田之吏今按七月篇云嗟我农夫我稼既同上入执宫功此岂田畯之谓乎播说文云种也百谷解见七月篇薛君云谷类非一故言百也骏当依陆本通作浚说文云抒也徐锴云取出之也愚按此即浚井之浚谓浚田使深取土出之即下文言发孟子所谓深耕是也发犹起也郑以爲伐也孔云冬官匠人云一耦之伐伐发地也以耜击伐此地使之发起也私毛云民田也朱子云此必乡遂之官司稼之属其职以万夫爲界者沟洫用贡法无公田故皆谓之私漳州陈安卿云周制国中乡遂之地用贡法田不井授但爲沟洫一夫受田百亩与同沟之人通力合作计亩均收大率十而赋其一终郑云竟也万尚烈云无遗地之谓但言三十里者郑云周礼曰凡治野田夫间有遂遂上有径十夫有沟沟上有畛百夫有洫洫上有涂千夫有浍浍上有道万夫有川川上有路计此万夫之地方三十三里少半里也孔云周礼以万夫爲限与此十千相当又计此万夫之地一夫百亩方百步积万夫方之是广长各百夫以百乘百是万也既广长皆百夫夫有百步三夫爲一里则百夫爲三十三里余百步即三分里之一爲少半里是三十三里又少半里也愚按古者六尺爲步广一步长百步曰亩四方长广皆百步曰百亩一亩之田实积百步而方十步一夫之田实积百亩而方十亩万夫之田四方纵横计之各百夫也以一方百步之亩积之三百步爲一里百夫之长万步计得三十三里零言三十里举成数耳赵颐孙云按遂人云十夫有沟百夫有洫窃意乡遂之地在近郊远郊之间六军之所从出必是平原广野可画爲万夫之田有沟有洫又有涂路也又陈祥道云考工记匠人爲沟洫广尺深尺谓之𡿨田首倍之广二尺深二尺谓之遂九夫爲井井间广四尺深四尺谓之沟方十里爲成成间广八尺深八尺谓之洫方百里爲同同间广二寻深二仞谓之浍郑康成以匠人有𡿨遂沟洫浍之制而多寡与遂人异故言采地制井田乡遂公邑制沟洫又谓乡遂公邑之吏或促民以公使不得恤其私诸侯专国之政或恣爲贪暴税民无艺故畿内用夏贡邦国用商助贾公彦之徒遂以载师自国中园?以至甸稍县都皆无过十二是乡遂及四等公邑皆用贡而无助以明乡遂特爲沟洫而已然先王之爲井田也使所饮同井所食同田所居同廛所服同事出入相友守望相助疾病相扶持乡遂六军之所寓庸岂各授之田而不爲井法乎大田之诗言曾孙来止而歌雨我公田遂及我私噫嘻之诗言祈谷于上帝而歌骏发尔私终三十里亦服尔耕十千维耦周官遂人言兴鋤旅师有鋤粟此乡遂井田之事也孟子曰乡田同井请野九一而助则乡遂之爲井田可知矣先王之时上以仁抚下下以义事上以仁抚下故先民而後公则骏发尔私是也以义事上故先公而後已则雨我公田遂及我私是也又私田稼不善则非吏公田稼不善则非民庸有乡遂公邑之吏促民以公使不恤其私者乎小司徒九夫爲井匠人亦九夫爲井井间有沟自井地言之也遂人十夫有沟兼沟涂言之也然遂人百夫有洫而匠人十里爲成成间有洫则九百夫之地遂人千夫有浍而匠人百里爲同同间有浍则九万夫之地其不同何耶成间有洫非一成之地包以一洫而已谓其间有洫也同间有浍非一同之地包以

一浍而已谓其间有浍也成与同地之广者也洫与浍沟之大者也於成举洫於同举浍亦其大略云尔按此说甚辨并存之亦郑训爲大朱训爲皆愚按从郑说则当通作奕然二说俱通服郑云事也耕说文云犁也字从耒从井耒所以犁古者井田故从井亦服尔耕者言使之皆从事於耕也十千者一川之内万夫之数也疏义云一里三夫十里三十夫三十里则九十夫又三里则九夫又三分里之一则一夫合爲百夫纵横皆百夫则万夫也此盖以百乘百以三十三里有奇乘三十三里有奇之法也耦汉志注云并两耜而耕也考工记云耜广五寸二耜爲耦说文云耒广五寸爲伐二伐爲耦季本云古之耕者步百爲亩亩爲三畎广尺深尺耜广五寸以二人并耕左右起土其深者爲畎高者爲壟也胡一桂云十千维耦者盖万夫合耦而耕实五千耦耳按周礼遂人职云以兴耤利甿里宰职云以岁时合耦于耤旅师职云掌聚野之耤粟而用之兴耤者谓鼓舞作兴之使之通力合作也合耦者谓配合其力相等者爲之俾强不独劳弱不独逸也耤粟者谓有兴耤合耦不至者则罚之粟以备赈恤之用也古者未有以牛挽犁之法故须用两人并耕如此上言骏发尔私终三十里则各言之人人发起其私田至竟三十里之内无一亩而不然说文所谓一耒之伐也此言亦服尔耕十千维耦则对言之一人各有一耦以举耕犁之事尽万夫而皆然考工所谓二耜之耦也耒耜共爲一器柄曲木曰耒耒端曰耜说文考工偶举其一耳欲播种必先深耕故倦倦及此又季云一夫百亩亩百步百亩之田纵横各百步积之得万步以三百步爲里法约之得三十三里三分里之一言三十者举成数也田一面百步计之爲一亩以千步计之则爲阡阡爲十亩是百亩之田爲十阡也十阡之内以耦耕之是百亩爲一耦也按据此说则三十里十千皆但主一夫百亩而言於算法亦似可通但古人文辞质确不應該诡若此孟子曰方里而井井九百亩一夫之田不过方一里中九分之一而乃张之爲三十余里可乎】

噫嘻一章八句【朱子以爲亦戒农官之词则此诗宜在雅不宜在颂辨已在臣工篇矣申培说谓康王孟春祈谷于东郊以成王配享之诗愚不知成王配享祈谷载在何典闻以后稷配矣未闻以祢配也岂亦将依仿于明堂严父之说耶诞妄如此大是可笑子贡传阙文】

甘棠思召公也【序云美召伯也召伯之教明于南国按韩诗外传云昔者周道之盛召伯在朝有司请营召以居召伯曰嗟以吾一身而劳百姓此非吾先君文王之志也於是出而就蒸庶于阡陌陇亩之间而听断焉召伯暴处远野庐于树下百姓大悦耕桑者倍力以劝于是岁大稔民给家足其後在位者骄奢不恤元元税赋繁数百姓困乏耕桑失时于是诗人见召伯之所休息树下美而歌之刘向说苑云召公述职当桑蚕之时不欲变民事故不入邑中舍于甘棠之下而听断焉陕间之人皆得其所是故後世思而歌咏之汉书王吉传云昔召公述职当民事时舍于棠下而听断焉是时人皆得其所後世思其仁恩至虐不伐甘棠史记燕世家云召公之治西方甚得兆民和巡行乡邑有棠树决狱政事其下自侯伯至庶人各得其所无失职者召公卒民人思召公之政怀棠树不敢伐歌咏之焦氏易林云大树之子百条共母当夏六月枝叶盛茂鸾凤以庇召伯游暑数说不一然总以见召伯之德入人之深故序谓召伯之教明于南国也左昭二年晋侯使韩宣子来聘公享之季武子赋甘棠宣子曰起不堪也无以及召公孔颖达云召伯食采文王时爲伯武王时故乐记曰武王伐纣五成而分陕周公左召公右是也郑以此篇所陈巡民决讼皆是武王伐纣之後爲伯时事以经云召伯即此诗召公爲伯时作也若文王时与周公共行王化有美即归之于王诗人何得感文王之化而曲美

召公哉武王之时召公爲王官之伯故得美之因诗系召公故録之在召南愚按郑谱谓文王受命作邑于丰乃分岐邦周召之地爲周公旦召公奭之采地分施政教于雍凉荆豫徐扬六州而采其诗爲风愚终不能无疑周召二公至武王时乃始辅佐在文王时未尝用事也故书君奭乃周召对语之辞其历举文王之臣惟曰虢叔閼夭散宜生泰顛南宫适及武王时虢叔先死则曰武王惟兹四人尚迪有禄而已周召之分陕而治在武王得天下之後而甘棠颂召伯之诗又当在康王之时考竹书召公以康王二十四年薨诸书皆谓召公没後始作此诗故孔丛子载孔子曰吾于甘棠见宗庙之敬也左定九年郑驪黻杀邓析而用其竹刑君子谓子然于是不忠用其道不弃其人诗云蔽芾甘棠勿翦勿伐召伯所茇思其人犹爱其树况用其道而不恤其人乎子然无以劝能矣襄十四年晋士鞅言乐黷汰虐已甚犹可以免盖武子之子也秦伯问故对曰武子之德在民如周人之思召公焉爱其甘棠况其子乎刘歆庙议以爲思其人尚爱其木况宗其道而毁其庙乎绎前数说则此诗因召公已歿而作尤其彰明较着者不但非作于文王之时亦非作于武王之时矣邹忠胤云周公先以成王二十一年薨旧说二南皆爲文王诗周公所集以明德化之盛亦正未可泥耳】

蔽芾【韩诗外传作蒹】甘棠勿翦【韩诗作剗汉书作鬻丰氏本作□】勿伐【叶队韵符废翻亦叶泰韵蒲盖翻】召【汉书作邵】伯所茇【叶队韵放吠翻亦叶泰韵博盖翻说文读诗记并作废赋也蔽说文云蔽蔽小草也一云薺也又云奄也齐语使海干有蔽注云可依蔽也芾说文云草木盛貌今以蔽芾二字连言盖阴翳茂盛之意甘棠郭璞云今之杜梨也陆玑云棠梨也按尔雅云杜赤棠白者棠樊光云白者爲棠赤者爲杜陆佃云草木虫鱼疏以爲赤棠与白棠同尔但子有赤白美恶子白色爲白棠甘棠也赤棠子澁而酢无味俗语曰澁如杜是也字说云诗言蔽芾甘棠以杜之美言有杕之杜以棠之恶言说诗者以意逆志乃能得之九域志云召伯甘棠树在陕州府署西南隅翦通作剪说文云齐断也伐释文云斩木也谓斩伐其枝曰勿者是惓惓爱护而不忍伤之故词若相戒言不但剪其根干不可虽伐其枝条亦不可也思人爱物与覩物思人二意俱有召地名召公奭采邑也史记燕世家云与周同姓皇甫谧云文王之庶子胜殷後封于北燕留周佐政食邑于召辅成王康王卒諡曰康长子继燕支子继召按左传富辰言文之昭十六国无燕似不足信丰熙以爲王季庶子亦不知何所本也茇通作废说文云舍也徐锴云今诗周礼皆借作茇郑玄云草舍也周礼夏官教茇舍注云草止之也军有草止之法孔云茇者草也草中止舍故云茇张文潜云召公爲天子之大臣中分天下而治之而治事临务至出于草野田亩草木之间宜若不知体矣然古人惟不敢遗一人故能康一家不敢遗一家故能王一国尝读西汉书见循吏传如美宣召信臣之徒其治郡邑事无大小一一立法曲有制度至於躬行田野不少休息未尝不爱其知爲政之理竭力勤事而至诚爱其氏也考索云周南天子所都周公不得专有其美召公专主诸侯则南国之教得以称召伯也在易二与四同功而异位二多誉远也四多惧近也周公近召公远有诗无诗此其异与苏辙云周公在内近于文王虽有德而不见则其诗不作召公在外远于文王功业明着则诗作于下此理之最明者也】蔽芾甘棠勿翦勿败【叶泰韵乌外翻丰本作?】召伯所□【叶泰韵丘盖翻原惕字今文作憇释文丰本俱作惕赋也败谓残坏之□本作惕说文云息也】蔽芾甘棠勿翦勿拜【叶霁韵变制翻】

【广韵作扒】召伯所说【叶霁韵输芮翻尔雅注丰本俱作税陆德明本作脱 赋也拜说文

云首至地也钱氏云谓攀下也攀下其枝如人之拜严粲云谓低屈之挽其枝以至地也程大昌云三章皆曰勿翦翦者断也勿拜则不止不翦且不敢屈其枝而垂之敬之至也孟子论天下易事曰爲长者折枝即肢体之肢与木枝一义则拜者折枝之谓也严云始则相戒不可斩伐而去之中则相戒岂特不可斩伐但残坏之亦不可终则相戒岂特不可残坏但低屈之亦不可爱之愈深护之愈至也说说文云释也後人作悦即此字言此树爲召公所喜悦也太史公云召公奭可谓仁矣甘棠且思之况其人乎燕社稷血食者八九百岁於姬姓独後亡岂非召公之烈耶】

甘棠三章章三句【子贡传谓召康公勤于劳民燕人怀之赋甘棠申培说亦谓燕人追美召公之诗按李德裕宋齐丘论有曰燕人之思召伯甘棠勿翦似相脗合然他无所出直是见召公其後封燕故耳燕诗别无入国风不如还诸召南之民之爲得也】

诗经世本古义卷十一

卷十二

钦定四库全书

诗经世本古义卷十二

明 何楷 撰

周昭王之世诗二篇

执竞祭成康也昭王之世始以成康备七庙此其日祭之诗也【朱子云此昭王以後之诗昭王名瑕成王孙康王子按天子庙制先儒所说不同有谓代各异制者礼纬稽命证及春秋鉤命决皆云唐虞五庙亲庙四始祖庙一夏四庙至子孙五殷五庙至子孙六周六庙至子孙七注谓夏太祖无功而不立惟禹与二昭二穆故五殷契爲始祖汤爲受命王各立其庙与亲庙四故六周以后稷始封文王武王受命而王是以三庙不毁与亲庙四故七也有主四庙之说者丧服小记云王者立四庙今按四庙即谓高曾祖考四亲庙南齐志云先儒说高祖以下五世亲尽故亲庙有四也有主五庙之说者汉匡衡云在昔帝王承宗庙之休典取象於天地天序五行人亲五属天子奉天故率其意而尊其制是以禘尝之序靡有过五受命之君躬接于天万世不坠继烈以下五庙而迁上陈太祖间岁而祫其道应天故福祿永终韦玄成等四十四人奏云礼王者始受命诸侯始封之君皆爲太祖以下五庙而迭毁毁庙之主藏乎太祖五年而再殷祭言一禘一祫也祫祭者毁庙与未毁庙之主皆合食于太祖父爲昭子爲穆孙复爲昭古之正礼也祭义曰王者禘其祖自出以其祖配之而立四庙言始受命而王祭天以其祖配而不爲立庙亲尽也立亲庙四亲亲也亲尽而迭毁亲疏之杀示有终也周之所以七庙者以后稷始封文王武王受命而王是以三庙不毁与亲庙四而七非有后稷始封文王受命之功者皆当亲尽而毁成王成二圣之业制礼作乐功德茂盛庙犹不世以行爲諡而已郑玄亦同是说马融申郑之意谓天子七庙者有其人则七无其人则五若诸侯庙制虽有其人不得过五也有主七庙之说者礼器云有以多爲贵者天子七庙孙卿云有天下者事七世家语子羔问尊卑立庙制孔子云礼天子立七庙诸侯立五庙大夫立三庙谷梁传亦云天子七庙诸侯五刘歆云天子七日而殡七月而葬诸侯五日而殡五月而葬此丧事尊卑之序也与庙数相应故德厚者流光德薄者流卑然七庙亦有二说王制云天子七庙三昭三穆与太祖之庙而七而祭法则云王立七庙曰考庙曰王考庙曰皇考庙曰显考庙曰祖考庙皆月祭之远庙爲祧有二祧享尝乃止王肃依据王制而兼取二祧之文谓天子七庙者高祖之父及高祖之祖庙爲二祧并始祖及亲庙四爲七朱子爲之图说又颇异王肃其大?谓太祖百世不迁一昭一穆爲宗亦百世不迁二昭二穆爲四亲庙亲尽迭毁其制则外爲都宫内各有寝庙别有门垣太祖在北东向左昭右穆以次而南六庙亲尽则毁而递迁昭常爲昭穆常爲穆祔昭则羣昭皆动而穆不移祔穆则羣穆皆移而昭不动且引书穆考文王诗率见昭考及左传文之昭也武之穆也以爲证盖文爲穆则文之孙及玄孙皆穆其子与曾孙皆昭也武爲昭则武之孙及玄孙皆昭其子与曾孙皆穆也既创此六庙之後其新陟王之升祔者昭入于昭穆入于穆截然不可紊此立庙之制也诸侯大夫其迁毁之次与天子同仪礼所谓以其班祔檀弓所

谓祔于祖父者也有主七庙之外宗无定数之说者王肃云周之文武受命之王不迁之庙权礼所施非常庙之数殷之三宗宗其德而存其庙亦不以爲数王舜刘歆亦云左氏传曰名位不同礼亦异数自上以降杀以两礼也七者其正法数可常数者也宗不在此数中宗变也苟有功德则宗之不可预爲设数故於殷太甲爲太宗太戊曰中宗武丁曰高宗周公爲无逸之戒举殷三宗以劝成王繇是言之宗无数也然则所以劝帝者之功德博矣而郑玄非之谓七庙自夏及周少不减五多不过七礼器曰周旅酬六尸一人发爵则周七尸七庙明矣今使文武不在七数岂礼也哉故卢植尹更始皆云天子七庙据周也又石渠论白虎通云周以后稷文武特七庙张融亦云曾子问孔子说周事而云七庙无虚主若王肃数高祖之父高祖之祖庙与文武而九主当有九孔子何云七庙无虚主乎其後唐明皇剋立太庙九室胡致堂深非之云宗庙之礼繇子孙不忘而建不忘者仁也或七庙或五庙或三庙者礼也其有功德无功德非子孙所当祔祧而隆杀之也是故天子七庙而已矣有祧焉不患其数盈也有祧焉不患其乏飧也明皇始爲九庙何所取乎以爲有功德之庙不毁则九亦安足以尽之一断以先王之礼无敢损益于其间是则礼之尽也愚尝合衆说而折衷之四庙习其近而忘其远五庙沿其同而昧其别七庙斯尽制矣而无以处夫有功德而亲尽者至如朱子谓初立一昭一穆亦百世不迁则苟非德如文武安足以当之故不如宗无常数之说於理爲长若拘摹文武二世室之制定爲九庙则不经之甚者也陈祥道云天子七庙诸侯五庙自虞至周之所不变也是故虞书禋於六宗以见太祖周官守祧八人以兼姜嫄之宫则虞周七庙可知矣伊尹言七世之庙商礼也礼记荀卿谷梁皆言天子七庙不特周制也则自虞至周七庙又可知矣然存亲立庙亲亲之至恩祖功宗德尊尊之大义古之人思其人而爱其树尊其人则敬其位况庙乎法施于民则祀之以劳定国则祀之况祖宗乎於是礼以义起而商之三宗周之文武汉之孝文孝武唐之神尧文皇其庙皆在三昭三穆之外历世不毁此所谓不迁之庙非谓祧也郑康成之徒以周制七庙文武爲二祧亲庙四而已则文武不迁之庙在七庙内是臆说也王肃圣证论曰礼自上以降杀以两使天子诸侯皆亲庙四则是君臣同等尊卑不别也又王祭殇五而下及无亲之孙上不及无亲之祖不亦诡哉王舜刘歆论之于汉韩退之论之于唐皆与肃同盖理之所在者无异致也又云父昭子穆而有常数者礼也祖功宗德而无定法者义也故周於三昭三穆之外而有文武之庙鲁于二昭二穆之外而有鲁公之世室观春秋传称襄王致文武胙於齐侯史记称显王致文武胙於秦孝公方是时文武固已远矣襄王显王犹且祀之则其庙不毁可知矣家语孔子在陈闻鲁庙火曰其桓僖乎以爲桓僖亲尽无大功德而鲁不毁故天灾之其言虽涉于怪而理或有焉若然则鲁公之室在所不毁可知矣王舜刘歆王肃韩退之之徒皆谓天子祖功宗德之庙不在七世之列特郑康成以周礼守祧有八人小记王者立四庙则谓周制七庙文武爲二祧亲庙四而已是不知周公制礼之时文武尚爲近庙其所以宗之之礼特起于後代也果所以宗之者在七庙内使继世祖先同有丰功盛德不下文武复在可宗之列则亲庙又益杀乎理必不然祭法曰远庙爲祧则祧者兆也天子以五世六世之祖爲祧所谓有二祧是也诸侯以始祖爲祧所谓先君之祧是也郑氏以祧爲超去之超误矣既曰祧矣又以文武爲不毁之祧何耶详观数说而七庙之义又益明矣然周自武王受命七庙自后稷而下始自何代经无明文以周礼考之守祧奄八人注疏谓天子七庙通姜嫄爲八庙庙一人故八人也是固然矣夏官隶仆职又云掌五寝之埽除糞洒之事祭祀修寝郑玄注则谓五庙之寝也前曰庙後曰寝周天子七庙惟祧无寝易氏以郑说爲误成王之时七庙虽立而未备以天子之礼致六享者五后稷大王王季文武此爲五庙五寝也愚按

易氏之言深爲可信唐中宗时太庙亦仅有六室周之追王止于大王则自大王而上皆不得登于七庙之列及成康歿而周始备七庙是则执竞之诗所爲作也然成王崩周人祀之于庙则有昊天有成命及下武二诗而康王祀庙之诗无闻焉执竞之诗爲成康作但一诗而以二王并言则又心疑之已乃恍然悟曰此即所谓日祭之诗也周语祭公谋父曰先王之制邦内甸服邦外侯服侯卫宾服蛮夷要服戎翟荒服甸服者祭侯服者祀宾服者享要服者贡荒服者王日祭月祀时享岁贡终王先王之训也刘歆以爲去事有杀故祖祢则日祭曾高则月祀二祧则时享坛禘则岁贡大禘则终王德盛而游广亲亲之杀也弥远则弥尊故禘爲重矣韦昭说大都相合而楚语观射父亦曰古者先王日祭月享时类岁祀诸侯舍日卿大夫舍月士庶人舍时汉初陵园中各有寝便殿日祭於寝月祭於庙时祭於便殿寝日四上食庙岁二十五祠盖犹存古意至唐贞元时中书舍人武儒衡议曰日祭者荐新也言物有可荐则荐之不必卜择时也故叔孙通云古有尝果今櫻桃方熟可以爲献繇是惠帝取以荐宗庙是不卜日矣当叔孙通之言且曰有尝果足明古礼非汉制也月享者告朔也论语子贡欲去告朔之饩羊孔子以爲不可则告朔必具牲牢明矣春秋又讥闰月不告朔犹朝于庙此则月祭殷周已降皆有之也荐园寝者始于秦代汉氏因之而又改人君三年之制以日易月丧纪既以二十七日而除则朔望奠酬不复亲执故既葬之後移之园陵又诸陵祠殿月游衣冠既象平生务从丰洁所以陵寝朔望上食与太庙日祭月享本旨不同朱子云左氏言特祀於寝而国语有日祭之文是主复寝犹日上食矣然主既复寝则其几筵未知当俟临祭而後设耶或常设而不除也今按日祭之典虽於他经无所见而国语两及之刘歆韦昭辈皆爲推明其说则古有此礼矣五经异义亦云谨按叔孙通宗庙有日祭之礼自古而然也然则成於昭爲祖康於昭爲祢执竞之诗当是於日祭上食时歌之故以二王并言篇中於八音独举金革石竹四者亦可见其与大祭祀不同故於音有所不备也】

执竞【周礼注作儆】武王【阳韵】无竞【五经文字作儆】维烈不【丰氏本作丕】显成康【阳韵】上帝是皇【阳韵】自彼成康【见上】奄有四方【阳韵】斤斤其明【叶阳韵谟郎翻 赋也执郑玄云持也竞通作儆说文云强也执竞以德之刚言敬胜怠义胜欲纯守此心如执持而不失者然易所谓自强不息是也此诗本爲祭成康作而以武王发端者原我周有天下之所自始也无竞维烈以兴王之功业言烈本火猛之义功之光且盛者亦以烈名之言武王功业着盛莫能与之争强也李氏云观武王伐纣而得天下拱揖指挥虽强暴之国莫不趋使一戎衣而天下大定则其功烈爲莫强矣周昌年云功业皆德性中作用有是德故有是功朱克升云刚健而加悠久乃能成莫大之功武王承肃将之志十三年始一怒而安天下养勇非一日宜其功烈之无竞矣不通作丕说文云大也显者头明饰之义故尔雅训爲见郑训爲光也不显亦以德言成之日就月将学有缉熙于光明康之敬忌天威对扬文武之光训是也上帝即天也程子云以形体言谓之天以主宰言谓之帝皇朱子云君也成王康王有不显之德故天命之继世以君天下也徐士彰云创业之君开天辟地其爲天心之所属有不待言至于守文之主类多凭藉旧业耳今成康以德凝命是其爲君亦天作之与武王之聪明作后不殊也自彼者追数昔日之辞奄说文云覆也大有余也奄有四方者居高位以临四方如天之覆然也斤斤其明亦以业言斤斤尔雅云察也舍人云物情详之察也孙炎云重慎之察也按斤者所以权轻重之数十六两爲斤班固以爲斤者明也十六两者四时乘四方之象以斤斤言明者礼乐刑政所以流布之四方者纤悉毕具锱铢不爽察之义也一说谓明察

如斧斤之断亦通愚疑斤只当通作昕说文云旦明日将出也周之方兴亦如明初出地之象故拟之曰昕昕耳以兼举成康故重言之】钟鼓喤喤【阳韵汉书风俗通俱作鎗鎗】磬筦【风俗通陆德明本俱作管】将将【叶阳韵资良翻汉书作锵锵说文作□□风俗通作枪枪】降福穰穰【阳韵】降福简简【叶铎韵九件翻】威仪反反【叶先韵甫裔翻潜夫论作板板】既醉既饱福禄来反【见上 赋也上章颂成康之德业至此乃言日祭之事八音中独举钟鼓磬筦四者皆燕乐所用也喤当依汉书当作鎗说文云钟声也筦陈阳云笙之筦也将当依说文通作□云行貌按周礼钟师掌金奏凡祭祀飨食以钟鼓奏燕乐磬师掌教燕乐之钟磬笙师凡祭祀飨射共其钟笙之乐燕乐亦如之此诗言日祭上食之礼非大祭祀意但与享食礼同故止用燕乐而燕乐所用之器其见于周礼者惟有钟鼓及钟磬钟笙四者而已四器以钟爲主郑玄解金奏之乐谓先考钟次击鼓鼓与钟相间爲节所先闻者钟声耳故诗但以鎗鎗爲言鎗鎗者钟声也按大司乐职云王大食三宥皆令奏钟鼓日祭上食犹之乎大食也其奏钟鼓宜矣钟磬者应钟之磬钟笙者应钟之笙钟先作而磬笙自後从之如人之行而相就者然故说文引此诗曰磬筦□□荀卿所谓从以磬管是也荀子云鼓大丽钟统实磬廉制鼓似天钟似地磬似水又竹音亦有名管者然与钟鼓磬相聚爲类则於经无文陈阳亦知此筦爲笙之筦矣而但泥笙磬同音之说谓钟与鼓应则磬当与筦应今考周礼眡了掌击笙磬固应笙之磬也而无燕乐用之文诗不应错举及之不敢从也陈阳云先王之交鬼神也非祭则祀祭之以其物有养而亲之之意所以致爱也祀之以其道有止而宁之之意所以致敬也燕之爲礼虽与祭祀不同要之亦不过致爱敬而已降说文云下也穰说文云黍□已治者按□乃黍茂盛之义故借爲谷丰稔之貌诗丰年穰穰史穰穰满车是也日祭之礼即唐武儒衡所云荐新者如月令所载荐麦荐黍荐谷荐稻之类故祖考降以穰穰之福俾其时和年丰也汉书云万物不夭天地顺而嘉应降降福穰穰之谓也简通作束说文云分别之也犹简在之简威仪反反与宾之初筵解同祭太数则易黜每行礼之时必周详反顾式礼莫愆也既醉既饱谓神享之也福禄者广言之凡诸福之物皆是万尚烈云反乃出乎尔反乎尔之反即楚茨云报以介福也承上言日祭之礼既行则祖考当降以穰穰之福然此福之降非妄施也先于冥冥之中用其简閱果其威仪克谨则神歆其祭方且报以无限之福禄不徒穰穰而已王符云德义无违神乃享鬼神受享福祚乃隆故诗云降福穰穰降福简简威仪板板既醉既饱福禄来反此言人德义茂美神歆享醉饱乃反报之以福也又荀子云上得天时下得地利中得人和则财货浑浑如泉源汭汭如河海暴暴如丘山不时焚烧无所藏之夫天下何患乎不足也故儒术诚行则天下大而富使有功撞钟击鼓而和诗曰钟鼓喤喤磬筦将将降福穰穰降福简简威仪反反既醉既饱福禄来反此之谓也韩诗外传云重色而成文累味而备珍则圣人所以分贤长明贵贱故道得则泽流羣生而福归王公泽流羣生则下安而和福归王公则尊而荣百姓皆怀安和之心而乐戴其上夫是之谓下治而上通下治而上通颂声之所以兴也诗曰降福简简威仪反反既醉既饱福禄来反以上二条俱影响傅会全与诗旨无涉】

执竞二章章七句【旧作一章十四句 桓宽盐铁论云周文武尊贤受谏敬戒不殆纯德上休神只相赐诗云降福穰穰降福简简夫篇中第言武王未尝及文王也而以文武并称於论疏矣序及蔡邕独断皆云祀武王之所歌也然不显成康自彼成康等语当作何解毛传强爲之说曰成大功而安之也如此诂字岂成文理即苏辙亦谏其说谓周之奄有四方不自成康之

时朱子辟之云此以辞害意之失皇矣之诗於王季章中盖已有此句矣又岂可以其太早而别爲之说耶夫成康明是二王之謚然如依序则固祀武王之诗也而下及成康何欵范蜀公有云祀武王而述成康见子孙之善继也吕涇野亦谓自成康以来其功则能崇天下其德能和敬以奉祭祀武王其必享之是於说亦似可通矣然既以成康二王爲言则此诗必作於昭王之世周公当成王时制礼作乐已极明备不应祀武王之歌至昭王而後有也朱子据诗词直以爲祭武王成王康王之诗较爲近之子贡传於执竞下空六字复有成康二字疑亦同朱子之说然三后合祭礼所未闻邹忠胤谓周制先公庙在岐文王庙在丰武王庙在镐其成康亦祔於武庙可知而此祭非祫非禘故止及三王耳朱克升亦云祭三王无其例然武王有世室则必有专祭矣岂昭王以後祭武世室而配以成康欵借曰文世室无诗则夫子正乐于残缺之余但因所存者存之耳二说要皆凭臆揣摩无所稽据申培说直以爲昭王禘康王于明堂之诗则将置篇中武王成王于何地其妄固无庸辨又按周礼注引吕叔玉谓此诗名繁遏即国语三夏之一以爲繁者多也遏者止也言福祿止于周之多也故曰穰穰简简杜预韦昭又谓此诗名遏乃九夏中之韶夏其详俱见时迈篇小引下今按九夏见于周礼自周公时已有之而此诗乃作于康王以後则周公何从预定此歌章耶】

鼓鍾昭王南游宴乐于淮水之上君子忧伤而作是诗【出诗说 韩诗云昭王之时作郑玄於中侯握河纪注亦云昭王时鼓鍾之诗所爲作子贡传但存昭王南三字而其余阙文按史记云昭王之时王道微缺昭王南巡狩不返卒於江上其卒不赴告讳之也外纪云昭王南巡狩反济汉滨之人以胶胶船王至中流胶液船解王及祭公溺焉二说皆以昭王爲南巡而竹书则纪昭王十六年伐楚涉汉遇大兕又纪十九年祭公辛伯从王伐楚天大噎雉兔皆震丧六师于汉大纪亦云王在位久不能强於政治风化稍衰有光五色贯紫微井水溢是岁王征荆蛮军旋涉汉梁败王及祭公陨於汉王右辛余靡振王北济反振祭公王因是发疾崩吕氏春秋云周昭王亲将征荆辛余靡长且多力爲王右远反涉汉梁败王及祭公殒於汉中辛余靡振王北济又反振祭公周公乃侯之於西翟实爲长公水经注则云昭王南征船人胶舟以进之渡沔中流而没故地有左桑大斂口横桑死沔之称左桑者言百姓佐昭王丧事于此也大斂口者言昭王于此殯斂也横桑者言得昭王丧处也死沔者言昭王济于是而死故有死沔之称也以上诸说皆以昭王爲南征故左传齐桓公责楚之辞曰昭王南征而不复寡人是问又屈原天问有云昭后成游南土爰底厥利维河逢彼白雉其说皆颇与竹书相应想亦乘巡游之便而因爲征伐之举耳王南行过淮凡再往一返是诗不知作于何时郝敬云是役也未必无朝会而诗但言鼓鍾淮水以讽其荒乐远游无复先王修礼辑瑞柴望祭告之典与秦政隋广先後一轍所以爲刺邹忠胤云自楚泽胶舟王灵斯替乃识者已于淮上之游卜宫声之无旋矣夫克诘戎兵陟禹迹而方行天下周公立政之训固云然戢而时动则威观则玩而无震况以水滨即次之地爲徜徉容与之观将觀光扬烈谓何嘉乐而野合亦异乎灵台之奏公卷阿之矢音矣乐是德非诗人所爲悼今怀古不胜怆耳其词隐其意微故曰思而不貳怨而不言其周德之衰乎嗟乎成康既没德如昭王颂声安得不寢岂惟颂哉即雅之亡愚以爲不亡於黍离而已亡于赋鼓鍾之日又云记曰乐不可极乐极生悲大夫忧之而赋鼓鍾似有先见】

鼓鍾将将【叶阳韵七羊翻】淮水汤汤【阳韵音伤】忧心且伤【阳韵】淑【丰氏本作

叔後同】人君子怀允不忘【阳韵 赋而兴也击鼓爲鼓而击锺亦称鼓者以击之义通也字从支支者小击也从又爲意以卜得声与乐器之鼓从支不同支字从手持半竹亦象其手击之也从豆者象陈乐立而上见之形也孔颖达云以鼓瑟鼓琴类之故鼓锺爲击锺也锺当作钟乐钟也字从童以其爲秋分之音物種成之时也与酒器之锺不同彼字从重乃慎重之意所以寓戒也解见关雎篇孔云乐器多矣必以锺爲首而先言之者以作乐必击锺左传谓之金奏是先击金以奏诸乐也按周礼锺师职云掌金奏凡乐事以锺鼓奏九夏鑄师职云凡祭祀鼓其金奏之乐飧食宾射亦如之陈阳云金音铿立秋之气先王作乐用之以爲金奏焉礼曰内金示和也又曰入门而金作示情也奏金而鸣之内以示情外以示和也又云十二辰之钟以应十二月之律大钟也大钟特县诗书尔雅所谓镛是也非十二辰之钟则编焉周礼所谓编钟是也将通作枪说文云钟声也以其连击而声不断故曰将将淮水名尔雅云江河淮济爲四渎四渎者发源注海者也水经云淮水出南阳平氏县胎簪山东北过桐柏山至广陵淮浦县入海广雅云淮均也春秋说题辞云淮者均其势也按淮之训均其义未喻当是字从準省准之爲言平也言水流平均也汤汤盛大貌书云汤汤洪水是也兴下文淑人君子意正在此言其流长远以兴先王往矣而其至德遗韵至今尚爲人所思也伤痛也说文云创也创者刀伤心之痛有似之也郑玄云爲之忧伤者嘉乐不野合今乃于淮水之上作先王之乐失礼尤甚严云当时祸变将作曾不觉悟顾远离京师爲从流忘反之乐诗人爲之寒心忧而且伤知祸之必不免也凌蒙初云此诗之刺最爲微婉若非忧心一句後人必以爲升歌雅乐矣淑人君子解见鳴鳩篇言此淑人之君子指文武也严云周家以仁厚立国故以善人君子称其先王怀思允信也子贡曰闻其乐而知其德乐作于先王而用于後王闻其声者感焉因是以思其人而信其有是德虽至于历世之久而终不能忘也然此章犹未明言至下章言其德不回乃道其实】鼓锺喈喈【叶支韵坚夷翻】淮水潏潏【叶支韵坚夷翻】忧心且悲【支韵】淑人君子其德不回【叶支韵乎爲翻 赋而兴也喈喈徐铉云声衆且和也潏说文云水流也徐云衆水之貌按潏字水右施皆当是以意兼声徐解谓衆水之貌是也禹贡导淮自桐柏东会于泗沂而水经所载入淮之水其流甚多故以潏潏言兴意亦取流水朝宗之义先王有盛德以来诸侯故诸侯咸归之不如王之以逸豫灭德使下国携贰而致勤兵于远也悲说文云痛也一云心非爲悲心之所以非则悲矣回者邪曲之义与正道相反乐以象德观其乐之有节即知其德之不回且用之各有其地施之必於其宜焉有游逸淫乐如王今者奏乐于淮水之上乎】鼓锺伐鼗【叶尤韵居侯翻丰本作皋】淮有三洲【尤韵丰本作州】忧心且妯【叶尤韵丑鳩翻说文作妯】淑人君子其德不犹【尤韵 赋而兴也鼗说文云大鼓也亦作皋鼓以音同通用耳考工记云鞀人爲皋鼓长寻有四尺鼓四尺倨句鼗折按长寻四尺者谓长一丈二尺鼓四尺者谓鼓面径四尺也倨言其直句言其曲鼗折谓中高而两头下有如鼗之圆折即今之鼓式也周礼地官鼓人职云掌教六鼓四金之音声以节声乐以和军旅以正田役教爲鼓而辨其声用以雷鼓鼓神祀以灵鼓鼓社祭以路鼓鼓鬼享以鼗鼓鼓军事以鼗鼓鼓役事以晋鼓鼓金奏以金錡和鼓以金镯节鼓以金铙止鼓以金铎通鼓凡军旅夜鼓鼗军动则鼓其衆田役亦如之按鼗乃役事所用緜诗所谓鼗鼓弗胜是也据此诗先言鼓锺末言琴瑟笙鼗自是金奏之乐则当用晋鼓而此言伐鼗者岂王在淮上有兴衆动役之事如繕治离宫别馆之类乎因忆淮南子云尧舜禹汤武王伐鼗而食奏雍而彻已饭而祭可谓至贵矣然战战栗栗日慎一日许慎谓鼗鼓王者之食乐诗鼓锺伐鼗是也雍则已食之乐也周礼大司乐职王大食三肴皆令奏钟鼓即此前二章第言伐钟此乃言伐鼓耳三洲毛传

云淮上地吕祖谦云作诗者赋其当时所见洲古作州水中可居者水落成洲觀盈涸之无常
兴世事之多变临流之间感慨系之矣与下文其德不犹相照妯说文云动也子华子云忧心
有妯心由是以动也方言云扰也齐宋曰妯郑云妯之言悼也按妯字从女训动训扰训悼於
文义虽近之终於制字从女之义无涉尔雅注娣姒或曰妯娌则妯字自有其解说文引此诗
妯作恟字从心云朗也以朗状忧者此心炯炯所见惟有忧之一路犹所云耿耿小明忧之貌
也其德即不同之德犹若也似也按犹乃兽名性多疑虑故借以爲恍惚之义不犹言与後之
人不相彷彿也首章第虚虚言怀次章乃言所怀者先王不同之德至此则隐隐讽到王身上
矣】鼓鍾钦钦【侵韵】鼓瑟鼓琴【侵韵】笙磬同音【侵韵】以雅【丰本作正】以南
【叶侵韵乃林翻又後汉书陈忠传引此诗於此句下有韎任朱离四字】以龠【丰本作龠
】不僭【叶侵韵千寻翻 赋也钦说文云欠貌盖震栗之容见于欠伸故又借以爲敬也钦钦
毛云言使人乐进也孔云此亦鍾声也云使人乐进者以陈先王之正乐正声之美使人闻乐
而进于善也鼓瑟鼓琴详见关雎鹿鸣篇乐书琴瑟论云古者瞽蒙掌琴瑟诗鹿鸣鼓瑟鼓琴
书曰琴瑟以咏大传亦曰大琴练弦达越大瑟朱弦达越尔雅曰大琴谓之离大瑟谓之洒明
堂位曰大琴大瑟中琴小瑟四代之乐器也古之人作乐声应相保而爲和细大不踰而爲平
故用大琴必以大瑟配之用中琴必以小瑟配之然後大者不陵细者不抑五声和矣後世有
雅琴雅瑟颂琴颂瑟岂其声合于雅颂耶又云考之虞书琴瑟以咏则琴瑟之声所以应歌者
也歌者在堂则琴瑟亦宜施之堂上矣又云关雎先琴瑟後鍾鼓此诗先鼓鍾後琴瑟者盖琴
瑟者乐之常鍾鼓者乐之盛关雎主乐得淑女至诚有加而无已故絃常以至盛鼓鍾主刺好
乐而不厌故先其盛者所以甚刺之也笙磬居八音中之二笙解亦见鹿鸣篇笙者匏音堂下
之乐记云歌者在上方匏竹在下方因笙磬连言遂以爲磬名非也按周礼眡了掌击颂磬笙磬
大射礼云乐人宿县于阼阶东笙磬西面其南笙鍾其南鑊皆南陈又云西阶之西颂磬东面
其南鍾其南鑊皆南陈解者谓磬在东方者名笙以东生出之方也在西方者名颂以西成功
之方也颂或作庸庸功也二磬对立无缘独举笙磬爲言故知其谬陈阳云大射仪笙磬西面
其南笙鍾盖笙艮音也於方爲阳鍾兑音也於方爲陰周官笙师掌教吹笙共其鍾笙之乐以
教衽夏书曰笙鏞以闲是鼓应笙之鍾而笙亦应之也眡了掌击笙磬磬乾音也与笙同爲阳
声是击应笙之磬而笙亦应之也笙磬则异器而同音笙鍾则异音而同乐仪礼有衆笙之名
而簠在建鼓之间盖衆笙所以备和奏洽百礼岂特应鍾磬而已哉鹿鸣所谓鼓瑟鼓琴吹笙
鼓簧应琴瑟之笙也宾之初筵曰龠舞笙鼓应鼓之笙也檀弓孔子十日而成笙歌仪礼歌鱼
丽笙絃庚之类应歌之笙也然则笙之爲用岂不备哉磬石音虞书谓击石拊石是也亦有用
玉者虞书谓戛击鸣球是也堂上之乐考工记云磬氏爲磬倨句一矩有半按磬形如人字以
上曲而折角者爲倨句下自左右两角不言湾曲而惟以直言爲倨矩者爲方之器自此倨句
磬形而言有如一长方并半长方也或云磬形四方如一矩焉内缺少一角犹云一矩之内有大
半也尔雅云大磬谓之鼗徒鼓磬谓之寒释名云磬磬也其声磬磬然坚致也明堂位云叔之
离磬世本云母句氏作磬母句尧臣也广雅云母句氏磬十六枚张萱云世或谓黄帝使伶伦
爲磬又谓尧实使叔爲磬余按特县者名离磬即大磬曰鼗是也母句氏及伶伦所制则编磬
也第编磬止十二枚以应十二律汉成帝时犍水滨得石磬十六枚此乃後世工师传会二少
二变之说郑康成亦从之误矣陈云磬立秋之音夷则之气也其用编之则櫜而小离之则特
而大叔之离磬则专簠之特磬非十二器之编磬也周官磬师掌教击磬击编鍾言编鍾於磬
师则知有编磬矣大则持县小则编县仪礼鼗倚於颂磬西紃所谓紃者其编磬之绳与又云

应笙之磬谓之笙磬应歌之磬谓之颂磬笙磬在东而面西颂磬在西而面东颂磬歌于西是南乡北乡以西方爲上所以贵人声也笙磬吹于东是以东方爲下所以贱匏竹也大射鼗倚于颂磬西紃颂磬在西而有紃是编磬在西而以颂磬名之特磬在东而以笙磬名之然言笙磬继之以钟鐃应笙之钟鐃也笙师共笙钟之乐是已言颂磬继之以钟鐃应歌之钟鐃也左传歌钟二肆是已愚按笙磬同音专主笙磬相和言旧说皆总上琴瑟言非是以雅以南者以奏二雅以奏二南也郑樵云周世未有乐名南者惟鼓钟之诗曰以雅以南左氏载季札观乐有舞象箛南龠者详而考之南龠二南之龠也象舞颂之维清也箛之舞象龠之奏南其在当时见古乐如此而文王世子又有所谓胥鼓南则南之爲乐古矣程大昌云南雅颂乐名也若今乐曲之在某宫者也南有周召颂有周鲁商本其所从得而还以系其国土也二雅独无所系以其纯当周世无所标别也均之爲雅音类既同又自别爲大小则声度必有丰杀廉肉亦如十二律然既有大吕又有小吕也若夫邶鄘卫十三国者诗皆可采而声不入乐则直以徒诗着之本土春秋诸侯卿大夫士赋诗道志者凡诗襍取无择至考其入乐则自邶至豳无一诗在数享之用鹿鸣乡饮酒之笙絺庚鹄巢射之奏驹虞采芣诸如此类未有或出南雅之外者然後知南雅颂之爲乐诗而诸国之爲徒诗也杜预之释左氏亦知南龠当爲文乐矣不胜习传之久无敢正指以爲二南也刘炫之释鼓钟虽疑雅南当爲二南亦不敢自信惟能微出疑见而曰南如周南之意而已诸儒既不敢主二南以爲南而钩命决之书叙载四夷凡乐适有名南者郑氏因遂采取以传足其数孔颖达辈率皆因袭其说凡六经之文有及于南者皆指南夷南乐以应塞古制甚无理也且夫周备古乐如韶夏濩武各取一代极盛者用之何有文王象舞而独采夷乐以配此其谬误不待辨而白也假设其时欲以广取爲备乃四夷之乐独取其一何名爲备此予所以敢违诸儒之说也语曰夫子自卫反鲁然後乐正雅颂各得其所夫雅颂得所于乐正之後非乐而何子谓伯鱼曰女爲周南召南矣乎爲之爲言有作之义既曰作则有器有声非但歌咏而已夫在乐爲作乐在南爲鼓南质之论语则如三年不爲乐之爲吾以是合而言之知二南二雅三颂之爲乐无疑也邹云按仪礼礼记凡乐四节首节歌也工入升堂歌鹿鸣四牡皇皇者华是爲升歌三终其比歌则以瑟手弹而口和也二节笙也笙入堂下奏南陔白华华黍是爲笙入三终其辅笙则以磬所谓磬南北面立也于是堂上间歌鱼丽则堂下笙絺庚堂上间歌南有嘉鱼则堂下笙崇丘堂上间歌南山有台则堂下笙絺仪是爲间歌三终歌笙相禅故曰间此乐之第三节也于是上歌关雎笙吹鹄巢合之上歌葛覃笙吹采芣合之上歌卷耳笙吹采芣合之堂上下歌瑟及笙并作是爲合乐三终此乐之第四节也燕礼又有所谓下管新宫大射仪亦曰新宫三终乡射礼又曰奏驹虞间若一鼓瑟鼓琴笙磬同音以雅以南此之谓也以龠孔云谓吹龠而舞也简兮曰左手执龠右手秉翟或谓之羽舞也郑云龠舞文乐也解见简兮篇周礼龠师职云掌教国子舞羽敔龠祭祀则鼓羽龠之舞宾客飧食则亦如之僭犹乱也不僭专就龠舞言乐之章有诗乐之容有舞以龠协音舞蹈疾徐有节是谓不僭此章絶无刺辞言外见乐非不古特作乐之人异于古耳此我之所以心忧也】

鼓钟四章章五句【序云刺幽王也然史无幽王东巡之事或又有谓淮水爲害幽王作乐而不恤则凿之尤矣又有谓此诗爲徐偃王作者亦似近之但无据不敢信】

卷十三

钦定四库全书

诗经世本古义卷十三

明 何楷 撰

周共王之世诗一篇

绸缪刺密康公也康公从恭王游于泾上有三女奔之诗人托爲其母之辞以刺之【周语云恭王游于泾上密康公从有三女奔之其母曰必致之于王夫兽三爲羣人三爲衆女三爲粲王田不取羣公行下衆王御不参一族夫粲美之物也衆以美物归女而何德以堪之王犹不堪况尔小丑小丑备终必亡康公弗献一年王灭密列女传称康公母姓隗氏按路史国名记载赤狄潞氏皆隗姓潞氏後爲晋所灭是诗乃周畿内诗而入之唐风者倘亦以康公母族後入晋故欵诗言三星言粲者又言邂逅非三女同奔之事而何】

绸缪束薪【真韵丰氏本作新】三星在天【叶真韵汀因翻】今夕何夕见此良人【真韵】子兮子兮如此良人【同上】何【赋之兴也绸说文云缪也缪说文云枲之十絜也今按绸右施周周者密也绸缪连文当是以十絜之枲周而束之毛传所谓犹纏绵也孔颖达云绸缪是束薪之状薪解见汉广篇曹氏云诗人每以薪喻婚姻如翘翘错薪析薪如之何是也束薪者析于彼而合于此有婚姻之义焉苏辙云合异姓以爲婚姻譬如错取衆薪而束之耳薪之爲物束之则合而释之则解是则绸缪固之而後可以望其合也三星之解有二毛以爲参参爲白虎宿见于十月而中于正月郑笺及朱传皆以爲心心爲明堂火星见于三月而中于六月今未知此诗果何所指也在天谓初昏之时始见东方也严粲云二十八宿半隐半见故以始见东方爲在天绸缪束薪仰而见三星则在天陶诗采菊东篱下悠然见南山语意同此取兴三星亦三女同奔之况耳妻象月妾象星譬彼小星三五在东正同斯义今夕谓今此三星在天之夕也曰何夕者讶之之辞後仿此良人夫也孟子谓良人者所仰望而终身是也子兮子兮称女之辞也因此女来奔故重言之以致其讽动之意男女居室人之大伦今也不繇其道而妄委身于人虽称之曰良人恐未必终爲汝之良人也将如此良人何哉易曰见金夫不有躬无攸利此之谓也】绸缪束刍【叶尤韵侧鳩翻亦叶有韵楚九翻】三星在隅【叶尤韵鱼侯翻亦叶有韵语口翻】今夕何夕见此邂逅【释文丰本俱作解下同】逅【叶尤韵户钩翻亦叶有韵狼口翻释文丰本俱作覩下同】子兮子兮如此邂逅【同上】何【赋之兴也刍说文云刈^𠂔也其字象包束^𠂔之形配不以正犹之束乱^𠂔而已隅毛云东南隅也朱子云昏见之星至此则夜久矣邂逅二字说文合解之云不期而遇也见此邂逅合密康公与三女而并言之子兮子兮上子指康公下子指三女也如此邂逅何知其必不终也】绸缪束楚【叶麋韵读如取此主翻】三星在户【麋韵】今夕何夕见此粲者【叶麋韵当古翻】子兮子兮如此粲者【同上】何【赋之兴也楚说文云丛木一名荆也解亦见汉广篇楚在衆薪中特爲翘起故以兴粲者见其美异于他女耳汉广之诗曰翘翘错薪言刈其楚虽所取

不同然寓意相类户朱子云室户也户必南出昏见之星至此则夜分矣粲通作𠂔说文云三女爲𠂔𠂔者美也子兮子兮晓悟康公之辞也小丑备物终亦必亡而已矣其如此粲者何哉先主女来奔而言故首云良人既则主康公与三女相见而言故次云邂逅既又主康公受三女之奔而言故末云粲者黄省曾云密康公室家久矣又濫取奔女而勿受厥母之诫则其覆宗也固宜】

绸繆三章章六句【序以爲刺晋乱也国乱则昏姻不得其时焉申培说亦云晋乱民穷昏嫠失时君子伤之而作是诗朱子谓此但爲昏姻者相得而喜之词首章妇语夫次章夫妇相语末章夫语妇三说之意皆同然末章言粲者於义何居岂其国乱婚姻失时而仍能备妾媵耶子贡传阙文】

诗经世本古义卷十三

卷十四

钦定四库全书

诗经世本古义卷十四

明 何楷 撰

周懿王之世诗一篇

还刺荒也齐哀公好田猎从禽兽而无厌国人化之遂成风俗习于田猎谓之贤闲於驰逐谓
之好焉【出序哀公名不辰太公四世孙後朝周爲夷王所烹因纪侯之譖也宋衷云哀公荒
淫田游史作还诗以刺】

【之按史记曰懿王之时王室遂衰诗人作刺金履祥云诗之时世多不可考其时王风未作
变小雅多有刺诗序皆以爲刺幽王太史公多见古书殆必有考胡氏大纪以齐哀公之立当
在懿王之世而以刺哀公之诗隶之】

子之还【叶先韵旬宣翻齐诗汉书水经注丰氏本俱作营云营丘也韩诗作嬖云好貌】兮
遭我乎【说文作于汉书齐诗俱作虓】猺【齐诗汉书崔灵恩集注丰氏本俱作嶲吕氏注
作巘】之闲【叶先韵居贤翻】兮并驱【释文作駈丰本作毆後同】从【说文作从】两
肩【先韵说文释文俱作豨丰氏本作狷】兮揖我谓我儼【先韵韩诗丰氏俱作嫺云好貌
】兮【赋也孔穎达云三章皆士大夫相答之辞还通作嫺说文云材紧也所谓便嫺也郑玄
云子也我也皆士大夫也俱出田猎而相遭也遭说文云遇也徐锴云犹匝也若行复相值也
猺齐山名字从山从狃按狃之爲义犬性骄也此山当是猎犬出没之所故从狃也董氏云考
于地记嶲猺巘皆山名在齐之郊故诸书或异间近也与猺山相近也并说文云并也即子与
我也驱驱马也从逐也张揖云兽三岁爲肩不定其爲何兽也或以爲即豨说文云豨三岁豕
肩相及者诗猺豨于公是也揖我谓我儼誉辞也儼说文云慧也孔云以报答相誉则尊卑平
等非国君也然驰车逐兽又非庶人故知子也我也皆士大夫出田相遭也严粲云以子之便
捷乃揖我谓我甚儼利也如子之能尚且见推此自矜于其党以气陵之之辞也章潢云子之
还兮已誉人也谓我儼兮人誉己也并驱则人已皆与有能也诗人直述其词而不加一语以
致美刺之意然齐人矜夸之俗昭然不容掩矣又班固云此亦其舒缓之体也】子之茂【叶
有韵莫後翻丰本作戊】兮遭我乎猺之道【叶有韵他口翻】兮并驱从两牡【有韵】兮
揖我谓我好【叶有韵许厚翻】兮【赋也茂盛也谓年华壮盛犹今言茂龄也道者适猺之
路尔雅云一达谓之道路牡说文云畜父也亦不明言其何兽好美也犹言其年力恰与彼相
宜也】子之昌【阳韵】兮遭我乎猺【丰本首章作嶲次章作猺此章作巘】之阳【韵】
兮并驱从两狼【阳韵】兮揖我谓我臧【阳韵】兮【赋也昌说文云美言也每相称誉是
其言之美也山南曰阳初犹近猺既而适猺此则在猺之中矣陆佃云狼物之尤暴戾者故诗
以爲後豺祭狼卜又善逐兽里语曰狼卜食狼将远逐食必先倒立以卜所向故今猎师遇狼

輒喜盖狼之所向兽之所在也其灵知如此许慎云狼似犬锐头白颊高前广後陆玑云其鸣能小能大善爲小儿啼声以诱人去数十步其猛健者虽善用兵者不能免也按尔雅云狼牡獾牝狼其子獾絶有力迅狼爲总名分之则有獾狼獾迅四名然狼之名独归之牝者罗愿云鸟之类雄挚于雌兽之类牝猛于牡以乳获其子非可得犯也是以黑爲熊之牝而黑猛于熊狼爲獾之牝而狼名独着虎猛者称乳虎盖其类也又陈祥道云周礼庖人掌共六畜辨其名物春秋传言六畜五牲以奉五味郑司农谓六兽者麋鹿熊麋野豕兔郑康成谓兽人冬献狼夏献麋又内则无熊则六兽当有狼而熊不属杜预则曰五牲者麋鹿狼麋兔今考之於诗五豝五豝两肩两狼私豝献豝麋鹿麋麋小豝大兕内则有鹿脯田豕脯麋脯麋鹿田豕麋皆有轩又曰麋鹿爲菹麋爲辟鸡野豕爲轩兔爲宛脾少仪麋鹿爲菹野豕爲轩皆聂而不切麋爲辟鸡兔爲宛脾皆聂而切之内则八珍有狼膍膏则六兽当有狼无熊如康成之说五牲当有野豕非如杜氏之论也臧善也誉其技艺之善邹忠胤云夫鬪鸡走犬六抔蹴鞠者齐之俗固然其於田事尤所习但如豳风之于貉爲裘其同纘武秦风之奉时辰牡亦谁得訾且禁之乃卒然狭道相逢而必欲以僇狡逞伎吕氏谓意气飞动勃勃见于眉宇之间所以染其神者深矣曹植乐府名都篇有云鬪鸡东郊道走马长楸间驰骋未能半双兔过我前揽弓捷鸣镝长驱上南山左挽因右发一纵两禽连余巧未及展仰手接飞鸢观者咸称善衆工归我妍此正与营之诗同意盖刺时人游聘之乐也邓元锡云还刺禽荒也言俗好猎不言君从禽斯风人之旨哉】

还三章章四句【韩诗篇名作嬖齐诗子贡传申培说丰氏本俱作营 子贡传云齐俗习于田赋营申培说云齐俗好田君子刺之朱传云猎者交错于道路相称誉如此皆不着其世愚以序及宋衷两说脗合皆以爲哀公时事故从之】

诗经世本古义卷十四

卷十五

钦定四库全书

诗经世本古义卷十五

明 何楷 撰

周夷王之世诗三篇

柏舟言仁而不遇也卫顷公之时仁人不遇小人在侧【出序 焦氏易林云泛泛柏舟流行不行耿耿寤寐心怀大忧仁不逢时退隐穷居孔丛子载孔子曰吾于柏舟见匹夫执志之不可易也按顷公时事无所考据史记卫自康叔封爲孟侯子康伯立六传至贞伯俱降封伯贞伯卒子顷侯立厚赂周夷王复命爲侯以諡法考之堕废社稷曰顷则谓其时仁人不遇小人在侧者理或然也】

泛彼柏舟【尤韵】亦泛其流【尤韵】耿耿不寐如有隐【文选注作殷】忧【尤韵】微我无酒以敖【释文一作遨】以游【尤韵 丰氏本作游 比而赋也泛浮也柏木名说文谓之鞠尔雅谓之掬陆佃云襍记所谓畅曰以掬者是也柏性坚致有脂而香故古人破爲畅曰用以捣郁竹竿之诗云桧楫松舟菁菁者莪之诗云泛泛杨舟是则松杨皆可爲舟而此独言柏舟者以柏木内贞外固故贤者取以自况後章匪石匪席之心内之贞也威仪二句外之固也舟载渡物者今不用而泛泛然流于水中喻已有济世之才而不见用也又严粲云舟以喻国必有人以维楫之而後能有所济今浮舟于水而无其人以维楫之则亦浮泛而流去耳其将何所止泊乎所谓渡江河亡维楫中流而遇风波船必覆矣亦泛其流犹言譬彼舟流不知所届也亦通耿杜林云光也朱子云耿耿小明忧之貌也辅广云人有所忧则其心耿耿然惟于忧之一路分明耳其他固有所不及也古人下字不苟如此惟其心耿耿然故不能寐也如有隐忧者沈忧之人不知所忧何事但觉胸中有物耳微之言非盖音近也遨说文云出游也从出从放以出放爲遨盖会意也非我无酒可藉遨游以解此忧而此忧似非酒与遨游之所能解耳】我心匪鉴【释文作监 韩诗外传作监】不可以茹【御韵】亦有兄弟不可以据【御韵】薄言往愬【遇韵】逢彼之怒【遇韵 赋也鉴镜也所以察形茹方言云食也吴越凡贪食者谓之茹故其义又训受取吞纳之意诗柔则茹之是也解见烝民篇 欧阳修云传曰火日外景金水内景盖鉴之於物纳影在内凡物不择妍媸皆纳其景我心匪鉴不能善恶皆纳善者纳之恶者不纳以其不能兼容是以见嫉于在侧之羣小而独不遇也 韩诗外传云君子洁其身而同者合焉善其音而类者应焉马鸣而马应之牛鸣而牛应之非和也其势然也故新沐者必弹冠新浴者必振衣莫能以己之皤皤容人之混汚然诗曰我心匪鉴不可以茹此之谓也 兄弟指僚友言据说文云杖持也犹言依也薄发语辞愬说文云告也逢说文云遇也彼彼兄弟也怒说文云恚也共事兄弟不与我同心意向既殊则言不相入故往愬以情而反逢其怒犹离骚所谓申申詈予者也上章言上不得于君此章言下不得于寮友也】我心匪【列女传作非】石不可转【叶铕韵 陟兗翻】也我心匪【列女传作非】席不可卷【铕

韵】也威仪棣棣【礼记释文作逮】不可选【铎韵朱穆传注作算】也【赋也转说文云运也筦蒲曰席卷本曲?之义因爲舒卷之卷此承上往愬逢怒而言小人之恶君子曰何爲斯踽踽凉凉然君子终不以是故易其所守于是自誓亦我心非如石然石可转我心之专一不可转也我心非如席然席可卷我心之专一不可卷也刘向云言守善笃也棣通作逮说文云及也威仪棣棣言其威仪之所泛及者衆多之辞也故毛传训棣棣云富而闲习也物有其容不可数也贾谊云夫有威可畏谓之威有仪可象谓之文富不可爲量多不可爲数故诗曰威仪棣棣不可选也棣棣富也不可选衆也言接君臣上下父子兄弟内外大小品事之各有容志也左传北宫文子亦云言君臣上下父子兄弟内外大小皆有威仪也愚按古字选算通用论语斗筭之人何足算也汉书作斗筭之徒何足选也故以不可选爲衆若如字解则选乃简择也言威仪棣棣然盛各有常度谁可容吾简择而自贬以苟合乎故孔子引此诗而以爲无体之礼也是道也非大德不踰闲而细行必矜者其孰能之诗之好仁如此】忧心悄悄【筱韵】愠于【尹文子作於】羣小【筱韵】覲【释文丰本作邁】闵既多受侮不少【筱韵】静言思之寤【说文作晤】辟【尔雅作擗陆德明本作擘】有標【叶筱韵卑小翻 赋也上章言内不失乎已此章言外不理于口也悄徐锴云忧思低小也愠说文云怒也羣小衆小人在君侧者君子见远识微忧先于事小人安其危而乐其所以亡见君子与已异趣则尝疾视于君子故君子忧国之心悄悄然反见怒于羣小也昔者孟子诵此诗而以孔子当之而孔子亦曰小人成羣斯足忧矣覲遇见也闵吊者在门也侮伤也俱见说文不少者不一而足也小人得志则爲谗譖以害君子既可哀怜矣又复从而伤之其曰既多不少者以着小人之衆也静说文云审也言语辞说文云寐觉而有言曰寤辟通作擘说文云搗也標说文云击也言静审而思念之每寤觉之时但自搗其手以拊心而已盖爲国事痛非自伤其遇也】日居月诸胡迭【韩诗作戡云伤也】而微【韵】心之忧矣如匪澣衣【微韵】静言思之不能奋飞【微韵 比也日君象月臣象居诸者语助也檀弓云何居左传云忽诸皆语助也迭说文云更迭也微本隱行之义严云谓不明也日月食则不明十月之交云彼月而微此日而微是也言日食朔月食望日乎月乎何爲更迭而皆微乎喻卫之君若臣并昏也匪通作非澣说文云濯衣垢也匪澣衣谓垢污不濯之衣郑玄云衣之不澣则愤辱无照察愚按如匪澣衣犹孟子所谓如以朝衣朝冠坐于涂炭者又苏辙云忧之不去于心如衣垢之不澣不忘濯也亦通奋说文云翬也翬者大飞也不能奋飞言不能如鸟大奋翼而飞去也虽含垢忍辱如此然以义则不可去以情则不忍去知其无可奈何而安之若命厚之至也此即箕子我不顾行遯之意若夫屈原事楚不忍其愤怀沙自沈此犹贤者之过贾谊不见用于汉文吊湘作赋乃曰历九州而相其君兮何必怀此都也则心可转而卷矣噫序以作此诗者爲仁人诚仁人哉】

柏舟五章章六句【韩婴以爲卫宣姜自警所作刘向列女传亦云卫宣夫人者齐侯之女也嫁于卫至城門而卫君死保母曰可以还矣女不听遂入持三年之丧毕弟立请曰卫小国也不容二庖请愿同庖终不听卫君使人愬于齐兄弟齐兄弟皆欲与君使人告女女终不听乃作诗愚按卫宣姜生子寿朔至宣公卒而见燕于昭伯左传记载甚明今云至城門而卫君死岂有两卫宣乎又他日向上封事论恭显倾陷正人引是诗忧心悄悄愠于羣小则又解之曰小人成羣亦足愠也夫非即向之言哉何其与序合乃尔乃朱子本列女传之意而以爲此妇人不得于其夫之诗遂疑庄姜所作政坐爲毛传篇次误耳然章首言饮酒遨游此岂妇人事愚未敢以爲然申培说以爲康叔因管叔欲害周公挟武庚以叛忧之而作考地理志云邶

以封紂子武庚使管蔡监之是诗固邶风也篇中如亦有兄弟不可以据似是恶管蔡之词至如威仪棣棣颯飏受侮等语皆与康叔不类至子贡传则谓管叔封于邶与蔡叔霍叔康叔监殷四国害周公康叔谏不听三叔遂以殷叛康叔忧王室赋柏舟子曰仁矣汉书亦曰周公善康叔不从管蔡之乱然考史记明言武王封管蔡之时康叔尚少未得封及周公杀武庚禄父管叔放蔡叔以武庚殷遗民封康叔爲卫君周公旦惧康叔齿少乃申告康叔谓之康诰酒诰梓材以命之则所谓康叔先受封及不从管蔡之乱者皆未足信】

北門仕不得志也亦卫顷公时之诗【序云刺仕不得志也言卫之忠臣不得其志尔朱传亦云卫之贤者处乱世事暗君不得其志愚按柏舟之诗曰亦有兄弟不可以据所谓兄弟指僚友也此诗言我入自外室人交徧谪我室人亦指僚友也其语意固已相类又史记载卫自康叔後六世俱降爵爲伯至顷侯厚赂周夷王夷王始命卫爲侯此诗云王事敦我意必曾有遣使往周之事故以王事称耳】

出自北門【叶真韵眉贫翻亦叶先韵谟连翻】忧心殷殷【叶真韵於真翻亦叶先韵因莲翻释文作殷殷】终窶且贫【真韵亦叶先韵频翻】莫知我艰【叶真韵渠巾翻亦叶先韵经天翻丰氏本作艱】已焉哉【叶支韵将其翻韩诗外传作亦已焉哉】天实爲之【支韵】谓之何哉【叶韵见上 赋也自从也旧说谓北門背阳向阴故借爲事暗君之况然以下章我入自外证之则亦不过因征役出此門遂赋之以自叹耳殷通作殷说文云痛也所痛心者非一故重言之若下文所称是也终者自始至今之谓窶说文云无礼居也徐锴云阶阼升降所以行礼贫无礼故先见於屋室贫说文云财分少也终窶且贫二事之辞窶则无以爲居贫则无以自给也艰尔雅云难也无知己以此爲难者言君既然矣诸臣亦如之严粲云仕不得志谁知我远役之艰苦者盖从事独贤之叹也已焉哉言固不见知于人亦无望于人矣郑云诗人事君无二志故自决归之于天孔云君臣义合道不行则去今君于已薄矣犹云勤身以事之知复何哉无去心是忠之至也愚按此与柏舟篇末言不能奋飞意正相似定是一人之作庄子云夫仕其君者不择事而安之忠之盛也知其无可奈何而安之若命德之至也】王事适【陌韵】我政事一埤益【陌韵】我我入自外室人交徧谪【陌韵】我已焉哉天实爲之谓之何哉【哉之韵见首章 赋也凡以事往来于王所者皆谓之王事适说文云之也政事谓本国之政事如兵甲财赋内外盟会之类一犹皆也埤增也益饶也俱见说文言奉命王所之事既适于我矣卫国之政事又皆一切增益丛集于我矣我入自外者我行役自外而归也室人谓僚案也尽人而求曰交每事而责曰徧谪责也苏辙云言已事而反则其处者争求其瑕疵而谴责之言劳而不免于罪也谓之室人者在内而不事事也旧以室人爲室家之人交徧谪我如周书所谓弗能有好于而家者亦自可通但专以叹贫爲言于义似浅】王事敦【叶灰韵鱼回翻】我政事一埤遗【叶灰韵夷回翻】我我入自外室人交徧摧【灰韵释文作催韩诗丰本俱作?】我已焉哉天实爲之谓之何哉【哉之韵见首章 赋也敦说文云怒也韩诗云迫也盖督促而不能副其意则怒也遗通作贻说文云赠也适者始辞敦者极辞益者略辞遗者尽辞摧说文云挤也一云捫也皆挫抑之意】

北門三章章七句【子贡传云管叔以殷畔仕者苦之故赋此诗然以武庚之事爲王事是岂明于义者耶申培说以爲邶之仕者处危国事乱君因征役而出門赋之以自叹彼但见此诗

在邶风中故云然不必有所据】

北风贤者去国也亦卫顷公时诗【愚按此与柏舟北门二篇皆爲僚友不睦之语而或去或不去异矣所以系之顷公者柏舟之序曰卫顷公之时仁人不遇小人在侧此诗亦足以当之】

北风其凉【阳韵】雨【去声後同】雪其雱【阳韵穆天子传注作 籀文作雱】惠而好
【去声後同】我携手同行【叶阳韵寒刚翻】其虚其邪【叶鱼韵祥余翻尔雅丰氏本俱作徐】既亟只且【叶鱼韵子余翻 兴也北风寒凉之风程子云四时之风春而自东则生物也夏而自南则养物也秋而自西则成物也冬而自北则杀物也以北风之杀害万物故以起兴自上而下曰雨雪说文云凝雨说物者本作?从雨从彗盖雪雨之可埽者亦能净纷秽若彗也省作雪释名云雪绥也水下遇寒而凝绥绥然下也雱即旁字说文云溥也雪助风爲虐风以譬君雪以譬臣惠说文云仁也犹爱也好谓相好也携说文云提也行去也言谁有仁人与我相亲厚者我将提携其手与之同行去而避之也其虚言君子在野也孟子云不信仁贤则国空虚邪者正之反其邪言小人在位也既尽也亟通作?说文云疾也或通作?说文云急也只且语助辞孔颖达云我所以去之者非直爲君之酷虐而在位之臣莫不尽爲急刻之行矣所以当去以此也又邓元锡云内经四时有经风风从其方来曰实风主生养收藏从其冲若前後來曰虚邪贼风犯则伤人按此解於虚邪二字亦合但章首以风雪并言不应咏风遗雪耳况末章亦有此二句而章首并无北风之语乎】北风其喈【古文作 𠂔】雨雪其霏【微韵列女传作霏霏】惠而好我携手同归【微韵】其虚其邪【见前】既亟只且【见前 兴也喈通作偕说文云强也霏雱也雪落急也毛传云甚貌谢枋得云喻祸害愈急也又陆佃云雱盖言聚霏盖言散凉者其刻也喈者其和也自今观之雪势布散无所不加其意或未艾也则风侯更和故是诗风以其喈雪以其霏爲後虽理亦可通然恐非诗意归拟归家而退休也】莫赤匪狐【虞韵】莫黑匪乌【虞韵亦叶麻韵於加翻】惠而好我携手同车【麻韵韦昭云古惟尺遮翻自汉以来始有居音按章首二句同用虞韵则此亦当叶虞韵读如驹恭于翻谓汉後始有居音者恐未然】其虚其邪既亟只且【邪且韵见首章 比也狐兽名似犬赤色说文云狐妖兽也鬼所乘之乌鸟名一名鷩黑色其字象形林罕以爲全象鸟形但不注其目睛万类目睛皆黑乌体全黑远而不分别其睛也狐乌皆不祥之物狐之类皆赤乌之类皆黑人莫能分别赤以爲非狐者莫能分别黑以爲非乌者繇狐赤乌黑其类相似以况卫之诸臣同恶相济无有出于其类者陆佃云狐羣者也乌合者也又管子曰乌集之交初虽相驩後必相咄诗人每引以刺者非特讥其爲恶如一亦以刺其初皆利合不以道也一说严粲云最赤者狐最黑者乌见其色而可知矣犹卫之无道不难辨也宜速去亦通程子云同车亦偕行耳但卒章词意益迫切同车有已驾之意愚按只因此一语故疑爲仕于卫者所作】

北风三章章六句【序以爲刺虐也卫国并爲威虐百姓不亲莫不相携持而去焉程子谓诗爲君子见几而作非百姓相携而去今按末章有携手同车之语则其非贱者可知矣子贡传申培说皆谓邶国危乱士民去之丰熙附会其说指爲管叔不义而衆叛亲离也然味诗意实不尔】

诗经世本古义卷十五

卷十六

<经部,诗类,诗经世本古义>

钦定四库全书

诗经世本古义卷十六

明 何楷 撰

周厉王之世诗十篇

渐渐之石将士苦东征也【竹书纪厉王三年淮夷侵雒王命虢公长父伐之不克是诗之作疑在此时也淮夷在东方故篇中有东征之语深入苦雨师人扶病不暇其不能克敌可知矣】

渐渐【陆德明本子贡传申培说丰氏本俱作嶮嶮】之石维其高【豪韵】矣山川悠远维其劳【豪韵】矣武人东征不皇【朱传大全俱作遑後同】朝【叶豪韵直高翻】矣【赋也首二句以远言渐渐於石义难通释文作嶮嶮然考说文无嶮字疑但通作斩言石之森立其状如斩截然也刘彝云渐渐之石维其高矣者谓所历之路石皆廉利伤人之足割马之蹄不可以践履也不独渐渐而已其高峻峭拔非攀缘则不可以登也悠本忧思之义借以爲长远之意山川悠远者刘云其山穷者川断之也其川尽者山间之也重重相间不可极不曰悠远乎劳说文云剧也谓疲倦也程途辽邈我行将倦此初行而悬拟之辞非已行而倦也武人郑玄云谓将率也东征者受王命东行而征伐也皇通作遑朱子云暇也按遑本训急或训爲暇者盖反言之犹乱之爲治也覲君曰朝周礼注云朝犹朝也欲其来之早也不皇朝矣者谓身既远行不得朝见天子此章以陞辞就道之时言严粲云虽在劳苦之地不忘君也】渐渐【丰本作嶮嶮】之石维其卒【叶质韵即聿翻】矣山川悠远曷其没【叶质韵莫笔翻】矣武人东征不皇出【质韵】矣【赋也卒毛传云竟也孔颖达云渐渐然险峻之山石我等登之维其终竟言徧历此石也没者沈灭之义犹尽也上章因石路阻隔不前而叹山川之悠远此章言既过此石而山川之悠远仍复如故故又叹其登历何时而可尽也一说万时华云没字状深箐悬洞杳杳深入之意曷何爲也杜子美诗行色逴隐见人烟半有无仆夫穿竹语稚子入云呼可想此景亦通不皇出矣朱子云谓但知深入不暇谋出也】有豕白蹢【丰本作?】烝涉波【歌韵】矣月离于毕俾滂【丰本作霿】沱【歌韵史记作池】矣武人东征不皇他【歌韵丰本作它】矣【丰本於此章之上又有一章其辞云马鸣萧萧陟彼厓矣月离于箕风扬沙矣武人东征不皇家矣盖因春秋有月离于箕风扬沙之语而妄益之其肤鄙可笑如此赋也豕彘也姤初六云羸豕孚蹢躅说文训蹢爲住足训躅则但曰蹢躅毛亨孙炎皆训蹢爲蹄今以意详之则住足之训当分属蹢躅两字足即蹢所谓蹄也躅当训住其音类也蹢尔雅亦作蹢云豕四蹢皆白 郑云豕之性能水又唐突难禁制白蹄其尤躁疾者孔云骇与 字异义同骇者躁疾之言白蹄名之爲骇是躁疾于余豕罗愿云在十二肖皆配十二

支故已象虵豕象亥史晋师伐齐以己亥爲三豕是也今既从豕又从亥者盖北方之卦水洊至焉 豕爲水之畜又应於水爲能充其类故在物从豕在气从亥烝本火气上升之义故又训爲进也涉说文云徒行厉水也波说文云水涌流也韩诗注云犬喜雪马喜风豕喜雨陆佃云说卦坎爲豕坎性趋下豕能俯其首又喜卑秽亦水畜也罗云豕之性能水牧猪之所必在水草之交故潞从猪以猪所食息也天将久雨则豕进而涉水波白蹄尤其躁进者故先进焉愚按涉以流言则是水流涌盛足见雨泽之多非以涉波爲雨兆也或疑此豕爲江豚今按江豚乃风信于雨无与离通作丽易训离爲丽谓相附也亦通作俚月令宿离不賁注读如俚偶之俚谓相偶也毕二十八宿之一解见大东篇孔云以是阴雨之星故谓之阴星甘氏云毕主街巷阴雨天之雨师也故明而移动则霖潦及街壅塞明而定则天下安朱子云毕是漉鱼底又网漉鱼则其汁水淋漓而下若雨然毕星名义盖取诸此今毕星上有一柄下开两义形亦类毕俾使也滂说文云沛也沱本水名今训以爲水貌按沱字右施它它者蛇也当是因其水之蜿蜒而来有如蛇然故施它也汉书云西方爲雨雨少阴之位也月失中道移而西入毕则多雨孔云洪范曰星有好风星有好雨者即此毕是也春秋纬说日月离于箕风扬沙则好风者箕也所以箕好风毕好雨者郑以爲箕东方木宿风中央土气木克土爲妻从妻所好故好风也毕西方金宿雨东方木气金克木爲妻从妻所好故好雨也推此则南宫好阳北宫好燠中宫四季好寒也是繇己之所克而得其妃从其妃之所好故也郑知然者以五行传貌属木言属金视属火听属水思属土庶徵亦依此貌言视听思爲次郑繇此故言雨木气也春而施生故木气爲雨也阳金气也秋物成而坚故金气爲阳也燠火气也寒水气也风土气也凡气非风不行犹金木水火非土不处故知土气爲风以此知风土雨木皆从妃所好也按此说五事庶徵所属与蔡沈书传不同存以备考家语云孔子将近行命从者皆持盖已而果雨巫马期问曰旦无云既日出而夫子命持雨具敢问何以知之孔子曰昨暮月宿毕诗不云乎月离于毕俾滂沱矣以此知之论衡云孔子出使子路齎雨具有顷天果大雨子路问其故孔子曰昨暮月离于毕後日月复离毕孔子出子路请齎雨具孔子不听出果无雨子路问其故孔子曰昔者月离其阴故雨昨暮月离其阳故不雨愚按俾滂沱矣玩一俾字是未雨而预料其将雨以爲月离毕实使之若归咎于月者然与首二句言从前之多雨不同严云停潦尚多雨歇未久而月离于毕则又将雨矣厌苦多雨之辞也对苦雨一事而言谓之他不皇他矣者遭逢蹇而智虑废惟雨是忧足矣尚能讲求制胜之事乎刘云深入蛮夷之域爲山川之所困雨水之所淫战敌未捷病疫相仍救其生命之不暇何皇及于他事哉此章在不皇出矣之後盖已至其地特爲雨所苦而恐其不能战耳辅广云世之治也固未尝无征伐之事也然行者之劳未尝自言而上之人则汲汲然以言其劳之可念世之乱也上之人未尝念其劳而言之也而行者则自言其劳苦而不置焉夫使劳者自言而上之人不加恤焉则乌在其爲民之父母也】

渐渐之石三章章六句【序云下国刺幽王也戎狄叛之荆舒不至乃命将率东征役久病于外故作是诗也按幽王东征之役史传无所经见殆不足信朱子但曰将帅出征经历险远不堪劳苦而作此诗子贡传亦云周人从征赋此而皆不能知其世申培说则直以爲桓王伐郑将帅不堪劳苦而作彼但知郑在周东而不知自西周视天下诸侯之国皆在东方所谓小东大东是也况篇中有山川悠远之语断非指郑可知】

桑柔芮伯刺厉王也【出序朱传从之】托爲诚谏僚友之词以讽切之【郑玄云芮伯畿内诸侯王卿士也字良夫按左文元年秦穆公引大风有隧章称为芮良夫之诗其说与序合序之可信如此篇中不敢斥言王而但斥当时执政者信用非人贪利生事以致祸乱大抵爲荣夷公辈发也周语厉王说荣夷公芮良夫谏不听既荣公爲卿士诸侯不享而墨子亦言厉王染於□公长父荣夷终苟卿成相篇亦云谗夫多进反覆言语生诈态争宠嫉贤利恶忌下敛党与上蔽匿上壅蔽失辅势任用谗夫不能制孰公长父之难厉王流于彘然则□公孰公长父盖亦一时用事之人与又汲冢周书有芮良夫解其言颇与诗意脗合今附录于此芮伯若曰予小臣良夫稽道谋告子惟民父母致厥道无远不服无道左右臣妾乃违民归于德德则民戴否则民讐兹言允効于前不远商纣不道夏桀之虐肆我有家呜呼惟尔天子嗣文武业惟尔执政小子同先王之臣昏行不顾道王不若专利作威佐乱进祸民将弗堪治乱信乎其行惟王暨尔执政小子攸闻古人求多闻以监戒不闻是惟弗知后除民害不维民害民乃非后惟其讐后作类后弗类民不知后惟其怨民至亿兆后一而已寡不敌衆后其危哉呜呼尔无或如之今尔执政小子惟以贪谀爲事不懃德以备难下民胥怨财单竭手足靡措弗堪戴上不其乱而以予小臣良夫观天下有土之君厥德不远罔有代德时爲王之患其惟国人呜呼惟尔执政朋友小子其惟洗尔心改尔行克忧往愆以保尔居尔乃黷祸翫裁遂弗俊余未知王之所定矧乃攸行惟祸发於人之攸忽於人之攸轻阙不存焉变之攸伏尔执政小子不图善偷生苟安爵以贿成贤者箝口小人鼓舌逃害要利并得厥求唯曰哀哉我闻曰以言取人人饰其言以行取人人竭其行饰言无庸竭行有成惟尔小子饰言事王寔蕃有徒王貌受之终弗获用面相诬蒙及尔颠覆自谓有余予谓尔弗足敬思以德备乃祸难难至而悔悔将安及无曰予爲惟尔之祸书序谓芮伯纳王于善暨执政小臣咸省厥躬作爲此书】

菀彼桑柔【尤韵】其下侯甸【真韵尔雅作洵】捋采其刘【尤韵】瘼此下民【真韵】不殄心忧【尤韵孙鑛云柔刘忧与甸民间叶此即後世所谓辘轳韵乃知古人体无所不有愚按篇中多用此体】仓兄【陆德明本作况】填【叶真韵他邻翻】兮倬彼昊天【叶真韵汀因翻】宁不我矜【叶真韵渠巾翻 比也菀毛传云茂貌侯语词据尔雅则伊维之类句说文云徧也按十日爲甸以周匝十日而言之故有徧之义捋说文云取易也诗诂云以指历取也采说文亦云捋取也愚按二字并言义当小别盖逐叶摘之谓之采牵枝以手循衆叶而兼下之谓之捋也刘本作镏杀伐之义桑叶虽茂而徧而或捋之或采之又或刘之三事并用则无遗叶矣喻王之於民其所以残削之者无所不备也豳风言采繁祁祁所谓采也言猗彼女桑毛传以爲角而束之所谓捋也言取彼斧斨以伐远扬所谓刘也欧阳修云他木皆有枝叶而诗人独以桑爲譬者惟桑以叶用于人瘼说文云病也殄尔雅云絶也说文云尽也不殄心忧犹曹操短歌行所云忧从中来不可断絶也见下民之病故心忧也仓通作怆说文云伤也兄通作况说文云狂之貌填本作寘说文云塞也忧之极而怆怆之极而况至于胸膈俱壅塞也倬说文云着大也郑亦以爲明大貌矜兢同音兢者危栗不安之状人心有所怜悯其状亦如之訛而爲矜因又训矜爲怜耳不然矜本矛柄之名训怜殊难解言彼明着于上之昊天见我之忧宁不少加矜怜使民病获瘳而我之忧亦因之以已乎民病之实备在下三章苏辙云桑之爲物其叶最盛然及其采之也一朝而尽无黄落之渐故诗人取以爲比言周之盛也如桑柔之茂其阴无所不徧至於厉王肆行暴虐以败其成业则王室忽焉凋弊如桑之既采民失其阴而受其病故君子忧之不絶于心悲之益久而不已号天而诉之也又陈际泰云周

之於物象瓜也桑也瓜甘美而善潰桑盛而柔周以忠厚立国而尚文归马放牛祖宗贻谋已弱即能延其世也然遂数传而不振吁柔之道固不利远也哉】四牡騤騤【支韵】旃旒有翩【先韵亦叶真韵批宾翻陆本作偏】乱生不夷【支韵】靡国不泯【叶先韵民坚翻亦叶真韵弥隣翻】民靡有黎【叶支韵吕支翻】具祸以烬【叶真韵词辛翻陆本作荇】於【音乌】乎有哀【叶支韵鱼羈翻】国步斯频【真韵说文作𨔵 赋也首章既啓其端次章乃据时事言之騤说文云马行威仪也騤騤毛云不息也鸟隼曰旃龟蛇曰旒此戎车所建礼所谓前朱雀而後玄武也翩说文云疾飞也孔云翩是旌旗行而舒张之貌旌旗止则纳之弣中言其行而翩翩是在路不息欧阳云四牡騤騤臣吏奔走於道路也旃旒有翩庶民召集于兵役也愚按此必厉王时有数兴征伐之事故诗云然或疑史无所载然史记楚世家明言周厉王暴虐熊渠畏其伐楚去其王又秦本纪亦言厉王无道诸侯或叛之西戎反王室灭犬丘大骆之族竹书载厉王三年淮夷侵雒王命虢公长父伐之不克十一年西戎入于犬丘皇王大纪载厉王时荆楚寇于南猓猓寇于北淮夷寇于东命虢公征之不克徵敛数起虐用其民民不堪命聚议而兴谤召穆公以告王怒得卫巫使纠谤者收杀之是其事皆与诗相脗合故自足信邹忠胤云司马子长有言诗书所以复见者多藏人家而史记独藏周室以故灭夫三代以前征伐之事岂尽可考哉乱谓兵革之乱夷说文毛传皆云平也孔云王本用兵欲以除乱但伐不得罪而乱日生不复能平之靡无通泯说文毛传皆云灭也尔雅云尽也征役繁兴侯国有调遣之烦故财力顿尽非谓无国不伐而使之皆泯灭也黎通作骊马深黑色禹贡厥土青黎史记作青骊可证诗书言黎民则以头之黑发言之犹秦呼百姓曰黔首黔亦黑也民靡有黎者言丁壮从军死亡略尽无复有黑发之人也具通作俱偕也祸谓兵革之祸烬说文云火余也具祸以烬连上句一串读郑云俱遇此祸以爲烬言害所及广孔云烬是焦烛既然之余以比其时之民得存性命者皆死亡之余愚按上文既言靡有黎而此尚云以烬者犹曰存什一于千百云尔繇王好用兵故乱日生而不能平繇乱日生而不能平故诸侯之国无不驿骚而王国及侯国之民皆受其病若此也於乎解见抑篇於乎有哀者叹而伤之言乌呼有是可哀痛也国谓王国犹言朝廷也步说文云行也频者说文以爲人临水厓频蹙不前而止之义则是与蹙同意言国家所行如是吾且见其日以穷迫而不能复有所施展矣一说苏云国步国之动也频数也畜大物者恶数动之故以国步斯频爲哀也亦通】国步蔑资【支韵】天不我将【漾韵亦叶阳韵资良翻】靡所止疑【支韵】云徂何往【叶漾韵于放翻亦叶阳韵於王翻】君子实维【支韵丰本作惟】秉心无竞【敬韵亦叶漾韵其亮翻五经文字作倥】谁生厉阶【叶支韵坚夷翻】至今爲梗【叶敬韵古孟翻亦叶漾韵口浪翻赋也蔑通作灭尽也资说文云货也人所齎持也将者扶持之意字从寸寸者手也疑说文云惑也徂即往也徂以人之行往言下文往以所往之地言故两文以别之曰云曰何皆疑辞也言国家数劳民动衆已殫尽其资财矣而天又不肯扶持我谓所至皆败衄也民心汹汹虑主之未肯悛改大役必未休息乃王无所以止其疑者於是咸相与惊惑曰今又将往何处乎一说毛传云疑定也朱子云读如仪礼疑立之疑按仪礼士昏礼妇疑立于席之西注疑立自定之貌又乡射礼宾拜西阶上疑立主人阼阶东疑立乡饮酒亦有此文盖人有疑则有徘徊姑定之意曰靡所止疑者郑云我从兵役无有止息时亦通但如此属字似太奇耳君子指当时执政者言即荣夷公辈是也维说文云网纲也系缀之义人以手持禾爲秉故郑笺训秉爲执秉心犹今人云立定主意者竞说文云疆语也喜争啓衅所谓竞也谁指上文君子不欲斥言之也厉本旱石之名岸之危处亦曰厉阶砌之有级者说文以爲陞也曰生厉阶者岸之危处本无

阶可升今忽生一阶焉以授之使之舍康庄而立于危险之地孟子所谓安其危而利其菑也梗钱氏以爲水上浮木壅水者今语以断梗与浮萍飘蓬并言是也言柄政之君子实爲国家之所系维其所以执持其心者当以无所争竞爲主用养和平之福谁爲兴兵构怨之谋以阶之厉使从役之民飘泊靡定至今如水上之浮梗乎左昭二十四年楚子爲舟师以啓吴疆沈尹戌曰亡郢之始於此在矣诗曰谁生厉阶至今爲梗其王之谓乎】忧心殷殷【叶真韵於真翻丰本作殷殷】念我土宇【麋韵】我生不辰【真韵】逢天憊【陆本作亶】怒【叶麋韵暖五翻】自西徂东【韵会小补云叶音丁入青韵古叶青通真】靡所定处【叶语韵敞吕翻】多我覯瘠【真韵】孔棘我圉【语韵 赋也殷说文云痛也宇本屋边之名因借爲边垂之义徐锴云按左传在君之宇下是爲边垂也念我土宇言国家之土宇可念亦如所谓日蹙国百里者不辰尔雅云不时也邢昺云言不得其时也逢说文云遇也憊说文云疾也憊怒者迅疾之怒犹云疾威也兵连祸结无稍停缓之时若天意所使者然故云逢天憊怒也处说文云止也严云是时镐京在西中原在东自西至东无有宁居者言京师及中原皆乱也覯说文云遇见也瘠郑云病也孔云瘠字从病而以昏爲声是昏忽之病按说文无瘠字当通作昏晋语鲜不天昏韦昭注以爲狂惑之疾是也多我覯瘠言我所遇见者无非狂惑之人指当时凡居位谋国者言也孔甚也棘通作?说文云急也圉通作圉说文云守之也按圉本圉圉所以拘罪人者今文圉圉多误用故尔雅训圉爲垂舍人云拒边垂也邢昺云守御在外垂也孔棘我圉者言朝廷信任昏惑之人挑怨贾祸故我之边垂又甚急即史言诸侯叛王及东夷西戎迭见侵扰之事也】爲谋爲毖【叶质韵壁吉翻大全云叶音必】乱况斯削【药韵】告尔【墨子作女下同】忧恤【质韵墨子作恤】诲尔序爵【药韵墨子序爵作予郁】谁【墨子作孰】能执热逝【墨子作鲜】不以【墨子作用】濯【觉韵亦叶药韵青药翻】其何能淑载胥及溺【药韵亦叶觉韵女角翻 赋中有比也承上三章言时事至于如此亦将如之何哉其惟知谋知毖而後可说文云虑难曰谋毖慎也乱即乱生不夷之乱况本寒水之名毛传郑笺皆训爲兹晋语韦昭注训爲益二解相通未详其义孔颖达以爲况者赐也赐人之物则益滋多故爲滋也据此说则况当通作贙然以滋益训贙於义爲迂不如依贙字本义即训作赐耳祸乱之来若天所与之故曰乱贙也削说文云析也仪礼注云犹杀也杀音色界翻谓刻削之使小也言今庙堂之上特无有谋改图而毖後患者耳若能爲谋以图其新爲毖以防其患则天之以大乱与我者将繇此渐渐削小非复不可收拾之势矣告通作诰晓谕之意尔指执政者观後有嗟尔朋友之语可见盖不欲斥言王而但托之告朋友耳恤据说文兼忧与收二义谓哀痛民之穷而收之也诲说文云晓教也序爵朱子云辨别贤否之道也张文潜云宜爲公卿者爵之以公卿宜爲大夫士者爵之以大夫士此爵之所以序也愚者爵尊贤者爵卑爵之所以乱也故序爵者别贤不肖而已前章推原祸乱之繇而曰谁生厉阶又曰多我覯瘠故此言谋毖之道维何亦惟告尔以忧念民穷而亟收恤之然非在位皆贤者必不能代君恤民故又诲之以序爵焉以其时在位皆忍心之人故欲其取而澄汰之也执热孙鑛云热气盈身如执之然鍾惺云旧解执字作执持之执今人以水濯手岂能便执持热物乎盖热曰执热犹云热不可解此古文用字奥处逝往也濯洗濯之濯浴可解热也此二句以比语作正意言人当盛热之时谁能执守此热以往而不思澣濯於清冷之渊用此以解其热者比今之民困于兵革已甚惟贤者在位秉无竞之心招携以礼怀远以德以罢兵息民而後民困可解也以濯解热是贤者恤民作用曰谁能曰不以皆叹今之不然孟子云今也欲无敌于天下而不以仁是犹执热而不以濯也左襄三十一年北宫文子相卫襄公如楚过郑印段迂劳于棊

林如聘礼而以劳辞文子入聘子羽爲行人冯简子与子大叔逆客事毕而出言于卫侯曰郑有礼其数世之福也其无大国之讨乎诗云谁能执热逝不以濯礼之於政如热之有濯也濯以救热何患之有合观孟左可得以濯之义又墨子云爵位不高则民不敬蓄禄不厚则民不信也政令不断则民不畏也故古圣王高予之爵重予之禄任之以事断予之令夫岂爲其臣赐哉欲其事之成也诗曰告女忧恤诲女予郁孰能执热鲜不用濯则此语古者国君诸侯之不可以不执善承嗣辅佐也譬之犹执热之有濯也将休其手焉按此则即取用贤比以濯旧说皆如是然意似未尽淑通作倬说文云善也使民无锋镝死亡之忧有安生乐业之庆善孰如之载之言则也胥尔雅云皆也溺通作?说文云没也此二句承不以濯而言以濯解热理势当然既不以濯则热终不可解其何能善哉不特民陷溺于祸难无出脱之时恐女在位者亦将与之俱尽而无脱身之地矣孟子云苟不志于仁终身忧辱以陷于死亡诗云其何能淑载胥及溺此之谓也】如彼遡风【叶侵韵孚金翻】亦孔之僇【队韵】民有肃心【侵韵】莽【陆本作迸云或作拼】云不逮【队韵】好【去声】是稼【郑陆本俱作家】穡【职韵郑陆本俱作嗇陆云寻郑家嗇二字本皆无禾者下稼穡卒痒始从禾】力民代食【职韵】稼穡维宝【皓韵】代食维好【皓韵 比而赋也遡通作 说文云向也水欲下违之而上也曰遡风者流逆而风亦与之俱逆也僇说文云仿佛也徐锴云见之不明也按祭义云祭之日入室僇然必有见乎其位字义正同风水俱逆舟行难前遥瞻彼岸不知尚在何处此承上章载胥及溺而言以比人处危乱之时真莫测将来世运如何究竟犹书所谓如涉大水茫无津涯也民有肃心二句又举当时病民之事言之肃说文云持事振敬也莽当依陆本作迸说文云散走也一云斥逐也与大学迸诸四夷义同谓斥逐使之散去也逮通作隶说文云及也民本无怠惰之心徒以征役繁兴使之东驰西窜不能及时趋事严云谓夺其农时使不得耕耨也好是稼穡四句劝谏之辞也好谓崇尚之耕种曰稼收敛曰穡孔云司勲云治功曰力则力民谓有功加于民者也代食钱氏云代耕而食也稼穡维宝申言好是稼穡之意鼂错有言明君贵五谷而贱金玉宝之义也韩诗外传云晋平公之时宝藏之台烧土大夫闻之趋车驰马救火三日三夜乃胜之公子晏子独束帛而贺曰甚善矣平公勃然作色曰珠玉之所藏也国之重宝也而天火之士大夫皆趋车走马而救之子独束帛而贺何也有说则生无说则死公子晏子曰何敢无说臣闻之王者藏于天下诸侯藏于百姓商贾藏于筐匱今百姓之于外短褐不蔽形糟糠不充口虚耗而赋敛无已王收大半而藏之台是以天火之且臣闻之昔者桀残贼海内赋敛无度万民甚苦是故汤诛之爲天下戮笑今皇天降灾於藏台是君之福也而不自知变怪亦恐君之爲隣国笑矣公曰善自今以往请藏于百姓之间诗曰稼穡维宝维好之好如字谓美好也严云今当好是稼穡言重农也其有功力於民者则使之代耕而食言任贤也盖稼穡当以爲宝而不可轻食禄以代耕者当择其人之好而不可滥也愚按好是稼穡与告尔忧恤相应力民代食与诲尔序爵相应使代食者不得其人则民亦不得尽力于稼穡矣故因言民之不逮而仍推及之】天降丧【去声】乱灭我立王【阳韵】降此蝥贼【职韵丰本作蝥】稼穡卒痒【阳韵】哀恫【陆本作同丰本作痛】中国【职韵】具赘卒荒【阳韵】靡有旅【丰本作吕】力【职韵】以念穹苍【阳韵 赋中有比也降下也丧者亡失之谓民失农业是降丧也兵连不休是降乱也灭尔雅说文皆云尽也立王郑苏皆云我王所恃以立者愚按即指下文稼穡是也国以民爲本民以食爲天非所恃立以爲王之具而何蝥食苗根者恶之故呼之以贼非二物也解见大田篇季本云此非以害稼者言盖借以指当时在位贪乱之人能害国者邓元锡云稼穡国之宝也贪人以好兵荒之是蝥贼也天降蝥

贼是降之丧乱也卒尽瘁病也俱见尔雅又说文训瘁爲瘡季云天下既乱则民不得尽力于
农田所以卒病而无成也哀说文云闵也徐云闵痛之形于声也於文口衣爲哀衣哀声也恫
说文云痛也一曰呻吟也中国兼人与地言之具通作俱偕也以物质钱曰贅爲其放贝于外
故字从敖男子出附女家谓之贅壻亦取斯义具贅者言中国之人民相偕从役于外鲜有家
居者如贅物然也荒说文云芜也卒荒者言中国之田地尽皆荒芜也夫然则是不肯宝好稼
穡而使民苦于不逮者皆此蠹贼之爲矣旅衆也旅力犹言合力也穹苍天也李巡云古时人
质仰视天形穹隆而高色苍苍然故曰穹苍念穹苍则思所以挽回气运矣严云羣臣无有尽
力以念及天意者是代食者其人非好也韩诗外传云民劳思佚治暴思仁刑危思安国乱思
天诗曰靡有旅力以念穹苍】维此惠君民人所瞻【叶阳韵诸良翻按汉较官碑以瞻爲彰】
秉心宣犹考慎其相【阳韵】维彼不顺自独俾臧【阳韵】自有肺【陆本作肺】肠【
阳韵】俾民卒狂【阳韵 赋也惠说文云仁也字从心从夷徐云爲惠者心专也惠君谓仁爱
之君曰维此者亦讽劝之辞以王暴虐不敢直斥其非故姑爲異语以感动之後言维此圣人
放此民谓百姓人谓羣臣广韵云仰视曰瞻仁爱之君有所举动必足以福国庇民故臣民皆
瞻仰之也秉心二句教其当如此也秉心宣犹与秉心无竞句法正同郑云宣徧犹谋也考通
作考说文云敏也撞击之义赵颐光云凡考索考究并当用考相说文云省视也惠君之所存
心者凡所举事必以徧谋于衆爲主不但不偏执一己之见亦不轻徇一二人之言既与衆共
谋之矣然後从而参互研索之务致谨于其所省视者可行则行可止则止不敢苟且从事也
惠君之所以爲惠君者道固如此旧说依郑笺以相作辅相解亦通但韵不叶耳维彼不顺指
当时执政者而言曰维彼者鄙而外之之辞如论语问子西曰彼哉是也後凡言维彼者放此
不顺谓不顺于理自独者言其自视唯有一独而已此外天下人皆无足当意者也俾使臧善
也严云欲用独自之见而使之善何繇得善乎自有肺肠者郑云行其心中之所欲孔云肺肠
五脏之物言之以表其心故云自有肺肠愚按肺气最盛故刘熙释名云肺勃也其气郁勃也
肠谓大小肠能化糟粕其所出者皆滓秽耳以不顺之盛气自用故但举肺言且所出者总非
良谋故但举肠言曰自有者见其不合於衆所同然也俾民卒狂者使民逐逐奔命尽皆如狂
也彼不顺者之所行惟任己见不顾民病如此而爲惠君者乃听信之何哉此正与第三章谁
生厉阶二句相应】瞻彼中林【侵韵】甡甡其鹿【屋韵】朋友已谖【叶侵韵子林翻陆
本作僭】不胥以谷【屋韵】人亦有言进退维【韩诗外传作惟】谷【屋韵 兴也中林林
中也甡说文云衆生竝立之貌甡甡毛云衆多也许慎云鹿性旅行草虫经云鹿欲食皆鸣相
召志不忌也朋友僚采之称指执政者後放此谖说文云愬也以鹿之相从起朋友之相谖乃
反兴也谷尔雅云善也不胥以谷与自独俾臧相应言彼惟自以爲是不肯参伍衆论以求其
真善之所在也意当时执政所谋者芮伯必曾力阻之既不见用而反被谖毁故云然人亦有
言盖恒言也谷两山间流水之道也欲进而尽言则己见恶于朋友欲退而不言则又抱愧于
幽独踌躇于前却之间如皆将坠于深谷也晏子春秋云叔向问晏子曰齐国之德衰矣今子
何若晏子对曰婴闻事明君者竭心力以没其身行不逮则退不以诬持禄事惰君者优游其
身以没其世力不能则去不以谗持危且婴闻君子之事君也进不失忠退不失行不苟合以
隐忠可谓不失忠不持利以伤廉可谓不失行叔向曰善哉诗有之曰进退维谷其此之谓与
又韩诗外传云田常弑简公乃盟于国人曰不盟者死及家石他曰古之事君者死其君之事
舍君以全亲非忠也舍亲以死君之事非孝也他则不能然不盟是杀吾亲也从人而行是背
吾君也呜呼生乱世不得正行刼乎暴人不得全义悲夫乃进盟以免父母退伏剑以死其君

闻之者曰君子哉安之命矣诗曰人亦有言进退惟谷石先生之谓也】维此圣人瞻言百里【纸韵】维彼愚人覆狂以喜【纸韵】匪言不能胡斯【汉书作此】畏忌【叶纸韵渠绮翻】赋也维此圣人亦讽王也圣说文云通也字从耳应劭云圣者声也言闻声知情也瞻言百里者严云圣人於人之言能瞻之於百里之外谓望之而喻其意也一说瞻言百里谓圣人能知微见远亦通维彼愚人刺当时执政者愚蠢覆反也狂即俾民卒狂之狂覆狂以喜者言民之奔命若狂其状甚可怜而彼反以爲喜也匪通作非非言不能芮伯自道也郑云胡之言何也礼记注云忌之言戒也言圣人在上虽疎逖之人骤进言于前且一见而能察其所怀来之意然则今有以狂爲喜之愚人若彼者圣人岂不辨之我爲其所譖亦非不能指摘其爲愚也乃於此若有所畏惧忌讳而不敢言者何也恨极而自诃之辞徐干云夫酒食人之所爱者也而人相见莫不进焉不吝於所爱者以彼之嗜之也使嗜者甚於酒食人岂爱之故忠言之不出以未有嗜之者也诗云匪言不能胡斯畏忌按周语云厉王虐国人谤王王怒得卫巫使监谤者以告则杀之国人不敢言道路以目王喜告召公曰吾能弭谤矣乃不敢言召公曰是鄣之也防民之口甚於防川川壅而溃伤人必多民亦如之是故爲川决之使导爲民者宣之使言故天子听政使公卿至於列士献诗瞽献典史献书师箴?赋蒙诵百工谏庶人传语近臣尽规亲戚补察瞽史教诲耆艾修之而後王斟酌焉是故事行而不悖民之有口也犹土之有山川也财用於是乎出犹其有原湿衍沃也衣食於是乎生口之宣言也善败於是乎兴行善而备败所以阜财用衣食者也夫民虑之於心而宣之於口成而行之胡可壅也若壅其口其与能几何王弗听於是国人莫敢出言竹书载厉王八年初监谤芮伯良夫戒百官于朝疑即此诗之所爲作也】维此良人弗求弗迪【叶屋韵读如轴直六翻】维彼忍心是顾是复【屋韵】民之贪乱宁爲荼毒【叶屋韵读如竺丁木翻史记身毒国转爲天竺又爲竺是也】赋也此章专责执政者良善也求通作述说文云敛聚也迪说文云道也毛云进也愚按书迪简在王庭义亦同此谓导引而进之也忍心谓有残忍之心者与良人对看良人以慈良爲德主于爱民忍心以残忍爲心主于害民亦曰维此维彼者与上二章所指不同乃诗人行文错综处然於良人言此者则爱而内之之辞於忍心言彼者则恶而外之之辞也顾说文云还视也复犹重也国有善人则不肯寻觅而导进之偏于忍心之人乃顾视而眷念之重复而绸缪之盖不顺者之所爲如此此其所以数建贪利之谋数兴得己之役而痍此下民也张文潜云荡曰曾是掊克曾是在服则维彼忍心是顾是复可知也贪郑云犹欲也宁本愿词此则反而言之犹云岂肯也荼苦菜也解见谷风篇朱子以爲蓼谓南方人名荼爲辣荼或用以毒溪取鱼即所谓荼毒也此或未足信毒说文云厚也害人之草往往而生愚按以往往往而生故训毒爲厚说者以爲荼蔓野葛之属是也荼毒二字并言荼当比不顺者毒当比忍心者以执政者唯一人而忍心者其类实繁故也民本喜乱至弱而强至顺而险岂肯甘爲人所荼毒而俯首听命乎言其势必终至于叛乱以深悚惕之周语太子晋云人有言曰无过乱人之门又曰佐讎者尝焉佐讎者伤焉又曰祸不好不能爲祸诗曰四牡騤騤旃旃有翩乱生不夷靡国不泯又曰民之贪乱宁爲荼毒夫见乱而不惕所残必多其饰弥章民有怨乱犹不可遏坊记子云贫而好乐富而好礼衆而以宁者天下其几矣诗云民之贪乱宁爲荼毒故制国不过千乘都城不过百雉家富不过百乘以坊民诸侯犹有畔者荀子云凡人莫不欲安荣而恶危辱故惟君子爲能得其所好小人则日徼其所恶亦引此诗】大【尔雅注作泰】风有隧有空大谷【屋韵】维此良人作爲式谷【屋韵】维彼不顺征【韩诗外传作往】以中【韩诗外传作虫】垢【叶屋韵居六翻】兴之比也此承上章而言严云大风损物喻小人也尔雅作泰风云

西風也愚按此以比忍心者隧本作邃說文云深遠也字从穴蓋謂穴之深遠者晉文公請隧鄭莊公隧而相見其義正同空說文云穹也字亦从穴一云虛也兼此二義爾雅注云有水曰溪無水曰谷鄭云有空大谷蓋風洞也今風洞所在有之聞之陽和有洞出風每年致祭而金華宋潛夫亦有風門洞碑記此類是也水經注亦云北屈縣故城西十里有風山上有穴如輪風氣蕭瑟習常不止當其沖飄也而略無生草蓋不定衆風之門故也鄭云大風之行有所從而來必從大空谷之中愚按有空大谷即上文所謂隧也此以比不順者空谷爲大風之所自出亦猶不順之人當國乃忍心之羣小所繇藉以進身也維此良人維彼不順解俱見前式說文云法也谷即不胥以谷之谷言良人之作爲必取法于善道也又毛傳引爾雅云式用也言良人之所作爲者必用善道也征鄭云行也中中所藏也垢說文云濁也字从土蓋土之穢濁者言其中藏之污穢盡爲忍心之人鼓動而發之以流毒于下民亦如大風之飛塵揚沙然也君子小人各於其類彼忍心者有隧而良人無之然則雖作爲式谷而不見求迪固其宜矣韓詩外傳云以明扶明則昇于天以明扶闇則歸其人兩瞽相扶不傷牆木不陷井穽則其幸也詩曰維彼不順往以出垢闇行也】大風有隧【寘韻】貪人敗類【寘韻】听言則对誦言如醉【寘韻】匪用其良覆俾我悖【叶寘韻蒲寐翻 比而賦也貪人指不順者言類鄭云等夷也敗類者言使同類之人皆將化其所爲胥而爲貪也地中有隧乃大風之所從生以比不順者當權則士習因而敗壞也周語厲王說榮夷公芮良夫曰王室其將卑乎夫榮公好專利而不知大難夫利百物之所生也天地之所載也而或專之其害多矣天地百物皆將取焉胡可專也所怒甚多而不備大難以是教王王能久乎夫王人者將導利而布之上下者也使神人百物无不得其極猶日怵惕懼怨之來故頌曰思文后稷克配彼天立我烝民莫匪爾極大雅曰陳錫載周是不布利而懼難乎故能載周以至于今今王學專利其可乎匹夫專利猶謂之盜王而行之其歸鮮矣榮公若用周必敗既榮公爲卿士諸侯不享愚按觀此則詩所咏貪人其指榮夷公明矣然以此詩繹之則所謂榮公好利而不備難者非但聚斂掊克之謂乃生事構衅以奪諸侯之有若孔子言患寡患貧孟子言辟土地充府庫是也韓詩外傳云福生於無爲而患生於多欲知足然後富從之德宜君人然後貴從之故貴爵而賤德者雖爲天子不尊矣貪物而不知止者雖有天下不富矣夫土地之生不益山澤之出有盡懷不富之心而求不益之物挾百倍之欲而求有盡之財是桀紂之所以失其位也詩曰大風有隧貪人敗類按韓詩所言正爲貪人二字作解听言則对誦言如醉者郝敬云欲人听从己言則以辭色接对若人指陳時事誦說則瞽然不顧如醉者矣一說鄭云誦詩書之言則冥卧如醉孔云樂記魏文侯自言端冕而听古樂唯恐卧史記稱商鞅說秦孝公以帝道孝公睡而弗應皆是心所不悟如醉然也亦通韓詩外傳云古之謂知道者曰先生何也猶言先醒也不聞道術之人則冥於得失不知亂之所繇眊眊乎其猶醉也故有先生者後生者有不生者詩曰听言則对誦言如醉匪通作非良良人也覆反也悖本作諄說文云亂也籀文顛倒从二或謂上下反覆相惑正諄亂之意不用其良覆俾我悖者謂不順之人所用者非善人之言而彼之所言則皆反于理以是爲非以非爲是使我聞之而惑亂也左文元年穀之役晉人既歸秦師秦大夫及左右皆言於秦伯曰是敗也孟明之罪也必殺之秦伯曰是孤之罪也周芮良夫之詩曰大風有隧貪人敗類听言則对誦言如醉匪用其良覆俾我悖是貪故也孤之謂矣孤實貪以禍夫子夫子何罪復使爲政】嗟尔朋友予豈不知而作【藥韻】如彼飛虫時亦弋獲【叶藥韻黃郭翻】既之陰女【音汝】反予來赫【叶藥韻閱各翻陸作吓 賦也自此章而下皆自明其作詩之意朋友指貪人也與第九章義同作严云即下既作尔歌之作承上章誦言如醉而言

我岂不知吾言之不合于尔而复作此诗乎一说我岂不知其理而妄作此诗乎亦通飞虫孔云飞鸟虫是鸟之大名故羽虫三百六十凤凰爲之长是鸟之称虫者也弋本训絜通作惟说文云微射飞鸟也获得也郑云女所行如是犹鸟飞行自恣东西南北时亦爲弋射者所得言放纵久无所拘制则将遇伺女之间者得谋女也一说飞虫喻事理朱子云言已之言或亦有中犹曰千虑而一得也亦通既者已事之辞之往也阴女张子厚云阴往密告于女也赫说文云火赤也朱子云威怒之貌言女恣贪不已必有祸患我昔日已曾以此意微婉劝谕于女欲女改图避祸而女反加赫然之怒于我是可怪也此即追述朋友已谮之事虽已经被其谮而仍作此诗以致其忠告诗人之厚也】民之罔极【职韵】职凉【郑笺作谅】善背【叶职韵必墨翻】爲民不利如云不克【职韵】民之回遹职竞用力【职韵 赋也极者止极之义民困于征役未知所止即第四章所谓靡所止疑云徂何往者职说文云记微也字从耳盖听而记之服膺不忘之谓故尔雅又训爲主也常也凉尔雅说文皆云薄也左传虢多凉德作法于凉其义皆同善即前所谓谷也背通作倍说文云反也克胜也言民之罔极已可怜矣而汝所记之心者惟以凉薄爲主絶无一毫惻怛之意闻人进仁爱之善言则违倍而不听其所爲者皆不利于民之事且如恐其不胜而勇于爲之也回说文云转也遹说文云回避也民疲奔命相与流转之四方以避之犹书所谓保抱携持厥妇子以哀吁天徂厥亡是也竞即秉心无竞之竞民既因罔极而四散奔避矣而汝犹专主爲争竞之谋日寻诸仇讐而用力不休也此皆据时事而言篇首四章所指即其事也】民之未戾【叶寘韵力置翻】职盗爲寇凉曰不可【叶歌韵居何翻古字歌作】

【可是可有歌音也】覆背善詈【寘韵】虽曰匪予【叶鱼韵羊诸翻】既作尔歌【韵亦叶鱼韵斤於翻按朱子谓此章叶韵未详今观戾与詈叶可与歌叶乃隔句用辘轳体此用韵之最奇者诸家所未有也若未二句只以鱼韵叶亦可但如此则前四句皆无韵矣达者详之赋也戾字从犬出户下说文以爲身曲戾也故训戾爲曲与乖同意盗指贪人所行言窃人之财犹爲之盗况攫非其有乎书注云羣行攻劫曰寇民之未戾言民此时虽逃亡犹未至于悍然乖戾而爲叛也若汝所专主者惟争夺是图则与盗无异民不堪此荼毒且羣起而爲寇而女亦不能复役使是民矣此即第十一章言民之贪乱宁爲荼毒之意预揭将来之祸以申戒之也凉曰不可三句追前日而言即第十四章所谓既之阴女反予来赫者覆反也背善犹上章云善背也詈说文云骂也匪读作非予与前予字同皆芮伯自谓也言我尝献规于女谓女所行凉薄多失民心断不可复蹈者汝反违背我之善言而骂詈我盖指前此谮毁之事也然虽曰女曾以我所言爲不是似无庸再更端矣而我之心终不能以自己亦既不憚淳复爲汝作歌庶其闻之而省悟乎提醒深切正与予岂不知而作句相应】

桑柔十六章八章章八句八章章六句【申培说以爲芮良夫伤厉王之失国而作是诗盖因诗中有灭我立王一语朱子曾疑此诗之作在共和之後遂附会之耳愚谓果共和之後景象如斯周其亡而宣不兴矣立王依郑笺解自不可易又考玩诗词与国语汲冢周书竹书俱互相出入断其在厉王之世子贡传阙文】

四月孝子叹征役而思祭也【孔丛子载孔子曰於四月见孝子之思祭也韩诗以爲叹征役也愚定属此诗於厉王之世按桑柔之诗曰四牡騤騤旃旃有翩乱生不夷靡国不泯则当时

征役繁兴可知已又荡之诗曰内燹于中国覃及鬼方鬼方者荆楚之地此诗咏滔滔江汉南国之纪意即爲覃及鬼方之事而发但史失传耳】

四月维夏六月徂暑【语韵】先祖匪人【丰氏本作神】胡宁忍予【语韵赋也四月夏正建巳之月所谓孟夏也此诗作于是时六月建未之月徂说文云往也二十四气中大暑在】

【六月故以暑言徂暑谓往年之暑也遡父而上皆曰先祖忍含忍也时盖有征伐南国之役大夫与焉踰年不归祭祀旷废因作诗以自悼曰今兹四月时已越春而夏矣追思往岁于征正在季夏盛暑之时屈指韶华朱明再历礼卿大夫宗庙四时皆有祭今以行役于外而此典缺焉不修我先祖独非人情乎所望於後人之报本反始者谓何宁能姑含忍予而无怨恫否也左文十三年郑伯会公于棐请平于晋郑伯与公晏于棐子家赋鸿鴈季文子曰寡君未免於此文子赋四月子家赋载驰之四章文子赋采薇之四章郑伯拜公答拜杜注谓子家赋鸿鴈义取侯伯哀恤鰥寡有征伐之劳言郑国寡弱欲使鲁侯还晋恤之文子赋四月义取行役踰时思归祭祀不欲爲还晋子家赋载驰之四章义取小国有急欲引大国以救助文子赋采薇之四章义取岂敢定居许爲郑还晋不敢安居此郑伯之所以拜而谢也今按季文子赋诗之意与孔子思祭之说正合王肃亦主是说】 秋日凄凄【陆德明本作栖栖】百卉具【韩诗作俱】腓【微韵尔雅作痠】乱离瘼矣【瘼矣家语说苑俱作斯瘼韩诗作斯莫】爰【家语朱传俱作奚】其适归【微韵赋而兴也秋日谓去岁六月後之秋日亦追述之辞也凄凄毛传云凉风也按凄字本义据说文云云雨起也此不可以云雨言故毛传解爲凉风盖拟其阴寒惨淡之状如云雨之方起者然緑衣所谓凄其以风是也卉说文云艸之总名也具通作俱偕也腓通作痠说文云风病也郑玄云凉风用事而衆草皆病按汉贾谊治安策云夫辟者一面病痠者一方痛今西边北边之郡虽有长爵不轻得复五尺以上不轻得息斥侯望烽燧不得卧将吏被介胄而睡臣故曰一方病矣诗之兴意亦以王数兴兵征伐重苦下国从征之人如百草遭风其枝叶当风者先受摧折也乱谓兵戈不息离谓室家分离瘼说文云病也郭璞云东齐谓病曰瘼乱离瘼矣者言因兵乱而分离凡有事于戎行者亦甚病矣自六月啓行秋尚在道而其士卒愁苦之状如此爰说文云引也谓引词也字从 从于于者词也 者引也故或以爲曰或以爲于也适毛云之也言此病不独士卒受之且还往归之于国家也王安石云乱出乎上而受患常在下及其极也乃适归乎其所出矣左宣十二年郑石制入楚师将以分郑而立公子鱼臣辛未郑杀鱼臣及石制君子曰史佚所谓母怙乱者谓是类也诗曰乱离瘼矣爰其适归归於怙乱者也夫又家语说苑载叶公问政于孔子孔子曰政在附近而来远子贡问曰政有异乎孔子曰夫荆之地广而居狭民有离志焉故曰在于附近而来远诗不云乎乱离斯瘼奚其适归此伤离散以爲乱者也又是一说】 冬日烈烈【丰本作冽冽】飘风发发【叶曷韵北未翻】民莫不谷我独何害【叶曷韵何葛翻 赋而兴也冬日谓去岁秋後之冬日烈通作颶说文云烈风也烈者火猛之义风以烈名亦风之猛者飘风回风也轻利僨军中策应无常有似于此民泛指不从征者而言谷毛云养也严云民莫不得遂其安养而我独何以遭此害乎】 山有嘉卉侯栗【丰本作?】侯梅【叶支韵莫悲翻丰本作某】废爲残贼莫知其尤【叶支韵盈之翻兴而比也嘉美也钱氏云卉草也通言之则 木皆卉也侯栗栗名侯梅梅名汉西京襍记云初修上林苑】

【羣臣远方各献名果异树亦有制爲美名以标奇丽栗四侯栗榛栗瑰栗峰阳栗梅七朱梅紫叶梅紫华梅同心梅丽枝梅燕梅侯梅广志云栗有关中侯栗大如鸡子三秦记曰侯国出栗愚按侯栗侯梅未详其状然意必栗与梅之大者故特以侯名又西京杂记中有侯李侯查其所以得名想亦同此栗梅之实皆可以荐笾豆而侯栗侯梅品尤瑰异故诗人因其名取以爲侯国之比李氏云言山有嘉卉是栗是梅也考工记言天下之大兽五脂者膏者羸者羽者鳞者与此诗之文相类废爲残贼者严云今其山废爲残贼之地言斫伐其本根无复存留其地荒矣尤通作邮过也诗人言王朝设立藩屏助宣政教譬之封殖嘉卉原以厚民之生今王构怨侯国日寻干戈俾纷纷背叛无有宁宇皆繇在位者多喜功贪利之輩蛊惑致然而王曾不自知其过也又韩诗外传云善爲政者顺情性之宜顺阴阳之序通本末之理合天人之际如是则天气奉养而生物丰美矣不知爲政者使情厌性使阴乘阳使末逆本使人诡天气鞠而不信郁而不宣如是则灾害生怪异起羣生皆伤而年谷不熟是以其动伤德其静亡救故缓者事之急者弗知日反理而欲以爲治诗曰废爲残贼莫知其龙】相【去声】彼泉水载清载浊【叶屋韵徒谷翻】我日构【丰本作邁】祸【丰本作害】曷云能谷【屋韵兴而比也相说文云省视也从目木会意易纬文云地可观者莫可观于木也载之言则也丘氏云我视泉水则有清时则有浊时不一於浊也我我王朝也构说文云盖也郑云犹合集也愚按结屋爲构合集衆材而成之也曷云能谷与民莫不谷相应严云今我国乃日日结祸犹水之无清时也何繇遂其生养乎】

滔滔江汉南国之纪【纸韵】尽瘁【陆本作萃】以仕宁莫我有【叶纸韵羽轨翻兴而比也滔说文云水漫漫大貌以下言江汉二水故重云滔滔江汉解见汉广篇发源于梁而合流于荆南国主荆州之地言也纪说文云丝别也朱子云谓经带包络之也郑云江也汉也南国之大水纪理衆川使不壅滞苏辙云诸侯放恣天下治乱莫能相一是以思得王者以纪诸侯如江汉之纪衆水使天下国有所宗而人有所赖孔云荆楚之域国无道则先强有道则後服瘁病仕宦也我以仕宦之故驰驱戎行固当鞠躬尽力然不识能终保有我身否乎郑云惧危亡也】匪鸛【说文陆本丰本俱作𪚩】匪鸛【先韵丰本作?】翰飞戾天【先韵】匪鱣匪𩚑【愚按若四句一韵则当作匪𩚑匪鱣鱣先韵】潜逃于渊【先韵丰本作 赋也鸛当依说文作𪚩云鵠也李氏云若以爲鸛鵠之鸛则无戾天之理今按鸛鵠之鸛本从佳非从鸟也陆佃云鵠能食草似鹰而大黑色俗呼皂鵠一名鷂其飞上薄云汉罗愿云鵠者鸛之类土黄色健飞击沙漠中空中盘旋无细不覩鸛?类尔雅云鸛鸟丑其飞也翔陶隐居云即俗人呼爲老鸦者与鵠鸛并相似而大极善飞腾江淮间捕鱼食之陆云鸛摩风回翔故其飞也翔曲礼曰前有尘埃则载鸣鸛鸛鸣则将风故也翰广韵云鸟羽也苏轼云鸟飞不在翼而在翰翰者翼之銳也戾通作丽附着之意鱣𩚑二鱼名解见硕人篇朱子云鸛鸛则能翰飞戾天鱣𩚑则能潜逃于渊我非是四者则亦无所逃矣愚按此忧其终不能免祸也即宁莫我有之意】山有蕨薇【叶支韵靡爲翻】隰有杞桋【支韵陆本作萑】君子作歌维以告哀【叶支韵鱼羈翻 赋也蕨薇二草名解见草虫篇陆佃云蕨薇所以祭也盖大夫妻之祭於其将嫁则以苹藻於其既嫁则以蕨薇神飨德与信不求备焉汉时官园种薇以共宗庙祭祀然则祭用蕨薇先王之礼旧矣隰说文云阪下隰也公羊传云下平曰隰又诗徂隰徂畛郑笺以爲新发田也杞通作芑旧说以杞爲枸櫞今按礼表记引诗丰水有芑注亦以芑爲枸櫞是?芑二字通也然此杞非枸櫞乃尔雅所云白苗之芑郭璞谓今之白梁粟也芑田中所生所以供祭生氏之诗云恒之麋芑是任是负以归肇杞是也桋当依说文作萑严云即静女自牧归萑之萑茅始

生者也陆佃云列子云因以爲茅靡茅靡一作弟靡弟读如稊茅之始生也莢稊一也茅体柔而理直又洁白故先王用之以藉亦以缩酒易曰藉用白茅礼曰缩酌用茅谓之明酌以茅缩而後酌也陆玑云茅之白者古用包裹礼物以充祭祀旧说泥尔雅以檋爲赤棟陆玑亦云棟叶如柞皮薄而白其木理赤者爲舜棟一名檋然据郭璞说赤棟树叶细而岐銳皮理错戾好丛生山中中爲车輶则其非隰地所有明矣又尔雅以女桑爲檋桑而诗亦云隰桑有阿则此隰之檋其或爲女桑不可知但于思祭之意不合故不取诗咏采薇采蕨昔人皆以爲在暮春之时戴侗谓薇生山中冬晚抽茅至春柔矣夏而刚宜芼豕贾思勰谓种粱与植谷同时以二月上旬种者谓上时三月上旬及清明节爲中时四月上旬爲下时而楚辞注亦谓茅春生布地如针俗谓之茅针亦可瞰夏生白叶茸茸然至秋而枯然则是四物者皆四月维夏时所有故诗人即所见而赋之与君子诗人自谓也礼不下庶人君子则有位之称以见已当守礼也陆佃云下国构祸怨乱并兴则孝子有不得脗其亲者矣故诗所以告哀也愚按此亦忧其身之将不免故云然不然岂以家事先国事哉】

四月八章章四句【序云大夫刺幽王也在位贪残下国构祸怨乱并兴焉按渐渐之石序亦以爲下国刺幽王也戎狄叛之荆舒不至乃命将率东征疑足与此诗相证然遍考史传皆无所载似不足信朱子但以爲遭乱自伤之诗而诋先祖爲非人既属无理且无端指出滔滔江汉二句尤不相涉申培谓大夫遭谗流离南国而作是诗恍惚近似今爲之集说于此先祖匪人言先祖非人也乃神也陟降在上胡宁忍予乎夏则暑秋则腓冬则烈飢乱日进无时而息也独不及春者盖天气和畅万物发育治之象也自古治世少乱世多观四时可知矣嘉卉废爲残贼者犹离骚所谓兰芷变而不芳荃蕙化而爲茅何昔日之芳兮今直爲此萧艾也莫知其尤言上无明主炀竈蔽明莫有能知其罪过者也相彼泉水载清载浊叹世道昏乱永无清明之期也我日构祸所谓举手挂网罗动足触机奔滔滔江汉咏其所见亦如三閭放逐泽畔行吟乎今我尽瘁以从仕而曾不我有此惓惓不忘君之辞也匪鶉四句不独义无可逃亦见避之无路薇蕨在山刺纤植而高张也?檋在隰叹美材而下列也一说谓蕨薇?檋四物皆可食盖思遁迹山林以逃世患如伯夷食薇四皓茹芝之意维以告哀者作此诗以告其哀怜天下之志非以爲其身也愚但以与左传孔丛子不合故不敢从子贡传阙文】

采绿刺怨旷也【出序 子贡传申培说皆谓周人从军室家念之而作李氏云时多征役久劳于外其所以怨旷也郝敬云人情者圣王之田男女居室人之大欲古者用民之力岁不过三日新婚三月不从政恤其私也今使其室家睽离匹妇衔怨故圣人录是诗以明王道本乎人情愚按篇中有五日爲期六日不詹之语谓三月当来归迟之四月犹未至也疑与四月维夏篇爲同时事一爲征夫之辞一爲思妇之语】

终朝【丰氏本作晷後同】采绿【沃韵楚辞章句作菰】不盈一掬【屋韵】予发曲局【沃韵】薄言归沐【屋韵绿与局叶掬与沐叶亦隔句用韵赋也毛云自旦及食时爲终朝采说文云捋取也绿当依王逸作菰尔雅云王刍也郭璞云即菰蓐^廿也今呼?脚莎亦作莎脚莎又作鹿蓐又名苳^廿唐本草注云此草叶似竹而细薄茎亦圆小生平泽溪涧之侧荆襄人煮以染黄色极鲜好俗亦呼淡竹叶陆玑云其茎叶似竹青綠色高数尺今淇澳傍生如草其草涩砺可以洗搅笏及盘枕利於刀错俗呼爲木贼盈说文云满器也毛云两手曰掬或谓一手

曰菊今按说文训菊爲左手则以爲一手者得之诗诂谓屈掌曰菊是也郑玄云终朝采之而不满手怨旷之深忧思不专于事也曲说文云受物之器局说文云促也如物之盘礴局促于曲中有蓬松散乱之意或以曲局爲不舒展非也郑云礼妇人在夫家笄象笄今曲卷其发忧思之甚也谢枋得云妇人夫不在不事容饰故伯兮曰自伯之东首如飞蓬薄言程子云发语辞後同沐说文云濯发也万时华云手方采绿忽念髮之曲局归而膏沐此中想头转动处大可味辅广云薄言归沐恐君子之或归也好饰者妇人之性也愚按棗^廿涩砺可以爲搅洗之用故采之而动归沐之思抑亦感其染色鲜好因而修容也与季本云爲夫将归有期故汲汲沐以待夫此以方及五日之期言也】终朝采蓝【覃韵】不盈一檐【盐韵亦叶覃韵都甘翻】五日【丰本作月後同】爲期六日不詹【盐韵亦叶覃韵多甘翻丰本作瞻 赋也蓝说文云染青^廿也尔雅葢马蓝注云即今大叶冬蓝爲淀者通志云蓝三种蓼蓝如蓼染绿大蓝如芥染浅碧槐蓝如槐叶染青三蓝皆可作淀色成胜母故曰青出蓝而青于蓝秦子云园圃之蓝不异衆草染而後朗齐民要术云蓝地欲得良三徧细耕三月中浸子令芽出乃畦种之五月中新雨後拔栽三茎作一科相去八寸五徧爲良七月中刈蓝罗愿云月令仲夏之月令民毋刈蓝以染注谓此月蓝始可别引夏小正曰五月啓灌蓝蓼灌谓丛生也种蓝之体初必丛生蓝儿长大始可分移使之稀疏以言正养蓝之时非刈蓝之侯也自四月微阴始起爲政者继长增高毋有坏墮此月又阴阳争死生分之月君子戒静以待宴阴之所成则微阴未成也戒刈蓝以损生气恐微阴不胜故耶又是月班马政游牝别羣繫驹之月马之爲性畏新出之灰驹遇辄死石矿之灰亦能令马落驹刈蓝以染也烧灰也暴布也三者皆有出灰之气令而禁之者盖爲马坎刈蓝之禁与马质禁原蚕同意不然蚕之再养蓝之早刈圣人何留意哉蓝于草中独有禁故字从监又按崔寔谓榆莢落时可种蓝五月可刈蓝其说与月令异非先王之法也衣蔽前谓之檐毛传说文同郭璞谓今之蔽膝今按檐蔽前正当蔽膝之处非蔽膝也陆佃云蓝绿易得之物今以忧思貳之故虽终朝采掇而绿不盈一菊蓝不盈一檐也蓝大于绿又其畦植如鳞则其采之盈檐易矣故诗以爲後绿可以染黄蓝可以染青则皆妇人致饰之物故诗正言之五日六日以豳风一之日二之日三之日四之日例之则五日爲三月六日爲四月也愚以易七日来复之七日爲五月义亦本此詹朱子云与瞻同仰视曰瞻期以三月而归至四月犹未瞻见也今又及采蓝之时则过五月矣是以不禁其忧思之如此也後汉书刘瑜上疏云天地之性阴阳正纪隔絶其道则水旱爲并诗云五日爲期六日不詹怨旷作歌仲尼所录】之子于狩言韞【陆德明本作鬯】其弓【东韵亦叶蒸韵姑弘翻】之子于钓言纶之绳【蒸韵亦叶东韵神融翻 赋也之子郑云是子也谓其君子也于往也孔颖达云狩者猎之总名言者发语辞韞说文云弓衣也亦名弣以革爲之韞其弓者孔云弛弓纳于韞中也钓钓鱼也朱子云理丝曰纶周易王肃注云纏裹也礼记疏云纶如宛转绳今按常说皆谓合丝爲绳谓之纶是也绳说文云索也孔云钓绳以生丝爲之此下二章皆预拟之词妇人苦夫之困于征役也曰君子今远出如此倘使归来将何所事乎假使往狩我当爲之纳其弓於韞中不使之用所以然者以田猎所以讲武我不欲其习於武事也如其往钓我则愿从焉当合丝爲绳以待耳盖时事倥偬故欲规其君子但以烟波钓徒自娱是虽闺阁之言亦见其所遭之不幸也观下章言钓不言狩则微意大可想见又韞其弓与纶之绳一其一之下字自别其者外之之辞之者内之之辞】其钓维何维鲂及鰠【语韵】维鲂及鰠【见上】薄言观【韩诗作覩】者【叶语韵掌与翻定本崔灵恩集注并作多孔云俗本作观覩误 赋也鲂鰠解见汝坟鱼丽敝笱诸篇按陆玕云鲂鱼之美者鰠鱼之不美者今举一美一不美则可以

槩衆鱼矣我之与子相亲相昵于其钓而获也行往观之岂至如今怨旷然归果何时耶意想如此非有是事或谓此与上节皆追述昔日之子在家时所爲殊觉味短】

采绿四章章四句【序谓幽王之时多怨旷者也今亦未有以见其然朱子但谓是妇人思其君子之诗非刺也然则圣人录此有何关系】

民劳召穆公刺厉王也【出序】皆戒同列之词盖王所亲信者戒同列即所以刺王也【季本云集传以爲同列相戒之辞以诗词观之大抵得之矣但所谓同列者必王所亲信之人故末章曰王欲玉女钱天锡云厉王之世卫巫监谤道路以目穆公故乱其词言在同列实刺王也】

民亦劳止汔【汉书作迄】可小康【阳韵】惠此中国以绥四方【阳韵】无【左传作毋】纵【左传丰氏本俱作从】诡随以谨无【潜夫论作是】良【阳韵】式遏寇虐僭【左传家语陆德明本俱作惨说文作替】不畏明【阳韵谟郎翻】柔【陆本作揉】远能迓以定我王【阳韵 赋也民中国之民也劳说文云劓也云亦劳者凌蒙初云下一亦字视甚字更百倍大东哀我憊人亦可息也亦然邓元锡云夫民之劳也实诡随之人贪於利寇之虐之也止通作只语助辞钱天锡云贾生有言安民可以行义而危民易与爲非民劳者危之渐也汔当依汉书作迄说文云至也曰可者见惟此时尚可他日将不及也曰小者几几不敢过望之辞康郑玄云安也顔师古云言人劳已久至此可以小安逸之彭执中云民劳甚矣未能遽望其太平也但庶几小康耳万时华云开口便唱此二语已自凄絶惠说文云仁也对四夷言爲中国兼京师四国皆是下文言式遏寇虐正所以仁此中国也绥本车中鞅之名尔雅以爲安也徐锴云升车必执绥所以安也四方对中国而言乃四夷也内地坚固则四夷皆帖息而不敢动是乃所以抚绥之也淮南子云圣主在上无隠人无軼民无劳役无冤刑四海之内莫不仰上之德象主之指夷狄之国重译而至非户辨而家说之也推其诚心施之天下而已矣诗曰惠此中国以绥四方内顺而外宁矣又荀子云朋党比周之誉君子不听残贼加累之譖君子不用隐忌雍蔽之人君子不近货财禽犊之请君子不许凡流言流说流事流谋流誉流愬不官而衡至者君子慎之如是则奸言奸说奸事奸谋奸誉奸愬莫之试也忠言忠说忠事忠谋忠誉忠愬莫不明通刑政平而百姓归之礼义备而君子归之故礼及身而行修义及国而政明天下愿令行禁止王者之事毕矣诗曰惠此中国以绥四方此之谓也左僖二十八年君子谓晋文公其能刑矣诗云惠此中国以绥四方不失赏刑之谓也引诗之意皆与下文无纵诡随四语互相发纵说文云绥也视若不介意之谓诡诈随从也万云通章无纵诡随句最重故章章有之小人祸国只是一味诡随大氏居高位者多喜软熟恶刚方小人欲进其身亦必未命先唯未令先诺阳顺其意阴匿其奸人主不察而信之于是逞其无良之志肆其悖恣之口穷其罔极之恶露其丑厉之状遂其缁纁之奸寇虐播于下民而王国因之以坏故不徒曰随而曰诡随随者不诡不过臧获下贱奔走承奉之态诡者不随虽敦懿操莽亦无进身之路合此二字真可谓曲尽小人情态矣无纵者明以辨之断以絶之决不姑息也谨说文云慎也与纵字对看无良不善也严粲云人见诡随者无所伤拂则目爲善良不知其容悦取宠皆爲自利之计而非忠於所事实非善良之士也今戒用事者无纵此诡随则可以谨防无良之人苏辙云人未有无故而妄从人者惟无良之人将悦其君而窃其权则爲之故无纵诡随则无

良之人肃无良之人肃则寇虐无畏之人止又後汉书陈忠上疏云臣闻轻者重之端小者大之源故堤溃蚁孔气泄鍼芒是以明者慎微智者识几书曰小不可不杀诗云无纵诡随以谨无良盖所以崇本絶末钩深之虑也按诗意谓诡随之事乃无良之人所爲而忠则谓诡随不禁必至无良亦随意取义耳式发语声遏尔雅云止也郭璞云今以逆相止爲遏又说文云微止也徐锴云缴绕使止也寇说文云暴也尚书注云羣行攻劫曰寇虐说文云残也寇虐二字串说谓逞虐于氏荼毒如寇孟子所谓民贼也懔尔雅训曾当依说文作替字从日发语声也懔不畏明者言此作爲寇虐之人肆然公行无所忌惮曾不畏人之共见之也李氏云不於诡随之时而禁止之至於爲寇虐而欲遏止之亦以晚矣严云远谓夷狄迓谓中国治道略外而详内夷狄则抚柔之而已中国之治甚详故必能其事犹言克家也以定我王者如此而後天位可永固也承上文言寇虐之人不遏则中国之民必不得安故又申之曰凡欲柔远必先能迓吾前所云惠此中国以绥四方者可不勤勤加之意以爲定我王地乎书言柔远能迓必难壬人诗言柔远能迓在谨无良其旨一矣又左昭二十年郑子产有疾谓子大叔曰我死子必爲政唯有德者能以寬服民其次莫如猛仲尼曰善哉政寬则民慢慢则纠之以猛猛则民残残则施之以寬寬以济猛猛以济寬政是以和诗曰民亦劳止汙可小康惠此中国以绥四方施之以寬也毋从诡随以谨无良式遏寇虐惨不畏明纠之以猛也柔远能迓以定我王平之以和也此非诗本旨然圣贤借经明理亦何所不可】民亦劳止汙可小休【尤韵】惠此中国以爲民逌【尤韵】无纵【丰本作从下同】诡随以谨懔【说文丰本俱作懔】懔【叶尤韵尼犹翻】式遏寇虐无俾民忧【尤韵】无弃尔劳以爲王休【见上丰本作麻 赋也休说文云止息也独言惠中国者上章据天下之大势发论此章则专主修内治而言逌说文云斂聚也民劳则散故必思所以斂聚之懔本作懔说文云不憊也懔说文云乱也诡随之人心中明了惟欲变乱成法以逞其寇虐之谋书所谓辨言乱政利口乱官即其人也旧但作謹譁解于义未尽盖懔懔二字皆从心不从口也俾使也忧通作懔说文云愁也先王立法所以造福民生事事皆有深意存焉今一旦取而纷更之于彼之爲寇虐计得已而民之愁苦将何所纪极故叮咛醒之曰无俾民忧弃说文云捐也尔劳亦主变法言尔误信懔懔者之言曰从事于更张固自谓劳于爲国矣岂知有害无利徒自擲此劳耳慎无虚用其劳于所不必用但因其固然行所无事而使吾王亦得享安静之福可也时必有变法之事王休之休与小休之休其解正同】民亦劳止汙可小息【职韵】惠此京师以绥四国【职韵】无【左传作毋】纵诡随以谨罔极【职韵】式遏寇虐无俾作慝【职韵】敬慎威仪以近有德【职韵 赋也息毛传云止也按息本喘息人以一呼一吸爲一息故息有止义此章又於中国内独提京师而言公羊传云京大也师衆也天子之居必以大衆言之京师者天下根本之地若京师先不安亦何能绥及四方之国乎然寇虐之施自近及远故戒其谨罔极此罔极与他处言罔极不同罔无也极者屋脊之栋有高与中二义惟京师足以当之商颂所谓商邑翼翼四方之极也使诡随之人得肆其寇虐之害则根本先摇而亦无以爲四方之极矣京师离心则四国必皆解体天子将安所托乎胡安国云王者以天下爲家则以京师爲室京师者本也周公作立政曰迪惟有夏乃有室大竞其作?鴉诗以遗成王亦曰既取我子无毁我室皆指京师言之也以京师爲室王畿爲堂诸夏爲庭户四夷爲藩篱治外者先自内治远者先自近本乱而末治者否矣慝当通作匿阴奸也按说文无慝字汉书月见东方谓之仄慝一谓之侧匿故知慝匿通用无俾作慝者无使其招来奸党暗相啸聚也敬慎威仪二句教其但当亲近君子非谓小人盘结必合衆君子与之争胜也观板之诗曰小子躑躑与下章言戎虽小子正是一人则此人必

平素侮慢自贤者孟子所谓詖詖之声音颜色距人于千里之外彼有德之人安肯爲之用乎故以敬慎威仪箴之又左昭二年叔弓聘于晋晋侯使郊劳辞致馆又辞叔向曰子叔子知礼哉吾闻之曰忠信礼之器也卑让礼之宗也不忘国忠信也先国後己卑让也诗曰敬慎威仪以近有德夫子近德矣断章取义非诗正旨】民亦劳止汙可小惕【齐韵】惠此中国俾民忧泄【齐韵】无纵诡随以谨丑厉【齐韵亦叶泰韵落盖翻】式遏寇虐无俾正败【叶泰韵乌外翻】戎虽【丰本改此二字作无曰】小子而式弘大【泰韵 赋也惕尔雅说文皆云息也徐锴云犹憩也惠此中国承上章惠京师绥四国言与首次二章语意有别言果能惠内以及外则惠庶几遍此中国矣泄毛云去也孔颖达云泄者闭物漏去之名故以爲去愚按泄字从水当如水流去之意俾民忧泄与次章无俾民忧相照前此惑于惛愒之说妄有变动既不能使民无忧矣及兹改图尚可使民忧写泄而去也丑说文云可恶也刘熙云臭也如物臭秽也厉说文云旱石也愚按此厉字即孟子厉民之厉以谨丑厉者言以慎防此臭秽可恶之人与有德者相齟齬如旱石之齟物也正败朱子云正道败坏也使有德者不见用而惟诡随之言是从则悖正者胜而守正者败矣戎郑云犹汝也孙毓云戎之爲汝诗人通训按其义未详当是古读戎汝同音故字得通用耳小子少年也国语称厉王说荣夷公其即此人乎辅广云以小子称同列必是长老者之辞式亦语声弘郑云犹广也按弘本弓声转训爲广于义无取当通作弘说文云屋响也屋广则响故以广训言汝乃新进少年而不意其旷度洪量於人无所不容乃尔盖讥调其滥比匪人旧说以爲规其责任之重非也】民亦劳止汙可小安【寒韵亦叶先韵於?翻】惠此中国国无有残【寒韵亦叶先韵财先翻】无纵诡随以谨缙绂【叶铎韵读如卷古转翻陆本作卷】式遏寇虐无俾正反【叶铎韵甫商翻】王欲玉女【音汝】是用大谏【叶铎韵九件翻魏高堂隆传丰本俱作简 赋也安说文云静也字从女在宀下徐锴云女子非有大故不踰阂也愚按此亦止息之意康休息惕安义无浅深趁韵成文耳惠此中国亦申上章之语残说文云贼也刘熙云践使残坏也国无有残李氏云言国无残败之祸也五章无纵诡随下各深一步说而各立一意缙绂苏朱皆云小人之固结其君者也辅云惟诡随之人方能委曲逢迎以自固结于君也按缙绂二字旧无明解说文训缙则曰缙绂不相离也训绂则曰缙绂也释名训绂亦但云藏物缙绂束缚之也毛传训缙绂云反覆也孔氏训缙绂云牢固相着之意愚以字意求之缙左施遣遣之爲言纵也绂左施卷卷之爲言曲也然则缙是纵丝绳令直後乃从而屈曲纏束之则谓之绂也此章爲五章之终故特言以谨缙绂乃归根挈要所在必使君志清明晓然知是之爲是非之爲非则自不爲诡随所惑倘无以破其奸而俾其得以诡随自结则交将日益深而不可解矣王安石云正败者败而已未尽反而爲不正若正反则无正也曹居贞云以是爲非以恶爲善一切相反则亡无日矣玉朱子云宝爱之意女指同列也谏白虎通云间也更也是非相间革更其行也徐锴云於文言東爲谏東者分别善恶通诗反覆详委言之不已故曰大谏朱子云言王欲以女爲玉而宝爱之故我用王之意大谏正於女盖托爲王意以相戒也凌蒙初云文似相戒而忽着王欲玉女一句便是刺王本旨愚按玉之一字亦诗人嘲谑之辞然古今以鼠朴爲璞者多矣独厉王哉】

民劳五章章十句【申培说云厉王之时公卿忧乱同列相戒而作此诗按此诗虽戒同列实刺同列以此同列乃王所信任爲执政者篇中所指诡随寇虐之人皆其党也申说於诗意大相刺谬子贡传阙文】

板凡伯刺厉王也【出序】切责僚友用事之人而义归于刺王【出严氏诗辑引朱子之言按左传云凡蒋邢茅胙祭周公之胤春秋隐七年天王使凡伯来聘然则凡伯乃周同姓国于畿内世在王朝胡一桂云厉王无道召穆凡伯以亲贤之故宜极言而力救之顾乃不直致其谏而姑责同僚以使之闻之者岂非亦以监谤之故不欲婴其锋以陷于罪而甚吾君之恶也耶蒋悌生云详味此诗盖朝廷始昏乱之时其时文武周公之道典章法度粲然具在非不存也在朝之臣老成才德非不有也但王心暴虐弃旧章而不顾疎斥老成而不用而其所任以政者乃少年不更事之人是以民劳于下而政乱于上其时若召穆公凡伯之徒又皆世臣与国同休戚者言不行谏不听义又不可去故其热中之情发而为恳惻切直之词一语责之旋以一语劝之不厌繁复惟欲其有所警悟而改纪于其政所谓乱世之音怨以怒其政乖此类是也】

上帝板板【叶铎韵俾緬翻尔雅作版】下民卒【韩诗作瘁】瘁【叶铎韵多卷翻礼记沈本俱作 陆德明本作憊】出话不然【先韵】爲犹【丰氏本作猷下同】不远【叶先韵於圆翻】靡圣管管不实於亶【叶谏韵直莧翻按管亶本俱旱韵但下两句远谏无叶今以亶叶谏】犹【左传作猷】之未远是用大谏【韵左传丰本俱作简 赋也上帝天也程子云以主宰言谓之帝板本作版说文云判也上帝板板者言天心判离之甚无眷顾之意也毛传训板爲反盖取其偏傍韩诗外传引此亦云劳心苦思从欲极好靡财伤情毁名损寿悲夫伤哉穷君之反於是道而愁百姓其解与毛传同尔雅训板板爲僻则但以文意取之然皆非板字本训也瘁说文云劳病也下民卒瘁者郑玄云天下之民尽病也又礼记缁衣篇子曰上人疑则百姓惑故君民者章好以示民俗慎恶以御民之淫则民不惑矣诗云上帝板板下民卒

按此乃推探乱本之言非本文正义话尔雅说文皆云善言也孙炎云善人之言也然通作嘽说文云语声也盖相应许之意犹尔雅云谋也解见采芑篇人有进善言于彼者彼则不以爲然而据彼之所爲谋者又全无长远之虑即下三章所称是也靡无通音之转也管乐器以竹爲之郑玄谓如箏而小并两而吹者是也实者对虚之名不实则虚矣亶说文云多谷也谷多则实故借爲充实之意此刺当时用事者相习谄谀谓从古安有圣人惟吾王圣耳一唱衆和如管与管之相应犹正月之诗所云具曰予圣者第五章夸毗正指此然听其言则洋洋盈耳而其实何尝有此事徒夸张赞诵以取悦而已时厉王好利其仓廩之所藏者必多故叹之曰若辈言不根心以无爲有不能如谷藏之充实也亦嘲謔之辞犹之未远与爲犹不远语意有别彼不远乃实指之辞此未远则根发端二句说言天心已离民病已极此何等时也宜可以改弦易辙矣而尚狃于细媚忘其大患谋猷仍然未远乎是用大谏虽曰谏同列正所以谏王也自次章以下至末反覆详委言之不已所谓大谏者也左成八年晋侯使韩穿来言汶阳之田归之于齐季文子饒之私焉曰土之二三犹丧妃耦而况霸主霸主将德是以而二三之其何以长有诸侯乎诗曰犹之未远是用大简行父惧晋之不远犹而失诸侯也是以敢私言之按传言不远犹但取无远虑之意】天之方难【叶先韵那沿翻】无然宪宪【叶先韵孚焉翻】天之方蹶【叶霁韵姑卫翻亦叶屑韵纪劣翻】无然泄泄【霁韵亦叶屑韵私列翻说文引此作咄咄又作詵詵尔雅今石经俱作泄泄】辞之辑【韵亦叶合韵祖合翻说文作晁新序作集】矣民之洽【叶辑韵胡急翻亦叶合韵葛合翻左传作协】矣辞之怛【陌韵亦叶药韵弋灼翻说苑陆本俱作绎】矣民之莫【药韵亦叶陌韵莫白翻】矣【赋也难本鸟名後借与易对言者以偏傍与艰同因从艰义艰说文训爲土之难治者以其用工不易故

爲反易之称宪说文云敏也字下从心从目徐锴云目与心应爲敏上从㐁从丰㐁读若绵深屋也丰读若介㐁生散乱也许氏曰于㐁暗丰乱之中以心目治之四体会意蹶说文云僵也即顛蹶也泄当依说文通作咄云多言也按孟子引此诗而解之曰泄泄犹沓沓也事君无义进退无礼言则非先王之道者犹沓沓也夫孟子以言则非先王之道解泄泄而说文亦以沓爲语多如水之流故其字从水从日则与训咄爲多言之义合矣宜从之荀子注引此诗作詵詵亦云辨说利口而饰非以言乱是则谓之詵也言天方以否塞之运难我尔无逞尔之敏捷一往而不顾也天方以顛蹶之运蹶我尔无骋尔之利口以非而乱是也又乐记武坐致右宪郑氏谓宪读如轩声之误也则此宪宪通作轩轩亦可世说谓轩轩若朝霞举是也车前爲轩盖状其足高气扬之象耳民劳之诗云俾民忧泄取水流去之义则此泄泄如字解亦可言其神情涣散不与国事相关亦如水之流去也辞之辑矣四句引起下章之语辞非号令之谓乃在朝诸臣各出所见而有裨益于庙谟者辑说文云车和辑也故取以爲和集之义言欲其集衆思也洽当依左传通作协说文云衆之同和也恠当从说苑及陆德明本通作绎於义爲长绎者抽丝也书曰庶言同则绎论语曰巽与之言能无悦乎绎之爲贵盖欲其集合衆论抽绎于心而思其至当之理也今但依本字解则尔雅训乐说文训悦乃是平心易气不相扞格之意莫通作嘆说文云□嘆也按严忌哀时命篇云嘆□默而无声正此字义尔雅训定而毛传解此莫字亦以爲定则知莫嘆通用取静定之意夫既和同又静定则乱何自生徐光啓云书云同寅协恭和衷哉国家之患莫大乎人私其见而不相能也厉王之时上监谤以防民下好利而不备难此是彼非盈庭莫执壅箴之谊泯矣所谓辑恠只是平心易气献可替否顺理调剂至尔我同心以厘庶政便能爲民造福而洽莫之效臻难蹶之天定也严粲云此诗首章责同僚出话不然爲犹不远故二章因戒之以言论之间宜相和协调谓徒执一己之见者未必有深长之虑惟寮友和同商议庶几合谋并智可以措民于安耳然愚而自用者终不能舍己而从人故三章言我即尔谋听我噐噐四章言匪我言耄尔用忧谗谓己以善言告之而不见听也善言既不见听乃大言虚诞谀言阿附善人见其如此不肯复言矣故五章言无爲夸毗善人载尸也前五章皆说寮友议论不相协犹小旻诗六章其前五章皆说谋犹之不臧也达观上下章旨知辞之辑恠非谓王者出令矣又左襄三十一年叔向曰辞之不可以已也如是夫子产有辞诸侯赖之若之何其释辞也诗曰辞之辑矣民之协矣辞之恠矣民之莫矣其知之矣说苑云子贡曰出言陈辞身之得失国之安危也诗云辞之恠矣民之莫矣夫辞者人之所以通也主父偃曰人而无辞安所用之昔子产修其辞而赵武致其敬王孙满明其言而楚庄以慙苏秦行其说而六国以安蒯通陈其说而身得以全夫辞者乃所以尊君重身安国全性者也故辞不可不修而说不可不善此皆因诗中有辞字遂借以明辞令之重非诗本意也】我虽异事及尔同寮【萧韵陆本大全朱传俱作僚】我即尔谋听我噐噐【萧韵尔雅作敖敖】我言维服勿以【荀子作用】爲笑【叶萧韵思邀翻】先民有言询于刍【说苑作藹】莛【萧韵 赋也此章主出话不然而言异事朱子云不同职也寮同官也按左传荀林父谓先蔑曰同官爲寮吾尝同寮敢不尽心乎爲赋板之三章是寮爲同官也但说文有僚字无寮字而苍颉篇训寮云小窗也其字从㐁则於同官之义无预惟僚字从人说文训爲好貌盖服官之人其威仪美好可知故古以官爲僚虞书百僚师师是也然则此寮字正当通作僚陈栌云观此言则其爲同列相戒甚明即就也噐说文云声也气出头上解见车攻篇盖相诟谇之意郑云我虽与尔职事异者乃与尔同官俱爲卿士我就尔而谋忠告以善道尔反听我言警警不肯受也我言维服与商书说乃言维服语正相类服即佩服之服凡我所言者尔当时常

记存之於心亦如衣服之附丽于身康诰篇所谓衣德言是也笑解顔啓齿也轻侮其言故用以资笑柄也先民孔颖达云先世上古之民贤者有言所谓成语也询说文云谋也𠂔说文云刊𠂔也𠂔说文云薪也𠂔𠂔毛云薪采者孔云𠂔者饲马牛之草𠂔者供燃火之草言古之贤人有语传于後世谓凡谋国者必须谋及下贱者始有以得民之情今我所与尔谋者皆询于下贱之所得其言民情最真而女顾以爲笑而不听乎礼坊记篇子上酌民言则下天上施上不酌民言则犯也下不天上施则乱也故君子信让以涖百姓则民之报礼重诗云先氏有言询于𠂔𠂔旧说皆谓𠂔𠂔尚可询况于僚友其义亦通但不如坊记孔子之说於味爲长若诸书引此皆同後说荀子云天下国有俊士世有贤人迷者不问路溺者不问遂亡人好独诗曰我言维服勿用爲笑先民有言询于𠂔𠂔言博问也韩诗外传云天子居广厦之下帷帐之内旃茵之上被躡舄视不出阃莽然而知天下者以其贤左右也故独视不若与衆视之明也独听不若与衆听之聪也独虑不若与衆虑之切也故明王使贤臣辐辏竝进所以通中正而致隐居之士诗曰先民有言询于𠂔𠂔此之谓也说苑云齐桓公设庭燎爲士之欲造见者朞年而士不至於是东野鄙人有以九九之术见者桓公曰九九何足以见乎鄙人对曰臣非以九九爲足以见也臣闻主君设庭燎以待士朞年而士不至夫士之所以不至者君天下贤君也四方之士皆自以论而不及君故不至也夫九九薄能耳而君犹礼之况贤於九九乎夫太山不辞壤石江海不逆小流所以成大也诗云先民有言询于𠂔𠂔言博谋也桓公曰善乃因礼之朞月四方之士相携而并至】天之方虐【药韵】无然谗谗【药韵】老夫灌灌【尔雅作灌灌】小子蹻

蹻【药韵列女传作矫矫】匪我言耄【号韵亦叶药韵慕各翻】尔用忧谗【见上】多将熇熇【叶号韵苦到翻亦叶药韵黑合翻尔雅作謫謫】不可救药【韵赋也此章主爲犹不远而言虐残谗戏也俱见说文天方降残虐将有覆亡之祸不止於方难方蹶而已女无以国事爲戏谗恬然不知斂戢也观下文尔用忧谗则知此谗谗是言其视国事不介意非谓其听己言而笑状类戏谗也老夫孔云凡伯自谓也灌漑也言之不已欲其沁入于心与书言启乃心沃朕心沃字义同小子指执政者即民劳篇所称戎虽小子也蹻说文云举足行高也刘向云诗曰老夫灌灌小子蹻蹻言老夫欲尽其谋而少者骄而不受也秦穆公所以败其师殷紂所以亡天下也故书曰黄发之言则无所愆诗曰寿胥与试美用老人之言以安国也耄朱子云老而昏也左传所谓老将智而耄及之是也忧谗当可忧之时而反以之爲谗孟子所谓安其危而利其菑是也多犹久也将者且然之辞熇说文云火也药所以治病周礼疾医职云以五药养其病注谓草木虫石谷也医职云凡药以酸养骨以辛养筋以咸养脉以苦养气以甘养肉以滑养窍王安石云列子曰曾不发药乎左氏曰不如闻而药之也与此救药同意苏辙云老者知其不可而尽其款诚以告之少者不信而骄之故曰非我老耄而妄言乃女以忧爲戏耳夫忧未至而救之犹可爲也苟俟其益多则如火之盛不可复救矣朱善云夫忧不可戏也苟以忧爲谗则积之之多将如火之燎于原不可得而扑灭矣刘向云夫死者犹不可药而生也悲夫乱君之治不可药而息也诗曰多将熇熇不可救药甚之之辞也韩诗外传云人主之疾十有二发非有贤医莫能治也何谓十二发痿蹶逆胀满支膈盲烦喘痹风此之曰十二发贤医治之何曰省事轻刑则痿不作无使小民饥寒则蹶不作无令财货上流则逆不作无令仓廩积腐则胀不作无使府库充实则满不作无使羣臣纵恣则支不作无使下情不上通则膈不作上材恤下则盲不作法令奉行则烦不作无使下怨则喘不作无使贤伏匿则痹

不作无使百姓歌吟诽谤则风不作夫重臣羣下者人主之心腹支体也心腹支体无疾则人主无疾矣故非有贤医莫能治也人皆有此十二疾而不用贤医则国非其国诗曰多将熇熇不可救药终亦必亡而已矣故贤医用则衆庶无疾况人主乎】天之方憯【叶支韵疾之翻亦叶齐韵征奚翻】无爲夸毗【支韵亦叶齐韵部迷翻】威仪卒迷【齐韵亦叶支韵武移翻】善人载尸【支韵】民之方殿【说文作念丰本作埶】屎【支韵说文作?丰本作呬】则莫我敢葵【支韵丰本作揆】丧【去声说文苑作相】乱蔑资【支韵】曾【家语无此字】莫惠我师【支韵 赋也憯尔雅云怒也按说文无憯字疑当通作挤排也天之方憯就执政身上说与前章方难方蹶方虐就国运说者不同夸通作夸说文云讖也讖者诞也即朱子所谓大言也毗通作比说文云相与周密也言天怒汝之甚方挤排汝不使汝当国汝无徒恣爲夸大之言称圣颂神谄媚人主以自固结首章靡圣管管正指夸而言若尔雅释夸毗爲体柔其实只解毗之一字耳卒郑云尽也迷说文云惑也屈己卑身求得于人籒籀戚施亦孔之丑其终日所行之威仪尽错乱回惑也善人忧国之人载之言则也尸孔云谓祭时之尸以爲神象故终祭而不言贤人君子则如尸不复言语畏政故也郑云时厉王虐而弭谤钱天锡云小人之焰张善人之气结畏而不敢言愤而不肯言知其无益而不遽言即欲不载尸得乎万时华云或束手旁观或屏迹闲处皆载尸也徐干云君子者行不媿合立不易方不以天下枉道不以乐生害仁安可以禄诱哉虽强抟执之而不获已亦杜口佯愚苟免不暇国之安危将何赖焉故诗曰威仪卒迷善人载尸此之谓也王应麟云善人载尸裴度之晚节也殿说文云击声也说文作念云?也屎当从说文作?云呬也孙炎云人愁苦呻吟之声也本无屎字又俗以粪爲屎庄子谓道在屎溺是也然古文屎本作 一字两譌可见其谬民之方殿屎以刑法之峻言无莫通音之转也葵菜也其性常倾叶向日解见采菽篇言民方遭搏击之威愁苦呻吟无敢依归于我如葵之向日也丧犹失也蔑王弼云犹削也孔云谓微蔑物之见削则微蔑也陆元朗云楚俗有削蔑之言资说文云货也人所齎持也曾说文云词之舒也惠即行庆施惠之惠谓恤其不足也师衆也民失其业又遭四方多故其所齎持者既削小矣而曾无有怜恤我衆之意叹其诛求之无已也此以赋敛之重言时荣夷公好利而厉王悦之故重敛不已民不能供其求则必至于重法民之殿屎盖繇于此家语说苑俱载孔子曰诗不云乎丧乱蔑资曾莫惠我师此伤奢侈不节以爲乱者也又邓元锡云此章傲求人也丧乱而善人尸居将蔑所与资孰爲代天惠民乎亦通】天之牖【风俗通作诱】民如埴【风俗通作埴】如簴【叶齐韵读如齐前西翻】如璋如圭【齐韵】如取如携【齐韵】携无曰益【陌韵】牖【礼记外传俱作诱】民孔易【陌韵】民之多辟【陌韵】无自立辟【见上 赋也此章承上章丧乱蔑资二句而深着其祸大学曰货悖而入者亦悖而出孟子曰上下交征利而国危矣即其意也天之牖民三句推原民性本善皆本于天之所命汤诰所谓维皇上帝降衷于下民若有恒性者凡仁不遗亲义不後君皆民之所能爲也特视上人所以开导之者何如耳牖说文云穿壁以木爲交窗也所以见日徐锴云古者一室一户一牖程子云牖者开通之义愚按左传言天牖其衷用字同此但彼只就一时言此则本其受于有生之初者言之谓开民良知而民无不知开民良能而民无不能也埴簴解见彼何人斯篇璋圭解见卷阿篇毛云如埴如簴言相和也如璋如圭言相合也孔云埴簴俱是乐器其声相和故云相和半圭爲璋合二璋则成圭故云相合愚按如埴如簴指衆民言孟子谓故凡同类者举相似也同肖形而爲人则同有此性故彼如埴此如簴也如璋如圭指天人相合言子思言天命之谓性散之则爲人人之性合之则共一维天之命故民如璋天如圭也然则王如能以德道民即无不能秉德以尊

君亲上者矣而其如在位之臣以言利导王弃德不务何哉如取如携言取民也取孔云谓物在他处行往取之携说文云提也谓以手举之取携只是一意言如取物于他处而以手举之也故下文但承携字言无通作毋戒辞也无曰者言慎毋出之于口也携而至于增益征敛无度非维正之供也此即上章所谓丧乱蔑资曾莫惠我师者民何以堪牖民指君言孔甚也易变易也按说文易本虫名乃蜥易也陆佃谓蜥易一日十二时变色故有变易之义夫上之所爲下之归也君好利民谁不好利君所以啓迪其民者如此民亦将疾趋改易而向所得于天牖之本体总渐灭而不复自存矣势必至于君能取民亦能夺下文言民之多辟所自来也乐记子夏云爲人君者谨其所好恶而已矣君好之则臣爲之上行之则民从之诗云诱民孔易此之谓也又韩诗外传云人有六情目欲视好色耳欲听宫商鼻欲嗅芬香口欲嗜甘旨其身体四肢欲安而不作衣欲被文绣而轻煖此六者民之六情也失之则乱从之则穆故圣王之教其民矣必因其情而节之以礼必从其欲而制之以义义简而备礼易而法去情不远故民之从命也速孔子知道之易行曰诗云诱民孔易非虚辞也按此则以易爲难易之易旧说亦皆如此读然於韵不合其失明矣若乐记所引孔易仍是变易之义定当以前说爲正民之多辟郑云民之行多爲邪辟者按此则辟当通作僻说文云从旁牵也从旁牵之其非出于正道可知自立犹言置身也辟即上文之辟毋自立辟者忧其不免也言民今既多邪僻而有乱心矣汝毋晏然置身于羣邪之中而不思所以挽回之策窃忧祸之及女也能无惧乎左宣九年陈灵公与孔宁仪行父通于夏姬皆衷其袒服以戏于朝泄冶諫曰公卿宣淫民无效焉且闻不令君其纳之公曰吾能改矣公告二子二子请杀之公弗禁遂杀泄冶孔子曰诗云民之多辟无自立辟其泄冶之谓乎昭二十八年晋祁胜与鄔臧通室祁盈将执之访於司马叔游叔游曰郑书有之恶直丑正实蕃有徒无道立矣子惧不免诗曰民之多辟无自立辟姑已若何按二传引诗语意正同】价【荀子汉书俱作介】人维【汉书作惟下同】藩大【荀子作太】师维垣【叶寒韵胡官翻按藩垣俱元韵但翰无元叶故俱用寒韵】大邦维屏大宗维翰【叶寒韵河干翻】怀德维【左传作惟下同】宁【叶阳韵尼良翻丰本作寔】宗子维城【叶阳韵辰羊翻】无【在传汉书俱作毋】俾城坏【叶贿韵胡罪翻】无【左传汉书俱作毋】独斯畏【叶贿韵乌贿翻 赋也此章承上章民之多辟二句而教之以弭乱之道价尔雅说文皆以爲善也价人即第五章所云善人也藩孔云园圃之篱也善人在位足以建威销萌天下望其气势自然有所畏惮而不敢发故曰维藩如此而可令其载尸乎大师王安石云大衆也垣孔云小墙之名国之有封疆犹家之有垣墙后非衆罔与守邦故曰维垣如此而可令其莫敢葵乎荀子云君人者爱民而安好士而荣两者无一焉而亡诗曰价人维藩大师维垣此之谓也大邦二句又进而推言之大邦郑云成国诸侯也孔云以言大邦则不兼小国故知爲成国诸侯七命赐国伯以上爲成国也尔雅云屏爲之树谓小墙当门中者王者以天下爲家侯甸男采卫诸侯在门庭之内堂奥之外有屏之象焉宜有以綰结之不可使之离心也大宗即梓材所谓大家孟子所谓巨室如尹吉之类翰鸟羽也大宗勲閼之旧枝叶之蕃足以联合衆心羽翼王室有翰之象焉宜有以联属之不可使其解体也时厉王用荣公爲卿士诸侯不享而卫巫监谤之後国人莫敢出言道路以目则外而大邦内而大宗其爲携贰者多矣故是诗云然怀德欲其怀爱民之德不言利也怀如怀抱之怀与论语孟子怀德同例下章言无在而不敬天正所谓怀也宁通作寔说文云安也天下康宁无多辟之患也宗子郑云谓王之适子愚按此盖不忍斥言王故但目宗子耳即所以目王也孔云城可以御寇难故以城喻言尔信能怀德以事君使四方无虞则庶乎王之太子亦有所恃以爲安矣左僖五年晋侯

使士蔦爲二公子筑蒲与屈不慎置薪焉夷吾诉之公使让之士蔦稽首而对曰诗云怀德维宁宗子维城君其修德而固宗子何城如之无通作毋戒辞也下同俾使也城指宗子也坏说文云败也独郑云独居也斯说文云析也郑云离也斧以斯之之斯畏惧也言汝苟不能怀德而仍惟贿是求则氏不堪命必祸及宗子是谓城坏城既坏矣汝将焉往虽存汝之一身而家与之爲怨人与之爲讐终必不免可惧也哉尔其长虑早图毋使至此非独爲宗子亦所以自爲也抑是言也岂独戒同列哉古人有言曰抚我则后虐我则讐孟子曰寡助之至亲戚叛之使厉王而闻及此能无然惧乎孔云周语曰彘之乱宣王在召公之宫国人围之召公以其子代宣王是祸及宗子也左传曰至于厉王王心戾虐万民弗忍居王于彘是独居而畏也贤人之言皆有徵矣又左昭六年宋寺人柳逐华合比於是华亥欲代右师乃与寺人柳比公使代之见于左师左师曰女夫也必亡女丧而宗室於人何有人亦於汝何有诗曰宗子维城母俾城坏母独斯畏女其畏哉此引诗意又稍异】敬【後汉书作畏】天之怒【遇韵】无【左传後汉书俱作不】敢戏豫【叶遇韵愈戍翻】敬天之渝【虞韵後汉书作威】无【左传後汉书俱作不】敢驰驱【虞韵後汉书作驱驰】昊天曰明【叶阳韵谟郎翻】及尔出王【阳韵丰本作往】昊天曰旦【叶霰韵都眷翻】及尔游衍【叶霰韵延面翻陆本作羨赋也敬天四句言怀德也敬非空空畏惧而已必思所以安民而回天者其所怀抱当在德矣夫方难不已至于方蹶方蹶不已至于方虐此天怒之甚也尚敢以戏豫处之耶尔用忧谗所谓戏豫也戏旧解皆训爲谗弄之意未详其义所出考说文解戏爲三军之偏而徐锴则云所谓戏下者也戏下即麾下然则戏麾通用直是状其信手指麾谓之谗弄耳豫乃象之大者旧训爲怠缓又训爲逸乐皆所未喻当是通作舒舒者伸也伸展自如则怠缓逸乐二义俱有矣故晋书地理志解豫州名义云豫者舒也言性理安舒也舒亦有豫音又偏傍相同故得通用也渝说文训爲变污故有变之义易言官有渝春秋言渝盟是也篇首言上帝板板则已将改易天命属之他人矣天心之变如此尚敢以驰驱承之耶走马谓之驰策马谓之驱然此不必指盘游言如小子蹻蹻即所谓驰驱也两无皆戒辞昊天曰明又覆说所以当无敢之意吴尔雅注云气皓□也天明天旦对天怒天渝言出王游衍对戏豫驰驱言世乱者天晦之象世治者天明之象自治而趋乱爲明入于地之象自乱而转治乃夜复爲旦之象两及尔与及尔同僚语气相类王毛云往也按往有王音故以音同通用左贵嫔德柔颂云邈邈德柔越天之刚神以知来智以藏往是也出王者朱子云言出而有所往也游说文云旌旗之流也亦借爲浮水之义衍水溢也言游又言衍总象其飘飘纵裕之意言我所以戒尔毋敢戏豫驰驱者亦谓此时天方怒方渝故耳假使天步际其清明则我固将偕汝以出往而观化自娱抑使否运倏而获转则我亦且偕汝以游衍而及时爲乐矣而岂故爲是苦言以规汝乎旧说谓天之监人无往不在其理自精然於此诗立言之意反觉寬缓未切读者详之】

板八章章八句【申培说云厉王用事之臣多怀不忠以致祸败故公卿赋此以责之按不忠二字既属寬泛而序言此诗凡伯所作则已明着其人乃泛云公卿赋此何也僞书鄙浅固无足怪子贡传阙文】

荡厉王无道召穆公赋此诗以谏之【出申培说序传皆以此诗爲召穆公作万时华云反覆说纣贾山之借秦爲喻也反覆说天霍光之所谓王行自絶于天也邹德胤云通篇托之文王叹商危言不讳而卒不能啓王之聪故异时彘之乱国人围王宫召公曰昔吾骤谏王王不从

以及此难夫骤谏者非独春秋外传所载谏监谤数语盖荡之诗尤最危焉而厉王不以为罪其犹有容言之度乎愚按民劳荡二诗皆穆公所作初犹托讽于同列其後王恶愈深故遂直谏王耳季本云此诗若非面陈则当为小雅】

荡荡【尔雅作荡荡】上帝下民之辟疾威上帝其命多辟【陆德明本作僻两帝两辟不别用韵亦一变体】天生烝民其命匪谌【叶东韵市隆翻说文作忱韩诗作訖】靡不有初鲜克有终【东韵 赋也孔颖达云此下诸章皆言文王曰咨此独不然者见实非殷商之事故於章首不言文王以起发其意也荡字从水非从艹故为水流广远之貌书荡荡怀山襄陵是也荡荡上帝呼上帝而告之也云荡荡者象其广远而言不敢斥君故借言下民与书高宗彤日篇言惟天降下民意同辟通作僻邪僻也解见板篇疾说文训病亦训急徐锴云病来急故从矢矢急疾也威说文以为姑之称故其字从女而又从戌者徐锴谓土盛于戌土者阴之主亦犹姑为妇之主故从戌也汉律有妇告威姑之文然则姑之称威其来古矣後人因此遂借为气势可畏之义以其统内事而为妇所严惮故也命自天之付畀于人者而言言此下民之相习于邪僻也岂上帝欲疾速降之威虐故其所以命之者无非戾气所鍾而使之多邪僻如是乎盖无所归咎而姑为憾天之辞也烝衆也其命二字略断匪非通谌说文云诚谛也匪谌主民言靡之言无也鲜通作尠少也有初鲜终以閱历之变态言诗人既先致憾于天矣因又为之解曰天生衆民其付畀之理本一而无二惟人不能使此理之在己者谌信不移故使天之命亦若有不可信者耳是使其命匪谌者皆人之为也试观天下人当其始时去性尚近多有可观迨夫末路染习日深少不变节此岂可归咎于天哉以诗意观之厉王初年似未甚有失德如第三章言而秉义类是犹知任贤人也迨其後小人进用遂至多行不义敛怨于民皆小人教之耳民亦知其播虐有自所以小人既殛而王流于彘之後犹尚得以寿终此诗言靡不有初以致其叹惜复言鲜克有终以动其挽回王若听此而觉悟焉且将不失为贤王何至有流彘之事乎朱善云人性皆善厉王之性亦文武成康之性也而何不善之有要其终而观之则文武成康若彼其仁厚而厉王若彼其暴虐何也盖文王性之者也武王身之者也成为康困知勉行者也厉王自暴自弃者也惟其自暴自弃也故与之言仁义之言则拒之而不信与之行仁义之行则绝之而不为然则非天命之多辟也乃王之逆天命而自底于多辟也非天命之匪谌也乃王之逆天命而自为是匪谌也非天命之多辟非天命之匪谌则其荡荡者固自若也而岂可以疾威言之哉因知其为怨天之辞而非天之实有是也朱子云刘康公曰民受天地之中以生所谓命也能者养之以福不能者败以取祸此之谓也左宣二年晋灵公不君士季将谏三进及溜而後公视之曰吾知所过矣将改之士季稽首而对曰人谁无过过而能改善莫大焉诗曰靡不有初鲜克有终夫如是则能补过者鲜矣君能有终则社稷之固也岂惟羣臣赖之晏子春秋云景公将观于淄上与晏子闻立公喟然叹曰呜呼使国可长保而传于子孙岂不乐哉晏子对曰婴闻之能长保国者能终善者也诸侯并立能终善者为长列士并学能终善者为师昔先君桓公其方任贤而赞德之时亡国恃以存危国仰以安是以民乐其政而世高其德行远征暴劳者不疾驱海内使朝天子而诸侯不怨当是时盛君之行不能进焉及其卒而衰怠于德而并于乐身溺于妇寺而谋因竖刁是以民苦其政而世非其行故身死乎胡宫而不举虫出而不收当是时也桀纣之卒不能恶焉诗曰靡不有初鲜克有终不能终善者不遂其君韩诗外传云官怠于有成病加于小愈祸生于懈惰孝衰于妻子察此四者慎终如始易曰小狐汔济濡其尾诗曰靡不有初鲜克有终按合观诸书所引可以得此诗

之意又外传云蚩之性爲丝弗得女工燔以沸汤抽其统理不成爲丝卵之性爲雛不得良鸡覆伏孚育积日累久则不成爲雛夫人性善非得明王圣主扶携内之以道则不成君子诗曰天生烝民其命匪谿靡不有初鲜克有终言惟明王圣主然後使之然也其言理甚是然以诗言烝民爲主化民言则絶非诗意若左襄三十一年卫侯在楚北宫文子见令尹围之威仪言於卫侯曰令尹似君矣将有他志虽获其志不能终也诗曰靡不有初鲜克有终终之实难令尹其将不免此但借初终二字爲言去诗旨更远矣】文王曰咨咨女【音汝下同】殷商【每章俱用此二句起又不用韵亦变体也】曾是强御【汉书注作圉】曾是掊克【职韵】曾是在位曾是在服【叶职韵鼻墨翻】天降滔【大全朱传丰本俱作慆】德女兴是力【职韵 赋也咨孔云叹辞殷商解见大明篇先儒以爲指紂也吕氏春秋云昔者紂爲无道杀梅伯而醢之杀鬼侯而脯之以礼诸侯於庙文王流涕而咨之孔云厉王弭谤穆公朝廷之臣不敢斥言王之恶故止陈文王咨嗟殷紂以切刺之欧阳修云以下条陈王者之过恶言此等事皆殷紂所爲文王咨嗟以戒於初而厉王践而行之於终也陈际泰云板刺厉王也其似刺同列托也惟民劳亦然至荡而乱益深矣其每章以文王发端亦托也托同列指言时事也托文王乃不指言时事托同列可尽言也托文王尤可尽言也文王尊盖所刺讥又在胜国夫在胜国于是益展其言故曰乱益深也曾说文云辞之舒也曰曾是者怪咤之辞上二句曾是言何乃有是人下二句曾是言何乃用是人也强御毛传云强梁御善也强说文云弓有力也孔云任威使气之貌御犹御人以口给之御按御圉圉三字音同解异御者祀也圉者守也止也圉者圉圉也今误以圉圉之圉爲圉而以止守之圉爲御至御之爲祀名则全无识者此御字当通作圉谓拒而止之也掊说文云把也引盐官入手取盐爲掊然则是取物之名也克胜也逆取于民而民无如之何是爲彼所胜也强御是妬贤嫉能者下章言强御多怼是也掊克是聚斂巧取者下章言寇攘式内是也时厉王任用此两等人故云然墨子曰厉王染于□公长父荣夷终吕览亦云厉王染于虢公长父荣夷终其即此辈乎服毛云服政事也在位在服总上言谓居公卿百执事之位而任其职事也孔云在服与在位对文谓非徒备官又委任之也降下也滔说文云水漫漫大貌滔德即指强御掊克言以其存之心者方兴未艾如滔天之水未知所极故曰滔德篇中女而尔皆指王也兴说文云起也登庸之谓人事之得失本于气化之盛衰国家不幸而有此滔德之人固若天之所降然亦繇汝作兴信用此一辈人故彼于是得以肆力爲之耳下章曰流言曰斂怨皆所谓是力者也一说冯时可云天降慆慢之德于人而女又兴起此辈以协爲力则胡爲不乱也亦通】文王曰咨咨女殷商而秉义类【寘韵亦叶队韵卢对翻】强御多怼【寘韵亦叶队韵徒对翻】流言以对【队韵】寇攘式内【队韵亦叶寘韵而瑞翻】侯作【陆本作诟】侯祝【叶宥韵职救翻】靡届靡究【宥韵 赋也而之爲汝音之转也手持禾爲秉则秉乃执持之意义犹善也对第五章不义言则此义指善人也类似也汝所秉持而见之行者乃与善人同类之事谓行善道也观此则善人当厉王初年其尝稍见用可知矣怼怨也强御之人见王之向善也则尝怀怨恨而思所以间阻之於是乎巧造言语以入告于王务诽谤其事之不便总之皆无根之言也以其浮浪如水之流谓之流言孔云以谤毁之言对王令王不用之使贤者黜退也按泰誓篇数紂之恶云崇信奸回放黜师保屏弃典刑囚奴正士事正谓此寇攘夺刼之名即掊克之人是也羣行攻刼曰寇取非其有曰攘加以盗名丑之之甚也式用也孔云强御之人既退贤者乃进其党类故寇盗攘窃爲奸宄者进在王朝而信之使用事於内也以小人後至而自外入内故云式内按牧誓篇数紂之恶云乃惟四方之多罪逋逃是崇是长是信是使是以爲大夫卿士俾暴虐于百姓以奸宄

于商邑即此所谓寇攘式内者也侯诸侯也作通作沮周礼沮祝掌盟沮郑注云大事曰盟小事曰沮邓元锡云诏明神殛之使沮败曰沮左传郑伯使沮射颖考叔者是也祝谓致词于神以求福周礼大祝掌六祝之辞以事鬼神示祈福祥求永贞是也六祝一曰顺祝二曰年祝三曰吉祝四曰化祝五曰瑞祝六曰筴祝此其爲顺祝化祝乎邓云顺祝者君仁臣忠之类化祝者祝化广被也靡无通届极究穷也俱见说文诸侯苦王之听信小人恣爲暴虐故有沮小人使神速殛之者亦有祝王使神牖王心而改图者而皆不敢必王暴虐之事於何时而始有穷极也】文王曰咨咨女殷商女桀然于中国【职韵】敛怨以爲德【职韵】不明尔德【见上】时无背无侧【职韵丰本作反】尔德不明【庚韵】以无陪【陆本作培】无卿【庚韵前汉书五行志中引此四句云尔德不明以亡倍亡卿不明尔德以亡背亡仄 赋也桀然毛云犹彭亨也郑云自矜气健之貌按桀然字俱从火则疑爲火炽盛之貌然说文解桀爲火炙肉而无桀字其义俱难解赵颐光谓本作咆哮乃是状其暗鸣立威之象亦或可信但未详所出耳愚意桀但当通作包包者裹也然韵会云通作休休者美也包休犹云积德与敛怨相反言女当敛聚美事于中国而乃偏为敛怨之人乎此解较顺请以俟达者中国对夷狄言与民劳篇解同观第六章对鬼方言可见敛怨者寇攘之人所行者皆敛集衆怨之事吕正献公所谓小人聚敛以佐人主之欲而不知其终爲害也赏其纳忠而不知其大不忠也嘉其任怨而不知其怨归于上也微子篇云降监殷民用乂讐敛召敌讐不怠罪合于一多瘠罔诏正谓此也以爲德者言王反以此敛怨之人爲有德之人而任用之也此惟王之不明于德故如此人心虚灵不昧衆理具焉是之谓德能明其德则自能知人矣此探本之论时是通用音之转也反面爲背是违于理不正爲侧是趋于邪皆指小人之敛怨言也背侧俱非佳字旧说以背爲前後左右之称背可谓之前乎其不该明矣尔德不明与不明尔德顛倒变文而意自相属繇不能明其德故其德遂不明也陪本重土之义因又训爲贰贰者重也孔云陪贰谓副贰王者则三公也卿士谓六卿也昭三十二年左传曰物有陪贰天生季氏以贰鲁侯诸侯以上卿爲贰则知天子陪贰唯三公也冢宰虽亦贰王治事当从六卿之制也前汉书五行志云诗云尔德不明以亡陪亡卿不明尔德以亡背亡仄言上不明暗昧蔽惑则不能知善恶亲近习长同类亡功者受赏有罪者不杀顔师古云言不别善恶有逆背倾反者有堪爲卿大夫者皆不知之也愚按班顔之解已得诗意但背侧陪卿四字俱是就小人身上说承上文敛怨以爲德一句而言无背无侧者彼实背侧而不知其爲背侧故明有而谓之无也无陪无卿者不知其不堪爲陪卿而漫以之爲陪卿故虽有而犹之无也又韩诗外传云智如泉源行可以爲表仪者人师也智可以砥行可以爲辅弼者人友也据法守职而不敢爲非者人吏也当前决意一呼衆诺者人隶也故上主以师爲佐中主以友爲佐下主以吏爲佐危亡之主以隶爲佐语曰渊广者其鱼大主明者其臣惠眼观而志合必繇其中故同明相见同音相闻同志相从非贤者莫能用贤故辅弼左右所任使者有存亡之机得失之要也可无慎乎诗曰不明尔德时无背无侧尔德不明以无陪燕卿又云有谗谀争臣者其国昌有默默谀臣者其国亡诗曰不明尔德云云言文王咨嗟痛殷商无辅弼谏诤之臣而亡天下矣按韩于背侧陪卿之义亦仍从旧说】文王曰咨咨女殷商天不湏尔以酒【无韵未详】不义从式【无韵未详】既愆【陆本作讐】尔止【纸韵】靡明靡晦【叶纸韵呼洧翻】式【陆本作或下同】号【平声】式呼【叶遇韵荒故翻亦叶个韵呼个翻又叶禡韵虚讶翻汉书崔注俱作譖】俾【陆本作卑】昼作夜【禡韵亦叶遇韵元具翻 赋也湏说文云沈于酒也按孔引酒诰注云饮酒齐色曰湏而文选薛君章句则云齐顔色均衆寡谓之沈闭门不出客谓之湏总之沈湏义颇相似

而沈字右施尤者淫淫行貌乃沈溺于酒之称涵字右施面则是自其见于面者言孔解爲确齐色谓共饮者皆醉面色齐同也涵尔以酒兼指君臣天之立君以爲民也岂使尔漫不事事乃偕其臣而涵于酒乎不义从式推所以涵酒之繇也从随式用也尔于不义之人随其所行用其所言因遂以饮酒爲乐事而君臣交涵耳小人蛊惑其君如声色狗马之类固自多端而饮酒亦其一彼乘醉饱之昏将有所爲也下章蝸蟴沸羹之弊皆繇于此而君岂能知之乎既愆尔止四句涵酒之容也愆说文云过也止举止也按止字象“木初生之形”木出有址故以止爲足愆尔止者起坐无恒举止失其常度也靡之言无也明言日晦言夜言其穷日夜以爲乐也按礼记云饮酒之节朝不废朝日不废夕今王异是矣式发语声与篇中诸式字不同陆德明云一作或号者嗟吁之声尔雅舞号雩也注云雩之祭舞者吁嗟而请雨是也呼本外息与吸对言内息爲吸外息爲呼此当通作虩说文云虩虩也盖大叫之声古文乌呼亦作於虩是也号呼亦愆止中之一事然至於号呼则酒酣极矣汉书成帝乘輿幄坐张画屏风画紆醉踞姐已作长夜之乐上因顾指画而问班伯曰此图何戒伯曰沈涵于酒微子所以告去也式号式諄大雅所以流连也诗书淫乱之戒其原皆在于酒上乃喟然叹曰吾久不见班生今日复闻说言俾昼作夜视靡明靡晦句更深言其沈醉不省虽白日昏昏然亦如夜也盖荒耽既甚神志昏迷岂特废时失事而已按微子篇云天毒降灾荒殷邦方兴沈酗于酒酒诰篇云在今後嗣王酣身用燕丧威仪皆紆涵酒之证又刘向说苑引此诗谓人之有鬪比之狂惑疾病诗云式号式呼俾昼作夜言鬪行也此全非诗旨】文王曰咨咨女殷商如蝸如蟴【阳韵】如沸如羹【叶阳韵卢当翻丰本作鬻】小大近丧【去声】人尚乎由行【叶阳韵寒刚翻】内燬于中国覃及鬼方【阳韵 赋也蝸蟴也解见七月篇蟴蟴也亦名蟴蝸按陆玕云蟴之大而黑色者有五德文清廉俭信一名蝸虬一名虬螭青徐谓之螭螭楚人谓之螭蛄秦燕谓之螭蛄或名之蜺蜺郭璞云俗呼爲胡蟴江南谓之蟴 陆佃从郭说谓蟴其首方广似蟴而小鸣声清亮蝸亦蟴之一种形大而黑昔人啖之佃所谓蝸乃玕所谓蟴总之蝸蟴皆蟴类大小异名莫能详也以诗意推之冠蝸于蟴之上则蝸当是大者邹阳柳赋亦云蝸蟴厉响而尔雅于螭蟴蟴又皆得蝸之名则佃之说爲足信矣蝸蟴皆善噪者沸说文云水腾涌也羹说文云五味和鬻也刘熙云汪也汁汪郎也如蝸如蟴言之乱也谋夫孔多各爲其所欲爲位之尊者则如蝸位之卑者则如蟴也如沸如羹政之乱也今日行一令明日行一令迭进不停如水之沸甲言亦行之乙言亦行之错互无章如羹之襍也顔师古亦云谓政无文理虚言噂沓如蝸蟴之鸣汤之沸涓羹之将熟也小大以法度言丧亡也先王之法度无论大纲领小节目皆爲小人所变乱其有尚存而未亡者特千百中之十一耳故曰近丧也周书无逸篇云乃变乱先王之政刑至於小大语正同此人指王也不欲斥言故但泛称人也由从也彼之变乱成法如此而人尚犹然从其所行曾不以爲非也按微子篇云卿士师师非度正谓此也对夷狄言则中国爲内燬说文云壮大也本作𠂔三大三目二目爲𠂔居倦切目围也三目爲𠂔益大也此象其赫奕尊严之状人不敢近苏子瞻所谓秦人视其君如雷霆鬼神者也史记云王行暴虐侈傲国人谤王王怒得卫巫使监谤者以告则杀之王益严国人莫敢言道路以目此即所谓燬于中国者也覃者延长之义说文以爲长味尔雅以爲延也鬼方王质谓楚俗多鬼指楚也季本云唐高祖以爲夏曰熏鬻商曰鬼方周曰玁狁汉曰匈奴唐曰突厥本一国而异名非也大王避熏鬻之患本在殷时则商亦仍熏鬻之旧未尝有鬼方之名也至周始名玁狁耳又世本注云鬼方於汉则先零戎後汉西羌传云武丁伐西戎鬼方然皆无确据今按易言高宗伐鬼方而诗言高宗伐荆楚则鬼方之地在荆楚中明矣史记楚世家亦云周厉王之

时暴虐熊渠畏其伐楚亦去其王此诗先言内燹而承之以覃及鬼方正谓峻厉之威及于远方与史殊合然则鬼方非荆楚而何】文王曰咨咨女殷商匪上帝不时【叶纸韵上纸翻】殷不用旧

【叶纸韵暨几翻】虽无老成人尚有典刑【叶阳韵胡光翻】曾是莫听【叶阳韵他阳翻丰本作□】大命以倾【叶阳韵曲王翻丰本作顷 赋也匪通作非严云不时者犹言厄运非上天爲此厄运乃殷自不用其先王之旧法耳按周书政繇旧之旧亦指旧法言一说用旧谓用旧人亦通老成人孔云年老成德之人典庄都云大册也字从册在丌下尊阁之也刑当作刑字从井从刀井者法也犯法者必丽于刑故从刀也典刑二字连言谓典册所载之法也听犹察也人有举典刑以入告者王每厌薄之以爲此岂足当老成人而我信之乎然其人虽可轻而其言一一本於典刑则固不可弃乃曾无一语见听察何也此隐隐是穆公自道而同志如凡伯芮伯之輩亦在其中矣一说郑云朝廷皆任喜怒曾无用典刑治事者孔云以莫爲总辞故知指君臣也亦通按微子篇云乃罔畏畏拂其耆长旧有位人亦纣弃老成之证大命以倾预卜其将然之辞严云盘庚云懋建大命大命谓国之兴亡也倾说文云仄也凡物倾仄则摇而不安故亦训爲危王应麟云正先谏诛羸运促李云忠陨汉宗覆章华罹戮陈业隳昭图嬰祸唐鼎移诗曰曾是莫听大命以倾刘向云君有过不谏诤将危国陨社稷也有能尽言於君用则留之不用则去之谓之谏用则可生不用则死谓之诤有能比和用力率羣下相与强矫君君虽不受不能不听遂解国之大患除国之大害成於尊君安国谓之辅有能亢君之命反君之事窃君之重以安国之危除主之辱攻伐足以成国之大利谓之弼故谏诤辅弼之人社稷之臣也明君之所尊礼而闇君以爲己贼故明君之所贵闇君之所杀也明君好问闇君好独明君上贤使能而享其功闇君畏贤妬能而灭其业罚其忠而赏其贼夫是之谓至闇桀纣之所以亡也诗云曾是莫听大命以倾此之谓也】文王曰咨咨女殷商人亦有言顛沛之揭【霁韵亦叶屑韵蹇列翻】枝叶未有害【叶霁韵暇憩翻】本实先拔【叶屑韵笔别翻列女传作败丰本作蹶】殷鉴不远在【国语在字上有近字】夏后【杜钦传后字下有氏字】之世【霁韵亦叶屑韵私列翻 赋也人孔云古之贤哲之人亦有言即顛沛以下三语是也顛通作楨说文云仆木也徐锴云尚书盘庚若顛木之有由楨本作此假借作顛仆字也沛本水流之貌孟子若水之就下沛然孰能御之是也此言沛者以仆地之势如之揭说文云高举也枝说文云本别生条也徐云自本两分故曰别生害说文云伤也木下曰本实谓充实拔说文云治也古人言顛仆之木沛然至地必高举而起之其根叶纵有所损未足爲伤须先拔治其根本使其元气充实则顛木可生矣今民怨已甚国势已危先王法度无小无大又皆爲小人所破坏欲骤然槩举而修复之固未易言惟于大关键所在亟加讲求斥远小人蠲除苛政要以收拾民心爲主民心者国家之根本根本既固国势可安然後渐次厘飭节目以还先王之旧此拨乱爲治之机括也召公谏王所惓惓望王有终者其指归全在于此旧说训揭爲蹶训拔爲絶於二字本义无涉全非诗意即如所说木之本根既已絶矣而枝叶尚然无害有此理否况厉王之时衆口嗷嗷内而中国外而鬼方人心无不尽去亦不得谓之枝叶未有害也传讹相沿深知其谬殷鉴二句危言以动之也夏后之世指桀也承上文言苟爲不然则大命之倾将不可救王其能无惧乎明镜非远视尔所代彼夏后之世何以讫于桀哉泰誓篇亦云厥鉴惟不远在彼夏王但彼爲诋辞此爲惕辞耳苏辙云殷鉴在夏盖爲文王叹纣之辞然周鉴之在殷亦可知矣周语太子晋云天所崇之子孙或在畎亩繇欲乱民也畎亩之人或在

社稷繇欲靖民也。无有异焉。诗云殷鉴不远，在夏后之世。孟子云暴其民甚，则身弑国亡，不甚则身危国削，名之曰幽厉，虽孝子慈孙百世不能改也。诗曰殷鉴不远，在夏后之世，比之谓也。韩诗外传云昔者禹以夏亡，桀以夏亡，汤以殷亡，纣以殷亡，故无常安之乐，宜治之民得贤则昌，不肖则亡，自古及今，未有不然而者也。夫明镜者所以照形也，往古者所以知今也。夫知恶往古之所以危亡而不袭蹈其所以安存者，则无以异于敛行而求遂於前人。鄙语曰不知爲吏，视已成事，或曰前车覆而後车不诫，是以後车覆也。故夏之所以亡者而殷爲之，殷之所以亡者而周爲之，故殷可以鑑於夏而周可以鑑於殷。诗曰殷鉴不远，在夏后之世。黄佐云板荡之诗，深刺其君之恶，非章君过也。忧国爱君之心所发也。唐之太宗以诗赐其臣萧瑀而曰板荡识诚臣，噫其亦有感于此也夫！

荡八章章八句【序云召穆公伤周室太坏也，厉王无道，天下荡荡，无纲纪文章，故作是诗也。苏辙駁之云：荡之所以爲荡，繇诗有荡荡上帝也。序以爲天下荡荡，无纲纪文章，则非诗之意矣。严云：臣子作诗，皆发於忧国之忠，欲以感悟其君，虽弊坏已极，犹几其改图，君臣大义无所逃于天地之间也。此诗托言文王叹商，特借秦爲喻耳。或谓伤者伤嗟而已，非谏刺之比如此。殆类後世词人吊古之作，非当时臣子惓惓之义也。子贡传但存召穆公三字，而其余阙文。朱子但泛称爲诗人之作，亦未深信其出于召穆。又郑樵云：三百篇中之诗，皆可被之弦歌。故琴中有鹄巢操、驺虞伐檀操、白驹操，皆今诗。文又古人谓之雅琴颂。琴古之雅颂，即今之琴操。琴者禁也，将以禁人之邪心，故以歌乎诗。如文中子归而援琴鼓荡荡之什，乃知声至隋末犹存】

宛丘刺陈幽公也。淫荒昏乱，游荡无度焉【出序。朱子谓陈国小，无事实，幽公但以謚恶，故得游荡无度之诗，未敢信也。愚按幽公非游荡无度，何至得恶謚，亦安在其不可信乎？考史记载幽公十二年，周厉王奔于彘，而竹书亦纪厉王二十二年，陈幽公薨，则幽公之爲诸侯，实在厉王之世】

子之汤【叶漾韵。他浪翻。楚辞章句作荡】兮宛丘之上【叶漾韵。时亮翻】兮，洵有情兮而无望【漾韵】兮【赋也。子毛传以爲指大夫郑笺以爲斥幽公。孔颖达云：大夫称子，是其常称。又公羊传公子翬谓隐公曰：百姓安？子诸侯说子，则诸侯之臣亦呼君曰子。愚按毛郑之说，皆非也。此直是游人相谓之辞，所以唤起下二章而着幽公淫荒之实耳。汤水流貌。曰子之汤兮者，言其纵情流览如水之流。宛丘水经注云：在陈城南道东。郡县志云：在陈州宛丘县南三里。王隐云：渐欲平，今不知所在矣。按尔雅云：宛中宛丘。又云：丘上有丘爲宛丘。毛公李巡、孙炎皆以爲四方高，中央下。惟郭璞谓中央隆峻，状如一丘，与诸说异。邢昺尔雅疏云：郭谓中央高者以四方高，中央下，即上文水潦所止泥丘也。又下文云：丘上有丘爲宛丘。既言丘上有丘，非中央隆高，而何洵通作恂？说文云：信也。有情犹云可以适情也。下章言歌舞之場，乃在此丘之下，凭高流览，信乎其有足系人情怀也。而之爲尔音之近也。望袁仁云：责望也。此歌舞之乐，乃吾君幽公之所爲，女无责望之也。言无望乃所以深望之耳。其讽切之者至矣。旧说以无望爲刺君之辞，言其威仪不足，观望亦通，但以国人刺君而正斥之曰汤曰无望，安所称婉而多风乎】坎其击鼓【麋韵】宛丘之下【叶麋韵。後五翻】无【汉书作亡下同】冬无夏值【丰本作植，後同】其鹭羽【麋韵。赋也。坎通作龔。说文引诗龔龔鼓，我今文作坎坎鼓，我龔说

文云舞也字从章从夆从攴乐有章故从章夆者降也舞有升降故从夆攴象人两胫有所躡也舞者之行步攴攴然故从攴如旧说以坎爲击鼓声然则後章坎其击缶又将爲击缶声乎应劭云鼓者春分之音以助万物皆鼓甲而出故谓之鼓按舞必应节击鼓所以爲舞节也故曰坎其击鼓後章放此无冬无夏言无时不然范祖禹云冬夏祁寒大暑之时也人之好乐于是时必少息焉今也无冬无夏则其他时可知矣值说文云措也犹持也鹭水鸟尔雅云春舂也一作舂舂陆佃云步于浅水好自低昂故曰舂舂也方言鷖鷖谓之独舂与此同意陆玑云鹭好而洁白故谓之白鸟齐鲁之间谓之舂舂辽东乐浪吴扬人皆谓之白鹭青脚高尺七八寸尾如鹰尾喙长三寸头上有长毛十数枚长尺余毵毵然与衆毛异欲取鱼时则弭之禽经云鹭啄则丝偃鹰捕则角弭藏杀机也郭璞云其头翅背上皆有长翰毛今江东人取以爲睫攤名之曰白鹭縗羽说文云鸟长毛也毛云鹭鸟之羽可以爲翳郑玄云翳舞者所持以指麾愚按此即下章所谓翻也与周礼之羽舞不同彼乃翟羽舞人所执卫诗右手秉翟是也此舞师所执宋太乐文舞不用翟羽而用鹭羽盖惑於此诗所云矣】坎其击缶【有韵】宛丘之道【叶有韵他口翻】无冬无夏值其鹭翻【叶有韵殖有翻尔雅丰氏本俱作纛 赋也尔雅云盎谓之缶孔云易离卦九三不鼓缶而歌注谓艮爻也位近丑丑上值弁星弁星似缶诗坎其击缶则乐器亦有缶又史记蔺相如使秦王鼓缶是乐器爲缶也坎卦六四樽酒簋贰用缶注谓爻辰在丑丑上值斗可以斟之象斗上有建星建星之形似簋贰副也建星上有弁星弁星之形又如弁天子大臣以王命出会诸侯主国尊于簋副设玄酒以缶则缶又是酒器也比卦初六爻有孚盈缶注谓爻辰在未上值东井井之水人所汲用缶左传曰具纛缶备水器则缶是汲水之器然则缶是瓦器可以节乐若今击瓠又可以盛水盛酒即今之瓦盆也国语云缶丝尚宫陈阳云缶之爲器中虚而善容外员而善应中声之所自出者也唐尧之时有击壤而歌者因使?以縗 冥缶而鼓之是以易之鼓缶而歌见于离诗之击缶见于宛丘缶之爲乐自唐至周所不易也孰谓始于西戎乎顾起元云或曰形如覆盆以四杖击之墨子吟缶史记秦王爲赵王击缶其来久矣又黄佐云缶秦声也陈师从胡公于丰徒衆习其声以归国人化之翻解见君子阳阳篇陈祥道云春秋传曰舞师题以旌夏则鹭翻盖若今大乐工执之以引舞者也又诗故云击鼓击缶舞鹭羽鹭翻娱神也盖若孙皓于巫梁武于佛矣踵大姬之余习也顔师古亦云鹭鸟之羽以爲翻立之而舞以事神也愚按商书伊尹曰敢有恒舞于宫酣歌于室是谓巫风况其真溺于巫而恒舞于道上者乎】

宛丘三章章四句【申培说以爲陈人讥其大夫之诗此特因章首有子之一字耳玩诗意似不然子贡传阙文又按春秋桓五年书春正月甲戌己丑陈侯鲍卒公羊传云曷以爲二日卒之?也甲戌之日亡己丑之日死而得君子疑焉故以二日卒之也谷梁传亦云陈侯以甲戌之日出己丑之日得不知死之日故举二日以包也然则此诗所云宛丘之下宛丘之道无冬无夏者其即刺陈侯鲍与未可知也】

东门之枌刺陈风也巫覡盛行女子往往弃其业而观之【班固地理志云周武王封嬀满于陈是爲胡公妻以元女大姬妇人尊贵好祭祀用巫故其俗好巫鬼郑玄诗谱云大姬无子好巫覡祷祈鬼神歌舞之乐民俗化而爲之孔颖达云大姬无子而左传子产云我周之自出杜预曰陈周之出者盖大姬于後生子以祷而得子故弥信巫覡也在女曰巫在男曰覡巫是总名诗称击鼓于宛丘婆婆于枌栩是有大姬歌舞之遗风也匡衡云陈夫人好巫而民淫祀黄

佐云大姬好巫禱本于忠信以通神明之德岂非肃肃之化哉但流俗日至于匪彝尔苏辙云列国之风皆有所自起方周之盛时王泽充塞其善者笃于善不善者以礼自将亦不至于恶其後周德既衰诸侯各因其旧俗而增之善者因善以入于恶而不善者日以益甚故陈以大姬之余俗爲游荡无度亦理势然也愚按时幽公恒舞酣歌国人化之相与纵观巫覡资其游戏所谓上有好者下必有甚也毛传系此诗于宛丘之後所以着巫风之自若归咎于大姬或未足信】

东门之枌宛丘之栩【夔韵】子仲之子婆【说文丰氏本俱作嫫後同】娑【丰本作莎】其下【叶夔韵後五翻 赋也严粲云陈都宛丘之侧其东门与丘之间乃国之交会戴氏云陈诗多言东门必陈人游息之地尔雅云榆白枌邢昺疏云榆之皮色白名枌然则枌即白榆也陆佃云先敷叶後着荚榆性扇地所扇各与木等故其阴下五谷不植而古之人就以息焉齐桓公时衢之民桑麻不种茧缕不治衣多弊屨多穿管仲请沐途旁之枝使无尺寸之阴爲是故也栩解见鸛羽篇枌栩之阴皆人之所趋而聚者子仲之子孔云礼孙以王父字爲氏此人上祖必有字子仲者故氏子仲也严云子女子也愚按以下文娑娑观之字皆从女则子仲之子即女巫是也诗之子于归亦以女子爲子婆说文作嫫云奢也奢者张也娑说文云舞也李巡云娑娑盘辟舞也舞所以娛神或娑娑于枌之下或娑娑于栩之下明其非一时非一处也】谷旦【陆德明本作且云苟且也】于嗟【叶歌韵仓何翻韩诗作嗟】南方之原【丰本作宛丘之坡盖因见原字于韵不叶臆改之耳然四句何必尽用韵鄙浅不足信】不绩其麻【叶歌韵眉波翻】市【潜夫论作女】也娑娑【歌韵 赋也谷尔雅云善也旦早朝也本一日之始而言孔以无阴云风雨谓谷旦是也差说文云不相值也尔雅云广平曰原又说文云高平之野曰原南方之原高明之地子仲之子向皆娑娑于枌栩之下而今忽变而之于南方之原则自故处求之而不可得矣故曰谷旦于嗟也绩缉也市即南方之原之市也此女子闻子仲之子娑娑于南方之原之市因遂不绩其麻而欲往观之也汉王符潜夫论云诗刺不绩其麻女也娑娑今多不修中馈休其蚕织而起学巫祝鼓舞事神以欺诬细民荧惑百姓妇女羸弱疾病之家怀忧愤愤皆易恐惧至使奔走便时去离正宅崎岖路侧上漏下湿风寒所伤奸人所利贼盗所中益祸益崇以致重者不可胜数或弃医药更往事神故至于死亡不自知爲巫所欺误乃反恨事巫之晚此荧惑细民之甚者也】谷旦于逝【霁韵丰氏本作市】越以𨔵迈【叶霁韵】视尔如茝【萧韵】贻我握椒【萧韵丰氏本作茝 赋也逝往也此谷旦之时既知子仲之子所在因往而从之越尔雅云於也𨔵通作总说文云聚束也孔云麻缕每数一升用绳纪之迈尔雅云行也𨔵迈言挟其麻总而行不暇绩也尔指子仲之子也尔雅云茝虺虺毛传以爲茝茝郭璞云今荆葵也谢氏云小草多华少叶叶又翘起陆佃云似茝菁华紫綠色可食微苦罗愿云华五铢钱大色粉红有紫文缕之一名锦葵大抵似芦葍华濮氏云茝茝紫荆春时开花自根及干而上连接甚密有类虻窠故尔雅名虺虺俗曰火虻愚按此以同时凑集而观子仲娑娑者其人亦如虺虺开花之盛故曰视尔如茝旧说皆谓以茝华比女色似未合握说文云搯持也陆佃云持五指也在外爲持在内爲握椒毛云芬香也按周礼女巫掌岁时祓除衅浴注谓如上已修禊以薰草药沐浴涤邪秽椒之实芬香故子仲之子取以相贻亦辟除不祥之意如後世元正小岁皆进椒酒亦其类也巫之所以结纳人心者其术在是此妇人女子辈之所以乐观之与邓元锡云国语曰古者民神不褻民之精爽不携贰者又能齐肃中正其知能上下比义其圣能光远宣朗其明能光昭之其聪能听彻之如是则神降

之在男曰覿在女曰巫是以使制神之处位次主而爲之牲器时服是以圣人用之今之巫祝既闇其义何明之见何法之行正神不降惑于淫厉苟贪货食遂诬人神令此道灭痛矣】

东门之枌三章章四句【序云疾乱也幽公淫荒风化之所行男女弃其旧业亟会於道路歌舞于市井尔朱子亦云此男女聚会歌舞而赋其事以相乐愚按此诗所言婆娑正巫覿之事未有良家子女而羣然歌舞于市中者况不绩其麻二句潜夫之解更自明晰乎子贡传申培说俱阙】

衡门诱陈僖公也愿而无立志故作是诗以诱掖其君也【出序 欧阳修亦云诗人以陈僖公其性不恣放可以勉进于善而惜其懦无自立之志故作诗以诱进之按諡法小心畏忌曰僖公得此諡则序所谓愿而无立志者盖近之矣然是诗通篇俱贤者自道之语盖言已虽隐居无求而实有用世之具特君不见用耳诚用之则转弱小爲强大不难矣诗人作此以诱进僖公其寓意如此蕞尔国乃有此人惜姓名之不传也】

衡门之下可以栖迟【支韵汉书栖迟作？】泌之洋洋可以乐【音络韩诗外传列女传俱作疗郑玄本及石经俱作】饥【支韵韩诗外传作饥 赋也此章言已不见用虽遯世亦足自乐也衡说文云牛触横大木徐锴以爲牛好抵触用木阑制之然则衡乃横木之义故毛传解衡门谓横木爲门也孔穎达云门之深者有阿塾堂宇此惟横木爲之言其浅也栖即栖字禽经云陆鸟曰栖谓止息也迟广韵云久也缓也泌说文云狭流也洋洋朱子云水流貌饥饿也孙毓云此言临水叹逝可以乐道忘饥是感激立志慷慨之喻陆燧云栖迟乐饥字连看上漏下湿恨不急去之爲快惟栖而迟则可久矣不曰忘饥而曰乐饥人惟饥饿切身未免愁烦惟乐而饥虽饥亦乐矣又乐饥一本作 饥按说文云 治也与疗同义孔云饮水可以 渴而云 饥者饥久则爲渴得水则亦小 故言饥以爲韵韩诗外传云子夏读诗已毕夫子问曰尔亦可言于诗矣子夏对曰诗之于事也昭昭乎若日月之光明燎燎乎如星辰之错行上有尧舜之道下有三王之义弟子不敢忘虽居蓬户之中弹琴以咏先王之风有人亦乐之无人亦乐之亦可发愤忘食矣诗曰衡门之下可以栖迟泌之洋洋可以疗饥夫子造然变容曰嘻吾子始可以言诗已矣】岂其食鱼必河之鲂【阳韵】岂其取【音娶下同】妻必齐之姜【阳韵赋而比也此下二章言已若见用则展布必有可观不问国之大小也孔子曰苟有用我者朞月而已可也三年有成孟子曰地方百里而可以王语意相类欧阳修云言何必大国然後可爲譬如食鱼者凡鱼皆可食若必待鲂鲤则不食鱼矣譬如娶妻则诸姓之女皆可娶若必待齐宋之族则不娶妻矣此所谓诱掖之也鲂解见汝坟篇姜齐姓齐者伯夷之後伯夷主四岳之职周语云四岳赐姓曰姜】

岂其食鱼必河之鲤【纸韵】岂其取妻必宋之子【纸韵 赋而比也陆佃云鲤鱼之贵者故尔雅释鱼以鲤冠篇而神农书曰鲤最爲鱼之主又云河性宜鱼故诗曰岂其食鱼必河之鲂必河之鲤也列女传曰糊弓以河鱼之胶说者以爲河胶粘子宋姓本纪云舜封契於商赐姓曰子齐姜宋子言其族类之贵足爲系援非谓色之美也食鱼不必于鲂鲤比小国亦可爲娶妻不必于姜子比大国不足慕陈国有贤焉如此而僖公不知其委靡而不能自立不亦宜乎按僖公幽公子】

衡门三章章四句【朱子云此隐居自乐而无求者之辞申培说亦以爲君子乐隐之诗愚谓如此说亦只赞得君子一半耳虽曰随遇而安不愿乎外心地自闲品格自高然使其徒爲泉石膏肓烟霞痼疾已也亦不过一自了之人耳於世道何赖焉子贡传阙文】

诗经世本古义卷十六

卷十七

<经部,诗类,诗经世本古义>

钦定四库全书

诗经世本古义卷十七

明 何楷 撰

周宣王之世诗二十篇

都人士周人思共伯和也【共国伯爵和其名按竹书纪年周厉王十二年王亡奔彘国人围王宫执召穆公之子杀之十三年王在彘共伯和摄行天子事二十六年大旱王陟於彘周定公召穆公立太子靖为王共伯和归其国遂大雨司马彪云共伯和修行而好贤厉王之难天子旷絶诸侯知共伯贤请立为天子共伯不听弗获免遂即王位一十四年天下大旱舍屋焚卜於太阳兆曰厉王为祟召公乃立宣王共伯归还於宗逍遥得意於共丘山之首庄子及吕氏春秋鲁连子皆言共伯得志於丘首即其人也周宗亡而复存实赖共伯之力此诗之作当在其逍遥共山时故有行归于周万民所望之语罗泌云共和十四年宣王立说者曰周室无君周公召公共和王政故号之曰共和自史迁至温公无异议也予不敢以为然夫厉王之时周公召公非昔日之周召也予闻厉王之後有共伯和者以德和民诸侯贤之入为王官十有四年天旱庐火归还於宗逍遥共山之首宣王乃立是以王子朝告於诸侯犹曰厉王戾虐万民弗忍流王於彘诸侯释位以间王政宣王有志而後效官是宣王之前诸侯有释位间於天子之事者矣然则所谓共和者吾以为政自共伯尔若曰周召共和吾弗信也和之贤也盖干王政而非其得已者也向秀郭象援古之说以为共和者周王之孙也怀道抱德食封於共厉王之难诸侯立之宣王立乃废立之不喜废之不怒斯则得其情矣吕氏春秋云共伯和修其行好贤仁而海内皆以来为稽矣周厉之难天子旷絶而天下皆来谓矣以此言物之相应也罗苹云按人表厉王後有共伯和孟康谓其入为三公盖周室无君和以三公摄政惟其日久故有大旱之变尔十三州志谓共伯後归国逍遥得意於共山之首使其窃篡则宣王之立可能得志於共首哉共谓今之共城故汉之共县寰宇记云厉王崩共伯使诸侯奉王子靖立为宣王共伯复归於国共山在县北十里其事益明而水经注亦云共即共和之故国山在国北故又曰共北山】

彼都人士狐裘【丰氏本作求】黄黄【阳韵贾谊新书作裳】其容不改出言有章【阳韵】行归于周万民所【新书作之】望【叶阳韵武方翻孔颖达云襄十四年左传引此二句服曰逸诗也都人士首章有之礼记注亦言毛氏有之三家则亡今韩诗实无此首章时三家列於学官毛诗不得立故服以为逸 赋也彼指共伯也都西都镐京也孔云士者男子行成之大称彼都人士言彼乃我西都之人素以士行着闻者即昔人所称怀道抱德修行好贤是也亦因其辞位逃荣故但以士称之又苏辙云都美也都人士士之有美人之行者也亦通狐裘

此人所服也黄黄朱子云狐裘色也以裘皮非一狐之腋故重言之按黄衣狐裘大蜡之服也故郊特牲云黄衣黄冠而祭息田夫也又云野夫黄冠黄冠草服也则黄色之裘为野人所得用矣共伯既废之後逍遥共山同於野人故亦服此孔云狐色不等狐白非君不服狐青及小而美者则可以供公子若黄狐及麤恶者庶人亦服之彼狐之黄者多黄狐之衣非贵服也庶人服犬羊不裼故此狐裘亦不裼取其温裕而已又按玉藻云君子狐青裘豹褰玄绀衣以裼之狐裘黄衣以裼之注谓君子士大夫也则狐裘黄衣贵者亦服之但以次章言台笠乃野人所用故知此当为野服耳其容不改者言其动作容貌有常也章说文云乐竟为一章从音从十十数之终也出言有章者吐辞合乎伦理亦如乐章之有节奏也此追思其平日在位时丰范如此周亦镐京也万民所望者望其自外行而复来归於周以为民之仪表也礼缁衣篇子曰长民者衣服不贰从容有常以齐其民则民德壹因引此诗愚按此第推言其足为民望之实衣服不贰从容有常即所谓其容不改出言有章者非指此狐裘黄黄言也又左襄十四年楚子囊还自伐吴卒将死遗言谓子庚必城郢君子谓子囊忠君薨不忘增其名将死不忘卫社稷可不谓忠乎忠民之望也诗曰行归于周万民所望忠也引诗意以不忘旧国为不忘君不忘社稷之比旧说训周为忠信非也】彼都人士台【尔雅丰本俱作臺】笠缁撮【叶屑韵祖悦翻】彼君子女绸直如髮【叶屑韵方结翻】我不见兮我心不说【屑韵音悦丰本以此为第三章 赋也台笠郑云以台皮为笠台 名林兆珂云有皮坚细滑致可为笠笠详见南山有台篇笠所以御暑雨有柄曰笠无柄曰笠孔云郊特牲曰大罗氏天子之掌鸟兽者诸侯贡属焉草笠而至尊野服也则草笠野人之服是贱者也前裘则冬所衣此笠则夏所用各举其一而言之罗愿云草服草笠自伊者氏为蜡始盖已久矣然犹存其衣服之制谨而不敢变缁撮毛云缁布冠也撮说文云两指撮也朱子云其制小仅可撮其髻也孔云按郊特牲云太古冠布齐则缁之三代改制齐冠不复用布故玉藻云始冠缁布冠自诸侯下逮冠而敝之可也则此应始冠而敝之今以为常服者士以上冠而敝之庶人则虽得服委貌因而冠之而俭者服缁布故诗人举而美焉又论语今也纯俭注云纯当为缁则缁亦得为?帛何知非?帛为玄冠而言缁布者以缁虽古布帛两名但字从才者为帛从留者为布此言缁故知非帛且若是帛为玄冠则有制度不得言撮故士冠礼云缁布冠頍项注云缁布冠无笄者着頍围髮际结项中隅为四缀以固冠也项中有?亦繇固頍为之耳今未冠笄者着卷帻頍象之所生也是缁布冠制小故言撮以此益明非玄冠也按玄冠即委貌亦名冠弁陈氏云缁布冠无綬後世以尊者不可无饰故加绩綬用於始冠及大夫之卜宅与葬日而已庶人或以为常服谓之缁撮则无梁矣季本云台笠出田时所戴缁撮居家时所戴彼君子女谓贵家之女盖指共伯之嫡媵後章尹吉是也又苏云君子女女之有君子之行亦通绸说文云密也绸直皆指髮言如髮犹言其髮有如此者按命妇首服有副编次三者副之言覆所以覆首为之饰编则列髮为之假作紒形加於首上次则次第也髮长短与已髮相合为紒谓之髮髻今但曰如髮而已以共伯既自弃其爵则其嫡媵皆不得服命妇之饰故第见其髮绸密而条直解颐新语谓一如其髮之本然不用髻为高髻是也共伯贤其内助亦必贤故诗人思而欲见之我不见兮谓未见其归来周京故心思之而忧非谓不见此人也若果不见此人则狐裘黄黄台笠缁撮已明明见之矣】彼都人士充耳琇实【质韵】彼君子女谓之尹吉【质韵】我不【陆本作弗】见兮我心苑结【叶质韵吉屑翻丰本以此为第二章 赋也充耳惟冕服有之琇通作秀下垂之象也解俱见淇澳篇云琇实者王肃云以美石为瑱塞实其耳是也此与下章垂带而厉皆追言共伯昔日为诸侯时服饰如此观卫武公诗亦云充耳琇瑱则其为诸侯可知矣

尹尹氏也世为周公卿吉郑读为姑唐宰相世系云吉氏出自姑姓黄帝裔伯□封於南燕赐姓曰姑又后稷妃家也左宣三年郑石葵曰吾闻姬姑耦其子孙必蕃姑吉人也后稷之元妃也或作郅潜夫论云郅与姑同而字异孔云尹姑世贵旧姓是有礼法者又姚宽云尹吉二姓俱出尹吉甫之後元和姓纂云尹吉甫之後以王父字为氏汉有汉中太守吉恪是也二说并存之苑毛云积也按苑所以养禽兽风俗通云苑蕴也言薪蒸所蕴积故有积义结缔也孔云如绳束之为结也苑以言其思之不已结以言其思之不解意共伯摄政时必有以深当於民心者故思慕之深至於如此後二章意同】彼都人士【寘韵】垂带【陆本作蓳】而厉【旧叶泰韵落盖翻今按下文蚤迈俱无泰叶当读如詈字叶寘韵力智翻与上句士字叶】彼君子女卷髮如蚤【卦韵】我不【陆本作弗】见兮言从之迈【卦韵 赋也带大带也小尔雅云带之垂者谓之厉左传所谓鞶厉孔云大带之垂者名之为绅而复名为厉者绅是带之名厉是垂之貌季本云从其垂下如将履之有危厉之意焉按礼绅长三尺子游曰三分带下绅居二焉注谓人长八尺大带之下四尺五寸分为三分绅居二分焉绅长三尺也卷通作髻说文云髮好也引诗美且髻一曰髮曲也蚤说文云毒虫也字象其奋螫曳尾之形长尾为蚤短尾为蠖陆玑云一名杜伯愚按蚤尾能卷曲曰卷发如蚤当是假紒之形似之即首服中之编也罗愿云此言命妇之饰谓首饰整然矣言发语辞迈说文云远行也我不见此人行归於周则愿从之远行也】匪伊垂之带则有余【鱼韵】匪伊卷之髮则有旃【鱼韵】我不见兮云何吁【叶鱼韵读如嘘休居翻丰本作吁】矣【赋也伊郑云辞也余说文云饶也象髮於旃者谓如旌旃舒卷之状罗愿云淮南子言郑舞者髮若结旌许氏曰屈而复舒也结旌则旃之义郑云此言士非故垂此带也带於礼自当有余也女非故卷此髮也髮於礼自当有旃也吁说文云张目也云何吁矣犹云使我如何其悬望乎言望之甚也初言不见则我心不悦继之以苑结又甚於不悦矣既又欲从之远行既又不欲其终於远行而不归而托之悬望夫共伯和何以得此於周人哉虽曰不贤吾不信也】

都人士五章章六句【序云周人刺衣服无常也古者长民衣服不贰从容有常以齐其民则民德归壹伤今不复见古人也贾谊新书取其说而衍之云人之情不异面目状貌同类贵贱之别非人人天根着於形容也所持以别贵贱明尊卑者等级势力衣服号令也乱且不息滑曼无纪天理则同人事无别然则所谓臣主者非有相临之具尊卑之经也特面形而肤之耳近习乎画近貌然後能识则疏远无所放衆庶无以期则下恶能不疑其上君臣同伦异等同服则上恶能不眩於其下诗云彼都人士狐裘黄裳行归于周万民之望孔子曰为上可望而知也为下可述而志也则君不疑於其臣而臣不惑於其君此之不行泳渌无界可为长太息者此也今按狐裘黄裳以台笠例之自是野人之服而以此为长民者衣服不贰可乎序不过剿緇衣成说耳朱子亦知其误而以此诗为乱离之後人不复见昔日都邑之盛人物仪容之美因作此以叹息之且云厉王流死于彘其时都邑自不能如旧不必东迁之後也其语意亦近似子贡传有君子怀三字大意当与朱传同而其余文尽阙申培说则谓尹伯封作周既东迁伯封见西周风俗之美而伤今之不古若赋此亦不过剿诗传赋黍离之意愚所疑者据旧说以前二章为言都人之贱者後三章为言都人之贵者意谓盛世之人贵贱俱佳浓淡皆好也夫万民所望隆峻之称既非野服之田夫所可居充耳琇实五冕之饰亦非都人士之等夷所可?心疑诗之所思必有人焉先居高位而後沦沉於草野者故作此以招之忽思及共伯和事而与诗中之语意一一皆合狐裘台笠其时所见也琇实垂带追忆之辞也称之为士以着

其不为诸侯也欲从于迈以明其长往不反也卒之曰我不见兮云何盱矣则犹是行归于周万民所望之意耳味诗辞既非盛世之诗而尹氏之贤着於吉父叔氏之贤着於蹶父皆宣王时人与厉王时相近辄确信谓非共伯无足以当之千载而下必有以予为知言者】

鸿鴈美宣王也【出序】王新即位丁乱离之後民莫适有居王命使臣劳来还定安集之於其还而劳焉【出邓元锡诗经绎序云美宣王也万民离散不安其居而能劳来还定安集之至於矜寡无不得其所焉郑玄云宣王承厉王衰乱之敝而起兴复先王之道以安集衆民为始也书曰天将有立父母民之有政有居宣王之为是务按天将有立父母二句今泰誓文也详绎诗词乃宣王劳使臣之作邓云王闵勤念功有皇华之心哉】

鸿鴈于飞肃肃【陆德明本作??】其羽【麋韵】之子于征劬劳于野【叶麋韵读如羽王矩翻】爰及矜人哀此鰥寡【叶麋韵果五翻比而赋也鸿厉二句以比流民其下四句则劳使臣之辞後放此鸿鴈二鸟名毛传云大曰鸿小曰鴈孔穎達云鸿鴈俱是水鸟故连言之嫌其同鸟雌雄之异故传辨之罗愿云按淮南鸿烈云鴈乃两来仲秋鸿鴈来季秋候鴈来候鴈比於鸿鴈而小今北方有白鴈似鸿而小秋深乃来来则霜降河北谓之霜信唐杜甫曰故国霜前白鴈来盖谓此尔今月令及周书乃不复有鸿鴈候鴈之别月令则云八月鸿鴈来九月鸿鴈来宾周书则曰白露之日鸿鴈来寒露之日又来既是一种何得前後不齐如此许叔重注二鴈则以八月来者其父母也是月来者盖其子也羽翼稚弱故在後耳今淮南子乃并作候鴈此当有所据愚按如罗说则以鸿名者乃鸿鴈而以鴈名者则候鴈也鸿大鴈小兼言之者取以为民老少长幼之比鸿鴈知避陰阳寒暑木落南翔冰泮北徂故名之为随阳之鸟鴈又名朱鸟扬雄云能来能往者朱鸟之谓与肃肃解见鸛羽篇鸿鴈春则避阳暑就北秋则避陰寒就南民之避危就安似之旧说以为转徙无定之比非也民实磬磬求安得不思所以为之地故有藉於之子焉之子欧阳修严粲皆云使臣也于往也後同征行也劬韵会云勤也韩诗云数也劳说文云剧也其劳频数谓之劬劳也邓云劬劬而劳之有父母心焉野尔雅云牧外说文云郊外诗传云以细别言之则郊外之地名牧牧外之地名野若大判而言则野者郊外通名以流民荡析播迁故命使臣巡行郊外以招来之爰曰也王命之辞也及说文云逮也谷梁传云犹汲汲也矜通作兢兢之为言危也此待毙可危之人若急为之所尚克有救稍迟则无及矣鰥寡即所矜之人也孟子云老而无妻曰鰥老而无夫曰寡刘熙云谓之鰥者为其愁悵不能寐日常鰥鰥然其字从鱼鱼目恒不闭者也寡倮也倮然单独也又按鰥虽老而无妻之名然有不得及时为室家者亦名为鰥舜年三十不娶书曰有鰥在下是未老亦称鰥也寡虽老而无夫之名然不必老而无夫者亦皆称寡史卓文君新寡湖阳公主新寡皆当盛年亦有男子称寡者左传襄二十七年齐崔杼生成及疆而寡娶东郭姜是丧妇称寡小尔雅以凡无夫无妇通谓之寡寡夫曰鳏寡妇曰嫠是也毛传亦云偏丧曰寡然则鰥是不娶之名寡是已娶而丧偶之名专主男子言之亦可有旷夫则有怨女矣总是无室无家之意世乱民散举目无非此辈洵可哀也重言以感动之或谓矜人之中惟鰥寡尤为可哀似觉支离今不取朱善云惠鲜鰥寡文王之所以兴也哿矣富人哀此鳏独幽王之所以亡也爰及矜人哀此鰥寡乃宣王之所以中兴也左文十三年公如晋朝且寻盟卫侯会公于沓请平于晋公还郑伯会公于棐亦请平于晋公皆成之郑伯与公宴于棐子家赋鸿鴈季文子云寡君未免於此】鸿鴈于飞集于中泽【叶药韵達各翻】之子于垣百堵皆作【药韵】虽则劬劳其究安

宅【叶药韵他各翻 比而赋也中泽毛云泽中也鸿鴈性好居泽书彭蠡既潞阳鸟攸居是也物类相感志云鸿鴈夜宿洲中鸿在内鴈在外逐更惊避备狐与人之捕已也郑云鸿鴈之性安居泽中今飞又集於泽中犹民去其居而离散今见还定安集也垣孔云小墙之名于垣者先往治小墙之所将以起屋舍也于征则之子出而在野于垣则之子已反而在邑矣苏辙云使者所至招来流民使反其都邑筑其垣墙而安处之然後民知所止如鸿鴈之集于泽也堵即垣也公羊传云五版为堵五堵为雉其高广之制传者不一有以一丈为版者则堵当五丈雉当二十五丈此毛传说也有以六尺为版者则堵当三丈雉当十五丈此郑笺说也然郑又云雉长三丈盖误以堵为雉孔氏谓雉长三丈经亦无文也有谓版广二尺者则一堵之墙长高各一丈一雉之墙长高当各五丈此周礼注说也然注又云雉高一丈长三丈则於五堵为雉之数又不合也有谓八尺为版者则堵当四丈雉当二十丈此韩诗传说也何休所谓版长八尺接五版而为堵接五堵而为雉是也有确谓雉长三丈者郑駁异义云左传郑庄公弟段居京城祭仲曰都城过百雉国之害也先王之制大都不过三国之一中五之一小九之一今京不度非制也古之雉制书传各不得其详今以左氏说郑伯之城方五里积千五百步也大都三国之一则五百步也五百步为百雉则知雉五步五步於度长三丈则雉长三丈也雉之度量於是定可知矣此即向诗笺之说然循而下之堵当长六尺版只当长一尺二寸似无此理故王愆期疑公羊传五堵为雉之文五当为三以诸儒皆谓堵长一丈三堵则三丈是雉之数然则五版为堵计一丈当长二尺正与周礼注说版堵之数合较为可信堵高广各一丈三堵为雉以横言不以直言陆佃云雉飞若矢一往而堕雉鸡类也不能远飞崇不过丈修不过三丈故雉高一丈长三丈也古者数数以万度度以雉师旷禽经云雉上有丈鷄上有尺所谓上者言飞而上也雉上能丈故计丈以雉也曰百者见非一家也作起也郑云百堵同时而起言趋事也劬劳谓之子也与首章劬劳不同向劳在招来此劳在安集究穷也犹言终也之子今虽有从事版筑之劳然其终能使民享有安居之乐亦何吝而不爲乎盖劝勉之辞孔云欲其不憚劳也】 鸿鴈于飞哀鸣嗷嗷【豪韵】维此哲人谓我劬劳【豪韵】维彼愚人谓我宣骄【叶豪韵起劳翻 比而赋也鸣之声哀曰哀鸣嗷说文云衆口愁也重言嗷嗷者合鸿鴈言之也王言我之所以遣汝于征于垣频频劳汝如斯者岂得已哉念此矜人当荡析播迁之後未有安宅衆口嗷嗷咸思控诉于上亦犹鸿鴈之哀鸣然此所以回环焦劳于心而不能自己也哲智也维此哲人美之子也我宣王自谓也君臣一体君劳心臣劳力我既劬劳于上之子明智之人体子此心自当劬劳于下也愚说文云戇也指愚人曰彼者鄙之之辞借以相形不必有其人也宣骄犹易所云鸣豫宣字从回有转运之义故诂者以为布也骄本马名乃马之高者一曰马行貌人之高亢纵逸似之言假若彼一等愚人不能知我之心见我之仆仆相烦则第谓我居人上而不能体恤徒宣布其骄恣而已设言以感动之亦劝勉之意又苏云兴废补败不能自靖不知者以为宣骄耳严云王者事业以民为本此诗可以见兴复之规模矣左襄十六年冬穆叔如晋聘且言齐故晋人曰以寡君之未禘祀与民之未息不然不敢忘穆叔曰以齐人之朝夕释憾於敝邑之地是以大请敝邑之急朝不及夕引领西望曰庶几乎比执事之闲恐无及也见范宣子赋鸿鴈之卒章宣子曰苟在此敢使鲁无鸛乎】

鸿鴈三章章六句【子贡传以为怀流人而不显其世申培说则云王者怀柔远人流民喜之而作是诗朱子亦谓此诗流民所作然始曰之子劬劳明指他人末乃曰谓我劬劳何也即云之子乃流民自相谓似矣然爰及矜人二句终说不去且无意味严粲则谓之子乃流民美使

臣之辞而以章首劬劳属使臣後二章劬劳为自道至其解末章大意谓哀鸣嗷嗷乃是既有安宅之後因生理未复别有所求在明哲之使臣悯其劬劳则将何以抚恤之若愚闇之使臣必将怒其求索无厌直以宣骄目之矣於文理亦近之但如此则祇是使臣之美耳与王何与如曰美使臣正所以美王何如径作王言之为庄重割摯而可列于雅乎郝敬云小雅自鹿鸣而下至此二十余篇皆朝廷制作不应忽采民謡一篇杂入其中此论是矣又纬书有四始之说以鸿鴈在申为金始其理未详】

韩奕宣王命蹶父如韩韩侯来朝王锡命之尹吉甫作诗美之【据竹书为宣王四年事孔穎達云梁山於韩国之山最高大为国之镇所望祀焉故美大其貌奕奕然谓之韩奕也序云韩奕尹吉甫美宣王也能锡命诸侯邹忠胤云韩为武穆与晋同祖均属望国诸侯之向背系焉而又密迩北国为一方屏翰故莫亟於得韩命蹶父如韩良有以也蹶父因是以缔姻而韩侯遂来朝盖犹用继世稟命之礼王因命之纘旧服受北国为伯其依毗亦隆重哉而馭下之柄可概见矣黄震云谢即南阳宛县卫武关以制楚韩扞临晋以制狄皆天下形胜故宣王中兴特着二诗焉又云前此厉王之世诸侯不朝入覲锡命之典视为赘物宣王侧身修行振举精明一洗衰頹之迹尊文武之道而复之故封申伯所以怀南方之诸侯也命樊侯城齐所以怀东方之诸侯也锡命韩侯所以怀北方之诸侯也以至淮夷不服则命召虎以平之徐方不庭则自将以征之规模宏大虽文武之世不是过也】

奕奕梁山【叶真韵疏臻翻亦叶先韵翰旃翻】维禹甸【叶真韵他邻翻亦叶先韵亭年翻亦叶径韵质证翻周礼注作隰】之有倬【陆德明本作晫】其道【皓韵】韩侯受命【敬韵】王亲命【见上】之纘戎【丰氏本作尔】祖考【皓韵】无废朕命【见上】夙夜匪解【叶真韵居缙翻】?共【音恭】尔位【真韵】朕命不易【陌韵】干不庭方以佐戎【丰本作汝】辟【陌韵 赋也此章追述韩侯始受封而王命之之辞也奕说文云大也重言之者季本云大而叠也梁山据括地志在韩城县东南一十九里雍大记云在今陕西西安府同州合阳县北四十里与韩城县接界按其地临河上当龙门之南西隔漆沮经耀州三水县而後至豳去岐尤远非太王迁岐所踰之梁山也太王所踰者何景明以为即禹贡治梁及岐之梁治田出谷税曰甸详见信南山篇禹平水土使梁山之野皆得成田而贡赋于天子也苏辙云禹之治水也九州之镇山无所不甸虽梁山亦禹之所甸也严粲云功莫大於禹故诗人言人君之功多配禹言之文王有声言丰水东注维禹之绩而继之以皇王维辟以武王之功配禹也宣王命韩侯为州牧是兴衰拨乱之事此诗亦以宣王之功配禹也倬说文云着大也苏云将言韩侯故先序其国曰梁山之下有倬然之道此韩侯之所从朝周以受命者也周昌年云厉王之时诸侯背侮梁山之道或未必通有倬处亦见中兴气象韩国名在今同州韩城县晋为少梁邑秦晋战於韩原即此地秦更名夏阳一统志云古韩城在县南十八里郑云韩姬姓之国也後为晋所灭按郑语史伯谓韩为武王之子韦昭云近宣王时命韩侯为侯伯其後为晋所灭以为邑以赐桓叔之子万是为韩万则其亡在平王时也孔云韩是武王之子其封当在成王之时其命为侯伯或成或康未知定何时也受命受继世而为诸侯之命也王亲命之者将命之为侯伯也纘戎祖考七句王命之辞也纘说文云继也戎之言汝音之转也後同祖考祖父也观末章云以先祖受命则第标祖而言见韩侯先世尝为州牧矣无废弃我之命即纘戎祖考之命也夙夜二句相承说无废之实也夙早夜晚也匪通作非解通作懈怠也?说

文云虎行貌徐锴云虎之行兢兢然有威故谓敬为?共通作供说文云设也言汝能早夜不怠敬谨以供尔所当尽之职事则我今之命汝纘祖考者不复改易仍使为州牧也有戒勉之意干徐锴云筑墙两旁木也孔云所以当墙两边障土者不庭方谓不来朝贡之国犹易云不寧方也左传以王命讨不庭杜预注谓下之事上皆成礼于庭中常武徐方来庭其义皆同佐助也字本作左辟尔雅云君也言有不来庭之方国汝当作桢干而正之谨侯度以作之倡明大义以示之趋用以佐汝君教化之所不及此又自?共尔位而推言之也钱天锡云韩地近边蛮夷之叛服不常自穆王以来荒服者不至天子欲振中兴之烈则干不庭以佐辟能无望於韩侯乎味干之一字有先自正而後正人之意以末章观之则其所正者亦北面之国耳】四牡奕奕孔修且张【阳韵】韩侯入覲以其介圭入覲于王【阳韵】王锡【周礼注作赐】韩侯淑旗绥【陆本作綏】章【阳韵】簟茀错衡【叶阳韵户郎翻】玄衮赤舄钩膺镂锡【阳韵说文作錫】鞞鞞【陆本作□】浅帻【叶质韵读如密莫笔翻陆本作箴丰本作臂】?【丰本作簪】革金厄【叶质韵於栗翻陆本丰本俱作盭 赋也首章是初受封时事此章则既封後而复入覲之事也四牡所以驾车者韩侯在道所乘也奕解同前以非一马故重言之孔甚也修通作修说文云饰也张毛云大也孔云物之小者张之使大若左传称张公室谓使公室强大是张为大之义也孔修且张者谓极其装饰之美而气象又雄伟也周礼大宗伯职云以宾礼亲邦国春见曰朝夏见曰宗秋见曰覲冬见曰遇注云覲之言勤也欲其勤王之事大行人职云春朝诸侯而图天下之士秋覲以比邦国之功夏宗以陈天下之谟冬遇以协天下之虑曲礼云天子当扆而立诸侯北面而见天子曰覲天子当宁而立诸公东面诸侯西面曰朝郑玄云诸侯春见曰朝受摯於朝受享於庙生气文也秋见曰覲一受气於庙杀气质也朝者位於内朝而序进覲者位於庙门外而序入王南面立於扆宁而受焉夏宗依春夏秋冬遇依秋郊特牲云覲礼天子不下堂而见诸侯下堂而见诸侯天子之失礼也繇夷王以下按仪礼惟覲礼篇存其朝宗遇之礼皆亡孔云朝者四时通名覲则惟是秋礼诸侯之朝天子四方时节其文不明贾逵以为一方四分之或朝春或覲秋或宗夏或遇冬马融以为在东方者朝春在南方者宗夏在西方者覲秋在北方者遇冬愚按一方四分殊无明据若马说所本以明堂位载鲁之祭礼云夏禘秋尝冬烝独无春祀明为朝王阙之以鲁在东方宜行春朝之礼然此诗言韩侯奄受北国则宜行冬遇何得行秋覲之礼意韩城本在西偏抑或天子於此四者自依其序或各以特命行之如欲图士则行朝礼欲比功则行覲礼欲陈谟则行宗礼欲协虑则行遇礼未可知也介通作玠玠圭即镇圭也解见崧高篇申侯奉王命为伯而有介圭之锡则韩侯继祖考为伯其亦有介圭之锡可知今以比功入覲故执之以还报天子如後世持节出使者亦持节反命也郑以为韩侯覲宣王而奉享礼贡国所出之宝引书黑水西河其贡璆琳琅玕孔亦谓西河之地法当贡玉韩在西河之西故以介圭入覲介圭当是奇异之大玉可以为圭璧按仪礼覲礼篇天子衮冕负斧扆侯氏入门右坐奠圭再拜稽首摈者谒侯氏坐取圭升致命王受之玉侯氏降阶东北面再拜稽首摈者延之曰升升成拜乃出四享皆束帛加璧庭实惟国所有据此覲礼既有奠圭加璧之事则郑说似若可信但圭名介圭乃天子所执断无以制就成形者入贡之理且崧高篇言锡尔介圭以作尔宝其文与此脗合则其出於天子所锡明矣或又以介圭即公侯所执之瑞圭尤谬彼但名桓信何得以介名也两言入覲者上入覲承四牡言谓此四牡之行乃以入覲之故下入覲承介圭言则志彼入覲之时其所执之物也锡通作赐说文云予也按覲礼事毕天子赐侯氏以车服迎于外门外再拜重赐无数下文所载即其事也淑疑通作儻说文云青黑缁?白色也旗者诸侯之所建覲礼云侯氏载龙旗

乐记云龙旗九旒天子之旌也所以赠诸侯也陈祥道云觐礼曰天子载大旗升龙降龙周礼曰交龙为旗又曰诸侯建旗则天子诸侯之旗龙章一也愚按先儒谓周礼所掌九旗之帛皆用绦绦者大赤色以为周所尚故耳诸如交龙熊虎鸟隼龟蛇之属皆谓画之绦帛之上愚终未敢信其然曲礼谓前朱雀後玄武左青龙右白虎已明着朱玄青白四色矣而巾车职亦有云大旗以封同姓大赤以封异姓大白以封四卫大麾以封蕃国旧说谓大麾者黑色也以此合曲礼所载于朱玄赤白四色之中已有其三所少者独青耳则大旗之为青色可知旗画交龙其为青龙明甚则大赤之为朱鸟大白之为白虎大麾之为玄武又可知且自青而赤而白而黑依四时之序以为降杀之等此亦先王制礼之意所可推者窃意四旗之帛各从其方之色不必谓九旗之中有通帛为旛者是全帛皆绦辄概以绦色例之也如此诗言淑旗若以淑儵音通则说文所训为青黑发白之色盖以象夫青之将近于黑而尚浅于黑者大抵即青色耳以青白画龙于上所谓青龙韩为姬姓大旗正封同姓所用不然训淑为善但云旗之善者成何文理綏通作綏礼记注云旌旗之旌也按说文训綏为系冠纓谓结纓颌下以固冠其结之余者散而下垂也旌旗之旌似之孔云徐州贡夏翟之羽有虞氏以为綏後世或无染鸟羽象而用之或以旄牛尾为之缀于幢上所谓注旄于竿首者然则綏者即交龙旗竿所建章王肃云所以为表章也簟弗详见载驱篇孔云弗者车之蔽簟者席之名陈祥道云卫夫人之车以翟弗齐襄公方叔之车以簟弗此妇人男子车蔽之别也错说文云金涂也车轭曰衡涂金于轭所以为文详见采芑篇玄衮玄衣而画以衮龙也凡冕服皆玄衣纁裳详见采芑篇赤舄冕服之舄也上公九命得服衮冕故屨赤舄与王同也详见狼跋车攻篇钩膺樊纓也马鞅在膺者用金为钩以拘之详见采芑篇镂说文云刚铁可以刻镂錫本作鑄说文云马头饰也徐锴云刻金华当马颌陈祥道云庄周言齐之以月题月题其象也郑云今当卢也孔云在眉眼之上按巾车玉路錫樊纓金路钩樊纓金路无錫有钩计玉路非赐臣之物此得有镂錫者盖特赐之使得施於金路也陆元朗云皮去毛曰鞞鞞毛云轼中也孔云轼者两较之间有横木可凭者也鞞为轼中盖相传云然言鞞鞞者盖以去毛之皮施于轼之中央持车使牢固也浅毛云虎皮浅毛也鞞毛云覆轼也孔云礼记作鞞周礼作?字异而义同玉藻言羔鞞鹿鞞春官巾车言犬?豸?皆以有毛之皮为鞞此云浅鞞则以浅毛之皮为鞞也兽之浅毛者惟虎耳陈祥道云鞞若席然施之轼上儵马轡也革谓轡首之垂者详见蓼萧篇厄当依释文通作搯说文云捉也郑云以金为小环往往纏搯之朱子云纏搯轡首也孔云往往者言其非一二处也淑旗綏章以旗言是载之车上者簟弗错衡以车言玄衮赤舄以服言钩膺镂錫以马言鞞鞞浅鞞又于车中别其轼言之儵革金厄又于马中别其轡言之】韩侯出祖出宿于屠【虞韵】显父【上声陆本作甫】饯之清酒百壶【虞韵】其殽【陆本作肴】维何炰鼈鲜【丰本作鱉】鱼【叶虞韵读如虞元俱翻】其?维何维笋【说文作葍陆本作笋】及蒲【虞韵】其赠维何乘马路车【鱼韵】筵【集韵作边】豆有且【丰本作俎】侯氏燕胥【鱼韵职也祖将行祭行神累祖也详见烝民篇郑云既觐而反国必祖者尊其所往去则如始行焉宿说文云止】

【也屠地名朱子云或曰即杜也汉志注云古杜伯国汉宣帝葬其地因曰杜陵在长安南五十里按杜有屠音晋有杜蒯通作屠蒯或说似可信但韩侯返国不宜复自镐南行意必其地与蹇里相近韩侯觐事既毕将便道往行亲迎之礼故出宿于彼也郑云祖于国外毕乃出宿示行不留于是也显父不详其人郑云周之公卿也孔云诸侯反国为王臣所送送者唯卿士

耳送行饮酒曰饯按仪礼聘礼篇云出祖释軺祭酒脯乃饮酒于其侧注谓行出国门止陈车骑释酒脯之奠于軺軺者祭道路之神道路以险阻为难是以委土为山伏牲其上以酒脯祈告之卿大夫处者於是饯之饮酒於其侧礼毕乘车辄之而遂行舍於近郊是则祖毕而後饯饯毕乃出宿今言饯於出宿之後者诗第先记韩侯所拟宿处为下章张本显父之饯当仍在国门外也郑谓王使显父饯之今以下文所赠证之知必出自王矣谢枋得云申伯之行王亲饯之韩侯之行王使显父饯之礼亦有等差也清酒孔云清美之酒壶说文云昆吾鬯器也徐锴云昆吾纣臣作瓦器季云礼器注曰壶大一石此以壶之大者言也云百壶则必小壶矣孔云多至于百壶言爱韩侯而送酒多也穀通作肴说文云啖也孔云饌物也焦贛解见六月篇郑云炰以火熟之孔云谓烝煮之也鲜鱼郑云中脍者也孔云新谷谓之鲜鱼馁则不任为脍说文云菜馐也按说文无馐字当作鬻云鼎实也陈留谓馐为鬻亦作餼易覆公餼是也笋郑云竹萌也笋谱云竹初种根食土而下求乎母也及擢笋冒土而上爱乎子也笋大约不过青绿色本草木性甲乙气蒲毛云蒲蒻也徐锴云按蒻蒲下入泥白处今俗呼蒲白郑云周礼注云蒲始生水中子按周礼醯人职云加豆之实深蒲醯醢笋菹鱼醢皆谓以蒲笋为菹故孔引陆玑云笋始出地长数寸鬻以苦酒豉汁浸之可以就酒及食蒲始生取其心中入地蒻大如匕柄正白生噉之甘脆鬻而以苦酒浸之如食笋法是说笋蒲菹之法也然菹与馐有异说文训菹为酢菜徐锴谓以米粒和酢以渍菜是也馐者醢食糝食之类二者皆有肉故郑衆解周礼糝食为菜餼蒸而郑玄解易覆公餼亦云糝谓之餼震为竹竹萌为笋笋者餼之为菜也是八珍之食此则笋可为糝食之证也维蒲之为餼无所经见然说文解鬻字下亦引此诗曰维苇及蒲意古必有用蒲为糝食之法但不传耳经言馐非言菹也故不可以不辨赠孔云以物送人之名郑云王既使显父饯之又使送以车马所以赠厚意也人君之车曰路车所驾之马曰乘马按采菽之诗曰君子来朝何锡予之虽无予之路车乘马覲礼曰天子赐侯氏以车服路先设西上路下四亚之注谓路下四者乘马也亚之者次车而东也是可以见其出于天子之证也孔云卿大夫无路车乘马之名则非显父赠之笱竹豆木豆孔云盛脯醢之笱豆且说文云荐也陈设之义侯氏吕祖谦云指韩侯也按覲礼称诸侯为侯氏贾公彦云言诸侯则凡之总称言侯氏则指一身不凡之也燕通作宴说文云安也胥通作𡵓说文云通也𡵓疏字同尔雅训皆公羊训胥为相义当取此彼此通同故曰皆曰相也侯氏燕胥者言韩侯与显父通相燕乐荣君宠也】韩侯取【去声陆本作娶】妻汾王之甥蹇父【上声】之子【纸韵】韩侯迎【去声】止【纸韵】于蹇之里【纸韵】百两彭彭【叶阳韵逋光翻】八鸾锵锵【阳韵陆本作将将】不【丰本作丕】显其光【阳韵】诸【白虎通作侄】娣从之祁祁如云【叶先韵于员翻】韩侯顾之烂其盈门【叶先韵谟连翻 赋也韩侯毕覲事而出国门遂于蹇父所居行娶妻亲迎之礼蹇父为周卿士意其采邑必在王城外也汾王郑云厉王也厉王流于彘彘在汾水之上故诗人因以号之解颐新语云犹晋侯居翼谓之翼侯晋人纳之鄂谓之鄂侯郑叔段居京谓之京城太叔及出奔共谓之共叔也又楚人谓王不终者为敖葬郑者曰郑敖葬訾者曰訾敖其汾王之类乎郡县志云汾水经霍邑县西二里周厉王陵在县东北二十五里汾王之甥指蹇父也尔雅云妻之父为外舅谓我舅者吾谓之甥郭璞云呼壻为甥孟子曰帝馆甥于贰室是也又自壻而外据尔雅呼甥者有四辈姑之子为甥舅之子为甥妻之舅弟为甥姊妹之夫为甥郭谓四人体敌更相为甥蹇父于其中或处一焉亦不可知郑笺谓姊妹之子为甥而孔疏误以为此文出于尔雅遂皆以韩姑当之按尔雅惟云男子谓姊妹之子为出未闻其以甥名惟刘熙释名有云舅谓姊妹之子曰甥虽今人亦同此称然要之尔雅

不载必非古名也然则甥是同辈之称如谓韩姑与厉王同辈至宣王时方嫁于论疏矣或谓外孙亦曰甥何知姑非厉王外孙乎今按外孙称弥甥不单名甥左传以肥之得备弥甥是也夫既不可谓姑为厉王同辈又不可以外孙为甥则汾王之甥其确为指蹇父无疑矣故下文即以蹇父属之蹇父毛云卿士也孔云蹇氏父字不书国爵则非诸侯下言靡国不到则是为王聘使之人故知卿士也焦氏易林引此作大夫祈父子女也迎昏礼六礼之中所谓亲迎也止语辞蹇即蹇父也里毛云邑也蹇父之里不知所在百两百乘也义见鹊巢篇彭通作𨔵说文云马盛也八鸾谓每车有八鸾铃象鸾鸟声𨔵通作𨔵说文云玉声也铃声之和似之孔云其迎之时则有百两之车彭彭然而行每车皆有八鸾之声𨔵𨔵然而鸣也不通作丕大也显者明饰之义光郑云犹荣也气有荣光也孔云车马之盛礼备如此显其有光荣也诸衆辞也娣公羊传云女弟也郑云媵者必娣侄从之独言娣者举其贵者孔云以衆妾之中娣为最贵故举娣以言衆妾明言诸可以兼娣侄也陆化熙云迎曰百两是迎以邦君之礼从曰诸娣是送以夫人之礼从说文云随行也祁通作跂缓步也祁祁行动舒迟貌如云与敝笱篇其从如云义同云顺风而行亦如媵之从嫡也顾说文云还视也烂光盛貌指诸娣言孔云韩侯于是回顾而视之见其鲜明粲烂盈满于蹇父之门也吕祖谦云古者任遇方面之臣既尽其礼复恤其私使之内外光显体安志平然後能展布自竭为王室之屏翰诗人述宣王能锡命诸侯而因道其娶之盛其意盖在於此而王室尊安人情暇乐亦莫不在其中矣】蹇【焦氏易林作祈】父孔武靡国不到【号韵】为【去声】韩姑相【去声】□莫如韩乐【叶号韵力吉翻】孔乐韩土【夔韵】川泽訏訏【叶夔韵火羽翻】魴𩚰甫甫【夔韵】麇【丰本作□】鹿麇麇【夔韵孔丛孔陆鹿俱作麇麇】有熊有罴有猫【陆本作苗】有虎【夔韵】庆既令居【鱼韵】韩姑燕誉【叶鱼韵羊诸翻 赋也蹇父材力甚壮健故能以王命奉使于四方吕氏靡国不到特言涉历邦国之多非必国国皆至也韩姑朱子云蹇父之子韩侯妻也孔云妇人称姓今以姓配夫之国谓之韩姑故知姑是蹇父之姓也按姑黄帝後黄帝之子二十五人为姓十二姑其一也左宣三年郑石葵曰吾闻姬姑耦其子孙必蕃姑吉人也后稷之元妃也亦作吉都人士篇彼君子谓尹吉是也又按路史国名记姑姓一十四国南燕伯儵国即后稷妃家亦曰东燕及左昭三年北燕伯款亦姑姓此诗末章有燕师所完之语疑蹇父国本在燕而仕于王朝因与韩侯联姻故诗中叙及其先世之事至如燕胥燕誉似皆指燕地而言但以无明据故未敢强解相说文云省视也□尔雅云所也按□之为所其义难详据说文以□为行水又引秦峰山刻石中洑字与此同文疑为浮泛不定之义以所训□当亦是无定在之辞耳言蹇父将为女择可嫁之地泛观之四方无有如韩国之为乐土者竹书称王命蹇父如韩正此时也孔甚也甚乐哉此韩土深美之辞下文正指其实川泽二句相连说以水产言川说文云贯穿通流水也泽国语云水之鍾也訏者夸张之义故以为大之称魴𩚰解见汝坟鱼丽敝笱诸篇陆玕云魴鱼之美者𩚰鱼之不美者陆佃云魴之为美旧矣今更与𩚰鱼连道以着韩国水土之善甫通作誦说文云大也麇鹿三句以陆产言不言山者韩地多山故略之也尔雅云鹿牡麇牝麇专言鹿则统乎牝牡之称今对麇言鹿则鹿者牡鹿也麇说文云麇鹿羣口相聚貌小尔雅云魴𩚰甫甫语其大也麇鹿麇麇语其衆也熊罴解见斯干篇罗愿云罴乃熊类古言熊者率与罴连言之如称如熊如罴维熊维罴非熊非罴赵襄子射熊罴是也今猎者言熊有两种猪熊其形如猪马熊其形如马各有牝牡问以熊则云熊是其雄罴则熊之雌者罴力尤猛或曰罴大于熊熊为罴之雄而称熊犹段为羆之段而称段兕为犀之特而称兕也盖皆相类而为牝牡犹麇与鹿交𩚰与鱼游也猫毛云似虎浅毛者也按尔雅虎

窃毛谓之𧆇猫注谓窃者浅也狻猊如𧆇猫周书记武王之狩擒虎二十有二猫二则是虎之类也又捕鼠之狸亦名为猫然其形状猥小不当与熊黑虎并言而陆农师引记迎猫迎虎之文谓猫食田鼠虎食田彘故诗以誉韩乐亦迂甚矣季云魴鱖麋鹿皆可以供食熊黑猫虎皆可以供裘韩地物产之隆如此他国莫及焉见其先祖能控百蛮而人不敢渔猎其地故得为乐土也庆喜令善也喜其已得此善居也韩姑燕誉者谓韩姑之心当亦安乐而称其得所也庆令居就相□时言燕誉则预度其後日而言也曹居贞云此章与硕人卒章意同齐近河韩多山各赋其所有一则美其父母之国一则美其所嫁之国也王安石云韩侯取妻何预於王政而诗言此盖汾王失道王室几丧为诸侯所卑则王甥亦安能相□惟宣王任贤使能然後汾王之甥更为乐国贤君之所愿娶而威仪备具光显如此乃所谓邦之荣怀也左成九年季文子如宋致女复命公享之赋韩奕之五章穆姜出于房再拜曰大夫勤辱不忘先君以及嗣君施及未亡人先君犹有望也敢拜大夫之重勤】溥【潜夫论作普】彼韩城燕师所完【叶先韵夷然翻】以先祖受命因时百蛮【叶先韵民坚翻】王锡韩侯其追其貊【陌韵亦叶药韵末各翻说文作貉】奄受北国因以其伯【陌韵亦叶药韵卜各翻】实【郑笺作寔後同】墉实壑【药韵亦叶陌韵呼格翻】实亩实籍【陌韵亦叶药韵穡龠翻】献其貔【说文作貔陆本作貄】皮【支韵】赤豹黄罍【支韵赋也溥说文云大也韩城解见首章或据水经注圣水迺方城县故城北又东南迺韩城东引此诗为证王肃谓涿郡方城县有韩侯城世谓寒号非也按方城即今顺天府固安县乃燕地与下文言奄受北国似合然去梁山远矣李氏谓恐是方城县相近梁门界上之山殊属牵附愚意寒号自是本名其改寒号为韩侯者王肃缘此诗有燕师所完一语而误而酈道元又为肃所误也燕朱子云召公之国也按燕虽召公所封而其地甚广如南燕东燕北燕皆是国都城记云地在燕山之野故国取名焉一统志云燕山在北京顺天府蓟州玉田县西北二十里完说文云全也郑云筑完也按竹书成王十二年王师燕师成韩即此朱子云韩初封时召公为司空王命以其衆为筑此城如召伯营谢山甫城齐之类也吕云春秋之城郢城楚丘城缘陵城?之类皆合诸侯为之霸令尚如此则周之盛时命燕城韩固常政也以者推原其故之辞先祖毛云韩侯之先祖武王之子也受命者孔云受王命为一州侯伯也愚按以下文奄受北国因以其伯观之则所谓为伯者亦为北国诸侯之伯耳因说文云就也时之言是也百蛮之蛮即周礼所谓蛮畿蛮服者主辨其疆界谓之畿以其服王政教谓之服其地在侯甸男采卫之外亦号要服以其国小而多故曰百蛮耳然此亦第据韩之先祖所率者言一说蛮夷可通称北称蛮犹西称夷史记匈奴传居于北蛮是也亦通言所以筑韩城而使韩之先祖居之者以其受命为牧伯实就是百蛮所介处之地而于此资弹压焉规模固宏远矣王锡韩侯以今日言也与次章王锡韩侯不同彼锡以物此锡以命也又与首章王亲命之不同彼为分封之初命此因入覲而申命也其追而下命之辞也按覲礼事毕赐车服之时诸公奉篚服加命书于其上升自西阶东面太史氏右侯氏升西面立太史述命侯氏降西阶之间北面再降稽首升成拜太史加书于服上侯氏受此正其事也依礼文之序当在次章之後三章之前而述之此者因前皆叙事成文故略之至此则韩侯已毕亲迎之事而将归国矣故重为诵服以致其叮咛之意亦诗人行文变化处追说文云逐也貊说文云北方国豸种其追其貊者驱而远之不使其逼处中国也上其字期之之辞下其字则指貊而言奄说文云覆也大有余也字从大从申申者展也与鲁颂奄有龟蒙义同北国北方诸侯之国伯者州牧之称孔云夏官职方氏正北曰并州言受王畿北面之国当是并州牧也宣王以貊不驱则侯国不得安期韩侯能驱北貊以抚北国故就以其先世侯伯之

职予之欲其思所以副重任也即首章纘戎祖考无废朕命之意实墉二句先内治也实之言是音之转也墉城垣也壑沟也俱见说文城下有壑墉壑皆旧所有于是因而修之使墉成其为墉壑成其为壑非谓新筑新凿也亩田亩也籍通作藉古者借民力耕田十分而取其一谓之藉亦讹作藉孟子曰助者藉也实亩实籍者言于是正其田亩之经界与什一之税法也观实籍之文而孟子虽周亦助之言益信修墉壑所以固吾圉正亩籍所以足民食此立国根本首章所谓夙夜匪解共尔位者尽在此矣仪礼注云凡进物曰献貔说文云豹属出貉国尔雅云貔白狐郭璞云一名执夷陆玑云似虎或曰似熊辽东人谓之白黑郭璞赞云书称猛兽如虎如貔盖豹属亦曰执夷白狐之云似是而非罗愿云豹似虎而圈文有数种山海经泰山多赤豹陆玑云毛赤而文黑谓之赤豹毛白而文黑谓之白豹罗愿云有黄黑有赤黑王会篇东胡黄黑成王献此愚按豹取赤黑取黄当是各取其美者亦如裘之重狐白也孔云貔皮之上言献其则豹黑亦献之貔言皮则豹黑亦献皮也辅广云此章言王之委重於韩侯勉以自强于政治而修其职贡于王也但言三兽之皮者猛兽韩国所富有故令贡其皮焉亦以见不强责其所无也愚按职贡修则体统明然後可以干不庭方而佐乃辟矣申命之辞语与初命相应黄佐云荒服不朝于穆王之时觐礼大坏于夷王之际宣王中兴诸侯畏服无敢不禀命者韩侯之朝固出于忠爱之诚亦宣王有以致之也】

韩奕六章章十二句【朱子以为韩侯初立来朝始受王命而归诗人作此以送之按诗词前後明有两命非初立之命也其叙述周详正以扬厉中兴气象而但以送行而作不綦小与申培说则云韩侯来朝受命将归显父饯之赠以是诗夫诗中第纪显父饯行未云作诵也何据云然其陋斯甚子贡传阙文】

六月纪北伐也宣王五年夏六月玁狁内侵王命尹吉甫为将驱而出之于太原师归自鄙行饮至之礼诗人作此以美之【班固云周懿王时周室遂衰戎狄交侵暴虐中国至懿王曾孙宣王兴师命将以征伐之诗人美大其功按竹书事在宣王五年愚按此诗盖当时与吉甫燕之友所作陆化熙云虽美吉甫而宣王之能命将在其中】

六月栖栖戎车是飭【职韵】四牡騤騤载是常服【叶职韵鼻墨翻】玁【盐铁论汉书丰氏本俱作狁下同】狁孔炽我是用急【叶职韵读如亟乞力翻盐铁论作戒】王于出征以匡王国【职韵 赋也六月朱子云建未之月也濮一之云诗言六月徂暑则为夏正可知按司马法冬夏不兴师所以兼爱民也今记六月者郑玄云盛夏出兵明其急也孔颖达云征伐之诗多矣未有显言月者此独言之故云明其急也黄氏云人知其上之出于不得已虽六月而人不以为暴盖以为其所以劳我者乃所以安我也栖栖同字鸟宿曰栖云栖栖者取其翔集不定之义论语何为是栖栖者注云犹皇皇言其不安也仓卒兴师人情扰攘其象如此戎车革路之等也其等有五解见采薇篇飭说文云致坚也四牡即五等戎车既驾之四牡与第五章同騤騤解见采薇篇载是常服者车中或载常或载服两举之也郑以韦弁服为常服似难通毛传云日月为常按周礼司常职云王建太常大司马职云若大师则建太常比军衆诛後至者小司马职云凡小祭祀会同飡射师田掌其事如大司马之法是知兴师之始必建太常以致军衆毛郑皆泥大司马职文谓必王亲征始建太常而郑又疑此举非宣王亲征故但解常服为戎服岂知戎服不可以常服言而小司马职明言凡小师田掌其事亦如大司马之法

然则是遣将出师皆得建太常以令衆不必王亲征也服戎服也以韎韦为弁又以为衣裳又戎仆职云掌驭戎车及王倅车之政正其服倅车即五戎之倅车中之将帅甲士各有所服之服故曰正其服不必尽韎韦也韎韦特将帅服耳所载有几载常以致衆载服以备用于是人知其将有事矣乃告之以出师之故如下文所云也炽盛也我主吉甫而言以吉甫为主将乃发令者後章二我字亦同急疾也玁狁来侵其势甚盛我用是急于徵兵不暇顾炎暑也于之为曰音之近也解见无衣篇按毛传多训于为往董氏云如下章王于出征以佐天子岂王自征而又佐天子乎匡尔雅云正也夷不乱华是之谓正王国王畿也周礼方千里曰国畿王者畿内谓之国畿当时玁狁内侵焦获泾阳皆在畿内故曰以匡王国也此吉甫初徵兵而述王命以告之也左僖二十三年晋公子重耳如秦秦伯享之公子赋河水公赋六月赵衰曰重耳拜赐公子降拜稽首公降一级而辞焉衰曰君称所以佐天子者命重耳重耳敢不拜晋语载此云君称所以佐天子匡王者以命重耳重耳敢有惰心敢不从德又左襄十九年季武子如晋拜师晋侯享之范宣子为政赋黍苗季武子兴再拜稽首赋六月】比物四骊闲之维则【职韵】维此六月既成我服【韵见前章】我服既成于三十【石经三十作世】里【纸韵】王于出征以佐天子【纸韵 赋也比陆德明云齐等也物类也指马而言孔云比物者比同力之物尔雅云戎事齐力按周礼校人掌王马之政辨六马之属种马一物戎马一物齐马一物道马一物田马一物弩马一物凡大祭祀朝觐会同毛马而颁之凡军事物马而颁之注云毛马齐其色物马齐其力朱子云吉事尚文武事尚强也骊深黑色陆佃云马善騊駼骊牡尔雅曰騊駼骊牡以罕称也孔云戎事齐力尚强不取同色而言四骊者虽以齐力为主亦不厌其同色也故曰駉駉彭彭又曰乘其四骐田猎齐足而曰四黄既驾是皆同色也无同色者乃取异毛耳骐骝是中駉骊是骖是也愚按此四骊乃吉甫所乘与凡言四牡不同篇中四牡凡三见皆谓军中驾戎车之四牡耳如使尽四骊安得骊牡如彼之多乎又檀弓云夏后氏尚黑戎事乘骊今吉甫乃周将而亦乘骊者意当时必有所取然不敢妄为之辞也书传云闲之者贯之也贯之也者习之也则法也刘彝云闲习之久则进退驰驱不失其则言其教阅有素也我主吉甫而言服则两服之服车驾四马在内两马谓之服在外两马谓之騑服字从舟取其可以舟旋也騑即骖也前言四骊则服与騑当各居其二今专言服者观郑诗云两服上襄两骖鴈行又云两服齐首两骖如手盖两服并首在前而两骖少次其後故服马必得其最良者为是是则举服可以该骖郑诗言巷无服马是也比物四骊所谓既成我服也此诗三用服字而义各异旧谓指凡军士之戎服则军需当有夙储必无临出征而始制服之理况寇迫门庭得无缓不及事乎于亦曰也发语之辞三十里为一舍汉昭云吉行五十里师行三十里孔云军法师行皆以三十里为限汉书律历志计武王之行亦准此也按志武王伐纣师初发以殷十月戊子日在析木月在天驷戎午渡于孟津孟津去周九百里凡三十一日而渡是师行日三十里之明证也朱子云既成我服即日引道不徐不疾尽舍而止又见其应变之速从事之敏而不失其常度也愚按周都在今咸阳县玁狁侵周至于泾阳考陕西志泾阳南至咸阳仅三十八里则此诗所云于三十里乃正道其实耳上章王曰出征以匡王国是统命军衆之辞此章王曰出征以佐天子乃责成吉甫之辞分别观之乃得此章叙吉甫承王命而徂征之事】四牡修广其大有颙【冬韵】薄伐玁狁以奏肤公【叶冬韵读如恭居容翻】有严有翼共【音恭下同】武之服【韵见首章】共武之服【同上】以定王国【韵见首章 赋也修毛传云长也考工记堂修七步之修广谓横量濶也檀弓广轮之广颙说文云头大也曹氏云修以言其身之长广以言其腹背之充颙以言其首之大三者相称所以成其大也薄发语

辞伐说文云击也字从人持戈左传云有钟鼓曰伐言陈钟鼓而击之也獫狁解见采薇篇奏进也肤旧训为大殊无据按说文无肤字有胪字集韵云胪省作肤其义俱训皮是可见肤即胪字也然以皮训肤于此诗义无当考古文胪旅通用周礼皆旅侯仪礼士冠礼东面旅占注云古文旅作胪又史记胪于郊祀正义云胪读旅旅祭名也是则胪旅二字原以音同通用後乃各异其读今因穷肤字之始而得胪又因通胪字之用而得旅则此肤字乃即旅字耳六书之不明久矣非好学深思心知其意谁能然子言者哉程大昌云古人旅作胪予因读此始悟胪传曰旅传也自殿上至殿下皆数人抗声相接使所唱之语联续远闻则胪传之为旅传其已审矣旅即师旅之旅周礼军制万二千五百人为军二千五百人为师五百人为旅百人为卒二十五人为两五人为伍今日旅者举中言之也公公所也毛传训为功亦无据此行也为伐獫狁故乃进师旅之衆于公所将有以誓戒之也下文有严有翼四句正吉甫誓衆之辞严戒也不敢轻敌之谓翼敬也不敢乱行之谓共朱子云与供同尔雅云具也服事也兵凶战危通将帅士卒凡有事于戎行者皆当致其戒谨以具武事也辅广云兵陰事也用之当以严敬为主不严则不整不敬则不肃范祖禹云共武之服者如此则足以定王国矣定与匡不同匡王国是宣王语以扶冠履之分言定王国是吉甫语以奠中外之疆言此章叙师既在途而誓衆之事以下章元戎启行之语观之计此时亦将迫乎敌垒矣】獫狁匪茹【叶遇韵读如吁俞成翻】整居焦获【叶遇韵胡故翻尔雅作护】侵镐及方【阳韵】至于泾阳【韵】织【丰氏本作帟】文鸟章【阳韵】白旆【陆德明本作筏】央央【阳韵】元戎十乘以先后【丰氏本作启】行【叶阳韵寒刚翻 赋也匪通作非茹茅根相牵引貌易泰卦拔茅茹之茹整居言整齐其衆而居之也孔云整齐居周之地无所畏惮也焦获周地获通作护尔雅十藪周有焦护即此孙炎云周岐周也郭璞云今扶风池阳县瓠中是也亦名瓠口沟洫志韩水工郑国说秦令凿泾水自中山西邸瓠口为渠班彪北征赋夕宿瓠口之玄宫即焦获地也今在陕西西安府三原县其地有焦吴里有焦村数处王翱云焦吴即焦护之讹朱子分焦获为二非是獫狁生长非托根于中国而来荐居焦获之地所谓他族逼处将与我争此土也又郑笺依尔雅训茹为度谓獫狁来侵非其所当度为也故焦氏易林有云獫狁非度治兵焦获盖古说之相传旧矣并存之侵说文云渐进也字本作侵从人又持帚若埽之进又者手也会意又左传云无钟鼓曰侵谷梁传云苞人民毆牛马曰侵镐先儒未详其所在王肃以为镐京王基駁之云据下章云来归自镐我行永久言吉甫自镐来归犹春秋公至自晋公至自楚亦从晋楚归来也故刘尚曰千里之镐犹以为远镐去京师千里长安雒阳代为帝都而济陰有长安乡汉有雒阳县此皆与京师同名者也愚按下章先言薄伐獫狁至于太原而後即继之云来归自镐则镐地必近太原古文镐鄠通用荀子武王以鄠史记周本纪复都丰鄠汉书戎败我骊遂亡酆鄠皆以镐为鄠若此诗之镐乃鄠地也鄠本晋邑管仲对鄠邑之黍齐弦施伐晋取鄠公羊春秋桓十五年公会齐侯于鄠皆此鄠也汉光武即位鄠南始分鄠为二字名高邑县今尚仍原名隶真定府其地正与山西太原接壤在汉均属恒山国其为此诗之镐明矣若镐京之镐字当作漕盖以漕水得名方朔方也以采薇诗观之先言王命南仲往城于方而後即曰天子命我城彼朔方则方非朔方而何解见采薇篇泾阳在今陕西西安府水北曰阳以池在泾水之北得名郑玄云来侵至泾水之北言其大恣也孔云泾去京师为近故言大恣愚按焦获泾阳相去止十数里泾阳在焦获南盖自周穆王迁戎于太原而太原隣近遂为獫狁出没之地故始而侵鄠迤邐西行以及于灵夏等处将以内犯京畿见焦获为十藪之一其地美水草遂整居之为久驻不返之计而时复钞掠及于泾阳去周都不过三十余里而近其势

亦孔岌矣安得不声罪致讨亟驱除之乎织文鸟章前军所建所谓前朱雀也织帜字通用汉志旗织加其上谓旗帜也说文云帜者旌旗之属郑云徽织也孔云言徽织者以其在军为徽号之织以绦为繆又绦为旒书名于末以为徽织司常掌九旗之物名各有属云物名者所画异物则异名也属谓徽织大传谓之徽号愚按旗之正幅名繆属于旗下者名旒即旂是也亦名旒在旒之末者名帜说文解为旌旗之属正言其缀属于旌旗耳书名旒末以为表识如前军後军左军右军之类谓之织文亦犹周礼司常职所云官府各象其事州里各象其名家各象其号然周礼于此上文曰皆画其象焉唐孔氏疑徽织之制亦如所建旌旗而画之其象但小耳今莫之能详也说文又解徽为帜谓以绦徽帛着于背引春秋传扬徽者公徒也若今救火衣而郑笺既解织为徽织又云将帅以下衣皆着焉孔氏亦谓今城门仆射所被及亭长着绦衣皆其旧象三说相合或是仿旗帜之制着之于衣则谓之徽若以此织文为军中所服则与下鸟章白旒语意不贯断不然也鸟章旗也毛云错革鸟为章也解见出车篇凡旗旒旗旒之类各有织文此独以鸟章言则织文乃鸟章之织文耳白旒央央後车所建按尔雅继旒为旒旒画龟蛇所谓後玄武也旒惟旒有之白通作帛孔云九旗之物皆绦则此亦绦也言白旒者谓绦帛犹通帛为旒亦是绦也又周礼巾车职云革路龙勒条纓五就建大白以即戎以封四卫或疑此白旒即大白按五路皆王所乘其云即戎建大白正谓王亲征时所建耳於将帅无预央通作英解见出车篇元毛云大也戎朱子云戎车也军之先锋也司马法云夏后氏曰鈎车先正也殷曰寅车先疾也周曰元戎先良也孔云鈎马饰也周礼革路无鈎此特设鈎故以名车其行曲直有正故云先正也或谓此车行鈎曲盘旋曲直有正不必为马饰也寅进也此车能进取远道故云先疾也元戎大车之善者故云先良也十乘为马四十匹甲士三十人步卒七百二十人王安石云元戎十乘所谓选锋也兵法兵无选锋曰北以先启行郑云以先前启突敌陈前行韩婴章句云元戎大戎谓兵车也车有大戎十乘谓车幔轮马被甲衡軓之上尽有剑戟名曰陷军之车所以冒突先后敌家之行伍也左传宣十二年楚子入晋军遂出陈孙叔曰进之寧我薄人无人薄我诗云元戎十乘以先后行先人也军志曰先人有夺人之心薄之也遂疾进师车驰卒奔乘晋军晋师大败朱子云建旌旗选锋锐进声其罪而致讨焉直而壮律而臧有不战战必胜矣此章叙吉甫师薄涇阳而调度元戎以赴敌之事】戎车既安如轻【说文潘岳赋俱作□】如轩【元韵轩与原叶闲与宪叶皆隔四句为韵亦一体也】四牡既佶既佶且闲【叶先韵何甄翻如以轩闲原宪为一韵则闲当叶元韵读如烦符袁翻】薄伐玁狁【史记汉书俱作狁】狁【汉书作允】至于【汉书作於】大【音泰】原【元韵】文武吉甫万邦为宪【叶元韵虚言翻礼记武坐致右宪郑氏云宪读如轩声之误也赋也上章言鸟章之旗选锋之乘皆言其前军也至此戎车四牡则大队继之矣然以下文至于大原观之亦玁狁既离焦获而我师追奔逐北之事轻毛传云摯也说文云抵也轩车後重也集韵云前顿曰轻後顿曰轩郑玄云戎车之安从後视之如摯从前视之如轩然後适调也凡车之势一低一昂戎车下尖上广易于不平此言前後适均可以平行而不倾跌见制度工巧也如轻如轩乃摹拟之辞犹云轻如轩如也後汉书马援疏云居前不能令人轻居後不能令人轩注言为人无所轻重即此意也佶说文云正也甘誓云御非其马之正汝不共命今四牡既佶所谓范我驰驱也闲习也与前解同但前闲之是以人闲马此曰且闲则马之自闲也谢枋得云西北平原广野举目千里利于车战故此诗以车马为重大原晋地禹贡既修大原是也亦名大鹵春秋昭元年晋荀吴帅师败狄于大鹵谷梁传云中国曰大原夷狄曰大鹵是也春秋说题辞云高平曰大原原端也平而有度释名云地不生物曰鹵卢又名大夏又名晋

阳在今山西大原府阳曲县县本汉名隋初以阳字叶音杨姓恶其曲名改名阳直至唐仍复今名後汉西羌传云穆王西征犬戎迁戎于大原夷王衰弱荒服不朝乃令虢公率六师伐太原之戎至于俞泉宣王遣兵伐大原戎不克按左传籍谈云晋居深山戎狄之与隣而远于王室王灵不及拜戎不暇则以大原之地为戎所荐居故也毛云至于大原言逐出之而已孔云吉甫薄伐玁狁敌不敢当遂追奔逐北至于大原之地采芑出车皆言执讯获丑此无其事明其不战也庄三十年齐人伐山戎公羊传曰此盖战也何以不言战春秋敌者言战桓公之于戎狄驱之耳义与此同严尤云当周宣王时玁狁内侵至于泾阳命将征之尽境而还其视玁狁之侵譬犹蠹蝨之螫殴之而已故天下称明陈师道云太王去邠宣王薄伐至于大原因时之宜非异道也太王诸侯之事也上无王下无霸既不能拒又不能去是危道也宣王王者事也拯民以去乱武之经也逐以尽境以限内外天之制也如鸟之攫如兽之搏殴之则已暴者为之则覆巢焚穴戮及麋卵不可谓政王应麟云自穆王迁戎于大原而大原为戎狄之居宣王仅能驱之出境而已其後料民大原而民患益深酈山之祸已兆于此其端自穆王迁我始西周之亡犹西晋也吉甫尹吉甫此时大将也徐光启云不专称吉甫之武而先美其文见能协人心以御侮非迫人强战以取胜于敌也文武只就出师上见如誓衆严翼以共武事薄伐出境而不穷追皆是其文处史记齐景公时晋伐阿甄而燕侵河上齐败绩景公患之晏婴乃荐田穰苴曰穰苴虽田氏庶孽然其人文能附衆武能威敌愿君试之意亦同此一说北伐可见其武崧高烝民诗可见其文则文武二字当连说以文为宾武为主言吉甫不徒能文而又能武也宪表也法也谓若表法以示人也字训见板篇能文能武何往不济故可为万邦诸侯法不重诸侯来法吉甫重在吉甫足为人法谢枋得云汉唐而下搢绅介冑分为两途愚儒武夫各持一说不知三代将帅必文武全才可以为万邦之法则者也洪武二十五年诏祭酒胡季安与翰林官考定射法颁于国子监召国子生前问之曰尔等读书暇亦尝习骑射矣乎对曰习之曰熟未对曰未也上曰古之学者文足以经治武足以戡乱故能出入将相而社稷奠安今天下粗平尔等当务学然武岂可忘哉诗曰文武吉甫万邦为宪文武并用古之道也】吉甫燕【汉书作宴】喜【纸韵】既多受祉【纸韵】来归自镐我行永久【叶纸韵苟起翻】饮御诸友【叶纸韵羽轨翻】炰【毛郑本俱作包】鼈脰鲤【纸韵】侯谁在矣【纸韵】张仲【汉书丰氏本俱作中】孝友【见上 赋也此章有二燕首二句是饮至之燕来归以下则吉甫自叙其契濶而私燕以相乐也所以定後燕为私燕者以下文有炰鼈脰鲤之语燕礼其牲狗天子之燕不过有牢牲炰鼈脰鲤非礼所载故知为私燕也邹忠胤云若谓总是宣王燕吉甫则方叔亦尝共功岂得不与燕而偏集吉甫之诸友相与道故乎此论确矣燕天子燕之也喜吉甫自喜也中外泰寧疆场无事可喜孰如非为一已成功喜也既者已事之辞祉福也郑云吉甫既伐玁狁而归天子以燕礼乐之则欢喜矣又多受赏赐也刘向云司马法曰军赏不踰月欲民速得为善之利也盖急武功重用人也吉甫之归周厚赐之其诗曰吉甫燕喜既多受祉镐解见四章来归自镐我行永久此吉甫意中语作诗者代写之也欢侑曰御曲礼御食于君即此御也诸友王之诸臣与吉甫为友者也在外日久友情疎故进诸僚友与之饮燕凡肉置火中曰炰说文释文皆谓合毛炙肉为炰诗毛炰是也严粲云楚辞脰鼈炰羔脰煮也鼈可煮不可炰今云炰鼈谓火熟之耳鼈介虫之可食者罗愿云卵生形圆而脊穹四周有鬐在易离为鼈为蠃为龟以其骨在外肉在内也至考工记则以外骨为龟之属内骨为鼈之属以鼈外有肉缘比龟为内骨耳一名神守谓其可以守鱼又名河伯从事俗呼团鱼脰说文云细切肉也凡牛羊鱼之腥聂而切之为脰枚乘七发云鲜鲤之脰陆佃云熟则有炰

鼃腥则有脍鲤侯毛云维也张仲诸友之一尔雅李巡注云张姓仲字路史云帝鸿氏次妃生挥造弧矢受封于张为张氏毛云善父母为孝善兄弟为友王安石云忠也者移孝以为之者也顺也者移友而为之者也故言忠顺之臣必及孝友之友邹云特揭孝友之张仲为殿固侈吉甫有重客亦以见王室多名贤矣孔云吉甫之贤有此善友因显宣王所任得人使文武之臣征伐孝友之臣处内亦所以为美也严云孝友者德之本卷阿言吉士曰有孝有德宣王之时朝多贤臣张仲独以孝友称则必盛德之士也北伐之功系夷夏盛衰诗人美其功而结以张仲孝友之辞盖有深意存焉岂非养君德者有其人乃攘夷复境之本欤范祖禹云宣王使吉甫征伐而与张仲居朝所以辅其德也若无孝友忠信之臣养君之心则虽征伐有功于外而不善之政将出于内朝廷心腹也戎狄四肢也故孝友之臣日纳王于善而敦厚之然後戎狄可攘而外患可除矣王云吉甫为将于外而内无忠顺之臣与之同志者辅王耳目而迪其心则妨功害能之人至矣妨功害能之人至则若吉甫者其身之不阅何暇议胜敌哉愚按孔氏以後诸说虽非诗人本旨然议论俱佳故备録之】

六月六章章八句【序及子贡传皆谓宣王北伐也毛氏遂以为咏宣王亲征之诗韦昭亦云六月道吉甫佐宣王征伐复文武之业也然观王于出征以佐天子二语则亲征之说不可通矣邹云六月之师盖宣王中兴第一举而不与江汉常武并列大雅者彼之为告庙策勲此之为讌宾叙款彼之为六飞亲驾此之为四牡徂征彼则归功于天子而此则归美于人臣词气固不侔也申培说谓吉甫帅师征玁狁史籀美之他无所经见固未足信金履祥通监前编属之宣王元年甲戌时事亦与竹书纪年不合史记匈奴传则云周襄王与戎狄伐郑戎狄逐襄王于是戎狄或居于陆浑东至于卫侵盗暴虐中国中国疾之故诗人歌之曰戎狄是膺薄伐玁狁至于太原按吉甫与申伯仲山甫同时读崧高烝民诗可见正宣王时人历幽平桓庄厘惠而後及于襄王今以此诗为襄王时事其谬明矣又序以此诗为变小雅之始且云鹿鸣废则和乐缺矣四牡废则君臣缺矣皇皇者华废则忠信缺矣棠棣废则兄弟缺矣伐木废则朋友缺矣天保废则福禄缺矣采薇废则征伐缺矣出车废则功力缺矣杕杜废则师衆缺矣鱼丽废则法度缺矣南陔废则孝友缺矣白华废则廉耻缺矣华黍废则蓄积缺矣由庚废则陰阳失其道理矣南有嘉鱼废则贤者不安下不得其所矣崇丘废则万物不遂矣南山有台废则为国之基坠矣由仪废则万物失其道理矣蓼莪废则恩泽乖矣湛露废则万国离矣彤弓废则诸夏哀矣菁菁者莪废则无礼仪矣小雅尽废则四夷交侵中国微矣似皆剩语殊无义味】

采芑纪南征也宣王命方叔为率行三年大阅之礼遂伐荆蛮克敌而归诗人美之【竹书纪宣王五年秋八月方叔帅师伐荆蛮即此诗事也按是年六月方伐玁狁而八月即伐荆蛮其用师亦云急矣通监前编以伐玁狁为元年事伐荆蛮为二年事与竹书不合然观篇末有征伐玁狁荆蛮来威之语则南征固在北伐後也严粲云六月之诗事势急迫采芑之诗辞气雍容盖北伐则四夷交侵初用兵也南征则北方已服中国麤定方叔乘北方之威以临蛮荆也陈傅良云北伐南征之诗班师时作六月之词迫采芑之词缓六月以讨而定采芑以威而服也苏辙云方叔之南征先治其兵既衆且治而蛮荆遂服故诗人详其治兵而略其出兵至于卒章而後言其遇敌愚按前三韦乃大阅之事公羊传云大阅者何简车徒也何休云大简阅兵车使可任用而习之比年简徒谓之蒐三年简车谓之大阅五年大简车徒谓之大蒐左传

臧僖伯云春蒐夏苗秋獮冬狩皆于农隙以讲事也三年而治兵入而振旅归而饮至以数军实昭文章明贵贱辨等列顺少长习威仪也杜预云虽四时讲武犹复三年而大习出曰治兵始治其事入曰振旅治兵礼毕整众而还谷梁传云出曰治兵习战也入曰振旅习礼也以周礼考之四时讲武各有其名中春教振旅以蒐中夏教茷舍以苗中秋教治兵以獮中冬教大阅以狩皆如战之陈兵阴事春阴所入也故教振旅夏阴所伏也故教茷舍舍之言止也秋阴始作故教治兵冬阴大肃故教大阅也惟大阅之礼为备及三年大习其出也名曰治兵即中秋礼也其入也名曰振旅即中春礼也统而取名于中冬之大阅则以凡田之礼惟狩最备故也其不及茷舍何也王制云天子诸侯无事则岁三田注云三田者夏不田也夏不田之说本于春秋运斗枢故公羊言春苗秋蒐冬狩谷梁言春田夏苗秋蒐冬狩说各不同而何休以为谷梁有夏苗于义为短也贾谊新书亦引传云夏不田何也曰天地阴阳盛长之时猛兽不攫鷙鸟不搏螻蝻不螫鸟兽虫蛇且知应天而况人乎哉然则左传所言四时之田虽与周礼合意古者于夏苗之礼亦鲜举行也是故不以教战也此诗首章叙方叔承命为帅而将行大阅之始次章言治兵之事治兵辨旗物故其诗曰旗旐央央三章言振旅之事末句明言振旅闾闾是其证也谷梁传云大阅者何阅兵车也修教明谕国道也】

薄言采芑【纸韵】于彼新田【先韵】于此菑亩【叶纸韵母鄙翻】方叔【丰氏本作未後同】涖【陆德明本丰本俱作莅後同】止【纸韵丰本作只後同】其车三千【先韵芑止一韵田千一韵亩试一韵此用韵之奇】师干之试【叶纸韵诗止翻】方叔率【去声复同】止【丰本作只後同】乘其四骐四骐翼翼【职韵】路车有奭【叶职韵讫力翻】簠簋鱼服【叶职韵鼻墨翻丰本作簠】钩膺鞶革【叶职韵讫力翻】兴也苏云首章二章三章皆治兵也薄言者发语辞芑说文云嘉谷也尔雅云白苗也郭璞云今之白粱粟陶弘景云白粱穗大毛多而长殻粗扁长不似粟圆米亦白而大其香美为黄粱之亚又旧说以为菜名陆玑云芑菜似苦菜朱子云即今苦蕒菜宜马食军行采之人马皆可食也按诗言芑者三毛传以薄言采芑为菜丰水有芑为草维糜维芑为谷王安石皆以为谷严云新田菑亩中乡不应指菜盖以田亩善养嘉谷喻周家善养士卒也而李氏颇疑之以为既谓之采则不宜谓之谷愚谓李氏之说迂也桑中之诗曰爰采麦矣麦亦谷也麦可言采何谓芑不可言采也新田田之新成者三岁田也菑亩田之初反草者一岁田也说见坊记郑注按尔雅田一岁曰菑二岁曰新田三岁曰畬孙炎云菑始灾杀其草木也新田新成柔田也畬和也田舒缓也郭云今江东呼初耕地反草为菑孔颖达云臣工传及易注皆与此同惟坊记注云二岁曰畬三岁曰新田坊记引易之文其注理不异当是转写误也诗诂駁之云今详田一岁曰菑始反草也二岁曰畬渐和柔也三岁曰新田谓已成田而尚新也四岁则曰田矣若二岁曰新田三岁则为田矣何名为畬郑注坊记之说为是但于采芑臣工不暇辨耳愚谓易以菑畬并言当是二田形质相近无缘隔新田于中若臣工之言新畬则繇新而推之于畬也诗之兴意最为深妙以三岁新田为三年大阅之况其义以新田为主言瞻彼新田则有芑可采矣然其初繇菑亩而後成犹之乎此之菑亩也对彼言此借他地以相形也新田兴今日之简练菑亩兴昔日之培养毛传云宣王能新美天下之士然後用之郑玄云谓和治其家养育其身严云厉王之乱天下荡荡如荒榛之地宣王经理弊坏之天下如耕垦荒榛之地以为田故言采芑谷者于新垦之地喻宣王取民为兵皆新抚之民也苏云方其治田也则劳而及其采芑也则佚故宣王之南征则亦使方叔治其军而後用之方叔毛传云宣王卿士路史云周书武王命伐方乃商圻内

地方叔采地洫通作?说文云临也洫止率止之止皆通作只语已辞也其车三千合兵车重车而得此数兵车一千五百重车一千五百兵车亦名轻车尚书孔疏云凡出车一乘则有两车一曰轻车甲马四匹甲士三人在车上左主射右主刺中主御步卒七十二人随之前拒二十四人左角二十四人右角二十四人共七十二人李靖云周制一乘步卒七十二人甲士三人以二十五人为一甲凡三甲共七十五人一曰重车牛十二头曹公新书谓之守车炊家子十人固守衣装五人廩养五人樵汲五人共二十五人皆所以佐兵车者兵车以战大车以载辎重两车总百人也左传乙卯楚帅军于邲丙辰楚重至于邲吕氏谓凡战兵车在前辎重在後楚重次日乃至後兵车一日故无钞掠之患愚按此诗言其车三千内兵车一千五百乘计甲士步卒共得十一万二千五百人重车一千五百乘计炊家子等共得三万七千五百人合之为十五万人天子六乡六遂之衆也以周礼制乡遂制卒伍之法考之其数正与此合六乡之内五家为比比有长五比为闾二十五家也闾有胥四闾为族百家也族有师五族为党五百家也党有正五党为州二千五百家也州有长五州为乡万二千五百家也乡大夫主之六遂之内五家为隣隣有长五隣为里二十五家也里有宰四里为鄹百家也鄹有长五鄹为鄙五百家也鄙有师五鄙为县二千五百家也县有正五县为遂万二千五百家也遂人主之小司徒职云凡起徒役毋过家一人以其余为羨其用之为卒伍五人为伍伍有长五伍为两二十五人也两有司马四两为卒百人也卒有长五卒为旅五百人也旅有帅五旅为师二千五百人也师有帅五师为军万二千五百人也军将主之是则乡遂卒伍皆以五起数乡遂起数于家卒伍起数于人尚书孔疏云周礼司徒万二千五百家为乡司马法万二千五百人为军家出一人一乡为一军天子六军出自六乡也周礼又云万二千五百家为遂遂人职云以岁时稽其人民简其兵器以令征役则六遂亦当出六军乡为正遂为副耳礼记疏亦云遂出军之法乡为正遂为副则遂之出军与乡同今按费誓以鲁人三郊三遂并言大国三军于郊遂均取给焉则天子之乡遂可推孔说是也旧说泥周礼小司徒职颁比法于六乡之文而未详观遂人职中有岁时登其夫家之衆寡及其六畜车犂以令贡赋以令师田之语遂谓王国六军仅取足于六乡而止以理论之如六乡之民人人尽用岁无更休而遂县都鄙之民均在王畿千里之内乃居然无事何劳逸之不均也况王国止此六军如天子巡狩于方岳夷狄奸宄交侵窃发谁与居守远近征讨何以迭用正当如孔氏所云乡为正遂为副者观周礼大司马所握之六军通王畿千里之内更休而迭调之故大事致民用之军旅田役大故致余子繇乡遂至于都鄙定法皆然即如四时教阅之法旗物号名兼州里野家都鄙而并陈之可见矣然六军止七万五千人而乡遂之应徭役者共十五万人或者分番而各用其半以足六军之数未可知也易氏云先王军制调兵必五数出兵必百数自五人之伍五伍之两以至五旅之师五师之军其积数实起于五也百人之卒成一小陈五百人之旅成一中陈二千五百人之师成一大陈万二千五百人之军成五大陈其积数实起于百也乃车徒异赋徒起法于人车起法于田徒则上文之说备矣车之赋法考周礼及司马法六尺为步步百为亩亩百为夫夫三为屋屋三为井四井为邑四邑为丘丘十六井出戎马一匹牛三头是曰匹马丘牛四丘为甸甸六十四井出长毂一乘戎马四匹牛十二头甲士三人步卒七十二人戈楯具谓之乘马又班固汉书云殷周以兵定天下设六军之衆因井田而制军赋地方一里为井井十为通通十为成成方十里成十为终终十为同同方百里同十为封封十为畿畿方千里有税有赋税以足食赋以足兵一同百里提封万井除山川沈斥城池邑居园囿术路三千六百井定出赋六千四百井戎马四百匹兵车百乘此卿大夫采地之大者也是谓百乘之家一封三百一十六里

提封十万井定出赋六万四千井戎马四千匹兵车千乘此诸侯之大者也是谓千乘之国天子畿方千里提封百万井定出赋六十四万井戎马四万匹兵车万乘故称万乘之主今按周礼言甸汉书言成者甸方八里四围各加一里则为方十里之成此一里即除山川沈斥等数也然则计甸即是计成矣所谓十同为封者以开方法折算则九同方三百里余一同为零数计方三百里外四面各加八里则纵横各十六里合之一同百里之数每面各三百里每百里加八里三八为二十四里则四面共九十六里尚长四里为四角补空之数每角补空各一里也然诸侯之封实无此制殆依千乘之说而以意为之耳详见闕宫篇甲士步卒既皆出于乡遂内家各一人不因田定数丘甸之法所谓出甲士步卒者大抵只是供其糗糒耳绎汉书赋以足兵之语可见又礼记疏云乡遂之衆七十五人遣出革车一乘马四匹牛十二头恐非力之所能皆是国家所给故周礼巾车职云凡车之毁折入齎于职币又质人职云凡受马于有司者书其齿毛与其贾司兵职云及授兵从司马之法以颁之及其受兵输亦如之是则戈楯长毂牛马之类皆出于官戈楯供士卒之用牛马所以拽车其刍秣之需出自甸赋费誓所谓鲁人三郊三遂峙乃刍茭无敢不多是也乃若以人配车亦有卒伍周礼县师职云将有军旅则受法于司马以作其衆庶会其车人之卒伍是可见车亦有卒伍大抵从二十五人之两起数三其两则为戎车甲士步卒之数一其两则为将重车者之数凡出车一乘则有两车合之共百人其法以二十五乘为一大偏计共二千五百人一师之数也周鱼丽之陈先偏後伍是也以十五乘为一偏共计一千五百人三旅之数也楚庄王为乘广三十乘分为左右二广广有一卒是也以九乘为一小偏计共九百人一旅四卒之数也申公巫臣适吴所舍之偏是也孔氏云科兵既至临时配割其车虽在其人分散前配车之人临战不得还属本车理亦近之至若乡遂丘甸徒赋之外据司马法又云井十为通通为匹马三十家士一人徒二人通十为成成百井三百家革车一乘士十人徒二十人十成为终终千井三千家革车十乘士百人徒二百人十终为同同方百里万井三万家革车百乘士千人徒二千人与乡遂丘甸法不同者孔氏云此谓天子畿内采地法彼是畿外邦国法外内有异故也凡出军之法先六乡赋不止次出六遂赋犹不止徵兵于公邑及三等采赋犹不止乃徵兵于诸侯赋犹不止则诸侯有遍境出之法以上皆古人徵兵制赋之大略也若此诗所咏其车三千乃三年大简车徒之事与备六师以亲征不同乡遂各七万五千人合而简之正以备六师番休之用此时分配之于兵车重车各应得一千五百乘以车之备六师用者亦当有正副如周礼所云五戎之倅故曰其车三千也旧说皆以兵车重车合算为一乘则计衆当三十万人又径谓方叔领之以南征故郑玄以为宣王承乱姜卒尽起王安石以为合诸侯之师朱子则谓此亦极其盛而言未必实有此数而严粲亦谓如项羽兵四十万号百万皆梦论也师乡遂之衆也干尔雅云扞也试朱子云肄习也谓如步伐止齐之类师干之试苏氏谓试其衆以扞敌之法是也然此亦方叔初蒞止而播告之辞至第三章乃试之实其车三千所谓简车也师干之试所谓简徒也又汉书云五国为属属有长十国为连连有帅三十国为卒卒有正二百一十国为州州有牧连帅比年简车卒正三年简徒羣牧五载大简车徒此乃主侯国而言与此异也率本作卫通作帅将也言此蒞止之方叔乃承王命而来为大将者也或作统率之义解于末章文义似不可通騶解见小戎篇按檀弓云周人尚赤戎事乘驪然六月比四驪采芑乘四骐则亦不定乘驪矣据周礼谓军事物马而颁之则毛色原非所泥而偶有毛物皆同如四驪四骐者安得不以充上驷之选供元帅之用乎陆佃强为之说谓驪上驷中驷北伐举四驪南征举四骐者方是时马政愈修故虽骐亦闲习任为用非独四驪也此殊不足信四驷为方叔驾路车者在车左右

如鸟之有翼以两服为两翼两骖又为两翼故重言翼翼也路车革路也奭通作赭说文云大赤也旧以为兵车之饰按周礼朱色惟象路有之则此有奭当指戎服言言在车中者有奭然之戎服韎韐有奭是也韎茅蒐所染之名赤色也韐即韞也芾之通称宋舆服志皇佑三年诏问冠韦弁何服太常礼院奏谓周礼司服凡兵事韦弁服释之者曰韦弁以韎韦为弁又以为衣裳春秋传晋郤至衣韎韦之跗注是也今伍伯缙衣古兵服之遗色孔云跗注礼记作不注不读如幅注属也言幅有属者据此则兵事凡弁衣裳芾皆以赤色为之故统称有奭也簞第解见齐载驱篇鱼服与采薇篇之鱼服不同当是以鱼服饰马服荀子蛟韞注云韞马服之革以蛟鱼皮为之又左传闵二年齐桓归卫夫人鱼轩注亦云车以鱼皮为饰也以上下文皆言车马之饰不应搀一矢箠于中钩膺毛云樊纓也樊读如鞶带之鞶纓今马鞶在膺者愚按钩即马腹带之饰带必有钩以拘之以金为钩施之于膺所谓鞶也又古者革带大带皆谓之鞶先系革带然後加以大带革带亦用赤金为钩以拘之所谓一钩金也後世谓之钩晋语寺人鞶云乾时之役申孙之矢集于桓钩钩近于祛而无怨言太玄经云带其钩鞶锤以玉环皆带钩也所以定此为马腹带非革带者以上下文类之孔以马娄环解钩以鞶与纓解膺按娄颌之钩惟金路有之非革路所有膺乃马之胷前何得训为器物又钩膺二字连言则是在膺之钩非娄颌之钩明矣儻革解见蓼萧篇】薄言采芑【见前】于彼新田【见前】于此中乡【阳韵】方叔涖止【见前】其车三千【见前】旗旐央央【阳韵】方叔率止约軹错衡【叶阳韵户郎翻】八鸾琚琚【阳韵陆本丰本俱作枪】服其命服朱芾【陆本作茀又云或作绂白虎通作紉丰本作市】斯皇有琚【陆丰本俱作创陆又云亦作枪】？【丰本作□】玼【叶阳韵寒刚翻礼记作衡国语注作紉兴也中乡者六乡与六遂适中交界之地故知此诗为简乡遂之衆而言也苏云中乡民居在焉故其田尤治言瞻彼新田则有芑可采矣然今日者彼地之新田异日者亦犹此地之中乡也所以然者田愈治则愈美以兴衆愈练则愈精旗旐央央文与出车篇相似而义各不同董氏云九旗之物太常王所建旐旌象辂木辂所建其诸臣之旗旗为上旐为下此言上下所建则余得兼举矣按周礼大司马职云中春教振旅司马以旗致民平列陈如战之陈辨鼓铎镯钦之用中夏教茷舍如振旅之陈羣吏撰车徒读书契辨号名之用中秋教治兵如振旅之陈辨旗物之用王载太常诸侯载旗军吏载旗师都载旂乡遂载物郊野载旐百官载旗各书其事与其号焉中冬教大阅羣吏以旗物鼓铎镯钦各帅其民而致质明弊旗诛後至者乃陈车徒如战之陈是则春夏皆不用旗物唯中秋治兵有之至冬则兼三时之礼用之若三年大阅于其出也亦行治兵之礼则自当载旗物以辨其用据此诗特言旗旐央央其为出而治兵无疑也又司常职云掌九旗之物名以待国事日月为常交龙为旗通帛为旂裸帛为物熊虎为旗鸟隼为旟龟蛇为旐全羽为旛析羽为旌及国之大阅赞司马颁旗物王建太常诸侯建旗孤卿建旂大夫士建物师都建旗州里建旂县鄙建旐道车载旐旂车载旌皆画其象焉官府各象其事州里各象其名家各象其号据此司马所颁惟常旗二物与太司马文同其他各异者彼为四时讲武之礼此为三年太阅之礼故所建不同此诗亦三年大阅然王不自行特命方叔往涖其事九旗中如太常旐旌三者以皆王旗非人臣所敢建其余六旗始于旗终于旐旌或方叔所建所谓天子之卿视侯也自方叔而下如小司马军司马舆司马行司马则孤卿大夫之类及师都州里县鄙莫不毕至则尽乎六乡六遂之衆举首尾可以该中故但言旗旐此诗所载典故与周礼合也约軹二句承上章而言车之饰不徒簞第鱼服也又有约軹错衡焉马之饰不徒钩膺儻革也又有八鸾琚琚焉軹毛传说文皆云长轂之軹也以朱约之孔云考工记说兵车乘车其轂长于田车是谓长

轂也言朱而约之谓以朱色纒束车轂以为饰轮人云陈篆必正注云篆轂约也盖以皮纒之而上加朱漆也诗诂云按考工记三分其轂长二在外一在内以置其辐是轂之外者长而内者短也軹非轂名乃是轂之外长而旁出者凡在轮中通名为轂轂之旁出者为軹按轮内有辐辐内有轂轂内有轴轂者辐所凑也三分其轂长除一分在辐内不可见者其二分在辐外可见者名之为軹即轂端是也故尔雅说文解为长轂之軹正如诗诂之说谓轂之长在辐外者孔指兵车乘车之轂长于田车以解长轂非训意也軹乃轂端而广雅云軹谓之轂其称殊混若方言所云轮韩楚间谓之軹或谓之軹夫軹虽轮内物而不可名轮名轮为軹混之混者也方言又云关之东西曰輶南楚曰軹今考说文训軹云车輶也训輶云轂端杳也以义求之輶軹軹本是一物而异其名方言谓軹即軹輶即軹可通者也特以为轮非耳约軹必以革故说文云或从革作?又说文有軹字与此不同彼字从氏大车後也此从氏不可不辨错衡毛云文衡也孔云错者襍也襍物在衡是有文饰其饰之物不知何所用也按说文训错云金涂也车輶曰衡涂金于輶以为文郑笺解商颂错衡亦曰金饰也与说文合鸾解见驷铁蓼萧篇按鸾有在衡者有在鑣者为铃各八其初本有虞氏所制谓之鸾车吕氏春秋注云鸾鸟在衡和在轼鸣相应和後世不能复致铸铜为之饰以黄金因谓之鸾路月令孟春天子乘鸾路是也後汉书舆服志云乘舆金根安车立车皆鸾雀立衡宋志云汉制乘舆金根车驾六黑马施十二鸾如周玉辂之制又五色安车五色立车驾四马施八鸾余如金根之制犹周金辂也准此则八鸾皆立于衡上口各衔铃盖初制如此故仍取名为鸾又名作銮亦字从鸾省也其後车乘异制或衡上不施鸾但设铃于鑣亦仍袭名为銮故说文解銮云人君乘车四马鑣八鸾铃象鸾鸟声朱子云马口两旁各一四马故八是也盖乘车鸾在衡既象鸾声亦存鸾形戎车鸾在鑣初无鸾形但象鸾声而已诗所咏如蓼萧庭燎韩奕烈祖皆在衡之鸾也如驷铁之鸾鑣及此之八鸾皆在鑣之鸾也所以知此鸾为在鑣者以方叔所乘当是戎路故也琯琯毛云声也按说文琯玉声也此鸾声亦云琯者以声和如玉故义得通用耳服其命服以下又赞其服佩之美命服朱子云天子所命之服也朱芾毛云黄朱芾也按黄朱即赤色解见斯干篇芾亦作韍韍也解见素冠篇陈祥道云韍色从裳礼记言君朱大夫素士爵者祭服之韍也盖君祭以冕服冕服玄衣纁裳故朱韍大夫祭以朝服缁衣素裳故素韍士祭以玄端玄裳黄裳襍裳可也故爵韍周官典命公侯伯之士一命而士之助祭以爵弁爵弁纁裳故緼韍所谓一命緼韍是也緼赤黄之间色公侯伯之卿三命大夫再命而卿大夫聘王助祭以玄冕玄裳纁裳故赤韍所谓再命三命赤韍是也韍之为物以其芾前则曰韍以其一巾足矣故曰韍芾是韍之通称君韍以朱而采芾言方叔之将兵韍亦以朱瞻彼雒矣言作六师而韍以韍韍者盖兵事韦弁服韦弁服纁裳故贵者以朱芾卑者以韍韍韍即所谓緼韍也皇通作黄尔雅黄鸟名皇是皇为黄之通称也又黄白曰皇鲁颂駟篇有騶有皇是也然则朱芾斯皇盖言朱而兼带黄白色所以别于纯朱即所谓黄朱也琯解见前?菜名按尔雅青谓之?盖象其色珩说文云佩上玉也所以节行止也通作衡玉藻云一命緼韍幽衡再命赤韍幽衡三命赤韍?衡孔云累一命至三命而止而云?珩则三命以上至九命皆?珩非谓方叔惟三命也大戴礼云上上有?珩下有双璜冲牙螭珠以纳其间孔云凡佩玉必上系于衡下垂三道穿以螭珠前後下端垂以璜中央下端垂以冲牙动则冲牙前後触璜而为声所触之玉其形似牙故曰冲牙璜半璧也悬之两端作牙形按礼凡带必有佩玉惟丧否则方叔虽蒞戎事其服命服而佩玉焉宜也曹氏误谓芾佩非军服金路非戎车和鸾非戎马以为方叔克壮其犹如吴起将战不带剑诸葛武侯不亲戎服羊祜轻裘而盛着威名杜预身不跨马自能制胜辅氏方谓方叔威仪整

暇如此可以决其有成其与後世以一勇之夫为民之司命者异矣立论虽美却非实事又刘氏云或曰吴起可谓知战矣亲与士卒最下者同其甘苦曰是何足以言其知战也子见夫乞人乎号呼偃仆乎康庄之间其声可哀也不如是不足以存其身若乃家丈人者五十可以衣丝七十可以食肉子孙求之耳父母之仇不共戴天兄弟之仇不与共国非虚加之然後称于人情视民如子者民报之如父母视民如弟者民事之如兄无所仇云耳有则争先致力焉子弟岂待父兄已均其苦然後为用哉故用民者矫之以身徇之以爱济之以术若一时之胜而已矣恶可以久也诗云服其命服朱芾斯皇八鸾璿璿道上不失其度下不失其节也驾彼四牡四牡騤騤君子所依小人所腓君子之所依而小人以为已腓安在其毁上下之节哉虽非经意所在其论亦美】 歟彼飞隼其飞戾天【先韵】亦集【丰本作隼】爰止【见前】方叔涖止其车三千【先韵】师干之试【见前天千一韵止试一韵】方叔率止钲人伐鼓【夔韵】陈师鞠旅【叶夔韵读如鲁笼五翻】显允方叔伐鼓渊渊【先韵崔注说文丰本并作鷁】振旅闐闐【先韵说文作𨔵 兴也歟毛云疾飞貌隼鸟名陆玑云鷁属齐人谓之击正或谓之题肩或谓之雀鹰春化为布谷者是也按布谷即鸣鸠盖隼所化也考异邮云陰阳气贪故题肩击宋均注云题肩有爪芒为阳中陰故击杀也顔师古云即今所谓鷁一曰鷁子一曰鷁酉阳襍俎云鷁子两翅各有後翎左名撩风右名掠草带两翎出猎必当获陆佃云今鹰之搏噬不能无失独隼为有准故其每发必中古之制字以此尔雅云鹰隼丑其飞也翬郭璞云鼓翅翬翬然是急疾之鸟也戾通作丽附着之意极言其飞之高将附于天也郑云飞乃至天喻士卒劲勇能深攻入敌也集本作鷁说文云羣鸟在木上也兴士卒之多故以集言爰于也亦集爰止亦集于其所当止之地也以隼之飞集有常兴师之进退有节苏云隼之飞而至天甚迅疾矣然必集于其所当止而後可用言士虽勇而不教则不知战之节亦不可用也师干之试至此乃见之行事下文所称是也程子云钲人击钲者伐鼓击鼓者以一句说两事郑云钲也鼓也各有人焉言钲人伐鼓互言尔钲者节鼓之器说文解镗为钲又解钲为铙解铙为小钲镗形如小钟铙似铃柄中上下通徐锴云铙镗相类俱得名钲按说文既以镗为钲而称铙为小钲则钲正得镗之名不得以小钲之铙混之一名丁寔晋语赵宣子云战以丁宁儆其民注谓钲也陈阳云自其声浊言之谓之镗自其儆人言之谓之丁宁自其正人言之谓之钲其实一也周礼鼓人职云以鼗鼓鼓军事以金铙节鼓以金铙止鼓军动则鼓其衆田役亦如之又大司马职云中春教振旅辨鼓铙镗之用王执路鼓诸侯执贲鼓军将执晋鼓师帅执提旅帅执鼙卒长执铙两司马执铎公司马执铙以教坐作进退疾徐疏数之节周礼注引司马法云十人之长执钲百人之师执铎千人之师执鼙万人之主执大鼓是则军中之器不止鼓钲特最卑者执钲最尊者执鼓故举其首末以该括之毛又谓钲以静之鼓以动之按周礼中冬教大阅之法虞人莱所田之野为表百步则一为三表又五十步为一表田之日司马建旗于後表之中羣吏以旗物鼓铙镗各帅其民而致质明弊旗诛後至者乃陈车徒如战之陈皆坐羣吏听誓于陈前斩牲以左右徇陈曰不用命者斩之中军以鼙令鼓鼓人皆三鼓司马振铎羣吏作旗车徒皆作鼓行鸣镗车徒皆行及表乃止三鼓攬铎羣吏弊旗车徒皆坐又三鼓振铎作旗车徒皆作鼓进鸣镗车骤徒趋及表乃止坐作如初乃鼓车驰徒走及表乃止鼓戒三阋车三发徒三刺乃鼓退鸣铙且却及表乃止坐作如初遂以狩田此即所谓教坐作进退疾徐疏数之节也初鼓行鸣镗车徒皆行又鼓进鸣镗车骤徒趋既而复鼓车驰徒走又既而鼓戒车三发徒三刺皆用鼓不用镗最後鼓退乃鸣铙且却是静衆者铙毛谓钲以静之非也五旅为师一师二千五百人之衆用轻车重车各二十五乘为大偏此诗咏其车三千

则为十二军之衆而但以陈师言者盖以车为陈故举一师之衆以明大偏之法若悉数之则有六十大偏矣鞠通作鞠毛云告也孔云誓而告之以赏罚使之用命也专言旅者告衆欲详一偏之中又分为五旅而告之也司马法云有虞氏戒于国中欲民体其命也夏后氏誓于军中欲民先成其虑也殷誓于军门之外欲民先意以待事也周将交刃而誓之以致民志也此诗所谓鞠旅亦周法也显允蒙上陈师鞠旅而言显谓号令明允谓赏罚信伐鼓以周礼考之先鼓作次鼓行次鼓进次鼓驰走次鼓戒又次鼓退凡六节自进而退无不用鼓故但言伐鼓也渊通作鼙说文云鼓声也鼓非一次故云鼙鼙也振通作整说文云齐也治兵礼毕整衆而还也孔云古者春教振旅秋教治兵以戎是大事又三年一教名异而礼同也尔雅云出为治兵尚威武也入则尊老在前复常法也杜预云出则少者在前还则在後所谓顺也闾说文云盛貌严云闾闾衆盛也犹今人言骈闾也至此而大阅之事斯毕旧说以为咏方叔南征还师则蠢尔蛮荆一章不应言于还师之後且治兵振旅皆古礼习战之名未闻古有以还师为振旅也】蠢尔蛮荆大邦为讐【尤韵】方叔元老克壮其犹【尤韵丰本作猷】方叔率止执讯获丑【叶尤韵尺尤翻丰本作醜】戎车嘒嘒嘒嘒焞焞【汉书作推推陆本作啍啍】如霆如雷【灰韵】显允方叔征伐玁狁蛮荆来威【叶灰韵乌恢翻 赋也大阅礼毕而忽有蛮荆蠢动之事故即命方叔为将以征之蠢说文云虫动也以蛮荆无知妄动故状之曰蠢尔蛮蛮服也周礼职方氏职云辨九服之邦国侯甸男采卫服之外方五百里曰蛮服又王制南方曰蛮说文云南蛮蛇种字从虫荆荆州楚所封地王安石云春秋之初曰荆而已後乃曰楚又谷梁传云楚何谓之荆狄之也圣人立必後至天子弱必先叛按郑语史伯云当成周者南有荆蛮荆子熊严生子四人叔逃难于濮而蛮惟荆实有令德范曄南荆传云今长沙武陵蛮其在唐虞与之要质故曰要服夏商之时渐为边患逮于周世党衆弥盛足以抗敌诸夏宣王中兴命将南征诗人所谓蛮荆来威者也亦似不?指荆楚惟晋语叔向云昔成王盟诸侯于岐阳楚为荆蛮置茅蕝设望表与鲜牟守燎故不与盟则径以蛮目荆大抵蛮族不一荆其最大而强者其作乱必挟诸蛮而起故?之曰蛮荆也邹忠胤云国语蛮夷要服在侯卫宾服之外戎翟荒服之内即周礼巾车所谓革路以封四卫者其制宜岁贡于坛墠不贡则修名而有威让之今今至????然勤王师必其骄逸不?不容不致武耶史记谓荆楚僥勇轻悍好作乱自古记之故以高宗中兴有事奋伐殷武之歌後世为烈而宣王采芑之役亦堪与之媲美焉大邦郑云列国之大也讐仇也孔云荆蛮不逊王命侵伐隣国动为寇害与大邦为讐怨列国之大尚犹讐怨其旁小国侵害多矣元高也字从一在兀上徐锴云与尧同义会意老以年言与下文壮字对看毛解谓五官之长出于诸侯曰天子之老非也方叔年老而其贤高出于人故名之曰元老盐铁论引此云方叔元老克壮其犹故商师若乌周师为荼盖谓商用少而周用老也刘公瑾云方叔以元老而率师即师卦所谓丈人所谓长子者也克能壮健也犹猷同谋也按犹乃兽名尔雅云犹如麋善登木此兽多疑虑常居山中忽闻有声每缘登木久之无人然後敢下须臾又上如此非一故借为谋虑之义朱子云言方叔虽老而谋则壮也严云方叔克壮其犹非取其老而勇决若矍铄翁之为也易大壮注壮者威盛强猛之名诗人之意正谓少年轻俊之人往往以勇力求胜未能深谋远虑惟方叔老成故能尚谋不尚战以谋为壮不以为力为壮也方叔率止言方叔承命为帅而徂征也执讯获丑解见出车篇兵不血刃而功已成壮犹之效也戎车还师之车也嘒嘒焞焞如霆如雷皆车声也嘒嘒指轻车言焞焞指重车言言声之舒缓者曰嘒荀子所谓嘒嘒学记所谓其声嘒以缓是也轻车固嘒嘒而其随于轻车後者有载辎重之车则其声又焞焞然焞焞当依陆本通作啍啍声重迟貌王风大车啍啍是也霆

说文云雷余声也铃铃所以挺出万物陆佃云震雷谓之霹雳其缓者霆先儒或以霆为疾雷盖尔雅疾雷谓之霆霆先儒岂读此故误与雷本作靄河图云阴阳相薄为雷说文云从晶象回转之形如霆当承嘽嘽言以车声之舒缓似之如雷当承焞焞言以车声之重迟似之时凯旋而归从容就道故其车声如此显允方叔蒙上三章之文也征者上伐下之名故以征伐二字连言威通作畏严云方叔尝与吉甫同伐玁狁威名已着是以蛮荆闻其名而皆来畏服也钱天锡云方叔一驾而为北伐之勲是名以功成者也再驾而为南征之绩是功以名致者也蒋悌生云玁狁大素桀骜侵寇在五服之外荆蛮素服役暂背叛在五服之内二诗均为用兵其气象大小难易亦少异朱善云北伐之诗是言行军之法南征之诗是纪行军之实不言其法则无以见军制之复不纪其实则无以见民数之复欲知宣王之复古观此二诗而可见矣夫岂曰夸云乎哉】

采芑四章章十二句【序及子贡传皆以为宣王南征也观诗中方叔率止之语其非宣王亲证明甚然则序以六月为宣王北伐其亦非亲行北伐明矣申培谓此诗史籀所作要不足信若纬书五际之说以午为采芑更不可晓】

常武召穆公美宣王也有常德以立武事因以为戒然【出子夏序】是时王亲征徐戎自即位至此已五用兵矣【按竹书纪年宣王三年王命大夫仲伐西戎五年夏六月尹吉甫帅师伐玁狁至于太原秋八月方叔帅师伐荆蛮六年召穆公帅师伐淮夷王帅师伐徐戎皇父休父从王伐徐戎次于淮王归自伐徐锡召穆公命邹忠胤云宣王武功见于小雅者则有六月采芑见于大雅者则有江汉常武考之竹书纪六年召穆公伐淮夷王伐徐戎然则平淮平徐二师盖一时并发也其锡召穆公命则纪年亦云归自伐徐也徐自伯禽时已与淮夷相倚为患故费誓曰徂兹淮夷徐戎并兴穆王时徐夷僭号率九夷以伐宗周厉王时淮夷侵雒王命虢公长父伐之不克淮徐蠢动从来久矣自宣王命吉甫伐玁狁方叔征蛮荆于是四方僭乱以次削平其一则遣召虎一则躬董六师者缘淮徐相距不甚远虑其合而角我故分道出师以防侵軼耳乃篇中要归于文德王犹若规若颂诗人之寓意殆深矣此皆宣王初年事也厥後伐太原之戎不克伐条戎奔戎则败伐姜戎至于千亩则又败美业不终惜哉岂其四方平而遂有?心乎周宣且然何论晋之武唐之宪朱子云诗中无常武字召穆公特名其篇盖有二义有常德以立武则可以武为常则不可此所以有美而有戒也郝敬云虞人之箴曰武不可重用不愆于夏家常武之谓也卒也西周之祸不在淮夷近在西戎乃见诗人献替之忠解颐新语云召穆公之意谓德为可常武不可黷故先极言其用兵之盛以满其志卒章乃陈警戒之言故其言易入也昔之为词赋者或窃取其义而後人以曲终奏雅劝百讽一讥之是不知其得古诗之意也愚按第四章有王奋厥武之语则武字固篇中所有其所谓常者即匪绍匪游之绍字是也】

赫赫【陆本作赫赫】明明王命卿士【叶麋韵读如数爽主翻】南仲大【音泰白虎通作太】祖【虞韵】大【音泰】师皇父【麋韵】整我六师以修我戎【叶麋韵读如乳櫟主翻】既敬【周礼注作敬】既戒【叶职韵乞力翻丰氏本作既敬既戒以修我戎】惠此南国【职韵 赋也发首以赫赫明明赞宣王是何等气象赫说文云火赤貌严粲云赫赫威严也明明光显也万时华云夷厉以来威灵不振几于泯泯灭灭宣王奋然亲总六师真如雷霆下

惊日月重朗故曰赫赫明明王命宣王亲命也以皇父为大将故须亲命之卿士皇父所居之职也南仲见出车篇郑玄云宣王之命卿士为大将也乃用其以南仲为太祖者今太师皇父是也命将必本其祖者因有世功于是尤显苏辙云南仲文王之所使伐玁狁者也盖称其世功以褒大之王应麟云召公是似南仲太祖世济其美也逵有充超叛鉴苏文忠慨焉或附曹羣忘汉朱文公恠焉谢枋得云宣王命将多取之世臣何也文事武备素讲于家庭定乱持危常在其念虑一日用之必老成持重不以轻易误国事矣太师朱子云皇父之兼官也陈鸟飞云自豕宰而下谓之六卿太师而下谓之三公既曰王命卿士又曰太师皇父周家不特设三公皆兼职而已如周公以豕宰兼太师也孔颖逵云十月之交皇父擅恣或皇氏父字传世称之亦未可知也整说文云齐也一齐起发之谓天子六师知是王亲行也孔云王既亲行仍须命元帅以统领六军故左传鄢陵之战楚王虽自亲行仍命子反将中军是也王应麟云康王即位同召六卿而命仲桓南宮毛者必太保宣王南征程伯休父实为司马而整六师者太师皇父也一相处内无所不统修通作修犹饬也戎说文云兵也整齐六师具其人数以待将以修饬我用兵之事言欲行天讨也既者期其如此之辞敬者居如守行如战也戒者临事而惧不敢轻敌也南国郑云淮浦之旁国董氏云伐其暴乱所以惠之也严云淮夷徐戎挺乱南方之国皆被其祸宣王之师盖除暴以安民也张文潜云赫赫示之显明明示之昭兵事尚神密而王之命将如此其明显者盖将讨伐有罪民各欲正己而已安用密乎既敬者不敢慢既戒者不敢忽也以宣王中兴之君皇父贤才之将而征蕞尔之徐土其重慎如此者盖兵凶器战危事也容可忽乎王明显以命之者道也臣重慎以临之者法也宣王中兴如斯而正】王谓尹氏命程伯休父【夔韵史记前汉书後汉书俱作甫】左右陈行戒我师旅【叶夔韵读如缕咙主翻】率彼淮浦【夔韵】省此徐土【夔韵】不留不处【叶语韵敞吕翻】三事就绪【语韵 赋也谓说文云报也尹氏掌策命之职意必有所请于王而王报之也毛云尹氏掌命卿士孔云即内史也其职曰凡命诸侯及孤卿大夫则策命之是也此时尹氏当是尹吉甫也吉甫卿士而掌命臣者盖为卿而兼内史也命程伯休父者尹氏承王命命之也上章命皇父三公也故亲命之此章命休父六卿也故策命之韦昭云程国伯爵休父名也楚语观射父云重黎氏世叙天地而别其分主者也其在周程伯休父其後也当宣王时失其官守而为司马氏郑樵云重为火正裔孙封程罗泌云程实为黎後为和氏商封之程二说未知孰是罗革云或谓风姓有裔孙程伯始启土失之子华子云昔吾之宗君为周日正周公作成周定鼎于郊廓修和周郊于是吾之宗君荐其所以为祥者其族有三曰井里之璞也曰大山之器车也曰唐叔里亩之禾也王命分宝玉于鲁公时庸展亲归禾于周公作归禾周公旅天子之命作嘉禾是以吾之宗君始有蒲璧以朝作程典令其显庸书在故府迨宣王之时吾之宗君入董六师为王虎臣是曰司马司马之後凡九世而其子孙或播居于汾河之间十有一世而国并于温程伊川撰明道先生行状云程氏之先曰乔伯为周大司马封于程子孙遂以氏按乔伯休父当是一人乔名而休字岂亦取乔木休息之意欤郡国志云雒阳有上程聚古程伯休父之国也文王居程故此加为上程一统志云在河南府雒阳县毛云休父始命为大司马孔云知为大司马者以大司马职云若大师则掌其戒令此言戒我师旅是司马之事又楚语谓程伯休父当宣王时为司马氏韦昭谓以诸侯为大司马也按司马迁叙传自述为休父之後则休父之为司马明矣朱子云上命皇父而此又命休父者盖王命太师以三公治军事而命司马以六卿副之耳左右陈行四句命休父之辞也陈通作讎说文云列也刘熙云两脚进曰行行伉也伉足而前也左右陈行者分其士衆为左若使成列而前此肃队伍也戒与上章既戒

之戒不同当通作诚说文云敕也下二句正其所诫者郑云军礼司马掌其誓戒二千五百人为师五百人为旅天子六师一师之衆有五旅也率郑云循也当通作卫字从行谓循之以行也浦说文云水滨也省说文云视也如省方之省亦足证为王亲行也省之中兼叛而伐之服而舍之二意一统志云直隶凤阳府泗州古徐子国徐城在州北五十里玉海云徐嬴姓伯益佐禹有功封其子若木于徐後汉书东夷传云徐夷僭号率九夷以伐宗周西至河上穆王畏其方炽乃分东方诸侯命徐偃王主之林之奇云周自文武兴于西土而化行于南故南夷最先服而东夷之服为最後是以武王牧野之战方与商师决服负于行陈之间而西南夷之邦所谓庸蜀羌髳微卢彭濮者已皆作使及成王之即政天下已太平矣然东夷之徐奄犹兴兵以叛也故徐虽伯益之後而俗流于夷周初一叛于三监流言之时再叛于伯禽抚封之日周公鲁公仅能定之至穆王稍有荒淫之失而偃王者遽尔僭号侈然有朝诸侯有天下之意泊厉王无道宣王拨乱之始而绎骚于南国者又徐也及徐始微弱而东南之鸛张僭窃以争诸侯者荆楚吴越相继兴矣其後徐益以弱服属吴楚不得免焉然吴楚倔强于东周衰微之後而徐倔强于西周鼎盛之日则其初本非弱国也曹氏云禹贡徐州东至海北至岱南至淮其地广人衆矣若淮夷则东夷之种散处淮浦者尔陈氏云徐大而淮夷小淮夷即徐州之夷而服属于徐者愚按徐国地在徐州故以徐得名命休父诫敕师旅务必循淮之浦涯以達徐之境土而省视之母得故违节制规便趋利此严号令也万尚烈云夫伐徐何以率淮徐北淮南其势相倚故淮徐倡乱每每并兴则淮者固徐夷出没之地常遁逃藏匿以为乱藪者也王师来自西北若惟直捣顺攻不为东南壅截之计彼不难于历淮浮海而天戈亦有所难指者故命将之时即已定策于淮而师之所至不曰铺敦淮濱则曰截彼淮浦彼徐夷者势不得越淮南下其来同也固其所哉此所以为王犹之允塞也又按淮南之役命一召虎而止此乃自将自将未已又必正副之将张皇若此何哉周起丰岐淮徐至远其从化也则後其倡乱也则先徐之无周其积玩也宣王赫然中兴伐玁狁灭蛮荆平淮南庶几乎一伸中国之气而蠹尔之徐尚背叛如此其为四方衅孽岂小小哉倘非出之全力期于荡平何以成终善後而称极治故不难屈万乘之尊躬夷荒之远正副之将必谆谆焉诚永逸之策而长治之图也常武其三代之盛举乎不留不处二句尹氏以王命命三事也留说文云止也尔雅云久也邢昺云留止稽久也处说文亦云止也徐锴云诗爰居爰处居者定居处者暂止而已留如孔明平孟获而议者欲留兵以镇之处如王全斌平蜀而师迁延不还是也按孙子曰兵闻拙速未闻巧久夫兵久而国利者未之有也常武所以戒留处也三事指六卿与十月篇之择三有事雨无正篇之三事大夫其义皆同按周书立政篇云任人准夫牧作三事周官篇云三事暨大夫敬尔有官乱尔有政故知统指六卿而言因六卿职掌六典皆为天子理事故以任人称皆为天子守法故以准夫称皆为天子爱民故以牧称着其职业所在非官名也时六卿中休父虽以司马出履行间然邦政之职亦必有人掌之耳就说文云就高也字从京从尤尤者异于凡也京者高大之义绪说文云丝端也尔雅训为事毛传训为业以理事建业者如治丝然周礼宫正职云稽其功绪是也言此行也王师所临有征无战天子必不久居于外尔三事诸臣为王居守当各积累其事业毋旷厥官以待王之归可也】赫赫业业【叶药韵逆约翻】有严天子王舒保作【药韵】匪绍匪游【尤韵】徐方绎骚【叶尤韵苏侯翻】震惊徐方【阳韵】如雷如霆徐方震惊【叶阳韵居良翻 赋也赫解见首章业者动而不息之意虞业之悬钟磬其象如之故谓之业徐光启云当积弱之後奋起而立功真是威灵气焰足以动人故曰赫赫明明又曰赫赫业业极其摹拟严说文云教命急也字从叩徐锴云急则从二口也愚按此所谓

严急非急于束士卒乃急于讨徐方也承上章言大将有皇父副将有休父居守有三事王乃可以出而亲征矣但见师行在途其气势赫赫然其进发业业然有严急而可畏者天子之教命凡在师中者俱无敢泄泄也舒通作纾说文云缓也保安作起也言宣王之为此行也舒徐审谛以为必如此然後可以保安南国于是起而为之非轻举也匪通作非绍说文云纠紧也游本作游说文云旌旗之旒也人之逍遥散诞其象如之故浮水出行皆命曰游绍与舒字意反游与保字意反舒而後作则非激于一时之血气而後绍也且作以图保则非骛于远方之览胜而为游也徐方绎骚正原其所以作之故也曰徐土曰徐方曰徐国非有二地特变文耳绎说文云抽丝也相续而不断之意骚尔雅云动也说文云扰也字从马当谓扰马使动也徐方数兴兵扰动南国为害已甚故亲征之役不可已也震说文云霹雳振物者即雷也易云震为雷惊说文云马骇也人之惶恐不安如之故亦曰惊天子亲征出徐方所不意亦如雷之猝然发声不可预避以此惊动乎徐方也如雷蒙上震字而言指王也观下章王奋厥武如震如怒可见霆者雷之余声采芑言嘽嘽焞焞如霆如雷以如霆属嘽嘽如雷属焞焞此第五章亦曰王旅嘽嘽则如霆当指王旅也王行而六师从之亦如雷之余声为霆也徐方震惊者徐方闻王师之来丧胆褫魄亦如闻震雷而惊惧也朱善云用兵之法攻心为上徐方震惊虽未即顺从而已先服其心矣】王奋厥武【夔韵】如震如【陆云一本此两如字皆作而】怒【叶夔韵暖五翻】进厥虎臣【真韵】阍如虢【风俗通作哮】虎【夔韵】铺【韩诗後汉书俱作敷】敦【尔雅铺敦作敦彼】淮瀆【叶真韵符筠翻臣与瀆叶】仍【陆本作扔】执丑虜【夔韵】截彼淮浦【夔韵】王师之所【叶夔韵读如数爽主翻 赋也上章言徐方震惊意此时闻大军从西来必越淮南窜而王师适至淮与之遇故宣王奋武而进兵也奋说文云翬也字从雀在田上鸟鼓翅翬翬然迅疾也奋厥武者奋扬其威武命迎击而进战也震怒只一意如震者如雷之威于下文进厥虎臣见之如怒者如天之怒而雷鸣不已于下文仍执丑虜见之进郑云前也如虎猛勇如虎之臣所谓战将也不指皇父休父言进厥虎臣如遣锐骑以迎敌用奇兵以邀击其大军在後尚未动也阍说文云望也虢说文云虎鸣也格物论云虎怒而吼其声如雷百兽为之震恐而风从之生言虎臣前行人从後望之但见其喑鸣叱咤之状如虎之虢而张威然也铺郑云陈也解见江汉篇敦通作焞说文云厚也瀆说文云水厓也孔云布陈敦厚之阵于淮水瀆厓之上愚按此所谓正兵也仍因也执捕罪人也丑可恶也虜获也孔云虜者囚系之名仍执丑虜者盖正兵不动但更番迭出以频仍捕执其可恶之人而囚系之也截说文云断也即今人所谓堵截者所处所也献于公所之所按所本伐木声而旧皆借训为处所其义未详当是通作处音之转也王师踞地利截断彼淮浦而居之而时分兵以迎击彼欲拒则不得欲逸则无路此其所以服也详此章及下章见宣王之行兵有法如此】王旅嘽嘽【叶翰韵徒案翻】如飞如翰【韵】如江如汉【翰韵】如山之苞【叶尤韵甫侯翻】如川之流【尤韵】緜緜【韩诗作民民】翼翼【职韵】不测不克【职韵】濯征徐国【职韵 赋也严云此章述移师征徐也王旅王之师旅也声之舒缓者曰嘽解见采芑篇嘽嘽郑云闲暇有余力之貌愚按此言其在道之容也翰鸟羽也如飞如翰只是一意言其兵不留行如鸟之飞又如其有两羽也即次章所谓左右陈行者如江如漠以合流言虽左右陈行而同时俱发絶无後先亦如江汉之合流然也严云征淮北之夷不緜江汉而言如江如汉者以江汉为九州之最大天下所共知犹?谷风言泾以渭浊亦非土风也苞通作包裹也如山包裹不可阑入李卫公所谓大陈包小陈大营包小营隅落钩连曲折相对者也川说文云贯穿通流水也如川长流不可间断八陈图所谓以後为前以前为後四头八尾触处为

首敌冲其中首尾俱救者也此三句皆以陈法言盖师行在道亦必结陈而行也一说孔云兵法有动有静静则不可惊动故以山喻动则不可御止故以川喻亦通縣縣二句申上四句而言也縣说文云聯微也翼说文云翅也合流如江汉固见其聯縣不絕矣而细观之则左右分为两翼如鸟之有羽翰然队伍何分明也测度克胜也其层层包裹则如山其节节贯穿则如川亦既不可测度矣不可测又孰能攻而胜之陈法何坚固也濯说文云澣也孟子云征之为言正也言征而先之以濯者有殲厥渠魁胁从罔治旧染污俗咸与维新之意又黄佐云大雅言文王之兵若临冲闲闲章言武王之兵若牧野洋洋章皆略述武事耳常武言宣王之兵则极其铺张扬厉若有过于文武之威者圣人之兵尚德贤人以下之兵尚威论德者其词典论威者其词夸且亦可见盛世中兴气象张文潜云是诗所陈盖先王之时用兵之法可以?见王旅嘽嘽所谓以逸待劳也有飞鸟之举者善超高也有积水之洋者善守下也固如山之苞止营垒也顺如川之流行部位也縣縣为弱外诱敌也翼翼为饬内谨法也先王之用兵虽动以仁义然行之有法驭之以术不为小仁末义以陷人于死盖明耻教战务以胜敌而宋襄公以君子不重伤不擒二毛为君子之所笑也】王犹【韩诗外传荀子俱作猷】允塞【职韵】徐方既【荀子作其】来【叶职韵六直翻】徐方既同【东韵】天子之功【东韵】四方既平【叶阳韵皮阳翻】徐方来庭【叶阳韵徒阳翻】徐方不回【灰韵】王曰还归【叶灰韵古回翻】赋也犹本兽名性多顾虑故借训为谋徐光启云凡平日所为兴衰拨乱安内攘外经营于庙堂敷布于海隅者皆王犹也允说文云信也塞说文云窒也字本作塞象垒物捧而塞于屋中故有充塞之义顔师古云满也既来郑云已来告服也严助云言王道甚大而远方怀之也承上章言宣王方移师以临徐方而徐方畏慑不战自服于是推美其所以然者繇于宣王平日经国之谋猷信哉其无所不充满故能致徐方之来非一时兵威使之然也此微辞也序所谓有常德以立武事因以为戒者二意具见于此韩诗外传云修礼以齐朝正法以齐官平政以齐下然後礼义节奏齐乎朝法则度量正乎官忠信爱利平乎下行一不义杀一无罪而得天下不为也故近者竞亲而远者愿至上下一心三军同力名声足以薰炙之威强足以一齐之则拱揖指挥而强暴之国莫不趋使如赤子归慈母者何也仁刑义立教诚爱深故诗曰王犹允塞徐方既来荀子云厚德音以先之明礼义以道之致忠信以爱之赏贤使能以次之爵服庆赏以申之时其事轻其任以调齐之长养之如保赤子政令以定风俗以一故民归之如流水所存者神所为者化而顺暴悍勇力之属为之化而愿旁辟曲私之属为之化而公矜纠收僚之属为之化而调夫是之谓大化至一诗曰王猷允塞徐方其来此之谓也又云械数者治之流也非治之源也君子者治之源也官人守数君子养源源清则流清源浊则流浊故上好礼义尚贤使能无贪利之心则下亦将慕辞让致忠信而谨于臣子矣故赏不用而民劝罚不用而民服有司不劳而事理政令不烦而俗美百姓莫敢不顺上之法象上之志而勤上之事而安乐之矣故籍歛忘费事业忘劳寇难忘死城郭不待饰而固兵刃不待陵而劲敌国不待服而诘四海之民不待令而一夫是之谓治平诗曰王猷允塞徐方既来此之谓也或又以塞通作?其义训实允塞既来即至诚动物之谓刘向新序及韩诗外传皆云勇士一呼三军皆辟士之诚也昔者楚熊渠子夜行见寝石以为伏虎关弓射之没矢饮羽下视知石也却复射之矢摧无迹熊渠子见其诚心而金石为之开况人心乎唱而不和动而不随中必有不诚者矣夫不降席而匡天下者求之已也孔子曰其身正不令而行其身不正虽令不从先王之所以拱揖指挥而四海宾者诚德之至已形于外故诗曰王猷允塞徐方既来此之谓也又云昔者赵之中牟叛赵襄子率师伐之围未合而城自坏者十堵襄子击金而退士军吏

曰君诛中牟之罪而城自坏是天助也君曷为去之襄子曰吾闻之于叔向曰君子不乘人于利不迫人于险使之城而後攻中牟闻其义乃请降诗曰王犹允塞徐方既来之谓也既同孔云与他国同服于王也是役也大将之敬戒副将之陈行虎臣之出力王旅之用命皆天子精神所鼓舞故曰天子之功荀子云君子贤而能容罢智而能容愚博而能容浅粹而能容褻夫是之谓兼术诗曰徐方既同天子之功此之谓也亦借辞取义朱子云江汉篇召公帅师以出归告成功故备载其褒赏之词此篇王实亲行故于卒章反复其词以归功于天子也既尽也来庭郑云来王庭也先言四方既平者宣王北驱獫狁西征羌戎南威荆蛮东伐淮夷皆已平定独徐方未服及今而始来庭以其平独在四方之後也回说文云转也严云不回谓既服而不复叛也徐方来在王庭其心不复回转则天下晏安不须用武王乃告之曰可以还归矣不黜武也王犹允塞王曰还归皆因以为戒也刘氏云武则戒黜故曰还归者止于义也愚按此亦与次章不留不处相应】

常武六章章八句【王肃主毛传以为王不亲行王基主郑笺以为王自亲行今玩诗词则郑说是也乃朱子以为宣王自将以伐淮北之夷诗人作此美之邹駁之云淮浦淮濱指所经历之地未尝指淮夷也或乃依违其说云徐方者兼徐淮而言谬也申培说亦剽朱子亲征淮北之说而兼剽序以为召穆公所作子贡传阙文】

江汉宣王命召穆公帅师伐淮夷王归自伐徐锡召穆公命尹吉甫作诗美之【据竹书为宣王六年事序云尹吉甫美宣王也能兴衰拨乱命召公平淮夷後汉书云殷武乙衰东夷浸盛遂分迁淮岱渐居中土周公征之遂定东夷厉王无道淮夷入寇王命虢仲征之不克宣王复命召公伐而平之刘汝桢云宣王淮上之役武功告成也盖六月北伐首事四夷采芑之南征次之故曰征伐獫狁蛮荆来威此其证也荆蛮既平乃伐淮夷故常武江汉二篇一是自将伐徐一是命将伐淮二师想一时并发王则将本国之六师而穆公则徵兵江汉以行者也何也夷在淮之南北势相犄角假令穆公先平淮南则还兵北伐亦易易耳何必侈言于王之亲行假令王既北定徐戎则淮南之夷胆已破穆公此行如发蒙耳何必张大其功而宠异若此哉故伐淮伐徐以两诗考之知其必并发也知平淮在采芑之後者荆蛮未平则穆公疆理不得至南海以南海之北正荆蛮之国故也一平淮而疆理至南海可见南海以勺诸国无不从服矣今按竹书纪年其征伐次第实是如此召穆公名虎】

江汉浮浮【尤韵风俗通作陶陶】武夫滔滔【叶尤韵他侯翻】匪安匪游【尤韵】淮夷来求【尤韵】既出我车【叶鱼韵斤於翻】既设我旟【鱼韵】匪安匪舒【叶虞韵读如须询趋翻】淮夷来铺【虞韵 赋也江汉二水名江出岷山汉出嶓冢汉流至大别与江合流杜预云大别在江夏界胡旦云今大别山之北汉口是也亦曰沔口亦曰夏口江东即江夏郡也吕祖谦云江汉合流去淮夷絶远或者会江汉之师以伐之坎季本云召公伐淮夷必自江汉顺流而下故所征本江淮之地而并汉言之也浮说文云汜也浮浮毛传云衆强貌孔颖达云以其合而东流是水之衆而强大也愚按此固赋其所经亦以二水合流为诸侯会师之况林氏云古者畿兵不出所以重内调兵诸侯各从其方之便武王伐商实用西土至于征徐以鲁平淮夷以江汉季云荆蛮既服而後召伯伐淮夷故此诗言江汉浮浮武夫滔滔若荆蛮方叛则武夫何繇可从江汉而发耶武夫将士从征者滔说文云水漫漫大貌曰武夫滔滔者王

安石云以其衆逝也郑玄云宣王命将率遣士衆使循流而下滔滔然孔云淮在江北相去絶远夷在淮上兵当适淮而云顺流下者江东北流顺之而行将至淮夷乃北行向之也匪通作非匪安以心言此心兢惕不敢遑宁非急于争利也下段放此说文无游字当通作游游本旌旗之旒人之翱翔自放似之故以敖为游匪游者身在军中不敢别有所游息也淮夷朱子云夷之在淮上者也孔云淮夷在东国昭四年楚子会诸侯于申而淮夷为国号其君之名姓则书传无文召公伐淮夷当在淮水之南鲁颂所伐淮夷应在淮水之北当淮之南北皆有夷也求通作逌斂索之义以其散处潜伏故欲求而得之左传曰率师以来唯敌是求是也孔云淮夷来求正是来求淮夷古人之语多倒凡言来据自彼至此之辞车郑云戎车也设说文云施陈也周礼云鸟隼曰旟愚按军行前朱雀此举前军以该其余也孔云上言来求已至淮夷之境此承其下云出车设旟明兵至境而期战地至期日而出车建旟也兵法止则有垒谓从营垒而出陈之也旌旆无事则纳之于弢故将战乃建之也舒通作纾说文云缓也心既不敢安寧故于出车设旟之事不敢纾缓与前言匪安匪游见当时从征之武夫皆竞劝用命如此铺陆元朗云陈也按说文训铺为着门铺首而旧说谓汉门有铺首乃铺陈之义故亦训为陈也淮夷来铺句法当与淮夷来求一例同为倒语季以为来陈其罪是也郑云据此战地故又言来】江汉汤汤【阳韵】武夫洸洸【阳韵盐铁论作潢潢】经营四方【阳韵】告成于王【阳韵】四方既平【庚韵亦叶敬韵皮命翻又叶青韵读如萍旁经翻】王国庶定【径韵亦叶青韵唐丁翻】时靡有争【庚韵亦叶青韵菑经翻又叶敬韵侧进翻】王心载宁【青韵亦叶径韵乃定翻 赋也汤说文云热水也江汉言汤汤者水流之怒如汤之沸也正与下文洸洸相照洸说文云水涌貌也引诗有洸有潰徐锴云言勇如水之涌也语曰战胜之威士气百倍伐淮夷而战胜于洸洸一语见之矣经本织丝之经纵曰经横曰纬营亦周匝之意说文训为匝居是也曰经营者纵横周匝而相度之正照下文四方言兼伐叛招攜二意当时江汉之间小国尚多淮夷倡乱或附和或观望者必非一国观下章言于疆于理至于南海则岂独淮夷而已四方近淮夷之四方成成功也郑云召公既受命伐淮夷服之复经营四方之叛国从而伐之克胜则使传遽告功于王孔云上言来至战地此言经营四方明是既战而胜乃经营四方之叛国也知非召公亲告王者以下章方云于疆于理则是召公未还故知使人告也四方既平蒙上经营四方之文也平犹言帖服也王国周礼所谓国畿也义与六月篇同淮夷倡乱声息摇动今四方既平则畿甸之内自此庶几安定也彭执中云用兵非人主之美事不得已而兴师故召公告成于王曰王国庶定庶云者幸其仅然非以是为美也时之言是靡之言无皆音之转也相侵相凌所谓争也时靡有争?天下言之也载之言则亦音近也宁通作寔说文云安也辅广云宣王以天下为心一有争鬪则王之心不安也读此章见宣王能以天下之心为心而召公又能以宣王之心为心也朱善云天下之所以未平者以争心之未息而争心之所以未息者以王化之未洽也故必使天下无有争心而後大臣之功成而王者之心亦安矣严粲云周兴西北岐丰去江汉最远故淮夷最难服从化则後孚倡乱则先动周人经理淮夷用力最多成王初年淮夷同三监以叛其後又同奄国以叛伯禽就封又同徐戎以叛至厉王之时四夷交侵宣王一命吉甫北方旋定继命方叔伐蛮荆其後又命召公平淮南之夷又命皇父平淮北之夷盖南方之役至再至三淮夷未平则一方倡乱天下皆危故至淮夷平然後四方平此江汉常武所以为宣王之终事而系之宣王大雅之末也】江汉之浒【麌韵】王命召【音邵後同】虎【麌韵】式辟【音辟】四方徂我疆土【麌韵】匪疚匪棘【职韵】王国来极【职韵】于疆于理【纸韵】至于南海【叶纸韵虎洸翻 赋也浒本作汭

尔雅说文皆云水厓也召公伐淮夷之师从江汉来仍从江汉归故班师至江汉合流之汭而适承王之後命谕以且无归也虎召穆公名世本云康公十六世孙式辟以下四句命之辞也式发语声辟通作辟说文云开也式辟四方獎其平淮之功也淮南诸国久隔化外今始重开辟之也云四方者亦蒙上召公告成中有四方既平之言也彻我疆土今日所当有事也彻即孟子所谓周人百亩而彻者方里而井井九百亩其中为公田八家皆私百亩而同养公田耕则通力合作收则计亩均分谓之彻也疆说文云界也与下文于疆之疆不同此为地界以入版图内之疆域言彼为田界按说文疆畺本有两字而误混为一愚意疆以土定意而以强得声疆土之疆也畺从二田上中下各以一横之是其界画于疆之疆当作此字曰彻我疆土者我疆域内之土地皆以彻法行之也严云古人伐叛讨贰之後则必去其苛政平其赋斂以慰民心故此章言彻法之事疚本作?说文云久病也棘通作?说文云急也束物之急莫若革极徐锴云屋脊之栋也故为高之义亦为中之义此则以中言周礼体国经野以为民极是其义也王国来极是倒句法与淮夷来求语气正同言来取中于王国也严云武事仅定而即行疆理赋税之法疑于病民且疑于急迫矣宣王谓我非疚也非棘也盖什一天下之中正乃我周之定制欲天下皆于王国来取中焉耳于疆于理二句纪事之辞也苏辙云召公于是经理其地至南海而止于於也对此而言犹言往彼也疆理义与信南山篇同画经界为疆分地理为理南东其亩所谓理也吕云淮夷在南故极其远而言之曰至于南海按左传楚子曰寡人处南海是时淮夷荆蛮俱已平定故召公奉行彻法得以至于南海也】王命召虎来旬来宣【先韵】文武受命召公维翰【叶先韵胡田翻】无曰予小子【纸韵】召公是似【纸韵】肇敏戎公【後汉书作功】用锡尔祉【纸韵 赋也武功已成疆理已定宣王于是美召虎之功而锡命之自来旬来宣以下至自召祖命皆册命之文也旬说文云徧也十日为旬周匝十日有徧之义宣朱子云布也按宣字从宀㐁者屋也说文训为天子宣室无布之义愚意当通作亘其字上下从一上天下地中从回象回转身故说文解云上下所求物也徐锴又为之解云回风回转所以宣陰阳也其义俱湮郁不明以意通之不过曰转旋布濩于天地之间耳凡训宣为布者义皆当取此来旬来宣是叙功之辞言尔昔奉王命来此南方徧历淮夷之地宣布疆理之事皆有成劳也孔云上章云经营四方告成于王又言于疆于理至于南海则召虎大功在此二事而已今王命召虎称其功劳则来旬来宣当指此二事召公召康公也名奭翰鸟羽也白虎通云礼服传曰子得为父臣者不遗善之义也诗曰文武受命召公维翰召公文王子也予小子宣王谦自谓也似说文云象也昔文王武王受天命之时汝祖康公实为羽翼今即不敢言予小子能比踪文武而汝则固已克肖康公矣按康公曰辟国百里而其宣布政教亦在江汉之间所谓是似者此耳肇尔雅云始也当通作厘说文云始开也敏说文毛传皆云疾也戎之言汝音之转也此云戎下文变云尔者亦犹韩奕篇虽称戎祖考戎辟亦变称尔位也公当依後汉书通作功说文云以劳定国也吕云自召康公之後其风烈寂寥无闻矣至穆公始复敏于从事以继其烈锡通作赐说文云予也祉说文云福也徐锴云祉之言止也福所止不移也严云我用此赐汝以福即下章所陈是也】厘尔圭瓚秬鬯一卣【陆本作□按二句无韵丰本遂改作秬鬯一卣厘尔圭瓚云瓚叶才田切】告于文人【真韵】锡山土田【叶真韵他因翻】于周受命【叶真韵眉辛翻】自召祖命【见上】虎拜稽首天子万年【叶真韵奴因翻 赋也孔云上言用锡尔祉此言赐之之事释文云厘音赉按周书用赉尔秬鬯一卣文法与此同当通作赉说文云赐也瓚者祭时酌鬯以献尸之器其柄以圭为之详见旱麓棫朴篇秬黑黍也详见生民篇鬯者酒名酿秬为酒和以郁金香金者香草也状如兰十

叶为贯百二十贯为筑捣之取汁合黑黍米煮而酿之秬为百谷之华郁为百草之英其气芬香调鬯故谓之鬯今按鬯之为字从口口者器也中从乂又有四点象秬米及郁形七所以扱之然则鬯之为酒以合酿秬郁二物而成主秬言则谓之秬鬯主郁言则谓之郁鬯而或据礼记有郁合鬯萧合黍稷之文遂谓鬯亦香草另是一物恐未然也郁字本作鬱罗愿云郁与鬯皆陰而玉为阳物圭璋又东南阳方之玉故假之嫌于无阳也若诸侯则天子赐之圭瓚然後为郁未赐圭瓚则资鬯于天子故先儒说王度记天子以鬯诸侯以薰者谓未得圭瓚之赐则用薰得赐日用郁耳故自诗书所载召虎及晋文侯仇皆尝受秬鬯圭瓚之赐惟文公重耳独言秬鬯一亩不言圭瓚者圭瓚自与秬鬯相副不言可知也既赐之後得自为鬯故又有诸侯相朝灌用郁鬯之礼尔雅云彝亩彝器也亩中尊也孙炎云尊彝为上彝为下亩居中郭璞云亩不大不小者按亩之为字要是象形而说文不载赵宦光疑当作𠂔者小瓠也似未足信又说文有 字读如调其字形殊与亩类按周礼鬯人庙用修注云修亦有调音岂 即亩耶其义为草木实 然象形岂亦以亩之为形上小下大草木悬实之象似之耶书之以质博古者孔云按春官郁人掌和郁鬯以实彝而陈之则郁当在彝而此及尚书左传皆云秬鬯一亩者当祭之时乃在彝未祭则在亩赐时未祭故亩盛之毛云九命锡圭瓚秬鬯韩诗外传云诸侯之有德天子锡之一锡车马再锡衣服三锡虎贲四锡乐器五锡纳陛六锡朱户七锡弓矢八锡鈇钺九锡秬鬯班固云圭瓚秬鬯宗庙之盛礼故孝道备而赐之秬鬯所以极着孝道程大昌云初赐圭瓚未及自为之鬯即并鬯以赐使归阙告之也告祭告阙】

【意更有进焉故复再拜稽首而陈之对扬二句自勉之词也天子万寿以下勉王之词也对扬王休与说命篇敢对扬天子之休命语气相类对犹应也扬举也休止也王之所命虎者止矣臣敢仰应王之意重复举之见其服膺不忘也作召公考对扬之实也作为也考成也王之命虎也曰召公是似曰自召祖命欲我无忝厥祖耳我自今以往当益戮力不怠为我祖召公成其终也严云成者毁之对康公立大勲于王室而後嗣子孙不能继之则康公之功业将毁矣我不敢不勉期为康公之成谓不毁坠其功也郝敬云前作後继则作者有成矣天子万寿申前天子万年之祝而转致属望无尽之意言我诚愿王寿考矣而所深愿者尤在我王御世明而益明善誉垂于无穷不徒得万年之寿已也矢者政教所施沛然莫御如发矢然文德如仁渐义摩礼陶乐淑是也洽说文云沾也徐徐沦注非用威武以震叠之也徐光启云令闻不已是虚矢其文德是实武节懿逝一时之功也协气横流万年之计也至于文教浹洽而治安之庆永世无斁令闻不已其在斯乎严云宣王方以武功褒虎而虎乃以文德勉宣王盖不矜己之功而纳君于德意度远矣朱子云言武功之不可恃亦所以戒之也礼孔子闲居篇云三代之王也必先其令闻诗云明明天子令闻不已三代之德也弛其文德协此四国大王之德也】江汉六章章八句【朱子谓宣王命召公平淮南之夷诗人美之邹云江汉明言伐淮夷常武明言征徐国何必取南北为目曰淮夷则淮南淮北兼举之矣常武所云淮浦淮濱指所经历及驻劄之地未尝指淮夷也申培说雷同朱传而但归作诗者于史籀不根殊甚子贡传阙文】

无衣复王仇也周宣王以兵七千命秦庄公伐西戎周从征之士赋此【据金履祥通监前编以此诗属之庄公今从之按史记周厉王无道西戎反王室灭犬丘大骆之族宣王即位以秦仲为大夫诛西戎後仲死于戎有子五人其长者曰庄公宣王乃召昆弟五人与兵七千使伐

西戎破之于是复予秦仲後及其先大骆地犬丘并有之为西垂大夫庄公居其故西犬丘】

岂曰无衣与子同袍【叶尤韵蒲侯翻】王于兴师修我戈矛【尤韵】与子同仇【尤韵】
越春秋作讐 赋也严粲云曰子者行伍相尔汝也袍尔雅说文皆云襦也孔颖达云玉藻纁为襦縕为袍注谓衣有着之异名也縕谓今纁及旧絮也然则纯着新絺名为襦襦用旧絮名为袍虽有着异名其制度是一故云袍襦也与子同袍犹所谓解衣相衣者王周天子也于尔雅云曰也李氏云按左传栾武子曰楚自克庸以来其君无日不讨国人而训之于民生之不易杜元凯以于为曰与此正同修通作修理也戈说文云平头戟也从弋一横之象形徐锴云谓戟小支上向则为戟平之则为戈郑玄云今之句子戟也或谓之鸡鸣或谓之拥颈句亦作钩子亦作舒孔云钩子戟如戟而横安刃但头不向上为钩也考工记云戈广二寸内倍之胡三之援四之又云戈秘六尺有六寸按内谓刃下接柄处其长四寸胡横刃即所谓钩舒者也其长六寸援直刃其长八寸秘即柄也矛即今之枪字亦象形毛云长二丈孔云谓酋矛也夷矛则长二丈四尺考工记谓攻国之兵欲短守国之兵欲长此言兴师以伐人国知用二丈之矛非夷矛也仇讐也西戎反王室又偶然杀天子之命吏此必讨之讐也时七千之士从征在行者自相告语曰我平日所以与子衣袍必共无分尔我者岂诚为尔与我无衣之故哉正以我辈居则为比閭族党之民出则为伍两军师之衆倘一日焉王命兴师则将飭我戎器与子同心以讐君父之讐是以相结缔而不可解耳言外见我辈今既奉王命征戎正出力敌忾之日也卒之破戎复所侵地所藉于同仇之奋发者不可诬矣谢枋得云无衣一诗毅然以天下大义为已任其心忠而诚其气刚而大其词壮而直吾乃知岐丰之地被文武周公之化最深惜也周既不能以此而令诸侯秦复不能以此而匡王室卒之数传之後其器然好战之习非复先王之民真秦之民矣】 岂曰无衣与子同泽【叶药韵达各翻说文作襍】王于兴师修我矛戟【叶药韵讵约翻】与子偕作【药韵 赋也泽朱子云里衣也以其亲肤近于垢泽故谓之泽又说文作襍云袴也孔云以上袍下裳则此亦衣名戟说文云有枝兵也本作戟从戈从干省干者枝也今文省作戟刘熙释名云戟觚也旁有枝觚也郑玄云今之三锋戟也考工记云戟广寸有半寸内三之胡四之援五之又云车戟常谓之车戟者以其建于车上其制长丈六尺晁错云两阵相近平地茂草可前可後此长戟之地也剑盾三不当一作说文云起也仇以心言作以气言】 岂曰无衣与子同裳【阳韵】王于兴师修我甲兵【叶阳韵逋旁翻】与子偕【汉书作皆】行【叶阳韵户郎翻赋也甲铠属周礼注云古用皮谓之甲今用金谓之铠释名云甲介函铠皆坚重之名按蚩尤作铠輿作甲】

【輿少康子也又蚩尤以金作兵郑司农云车之五兵戈殳戟酋矛夷矛卒之五兵无夷矛而有弓矢行毛云往也心相同气相鼓则可以偕行矣班固云山西天水陇西安定北地处势迫近羌胡民俗修习战备高上勇力鞍马骑射故秦诗曰王于兴师修我甲兵与子偕行其风声气习自古而然今之歌謠慷慨风流犹存耳左定四年吴入郢楚申包胥如秦乞师立依于庭墙而哭日夜不絶声勺饮不入口七日秦哀公为之赋无衣九顿首而坐秦师乃出以此诗凡三章每章三韵一韵一顿首故有九顿首云】

无衣三章章五句【序云刺用兵也秦人刺其君好攻战亟用兵而不与民同欲焉朱子以为序意与诗情不协良是然谓是秦俗强悍乐于战鬪之诗则胥失之矣子贡传申培说皆云秦

襄公以王命征戎周人赴之赋此较为近之然襄公之世周西之地已为秦有宜不复知有王而此诗尚谆谆以王于兴师为言则固周人诗也考史记称宣王以兵七千与秦庄公使伐西戎正与王于兴师之言合故仁山金氏编次此诗属之庄公不为无见也又按竹书西戎杀秦仲事在宣王六年】

崧高尹吉甫美宣王也天下复平能建国亲诸侯褒赏申伯焉【出序竹书载宣王七年王锡申伯命邹忠胤云崧高与黍苗相表里彼代为役者言此则王朝重臣赠章祖道词气迥别且篇中虽美申伯而多述王命亦以见王灵之赫濯序谓美宣王能建国亲侯褒赏申伯得之矣张文潜云崧高之所序止于建国亲诸侯褒赏申伯韩奕之所序止于能锡命诸侯夫武王之盛时大邦畏其力小邦怀其德朝觐会同无敢失时征伐侵讨莫不如志爵赏有度锡命有礼夫岂以为盛哉天子之事固若是也一不能是则乱而已矣而宣王之所能乃止于褒赏申伯锡命韩侯而诗人美之如是者盖周至厉王而乱极矣王室衰微诸侯肆行王且不能有国矣而况能建国乎诸侯背叛构怨连祸而况能亲诸侯乎赏命不行于上则褒赏中伯为可美也锡命不行乎下则锡命韩侯为可善也扬子曰习治则伤始乱也习乱则好始治也方宣王之初可谓习乱矣而宣王之始能行天子之职诗人为乐其始治而好之此所以美之也郝敬云吉甫对扬于朝而国史录之圣人存之以表亲亲崇贤封建复古之治耳人臣立功纪勋着于小雅人主治定功成见于大雅诗至大雅作者之志愈远而序者之义愈深故云汉不为救旱以明格天之德嵩高不为赠行以明亲贤之礼烝民不为赠山甫以表能使之功梁山不为美韩封以纪馭福之柄江汉以下皆可知也】

崧【风俗通作嵩】高维【礼记作惟】岳【陆德明本丰氏本俱作岳】峻【礼记丰本俱作峻】极于天【叶真韵汀因翻】维岳降神【真韵】生甫【丰本作吕下同】及申【真韵】维申及甫维【礼记作为】周之翰【叶先韵胡田翻】四国于蕃【叶先韵汾沿翻】四方于宣【先韵赋也崧毛传云高貌刘熙云竦也孔颖达云山形竦然故为高貌崧古文亦作嵩说文因解为嵩高山按尔】

【雅山大而高曰崧郭璞注谓今中岳崧高盖依此名然则凡大山之高竦者皆可以崧称因中岳高大故取崧以名之非崧专为中岳之名也观郭注了然岳即周礼所谓岳山雍州镇也古文岳岳通用故尔雅又作岳凡天下诸山之得专以岳名者惟此山耳一名吴山古文以为汧山在今陕西凤翔府陇州南八十里唐为西镇山耸五峰一曰西颠二曰大贤三曰灵应四曰会仙五曰望辇见雍大记其名不雅非古名也旧说皆谓指四岳言按四岳始见于尧舜时以尧建官主四方之岳故尧典每云咨四岳至舜五载一巡守东至岱宗南至南岳西至西岳北至北岳所谓四岳也然自岱宗而外皆未明言其处至周礼有五岳尔雅称泰山为东岳华山为西岳霍山为南岳恒山为北岳嵩山为中岳是也泰山在今山东济南府泰安州北五里华山在陕西西安府华州华阴县南十里霍山即衡山在湖广衡州府衡山县西三十里恒山在直隶真定府定州曲阳县西北一百四十里嵩山在河南河南府登封县北十里禹贡之外方也东为太室西为少室相去十七里嵩其总名也衡山一名霍与泰山一名岱皆一山而有二名故孔安国郑玄服虔及孝经钩命决龙鱼河图皆以衡山为南岳而书传白虎通风俗通尔雅广雅说苑诸书并以霍山为南岳衡霍一也乃直隶庐州府六安州有霍山即天柱山汉武

南巡以衡山辽旷移岳神于此而祀焉其後因得霍山之名张揖郭璞并以天柱当之非也然考礼记言天子祭天下名山五岳视三公而书周官篇乃言六年五服一朝又六年王乃时巡考制度于四岳诸侯各朝于方岳则意祭告有五岳而考功德之处仍止四岳固与唐虞不异耳五岳之名虽见尔雅释山篇而其发首则云河南华河西岳河东岱河北恒江南衡与五岳微异者增河西之岳而不数嵩高而周礼职方氏列九州山镇之名正西曰雍州其山镇曰岳山嵩高亦不与焉郑玄注周礼五岳因此遂取吴山与岱衡恒华以足其数而其注康诰有云岐镐处五岳之外周公为其于正不均故东行于雒邑合诸侯谋作天子之居是西都无西岳权立吴岳为西岳尔雅嵩高为中岳华山为西岳者据东都地中而言尔今即未知郑说信否然此诗之言维岳既与周礼尔雅所言山名相合又为雍州之镇依文求义其为岳山断无疑也骏通作峻说文云高也极毛云至也言其高竦之势将至于天也山高近天亦大臣近天子之象五岳之所以视三公也降说文云下也孔云降其神灵和气也甫据郑玄礼记注云仲山甫也申即下章申伯也後汉书刘陶云周宣用申甫以济夷厉之荒旧说依毛传指岳为四岳之神以尧之时姜氏为四伯掌四岳之祀申吕皆其苗裔故诗以为岳神所生而据孔安国称吕侯後为甫侯故尚书吕刑篇名礼记引作甫刑因遂以此诗所言甫即指穆王时甫侯也严粲不然其说谓申伯光辅中兴而远取周道始衰之甫侯以匹之非所以褒扬申伯其论确矣或又疑甫父古文通用仲山甫国语作仲山父至如吉甫蹶父皇父休父之类亦皆以甫父为名字安见其为仲山甫乎愚但就诗文证之唯仲山甫吉甫字俱作甫而其余蹶父皇父休父皆是父非甫何虞其混若吉甫既为作诗之人必无自讚之理而烝民之诗美仲山甫篇中亦明着为吉甫所作则此诗以申甫并言乃似统为二诗发端亦可以见甫之为仲山甫又断无疑也生甫反申叙甫于申之前者或以爵或以齿差次之皆未可知定非泛泛趣韵岳山与岐周相近乃肇基王迹之地推本二人之生于神降者犹曰祖宗神灵之所孕毓云尔黄佐云凡气之灵处则为神神之灵处则为人故曰人者鬼神之会也韩子论衡山谓其蜿蜒扶輿磅礴而郁积则白金水银丹砂石英等物皆不足以当其奇意必有魁奇才德之民生于其间也是亦不过以气之神而为人之神耳严云诗人之意谓申伯佐宣王中兴关国家之运则其生必不凡故设为神异之辞言崧然而高竦者岳也其山骏大极至于天惟此岳降其神灵以生仲山甫及申伯也当时仲山甫为相申伯亚于山甫此诗为美申伯而以山甫并言盖为申伯与山甫伯仲间耳借山甫以大申伯也推原于岳降以尊之犹烝民言天生仲山甫耳或者疑甫为字申为国则名称不类故以申甫皆为国不知古人文辞难以例拘舜典称稷契稷以官契以名汉称绦灌绦以封邑灌以姓皆不类也维申及甫又先申後甫者明此诗为赠申伯而作自宜主申伯以立言耳翰鸟羽也言其为王室之羽翼鸟有两翼亦见二人阙一不可也四国四方之国蕃通作藩晋语以蕃为军韦昭注云篱落也王安石云言扞蔽也四方则自四国之外广言之张文潜云四国有所界内也四方无所限外也民劳曰惠此中国以绥四方则中国者四国也四方外也故先中国而後四方则四国为内可知也又曰惠此京师以绥四国者盖四国比四方为内而比京师为外京师者王所都而已故其言如此宣者徧布之义布威灵布德泽皆是也言二人虽身在王朝而能佐王制驭宇内故四国则于以藩蔽其患难四方则于以宣布其威德此皆指已然之效言礼记孔子闲居篇云清明在躬志气如神耆欲将至有开必先降时雨山川出云其在诗曰崧高维岳骏极于天维岳降神生甫及申维申及甫为周之翰四国于蕃四方于宣此文武之德也严云谓文武之德施及後世故天生申甫以佐中兴魏了翁云盖自天地山川之神气鍾而为人是心清明与宇宙之内流行发见者实同

一原又推本而求之有如甫申之生乃繇十世而上文武二王积德所感呜呼人之此心与天地山川相为流通固也而人物之生又系乎时数清明之感山川英灵之会祖宗德泽之积然则是岂数数然哉】 𡗗𡗗【丰本作娓娓】申伯王纘【韩诗作践潜夫论作荐】之事【真韵】于邑于谢【潜夫论路史俱作序】南国是【潜夫论作为】式【叶真韵式吏翻丰本是式作之纪】王命召【音邵後同】伯【陌韵】定申伯之宅【陌韵】登是南邦【叶东韵悲工翻】世执其功【东韵 赋也𡗗尔雅训勉说文无𡗗字当通作娓娓其义训顺兼此二义见臣道无成代终之意申国名王符谓在南阳宛北序山之下即今河南南阳府南阳县是也李氏云按史记周本纪申者乃侯爵也以其为方伯故谓申伯严云方伯者一方之牧也黄佐云召公称伯恐亦是如此王宣王也後仿此纘尔雅说文皆云继也李云王纘继之以事如北门政事一埤益我于郑云往也下同邑指申言王安石云国之所都亦曰邑作邑于丰商邑翼翼是也谢国名在今河南汝宁府信阳县欧阳修谢绛铭云黄帝後昔周灭之以封申伯在南阳之宛罗泌路史云其地西甚广严云西汉地理志申国在南阳宛县後汉地理志谢城在南阳棘阳县东北百里申谢其地相近愚按时必宣王命申伯于申谢之间有所经营故先自京师而往其国邑继又从其国邑而往谢正上文所谓王纘之事者也于谢或即是命之灭谢特旧史无明文耳林氏云宣王之世申伯以王舅大臣为南国屏翰盖前此中在王畿之内而宣始分封之以干城王室楚经营北方大抵用申息之师其君多居于申合诸侯亦在焉秦汉之际南阳为要地高祖踰宛攻武关张子房曰强秦在前强宛在後此危道也汉与楚相持常出武关收兵宛叶间光武起南阳以宛首事申即宛也王应麟云当成周者南有申吕左传楚子重请申吕以为赏田申公巫臣曰不可此申吕所以邑也是以为赋以御北方盖楚得申吕而始强兹所以为周邑之屏翰与高帝入关光武起兵皆先取宛其形势可见李忠定尝言天下形势关中为上襄邓次之季本云谢近于荆而荆与徐连旧尝表里为江淮诸国之患穆王以降周德寢衰至于厉王失道滋甚江淮上下荆徐并兴宣王命将以伐荆而蛮荆威自将以伐徐而淮夷服于是使召虎疆理江汉申在汉阳因使虎彻谢土田以筑城定宅焉谢荆徐之要冲也其扼吭之虑远矣南国南方诸侯之国式说文云法也南国诸侯见申伯有于蕃于宣之能则皆以之为法式也召伯孔云以常武之序知召伯是召穆公也王肃云召公为司空主缮治宅尔雅云居也宅是镐京之宅该宗庙宫室城郭之类王嘉申伯之能式南国也思并以谢与之乃使召伯更定申伯所居之国欲使自申而迁于谢也但尚未明言至下章王命申伯乃定指其地而召伯遂因而成之耳登尔雅云陞也申伯在南邦中独膺加地进律之赏是陞之于此南邦也执者持守之意功即蕃宣之功世世子孙长有此土以持守其蕃宣之功欲其与国咸休久而不替也】 王命申伯式是南邦【叶见前章】因是谢人以作尔庸【叶东韵读如融余中翻】王命召伯彻申伯土田【先韵亦叶真韵他因翻】王命傅御迁其私人【真韵亦叶先韵如延翻 赋也申伯出为诸侯所治者不过一国而已而命之式是南邦者使之为州牧也使为州牧则当改大其邑故以谢地界之曰因是者蒙上章于谢之文也作说文云起也庸尔雅云劳也说文云用也字从用从庚庚更事也周礼云民功曰庸按郑语桓公问于史伯曰谢西之九州何如对曰其民沓贪而忍不可因也惟谢郟之间其冢君侈骄其民怠沓其君是易取也注谓州者二千五百家之州以此推之则谢地甚广其国新为宣王所灭其人必有难治者宣王既使申伯往谢以经理之而今又使之改封于谢以镇压之故其命之之辞谓因是谢地之人俾之属尔统辖以奋起尔之事功也彻者周之税名详见公刘篇用彻法以正其土田则经界之修明税赋之画一皆在其中矣此即黍苗篇所云平原隰清泉流之事沈万

钶云韩奕言实亩实籍江汉言彻我疆土而此言彻申伯土田盖自厉王贪暴而税法坏尽矣宣王中兴之美此亦可见其一傳御者郑云貳王治事谓冢宰也孔云三公有太傅知此非者以王之所命当有职事三公无职故知非也僖二十八年左传曰郑伯傅王是谓辅相王事者为傅也副貳于王以治国事者唯冢宰为然故知谓冢宰私人毛云家臣也孔云对王朝之臣为公人家臣为私属也有司彻云主人降献私人注谓大夫言私人明不纯臣此申伯虽是王之卿士亦是不得纯臣故称私人也愚按此即第七章所云徒御者迁其私人谓先定其名籍以待迁耳非先使之就国孔谓其迁犹与申伯同行是也】申伯之功召伯是营【庚韵亦叶阳韵于方翻】有俶【陆本作?】其城【庚韵亦叶阳韵辰羊翻】寢庙既成【庚韵亦叶阳韵辰羊翻】既成藐藐【叶质韵莫笔翻】王锡申伯【叶质韵必益翻亦叶药韵卜各翻】四牡蹻蹻【药韵亦叶沃韵拘玉翻】钩膺濯濯【叶沃韵厨玉翻亦叶药韵书药翻 赋也功犹事也与世执其功之功不同此指工役之事言观黍苗篇言肃肃谢功召伯营之可见营者周匝相度之意规制新邑而自居之乃申伯之事而今召伯则奉王命为之相度也俶尔雅以为始说文以为善兼此二义言创始为之而甚善也坚完之谓善城说文云以盛民也寢庙宗庙也前曰庙後曰寢详见巧言篇专举寢庙亦营宫室先宗庙之意既者已事之辞成说文云就也城以纳民而扞患庙以奉先而萃涣皆谢功之大者下既成只蒙上文言寢庙既成则其余功之小者皆可以兼该之矣藐通作邈说文云远也上林赋微睇绵藐注亦以绵藐为远视貌左传以是藐诸孤孟子说大人则藐之其义皆同谢去周京颇远故云藐藐也此结王命召伯定申伯之宅一案亦为下文遣行发端或问朱子崧高烝民二诗皆是遣大臣出为诸侯筑城不知当初何故不教本土人筑朱子曰此也晓不得封诸侯故是大事看黍苗诗当初召伯带领许多车徒人去也是劳攘古人重劳民如此等事却又不然更不可晓如汉筑长安城如今建州南剑上下筑城皆去别处调人来都晓不得邓元锡云古王者封诸侯诸定宅俶城作寢庙至于彻田皆司空职之司空掌邦土也又董工作既成而全畀之胙之土之道也亦嫌侯始就国以寢庙工作之事遽勤民焉曲而至矣锡通作赐说文云子也谢功既成就封有日故又赐之车马四牡所以驾车者蹻说文云举足行高也以非一马故重言之见其壮也钩膺毛云樊纓也详见采芑篇乃马腹带之饰非金路马颌之钩也按周礼巾车职云象路朱樊七就异姓以封申伯异姓诸侯只宜用象路耳濯濯鲜明之貌季云此章言营谢既成而始命申伯以往不以工役累其心也】王遣申伯路车乘马【叶麌韵满补翻】我图尔居莫如南土【麌韵】锡尔介【尔雅注作玠】圭【尔雅注作珪】以作尔宝【皓韵亦叶麌韵彼五翻】往近【丰本作?】王舅南土是保【皓韵亦叶麌韵彼五翻 赋也遣申伯者孔云发遣申伯令使之国也路车象路也四马曰乘即上章所云四牡也上章言马而未及车故此又合车马总言之图说文云画计难也徐锴云规画之也故从口畷者吝嗇难之义也尔雅云谋也南土所包者广凡南方之国皆是谢地亦在其中故以南土言曰莫如者非徒以地美人衆有酌全才择重地意圭之类不同其制上圜下方介圭居其一介通作玠说文云大圭也尔雅云珪大尺二寸谓之玠注训大为长也郑笺训介圭从此说按考工记玉人之事云镇圭尺有二寸天子守之命圭九寸谓之桓圭公守之命圭七寸谓之信圭侯守之命圭七寸谓之躬圭伯守之天子执冒四寸以朝诸侯大圭长三尺杼上终葵首天子服之周礼典瑞职云王晋大圭执镇圭纁藉五采五就以朝日据此则尔雅所谓玠即所谓镇圭镇圭与大圭其长不同说文训玠为大圭混也又书顾命言太保承介圭上宗奉同瑁王惟朝日始执镇圭搢大圭若见诸侯则执瑁圭耳此承与奉所以不同也至如公侯伯守圭名桓信躬不名介故宜从郑说宝说文

云珍也徐锴云人所保也以作尔宝者言锡此物以为尔之所贵重也陈祥道云夫王之大圭长三尺则尺有二寸所以锡诸侯者也诸侯之圭长不过九寸锡以尺有二寸使宝之而已愚按典瑞职云珍圭以徵守以恤凶荒杜子春云珍当为镇书亦或为镇以徵守者以徵召守国诸侯若今时徵郡守以竹使符也镇者国之镇诸侯亦一国之镇故以镇圭徵之也凶荒则民有远志不安其土故以镇圭镇安之郑玄云珍圭王使之瑞节王使人徵诸侯忧凶荒之国则授之执以往致王命焉如今时使者持节矣凡瑞节归又执以反命详杜郑二说乃识此诗锡介圭之意王命申伯镇抚南土故使之执介圭而往以镇安之如王自行也介圭王之守器申伯执此物即王之威灵在焉当加宝重不敢褻也又按论语言执圭鞠躬如也亦是使臣执诸侯之圭可以相证往谓申伯之国也近王舅指南土诸国言说文云母之兄弟为舅妻之父为外舅申伯称王舅疑是后父汉书外戚恩泽侯表云其余后父据春秋褒纪之义帝舅缘大雅申伯之意寢广博矣又以列女传证之宣后称姜后申国姜姓而後章亦有申伯番番之语番番者老也此非后父而何保犹安也言申伯往矣表里江淮控带荆徐为南方巨镇凡地近王舅遍南土之诸侯皆将赖是以保安也自我图至此皆册遣之辞一说万象烈云此介圭也自王锡之往与王舅朝夕亲近而不相离以保此南土亦通】申伯信迈王饯于郿【支韵亦叶寘韵明秘翻】申伯还南谢于诚归【叶支韵俱为翻亦叶寘韵求位翻】王命召伯彻申伯土疆【阳韵丰本作疆】以峙【陆本作峙】其粳【阳韵】式遄其行【叶阳韵户郎翻赋也迈说文云远行也信迈犹云果行也饯说文云送去也郑云送行饮酒也一统志云古郿城在今陕西】

【凤翔府郿县北十五里渭水之北也郑云时王盖省岐周故于郿云孔云申在镐京之东南自镐适申涂不经郿时宣王盖省视岐周申伯从王至岐自岐遣之故饯之于郿也岐周周之所起以有先祖之灵故时省之非为申伯故往王先在岐得召公之报知营谢已讫召申伯于镐至岐周而命之也严云郿即董卓所筑郿坞郿丰皆在镐京之西其地相近王命申伯为州牧改邑于谢必册命于文王之庙故告庙毕而饮饯于郿也祭统云赐爵禄必于太庙召诰王朝步自周则至于丰注谓文王之庙在丰命诸侯必至丰告庙于周受命亦丰庙也还说文云复也言复之镐京也南指谢也还南二字中具有转折自郿至镐繇是而南也按輿地岐周最在西北稍东则为郿又东则为镐而谢又在镐之东南或误谓南还于镐然後适谢岂知镐在东不在南也诚归言始成行也申伯改封于谢则谢是其本国故以往为归谢于诚归者郑云诚归于谢也孔云古人之语多倒故申明之严云申伯志存王室宣王恩隆元舅人疑其未必往谢故言信迈诚归谓果然成行也陆化熙云曰信曰诚见王不能舍伯伯亦不能去王唯其势不得已故龟勉辞去王命召伯是重复追述之辞非谓此时更命也彻土疆与上彻土田同言彻土田之疆界也意在唤起下峙粳一语言追自王命召伯彻土田之时而已预峙其粳谓取井田十一之赋以供委积之用也此结前王命召伯彻申伯土田一案峙本作侍说文云待也徐锴云按汉书张忠为孙宝设储侍物以待须索也粳说文云食米也式发声也遄尔雅云速也式遄其行是预计其如此郑云自京至国在路所须命皆预备委积以速申伯之行繇在道无所阙乏故得疾至也按周礼地官遗人职云凡国野之道十里有庐庐有饮食三十里有宿宿有路室路室有委五十里有市市有候馆候馆有积少曰委多曰积季云观申伯至此方行则其事可以需迟而当在荆徐既服之後矣】申伯番番【叶先韵孚焉翻亦叶歌韵逋禾翻】既入于谢【楚辞章句作徐】徒御嘽嘽【叶先韵於权翻亦叶歌韵托何翻】周邦咸

喜戎【丰本作我】有良翰【叶先韵见首章】不【丰本作丕】显申伯王之元舅文武是宪【叶先韵孚焉翻 赋也番通作幡说文云老人白也秦誓番番良士义亦同此观其先言询兹黄髮而以良士为旅力既愆又与伉伉勇夫对言则其为高年之状可知矣既入于谢者黄佐云言自此而入于彼非已到谢也徒御毛云徒行者御车者声之缓者曰嘽此嘽嘽亦取缓义郑训为安舒是也此据其去时之仪如此结前王命傅御迁其私人一案周邦咸喜者京师之臣若民皆聚观而喜也戎有良翰者周人自相谓之辞戎之为汝音之转也古者戎有汝音良说文云善也申伯在王朝则王朝重在南土则王朝益重以其保南土于外而内之王朝愈安故曰良翰与首章维周之翰相应不显三句吉甫推咸喜之意而夸美之也不显即丕显也以闻望言元字从一在兀上徐锴云高也舅以元称谓辈行之高尊者黄佐云王之元舅似常事何足道者然观韩信拜大将而一军皆惊则位望亦未可全轻也故道及之文武毛云言有文有武也愚按文武是德之见于才者乃据申伯平日在王朝而言文能经邦武能戡乱蕃宣之绩所自来也宪尔雅云法也郑云表也凡法令以表悬之谓之宪是宪即南国是式之意言丕显申伯岂徒以其为王之元舅而人瞻仰之哉亦以其有文武全才足为南国诸侯法式此所以咸喜其为良翰耳钱天锡云因亲建贤疑为王者之私恩以亲蒙宠亦非申伯之休美故特铺张其贤见锡之遣之饯之以华其行者非止为一外戚之荣而已】申伯之德【职韵】柔惠且直【职韵】揉【陆本作柔】此万邦闻于四国【职韵】吉甫作诵其诗孔硕【陌韵亦叶药韵实若翻】其风肆好以赠【崔灵恩集注作增】申伯【陌韵亦叶药韵卜各翻 赋也德高文武一层承上章言申伯所以有文武之才者以其本于有柔惠且直之德耳柔者对刚之名惠说文云仁也尔雅云顺也直说文云正见也荀子云是谓是非谓非曰直惟有柔惠之德故能文惟有直之德故能武中加一且字见兼济之妙张文潜云柔者嫌于无立不能刚而有立则其为柔惠也挠而已矣夫惟柔惠且直者外柔顺而内不挠者也夫直者所以为无挠也揉说文云屈伸木也强者治以刚弱者抚以柔之谓此足以徵其文武矣万邦即四国举其多而言则曰万邦就其方而言则曰四国闻跟揉字来谓怀其柔惠者颂仁憚其直者颂义也此皆追申伯在王朝时而言观揉此万邦语可见若在往谢後则但当云揉此南邦不得泛及万邦矣吉甫毛云尹吉甫也周之卿士孔云其先尝为尹官而因氏焉六月言宣王北伐吉甫为将礼军将皆命卿也作诵毛云作是工师之诵也孔云诗者工师乐人诵之以为乐曲欲使申伯之乐人常诵习此诗也孔甚硕大也诗中所指陈者甚大有系于天下国家也风郑云风切申伯也按声之足以感人者为风肆朱子云遂也取披拂四散之意好说文云美也意无不尽辞无不美足以感动申伯矣或谓此雅诗而有风体非是诗言志吉甫岂按风雅之体而作诗者乎赠说文云玩好相送也毛云增也孔云凡赠遗者所以增长前人赠之财使富增于本赠之言使行增于义也以赠申伯者详美其已往所以益勉其将来如德则柔惠且直也才则文武也功则四国于蕃四方于宣也循此不替则可以保是南土而永为周之翰矣此吉甫作诗送行之意崔灵恩谓增益申伯之美是也孔云此诗之作主美申伯而已申伯有德王能建之美申伯亦所以美宣王故为宣王诗也邹忠胤云夫柔惠且直揉万邦而闻四国申伯固宜为文武宪矣岂可因王之元舅而反掩其德谢功之营亦岂猥与後世恩泽侯可同日语哉至其後人逆节亦非凭椒房之宠内执朝权如王窦阎梁辈也嗟夫为媾为寇斯其故盖难言之而以造端咎崧高过矣又郝敬云按申伯以王元舅褒封晋锡可谓厚矣未几以幽后见黜率犬戎杀幽王而灭宗周申为戎首焉然则宣王之褒赏元舅与後世主宠任外戚移祚篡国者何以异乎故天子有道则万国亲无道则亲戚叛易曰匪寇婚媾反覆手之间而已父子

相继宣兴幽灭可不畏哉故国风存扬之水大雅録崧高圣人有微意焉诵者见其美而忘其规泥其辞而不逆其志乌可与言诗矣王应麟云外戚秉政未或不亡汉亡于王莽何进晋亡于贾谧唐几亡于杨国忠石晋亡于冯玉愚按竹书纪王锡申伯命在宣王七年又纪四十一年王师败于申则申人之逆王命已在宣王之季矣】

崧高八章章八句【朱子谓宣王之舅申伯出封于谢而尹吉甫作诗以送之申培说同此但据篇中约略成文固自不谬然使作诗之大意非为美王则不过朋友相送之诗但当列之小雅何以入大雅乎子贡传阙文】

黍苗营谢也宣王封申伯于谢命召穆公往营城邑故将徒役南行而行者作此【自宣王下俱出朱传朱子云此诗与大雅崧高相表里邹忠胤云崧高何以系之大雅黍苗何以系之小雅固知体裁音律自尔不等盖黍苗即非作于行役庶士亦代为行役庶士言若崧高铺叙宏濶自是名公鉅章此大小雅所繇别与愚按崧高意重申伯此意重召公命旨各别】

芄芃黍苗陰【丰氏本作黔】雨膏【叶号韵居号翻】之悠悠南行召【音邵後同】伯劳【叶号韵郎到翻】之【兴也芃芃黍苗陰雨膏之解见下泉篇以陰雨能泽物兴召伯能抚下悠说文云忧也尔雅云思也字从心国有大役衆之所憚又地远而时久则忧思迸集矣北自镐京至谢故曰南行孔穎達云以嵩高言王命召伯定申伯之宅又曰因是谢人与四章肃肃谢功相当故知此南行谓宣王之时召伯营谢邑将徒役南行也召伯韦昭云召康公之子穆公虎也劳之谓慰其劳苦恤其饥渴拊循劝勉如天泽沃然其劳也盖膏也孔云此言南行是举其始去而劳之左襄十九年季武子如晋拜师晋侯享之范宣子为政赋黍苗季武子兴再拜稽首曰小国之仰大国也如百谷之仰膏雨焉若常膏之其天下辑睦岂惟敝邑晋语秦伯燕公子重耳子余使重耳赋黍苗子余曰重耳之印君也若黍苗之印膏雨也若君实庇膏泽之使成嘉谷荐在宗庙君之力也君若昭先君之荣东行济河整师以复强周室重耳之望也】我任【丰本作壬】我犂我车我牛【叶支韵鱼其翻】我行既集盖云归哉【叶支韵将其翻赋也召伯知南行者之劳苦忧思也因呼而喻之此下二章皆召伯之语所谓劳之也孔云任犂车牛是转】

【运所用任郑笺训抱也按说文训任为保保抱同意故孔氏谓任在前负在背训抱是也或训为担非也犂说文云挽车也从车从?在车前引之?音伴并行也从两夫汉书注驾人以行曰犂司马法云夏后氏谓犂曰余车殷曰胡奴车周曰輶犂犂一斧一斤一凿一耜一耒周犂加二板二筑又曰夏二十人而犂殷十八人周十五人杨慎云说者以为夏出师不踰时殷踰时周历时故前世犂少後世犂多车大车也孔云此转运载任则是大车朱子云牛所以驾大车也我任我犂者我有所抱持之器具则置于我之犂我车我牛者我有所任载之大车则驾以我之牛也集犹就也盖者未定之辞百物具备竣事不难俟我南行之功既就斯时庶可言归哉严粲云示以归期安其心也】

我徒我御我师我旅【语韵】我行既集盖云归处【叶语韵敞吕翻 赋也郑云步行曰徒召伯营谢邑以兵衆行其士卒有步行者有御兵车者五百人为旅五旅为师春秋传曰君行师从卿行旅从孔云旅属于师徒行御车还是师旅之人天子之卿与诸侯同故有师也处止也】

功成事毕庶可以归而止息矣皆慰劳之辞上章任辇车牛以载工作之器言此章徒御师旅以受工役之人言盖皆自周调发而不以劳谢民也】肃肃谢功召伯营【庚韵】之烈烈【左传杜注作列列】征师召伯成【庚韵】之【赋也肃说文云持事振敬也以相度周至故曰肃肃谢申伯今所改封之国郡国志云南阳郡宛县本申伯国棘阳县东北百里有谢城按棘阳即今河南汝宁府信阳县也申谢相近功朱子云工役之事也营本匝居之义故旧说以纵横相度为经周回相度为营烈说文云火猛也烈烈是猛于趋事之状征行也师即上章我师之师谓此南行之师衆也成之者以抚循为激劝有以成其烈烈也此诗先言初行之时备加慰劳及规模既定于是人皆趋事赴功而谢功于是可成矣盖立言之次第如此左襄二十年郑伯享赵孟于垂陇子西赋黍苗之四章赵孟曰寡君在武何能焉】原隰既平【庚韵】泉流既清【庚韵】召伯有成【庚韵】王心载宁【叶庚韵泥耕翻丰本作寔 赋也原隰解见信南山篇孔云五土有十等独言原隰者以其最利于人故特言之治土高下各得其宜故曰平泉流以水利言水壅则流浊既清如纵者为沟横者为遂而无壅塞之患也蔡汝楠云清水道所以平原隰也上章言烈烈征师召伯成之不过成就建城郭治宫室等事而已至此相其原隰之宜通其水泉之利则召伯营谢之功于是乎有成矣载之言则也寔通作寔安也谢为荆徐要冲之地封申伯于此则足以镇抚南国宣王之心则安也观崧高之诗一则曰南土是保再则曰戎有良翰则王心之所以寔可知不独谓其足以笃厚元舅克副亲亲贤贤之念已也吕祖谦云天子子万姓者也大臣虑四方者也方伯分一面者也申伯之体势不重则无以镇定南服召穆公身为卿士岂得辞其忧责哉宣王虽深居九重宵旰之虑固未尝一日忘之也必待召公告厥成功而王心始宁焉此真知职分者也】

黍苗五章章四句【子贡传以为城申也按申伯改封于谢诗言营谢非言城申也序以为刺幽王也不能膏润天下卿士不能行召伯之职焉黄震云诗中明言美召公而诗序乃以为刺幽王此类亦何讶晦庵之去序耶杜预谓美召伯劳来诸侯韦昭亦云道召伯述职劳来诸侯也今按诗言营谢功成于述职何与其云劳之者乃劳南行师旅非劳来诸侯明甚华谷严氏又谓此诗乃兼美营谢伐淮二役郝敬取之盖误认徒御师旅一章及烈烈征师二语为平淮夷之事考竹书纪年宣王六年召穆公帅师伐淮夷是年王伐徐戎归自伐徐锡召穆公命越明年始锡申伯命则营谢之举在平淮之後今篇中先言肃肃谢功召伯营之後言烈烈征师召伯成之何得以征师为指伐淮耶若申培说亦与朱传同但谓此诗乃史籀所作亦无稽据何宣王之世惟史籀作诗为多我未之闻也】

烝民宣王命樊侯仲山甫城齐尹吉甫作诗美之【据竹书事在宣王七年序云尹吉甫美宣王也任贤使能周室中兴焉愚按贤以德言能以才言篇中言柔嘉维则是德也赋政于外四方爰发是才也王命仲山甫式是百辟纘戎祖考王躬是保所谓任贤也王命仲山甫城彼东方所谓使能也陈氏云崧高烝民二诗皆尹吉甫赠行之诗而序诗者皆以为美宣王何也盖人君委任得人而僚友之间赋诗以相娱乐则人君之美莫大焉郝敬云普天之下莫非王土惟王建国文武之制也周衰诸侯强僭继世不繇天子裂封启土悉自己出厉王中衰周人放之于彘是畿甸诸侯且不知有天子而况齐远在东隅境内区区之城郭必以上请岂非宣王中兴之烈足以震叠之与夫子删诗存烝民春秋之义也故曰诗亡春秋作樊地名仲山甫所封也杜预云一名阳樊野王县西南有阳城季本云野王本河内今属怀庆府夹漈郑氏以为

阳樊在济源东南三十八里济源南与河内相隣即其地也晋语王赐文公阳樊之田阳人不服公围之将残其民仓葛呼曰阳有夏商之嗣典有周室之师旅樊仲之官守焉樊仲即仲山甫也毛传称仲山甫为樊侯与竹书合孔颖达云山甫为樊国之君韦昭谓食采于樊樊在东都之畿内杜预曰经传不见畿内之国称侯男者天子不以此爵赐畿内也如预之言畿内本无侯爵传言樊侯不知何所按揭】

天生烝【孟子韩诗外传俱作蒸】民有物有则【职韵】民之秉彝【孟子作夷】好【去声】是懿德【职韵】天监有周昭假【丰氏本作格】于下【叶麋韵後五翻】保兹天子生仲【丰本作中後同】山甫【麋韵丰本作父後同 赋也烝尔雅云衆也按烝本热义转训为衆者人衆则气热曰蒸民者泛言天下之人也物犹事也则说文云等画物也从刀从贝贝古之物货也徐锴云则节也取用有节刀所以裁制之也愚按凡制度品式皆曰则天理当然不可增减者亦谓之则易所云天则诗所云帝则是也大学言致知在格物格者格式之谓有一物必有一天然恰好之格不可过不可及即此所谓则也是格也大学又谓之至善散之为物物之至善合之为统体之至善知其散则知其合也以其极至而无以复加如是则可以止矣此非意识所得预与生俱生乃吾性本然之体也故知而致及于是则知止矣亦所谓知之至矣庄子云各有义则谓之性真德秀云易曰形而上者谓之道形而下者谓之器道者理也器者物也精粗之辨固不同矣然理未尝离乎物之中知此则知有物有则之说矣盖盈乎天地之间者莫非物而人亦物也事亦物也有此物则具此理是所谓则也以人言之如目之视耳之听物也视之明听之聪乃则也君臣父子夫妇长幼物也而君之仁臣之敬子之孝父之慈夫妇之别长幼之序乃则也则者准则之谓一定而不可易也古人谓规矩准绳衡为五则者以其方圆平直轻重皆天然一定之法故也夫物之所以有是则者天实为之人但循其则耳秉尔雅云执也此字宜着力说韩诗外传云民之秉德以则天也彝说文云宗庙常器也尔雅训彝为常其义取此好者慕爱之意懿说文云专久而美也曰则曰彝曰懿德其实一也自其丽于物而言谓之则自其人人所同更无改易而言谓之彝即书言恒性是也自其至一至精无容增减出入而言谓之懿德按德与惠字有辨理之得于天者谓之惠其字从直从心行道而有得于心者谓之德其字从彳从惠今文多混此言懿德乃性之惠也正当通作惠苏辙云民能秉常则莫不好德维其失常乃有不善孟子云仁义礼智非由外铄我也我固有之也弗思耳矣故曰求则得之舍则失之或相倍蓰而无算者不能尽其才者也诗云天生烝民有物有则民之秉彝好是懿德孔子曰为此诗者其知道乎故有物必有则民之秉夷也故好是懿德旧说皆谓民自然好德殊不知此诗及孔孟之意按此诗以此四语发端其理甚精而意甚切乃统宣王及山甫俱包括于天生之内而言物各有则而惟山甫能完其则故能予君以则观後章言柔嘉维则是山甫之能自完其则也又言袞职有阙惟仲山甫补之是山甫之能予君以则也凡民非能秉执其彝不使放失者则虽有自有之懿德亦不知好德轡如毛民鲜克举之惟不能秉彝故也我义图之惟仲山甫举之惟其能秉彝故也山甫之德如是为保王躬计岂可少此人哉监临下也昭曰明也俱见说文假通作假至也保者扶持之意仲山甫孔云字也按汉书杜钦传云仲山父异姓之臣无亲于宣就封于齐唐权德舆集云鲁献公仲子曰仲山甫入辅于周食采于樊罗泌路史中樊国凡两见一以为泰伯仲雍後一据潜夫论以为庆姓俱未详孰是然据第三章有纘戎祖考之语疑德舆说为近之彼所云祖考指周公耳若其他固未有显者苏云天之监周也其明实指于下将保安宣王乃生仲山甫以佐之凡

宣王之所以能全其性而无失其常者皆仲山甫之功也严粲云此诗欲美山甫故谓山甫天生之山甫卒謚穆周语亦称樊穆仲】仲山甫之德【职韵】柔嘉维则【职韵】令仪令色【职韵】小心翼翼【职韵】古训是式【职韵】威仪是力【职韵】天子是若明命使赋【若赋叶韵未详丰本赋作职 赋也仲山甫之德只柔嘉维则一语尽之君道主刚臣道主柔此亦一物之则也臣道无成故尚柔邹忠胤云易坤为臣道系以利牝马之贞盖坤非偏柔承乾而为柔也嘉美也则即物则之则万象烈云柔嘉维则者言柔之嘉处乃其则也柔非其则即不得为嘉柔而不嘉只为非其则即此一句已自细到至处令郑玄云善也令仪令色亦自其对君者而言严云令仪则动止雍容令色则容貌温粹小心翼翼与大明篇义同为君者心欲大主于仁也为臣者心欲小主于敬也念念皆在羽翼王室故曰翼翼辅广云令仪令色柔嘉之发于外也小心翼翼柔嘉之存于内也古训郑云故训也式说文云法也法古训逊志典学後章言既明且哲不茹柔不吐刚其理皆从此出蔡汝楠云所以全此则者为其有此学也凡民无此学则无此德天生之则亦乍明乍灭终谓之凡民而已左传云有威可畏谓之威有仪可象谓之仪力者以志帅气以神驭官非着力矜持之谓严云山甫令仪令色则动容周旋中礼矣犹曰威仪是力何也有德者固威仪之所自形而谨其威仪者亦所以检摄而养其德也故致礼以治躬则庄敬外貌斯须不庄不敬而慢易之心入之矣可不勉与愚按式古训力威仪亦见山甫之能时时秉执其常性处此其所以有柔嘉之德而能尽为臣之则也天子二句引起下二章若尔雅云顺也按若字从艸从右说文云择菜也徐锴云择之顺手故从右右者手也以此训顺似乎强解当通作叒周伯琦云顺也从三又又者手也二又为友三又为叒所助者多故为顺也会意愚因是悟桑字从叒从木古人析为二文讹叒为若曰若木若木者扶桑也其实即桑之一字耳然则叒若同音其混用久矣请以此补字学所未发明命者天子明告邦国之命也赋者徵求之义言宣王见山甫有柔嘉之德心悦顺其为人因使之典司政本为天子宣布明命以徵求邦国之应即下章所称出纳王命是也书曰令出惟行不惟反令出而必求其行即赋之说矣】王命仲山甫式是百辟【甫辟叶韵未详】缙戎【丰本作尔】祖考【皓韵亦叶有韵去九翻】王躬是保【皓韵亦叶有韵补苟翻丰本作佛】出纳【陆本丰本俱作内】王命王之喉舌赋政于外四方爰发【舌发叶韵未详 赋也此章言仲山甫所居之职郑以为冢宰是也自式是百辟以下至王之喉舌皆命词孔云王命此仲山甫曰尔可以为长官施其法度于是天下之百君缙说文云继也戎之言汝以音同通用祖考祖父也疑但指祖言意必尝居冢宰之职故今又使山甫继之也依权德舆说周公是山甫之祖书言惟周公位冢宰正百官是也自周公後历伯禽考公炀公幽公魏公厉公至献公凡七公炀公为考公之弟魏公为幽公之弟献公为厉公之弟实止三世耳献公卒子真公湣立真公卒弟放立是为武公当宣王时尝以长子括少子戏见王王爱戏欲立戏为鲁太子山甫谏曰不可事见周语据德舆谓山甫是献公仲子则山甫乃真公弟武公兄而仕于王朝者也王躬是保与首章保兹天子之保义同王躬之所以保其故尚在下文惟动丕应僭志则天子之身于是获安矣出纳王命者胡一桂云谨审上之命令命之善者宣出之不善者缴纳之如後世封还词头之类或但谓出为宣而布之既布则纳而复之亦自可通但此不过一奉行之任冢宰居密勿论思之地其间调剂刚柔使得其宜以致邦国之若者尚有许多参详恐不止如此且此既已言出讞而下文又言赋政言将命亦太复矣喉说文云咽也舌说文云在口所以言也喉舌皆言之所从出曰王之喉舌则其膺代言之任明矣孔云舜命龙作纳言云出纳朕命彼特立纳言之官以典王命出入即今之纳言也与此出纳王命者异赋解见前章凡有所施

行者皆谓之政外郑云畿外也爰说文云引词也发犹起也徵求其所当施行之政于外则天下诸侯无不于是皆起而应者繇其所出之命皆尽善故也山甫身在王朝而其所召致者如此非以经营四方言也】肃肃【後汉书作赫赫】王命仲山甫将【叶阳韵资良翻】之邦国若否仲山甫明【叶阳韵谟郎翻】之既明且哲以保其身【真韵】夙夜匪解【音懈左传晏子春秋韩诗外传作懈】以事一人【真韵 赋也严云此章申上章赋政之事命出天子何等庄严故曰肃肃将者奉行之义此二句即上章所谓赋政于外者也邦国谓诸侯也若解见二章否说文云不也字从口从不徐锴云不可之意见于言也明朱子云谓明于理此二句在将命以前事即上章所谓出纳王命者一令之出如何而邦国顺如何而邦国不顺山甫皆能烛照其理而逆计其必然其可使邦国顺者则诏王出之否则讷之故其所将之于外者皆有顺而无拂四方爰发实繇于此非徒以宣布塞责已也又韩诗外传云王者必立牧方二人使闚远牧衆也远方之人有饥寒而不得衣食有狱讼而不平其冤失贤而不举者入告乎天子天子于其君之朝也揖而进之曰噫朕之政教有不得尔者耶何如乃有饥寒而不得衣食有狱讼而不平其冤失贤而不举然後其君退而与其卿大夫谋之远方之民闻之皆曰天子也夫我居之僻见我之近也我居之幽见我之明也可欺乎哉故牧者所以开四目通四聪也诗曰邦国若否仲山甫明之此之谓也仲山甫既能明于邦国若否之理且又能哲以保其身哲尔雅云智也就保身见哲则知几之谓即柔嘉二字可以想见山甫主眷既隆輿望共属若使驚然自恃信心一往略无前瞻後顾之意未必非悔吝之所繇丛有山甫之哲则知微知彰知柔知刚故能功盖天下而主不疑位极人臣而衆不忌自然灾害不及其身矣扬雄言明哲煌煌旁烛无疆于山甫之哲殆有合焉特其言逊于不虞以保天命者非耳中庸云居上不骄为下不倍国有道其言足以兴国无道其默足以容诗曰既明且哲以保其身其斯谓与徐干云大雅贵既明且哲以保其身夫明哲之士者威而不摄困而能通决嫌疑辨物居方禳祸于忽杪求福于未萌见变事则達其机得经事则循其常巧言不能推令色不能移动止可观则出辞为师表比诸志行之士不亦愈乎夙早夜暮也匪通作非解通作懈说文云怠也一人郑云谓天子也山甫之保身非为身也将为事一人计也身保则可以长在位而事一人而山甫朝乾夕惕凡所以尽其所事者一日如是日日亦如是无有一毫怠忽信可谓小心翼翼矣左襄二十六年卫太叔文子曰君子之行思其终也思其复也书曰慎始而敬终终以不困诗曰夙夜匪懈以事一人文二年秦伯伐晋遂霸西戎用孟明也君子是以知孟明之臣也其不解也能惧思也诗曰夙夜匪懈以事一人孟明有焉晏子春秋云叔向问晏子曰人何以则可谓保其身晏子对曰诗曰既明且哲以保其身夙夜匪懈以事一人不庶几不要幸先其难乎而後幸得之时其所也失之非其罪也韩诗外传云昔者周德大衰道系于厉申伯仲山甫辅相宣王拨乱世反之正天下略振宗庙复兴申伯仲山甫乃并顺天下匡救邪失喻德教举遗士海内翕然向风故百姓勃然咏宣王之德诗曰周邦咸喜戎有良翰又曰邦国若否仲山甫明之既明且哲以保其身夙夜匪懈以事一人如是可谓救世矣】人亦有言柔则茹【叶麋韵读如乳榮主翻】之刚则吐【麋韵】之维仲山甫【麋韵】柔亦不茹【见上】刚亦不吐【见上左传颠倒引此二句】不侮矜【左传丰本俱作鰥】寡不畏强【韩诗外传作强】御【叶麋韵读如麋鱼矩翻汉书作圉 赋也此章再以其赋政之善言之人亦有言相传之言也後仿此五六章言山甫之贤各以人言起之见恒情如此而山甫不然正其异于凡民处柔刚就人所处之地言引言之意黏着邦国上与第二章柔嘉之柔全无干涉柔郑云犹濡毳也茹说文云飮马也飮者餒也俗作饲按马之食草为茹而孔氏谓菜之入口亦名为茹孟子

言舜之饭糗茹草庄子谓不茹荤即其义也又礼记言饮血茹毛曹居贞云茹者吞啗之名凡鱼肉柔也则吞啗之刚郑云坚强也吐说文云写也曹云骨鲠则吐弃之严云喻陵弱而畏强也侮说文云伤也矜通作鰥孟子云老而无妻曰鰥老而无夫曰寡刘熙释名云鰥愁悵不能寐日常鰥鰥然其字从鱼鱼目恒不闭者也寡偶也偶然单独也畏者惧怯之意强御解见荡篇但彼以强梁御善言此以强梁御人财物言凡人情鲜不茹柔吐刚而非所以语山甫柔莫柔于鰥寡亦不之侮而凡为柔者可知己刚莫刚于强御亦不之畏而凡为刚者可知己孔云不侮不畏即是不茹不吐既言其喻又言其实以充之愚按不侮鰥寡不畏强御亦是借言即扶弱除暴影子见仲山甫所以为王扶政者宽猛相济仁义并用各有当然之则在泽所必加不靳于弱小故无不怀其德势所必行不诘于强大故无不畏其力四方爰发有以也夫苏辙云此诗言仲山甫其始曰柔嘉维则令仪令色此与汉胡广赵戒何异其终曰柔亦不茹刚亦不吐不侮鰥寡不畏强御此与汉汲黯朱云何异胡赵柔而陷于佞汲朱刚而近于狂如仲山甫内刚外柔非佞非狂然後可以为王者之佐当天下之事矣呜呼非斯人其谁与归又韩诗外传云君子崇人之德扬人之美非道谀也正言直行指人之过非毁疵也拙柔顺从刚强猛毅与物周流道德不外诗曰柔亦不茹刚亦不吐不侮矜寡不畏强御又云所贵为士者上摄万乘下不敢傲乎匹夫外立节矜而敌不侵扰内禁残害而君不危殆是士之所长君子之所致贵也诗曰不侮矜寡不畏强御左文十年楚子田孟诸宋公为右孟郑伯为左孟文之无畏为左司马命夙驾载燧宋公违命无畏扶其仆以狗或谓子舟曰国君不可戮也子舟曰当官而行何强之有诗曰刚亦不吐柔亦不茹毋纵诡随以谨罔极是亦非辟强也敢爱死以乱官乎昭元年楚右尹子干出奔晋叔向使与秦公子同食赵文子曰秦公子富叔向曰底禄以德德钧以年年同以尊公子以国不闻以富且夫以千乘弃其国强御已甚诗曰不侮矜寡不畏强御秦楚匹也使后子与子干齿定四年蔡侯吴子唐侯伐楚楚昭王奔郢郢公辛之弟怀将弑王曰平王杀吾父吾杀其子不亦可乎辛曰君讨臣谁敢讐之君命天也若死天命将谁讐诗曰柔亦不茹刚亦不吐不侮矜寡不畏强御唯仁者能之违强陵弱非勇也乘人之约非仁也灭宗废祀非孝也动无令名非知也必犯是余将杀女以王奔随按以上皆断章取义无关诗旨】人亦有言德輶如毛民鲜克举【叶麋韵读如踣果羽翻】之【荀子无之字】我义【此毛传古本陆德明释文同郑笺作仪以後诸本皆从之】图【叶麋韵动五翻】之维仲山甫举【见上】之爱莫助【叶麋韵牀五翻】之袞职有阙维【左传作唯】仲山甫补【麋韵】之【赋也此章推言山甫所以能赋政之善如斯者繇于其中之有德故耳人性中所本具有一物必有一则所谓懿德也輶者轻车也故尔雅训輶为轻言德而言其輶又以如毛比之者取微妙恍惚之义民即烝民之民鲜通作尠说文云少也克能也举者以手挈之天则无形不可控执毫厘之差千里之谬诗意言其微而难举而旧说相承皆以为轻而易举非也邓元锡云夫懿德之则如毛然微乎微者也入微难烝民具有之而鲜其举之按中庸引诗曰予怀明德不大声以色子曰声色之于以化民末也诗曰德輶如毛毛犹有伦上天之载无声无臭至矣夫繇声色之不大而推之于如毛繇如毛而极之于无声无臭则中庸之言德愈精而德輶之义亦可识矣韩诗外传云德也者包天地之美配日月之明立乎四时之调览乎阴阳之交寒暑不能动四时不能化也敛乎太陰而不湿散乎太阳而不枯鲜洁清明而备严威武疾而神竞清而福乎天地之间者德也微圣人其孰能与于此矣诗曰德輶如毛民鲜克举之荀子云财物货宝以大为重政教功名反是能积微者速成诗曰德輶如毛民鲜克举此之谓也我郑云吉甫自我也义毛云宜也图犹度也我义图之即孔子所谓以义度人者我尝于

事事物物之间以当然之宜度之而见山甫之所为无不合乎是者故知此微妙之德惟山甫为能举之如上章言柔不茹刚不吐即其类也义字亦与则字同意爱好也好是懿德之好助犹与也山甫诚心好乎懿德故能举此懿德而人莫有相偕助而好之者此德之所以独让山甫也礼表记篇子曰仁之为器重其为道远举者莫能胜也行者莫能致也取数多者仁也夫勉于仁者不亦难乎是故君子以义度人则难为人以人望人则贤者可知已矣子曰中心安仁者天下一人而已矣大雅曰德輶如毛民鲜克举之我仪图之惟仲山甫举之爱莫助之按德之浑然在心无私意间断则谓之仁故诗以德言孔子以仁言王安石云商之时天下尝大乱矣在位贪毒祸败皆非其人及文王之起而天下之才尝少矣当是时文王能陶冶天下之士而使之皆有士君子之才然後随其才之所有而官使之诗曰岂弟君子遐不作人此之谓也及其成也微贱兔置之人犹莫不好德兔置之诗是也又况于在位之人乎文王惟能如此故以征则服以守则治及至夷厉之乱天下之才又尝少矣至宣王之起所与图天下之事者仲山甫而已故诗人叹之曰德輶如毛惟仲山甫举之爱莫助之盖闵人士之少而山甫之无助也宣王能用仲山甫推其类以新美天下之士而後人才复衆于是内修政事外讨不庭而复有文武之境土褒职郑云不敢斥王之言也孔云以衣服之中有袞冕者是人君之上服故举袞以表君也不言王而言袞犹律谓天子为乘舆也凡事之有专主者谓之职阙本门观之名徐锴云中央阙而为道故谓之阙旧说以阙为空而不完之义盖本于此或通作缺说文云器破也补说文云完衣也孔云服袞冕之人职事有所废阙维仲山甫能补益之谓有所不可则谏争之故可任用以致中兴邓云仲山甫践物维则者也微无不入以补袞袞不废矣按周语宣王立鲁公子戏则山甫有谏料民太原则山甫又谏此其为补王阙也多矣左宣二年晋灵公不君士季曰人谁无过过而能改善莫大焉诗曰袞职有阙唯仲山甫补之能补过也君能补过袞不废矣季云言此以起下章欲其遄归之意又黄震云方博士解王制三公一命袞若有加则赐也云袞虽三公可服非有加则不赐诗言袞职有阙维仲山甫补之盖谓是也此言袞者人臣之极常缺之而不服唯仲山甫加赐而得之是当时所缺而今则补之也按後汉书蔡茂在广陵梦坐大殿极上有三穗禾茂挑取之得其中穗辄复夫之以问主簿郭贺贺离席庆曰大殿者官府之形象也极而有禾人臣之上禄也取中穗是中台之位也于字禾失为秩虽曰失之乃所以得禄秩也袞职有阙君其补之旬月而茂徵焉贺之引诗其意与黄说合然补为完衣之义乃蒙上袞衣而言从左传补过之说於义为允】仲山甫出祖四牡业业【叶韵】征夫捷捷【叶韵】每怀靡及【叶叶韵极叶翻】四牡彭彭【叶阳韵逋旁翻】八鸾锵锵【阳韵陆本作将将】王命仲山甫城彼东方【阳韵赋也顔师古云祖者送行之祭因飧饮焉昔黄帝之子累祖好游而死于道故後人祀以为行神其祭设轍】

【于门外曹云出门而後祖祭故云出祖也详见生民篇四牡驾车之四马业所以悬钟虞曰业业者严以为动而不息之意盖取钟虞摇动之象征夫从行之人也捷通作逮说文云疾也或通作捷说文云攸也攸者便利也一云攸者相次比也其义俱通捷捷郑云言乐事也孔云捷者举动敏捷之貌行者或苦于役则举动迟缓故言捷捷以见其劝乐于事也每怀靡及与皇皇者华义同不独山甫怀如不及事之虑而已虽其征夫亦无人而不然盖山甫之急公所感也然以下章永怀之语观之山甫身远阙庭而心悬启沃其所为皇皇如靡及者亦欲事毕而早还朝耳又韩诗外传云赵王使人于楚鼓瑟而遣之曰慎无失吾言使者受命伏而不起曰大王鼓瑟未尝若今日之悲也王曰调使者曰调则可记其柱王曰不可天有燥湿弦有缓

急柱有推移不可记也使者曰请借此以喻楚之去赵也千有余里亦有吉凶之变凶则吊之吉则贺之犹柱之有推移不可记也故王之使人必慎其所之而不任以辞诗曰征夫捷捷每怀靡及盖伤自上而驭下也彭通作騊说文云马盛也八鸾者四马鑣八鸾铃象鸾鸟朱子云马口两旁各一四马故八是也详见采芑篇说文无鏦字当作璫玉声也鸾声之和似之观采芑篇可见前出祖是将行之时此彭彭璫璫则行而在道矣王命二句始言其所以行之故也东方毛云齐也古者诸侯之居逼隘则王者迁其邑而定其居盖去薄姑而迁于临淄也孔云毛时书籍犹多去圣未远其当有所依约而言也史记齐世家献公元年徙薄姑都治临淄计献公当夷王之时与此传不合迁之言未必实也按薄姑在今山东青州府博兴县临淄今为临淄县亦在青州府朱子云岂徙于夷王之时至是而始备其城郭之守欤邹云天为保天子生山甫王以保王躬命山甫山甫之责甚鉅区区域齐之役曾何足以烦之第成王时召康公亦尝以太保营雒虽王都之肇建不比于侯封然是役也倘非异人堪任堪者必仲山甫乎且山甫于王命固无不能将而城彼东方亦王命之一此行亦未必久淹固不妨其为保躬补阙也王安石云城郭者先王有之而非所以恃而为存也及至喟然觉悟兴起旧政则城郭之修也又常不敢以为後盖有其患而图之无其具有其具而守之非其人有其人而治之无其法能以久存而无败者皆未之闻也故文王之兴也有四夷之难则城于朔方而以南仲宣王之起也有诸侯之患则城于东方而以仲山甫此二臣之德协于其君于为国之本末与其所先後可谓知之矣虑之以悄悄之劳而发赫赫之名承之以翼翼之勤而续明明之功卒所以攘戎夷而中国以全安者盖其君臣如此而守卫之有其具也林氏云宣王时北有獫狁南有荆楚东有徐夷故式是南邦以申伯城彼东方以仲山甫奄受北国以韩侯其为谋甚悉而犬戎自西作焉夫四隅而防其三有变出于不备之方况得一不为备乎又杜钦以山甫为封于齐邓展引韩诗之说亦然王符谓山甫以文德致昇平王封之以乐土皆误】四牡騤騤【支韵】八鸾喈喈【叶支韵坚夷翻】仲山甫徂齐【叶支韵墙之翻】式遄其归【叶支韵读如妨渠为翻】吉甫【丰本作父】作诵穆如清风【叶侵韵孚金翻】仲山甫永怀以慰其心【侵韵 赋也騤说文云马行威仪也喈说文云鸟鸣声徐锴云声衆且和也前言彭彭第咏马之盛此则及其行之容前言鏦鏦第咏声之和此则及其声之衆意微有别而总之皆纪其在道所见耳徂往也式遄其归吉甫告王之词也式发声也遄说文云往来数也毛云疾也欲王敦趣山甫使其疾归也郝云诗称山甫才德位望为王补袞之臣不可一日去王所诗言袞职有阙式遄其归寓讽规之意云尔作诵者作此诗命工歌颂之也穆通作?说文云细文也朱子云如烝民诗大较细腻清风毛云清微之风也篇中缕缕言山甫德业人品心术若讚诵不尽者朝野关重之人谁不爱好播之声诗使人闻之者如清风徐来形神为之俱释而岂肯令久居于外乎吉甫言此非自夸所作之美盖寓规讽于扬厉欲王之深思而自得之也永怀长思也慰说文云安也吉甫以遄归告王所以安山甫之心也张叔翹云山甫一身所系甚重不可一日不在朝廷之上者当时城齐之役未详其事或者当用大臣董治之亦未可晓然山甫一旦去君远行其身远在不得朝夕纳诲顾瞻君侧系心不忘能无永长之怀乎故山甫之城齐而有怀爱君之心也吉甫之作诵以慰山甫亦所以讽王也夫汉臣尚有辞淮阳而愿入禁闕者山甫岂无是心而大臣远役间疏之渐识微如吉甫者安得不深致思哉遄归之语其旨深矣说者谓此诗言降生之异为举德尽职张本言德职之隆为城齐易副张本夫吉甫之反覆赞咏乃仅为一城齐事而仲山甫之惓惓永怀亦止于东方一役而已是岂诗人立言之旨哉】

烝民八章章八句【朱传谓宣王命樊侯仲山甫筑城于齐而尹吉甫作诗以送之申培说同郝云僚友相送非关献纳何登于雅王朝命使往来饯送不少诗可胜录乎】

无羊宣王考牧也【出序子贡传同 考者成也故凡落成曰考郑玄云厉王之时牧人之职废宣王始兴而复之陈氏云牧者牧养畜牲之牢畜牲之多寡足以表国之盛衰故于其牧成而考之孔丛子载孔子曰于无羊见善政之有感也按列子云周宣王之牧正有役人梁鸯者能养野禽兽委食于园庭之内虽虎狼鸚鵡之类无不柔驯者雌雄在前孳尾成羣异类裸居不相搏噬也王虑其术终于其身令毛丘园传之梁鸯曰鸯贱役也何术以告尔惧王之谓隐于尔也凡顺之则喜逆之则怒此有血气者之性也然喜怒岂妄发哉皆逆之所犯也吾岂敢逆之使怒哉亦不顺之使喜也夫喜之复也必怒怒之复也常喜皆不中也今吾心无逆顺者也则鸟兽之视吾犹其侪也故游吾园者不思高林旷泽寝吾庭者不愿深山幽谷理使然也列子之书大都诙诡不足信然彼生于周末而以此事属之宣王则当日宣王之留意牧事可知已】

谁谓尔无羊三百维【读诗记作为】羣【叶先韵逵员翻】谁谓尔无牛九十其牯【叶先韵而宣翻】尔羊来思其角濈濈【缉韵陆德明本作 埤雅作戢戢】尔牛来思其耳湿湿【缉韵 赋也尔指牧人之官旧以为呼宣王似无此理首言谁谓者矜诌之辞季本云无羊无牛者其心不知有羊牛也故人以此谓之然则斯人其百里奚爵禄不入于心而饭牛牛肥之俦与陆佃云羊性喜羣故于文羊为羣犬为独也牯牛名有二义尔雅及尸子云牛七尺为牯又尔雅云黑唇牯说文毛传皆以为黄牛之黑唇者诸家俱从後说愚按牛类虽多不应独举黑唇者言似无意味当是标其最高大者于义为长孔颖逵云羊三百头为羣故一羣有三百不知其羣之有多少也牯者九十头直知牯者有九十亦不知其不牯者之数也来者自外而来归即羊牛下来之来思语辞也濈说文云和也王安石云羊以善触为患故言其和谓聚而不相触也或通作戢戢也陆云其角戢戢羊前其刚以触者也故以其角齐聚为善其耳湿湿言润泽也盖牛之为物病则耳燥安则湿润而泽毛传则谓呵而动其耳湿湿然食已复出嚼之曰呵言其用力故湿湿也董氏则谓牛卧则耳下垂湿者其垂也亦通又祭义云卿大夫袒而毛牛尚耳孔疏谓耳主听盖欲使神听之也然古之盟者亦执牛耳陆谓牛耳无窍以鼻听盟者听于人神故执牛耳正以不听为戒焦贡易林曰牛龙耳聵盖龙亦聵者也先儒以为面牛鼓簧为聵故也以上二说各有取义但与此言牛耳无涉此章先举羊牛之归来者而言已可见其衆盛至若未归来者数目尚繁不仅此三百九十若下二章所称是也严粲云羊不归而聚则不见其角之濈濈牛不归而息亦不见其耳之湿湿两言来思皆所以见牢之成也故首章及之先言羊後言牛者羊躁进竞前又其性畏露每归尝先于牛君子于役篇所谓羊牛下来羊牛下括是也古人立言之不苟如此】或降于阿【歌韵】或饮于池【支韵阿与讹叶池与思叶隔句为韵亦叶歌韵唐何翻】或寝或讹【歌韵韩诗读诗记丰氏本俱作譌】尔【诗缉作而】牧来思【支韵】何【丰本作荷後同】蓑【丰本作衰】何笠或负其鬴【叶宥韵读如候胡茂翻】三十维物尔牲则具【叶宥韵忌救翻 赋也阿曲阜也孔安国云停水曰池讹本作毗说文云动也徐锴云卧既觉必有声气也言羊牛之归者归矣而其未归者或降阿或饮池又或寝者或讹者其不一如此後乃将次第而来归也尔牧指牧养牛羊之人与末章牧人不同彼乃官名统此牧者来思亦谓日将夕而驱牛羊以来归也何说文云

儋也即负荷也蓑说文云草两衣也笠仪礼注云竹?盖也有柄曰簦无柄曰笠蓑笠皆雨具今蓑何之而不披笠何之而不戴则亦但备之而已又笠兼所以御暑日夕则笠亦无所用也负之言背盖音近也古负有背音史记晋世家负父之命正义音佩是也释名云置项背也徐锴云饭乾曰餼言牛羊布满于山谷之间而牧人持雨具齎饮食从其所如以顺适其性故于其来归之时见其装束如此物谓毛物与比物四骊之物同三十维物兼牛羊豕犬鸡五者言之也按周礼牧人职云掌牧六牲而阜蕃其物以供祭祀之牲牲凡阳祀用騂牲毛之阴祀用黝牲毛之望祀各以其方之色牲毛之凡时祀之牲必用牲物凡外祭毁事用髡可也旧说本尔雅六畜之名为六牲谓牛马羊豕犬鸡也愚以为不然马以供驾乘之用原不可为牲所谓六牲者止是以毛色别之耳赭赤黄白黑五色并髡为六色凡牲皆具此六色故谓之六牲髡者髡也裸色曰髡纯色曰牲天与宗庙为阳祀牲毛用赤地与社稷为阴祀牲毛用黑望祀岳渎则随其方之色以取其毛山川以下凡四时之常祀则不拘何色但必取其毛色之纯者其副辜候禴毁除殃咎之属谓之毁事则用裸色之毛此皆所谓物也每牲六色五六三十故云三十维物尔牲则具兼祭祀燕享言牲谓牛羊也郑云始养之曰畜将用之曰牲具备也毛物有三十牛羊各居其六尔之牲索则皆有之也按周礼牛人职云掌养国之公牛以待国之政令凡祭祀共其享牛以授职人而刍之凡宾客之事共其牢礼积膳之牛飧食宾射共其膳羞之牛军事共其犒牛丧事共其奠牛又羊人职云掌羊牲凡祭祀饰羔祭祀割羊牲登其首凡祈珥共其羊牲宾客共其饔羊凡沈辜侯禴衅积共其羊牲若牧人无牲则受布于司马使其贾买牲而共之又周礼有犬人鸡人独无豕人郑以为豕属司空冬官亡故不见孔云此诗唯言牛羊者豕犬鸡则比牛羊为卑故特举牛羊以为美也】尔牧来思以薪【丰本作新】以蒸【韵】以雌以雄【叶蒸韵如乘翻】尔羊来思矜矜兢兢【蒸韵】不騫不崩【蒸韵】麾之以肱【蒸韵】毕来既升【蒸韵 赋也再言尔牧者牛羊多则牧养者亦必多故复举之也上言来思是方归来之时此则已来而至矣郑云麤曰薪细曰蒸说文云雄鸟父雌鸟母此言牛羊驯扰故牧者亦闲暇得乘其余力拾取柴木以供爨燎弋取飞鸟以备饮食至暮乃携之以俱归也又言尔羊来思者此是续归之羊即前所言或降于阿或饮于池或寝或讹者并牛亦在其内而专以羊言者羊性躁竞行常在牛前故特揭之也矜之为言兢也兢之为言竞也陵矜不让竞先争归此羊态也又陆云矜矜言羊之爱牧人也兢兢言羊之畏牧人也牧之为道扰之以顺其性故能使物爱支之以制其放故能使物畏亦通不騫不崩旧说以騫为亏损似也以崩为羣疾则殊不伦愚有二说皆可通天保言如南山之寿不騫不崩则此指山体言也山之中有亏损者有崩圯者今羣羊皆循正道而行未尝奔逸旁出于崎岖险仄之处致难收摄此一说也又说文解騫为马腹繁也崩通作縋束也言此羊驯扰之极不假繁维之拘束之但聽其自行贾思勰所谓羊必须老人及心性宛顺者起居以时调其宜适缓驱行勿停息若使急性人及小儿者拦约不得必有打伤之灾或懒不驱行则无肥充之理是也此又一说也麾通作摩亦作撝王逸云以手教曰麾肱徐锴云臂上一节也毕说文云田罔也以罔罗物尽入其内故尔雅又训毕为尽言毕则兼及牛可知以牛随羊後而至故槩括之也升之为言进也既升者牛羊皆进入于闲也至是而一日之牧事毕矣】牧人乃梦【丰本作?】衆维【潜夫论作惟後同】鱼【韵】矣旒维旒【鱼韵】矣大人占之衆维鱼矣实维丰年【叶真韵奴因翻】旒维旒矣室家溱溱【真韵潜夫论作蓁蓁丰本作□□ 赋也牧人说见次章仲山甫云牧协职周礼牧人下士六人府一人史二人徒二十人上章言牧事有成物各得所如此则年丰人阜自是此时景象所有故其朕兆形于牧人之梦或以为托言者非也衆维鱼

矣言初见为衆而忽见为鱼旐维旐矣言初见为旐而忽见为旐皆梦景如此大人占之解见斯干篇按周礼占梦职云岁终献吉梦于王王拜受之孔谓天下臣民有为国梦者其官得而献之盖此梦是也人多为衆而鱼则其族尤盛故为丰年之兆以年丰则人蕃物阜故梦衆又梦鱼盖富庶之象也郑云旐旐所以聚衆按周礼司常职云州里建旐县鄙建旐州里是州中之里乃六乡之属与五隣之里不同尔雅注以邑居为里故乡师职云凡四时之田前期出田法于州里州长职云三年大比则大考州里里系于州知其非六遂中五隣之里也县鄙乃六遂之属详司常之文乡遂所建惟旐旐二物今既梦旐又梦旐则乡遂之衆罗列咸在故其象为室家溱溱男有室女有家溱通作蓁草盛貌言生齿殷盛也徐光启云记曰问衆人之富数畜以对若止前三章则一庶人之富已耳有此一章便关天下国家之大邹云诗人点缀中兴富庶之兆如此向使千亩之籍时修太原之民不料此丰年溱溱者正未有艾矣曾巩云窃观于诗其所言者盖农夫女工筑室治田师旅祭祀饮尸受福委曲之常务至于兔之武夫行修于隐牛羊之牧人爱及微物无不称纪所以论功德者繇小以及大其详如此後嗣所以昭先人之功当世之臣子所以归美其上非徒荐告鬼神觉寤黎庶而已也书称劝之以九歌俾勿坏盖歌其善者所以兴其向慕之意防其怠废难久之情养之于听而成之于心其于劝帝者之功美昭法戒于将来圣人之所以列于经垂为世教也又陈际泰云卜梦之说惟人以其意言之未知其果安在也衆何以为鱼也民其鱼乎旐何以为旐也小其大乎不数十年诸侯分争神州陆沈而徐吴楚越淫名上淹于天子牧人之梦已妖矣冯时可云宣王雅终无羊隐之哉三百九十澣澣湿湿牧盈而牧人志亦盈矣衆维鱼旐维旐盈之感也太卜之官雷同献谀丰年溱溱何以称焉吁嗟虚美熏心信吉忘凶太子晋伤之曰自我先王厉宣幽平贪天祸至于今未弭宣之埒于三王也其以鲜终哉按二论亦有理并存之】

无羊四章章八句【申培说云宣王考牧史籀美之按宣王诸诗申说多以为史籀作亦无据又按竹书纪宣王八年初考室意考牧亦同时事也】

车攻美大田也宣王朝诸侯于东都遂狩于圃田诗人美其能复古【按竹书宣王九年王会诸侯于东都遂狩于圃即此诗事也又墨子云周宣王杀其臣杜伯而不辜杜伯曰吾君杀我而不辜若以死者为无知则止矣若死而有知不出三年必使吾君知之其三年周宣王合诸侯而田于圃田车数百乘从数千人满野日中杜伯乘白马素车朱衣冠执朱弓挟朱矢追周宣王射入车上中心折脊殒车中伏弢而死当是之时周人从者莫不见远者莫不闻着在周之春秋今考竹书则杀杜伯乃宣王四十三年事至四十六年而王陟岂宣王之时曾两合诸侯于圃田欤序云车攻宣王复古也宣王能内修政事外攘夷狄复文武之境土修车马备器械复会诸侯于东都因田猎而选车徒焉朱子云此诗所赋自修车马备器械以下其修政事攘夷狄则前乎此矣孔穎達云序以选徒本为田猎故言因田猎选车徒也言因者以见王为因会而猎也王者能使诸侯朝会是事之美者故以会诸侯为主焉严粲云宣王中兴为东都之会诗人自于复见威仪之盛故铺张杨厉以见喜谈乐道之意邹忠胤云尝观无逸之训曰继自今嗣王则其无淫于观于逸于游于田乃诗美宣王田事何也此正宣王所为无逸也盖古者蒐苗獮狩之法实与军政相为表里先王陰用其道使人繇而不知而後王藉为利兽之乐宣王之举则异乎是彼其乘积衰之後奋然图治蛊事终而鼎事始东莱吕氏所谓王赋复军实盛师律严上下洽综理周者盖具见之左传楚椒举曰夏启有钧台之享商汤有景亳之

命周武有孟津之誓成有岐阳之蒐康有酆宫之朝穆有涂山之会皆所以示诸侯礼也诸侯所繇用命也夏桀为仍之会有缙叛之商纣为黎之蒐东夷叛之周幽为太室之盟戎狄叛之皆所以示诸侯汰也诸侯所繇弃命也然则讲事度轨岂繁细故其亦趾美成康者欤王道云天下虽安忘战必危故周召二公于成王康王之初皆以诰尔戎兵张皇六师为言正恐守文之主溺于宴安忽忘武备驯至陵夷以阶祸乱耳况周家以仁厚立国其势颇弱穆王几致徐方之乱昭王南征不复至于厉王遂死于彘虽诸王君人之道有所未尽而兵威不振无以慑服人心亦可见矣宣王丁积衰之後乃能蒐乘讲武蓄威昭德以成中兴之美以复祖宗之旧深合二公诰兵之意故诗人喜而幸之】

我车既攻【东韵子贡传申培说丰氏本俱作工】我马既同【东韵】四牡庞庞【叶东韵卢东翻】驾言徂东【韵赋也考工记攻木之工七轮舆弓庐匠车梓董氏云攻者治也治而成其良故曰攻同齐也尔雅云宗庙齐毫戎事齐力田猎齐足毛传云齐毫尚纯也齐力尚强也齐足尚疾也孔云祭于宗庙当加谨敬取其同色也兵革战伐之事当齐其力以战田猎取牲于苑囿之中追飞逐走取其疾而已此车马皆所以备田猎之用者曰既攻既同见天子中兴百度惟新田赋复马政修非如昔日车马之凋敝也朱善云车攻马同泛言其军实之盛也四牡庞庞则自君子所乘者言之也庞通作彪说文云石大貌盖象马之壮大也凡君出必先命有司所之故曰驾言徂说文云往也东东都雒邑也左传成王合诸侯城成周以为东都宣王既备车马因命驾将如东都严云言往东都未言所为之事也蔡汝楠云周公营雒非独化殷中原之地镐远雒近雒中乃兵车辐凑之处天子都镐以建邦极幸雒以合中原正圣人貽谋之精也车攻幸雒蒐狩故诗人美而咏之晁氏云昔夏后初都阳城南踰雒阳百里而远成汤迁亳殷东踰雒阳五十里而近皆会雒阳而不都周兴武王既定鼎郊廓厥後召公相宅雒邑周公营成周其意盛矣而成王卒不果迁逮夫宣王中兴自济之雒狩于圃田及于敖山因以朝诸侯车攻之诗作焉岂不欲成周召之志欤惜夫宣王卒亦不果迁矣至平王是迁而周衰矣王安石云成王欲宅雒者以天事言则日东景朝多阳日西景夕多陰日南景短多暑日北景长多寒雒天地之中风雨之所会陰阳之所和也以人事言则四方朝聘贡赋道里均焉虽然镐京宗庙社稷官府宫室具在不可迁也故于雒时会诸侯而已何以知其如此以诗考之宣王时会诸侯于东都而车攻谓之复古邹云夫东都者盖先王之所高会四方之所轨则康朝酆宫穆会涂山皆不于东都若夫楚泽胶舟徐方回马又无论矣宣王此举岂非目中夏而布德瞰四裔而抗棱者哉按春秋成周宣榭火公羊传谓成周者东周也楚语云先王之为台榭也榭不过讲军实汪克宽谓疑宣王南征北伐讲武于此遂以为庙张洽则谓宣王复会诸侯于东都因存其庙古者祖有功故不毁也】田车既好【叶有韵许厚翻】四牡孔阜【有韵丰本作?】东有甫【文选注水经注俱作圃後汉书作圃】草【叶有韵此苟翻羣书音辨丰本俱作^廿】驾言行狩【叶有韵始九翻丰本作守赋也严云此章乃言所为之事田车田猎之车木路是也周礼王五路五曰木路以田亦曰田路考工记云田车之轮六尺有三寸好善也四牡即上章之四牡所以驾王车者周礼所谓田马也孔阜解见驷铁篇高厚之意上言庞庞象其大此言孔阜则象其高而且厚也甫草郑云甫田之草也郑有甫田尔雅作圃田十藪之一泽无水者曰藪郭璞云今荥阳中牟县西圃田泽是也郡县志云圃田泽一名原圃在中牟县西北七里其泽东西五十里南北二十六里或疑下章言搏兽于敖与此甫草行狩地名互异谓不应既猎于此又猎于彼按今河南通志古敖城在荥泽县西南十七里荥泽南

至郑州界五里郑州东至中牟县界三十五里中牟菴泽在晋俱属荥阳郡在金俱属郑州至我朝以菴泽属郑州与中牟俱隶开封府二地相去本不甚远据郡县志言圃田泽东西长五十里则敖地正在圃田中耳酈道元云圃田泽多麻黄草述征记曰践县境便覩斯卉穷则知踰界诗所谓东有圃草也孔云宣王之时未有郑国圃田在东都畿内故宣王得往田焉按宣王封庶弟友于西都咸林之地是为郑桓公其子武公当平王时徙封于东都然後圃田为郑地陈傅良谓诗不以圃田系郑犹春秋不以沙麓系晋以为九州川浸泽藪名在职方不属诸侯之版此说非也其所以取名为甫者毛传训甫为大周语云藪有圃草圃有林池韦昭亦训圃为大古文甫圃通用然则此藪盖亦以有茂大之草而得名穆天子传所云天子里甫田之路东至于房即此地也行谓往至彼也狩尔雅周礼左传皆以为冬猎之名按下章言之子于苗则是夏猎而此云狩者孔氏谓凡田之礼惟狩最备故以为猎之总名又蒐苗猕狩四时虽各异名惟苗猕二者不为他时他事借用若比年简徒亦名为蒐五年大简车徒名谓大蒐春秋书蒐者五皆简车徒之蒐也岂非以春蒐为田事之始冬狩为田事之终故大其名而借以他用乎胡安国云蒐狩所以讲大事也然不时则害农不地则害物田狩之地如郑有原圃秦有具圉皆常所也违其常所犯害民物而百姓害之则将闻车马之音见羽旄之美举疾首蹙頞而相告可不谨乎钱天锡云行狩分明以收文武之盛业合宇宙之人心非区区从兽也】之子于苗【萧韵亦叶豪韵谟袍翻】选徒蹢躅【萧韵亦叶豪韵牛刀翻丰本作?】

建旐设旄【豪韵】搏【东京赋水经注後汉书注俱作薄】兽【东京赋水经注後汉书注俱作狩】于敖【豪韵 赋也之子毛云有司也朱子云不敢斥王故以有司言之于者助语之辞字本作亏说文云象气之舒从亏从一一者其气平之也试言于则口气直平出也未章之子于征放此苗周礼尔雅左传皆以为夏猎之名公羊传以苗为春猎又谓夏不田非也所以名苗者杜预云为苗除害也又郑玄孙炎皆以为择取不孕任者若治苗去不秀实者刘向亦云苗者毛也取之不围泽不掩羣取禽不麝卵不杀孕重者选通作算亦作撰数也徒步行之衆也不言车者举徒以该车亦以首章先已言车至第七章徒御不惊则于二者皆兼举之也蹢说文云声也气出头上从?从页页首也郑氏云象声之形声形不可象故象其气从口出也重言蹢蹢者以车徒多故算数之声衆而且盛按周礼大司马职云中夏教茷舍如振旅之陈羣史撰车徒读书契辨号名之用帅以门名县鄙各以其名家以号名乡以州名野以邑名百官各象其事以辨军之夜事其他皆如振旅遂以苗田如蒐之法郑氏注云茷舍草止也军有草止之法草止者谨于夜于是主别其部职王安石云教茷舍者教以草舍之法撰车徒所以具之读书契所以声之皆比军事也比军事为将茷舍焉古者昼战则目相视故为之旗旌夜战则声相闻故为之号名草舍欲其名声相闻足以相别而已辨号名固其宜也此诗所咏选徒蹢蹢即周礼撰车徒读书契辨号名之事也时王行未至东都而有司戒徒以待其事如此旐者郊野县鄙所建周礼中秋教治兵则郊野载旐及国之大阅则县鄙建旐其夏苗建旐礼无明文然引类通之距国五百里为远郊周之东都在今河南府敖在今开封府与东都相去正四五百里其地则远郊之野其人则畿内县鄙之衆理皆得建旐也建树也树以致民非建之于车之谓设施也旐者以旐牛尾结为之施于旐之首如今之幢解见干旄篇搏说文云索搏也与捕同义搏兽在天子诸侯大夫既射之後王制所谓佐车止则百姓田猎是也建旐设旄以召致县鄙之民近于敖地者俾皆来会而搏兽于敖此又出选徒之外周礼县师职云若将有田役之戒则受法于司马以作其衆庶使皆备旗鼓兵器以帅而至遂人职云凡师田任

野民帅而致以遂之大旗致之县正职云若将用野民师田行役则帅而至皆其事也敖山名史记作敖尚书序作鼯殷帝仲丁迁都于鼯即此周时名北制其城在敖山之阳秦于此筑仓是为敖仓亦曰敖庾郡国志云河南荥阳有敖亭周宣王狩于敖即其地也吕祖谦云晋师救郑在敖鄙之间士季设七覆于敖前则敖山之下平旷可以屯兵翳荟可以设伏所谓东有甫草即此地也宣王之往东都以会诸侯为主因田猎以选车徒而二章三章先言田猎者盖有司先为戒具以待毕而田猎也】驾彼四牡四牡奕奕【陌韵】赤芾【白虎通作紕丰本作市】金舄【陌韵】会同有绎【陌韵 赋也四牡即前章之四牡王所乘也严云泥一彼字以为指诸侯之四牡非是奕说文云大也曰奕奕者大而相连之貌或通作翼翼此时王已行而将至矣赤芾以下言诸侯来朝也序所谓会诸侯于东都者即此天子朱芾诸侯赤芾然按礼君鞞用朱则诸侯之在其国亦得用朱芾唯入朝于天子乃用赤芾所以别于天子也又礼三命以上皆赤韍说见采芑篇罗泌云车攻之诸侯会王则赤芾而不以朱韍礼之侯氏朝则墨车而不以辂盖诸侯之在国则南面制节以存君道而有以与王同徕朝则北面谨度以全臣道而必以与王异此礼之大辨也舄毛云達屨也古今注云以木置履下乾腊不畏泥湿故曰舄说文本舄字象形陆佃云今通为履舄之舄古人居欲如燕行不欲如舄故借为舄字所以为行戒也孔云重底者名舄单底者名屨凡屨舄各象其裳之色周礼屨人职云掌王及后之服屨为赤舄黑舄赤纁黄纁青句素屨葛屨纁者牙底相接处缀绦于其中句通作絢谓絢头以绦为鼻絢者拘也取拘持之义舄以赤为上王冕服之舄也然诗咏周公曰赤舄几几咏韩侯曰玄衮赤舄则诸侯之舄与王同此云金舄者郑以为黄朱色按黄朱色名金义所未闻当是诸侯之舄虽赤色而终与王之赤舄异大都朱色较浅黄色较深金之为色黄主黄而言故遂曰金舄也孔谓加金为饰殊无依据若唐制以金饰履则亦祖孔之说耳周礼大宗伯职云时见曰会殷见曰同郑氏注云时见者言无常期诸侯有不顺服者王将有征讨之事则既朝觐王为坛于国外合诸侯而命事焉春秋传曰有事而会是也殷犹衆也十二岁王如不巡狩则六服尽朝朝礼既毕王亦为坛合诸侯以命政焉绎说文云抽丝也抽丝愈长连属之义也故往来不絶曰络绎会同有绎者言诸侯先此既已行会同之礼矣因王有于苗之举复于会同之外络绎而来朝见也或问诸侯见王不过春朝夏宗秋觐冬遇时会殷同六礼此有绎而来既不名为会同当属何礼曰彼所谓宾礼也此则大田简衆之礼所谓军礼也大宗伯以宾礼亲邦国以军礼同邦国观秋猕及大閱颁旗物之法皆有诸侯载旗建旗之文可见矣从王于田必先见王则此诗所咏是也旧说不達文义即以此举为会同又见会同原属二礼不得并行遂谬为会同即来朝之通称孔氏则但以字义强解谓会者交会同者同聚其鄙率可笑更甚曹居贞云东都雒邑本诸侯朝觐之地而夷厉以来此礼久废宣王中兴复古甫见斯会诗人所以美之也陈际泰云此宣王微权之所在也天下新服不可不借蒐狩之礼略地而会诸侯以振耀其甲兵是故天王狩于河阳因狩而行朝礼文公之微权也车攻狩于东都因狩而行会礼宣王之微权也】决【周礼注作挾陆德明本作夬】拾既攸【叶支韵读如兹津之翻荆有攸飞吕氏春秋作兹飞可证周礼注作次】弓矢既调【叶东韵徒红翻此章四句以中二句相连为韵首末二句遥应为韵亦一奇体丰氏本作弓矢既调决拾既攸】射夫既同【东韵】助我举柴【叶支韵楚宜翻说文作?赋也诸侯既会将行田猎此章乃言其它器除地之事决通作挾其义训挑也毛云钩弦也朱子云以象骨】

【为之着于右手大指所以钩弦闔体详见芄兰篇拾义训掇郑云鞬扞也着左臂里以韦为

之诗诂云韬左臂拾其衣袖以利弦曰拾亦名为遂取其能遂弦也内则名为扞为其可以扞弦也陈祥道云扞拾遂一物而三名决以护大指拾以护左臂攸说文云便利也弓矢字俱象形吕不韦谓蚩尤作弓荀卿谓浮游作矢说文世本皆谓挥作弓夷牟作矢山海经谓少皞生般是始弓矢莫之详也调说文云和也郑云谓弓强弱与夫轻重相得周礼司弓矢掌六弓八矢之法辨其名物夹弓庾弓以授射鸟兽者杀矢鍬矢用诸田猎考工记云凡为弓各因其君之躬志虑血气丰肉而短宽缓以荼若是者为之危弓危弓为之安矢骨直以立忿执以奔若是者为之安弓安弓为之危矢又云其人安其弓安其矢安则莫能以速中且不深其人危其弓危其矢危则莫能以愿中谢枋得云矢之轻重必视弓力之强弱弓强而矢轻则不中弓弱而矢重亦不中既调谓配和弓矢以待观下章四黄既驾专主王车而言则此攸决拾调弓矢皆是待王射周礼繕人职掌王之用弓矢挾拾掌诏王射即其事也射夫自诸侯而下凡与于射者之通称孔云夫者男子之总名按宾之初筵乃卫武公为王卿士时所作纪天子大射之事亦咏射夫既同可见与射之诸侯皆通称射夫也同说文云合会也助说文云佐也主王事而言故曰我举挈也说文云对举也柴说文云小木散材徐锴云师行野次竖散木为区落名曰柴篱後人语譌转入去声又别作寨字非是愚按此即艾草为防纏质为 之事也毛传云田者大芟草以为防褐纏旃以为门裘纏质以为 左者之左右者之右然後焚而射焉孔云芟杀野草以为防限作田猎之塲拟杀围之处既为防限当设周卫而立门乃以织毛褐布纏通帛旃之竿以为门之两傍其门盖南开并为二门用四旃四褐也又以裘纏樅质以为门中之闐闐车轨之里两边约车轮者以天子六军分为左右令三军各在一方其属左者之左门属右者之右门不得越离部伍以此故有二门也谷梁传文与毛小异云艾兰以为防置旃以为辕门以葛覆质以为 疏云兰是草之贵者广泽之内而衆同生艾之为防则逢兰当剪故举以包之置旃以为辕门者谓以车为营举辕为门又建旃以表之质者中门之木樅谓恐木樅伤马足故以葛草覆之以为 合毛传谷梁二设则防限之设当如柴篱竖橛门中原需短木故皆用柴特以莱田立表乃虞人事而衆射夫协为之是之谓助我举柴也内如诸侯大夫虽无自举柴之理然命其部衆举之亦得名助又按礼记月令季冬收秩薪柴注谓大者可析谓之薪小者合束谓之柴薪施炊爨柴以给燎故尔雅祭天曰燔柴注以为既祭积薪烧之今宣王此举乃属夏苗夏苗之教以芟舍为名其所辨者军之夜事当是夜猎盖所以习夜战也夜必用燎故尔雅云宵田为獠或亦取义于燎郭璞注云即今夜猎载鑪照也然则助我举柴所以给燎亦通但如此说则射夫不过指士卒辈耳自说文改柴为?其义训积先儒遂以为举积禽也夫苗事未行何禽之积试按章次绎之亦自觉其不可通矣】四黄既驾两骖不猗【叶寘韵于寄翻亦叶个韵于个翻朱传丰本俱作倚】不失其驰【叶寘韵直冒翻亦叶个韵徒卧翻】舍【音舍】矢如破【个韵亦叶寘韵披义翻 赋也此章方言田猎事以首句贯之知专主宣王言也四黄即前之四牡王云向曰四牡则既言力之强今日四黄则又言色之纯陆佃云黄驎曰黄黄亦马之上色故駟颂首章曰有骃有黄也明堂位曰周人黄马蕃鬣言吉事乘此诗曰四黄既驾是也愚按周书康王之诰诸侯入见新王皆布乘黄朱注谓陈四黄马而朱其鬣以为庭实是亦周马贵黄之明证又汉乐府云君马黄臣马苍独言两骖者骖在服外易于出入也陆谓天子之马盛则驾六常则驾四以四黄两骖为驾六要属臆说不足信猗通作倚朱子云偏倚不正也韵会云相附着也驰说文云大驱也不失谓不失其法舍通作舍释也如破者郑云矢发则中如椎破物也旧说谓自左髀達于右膂为上杀能如是则可谓如破矣此章之义须取谷梁及毛氏二传解之方明谷梁传云艾兰以为防置旃以为辕门以葛

覆质以为 流旁握御轡者不得入车轨尘马候蹄掩禽旅御者不失其驰然後射者能中过防弗逐不从奔之道也疏云流旒古字通流旁握者谓建旒表门之旒旁去车之两轴各一握握四寸也轡谓挂着若车挂着门则不使得入以耻其御拙也车轨尘谓驱车尘不出轨辙马候蹄谓四蹄皆发後足蹶前足而相伺候掩禽旅旅衆也谓掩取衆禽愚按礼云不掩羣何得尽旅禽而掩取之详其语意聯属下文言欲掩取衆禽必须御者不失驰骋之节然後射可中而禽可得非谓真掩旅也至若车挂门则自不能入亦非谓其御拙取之使不得入也毛传之文与谷梁少异云褐纆旒以为门裘纆质以为 闲容握驱而入系则不得入疏云门之广狭两轴头去旒竿之间各容一握握人四指为四寸是门广于轴八寸也入此门当驰走而入不得徐也若驱之其轴头系着门旁则不得入也合以上二传文观之车两轴去门各止四寸其窄已甚若轴头挂于门则不得入故有贵于两骖不倚也入此门当驰走而入盖乘车驰之势以从禽若稍徐则禽必失故有贵子不失其驰也不失其驰然後射者能中是以舍矢如破也学者不明古礼安能解古经哉又按周礼保章氏掌教国子五驭之法一曰鸣和鸾二曰逐水曲三曰道君表四曰舞交衢五曰逐禽左详俱见太叔于田篇五御中惟道君表逐禽左二者为田猎所用若此章之御乃道君表耳所以知其非逐禽左者以逐禽左乃驱逆之车名为佐车此首云四黄既驾则君车也故知其为道君表也详此则上章先言助我举柴正为此章而发其为设防树 之事无可疑者孟子云昔者赵简子使王良与嬖奚乘终日而不获一禽嬖奚反命曰天下之贱工也或以告王良王良曰请复之强而後可一朝而获十禽嬖奚反命曰天下之良工也简子曰我使掌与女乘谓王良王良不可曰吾为之范我驰驱终日不获一为之诡遇一朝而获十诗曰不失其驰舍矢如破我不贯与小人乘请辞御者且羞与射者比比而得禽兽虽若丘陵弗为也】萧萧【二字当作去声读】马鸣【庚韵】悠悠旒旌【庚韵】徒御不惊【庚韵】大庖不盈【庚韵 赋也萧通作啸吹声也马鸣之声似之重言之者非一马也按毛传云天子发然後诸侯发诸侯发然後大夫士发上章所言舍矢是天子发之事天子既发则诸侯大夫士继之矣此所云萧萧马鸣当是诸侯大夫士所乘之马其更进迭骛之状总于此四字括之又周礼田僕职云设驱逆之车凡田王提马而走诸侯晋大夫驰驱谓驱出禽兽使趋田逆谓逆要不得令走若王提马首而走其田路将以趋其禽而射之则诸侯自晋其车大夫自驰其车皆所以佐佑翼禽致获于王也详此则萧萧之声在此时亦有然如此则是但纪天子之射其诸侯以下之射更不言及于纪事之义阙矣不如前说为密悠通作?说文云旒旗之流也音义与旒字俱同流即旒也以下言旒旌皆有旒故重言之曰??亦犹朱纁鑣鑣云非一鑣也旒解见出车篇旒惟旒有之与第三章建旒设旒相应以其地在郊野故自始事至终事皆建此旒也旒解见干旄篇此旒即虞旌也所以属禽者按毛传云天子发抗大绥诸侯发抗小绥献禽于其下发者发矢以射也抗举也绥当作綏旒旗无旒者周谓之大麾巾车职所谓建大麾以田是也各举绥以为表因献其所获之禽于其下田僕职所谓令获者植旌是也此第一节事又王制云天子杀则下大绥诸侯杀则下小绥大夫杀则止佐车佐车止则百姓田猎杀者射而杀之也下者弊也谓弊仆于地也初杀之时各抗其绥而举之已杀之後各仆其绥而弊之此第二节事孔氏云因置虞旗于其中受而致禽焉受禽猎止则弊之此第三节事也虞又有山泽之异山虞职云若大田猎则莱山田之野及弊田植虞旗于中致禽而珥焉注谓山虞有旗以其主山得画熊虎珥者取禽左耳以效功也泽虞职云若大田猎则莱泽野及弊田植虞旌以属禽注谓泽虞有旌以其主泽泽鸟所集故得注析羽也属禽亦犹致禽而珥焉详二虞所职山以旗泽以旌各有专属圃田系泽理当植泽之旌今此诗以旌言

与周礼殊合先既设旃後复设旌盖正当比禽之时而猎事亦将毕矣徒即选徒之徒御御车者尔雅合释徒御为輶者不足信也惊朱子云如汉书夜军中惊之惊不惊犹言不扰也此言其分禽时也大兽公之小禽私之何惊扰之为郊特牲云简其车赋历其卒伍左之右之坐之起之以观其习变也而流示之禽而盐诸利以观其不犯命也求服其志不贪其得故以战则克以祭则受福按流示诸禽而盐诸利者流如水之流言多也盐与艳通利则禽也多示之以禽而歆艳之以得禽之利若皆能不犯君命不贪苟得则何往不可是所谓不惊者也大庖朱子云君庖也不盈兼二义取之节颁之均则君庖不得盈满矣王制云天子诸侯无事则岁三田一为乾豆二为宾客三为充君之庖无事而不田曰不敬田不以礼曰暴天物天子不合围诸侯不掩羣不麝不卵不杀胎不殀夭不覆巢孔云一曰乾豆谓第一上杀者乾之以为豆实供宗庙也二曰宾客谓第二中杀者别之以待宾客也三曰充君之庖谓第三下杀者取之以充实君之庖厨也君尊宗庙敬宾客故先人而後己取其下也毛传云自左髀而射之达于右髀为上杀射右耳本次之射左髀达于右?为下杀面伤不献践毛不献不成禽不献髀三苍云小腹两边肉也说文云胁後髀前合革肉也徐以为肉最薄处合革肉言皮肉相合也髀郭璞云肩前两间骨也射右耳本郑云射当为达髀说文云股也?释文云谓水赚也字书无此字或作髀孔云自左髀而射之达过于右肩髀为上杀以其贯心死疾肉最洁美故以为乾豆也射右耳本亦自左射之达右耳本而死者为次杀以其远心死稍迟肉已微恶故以为宾客也射左股髀而达过于右肋?为下杀以其中肋死最迟肉又益恶充君之庖也凡射兽皆逐後从左厢而射之达于右?言射左髀则上杀达于右髀当自左肋也次杀右耳本当自左肩髀也不言自左举下杀之射左髀可推而知也面伤不献者谓当面射之翦毛不献谓在傍而逆射之二者皆为逆射不献者嫌诛降之义不成禽不献者恶其害幼少此不能使猎者无之自君所不取以示教法耳又范甯云上杀中心速死乾之以为豆实次杀射髀骼死差迟故为宾客下杀中肠污泡死最迟故充庖厨与毛说异也谷梁传云禽虽多天子取三十焉其余与士衆以习射于射宫射而中田不得禽则得禽田得禽而射不中则不得禽是以知古之贵仁义而贱勇力也孔云三十者宗庙宾客君庖各十也按合围杀胎等事在礼既皆有禁及三等之?又惟下杀乃充君庖且仅止于得十其余自总数三十而外皆以分赐则大庖不盈可知爱物之仁处己之约待人之周胥于此见之後世作赋者曰收禽举觥数课衆寡置互摆牲颁赐?卤割鲜野飧犒勤赏功乐不极盘杀不尽物马踠余足士怒未□盖亦即此诗而衍之也而又有云禽相镇压兽相枕藉风毛雨血洒野蔽天则几乎导侈而先王之意微矣】

之子于征【庚韵】有闻无声【庚韵】允矣【礼记作也】君子展也大成【庚韵 赋也朱子云此章序其事既毕而深美之也征说文云正行也谓以正道行也之子于征犹云之子之为此行也有闻谓有声誉着闻无声谓无事条教号令言不动声色而人自化之也苏辙云我必声之然後人闻之我则不声而人则闻之必其实有余也允信也君子兼德位言循礼而动以古为师信哉其德足居人上矣展说文云转也大成谓功业大有成就宣王维新百度整肃人心繇此转进而不已则将有大成之业也礼记子曰言从而行之则言不可饰也行从而言之则行不可饰也故君子寡言而行以成其信则民不得大其美而小其恶小雅曰允也君子展也大成愚按味孔子之解诗如此亦可以悟有闻无声之说矣毛传误解无声为无喧哗之声遂将篇中选徒蹢蹢萧萧马鸣悠悠旆旌徒御不惊等语皆槩以无喧哗解之诸家递相祖述且以此为至极妙义正不知即如此三字亦有何名理有何意趣古礼典故通不研涉何繇得见古人诚可叹也朱子云好田猎之事古人亦多刺之畋于有雒五子作歌以告太康恒于

游畋伊尹作训以告太甲矣然宣王之田乃是因此见其车马之盛纪律之严所以为中兴之势者在此其所谓田者异乎寻常之田矣徐光启云靡不有初鲜克有终故曰行百里者半于九十言末路之难也宣王赫然中兴几复文武之旧而迨其晚节竟以鲜终则展也大成之一言已逆窥而微讽之矣为此诗者意亦吉甫之流与】车攻八章章四句【朱子云以五章以下考之恐当作四章章八句今按以文势考之每章四句自为段落条理井然断当依旧子贡传以为宣王閱武申培说以为宣王大閱于东都诸侯毕会史籀美之皆妄说也明言之子于苗何谓大閱乎】

泛彼柏舟卫共姜自誓也厘侯世子共伯蚤死其妻守义母欲夺而嫁之誓而弗许故作是诗以絕之【出序朱传从之但本文母字上有父字愚特据经文去之又卫风有柏舟今加泛彼二字为别厘侯一作僖侯共伯一作恭伯名余恭其諡也恭伯娶齐武公之女考史记齐武公二十四年周宣王初立二十六年武公卒实宣王之三年卫厘侯二十八年周宣王立四十二年厘侯卒实宣王之十五年俱与竹书合世子共伯之卒其年无考据诗中有母也天只之语当在武公已歿之後】

泛彼柏舟在彼中河【歌韵】□【说文作紃释文作□】彼两髦【韩诗作□说文作□】实维我仪【叶歌韵牛河翻】之死矢靡它【歌韵今本或作他】母也天【叶真韵汀因翻】只不谅【尔雅作亮】人【真韵】只【兴也柏舟解见亦泛其流篇共姜取以自况也中河河中也舟在河中犹妇人之在夫家舟不可以去水以兴妇必不可以他适也曹氏云齐地西以河为境而卫居河之西共姜归齐则当乘舟渡河而去故即此以起兴又季本云柏舟坚实而在中河以比志节之坚而夫死无所着也亦通髦朱子云髮垂貌按说文无髦字惟作紃葛覃注云紃织五采如绦状用县瑱者此则系髦之彩也毛传云髦者髮至眉子事父母之饰项安世云以髮作伪髻垂两眉之上如今小儿用一带连双髻横系额上是也礼记注云髦象幼时髻小儿剪髮也儿生三月剪髮为髻男角女羈夹囟曰角两髻也午达曰羈三羈也否则男左女右长大犹为饰存之谓之髦所以顺父母幼小之心内则所云子事父母拂髦是也若父母有先死者于死三日脱之服阕又着之若二亲并歿则因去之矣玉藻所云亲没不髦是也又云父死脱左髦母死脱右髦亲始死犹幸其生未忍脱之故士待既殯诸侯待小殮而後脱之也世子朝君亦以拂髦为饰所谓拂髦者谓拂去髦上之尘也此两髦之人指共伯也以夫已死不忍斥故以其生前事亲之饰言之我共姜自我也仪吕氏云以夫为法也犹夫曰皇辟辟亦法也刑于寡妻之谓也又按尔雅毛传皆训仪为匹书凤凰来仪注以为相乘匹及国语丹朱冯身以仪之注亦谓冯依其身而匹偶之二义皆通之犹至也矢誓也靡无通它它适也言至于死誓不他适也母也天只情极而呼天以告也只说文云语已辞也陆佃云女子从母而已故称母焉朱子云母之于我覆育之恩如天罔极故曰天只谅信也言我心之坚贞如是何母之不见信我也徐光启云不谅人只不可说坏盖母之欲嫁共姜不过儿女之情姑息之爱为之虑其所终耳今共姜之自誓知此母方且信其心之不二幸其节之可终惑可解而虑可息矣按丧服传云夫死妻禭子幼子无大功之亲妻得与之适人或谓据此则于礼得嫁但以守义言终不如不嫁为善礼谓一与之齐终身不改是也或问程子有孤孀贫穷无托者可再嫁否曰只是後世怕寒饿死故有是说然饿死事极小失节事极大】泛彼柏舟在彼河侧【职韵】髦彼两髦实维我特【职韵韩诗作直云相当值也】之死矢靡慝【职韵】母

也天【见前】只不谅人【见前】只【兴也季云柏舟在河侧则有畔岸盖以礼义为依也特之言独音之近也从一而终故称夫曰我特胡氏云愿字从心从匿盖恶之匿于心者按说文无愿字当通作匿旧说以为陰奸也上章言他适而誓之死无为其事犹显至于一念邪思之微亦誓至死而靡发可见其心之贞固而节不渝矣邓元锡云易淫莫若贞故鄱首柏舟明贞者性也风渍乃流岂系固然及其本而风可正也移风之道也王慎中云古载籍可见其辨于妇人女子之事莫诗详矣事之大者宜莫如节礼所谓一醮不改名之曰信是为妇德而所以事人者也今考其诗以节着者共姜一人而已诗之所载自芣苢湘藻求桑采蘋抱衾宜雁裸佩蓄旨敬一职而勤细事皆录于师氏仲尼存之以教不宜详小而顾略于大岂诗之所载皆妇人之能言者其以节自全者或偶不能言师氏无从采而仲尼亦不得而存之与至于春秋所书终始全节不失妇道者惟纪叔姬又何其靳也繇是以推而节之难全也盖可见矣】泛彼柏舟二章章七句【序谓共姜守义父母欲夺而嫁之申培说亦云卫厘侯在位世子共伯先卒共姜守义齐武公欲召之归宁而嫁之共姜不许故作此诗今按诗中惟言母也天只无呼父之文则谓此诗作于齐武公在时者非也乃史记世家则曰卫厘侯卒太子共伯余立共伯弟和有宠于厘侯多与之赂和以其赂赂士攻共伯于墓上共伯入厘侯墓自杀墓道也卫人因葬之厘侯墓旁諡曰共伯而立和为卫侯是为武公吕祖谦云按武公在位五十五年国语又称武公年九十有五犹箴儆于国计其初即位其齿盖已四十余矣使果弑共伯而篡立则共伯见弑之时其齿又加长于武公安得谓之蚤死乎髦者子事父母之饰诸侯既小敛则脱之史记谓厘侯已葬而共伯自杀则是时共伯既脱髦矣诗安得犹谓之髦彼两髦乎是共伯未尝有见弑之事武公未尝有篡弑之恶也愚按共伯蚤卒于厘侯在位之时故序以世子称东莱之辨最为明晰以篡弑之恶加之叡圣武公万无此理郝敬邹忠胤则谓此共姜未嫁而自誓之诗以为两髦乃童子之饰即非是也分髮作双髻字取象形内则曰鸡初鸣埽纵笄总拂髦冠綏男女未冠笄者亦埽縱拂髦总角其言妇事舅姑止埽縱笄总衣绅并不言拂髦则髦为男子已冠未冠及女子未嫁者之通饰汉儒以初生之髻垂两眉之上者释拂髦窃意古今体制或不甚相远若既冠而仍横系双髻于额端成何法象观内则以拂髦先冠綏先总角则冠者必先拂髦而後加冠髦当在冠内未冠者拂髦而总为之角斯真童子之饰所谓两髦者此是耶礼男子冠而後娶共伯两髦故知共姜尚未嫁也未嫁而父母欲以别适盖亦人情共姜誓死所以为难能而可贵故风首列之愚按诗言两髦不言总角意即所谓拂髦而韬之冠内者况父丧脱左母丧脱右古有明文谁谓两髦不可以言既冠乎】

庭燎箴晏朝也宣王怠于政事诗人设为问夜以讽【序云美宣王也因以箴之愚按宣王初年励精勤政能得万国之懽心以成中兴之业观此诗末章云君子至止言观其旗明是诸侯来朝之事非常朝也盖周自康王而後王室渐卑昭王南征而不复穆王时诸侯咸宾祭于徐荒服者不至及懿王而王室遂衰夷王始下堂而见诸侯至于厉王诸侯不享终流于彘非宣王中兴孰能使会同有绎复见周官威仪乎是可美也然勤初懈末自不藉千亩而後求治之志寢不如前故庭燎诗人作此诗以讽尝考外纪姜后脱簪谏王晏朝事在二十二年与此诗同意序所谓因以箴之是也先儒不察反以为宣王问夜之勤误矣】

夜如何其夜未央【阳韵】庭燎【丰本作□】之光【阳韵】君子至止【丰氏本作只後同】鸾【丰本作銮後同】声将将【阳韵陆德明本作锵锵丰本作枪枪 赋也夜如何其问

辞也其者语辞夜未央以下答辞也後放此旧说皆谓宣王不安于寝而数问夜之早晚王质云人君数问夜亦非体恐是殿陛之间宫掖之内执事者相为问答之辞上夕及夜既旦以警百官汉仪中黄门持五夜甲乙丙丁戊相传未几卫士鸡唱所谓鸡鸣歌或是此曹黄震云王朝之报早晚自有司存不待人主亲问而後知也纵夜未央时为人主所问至于乡晨是正不问所致若每每亲问如初则不至于乡晨矣愚按王黄之说深为近理此诗盖鸡人司烜之流所作周礼鸡人职云大祭祀夜嘑旦以?百官凡国之大宾客会同军旅丧纪亦如之凡国事为期则告之时司烜职云凡国之大事供坟烛庭燎此诗既有设燎之事又有告时之语其为若辈所作无疑也央广雅说文皆云中也字从大在门之内徐锴云从大取其中正会意秦风宛在水中央央亦中也顏师古以为半也今中夜亦曰半夜夜未央者郑玄云犹言夜未渠央也按渠通作遽史记尉陀曰使我居中国何渠不若汉班史作何遽不若汉是也故乐府有云丈人且安坐调弦未遽央语正同此但此诗明言夜未半何必增一字曰未遽半乎庭燎将朝所设所以照衆为明毛传解以为大烛非也据周礼坟烛与庭烛对言明是两物坟烛者大烛也郑云在地曰燎执之曰烛又谓树于门外曰大烛于门内曰庭燎郑所以定庭燎在门内者以庭是门内故有庭燎之名又烛燎别文则所设当非一处然燕礼有云甸人执大烛于庭閤人为大烛于门外则大烛亦有在庭之设或燕则用烛朝则用燎所用之地各异未可知也又郊特牲云庭燎之百繇齐桓公始也郑云庭燎之差公盖五十侯伯子男皆三十大戴礼文其百者天子礼也庭燎所作依慕容所为以苇为中心以布纆之饴蜜灌之若今蜡烛百者或以百根一处设之或百处设之孔穎達云要以物百枚并而纆束之今则用松苇竹灌以脂膏也愚按记以庭燎之百为僭天子恐非百枚并束之说一燎自可束百枚然所以异于诸侯者正当是百处设之所用人数与诸侯有多寡之异耳光说文云明也尔雅云充也言明充盛也此初设庭燎之时故其明盛君子毛云谓诸侯也至止谓已至朝门之外鸾解见蓼萧篇将将通作琯琯鸾声也解见采芑篇按仪礼诸侯覲天子之礼乘墨车载龙旗以朝记以为偏驾不入王门谓之偏驾者天子五路惟玉路以祀不赐诸侯金路以封同姓象路以封异姓革路以封四卫木路以封蕃国此四路者天子乘之为正侯国乘之为偏盖对天子言也诸侯在本国皆乘其路若入朝则嫌于并天子故止乘墨车墨车者大夫所乘也此诗末章云言观其旗则是入覲之礼而有鸾声者岂墨车亦设鸾也与又周礼大行人以九仪待宾客上公樊纁九就诸侯诸伯樊纁七就诸子诸男樊纁五就夫既偏驾不入王门何得有樊纁九就之等孔氏谓彼乃覲礼此乃朝礼未知然否诗人相与言曰今夜早晚何如乎应者曰此时夜尚未半业已设燎于庭以待王朝其光甚盛而诸侯已有来朝而至止者闻其车鸾之声则将将矣盖诸侯之敬王而勤于趋朝也如此王宴处深宫其知之乎】夜如何其夜未艾【叶霁韵鱼刈翻丰本作父】庭燎晰晰【叶霁韵征例翻陆德明本作哲字同】君子至止鸾声嘒嘒【叶霁韵呼惠翻说文丰本俱作钺 赋也艾通作父或从刀作刈刈草也故郑笺云芟末曰艾左传秦后子云一世无道国未艾也注训艾为絶亦芟末之意夜未艾言夜漏尚未尽也若漏尽则天明矣晰说文云昭晰明也易明辨皙也之皙曰晰晰者百燎森列晰而又晰也嘒说文云气梧也诸侯有後至者驱车而行如将不及故其声如此而王于此时亦可以夙兴矣】夜如何其夜乡【去声陆本通典俱作向】晨【叶文韵除军翻丰本作?按从臼之?本昧爽之?从日之晨本晨星之晨今以晨星之晨为辰昧爽之?为晨殊误丰本是也】庭燎有輝【叶文韵许云翻】君子至止言观其旗【叶文韵巨斤翻说文旗从?斤声徐锴云斤旗近似声韵家所以言旁纽也赋也乡通作向晨说文云早昧爽也乡晨朱子云近晓也胡旦云从夜未中至未尽从未尽至

向明也輝与晕同意字亦通用周礼眡祲掌十輝之法即晕字也日月之旁气为晕火之旁气为輝吴械云天欲明而烟光相襍也黄佐云烟者木之气光者火之精木火相为体用则烟结而明生焉烟以晦而藏光以晦而显烟光相襍而并见则明穷而日出矣旗建于车上即覲礼所谓龙旗也交龙为旗诸侯之所建周礼司常职云大阅颁旗物王建太常诸侯建旗凡祭祀会同宾客亦如之是也交龙者画作两龙相依倚一升一降升象其升朝降象其下复也然大行人职又云上公建常九旂诸侯诸伯建常七旂诸子诸男建常五旂彼言建旗此言建常者先儒亦谓礼有覲朝之异如覲则乘墨车朝则乘路车也陈祥道则谓旌旗旗常之名古人多通用如熊虎为旗而九旗亦谓之旗经传凡言旌旗是也析羽为旌而天子至大夫士之旗亦谓之旌乐记龙旗天子之旌乡射旌各以其物是也交龙为旗而天子之常亦谓之旗覲礼天子载大旗是也日月为常而诸侯之旗亦谓之常大行人职公侯伯子男建常是也是其说良辨并録以俟考上二章尚在夜时所闻者但鸾声耳至此五等诸侯之旗一一可别则辨色之时可以朝矣而王尚寂然也勤怠之间万国之观瞻所系用命恒于斯弃命恒于斯能不图为王告哉诗不以刺而以讽先述诸侯趋朝之早後及王视朝之晏而意已隐跃言外矣又按周制天子有三朝外朝一内朝二外朝以大询秋官司士掌之内朝二者一曰治朝亦谓之中朝以旦夕听政夏官司士掌之一曰燕朝亦谓之路寝朝天子退而居此与宗人图其嘉事及待诸侯之复逆夏官太僕掌之诸侯来朝则见于太庙然外朝亦有诸侯之位焉意必诸侯来朝而未归则以其位位之左九棘公卿大夫右九棘公侯伯子男是也诸侯朝于天子其礼有六春见曰朝夏见曰宗秋见曰覲冬见曰遇今惟覲礼存而朝宗遇之礼皆亡若时会曰会殷见曰同则诸侯既至天子之国先朝于国内然後为坛于国外更行朝礼今按覲会同皆得建旗而会同则旗置于为坛之处此诗咏言观其旗与在庭之燎并称则明是朝覲之礼与会同无涉也诸侯三朝同于天子玉藻所云朝于内朝羣臣辨色始入君日出而视朝退适路寝听政使人视大夫大夫退然後适小寝释服所谓内朝即同天子之治朝所谓路寝即同天子之燕朝其辨色始入日出视朝之礼虽仅见于此文然窃意庙朝外朝其礼亦是如此以其朝旦用事故名之曰朝也杜佑云朝辨色始入所以防微日出而视之所以优尊诗日夜向晨言观其旗臣辨色始入之时也又曰东方明矣朝既盈矣君日出而视之之时也盖尊者体盘卑者体蹙体蹙者常先体盘者常後故视学衆至然後天子至燕礼设宾筵然後设公席则朝礼臣入然後君视之皆优尊之道也然朝以先为勤以後为逸退以先为逸以後为勤朝而臣先于君所以明分守退而君後于臣所以防怠荒此所以使人视大夫大夫退然後适小寝释服也然则公卿诸侯之朝王其有先後乎诗曰三事大夫莫肯夙夜邦君诸侯莫肯朝夕夫夙先于朝夜後于夕则公卿朝常先至夕常後退诸侯朝常後至夕常先退今按向晨视朝未为失礼然于宣王初年勤政景象觉不侔矣诗人亦窥见其微逆忧其渐与列女传云周宣姜后贤而有德宣王尝早卧而晏起后夫人不出于房姜后既出乃脱簪珥待罪于永巷使其傅母通言于王曰妾不才妾之淫心见矣至使君王失礼而晏朝以见君王之乐色而忘德也夫苟乐色必好奢好奢必穷乐穷乐者乱之所兴也原乱之兴从婢子起婢子生乱当服其辜敢请婢子之罪唯君王之命王曰寡人不德实自生过从寡人起非夫人之罪也遂复姜后而勤于政事此诗之作倘即其时与】

庭燎三章章五句【子贡传申培说皆以为美宣王勤政朱子之意亦然俱不達诗旨申培谓此诗作于史籀絶无稽据至程子吕东莱严华谷皆以规宣王过勤为言更不成义理】

云汉仍叔美宣王忧旱也【序云仍叔美宣王也宣王承厉王之烈内有拨乱之志遇灾而惧侧身修行欲销去之天下喜于王化复行百姓见忧故作是诗也朱传从之郑玄云仍叔周大夫也春秋鲁桓公五年夏天王使仍叔之子来聘孔颖达云仍氏叔字春秋之例天子公卿称爵大夫则称字此言仍叔故知大夫也以史记考之桓之五年上距宣王之崩七十六年至其初则百余年也未审此诗何时而作按仍叔未必即春秋仍叔彼仍叔公羊作任叔孔又云宣王遭旱早晚及早年多寡经传无文皇甫谧以为宣王元年不藉千亩虢文公諫而不听天下大旱二年不雨至六年乃雨以为二年始旱旱积五年谧之此言无所凭据不可依信邹忠胤云尝考竹书厉之末年频年大旱庐舍俱焚会其陟也卜于太阳兆曰汾王为祟周定公召穆公乃立太子靖为王共伯和归其国遂大雨然则雨不系新王所祷明矣竹书宣二十五年大旱王祷于郊庙遂雨云汉之作意在此时观其诗曰祈年孔夙方社不莫则泄政盖亦有年愚按不藉千亩据国语史记竹书系宣王末年事皇甫氏指为初元致旱之繇其谬甚明乃皇王大纪于宣王二年以天下大旱书三四五年书旱六年书大旱通监前编亦载宣王六年大旱皆似祖诗序及谧说何也】

倬彼云汉昭回于【春秋繁露作於】天【叶真韵汀因翻】王曰於【繁露作呜】乎【繁露作呼】何辜今之人【真韵】天降丧乱饥【繁露作饥】饉荐【繁露作荐】臻【真韵】靡神不举靡爱斯牲【叶青韵桑经翻】圭【繁露作珪】璧既卒宁莫我听【叶青韵汤丁翻丰氏本作□赋也倬彼云汉解见旱麓篇淮南子云旱云烟火左传梓慎云汉水祥也昭尔雅云光也回说文云转也郑云精光转运于天也陆佃云水气之在天为云水象之在天为汉今皆倬然昭明回转于上则非雨之候也此二句与末章有嘒其星相照应皆是同时所见而此乃诗人之语自王曰以下则述王仰诉于天之词述之所以为美也王宣王也於乌同乎通作呼嗟叹之声如乌鸟之吁呼也辜说文云罪也何辜今之人乃反求诸己哀矜惻怛不能自己之诚与第六章憯不知其故同意天降丧乱就大旱言衣食无资民财尽失是降丧也流离载道民心不安是降乱也或读丧如字谓死亡者多亦通顔师古云谷不熟为饥菜不熟为饉又谷梁传云一谷不升谓之歉二谷不升谓之饥三谷不升谓之饉四谷不升谓之康五谷不升谓之大侵荐通作荐尔雅云再也毛传云重也按荐即藁也所以藉席故有重义臻说文云至也孔云宣王遭旱非止一年故皇甫谧以为旱积五年五年之言未知信否要言饥饉荐臻必是连年不熟故云重至也靡之言无也举犹揭也凡为祀典所载之神无不一一揭而祭之也孔云言已为旱之故祈祷明神无有神不求而举祭之者即下经所陈上下郊宫之类也大司徒以荒政十有二聚万民其一有曰索鬼神遭遇天灾必当广祭羣神神皆用牲祭之故言靡爱斯牲徧祈羣神所祭者广天地五帝当用特牲其余诸神或用太牢或用少牢三牲皆用故言无所爱于三牲也庄二十五:left传曰凡天灾有币无牲而此云靡爱斯牲者设文之意各有所主彼因日食大水而天之见异所以谴告人君只欲令改过修善非为求人饮食而降此灾异於时鲁不罪已修政谓天求饮食而用牲祭之望天不为咎故传据正礼谓救止天灾告社之法不当用牲也至于水旱荐至祷祀羣神以祈福祥遏止灾沴者则不得不用牲也祭法曰雩祭祭水旱也注谓祭用少牢又春官大祀掌六祈以同鬼神示类造禴祭攻说注谓造类禴祭皆有牲攻说用币而已是天灾祈祷有用牲也圭说文云瑞玉也上圆下方白虎通云璧者外圆象天内方象地尔雅云肉倍好谓之璧注谓肉边也好孔也按周礼春官大宗伯职云以玉作六器以礼天地四方以苍璧礼天以黄琮礼地以青圭礼东方以赤璋礼南方以

白琥礼西方以玄璜礼北方皆有牲币各放其器之色典瑞职云四圭有邸以祀天旅上帝两圭有邸以祀地旅四望裸圭有瓚以肆先王圭璧以祀日月星辰璋邸射以祀山川考工记玉人之事云四圭尺有二寸以祀天裸圭尺有二寸有瓚以祀庙圭璧五寸以祀日月星辰郑玄引尔雅曰邸者本也四圭有邸中央为璧圭末四出两圭有邸儻而同邸儻谓两足相向圭璧者圭其邸为璧贾公彦曰四圭两圭及下璋邸皆言邸郑皆以邸为璧圭璧不言邸故郑还以邸解璧也陈祥道云璧象天也祀天则四圭邸璧琮地象也祀地必两圭邸琮日月星辰天类也必一圭邸璧山川地类也必一璋邸琮谓地与山川皆邸璧非所称也或谓璧琮礼天地四圭两圭祀天地皆一祭兼用之四方有礼玉无祀玉日月星辰山川有祀玉无礼玉周官之书虽或简略不应如是之缺也祀之乃所以礼之康成以祀为礼其神于义或然孔云礼神之主器自有多名言圭璧为其总称卒郑云尽也按卒□通用□义训死人死而事尽矣故以卒为尽既卒者万象烈云某神合用某璧某璧合祀某神尽如典礼用之无有余者如是之谓既卒也罗泌云祭天燔燎祀地瘞埋盖特币耳惟韩婴诗传始有天子奉玉升柴加之于牲之说而崔灵恩遂引诗之圭璧既卒以实之为燔玉且谓肆师立大祀用玉帛牲醴为论燎玉之差降详考肆师所用玉帛特礼神之用云汉所言亦礼神之玉耳何自而有燔且瘞哉宁犹曾也後放此承上文言我将如此以致其呼吁之意岂曾无有听聆我之精诚而兴云雨者乎盖追述始事预拟而悬望之之辞也孔云岁或水旱皆是上天之为假祭羣神未必能已圣王制此礼者何哉将以灾旱不熟必至于死人君为之父母不可忍观穷厄固当责躬罪已求天祷神罄忠诚之心为百姓请命圣人缘人之情而作为此礼非言祈祷必能止灾也】旱既大【音泰後同春秋繁露作太】甚藴【韩诗作郁陆德明本作煜】隆虫虫【东韵尔雅作熯熯丰本同韩诗作炯炯】不殄【丰本作腆】禋祀自郊徂宫【东韵】上下奠瘞靡神不宗【叶东韵读如?祖丛翻】后稷不克上帝不临【叶东韵良中翻】耗斃【说文字林皆作殫繁露作射】下土宁丁【繁露作一】我躬【东韵赋也旱既太甚旱愈久而益甚也藴积也隆丰大也俱见说文虫通作熯尔雅云薰也说文云旱气也严云旱气藴积隆盛其热熏人也殄尔雅云絶也禋说文云洁祀也祀说文云祭无已也不殄禋祀者谓既祭此而复祭彼相续不絶如下文所云也上章言靡神不举乃拟议之辞至此始行其礼也自从也郊朱子云祀天地也徂往也宫郑云宗庙也辅广云先郊後宫先尊而後亲也陈祥道云雩必自郊徂宫後世或祈山林川泽羣庙百辟卿士然後及于上帝梁北齐及唐皆然非古也上下犹云陟降也奠说文云致祭也从酋酋酒也下其丌也瘞说文云幽薶也上言奠谓祭时进之神前下言瘞谓祭毕埋之于土凡酒食牲玉币帛祝册之类皆然宗之言尊音之转也曰靡神不尊祀之则天神地只人鬼无不在其中矣按周礼大宗伯国有大故则旅上帝及四望小宗伯大雩及执事祷祠于上下神示大祝国有大故天雩祀社稷祷祠小祝掌小祭祀将事候禋祷祠之祝号以逆时雨宁风旱左传子产云山川之神则水旱疢疫之灾于是乎禘之日月星辰之神则雪霜风雨之不时于是乎禘之皆所谓靡神不宗者也后稷周之始祖克之为言能也上帝郑玄云天之别号临视也严云在宫之神莫尊于后稷非不临顾我而力不足以胜旱灾在郊之神莫尊于上帝力足以胜旱灾而不肯临顾我愚按举后稷于上帝之前者先希望于亲而後敢上及于尊也郑孔以为又明从宫至郊为不絶之义恐未然辅云不言地及他鬼神者举尊亲以该之也耗本作耗乃稻属说文引伊尹曰饭之美者南海之耗旧说相传皆以爲虚减之义者以耗通作毛毛又通作无佩觿集曰河朔谓无曰毛顔师古曰今俗语犹谓无为耗是也斃通作殫说文云败也食为民天民为邦本旱不能生谷耗可知矣民无所得食败立见矣是之谓耗斃

下土也丁尔雅毛传皆云当也愚按丁之为当亦音之转也亦此耗斲之祸曾是不先不後而适当我身耶意者其有所以致之也】旱既大甚则不可推【灰韵】兢兢【陆本作矜矜】业业如霆如雷【灰韵】周余【论衡周余作维周】黎民靡有子遗【叶灰韵夷田翻】昊天上帝则不我遗【见上】胡不相畏先祖于【尔雅注作於】摧【灰韵赋也每章必以旱既大甚?端者见王之忧旱念念不忘故娓娓言之不置也推说文云排也毛传云去也排而去之也兢说文云竞也兢兢战惧之意业笋虞大版也所以饰悬钟鼓者业业危动之象灾繇人兴自反必有所以致是者故其且惧且危有如此也霆者雷之余声旱久已称甚矣而今比前又更甚如霆之後而又继以雷也子说文云无右臂也遗犹言留余也旱甚如斯周之黎民所余者固已无几若更甚不已势必至无复有半身之余者甚忧之之辞也王充云诗人傷旱之甚民被其害言靡有子遗增益其文欲言旱甚也孟子云故说诗者不以文害辞不以辞害志以意逆志斯为得之如以辞而已矣云汉之诗曰周余黎民靡有子遗信斯言也是周无遗民也昊天四句又自后稷不克上帝不临推深一步说昊天孔安国云元气昊然广大程子云自形体言谓之天自主宰言谓之帝则不我遗者言天意似不欲为我留遗此余黎非但不临而已胡之言何也胡不相畏对大夫君子言之先祖祖之最先者指后稷也摧说文云挤也言我君臣何可不相与畏惧乎今日旱灾似先祖于冥冥之中陰为摧挤而然者非果不克之谓也不知我何罪而见怒于上帝与先祖之深使黎民受困乃尔乎】旱既大甚则不可沮【叶语韵在吕翻】赫赫炎炎【陆本作熒熒】云我无所【语韵】大命近止靡瞻靡顾【叶语韵读如举苟许翻】羣公先正则不我助【叶语韵牀举翻】父母先祖胡宁忍予【语韵赋也沮通作阻险也人遇险则止故毛传训沮为止上章言推犹欲排而去之此但言沮则仅欲其止于是勿更加益耳然而亦不能矣赫说文云火赤貌韵会云火炙日曝皆曰赫炎说文云火光上也炎炎尔雅云薰也郭璞云旱热薰炙人也愚按据上说则赫赫是言日曝之象炎炎是言旱热之象云我无所者承上章言黎民既尽则我亦无容身之所矣非但如应璩所云宇宙虽广无陰以憩也命者人所稟受於天之度人死则谓之命尽今日大命则是以国祚言盘庚篇懋建大命是也近谓灭亡之期不远止通作只语已辞也仰视曰瞻还视曰顾瞻似属下文羣公先正远而疏之也顾似属下文父母先祖近而亲之也靡瞻靡顾言若远若近俱无可恃赖也羣公即郑玄所云古之上公若勾龙后稷之类谷梁传云古之神人有应上公者通乎陰阳君亲帅诸大夫道之而以请焉孔云国语繇为宗伯祭法有祀之文社稷五祀虽为王朝卿士兼带上公之官故左传云封为上公祀为贵神先正季本云先世为官之正人即月令所谓雩祭百辟卿士之有益于民者也万时华云月令季冬乃毕山川之祀及帝之大臣季夏乃命百县雩祀百辟卿士以祈谷实此即祭羣公先正之礼今则因旱而祭也陈祥道云郑氏谓天子雩上帝诸侯雩上公然周礼小祝小祭祀逆风雨宁风旱则百辟亦天子所祀也愚按此皆在靡神不宗之内特借之以形先祖及上帝耳不我助言不肯助兴云雨也父母先祖者孔云以其为民父母故称父母愚按所以知诗言父母是意属先祖者厉王无道获罪于天其必不能挽回天意明矣况其文又加于先祖之上乎忍犹言决絶也言我徧告百神之中若羣公先正其亲与先祖异固无望其我助也乃以为民父母之先祖而亦何故曾若是之忍予乎朱子云以恩望之所谓垂涕泣而道之也此申前后稷不克及先祖于摧之意】旱既大甚淅淅【说文作??】山川【先韵】旱魃为虐如惓【後汉书注作炎】如焚【叶先韵汾沿翻陆本作焚】我心憊暑忧心如薰【叶先韵许旃翻陆本作熏云又作燠】羣公先正则不我闻【叶真韵微匀翻】昊天上帝宁俾我遯【叶真韵徒匀翻陆本丰本俱作遂按此诗他章俱无

转韵惟此章欲全用先韵则于遯无叶欲全用文韵则于川遯无叶欲全用真韵则于薰无叶姑分前三韵入先後二韵入真俟後博详 赋也滌说文云洒也严云旱久则山枯川竭故如滌濯然按晏子云灵山以石为身以草木为髮天久不雨髮将焦身将热河伯以水为国以鱼鼈为民天久不雨水泉将下百川竭国将亡民将灭矣此所谓滌滌者也旱魃二句蒙滌滌山川言魃说文云旱鬼也神异经云南方有人长二三尺袒身目在项上走行如风名曰魃所见之国大旱赤地千里一名旱母遇者得之投溷中即死旱灾消也山海经云系昆之山有人衣青衣名曰黄帝女魃黄帝攻蚩尤冀北之野蚩尤请风伯雨师纵大风雨黄帝乃下天女曰魃雨止遂杀蚩尤魃不得复上所居不雨叔均言之帝後置之赤水之北所欲逐之者令曰神北行魃一作妣文字指归云女魃秃无髮或问韦曜天有常神人死为鬼不审旱气生魃奈何荅曰天欲为灾何所不生而云有常神者耶虐说文云残也为虐者为虐于山川也惓通作炎解见四章焚本作焚说文云烧田也如惓如焚直说言旱热之气如火光之延烧然此所以山川滌滌也我心二句起下羣公四句憚忌难也暑热也俱见说文憚暑者忌热气之难退也薰通作熏说文云火烟上出也心忧之极热气上升亦如火之炎上也与易厉熏心义同不我闻者犹言若不相关也遯说文云逃也我心之忧如此羣公先正若无闻知然者昊天上帝曾是欲使我避位而去倘我一去而旱庶几可止乎自怨之极而为无聊之思也此申前上帝不临及昊天上帝则不我遗之意】旱既大甚黽勉畏去【叶遇韵读如袴苦故翻】胡宁瘝【韩诗作疹】我以旱僯不知其故【遇韵】祈年孔夙方社不莫【叶遇韵莫故翻陆本作暮】昊天上帝则不我虞【叶遇韵元具翻】敬恭明神【陆本作祀】宜无悔怒【遇韵 赋也黽说文云黽也其性好跃越王见怒蛙式之为其有气即此虫也勉说文云强也曰黽勉者力所不堪犹勉强为之似黽之奋跃而不自量力者然畏去者承上宁俾我遯而又作一转语严云始欲遯去既又念民命方急当思救之故黽勉于此不敢去也苏辙云弃位以避忧患非人主之义故黽勉不去以求济斯难畏不敢也 病也僯痛也俱见说文严云天何偏病我以旱乎水旱之灾皆由政失必有以自取之但痛哉不知其何故而致也知其故则当速改矣按说苑载汤之时大旱七年雒圻川竭煎沙烂石于是使人持三足鼎祝山川教之祝曰政不节耶使人疾耶苞苴行耶谗夫昌耶宫室营耶女谒盛耶何不雨之极也盖言未已而天大雨今宣王能自反如是几同符成汤矣宜其建中兴之业也祈年二句又更端以起下意夙早莫晚也曹氏云月令孟冬天子祈年于天宗大割注谓天宗日月星辰也大割者大杀羣牲而割之也又云孟春天子以元日祈谷于上帝注谓以上辛郊祭天也春官龠章氏凡国祈年于田祖歃豳雅击土鼓以乐田畯注谓田祖始耕田者谓神农也后稷配食焉夫自去岁之春冬已祈今岁之丰稔其祀至于上帝日月星辰神农后稷无不徧及可谓夙矣方社指雩祭四方之神及后土言详见倬彼甫田篇前此冬春既行祈年之礼及已月万物始盛待雨而大复行雩祭请雨之礼谨遵其时不为晚矣又按秋报亦祭方春祈秋报皆祭社解者或误以此句兼祈报言又或谓专指秋报言皆于诗意未合诗为闵此时不雨而言何远及前岁报赛之事乎虞郑云度也疑通作虑敬恭二字虽可通言既已聯文义当有异孔氏谓在貌为恭在心为敬又谓貌多心少为恭心多貌少为敬愚意恭字从心则是当主心言敬字从支则是指其见于作为者言论语曰居处恭执事敬是其义也此敬恭言其外则尽礼内则尽诚也神能聪明故曰明神指羣公先正也悔说文云恨也怒说文云恚也韵会云弩也若强弩之?人怒则面目张起怒当以心节之故心奴为怒愚按此二字亦当有别悔犹蓄之于心怒乃见之于外矣言我于祈年方社致其敬恭若此昊天上帝处尊严高远之地或未必顾虑及我羣公先正皆称明神宜无所怀

恨而逞怒于我者独不能代吁上帝为民请命乎因上二章有则不我助则不我闻之言故此章特指及之诗之作法绵密而条理不紊如此周昌年云宜无二字有味宜无而不无必有其故矣此与孟子我竭力耕田数语意略相似】旱既大甚散无友纪【纸韵】鞠哉庶正疚【陆云或作?又作究】哉冢

宰【叶纸韵樊里翻】趣马师氏【纸韵】膳夫左右【叶纸韵羽轨翻】靡人不周无不能止【纸韵】瞻印【陆本丰本俱作仰】昊天云如何里【纸韵尔雅作惺陆本丰本俱作?】赋也此章言救旱之实政也散者散仓廩以赈济也友朱子引或云疑作有当从之纪说文云丝别也谓丝缕之数也散无有纪者宣王自言?散仓廩为数已多不可胜计也鞠尔雅云穷也字从言当是谓其议论条尽之多至于穷尽也庶正郑云衆官之长也孔云周官三百六十每官各有其长说文无疚字当依别本作?说文云贫病也赵颐光云礼画不居内故久在?下为?冢宰天官特于庶正中提出之以其为衆长之长也殫力倡率夙夜不遑故至于病也趣马师氏膳夫解俱见十月之交篇趣马掌马之官师氏以媿诏王膳夫进饮食于王皆近臣也左右则统指侍御仆从而言举大以该小举近以该远凡在王朝者具举之矣周说文云密也毛传训救郑云当作调周礼大司徒相调注谓相给足是也但说文无调字论语君子周急孟子周之则受俱只用周字盖思施密徧之义孔云言汝等无有一人而不调救其百姓困急者无有自言不能调救而止不为者以此分贫恤寡之故使汝等益困也又按篇中如大命近止止乃语辞则此止字但作语辞亦通印说文云望也欲有所庶及也字从匕从口徐锴云匕倾首望也口庶也会意曰瞻印者初则举首而瞻既则倾首而望也言我及诸臣之劳于救荒如此庶乎足以挽回天意矣而天仍漠然也乃瞻望昊天而诉之曰天之去地不知有几几何里虽居高而听则卑亦曾鉴察我君臣之所为否乎旧说但以此诗为宣王忧旱之深祷雨之切而絶无所作为然者亦懵于诗旨甚矣】瞻印【丰本作仰】昊天有嘽【说文作□】其星【叶庚韵读如声青盈翻说文作声】大夫君子昭假【音格丰本作格】无羸【庚韵】大命近止无弃尔成【庚韵】何求为我以戾庶正【叶庚韵诸盈翻】瞻印【丰本作仰】昊天曷惠其宁【叶庚韵读如蕤泥耕翻】赋也此章勉羣臣赈救之不怠也赈救之事兼公私皆有之嘽毛云微貌按小星为嘽故有微小之义陆佃云言旱久而繁星备见繁星备见则尤非雨之候也且其正言昊天则夏之时也以今观之炎夏旱暵而热则小星森布如棊星阳之精也阳盛而亢则星稠于上其理然也大夫君子通指羣臣也大夫以位言君子以德言昭明也假通作假说文云至也无通作毋戒辞下同羸说文云贾有余利也言汝诸臣当勤于赈救明布其惠泽之所至毋或愆嗇尚有余利王肃谓无敢有私羸之而不敷散是也大命近止解见四章成功也安民所以保国前者靡人不周无不能止庶几有成功已然而旱灾未已则赈救犹未可辍毋或厌倦苦难而弃尔之成功亦为国祚计也我宣王自谓也我居民上一夫不获皆我之责今所以求诸臣之为民者即为我也戾犹虐也使诸臣早夜戮力不遑以纾民之困迹似乎虐矣因自致其不安之意曰奈何以求为我之故而重苦我庶正乎曷说文云何也惠犹赐也宁通作寔说文云安也得雨则民安矣朱子云于是语终又仰天而诉之曰果何时而惠我以安宁乎张子厚云不敢斥言雨者畏惧之甚且不敢必云尔凌蒙初云通诗不露一雨字为後來诗家不露本题法門张文潜云不诚意于人事而诚之于祭祀不勉之于吾身而推之于臣仆何也盖人事已修矣吾身已勉矣所不可知者祭祀与臣仆而已今也祭祀无不诚臣仆无不善则本末大小一切皆治矣此所为侧身修行之至也晋穆帝永和时大雩歌云汉之诗

初博士议宣王承厉王拨乱遇灾而惧故作是诗今晋中兴奕叶重光岂比周人耗斲之辞乎汉魏之代别造新诗晋室太平不必因故司徒蔡謨议曰圣人迭兴礼乐之制或因或革云汉之诗兴于宣王今歌之者取其修德禳灾以和阴阳之义故因而用之】

云汉八章章十句【董仲舒云周宣王时天下旱岁恶甚王忧之其诗曰云云今按诗中有王曰二字其非宣王自作明矣申培说以为宣王忧旱史籀美之絶无稽据凡申说遇宣王时诗多归之史籀亦自可笑子贡传阙文】

祈父王师责诸侯也【序云刺宣王也愚按此王师刺宣王号令不行于诸侯而用兵无已考竹书宣王三十八年王师及晋穆侯伐条戎奔戎王师败逋周语宣王二十九年战于千亩王师败绩于姜氏之戎其时诸侯之师亦有在行者左传所载晋穆侯之夫人姜氏以条之役生太子命之曰仇其弟以千亩之战生命之曰成师即其事也然诸侯之师皆无恙而王师独受其败则以勤王不力故耳故恨而责之毛郑以为此诗之作在战于千亩之时是也】

祈【左传丰氏本俱作圻】父【音甫後同】予王之爪牙【叶鱼韵牛居翻】胡转予于恤靡所止居【鱼韵 赋也祈父侯国官名祈通作圻左传叔孙穆叔赋圻父可证天子六卿冢宰掌邦治司徒掌邦教宗伯掌邦礼司马掌邦政司寇掌邦禁司空掌邦土诸侯三卿武王诰康叔曰矧惟若畴圻父薄违农父若保宏父定辟是也说者以为圻父所掌即司马之事农父所掌即司徒之事宏父所掌即司空之事然其官名自与天子不同故周礼之书不载非如太史内史之官则天子诸侯皆有之也旧说皆解圻父谓王之司马非是所以名为圻父者圻即畿字周礼大司马职云以九畿之籍施邦国之政职方千里曰国畿其外有侯畿有甸畿有男畿有采畿有卫畿有蛮畿有夷畿有镇畿有蕃畿凡九畿各方五百里以各有畿限疆畔故皆名畿父者官之尊称犹尚父仲父亚父之类圻父以薄违为职主于提师迫逐违命者故旧说谓其职掌封圻之兵甲也先王之制诸侯有故则方伯连帅以诸侯之师讨之王室有故则方伯连帅以诸侯之师救之其典兵则圻父之事此诗首章主六军之衆言之天子六军出自六乡六遂予军衆自谓也後放此以对侯国之圻父言故自称为王之爪牙若对王朝之大司马言则无此文矣爪牙凡军士之通称孔颖达云鸟用爪兽用牙以防卫己身此人自谓王之爪牙以鸟兽为喻也转移恤忧也靡所止居虑其不得竣役而安居言必死也六军之衆呼圻父之官而责之曰我以王之爪牙从征汝为王臣子分当敌王所忤胡为坐视成败徒转移我于忧恤之地使我无所止居乎盖自宣王废鲁嫡立庶以成鲁乱诸侯从是不睦其不肯戮力王室有自来矣按章氏云古者畿内之兵不出所以重内也卒有四方之役调兵诸侯亦各从其方之便武王克商实用西土至于征徐以鲁追貉以韩平淮夷以江汉略见于经可考也然则六军之怨望圻父固其宜已左传襄十六年鲁穆叔如晋聘且言齐故晋人曰以寡君之未禘祀与民之未息不然不敢忘穆叔曰以齐人之朝夕释憾于敝邑之地是以大请敝邑之急朝不及夕引领西望曰庶几乎比执事之闲恐无及也见中行献子赋圻父献子曰偃知罪矣敢不从执事以同恤社稷而使鲁及此】

祈父予王之爪士【纸韵】胡转予于恤靡所底【丰本作氏】止【纸韵 赋也此章主宿卫之士言之爪士者虎士也以其宿卫故以士名所以别于军衆也宿卫之士居止辇毂之下以藩卫王室原不在调发之列按周礼虎贲氏其徒有虎士八百人掌先後王而趋以卒伍军旅

会同亦如之舍则守王闲王在国则守王宫国有大故则守王门又司士职云正朝仪之位辨其贵贱之等虎士在路门之右徐氏云周之兵制无事则散之田亩有役则召以县师而宿卫常养之兵则有虎贲之士八百人时盖空国俱出六军与宿卫之士皆在行间若如旧说漫无分别则此章可省矣底通作致毛云至也靡所底止犹云不知所究竟也】祈父亶不聪【东韵】胡转予于恤有母之尸饔【叶东韵读如翁乌公翻韩诗外传作雍丰本作?赋也亶实也解见常棣篇书云听曰聪易曰闻言不信聪不明也更端以告而祈父漠然全不动念是听若无听也故以实不听诋之尸说文云陈也饔说文云熟食也孔云明熟食故可陈也许氏异义云谓陈饔以祭也独言有母者以母性爱子又或此从征之人多是无父以王师屡丧复遣孤子出征犹战国策所谓今其存者皆死秦之孤也其悲甚矣苏辙云饔祭食也士忧兵败身没不得还守祭祀而使母独主祭也愚按苏解近之但尸饔非主祭之说乃是虑已必死则其母当陈熟食以祭已也一说尸主也兵败身没无人可以奉养则必使其母独主饔飧之事亦通旧说谓军士因久役而兴归养之思欲如越勾践伐吴令有父母耆老而无昆弟者皆遣归及魏公子无忌救赵亦令独子无兄弟者归养之例则忘家忘身之谓何虽在上人行之则为恩而使人人离心解体睽怀内顾则国难何时而平于同仇之义伤矣今不取】

祈父三章章四句【左传作圻父子贡传申培说丰氏本皆作圻招朱子谓军士怨于久役故呼祈父而告之语意亦近似然祈父乃诸侯之官实非司马则王爪牙之士何得繇祈父调发乎子贡传申培说皆改此诗篇名为圻招谓穆王西征七萃之士咸怨祭公谋父作此诗以讽谏而丰氏本径取左氏祈招之诗列于首章之前按左传楚右尹子革曰昔穆王欲肆其心周行天下祭公谋父作祈招之诗以止王心其诗曰祈招之愔愔式昭德音思我王度式如玉式如金形民之力而无醉饱之心据左传注祈招有三义杜预依此诗以祈为祈父之官招其名贾逵本招作昭云祈求也昭明也言求明德也马融本祈作圻招亦作昭云圻为王圻千里王者游戏不过圻内昭明也言千里之内足明德也是祈招二字在古注中尚无确义若杜氏以祈为官招为名则于下文之愔愔三字尤自难通且无端举此人以规穆王更不相涉而如果为贤人则史传何别无经见愚意祈招乃乐章之名祈通作祁大也招即徵招角招之招通作韶祈招者大韶也故其声和乐而可以式昭德音穆王盘游无度驰八骏以周行天下祭公欲奏韶乐以镇定其心犹趋以采齐行以肆夏之意耳又诗纬有午亥卯酉辰五际之说以西为祈父其理无传】

沔水畏谗也疑隰叔所作【隰叔事详见黄鸟篇小引下是诗也其作于杜伯遭谗将见杀之时左儒九谏而王不听之日乎】

沔彼流水【纸韵】朝宗于海【叶纸韵虎洧翻】歟彼飞隼载飞载止【纸韵】嗟我兄弟【叶纸韵荡以翻】邦人诸友【叶纸韵羽轨翻】莫肯念乱谁无父母【叶纸韵母鄙翻比而赋也沔毛传云水流满也海纳百川者郑玄云水流而入海小就大也喻诸侯朝天子亦犹是也诸侯春见天子曰朝夏见曰宗孔颖达云朝朝也欲其来之早宗尊也欲其尊王臣之朝君犹水之趋海故以水流入海为朝宗禹贡亦云江汉朝宗于海也歟彼飞隼解见采芣篇载之言则也载飞载止飞则有止也流水以喻谗言所谓流言也飞隼以喻谗人所谓凶人也水虽漫流犹有到海之期隼虽高飞亦或时有止息而谗人之造言生事以害人者偏无所底极

故反言以为喻注疏泥朝宗二字谓兴诸侯当来朝难通水入海名朝宗犹大水合小水为会二水合流势均力敌曰同亦借名也会同不必泥朝宗何必泥乎兄弟谓僚友也亲之则曰兄弟以其同国而居则曰邦人诸友莫之言无也肯之言可也古训云尔于义无所取当以音通之念说文云常思也谗说殄行致乱之繇诚常思及此则自不为矣黄佐云尝诵此诗而历考之始知圣人之深恶夫佞人也自昊天之日有若人也而君臣之道丧自小弁之日有若人也而父子之恩绝自何人斯之日有若人也而朋友之义亏自巷伯之日有若人也而士大夫之心离自十月之日有若人也而地震天鸣下民孽作矣国有佞人亦曰殆哉此沔水之所以念乱也作此诗者其父母必有身遭谗言而将罹凶祸之事故悲痛其词以声动之曰诸友纵不肯念乱然谁人无父母乎而何独使我父母至于此极乎愚所以疑为隰叔之作者以此以宣王末年有杀杜伯一事而其子隰叔因之以奔晋也又王符云一国尽乱无有安身诗云莫肯念乱谁无父母言将皆为害然有亲者忧将深也是故贤人君子既忧民亦为身夫盖满于上沾溥在下栋折榱崩惧有压患仁者兼护人家者且自为也易曰王明并受其福是以次室倚立而叹啸楚女揭幡而激王仁惠之思忠爱之情固能已乎按如此说亦自可通】沔彼流水其流汤汤【阳韵音商】歟彼飞隼载飞载扬【阳韵】念彼不殄载起载行【叶阳韵户郎翻】心之忧矣不可弭忘【阳韵比而赋也汤汤水盛貌按汤本热水之名而书有汤汤洪水方割之语者盖谓水势之盛如汤之沸也扬说文云飞举也振羽之意尔雅云鹰隼丑其飞也翬鹰亦好扬诗鹰扬是也水方盛而未杀则与朝宗于海者异矣隼方扬而未息则与载飞载止者异矣以喻谗方兴而未已前反言之此正言之也蹟迹同字说文云步处也不蹟毛传云不循道也如所谓无罪无辜谗口嚣嚣者起说文云立也载起载行起立而复行也朱子云言忧念之深不遑宁处也弭之训止其义未详按弭乃弓末反之可以解紃不可弭犹云不可解也忘遗也言不可解此忧而使之遗忘也上忧国家之将乱下忧父母之不保自不能释然耳】歟彼飞隼【丰本此句上伪撰沔彼流水东灌于瀛两句】率彼中陵【蒸韵】民之讹【说文丰本俱作譌】言宁莫之惩【蒸韵】我友敬矣谗言其兴【蒸韵比而赋也率说文云捕鸟毕也象丝网上下其竿柄也大阜曰陵中陵陵中也民指小人不欲斥言故泛指】

【之也讹毗同字通作譌郑云伪也小人好诈伪为交易之言孔云谓以善言为恶以恶言为善交而换易其辞也宁反辞也犹言如何也惩说文云?也戒止之意言隼虽飞在中陵人犹有持鸟毕而捕之者今民造为讹言变乱是非以荧惑听闻奈何遂无禁止之者乎暗规王也又旧说以率为循则率彼中陵乃谗人优游自得之比于义亦通我友即首章所谓嗟我兄弟邦人诸友者皆惯造谗说之人也敬犹戒也谗譖也就所譖之事言曰谗以所譖之言而求之于理则是非变乱曰讹其者将然之辞兴起也譖人者人恒譖之长恶不悛从自及也故警之曰我友其慎之哉世风偷矣谗言方起其流之敝必至天下无有完人吾虑汝之将不免毋以今日譖人为得计也後世若唐周兴来俊臣之徒其明鉴也出尔反尔能无惧乎韩诗外传引此云鸟之美羽勾啄者鸟畏之鱼之侈口垂腴者鱼畏之人之利口赡辞者人畏之是以君子避三端避文士之笔端避武士之锋端避辨士之舌端朱子谓我之友诚能敬以自持则谗言何自而兴其意亦善但以首章邦人诸友莫肯念乱之语推之固知此友非同调者无缘以同心之言告之耳王应麟云宣王晏起姜后请愆则庭燎之箴始勤终怠可见矣杀其臣杜伯而非其罪则沔水之规谗言其兴可见矣】

沔水三章二章章八句一章六句【朱子疑卒章脱前两句谓当作三章章八句此大属蛇足丰氏本便添两句其伪妄可笑甚矣序谓规宣王也朱传谓忧乱也于诗词固亦相附但无所发明耳子贡传则谓宣王念乱也邹忠胤为阐其说云厉王流彘古今一大变也即曰万民弗忍当时必为之倡乱者至并欲甘心其太子微召公以己子易之周不祀矣平王忘父讎而奸其位比于篡逆东迁而後日以陵夷则习乱而忘始治也使宣王无念乱之志是亦一平王耳故人知宣王内修外攘中兴之烈烂然不知沔水一诗实为干蛊之本观其言曰谁无父母抑何情恻而旨痛乎闻斯言而不相与共图拨乱者非人臣矣乃末章复虑及于谗言而勉我友以敬想当时汾王即世少主践阼中外危疑或有幸乱之徒造蜚语以撼在位故其卒以此勸也与其说虽纚然可听然不无辞费若申培说与宣王即位乞言于羣后而作是诗则篇中殊无乞言意又文昌化书云宣王有贤臣尹吉甫文武兼资搢绅所慕国家中更板荡四夷交侵反王即位北伐西征以复文武之境吉甫尝任专钺之命惟予与王俱吉甫居多略而忽细故王之左右多不悦者于是谗譖迭兴王亦未免于疑方其在镐有飞语闻于王予为多方解释意犹未明予为沔水之诗王听之泊吉甫归功烈既成君宰胶固中兴之绩视少康高宗为优焉按文昌世传张仲化身此书乃其自谱以示人者仙迹幻化事尚在杳茫间耳】

黄鸟避谗去国也宣王杀杜伯而非其罪其子隰叔出奔晋而作此诗【竹书纪宣王四十三年王杀大夫杜伯其子隰叔出奔晋汲冢璣语云宣王之妾女鸠欲通杜伯杜伯不可女鸠反诉之王王囚杜伯于焦杜伯之友左儒九谏而不听并杀之後三年而杜伯射王周语内史过云周之衰也杜伯射王于鄆墨子引周春秋云宣王杀杜伯而无辜後三年宣王会诸侯田于甫田日中杜伯起于道左衣朱衣朱冠操朱弓朱矢射宣王中心折脊而死今按竹书宣王以四十六年陟距杀杜伯时仅三载与璣语周春秋所记俱合盖杜伯为崇也隰叔者杜伯子所以知此诗为隰叔作者以复我邦族三语知之晋语訾祐曰昔隰叔子违周难于晋国生子舆为理世及武子以受随范左传范宣子曰昔勾之祖自虞以上为陶唐氏在夏为御龙氏在商为豕韦氏在周为唐杜氏晋主夏盟为范氏韦昭云豕韦自商之末改国于唐周成王灭唐而封弟叔虞迁唐于杜谓之杜伯张守节云周成王时唐人作乱成王灭之据前数说则晋地杜之故封聚族在焉国既被灭而仕于周然犹不忘其本以唐杜为氏今隰叔以父死非罪还归故国故曰复我邦族也】

黄鸟黄鸟无【丰本作母後同】集于穀【屋韵此穀字从木不从禾】无【丰本作母後同】啄我粟【叶屋韵读如菽式竹翻】此邦之人不我肯谷【屋韵】言旋言归复我邦族【屋韵兴也黄鸟解见葛覃篇一名黄鹂留即黄莺也格物论云莺三四月间鸣声音圆滑罗愿云诗称鸟鸣嚶嚶按禽经称鸛鸣嚶嚶则诗所言鸟殆谓此故後人皆以鸛名之陆佃云韩子曰以鸟鸣春若万鸟之类其善鸣者也此诗托兴专取黄鸟善鸣为巧言之况沔水之诗以飞隼喻谗人之雄者此则所况者下所指者衆以当时讹言繁兴夫人而能为谗也故重言黄鸟焉又罗云此鸟之性好双飞故鹂字从丽所谓鹂必匹飞鵙必单栖也然则重言黄鸟诗人抑又精于体物矣穀桑栩以况谗人所处之地皆丑之之辞也穀恶木也解见鹤鸣篇啄说文云鸟食也鸟之啄物兴谗人之害人粟梁黍皆嘉谷则隰叔所以自况也罗云古者不以粟为谷之名但米之有莩穀者皆粟也春秋说题辞云粟助阳扶性粟之为言续也一变而以阳生为苗二变而秀为禾三变而粲然为之粟四变入臼米出甲五变而蒸饭可食西者金所立米者

阳精故西合米而为粟金履祥云粟即所谓谷也古人米与谷兼积米切用而易腐谷气全而可久缓急兼储後世军储独以米故久即不可食黄鸟集于穀木之上与粟判不相及而来啄我粟则意外之加也故呼而戒之其辞虽隐亦近于骂矣後放此此邦之人指在朝之人沔水篇所谓邦人诸友是也谷毛传云善也莫我肯谷者造言生事不肯以善道待我也惊心于其父之往事故云然言发语辞旋归复三字同义皆谓返也以初行言曰旋以行之本意言曰归以返而已至言曰复邦族谓故国之宗族此邦之人非我族类故反而自求其宗族也隰叔之先本晋人于是复出奔晋】黄鸟黄鸟无集于桑【阳韵】无啄我梁【阳韵】此邦之人不可与明【叶阳韵谟郎翻】言旋言归复我诸兄【叶阳韵虚王翻 兴也桑非恶木而字音不佳故以为丑伊陟相太戊亳有祥桑穀俱生于朝七日而大拱刘向以为桑犹丧也桑穀俱生谓之不祥此诗首章言穀次章言桑其丑可知梁解见鸛羽篇不可与明者不可与分割其是非也兄之亲疎不同凡长于我者谓之诸兄以况僚友本犹兄弟故沔水之诗云嗟我兄弟邦人诸友而今不可与明若此此所以欲返而依诸兄以居盖着其无兄弟之谊也时杜伯虽死于女鸠之诉然同朝之臣为杜伯明冤者惟左儒一人耳其与女鸠表里相济者必实繁有徒沔水之诗所以致憾于邦人诸友而此诗所以广慨及此邦之人也】黄鸟黄鸟无集于栩【麋韵】无啄我黍【叶麋韵读如竖上主翻】此邦之人不可与处【叶麋韵读如取此主翻】言旋言归复我诸父【麋韵 兴也栩即栎也解见晨风篇庄子云匠石之齐至于曲辕见栎社树其大如牛絜之百围匠伯不顾曰散木也以为舟则沈以为棺槨则速腐以为器则速毁以为门户则液樗以为柱则蠹是不材之木也无所可用又罗云木不出火唯栎为然然则栎亦恶木也黍解见黍离篇处止居也既不肯以善道相与而又不能与之分理是非则变乱黑白何所不至祸机一动身且不保岂可与之久处乎伯叔谓之诸父乃分之尊者暗刺王也王信谗在上则臣守之在下者无不怀危计无所出唯有返而依诸父以居耳苏辙云夫去非士之患也使天下之士从此而逝则人主之患也】

黄鸟三章章七句【焦氏易林云黄鸟来集既嫁不荅念我父兄思复邦国朱子则云民适异国不得其所故作此诗子贡传同申培说亦云民适异国见拒于人而思归故乡乃作是诗初观语意俱似近之既而寻绎不我肯谷不可与明二言乃知分明为惧谗而发且于黄鸟啄粟兴义更自了然序但以刺宣王而不能知其事】

鹤鸣教宣王求贤人之未仕者【出郑笺序云海宣王也按说文云海晓教也徐锴云丁宁海之若决晦昧也此诗止一意而引类晓譬不一而足有丁宁之思焉故谓之海陆佃云箴规者友道也海诱者师道也记曰能博喻然後能为师鹤鸣二章皆比而不赋则以海诱故也邓元锡云古纳海者之善诱如是乎然言已孙中兴之业兹替矣愚按此必宣王末年之诗意其时山甫吉甫张仲召虎诸贤皆已次第凋谢故其诗曰爰有树檀其下维穉至如谏废鲁嫡谏不藉千亩谏料民太原谏杀杜伯诸说论皆不见听此诗人所以益致意于他山之石也】

鹤鸣于九臯声闻于野【叶语韵余吕切】鱼潜在渊【丰本作 後同】或在于渚【语韵】乐【音络】彼之国爰有树檀其下维穉【药韵】它【朱子本作他後同】山之石可以为错【药韵说文丰本俱作厝 比也鹤鸟名陆玑云形状大如鷲长三尺脚青黑高三尺余赤顶赤目喙长四寸余多红白亦有苍色者常夜丰鸣其鸣高亮闻八九里雌者声差下鸡鸣时

亦鸣罗愿云繁露曰鹤知夜半鹤水鸟也夜半水位感其生气则喜而鸣陆佃云旧云此鸟性警至八月白露降流于草上点滴有声因即高鸣相警移徙所宿处虑有变害也盖鹤体洁白举则高至鸣则远闻性又善警行必依洲屿止必集林木故诗传以为君子言行之象杨观光云鹤阳鸟也依火精以自养故顶红而不畏海气夜半之鸣喜阳至也露降之戒虑阴盛也阳与阳遇则喜而起阴与阴遇则疑而避殆复後之临姤後之遯与鹤也而龙德在其中矣禽经云鹤以洁喉又云鹤爱阴而恶阳相鹤经云鹤阳鸟也而游于阴臯毛传云泽也韩诗云九臯九折之泽按臯之为泽于义无取或亦作?史记历书秣鳩先溍索隐云谓子鳩鸟春气发动则先出野泽而鸣是溍亦训泽也然溍字说文不载愚意溍即泽字之讹故史记天官书云其色大圜黄??亦音泽即润泽之义泽或省作臯荀子侧载臯芷臯芷者泽芷也臯或混作臯故臯有臯音列子望其圻臯如荀子作望其圻臯如又後汉书郡国志以成臯为成臯皆其明证然则九臯之臯本泽字传写讹耳後人循用遂忘其本郑云泽中水溢出所为坎自外数至九喻深远也孔颖达云郑以一鸟不鸣九泽而云九臯者然则明深九坎于时泽有然者故作者举之郝敬云九臯深泽犹九泉九天极言其深也罗云禽经曰鹤老则声下而不能高近而不能远鸣于九臯鹤之俊者以喻士之及时而未仕者声鹤鸣声也鹤鸣深泽中人莫之见而其声闻于四野郑云喻贤者虽隐居人咸知之毛云言身远而名著也潜藏也洲说文云圉水也水盘旋处为渊渚小洲也解见江有汜篇郑云此言鱼之性寒则逃于渊温则见于渚喻贤者世乱则隐治平则出在时君也孔云此文止有一鱼复云或在是鱼在二处以鱼之出没喻贤者之进退于理为密树说文云生植之总名檀良木解见将仲子兮篇其材强韧可为车喻贤者之才可以重任也乐彼之园爰有树檀者言何乐于彼园之游乎所以乐游彼园以其中有良木故也蘗木叶堕也解见七月篇檀之下所见者惟蘗则凋零之甚而檀亦已槁矣喻贤者衰谢也毛郑以檀喻君子以蘗喻小人则蘗固檀之蘗也岂其身足喻君子而其叶乃喻小人乎不可通矣它山之石喻贤人之在踈远者以其坚质而有廉隅故以石象之它本蛇字象形借为别也彼也说文云上古草居患蛇故相问无它乎因借为别之义魏较云蛇匿莽中莫知何处因借为彼之义後人改作他非古文也错通作厝说文云厉石也旱石曰厉可以磨刀剑荀子所谓钝金必待礪厉然後利又禹贡有磬错则治磬亦用之不必端照下章攻玉言喻得贤人则可以砥世磨钝有移风易俗之效也诗虽托喻四事然转折止是一意言贤者身不可见而名则可闻苟得其所以致之之道则虽始之不可见者终亦未尝不可见也所以乐游王之庭者为贤者在位故耳此时既衰谢如斯矣野有遗贤正当劳于求之资其砥砺之用慎毋以落落难合弃之也九臯他山语自相应皆为侧陋之贤者言耳】鹤鸣于九臯声闻于天【先韵】鱼在于渚或潜在渊【先韵】乐彼之园爰有树檀其下维穀【叶沃韵读如牯姑沃翻陆德明云说文穀从木?声非从禾也】它山之石可以攻玉【沃韵比也上章言声闻于野仅野之人知之此言声闻于天则已升闻在上矣王充云鹤鸣九折之泽声犹闻于天以喻君子修德穷僻名犹达朝廷也荀卿云君子务修其内而让之于外务积德于身而处之以遵道如是则贵名起之如日月天下应之如雷霆故曰君子隐而显微而明辞让而胜诗曰鹤鸣于九臯声闻于天此之谓也鱼在于渚喻贤者出而用世也承声闻于天言朝廷既闻贤者之声名于是迎之致敬以有礼言将行其言也则贤者就之犹之鱼在于渚矣其或礼貌衰或言弗行也则贤者又将去之如鱼始之在渚者或复潜而在渊郑笺谓时蹇则鱼在渚逃于渊是也非变文叶韵之说谷罗云恶木也易生之物一说谷田久废则生谷此声所以通于谷其实正赤如杨梅而无核鹤鸣之诗园之所有木不同而其下皆谷则以谷易生故也伊陟相太戊亳

有祥桑穀共生于朝传曰俱生于朝七日而大拱伊陟戒以修德而木枯刘向以为桑犹丧也穀犹生也杀生之柄失而在下则是以桑穀为二物也而陆玑以为穀幽州谓之穀桑或曰楮桑然则盖一物也论衡曰枫桐之木生而速长故其皮肤不能坚刚树檀以五月生叶後彼春荣之木其材强劲车以为轴商之桑穀七日大拱长速大暴故为变怪穀虽易生至于七日而拱则已速矣江南人绩其皮以为布又捣以为纸长数丈洁白光泽甚好其叶初生可茹又取斑穀之皮以为冠裴渊广州记曰蛮夷取穀皮熟槌为揭里布铺以拟氍然则虽恶木用亦博矣陆佃云穀恶木也而取名于谷者谷善也恶木谓之穀则甘草谓之大苦之类也穀恶木也而疑于美散木也而疑于才其别之则难矣故以海宣王分别善恶先贤以为皮斑者为楮皮白者为穀有瓣者曰楮无瓣者曰构非一种首章言其下惟擗第叹贤人凋谢耳此言其下维穀则喻所进用者无非小人又不独无贤人而已孟子有云舍其梧櫟养其槲棘则为贱场师焉然则向所乐游于彼园而观之者既景象一变如此亦何乐有此园乎攻治也磨玉以石所谓攻也玉主君言以玉者贵物故为君德之比程子云两玉相磨不可以成器以石磨之然後玉之为器成焉王符云攻玉以石洗金以盐濯锦以鱼漉布以灰夫物固有以贱理贵愚按此比首章亦深一层说喻贤者不特下之可以善俗上之亦可以正君故求而用之不可以不亟也】

鹤鸣二章章九句【此章依郑作求贤解其义甚明而意甚串试逐语细玩自见如子贡传云所以修身也反觉寬泛不切朱子亦以为陈善纳诲之辞谓鹤鸣二句言诚之不可掩鱼瞽二句言理之无定在而树檀二段则以爱当知恶憎当知善为言夫然则固知人之事也胡前四句之不相蒙耶申培说阙文】

诗经世本古义卷十七

卷十八之上

<经部,诗类,诗经世本古义>

钦定四库全书

诗经世本古义卷十八之上

明 何楷 撰

周幽王之世诗三十一篇

无将大车刺幽王任用小人也【按竹书纪幽王元年锡太师尹氏皇父命其後与家伯仲允番掇蹶□之徒朋比褒姒表里为恶卒以灭周诗人当王任用之初预忧及此故作此诗又国语言虢石父谗諂巧从之人也而王立以为卿士史父亦言石父为人佞巧善谀好利幽王以石父为卿用事国人皆怨又云褒姒有宠生伯服於是乎与虢石父比逐太子宜臼而立伯服周於是乎亡然则皇父之外更有石父羣小充斥紊乱朝政祚安得延左传王子朝曰至于幽王天不吊周王昏不若用愆厥位正谓此也】

无将大车祇自尘【真韵】兮无思百忧祇自底【叶真韵武巾翻赵颐光云多我覲瘠之瘠即此字石经作瘠俗按底瘠所以有民音者古文如昏緡等字或从氏又或从民且云以民得声然则氏民通用当是字画相近传写致然此底字下从氏或亦通从民也丰氏本作□】兮【兴而比也将郑云犹扶进也按将字从寸寸者手也故为扶而进之之义孔颖达云冬官车人为车有大车平地载任之车也其车驾牛故酒诰曰肇牵车牛远服贾须人傍而将之是为扶车而进也大车比小人言无扶进此小人也郝敬云小车驾马大车驾牛车行利轻而恶重贵马而贱牛故以牛车为小人负重之比始不察而误用至于困惫不前误国债事所以可忧祇旧皆训适也亦通作多尘本作□说文云鹿行扬土也车行土起亦然凡大车所过尘必障天将车之人面目殆不可辨焦氏易林云大车多尘小人伤贤所忧多端曰百忧要玩无思二字忧至于不欲思正其忧之深也底说文云病不翅也不翅犹言不止也小人进用则蛊惑若上之视听以是为非以非为是国事受其紊乱人才受其颠倒其可忧者非上一端故思之而至于疾病不能止也然是小人者谁用之王自用之耳王诚能深思其可忧则斥而远之不难矣不敢诵言而代为懊恨之辞欲王闻之而庶有悟也】

无将大车维尘冥冥【叶迥韵母迥翻】无思百忧不出于頄【迥韵 兴而比也冥说文云幽也从日六门声日数十十六日而月始亏门亦夜也郑云冥冥者蔽人目明令无所见也荀子云君人者不可以不慎取臣匹夫者不可以不慎取友友者所以相有也道不同何以相友也均薪施火火就燥平地注水水流湿夫类之相从也如此之着也以友观人焉所疑取友善人不可不慎是德之基也诗曰无将大车维尘冥冥言无与小人处也韩诗外传云魏文侯之时子质仕而获罪焉去而北游谓简主曰从今已後而不复树德于人矣简主曰何以也质曰吾所树堂上之士半吾所树朝廷之大夫半吾所树边境之人亦半今堂上之士恐我以法边境

之人劫我以兵是以不树德於人也简主曰噫子之言过矣夫春树桃李夏得阴其下秋得阴其实春树蒺藜夏不可采其叶秋得其刺焉繇此观之在所树也今子所树非其人也故君子先择而後种也诗曰无将大车维尘冥冥頍说文云火光也可忧多端倘复思之满腹迷闷终无以自解矣郑云思衆小事以为忧使人蔽闇不得出于光明之道】无将大车维尘雍【叶肿韵委勇翻亦叶宋韵於用翻大全朱传严本苏本丰本俱作壅陆德明本作壅】兮无思百忧祇自重【宋韵亦叶肿韵柱勇翻】兮【兴而比也雍通作邕说文云邕四方有水自邕城池者从川从邑故有障塞之义先言尘继言冥继言雍转起而转盛也严云尘雍蔽则小人之势盛矣是其始将之之过也愚按此谓小人用事则其类方且湊集而至故其象为尘合而壅蔽之甚如此重郑云犹累也王安石云凡物之行不为物所累则轻而速为物所累则重而迟此言不思则己一思则百端交集徒自觉重累耳】无将大车三章章四句【序云大夫悔将小人也郑玄云幽王之时小人衆多贤者与之从事反见譖害自悔与小人并今按幽王之时未有以进用小人而为小人所害者虽史册无考然政不足信子贡传谓是周人谏大夫之诗而其文不全申培说则足之云周大夫有亲信小人者其臣谏之而作是诗与序意大同小异而其义反浅邹忠胤云玩诗人语意实非以大车比小人盖任车莫如重大车以载积中不败此岂小人可拟愚意周人其谏士大夫之贪位擅权乎盖王政不纲王室大夫每相与争政而酿衅小雅故刺之曰民之无良相怨一方受爵不让至於已斯亡夫器小不可以怀大易曰鼎折足覆公餗又曰负且乘致寇至漆园氏有言亲权者不能与人柄操之则栗舍之则悲而一无所鉴以闢其所不休者昊天之恩民也此大夫必力小任重又恋不能舍其所谓百忧亦不过患得患失自貽伊戚而已诗人谏以弛于负担无徒自苦为也故曰无思百忧祇自底兮若使忧而为王室起见则嫠犹不恤其纬而忧宗周之隕为将及周人顾耽怡堂而忘焚栋欲禁使忧者之勿忧反不及嫠恤之忠圣人又何为録之乎其说亦通愚但玩自尘及冥冥雍兮等语明是为诬上行私者而发若朱子以为行役劳苦而忧思之诗则谓此诗真是将大车者所作殊可笑也】

隰桑刺幽王也小人在位君子在野思见君子尽心以事之【出序 愚按郑史伯之言幽王也曰王弃高明昭显而好谗慝暗昧恶角犀丰盈而好顽童穷固去和而取同夫和实生物同则不继以它平它谓之和故能丰长而物生之若以同裨同尽乃弃矣先王择臣取谏工而讲以多物务和同也声一无听物一无文味一无果物一不讲王将弃是类而与剽同天夺之明欲无弊得乎史伯之论和即此诗遐不谓矣之旨知无不言言无不尽是和也非同也诗人所思之君子其亦向在位而今在野者与】

隰桑有阿【歌韵】其叶有难【叶歌韵囊何翻】既见君子其乐【音络】如何【歌韵 兴也隰说文云阪下隰也典术云桑木者箕星之精神木也虫食叶为文章阿通作嬰说文云阴嬰也韵会小补云嬰娜弱态也难通作雉本人行步有节之义以叶之迎风摇曳似之孔颖达云阿那是枝叶条垂之状桑非能水之木而言隰桑美者以桑不宜在停水之地宜在隰润之所隰之近畔或无水而宜桑以今验之实然者也郑玄云正以隰桑兴者反求此义则原上之桑枝叶不能然冯时可云不在原而在隰喻其野处有覆养之德言隰而不言原阴刺在位者之无德于民也愚按车辚篇言阪有桑南山有台篇亦言南山有桑此独以隰桑为言诗人不为无意郑冯之解是也桑生下湿其枝叶嬰雉可爱兴君子在野虽处穷约而英华发外无入

而不自得我若见此君子其乐当如何哉乐喜乐也小曰喜大曰乐曰如何知为虚拟之辞非朝中真见此人也君子必有所指难字中亦含有乐意】

隰桑有阿其叶有沃【叶药韵鬱缚翻】既见君子云何不乐【叶药韵历各翻 兴也沃说文云溉灌也其叶有沃者刘彝云谓长茂光润如膏之沃也按王盘桑书云桑种甚多世所名者荆与鲁也叶薄而尖其边有瓣者荆桑也凡枝干条叶坚劲者皆荆之类也叶圆厚而多津者鲁桑也凡枝干条叶丰腴者皆鲁之类也鲁桑宜饲大蚕而荆桑宜饲小蚕今此桑言阿又言沃意即所谓鲁桑耳桑叶沃则可以养蚕而人皆资其衣被之用兴君子之德足为人所利赖俾之在位则有泽民济世之能此既见之所以可乐也云何不乐反言以见意今不得见则其不乐可知又徐光啓云曰其乐如何者欲自言而非言语之所能形容也曰云何不乐者欲自止而非在我之所能抑遏也亦通】隰桑有阿其叶有幽【尤韵亦叶肴韵於交翻】既见君子德音孔胶【肴韵亦叶尤韵居侯翻 兴也春秋元命苞云幽之为言窈也毛传以为黑色愚按此状叶盛之貌叶盛而密祇见其窈然作深黑色稀疏则不能也言从德出曰德音孔甚也胶说文云昵也煮皮作之所以黏物或用角君子非德不言无言非德亦如桑叶之茂密然闻之者渐渍其中自然胶固而不可解所谓君子之德音甚足以胶固乎人者此也下章遐不谓矣正孔胶之实韩诗外传云夫狂者自齷忘其非揭豢也饭土而忘其非梁饱也然则楚之狂者楚言齐之狂者齐言习使然也夫习之于人微而着深而固是暘于筋骨贞于胶漆是以君子务为学也诗曰既见君子德音孔胶】心乎爱【叶未韵许既翻】矣遐【礼记作瑕】不谓【未韵】矣中心藏【阳韵】之何日忘【阳韵】之【赋也严粲云心乎言繇中也爱谓爱君也遐之言胡也胡之言何也皆音之转也仪礼永受胡福注亦训胡为遐故知胡遐通用遐不犹言无不也谓朱子云犹告也序所谓思见君子尽心以事王者即此藏蓄也中心藏之拳拳服膺之意忘遗忘也言此德音孔胶之君子彼固心乎爱君者凡所当言将无不以之入告矣王诚能以其所言者藏之于心服念不置必知其皆本于忠爱之发自不能一日暂忘此人也藏之之字指言忘之之字指人此君子必以言见弃者故诗人云然表記子曰事君欲谏不欲陈因引此诗以谏者造膝披诚意在悟主君必亮之若陈者乃扬之于外直暴君之失耳所繇与心乎爱君异矣孝经子曰君子之事上思尽忠退思补过将顺其美匡救其恶故上下能相亲也亦引此诗愚绎孔子之言因悟此诗之义进思尽忠退思补过心乎爱也将顺其美匡救其恶遐不谓也遐不谓从心乎爱而来是下亲上也君因其遐不谓而中心藏之自知其心乎爱而无日忘之是上亲下也左襄二十七年郑伯享赵孟于垂陇子产赋隰桑赵孟曰武请受其卒章意欲子产之见规海也又韩诗外传引孟子曰仁人心也义人路也舍其路而弗由放其心而弗求人鸡犬放则知求之有放心而不知求其于心为不若求鸡犬哉不知类之甚矣悲夫终亦必忘而已矣故学问之道无他焉求其放心而已诗曰中心藏之何日忘之玩此引诗之意可知中心藏之更自吃紧】

隰桑四章章四句【朱子谓此喜见君子之诗词意大槩与菁莪相类子贡传则谓此诗与鹿鸣伐木菁莪白驹皆所以燕贤也申培说亦以为天子燕士之诗今按此诗虽彷彿与菁莪近似然细味实有不同者以菁莪取兴自中阿而中沚而中陵有离潜向升之象此三章但皆曰隰桑耳隰者卑下之地其非在高明之位可知况其乐如何云何不乐又皆未有是事而假设之语乎故知序解自确若季本谓此乃妇人于蚕桑之时得见其夫而作其鄙浅不经殊甚】

大东刺乱也东国困于役而伤于财谭大夫作是诗以告病焉【出序 诗称西人谓西京之人也则其为西周之诗可知竹书纪幽王二年初增赋是诗之作其在此时乎周道虽衰而诛求之令尚行于天下及至东周则不能然矣王应麟云择三有事亶侯多藏贪墨之臣为蠹贼小东大东杼柚其空聚敛之臣为斧斤文侯之命所谓殄资泽于下民也孔颖达云谭大夫以谭国在东而见偏役故经云小东大东不指谭而言东者大夫虽自为已怨而非谭独然故言东以广之陈氏云晋之乘楚之檇机鲁之春秋皆东迁之史也古者诸侯无私史有邦国之志则小史掌之而藏周室鲁人所谓周人御书晋人所谓辛有之二子董之晋於是有董史者也是故费誓系於周书汉汝江沱至于谭大夫下国之诗皆编入于南雅按谭嬴姓子爵详见硕人篇】

有饁【杨子奇字作□】簋殽有捄棘?【纸韵】周道如砥【纸韵孟子作底】其直如矢【纸韵】君子所履【纸韵】小人所视【叶纸韵善旨翻丰氏本作眎墨子引此诗云其直若矢其易若底君子之所履小人之所视】睠【後汉书陆德明本俱作眷】言【後汉书作然荀子作焉】顾之漕焉【荀子作然】出涕【叶纸韵天以翻 赋也饁说文云盛器满貌簋解见权舆篇殽毛传云熟食谓黍稷也郑玄云殽者客始至主人所致之礼也凡殽饗饔以其爵等为之牢醴之数陈孔云主人供宾客有禾有米此以盛于簋故知熟食也又礼之通例皆簋盛稻粱簋盛黍稷故知谓黍稷也聘礼宾初至大夫帅至于馆宰夫朝服设殽必先设之者以其初至权致小礼彼注云食不备礼曰殽对饗饔之为不备司仪注谓小礼曰殽大礼曰饗饔是也杨慎云殽客始至之礼饗将币之礼今之通训曰朝饗夕殽殽如今驿舍下马饭饗如今下马宴客至必夕夕食未盛故曰夕殽享宴必以早为敬而享宴必盛故曰朝饗按周礼大行人以九仪待宾客有飧礼有食礼小行人掌宾客礼籍以待四方之使者春入贡秋献功王亲受之各以其国之籍礼之大客则摈小客则受其币而听其词掌客掌四方宾客之牢礼饔饗饮食之等数羣介行人宰史皆有殽饗饔凡诸侯之卿大夫士为国客则如其介之礼以待之捄通作觶本作觶角上曲而长之貌此亦以曲而长言棘赤心之木匕亦作枇匕所以取饭亦所以载牲体载谓出之于鼎升之于俎也其别有四仪礼少牢篇廩人所漑者黍稷之匕也雍人所漑者牲体之匕也又有疏匕注谓匕柄有刻饰者以其言疏是疏通刻饰之名通柄刻云气以饰也又有挑匕注谓挑者长枋可以杼物于器中者此二匕皆有浅升状如饭糲则亦皆雍人所用之匕也裸记云枇以桑长三尺或曰五尺刊其柄与末郑注谓此丧祭之枇若吉祭则用棘孔谓知吉祭枇用棘者特性记枇用棘心是也按易震卦言不丧匕鬯震所以有匕象者以三四五互体坎坎为丛棘故云则吉祭之用棘匕审矣桑枇刊柄与末棘匕当不然吉凶之别也孔又云待宾客之匕礼当用棘棘木赤心言于祭祀宾客皆赤心竭诚也古之祭祀享食必体解其肉之胖既大故须以匕载之按国语周定王云禘郊之事则有全烝王公立烝则有房烝亲戚宴享则有殽烝今我王室之一二兄弟以时相见将酺协典礼以示民训则无亦择其柔嘉选其馨香洁其酒醴品其百边修其簠簋奉其牺象出其尊彝陈其鼎俎静其巾冪敬其祓除体解折节而共饮食之是正所谓殽烝者此诗棘匕所用亦当主殽烝言盖追思周之盛时其待诸侯之客礼意殷勤劳来周悉如此所以怀远为近宾至如归观周道而不觉恍然兴今昔之感如下文所云也周道适周之道砥细于砺磨石也如砥以平原四达言如矢以驰道千里言履者朝覲会同循斯道以往来视者沿途小民莫不踴躍盱眙乐观盛典也又孟子引此诗云夫义路也礼门也惟君子能繇是路出入是门也乃断章取义非此诗旨瞻

眷同字睠顾皆以还视为义言语辞源说文云涕流貌涕目汁也郑云在乎前世过而去矣我从今顾视之为之出涕伤今不如古也朱子云以东方之赋役莫不繇是而西输于周也】小东大东【韵】杼柚【易林陆本丰本俱作轴】其空【东韵】纠纠葛屨可以履霜【阳韵】佻佻【韩诗作耀耀云往来貌楚辞章句作苕苕陆云或作窈非也】公子行彼周行【叶阳韵户郎翻】既往既来【叶职韵六直翻】使我心疚【叶职韵乞力翻诗以来疚为叶者凡三处采薇篇忧心孔疚我行不来杕杜篇匪载匪来忧心孔疚并此而三丰本作怵赋也小东大东朱子云东方小大之国也自周视之则诸侯之国皆在东方一说郑云小也大也为赋敛之多少也小亦于东大亦于东亦通杼说文云机之持纬者柚通作轴董鼎云卷织者朱子云受经者也所以知柚为此器者上文杼推之布缕为三征之首举此以见其余也又方言云作也土作谓之杼木作谓之柚似非此诗义空尽也易林云赋敛重数政为民贼杼柚空虚家去其室陈际泰云关东诸侯之不贡也於求车求金见东诸侯之罪於小东大东见周天子之罪纠纠二句解见葛屨篇上泛言诸侯此下则大夫自咏也言敝坏之葛屨以绳纠纏之纠而复纠用以践霜贫乏之甚也时盖以夏日供赋适周至履霜时反国故云然佻薄也佻佻朱子云轻薄不耐劳苦之貌谓形体脆弱也诸侯之子曰公子此谭国之公子大夫所从行者也季本云以周人责礼于诸侯而诸侯使贵戚之卿修问也周密布也行班列也与卷耳鹿鸣篇义同既者已事之辞往往周朝也来来本国也我大夫自谓也疚尔雅云病也说文无疚字当作?此公子行至于周见彼布列有位者无非疆御掊克之徒即第四章所称者是以赋敛无经流毒下国而大夫与之偕行亲所目击故自往而来心怀疚病不能自己是诗之所为作也】有洌洌【陆本作晷】泉无浸【陆本丰本俱作浸】获【尔雅作获云木名】薪【真韵丰本作新下同】契契寤叹哀我憊【尔雅陆本丰本俱作瘁下同】人【真韵】薪是获薪【见上】尚可载【叶职韵节力翻】也哀我憊人【见上】亦可息【职韵】也【兴而比也洌本作洌说文云水清也尔雅云洌泉穴出穴出仄出也李巡云水泉从旁出名曰洌刘熙云洌轨也流狭而长如车轨也浸本作浸渍也获毛云艾也孔云读如获稻之获刈也薪当析之云刈者盖木之细荆楚之类曰言刈其楚是小者刈之也按周礼邦畿之外侯服贡祀物甸服贡嫔物男服贡器物采服贡服物卫服贡财物要服贡货物是皆有常数矣此外有所徵求即非惟正之供是侧出之泉之比也谭小国也不憊悉索以效输将民力竭矣譬之获薪生意已槁更以洌泉渍之行且腐败而不中用即薪亦不能成其为薪民已憔悴而更殫残之势必至无民而後已耳契通作忤契契寤叹即下泉篇云忤我寤叹也解见下泉篇或云契通作契刻也重言之者刻画切心之意亦通憊通作瘁劳病也薪是获薪以下四语为王朝正告也息即喘息之息一呼一吸有停歇之义惟兹获薪司?者欲用之为薪庶其载而蓄之勿使受浸可也哀我劳病之民亦可稍从休息勿使劳而不已可也邓元锡云周轍东而诸侯之职贡不复至则浸获薪之效也当是时即欲来憊人岂有及哉故九经於远人于诸侯曰柔曰怀有以也夫】东人之子职劳不来【叶职韵六直翻】西人之子粲粲【韩诗作采采】衣服【叶职韵鼻墨翻】舟【未育集字作周】人之子熊羆是裘【叶支韵渠之翻丰本作求】私人之子百僚【陆本作寮】是试【叶支韵申之翻】或以其酒不以其浆【阳韵】鞞鞞【尔雅陆本丰本俱作琕琕】佩璲不以其长【阳韵 赋也孔云从首章以尽三章皆是困役财之事四章以下言周衰政偏衆官废职繇此已国所以赋重故言之以刺周乱也东人泛言诸侯之人谭亦与焉职专主也来来之也朱子云慰抚也职劳不来谓专主劳苦之事而无有慰抚之者西人毛云京师人也盖当权用事者与谭之公子大夫对看粲通作灿说文云灿烂明滯貌重

言之者见非一粲也衣服谓在官之章服舟人操舟之人熊罴解见斯干篇裘说文云皮衣也寒时所用朱子云熊罴是裘言富也愚按说苑载晋平公使叔向聘于吴吴人拭舟以逆之左五百人右五百人有绣衣而豹裘者有锦衣而狐裘者叔向归以告平公平公曰吴其亡乎奚以敬舟奚以敬民此即所谓舟人之子熊罴是裘者也私人谓权门私家之人按崧高云迁其私人以申伯为王卿士称其家臣为私人又仪礼有司彻云献私人礼记玉藻云大夫私事使私人摈则称名皆以臣事于私家谓之私人也僚官试用也百僚是试毛云用于百官也舟人私人又就西人中举其至贱者以深恶之四种人皆平等以子称寓不足之意犹曰夫非尽人之子与苏辙云舟人水居而服熊罴之裘所服非其所有也私人无籍于王室而试百官所事非其所职也严粲云东人困悴虽贵者犹葛屨以履霜而西人逸乐虽贱者皆美服厚禄言不均也酒与浆有别浆乃酒之薄者素问所云今时之人以酒为浆是也说文谓之酢浆言其有酸味也周礼酒正辨四饮之物三曰浆注以为今之馥浆也石氏星经云酒醪五齐之属天文酒旗星主之浆水六清之属天文天乳星主之毛云或醉于酒或不得浆愚按此亦以厚薄不均言东人之子职劳不来其不获沾一浆之赐固其宜矣韩诗外传云宋燕相齐见逐罢归之舍召门尉陈饶等二十六人曰悲乎哉何士大夫易得而难用也饶曰君弗能用也则有不平之心是失之已而责诸人也三斗之稷不足於士而君鴈鹜有余粟是君之一过也果园梨栗後宫妇人以相提擲士曾不得一尝是君之二过也绂纁绮縠靡丽於堂从风而弊士曾不得以为缘是君之三过也且夫财者君之所轻也死者士之所重也君不能行君之所轻而欲使士致其所重犹譬鈇刀畜之而干将用之不亦难乎宋燕面有慙色逡巡避席曰是燕之过也诗曰或以其酒不以其浆鞞说文云大车缚?鞞也鞞者柔革也於佩璲文义不相蒙当通作璲璲者络也凡偏旁用璲者多易混如玃或为玃或为玃是也但从革从系不同以音同通用耳尔雅作琚琚按说文无琚字璲通作瑞郑云以瑞玉为佩又徐广云今名璲为璲范曄云璲者古佩璲也佩绶相迎受故曰璲佩所以章德韍所以执事礼有其度威仪之制三代同之五伯迭兴战兵不息佩非战器韍非兵旗於是解去韍佩留其系璲以为章表故诗曰鞞鞞璲此之谓也韍佩既废秦乃以采组连结於璲光明章表转相结受故谓之绶汉承秦制用而弗改今按说文无璲字尔雅解璲为瑞正当以音同通用若曄後汉书以璲为璲恐未必然意即是佩璲之络耳不以其长者苏云虽则佩王盛服而非其长过人也郑云徒美其佩而无其德刺其素餐愚按或以其酒二句承舟人之子言鞞鞞璲二句承私人之子言以深嫉其富贵周语卫彪傒曰自幽王而天夺之明使迷乱弃德而即愆淫以忘其百姓夫周高山广川大藪也故能生之良材而幽王荡以为魁陵粪土沟渎此之谓也】维天有汉鉴亦有光【阳韵】跂【说文丰本俱作𠂔】彼织女终日七襄【阳韵】虽则七襄【见上】不成报章【阳韵】睨彼牵牛不以服箱【阳韵 赋也此下皆恨极无聊之词万时华云自此至末文字到无义理处已入絕妙田地痴人说梦不得汉毛云天河也河图括地象云河精上为天汉杨泉云水之精也气发而着精华浮上宛转随流名曰天河又史记云汉者亦金之散气朱子云在箕斗二星之间其长竟天步天歌云天河亦一名天汉起自东方箕尾间遂乃分为南北道南经传说入鱼渊开龠戴弁鸣河鼓北经龟宿贯箕边次络斗魁冒左旗又合南道天津湄二道相合西南行分夹匏瓜络人星杵畔造父螭蛇精王良附路阁道平登此大陵泛天船直到卷舌又南征五车驾向北河南东井水位入吾骊水位过了东南游经次南河向阙丘天狗天纪与天稷七星南畔天河没石氏云天汉盖天一所生凝毓而成者天所以为东南西北襟带之限也天下河汉之源盖出诸此按天河从北极分为两条至于南极其一经南斗中过其一经北

斗中过两河随天转入地中夏小正云七月汉案户注云案户直户也古者户皆南是时初昏天汉直南孔云星皆在天独汉言维天者以其初言天象故云维天以总之使下诸星皆蒙维天之文也监说文云临下也谭人仰诉于天言我民困矣维天之汉固有光明者亦能下监我民乎其不言日月之明而言汉之光者欧阳修谓不能下监是也又按毛孔说天汉虽有精气之光然徒有光而无所明则是亦刺王不明之意自跂彼织女至未分为五段节节与前章相应求助于织女为杼柚其空而言也求助于牵牛为职劳不来而言也跂通作企举踵也跂予望之同此天官书云婺女其北织女织女天女孙也星经云织女三星在天市东端主丝帛尝以七月一月六七日见东方色赤精明女功善常向扶匡即善不向则丝帛倍贵火星守布帛贵客守丝帛等贵婺女四星主布帛大明女功有就日月蚀女中天下女功不为火星守布帛贵水星守布帛贵客守布帛贵左昭十年有星出于婺女杜预注婺女为既嫁之女织女为处女也按此诗止言织女因下文有七襄字则似当兼婺女言之以织女星三婺女星四合之方成七数又皆主布帛则皆能织之类耳婺女居二十八宿之一亦名须女须者贱妾之称妇职之卑者也若织女乃牛宿所属虽颇相近自不可混而为一杜甫诗云牵牛出河西织女处其东张鼎思云余考天文图织女在河南而东牛宿在河北而西以河为界子美诗是也张子野谓须女在牛东考图乃在牛西亦不隔河从旦至暮为终日襄通作纁佩带也报答也章文章锦绮之属企望织女至于竟日且致七襄以申其祈祷之意楚辞所谓解佩纁以结言是也庶七星者怜我杼柚之空肯以织作之文章答我乎其如有虚愿而无成事何哉易林云天女抚床不成文章睨说文云大目也睨彼牵牛盖谓张目以视之天文志牵牛为牺牲其北河鼓按河鼓十二星在牵牛北尔雅直以河鼓为牵牛非也步天歌云牛六星近在河岸头头上虽然有两角腹下从来欠一足郑云以用也邱氏云服箱犹言驾车按郑司农云服读为负有负荷之义箱说文云大车牝服也大车平地任载之车牛所驾者牝服长八尺谓较也两较之内谓之箱是车内容物之处毛郑皆以服为牝服夫牝服即箱既言服又言箱於义复矣彼睨然之牵牛既不可用以负箱则我东人尽其车牛输其职贡以劳敝于道路者尚未有已也夫财殫不胜役力疲不胜求而天又不肯见恤我如是然则我将于何请命乎】东有启【尔雅说文徐注丰本俱作启大戴礼作开】明【庚韵亦叶阳韵谟郎翻】西有长庚【韵亦叶阳韵居郎翻】有捄天毕载施之行【庚韵亦叶阳韵户郎翻】维南有箕不可以扬【阳韵】维北有斗【陆德明云沈作主後同】不可以挹酒浆【阳韵】维南有箕载翕其舌【屑韵】维北有斗西柄之揭【叶屑韵丘杰翻 赋也上章因赋役之苦而望救于天此则刺在位者皆贪鄙小人而愬之于天也尔雅云明星谓之启明孙炎云明星太白也晨出东方高三舍命曰启明昏出西方高三舍命曰太白班固云太白白比狼赤比心黄比参右肩青比参左肩黑比奎大星天官占云太白者西方金之精白帝之子一名荧星一名官星一名梁星一名灭星一名大器一名大爽径一百里史记云察日行以处位太白太白大臣也其号上公其他名殷星太正营星观星官星明星大衰大泽终星大相天浩序星月纬大司马位谨候此张衡云一名火政一名明堂一名文表一名太皞一名天相一名威星孔云长庚不知是何星未能审也今按太白名号甚多独不见长庚之称其广如一匹布着天者亦名长庚此星见兵起乃妖异之星非常见者不应与启明对言郑樵则以长庚为水星谓金水二星附日而行金在日西故日将出则东见水在日东故日将没则西见夫水星自名辰星古来载籍未尝闻有以长庚呼水星也且据史记称太白出以辰戌入以丑未辰星出入亦常以辰戌丑未安得每日东西见乎及考张揖广雅则云太白谓之长庚或谓之太器始知长庚启明本是一星而李白之生母梦

长庚星因以白为名而字太白非无据也韩诗毛传亦皆指为明星特从来解说东西二字不明似乎每日东西两见者然孟康有云太白阴星出东当伏东出西当伏西过中为经天谓出东入西出西入东也太白经天天下革民更王今使每日皆东西两见岂每日皆经天乎抑岂作诗之时偶逢此变乎以文害辞正此之谓夫东西原非同时当其晨见东方去夕见之期甚远及其夕见西方去晨见之期甚远启明长庚正因东西见而异其名先儒谓启者开也言开导日之明也庚者续也言长能续日之明也一说庚金属亦通又按星之在天有经有纬三垣二十八舍为经星附天转运各有常位譬如百官万民各守其职业而听命于七政三垣一曰紫微一曰太微一曰天市二十八舍者东方七宿角亢氐房心尾箕为苍龙之体北方七宿斗牛女虚危室壁为玄武之体西方七宿奎娄胃昂毕觜参为白虎之体南方七宿井鬼柳星张翼轸为朱雀之体中外官星总计二百八十三座常明者百有二十可明者三百二十为星二千五百微星之数万有一千五百二十焉金木水火土五星为纬星合日月为七政悬虚运转不附于天木曰岁星行四千三百三十一日有奇约十二岁一周天火曰荧惑行六百八十七日弱约二岁一周天土曰填星行一万七百四十八日弱约二十八岁一周天惟金曰太白水曰辰星二星各行三百六十五日有奇岁一周天旧说谓金水二星常附日行者乃谓其一岁所行周天日数与日行相等非谓星体常附日行也凡五星之迟留伏逆皆因于日近日则疾远日则迟迟甚而留留久而退初迟退渐疾退退最疾而後迟退如初退止而留留久而顺行却从最迟以至于最疾最疾则与日同躔也水火土三星比日行度较少与日未对冲之先夜半後可望与日既对冲之後夜半前可望兹不具陈若太白辰星则不然其行度亦各不相似太白最疾时约四日行五度有余辰星最疾时约一日行一度有余此两星比日行度较多伏合以後则过日而前太白距日十度半而夕见辰星距日十六度而夕见夕见则在西方太白距日甚远不过四十五度辰星距日甚远不过二十四度既已甚远则所行迟比日较少繇是渐与日近太白距日三十度有余而初留辰星距日二十一度半而初留太白留後距日二十四度有余而初退辰星留後距日十九度半而初退退行之际与日相近如夕见之度伏而不着与日相远如夕见之度晨见于东退行最疾之时与日必同度退止而留则距日如初退之度留久而顺行则距日如初留之度迟行渐疾而渐近日距日如退伏之度则又退而不着矣与日未退合之先昏後可望与日既小合之後晓前可望盖金木形体大故伏见与日近水火土形体小故伏见与日远岁星八十三年而七周天与日合度者七十六合期约二百九十九日荧惑七十九年而四十二周天与日合度者三十七合期约七百八十日填星五十九年而二周天与日合度者五十七合期约三百七十八日太白辰星与日常相近随日一年一周天太白八年而五合于日退合者又五约五百八十四日而顺逆两合辰星四十六年之间合于日者一百四十五退合亦然约一百一十六日而顺逆两合此乃五纬之常数也古法唯知有常数未知有变数之加減北齐张子信仰观岁久知五纬有盈缩之变当加減常数以求其逐日之躔盖五纬不繇黄道亦不繇月之久道而出入黄道内外各自有其道视日远近为迟速如足力之有倦勤其变数之加減如里路之径直斜曲也岁星加減最多处约七度荧惑加減最多处二十五度有余填星加減最多处八度有余太白加減最多处四度有余辰星加減最多处六度有余此乃五纬盈缩之变数也五纬之外又有四余四余者天之隐曜也行无迟疾紫气木之余气也隐而不见见为有道谓之景星其行一万二百二十七日有奇约二十八岁一周天月孛水之余气也隐而不见见则妖孽谓之彗星其行三千二百三十二日弱约八岁十月一周天凡六十二年而七周天罗?火之余气计都土之余气常隐不见是谓天首天尾从

交会之蚀限计之其行六千七百九十三日有奇约十八岁七月一周天但五纬与月孛紫气顺行皆以左旋步之罗?计都逆行乃右旋步之耳夫在天成象日月星辰皆象也而日月五星独异于衆星自有行度者此陰阳五行之精所以为造化之妙非衆星比也旧闻如此因详录之陆佃云启明则以况其左长庚则以况其右言王左右或当养人以启导王德或当养人以赓续王事今皆有名位而已无其实也愚按日者君象故启明长庚有臣之义诗隐辞以刺正与上章言采采衣服鞞鞞佩璲者相应一说苏云言王之百役皆取于东则曰东有启明西有长庚启明长庚皆太白也亦通有球与首章有球同义曲而长也天毕朱子云毕星也尔雅云浊谓之毕孙炎云掩兔之毕或呼为浊因以名星孔云月令禁罗网毕翳无出国门是田器有毕也特牲馈食礼曰宗人执毕是祭器有毕也孙毓云祭器之毕状如毕星名象所出也毕弋之毕又取象焉而施网于其上步天歌云毕恰似瓜叉八星出史记云毕曰罕车主弋猎其以天名必有其义後汉书云毕为天网主网罗无道之君故武王伐纣上祭于毕求助天也又晋书毕八星其大星曰天高又昂毕之间为日月五星出入要道故元命包云毕为天阶今不知何所取之载之言则也施旗逶迤貌行谓二十八宿之行列毕星球然逶迤于星宿之列若欲尽皮革之族而掩捕之者小人罔利之象何以异此亦与熊罴是裘相应南箕解见巷伯篇步天歌云四星形状如簸箕箕下三星名木杵箕前一黑是糠皮簸说文云扬米去糠也扬说文云飞举也维北有斗乃七星之北斗晋书云北斗七星在大微北七政之枢机陰阳之元本也星经云第一名天枢为土星主阳德亦曰政星也是太子像第二名璇主金刑阴女主之位主月及法第三名玗主木及祸亦名金星第四名权主火为伐为天理主伐无道第五名衡主水为煞助四时旁煞有罪第六名□阳主木及天下仓库五谷第七名瑶光主金亦为应星春秋运斗枢云第一至第四为魁第五至第七为标合而为斗史记云杓携龙角衡殷南斗魁枕参首用昏建者杓夜半建者衡平旦建者魁斗为帝车运于中央临制四乡分陰阳建四时均五行移节度定诸纪皆系于斗旧说谓魁第一星衡第五星杓第七星此三星谓之斗纲乃七政之枢机四时之斟酌随所指以运元化者也如今寅月雨水後日躔入亥宫则斗杓昏刻指寅斗衡夜半指寅斗魁平旦指寅以春卯月春分後日躔入戌宫则斗杓昏刻指卯斗衡夜半指卯斗魁平旦指卯以推余月皆然下文言西柄之揭是斗柄指西正在秋时且明言维北有斗於二十八宿之南斗何与孔朱泥箕斗连言谓箕斗二星以夏秋之间见于南方箕在斗南斗在箕北故云维北有斗迂矣凌蒙初云考天文夏秋之间斗宿在箕东而稍北固未尝在北且譚大夫东人自东而指正谓其在北之斗耳岂得指时方在南之斗宿而因在箕北以谓之北斗乎按南斗六星状亦如北斗东四星为魁西二星为柄挹毛云?也说文云抒也徐铉云从上酌之也陆佃云诗曰酒醴维醕酌以大斗釁取象于雷斗取象于斗也东人困于不得饮食故思 扬米粟以成酒浆而挹?之而箕斗徒存空名了无实用亦徒付之妄想而已与或以其酒不以其浆相应翕合也孔云箕斗之形成于柄舌揭说文云高举也末又转一意而言箕斗非特不可用已也箕其踵似箕且有舌今其舌翕翕反若将有所吞噬斗四星为斗三星为柄今既西揭其柄则其方如斗者且向东而将有所挹取哀我憊人何时得息乎亦深恶在位皆贪残也又此章止作刺横斂无已亦可但於第四章似无绾结故定主前说严云此诗其作于秋乎露渐为霜云汉分明斗指西箕在南皆秋时也时惟毕未见因言星及之耳按月令孟秋旦毕中唐月令八月晓毕中则此时毕星或旦见也】

大东六章四章章八句二章章十二句【子贡传申培说丰氏本篇名俱作小东毛传及诸家

本皆作七章章八句惟严粲分为六章内第四章十二句与此同第五章自维天有汉起至载施之行止共十二句为一章与此异今以愚意定之 子贡传惟存厉王之时诸侯劳七字其余文皆阙申培说与序同惟谭大夫去一谭字因朱子有云谭大夫未有所考不知何据遂删此字真伪书之陋者也又杨慎云周自平王遭父子之变去丰而迁雒周始东也故曰大东自敬王遭兄弟之争子朝居王城曰西王敬王居狄泉曰东王周又东也故曰小东周有二东之变王迹熄而王室乱矣大国攻战会盟小国贡赋奔走故空其杼柚而怨刺作也曰然则诗词何以先小也曰自今而追昨故先小而後大也曰诗篇名何又曰大东也曰纪乱之原也按用修之说二东亦自有理但篇中以西人与东人对言明指西周非东迁後诗也今不取】

巷伯嫉谗也幽王初听谗有孟子者为巷伯所譖遂遭宫刑因作此诗【序云刺幽王也寺人伤於谗故作是诗也申培说云幽王之时孟子遭谗而被宫刑作此朱传同按班固之评史迁曰迹其所以自伤悼小雅巷伯之伦夫惟大雅既明且哲以保其身难矣哉其意亦谓巷伯本以被譖而遭刑也作诗在为寺人之後故自表其官以志恨刘敞云诗名巷伯是其身所病者故以冠篇愚按巷伯即行譖之人诗中既隐其名以明厚而又不欲其湮泯失传故特于篇名著之路史以巷为伯之采邑而姓纂有巷氏者云是巷伯之後可见巷伯自有其人旧说以巷为永巷伯者内小臣之长云即寺人非也周礼官名有寺人而无巷伯其非奄官审矣】

萋【说文丰氏本俱作縵】兮斐【陆德明本作菲】兮成是贝锦【寢韵】彼譖人者【音覩後同】亦已大【音泰】甚【寢韵 比也萋盛貌如卉木萋止之萋斐说文云分别文也萋兮菲兮者言盛矣其文章之分别也若依说文则萋通作縵白文貌言白质而加之以縵文也若依释文则斐通作菲薄也文有盛处又有薄处见其浓淡之相错也贝陆玕云水介虫也龟鼈之属其文彩之异大小之殊甚衆古者货贝是也余蚬以黄为质白为文余泉以白为质黄为文又相贝经云贝盈尺状如赤电黑云谓之紫贝素质红黑谓之珠贝青地绿文谓之绶贝黑文黄画谓之霞贝紫愈疾珠明目绶消气障霞服蛆虫陆佃云锦文如贝谓之贝锦禹贡云厥篚织贝严粲云此言谗人织成己罪也锦文如贝縠萋兮菲兮错縠衆采织而成之也譖诬告之也人作诗者自谓也後放此亦已太甚言譖人之人所为之忍也郑笺云谓使己得重罪也】哆【说文作𠂔云曲𠂔也一曰鬻鼎崔灵恩注作侈】兮侈【叶寘韵充?翻说文崔注俱作哆尔雅作𠂔丰本作𠂔】兮成是南箕【叶寘韵居吏翻按箕籀文作其其有忌音诗彼其之子是也】彼譖人者【叶夔韵当古翻集韵云助语辞】谁适与谋【叶夔韵满补翻 比也哆说文云张口也侈说文云掩胁也侈之训掩胁其义未闻以意揣之侈从人从人多则力盛故可以掩胁也掩者掩而取之之谓胁即胁从之胁通作協摺也若今人用奢侈之侈本?字或?字?火盛也?广也以音同通用积习相沿遂忘其本哆兮侈兮者象箕星张口之状如将掩物而食之者然所谓维南有箕载翕其舌也孔穎达云箕四星二为踵二为舌踵狭而舌广又按步天歌云箕四星形状如簸箕中有三星名木杵箕前一黑是糠皮与孔说微异晋书云箕四星亦後宫妃后之府亦曰天津一曰天鸡主八风郑晓云箕承帚以埽者又扬谷器尾受之以箕章妇道也又主口舌骨肉谗之所生也故箕一名卷舌诗纬云箕为天口主出气史记天官书云箕为敖客曰口舌宋均云敖调弄也箕以簸扬调弄为象又受物有去去来来客之象也严云箕东方之宿考星者多验于南方故曰南箕愚按以比意求之取象南箕有簸扬其说之意与下文谁适与谋相炤目锦锦也而譖人者其言似之南箕星也而共谋为譖者其人

似之故曰成是贝锦成是南箕也非因小过而饰成大罪因疑似而构成实罪之说果尔则在我实有瑕可乘矣於譖者何尤适郑云往也谁往就汝谋乎怪其言多且巧也】缉缉【说文作𠄎𠄎云聂语也】翩翩【陆本作扁扁】谋欲譖人【真韵】慎尔言也谓尔不信【叶真韵升人翻 赋也承上言谁适与谋故此及下章缉翩捷幡皆用重字见同谋者之衆也缉说文云绩也翩说文云疾飞也严云接续增益缉缉然如女之绩往来轻飘翩翩然如鸟之飞相与经营谋为谗譖而已不信者言之无实也尔譖人今日固自以为得意矣然更宜慎重尔言毋徒饰虚为实苟不慎尔言将有时而败露听者亦知尔言为无实而不受也此盖微词以讽王下章放此】捷捷幡幡【说文引此有𠄎𠄎幡幡之语当是误以上章缉缉与此章幡幡合作一语丰本从之非也】谋欲譖言【叶真韵疑斤翻】岂不尔受既其女【音汝】迁【叶真韵仓新翻 赋也捷通作逮疾也幡通作翻飞也朱子云捷捷僇利貌幡幡反覆貌谋欲譖言者谋欲求工於譖人之言也受纳也女即尔也迁毛云去也孔云王於仓卒之间岂不为汝受之但已受之後知汝言不诚实王心或将舍汝而更迁去也】骄人好好【皓韵】劳人草草【皓韵读诗记丰本俱作^廿^廿】苍天苍天【先韵亦叶真韵汀因翻】视彼骄人【真韵亦叶先韵如延翻】矜此劳人【同上 赋也骄纵恣也如马行骄骜之貌骄人指譖人者言好好毛云喜也严云譖人者得意而骄好而又好也劳人作诗者自谓也草通作燥愁不安也身虽劳于职事而不见察忧愁之极燥而又燥也不敢斥王故重呼苍天而告之也陆佃云庄子曰天之苍苍其正色耶远而无所至极耶故诗於高远难诉每称苍天黍离曰悠悠苍天此何人哉巷伯曰苍天苍天视彼骄人矜此劳人黄鸟曰彼苍者天歼我良人是也锺惺云视字妙即俗所云看他不过也矜怜也辅广云视彼骄人庶乎有以抑遏沮止之也矜此劳人庶乎有以扶持安全之也陆燧云下三句无可奈何要天开眼的话头】彼譖人者【叶麋韵见第二章】谁适与谋【叶麋韵见第二章】取彼譖【礼记注後汉书俱作谗】人【丰本无谁适与谋取彼譖人二句其为伪删无疑】投畀豺【陆本作豺後汉书注作有】虎【麋韵】豺虎不食【职韵】投畀有北【职韵】有北不受【叶皓韵时倒翻亦叶宥韵承呪翻】投畀有昊【皓韵亦叶宥韵许候翻 赋也彼譖人者果谁适与谋乎恨之之深而又不得其主名姑但欲取譖人者而甘心焉投说文云擿也畀相付与也俱见说文豺说文云狼属狗声郭璞云脚似狗贪残之兽也罗愿云牙如锥长尾白颊足前矮後高而长尾其色黄瘦健今人称豺狗格物论云虎如猫而大如黄牛黑章鉤爪踞牙舌不大於掌生倒刺须硬尖而光横行而妥尾其怒而吼也声如雷百兽为之震恐陈藏器本草云虎威如乙字长一寸在胁两傍皮内尾端亦有之北北方也毛云北方寒凉而不毛罗泌云帝戮蚩尤迁其民善者于邹屠恶者于有北诗曰投畀有北恶可知矣昊天也大而明曰昊天朱勃云此言欲令上天而平其恶孔云豺虎若不肯食当掷予有北太阴之乡使冻杀之若有北不肯受则当掷予昊天自制其罪以物皆天之所生天无推避之理故止於昊天也豺虎之食人寒乡之冻物非有所择言不食不受者恶之甚也故礼记曰恶恶如巷伯言欲其死亡之甚陆佃云地于四方正言有北者有北朔地也朔地者寛闲之至天於四时正言有昊者有昊南天也南天者辨察之至真德秀云谗人为害至深故诗人疾之亦甚舜之治四凶也以御魑魅而大学於不仁之人欲屏诸四夷诗人之情亦若是也钱天锡云上之求诉于天以王之不明下之求制于天以王之不振邓元锡云听断制其命于天盖于是知其疾谗者一天也锺云无可奈何反作此奇想邹忠胤云五刑之属官居一而诟称甚所谓中才莫不伤气何况慷慨之士巷伯所以痛心疾首抚膺而吁天也】杨园之道猗于亩丘【叶支韵祛箕翻】寺人孟子作为此诗【支韵陆云一本云作为作诗】

凡百君子敬而听之【支韵 比而赋也扬者近水之木宜下湿故杨园为下地猗通作倚郝敬云自下而达上如倚丘也尔雅云如亩亩丘按亩田之壠也丘如田壠曰亩丘孙炎云方百步也孔云於时王都之侧盖有此园丘诗人见之而为辞也严云杨园下地以况卑人亩丘高地以况大臣欲陵亩丘则必道杨园言将譖大臣必始于卑人也寺人内小臣周礼寺人职云王之正内五人寺之为言侍也正内者路寝也侍王于路寝而掌王之内人及女宫之戒令盖奄人也孟子其字也姓名无考毛云寺人而曰孟子者罪已定矣而将践刑作此诗也孔云知罪已定者若不定则不应疾谗人如此之甚也由践刑而作此诗知自言孟子以殊于余寺人不被谗者也作说文郑笺皆云起也孟子起而为此诗王应麟云为吉甫易为家父孟子难又云大雅之变作於大臣召穆公卫武公之类是也小雅之变作於羣臣家父孟子之类是也风之变也匹夫匹妇皆得以风刺清议在下而世道益降矣魏了翁云气数屈伸之变人事昏明之感天下治忽之机犹阴阳昼夜一长则一消不能独无者虽然其所以主张是者则未尝一日无也节之诗尹氏以太师秉国钧方茂恶怨正莫敢戏谈周大夫既诵言之而其乱曰家父作诵以究王訕巷伯之诗彼譖人者方幡幡其词好好其容寺人既深诋之而其乱曰寺人孟子作为此诗诗中讥刺之语率多微婉词义隐匿姓名至於自状其人甘於抵冒忌讳如此类絶少人之恶不善如恶恶臭凡皆实理之不能自欺者及其隐于心而不自知其不可而言之也虽刀锯鼎鑊在前亦奚暇恤哉凡百君子谓衆在位者亦以讽王也敬而听与听而敬有异敬者不忽略之谓勿以为微贱之言而轻之勿以为隔肤之视而置之就听言上说刘敞云谗人罔极不独譖已而已必将上及大臣骨肉但先自己始也故曰凡百君子敬而听之其後王后太子及大夫果多以谗废者辅广云譖始於微者进而尝之也君若受之则譖者之气益壮而心益大故圣谗必折其芽邹云诗作於寺人圣人录之夫亦闵其受祸之酷为不聪听者永鉴耶夫幽王之时哲妇煽处以倾城羣小如簣而竞进恶恶如巷伯且不难自署其诗尾固宜不免於口哉其为君子谋则忠矣抑巷伯此诗非仅为百君子谋也尝按班固史赞历数春秋以来祸败曰昔子翬谋桓而鲁隐危栾书构郤而晋厉弑竖牛奔仲叔孙卒郈伯毁季昭公逐费忌纳女楚建走宰嚭譖胥夫差丧李园进姝春申毙上官诉屈怀王执赵高败斯二世缢伊戾盟坎宋座死江充造蛊太子杀息夫作奸东平诛皆自小及大繇疎逮亲可不惧哉因斯以观谗人之祸岂止被谗者受之并使信谗者还自受之是故申后黜宜曰废而幽王亦竟不免於戮向令早听巷伯之诗不及此噫吾犹虑夫譖之近而易以信受而莫之迁者无过於寺人也】巷伯七章四章章四句一章五句一章八句一章六句【礼记子曰好贤如缙衣恶恶如巷伯则爵不渎而民作愿刑不试而民咸服缙衣巷伯皆诗篇名非以作诗之寺人为巷伯也子贡传阙文後汉书云诗之小雅有巷伯刺谗之篇宦人之在王朝其来旧矣杨氏云寺人内侍之微者出入于王之左右亲近于王而曰见之宜无间之可伺矣今也亦伤于谗则疎远者可知故其诗曰凡百君子敬而听之使在位知戒也董鼎亦云幽王之世大臣伤于谗者如苏公小臣伤于谗者如寺人孟子则上下其得以免乎愚谓此诗果出于奄之口圣人未必录之於经正为孟子本非寺人而以遭谗被宫故愤懣作此孔子取之以为恶恶者训宜矣】

鸳鸯美大昏也疑为咏幽王娶申后而作【此美大昏之诗故以鸳鸯起兴若如序以为刺幽王则咏娶申后事也以白华之诗证之其第七章曰鸳鸯在梁戢其左翼之子无良二三其德是诗亦有在梁二语词旨昭然矣幽王之娶申后当在未即位时诗人追美其初昏时祝以万年之福亦犹唐高宗欲废王皇后长孙无忌述太宗言朕佳儿佳妇今以付卿言犹在耳之意

鸳鸯于飞毕之罗【歌韵亦叶支韵陵之翻】之君子万年福禄宜【支韵亦叶歌韵牛何翻】之【兴也鸳鸯毛传云匹鸟也罗愿云归藏曰有鳧鸳鸯盖鳧属也雄名为鸳雌名为鸯水鸟之类多相匹偶好以颈相勾惟此雄雌鸟尤甚其大如鸞其质杏黄色头戴白长毛垂之至尾翅皆黑今妇人闺房中饰鸳鸯以黄赤五采有纓者皆鸞耳然鸞亦鸳鸯之类其色多紫李白诗所谓七十紫鸳鸯双双戏幽亭谓鸞也稽圣赋云睢鸠奚别鸳鸯奚双郑玄云飞则为双止则相耦崔豹云鸳鸯水鸟也雌雄未尝相离人得其一则其一思而死故谓之匹鸟也陆佃云鹊好外反鸳好内思说文称凤谓鸞□鸳思是已毕说文云田罔也月令注云罔小而柄长谓之毕罗说文云以丝罟鸟也孔穎达云毕罗异器毕则执以掩物罗则张以待鸟旧说谓毕所以掩免按说文训率字为捕鸟毕也象丝罔上下其竿柄也是则捕鸟之率亦名为毕何专指为掩免之物乎鸳鸯匹鸟其飞必双或毕或罗皆可双而得之今人多畜之池塘以供翫赏亦重其匹配之有情故耳孔云鸳鸯性驯善而相耦则取之易得君子指王也万年以传世之久言书云惟曰欲至于万年惟王子子子孙孙是也无穷祚胤皆自此日之伉俪开之福禄之宜非虚祝矣礼记孔子侍坐於哀公哀公曰敢问人道谁为大孔子对曰礼为大所以治礼敬为大敬之至矣大昏为大大昏至矣大昏既至冕而亲迎亲之也亲之也者亲之也是故君子与敬为亲舍敬是遗亲也弗爱不亲弗敬不正爱与敬其政之本与公曰冕而亲迎不已重乎孔子愀然作色而对曰合二姓之好以继先圣之後以为天地宗庙社稷之主君何谓已重乎天地不合万物不生大昏万世之嗣也君何谓已重焉按孔子所言万世之嗣正与此诗咏万年福禄同意鸳鸯不再匹故以兴新昏且刺幽王黜申后立褒姒也凡诗中言于飞者有六曰黄鸟于飞曰仓庚于飞曰雉于飞皆单举一鸟曰燕燕于飞虽重言之然以比庄姜戴妫则犹之乎皆雌燕也曰鸿鴈于飞则以有大小之异要非一族其以雌雄连言者惟凤凰于飞及此鸳鸯于飞耳卷阿咏凤凰虽不从配匹取义而左传载齐懿氏之卜妻陈敬仲也其妻占之曰吉是谓凤凰于飞和鸣锵锵有妣之後将育于姜亦以雄凤雌凰之俱飞比夫妇也然则此诗双举鸳鸯以兴夫妇抑何疑焉兴意重于飞不重毕罗】

鸳鸯在梁戢其左翼【职韵】君子万年宜其遐福【叶职韵笔力翻 兴也梁即无逝我梁之梁戢郑玄云敛也敛其左翼以右翼掩之阴阳相下之义也孔云此举雄者而言按尔雅云鸟之雌雄不可别者以翼右掩左雄左掩右雌郑孔之说盖本于此然诗称戢左翼明以鸳鸯合言何得谓单举雄乎陆云止言左翼者盖凡鸟左顾则怒作右盼则喜生飞而起则仰左翼飞而下则仰右翼故今鸞鸟下击皆先侧左翅也又张子厚云禽鸟并栖一正一倒戢其左翼以相依于内舒其右翼以防患于外盖左不用而右便故也二说皆通鸳鸯于飞毕而罗之皆可得所谓飞则为双也鸳鸯在梁戢其左翼以相向所谓止则为耦也遐远也即所云万年也诗兴夫妇之和睦如此故宜具享长远之福不言禄者举福可以兼禄也上宜字犹云应尔人与福相配故曰宜其】乘马在廐摧【说文解字作剉郑云今莖字】之秣【叶队韵莫佩翻】之君子万年福禄艾【叶队韵疑刈翻】之【赋也此下二章皆咏亲迎之事而因以致其颂祷之意按昏义云天地合而後万物生焉夫昏礼万世之始也取于异姓所以附远厚别也男子亲迎男先於女刚柔之义也壻亲御授绥亲之也亲之也者亲之也敬而亲之先王之所以得天下也出乎大门而先男帅女女从男夫妇之义由此始也玄冕齐戒鬼神阴阳也将以为社稷主为先祖後而可以不致敬乎是则古之先王亦行亲迎之礼也孔云公羊说天子至庶

人娶皆当亲迎左氏说王者尊无体敌之义故不亲迎郑駁之云天子虽至尊其於后犹夫妇也夫妇判合礼同一体所谓无敌岂施于此哉礼记孔子言亲迎继先圣之後为天地宗庙主非天子则谁乎白虎通云天子下至士必亲迎授绥者何以阳下阴也欲得其欢心示亲之心也必亲御轮三周下车曲顾者防淫佚也宋范祖禹论立后疏云进言者必曰天子至尊无敌于天下不当行夫妇之礼而荀卿有言天子无妻告人无匹也如此则是周公之典孔子之言皆不可信而荀卿之言可信也谨按礼冠昏惟有士礼而无天子诸侯之礼故三代以来惟以士礼推而上之为天子诸侯之礼盖以成人之与夫妇自天子至于士则一也乘马四马也廐说文云马舍也周礼马四匹为乘乘马一师四圉三乘为皂一趣马二皂为系一驭夫六系为廐一仆夫计一廐之马凡二百一十有六应乾之策此乘马乃亲迎时所用与硕人车牵之四牡同在廐则其未亲迎之时也毛云摧莖也秣粟也郑云摧今莖字按摧之所以为莖者以摧通作挫说文解挫为摧是也挫又通作莖以形声相邻而混莖说文云斩刂也史记范雎坐须贾于堂下置莖豆其前令两黥徒夹而马食之即此莖也秣说文本作𥝱云食马谷也郑云古者明王所乘之马系于廐无事则委之以莖有事则予之谷言爱国用也愚按此谓在廐之马前此无事则莖之今将用之以亲迎则秣之也汉广之诗曰之子于归言秣其马事亦同此艾久也见毛传夜未艾之训当是以艾乾久益善又方言东齐鲁卫之间凡尊老谓之艾故训艾为久耳言自今日新昏以往至于万年福禄之来永久而不替也盖祝辞下章仿此】乘马在廐抹之摧【叶哿韵取果翻按摧字与下绥字虽各有灰支二韵然此摧字通作莖则当用哿韵叶】之君子万年福禄绥【叶哿韵吐火翻】之【赋也此乘马在廐与上章异谓亲迎返时也前此将用以乘车则饲之以秣今既返而在廐则仍饲之以莖也绥尔雅云安也徐锴云升车必执绥所以安也绥者所执轡之总也此承上章艾之言久而不替则安而不迁矣言外见大昏关系之重如此今申后安在乎失意一人是谓永讫甚为王惜此盛礼也】

鸳鸯四章章四句【子贡传谓诸侯所以报天子申培说谓诸侯祝天子之诗朱子谓诸侯所以答桑扈亦颂祷之词三说皆同然於鸳鸯乘马之解不可通也序则云刺幽王也思古明王交於万物有道自奉养有节焉其意以前二章言鸳鸯为交于万物有道後二章言乘马为自奉养有节牵强附会如此盖无理之尤者】

白華幽王娶申女以为后又得褒姒而黜申后故作此诗【出朱传按史记周本纪云幽王三年嬖爱褒姒褒姒生子伯服幽王欲废太子太子母申侯女而为后後幽王得褒姒爱之欲废申后并去太子宜臼以褒姒为后以伯服为太子周太史伯阳读史记曰周亡矣昔自夏后氏之衰也有二神龙止于夏帝庭而言曰余褒之二君夏帝卜杀之与去之与止之莫吉卜请其鬯而藏之乃吉於是布帛而策告之龙亡而鬯在榑而去之夏亡传此器殷殷亡又传此器周比三代莫敢发之至厉王之未发而观之鬯流于庭不可除厉王使妇人裸而噪之鬯化为玄黿以入王後宫後宫之童妾既胝而遭之既笄而孕无夫而生子惧而弃之宣王之时童女謡曰檠弧箕服实亡周国於是宣王闻之有夫妇卖是器者宣王使执而戮之迹於道而见乡者後宫童妾所弃妖子出於路者闻其夜啼哀而收之夫妇遂亡奔于褒褒人有罪请入童妾所弃女子者於王以赎罪弃女子出於褒是为褒姒当幽王三年王之後宫见而爱之生子伯服竟废申后及太子以褒姒为后伯服为太子太史伯阳曰祸成矣无可奈何据本纪褒姒为后事在幽王三年则申后见黜当在是时金履祥通监前编谓三年王始嬖褒姒至五年始废申

后及太子宜臼不知何所本然大约误也汲冢竹书亦载三年王始嬖褒姒而不言立之为后或亦丑其事而微之及五年书王世子宜臼出奔申八年书立伯服为太子而郑语史伯有云王嬖是女也使至於为后而生伯服则生伯服乃在褒姒为后之後皆与本纪不合综而核之废后立后事最在先即幽王三年事其後伯服生宜臼心怀疑惧始出奔申又三年而伯服稍长故遂立之竹书之纪事确矣孔穎达云厉王之末流彘之岁也毀齿曰龀女七岁而毀齿十五而笄帝王世纪以为幽王三年嬖褒姒褒姒年十四若然则宣王立四十六年崩是先幽王之立十一年而生其生在宣王三十六年也厉王流彘之岁为共和十四年而後宣王立自宣王三十六年上距流彘之岁为五十年流彘时童妾七岁则生女时母年五十六凡在母腹五十年其母共和九年而笄年十五而孕自孕後尚四十二年而生作为妖异故不与人道同】

白華菅兮白茅束【叶屋韵读如速苏木翻】兮之子之远俾我独【屋韵】兮【兴也白华尔雅云野菅毛传云已沤为菅孔云沤之柔韧异其名谓之为菅因谓在野未沤者为野菅也解见东门之池篇陆佃云菅茅属也而其华白故一曰白華诗序曰白華孝子之洁白也按束皙补白華诗云白华朱萼被于幽薄粲粲门子如磨如错白华綵趺在陵之陬萋萋士子湟而不渝白华玄足在丘之曲堂堂处子无营无欲推是以思则白華之美信矣茅解见野有死麋篇茅亦洁白故曰白茅孔子谓茅之为物薄而用可重为其可以为藉又祭祀亦用之以缩酒然诗人触物起咏寄意不同故楚辞云兰芷变而不芳兮荃蕙化而为茅则亦贱茅之辞此诗取茅与菅对言正以菅茅同类但菅韧茅脆菅比茅为有用故申后以菅自喻而以茅喻褒姒也又左传引逸诗云虽有丝麻不弃菅蒯虽有姬姜不弃憔悴则菅蒯乃憔悴之比而白茅用之于宗庙祭祀或取以包裹礼物其崇重可知亦褒姒得时之比束说文云缚也束薪之束字从口木严粲云白華柔韧宜为索则刈取之沤以为菅白茅不可用则以纆束白华而已菅喻后茅喻妾以贱承贵宜也欧阳修云言二物各有所施可以并用如妻妾各有职可以并居按天子一后三夫人九嫔二十七世妇八十一御妻皆以助后治内事是亦菅茅相须之意孔云宠褒姒以黜申后似取白茅而弃韧菅之子郑云斥幽王也俾使也我朱子云申后自我也孤单也刘熙云鹿也鹿无所依也今之子远弃我而不相亲近使我单独失所则不独菅茅无别且弃菅而专取茅矣】英英【韩诗作泱泱】白云露彼菅茅【叶尤韵迷侯翻姚旅谓古本作英英白露沾彼菅茅不知何据】天步艰【丰氏本作躋】难之子不犹【尤韵兴也草華而不实者谓英李云白云水土轻清之气未为层云也而英英如花朵然露者显露之义大凡天清明则夜气降而为泽其名曰露若有云则无露矣故言物之隐而忽见者以露称之如露臂露身之类是也此刺幽王不明言白云在天非能如日月之明也然犹能下炤庶物如菅之非茅茅之非菅一一显露其下了然可指岂有遁形今王惑于嬖宠不知菅之可贵茅之可贱犹之泾渭莫辨玉石无分则非特明有愧于日月抑亦白云之不如矣天步犹天运天步艰难以天下将乱言繇王宠褒姒故天下将乱也犹谋也孔云之子幽王何故不图其变之所繇来而宠之以代后将至于灭国乎诗人深见狐媚惑主乃宗社危亡所系故欲王之深思而自得之痛之至也邹忠胤云后实天步是虑岂直为己之失意永讫发哉愚按英英白云露彼菅茅申上章白華二句天步艰难之子不犹申上章之子二句此上二章皆讽幽王】漭【说文作漭】池【说文丰本俱作沱】北流浸【陆德明丰本俱作浸】彼稻田【先韵亦叶真韵他因翻】嘯【陆本丰本俱作歎】歌伤怀念彼硕人【真韵亦叶先韵奴延翻兴也漭毛传说文皆云水流貌池说文作沱无池字今按水自江出者别名为沱意凡大水支流别而为小

水者亦皆可以沱称穿地通水曰池亦其类也水经注云鄠水又北流西北注与滌池合水出鄠地西而北流入于鄠滌流浪也而世传以为水名矣鄠地又北迳于渭九域志云京兆府冰池名滌池亦名圣女泉寰宇记云渭水西自京兆鄠县流入长安汉建元三年造便桥跨渭斯滌池之别名西北合渭水今按滌池北入鄠鄠北合渭则是皆北流矣故郑笺云丰镐之间水北流也鄠镐通用浸字本作?渐渍之义罗愿云稻性宜水故五谷外别设稻人之官掌稼下地以瀦蓄水以防止水以沟荡水以遂均水以列舍水以浍写水愚按稻田下流所归之地故以喻褒姒观一彼字可见严云池水滌然北流则止能浸彼在北之稻田耳喻幽王之泽有所偏也嘯歌者既嘯而复歌解见江有汜篇谢枋得云所谓长歌之哀过于痛哭也伤怀者怀思往事而自伤也念说文云常思也硕人朱子云尊大之称亦谓幽王也愚按亲之则曰之子尊之则曰硕人凡言硕人皆称彼者以幽王既爱褒姒非己所敢亲故也此诗意不专刺王与下章皆是自鸣其不妬忌之意言褒姒未正位中宫之先王泽虽偏于彼亦繇我能容之何幽王之不知返念所以追怀往事恍然欲絶也盖於怨恨之中寓感动之意】

樵彼桑薪【丰本作新】印烘于熒【侵韵】维彼硕人实劳我心【侵韵 兴也樵据说文是散木之义汉书音义又训取薪者为樵孔云樵者薪之一名但诸事皆反其名以名其事此樵彼桑薪犹薪是获薪也桑虽嘉木但鸠食其甚则淫故氓之蚩蚩篇取以自况此举以喻褒姒亦刺淫乱之意又程大昌云吾微之桑春每气应土脉欲动木津未上则相与腰刀相其良鹽凡柯枝繁密而相翳者倒垂乱行而不上达者或又半枯半萎不善茁叶者率皆删剝弃之不使分其正力俗语谓之剃桑言能剪恶存好也张堪守渔阳劝民耕种百姓歌曰桑无附枝麦穗两岐夫桑枝以无所附着为贵则是常加删剪而无有交戛相防者矣按据此则桑木之可析为薪者乃附枝耳亦庶妾之比大木可析者谓之薪印字从匕从口与维王之印从工从邑不同尔雅训印为我诗人涉印否是也郭璞云印犹映也女人称我曰映其语转故曰印烘尔雅说文皆云燎也熒尔雅说文皆以为炷郭云今三隅竈也孔云炷者无釜之竈其上然火谓之烘本为此竈止以然火炤物若今之火炉也上章言北流浸彼犹曰王之自幸之而我姑能容之耳此兴言取彼外来之桑木为薪我则特为置之于熒以共炤燎之用不使有积薪之叹也意褒姒初来时申后必有进之于王而让之当御之事则不徒能容之而已幽王宁不知之乃今之待我何如能不使我抚今思昔而劳病我之心乎此上二章刺王而兼讽褒姒】 鼓钟【韩诗外传亦作钟鼓】于宫声闻于外【叶队韵鱼刘翻】念子懔懔【陆本丰本俱作惨惨】视【丰本作眎】我迈迈【叶队韵读如昧莫佩翻韩诗说文丰本俱作怖怖云意不说好也又很怨也 兴也鼓钟击钟也击钟于深宫之中而其声必彻闻于外喻诚之不可掩盖反兴也韩诗外传云伪诈不可长?虚不可守朽木不可雕情亡不可久诗曰钟鼓于宫声闻于外言有中者必能见外也又云孔子见客客去顔渊曰客仁也孔子曰恨兮其心頼兮其口仁则吾不知也言之所聚也顔渊蹙然变色曰良玉度尺虽有十仞之土不能掩其光良珠度寸虽有百仞之水不能掩其莹夫形体也色心也闵闵乎其薄也苟有温良在中则眉睫与之矣疵瑕在中则眉睫不能匿之诗曰钟鼓于宫声闻于外子指王也懔说文云愁不安也陆元朗云愁不申也非一念之而已故曰懔懔迈说文云远行也王之视我望望然去之不顾若迈而又迈然者远之之甚也朱子云鼓钟于宫则声闻于外矣念子懔懔而反视我迈迈何哉程子云此自伤其诚意之不能动王也懔懔然忧戚而曾不能感动视我迈迈然而去愚按此承上文兼讽褒姒之後而专讽王言褒姒於我固无情者我之诚意或不足以动彼若王之于我有伉俪之分有相爱之素岂不知我之愁惨如斯而亦漠然不动念谓之何哉一说以首二句为

喻宫庭之事不可掩王当端本以善则如知远之近知风之自知微之显之意於理亦近之然於下二句兴意不甚关切故不从】

有鷺在梁有鶴在林【侵韵】维彼硕人实劳我心【侵韵 兴也鷺毛传说文皆云秃鷺也陆佃云鷺性贪恶一名扶老状如鹤而大长颈赤目其毛辟水毒头高八尺善与人鬪好蛇刘桢鲁都赋曰绿鷺葱鷺鷺色盖青也按禽经云扶老强力注谓食之益人气力走及奔马即此一名舍利北史後魏明帝时尝获鷺鸟於宫中养之崔光以为此贪恶之鸟野泽所有诗所谓有鷺在梁者魏黄初中鵩暂集而去犹以为戒况饕餮之禽必费鱼肉菽麦稻粱之食岂可留意於丑形恶声哉梁孔云鱼梁也解见卫谷风篇鹤解见鹤鸣篇说文云平土有丛木曰林陆佃云鹤飞必依洲屿止必集林木按鷺鹤相类亦犹之菅茅然特鷺贪鹤洁故兴意以鷺喻褒姒而以鹤自喻郑云鷺也鹤也皆以鱼为美食者也鷺之性贪恶而今在梁鹤洁白而反在林兴王养褒姒而馁申后苏辙云鷺鹤皆以鱼为食然鹤之於鷺清浊则有间矣今鷺在梁而鹤在林鷺则饱而鹤则饥矣幽王进褒姒而黜申后譬之如养鷺而弃鹤也欧阳云言二物皆非其所处如妾不宜居正位而妻不宜被远弃也维彼硕人实劳我心者王之所为如此所以使我思之极而至于劳但自伤其所遭之不幸而已】鸳鸯在梁戢其左翼【职韵】之子无良二三其德【职韵 兴也鸳鸯】

【鸳鸯二句解见鸳鸯篇鸳鸯匹耦相随之鸟雄者名鸳雌者名鸯然则鸳以喻幽王鸯后以自喻梁与上章梁同斂左翼以相向雌雄和睦之象亦反兴也谢枋得云鸳鸯不失其匹耦幽王乃丧其良心嬖妾废后有愧于鸳鸯矣卫诗曰士也罔极二三其德亦刺夫妇之相弃背也与此意合上章以己与褒姒相形归咎硕人此又专责备之子使之子不二三其德虽百褒姒何能为其怨之也切矣】有扁斯石履之卑【支韵】兮之子之远俾我底【支韵】兮【兴也扁说文云署也从户册户册者署门户之文也徐锴云门户封署也按何晏景福殿赋云爰有禁扁即此石郑云乘石也周礼夏官隶仆职云王行则洗乘石郑司农谓乘石者王所登上车之石礼书云王乘车於是石登降也设于两阶今按路寝崇严其上必有题署而於两阶之间又设有乘石焉所谓有扁斯石也履践卑下也履之卑兮是倒句文法言此乘石也虽其处地卑下亦时得蒙王之践履而我独无繇与王亲近则是斯石之不如也唐诗有云玉颜不及寒鸦色犹带昭阳日影来意亦类此王起沈乘石赋云承玉趾以增丽拂袞衣而更妍洗列周经履合诗雅底本作底说文云病不翅也按不翅犹言不止或以为过多之意盖言病之甚也以欲亲近之子不得故至于困病此诗通篇备极曲折而条理故自井然首言妻妾相资王不宜弃妻嬖妾若贵贱倒置恐乱天下次言己亦素有恩于褒姒固不当倾己而王亦不宜听之既又言己诚意不足动褒姒或无足怪而王不知己之念彼至待己与待褒姒相越之远为可讶既又谓褒姒无足责而独归咎于之子之无良盖至是始露其怨王之意然竟不忍决絶而自叹其不如乘石至以俾我底终焉亦可谓怨而不怒者矣真德秀云申后虽见弃而其辞气和平如此信乎其为先王之泽与邹云易家人之九五曰王假有家勿恤象以为交相爱也解者曰夫爱其内助妇爱其家也自夫妇之道苦而谷风之篇奏此在氓庶家犹羞称之况为天下主乎记云无以嬖御人嫉庄后夫王后固奉神灵之统理万物之宜者为龙螫之妖幸而至于见黜幽之三纲於是乎沦矣史迁谓妃匹之际或虽合而不能成子姓或能成子姓而不能要其终人能弘道无如命何是故京室将隆任姒幸逢其盛宗周将灭申后不幸遇其艰岂非命也哉读白华之雅有余恫焉嗟夫周失申后而殒於戎卫失庄姜而於狄圣人录白华及绿

衣终风诸篇以着旤败之原非直为怨妇写?憊而已】

白華八章章四句【序云周人刺幽后也幽王娶申女以为后又得褒姒而黜申后故下国化之以妾为妻以孽代宗而王弗能治周人为之作是诗也汉书注引此序幽字下有王废申三字郝敬云愚幼受朱传疑申后能为白华之忠厚胡不能戢父兄之逆谋宜曰能为小弁之亲爱胡乃预骊山之大恶读古序始知二诗托刺故序不可易也今按谓此诗为周人代申后作亦无不可但漈池二章自是申后意中事恐非外人所能及至若骊山之事举以责宜曰则可举以责申后则不可何者宜曰身在中国亲与逆谋何所逃罪故小弁文壽序不谓宜曰作愚深信之若申后被废未必大归又幽王遇弑事在十一年距废后时盖已九载此时申后存亡亦未可知邹氏忠胤谓观于宫于外在梁在林之咏当时或废处离宫其赋白華亦如後世之赋长门耳此论为允若申培说以为幽王废姜后后归申作此然他书絶无载后归申之事故不足信子贡传但存申后二字而缺其二字】

车輦刺幽王也王以褒姒为后宫中之人丑之思得贤女代之为后焉【序以为大夫刺幽王也褒姒嫉妬无道并进谗巧败国德泽不加於民周人思得贤女以配君子故作是诗也愚按以此诗为刺褒姒嫉妬思得贤女以配君子者近之但窃意是宫中之人所作如谓出于大夫则于好友酒殽歌舞等语俱不可通读者详之因忆汉许后之废也成帝欲立赵飞燕为皇后諫大夫刘辅上书以为宜畏天命念祖宗妙选有德之世考卜窈窕之女以承宗庙顺神祇心塞天下望子孙之祥今乃触情纵欲倾於卑贱之女欲以母天下不畏于天不愧于人惑莫大焉里语曰腐木不可以为柱卑人不可以为主与此诗恶褒姒而思贤女意雅相类或疑何不讽王复故后而讽以别选新婚则此时申后以废黜故或幽忧而死亦不可知但经传无明文耳】

间关车之輦【叶曷韵何葛翻左传作辖】兮思变季女逝【叶屑韵食列翻】兮匪饥匪渴【曷韵亦叶屑韵巨列翻】德音来括【曷韵亦叶屑韵纪劣翻】虽无好友【叶纸韵羽轨翻】式燕且喜【纸韵 赋也间襍也厠也横木持门者为关即门牡也车之横轴似之加铁于轴端使铁与木相间而不得脱是谓间关下文言輦是也今人以驰驱为间关义亦本此輦说文云车轴端键也两穿相背孔穎达云輦无事则脱行乃设之变说文云慕也季女谓女之少者逝往也言所以设此间关之輦者为思慕彼少女之故欲以车往迎之使代褒姒为后也此虚拟之辞曰思变则非有其人可知饥饿也渴通作?说文云欲饮也今经传中凡?字俱作渴括当依释文作佾说文云会也言思慕此季女之深非饥而若饥非渴而若渴所以然者欲闻其有德之言来与我辈相会聚也思季女之德音亦以刺褒姒之不德也虽无好友宫人自谓也宫人从王后之後鱼贯以事主亦有友之义焉式发语声燕通作宴安也言我辈虽无可为季女之好友然使得季女而事之亦庶乎心安而可以自喜乐矣】依彼平林有集维鷖【萧韵】辰【列女传作展】彼硕女【丰氏本作人】令德来教【叶萧韵读如浇坚尧翻】式燕且誉【叶遇韵读如芋王遇翻】好【去声】尔无射【叶遇韵都故翻兴也依说文云倚也平林毛传云林木之在平地者也集说文云羣鸟在木上也薛综云雉之健者为鷖尾长六尺陆玕云鷖微小于翟也走而且鸣音鷖鷖然其色如雌雉尾如雉尾而长其头上有肉冠冠上藜毛长数寸如雄雉尾角也其肉甚美故林虑山下人语曰四足之美有麋两足之美有鷖

麋者似鹿而小也禽经云火为鷩亢为鹤王安石云鷩字从乔尾长而走且鸣则其首尾乔如也陆佃云鷩走且鸣行止不能自舍女有取节尔夫虽等雉也类有不同则其取以拟象亦因以异若王后翬衣夫人揄翟公之服自鷩冕而下是也鷩又下鷩一等故取以况衆妾说文以为雉十有四种字或从弟以此故也诗曰依彼平林有集维鷩言王后无妬忌之行险詖之心能庇其所赖而淑女从焉则如平林之集鷩雉也辰北辰也论语曰居其所而衆星共之北辰之象也硕大也硕女即季女前据其在家而言则第称季女此以正位中宫而言则尊之为硕女也辰彼硕女者拟硕女于北辰尊而仰之若史之称韩愈谓学者尊之如北斗也令善也令德来教谓以令德之言来相训告即上章所谓德音也衆妾尊之为北辰而望其来教即末章所谓高山仰止景行行止也时褒姒已立为后而宫人之言如此则其嫉褒姒无德甚矣式燕解见上章誉说文云称也好犹爱也尔尔硕女也射通作斲说文云解也硕女有德音可以教人故衆妾皆心安之且相与称道之悦慕尔硕女终无有解释之期也严云悦彼所以恶此也】 虽无旨酒式饮庶几【尾韵】 虽无嘉殽【丰本作肴】 式食庶几【几几相应为韵亦变体】 虽无德与女【音汝叶麋韵读如乳蔡主翻】 式歌且舞【麋韵赋也首章言往迎次章欲其立以为后此章则虚拟其初至时也旨嘉皆美也殽通作肴徐锴云谓肉已修】

【庖之可食也或云凡非谷而食皆曰肴治中馈者衆妾之事故以酒殽言时幽王与褒姒沈湎无度其见于頍弁之诗者方且酒必求旨殽必求嘉此欲反其所为言我虽无美酒殽以为供具尔庶几饮之食之万不至如褒姒之厌纵其口腹也与如与人为善之与朱子云犹助也女朱子云亦指季女也既又内自循省言我辈虽自愧无德可以助女然忻喜之深诚不自禁其咏犹舞蹈之不置也虽无德与女即首章谦言虽无好友之意又左昭二十六年齐侯与晏子坐于路寝公叹曰美哉室其谁有此乎晏子曰敢问何谓也公曰吾以为在德对曰如君之言其陈氏乎陈氏虽无大德而有施于民豆区釜锺之数其取之公也薄其施之民也厚公厚斂焉陈氏厚施焉民归之矣诗曰虽无德与女式歌且舞陈氏之施民歌舞之矣此虽断章取义然亦可见式歌且舞为贱者之事也】 陟彼高冈【阳韵】 析【丰本作□】 其柞薪【叶阳韵思将翻】 析其柞薪【见上】 其叶湑【语韵】 兮鲜我覯尔我心写【叶语韵敞吕翻】 兮【兴也此章言欲黜褒姒也褒姒时为王后不黜之则季女无繇得立故首以析薪为言说文云陟登也冈山脊也析破木也柞郭璞以为栩即柞栎也解见鸛羽篇周处风土记云历山在始宁鄞鄮二县界上舜所耕田在於山下多柞树吴越之间名柞为栎故曰历山罗愿云柞生南方叶细而密今人为梳用之齐民要术称柞砍去寻生料理还复宜种于山阜之曲十年中椽二十年中屋桷薪樵不在此数然则为利亦博矣大木可析曰薪所以施炊者孔云言为薪是废弃不用之辞湑叶得露而润泽之貌解见蓼萧篇曹居贞云柞坚忍之木其新叶将生故叶乃落附着甚固孔云言有人登彼高冈之上当必析伐其柞木以为薪析伐其柞木以为薪者以此柞木其叶湑湑然茂盛兮为其蔽冈之高故伐而去之以兴褒姒其恶衆多为其蔽王之明故除而去之也欧阳修云夫艳嬖之兴常在中主第禍既接则情与爱迁顔辞媚熟则事为私夺乘易昏之明牵不断之柔险言似忠故受而不诘丑行已效反徇而为好左右附之儉壬憖之狡谋钳其悟先哀誓捷于宠初天下之事已去而恬不自觉也鲜通作尠少也鲜我覯尔与鲜我方将意同写尔雅注云有忧者思散写也解见泉水篇诗诂云接见曰覯郝敬云柞生高冈其叶湑然艳妻方嬖犹是也惟彼硕女世所鲜有我得覯之易柞薪而为良木心忧亦倾写矣】 高山仰【阳韵疑刚翻陆德明本丰本俱作印】 止【陆本丰本俱作之】 景

行行【叶阳韵户郎翻】止【史记丰本俱作之】四牡騑騑六轡如琴【侵韵】覼尔新【丰本作案】昏以慰【韩诗作愠云恚也】我心【侵韵兴也仰说文云举也谓举首而望也景说文云光也郑云明也上行字谓道也下行字谓人之步趋也刘熙云两脚进曰行行伉也伉足而前也此兴季女之贤可为师法与令德来教相应言山维高则人共瞻望而仰之彼培塿奚仰焉大道之灿然可见者人则共往来而行之彼邪径奚行焉深誉此所以痛斥彼也亦卑人不可以为主之意韩诗外传云南假子过程本本为之烹鰠鱼南假子曰闻君子不食鰠鱼本子曰此乃君子食也我何与焉假子曰夫高比所以广德也下比所以狭行也比於善者自进之阶比於恶者自退之原也且诗不云乎高山仰止景行行止吾岂自比君子哉志慕之而已矣表记引此诗孔子曰诗之好仁如此乡道而行中道而废忘身之老也不知年数之不足也俛焉日有孳孳毙而后已又徐干云学者如登山焉动而益高如寤寐焉久而愈足顾所繇来则杳然其远以其难而懈之误且非矣诗云高山仰止景行行止好学之谓也倦立而思远不如速行之必至也矫首而徇飞不如循雌之必获也孤居而愿智不如务学之必达也按此虽非诗义然借意甚精四牡六轡女来时所乘之车即首章所云车鞶也騑騑解见四牡篇如琴犹如舞调和之意慰说文云安也严云我愿具四牡之马騑騑然行而不息调其六轡如琴声之相应以往迎此贤女使我见王得此贤女为新昏则慰我心矣言新昏则外其旧者也愚按通章皆虚设之辞非有是人非有是事】

车鞶五章章六句【左昭二十五年宋元夫人生子以妻季平子叔孙昭子如宋聘且逆之宋公享昭子赋新宫昭子赋车辖义取此诗思得贤女以配君子也子贡传系此诗于宣王之世云乐亲昏也朱子亦以为燕乐其新昏之诗申培说则云宣王中兴士得亲迎其友贺之而作此诗若然皆当入风何缘得入于雅况文义又多所未协乎抑闻之礼云昏礼不贺人之序也申培之说何居又云娶妇之家三日不举乐思嗣亲也新婚安得有燕耶此又可以破子贡及朱子之说矣】

角弓父兄刺幽王也不亲九族而好谗佞骨肉相怨故作是诗也【出序 愚按此刺幽王宠任昏姻而疎远同姓之诗序所谓谗佞指昏姻也申培说与序同魏文帝报曹植诏曰恩泽衰薄不亲九族则角弓之章刺前汉书王音与王谭有隙杜邳说音曰邳闻人情恩深者其养谨爱至者其求详夫戚而不见殊孰能无怨此常棣角弓之所为作也】

騑騑【陆德明本引说文作弭弭今按说文引此诗作騑騑玉海补遗丰氏本同】角弓翩【路史作扁丰本作偏】其反【叶先韵分遭翻】矣兄弟昏姻无胥远【叶先韵於圆翻按反远皆属阮韵依下章以远叶然故当用先叶】矣【兴也騑字本作骑当依说文通作騑云用角低印便也毛传云騑騑调利也角弓朱子云以角饰弓也考工记云弓人为弓取六材必以其时六材既聚巧者和之干也者以为远也角也者以为疾也筋也者以为深也胶也者以为和也丝也者以为固也漆也者以为受霜露也又云弓有六材焉维干强之张如流水维角?之欲宛而无负弦引之如环释之无失体如环言六材之中惟干与角为要干者弓身也角附干而安故指干为强也?读如掌距之掌宛之为言引也引之弓体不辟戾谓之无负弦也干善则张之如水之顺流角善则引之无负弦其状如环然及放矢後能无失体亦如环然此弓之妙也翩说文云疾飞也朱子云反貌盖疾速而反之义反说文云覆也谓弛弓时弓外反而去也】

诗意言王於兄弟昏姻无偏用偏舍之理如弓之一张一弛角干亦有互为内外之时张时则角在内干在外弛时则干在内角在外今王惟一于任昏姻而不任兄弟则是弓有张而无弛角恒在内干恒在外也兄弟与君同体为干之况昏姻本乎人合则外来附丽者乃角之况耳诗为昏姻发论故特举角言兄弟乃同姓之通称今按頍弁之诗为幽王不亲兄弟之明证而十月之交篇所言皇父卿士番聚蹶橐鞬大抵皆褒姒姻娅故汉书谷永云古之王者废五事之中失夫妇之纪妻妾得意谒行于内势行于外至覆倾国家惑乱陰阳诚修後宫之政明尊卑之序抑褒閹之乱息白华之怨後宫亲属饶之以财勿与政事以远皇父之类损妻党之权未有閹门治而天下乱者也又正月之诗亦曰洽比其邻昏姻孔云意皆指此观此诗第三章但言兄弟不言昏姻其为嘲刺之意明矣或又见頍弁末章兼举兄弟甥舅疑此亦因言亲亲而并及之岂知王者於异姓之臣通呼甥舅此特指言昏姻自是私门嬖幸琐琐廛仕之流与泛言甥舅自别无通作母戒辞也胥相也无胥远矣言王之视兄弟不必与昏姻大相悬絶也怨恨而规戒之左襄八年范宣子来聘公享之宣子赋標有梅季武子赋角弓昭二年晋侯使韩宣子来聘公享之韩子赋角弓季武子拜曰敢拜子之弥缝敝邑寡君有望矣既享宴于季氏有嘉树焉宣子誉之武子曰宿敢不封植此树以无忘角弓】尔之远【见前】矣民胥然

【先韵】矣尔之教【效韵】矣民胥【潜夫论作斯】倣【效韵左传潜夫论俱作效】矣【白虎通作欲民斯效 赋也尔尔幽王也远字承上章而言然通作嘽说文云语声也民胥然矣犹言民亦相与如此也上所施下所效曰教倣本作效说文云象也下二句只申上二句尔幽王视兄弟不如昏姻则自此以往恐下民亦将无不然者繇尔居上位实以此教之故民皆相与则而象之也抑亲昏姻疎兄弟恒情类然况重以上之教乎重致其警醒之意左昭六年韩宣子之适楚也楚人弗逆公子弃疾及晋竟晋侯将亦弗逆叔向曰楚辟我衷若何效辟诗曰尔之教矣民胥效矣从我而已焉用效人之辟书曰圣作则无宁以善人为则而则人之辟乎匹夫为善民犹则之况国君乎晋侯悦乃逆之】

此令兄弟绰绰有裕【遇韵】不令兄弟交相为瘵【叶遇韵俞戍翻 赋也令善也按令乃？号之义旧皆训善不知何据疑通作泠庄子云列子御风而行泠然善也泠虽水名必水之流而清者人之无欲自得亦如之故有善义与寒冷之冷不同彼字乃从？即氷字此令兄弟意为作诗者自道之辞绰说文云缓也裕说文云衣物饶也绰绰有裕与孟子云则吾进退岂不绰绰然有余裕哉意同交郑云犹更也瘵毛云病也言王之亲疎失宜如此在此宗族之中有令善者固绰绰然寛裕不以介意其不善者激於怨毒不能自制则与昏姻交相构衅而为王之病矣愚按此必为王朝卿士相与争政而作坊记子云睦於父母之党可谓孝矣故君子因睦以合族诗云此令兄弟绰绰有裕不令兄弟交相为瘵】民【说苑後汉书俱作人】之

【说苑作而】无良【阳韵】相怨一方【阳韵】受爵不让【叶阳韵如羊翻】至于己【音纪】斯亡【阳韵赋也良善也相怨一方正无良之实一方犹言一隅各有所执自见其是而不肯相下所以每至相怨顔师古云一方谓自守一方所向异也又郑笺云民之意不获当反责之於身思彼所以然者而怨之无善心之人则徒居一处怨患之朱子云相怨者各据其一方耳若以责人之心责己爱己之心爱人使彼己之间交见而无蔽则岂有相怨者哉此皆名理之言然似非诗意礼记疏则云小人在朝无良善之行各在一方不相往来韩诗外传则云民皆居一方而怨其上上亡者未之有也今按经言民则非属有位言相怨则非指怨上故皆不取爵钱氏云酒爵也至于己斯亡者严粲云失意杯酒之间以亡其身如汉田蚡灌夫是也邓元锡云怨不在大献酬而让细矣受不让而怨兹生或以死亡子公之尝鼯是已愚按此

承上章言不令兄弟交相为瘡固无足怪大凡民情好胜护前罕有善者彼执其一偏此亦执其一偏谁肯相下往往非有积怨深讐但一爵之酒受之不让遂至逞忿以亡其身况事有大于此者使其彼此之间得意与失意相形懞忮恚怒亦势所必至者已坊记子云觴酒豆肉让而受恶民犹犯齿衽席之上让而坐下民犹犯贵朝廷之上让而就贱民犹犯君诗云民之无良相怨一方受爵不让至于已斯亡旧说以受爵不让谓受爵禄不辞让故荀子引此诗云君子务修其内而让之于外务积德于身而处之以遵道如是则贵名起之如日月天下应之如雷霆故曰君子隐而显微而明辞让而胜鄙夫反是比周而誉俞少鄙争而名俞辱烦劳以求安利其身俞危孔颖达云凡禀血气皆有争心在上者可量功较能受之者当先人後己故礼设辞让之法曰爵禄可辞又曰爵位相先文王之朝士让为大夫大夫辞为卿舜命羣官禹让稷契之类皆先圣典谟有相让之法也此于理亦通但据经以民为言则似无爵禄之可争耳又苏辙解至于已斯亡谓民于受爵不让之人皆知尤之而至于已则亡其非此所谓一方也其说与韩诗外传合云有君不能事有臣欲其忠有父不能事有子欲其孝有兄不能敬有弟欲其从令诗曰受爵不让至于已斯亡言能知于人而不能自知也详诗中俱无此意今皆不取】老马反为驹【叶遇韵如遇翻隔句各叶】不顾其後【叶麋韵后五翻】如食宜【韩诗陆本皆作饴】齧【遇韵】如酌孔取【麋韵比也此章专刺昏姻之窃位者老马喻当谢事驹以喻新进辅广云此必指当时实事而言盖时有谗己以取其爵位而不自度其不胜任者朱子云如老马惫矣而反自以为驹不顾其後将有不胜任之患也齧字本作饴说文云燕食也毛传云不脱屣升堂谓之饴周语单穆公云夫礼之立成者为饴昭明大节而已注谓立成者立而行礼不坐也酌说文云盛酒行觴也郑云孔取谓度其所胜多少凡器之孔其量大小不同孔颖达云孔所谓器中空虚受物之处器之所受有大小满则止老子孔德之容亦谓器之受实为孔也按孔空以古音同通用此二语盖反言以规之言如食者但宜于举立成之礼而已不可过食而无节如酌酒者必于其孔焉取之若孔已满则无以为容受之地皆讽其知止足也一说齧饱孔甚也言其惟以得爵禄为快如食者但知称其齧饱之欲酌者但知多取曾不少加斟量也按此则与上章受爵不让之喻相为映?亦可从】母教猱【丰本作□】升木如涂涂附【叶遇韵符遇翻】君子有徽猷小人与属【叶遇韵朱成翻比也此章专刺王之弃兄弟而任昏姻而不知其皆假合不足恃也猱字本作□亦作猱说文云贪兽也尔雅云猱援善援援亦作猿孔云猱则猿之辈属非猿也按猱之类有五种一曰猴亦名猕猴状似愁胡故谓之胡孙或谓之王孙也老者为獼猴也一曰为母猴也好爪下腹亦谓之沐猴母沐音通非以牝称母也一曰獼猴也似猕猴而大色苍黑能攫持人好顾盼一曰禺头似鬼母猴之属其一则猱亦作猱司马相如赋蜚蜴獼猱顔注云今猱皮为鞍褥者非猕猴也陆佃云猱盖猿狖之属轻捷善缘木大小类猿长尾尾作金俗谓之金线猱人以药矢射杀之取其尾为卧褥鞍被坐毯猱甚爱其尾中矢毒即自啮断其尾以抑之恶其为深患也猱一名猱顔氏以为其尾柔长可藉然则制字从柔以此故也涂泥饰也按服?云猱人古之善涂者师古云猱善擦拭故今谓涂者为猱人乐记所谓及优侏儒猱裸子女不知父子是也附本小土山之名故取以为附丽附益之义诗以猱刺昏姻之小人犹史言沐猴而冠之意真猱自能升木假则安能王毋庸教之言不必以假当真也此辈呼朋引类实繁有徒犹如猱人之相附丽彼亦涂饰此亦涂饰皆非其本来面目与天属之亲异矣王信任之亦何为乎一说小人之性本能为谗佞今王又好以来之是犹教猱升木又如於泥涂之上加以泥涂附之也亦通君子指王也徽说文云三纠绳也慎徽五典之徽取人伦相绾结之意与下文属字相炤猷谋也小人指

民郝敬云君子小人以分而言即德风德^廿之意属说文云连也徐锴云以相联属若尾之在体故从尾此与第二章反应言在上者若能亲其骨肉有绾结而不可解之谋则小民效之亦皆连属而相亲矣论语子曰君子笃於亲则民兴於仁此之谓也】雨【去声後同】雪灏灏【萧韵汉书韩诗外传俱作麇麇】见【韩诗作臙云见日出也荀子作宴】

睨【荀子作然丰本作嚙後同】曰【韩诗汉书荀子韩诗外传丰本俱作聿】消【萧韵】莫肯下遗【荀子作隧】式居娄【荀子丰本俱作屡】骄【萧韵兴也首二句反兴末章同自上而下曰雨灏灏陆德明云雪盛貌见颜师古云无云也睨说文云日见也从日从见毛云日气也颜云无云日气始出也消释也郑云雨雪之盛灏灏然至日将出其气始见人则皆称曰雪今消释矣孔云以曰者人言之辞若日出则雪消不复须言矣明言者於日未出而言之愚按雨雪喻昏姻之进谗言于王以离间兄弟者序所谓王不亲九族而好谗佞者也然使王心稍一憬悟如日气之见于天则谗言有顿为衰止之势以阴不能胜阳故也陆佃云言君子体道在上而小人之类易消如此刘向云谗邪之所以并进者繇上多疑心既已用贤人而行善政如或譖之则贤人退而善政还夫执狐疑之心者来谗贼之口持不断之意者开羣枉之门谗邪进则衆贤退羣枉盛则正士消故易有否泰小人道长君子道消君子道消则政日乱故为否否者闭而乱也君子道长小人道消则政日治故为泰泰者通而治也诗又云雨雪麇麇见睨聿消与易同义莫之言无也肯之言可也皆以声转通用言王之意有所不可于此也下降遗弃也张子厚云谗言遇明者当自止而王甘信之不肯贬下而遗弃之也式?语声居谓居于王所娄郑云斂也按娄之训斂当通作楼说文云曳聚也尔雅又通作楼云哀鵒楼聚也马之高者为骄故有骄骜之义言王既信任此辈俾之居于王所且日招集诸骄骜之人与之同恶相济也荀子云人有三不祥幼而不肯事长贱而不肯事贵不肖而不肯事贤是人之三不祥也人有三必穷为上则不能爱下为下则好非其上是人之一必穷也乡则不若偕则谩之是人之二必穷也知行贱薄曲直有以县矣然而仁人不能推知士不能明是人之三必穷也人有此三数行者以为上则必危为下则必灭诗曰雨雪灏灏见睨聿消莫肯下遗式居娄骄此之谓也】雨雪浮浮【尤韵】见睨曰【丰本作聿】流【尤韵】如蜚如髦【丰本作鬣】我是用忧【尤韵兴也浮浮刘彝云积之厚而浮于地上也王安石云积之高则浮浮流义比消为深毛云流而去也蜚毛云南蜚也孔云尔雅八蜚在南髦通作鬣说文引诗虬彼两鬣今诗作文作髦彼两髦可证郑云西夷别名武王伐纣其等有八国从焉孔云牧誓曰及庸蜀羌鬣微卢彭濮人又曰逖矣西土之人是西方也彼鬣此髦音义同也括地志云姚府以南古鬣国之地有鬣州如蜚如髦亦指谗人言两举之者见其人之不一且比骄为又甚矣朱子云言其无礼义而相残贼也我是用忧者忧其有害无底止也唐士谔云昔辛有适伊川见有被髮野祭者曰不及百年此其戎乎其礼先亡矣已而楚子果迁陆浑之戎于此类之应也如蜚如髦我是用忧诗人之意深矣幽王卒死犬戎之难可畏哉韩诗外传云君子大心即敬天而道小心即畏义而节知即明达而类愚即端慤而法喜即和而治忧即静而违达即宁而容穷即纳而详小人大心即慢而暴小心即淫而倾知即攫盗而渐愚即毒贼而乱喜则轻易而快忧则挫而慑达则骄而偏穷则弃而累其肢体之序与禽兽同节言语之暴与蜚夷不殊出则为宗族患入则为乡里忧混然无道此明王圣主之所罪诗曰如蜚如髦我是用忧】

角弓八章章四句【子贡传唯有兄弟不三字其大指与序说合然兄弟之离心繇王听信昏

姻之谗佞则从无明言之者刘向引此诗以为幽厉之际朝廷不和转相非怨诗人疾而忧之曰民之无良相怨一方今按此诗作于幽王之世殆无可疑分属之厉似无据】

頍弁同姓刺幽王也乱亡已迫而不自知族人与国同休戚深窃忧之而王疎远宗族无繇进其忠告其族人之尊者遂作此诗【出严粲诗缉序云诸公刺幽王也暴戾无亲不能宴乐同姓亲睦九族孤危将亡故作是诗也严粲云族人因王不宴乐同姓藉以为辞而告以祸败之戒非欲王宴乐之也但诗人优柔之辞先从宴乐上说来以渐及危亡警惧之意故读者不觉真谓刺不能宴乐同姓而已当是时骊山之祸将作人情凛凛不保朝夕幽王方且饮酒无度诗人岂复劝其宴乐哉郝敬云幽王日与羣小酣于酒亲族疎远无繇得关其忠文武盛世鹿鸣乐嘉宾伐木宴朋友故忠言得上闻幽王以兄弟为路人危亡已至而深宫之饮不休故诗人借饮酒以致愿见之情而非为酒也愚按刘向列女传称幽王惑于褒姒出入与之同乘不恤国事驱驰弋猎不时以适褒姒之意饮酒沈湎倡优在前以夜继昼是可为幽王酗酒之证】

有頍者弁实【丰氏本作寔後同】维伊何【歌韵】尔酒既旨尔殽既嘉【叶歌韵居何翻】岂伊异人兄弟匪他【歌韵丰本作它】芑与女萝施于松柏【陌韵朱传大全读诗记丰本俱作栢】未见君子忧心弈弈【陌韵诗缉颍滨集传丰本俱作奕】既见君子庶几说悌【陌韵陆德明本丰本俱作绎赋而比也頍说文云举头也陆德明云着弁貌弁毛传云皮弁也孔颖达云弁者冠之大名称弁者多矣但爵弁则士之祭服韦弁则服以即戎冠弁则服以从禽非常服也唯皮弁上下通服之故知皮弁也有頍者弁指幽王也实通作寔寔之言是也尔亦指王也旨嘉皆美也言有举首而冠是皮弁之冠者是果何所作为乎不过日从事于饮食而已尔之酒尔之殽必求其精亦既具美矣而自旨酒嘉殽而外曾有所系念否耶今我辈之叩阊求见者岂有异人疎远者乎皆王同姓兄弟至亲情谊关切将有所建白于王而非有他故也若下文所云是也芑郭璞云寄生树也广雅作檮尔雅寓本宛童即此陆玕云叶似当卢子如覆盆赤黑甜美本草一名寄屑图经云是乌鸟食物子落枝节间感气而生叶似橘而厚软茎似槐枝而肥脆三四月生莖黄白色六月七月结实黄色如小豆大女萝一名蒙说文云玉女也陆德明云在^二曰菟丝在木曰松萝罗愿云女萝菟丝其实二物也然皆附木上释草谓唐蒙女萝女萝菟丝郭云别四名则是谓一物也广雅谓女萝松萝也菟丘菟丝也则是两物陆玕亦云今菟丝蔓连^二上正黄赤如金药中菟丝子是也非松萝松萝自蔓松上枝正青与菟丝殊异以予考之诚然今女萝正春而细长无襍蔓故山鬼章云被薜荔兮带女萝萝青而长如带也何与菟丝事然两者皆附木或当有时相蔓古乐府云南山幕幕菟丝花北陵青青女萝树繇来花树同一根今日枝条分两处唐乐府亦曰菟丝故无情随风任倾倒谁使女萝枝而来强萦抱两^二犹一心人心不如^二则古今多知其为二物者博物志魏文帝所记诸物相似乱者女萝寄生兔丝兔丝寄生木上根不着地然则女萝有寄生兔丝上者释草女萝菟丝或亦此义耳施者纏绕之义解见葛覃篇松柏二木名林兆珂云史记松柏为百木长也而守宫阙按芑与女萝诸公自比松柏则以比君相也陆佃云柏视松也犹伯视公伯用拙所执躬圭者以此公用直所执桓圭者以此时王任虢石父为卿士国事日非危亡不保故言我辈皆托命于君相所以醒王也严云芑与女萝延于松柏之上视松柏以为命松柏殒则二^二亡矣奕说文云围碁也弈者举碁不定不能胜其耦故凡人之对弈胜负在念无暂置者今

心忧有似之也或以大解则当通作奕言所忧甚大也怵亦悦也按悦怵义同连言似无意味当依陆本作绎抽丝为绎人之抽引其思绪似之故书曰庶言同则绎孔子曰巽与之言能无悦乎绎之为贵是也今王疎远族人使之不得亲近故我未见王则忧心弈弈然以我辈与王死生存亡相关而无繇効其忠告其忧可知倘既见王则忠言得以上达庶几王之忻然有当于心而深思吾言矣又苏辙云兄弟之於王譬如芎藭之托松柏耳不见则忧见则庶几王乐之王奈何独不顾哉】有頍者弁实维何期【支韵陆本丰本俱作其】尔酒既旨尔殽既时【支韵】岂伊异人兄弟俱来【叶支韵陵之翻】芎与女萝施于松上【叶漾韵时亮翻】未见君子忧心忡忡【叶漾韵兵旺翻杨用修云丙古与方同音柄亦作枋可证】既见君子庶几有臧【叶漾韵才浪翻 赋而比也何期言何所期约也王宠任小人则所期约者不过皐石父之辈耳尔殽既时者杨氏云君子之食惟其时物如春则食麦与羊之类是也具通作俱偕也来至也言我同姓兄弟皆来见王非止一二人之私忧过计也前言松柏此变言松上者专责王也王实制命当自为社稷计奈何令小人败之使同姓兄弟有危亡不保之忧乎忡说文云忧也毛云忧盛满也按忡从丙得声丙位南方火地也心火上炎因状忧为忡也所忧非一故弈弈忡忡皆重言之臧善也庶其以吾言为善则改图有机犹云庶曰式臧也】有頍者弁实维在【有韵】尔酒既旨尔殽既阜【有韵】岂伊异人兄弟甥舅【有韵】如彼雨雪先集维霰【韵尔雅陆本俱作?】死丧无日无几相见【霰韵】乐【音络】酒今夕【楚辞章句作昔】君子维宴【霰韵 赋而比也弁所以庄首羣臣之戴王亦如衣服之有冠冕也此兼有兴义孔云谷梁传云牟冕虽旧必加于首周室虽衰必先诸侯然则王者之在上位犹皮弁之在人首故以为喻刘熙云土山曰阜阜者厚也郑云犹多也不但嘉而且时不但时而且阜通进之辞也尔雅云姑之子为甥舅之子为甥妻之舅弟为甥姊妹之夫为甥母之舅弟为舅母之从夫舅弟为从舅妻之父为外舅按此则甥舅之称其类不一今世惟母之昆弟妻之父妻之昆弟有舅名已女之子已之壻姊妹之子有甥名其他不然非古法也许慎云谓我舅者吾谓之甥刘熙云甥者生也他姓子本生于外孔云舅之言旧尊长之称前只言兄弟此兼言甥舅者见无人不知国之将亡故合辞求见以冀王之悔悟也孔云先集者谓雪集聚也天将大雨雪其始必微温暖雪自上下逢遇温气渐释集聚而抔谓之霰说文云霰积雪也徐锴云雪初作未成花圆如稷粒撒而下也曾子云阳之专气为霰阴之专气为雹尔雅作?陆佃云尔雅雨?为霄雪?从睨省霄从消省诗见睨曰消盖雪以微温抔之故散而成?郭璞所谓冰雪襍下谓之消雪是也闽俗谓之米雪言其霰粒如米今名濇雪亦曰湿雪雪之所加物有死者霰其先至者也霰至则危亡之兆见矣霜霰阴刚之微也霜集而後坚冰至霰集而後雪至故诗易以为始乱之象严云霰集雪即继之不待迟久而死亡之兆已见近在旦夕无多日矣上二章言以未见王为忧其辞犹缓也未章言国亡无日纵得见王其能几乎其辞甚迫矣所以警告于王者至剴切矣郝云今夕何夕死丧近矣而君子惟怡然宴乐长夜之驩不辍来朝之事未可知矣如後世敌兵四合而帐中夜饮亡国之惨千古一辙杜甫所谓东方渐高奈乐何者也长歌可以代泣其頍弁之谓乎愚按此诗亦求见于王而终不得见之辞忧而继之以怨矣】

頍弁三章章十二句【子贡传以为燕亲戚之诗申培说以为燕王族之诗朱传合之以为燕兄弟亲戚之诗今玩末章词旨哀伤果可与伐木行苇例观否耶朱子云古人劝人燕乐多为此言如逝者其耄他人是保之类然如彼雨雪二句当作何解即如所言霰集则将雪之候以

比老至则将死之徵亦牵强甚矣】

瓠叶大夫刺幽王也上弃礼而不能行虽有牲牢饗飨不肯用也故思不以微薄废礼焉【出序惟故思下有古之人三字今去之 愚按古者蔬以芼羹未闻徒羹瓠叶者庶羞有兔及兔羹兔醢未闻炮炙纯用兔者必如毛郑说以为庶人之礼则篇中何以有君子之目乎序谓思古之人不以微薄废礼古之人三字殆剩语也惟谓刺幽王有牲牢饗飨而不肯用者深得之诵頌弁之诗旨酒嘉殽徒为羣小设而兄弟甥舅总不得沾其余沥分其一脔故寓言瓠兔以讽若曰何时得被此礼乎是亦足耳郝敬云士君子日亲则深宫长夜之娱自损幽王日荒于酒羣臣宗族罕得进见故诗人托兴瓠叶以训恭俭瓠贱而叶兔小而首至薄也牲牢饗飨不用而取其至薄善诱之意】

幡幡瓠叶采之亨【叶阳韵铺郎翻丰氏本作烹】之君子有酒酌【丰本作勺後同】言尝【阳韵】之【赋也幡幡斲之类说文以为书儿拭觚布也瓠之叶似之非一叶而已故曰幡幡瓠解见硕人七月南有嘉鱼诸篇罗愿云其叶可为菜采说文云捋取也亨郑玄云熟也熟瓠叶者以为饮酒之菹也按菹者酢菜之名徐锴以为米粒和酢以渍菜也孔颖达云知为菹者以礼饮酒为菹醢故也君子谓主人若此诗意所称则指王也酌说文云盛酒行觴也谓挹酒而实之于卮也言者语辞尝徐锴云口试其味也王安石云尝其旨否然後行献酬之礼愚按此尝之当谓使客尝之臣侍食于君有先尝之礼左昭元年赵孟叔孙豹入于郑郑伯兼享之子皮戒赵孟礼终赵孟赋瓠叶子皮遂戒穆叔且告之穆叔曰赵孟欲一献子其从之子皮曰敢乎穆叔曰夫人所欲也又何不敢乃享具五献之?豆于幕下赵孟辞私于子产曰武请于冢宰矣乃用一献按戒赵孟之戒犹告也谓告以享期】有兔【後汉书注作菟】斯【郑玄本作鲜】首炮【陆德明本作炰】之燔【元韵亦叶先韵汾洽翻】之君子有酒酌言献【叶元韵虚言翻亦叶先韵汾洽翻】之【赋也兔兽名蟬史云似羊而小长耳短足大者不过二斤亦见巧言篇食物本云兔为食品之主品罗愿云冬月唯斲木皮至春长麦繁而肉反不美按仪礼公食大夫云上大夫庶羞二十加於下大夫以雉兔鹑鴛礼记内则篇纪诸膳共二十豆与仪礼同雉兔鹑鴛四物为四豆列为五行惟上大夫得有之然不过二十豆中之一耳又有以兔为羹者内则云兔羹和糝不蓼言以五味调和米屑为糝不须加蓼也又云雉兔皆有芼言雉羹皆有芼菜以和之也又有以兔为菹类者内则云兔为宛脾按青箱记云古称兔无脾今有宛脾之名其制後人所未详也有以兔为醢者周礼加豆之实芹菹兔醢内则云脯羹兔醢言食脯羹者当以兔醢配之也此诗单举兔一物而又以炮炙为言皆礼所不载孔云有兔斯首谓惟有一兔斯字当训为此王肃孙毓皆云惟有一兔头耳然按经有炮之燔之且有炙之则非惟一兔首而已既能有兔不应空用其头若头既待宾其肉安在以事量理不近人情李氏朱子皆谓兔以首言犹数鱼以尾愚谓此说未尽内则言物之不可食者狼去肠狗去肾狸去正脊兔去尻狐去首豚去脑鱼去乙鼈去丑夫兔既去尻则弃其後臀处不用故但举首以显之耳又陆佃云兔尻有九孔今尻於文从九盖生於兔也炮燔炙三字旧说据郑笺义谓鲜明而新杀者合毛炮之若割截而柔者则脔贯而炙之其为脯腊而乾者则加之火上燔之今按有兔斯首三章同文止此一新杀之兔耳既已合毛与肉而炮之何又有肉之柔处可割截而炙之又于何时乾其肉成脯腊而至今复燔之彼其大者不过二斤而其为用之宏至于如此岂不可笑若谓有新杀而鲜者又有近杀而柔者又有久杀而乾者则是具

三兔也何不移以治他羞而酷嗜此物若是且观所言菜惟瓠叶其礼之薄可知必非具三兔明矣此辨近俚然於理有妨又於先後文义未合故不容以不辨以愚见则燔是先事而或炮之或炙之则其後事也燔说文云熬也兔始杀而熬去其毛也与或燔或炙之燔不同彼乃燔肉耳炮礼记注谓裹烧之周礼地官封人职云毛炮之豚郑氏注谓燂去其毛而炮之以备八珍按内则云炮取豚刳之剝之实枣於其腹中编以苴之涂之以谨涂炮之涂皆乾擘之刳之剝之杀而去其五藏萑芦苇之类苴裹也谨通作瑾黏土也擘之者擘去乾涂也自是之後则濯手以摩之去其皽膜和之以稻粉之粥煎之以膏调之以醯醢此八珍之一也贾公彦云郑知去毛者毛於牲无用空以污损牲体故知凡炮者皆去毛也此言炮之当亦如是燔毛之後乃以物包裹而烧之也毛传云炕火曰炙孔云炕举也谓举於火上以炙之愚按此炙非炙肉当与或燔或炙之炙同解彼为炙肝知此所炙者亦肝之类盖将炮之时刳去五藏因取而炙之孔疏楚茨篇谓炙者远火之称以难熟者须近火易熟者远之肝易熟之物故但用炙是也又药性本谓兔肝主明目亦可食之物若以炙为炙肉则全体既皆炮之矣复何处可用其炙乎然则此诗先言炮之燔之者谓本欲炮之先命燔其毛也次言燔之炙之末言燔之炮之者谓既燔之後先刳出其五藏因择取而炙之而後乃实物于腹中从而炮之也各有条序非变文叶韵之说又按郑云饮酒之礼既奏酒于宾後乃荐羞据下文初言献之则此炮之燔之乃未献宾以前事此时尚未荐羞及献宾後始荐之後二章是也朱子云主人酌以献宾曰献】有兔斯首燔之炙【叶药韵职略翻】之君子有酒酌言酢【药韵】之【赋也燔之炙之解见上章孔云今礼乡饮酒燕礼大射皆先进酒乃荐脯醢乃羞庶羞愚按荐脯醢事在羞庶羞之前此下二章先举炙後举炮者亦先脯醢而後庶羞之意仓颉篇云客报主人曰酢朱子云宾既卒爵而酌主人也】有兔斯首燔之炮【叶尤韵蒲侯翻】之君子有酒酌言醕【尤韵】之【赋也燔之炮之解见首次二章醕毛云道饮也郑云主人既卒酢爵又酌自饮卒爵复酌进宾犹今俗之劝酒孔云欲以醕宾而先自饮以导之其实饮讫进酒于宾乃谓之醕也按礼主人导饮之後宾受爵卻不饮奠于席前乃行旅醕之礼交错以徧卒饮者真爵于篚今此一献礼薄当无旅酬之事】

瓠叶四章章四句【朱子谓此亦燕饮之诗然古无以瓠叶一兔为礼者虽曰物薄意诚不应乔野如此其何敢信或又以为谦言之味诗词果谦言之云乎申培氏不着说若子贡传谓所以燕大臣则不根益甚矣】

小戎美襄公也备其甲兵以讨西戎【出序 史记秦本纪云庄公生子三人其长男世久世父曰戎杀我大父仲我非杀戎王则不取入邑遂将击戎让其弟襄公为太子庄公卒襄公代立二年戎围犬丘世父世父击之为戎人所虏岁余复归世父按竹书纪幽王四年秦人伐西戎意世父遇虏即在是年则此诗之所为作盖因秦师车甲之盛戎虑非敌故复归世父耳终襄公之世惟两伐戎是役之後至平王五年之役则卒于师矣据史记称襄公伐戎至岐卒诗不应有在其板屋之语固知是役为救世父也】

小戎儻收【尤韵】五檠梁【汉书注作良】輶【尤韵】游【陆德明本作鞠引沈云旧本皆作靳】环胁【丰氏本作脇】驱【叶尤韵祛尤翻又叶遇韵区遇翻又叶屋韵居录翻陆本作駟丰本作?】阴鞞縢续【叶屋韵读如熟神六翻亦叶遇韵辞屡翻徐邈读】文茵【释

名作鞞丰本作因】畅【丰本作鬯】穀【屋韵】驾我骐驎【遇韵亦叶屋韵读如祝之六翻】言念君子温其如玉【沃韵】在其板屋乱我心曲【沃韵 赋也小戎毛传云兵车也董氏云六月言元戎十乘以乘此天子之车也故夏钩车殷寅车周元戎然则诸侯之戎车谓之小戎宜也】倭尔雅说文皆云浅也旧说以为平地任载之大车前軹至後軹其深八尺兵车当輿之内从前軹至後軹惟深四尺四寸是兵车比大车之軹为浅人之升车也自後登之入于车内故以深浅言之按此解亦通然于第三章倭驂二字终觉难解管子有曰甲不坚密与倭者同实将徒人与倭者同实房玄龄注以倭为单也单犹空也言甲不坚与单身无甲者同徒卒以器械亦与单身同也此可识倭之义倭之为单以音近耳戎车不载他物故曰倭收毛云軹也孔穎达云軹者车之前後两端之横木也所以收敛所载故名收焉按軹在輿上以载人物故考工记言軹方以象地即车箱是也说文以軹为车後横木方言小尔雅以軹为车枕盖但据其後言之耳兵车以驰突攻击为事故车箱中空无所收载贵取其轻利也五毛云五束也檠说文云历录束交也孔云五檠是辕上之饰故以五为五束言以皮革五处束之所束之处因以为文章历录然历录盖文章之貌也梁輶毛云輶上钩衡也按小尔雅云輶谓之輶又方言云楚卫之间谓輶为輶车之进退以輶为主车前两服马一在輶左一在輶右輶直一木据礼记车制图云长一丈四尺四寸考工记云三分其长二在前一在後其制从後軹至前軹稍曲而上以便两服马之进退不使其体肤至施衡之处则驾于衡之上而向下鈎之衡輶端横木当服马项上有缺处以扼马颈亦谓之扼考工记谓之鬲长六尺六寸横居于輶下而輶形穹隆上曲如屋之梁故谓之梁輶也愚因此得服马服字之义服从舟?声盖以两服马居輶两旁得名而说文但以车右騑之称非也或又谓梁輶即所谓軹按说文云軹车輶端持衡者徐锴解以为重缚在衡上其非梁輶明矣五分其輶之穹每分各束以皮盖为恐曲处多是斲成不随木理易致折耳按考工记云良輶环灑灑即漆也輶有胶筋之被故輶之良者四环皆漆之也游环毛传朱子皆以为鞞环非是陆德明引沈云旧本皆作靳靳者言无常处以驂马外轡贯之以止驂之出左传所云如驂之有靳无取于鞞也据此则靳鞞二字原有辨鞞解见下靳乃游环之名所谓游环者以皮为环即皮圈也引两驂马之外轡并两服马之内两轡俱贯于圈内而执之所以制驂马使不得外出故谓之靳徐锴以为靳制其行是也其号此环为游者取游移之义以其在两服两驂背上或前或却变动不居而陆德明但据驂马而言刘熙但据服马而言俱非通义脇驱郑玄云着服马之外脇以止驂之入孔云以一条皮上系于衡後系于軹驂马欲入则此皮约之按此则左右两边皆有以此物正当服马之脇而隔断两驂于其外如驱之使不得相近者然故名之曰脇驱也阴mao云揜轨也刘熙云阴荫也横侧车前以荫穹也按轨车下横木以持轮者亦谓之轡穹横在车前织竹作之穹在轨之上阴又在穹之上其制为板木横侧车前系鞞于此严粲以揜轨之轨当作轨音犯非是考轨与?同其义则軹前也据郑解揜轨垂輶之上当軹之前疑此阴即?耳鞞毛云所以引也朱子云以皮二条前系驂马之颈後系阴板之上孔云车衡之长惟六尺六寸止容二服而已驂马颈不当衡别为二鞞以引车故云所以引也大叔于田云两服齐首两驂鴈行明驂马之首不以服马齐也左传称邠无恤说已之御云两鞞将絶吾能止之驾而乘材两鞞皆絶是横轨之前别有驂马二鞞也又广雅以阴鞞为伏兔非是鍤毛云白金也刘熙云鍤沃也治白金以沃灌鞞环也孔云尔雅白金谓之银其美者谓之鍤然则白金不名鍤谓销此白金以沃灌非训鍤为白金也金银铜铁总名为金此说兵车之饰或是白铜白铁未必皆白银也续毛云续鞞也孔云鍤续是作环相接以白金饰续鞞之环愚按阴与鞞原是两物不相聯属今缀环于阴板而系鞞

于环以聯属此两物故名此环为续也若鍤则意即今所谓流金是也文茵孔云茵者车上之褥用皮为之言文茵则皮有文采刘熙释名作文鞬云车中所坐者也用虎皮有文采因与下輶相连着也畅毂毛云长毂也朱子云毂者车轮之中外持辐内受轴者也王安石云老子曰三十辐共一毂轮之心为毂毂中横截者谓之轴考工记云毂也者以为利转也辐也者以为直指也孔云郑司农注考工记谓兵车之毂长三尺二寸大车毂长尺半是兵车之毂比之为长故谓之长毂按兵车所以贵长毂者盖以其驰驱险阻虑毂短则脱辐故也骐毛云綦文也孔云色之青黑者名为綦马名为骐知其色作綦文又说文云马青骊文如博棊也或云苍艾色易云震为鼻足尔雅云马後右足白骊左白鼻又云膝上皆白惟鼻郭璞云马膝上皆白为惟鼻後左脚白者专名鼻也统全文训之賤收畅毂戎车之制也文茵车上所用物也五檠梁輶所以馭两服也游环胁驱阴靽鍤续所以馭两骖也终之曰驾我骐鼻则又仍主两服而言即下章骐驎是中是也言?语辞君子谓襄公之兄世父也事见小引下後仿此温其如玉以德性言若曰战阵乃武勇者之事以世父之温然如玉则不堪此任矣故复仇之志虽切而卒至为戎所虏也又聘义子贡问於孔子曰敢问君子贵玉而贱?者何也为玉之寡而?之多与孔子曰非为?之多故贱之也玉之寡故贵之也夫昔者君子比德于玉焉温润而泽仁也缜密以栗知也廉而不刖义也垂之如队礼也叩之其声清越以长其终诎然乐也瑕不掩瑜瑜不掩瑕忠也孚尹旁达信也气如白虹天也精神见于山川地也圭璋特达德也天下莫不贵者道也诗曰言念君子温其如玉故君子贵之也荀子引孔子之言曰虽有珉之雕雕不若玉之章章亦引此诗皆无关诗旨板屋朱子云西戎之俗以板为屋班固地理志云天水陇西山多林木民以板为屋故秦诗云在其板屋酈道元云上邽故邽戎国秦武公十年伐邽县之汉改天水郡其乡居悉以板盖屋按张宣公南岳唱酬序云方广寺皆板屋问老宿云用瓦辄为冰雪冻裂以南岳观之则知板屋非独西陲为然愚按时世父被虏在戎地故云然心曲郑玄云心之委曲也忧思而至于心乱故今日之具兵甲以往征亟亟不容已也】四牡孔阜【有韵丰氏本作?】六轡在手【有韵】骐驎是中【东韵】騶骊是骖【丰道生云当叶车韵读如骢麤丛翻】龙盾之合【韵】鍤【说文作沃】以觶輶【合韵】言念君子温其在邑【叶念韵遏合翻】方何为期【支韵】胡然我念之【支韵 赋也承上章驾我骐鼻而言四牡谓驷马皆牡孔阜六轡在手解俱见驷铁篇驎说文以为赤马黑毛尾郑笺以为赤身黑鬣按此诗所言戎车乃驷马之车骐驎騶骊四牡备矣益以上章之鼻不又成五马乎偶以尔雅求之而悟此章之驎即上章之鼻乃尔雅之所谓驎白驳者也盖马有驎色有白色者名之曰驳此本驳马特上章因其白之在足而题之以鼻此章则因其驎之在体而题之以驎耳又罗愿云古者驎非所贵故淮南子曰旁光不升俎驎驳不入牲以其犁也陆佃云骐驎中驷騶骊上驷故服以骐驎骖以騶骊淮南子曰骖欲驰服欲步说文云騶黄马黑喙驊马深黑色毛云中中服也骖两駟也孔云车驾四马在内两马谓之服在外两马谓之駟春秋时郑有公子駟在子驷是有駟乃成驷也盾干也说文云戣也戣者所以蔽身扞目以木为之画龙于上谓之龙盾合王肃云合而载之以为车蔽也黄震云盾狭而车广一盾不足为卫故合载之非止防其破毁也与二矛重弓意不同觶说文云环之有舌者徐锴云言其环形象玦通作觶輶毛云骖内轡也按此与阴靽之靽不同彼乃引车之靽此是控骖之轡郑云鍤以觶輶輶之觶以白金为饰也孔云四马八轡而经传皆云六轡明有二轡当系之马之有轡者所以制马之左右令之随逐人意骖马欲入则偃于胁驱内轡不须牵挽故知輶者纳骖内轡系于轼前其系之处以白金为觶也今按一车之内通计轡与革凡十二条在手者六皆轡即服马内外四轡骖马外二

轡是也游环则总收六轡之皮圈也系之车者其四为革即胁驱阴靽各皮二条其二为骖内轡即此所谓靽是也胁驱则系之衡与軫靽则系之于阴板而靽则系之于轼者也各不容混邑犬丘之邑也方将也此温然之世父望其在邑将以何为期乎按世父有言曰我非杀戎王则不敢入邑已而遇虜故诗人念其入邑之无期也胡通作何声之近也此世父也胡然我辈念之至是乎自问之辞其所以念之之故至下章始明言之厌厌良人秩秩德音二语是也】
𨔵駟孔羣【文韵】𨔵【说文丰氏俱本作𨔵】矛鏐【说文作沃】𨔵蒙伐【释文作?】有苑【叶文韵於云翻】虎鞞【释文作暢】鏐膺【蒸韵】交鞞二弓【叶蒸韵姑弘翻】竹闭【周礼注丰氏本俱作?仪礼注作秘】緄滕【蒸韵】言念君子载寝载兴【蒸韵】厌厌【平声列女传作愔愔】良人秩秩德音【叶蒸韵一陵翻 赋也承上章龙盾之合鏐以鞞靽而吉韩诗云駟马不着甲曰𨔵駟按战马无不被甲者此固其未进战之时也孔云物不和则不得羣聚故美其能甚羣言和调也章潢云汧渭马之所产也秦以非子善养马开国观小戎所咏信然唐张万岁云锦成羣非此地乎今秦陇如故而苑马行太仆之所职者即其事也而马政不举得非有其地而无其人抑亦牧之不得其道也𨔵矛毛云三隅矛也孔云刃有三角盖相传为然𨔵说文云矛戟柅下铜𨔵也通作鏐孔云曲礼曰进戈者前其𨔵後其刃进矛戟者前其鏐是矛之下端当有鏐也彼注云銳底曰𨔵取其𨔵地平底曰鏐取其鏐地则鏐𨔵异物言鏐为𨔵者取类相明非训为𨔵也鏐𨔵朱子云以白金沃矛之下端平底者也毛云蒙讨羽也伐中干也郑云蒙扈也讨襍也画襍羽之文于伐故曰扈伐孔云夏官司兵掌五盾各辨其等以待军事注谓五盾干櫓之属其名未尽闻也言辨其等则盾有大小櫓是大盾伐为中干干伐皆盾之别名也蒙有襍色知苑是文貌陆化熙云𨔵矛以敌人蒙伐以自卫鏐之画之俱尚文采之意毛云虎虎皮也鞞弓室也陈祥道云鞞弣鞞鞞鞞皆弓衣也覲礼言包干戈以虎皮诗言虎鞞而鞞鞞皆从韦则古之弓衣以皮为之也尔雅云金谓之鏐郑云刻金饰也孔云弟子职曰执箕膺揭则膺是胷也补传云谓弓室之胷也言以虎皮为鞞而以金鏐饰其胷也严粲云传以膺为马带疏释之为鏐胷之鞞即钩膺也然采芑钩膺幃革崧高钩膺濯濯韩奕钩膺鏐锡上下文皆言车马之饰则膺当为马胷之带此首言虎鞞继言鏐膺下文又言交鞞二弓竹闭緄滕则皆言弓耳不得以此鏐膺为彼钩膺也交鞞二弓孔云交二弓於鞞中谓颠倒安置之王安石云鞞必二弓如有副马以备坏也竹闭一名?亦作秘周礼注云弓檠也弛则缚之于弓里备损伤也以竹为之緄说文云织带也毛云绳也滕约也弓体欲正故必以竹为闭象弓之形纳于弓之?用绳约之而後入于鞞即考工记所谓继也陈祥道云秘以闭之故亦谓之闭緄以系之故亦谓之继如此则纳之鞞中足以定往来之体祛翻反之病矣载之言则音之近也寝寐兴起也寝兴不忘念之切也厌厌二句则所以念之之故也厌通作慝说文云安也厌厌毛云安静也即前章温字意良善也秩说文云积也秩秩德音言世父有德之言不一而足也敌王所忤是其忠复祖父之仇是其孝世父秉心惟以忠孝为归故美之曰厌厌良人其所言者一本於忠孝之言故赞之曰秩秩德音而兹不幸遇敌失利至幽囚于板屋之中也此今日之所以大举而往救也朱子云襄公报仇所以不自己者岂忮忿之心哉乃人伦之正天理之?以大义驱其人而战之也此襄公所以能用其人而秦人所以乐为之用也】

小戎三章章十句【子贡传申培说皆谓襄公遣大夫征戎而劳之夫襄公当幽王时尚为西垂之大夫未为诸侯也而所遣者亦大夫耶安知其非自将耶序则谓襄公备兵甲以讨西戎西戎方强而征伐不休国人则矜其车甲妇人能闵其君子焉朱子本此遂以为妇人之诗不

审深居闺阁者安能知军容之盛若此此不过因篇内有良人字遂意之耳然黄鸟之诗亦称良人安在其为妇人语耶又按先秦之世良人为君子通称吕氏纪序意曰秋甲子朔朔之日良人请问十二纪注亦谓良人君子也】

正月大夫刺幽王也【出序 按竹书纪幽王四年夏六月陨霜即此诗所谓正月繁霜者也篇中有不自我先二语与瞻印篇同疑亦为凡伯所作】

正月繁霜【阳韵】我心忧伤【阳韵】民之讹【说文读诗记俱作譌石经丰氏俱本作伪】言亦孔之将【叶阳韵资良翻】念我独兮忧心京京【叶阳韵居良翻】哀我小心癯忧以痒【阳韵 赋也正月毛传云夏之四月郑玄云建巳之月按左传昭十七年夏六月甲戌朔日有食之祝史请所用币李平子曰止也惟正月朔慝未作日有食之於是乎有伐鼓用币其余则否大史曰在此月也当夏四月是谓孟夏颜师古云四月正阳之月故谓之正月按周之六月夏之四月也孔颖达云以大夫所忧则非当霜之月若建寅正月则固有霜矣不足忧也邵宝云四月曰正月十月曰阳月扶阳抑阴无所不用其极也繁多也霜凝露也大戴礼云霜露阴阳之气阴气胜则凝而为霜刘熙云其气惨独物皆丧也解颐新语云或疑四月不应有霜考之汉武帝元光四年四月陨霜杀草晋武帝咸宁九年四月陨霜杀粟麦郑云建巳之月纯阳用事而霜多急恒寒若之异按洪范谋时寒若急恒寒若以听属金金主寒谋者听之用急者谋之反故有恒寒之异讹言繁兴王听不聪之应也淮南子云逆天暴物则日月薄蚀五星失行四时于乖画冥宵光山崩川涸冬雷夏霜诗曰正月繁霜我心忧伤天之与人有以相通也故国危亡而天文变世惑乱而虹蜺见万物有以相连精?有以相荡也伤说文云痛也思其所以致此繁霜之异厥有繇然故忧之甚而至于伤若下文所云是也民之讹言解见沔水篇孔甚也将者苏林云甫始之辞言讹言方兴其势甚炽而未有艾也真德秀云以是为非以非为是以忠为佞以佞为忠此所谓讹言也讹言兴则君子小人易位而邪正混淆所以致繁霜之灾独对衆言衆讹成羣而已孤特无与与第十二章语意相似非衆皆不忧而已独忧之说京者数目之称十万曰亿十亿曰兆十兆曰京十京曰垓京京衆也言所忧多端盖不徒为一身忧而为社稷生民忧也癯从鼠说文无此字毛传以为病也吕氏云与鼠思泣血文虽小异而义同范氏云凡物之多畏者惟鼠为甚故谓癯忧痒瘍同义头创也亦作痒鼠潜穴内不敢见人已之小心畏谨似之其状之可哀如此而念及国家之将亡则所忧者又不能自己如皮肤之有痒欲不抑搔之而不得也】父母生我胡俾我癯【麋韵】不自我先不自我後【叶麋韵後五翻】好言自口【叶麋韵孔五翻】莠言自口【同上】忧心愈愈【麋韵尔雅作痠痠】是以有侮【麋韵 赋也癯毛云病也与交相为癯之义同说文以病瘳解非是严粲云人穷则呼父母言父母生我胡为使我癯病乎不出我之前不居我之後适当其时是我生之不幸也好言者夸谀之言莠害苗草也莠言者害正之言曰自口者讹言之人为誉为毁惟其口之所出本非繇中之言无真实也愈与愉同字于义难通当依徐锴作忸说文云忘也譟也譟者含深也盖含忧之深而至于善忘也侮说文云伤也郑玄云我忧心愈愈然与譌口者殊涂为譌言者所疾是以有此见侵侮于己也首章忧民之讹言犹属泛词至此曰是以有侮则己亦亲受其害矣】忧心惓惓【陆德明本作茕茕】念我无禄【屋韵】民之无辜并其臣仆【叶屋韵步木翻】哀我人斯于何从禄【见上】瞻乌爰止于谁之屋【韵 赋也周礼注云人无兄弟曰惓按说文无惓字孟子通作?说文云回飞疾也于义无取集韵云或作憊忧

也赵颐光云三十斤为鰌从钩从心心之重也忧可知矣又扶杜篇独行翼翼说文云目惊视也陆德明本亦作??古文字音同通用或又作茷 嫗其义俱同然说文皆不载禄说文云福也孔云禄名本出于居官食廩得禄者是福庆之事故谓福佑为禄无禄犹言不幸左传无禄献公即世是也此承上章有侮而言辜罪也并相从也其者将然之辞臣仆家之贱者左传晋惠公卜男为人臣女为人妾孝经云治家者不敢侮于臣妾而况其妻子乎臣者事人之通称凡已所得役使者皆谓之臣故与妾并言明其贱也仆给事者左传云人有十等王臣公公臣大夫大夫臣士士臣皂皂臣舆舆臣隶隶臣僚僚臣仆仆臣台是也臣仆虽贱称然必贵家有之非谓凡人皆有臣仆此言无罪之民遭此讹言孔将之世惴惴莫必其命将来必尽皆服属于权门为其臣仆庶可自免也辅广云民指在下之民人则并上下而言之念我无禄伤己之不幸也哀我人斯将从何人而受禄乎伤斯人之俱不幸也然昧于何从禄之语则能禄人者必在权门可知故继之曰试观羣乌之飞果止于何人之屋乎毛云富人之屋乌所集也郑云乌止于富人之屋以求食愚按乌以比趋炎附势者禽经云乌向啼背栖管子云乌集之交初虽相驩後必相咄而招集流亡亦称乌合之衆以乌易合亦易散也小人趋附情状类此故借乌言所集之屋则褒姒虢石父辈是也旧说以为哀国之将亡如郭林宗所云不知瞻乌爰止于谁之屋者似非诗意】瞻彼中林侯薪【丰本作新】侯蒸【韵】民今方殆视【丰本作眎】天梦梦【叶蒸韵莫滕翻丰本作??後章同】既克有定靡人弗胜【叶蒸韵书蒸翻】有皇上帝伊谁云憎【蒸韵 比而赋也中林林中也侯维也薪蒸解见无羊篇郑云中林中大木之处而维有薪蒸尔喻朝廷宜有贤者而但聚小人愚按韩诗外传亦如此说盖承上乌止谁屋而言见布满有位者皆趋炎附势之徒也殆危也徐锴云梦之言蒙也不明之貌既克有定指天言定者梦之反人谓有位之人胜说文云任也今日小人用事民方在危殆之中视天若梦梦不明然者而究竟天亦有定之日及其既定必使登明选公无不克胜其任断不似今日闕冗充位也一说靡人弗胜言天非不能胜恶人特此时天犹未定耳正深恨恶人之语如谚所谓善恶到头终有报只争来早与来迟之意皇说文云大也上帝朱子云天之神也程子云以其形体谓之天以其主宰谓之帝伊发语辞憎恶也小人固可憎而使小人在位者谁实为之然则上帝当憎恶何人乎推本用人之人所以刺王也】谓山盖卑【陆本作庳】为冈为陵【蒸韵】民之讹【丰本作譌】言宁莫之惩【蒸韵】召彼故老讯之占梦【叶见上章】具曰予圣谁知乌【孔丛子作鸟】之雌雄【叶蒸韵如乘翻 比而赋也谓山盖卑二句与瞻彼中林二句对看语曰培塿无松柏将谓山盖卑故美材不生而其实为高冈为大陵非卑也安在其无嘉植乎以比国非无贤才特小人巧肆排挤或诋之曰无能或中之以奇祸人主受其蛊惑遂谓举朝无足称任使者骛然有轻士大夫之心下文予圣之病正原于此皆讹言之为也其空虚人国如是而曾莫之惩创何哉周语卫彪傒曰自幽王而天夺之明使迷乱弃德而即愆淫夫周高山广川大藪也故能生之良材而幽王荡以为魁陵粪土沟渎其有悛乎正谓此也召彼以下皆主王言讯问也孔云爱好鄙碎共信徵祥召彼元老宿旧有德者但问之占梦之事言其不尚道德侮慢长老也班固云惑者不稽诸躬而忌妖之见是以诗刺召彼故老讯之占梦伤其舍本而忧末不能胜凶咎也严云但问占梦之事其所问不急也李义山诗曰可怜夜半虚前席不问苍生问鬼神亦此意具通作俱偕也予代王自予也具曰予圣意连下文与上不相蒙此非故老之言乃谄佞小人思以逢王之欢聊献谀为固宠地而王不察闻其称神颂圣遂真谓天下莫已若也故叹之曰是皆上章所比集屋之乌羣然为利来者耳其雌其雄谁能辨之鄙其识趣齐等无以相别也欧阳修云凡禽鸟之雌雄多以其首尾毛色

不同而别之乌之首尾毛色雌雄不异人所难别按国语郑桓公问于史伯曰周其弊乎对曰殆於必弊者泰誓曰民之所欲天必从之今王弃高明昭显而好谗慝暗昧恶角犀丰盈而近顽童穷固去和而取同夫和实生物同则不继以它平它谓之和故能丰长而物生之若以同裨同尽乃弃矣故先王以土与金木水火襍以成百物是以和五味以调口刚四支以卫体和六律以聪耳正七体以役心平八索以成人建九纪以立纯德合十数以训百体出千品具万方计亿事材兆物收经入行姦极故王者居九畹之田收经入以食兆民周训而能用之龢乐如一夫如是龢之至也於是乎先王聘后于异姓求财于有方择臣取谏工而讲以多物务和同也声一无听物一无文味一无果物一不讲王将弃是类而与剽同天夺之明欲无弊得乎夫虢石父谗谄巧从之人也而立以为卿士与剽同也弃聘后而立内妾好穷固也侏儒戚施实御在侧近顽童也周法不昭而妇言是行用谗慝也不建立卿士而妖试幸措行暗昧也是物也不可以久味史伯所言弃和取同与此诗具曰予圣之意殊合其为刺幽王诗明矣又按吕氏春秋云幽王染于虢公鼓祭公敦鼓即石父名孔丛子云子思谓卫君曰君之国事将日非矣君曰何故对曰有繇然焉君出言皆自以为是而卿大夫莫敢矫其非卿大夫出言亦皆自以为是而士庶莫敢矫其非君臣既自贤矣而羣下同声贤之贤之则顺而有福矫之则逆而有祸故使如此如此则善安从生诗曰具曰予圣谁知乌之雌雄抑亦似卫之君臣乎】谓天盖高不敢不局【叶陌韵居亦翻说苑陆本俱作局】谓地盖厚不敢不踣【陌韵说文作趺】维号【丰本作号】斯言有伦有脊【陌韵春秋繁露作迹】哀今之人胡为虺蜴【陌韵盐铁论说文俱作蜥 赋也局曲也踣说文云小步也毛云累足也郑云局踣者天高而有雷霆地厚而有陷沦上下皆可畏怖之言也王述之云言天高己不敢不曲身危行恐上触忌讳也地厚己不敢不累足惧陷于在位之网罗也愚按此因小人工为讹言而王又听信之故畏惧之甚至于如此家语及说苑皆载孔子论诗至于正月六章惕然如惧曰彼不逢时之君子岂不殆哉从上依世则道废违上离俗则身危时不兴善已独繇之则曰非妖即妄也故贤者既不遇恐不终其命焉桀杀关龙逢纣杀比干皆是类也诗曰谓天盖高不敢不局谓地盖厚不敢不踣此言上下畏罪而无所自容也号说文云呼也斯言指讹言者伦说文云辈也犹类也脊当依繁露通作迹说文云步处也谓人行事之可据者虺解见斯干篇蜴虫名旧皆以为蜥蜴罗愿云蜥蜴似蛇而四足长五六寸生^二泽中尔雅蝮螭蜥蜴蝮螭守宫四名转相解至陶隐居以为其类有四种形大纯黄色者名蛇医其次似蛇医而小形长尾见人不动者名龙子小而五色尾青碧可爱者名蜥蜴形小而黑喜缘墙壁者名蝮螭则与今所见似同按说文及字林及崔豹古今注并以蝮螭为蛇医而说文又云在壁曰蝮螭在^二曰蜥蜴蜥蜴守宫也方言亦云秦晋西夏谓之守宫或谓之蠃^二或谓之蜚易其在泽中者谓之易蜥南楚谓之蛇医或谓之蝮螭按此诸文则在^二泽名蝮螭蜥蜴在墙壁者名蝮螭守宫也诗诂云守宫蜥蜴二物蜥蜴尾通于身如蛇而加足有黑色者有青绿色者常居^二间守宫褐色四足有尾偃伏壁间故名蝮螭亦名守宫常在屋下也又陆玕云虺蜴一名蝮螭蜴也或谓之蛇医如蜥蜴青绿色大如指形状可恶详陆所言则虺蜴乃蝮螭之别名实非二物未详孰是虺蜴之为虫虽小以其有毒而能螫人故以为小人之比诗人局踣于讹言之害故号呼此为讹言者而告之曰凡以言加人者必稽于其类如人之伦辈灼然难混附于其事如人之行步昭然可数则是者不可以为非无者不可以为有自无所容讹言为矣哀今之人胡为肆毒以害人而自同于虺蜴乎深恨之之词又董仲舒云是非之正取之逆顺逆顺之正取之名号名号之正取之天地天地为名号之大义也古之圣人謫而效天地谓之号鸣而命施谓之名名号异声而同本皆

鸣号而达天意者也号凡而略名详而目目者徧辨其事也凡者独举其事也物莫不有凡号号莫不有散名事各顺于名名各顺于天天人之际合而为一同而通理动而相益顺而相受谓之德道诗曰维号斯言有伦有迹此之谓也此读号为去声其解又异】瞻彼阪田有苑其特【职韵】天之机我如不我克【职韵】彼求我则【职韵】如不我得【职韵】执我仇仇亦不我力【职韵】比而赋也山胁曰阪郑云阪田崎岖堦堦之处苑茂也特朱子云特生之苗也视彼阪田之苗苑然而特生以况已居昏乱之朝挺然而特立虽然地之美者善养禾君之仁者善养士彼苗在阪田亦岂能以其苑终乎机说文云动也我诗人自我也欧阳修云曰天之机我者君子居危推其命于天也下文执我仇仇正所谓机我者克胜也朱子云天之机我如恐其不我克何哉亦无所归咎之词彼指王也则其则不远之则犹言求之以为榜样其始求之惟恐不得盖第借以美观非真欲取法之也锺惺云士居乱世一退位不仕耳读此诗乃知乱而可退犹非乱之至也执持仇讐也执我仇仇言衆讐朋兴持我之短长以与我为讐者不一其人即第二章所谓有侮是也亦不我力言不使我得以効力于国也礼记子曰大人不亲其所贤而信其所贱民是以亲失而教是以烦诗云彼求我则如不我得执我仇仇亦不我力君陈曰未见圣若己弗克见既见圣亦不克繇圣】心之忧矣如或结【屑韵】之今兹之正胡然【大全作为】厉【叶屑韵力薛翻】矣【丰本作之】燎之方扬【汉书作阳】宁【汉书作能】或灭【屑韵韵书作威杨慎云当作□】之赫赫宗周褒姒威【屑韵音血与灭字异左传汉书列女传俱误作灭】之【赋也孔云心之忧矣如有结之者言忧不离心如物之纏结也愚按此不为已往之讹言忧而为孔将之讹言忧见其势方盛其来未已即下文所谓燎之方扬宁或灭之者宜其忧之纏绵于心而不可解也正正月也厉与沴同当今兹正阳之时而有繁霜之异所谓厉也变不虚生必於其类胡然而致此哉可以推其故矣燎说文云放火也尚书若火之燎于原是也扬举也火熄为灭以水沃之而熄故其字从水讹言孔将一唱衆和如方当燎原之初火烈具扬未易扑灭也赫赫明盛貌宗周镐京也褒姒幽王之嬖妾褒国女姒姓也列女传云褒姒者童妾之女周幽王之后也初夏之衰也褒人之神化为二龙伺于王庭而言曰余褒之二君也夏后卜杀之与去莫吉卜请其鬯藏之而吉乃布币焉龙忽不见而藏鬯榑中乃置之郊至周莫之敢发也及周厉王之末发而观之鬯流于庭不可除也王使妇人裸而噪之化为玄蜃入後宫宫之童妾未毁齿遭之既笄而孕当宣王之时产无夫而乳惧而弃之先是有童謡曰檠弧箕服实亡周国宣王闻之後有人夫妻卖檠弧箕服之器者王使执而戮之夫妻夜逃闻童妾遭弃而夜号哀而取之遂窜于褒长而美好褒人姁有狱献之以赎幽王受而嬖之遂释褒姁故号曰褒姒既生子伯服幽王乃废后申侯之女而立褒姒为后废太子宜臼而立伯服为太子幽王惑于褒姒出入与之同乘不恤国事驱驰弋猎不时以适褒姒之意饮酒沈湎倡优在前以夜继画褒姒不笑幽王乃欲其笑万端故不笑幽王为烽燧大鼓有寇至则举诸侯悉至而无寇褒姒乃大笑幽王欲悦之数为举燧火其後不信诸侯不至忠諫者诛唯褒姒言是从上下相谗百姓乖离申侯乃与缙西夷犬戎共攻幽王幽王举烽燧徵兵莫至遂杀幽王于骊山之下虜褒姒尽取周赂而去于是诸侯乃即申侯而共立故太子宜臼是为平王自是之後周与诸侯无异诗云赫赫宗周褒姒灭之此之谓也灭义即灭而字与灭异从火从戌许慎云火死于戌阳气至戌而尽朱子云时宗周末灭以褒姒淫妬谗谄而王惑之知其必灭周也欧阳修云上七章皆述王信譌言乱政至此始言灭周主於褒姒谓王溺女色而致昏惑推其祸乱之本以归罪也孙鑛云威之二字点得煞然险峻此必作未然说方有味按史苏谓褒姒与虢石父比逐太子宜臼而史记亦称石父为人佞

巧善谀好利王以为卿用事国人咸怨然则讹言之祸即二孽所为盖主之者褒姒翼之者石父宜诗人之推本于是也又左昭元年楚令尹子园享赵孟事毕赵孟谓叔向曰令尹自以为王矣何如对曰王弱令尹强其可哉虽可不终赵孟曰何故对曰强以克弱而安之强不义也不义而疆其毙必速诗曰赫赫宗周褒姒灭之强不义也此解赫赫又异】终其永怀又窘阴雨【麇韵】其车既载乃弃尔辅【麇韵】载输尔载将伯助予【叶麇韵读如雨王矩翻郭忠恕云予本无余音後人读之也赋而比也终其永怀承上褒姒威之言周虽未灭亡然其势不灭亡不止有深识远虑者已当永思其终矣况又迫于强臣跋扈戎狄荐窥之时乎窘说文云迫也朱子云阴雨则泥泞而车易以陷按郑语史伯云申缙西戎方强王室方骚将以纵欲不亦难乎王欲杀太子以成伯服必求之申申人弗界必伐之若伐申而缙与西戎会以伐周周不守矣缙与西戎方将德申申吕方强其隩爱太子亦必可知也王师若在其救之亦必然矣王心怒矣虢公从矣凡周存亡不三稔矣据此所言申缙西戎皆将合力以与周为难即此诗所云阴雨也其车既载言此车载物既当此阴雨之时甚可惧也郑云以车之载物喻王之任国事也弃辅喻远贤也孔云考工记车人为车不言作辅此云乃弃尔辅则辅是可解脱之物盖如今人缚杖於辐以防辅车也张文潜云辅之为物有功於车而非车也考一车之物而辅不与焉然正六辔谨轮辐仆在前马伏軾而辅不至则车不安登险而忧倾涉淖而忧濡视车中之载如寄物焉天下之物固有不相有而相须不同城而相成者岂独辅也哉载即既载之载与下输字连读输通作渝变也左氏春秋郑人来渝平公羊作输二字以音同通用传解输为堕今按输委输也以车运物与载同意训堕似难通特载输二字不应并言故当通作渝尚书云若乘舟汝弗济臭厥载注谓乘舟者久而不济必至败坏其所资载输之谓也盖遇雨而又弃辅则车将有泥陷之患而不得行故所载之物必至臭败而此臭败者非他人之载乃尔之载得无惜乎将毛传云请也盖请辞也伯长也以望助于彼因尊称之为伯曰助予者代王自言也及夫尔载既输之时然後呼请长者而告之曰试助我为出此载于泥涂嗟何及矣诗人逆知周之必亡而此怀不能自己冀其任贤自辅庶几挽回万一毋终任其倾覆而不可救也王氏云如唐太宗败于高丽乃思郭元振玄宗蒙尘入蜀乃思张九龄不用而思之亦晚矣】无弃尔辅员于尔辐【叶职韵笔力翻】屡【陆本作娄】顾尔仆不输尔载【叶职韵节力翻】终踰絶险曾是不意【叶职韵乙力翻文中子作亿比也反应上章而言无弃尔辅二句与其车既载乃弃尔辅相应屡顾尔仆二句与载输尔载将伯助予相应终踰絶险二句与终其永怀又窘阴雨相应员即方员之员通作圆员于尔辐盖言轮也轮之柵名辐其心名毂毂中虚而容轴辐三十枝以实轮而凑毂其包于毂外者名 所以为员也合是三者总名为轮故考工记云望而眡其轮欲其幪尔而下迤也进而眡之欲其微至也无所取之取诸圜也旧训员为益未是轮辐皆车中所有所以喻政辅则车外之物所以喻贤无弃尔辅以防倾跌则尔辐有员转之利虽有阴雨而所载者自不至于输矣屡数也顾犹视也仆将车者也俱见郑笺愚按尔仆以比当时用事者即虢石父辈是也弃尔辅而不用试屡顾尔将车之仆果能不渝尔之载否乎终即终其永怀之终踰说文云越也郑云终是用踰度陷絶之险女不曾以是为意乎严云奈何终踰絶险曾不以为意而覆败必矣蒋悌生云此二章复借驱车以明救乱之道惓惓然忧君爱国之诚有不忍忽然之意此诗之所以为厚也文中子游马颊之谷遂至牛首之谿登降信宿从者乐寔威进曰闻朝廷有召子议矣子曰彼求我则如不我得执我仇仇亦不我力姚义曰其车既载乃弃尔辅寔威曰终踰絶险曾是不亿子喟然遂歌正月终焉既而曰不可为矣】鱼在于沼【叶啸韵之少翻】亦匪克乐【叶啸韵力炤翻亦叶药

韵历各翻】潜虽伏矣亦孔之炤【啸韵亦叶药韵职略翻中庸丰本俱作昭】忧心惨惨【叶药韵七各翻丰本作懔懔】念国之为虐【药韵亦叶啸韵宜炤翻比而赋也沼者池之别名一云圆曰池曲曰沼鱼相忘于江湖者也今乃在于池沼之中其生已蹙云胡能乐以比小人之在危朝虽侈然肆志然国事日非其乐必不能久犹处堂燕雀之意潜尔雅云深也伏匿孔甚炤明也此二句亦指鱼言鱼虽匿于水之深处而其形状亦甚炤然而易见以比羣小立朝总之以害人为事虽藏机不露而其念虑所存人无有不知之者即下文言为虐是也故中庸引此而申之曰君子内省不疚无恶於志君子之所不可及者其惟人之所不见乎惨说文云毒也尔雅云忧也惨惨毛云犹戚戚也虐说文云残也我所以忧心惨惨然愁戚者惟念举国相率为虺蜴之事其肆毒于人未已耳】彼有旨酒【叶筱韵子小翻】又有嘉殽【叶筱韵下了切陆本作肴丰本改嘉殽二字作肴烝伪也】洽【左传作协】比其邻昏姻【丰本作媼】孔云【文韵陆本作员】念我独兮忧心殷殷【文韵尔雅丰本俱作殷殷赋也彼严云小人也旨嘉皆美也殽通作肴广韵云凡非谷而食曰肴又曲礼注云熟肉有骨曰肴洽说文】

【云沾也比说文云密也二人为从反从为比相与周密也五家为邻据左传则以为指兄弟盖会意耳云毛传以为旋也按云即古云字陆佃云象周旋盘薄之形故云旋也此以形训林尧叟云犹言旋旋归之殷说文云痛也曰京京曰愈愈曰惓惓曰惨惨曰殷殷重文叠见总见其所忧之无已也承上章言我心虽忧小人则乐彼有旨酒又有嘉殽与其邻近之人沾洽亲比而琐琐姻亚之辈亦甚相与回旋而归之独我孤特无侣而不禁其殷殷然忧之痛也左僖二十二年富辰言于王曰请召大叔诗曰协比其邻昏姻孔云吾兄弟之不协焉能怨诸侯之不睦王说王子带自齐复归于京师王召之也又襄二十九年晋平公杞出也故治杞六月知悼子合诸侯之大夫以城杞卫大叔文子曰甚哉其城杞也郑子大叔曰若之何哉晋国不恤宗周之阙而夏肄是屏其弃诸姬亦可知也已诸姬是弃其谁归之吉也闻之弃同即异是谓离德诗曰协比其邻昏姻孔云晋不邻矣其谁云之合观此可以识洽比二句之义李氏云昔人有言曰燕雀处堂母子相安自以为乐也突决栋焚而母子恬然不知祸之将至也今国势如此而小人徒乃羣居饮酒以相乐殆燕雀之类也愚按首章念我独兮之独对衆讪而言此章念我独兮之独对衆乐而言正所谓人皆不忧而已独忧者也】岵岵【岵尔雅说文丰本皆作□斯氏翻】彼有屋【韵】蔌蔌【後汉书丰本俱作速速尔雅韩诗同】方有谷【屋韵後汉书韩诗丰本俱作穀又陆本方有谷作方谷无有字云或作方有谷非也】民今之无禄【屋韵】天天【後汉书韩诗丰本俱作夭夭】是榘【叶屋韵丁木翻】哿矣富人哀此惓【孟子作?楚辞章句陆本俱作茷】独【屋韵 赋也岵说文作□云小貌字从人从凶赵颐光云凶为小儿头故从凶彼亦彼小人也尔雅菜谓之蔌考说文无蔌字有鬻字云鼎实惟芻及蒲陈留人谓之?通作餽周礼醯人糝食注菜餽也今按韩奕之诗云其蔌维何维笋及蒲其语与说文合则蔌鬻同字信矣谷禄也言彼小人同类互相汲引向之所鄙为岵岵然琐小者今且有华屋以为居向之所食惟能具菜餽者今且有厚禄以为养不特旨酒嘉殽相呼召而已重言岵岵蔌蔌者见小人之衆也天通作妖短折也商书彤日篇云非天天民民中絶命正与此天天同义是指小人言榘通作桎说文云击也孔云如?杙之?谓打之也言民何不幸而生于今之时乎然斯人之恶贯已盈而天怒亦将及矣行且从而夭折之必尽是羣类而榘击之也张衡应间云利端始萌害渐亦芽速速方谷夭夭亦加欲丰其屋乃鄙其家意正如此

独以天天为天天则传写之讹耳胥说文云可也一云嘉也言天之所以怒是人何哉以为此辈有屋有谷俨然富人其於自为封植计诚可矣独哀此桀独之人无辜受其荼毒耳得不速夭殛之为快乎盖恨之之深姑托言于天以恐惧之然天意诚亦有在于此是以孟子言文王发政施仁必先鰥寡孤独而引此诗以为证也季本云此诗愤世嫉邪不避忌讳忠於国而不顾其力者自险艰之世言之鲜有不蒙危祸者矣然而敢于直言如此类者皆得免焉岂非先王立采诗之官正欲得人愤郁之情以观国政之有阙言虽诽谤而不以为尤故凡情之不得伸者皆欲因诗而达此文武之泽所以没世而不忘也杀谏臣之事至春秋始有之然後有诽谤之诛矣孔子谓邦无道危行言逊其有感于此与史载厉王使卫巫监谤得谤者而杀之厉固虐君也不可以常理论】正月十三章八章章八句五章章六句【子贡传以为西周丧道大夫伤之申培说亦谓周室丧乱大夫伤之而作是诗皆不显其世朱子引或说曰此东迁後诗也时宗周已灭矣其言褒姒灭之有监戒之意而无忧惧之情刘公瑾深然之谓使宗周末灭褒姒方宠则诗人之言未应指斥如是然灭威原不同字愚但据竹书陨霜之事在幽王四年六月与此诗合故定从序说云】

瞻卬凡伯刺幽王大坏也【出子夏序】其原在嬖褒姒以致乱【凡伯作板诗在厉王末厉共和摄政十二年宣王在位四十六年至幽王三年嬖褒姒八年立伯服九年王室始骚中间相距六十余年此诗之作在幽王时计凡伯当为八九十岁间人矣老臣见国事之非日甚一日不避祸怨愤激而言故序于此诗及召旻皆以为刺大坏也合正月小旻四诗疑皆为凡伯所作诗中语意俱互为出入见幽王之时褒姒擅权于内皇父石父之辈朋应于外所用者小人所信者谗言所任者刑罚所事者剋剥饥馑荐臻戎狄窥伺驯致骀山之祸非大坏而何】

瞻卬【丰氏本作仰】昊天则不我惠【霁韵】孔填不宁降此大厉【霁韵】邦靡有定士民其瘵【卦韵亦叶霁韵子例翻】蝥【陆德明本作蚩下同】贼蝥疾【叶寘韵秦二翻】靡有夷届【卦韵亦叶寘韵居吏翻又叶霁韵居例翻】罪【丰本作臯】罟不收【尤韵】靡有夷瘳【尤韵 赋也举首而视曰瞻倾首而望曰卬说见云汉篇昊天孔安国云元气昊然广大惠者仁爱之意朱子云首言昊天不惠无所归咎之辞也孔甚也填说文云塞也宁通作寘安也甚填塞不安宁之事言其多也降说文云下也厉犹危也义见桑柔篇瘵尔雅说文皆云病也下文言蝥贼蝥疾靡有夷届正孔填不宁之实食苗根者曰蝥解见大田篇蝥贼言如蝥之为苗贼以比当时用事者如尹氏皇父石父辈是也贼自外至故桑柔之诗刺厉王用小人亦曰降此蝥贼也蝥疾言如蝥之为苗疾疾自内生则指褒姒耳靡之言无音之转也夷说文云平也犹云稍稍衰息也届说文云极也罪罟毛云设罪以为罟孔云谓多立科条使人易犯若设网以待鸟兽是以谓之罟愚按此斥蝥贼蝥疾之人言收说文云捕也瘳说文云疾瘳也徐锴云忽愈若抽去之也言此内外之蝥相煽为害无有平夷止极之时譬如张设罗网以人于罪若不急加收捕则士民之病亦无有平夷瘳愈之时也甚恨之之辞】人有土田【先韵亦叶真韵他因翻】女【音汝後同】反有【叶宥韵于救翻】之人有民人【真韵亦叶先韵如延翻】女覆夺【曷韵】之此宜无罪【与下罪相应为韵】女反收【叶宥韵舒救翻】之彼宜有罪女【潜夫论作汝】覆【後汉书潜夫论俱作反】说【叶曷韵他活翻後汉书潜夫论俱作脱】之【分章依朱传按此章四段八句每段上句各隔一句下句各隔四句用韵又辘轳之变体 赋也此章指言罪罟之实盖以刑罚为陷阱而後从而侵牟夺取之所

以成其为蠹也土田人民乃诸侯卿大夫所有无罪有罪则兼括士民而言彼淫刑以逞惟贿是求其待诸侯卿大夫已如此矣又何有于士民乎宜其刑宥之颠倒也女通指蠹贼蠹疾两辈人也反者对正之称凡事之不当然而然者则谓之反怪之之辞也覆郑云犹反也夺犹攘也按董仲舒云周室之衰其卿大夫缓于义而急于利亡推让之风而有争田之讼则土田之为他人有者多矣正月之诗曰民之无辜并其臣仆则民人之为他人夺者多矣收与上章义同说通作挽说文云解挽也周昌年云取非其有者其贪之本谋也出入人罪正所以行其贪重在收无罪上言说有罪只以见其独及无辜之人耳王符云先王之制刑法也非好伤人肌肤断人寿命者也乃以威奸惩恶除民害也天下本以民不能相治故为立王者以统治之在于奉天威命共行赏罚故经称天罚有罪五刑五用诗刺彼宜有罪汝反脱之】哲【陆本作诘後同】夫成城哲妇倾【丰本作顷】城【城城相应为韵毛郑本以人有土田至此为第二章】懿厥哲【汉书作哲】妇为梟为鸱【支韵】妇有长舌维厉之阶【叶支韵坚夷翻】乱【汉书引此句无乱字】匪降自天【先韵亦叶真韵汀因翻】生自妇人【真韵亦叶先韵见第二章 赋也此章斥蠹疾也有蠹疾主于内而後蠹贼得肆于外故先言之哲说文云智也夫妇非伉俪之谓即男子妇人之目耳成城犹所谓衆心成城者倾说文云仄也物仄则覆故朱传又以为覆也倾城犹所谓坏汝万里长城者上之贤臣有才智多谋虑足以拥卫国家犹如城然而王所嬖宠之妇心不利其所为必逞其才智百计以倾陷之使不得安其位所谓倾城也後章言人之云亡指此哲夫退则蠹贼进矣故下文又以梟鸱目之孙鑛云艳妻意浅哲妇意精说到哲处可谓透入骨髓一说郑云城犹国也欧阳修云士多才智为谋虑则能兴人之国妇有才智者干外事则倾败人之国亦通晏子春秋云翟王子姜臣于景公以重驾公观之而不说也嬖人嬖子说之因为之请曰厚禄之公许诺晏子起病而见公公曰翟王子姜之驾寡人甚说之是欲禄之以万鍾其足乎对曰昔卫士东野之驾也公说之嬖子不说公曰不说遂不观今翟王子姜之驾也公不说嬖子说公因说之为请公许之则是妇人为制也且贤良废灭孤寡不振而听嬖妾以禄御夫以蓄怨与民为讐之道也诗曰哲夫成城哲妇倾城今君不思成城之求而惟倾城之务国之亡日至矣公曰善懿说文云专久而美也厥郑云其也懿厥哲妇顔师古云言幽王以哲妇为美也愚按言懿厥者即鍾爱之意梟土梟也罗愿云梟穴土以居故曰土梟偃伏其子百日而长羽翼既成食母而飞盖稍长从母杀食母无以应于是而死黄帝欲絶其类使百吏祠皆用之今人养以致鸟後汉五行志称衆鸟之性见非常斑駁好聚观之至于小爵希见梟者暴是尤聚鸱怪鸱即鸱鸺也亦名鸱鸺与鸱鸺不同彼但名鸺以其为鸺属故谓之鸺鸺耳陆佃云一名只狐昼无所见夜即飞瞰蚊蠹庄子所谓鸺鸺夜撮蚤察豪末画出瞋目而不见丘山者其鸣即雨为?可以聚衆鸟愚按察罗陆所说可以识诗人引喻之意梟鸺皆恶鸟而能致衆禽以比幽王惟鍾爱褒姒故羣小皆来集聚之也旧说但取譬恶声似未尽舌所以言者长舌非指褒姒自言盖谓言出而人皆附和而奉行之则其长孰甚焉厉即首章降此大厉之厉阶说文云陞也曹氏云自下而上以渐而升也丁奉云妇有长舌其自此诗创言乎然亦秦誓牝鸡之晨之遗旨也夫谓维厉之阶者幽王之厉夥甚矣申后黜而太子废家厉也小人盛而刑狱繁国厉也诸侯畔而夷狄侵天下厉也三川竭而岐山崩天地厉也凡此之厉皆从妇之一舌以为阶小雅曰赫赫宗周褒姒灭之而不言其所以灭然则所以灭者此舌耶乱谓朝政紊乱也政事人所自作岂从天而下而莫尸其咎者哉实繇此妇人而已然则向所云降此大厉亦无可奈何而归咎于天之辞其实致厉固有阶天不任受过也】匪教匪诲【叶寘韵胡位翻】时维妇寺【寘韵毛郑以懿厥哲妇至此朱传

以哲夫成城至此为第三章】鞫【说文作𡇗】人伎【说文作伎】忒【职韵】譖【陆本作僭】始竟背【叶职韵必墨翻】岂曰不极【职韵】伊胡为慝【职韵】如贾【音古】三倍君子是识【职韵】妇无公事休其蚕织【职韵毛朱诸本皆以鞫人至此为第四章 赋也此章斥蠹贼也蠹贼与蠹疾互相表里以恣其攘攫之谋于是乎有罪者挽无罪者收而有土田夺人民之事纷然接踵矣教导海晓也皆施之自上者妇斥褒姒即上文云哲妇也寺说文云廷也有法度者也故字从寸左传疏云庭有法度令官所止皆曰寺刘熙云寺者嗣也治事者相嗣续于其内也承上章言褒姒为王宠爱如此故一时承望风旨者皆不知有王之教诲而惟褒姒之言是依其所从出法度之庭虽有吏存焉犹无吏也谓之是惟妇人之寺焉可也鞫人以下乃道其实一说朱子云寺奄人也妇人与奄人二者常相倚而为奸欧阳公尝言宦者之祸甚于女宠其言尤为深切有国家者可不戒哉孔云奄人防守门合亲近人主庸君以其少小贯习朝夕给使顾访无猜憚之心恩狎有可说之色且其人久处宫掖颇晓旧章常近牀第探知主意或乃色和貌厚挟术怀奸或乃捷对敏才饰巧乱实于是邪正并行情貌相越遂能迷罔视听谓其智足匡时忠能辅国信而使之亲而任之国之灭亡多繇此作邹胤忠云周礼寺人掌女官之戒其酒人浆人笱人醢人舂人槁人之属皆与女奚为类内司服缝人至与女御女工共事则其相倚为奸利固易耳此言妇而兼及寺也愚按此说亦通但以上下俱无言及寺人之事而幽王之时寺人乱政史亦未有闻者故定主前说鞫说文云穷理罪人也徐锴云以言鞫之也伎当依说文通作伎云与也忒说文云更也毛传云变也言此蠹贼之辈奉命鞫狱惟与其能更变辞说以诬陷人于罪者下文所云譖始竟背是也一说伎如字说文云恨也毛传云害也曰伎忒者朱子云言其心伎害而变诈无常亦通譖说文云愬也诬告之也譖者簪也若簪之着物切至也乐曲尽为竟故有终之义反面为背故有反之义极者屋脊之栋故有中之义伊发语辞胡之言何音之转也说文无慝字当通作匿阴奸也义见民劳篇言譖人之人其始所譖之说如此而其终乃与之相反斯其虚伪灼然彼鞫狱者岂曰不可即是而得其中正之理乎乃藏匿奸恶于心若将有所图者何也总之外内呼应皆为贪心所使以为不伎忒则不足以罗织无罪者为有罪而攫其土田民人之属耳居货曰贾盖坐卖以待售者物相二曰倍孔云利之多少其数无常必以三倍为言者以三是三才之数数之小成故举以言焉君子有位之称指蠹贼辈也妇指褒姒公事官府之事休说文云息止也郑云妇人无与外政虽王后犹以蚕织为事古者天子诸侯必有公桑蚕室近川而为之筑宫仞有三尺棘墙而外闭之及大昕之朝君皮弁素积卜三宫之夫人世妇之吉者使入蚕于蚕室奉种浴于川桑于公桑风戾以食之岁既单矣世妇卒蚕奉茧以示于君遂献茧于夫人夫人曰此所以为君服与遂副禕而受之少牢以礼之及良日后夫人纁三盆手遂布于三宫夫人世妇之吉者使纁遂朱绿之玄黄之以为黼黻文章服既成矣君服之以祀先王先公敬之至也刘向云妇人以织绩为公事者也休之非礼也严云商贾有三倍之利贱丈夫之所为而君子反知之妇人不宜与外事今乃休其蚕桑织紵之事而与朝廷之事皆非其宜也愚按如贾三倍刺鬻狱者坐而网利也所谓蠹贼也休其蚕织刺内外相关通而王不能制也所谓蠹疾也十月之交归咎皇父外则番聚蹶橐布列要津内则艳妻骄扇日以不臧国语史伯策周之必敝曰先王聘后于异姓求财于有方择臣于谏工而讲以多物王将弃是类而与剽同天夺之明欲无弊得乎夫虢石父谗谄巧从之人也而立以为卿士与剽同也弃聘后而立内妾好穷固也侏儒戚施实御在侧近顽童也周法不昭而妇言是行用谗慝也不建立卿士而妖试幸措行暗昧也可与此诗互证】天何以刺【寘韵】何神不富【叶寘韵香义翻】舍【音舍】

尔介狄【说文作逖】维予胥忌【寘韵】不吊不祥【阳韵】威仪不类【寘韵】人之云亡【阳韵】邦国殄瘁【寘韵】汉书作頽 赋也刺说文云直伤也总承前三章言天何以直伤良善而使受罪罟之毒乎为其瘵之士民叹也既言天又变言神者盈天地之间惟神而已矣孔云亚前为势故何在神上言何故神不以富予此君子妇人而使之网利为愿无已乎盖深恶蠱贼蠱疾者而又归咎于神也舍通作舍说文云释也尔指王也介犹摈介之介古者主有摈客有介礼云七介以相见孔丛子云士无介不见是也狄泛指夷狄非专指北狄也言此蠱贼蠱疾辈日惟以求富为事彼非忠于上者其心皆已舍置王矣而据其所为势必能招夷狄之来若为之摈介然国语史伯云申繇西戎方强王室方骚将以纵欲不亦难乎此所谓介狄者也万时華云介狄一语骊山之祸已逆覩之矣予凡伯自谓也胥尔雅云皆也当通作□说文云通也忌说文云憎恶也言我时出正言以相规戒则此辈皆胥以我为憎恶也吊犹愍也祥说文云善也不吊谓所存无仁心不祥谓所行无善事皆指蠱贼蠱疾辈也外言不入内言不出则有威可畏有仪可象今也内外交通曾无嫌限成何威仪乎不类言与寻常不相类甚怪之之辞也人泛指朝中之贤臣亡说文云逃也邦国天下之通称殄说文云尽也说文无瘁字当依汉书通作頽徐锴云劳苦见于貌也朝中贤士见几而作既皆曰奔亡矣则任羣蠱之横行将孰与救正之势不至使天下之邦国尽皆顛頽不止矣按周书文侯之命篇云闵予小子嗣造天丕愆殄资泽于下民侵戎我国家纯即我御事罔或者壽俊在厥服与此诗所言一一脗合韩诗外传云易曰困于石据于蒺藜此言困而不见据贤人者也昔者秦繆公困于殽疾据五羖大夫蹇叔公孙支而小霸晋文困于骊氏疾据咎犯赵衰介子推而遂为君越王句践困于会稽疾据范蠡大夫种而霸南国齐桓公困于长勺疾据管仲甯戚隰朋而匡天下此皆困而知疾据贤人者也夫困而不知疾据贤人而不亡者未尝有之也诗曰人之云亡邦国殄瘁无善人之谓也左文六年秦伯任好卒以三良为殉君子曰秦繆之不为盟主也宜哉诗曰人之云亡邦国殄瘁无善人之谓若之何夺之古之王者知命之不长是以并建圣哲树之风声分之采物着之诂言为之律度陈之艺极引之表仪予之法则告之训典教之防利委之常秩道之以礼则使母失其土宜衆隶赖之而後即命圣王同之】天之降罔【叶阳韵武方翻】维其优【尤韵】矣人之云亡【阳韵】心之忧

【尤韵】矣天之降罔【见上】维其几【叶支韵读如饥居宜翻】矣人之云亡【见上】心之悲【支韵】矣【赋也此咏叹上章之言天之降罔即所谓天何以刺也罔与罪罟之罟同义优说文云饶也忧通作?说文云愁也徐锴云?形於顔面故从页页者首也几说文云殆也悲说文云痛也天降下罗网民之犯罪者亦既多矣加以人之云亡则此罔之降尚不知何所底止所以愁而形于面也天降下罗网民之犯罪者将殆尽矣加以人之云亡则此罔之降势必至靡有留遗所以痛而结于心也曰忧曰悲亦正为邦国殄瘁故耳後段深前段又左昭二十五年宋乐祁曰鲁政在季氏三世矣鲁君丧政四公矣无民而能逞其志者未之有也国君是以镇抚其民诗曰人之云亡心之忧矣鲁君失民矣焉得逞其志靖以待命犹可动必忧按此以人作民解亦通但上章亦当一例不宜自相矛盾】霤【丰本作澤】沸檻【尔雅作濫】泉维其深【侵韵】矣心之忧矣宁自今【侵韵】矣不自我先【韵】不自我後【叶麌韵後五翻】藐藐昊天【先韵】无不克巩【叶麌韵杲五翻朱子云叶音古】无忝皇祖【□韵】式救尔後【见上 兴而赋也霤水喷出之貌沸说文云水腾涌也檻通作濫汜也水泉从下上出者曰檻泉义见采菽篇郑云涌泉之源所繇者深喻己忧所从来久也徐光启云

盖自初进褒姒之时已忧之矣史苏识女戎之乱晋方成知祸水之灭火此其类也不自我先二句语气与正月篇同郑云恶政不先已不後已怪何故正当之韩诗外传云孟子曰夫蓊冬至必雕吾亦时矣诗曰不自我先不自我後非遭雕世者欤又左昭十年叔孙昭子至自晋大夫皆见高强见而退昭子语诸大夫曰为人子不可不慎也哉昔庆封亡子尾多受邑而稍致诸君君以为忠而甚宠之其子不能仕是以在此忠为令德其子弗能任罪犹及之难不慎也丧夫人之力弃德旷宗以及其身不亦害乎诗曰不自我先不自我後其是之谓乎据此引诗之意则此二句乃主幽王而言犹书所云自作孽者亦通藐通作邈说文云远也无通作毋戒辞也下同克能也巩说文云以韦束也毛云固也天意在今日似邈不相属矣然亦有可以巩固之理毋自诿于不能巩固而听其邈邈已也巩固之道惟在法祖而已忝说文云辱也皇祖指文武也去谗远色贱货贵德此文武之道布在方策者王当仿而行之进羣蠹亲善类毋自忝辱于皇祖也式发语声救者维挽之谓对往日言为後幽王果能猛图补救当日今日始矣严云往者不可谏来者犹可追所谓式救尔後也幽王大坏至此凡伯尚欲救之拳拳之忠不能自己也邹云檠弧箕服亡国之兆虽已久见于童谣亦俟淫德而後加之幽王惟长舌是嬖休蚕织而预朝政欲代后则代后欲夺宗则夺宗方且裂繒为入耳之欢举烽为博粢之赋几如是而不亡者而诗人尚规之以善後盖诚欲回国脉于一綫不忍坐视其殄瘁也陆燧云通诗生自妇人是病无忝皇祖是药】

瞻卬七章三章章十句四章章八句【内第二章依朱传分章与毛郑旧本异第三章第四章与毛郑朱诸本俱异朱子以为此刺幽王嬖褒姒任奄人以致乱之诗今按此因篇中有时维妇寺一语故遂以奄人当之而诗意政未必然申培说剽窃朱子已彰其浅且谓尹伯奇忧乱而作此诗则又疑序所云凡伯其见于咏荡诗者乃厉王时人见于春秋隐七年者乃桓王时人皆于幽王时不合而赵岐王充又有尹伯奇作诗小弁篇之说时世相同辄妄取而附会之尤浅之浅者也子贡传阙文】

召旻凡伯刺幽王大坏也【出序】任用小人以致饥馑侵削焉【出朱传 苏辙云因其首章称旻天卒章称召公故谓之召旻以别小旻而已郝敬云昔周公兴而召南作今周将亡故诗人思召伯因以召旻名篇潘笠江云瞻卬言内惑于宠妾召旻言外嬖于小人盖内有褒姒之宠则外无召公之臣矣低昂轻重之势如持衡然故曰後宫色盛则贤者隐微羣婢倡言则善类喑哑邦国殄瘁恒必繇之若二诗非万古永监哉】

旻【韩诗外传作昊】天疾威天笃降丧【阳韵】瘠我饥馑民卒流亡【阳韵】我居圉【韩诗外传作御】卒荒【阳韵 赋也旻郭璞云愍也虞书说云仁闵覆下则称旻天疾迅威怒也天以仁闵为德而今也反迅疾其威怒是可异也天笃降丧以下疾威之实笃通作竺说文云厚也厚降以死丧之祸下文饥馑是也瘠说文云病也我我国家也顔师古云谷不熟为饥菜不熟为馑卒郑云尽也当通作□义见云汉篇亡说文云逃也逃徙无定如水之流曰流亡也天病我国家以饥馑之灾故民之死丧甚衆而其仅存者又尽皆逃散之四方也居孔穎达云谓城中所居之处圉尔雅云垂也当通作圉说文云守之也拒守在外故为边垂左传聊以固吾圉是也季本云以国事为己事故曰我居圉也荒说文云芜也自国中至边境尽皆荒芜田野不治是时盖岁旱之极也邓元锡云蠹贼江胥谗也罪罟张胥虐也妇舌长胥聒也土田

人民胥夺也故怨戾之气干天和而饥馑卒荒周其亡矣季云此章言岁饥民散而无可愬则归祸于天而已】天降罪【丰氏本作臯】罍蠹贼内讧【东韵】昏椽靡共【叶东韵居雄翻丰本作恭】溃溃回遹实【丰本作寔】靖夷我邦【叶东韵悲工翻 赋也此章推天所以疾威之繇也罪罍蠹贼俱见瞻卬篇小人罗织善良使手足无措真罪罍也本繇王用之而曰天降是无所归咎之辞也吕祖谦云天降罪罍所谓天之降罔也蠹贼斥小人内斥褒姒讧说文云?也司马法曰师多则人?盖谓以言相惑乱也昏通作闇司昏晨以启闭者以墨者为之周礼天官闇人职云掌守王宫之中门之禁凡内人公器宾客无帅则几其出入以时启闭凡内外命夫命妇出入则为之辟椽郑云?毁阴者也周书吕刑篇云爰始淫为劓刵椽黥即此本作?说文云去阴之刑也孔云书传曰男女不以礼交者其刑宫丈夫则割其势女子闭于宫中按周礼内小臣寺人内竖奄人之属皆以宫刑者为之此诗所指当谓内小臣内竖也内小臣掌王后之命后出入则前驱后有好事于四方则使往有好令于卿大夫亦如之内竖掌内外之通令靡之言无音之转也共通作供说文云设也言此蠹贼之人内与褒姒夤缘交通以相惑乱而为闇寺者曾无有能供其职事为之禁断是以出入自如略无间阻也溃者水流四散之貌毛云溃溃乱也回说文云转也遹说文云避也回转而避于正道言去正就邪也靖安也俾予靖之靖夷平也乱生不夷之夷承上言蠹贼通内之後肆无顾忌溃溃然敢乱为邪僻之行而王乃实使之治国以望其转危为安转陂为平其将能乎言所使非其人犹大学所谓小人之使为国家也】

臯臯訛訛曾不知其玷【叶琰韵多忝翻丰本作?】兢兢业业孔填不宁我位孔贬【琰韵 赋也此章叹用舍倒置也皋引声之缓者故有缓之义左传鲁人之皋是也訛与啮同意斥人不肯用力勤事徒腾口说而已解见小旻篇尔雅云臯臯刺素食也訛訛莫供职也毛云臯臯顽不知道也訛訛齷不供事也曾说文云词之舒也玷本作?说文云缺也小人在位所为如此其於政事之缺失者多矣而王曾不知其缺也兢兢战惧之意业业勤动之意形容忧时供职之心即末章召公之流所谓不尚有旧者也孔甚填塞也宁通作寔安也甚填塞以扰攘不安之事所谓王事一埤遗我也我代为兢兢业业者之自我也位所居之职位也贬说文云损也劳于趋事而不遑安宁如我辈者反不能安其位而甚遭贬黜其颠倒错乱如此十月之交篇云黽勉从事不敢告劳无罪无辜谗口瞽瞍正谓此也】如彼岁旱草【丰本作?韩诗外传作莫】不溃【韩诗外传作渍崔灵恩注丰本俱作遂】茂【叶纸韵姥?翻】如彼栖苴我相此邦无不溃止【纸韵丰本作且 赋也首章言天之疾威亦既甚矣而在位用事者素皆蠹贼者流方且视之漠然絶无恪供职业以挽回灾变之意则天下之民宁复有生理乎故复即首章之意而申言之以重致其叹悯之意如彼岁旱草不溃茂死丧多也草最易生之物何地无之岁旱至草亦枯槁而他物之死者多矣曹氏云溃训散又训乱草散乱则茂盛故岁旱无雨泽则草不溃茂如彼栖苴流亡衆也苴者蒯属可以作履其质轻微随风栖泊无有定处犹所云转蓬也王安石云民荡析离散故如彼栖草也相说文云省视也此邦即次章之我邦兼居圉而言也凡水之溃者其势横暴而四出故乱之甚者为溃乱公羊传云国乱曰溃邑乱曰叛郑云无不乱者言皆乱也季云溃止者不至于溃不止也愚按居圉卒荒犹曰天灾所为此邦无不溃止则人怒不可收拾矣】维昔之富不如时【支韵七言为句】维今之疚【陆德明本作?】不如兹

【支韵七言为句】彼疏斯稊胡不自替职兄【丰本作况後同】斯引【大全云叶韵未详

赋也富禄也既富方谷之富时之言是音之转也维昔之富不如时申前天降罪罟二章而言孔云维昔明王之所富者不如今之时昔时富贤人今时富谗佞也疾本作?说文云久病也兹之言此亦音转也维今之疾不如兹申上如彼岁旱一章而言徐云言今之疾亦不意其如此之甚如不图为乐之至于斯也之意曰彼曰斯就小人中强为分别之也斯之言此亦音转也疏通作粗郑云谓粝米也米之率粝十稗九凿八侍御七孔云其术在九章粟米之法彼云粟率五十粝米三十稗二十七凿二十四御二十一言粟五升为粝米三升以下则米渐细故数益少四种之米皆以三约之得此数也曰疏曰稗言其相去不远犹曰不相长弟也胡之言何亦音转也替尔雅云废也职说文云记微也尔雅云主也兄通作况说文云狂之貌辅广云谓忧乱而无情绪之意引本关弓之义尔雅云长也谓伸之使长也言今民疾之甚皆繇于朝廷所富不得其人试使比肩而品题之曰彼为粗此为稗其度量总无以大相越者胡不自行引退以避贤者路乎而使我记忆在心专主为此之故恹恹不知所为且至于思绪引之愈长而不能自释也钱天锡云小人日在君侧本自难退而诗人是为是言者盖絶望于王冀得收功于万不可知之中无聊之极也】池之竭矣不云自频【郑笺列女传俱作滨八言为一句观此句不用韵可见】泉之竭矣不云自中【东韵】溥斯害矣职兄【路史作况】斯弘【叶东韵胡公翻】不裁【路史作灾】我躬【东韵比也上章责小人此章刺王也维今之疾所以益甚于前者实繇于此蠱贼内讧相表里为奸利故王泽曰竭而王不知也孔云池者穿地引水家语曰池水之大鱼鼃生焉?苇长焉谁知其非泉也是池繇自外引水而为之竭通作渴说文云尽也频说文云水厓也郑云池水之溢繇外灌焉今池竭繇外无益者喻王犹池也政之乱繇外无贤臣益之泉者中生水则益深水不生则竭喻王犹泉也政之乱又繇内无贤妃益之两曰不云者言王不肯归咎于是也刘向列女传云赵昭仪之凶嬖与褒姒同行成帝之惑乱与周幽王同风诗曰池之竭矣不云自滨泉之竭矣不云自中成帝之时舅氏擅外赵氏专内其自竭极盖亦池泉之势也溥说文云大也郑云犹徧也孔云王内无贤后外无贤臣溥徧有此内外无贤之害矣弘通作宏说文云屋深响也屋广大则响故有大之义职兄斯弘谓我之恹恹益甚也引言其忧之长弘言其忧之大盖为宗社虑非为身家危也故继之曰此害之溥不独裁祸及于我身而已将无不被其毒者矣】昔先王受命【句】有如召【音邵】公曰辟【音辟】国百里【纸韵九言为句】今也日蹙国百里【七言为句】於乎哀哉【句】维今之人不尚有旧【八言为句叶纸韵暨凡翻 赋也此章欲王用贤以救乱也郑云先王受命谓文王武王时也召公召康公爽也辟通作辟说文云开也蹙毛云促也说文云迫也曰辟曰蹙皆以国势言借百里以形容之耳按召公受采邑于召在文王时分陕西为伯在武王时周召分理此诗独思召公者苏辙谓文王之治周也所以为其国者属之周公所以交于诸侯者属之召公周公治内召公治外故周人之诗谓之周南诸侯之诗谓之召南是也文王之化自北而南三分天下有其二渐至武王因之以有天下召公助流政教与有力焉然则曰辟国百里之言非无据矣朱子云今谓幽王之时蹙国盖大戎内侵诸侯外叛也孔云於蹙国之上不言无贤臣者以不尚有旧事见於下故空其名以下句互而知之於鸟名乎通作呼叹息之声如鸟鸟之吁呼也不尚有旧者谓老成人犹在也第三章言兢兢业业即其人耳朱子云又叹息哀痛而言今世虽乱岂不犹有旧德可用之人哉言有之而不用耳陈栎云此诗及瞻卬篇末皆有拳拳望治之意前诗望其改过而无忝皇祖此诗望其改图而擢用旧人审如是则否犹可泰危犹可安也岂至有犬戎祸哉陈传良云周南系于周公召南系于召公岂非化之盛者必有待乎二公也至於风之终系以邠雅之终系以召旻岂非化之衰者必有思乎二

公也又陈际泰云宣王之兴也有召虎之命矣幽王之乱也有召公之思矣与召公劳之之语若出一揆何也召公之後世有庸於周焉而周公之後易世其衰矣一也召公居外以分陕甘棠志之矣而周公居中以运其功在辅精微也未易见焉二也】召旻七章章五句【旧皆作四章章五句三章章七句自第五章而下每章俱作七句今改正 序云凡伯刺幽王大坏也旻闵也闵天下无如召公之臣也朱子谓旻闵以下不成文理苏氏亦诋其衍说是矣申培说则云幽王还刑人近顽童谄巧用谗慝诸侯携贰戎狄内侵饥馑因之国人流散尹伯奇谏王而作是诗盖掇取篇中近似之语堆积成文赘累特甚尤无义理其妄驾之于尹伯奇辨已见瞻印篇子贡传阙文】

小旻大夫刺幽王也【出序】以王弃高明昭显而好谗慝暗昧去和而取同故作是诗【朱子云大夫以王惑于邪谋不能断以从善而作此诗邹忠胤云小旻作于幽王之世与召旻相表里彼云溃溃回遹靖夷我邦此谋犹回遹所自来也国语史伯策周之必弊谓其弃和而与剽同犹之声一无听色一无文味一无果物一不讲此正所谓舍臧而用不臧者愚按据此则此诗疑亦凡伯所作】

旻【列女传作昊】天疾威敷于下土【麌韵】谋【丰本作谟後同】犹【石经崔灵恩注丰本俱作猷下同】回遹【韩诗作猷石经作沈文选注作宥】何日斯沮【叶麌韵读如组总古翻】谋臧不从【冬韵】不臧覆用【叶冬韵丑封翻】我视谋犹亦孔之邛【冬韵赋也旻天疾威与雨无正篇意同敷说文云施也对上天称下土严粲云旻天以仁悯为称今乃迅烈威虐】

【敷布于下土使徧受其害言灾祸荐臻也是皆人事有以召之幽王宜恐惧而改图矣徐铉云虑一事画一计为谋今按谋字右旁施某不徒定声亦自有义说文云某者未定之位宅也凡不知名者皆言某犹枚数之云虑某事画某计云尔徐解是也犹解见采芑篇犹本兽名性多疑虑故以为熟思覆酌之意谋主臣言犹主王言各有所属观篇中本文可见回说文云转也古字作回口中象回转形遹说文云回避也回遹者回转而避于正道言去正就邪也沮通作阻人行险所限隔则不能进前故其义又训为遏止也此言下之谋上之猷皆相寻于回遹莫知其何日能遏止也臧善覆反也谋之善即第四章所谓先民是程可以福国庇民者而王则不从谋之不善即所谓浅末之迹言必至于有咎败者而王反用之孔甚也邛赵颐光云当通作穷穷之为言困也故尔雅以为病广雅以为劳也我观今日君臣之谋犹其回遹而何日斯沮则可谓甚劳其臧者不从而不臧者覆用则可谓甚病二义皆有也】滃滃【尔雅说文俱作翕翕汉书丰本俱作歛歛荀子作噏噏】訛訛【叶支韵将支翻说文作訾訾荀子作訾訾】亦孔之哀【灰韵亦叶支韵鱼羈翻】谋【丰本作谟下同】之其臧则具是违【叶灰韵胡隈翻亦叶支韵於宜翻】谋之不臧则具是依【叶支韵鱼羈翻】我视【曹本作眎】谋犹【丰本作猷】伊于胡底【叶支韵蒸夷翻 赋也朱善云上章指王而言此章指小人而言尔雅云翕翕訛訛莫供职也郭璞注云贤者陵替奸党炽背公恤私旷职事按滃之为义水流疾声也重言滃滃者孔颖达以为状小人作威福之势即尔雅注所云奸党炽也訛说文作訾与訾訾二字形音相类而义各别訛不思称意也徐锴云言不思称事之意訾讎也訾苛也今以字义求之则訛正与訾同意盖訛从言訾从叩斥人不肯用力勤事徒腾口说而已故

训詖为不思称乎事而训詖为惰窳观召旻篇以臯臯詖詖与兢兢业业对言其旨可见毛传解詖詖亦云窳不共事也与尔雅说文合当从之若如刘向引此谓衆小在位而从邪议歛歛相是而背君子则滫通作歛缩气出声也詖通作些乃苛细之义即朱传所云相诋也亦通郑云臣不事君乱之阶也甚可哀也具通作俱偕也言谋之善者则羣小皆讥议而必欲背违之其不善者则皆附和而必欲依就之先立一从违之帜以簧鼓于君侧王之不从覆用全根于此荀子云小人致乱而恶人之非己也致不肖而欲人之贤己也心如虎狼行如禽兽而又怨人之贼已也谄谀者亲谏诤者疏修正为笑至忠为贼虽欲无灭亡得乎哉诗曰滫滫詖詖亦孔之哀谋之其臧则具是违谋之不臧则具是依此之谓也底砥同字磨石也我观今日谋猷错出刺谬若是谁能磨治之使归于正乎】我龟既厌不我告犹【叶宥韵余收翻丰本作猷】谋夫孔多是用不集【叶宥韵疾救翻韩诗崔注丰本俱作就】发言盈庭谁敢执其咎【有韵亦叶宥韵巨又翻】如匪行迈谋是用不得【丰本作集】于道【有韵亦叶宥韵徒侯翻 赋也具违具依彼滫詖之徒何足责而不从覆用王之自为犹亦已疎矣故三四两章专以犹言意重责重也夫必有预定之人谋而後有协从之神谋故虞书曰官占惟先蔽志昆命于元龟洪范曰谋及乃心谋及卿士谋及庶人谋及卜筮绵之诗亦曰爰始爰谋爰契我龟今王曾无定见既听荧于不臧之谋矣虽乞灵于卜何益此龟所以厌之而不复告其所图之吉凶也礼记子引此诗曰南人有言曰人而无恒不可以作卜筮古之遗言与龟筮犹不能知也而况于人乎谋夫孔多言既与臧者谋之而复使不臧者乱之是非相夺莫适所从我龟既厌正繇于此不集者谓龟之神灵不来集也即不我告犹之意发言犹云出言自堂下至门谓之庭执持咎愆也谋臧具违不臧具依一唱衆和闐然盈庭其势之炽盛如此谁敢与之敌而持其愆咎者哉迈说文云远行也严云如人欲行路必问于曾行之人非行迈之人而与之谋问其所不知宜其无得于道路之事也如沈庆之言耕当问奴织当访婢也左襄八年楚子囊伐郑子驪子国子耳欲从楚子孔子侨子展欲待晋子驪曰周诗有之曰俟何之清人壽几何兆云询多职竞作罗谋之多族民之多违事滋无成诗云谋夫孔多是用不集发言盈庭谁敢执其咎如匪行迈谋是用不得于道请从楚駢也受其咎乃及楚乎】哀哉为犹【丰本作猷下同】匪先民是程【叶阳韵仲良翻】匪大犹是经【叶阳韵居良翻】维迓言是听【叶阳韵他阳翻】维迓言是争【叶阳韵诸良翻】如彼筑室于道谋是用不溃于成【叶阳韵辰羊翻 赋也滫詖固可哀而不意王之遂听之也则其为犹亦可哀矣言祸必中之国也国语云古曰在昔昔曰先民孔云民者人之大名其实是贤圣者也今按书相古先民有夏称亦同此程品也按说文十髮为程十程为分十分为寸盖度量繇此而起故取以为品式之名荀子所谓程者物之準也大犹谓谋虑之大者经说文云织也今织作家东西其纬曰经大犹是经言取大是非大利害所在图回于心亦如织经之往来也诚欲经大谋必先取程先民矣迓言浅末之言无关宗社生灵之计者正与大犹相反桓寬云此诗人刺不通于王道而善为权利者听受争竞也听在上争在下言上之人固惟迓言是听而下之人见上之听迓言也亦随有起而以迓言争迓言者盖始合终离自相犄角小人情态往往如此邹云向犹有臧否之两端至此则能为臧者咸思卷舌退矣向犹有从违之两见至此则具是依者又相与攘臂起矣纖计小谈不胜异指兆云询多职竞作罗听者听所不必听争者争所不必争国是其何定之有溃决成就也譬如筑室者不谋之于工师而维于行道之人是谋彼原不知作室为何事其能决断此谋而有所成就也哉行道之谋正譬迓言东汉曹褒请着汉礼班固以为宜广集诸儒共议得失章帝曰谚言作舍道边三年不成会礼之家名为聚讼互生疑异笔不得下昔尧作大

章一夔足矣意亦同此】国虽靡止【纸韵】或圣或否【叶纸韵补美翻】民虽靡盬【鱼韵亦叶灰韵莫杯翻又叶麋韵罔甫翻韩诗作腓外传作怵】或哲【汉书作哲】或谋【叶虞韵蒙晡翻亦叶灰韵蒲杯翻又叶麋韵满补翻】或肃或艾【泰韵亦叶队韵疑刈翻丰本作义】如彼泉流【朱传读诗记诗大全丰本俱作流泉误】无沦胥以败【叶泰韵乌外翻亦叶队韵蒲昧翻丰本作? 赋也国以国事言止定也圣通明也否不通也民以伦品言臚腊之无骨者故以为腴美之称周原臚臚是也哲知肃敬也艾通作义治也洪范五事之畴云貌曰恭言曰从视曰明听曰聪思曰睿恭作肃从作义明作哲聪作谋睿作圣按视明则知见彻故哲听聪则多闻善断故谋貌恭则气象严整警顽起懦故肃言从则令行人顺故义通微之谓睿思能通微则无所不通故圣刘公瑾云洪范五事次序与此诗不同者彼以人事发见先后为序此则便文以叶韵耳言国事纷纭虽未有定止矣然或有圣焉其人者正可就之以决谟议即思虑不通之人容或有之岂可薄待天下谓尽皆否而无圣哉二或字要看得圆融圣足以该下四德故特提言之民之才识丰美者诚不多见然哲谋肃艾之四德或各有其一焉亦可取材而用也召旻之诗云维今之人不尚有旧亦此意凌蒙初云言民字正见野有遗贤不在谋夫之列者如彼泉流以此言路欲其疏通不欲其底滞也国语云为川者决之使导为民者宣之使言引类不同其指一耳无通作母属望而警戒之欲使其无至此极也沦水流转貌谋臧不臧无所分别正如泉流之清沦而至于溷浊也胥皆败毁也犹言贤人与国与民同尽也苏辙云虽世乱民辟犹有贤者在焉苟能用之愚者可赖以皆济也苟废而不用而使愚者壅之于上则相与皆败无能为矣譬如泉水苟疏而流之则淤腐者从之而行苟不疏其源而瀦蓄之虽其流者亦相与?溺腐败而已矣】不敢【盐铁论作可】暴虎不敢冯【盐铁论作凭】河【歌韵】人知其一莫知其他【歌韵荀子作佗】战战兢兢【蒸韵左传兢兢作矜矜】如临深渊【丰本作?】如履薄冰【蒸韵丰本作义 赋也暴虎解见大叔于田篇冯通作溥说文云舟渡河也孔云空涉水凌波而渡也一他泛指而对举之辞衆人之虑不能及远暴虎冯河之患近而易见皆知畏之若夫无形之祸远在岁月则恬然不以为忧此所谓人知其一莫知其他者也吕氏春秋云此言不知隣类也战者危事恐惧之至如临大敌故重言战战也兢之犹言竞也竞者强也重言兢兢努力自强之意如临二句又就其战兢处而形容之渊言深水言薄危之至也如临恐其坠如履恐其?慎谋若此自不至舍其臧者而从其不臧者矣邓元锡云君子之战兢也皆以其戒暴虎冯河之心将之谋与有无远乎是笃敬之谋也昔夫子之行三军也曰暴虎冯河死而无悔者吾不与也必也临事而惧好谋而成者也此圣者谋也左僖二十二年伐邾取须句邾人以须句故出师公卑邾不设备而御之臧文仲曰国无小不可易也无备虽衆不可恃也诗曰战战兢兢如临深渊如履薄冰又曰敬之敬之天惟显思命不易哉先王之明德犹无不难也无不惧也况我小国乎弗听及邾师战于升陞我师败绩又荀子引此诗云人不肖而不敬则是狎虎也狎虎则危灾及其身左昭元年会于虢楚公子围设服离卫晋乐王鲋曰小旻之卒章善矣吾从之杜注谓卒章义取非惟暴虎冯河之可畏也不敬小人亦危殆王鲋从斯义故不敢讥议公子围今按毛传意亦同此然实非诗意又宣十六年晋士会将中军且为大傅于是晋国之盗逃奔于秦羊舌职曰吾闻之禹称善人不善人违此之谓也夫诗曰战战兢兢如临深渊如履薄冰善人在上也善人在上则国无幸民谚曰民之多幸国之不幸也是无善人之谓也如此说诗其去诗旨尤远矣】

小旻六章三章章八句三章章七句【郑谓所刺列于十月之交雨无正为小故曰小旻其义

难通苏云小旻小宛小弁小明四诗皆以小名篇所以别其为小雅也其在小雅者谓之小故其在大雅者谓之召旻大明独宛弁阙焉意者孔子删之矣虽弃其大而其小者犹谓之小盖即用其旧也朱传录之而郝敬则谓凡篇目皆作者自命或太史记之太师目之未有二雅先有篇目如前说是先有小雅而後以此诗从之非也且小雅诗多矣何独别此四篇若然大东名小东正宜反以大名何也至谓大宛大弁夫子删之然则颂有小毖又焉得有大毖乎皆猜说也冯时可则云此诗言朝廷诸臣琐尾齷齪谋犹反覆君子无所容其身而局天蹐地故以小旻名篇亦是一说子贡传阙申培说袭朱传益表其为伪书耳】

诗经世本古义卷十八之上

卷十八之下

<经部,诗类,诗经世本古义>

钦定四库全书

诗经世本古义卷十八之下

明 何楷 撰

周幽王之世诗

青蝇大夫刺幽王也【出序】愚意为太子宜臼遭谗而作【按小弁之诗曰君子信谗如或譖之巧言之诗曰乱之又主君子信谗即此诗首章所言信谗国语史伯曰夫虢石父谗谄巧从之人也而立以为卿士与剽同也周法不昭而妇言是行用谗慝也即此诗二三章所谓谗人也焦氏易林亦云青蝇集蕃君信谗言害贤伤忠患生妇人又云马蹄蹶车妇恶破家青蝇污白恭子离居义亦同此汉戾太子之乱壶关三老令狐茂上书曰臣闻父者犹天母者犹地子犹万物也故天平地安阴阳和调物乃茂盛父慈母爱室家之中子乃孝顺阴阳不和则万物天伤父子不和则室家丧亡故父不父则子不子君不君则臣不臣虽有粟吾得而食诸昔者虞舜孝之至也而不中于瞽瞍孝已被谤伯奇放流骨肉至亲父子相疑何者积毁之所生也繇是观之子无不孝而父有不察今皇太子为汉适嗣承万世之业体祖宗之重亲则皇帝之宗子也江充布衣之人间阎之隶臣也陛下显而用之銜至尊之命以迫釐皇太子造饰奸诈羣邪錫谰是以亲戚之路鬲塞而不通太子进则不得上见退则困于乱臣独冤结而亡告不忍忿忿之心起而杀充恐惧逋逃子盗父兵以救难自免耳臣窃以为无邪心诗曰营营青蝇止于藩恺悌君子无信谗言谗言罔极交乱四国陛下不省察深过太子发盛怒举大兵而求之智者不敢言辨士不敢说臣窃痛之诗云取彼谗人投畀豺虎唯陛下寛心慰意少察所亲无令太子久亡书奏天子感寤按茂奏引此诗事相类而指正合故备録之云】

营营【说文丰氏本俱作營營云小声也後同】青蝇止【汉书作至】于樊【元韵说文丰本俱作櫨史记作蕃汉书作藩易林作蕃】岂【左传汉书作恺】弟【左传汉书作悌】君子无【汉书作毋】信谗言【元韵汉书引此章下即接以谗言罔极交乱四国兴也营说文云匝居也连言营营者象其回旋飞绕之状程子云谗人之情常欲污白以为黑而其言不可以直达故必营营往来也青蝇与苍蝇异种段成式云苍蝇声雄壮青蝇声清聒其声皆在翼又云青蝇粪尤能败物虽玉犹不免陆佃云苍蝇善乱声青蝇善乱色故诗以青蝇刺谗青蝇首赤如火背若负金怀蛆索利喜暖而恶寒汉书昌邑王梦青蝇之矢积粟阶东可五六石以屋版瓦覆发视之青蝇矢也以问郎中令龚遂遂曰陛下之诗不云乎营营青蝇至于藩恺悌君子毋信谗言陛下左侧谗人衆多如是青蝇恶矣宜进先帝大臣子孙亲近以为左右顔师古云恶即矢也按青蝇之恶只在于矢止则布秒飞则不能也或以青蝇止于樊兴谗言止于智者非是樊当从说文作櫨从木中枝交也其义为藩即今之篱屏也严粲云青蝇集于在外

之藩篱若不必恶之也然其营营往来将入宫室污几席不但止樊而已也喻谗人为乱渐致迫近当防其微也王充云谗言伤善青蝇污白同一祸败诗以为兴岂通作悵康也弟通作悌顺也郑玄云岂弟乐易也陈鸟飞云谗言多繇持心倾险而後入故君子当持心乐易不听谗言也一说岂弟乃优容不断之意犹齐子岂弟之称微讽之辞也谗言之所以得入实繇于此苟遇英断之主自畏而远去矣亦通刘昼云谗邪之蔽善人也犹朝日洞明雾甚则不见天沙石至淨流浊则不见地虽有明淨之质而不发明者水雾蔽之也左襄十四年曾于向范宣子将执戎子驹支驹支对曰今官之师旅无乃实有所阙以携诸侯而罪我诸戎我诸戎饮食衣服不与华同贄币不通言语不达何恶之能为不与于会亦无膏焉赋青蝇而退宣子辞焉使即事于会成悵悌也】营营青蝇止于棘【职韵】谗人【史记汉书论衡俱作言】罔极【职韵然以下章例之则此句非韵】交乱四国【职韵史记东方朔引此诗上章之後即继之曰谗言罔极交乱四国兴也宜曰之废也有褒姒以谗之于内有虢石父以谗之于外此章所兴青蝇指石父也石父为王卿士周王朝植九棘孤卿大夫位焉故言止于棘也又棘者刺人之物故以为谗人之况楚辞云藜棘树于中庭王逸注谓蒺藜棘刺之木满于中庭以言远仁贤近谗贼也谗人进谗言之人也罔极谓深险变幻无所底极人罔极则具言亦罔极矣交乱者交构以成乱四国四方之国也交乱四国如构王伐申之事以宜曰为申之自出故求之申其时吕缙西戎皆申与国因遂蠢然俱动是皆虢公之为也王充云人中诸毒一身死之中于口舌一国溃乱诗曰谗言罔极交乱四国四国犹乱况一人乎故君子不畏虎犹畏谗夫之口谗夫之口为毒大矣陆贾云谗夫似贤美言是信听之者惑观之者冥故苏秦尊于诸侯商鞅显于西秦世无贤智之君孰能别其形故尧放驩兜仲尼诛少正卯甘言之所嘉靡不为之倾惟尧知其然仲尼见其情故干圣王者诛遏贤君者刑遭凡王者贵触乱世者荣郑僇亡齐而归鲁齐有九合之名而鲁有乾时之耻夫据千乘之国而信谗佞之计未有不亡者也故诗云谗人罔极交乱四国衆邪合党以回人君邦危民亡不亦宜乎】

营营青蝇止于榛【真韵】谗人罔极构我二人【真韵兴也此章所兴青蝇指褒姒也以止于榛之语知之左传女挚榛栗枣修榛者妇人贄也又说者以榛可为贄为文事亦可为矢为武事今青蝇止焉为谗人害善之兴亦通构广韵云架也解见四月篇孔云构者构合两端令二人彼此相嫌交更惑乱也我者亲之之辞二人谓王与宜曰也王天下君也太子亦储君也故以我二人称之离间骨肉之事非外庭之臣所能辨浸灌滋润当以属之艳妻耳邓元锡云交乱四国造乱罔大也构我二人靡亲不离也皆罔极也罗愿云君子之于谗也初盖易之至于乱之又生而後君子信其谗此诗亦然故首章但云毋信谗言至其二章则已交乱在外之四国至其三章则虽同心如我二人者亦不能以相有其始轻之而不忌皆如此蝇矣高伯宗云君子之谗于小人亦可悲哉忠臣不得而卒宠于君孝子不得而终爱于父贞女不得而暴志于夫良士不得而全交于友是故晁错削国计安宗社可谓智矣朝衣东市惨何极焉然犹可诿曰深刻之贾祸也屈原定令修洁无私可谓忠矣汨罗之沈至今悲之然犹可诿曰婞直之招谤也子胥之功何负于吴而有鸱夷之浮乎则又诿曰君宠之不笃也楚之美人何疎于王而有剺鼻之祸乎则又诿曰嫔妇之愚自见欺也西伯之圣足自全矣而羑里之囚几不免焉则又诿曰主臣之疎人易问耳申生致胙分非疎矣而待烹之殃奚为而至则又诿曰父之不道人伦之变也伯奇掇蜂非不遇贤父矣而何至有伯劳之伤乎吁智如晁错忠如屈平功如子胥宠如美人圣如西伯戚如父子聪者如尹吉甫亦可保矣而皆不能免则不及此者当何如也甚矣谗之为祸而君子之不可不辨也嗟夫青蝇为崇一至于此中蒿之言可胜道哉

斯诚来世之永鉴矣】

青蝇三章章四句【朱子不着其世子贡传以为厉王信谗大夫忧之申培说亦云厉王之世谗言繁兴君子忧之而作邹忠胤云厉王之信谗虽无可考然观荡之诗曰流言以对桑柔之诗曰朋友以谮不胥以谷而国语载其用卫巫监谤道路以目夫恶直未有不好谀者故逸周书芮良夫解有云贤智箝口小人鼓舌厉之世如蝮如螳如沸如羹国步茂资乱况斯削有繇然矣今按是诗之属于幽厉虽皆可通然不若幽王信谗夺嫡之事为较然明着也而袁孝政注刘子则云魏武公信谗诗刺之曰营营青蝇止于藩岂弟君子无信谗言正不知其所自出国风有魏而世系无考今于此诗得一武公遗事奇矣然此故魏诗也何得入雅愚终不敢信以为然窃意毛传篇次此诗与宾之初筵相属彼为卫武公所作遂以此并系之武公而訾卫音为魏耳又此诗若指为周公之诗亦自肖似所谓谗言即指流言也所谓四国即指管蔡商奄也所谓二人则王及周公自谓犹之雒诰所云我二人共贞者也真德秀云自昔不惟狂暴之君信谗害政虽慈祥乐易之君一惟谗言是信亦能变移心志如成王疑周公是也成王岂非乐易之资哉始为管蔡流言所入几至猜阻赖天动威而後悔故曰岂弟君子无信谗言也谗人之情志在伤善无有穷已故家有谗则家乱国有谗则国乱管蔡流言而四国不靖乃其验也故曰谗人罔极交乱四国末章又指实事而言】

我行其野疑太子宜臼出奔申之作【晋语史苏曰周幽王伐有褒有褒人以褒姒女焉褒姒有宠生伯服于是乎与虢石甫比逐太子宜臼而立伯服太子出奔申申人憎人召西戎以伐周周于是乎亡竹书纪幽王五年王世子宜臼出奔申愚按宜臼以被逐而奔申其情可悯厥後骊山变作而偃然身居天位忘仇不讨则无以解于弑父与君之罪矣】

我行其野【子贡传丰氏本俱作埜後同】蔽芾其樗【鱼韵】昏姻【读诗记作因丰本作嫀後同】之故言就尔居【鱼韵】尔不我畜复我邦家【叶鱼韵读如居斤於翻 赋也此诗愚疑为宜臼所作我行其野身被放逐而无所依怙之辞也蔽芾解见甘棠篇樗解见七月篇昏通作婚尔雅云壻之父谓姻妇之父谓婚妇之父母壻之父母相谓为婚姻妇之党为婚兄弟壻之党为姻兄弟刘熙云曰婚者言壻亲迎用昏又恒以昏夜成礼也曰姻者姻因也女往因媒也幽王娶于申宜臼申后所出故云然畜毛云养也按淮南子云玄田为畜偶思而得其解当玄月之时田事已毕收获而藏之故畜有止义又有聚义所藏之谷可以为养故又有养义复反也邦家即己家也樗恶木尚可庇而息今以我父与舅家为婚姻之故特就尔国而托处马岂敢谓尔乃樗之不如乎有如尔不肯畜养我则惟有复反我之邦家以归死于君父之前耳情急而与之自诀之辞】我行其野言采其蓫【屋韵陆德明本作蓄】昏姻之故言就尔宿【屋韵】尔不我蓄【屋韵】言归斯【朱传读诗记丰本俱作思】复【屋韵 赋也蓫郑玄云牛薺也仲春时生尔雅以为藟郭璞云今江东呼^𦉰为牛薺者高尺余许方茎叶长如銳有穗穗间有华华紫缥色可淋以为饮图经云生下湿地春生苗高三四尺叶狭长颇似蒿苣而色深茎节间紫赤花青白成穗子三棱若茺蔚夏中即枯根似牛蒡而坚实陆玑云扬州人谓之羊蹄似芦服而茎赤可瀹为茹滑而美也多啖令人下气幽州人谓之蓫按说文无蓫字蓫亦作蓄谷风篇云我有旨蓄亦以御冬陶隐居谓即此菜也戴侗云今羊蹄菜谓之秃唐即此物也秃蓫蓄一声之转一名束方宿一名连虫一名鬼目又原始云蓫即马尾草也亦可

作蔬尔雅蓴蕸马尾广雅云马尾蕸陆本草云今关西呼为蕸江东为当陆一名蕸根一名夜呼一名白昌据此则蓴有两解未详孰是宿止也暂托宿而已若君父悔悟则归期不远非必遂为久居之计也夫旨蓄尚可以御冬昏姻缓急所赖独不可以托宿乎尔若不然则当回首言归而复我之邦家更不再计矣】我行其野言采其蓴【叶职韵笔力翻】不思【白虎通作惟】旧姻【白虎通作因】求尔【俗本朱传作我误】新【丰本作亲】特【职韵】成【论语作诚】不以富【叶寘韵香义翻亦叶职韵笔力翻】亦祗以异【寘韵亦叶职韵逸职翻 赋也蓴尔雅说文皆以为?也广雅谓之鸟□郭云大叶白华根如指正白可啖陆玑云河内谓之蓴幽州人谓之燕?其根正白可着热灰中温噉之饥荒之岁可蒸以御饥汉祭甘泉可用之原始云俗名老鸦蒜昔生于燕地今随处有之郑云亦仲春时生风土记云蓴蔓生被树而升实状如牛角一枝数枚味甜如蜜戴云按此其蓴即木通本草云木通蔓大者径三寸每节有三二枝实如小木瓜长三四寸核黑穰白陈士良云实名桴椌子陶弘景云近道绕树藤生汁白茎有细孔两头皆通含一头吹之气出彼头者良主通利九窍出音声去脾胃中寒热盖通可去塞故其治如是也但未有嚼其根者又尔雅云蓴蓴茅邢昺云华白者即名蓴华赤者别名蔓茅陆玑言其草两种赤者有臭气也蓴犹有治疾御饥之用昏姻之相与固望其穷则相收困则相恤也曾蓴之不如乎旧姻宜曰自谓也特之为言独也申国新强足以自立所谓新特也言我之所以就尔者岂其不思我父为尔之旧姻徒以尔国新能自立之故而求尔乎此二句反辞也下文诚不以富二句乃是正意成通作诚富谓有国之富土地广甲兵衆是也异谓甥舅情谊异于他人也我之求尔实不因尔国强大之故亦但谓尔如念旧姻之谊则休戚相关必有大异于他人者庶几其相收恤耳论语云齐景公有马千驷死之日民无得而称焉伯夷叔齐饿于首阳之下民到于今称之诚不以富亦只以异其斯之谓与引诗之意言民之称誉人诚不以其人之富而但以其人之异虽命意不同然恍惚可得富异之解按礼记檀弓篇云晋献公将杀其世子申生公子重耳谓之曰子盖言子之志于公乎世子曰不可君安骊姬是我伤公之心也曰然则盖行乎世子曰不可君谓我欲弑君也天下岂有无父之国乎吾何行如之使人辞于狐突曰申生有罪不敢爱其死再拜稽首乃卒是以为恭世子也晋语亦云人谓申生曰非子之罪何不去乎申生曰不可去而释罪必归于君是恶君也章父之恶而笑诸侯吾谁乡而入内困于父母外困于诸侯是重困也弃君去罪是逃死也吾闻之仁不恶君知不重困勇不逃死若罪不释去而必重去而罪重不知逃死而恶君不仁有罪不死无勇去而厚恶恶不可重死不可避吾将伏以俟命乃雉经于新城之庙是以諡为共君先儒有谓申生自经而死陷父不义不得为孝但得諡恭而已然则宜曰之被逐奔申尚有合于大杖则走之义未有甚失圣人亦怜其所遭之不幸而録之与】

我行其野三章章六句【子贡传云士就親戚而莫之恤赋我行其野朱子亦以为民适异国依其婚姻而不见收恤故作此诗语意固自近似而为士为氏孰能详之序则谓刺宣王也夫下有偷俗实上之人无以导之谓刺王是也独以为刺宣则无所据序诗者但见篇次当在宣王之世又篇中有复我邦家之文与黄鸟篇复我邦族相似因其彙作一处而遂槩目之为刺王耳毛郑则以为宣王之末男女失道以求外昏弃其旧姻而相怨审尔则所云就尔居就尔宿者亦可谓无志节之甚视谷风之妇相去不啻倍蓰而又何録焉若苏辙谓此诗乃甥舅之诸侯求入为王卿士而不获者之所作毋论其牵强难通且以尔呼王成何文理申培说阙】

小弁幽王太子之傅所作刺幽王也【出序】幽王娶于申生太子宜臼後得褒姒而惑之信其谗黜申后逐宜臼其傅憫其无罪故述太子之情而为之作是诗【出朱传】以冀王之一悟也【宜臼亦作宜咎孔穎達云以太子不可作诗刺父故自传意述而刺之按竹书幽王三年嬖褒姒五年太子宜臼出奔申此诗当是奔申时所作高子曰小弁小人之诗也孟子曰何以言之曰怨曰固哉高叟之为诗也有入于此越人关弓而射之则已谈笑而道之无他疏之也其兄关弓而射之则已垂涕泣而道之无他戚之也小弁之怨亲亲也亲亲仁也固矣夫高叟之为诗也曰凯风何以不怨曰凯风亲之过小者也小弁亲之过大者也亲之过大而不怨是愈疏也亲之过小而怨是不可矶也愈疏不孝也不可矶亦不孝也罗泌云小弁人子之怨其亲者也亲天也天可怨乎怨者亲爱之情也伊人子之于亲惟欲用其情耳于其亲不得而用其情能无怨乎虽然君子之为怨亦有道矣思而怨怨而不讐是故虞帝怨申生亦怨岂若匹夫匹妇自经于沟渎而人莫之知欤方幽王之愎也将放其太子宜臼而杀之夫为人子而将见杀此人情之至痛而无告者也苟于是而不怨则是陷父不义而致已于不终矣此小弁之所以不得不怨也兄弟之亲情同手足安则同安辱则偕辱邦分崩族离析于此犹得而相忘乎然则五观之怨亦涕泣乎关弓者也孔子曰诗可以怨此于诗所以取小弁于书所以取五子之歌也郝敬云窃疑平王与申侯杀父而弃祖宗累十世之业孟子许以亲亲之仁何也读毛传以为其傅所作然後其疑顿释】

弁彼鸛斯【支韵】归飞提提【叶支韵是移翻】民莫不谷我独于罹【支韵亦叶歌韵良何翻】何辜于天我罪伊何【歌韵】心之忧矣云如之何【同上 兴也弁通作拊拊手之义鸟之将飞而拊翼似之或通作般谓般旋也鸛雅鸟也亦名鸛鵒或作卑居说文云楚鸟也秦谓之雅或作鴉张揖云纯黑而反哺者谓之鸟小而腹下白不反哺者谓之雅鸟郭璞云雅鸟小而多羣江东呼为鸛鸟孙炎云捷为舍人以为壁屋又马融以为贾鸟严粲云鸛鸟不能反哺犹已之不能致养是为不孝自罪之辞也孔穎达云斯者语辞按尔雅禽经皆名此鸟为鸛斯扬雄法言亦云频频之党甚于鸛斯刘孝标作类苑于鸟部立鸛斯之目孙氏云诗人以斯为语助者多矣不然此篇又有柳斯鹿斯亦将并以为柳鹿名可乎归飞二字兴意在此鸟得所归而飞不若宜臼之被放逐而无所归也提之为言举也提提羣飞而高举之貌孔云此鸟性好羣聚故云提提陆佃云东都赋谓鸛鵒秋栖鸛鵒春鸣今衆鸟秋分皆羣集非特鸟也然至春分辄两两而翔不复羣矣里俗谓之分羣谷郑玄云养也按五谷所以养人故有养义于通作吁叹也于嗟麟兮之于罹说文云心忧也凡民为子无不得养其父者我独所遭不幸而日惟叹息忧愁之不置也辜罪也我之不得于亲疑天实使之我何所得罪于天而至是乎且不知我之所以得罪于亲者其故安在乎迟回自审以探被放之繇非谓自反果无缺也朱子云怨而慕也舜号泣于旻天曰父母之不我爱于我何哉盖如此矣心之忧矣终将何道以处此故曰云如之何乃无聊赖之极而思欲补救之辞朱子谓知其无可奈何而安之亦非也】
蹶蹶【尔雅作儻儻】周道【叶有韵他口翻】鞠【石经作鞫】为茂草【叶有韵此苟翻丰本作^𦰩】我心忧伤惄焉如捣【叶有韵当口翻韩诗丰本俱作疇陆本作^𦰩】假寐永叹维【论衡作惟汉书作唯】忧用老【叶有韵朗口翻】心之忧矣疢【陆本作疹】如疾首【有韵 兴也蹶说文云行平易也周道毛云周室之通道鞠通作^𦰩说文云穷也赵颐光云^𦰩为茂草石经误作鞫注疏内本并误用鞠非是茂说文云草丰盛也周道坦平人所共来往一旦穷塞化为榛莽之区以我天伦无故父子一朝隔絶何以异此惄舍人云恚而不得之思也解

见汝坟篇捣说文云手椎也颜师古云筑也孔云怒焉悲闷如有物之捣心也按此即易林所谓胸春也郑云不脱衣冠而寐曰假寐永叹长叹解见泉水篇维忧用老者严云身未老而以忧故老也谢枋得云事关心者梦中亦长吁故曰假寐永叹忧愁多者年少而髮白故曰维忧用老疾说文云热病也从病从火会意忧思不解心火上炎则头为之痛孟子所谓人之有德慧术知者恒存乎疾疾独孤臣孽子其操心也危其虑患也深是也辅广云忧非特能老人又能使人病头痛最叵忍疾如疾首则其病甚矣朱善云此章忧之一字凡三言之怒焉如捣忧之而至于痛也维忧用老忧之而至于衰也疾如疾首忧之而至于病也愚按上章怨已之不得于亲而思慕此则忧亲之终弃乎已而自伤也】维桑与梓【纸韵】必恭敬止【纸韵丰本作只】靡瞻匪父靡依匪母【叶纸韵母鄙翻】不属于毛不离于里【纸韵】天之生我我辰安在【叶纸韵才里翻丰本安在作曷以兴也此章痛已之遭放而不得近乎亲也孟子云五亩之宅树墙下以桑罗愿云梓为百木长室屋之间有此木则余材皆不复震其叶可以饲豕肥硕十倍古者见乔木必下而趋所以广孝桑者母之所事以供蚕缫梓者父之所植以伐琴瑟故见之而恭敬之心惕然生焉不必待于口泽手泽之所渐也又梓之为木有子之道昔者伯禽之于康叔见周公三见而三答遂见商子商子使观于南山之阳见乔木高而仰又使之观乎北山之阴见梓焉晋然实而俯商子曰乔者父之道也梓者子道也于是二子再见乎周公入门而趋登堂而跪周公拂其首劳而食之则以能子道焉耳襍五行书曰舍西种梓楸五令子孙顺孝盖亦此义陆佃云桑梓父之所植尚或敬之礼曰见君之几杖则起其类是乎刘公瑾云古者一夫受五亩宅二亩半在邑二亩半在田田围墙下植木此民居之制也盖托以起兴耳恭敬说文皆云肃也礼记疏云在貌为恭在心为敬又貌多心少为恭心多貌少为敬若通而言之则恭敬是一左传云恭敬父命士昏礼云敬恭宗父母之言孝经云恭敬安亲此并恭敬连言明是一也朱子云瞻者尊而仰之依者亲而倚之兴意言家庭之间有桑梓焉以其为父母所植一望见之如见父母尚且恭敬之念油然而生况父母之身人子之所怙恃所瞻者惟有一父他无足为我瞻所依者惟有一母他无足为我依而忍自睽离于膝下乎伤已既已为父所放又其母申后早已见黜不得瞻父依母也属说文云连也从尾蜀声徐锴云相连续若尾之在体故从尾毛者血之余离丽也里说文云衣内也此当主皮肤而言谓与衣之里相亲近者也今我被放逐无繇与父母相见则真若不连接于父母之毛不附丽于父母之里矣天下岂有无父无母之人乎无所归咎则推之于天曰我生所遇值之辰果安在哉岂适逢其凶而然耶何为使我至此极也按日月之会是谓辰即月建是也程良孺云我辰安在郑氏以为六物之吉凶王充论衡所谓覩命禄而知骨体即此法也况小运之法本许慎说文已字之训空亡之说原司马史记孤虚之术盖以五行甲子推人休咎其术已久矣】菀彼柳斯鸣蜩嘒嘒【霁韵】有漙者渊【丰本作 漙】萑【韩诗外传作萑说苑作莞】葍淠淠【霁韵外传作淠淠】譬【陆本丰本俱作辟】彼舟流不知所届【叶真韵居吏翻】心之忧矣不遑假寐【真韵兴也此章详已所以见放之故皆谗言为之菀茂也蜩诸蝉之总名其类不一若此诗所咏则尔雅所谓蝻马蜩者也亦名马蟬大如雀黑色鸣震岩谷亦名蜩范格物论云五月鸣亦名蚱蜢罗愿云本草蚱蜢生杨柳上诗曰菀彼柳斯鸣蜩嘒嘒是形大而黑所谓马蜩今夏中鸣者比衆蟬最大方言谓之蝻马又谓之螳广雅谓之螳□陆佃云邹阳柳赋以为蜩螗厉响蜘蛛吐丝盖蟬得美荫则其鸣声尤清厉蜩亦蟬之一种形大而黑昔人啖之礼有雀鷄蜩范是也按爵鷄蜩范皆人君燕食所加庶羞记所谓范则冠而蟬有綏者也嘒说文云小声也不一其声故曰嘒嘒漙说文云深也渊说文云回水也萑葍第二草名解见蒹葭

篇淠集韵云动也字从水如水之动诗其旗淠淠是也菀柳濯渊以兴朝廷鸣蜩嘒嘒以兴谗言之多萑苇淠淠以兴小人之衆如號石父番聚蹶橘之俦皆是也说苑东郭子惠问于子贡曰夫子之门何其襍也于贡曰夫隳括之旁多枉木良医之门多疾人砥砺之旁多顽钝夫子修道以俟天下来者不止是以襍也诗云菀彼柳斯鸣蜩嘒嘒有濯者渊莞苇淠淠言大者之旁无所不容屈说文云极也郭璞云有所限极徐云极即至也宜曰被放如不系之舟流于水中无所依泊不知其终所至也孔云于时太子奔申则是有所至矣言无所至者弃储君之重而逃窜舅家非太子所当至故也遑说文云急也不急急求假寐盖虽劳苦倦极欲假寐而有所不得视前言假寐永叹忧转深矣】鹿斯之奔维足伎伎【叶支韵翹移翻】雉之朝【丰本作鼃】雉尚求其雌【支韵】譬【丰本作辟】彼坏【尔雅疏说文俱作庑】木疾用无枝【支韵】心之忧矣宁莫之知【支韵 兴也说文云鹿解角兽羣萃善走孔云此鹿斯与鸞斯柳斯斯皆辞也伎通作跂说文云足多指也重言伎伎者以不一其鹿故见其足指之衆耳罗愿云鹿爱其类发于天性欲食皆鸣相召志不忌也陆佃云古伏羲之世丽皮为礼按说文集韵丽旅行也鹿之性见食急则旅行丽皮盖鹿皮也今宜曰出奔子然一身絶无与之偶者则鹿奔之不如矣雉解见兔爰篇雉说文云雄雌鸣也雷始动雉鸣而雉其颈蔡邕以为雷在地中雉性精刚故独知之应而鸣也罗云雉□以足相勾雉以颈相勾故雉□从句雉雉亦从句雉一作响夏小正云正月雉震响注云震晨之讹也爵乳子而集以春雉求雌而响以朝盖雉当春而雉桴粥时也雌说文云鸟母也郑云雉之鸣犹知求其雌今太子之放弃其妃匹不得与之去愚按雉雉在于春初蜩鸣在于夏半萑苇鶉鷃皆秋分时所有计太子自春初出奔至此已历三时矣故各即其所见以起兴坏木当依尔雅说文作痍木尔雅云痍木苻娄说文云肿旁出也陆德明云木瘤肿也郭璞云谓木病疔伛癭肿无枝条者殷大白云奔鹿也而留具羣雉雉也而求其雌放逐之人兄弟妻子不得近若无枝坏木也悲哉宁字有怪叹之意莫之知指王也此章述已被放出奔之苦以起下章苏严二家皆谓幽王黜后放子兀然如伤病之木内有蠹病而外无附枝亦通但奔鹿之拟既于幽王不伦即雉雉求雌岂所以比父母又王有褒姒为后伯服为子亦未可谓之无雌无枝也】相【去声】彼投兔尚或先【叶震韵苏晋翻】之行有死人尚或殣【震韵说文作殣】之君子秉心维其忍【軫韵】之心之忧矣涕既陨【軫韵】之【兴也此承上章宁莫之知而言相视也投兔朱子云投人之兔也导之使前进曰先之刘敞云兔为人所驱急更投人人哀其穷则及驱者未至而先存之兔虽可利以其可怜犹存之也何则诚不忍其心之穷急也今俗犹言飞鸟入怀勿杀杀之不祥此投兔之比行郑云道也殣通作殣说文云道中死人所覆也孔云殣者埋藏之名于道旁故曰路冢左传道殣相望是也兔乃异类行道之人于我无亲尚有怜而恤之者以惻隐之心人所皆有故也子归命于父何啻兔之投人出亡在外而无所归势亦必转乎沟壑耳曾是天性之亲而漠不动念何哉两言尚或意义甚活虽未必尽然而亦未必尽无词之婉也君子郑云斥幽王也後同秉执也忍对不忍看谓不怜恤于文心上施刃割絶之义也心之忧矣篇中凡五见至此则付之无可奈何矣涕解见泽陂篇自涪鼻液皆是陨说文云从高下也涕出无声见悲之极徐光启云此诗到此求哀乞怜之意不复可加图回感悟之方更无余术已是尽情语尽头路也】君子信谗如或醺【叶宥韵承咒翻】之君子不惠不舒究【宥韵】之伐木掎【叶歌韵居何翻】矣析【丰本作□】薪【丰本作新】杙【叶歌韵徒何翻陆德明本读诗记颖滨集传俱作地】矣舍彼有罪予【丰本作子】之佗【歌韵】矣【赋而比也承上章原王心之忍繇于信谗而为谗者又非一人此王之所以终不悟也醺通作酬说文云主人

进客也按主人进酒于客曰献客答主人曰酢主人既卒酢爵又酌自饮卒爵复进宾曰酬故谓之导饮犹今俗人劝酒也孔云酬有二等既酢而酬宾者宾奠之不举谓之奠酬至三酌之后乃举向者所奠之爵以行之于后交错相酬名曰旅酬谓众相酌也此喻得谗即受而行之故知是旅酬非奠酬也惠郑云爱也字从心从夷徐锴云为惠者心专也会意舒通作纾缓也苟亦无信苟亦无然所谓舒也究说文云穷也从穴从九亦究竟之意不舒究正根不惠来真德秀云父子天性之恩太子天下之本幽王一听褒姒之谗如受献酬之爵得则饮之曾不少拒夫谗者之言骤而听之则不能无惑徐而察之则可得其情幽王惟无爱子之心故一闻谗言不复纾缓以究其实而遽加放逐焉此太子所以不能自明也虽然褒姒亦岂能自为谗哉国语谓褒姒有宠于是乎与虢石父比而逐宜曰虢石父者谗谄面谀之人也幽王立之以为卿士聘后弃而内妾立庶孽宠而嫡长危皆石父实为之也卒使申侯衔忿以召戎幽王死褒姒虜宜曰虽立而东周迁矣谗人之害至于如此可不监哉摘说文云偏引也按左传云辟如捕鹿诸戎犄之注谓犄其足也释文云从后牵也析说文云破木也薪堯也解见汉广篇柅说文云落也郑云谓观其理也孔云柅者施也言观其裂而渐相施及也严云木附着于本根伐木者既以斧斤伐之又以绳索从其后牵拽之以倒其木使绝离其本根又薪本一木相联属析薪者既斧之又以手柅而离之使一木析而为二皆喻幽王父子天性本附着联属为一体而谗人横离绝之也舍通作舍释也彼有罪谓谗人也予通作余我也对彼而言佗说文云负荷也按史记匈奴奇畜有橐佗义正取此今俗讹作他非也彼谗人者离间人骨肉其罪大矣王舍置不问乃以彼所构之虚词将加罪于我者悉使我负何之也又予若如字解则予乃上下相推予之义佗当通作它言舍彼有罪之人不加穷治乃推予具罪于它人对彼言它盖自道也亦通】莫高匪山【叶先韵翰旃翻】莫浚匪泉【先韵】君子无易【去声】由言【元韵】耳属于垣【元韵】无【此用无字与谷风用母字异下同】逝我梁无发我笱【有韵】我躬不阅【左传作说】遑【左传作皇】恤我后【有韵比而赋也此章专写去后属望之意以结通章浚毛云深也山处高泉处深嫡庶之分似之使庶可夺嫡是山与泉易位也易轻易也任意而言曰繇言郑训繇为用谓王无轻用谗人之言亦通垣墙也王不可轻于其言恐左右小人窥伺意旨将有附属其耳于墙壁之间而窃听之者考竹书宜曰奔申在平王五年至八年始立褒姒之子为太子计奔申之时宜曰尚未见废国语史伯所谓王欲杀太子以成伯服必求之申是也故此诗云然犹惓惓虑王醉饱之昏或有溺爱轻许之语则羽翼伯服者愈多而媒孽宜曰者愈甚人皆集于菀谁肯集于枯势不至废立不止矣韩诗外传云孔子侍坐于季孙季孙之宰通曰君使人假马其与之乎孔子曰吾闻君取于臣谓之取不曰假季孙悟告宰通曰今以往君有取谓之取无曰假孔子曰正假马之言而君臣之义定矣论语曰必也正名乎诗曰君子无易繇言名正也吕祖谦云唐德宗将废太子而立舒王李泌谏之且曰愿陛下还宫勿露此意左右闻之将树功于舒王太子危矣此正君子无易繇言耳属于垣之意无逝我梁以下训俱见谷风篇疑古有此成语故二诗皆引用之言我今去后庶几勿使人往我之梁发我之笱以储位不可窃据神器不可黯干也虽然我身且不容谁肯恤我后者乎婉讽微规正是望王悔悟见容之意虽复金玦长辞铜龙永绝而思慕之怀不能自己故曰小弁之怨亲亲也亲亲仁也】

小弁八章章八句【汉书篇名作小卞赵岐孟子注云伯奇仁人而父虐之故作小弁之诗曰何辜于天亲亲而悲怨之词也中山胜亦如此说刘更生且以伯奇为王国子正谓继母欲立

其子伯封而譖之王王以信之王充论衡亦云伯奇放流首发早白故诗云惟忧用老子贡传申培说翕然同辞而以为吉甫之邻大夫所作按琴操云尹吉甫子伯奇事亲甚孝甫娶後妻欲害伯奇乃取蜂去尾而自着衣领上伯奇恐其螫也趋而掇衣後妻呼曰伯奇牵我衣甫闻之曰唉伯奇惧走之野履霜以足采椋花以食其邻大夫悯伯奇无罪为赋小弁以讽吉甫吉甫悟遂後妻而召伯奇伯奇至请父复後母吉甫从之後母感伯奇孝化而为慈诸家之说盖本于此但果如所云则不过关人家庭之事於义小矣且踟蹰周道鞠为茂草此岂伯奇之言哉又韩诗及曹植皆谓吉甫信後妻之谗杀孝子伯奇其弟伯封求而不得作黍离之诗则与琴操言吉甫感悟者更相矛盾总之皆委巷传讹之语要不足信】

蓼莪孝子思养也疑亦太子宜臼之傳所作因宜臼被废于外代为思亲之辞将使人讽诵以感悟幽王也【孔丛子载孔子曰于蓼莪见孝子之思养也愚按此诗与小弁同意何以知之以二诗词相脗合知之小弁曰靡瞻匪父靡依匪母此曰无父何怙无母何恃小弁曰不属于毛不离于里此曰父兮生我母兮鞠我拊我畜我长我育我顾我复我出入腹我小弁曰民莫不谷我独于罹此曰民莫不谷我独何害民莫不谷我独不卒殆若出一吻然者乃小弁慕而兼怨此诗慕多怨少其言更悲其情更切矣昔者魏文侯有子曰击次曰欣欣少而立以嗣封击中山三年莫往来其傅赵苍唐曰父忘子子不可忘父何不遣使乎击曰愿之而未有所使也苍唐曰臣请使击曰诺苍唐至文侯曰中山之君亦何好乎对曰好诗文侯曰於诗何好曰好黍离与晨风文侯曰黍离何哉对曰彼黍离离彼稷之苗行迈靡靡中心摇摇知我者谓我心忧不知我者谓我何求悠悠苍天此何人哉文侯曰怨乎曰非敢怨也时思也文侯曰晨风谓何封曰馱彼晨风鬱彼北林未见君子忧心钦钦如何如何忘我实多于是文侯大悦曰欲知其子视其母欲知其君视其所使中山君不贤恶能得贤遂废太子欣召中山君以为嗣今宜臼之傳其委曲调护不下于苍唐也苍唐能称诗以悟文侯此傳屡作诗终不能悟王则以其惑志于艳妻者甚耳又所以知此诗及小弁非太子自作者以太子立言仁孝如此不应他日有弑父戍申之事】

蓼蓼者莪匪莪伊蒿【豪韵】哀哀父母生我劬劳【豪韵 比也蓼草苍蒨貌解见蓼萧篇莪解见菁莪篇蓼蓼者莪言非一莪盖以?比天下之为人子者蒿尔雅云蒿也又云繁之丑秋为蒿以蒿虽专得蒿之名而繁之类如萧如莪在春时种名各异至秋老成通呼为蒿详味诗意此蒿正指繁之丑言非谓蒿也晏子云蒿草之高者也罗愿云古者言蒿以为非美物者凉秋九月枝干益高荒坛枉径芜秽不治故蒿者农恶之明堂月令违天时则藜莠蓬蒿并兴管仲戒桓公封禅亦称今凤凰麒麟不至嘉禾不生而蓬蒿藜莠茂鸱鸢羣翔而欲封禅无乃不可乎桓公为是而止然则蒿者盖非农祥也严粲云始生为莪长大为蒿以莪形蒿莪美而蒿恶莪始生香美可食至秋高大为蒿则麤恶不可食故菁莪以喻人材而蒿正为鹿食也其始为莪犹可食其後为蒿则无用喻父母生长我身至于长大乃是无用之恶子不能终养也此孝子自怨其身之辞也与凯风言棘非美材仅堪为薪之意正同哀徐铉云闵痛之形于声也于文口衣为哀衣哀声也哀哀二字声气略歇以父母连下句看重言之者尔雅云怀报德也报德则兼父母也生我不专指始生言如第四章所云皆所以生我者劬勤劳剧也其劳频数谓之劬劳父母生我何等劬劳今我之不才如此有负父母多矣晋王裒父仪为文帝所杀裒痛父非命未尝西向而坐示不臣朝廷也隐居教授庐于墓侧旦夕拜跪攀柏悲号涕泣着树树

为之枯及读诗至哀哀父母生我劬劳未尝不三复流涕门人受业者并废蓼莪之篇齐顾欢早孤读诗至哀哀父母辄执书痛泣繇是受学者废蓼莪篇不复讲焉二事大相类又孟元方诵诗至蓼莪篇必哀咽不已唐太宗生日谓羣臣曰吾今日生日世俗皆为乐在朕翻成伤感今君临天下富有四海而欲承颜膝下永不可得此子路有负米之恨也诗曰哀哀父母生我劬劳奈何更以劬劳之日为宴乐乎因泣数行下左右皆悲】

蓼蓼者莪匪莪伊蔚【叶寘韵读如萎於伪翻】哀哀父母生我劳瘁【寘韵英雄记作悴比也蔚尔雅云牡蒿也陆玕云牡蒿也三月始生七月华华似胡麻而紫赤八月为角角似小豆角锐而长一名马新蒿邢昺云蔚即蒿之雄无子者故云牡罗云匪莪伊蒿蒿犹有子者匪莪伊蔚蔚则无子盖今青蒿叶端皆作子如米大蔚独无尔以见父母得我之难也今皆无报矣则有我之不如无也且蔚又治无子亦寓其意焉本草谓之马先蒿愚按匪莪伊蒿蒿即莪所成穉为莪壮为蒿也比宜曰幼见立为太子亦以美材视之长以不材失爱故被废也匪莪伊蔚蔚与莪异类莪有子蔚无子人为莪我则蔚也比凡人有子望其嗣续若宜曰见遂于外父母不以为子一身子然此後永无嗣续之望虽有子犹之乎无子也瘁通作顙顙也劬劳而至于瘁劳苦见于貌也念生我之劳瘁而我不能以子报其哀奚如】 餅之罄【说文丰氏本俱作𩰫】矣维罍之耻【纸韵】鲜民之生不如死之久【叶纸韵苟起翻】矣无父何怙无母何恃【叶寘韵尝利翻】出则衔恤入则靡至【寘韵比而赋也餅说文云饔也或从瓦作瓶瓶有二义有以为酒器者礼记孔子曰夫奥者老妇之祭也盛于盆尊于瓶疏以为盛食于盆盛酒于瓶也有以为汲器者易井卦言羸其瓶扬雄酒赋言观瓶之居居井之眉是也罄说文云器中空也罍之用不一有盛酒者周礼鬯人社壝用大罍以盛鬯也司尊彝祠禴尝蒸皆有罍及诗卷耳酌彼金罍者盛酒也有盛水者仪礼罍水在洗东是也罍有大有小尔雅释盛酒器有彝卣罍三者孙炎以彝为上卣为中罍为下邢昺据毛诗说谓罍大一硕乃尊之大者今按尔雅又云小罍谓之坎则罍之小者别名坎其大者自名罍邢说是也旧说谓罍金饰龟目刻为云雷之象又取象云雷博施如人君下及诸臣故名为罍张萱解云大罍震也小罍坎也其说奇矣耻说文云辱也礼图云罍大一斛其所容甚多泻酒于瓶以供斟酌故瓶罄而罍耻也瓶小喻子罍大喻父母此餅罍皆当主酒器言餅之充实皆罍所注以比子之免于饥寒皆父母所恤今宜曰被逐在外无以为生谁独无子而使之至此为父母者宁不欲然于心此慕而兼怨之辞盖以骨肉至情动之庶几王之转念也然以耻贻父母则人子之罪益甚言外亦有痛自刻责意左昭二十四年郑伯如晋子大叔相见范献子献子曰若王室何对曰老夫其国家不能恤敢及王室抑人亦有言曰嫠不恤其纬而忧宗周之隕为将及焉今王室实蠢蠢焉吾小国惧矣然大国之忧也吾侪何知焉吾子其早图之诗曰餅之罄矣维罍之耻王室之不宁晋之耻也献子惧乃徵会于诸侯传引诗意以瓶自喻以罍喻晋谓宁王室乃晋之责意虽似而比类欠顺又严云餅以汲水罍以盛水餅汲水以注于罍犹子之养父母餅罄竭则罍无所资为罍之耻犹子穷困则贻亲之羞也亦通然与宜曰被废事不合故不从鲜通作𩰫说文云少也俗作𩰫非民庶民也宜曰居东宫之贵而其所遭乃凡氏之不若故每以民对言鲜民之生犹云无生人之乐民间父子膝下相欢虽在贫贱犹有生意也疾疾孤穷速死为幸曰不如死之久矣痛切之言也大戴礼孔子引逸诗曰鱼在在藻厥志在饵鲜民之生矣不如死之久矣言君好贪利兴师民困兵革鲜有生者则不如速死也怙义训恃恃义训赖无父何怙者言非父则子何所依怙非以父死为无父也下句放此时申后已被废倘幽王闻诗而悟则将复立申后召还宜曰父母与子皆可聚首如初故小弁及此诗皆以父母并言非以母

呼褒姒也出谓餬口四方衔马衔也行马所用含之口中以金为之故字从金从行与含同意恤忧也通论云于文心血为恤血恤声也血亦心之至也入则靡至所谓如穷人无所归也此皆放逐後之语孔颖达云出门则中心衔忧旋来入门则堂宇空旷不复覩见如行田野无所有至是其所以悲恨也唐鹤徵云抱苦在心郁郁不自得神魂不定愤愤靡所之衔恤靡至四字形容真切】父兮生我母兮鞠【屋韵】我拊【後汉书作抚】我畜【屋韵】我长【上声】我育【屋韵】我顾我复【屋韵】我出入腹【屋韵】我欲报之德【职韵】昊【汉书作皞】天罔极【职韵 赋也此章皆父母所以生我者正劬劳劳瘁之实也郑笺云父兮生我者本其气也鞠通作鞠说文云两手曰掬子幼而母时常置手中以玩弄之所谓爱惜如掌上之珠也拊说文云搯也史记淮南拊搯其民谓抚摩身体察其肥瘠忧其疥鲜也畜兼止与养二义既乳哺之又谨其出入察其起居藏之堂奥之中惟恐其有疾病所以善其养也长者谢云如南方之长养万物调和其身体滋养其血气日夜望其长大也育说文云养子使从善也从云肉声按云音突乃子字之倒体徐铉云云不顺子也不顺子亦教之况顺者乎谢云如易曰育德孟子曰教育英才涵养其德性发舒其志气开导其聪明日夜望其成人也顾说文云还视也尝目在之察其所行之是否也复者反覆之义丁宁反复谆谆然命之也出入主父母言腹郑云怀抱也自少至长倦倦置之于怀出入以之不暂释也掬拊畜三事次于生之後皆以养言育顾复三事次于长之後皆以教言出入腹我则总括教养而言养所以全其生教所以善其生皆本于父母爱子之心为之也连下数我字抚躬自念凄其欲絶韩诗外传引此诗云夫为人父者必怀慈仁之爱以畜养其子抚循饮食以全其身及其有识也必严居正言以先导之及其束发也授明师以成其技十九见志请宾冠之足以死其意血脉澄静婢内以定之信承亲授无有所疑冠子不言发子不答听其微谏无令忧之此为人父之道也旧说皆主幼时言则畜谓乳之育谓哺之其顾我复我出入腹我二语谢谓父母行而儿不随则回顾之儿行而父母不随则追唤之父母有所往将出门怀抱其子而不忍舍父母自外归既入门怀抱其子而未肯置严谓儿稍长行戏于地父母或去则回首以顾视之且顾之又顾反覆不能暂舍爱之之至也在家容其行戏或自内而出外或自外而入内未可令其自行则抱之于怀此曲尽父母爱子之情也二说虽微不同然其摹写逼真令人回想父母深思不觉潜然泣下故备録之礼记疏云谢其恩谓之报仪礼疏云感恩者皆称报郑云之犹是也按庄子言之人也之德也字法同此之德指上文生我以下六句言昊天孔安国云元气昊然广大也言欲报父母是德而其德广大如天无穷不知所以为报也唐孟郊有诗云谁言寸草心报得三春晖意本于此今我既见逐于外且不能自比于人子况言报乎痛当奈何也郝敬云君之恩捐躯足报以身为吾有也至于亲则身亦亲之有也虽捐躯莫报也而况身之外乎而况身之外且不能致之亲乎哀痛可胜道哉严云读此诗而不感动者非人子也又章潢云天之天德曰生故论德之罔极者必归诸天也以天德之大而欲报之难矣子之于亲虽莫不受其鞠育之恩若难乎与天并也然得天地之塞以成形而所以成其形者非亲乎得天地之帅以成性而性即秉于赋形之始所以成其性者非亲乎形性合而成人天亲原自合一以其生生者一也穷神善继其志知化善述其事践形惟肖果在天为肖子即为父母之孝子所以孔子谓能敬其身则能成其亲仁人之事亲也如事天事天如事亲是故孝子成身此之谓也】南山烈烈【丰本作剌剌】飘【陆德明本作票後同】风发发【叶曷韵北末翻】民莫不谷我独何害【叶曷韵何葛翻 兴而比也南山南面所向之山烈通作列分布之义峯峦相错故重言列列也此即所见起兴亦以比人之父父子子各有定位如山之峙高卑罗列也飘风回风也苟

子谓轻利僇速卒如飘风即此发如矢之发言其疾也非一发而已曰发发也此谗言之比又王吉云诗曰匪风发兮说者曰是非有道之风也发发者民莫不谷解同小弁伤害也民皆得养其父母我独为何人所伤害而不得共子职盖斥褒姒及虢石父辈也】南山律律【丰本作律律】飘风弗弗【叶月韵读如忽呼骨翻】民莫不谷我独不卒【月韵兴而比也律说文云均布也律律亦列列之意以比凡人父父子子无不各得其所者弗通作拂说文云过击也徐云击而过之也卒通作碎说文云大夫死曰碎我既被逐于外不得事亲而独不死何也深自恨之辞】

蓼莪【隶释汉碑作仪亦作?】六章四章章四句二章章八句【序云刺幽王也民人劳苦孝子不得终养尔後汉陈忠疏亦云孝经始于爱亲终于哀戚上自天子下至庶人尊卑贵贱其义二也夫父母于子同气异息一体而分三年乃免于怀抱先圣缘人情而着其节制服二十五个月是以春秋臣有大丧君三年不呼其门闵子虽要絰服事以赴公难退而致位以究私恩故称君使之非也臣行之礼也周室陵迟礼制不序蓼莪之人作诗自伤曰緦之罄矣维罍之耻言已不得终竟子道者亦上之耻也盖相传云尔愚独有疑者如序言氏人劳苦则不独孝子为然乃篇中云民莫不谷何说至不得终养之解相沿以为二亲病亡之时在役所不得见之也岂真偕亡耶天奚祸彼人之酷若是固哉其为诗矣子贡传阙文申培说则谓王室昏乱谗邪肆行其大夫士有役而不得其所者孝子痛伤而作是诗此特影响王褒之事而强为说以傅之尤鄙陋不根之甚】

十月之交大夫刺幽王也【出序】幽王之世褒姒用事于内皇父之徒乱政于外六年之冬日食阳月大夫恶之故作此诗【谷永云古之王者废五事之中失夫妇之纪妻妾得意谒行于内势行于外至覆倾国家惑乱阴阳昔褒姒用国宗周以丧閭妾骄扇日以不臧此其效也传曰皇之不极是谓不建时则有日月乱行诚修後宫之政明尊卑之序抑褒閭之乱息白华之怨後宫亲属饶之以财勿与政事以远皇父之类捐妻党之权未有闺门治而天下乱者也刘向云衆贤和于朝则万物和于野天应报于上此皆以和致和获天助也幽厉之际朝廷不和转相非怨君子独处守正不挠衆枉勉强以从王事则反见憎毒谗愬故其诗曰密勿从事不敢告劳无罪无韦谗口瞽瞍当是之时日月薄蚀而无光其诗曰朔日辛卯日有蚀之亦孔之丑天变见于上地变动于下水泉沸腾山谷易处其诗曰百川沸腾山冢卒崩高岸为谷深谷为陵自此之後天下大乱篡杀殃祸并作繇此观之和气致祥乖气致异祥多者其国安异衆者其国危天地之常经古今之通义也班固云悬象着明莫大乎日月是故圣人重之于易在丰之震曰丰其沛日中见昧折其右肱亡咎于诗十月之交则着卿士司徒下至趣马师氏咸非其材同于右肱之所折明小人乘君子阴侵阳之原也丁鸿云昔周室衰季皇甫之属专权于外党类强盛侵夺主執则日月薄食按竹书纪幽王元年锡皇父命二年泾渭雒竭岐山崩三年王嬖褒姒冬大震电四年夏六月陨霜五年王世子宜臼出奔申皇父作都于向六年冬十月辛卯朔日有食之其事与此诗及正月之诗合义愚疑此诗为赞御之臣所作说见雨无正篇小引下】

十月之交朔月【前汉书後汉书朱传读诗记苏子繇本大学衍义诗大全俱作日】辛卯【叶有韵莫後翻】日有食【汉书作蚀】之亦孔之丑【有韵】彼月而微【韵】此日而微

【同上】今此下民亦孔之哀【叶微韵於希翻 赋也十月苏子繇陈少南朱子严华谷皆谓夏正建亥之月也纬书竹书郑笺以为周正建酉之月元齐履谦云以授时历推之周幽王六年岁在乙丑距延佑丁巳二千九十二年是岁实以夏正八月辛卯朔入食限是周人改月数之一证邢云路亦云以元郭守敬授时法上推周幽王六年乙丑十月建酉朔辛卯日辰时日食梁太史令虞 唐僧一行亦步得是日日食今按虞 造梁大同历推此食在幽王六年而未明言此为八月一行定朔之法本乎傅仁均仁均造唐戊寅元历列其大要所可考验者七事其三曰周幽王六年十月辛卯朔日蚀与诗合亦未明言此十月乃夏之八月也愚以三议推之则建酉之说似未可信一者先儒谓诗有夏正无周正如七月之诗皆夏正也章潢云小雅出车章曰春日迟迟卉木萋萋仓庚喈喈采芣苢周颂臣工章曰维暮之春亦又何求如何新畲於皇来牟将受厥明使周果改时则春日暮春必夏之正月也正月安得有迟迟萋萋喈喈苢苢之景而来牟安得有将熟之徵乎至于四月维夏六月徂暑秋日凄凄百卉俱腓冬日烈烈飘风发发其朱改时与月也又不待训释而自明矣夫诗皆夏正而何独以此为周正乎一者食当八月则是秋分左昭二十一年秋七月壬午朔日有食之公问于梓慎曰是何物也祸福何为对曰二至二分日有食之不为灾日月之行也分同道也至相过也其他月则为灾于是叔辄哭日食昭子曰子叔将死矣非所哭也八月叔辄卒是则八月日食未足为灾乃孔颖达又引左昭七年四月甲辰朔日有食之周之四月乃夏正二月晋侯问于士文伯曰谁将当日食对曰鲁卫恶之卫大鲁小公曰何故对曰去卫地如鲁地于是有灾鲁实受之其大咎其卫君乎鲁将上卿其年八月卫侯恶卒十一月季孙宿卒以此为春分之月日食有灾之验按即如孔所駁分月之灾所应仅在侯国未至若此诗孔丑之云明其将有大变应在幽王骊山之事则以阳月之灾为古人所甚忌故也一者古历年之某岁某甲子其真否总未可知如尚书胤征篇季秋月朔辰弗集于房虞 以为元年僧一行以为五年以授时法步之在仲康六年丁丑岁九月辛巳朔日食其余前後十余年之九月朔俱不入时限据授时法步此诗日食既与 一行同何仲康之食差殊若此班固云周不班朔鲁历不正置闰不得其月月大小不得其度王应麟亦云黄帝颛顼夏殷周鲁六历皆无推日食法但有考课疎密而已尝考通监皇极经世秦始皇八年岁在壬戌吕氏春秋则云维秦八年岁在涒滩涒滩者申也历有二年之差後之?历者于夏之辰弗集房周之十月之交皆欲以术推之亦已疎矣据此三议皆足以破建酉之说故当从夏正解为长而孔氏又引王基云以历较之自共和以来当幽王世无周十月夏八月辛卯交会欲以此会为共和之前其说更疎谬无据今但即诗辞以求时事则其在幽王世明矣十月谓之阳月孔云日月之食本无常时惟正月之月君子忌之沈括云先儒以日食正阳之月止谓四月不然也正阳乃两事正谓四月阳谓十月岁月阳止是也诗有正月繁霜十月之交朔月辛卯日有食之二者此先王所恶也盖四月纯阳不欲为阴所侵十月纯阴不欲过而干阳也苏辙云四月纯阳故谓之正月十月纯阴故谓之阳月纯阳而食阳弱之甚也纯阴而食阴壮之甚也类占云十月日食乃六阴之极阴冒其阳君昏信谗阴谋作乱毛传云之交日月之交会孔云日月行相逮及交而会际故云交会朱子云谓晦朔之间也按会与交不同会但言其同度而已交则同度又当交道也会不必食会而交则食历家所谓交食是也故此诗特以交言古历纬及周髀皆云周天三百六十五度四分度之一每度九百四十分算四分度之一该二百三十五分计共行过三百六十五度二百三十五分日月皆右行于天日日行一度月日行十三度十九分度之七以每度九百四十分剖为十九分每分该四十九分四厘七毫三丝六忽八微四尘有奇于十九分中得其七计于十三度外又行过

三百四十六分三厘一毫五丝七忽八微九尘有奇盖天行至健每一昼夜绕地一周又过一度以其行过处一日作一度至三百六十五日四分日之一则适合其初起之度谓之期而周天之数遂为三百六十五度四分度之一凡星辰远近之相去月与五星之行皆以其度为度焉度之为言数也则也天本无度以与日离合而有度之名在天成度在历成日天体员故日东西行其周布本东西而纵横南北皆以其度为数月行疾于日日行积三百六十五日九百四十分日之二百三十五而与天会月行二十七日有奇而行天一周又二日追及于日计积二十九日九百四十分日之四百九十九而与日会方会则月光都尽而为晦已会则月光复苏而为朔一岁之会凡有十二次十有一月会于星纪之次十有二月会于玄枵正月会于娵二月会于降娄三月大梁四月实沈五月鹑首六月鹑火七月鹑尾八月壽星九月大火十月析火亦名十二辰也日月相去近一远三谓之上弦下弦日月相去百八十二度六十二分有奇分天之中谓之望日有中道月有九行中道者黄道亦曰光道光道北至东井去北极近为夏至南至牵牛去北极远为冬至东至角西至娄去极中为春秋分九行者黑道二出黄道北赤道二出黄道南白道二出黄道西青道二出黄道东立春春分月东从青道立秋秋分西从白道立冬冬至北从黑道立夏夏至南从赤道八行与中道而九是谓九道月不行中道但此八道皆斜出入于中道内外凡日行不可指而知也以二至二分之星为候至月行则以晦朔决之春分月上弦在东井望于角下弦在牵牛秋分月上弦在牵牛望于娄下弦在东井此于日如绳衡往来流通而相应也日行黄道阳路也月者阴精不繇阳路故或出其外或入其内出入去黄道不得过六度入十三日有奇而出亦十三日有奇而入凡二十七日有奇而一入一出矣又沈存中谓黄赤诸道第欲以别算位如算法用赤筹黑筹以别算位而已非真有黄赤等色也日月异道有时而交交则相犯交道有二朔文为交初圣交为交中历家为日月交会之术大率以百七十三日有奇为限朔而日月之会东西同道南北同度则月掩日而日为之食望而日月之对同度同道则日冲月而月为之食是之为交食如月或在日道表或在日道里则不食矣日之所以食者朱子谓日尝在上会时月在下面遮了日故日食刘保斋亦云日轮大月轮较小日道近天在外月道近人在内日食既时四面犹有光溢出可见月轮小不能尽掩日轮也日月合朔时月常在内未有日在内者故月食日也何孟春深然之谓日外月内者日火也月水也此日月之行所以有上下之异而刘孝荣则谓朔旦之日日月同宫如月在日上掩太阳而过则日光为所遮即朱子他日亦云日月会合处月合在日之下或反在上故蚀二者说皆可通而谓月在日下则理较可信也月之所以食者朱子谓火日外影其中实闇至明中有闇虚其虚至微望时月与之对无分毫相差为闇虚所射故食保斋亦云历家所谓闇虚言月为日所暗而非日之实体暗之乃日之虚冲耳如点灯者当正炉炭炎炽之尖所冲射则灯反不然卓尔康亦云日月异道有时而交道不正交则日斜照月故月光更盛道若正交则日冲当月故月光即灭譬如火斜照水日斜照镜则水镜之光旁照他物若使镜正当日水正当火则水镜之光不能有照日之夺月亦犹是也而孝荣则谓月受日为明望夜正与日对故一轮光满或月行有迟疾先後日光所不照处则为食张鼎思亦云月非以抗日而食也乃与日对时不全合耳一分不对则食一分数分不对则食数分须之复其当行之道而相对则复满矣二说皆可通而谓闇虚所射则理较可信也大抵月本无光沈括谓如银九日耀之乃光皇极外书亦言月本黑受日之光而白故魄掩日则日为之食当日闇虚日光不及照则为日所食以掩闇有表里浅深故食有南北多少又星家祖西天法以为交初者罗?所为亦名天首交中者计都所为亦名天尾自交初至交中月在黄道外名阳历乃背罗向计之处

自交中至交初月在黄道内名阴历乃背计向罗之处月道犹水道日道犹陆道而罗计犹桥道然隐暗不可见于是为入交法以求之其说殊无据若李日华述利玛窦之说谓日大于地地大于月地之最高处有阙日月行度适当阙处则光为映蔽而食其肤甚矣万尚烈云十月之交四字最有意义按历家日月之交也有限其交会之法日行黄道月不行黄道只行其余八道每行一道必随黄道而斜出其旁半在黄道之里半在黄道之表或高而出黄道之上或低而出黄道之下然其高低上下与黄道相去约计六度方其在表谓之入阳历方其在里谓之入阴历历者日之所历也入历之时正其入表里之际或相迫相偪或两道相合遂交而以其交媾而故谓之交故验日食者必以日纏月道之交验之月一岁十二次经天惟有两次与日会约计一百七十三日有奇而有一交日方有食此常度也故左传曰二至二分日有食之不可为灾此而曰十月之交非分非至失其常度正谓之灾愚以为四字最有意义者此也朔月谓十月之朔日即交之日也史绳祖云朔日也而乃谓朔月盖月朔之反辞也亦犹书之月正元日乃正月元日之比也又论语吉月注谓月朔也诗二月初吉注月朔谓之吉吉月亦犹朔月也按古历有平朔定朔二家三大三小为定朔朞一大一小为平朔朞平朔亦名经朔古者止用经朔故朔或在晦或在二日春秋日食三十五书朔者二十七其不书朔者八公羊传以为二日谷梁传以为晦日惟左传云不书朔者官失之也汉魏以后日食亦多在晦宋何承天始立新法谓月有迟疾前历合朔月食不在朔朞今当以盈缩定小余正朔朞之日隋刘孝孙亦推算春秋日食不书朔者俱在朔日乃议行定朔而为有司所抑不得行至唐傅仁均申孝孙旧议引比诗及胤征为证云书既言季秋月朔辰弗集于房又云先时者杀无赦不及时者杀无赦既有先後之差是知定朔矣梁虞亦云所谓朔在会合苟躔次既同何患频大日月相离何患频小僧一行力主梁传之说为合朔议云日月合度谓之朔无所取之取之蚀也昔人考天事多不知定朔假蚀在二日而常朔之晨月见东方食在晦日则常朔之夕月见西方或以为朒朒变行或以为历术疎濶遇常朔朝见则增朔余夕见则减朔余此纪历所以屡迁也又云天事诚密虽四大三小庸何伤一行盖取左传官失之之言而深明定朔之不可易惟定朔立而晦不东见朔不西朒日食常在朔月食常在朞矣辛卯朔日之干支也辛为日卯为辰左昭七年季武子卒晋侯谓伯瑕曰吾所问日食从矣可常乎对曰不可六物不同民心不壹事序不类官职不则同始异终胡可常也公曰何谓六物对曰岁时日月星辰是谓也公曰多语寡人辰而莫同何谓辰对曰日月之会是谓辰故以配日又翼奉云师法用辰不用日辰为客孟康注云假令甲子日子为辰甲为日用子不用甲也天官书又云日食食所不利复生生所利不然食尽为主位以其直及日所躔加日时用名其国此诗举卒卯亦有意义乃六物中所谓论日者也但占法深微非有师授莫能通之笺疏谓日为君辰为臣辛金也卯木也辛日以辰侵木金应胜木反侵金是五行相逆犹君臣颠倒此一说也或谓十干寄宫辛寄在戊戊土卯木贼之又一说也或又谓十月建亥六阴用事一阳未复而月与日交会又正在晦朔之间是其月为纯阴且庚辛属金而重光之辛为阴金寅卯属木而单阙之卯为阴木是其日又为阴阴此日而食则羣阴擅令微阳不能独存又一说也又司马迁云甲子四海之内不占丙丁江淮海岱也戊巳中州河济也庚辛华山以西壬癸恒山以北日蚀国君月蚀将相当之今食在辛日属华山以西正在周地而翼奉推论六情十二律又以卯为阴贼王者所忌礼经避之春秋讳焉故春秋潜潭巴云辛卯蚀臣伐其主戎事类占亦云日食辛卯日有谋逆具观数说则此日之食其为凶祸昭然矣又刘昭云按春秋纬六旬之蚀各以甲子为说此偏举一隅未为通证故于事验不尽相符日有食之者月食之也何休云不言月食之者其形不

可得而观故疑言日有食之焦贛云不徒曰日食而曰日有食之则若真有物食之者记异也警人君也谷梁传云吐者外壤食者内壤阙然不见其壤有食之者也有内辞也有食之者内于日也其不言食之者何也知其不可知也李寻云日者衆阳之长輝光所烛万里同晷人君之表京房易传云亡师兹谓不御厥异日食其食也既并食不一处诛衆失理兹谓生叛厥食既光散纵畔兹谓不明厥食先大雨三日雨除而寒寒即食专禄不封兹谓不安厥食既先日出而黑光反外烛君臣不通兹谓亡厥食三既同姓上侵兹谓诬君厥食四方有云中央无云其日大寒公欲弱主位兹谓不知厥食中白青四方赤已食地震诸侯相侵兹谓不承厥食三毁三复君疾善下谋上兹谓乱厥食既先雨雹杀走兽弑君获位兹谓背厥食既先风雨折木日赤内臣外向兹谓背厥食食且雨地中鸣豕宰专征兹谓因厥食先大风食时日居云中四方亡云伯正越职兹谓分威厥食日中分诸侯争美于上兹谓泰厥食日伤月食半天营而鸣赋不得兹谓竭厥食星随而下受命之臣专征云试厥食虽侵光犹明若文王臣独诛纣矣小人顺受命者征其君云杀厥食五色至大寒陨霜若纣臣顺武王而诛纣矣诸侯更制兹谓叛厥食三复三食食已而风地动适让庶兹谓生欲厥食日失位光晦晦月形见酒亡节兹谓荒厥食乍青乍黑乍赤明日大雨发雾而寒凡食二十占其形二十有四改之辄除不改三年三年不改六年六年不改九年孔甚丑恶也以阳月而有日食之异甚可丑恶也大戴礼孔子曰古之治天下者必圣人圣人有国则日月不食星辰不孛杨简云尧舜禹之时历年多无日食至太康失邦始日食历家谓日月薄食可以术推者衰世之术也杜预云日月动物虽行步有大量不能不少有盈缩故有虽交会而不食者或有频交而食者刘公瑾云若以常度论之一岁两交当两食而春秋二百四十二年日食三十六唐二百九十年食百余者此所谓虽交而不食或频交而食者也在乎人君行事之所感召耳朱子云王者修德行政用贤去奸能使阳盛足以胜阴阴衰不能侵阳则日月之行虽或当食而月常避日故其迟速高下必有参差而不正相合不正相对者所以当食而不食也若国无政不用善使臣子背君父妾妇乘其夫小人陵君子夷狄侵中国则阴盛阳微当食必食虽曰行有常度而实为非常之变矣程子云日食有定数圣人必书者盖欲人君因此恐惧修省如治世而有此变则不能为灾乱世则为灾矣人气血盛虽遇寒暑邪秽不能为害其血气衰则为害必矣胡安国云日者衆阳之宗人君之表而有食之灾咎象也或妾乘其夫或臣子背君父或政权在臣下或夷狄侵中国皆阳微阴盛之证也是故十月之交诗人以刺日有食之春秋必书僧一行云使日食而不可以常数求则无以课历数之疎密使日食而皆可以常数求是何以占政教之休咎来斯行云唐虞之时历象已极详密独日月之食缺而不讲良有深意後世畴人预定视为固然戒省之意蔑如矣何孟春云古人罔不以日蚀为惧春秋于日食必谨而书之圣贤岂不知数不可移欲以存上天之戒耳汉时诏有云谪见于天灾莫大焉犹是此意宋徽宗时乃下诏言此定数不足为灾异古人以为异者皆不晓历之故是何言欤孔云日月之食于算可推而知则是虽数自当然而云为异者人君位贵居尊恐其志移心易圣人假之灵神作为鉴戒耳夫以昭昭大明照临下土忽尔殒亡俾昼作夜其为怪异莫斯之甚故有伐鼓用币之仪贬膳去乐之数皆所以重天变警人君者也而天道深远有时而验或亦人之祸衅偶与相逢故圣人得因其变常假为劝戒使智达之士识先圣之深情中下之主信妖祥以自惧但神道可以助教而不可以为教神之则惑衆去之则害宜故其言若有若无其事若信若不信期于大通而已矣彼彼昔日也李寻云月者衆阴之长消息见伏百里为品千里立表万里连纪妃后大臣诸侯之象微郑云谓不明也孔云下章彼月而食此日而食与此微同则不明为日月被食而不明也彼月

而微意前此必有月食之时此此今日也前既月食今又日食所谓日居月诸胡迭而微也欧阳修云日君道也月臣道也望而至于黄道是谓臣干君明则阳斯蚀之朔而至于黄道是谓臣壅君明则阳为之蚀按周礼春官大司乐云日月食令去乐秋官庭氏有救日月之弓矢昏义云阴事不修谪见于天月为之食管子云日食修德月食修刑然则日月之食皆谓之灾非谓月宜食日不宜食也严粲云伤败将至灾异先出故此下民将罹其祸而可哀也】日月告【汉书作鞠】凶不用其行【叶阳韵户郎翻】四国无政不用其良【阳韵】彼月而食则维其常【阳韵】此【左传作彼】日而食于何不臧【阳韵 赋也日月告凶兼日食月食而言以是时二变皆有也告凶郑云告天下以凶亡之徵凌蒙初云告字妙天不言以日月示之也行郑云道度也不用之者谓相干犯也颜师古云言日月不用其常行之道以告凶灾者繇四方之国无政理不能用善人也按郑语史伯策周之必敝谓其弃高明昭融而好谗慝暗昧恶角犀丰盈而近顽童穷固去和而取同好穷固者弃聘后立内妾也近顽童者侏儒戚施实御在侧也用谗慝者周法不昭而妇言是行也行暗昧者不建立卿士而妖试幸措也其立为卿士者谗谄巧从之虢石父所谓与剽同也凡此皆不用其良之实左雄云幽厉昏乱不自为政褒姒用权七子党进贤愚错绪深谷为陵故其诗云四国无政不用其良韩诗外传云人主欲附下一民则莫若反之政欲修政美俗则莫若求其人彼其人者生今之世而志乎古之世知国之安危臧否若别白黑则是其人也人主欲强国安乐则莫若与其人用之巨用之则天下为一诸侯为臣小用之则威行邻国莫之能御若殷之用伊尹周之遇太公可谓巨用之矣齐之用管仲楚之用孙叔敖可谓小用之矣巨用之者如彼小用之者故如此也曰粹而王駁而霸无一而亡诗曰四国无政不用其良不用其良臣而不亡者未之有也彼月而食此日而食与上章微字同是一事而意稍别前以阴阳之本体较此以阴阳之胜负较也维其常者言视之为常事也于何二字有味乃唤醒之辞班固所谓推日食之占循变复之要也臧善也真德秀云吾何繇而有此不善之证也月之食也繇于以阴干阳故为阳所蚀昔遭此变亦可以憬然矣乃以寻常视之略不介意今天心仁爱无已复以日食告是明言阳非特不能蚀阴且为阴所蚀也其非吉祥善事昭然甚明可不亟思其何以致此而改图以销此变乎又汉书引诗传云月食非常也比之日食犹常也日食则不臧矣谓之小变可也谓之正行非也此解费词似非诗旨左昭七年晋侯问于士文伯曰诗所谓彼日而食于何不臧者何也对曰不善政之谓也国无政不用善则自取谪于日月之灾故政不可不慎也务三而已一曰择人二曰因民三曰从时】煜煜【丰本作煜煜】震电不宁【丰本作盭】不令【叶蒸韵读如陵间承翻】百川沸腾【蒸韵】山豕峯【汉书博物志俱作卒】崩【蒸韵】高岸为谷深谷为陵【蒸韵】哀今之人胡?莫【丰本作不】惩【蒸韵 赋也?字从火火盛也即电光也震说文云劈历振物者易震为雷是也电说文云阴阳激耀也淮南子云雷以电为鞭陆佃云与雷同气发而为光雷从回电从申阴阳以回薄而成雷以申泄而为电故曰雷出天气电出地气故电从坤省说卦曰离为电火属也盖阴阳暴格分争激射有火生焉其光为电其声为雷易曰雷电噬嗑又曰雷电皆至丰雷电噬嗑言雷电合而章也盖今震雷与电俱赴者所谓雷电皆至者也故君子以折狱致刑以象天之至威非特明罚勅法而已诗曰??震电不宁不令言震雷变乱于上不安故常且非所以号令万物也董子曰太平之时雷不惊人号令启发而已矣电不眩目宣示光耀而已矣沸水涌出貌腾相乘陵也汉李寻灾异对云臣闻五行以水为本其星玄武婺女天地所纪终始所王水为准平王道公正修明则百川理落脉通偏党失纲则踊溢为败诗所谓百川沸腾者也其咎在于皇甫卿士之属惟陛下留意诗人之言少抑外

亲大臣冢尔雅云山顶也释名云肿也象山顶之高肿起字从勺徐锴云地高起若有所包也
峯说文云危高也尔雅云峯者屺?自上坠下曰崩谷梁传云高曰崩厚曰崩尊曰崩岸说文云
水崖而高者尔雅云望厓洒而高岸注以为视厓峻而水深者曰岸也说文云泉出通川为谷
从水半见出于口张揖云水注川曰溪注溪曰谷陵说文云大阜也释名云隆也体隆高也孔
云当时天下有百川之水皆溢出而相乘水流趋下小人之象今溢出繇贵小人在上也又时
山之冢顶高峰之上峯然崔嵬者皆崩落山高在上君之象今崩落是君道坏也于时又高大
之崖陷为深谷岸应处上今陷而在下繇君子居下故也又深下之谷进出为陵谷应处下今
进而在上繇小人处上故也此所陈皆当时实事推度灾云百川沸腾衆阴进山冢峯崩人无
仰高岸为谷贤者退深谷为陵小临大张华云小人握命君子陵迟白黑不别大乱之徵也周
语幽王三年西周三川皆震伯阳父曰周将亡矣夫天地之气不失其序若过其序民之乱也
阳伏而不能出阴遁而不能烝于是有地震今山川实震是阳失其所而镇阴也阳失而在阴
川源必塞夫水土演而民用也水土无演民乏财用不亡何待昔伊雒竭而夏亡河竭而商亡
今周德若二代之季矣其川源又塞塞必竭夫国必依山山川崩川竭亡之徵也川竭山必崩
若国亡不过十年数之纪也夫天之所弃不过其纪是岁也三川竭岐山崩十一年幽王乃灭
周乃东迁又左昭三十二年公薨于乾侯晋史墨曰鲁君世从其失季氏世修其勤民忘君矣
虽死于外其谁矜之社稷无常奉君臣无常位自古以然故诗曰高岸为谷深谷为陵三后之
姓于今为庶此以高下变迁为尊卑易位之象亦通董仲舒云国家将有失道之败而天乃先
出灾异以谴告之不知自省又出怪异以警惧之尚不知变而伤败乃至此见天心仁爱人君
而欲止其乱也胡?莫惩与节彼南山解同严云变异荐臻哀哉今幽王君臣何为处可痛而莫
惩创也谢枋得云诗人不指幽王而曰哀今之人微而婉也徐光启云野雉着怪高宗深动大
风暴过成王坦然二君亦知所惩也而卒成中兴业幽王之亡不亦宜乎愚按此承上二章因
十月之日食而推及于前此之月食又及雷电崩竭诸异皆追述之语非同时事也考竹书涇
渭雒竭岐山崩在幽王二年与史记同即周语所云三川皆震川竭山必崩者也特周语以为
三年耳竹书又记冬大雷震电在三年即此诗之震电夏六月陨霜在四年即正月篇之繁霜
而日食之变乃在六年冬十月惟月食无所考则以春秋凡日食必书而月食无纪意古史之
法皆然诗人追数之意若曰昔年天已示变如此胡不少悛改而复致于天象于今也山崩川
竭已是亡国之徵况冬电夏霜月食诸变频仍不已又继之以日食乎朱子以诸异皆在十月
似太泥徐士彰云天地犹人身也天地之气舛错犹人身之气壅阏也人身之气壅阏于是发
而为疹疾结而为赘疣郁而为臃肿天地之气舛错于是有日月薄蚀之变亦犹人身之疹疾
也有陵谷变迁之异亦犹人身之赘疣也有山崩川溢之患亦犹人身之臃肿也人身之气非
无自而壅阏则天地之气之舛错亦必有使之者矣】皇父卿士【纸韵】番【汉书作皮汉
书注作蕃韩诗作繁】维司徒【虞韵】家伯维【朱传大全读书记衍义丰本俱作冢】宰
【叶纸韵樊里翻】仲【汉书作中】允【汉书作术】膳【汉书注作缮】夫【虞韵】聚
【汉书作振】子内史【纸韵】蹶【释文作蹶丰本作□】维趣马【叶麋韵满补翻】楫
【汉书作萬】维师氏【纸韵此章八句前四单句士宰史氏俱一韵後四双句徒夫为一韵
马处为一韵亦奇体】艳【纬书作剡汉书作阎】妻嬖【说文作偏汉书注作扇】方处【
叶麋韵读如取此主翻陆德明本作炽 赋也皇父与常武篇之皇父非一人彼乃文王时南仲
之後辨证云汤八世孙盘庚妃姜氏梦赤龙入怀孕十二月生子手抱南字长荆州号南赤龙
生条孙仲为纣将平玃玃此南仲则尹氏也竹书载宣王二年锡太师皇父命又载幽王元年

锡太师尹氏皇父命系尹氏于皇父之上所以别于宣王时之皇父耳卿士孔云谓卿之有事按左传郑武公庄公为平王卿士杜注谓王卿之执政者与周公以蔡仲为已卿士不同郑云下文六人之中虽官有尊卑权宠相连朋党于朝皇父则为之端首兼擅羣职故但目以卿士云番疑即樊仲山甫之後据汉书作皮颜师古汉书注作蕃韩诗作繁按古文番蕃皮繁樊五字皆通用卜式传随牧畜番番即蕃也路史载有虞氏後有番国者其地在汉属鲁国亦名蕃城而引白褒鲁国记云陈子游为鲁相太尉陈蕃子也国人为讳蕃改曰皮是番与蕃通蕃与皮通之证也仪礼君射则皮树中今文皮作繁音婆是皮与繁通之证也左传繁纓以朝礼记作大礼樊纓是繁与樊通之证也此诗若皇父之先为尹吉甫蹶之先为蹶父而率犬戎以攻周者其先为申伯皆宣王时臣则番之为仲山甫後可类推矣司徒周地官卿尚书云司徒掌邦教敷五典扰兆民崔琦外戚箴云匪贤是上番为司徒荷爵负乘采食名都诗人是刺德用不怗家亦采邑解见节南山篇但未详其处伯字也家伯即家父之先也宰王肃以为小宰郑司农周礼注引此以为宰夫孔颖达谓经传于宰夫未有单称宰者至如小司徒小宗伯不得单称司徒宗伯则小宰亦不得单称宰也郑笺以为冢宰今按汉书古今人表称太宰家伯则笺说是矣当从之尚书云冢宰掌邦治统百官均四海周天官卿也周礼疏云宰者调和膳羞之名冢宰亦能调和衆官故名仲允郑云字也人表作中术未详何许人膳夫天官之属上士也周礼膳夫职云掌王之食饮膳羞以养王及后世子聚蹶楸郑云皆氏也聚楸木详其所出韵会云聚姓也襄州有之孔云聚子以子配之若曾子闵子然故知皆氏季本云称氏者繇世族而进用也称子者年尚少也内史春官之属中大夫也周礼内史职云掌王之八枋之法以诏王治一曰爵二曰禄三曰废四曰置五曰杀六曰生七曰予八曰夺执国法及国令之贰以致政事以逆会计掌叙事之法受纳访以诏王听治蹶本姑姓盖以蹶父之字为氏趣马趣养马者名趣取督促为义夏官之属下士也周礼趣马职云掌赞正良马而齐其饮食简其六节掌驾说之颁辨四时之居治以听驭夫颜师古云楸者木名因树以得姓也谓女宠之族有姓楸者为师氏之官人表作萬汉书游侠传有萬章字子夏者其後也师氏地官之属中大夫也周礼师氏职云掌以□诏王以三德教国子一曰至德以为道本二曰敏德以为行本三曰孝德以知逆恶教三行一曰孝行以亲父母二曰友行以尊贤良三曰顺行以事师长居虎门之左司王朝掌国中失之事以教国子弟凡国之贵游子弟学焉按司徒当在宰下膳夫趣马皆士职当在内史师氏之下而各序于其上者孔谓便文取韵理或然也蔡汝楠云古人慎独之学自宫及府无非正人幽王自中朝大臣以至燕朝小臣皆不得其正艳妻毛云褒姒也艳说文云好而长也从丰徐锴云容色丰满也郑云敌夫曰妻钱天锡云诗人称太姒则曰淑女称褒姒则曰艳妻王安石云言其配王以色而已非以德也是时褒姒已正位中宫矣礼天子之妻曰后此不言后而言妻者不予其为后也煽本作偏说文云炽盛也徐云人权力相成若火之相扇也方四方也处居也褒姒与皇父之徒相比肆行鼓煽令各散处四方以张其羽翼便其私图纪无为国家分猷宣力之念若後章作都于向之事是也】抑此皇父岂曰不时【支韵】胡为我作不即我谋【叶支韵谟悲翻】彻我墙屋田卒污莱【叶支韵陵之翻】曰予不戕【王肃本作臧】礼则然矣【叶支韵於姬翻丰本移置此章于皇父孔圣章之後未可信赋也上章言艳妻煽方处则自皇父而下皆已布满四方各有分邑而皇父尤为衆恶之首故特斥而言之抑朱子云发语辞郑云抑之言噫噫是皇父疾而呼之时朱子云农隙之时我皇父自我也作即下章作都之作画计为谋言抑此皇父承方处之命岂肯谓此时非兴作之时但闻其聚族而相语曰是役也既将为我作邑何故不先就我谋乎行当即彻我王都所居

之墙屋以移居于外邑无庸再计盖喜幸之极见其与褒姒有同心也彻说文云通也除去之意墙屋除去则其地通达无碍故谓之彻田卒污莱以纷纷不时移徙之故使民疲于兴作不得趋农事故田尽化为污莱卒尽也毛云下则污高则莱孔云污者池停水之名莱者草秽之名下田可以种稻无稻则为池高田可以种禾无禾则生草曰皇父对衆之言也予皇父自予也戕郑云残也田卒污莱所谓戕也言我非欲残败汝田业但臣奉君命礼实当然吾岂敢以不时之故而惮迁乎其托辞文过有如此者】皇父孔圣作都于向【漾韵】择三有事亶侯多藏【叶漾韵材浪翻】不慙遗一老俾守我王【叶漾韵于况翻】择有车马以居徂向【见上 赋也孔甚圣通也上章言曰予不戕礼则然矣皇父偃然自以为达于礼而不恤民之病诗人所为讥孔圣也钱云夫惟有自圣之心故谓天变为不足畏人言为不足恤王应麟云皇父孔甚自谓圣也具曰予圣君臣俱自谓圣也自圣者乱亡之原光武诏上书者不得言圣大哉言乎向地名孔云在东都畿内按左隐十一年桓王取鄆刘蔿之田于郑而与郑人苏忿生之田共十二邑向在其中杜注云河内轵县西有地名向上在今河南怀庆府济源县西南忿生周初时人书所谓司寇苏公者向原其所食邑意其後复归于王故幽王以之与皇父而桓王复以之与郑耳路史以为沛国之向九域志以为同州之向皆非是又承县亦有向城乃姜姓左传所为莒子娶于向向姜不安莒而归者别是一向与此无涉竹书纪幽王五年皇父作都于向邹忠胤云向在京都畿内而此时周尚都西镐皇父既总集朝权何肯舍此而徂彼夫亦见西戎方强王室方骚自知负天下之怨而营狡窟以自固耶且如郑桓公亦贤司徒也惧周难之及谋何所可以逃死乃东寄孥与贿于虢郃盖当时诸侯皆有郢郃之营焉而皇父实为之俑其背公植私如此卒至王室播迁三事大夫莫肯夙夜斯固势之必至者三有事即三事解见雨无正篇择之者择以为王之三事也亶实也侯语辞尔雅云维也乃也藏蓄也皇父既出居私邑而所选择为王朝三事之官留以辅佐天子者实维贪墨聚敛之人周书文侯之命篇所谓殄资泽于下民侵戎我国家纯也史称虢石父为人佞巧善谀好利王立以为卿士国人咸怨又吕览云幽王染于虢公鼓祭公敦其即此时为三事之人乎慙尔雅云强也且也郑云慙者心不欲自强之辞字从心孔引说文云肯从心也言初时心所不欲後始勉强而肯从也遗余也老谓老成人云一者数之少也王以王业言皇父播弃黎老不肯勉强留一人于朝以守我周王天下之大业也盖所用者多藏则所弃者故老趣向使然无足怪者谢枋得云平王东迁作文侯之命推原召乱之繇亦曰罔或者壽俊在厥服西周之亡实兆于此使皇父秉政之时能留一老以守我王如周召之师保如仲山甫之保王躬则幽王有冯有翼未至于身辱国亡也皇父之罪莫大于此择有车马亦指皇父言择谓择取其精有谓具有其数自择而自有之盖备輜重以行也非遴取富民偕迁之说以居徂向者以往向邑而居此倒文法亦取叶韵耳】黽【陆本作儻汉书作密丰本作宓】勉【汉书丰本俱作勿】从【丰本作从】事不敢告劳【豪韵】无罪【丰本作辜】无辜谗口嚣嚣【叶豪韵牛刀翻韩诗作警警汉书丰本俱作瞽瞍】下民之孽匪降自天【先韵亦叶真韵汀因翻】噂【左传丰本俱作噂说文亦作噂】沓【陆本丰本俱作???】背憎职竞由人【真韵亦叶先韵如延翻 赋也黽勉解见谷风篇从事从王事也嚣嚣解见车攻篇时皇父辈已散之四方矣诗人独留居王朝勉力以供王之事未尝敢以劳苦自言然且非有罪辜而横罹谗毁繇褒姒用事于内已又非其党故不免为谗口所害自伤其所遭之不幸也下民之孽以下推本祸始而言孽本作□通论云妾隶之子曰孽孽之言孽也有罪之女没废役之而已得幸于君有所生若木既废而生栢故于文子辟为孽辟者罪也童妾感繫而生褒姒褒人媼得之因以赎已罪而纳之于

後宮所謂孽也對天言故曰下民降下也噲說文云聚語也沓說文云語多沓沓也字從水從日以語多若水之流故從水也曰者言也背憎背後相憎惡也職主競逐也方王嬖褒姒之初使在朝賢士大夫同心匡救必不至釀成廢立之事無如皇父輩陰相比附其所與聚談以浸潤于上前者無非丑直毀止之語故使忠言不行王終感溺不悟如唐高宗欲立武昭儀為后長孫無忌褚遂良韓瑗皆執以為不可而李積則曰此陛下家事何必更問外人許敬宗則曰田舍翁多收十斛麥尚欲易婦況天子立一后何豫諸人事而妄生異議乎上意遂決即其類也然則此孽之在王宮豈誠天所降下哉皆繇此噲沓背憎之人立定主意競逐為此此所以致有今日之燭耳又左僖十五年初晉獻公筮嫁伯姬于秦史蘇占之曰不吉及惠公在秦曰先君若從史蘇之占吾不及此夫韓簡侍曰龜象也筮數也物生而後有象象而後有滋滋而後有數先君之敗德及可數乎史蘇是占勿從何益亦引此詩蓋取其意相近】悠悠【爾雅音義作攸攸】我里【紙韻韓詩作惺爾雅注顧野王本丰本俱作?]亦孔之瘳【叶紙韻讀如毀虎委翻陸本作悔又云一作侮】四方有美我獨居憂【尤韻】民莫不逸【韓詩外傳作谷】我獨不敢休【尤韻】天命不徹【叶質韻直質翻】我不敢傲我友自逸【質韻八言為句又見此賦也悠悠爾雅云思也周禮五鄰為里說文無瘳字當作悔云恨也嚴云仕不得志則思其鄉里悠悠然道遠而未得歸亦甚恨矣四方有美民莫不逸我友自逸皆指皇父輩而言美說文云貪欲也凡散處於四方者皆有貪欲我獨居此憂苦之地無所可欲也逸通作佚安佚不勞也民之得遂其身圖者莫不優游自便我獨于職業置力不敢休息也徹通徹學也我友僚友也泛言則為民斥言則為友國家氣運方在否塞不通之時食人之食者當事人之事我豈敢仿效我友而自求安逸乎所以思我里而不忍言歸者以此其詞婉其志堅彼幽王君臣聞之亦戚戚有動否也】十月之交八章章八句【中侯擿雒貳云昌受符厲倡嬖期十之世權在相又云剡者配姬以放賢山崩水潰納小人家伯罔主異載震孔穎達解之云既言昌受符為王命之始即云期十之世自文數之至厲王除文王為十世也剡與家伯與此篇事同以剡對姬剡為其姓以此知非褒姒也剡艷古今字耳山崩水潰即此篇百川沸騰山冢峯崩是也如此中侯之文亦可以明此為厲王但緯候之書人或不信又尚書緯說艷妻謂厲王之婦不斥褒姒漢書艷妻作閭妻顏師古注亦謂此詩刺厲王淫于色皇父之屬因嬖寵而為官內寵熾盛政化失理故致災異日為之食也顏說不知何所本或當是祖緯書而鄭氏箋則又以意斷其為刺厲王詩謂節刺師尹不平亂靡有定此篇讥皇父擅恣日月告凶正月惡褒姒滅周此篇疾艷妻煽方處又幽王時司徒乃鄭桓公友非此篇之所云番也是以知然愚按尹氏乃桓王時之尹氏非幽厲時人解見節南山篇皇父以幽王五年作都于向而鄭桓公至幽王八年方為司徒正是皇父徂向後故以友代之耳惟褒姒艷妻或疑是兩人以漢書考之谷永云褒姒用國宗周以喪閭妻驕扇日以不臧班婕妤賦云悲晨婦之作戒兮哀褒閭之為郵使厲王時別有閭妻則當序閭于褒之前不應先褒後閭也褒表其地剡仍是艷之轉音以表其色且使厲王因艷妻用事以致亂亡國語史記不應都沒而不見而竹書紀幽王事又與是詩種種相合乃爾其為刺幽王詩明矣又翼奉云窃學齊詩聞五际之要十月之交篇知日蝕地震之效昭然可明猶巢居知風穴居知雨按五际之說本于緯書詩緯泛歷樞云午亥之際為革命卯酉之際為改正辰在天門出入候听卯天保也酉析父也午采芑也亥大明也然則亥為革命一际也亥又為天門出入候听二际也卯為陰陽交际三际也午為陽謝陰興四际也酉為陰盛陽微五际也其理亦未所喻】

雨无正刺幽王也正大夫离居之後?御之臣所作【出朱传 邹忠胤云诗人慨正大夫离居莫知我勩又曰曾我?御憊憊日瘁其为?御所赋无疑惜乎不着其名如家父孟子之类也王伯厚有云大雅之变作于大臣小雅之变作于羣臣虽未必尽然意亦近似愚按此与十月之交篇同为一人之作今以二诗语意参考之皇父徂向即所谓正大夫离居也龟勉从事不敢告劳即所谓莫知我勩也我独居忧我独不敢休即所谓憊憊日瘁也噂沓背憎即所谓巧言如流也四方有美我友自逸即所谓俾躬处休也无罪无辜谗口嚣嚣即所谓若此无罪沦胥以铺也至云谓尔迁于王都昔尔出居谁从作尔室则其为刺彻墙屋择车马之事更复了然盖是时散处四方经营私邑者不独皇父一人如番维司徒家伯冢宰皆正大夫也若仲允聚子蹶橈之流则所谓三事之大夫莫肯夙夜者也特彼因灾异频仍而作此因戎饥荐而作命旨不同耳凡祸患之来其徵必先见则此诗实作于十月之後毛诗次第是也】

浩浩昊天【刘安世云尝读韩诗篇首多雨无其极伤我稼穡八字丰氏本同】不骏其德【职韵】降丧【去声】饥馑斩伐四国【职韵】旻【陆德明云本有作昊天者非也孔颖达云上有昊天明此亦昊天定本皆作昊天俗本作旻天误也二说未详孰是埤雅作昊】天疾威弗虐弗图【虞韵】舍【上声】彼有罪既伏其辜【虞韵】若此无罪沦【齐韩鲁诗汉书俱作薰後汉书作熏】胥以铺【虞韵韩诗作痛邹忠胤云按韩诗篇首多二句愚意此十二句当分为二章其韵乃叶丰本以前六句为第一章後六句为第二章赋也浩大水貌王安石云浩浩广大流通之意昊本作界从日从夂从日取其明从夂取其大陆佃云昊天者大而明也大所以临下明所以照下骏马之良者其行最疾故取以为疾速之义德朱子云惠也降下也丧死亡也兵戎不靖民多死亡第四章所谓戎成不退也饥馑有二义尔雅云谷不熟曰饥蔬不熟曰馑谷梁传云一谷不升谓之馑二谷不升谓之饥三谷不升谓之饥四谷不升谓之康五谷不升谓之大饥又谓之大侵未详孰是天灾流行民困饥馑第四章所谓饥成不遂也四国四方之国言天不速行德惠而惟降下此丧乱饥馑之变相寻未已以戕害四方之人也旻闵也昊天旻天解俱见黍离篇疾迅威虐也与不骏其德对看弗虐弗图指王也言此昊天也以其有仁覆闵下之德则又谓之旻天今德则不骏而威反迅疾若此王当思虑其所以致此之故而亟图谋挽回之术可矣乃漠不动念何哉舍通作舍释也彼有罪既伏其辜作一气看既伏其辜言罪状明确也此主刺皇父辈言若此无罪二句则诗人惧祸而自拟也沦没也胥尔雅云皆也按方言东齐谓皆曰胥疑古有此语铺有陈布之义故郑笺以为徧也彼小人之有罪状可指据者则王既舍之而不问矣若此无罪之人日为小人所陷害行见其沦没于非辜而皆徧及也此将然之辞所以然者以谗口嚣嚣而王听不聪故也】周宗【左传作宗周】既灭靡所止戾【霁韵】正大夫离居莫知我勩【霁韵左传作肄】三事大夫莫肯夙夜【叶药韵弋灼翻】邦君诸侯莫肯朝【丰本作鼂】夕【叶药韵祥龠翻】庶曰式臧覆出为恶【药韵丰本以为第四章 赋也周室为天下所宗故曰周宗止居息也戾说文云身曲戾也字从犬出户下徐锴云犬善出卑户会意此二句乃设为未然之语言假若宗周既灭则我辈为臣子者将托身何所是以当不憚早夜勤渠恪修职业亦为共维宗社计耳正大夫者六官之长皆上大夫周礼八职一曰正是也离居者离析而居于外邑若皇父之居向也我作诗者自我也勩说文云劳也人去而已独居则人逸而已独劳然虽劳而去者曾莫之知抑亦彼所不欲知也三事大夫犹周官所谓三事暨大夫也三事郑以为三公殊无据按周书立政篇云任人准夫牧作三事周官篇云三事暨大夫敬尔有官乱尔有政则明指六卿而言因

六卿职掌六典皆为天子理事故以任人称皆为天子守法故以准夫称皆为天子爱民故以牧称着其职业所在非官名也三事之属各有中下大夫此三事乃十月篇所谓择三有事宣侯多藏者大夫则其所属之大夫耳夙夜者早夜在公以供职业也诸侯各君其国则邦人呼之为君莫肯朝夕者不来朝也柳宗元云古者旦见曰朝暮见曰夕传朝而不夕礼云日入而夕朝不废朝夕不废夕晋叔向夕楚右尹子革夕赵文子砉其椽张老夕知襄子为室士茁夕皆暮见也汉仪夕则两郎向 闾拜谓之夕郎亦出是名也庶曰式臧二句指正大夫言式发声臧说文云善也覆毛云反也为恶犹言肆虐也自正大夫离居之後六官之属无肯夙夜勤王事者其称邦君而为诸侯莫肯来朝暮省王者惟我躬任其劳庶几其以我为善乃反出而肆虐无已即谗口瞽瞍是也左昭十六年齐侯伐徐徐人行成赂以甲父之鼎鲁叔孙昭子曰诸侯之无伯害哉齐君之无道也兴师而伐远方会之有成而还莫之亢也无伯也夫诗曰宗周既灭靡所止戾正大夫离居莫知我肆其是之谓乎】如何昊天【叶真韵汀因翻】辟言不信【叶真韵斯人翻】如彼行迈则靡所臻【真韵】凡百君子各敬尔身【真韵】胡不相畏不畏于天【见上丰本以为第三章 赋也郑云如何乎昊天痛而愬之也辟法也辟言所谓法语迈远行也臻至也解俱见说文繇谗言高张故已所进法度之言不为王所听信将来受祸未知胡底如行远道者茫茫莫测其所至也凡百君子亦主正大夫辈而言不欲斥之故泛指之也各敬尔身欲其不敢为恶也以是为非以非为是所谓不相畏也作恶既甚则天罚将及之能无惧乎王安石云世虽昏乱君子不可以为恶自敬故也畏人故也畏天故也钱天锡云王之不信则诉于天臣之不敬则惕于天皆首章呼天之意左文十五年齐侯侵我西鄙谓诸侯不能也遂伐曹入其郛讨其来朝也季文子曰齐侯其不免乎已则无礼而讨于有礼者曰女何故行礼礼以顺天天之道也已则反天而又以讨人难以免矣诗曰胡不相畏不畏于天君子之不虐幼贱畏于天也在周颂曰畏天之威于时保之不畏于天将何能保以乱取国奉礼以守犹惧不终多行无礼弗能在矣】戎成不遂【叶真韵吐类翻陆本作?丰本作□下同】饥成不遂【真韵】曾我?御??【释文作惨惨】日瘁【真韵】凡百君子莫肯用讯【叶真韵虽遂翻集韵本作譴】听言则答【新序汉书俱作对丰本作畬】谮言则退【见上 赋也戎兵也遂礼记疏云谓申也申遂不有缺少也严云兵戎之祸已成而其势不退言外患之炽也饥困之灾已成而其生不遂言内忧之迫也邹云或谓秦以前无岁字止有遂字遂即岁然则易云羝羊触藩不能遂岂亦不能岁耶曾说文云词之舒也徐锴云缓气言之故曰舒?说文云日狎习相慢也御侍也?御盖近侍之官国语所谓居处有?御之箴是也?说文云痛也瘁通作顙说文云顙顙也??日瘁即前章所云我勩也讯说文云问也言时事多艰师旅饥馑裸然并凑如此曾是为我?御之官不过王之左右小臣尚且日忧痛之而至于病凡百君子乃莫有问及此者何哉听言之言诗人所自谓辟言也答尔雅云然也注云应也按说文无答字疑当通作合谓相合也谮韵会云诬告之也谮者簪也若簪之着物切至也言王若听我之言知其俱从爱君忧国中来而虚怀欣合则虽有加谮于我之言亦将自退远矣然则彼之谮我繇王之信谮故耳王之信谮繇王不知我之??日瘁而不听我之言故耳刘向新序云齐有閭丘印年十八道遮宣王曰家贫亲老愿得小仕宣王曰子年尚稚未可也閭丘印对曰不然昔有颡项行年十二而治天下秦项橐七岁为圣人师繇此观之印不肖耳年不稚矣宣王曰善子有善言何见寡人之晚也印对曰夫鸡豚謹噉则夺钟鼓之音云霞充咽则夺日月之明谗人在侧是以见晚也诗曰听言则对谮言则退庸得进乎宣王拊轼曰寡人有过遂载与之俱归而用焉】哀哉不能言匪舌是出【叶真韵尺类翻】维【左传作唯】躬是瘁【真

韵尔雅作頼】 哿矣能言巧言如流【尤韵】 俾躬处休【尤韵 赋也此承上章末二句而言哀哉诗人自哀也辟言质朴世之所谓不能言也然非徒出之于舌而已且瘁其身以图之而人终莫之怜也是可哀也按是出之出作去声读韵会云自内而外也物自出则入声使之出则去声哿可也哿矣能言致其叹美之意巧言如流者旋转无滞如水转流使是非邪正为之易位巧孰如之此世之所谓能言者也用能使其身处于休息安乐之地而理乱不关其责亦不入其心十月之交篇所云我友自逸是也又左昭八年石言于晋魏榆晋侯问于师旷曰石何故言对曰石不能言或冯焉不然民听滥也抑臣又闻之曰作事不时怨讟动于民则有非言之物而言今宫室崇侈民力雕尽怨讟并作莫保其性石言不亦宜乎于是晋侯方筑虎祁之宫叔向曰子野之言君子哉君子之言信而有徵故怨远于其身小人之言僭而无徵故怨咎及之诗曰哀哉不能言匪舌是出唯躬是瘁哿矣能言巧言如流俾躬处休其是之谓乎是宫也成诸侯必叛君必有咎夫子知之矣此引诗大与诗旨相反亦左氏之失也】 维曰于仕【纸韵】 孔棘且殆【叶纸韵养里翻】 云不可使【纸韵】 得罪于天子【纸韵】 亦云可使【见上】 怨及朋友【叶纸韵羽轨翻 赋也此章诗人自悼苦之辞言其去住两难也于往孔甚也棘小木丛生者如枣而多刺又方言云凡草木刺人者比燕朝鲜之间谓之棘自关以西谓之刺江淮之间谓之棘言人皆曰往仕耳殊不知仕途甚多荆棘动辄遭刺且有凶危也一说棘通作急也谓其不得从容也郑笺云居今衰乱之世云往仕乎甚急连且危亦通使即任使之使我见谗言朋兴仕路之孔棘且殆也于是萌乞休之志告于上曰小臣无状不足供任使矣而天子不许也且将以君臣大义责我罪何能免故曰得罪于天子我既求去不得则必夙夜在公以尽厥职姑不获已而亦云可使矣而同官之朋友又且咸相忌怨似不容我为天子使者去既不可留复不可亦且奈之何哉北门之诗曰我入自外室人交徧谪我则仁者为居者所忌也此曰亦云可使怨及朋友则留者为出者所忌也衰世臣工不和转相非怨大率如此异态同情亦足慨矣】 谓尔迁于王都【虞韵】 曰予未有室家【叶虞韵攻乎翻】 鼠思泣血无言不疾【质韵】 昔尔出居谁从作尔室【质韵赋也尔朱子云指离居者即第二章所言正大夫也迁说文云登也集韵云去下之高也诗迁于乔木其义】

【如此王都京师也诗人因已之留居王都而为朋友所怨也乃呼离居者而告之曰尔今亦自外而还朝何如而彼不肯也但托言已于王都未有室家可居耳诗人见彼之不肯来而已之不得去也自状其思曰鼠思言其幽忧窘迫如鼠在穴中不得出也泣说文云无声出泪也建安何士信云人泪必因悲声而出若血出则不繇声也今无声而涕出如血之出故曰泣血疾通作嫉憎恶之意我所以忧思之甚至于泣血者亦谓国无羣僚谁与共理而彼则不以为然但闻我劝迁王都之言则无不见憎嫉也故又因而诘之曰尔谓王都无室家可居是则然矣然昔尔自都出居于外此时都中本有室家而外则无之谁随尔营建室宅于彼乎夫出既能作室则还何患无家尔亦无庸遁辞为也抑是人也即使其还而同朝其所为者不过丑直害正之事诗人何利焉然犹惓惓属望若此盖隐然以体国至情动之庶几幡然改图忠厚之至也】

雨无正七章二章章十句二章章八句三章章六句【韩诗作雨无极子贡传申培说丰本俱作雨无其极丰本又颠倒章序分为八章五章章六句二章章八句一章十句 序云大夫刺幽王也雨自上下者也衆多如雨而非所以为政也郑笺谓刺王所下教令甚多而无正也欧阳

修云古之人于诗多不命题而篇名往往无义例其或有命名者则必述诗之意如巷伯常武之类是也今雨无正之名据序所言与诗絶异当阙其所疑苏子繇则云雨之至也不择善恶而雨焉幽王之世民之受祸者如受雨之无不被也夫雨岂尝有所正雨哉此所以为雨无正也愚按二说俱难通以诗意玩之所谓雨即戎成不退饥成不遂祸乱之来其多如雨也所谓无正即正大夫离居无匡勦国事也冯时可云雨无正之篇不敢刺王而言天不敢指天而言雨其称名也隐其虑患也深而元城刘氏又云尝读韩诗有雨无极篇序云雨无极正大大刺幽王也至其诗之文则比毛诗篇首多雨无其极伤我稼穡八字元诗所见韩诗本世无传者似未足信朱子疑之谓第一章本皆十句今遽增之则长短不齐非诗之例又此诗实正大夫离居之後御之臣所作其曰正大夫刺幽王者亦非是夫以章句长短为疑或云未可槩例然谓此诗为正大夫所作则诗中明有正大夫莫知我勦之语对彼言我其不作于正大夫明矣至若子贡传申培说篇名皆作雨无其极殆後人取元城之说附会为之非古书也申培说又以此诗为东迁之初大夫有不忠于王室者御之臣闵之而作传亦有王室播迁之语而中有阙文其意亦同此又袭大全中安成刘氏之说谓东迁之际羣臣惧祸者因以离居不复随王同迁于东都故见于诗词如此郑笺则以为刺厉王之诗谓在王流彘後所作总皆泥于周宗既灭之云然细味诗意俱不似且絶无稽据】

北山行役之士刺幽王不均也劳于王事而不得养父母焉【孟子曰是诗也劳于王事而不得养父母也曰此莫非王事我独贤劳也子夏序同而以为大夫刺幽王役使不均愚按篇中自叙偕偕士子而怨大夫不均则作此诗者其为士而非大夫明甚唯谓刺幽王则理固可信雨无正之诗曰正大夫离居三事大夫莫肯夙夜即所谓大夫不均燕燕居息也曾我御惨惨日瘁即所谓偕偕士子尽瘁事国也特彼意主黽勉尽职言此意主行役四方言微不同耳三山李氏云北山不当怨而怨夫子不删之者盖所以刺幽王也孔子曰公则说人主苟有均平之心则虽征役之重不以为怨若不均则虽未甚劳苦而人亦将怨矣观大东之诗则有粲粲衣服者有葛屨履霜者北山之诗则有息偃在牀者有不已于行者天下安得而悦服哉邓元锡云雅之盛也上平其政载恤其私内外均劳役也故士尽瘁而忘其劳雅之变也上不平其政不恤其私私内勤外故士尽瘁而哀其病盖四牡皇华之意索其尽矣】

陟彼北山言采其杞【纸韵丰氏本作芑】偕偕士子【纸韵】朝【丰本作鼂】夕从事【叶纸韵鉏里翻】王事靡盬【夔韵】忧我父母【叶夔韵满补翻亦叶纸韵母鄙翻赋也杞拘欏解见四牡杖杜篇郝敬云北山背阳之比杞苦菜食苦之比偕说文云俱也士六等之爵之一有上士中士下士子者男子之通称严粲云偕偕同也士子已之侣也王事靡盬解见鸛羽篇忧我父母贻父母以忧也诗人奉王命行役于外言陟彼北山采杞而食劳苦饥饿甚矣念我偕偕然与衆士子旅行以朝夕从王之事无有休时亦以王事不可以不坚固故我当尽力勤劳于役乃至久不得归使父母思我而忧也】溥【左传孟子荀子韩子丰本俱作普】天之下【叶夔韵後五翻】莫非王土【夔韵】率土之滨【真韵说文丰本俱作瀕】莫非王臣【真韵】大夫不均【真韵】我从事独贤【叶真韵下珍翻赋也溥尔雅说文皆云大也率通作卫字从行故毛传以为循也滨说文本作瀕水厓也孔颖达云汧滨涯浦皆水畔之地同物而异名也民居不尽近水而以滨为言者古先圣人谓中国为九州以水中可居曰州言民居之外皆有水也邹子曰中国名赤县赤县内自有九州瀛海环之是地之四畔皆至水

也严云溥大天下皆王土也循土地之岸滨除海水在外居其中者皆王臣也愚按四句串说意重王臣以起下不均之意左昭七年楚申无宇曰天子经略诸侯正封古之制也封略之内何非君土食土之毛谁非君臣故诗曰普天之下莫非王土率土之滨莫非王臣天有十日人有十等下所以事上上所以供神也故王臣公公臣大夫大夫臣士士臣阜阜臣舆舆臣隶隶臣僚僚臣仆仆臣台马有圉牛有牧以待百事又吕氏春秋谓舜自为诗曰普天之下莫非王土率土之滨莫非王臣此疑与咸丘蒙同一说而托之于舜耳丰熙云大夫指官长之预国政者均说文云平徧也王安石云取数多谓之贤礼记曰某贤于某若干与此同义小尔雅云我从事独贤劳事独多也谢枋得云自古君子常任其劳小人常处其逸君子常任其忧小人常享其乐虽曰役使不均我独贤劳然君子本心亦不愿逸乐也朱子云不斥王而曰大夫诗人之忠厚如此愚按此亦指其实言之玩後章燕燕居息等语则大夫不止一人凡正大夫及三事所属之大夫皆有故统以大夫言上章虽言偕偕士子朝夕从事玩此则士子之中已又独当其劳也又左襄十三年晋侯使士句将中军辞曰伯游长君子曰让礼之主也范宣子让其下皆让晋国以平数世赖之刑善也夫一人刑善百姓休和可不务乎周之兴也其诗曰仪刑文王万邦作孚言刑善也及其衰也其诗曰大夫不均我从事独贤言不让也世之治也君子尚能而让其下小人农力以事其上是以上下有礼而谗慝黜远繇不争也谓之懿德及其乱也君子称其功以加小人小人伐其技以冯君子是以上下无礼乱虐并生繇争善也谓之昏德国家之敝恒必繇之此以独贤为不让其旨又异】四牡彭彭【叶阳韵蒲光翻说文作騶騶】王事傍傍【阳韵】嘉我未老鲜我方将【叶阳韵资良翻】旅【丰本作吕】力方刚【阳韵】经营四方【阳韵 赋也彭彭当依说文作騶騶马盛也傍通作旁侧出无方所之意彭彭四牡奉使时所乘而又每有意外之王事纷至沓来所以劳而不得息也嘉美也鲜通作尠少也朱子云以为少而难得也将毛传训壮当通作壮未老以年言方将以力言下文言旅力方刚正其实也旅毛云衆也严云秦誓旅力既愆夏氏解谓衆力如目力耳力手力足力也或说旅为陈如陈力就列之陈然陈力方刚则不辵矣经经画营营造如人作室曰经之营之是也言我之从事所以独贤于诸大夫者以王美我之年尚未老且气力方壮亦少有如我者如耳目聪明手足轻捷之类无在不见其刚强故独使我区画造作四方之事也谢云此诗本为役使不均独劳于王事而作反以王为知己忠厚之至也】或燕燕【汉书作宴宴】居息【职韵】或尽【左传丰本俱作憊】瘁【左传丰本俱作悴汉书作頽】事国【职韵】或息偃【丰本作偃】在牀【阳韵】或不已于行【叶阳韵户郎翻】或不知叫【陆德明本作𪔐】号【叶豪韵呼刀翻丰本作号】或惨惨【陆本作燥燥】劬劳【豪韵】或栖【丰本作?大全朱传俱作栖】迟偃【丰本作偃】仰【养韵陆本丰本俱作印】或王事鞅掌【养韵】或湛【家讳】乐【音络】饮酒【有韵】或惨惨畏咎【有韵】或出入风议【叶支韵鱼鞅翻】或靡事不为【支韵赋也刘公瑾云以下凡十二句为偶皆以他人之逸乐对己之忧劳所以形容不均之意愚按单句六或字分六项人看首言燕燕居息盖指正大夫也自息偃在牀而後其情状各不同则三事大夫之辈耳双句分六项总是自道以与上文对举相形故皆用或字燕燕当依汉书作宴宴安也辅广云重言之见安之甚也愚按六官之长养尊处优故特以燕燕言居谓私居息谓休息言惟休息于私居而已无所事事也瘁病也尽瘁犹言尽劳与燕燕对看事国严云从事于国也与居息对看左昭八年晋侯谓伯瑕曰吾所问日食从矣可常乎对曰不可六物不同民心不壹事序不类官职不则同始异终胡可常也诗曰或燕燕居息或尽瘁事国其异终也如是偃说文云僵也吴越春秋云迎风则偃背风则仆

仆是前覆偃是却倒牀说文云安身之坐者刘熙云牀装也所以自装载徐铉云左传蘧子冯诈病掘地下水而牀焉至于恭坐则席也故从月月象人斜身有所倚着愚按休息而偃卧于牀如今仕者之引疾在告也已止也不止于行谓日驰驱于道路若病则不能矣叫徐铉云直声呼也释文作跽谓大呼也周礼鸡人掌夜譟旦跽百官即此号亦呼也一云教令也孔颖达云或不知叫号者居家用逸不知上有徵发呼召也愚按此有意违命而佯为不知者惨惨当依释文作懔懔以别于後之惨惨畏咎懔说文云愁不安也与下劬劳连言所谓劳人懔懔也其劳频数曰劬劳栖迟解见衡门篇仰举首也李氏云有栖迟于家而偃仰者愚按此如今仕者之请急休沐或偃或仰则象其夷犹自得之容耳鞅说文云颈组也孔云马鞅之鞅掌说文云手中也控马者执组在手一释手则马逸矣身肩王事如纳鞅于掌中无时可以暂释则虽欲不夙夜在公亦不可得寧复有栖迟于家之日乎说文云嫫乐也从女今文与从水通用又说文云酖乐酒也徐云酖酖然安且乐也观下文言饮酒则通云酖亦可此以酖酖而旷废职业者亦其咎责不及故能适意如是惨尔雅云夏也咎说文云灾也从人从各各者相违也郑云犹罪过也救过不暇其焉能乐畏者乐之反也风如马牛其风之风郑云犹放也言其议论不根如风飘荡且出亦议论入亦议论则天下事之不经其议论者盖亦少矣然何尝以身亲之乎而我则百责交萃至于无所不为雨无正之诗曰哀哉不能言匪舌是出维躬是瘁哿矣能言巧言如流俾躬处休正此诗之谓也以上两两相形其不均有如此者刘氏云彼或如彼我则如此以彼为贤耶则国事待我而集以我为贤耶则厚禄居彼为多丁奉云或字十二叠诗中奇格也後代韩昌黎南山诗文信国正气歌皆祖诸此】

北山四章三章章六句一章十二句【旧作六句自或燕燕而下分为三章章各四句子贡传以为懿王时诗邹忠胤谏其说引竹书纪年注谓懿王之世兴居无节号令不时挈壶氏不能供其职诸侯于是携德按此乃全抄东方未明篇诗序固齐诗也沈约意其在懿王时遂以属之耳然即如所云亦于役使不均何与申培说及朱传皆谓大夫行役作此与序略同辨已见前】

何草不黄周室将亡征役不息行者苦之故作此诗【出朱传曰周将亡则朱子亦以为在幽王之世矣此诗与北山相表里北山为行役之士所作故其诗曰偕偕士子朝夕从事又曰大夫不均我从事独贤此诗为从役行役之人所作故曰哀我征夫独为非民盖自道也又曰有栈之车行彼周道正指士也二诗中亦皆有经营四方之语其为同时共事明矣】

何草【丰氏本作𦰩後同】不黄【阳韵】何日不行【叶阳韵户郎翻】何人不将【叶阳韵资良翻】经营四方【阳韵 赋也朱子云草衰则黄郑玄云岁晚矣何草而不黄乎言草皆黄也孔颖达云何草不黄是见黄而怨若草大始去或欲黄乃行不应见草之黄嗟怨若此明草有生死之期行者覩物而思日月长久征行不息是其所以怨也何日不行言岁已将尽可休息矣而行犹未已正与北山篇不已于行语意相类此二句只据自己言何人不将二句推广言之见行役者不独一人所以为时事慨也将有相扶持之义字从寸寸者手也言何人不为奉王命以经营四方之故而相将以偕行乎经营解见北山篇幽王之世行役不息之事无所考然读小明大东诸诗意必政令繁兴诛求无艺其仆仆道路之象殆可想见诗即史也】何草不玄【先韵亦叶真韵胡匀翻】何人不矜【叶真韵渠中翻亦叶先韵姑元翻韩诗丰

本俱作鰥】哀我征夫【丰本作征夫作人斯】独为匪民【真韵亦叶先韵弥延翻赋也玄郑云赤黑色始春之时草芽孽者将生必玄于此时也孔云玄色在緇缁之间春秋元命苞稽耀嘉皆言夏以十二月为正物生色黑故知始春之时草牙孽者将生必玄也王安石云草既黄而死矣岁暮之时死而复生其色既玄则又改岁矣焦氏易林云何草不黄至未尽玄室家分离悲愁于心按小明篇大夫以十二月西征中历一岁至後岁之二月犹未得归四月篇大夫亦以去岁六月征伐南国至今岁四月犹未得归以此而推当时征途所见其为草之历黄而玄者多矣矜兢音同通用兢者战栗之貌凡怜人者必为之心寒色战故矜有怜义何人不矜言岂有人而不相矜怜者乎先儒谓天地之性人为贵人之于人尤为同类而相亲正此意也草既黄而又玄生意之不断也人皆有不忍人之心性体之本然也哀我征夫虽主我言凡同时行役者皆兼举之犹云我辈也匪通作非後同孔云既久役如此哀我征行之夫岂独为非民乎若亦是民当休息何为使之从役久而不得归也谢枋得云东山采薇出车杜诸诗叙情悯劳皆以室家之望者为说同为天民血气嗜欲岂有异哉先王以民待民幽王之待民如犬马耳故曰哀我征夫独为匪民】匪兕匪虎【麋韵】率彼旷野【叶麋韵读如竖上主翻】哀我征夫朝【丰本作晷】夕不暇【叶麋韵後五翻 赋也兕解见吉日篇虎说文云山兽之君也格物论云虎属阳兽状如猫而大如黄牛黑章鉤爪踞牙舌不大于掌生倒刺须硬尖而光横行而妥尾其怒而吼也声如雷百兽为之震恐而风从之生考异邮云三九二十七日阳气成故虎七月而生阳立于七故虎首尾长七尺般般文者阴阳襍也癸辛襍志云虎不行曲路率通作循也从行故有循义旷颜师古云广也毛云空也野者郊外通名陆佃云言兕抵触虎抐噬先王驱而远之则率彼旷野兕虎之所宜今征人如此则可哀矣按家语楚昭王聘孔子孔子往拜礼焉路出于陈蔡大夫使徒兵距孔子不得行絶粮七日外无所通孔子乃召子路而问焉曰匪兕匪虎率彼旷野吾道非乎奚为至于此乎引诗之意亦为被人驱逐使循行于旷野而无所栖泊也孔云我此役人非是兕非是虎何为循旷野之中与兕虎无异乎时既视民如禽兽故哀我此征行之夫朝夕常行而不得闲暇】有芄者狐率彼幽草【皓韵】有栈之车行彼周道【皓韵兴也芄】

【说文云草盛貌徐锴云泛泛然若风之起也狐解见有狐篇以芄言狐者丘氏云毛尾长貌幽说文云隐也幽草谓草中也孔云狐草行草止罗愿云雄狐者君子之象也春秋秦穆伐晋筮之吉曰获其雄狐释者曰夫狐蛊必其君也既而获晋惠公栈说文云棚也竹木之车曰栈按周礼巾车职云服车五乘孤乘夏篆卿乘夏纁大夫乘墨车士乘栈车庶人乘役车注谓服车服事者之车也夏即夏翟之夏五采备乃为夏轂有约曰篆夏篆谓以五采画轂约也夏纁亦五采画如纁帛无篆耳墨车无画以墨漆革车而已栈车谓不革鞅而漆之役车方箱可载任器以共役又大昏礼摄盛亦得乘墨车考工记舆人云栈车欲弇饰车欲侈注谓栈车无革鞅舆亦可折坏故欲弇向内为之饰车以革鞅舆不畏折坏故欲得向外後也未命为士者不得乘饰车士得乘饰车者後异代法也又仪礼既夕篇云宾奠币于栈程良孺云车之上者有栈今人编竹置木亦谓之栈则栈车者编竹为舆也周道谓周之路孔云狐本是草中之兽故可循彼幽草此人本非禽兽何为行彼周道之上常在外野与狐在幽草中同乎故伤之也严粲云士乘栈车行于周之道路非特民也愚按此士盖征夫所从者】

何草不黄四章章四句【序云下国刺幽王也四夷交侵中国背叛用兵不息视民如禽兽君

子忧之故作是诗也按经有征夫之语故序以用兵不息为言然出使行役皆名曰征不必征伐也至此诗乃征夫所作语气昭然与下国无预或疑为举火召诸侯师之事其曰栈车则谓因兵车不足而取之为物力凋敝之证然篇中言经营四方岂云命诸侯勤王乎子贡传有桓王卒苦之五字而桓王下缺二字申培说直云桓王之世伐滕薛唐杞诸国连岁不息周人苦之而作是诗今按伐滕薛唐杞事无所考邹忠胤以为先是鲁隐五年曲沃庄伯以郑人邢人伐翼王使尹氏武氏助之无何而曲沃叛王乃始命虢公伐曲沃而立哀侯于翼喜怒总以恣其私不足彰天讨而三时之中再寻干戈轻用民力如此嗣是鲁隐九年宋公不王郑伯为王左卿士以王命讨之徵兵畿内可知已鲁桓四年冬王师秦伯围魏执芮伯以归师竟已甚明年遂有伐郑之役繻葛中肩王令益不行于天下嗣是曲沃灭翼王命虢仲立晋哀侯之弟缙于晋又十年春虢仲谮其大夫詹父詹父有辞以王师伐虢终桓王之世无岁不有兵革军旅驿骚非止春秋所书伐郑一役而已此正所谓经营四方者按如邹说归之桓王亦近似但篇中何故专指士之栈车为言明与北山偕偕士子之言脗合故仍定以为幽王世之诗】

小明大夫悔仕于乱世也【出序】遭时不偶役则偏苦行则过期所以悔也【出冯时可诗说 邓元锡云世乱则制命者庇私人而媚贤必寘之艰虞投之烦剧张之深文刺法或制之前或议其後或牵其左右凌挫顿蹙靡所不至已又从而扞斲之盖内不量心外不度力俾进不得遂退不得全必窘其用蔑其名使败涂地而後已也故北山伤其独劳小明畏其罪罟谴怒反覆也如张之罟然罹之岂有脱哉古于危乱不入不居有以也夫愚按此西征大夫困于行役瓜期已踰而代者不至故作此诗观前三章皆曰念彼共人後二章曰无恒安处无恒安息可见当与北山合看篇名小明欧阳修以为大雅明明在下谓之大明小雅明明上天谓之小明自是名篇者偶为志别耳冯谓耿耿小明乃忧之貌故取以命篇亦通】

明明上天照临下土【麋韵】我征徂西至于朁【丰氏本作荒】野【叶麋韵读如竖上主翻】二月【丰本作日】初吉载【丰本作再】离寒暑【叶麋韵读如数爽主翻】心之忧矣其毒大苦【麋韵】念彼共【音恭後同】人涕零【丰本作霏】如雨【麋韵】岂不怀归畏此罪【丰本作臯】罟【麋韵 赋也苏辙云大夫行役久劳而不息故称天之无不照临言臣下无贤劳而不察者也尔雅云春为苍天夏为昊天秋为旻天冬为上天李巡云冬气在上万物伏藏故曰上天陆佃云言时无事在上临下而已今按此以上天对下土则不必泥冬为上天之说诗意呼天而诉之但欲其见察而已故以明明言明明者照也明明在上者以能照为临也郑玄云征行徂往也我行往之西方也孔颖达云野是远称朁盖地名今按朁野未详其地说文训朁为远荒或当是西戎荒服之地耳二月朱子云夏正建卯之月初吉毛传云朔日也孔云以言初而又吉故知朔日也君子举事尚早故以朔为吉周礼正月之吉亦朔日也按二月初吉文系在至于朁野之下当是此时作诗之日非徂征初行之日玩後章云昔我往矣日月方除则知此大夫徂西在前岁之十二月中历一岁至今岁之二月犹未得归故云载离寒暑也载犹更也按载字从车车所以载物而运行者唐虞号年为载取物终更始以年运而往为义上天之载其义亦同离者脱离之离前此历春夏而秋已离乎暑今此历秋冬而春又离乎寒也心之忧矣忧未得归也孔云其忧之甚则如毒药之大苦然共通作供具也共人谓治事之人辅广云即靖共尔位之僚友也愚按此共人盖指在内僚友当出与已代者本安处而不肯供事乃以共人称之亦反词也雨余为零望其来而不来故涕之下有如雨也罟

徐铉云网之总名辅云言其以罪而加人如网罟取物而物有不及知者也愚按此言已本无罪但恐以归获罪故虽过期怀归而终不敢也桓宽云古者行役不踰时春行秋反秋往春来寒暑未变衣服不易固已还矣上不苛扰下不烦劳各修其业安其性今则繇役极远尽寒苦之地危难之处今兹往而来岁还父母延颈而西望男女怨旷而相思故一人行而乡曲恨一人死而万人悲诗曰念彼恭人涕零如雨岂不怀归畏此罪罟】昔我往矣日月方除【叶遇韵读如措苍故翻】曷云其还岁聿云莫【叶遇韵漠故翻】念我独兮我事孔庶【叶遇韵读如素苏故翻】心之忧矣惮【陆德明本丰本俱作瘡】我不暇【叶遇韵胡故翻】念彼共人睠睠【文选注作眷眷】怀顾【遇韵】岂不怀归畏此谴怒【遇韵 赋也日月方除谓十二月也除毛云除陈生新也邢云路云如尧典朔易言丑月岁功将兴正除旧更新之日云聿皆词也还说文云复也当徂征之时预计之曰何时可以言归必岁暮方可竣此役盖以匝岁为期也庶衆也郑云我事独甚衆言王政不均臣事不同也惮说文云忌难也身独而事衆是以心焉怀忧唯忌畏我之力量难支必至于日不暇给也睠顾皆以还视为义所谓内顾也此指共人言谴说文云谪问也念彼在位供事之人方且皆以勤视妻子为念我岂不思家哉只畏上人谴怒之及故不敢耳此章本其于役之始而言之】昔我往矣日月方奥【叶屋韵於六翻丰本作隩】曷云其还政事愈蹙【屋韵】岁聿云莫采萧获菽【屋韵】心之忧矣自诒伊戚【叶屋韵子六翻左传作戚】念彼共人兴言出宿【屋韵】岂不怀归畏此反覆【叶屋韵芳六翻赋也奥说文云宛也室之西南隅朱氏云古人室在东南隅门开东北隅为穴入西北隅为堂西南隅为奥】

【人随进先见东北却到西北然後西南此至深密之地愚按此与尧典厥民隩同义言是时日月正在季冬气方寒而民聚于室之内也愈郑云犹益也蹙说文云迫也何时能来旋乎其如政事纠纷擘画不前愈益蹙迫何哉捋取曰采刈谷曰获萧解见生民篇菽解见七月篇采萧获菽事在秋冬之交言岁行且暮矣人皆有事于此将以为改岁之备也董鼎云采萧所以祭也获菽所以畜也观时之晚所以为畜为祭不得有备故忧之而感也诒通作贻遗也伊语辞戚当依左传作戚即忧也郑云我冒乱世而仕自诒此忧悔仕之辞兴起也言亦语辞宿止也兴言出宿亦指共人言冀其起而出宿于外将来代已也然而不可必也故继之曰我一年役事已竣岂不思归哉但畏此供事之人不循常道反覆而未即来耳反覆二字义互相通但倒上而下即为反易面而背即为覆亦微有辨此章又叙其竣事之际而言之】嗟尔君子无恒安处【叶语韵敞吕翻】靖【外传作静】共【汉书外传丰本俱作恭】尔位正直是与【语韵】神之听之式谷以女【语韵音汝 赋也嗟叹声君子指僚友谢枋得云即所谓共人也无通作毋诚辞也恒说文云常也安处安于其所止之地也苏辙云有久劳于外则必有久安于内者矣故告之使无以安处为常朱子云言当有劳时勿怀安也靖说文云立𡵓也𡵓者亭安也盖亭亭安立而不迁之意书曰自靖解者以为安其义之所当为是也共通作供靖共尔位勗之自靖以供其职则东西南北自当唯命是从矣正者无邪直者无曲此正直指人言与者与之游也僚友中有不正不直之人思中人之欢心必导以择便偷安之说故言此以深规戒之末冀鉴于神亦怨语也听犹察也式用也谷善也犹言福也春秋传云能左右之曰以女即尔也孔云女者相於之辞礼表記篇子曰事君不下达不尚辞非其人弗自小雅曰靖共尔位正直是与神之听之式谷以女疏云言若见正直善人于是与之为朋友如此则神明听聆女之所为用此福祿以与女也徐干引此诗亦云君子之交人也欢而不媾和而不同好而

不佞诈学而不虚行易亲而难媚多德而寡非故无絶交无畔朋书曰慎始而敬终终以不困王应麟云神之听之终和且平朋友之信可质于神明神之听之式谷以女正直之道无愧于幽隐愚按此下二章皆反语玩一无字可见责僚友正所以自伤也】嗟尔君子无【春秋繁露作勿汉书作毋】恒【汉书作常】安息【职韵】靖【繁露作静】共【外传丰本俱作恭】尔位好【去声】是正直【职韵】神之听之介尔景福【叶职韵笔力翻赋也安息比安处较深息有休息之义言了不事事也好犹慕也此正直主已言言在已当以正直之道为】

【好同为王臣劳逸均之若居人于劳而自处以逸不正不直孰甚焉马融云有国之建百工惟才守位谨常非忠之道故君子之事上也入则献其谋出则行其政居则思其道动则有仪秉职不回盖百工之忠也诗云靖共尔位好是正直又礼缙衣篇子曰有国家者章善瘝恶以示民厚则民情不贰亦引此诗此以好是正直为爱好正直之人又是一说介郑云助也按古者主有摈客有介故以介为助景说文云光也景福谓彰明可见之福言谷言福即永保禄位之意荀子引此诗而云神莫大于化道福莫长于无祸董仲舒云圣人于鬼神也畏之而不敢欺也信之而不独任事之而不专恃恃其公报有德也幸其不私与人福也其见于诗曰嗟尔君子勿恒安息静共尔位好是正直神之听之介尔景福正直者得福也不正者不得福此其法也左襄七年晋韩献子告老公族穆子有废疾将立之辞曰无忌不才让其可乎请立起也与田苏游而曰好仁诗曰靖共尔位好是正直神之听之介尔景福恤民为德正直为正正曲为直参和为仁如是则神听之介福降之立之不亦可乎庚戌使宣子朝遂老宣于即韩起也】

小明五章三章章十二句二章章六句【丰氏本作四章章十二句合嗟尔君子二章为一章子贡传有厉王出居于彘六字下皆阙文中培说亦云厉王流于彘大夫之从行者历时既久悲伤而作按此于诗义絶不相蒙正以其中有念彼共人一语为指共伯和耳其妖妄如此】

匪风桧之君子行役适周见周道衰微归而感伤之作【序云思周道也国小政乱忧及祸难而思周道焉子贡传有桧之君子四字而其下阙文申培说及朱子皆以为周室衰微贤人忧之而作愚按系此诗桧风之末则作此诗者必桧之贤者也韩非子云郑桓公将欲袭桧先问桧之豪杰良臣辨智果敢之士尽与其名姓择桧之良田赂之为官爵之名而书之因为设坛场郭门之外而理之衅之以鸡豕若盟状郃君以为内难也而尽杀其良臣桓公袭郃遂取之今观此诗则桧果非无贤臣也特为郑桓所问耳国安能不亡】

匪风发【叶曷韵北末翻】兮匪车偈【叶曷韵胡葛翻前汉书丰氏本俱作揭韩诗外传作扬】兮顾瞻周道中心怛【曷韵前汉书丰本俱作 】兮【赋也匪非通发钱氏云风大起也严粲云今俗呼大风为风发偈博雅云疾也按说文无偈字当依前汉书作揭云高举也车升高则在车上者必震荡而不安也此亦车中即事之语郑玄云回首曰顾广韵云仰视曰瞻与民具尔瞻之瞻同周道朱子云适周之路也孔颖达云言顾瞻周道则周道已过回首顾之愚谓诗言顾瞻虽指适周之路而意之所托则仍在西周盛时其礼乐刑政布在方策者与今之所行大不相同如孔子所谓我观周道幽厉伤之是也孔云怛者惊痛之言诗人言我中心

之所以惊怛者非关风之大作也非关车之高举也直谓周道日非回首仰观不觉动伤今思昔之感耳又韩诗外传云国无道则飘风厉疾暴雨折木阴阳错氛夏寒冬温春热秋荣日月无光星辰错行民多疾病国多不祥羣生不壽而五谷不登当成周之时阴阳调寒暑平羣生遂万物宁故曰其风治其乐连其驱马舒其民依依其行迟迟其意好好诗曰匪风发兮匪车扬兮顾瞻周道中心怛兮前汉王吉治韩诗其上昌邑王疏云臣闻古者师日行三十里吉行五十里引此诗说曰是非古之风也发发者是非古之车也揭揭者盖伤之也今按毛传之解同此但玩诗人语意殊不尔故不从】 匪风飘【叶啸韵匹妙翻】 兮匪车嘌【叶啸韵匹妙翻说文作𠂔释文作票丰本作𠂔】 兮顾瞻周道中心吊【啸韵】 兮【赋也尔雅说文皆云回风为飘李巡云旋风也严云今考尔雅扶摇谓之森孙炎云回风从下上曰森又云回风为飘与森同音义别盖回风谓之飘其回风自下而上则谓之森嘌说文云疾也字从口盖言声之疾也程大昌云言嘌嘌无节度也上言风发未明其为何风此言飘则所发者乃回风也上言车偈则行之不安此言嘌则其不安之见于声者也吊毛云伤也上言怛此言吊先惊痛而後悲伤也】 谁能亨【音烹】 鱼漑【说文释文俱作𩚑】 之釜鬻【侵韵】 谁将西归怀之好音【侵韵比也亨享同字本进熟之义故又借为熟物之名後人加火字于亨下非古文也漑通作𩚑说文毛传皆云】

【滌也少牢礼祭之日雍人漑鼎廩人漑甗是洗器之名鬻说文云大釜也又陆德明云鼎大上小下若甗曰鬻孔云尔雅?谓之鬻鬻鎔也孙炎云关东谓甗为鬻凉州谓甗为鎔然则鬻是甗非釜类烹鱼用釜不用甗双举者以其俱在食器故连言耳愚按鬻果是甗则非烹鱼之器不应与釜并言政当依陆氏解其形若甗耳非便可以鬻当甗也烹鱼以喻治国曰漑之釜鬻者取洗濯更新之义以喻当改弦易辙之意犹易所谓鼎颠趾利出否者与下文怀之好音相照郑云桧在周之东故言西归孔云桧在荥阳周都丰镐周在于西按匪风作于幽王之世周犹都镐故云然怀抱也好音谓安民致治之言貽之好音使之怀之倒句法也言谁有将西归而见周天子者将以兴道致治之理告之使之旷然一大变革其政以复文武成康之盛母徒使人瞻周道而兴感也吕祖谦云匪风思周道何也曰政出天子则强不陵弱各得其所政出诸侯则徵发之烦共亿之困侵伐之暴惟小国偏受其祸所以睠怀宗周为独切也战国时厉喜谓韩王曰大国恶有天子而小国利之以此诗验之其理益明贾谊欲衆建诸侯而少其力虽其言略而不精亦可谓少知治体矣章潢曰读素冠而兴孝思读匪风而动忠义故曰兴于诗】

匪风三章章四句【王符云匪风冀君先教也会仲不悟重氏伐之上下不能相使禁罚不行遂以见亡所谓先教未详其旨】

素冠刺不能三年也【出序及朱传子贡传申培说俱同 此诗在邶风中愚意当为刺邶君而作邶君在位好洁衣服计其居先君之丧服制必不能如礼故诗以为刺】

庶见素冠【寒韵】 兮棘【崔灵恩注丰氏本俱作𣎵】 人栾栾【寒韵说文作𣎵𣎵丰本作𣎵𣎵】 兮劳心博博【寒韵】 兮【赋也庶尔雅云幸也庶见者忧不得见之辞素冠王肃郑玄孙毓皆以为大祥之冠玉藻云缟冠素紕既祥之冠也注云紕缘边也既祥祭而服之也间

传注云黑经白纬曰缟其冠用缟以素为紕故谓之素冠也毛传以为练冠按礼三年之丧十三月而练孔颖达云毛以此冠练布使熟其色益白是以谓之素焉然经传之言素者皆谓白绢未有以布为素者则知素冠非练也邹忠胤云人子于亲丧再期则大祥祥後则将即吉于是不以布为冠而以缟然犹不以采为缘而以素盖虽渐易凶而不敢遽用吉此与丧服小记所谓朝服缟冠除丧不类小记曰除殇之丧者其祭也必玄除成丧者其祭也朝服缟冠此则期功之丧除服所通用不必三年丧也棘韵会云羸瘠也季本云因棘刺而言棘刺叶少而体常露故谓居丧而骨立见者为棘人愚按即此冠素冠之人也栾当依说文作裔云臞也臞者少肉也曰栾栾者毁瘠之甚也劳心诗人自谓也说文无博字当依作团云圜也结聚不散之谓世衰礼废庶几有此栾栾之棘人使我得而一见之而其如终不可见何故劳心而至于博博也陈际泰云上古质朴心丧父母有终身之哀痛焉中世稍漓心不可测也于是制为丧服缘情以为之节文非止于三年然而遂之则是无已也至春秋而废久矣悲夫】庶见素衣【微韵亦叶支韵读如依鱼羈翻】兮我心伤悲【支韵】兮聊与子

同归【微韵亦叶支韵读如岵区韦翻】兮【赋也毛传云素冠故素衣也又礼深衣云孤子衣纯以素我心伤悲者哀其孝也子指棘人後仿此聊与子同归者言世有此敦崇古礼之人则凡事必皆能如礼自此我之诸凡趋向皆欲与之同归也】庶见素韠【质韵】兮我心蕴结【叶质韵激质翻】兮聊与子如一【质韵】兮【赋也韠说文云韍也所以蔽前以韦为之玉藻云韠君朱大夫素士爵韦天子直公侯前後方大夫前方後挫角士前後正下广二尺上广一尺长二寸其颈五寸古者席地而坐以临俎豆故设蔽膝以备濡渍郑玄云冕服谓之韍他服谓之韠又孔云古者佃渔而食皆衣其皮先知蔽前後知蔽後後王易以布帛而犹存其蔽前者不忘本也陈祥道云衣之上韦犹尊上玄酒俎上生鱼也郑氏谓衣之上韠者执事以蔽裳为敬与不忘其本之说戾矣孔云丧服斩衰有衰裳經带而已不言其韠檀弓说既练之服云练衣黄里緇缘葛要經绳屨无絢角瑱鹿裘亦不言有韠则丧服始终皆无韠矣礼大祥祭服朝服缟冠朝服之制緇带素韠韠从裳色素韠是大祥祭服之韠故毛公意亦谓卒章思大祥之人也邹忠胤云间传曰又期而大祥素缟麻衣是则素冠素衣素韠特服于祥祭之日祭讫则反服微凶之深衣以寄其余哀至间一月而禫禫而緇斯无不佩矣诗人所愿见谓其能举祥祭者耳终丧而後有祥丧礼不终则未祥而服已除无论禫也此素者何从见之蕴说文云积也本作蕴左传蕴崇解云积之低为蕴堆之高为崇结说文云締也蕴结谓积想系思而不可解之意与子如一者言凡可遵先王之典礼而立于无过之地皆欲与之为一即同归之意但归以事言一以心言辅广云素衣素冠不祥之服也常情之所厌见也桧国之俗不能行三年之丧则不复见此既祥之衣冠矣而当时贤者庶几见之而不可得则至于忧劳如比是其心必有大不安者也幸而得见之则又为之爱慕而欲与同归为一焉是又必有大慊于其心者也此秉彝之心也先王之制丧服亦以是心而已岂强民而为之哉方弘静云三年之丧其不尽行也久哉孟子云春秋未远也而滕之父兄忧曰吾宗国鲁先君莫之行吾先君亦莫之行明王不兴道德不一风俗不同丧亲如礼者鲜矣又按礼记大全云从祥至吉凡服有六祥祭朝服缟冠一也祥讫素缟麻衣二也禫祭玄冠黄裳三也禫讫朝服祔冠四也踰月吉祭玄冠朝服五也既祭玄端而居六也】

素冠三章章三句【旧说皆以为慕见孝子之辞朱得之深不谓然以为此诗鉴羔裘之骄奢

冀得见勤俭劳苦之人也悲伤其骄奢欲同归于勤苦谓欲见行丧礼者迂而凿也今按素冠明是大祥之冠素韠明是大祥祭服棘人桀桀明是孝子毁瘠之状则旧说固未可废】

逍遥【本名羔裘嫌与郑风唐风篇同摘用首句二字为别】郈大夫以道去其君也国小而迫郈君不用道好洁其衣服逍遥游燕而不能自强于政治故作是诗也【出序 郑语史伯谓郑桓公曰郈仲恃险有骄侈怠慢之心而加之以贪冒今按序所云洁其衣服逍遥游燕近于骄侈怠慢非其有恃必不至此大夫知其国之将亡而谏必不听故去之】

羔裘【丰氏本作求下同】逍【说文作消】遥【萧韵说文作摇】狐裘以朝【萧韵】岂不尔思劳心忉忉【叶萧韵读如凋丁聊翻 赋也郑玄云诸侯之朝服缁衣羔裘逍遥毛传云游燕也严粲云狐裘有白有青有黄玉藻谓君衣狐白裘锦衣以裼之此狐白裘也又云君子狐青裘豹褭玄绀衣以裼之此狐青裘也又云狐裘黄衣以裼之此狐黄裘也郑氏以狐白之上加皮弁服天子以日视朝诸侯在天子之朝亦服之以黄衣狐裘为大蜡之後作息民之祭则服之黄衣黄冠而祭息田夫也引此为证以狐青为臣下之服诸侯不服之玉藻称君子狐青裘注以君子为大夫士也此诗狐裘不指何色狐青为臣下之服非桧君所服桧君好洁其衣服亦必不服狐黄当从苏辙之说以为狐白然诗人之意非以羔裘狐裘为大故而以逍遥翱翔为可忧也陈祥道则谓狐白裘为君之燕服狐青裘为大夫士之燕服邹忠胤云少仪曰衣服在躬而不知其名为罔盖羔裘法服也狐裘燕服也羔裘何以为法服春秋繁露曰羔有角而不用如好仁者执之不鸣杀之不号类死义者乳必跪而受类知礼者故羊之为言犹祥也君纯羔而臣以豹饰在朝皆得服之狐裘何以为燕服埤雅曰狐性好疑貉性好睡又皆藏兽不可以有为故狐貉之厚以居疑斯戒睡斯安取燕息之义今逍遥也而以羔裘是法服为嬉游之具矣视朝也而以狐裘是临御为?媒之场矣苏子繇谓锦衣狐裘朝天子之服此本郑氏臆说按玉藻但云君衣狐白裘锦衣以裼之安在其为朝天子陈氏祥道不从之是也狐比羔为贱故朝服用羔燕服用狐而桧君一切反其常则凡败度败礼恣情颠倒何所不至其厘诗人之劳心岂独以鲜衣故哉愚按先言逍遥後言以朝则是以逍遥为急务而朝在所缓矣但举首句已见其不能自强于政治而裘服反常犹其後耳说文无忉字当作怵云悲也庄子云怵乎若婴儿之失其母是也悲而不已故重言之曰忉忉严云桧君者当深思远虑孜孜汲汲求所以为自强之计今乃偷安岁月坐而待亡大夫谏而不听故去之虽去国而不忘君故言我岂不思尔乎实思之而劳心忉忉也朱子云孟子去齐其心盖如此云】

羔裘翱翔【阳韵】狐裘在堂【阳韵】岂不尔思我心忧伤【阳韵 赋也说文训翔为飞训翱但云翱翔也终未详翱字之义按翱字左施皐皐者气之进也翱翔犹云高飞也上章言逍遥谓趋而至远即远游也此章言翱翔谓游而不止犹鸟之高飞而不下也孔颖达云上言以朝谓日出视朝此云在堂谓正寝之堂人君日出视朝乃退适路寝以听大夫所治之政二者于礼同服羔裘今桧君皆用狐裘故二章各举其一忧通作?说文云愁也伤说文云创也人遭创则痛曰忧伤者臣之于君荣辱一体休戚相关见君之所行如此而自伤无如之何故不徒忧之而又痛之】羔裘如膏【叶号韵居号翻】日出有曜【叶号韵于号翻】岂不尔思中心是悼【号韵赋也韵会云以脂膏润物曰膏孔云此言裘色润泽如脂膏严云凡人忧劳戒惧则不暇鲜其衣禹恶衣文王卑服卫文大布之衣是也今桧君衣服鲜明如此其志虑凡近可见矣说文无曜字当作惧云照也陆佃云言日出有曜然後见其如膏且亦听朝之时也而

反以燕游又与狐裘以朝狐裘在堂异矣故是诗後之也愚按此如膏正于游燕之时见之上言以朝次言在堂则游燕之後尚有视朝适寝之时今并其以朝在堂者而亦无之则自辨色而起以至竟日皆游燕也悼说文云惧也陈楚谓惧曰悼又毛云动也盖谓心神震动亦惧意也首言劳心忉忉悲其君之失道也继言我心忧伤痛已之不能匡救也此言中心是悼则惧其国终不可保矣】逍遥三章章四句【子贡传阙文申培说云桧君不能自强于政治国人忧之而作今玩诗意是大夫去国之语从序为长又王符潜夫论云会在河雒之间其君骄贪嗇俭灭爵损禄羣臣卑让上下不临诗人忧之故作羔裘闵其痛悼也会仲不悟重氏伐之上下不能相使遂以亡愚按逸周书史记解亦云昔有郃君嗇俭灭爵损禄羣臣卑让上下不临禁罚不行重氏伐之郃君以亡与潜夫之语相合然史记解乃周穆王所作以命左史戎夫者其非诗之郃国明甚及考竹书载帝啗十六年使重师师灭有郃则史记所述郃亡政帝啗时事而王符乃取以解此诗何其罔也】

丘中有麻刺郑桓公也桓公处于留与郃君夫人叔妘通焉诗人托为叔妘之辞以丑之【春秋公羊传云古者郑国处于留先郑伯有善于郃公者通乎夫人以取其国而迁郑焉而野留今按郑语幽王八年桓公为司徒问于史伯曰王室多故余惧及焉其何所可以逃死史伯对曰其济雒河颍之间乎是其子男之国虢郃为大虢叔恃势郃仲恃险是皆有骄侈怠慢之心而加之以贪冒君若以周难之故寄孥与贿焉不敢不许周乱而弊是骄而贪必将背君君若以成周之衆奉辞伐罪无不克矣若克二邑鄢蔽补丹依?历莘君之土也若前莘後河右雒左济主茅騶而食溱洧修典刑以守之惟是可以少固又周语富辰曰昔鄢之亡也繇仲任密须繇伯姑郃繇叔妘聃繇郑姬息繇郑姊是皆外利离亲者也参观此两说郑伯以寄孥于郃故得与叔妘通而叔妘以行淫辟求利于外故富辰谓之外利郃风莠楚之刺繇斯而作是则公羊之言不为无据矣此诗篇次本在王风之末以郑桓公初封国在畿内然亦以其为郑事故与郑风之卷相连朱子能知旧说之非直谓妇人望其所与私者而不来贼此其于诗意固自脗合而特不知其为谁而作惜无以公羊传之言告之者又按竹书纪幽王二年晋文侯同王子多父伐郃克之乃居郑父之丘是为郑桓公而班固地理志则云桓公死其子武公与平王东迁卒取史伯所云十邑之地食溱洧焉韦昭亦引唐尚书云郃郑武公灭之似与竹书异者盖幽王二年第伐郃克之而已未灭其国至平王六年竹书始记郑迁于溱洧斯则郃国已灭正当武公之时可知寄孥贿通叔妘为桓公之事而灭郃者乃武公也】

丘中有麻【韵亦叶歌韵谟婆翻】彼留子嗟【麻韵亦叶歌韵曹哥翻】彼留子嗟【见上】将其来施施【叶麻韵时嗟翻亦叶歌韵疎何翻顔之推家训云毛传郑笺韩诗重为施施河北毛诗皆云施施江南旧本悉单为施俗遂是之恐有少误兴也丘说文云土之高也麻麦皆五谷之一麻枲同类无实曰枲有实曰麻本草云麻一名麻勃此麻上花勃勃者麻子味甘平无毒园圃所蒔即今人所作布者春秋说题辞云麻之为言微也阴精寢密女作織微也宋均云麻三变生成形一变也沤取皮二变也积成为缕三变也愚按麻有三变诗之取兴盖疑桓公之多变态犹之麻也留地名路史云留国陶唐氏之後妘姓愚按留後入于郑或先为王所灭而以之封郑或郑自取之莫能详也孟康云留郑邑後为陈所并故曰陈留留子指郑伯也隐其国爵而以留子呼之盖自丑其行而忌讳之意亦犹氓篇之妇人呼夫为复关也嗟说文云咨也甫呼留子而嗟叹之辞即与之俱伤其不得见也将犹言方且也曰将其者望之也

施说文云旗貌徐锴云旗之逶迤也象其来时行动逶迤之状曰施施也言安得彼逶迤而来以慰我之望乎又按麻皮沤之甚长故以兴施施】

丘中有麦【叶职韵纥力翻】彼留子国【职韵】彼留子国【见上】将其来食【职韵 兴也麻麦互相为候麦黄种麻麻黄种麦盖皆同时所有故即所见以起兴罗愿云麦者接絶续乏之谷夏之时旧谷已絶新谷未登民于此时乏食而麦最先熟愚按兴意疑桓公之有他遇亦如麦之可以接絶续乏故不来也彼留子国者指郑伯所居之国即留是也来食朱子云就我而食也麦可养人故以兴来食】

丘中有李【纸韵】彼留之子【纸韵】彼留之子【见上】贻我佩玖【叶纸韵苟起翻 兴也李字从木子盖有二义罗愿谓李木之多子者陆佃则云李非皆酸李东方之果木子也三义皆通罗说为正诗曰何彼穠矣华如桃李兴意盖疑桓公别有所遇悦他人颜色之美而忘已也又陆云李性颇难老老虽枝枯子亦不细然则言李又正以自况耳贻说文云赠遗也佩襍佩也刘熙云陪也言其非一物有陪贰也玖说文云玉之黑色者赵颐光云玖从玉从久意兼声玉久土侵白光似石故从久也之子曩曾贻我以佩玖盖取坚久不渝之意岂其一旦而遂弃我乎】

丘中有麻三章章四句【子贡传丰氏本篇名俱作丘中 序云思贤也庄王不明贤人放逐国人思之而作是诗也子贡传亦云留子贤而退隐周人慕之盖剿袭序说云尔毛传遂以子嗟子国为二贤之字又以子国为子嗟父絶无稽据殆不足信毛又以丘中有麻麦草木乃留氏子之所治而陆佃为之说曰麻以衣之麦以食之又有李焉且皆丘中植之则留子之政修矣此人之所以思之法言曰男子亩妇人桑之谓思吕子曰子产相郑桃李之垂于街者莫之援也然则丘中有李又能使人不盗也愚按似此说诗絶不识比兴之趣固亦甚矣申培说阙】

隰有萋楚疾恣也【出序】邠君之夫人与郑伯通邠君弗禁国人疾之【邠诗作桼邠君字仲序云国人疾桼君之淫恣而思无情慾者也愚按诗言乐无家无室是兼刺夫人不专刺邠君也夫人名叔妘通于郑伯事见丘中有麻篇韦昭云邠妘姓之国叔妘同姓之女为邠夫人】

隰有萋【尔雅作长】楚猗猗其枝【支韵】夭之沃沃乐【音络後同】子之无知【支韵 兴也下湿曰隰萋楚草名尔雅云钼芑也一作钼戈广雅以为鬼桃本草以为羊肠通志以为御戈郭璞云今羊桃也叶似桃叶白子如小麦亦似桃而陆玑则云叶长而狭叶紫赤色其枝茎弱过一尺引蔓于草上或云一名叶楚生平泽中子细如枣核苗弱不能为树蜀本图经云今人呼为细子根似牡丹猗通作倚依也猗通作那那又通作姆说文云弱长貌夭通作杕徐锴云谓草木始生未几得地力而速大也沃说文云溉灌也曰沃沃者润泽之意其叶沃若是也子朱子云指萋楚也呼萋楚为子犹今人对物而言皆称尔也萋楚条弱不能自立过尺则引蔓于草上其枝有所倚着而袅娜下垂但见其沃沃然发荣滋长在萋楚若有以自乐矣然亦惟萋楚无知之物故可以随处蔓引而不择地若人含五常之性各有配偶男有室女有家无相渎也谓之有礼而可以不顾廉耻漫然相附丽为哉此即言桼夫人通乎郑伯之事而桼君不禁故借萋楚反言以志刺其语意恍然胡安国云男女人之大欲存焉欲生于色而纵于淫色出于性目之所视有同美焉不可掩也淫出于气不持其志则放僻趋蹶无不为矣夫以

志徇气肆行欲而不能为之帅至于弃其家国而不顾此天下之大戒也】

隰有萋楚猗猗【猗猗楚辞章句作旖旎】其华【麻韵】夭之沃沃乐子之无家【麻韵 兴也上言无知合君与夫人并刺之此下二章则析言之也乐子之无家刺夫人也女以男为家】隰有萋楚猗猗其实【质韵】夭之沃沃乐子之无室【质韵 兴也先言枝次言华後言实乃立言之序又陆佃云有一种羊桃华实皆连理故诗以刺淫恣乐子之无室刺桧君也男以女为室桧君不能有其室也华之敷在外故以兴家实之含在内故以兴室邓元锡云人生而有知其愿有室家者人之道也以从淫不如无之为愈也深痛至矣】隰有萋楚三章章四句【子贡传申培说丰字本篇名俱作萋楚 子贡传申培说皆以为桧人困于赋役而作朱子解亦然愚初亦从其说因为之义曰萋楚不能自立必引蔓于草上以兴民必附君以有生而今乃憔悴于虐政曾不如无知之萋楚犹得荣茂于光天化日之下也此以解首章亦近之特以後两章有室家之语明是为男女之事而发故定从序焉】

菀柳刺幽王也【出序】侮慢诸侯数徵会之而无信义焉【愚按采菽之序有云幽王侮慢诸侯诸侯来朝不能锡命以礼数徵会之而无信义即移为是诗之本序可史记云褒姒不好笑幽王欲其笑万方故不笑幽王为烽燧大鼓有寇至则举烽火诸侯悉至至而无寇褒姒乃大笑幽王说之为数举烽火其後不信诸侯益亦不至吕氏春秋亦云周宅酆镐近戎人与诸侯约为高葆祷于王路置鼓其上远近相闻即戎寇至传鼓相告诸侯之兵皆至救天子戎寇当至幽王击鼓诸侯之兵皆至褒姒大悦喜之幽王欲褒姒之笑也因数击鼓诸侯之兵数至而无寇至于後戎寇真至幽王身之乃死于骊山之下为天下笑是诗所刺盖在举烽悉至而无寇时也】

有苑者柳不尚息【职韵】焉上帝甚蹈【郑玄本作悼】无【丰氏本作母後同】自昵【叶职韵质力翻】焉俾【陆德明本作卑後同】予靖之後予极【职韵】焉【兴也苑毛传云茂木也国语优施歌曰暇豫之吾吾不如鸟乌人皆集于苑已独集于枯即此苑也柳说文云小杨也郝敬云杨之垂者曰柳柔脆之木也桑车亦曰柳日酉亦曰柳昧谷谓之柳谷盖颓败丧亡之比不者疑辞尚郑玄曰庶几也息本喘息人以一呼一吸为一息故有止义言此苑然森茂之柳虽其枝叶低垂不庶几为行路之人所就之止息焉以兴王室将卑未卜此後天下尚肯宗周否也上帝指天观国策引此句作上天可见蹈毛云动也按动足践履为蹈故有动义无通作母禁止辞昵说文云日近也徐锴云日日相近也亦作昵训为黏考工记凡昵之类不能方是也此指王嬖褒姒言言天意甚变动其去留将不可测王母徒自快意而日与褒姒相亲昵也俾使也靖安也解见小明篇极剧同音古皆以为劳倦之意晋人所谓小极史记屈原传所谓劳苦倦极是也言王举烽伐鼓将使我兵京师以安靖祸乱矣而後乃不然乃徒以欲悦褒姒之故假称有寇使我疲于道路也】有苑者柳不尚惕【霁韵】焉上帝【战国策作天】甚蹈【战国策作神韩诗外传作恹】无自瘵【叶霁韵子例翻】焉【战国策作也】俾予靖之後予迈【叶霁韵力制翻】焉【兴也惕毛传说文皆云息也徐云犹憩也瘵毛传说文皆云病也郭璞云今江东呼病曰瘵上帝甚变动其意将有所转移王母以昵于内嬖之故而卒至于自病也韩诗外传载荀卿为赋谢春申君曰璇玉瑶珠不知佩襍布与锦不知异间姬子都莫之媒娣母力父是之喜以盲为明以聋为聪以是为非以吉为凶呜呼上天曷维其同诗曰上帝甚恹无自瘵焉战国策略同迈说文云远行也言将使我安靖寇乱既

至之後乃徒使我空归而远行也】有鸟高飞亦傳于天【光韵亦叶真韵汀因翻】彼人之心于何其臻【真韵亦叶先韵则然翻】曷予靖之居以凶矜【叶真韵渠巾翻亦叶先韵姑元翻】兴而比也鸟譬褒姒也传通作附取附丽之义故毛传以为至周礼注以为近也天譬王也彼人亦斥褒姒也臻毛传说文皆云至也褒姒一下国之贱女而获宠于王至夺嫡为后譬如鸟之高飞亦既附丽于天矣然犹不知厌足所以蛊惑王者日新无已不识彼人之心将于何底止乎左传云女德无极此之谓也曷说文云何也怪叹之辞矜通作兢毛传云危也按战战兢兢乃危意也时方无寇何故举烽为戏使我来靖乱乎信义不立其何以令徒自居于凶危之地而已厥後申侯与缙西戎犬戎攻幽王幽王举烽火徵兵兵莫至遂杀幽王骊山下虜褒姒尽取周赂而去居以凶矜之言于斯验矣吕氏春秋云褒姒之败乃令幽王好小说以致大灭故形骸相离三公九卿出走此褒姒之所用死而平王所以东徙也】

菀柳三章章六句【序云刺幽王也暴虐无亲而刑罚不中诸侯皆不欲朝言王者之不可朝事也子贡传云厉王不礼于诸侯诸侯相戒以避之申培说云厉王暴虐诸侯相戒而作朱子亦主暴虐不朝之说而不显其世夫君臣大义无所逃于天地之间王虽不道而臣子朝贡之礼岂可以不修果如旧说诸侯相戒不欲朝王乃悖理伤教之甚者夫子岂肯錄之乎】

巧言大夫伤谗也周幽王惑于谗既立伯服逐宜臼复与诸侯为太室之盟将谋伐申以求宜臼而杀之大夫忧丧乱之将至而作此诗【序云刺幽王也大夫伤于谗故作是诗也愚按竹书幽王十年春王及诸侯盟于太室秋九月王师伐申左传椒举亦云周幽王为太室之盟戎狄叛之据此篇有君子屡盟之语则此诗必于盟太室後作也何以盟太室谋伐申也何以谋伐申时宜臼奔于申将求而杀之也谁为此谋者乎虢石父也其事始末在国语言之最详与此诗相印合备錄于此晋语史苏谓献公曰周幽王伐有褒有褒人以褒姒女焉褒姒有宠生伯服于是乎与虢石甫比而立伯服太子出奔申申人缙人召西戎以伐周周于是乎亡郑语史伯谓桓公曰夫虢石甫谗谄巧从之人也而立以为卿士与剽同也弃聘后而立内妾好穷固也侏儒戚施实御在侧近顽童也周法不昭而妇人是行用谗慝也不建立卿士而妖试幸措行暗昧也是物也不可以久申缙西戎方强王室方骚将以纵欲不亦难乎王欲杀太子以成伯服必求之申申人弗畀必伐之若伐申而缙与西戎会以伐周周不守矣缙与西戎方将德申申吕方强其隩受太子亦必可知也王师若在其救之亦必然矣王心怒矣虢公从矣凡周存亡不三稔矣此诗所指僭始既涵正斥褒姒也所指为谗为盗为巧言皆斥石父也曰既微且燿则石父之徒所谓侏儒戚施实御在侧者也曰尔勇伊何尔居徒几何则斥其同谋伐申之事也曰跃跃毚兔遇犬获之则豫策周之必亡于申也然乱之长乱之暴乱之燄总之石父之谗阶之序谓大夫伤于谗犹云所痛伤者在于谗人耳非谓大夫身自遭谗也旧解俱谬】

悠悠昊天曰父母且【叶虞韵丛租翻】无罪无辜【虞韵】乱如此怵【叶虞韵荒鸟翻石经尔雅俱作𢇛】昊天已威【叶贿韵读如猥鄔贿翻】予慎无辜【贿韵】昊天大【韩诗外传引此同陆德明本朱传苏传读诗记诗缉俱作泰新序作太】怵【见上】予慎无辜【见上】赋也悠说文云忧也尔雅云思也悠而又悠者忧思之极故呼昊天而诉之也昊天解见雨无正篇天之于人若父母然亲之之辞也且语助也无罪无辜泛指下民怵通作𢇛覆也昊

天为民父母今乃使无罪无辜之民横遭祸乱之及如此乎其无不笼罩也此以未然言逆料其势必至是也已止威虐也予诗人自谓也谨慎也大如字诗人见天下大乱已将与人俱不免故又呼天而祝之曰昊天庶几其止此威虐乎若予平日兢兢自审未尝有乱国之事固无罪也昊天庶几其大加覆庇乎若予平日兢兢自审未尝有乱国之事固无辜也夫乱阶于一人而祸延于众人使无罪无辜同归于尽生斯世乎何不幸若此诗人灼见周之必亡故先作危惧之语以端郑桓公所谓王室多故余惧及焉其何所可以逃死即此意】乱之初生僭

【读诗记作潜】始既涵【叶咸韵胡谗翻韩诗作减】乱之又生君子信谗【咸韵】君子如怒【叶夔韵暖五翻颜师古纠缪正俗云自古读怒有上去二音今山东河北但知怒有去声失其真也】乱庶遄沮【叶夔韵读如组总古翻】君子如祉【纸韵】乱庶遄已【纸韵兴也僭说文云假也徐铉云按左传惟名与器不可以假人是僭也涵毛云容也此言褒姒不安嬖妾之分当其初兴夺嫡之谋幽王惟欲顺适其意辄涵容之此乱之所自生也君子以位言谓天子也不忍斥言王故但言君子若泛指者然谗指虢石父也石父谗佞与褒姒为比幽王信之于是乎申后废太子宜臼逐此乱之所以又生也然则幽王盖身自开乱而石父其成之者也君子如怒以下四句规王之辞庶庶几也遄尔雅云疾也沮通作阻遏也祉福已止也如怒反信谗而言如祉反涵僭而言谗而信之则有怒其所不当怒者矣君子如有所加谴怒于人必其庶几可以疾速遏乱者怒一人而人知惩然後怒之若惑于谗而妄怒焉乌可也僭而涵之则有祉其所不当祉者矣君子如有所施福泽于人必其庶几可以疾速止乱者福一人而人知劝然後福之若溺于僭而妄祉焉乌可也伤幽王之不然所以致乱冯时可云人主之好恶喜怒乃天之暖清寒暑也当暑而寒当寒而暑物受其灾当怒而喜当喜而怒民逢其乱是故人主大守在于谨藏而深禁怒四时之未尝过则胡不底于理按左昭十七年范武子将老召文子曰變乎吾闻之喜怒以类者鲜易者实多诗曰君子如怒乱庶遄沮君子如祉乱庶遄已君子之喜怒以已乱也正此诗义疏又文二年秦孟明帅师伐晋以报殽之役晋献公以狼瞫为右箕之役先轸黜之瞫怒其友曰盍死之瞫曰周志有之勇则害上不登于明堂死而不义非勇也及彭衙既陈以其属驰秦师死焉晋师从之大败秦师君子谓狼瞫于是乎君子诗曰君子如怒乱庶遄沮怒不作乱而以从师可谓君子矣昭三年齐景公繁于刑有鬻踊者公问晏子曰子之宅近市识贵贱乎对曰踊贵屣贱景公为是省于刑君子曰仁人之言其利溥哉晏子一言而齐侯省刑诗曰君子如祉乱庶遄已其是之谓乎皆借词立义】君子屡盟【叶阳韵谟郎翻】乱是用长【阳韵】君子信盗【号韵】乱是用暴【号韵】盗言孔甘【覃韵】乱是用餽【叶覃韵徒甘翻】匪其止共【叶冬韵居容翻韩诗外传陆本俱作恭陆又云一作供】维【礼记说苑家语外传作惟】王之叩【冬韵 赋也屡古文作娄数也尔雅云疾也亟也义同盟朱子云杀牲歃血告神以相要束也字从明在血上会意明者明神也周礼司盟职云凡邦国有疑会同则掌其盟约之载及其礼仪北面诏明神郑玄云时见曰会殷见曰同非此时而盟谓之数盟之所以数者繇世衰乱多相背违也愚按此正指王及诸侯盟于太室之事史记载褒姒不好笑幽王欲其笑万方故不笑幽王为烽燧大鼓有寇至则举烽火诸侯悉至至而无寇褒姒乃大笑幽王悦之为数举燧火其後不信诸侯盖亦不至此时王亦觉诸侯离心故不得已为盟以要之曰屡盟则前此盖不一盟矣长如字无所以聯诸侯之心而徒乞灵于盟盟可燂亦可寒也此乱之所以未已也荀子云不足于信者诚言故春秋善胥命而诗非屡盟其心一也王符云大人之道周而不比微言相感掩若同符又焉用盟左桓十二年公欲平宋郑冬又会于龟宋公辞平故与郑伯会于武父遂帅师伐宋而战焉宋

无信故也君子曰苟信不继盟无益也诗曰君子屡盟乱是用长无信也襄二十九年郑大夫盟于伯有氏裨谌曰是盟也其与几何诗曰君子屡盟乱是用长今是长乱之道也祸未歇也盗亦指石父也公羊传云贱者穷诸盗孔颖达云穷者尽也小人贱者尽诸盗知盗是恶名故引以证盗为小人也盗昼伏夜行石父投闲伺隙为谗言以中王其状亦如穿窬之盗然故以盗目之暴通作𠂔说文云疾有所趣也王惟信石父不已故乱之来甚疾也按史记称王以虢石父为卿用事国人皆怨夫曰国人怨则诸侯之怨可推使王不信石父亦无事屡盟为矣孔甚甘美也小人之言先务谀说其君甘言卑辞以入之使人君听之不倦如嗜美物而不厌也𩚑本作𩚑说文云食也赵世家云故以齐𩚑天下是也乱是用𩚑言王以身受乱如人之食物也亦与甘字相应礼表記篇子曰君子之接如水小人之接如醴君子淡以成小人甘以坏小雅曰盗言孔甘乱是用𩚑止以心言共通作恭敬也𠂔通作穷困也听小人孔甘之言斌媚曲谨似甚恭敬君者而其心实不然非能安止于恭者也不过欲借此售其奸利徒足蛊惑王心而使王受其困耳礼缁衣篇子曰下难知则君长劳臣仪行不重辞不援其所不及不烦其所不知则君不劳矣小雅曰匪其止共惟王之𠂔家语说苑云鲁哀公问政于孔子孔子曰政在于谕臣子贡问曰政有异乎孔子曰哀公有臣三人内比周公以惑其君外障距诸侯宾客以蔽其明故曰政在谕臣诗不云乎匪其止共惟王之𠂔此伤奸臣蔽主以为乱者也韩诗外传云哀公问取人孔子曰无取健无取佞无取口谗健骄也佞谄也谗诞也故弓调然後求劲焉马服然後求良焉士信慤而後求知焉士不信焉又多知譬之豺与其难以身近也周书曰为虎传翼也不亦殆乎诗曰匪其止恭惟王之𠂔言其不恭其职事而病其主也又云有大忠者有次忠者有下忠者有国贼者不恤乎公道之大义偷合苟同以持禄养者是谓国贼也诗曰匪其止共惟王之𠂔】奕奕寝庙君子作【药韵】之秩秩【说文作𠂔】大猷【汉书注作繇】圣人莫【药韵陆本作漠汉书注作谟】之他【丰本作它】人有心予【史记作余】忖【陆本作寸】度【叶药韵达各翻亦叶陌韵直格翻】之跃跃【史记韩诗丰本俱作趯趯】鼯兔遇犬获【陌韵亦叶药韵黄郭翻】之【史记引此趯趯鼯兔二句在他人有心二句之前赋而比也奕说文云大也兼寝庙而言故重曰奕奕寝庙即太室也书雒诰云王入太室裸疏云清庙有五室中央曰太室周礼注云前曰庙後曰寝方氏云既曰寝又曰庙何也盖王者之于祖宗以人道事之则有寝以神道事之则有庙後汉祭祀志云古宗庙前制庙後制寝以象人之居前有庙後有寝也月令有先荐寝庙诗称寝庙奕奕言相通也庙以藏主以四时祭寝有衣冠几杖象生之具以荐新物秦始出寝起于墓侧汉因而弗改故陵上称寝殿起居衣服象生人之具古寝之意也陈祥道云春秋之时子太叔之庙在道南其寝在道北此古者前庙後寝之遗制也此君子谓天子也作造也即奚斯所作之作按曲礼注曰诸侯春见曰朝受摯于朝受享于庙秋见曰覲一受之于庙朝者位于内朝而序进观者位于庙门外而序入王南面立于依宁而受焉夏宗依春冬遇依秋左传叔向云明王之制使诸侯岁聘以职业间朝以讲礼再朝而会以示威再会而盟以显昭明所谓再会而盟者十二年王一巡守盟于方岳之下也是则王之立宗庙所以待诸侯之朝覲宗遇非为盟而设又盟之事惟时巡与会同有之今幽王与诸侯盟于太室失礼甚矣秩说文云积也字从禾徐铉云有叙之貌猷犹同字谋虑也谋之有关于朝常国典世道人心者谓之猷圣人以庙中之圣人言文武是也莫通作谟徐铉云泛议将定其谋曰谟大猷之定皆拟议自圣人如周礼仪礼之类各有次序不可移易继世而为天子者必本祖宗所定之大猷以出治然後可以仰对宗庙而无媿今幽王于君臣父子夫妇之间举失其道至如伯服石父之辈亦皆于兄弟朋友有慙德焉则天与我民

彝大泯乱而负此尊位多矣他人指申侯也对他人言称予欲幽王之自审也忖度二字互相解皆取量度长短之义时石父与王谋者非大猷是经惟以伐申求太子为事岂知申侯必有所以处此当宜曰奔申之後太室未盟之先竹书所纪申侯聘西戎及鄩事正在幽王九年其心已叵测矣奈何徒见已而不见彼乎董仲舒云物莫无邻察视其外可以见其内也东郭先生云目者心之符也言之者行之指也夫知者之于人也未尝求知而後能之也观容貌察气志定取舍而人情毕矣齐宣王谓孟子曰夫我乃行之反而求之不得吾心夫子言之于我心有戚戚焉凡此皆明于忖度之术者也跃说文云迅也或作趯踊也鼯说文云兔之骏也苍颉解诂云大兔也大兔必狡猾又谓之狡兔格物论云兔鼠形尾匾弯短大如猫毛色褐耳大而锐且卓口缺长须趯捷善走其狡者鼯又其大也有兔故重言跃跃则石父与其徒党之比皆同谋伐申者也犬比申繒犬戎猎所得曰获鼯兔虽善腾跃适与田犬遇或又为所获深危之之辞也其後申人繒人及犬戎入宗周弑王及郑桓公犬戎杀王子伯服执褒姒以归诗人之言于是乎始验史记秦令伯起与韩魏共伐楚楚使黄歇适至于秦乃上书说秦昭王曰昔智氏见伐赵之利而不知榆次之祸吴见伐齐之便而不知干隧之败此二国者非无大功也没利于前而易患于後也吴之信越也从而伐齐既胜齐人于艾陵还为越王禽三渚之浦智氏之信韩魏也从而伐赵攻晋阳城胜有日矣韩魏叛之杀智伯瑤于凿台之下今王妬楚之不毁也而忘毁楚之疆韩魏也臣为王虑而不取也诗曰大武远宅而不涉从此观之楚国援也邻国敌也诗云趯趯鼯兔遇犬获之他人有心予忖度之今王中道而信韩魏之善王也此正吴之信越也按歇所援引可借为此诗义疏】荏染柔木君子树【叶麋韵上主翻】之往来行言心焉数【麋韵】之蛇【以支翻下同】蛇硕言出自口【有韵】矣巧言如簧顔之厚【有韵】矣【比而赋也荏色厉而内荏之荏愚按宜通作恧说文云下齎也言心所齎者卑下故借为柔弱之意染通作舛说文云弱长貌柔木朱子云桐梓之属可用者也树植也荏染然之柔木良材也君子当封殖之俾无牛羊斧斤之患以比太子宜曰柔弱不能自立王宜爱护之勿听谗言伤害之也按中候云无易树子注以树子为适子所以名适子为树子者文王之诗云本支百世以适子比树本庶子比支蘖也行言朱子云行道之言也焉何也数钱氏云犹记也吕祖谦云谗言易入而难忘听之当如听行路之言人之听往来行路之言者或歌或詈如风过耳心焉尝数之乎愚按此以上四句皆比体蛇蛇屈曲之貌蛇属纡行所言不必与理会而宛转关生无所不入有似蛇行之纡曲者然又此唱彼和故目之以蛇蛇也硕大也出自口矣与好言自口莠言自口同意簧解见君子阳阳篇宜曰奔申岂无善处之术彼但以伐申杀太子为事信口大言谓王师所至必无敢逆我顔行者骋其巧辨总不根心如笙中之簧随气转动而不自知其可羞愧盖为人臣子而日以离间骨肉为事诚负恩之甚者尚敢然呈面目于人世所谓胡顔之厚也上章以事势言故曰跃跃鼯兔遇犬获之危之也此章以情理言故曰巧言如簧顔之厚矣鄙之也】彼何人斯【支韵】居河之麋【支韵尔雅注陆本俱作湄】无拳无勇职为乱阶【叶支韵坚夷翻】既微且黷【说文作𡗗陆本作肿】尔勇伊何【歌韵】为犹将多【歌韵】尔居徒几何【见上赋也彼彼小人也孔云贱而恶之作不识之辞故曰何人斯通作𡗗说文云悲声也麋古文通作湄水草交际之处左传吾赐汝孟诸之麋是也拳通作卷说文云气势也引国语予有卷勇之卷勇说文云健也小人之工为谗佞者其貌极卑其气极下奄奄若九泉下人何拳勇之有职主也阶级也刘熙云梯也如梯之等差也郑云此人主为乱作阶言乱繇之来也愚按此以上四句专主號石父而言居河之麋则其所居之采邑也微细也以形体言黷说文云胫气足肿贾谊传方病大𡗗是也此石

父之徒党史伯谓侏儒戚施实御在侧微即侏儒也燿即戚施也戚施为蟾蜍之别名背上多痂磊似于燿也尔尔石父也後同石父固无拳勇之可言矣观其徒党既有微者且有燿者与石父表里相依石父未必不资之以为重然其形状猥陋如此即尔之所谓勇亦乌在其能勇哉犹谋也将者且然之辞为犹将多所谋皆兴兵构怨之事方兴而未艾也因又警之曰尔所与聚居之徒衆几何许人而能为此正恐作之不顺威之不立衆怒难犯祸不旋踵耳左襄十四年卫献公射鸿于囿孙文子从之不释皮冠而与之言公饮之酒使太师歌巧言之卒章太师辞师曹请歌之遂诵之文子曰君忌我矣弗先必死遂作难公出奔卫】

巧言六章章八句【朱子云以五章巧言二字名篇子贡传申培说丰氏本皆合巧言何人斯为一篇故其篇名止有巧言而无何人斯今按二诗立言各有所为原不相涉彼但见篇中皆有彼何人斯一语遂谬欲混之为一耳邹忠胤谓诗以悠悠昊天?端而摘第五章中巧言二字为目意诗章原止于五其居河麋章当与下篇相属然左传卫献公使太师歌巧言之卒章以嘲林父时林父如戚将为乱则所歌必是居河之麋也左传所举章次与毛传殊合犹不足信耶若旧说相沿皆以此诗为圣谗之作故于寢庙章则曰是言谗之心不难知也于荏染章则曰是言谗之说不难辨也于河麋章则曰是言谗之党不难除也于是有为之着论者云如王莽之谦恭使当年即死孰知其伪如王安石之依于道动引经术神宗以为圣人虽司马亦不知其伪又或有拳勇如羿篡吕布有徒党如汉唐宦官宋章惇蔡卞之流除之不得其方必致大乱是皆可患也今谗人之伎俩如此而王不能去其罪不独在谗人也又云国家之有小人其强悍跋扈者多易败而奸深诡谲者多难驱此何以故为其心如重渊之不可窥而知之实难其言如悬河之不可御而辨之实难此其所以卒至覆国不然虽有羿篡之权力章蔡之结党而除之如?蒙振落耳诗人繇心不难知言不难辨而始推及于党不难除意深远矣二论皆佳然要之非此诗本旨】

苕之华幽王之时西戎之乱始于褒姒而其祸遂连于中国诗人伤之于其末章穷而反本【出罗愿尔雅翼

竹书纪幽王十年王师伐申至次年申人郾人及犬戎遂入寇此诗之作当在其时】

苕之华芸其黄【阳韵】矣心之忧矣维其伤【阳韵】矣【兴而赋也苕毛传云陵苕也严粲云非防有鹊巢所谓叩有旨苕也郭璞云一名陵时华尔雅云苕也木谓之华草谓之荣邢昺云木则名华月令季春桐始华草则名荣月令仲夏木槿荣此对文耳草亦名华郑风云隰有荷华是也愚按以字母推之华从艹荣从木疑木当名荣草当名华也芸其黄矣言如芸华之色黄也解见裳裳者华篇按尔雅苕陵苕黄华蓂白华芡舍人谓别华色之名也华黄者名蓂华白者名芡故说文解蓂字谓苕之黄华也本草以为紫葳又名芡华则华之白者耳图经云凌霄花也多生山中人家园圃亦或种蒔初作藤蔓生依大木岁久延引至巅而有华其华黄赤夏中乃盛罗云凌霄蔓生乔木极木所至开花其端是物虽名紫葳而华不紫又或以瞿麦根为紫葳瞿麦花红亦非此类然则芸其黄者正自花开之色耳据图经及罗说与此诗及尔雅殊合陆玕乃谓一名鼠尾似王刍生下湿水中七八月中华紫似今紫草华可染皂煮以沐发即黑叶青如蓝而多华今考玕所说乃尔雅所谓蒨也尔雅云蒨鼠尾注云可以染皂本草经云鼠尾草有白华者赤华者一名蒨一名陵翹生平泽中四月采叶七月采华陶隐

居云田野甚多人采作滋染阜图云苗如蒿夏生茎端作四五穗穗若车前与陆说生下湿七月华可染阜者相似则陆误以陵苕为鼠尾矣苕蔓生附于乔木正如藤萝之类乃女宠小人之比而首以华黄?端则指以兴褒姒取其容貌如华如史记赵武灵王歌曰美人荧荧兮颜若苕之荣是也且黄者土色坤卦所谓黄裳也时褒姒已正位中宫矣又罗说此华弥络石壁盛夏视之如锦绣不可仰望露滴目中有失明者则亦褒姒妖艳能蔽明之况耳褒姒为亡周祸本而诗人不敢斥言故首托兴于此心之忧矣忧周之将亡也伤说文云创也维其伤矣者忧痛之甚坐立不安如体之被创也】苕之华其叶青青【韵】知我如此不如无生【叶青韵桑经翻 赋】

【而兴也叶以斥褒姒之党故亦蒙苕华之文谓是辅华之叶耳皇父卿士辈是也叶方盛则其色青兴其得时也非一叶而已故重言之知我之所遭如此不如不生之为愈痛之深亦恨之至孔颖达云人莫不好生而云已不用生生非已所裁而以生为恨自伤逢今世也又罗云周室之于诸夏犹衣服之有冠冕水木之有本源盖有深根固植之义不特以其在物上而已今苕虽居高在物之上然荏弱而托于物所自恃者微矣虽华之芸黄叶之青青识者知其将不久也故见其华则为之忧伤逮其华落而叶存则不如无生矣今按以弱周比苕固为近似但于华叶两义终觉无当且苕叶自黄非将落而黄有何可忧若云其叶青青见华已尽落则上文何云苕之华乎故皆不取】 牂羊坟【易林丰氏本俱作羴】首【有韵】三星在罍【有韵陆德明本作溜】人可以食鲜可以饱【叶有韵补苟翻 比也牂羊毛云牝羊也坟据焦氏易林作羴按说文有羴字无羴字羴羴同音当通作羴尔雅释羊牡羴牝羴是也说文解羴为羴当是为此诗句所误广雅云吴羊牡一岁曰牡羴三岁曰羴其牝一岁曰特?三岁曰羴罗云羴止是牝羊而诗正义欲合坟大首之义称为牝小羊夫吴羊三岁称羴则非小矣焦氏易林有云开牢择羊喜得大羴字说谓羴以乘而不逆为刚羴以承而不随为臧盖羊之性顺羴虽牡而犹有顺性故为乘而不逆羊性狠羴虽牝而犹有狠故为承而不随羴羊羴首喻妇人而为男子之事犹武王数纣称牝鸡之晨矣羴或作?刘昼云晋文公不服羔裘羣臣皆衣?羊?非美毳而竞之者随君所好也即此三星在罍者三星婚姻之星在罍则非其所矣又以叹夫褒姒也按三星者参也参为白虎宿见于十月而终于正月正婚姻之时故以为婚姻之星罍说文云曲梁寡妇之笱鱼所留也尔雅亦谓之嫠妇之笱所以取此名者其说有二尔雅疏谓罍曲梁其功易故曰寡妇之笱盖曲薄也寡妇者匹妇也言虽一妇人亦能为此笱非嫠寡之寡也诗诂谓古者獺祭鱼然後虞人入泽梁川泽之利不使人得专之惟寡妇家上所矜闵使得织薄曲絶水为梁以笱承之以时得鱼若遗秉滞穗之意罍乃曲梁之笱非曲梁也二说皆道诗言此以刺王娶褒姒而托之隐语谓寡妇乃无夫者今以婚姻之星下临寡妇之笱则必将有配匹之事也人可以食承羴羊句言牝羊牡首物之妖也人遇此物可以杀而食之则牝羊之妖亡矣恶褒姒也鲜可以饱承三星句言老子云治大国若烹小鲜鲜者鱼也三星在天人见之而行婚姻之礼当其下照鱼笱斯时鱼可以尽吞而厌饫之则人不见此星而庶乎无婚姻之事矣以王娶褒姒致阶祸乱故溯其本而云然又罗云五行传有羊祸说者曰易刚而包柔为离离为火为目羊上角下蹯刚而包柔大目而不精明视毁故有羊祸然则咏羴羊羴首又与咏苕华损目同意皆于王溺嬖宠而不明有深恫焉】

苕之华三章章四句【序云大夫闵时也幽王之时西戎东夷交侵中国师旅并起因之以饥

饑君子閔周室之將亡傷已逢之故作是詩也先儒皆主飢饉之說謂羊?則皆大罾中无魚而木靜故但見三星之光又謂羊食百卉乃肥歲荒草木皆瘁羊所以?魚与蝗本一種歲荒盡化為蝗魚所以少以是為飢饉之驗果爾則當野无青草而上章言苕華之黃苕叶之青又何以云乎焦氏易林亦云牂羊羶首君子不飽年飢孔荒土民危殆蓋祖述序說朱子但謂詩人自傷身逢周室之衰而不着其世子貢傳有王室乱人不生六字而生字之上闕其一字申培說則云景王崩王室乱兵連歲饑民物盡耗君子自傷身逢其難而作是詩要皆想像之語无所依据】

詩經世本古義卷十八之下

卷十九之上

<经部,诗类,诗经世本古义>

钦定四库全书

诗经世本古义卷十九之上

明 何楷 撰

周平王之世诗三十四篇

瞻彼洛矣纪东迁也【按史周幽王十有一年申侯与犬戎入寇戎弑王于骊山之下郑桓公友死之郑人共立其子掘突是为武公时晋卫秦皆以兵来救平戎武公收父散兵从诸侯东迎故太子宜臼于申立之是为平王王以丰镐逼近戎狄不可居乃迁都于洛此诗所咏正其事也篇中有韎韐一语知为指郑武公解见本文下武公新丧父故服韎韐竹书称武公为郑子而缁衣之诗亦呼武公为子则以诸侯即位未踰年改元犹称子也左传谓周之东迁晋郑焉依故书有文侯之命而诗如瞻雒裳华缁衣诸篇凡为郑武公咏者不一而足则以申为平王母家而武公亦娶于申有昏姻之谊深为平王所倚重故也】

瞻彼洛【光庙讳今文通作雒按光武都雒以火行忌水故去其水而加佳及魏为土德以土水之母也水得土而流土得水而柔复除佳加水】矣【纸韵】维水泱泱【丰氏本作漪漪彼不知矣止之为韵而欲与茨师叶耳二三章亦妄以意改之伪书之庸鄙可哂如此】君子至止【纸韵】福禄如茨【支韵】韎韐有奭【白虎通作施】以作六师【支韵每三句一韵而夹一句不韵于其中亦殊制也 赋也雒水名王安石朱子皆以为在东都者是也山海经称瀼举之山雒水出焉而禹贡云导雒自熊耳盖发源瀼举而经繇熊耳也及过河南县南又过雒阳县南则周公所营雒邑在焉孝经援神契云八方之广周雒为中谓之雒邑周书云周公将致政乃作大邑成周于土中城方千七百二十丈郭方七百里南系于雒水北因于邙山以为天下之大凑制郊甸方六百里国西土为方千里摯仲治云古之周南今之雒阳也泱说文云滂也重言泱泱毛传云水深广貌钱天锡云自古都会必居大川之侧以四方朝贡漕挽为易如在渭之将丰水东注观禹贡所列贡道此意可见君子朱子云指天子也至止者至雒邑而定都也孔颖达云凡言福者大庆之辞禄者吉祉之谓善事皆是不必一定愚按此主言其居天位享天禄也茨以覆屋绵密坚固不可动摇今王迁都实为子孙奠无穷基业故以如茨期之後章所云保家室保家邦是也韎说文云茅蒐染韦也杜预云韎声也今绦草茅蒐急疾呼茅蒐成韎也即今之蓍礼记注云赤黄之间色韐本作□从市合声市即韐字亦谓之鞞说文云士无市有□制如榼缺四角徐铉云酒榼腹圆上小下大象之也郑云韎韐者祭服之鞞合韦为之孔云大夫以上祭服谓之韐士无韐名谓之韎韐士冠礼爵弁服韎韐不言韐是也士言韎韐亦犹大夫以上之言韐也陈阳云鞞之色视裳而已兵事韦弁服韦弁服纁裳故贵者以朱芾卑者以韎韐周祈云韐鞞韐三者皆蔽膝之衣制同名异韐乃合韦韐鞞不合此

其异耳爽通作赭赤貌白虎通云世子上受爵命衣士服何谦不敢自专也故诗曰韎韐有奭世子始行也孔云王制言诸侯之世子未赐爵视天子之元士以君其国此言韎韐故知诸侯世子未赐爵命服士服也愚按此指郑武公也作说文云起也指麾鼓舞之意毛云天子六军郑云时有征伐之事天子以其贤任为军将也补传云六师万年之语可为王者之证王应麟云周公东征四国是皇此上公为军将也韎韐有奭以作六师此诸侯世子为军将也金履祥云按东迁时定难立君惟秦晋郑卫四国耳秦襄公与西戎世为不共戴天之讐其势亦不两立其与戎力战固亦为已不独为王室也平王以?丰之地予之使之自取然西戎方炽父子力战二十一年而始得之固不暇东略矣周室都雒则晋居河北表里山河是为屏辅文侯固忠而贤然其前有殇叔之难其後有曲沃之封晋之替实自是始平王所望于文侯者亦固不以兴复期之则其委任可知平王申出郑武公娶于申武公以昏姻之故迎王于申立之观平王戍申之志则其依郑之心可推也想其柄任在于郑武所以终平王之世郑伯父子世于其职卫武虽贤其柄任未必在】瞻彼洛矣【见前】维水泱泱【丰本作滢】君子至止【见前】韎【陆德明本作琕】琕【陆本作?】有珌【质韵陆本作?】君子万年保其家室【质韵 赋也韎说文云刀室也孔云古之言韎犹今之言鞘也亦谓之遘内则云右佩遘是也琕徐锴云刀削上饰也琕之为言琕也若琕持之也上谓首也刘熙云室口之饰曰琕或作鞞左传韎鞞是也珌说文云佩刀下饰亦作琕刘熙云下末之饰曰琕琕卑也盖琕琕虽皆刀削之饰而琕尤在其下也毛云天子玉琕而珌珌诸侯璆琕而璆璆大夫璆琕而璆璆士琕琕而琕璆董氏云此出于三朝礼陆德明云璆谓之珌黄金谓之璆璆皆玉也琕璆属又璆璆或从金作鏐鏐尔雅云黄金美者谓之鏐白金美者谓之璆愚按左传云藻率韎鞞鞞厉游纓昭其数也此诗概言琕珌而不言其所饰之物当是通天子诸侯而下言之犹云不图今日复见周官威仪耳家室以天子之家室言天室既奠贻子孙以万年之安所谓保也】瞻彼洛矣【同前】维水泱泱【丰本作滢滢】君子至止【同前】福禄既同【东韵】君子万年保其家邦【叶东韵悲工翻 赋也苏辙云福禄既同言与诸侯共之也愚按孟子言与共天位与食天禄即所谓既同者家邦指天下也王者以天下为家故曰家邦】

瞻彼洛矣三章章六句【序云刺幽王也思古明王能爵命诸侯赏善罚恶焉其於经义有何相涉朱子谓此天子会诸侯于东都以讲武事而诸侯美天子之诗申培说袭之子贡传则谓此诗与鸳鸯鱼藻皆诸侯所以报天子而或又据车攻有徂东之语疑为宣王时诗虽皆近似然究之韎韐有奭非天子服也故断谓非东周郑武不足以当之】

緇衣美郑子掘突也犬戎弑幽王於骊山下并杀郑桓公郑人共立其子掘突是为武公【自犬戎下至此俱出史记】与晋卫秦会师兴复周室故平王爱之如此【竹书纪幽王十一年申侯鲁侯许男郑子立宜臼于申平王元年王东徙雒邑晋侯会卫侯郑伯秦伯以师从王入于成周是则武公之于平王始而迎立继而东徙皆与有力王之德郑也深故其情见乎词特为恳挚如此礼记载子曰好贤如緇衣孔丛子亦载子曰於緇衣见好贤之至也】

緇衣之宜【支韵】兮敞【絶句陆德明本作弊】予又改为【支韵】兮适子之馆【叶翰韵古玩翻】兮还【絶句此与上文敞字皆以一言为一句】予授子之粲【翰韵】兮【赋也緇说文云帛黑也按尔雅及考工记云一染谓之纁纁浅赤色今之红也再染谓之纁纁与

頽同赤色也三入为纁谓染朱黑色即绦也五入为緌谓三入之後再染以黑七入为緌谓五入之後又复以黑再染之也此緌衣乃诸侯与其臣服之以日视朝者故礼通谓此服为朝服时武公继立新受封爵故有緌衣之赐宜说文云所安也言此服与此人相安明其德足以居此也敝败衣也改更也俱见说文言他日此衣若敝则我当更制以赐见其眷注之无已也适说文云之也子指武公也诸侯即位未踰年改元称子馆说文云客舍也时周新迁东都故武公止于客舍平王亲临视之亦以省其舍止之安否也还说文云复也谓见毕而驾旋也承适字而言授说文云予也粢粟治之精者说文云稻重一?为粟二十斗为米十斗曰穀为米六斗大半斗曰粢汉有白粢之刑给舂稻之役尔雅训粢为餐亦曰粢乃所以为餐云尔郭璞以为今河北人呼食为餐则粢乃餐之转音非是严粢云既见之而归我又取米之精者以遗之犹白饭青刍之意孔颖达云饮食虽云小事圣人以之为礼伐柯言王迎周公云我覲之子笱豆有践奉迎圣人犹愿以饮食也】緌衣之好【皓韵】兮敝予又改造【皓韵】兮适子之馆【见前】兮还予授子之粢【见前】兮【赋也好美也此以緌帛之美好言与上章宜字意有别造说文云就也谓成就也】緌衣之蓆【叶药韵祥龠翻】兮敝予又改作【药韵】兮适子之馆【见前】兮还予授子之粢【见前】兮【赋也蓆韩诗云储也说文云广多也尔雅云大也愚按蓆之为字从艹从席如前三训不得其解今人误谓蓆即席故程子谓蓆有安舒之义然考古文凡用席字无通用蓆者则蓆之非席确矣偶思之而得古人命字之义古人坐席或敷数重此蓆字加艹于席上当是取卉艹相枕藉如席然故韩诗训储说文训多又因多而推言之则为广为大总之不离储与多者近是然则此言緌衣之蓆者亦明其所赠緌衣不止一袭也作说文云起也谓创起而为之也平王之爱武公虽用物有尽而寄意无穷故其言之不一而足如此】

緌衣三章章六句【旧于敝字还字不絶皆云章四句序云美武公也父子并为周司徒善于其职国人宜之故美其德以明有国善善之功焉朱子从其说徐学谟云适馆授粢岂民之得施于上者而朱传因之何也愚按礼玉藻云天子皮弁以日视朝诸侯朝服以日视朝曹氏云天子常朝之服用皮弁诸侯常朝之服用羔裘玄冠也皮弁以白鹿皮为冠以狐白皮为裘以素锦为衣而裼之其上加朝服十五升白布为之衣冠同色故也羔裘以緌布为冠以黑羊皮为裘以緌布为衣而裼之其上加朝服十五升緌布为之其裳皆素凡朝服君与卿大夫同今武公既入为天子之卿则当服皮弁不当服緌衣矣又按竹书王锡司徒郑伯命在平王三年此时武公已除服即吉不应复以子称且曰适子之馆明是周初迁都时栖止未定故武公暂就客舍以居然则此诗之作当在武公初受封为伯而从王入成周之时其必非在为司徒之日甚明也若子贡传申培说皆以为郑武公好贤赋诗贻之虽亦近似然武公好贤之事史无所载不敢谓然】

车邻秦臣美襄公也平王初命襄公为秦伯其臣荣而乐之【子贡传云襄公伐戎初命为秦伯国人荣之赋车邻按史记襄公七年西戎犬戎与申侯伐周杀幽王骊山下而襄公将兵救周战甚力有功周避犬戎难东徙洛邑襄公以兵送周平王平王封襄公为诸侯赐之周以西之地玩此诗乃秦臣所作】

有车邻邻【叶先韵陵延翻汉书作隣释文作隣】有马白颠【先韵】未见君子寺【释文

作侍】人之令【叶先韵力延翻韩诗作伶 赋也邻通作隣说文云车声也曰邻邻者毛传以为衆车声孔穎达云车有副贰明非一车又曹氏陆佃皆解如字云邻邻密比之意言车之衆亦通尔雅云马的颡白颠舍人云的白也颡额也额有白毛今之戴星马也陆佃云觐礼曰奉束帛匹马卓上九马随之说者以为卓即的颡故以为上列而九马随其後庄子曰齐之以月题盖月题额上当颇如月者所以象颠之白然则马之贵的颡也可知矣易曰其于马也为的颡盖震二陰在上故为的颡夫文入二为白白陰色也二陰数也于车言其衆于马言其特相备也陆化熙云车多则声衆故邻邻然马多则色奇故有白颠君子指襄公也寺人奄人周礼天子有之今按左传齐有寺人貂晋有寺人披宋有寺人柳是诸侯之官亦有寺人也令使也言君子尚未得见但见其往来奔走者有寺人以供使令也严粲云秦前此所未有故诗人美其始有也冯时可云古者君臣相与如家人父子至秦而始自尊大屏居深宫怠于延接矣君臣隔絶则必以寺人传语盖秦俗然也史记年表书繆公学于宁人宁人守门之人即寺人也是襄公为之法也夫传语而至于受学受学而至于窃权变所繇来非一日矣然则望夷之祸其滥觞于车邻也圣人录此以冠秦风垂戒深矣严云秦反周之政者秦兴而帝王之影响尽矣车邻其滥觞也世道兴衰升降之机在是欤沈守正云夫子删书以秦世为殿知代周者秦也删秦风以寺人之令为冠知亡秦者寺人也圣人无不知者以近怪而不言耳】阪有漆【质韵丰氏本作漆】隰有栗【质韵丰氏本作?】既见君子并坐鼓瑟【质韵】今者不乐【音络後同】逝者其耄【叶质韵徒吉翻 兴也尔雅云陂者曰阪下者曰隰李巡云陂者谓高峰山陂下者谓下湿之地曹氏云说文阪山脇也地理志陇西有陇坻在其西注陇坂也即今陇山三秦记其坂九回欲上者七日乃越高处东望秦川然则阪固秦地所有也漆解见定之方中篇栗解见东门之墀篇罗愿云秦风隰有栗燕秦千树栗是其出处也秦饥应侯请发五苑之果蔬橡枣栗以活民昭王不许毛诗义疏曰五方皆有栗周秦吴扬特饶阪有漆以兴位之尊者隰有栗以兴位之卑者况人材之盛也并坐鼓瑟是伶工之辈与其侪侣并坐以供鼓瑟之事非君臣并坐也下章放此瑟解见关雎篇鼓瑟鼓簧第取叶韵别无意义按李斯上秦皇书曰夫击瓮叩缶弹箏拊鞀而歌呼呜呜快耳目者真秦之声也今鼓瑟鼓簧非其旧声盖亦变西戎之陋而习华夏之风矣今者不乐恐失时也曰逝者犹言自今以往也耄尔雅云老也或言七十或言八十无正文也增韵云耄至也年之至也孙炎刘熙皆云耄铁也皮肤变黑色如铁也诗诂云耄之言眊也过七十则筋力已衰如日之眊故谓之耄至八十则大耄易云日昃之离不鼓缶而歌则大耄之嗟与此语意相类此与下章其亡犹汉疏所云冀须臾无死以观德化之成之意辅广云盖国家方兴礼仪初备而人情喜乐故至于此严云言贵生前得意否则虚老岁月耳此强毅果敢之气勇于有为已有安能邑邑以待数十百年之意矣秦之能强者在此而周人之气象变矣】阪有桑【阳韵】隰有杨【阳韵】既见君子并坐鼓簧【阳韵】今者不乐逝者其亡【阳韵 兴也桑解见氓篇杨木名有黄白青赤四种此当指白杨耳以桑杨兴下文其亡者桑之为言丧也白杨墓上所种株大叶圆如梨皮白一名高飞一曰独摇其树干霄古诗所谓上叶拂青云下根通黄泉又云鬼火烧白杨又云白杨多悲风萧萧愁杀人是也簧解见君子阳阳篇 阳云书以琴瑟为堂上之乐笙簧为堂下之乐则鼓瑟堂上常御之乐也鼓簧堂下甚盛之乐也先鼓瑟後鼓簧与关雎先琴瑟後钟鼓同意亡死也耄之後则亡矣】车邻三章一章四句二章章六句【序以为美秦仲也秦仲始大有车马礼乐侍御之好焉陈阳为之说云定之方中曰椅桐梓漆爰伐琴瑟则阪有漆君子所以为乐也东门之墀曰东门之栗有践家室则隰有栗君子所以为礼也曲礼曰并坐不横肱则并坐者礼

也鼓瑟者乐也秦仲始大有礼乐之好是礼乐自诸侯出非所以为美而车邻美之者变中之美也说诗如是可谓凿矣按史记秦仲立三年周厉王无道诸侯或叛之西戎反王室灭犬丘大骆之族周宣王即位乃以秦仲为大夫诛西戎刘公瑾云秦仲但为宣王大夫未必得备寺人之官此诗疑作於平王命襄公为侯之後其说与子贡传合矣朱子亦心疑之但泛指为秦君不显其名若申培说则云襄公初为诸侯周大夫与燕美之而作今按篇中所云今者不乐逝者其耄逝者其亡似非过客之语总因并坐鼓瑟一句不得其解误以为君臣无并坐之理遂别为之辞耳不足信也】

裳裳者华美同姓诸侯也继世象贤天子美之意必为郑武公而作【孔丛子载孔子曰於裳裳者华见古之贤者世保其禄也愚按此诗以常华起咏知其兴同姓也以常常者华联言知其兴继世也既曰维其有章是以有庆又曰维其有之是以似之知其赋象贤也终周之世惟周公之後有鲁公郑桓之後有郑武足以当之然鲁公出就侯封未尝踵周公冢宰之位而郑桓公以宣王母弟始封于郑及子武公皆相继入为周司徒善于其职则济美之最着者且据毛传系此诗篇次于瞻彼雝矣之後彼赫韐有奭既指武公则此诗之断为武公咏无疑也又按竹书载平王三年锡司徒郑伯命是诗之作当在此时】

裳裳【子贡传申培说丰氏本俱作常常後同董氏云裳古文作常】者华其叶湑【语韵】兮我覯之子我心写【叶语韵洗与翻】兮我心写【见上】兮是以有誉处【叶语韵敝吕翻】兮【兴也裳说文本从巾作常或从衣作裳徐铉云裳下直而垂象巾故从巾然则常裳在古文本是一字非通用也此言裳谓常棣也采薇之诗曰彼尔维何维常之华即此解见棠棣篇郝敬云常棣其华同蒂故比兄弟世族非亲非族鲜有以常棣比者重言裳裳者相继非一之辞兴兄弟再传又有兄弟也湑叶上露貌解见蓼萧篇叶得露而润则其华之承露可知诸侯受天子德泽有似于此以兴父既膺宠于前子复膺宠于後也杨慎云裳裳者华其叶湑兮气相属润相滋也常棣之华鄂不韡韡体相亲意相承也我天子自我也覯说文云遇见也按遇有接遇之意之子是子指诸侯也心写誉处解俱见蓼萧篇严粲云我见是勲贤之子孙我心为之输写爱其先人美其有後也愚按诗咏叶湑兴意在此孔颖达云君臣相得是以有声誉之美而处之兮言常处此声誉之美也】裳裳者华芸其黄【阳韵】矣我覯之子维其有章【阳韵】矣维其有章【见上】矣是以有庆【叶阳韵虚良翻】矣【兴也此下三章皆咏之子蕴藉之盛所以我覯而心写也亦以裳裳起兴者先表其父子合德不独为之子咏也芸草名芸其黄矣言如芸华之色黄也按尔雅云权黄华郭璞注云今谓牛芸草为黄华其华黄叶似菽萁邢昺疏云牛芸者亦芸类也章郑玄云礼文也苏辙云黄色之正也君子之有文粲然如华之盛也邹忠胤云黄者中央正色易坤卦曰含章可贞曰黄裳元吉盖陰虽有美含之以从王事美在中而畅四肢发事业则章莫美于黄矣有庆谓君宠锡之指禄位言如王制孟子所云则有庆是也郑武继桓为周司徒以典司文教为职非其德之有章何以得此】裳裳者华或黄或白【叶药韵仆各翻】我覯之子乘其四骆【药韵】乘其四骆【见上】六轡沃若【药韵兴也按戴侗六书故称棣华有红白二种今言或黄或白疑红黄二色相近亦或另自有一种也四骆解见四牡篇礼惟天子之卿驾纯駟诸侯亦然沃若解见皇皇者华篇乘其四骆必有出使从戎之事见其才无所不可下章所谓左宜右有是也故以或黄或白起与黄言文白言质维其有章英华发外是其文也乘其四骆急病让夷是其质也又邹云黄

白之华以兴四骆盖黄马黑鬣曰骆白马朱鬣亦曰骆之子所乘非一或黄或白有如此华矣此虽巧合嫌其太巧】左之左【叶歌韵祖戈翻】之君子宜【叶歌韵牛何翻按宜仪通用仪亦有纸叶语绮翻】之右之右【叶有韵云九翻亦叶纸韵羽轨翻】之君子有【韵亦叶纸韵羽轨翻】之维【左传作惟新序非唯】其有【见上】之是以似【纸韵】之【赋也毛传云左阳道朝祀之事右陰道丧戎之事孔云阳道谓嘉庆之事朝者人所乐祀者吉之大故为阳也陰道谓忧凶之事丧者人所哀戎者有所杀故为陰也以能事弘多故皆重言以见衆也郑云君子斥其先人也多才多艺有礼于朝有功于国按诗目诸侯为之子故知此变言君子为指其先人也宜安也言与之相安习也有严云谓所蘊不竭也刘向说苑引此诗传云君子者无所不宜也是故鞶冕厉戒立于庙堂之上有司执事无不敬者斩衰裳苴絰杖立于丧次宾客吊唁无不哀者被甲纓冑立于桴鼓之间士卒无不勇者故仁足以怀百姓勇足以安危国信足以结诸侯强足以拒患难威足以率三军故曰为左亦宜为右亦宜为君子无不宜者此之谓也又荀子云此言君子之能以义屈伸变应也韩诗外传云孔子曰昔者周公事文王行无专制事无繇己身若不胜衣言若不出口有捧持于前洞洞焉若将失之可谓子矣武王崩成王幼周公承文武之业履天子之位听天子之政征夷狄之乱诛管蔡之罪抱成王而朝诸侯诛赏制断无所顾问震动天地振恐海内可谓能武矣成王壮周公致政北面而事之请然後行无伐矜之色可谓臣矣故一人之身能三变者所以应时也诗曰左之左之君子宜之右之右之君子有之愚按老子言吉事尚左凶事尚右毛传之说本此今观下文单以维其有之为言明是指武公帅师兴复之事传解自确一说季本云左逆行也不用之义右顺行也见用之义左之而不宜者不能藏也右之而不有者不能行也此说亦通但於作诗之指不合耳维其有之指之子也之子之先君子不特宜于左而且有于右今之子亦能以戎事建功为国家所倚赖此则左右咸有亦如其先君子也似说文云象也才德如其先人故受天朝宠任特命之为司徒亦如其先人也邹云曲礼诸侯既葬见天子曰类见谓其继先君之德乃得受国而见天子故曰类见郊特牲所云继世以立诸侯象贤也士冠礼亦云然则似之犹言克肖即宛鳩所云式谷似之也誉处而有处所谓世保其禄也若析薪而弗克荷其何似之有又左传赞祁奚能誉善引此诗谓唯善故能举其类亦断章取义也】

裳裳者华四章章六句【序云刺幽王也古之仕者世禄小人在位则谗諂并进弃贤者之类絶功臣之世焉其以此诗为功臣世禄而言与孔丛子微合但篇中絶不见有刺语子贡传以为天子燕诸侯然篇中亦无言及燕饮之事坐繇首章与蓼萧首章词意颇相似遂因而附会之耳申培说及朱子皆以为天子美诸侯之诗盖亦近之而朱子又谓此诗所以答瞻彼雛矣则未必然也】

溱洧刺郑风淫也【竹书纪平王六年郑迁于溱洧後汉书薛君注云郑国之俗三月上巳桃花水下之时之溱洧两水之上招魂续魄秉兰草祓除不祥韩诗传十道志皆云然按此即後世所谓修禊事者但彼乃士女同游故相于淫耳辅广云郑国之土地寛平人物繁丽情意荡风俗淫佚读是诗者可以尽得之诗可以观岂不信然白虎通云郑国土地人民山居谷浴男女错杂为郑声以相悦怿故邪僻声皆淫色之声也】

溱【说文作漣】与洧方涣涣【叶元韵于元翻韩诗作洹洹汉书作灌灌说文作泛泛】兮

士与女方秉蘭【叶元韵读如昆公浑翻汉书作菅韩诗丰本俱作兰】兮女曰观乎【虞韵】士曰既且【叶虞韵丛租翻】且往观乎【虞韵】洧之外洵【汉书韩诗俱作恂尔雅作洵丰本作?後同】訏【汉书韩诗俱作盱云恂盱乐貌丰氏本亦作盱後同】且乐【叶药韵历各翻】维士与女伊其相谑【药韵】赠之以勺【埤雅作芍】药【韵赋也溱洧解见褰裳篇前汉书地理志云郑地右雒左沛食溱洧焉土陋而险山居谷汲男女亟聚会故其俗淫涣说文云流散也郑玄云冰已释水则涣涣然韩诗传云谓三月桃花水下之时方者始事之辞秉执蘭也陆佃云兰香草也而文闌草为兰兰闌不祥故古者为防刈之也一名蘭盖兰以闌之蘭以闲之其义一也陆玕云蘭即兰春秋传曰刈兰楚辞云纫兰孔子曰兰当为王者香草皆是也其茎叶似药草泽兰但广而长节节中赤高四五尺汉诸池苑及许昌宫中皆种之可着粉中故天子赐诸侯?兰藏衣着书中辟白鱼也罗愿云陆氏所说皆是惟引以解左传楚辞之兰为非矣兰草一名都梁香一名水香大都似泽兰其泽兰叶尖微有毛不光润方茎紫节八月花白人多种于庭池此兰生泽畔叶光润其陰小紫所以一名都梁者盛洪之荆州记曰都梁县有山山下有水清浅其中生兰草因名都渠因山为号其物可杀虫毒除不祥故郑人方春之月于溱洧之上女士相与秉兰而祓除因以淫佚又周礼女巫岁时祓除豐浴郑氏亦云今三月上巳水上之类豐浴以香药薰草沐浴然则用蘭可知矣按罗意以此蘭为水香而左传楚辞之兰乃泽蘭耳冯复京云兰之种类至多本草经谓兰草可辟不祥故执以祓除抑或以兰有国香人所服媚淮南子曰男子树兰美而不芳说者以为兰女类故左传称女为季兰宜女子树之郑女故执之以媚其士与溱与洧四句是叙时事如此女曰以下见人往而已亦欲往也然女曰士曰亦是旁观者之辞此女士与女曰鸡鸣之女士不同彼谓夫妇此谓衆女与衆士中之相悦者以末句临别有勺药之赠故知其非夫妇也曰观乎者郑云欲与士观于寬闲之处邓元锡云淫始云观游礼禁妇女无观慎微也郑女士淫于观矣既者已事之辞且通作徂说文云往也士曰余业已往而观矣末之从也且往观乎洧之外洵訏且乐女劝男之辞也专言洧者水经谓洧水过新郑县南溱水从西北来注之是溱已为洧所有故不必言溱也洵通作恂说文云信也訏通作迂其意则远也曲也言洧水之外其土地信濶大纡回而且可乐也伊郑云因也士从女言因往观而相谑也谑说文云戏也字从言盖以言相调戏也勺药即芍药广雅名挛夷本草云一名黑牵一名没骨花一名白水一名余容一名犁食一名解仓一名鉶图经云春生红芽作藂茎上三枝五叶似牡丹而狭长一二尺夏开花有红白紫数种子似牡丹而小本草注云芍药有二种有草芍药木芍药亦名江离博物志云芍药养性毛传云香草也释文云离草也言将离别赠此草也崔豹古今注载牛亨问曰将离别相赠以芍药者何答曰芍药一名可离故将别以赠之亦犹相招召赠之以文无文无亦名当归也罗云芍药名可离然则相谑之复喻使去尔其根可以和五脏制食毒古者有芍药之酱合之于兰桂五味以助诸食因呼五味之和为芍药七发曰芍药之酱子虚赋曰芍药之和具而後御之南都赋曰归鴈鸣鷄香稻鲜鱼以为芍药酸甜滋味百种千名是因致其滋味也服文颖伏俨辈解芍药称具美也或以为芍药调食或以为五味之和或以爲以兰桂调食虽各得彷彿然未究名实之所起至韦昭又训其读勺丁削切药旅酌切则并没此物之名实矣今人食马肝马肠者犹合芍药而煮之古之遗法食之毒莫甚于马肝则制食之毒者宜莫良于芍药故独得药之名又陆玕谓今药草芍药无香气非是也盖医方但用其根陆不识其花故云无香气陆佃云芍药荣于仲春华于孟夏传曰惊蛰之节後二十有五日芍药荣是也华有至千叶者俗呼小牡丹今羣芳中牡丹品第一芍药第二故世谓牡丹为华王芍药为华相又或

以为华王之副也陈氏云芍药者溱洧之地富有之诗人赋特有所因也宋熙寧时始尚经术说诗者竞为穿凿如伊其相谗赠之以芍药谓此为淫佚之会必求其为士赠女乎女赠士乎刘贡父善滑稽尝曰芍药能行血破胎气此盖士赠女也若视尔如蒹葭我握椒则女之赠士也本草云椒性温明目暖水脏故耳闻者絶倒】溱与洧浏其清【庚韵】矣士与女殷其盈【庚韵】矣女曰观乎

【见前】士曰既且【见前】且往观乎【见前】洧之外洵訏且乐【见前】维士与女伊其将谗【见前】赠之以勺药【见前 赋也 洧毛云深貌说文云流清貌按水深故清殷毛云衆也盈满也游人衆多而填满于溱洧之上也陆佃云郑人会于溱洧秉蕢以自祓除其风俗之旧也及其甚也淫风大行过时而不反来者且益以衆将严粲云方且也犹将安将乐之将鍾惺云後人诗语用相将字本此自女曰观乎以下复将上章文咏叹一番而于无意中易一将字是诗人最善脱换处言方且相谗而未已也朱子以为相将声同而讹其亦误矣】

溱洧二章章十二句【序以为刺乱也兵革不息男女相弃淫风大行莫之能禁焉申培说亦然朱子谓郑俗淫乱乃其风声气习流传已久不为兵革不息男女相弃而後然也今以诗词观之模写士女骀荡之状宛然在目使果困于兵革後则其情事必然凄苦安能游佚若此子贡传则以为郑灵公好倡国人化焉君子讥之赋此然考左传灵公以鲁宣三年冬嗣位至次年六月为公子归生所弑计其在位仅半载耳未有移风如此之速朱子据薛君注以解此诗是矣然谓淫奔者自叙之词则亦未然观篇中具叙事体乃直是作诗者暴其事以刺尔又冯时可云古于睽合通塞皆借夫妇以喻君臣郑国政教迫促上下间隔作诗者进以乐易广大故曰洧之外洵訏且乐訏大也曰赠之以芍药芍药调和具也此意甚美但恐未然也】

东门之墠亦刺郑风淫也【郑玄云此女欲奔男之辞焦贛易林云东门之墠茹庐在坂礼义不行与我心反刘公瑾云自昔说郑诗者惟以东门之墠与溱洧为淫诗】

东门之墠【铎韵正义云诸本作坛今定本作墠】茹蘆【易林作庐】在阪【阮韵亦叶铎韵孚恋翻易林作坂】其室则迕其人甚远【阮韵 赋也东门城东门衆所经行也严粲云东门郑要会之地在隐四年宋公陈侯郑人卫人伐郑围其东门即此门也墠毛传云除地町町者孔颖达云礼记尚书言坛墠者皆封土者谓之坛除地谓之墠除地去草故云町町此妇人所奔以待男子之处非男子所居也茹蘆草名尔雅云茅蒐也李巡云茅蒐一名茜可以染绛陆玕云蒨草也一名地血齐人谓之茜徐州人谓之牛蔓今圃人或作畦种蒨故货殖传云卮茜千石亦比千乘之家陆佃云叶似棘说文曰人血所生故蒐从草从鬼齐人谓之茜陶隐居以为东方诸处乃有而少不如西多夫文西草为茜其或又以此乎罗愿云叶似枣叶头尖下濶茎叶俱澁四五叶对生节间蔓延草木上根紫赤色今所在有八月采根人血所生故一名地血今茹蘆能治血又所染亦赤盖其类耳古者士爵弁服弁色赤而微黑如爵头里亦纁色士冠礼曰爵弁服纁裳纯衣缁带鞶鞶也士鞶鞶幽衡合韦为之染以茅蒐因名焉说文曰茅蒐染韦一入为鞶诗曰鞶鞶有爽左传鞶韦之跗注是也其女子之染则毛氏云茹蘆茅蒐之染女服也郑笺云茅蒐染巾也则缁衣茹蘆为妇人服矣博雅云陞者阪也尔雅云陂者曰阪孔疏云陂陀不平而可种者名阪司马相如哀二世赋登陂陀之长陂是也详诗意男子

所居正在陂外女身至东门之墀以待之而尚有阪以为之限故叹室虽近而人甚远盖欲奔而未遂之辞也】东门之栗【质韵丰氏本作?】有践【韩诗作靖艺文类聚丰氏本俱作静】家室【质韵】岂不尔思子不我即【叶质韵子息翻赋也栗说文作?云其实下垂故从者草木实垂然盖象形也古文从西从二徐巡说木至西方战?罗云言木则凡木皆然而栗至罅发之时将坠不坠尤有战栗之象故天子五社西社植栗陆佃云栗味咸北方之果也有菜蜩自裹故先贤云皂者柞栗之属国语曰妇摯不过枣栗以告处也先儒以为枣取早敬栗取恂栗践履也与践约之践同意犹後迹之履前迹也男以女为室女以男为家苏辙云栗女摯也取栗为礼而可以行室家之道矣即犹就也尔雅云尼也注云尼者近也即今相近也此女言东门有栗人固有取之为摯以践室家之约者我岂不尔思而欲往汝家以行此礼哉特无如子之不我就何耳上章思之而未得见之词此章思之切而冀其亟来就己之辞详此则郑所谓女欲奔男者信矣又罗云茹蘆女所以染也今方在陂栗者女所以为摯也今方在门则衣服摯见之物未备不待礼而相奔矣亦通】

东门之墀二章章四句【子贡传无此篇申培说于王风内有唐棣篇名丰氏本以为即此篇作唐棣三章章四句其首章云唐棣之华偏其反而岂不尔思室是远而丰氏据申培说云此因僖王弃贤而讽之但唐棣四句原出论语旧说以为逸诗今以此冠于首章倘亦以岂不尔思二语与此诗词颇相类而附益之耶不足信也季本云唐棣之与东门各为起语室远之与室迕亦各异情不得合而为一也序以为刺乱也男女有不待礼而相奔者也夫淫者自淫不关世乱必曰因乱而淫岂其然乎】

女曰鸡鸣述郑贤夫妇相劝勉之辞溱洧之反【子贡传云夫妇相戒以勤生乐善辅广云观此诗则郑国之俗虽曰淫乱然在下之人夫妇之间犹知礼义勤生业不昵于宴私相安于和乐而又能赞助其君子亲贤乐善以辅成其德此可以观先王之泽与民性之善矣】

女曰鸡鸣士曰昧旦【翰韵】子兴视夜明星有烂【翰韵】将翱将翔弋鳬与鴈【叶翰韵鱼肝翻赋也女曰士曰妇与夫相对语也孔颖达云士者男子之大号昧晦旦明也朱子云昧旦天欲旦昧晦未辨之际也列子云将旦昧爽之交日夕昏明之际子兴视夜二句妇之语也子指夫也兴起也警以夙兴不留色也明星朱子苏氏严氏皆以为启明之星先日而出者也烂光色也严粲云此诗述夫妇相警之辞始妇警其夫曰鸡鸣可兴矣夫曰姑俟昧旦也妇又警其夫曰子宜兴而视夜之如何盖小星已不见惟明大之星烂然天将晓矣毛氏谓天将晓则小星不见惟明大之星烂然虽不指为启明然将晓而明大者惟启明耳将翱将翔二句夫之语也将发语辞说文训翱为翱翔训翔为飞不容二义无别以字求之翱左施皐皋者缓也当为缓飞之义若翔则初飞而布翅之状所谓回翔是也此指鳬鴈言弋本作惟说文云缴射飞鸟也以生?为?系矢而射也按周礼夏官司弓矢云矰矢箛矢用诸弋射注云结缴于矢谓之矰矰高也箛之言刺也二者皆可以弋飞鸟刺罗之也鳬水鸟按尔雅云舒鳬鹭又云鷖沉鳬盖舒鳬则名鹭沈鳬则名鷖郭璞以为鸭也李巡云野曰鳬家曰鹭然则专有鳬名者乃鷖耳又此诗言弋鳬与鴈则其在野明矣郭云鳬似鸭而小长尾背上有文陆玕云青色卑脚短喙水鸟之谨愿者也庄子云鳬胫虽短续之则忧鴈阳鸟鸿属大曰鸿小曰鴈又尔雅云鳬鴈丑其足蹢其踵企郭云鳬鴈之类脚指间有蹢蹢属相着飞则伸其脚跟企直也陆佃云鳬

鴈常以晨飞故是诗如此赋曰晨鳧旦至此之谓也夫闻其妇明星有烂之言而曰果尔天将晓矣此时有鳧鴈翱翔吾将起而弋之盖将有所用之如下章所云也按左昭二十八年魏献子曰昔贾大夫恶娶妻而美三年不言不笑御以如皋射雉获之其妻始笑而言贾大夫曰才之不可以已我不能射女遂不言不笑夫与此诗意象颇相彷彿】弋言加【叶支韵居之翻亦叶歌韵居何翻】之与子宜【支韵亦叶歌韵牛何翻】之宜言饮酒与子偕老【皓韵】琴瑟在御莫不静好【皓韵 赋也此章承上将翱将翔二句皆其夫之语加犹施也吾亦欲无加诸人之加二子皆指妇也言我之弋鳧与鴈何为也哉言将有所施之耳所施必得其人故与子谋其所宜也昔晋山涛之妇自比于负羈之妻欲观狐赵而言阮籍等正当以识度相友是可见明鉴在妇人中多有之知此妇亦非汶汶者矣治酒食者中馈之职既相商度而得其所宜则言将召是人为宾客而饮之酒以示欢洽庶乎赖仁贤之助以保室家亦可以与尔偕老矣云饮酒则鳧鴈以充豆实亦在其中琴瑟所以乐宾曲礼云士无故不彻琴瑟御侍也按车中御在左故谓御为侍静好以声言静安静也不烦数浮荡之谓好和好也不淫哇憇憇之谓此又嘱其妇而曰尔不但治酒食而已凡劝侑之人操琴瑟而在侍御者尔皆当预谨飭之使之莫不静好以娱此嘉宾可也盖是夫之好德如此白虎通云公羊传曰天子八佾诸公六佾诸侯四佾诗曰大夫士琴瑟御大夫士北面之臣非专事子民者也故但琴瑟而已左传医和曰君子之近琴瑟以仪节也非以恣心也陈阳云琴瑟其声尚宫其音主丝士君子常御所以乐得其道堂上之乐也故用大琴必以大瑟配之用中琴必以小瑟配之然後大者不陵小者不抑足以禁淫邪正人心矣故荀卿曰琴瑟以乐心罗泌云琴统阳瑟统陰以阳佐陰不可易也瑟维陰也故朱襄鼓五弦之瑟而羣陰来琴惟阳也故虞氏鼓五弦之琴而南风至陰阳之应各从其类是以伯牙鼓琴而马仰秣瓠巴鼓瑟而鱼出听鱼水物而马火物以类应也杨泉曰琴欲高张瑟欲下声数不踰琴以佐阳也阳主生故其情喜陰主杀故其情悲陰阳并毗则寒暑不成而四时忒矣此帝女之鼓瑟所以动陰声而悲不能克也故乐惟不可苟作也先王以术调鼎以鼎调乐乐和而玉烛调矣诗曰琴瑟在御莫不静好此古之君子无故之所以不彻欤】知子之来【叶职韵六直翻】之襍佩以赠【朱子云叶音则入职韵按来赠相叶终觉牵强丰氏本赠作贻系支韵上文来据仪礼注读为厘亦叶支韵似可从且赠贻字形颇相似疑传写讹也】之知子之顺【震韵】之襍佩以问【叶震韵徵闰翻】之知子之好【叶号韵虚到翻】之襍佩以报【号韵】之【赋也此妇人答其夫之词三子皆指夫也朱子云来之致其来者如所谓修文德以来之礼妇人左佩纷帨刀砺小觿金燧右佩箴管线纁大觿木燧之属所以备尊者使今也毛氏以为佩玉珩璜琚瑀冲牙之类似非士庶之常服且与襍字不协赠说文云玩好相送也一曰增也孔云赠遗者所以增长前人赠之财使富增于本赠之言使行增于义故曰赠增也顺郑云谓与已和顺即莫逆于心之谓问毛传云遗也孔云曲礼凡以苞苴簠箚问人者左传卫侯使人以弓问子贡皆遗人物谓之间古人通言必遗以物好者喜好也所谓中心好之者是也报答也礼疏云感恩者皆称报陆化熙云既致其来故思赠其往顺则不忍其踈濶故思问之好之者好之善也我好彼善是彼以善施我故有报下字俱有别此妇言子之好德既如此则我私心幸甚非但治酒食飭琴瑟而已虽服玩之物亦无所爱知其初来则将有以赠之知其久而莫逆则将有以问之知其能以善道相成则将有以报之也是不特能奉承其君子之意而其好德更甚于君子矣朱子云此诗意思甚好读之使人有不知手舞足蹈者】

女曰鸡鸣三章章六句【申培说以为夫妇相警戒之词与朱传同今按此诗亦不见有戒意直相劝勉耳序则云刺说德也陈古义以刺今不说德而好色也所谓陈古刺今亦不必有所据】

出其东门郑之贞士宜其室家不染淫俗而作此诗【出申培诗说子贡传同】东门之墀之反【朱子云是时淫风大行而其间乃有如此之人亦可谓能自好而不为习俗所移矣羞恶之心人皆有之岂不信哉又云郑诗虽淫乱然此诗却如此好女曰鸡鸣一诗亦好辅广云郑诗惟女曰鸡鸣与此诗为得夫妇之道夫子录之正以见人性之本善而先王之泽犹未泯也】

出其东门【叶先韵谟连翻】有女如云【叶先韵于员翻】虽则如云匪我思存【叶先韵从缘翻】缟衣綦巾【说文作縹】聊乐我员【先韵陆德明丰氏本俱作云韩诗作魂魂神也赋也苏辙云东门郑之为乱者之所在也故墀栗皆曰东门毛传云如云众多也匪通作非言此如云之女皆非我思所存也严粲云缟衣綦巾称其妻犹云荆钗布裙也缟说文云鲜色也一云帛已练研者曰缟一云缁精白者曲阜之俗善作之尤为轻细故曰鲁缟孔颖达以为薄缁不染故色白也綦一作縹说文云帛苍艾色孔云綦者青色之小别苍即青也艾谓青而微白为艾草之色也巾佩巾即纷帨也礼妇人在佩纷帨纷本作楚谓大巾曰以拭器帨以饰手皆巾也故下章有茹蘆之异盖一是帨耳聊郑玄云且略之辞亦自足之意乐谓室家之乐员云通孔云云员古今字助句辞也杨慎云今之云字乃员之省文诗景云维何秦誓虽则员然石鼓文君子员猎员猎员游皆云员通也缟衣綦巾聊乐我员正以着如云之女匪我思存耳又按说文云缟衣縹巾未嫁女所服不知何据殆不足信】出其闾閭【虞韵】有女如荼【虞韵】虽则如荼匪我思且【叶虞韵丛租翻】缟衣茹蘆【叶虞韵读如卢笼都翻】聊可与娱【虞韵丰氏本作虞赋也闾閭东门之闾閭也闾毛云曲城也徐锴云若今门外壅城门外陈氏云门外之有副城回曲以障门者尔雅云闾谓之台孙炎云积土如堵所以望气祥也孔云出谓出城则闾是城上之台谓当门台也荼毛以为英荼郑以为茅秀按诗中咏荼有三种风谁谓荼苦则尔雅所谓荼苦菜者也周颂以薺荼蓼则尔雅所谓荼萎叶者也荼通作茶此有女如荼即芳也萑茅之属尔雅所谓蓼荼蓼芳者也曰蓼曰萑曰蓼皆茶芳之别名方语异尔毛言英荼者孔云茅之秀者其穗色白国语吴王黄池之会陈兵胁晋万人为方陈皆白常白旃素甲白羽之矰望之如荼亦以白色为如荼也又郑谓荼乃物之轻者飞行无常则是又淫佚女子之比矣且通作徂兼往存二义郭璞云以徂为存犹以乱为治以曩为屨以故为今此皆训诂义有反覆也故郑云匪我思且犹匪我思存也茹蘆可以染绦郑以为染巾是也蒙上章缟衣綦巾之文知此亦为巾也此草乃郑东门所有观东门之墀篇可见娱说文云乐也上章言聊乐者自乐也此曰与娱则与之同乐矣】

出其东门二章章六句【序以为闵乱也公子五争兵革不息男女相弃民人思保其室家焉所谓公子五争者谓突再也忽子亹子仪各一也郝敬为之说云恒情穷则反本安则思淫郑昭厉之际干戈不息人民离散室家以苟全为幸虽有东门之游女而无江汉之求思时使之然也故夫男女之际人之至情世治则怀春之女诱于吉士世乱则如云之女所思匪存若使

上无教化则野有死麕为淫奔矣国无乱离则出其东门为义士矣故诵其诗当论其世未可以其辞而已也刘辰翁云舍序读诗辞意甚美今按诗中所云聊乐我员聊可与娱襟怀洒落似非兵革不息男女相弃时语朱子改正较为得之】

駉秦人从狩而作【出申培说按史记秦文公元年居西垂宫三年文公以兵七百人东猎四年至汧渭之会乃卜居之此诗当即是文公东猎之事居西垂而东猎其亦有略地岐丰之意乎又按文公三年即平王之九年】

駉【汉书说文俱作四】驪【汉书作駉】孔阜【有韵丰氏本作?】六轡在手【有韵】公之媚子从公于狩【叶有韵始九翻丰氏本作守赋也四马曰駉驪马名毛传以为驪非也陆佃云说文曰马深黑色驪赤黑邑驪先儒谓取其马色如铁非特有取于色盖亦取其坚壮如铁故曰驪也月令孟冬乘铁驪即此是也孔甚也阜字本作徐锴云弥高大也故从三尸刘熙云土山曰阜厚也言高厚也郑玄云四马六轡六轡在手言马之良也陈祥道云四马八轡而诗每言六轡者盖驾马之法有游环以止驂马之外出有胁驱以止驂马之外人有胁驱矣则驂马之内轡无所施也系于轼前而已此诗所以言六轡也孔云驂马内轡纳之于舄故在手者惟六轡耳聘礼宾覲总乘马注云总八轡牵之赞者谓步牵马故八轡皆在手也大叔于田言六轡如手谓马之进退如御者之手故为御之良此言六轡在手谓在手而已不假控制故为马之良也陆云马之族不一而驂马则喜前驂马则喜後故古之御者驂马以鞭为主驂马以轡为主铁性坚驂则疑于难御而有繁手之劳矣今其六轡在手而已则是无事于轡故诗以美之也一说严粲云在手言把握其轡能制马之迟速惟手之是听也在如师之耳目在吾旗鼓之在亦通公文公也媚说文云悦也媚子谓公所爱悦之人也狩字从犬说文云犬田也以未章载猷观之知其为犬田也此章言往狩之事】奉时辰牡辰牡孔硕【陌韵】公曰左之舍拔则【丰氏本作其】获【陌韵赋也奉谓以两手翼之驱兽而聚之一处以待君射也谁奉之者媚子也毛云时是辰时也牡朱子云兽之牡者辰牡犹言时兽硕郑云肥大也孔云公曰左之是公命御者从禽之左逐之欲从禽之左而射之也逐禽繇左礼之常法朱子云射必中左乃为中杀五御所谓逐禽左者为是故也逐禽左逆驱禽兽使左当人君以射之也建安何氏士信曰公羊传解第一杀第二杀第三杀皆自左膘射之达于右则左当人君之左指禽兽之左膘而言详见车攻篇舍放也拔毛传云矢未也郑云括也孔云以镞为首故拔为未拔当作校亦犹括当作栝列子曰後镞中前栝是也亦作箬箬会也谓与弦相会乃受弦处又名比考工记曰夹其羽而设其比是也孔云既言公曰则是公自舍之猎所得曰获公舍放矢未则应弦而获其兽言善射也此章言方狩之事】游于北园【叶先韵于权翻】四马既闲【叶先韵何甄翻】輶车鸾镳【萧韵】载猷歇【说文作猷】骄【萧韵说文作猷赋也顔师古云养鸟兽曰苑苑有垣曰园孔云游于北园盖近在国北地官载师云以场圃任园地明去其国近也朱子云田事已毕故归而游于北园四马即駉铁也闲尔雅云习也輶车轻车也端言輶亦训轻车见说文鸾铃也象鸾鸟声故曰鸾亦作銮镳马勒傍铁也解见硕人篇言置铃于马口之两旁也郑云轻车驱逆之车也置鸾于镳异于乘车也陆云驱逆之车尚轻疾孔云驱驱禽使前趋获逆御还之使不出围若君所乘者谓之田车不宜以輶轻为名乘车鸾在衡此鸾在于镳故异于乘车也载车中所载也毛云猷猷骄田犬也猷或作猷周谓北夷曰猷即此猷也歇骄当依尔雅说文作猷猷张衡西京赋曰属车之箠载猷猷是也尔雅云长

喙殄短喙猓獠朱子云以车载犬盖以休其足力也韩愈画记有骑拥田犬者亦此类一说王雪山严华谷戴岷隐皆云歇骄谓歇其骄逸即休其足力之意亦通但尔雅说文皆以为犬名似当从古耳又按古者狩以讲武未尝以犬从禽载犬者秦之陋也轻车有和鸾之声而犬载其上总是写毕狩光景此章言毕狩而游观之事张敬夫云读车邻驂铁之诗则知秦之立国自其始创时不过盛其车马奉养之事竟为射猎之为而已盖不及于用贤制民也则其流风亦习乎是而已】

驂铁三章章四句【序云美秦襄公也始命有田狩之事园囿之乐焉子贡传亦以为襄公始有田囿之事秦人喜之按秦自文公东猎而外其他君田狩之事史皆无所见则此诗之当属文而不属襄明矣朱子谓此诗亦车邻之意要是影响】

宾之初筵卫武公饮酒悔过也【出後汉书注引韩诗之说申培说亦云卫武公自警之诗朱子云今按此诗意与大雅抑戒相类必武公自悔之作当从韩义刘公瑾云此诗之意欲以自警抑诗之意亦以自警也此诗之意恐醉酒而伐德犹抑诗所谓颠覆厥德荒嬉于酒也此诗之意反覆以威仪为言犹抑诗言抑抑威仪敬而威仪敬尔威仪不愆于仪也以此章有童羖之语抑诗亦有彼童而角之喻其语气亦相类也然抑诗凡言女言尔集传以为武公使诵诗者命己之词今按此诗凡言宾言尔者恐亦武公自谓也】

宾之初筵左右秩秩【朱子云无韵未详後三四章放此丰氏本作秩秩左右】笾豆有楚【语韵】殽核维旅【语韵】酒既和旨【纸韵】饮酒孔偕【叶纸韵苟起翻】钟鼓既设【叶质韵式质翻】举醺逸逸【质韵】大侯既抗【漾韵亦叶阳韵丘冈翻】弓矢斯张【阳韵亦叶漾韵知亮翻】射夫既同【东韵】猷尔发功【东韵】发彼有的【叶药韵子药翻陆明德本作勺】以祈尔爵【药韵 赋也孔颖达云上八句言射初饮燕之事下六句言大射之事将祭而射谓之大射大射之初先行燕礼按礼射有三一为大射二为宾射三为燕射大射者将祭择士之射也射义云天子将祭必先习射于泽择者所以择士也已射于泽而後射于射宫射中者得与于祭不中者不得与于祭不得与于祭者有让削以地得与于祭者有庆益以地先儒谓将祭之时再为射礼然泽官言习射则未是大射至射于射宫乃行大射也今考周礼夏官司弓矢职云泽共射楫质之弓矢大射燕射共弓矢如数是则泽宫之射与大射异此其证也郊特牲云卜之日王立于泽亲聽誓命泽者泽宫也今家语文亦作王亲立于泽宫盖既卜之後必到泽宫择可与祭祀者因誓勅之以礼耳其地所在旧无明文先儒谓于宽闲之处近水泽而为之愚意即辟雍也辟雍之水旋丘如璧朱子云说者以雍为泽盖即旋丘之水而其学即所谓泽宫也此论得之亦如说文解泮为诸侯乡射之宫礼言鲁人将有事于上帝必先有事于泮宫盖亦于此处射而择士其制西南为水东北为墙与泽官制盖相近也又卿大夫从君田猎後班余获而习射亦于泽宫尚书大传所云凡祭取余获陈于泽然後卿大夫相与射是也射宫则在郊乐记云武王克殷散军而郊射左射狸首右射驸虞而贯革之射息注谓郊射是为射宫于郊又周礼夏官诸子职云掌国子之倅使之修德学道春合诸学秋合诸射疏谓学大学也射即射宫乃国之小学在西郊则虞庠是也疏所以指为小学者以天子大学在国中小学在郊故乡射礼云君国中射则皮树中于郊则闾中於竟则虎中国中射者燕射也于郊者大射也於竟者谓与邻国君射则宾射也中者盛算之器以木为之刻为

兽形皮树与间皆兽名间状如驴详见猗嗟篇而大射礼于事毕之後云卿大夫皆出公不送公入鶩鶩者鶩夏也乐章之名公入则奏之以从郊入国故言入凡此皆射宫在郊之证也又春官司服职云飨射则鶩冕注谓飨射者飨食宾客与诸侯射也燕礼云燕朝服于寝注谓其服玄冕缁衣素裳汉法衣皮弁服与古异据此诗第三章言侧弁之俄则其非飨燕之射可知先儒谓为学宫之射当服皮弁以学记云皮弁祭菜故也然则此诗以弁入咏而二章又有烝衎烈祖之语其为将祭而行大射之礼无可疑矣宾射者诸侯求朝天子入而与之射或诸侯相朝而与之射即周礼所谓飨射大宗伯之职以宾射之礼亲故旧朋友是也燕射者谓息燕而与之射息者休农息老物也燕者谓劳使臣若与羣臣饮酒而射也春官乐师职云燕射射夫以弓矢舞是也宾射行于朝燕射行于寝三射之处不同其侯亦别考工记梓人云张皮侯而栖鹄则春以功张五采之侯则远国属张兽侯则王以息燕凡侯皆用布为之皮侯则以虎熊豹麋之皮饰其侧又方制之以为一谓之鹄着于侯中周礼天官司裘职云王大射则共虎侯熊侯豹侯设其鹄诸侯则共态侯豹侯卿大夫则共麋侯皆设其鹄即此大射之侯也宾射之侯尽以五采周礼夏官射人职云掌国之三公孤卿大夫之位三公北面孤东面卿大夫西面诸侯在朝则皆北面以射法治射仪王以六耦射三侯三获三容乐以驹虞九节五正诸侯以四耦射二侯二获二容乐以狸首七节三正孤卿大夫以三耦射一侯一获一容乐以采苹五节二正士以三耦射豸侯一获一容乐以采蘩五节二正三侯虎熊豹也二侯熊豹也一侯麋也获谓唱获之旌容亦名乏以革为之在侯之旁所以为唱获者御矢也以其可以容身故谓之容以其矢于此匮乏不去故亦谓之乏九节七节五节之解见後五正者先儒以为中朱次白次苍次黄玄居外三正损玄黄二正去白苍而画朱绿未知何据正者鸟名正与鹄皆鸟之捷黠者大射射鹄宾射射正燕射射质燕射之侯画兽为侯乡射记所云天子熊侯白质诸侯麋侯赤质大夫布侯画以虎豹士布侯画以鹿豕是也综上诸礼文天子诸侯大夫三射皆具士惟有宾射燕射而无大射先儒以为士无臣故祭无所择理或然也三射之礼皆有饮酒故射义引诗曰曾孙侯氏四正具举大夫君子凡以庶士小大莫处御于君所以燕以射则燕则誉但宾射燕射因飨燕而射意止于娱宾大射是将祭而射意专主于择士饮酒特其中之仪节耳此三射之外又有乡射其侯用采侯礼与燕射同乃乡大夫贡贤能之後行之以询衆庶及州长射于州序之礼非天子诸侯所用也又射义云古者诸侯之射也必先行燕礼卿大夫士之射也必先行乡饮酒之礼故燕礼者所以明君臣之义也乡饮酒之礼者所以明长幼之序也今按所谓先行燕礼者言大射未旅之前所行之礼似燕之法非谓先一日行燕礼毕而後射也天子大射之礼亡所可考见者唯诸侯大射见于仪礼意其节文当不甚相远若此诗乃卫武公入为王卿士所作则天子之大射也宾武公自谓也时王以武公为宾故自云然初筵朱子云初即席也孔云铺陈曰筵藉之曰席筵席通也左右郑玄云谓折旋揖让也孔云以宾与主人为礼随其左右之宜其行或方折或回旋相揖而辞让也秩序也合宾与主人言之故重云秩秩按大射仪摈者纳宾宾及庭公降一等揖宾宾辟公升即席奏肆夏宾升自西阶主人从之宾右北面再拜宾答拜主人取酌膳筵前献宾宾拜受爵于筵前然後宾升筵即此所谓宾之初筵左右秩秩者也其礼以宰夫为主人君于臣虽为宾不亲献以其莫敢抗礼也筵豆解见代柯篇楚毛传云列貌按楚字义说文以为丛木谢眺诗曰平楚正苍然以丛木广远谓之平楚此言有楚谓森然成列如丛木然也穀毛云豆实也郑云菹醢也凡非谷而实之曰穀核郑云筵实有桃梅之属按周礼筵人掌四筵之实醢人掌四豆之实凡祭祀共其筵豆荐羞之实宾客丧纪亦如之是飨燕有筵豆也四筵内有馈食之筵其实枣?桃乾?榛实

乾?者乾梅也内则有桃诸梅诸是其乾者皆有核之物也孔云此经二句自相克配穀核即筵豆所盛穀则实之于豆核则实之于筵也先穀後核不依筵豆次者便其文耳旅衆也军之五百人为旅故有衆多之义和旨郑云酒调美也孔甚偕俱也言与燕者皆在列也按大射仪官饌羹定射人告具于公公升即位于席西向小臣师纳诸公卿大夫诸公卿大夫皆入门右北面东上公降立于阼阶之东南南乡小臣师诏揖诸公卿诸公卿西面北上揖大夫大夫皆少进然後摈者请宾即此所谓饮酒孔偕者也首二句纪宾初升筵之礼次三句纪官所饌之物至此句乃纪与燕之人钟鼓谓笙钟颂钟建鼓之属大射仪所云乐人宿县于阼阶东笙磬西面其南笙钟建鼓作阼阶西南鼓西阶之西颂磬东面其南钟一建鼓在其南东鼓一建鼓在西阶之东南面是也设说文云施陈也云既设者非谓此时方设言既设则奏之可知盖在主人献君爵而奏肆夏时也按周礼钟师以钟鼓奏九夏肆夏者九夏之一大射仪摈者纳宾及庭公先升即席奏肆夏宾升自西阶主人送爵献宾宾乃升筵啐爵而乐阌宾遂酢主人主人乃献公公拜受爵复奏肆夏卒爵而乐阌又郊特牲云宾入大门而奏肆夏燕礼记亦云宾及庭奏肆夏皆指公升即席而言此言钟鼓既设在初筵之後举醺之前明是君受爵时所奏与即席之奏无预举醺朱子云举所奠之醺爵也逸逸往来安闲之貌按仪礼主人酌宾曰献宾既酢主人主人又自饮而献宾曰醺宾受之奠于席前而不举至旅而遂举所奠之爵交错以徧以大射仪考之初主人献宾宾酢主人次主人献公此时奏肆夏卒爵乐阌主人受公酢乃醺宾宾告于摈者请旅诸臣公许之乃举旅行醺即此所谓举醺逸逸也大侯毛云君侯也侯者射布之名字本作侯从人从厂从矢象张布矢在其下古者以射选贤射中者获封爵因谓之诸侯也故射义云天子之大射谓之射侯射侯者射为诸侯也射中则得为诸侯不中则不得为诸侯又考工记云祭侯之礼以酒脯醢其辞曰惟若宁侯母或若女不宁侯不属于王所故抗而射女今以字义考之诸侯之名义本因射布之侯而得名而考工记以为射诸侯之不安於为侯者则是射布之名侯乃反因射诸侯而得名非事实也若大侯之名见于此诗及仪礼而未详其为何侯据周礼注谓王之大射虎侯王所自射熊侯诸侯所射豹侯卿大夫所射理或近之则此诗所云大侯盖虎侯也然射人职诸王大射则以狸步张三侯与司裘职王大射共虎熊豹三侯之说合若诸侯则皆云二侯而已仪礼大射篇所记者诸侯之礼乃云命量人量侯道与所设乏以狸步大侯九十参七十干五十设乏各去其侯西十北十遂命量人巾车张三侯大侯之崇见鹄于参参见鹄于干于下纲不及地武抑又异周礼二侯之说何耶先儒谓彼乃畿内诸侯用二侯此畿外诸侯亦得用三侯但不敢同于天子虎熊豹之三侯似已然亦以大侯为熊侯而读参为糝读干为豢糝者裸也裸侯者豹鹄而麋饰豢侯者豢鹄豢饰也是皆妄意推测未有以证其必然愚偶以乡射记之说合之则此所云大侯杲熊侯也所云参侯乃麋侯也何以明之盖诸侯本宜射熊侯而乡射记天子熊侯白质以天子之燕射亦有取于熊为其同于天子故尊而大之也麋侯据司裘职本卿大夫所用而乡射记云诸侯麋侯赤质则诸侯之燕射亦有取于麋以其诸侯卿大夫皆得参用故变名之为参也若于侯即士所射之豢侯见于射人职者是也熊侯诸侯所自射麋侯以待卿大夫之射故大射仪云公射大侯大夫射参士射于士虽不得自行大射之礼然得与君同射又射义云古者天子之制诸侯岁献贡士于天子天子试之于射宫则是天子之大射士亦得与矣并记于此抗毛云举也广韵云以手抗举也先此已张侯而不系左下纲至此乃系之故曰既抗按乡射仪初张侯不系左下纲中掩束之及有司请射于是司马命张侯弟子说束遂系左下纲纲者持舌?之名舌所以维特侯者侯上下各有左右舌故有左右上下纲?出于舌外以持舌而系之于植也侯

以向堂为面则左下纲以西畔而言初之不系者事未至也中掩束之者中掩左厢向东束之故将射乃解之也司马者即司正所为泄酒名司正泄射名司马弟子卑幼者也脱其束遂系左下纲于植事至故也大射仪于将射虽不言系纲而前此张三侯之时亦有不系左下纲之文及毕事又有量人解左下纲之文则於此时系之可知所以不言及者互相见耳又郑笺以为既抗者举鹄而栖之于侯也按考工记梓人为侯广与崇方三分其广而鹄居一焉又云张皮侯而栖鹄当侯之中别制皮为鹄举以栖之故曰既抗亦通所抗者不止于大侯举尊以该卑也又按礼卑者与尊者为耦不异侯张说文云施弓弦也孔云弓可言张而并言矢者矢配弓之物连言之耳按大射仪旅酬之後纳工歌鹿鸣管新宫毕司射适次祖决遂执弓挟乘矢于弓外见鏃於附右巨指鈎弦自阼阶前曰为政请射即此所谓弓矢斯张也以句在射夫既同之前知为司射之弓矢非射夫之弓矢也射夫郑云衆射者也既同朱子云比其耦也射每二人相对以决胜负曰耦与车攻既同差异彼特以人衆齐集言此乃以艺能相近言按大射仪司射请射之後遂告曰大夫与大夫士御于大夫言大夫与大夫不足则士侍于大夫与为耦也乃比三耦三耦俟于次司射命上射曰某御於子命下射曰子与某子射及三耦卒射之後复比衆耦比者选次之谓即此所谓射夫既同也然三耦乃诸侯之礼若天子则六耦以诸侯为之周礼大司马职云若大射则合诸侯之六耦是也或诸侯不足亦当取足于卿大夫也献郑云犹奏也尔指宾武公自谓盖使人诵之以刺己也发功郑云发矢中的之功按大射仪三耦取弓矢于次司射适次作上耦射命曰母射获母猎获乃射上射既发挟矢而後下射射拾发以将乘矢获者坐而获举旌以宫偃旌以商获而未释获三耦卒射亦如之此射之第一节作上耦射者射有三耦先使上耦射而後通及其次三耦也获解见前母射获者母使矢中乏也从旁为猎发挟矢者发其所挟之乘矢也下射亦如之拾之言更也将之言行也获者坐而获言负获旌之人坐而告获下文举旌偃旌是也以宫以商者以磬声之宫商为节奏也此即所谓献尔发功者也获而未释获者此时但言获而已犹未释算也彼指射侯也的说文云明也即鹄是也以其明白而可见故名的也祈求也尔即宾也爵饮器其形象雀取其鸣节节足足也韩诗说云一升曰爵爵尽也足也二升曰觚三升曰觶四升曰角五升曰散总名曰爵陆佃云雀固物之淫者也酒善使人淫佚故一升曰爵爵所以戒也亦取其鸣节以戒荒淫之饮言尔所与射之耦发矢于彼侯而有中其的者则将以此求尔之饮此爵也射义孔子曰诗云发彼有的以祈尔爵祈求也求中以辞爵也酒者所以养老也所以养病也求中以辞爵者辞养也按大射仪三耦初射之後乃设楅上耦取矢复射司射请释获于公公许司射命曰中离维纲扬触梱复公则释获衆则不与唯公所中中三侯皆获复进视上射命曰不贯不释释获者实八算于中乃射若中则释获者每一个释一算上射于右下射于左若有余算则反委之俟三耦卒射然後公及诸公卿大夫相继卒射於是司射视算释获者先数右获二算为纯一纯以取实于左手十纯则缩而委之每委异之有余纯则横诸下一算为奇奇则又缩诸纯下又释左兼斂算实于左手一纯以委十则异之其余如右获司射复位释获者遂进取贤获执之繇阼阶下北面于公若右胜则曰右贤于左若左胜则曰左贤于右以纯数告若有奇者亦曰奇若左右钧则左右各执一算以告曰左右钧于是司射者命设丰胜者之弟子洗觶升酌奠于丰上一耦出揖及阶胜者先升升堂少右不胜者进北面卒觶遂揖而下不胜者先降与升饮者相左交于阶前相揖反位三耦以次卒饮若宾诸公卿大夫不胜则仆人师洗升宾觶以授宾诸公卿大夫受觶于席若饮公则侍御者降洗角觶升酌及射爵办乃彻丰与觶此射之第二节也详第一节之射似是人皆先习射一次故虽告获而未释算至此乃计的之中

否以为胜负而饮射爵焉即此诗所谓发彼有的以祈尔爵也楅中二器名解见猗嗟篇离犹过也猎也侯有上下纲其邪制躬舌之角者为维躬侯身也舌解见躬扬触者谓矢中他物扬而触侯也楅复谓矢至侯不着而还反也言虽中侯而猎过侯之维纲及扬触楅复之类皆不得释获惟公则许所以优君也又三侯随公所值中一侯亦得释获若他人则必中其所应射之侯方释获也贯犹中也不贯不释言不中鹄不释算也释获者谓主释算之人也射以二人为耦一名上射一名下射人各四矢一耦则八矢矣故於中上实八算也上射中则释算于中内之右下射中则释算於中内之左其不得释之余算则另置之视算先右後左先上射而後下射也纯犹全也缩者从也东西为从贤获者胜党之算也丰形似豆卑而大觶饮酒角也受四升或云三升仆人师者服役之人也角觶即兕觥罚爵也办者徧也】 龠【丰本作龠】舞【丰本作□】笙鼓【夔韵】乐既和奏【叶夔韵宗五翻】烝衍烈祖【夔韵】以洽百礼【丰本叶夔韵笼五翻】百礼既至有壬有林【侵韵】锡尔纯嘏子孙其湛【先君印海先生叶侵韵持林翻】其湛曰乐【音洛】各奏尔能【丰本叶侵韵奴金翻】宾载手仇【尤韵亦叶支韵渠之翻董本丰本俱作?】室人入又【叶尤韵夷周翻亦叶支韵盈之翻】酌彼康【尔雅作漣】爵以奏尔时【支韵亦叶尤韵时流翻赋也龠舞执龠而舞文舞也解见简兮篇按周礼春官龠师掌教国子舞羽龠龠祭祀则举羽龠之舞宾客飨食亦如之大射具宾客飨食之礼既命用乐则有舞可知仪礼无文偶略之也又按大司乐职云大射令奏驺虞诏诸侯以弓矢舞陈阳云祭祀天子执于戚而舞所以乐尸大射诸侯执弓矢而舞所以乐王笙解见鹿鸣鼓钟篇大射仪所谓笙钟笙磬皆应笙之钟磬而周礼笙师凡祭祀飨射共其钟笙之乐亦谓与钟声相应之笙也又笙有与瑟琴相应者鹿鸣所谓鼓瑟吹笙是也有与磬相应者鼓钟所谓笙磬同音是也有与歌相应者仪礼所谓歌鱼丽笙繇庚是也有与鼓相应者此言笙鼓是也以其为用无所不备故特举之鼓解见关雎篇不独乐以鼓为节射亦以鼓为节所谓不鼓不释者也奏以出声言声有高下缓急之度谓奏即奏驺虞狸首之奏言乐之声既和于所奏之诗也按大射仪彻丰觶之後献服不氏及释获者毕司射复请射如初司射北面请以乐于公公许司射东面命乐正曰命用乐乐正曰诺司射遂适堂下北面眠上射命曰不鼓不释乐正命太师曰奏狸首间若一遂奏狸首以射三耦卒射宾待于物如初公乐作而後就物稍属不以乐志其他皆如初仪然後反位就席始命退楅解左下纲退中与算而俟此射之第三节也服不氏於周礼为司马之属掌养猛兽而教扰之者请用乐于公请奏乐以为节也不鼓不释者不与鼓节相应不释算也狸首愚谓即七月之四章间若一者声之中间相去或希疏或密数调之使如一也物谓射时所立处也谓之物者物犹事也君子所有事也君之射仪迟速从心但稍与乐相属而已其发不必应乐避不敏也志犹拟也及解左下纲则正射之事毕矣未犹言俟者俟将复射与否也郑玄曰始将射而未释获复释获复用乐行之君子之于事始取苟能中课有功终用成法教化之渐也射用应乐为难射义云天子以驺虞为节诸侯以狸首为节卿大夫以采苹为节士以采蘩为节驺虞者乐官备也狸首者乐会时也采苹者乐循法也采蘩者乐不失职也是故天子以备官为节诸侯以时会天子为节卿大夫以循法为节士以不失职为节故明乎其节之志以不失其事则功成而德行立德行立则无暴乱之祸矣功成则国安故曰射者所以观成德也按周礼射人职云驺虞九节狸首七节采苹采蘩皆五节先儒谓九节者五节先以聽七节者三节先以聽五节者一节先以聽其後四节皆以应乘矢拾发也乘矢四矢拾发连发也一终为一节孔子曰射者何以射何以聽循声而发发而不失正鹄者其惟贤者乎若夫不肖之人则彼将安能以中烝衍烈祖以下六句皆

预拟之辞非实祭也承上言大射之礼既毕凡射而中者皆得与于祭则今日能中之人即後日助祭之人矣烝衆也通与射者而言也映下文百礼可见衍说文云行喜貌尔雅云乐也烈本火猛以功之光而盛者似之故尔雅又转训为业也烈祖孔云功烈之祖也洽郑云合也当以偏傍省通用百礼严云事神之衆礼以洽百礼者言助祭之人既多则可以合举事神之衆礼也百礼既至言行礼之时至也壬通作任任之为义担也负也言任其事也本多为林衆之意也衆礼次序行之各有其时当其时之至则有身任其事者又有衆多林立以待事者凡皆骏奔走于庙中也锡通作赐说文云予也篇内尔字皆指宾则以兼通助祭者而言纯全也嘏说文云大远也皆指福言子孙指主祭者犹云曾孙也湛本作堪说文云乐也言助祭者能合举百礼以乐先祖则神将赐之以纯全久大之福而主祭之子孙见助祭者之皆得人亦因之以喜乐也其媿曰乐为复射发端也其媿以心言乃虚写未然之景曰乐则指其当日射毕升坐安燕之事而言也按大射仪射毕彻俎司正升宾宾诸公卿大夫皆说屡升就席公以宾及卿大夫坐乃安羞庶羞公曰衆无不醉宾及诸大夫皆兴对曰诺敢不醉乃举爵为士偏举旅行酬即此所谓乐也各奏尔能命复射也奏犹献也尔通与射者而言实在其内载者更始之义唐虞名岁曰载取物终更始也手毛云取也仇匹也训仇为匹犹训洁为污训乱为治反言之也宾载手仇谓再取其技能之相敌者与之为耦也按大射仪若命曰复射司射命射唯欲一发中三侯皆获云命射唯欲者欲者则射不欲者则止可否之事从人心也此所谓手仇者也前此惟君释获不拘三侯此臣得与君同者以燕射复射其法寛亦尚欢乐之意也室人孔云有室中之事者毛云主人也按主人即宰夫也入又者谓入而又行献酬之礼康尔雅云安也毛云酒所以安体也郑云虚也无酒于爵谓之虚爵按康即糠字从米庚声谷皮也故尔雅亦训康为空谓去其内之米以空之也然则空虚是康本义其转训为安者当是康庄之康尔雅道五达曰康亦空虚洞达之意康衢可以安行故又训为安也二义皆通按大射仪复射後无算爵士有执膳爵者有执散爵者膳爵者酌以进公散爵酌以之公命所赐受赐爵者以爵就席坐公卒爵然後饮执膳爵者受公爵酌反奠之受赐者以散爵授执者执散爵者乃酌行之唯受于公者拜此康爵即散爵也膳爵公所用公饮毕仍反奠于公所散爵自拜赐後随执爵者劝其所欢徧行于宾及诸公卿大夫士不以次数为限所谓无算爵也奏与乐既和奏之奏同义谓奏陔夏也陔夏者九夏之一时谓欢燕已洽宾可以出之时也按大射仪无算爵之後君有命彻幕皆降再拜稽首反位无算乐宵则庶子执烛于阼阶上司宫执烛于西阶上甸人执大烛于庭閤人为烛于门外宾醉北面坐取其荐脯以降奏陔遂出卿大夫皆出公不送公入鼙而大射之仪毕于此命彻幕者君意殷勤欲尽酒也无算乐者升歌间合无次数惟意所乐也取脯以降重得君之赐也奏陔者陔之言戒也以陔为节明无失礼也鼙解见前此诗所载行礼次第与大射仪一一具合而旧说絶不理会今故逐段为之附丽以诏来者不敢厌其繁焉】宾之初筵【先韵】温温其恭【无韵未详】其未醉止威仪反反【叶先韵分遭翻韩诗作𦣻𦣻云善貌】曰既醉止威仪幡幡【叶先韵孚焉翻】舍【音舍】其坐迁【先韵】屡【陆德明本作娄】舞僊僊【先韵乐书作蹁蹁】其未醉止威仪抑抑【叶寘韵固利翻国语引诗抑戒作懿戒可证】曰既醉止威仪怱怱【叶寘韵毗志翻说文作怱怱】是曰既醉不知其秩【叶寘韵直詈翻 赋也宾之初筵谓未射以前行燕礼时也温温和柔貌在心为敬在貌为恭又貌多心少为恭心多貌少为敬故少仪云宾客主恭祭祀主敬各有攸当也其未醉止卒射而饮觶时也有威可畏谓之威有仪可象谓之仪皆主升降周折之容言反反苏彻云顾礼也曰既醉止谓酌康爵时也此时饮无算爵又彻幕尽欢则势必至于醉矣幡

通作翻说文云飞也飘扬之意幡幡犹翩翩也苏云轻数也舍通作舍置也迁移屡数也宾醉降阶将出业已舍其故坐斯时闻乐人奏陔即当遂出而犹未肯出乃迁移他处以屡舞为乐也此舞非乐舞如以舞属客之类直是戏耳陈阳云前代欢饮酒酣必起舞盖所以极欢心叙诚意魏晋以来尤重以舞相属乐饮以舞相属犹饮酒以杯相属也故汉李陵起舞以属苏武王智起舞以属蔡邕晋谢安起舞以属桓嗣陈智匠曰比见北人犹以舞相属则属舞古人非不尚也然田蚡与灌夫过窦婴家酒酣起舞属蚡蚡不起夫徒坐语侵之陶谦为舒令见太守张磐磐舞属谦谦不为起固强之虽舞而不转曰不当转耶曰不可转转则胜人繇此观之以舞相属情意一有不至而祸患随之可不重之哉诗曰屡舞蹢躅然则相属之舞其亦不可屡而常矣江表孙谭酒酣屡舞而不知止顾雍所以深责之也唐中宗数与近臣狎宴逖起舞唱儉幸之人因之徼求官爵君臣之礼微矣僊通作蹢说文云蹢蹢旋行也若如本字解则为仙人轻举之状亦如赵飞燕外传云后杨袖曰仙乎仙乎之意以屡舞故重言僊僊後放此抑说文云按也字本从反印後加从手作抑印者执政所持信器也印所以行之于外今反而斂之于内则为自按抑也说文无忮字引此诗作忮忮云威仪也韵会云威仪备也此四句以理言人当未醉时其威仪固当折抑而收斂即当既醉时其威仪亦当忮忮而周备乃是之名既醉者何如哉第见昏然沉迷不知其秩而已矣秩即左右秩秩之秩亦以折旋揖让言彼入时之礼此出时之礼也庄子云以礼饮酒者始乎治常卒乎乱孔云小人未醉身有恶态强自收掩及其醉酒则旧时情态皆出庄子说察人之法曰醉之以酒以观其态是从饮酒则情态出也蔡汝楠曰武公自戒甚严多勗以威仪观风人称之曰善戏谑兮盖亦过于和易而能悔者也】宾既醉止载号【丰本作号平声】载呶【无韵未详】乱我箴豆屡舞僛僛【支韵】是曰既醉不知其邮【叶支韵是为翻】侧【说文丰本俱作仄】弁之俄【歌韵】屡舞傴傴【歌韵说文作娑娑】既醉而出并受其福【屋韵亦叶职韵笔力翻】醉而不出是谓伐德【职韵亦叶屋韵都未翻】饮酒孔嘉【叶歌韵居何翻】维其令仪【叶歌韵牛何翻 赋也号说文云呼也呶说文云謹声也乱我箴豆与首章箴豆有楚相应此因屡舞僛僛而乱及箴豆二句当合看非两事也僛徐铉云欹倾不能自正也邮通作尤过也侧旁也通作仄说文云倾侧也言倾于其旁也弁皮弁也解见前俄说文云行顷也傴说文云醉舞貌傴傴毛云不止也诗言既醉而屡舞者三初迁而屡舞已可异矣然且不止而继之以号呶又继以俄顷之间数侧其弁盖君形者去而口容首容举失其度屡舞不休欲何为乎酒以合欢原期于醉先王之礼所以有无算爵也既醉何病然醉斯可以出惟醉而不出为可丑耳此诗专为酌康爵奏陔夏从昏醉丧仪而不肯出者发意武公必曾有是失故使人诵之以自儆也全篇次序相承皆纪尝日实事非谓以前二章为思古以後三章为伤今也既醉以下是叹悔之辞并受其福者郑云宾醉则出与主人俱有美誉也是谓伐德者孔云若至于醉而不出是谓诛伐其德醉前无失为有德既醉为愆以丧之是伐其德也晏子春秋云晏子饮景公酒日暮公呼具火晏子辞曰诗云侧弁之俄言失德也屡舞傴傴言失容也既醉以酒既饱以德既醉而出并受其福宾主之礼也醉而不出是谓伐德宾之罪也婴已卜其日未卜其夜公曰善举酒祭之再拜而出诸葛亮戒子书云夫礼之设合礼致情适体归性礼终而退此和之至礼意未殫宾有余倦可以至醉无致于乱孔甚嘉美令善也仪即威仪之仪朱子云饮酒之所以甚美者以其有令仪耳今若此则无复有仪矣苏云此章申言其乱而终悔之也】凡此饮酒【有韵】或醉或否【有韵】既立之监或佐之史【纸韵】彼醉不臧不醉反耻【纸韵】式勿从谓无俾大【音泰】怠【叶纸韵养里翻】匪言勿言匪由勿语【叶麋韵读如午疑古翻】由醉之

言俾出童【丰本作 】殺【麋韵】三爵不识【叶寘韵职吏翻】矧敢多又【叶寘韵夷鼓翻 赋也此章皆深絕醉者之辞所以着自儆之意饮酒一也而醉与不醉异故为之监史以伺察之朱子云监史司正之属按燕礼射人为司正注谓将留宾饮酒更立司正以监之察仪法也又大射仪先以大射正为摈其後以摈为司正及誓射则大史俟于西序东面以听政其释获释算之事大史司之既毕射司正升宾将公命曰衆无不醉则以司正为监者近之但未知史即太史否耳吕祖谦云淳于髡说齐威王曰赐酒大王之前执法在傍御史在後秦赵会渑池秦王请赵王鼓瑟蔺相如请秦王击缶两国御史皆前书之此古人君燕饮之制犹存于战国者也或立之监即执法也或佐之史即御史也董鼎云监以监之史以书之古之慎礼如此钱天锡云一察一书相为副貳谓之佐非谓监所不及史则书之也臧善也失礼为不臧朱子云彼醉者所为不善而不自知使不醉者反为之羞愧也式勿从谓以下设为监史告不醉者之辞所以深厌恶夫醉者也式发语声勿禁止辞从就谓告也严粲云彼人已醉勿就其位而与之言与之言则彼愈更号□是使之大为怠慢也匪通作非言自言也由谓理所当繇者语与人语也徐铉云语者午也言交午也所不当言者勿言所不当由者勿语彼醉者虽极善号呶然无人与之酬答则亦将废然而自止矣殺羊名尔雅云夏羊牡羴牝羴羅愿云殺本夏羊牝者之名以吴羊白夏羊黑今人便以殺为黑羊名殺羊之角主明目安心益气轻身辟鬼魅虎狼疗疥虫蛊毒结气止寒泄其角为用最大严云童羊无角殺未有无角者愚按此盖戒人以醉言不可听亦如人言殺羊无角其不足信明甚汝若听醉人之言则责之使出童殺困之以必无之物以喻有是言无是事也冯时可云信醉者之言以虚而责实则必不可行传注曰设言必无之物以恐之非也既曰必无之物恶足以恐哉三爵谓射毕後饮酒君已举旅三次则情意已洽礼文已备可以辞而出之时也按大射三射礼毕公举奠觶惟公所赐若宾若长以□于西阶上此第一爵也于是彻俎升宾及诸公卿大夫皆就席坐羞庶羞宾降洗升媵觶于公公取宾所媵唯公所赐受者如初受酬之礼及就席坐行之注云坐行之者若今坐相劝酒也旅酬至士而徧此第二爵也已而命复射遂行无算爵之礼执散爵者酌以之公命所赐受赐者饮毕以散爵授执者执散爵者乃酌行之注云酌行之谓与其所欢者也亦旅酬至士而徧此第三爵也旧说皆失考又玉藻云君子之饮酒也受一爵而色酒如也三爵而言言斯礼已三爵而油油以退识记也又即室人入又之又谓复饮酒也言君已举行三爵之礼矣汝奈何不记忆而况敢号呶不出更复思多饮乎监史以此为训明者以醉为监庶乎知儆耳】

宾之初筵五章章十四句【序云卫武公刺时也幽王荒废嬖近小人饮酒无度天下化之君臣上下沈湎淫液武公既入而作是诗也按此诗明止为刺宾而作未见君臣上下沈湎淫液之意而语气雅与抑戒相类其为武公自儆之诗无疑或谓王朝之诗曰雅侯国之诗曰风果武公作宜与卫风淇澳伍今在雅则王朝献纳之辞矣是又不然序言武公既入而作是诗郑笺谓入者入为王卿士然则以其为王朝卿士所作故列之雅耳曰果尔何以辨其非刺幽王曰史记载武公四十二年犬戎杀周幽王武公佐周平戎甚有功平王命武公为公其後平王十有三年武公始卒则武公为周卿士实在平王之世当幽王时武公受封于卫未尝入周也又子贡传但存卫武公三字其下阙文】

抑卫武公刺王室亦以自戒行年九十有五犹使臣日诵是诗而不离于其侧【出侯包韩诗

翼要 楚语左史倚相云昔卫武公年数九十有五矣犹箴儆于国曰自卿以下至于师长士苟在朝者无谓我老耄而舍我必恭恪于朝朝夕以交戒我闻一二之言必诵志而纳之以训道我在舆有旅賁之规位宁有官师之典倚几有诵训之谏居寝有?御之箴临事有瞽史之道宴居有师工之诵史不失书蒙不失诵以训御之於是乎作懿戒以自儆也及其没也谓之叡圣武公韦昭云懿诗大雅抑之篇也懿读曰抑徐干云昔卫武公年过九十犹夙夜不怠思闻训道作抑诗以自儆卫人诵其德为赋淇澳邹忠胤云夷考武公在位五十有五年以宣王十六年立以平王十三年卒此诗作于晚年在平王之世篇中亦聿既耄其证也讽时王之意在于言外见之所云天方艰难曰丧厥国取譬不远昊天不忒则明指骊山之覆辙矣骊山之难武公将兵救周有功平王命为公是诗作于王朝故不复还系其本国邓元锡云王妣酒故初筵引以为戒不斥言故引而反之躬自怨责感焉初筵专言酒抑广言深言精言于天人之际故分隶二雅又卫风録淇澳风二雅具有诗惟周召卫武矣】

抑抑威仪维【汉书作惟】德之隅【虞韵亦叶尤韵鱼侯翻】人亦有言靡【淮南子作无】哲【陆德明本作喆又云亦作愬】不愚【虞韵亦叶尤韵鱼侯翻】庶人之愚亦职维疾【质韵亦叶寘韵秦二翻】哲人之愚亦维斯戾【叶寘韵力置翻亦叶质韵力质翻 赋也抑说文云按也自按抑也详见宾之初筵篇抑抑者抑而又抑也与扬扬相反威仪扬则放抑则斂抑而不扬谦下之度也左传北宫文子云有威而可畏谓之威有仪而可象谓之仪孔颖达云隅者角也郑玄云宫室之制内有?直则外有廉隅王安石云德譬则宫城也仪譬则隅也观其隅则宫城之中可知矣有诸中必形于外故也严粲云廉隅者屋之外角譬人之外有威仪也凡宫室观其外有廉隅则知其在内之制必方正也如人外有抑抑然谨密之威仪则知其在内之德性严正也张文潜云老子曰高者抑之使卑书曰太王王季克自抑畏盖裁其盛而使退挹其满而使亏者抑也临下而使物畏之者威也居上而使物象之者仪也威能抑抑则不至于刚暴仪能抑抑则不至于不逊虽威仪外也非不可以伪作使修其威仪者盖使之勉其德而已故曰惟德之隅治室者不先治隅也使之治隅者是使之治宫室而已愚按全诗头绪甚多读者茫然不能得其要领再四讽咏始知意分四层修德是第一层其工夫全在谨独七章不愧屋漏等语是也能潜心修德则威仪自然敬慎是第二层此所谓抑抑後所谓柔嘉及不僭不贼温温恭人等语是也其威仪见于外者如此则闻善言必能虚心聽受此第三层二章言远犹辰告九章言顺德之行是也所乐闻者善言则小人变乱旧章之言无繇而入而条教号令必皆中理此第四层二章言定命五章六章言慎尔出话惠于朋友庶民是也反是而回遹其德则不能敬其威仪方且骜然自大而反以教我者为虐于是忠直日退谀佞日进所出政令必皆与先王明刑相悖而俾民大棘矣诗词虽错综而其条理明白如此人亦有言谓古人之遗言靡无通哲说文云知也书云知之曰明哲孔云愚者痴也靡哲不愚即老子所谓良贾深藏若虚君子盛德容貌若愚者淮南子云人能繇昭昭于冥冥则几于道矣诗曰人亦有言无哲不愚此之谓也职尔雅云主也常也郑云衆人性无知以愚为主是其常也疾说文云病也王云庶人之愚则天性之疾也孔子曰民有三疾斯者语辞亦训为此盖指愚而言也戾训为至鸛飞戾天鲁侯戾止皆同是义亦维斯戾者言哲人之所以哲者亦维其愚以自居故能至于哲也徐光启云此诗之作以聽言修德为主欲聽言修德必先磨去一段矜许自贤之心使此中退然自下若拙若讷乃可故曰虚以受害又曰满招损谦受益此章全是发明此义以为一篇提领抑抑谦逊卑下之貌有此威仪便想见他虚中受善之意故曰维德之隅

此等人其中全无织翳障塞廓然空洞澄然虚明故又谓之哲人人亦有言无有哲人而不愚者哲即德也愚即抑抑威仪也惟哲故愚惟愚益见其哲也後四句又言愚有不同庶人气浊质闇稟赋之偏此真愚也若哲人之愚是其盛德容貌收斂退藏乃所繇以至于道也老子之若愚顏子之如愚乌得与庶人之愚同类而称哉第九章说修德之事已毕重宣此义温温恭人即是抑抑威仪维德之基即是维德之隅哲人顺德即是靡哲不愚其维愚人即是庶人之愚语意相应脉络粲然一说抑抑威仪为德之隅此宜尽人知之而靡哲不愚皆不能知也庶人之愚专坐此不知抑抑之病哲人而愚亦维于此抑抑处有乖戾耳按此说亦通但第九章明以哲人愚人对言哲愚相反果其真愚又何以称哲人乎故定主前说】无竞【吕覽作兢五经文字作京】维【吕覽作惟】人四方其顺【叶震韵读如岬许刃翻】之有觉【礼记作梏】德行四国顺【震韵】之訏谟【释文云沈本作漠】定命远犹【外传世说丰氏本俱作猷】辰告【叶职韵讵得翻】敬慎【中论作尔】威仪维【左传中论俱作惟】民之则【职韵 赋也无母通戒辞也竞强语也训教也俱见说文无竞维人是劝其虚受即上章所谓哲人之愚者言汝若不与人争辨求胜则四方之人皆将以言来训诲乎女也觉说文云寤也欧阳修云警动也按朱子谓呼寐者而使之寤曰觉有觉德行言人君有德行足以醒动人心人皆晓之也德即上章维德之隅之德德不可见自其行之着于威仪者而信其有德谓之德行也董仲舒引此诗而释之云觉者着也王者有明着之德行于世则四方莫不响应风化善于彼矣四国即四方之国左传云慈和徧服曰顺欧阳云谓一日克己而天下归仁也韩诗外传云水渊深广则龙鱼生之山林茂盛则禽兽归之礼义修明则君子怀之故礼及身而行修礼及国而政明能以礼扶身则贵名自扬天下愿焉令行禁止而王者之事毕矣诗曰有觉德行四国顺之夫此之谓也又云齐桓公见小臣五往而德见也天下诸侯闻之谓桓公犹下布衣之士而况国君乎于是相率而朝靡有不至桓公之所以九合诸侯一匡天下者此也诗曰有觉德行四国顺之礼记缁衣篇子曰上好仁则下之为仁争先人故长民者章志贞教尊仁以子爱百姓民致行已以说其上矣诗云有梏德行四国顺之孝经子曰昔者明王之以孝治天下也不敢遗小国之臣而况于公侯伯子男乎故得万国之懽心以事其先王治国者不敢侮于鰥寡而况于士民乎故得百姓之懽心以事其先君治家者不敢侮于臣妾而况于妻子乎故得人之懽心以事其亲夫然故生则亲安之祭则鬼享之是以天下和平灾害不生祸乱不作故明王之以孝治天下如此诗云有觉德行四国顺之按以上数条引诗意皆恍惚相近又毛传训觉为直与尔雅梏较等字同解皆以音同通用而未详其义所出左襄二十一年范宣子囚叔向乐王鲋见叔向曰吾为子请叔向弗应出不拜其人皆咎叔向叔向曰必祁大夫外举不弃讐内举不失亲其独遗我乎诗曰有觉得行四国顺之夫子觉者也昭五年叔孙昭子朝其家衆曰牛祸叔孙氏杀适立庶罪莫大焉牛惧奔齐杀诸塞关之外仲尼曰叔孙昭子之不劳不可能也周任有言曰为政者不赏私劳不罚私怨诗云有觉德行四国顺之按左传所引有觉皆取训直之义但于诗意甚远不必从訏谟二句承无竞二句而言訏即实覃实訏之訏郑以为张口呜呼是也谟说文云议谟也徐锴云泛议将定其谋曰谟定朱子云审定不改易也命政令也第五章所谓出话者指此言嗟呼衆人使各出其议论以为酌定政令之地絶无自广以狭人之心又不止于无竞而已犹本兽名其性多疑故借为谋虑之义曰远犹者吕祖谦云所谋不止于一身而计天下之安危不止于一时而监百世之损益长虑却顾思其所终稽其所敝也辰毛云时也按尔雅以不辰为不时告当通作诰尔雅云请也严云入告尔后于内之告言人君诚乐于求言则凡有深远之图者得以时时入告此即上文所谓四

方其训之者孟子有言夫苟好善则四海之内皆将轻千里而来告之以善正谓此也世说新语云谢公因子弟集聚问毛诗何句最佳公曰訏谟定命远犹辰告此句偏有雅人深致敬慎二句承上文有觉二句而言敬慎者有觉之本也敬慎其怠慎防其踈必能敬慎威仪然後德行之见于外者始于兹大着矣则郑云法也其仪不忒而後民法之上文所谓四国顺之者此也匡衡云圣王之自为动静周旋奉天承亲临朝享臣物有节文以章人伦盖钦翼祗栗事天之容也温恭敬逊承亲之礼也正恭严恪临衆之仪也嘉惠和说飨下之顔也举错动作物遵其仪故形为仁义动为法则孔子曰德义可尊容止可观进退可度一临其民是以其民畏而爱之则而象之大雅云敬慎威仪维民之则徐干云夫法象立所以为君子法象者莫先乎正容貌慎威仪是故先王之制礼也为冕服采章以旌之为佩玉鸣璜以声之欲其尊也欲其庄也焉可懈慢也夫容貌者人之符表也符表正故情性治情性治故仁义存仁义存故盛德着盛德着故可以为法象斯谓之君子矣诗云敬尔威仪惟民之则若夫墮其威仪恍其瞻视忽其辞令而望民之则我者未之有也莫之则者则慢之者至矣小人皆慢而致怨乎人患己之卑而不知其所以然哀哉左襄三十一年卫侯在楚北宫文子见令尹围之威仪言于卫侯曰诗云敬慎威仪惟民之则令尹无威仪民无则焉民所不则以在民上不可以终公曰善哉何谓威仪对曰有威而可畏谓之威有仪而可象谓之仪君有君之威仪其臣畏而爱之则而象之故能有其国家令闻长世臣有臣之威仪其下畏而爱之故能守其官职保族宜家顺是以下皆如是是以上下能相固也】其在于今【叶庚韵读如京】兴迷乱于政【叶庚韵诸盈翻】颠覆厥德荒湛【先君讳汉书作沈韩诗作愷】于酒【叶筱韵子小翻】女【音汝】虽湛乐【音雒】从弗念厥绍【筱韵】罔敷求先王【阳韵】克共【丰本作恭】明刑【叶阳韵胡光翻诸本祖毛郑皆以其在于今至此为第三章】肆皇天弗尚【叶阳韵辰羊翻】如彼泉流【读书记大全朱传丰民本俱作流泉】无沦胥以亡【欧阳以其在于今至此为第三章今从之 赋也今朱子云武公自言已今日之所为也盖使人箴儆而为是切责之辞非必真有是事所谓讽王者正在于此兴迷乱于政者郑云兴犹尊尚也尊尚小人迷乱于政事者一说苏辙云作起迷乱之人而任之以政也皆通顛通作楨仆木也覆犹反也已本有德而自坏之谓之顛覆也兴迷乱于政则与訏谟定命反矣顛覆厥德则与敬慎威仪反矣荒芜湛没也俱见说文初则荒芜而不治继则沉没而不还均是纵情于酒而亦有浅深时必王有此事又武公亦曾蹈此观初筵诗可见女朱子云武公使人诵诗而命己之辞也後凡言尔言女言小子者放此又云如幕中之辨人反以女为叛台中之评人反以女为倾等类亦是自谓古人此様亦多从随也谓与沈湎为乐之人相随也念说文云常思也绍尔雅云继也朱子云谓所承之绪也罔通作亡与无同意敷说文云施也求通作逯说文云敛聚也先王之典章法度其犹存者则不能施布之其散逸者则不能敛聚之共通作?刑通作刑法也明刑谓成法之昭垂者王安石云弗念为人子孙当绍祖考故罔敷求先王克共明刑克共者不敢慢之谓也愚按敷求以事言克共以心言前空言先王尚未知何所指故以明刑实之肆承上起下之辞说文以为极陈也皇说文云大也惟天为大故曰皇天尚通作上犹言崇重也弗尚朱子云厌弃之也言如上文所为自絶于天故不为天所崇尚而丧亡之祸亦将及矣无通作毋朱子云言无者戒之欲其不至是也如彼泉流者辅广云如泉流之不可止季本云其亡如流泉趋下之易韩诗云顺流而风曰沦胥尔雅云皆也方言云东齐谓皆曰胥欧阳云沦胥以亡者君臣皆将灭亡矣郝敬云言当早堤防之无使沦没相率以亡可也】夙兴夜寐【寘韵】洒埽【外传作扫】庭【陆本读诗记大全朱传诗缉俱作廷】内【叶寘韵而瑞翻】维民之章【

阳韵】修尔车【潜夫论作舆】马弓矢戎【潜夫论作戈】兵【叶阳韵逋旁翻】用戒戎作【潜夫论改戎作为作则】用遄【潜夫论作逖】蛮方【阳韵诸本皆以肆皇天至此为第四章欧阳以夙兴至此为第四章】质【盐铁论作诘外传说苑俱作告】尔人民【说苑盐铁论俱作民人】谨【左传作慎】尔侯度【遇韵】用戒不虞【叶遇韵元具翻】慎尔出话敬尔威仪【叶歌韵牛何翻】无不柔嘉【叶歌韵居何翻欧阳以质尔人民至此为第五章 赋也此章承上章示以救亡之法夙兴六句是不泄迹不忘远之意上文言迷乱于政则事之大者且置不理何况细行故此言及寝兴洒扫举细以该大也近而易见者且或遗忘何有远虑故此言及修武备遄蛮方举远以该近也夙兴夜寐是无逸之念言须侵早而即起夜分而後卧也洒淲埽弃也俱见说文孔云洒埽者谓以水洒地而扫之庭说文云宫中也洒扫庭内是慎微之念此两句正克勤之实崇功广业皆基于此韩诗外传云子路治蒲三年孔子过之入境而善之曰繇恭敬以信矣入邑曰善哉繇忠信以宽矣至庭曰善哉繇明察以断矣子贡执辔而问曰夫子未见繇而三称善可得闻乎孔子曰入其境田畴草莱甚辟此恭敬以信故民尽力入其邑墉屋甚尊树木甚茂此忠信以宽故民不偷入其庭甚闲此明察以断故民不扰也诗曰夙兴夜寐洒埽庭内章通作彰明着之义维民之章承上二句言民皆晓然知上之勤于政事也修通作修说文云饰也戎兵孔云戈盾矛戟之类戒说文云警也谓警备也遄毛云远也说文无遄字当通作逖蛮方郑云蛮畿之外也孔云周礼九服六服之内为中国七服以外为夷狄而第六者大行人谓之要服职方氏谓之蛮服大司马谓之蛮畿此经有二义用戒戎作为中国则用遄蛮方为夷狄且蛮方与彼蛮夷同故知是蛮畿之外也按周礼大司马职云蛮畿外方五百里曰夷畿又其外方五百里曰镇畿又其外方五百里曰蕃畿孔云言当修治汝征伐之车马及弓矢与戎兵之器用以此戒备戎兵动作之处当征伐之又用此以驱远蛮方之来内侵者当逐令远去使不得来侵也李氏云当时沉荒于酒贪目前之乐而忘意外之变故戒之如此以上两段皆推开一步说质尔人民以下始就其本诸身者而言质犹证也据说文为以物相赘之义徐锴云质实也事疑虚以人物实之也人谓羣臣民谓庶民质尔人民质证之人民以验其信从与否下章言慎出话之事则曰惠于朋友庶民言敬威仪之事则曰不僭不贼鲜不为则是也侯度诸侯所以律身治国之常度不越出话威仪二者但未说出耳曰谨者即下文言慎言敬之谓戒备也虞本兽名尔雅训虞为度未详其义疑即是虑字之误故音与度叶而朱子亦训虞为虑虞字从虍而吴声故宜为兽名虑字从思而虍声故宜为思虑虽字形相似而所从各别又有训虞为乐者正当通作娱耳不虞者孔云非意所亿度之事愚按谨侯度正所以戒不虞二句相联说人民皆我之人民一旦离心不为我用是不虞也若侯度克谨自不至是一说质尔人民与天保民之质矣同意谨尔侯度与尚书明乃服命同意亦通说苑及韩诗外传云古者必有命民命民能敬长怜孤取舍好让居事力者告於其君然後君命得乘饰车骈马未得命者不得乘乘者皆有罚故其民虽有余财侈物而无仁义功德则无所用故其民皆兴仁义而贱财利贱财利则不争不竞则强不陵弱衆不暴寡是唐虞所以兴象刑而民莫敢犯法民莫犯法而乱斯止矣皆引此诗左襄二十二年郑公孙黑肱有疾归邑于公召室老宗人立段而使黜官薄祭尽归其余邑曰吾闻之生於乱世贵而能贫民无求焉可以後亡敬共事君与二三子生在敬戒不在富也君子曰善戒诗曰慎尔侯度用戒不虞郑子张其有焉以上皆从後说慎说文云谨也徐锴云心真为慎不鹵莽也话尔雅说文皆云善言也郑云谓教令也慎尔出话必如前章所云远犹足以定命者而後出之无不柔嘉单承敬尔威仪说观後章言辑柔尔顔俾臧俾嘉皆敬威仪之事曰无不者内自深宫

外至大庭凡动容周旋之间无不气象从容中规中矩也柔指气象嘉则极致其赞美之辞王应麟云古之君子刚中而柔外仲山甫之德柔嘉维则随会柔而不犯韩文公为王仲舒铭曰气锐而坚又刚以严哲人之常与其友处顺若妇女何德之光愚按慎出话从虚受中来敬威仪从慎独中来礼记缁衣篇子曰君子道人以言而禁人以行故言必虑其所终而行必稽其所敝则民谨於言而慎於行诗云慎尔出话敬尔威仪刘向说苑云夫树曲木者恶得直景人君不直其行不敬其言者未有能保帝王之号垂显令之名者也易曰夫君子居其室出其言善则千里之外应之况其迩者乎居其室出其言不善则千里之外违之况其迩者乎言出於身加於民行发乎迩见乎远言行君子之枢机枢机之发荣辱之主君子之所以动天地可不慎乎天地动而万物变化诗曰慎尔出话敬尔威仪无不柔嘉此之谓也】白圭之玷【说文丰本俱作?下同】尚可磨【叶歌韵眉波翻】也斯言之玷不可为【叶歌韵吾何翻】也【诸本皆以质尔人民至此为第五章】无易【音异】由言无曰苟矣【大全云此二句不用韵丰氏考补云与第四句二矣字自为韵】莫扞朕舌【屑韵】言不可逝【叶屑韵食列翻】矣【欧阳以白圭至此为第六章】无言【墨子言下有而字】不讎【叶宥韵承呪翻列女传作讎外传作酬】无德【墨子德下有而字】不报【叶宥韵敷救翻汉书引此句下有惟民之则一句】惠于朋友庶民【句叶阳韵谟阳翻】小子子孙绳绳【蒸韵尔雅作懃懃外传作承承】万民靡【陆云一本作是】不承【蒸韵亦叶阳韵辰羊翻诸本皆以无易由言至此为第六章 赋也此章言慎尔出话之事圭说文云瑞玉也上圜下方按王搢大圭长三尺执镇圭长尺有二寸公执桓圭九寸侯执信圭伯执躬圭皆七寸凡有土地者必有圭故其字从重土玷本作?说文云缺也磨谓以石磨之使平也斯郑云此也孔云白玉为圭圭有缺损犹尚可磨鑢而平若此政教言语之有缺失则遂往而不可改为王者安危在于出令故特宜慎之愚按诗人以白圭为喻原非泛论圭乃国之守器虽玷尚可磨犹未至于失国也若条教号令一失其当则必有危亡之祸不可解救夫有天下国家者而一出言所系其重若此等而下之士庶人不能慎言则必至于亡其身矣此南容一日三复白圭独居思仁公言必于仁义孔子谓其邦有道不废邦无道免于刑戮而以其兄之子妻之也刘向说苑云口者关也舌者机也出言不当四马不能追也口者关也舌者兵也出言不当反自伤也故蒯子羽曰言犹射也栝既离弦虽有所悔不可从而追己因引此诗左僖九年晋献公疾召荀息曰以是藐诸孤辱在大夫其若之何稽首而对曰臣竭其股肱之力加之以忠贞其济君之灵也不济则以死继之及里克杀奚齐及公子卓荀息死之君子曰诗所谓白圭之玷尚可磨也斯言之玷不可为也荀息有焉无易由言四句戒之也无通作毋禁止辞易通作?说文云轻也任意而言曰由言严云由言者自由之言所谓惟其言而莫予违也无曰苟矣莫扞朕舌二句相联说荀说文训草古义又相传训且者取靡乱之意犹云草草也扞说文云扶持也朕说文云我也蔡邕云古者上下共称咎繇与帝舜言称朕伊尹曰惟朕以恠周公曰朕复子明辟屈原曰朕皇考至秦始皇二十六年始尊为天子之自称汉因之不改按朕之训我其解难明字左从舟於义甚远吴氏谓从身不从舟宜若可信右施弁上火下升其字说文不载音义俱无传余再四寻绎忽忆秦赵高谓二世曰天子不宜亲近卑贱之人但示之朕兆而已索隐为之解曰才有朕兆不见其形也以此义推测知朕乃至小之称因悟弁字从火又从升之说升音拱人竦两手也火至热之物而人敢以两手拱之此必火之至小者其音似当与朕同古人自称曰朕盖谦居渺末之辞犹曰寡人曰小子云耳非赵高言几不识朕字本义谁谓六书不可以意通哉逝去也郑云女无轻易於教令无曰苟且如是今人无持我舌者而自聽恣也教令一往行于下其

过误可得而已之乎孔云往则不可复改故时须慎之雝尔雅云匹也说文云犹磨也从言又从雝双鸟为雝匹之义也孔云匹敌相报也愚按易云出其言善则千里之外应之大学云言悖而出者亦悖而入善悖之报皆如其所施非相匹而何德指言之根乎德者即下文所谓惠是也无言不雝兼善恶而泛论之无德不报则专指言之善者惠于朋友庶民三句正承此一句而言前用戒此下则用劝也惠郑云顺也朋友谓羣臣与假乐篇义同有德之言据理而发自然顺于人心故不独同朝之羣臣皆以为然转属而下至于庶民亦莫不以为然也小子武公自谓也使人诵于已侧为命已之辞谦卑之至也小子之子孙谓继世而为君者绳说文云索也绳绳严云如绳之牵连不絶万民即上文之庶民承说文云奉也受也小子子孙绳绳者谓其善言可以为後世无穷之法则万民靡不承谓言出而人无不尊奉之正上文所谓无德不报也君者出令臣者行君之令而致之民故靡不承但以庶民言而不及朋友焉】视【丰本作眎】尔友君子辑柔尔颜【叶真韵鱼巾翻亦叶先韵倪坚翻】不遐有愆【先韵亦叶真韵乞邻翻欧阳以无言至此为第七章】相【去声】在尔室尚不愧【陆本作媿】于屋漏【宥韵】无曰不显莫予云覲【宥韵】神之格【陌韵亦叶药韵葛鹤翻】思不可度【叶陌韵直格翻亦叶药韵達各翻】思矧可射【叶陌韵夷益翻亦叶药韵弋灼翻】思【诸本以视尔至此为第七章欧阳以相在至此为第八章】辟尔为德俾臧俾嘉【叶歌韵见四章】淑慎尔止不愆【礼记作讐】于仪【叶歌韵见四章】不僭不贼【职韵】鲜不为则【职韵欧阳以辟尔至此为第九章 赋也此章言敬尔威仪之事视犹云交接也友即上章朋友尔友君子谓尔所友之君子指士大夫也辑说文以为车和辑也调和之意柔与第四章柔嘉义同谦卑之意颜说文云眉目之间也不遐有愆问辞也不遐言近也愆说文云过也主威仪言不敬则愆矣言尔当交接诸君子之时必和柔其颜色以质证于君子曰吾之举动得无有未远于过差者乎然威仪之所以敬全本于心故下文又以谨独之事言之正抑抑之所从出非徒简束其外已也相省视也尚庶几也愧慚也俱见说文尔雅云西北隅谓之屋漏李氏云曾子问谓之当室之白孙炎云当室之白日光所漏入也舍人云古者彻屋西北隅以炊浴没者讫而复之故谓之屋漏言尔自视独居在室之时虽未与君子相接其敬与否人不得而知之然室有屋漏光斯入焉庶几求不愧之可也中庸云君子之所不可及者其惟人之所不见乎因引此诗而足之曰故君子不动而敬不言而信薛应旗云屋漏非身之处乃心之所存心曲隐微之中自家照自家惭阻略无所容如何可愧下文特把神明来形容不可愧之意非是为鬼神而求其不愧也无通作毋无曰者戒辞也不显莫予云覲六字相贯覲说文云遇见也格通作假说文云至也度犹量也矧说文云况也从矢从引取词之所之如矢也射通作斲说文云解也三思皆语辞尔无以屋漏为不显之地而人莫我见也当室之白则非不显矣且人纵不见而神则无不体神之往来不可测度不显亦临何如可畏况可自解散其精神而不敬乎谢枋得云庄子曰为不善于显明之中者人得而非之为不善于幽暗之中者鬼神得而责之君子无人非无鬼责亦此意也真德秀云人之常情祇敬于羣居者易渊蛰蟄伏之地无法家拂士之在侧有近习?御之旁环而能凜然自持不愧屋漏者虽明主犹或难之故武公自谓无曰此非显明之地而莫予见也当知鬼神之妙无物不体可有厌斲之意乎子思作中庸推明其说曰微之显诚之不可揜也呜呼武公其圣贤之徒与辟尔为德以下复举敬威仪之效验以劝勉之与上章惠于朋友庶民三句对看辟说文云法也法尔为德於威仪上徵之威仪其可见者德其不可见者观其威仪则可以知其德矣首章所云德隅次章所云德行意正如此俾使臧善嘉美也言臧又言嘉犹云尽善尽美也下文淑慎二句正所以使之臧嘉者

淑通作倝说文云善也止者心之所止与虞书安汝止商书钦厥止同义善其所止澄然粹白无妄念之参谨其所止亹然惺存无一刻之懈此申上相在尔室七句而言乃不愆于仪之本领处武公之学至是亦可谓深矣不愆以工夫言不使其有愆也舍威言仪者凡动容可象者皆谓之仪威亦仪也观古人以经礼为礼仪以曲礼为威仪可见又礼记缁衣篇子曰王言如其出如纶王言如纶其出如紵故大人不倡游言可言也不可行君子弗言也可行也不可言君子弗行也则民言不危行而行不危言矣诗云淑慎尔止不讐于仪按此似与诗意相远僭说文云假也毛云差也愚按有所假借则失其当然之则而至于差矣二义俱通贼朱子云害也鲜通作尠说文云少也则法也季本云僭则有愆而害德不足以为民则矣此申前章敬慎威仪维民之则意又左僖九年公孙枝曰维则定国诗曰不识不知顺帝之则文王之谓也又曰不僭不贼鲜不为则无好无恶不忌不克之谓也昭元年会于虢赵文子曰武将信以为本循而行之譬如农夫是穰是蓂虽有饥馑必有丰年且吾闻之能信不为人下吾未能也诗曰不僭不贼鲜不为则信也能为人则者不为人下矣荀子云仁者必敬人敬人有道贤者则贵而敬之不肖者则踈而敬之其敬一也其情二也若夫忠信端慤而不伤害则无接而不然是仁人之质也忠信以为质端慤以为统礼义以为文伦类以为理喘而言臚而动而一可以为法则诗曰不僭不贼鲜不为则此之谓也以上皆借辞立义非诗本旨】投我以桃报之以李【纸韵】彼童而角实虹小子【纸韵诸本以辟尔至此为第八章】荏染柔木言缙之丝【支韵】温温恭【陆本作共】人维德之基【支韵欧阳以投我至此为第十章】其维哲人【叶先韵知延翻】告之话【说文作诒】言顺德之行【叶先韵胡千翻】其维愚人覆谓我僭【叶侵韵千寻翻晁补之集作譖】民各有心【侵韵诸本以荏染至此为第九章欧阳以其维哲人至此为第十一章比而赋也此下皆教之以听言也凡人有投我以桃者我必报之以李感其善意故也今人有进美言于我者而我顾不思所以报之乎夫至闻言思报则其欣然嘉纳绝无扞格可知矣旧说以为承上文鲜不为则而喻上感下应之理果尔则当云投之以桃报我以李不宜云投我报之也彼童而角指当时少年用事者即第三章所称迷乱于政之人也童通作僮按说文童奴也僮幼也今文僮幼字作童童仆字作僮相承失也下文以而角为言则此童乃指畜类之幼者犹易言童牛诗言童羖也角者坚刚之物故易云姤其角新进少年见事风生不知远犹之所在不念明刑之当遵但逞其意见恣为议论如戴角之牛羊遇物无所不抵触也然天下无童牛羊而有角者曰童而角则更可异矣甚怪而贱之之辞也虹毛云溃也严云谓幻惑也如蜺蜺不正之气暂见于天须臾散灭也小子指武公也孔云言而角以溃小子则是专恣之人能乱朝政者也愚按武公自责而亦以讽王意正在此书曰听德维聪惟主聪不聪则金小之言皆得起而溃乱之而於忠直之言鲜不以为逆耳而见摈者故下文又反覆以虚怀听纳之理告之荏染陆元朗云柔意解见巧言篇柔木郑云柔忍之木缙尔雅云纶也孔云纶则绳之别名言缙之丝正谓以丝为绳被之于木有荏染然柔忍之木是维可以为弓之干我乃缙被之以丝则有弦而成弓按考工记弓人为弓取干之道七柘为上櫪次之檠桑次之橘次之木瓜次之荆次之竹为下自柘至荆皆所谓柔木也温者和柔之意以气象言恭者谦下之意以存心言俱与下章盈字相反基说文云墙始也此以柔和之木乃弓之材比温恭之人乃德之基温恭之所以基德者正谓其能容受善言故其德日进于高大特此尚未说出耳辅广云人才温柔则便是消磨了那客气消磨得客气则其德方可进故明道谓义理与客气常相胜只重消长分数为君子小人之别消尽者为大贤而横渠亦言学者先须去其客气惟温柔则可以进学蒋悌生云人谦卑巽顺纳谏受言则过而能改善言

日闻而可以为进德之基苟或刚愎自用则善言不闻过不能改而终无以入德矣表记篇子曰恭近礼俭近仁信近情敬让以行此虽有过其不甚矣夫恭寡过情可信俭易容也以此失之者不亦鲜乎诗云温温恭人维德之基荀子云君子宽而不慢廉而不刳辨而不争察而不激寡立而不胜坚强而不暴柔远而不流恭敬谨慎而容夫是之谓至文诗曰温温恭人维德之基此之谓也又云君子耻不修不耻见污耻不信不耻不见信率道而行端然正己不为物倾侧夫是之谓诚君子诗云温温恭人维德之基此之谓也哲人愚人与首章相应陆化熙云明繇虚生恭人即哲人也话尔雅说文皆云善言也顺德指话言说德者人心同得之理言之善者必与德相合哲人於人所告之话言知其顺乎德即从而行之无留难也刘向新序云叶公诸梁问乐王鲋曰晋大夫赵文子为人何若对曰好学而受规谏叶公曰疑未尽之矣对曰好学智也受规谏仁也江出汶山其源若瓮口至楚国其广十里无他故其下流多也人而好学受规谏宜哉其立也诗曰其惟哲人告之话言顺德之行此之谓也左襄二年齐姜薨初穆姜使择美櫨以自为衬与颂琴季文子取以葬君子曰非礼也礼无所逆妇养姑者也亏姑以成妇逆莫大焉诗曰其惟哲人告之话言顺德之行季氏於是为不哲矣杜预云言智者行事无不顺按观此足以识顺德二字之义覆郑云犹反也僭义见前其维愚人有如我告以顺德之言彼必反以为假设之辞谓非实有此理也民各有心专承愚人说而致其慨叹之意言人之度量相越如哲人之心以善言为当受而愚人则不然其心之不同有如此者泛就民说似推开一步而讽动之意愈深後章放此陆云顺行之哲人所以有哲人之隅谓僭之愚人所以成愚人之疾】於【音乌後同】乎【音呼後同】小子【纸韵】未知臧否【叶纸韵补美翻】匪手之?言示之事【叶纸韵鉏里翻】匪面命之言提其耳【纸韵】借【汉书作藉】曰未知亦既抱子【见上】民之靡盈【庚韵】谁夙知而莫【音慕陆本作暮】成【庚韵诸本以此章为第十章欧阳以为第十二章 赋也於乌乌也乎通作呼於乎叹声如鸟之吁呼也此章盖追其昔日而责之若曰女之不昔受言自少时而已然矣未知臧否犹俗人言不识好丑指其年幼未有知识之时也手?四语皆昔日事匪通作非言不但也?说文云提也郑云掣也提本训掣焦竑云此提当音抵言附耳以教之也礼少仪牛羊之肺离而不提心史记薄后以冒絮提文帝汉书景帝以博局提杀吴太子杨雄酒箴身提黄泉皆作抵音若平声读当作揪扯之义不如前说为雅邹忠胤云此解甚精且於匪面命意关切淮南子有云握火提人反先之热亦是义也严云曲礼云长者与之提?则两手奉长者之手负劔辟咎诏之注谓倾头与语又云口耳之间曰咎是?手提耳皆长者教诰小子之常也手?既指点其大槩矣又嫌其疎略且随事而为之指示面命既啓迪之无余矣又虑其忽忘且附耳而加之儆惺我之所以诲尔者一日如是日日亦如是可谓勤矣假设尔犹曰未有所知则韶华不待尔亦既忽然抱子为人父矣斯时年已长大非复未知臧否之时也而顾犹然懵懵耶靡之言无也盈满夙早也莫毛云晚也成说文云就也凡汝所以懵懵如斯者坐繇盈满为累以中坚成外拒不能受人言耳假使凡民而皆能除去盈满之念虚怀聽纳则其早岁必有所知以成就其德岂俟晚年而後成就耶知与成相因惟夙之不知则不能无待于晚成矣吾之所懊恨于尔之昔日者如此陆燧云知则必成夙知则必夙成聽言始能夙知不聽言必满之为害耳民泛言是论从来道理如此】昊天孔昭【叶啸韵三笑翻亦叶药韵元若翻】我生靡乐【叶啸韵力炤翻亦叶药韵历各翻】视【丰本作眎】尔梦梦我心惨惨【叶药韵七各翻大全云当作懔五经文字丰本俱作懔懔】海尔谆谆【礼记注作饨饨尔雅陆本俱作訕訕】聽我【中论作之】藐藐【叶效韵眉教翻】匪用为教【效韵】覆用为虐【药韵】借曰未知亦聿既耄

【叶药韵慕各翻诸本以此章为第十一章欧阳以为第十三章 赋也上章以晚成为言则当其抱子之时虽曰未知犹冀其末路有知之日及今年已老大而其未知者犹故也故此章特据今日之所见者而切责之昊天孔昭遥应前皇天非尚言元气皓吁谓之昊天天道亏盈益谦其理甚明故曰孔昭我生靡乐托为诵诗者自警之语谓我生无日非恐得罪于天之日不见有可逸乐也凡人忽于修德者其病只在乐之一字故言此以深惕之亦与前乐从句相应梦犹今人言醉生梦死者视尔梦梦即前所称颠覆厥德一段正与靡乐相反夫然故我心惨惨然为之忧也惨当作燥惨训毒燥训愁二义相近特作燥则於韵为叶耳海说文云晓教也諄说文云晓教之熟也海从尔諄諄从我心惨惨来惟忧之深故海之切通以上所言者皆是藐通作邈说文云远也聽我藐藐於我所言泛泛置之不相关切也匪通作非虐犹苦也不以我之諄諄为意欲晓教之反以我言太多为将欲烦苦之也聿通作吹说文云诤辞也曲礼云八十九十曰耄借曰尔此时尚犹然未知臧否如前则年亦已踰耄矣将待何时而後能知乎然则向所冀晚成者竟终于无成已耶左史谓卫武公作诗自警在年九十有五之时於既耄句可见】於乎小子告尔旧止【纸韵丰本作只】聽用我谋庶无大悔【叶纸韵虎洧翻】天方艰【丰本作難】难曰【韩诗作聿】丧【去声】厥国【职韵】取譬【列女传作辟】不远昊天不忒【职韵】回遹其德俾民大棘【职韵诸本以此章为第十二章欧阳以为第十四章 赋也旧久也言我之告尔非一日也止语辞我谋即前所言者劝修德正所以计保国也大悔指丧国言此厥不聽将有败亡之祸彼时悔之亦无及矣曰庶无者望之也方者近今之辞天步近方艰难亦既有丧国之祸矣指幽王骊山之事也譬说文云喻也徐云犹匹也匹而论之也取譬即前丧国之譬其事甚近言无多日欲其以幽王为戒也愚指此诗谓兼讽平王者於此可见忒说文云更也毛云变也天道终古不变有德者兴无德者亡也此亦与孔昭句相应但孔昭以理言不忒以效言回转也遹回避也俱见说文回转而避于正道即是自盈满不聽用我谋不修政令不谨威仪而迷乱顛覆意棘通作?说文云急也字从革亟声徐云束物之急莫若革大棘郑云大困急也以不修德之故而使民至于大困急则国之丧亡无日矣总是反覆望其聽言之意黄佐云是诗也虽古圣贤之检身亦不过是而卫武公乃能身体而力行之至使人直呼为小子而无一毫自恃自高之意其亦有得于切磋琢磨之力而然与邓云篇中精言类臯谟质言类说命深言为学庸源乃諄怛似周文公书金锡圭璧故君子兢兢三复终身焉】

抑【国语作懿子贡传申培说俱作懿戒】十章二章章八句三章章十句一章章十一句二章章十三句一章章十四句一章章十六句【诸本皆作十二章三章章八句九章章十句欧阳修云旧分断章句皆失其本既害诗义不可以不正也诗句无长短之限短或一二言长至八九言取其意足矣分为十四章四章章六句一章章七句四章章八句一章章九句三章章十句一章章十一句今皆不从序云卫武公刺厉王亦以自儆也朱子云此诗之序有得有失盖其本例以为非美非刺则诗无】

【所为而作又见此诗之次适出于宣王之前故直以为刺厉王之诗又以国语有左史之言故又以为亦以自儆以诗考之则其曰刺厉王者失之而曰自警者得之也夫曰刺厉王之所以为失者史记武公即位於宣王之三十六年不与厉王同时一也诗以小子目其君而尔汝之无人臣之礼与其所谓敬威仪慎出话者自相背戾二也厉王无道贪虐为甚诗不以此箴

其膏盲而徒以威仪词令为諄切之戒缓急失宜三也诗词倨慢虽仁厚之君有所不能容者厉王之暴何以堪之四也或以史记之年不合而以为追刺者则诗所谓聽用我谋庶无大悔非所以望于既往之人五也曰自警之所以为得者国语左史之言一也诗曰谨尔侯度二也又曰曰丧厥国三也又曰亦聿既耄四也诗意所指与淇澳所美宾筵所悔相表里五也二说之得失其佐验明白如此必去其失而取其得然後此诗之义明欧阳云郑於荡谓召穆公畏王监谤不敢斥言王而远引殷商於抑则以小子皆为斥王何前後之不类也召穆卫武皆厉王时人不宜相戾如此臣斥其君为小子义亦难安也今徧考诗书称小子者多矣皆王自称为谦损自卑之言也未见臣呼其君为小子者也书曰小子封小子胡君命其臣可也周公呼成王为孺子者成王幼周公属亲而尊其语或然其曰公将不利於孺子者盖言成王之幼疑周公害之犹言孤儿耳理亦通也卫武公於厉王非如周公之尊亲而厉为暴虐之长王斥以小子而乳臭待之理必不然况考诗义亦非也严云或又以为武公老作此诗故呼其同寮为小子武公学问深粹谦抑自处年九十有五犹求益于其国之臣若哆然以老成自处而呼王朝同寮为小子不似武公之气象也愚按武公为诸侯实在宣幽平三王之世是诗既非所以刺宣而篇中有既耄之语计其年岁亦非当幽之时况武公入为王卿士乃在东迁之後则是诗为平王而作无可疑者其惓惓忠君之意欲显语之不能故托之自傲耳篇末言曰丧厥国正指骊山往事而言国乃天下之通称朱但以侯国而引此语为自警之证亦非也或引左襄四年鲁人之歌云我君小子然彼称幼君为小子乃私刺之辞而又有引天保卷阿之诗谓古人亦尔其君则美恶原不同文在彼为亲而在此为贱据斯为解其迂甚矣申培说谓卫武公自警兼训国人训国人之说尤为无谓子贡传但存卫武二字而其余阙文】

淇奥卫人美武公之德也【出朱传 申培说以为美卫武公之诗子贡传云武公好学明德国人美之徐干中论云昔卫武公年过九十犹夙夜不怠思闻训道命其羣臣曰无谓我老耄而舍我必朝夕交戒又作抑诗以自傲也卫人诵其德为赋淇奥序云淇奥美武公之德也有文章又能聽其规谏以礼自防故能入相于周美而作是诗也数说皆相为出入孔丛子载孔子曰於淇奥见学之可以为君子也】

瞻彼淇奥【大学孔丛子子贡传皆作澳】緑【尔雅大学陆玕疏丰氏本俱作菴】竹【韩诗石经丰本俱作?下同】猗猗【叶歌韵於何翻陆玕疏作漪漪】有匪【大学释文丰本俱作斐下同韩诗作邲云美貌】君子如切【丰本作屑】如磋【歌韵丰本作□】如琢如磨【叶歌韵眉波翻释文作摩丰本作?] 瑟【丰本作□】兮僩兮赫兮咺【阮韵亦叶元韵许元翻大学列女传俱作喧韩诗作宣说文作愜】兮有匪【列女传作斐】君子终不可谖【元韵亦叶阮韵兄晚翻大学列女传丰本作誼】兮【兴也淇卫水也解见泉水篇奥通作澳说文云隈崖也其内曰澳其外曰隈尔雅作隩李巡云厓内近水为隩是也又^卅木疏云奥亦水名水经注云美沟水东南注淇水博物志谓之奥水流入于淇并存之綠色也竹^卅属戴凯之云谓竹是^卅不应称竹竹是一族之总名一形之偏称也植物之中有^卅木竹犹动品之中有鱼鸟兽也又云根深耐寒茂被淇苑班彪志云淇园卫地殷纣竹箭园也汉志武帝塞瓠子决河薪柴少乃下淇园之竹以为撻又寇恂传伐淇园之竹为矢百余万则淇上多竹在汉世犹然矣诗故云河朔无竹淇澳独产兴武公特稟异气而生也又陆玕云緑竹一^卅名其茎叶似竹青綠色高五六尺今淇澳傍生此人谓此为緑竹未知是否猗通作倚季本云猗与依同

倚也互相倚倚则不摧折而得以成其美以兴工夫之夹持也匪斐通考工记曰且其匪色必似鸣矣匪者有文章之谓也君子指武公切说文云刊也磋广韵云磨治象牙也按说文无磋字当通作齧齧者齿不齐之名盖以器之有齿者磨之使光朱子谓磋以鑢荡是也琢者治玉器加功而成之名磨治石也按尔雅云象谓之鹄角谓之鬻犀谓之割木谓之剡玉谓之雕金谓之镂木谓之刻骨谓之切象谓之磋王谓之琢石谓之磨象言鹄又言磋玉言雕又言琢者尔雅疏云鹄鬻割剡雕皆物未成而治其朴也镂刻切磋琢磨皆物之已成而复治之也朱子谓治骨角者既切复磋治玉石者既琢复磨似无据郭璞云骨角须切磋而为器人须学问以成德玉石之被琢磨犹人自修饰也又荀子云人之於文学也犹玉之於琢磨也诗曰如切如磋如琢如磨谓学问也和之璧井里之厥也玉人琢之为天子宝愚按武公之学修如楚倚相所云在舆有旅賁之规位宁有官师之典倚几有诵训之谏居处有?御之箴临事有瞽史之道宴居有师工之诵皆切磋琢磨之实此就成德後叙述故以四如言亦状其有匪之象如此耳论语子贡曰贫而无谄富而无骄何如子曰可也未若贫而乐富而好礼者也子贡曰诗云如切如磋如琢如磨其斯之谓与子曰赐也始可与言诗已矣告诸往而知来者盖乐与好礼原非二事惟有切磋琢磨之工夫者则皆能之观武公之充耳会弁是其好礼也寛绰戏谑是其乐也岂徒借此以馭贫富哉此孔子所谓知来者也瑟缙密也按瑟二十五弦其弦甚密故训瑟为密僊说文云武貌按荀子陋者俄且僊释之者引晋魏之间谓猛为僊左传僊然授兵登陴皆武意也武公资性严武故谥曰武观此可见赫明盛貌字从二赤言火盛也咍殷敬顺云寛绰貌张氏家海云污缓貌按说文朝鲜谓儿泣不止曰咍亦缓意也瑟僊赫咍俱以德容言媛尔雅云忘也曰终不可媛者犹言到底如此非没世之谓是义也大学传言之详矣如切如磋者道学也如琢如磨者自修也瑟兮僊兮者恂栗也赫兮喧兮者威仪也有斐君子终不可諠兮者道盛德至善民之不能忘也然玩此诗三章皆以匪之一字为言还是就德容上想象意居多左昭二年韩宣子聘于卫卫侯享之北宫文子赋淇奥】瞻彼淇奥緑【丰本作葦下同】竹青青【韵释文作菁菁】有匪君子充耳琇【说文作璫丰本作秀】?【叶青韵户局翻】会【说文作?云骨摘之可会髮】弁如星【青韵】瑟兮僊兮赫兮喧【见前】兮有匪君子终不可媛【见前】兮【兴也青青者青而又青坚刚之貌陆佃云竹之初生其色緑长则转而青矣宋熙宁中太子右赞善大夫吴安度召试舍人院赋入第三等论入第四等止緑竹青青诗不依注解作王葛篇竹遂定入第五等因是改一官放罢宰臣富弼言切详安度命意必谓王葛篇竹柔脆常?不足以咏武公之德又按史记河渠书云淇圉之竹则知淇奥之竹祇是竹箭之竹也又按陆德明释文青音菁茂盛之貌於理甚通未为不识题意乞再取安度所试下学士院看详於是赐安度进士出身程大昌云汉世下淇园之竹为榑又诗籊籊竹竿以钓于淇卫竹大可以为河榑而其竿之长可以垂钓则其不为王葛之?亦已明矣充耳瑱也惟服冕旒时有之若皮弁以下不得有充耳按周礼弁师职云掌王之五冕皆玄冕朱里延组五采纁十有二就皆玉采玉十有二玉笄朱紘诸侯之纁旒九就璫玉三采其余如王之事纁旒皆就玉瑱玉笄王之皮弁会五采玉璫象邸玉笄注谓王之冕不言玉瑱於诸侯言之者以互见为义又王之皮弁不言玉瑱可知瑱惟服冕时有之矣琇释文云石之次玉者毛传云天子玉瑱诸侯以石盖据此文为说按说文无琇字当通作秀禾实也禾有实则其象下垂充耳之形亦如之故都人篇亦曰充耳琇实也?洁也说文云玉色引逸论语曰如玉之?会弁如星者郑云会谓弁之缝中饰之以玉皤皤而处状似星也弁皮弁也按周礼注皮弁以皮六方缝之会其合缝处每贯结五采玉以为饰五采玉者五色之玉琢为珠贯之如冕旒之数其

名曰璫通作綦即此诗会弁如星及其弁伊綦是也天子璫饰十二玉五采侯伯璫饰七子男璫饰五璫玉三采璫石似玉者不以玉三采注谓朱白苍也不以五皆如其冕旒七就五就之数天子诸侯皆服皮弁以视朝礼在朝君臣同服时武公入相于周则亦在王朝之服也诗人瞻望丰仪肃然讚叹以竹之坚刚兴其服饰之崇严正抑诗所云抑抑威仪惟德之隅敬慎威仪惟民之则者上章所咏瑟僖赫赫咍之气象于斯倍为盎溢故申咏之】瞻彼淇奥绿竹如簣【陌韵亦叶锡韵则历翻韩诗作蕢字从艹云积也薛君云绿?盛如积也】有匪君子如金如锡【韵亦叶陌韵思积翻】如圭如璧【陌韵】宽兮绰【药韵】兮猗【丰本作倚】重【平声】较兮善戏谑【药韵】兮不为虐【药韵】兮【兴也檀弓注云簣谓床第即床棧也竹之疎密得宜似之陆佃云曰如簣则又以明其为竹矣凌蒙初云簣竹所为也即以既比之竹形容在林之竹巧于取喻万时华云猗猗兴其进修青青兴其尊严如簣兴其成就然言有次第意无浅深按尔雅云棗王刍竹篇蓄旧说以为即绿竹也读至如簣之句而始悟其不伦王刍篇蓄安能如簣则绿竹之是竹非艹无可疑者金黄金也锡说文云银铅之间也徐锴云银色而鈹质也顾起元云攻金之工如筑冶皐?段桃以金工料言之宜用铜铁等物为多特总名曰金锡以分六齐六分其金而锡居一为钟鼎之齐五分其金而锡居一为斧斤之齐四分其金而锡居一为戈戟之齐三分其金而锡居一为大刃之齐五分其金而锡居二为削杀矢之齐金锡半为监燧之齐使如今时所谓锡则岂堪为斧斤戈戟矢刃哉?氏改煎金锡定火候以青黄黑白之气而使以铸量使如今时所谓锡则岂能声中黄钟之宫哉观史记平準书及汉食货志亟称银锡汉武帝造银锡为白金可以见古者银与锡通称白金考工先秦古书当以锡为银铅之总名说文谓锡曰银铅之间稍近古意徐氏不察考工金锡之说殊失许叔重本旨周礼卅人职金皆言金玉锡石盖铜铁银锡皆取升炼成言锡而不必枚举铜银铁也尝叹汉儒拘尔雅之文於卅人之注直以锡为鋇铅尔雅专以银为白金不思汉时固以锡为白金其注鐐银钹金名物琐细而於考工金锡之义乃无所发明曾不若说文能合银铅以言锡也职方氏於扬州言金锡荆州言银以今出产之地言之则银在扬而锡在荆锡亦银也特以荆扬地利互文见之尔若如今人分别银锡则考工所谓金锡於理有不通者故着其说使读考工记者无惑焉今世用物铜铁为多经文絶少言铜亦罕言银铁考工言金者铜铁在其中言锡者银铅在其中合而言之总曰金锡尔闻决银者言锡能贼他金似不宜混合然物各有用攻金之工不一铜铁及鋹铜得锡愈佳铸铜得铅益骨金锡相须尚矣圭瑞玉也其制上圜下方璧亦瑞玉其制外圜内方如金如锡言其从革之随宜从容中道也如圭如璧言其方圜之不毗周旋中礼也绿竹挺于淇滨其疎密得宜象亦如此故因以起兴宽者屋宽大之义故因训为大绰说文云缓也猗通作倚说文云依也孔穎達云周礼輿人注曰较两轡上出轼者今谓之平较但周礼无重较单较之文杨慎云轡是两边檀木较横轡上轡两而较一说文作较通作较云车轡上曲铜也盖较在轼上恐其坠故以曲铜关之古谓较为车耳故谚云仕宦不止车生耳三国志吴童謡云黄金车斑兰耳闔闔门见天子符曲铜之说矣晋崔豹云重耳古重较也文官青耳武官赤耳或曰重较在军车藩上重起如牛角故云重较耳吕和叔云古者车箱长四尺四寸三分前一後二横一木下去车牀三尺三寸谓之轼又于轼上二尺二寸横一木谓之较去车牀凡五尺五寸古人立乘平常则凭较若应为敬则落手凭下轼而头得俯又按补传云较高五尺五寸轼高三尺三寸较既出于轼上故曰重较亦通车上之人致敬则凭轼闲适则凭较故以目宽绰时焉戏通作□即摩字以音同通用□者用旌旗以指麾也人之举止散诞象亦如之谑说文亦训戏但字从言则当为戏言耳善戏谑兮者颐气解言

不立崖岸载色载笑与孔子莞尔之戏同陈传良云古人肃肃不废雍雍僮僮不废祁祁有所拘者必有所纵也虐者戏谑之过必至任情凌物玩一善字已是中节特言不为虐以足之耳非二时事首言如切磋琢磨是何等工夫末言如金锡圭璧是何等造詣前二章皆美其瑟僖赫咺此更美其寬绰戏谑卷舒张弛各得其宜是其所以谓有匪也与徐光啓云有谓上二章末四句犹有英气末章末四句则浑化无迹为武公渐进之益此说不是盛德容貌当敬而敬则瑟僖赫咺当和而和则为寬绰戏谑如孔子有时而蹶蹠色勃有时而申申夭夭岂有到寬绰戏谑时便不瑟僖赫咺乎诗人之言本自互见而不知者巧生意见便错认诗意不可不察】

淇奥三章章九句【严粲定为幽王时诗然以幽王之暴虐至于杀身武公于此略不见有庇君匡国之效何哉考世家武公四十二年犬戎杀幽王武公将兵佐周平戎甚有功平王命武公为公意必此时始入相耳徐干中论谓此诗之作在武公年九十作抑武之後而欧阳氏补图属之于平盖有见矣】

终南秦人美文公也始得岐周之地国人矜而祝之【按史记秦本纪云秦襄公以兵送周平王平王封襄公为诸侯赐之岐以西之地曰戎无道侵夺我岐丰之地秦能攻逐戎即有其地与誓封爵之襄公於是始国与诸侯通使聘享之礼十二年伐戎至岐卒生文公文公十六年以兵伐戎戎败走於是文公遂收周余民有之地至岐岐以东献之周以竹书考之事在平王十八年襄公虽受岐西之赐于周而未能有其地至文公始大败戎师而後取之此诗以终南入咏当在文公时孔穎达云本纪谓文公收周地至岐岐以东献之周按终南之山在岐之东南则亦得岐东非惟自岐以西也】

终南何有有条【释文作櫟】有梅【叶支韵莫悲翻丰氏本作某】君子至止锦衣狐裘【叶支韵渠之翻丰本作求】顔如渥丹【韩诗作沍云赭也外传作赭】其君也哉【叶支韵将其翻 兴也终南山名即中条山在今陕西西安府或谓一名太乙非也按太乙在终南之南严粲云周都丰镐面对终南平王以岐西之地赐秦岐西之地其名山莫如终南举终南则可以该岐西北邹忠胤云九州之险终南居一焉其地据天之中在都之南连冈乎嶓冢西至于褒□又西至于陇首以临于戎东至于商顔又东至于太华以拒于关抱杜含鄠□丰吐镐爰有蓝田珍玉是之自出班固所谓萐实之毛则上腴防御之阻则奥区实能作固以屏王室平王一旦捐以畀秦秦得百二实始基之而周则自失其险矣条陆玑以为稻今山楸也皮叶白色亦白材理好宜为车板宜阳共北山多有之按尔雅云稻山楸又云柚条是则山楸名稻条自名柚无缘以稻为条也然以条为柚亦未足信列子曰吴楚之国有大木焉其名为柚食其皮汁已愤厥之疾齐州珍之渡淮而北而化为枳也故曰橘柚有乡萑蒲有丛又曰橘柚凋于北徙若榴郁于东移也据此柚不北徙则终南不宜有之矣梅尔雅说文皆云桮也孙炎云荆州曰梅扬州曰桮按梅桮异木何得相混桮木似豫章陈文帝尝出桮木造战舰即此桮也梅似杏古者用以和羹然陆佃有云梅至北方多变而成杏故北人有不识梅者是则亦非终南所宜有矣愚意此梅但当通作枚与汝坟篇条枚义同条自干而出兴文公之为诸侯枚自条而出则以兴文公之羣臣也章末其君也哉言使羣臣共戴之为君正兴意归结处君子指文公也至止者郑玄云受命服于天子而来也钱天锡云至止句最重言逐戎之後奄有岐丰八

百里之地而终南为秦镇也此不比游观览胜看玉藻云锦衣狐裘诸侯之服也又云君衣狐白裘锦衣以裼之君子狐青裘豹褰玄绀衣以裼之陈皓云古人之衣近体有袍襪之属其外有裘夏月则衣葛或裘或葛其上皆有裼衣裼衣上有裘衣裘衣之上有常着之服则皮弁服及深衣之属是也孔隶达云君衣狐白毛之裘则以素锦为衣覆之使可裼也袒而有衣曰裼必覆之者裘也陈祥道云古者行礼之裘必以羔与麕燕居之裘必以狐与貉狐白为人君之服所以象德之成狐青而下为君子之服所以象仁之发言君子之服则大夫士同之也夫天下无粹白之狐而有粹白之裘则狐白裘天下之尤难得者也士不衣狐白裘不特以其德之未成也盖亦不敢以贱服贵坎渥说文云沾也毛云厚渍也丹说文云巴越之赤石也郑云颜色如厚渍之丹言赤而泽也一说凌蒙初云渥丹花名似鹿葱而小色甚红见仙经又名华丹见抱朴子此言如正喻其颜之红也程良孺云今其种不一有散丹有卷丹其君也哉苏辙云严惮之辞也韩婴云上之人所遇色为先声音次之事行为後故望而宜为人君者容也近而可信者色也发而中者言也文而可观者行也故君子容色天下仪象而望之不暇言而宜人为人君者诗曰颜如渥赭其君也哉蔡汝南云秦人之称其君曰其君也哉而生其矜心周书则曰孺子王矣而生其惧心敬肆之所以关乎盛衰也黄佐云终南者周之故都也东迁而王辙不西矣盖复周公之宇鲁人所以愿僖公而郑伯以璧假许田春秋讥之终南入秦周欲不亡得乎又苏辙云终南有草木以自衣被而成其深君子则有服章以自严饰而成其尊愚按此说于兴意亦近】终南何有有纪【释文崔灵恩集注初学记俱作妃】有堂【阳韵】君子至止黻衣绣裳【阳韵】佩玉将将【叶阳韵资良翻中论作锵锵】寿考不忘【阳韵毛诗作亡兴也纪通作妃毛传云基也谓山基也解见陟岵篇又崔灵恩云终南之旁有岷山今未详其处堂朱子云山之寛平处也按尔雅云山如堂曰密郭璞以为形如堂室者尸子谓松柏之鼠不知堂密之有美枏是也毛传误因尔雅有毕堂墙之句遂解云毕道平如堂今考毕即周公葬毕之毕以为终南之道名是矣但既谓其平如堂则尔雅何得有墙之目郑玄以为毕道边如堂之墙则尔雅又不应当即以毕为堂墙也愚意凡厓岸如堂墙之形者名之为毕原与毕道无涉上章咏有条有梅取有君有臣之义以兴文公之能为人君此章咏有纪有堂亦犹祝如山如阜如冈如陵之意以兴下文之寿考不忘也黻有二义考工记及说文皆以为黑与青相次韦孟诗注云画为亚古弗字增韵云为两已相背形周礼注云黻取臣民背恶向善亦取君臣有合离之义去就之理孔云郑於周礼之注差次章色黻皆在裳言黻衣者衣大将与绣裳异其文耳愚按九章尽于黻故以黻该之黻衣绣裳犹云此有黻之衣其绣之则在裳也以五采刺文谓之绣以黑青两色绣为两已相背则名黻须兼此两义始全衣之章用绘裳之章用绣故云绣裳佩玉见非三命黜珩之旧玉藻云天子佩白玉公侯佩山玄玉大夫佩水苍玉世子佩璊玉是佩各不同也将通作璫说文云玉声也寿考不忘祝愿之辞欲其居此位服此服长久安宁不忘王命也吕祖谦云苏氏谓周之失计未有如东迁之谬使平王定不迁之计收丰镐之遗民以形势临诸侯齐晋虽大未敢贰也此论考之不精岐丰之地自犬戎盘据旧都非周所有故平王遂以赐襄公使之自取其势非可以不迁也金履祥云秦与戎世为不共戴天之讐势不两立其与戎力战固亦为已不独为王室也当时犬戎盘据岐丰之间平王不得不许秦秦亦不得不取之然西戎方炽父子力战二十一年而始得之固不暇东略矣扈言云世儒多咎周平王不宜以岐周之地予秦宜自取之窃谓不然夫大戎之力足以弑幽王取宗周则亦非一二诸侯之所能制也且召犬戎者申侯也立平王者申侯也平王能背申侯以令诸侯乎申侯能率诸侯以攻犬戎乎惟犬戎於秦为世讐而其地相近故不得不赐之

岐西而与之誓曰能逐犬戎即有其地是藉手于秦以报其讐而偿利於秦以动其心地之与秦犹愈于犬戎平王此举未甚失也邹忠胤云秦能以一国取之王独不能率诸侯取之乎竟使千年堂构一旦瓦解周人方悲其离黍而秦人且侈其条梅代兴之兆於是见矣】

终南二章章六句【朱子但以为秦人美其君之辞而不着其世序谓戒襄公也能取周地始为诸侯受显服大夫美之故作是诗以戒劝之子贡传则云襄公克戎始取周地秦人矜之欧阳修谓自戎侵岐丰周遂东迁虽以岐丰赐秦而终襄公之世不能取之但尝一以兵至岐至文公始逐戎而取岐丰之地据此则是诗为咏文公非咏襄公明矣若申培说以为襄公初为诸侯秦人祝之而作则诗之发首即以终南何有为言自是夸其得地非但美其为诸侯也】

蒹葭刺秦也未能用周礼将无以固其国焉【出序但原本秦下有襄公二字今去之 秦至襄公子文公始有岐丰之地则此诗当属之文公郝敬云周道亲亲尚贤平易忠厚黜诈力而卑武功自文武至宣幽国于岐丰民习先王礼教数百年矣平王东迁秦据有其地始以攻战为事刑杀为威其民愁居慑处思昔大和景象不复可见东望河洛有游从宛在之思西视秦邦有艰难牵率之苦文武成康之泽维系民心而秦人惨礲之法束缚其手足自立国之初已然矣序所以谓之将无以固其国盖周之兴也诗歌茁葭是春和之明景也周礼行而忠厚笃祐开卜世有道之长秦之兴也诗歌蒹葭是肃杀之萧晨也周礼废而强梁腊毒兆二世扑灭之祸圣人删定法戒昭然後儒不达诋诗序为凿空岂不误乎】

蒹葭苍苍【阳韵】白露为霜【阳韵】所谓伊人在水一方【阳韵】溯【尔雅作泝说文作 丰氏本同下三溯如字】洄【丰本作回】从之道阻且长【阳韵】溯游从之宛【释文作苑】在水中央【阳韵 兴也尔雅云蒹蒹葭芦郭璞云蒹萑之未秀者即今之荻葭苇之未秀者即今之芦蒹高数尺今人以为帘箔因此为名也葭一名华至秋坚成谓之萑苇诗曰八月萑苇庄子曰欲恶之孽为性萑苇蒹葭始萌以扶吾形寻擢吾性则明此幼曰蒹葭长曰萑苇矣又云萑荻也荻之初生曰莢一曰薺一曰薺蒹其未秀者也按此则蒹自小至大有七名莢薺薺蒹蒹荻萑也葭自小至大有四名葭华芦苇也二物共十一名览者易混详载于此苍苍深青色毛传云盛也白露为霜者孔穎达云八月白露节秋分八月中九月寒露节霜降九月中郑玄云蒹葭在衆^二之中苍苍然强盛至白露凝戾为霜则成而黄愚按露主敷施霜主刻制白露况周霜以况秦言时值白露蒹葭之色尚苍苍然今也阴气过盛露忽凝而为霜则苍苍者将忽变而为黄矣以兴岐丰之地今为秦有秦变周道非复昔日忠厚德泽之旧也民何以堪伊说文云从人从尹尹正也又云尹大治天下者所谓伊人言追思昔日正治天下之人指文武也文王都丰武王都镐丰依沔水镐依镐水故以在水一方言之一方解见汾沔篇以後章湄涘推之乃近水之地与下文水中不同溯本作?说文云向也尔雅云逆流而上曰溯洄顺流而下曰溯游孙炎云逆渡者逆流也顺渡者顺流也道水道也增韵云山巘曰险水隔曰阻宛说文云屈草自覆也掩蔽而不能自达之意央说文云中央也从大在门之内徐锴云从大取其中正会意礼记集解方氏云央以适当言之惟中乃可言央诗人设为立此望彼之言云彼近水一方之地恍惚见伊人在焉必逆水以求庶有登岸相见之期然其如目前之苦难何若顺水而求则愈趋愈下而伊人终不可得而见矣何者伊人所居原不在水而求之于水此必不得之数也严粲云远方之俗不闻中国之礼义将使之逆流而上以往求攸济欤则

路险阻而且长远喻其狃于功利以道为远而难致必不能强勉而行之也将使之顺流以涉而听其所止与则宛然惟在水之中央喻繇今之道无变今之俗终必亡而已矣道本非远而秦人以为远所谓安能邑邑以待数百十年而为帝王也故诗人因秦人之意以道阻且长言之又云周弱而繇秦强而顛繇其礼之存亡异焉耳苏辙云秦起于西垂与远裔襍居本以强兵富国为先而不知以礼义终成之故其後世狃于利而不知义至商君厉之以法卒以此胜天下既胜之後二世而亡其数有以取之矣】蒹葭凄凄【叶支韵此移翻石经丰氏本俱作萋萋】白露未曦【叶支韵读如羲虚宜翻】所谓伊人在水之湄【支韵丰氏本作蘼】溯洄从之道阻且跻【叶支韵读如支章移翻释文作隋】溯游从之宛在水中坻【支韵兴也凄通作萋说文云^廿盛也言蒹葭尚盛也曦乾也未曦郑云未为霜孔云匪阳不曦言见日则乾此篇上章言白露为霜则此言未曦谓未乾为霜与彼异盖时当八月虽气候早寒而露亦有未尽凝为霜者以喻王泽之犹未熄也湄毛云水隈也尔雅说文皆云水草交为湄孔云谓水草交际之处水之岸也释名云湄眉也临水如眉临目也跻尔雅公羊皆云陞也逆流渐上与陞高同也坻水中地之略高者尔雅云小洲曰渚小渚曰沚小沚曰坻】蒹葭采采【叶纸韵此礼翻】白露未已【纸韵】所谓伊人在水之涘【纸韵】溯洄从之道阻且右【叶纸韵羽轨翻】溯游从之宛在水中沚【纸韵兴也采说文云捋取也曰采采者非一辞也先言苍苍象其色继言凄凄美其盛至是则可以采矣然犹是八月之时故白露方下而未止也子贡曰文武之道未坠于地白露未已之况也涘厓也水滨之地言湄比一方为近言涘比湄又为近以况王道之近人也人病不求耳右者在我之右也初言道阻且长似茫茫未有穷期次言跻则道虽阻然已近在我之上更一跻而是耳此言右则道虽阻然已迫居我之右但一转而是耳亦渐求而渐近之况也沚释名云止也可以止息其上言如狃于所趋必无见伊人之日初言在水中央或犹可以纵一苇凌茫然而改途以求至焉过此溯游不已则登岸何从将有小于沚之坻为之碍矣又将有大坻之沚为之碍矣是又愈隔而愈远之况也诗言之婉而多风如此】

蒹葭三章章八句【朱子谓此诗不知何所指而以序说为凿夫不能虚心以求其义则序说诚凿也子贡传申培说皆以为君子隐于川上秦人慕之于语意近似然诗人托物起兴皆有深意存焉白露为霜白露未已语自有骨岂徒纪时而已乎序深得之但以为刺襄公则此诗乃刺文非刺襄也】

黍离闵宗周也周大夫行役至于宗周过故宗庙宫室尽为禾黍闵周室之顛覆□□不忍去而作是诗也【出序朱传从之按武王作邑于镐京谓之宗周是为西都成王在丰欲宅雒邑使召公先相宅以庶殷攻位于洛汭在涧水东瀍水西既成谓之王城今河南是也是为东都召公既相宅周公又再小瀍水东以居殷顽民谓之成周今雒阳是也是为下都已而成王迁九鼎于雒邑而复还归处西都至十一世幽王嬖褒姒生伯服废申后太子宜臼奔申申侯与犬戎攻宗周杀幽王于戏晋文侯郑武公迎宜臼于申而立之是为平王以乱故徙居东都王城及襄公兴兵讨西戎救周乃以岐丰之地赐之秦遂有西都宗周畿内八百里之地自平王东迁之後凡称西周者指丰镐也称东周者指东都也及威烈王而後东都下都又分二周所谓西周则东都河南也所谓东周则下都雒阳也】

彼黍离离【说文作??】彼稷之苗【萧韵】行迈靡靡中心摇摇【萧韵尔雅作悵悵】知我者谓我心忧【尤韵】不知我者谓我何求【尤韵】悠悠苍天【释文作仓】天【先韵下叶真韵汀因翻】此何人【真韵亦叶先韵如延翻】哉【赋而兴也彼彼宗庙宫室黍说文云禾属而黏者也以大暑而种故谓之黍本^廿注云黍似粟而非粟也有二种米黏者为秬可以酿酒不黏者为黍如稻之有秬糯耳罗愿云孔子曰黍可以为酒禾入水也然则又以禾入水三字合而为黍家语孔子曰黍者五谷之长祭先王以为上盛离乃鸟名当通作丽说文云^廿木相附丽土而生重言离离者谓衆黍分布相属着也稷似黍而小黑色亦谓之粟古谓之粢曲礼稷曰明粢是也亦谓之稭穆天子传赤鸟之人献稭百载是也徐铉云关中谓之糜罗愿云冀州谓之^口凡^廿之生于田者曰苗故字从^廿从田初生亦曰苗论论谓苗而不秀秀而不实盖自苗而秀而实是其序也孔云黍言离离稷言苗则是黍秀稷未秀按出车谓黍稷方华则二物大时相类但以稷比黍黍差为植故黍秀而稷苗也陆化熙云诗为闵故宗庙宫室作而诗中不见一字直将彼字暗指而已此是感慨最深处又程氏解彼黍者我后稷之苗也殊穿凿一说季本云宗庙宫室尽为禾黍以事理论之似不尽然当时周虽东迁雒邑而岐周旧地已尽封秦假使故宫为其所毁则都城之内宜为室庐乃以黍稷为言则当在野外之地而岂可语于城内哉且五谷者民之所资以养者也而称其黍稷之盛则其民尤为勤力似有叹美之意与言蔓草荆榛者不同矣其必秦得岐周之後务本力农周大夫出过其地而见之知秦地广民勤将以富强雄天下而伤周室之不竞乎亦通行迈以往来之人言迈说文云远行也靡说文云披靡也徐锴云披靡分也故於非取相违之义往者过来者续覩兹丘墟景象已习为故常但分道而驰略无停步低徊之意所谓靡靡也悵悵者心忧而无所附着战国策谓心悵悵如悬旌是也下文两谓我正是靡靡情状我见行者迈者之靡靡则中心益摇动而不能自己间有一二知者或亦谓此人必有所忧然其实非真知也其不知者怪我低徊不去谓我将何所求乎一腔隐痛向伊谁诉言下已有欲呼天之意矣锤惺云知我者谓我心忧不知我者谓我何求盖以黍离为固然而不复知此为何地此诗之作为何繇矣那得不哭悠说文云忧也尔雅云思也苍天以体言之尊而君之则称皇天元气广大广称昊天仁覆闵下则称旻天自上降鉴则称上天据远视之苍苍然则称苍天孔云尔雅春为苍天夏为昊天秋为旻天冬为上天谨按尚书尧典羲和以昊天总勅以四时故知昊天不独春也左传夏四月孔子卒称曰旻天不吊非秋也六艺之中诸称天者以情所求之耳非必于其时称之浩浩昊天求天之博施苍天苍天求天之高明旻天不吊求天之生杀当其得宜上天同云求天之所为当顺其时也此之求天犹人之说事各从其主耳若察於是则尧命羲和钦若昊天孔子卒旻天不吊无可怪耳陆佃云诗于高远难诉每称苍天巷伯之矜此劳人黄鸟之殄我良人皆是也又云尔雅于春言其色于夏言其气于秋言其情于冬言其位相备也悠悠苍天言我之忧思惟苍天知之而已此何人哉不忍斥言盖指平王也对彼言此谓此居东都之人也旧说以为指幽王然幽王已成往事似不足言矣大夫之为此诗其有志于兴复者乎谢枋得云能为闵周之诗者一行役大夫之外无人也不知平王而闻此诗也亦有惻于中否乎吾观书至文侯之命知平王之不足有为矣所以训戒晋文侯者惟曰自保其国而已王室之盛衰故都之兴废悉置度外吾于黍离之诗重有感夫苏轼云周之失计未有如东迁之谬也自平王至于亡非有大无道者也顓王之神圣诸侯服享然终以不振则东迁之过也昔武王克商迁九鼎于洛邑成王周公复增营之周公既没盖君陈毕公更居焉以重王室而已非有意于迁也周公欲葬成周而成王葬之毕此岂有意于迁哉今夫富民之家所以遗其子孙者田宅而已不

幸而有败至于乞假以生可也然终不敢议田宅今平王举文武成康之业而大弃之此一败而鬻田宅者也夏商之王皆五六百年其先王之德无以过周而後王之败亦不减幽厉然至于桀纣而後亡其未亡也天下宗之不如东周之名存而实亡也是何也则不鬻田宅之效也盘庚之迁复殷之旧也古公迁于岐方是时周人如狄人也逐水草而居岂所难哉卫文公东徙渡河恃齐而存耳齐迁临淄晋迁于绛于新田皆其盛时非有所畏也其余避寇而迁都未有不亡虽不即亡未有能复振者也春秋时楚大饥羣蛮叛之申息之北门不啓楚人谋徙于阪高蔦贾曰不可我能往寇亦能往于是乎以秦人巴人灭庸而楚始大苏峻之乱晋几亡矣宗庙宫室尽为灰烬温峤欲迁豫章三吴之豪欲迁会稽将从之矣独王导不可曰金陵王者之都也王者不以丰俭移都若弘卫文大帛之冠何适而不可不然虽乐土为墟矣且北寇方疆一旦示弱窜于蛮越望实皆丧矣乃不果迁而晋复安贤哉导也可谓能定大事矣嗟夫平王之初周虽不如楚之疆顾不愈于东晋之微乎使平王有一王导定不迁之计收丰镐之遗民而修文武成康之政以形势临东诸侯齐晋虽强未敢贰也而秦何自霸哉魏惠王畏秦迁于大梁楚昭王畏吴迁于郢顷襄王畏秦迁于陈考烈王畏秦迁于寿春皆不复振有亡徵焉东汉之末董卓劫帝迁于长安汉遂以亡近世李景迁于豫章亦亡故曰周之失计末有如东迁之谬也】彼黍离离彼稷之穗【寘韵】行迈靡靡中心如醉【寘韵】知我者谓我心忧【见前】不知我者谓我何求【见前】悠悠苍天【见前】此何人哉【赋而兴也穗本作采说文云不成秀也通志云稷穗似芦而米可食如醉者言忧之沉昏而不醒如醉然也】彼黍离离彼稷之实【质韵】行迈靡靡中心如噎【叶质韵於悉翻】知我者谓我心忧【见前】不知我者谓我何求【见前】悠悠苍天【见前】此何人【见前】哉【赋而兴也实谓成实而坚也孔云三章历道其所更见大夫役当有期而反但事尚未周了故也或疑稷文有改易而黍文不变何也按罗愿云黍以大暑而种故农家以三月上旬为上时四月上旬为中时五月上旬为下时月令仲夏之月农既登黍天子以雒尝黍羞以含桃先荐寝庙黍固有早晚其晚者不妨至孟秋始熟故庶人秋乃荐黍此天子之礼自重其先熟者而尝荐之耳据此黍既有早晚三辈则当离离时而或值稷之苗稷之穗稷之实盖以早晚为异理固然也杨慎直以为犹兴桃夭者因叶及华因华及实盖一时所见一日所赋则诗人乃是悬空托咏似未是又罗云黍大体似稷故古人并言黍稷行役之人有忧于内则有不察于外故于此或不能辨也此说在太平御览先有之故刘勰云思亲者莪蒿不分闵周者禾稷莫辨盖心在於忧与哀而视物之似而误也亦通孔云噎者咽蔽塞之名言忧深不能喘息如噎之然三章所以为赋而兴者盖以苗之摇曳兴摇摇以穗之下垂兴如醉以实之坚满兴如噎也按小弁之诗云踽踽周道鞠为茂草若预知有今日然者箕子朝周过殷故墟城坏生黍箕子伤之乃作麦秀之诗曰麦秀渐渐兮禾黍油油彼姣童兮不我好仇其语意与此相类但彼所谓姣童正指纣此则意在平而不在幽耳】

黍离三章章十句【序不录作者姓名而子贡传以为尹伯封之作至申培说独详云幽王伐申申侯逆战于戏射王弑之立平王于申自申迁雒命秦伯帅师逐犬戎于镐京寻遣尹伯封犒秦伯之师过故宗庙宫室秦人皆垦为田咸生禾黍旁皇不忍去故作此诗因记曹植云昔尹吉甫信後妻之谗而杀孝子伯奇其弟伯封求而不得作黍离之诗而太平御览亦载韩传云黍离伯封作也离离黍貌也诗人求亡不得忧懣不识于物视彼黍离离然忧甚之时反以为稷之苗乃自知忧之甚也则此诗之为伯封作相传已久特作诗之指异耳乃刘向新序则

云卫寿闵其兄汲之且见害作忧思之诗黍离是也其事与伯封事相类但黍离为王风之首向之言殆未可信或讹以传讹耳】

中谷有蓷宗周当丧乱之後地弃不恤其人民饥荒离困罔克匡生之象该乎词矣【出程仲虞紫云隐书序云闵周也夫妇日以衰薄凶年饥馑室家相弃焉申培说亦云民饥而流夫妇不保君子闵之而作是诗孔颖达严粲皆皆属之平王时然则直是王室东迁旧都之民无所依怙故其颠沛流离遂至于此诚可闵也胡安国云男女居室人之大伦也婚姻之礼废则夫妇之道苦淫辟之罪多矣氓之诗所以刺卫中谷有蓷所以闵周易序咸恒为下经首春秋内女出夫人归凡男女之际详书于策所以正人伦之本也其旨微矣】

中谷【陆玕疏作谷中】有蓷嘆【说文作𦵏云水濡而乾也陆德明本一作滩】其乾【叶寒韵居寒翻】矣有女叱离嘅其叹【叶寒韵他干翻陆本一作叹】矣嘅其叹【同上】矣遇人之艰【丰氏本作𦵏】难【寒韵】矣【与也尔雅云水注川曰谿注谿曰谷蓷^𦵏名说文云蓷也陆佃云叶形似荏方茎白萼萼生节间如鸡冠子黑色细长三棱罗愿云全似杜天麻而不生横枝陆玕云旧说及魏博士济阴周元明皆云庵^𦵏是也韩诗及三苍说悉云益母也故曾子见益母感恩郭璞云今茺蔚也本^𦵏衍义云茺蔚子叶至初春亦可煮作菜食凌冬不凋瘁一名益母一名益明一名大札一名贞蔚刘歆李巡皆以为臭穉^𦵏即茺蔚也毛郑误解为𦵏按𦵏乃蓷之别名即莢也初生为莢长大为𦵏成则名蓷又名为𦵏一物四名其字从^𦵏蓷声蓷音完从佳从^𦵏乃山羊角今文於蓷省故作蓷耳与名蓷之蓷相乱而实不同此蓷从^𦵏佳声音迫不可不辨严粲云旧以蓷^𦵏宜生高陆生谷中则伤于水非也据本^𦵏茺蔚正生海滨池泽其性宜湿嘆早燥也易曰燥万物者莫熯乎火说文云耕^𦵏田曰嘆毛传解嘆为菸以为萎死之义非是乾亦燥也指蓷而言严云谷中之地阴润其蓷^𦵏宜难旱也今嘆燥其乾者旱则乾者先燥也与饥馑则贫者先悴也万尚烈云蓷益母也故以与女叱说文云别也郑氏云近曰离远曰别有女叱离者有女为其夫所弃或近而离或远而别见非一女也嘅叹声徐锴云意气有所郁嘅然也叹说文云吟也亦谓之长大息人嘅叹则息大而长也人谓夫也艰难犹言穷厄也盖归咎其夫之所遭云尔未有怨意范祖禹云世治则室家相保者上之所养也世乱则男女相弃者上之所残也其使之也勤其取之也厚则夫妇日以衰薄而凶年不免于离散矣又罗愿云蓷一名益母曾子见之而悲诗人之托此亦其穷而反本氓之诗色衰相弃则叹兄弟之不知竹竿适异国而不见答则叹父母之相远此所以独感于益母与亦通】中谷有蓷嘆其修【叶屋韵式竹翻陆云或作蓷】矣有女叱离条其𦵏【叶屋韵式六翻陆云或作𦵏】矣条其𦵏【同上】矣遇人之不淑【屋韵丰本作叔】矣【兴也修说文云脯也旱既久则^𦵏乾之极如脯然也条犹长也汉郊祀歌云声气远条𦵏吹声也解见江有汜篇严云条条然而长𦵏其悲恨深于叹矣淑通作淑不淑不善也郑玄云言君子与己不善此正斥其夫之行而言盖怨辞也】中谷有蓷嘆其湿【缉韵苏子繇本作隰】矣有女叱离啜【韩诗本作啜外传作掇】其泣【缉韵】矣啜其泣【同上】矣何嗟及【缉韵】矣【兴也湿广韵云水沾也严云生于湿者今亦为所嘆兴富足者亦乏絶矣凶年饥馑之甚贫富皆憔悴也啜说文云尝也尔雅云茹也诗诂云泣而缩气也泣说文云水泪也无声出涕曰泣徐锴云泣哭之细也微子过殷墟欲哭则不可欲泣则以其似妇人是也补传云𦵏甚于叹泣甚于𦵏苏辙云中谷之蓷旱之所难及也今也既先燥其乾者及其甚也则虽其生于湿者亦

不免也早及于湿则尽矣譬如周人风俗衰薄其始也人之艰难者弃其妻耳其後人之不善者弃之矣及其既甚至有无故而弃之者故其以艰难而见弃者则叹之叹之者知其不得已也以不善而见弃者则条条然而歔歔者怨之深矣及其无故而见弃也则泣而已泣者穷之甚也何嗟及者言何所嗟悔而可及盖虽其所遭之不幸亦自伤其所从之非人也说苑引孔子曰不慎其前而悔其後虽悔无及矣诗曰啜其泣矣何嗟及矣言不先正本而成忧于末也黄佐云周官行于盛时每遣小行人赕委其凶荒今也不然室家相弃则亦付之无可奈何而已】

中谷有蓷三章章六句【子贡传申培说丰氏本篇名俱作中谷按诗序乃诗人闵周之作朱子改为妇人自述其悲叹之辞非也观篇中云有女此离安在其为妇人自作也子贡传中有阙文大抵与申培说同】

硕人卫傅母作也庄姜始嫁至卫先容後礼傅母作此以励之【刘向列女传云齐女为卫庄夫人号曰庄姜姜姣好始往操行衰惰心淫佚冶容傅母见其妇道不正谕之曰子之家世世尊荣当为民法则子之质聪达于事当为人表式仪貌壮丽不可不自修整衣锦綢裳饰在与马是不贵德也乃作诗曰硕人其颀衣锦綢衣齐侯之子卫侯之妻东宫之妹邢侯之姨谭公维私砥厉女之心以高节以为人君之子弟为国君之夫人尤不可有邪僻之行焉女遂感而自修君子善傅母之防未然也愚因此悟子夏礼後之说其所谓素以为绚者盖咏象服耳先儒谓象服者画翟羽于其上故孔子以绘事後素解之诗人但咏姜氏族类容貌服饰之盛而絶无一语称赞其德子夏心疑诗人之有微辞也若曰君夫人信美矣但象服礼服也诗人何为仅附见于容貌之後倘亦刺其修容而简礼乎此即傅母立言之指所谓意在言外者故孔子许之曰起予者商也始可与言诗已矣今文逸素绚一语而旧解礼後复牵强不可通非列女传孰使正之哉他诗若刺宣姜刺鲁桓亦俱言服饰容貌威仪技艺之美而阙失自见其机轴颇与此同甚矣古诗之微而婉也又按史记卫武公卒子庄公扬立庄公五年取齐女为夫人好而无子以竹书纪年推之武公之薨在平王十三年则庄公取齐女之岁实平王之十八年也】

硕人其颀【微韵】衣锦褰【礼记列女传俱作綢说文作繻书大传作纁】衣【微韵】齐侯之子卫侯之妻【叶支韵子宜翻】东宫之妹邢侯之姨【支韵】谭【白虎通作覃】公维私【支韵 赋也头大曰硕故硕为大义硕人尊大之人指庄公也白华之诗申后亦称幽王为硕人说文无颀字本作頰其义则面颧也然庄子云其颡頡然注以为大朴之貌又尔雅贝虺博而頡注云頡者中央广两头锐合此二说可以得用頡字之意盖摹拟庄公容貌如此衣锦以下始咏庄姜衣锦三句须一气读急回顾与首句相应言此衣锦褰衣而来者乃是以齐侯之子而为卫侯之妻也锦说文云襄色织文按襄者襍色也刘熙云锦金也作之用功重其价如金故字从金帛衣锦者言以锦为衣也旧注衣锦之衣去声谓衣着褰衣之衣如字谓衣服然丰之诗云衣锦褰衣与此文正同下文对裳锦褰裳则上衣为衣着者非也郑玄云国君夫人翟衣而嫁今衣锦者在涂之所服也褰说文云繻也繻者臬属罗愿云繻高四五尺或六七尺叶似苧实如大麻子今人绩为布或作頡褌记云三年之丧既頡是也通作綢玉藻云褌为綢是也褌者衣不重也亦作景士昏礼云女登车姆为加景乃驱是也古妇人盛服必加

禪衣于外即周礼六衣之素沙君子偕老篇之蒙彼绉絺中庸所谓恶其文之着者也孔穎达云妇人之服尚轻细且欲露锦文必不用厚繒故郑笺云以禪縠为之而许慎说文字作繻沈括谓是织繻麻以成布未知孰是严粲云齐侯之子嫁为卫侯之妻言匹敌也东宫以下又自齐侯一语而推衍言之乃文法波澜处东宫太子所居之宫杜预云太子不敢居上位故常处东宫孔穎达云四时东为春万物生长在东西为秋万物成就在西以此君在西宫太子常处东宫也易象西北为乾乾为君父故君在西东方震震为长男故太子在东也按左传东宫名得臣孔云齐世家庄公生僖公东宫得臣未知何公太子按史记年表卫庄公之立在春秋前二十五年齐僖公之立在春秋前八年然则庄姜必非齐僖之女盖是庄公之女僖公姊妹也得臣为太子早死故僖公立也不言僖公姊妹而系得臣者见其是适女也尔雅云男子谓女子先生为姊後生为妹张揖云妹末也刘熙云妹昧也犹日始入历时少尚昧也孔云系太子言之明与同母见夫人所生之?邢周公子所封邑左传所谓邢茅胙祭周公之胤者在今直隶顺德府邢台县侯爵也谭国名在今山东济南府历城县路史云嬴姓春秋庄十年书齐侯灭谭谭子奔莒则谭本子爵而得称公者白虎通云伯子男臣子於其國中褒其君为公以为诸侯有会聚其事相朝聘之道故称公而尊或称伯子男而卑为交接之时不私其臣子之义心俱欲尊其君父故皆令臣子得称其君为公也此诗亦言公者盖依其臣子之称便文耳尔雅云妻之姊妹同出为姨女子谓姊妹之夫为私郭璞云同出谓其已嫁刘云姊妹互相谓夫曰私言於其夫兄弟之中此人与己姊妹有恩私也孙炎云私无正亲之言然则谓吾姨者我谓之私邢侯谭公皆庄姜姊妹之夫互言之耳刘公瑾云历言此者以见庄姜之姊妹与庄公之姻娅其尊皆同也邹云按汉儒谓礼惟嫁长女余皆为媵然硕人既为卫侯妻而邢谭之夫人又皆其姊妹行也亦足证汉儒之诞妄】手如柔荑【叶支韵弋枝翻】肤如凝脂【支韵】领如蝤蛴【释文作□又作齐】齿如瓠犀【叶支韵息滋翻尔雅注作栖】螭【说文作□云好貌】首娥眉【支韵】巧笑倩【霰韵释文作倩】兮美目盼【叶霰韵匹见翻说文释文石经俱作盼按盼胡计翻恨视貌佩觿集云流俗以盼恨之盼为盼睐之盼莫以为非】兮【论语此下有素以为绚兮一句丰氏本同朱子谓硕人诗四章而皆七句不应此章独多一句盖不可知其何诗赋也茅之始生曰荑解见静女篇按荑不专为茅荑说文徐锴云荑初生^廿也一云卉木初生叶貌相经云筋不束体血不羣色手无春荑之柔髮有寒蓬之樵盖形之下也肤本作胠说文云皮也礼运疏云革外薄皮曰肤肤内厚皮曰革凝冰同字故有凝结之义内则疏云凝者为脂释者为膏孔云脂有凝有释散文则膏脂皆总名对例即孙炎云膏凝曰脂是也领说文云项也一名颈蝤蛴虫名方言作蝤蛴尔雅云蝤蛴螭螭蛴又云螭蛴螭桑蠹孙炎据方言云蝤蛴谓之蝤自关而东谓之蝤蛴梁益之间或谓之螭秦晋之间谓之蠹然则蝤蛴也螭蛴也蝤蛴也蛴也桑蠹也螭也一虫而六名也按郭璞云螭蛴在粪土中螭在木中陆佃云蝤蛴外黄内黑亦或谓之螭蛴列子所谓乌足之根为螭蛴是也蝤蛴内外洁白符子所谓石生金木生螭是也化书曰燥湿相育不母而生蝤蛴此即木中蠹虫亦曰桑蠹繇是以观蝤蛴名螭蛴名螭蛴原是两物而蛴与桑蠹则蝤蛴之别名也以其在木中白而长故以况庄姜之领七辨云蝤蛴之领阿那宜顾是也瓠匏属陆佃云长而瘦上曰瓠短颈大腹曰匏尔雅作栖字异音同通用孙炎云瓠中瓣也齿如瓠犀者朱子云言其方正洁白而比次整齐也按相法齿瓣白如瓠犀青如榴子者?螭郑玄云谓蜻蜻也郭璞云如蝉而小有文尔雅翼云螭蛴之小而绿色者此虫额广而且方故以为妇人首之比蛾蚕蛾也陆佃云茧生蛾蛾生卵蛹者蚕之所化蛾者蛹之所化荀卿蚕赋云蛹以为母蛾以为父是也蛹一名螭

蛾一名罗孙炎以为蠅即是雄蛹即是雌罗即是雄蛾即是雌蛾似黄蝶而小其眉句曲如画故曰蛾眉也巧犹工也笑解顏啓齿也字从竹从夭李阳冰云竹得风其体夭屈如人之笑故苏子瞻作文与可画竹赞云竹亦得风夭然而笑是也倩说文云美也徐锴云若^𣎵木之葱蒨也毛传以为好口辅韩诗以为仓白色俱无据盼说文云目好貌按盼本作盼从目从分毛传解以为目黑白分者是也是则庄姜容貌之美又有如此者邹云此章妙写娟丽後世骚人辞赋祖之如大招篇云朱唇皓齿嫫以媵只丰肉微骨体便娟只曾颊倚耳曲眉规只小腰秀颈若鲜卑只靥辅奇牙宜笑嚙只招魂篇云娉光眇视目曾波些被文服铁丽而不奇些长发曼鬋艳陆离些好色?云眉如翠羽肌如白雪腰如束素齿如含贝雒神?云肩如削成腰若约素延颈秀项皓质呈露云髻峨峨修眉联娟丹唇外朗皓齿内鲜明眸善睐靥辅承权皆此诗为之嚙矢也】 硕人敖敖【豪韵】说【释文丰氏本俱作税】于农郊【叶豪韵居劳翻】四牡有骄【叶豪韵起劳翻】朱幘鑣鑣【叶豪韵博毛翻丰氏本作麋麋】翟茀【周礼注作蔽又作茝】以朝【叶豪韵直高翻】大夫夙退【列女传作夜】无使君劳【豪韵 赋也硕人指庄公也敖说文云出游也说尔雅云舍也说文云释也农郊近郊时盖庄公不行亲迎之礼故因庄姜未至而出游舍止於近郊以待之也四牡以下皆谓庄姜之舆马也四牡车之四马骄壮貌说文云马高六尺为骄幘鑣饰也毛传云人君以朱缠鑣且以为饰按说文无幘字疑通作喷喷者吒也盖鑣在马口傍时或喷吒而出涎沫故鑣谓之排沫其缠之则以朱为饰但以其正当马喷吒之处故曰朱喷也喷讹为幘今谓朱是鑣饰之色则可谓朱为鑣饰之名则不可鑣者马衔外铁释名云包也在旁也斂其口也一名扇汗一名排沫尔雅谓之鑣严粲云鑣鑣非一鑣也每马之鑣皆有朱色之饰故曰鑣鑣翟翟车也夫人以翟羽饰车茀者^𣎵盛之义^𣎵盛则能蔽物故谓车蔽为茀尔雅輿革前谓之鞅後谓之茀易妇丧其茀是也孔云妇人乘车不露车之前後设帐以自隐蔽谓之茀因以翟羽为饰周礼巾车注引此谓厌翟也厌翟者次其羽使相迫也朱幘拟人君之翟茀极小君之仪嫡夫人之正礼以朝者庄姜已至于卫而入君之朝也夙早退罢也礼玉藻云君日出而视朝退适路寝听政使人视大夫大夫退然後适小寝释服国人乐得夫人以为君配而又郑重大昏之礼故谓大夫之在公者宜早退无使吾君劳倦于政事而于礼文或有所阙耳非恐其不得相亲之谓也】 河水洋洋北流活活【曷韵说文作□】施罟【说文作罟】濊濊【叶曷韵呼括翻又叶月韵许月翻说文作濊】鱣鮪发发【月韵叶曷韵北末翻韩诗作鱣说文作鮪丰氏本作□】葭莩揭揭【叶月韵语讎翻又叶屑韵蹇列翻又叶曷韵乌割翻】庶姜孽孽【屑韵韩诗丰本俱作?云长貌】庶士有暵【屑韵亦叶月韵丘谒翻韩诗丰本俱作桀云健也兴也此即来途所见以起兴河在齐西卫东自齐适卫河界其中北流入海洋洋盛大貌活活说文云水流声尔雅鱼罟谓之罟注云网最大者濊濊朱子云罟入水声也说文云凝流也本作濊杨慎云水平则流凝杜诗江平不肯流李端诗水深难急流是也又马融云大鱼网目大豁豁也此但以音解似无据郭璞云鱣大鱼如鰪肉黄大者二三丈今江东呼为黄鱼即是也陆佃云俗谓之玉版严云本^𣎵以鱣为鱣鱼俗作鲟即鲟鱣鱼也鮪鱣属陆佃云鮪岫居至春始出而浮阳北入河西上龙门入漆沮故诗言漆沮入河通道此鱼按尔雅鰪鮪鮪沈云江淮间曰鮪伊洛曰鮪海滨曰鰪即一鱼也能度龙门则为龙故礼记云龙以为畜故鱼鮪不谗鮪从龙者也陆玑云鱣鮪出江海三月中从河下头来上鱣身形如龙锐头口在颌下背上腹下皆有甲纵广四五尺今于盟津东石碛上钓取之大者千余斤可炙为臠又可为鮓鱼子可为酱鮪鱼形似鱣而青黑头小而尖似铁兜鍪口亦在颌下其甲可以磨姜大者不过七八尺益州人谓之鱣鮪大者为王鮪小

者为鮓色白味不如鱸也宋祁云王鮓腥不可近官以为鮓献御其味甚美发韩诗作鮓鱼掉尾也云发发者马融云鱼着网尾发发然即谚所云拔刺是也尔雅云葭芦莢薹李巡云分别苇类之异名按葭苇之未秀者即芦也莢薹之初生者似苇而小长大名薹成则名薹又名薹陆玑云薹或谓之荻其初生三月中其心挺出其下本大如箸上锐而细扬州人谓之马尾揭说文云高举也云揭揭者争长而竞进之貌冯时可云葭莢出河中者得气尤厚故卫风曰河水洋洋葭莢揭揭北魏信都芳为律管吹灰之术得河内葭灰用之应节便飞余灰即不动也可以信诗人之深于物理矣庶姜谓侄娣庄姜为东宫之妹乃庄公之嫡出曰庶姜则同姓之媵也严云庶出为孽言孽孽者衆多之貌犹言非一孽也庶士毛传云齐大夫送女者孔云左传凡公女嫁于敌国公子则下卿送之於时齐卫敌国庄姜齐侯之子则送者下卿也大夫卿之总名士者男子之大称故云庶士揭说文云去也字从去楚辞车既驾兮揭而归即此揭也庶士送庄姜而来今既毕事则有去卫国而归者矣诗之兴意以施鱼罟于河中而得大鱼兴庄公求昏于齐而得贵女以河上葭莢之“揭揭然兴庶姜庶士从庄姜而来归也夫以庄姜所居之贵齐国资送之盛如此方为卫人所仰望而可不以礼自修乎郑重言之使其自悟傅母之所以为善讽也左僖二十三年公子重耳于秦秦伯纳女五人怀嬴与焉他日公享之公子赋杜水杜预以为逸诗韦昭国语注以为当作沔水取朝宗于海之义今按二说皆非也河水即此章因秦伯纳女故有庶姜孽孽之咏然不云硕人之四章而但举章首二字史笔固不拘一法耳】

硕人四章章七句【左传云初卫庄公娶于齐东宫得臣之妹曰庄姜美而无子卫人所为赋硕人也序泥其说遂以为闵庄姜也庄公惑于嬖妾使骄上僭庄姜贤而不答终以无子国人闵而忧之子贡传申培说亦云卫庄公娶于齐夫人贤而不礼焉国人闵之今按此诗作于庄姜始至之时初无闵意左传所云卫人为之赋硕人者但谓硕人之诗为庄姜咏耳非谓以庄姜无子之故然後赋此诗也不善读古书者以辞害意弊率类此】

绿衣卫庄姜伤己也妾上僭夫人失位而作是诗也【出序按左传卫庄姜美而无子公子州吁嬖人之子也有宠而好兵公弗禁母嬖子骄所谓妾上僭而夫人失位者也】

绿【子贡传作藁】兮衣兮绿衣黄里【纸韵】心之忧矣【纸韵】曷维其已【纸韵比也绿苍黄之间色黄中央之正位刘公瑾云青黄赤白黑五方之正色也绿红碧紫纁五方之间色也盖以木之青克土之黄合青黄而成绿为东方之间色郝敬云妇人衣夫者也夫人位中宫黄者中央土之正色襍以青则为绿青木气也木克土中宫所以见逼于旁孽也绿兮衣兮者言此间色之绿也今乃为衣也按玉藻云衣正色裳间色是间色不可为衣而正色当为衣也严粲云读诗不可鹵莽如读绿兮衣兮不可但言是绿色之衣当玩味两兮字诗有黄鸟白华不言黄兮鸟兮白兮华兮惟绿衣曰绿兮衣兮盖绿衣字皆有意义绿以喻妾衣以喻上僭故以二兮字点缀而丁宁之里说文云衣内也孔云间色之绿不当为衣犹不正之妾不宜嬖宠今间色之绿为衣而见正色之黄反为里而隐以兴不正之妾今蒙宠而显正嫡夫人反见疏而微绿衣以邪干正犹妾以贱凌贵夫人既见疏远故心之忧矣何时其可已止也张敬夫云绿衣之忧言嫡妾之乱其弊将至于不可胜言者忧在家国也夫岂特为一身之私哉】

绿兮衣兮绿衣黄裳【阳韵】心之忧矣曷维其亡【阳韵比也上曰衣下曰裳孔云以兴不

正之妾今蒙宠而尊正嫡夫人反见疏而卑虽嫡妾之位不易而庄公礼遇有薄厚也严粲云绿衣黄里言掩蔽而已绿衣黄裳则贵贱倒置夫人失位矣曾巩云亡失也不须训为忘言此心之忧无时失去也真德秀云嫡妾之乱其弊将有不胜言者曰曷维其已曷维其亡盖虽欲亡忧而不可得也其後嬖妾之子州吁果以篡立而卫为之大乱庄姜之忧於是乎验有国者其可不鉴于兹张洽云夫君臣父子夫妇之分一失其正则乱之所从生卫庄溺爱而使内宠僭嫡嬖子害正辨之弗早貽祸後嗣可谓惨矣】绿兮丝【支韵】兮女所治【叶支韵澌之翻】兮我思古人俾无訖【叶支韵盈之翻】兮【比而赋也绿兮丝兮者言此间色之绿也本是丝也女泛指妇女治谓染治之也皎皎练丝在所染之不然奚转而有此绿也以比妾之所以能上僭者皆繇己不德致然此与下章皆自讼之辞也古人泛言古之人或有处此者訖说文云罪也黄佐云天下无难处之事善处嫡妾之间则亦必敬必戒无违夫子不使有愆而已程子云卫庄姜伤己无德以致之行有不得反求诸己而已矣丝之绿繇女之染治以成言有所自也絺綌所以来风也又鲁语公父文伯之母欲室文伯享其宗老而为赋绿衣之三章师亥闻之曰善哉宗室之谋不过宗人谋而不犯微而昭矣诗所以合意歌以咏之度於法矣赋诗之意亦取章首二句欲其慎于始耳】絺兮綌兮凄【笺云妻旁二点者从冰也寒也妻旁三点者从水也水云惨澹之貌此凄其以风及郑风风雨凄凄四月秋日凄凄皆当从冰今按说文只有从水之凄无从冰之凄当以凄字为正】其以风【叶侵韵孚金翻】我思古人实获我心【侵韵比而赋也絺綌解见葛覃篇凄毛传云寒风也按说文凄云雨起也今以?风者取其阴凉惨淡亦如云雨方起之时耳絺綌乃来风之物衫絺綌以御风吾知其难矣故古语云御寒莫如重裘止谤莫如自修也或以上章绿丝比少艾之妾言惟其绿而丝也故人爱而欲治之此章喻己之过时言絺綌本暑服今乃当凄然寒风之候犹班婕妤怨歌行所谓常恐秋节至凉飈夺炎热者盖恕己谅人绝无争宠之心虽摹情近似然斤斤以色之盛衰为较量其于义未矣获我心谓先得我之心孟子曰心之所同然者何也谓理也义也圣人先得我心之所同然耳我思古人其处夫妇嫡妾之际实有当于我心者我其可不自勉乎古人不知何所指盖亦如关雎鹊巢之类当时女史所载也曰无訖只委曲以全妇道犹有模范古人之意实获我心则古人来合我矣俾字与实字遥相呼应陈栎云不得于夫而不疾其妾惟思古人以自修其身忧而不伤怨而不怒孔子谓诗可以怒其此类也夫邓元锡云镜古所以平心也困而能通忧而维则其惟绿衣乎又左成九年季文子如宋致女复命公享之赋韩奕之五章穆姜出于房再拜曰大夫勤辱不忘先君以及嗣君施及未亡人先君犹有望也敢拜大夫之重勤又赋绿衣之卒章而入亦借辞取义】绿衣四章章四句【子贡传申培说皆谓卫庄公嬖人生州吁有宠而好兵庄姜忧之而作今按此诗无刺及好兵之义】

终风卫庄姜见怒于庄公赋此【出子贡传

徐光启云详味日月终风见庄姜惻然望夫之情见诗人忠厚之意长门赋义本于此】

终风且?【号韵说文作瀑】顾我则笑【叶号韵读如燥先到翻古本一作?陆德明云俗字也】谑浪笑敖【叶号韵疑到翻】中心是悼【号韵比也终风终日风也?说文云曦也亦风亦日比庄公之意态变幻不可测识也顾说文云还视也笑喜也顾我则笑玩一则字便见原无笑意谑说文云戏也浪者水流之名敖通作傲说文云倨也此承上笑字而言言不过是戏谑放浪以笑为傲而已悼说文云惧也不知其所以待我者终将何如惟有中心自悼惧而

已】

终风且霾【叶支韵陵之翻】惠然肯来【叶支韵陵之翻】莫往莫来悠悠我思【支韵比也尔雅说文皆云风而雨土为霾孙炎云大风扬尘土从上下也肯之言可莫之言无皆音近也惠然肯来乃期望之辞言庄公仁爱于我庶其可一来乎莫往莫来者言我不往则彼亦不来也悠说文云忧也庄姜无自往之理则庄公终不来矣是以使我思之而忧愁不置盖望其君子之深厚之至也】终风且噎【霁韵】不日有噎【见上】寤言不寐愿言则嚏【霁韵韩诗陆本作嚏云一作嚏又作嚏比也噎说文云阴而风也有之言又亦音近也吕祖谦云阴风终日意其止矣不旋日而又噎焉厌苦之辞也愚按三章之言终风同然始而曰?则尚有日继而曰霾则不见日矣又重之以不日之噎则无开霁之时矣比庄公之狂惑日甚也说文云寐觉而有言曰寤论语注云自言曰言寐说文云卧也愿通作愿说文云谨也曰愿言者以其心之所谨念者发之于自言也嚏说文云悟解气也徐锴云脑鼻中气壅塞喷嚏则通郑玄云嚏读当为不敢嚏咳之嚏我其忧悼而不能寐汝思我心如是我则嚏也今俗人嚏云人道我此古之遗语也宗镜录云心者形于未兆动静无不应于自心如诗之愿言则嚏谓人思已则嚏故知心应千里设有处远而思者我皆知矣是以万事惟心先知故得称心灵也丰熙云此承莫往莫来而言不敢望君之复来矣但得一齿及之而使我一嚏亦足矣盖思望之尤深也】噎噎【韩诗丰氏本作??】其阴【丰本作】虺虺其雷【灰韵】寤言不寐愿言则怀【叶灰韵胡猥翻比也重言噎噎即所谓不日有噎也万尚烈云蛇之小者为□虺虺电光之貌谚谓蛇子霍闪是也前三章皆言风此不言风而独终之以雷者风比庄公之初惑于嬖妾及其惑之甚而至于昏则取象于雷噎又其甚也则将有无道之施于嫡矣故以雷终之也首章曰中心是悼庄姜已惧及此怀说文云念思也严粲云我为伤悼汝之故寤觉而不寐愿汝思怀我而悔悟也丰熙云此承愿言则嚏而言不敢望君之道我然亦愿君之一思及之乎至此则望之极矣亦因以见其君之至薄也】

终风四章章四句【序以为卫庄姜伤已也遭州吁之?见侮慢而不能正也申培说则云庄姜戒州吁公不悦姜忧而作诗朱子谓详味此诗有夫妇之情无母子之意】

日月卫庄姜伤已也【出序朱子云明是庄公在时所作其篇次亦当在燕燕之前按史迁有言甚哉妃匹之爱君不能得之于臣父不能得之于子况卑下乎贤如庄姜而不见礼卒於无子信有命焉】

日居月诸照临下土【麌韵】乃如之人兮逝不古【丰氏本作故】处【叶麌韵读如取此主翻】胡能有定宁不我顾【叶麌韵果五翻陆德明本作顾兴也日月郑玄云喻国君与夫人也居诸皆语助辞与柏舟篇解同又吾师蔡先生穀中云居诸分属日月亦有义居言日新之日居然无改诸言生明生魄诸常改易亦一说也孔颖达云日以照画月以照夜同曜齐明照临下土以兴国君视外治夫人视内政之人郑云是人也谓庄公也逝者一往而不反之意古处朱子云以古道相处也古人于夫妇之伦必以道相处如文王之刑于寡妻是也辅广云观绿衣之诗所谓我思古人则于此叹庄公不以古道处已者宜也自处以古人为法而望人以古道处已庄姜之庭已望人皆有则矣胡之言何音之转也定说文云安也宁犹壹也顾说文云还视也言是其心志回惑何能有安止之时乎使其能有定也岂终弃我而不顾乎此二

句皆期之之辞朱子云见弃如此而犹有望之之意焉此诗之所以为厚也又韩诗外传云君子之闻道入之于耳藏之于心察之以仁守之以信行之以义出之以逊故人无不虚心而听也小人之闻道入之于耳出之于口苟言而已譬如饱食而呕之其不惟肌肤无益而于志亦戾矣诗曰胡能有定按此借辞取义然于刺庄公处夫妇之间不能以古道自持其意亦复相合【日居月诸下土是冒】【号韵】乃如之人兮逝不相好【叶号韵虚到翻】胡能有定宁不我报【号韵兴也冒毛传云覆也李氏云亦照临下土之意爱而不释曰好韵会云女子之性柔而滞有所好则爱而不释故于文女子为好报答也不我报者张氏云以礼事庄公不以恩答己刘公瑾云每章末二句皆有望之之意孙能传云宁不我顾犹望其顾也宁不我报犹望其报也语意何等缱绻玉台新咏载王僧孺为姬人自伤诗还君与妾扇归妾奉君裘断弦犹可续心去最难留果於自絶无少顾恋失诗人忠厚之意矣】

日居月诸出自东方【阳韵】乃如之人兮德音无良【阳韵】胡能有定俾也可忘【阳韵兴也礼云大明生于东杨雄云月未望则载魄于西月既望则终魄于东朱子云日旦必出东方月望亦出东方陆佃云日月之盛皆在东方愚按此诗言日月皆以日月相望之时言敌体同德之意也音声良善也严粲云此德音无良及邶谷风言德音莫违皆妇人言其夫待己之意耳故为声音言语朱子云德音美其辞无良丑其寔陆化熙云德音如顾我则笑之类然皆出于戏慢故曰无良忘说文云不识也谓遗忘也言何时能有定乎果有定则向日所以待我者庶几使我可以遗忘之而亦不复记忆之追咎之矣诗之敦厚如此】日居月诸东方自出

【质韵】父兮母兮畜我不卒【叶质韵即事翻】胡能有定报我不述【质韵文选注作衍薛君云法也兴也畜养卒终也朱子云不得其夫而叹父母养我之不终盖忧患疾痛之极必呼父母人之至情也徐光啓云畜我不卒非欲父母养之终身也只如今人说养我不了悞我一生真妇人语也述说文云循也循其事而称述之也言何时能有定乎则向日庄公之所以报我者亦不复称述之矣厚之至也】

日月四章章六句【序以为卫庄姜遭州吁之难伤己不见答于先君以至困穷之诗苏辙引左传石碻之谏庄公曰将立州吁乃定之矣若犹未也阶之为祸庄公不从故及于祸此胡能有定之谓与吕祖谦亦云子叔姬妃齐昭公生舍叔姬无宠舍无威夫人见薄则冢嗣之位望亦轻此国本所以倾摇也庄姜既不见答则桓公之位何能有定乎今绎诗中全无此意其解有定二字甚牵强朱子以为诗言宁不我顾犹有望之之意又言德音无良亦非所宜施于前人者明是庄公在时所作其辨甚核然不以首句日月为取兴而云是呼日月而诉之则迂矣至如子贡传申培说皆谓州吁弑桓公庄姜大归于齐而作是诗盖悞认诗中有父兮母兮畜我不卒之言然其事无据】

简兮卫之贤者仕于伶官【出序】而作此诗刺庄公废教也【卫风硕人之诗为庄姜作也其两言硕人则指庄公也此诗及考盘之诗皆有硕人之语与彼同文故知亦刺庄公也伶官乐官也自黄帝时使伶伦氏截竹而吹之以为黄钟之宫及周景王铸无射而问律于伶州鸠是伶氏世掌乐官故後世多号乐官为伶官左传锺仪对晋侯自称伶人鲁语伶箫咏歌及鹿鸣之三是也此诗言万舞者伶官之事其所以通于教者何也周礼大司乐以乐教国子乐师教国子小舞龠师掌教国子舞羽吹龠诸侯之礼亡先儒谓彼虽天子之法推此诸侯亦有国学也按王制云诸侯天子命之教然後为学是则侯国设学之明证然祭祀燕享亦皆有舞何

知此为学中之舞月令仲春上丁命乐正习舞释菜周礼大胥掌学士之版以待致诸子春入学舍菜合舞舍菜即释菜也入学者必释菜以礼先师其时在仲春即此诗所云日之方中也卫自桓公始入春秋庄为桓父其行事无所表见但以左传所载宠州吁一节观之公子州吁嬖人之子也有宠而好兵公弗禁石蜡谏曰臣闻爱子教之以义方弗纳邪骄奢淫佚所自邪也弗听其子厚与州吁游禁之不可夫州吁石厚皆国子之流而所行若是然则庄公当时之废教盖可知矣又篇末有西方美人之语则此诗之为东迁後作无可疑者】

简【陆德明云或作藺非也丰氏本作东云伶官名】兮简兮方将万舞【麋韵】日之方中在前上处【叶麋韵读如取此主翻朱传自章首至此为第一章今依毛郑旧本】硕人俣俣【麋韵韩诗作扈扈云美貌】公庭万舞【麋韵 赋也简通作东说文云分别之也谓分别其能舞与否者将使之舞也旧说训简为简易不恭按周礼小胥巡舞列而挹其怠慢者若使当舞之时简易不恭岂得为贤者乎方将犹言且也万初学记云大舞也所以名万者何休以为象武王以万人定天下民乐之故名之然商颂曰万舞有奕夏小正曰丁亥万用入学竹书帝舜十七年春二月入学初用万则万之称其来已久或但取万物得所之义耳舞者用两足左右相背故其字从舛山海经云帝俊八子始为舞又吕氏春秋云陰康氏之始阴多滯伏民气鬱阂故作舞以宣导之毛传云以干羽为万舞按武舞名干舞干则有戚矣文舞名羽舞言羽则有翬矣或又以文舞为翬舞吕祖谦云郑康成据公羊传以万舞为干舞盖公羊释经之误也春秋书万入去翬言文武二舞俱入以仲遂之丧于二舞之中去其有声者故去翬焉公羊乃以万舞为武舞与翬舞对言之失经意矣若万舞止为武舞则此诗与商颂何为独言万舞而不及文舞耶左氏载考仲子之宫将万焉妇人之庙亦不应独用武舞也然则万舞为二舞之总名明矣又左庄二十八年楚令尹子元欲蛊文夫人为馆于其宫侧而振万焉夫人闻之泣曰先君以是舞也习戎备也盖谓万舞之中有武舞焉非专以万舞为武舞也孔颖达云月令仲春之月命乐正习舞入学者必释菜以礼先师此日之方中即彼春入学是矣谓二月日夜中也尚书日中星鸟左传马日中而出皆与此同也愚按竹书所载二月入学初用万及夏小正所云丁亥万用入学即月令仲春上丁之制也在前者在下文公庭之前上谓上头也处说文云止也此教舞之伶官在公之前其所止之地位则在衆舞者之上头也孔云在前列上头唯教者为然硕人指庄公也解见硕人篇俣说文云大也以容貌言言庄公以俣俣之容临之于上也公庭者公所居之庭礼仲春入学习舞此日中之时舞当在学乃令之于公庭而万舞焉庄公之屑越礼教於此徵之矣】有力如虎【麋韵】执轡如组【麋韵朱传自硕人至此为第二章今依毛郑旧本】左手执翬【药韵丰本作翬】右手秉翟【叶药韵读如迪毒药翻】赫如渥赭公言锡爵【药韵 赋也有力二句与舞事无关意是武舞之形容耳有力如虎言其武力比于虎也执持也轡马缰也组说文云绶属诗诂云间次五采为之织组者总紕于此而成文于彼御者执轡于此使马骋于彼如织组也按武舞中有所谓发扬蹈厉者故见其如虎有所谓夹振驷伐者窃意即谓驱驷马以往伐故有执轡之事先儒谓驷通作四恐未然也又吕氏春秋云诗云执轡如组孔子曰审此言也可以为天下子贡曰何其躁也孔子曰非谓其躁也谓其为之于此而成文于彼也圣人组修其身而成文于天下矣淮南子云圣人在上化育如神太上曰我其性与其次曰微彼其如此乎故诗曰执轡如组易曰含章可贞动于近成文于远断章取义古人说诗类如此礼记云伊耆氏作苇翬陆元朗云以竹为之长三尺执之以舞刘熙云翬跃也气跃而出古者取卯地之竹以为翬春分之音万物振跃而出也

易林云芽蘖生达阳唱于外陈阳云道生一则奇而为阳一生二则偶而为阴二生三因阴阳参合而为冲气龠之为器如笛而三孔律度量衡所出阴阳冲气所生伊耆氏用苇以始之後世用竹以易之徒度所生阴阳合焉所以通中声也又云易曰震为萑苇为苍筤竹苇龠竹龠皆震音也盖太极元气函三为一行于十二辰而律吕具矣龠之为器本於黄钟之龠窍而三之所以通中声而上下之律吕之所繇生也古之人始作乐器而苇龠居其先焉震为六子之首龠为衆乐之先又毛传以为六孔广雅以为七孔云即笛是也按尔雅龠有三种大龠谓之产其中谓之仲小者谓之药其七孔六孔三孔之异乎孔云龠虽吹器舞时与羽并执故得舞名是以宾之初筵云龠舞笙鼓公羊传云龠者何龠舞是也按周礼言舞羽翯龠盖执羽舞吹龠为节陈氏云舞羽皆执龠以声音之本是故也秉持也翟说文云山雉尾长者此云秉翟谓持翟雉之羽而舞公羊说乐万舞以鸿羽取其劲轻一举千里韩诗说万以夷狄大鸟羽非也南齐郑义奏更以翟为笛谓笛饰以髦龠饰以羽梁武帝曰翟是五雉之一取其毳羽以秉之耳宁谓羌笛耶宋元丰三年详定朝会议注以为今文舞所秉翟羽以雉尾掉髹漆之柄求之古制盖无所本景佑广乐记载聂崇义图羽舞所执类羽葆幢析羽四重以结绶系之于柄请依崇义图以翟羽为之今按此说与古义合陈阳云龠所以为声翟所以为容声繇阳来故执龠於左左阳故也容自阴作故秉翟於右右阴故也李照舞节论云翟进则龠退龠进则翟退按书言舞干羽于两阶乐记言皆音而乐之及干戚羽旄谓之乐郊特性明堂位祭统皆言朱干玉戚以舞大武皮弁素积以舞大夏则皆用于与羽矣其所以先武後文者两阶之舞则以苗民逆命故也汤武征伐则以有武功为大故也此诗先言有力二句愚以为武舞继言执龠秉翟则是文舞亦先武後文者盖周时万舞之制然耳汉舞先武德後文始唐舞先七德後九功其意以谓武以威衆而平难文以附衆而守成平难在所先守成在所後唐太宗谓封德彝曰朕始虽以武功兴终以文德绥海内谓文容不如蹈厉斯言过矣厥指正同又按周礼大司乐以乐舞教国子云门大卷大咸大磬大夏大濩大武此六者谓之大舞云门大卷黄帝之乐也大咸尧乐也大磬即韶舜乐也大夏禹乐记言二十舞大夏则六舞皆学而特举大夏者旧谓自夏以上揖让得天下自夏以下征伐得天下夏为文武中故特举之可以兼前後也大濩汤乐大武武王乐若内则言成童舞象左传季札见舞象箛南龠者象箛武舞南龠文舞此皆文王之乐不列于六舞之内赫通作赭说文云大赤也渥说文云沾也毛传云厚渍也孔云渥者浸润之名渍之久厚则有光泽故以兴颜色之润赭说文云赤土也郑玄云容色赫然如厚传丹愚按此赞伶官容貌之美盖德充之符粹然见于面序所以称之为贤者也公谓庄公也言谓命也锡通作赐说文云予也爵饮器似雀所以饮器象雀者取其鸣节节足足也按锡爵乐工其礼有二一则祭统有畀鞶髀翟阍之礼翟者乐吏之贱者也毛传以为见惠不过一散孔云礼器云礼有以小为贵者贵者献以爵贱者献以散祭统云尸饮九以散爵献士散受五升一则仪礼有君燕臣而献工之礼臣为宾公命宰夫为主人乐宾升歌工歌鹿鸣四牡皇皇者华卒乐主人洗升献工工不兴左瑟一人拜受爵若与四方之客燕舞则以勺今详此诗乃上丁习舞之礼与祭祀燕享不同既以教国子为职则与有教化之责今乃以畀翟献工之礼施之贱斯甚矣自简兮至此该括当日习舞始终上章刺意在公庭万舞此章刺意在公言锡爵】山有榛【真韵释文作秦说文作𣎵】隰有苓【叶真韵读如邻离珍翻丰本作藿】云谁之思西方美人【真韵】彼美人【同上】兮西方之人【同上】兮【兴也榛木名本作𣎵陆玕云?属其子小似柿子表皮黑味如?罗愿云枝茎如木蓼叶如牛李色高丈余子如小栗关中鄜坊甚多其字从秦从此意也周礼笱人职云馈食之笱其实榛左传云女贄榛栗枣

修下湿曰隰苓^𦵏名说文云卷耳也按尔雅卷耳苓耳也解见卷耳篇诸家相传则谓诗中咏苓乃尔雅之藟一名大苦今之甘^𦵏是也本^𦵏名为国老陆佃云解百药毒安和七十二种石一千二百种^𦵏故号国老之名国老宾师之称盖药有一君二臣三佐四使苓者又其宾师也故药罕不用者虽非其君而君实宗焉蔓生叶状似荷少黄茎赤有节节间有枝相当喜生下泽或云似地黄又名美丹又名蜜甘又名美^𦵏又名蜜^𦵏又名露^𦵏愚按甘^𦵏味甘而尔雅名之大苦者反言之也榛可供筵实资民生之用苓可备药物救民之患害皆有益于人者此以兴教化行则人才盛也山有榛以兴国君之子隰有苓则兴卿大夫之子耳今庄公所宠之公子如州吁其州吁所从游之人如石厚有愧榛苓多矣西方指西周也晋语齐姜氏引西方之书韦昭亦以为西周也朱子云西方美人托言以指西周之盛王也如离骚亦以美人目其君也又曰西方之人者叹其远而不得见之辞也所以思西方美人者非泛然怀明王之思而已春夏学干戈秋冬学羽龠文王之教也乐正司业父师司成武王周公之制也其教之成则大乐正论造士之秀者以告于王而升诸司马曰进士司马辨论官材论进士之贤者以告于王而定其论论定然後官之任官然後爵之位定然後禄之所谓山有榛而隰有苓者也且唐虞三代舞用国子意亦欲其早习于道非如後世给繇役之贱者而已唐臣赵慎言有言古之舞者即诸侯子孙故神只降福灵光烛坛是以此教之人亦必择贤人君子为之其所以立教之意何如郑重而公仅以伶工视之徒取供悦目之娱而已教化不兴则人才何以逮古可胜叹哉王应麟云大司乐言乐德乐语而终于乐舞乐师言乐成告备而终于皐舞孟子言仁义礼乐之实而终于不知手之舞之记言诗言志歌咏声而终于舞动容此舞所以为乐之成也繇小学之书以进于瞽宗之礼乐而成之以东序之舞则周之教法可知矣】

简兮三章章六句【朱传作四章三章章四句一章六句序谓刺不用贤也卫之贤者仕于伶官可以承事王者也按诗中废教简贤二意皆有而刺废教之意居多若申培说以为伶官心乎王室而自伤之诗子贡传则谓邶之伶柬心乎王室又若在武庚之时然者今以诗词观之若有力如虎赫如渥赭皆旁观赞叹之词絕非自作之语至以东为伶名则别无经见尤不足信】

考盘刺卫庄公也不能继先君之业使贤者退而穷处【出序庄公名扬武公子邓元锡云夫武公之德圣矣务士于交傲终老弗懈也庄公有溺志贤者退而适于野孰与尽规傲哉先公之业宜替矣故序以为刺愚按此诗与简兮篇宜皆为一人之作以考盘二字知之君不用贤使之沉沦下位与伶人贱工为伍尚能俛首求容乎所以考盘而自乐也孔丛子载孔子曰吾于考盘见遯世之士无闷于世】

考【孔丛子吕氏读诗记俱作考】盘【韩诗丰氏本俱作盘】在涧【叶先韵居贤翻韩诗作干云境塙之处文选注云地下而黄曰干丰本同】硕人之寛【叶先韵驱圆翻】独寐寤言【元韵】永矢弗谖【元韵按二章三章四句俱一韵而此上下二句各自为韵赋也考通作考说文云敏也毛传云击也盘木器说文云承盘也籀文作盘陈氏云盖扣之以节歌如鼓盆拊缶之为乐也尔雅云山夹水曰涧硕人之寛刺庄公之辞也硕人解见硕人简兮篇寛说文云屋寛大也庄公为人好丑兼容贤不肖无别故以寛目之孔子所谓糟者犹糟玉者犹玉血者犹血酒者犹酒是也观当时知州吁之好兵而不禁知石厚之匪类而不絶非寛而何寐

卧也寐觉而有言曰寤俱见说文自言曰言独寐寤言者既寐而寤既寤而言皆独自也後放此永说文云长也矢尔雅云誓也盖谓意之激切如矢之直也谗说文云诈也奉身而退处涧谷之间独自寐独自寤独自言可谓离索寂寞矣然长久誓愿如此非敢有诈所以自表其素心亦愤懣之极也记曰道合则从又曰事君者量而後入既已沉伏下僚而人君又以俳优畜之度无复表见之时矣不然学期世用而顾甘于遯世耶】 考盘在阿【歌韵】硕人之藹【歌韵韩诗作 云美貌】独寐寤歌【韵】永矢弗过【歌韵 赋也毛传云曲陵曰阿文选注云曲景曰阿孔穎达云以大雅云有卷者阿则阿有曲者于隐遯为宜想硕人所居之地两山夹水其旁有阿也藹说文云^廿也硕人之藹者刺庄公时政愤乱亦如^廿之芜秽荒裸也歌咏也徐锴云长引其声以诵之也过说文云度也永矢弗过者长誓栖托于此山阿之中不复别有所从矣】 考盘在陆【屋韵】硕人之轴【屋韵尔雅作逐云病也】独寐寤宿【屋韵】永矢弗告【叶屋韵居六翻 赋也陆说文云高平地在涧在阿在陆总是一处盖谓左右前後之相近者轴说文云持轮也释名云抽也入毂中可抽出也硕人之轴者言其意向无定如轴之随轮以转徙也诵终风日月之篇庄公之所以待庄姜者如彼则其为人可知矣宿说文云止也独寐寤宿者言独寐而觉既觉而仍然止宿于彼也告通作诰谓相晓示也永矢弗告者长誓不以姓字告人如韩休逃名是也】

考盘三章章四句【子贡传申培说皆谓鄘人美其君子不仕乱邦赋此殊无明据朱传但以爲诗人美贤者之诗而不着其世】

采葛惧谗也【出序 左传称郑武公庄公为平王卿士王貳于虢郑伯怨王王曰无之故周郑交质此诗疑郑庄公所作也周之东迁晋郑焉依平王不知以何事爱虢而憎郑及桓王立遂夺郑伯政至有繻葛之役郑固不臣而周之所以待郑亦失其道矣】

彼采葛【叶月韵居謁翻】兮一日不见如三月【韵】兮【比也田艺衡云彼谓君也愚按此不敢斥言王故托之乎彼也葛解见葛覃篇田云葛性善攀附萧艾并腐秽之物喻小人也采喻君方?近之也小人本好谗君又?近之则易谗欧阳修云诗人以采葛采萧采艾者皆积少以成多如王听谗积微而成惑夫谗者疎人之所亲疑人之所信夺人之所爱非一言可効一日可为必须累积而後成或渐入而日深或多言之并进故曰浸润之譖又谓积毁销骨也采葛之义如是而已郝敬云葛之为物可以织谗言蔓引何以异葛愚按葛生于初夏采于盛夏故下承三月也一日不见谓偶以事他出不进见于君也如三月兮如三月之久其中变态有不可知者也李氏云小人之譖人多乘间而谗之如上官桀等谋譖霍光伺光出沐日奏之弘恭石显欲譖萧望之候望之出沐日上之郝云君臣相与近则亲而远则疎君子日在君侧精诚可以直通羣邪有所畏而不敢孟轲致主忧十寒于退後赵高窃秦使二世深居人不得见而後马鹿之计行自古小人排君子权奸欺庸君未有不始于离间而终于?害者诗人忧虑深矣古语曰一日不朝其间容刀李解云夫君臣之礼不可以不接不接则上恩不下流下情不相通嫌疑易以生毁誉易以入在易天地不交则否柔进而上行则锡马蕃庶昼日三接也先王知其如此故制诸侯之朝远者不过六岁以之图事比功陈谋协虑发禁施政则言何以不纳行何以不见知奸邪何以介其间左右何以塞其路汉刺史奏事京师其是之谓乎石显五鹿充宗疾京房欲远之元帝以房为魏郡太守房自请岁尽乘传奏事天子许焉房未发诏

止无乘传奏事房意愈恐繇此观之臣子不得见君父其祸何如诗曰彼采葛兮一日不见如三月兮一日之中尚曰如三月三秋三岁况其久者乎】彼采萧【韵亦叶尤韵疎鳩翻】兮一日不见如三秋【尤韵亦叶萧韵七遥翻】兮【比也萧解见生民篇祭祀以脂熬之为香郝云萧之为物可以?谗言熏灼何以异萧姚舜牧云萧采于秋故下承三秋又孔云年有四时时皆三月设言三春三夏其义亦同作者取其韵耳】彼采艾【泰韵亦叶霁韵鱼刈翻】兮一日不见如三岁【霁韵亦叶泰韵与艾翻】兮【比也尔雅云艾冰台博物志云削冰令圆举以向日以艾承其影得火故号冰台一名灸^ㄣ亦名医^ㄣ为其可用以灸又名病^ㄣ师旷占云岁欲疫病^ㄣ先生是也罗愿云萧与艾本皆香^ㄣ古者天子祭以鬯诸侯蕙大夫兰士萧庶人艾至离骚则薄之曰户服艾以盈要兮谓幽兰其不可佩又云何昔日之芳^ㄣ兮今直为此萧艾也萧艾虽非恶物然比之蕙兰芳^ㄣ则有间矣愚按萧艾乃士庶人所用岂得非贱郝云艾之为物可以灸谗言烁肤何以异艾岁年也郭璞云取岁星行一次岁星者木星也越历二十八宿宣徧阴阳十二月一次晋灼注天文志云太岁在四仲则岁行三宿太岁在四孟四季则岁行二宿二八十六三四十二而行二十八宿十二岁而周天此星行一次而四时功毕故年谓之岁罗云艾以久畜为善孟子所谓七年之病求三年之艾艾之久畜者至三年此采艾者所以一日不见如三岁也孔云积日成月积月成时积时成岁故以月秋岁为次邓元锡云夫尊贤莫先于去谗已则不明好摘伺为明即有谗如或酬之亲而暂离斯有隙矣隙斯投投斯售矣嗟夫主之不明岂足赖哉乃安得无惧矣唐人伤之曰春明门外即天涯善夫一说此贤臣见弃而思君之作葛藟蔓延本支联属比君臣情谊相维也萧可荐祭香气上达比君臣诚悃相通也艾可疗疾采而预蓄久而益善比君臣休戚相关也今君弃予一日不见则思之极其切矣故于采葛见慕君之至也亦通】

采葛三章章三句【子贡传云某王好谗大夫忧之於王字上阙一字申培说以为贤者被谗见黜于野周人闵之而作总之不能知其世以意想像之耳至如朱子目为淫奔者怀人之诗则猥斯甚矣郑谱属此诗于桓王谓桓王之时政事不明臣无大小使出者则为谗人所毁故惧之此但据篇次而为之说要不必有所本】

诗经世本古义卷十九之上

卷十九之下

<经部,诗类,诗经世本古义>

钦定四库全书

诗经世本古义卷十九之下

明 何楷 撰

周平王之世

遵大路周公卿欲留郑庄公也【左隐三年初郑武公庄公为平王卿士王贰于虢郑伯怨王王曰无之故周郑交质王子狐为质于郑郑公子忽为质于周君子曰信不繇中质无益也明恕而行要之以礼虽无有质谁能间之按国语史记当幽王之时褒姒与虢石父比实废平王而竹书又载骊山之乱虢公翰立王子余臣于携是为携王与平王并立至平王二十一年余臣始为晋文侯所杀然则虢者平王之仇宜不得与东迁所依之郑庄等王不知何意反贰于虢此郑庄之所以怨王也既而王亦自悟?虢贰郑之非故有交质之事以自解于郑意即此诗之所繇作其後平王崩桓王立复欲畀虢公政於是周郑交恶庄公如周朝王王不礼焉周公黑肩言于王曰我周之东迁晋郑焉依善郑以劝来者犹惧不覲况不礼焉郑不来矣】

遵大路【遇韵今按後章亦用路字与下韵不叶则此不宜为韵】兮掺执子之祛【叶遇韵区遇翻】兮无我恶【叶遇韵乌故翻】兮不逮【俗作?】故【遇韵】也【释文作兮後同赋也遵说文云循也路即道也字从足从各言人足有所适也一云道容三轨曰路掺毛传云擎也孔颖达云以掺字从手又与执共文故为挽也按说文无掺字宜通作攬云好手貌执持也子谓郑庄公也按庄公以平王二十八年即位初为周卿士王贰于虢当在此时以即位未踰年故称子耳祛徐锴以为袖口也孔云礼丧服云袂属幅祛尺二寸则袂是祛之本祛是袂之末无母通止辞也恶如周郑交恶之恶逮说文云居之速也字从宀从辵宀者屋也辵者疾也言不必退居之速时庄公欲自周归郑故云然故旧也周公卿见庄公有不安于周之意心欲留之乃拟为遵循于大路之间挽持其袂末而告之曰子母恶我遂归而不留也我虽不德然不汲汲于退居者亦故旧之谊当然子宁不以厚道自处乎不言其恶平王而以为恶我婉辞也言故言好非止为挽留庄公亦所以讽王也郑于周有兴复之勲自桓公武公父子为周卿士善于其职甚得周衆其子庄公继辅平王乃以王贰于虢之故不能安于其位此周公卿所深惜也诵周公黑肩告桓王之辞可以得周公卿欲留庄公之意】遵大路【丰氏本作道】兮掺执子之手【有韵】兮无我醜【有韵说文作𠂔释文作𠂔又作𠂔丰本作𠂔云忤视貌】兮不逮好【叶有韵许厚翻】也【赋也郑玄云言执手者思望之甚醜亦恶也孔云醜与丑古今字谓丑恶可弃之物好情好也故以谊言好以情言】遵大路二章章四句【序以为思君子也庄公失道君子去之国人思望焉今按郑庄公在位之时已入春秋其失道而为君子所去传无所见愚不敢信其然朱子初亦从序说既而见宋玉登徒子好色赋有曰郑卫

溱洧之间羣女出桑臣观其丽者因称诗曰遵大路兮揽子祛赠以芳华词甚妙以为宋王去此诗之时未远其所引用当得诗人之本旨然彼为男语女之词而此似女语男之诗又疑大道之傍不应显然执男子之手则又指谓淫妇为人所弃者之作果尔于义更猥矣子贡传申培说意与米传同而但列此诗于邠风谓是邠氏夫妇相弃之词总之无据】

白石刺昭公也昭公分国以封沃沃盛强昭公微弱国人将叛而归沃焉【王风郑风俱有扬之水今摘篇中白石二字命篇以为识别申培说云成师有篡国之谋国人知之而作是诗按叔虞始封于唐至子燹改为晋侯再传成侯南徙居曲沃又三传僖侯再传穆侯始徙居于絳穆侯卒弟殇叔立为穆侯太子仇所杀仇立是为文侯即书文侯之命平王称父义和者仇之字也卒子昭侯立元年封文侯之弟成师于曲沃为曲沃伯而徙于翼翼在平阳絳邑县东晋始分而为二时鲁惠公之二十四年也及惠之三十年晋潘父弑昭侯而纳桓叔晋人发兵攻桓叔桓叔败还归曲沃晋人杀潘父立昭侯之子孝侯後八年成师卒子釐立是为庄伯惠四十五年庄伯伐翼弑孝侯晋人攻庄伯庄伯复入曲沃翼人立孝侯之弟鄂侯鲁隐公五年曲沃庄伯以郑人邢人伐翼王使尹氏武氏助之鄂侯奔随已而曲沃叛王命虢公伐曲沃而立鄂侯之子哀侯于翼哀侯立二年庄伯卒子称代立是为曲沃武公鲁桓公二年哀侯侵阍庭之田阍庭南鄙啓曲沃伐翼三年春曲沃武公伐翼次于阍庭逐翼侯于汾隰驂絪而止夜获之晋人立其子小子侯桓七年武公诱晋小子侯杀之八年春曲沃灭翼冬王命虢仲立晋哀侯之弟缙于晋及鲁庄公十六年曲沃武公伐晋侯缙灭之遂并晋国是年王使虢公命曲沃伯以一军为晋侯即武公也已即位三十七年矣以上晋封曲沃及曲沃并晋本末如此事见春秋传竹书纪年史记及郑氏谱左传注郝敬云此托为国人从沃之词刺昭公之失民也章潢云读其辞若美曲沃推其意实刺晋昭意在言外讽咏当自得之严粲云时沃有篡宗国之谋而潘父阴主之将为内应而昭公不知故此诗深警之谓昭公勿以沃为患之在外而犹缓也今国内有谋应之者欲奉沃以为君而篡汝之位腹心作难而外患乘之祸已迫矣此正发潘父之谋其忠告于昭公者可谓切至若真欲从沃则是潘父之党必不作此诗以泄漏其事且自取败也又云将叛者潘父之徒而已国人拳拳于昭公无叛心也异时潘父弑昭公迎桓叔晋人发兵攻桓叔桓叔败还归曲沃皆可以见国人之心矣亦唐风之厚也】

扬【子贡传申培说丰氏本俱作 後同】之水白石凿凿【药韵】素衣朱褱【叶药韵伯谷翻】从子于沃【叶药韵鬱缚翻】既见君子云胡不乐【叶药韵历各翻 比而赋也扬解见王风水喻晋侯石喻桓叔石在水中为水所荡涤故白凿器之能穿木者广韵以为鑿也石之廉利似之扬水以求其能流虽物之易流者有不能流矣而况于石乎但见其凿凿然立于水中水缓而石壮也晋弱沃强何以异此素丝也衣中衣也中衣者朝服祭服之里衣也後世谓之中单严云凡服先以明衣亲身次加中衣其制如深衣但袖小长耳此以素为衣是以丝为之按玉藻云以帛裹布非礼也注谓中外宜相称也冕服丝衣也中衣用素皮弁服朝服玄端麻衣也中衣用布大夫以上祭服中衣用素其朝燕之中衣皆以布为之士祭以朝服中衣以布惟助祭于君则中衣亦用素但不得用朱褱也朱者赤色染繒为纯纯者缘也褱者绣刺黼文为褱褱者领也此诸侯中衣之制也按郊特牲云绣黼朱丹中衣大夫之僭礼也大夫服之则僭知诸侯当服之也今国人具此服将以进之桓叔见欲奉为诸侯耳即一旦黄袍加身之意严云子指叛者下文君子既指桓叔则此言子者设言欲叛之人如潘父之徒也于往也

我将从子往沃以见此桓叔其意谓国中有相与为叛以应曲沃者矣此微词以泄其谋欲昭公闻之而戒惧早为之备也沃曲沃也地理志云河东闻喜县故曲沃也汉武帝元鼎六年更名应劭云武帝于此闻南越破故曰闻喜既见君子云何不乐与草虫章同意乃未见之时而想既见之乐如此】扬之水白石皓皓【叶号韵胡暴翻】素衣朱绣【叶号韵读如燥先到翻鲁诗仪礼注崔灵恩集注丰氏本俱作绡】从子于鹄【叶号韵居号翻】既见君子云何【石经作胡】其忧【叶号韵读如奥於到翻比而赋也说文无皓字当作颢云白貌水微而石显也绣毛传云黼也孔颖达云郊特牲文绣黼丹朱中衣注谓绣读为绡以考工记云白与黑谓之黼五色备谓之绣若五色聚居则白黑共为绣文不得别为黼称绣黼不得同处明知非绣字也绡是繒绮别名于此绡上刺为绣文故谓之绡黼也绡上刺黼以为衣领然後名之为褱故尔雅黼领谓之褱褱为领之别名也如传意绣得为黼者绩是画绣是刺刺虽五色备具乃成为绣初刺一色即是作绣之法故绣为刺名传言绣黼者谓于繒之上绣刺以为黼非训绣为黼也孙炎注尔雅取毛绣黼为义不破绣字义亦通也鹄毛云曲沃邑也孔云晋封桓叔于曲沃非独一邑而已其都在曲沃其旁更有邑按鹄地所在今未详愚意盖指欲叛者所居之邑也曰云何其忧者晋衰沃盛从沃之愿既遂则可以免祸而无危何忧之有】扬之水白石粼粼【真韵陆德明本又作磷】我闻有命不敢以告人【真韵荀子引此诗曰国有大命不可以告人妨其躬身疑诗原有此未句而孔子删之第观左传驪赤以扬水卒章为四言则荀子所引亦未可据比而赋也粼说文云水生厓石间粼粼也徐锴云水流石间不驶也此言水落而石见也言桓叔篡晋之谋已定如白石在清水之中昭然可见所谓司马昭之心路人所知也曰我闻者通国皆知之辞命桓叔之命言已命其徒以举事也曰不敢告人则固已告矣语甚隐妙是巧于告密者严云昭公诸诗皆以沃强为忧山有枢言死亡之迫最激切而微词深意未若此诗末章之云盖反词以见意故泄其谋欲昭公知之忠之至也诸家皆谓国人助之而匿其情且引阳生夜至于齐国人知之而不言为比晋人之心异于齐也自桓叔至武公屡得志矣而晋人终不服相与攻而去之其後更六世逾六七十载迫于王命而後不敢不听在昭公之初晋人之心岂从沃哉若助桓叔而匿其情则此诗不作可也亦既声之于诗使采诗者扬之以讽其君矣安在其为匿之也故言不敢告人者乃所以告昭公言我闻有命者又以见其事已成祸至甚迫所以激发昭公者至切切也执诗之辞而不能以意逆志固哉说诗风人之情远矣凌蒙初云素衣朱褱何等服物我闻有命何等密谋而明明见之篇什且不敢告人一语直同儿戏不虞败乃公事耶谬意此阳虽为沃阴实耸晋犹厮养卒所谓名为求赵王实欲燕杀之也惜哉晋主孱庸辜负此一片深心耳左传说定十年侯犯以郈叛叔孙武叔谓驪赤曰将若之何对曰臣之业在扬水卒章之四言矣】

白石三章二章章六句一章四句【朱子解此诗为叛者自作非也无论民欲叛主断无敢作诗以自明者纵使有之亦不义之甚圣人胡为录之于经以为後世乱臣贼子口实哉子贡传阙文】

山有枢刺晋昭公也【出序】诸大夫哀昭公之将亡而私相告语之词【申培说以为唐人忧国之诗按左传云初晋穆侯之夫人姜氏以条之役生太子命之曰仇其弟以千亩之战生命之曰成师仇立为文公卒昭公立封成师于曲沃是为桓叔桓叔有不轨之谋而昭公不知诸大夫难察察言之故作此诗以使之觉悟非相劝为乐也胡胤嘉云是时昭公弱不自竖桓

叔强且渐逼若朝生之菌夕而即落识者伤之以甚愚之主至急之势百务颓废不举之时而欲告之以保身宁家之道则其说也长而其入也无绪故喟然曰与其龉龉以待亡何如快乐以永日所以发其伤心之痛而振其欲死之气诗人语苦而意蹙迫矣其後昭公卒为潘父所弑何其难悟耶】

山有枢【虞韵亦叶尤韵乌侯翻尔雅作蘓石经作蔕】隰有榆【虞韵亦叶尤韵夷周翻】子有衣裳弗曳弗娄【尤韵亦叶虞韵龙珠翻】子有车马弗驰弗驱【虞韵亦叶尤韵祛尤翻丰氏本作駟】宛【陆德明云一作苑】其死矣他【丰氏本作它後同】人是愉【虞韵亦叶尤韵他侯翻汉书文选注俱作愉兴也枢榆属亦名莖即所谓刺榆也陆玑云其针刺如柘其叶如榆淪为茹美滑于白榆榆之类有十种叶皆相似皮及木理异尔齐民要术注云今世有刺榆木甚牢纫可以为犍车材挟榆可以为车毂及器物凡种者直种刺挟两种利者为多其余软弱例非佳好之木也隰解见山有扶苏篇严粲云曰榆者总言诸榆也榆之种多不知所指也陆玑释榆云白粉也误矣尔雅谓榆白为粉玑误谓榆为白粉也粉乃榆之白者无缘榆又为粉之白者然则此言隰有榆总言榆耳管子云五粟五沃之土其榆条直以长罗愿云按陈藏器云江南有刺榆无大榆盖大榆北方有之秦汉故塞其地皆榆塞榆北方之木也是以江南无榆但见枢耳若晋风则山隰兼有之按枢榆同类櫟五行书云舍北种榆九株蚕大得齐民要术亦云于北方种榆九根宜蚕桑田谷好又榆种至十五年後中为车毂一树三具考工记注云毂用櫟榆意者诗人因下文有衣裳车马之咏故即枢榆以起兴欤子大夫相谓也曳犹披拂也孔穎达云曳者衣裳在身行必曳之严云汉文帝赞衣不曳地曳有优游娱适之意娄通作缕说文云綫也衣曳而至于敝坏则当以綫紩之也驰说文云大驱也孔穎达云走马谓之驰策马谓之驱驱驰俱是乘车之事宛通作窻说文谓窻宛同字非也窻字从心即今人所谓惋惜是也白虎通云死之为言澌也精气穷也愉通作觫说文云欲也诗人之意谓此岌岌者国也此衣裳车马之物必非我辈所能享何不及今曳娄之驰驱之之为愉快而坐视其为他人所欲乎昭公闻此若会其言外之意则必瞿然知惧汲汲然思所以防患之计矣】山有栲【叶有韵去九翻诗草木疏云许慎读栲为□今人音考失其声也今按说文本音考或陆玑所见本异耳】隰【陆玑疏作山】有杻【有韵】子有廷内弗洒【吕氏读诗记丰氏本俱作洒】弗埽【叶有韵苏后翻】子有钟鼓弗鼓【陆德明云或作击】弗考【叶有韵去九翻】宛其死矣他人是保【叶有韵补苟翻兴也尔雅云栲山櫟说文作□亦云山櫟也郭璞云栲似櫟色小白生山中因名云亦类漆树古俗语云櫟櫟栲漆相似如一张萱云□櫟恶木也庄子吾有大树人谓之櫟即此与椿相类櫟本以不才而寿故庄子因而有大椿之说耳又陆玑云山櫟与下田櫟略无异叶差狭耳吴人以其叶为茗今所云为栲者叶如栎木皮厚数寸可为车辐或谓之栲栌未详是否杻尔雅云櫟也说文云櫟杻也郭云似棣细叶叶新生可饲牛材中车輶关西呼杻子一名土樗陆玑云叶似杏而尖白色皮正赤为木多曲少直枝叶茂好二月中叶疎华如练而细药正白盖此树也今官园种之正名曰万岁既取名于亿万其叶又好故种之共汲山下人或谓之牛筋或谓之櫟材可为弓弩干也考工记云取干之道柘为上櫟次之张云櫟梓属大者可为棺槨小者乃可为弓杻之名万岁者以櫟有亿万之义也谢眺诗风动万年枝即此杨慎云宫中多树之取亿万之意谓之万年树注唐诗者以冬青为万年枝非也廷庭通宫中也抑诗曰夙兴夜寐洒埽庭内孔云洒谓水湿地而埽之故转为洒洒是散水之名埽拚除也字从土从帚会意钟鼓廷内所设周礼小胥正乐县

之位王宫县诸侯轩县大夫判县士特县曲礼云大夫无故不彻悬乐记云鼓无当于五声五声不得和是则天子诸侯大夫士凡奏乐必有钟鼓也钟鼓之鼓从支弗鼓之鼓从支顏师古云鼓者动也严云动其声也解见鼓钟篇考通作考说文云敏也敏者击也保犹守也此章以桮杓取兴未喻其指岂亦以桮全天年杓号万岁有长守之义故耶】山有漆【质韵丰氏本作漆】隰有栗【质韵丰氏本作?】子有酒食何【石经作胡】不日鼓瑟【质韵】且以喜乐【音络】且以永日【质韵】宛其死矣他人入室【质韵兴也漆解见定之方中篇栗解见东门之墀篇漆可成琴瑟栗可供笱实故以兴下文酒食鼓瑟之事鲁诗传云天子食日举乐诸侯不释县大夫士日琴瑟陈阳云此与车邻言瑟不及琴者琴则五弦瑟则二十五弦言瑟不及琴举大以见之也与仪礼乡饮燕礼皆言左何瑟乐记言清庙之瑟以见琴同意言何不日鼓瑟而钟鼓不言日者以琴瑟常御之乐故也与士无故不彻琴瑟同意一说罗泌云登歌惟王备琴瑟诸侯则有瑟而无琴燕礼登歌有瑟而已所以别于王也二且字有勿问其他意永说文云长也毛云引也曰永日者严云言死亡迫矣不及时为乐则有仓卒之恨是来日已短宜及今为乐以延引此日也吕祖谦云诗人岂真欲驰驱饮乐者哉盖曰是物也行且为他人所有曾不若及今为乐之为愈其激发感切之者深矣非劝其为乐也吕禄弃军其姑吕嬃悉出珠玉宝器散堂下曰毋为他人守也乃此诗之意也末章可见愚按首言衣裳车马是身中物次言廷内钟鼓是家中物至末章则身家之物俱有所不暇念姑偷取目前之乐而已意愈悲而词愈切矣通篇兴意惟以章首六有字引起下文五有字苏辙所谓有衣服车马钟鼓饮食而不能用于譬如山木之不采终亦腐败摧毁归于无用而已】山有枢三章章八句【序云刺晋昭公也不能修道以正其国有财不能用有钟鼓不能以自乐有朝廷不能洒埽政荒民散将以危亡四邻谋取其国家而不知国人作诗以刺之也朱子以宛其死矣之言谓非臣子所得施於君父者序说大误其论亦正惟谓此诗盖亦答蟋蟀之意而寬其忧则无据甚矣且及时行乐乃狃目前细误者之为以此相劝岂足以训愚详味诗意以为大夫相告语之词者近是又季本云此刺俭而不中礼之诗大意言天地变化草木蕃殖未尝闕而不发也人于衣服车马宫室器具饮食凡礼所当为者乃皆闭而不用徒自忧苦一生何哉是说也吾有取焉可举以破夫世之为慳者然而非诗意也子贡传阙文】

椒聊晋人美当时忠臣不入沃党者然终有寡不敌衆之虑所以深危昭公也【此诗据序以为指曲沃桓叔之事而韩诗外传引硕大且笃以为赞君子之语故特主今说】

椒【丰氏本作茱後同】聊之实蕃衍盈升【蒸韵】彼其之子硕大无朋【蒸韵】椒聊【萧韵】且【子余反後同】远条【萧韵】且【比而赋也椒聊二木名尔雅云椒櫞丑茱櫞茱萸也丑类也椒与茱萸之类皆有茱萸者裹实之房也陆玑云椒树如茱萸有针刺叶坚而滑泽说文作茱徐锴云按说文无椒字此茱为椒字也椒丛生如蔷薇之属非木也故但从艸陆佃云酉阳襍俎曰椒可以求水银茱萸气好上椒气好下盖椒气性不上达故也聊旧以为语助辞似非文理按尔雅云杞檠梅杓者聊又云杜赤棠白者棠以两处文法例之赤棠名杜其白者名棠则檠梅名杞其杓者名聊也杓说文云高木也聊即杞之高者郭璞云杞树状似梅子如指头赤色似小柰可食蕃茂衍饶盈满也汉志云升者登合之量也龠十为合合十为升古升上径一寸下径六分其深八分诗取二树之实以比从桓叔于曲沃者其党繁盛如此又椒气下求则桓叔之植党似之聊树上亢则桓叔之偏上似之诗人取类各有当也彼其之

子指晋忠臣意如师服之流惜其姓名不显按左传晋始封桓叔于曲沃师服曰吾闻国家之立也本大而末小是以能固故天子建国诸侯立家卿置侧室大夫有贰宗士有隶子弟庶人工商各有分亲皆有等衰是以民服事其上而下无觊觎今晋甸侯也而建国本既弱矣其能久乎昭公不能用其後卒为曲沃所灭若师服者可谓忠于晋者也硕说文云头大也硕以貌言大以德言白虎通云朋者党也时晋人多趋曲沃而之子独介然特立不与之党故诗人云然然羽翼既成虽有之子将奈之何故于章末复咏叹之曰此椒也聊也其枝条愈布濩愈益长远势必至遍地无非椒聊者犹之晋人趋曲沃者日衆不至尽化为曲沃之人不止也范祖禹云椒聊且者本其始也远条且者言其枝别将远而无穷也朱子云且叹辞】椒聊之实蕃衍盈匊【屋韵释文作掬】彼其【韩诗外传作已】之子硕大且【如字】笃【叶屋韵读如腭徒谷翻】椒聊且远条且【比而赋也毛传及广雅皆以两手为匊字从勺从米徐云手掬米会意陆佃云先盈升後盈匊古者匊大而升小升之所容不足以盈匊故也范云盈匊者不复以升较言益多也笃通作竺说文云厚也前言无朋此言且笃守志不移纯乎忠者也韩诗外传云子路曰士不能勤苦不能轻死亡不能活贫穷而曰我行义吾不信也昔者中包胥立于秦廷七日七夜哭不絶声是以存楚不能勤苦焉得行此比干且死而谏愈忠伯夷叔齐饿于首阳而志益彰不轻死亡焉能行此曾子褐衣緼絮未尝完也粝米之食未尝饱也义不合则辞上卿不活贫穷焉能行此夫士欲立身行道无顾难易然後能行之欲行义徇名无顾利害然後能行之诗曰彼己之子硕大且笃非良笃修身行之君子其孰能与之哉】

椒聊二章章六句【子贡传申培说丰氏本篇名皆作茱 子贡传阙文申培说文唐昭侯封公子成师于曲沃成师治聚盛强师服忧之而作是诗序亦云刺晋昭公也君子见沃之盛强能修其政知其蕃衍盛大子孙将有晋国焉二说皆相彷彿解者以无朋犹云无比然沃即大都耦国尚未并晋何至便云硕大无比哉或谓此句及下硕大且笃皆指桓叔之德而言如此赞词于义悖矣郝敬云彼其之子指昭公也无朋言寡助也笃者马行不进貌言迟钝也以其身为诸侯奄有邦国故以硕大称之于文义亦通但从来未闻有国人斥其君为彼其之子者故不敢从若朱子则以此诗谓未必为沃而作且不知其所指则又过于疑旧说者也】

戍申【郑风亦有扬之水今摘篇中戍申二字命篇以为识别】刺平王也不抚其民而远屯戍于母家周人怨思焉【出序 按郑谱云幽王嬖褒姒生伯服废申后太子宜臼奔申申侯与犬戎攻宗周弑幽王于戏晋文侯郑武公迎宜臼于申立之是为平王竹书纪年云平王三十三年楚人侵申三十六年王人戍申愚按此诗当与君子于役合看彼为思妇之辞此为征夫之辞】

扬【子贡传申培说丰氏本俱作 下同然考字书无 字】之水不流束薪【真韵丰氏本作新】彼其【郑笺云或作记读或作已读声相似诗内皆放此】之子不与我戍申【真韵】怀哉怀【叶微韵胡威翻亦叶灰韵胡隈翻】哉曷月予还归【微韵亦叶灰韵古回翻】哉【比也扬字从手乃以手播扬之义说文以为飞举也束说文云缚也字从口从木徐锴云谓束薪也口音围象纏也大木可析曰薪苏辙云扬之水非自流之水也水不能自流而或扬之虽束薪之易流有不流矣水之能自流者物斯从之安在其扬之哉周之盛也诸侯听役于王室无敢违命及其衰也虽令而不至严粲云薪本浮物一束之薪非不可流转若凿凿之白

石也而水浅弱不能流转之喻诸侯本非难令而东周衰弱不能号令之也朱子云其语助也
欧阳修云彼其之子周人谓他诸侯国人之当戍者也戍守也字从人从戈人持戈以守也申
姜姓之国四岳之後初封于宛今河南南阳府南阳县至宣王时迁于谢则今汝宁府之信阳
州也郑笺云平王母家申国在陈郑之南迫近强楚数见侵伐王是以戍之後竟为楚所灭吕
氏云平王戍申与晋平公城?相类怀念思也曷何也还复也俱见说文彼诸侯之人无肯与我
共戍申国者而独使我周人远戍久而不得代故我思念不置未知何月而得旋归也朱子云
先王之制诸侯有故则方伯连帅以诸侯之师讨之王室有故则方伯连帅以诸侯之师救之
天子乡遂之民供贡赋卫王室而已今平王不能行其威令于天下无以保其母家乃劳天子
之民远为诸侯戍守故周人之戍申者以非其职而怨思焉又况申侯实启犬戎以致骊山之
祸乃平王及其臣民不共戴天之讐也今平王知有母而不知有父知其立已为有德而不知
其弑父为可怨至使复讐讨贼之师反为报施酬恩之举则其绝灭天理而得罪于民又益甚
矣刘彝云六乡六遂之兵所以制方伯之失职非以御夷狄也严云宗庙禾黍曾不以之兴怀
而惟申国之忧失轻重矣郝敬云是时周室播迁非有余勇可贾特以受人施者畏人欲不为
之役不可得耳寄生之天子既不能令于诸侯六百里之甸卒又无人可为践更故行者有不
均之叹力本寡弱而使人又不以道人所以怨之苟师出有名讨贼兴复如夏少康一成一旅
人谁敢谓为扬之水哉夫子删诗存此篇书録文侯之命其作春秋始平王垂戒远矣】扬之
水不流束楚【叶麋韵读如取此主翻】彼其之子不与我戍甫【麋韵】怀哉怀【见前】
哉曷月予还归【见前】哉【比也楚丛木一名荆甫国名本作吕姜姓史记云吕尚先祖为
四岳佐禹治水有功虞夏之际受封于吕尚书有吕刑之篇礼记引之皆作甫刑唐世系表云
宣王世改吕为甫按括地志故申城在邓州南阳县北三十里故吕城在邓州南阳县西四十
里同为宛县地周时荆宛并韩皆近京师韩扞临晋以制狄宛卫武关以制楚其後申吕皆入
于楚左传楚子重请取于申吕以为赏田申公巫臣曰不可此申吕所以邑也是以为赋以御
北方若取之是无申吕也晋郑必至于汉然则申吕相距不远此周人戍申而亦以戍甫与又
輿地广记载蔡州新蔡县古吕国王应麟云以左传考之楚有申吕时新蔡属蔡非楚邑当以
在宛县为正】扬之水不流束蒲【叶麋韵颇五翻】彼其之子不与我戍许【叶麋韵火五
翻】怀哉怀【见前】哉曷月予还归【见前】哉【比也蒲陆佃云水^ㄅ似莞而褊有脊生
于水厓轻扬善泛柔滑而温可以为席故男执蒲璧言有安人之道也按左传臧文仲妾织蒲
即此丰氏云楚小于薪蒲轻于楚严云楚愈轻蒲又愈轻至不流束蒲则弱之极矣郑玄解为
蒲柳以首章言薪下言蒲楚则蒲楚是薪之木名不宜为^ㄅ陆佃驳之云夫^ㄅ亦^ㄅ也而绸繆
之诗乃曰束薪束^ㄅ束楚则岂以言木故妨^ㄅ哉许国名亦姜姓在今河南开封府许州即古
许昌是也按国语曰齐许申吕繇大姜又曰申吕虽衰齐许犹在然则许与申吕皆同姓邹忠
胤云甫许与申接壤当时楚人因伐申而并侵甫及许容有之即不然而二国惕于震邻或邀
王灵并为之戍亦非必待其见侵也国语史伯曰王欲杀太子以成伯服必求之申申吕方强
其隩爱太子亦必可知也竹书纪幽王既弑立宜臼于申者许男与焉则平王之德甫许当亦
德申之亚夫以天子恤诸侯之患岂非义举第平王此举则私私其恩实私其讐吕氏谓平之
戍申与晋平城?相类夫晋於?戚也非讐也以其弃诸姬而屏夏肄君子犹讥之若平王奄奄
甘为讐人役又未可同日语矣】

戍申三章章六句【申培说谓荆子讨申侯弑幽王之罪伐申侵甫及许于他史无所见盖摺

摭诗辞而为之反觉附会不可信】

君子于役戍申者之妻所作【出申培说 子贡传云戍者不归室家思怨今按扬之水篇云怀哉怀哉曷月予还归哉与此诗言君子于役不知其期曷至哉语意相类以为戍申者之妻作亶其然矣】

君子于役不知其期【支韵】曷至哉【叶支韵将其翻】鸡栖于埭【释文及羣经音辨俱作时】日之夕矣羊牛下来【叶支韵陵之翻】君子于役如之何勿思【支韵 赋也君子妇人目其夫之辞于往也役谓行役不知其期计时也犹云不知何时可以竣事也谢枋得云雨雪霏霏遣戍役而预言归期也卉木萋萋劳还卒而详言归期也四牡之役宁几何时劳之曰我心伤悲吉甫在镐不过千里劳之曰我行永久不如是无以体羣臣也本推己及物之恕为叙情闵劳之仁岂有无期度者哉今君子于役至不知其期仁恕之意泯然矣曷至哉计地也音耗久断恐调发无恒并其所至之处亦不能知也鸡知时畜也栖本作西加木作栖禽经云陆乌曰栖说文云日在西方而鸟栖故因以为东西之西後人于鸟之栖加木以别之李巡云寒乡凿墙为鸡作栖曰埭夕暮也字从月半见月初生则暮见西方故半月为夕羊牛下来者郑笺云羊牛从下牧地而来陆佃云先羊後牛者羊性畏露晚出而早归常先于牛故也日之夕矣一句关上下两语鸡栖于埭则日之夕日而已夕则羊牛下来明明见有出即有入有旦即有暮而欲付萍踪飘泊杳无归期之人于不思非人情矣郑云言畜产出入尚使有期节至于行役者乃反不也愚谓诗意乃因思触物犹唐人云月明花落又黄昏有无限感叹非缘感物兴思而方人于物也重言君子于役弥增凄惋邹忠胤云悦以使民民忘其劳平王遣畿内之民为讐人役周人固已不甘使其蚤毕事言旋犹慰室家之望观扬之水篇言曷月予旋则固已卜归休无期矣居者之思当亦犹行者之怀此于役所为也尝观杜采薇悲日月之继嗣多恤于匪载匪来悼居之不遑烈忧於载饥载渴似与此诗不甚相远然彼则自上闵之此则自下述之民情舒郁所繇异乎嗟乎先王以人道使人後世以牛羊使人而不知牛羊之归犹有期也齐襄葵丘之戍瓜时而遣及瓜弗代而无知之祸因之为人上者勿以于役为细故人情固圣王之田也】君子于役不日不月【叶屑韵读如臬倪结翻】曷其有佸【叶屑韵纪劣翻说文作𠂔】鸡栖于桀【屑韵尔雅作櫟】日之夕矣羊牛【朱传作牛羊】下括【叶屑韵纪劣翻】君子于役苟无饥渴【叶屑韵巨列翻 赋也不日不月言君子往役非一日一月之故是已往事佸说文云会也韩诗云至也曷其有佸言何时而有聚会至止之期乎是将来事尔雅云鸡栖于桀为桀括说文云絜也絜之为义麻一端也礼记注云犹结也絜也盖以绳系之絜而来归曰下括也太玄经云四马就括义亦同此苟无饥渴犹云庶几无疾病苟字最下得凄惋有无可奈何之意苟幸无饥渴庶後归有期此思之极也後汉书所谓万里之外以身为本亦此意也】

君子于役二章章八句【序云刺平王也君子行役无期度大夫思其危难以风焉吕祖谦云考经文不见思其危难以风之意朱子亦云此国人行役而室家念之之辞序说误矣今按篇中有鸡栖牛羊等语乃寻常村庄中景象絶不似冠盖家口角】

葛藟王族刺平王也周室道衰弃其九族焉【出序申培说亦云王族流散而作子贡传但存

平王之族流散六字而其余阙文】

縣縣葛藟在河之浒【麋韵】终远兄弟谓他【丰氏本作它下同】人父【麋韵】谓他人父亦莫我顾【叶麋韵果五翻 兴而比也縣说文云聯微也毛传云縣縣长不絕之貌葛藟葛之蔓也解见樛木篇罗愿云葛蔓延盛者牵其首以至根可二十步朱氏云葛藟支蔓聯属有宗族之义左传宋昭公将去羣公子乐豫曰不可公族公室之枝叶也若去之则本根无所庇廕矣葛藟犹能庇其本根故君子以为比况国君乎此谚所谓庇焉而纵寻斧焉者也必不可君其图之亲之以德皆股肱也谁敢携贰若之何去之即此诗托物起兴之意浒旧以水厓解似未是按尔雅释厓云重厓岸岸上浒盖厓乃水边即下章之所谓涘厓之上又有厓则为岸岸上地则为浒也然于释水又云浒水厓者或是谓浒之下乃水之厓非以水厓名浒也胡旦云周南葛之覃兮施于中谷又云南有樛木葛藟累之风云旄丘之葛兮何诞之节兮唐风云葛生蒙楚葢蔓于野大雅云莫莫葛藟施于条枚然则葛藟必生于山谷丘野之地延蔓于草木条枚之上不生于河浒水厓严粲云近水之岸善崩将为水所荡犹王室衰微人将失其所依也又陆佃云河浒为水所荡危地也然润泽葛藟而生之则亦所以自固今王弃其九族则曾是之不如也亦通终远兄弟以下皆指王言斥也非讽也终远与縣縣字相应谓他人父所谓不爱其亲而爱他人者顾说文云还视也王之终远兄弟略不以亲亲为念縣于不父其父而以他人为父故视我辈漠然无亲而亦不我肯顾也幽王为申侯所弑平王但以其父昔日之废已为可恨感申侯之立已为有德父讐不讨反汲汲图报焉非谓他人父而何邹忠胤云周之盛也华鄂辉于常棣苞体茂于行苇逮葛藟之刺兴而维翰之势日衰矣周所以卒于不竞与】縣縣葛藟在河之涘【纸韵】终远兄弟谓他人母【叶纸韵母鄙翻】谓他人母亦莫我有【叶纸韵羽轨翻 兴而比也尔雅说文皆云涘为水厓按此诗两章以浒涘分言涘既为厓则浒之为岸而非厓明矣谓他人母者朱子云谓他人父者其妻则母也有郑笺云识有也严云莫我有言视之若无也左传曰不有寡君】縣縣葛藟在河之漘【真韵】终远兄弟谓他人昆【叶真韵俱伦翻】谓他人昆亦莫我闻【叶真韵微匀翻 兴而比也按尔雅云夷上洒下不漘旧注谓夷上平上洒下陷下惟不字难解或以为发声或以为衍字愚意不即否字言其上面平夷而陷下处则否东阳许氏以为岸下为水洒荡啮入若唇是也涘在浒之下漘在涘之下故其序云尔昆兄也本作罍从弟从眾徐锴云眾目相及也兄弟亲比之义省作罍与昆音同通用礼天子必有父诸侯必有兄故天子无兄礼今斥王谓他人兄者丑之也闻相闻知】葛藟三章章六句【朱子谓世衰民散有去其乡里家族而流离失所者作此诗以自叹于义小矣味诗意实出于王族其辞甚直而不说出一王字故使观者不觉耳】

叔于田刺郑庄公也【出序】弟叔段以好勇得衆而公不教故诗人讥之【申培说云叔段多才而好勇大夫忧之而作是诗所谓忧之者盖忧其将为国祸不能令终也严粲云二叔于田皆美叔段之材武无一辞他及而序以为刺庄公盖与春秋书郑伯克段讥失教之意同苏辙云言庄公力能禁之而不禁俟其乱而加之以大戮也章潢云词虽美叔段意实刺庄公国人不敢直指其君故词在此而意在彼乃风之体也】

叔【丰氏本作未上有大字下同】于田【先韵亦叶真韵他因翻丰氏本作林】巷【丰氏本作 】【无居人【真韵亦叶先韵如延翻】岂无居人【见上】不如叔也洵美且仁【真

韵亦叶先韵如延翻 赋也叔名段郑庄公寤生之弟孔颖达云其字曰叔于往也田者猎之别名以取禽于田因名曰田易所谓田有禽利执言是也巷说文云里中道也古文作 从 从共言在邑中所共也省作?又省作巷增韵云直曰街曲曰巷洵通作恂说文云信也美以态度言仁爱人也字从人从二通论云仁者兼爱故人二为仁以叔与衆混处故见其仁欧阳修云国人爱叔以谓叔出于田则所居之巷若无人矣非实无人虽有而不如叔之美且仁也严云叔岂真美且仁哉其党私之之言犹河朔之人谓安史为圣也诗人之意谓段之不令而羣小相与从舆如此必为厉阶以自祸庄公曷为不禁止之乎故序曰刺庄公也】叔于狩【叶有韵始九翻春秋天王狩于河阳谷梁传作守】巷无饮酒【有韵】岂无饮酒【见上】不如叔也洵美且好【叶有韵许厚翻 赋也狩者冬猎之名杜预云狩围守也冬物毕成获则取之无择也孔车攻注云狩者猎之总名冬猎大于三时故名以狩又尔雅云火田为狩疏以为放火烧草守其下风故名为狩若以後篇火烈等语例之则此亦火田也说文又谓犬田为狩未详孰是巷无饮酒者叔出则巷无可饮酒之人也好者献酬款洽情意交通之谓以其与衆饮酒故见其好】叔适野【叶麋韵读如羽王矩翻】巷无服马【叶麋韵满补翻史记索隐音姥凡马皆读如姥】岂无服马【见上】不如叔也洵美且武【麋韵 赋也适说文云之也野说文云郊外也又尔雅云牧外谓之野诗传云以细别言之则郊外之地名牧牧外之地名野若大判而言则野者郊外通名服马郑玄云犹乘马也孔云易称服牛乘马俱是驾用之义故云服马犹乘马巷无服马者言叔出则巷无能服马之人矣武亦于服马见之罄控驰骋力能使马之谓一说夹辕两马谓之服马後篇言两服两骖是也举服以该骖耳亦通彭执中云玩味此诗宛然如见叔段轻猥浮扬之意如今之贵族轻薄子闾里少年朋徒追逐而极口夸美之也】

叔于田三章章五句【丰氏本作大叔于田 序以此篇为叔于田後篇为大叔于田今按段称大叔据左传在封京之後号为京城大叔既受宠异之号又有民人兵甲之衆不得出居闾巷下褻民伍玩此诗有巷无居人等语当是未受封时事耳故篇名但以叔称子贡传谓大叔段多才而好勇郑人爱之赋于田于诗意甚合然却衍大之一字若序云刺庄公也叔处于京缮甲治兵以出于田国人说而归之则全未解古人名篇之意所谓似是而非者也朱子于此诗既从序矣而又云或疑此亦民间男女相说之词则胡不思後篇献于公所之语其为叔段之事凿凿明甚夫亦犹此叔于田也此而可疑孰不可疑耶】

大叔于田刺郑庄公也叔多才而好勇不义而得衆也【出序 庄公封叔段于京之後段始有京城大叔之号此诗古篇名作大叔于田则受封後事也范祖禹云庄公之于段稔其恶而欲毙之也故春秋书克段于鄢以罪郑伯诗人言叔多才好勇而得衆心以深咎庄公夫段之恶易知而庄公之罪难见故春秋书郑伯而诗人刺其君皆本其所起以罪之以为世戒也】

叔【毛诗古本叔上有大字严粲云采诗之初未有序故于首章加大後有序因存而不去犹书序作尧典之下复有尧典二字存其旧也丰氏本作未下同】于田乘乘【上乘平声下乘去声後仿此】马【叶麋韵满补翻】执轡如组【麋韵】两骖如舞【麋韵家语作儻】叔在藪火烈【文选注作列】具举【语韵】檀【释文作袒说文作臄】楊暴虎【麋韵】献于公所【语韵】将叔无【释文丰本俱作毋】狃戒其伤女【语韵音汝 赋也叔于田毛传

以此为叔之从公田也以下文有献于公所之句故云尔若上篇叔于出则段自出田耳乘乘马上乘驾也下乘四数也凡物之四数者皆名乘故四马为乘马四鴈为乘鴈四矢为乘矢又田制四丘曰乘亦其类也又陆佃云古者庶人驾一士驾二大夫驾三诸侯驾四天子驾六乘马则僭诸侯之礼矣盖乱生于车马衣服之间而已大叔于田乘乘马而沃之大夫素衣朱襮此晋郑之所繇乱也执轡如组解见简兮篇轡御马索所谓繯也车四马各两轡以驂马内两轡系于轼驂马外轡及两辕两服马轡分置两手故在手者惟六轡耳驂说文云驾三马也按夏初驾两谓之丽殷益一谓之驂周又益一谓之駟春秋时郑有公子駟字子駟车驾驂马在内两马谓之服在外两马谓之駟是有駟乃成駟也今日两驂者一驂之外又益一驂即駟是也故礼记注云外駟曰驂董氏云五御之法有舞交衢者盖诗所谓如舞也服制于衡不得如舞其言舞者驂也按周礼保氏掌教国子五驭注云一曰鸣和鸾和在轼鸾在衡皆铃也升车则马动马动则鸾和应二曰逐水曲谓车行如水顺曲而流三曰道君表诗毛传谓裼纁旃以为门裘纁质以为櫛闲容握驱而入击则不得入也四曰舞交衢谓车在交道旋应舞节五曰逐禽左谓田车逆驱禽兽使左当君以射此首言叔之善御是往田在道时自矜其能亲代御者执轡其御马光景如此至在藪以下则至其所而田矣後章同韩诗云禽兽居之曰藪毛传云藪泽禽之府也孔颖达云泽水所鍾水□曰藪俱是旷野之地但有水无水异其名耳尔雅释地说十藪云郑有圃田此言在藪盖在圃田也烈说文云火猛也具通作俱偕也举火之初举也火烈具举疏以为宵田故持火焰之按周礼大司马中春蒐田用火尔雅冬猎名狩火田亦名狩曹氏谓王制昆虫未蛰不以火田惟冬田乃用火孔颖达礼记疏则云今俗放火张罗从十月以後至仲春皆得火田是则田之用火凡春冬皆有之不必宵田也然春冬之火亦自有辨所云蒐田用火不过刈草为防驱禽而纳之防中然後焚而射焉所以除陈草习火攻要其所焚者不出于防外非如冬之火田直是放火焚山林以猎也若此诗所云火烈具举後又云具扬具阜其火势之猛如此定不比春蒐之火或即冬之火田耳又叔驰逐自雄郑伯不善教弟其射猎不必尽依礼法然以举火为宵田则似属无当檀说文作臄肉臄也脱衣而见体也亦作亶荀子露亶是也今文讹作檀按檀乃丹穀衣本作褰亦作展即王后六服中之展衣也与肉臄义无涉裼说文云袒也袒者衣缝解也暴当作□说文云疾有所趣也按暴□字易相混不可不辨公庄公也孔云公亦与之俱田也献于公所者进之于君前一说胡胤嘉云所不必于田所献之曰公所则不在田可知将请也无通作毋禁止辞徂说文云大性骄也字从犬尔雅云复也顏师古云怵也孙炎云徂伏前事复为也盖因骄成惯故徐氏解以为怵惯习是也叔之徒见叔露体解衣疾趋搏虎相与戒叔曰请叔无骄惯此事恐虎之或伤汝也爱之之辞郑氏云段以国君介弟之亲京城大叔之?而所好者驰骋弋猎也所矜者檀裼暴虎也所贤者射御足力也出而人思之者饮酒服马之俦也气习至此而又恃其君母之爱玩于庄公之惟其所欲而不谁何也欲不为叛得乎是则置段于必乱之地者庄公也鍾惺云叔段无大志一驰马试剑公子耳其徒夸美亦不过媚子狎客从臾游戏者不然且为曲沃武公矣看将叔无徂戒其伤女及我闻有命不敢以告人气象大小深浅相去多少】叔于田乘乘黄【阳韵】两服上襄【阳韵】两驂鴈行【叶阳韵寒刚翻】叔在藪火烈具扬【阳韵】叔善射【禡韵丰氏本作?]忌又良御【叶禡韵五驾翻】忌抑磬控【送韵】忌抑纵送【韵】忌【赋也陆佃云黄驂曰黄黄亦马之上色故駟颂首章曰有骊有黄列子亦曰牝而黄牡而骊马至果天下之马也旧说以乘黄为四马皆黄然则後章乘鵠岂又四马皆鵠乎何叔乘马之骤易如此愚谓乘黄乘鵠俱当于乘字略断续之盖四马为乘于乘之中有黄者又有鵠者或

两服为黄而两骖为鹄也朱子云衡下夹轅两马曰服按服字从舟舟即车輶也盖以两服马居輶两旁得名襄通作骧说文云马之低昂也两服上襄言两服在两骖之上其行并低并昂即下章所言齐首是也两骖鴈行者谓骖少次服行如飞鴈斜行曲礼注云鴈行者与之竝差退是也孔颖达云此四马同驾其两服则齐首两骖与服马鴈行其首不齐故左传云如骖之有靳扬说文云飞举也盖言接续而举略无停歇也射说文作?从身从矢谓弓弩发于身而中于远也篆改矢从寸寸者手也忌语助辞或作其或作已或作记或作期或作其皆音近也良亦善也御说文云使马也从彳从卸徐锴云彳行也卸解车马也或彳或卸皆御者之职射御不对言叔本善射因有良御而益以济其善射也下二句正举其实抑发语辞毛传云骋马曰磬止马曰控谓之磬者骋马从禽随其所使马即从之曲折如磬也按磬之折杀其形必曲故谓之磬折控说文云引也马行方速遇兽而射引而止之即止随所制勒也朱子云舍拔曰纵覆骹曰送拔即括也矢衔弦处满则放手以任其去故曰纵骹弓梢头也覆倒也弓满时弓梢向内既放矢则颠倒其梢并指于前如送矢远去也又严粲云纵放箭也送送箭也今射者云前手擲後手?擲即送也?即纵也能?能擲则矢去劲而有力亦通陆化熙云要知磬时未尝不控纵时即为之送不是二事上章言徒搏第见其始事之勇此章乃以其射猎之实言也】叔于田乘乘鹄【叶有韵补苟翻丰氏本作□】两服齐首【有韵】两骖如手【有韵】叔在薮火烈具阜【有韵】叔马慢【叶翰韵莫半翻释文丰氏本俱作嫚】忌叔发罕【叶翰韵黄半翻】忌抑释棚【蒸韵丰氏本作欠礼书作弣】忌抑鬯【丰氏本作轡】弓【叶蒸韵姑弘翻】忌【赋也鹄鸟名尔雅马骀白裸毛曰鹄盖取诸鸟也郭璞云今呼之为鸟骀齐首马首齐也如手郑云如人左右手之相佐助也朱子云两服并首在前而两骖在旁稍次其後如人之两手上章言乘黄意是主两服为言而并及两骖之善此章言乘鹄意是主两骖为言而明其能为两服之助然第据骖服并行之象如此无御之善意与首章执轡如组二句不同阜本土山之名刘熙云厚也言高厚也毛云盛也徐光启云始而具举既而具扬终而具阜形容火势以渐而炽乃知诗人体物之妙一字不苟此存薮二句虽与上同然已是田事将毕时矣慢毛云迟也孔云凡惰慢者必迟缓故训慢为迟罕毛云希也按罕本罔名所以训希者当是谓其罔目希疏故耳郑云田事且毕则其马行迟发矢希释说文云解也棚毛传及说文皆云所以覆矢亦作冰昭二十五年左传云公徒执冰而踞服虔云冰犊丸盖杜预云犊丸是箭筈其盖可以取饮严云用矢则举棚以开箭既用则纳矢箭中释下其棚以覆箭也鬯孔云韬弓之器鬯弓盖韬弓而纳之鬯中本作轡说文云弓衣也又苍颉名冰为矢房诗注名轡为弓室可作的对盖矢韬弓及田事既毕之时严云言其从容得意如庖丁解牛提刀而立为之四顾为之踌躇满志善刀而藏之也亦可想叔段洋洋之意矣又云段有不义之谋兄弟之间人所难言诗人优游之意但言段矜能恃勇暴虎以献气陵其兄私党諂事甘言媚说方且踊跃驰骋不能自己从容毕事意气自得其气习轻扬麤暴如此殆非令终之器所谓智伯射御足力则贤而以不仁行之者也公何为不早禁止之乎吕祖谦云鸢鸟将击必匿其形二诗所载段之轻浅如此宜其为庄公之所易也诗人乃若忧其不能制者岂其未得庄公之情也哉忧之云者兄弟之心也欲止其恶者也涕泣而道之者也易之云者仇敌之心也欲养其恶者也谈笑而道之者也诗人直以兄弟之心为庄公忧耳岂知其他哉万时华云叔之得衆如此为魏之信陵齐之孟尝不足为晋之桓叔卫之州吁亦不足何也其知不深其勇不沈结纳皆亡命之人终不足以举大事庄公识破此人弄之股掌中亦久矣桓志杀段固不足言汉文实友爱诸弟不朝赐几杖不问杀辟阳侯不问警蹕称制不问卒令以骄恣自败损爱弟之名始知

国家大体毕竟私情上稍姑息不得公义上稍宽假不得】

大叔于田三章章十句【丰氏本作叔于田 郝敬云于田二诗朱子皆以为郑人爱段而作非也序刺庄公无中才之教?其弟于恶也二诗极道段材艺武勇其缮甲治兵不轨之志隐然言外夫子删诗存此戒人君父兄于子弟爱之能勿劳乎若谓郑人美段而作何足以风又汉匡衡谓郑伯好勇而国人暴虎殊非事实】

将仲子郑庄公欲?弟段授以大邑祭仲谏阳拒之大夫原其情而刺之【出申培说 左隐元年初郑武公娶于申曰武姜生庄公及共叔段庄公寤生惊姜氏故名曰寤生遂恶之爱共叔段欲立之亟请于武公公弗许及庄公即位为之请制公曰制岩邑也虢叔死焉他邑惟命请京使居之谓之京城大叔祭仲曰都城过百雉国之害也先王之制大都不过参国之一中五之一小九之一今京不度非制也君将不堪公曰姜氏欲之焉辟害对曰姜氏何厌之有不如早为之所无使滋蔓蔓难图也蔓草犹不可除况君之宠弟乎公曰多行不义必自毙子姑待之既而大叔命西鄙北鄙贰于己公子吕曰国不堪贰君将若之何欲与大叔臣请事之若弗与则请除之无生民心公曰无庸将自及大叔又收贰以为己邑至于廩延子封曰可矣厚将得衆公曰不义不昵厚将崩大叔完聚缮甲兵具卒乘将袭郑夫人将啓之公闻其期曰可矣命子封帅车二百乘以伐京京叛大叔段段入于鄆公伐诸鄆五月辛丑大叔出奔共书曰郑伯克段于鄆段不弟故不言弟如二君故曰克称郑伯讥失教也谓之郑志不言出奔难之也邹忠胤云尝观楚申无宇云制城邑若体性焉自首领股肱至于手拇毛脉大能掉小故变而不动国为大城未有利者叔段以京患严公郑几不封栎人实使郑子不得其位卫蒲戚实出献公宋萧蒙实杀昭公鲁卞费实弱襄公齐渠丘实杀无知晋曲沃实纳成师秦微衞实难桓景此即祭仲所谓大城不过百雉及晋师服所谓本大而末小是以能固之说也何国无谋臣而其主不听或戕其弟或戕其身或戕其子孙以此为鉴犹有树国相疑豪植太强酿七国之变者严粲云祭仲之谋迫而浅欲速去其偪曰早为之所庄公之谋狡而深欲养成其恶曰子姑待之公与祭仲皆欲致段于死地所争迟速之间耳公非拒祭仲也国人知公与祭仲有杀段之谋乃反其意设为公拒祭仲之辞以讽之按序云将仲子刺庄公也不胜其母以害其弟弟叔失道而公弗制祭仲谏而公弗听小不忍以致大乱焉子贡传亦云郑庄公封弟段于京祭足谏之不听大夫风之严云庄公克段之事左氏以为讥失教诗序以为小不忍皆责之也轻谷梁公羊及胡氏深诛其心以为大恶後之说诗者祖其意以序为非且谓诗人探庄公之心在于杀段而托诸父母诸兄国人以为说冀以稔成其恶耳窃谓此驳序未尽庄公之恶则然而说诗之本意则未也叔段旧有夺嫡之谋庄公固已不能释然于怀矣而又挟材武怙母宠结羣小将不利于宗国此庄公之所深忌也请制弗许请京与之迫于母意不得已焉耳始荅祭仲曰多行不义必自毙继答公子吕曰无庸将自及至公子吕又言之则曰不义不?厚将崩盖挟数用术为秋实黄落之计设心不仁矣观段之浅露为羣小所从與而欲谋宗国何能为者耶固易之矣及段将袭郑公曰可矣盖幸其衅自彼作谓人不得以议我岂有涕泣而道之之意哉公固非不忍者然春秋乃圣人褒贬之法变风乃国人讽谏之辞不可以并论也此诗止以公与祭仲有杀段之谋故设为公拒祭仲之辞以天理感动之公论开悟之耳如此则不失诗人温柔敦厚之旨胡安国云姜氏当武公存之时尝欲立段矣及公既没姜以国君嫡母主乎内段以宠弟多才居乎外国又悦而归之恐其终将轧已为後患也故授之大邑而

不为之所纵使失道以至于乱然後以叛逆讨之则国人不敢从姜氏不敢主而太叔属籍当絶不可复居父母之邦此郑伯之志也王政以善养人推其所为使百姓兴于仁而不偷也况以恶养天伦使?于罪因以翦之乎又云世衰道隐民彝泯乱若宋殇之于冯也卫侯郑之於叔武瑕也皆为利争不胜计也而庄公独以顺母为辞养成段恶夫中也养不中才也养不才故人乐有贤父兄也仁人之於兄弟不藏怒焉不宿怨焉亲爱之而已矣象忧亦忧象喜亦喜恩掩义也使吏治其国而象不得有为义胜恩也恩义并立而中持衡焉段虽凶逆焉攸乱此春秋责庄公之意也东莱博议云庄公雄猜陰狠视同气如寇讐而欲必致之死故匿其机而使之狎纵其欲而使之放养其恶而使之成封京之後伐鄆之前其处心积虑曷尝须臾而忘叔段哉吾尝反覆考之然後知庄公之心天下之至险也祭仲之徒不识其机反谏其都城过制不知庄公正欲其过制谏其厚将得衆不知庄公正欲其得衆是举朝之卿大夫皆堕其计中矣郑之诗人不识其机反刺其不胜其母以害其弟不知庄公正欲得不胜其母之名刺其小不忍以致大乱不知庄公正欲得小不忍之名是举国之人皆堕其计中矣庄公之机心犹未已也鲁隐之十一年庄公封许叔而曰寡人有弟不能和协而使糊其口于四方况能久有许乎其为此言是庄公欲以欺天下也鲁庄之十六年郑公父定叔出奔卫三年而复之曰不可使共叔无後于郑则共叔有後于郑旧矣段之有後是庄公欲以欺後世也既欺其朝又欺其国又欺天下又欺後世噫嘻岌岌乎险哉庄公之心与胡云庄公志杀其弟使糊其口于四方自以为保国之计得也然身歿未几而世嫡出奔庶孽夺正公子五争兵革不息忽仪躋突之际其祸慄矣乱之初生也起于一念之不善後世则而象之至於兄弟相残国内大乱民人思保其室家而不得不亦酷乎】

将仲子兮无【丰氏本作毋下同】踰我里【纸韵】无【丰本作毋下同】折我树?【纸韵】岂敢爱之畏我父母【叶纸韵母鄙翻】仲可怀【叶微韵胡威翻亦叶灰韵胡猥翻】也父母之言亦可畏【叶微韵於非翻亦叶灰韵乌回翻】也【赋而比也将毛传云请也仲子祭仲也名足仲其字郑大夫也其先为祭封人因以为氏踰说文云越也周礼五家为邻五邻为里皆有地域沟树之折说文云断也杞木名陆玑云柳属也生水傍树如柳叶麤而白色理微赤今人以为车毂按?材坚韧故以比段李氏云无踰我里言无与我家事也郑玄云无折我树?喻言无害我兄弟也苏辙云异姓而干公族以谋兄弟譬如踰里而折杞也吕祖谦云首三句辞虽拒仲而意则与之如侍人僚相告昭公以去季氏之谋公执戈以惧之之类郑云段将为我害我岂敢爱之而不诛欵以父母之故故不为也苏云庄公非畏父母之言者也欲必致叔于死耳夫叔之未袭郑也有罪而未至于死是以谏而不听谏而不听非爱之也未得所以杀之也未得所以杀之而不禁而曰畏我父母君子知其不诚也故因其言而记之夫因其言而记之者以示得其情也吕云岂敢爱之畏我父母则于段非有所不忍也其拳拳于叔而不得已于姜氏者可见矣郝敬云借庄公之口以诛其心辞若寬而心甚险千载读之如见肺肝诗所以善于讽也郑云怀私曰怀言仲之为我谋实与我亲?以私情论若可怀也然听人言而忍于同气在父母必有怨望之辞亦可畏也此又诗人因上有畏我父母之言而拨转之以致其讽动之意含情更深严云公未尝有是言也而诗人代公言之若谓公纵不爱段独不畏父母乎盖譎谏也孔云於时其父虽亡遗言尚存故与母连言之也】将仲子兮无踰我墙【阳韵】无折我树桑【阳韵】岂敢爱之畏我诸兄【叶阳韵虚王翻】仲可怀【见前】也诸兄之言亦可畏【见前】也【赋而比也墙说文云垣蔽也字从嗇取爱嗇自护也桑亦木之韧

者故以比段按孟子曰五亩之宅树墙下以桑则桑在墙下也诸兄毛云公族严云讽公纵不爱段独不畏公族之议乎】将仲子兮无踰我园【叶先韵于权翻】无折我树檀【叶先韵徒治翻】岂敢爱之畏人之多言【叶先韵倪坚翻】仲可怀【见前】也人之多言亦可畏【见前】也【赋而比也孔云太宰职园圃毓草木园者圃之藩故其内可以种木也檀强韧之木可以为车亦以比段鹤鸣之诗云乐彼之园爰有树檀罗愿云淮南子十月檀檀陰木也王充云枫桐之树生而速长故其皮脆不能坚刚树檀以五月生叶後彼春荣之木其材强劲车以为轴人国之人也繇父母而诸兄而国人立言之序如此严云讽公纵不爱段独不畏国人之多言乎吕云畏我诸兄畏人之多言特迫于宗族国人之议论非爱段也具文见意而庄公之情得矣丰熙云庄公所以不惜以京授段者乃老子所谓将欲取之必固与之其术深矣顾委於诸兄国人之言盖潜秘其机而阳以拒仲之谏耳又晋语公子重耳安于齐姜氏劝之行曰西方之诗有之曰怀与安实疚大事郑诗云仲可怀也人之多言亦可畏也韦昭注云言虽欲从心思仲犹能畏人自止见可怀思可畏也】将仲子三章章八句【左襄二十六年郑伯为卫侯如晋晋侯言卫侯之罪使叔向告郑伯子展赋将仲子兮晋侯乃许归卫侯叔向曰郑七穆氏其後亡者也子展俭而壹诗篇名多兮字实即此诗也此诗为祭仲谏大叔事而作语意昭然无可疑者朱子先有成见胷中主定郑卫皆淫诗一闻蒲田郑樵氏谓此淫奔者之辞便欣然引为同调令人懣极】

野有蔓草刺郑庄公也祭仲为公谋去段遂有宠于公国人托为公爱仲之辞以刺之【按段之初封京也祭仲实首先为公谋其言曰今京不度非制也不如早为之所无使滋蔓蔓难图也蔓草犹不可除况君之宠弟乎此诗以野有蔓草发端因祭仲之辞也又左传曰初祭封人仲足有宠於庄公庄公使为卿夫仲之先不过一封人耳已而骤进为卿则以为公忠谋之故因而获宠诗所为歌邂逅者此也】

野有蔓草【丰氏本作𦵏後同】零【丰本作霏後同】露漙【叶阮韵上充翻陆德明本作团顏师古纠缪正俗作𦵏云古本有水旁作𦵏者皆当读上充切叶清扬婉兮陆粲云今韵书作上充切非盖𦵏字传写作衮耳杨慎云婉字在阮韵𦵏字当从之矣诸韵书不收当补入之】兮有美一人清扬婉【阮韵集韵作𦵏】兮邂逅【丰本作解後同】逅【陆本作邁丰本作觀後同】相遇适我愿【叶阮韵五远翻】兮【兴之比又赋也野在四郊之外蔓说文云葛属茎叶相聯野有蔓草比叔段也说见小引下零之为义雨余也露之润泽似之故亦曰零蔡邕月令章句云露者阴液也释为露结为霜漙说文云露貌草之延蔓者凝露浓以比段之有宠于姜氏也有美一人指祭仲足也清扬解见君子偕老篇婉顺也言其眉目之间和顺可掬也邂逅二字说文皆解云不期而遇也遇说文云逢也祭仲以封人入见于公故曰邂逅相遇适犹当也愿通作愿愿者专谨之义人心有所爱则谨持之而不能释谓之愿也适我顾兮言与我心之所怀来者适相当也公欲去段仲亦欲去段谓之曰适我愿兮以见庄公之处心积虑欲害弟段见乎辞矣又左襄二十七年郑伯享赵孟于垂陇子大叔赋野有蔓草赵孟曰吾子之惠也昭十六年郑六卿饒晋韩宣子于郊子蠡赋野有蔓草宣子曰孺子善哉吾有望矣韩诗外传亦云孔子遭齐程木子于郟之间倾盖而语终日有间顾子路曰繇束帛十匹以赠先生子路不对有间又顾曰束帛十匹以赠先生子路率尔而对曰昔者繇也闻之于夫子士不中道相见女无媒而嫁者君子不行也孔子曰夫诗不云乎野有蔓草零露漙兮有美一人清

扬婉兮邂逅相遇适我愿兮且夫齐程木子天下之贤士也吾于是而不赠终身不之见也程木子名本即子华子家语说苑及子华子孔丛子诸书具载此事皆借此诗以表其喜于相遇之意要与诗旨无涉】野有蔓草零露漙漙【阳韵奴当翻】有美一人婉如清扬【阳韵】邂逅相遇与子偕臧【阳韵 与之比又赋也漙漙露盛貌段封京未已又命西鄙北鄙贰于己又收贰以为己邑至于廩延此蔓草得露之盛也婉如清扬犹言清扬婉如倒句法也亦就上章语而翻之耳偕俱臧善也与子偕臧犹言欲与子共安乐同富贵也盖庄公感仲之深如此不爱其弟而爱同谋害弟之人庄公可为有人心乎此诗不必庄公作而国人代为之言欲公闻之而自丑之也】

野有蔓草二章章六句【序以为思遇时也君之泽不下流民穷于兵革男女失时思不期而会焉吕祖谦云君之泽不下流盖讲师见零露之语从而附益之而陈氏引绸缪诗云见此邂逅以为邂逅正谓婚姻若尔直为野合纪咏耳子大叔辈何取焉苏辙云信如此说则赵文子将不受虽与伯有同讥可也时伯有赋鹑之贲贲文子讥之朱子直改为男女相遇于野田草露之间而作邪秽已甚更不足辨子贡传申培说则云臼季遇郤缺于冀荐于文公晋人美之意颇近似愚所以断其不然者以左传为证当子蠢赋此诗钱韩宣子宣子美之以为赋皆不出郑志岂得入之唐风耶】

诗经世本古义卷十九之下

卷二十

钦定四库全书

诗经世本古义卷二十

明 何楷 撰

周桓王之世诗三十篇

燕燕卫庄姜送归妾也【出序 郑玄云庄姜无子陈女戴妫生子名完庄姜以为己子庄公薨完立而州吁弑之戴妫于是大归庄姜远送之于野作诗见己志按完即桓公也春秋始於隐元年为平王之四十九年时桓公在位已十三年矣计其即位在乎王之三十七年也及隐四年而桓公见弑凡在位十六年史记载桓公二年弟州吁骄奢桓公绌之州吁出奔十三年郑伯弟段攻其兄不胜亡而州吁求与之友十六年州吁收聚卫亡人以袭杀桓公州吁自立为卫君此一段足补左传之缺或者不知谓桓公甫立便遇弑非也】

燕燕于飞差池其羽【麋韵亦叶语韵王许翻】之子于归远送于野【叶麋韵读如豎上主翻亦叶语韵上与翻】瞻望弗及【列女传作不】及泣涕如雨【麋韵亦叶语韵於许翻 兴也燕鸟名陆佃云齐人呼𪚩盖取其鸟自呼故曰𪚩也一名玄鸟盖取其色之玄故曰玄鸟也一名鷦鷯庄周所谓鷽鷽者也言燕燕者曹氏云两燕也按尔雅云鷽周燕燕𪚩孙炎舍人皆以为鷽周名燕燕又名𪚩一物三名戴侗引陆玑言鷽周子规也燕燕则乙也考说文云鷽周燕也是以周燕训鷽其训为乙者只名燕不名燕燕也孔颖逵则谓古人重言之汉书童谣燕燕尾涎涎是也然童谣之所云燕燕亦谓赵飞燕姊弟二人同时入宫仍是两燕也郝敬云燕雀依人为孚子也故玄鸟为祈子之祥庄姜于妫以子相依子亡相失故用为比于飞者各飞也以兴己与妫相离也差说文云贰也差不相值也陆佃云两相差为差池通作迟说文云徐行也杨慎云师旷禽经曰鸟向飞背宿燕向宿背飞此物理也故庄姜以为送归妾之比取其背飞之义送别之情也之子指戴妫也归大归也春秋文十八年夫人姜氏归于齐左传云大归也以归宁者有时而反此即去不复来故谓之大归也郊外曰野苏辙云礼妇人送迎不出门远送于野情之所不能已也瞻望弗及者至野与之诀别已留而彼去稍稍更远瞻望之不复能及也无声出涕曰泣自目曰涕如雨者如雨之倾也夫之子于归以子弑也归极苦矣送其归者遭际同之悲人亦还自悲而州吁方阻兵安忍痛哭之不可则有涕泣而已此岂若寻常临岐惜别而已乎风人含不尽之意止言涕泣而吁之暴子之弑国之危悉寓涕泣之中矣】燕燕于飞颉之颃【阳韵】之子于归远于将【叶阳韵资良翻】之瞻望弗及【缉韵】伫立以泣【缉韵 兴也颃说文云直项也颃亢同字尔雅以为鸟咙也盖鸟高飞直上故见其项颈上向也双燕各飞兴己与妫形影相望也将持也言相携持而行也伫说文云久立也】燕燕于飞下上其音【侵韵】之子于归远送于南【叶侵韵乃林翻】瞻望弗及实劳我心【侵韵 兴也孔云音无上下惟飞有上下耳知飞而上为音曰上音飞而下为音曰下音也鍾惺云音字从飞字看出故曰下上送于南者毛传云陈在卫南朱子谓远送于南一句可为送

戴妫之验初别时至泣涕如雨已别后犹伫立以泣及望之不见而茫然以失此时目断行尘无泪可挥矣所谓实劳我心也陆化熙云实字絶有味政见无限苦楚都在心上而口说不出亦微逗下思其贤意矣】仲氏任只其心塞渊【叶真韵一均翻丰氏本作 】终温且惠淑慎其身【真韵】先君之思以勗【礼记列女传作畜】寡人【真韵 赋也仲氏妫字也孔云妇人不以名行礼男女异长各自为伯季故称仲氏也郑云任者以恩相亲信也周礼六行孝友睦婣任恤陆化熙云任是以恩意相孚在平日嫡妾相与上见提此一字便见感念只语已辞也塞窒也一说通作?实也亦通渊深也塞渊有困心衡虑忧深思远之意与卫文公之秉心塞渊同义终者始终如一温和惠仁也藏诸中者为塞渊见诸外者为温惠淑通作俶说文云善也慎谨也淑慎其身言善能谨慎其身塞渊温惠即其实也身者兼内心外貌而言徐光啓云凡人朝夕聚首虽深恩厚谊都可相忘一经别离便想像他平日许多好处诗之曲尽人情如此先君谓庄公也勗说文云勉也寡人寡德之人庄姜自称也顾起元云君称寡人而凡人亦可称王右军论字假令寡人耽之若此妇人亦可称寡人庄姜云以勗寡人是也此述其临时分手之语盖以庄姜敌体先君谊不可去与己为媵妾不同故勉其以先君为念又郑云戴妫思先君庄公之故故将归犹劝勉庄姜以礼义亦通坊记子云利禄先死者而後生者则民不僭先亡者而後存者则民可以托诗云先君之思以畜寡人以此坊民民犹偕死而号无告邓元锡云篇中伤离美德终不斥言国祸处大乱包周身之防也夫丰熙云春秋传曰石碏之子厚从于州吁州吁弑桓公厚问定君于碏碏曰王艷为可曰何以得艷曰陈桓公方有宠于王陈卫方睦若朝陈使请必可得也厚从州吁如陈石碏使告于陈曰卫国褊小老夫耄矣无能为也此二人者实弑寡君敢即图之陈人执之而请蒞于卫卫人使右宰丑涖杀州吁于濮夫陈人既从州吁之请而与之伐郑矣曾几何时乃从石碏之请而诛州吁盖戴妫归在陈国有以愬于陈侯故碏得藉之以成讨贼之功耳然则戴妫诚贤矣哉按史记州吁新立好兵弑桓公卫人皆不爱石碏乃因桓公母家於陈佯为善州吁至郑郊石碏与陈侯共谋使右宰丑进食因杀州吁于濮夫桓公陈之自出而州吁弑之戴妫方大归于陈则陈与州吁盖仇国也州吁不知忌陈而反与陈睦卒杀其身可谓愚矣】

燕燕四章章六句【孔氏正义云卫世家谓庄公娶齐女为夫人无子又娶陈女为夫人生子早死陈女女娣亦幸于庄公而生子完完母死庄公命夫人齐女子之立为太子礼诸侯不再娶且庄姜仍在左传唯言又娶于陈不言为夫人世家云又娶陈以为夫人非也左传唯言戴妫生桓公庄姜养之以为己子而言完母死亦非也然传言又娶者盖谓媵也左传曰同姓媵之异姓则否此陈得媵庄姜者春秋之世不能如礼戴諡也妫陈姓也刘向列女传则以为卫姑定姜者卫定公之夫人公子之母也公子既娶而死其妇无子毕三年之丧定姜归其妇自送之至于野恩爱哀思悲心感恻立而望之挥泣垂涕乃赋诗曰燕燕于飞差池其羽之子于归远送于野瞻望弗及泣涕如雨送去归泣而望之又作诗曰先君之思以畜寡人君子谓定姜为慈姑过而之厚韩诗则云定姜归其娣送之而作然其事有可疑者时定公尚在不得称先君也定公卒立敬妫之子衎为君是为献公王伯厚引鲁诗说云畜孝也献公无礼于定姜定姜作诗言献公常思先君定公以孝于寡人则于是诗之上下文全不相属其谬明矣按孔云坊记引此诗注以为夫人定姜之诗不同者郑志答灵模云为记注阙就卢君先师亦然後乃得毛公传记古书义又且然记注已行不复改之申培说又谓庄姜与娣戴妫皆为州吁所逐同出卫野而别庄姜作诗以赠妫焉今按庄姜被逐事无所载且诗中明言远送于野岂同

逐之辞乎】

击鼓怨州吁也【出序】卫州吁使公孙文仲帅师会陈侯宋公伐郑其从军者赋此【子贡传云州吁求宠于诸侯使公孙文仲帅师及宋公陈侯鲁人蔡人伐郑卫人怨之申培说亦云州吁伐郑国人怨之而作按左隐元年郑共叔之乱公孙滑出奔卫卫人为之伐郑取廩延二年冬郑人伐卫讨滑之乱四年春卫州吁弑桓公而自立宋殇公之即位也公子冯出奔郑郑人欲纳之及卫州吁立将修先君之怨于郑而求宠于诸侯以和其民使告于宋曰君若伐郑以除君害君为主敝邑以赋与陈蔡从则卫国之愿也宋人许之于是陈蔡方睦于卫故宋公陈侯蔡人卫人伐郑围其东门五日而还秋诸侯复伐郑败郑徒兵取其禾而还朱传以为此诗卫人从军者所作愚谓此当是再伐郑时军中寓书与家人诀别之辞以二章不我以归三章爰居爰处之语知之】

击鼓其镗【阳韵石经说文作鏐丰氏本作□】踊跃用兵【叶阳韵通旁翻】土国城漕我独南行【叶阳韵寒刚翻 赋也镗通作鏐鼓声也踊跃迅也俱见说文严粲云踊跃言喜之意郑玄云此用兵谓治兵时会巩云镗然击鼓踊跃用兵想见州吁好兵喜鬪之状其兴师动众非出于不得已也人所甚惮者州吁之所最乐国人怨之正以其踊跃尔郝敬云击鼓踊跃轻佻之状轻佻者无谋易师之象曰师贞文人吉以兵为戏未有不亡者州吁所以死也按左传记鲁众仲之对隐公曰州吁阻兵而安忍阻兵无众安忍无亲众叛亲离难以济矣夫兵犹火也弗戢将自焚也夫州吁弑其君而虐用其民于是乎不务令德而欲以乱成必不免矣是岁九月卫人杀州吁于濮众仲之言于是始验土土功国中城筑城也漕卫邑左传作曹戴公庐于曹即此一统志云废白马县在今大名府滑县治南本卫之漕邑南行者从军南行伐郑郑在卫之南也卫国之民或役上功于国或筑城于漕非不劳苦而犹处于境内今我独南行则死亡未可知其危苦为尤甚也此章追述始行之辞邹忠胤云按史记卫桓公二年弟州吁骄奢桓公绌之州吁出奔十三年郑伯弟段攻其兄不胜亡而州吁求与之友十六年州吁收聚卫亡人以袭杀桓公自立为卫君为郑伯弟段欲伐郑请宋陈蔡与俱三国皆许之观此则州吁之伐郑盖与段比谋所谓同欲相求如市贾者也】从孙子仲【送韵】平陈与宋【叶送韵读如送苏弄翻】不我以归忧心

有忼【叶送韵敕众翻丰本作 赋也从说文云随行也王粲诗曰从军有苦乐但问所从谁即此从也孙公孙其後因以孙为氏子仲其字序称公孙文仲者文其諡也名无考时军帅也平朱子云和也合二国之好也陈与卫相睦宋与郑有仇卫欲伐郑使宋为主以是时陈尚未从宋故先合二国之好而後进兵也自此以上皆追述前日之语不我以归者先是平陈与宋之後即往伐郑既围其东门五日而还矣未几鲁翬帅师来会复往伐郑自夏而秋仅隔一时耳必师归在途又闻後命未得班师故曰不我以归也忼说文云忧也既言忧又言忼者忧主前日言忼主今日言见其忧之继至而无已也】

爰居爰处【上声】爰丧【去声】其马【韵】于以求之于林之下【马韵 赋也此下皆与家人诀别之语爰说文云引也谓引辞也上章言不我以归则於是居於是处矣居者久居处者暂止未死则当久居死则为暂止总之无还日也下文言林之下是其居处所在也丧失也钱氏云自知必死也不言死唯言丧马盖婉辞严粲云身死则马非我所有唐人诗所谓去时

鞍马别人骑也郝敬云唐诗可怜马上郎意气今谁见本此汝家中之人若欲求我其于林之下乎山木曰林郑玄云军行必依山林求其故处近得之此盖嘱以後事左传蹇叔哭送其子曰晋人出师必于殽必死是间余收尔骨焉即此意也】死生契【陆德明云一作挈】濶【曷韵】与子成说【叶曷韵读如桑曷翻】执子之手【有韵】与子偕老【叶有韵朗口翻】赋也契说文云大约也合以为信故其义为合也濶说文云疏也犹言离也死生契濶盖言夫妇之情死生以之虽时之所遇有合有离而终于不相忘弃此是约誓浑成语子谓其家人成说朱子云谓成其约誓之言偕说文云俱也又相与执手而期以俱老盖欲其有合无离而白首同归也此又成说时缱绻祝愿之意】于嗟濶【曷韵】兮不我活【曷韵】兮于嗟洵【真韵韩诗作夔陆德明云一作询误】

【也】兮不我信【叶真韵升人翻陆云信即古伸字经典通作伸徐锴云假借也】兮【赋也于嗟叹也活生活也洵恂通说文云信也信通作伸舒展之意此承上章而言言人生虽契濶不常然离尚有合之日今则必至死地无相见期矣向者执手之言何如其信今则中道捐弃不能遂其前约矣其忧危如此所以然者则以州吁身犯大逆衆叛亲离有必败之道故也】

击鼓五章章四句【序云怨州吁也卫州吁用兵暴乱使公孙文仲将而平陈与宋国人怨其勇而无礼也今按平陈与宋专为伐郑序但依经为说而不及伐郑亦是漏义】

节南山刺桓王从尹氏助曲沃也【按左传鲁隐公五年桓王之二年也曲沃庄伯以郑人邢人伐翼王使尹氏武氏助之翼侯奔随又据春秋书桓八年天王使家父来聘鲁桓公八年乃桓王之十六年则此诗所云尹氏家父其皆为桓王时人明矣庄伯者文侯仇弟成师之子而翼侯者则文侯孙孝侯之弟也事见扬之水鹁羽等篇桓王轻徇曲沃之请助少陵长不可以训意必尹氏辈实怂恿之故诗以为刺已而曲沃叛王是年秋王复命虢公伐曲沃而立翼侯之子哀侯】

节彼南山维【汉书作惟】石岩岩【咸韵亦叶盐韵疑欬翻陆德明本作严严】赫赫师尹民具尔瞻【盐韵亦叶咸韵侧衍翻】忧心如惓【覃韵韩诗後汉书俱作炎字书丰氏本俱作焱说文作𤇗】不敢戏谈【覃韵】国既卒斩【叶咸韵侧衍翻】何用不监【咸韵兴也节通作岳从山从卩徐锴云山之陬隅高处曰岳凡国都南面所向之山皆可谓南山非终南山也以】

【所见起兴岩通作晷说文云晷晷也岩岩毛传云积石貌郑玄云兴者喻三公之位人所尊严赫赫毛云显盛貌师大师周之三公也尹尹氏为大师李氏云洪范曰师尹惟日此师尹不可指其人如此诗曰尹氏大师是尹氏为太师明矣具通作俱偕也瞻视也孔云尹氏为大师既显盛处位尊贵故下民俱仰尔而瞻之尔既天下所瞻宜当行德以副之按大学引此诗而申之曰有国者不可以不慎辟则为天下戮矣谓任相当慎也忧心家父自写也惓字从心从炎说文云忧也徐锴云如火热也孔丛子载孔子曰於节南山见忠臣之忧世也戏谑谈语也徐锴云谈者和绎而悦言之不敢戏谈言不敢以谈为戏犹云不敢不以正告也卒通作猝暴

疾也斩毛云断也谓国祚中断也监厥监维不远之监通作鉴诫也按竹书载幽王二年锡太师尹氏皇父命则皇父乃今尹氏之先当幽王之世已为太师善状无闻徒与艳妻及多藏之人表里煽结致使国统猝然而绝今日者尹氏复居太师之位岂可不用此以为鉴戒而图盖前愆乎此追述骊山事其为东迁以後之诗明矣】节彼南山有实其猗【叶歌韵於何翻】赫赫师尹不平谓何【歌韵】

天方荐瘥【叶歌韵才何翻说文丰本俱作嗟】丧乱弘多【歌韵】民言无嘉【麻韵亦叶歌韵居何翻】？【陆德明本作嗜】莫惩嗟【麻韵亦叶歌韵曹哥翻丰本作 兴也实毛云满也满乎山者 木是也猗通作倚说文云依也山中卉树丛襍则交加相倚固其宜也今赫赫师尹为百官之长而偏倚不平谓之何哉不平即指助曲沃伐翼之事然不明说出使之自悟後章言秉国之均亦此意谓何者诃而诘之之辞也方者方来未已也荐通作荐尔雅云再也毛云重也按荐即藁也所以藉席故有重义瘥说文云瘥也瘥者病也弘通作弘说文云屋响也屋大则响故为大之义天方降此荐至之病以人则死丧以世则祸乱甚大而且多也兴师助战故有死丧兵争未已故为祸乱嘉说文云美也民丁此丧乱不闻美言但有谤黜而已？说文云痛也家父自言我为民言无嘉深痛朝廷之举动乖方至於如此而尹氏太师绝无惩创之见于事嗟□之形于声恬然自是无改悔之意也金履祥云晋文侯于平王有修扞之功其後嗣为曲沃所弱王室不能救已非矣桓王使尹氏武氏助曲沃於君臣大义邪正一切反之东迁已来诸侯方恣而周之举措如此何以服诸侯之心乎首章第就师尹二字起议此及下章则直指其助曲沃一事而深责之也】尹氏大【音泰】师【支韵】维周之氏【叶支韵陟离翻】秉国之均【汉书丰本俱作钧】四方是维【支韵】天子是毗【支韵尔雅作毗荀子作痺王肃本作埤】俾【荀子作卑陆本作裨】民不迷【叶支韵武夷翻】不吊昊天不宜空我师【见上 赋也尹氏吉甫之後大师三公之首公羊传云尹氏者何天子之大夫也其称尹氏何贬曷为贬讥世卿世卿非礼也何休云世卿者父死子继也氏者起其世也若曰世世尹氏也礼公卿大夫士皆选贤而用之卿大夫任重职大不当世为其秉政久恩德广大小人居之必夺君之威权胡安国云官不择人世授之柄党与既衆威福下移大奸根据而莫除人主孤立而无助国不亡幸尔汪氏云宣王时吉甫已称氏春秋惟尹武公两伐郑书子其余经传所纪悉曰尹氏疑若汉大将军霍氏专权秉政特宠异之而不名也王应麟云春秋於平王之末书尹氏卒见权臣之继世也於景王之後书尹氏立王子朝见权臣之危国也诗之所刺春秋之所讥以此坊民犹有五侯擅汉三马食曹之祸氏毛云本也徐锴云天根也指事按氏二十八宿之一说者谓角亢下系於氏若本之有根故名为天根因借训为本也王安石云朝廷以尊官为氏氏者安危存亡所出也大师尊官也秉持也字从又持禾又者手也以手持禾故其义为持也均说文云平徧也从土从匀平徧意也秉国之均言持国之平犹商相名阿衡亦谓天下所倚平也孙鑛云刺其人却颂其职盖反意责之维者连缀之义毗本作□说文云脐也字从囟囟取气通也按此则天子是毗犹云天子于焉寄心腹也或通作毗辅也徐锴云毗辅字本作毗多借此□字迷说文云惑也惟平则能使民不迷尊尊卑卑长长幼幼各安其分民知所趋向不至迷惑也夫然後不愧为天子之腹心臣而四方侯国亦庶几系属而不散矣孔子曰三军大败不可斩也狱犴不得不可刑也罪不在民故也故先王既陈之以道上先服之若不可尚贤以綦之若不可废不能以单之綦三年而百姓往矣邪民不从然後俟之以刑则民知罪矣诗曰尹氏大师维周之氏秉国之均四方是维天子是庠卑民不迷

又曰上陈之教而先服之则百姓从风矣躬行不从而後俟之以刑则民知罪矣夫一仞之墻民不能踰百仞之山童子升而游焉陵迟故也今是仁义之陵迟久矣能谓民弗踰乎诗曰俾民不迷又曰昔之君子道其百姓不使迷是以威厉而刑措不用也故形其仁义谨其教道使民目晰焉而见之使民耳晰焉而闻之使民心晰焉而知之则道不迷而民志不惑矣按鲁有父子讼者季康子欲杀之孔子以为不可荀子说苑韩诗外传三书所载孔子之言互有出入而皆引此诗今节録之盖所责备于上人之身教者深矣綦当作憇教也单当作瘳病也不吊昊天刺尹氏也吊恤也天方荐瘳而尹氏不恤故曰不吊昊天此与昊天不吊文理自异左传之解甚明详见第六章空犹旷也我师以大师之官言尹氏既不能佐天子以平其政而使民不迷是不恤昊天之谴怒则不宜虚踞其位徒旷我大师之官也严云非其人而处其位与无人同故谓之空一说兴师征伐将恐有败亡之祸是空我师也亦通】弗躬弗亲【叶震韵七刃翻丰本作親】庶民弗信【震韵】弗问弗仕【纸韵】勿罔君子【纸韵】式夷式已【纸韵】无小人殆【叶纸韵养里翻】琐琐【陆云或作璫非也】姻【石经丰本俱作媼】亚【石经丰本俱作娅】则无廌仕【见上 赋也承上章言尹氏之不平固可罪矣而亦繇王之任用而听信之故此章专规王也躬谓王身也王不身亲为政自筹度其可否而一任尹氏之所为此庶民之所以不信服也胡安国云昔周公戒成王以继自今我其立政立事夫不自为政而委于臣下是以国之利器示人而不知宝也左襄七年晋韩献子告老公族穆子有废疾将立之辞曰诗曰弗躬弗亲庶民弗信无忌不才让其可乎请立起也夫穆子身有废疾尚知不躬亲之不可以为政而王乃使尹氏代为之可乎问访问也弗仕谓失位者以下文姻亚廌仕反观之则此时失位者皆贤人也勿戒辞罔论语不可罔也孟子难罔以非其道之罔谓造设机谋以笼络之如?物于网罟之中使之不能自脱也君子指王也勿罔君子责尹氏也王纵不肯下问及弗仕之人以裁度其事理而尹氏顾可以非理之事欺罔王行之乎楚语灵王虐白公子张谏曰齐桓晋文皆非嗣也还轸诸侯不敢淫逸心类德音以得有国近臣谤与人诵以自诘也是以其入也四封不备一同而至於有畿田以属诸侯至于今为令君桓文皆然君不度忧於二令君而欲自逸也无乃不可乎周诗有之曰弗躬弗亲庶民弗信臣惧民之不信君也故不敢不言按诗刺王弗躬弗亲而归咎于弗问弗仕与白公谏楚灵意同式发语辞夷平已止也尹氏之所行固不平矣尚望王平其心止其事也无母通禁止辞下同小人指尹氏武氏辈也殆郑云近也孔云无小人近犹云无近小人也按易其殆庶几乎亦训殆为近疑通作逮逮训为及近之义也又大戴礼子贡云学以深厉以断送迎必敬上友下交银手如断是卜商之行也孔子曰诗云式夷式已无小人殆而商也其可谓不险也此言子夏于交友必慎即无近小人之意琐通作?字从贝从小盖贝之小者故为细小之义舍人云计谋褊狭之貌愚按此即上文所谓小人也以不一其人故曰琐琐下文言有为姻者有为亚者是也尔雅云婿之父谓姻两婿相谓为亚刘熙云曰亚者言每一人取姊一人取妹相亚次也又并来女氏则姊夫在前妹夫在後亦相亚也廌说文云无骨腊也腴美之意位高则禄厚谓之廌仕按都人士之诗称彼君子女谓之尹吉郑氏以为尹氏周室昏姻之旧姓然则此尹氏武氏意必皆凭藉昏连王室以处大位故劝王当择贤而用之不可使此辈滥居要职也往者不可谏来者犹可追王可不亟清政地以回丧乱之运收四方之心乎】昊天不佣【冬韵韩诗丰本俱作庸】降此鞫訥【冬韵】昊天不惠【霁韵】降此大戾【霁韵】君子如届【叶霁韵居例翻】俾民心阒【叶霁韵苦桂翻】君子如夷【支韵】恶【去声】怒是违【叶支韵读如为于妨翻 赋也此章申首章国既卒斩何用不监之意但首章为尹氏言此则为王言耳昊大

也说文以春为昊天尔雅以夏为昊天然尧典命义和统言钦若昊天则未必为春夏之专称也侖说文云均直也降下也鞠通作鞠尔雅云穷也字从言盖谓以言语相穷诘也说文无訇字当通作凶云恶也象地穿交?其中也惠顺也戾毛云乖也大戾犹言大变也不侖不惠皆指幽王之已事而言诗刺幽王信任昏姻而疎远宗族所谓不侖也史记言幽王数欺诸侯诸侯叛之所谓不惠也昊天惟以幽王之所行为不均也故降之以鞠訇谤黷蹶然离心离德也昊天惟以幽王之所行之事为不顺也故降之以大戾身既被弑而周遂东也然则王今日可不知监乎君子与上章君子同皆指王也屈说文云极也阋息也说文云事已闭门也按事已闭门息之意也夷即式夷式已之夷恶怒谓民恶之极而至于怒次章言民言无嘉是也君子如屈二句反上文不侖而言王之信任姻娅如极于此而後勿复然庶使民弗信之心於此而息君子如夷二句反上文不惠而言王所行之政如自今以往能反不平而之平则民之恶怒自去矣劝勉之之辞欲王惩前毖後也】不吊昊天【叶庚韵铁明翻】乱靡有定【叶青韵唐丁翻】式月斯生【庚韵亦叶青韵桑经翻】俾民不宁【青韵亦叶庚韵读如儻漏耕翻】忧心如醒【庚韵】谁秉国成【庚韵】不自为政【敬韵亦叶庚韵诸盈翻礼记作正】卒劳百姓【敬韵亦叶庚韵师庚翻 赋也定止也昊天於幽王之时降訇降戾其鉴戒甚明如此而王曾不少恤故今日丧乱弘多未有所止左传成七年吴伐郢郢成季文子曰中国不振旅蛮夷入伐而莫之能恤无吊者也夫诗曰不吊昊天乱靡有定其此之谓乎有上不吊其谁不受乱吾亡无日矣襄十三年吴侵楚养由基奔命子庚以师继之养叔曰吴乘我丧谓我不能师也必易我而不戒子为三覆以待我我请诱之子庚从之战于庸浦大败吴师获公子党君子以吴为不吊诗曰不吊昊天乱靡有定合观此二传则不吊昊天之解甚明式发语声月生必盈如月复生言幽王之世既乱矣而今乱又方始也俾民不宁即前言弗信言恶怒皆震荡而不安宁之象也忧心如醒家父自道也醒说文云病酒也前云忧心如惓如烈炎之乍炽据时事之乱言也此云忧心如醒如宿酒之未醒则兼幽王时之乱而言也谁秉国成怨问之辞刺尹氏也成犹定也自其公平正大之体而言则曰国均自其纪纲法度有一成而不可变者在则曰国成尹氏能秉国成则不至有今日之事矣不自为政归咎王也前章所谓弗躬弗亲是也百姓与庶民不同古者以官为氏又左传云天子建德因生以赐姓谓建立有德以为公卿因其所生之地而赐之以为其姓故书君奭篇云百姓王人罔不秉德明恤酒诰篇云越百姓里居罔敢湏于酒楚语观射父云民之彻官百王公之子弟之质能言能听彻其官者而物赐之姓以监其官是为百姓愚按此即指尹氏武氏也尹武二氏乃百官之着姓者今王使之帅师助曲沃是烦劳之也兴得已之役故以烦劳嘲之亦微辞】

驾彼四牡四牡项领【梗韵】我瞻四方蹙蹙靡所骋【梗韵 赋也此章刺尹氏承王命出师而行役于外也四牡驾车四牡马尹氏所乘也项说文云头後也领即项四牡项领言四牡之项领整齐可观苏子繇谓好其项领是也驾四牡者必加衡轡于颈上故以项领言我瞻四方二句叹其行无所之也蹙迫也骋直驰也俱见说文尹氏助少凌长其心不平其事不顺四方诸侯闻之方且心非舌刺共加憎恶行将安入乎又徐干云良农不患疆场之不修而患风雨之不节君子不患道德之不建而患时世之不遇诗曰驾彼四牡四牡项领我瞻四方蹙蹙靡所骋伤道之不遇也岂一世哉岂一世哉刘向新序云宋玉事襄王而不见察意气不得形於顔色或谓曰先生何谈说之不扬计画之疑也宋玉曰不然子独不见夫玄猿乎其居桂林之中峻叶之上从容游戏超腾往来龙兴而鸟集悲啸长吟当此之时虽羿逢蒙不得正目而视也及其在枳棘之中也恐惧而掉栗危视而躡行衆人皆得意焉此皮筋非加急而体益短

也处世不便故也夫处世不便岂可以量功较能哉诗不云乎驾彼四牡四牡项领夫久驾而长不得行项领不亦宜乎易曰臀无肤其行趑趄此之谓也按此皆借诗辞为比喻与本旨无涉】方茂尔恶相尔矛【尤韵】矣既夷既怿如相醺【尤韵陆德明本作酬】矣【赋也茂说文云丰盛也尔指尹氏恶谓偏党不平之恶相说文云省视也矛所以刺者夷平怿悦也醺说文云主人进客也毛云犹酌饮也郑云犹今俗人劝酒按主人进酒於客曰献客答主人曰酢主复酌宾曰醺及举旅则又衆相醺此章据周郑之事起议先是郑庄公为平王卿士及平王崩周人将畀虢公政於是周郑交恶今曲沃以郑人伐翼而王又使尹氏武氏助之时尹氏方有宠于王必是以一己爱憎私意播弄其间故家父责之曰当尔恶意方逞视尔之於郑不难推刃相加故使王恶郑也及尔忿怒既平转为悦怿则如饮酒者主宾相酬而不倦然何爱憎之至变如此夫周之东迁晋郑焉依前此王之恶郑也固为恶其所不当恶今郑与曲沃同恶相济王不致讨而反助之亦为助其所不当助矣】昊天不平【庚韵】我王不宁【叶庚韵漏耕翻丰本作寔】不惩其心覆怨其正【叶庚韵诸盈翻 赋也师尹不平将来必致昊天不平言天怒也俾民不宁其究必至吾王之不宁言王危也天怒君危皆自尹氏之私心酿之可以憬然而改图矣而莫惩者犹故反自以为是而怨人之规正于尔谓之何哉】家父【音甫】作诵【叶冬韵墙容翻又杨慎云诵音松淮南书赤松子作赤诵子】以究王讟【冬韵】式【新语作或】讹尔心以畜【新语作蓄】万邦【叶冬韵悲恭翻赋也家父周大夫何休以家为采地因以为氏父其字也春秋桓八年天王使家父来聘十有五年天王使家父来求车皆作诗後事家父刺尹氏之不平不憚激怒于君相盖竭忠于王室者曾几何时风节顿隳至于曲徇王命而有求卓之失人品之难持如此可畏哉诵说文云讽也又周礼注云背文曰讽以声节之曰诵作诵谓作此可诵之辞即此诗是也孔云诗人之情不一或微加讽谕或指斥惩咎或隐匿姓名或自显官字家父尽忠竭诚不憚诛罚故自载字焉寺人孟子亦此类也王应麟云吉甫作诵美诗以名著者也家父作诵以究王讟寺人孟子作为此诗刺诗以名著者也为吉甫易为家父孟子难又邹忠胤云其诗谏尹氏而非谏王故无嫌自称其字究说文云穷也讟即凶字以究王讟者家父自陈其作诗之意欲王听家父之言则王之凶祸当穷止于此庶国不至复斩耳式讹尔心二句又为叮嘱尹氏之辞式语声讹尔雅云化也犹今人言洗涤肠胃也上章言不惩其心为指尹氏则此言式讹尔心其指尹氏可知旧说谓指王非是畜养也畜万邦犹云怀诸侯治其乱使上下相安持其危使大小相恤皆畜养之事也尹氏非尽化其从前不平之心必不能为此而王向之失于偏听轻任者闻此可以觉悟矣左昭二年晋侯使韩宣子来聘公享之季平子赋节之卒章】

节南山十章六章章八句四章章四句【左传子贡传申培说丰氏本篇名俱作节申丰又作八章章八句今按後四章语气恰是四段若合而为二其意反不相属当以章四句为正 董仲舒云周室之衰其卿大夫缓於谊而急於利亡推让之风而有争田之讼故诗人疾而刺之曰节彼南山维石岩岩赫赫师尹民具尔瞻尔好谊则民向仁而俗善尔好利则民好邪而俗败岂可以居贤人之位而为庶人行哉今观篇中絶无一语及争田事惟天方荐瘥说文作荐云残岁田也岂即争田说耶然即如所言亦於义小矣若子贡传第存桓王伐郑家父谏之二语而中有阙文申培为畅其说云桓王之时任用非人诸侯咸叛兵败民残家父忧之作此以谏王焉此亦据春秋以家父为桓王时人遂附会于伐郑之事而於诗刺尹氏竟无着落序则以为家父刺幽王盖亦为篇序所惑又泥于东迁以後不当有雅故不敢以此之家父为春秋之

家父耳愚按幽王时有家伯维宰为褒姒之党彼决不敢刺王若家父之见于诗春秋止是一人则以左传载尹氏之伐翼家父之聘鲁同在桓王之世此其最足徵者也】

雄雉刺卫宣公也军旅数起【出序】室家之人思其君子行役于外而作是诗【左传隐四年冬十二月宣公即位隐五年四月郑人侵卫牧以报东门之役卫人以燕师伐郑郑曼伯与子元以制人败燕师于北制秋卫师入郕隐十年秋宋人卫人入郑又伐戴桓五年王以诸侯伐郑虢公将右军卫人属焉桓十年诸侯之大夫戍齐齐人馈之饩使鲁为其班後郑郑人怒请师于齐齐人以卫师助之战于郎凡此皆宣公在位军旅数起之事也是诗之作不知其何时愚意必为以燕师伐郑而?此室家所思之君子即所使乞师于燕之人也宣初即位当以休养民生为急而仍蹈州吁往辙报复无已伎求之刺其殆是与】

雄雉于飞泄泄【石经作泄泄】其羽【叶语韵读如雨於许翻】我之怀矣自诒【释文作贻】伊阻【语韵兴也雄说文云鸟父也雉解见匏有苦叶篇雉之雄者有冠长尾身有文采善鬪陆佃云雉死耿介妬垄护疆善鬪虽飞不越分域一界之内要以一雄为长余者虽衆莫敢鸣雉潘岳所谓画坟衍以分畿者也周官曰士执雉士死制故执雉所谓二生一死贄者也泄通作曳牵曳也愚按雉妬垄护疆虽飞不越分域故有牵曳之象今大夫以军事远行于外则是雉之不如也怀说文云念思也思其夫也诒通作贻说文云赠遗也伊郑玄云当作繫繫犹是也阻险难也指军旅之事而言此行役者必当时在朝同与谋议以啓兵端故其妻咎之曰自诒也左传赵宣子曰呜呼我之怀矣自诒伊戚其我之谓矣自诒伊戚与自诒伊阻语气正同而彼二句不见于经杜预以为逸诗愚疑阻改为戚或传写譌也】

雄雉于飞下上其音【侵韵】展矣君子实劳我心【侵韵兴也严粲云诗人之言不必尽同燕燕言下上其音谓双燕相追逐而飞鸣也此言雄雉下上其音则止是一雉之音或下或上也愚按雌飞不越分域故其鸣音近而可闻今大夫远行在外则无音之可闻矣展说文云转也君子谓其夫也展转在怀惟此仰望终身之君子实使我心忧劳而不置也所以劳我心者诚虑其挑衅贾祸非徒牵於闺门之爱而已】

瞻彼日月悠悠【说苑作遥遥】我思【叶灰韵新才翻】道之云远曷云能来【灰韵赋也程子云日月取其迭往迭来之意又日月陰阳相配而不相见且旦暮所见动人情思悠说文云忧也严粲云视日月之往来则君子之从役积时已久矣使我心悠悠然思之道路之远如此不知何时能归乎又家语载孔子谓季孙曰今世之陵迟亦久矣而能使民勿踰乎因引此诗而曰伊稽首不其有来乎其意谓若施德化使下人稽首归向虽道远必有来者然则此章乃刺宣公不务德以来远人即下章规其不伎不求之意并存之】百尔君子不知德行【叶阳韵寒刚翻亦叶漾韵合浪翻】不伎不求何用不臧【阳韵亦叶漾韵才浪翻赋也百犹凡也百尔君子泛及同时在位者而言德在内主于心行在外主于行伎说文云恨也毛传云害也求通作述说文云歛聚也臧善也言告尔有位之君子我妇人亦不知如何为德行也我但知人若不伎恨而伤害于人不贪求而歛聚非有则何往而不善乎刺当时之不然也夫不伎不求则臧苟徒以伎求为事则必不臧矣言外深有为宣公虑患之意而亦虑其君子之及所以劳心于伊阻之自诒而悠悠不能已也胡安国云春秋之时用兵者非怀私复怨则利人土地耳不伎则能惩忿不求则能窒慾然後贪忿之兵亡矣朱善云不伎不求此孔门克己之术求仁之方而妇人能言之其亦可谓贤也已子曰衣敝緼袍与衣狐貉者立而不耻者其由也与

不忮不求何用不臧子路终身诵之韩诗外传云喜名者必多怨好与者必多辱唯灭迹于人能随天地自然为能胜理而无爱名名兴则道不用道行则人无位矣夫利为害本而福为祸先惟不求利者为无害不求福者为无祸诗曰不忮不求何用不臧又云聪者自闻明者自见聪明则仁爱着而廉耻分矣故非道而行之虽劳不至非其有而求之虽强不得故智者不为非其事廉者不求非其有是以害远而名彰也诗曰不忮不求何用不臧又云安命养性者不待积委而富名号传乎世者不待势位而显德义畅乎中而无外求也信哉贤者之不以天下为名利者也诗曰不忮不求何用不臧】

雄雉四章章四句【序云刺宣公也淫乱不恤国事军旅数起大夫久役男女怨旷国人患之而作是诗今按此诗但是妇人思君子从役於外如朱传之说而絶无讥及淫乱之意毛郑欲牵经以配序至谓下上其音兴宣公大小其声怡悦妇人可笑甚矣子贡传申培说皆以为大夫諫管叔之诗然观此诗以雄雉起兴而又曰展矣君子实劳我心及瞻彼日月一章自是妇人思夫之语】

新台刺卫宣公也纳汲之妻作新台于河上而要之齐人闻而恶之【按左传初卫宣公烝于夷姜生急子属诸右公子职为之娶于齐而美公取之是谓宣姜即此事也宣公名晋庄公之庶子桓公之弟也以周桓王二年即位实鲁隐公之五年也史记载汲寿争死事在宣公十八年计其纳宣姜当在初即位时汲急古字通用严粲云自齐人言之故以籛篠戚施诋卫君而无嫌非卫人之辞也】

新【子贡传申培说丰氏本俱作亲下同】台有泚【叶纸韵浅氏翻说文作玼云玉色鲜也】河水弥弥【纸韵】燕【文选注作嬾说文作𪔐云目相戏也丰氏本作𪔐下同】婉之求籛篠不鲜【叶纸韵想止翻 赋而比也尔雅云四方而高曰台水经注云鄆城北岸有新台寰宇记云在濮州鄆城县北十七里苏辙云国人疾宣公而难言之故但识其台之所在而已孔颖达云此时汲妻盖自齐始来未至于卫而公闻其美恐不从己故使人于河上为新台待其至于河而因台所以要之耳若已至国则不须河上要之矣泚说文云清也新台有泚言新台之下有此泚然之清水也弥说文云水满也水所以洁污秽公反于河上而为淫昏之行虽挹彼洪流安能涤之乎登兹台可以愧矣燕安婉顺也俱见说文燕婉谓汲也籛篠说文以为鼃竹席顔师古云织蓆而鼃文者方言云关西谓之簞其粗者谓之籛篠按籛篠人或编之为困其状如人之拥肿而不能俯者故以名不能俯者之疾与末章戚施皆借以丑宣公非真有此疾也鲜通作癬说文云乾疮也其物善侵淫移徙亦恶疾也言齐女之来固将求为燕婉者之匹若彼丑恶之人何不婴被重疾而顾使能为新台之游以逞其淫秽之行乎甚恶之之辞】新台有洒【叶铎韵苏典翻与洗字通韩诗作濯云鲜貌丰本同】河水浼浼【叶铎韵亡辨翻韩诗作泥泥云盛貌丰本同】燕婉之求籛篠不殄【铎韵 赋而比也洒说文云涤也新台有洒言新台之下有水来洒涤之也按尔雅云望厓洒而高岸洒义同此浼说文云污也诗缉云浼浼水浊流貌台下之水甚深而公为淫昏之行累此河水亦浼浼然受其污也殄说文云尽也尔雅云絶也言此等丑恶之人天何不尽絶之也至此而恶之之辞为益甚矣一说鲜少也殄絶也诗意盖曰方将燕婉是求岂意世固不乏籛篠者哉亦通】鱼网之设鸿则离【支韵】之燕婉之求得此戚施【支韵戚施说文作𪔐?韩氏集韵作𪔐?杨氏古音略作𪔐?比而赋也】

纲说文云庖牺所结绳以渔鸿鴈之大者离易云丽也设鱼网者宜得鱼鸿反丽焉所得非所求也鱼比汲鸿比宣公戚施人之不能仰者亦丑疾也又太平御览载薛君云戚施蟾蜍也杨慎云蟾蜍形大背上多痂磊行极迟缓不能跳跃亦不解鸣多在湿处故诗人以况宣公老而无耻之状说文引诗作??即此物也以??为戚施其音之转乎又按尔雅云籛籛口柔戚施面柔孔云籛籛戚施本人疾之名晋语籛籛不可使俯戚施不可使仰是也但人口柔者必仰面观人之颜色而为辞似籛籛不能俯之人因名口柔者为籛籛面柔者必低首下人媚以容色似戚施之人因名面柔者为戚施而季本不以为然以为籛籛龟匈之疾戚施驼背之疾盖卫晋以舅为君初至新台时则以尊临卑外为尊大之态如籛籛然其後见齐女有未顺者则俯而求之极其卑屈如戚施矣故卫人形容其情状如此新台二章本在台言而皆曰籛籛鱼网鸿离一章则言戚施义各有当也真德秀云宣公既纳汲妻而杀汲寿自汲寿死而国俗败子顽象之上烝君母君臣父子之行皆同於禽兽卫国之俗亦与之俱敝安得狄人之祸不乘之以作乎夫狄人非能灭卫国也以卫君自为禽兽而後狄人得以肆焉乱亡之自兆也原宣公之初亦溺於情欲而不能制耳安知其祸若此之烈哉三山李氏云圣人存此以垂戒後世宜惩其辙而乃有踵其恶者楚平王纳太子建妻唐明皇纳寿王妃此三君者其恶一也其後宣公之子汲寿为贼所杀惠公奔齐子懿公为狄所灭楚平王有鞭尸之祸唐明皇身窜南蜀几失天下则知淫乱之祸其报如此可不戒哉】

新台三章章四句【子贡传作亲台申培说作親台序谓刺卫宣公也云云国人恶之而作是诗也朱传从之申培说亦云卫宣公为汲娶妇而美筑親台而自纳之卫人恶之而赋其事子贡传但云卫宣公纳汲之妻国人恶之今按国人即恶其君未必敢显然自为籛籛戚施严氏之说固自中理】

蝮螫刺卫宣公夺太子汲妇也亦齐人所作【史记卫世家云初宣公爱夫人夷姜夷姜生子汲以为太子而令右公子傅之右公子为太子取齐女未入室而宣公见所欲为太子妇者好说而自取之更为太子取他女今按此诗及新台皆为此事而作新台作于宣姜初至卫之时此诗作于宣姜既配公之後所以知为齐人语者以怀昏姻也大无信也二语知之】

蝮【尔雅说文作蝮】螫在东【皮日休云鸳鸯在梁蝮螫在东即後人叠韵之始】莫之敢指【纸韵】女子有行远父母兄弟【叶纸韵荡以翻 兴而赋也蝮螫通作蝮螫毛传云虹也尔雅云蝮螫谓之雩郭璞云俗名为美人音义云虹双出色鲜盛者为雄雄曰虹闇者为雌雌曰蜺虹色赤白蜺色青白春秋元命苞云陰阳之气聚为云气立为虹蜺离为倍僂分为抱珥曹氏云淮南子曰天二气则成虹说者谓陰阳相干也盖陰气积而上升日光映之乃成虹庄子云阳炙陰成虹刘公瑾云虹之为质不映日不成盖云薄漏日日映雨气则生也今以水曜日亦成青红之晕刘熙云虹攻也纯阳攻陰气也又云淫风流行男美于女女美于男恒相奔随之时则此气盛按尔雅蝮螫名雩夫雩以祈雨也谓之雩者犹言雨与不雨尚未定也在东者暮虹也虹随日所映故朝在西而暮在东也蔡邕云夫陰阳不和昏姻失序即生此气虹见有青赤之色常依陰云而昼见于日冲无云不见太陰亦不见见辄与日相互率以日西见于东方故诗曰蝮螫在东蝮螫虹也刘熙云蝮螫其见每于日在西而见于东掇饮东方之水气也顾起元云云心漏日日脚射云则虹特明俗谓之蜺谚谓东蜺日头西蜺雨信然大率与霞

相映朝霞不出市暮霞走千里是也指以手指之也莫之敢指者深恶而讳及之也陆佃云夫水气之在天成虹天之淫气尔尚且恶之如此而况于人乎愚按蝮螭在东所以拟卫宣也宣年老比日薄西山矣而淫恣不已犹蝮螭为天之淫气见于日在西之时也陰阳不和不能降雨泽犹之昏姻失序不能成家道也女子指宣姜也有行谓嫁也女子有行与父母兄弟相隔远矣公於是无所顾忌因取而自纳之耳韩诗传云臣子为君父隐藏故言莫之敢指又曰乃如之人兮】朝【丰氏本作鼃下同】隤于西【按隤西亦叠韵】崇朝其雨【震韵】女子有行远兄弟父母【叶震韵满补翻 兴而赋也隤本作跻尔雅云陞也按周礼眡衽掌十輝之法以观妖祥辨吉凶一曰?二曰象三曰镌四曰监五曰闇六曰瞢七曰弥八曰叙九曰隤十曰想孔穎達云隤虹隤也絲升气所为故号虹隤朱子云盖忽然而见如自下而升也崇之言终音之近也从旦至食时为终朝朝隤于西拟宣姜也姜年少正如朝日在东之时而与宣公为配耦犹蝮螭之朝升于西虽能成雨然不过终朝止耳以女妻配老夫暂尔欢娱其能久乎女子有行远在异国兄弟父母不能为谋而使之失身至此深惜之也上先父母此先兄弟变文叶韵非有他义】乃如之人【真韵】也【韩诗外传作兮说苑无也字】怀昏姻【真韵丰氏本作嫺】也大无信【叶真韵息邻翻】也不知命【叶真韵眉辛翻】也【赋也乃如之人指卫宣也怀犹恋也礼记疏云壻曰昏妻曰姻壻以昏时而来女则因之而去此云怀昏姻者言宣公心思恋欲与宣姜谐昏姻之事也宣公为其子求昏于齐竟自取之是与其初约相背故曰大无信也命者人所稟于天之正理子思所云天命之谓性也纵欲恣情不顾礼义裂衣裳为毛羽贬人类于禽兽如宣公者彼岂知稟受之初有所谓天命之理哉故曰不知命也又按韩诗外传及刘向说苑云天地有合则生气有精矣陰阳消息则变化有时矣故人生而不具者五目无见不能食不能行不能言不能施化三月達眼而後能见七月生齿而後能食期年生髡而後能行三年顴合而後能言十六精通而後能施化陰阳相反陰穷反阳阳穷反陰故男八月生齿八岁而齔齿十六而精化小通女七月生齿七岁而齔齿十四而精化小通是故阳以陰变陰以阳变故不肖者精化始具而生气感动触情纵欲故反施乱化是以年岁亟夭而性不长也诗曰乃如之人也怀昏姻也大无信也不知命也贤者不然精气闾溢而後伤时之不可过也列女传亦云大无信也不知命也言嬖色殒命也按此皆以命为寿命之命盖古说云尔然于义肤矣】

蝮螭三章章四句【序云止奔也卫文公能以道化其民淫奔之耻国人不齿也朱谋玮云文公惩卫之难繇乎纵欲忘礼故为是诗使瞽朝夕讽诵于宫闈之内以示教戒焉今按是诗之属于文公时无所依据序诗者或以其篇次在定之方中之後从而附会之耳韩诗传则云刺奔女也诗人言蝮螭在东者邪色乘阳人君淫佚之徵虽亦近似然莫能定其为何世至子贡传申培说皆以为卫灵公为南子召宋朝于宋国人讥之按太白诗云汉祖吕氏食其在旁秦皇父后毒亦淫荒蝮螭作昏遂掩太阳似与其意脗合然灵公之世已在春秋之末圣人删诗疑未及此】

君子偕老刺卫宣姜之诗【出申培说朱传同 子贡传亦以为宣姜不闲于礼卫人风之按宣公夺公子汲之妻其後遂称宣姜则俨然为君夫人矣序以君子偕老?端故知为刺宣姜也】

君子偕老副笄六珈【叶歌韵居何翻】委委【尔雅音义作禕禕】佗佗【歌韵尔雅音义

作它它释文作他他】如山如河【歌韵】象服是宜【叶歌韵牛何翻】子之不淑【丰氏本作叔】云如之何【歌韵 赋也君子指宣公也凡妇人称夫为君子偕俱也倡随大义从一而终所谓偕老也此一句正指宣姜言若曰之人也是君子之所将偕与俱老也云尔副者祭服之首饰毛传云编发为之按周礼追师掌王后之首服为副编次追衡笄注云副之言覆所以覆首为之饰其遗象若今之步摇矣服之以从王祭祀编者编列他发为之其遗象若今假紒服之以告桑也次者髣他发而次第其长短与己发相合为紒服之以见王也追者治玉石之名谓治玉为衡笄即诗追琢其章之追衡笄郑玄以为二物其制皆以玉为之谓祭服有衡垂于副之两旁当耳其下以紒县瑱孔氏以左传衡紒紒証之谓紒与衡连文明言紒为衡设矣然衡者横也笄横据在头上以横贯为横此衡垂在副旁当耳据人身而言豎为从则此衡为横其衡下乃以紒悬瑱也愚按如孔说大是强解左传虽衡紒连言然自是两事如下言紒紒是纓从下而上者紒是冠上覆之玄布何相涉之有且衡之为制既言垂于副之两旁何得名衡据郑衆杜预解衡但谓维持冠者愚意左传言衡直是指笄而周礼衡笄连文亦正谓笄横贯在头上故名之谓衡笄耳男子之笄以维持冠妇人之笄则以固发所以知后笄用玉者以弁师王之笄以玉故知后与王同也侯夫人无考珈说文云妇人首饰毛传云珈笄饰之最盛者所以别尊卑郑笺云珈之言加也孔云以珈字从玉则珈为笄饰繇副既笄而加此饰故谓之珈如汉之步摇之上饰也言六珈必饰之有六据此侯夫人为六王后则多少无文也季云笄本妇人之常饰惟副之珈则后夫人有之卿大夫以下妻所无也钱氏云今人步摇加饰以珠饰之少者六多者倍蓰至三十六据诗云六珈然则古玉数凡六也按後汉书輿服志云皇后步摇以黄金为山题贯白珠为桂枝相缪一爵九华熊虎赤黑天鹿辟邪南山丰大特六兽诗所谓副笄六珈者诸爵兽皆翡翠为毛羽金题白珠璫绕以翡翠为华云疑未必古制也委说文云委随也字从女从禾徐锴云女子从人者也徐铉云取禾谷垂穗委曲之貌佗说文云负荷也愚按委委以状其行步之美佗佗则指其首容所负荷者而言即副笄六珈是也朱子云如山安重也如河寛广也又季云山河卫国之疆域故特举以明同主山川之意象服即下章翟也孔云翟而言象者象鸟羽而画之故谓之象以人君之服画日月星辰谓之象故知画翟羽亦为象也宜说文云所安也子谓夫人也淑通作倬说文云善也此章及次章皆以祭服为言以见夫人承宗祧之重不可慢易轻佻况祭祀家庙其礼尚严神实鉴之必有委委佗佗如山如河之度而後可与象服相宜有如子而不淑谓此象服何哉盖惜其不称也咏叹讽动优柔不迫旧说径以子之不淑二语为指斥之词似未是】玼【陆德明云本或作璫与後文同不容重出】兮玼兮其之翟【叶霁韵都计翻】也鬢【说文作𩇑】发如云不屑髢【霁韵周礼注作鬢】也玉之瑱也【说文作兮】象之揅【霁韵陆德明云一作摘音同或作撻又作摘并非】也扬且【子余反】之皙【按皙字系锡韵无霁韵疑当作皙从折不从析诗明星皙皙易明辨皙也皆此皙也霁韵】也胡然而天也胡然而帝【霁韵】也【赋也玼说文云玉色鲜也王肃云顔色衣服鲜明貌上章言子指宣姜此言其者承上文也翟山雉尾长者取以为衣名按周礼内司服掌王后之六服褱衣揄狄阙狄鞠衣展衣缘衣注云褱当作翟揄与摇同狄与翟同皆雉名伊雒南雉素质五色皆备成章曰翟江西南雉青质五色皆备成章曰摇褱衣画翟揄翟画摇阙则刻缋为翟形而不画褱衣从王祭先王之服色玄揄翟从祭先公服色青阙翟祭小祀服色赤孔云凡诸侯夫人於其国衣服与王后同上公夫人得褱衣以下褱衣从君见大祖揄翟从君见羣庙阙翟从君祭羣小祀侯伯夫人得揄翟以下揄翟见大祖及羣庙阙翟祭羣小祀又郝敬云阙狄丧大记作屈狄栖?曰屈狄有揄屈犹袞龙有

升降也郑玄云三翟以翟雉之形为饰不用真羽孙毓云自古衣饰山龙华虫藻火粉米及周礼六服无言以羽饰衣者羽施于旌旗盖则可施于衣裳则否盖附人身动则卷舒非可以羽饰故也鞠菊通黄衣也告桑事之服展玉藻作襜说文作𦃟云丹縠衣也毛传亦云礼有展衣者以丹縠为衣与说文合当从之礼见王及宾客之服缘当作祿御于王之服色黑此后六服也又按郑司农谓褱衣玄揄翟青阙翟赤展衣白鞠衣黄祿衣黑而孙毓以为褱衣赤阙翟黑展衣赤其揄翟鞠衣祿衣同俱未详所出姑两存以备考此翟依郑说则揄翟阙翟也与上章言副皆祭祀之服鬢说文云发稠也郑玄云发黑也二义兼之以下曰如云则稠密之象又天油然作云亦黑象也屑说文云动作切切也髣亦作鬣说文云髮也宣姜发美无资于髣故不切切于用髣也瑱说文云塞耳也以玉为之亦曰充耳周礼弁师职云侯玉瑱夫人与君同也象象齿也掬所以摘发因以为饰一云以象骨搔首若今篦儿一云整发钗也未详孰是玉瑱礼服所有象掬礼服所无今并用之亦非礼也扬说文云飞举也且朱子云助语辞哲通作哲说文云昭哲明也言扬又言哲形容其轩昂开爽之状想其瞻矚举止风流照映正舆如山如河之象相反而又致讶于天帝胡然生有此人盖叹其为尤物也礼记疏云据其在上之体谓之天因其生育之功谓之帝帝为德称是也旧说以为言其服饰容貌之美见者惊犹鬼神如唐人咏太真诗云若非羣玉山头见会向瑶台月下逢然匹天帝于妇人?斯甚矣】 嗟兮嗟兮其之展【叶先韵也张连翻】蒙彼绉絺是继【说文作𦃟今石经作絺】袼【叶先韵汾洽翻】也子之清扬扬且【子余反】之顔【叶先韵倪坚翻】也展如之人兮邦之媛【叶先韵子权翻韩诗作媛】也【说文作兮赋也嗟说文云玉色鲜白也展展衣解见次章展衣色赤而云嗟兮者盖象下文绉絺之色而言如从郑司农以展衣为色白则嗟兮又即象展衣之色矣宣姜以礼见君及宾客宜服展衣蒙通作冢说文云覆也绉絺郑笺云絺之蹙蹙者孔云絺者以葛为之精曰絺麓曰紕其精尤细靡者绉也言细而缕绉也按周礼六服之外原有素沙郑注谓素沙为六衣之里据襍记云复用素沙其非衣里明矣所谓蒙彼绉絺乃展衣上加绉絺蒙之即素沙也郝敬云素沙即白纱所以加于衣上者尚絅之意古妇人盛服以薄绡蒙于外凡缵薄细者皆称絺即今方目纱之类不独葛也继说文云系也袼说文云衣无色也一云近身衣也故其字从衣从半即所谓?衣也清视清明也扬解见上章顔说文云眉目之间也扬且之顔者言其飞举之象见於眉目之间也展据周礼注即其之展也之展谓展衣也展如之人兮言服展衣者有如此人也尔雅云美女为媛说文云人所媛也从女从爰爰者引也谓其徒有美色而无小君之德至以邦之媛斥之其刺之益深切矣欧阳修云诗人之意责之愈切则其言愈缓君子偕老是也郑樵云诗有美刺者不可以言语求必将观其意可矣其颂美是人也不言其所为之善而言其冠佩之华容貌之盛而民安之以见其无愧也緇衣之宜兮服其命服朱芾斯皇是也其讥刺是人也不言其所为之恶而言其爵位之尊服饰之美而民疾之以见其不堪也节彼南山维石岩岩君子偕老副笄六珈是也】

君子偕老三章一章七句一章九句一章八句【序谓刺卫夫人也夫人淫乱失事君子之道故陈人君之德服饰之盛宜与君子偕老也朱子云此诗所以作亦未可考愚按今以诗之世论之则舍宣姜无足当此者硕人之诗虽赞美容貌颇复相似而此曰子之不淑又曰邦之媛也其非所以施之庄姜明矣】

静女刺时也卫君无道夫人无德【出序 子贡传云时不尚德陈古以风之申培说亦云陈古

讽今之诗而皆不着其世严粲以为此宣公时诗按宣公上烝父妾下纳子妇淫秽已极国人不欲斥言故托言思静女以为刺亦犹车鞳之思淑女也郑玄云以君及夫人无道德故陈静女遗我以彤管之法】

静女其姝【虞韵董氏云隋得江左本作 丰氏石经本亦作 】俟我於【韩诗外传作乎】城隅【虞韵】爱【说文石经及丰氏本作僂云彷彿也方言注引作夔云掩翳也】而不见搔首踟蹰【虞韵踟蹰文选注作踟躇 赋也静通作娉说文云亭安也以德言故曰静女姝说文云好也此赞其色言既有德而又有色也俟通作俟说文云待也待君命也周礼王城高七雉隅九雉隅说文云隅也吕大临云古之人君夫人媵妾散处後宫城隅者後宫幽闲之地也女有静德又处于幽闲而待进御此有道之君所好也故张敬夫诗云後宫西北邃城隅俟我幽闲念彼姝爱而不见二句俱指静女言爱通作僂说文云彷彿也搔说文云括也括者絜也搔首即束发之谓也踟本作峙从止寺声从止者止而不进也右施寺与待同意蹰本作?说文云峙?不前也静女安处于後宫幽闲之地以待君命虽彷彿见其容貌而犹未得见方且庄其首容峙?而未遽进其守礼如此】 静女其变【铕韵亦叶寒韵落官翻】贻我彤管【叶铕韵古转翻亦叶寒韵古丸翻】彤管有炜【叶纸韵读如委鄢毁翻】说【释文作悦】恠女美【纸韵 赋也变说文云慕也静女其变言此女之可慕也贻说文云赠遗也彤说文云丹饰也彤管郑玄云笔赤管也毛传云彤管以赤心正人也古者后夫人必有女史彤管之法史不记过其罪杀之后妃羣妾以礼御于君所女史书其日月授之以环以进退之生子月辰则以金环退之当御者以银环进之着于左手既御着于右手事无大小记以成法孔颖达云此是女史之法似有成文未闻所出或谓古以刀为笔未有用毫毛者安得有管故书谓之画盖以刀笔刻画于简至秦蒙氏始以毫毛制笔故汉以来始有竹简写之之说丰坊辨之云夫以刀刻木乃包羲史皇书契之始至黄帝命沮诵为史以漆书记事于竹简以墨书记言于帛漆则削竹如筴以点之故有科斗之形墨必用有毫之管然後可书于帛孔子修春秋笔则笔削则削削谓以刀除去竹简之漆书笔则以墨书于帛也世传蒙恬作笔谓始用中山兔毫前所用者羊豕之毛而已若用刀于帛岂不百碎焉能成字耶按贻我彤管盖静女以此寓规谏之意进御以叙有过必书是也晋张华尝假女史作箴其辞曰茫茫造化二仪既分散气流形既陶既甄在帝庖羲肇经天人爰始夫妇以及君臣家道以正而王猷有伦妇德尚柔含章贞吉婉孌淑慎正位居室施衿结褵?恭中馈肃慎尔仪式瞻清懿樊姬感庄不食鲜禽卫女矫桓耳忘和音玄熊攀檻冯媛趋进夫岂无畏知死不恠班妾有辞割驩同辇夫岂不怀防微虑远道罔隆而不杀物无盛而不衰日中则昃月满则微崇犹尘积替若骇机人咸知饰其音而莫知饰其性性之不饰或愆礼正斧之藻之克念作圣出其言善千里应之苟违斯义则同衾以疑出言如微而荣辱繇兹勿谓幽昧灵鉴无象勿谓玄漠神听无响无矜尔荣天道恶盈无恃尔贵隆隆者坠鉴于小星戒彼攸遂比心螽斯则繁尔类驩不可以黷宠不可以专专实生慢爱极则迁致盈必损理有固然美者自美翩以取尤冶容求好君子所讐结恩而絶职此之繇故曰翼翼矜矜福所以兴靖恭自思荣显所期女史司箴敢告庶姬此亦贻彤管之意但诗在规人君而彼则专主戒後宫耳炜说文云盛赤也女指君所悦之女非谓静女也静女以彤管贻君则固将以礼坊君矣然虽覩彤管之有炜记过记动何如可畏而我心喜悦在於女之美有非彤管之所能遏者盖情欲在人其易?而难制类若此左传引静女之三章取彤管焉杜预注云虽悦美女义在彤管女史记事规诲之所执】

自牧归荑洵【释文作询】美且异【寘韵】匪女之为美美人之贻【叶寘韵羊至翻 比也自从也尔雅云郊外谓之牧周礼三曰藪牧小雅我出我车于彼牧矣是也张子云牧牧地也不耕种之牧地则多草木根芽归犹献也归孔子豚之归韵会云茅之始生曰荑今人食之谓之茅堰诗手如柔荑或作稊列子因以为茅靡一作弟靡弟读如稊荑与弟稊一也易曰藉用白茅盖茅本洁白之物况荑乃茅之始生者采之自郊外以比美女自外至而进之君也洵通作恂说文云信也洵美且异言其美色信异於人也匪通作非女之为美即上章所云女美也人指静女贻即贻我彤管之贻美女虽有色可悦而不若静女之所贻者能以礼坊君不纳於淫也故申之曰女之美何足美如若人以彤管贻我乃可美耳次章所云静女其变者以此今卫君与夫人不则德义而惟淫佚是闻何无有静女其人者以彤管规诲之也乎】

静女三章章四句【朱子以为此淫奔期会之诗贻我彤管岂淫奔人语耶】

相鼠卫夷姜谄宣公也【班固白虎通云夫妇荣耻共之诗云相鼠有体人而无礼人而无礼胡不遄死此妻谏夫之诗也愚按妻之谏夫至欲以身殉之其情可谓极矣此诗在卫风中虽不着作者之名然考左传卫宣公烝於夷姜生急子其後为之娶于齐而美公取之生寿及朔於是夷姜缢夫宣烝父妾而夺子妻躬鸟兽之行人之无礼孰过于此夷姜先既失身後复失宠不胜其愤恚之甚因而自裁所谓不死何为其志已先露之矣故定为夷姜之诗亦以合于妻谏夫之说】

相【去声下同】鼠有皮【支韵】人而无仪【支韵丰氏本作义下同】人而无【汉书作亡】仪不死何为【支韵 比也相说文云省视也鼠穴虫也似兽善窃昼伏夜动人见其形而恶之故首以皮言仪容也凡举动之可观者皆是左传云有仪可象谓之仪人无威仪则衣冠扫地而躯殼徒存亦犹鼠之仅有皮耳甚丑之也严粲云旧说鼠尚有皮人而无仪则鼠之不若以人之仪喻鼠之皮非也说诗全在点掇此繇误加尚字耳尚字当作只字言鼠则只有皮人则不可以无仪人而无仪则何异于鼠如此语意方莹点掇人而二字分晓人亦天地一物耳饥食渴饮无休时若非道义充其腹何异鸟兽安须眉即此意也愚按上人而无仪是泛言为人不可以无仪下人而无仪则谓其夫之无仪也此夷姜刺宣公之词也彼人而既无仪若此矣我不幸而身既为彼所污又为彼所弃不死欲何为哉词若决絶而意寓感动此班固所以谓妻谏夫之诗也冯时可云地无去天之义妻无去夫之义所谓不死何为者不忍其夫之无礼甘死而不去也左传襄二十七年齐庆封来聘鲁叔孙与庆封食不敬为赋相鼠亦不知也】相鼠有齿【纸韵】人而无止【纸韵】人而无止不死何俟【纸韵 比也按说文鼠字象形徐锴谓鼠好啮伤故象齿又鼠有齿而无牙行露之诗云谁谓鼠无牙是也止释文云止节也言无礼节也鼠偷食苟得而不知止宣公前淫父妾後淫子妻其渔色无厌有如此鼠矣俟通作埃说文云待也】相鼠有体【荠韵】人而无礼【荠韵】人而无礼胡不遄死【叶荠韵少礼翻比也体四体礼者天理之节文所该甚广夫妇人伦之首尤礼之所最重者吉鼠亦能行但有四体而无礼人而无礼则与鼠之行走何异遄尔雅云疾也今人而既以无礼加我矣奈何不速死乎未几而姜果自缢姜固无足道者然卫宣之丑则已甚矣圣人録刺宣之诗不一而足甚恶之也文礼记孔子曰夫礼先王以承天之道以治人之情故失之者死得之者生诗曰相鼠有体人而无礼人而无礼胡不遄死是故夫礼必本于天殽于地列于鬼神達

於喪祭射御冠昏朝聘故聖人以禮示之故天下國家可得而正也韓詩外傳載孔子曰為上無禮則不免乎患為下無禮則不免乎刑上下無禮胡不遄死左傳定八年晉師將盟衛侯于剡澤涉佗援衛侯之手及挽衛侯怒叛晉十年晉人討衛之叛故曰繇涉佗遂殺涉佗君子曰此之謂棄理必不鈞詩曰人而無禮胡不遄死涉佗亦遄矣哉昭三年鄭伯如晉公叔段相甚敬而卑禮無違者晉侯嘉焉授之以策君子曰禮其人之急也伯石之汰也一為禮于晉猶荷其祿況以禮終始乎詩曰人而無禮胡不遄死其是之謂乎晏子春秋云景公飲酒酣曰今日愿與諸大夫為樂飲請無為禮晏子蹙然改容曰君之言過矣羣臣固欲君之無禮也力多足以勝其長勇多足以弑君而禮不使也禽獸矣力為政強者犯弱故曰易主今君去禮則是禽獸也羣臣以力為政強者犯弱而曰易主君將安立矣凡人之所以貴乎禽獸者以有禮也故詩曰人而無禮胡不遄死又云景公飲酒數日而樂釋衣冠自鼓缶晏子朝公曰寡人甚樂此樂欲與夫子共之請去禮晏子對曰君之言過矣羣臣皆欲去禮以事君嬰恐君子之不欲也今齊國五尺之童子力皆過嬰又能勝君然而不敢亂者畏禮義也上若無禮無以使其下下若無禮無以事其上夫麋鹿維無禮故父子同麋人之所以貴於禽獸者以有禮也嬰聞之人君無禮無以臨其邦大夫無禮官吏不恭父子無禮其家必凶兄弟無禮不能久同詩曰人而無禮胡不遄死以上諸條但謂無禮之人必有死亡之禍以着禮之為急與詩之本指異】

相鼠三章章四句【申培說以為刺三叔之詩子貢傳以為未處不義鄘人刺之丰熙云霍叔名處初封于鄘鄒忠胤云處與鼠同音似非無意而作愚謂此特因是詩列于鄘風遂從而附會之耳序則云刺無禮也衛文公能正其君臣而刺在位承先君之化無礼仪也此亦為毛傳篇次所誤尤覺不倫】

谷風刺夫婦失道也衛人化其上淫于新昏而棄其旧室夫婦離絕國俗傷敗焉【出序毛氏云皆述逐婦之詞也宣姜有寵而夷姜縊是以此民化之而谷風之詩作所謂一國之事繫一人之本者如此朱善云谷風雖棄婦所作而觀其自叙有治家之勤有睦鄰之善有安貧之志有周急之義則是初无可棄之罪也然其言之有序而不迫如此殆庶幾乎夫子所謂可以怨者矣】

习习谷風以陰【丰氏本作露】以雨【麋韵】黽【陆德明本作僊】勉【黽勉韓詩作密勿】同心不宜有怒【叶麋韵腰五翻顏師古云自古讀有上去二音今山东河北但知怒有去聲失其真也】采葑【字書作豐】采菲无以下體【芥韵亦叶紙韵天以翻】德音莫违及尔同死【紙韵亦叶芥韵少礼翻比而賦也习本鳥數飛之義轉訓為重复正以數義取之谷風詩詁云風自谷出也陆佃云谷風言其自詩大風有隧有空大谷者大風之自也按宋玉風賦大風盛怒于土囊注謂土囊谷口也严粲云来自大谷之風大風也盛怒之風也又习习然连续不断所謂終風也又陰又雨无清明开霁之意所謂噎噎其陰也皆喻其夫之暴怒无休息也旧說谷風為生長之風以谷為谷固已不安又以习习為和調喻夫婦和同說此詩犹可通至小雅谷風二章言維風及頽頽暴風也非和調也三章言草木萎死非生長也其說不通矣詩多以風雨喻暴亂北風其涼喻虐風雨淒淒喻亂風雨漂搖喻危大風有隧喻貪故風雅二谷風邶下文言以陰以雨喻暴怒猶終風且噎喻州吁之暴也雅下文言維風及雨喻恐懼犹後人以震風凌雨喻不安也愚按尔雅东风謂之谷風疏謂谷之言谷谷者生也然則此

谷风亦与彼谷风异矣鼃虫名鼃也其性好跃越王见怒蛙式之为其有气即此虫也勉说文云强也曰勉勉者虽力所不堪犹勉强为之似鼃之奋跃而不自量力者然怒说文云恚也言我勉勉尽力于家事与尔同心尔不宜以暴怒加我如此也采说文云捋取也葍说文云蒹苳也毛传云须也按尔雅云须葍苳孙炎云须菜名葍苳草木疏云茺菁也亦名蔓菁郭璞云今苳菜也陆德明云案江南有苳江北有蔓菁相似而异张萱云茺菁其梗短连地而生叶濶而红夏则苗枯又名鸡毛菜唐本草注根叶及子乃是苳类特梢似芦菔耳陆佃云茺菁似苳而小有台字书葍作葍方言云葍茺茺菁也陈楚之郊谓之葍鲁齐之郊谓之茺关之东西谓之茺菁赵魏之郊谓之大芥其小者谓之辛芥或谓之幽芥其紫华者谓之芦菔东鲁谓之苳?陶隐居云芦菔是今温苳根可食叶不可食茺菁根乃细于温苳而叶似苳可食然则是茺菁芦菔非一物矣图经又云茺菁亦谓之台子春食苗夏食心秋食茎冬食根又名诸葛菜嘉话录云诸葛所止必多种之才出甲便可啖一也叶舒可煮食二也久居则随以滋长三也弃之不足惜四也回则易寻而采五也冬有根可斲而食六也比诸菜其利最博菲孙炎云菹类也陆玑云似菹茎粗叶厚而长有毛三月中蒸煮为茹甘美可作羹幽州人谓之茺尔雅又谓之蕙今河内人谓之宿菜按尔雅云菲茺郭璞注以为土瓜也又云菲蕙菜郭注以为生下湿地似茺菁华紫赤色可食孔颖达云尔雅菲茺与蕙菜异释郭注似是别草如陆之言又是一物某氏注尔雅二处引此诗即菲也茺也蕙菜也土瓜也宿菜也五者一物也唐慎微云土瓜根似葛细而多糝即月令所谓王瓜无如论语无乃为佞乎之无下体毛传云根茎也周祈云二物根为美诗人谓采葍采菲者得无以下体之故乎愚按此即取节之意旧注谓不可以其根之恶而弃其茎之美盖繇不辨二物故也程大昌云古者祭之用牲以上体为贵羊首牛首肩膊心肺皆上体之物也至於肾肠臀足之类皆不用以其在下而污秽也茺菁之叶可食而不如其根之美故采葍者不弃下体也左僖三十三年晋臼季使过冀见冀缺耨其妻饁之敬相待如宾与之归言诸文公请用之公曰其父有罪可乎对曰舜之罪也殛鯀其举也兴禹管敬仲桓之贼也实相以济康诰曰父不慈子不友兄不友弟不共不相及也诗曰采葍采菲无以下体君取节焉可也又坊记子云君子仕则不稼田则不渔食时不力珍大夫不坐羊士不坐犬诗云采葍采菲无以下体孔颖达云引此诗证君子不尽利于人无以其根美则并取之义与此同德音程子云好音也指其夫言莫之言无音之近也违说文云离也同死犹云偕老也言若使尔存取节之意而德音之加于我者无相离背之意则亦可以及尔同死而有终矣伤所遭之不然也】行道迟迟中心有违【微韵】不远伊迓薄送我畿【微韵】谁谓荼苦其甘如荠【韵】宴【释文作燕】尔新【丰本作亲】昏如兄如弟【荠韵 赋而比也上章言本望与其夫偕老此乃述其见弃迟说文云徐行也违犹背也言我之被弃行于道路迟迟不进盖其足欲前而心有所不忍如心与足相背然也杨慎云紫玉歌所谓身远心迓洛神赋所谓足往神留皆祖其意畿者疆限之名毛传以为门内也孔云周礼九畿及王畿千里皆期限之义言至有限之处故知是门内吕祖谦云韩愈谴疟鬼诗白石为门畿盖以畿为门阃也按韵会阃门榘也即门限两?夹木此非真谓其夫之送之言我既行矣汝与我诀别即不敢望其远独不可近相送而一至于畿乎柰何其不一顾也恕斯极矣白虎通云出妇之义必送之接以宾客之礼君子絶愈于小人之交诗云薄送我畿正谓此也荼尔雅云苦菜易纬通卦验玄图云苦菜生于寒秋经冬历春至夏乃秀月令孟夏苦菜秀即此荼也本草一名选一名游冬楚辞疏云三月生扶疏六月华从叶出茎直黄八月实黑实落根生於冬不枯紫叶者为香荼青叶者为青荼陆佃云此草凌冬不凋故名游冬凡此则以四时制名也顔之推云茶叶似苦

莛而细断之有白汁花黄似菊陆玕云生山田及泽中得霜甜脆而美所谓莛茶如饴内则谓濡豚包苦用苦菜是也杨慎云一名吴葵按唐王冰注素问引古月令四月吴葵华而无苦菜秀一句唐本草注吴葵云即关河间谓之苦菜者俗作鷺儿菜又名野苦蕒严粲云经有三茶一曰苦菜二曰委叶三曰英茶此诗及采苓繇之茶皆苦菜也良耜以薺茶蓼之茶委叶也出其东门有女如荼英茶也鷓鴣予所捋茶亦英茶之类又徐锴云即今之茶字按尔雅云檟苦茶乃今之茶然此在释木之类非此茶也荠甘菜尔雅云薺荠实本草云荠味甘人取其叶】

【作菹及羹亦佳通志云荠菜甚小自生园圃实曰薺诗其甘如荠谓此菜之美沈万钶云冬至春开白花一名甘草甘草先生则岁丰按尔雅荠类不一其一曰?莫大荠俗呼老荠似荠而叶细又名薺?又名太薺又名马辛其一曰薺苳苳广雅以为狗荠淮南子云荠水菜冬水而生夏土而死又其枝叶细靡谓之靡草月令孟夏之月靡草死许慎郑康成皆云靡草荠苳苳之属是也又名大室又名大适子细黄至苦以上二荠皆非甘而可食者其一曰薺苳郭璞以为荠苳本草陶注云根茎都似人参而叶小异根味甜或以为即此诗所咏之荠也春秋繁露云荠以冬美冬水气也荠甘味也乘于水气而美者甘胜寒也此以茶苦比新人与下章以渭清自况意互相发言谁谓新人之丑恶如荼之苦自君子爱之则不啻如荠之甘与己之贞絜本如渭之清然君子恶之则不啻如泾之浊皆爱憎之至变也下文宴尔新昏如兄如弟正所谓其甘如荠者宴说文云安也新昏夫所更娶之妻也孔云言安爱尔之新昏其恩如兄弟也以夫妇坐图可否有兄弟之道故以兄弟言之旧说谓茶虽甚苦反甘如荠以比己之见弃其苦有甚于茶而其夫方且宴乐其新昏如兄如弟而不见恤亦通但于上下文湊泊不甚有情耳】泾以渭【陆本作谓】浊湜湜其沚【纸韵说文作止】宴【列女传作嫵】尔新【丰本作亲】昏【列女传作婚】不我屑以【纸韵】毋逝我梁毋发我笱【有韵】我躬【礼记作今】不閱【左传作说】遑【礼记作皇】恤我後【有韵比而赋也泾渭二水名毛传云泾渭相入而清浊异地理志云泾水出今安定泾阳西开头山东南至京兆陵阳行千六百里入渭汉书沟洫志云泾水一石其泥数斗尚书疏云渭水出陇西首阳县至京兆北船司空县入河湜说文云水清见底也季本云泾浊渭清及既合流则渭亦因泾而浊然二水相交之处壅土成沚而渭在沚之上者则湜湜然见底而本清之体固自若也吕祖谦云泾新昏也渭旧室也泾渭既合则清浊易惑于洲渚浅处视之渭之清犹可见也诗人多述土风此卫诗而远引泾渭者盖泾浊渭清天下所共知如云海咸河淡也愚按泾以渭浊严粲谓泾诬渭谓浊是也程子云视于浅处则有清彼以为浊而其沚自湜湜以言其惑而不能正也屑说文云动作切切也以说文云用也言不以我之平日动作切切然用力为有劳而念我也言此以起下就其深矣三章之意梁笱之喻盖本于此郑玄云毋者谕禁新昏也逝说文云往也孔穎達云我者己所自专之辞梁鱼梁王制云獭祭鱼然後鱼人入泽梁注云梁絶水取鱼者发韩诗云乱也笱说文云曲竹捕鱼笱也按郑云梁水堰堰水而为关空以笱承其空朱子云梁堰石障水而空其中以通鱼之往来者也笱以竹为器而承梁之空以取鱼者也孔云梁者为堰以障水空中央承之以笱然则水不絶云絶水者谓两边之堰是絶水也程大昌云笱者以竹为器设逆须於其口鱼可入不可出也曰毋逝我梁毋发我笱者盖横溪为梁梁傍开缺透水而设笱以承其下鱼堕梁即觉水浅急趋旁阙以求入溪既入即陷笱中见者发笱而取之也相戒毋发我笱者惧其发取已获之鱼也閱说文云具数于门中也遑急恤忧也俱见说文言我既不能自安其身于门内以简閱取鱼之数乃急急忧恤我已去之後欲何为哉自怜之甚也苏辙

云梁笱皆所设以取鱼逝人之梁而发人之笱因人之成功之谓也新昏因旧室之成业不知其成之难则将轻用之我虽见弃犹忧其後之不继也故告而止之梁笱指治家言即下章所言者是孔子曰我今不閱皇恤我後终身之仁也辅广云不忍遂弃其家事者仁也知其不能禁而絕意焉者知也罗景伦云太白去妇词云忆昔初嫁君小姑才扶床今日妾辞君小姑如妾长回头语小姑莫嫁如兄夫古今以为絕唱然以予观之特忿恨决絕之辞耳岂若谷风去妇虽遭放弃而犹反顾其家恋恋不忍乃知国风优柔忠厚信非後世诗人所能彷彿也】就其深矣方之舟【尤韵】之就其浅矣泳之游【尤韵】之何有何亡龟勉求【尤韵】之凡民有丧匍匐【礼记及谷永传匍匐作扶服】救【叶尤韵居尤翻】之【比而赋也郑玄云言深浅者喻君子之家事无难易吾皆为之方说文云并船也徐锴云今之舫竝两船也或云汭也水中为汭筏也按尔雅天子造舟注比船为桥也诸侯维舟连四船也大夫方舟并两船也士特舟单船也庶人乘汭并木以渡也然则方与汭异当以并船之解为正舟船也孔云舟者古名也今名船尔雅云潜行为泳说文云潜行水中也游通作汙或作汭说文云浮行水上也今字从?音偃汙声者乃旌旗之流以偏傍同故得通用也言有亡者孔云谓于一物之上有此物无此物郑玄云言君子何所有乎何所无乎吾其龟勉勤力为求之有求多亡求有也深浅以比有亡方舟泳游以比勉求匍说文云手行也匍说文云伏地也孔云问丧注匍匐犹颠蹙然则匍匐者以本小儿未行之状其尽力颠蹙似之故取名焉救之者孔云谓营护凶事若有贈贈也孔子以为此无服之丧也程子云就其深矣以下陈其躬所为治家勤劳之事随事尽其心力而为之不特如是治其家又周睦其邻里乡党莫不尽其道也张氏云皆妇人曲徇其夫之言】不我能慼【叶宥韵许救翻说文及孙毓王肃本俱作能不我慼又诗缉慼作畜】反以我为讐【尤韵亦叶宥韵承咒翻】既阻我德贾【音古】用不售【宥韵亦叶尤韵时流翻】昔育恐育鞠【屋韵毛传作鞠字通用陆本作鞠即鞠字读诗记丰本俱作□】及尔颠【丰本作眞】覆【叶屋韵芳六翻】既生既育【屋韵】比予于毒【叶屋韵读如楮徒谷翻 赋也慼说文云起也作兴之意讐仇同义左传云怨耦曰仇言不能兴起我使有伉俪之乐而反以我为仇讐也阻犹拒也我德即上章所言勤劳家事周恤隣里皆是贾说文云坐卖售也行卖曰商坐贩曰贾售说文云去手也郝敬云惟其有心阻我虽善不录如贾百货具陈终不见售矣程子云心既阻絕我之善故虽勤劳如是而不见取如贾之不售凡人所以憎而不知其善者繇其心阻絕其善故也昔前日也按昔本乾肉之名乾肉者所更多日故谓昔为前日育尔雅云养也与下文既生既育皆以生理言商书所谓生生是也鞠通作?说文云穷也张子云育恐谓生于恐惧之中育鞠谓生于困穷之际颠通作蹢说文云跋也覆本训覆为盖冒之义因又训为倒及尔颠覆郑玄云与女颠覆尽力于衆事难易无所辟孔云以龟勉匍匐类之故颠覆为尽力若黍离云闵周室之颠覆抑云颠覆厥德各随其义不与此同言昔者求育养于恐惧困穷之时与尔颠覆尽力以营家业今既遂其生而得所养矣乃反比我于毒而弃之乎毒谓药物钱天锡云毒药攻病必不得已而後用之故垂絕之时藉以祛痼疾而生即弃去故曰比予于毒正所谓将恐将惧维予与汝将安将乐汝转弃予是也】我有旨蓄【陆本作畜】亦以御冬【叶东韵读如东都笼翻】宴尔新【丰本作亲】昏以我御【陆本云一作御】穷【东韵】有泔有渍既诒我肄【寘韵尔雅作勩】不念昔者伊余来塈【寘韵 比而赋也旨说文云美也蓄说文云积也字从艹徐锴云蓄谷米刍茭蔬菜以为岁备也愚按此言旨又言御冬则专为蓄菜也急就章云老菁蓂荷冬日藏一说蓄菜名即小雅所谓遂陶隐居云羊蹄菜也今呼秃菜音之讹也未必是诗意御侍也下文御穷义亦放此亦以御冬

言蓄聚美菜以待冬月乏无之时则用此为伴侍也刘公瑾云古人塲圃同地秋收则筑坚圃地为塲以纳禾稼至来春又耕治之以种菜茹故蓄菜但以御冬也御穷犹云侍穷言今君子安于新昏而厌弃我是但于穷苦之时则以我为伴侍至于安乐则弃之似冬月蓄菜至春夏有新美之蔬可食而向之所蓄者皆见遗也曾巩云穷犹乏无耳人之于物得新可以捐故然厚者犹有所不忍夫妇义当偕老乃姑以御穷而已其薄恶可知邹忠胤云孔子系易曰夫妇之道不可以不久也故咸而受之以恒戴记有七出之条而又有三不出之例其一谓先贫後富者谷风之良妇未知何以见弃今观其诗曰何有何亡龟勉求之昔育恐育鞠及尔颠覆则其食贫操作艰阻亦既备尝矣曰既生既育比予于毒曰宴尔新昏以我御穷此所谓富易妻者耶夫贫使旧妇拮据谋之富则与新人宴安享之以新闻旧而屏逐其旧苟未免有情亦复谁能堪此此谷风所为赋也有洸有溃正与首章不宜有怒相应毛传云洸洸武也溃溃怒也韩诗云溃溃不善之貌郑云君子洸洸然溃溃然无温润之色按说文洸水涌貌也引诗有洸有溃徐锴云言勇如水之涌也苍颉篇云傍决曰溃项安世云水之溃者其势横暴而四出故怒之盛者为溃诂说文云相欺诂也诳诈之义肆说文云习也言时而武暴忿怒又或时而为谩语以诳诈我既习以为常矣一说诂通作贻说文云相赠遗也肆即伐其条肆之肆言夫奋其武怒而遗我以祸如萌蘖之生生不已亦通壁说文云仰涂也谓弥缝其阙如涂屋壁之罅隙也尔即弃絶我独不念往日来此弥缝阙失之时乎此申叹上章之意冀其夫之感悟也】

谷风六章章八句【小雅亦有谷风篇名

子贡传申培说皆以为邶之良妇见弃于夫而作亦无所据】

氓卫宣公之时淫风大行男女无别互相奔诱华落色衰复相弃背【出序】淫妇为人所弃而自叙其事以道其悔恨之意【出朱传 焦氏易林云氓伯以?抱布自媒弃礼急情卒罹悔忧郑樵云氓之诗如是其丑也然有反之而自悔者此所谓变之正也】

氓【石经作氓】之蚩蚩【支韵字从虫之声今俗之作山非】抱布贸丝【支韵】匪来贸丝来即我谋【尤韵亦叶支韵谋悲翻】送子涉淇【支韵】至于顿【尔雅注作敦】丘【尤韵亦叶支韵祛其翻】匪我愆期【支韵亦叶尤韵渠尤翻】子无良媒【叶支韵谟悲翻亦叶尤韵迷侯翻】将子无怒秋以为期【见上 赋也孔颖达云氓民之一名此妇人见弃乃追本男子诱己之时己所未识故以悠悠天下之民言之愚按氓字从亡从民乃流徙之民非土着者孟子谓天下之民皆悦而愿为之氓许行陈相自楚之滕皆曰愿为滕氓即其义也杨慎云周礼凡治野以下剂致氓以田里安氓以乐昏扰氓以土宜教氓又曰新氓之治注谓新徙来者也若是本国之氓已授田矣又何必以田里安之已安土矣又何必以土宜教之乎以诗与孟子证之尤可验诗曰氓之蚩蚩此盖氓之离其本土而淫于外州者也蚩说文云虫也曰蚩蚩者言其蠢动无知如虫之集聚然鄙贱之辞也布说文云帛织也毛传云币也按周礼载师职郑司农注云里布者布参印书广二寸长二尺以为币贸易物引诗云抱布贸丝即此布也贸说文云易财也徐锴云犹乱也交互之义郑笺云季春始蚕孟夏卖丝孔云欲明此妇人见诱之时节故言卖丝之早晚匪通作非後放此即就也此氓来意非真欲贸易我之丝乃借此以来就我谋欲密邀我为室家耳送说文云遣也亦为随行之义盖遣之去而又随之以行也子者男子之通称指氓也刘熙云丘一成曰顿丘一顿而成无上下大小之杀也尔雅易

顿为敦敦亦顿也汉地理志东郡有顿丘县师古云以丘为县也阨駟云顿丘在淇水南按今大名府之开州是其地水经注云淇水屈迳顿丘西又东屈而西转迳顿丘北又按宿胥故渚受河于顿丘县遮害亭东黎山西北会淇水战国策所谓决宿胥之口魏无虚顿丘即指是渚也路史云即古观国后啓五庶俱封於卫是谓五观即此愆说文云过也期犹限也良说文云善也周礼媒氏注云媒之言谋也谋合异类使和成也郑玄云非我欲过子之期子无善媒来告期时将文选注云辞也郑云请也氓来即女谋本谋即挈是女而归而女意犹未可谓子无良媒先来告我故我行计未办请子无怒以秋为限当从子以往盖将为治装地如下文所言以贿迁耳朱子云夫既与之谋而不遂往计亦狡矣以御蚩蚩之氓宜其有余而不免於见弃盖一失其身人所贱恶始虽以欲而迷後必以时而悟是以无往而不困耳士君子立身一败而万事瓦裂者何以异此可不戒哉】乘彼坳垣以望复关【叶先韵圭玄翻】不见复关泣【楚辞章句作波】涕涟涟【先韵】既见复关载笑载言【叶真韵疑斤翻亦叶先韵倪坚翻】尔卜尔筮体【礼记作履注云礼也韩诗亦作履云幸也】无咎言【同上】以尔车来以我贿迁【先韵亦叶真韵苍新翻 赋也乘说文云覆也盖登高而覆之如乘马之义坳说文云毁垣也垣而毁必危故字从土从危意兼声也垣土墙也复关当是古关名滑县志云复关在县城东北六十里今有复关堤寰宇记云澶州临河县复关城在南黄河北阜也复关堤在南三百步自黎阳下入清丰县界此氓所居之地不敢斥其名而以所居呼之犹秦人之称橐里也涟澜同字古人谓流涕为泛澜严粲云涟涟涕出接续之貌别後相思凭高远望恐其负约则泣喜其践约则笑先笑而继之以言故曰载笑载言也下四句乃其所言者尔指氓龟曰卜蓍曰筮体谓卜之兆体筮之卦体也车者迎妇载贿之车贿说文云射也妇之嫁装也妇人既与氓有成言乃问之卜筮以决其可托与否而其兆卦之体皆无凶咎之言深自喜其得所托故谓尔可遂即以车来我当即以所有之贿财迁徙随子而往不烦再计也厥後色衰被弃似若卜筮不灵然者先儒所谓易为君子谋不为小人谋也坊记子云善则称人过则称己则民不争善则称人过则称己则怨益亡诗云尔卜尔筮履无咎言意谓人之践履动与吉会者不当自以为功必归之于卜筮亦断文取义耳】桑之未落【药韵】其叶沃若【药韵】于嗟鸠兮无【丰氏本作母】食桑葚【叶侵韵知林翻释文作榘】于【韩诗外传作吁】嗟女兮无【丰氏本作母】与士耽【叶侵韵持林翻尔雅作妣】士之耽兮犹可说也女之耽兮不可说【说说相应为韵犹上章载言与咎言相应】也【赋而兴也桑蚕所食叶木也说文凡草曰零木曰落徐锴云木曰落而从草者木但叶落耳其枝干劲与草零无异故从艸秋以为期此时车来桑犹未落故即其景以起兴亦以言贸丝及之然曰未落已隐然见有黄落可虑矣沃本作□说文云溉灌也沃若毛传云犹沃沃然言润泽也鸠毛传云鵲也江东亦呼鵲鵲以其春来冬去备四时之事故少皞氏取以名司马之官陆佃以为一名鸞鵲按尔雅释鸟云鸞山鵲也以此鵲似山鵲而小又其短尾青黑色多声故亦名鸣鵲也孔穎達云尔雅鵲类非一知此是鵲鵲者以鵲鵲冬始去今秋见之以为喻故知非余鵲也葚说文云桑实也毛传云鵲鵲食桑葚过则醉而伤其性又旧说鵲食桑葚则革暴鵲食之则淫故戒鵲无食桑葚妇人未嫁称女已嫁称妇诗疏云士者男子行成之大称又未娶亦谓之士周易老妇得其士夫是也耽通作媿说文云乐也严粲云桑之沃若喻情眷欢洽之时鵲嗜桑葚之甘则食之不已犹女爱男情眷之浓而为其所诱故叹鵲无食桑葚女无与士耽今玩诗语意明是以鵲兴女以桑兴士而旧说谓桑之沃若以比妇人容色未衰之时恐未然也说许慎云释也郑云解也士有百行可以功过相除至于妇人无外事维以贞信为节严云女子一失身于人无可

解说言其既奔之後不待爱弛旋即愧悔已无及也鍾惺云淫妇人到狼狽时偏看出许多正理说出许多正论与烈女贞妇只争事前事後之別耳】桑之落矣其黄而陨【叶真韵于贫翻亦叶先韵于权翻诗幅陨既长陨作圆读】自我徂尔三岁食贫【真韵亦叶先韵频眠翻】淇水汤汤【阳韵尸羊翻】渐车帷【仪礼疏作帟】裳【阳韵】女也不爽【叶阳韵师庄翻】士贰其行【叶阳韵寒刚翻】士也罔极【职韵】二三其德【职韵 赋而比也月令季秋草木黄落此时妇人已在氓家矣陨说文云从高下也曰其黄而陨者桑叶先黄而後陨以比男子之情眷渐淡而向衰下文三岁食贫即其事也徂说文云往也往之夫家也三岁自始嫁至今閱三岁也食贫犹云茹苦此氓非真贫特不以善遇此妇使如食贫者之食耳汤汤毛云水盛貌渐朱子云渍也车帷在上曰幄在旁曰帷裳郑云童容也孔云以帟幃车之旁以为容饰此惟妇人之车饰为然丈夫车立乘则有盖无帷裳或谓之帟裳爽说文云明也此追其始嫁时而言言我既以身许汝其时虽渡深水至渐车之童容而我犹不遑恤曾不意其所托之非人如此因自恨其不明也士贰其行此有所指必氓别有私者末二句又推本其德而言所以无所止极如斯者繇其心德所藏不能专一故也严粲云士也罔极所谓怨灵修之浩荡也罔极为无穷之意善恶皆可言之魏园有桃谓我士也罔极为志念无穷极蓼莪昊天罔极谓父母之德无穷极青蝇谗人罔极桑柔民之罔极与此士也罔极皆为反覆无穷极刘公瑾云此妇首称曰氓继而曰子继而曰尔又继而谓之士继而复曰尔又复曰士或鄙之或亲之或贵之此所以为怨妇之辞与左成八年晋侯使韩穿来言汶阳之田归之于齐季文子饯之私焉曰大国制义以为盟主是以诸侯怀德畏讨无有二心谓汶阳之田敝邑之旧也而用师于齐使归之敝邑今有二命曰归诸齐信以行义义以成命小国所望而怀也信不可知义无所立四方诸侯其谁不解体诗曰女也不爽士贰其行士也罔极二三其德七年之中一与一夺二三孰甚焉士之二三犹丧配耦而况霸主霸主将德是以而二三之其何以长有诸侯乎】三岁为妇靡室劳【豪韵亦叶萧韵怜萧翻读作辽】矣夙兴夜寐靡有朝【萧韵亦叶豪韵直高翻丰氏本作鼯】矣言既遂矣至于暴【号韵】矣兄弟不知咥其笑【叶号韵读如燥先到翻】矣静言思之躬自悼【号韵】矣【赋也靡之言无音之近也男以女为室劳说文云劬也言我三岁为尔妇无有为人室而受如是之劳劬者侵晨而起至夜方寐靡有一朝之暇所谓劳也鍾惺云此妇劬劳何减谷风谷风见弃以色此曰三岁色未衰也直轻其人耳言即首章来即我谋之言遂犹申也暴通作虤说文云虐也急也咥说文云大笑也初与尔谋为室家惟恐不谐所愿今前言既遂而尔至翻以暴虐加我我之定计从尔兄弟初不及知今见我为尔诱而还为尔暴则惟有咥咥然笑我而已静言思之孽自己作虽躬自痛悼亦何所归咎哉连用数矣字寥落悲前事支离笑此身情况凄絕严粲云此

妇盖父母不存惟有兄弟耳】及尔偕老老使我怨【叶翰韵乌贯翻】淇则有岸【翰韵】隰则有泮【翰韵丰氏本作畔】总角之宴【叶翰韵於吁翻孔穎達云经有作卯者因甫田总角卯兮而误】言笑晏晏【叶翰韵乌吁翻】信誓旦旦【翰韵说文作??】不思其反反是不思【支韵亦叶灰韵新才翻】亦已焉哉【灰韵亦叶支韵将其翻 赋而兴也及与偕俱怨恚也言初拟与尔相俱至老今甫三岁而见暴至此则後來老之境皆使我恚恨之境也岸水涯而高者隰阪下湿也俱见说文郑云泮读为畔畔涯也言淇与隰皆有厓岸以自拱持今君子放恣心意曾无所拘制也总角者直结其发聚之为两角诗有总角卯兮为男子未冠按内则云男女未冠笄者总角衿纓则女子亦得称总角宴安也此总角盖氓所私所谓士贰其行者捐故怜新妇人之所为恨也旧说连下文言我自总角之时即与尔宴乐如古诗结发为

夫妻之意亦通晏说文云天清也言笑晏晏者盖象其开霁之状旦旦明也严粲云昊天曰旦之旦此言笑信誓皆指氓言乃追数其昔日挑诱之情状非妇人自谓也尔雅云晏晏旦旦悔爽忒也反复也责其不思念复前言也亦已焉哉者决絶之辞表记子曰口惠而实不至怨菑及其身是故君子与其有诺责也宁有已怨国风曰言笑晏晏信誓旦旦不思其反反是不思亦已焉哉朱子以为此妇人自悔之语言我不自思其反覆以至此则亦如之何哉传曰思其终也思其复也思其反之谓也理亦可通然与孔子引诗之意不合陆化熙云此诗立言有序总是悔之无及最可扼腕荀文若之失身曹瞞柳柳州之濡足叔文其是类也夫辅广云谷风与氓二诗皆怨然谷风虽怨而责之其辞直盖其初以正也氓之诗则怨而悔之耳其辞隐盖其初之不正也沈守正云诗虽作于悔恨然悔所托之非人不悔始奔之不正此所谓淫人之悔也邹忠胤云婚姻人道之始在易咸称取女渐称女归皆利贞则吉不徒悦徒巽而已易归妹曰征凶无攸利盖其卦与渐反位不当而柔乘刚士动於欲而失其健女骄於悦而失其顺淫者之感终非嘉偶故象曰君子以永终知敝夫使行必稽其所敝何至立身一败万事瓦裂自贻伊戚乎】

氓六章章十句【序云刺时也宣公之时礼义消亡云云或乃困而自悔丧其妃耦故序其事以风焉美反正刺淫佚也朱子谓此非刺诗其曰美反正者尤无理子贡传申培说皆以为鄘人所作亦无据】

何人斯絶友也暴辛公为王卿士而譖苏成公成公之友有与暴同行者成公恶之作是诗以絶之【序以为苏公刺暴公也暴公为卿士而譖苏公焉故苏公作是诗以絶之愚按苏公此诗虽为见譖于暴公而作而其意所专责者非暴公也时苏公之友有与暴公同譖之者偶过苏公之门求见苏公而公不之见故作此诗以责之以暴公平昔交谊不如此人之深而此人去苏从暴初终易面则无行义之尤者也暴公不足刺矣刺此人亦所以刺暴公也郑笺云暴也苏也皆畿内国名按春秋文八年公子遂会雒戎盟于暴杜注以为郑地其姓未详苏据郑语谓己姓昆吾之後左成十一年单子刘子曰昔周克商使诸侯抚封苏忿生以温为司寇与檀伯达封于河书立政篇所谓司寇苏公是也春秋时苏称子以国在温又称温子此云公者孔穎達谓盖以子爵而为三公今以世本及谯周古史考证之则此暴公乃暴辛公苏公乃苏成公也辛公路史又作新公世代无考又按左隐十一年王以苏忿生之田温原緄樊隰郕攢茅向盟州陞隕怀凡十二邑以与郑人实周桓王八年也苏公以被讒失国或在此时张守节云苏忿生十二邑桓王夺以与郑故苏子同五大夫伐惠王卮言云苏为畿内国故桓王得以其田与郑当时苏之采地亦可谓广矣然所谓原樊成茅其初亦皆国也岂苏子亦有兼并坎无故而夺之是以叛】

彼何人斯其心孔艰【叶先韵经天翻丰氏本作艱】胡逝我梁不入我门【叶先韵谟连翻】伊谁云从维暴之云【叶先韵于员翻 赋也彼何人斯义见巧言篇此与第三章皆指苏公之友新从暴公者也贱而恶之故若为不相识之辞然於暴公则显其食邑於此人则并不着其名氏亦所谓交絶不出恶声者也孔甚也艰说文云土难治也郑笺以为难也此人从暴公以过苏公之门欲不入见则似忘旧谊欲入见则恐拂新知迟回于见不见之间有甚难为情者故曰其心孔艰也逝郑云之也主彼而言故曰之我苏公自谓也後放此梁说文云水桥也

夏令十月成梁之梁苏公所居之门外有之非鱼梁也初逝梁之时尚未及我门故疑其不肯入也伊发语辞上云苏公问也下云所问之人答也从说文云随行也暴暴公也不以公称者亦恶而贱之也问彼所与相随而行以逝我梁者何人乎曰维暴公耳夫暴公与我不相善而斯人从之则其踌躇於门外而不即入也无怪矣】

二人从行谁为此祸【哥韵】胡逝我梁不入唁我【哥韵】始者不如今云不我可【哥韵赋也孔云以上言维暴之云则暴是其一明二人者谓暴与其侣也为此之此蒙上文言祸害也凶终隙未之意二人从行则其交深矣谁离间此人使之舍我从彼而使交道不能善其终非祸而何服?云吊生言唁相痛伤之名也朱子云吊失位也时苏公必有被王谴让之事故云然不入我门则不入唁我其为前此相从以譖我明矣始者不如今言始者与我厚不如今之与暴公厚也云者代揣其意之言也可许也不我可者言不许我为可犹言不悦也汉刘向传上问杨兴朝臣断断不可光禄勳何也其用不可字义同此】彼何人斯胡逝我陈【真韵亦叶先韵澄延翻】我闻其声不见其身【真韵亦叶先韵尸连翻】不愧【陆德明本作媿】于人【真韵亦叶先韵如延翻】不畏于天【先韵亦叶真韵汀因翻 赋也尔雅云堂涂谓之陈孙炎云堂下至门之径也按战国策美人克下陈下陈犹下堂也逝我陈则已入我门矣此人亦深情厚貌者故谬欲入而唁苏公也苏公已闻此人之声音但薄其人而不之见故曰不见其身非踪迹诡秘之说既入我门矣秘将安往乎愧慙畏怯也天非苍苍之天吾心中有天存焉可对人言斯可对天知故能不愧于人则不畏于天矣今此人欲入见而不胜其消沮闭藏之状其负愧于苏公者何如亦寸心之天所不许也故苏公陈正理以深责之表记子曰圣人之制行也不制以已使民有所劝勉愧耻以行其言礼以节之信以结之容貌以文之衣服以移之朋友以极之欲民之有壹也小雅曰不愧于人不畏于天疏云引此者言人之行当须愧于人畏于天也】彼何人斯其为飘风【叶侵韵孚金翻】胡不自北胡不自南【叶侵韵乃林翻】胡逝我梁祇【音支】搅我心【侵韵 赋也此彼何人斯指暴公也不斥其姓名者亦贱而恶之之辞飘说文云回风也尔雅作回风郭璞云旋风也严粲云旋风回旋无定故不自北不自南言无準也喻谗者之反覆不测也先是二人从行以逝苏公之梁既而彼一人者入门至陈将以求见苏公矣而暴公不与之偕入姑留梁间以待故此仍云胡逝我梁也祇旧皆训适也亦通作多晁氏云古文祇用多字搅说文毛传皆云乱也疾之之深惟欲其不相亲近其来逝我梁何为哉则多足以搅乱我心而已】尔之安行亦不遑舍【叶鱼韵商居翻】尔之亟行遑脂尔车【叶鱼韵斤於翻】壹者之来云何其吁【叶鱼韵读如嘘休居翻 赋也此下三章所称尔者皆为苏公之友言也遑说文云急也周礼掌舍职注云舍者所解上之处亟疾也脂车以脂涂车轴使其滑泽也壹者一人也云者代暴公意中之言也吁说文云张目也时苏公之友入见苏公而暴公待之于外苏公恶其所比匪人而心不欲见之也因为辞以谢之曰尔此行也果其安舒而别无所事也者似可以暂憩矣然我亦不急急为舍馆以留尔果其倥偬而别有所图也者则尔当从兹趣驾矣我即急急脂尔之车所以然者何故哉以尔二人从行今一人来此一人留彼彼留者必且曰何其久而不出徒使我张目而望也然则尔今者且姑不见我可也】尔还而入我心易【叶支韵以支翻韩诗作施云善也】也还而不入否【音鄙】难知【支韵】也壹者之来俾我祇【支韵音岐】也【赋也还说文云复也郑云行反也易平易也繫辞云易则易知与下文难知对看否郑云不通也祇适也亦通作禊易无祇悔王肃陆绩本俱作禊可证禊之为言安也苏公不欲见此入而心又不忍终绝之也乃与之订期後会言我今虽不见尔矣尔此行旋反之时其经过我门入而见我乎我心平易

明白原无所芥?也若还而不入则是尔之情与我否隔不通尔自示人以不可知於我何与复又嘱之曰尔即还而入见我亦必但以一人来勿与暴公同行庶乎使我心安也盖薰莸不同器惟絶暴公乃可以交苏公无骑墙中立之理易曰三人行则损一人一人行则得其友其谓是乎凌蒙初云小人良心不死如象之见舜而忸怩是也只是望其来见妙甚妙甚董氏云是诗至此其词益缓若不知其为譖矣】伯氏吹埙仲氏吹篪【支韵】及尔如贯谅不我知【支韵】出此三物以诅尔斯【支韵 比而赋也此章发出始者不如今二句之意伯仲郑云喻兄弟也我与汝恩如兄弟愚按此当以年之长幼序之今亦不定其谁属也吹说文云嘘也从口从欠会意埙周礼尔雅俱作埙按王嘉云春皇庖牺氏灼土为埙礼乐于是兴矣尔雅云大埙谓之觶孙炎云音大如叫呼声也周礼注云大如鴈卵郭璞云烧土为之大如鷲子銳上平底形如秤锤六孔小者如鸡子陈阳云周官之於埙教于小师播于瞽蒙吹于笙师立秋之音也平底六孔水之数也中虚上銳如秤锤然火之形也埙以水火相合而後成器亦以水火相和而後成声故大者声合黄钟大吕小者声合大簇夹钟要在中声之和而已风俗通谓围五寸半长一寸半有四孔其二通凡六空也盖取诸此尔马端临云古有雅埙如雁子颂埙如鸡子其声高浊合乎雅颂故也白虎通云埙之为言勲也阳气于黄泉之下勲蒸而萌释名云埙喧也声喧喧然也篪本作?亦作箠尔雅大篪谓之沂广雅云以竹为之有八孔前有一孔上有三孔後有四孔头有一孔郭云长尺四寸围三寸一孔上出径三分名翹横吹之小者尺二寸按郑司农周礼注谓篪七孔唐孔氏以为广雅言篪八孔此盖不数其上出者非也据广雅称篪共有九孔又蔡邕云篪六孔有距横吹之此或小篪耳释名云篪啼也声从孔出如婴儿啼声春分之音也世本载暴辛公作埙苏成公作篪譙周古史谓古有埙篪尚矣周幽王时暴辛公善埙苏成公善篪今按二说大要因此诗而附会之殊不足信其实苏公借以喻己与其友谋国议论唱和相应如此亦非指暴公也张萱云八音皆克谐无有乖戾而不和者诗喻兄弟之和止以埙篪从来注疏皆未能发其旨余因閱古今乐律诸书乃知七音各自为五声如宫磬鸣而徵磬和独埙篪则二器共为一音埙为宫而篪之徵和伯宫也仲徵也此古人所以喻同气也其旨微矣程良孺云如埙如篪古人比之兄弟相和夫他音岂皆不和而独以埙篪言者他音一音各为一节惟埙篪二音同为一节陈阳云土王於长夏而埙土音也有伯氏之意焉竹王於仲春而篪竹音也有仲氏之意焉观周官小师教埙瞽蒙播之笙师兼篪而教之详於埙略於篪者以埙主唱始不得不详篪主和终而已不得不略不亦寓伯仲之旨乎及尔如贯如易言有孚挛如之意郑云如物之在绳索之贯也董鼎云如贯弁贯珠皆以绳结之以上三句皆主平日言谅说文云信也我之与尔交好中心诚信如此而尔曾不我知是以有二心于我也三物毛云犬豕鸡也诅说文云誅也周礼司盟职云盟万物之犯命者诅其不信者注云盟诅主于要誓大事曰盟小事曰诅疏云盟者盟将来诅者诅过往出此三物如郑伯使卒出貍行出犬鸡以诅射潁考叔者貍即豕也毛传谓君以豕臣以犬民以鸡似无据因其曾不知我而诅之恚怼之深无聊之极欲其悔悟而速改之也孔云已不欲长怨欲与之诅而和谐】为鬼为蜮【职韵】则不可得【职韵】有腼面目视人罔极【职韵】作

此好歌以极反侧【职韵 丰本作仄 赋也严云末章峻辞责之不复含隐也说文云人所归为鬼韩诗外传云人死肉归于土血归于水骨归于石魂气升于天其陰气薄然独存无所依也故纯陰底滯之气着人为害蜮虫名陆玑云一名射影江淮水皆有之人在岸上影见水中投入影则杀人故曰射影南人将入水先以瓦石投水中令水浊然後入陆佃云蜮含水射人一

曰含沙射人之影其疮如疥稽圣赋所谓蜮旋於影蜮射於光是也一名射工一名溪毒有长角横在口前如弩檐临其角端曲如上弩以气为矢因水势以射人故俗呼水弩然畏鷺鷥能食之禽经所谓鵞飞则蜮沉鵞鸣则蛇结也罗愿云蜮生江南溪水中甲虫之类也长一二寸有翼能飞口中有横物如角弩冬月蛰涧谷口大雪时索之此虫所在其雪不积气起如烝掘之不过入地一尺则得也说者又言水弩状如蜣螂尾长四寸即弩也见人影则射南越志称水弩四月一日上弩射人影至八月卸弩此云弩在口彼云弩在尾差不同春秋庄十八年秋有蜮刘向以为蜮生南越越地多妇人男女同川淫女为主乱气所生故圣人名之曰蜮蜮犹惑也在水旁能射人甚者至死南方谓之短狐刘歆以为蜮盛暑所生非自越来也又柳宗元云射工射虱含怒窃发中人形影动成疮痂韵会小补云诸家说蜮皆不为的居水中以气射人者名射工居水旁山林间含沙射人者名射虱若说文所谓蜮似鼈三足者是能也非蜮也臚说文云面见也字从面从见会意徐铉云凡人所视瞻心实见之故有别识无耻之人面见之而已心实否也国语范蠡曰虽臚然人面实禽兽也人对鬼蜮言罔极谓无所止极殷大白云恩之重者曰罔极情慾之甚者曰罔极心术之险者曰罔极言鬼之为物往来无常蜮之为物能潜形以射人之影则吾不得而知之今以臚然面目相看之人而视之亦如鬼蜮然其翻覆不测则无所止极良足慨也好郑云犹善也歌此八章之歌也极谓穷极其情初则絶而不之见既则订之使复来又既则沮之以絶其翻覆皆所以穷其罔极之情而使之止于是也反侧毛云不正直也孔云翻覆之义王安石云作是诗将以絶之也而曰好歌者惟其好也是以极求其反侧极其反侧非恶之也有欲其悔悟之心焉尔又云君子之处己也忠其遇人也恕使其繇此悔悟更以善意从我固所愿也虽其不能如此我固不为己甚岂若小丈夫然哉一与人絶则丑诋固拒惟恐其复合也馮时可云匪人之比苏安得无责者但交已絶而犹惓惓望之则与後世小人盃酒睚眦之隙而至於树党相攻没身不解者其亦异矣郝敬云愚读是诗而益知性情之说矣欺君贼友分谊已絶而其言周恩伤往望来有不忍遽絶之情何其厚也言不如此不可以为诗人能以诗之言养性则性定以诗之义操心则心安以诗之气处人则人和以诗之性情处变则无所往而不自得故曰不学诗无以言】何人斯八章章六句【朱子云此诗与巧言篇文意相似疑出一手但上篇先刺听者此篇专责谗人耳按二诗立言之意本不相涉因朱子有是说而伪为子贡传申培说者遂不载此诗篇名丰邹诸本径合二篇而一之然则西汉龚遂王式及乐纬诗纬尚书璿玑铃诸书皆以三百五篇为夫子删采定数此不已阙其一耶作传说者其人皆在朱子之前不应朱子都不之见而立论便閤合若此益显其为浅陋之贗书也】

着刺鲁桓公也娶齐文姜而不亲迎至于謹以迎之于是得见乎公矣国人代为文姜之辞以丑之【序云刺时也时不亲迎也愚按以其世求之则文姜也何以明之春秋桓三年公子翬如齐逆女九月齐侯送姜氏于謹公会齐侯于謹夫人姜氏至自齐公羊传云翬何以不致得见乎公矣胡安国云古者昏礼必亲迎则授受明後世亲迎之礼废于是有父母兄弟越境而送其女者以公子翬往逆则既轻矣为齐侯来乃逆而会之于謹是公之行其重在齐侯而不在姜氏岂礼也哉不言以至者既得见乎公也不能防闲於是乎在敝笱之刺兆矣】

俟【尔雅齐诗汉书俱作埃】我於着【叶虞韵重铢翻】乎而充耳以素【叶虞韵孙祖翻】乎而尚之以琼华【叶虞韵芳无翻】乎而【赋也俟通作埃说文云待也我文姜自谓也】

毛传云门屏之间曰着通作宁李巡云谓正门内两塾间人君视朝所宁立处也按昏礼壻往妇家亲迎既奠鴈御轮壻乃先往俟于门外妇至壻揖妇以入及寝门揖入升自西阶今桓公既不亲迎会讌之後以夫人归所谓俟我于着乎而即昏礼壻俟于门外妇至壻揖妇以入之时也孙炎云充耳是塞耳即所谓璵悬当耳故谓之塞耳悬之者别谓之紃经言充耳以素素丝悬之非即以素为充耳也郑玄云素所以悬璵者或名为紃织之人君五色臣则三色王肃辨之以为王后织玄紃天子之玄紃一玄而已何云具五色乎王基理之云紃今之绦岂有一色之绦色不襍不成为绦王后织玄紃者举夫色尊者言之耳孔穎達祖其说又谓天子诸侯皆五色卿大夫士皆三色今按五色三色礼无明文郑孔之意盖惑于序中时不亲迎之说以为此诗乃刺时之诗不为诸侯咏耳愚以周礼玉瑞弁冕制度彷彿求之则此诗所云素青黄三色者乃正诸侯之紃也一见之典瑞职云王圭纁藉五采五就公侯伯圭纁皆三采三就子男璧纁皆二采再就一见之弁师职云王五冕皆五采玉诸侯瑋玉三采及孤卿大夫之冕各以其等为之夫天子之纁与玉既俱用五采诸侯之纁与玉既俱用三采则悬璵之紃何独不然诗咏素青黄三色其为鲁侯之服无可疑者所以取此三色素西方之色于时属秋青东方之色于时属春春秋乃陰阳之中气而黄又中央土之正色是或其所以取之之义也若天子则位尊备物当具五色矣篇中于着见素於庭见青于堂见黄但取韵叶孔谓素色分明目所先见故先言之此迂缪无理之甚也又周礼注云一命之大夫冕而无旒士变冕为爵弁疏云无旒之冕与爵弁不殊但前低一寸余故亦得冕名今按充耳惟冕服有之弁则否则是自一命而下皆不得有充耳亦可知其非民间亲迎之常服也或又谓古者士昏礼摄盛故士得摄大夫冕服今考仪礼云主人爵弁纁裳緇拖从者毕玄端乘墨车从车二乘注谓大夫墨车士浅车今墨车大夫已上有二车士无贰今从车二乘所谓摄盛也亦不闻有主人服冕之说尚加也张子厚云充耳非一物先以纁塞後以玉加之琮说文云赤玉也华孔云谓色有光华按毛解充耳琇莹谓天子用玉诸侯用石据周礼弁师职但云玉璵絶无用玉用石之别而或又解琇为玉名此琮华当即是玉郑以为石色似琮殊费解夫文姜自会讌时已得见乎公因随之俱归不谓已之失礼为可羞而但津津鲁君之盛饰为可喜则其为人流荡淫佚于此已见其端矣】俟我於庭【青韵】乎而充耳以青【韵】乎而尚之以琮莹【叶青韵户局翻】乎而【赋也庭说文云宫中也增韵云门屏之内俟我于庭即昏礼所谓壻道妇及寝门揖入之时也?说文云玉色也】俟我於堂【阳韵】乎而充耳以黄【阳韵】乎而尚之以琮英【叶阳韵十良翻】乎而【赋也堂正寝也升阶而後至堂此昏礼所谓升自西阶之时也吕祖谦云既不亲迎故但行妇至壻家之礼壻道妇入故于着于庭于堂每节皆俟之也华莹英总一琮而异其名按尔雅木谓之华草谓之荣荣而不实者谓之英则言琮华琮英总之借草木以形容玉之光色耳】

着三章章四句【子贡传申培说皆谓齐俗废亲迎之礼君子讥之朱子解同然劝篇中所云着乃朝内之位至充耳琮华之饰何等庄严岂是士庶所有齐之流俗其谬确矣如序谓刺时不亲迎却自浑然盖谓其时固有如此人如此事耳又班固前汉书地理志引齐诗曰子之营兮遭我乎嶠之间兮又曰俟我于着乎而以为齐俗舒缓之体如此固既以营为青州临淄之营丘而顔师古亦以着为济南郡着县审尔则茂昌庭堂亦复可以地名强解否耶是皆不究全诗之文理而漫为之辞者也】

敝笱刺鲁文姜也【出序序以为齐人恶鲁桓公微弱不能防闲文姜使至淫乱为二国患焉愚按左传先是齐僖公欲以女文姜妻郑太子忽太子忽辞想文姜为室女之日内行已不正矣忽所谓齐大非耦盖权辞也桓竟取之国人知其妇道之必不终也故作是诗以刺之观篇中有齐子归止之语当是始嫁时诗也姜齐女鲁妇以不正故使二国俱被恶名序所谓为二国患者以此】

敝【释文作弊】笱在梁其鱼魴鰋【叶元韵姑元翻】齐子归止其从【去声後同】如云【叶元韵於元翻】兴也敝郑玄云败也笱梁俱见谷风罗愿云笱之守鱼犹礼之守国也池鱼三千六百蛟来为之长能率鱼飞置笱水中则蛟去矣魴解见鱼丽篇说苑阳昼云夫投纶错饵迎而吸之者阳桥也其为鱼也薄而不美若存若亡若食若不食者魴也其为鱼也博而厚味陆佃云魴鱼虽等美而缘水之异则有优劣故里语曰洛鲤伊魴贵于牛羊又曰居就粮梁水魴愚按如陆说伊梁之魴虽美而诗有曰岂其食鱼必河之魴则河魴尤美也齐地近河据陈诗以食鱼必河魴对言娶妻必齐姜是则魴乃姜之比此诗首章言魴鰋次章言魴鰋鰋之名变而魴名不变可知专以魴拟文姜而鰋拟从者矣盖文姜一而从者衆也故焦氏易林云敝笱在梁魴逸不禁舍鰋鰋而专举魴亦足为罪状文姜之明据鰋之为鱼未详据孔丛子云卫人钓于河得鰋鱼焉其大盈车子思问曰如何得之对曰吾下钓垂一魴之饵鰋过而不视益以豚之半则吞矣子思曰噫鰋贪以饵死士贪以禄死然则是鰋大于魴故毛传以鰋为大鱼严粲驳之云卫人所钓鰋鱼偶得大者以为大而谓之此诗配魴鰋言之则不必便是其大盈车者入笱中必非大鱼此笃论也又按老而无妻者名曰鰋刘熙释名云为其愁悵不寐目恒鰋鰋然也故其字从鱼鱼目恒不闭者也夫鱼不闭目凡鱼尽然故古者以鱼司钥然则鰋是鱼视之状初非鱼名则诗人不应与魴鰋并咏矣曾记一书载东海之鱼名曰鰋比目而行不相得不能达今忘其所出若以制字之意求之鰋右从眾眾之为义目相及也与比目而行者义正相合其必系是鱼无可疑矣姑志以俟後考鰋以目相及而得名然则是文姜从者之比也齐子文姜也不称姜称子者非独明其为齐女抑亦恶其丑行故讳之使若宋女然亦犹鲁讳吴孟姬为吴孟子耳归嫁也旧说以为归齐按妇人父母在称归寧去而不反称大归无以归名者此归正与南山之诗既曰归止同皆以嫁为归也其从郑玄云侄娣之属如云不独言其盛郑以为其从者之心意如云然云之行顺风者也诗人见鲁桓为人昏闇懦弱逆料其不能制姜故以敝笱为比言女之归夫家犹鱼之入于笱可入而不可出者也笱敝则任其往来今之入者不久将复出矣况以姜之健悍骄伉观其挟如云之从者以偕行其气势之盛如此目中岂复有桓者哉必不能安其室已胡安国云为乱者文姜而春秋罪桓公治其本也乾者夫道也以乘御为才坤者妇道也以顺承为事易着于乾坤述其理春秋施于桓公见其用】敝笱在梁其鱼魴鰋【语韵】齐子归止其从如雨【叶语韵读如与演女翻兴也陆佃云鰋鱼似魴而弱鳞其色白北土皆呼白鰋西征赋曰华魴跃鳞素鰋扬鬣性亦旅行故其制字从与亦或谓之魴也传曰连行鱼属若此之类是已失水即死弱鱼也其头尤大而肥者或谓之鰋六韬曰缙隆饵重则嘉鱼食之缙调饵芳则庸鱼食之鰋庸鱼也故其字从庸盖鱼之不美者故里语曰网鱼得鰋不如啖茹而鰋读曰慵者则又以其性慵弱而不健故也愚按此又足为文姜从者之比矣陆玕云幽州人谓之鰋或谓之胡鰋罗云鱼虽一类而所食不同今鰋惟食草鰋食螺蚌鰋乃食鰋矢则宜其味之不美尔今人亦不珍此族如雨不独言其多陆佃以为其倾从如雨之从天是也郑玄云如雨天下之则下天不下则止】敝笱【韩诗

作简】在梁其鱼唯唯【叶纸韵愈水翻韩诗作遗遗云不能制也丰氏本同】齐子归止其从如水【纸韵兴也唯唯郑云行相随顺之貌蒙前章鰈鰈随鲂而行以兴从者随姜而行如水不独言其衆如水之长流不息严云言从之者顺犹孟子言民归之如水之就下也陆佃云云升而生雨故如雨继之雨降而生水故如水继之亦立言之序黄佐云鲁国无风寓齐诗中此诗及南山载驱是也然姜齐女也抑固齐之风乎】

敝笱三章章四句【子贡传申培说皆以为鲁桓与夫人文姜如齐齐人刺之盖繇误以归止为归齐耳朱子改为刺庄公诗尤为无据郝敬云庄公于文姜则子耳桓公其夫也夫为妻网如笱可制鱼子之于母犹曰弗克夫不能制其妻则同敝笱矣故敝笱以刺夫猗嗟以刺子序说各有当也】

葛屨刺芮姜也芮伯万之母芮姜恶芮伯之多宠人也逐之出居于魏其宠人作此【芮姜事见左桓三年及四年秋秦师侵芮败焉小之也冬王师秦师围魏执芮伯以归竹书亦载周桓王十一年芮伯万出奔魏十二年王师秦师围魏取芮伯万而束之其事与左传合芮伯之多内宠固可非而其母至逐之出居于魏以致身被执而国几灭则已甚矣此诗疑宠人所作因芮伯居魏故系之魏风芮魏接壤水经谓河水自河北城南东迳芮城是也河北县故魏国也鍾惺云芮姜恶芮伯之多内宠逐之妇人之妬如此隋独孤后见羣臣有媵妾者辄言于上黜之恶其子勇多内宠废之至死代人行妬真造化戾气也】

纠纠葛屨可以履霜【阳韵】掺掺【文选注作纖纖说文作??云好手貌丰氏本同】女手可以缝裳【阳韵】要之襋【职韵】之好人服【叶职韵鼻墨翻】之【赋也纠说文云绳三合也徐锴云调三股绳也纠纠者纠而复纠绕纏之意故毛传云犹繚繚也士冠礼云屨夏用葛冬皮屨可也孔穎達云夏日之有葛屨犹絺綌所以当暑特为便于时耳非行礼之服若行礼之服虽夏犹当用皮郑于周礼注及志言朝祭屨舄各从其裳之色明其不用葛也月令季秋霜始降则履霜自秋始葛屨履霜指芮伯也意芮伯以夏时被逐至秋冬犹未得归故着葛屨而履霜于中野见其凄凉之状也说文无掺字当作??云好手貌女宠人自谓也缝说文云以鍼紩衣也裳男子之下服孔云以妇人服不殊裳知当为男子之下服要说文云身中也襋说文云衣领也好人正指芮伯也亲爱之称犹云大人美人也服说文云用也时芮伯出亡在魏故此所宠之内人为之缝裳因治其衣之腰领而寄使服之也】好人提提【齐韵亦叶霁韵大计翻楚词章句作媿媿】宛然【说文作如】左辟【陌韵亦叶寘韵卑义翻说文作僻】佩其象揅【霁韵亦叶齐韵都奚翻】维【石经作惟】是褊心是以为刺【寘韵亦叶陌韵七迹翻赋也提提当依楚辞章句作媿媿说文云江淮之间谓母曰媿愚按此指芮姜也重言之者疑其方言称母如此今俗於亲属之称亦多用叠字宛说文云屈^𠂔自覆也曰宛然者盖深自藏匿之意左辟当依说文作左僻僻之为义从旁牵也黄公绍云手足便右以左为僻故凡幽猥皆曰僻左象揅解见君子偕老篇陈祥道云以象骨搔首因以为饰名之曰揅盖有事则为饰无事则佩之按妇人之褊佩不一今所佩者惟象揅而已亦见其简朴无华之甚也褊说文云衣小也或云衣急盖以狭小而急故取以名焉褊心亦指芮姜也刺说文云直伤也按以言语伤人者亦如刺之然故毛萇别训刺为责也上章咏芮伯之出亡此章则表芮伯之所以见逐于其母者正以内宠之故言此好人之芮伯有母芮姜临之在上我辈之为妾媵者

亦既自覆藏于左僻之地而不敢与芮伯相近矣至于服饰无华仅以一象掇为佩而姜之褊心犹不能容且以此见责也虽俭亦美德而刻核太甚至于逐其子以出亡不其忍与圣人所以録此诗者见父母之教子自有其道如芮姜之于芮伯但节其女宠可也身为国君而逐之于外谓宗祀何至使秦师见侵魏国被围皆芮姜一逐阶之为厉妇人无识祸及国家遂至于此可畏哉】

葛屨二章一章六句一章五句【序谓刺褊也魏地愜隘其民机巧趋利其君俭嗇褊急而无德以将之旧说因此遂谓俭之为害足以亡国亦与奢等愚深不谓然过俭之弊其失为野而已岂遂至于亡乎且魏之後入于晋未闻有俭嗇之俗为史册所称也子贡传申培说皆谓魏之内子俭不中礼媵者怨之语意近似然内子能俭政自可嘉乃徒以褊心见刺于媵其意义甚小而圣人肯録之于经欤】

墓门刺陈佗也陈佗无良师傅以至于不义恶加于万民焉【出序 陈佗陈文公之子桓公鲍之弟桓公疾病佗杀其太子免而代之陈氏云此诗虽以刺佗乃是耆旧之贤者备见始末追咎先君不能为佗致良师傅致有弑逆之事也孔颖達云史记世家云文公圉卒长子桓公鲍立三十八年卒弟佗其母蔡女故蔡人为佗杀五父及桓公太子免而立佗是为厉公厉公取蔡女数如蔡淫七年太子免之三弟长者名跃中曰林少曰杵臼共令蔡人诱厉公以好女与蔡人共杀厉公而立跃是为利公利公者桓公子也按春秋桓五年春正月甲戌己丑陈侯鲍卒左传曰再赴也于是陈乱文公子佗杀太子免而代之则是佗自杀免非蔡人为佗杀免也桓六经云蔡人杀陈佗庄二十二年传曰陈厉公蔡出也故蔡人杀五父而立之经云蔡人杀陈佗传言蔡人杀五父则五父与佗一人不得云为佗杀五父也六年杀佗十二年陈侯跃卒则厉公即是跃跃为厉公则无复利公矣马迁既误以佗为厉公又妄称跃为利公简春秋世次不得有利公也迁盖见公羊传云陈佗淫于蔡人蔡人杀之因傅会为说云诱以好女而杀之案蔡人杀佗在桓六年世家言佗死而跃立五月而卒然则跃亦以桓六年卒矣而春秋之经跃卒在桓十二年距佗之死非徒五月皆史记之谬也】

墓门有棘斧以斯【支韵】之夫也不良国人知【支韵】之知而不已【纸韵】谁昔然矣【纸韵 兴之比而赋也周礼注云墓冢莹之地孝子所思慕之处谓之墓墓门毛传云墓道之门斧斫刀也斯说文云析也尔雅云离也字从斤孙炎云斯析之离读者如字毛云幽间希行故生此棘薪惟斧可以开析之夫指陈佗也鄙而不欲斥名之意无良不善也已郑玄云犹去也严粲云论语三已之孟子士师不能治事则已之皆谓废退之也谁昔尔雅云昔也朱子以为犹畴昔杨慎以为犹伊昔今按谁字原有所指之人以谁昔为昔意似未尽苏辙云桓公之世陈人知佗之不臣矣而桓公不去以及于乱是以国人追咎桓公以为桓公之智不能及其後故以墓门刺焉夫墓门而生棘亦以斧析之则已不然吾恐女死而棘盛以害女墓也佗之不良国人莫不知之者知而不之去昔者谁为此乎盖归咎桓公也吕祖谦云左传载佗劝陈侯许郑平亲仁善邻之言中于事理盖非昏愚者陈侯不许卒见侵伐既而徐思佗言复与郑和遣佗往郑泣盟佗与郑伯盟如忘泄伯料其必不免考其岁月才数年尔而蛊惑变坏如是此诗人之所伤也】 墓门有梅【列女传作□丰氏本作某】有鴝【列女传作鸛】萃【寘韵】止夫也不良歌以讯【叶寘韵虽遂翻集韵本作譴陆德明本作淬】之【列女传作止

】讯【楚辞章句作谗】予【丰本作而】不顾【叶麋韵果五翻】颠倒思予【叶麋韵读如雨王矩翻 兴之比而赋也梅解见摽有梅篇程子云美木也邢昺云鵽一名鵽一名梟陆玑亦云鵽大如斑鸠绿色恶声之鸟也入人家凶贾谊所赋鵽鸟是也其肉甚美可为羹臠又可为炙汉供御物各随其时唯鵽冬夏常施之以其美故也今按如邢陆说则梟鵽乃一物而罗愿别鵽与鵽为二云鵽似鵽小如雉体有文采行不出域若有疆服者故名鵽则鵽之非鵽明矣然鵽亦非梟张揖广雅以为?鸟但未详其状云何荆州记云巫县有鸟如?鸡其名为鵽广志云鵽楚鸠所生如蛩蛩巨虚种类不滋乳也其名梟者乃尔雅所云梟鵽耳亦谓之土梟故瞻印篇云为梟为鵽旧说相传皆谓梟者土梟鵽者怪鵽此与鵽无涉不可不辨萃说文云草貌一曰聚也谓如草之聚也苏公墓门有梅而鵽则集之梅虽善将得全乎桓公之没也虽有太子免以为後而佗在焉求太子之无危不可得矣严云萃集非止一鵽喻羣小附和之衆纵與之为恶也愚按此即序所谓佗无良师傅以至于不义者也歌以讯之讯予不顾指昔日言颠倒思予指今日言歌即此诗人所作所以告桓公者然今已不传矣讯尔雅云告也韩诗云谏也虽讯之而我言终不蒙其顾念至今日身死未寒而颠倒狼狈若此使桓公地下有知亦必思我昔日所歌之言然已无及矣皆追恨之辞】

墓门二章章六句【朱子谓此诗不知何所指且云序因陈国无事可纪独陈佗作乱故以是诗与之耳郝敬辨之云夫事孰有大于弑君者陈之有佗犹卫之有州吁郑之有叔段皆国家大故采风而无刺奚贵为风故陈风墓门犹卫之终风郑之叔于田耳其论良是子贡传申培说皆谓泄治谏灵公孔宁仪行父譖而囚之治作是诗语亦近似独发端以墓门起咏殊属不伦若列女传所载陈辨女事云辨女者陈国采桑之女也晋大夫解居甫使于宋道过陈遇采桑之女而戏之曰女为我歌我将舍汝乃为之歌曰墓门有棘斧以斯之夫也不良国人知之知而不已谁昔然矣大夫又曰为我歌其二女曰墓门有梅有鵽萃止夫也不良歌以讯止讯予不顾颠倒思予大夫曰其梅则有其鵽安在女曰陈小国也摄乎大国之间因之以饥饿加之以师旅其人且亡而况鵽乎大夫乃服而释之君子谓辨女贞正而有词柔顺而有守其後屈原天问中亦用其事云昏微遵迹有狄不寧何繁鸟萃棘负子肆情按繁鸟当作?鸟王逸注云人循闇微之道为戎狄之行不宁可以安其身谓晋大夫解居父聘吴过陈之墓门见妇人负其子欲与之淫佚妇人则引诗刺之曰墓门有棘有鵽萃止言虽无人棘上犹有鵽汝独不愧也玩逸此注则是陈国旧有此诗而辨女引而歌之耳固非其所自作也】

习习谷风疑郑人怨周之诗【篇名只谷风二字因卫诗亦有谷风特加习习二字以别之 初幽王以郑伯友为司徒申侯与犬戎入寇戎弑王于骊山之下郑伯友死之郑人共立其子掘突是为武公武公收父散兵从诸侯东迎故太子宜臼立之是为平王武公薨子寤生立是为庄公相继为王卿士王貳于虢郑伯怨王王曰无之故周郑交质王子狐为质于郑郑公子忽为质于周及平王崩周人将畀虢公政郑祭足帅师取温之麦又取成周之禾周郑交恶桓王三年郑伯始如周朝王王不礼焉周桓公言于王曰我周之东迁晋郑焉依善郑以劝来者犹惧不饒况不礼焉郑不来矣十三年王夺郑伯政郑伯不朝王以诸侯伐郑郑伯御之王卒大败祝聃射王中肩以上事俱见春秋传郑于周有迎立兴复之功而周不以为德且夺其政故其言如此其以子女对言絶不知有君臣之分王室陵夷于兹可见所云小怨殆指取禾取麦事也东周之不竞郑实为之然周之失郑不为无过此世变之大者故着之于经而前人未有

言及姑存此说质後之君子其後周襄王十三年郑人伐滑王使游孙伯请滑郑人执之王怒将以翟伐郑富辰亦曰郑在天子兄弟也郑武庄有大勲力于平桓凡我周之东迁晋郑是依子颓之乱又郑之繇定今以小忿弃之是以小怨置大德也无乃不可乎语意与此诗相类然则愚之所疑或不谬也】

习习谷风维风及雨【叶语韵读如与演女翻】将恐将惧【丰氏本作?】维【後汉书作惟】予与【後汉书作惟】女【音汝下同语韵】将安将乐【音络後同】女转弃【後汉书作弃】予【语韵比而赋也习习谷风解见国风严粲云来自大谷之风大风也盛怒之风也又习习然连续不断继之以雨喻遭变恐惧之时犹後人以震风凌雨喻不安也旧说谷风为生长习习为和调今考二章言维风及颓颓暴风也非和调之类三章言草木萎死无生长之意其说难通矣将郑笺云且也恐有危疑之意安者恐之反惧有局促之意乐者惧之反弃说文云捐也维予与女我能先施也女转弃予施而无报也转字最重言昔日同心协力忽然转变也惊讶之意当处变之时且恐且惧惟予与女同其忧患及得志之後且安且乐女反弃我其薄甚矣】习习谷风维风及颓【灰韵丰本作隕】将恐将惧寘予于怀【叶灰韵胡隈翻】将安将乐弃予【新序作我】如【韩诗外传作似】遗【叶灰韵夷回翻比而赋也尔雅云焚轮谓之颓扶摇谓之猋李巡云焚轮暴风从上来降谓之颓颓下也扶摇暴风从下升上故曰猋猋上也按颓本训为秃貌如尔雅解则当通作隕隕者下坠之义考工记颓尔如委礼记颓乎其顺皆与隕通陆佃以风之銳而上者为猋名曰扶摇风之旋而上者为颓名曰羊角非也严云不断之风又加以暴风喻事变益甚寘安置也怀抱也与免于父母之怀同义置我于怀抱如所谓若将加诸膝者亲爱之至也刘峻云阳舒陰惨生民大情忧合欢离品物恒性故鱼以泉涸而响沫鸟因将死而哀鸣同病相怜缀河上之悲曲恐惧寘怀昭谷风之盛典遗亡也如遗者郑云如人行道遗忘物忽然不省存也此比上章又深一层徐光啓云维予与女义同鸛鵒女转弃予别有参商寘予于怀如漆中之投胶弃予如遗则道旁之敝屣】习习谷风维山崔嵬【灰韵陆德明本作崑】无草不死无木不萎【叶灰韵乌回翻徐干中论作何木不死何草不萎】忘我大德思我小怨【朱子云叶韵未详丰道生云叶灰韵於隈翻比而赋也崔嵬解见卷耳篇萎李氏云衰落也孔云草小或连根死故言死也木大或一枝枯故言萎也严云大风摧物惟戴土之石山崔嵬独存而其山之草木无不萎死矣喻大患难也大德谓共济患难之大恩小怨谓言语行事之小失邹忠胤云为此诗者必是危疑之际曾脱其厄而与以生全故言山峻风高草枯木萎而女独得至今享有安乐者繫谁之德奈何便忘却乎按此诗之辞与周郑交恶事絶为相类然古人以此诗为刺友而作相传旧矣虽未必然亦有关风教备録于後蔡邕云古之交者其义敦以正其誓信以固逮夫周德始衰颂声既寢伐木有鸟鸣之刺谷风有弃予之怨应劭云谨按尚书曰人惟求旧诗曰虽有兄弟不如友生论语久要不忘平生之言周礼九两友以任得民是以隋会图其身而不遗其友鲍叔度其德而固推管子厥後陵迟弥已凋翫伐木为鸟鸣之刺谷风有弃予之怨陈余张耳携手遯秦交犹父子及据国争权还为豺虎自汉所称王贡弹冠萧朱结绶博育复隙其终始以交为难况容悦偶合而能申固其好者哉朱穆云务进者趋前而不顾後荣贵者矜已而不待人智不接愚富不赈贫贞士孤而不恤贤者斥而不存故田蚡以尊显致安国之金淳于以贵執引方进之言夫以韩翟之操为汉之名宰然犹不能振一贫贤荐一孤士又况其下者乎此禽息史鱼所以专名於前而莫继於後者也是以虚华盛而忠信微刻薄稠而纯笃稀斯盖谷风有弃予之

叹伐木有鸟鸣之悲李华正交论略云上古无交饱于和气至于善恶分利害竞而後有交交天命也微鲍子之知管氏则诸夏迁为左衽无归生之说屈建则椒举死于他国大者济天下叔牙夷吾是也小者全宗族声子伍举是也慈明奉元礼一如大人真长丧仲祖临枢恸色繇是近于骨肉之恩不止交游而已矣朋友渐于讲习缘情而亲于我为重忧危相急仕进相推望而不从厚实生怨诗曰丧乱既平既安且宁美道义相成也又曰将恐将惧维予与女将安将乐女转弃予哀势利相倾也利招则不悔机罔名眩则甘心鼎镬倾之以势则不畏于天地饵之以权则忍絶其亲爱故诗有谷风之刺礼有邦朋之禁以此防人犹或踰之嗟夫受施忘惠者仁义之蠹远贤奔利者商贩之行若然者无代无之至交之道殆絶乎善交者义在切切偲偲匡救其阙则辅宣之过则以规诲之不从则一心以蔽之不幸寘于刑辟则生死以全之传曰朋友无大故不弃此之谓也苟能久要之约必存平生之言可复如楼护终身与吕公同食张裔养杨恭母如亲则家室有归人谁虞死古者言之不出耻躬之不逮也务省诸身而已矣吕祖谦云朋友之义出于天其相求本非以利害也故穷達若一不知其义则利害而已耳离合安可常哉】习习谷风三章章六句【子贡传有朋友二字余文俱阙序则云刺幽王也天下俗薄朋友道絶焉申培说朱传亦以为朋友相怨之诗刘彝云天子之於天下无他职也厚其人伦皇建厥极人君之所以夙夜者也是故朋友道絶则琢磨之义不行琢磨之义不行则人不会其有极而归其有极矣於是君得以遂其不君臣得以遂其不臣至于父子兄弟夫妇莫不皆然皆繇琢磨之义不行而习以成俗莫知以为耻也乃至人伦悖乱亡国丧身而弗可救天下俗薄而朋友道絶非天子之职欤其曰刺之不亦宜哉郝敬云文武道隆伐木求友幽王失德谷风刺薄所以属雅雅政也献纳之义如谓民间朋友相怨而作则当属风邦国为风王朝为雅又云小雅短章叠咏如此篇之类犹是风体大雅皆庄严大篇是以有小大雅之别愚按此皆惑于诗序而云尔然愚独不谓然者如篇中言将安将乐此岂幽王时耶即不系之幽王而交谊衰薄如此其不可语盛世景象明甚且所谓安乐弃予者谓其不与共富贵耶邦无道富且贵焉其友人之品已自可知而且沾沾慕之以不得分一啜为憾则其为见亦鄙矣】

伯兮卫宣公之时蔡人卫人陈人从王伐郑伯也为王前驱久故家人思之【出郑氏笺陆元朗云从王伐郑读者或连下伯也为句者非按此即繻葛之役也春秋书隐三年秋蔡人卫人陈人从王伐郑服云言人者时陈乱无君则三国皆大夫也故称人详见兔爰篇谷梁传云郑同姓之国也在乎冀州於是不服为天子病矣张洽云自入春秋以来王室未尝兴兵伐诸侯今一旦天子率元戎啓行而诸侯从之若天讨加于宋督鲁桓则所谓仁不以勇义不以力而真足以大服天下之心矣今桓王以小忿夺郑伯之政又帅诸侯伐之而巨奸大恶反易天常之乱臣贼子乃屡聘焉其失天下共主之义非小过也遂致郑伯敢於抗拒祝?逆节加于王身而王灵至此竭矣】

伯【子贡传作柏】兮謁【屑韵文选注作偈云桀挺也】兮邦之桀【屑韵】兮伯也执殳【虞韵】为王前驱【虞韵 赋也伯妇人目其夫之字也名氏未详謁说文云去也言去从役也桀通作杰毛传云特立也白虎通云贤万人曰杰执持也殳吕氏春秋谓蚩尤所作长丈二而无刃孔穎達云考工记殳长寻有四尺寻八尺又加四尺是丈二也洽氏为戈戟之刃不言殳刃是无刃也许慎谓积竹为之徐锴云殳体八觚戈殳戟矛皆插车轡此云执之者在车当

挿用则执之此据用以言也前驱王应麟云如今道引也崔豹云受前驱之器也以木为之後世滋伪无复典刑以赤油韬之亦谓之油戟亦谓之檠戟公王以下通用之以前驱愚按伯也二句只是言其夫所事如此以起思念之端旧说谓惜其大才小用似无此意】自伯之东【韵】首如飞蓬【东韵】岂无膏沐谁适【音滴】为容【叶东韵读如融余中翻 赋也孔云此时从王伐郑郑在卫之西南而言东者时蔡卫陈三国从王伐郑则兵至京师乃东行伐郑也上云为王前驱即云自伯之东明从王为前驱而东行故据以言之非谓郑在卫东也蓬蒿属艸之不理者叶散生末大于本故遇风辄拔而旋朱子云其华如柳絮聚而飞如乱髮也自初至周而我首已如飞蓬矣不待行役之久也膏油所以泽发者沐说文云濯发也朱子云涤首去垢也左氏传遗之潘沐杜预注云潘米汁可以沐头适说文云之也容容饰也豫让云女为悦己者容是也言伯既不在我当何所之而为容饰乎吕希哲云诗曰岂无膏沐谁适为容则妇人涂面油髮自古而然庄子曰天子之侍御不爪揃不穿耳则穿耳带环自古而然】其雨其雨杲杲出日【质韵】愿言思伯甘心首疾【质韵 兴也严粲云时以秋伐郑秋暑之时艰于得雨故因以起兴朱子云其者冀其将然之辞杲说文云明也从日在木上徐锴云按淮南子曰日拂于扶桑是谓晨明故东字日在木中登于扶桑是谓朏明故杲字日在木上日晡则反景上照于桑榆故杳字日在木下皆会意也郑笺云人言其雨其雨而杲杲然日复出犹我言伯且来伯且来则复不来甘毛传云厌也凡人饮食口甘遂至于厌足曰甘心者心以如是为厌足也首疾头痛也夫忧思非人所欲而愿言之至于头痛然且甘心焉不以为悔可以观情矣】焉得谖【说文丰氏本作蕙韩诗陆德明本作萱陆又云或作諝尔雅音义作蕝文选注作諝云忘忧也】草【说文韩诗及丰本俱作艸】言树之背【队韵演繁露作北】愿言思伯使我心痾【队韵赋也谖通作蕙或作萱说文云令人忘忧艸也按本草即今之鹿葱也盖鹿食九种草此其一云味甘丰熙云食其花健忘一名宜男周处风土记云花宜怀妊妇人佩之必生男俗谓母为萱堂殆是义乎又名忘忧董子云欲忘人之忧则赠之以丹棘丹棘一名忘忧欲蠲人之忿则赠之以青堂青堂一名合欢养生论以为合欢蠲忿萱草忘忧即此是也朱子以合欢忘忧为一物误矣徐勉萱赋云信兹华之独茂挺金质于炎辰既耀色以祛痾亦含香而可珍同芰荷于阑署及蝉露乎首旻其叶四垂其跗六出亦曰宜男嘉名斯吉华而不艳雅而不质又名後庭草温庭筠诗云宜男漫作後庭草不似樱桃结子红又名万年韭背毛传云北堂也孔云背者向北之义房室所居之地总谓之堂房半以北为北堂房半以南为南堂也郝敬云树之背者今人多于堂北墙下作花坞是也卫之君子行役过时不反其妇思之欲暂忘而不可得故愿得忘忧之艸而植之庶几漠然而无所思陆机诗云安得忘归草言树背与襟亦是义也又按萱花宜怀妊则以为寓思夫之意亦通说文无痾字当作悔通作?易以本卦为贞变卦为?故悔有改变之义愿言思伯使我忽然将此心改变而不复思也与上文欲树谖草意相应盖无所聊赖之辞夫臣子从王义也时王室渐卑诸侯犯上故其妇忧思而不能忘若此是役果有射王中肩之事可以观世变矣】

伯兮四章章四句【序云刺时也言君子行役为王前驱过时而不反焉愚按此诗亦未见所谓过时云者但因其夫从王出征胜负未必故盼望而忧之耳郑笺引春秋传桓五年事确无可疑或谓击鼓亦卫风也乃伐郑而曰我独南行此不应云自伯之东殊不知周既东迁卫自西北而往故曰之东孔氏解之晰矣子贡传申培说皆谓鄘人从武庚伐卫室家忧之然武庚称王於他书无所考邹忠胤引诗史前编谓武庚修其政令殷人悦之周公归自东三叔惧乃

尊武庚为殷王遂率蔡霍及奄君淮夷叛王命亦未足信】

兔爰闵周也桓王失信诸侯背叛构怨速祸王师伤

败君子不乐其生焉【出序 按左传初郑武公庄公为平王卿士王貳于虢郑伯怨王王曰无之故周郑交质平王崩桓王即位将畀虢公政郑祭足帅师取温之麦又取成周之禾周郑交恶已而郑庄公如周朝桓王王不礼焉又取郕刘蕢邾之田于郑鲁桓公五年王夺郑伯政郑伯不朝王以诸侯伐郑王为中军虢公林父将右军蔡人卫人属焉周公黑肩将左军陈人属焉郑伯御之郑子元请为左拒以当蔡人卫人为右拒以当陈人曰陈乱民莫有鬬心若先犯之必奔王卒顾之必乱蔡卫不支固将先奔既而莘于王卒可以集事从之曼伯为右拒祭仲足为左拒原繁高渠弥以中军奉公为鱼丽之陈先偏後伍伍承弥缝战于繻葛命二拒曰旂动而鼓蔡卫陈皆奔王卒乱郑师合以攻之王卒大败祝聃射王中肩林尧舆云自伐郑无功而後王命始不行于天下】

有兔【汉书注作菟】爰爰雉离【汉书注作罹】于罗【歌韵】我生之初尚无为【叶歌韵吾何翻】我生之後逢此百罹【叶歌韵良何翻扬雄方言云罹谓之罗罗谓之罹陆德明本作离】尚寐无吪【歌韵陆德明本作讹 比也兔兽名罗愿云凡野兽有髡兔足底皆毛号建毛性狡善走爰爰尔雅云缓也宜通作缓缓雉离经云介鸟也解见雄雉篇离丽音近故易训离为丽也尔雅云鸟罟谓之罗说文云以丝罟鸟也戴侗云高网罗飞鸟者也以绳三维故其字从网从维是诗繻葛之战蔡卫陈三国之师先奔王师遂败作诗者以兔比列国之卒以雉比王卒见王室微弱诸侯携心皆宽缓无肯为王出死力者而王又好征伐无已则所苦者徒畿内之民而已或以兔喻郑人未是尚字有二义说文云曾也庶几也尚无为之尚当从曾字解下文尚寐无吪之尚当从庶几字解为本母猴之名姓好用爪故借为造作之义逢说文云遇也罹说文云心忧也从网未详愚按罹既训心忧则字当入心部从罗省意兼声心事如在网罗中忧之意也原不宜入网部朱子云为此诗者盖犹及见西周之盛故曰方我生之初天下尚无事及我生之後而逢时之多难如此郝敬云繻葛之败此霸者无王之始也自是以後桓文迭兴诸侯相攻而天下大乱王霸升降之际故曰我生之初尚无为我生之後逢此百罹王迹熄于五霸春秋始于诗亡以此後儒言春秋褒霸失兔爰之意矣寐说文云卧也徐锴云寐之言迷也目闭神藏谓之迷也吪说文云动也字从口徐以为卧既觉必有声气是也言自今以後庶几寐而不动则不复见此景象也】有兔爰爰雉离于罟【叶啸韵步妙翻说文作?]我生之初尚无造【叶啸韵读如隋七肖翻】我生之後逢此百忧【叶啸韵一笑翻】尚寐无觉【叶啸韵吉吊翻读如叫比也罟说文云覆车也郭璞云今之翻车大?有两辕中施罟以捕鸟或作罟非罟乃兔罟也造作也与为同意即序所谓构怨连祸者忧通作?说文云愁也字从心从页页者首也徐锴云?形于顔面故从首觉说文云寤也唐人诗云安得中山千日酒酩酊直到太平时正尚寐无觉之意】有兔爰爰雉离于罟【冬韵】我生之初尚无庸【冬韵】我生之後逢此百凶【冬韵】尚寐无聪【叶冬韵读如冲昌容翻比也韩诗云施罗于车上曰罟按尔雅云罟谓之罟罟罟也罟谓之罟据此则罟与罟是一物而诗人两言之何也郭璞以大?解罟或罟大而罟小也又说文云罟捕鸟覆车也然则罟罟皆鸟罟而孙炎乃以为掩兔之具不足信庸说文云用也用之于作为也凶祸也郑玄云百凶者王构怨连祸之

凶聰聞也凡寐者必人呼之而後能覺故欲其無所聞焉聞先于覺覺先于吡三章立言自有次第一节深一节也】

兔爰三章章七句【子貢傳申培說丰氏本俱作有兔 子貢傳申培說皆以此詩為晉趙鞅殺莒弘周人傷之而作按莒弘事劉文公嘗勸之擁敬王以安周荐孔子以相魯其後晉趙鞅殺晉大夫邯鄲午荀寅之甥也寅范吉射之姻也二子伐鞅鞅恨之劉氏與范氏世為婚姻鞅遂遷怒于劉以弘為其黨也脅周殺弘弘死血化為碧云詩以兔喻趙鞅雉喻莒弘其說頗與朱子合惟用我生之初等句終難強解故定從序】

有女同車刺忽也鄭人刺忽之不昏于齊太子忽嘗有功于齊齊侯請妻之齊女賢而不取卒以無大國之助至于見逐故國人刺之【出序 子貢傳申培說以為鄭世子忽辭昏于齊祭仲足諫之而作是詩按左傳魯桓公之未昏于齊也齊侯欲以文姜妻鄭太子忽忽辭人問其故太子曰人各有耦齊大非吾耦也詩云自求多福在我而已大國何為君子曰善自為謀隱八年鄭太子忽如陳逆婦以妘氏歸桓六年北戎伐齊齊侯使乞師于鄭鄭太子忽帥師救齊六月大敗戎師獲其二帥大良少良甲首三百以獻於齊齊侯又請妻之固辭人問其故太子曰無事于齊吾猶不敢今以君命奔齊之急而受室以歸是以師昏也民其謂我何遂辭之鄭伯祭仲曰必取之君多內寵子無大援將不立三公子皆君也弗從三公子謂子突子亹子儀也桓十一年夏鄭莊公卒初祭封人仲足有寵于莊公莊公使為卿為公娶鄧曼生忽故祭仲立之是為昭公又宋雍氏女于鄭莊公曰雍姞生突是為厲公雍氏宗有寵于宋莊公故誘祭仲而執之曰不立突將死亦執厲公而求賂焉祭仲與宋人盟以厲公歸而立之秋九月昭公奔衛桓十五年厲公惡祭仲之專使其壻雍糾殺之已而謀泄公出奔蔡六月昭公入桓十七年高渠弒昭公立公子亹十八年齊人殺子亹而轅高渠弒祭仲逆子儀于陳而立之莊十四年鄭傅瑕殺子儀而納厲公忽始于見逐终于見殺三公子更立亂鄭國使忽當日不辭昏則外有強援何以至此】

有女同車【麻韻】顏如舜【說文作薺丰氏本作?後同】華【麻韻丰本作 】將翱將翔【丰本作趨按据丰本則以趨踞都為韻而下章則以翔將忘為韻聲調殊叶矣但將翱將趨古無此文句且兩章皆有孟姜又當如何叶耶】佩玉琚瑀【魚韻】彼美孟姜洵美且都【叶魚韻陟魚翻讀如潞 賦也有女陳女也同車毛傳云親迎也孔穎達云士昏禮壻揖婦出門乃云壻御婦車授綬是親迎之禮與婦同車也此即忽如陳逆婦妘之事先是周鄭交質鄭太子忽為質于周在王所陳侯請妻之鄭莊公許之乃成昏舜說文作薺即木槿也華今文花字按爾雅釋草云葭木槿櫟木槿樊光云別二名也其樹如李其華朝生暮落與草同氣故在草中木槿通作木堇抱朴子云夫木堇楊柳斷植之更生倒之亦生橫之亦生生之易者莫過斯物也陸玕云齊魯之間謂之王蒸五月始花故月令仲夏木槿榮郭璞云或呼日及陸機賦如日及之在條常及而不悟是也日及通作日給篤論云日給之華似柰禁實而日給虛虛偽之與真實相似也傅玄云或謂之洽容或謂之愛老陸佃云槿華如葵朝生夕隕一名舜蓋瞬之義取諸此衍義云如小葵花淡紅色五葉成一花羅愿云舜乃華之甚茂者枝葉相當有同車之象有女同車之詩比之舜華舜英舜并蒂之華彼以諸侯娶諸侯之女故華色相稱何彼穠矣之詩比唐棣之華言其反而後合若下降然又潘尼以朝菌為舜華非是翱翔緩飛也車

中衣服迎风轻扬之貌琼琚即佩玉也解见木瓜篇孟姜齐女也孔云如左传文齐侯前欲以文姜妻忽後复欲以他女妻忽非文姜也他女必幼于文姜而序谓之孟者或与文姜非同辈耳都毛云闲也按都者鄙之对左传云都鄙有章淮南子云始乎都者常卒乎鄙都者城廓之域声名文物之所聚故其士女雍容闲雅之态生相如传车从甚都是也鄙者里鄴之名细民所居不过相习为吝嗇村陋之状今谚云野樣老子所谓我独顽似鄙是也杨慎云冶容艳态多出膏腴甲族薰醲含浸之下彼山姬野妇虽美而不都纵有舜华之顔加以琼琚之佩所谓婢作夫人鼠披荷叶举止羞澁乌有闲雅乎汉官尹夫人之见邢夫人贾充家郭氏之见李氏亦可证也严粲云旧说以有女即孟姜其文重复彼乃别指之词有女同车指忽所取者彼美孟姜指忽所不取者诗意言忽所取他国之女行亲迎之礼而与之同车者特取其色耳此女色如木槿之华朝生暮落不足恃也而今也且翺且翔于此佩其琼琚之玉徒有威仪服饰之可观而无益于事也曷若彼美好齐国之长女信美而且闲雅乎齐大陈小其女子气象自别忽若取之则有大国足为援矣】有女同行【庚韵丰本作堂】顔如舜英【庚韵】将翺将翔【阳韵】佩玉将将【叶阳韵资良翻楚辞章句丰本俱作锵】彼美孟姜【阳韵】德音不忘【阳韵 赋也女始乘车壻御轮三周御者代壻即先道而行故曰同行英增韵云萼也又说文云草荣而不实者谓之英舜华舜英皆言其不可与久之意将通作璫说文云玉声也班固云佩即象其事若农夫佩其耒耜工匠佩其斧斤妇人佩其鍼缕何以知妇人亦佩玉诗云将翺将翔佩玉将将德惠音言也谓齐侯请妻之言将大有造于郑国故怀其惠而不能忘也或以德音为齐女之德音犹言有贤誉也亦通吕祖谦云不借助于大国而自求多福忽非奋然诚有是志也盖其为人浅狭而多所拘挛暗滞而动皆疑畏浮易而不知审量子子然以文义自喜而国势人情与其身之安危皆懵然莫之察也适足以取亡而已矣使忽诚有是志而深求其实则质之弱固可强而所以持国者固无待于外助也惟其为善有名而无情所以卒见嗤于祭仲而为诗人所闵此功利之说所以多胜而信道者所以益寡张氏云忽之不昏于齐未为失也而诗人追恨其失大国之助者盖见忽之弱为甚追念其资于大国或有以自立此国人之情也胡安国云诗人刺忽之不昏于齐至于见逐欲固其位者必待大国之援乎曰此独为郑忽言也如忽之为人苟无大援则不能立尔若夫志士仁人卓然有以自立者进退之权在我矣郑自五伯之後益以侵削他日子产相与驰词执礼以当晋楚至于坏诸侯之馆垣却逆女之公子于野皆变其常度以晋楚之强卒莫能屈亦待大国之助乎然则仲见胁忽出奔咸其自取焉耳严云突挟宋之援以逐忽故国人惜忽之无援而作此诗也又邹忠胤云夫昏姻祸福之阶郑不耦齐郑无齐援亦无齐祸鲁一耦之得齐祸无若鲁酷者般卒闵弑鲁再罹妇祸也杀恶立接齐三成鲁乱也岂非利外不利内之明戒耶祭仲智犹未及此】

有女同车二章章六句【玩诗中孟姜二字明言齐女其事与左传合而朱子疑谓亦淫奔之诗则昭十六年郑六卿伐晋韩宣子于郊子旗赋有女同车而宣子皆称善岂有淫奔之词而可登之燕享者乎】

鸛羽刺时也晋昭公之後大乱五世【出序】民从征役而不得养其父母故作此诗【出朱传申培说同 晋自潘父弑昭侯纳桓叔不克晋立昭侯子孝侯为桓叔子曲沃庄伯所弑晋立孝侯弟鄂侯庄伯伐之桓王使尹氏武氏助之鄂侯奔随已而曲沃叛王王命虢公伐曲沃而立鄂侯之子哀侯後为庄伯子曲沃武公虜而杀之晋立哀侯子小子侯武公又诱杀之于是

王又命虢仲立哀侯之弟缙此序所谓大乱五世而是诗所称王事靡盬者也然则是诗之作其在桓王十四年王命立缙之时乎故毛传次序鸛羽下篇以无衣接焉】

肃肃鸛羽【虞韵】集于苞栩【虞韵】王事靡盬【虞韵】不能艺稷黍【叶虞韵读如竖上主翻】父母何怙【虞韵丰氏本作恟】悠悠苍【韩诗外传作仓】天曷其有所【叶虞韵读如数爽主翻 兴而比也肃者矜持振肃之义鸟之振羽其形肃然故曰肃肃鸛鸟名陆德明云似鴈而大无後指孔颖达云鸛鸟连蹄性不树止陆佃云毛有豹文一名独豹罗愿云鸛亦水鸟上林赋曰鸿鵠鸛鸛鵀属玉交精旋目烦鸛庸渠箴疵鵀卢羣浮乎其上是也鸛羽之诗言征役不得养其父母以喻鸛之集于苞栩苞棘苞桑盖水鸟而木栖既失其常又无後指尤非所以有托于木者可谓不得其所矣段成式云鸛遇鵀鸟能激糞御之糞着毛悉脱今鵀之毛能落衆羽然其鵀烈足以服羽族此类之可推者鸛乃水鸟不以鵀称而鵀鸟为之落羽此类之不可推者按今号老娼曰鸛岂亦以是故与羽说文云鸟长毛也集止也苞尔雅云稭也李巡云物丛生曰苞齐人名曰稭郑玄云稭者根相迫连栖致貌栩尔雅云杼也郭璞云柞树也陆玑云今柞栎也徐州人谓栎为杼或谓之栩其子为阜或言阜斗其殼为汁可以染阜今京雒及河内多言杼斗或云橡斗谓栎为杼五方通语也一名榲郑樵云南多榲北多栎按栩栎本是一物而栩又有柞栎之名孙炎说栎之实为橡而小尔雅亦云柞之实谓之橡本草图经云柞栎也栩也杼也皆橡栎之通名此说得之橡说文作𣎵煮食可以止饥以王命征伐谓之王事靡盬之言无盬之言固皆音近也解见采薇篇言王事无有坚固者故使祸乱相仍征役不息如此以晋事求之翼与曲沃攻伐不休祸起于桓王之助曲沃诗咏靡盬讥诮实深周昌年云此言王事靡盬与他处不同他处意皆在奋忠义此则一气赶下直以失所而志怨耳孔云怙恃义同言父母当何恃食故下言何食何尝与此相接成也悠悠苍天解见黍离篇有所犹云得所但使得归艺黍稷以养父母则得其所矣孔云人穷则反本困则告天此时征役未止故诉天告怨也】肃肃鸛翼【职韵】集于苞棘【职韵】王事靡盬不能艺黍稷【职韵】父母何食【职韵】悠悠苍天曷其有极【职韵 兴而比也翼说文云翅也极止也曷其有极言何时得止此征役也征役止则得耕田以供子职矣】肃肃鸛行【叶阳韵寒刚翻】集于苞桑【阳韵】王事靡盬不能艺稻粱【阳韵】父母何尝【阳韵】悠悠苍天曷其有常【阳韵 兴而比也行列也陆佃云说文曰𠂔相次也从七从十盖鸛性羣居如鴈自然而有行列故从𠂔诗曰鸛行以此故也闽谚曰鸛无舌兔无脾盖鸛无舌连蹄性不木止又其飞肃肃劳苦然其于苞栩苞棘苞桑也尚得以其类集聚衆羽而成翼聚衆翼而成行今君子无所于愬下从征役又不得养其父母则鸛之不如也又按先言集栩继言集棘继言集桑亦征役无定之况罗愿云稻米粒如霜性尤宜水故五谷外别设稻人之宫掌稼下地而汉世亦置稻田使者以其均水利故也稻一名稯然有黏有不黏者今人以黏者为糯不黏者为粳然在古则通得稻稯之名说文云沛国谓稻曰稯秬稻属或作粳是则直以稯为稻耳若郑康成注周礼稯粳也则稻是稯然要之二者皆稻也故汜胜之云三月种秬稻四月种秬稻字林曰糯黏稻也秬稻不黏者今人亦皆以二谷为稻若诗书之文自依所用而解之如论语食夫稻则稻是稯月令秬稻必齐则稻是糯周礼牛宜稯则稯是秬丰年多黍多稯为酒为醴则稯是糯又稻人职云泽草所生种之芒种是明稻有芒有不芒者今之稯则有芒至糯则无是通得称稯稻之明验也然说文所谓沛国谓稻曰稯至郭氏解雅稯稻乃云今沛国称稯不知说文亦岂谓此稯讹为稯耶将与郭自异义也又有一种曰粳比于稯小而尤不黏其种甚早今人

号粳为早稻粳为晚稻苏氏以粳一曰粳亦未尽也梁今之粟类古不以粟为谷之名但米之有孚穀者皆称粟今人以谷之最细而圆者为粟则梁是其类内则曰饭黍稷稻粱白黍黄粱稻稊说者曰下言白黍则上是黄黍下言黄粱则上是白粱今粱有三种青粱穀穗有毛粒青米亦微青而细于黄白米也夏月食之极为清凉但以味短色恶不如黄白粱故人少种之亦早熟而收少作饧清白胜余米黄粱穗大毛长穀米俱麤于白粱而收子少不耐水旱食之香味胜于诸粱人号为竹根黄白粱穗亦大毛多而长穀麤扁长不似粟圆米亦白而大其香味为黄粱之亚古天子之饭所以有白粱黄粱者明取黄白二种耳今人大抵多种粟而少种粱以其损地力而收获少耳然古无粟名则是以粱统粟今粟与粱功用亦无别明非二物也粱比他穀最益胃但性微寒其声为凉盖是亦借凉音如许叔重说黍大暑而种则以黍从暑粱从凉其义一也又尔雅注云藿今之赤粱粟也芑今之白粱粟也皆好穀也郝敬云今高粱之类胡胤嘉云周礼食豮云犬宜粱礼记粱曰芻其以为宗庙之祭又大夫无故不食粱古人用粱之重如此燕代间谓之粱穀关西谓之毛穀尝徐锴云口试其味也常朱子云复其常也得耕田以供子职则复其常矣】鹄羽三章章七句【序谓昭公之後大乱五世君子下从征役不得养其父母而作是诗今按篇中有艺稷黍等语似与君子不类子贡传以为魏若于征役之诗邹忠胤云魏居周之西土与邠芮岐毕俱属迺封其调遣或尤烦于诸国此风诗王事靡盬所以独见咏于魏耳亦无据】

山有扶苏刺忽也所美非美然【出序 愚按此与狡童褻裳三篇皆为祭仲足而作据左传仲足初为祭封人因有宠于庄公庄公使为卿为公娶邓曼盖君之嬖幸臣也仲虽为卿诗人本其进身之始而丑之故有狂童狡童之目先是仲为庄公娶邓曼生昭公忽以邓曼故遂立忽忽固长也已而为宋人所胁旋逐忽而立突是为厉公仲专政公恶之使其壻雍纠杀之以谋泄公遂出奔昭公复位不久为高渠弥所弑立子亶仲与焉齐人来讨高渠弥子亶见杀仲以智免又逆子仪于陈而立之其後厉公使傅瑕杀子仪而复入因治与于雍纠之乱者而仲已死矣仲擅废立之权犯不臣之罪竟以善终君子恨之当时目之为狂狡固宜】

山有扶【杨慎云徐邈引作搏尔雅翼作扶】苏【虞韵丰氏本作胥杨慎云徐邈引作疋】隰有荷华【叶虞韵芳无翻丰本作 】不见子都【虞韵】乃见狂且【叶虞韵丛租翻丰本作狙兴也扶苏毛传以为扶胥小木也未详所出以文义观之下篇乔松是高木则扶苏非小木考说文扶字当】

【作扶扶之为义言扶疏四布也通作搏即搏桑之木也字从專亦取扶疏四布之意後讹作搏淮南子朝发搏桑是也後人濶作扶故称扶桑今据徐邈引扶苏作搏疋亦是以搏讹搏而搏又通为扶若苏之言疋疋之言疏皆以音同通用然则扶苏即扶疏也说文以搏为搏桑神木乃日所出别无木名搏者愚按管子地员篇称五沃之土木宜桐梓扶櫨或即此扶耳其木之形象未详隰说文云阪下湿也荷华荷之华也毛传云扶渠也扶渠即芙渠尔雅云荷芙蕖其茎茄其叶蕝其本密其华萏萏其实莲其根藕其中的的中薏李巡云芙渠其总名也别名芙蓉郭璞云今江东人呼荷华为芙蓉北方人便以藕为荷亦以莲为荷或用其母为华名或用根子为母叶号此皆名相错习俗传误也毛传以扶渠名荷华所谓用其母为华名者也又陆元朗云华未开曰萏萏已发曰芙蕖严粲云世称美好之人为子都孟子所称子都以貌之

美此诗所称子都以德之美犹美人之名或称美貌或称美德也若以此子都为美貌则与狂且意义不贯焦氏易林云视暗不明云蔽日光不见子都郑人心伤狂且指祭仲也狂乃猘大之名韩子云心不能审得失之地谓之狂且语辞吕祖谦云山宜有扶苏者也隰宜有荷华者也朝宜有贤俊者也今观昭公之朝者不见子都乃见狂且焉则昭公所美非美可知矣】山有桥【陆德明本作乔】松【冬韵】隰有游龙【冬韵邢昺疏作茈】不见子充【东韵】乃见狡童【东韵 兴也桥通作乔说文云高而曲也尔雅云本上句曰乔松木名赵颐光云壽木也故从公游取枝叶放纵为义龙毛传云红草也当作茈尔雅云红茈古其大者藟郭璞云俗呼红草为茈鼓语转耳红亦作茈陆玕云一名马蓼叶麓大而赤白色生水泽中高丈余张子厚云其枝干樛屈着土处便有根如龙也广雅以为龙口本草云一名鸿鹄如马蓼而大主消渴去热明目益气陶隐居云马蓼生下湿地茎班叶大有黑点最大者是茈草即水红也下湿地皆有之又陆佃云以纵故谓之龙木桥耸于上草游纵于下则山湿之所养以自美者至矣罗愿云龙与荷华皆隰草之伟者然所配扶苏乔松不同按管子有五栗五沃五位五隰五壤五浮之土谓之上土五沃之土则桐柞扶櫨秀生茎起五臭疇生莲与藟茈藁本白芷然则首章言扶苏荷华应此五沃之土也其五位曰其山之浅有龙与卉羣木安遂条长数丈其桑其松其?其茸次章言乔松游龙应此五位之土也此皆土之最美者山不惟有扶苏而又有乔松隰不惟有荷华而又有游龙以兴一国之大贤材无不有也充说文云长也高也子都子充总为题目贤人之称不必有是人名也狡说文云少狗也故以比童郑玄云狡童有貌而无实亦指祭仲】

山有扶苏二章章四句【子贡传申培说丰氏本皆作扶胥 朱子以为淫女戏其所私者浅陋甚矣子贡传申培说皆以为郑灵公弃其世臣而任嬖人狂狡子良谏之而作是诗考左传载狂狡事在宣二年实郑穆公二十一年也郑公子归生受命于楚伐宋战于大棘宋师败绩狂狡貉郑人郑人入于井倒戟而出之获狂狡君子曰失礼违命宜其为禽也戎昭果毅以听之之谓礼杀敌为果致果为毅易之戮也狂狡本宋大夫而为郑所俘获事仅止此其见嬖于穆公之子灵公絶不经见後灵公立一年为归生及公子宋所弑郑人欲立子良子良名去疾穆公庶子也辞乃立襄公坚而子良为大夫云丰坊引乐正子春国记谓宋文公立狂狡年十八为大夫四年降郑郑穆公使事太子夷嬖穆公薨夷立是为灵公狡以大棘之战故怨公子归生公子宋譖于灵公将杀之归生弑灵公狡死焉其族奔楚狂接輿其後也此书他不着録人以为坊伪为之者不足信坊又谓子都乃公孙阙字子充乃瑕叔盈字皆郑世族之贤者今按二人同在郑庄公时历昭厉文穆而後及灵凡六公矣乃引之与狂狡并称殊属无谓郑多贤者亦何专屑屑称此二人又考瑕叔盈字子充原无所载而子都乃射杀孝子潁考叔者当时郑庄公使卒出貍行出犬鸡以诅之君子方叹其失刑则子都亦何贤之有季本云穆公卒而灵公嗣不半载而为公子归生所弑盖实归生之谋而假手于公子宋者也则归生当国而公子宋辅之事权属焉岂宋囚狂狡之所能輿而灵公在位日浅即已被弑何遽能用狂狡哉且狂狡一小人耳其恶必不至如归生与宋之甚不责归生与宋而区区于咎狂狡此非公论而孔子岂得録之】

狡童郑人忠于忽者之辞闻祭仲有立突出忽之谋而因以告之也【严粲云为告忽言之故指狡童为彼而称忽为子】

彼狡童兮不与我言【元韵亦叶先韵倪坚翻】兮维子之故使我不能餐【叶元韵苏昆翻亦叶先韵遂缘翻】兮【赋也狡童指祭仲也说见山有扶苏篇不与我言所谓阴谋也子指忽也礼诸侯即位未踰年称子餐说文云吞也不能餐犹言食不下咽也严云彼者薄之之辞子者亲之之辞权臣擅命将有他志恶察察言故但言忧之而不能餐微词也】彼狡童兮不与我食【职韵】兮维子之故使我不能息【职韵】兮【赋也严云共食则可以从容谋事息说文云喘也不能息者谓忧之深而至于不能喘息也一云息犹安止也即寝不安席之意亦通】狡童二章章四句【子贡传贵竹本申公说及丰氏本皆作麦秀丰氏本多一首章其辞曰麦秀蘩蘩兮禾黍油油彼狡童兮不与我好兮愚按此箕子伤纣之歌见于史记此诗不应全用其语或好事者见两章各有彼狡童兮二句文法偶同因附益之然章法不类未足信也序云刺忽也不能与国人图事权臣擅命也所谓权臣擅命者得之惟以为刺忽而作则无不无可议忽以世子为郑君其当时国人作诗义不容遂忘君臣之分而目为狡童也说者谬谓箕子亦目纣为狡童然何知非指飞廉恶来辈乎朱子辟之谓昭公之为人柔懦疎濶不可谓狡即位之时年已壮大不可谓童以是名之殊不相似其论正矣然云此亦淫女见絶而戏其人之词不审圣人删诗将以垂世教顾留此等诗何为子贡传申培说以为子良谏用狂狡灵公不听将去其国赋此然灵公用狂狡事传无所载亦不足信辨在山有扶苏篇】

褻兮郑人思出突而纳忽也忽以世子践位正矣宋人乃使祭仲立突而逐忽故郑人不义突而作此诗【出诗故按左传祭仲为郑庄公娶邓曼生昭公故祭仲立之宋雍氏女于郑庄公曰雍姑生厉公雍氏宗有宠于宋庄公故诱祭仲而执之日不立突将死亦执厉公而求赂焉祭仲与宋人盟以厉公归而立之秋九月丁亥昭公奔卫己亥厉公立此诗之作当在祭仲与宋人盟之时也事在桓王十九年】

褻兮褻兮风其吹【支韵】女【音汝下同】叔【丰氏本作未】兮伯兮倡予和【叶支韵胡猥翻】女【比而赋也说文云草木凡皮叶落堕地为褻女朱子云指褻而言也此言忽之必为仲所逐犹褻之必为风所吹也忧惧之深不敢斥言正似隐语耳叔伯谓诸大夫也倡通作唱说文云导也和说文云相膺也女指叔伯也言谁有倡大义者则我将应而从之也严粲云此诗小臣愿忠于国而力不能自为呼诸大夫而告之言汝叔伯其亟图之汝倡我则我和汝矣谓患无其倡不患无和之者也当时卒无倡之者繇忽无忠臣良士也张氏云忽盖不足道而人之情犹不欲遽絶之者以其立之正故耳】褻兮褻兮风其漂【萧韵亦叶啸韵匹妙翻释文作飘】女叔【丰氏本作伯】兮伯【丰氏本作未】兮倡予要【啸韵亦叶萧韵伊尧翻说文本身腰字今身腰之要加月作腰而要但为要约字矣】女【比而赋也漂飘通尔雅回风为飘此则从风回旋之意要本身腰之腰徐锴谓腰为中关所以自臼持也故借为约结之义和者和于始顺而无逆也要者要于终约而不离也】

褻兮二章章四句【序以为刺忽也君弱臣强不倡而和也今按如序言则此诗语乃絶无人臣礼岂可以训子贡传申培说以为郑庄公卒公子争立而齐楚伐之忠臣忧之欲相帅献谋以救其国故作此诗较为近之然相帅献谋献之何人似不如出突纳忽之义为得其正揣摩当日诗意恰是如此不知朱子何意必欲改为淫女之词夫女虽善淫不应呼叔兮又呼伯兮殆非人理言之污人齿颊矣又按郑六卿饒晋韩宣子各赋郑诗子柳赋褻兮宣子皆称善则

其非淫诗可知】

褰裳思见正也郑祭仲恣行国人思大国之正已也【出序但郑祭仲三字原作狂童孔颖达云庶子与正适争国祸乱不已无可奈何郑国之人欲大国以兵征郑正其争者之是非令去突而定忽也严粲云郑人始作穉兮望大夫相与扶持之既无其人则又作褰裳望大国之见正盖倦倦于忽也说者多以狂童指忽非也忽以世子嗣位其立也正国人忧之至于不能餐其情可见此诗及有女同车皆欲求援大国以扶植之也王道既微小国无所控愬往往思方伯之拯已霸图能无兴乎是可以观世变矣】

子惠思我褰【说文作褰陆德明云或作褰非】裳涉溱【真韵丰氏本作溱】子不我思岂无他【丰本作它後同】人【真韵】狂童之狂也且【音诸後同此句不用韵 赋也子斥大国之人也惠说文云仁也褰当从说文作 云衽衣也班固云黄帝尧舜垂衣裳而天下治何以知上为衣下为裳以其先言衣也诗曰褰裳涉溱所以合为衣也弟子职言衽衣而降也名为衣何上兼下也涉说文云徒行厉水也溱水名河南通志云源出密县一名浚水东北至新郑县与洧水合水经作溱水其名溱者出桂阳临武入汇非此水也酈道元云溱水出郃城北西鸡络陂下又东南流历下田川迺郃城西谓之柳泉水也故史伯答桓公曰若尅虢郃君之土也前莘後河左雒右济主丕驩而食溱洧循典刑以守之可以少固即谓此矣南注于洧世所谓之为郃水也补传云溱洧未必褰裳可涉此言欲其急于拯乱耳言大国如有惠然思念我郑国之乱欲来为我讨正之者则当速褰揭其裳渡水而来毋容少辽缓也他人他国之人也夫乱臣贼子人人得而诛之纵尔不我思然大义所在独无他国之人起而图我者哉盖激之也苏辙云子苟不我思岂无他人乎吾恐他人之先子也严云望大国之正已其情甚切不主一国也旧说谓尔不我思则当有他国思我者如此则自为悠缓之辞非告急之意狂童指祭仲即扶苏篇所谓狂且也邓元锡云仲置君如奕棋盖其易也故诗数以狂童目焉谷梁传云死君难臣道也今立恶而黜正恶祭仲也狂童之狂也且言狂童之狂已甚故大国之正已不可缓也且助语辞左昭十六年四月郑六卿饯晋韩宣子于郊子太叔赋褰裳宣子曰起在此敢勤子至于他人乎子太叔拜宣子曰善哉子之言是不有是事其能终乎是可以得此诗之意矣子太叔游吉字】子惠思我褰裳涉洧【纸韵】子不我思岂无他士【纸韵】狂童之狂也且【赋也洧水名前汉地理志云潁川阳城山洧水所出东南至长平入潁水经云洧水出河南密县西南马领山又东过新郑县南溱水从西北来注之又东过习阳城西折入于潁考酈道元注谓阳城山在阳城县之东北盖马领之统目而长平城在习阳城之上志与经合矣他士郑玄云犹他人也大国之卿当天子之上士】

褰裳二章章五句【子贡传谓子良去国不忘谏君申培说谓子良如晋作诗以寓灵公今按子良辞君位不肯立见于左传从不闻有去国之事且子太叔之引是诗语意明白别无烦曲说矣朱子旧注亦依序义後乃改以为淫女语其所私者之诗郝敬云按郑风如穉兮狂童褰裳诸篇慷慨伤时而其言皆似妇人艷语此所谓郑声好滥淫志者也故曰诗言志勿以辞害志如以辞而已凡郑诗孰不可目为淫奔乎朱传所以偏执成误也又吕氏春秋云晋人欲攻郑令叔向聘焉视其有人与无人子产为之诗曰子惠思我牵裳涉洧子不我思岂无他士叔向归曰郑有人子产在焉不可攻也秦荆近其诗有异心不可攻也晋人乃辍攻郑其意与子

太叔称时颇相类於诗指为近然子太叔与子产同时不应遂赋其诗或即一事两属耶】

二子乘舟卫宣公之子汲也寿也朔也汲前母子也寿与朔後母子也寿之母与朔谋欲杀太子汲而立寿也使人与汲乘舟于河中將沉而杀之寿知不能止也因与之同舟舟人不得杀汲方乘舟时汲傅母恐其死也闵而作诗【出刘向新序 二子乘舟之事当以刘向所传为确其後舟行无恙未几又使汲之齐將使盜见载旌要而杀之寿止汲汲曰弃父之命非子道也不可寿又与之偕行寿之母知不能止也因戒之曰寿无为前也寿又为前窃汲旌以先行几及齐矣盜见而杀之汲至见寿之死痛其代已死涕泣悲哀遂载其屍还至境而自杀兄弟俱死故君子义此二人而伤宣公之听谗也以上俱见新序与左传史记毛传列女传诸书大同小异按左传云初宣公烝于夷姜生急子属诸右公子为之娶于齐而美公取之生寿及朔属寿于左公子夷姜縊宣姜与公子朔构急子公使诸齐使盜待诸莘將杀之寿子告之使行不可曰弃父之命恶用子矣有无父之国则可也及行饮以酒寿子载其旌以先盜杀之急子至曰我之求也此何罪请杀我乎又杀之史记则云宣公十八年太子汲母死宣公正夫人与朔共谗恶太子汲宣公自以其夺太子汲妻也心恶太子欲废之及闻其恶大怒乃使于齐与之白旄而令盜遮界上杀之壽止太子不可乃盜其白旄而先驰至界界盜见其验即杀之寿已死而太子汲又至谓盜曰所当杀乃我也盜并杀太子汲以报宣公宣公乃以子朔为太子毛传则以为使賊先待于隘寿窃节先往列女传则以为宣姜陰使力士待之界上曰有四马白旄至者必要杀之然总之皆後一节事其二子乘舟之诗实不作于是时也于何知之此诗中有乘舟之语固非待于隘而杀之于陆者耳新序所载首尾完密足补信史故从之水经注云京相璠曰今平阳县北一十里有故莘亭道厄陈蹊要自卫适齐之道也望新台于河上感二子于宿龄诗人乘舟诚可悲矣今县东有二子庙犹谓之孝祠矣严粲云卫自宣公杀汲寿以朔为世子代立是为惠公左右公子怒朔之谗杀太子汲乃作乱立黔牟惠公奔齐其後诸侯复立惠公黔牟奔周惠公怨周之容黔牟与燕伐周立子頹为王惠王奔温及惠公卒子懿公立百姓大臣犹以杀汲之故皆不服狄乘其衅杀懿公而灭卫呜呼卫之乱极矣父子兄弟君臣之间相戕相贼不惟流毒子孙啓侮啓狄以之杀身亡国其余殃所渐且稔王室之祸盖纲常道尽天地几乎倾陷矣推原乱根始于夫妇之不正衽席之祸一至此邪以是知诗首关雎圣人之意深远矣司马迁云余读世家言至于宣公之子以妇见诛弟寿争死以相让此与晋太子申生不敢明骊姬之过同俱恶伤父之志然卒死亡何其悲也或父子相杀兄弟相戮亦独何哉苏辙云宣公专欲以兴祸固无足言汲寿勇於义惜其不为吴泰伯而蹈申生之祸以重父之过可以为廉矣未得为仁也胡胤嘉云完廩浚井之命舜未尝不从也卒不可得而杀者圣人之道全而德慧妙也大杖则走曾子之孝亦若是矣曾子之父贤父也又似不可槩语者汲尊父命寿先兄死一往不返盖有独至之性焉废长立少岂正命哉伯夷逃之父尸未寒齐终弃其命而从兄千古称两人之仁未尝有以陷父不义非之者有孔子之断例也汲寿即不得比于二子之无怨即其争死不悔亦足追其芳躅矣世之论者或以寿无救于兄而重父之过或以汲当逃避使父无杀子之名此平居中庸之论值汲壽之时以推其不得已之心彼诚有大不忍者迫于中也论人而以周孔为关键天下必无全人论人而以周孔为关键汲寿必无罪也何也孔子仁夷齐必錄汲寿矣不然其事着于春秋圣人何不一语贬之也耶又洪迈云考之左传卫宣公以鲁隱四年十二月立至桓十二年十一月卒凡十有九年其烝于庶母夷姜也姑以即位之始便成淫乱而汲即以次年生勢須十五年然後娶而夺之又

生寿朔已能同母譖兄又能代为使越境非十岁儿所能办然则十九年之间何以处之此决无之事邹忠胤駁之云夷姜固庄公妾而卫宣非与其父庄公为代者洪氏殆考之未悉也庄卒而桓立十三年入春秋至鲁隐四年则卫桓十六年矣其春桓为州吁所弑九月卫人杀州吁而宣公晋以是冬立然则晋之烝夷姜而生汲子当在其兄桓公之世及宣即位计汲年且长因以为世子新台之筑距此时亦或不远其十九年间所生壽朔或已几弱冠寿之能代兄使而朔之能同母愬兄固无足怪其辨确矣愚按宣公杀汲之岁实桓王之十九年】

二子乘舟泛泛其景【叶养韵举两翻】愿言思子中心养养【韵尔雅作洋洋丰氏本作憬憬 赋也景说文云光也泛泛其景描写其渡河之时舟影与波光相上下也愿通作愿说文云谨也思子思二子也养通作恙说文云忧也重言之者见其忧之相继续而无已也】

二子乘舟泛泛其逝【霁韵】愿言思子不瑕【丰本作遐】有害【叶霁韵暇憇翻 赋也逝说文云往也瑕礼记注云玉病也害说文云伤也不瑕与泉水之解同但彼之有害以理言此之有害以身言言二子乘舟孤帆远去泛泛往矣愿言思子其所自处者既无瑕玷岂诚不能免于有害乎揆理而姑以自慰也作此诗者为汲之傅母亦贤矣哉】

二子乘舟二章章四句【序以为卫宣公二子争相为死国人伤而思之故作是诗辨已在小引下子贡传则云宣公杀其世子汲及母弟寿卫人伤之以寿为汲之同母弟絕无稽据申培说则云宣公欲立少子朔使汲寿如齐而沉之于河卫人伤之而作是诗沉河於乘舟似合矣然羣书所称二子实死于盗非死于水皆不可信】

芄兰刺卫惠公也骄而无礼大夫刺之【出序 惠公名朔宣公子按左传惠公之即位也少杜预云盖年十五六孔颖達云初卫宣公烝于夷姜生汲子为之娶于齐而美公娶之生寿及朔言为之娶于齐则宣公已即位也宣公以隐四年冬立假令五年即娶齐女至桓十二年见经凡十九年而朔尚有兄寿则宣公即位三四年始生惠公也故疑为十五六也黄佐云序刺惠公如鲁昭公犹有童心之例】

芄【释文一作丸】兰之支【韵石经说文说苑俱作枝】童子佩【陆德明云字从人或作玉傍者非】觿【叶支韵翺规翻又醉绥翻周礼注作鑿】虽则佩觿能不我知【支韵】容兮遂【寘韵丰氏本作遂】兮垂带悸【寘韵韩诗作萃云垂貌】兮【比也芄兰二名说文云莞也一名葱蒲可为席周礼有莞筵蒲筵莞蒲总一草而莞则蒲之小者以之为席则莞精而蒲粗旧说误读尔雅有藿芄兰之句以为此即藿非也按郭璞注云藿芄蔓生断之有白汁可啖孔疏云如此注则以藿芄一名兰可知其非此诗之芄兰明矣莞所以名芄兰者以莞丛生水中似兰而茎圆故字从丸而又呼之以兰也其质轻扬善泛故取以为幼弱不能自立者之比支徐锴云竹叶下垂也芄兰之叶亦下垂如竹故其茎以支名觿者成人之佩非童子之饰子华子云晏子闻其言请刻诸佩觿以志不忘是也按内则云子事父母左佩小觿右佩大觿下别云男子未冠笄者但佩容臭而已故知觿为成人之佩貌如锥以象骨为之其锐端可以解结也刘向云知天道者冠钹知地道者履躡能治烦决乱者佩觿能射御者佩鞬能正三军者搢笏衣必荷规而承矩负绳而准下故君子衣服中而容貌得接其服而象其德故望玉貌而行能有所定矣诗曰芄兰之枝童子佩觿说行能者也又沈括云芄兰生莢枝出於叶间

垂之正如解结锥後章所谓佩鞶者疑古人为鞶之制亦当与茝兰之叶相似但今不复见耳夫以童子而服成人之饰则俨然成人矣然而其实非也云能不我知者言以彼材能若较之于我则未见其果有知识能加于我轻之之辞也惠公以穉年即位听其母与庶兄通而不能禁亦可谓无知之甚者矣容从容遂申遂朱子以为舒缓放肆之貌是也垂带即绅玉藻云绅长制三尺郝敬云礼童子不垂带走则拥之有事则收之悸说文云心动也灵光赋云心愧愧而悸言彼之举动虽雍容直遂垂带翩然而其执心终未免悸悸然不定盖自觉不称其服也此序所云骄而无礼也通篇皆比体乃是借童子躡等之状为刺若云正斥惠公则亦非大夫所宜言矣】茝兰之叶【韵】童子佩鞶【叶韵】虽则佩鞶能不我甲【叶叶韵吉协翻韩诗作狎】容兮遂【见前】兮垂带悸【见前】兮【比也鞶说文云射决也毛诗云决也车攻作决周礼作挾谓钩弦也以象骨为之挟矢时着右手巨指以钩弦郑玄则以礼无以鞶为决者云鞶之言沓也所以彊沓手指放弦令不挈也按仪礼大射云朱极三注云以朱韦为之用以韜指极犹放弦也三者食指将指无名指其小指短则不用也亦谓之挾孔云巨指着块右臂加拾右手手指又着沓然则从郑说为是愚按内则言右佩玦扞玦义见前扞即拾也不及鞶者以三物皆?矢时所用举其二以该之耳甲者十干之首犹言长也即甲于天下之甲言其材能未必遂长于我也】

茝兰二章章六句【朱子谓此诗不可考当阙郝敬云夫卫惠公之为童子非不可考也而谓当阙则三百篇之着姓名者无之子贡传但以童子不孙鄫人刺之既於义无所?明而邹忠胤乃为说曰鄫在朝歌之南染纣余习故周书毕命尚云兹殷庶土席宠维旧服美于人骄淫矜夸将繇恶终况在鄫侯之世风未移于三纪乎信如所云以此入诗其猥已甚顾不知童子之刺乃借言也申培说则云刺霍叔也以童子僭成人之服此其不度德量力而助武庚作乱胡胤嘉駁之云按竹书记武王崩寿五十有四时管叔五十有二蔡叔五十周公四十有八康叔四十有六霍叔四十有四成王之二年管叔畔又七年而死则管叔寿止六十成王十年蔡叔卒则其寿五十九是岁霍叔复封则五十有四矣非童幼时也何所取义哉】

墙有茨卫人刺其上也公子顽通乎君母卫人疾之【出序按左传初惠公之即位也少齐人使昭伯烝于宣姜不可强之生齐子戴公文公宋桓夫人许穆夫人是其事也宣姜惠公之母昭伯即公子顽宣公子太子汲之同母弟也上淫曰烝】

墙有茨【说文作荠】不可埽【叶有韵苏后翻】也中葍【集韵作?鲁诗作夜晋灼张揖皆以为夜也释文作邁丰氏本作构】之言不可道【叶有韵他口翻】也所可道【见上】也言之丑【有韵丰氏本作□】也【比也茨说文云茅盖屋也其字从艹从次徐锴谓次第茅以盖之也此言墙有茨则是以茨覆墙周礼圉师职云茨墙则翦阖是也埽说文云弃也从土从帚会意夫人之有墙以蔽恶也加茨以蔽墙惟恐墙坏人窥其中也厚茨犹恐不密况可埽而去之乎以比国丑不可宣扬因而思为之掩盖忠厚之至也又尔雅云茨蒺藜说文引此作墙有荠荠乃蒺藜布地蔓生细叶子有三角如菱而小刺人陆佃云以其可以茨墙故谓之茨欧阳修云公子顽通乎宣姜人所共恶当加诛戮然宣姜是国君之母诛公子顽则暴宣姜之罪伤惠公子母之道故不得而诛尔诗人乃引蒺藜人所恶之草今乃生於墙理当埽除然欲埽除则惧损墙以为比亦通葍说文云交积材也象对交之形前汉梁共王传听闻中葍之言

注应劭云中葍材葍荏堂之中也顏师古云谓舍之交积材木也盖室中构结深密之处中葍之言若曰闺门之言也道通作导说文云导引也谓导引之使言也丑说文云可恶也释名云臭也如物臭秽也所以不可言者为其事臭秽言之而污人齿颊也范氏云埽之则伤墙道之则伤君孔颖達云周礼媒氏凡男女之陰讼聽之于胜国之社注谓陰讼乃争中葍之事以触法者胜国亡国也亡国之社掩其上而棧其下使无所通就之以听陰讼之情明不当宣露即引此诗以证之邓元锡云曰不可言刺而疾也耻心若观火然或昏而覆为之甚矣乎欲之惑人也诚令为之者充观之者之心廉耻有不兴乎】墙有茨不可襄【阳韵】也中葍之言不可详【阳韵韩诗作杨】也所可详【见上】也言之长【阳韵】也【比也襄通作攘说文云推也推而去之也详说文云审议也增韵云语备也曰言之长者欲尽言则其说甚长盖不欲言之也今人不欲言之事则曰其说甚长】墙有茨不可束【沃韵】也中葍之言不可读【叶沃韵读如毒徒沃翻陈士元韵注云读旧本作抽顏氏正俗纠缪亦作抽郑笺云抽犹出也宣露之义】也所可读【见上】也言之辱【沃韵】也【比也束说文云缚也毛传云束而去之也读本诵书之义朱子以为诵言也辱说文云耻也毛传云谓辱君也道详读有次第先必导人使言而後能知其详既知其详则於是从而诵之也真德秀云夫言犹不可圣人乃着之于经何也善乎先儒杨时曰自古淫乱之君自谓密於闺门之中世无得而知者故自肆而不反圣人所以着之于经使後世为恶者知虽闺中之言亦无隐而不彰也其为训戒深矣】

墙有茨三章章六句【子贡传以为三未葍周公鄘人风之申培说同丰氏本葍作构丰熙云中构之言谓周公之流言繇三未从中构起骨肉相残故以墙茨起兴言墙之有茨以御盜不可埽而去之以兴兄弟之亲以御外侮不可从中构祸而传道其言也常棣外御其侮实本于此章曰言之长者长久远也流言之祸管叔倡之蔡霍和之武庚奄君传播之十七国附之三年而後息可谓远且久矣末章曰言之辱者谓传诵之不已则自取危辱之祸也邹忠胤云左传叔孙豹曰人之有墙以蔽恶也墙之隙坏谁之咎也燕惠王贻乐间书曰家之有垣墙所以合好掩恶也室不能相和出语邻家未为通计也三叔交葍周公正所谓萧墙之衅故书大诰曰艰大民不静亦惟在王宫邦君室诗人以墙有茨?端意盖如此有茨借作有疵大诰亦曰知我国有疵想当时三叔造为流言其谋颇泄而国人不与与之则为唐诗之扬之水不与则为鄘诗之墙有茨而已愚按毛郑解中葍之言亦以为宫中所葍成之语则谓此诗为三叔构周公而?语亦近似但观古语引用中葍皆指为闺门之事则从序为正】

鶉之奔奔娣妾刺卫宣姜之诗【出溇佃埤雅序云刺卫宣姜也卫人以为宣姜鶉鵲之不若也胡安国春秋传云臣昔尝谓河南刘奕曰史氏记繁而志寡如班固书载诸王淫乱等事尽削之可也奕曰必若此言仲尼删诗如墙有茨鶉之奔奔桑中诸篇何以录于国风而不削乎臣不能答後以问延平杨时时曰此载卫为狄所灭之因也故在定之方中之前因以是说考於历代凡淫乱者未有不至于杀身败家而亡其国者也然後知古诗垂戒之大而近世有献议乞於经筵不以国风进读者殊失圣经之旨矣】

鶉【子贡传丰氏本俱作□】之奔奔【音坟左传礼记子贡传丰本俱作贲贲】鵲之疆疆【阳韵礼记作姜姜】人之【外传作而】无良我以为兄【叶阳韵虚王翻兴也鶉?属按?

一名鴛尔雅谓鴛子鴛鴦子鸕贾公彦以鴛鴦为一物非也又其雄名鸕其牝名鴦张萱云鴛淳也不乱其匹与其牝偕者故曰鸕其匹不乱改其牝曰鴦若牝鸕司晨非以不安于卑之故乎刑于者念之陆佃云此鸟性淳蠢不越横草所遇小草横其前即旋行避碍名之曰淳以此鸕解见鸕巢篇奔说文云走也疆者有力之义尔雅以为当也注谓好与物相当值也奔奔疆疆韩诗云乘匹之貌孔颖达云言鸕则鸕自相随奔奔然鸕则鸕自相随疆疆然各有常匹不乱其类今宣姜为母顽则为子而与之淫乱失其常匹曾鸕鸕之不如矣又礼记注云疆疆奔奔争鬪恶貌也陆佃亦云奔奔鬪也疆疆刚也补传云鸕所以奔奔然喜鬪者恶乱其匹而鬪也鸕能不淫其匹故以刚言并存之人指宣姜无良不善也兄女兄即姊也此娣刺宣姜之词左传襄二十七年郑伯享晋赵孟伯有赋鸕之奔奔赵孟曰牀第之言不踰阼况在野乎非使人之所得闻也】鸕之疆疆鸕之奔奔【叶文韵符分翻】人之无良我以为君【文韵 兴也疆疆奔奔颠倒成文取叶韵耳君女君也释名云女谓夫之嫡妻曰女君夫为男君故名其妻亦曰女君也此娣刺宣姜之词陈用之云国君理阳道而正人於其外故谓之君夫人理陰道而正人於其内故亦谓之小君易曰其君之?诗曰我以为君示与君齐也按表記子曰惟天子受命于天士受命于君故君命顺则臣有顺命君命逆则臣有逆命诗曰鸕之疆疆鸕之责责人之无良我以为君引诗意盖谓宣姜所行不顺故娣妾辈得而讥诮之耳而古注乃云姜姜责责争鬪恶貌言我以恶人为君亦使我恶如大鸟姜姜于上小鸟责责于下溺其解矣】

鸕之奔奔二章章四句【子贡传以为卫昭伯无礼于宣姜国人恶之然次章我以为君之语殊属难解申培说以为刺宣姜与公子顽之诗朱传亦谓卫人刺宣姜与顽非匹耦而相从故为惠公之言以刺之夫顽为惠公之兄其曰人之无良我以为兄是已若我以为君断当主国人称宣姜为小君而言均一我也上章则代惠公称我下章则国人自我于文理母乃未顺耶】

桑中刺奔也卫之公室淫乱男女相奔至于世族在位相窃妻妾期于幽远政散民流而不可止【出序左传巫臣聘夏姬于郑尽室以行申叔跪遇之曰异哉夫子有三军之惧而又有桑中之喜宜将窃妻以逃者也其引诗与序指合子贡传亦云公室无礼卫人刺之郑玄谓公室淫乱在宣惠之世而孔颖达据毛传篇次但以惠公时诗按惠公父宣公上烝父妾下夺子妇惠公母宣姜既以子妇而为舅之配复以继母而为子之室伤风败俗亘古罕闻不至胥一国而禽兽之不止矣是诗乃国人代为淫奔者之语以志刺】

爰采唐【阳韵】矣沫之乡【阳韵】矣云谁之思美孟姜【阳韵】矣期我乎桑中【叶阳韵诸良翻】要【平声後同】我乎上宫【叶阳韵俱王翻】送我乎淇之上【叶阳韵辰羊翻】矣【赋也爰说文云引也谓引辞也唐⁴⁴名本草云夏生苗如丝蔓延木上生实如蚕子按尔雅云唐蒙女萝女萝菟丝曰唐曰蒙曰女萝曰菟丝一物四名又名松萝又名玉女故尔雅又云唐玉女则通为六名而其实非也陆玕云今菟丝蔓连草上正黄赤如金非松萝松萝自蔓生松上正青与菟丝殊异本草经云菟丝子一名菟芦一名菟缕一名唐蒙一名玉女一名赤刚一名菟累陶隐居云田野墟落中甚多皆浮生蓝芷麻蒿上史记云下有茯苓上有菟丝淮南子云菟丝无根而生茯苓抽菟丝死按唐无根不择物而附有苟合之象刘彝云采唐麦葑者欲适幽远行其淫乱不敢正名而托以采此也沫卫邑通作妹即妹邦也晋书地道记

云朝歌城本沫邑为殷邦孟长女也姜齐姓始于神农居姜水因以为姓所思云谁乃美色之孟姜不惟其配惟其美也期谓相订限也桑中朱子以为沫乡之中小地名也要者约结之义必指盟誓之事而言按通典卫州卫县有上宫台又孟子之滕馆于上宫赵岐训上宫谓楼也言舍止宾客所馆之楼上也然则相盟约于上宫者亦以其秽渫不欲人知之也淇水名出沮洳山至朝歌入河谓之淇水口详见泉水篇焦氏易林云采唐沫乡要我桑中失信不会忧思约带愚按此诗人代为之词故连言我字韩诗曰匹夫匹妇相会于腐阴而明日有传之者矣独之不可不慎如比】爰采麦【职韵】矣沫之北【职韵】矣云谁之思美孟弋【职韵】矣期我乎桑中【见前】要我乎上宫【见前】送我乎淇之上【见前】矣【比也麦说文云芒谷也郝敬云麦秋不收冬不藏三时在外谓之宿麦有奔之象百物未长而独先秋有淫之象弋女姓按春秋定姒公谷作定弋然则弋姒同一姓盖?女夏后氏之後】爰采葑【冬韵】矣沫之东【叶冬韵读如冬都宗翻】矣云谁之思美孟庸【冬韵】矣期我乎桑中【见前】要我乎上宫【见前】送我乎淇之上【见前】矣【比也葑解见谷风篇郝云义取下体贱其?也补传云鄆本庸姓之国汉有庸光及胶东庸生是其後也古或作庸按通典卫州新乡县西南三十二里有鄆城即鄆国鄆为卫所灭故其後有仕于卫者苏辙云姜弋庸皆着姓刺无礼则称孟言虽长而忘礼也美有礼则称季曰有齐季女言虽幼而知好礼也又黄佐云周婚礼惟嫁长女而其仲季充娣媵从之自殷以前皆然易曰帝乙归妹其君之袂不如其娣之?良是也季文云历数三人而见风俗之淫奔彼此不以为丑也邹忠胤云墨子言燕之祖齐之社稷宋之桑林楚之云梦男女之所属而观也彼沫乡东北亦前四国之类欤】

桑中三章章七句【乐记曰桑间 上之音亡国之音也其政散其民流诬上行私而不可止序偶用其语朱子遂谓桑间即此篇考史记纣使师延作新淫声武王伐纣师延抱乐器投濮水而死後师涓从卫灵公过濮上夜闻水中乐音因写之为晋平公奏焉师旷抚之曰此亡国之音得此必於桑间濮上乎然则桑间乃纣乐非桑中明甚又考郡国志东郡濮阳县有颛帝冢皇览曰冢在城门外广阳里中博物记曰桑中在其中疑此即桑间也若诗之桑中乃在朝歌今之卫辉府是也与濮上迥不相涉至申培说云宣姜召公子顽于公桑久处而远送之国人刺之而作是诗则亦附会而强为之词者其远送之说尤无义理且以孟姜为宣姜似矣孟庸孟弋当作何解乎朱传与序同而但谓此诗乃淫奔者所自作则亦可丑之甚而夫子何録焉固不如作刺者之说为长】

东方未明齐人刺襄公无常也【序亦云刺无节也朝廷兴居无节号令不时挈壶氏不能掌其职焉朱传从之但不着其世按左传云初襄公立无常鲍叔牙曰君使民慢乱将作矣而管子书亦云僖公生公子诸儿公子纠公子小白僖公卒诸儿以长得为君政令无常管鲍相谓曰君乱甚矣必失国诸公子之可辅者非纠则小白也吾与子人事一人焉先達者相收可以集事据二书皆言襄公无常是即序所谓无节者然则是诗之作在此时也又孔穎達云古者有挈壶氏以水火分日夜谓以水为漏夜则以火照之冬则水冻不下又当置火于傍故用水用火準昼夜共为百刻分其数以为日夜以告时节于朝职掌如此漏刻之箭昼夜共百刻冬夏之间则有长短焉太史立成法有四十八箭案乾象历及诸历法与今太史所候皆云冬至则昼四十五夜五十五夏至则昼六十五夜三十五秋分则昼五十五半夜四十四半从春分至于夏至昼渐长增九刻半从夏至至于秋分所减亦如之从秋分至于冬至昼渐短减十刻

半从冬至至于春分所加亦如之又于每气之间加減刻数有多有少其事在于历术以其算数有多有少不可通而为率故太史之官立为法定作四十八箭以一年有二十四气每一气之间又分为二通率七日强半而易一箭故周年而用箭四十八也历言昼夜者以昏明为限马融王肃注尚书以为日永则昼漏六十刻夜漏四十刻日短则昼漏四十刻夜漏六十刻日中宵中则昼夜各五十刻者以尚书有日出日入之语遂以日见为限尚书纬谓刻为商郑作士民礼目錄云日入三商为昏举全数以言耳其实日见之前日入之後距昏明各有二刻半減昼五刻以裨夜故于历法皆多较五刻也郑于尧典注云日中宵中者日见之漏与不见者齐也日永者日见之漏五十五刻日不见之漏四十五刻与马王不同与历甚错漏刻之数见在史官古今历者莫不符合郑君独有此异不可强为之辞案挈壶之职惟言分以日夜不言告时于朝春官鸡人云凡国事为期则告之时注云象鸡知时然则告时于朝乃是鸡人此言挈壶告时者盖天子备官挈壶掌漏鸡人告时诸侯兼官不立鸡人故挈壶告也庭燎笺云王有鸡人之官是郑意以为惟王者有鸡人诸侯则无也】

东方未明【叶阳韵谟郎翻】顛倒衣裳【阳韵】顛之倒【叶啸韵都妙翻】之自公召【叶啸韵】之【賦也古者衣裳连上曰衣下曰裳孔穎達云此相对定称散则通名曰衣曲礼两手扞衣去齐尺齐谓裳下缉是裳亦称衣也今上者在下是为颠倒也自从也公君所也召说文云呼也王逸云以手曰招以言曰召礼羣臣朝辨色始入今东方犹未明自可徐徐盛饰而入而乃至颠倒衣裳所以然者以有自君所而召之者故其急遽如此正序所谓兴居无节号令不时者也又荀子云诸侯召其臣臣不俟驾颠倒衣裳而走礼也诗曰顛之倒之自公召之说苑载魏文侯封太子击于中山後遣赵仓唐赐太子衣一袭勅仓唐以鸡鸣时至太子起拜受赐发篋视衣尽颠倒太子曰趣早驾君侯召击也仓唐曰臣来时不受命太子曰君侯赐击衣不以为寒也欲召击无谁与谋故勅子以鸡鸣时至诗曰东方未明顛倒衣裳顛之倒之自公召之遂西至谒文侯大喜乃复封为太子愚按君召臣臣必速至虽於礼宜然然召臣不以其时则非礼矣】东方未曦【微韵】顛倒裳衣【微韵】倒之顛【先韵】之自公令【叶先韵力延翻】之【賦也曦说文云乾也毛传以为明之始升严粲云日气所乾为曦未曦未有日之乾气则日未出也上章曰衣裳此日裳衣上章曰顛之倒之此曰倒之顛之者非徒取其叶韵按说文顛顶也倒仆也顶本在上仆而在下是上衣下裳倒置故曰顛之倒之既乃挈其倒於下者返之于上衣仍其上之旧裳仍其下之旧是曰倒之顛之当其顛之倒之则衣裳翻为裳衣及其倒之顛之则裳衣仍为衣裳矣令说文云发号也上章言召之第谓召见其人耳此则将有所使之虽不指言其事而此时非聽政出治之时则此召此令何为而至也哉】折柳樊圃【叶遇韵博故翻】狂夫瞿瞿【遇韵丰氏本作??】不能辰【朱传丰本俱作晨】夜不夙则莫【叶遇韵漠故翻 比也柳说文云小杨也朱子云杨之下垂者陶氏以为水杨本草注云柳与水杨全不相似水杨叶圆濶而赤枝条短硬柳叶狭长青緑枝条长软樊通作藩说文云屏也即篱落也说文云种菜曰圃周礼太宰九职二曰园圃毓𣎵木说者以为种菜及果庌之地谓之圃其外藩篱谓之园然则圃而有樊正名为园耳贾思勰齐民要术云凡作园篱法高七尺便足匪直奸人慙失而返狐狼亦息望而回枳棘之篱折柳樊圃斯其义也其种柳作之者一尺一树初时斜插插时即编如其栽榆与柳斜直高与人等然後编之数年长成共相蹙迫交柯错叶持似房栊既图龙蛇之形复写鸟兽之状缘势嶽崎其貌非一萦布锦绣万变不穷狂说文云猊犬也今名人曰狂夫者韩子谓心不能审得失之地谓之狂是也

瞿说文云鷹隼之视也字从佳从?佳鸟之短尾者?左右视也檀弓瞿瞿如有求而弗得注云瞿瞿眼目速瞻之貌折柳樊圃二句乃思患豫防之义犹所云绸繆牖户者左传申公巫臣曰夫狡焉思啓封疆以利社稷者何国蔑有勇夫重闭况国乎与此同意一说冯时可云折柳以为樊其为卫也疎矣虽以狂夫处于中犹尚瞿瞿然而为备乃国家危殆而人君莫之为念不慎其兴居之节则狂夫之不若矣亦通按国语管仲至齐桓公亲迎之于郊而与之坐问焉曰昔吾先君襄公筑台以为高位田狩毕弋不听国政卑圣侮士而惟女是崇九妃六嫔陈妾数百食必梁肉衣必文绣戎士冻馁戎车待游车之裂戎士待陈妾之余优笑在前贤材在後是以国家不日引不月长恐宗庙之不扫除社稷之不血食管子书所载亦同观此则襄公之为人可知其所以兴居无节号令不时者大抵皆荒淫无度使之然耳诗人所以惓惓致戒于樊圃也辰晨通说文云早昧爽也不能辰夜者谓不能依昼夜之节明而动晦而休也夙早也莫说文云日且冥也字从日在艸中徐锴云平野中望日且莫将落如在艸中也艸音莽衆艸也不夙则莫言其恣情出入无复限制非失之太早则失之太晚所谓不能辰夜者也鲁语敬姜曰诸侯朝受天子之业命昼考其国职夕省其典刑夜儆百工使无愆淫而後即安是则一日之中自晨至夜必有事焉若襄之不夙则莫非色荒即禽荒而已使奉命者奔走不遑国不亡幸尔】

东方未明三章章四句【子贡传申培说皆谓齐大夫相戒以勤于公今按孟子言周公思兼三王幸而得之亦且坐以待旦则东方未明岂在公之时乎当以序说为正其所云挈壶氏不能掌其职者盖亦无所归咎而责诸挈壶之辞非大指所在略之可也】

卢令刺荒也【出序】齐襄公好田大夫风之【出子贡传申培说亦云襄公好田君子讽之而作是诗按国语及管子书皆称襄公田狩毕弋不听国政公羊传载庄四年公与齐侯狩于禚左传载庄八年齐侯田于贝丘见大豕从者曰公子彭生也公怒射之豕人立而啼公惧队于车因遂为无知所弑此足为襄公好田之明证】

卢令令【叶先韵力延翻说文作獐獐韩诗作泠泠孔颖達本作铃铃丰氏本作??】其人美且仁【叶先韵如延翻丰氏本作甄 赋而兴也卢毛传云田犬孔颖達云战国策曰韩国卢天下之骏犬也东郭逡海内之狡兔韩卢逐东郭逡山三越冈五兔极于前犬疲于後俱为田父之所获是卢为田犬也义训云良犬韩有卢宋有鹄卢黑色鹄黑白色按说文齐谓黑为黧则卢当作黧程大昌云世人呼鸡皆曰朱朱呼犬皆曰卢卢不问何地其声皆同朱朱其来已久卢卢别无所见是借韩卢之名与犬为高耶令令毛云纓环声孔云此言铃铃下言环鉤铃铃即是环鉤声之状环在犬之颌下如人之冠纓然故云纓环声也愚按下章言卢重环卢重鉤盖卢有带重环者有带重鉤者此以令令声统之明非一卢也令据孔作铃说文以为令丁也环鉤之声似之故曰铃铃耳其人指襄公也逐兽者犬也发纵指示者人也美以态度之好言仁自田猎上见乃寛厚之意从狩必俱颁禽必均与人同乐不以尊卑形迹表异是其仁也】卢重【平声後同】环【叶先韵胡涓翻】其人美且鬣【先韵 赋而兴也璧肉好若一谓环尔雅注云边孔适等此则铁锁之属即银铛也以其圓形如环故亦名为环重环即颌带两环毛以为子母环孔以为大环贯一小环非也鬣说文云发好也一曰发曲也愚按此以环之圓兴发之曲盖赞其貌】卢重鉤【灰韵】其人美且偲【灰韵丰氏作思 兴也鉤说文云大锁

也一环贯二者增韵云子母环也孔云谓一大环贯二小环也曰重鍤是颌带两鍤如旧说以一大环贯一小环为重环则此重鍤可谓一鍤复贯一鍤乎是合大小相连共有六环矣恐无此体制又陆佃云一章曰令令二章曰重环三章曰重鍤者言田事弥饰而弥以有制所以刺荒也令令铃声也说文云旗有衆铃以令衆也铃以令之环以制之重鍤又言贯制之衆愚按令令系卢明是所带重环重鍤相戛成声以为旗铃之声非也偃说文云强力也徐锴云偃之言材也郑笺及广韵皆云多才也愚按此以环之多兴才之多盖赞其才】

卢令三章章二句【子贡传申培说丰氏本篇名俱作卢序云刺荒也襄公好田猎毕弋而不修民事百姓苦之故陈古以风焉其属之襄公与传说同惟云是陈古以风则以仁与偃归之似矣美且髡明是见前有此人可亦谓是古人之髡耶朱子不信序说但谓义与还同然则襍及贝丘之证非与】

诗经世本古义卷二十

卷二十一

<经部,诗类,诗经世本古义>

钦定四库全书

诗经世本古义卷二十一

明 何楷 撰

周庄王之世诗九篇

扬之水闵无臣也郑君子闵忽无忠臣良士终以死亡而作是诗也【出序 孔颖达云作诗之时忽实未死序以繇无忠臣竟以此死故闵之郝敬云为此诗者郑之君子怀忠良之志而伤忽之微弱也愚按此即前咏狡童咏擗兮咏褰裳之人所作绎篇中维予二人之云则爱忽者仅此一人耳惜其姓名不可考矣】

扬【丰氏本作 下同】之水不流束楚【语韵】终鲜兄弟维予与女【音汝语韵】无信人之言人实迂女【同上 比也扬之水二句解见王风下章亦同苏辙云扬水以求其能流虽束薪而有不能载矣譬如失衆之君虽其私昵为之尽力以求与之而衆不与终不可得也鲜通作尠说文云少也曹氏云按左传忽突争国而子仪子亹更立及至庄十四年忽与子仪子亹皆已死而原繁谓厉公曰庄公之子犹有八人不得为鲜严粲云昭公兄弟甚衆无与之同心者故言今兄弟虽多终竟是少谓要其终必不相助虽多犹少也予诗人自谓也郑玄以为作此诗者乃同姓臣亦未必然总以见外此别无与忽同心者则忽之孤立亦甚矣人谓郑羣臣迂通作诳说文云欺也迂女之言盖离间我女之言吕祖谦云无信人之言非教之以不信人言也忽既微弱强公子复多其臣大抵怀二心而外市仅有一二人实心向之者乃暗于情伪不知所倚故提耳而告之也】扬之水不流束薪【真韵丰本作新】终鲜兄弟维予二人【真韵】无信人之言人实不信【叶真韵升人翻 比也曹氏云此先楚後薪以见臣之愈强耳郑玄云二人者我身与女忽黄佐云迂女则所欺者一人耳不信则欺人也多矣其诞妄也久矣朱子旧传云兄弟既不相容所与亲者二人而已然亦不能自保于谗间此忽之所以亡也愚按厉公突以少夺长其嗣位非正然及其出奔诸侯尚有约会起兵而共谋纳之者忽实伯兄当立乃自其失位以至复国讫于被弑外不闻有邻国之援内不闻有臣民之戴意其为人必多猜喜忌於物无亲者读此书可想见其大概矣】

扬之水二章章六句【朱子改为淫者相谓之辞而于兄弟二字难解则曰兄弟婚姻之称礼所谓不得嗣为兄弟是也今按礼文意殊不然见曾子问篇壻有父母之丧则辞于女家曰恐不得嗣为兄弟其言嗣者姑舅之子永为中表兄弟之亲居丧不可嫁娶将无中表之续故曰恐不得嗣为兄弟非夫妇而有兄弟之称也或曰兄弟犹所云宴尔新昏如兄如弟者盖亲之之辞然章首扬之水云句当作何解就如子贡传申培说皆以为郈人兄弟被谗相弃而自诉

之诗于文意亦近之矣愚所以断从序者以国风扬之水三见皆微弱之比一王风比平王不能令诸侯一唐风比晋昭不能制曲沃此诗言忽不能制权臣其事同故其比同参伍求之则诗意粲然明白无容复二三其说矣】

风雨郑人思君子也乱世则思君子不改其度焉【严粲云五公子之乱时事反覆士之怵于利害随势变迁失其常度者多矣故诗人思见君子焉】

风雨凄凄【叶支韵此移翻说文作淅淅】鸡鸣喈喈【叶支韵坚夷翻】既见君子云胡不夷【支韵兴也风雨风而兼雨凄说文云云雨起也孔颖达云凄凄寒凉之意鸡说文云知时畜也徐锴云鸡稽也能考时也喈说文云鸟鸣声按喈字以口而右施皆徐锴以为声衆且和是也陆佃云秋气惨而凄凄风雨如此则疑于不能和今日喈喈言鸣而不失其和也兴君子虽居乱世不变改其节度按陆机演连珠云贞乎期者时累不能淫是以迅风陵雨不谬晨禽之察正用此意杨观先云鸡鸣无风雨雁飞无晦暝物之恒也可以人而不如乎君子不知何所指或曰感当时无此等人思而不得见之辞也夷说文云平也言我若得此等人而见之则平日鬱结之思岂不於此顿平哉一说鸡鸣将旦之时夜来风雨虽景象惨黯然忽闻鸡鸣声则时将旦矣即荀卿倦诗所云圣人共手时几将矣之意以兴既见君子必将有以平其祸乱亦通】

风雨潇潇【萧韵】鸡鸣胶胶【叶萧韵何乔翻】既见君子云胡不瘳【叶萧韵怜萧翻兴也潇当通作啸说文云吹声也风雨相乱其声如啸也胶说文云昵也礼注云胶之言纠也今日胶胶者鸡声与风雨声相为纠襍而不可分别之意庄子胶胶扰扰乎是也瘳说文云疾瘳也徐云忽愈若抽去之也朱子云言积思之病至此而愈也】

风雨如晦【叶纸韵呼洵翻】鸡鸣不已【纸韵】既见君子云胡不喜【纸韵兴也晦本月尽之名尔雅以为冥也已止也郑玄云鸡不为如晦而止不鸣愚按天将晓则鸡鸣愈速不已者接续而鸣之谓此将晓之时也刘峻辨命论引此诗曰风雨如晦鸡鸣不已故善人为善焉有息哉辅广云喜甚于瘳瘳甚于夷云胡不善言如之何而不喜也盖善剧之辞邓元锡云世乱俗败矣自非性生能不改度故以鸡鸣起兴鸡司农性也风雨凄其而喈喈和者自若也风雨潇然而胶胶同者自若也天且旦风雨如晦若将漫漫无旦然而鸣不已自若也有常度也性之德也君子不易乎世独行其道不惑于邪独立其节性之德也适我愿也胡不夷也胡不瘳也又胡不喜也今觀之下拜之矣冯时可云行其道不失其和似鸡鸣之喈喈立其节不惑于邪如鸡鸣之不已其善处衰世者乎】

风雨三章章四句【朱子云序意甚美以词气轻佻断作淫诗今按此诗词气亦未见有轻佻处且其云风雨晦冥乃淫奔之时然耶否耶子贡传申培说以为齐桓公相管仲以匡天下齐人美之之诗则愚有以断其不然左传昭十六年郑六卿饯韩宣子于郊宣子曰二三君子请皆赋起亦以知郑志子游赋风雨宣子喜曰郑其庶乎二三君子以君命赋起赋不出郑志皆昵燕好也二三君子数世主也可以无惧矣若如传说所云则风雨乃齐诗何以谓之郑志耶】

南山齐人刺鲁桓公与文姜来齐也【鲁桓公名轨一名允夫人文姜则齐僖公之女襄公亲

妹也僖公一作厘公襄公名诸儿春秋桓十八年公与夫人姜氏如齐将行申繻諫曰女有家男有室无相瀆也谓之有礼易此必败不听姜氏至齐襄公通焉公谪之夫人譖公于齐侯述公之言曰同非吾子齐侯之子也齐侯怒与之饮酒于其出焉使公子彭生送之于其乘焉拉干而杀之事见左传及公羊传齐襄以鸟兽之行淫于其妹鲁桓既已知之而不自顾忌卒贾杀身之祸可谓大愚矣】

南山崔崔【灰韵亦叶支韵遵绥翻】雄狐绥绥【支韵亦叶灰韵他回翻】鲁道有荡齐子由归【叶灰韵古回翻】既曰归【同上】止曷又怀【叶灰韵胡猥翻】止【丰氏本作只比而赋也毛传云南山齐南山也孔颖达云诗人自歌土风山川不出其境崔说文云大高也狐邪媚之兽孔云对文则飞曰雌雄走曰牝牡散则可以相通按诗曰雄狐书曰牝鸡皆互言之无所滞也绥通作綏解见次章以雄狐之尾似之故曰绥绥也郑玄云雄狐行求匹耦于南山之上形貌绥绥然喻襄公居人君之尊而为淫夫之行其威仪可耻恶如狐也又罗愿云诗人之义寓物以显其人雄狐者君子之象也春秋秦穆伐晋筮之吉曰获其雄狐释者曰夫狐蛊必其君也既而获晋惠公陆佃云说者以雄狐为牡狐非是宜读如狐不二雄之雄雄君之象也亦通鲁道适鲁之道荡通作宕说文云洞屋也路之宽平如之故毛传训为平易也水经注云汶水南迳钜平县故城东西南流城东有鲁道诗所谓鲁道有荡今汶上夹水有文姜台齐子文姜也王安石云谓文姜曰齐子者以为此齐之子也而淫于齐由当通作逊从也妇人谓嫁曰归言从此道以嫁于鲁也怀尔雅云思也来也释名云回也本有去意回来就已也文姜既嫁而得所归矣何复思恋于齐而回来为乎抑亦留情此绥绥之狐而不忍舍乎盖专刺文姜也孔云猗嗟序称人以庄公为齐侯之子公羊传称桓公云同非吾子明非如齐之後始与齐侯通但左传为公谪张本故于如齐之下始言齐侯通耳朱子从王肃说谓怀指襄公言文姜既嫁于鲁适人矣何为复思与之会而淫乎于义亦顺第考文姜如齐实桓从姜氏之意非襄公召之而然故不得以怀属襄也】葛屨五两冠綏双【叶冬韵疎恭翻】止【丰本作只】鲁道有荡齐子庸【冬韵】止既曰庸【同上】止曷又从【冬韵】止【丰本作只赋也周礼屨人掌王及后之服屨为赤舄黑舄赤纁黄纁青句素屨葛屨辨外内命夫命妇之命屨功屨散屨注疏云服屨者着服各有屨也复下曰舄禅下曰屨古人言屨以通于复今世言屨以通于禅禅者单也下者底也舄饰如纁以六色相对为文屨饰如綉以五色相次为文葛屨葛布所为遇夏用葛为之曰葛屨遇冬用皮为之曰功屨孔云屨必两只相配故以一两为一物綏必属之于冠故冠綏共为一同愚按今经文曰葛屨五两则是明言着此屨者有五人矣绎末句从止盖从文姜如齐者孔谓侄娣傅姆辈是也冠说文云綦也所以綦髮弁冕之总名也綦音卷卷束也白虎通作□綏说文云糸冠纓也礼记注云结纓颌下以固冠结之余者散而下垂谓之綏汉輿服志云上古穴居野处衣毛冒皮後圣人见鸟兽有冠角 胡之制遂作冠冕纓綏必双方可对结冠綏双止指鲁桓公也庸朱子云常也言此平易之鲁道齐子之往来亦已常矣丰道生云按春秋文姜以桓三年归鲁至十四年其父僖公禄父卒礼诸侯之女适于诸侯父母在岁一归宁则文姜自桓四年之後归宁已十度矣其不见于经者春秋常事不书父母在而归宁礼之常也从谓从文姜如齐夫文姜之来齐既不止一次今父母既没似亦可以已矣乃鲁君不加禁制而且从之偕来何为者哉盖专刺桓公也杨中立云许穆夫人思归唁其兄许人尤之终以义不得而止若鲁桓公刚而有制使鲁人无肯从者如许人焉则文姜虽欲适齐尚可得乎吕大圭云公之与夫人如齐是夫而不能夫也夫者以知帅人

者也知不足以帅人而可谓之夫乎胡安国云为者文姜而春秋罪桓公治其本也易曰夫夫妇妇而家道正夫不夫则妇不妇矣乾者夫道也以乘御为才坤者妇道也以顺承为事易着於乾坤述其理春秋施於桓公见其用钱天锡云鲁桓弑兄自立有危心焉结婚于齐归田于郑成乱于宋树三强以自固尤属望者齐耳齐襄恃强以行淫文姜挟齐以纵欲桓之不能制妻以齐之势重也襄之敢于淫其妹以桓之中怯也吕祖谦云国君夫人父母没则使大夫宁于兄弟礼也姑姊妹已嫁而厌兄弟弗与同席亦礼也是二礼者人不过以为别嫌明微耳亦未知其为甚急也及鲁威文姜犯是礼以如齐转盼而罹拉干之祸身死异国为天下笑一出于礼而祸遽至此人其可以斯须去礼耶】 艺【释文作艺】麻如之何衡【礼记韩诗俱作横】从【韩诗作由云东西耕曰横南北耕曰由】其亩【有韵】取【去声後同】妻如之何必告【音见下】父母【有韵】既曰告【叶屋韵居六翻】止【丰本作只】曷又鞠【屋韵读诗记丰本俱作□】止【丰本作只 比也首章刺文姜次章刺鲁桓此下二章又追原其夫妇成婚之始本不以正而反言以恨之艺本作□种也字从耑从 耑者土块也□音戟持也手持而种之也麻解见丘中有麻篇东西为衡南北为从毛传云衡猎之从猎之然後得麻孔云猎是行步践履之名谓既耕而践蹊概摩之也古者推耒耜不宜纵横耕田故知是摩猎之也按齐民要术云麻欲得良田不用故墟地薄者粪之耕不厌熟注谓纵横耕七遍以上则麻生无叶衡从其亩盖古法也告禀命也娶妻者必禀命于父母父母皆熟筹以为可而後娶之所以隆重其事而不敢苟合也孟子曰舜不告而娶为无後也君子以为犹告也严粲云考之左传惠公生桓公而薨桓公母仲子亦以隐二年薨桓公三年文姜乃归鲁是桓公娶妻之时无父母矣鞠通作?说文云穷也谓夫妇之道穷也言苟使告于父母而娶则佳儿佳妇必皆父母所厌心者何至有苟合不正之弊而夫妇之道穷乎易归妹之象曰君子以永终知敝穷即敝之谓也今文姜之娶桓公之所自为也无二人在上为之决择是以无良配耳深恨之之辞通章皆反意】 析【丰氏本作□】薪【丰氏本作新礼记析薪二字作伐柯】如之何匪斧不克【职韵】取妻如之何匪媒不得【职韵】既曰得【同上】止【丰本作只】曷又极【职韵】止【丰本作只 比也析说文云破木也匪通作非斧斫刀也克能也郑玄云析薪必待斧乃能也曲礼曰男女非有行媒不相知名周礼媒氏掌万民之判凡男女自成名以上皆书年月日名令男三十而娶女二十而嫁注谓判半也得耦为合主合其半成夫妇也故以析薪为比又曹氏云析薪者断取于彼以供我?事既析则于本根不可复合取妻者取他姓之女以供我中馈既嫁则于父母兄弟日远亦通班固云阳唱阴和男行女随男不自专娶女不自专嫁必繇父母须媒灼何远耻防淫佚也极亦穷也言苟因媒灼作合则所娶必得佳偶何至秽德彰闻如此极乎按春秋桓三年公会齐侯于嬴左传云成昏于齐也杜预云公不繇媒介自与齐侯会而成昏非礼也是则桓之娶文姜初不繇媒而得故诗人反言之如此家铉云桓以篡弑得国惧方伯之有讨而乞昏于齐以为此会夫婚姻之於媒灼所以别嫌明微重大婚之始今鲁桓亲为此会以缔好于强齐匪媒而昏合不以正也越境而会会不以正也使其私人往逆逆不以正也为齐侯而亲迎迎不以正也是故春秋于嬴之会谨而书之以见祸败之所从始求追弑君之计而终殒于齐天也非人所能为也其後庄公躬纳币于齐以盛饰而尸女恣为淫行无复羞恶造端实始此父之行子之效以致败伦乱国历数传而未已可不谨哉坊记子云夫礼坊民所淫章民之别使民无嫌以为民纪者也故男女无媒不交无币不相见恐男女之无别也诗云伐柯如之何匪斧不克娶妻如之何匪媒不得艺麻如之何横从其亩取妻如之何必告父母以此坊民民犹有自献其身】

南山四章章六句【序云刺襄公也鸟兽之行淫乎其妹大夫遇是恶作诗而去之按篇中惟章首二句为刺襄公其後或刺文姜或刺鲁桓又合刺之总以通于襄公故序使襄主恶是矣唯谓大夫遇是恶作诗而去之则似为篇中曷又怀止之语所误齐臣因此事而去国於史传无所见也子贡传申培说则皆以为襄公久留姜氏鲁桓不能制齐人刺之今味诗意乃姜如齐时作似不在留齐时也盖姜之通于襄非一日矣】

东方之日刺齐襄公也君臣失道男女淫奔不能以礼化也【出序 愚意此诗齐人为鲁文姜来齐而作以通于其兄襄公国人丑之不敢斥言故托为规淫奔者之辞以志刺按春秋传桓十八年春公与姜氏如齐齐侯通焉公谪之以告夏四月享公使公子彭生乘公公薨于车庄公嗣位元年三月夫人孙于齐二年十二月夫人姜氏会齐侯于禚四年二月姜氏享齐侯于祝丘五年夏姜氏如齐师七年春姜氏会齐侯于防冬又会齐侯于谷至八年冬齐侯为无知所弑终襄公之世与文姜会者不一而足而姜之入于齐者凡再故南山之诗刺之曰既曰归止曷又怀止是诗所云在我室在我闼即其事也】

东方之日【质韵】兮彼姝者子在我室【质韵】兮在我室【见上】兮履我即【叶质韵子悉翻】兮【兴也曰东方之日东方之月者亦因时以起兴日者君象日出东方万物莫不瞻仰今君德不明不能以礼教善俗有愧于日多矣姝说文云好也彼姝者子暗指文姜一说薛君章句云彼姝者子诗人言所说者颜色美盛若东方之日盖以此女年方少艾比初升之日耳月至望则光辉倍常女子之丰采晦映似之故又取东方之月为比亦通但以序有君臣失道之语故从前说耳室男子之室申繻谓鲁桓公曰女有家男有室无相瀆也谓之有礼易此必败今以妇人而入男子之室违礼甚矣履者礼也以其可为人之所践履故系辞解履卦名为礼即就也言此女于光天白日之下径然造我之室若揆之于礼而合则我可往就之兮不然而可漫然苟合乱男女之别哉经解曰夫礼禁乱之所自生犹防止水之所自来也以旧防为无所用而坏之者必有水败以旧礼为无所用而去之者必有乱患诗人为国恶讳虽不正言而刺讥之旨已深切矣】东方之月【韵】兮彼姝者子在我闼【叶月韵他越翻】兮在我闼【见上】兮履我发【月韵】兮【兴也月者臣象扬子云月未望则载魄于西月既望则终魄于东月出东方明盛之时今臣不能辅君明其教化则是亦有愧于月也时襄公躬鸟兽之行未闻其臣有匡正之者故诗人微其辞以致责闼毛传云门内也韩诗云门屏之间曰闼在我闼者言此女入在我之门内也发遣也暮夜之时嫌疑之际揆之于礼则我惟有发遣之使去已耳今留之不去何为也哉程子云人虽不能无欲然当有以制之无以制之而惟欲之从则人道废而入于禽兽矣张洽云文姜元年以罪孙于齐後复宣淫论其时世与卫懿之责责墙有茨诸篇皆一时之事鲁卫先王之後妇行放逸同播其恶于万民夫子曰鲁卫之政兄弟也盖不特周公康叔之盛而其世衰俗薄末政之陵夷亦相似也其後庆父乱鲁齐几取之与卫灭同时圣人以鲁事详于春秋而齐诗及鲁事者不删夫二南之风后妃不待闲而德足以化天下後世闲有家之道废而亡国败家之祸同一轨辙诗春秋之旨盖相表裏也】

东方之日二章章五句【是诗之为刺襄无可疑者陆佃埤雅亦从其说乃陆德明因一本作刺衰遂云或作刺襄非也南山已下始是襄公之诗此不过惑于毛诗次第而郑玄强为之说以为着东方之日东方未明三篇序皆云刺而不举号谥则举上明下知其为哀公之诗夫既

可举上以概下何不可举下以蒙上况此篇诗序又明有刺襄之本何知非传写譌襄为衰乎申培说以齐庄公好女乐君子讥之既絶无稽据子贡传谓庄公无礼齐人刺之或以为即庄公淫于崔杼之妻棠姜之事然据左传公往淫于崔子之室未闻棠姜入齐侯之宫也何得云在我室在我闼乎抑岂以彼姝者子指庄公乎必不然矣朱子但谓淫奔之词嚼蜡殊甚】

猗嗟刺鲁庄公也齐人伤鲁庄公有威仪技艺然而不能以礼防闲其母失子之道人以为齐侯之子焉【出序 春秋庄四年冬公及齐人狩于禚公羊传云公曷为与微者狩齐侯也齐侯则其称人何讳与雝狩也前此者有事矣後此者有事矣则曷为独于此焉讥於雝者将壹讥而已故择其重者而讥焉莫重乎其于雝狩也於雝者则曷为将壹讥而已雝者无时焉可与通通则为大讥不可胜讥故将壹讥而已其余从同同谷梁传云齐人者齐侯也其曰人何也卑公之敌所以卑公也何为卑公也不复雝而怨不释刺释怨也此诗疑即狩禚时事盖公朝齐而因以狩也古者诸侯相朝则有宾射故所言者皆宾射之礼又按春秋无书庄公朝齐之文惟二十二年书公如齐纳币二十三年书公如齐观社二十四年书公如齐逆女皆在二十一年文姜薨之後据此诗曰展我甥兮自是庄公初至齐而人骤见之之语当与甫田篇为同时之作先是庄二年夫人姜氏会齐侯于禚谷梁谓妇人既嫁不踰竟踰竟非正也禚为齐地然则庄公之狩禚其为朝齐明矣禚公谷俱作郚】

猗【陆德明本作猗】嗟昌【阳韵】兮颀而【孔颖达本作若】长【阳韵】兮抑若扬【阳韵】兮美目扬【同上】兮巧趋【陆本作趋】踰【阳韵】兮射则臧【阳韵】兮【赋也猗之为咦音之近也说文云南阳谓大呼曰咦嗟说文云咨也孔颖达云是口之暗咀亦叹声也昌说文云日光也猗嗟昌兮叹美鲁庄公之仪容有光采也公羊传云宋万尝与鲁庄公战获乎庄公归反为大夫于宋曰甚矣鲁侯之淑鲁侯之美也天下诸侯宜为君者惟鲁侯耳然则鲁庄之美当时盖侈称之矣说文无颀字当通作頍解见頍人篇长以体貌言抑扬以容止言若犹而也古文而若通用此颀而长兮旧本作颀若长兮是也严粲云抑而扬言进退高下不失其宜也扬说文云飞举也时方宾主酬酢见其目之扬举也王充论衡云人心慧而目多采趋说文云走也曲礼注云行而张足曰趋孔云趋今之吏步则趋疾行也礼有徐趋疾趋为之有巧有拙故美其巧趋也踰说文云动也毛传云巧趋貌按曲礼云士踰踰注以为容貌舒扬也今与趋连文故知其为巧趋貌此盖升阶降阶就位复位之时其揖逊之威仪如此吕才云鲁桓公六年子同生是为庄公按历岁在乙亥月建申然则值禄空亡据法应穷贱又触勾绞六害皆驿马身尅驿马三刑法无官命火也生当病法曰为人尪弱矬陋而诗言庄公曰猗嗟昌兮颀而长兮美目扬兮巧趋踰兮唯向命一物法当壽而公薨止四十五一不验也射宾射也诸侯来朝天子入而与之射或诸侯相朝而与之射皆为宾射此射则诸侯相朝之宾射也详见宾之初筵篇臧善也虚赞其善乃引起下章之辞所云终日射侯不出正兮及射则贯兮则其臧之实也】猗嗟名【庚韵集韵作?】兮美目清【庚韵】兮仪既成【庚韵】兮终日射侯不出正【叶庚韵诸盈翻】兮展我甥【庚韵】兮【赋也名集韵作?云眉目间也然说文无?字当通作覲说文云小见也一说名者称誉之谓承上章末句而叹美其射之善可称誉也亦犹美山之大家为名山人之贤者为名人也亦通清说文云朗也激水之貌徐锴云在地者莫明于水火故于文水青为清青者清也刘熙云清青也去浊远秽色如青也礼射者左足履物还视侯中合足而俟按凡射度地而画以容足者谓之物长三尺横一尺二寸令

射者立其中左足已履物右足未并先南面旋视侯之中乃以右足随之而後射此以清表目之美当是其履物视物时也仪宾射之仪既成言终事也今按仪礼大射燕射凡三释获而射礼告成所谓释获者设筭长尺有四寸以器盛之每中一矢则释一筭获之为言得也射本以讲武主田故于其中也则大言获其盛筭之器君大夫士及所用之地等各不同以木为之刻为兽形总名曰中有皮树中有间中皮树与间皆兽名也有虎中有兕中有鹿中涂之以髹前足跪凿背为员孔令容八筭因射者二人为耦人各四矢合之则八矢故令容八筭也二射之礼既同想宾射礼亦相类终日犹云毕事非真谓射竟一日也侯射布也解见宾之初筵篇大射宾射燕射之侯各别考工记云张皮侯而栖鹄则春以功张五采之侯则远国属张兽侯则王以息燕五采之侯者宾射侯也远国属谓诸侯来朝者也天子侯画五采周礼所谓五正者注以为中朱次白次苍次黄玄居外其侯之饰又以五采画云气焉诸侯三采损玄黄所谓三正者也孤卿大夫士二采去白苍而画朱绿所谓二正者也皆画之于布上此诗所言诸侯宾射之礼乃三采之侯耳郑玄云正所以射于侯中者仪礼大射注云正鸟名齐鲁之间名题肩为正正鸟之捷黠者射之难中以中为俊故射取名焉郑司农云方十尺曰侯四尺曰鹄二尺曰正四寸曰质大射之侯用鹄宾射用侯用正燕射之侯用质正或作鴈方言齐鲁间谓题肩为鴈通作征月令征鸟厉疾是也亦作怔不出正者发必中的也展尔雅毛传皆云诚也未详其义毛传云外孙曰甥曰我甥者王肃云据外祖以言也谓不指襄公之身总据齐国为言孔云外孙得称甥者左传以肥之得备弥甥是也或以此语为诗人之微辞春秋桓六年书子同生谷梁传云疑故志之又按女之壻亦曰甥孟子帝馆甥是也庄公于齐桓即位後已昏于齐矣使其如齐在桓时也得非即壻之称与】猗嗟变兮清扬婉【叶翰韵乌贯翻】兮舞则选【薛君章句作纂云言其舞应雅乐】兮射则贯【翰韵】兮四矢反【韩诗及丰氏本俱作变】兮以御乱【翰韵】兮【赋也变通作?说文云顺也射礼告成宾主欢洽但见其情意蔼然可亲如此清扬总上美目扬美目清言之婉亦顺也和顺之意流露于瞻顾之间也选严云犹精也愚按舞则选兮言供事于舞者皆极一时之选也仪礼云若与四方之宾燕以乐纳宾则奏肆夏升歌鹿鸣下管新宫笙入三成遂合乡乐若舞则勺周礼龠师职云祭祀鼓羽龠之舞宾客飧食则亦如之司干职云祭祀舞者既陈则授舞器既舞则受之宾飧亦如之是皆足为宾飧用舞之证此章言射终之事乃释获者退中与筭之後乐正赞工迁乐备燕之时也乐必有舞故薛君章句及毛传皆谓舞应乐节也此非指庄公言特以起下文射则贯兮正在是时亦能与舞节相应耳贯者贯布也礼射布侯中必贯布始释筭乡射礼云司射堂下北面命曰不贯不释是也若大射用皮侯则必贯革也又按保氏教五射其法一曰白矢谓矢贯侯过见其镞白也二曰参连谓前放一矢後三矢连续而去也三曰剡注谓羽头高镞低而去剡剡然也四曰襄尺谓臣与君射不与君并立襄君一尺而退也五曰井仪谓四矢贯侯如井之容仪也白矢贯侯皆所谓贯也庄公每射皆贯盖技之精如此礼每射必四矢谓之乘矢以乘车必驾四马因即谓四为乘有司初授矢于射者射者受之搢三而挟一个谓插三矢带右而以一矢挟于弦及射则次第发之也孔云内则云男子生以桑弧蓬矢六射天地四方注谓天地四方男子所有事彼于初生之时以上下四方男子皆当有事故用六矢以示意射礼则象能御乱上下无乱不复须象之故也又按周礼射人职云王乐以驺虞九节诸侯乐以狸首七节孤卿大夫乐以采苹五节士乐以采芣五节九节谓歌九终先五节以听後四节以应乘矢矢必按节而发故曰节也七节者歌七终三节先以听五节者歌五终一节先以听尊卑乐节虽不同後四节以尽乘矢则同乡射礼云乐正东面命大师曰奏驺虞间若一大射仪云乐正命

太师曰奏狸首间若一皆谓五节三节之间声长短疏数如一也驺虞本天子乐节而乡射用之者先儒以为位相绝不嫌僭也若大射仪所载则诸侯之射礼也反者反其矢于受矢之处即楅是也乡射记云楅长如筈博三寸厚寸有半龙首其中蛇交韦当楅髹按楅以受矢其长如之三尺也博者其宽也厚者其深也龙首刻首为龙形也中谓腹受矢处蛇犹龙也两端为龙首中为蛇身相交蛇龙君子之类也韦皮也当中也与裆通中衣袴曰裆两腹各半圆交处脊起如衣裆抚矢乘之则分委两腹以韦挽之如裆衣也以赤黑漆之曰髹与中之髹同此言四矢仄兮者乃礼卒射时耦及宾主人大夫衆宾皆拾取矢授有司已皆升就席而有司乃还其矢于受矢之故处也御通作圉说文云守之也守者有扞拒之义故又训为止曰以御乱兮者赞美庄公之善射如此其才足以御四方之乱也吕祖谦云庄公弓矢之精观其以金仆姑射南宫长万可见矣金仆姑矢名通篇于公无贬辞而讥刺叹惜之意寓焉若曰不谓斯母而生斯子也云尔或又若曰不谓是子也才而不能防闲其母也若是或又若曰不谓是子而竟忘父讐乃尔或又若曰此甥于我者也必非讐我者也是数者皆未必非诗人意中之所无然而不明言也此其所以为风也与胡胤嘉云庄虽不能无罪而压於其母其情犹可矜君子於人之母必有以讳之故於猗嗟之诗仅道其仪容技艺之美而微寄不足於慨叹中焉此立言者之道也又云母子之际难言之蒯聩不忍於南子卒以逆终况桓孱主也文姜之侈从来矣其从如云其从如水操柄固在手也桓亡而以国母庄临于上区区欲于车马仆御间求堤防之术亦已疎矣故庄第不能闲其母何足为庄罪庄之罪莫大於忘讎也桓与夫人如齐襄公醉而擅杀于车上则庄之於襄讎也非甥也姜之於桓罪人也非夫人也不为汲也妻则不为白母庄公於姜母道已絶矣一彭生之杀齐何足以谢鲁而庄公漠然不问此固可以为天子乎虽有面目无所施於天地之间而雍雍若都愈?於仪愈不可以人人即贯革之能复中之巧不寻诸讐讎而徒逞其僥捷亦足丑矣故曰展我甥兮非拒其不为齐侯之子也若云是甥我者矣必非讐我者也其诗人之微辞乎或曰此齐风也齐人岂欲其讐我哉夫鲁无风而刺桓与庄之诗俱见於齐且天下之恶一也庄公当讐齐虽齐亦不得而讳言之也齐人不得讳言之而庄公不问焉庄之所以为大罪也邹忠胤云父子之道天性也使庄诚有志则于时亦不甚稚所谓婴儿拱手谁敢侮之乃元年筑王姬之馆二年任其母会齐侯于禚三年任溺会齐师伐卫四年任其母享齐侯于祝丘而是冬又躬及齐人狩于禚于时庄公已十七何无心肝至此齐人道其威仪技艺之美而目之为展甥似誉似嘲若玩孺子於股掌之上甚矣庄之不竞徒为讎国所狎昵而窃笑也崔铣云为庄公者宜痛父复讎而已是故居文姜而饬其养责襄公而絶其使枕戈衽干衣衰食糲号泣于王求助于与国明大义于鲁之臣庶治兵畜锐观衅而东以身委之天下之恶一也宁无恻我之不幸者惜乎庄公既幼而愚又无石碣子犯之臣庶公子者方观变而徐图其利幸其小安忘此大怨悲夫】

猗嗟三章章六句【子贡传谓鲁庄公会齐大夫狩于禚齐人讥之申培说则谓鲁庄公朝于齐遂及齐大夫狩禚齐人刺之按春秋书公及齐人狩于禚公谷皆谓齐人者齐侯也二传去古未远必得其实则所云公及齐大夫狩者非矣诗为两君行宾射之礼而作观射侯不出征之语可见岂为狩咏耶】

无田齐人刺鲁庄公也【原名甫田改别小雅
与猗嗟同意此曰婉兮变兮彼亦曰猗嗟变兮清扬婉兮非指庄公而何】

无田【丰氏本作甸後同】甫田维莠骄骄【萧韵亦叶豪韵起劳翻杨子法言丰本俱作乔乔】无思远人劳心【劳心丰本作心焉】忉忉【豪韵亦叶萧韵读如凋丁聊翻比而赋也无通作母甫通作誦说文云大也一曰入相助也鲁桓求助于大国因婚于齐故以田甫田为比孔云上田谓垦耕下田谓土地言无田甫田犹多方云宅尔宅田尔田今人谓佃食古之遗语也莠徐铉云粟下扬生艸也谓禾粟下播扬而生罗愿云先儒不适主何物惟韦昭解鲁语云莠似稷无实又韦曜问答云甫田维莠今何答曰今之狗尾也然後此物方显今之狗尾诚似稷而不结实无处不生愚按莠以比庄公猗嗟之序云齐人刺鲁庄公以为齐侯之子焉公羊传亦云夫人姜氏譖鲁桓公於齐侯述公之言曰同非吾子庄公之子也同者庄公名庄虽为桓子而当时议者咸疑为非桓所生故用莠为比莠似苗而实非苗种孔子所谓恶莠恐其乱苗是也猗嗟刺展我甥兮意亦如此骄骄朱子云张皇之意严粲以为蔓延长茂如有骄纵之状是也诗人戒人不可耕大田耕大田则恐有非种之族窃据于中而已不能觉也鲁桓欲得齐襄公之欢心轻狗文姜之意听其往来遂有同非吾子之事然则何以求欢于大国为乎嘲之也远人亦指庄公也齐鲁异国故曰远人说文无忉字当作怵云悲也曰无思远人者讳言而不欲念及之也庄公生而蒙非种之讥及已即位而有不能防闲其母之谗且与其母更递入于齐国将安所施其面目乎诗人代为之愧而又怜之曰自今以往我勿复思及远人一思之徒使我心烦劳而且继之以悲也悲天壤之内乃有如此人将为天下诸侯所窃笑耳极其诧异而终不欲明言虽以刺庄公亦以讳国恶也】无田甫田维莠桀桀【屑韵】无思远人劳心怛怛【叶屑韵旦悦翻丰本作比也桀谓桀然挺立也宜通作杰骄骄喻其年长桀桀喻其在位重言之者形其骄桀之甚也怛说文云憊也憊者痛也悲之极而至于痛憊悼之深也】婉兮变【叶霰韵龙倦翻说文作𠂔】兮总【丰本作𠂔】角卩【叶霰韵古县翻】兮未几见【霰韵】兮突而【古本作若】弁【霰韵丰本作𠂔】兮【比也婉说文云顺也猗嗟及此篇皆以婉变摹庄公想见其为人之性情如此总角即柏舟所谓两髦总聚其髦以为两角内则云男女未冠笄者总角衿纓是也卩朱子云两角貌严云言两角如卩字之形又杨慎云周官有卩人卩金未成器也借作童卩之卩童未成人犹矿之未成器亦通按秦始皇遣徐福发童男女千人至海上求仙筑城侨寓号卩兮城盖取此未几朱子云未多时也突说文云犬从穴中暂出也徐锴云犬匿于穴中伺人人不意之突然而出也方言云凡卒相见谓之突弁皮弁也礼曾子问篇云诸侯相见皮弁鲁庄即位时年方十三及四年狩禚之役年仅十七耳齐人骤见其服诸侯之服故曰突而弁兮然年已长大而绝无羞恶之心位列诸侯而不闻复讐之志则诗人深刺之意亦寓於此】

无田三章章四句【序云大夫刺襄公也无礼义而求大功不修德而求诸侯志大心劳所以求者非其道也诸儒皆祖其说故杨雄云田甫田者莠骄骄思远人者心忉忉桓宽盐铁论云夫治国之道繇中及外自近者始近者亲附然後来远百姓内足然後恤外今中国弊落不忧务在边境意者地广而不耕多种而不耨费力而无功诗云无田甫田维莠骄骄其斯之谓与盖旧说相传云尔朱子谓未见其为刺襄公诚是子贡传申培说则皆谓齐景公欲求诸侯急于图霸大夫讽之亦祖序之意而少变其说然细按之实与诗辞不贴要之非也】

载驱齐人刺襄公也无礼义故盛其车服疾驱於通道大都与鲁文姜淫播其恶于万民焉【出序按春秋鲁桓公歿後子庄公嗣位二年夫人姜氏会齐侯于禚四年夫人姜氏享齐侯于

祝丘五年夫人姜氏如齐师七年夫人姜氏享齐侯于防又会齐侯于谷惟如齐师不显其处祝丘与防皆鲁地禚谷皆齐地禚地未详所在谷在今兖州府东阿县绎诗中有汶水汤汤齐子翱翔之语汶水在济南鲁北境上即今兖州府汶上县其地与谷相近此诗疑即于会谷时作也是年一岁再会出入无时内外无忌未有若是之淫奔者而齐襄之与文姜会亦止于此越明年遂为无知所弑胡安国云此其祸淫之明验也】

载驱【释文作駟丰氏本作馭】薄薄【药韵】簟茀【释文作箒】朱鞞【药韵】鲁道有荡齐子发夕【叶药韵祥龠翻 赋也载之言则盖音近也驱驱马驾车也薄通作□说文云车下索也治车而重以索缚之曰□□也簟说文云竹席也毛传云方文席也孔颖达云用竹为席其文必方茀解见硕人篇尔雅作箒云輿革前谓之鞞後谓之箒竹前谓之御後谓之蔽郭璞云鞞以韦□车轼也箒以韦鞞後户也御以簟衣轼也蔽以簟衣後户也孔云如尔雅之文车前後之饰皆有革有簟故此说车饰云簟茀朱鞞也愚按茀者当为车前後蔽之总名故簟有茀称陈祥道云鞞与茀皆革为之谓所谓朱鞞是也御与蔽皆竹为之诗所谓簟箒是也又云齐襄公方叔之车以簟茀卫夫人之车以翟茀此妇人男子车蔽之别也朱朱漆也鞞是革之别名兽皮治去毛曰革徐锴云皮去其毛染而莹之曰叶鞞空鞞之意也以鞞鞞车所以为固漆之以朱所以为饰也载驱二句俱指襄公言驱车治车行于道上盖将以会文姜也鲁道有荡及齐子解见南山敝笱篇夕说文云莫也发夕谓夕时发行也文姜闻襄公所在即夕啓行不能待旦经有荡之鲁道而适齐境也孔云兄则盛饰而往妹则疾行会之曾无愧色故刺之严粲云车饰之美系衆观也道路坦夷非隐处也无耻甚也】四骊济济【叶荠韵子礼翻】垂【丰本作六】辔濞濞【荠韵陆德明本作尔尔丰本作弥弥】鲁道有荡齐子岂弟【荠韵郑玄云岂读当为圉弟古文尚书以弟为圉圉明也孔云圉开也古文尚书即今郑注尚书是也无以悌为圉之字惟洪范稽疑论卜兆有五曰圉注云圉者色泽光明盖古文作悌今文作圉贾逵以今文较之定以为圉故郑依贾氏所奏从定为圉于古文则为悌愚按岂弟二字甚明郑玄改作圉圉更不可晓 赋也四骊二句以上章载驱二句例之亦当指襄公言郑玄云此又刺襄公乘是四骊而来徒为淫乱之行四一驷也驷说文云马深黑色毛传云四驷言物色盛也列子云牝而黄牡而驷马至果天下之马也尔雅亦云騊牼驷牡济之言齐谓齐色也孔云襄公将与妹淫盛其一驷之马皆是铁驷之色其马济济然而美辔解见大叔于田篇垂辔辔之垂者濞通作尔说文云丽尔也犹靡丽也此赞辔之美也岂弟解见旱麓篇即乐易也本为盛德之称此以称齐子者以其无慙耻之色亦乐易也所谓美恶不嫌同辞又尔雅云恺悌发也郭璞谓发明而行也殊属强解】

汶水汤汤【阳韵户羊翻】行人彭彭【叶阳韵逋旁翻】鲁道有荡齐子翱翔【阳韵 赋也汶水出泰山莱芜县原山西南入济在济南鲁北闵子骞曰吾必在汶上欲北如齐也孔云齐在鲁北水北曰阳僖元年左传称公赐季友汶阳之田当齐襄公之时汶水之北尚是鲁地酈道元云汶水又南迳钜平县故城东而西南流城东有鲁道今汶上夹水有文姜台又许慎以为汶水出琅邪朱虚县东泰山东至安丘入潍此淮南子所谓汶出弗其者乃青州之大汶小汶非此汶也其水入潍而淮南以为流合于济则几与此汶混矣汤汤水流盛而沸有如汤然也行人往来之人也彭通作旁侧出之貌言其多也朱子云言行人之多以见其无耻也凌蒙初云说行人便有口似碑之意翱翔者缓飞之谓此谓徐行也】汶水滔滔【豪韵】行人儻儻【叶豪韵博毛翻】鲁道有荡齐子游【丰本作游】敖【豪韵严粲苏辙本作遨 赋也滔

说文云水漫漫大貌儻说文云行貌上章以水之盛对言人之多此章以水之流对言人之行各有当也游本作游状其飘扬之态如旌旗之流也敖说文云出游也字从出从放出放为敖也谢枋得云曰岂弟曰翱翔曰游敖文姜之情态欢欣快乐如此无礼义无羞耻无忌惮尽见于此诗矣诗人铺叙之详形容之巧刺之深疾之甚也胡胤嘉云为邪而有凝滞不畅之意焉其中必畏人也文姜车马之驰骤意气之扬诩其所繇者鲁道也其所渡者汶水也其行人彭彭儻儻如此衆多也其所求者何事其所合者何人而舒徐容与坦然无疑乎可谓无耻无忌甚矣诗人无一语及於淫谑而其恶着无一语及於刺贬而其恶深此诗之为微妙也愚按桓公与姜如齐仅一次耳篇中单言齐子故知其为桓公没後之诗胡安国云妇人无外事送迎不出门见兄弟不踰阂在家从父既嫁从夫夫死从子今庄公不能防闲其母失子道也故赵匡曰姜氏齐侯之恶着矣亦所以病公也曰子可以制母乎夫死从子通乎其下况於国君君者人神之主风教之本也不能正家如正国何若庄公者哀痛以思父诚敬以事母威刑以督下车马仆从莫不俟命夫人徒往乎夫人之往也则公威命之不行哀戚之不至尔崔铄云春秋志文姜之恶极矣庄公擅一国之命怙然从之古未之有也论者失其情而衍于辞且欲制其仆从胡得为笃论哉夫季友之祥庆父之才皆可君鲁也文姜失行国人耻之故敝笱诸刺兴焉齐襄立庄以示德庄公藉舅以自固文姜挟宗国以愚其子慑其下彼淫邪之迷不惜其夫之弑奚有于子之废是故狩禚围郕伐卫归俘待齐女之长主王姬之昏仆仆焉甘役于齐盖襄公之威重矣文姜之术狡矣尚何仆从之制哉邹忠胤云车中之难庄于时为年几何泝之会桓实尸之虽有申繻之衷言不听固非一孺子所能尼其辙桓没之年庄仅十三可辄以制母之事求多于童昏乎黄懋容云夫人挟淫佚之性诸儿凭强大之威藉令长君嗣位少乏刚断或不能制况庄公才生十五可过责之哉上无作福作威之明辟下无托孤寄命之重臣此庄公之不幸也】

载驱四章章四句【焦氏易林云襄送季女至于荡道齐子旦夕留连久处此说不知何所本朱子但以爲齐人刺文姜之诗然则齐襄之罪可未减乎子贡传以爲襄公伐卫姜氏会之于师申培说亦云齐襄纳卫朔抗王人鲁人从之文姜归齐以犒师皆影附而为之说要自无据春秋书夫人姜氏如齐师不言所在且篇中亦不见有如师之语岂以行人彭彭与驷介彭彭略相彷彿乎】

何彼禮矣美王姬下嫁齐桓公也【春秋鲁庄公十有一年冬王姬归于齐时周庄王之十四年也左传云齐侯来逆共姬公羊谷梁传皆云过我也林尧叟云共姬即王姬按左传记齐桓公之夫人三王姬徐嬴蔡姬皆无子然则即此王姬也桓新有齐国任用管仲将兴霸业而联姻王室故诗人美之其後一匡九合以尊周为名共主之不替紧桓霸是赖夫子特録此诗附于召南盖许齐桓与召公才美寓意深矣】

何彼禮【冬韵韩诗作茝朱传丰氏本俱作禮】矣唐【稗编作棠】棣【成祖讳】之华【麻韵】曷不肃雝【冬韵此章亦隔句两韵】王姬之车【麻韵刘熙释名云古者曰车声如居所以居人也今日车音尺奢反云舍也韦昭云古皆音尺奢反从汉以来始有居音赋中有比也何彼曷不皆设问之辞禮说文云衣厚据春秋王姬以冬归齐则衣厚之时也故即其所见为咏唐棣之华比辞也尔雅云唐棣栌本草云栌树大十数围亦名栌杨团叶弱蒂微风大

摇郭璞云唐棣似白杨江东呼夫移沈括驳之云扶移即白杨也本草以白杨扶移为两条盖不知其为一物也扶移亦谓之蒲移至今越人谓白杨为蒲移陈藏器引论语注以唐棣为移杨此误也戴侗云按白杨多种于虚墓间似杨而白故谓之白杨夫移扶移蒲移本一物以扶扶蒲声相迓故通用之耳陆玑解唐棣则云蓂李也一名雀梅亦曰车下李所在山皆有其华或白或赤六月中熟大如李子可食沈云其实似照照含桃也按晋宣室阁铭云华林园中有车下李十四株蓂李一株则车下李与蓂李自为两物玑既以唐棣为蓂李乃云亦曰车下李本草有郁李仁亦云一名爵李一名车下李此皆误也严粲云蓂李又有车下之名盖繇二者相类故名称相乱也论语曰唐棣之华偏其反而陆佃云凡物之华皆先合而後开惟此华先开而後合钱天锡云唐棣之华一树辄生二萼以美夫妇如云竝蒂芙蓉耳肃敬黮和也王姬者王女而姬姓杜预云王姬不称字以王为尊也序云虽则王姬亦下嫁于诸侯车服不系其夫下王后一等按巾车职王后五路其一曰重翟锡面朱总重翟者用雉羽重叠饰车为蔽马面有锡锡音阳马面当卢也总着马勒直两耳与两镳朱纒为之配王玉路以祀者其二曰厌翟勒面绩总厌翟者鳞次翟羽使相厌为饰勒面者彪韦饰面绩画文配王金路以宾者其三曰安车雕面鷖总安车者坐乘车雕面者画之不彪其韦鷖青黑色以上皆有容盖容车旁惟也盖车上盖也其四曰翟车贝面组总有握翟车者不重不厌握当作幄后乘以蚕北郊之车其五曰辇车组挽有翟羽盖辇车者四轮而小织组为挽人引之行翟以御风尘盖以翳日后宫中燕闲所乘此所谓五路也郑玄云下王后一等谓车乘厌翟孔颖达云王后五路重翟为上厌翟次之今言下王后一等故知乘厌翟也国风硕人曰翟茀以朝谓诸侯夫人始来乘翟蔽之车盖厌翟也崔灵恩云诸侯夫人初嫁不得上摄以其逼王后故也卿大夫之妻得上摄一等愚按如孔崔所说则诸侯夫人皆得乘厌翟不必王姬也而序谓车服不系其夫下王后一等者当是通子男之夫人言之虽配子男亦得乘厌翟耳朱子云何彼戎戎而盛乎乃唐棣之华也此何不肃肃而敬黮黮而和乎乃王姬之车也按王姬在车中不可见但见其车范我驰驱和鸾有节则肃黮象也夫南子以车声而知蘧伯玉以伯玉之车宜有鳞鳞之辙则覩兹王姬之车而亦可知其有肃黮之度矣邓元锡云礼言之肃肃敬也黮黮和也夫敬以和何事不行采之见前王之化者远也愈久而不忘是夫子之志也】

何彼禮矣【纸韵】华【丰本作顔】如桃李【纸韵】平王之孙齐侯之子【纸韵 赋中有比也陆佃云李韭皆酸李东方之果木子也故其字从木从子罗愿云李木之多子者故从子亦南方之果也火者木之子故名二说并録之陆较僻矣郑玄云华如桃李者兴王姬与齐侯之子顔色俱盛朱子云以桃李二物兴男女二人也平王名宜臼孙桓王名林曾孙庄王名佗未知共姬为何王之女齐侯之子谓桓公小白也小白父僖公名禄父兄襄公名诸儿桓即位後三年王姬始归齐时已将霸矣桓本非嫡而为诸侯故本其所自而曰齐侯之子】其钓维【丰本作伊】何维丝伊缙【真韵亦叶元韵呼昆翻说文作緡】齐侯之子平王之孙【元韵亦叶真韵颁伦翻 兴也伊维也缙尔雅云纶也说文云钓鱼缴也维丝伊缙言合丝以为纶也钓者必合丝为纶而後得鱼以兴娶者必有媒妁以合二姓之好而後得妻愚按此指鲁言也谷梁传所谓为之中者是也时王姬以鲁为主齐侯来鲁逆之故云然上章主嫁者言故先言平王之孙尊王也此章主娶者言故先言齐侯之子从夫也其辞匹敌则其不骄亢可知矣或云族类先女王制也婚姻先男夫纲也亦通又胡安国云阳唱而阴和夫先而妇从则虽以王姬之贵当执妇道与公侯大夫士庶人之女何以异哉故舜为匹夫妻帝二女而曰嫔于虞王姬嫁于诸侯而亦成肃黮之德自秦而後列侯之尚公主使男事女夫屈于妇逆阴阳之位

故王阳条奏世务指此为失而长乐王回以其弊至父母不敢畜其子舅姑不敢畜其妇原其意虽以尊君抑臣而使人伦悖于上风俗坏于下又岂所以为治也哉荀悦云尚主之制非古也厘降二女陶唐之典归妹元吉帝乙之训王姬归齐宗周之礼也以阴乘阳违天以妇凌夫违人违天不祥违人不义汪克宽云後世公主出嫁无王姬执妇道之风莫不庸奴其夫虽尚主者极有才名而势屈于崇贵吞悲茹气无所逃诉故晋人有无事取官府之说至六朝其失尤甚江敦尚临海公主让婚表有云制勒甚于仆隶则其敝可知矣春秋书王姬之归与诗相表里实万世之法也按此虽非诗正旨然却有关系故附錄之】何彼禮矣三章章四句【序云美王姬也虽则王姬亦下嫁于诸侯车服不系其夫下王后一等犹执妇道以成肃雝之德也此但依附诗词为说而不能知其世毛公心疑东迁後诗不宜入二南于是训平为正郑康成笺谓正王者德能正天下之王诸儒递相祖述以为如契称为玄王武王称为宁王厉王称为汾王之类皆不必以諡称而更谬以齐侯为齐一之侯犹易之康侯礼之宁侯云者皆杜撰不根之甚使凡读古人书者尽如此立说则以有以无以为有亦何所不至乎朱子云此乃武王以後之时不可的知其何王之世然文王太姒之教久而不衰亦可见矣子贡传以为齐襄公诗而云周人耻之赋此然中有阙文申培说则以为齐襄公杀鲁桓公庄公将平之使荣叔锡桓公命因使庄公主昏以桓王之妹嫁襄公周人伤之而作是诗丰熙谓称王姬车从之肃雝盖畏齐而然所以深惜之也次章以王齐并言见天子微弱诸侯强抗末章先齐後王见齐之盛而王之卑也考春秋传鲁庄公元年为周庄王之四年齐襄公之五年夏单伯送王姬秋筑王姬之馆于外冬王姬归于齐公羊传云天子嫁女于诸侯必使诸侯同姓者主之谷梁传云筑礼也于外非礼也筑之为礼何也主王姬者必自公门出于庙则已尊于寝则已卑为之筑节矣筑之外变之正也筑之外变之为正何也仇讐之人非所以接昏姻也衰麻非所以接弁冕也其不言齐侯之来逆何也不使齐侯得与吾为礼也盖先是庄公之父桓公与夫人文姜如齐襄公通焉公谪之齐侯享公使公子彭生乘公公薨于车故襄公者虽庄公之母舅而实讐也齐强鲁弱公不能讐齐又不敢逆王命而为之主其婚然则是诗之作直是鲁人伤庄之词耳申培之说近是愚所疑者襄已为齐侯五年似不应仍称齐侯之子唯襄弟小白亦娶王姬以内难得国故诗人本其父为齐侯以称之盖许其继统也独惜共姬之贤无所考耳又郑箴膏肓谓齐侯嫁女以其母王姬始嫁之车远送之审尔则又宜属之齐诗矣似无据】

鸡鸣齐卫姬劝桓公以勤政故作此诗【出申培说子贡传亦云桓公好内卫姬箴之按左传桓公之夫人三王姬徐嬴蔡姬皆无子齐侯好内多内宠内嬖如夫人者六人长卫姬生武孟少卫姬生惠公郑姬生孝公葛嬴生昭公密姬生懿公宋华子生公子雍刘向列女传云桓公好淫乐卫姬为之不听郑卫之音桓公乃立卫姬为夫人号管仲为仲父曰夫人治内管仲治外寡人虽愚足以立于世矣曹大家云卫国作淫佚之音卫姬疾桓公之好是故不听以厉桓公也张华女史箴云卫女矫桓耳忘𩚑音邹忠胤云桓公有两卫姬长者共姬也易牙有宠于共姬因寺人貂以荐羞于公公许之立武孟桓公卒易牙入与寺人貂因内宠以杀羣吏而立公子无亏即武孟也无何亦旋见杀於国人以共姬之怙宠养交险諛倾国如此彼不为夜半之泣斯已矣安能为此鸡鸣之赋赋鸡鸣者其少姬乎夫五公子争立皆莫克终卒之有国而传者惠公也倘亦其母德懋耶】

鸡既鸣【庚韵】矣朝既盈【庚韵】矣匪鸡则鸣【庚韵】苍蝇之声【庚韵赋也此章及

次章皆贤妃告君之辞也列女传云礼后夫人御于君以烛进至于君所灭烛适房中脱朝服衣?服然後进御于君鸡鸣乐师击鼓以告旦后夫人鸣佩而去孔云书传说夫人御于君所之礼太师奏鸡鸣于阶下夫人鸣玉佩于房中告去则鸡鸣以告当待太师告之然此夫人自听鸡鸣者彼言告御之正法有司当以时告君此说夫人相警戒不必待告方起故自听之也朝谓会朝之臣不指殿陛盈满也言充满于朝门之下也鸡鸣乃趋朝之时故贤妃闻鸡声而警君欲其蚤起又恐君之尚嫌其早也复申之曰君母谓此时为早过此以往不但闻鸡之鸣将有苍蝇之声来聒人耳矣旧说谓夫人在君所心常恐晚误以蝇声为鸡鸣无论章法未顺然鸡未鸣以前当子夜之时曾有闻蝇声者否故知非格物必无以穷理也罗愿云苍蝇蝇之洁者雅有青蝇风有苍蝇苍蝇比于青蝇而小其色苍好集几案饮食上者是也段成式云苍蝇声雄壮青蝇声清聒其声皆在翼一说季本云天将曙而苍蝇始有声此贤妃疑其已迟之辞也亦通】东方明【叶阳韵谟郎翻说文作昌误】矣朝既昌【阳韵】矣匪东方则明【见上】月出之光【阳韵 赋也鸡既三号东方渐白则天将晓矣礼曰大明生于东大明日也淮南子云日出于阳谷浴于咸池拂于扶桑是谓晨明登于扶桑爰始将行是谓朏明至于曲阿是谓朝明临于曾泉是谓早食皆东方地也故凡明必始于东方以日光所起故耳昌说文云美言也其字从日从日盖以言语昭布宣扬为义此云朝既昌者以会朝人衆偶语者多声音嘈襍故曰昌也又申之曰过此不已不但东方明而已自昼而夜为时几何诚恐月出之光继之矣一说季云苍蝇已有声矣然犹未大明故月光尚显此贤妃幸其尚蚤之辞也亦通】虫飞薨薨【蒸韵丰氏本作 】甘与子同梦【叶蒸韵武登翻】会且归矣

无庶予【陆德明云定本作与】子憎【蒸韵 赋也始而鸡鸣继而东方明又未几则天将旦而百虫作矣礼臣朝君辨色而入君日出而视朝时已经贤妃两警之後而君亦不遑宁寢矣此章乃君将出朝而别妃之辞也孔云大戴礼羽虫三百六十凤凰为之长则鸟亦称虫此虫飞薨薨未必惟小虫也薨通作轰羣车声也衆鸟之飞声亦如之甘犹乐也子指妃旧说此章亦妃告君之辞古未有妃称君为子者今正之同梦即同寢也会会朝也君未视朝臣固不得遽入此所谓会亦会于朝门外耳归谓归治其家事庶衆也谓此会朝之衆臣也予子对言我与汝也加予於子之上益信其为君言也憎说文云恶也恶其留色也言当此羣虫竞飞之时倘与子卧而同梦我岂不甘之然闻汝朝盈朝昌之言信乎羣臣之会于朝者已久亦欲退而归治其家事矣我其亟起视朝庶无使诸臣以我与汝为憎恶也此一君者因妃言而能终于自克若此亦可谓之贤君矣孔丛子载孔子曰吾于鸡鸣见古之君子不忘其敬也无庶予子憎不忘其敬之谓也范祖禹云圣人顺天地阴阳之理观万物之情明而动晦而休故以鸡鸣为夙兴之节至于虫飞薨薨则不独以怠于政事亦非尚寐之时也君子之修身不以有事而蚤无事则晏其兴居皆顺天地之理所以为常也刘公瑾云夫为妻纲古之人身修而家齐者上也思齐所谓刑于寡妻是也夫道不足幸有贤妃助之成德者次也此诗所述是也彼有相与昏淫耽乐卒以覆亡如瞻卬所刺幽王褒姒者无足道矣】

鸡鸣三章章四句【序云思贤妃也哀公荒淫怠慢故陈贤妃贞女夙夜警戒相成之道焉朱子谓序得之但哀公未有所考诗以为说人也其义未详】

卷二十二

钦定四库全书

诗经世本古义卷二十二

明 何楷 撰

周僖王之世诗二篇

大车美息妫以丑楚子也【刘向列女传云楚伐息破之虏其君使守门将妻其夫人而纳之于室楚王出游夫人遂出见息君谓之曰人生要一死而已何至自苦妾无须臾而忘君也终不以身更貳醮生离于地上岂如死归于地下哉乃作诗曰谷则异室死则同穴有如不信死如皦日息君止之夫人不听遂自杀息君亦自杀同日俱死楚王贤其夫人守节有义乃以诸侯之礼合而葬之君子谓夫人说于行善故序之于诗按左传庄十年蔡哀侯献舞娶于陈息侯亦娶焉息妫将归过蔡蔡侯曰吾姨也止而见之弗宾息侯闻之怒使谓楚文王曰伐我吾求救于蔡而伐之楚子从之秋九月楚败蔡师于莘以蔡侯献舞归十四年蔡哀侯为莘故绳息妫以语楚子楚子如息以食入享遂灭息以息妫归生堵敖及成王焉未言楚子问之对曰吾一妇人而事二夫縱弗能死其又奚言楚子以蔡侯灭息遂伐蔡秋七月楚入蔡而吕氏春秋则云楚王欲取息与蔡乃先佯善蔡侯而与之谋曰吾欲得息奈何蔡侯曰息夫人吾妻之娣也吾请为飧息侯与其妻者而与王俱因而袭之楚王曰诺於是与蔡侯以飧礼入於息因与俱遂取息旋舍于蔡又取蔡二说微不同然皆与列女传相出入息妫非完节者特以其生二子而从不与楚子交言又能隐忍以复夫仇可谓奇矣其践同穴之言同日俱死想亦在蔡仇既报之後乱之生也则自蔡侯之侮息妫始之故圣人録其诗以为色诚息在今汝宁府息县姬姓侯爵初郑息有违言息侯伐郑事在隐十一年君子以息不亲亲卜其将亡故知其为姬姓也其诗无所附或因其为周同姓之国是以姑系之王风与】

大车檻檻【叶感韵读如撼户感翻】毳衣如𦃟【感韵说文作𦃟徐锴云今人所染麦緑也】岂不尔思畏子不敢【感韵 赋也大车牛车也以下文檻檻证之则此乃囚车也檻说文云桯也徐锴云古谓檻车按管仲檻车至齐即此檻也息为楚所灭君与夫人皆被虏用檻车载之以归故重言檻檻耳毳衣楚子之服按周礼公之服自衮冕而下如王之服侯伯之服自鷩冕而下如公之服子男之服自毳冕而下如侯伯之服详见采菽篇细毛曰毳以其衣无龙山华虫大而首宗彝宗彝虎雉兽名似猕猴而大于虎皆毛虫也故取毳为冕名凡冕服皆玄衣纁裳此本郑玄之说楚为子爵衣正首毳𦃟萑之初生者尔谓息君也子指楚子楚僭称王而妫乃以子呼之盖讳言之也我岂不思复与尔为夫妇哉身既被囚畏彼而不敢耳】

大车哼哼【元韵广韵作噉噉】毳衣如𦃟【元韵说文作𦃟】岂不尔思畏子不奔【元韵 赋也哼说文云口气也叠言哼哼者口气重迟之貌故以象车行重迟之状𦃟说文云王?色也?赭通尔雅云一染谓之縹再染谓之赭郭璞以为浅赤也沈括云稷之𦃟色者谓之縹縹色在朱黄之间似乎赭极光莹掬之粲泽熠熠如赤珠此自是一色似赭非赭盖所谓𦃟色名也而

从玉以其赭而泽故以喻之也犹鷩以色名而从鸟以鸟色喻之也如璫指裳也陈祥道云莢之初生其色玄则如莢言其衣璫之为玉其色赤则如璫言其裳按此与郑氏玄衣纁裳之说合纁者赤黄色裳色象坤以土无正位必附于火故也古者衣不殊裳故如莢如璫皆言衣以冠之奔谓奔往相就】谷则异室【质韵】死则同穴【叶质韵户橘翻】谓予【列女传作有如】不信有【列女传作死】如皦【列女传作皎】日【质韵 赋也谷毛传云生也郝敬云老子曰谷神不死谷与谷同上二章皆纪初遇虜时事至此则妫己为楚王纳之宫中矣故有谷则异室之语穴郑云谓塚圻中也孔云檀弓曰合葬非古也自周公以来未之有改然则周法始合葬也白虎通云合葬者所以固夫妇之道也汉书哀帝太后崩上曰朕闻夫妇一体诗云谷则异室死则同穴附葬之礼兴焉郁郁乎文哉吾从周又吕氏云古之所谓合葬者同其兆而已非同坎而葬也盖死有先後前丧已葬复啓之以纳後丧仁人有所不忍有礼者有所不取也此云同穴者亦同兆也皦说文云玉石之白也毛郑以皦日为白日象其色也言生既不得同室而居矣庶几死而得同穴以葬乎盖至是妫亦视死如归矣呼皦日以为正若谓所不即就死者有如日于是妫果死也妫其毁节以伸志者耶一说程大昌云言我志明白如日皦然也亦通韩凭妻何氏诗云其雨淫淫河大水深日出当心其义正同刘向赞云楚虜息君纳其适妃夫人持固弥久不衰作诗同穴思故忘新遂死不顾列于贞贤】

大车三章章四句【序云刺周大夫也礼义陵迟男女淫奔故陈古以刺今大夫不能听男女之讼焉其说既目难通朱子则谓周衰大夫犹有能以刑政治其私邑者故淫奔者畏而歌之如此然革面而不革心圣人何取焉子贡传申培说皆以为周人从军行役而讯其室家之诗丰氏解谓大车乃任载之车毳衣乃行役者之服而畏子不敢则指其主者而言也邹忠胤亦谓古者凡出车一乘则有两车一正一副小者曰轻车即兵车所以战者大者曰重车即役车所以载輜重者又引季彭山说谓毳冕五章之画衣以丝为之而如莢如璫之毳衣以毛布为之莢雅也亂也璫薺也即大雅之维?也诗人意谓役久衣敝其蒙茸绽裂有如此耳于文义固亦近之惟末章约誓之辞终非男子之语彼其晓晓自明无他亦何为哉】

无衣七兮【秦风亦有无衣故加七兮二字为别】晋人刺曲沃武公也武公伐翼弑晋侯缙尽以其宝器赂王请命王使虢公命曲沃伯以一军为晋侯於是武公尽有晋地更号曰晋【自武公伐翼下俱出史记 子贡传云曲沃僭弑三君而取其国尽以宝器赂周僖王王命之为晋侯国人作此诗以刺之申培说同惟曲沃僭作唐公孙僭僭者武公名也史记又作称三君谓哀侯小子侯及侯缙也僖王一作厘王按左传桓八年王使立缙于晋至庄十六年乃云王使虢公命曲沃伯以一军为晋侯武公虽已封侯而仅立一军者不正其篡晋得之故地虽大而礼从小国也至闵二年武公子献公始作二军吕祖谦云以史记左传考之平王二十六年晋昭侯封季弟成师于曲沃专封而王不问一失也平王三十二年潘父弑昭侯欲纳成师而王又不问二失也平王四十七年曲沃庄公弑晋孝侯而王又不问三失也桓王二年曲沃庄伯攻晋王非特不能讨曲沃反使尹氏武氏助之及曲沃叛王王尚能命虢伐曲沃立晋哀侯使其初师出以正岂至于此乎四失也桓王十三年曲沃武公弑晋小子侯王虽不能即讨明年犹能命虢仲立晋哀侯之弟缙于晋又明年犹能命虢仲芮伯梁伯荀侯贾伯伐曲沃至是武公篡晋僖王反受赂命之为诸侯五失也以此五失观之则礼乐征伐移于诸侯降于大夫窃于陪臣其所繇来者渐矣】

岂曰无衣七【质韵】兮不如子之衣安且吉【质韵】兮【赋也衣言七者谓七章之衣周礼典命职云侯伯七命其国家宫室车旗衣服礼仪皆以七为节大行职云诸侯之礼执信圭七寸纁藉七寸冕服七章建常七旂樊纁七就贰车七乘介七人礼七牢朝位宾主之间七十步此皆所谓七命之数也专言衣者古礼王命诸侯必皆以衣赐之春秋文元年天王使毛伯来锡公命公羊传云锡者何赐也命者何加我服也是命诸侯必赐衣之证也岂曰无衣七兮言我国非不能自制此衣但苟无所受则此衣亦不足重耳子指武公也武公既受王命而得诸侯之服故曰子之衣以其初受王命甫欲即位非旧为诸侯者故仍以子称之安以命有所受不可动摇言沃自桓叔乘潘父之难入晋为晋人败归庄伯弑孝侯又为晋人所攻又乘鄂侯之卒伐晋晋人立哀侯以拒之屡得屡失亦知不受王命之不安矣吉字与凶相反书曰惠迪吉顺理之谓也此所谓吉不过谓此衣既受之於天子则可以杜絶衆忿压服人心而无终朝三褫之患问罪篡弑之凶耳武公之所以赂王请命者意正在此诗人辞若扬之而实诛其心言子则若将以此衣为安且吉乎吕云唐乔琳为朱泚吏部尚书选人白前所注某官不便琳答曰足下谓此选竟便乎朱泚虽有吏部选而不可谓之便晋国虽有冕服苟无天子之命亦不可谓之安且吉安且燠也严粲云五代刘仁恭谓梁使者曰旌节吾自有之但要长安本色耳与岂曰无衣之言一也武公之事国人所不与最後僖王命武公为诸侯晋人力不能讨无如之何特迫于王命不得已而从之耳且武公有无王之心而後动於恶篡弑大恶也王法之所不容诛也彼其请命于天子岂真知有王哉特以人心所不与非假王灵终不能定晋正与唐藩镇戕其主帅而代之以坐邀旌节者无以异无衣之诗不删者所以着世变之穷而伤周之衰也鍾惺云末世天子反为乱人之资此曹操所以终身不废汉献也】岂曰无衣六【屋韵】兮不如子之衣安且燠【叶屋韵乙六翻陆德明本作奥】兮【赋也降七言六者天子之卿典命职云王之三公八命其卿六命其大夫四命及其出封皆加一等其国家宫室车旗衣服礼仪亦如之说者以为在王朝全乎臣故命数仪等从阴以近王而屈出就封全乎君加一等命数仪等从阳以远王而伸晋侯爵出得七命则入为王卿正当得六命也简晋之先君见经传者如燮父事康王文侯辅平王亦皆入为王卿也但八命六命其绘绣之物无考盖礼文轶耳燠说文云热在中也与席不暇煖煖字同服久则煖命出天子无更易之患故可以久王应麟云自僖王命曲沃为晋侯而篡臣无所忌威烈王之命晋大夫袭僖之迹也有曲沃之命则有三大夫之命出尔反尔也】

无衣七兮二章章三句【序以为美晋武公也武公始并晋国其大夫为之请命乎天子之使而作是诗也朱子驳云武公弑君篡国大逆不道乃王法之所必诛而不赦者虽曰尚知王命之重而能请之以自安是亦御人于白昼大都之中而自知其罪之甚重则分薄赃饵贪吏以求私有其重宝而免于刑戮是乃为贼之尤耳以是为美吾恐其獎奸诲盗而非所以为教也小序之陋固多然其颠倒顺逆乱伦悖理未有如此之甚者愚按朱子之论正矣至序中所云请命乎天子之使一语亦无稽据坐为诗中子之一字误耳顾不知子即指武公也此诗寓刺于美其言衣之安吉繇请命而得之然篇中不叙及请命之事朱传改为作诗者代武公自述而以子为天子之称则又不伦甚矣】

卷二十三之上

钦定四库全书

诗经世本古义卷二十三之上

明 何楷 撰

周惠王之世诗十六篇

君子阳阳刺王子颓也【按左庄二十一年初王姚嬖於庄王生子颓子颓有宠焉国为之师惠王立取焉国之圃为囿又取边伯之宫夺子禽祝跪与詹父田而收膳夫石速之秩故五大夫及石速作乱因苏氏奉子颓以伐王不克出奔温苏子奉子颓以奔卫卫师燕师伐王入王城立子颓王处于栎子颓享五大夫乐及徧舞郑伯闻之见虢公曰寡人闻之哀乐失时殃咎必至今颓歌舞不倦乐祸也司寇行戮君为之不举而况敢乐祸乎奸王之位祸孰大焉临祸忘忧忧必及之盍纳王乎虢公曰寡人之愿也春胥命于弭夏同伐王城郑伯奉王自圉门入虢叔自北门入杀子颓及五大夫周语亦云惠王三年边伯石速焉国出王而立王子颓王处于郑子颓饮三大夫酒子国为客乐及徧舞郑厉公见虢叔曰吾闻之司寇行戮君为之不举而况敢乐祸乎今吾闻子颓歌舞不思忧夫出王而代其位祸孰大焉临祸忘忧是谓乐祸祸必及之盍纳王乎虢叔许诺郑伯将王自圉门入虢叔自北门入杀子颓及三大夫乃入二书所载相合此诗所咏即子颓乐舞之事也】

君子阳阳【韵】左执簧【阳韵】右招我由房【阳韵】其乐只且【子余翻此此句无韵赋也君子指子颓也孔颖达云史记称晏子御拥大盖策四马意气阳阳甚自得则阳阳是得志之貌董鼎云庄子曰以阳为充孔扬则阳阳者气充于内容貌不枯也簧孔云笙管之中金薄铍也刘熙云簧横也於管头横施于中也以竹铁作於曰横鼓之亦是也大笙十九簧小笙十三簧朱子云盖以竹管植于匏中而窍其管底之侧以薄金叶障之吹则鼓之而出声诗言吹笙鼓簧以其为笙之舌故以簧表笙又有口舌之类故亦曰巧言如簧也左执簧者言执簧之人在左也按仪礼大射仪云乐人宿县于阼阶东笙磬西面其南笙钟曰笙磬笙钟者谓应笙之钟磬也据此应笙之钟磬在东则笙在东可知矣簧者笙之簧东为左故曰左执簧也独举笙为言者以其随县在东方万物生于东故乐人宿县以阼阶为首而西阶次之诗之举左以该右意亦如此招说文云手呼也我五大夫之辈也此诗代为五大夫之辞故云尔由从也房说文云室在旁也崔氏云宫室之制中央为正室正室左右为房尚书大传云天子之堂广九雉三分其广以左为内五分内以一为高东房西房北堂名三雉陈祥道云天子路寝之制室居中左户右牖东西有房房之南有东西夹室郑康成释仪礼谓房当夹室北是也孔安国谓西房西夹室东房东夹室误矣然房皆南户而无北墉室有北墉而无北堂则房户之外繇半以南谓之堂其内繇半以北亦谓之堂昏礼尊于房户之东是房有南户矣礼大射修膳者升自北阶立于房中而不言入户是房无北墉矣昏礼尊于室中北墉下是室无北堂矣故昏礼洗在北堂直室东隅则北堂在房之北可知右招我由房者谓招我辈而相从於西房之间

也右为西西者宾位故招之使居于此亦犹宾在西阶主人在阼阶也只且语助声其乐只且见五大夫辈亦以此为乐也与君子阳阳相应诗之刺意则郑伯数语尽之矣】君子陶陶【豪韵】左执翮【叶豪韵徒刀翻说文作翮】右招我由敖【豪韵】其乐只且【赋也陶通作谣说文云喜也翮尔雅云翮翮也注云今之羽葆懂陈祥道云盖执之以引舞者按乡射礼君国中射则皮树中以翮旌获白羽与朱羽糅翮旌之羽惟白与朱而已舞有文武二舞虞书舞干羽于两阶旧说谓武舞执干在西阶文舞执羽在东阶比但言左执翮者举东以该西亦如上章左执簧之意左传国语所谓乐及徧舞者即其事也徧舞据韦昭以为徧舞黄帝尧舜夏商周六代之乐则文武二舞兼用可知或泥左之一字疑专用文舞然则左执簧者岂亦只鼓一簧乎必不然矣说文云出放为敖右招我由由敖者谓招我等从西房之间而放观乎彼也】

君子阳阳二章章四句【子贡传谓某王好音大夫风之王上阙一字申培说以为景王好音而士遂习音君子讽之而作是诗按左传国语载景王铸大钟而问律于伶州鸠景王好音之说本此然正未必然序则以为闵周也君子遭乱相招为禄仕全身远害而已亦无所据若朱子改为行役者之妇人其夫既归家室相乐而作匪直浅陋抑凿空甚矣倘亦为房之一字所误乎】

防有鹊巢忧谗贼也陈宣公多信谗君子忧惧焉【出序陈宣公信谗事无所考惟史记载宣公二十一年公有嬖姬生子欸欲立之乃杀其太子御寇御寇素】

【爱厉公子完完惧祸及己乃奔齐此亦足为信谗之一证宣公名杵臼】

防有鹊巢【叶豪韵读如曹时劳翻】邛【从邑工声与印不同印从匕从卩】有旨苕【叶豪韵徒刀翻】谁侑【丰氏本作譱後同】予美【韩诗作媿云美也】心焉忉忉【豪韵兴也防邛一说皆陈地名郡国志陈国陈县注引博物记云邛地在县北防亭在焉愚按防堤也人所筑以扞水者朱子之解得之防所以有鹊巢者罗愿云鹊水大则巢高水小则巢卑巢皆取木之枝梢不取坠枝陆佃云先儒以为鹊巢居而知风岁多风则去乔木巢傍枝故能高而不危也又云鹊善相其地而累巢安则致其功用有惊惧之忧则不累也盖巢性多惧就利违害庄子所谓瞿鹊子者义取诸此许慎云鸟在木上曰巢在穴曰窠巢字从木象形徐锴云曰巢形也《三鸟也》邛毛传云丘也孔颖达云土之高处草生尤美故邛为丘旨说文云美也苕草名与苕之华之苕不同陆玕云旨苕之苕苕饶也幽州人谓之翘饶蔓生茎如劳豆而细叶似蒺藜而青其茎叶绿色可生食如小豆藿也愚按苕可生食故云旨苕陆佃云言不惊惧之故防有鹊巢不残贼之故邛有旨苕也谁郑玄云谁谗人也孔云是就衆谗人之内告问是谁为之侑尔雅云诳也郭璞云幻惑欺诳人者又说文云有痛蔽也盖以欺诳为壅蔽也予美郑玄云我所美之人谓宣公也按古者目君皆曰美人既为人所侑矣而犹呼之曰予美忠爱之至也说文无忉字当作怵云悲也诗之取兴言鹊以构木为巢而得安苕以生于高丘而茂盛今我为谗人诳譱于君所心焉怀忧无以自宁则鹊巢旨苕之不如也首二句反兴忉忉非兴谗人後章仿此】中唐有璧【锡韵】邛有旨鸛【锡韵尔雅注作□说文丰本俱作□】谁侑予美心焉惕惕【锡韵兴也尔雅云庙中路谓之唐按唐字义训大说文以唐为大言周礼

亦以唐弓为大弓是也庙之中路比所居宫室之中路为大故曰中唐璧尔雅云瓠觚也张揖郭璞皆以为?瓠也今江东呼为瓠璧乃地下所践者陈祥道云唐与陈皆堂下至门之径特庙堂异其名耳考工记曰堂涂十有二分郑氏曰堦前若今令辟裼也分其督旁之修以二分为峻盖令辟即璧也裼其道也中央为督峻其督所以去水鷓鴣鸟名陆佃云绶鸟也鷓善相其天而吐绶乐则见其文采有戕贼之疑则不吐也今绶鸟大如鸚鵡头颊似雉有时吐物长数寸食必蓄嗉臆前大如斗虑触其嗉行每远草木古今注谓之吐绶鸟一名锦带功曹今俗谓之锦囊韵会小补云一名辟株以其行必远草木亦曰真珠鸡体有真珠点文食之甚美愚按鷓亦可食故称旨鷓又尔雅注作鷓所谓绶草者也以此草具五色作绶文故字从鷓然未闻言鷓可食者则不得以旨名矣或谓以其五色美观变美言旨然终涉牵强当作鸟名解为正惕说文云敬也诗之取兴言中唐垒璧泻水不侵叩有旨鷓吐绶成采今我为谗人所中心焉敬惧不敢自宁安能使萋菲不入而自露其章采乎是则璧与旨鷓之不如也一说欧阳修云谗言惑人非一言一日之致必繇积累而成如鹊巢渐积以构成之又如苕饶蔓引牵连以及我也又云中堂有璧非一璧也亦以引牵而成绶草裸衆色以成文犹多言交织以成感义与贝锦同严粲吕祖谦皆主其说但四句既皆比谗人则苕鷓二物似不应以旨称之愚所不取】

防有鹊巢二章章四句【子贡传申培说皆以为泄冶被谗内子忧之而作按左传陈灵公与孔宁仪行父通于夏姬皆衷其相服以戏于朝泄冶谏曰公卿宣淫民无效焉且闻不令君其纳之公曰吾能改矣公告二子二子请杀之公弗禁遂杀泄冶此诗语意近之其所云予美者乃妻称夫之辞与葛生之予美同义惟用俯之一字于文理不可通耳韩诗解心焉惕惕以为悦人也朱子亦谓此男女之有私而忧或间之之词则未知所谓予美者男称女乎女称男乎善乎郝敬驳之云以予美为男子则简兮为怨女矣以予美为妇人则离骚为旷夫矣从序则此诗为忠愤从朱则此诗为闺思圣人刚订之义宜何从乎】

伐檀魏国女闵伤怨旷而作【出陈阳乐书述古琴曲魏国小政繁居高位者贪鄙不事事而小臣困于行役故其室家嗟怨之如此旧说谓伐檀寘河干比君子不见用亦似近之惟河水清且涟漪一语竟属无谓再四寻求乃悟为怨女之自道也古琴曲所传固不妄】

坎坎伐檀【叶先韵徒沿翻】兮寘之河之干【叶先韵经天翻】兮河水清且涟【先韵尔雅作澜】猗【尔雅释文俱作漪石经作兮】不稼不穡【石经作嗇】胡取禾三百廛【先韵陆德明云亦作?又作厘】兮不狩不猎胡瞻尔庭有县貆【叶先韵读如玄胡涓翻释文作狍】兮【八言为句】彼君子兮不素餐【叶先韵遂缘翻】兮【比而赋也坎易云险也说文云?也坎坎伐檀者言经历险?之地以伐檀也伐斫也檀解见将仲子兮篇其材可为车四牡云檀车憺憺是也寘说文云置也班固云魏在晋之南河曲水经云河水东过河北县南又东永乐涧水注之酈道元云涧水迳河北县故城西故魏国也晋献公灭魏後乃县之在河之北故曰河北县干毛传云厓也按干之为厓义师所出当通作间说文云隙也谓河旁之隙也若易之鸿渐于干诗之秩秩斯干政当通作涧耳河水性浊易纬谓王者太平嘉瑞将出则河水先清故左传云俟河之清人壽几何而此篇三言河清者董氏谓在岸之干之侧之漚者清是也孔颖达云风行吹水成文章者曰涟按说文无涟字当依尔雅通作澜云大波为澜郭璞云澜言涣澜也刘熙云澜连也波体转流相及连也猗助辞通作兮盖音近也书断猗大学

作兮可证此诗怨女所作以檀比其夫以河自比伐檀而寘之河干河干非檀久居之地也盖檀可以为车行且离水而之陆比君子効力于君岂能长与室家相聚哉亦如檀之在河干暂相亲傍已耳而已则贞洁自持虽河水之清有不啻焉此所以为伤怨旷之作也不稼不穡四句刺当时居高位者皆无功窃禄之小人也周礼注云种谷曰稼如嫁女以有所生也一云稼家事也说文云谷可收曰穡左传疏云穡爱也言爱惜而收敛之贾思勰云稼农之本穡农之末稼欲熟收欲速此良农之务也胡之言何八月而熟得时之中和故谓之禾毛传云一夫之居曰廛周礼遂人授民田夫一廛田百亩此曰三百廛则三百夫之家也所以言三百者易讼卦其邑人三百户先儒以为下大夫制语称伯氏骍邑三百是也此云取禾盖以食邑所入言耳下亿困仿此廛之内有困困之所藏每困各得禾秉一亿故诗曰我庾惟亿是其禾数也狩者冬猎之名说文云犬田也故字从犬杜预云狩围守也冬物毕成获则取之无择也故又从守猎说文云放猎逐禽也春蒐夏苗秋獮冬狩通曰田猎又狩亦猎之总名以冬猎大于三时故也尔尔小人也庭宫中也县系也俱见说文尔雅云貉子貉说文云貉之类彼君子兮自叹惜其夫之劳也素毛传云空也餐说文云吞也曰素餐者严云谓空食其禄而无补也此妇伤己之君子行役尽瘁而居高位食厚禄者则燕燕居息无所建明也乃责之曰汝辈何功顾不稼穡而得禾不狩猎而得兽试思彼君子兮其劳于君事而不敢空糜君糈有如彼者夫独非人臣也与哉此亦北山伤独贤之意但彼出于劳人此则出于思妇耳故孔丛子载孔子曰于伐檀见贤者之先事後食也人公孙丑曰诗曰不素餐兮君子之不耕而食何也孟子曰君子居是国也其君用之则安富尊荣其子弟从之则孝弟忠信不素餐兮孰大於是夫以如此为不素餐则又非此妇人意识之所能及矣】坎坎伐辐【叶职韵笔力翻】兮寘之【汉书作诸】河之侧【职韵】兮河水清且直【职韵】猗不稼不穡胡取禾三百亿【职韵】兮不狩不猎胡瞻尔庭有县特【职韵】兮彼君子兮不素食【职韵】兮【比而赋也伐辐蒙上章伐檀而言伐檀为车之辐也老子云三十辐共一毂说文云辐轮輳也谓车轮中木之直指者故与下文河水且直相照侧说文云旁也尔雅云河流百里一小曲千里一曲一直亿数名毛依九章算术以万万为亿郑以十万为亿按亿有小大二数尹文子云楚语百姓千品万官亿丑皆以数相十此谓小亿也数万至万曰亿是为大亿也韦昭云十万曰亿古数也秦时改制始以万万为亿然则当从郑说为正郑云三百亿禾秉之数孔云若为釜斛之数则太多不类故为禾秉之数秉把也谓刈禾之把数尔雅云豕生三豰二师一特注云猪生子常多故别其少者之名愚按此蒙上狩猎言如田豕是也食食禄也】坎坎【石经作欲欲】伐轮【真韵】兮寘之河之漘【真韵释文作唇】兮河水清且沦【真韵】猗不稼不穡胡取禾三百困【真韵】兮不狩不猎胡瞻尔庭有县鹑【真韵丰氏本作□】兮彼君子兮不素飧【叶真韵颁伦翻】兮【比而赋也辐轮皆车中之物言伐辐又言伐轮总见檀之可为车其所伐者惟此一檀而已说文云有辐曰轮无辐曰輳考工记云轮人为轮斩三材必以其时三材既具巧者和之毂也者以为利转也辐也者以为直指也牙也者以为固抱也漘解见葛藟篇干为水所停处侧在水边漘又稍远于侧亦立言之序薛君云顺流而风曰沦尔雅说文皆谓小波为沦毛传云小风水成文转如轮也亦与伐轮相照困说文云廛之圜者圜谓之困方谓之京鹑一名鶡解见鹑之奔奔篇庄周云吾未尝好田而鹑生于实愚按县貆县特县鹑皆举其小者言之貆为貉子特为豕子特比貆为易得而鹑比特为尤小然且皆县之于庭以见未尝择其大而舍其细则贪之至也飧说文云餽也字从夕从食晡时食也人旦则食饭夕则食飧飧为饭别名字林云水浇饭也】

伐檀三章章九句【序云刺贪也在位贪鄙无功而受禄君子不得进仕尔张揖云刺贤者不遇明王也申培说云君子能官而不用魏人慕之而作是诗此但从章末二句生义犹为近之若朱子谓此诗专美君子之不素餐如後世徐穉之流非其力不食者因以伐檀为实有是事固斯甚矣政使斯人稼穡以得禾狩猎以得兽穷年攻苦止为口腹谋而无关于斯世斯民之虑何其细也其亦公孙丑之见也哉子贡传阙文又按大戴礼投壶篇云凡雅二十六篇其八篇可歌鹿鸣狸首鹊巢采芣采芣伐檀白驹驹虞也琴操曰古琴有诗歌五曲鹿鸣伐檀驹虞鹊巢白驹曹魏时得汉雅乐郎杜夔能歌文王鹿鸣驹虞伐檀四篇皆古声辞夫列国之诗赋以见志者固多被之弦歌者或少伐檀独与南雅并列岂其有取于君子不素餐之言足为士人砥节故耶然是固风诗而诗亦风体投壶篇乃以此诗及狸首鹊巢采芣采芣并列之雅或未足信今不能定此诗之起于何世姑系于献公灭魏之年云魏以蕞尔国而使贪鄙之徒得志若此不亡何待】

园有桃晋人忧献公宠二骊姬之子将黜太子申生也【魏灭于晋凡魏诗多是晋诗如邶鄘之入于卫也愚于园有桃陟岵十亩之间汾沮洳硕鼠皆定以为晋诗左传闵元年晋侯作三军公将上军太子申生将下军以灭耿灭霍灭魏还为太子城曲沃士蒍曰太子不得立矣分之都城而位以卿先为之极又焉得立按魏之亡申生实有力焉然克敌而反谗言弥兴至分封于外故士蒍预策其不得立是诗之所为心忧者此也先是献公娶于贾无子烝於齐姜生秦穆夫人及太子申生又娶二女於戎大戎狐姬生重耳小戎子生夷吾晋伐骊戎骊戎男女以骊姬归生奚齐其娣生卓子骊姬嬖欲立其子赂外嬖梁五与东关嬖五使言於公曰曲沃君之宗也蒲与二屈君之疆也不可以无主宗邑无主则民不威疆场无主则啓戎心戎之生心民慢其政国之患也若使太子主曲沃而重耳夷吾主蒲与屈则可以威民而惧戎且旌君伐使俱曰狄之广莫於晋为都晋之啓土不亦宜乎晋侯说之夏使太子居曲沃重耳居蒲城夷吾居屈羣公子皆鄙惟二姬之子在绛二五卒与骊姬譖羣公子而立奚齐晋人谓之二五耦史苏朝告大夫曰二三大夫其戒之乎乱本生矣吾闻君子好好而恶恶乐乐而安安是以能有常伐木不自其本必复生塞水不自其源必复流灭祸不自其基必复乱今君灭其父而畜其子祸之基也畜其子又从其欲子思报父之耻而信其欲虽好色必恶心不可谓好好其色必授之情彼得其情以厚其欲从其恶心必败国且深乱乱必自女戎三代皆然骊姬果作难杀太子而逐二公子君子曰知难本矣此诗所言园有桃其实之穀园有棘其实之食盖刺奚齐及卓子也其後献公卒里克杀奚齐荀息立公子卓里克又杀之胡安国云人君擅一国之名宠为其所子则当子矣国人何为不子也民至愚而神是非好恶靡不明且公也其为子而弗子者莫能使人弗之子也非所子而子之者莫能使人之亦子也】

园有桃【豪韵】其实之穀【叶豪韵胡刀翻陆德明本作肴】心之忧矣我歌且谣【萧韵】不我知【朱传苏辙严粲丰氏本我知俱作知我後同】者谓我士也骄【萧韵】彼人是哉【叶支韵将其翻】子曰何其【支韵丰本作居後同】心之忧矣其谁知之【支韵】其谁知之【同上】盖亦勿思【支韵比也园说文云所以树果也桃果之贱者以比奚齐家语孔子曰果属有六而桃为下祭祀不用不登郊庙树果曰实穀通作肴说文云啖也诗之比意与下章同园之中仅有桃棘二者皆贱品也而以其实充穀充食比国中羣公子皆已出居于外独存奚齐卓子其母皆贱而反得宠将来必有废立夺嫡之事诗人言心之忧矣正忧此也】

非徒为太子忧亦为败国忧也此作诗者意必史苏士蒹之属尔雅云徒歌曰谣说文作𠂔云肉言也杨慎云歌者人声也出自胸臆不繇人教也晋孟嘉谓丝不如竹竹不如肉唐人谓徒歌曰肉声即说文肉言之意初学记引章句云有章曲曰歌无章曲曰谣陈阳云歌生於嗟叹之不足而谣又生于歌之不足岂谣者歌声之远闻与歌谣正以写所忧非假此释忧也按左传士蒹筑蒲与屈退而赋曰狐裘蒙茸一国三公吾谁适从其即此歌谣之类与我士诗人自谓也以歌谣为骄谓其指斥时事长言无忌彼人是哉二句亦不我知者之语彼人指献公也是哉言以彼之所行为是也诗人之歌谣必有所指不相知者遂从而剖之耳子曰指歌谣言何者诃之之辞言何谓如此也其助语辞按晋语公将黜太子申生而立奚齐里克?郑荀息相见里克曰大史苏之言将及矣其若之何荀息曰吾闻事君者竭力以役事不闻违命君立臣从何贰之有然则谓彼人是哉者殆即荀息其人与再言心之忧矣比前又进一步因人之议我而益重其忧也其谁知之慨人之莫察其心也於是重嗟叹之言虽无人我知然彼人亦惟相安于不思焉可耳果思之则恐彼亦将同我之忧而有所不能自己矣岂独我有此忧乎勿者禁止之辞惕之以勿思正欲动人深长之思非真禁其思也】园有棘【职韵】其实之食【职韵】心之忧矣聊以行国【职韵】不我知者谓我士也罔极【职韵】彼人是哉【见前】子曰何其【见前】心之忧矣其谁知之【见前】其谁知之【见前】盖亦勿思【见前】比也诗诂云棘如枣而多刺木坚色赤丛生人多取以为藩岁久无刺亦能高大如枣木色白者为白棘实酸者为棘棘陆佃云大者枣小者棘盖若酸枣所谓棘也于文重束为枣并束为棘一曰棘实曰枣盖枣性重乔棘则低矣故其制字如此豫章以木称郡骏枣以棘名邦孟子云养其棘棘则为贱场师盖果实之贱者也聊且略之辞行国散步国中也如楚屈原行吟泽畔之谓苏辙云聊以行国行告人以不可也罔极言无穷极也出游狂歌似纵恣不羁也】

园有桃二章章十二句【序云刺时也大夫忧其君国小而迫而俭以嗇不能用其民而无德教日以侵削故作是诗也此仍是为篇次所误说者因而附会之谓其安于俭嗇固陋而不知经制之大振起之谋如园桃以为穀园棘以为食是也又谓推其气量所至将必以桃当肉以棘当谷毛传朱子则以首二句为兴体刘敞亦云桃不能自用其实故其实为人之穀犹君不能自用其民反为人有也而胡胤嘉则云国有民园有桃我自有也民虽寡其力犹可用桃虽贱其实犹可穀取譬婉矣序言不用其民而无德教国日侵削盖无德教则弃其民於荒惰宴溺之乡而其民日顽其国日弊虽欲不亡不可得者诸以园桃寓意见国非无民民非不可用而君自弃之故反覆道其忧惧之思焉皆属牵强申培说直以为君子忧国而叹之故作此诗然不能指其所忧何事惟姚舜牧谓朝用非人以乱国是君子有深忧焉较为近之而亦不知其作于何世子贡传阙文】

河广宋襄公母归于卫思襄公而不止故作是诗也【出序但原本只作思而不止今增襄公二字子贡传云宋桓姬归于卫思襄公赋河广按襄公父桓公其母为桓夫人卫戴公文公之妹也孔颖达云襄公母本为夫所出而归于卫以子无出母之道故知当桓公时也大戴礼及家语皆云妇有七出不顺父母出为逆无子出为絶人世淫佚出为其乱族疾妬出为其乱家有恶疾出为其不可供粢盛多口出为其离亲盗窃出为其反义襟记有诸侯出夫人礼春秋杞伯姬来归及此宋桓夫人皆是也王后犯出则废之而已皆不出以天子天下为家其后无所出故也刘向说苑云宋襄公为太子请于桓公曰请使目夷立公曰何故对曰臣之舅在卫

爱臣若终立则不可以往吕祖谦云味此诗而推其母子之心盖不相远所载似可信也不曰欲见母而曰欲见舅者恐伤其父之意也母之慈子之孝皆止于义而不敢过焉不幸处母子之变者可以观矣朱子云为襄公者将若之何生则致其孝没则尽其礼而已愚按此诗作于卫未迁国之先盖宋襄为世子时也夫妇以义合者也有过而出事之必不获已者也桓夫人被出之故不可知而出妻与庙绝不可复反故河广之诗圣人取之】

谁谓河广一苇杭【阳韵】之谁谓宋远跂【楚辞章句作企】予望【叶阳韵武方翻】之【赋也卫旧都朝歌在河北宋都睢阳在河南苇芦属说文云大葭也诗疏云苇初生名葭稍大为芦长成乃名为苇杭毛传云渡也本作旂字从方亢声说文云方舟也一苇杭之犹言一作可以当方舟也跂本作企说文云举踵也予我望悌也严粲云夫人义不可以往宋而设为或人以沮已已为辞以解之谁谓河水广而令我勿渡乎但以一束芦苇浮之水上则可以杭渡而过不为广也谁谓宋国远而令我勿往乎我跂其足则可以望之不为远也欲往之切故谓远为近若真欲往宋者思子之情隐然于言外矣章潢云义以制情亦在言外】谁谓河广曾不容刀【豪韵亦叶萧韵丁聊翻或作刁韵会小补云本一字而二音後人作刁以别之而已字书及丰氏本俱作舠】谁谓宋远曾不崇朝【萧韵亦叶豪韵直高翻丰本作鼃赋也小舠名刀以其形如刀也刘熙云二百斛以上曰艇三百斛曰刀江南所谓短而广安不倾危者也不容刀者喻其狭也崇之为终音之似也行不终朝而至喻其近也邓元锡云美哉乎河广之思也严礼义于河矣乃大归于宋何哉於庄夫人同遇同德矣章云前録载驰见许穆公夫人于卫为克孝之女此録河广见宋桓夫人于宋为畏义之妇愚按桓姬既为桓所出及卫有难戴公庐于漕实赖桓之力事理殆不可晓岂亦以襄公之故与】

河广二章章四句【郑笺云宋桓夫人生襄公而出襄公即位夫人思宋而义不可往故作诗以自止申培说朱传皆从之严粲云卫都河北宋都河南自卫适宋必涉河自鲁闵二年狄入卫之後戴公始渡河而南此诗言谁谓河广则是作于卫未迁之前时宋桓犹在襄公方为世子卫戴文俱未立也旧说误矣又桓寛盐铁论云尧舜之道非远人也人不思之耳诗曰求之不得寤寐思服有求如关雎好德如河广何不济不得之有故高山仰止景行行止虽不能及离道不远也顔渊曰舜独何人也回何人也故土积而成山阜水积而成江海行积而成君子孔子曰吾于河广知德之至也按此亦断章取义与论语唐棣之解同意】

干旄卫求援也懿公时狄入卫卫人济河南奔於是求援于齐宋许三国立戴公焉【左闵二年冬十一月狄人伐卫卫懿公好鹤有乘轩者将战国人受甲者皆曰使鹤鹤实有禄位余焉能战公与石祁子玦与甯庄子矢使守曰以此赞国择利而为之与夫人绣衣曰听於二子渠孔御戎子伯为右黄夷前驱孔婴齐殿及狄人战於荧泽卫师败绩遂灭卫卫侯不去其旗是以甚败狄人囚史华龙滑与礼孔以逐卫人二人曰我大史也实掌其祭不先国不可得也乃先之至则告守者曰不可待也夜与国人出狄入卫遂从之又败诸河初惠公之即位也少齐人使昭伯烝於宣姜不可强之生齐子戴公文公宋桓夫人许穆夫人文公为卫之多患也先适齐及败宋桓公逆诸河宵济卫之遗民男女七百有三十人益之以共滕之民为五千人立戴公以庐于曹许穆夫人赋载驰齐侯使公子无亏帅车三百乘甲士三千人以戍曹史记卫世家云懿公之立也百姓大臣皆不服自懿公父惠公朔之谗杀太子汲代立至於懿公常

欲败之初翟杀懿公也卫人思复立宣公前死太子汲之後汲子又死而代汲死者子壽又无子太子汲同母弟二人其一曰黔牟黔牟尝代惠公为君八年复去其二曰昭伯昭伯黔牟皆已前死故立昭伯子申为戴公戴公卒复立其弟毀为文公今按卫既为狄所灭幸戴公立於是国已亡而复存然实赖诸女兄弟之力世皆知宋桓许穆娶戴公之妹而不知齐桓亦娶戴公之姊则所谓齐子是也何以知之左传称桓公好内嬖如夫人者六人长卫姬生无亏今成曹之役桓公实使无亏以其为卫之甥故耳然则长卫姬非即齐子而何在齐称其所自出曰卫姬而在卫则据其所嫁之国称之为齐子其变姬称子者意如鲁文姜吴孟子之例盖国人丑其所出不正故不欲以国氏氏之耳假使齐与卫无亲则戴公之弟文公必不先适齐而戴公兄弟非有齐宋可为外援亦必不能相继而立且齐宋岂肯倾心拥护之若是此诗盖卫夫人渡河之後望救于齐宋许三国之辞观篇中在浚之语可见浚漕楚丘三邑相近在汉皆濮阳县地先渡河而至浚既而戴公立於是自浚徙漕戴公卒宋桓迎文公於齐立之复自漕徙楚丘也】

子子干【左传家语俱作竿】旄【豪韵】在浚之郊【叶豪韵居劳翻】素丝紕【叶寘韵毗至翻】之良马四【寘韵】之彼姝者子何以畀【寘韵】之【赋也说文以子无右臂为子故借为单独之义重言子子者以下文干旄迤邐在道人非徒一见之而已非谓干旄多也干通作竿说文云竹挺也旄李巡谓以牛尾着竿首广志云犛牛旄牛也髀膝尾间皆有毛山海经云潘侯山有兽状如牛而四节生毛名曰旄牛陈祥道云尔雅旄谓之龙荀卿曰西海则有文旄地理志秦西近印旄有旄西方之产也其尾可以饰旗亦可以饰舞郭璞云以旄牛结为之如今之幢以县注于竿头谓之干旄孔颖达云九旗之干皆有旄按周礼司常掌九旗之物名各有属以待国事日月为常交龙为旗通帛为旟裸帛为物熊虎为旗鸟隼为旟龟蛇为旟全羽为旟析羽为旟据诸家说经九旗皆有旄而此诗次章独以干旄为言则此旄乃旟之旄耳所以特举旟旄者以鸟隼之旗乃前军所建军行前朱雀而後玄武诗所谓彼旟旟斯胡不旆旆又云织文鸟章白旆央央是也时卫新为狄所破空国出走将渡河而南狄人追及之又败诸河则惟军之先济者无恙而其余已皆覆没故所见至浚郊者仅有此子子然前军所建之旄耳左传谓卫之遗民男女宵济者止七百有三十人是也浚毛传云卫邑据水经注通典皆谓在濮州濮阳县东南故凯风卫诗亦曰在浚之下或以浚仪之浚沟当之此非卫地其非卫诗所指明矣尔雅云邑外谓之郊素丝丝之未染者郑玄云素丝者以为缕孔云以前云干旄此云素丝紕之故知以素丝为线缕也紕说文云氏人一也于诗义不合愚意但当通作比比之为言密也并也谓联络而密并之也礼记紕以爵韦縗冠素紕其义皆同盖结聚旄尾悬之竿头皆须用缕以联合之也良马善马也所乘之马非善则不能疾驰而免于难矣曰四之者言初乘善马而来至此浚郊凡有四辈也以左传考之其时先去以为民望则石祁子甯庄子史华龙滑礼孔四人也是也姝说文云好也子女子也此首言彼姝者子盖指齐子也畀说文云相付与也国都初破生计萧然不知彼姝者子嫁在大国亦有可以付与我者否乎厥後左传称齐桓公使公子无亏帅师成曹又归公祭服五称牛羊豕鸡狗皆三百与门材归夫人鱼轩重锦三十两则所以畀之者不谓无矣】子子干旟【鱼韵】在浚之都【叶鱼韵陟鱼翻】素丝组【麌韵】之良马五【麌韵】之彼姝者【论衡作之】子何以予【叶麌韵读如羽王矩翻】之【赋也旟义见首章刘熙云旟誉也画鸟与鹰隼象羣疾也急疾趋事则有称誉也郑云城郭之域曰都愚按以前後章推之则都在郊之内在城之外也组说文云绶属

诗诂云间次五色为之郑云以素丝缕缝组于旌旗以为之饰孔云周礼九旗皆不言组饰释天说龙旗云饰以组此亦有组则九旗皆以组为饰故郭璞曰用綦组饰旌之边是也良马五之谓继前四辈而来者又有五辈也立言之意但以前至者四人为主继此曰五之又曰六之皆承上积累之辞不必定有所主此彼姝者子谓许穆夫人也予说文云推予也许小国力不能救卫夫人伤之而赋载驰圣人悲其志】子子干旌【庚韵】在浚之城【庚韵】素丝祝【屋韵】之良马六【屋韵】之彼姝者子何以告【叶屋韵居六翻】之【赋也九旗中旌旌虽居其二此干旌则直旃之旌耳非谓旃之外又有旌也按周礼析羽为旌尔雅谓注旌首曰旌徐锴以为分析鸟羽为之其竿头则缀以旄牛尾也然周礼明言州里建旌旂车载旌则旌与旃似无容相混而愚以此旌为旃之旌者盖旄旌二物凡旗皆有之故孔云干旌干旌一也既设旄纆有旃旃之称未设旄纆空有析羽谓之旌纆谓系于旌旗之体旄谓纆末之垂者旂车则空载析羽无旄纆也此其说确矣城毛云都城也自郊而都自都而城明其自外至也祝当依郑笺通作属说文云连也谓连属素丝以系着于竿也紕主旄言组主旃言祝主旌言良马六之义见次章此彼姝者子谓宋桓夫人也以被出在卫故最居後告通作诰徐锴云以文言告晓之也按桓夫人虽已被出而子襄公为宋太子故欲其通音问于彼使之来救援也卒之宋桓公使人逆卫遗民于河又益以共滕之民立戴公以庐于曹则桓公尚犹然以昏姻为念而彼姝之告不可为无力矣又按左定九年郑驷颢杀邓析而用其竹刑君子谓子然於是不忠苟有可以加于国家者弃其邪可也竿旌何以告之取其忠也故用其道不弃其人愚按宋桓夫人以遭黜大归戮辱斯甚而能善其辞再延父母国之绪则君子犹有取焉左所谓用其道不弃其人引诗之意或有在于此也】

干旌三章章六句【序谓美好善也卫文公臣子多好善贤者乐告以善道也子贡传申培说皆谓卫武公好贤善国人美之朱传但以卫大夫乘车马建旌旌以见贤者而不着其世今按是诗之属文属武总无明据然以彼姝者子为男子之称则静女其姝东方之日兮二诗皆有彼姝者子之句又何以称焉】

竹竿许穆夫人念卫也【此诗之语多与泉水相出入彼曰瑟彼泉水亦流于淇此曰泉源在左淇水在右彼曰女子有行远兄弟父母此曰女子有行远父母兄弟且未皆曰驾言出游以写我忧其出于一人之手明矣愚所以定为许穆姬诗者以载驰之诗左传谓许穆夫人所赋彼曰驱马悠悠言至于漕而泉水之诗亦曰思须与漕我心悠悠其为戴公庐曹而作无可疑者又戴公之女兄弟三人长齐子嫁于大国其力足以援卫次宋桓夫人则已被出在卫皆与三诗语意不合故断当属之穆姬而三诗作之先後则宜以竹竿为首意其诗初闻卫破而尚未及知庐曹之事次赋载驰则已知戴公庐曹而自伤国小不能救其後复赋泉水则以自伤不能救之故而更欲望救于他国盖其用情之真切如此夫子所以备录之也】

籊籊竹竿以钓于淇【支韵】岂不尔思【支韵】远莫致之【支韵】赋也籊籊毛传以为长而杀也按说文无籊字当通作擢说文云引也谓引竹竿以钓也引而又引故重言之竿说文云竹挺也淇解见淇澳泉水篇尔指卫国也致说文云送诣也诗言竹竿虽长而不可以钓于卫之淇我今岂不思卫乎特以道远而莫能诣耳】泉源在左淇水在右【叶有韵云九翻亦叶纸韵羽轨翻】女子有行远兄弟父母【有韵亦叶纸韵母鄙翻按古注疏及苏子繇吕伯

恭严坦叔诸本俱作兄弟父母今朱子本作父母兄弟丰氏本同俱误 赋也泉源淇水卫之故墟故穆姬思之泉源即百泉也按淇水出相州林虑县东流泉水自西北东注之严粲云左右盖主山而言相卫之山东面故以北为左南为右有行谓嫁也此诗四章皆言淇水语意当以淇水为主泉源犹能与淇水相入女子已嫁则与兄弟父母相远是泉水之不如也加兄弟于父母之上者时穆姬父母已亡惟兄弟在故先其存者後其亡者耳言外见卫国有难而已不能以身往赴之意】

淇水在右泉源在左【芻韵】巧笑之瑳【叶芻韵此我翻】佩玉之傪【叶芻韵乃可翻 赋也巧工也犹好也瑳说文云玉色鲜白也笑而见齿其色似之傪说文云行有节也徐锴云佩玉所以节步陈祥道云诗佩玉之傪佩玉琮琕卫之南子环佩璆然阿谷之女佩璜而澣皆妇人佩也其等衰不可以考或亦眡其夫而为之度与汉制太后皇后绶舆乘舆同公主绶与诸侯王同愚按此追述已之未嫁时身在卫国覩淇水泉源之在左右怡然可乐其笑语跣步之容有如此者而今地沦于狄则此景不可复得矣】 淇水瀼瀼【尤韵陆德明及丰本俱作泂】 桧楫【陆本作楫】松舟【尤韵】驾言出游【尤韵】以写我忧【尤韵赋也瀼瀼毛传以为流貌按说文无瀼字当通作攸说文云行水也桧木名柏叶松身即禹贡之所谓栝也故桧又有栝音罗愿云桧性耐寒其材大可为舟楫所以行舟者说文云舟櫂也刘熙云楫捷也拨水舟行捷疾也方言云或谓之桡松木名赵颐光云松壽木也故字从公桧之与松其生相类至剗剗而为济川之用则又相须此亦兄弟之况也罗云此诗与泉水皆卫女所以寓其思泉水则思出同归异之肥泉竹竿则思出同归同之松桧也末二句解亦与泉水同言淇水之上行水者甚多然必得舟楫而後有济今舟楫安在乎无聊之极则姑驾言出游以自除去其忧而已即首章远莫致之之意】

竹竿四章章四句【序以为卫女思归也适异国而不见答思而能以礼者也朱子谓未见不答之意是矣子贡传申培说皆谓宋桓夫人之媵和其小君泉水之作亦未有以见其然】

载驰许穆夫人作也闵其宗国颠覆自伤不能救也卫懿公为狄人所灭国人分散露於漕邑许穆夫人闵卫之亡伤许之小力不能救思归唁其兄又义不得故作是诗也【出序申培说同 左传云许穆夫人赋载驰子贡传云狄入卫卫戴公次于漕许穆姬闵之其说皆与序合愚谓序所云思归唁其兄又义不得者意特见于泉水篇中若此诗则为闵卫之亡伤许之小力不能救而作通篇皆追恨之语盖以列女传证之传云许穆夫人者卫懿公之女许穆公之夫人也初许求之齐亦求之懿公将与许女因其传母而言曰古者诸侯之有女子也所以苞苴玩弄系援于大国也言今者许小而远齐大而近若今之世强者为雄而使边境有寇戎之事维是四方之故赴告大国妾在不犹愈乎今舍近而就远离大而附小一旦有车驰之难孰可与虑社稷卫侯不听而嫁之于许其後翟人攻卫大破之而许不能救卫侯遂奔走涉河而南至楚丘齐桓往而存之遂城楚丘以居卫侯于是悔不用其言当败之时许夫人驰驱而吊唁卫侯因疾之而作诗云载驰载驱归唁卫侯驱马悠悠言至于曹大夫跋涉我心则忧既不我嘉不既旋反视尔不臧我思不远君子善其慈惠而远识也今按卫宣公先娶夷姜生太子汲公子黔牟公子顽已又娶齐女是为宣姜生壽及朔其後汲壽俱为盜所杀以朔为太子是为惠公惠公卒子赤立是为懿公初惠公之即位也齐人使顽烝于宣姜生齐子戴公文公宋桓夫人许穆夫人及懿公在位九年为翟所杀卫人思立汲壽之後而皆无子先是惠公四年黔

牟作乱代惠公为君八年诸侯放之于周及顽皆已前死至是乃立顽子申为戴公戴公卒复立其弟毁是为文公以辈行论之许穆夫人虽宣姜所出而实懿公之从妹以为懿公女者非也懿公死于翟难许穆夫人所欲归唁者乃是戴公传谓卫侯奔走涉河而南似仍是懿公亦非也惟许穆夫人所与传母言者其说印之韩诗外传及诗小序皆合当从之女之许婚当繇懿公所谓因其传母而言之于懿公者自是寔録刘向为作颂曰卫女未嫁谋许于齐女讽母曰齐大可依卫君不听後果遁逃许不能救女作载驰邓元锡云闵亡念乱笃亲怀宗思控大国以拯其危是春秋之志也】

载驰载驱【叶尤韵祛尤翻郑康成读又列女传仍作驰释文作駟丰氏本作毆】归唁卫侯【尤韵】驱【丰本作毆】马悠悠【尤韵】言至于漕【叶尤韵徂侯翻列女传作曹】大夫跋【仪礼疏作輶】涉我心则忧【尤韵 赋也载?语辞诗疏云走马谓之驰策马谓之驱驰驱俱是乘车事唁说文云吊生也又谷梁传云吊失国曰唁卫侯谓戴公夫人兄也悠说文云忧也其忧非一故重言之漕解见泉水篇诗作于庾漕时故曰至漕味言之一字则是心口相语乃虚作此想而托为之辞非真有此事也严粲云戴方露处漕邑岂女子归唁之时乎大夫跋涉者郑笺云卫大夫来告难也愚按跋涉亦是望救不专告难跋说文云蹢趺也涉说文云徒行厉水也毛传云草行曰跋水行曰涉孔颖达云左传跋涉山川则跋者山行之名也又韩诗注云不繇蹊隧而行曰跋涉我心则忧者忧宗国之颠覆有自伤力不能救之意特未说出耳】既不我嘉不能旋反【阮韵】视尔【韩诗外传作我】不臧我思不远【阮韵】既不我嘉不能旋济【霁韵】视尔不臧我思不閤【叶霁韵读如闭必计翻 赋也嘉臧皆善也旋还也以夫人归卫言反覆也以卫侯复国言与上章唁失国相应尔者对大夫之语其意则泛指卫国之君臣也夫人初亦知许小力绵不足倚仗愿嫁于齐而卫君不听也其时诸大夫辈亦皆徒谀君指无有深识长虑者至是乃追恨之曰当时既不置我于善地故至今日亦不能旋归而反尔君于故国视尔辈之为国谋诚不臧而我当时之思亦不远也盖懊悔之深也是说也韩诗外传有之高子问于孟子曰夫嫁娶者非己所自亲也卫女何以得编于诗也孟子曰有卫女之志则可无卫女之志则怠若伊尹于太甲有伊尹之志则可无伊尹之志则篡大道二常之为经变之谓权怀其常道而挟其变权乃得为贤夫卫女行中孝忠中圣权如何诗曰既不我嘉不能旋反视我不臧我思不远味外传解诗之辞与列女传所云若合符节矣济犹言事遂也閤者闭门之义犹止也言既不置我于善地故至今日亦不能旋归而有所济视尔辈之为国谋诚不臧徒使我终日思之而不能自禁闭也】陟彼阿丘言采其蕝【叶阳韵谟郎翻说文系传作蒍】女子善怀亦各有行【叶阳韵寒刚翻】许人尤【释文一作訖】之衆穉【释文一作稚】且狂【阳韵 赋也尔雅云偏高曰阿丘疏云四隅有一高而不正在左右前後者刘熙释名云阿荷也如人檐荷物一边偏高也蕝通作蒍尔雅云蒍贝母又广雅云贝父药实也按空^廿药实苦花苦菜商^廿勤母皆蒍之别名既云贝父亦云贝母贝背同音岂亦女子出嫁而背其父母之譬乎郭璞云蒍根如小贝圆而白华叶如韭陆玑云叶如栝楼而细小其子在根下如芋子正白四方连累根着有分解也张萱云根有瓣子黄白色二月生苗茎叶皆青叶如荞麦随苗出七月间作花碧绿色如鼓子花第陆玑疏叶如栝楼今世所见郭注叶如韭不复见也本^廿云治中心气不快多愁鬱徐锴云治目眩不得返顾夫人返顾宗国愁鬱无聊故登阿丘而采蕝以自药二意兼寓矣善怀多忧思也古书善字训多前汉志岸善崩後汉纪蚕麦善收晋春秋陆云善咲皆训多也曾巩云女子之于怀思甚于男子亦

各者不一之辞有行即出行于外如此章之升阿丘後章之行其野皆是也尤异也衆即诗人也穉者幼禾之名凡人物幼小皆曰穉戴公女兄弟惟穆姬年最少故云然狂犹躁也言凡为女子者每多思虑亦皆有所行以自排遣许人曾不谅我之无聊方以我之行为怪异乃羣然谓我少不更事而更且诋我为狂躁也是盖夫人初有驱马归唁之意已而思力不能救归亦无益则意已中止于是姑登高采药以舒散其情怀耳胡胤嘉云卫遭狄祸国覆君迁许为婚姻兄弟之国必有扶救之诚如宋桓之迎遗民徙漕邑以致其周恤焉今观诗云衆穉且狂即许人赴难恤灾之义不切于心此诗音旨凄痛其责许至矣】我行其野芄芃其麦【叶职韵密力翻】控于大邦谁因谁极【职韵】大夫君子无我有尤【韵亦叶支韵盈之翻】百尔所思【支韵】不如我所之【支韵亦叶尤韵职流翻 赋也其野即许国之野芃说文以为^廿盛貌此则言麦盛也云芃芃者徐锴云言泛泛然若风之起也控说文云引也因如因魏庄子因徐辟与无因至前之因极终也穷尽之名按春秋传及史记鲁闵公二年十二月狄入卫懿公死焉于是懿公立其明年为鲁僖公九年即戴公元年也是年齐桓公迁邢于夷仪又明年戴公卒文公立齐桓公封卫于楚丘卫国之乱始定时鲁僖公二年也此章言狄入卫在去岁之冬今行旷野而见麦已芃芃然盛乃入夏之时已四閱月矣尚未闻隣邦救恤兹欲求援引于大邦必有所因然後克济其事不知将何所因而其患何所底极乎意谓使昔日结昏大国则今日国难必当相恤而亦不患其无因矣大夫即卫大夫曰君子者称之也百尔泛指在位言所之者心之所之也言尔大夫君子毋怪异我之出一言以相责凡百尔衆人之所以为国筹度者总不如我思之所往叹其智不若女子也皆追悔之语其後齐桓卒救卫而存之然後信夫人所思为有理而卫国君臣真可谓无远识者矣左文十三年冬郑伯与公宴于棐郑子家赋载驰之四章襄十九年鲁穆叔会晋范宣子于柯穆叔见叔向赋载驰之四章皆取义小国有急欲引大国以自救助也】

载驰四章二章章六句二章章八句【朱子云旧此诗五章一章六句二章三章四句四章六句五章八句苏氏合二章三章以为一章按春秋传叔孙豹赋载驰之四章而取其控于大邦谁因谁极之意与苏说合今从之 朱传许穆公夫人闵卫之亡将唁卫侯于漕邑未至而许之大夫有奔走跋涉而来者夫人知其必将以不可归之义来告故心以为忧既而终不果归乃作此诗以自言其义或又谓礼诸侯夫人父母终无归宁惟使大夫问于兄弟夫人欲自归唁其兄弟故托言不欲劳其大夫之跋涉今观後章称尔称大夫君子皆面相质证之辞而第三章曰许人尤之如果对本国之大夫言则不应称许人矣】

诗经世本古义卷二十三之上

卷二十三之下

钦定四库全书

诗经世本古义卷二十三之下

明 何楷 撰

泉水许穆夫人自伤己力不能救卫思控于他国也【说见竹竿篇徐光启云夫子存泉水载驰之诗而姜氏会齐侯于禚于防于谷则备记诸春秋劝戒昭然矣愚按夫子录穆姬之诗不一而足亦取其能惓惓以父母国为念不独为其守礼不敢归宁也朱子云宣姜生卫文公宋桓夫人许穆夫人卫寿子以此观之则人生自有秉彝不系气类】

恚【韩诗作秘说文作?】彼泉水亦流于淇【支韵】有怀于卫靡日不思【支韵】变彼诸姬【支韵】聊与之谋【叶支韵谟悲翻 兴也恚当依说文通作?云直视也泉水吕祖谦云即今卫州共城之百泉也广輿记云百门泉出苏门山在今河南卫辉府辉县即朝歌地古共伯国据水经注则末章所谓肥泉竹竿之诗所谓泉源是也淇水名汉书地理志云出河内共国北山水经云出河内隆虑县西大号山隆虑後改为林虑又山海经云沮洳之山淇水出焉即此水也泉水自西北而东南来注之怀说文云念思也靡之言无盖音近也卫国新破故思之而不寘也变说文云慕也诸姬周同姓之国也左氏曰汉阳诸姬楚实尽之又曰其弃诸姬亦可知也已与此义同聊郑玄云且略之辞说文云虑难曰谋穆姬志欲归卫以救卫言彼泉水亦流入于卫国之淇已独不得归卫是泉水之不如也我之怀念于卫虽无日不思而国小力绵无如彼何窃慕彼同姓之国必有以笃亲恤灾为念者聊欲以大义动之而与之谋兴复焉】出宿【周礼注作宿】于沛【荠韵列女传作济】饮饯【周礼注云吉文作践】于祢【荠韵】

【韩诗作坭】女子有行远父母兄弟【荠韵亦叶纸韵荡以翻】问我诸姑遂及伯姊【叶荠韵蒋礼翻赋也此下二章皆言谋及诸姬之事按春秋僖元年春王正月齐师宋师曹师次于聂北救邢夏六月邢迁于夷仪齐侯宋师曹师城邢至次年始城楚丘而封卫焉当邢迁夷仪之时卫尚庐于漕也齐桓新霸而宋曹邢之交方合其势足为诸侯所倚恃四国之中曹邢与卫同为姬姓而齐宋则卫之婚姻也穆姬之所欲与诸姬谋者意在曹邢二国而中间又欲望援于齐者以齐为霸主且伯姊在焉若宋桓夫人已归于卫而不在宋则礼不当往宋故语不之及诗之写怀与当日情事相合如此其先适曹次适齐次适邢而後至卫者意行程次第云尔出宿于沛言适曹也宿说文云止也沛水名地理志云沔水东流为沛徐锴云今多作济故与常山济水相乱此则四渎之济按禹贡导沔水东流为济入于河溢为荥东出于陶丘之北曹国所治也今山东兖州府曹州是其地饯说文云送去也徐云以酒食送也祢即今曹州之大祢泽也穆姬自许国出而止宿于沛水之上盖将以救卫之事告之曹国告曹已毕又将适齐则曹人当饯送之于祢也然此及下章皆虚拟之如此非有是事出宿于沛一句中该括与之谋意在內後仿此女子有行二句义与泉水篇同女子穆姬自谓也问说文云讯也诸衆

也徐锴云别异之辞父之姊妹为姑孙炎云姑之言古尊老之名也姊女兄也尔雅疏云姊之言咨以其先生可咨问也左传引此诗以为知礼谓其姊亲而先姑也愚按此诸姑伯姊指齐桓公宫内之诸姬言桓公之夫人曰王姬内嬖如夫人者六人自长少二卫姬而外尚有郑姬密姬皆卫同姓不能定其辈次故但以尊行称之曰诸姑也伯姊则穆姬之长姊齐子即长卫姬是也穆姬欲赴控于齐言我为嫁出之女虽与父母兄弟相远而故国有难情不容恕今齐为大国力能相救不知尊而诸姑亲而伯姊将何以为之策乎时穆姬虽不果行而齐桓公已使武孟帅师戍曹武孟齐子所出卫之甥也後又合诸侯封卫于楚丘倘亦齐子吹嘘之力欤】出宿于干【寒韵】饮饯于言【叶寒韵读如原吾官翻丰氏本作缙】载脂载牵【丰本作辖】还车言迈【叶荠韵力制翻】遄臻于卫【霁音】不瑕有害【叶霁韵暇口翻 赋也于言二地名隋志邢州内丘县有干山言山即栢人县在今为直隶顺德府唐山县古邢国也出宿于干穆姬又自齐国出而止宿于干之地欲求救于邢也饮饯于言者既与邢谋则求救之事已毕可以归卫故邢人又具酒食于言地饯送之也脂朱子云以脂膏涂其牵使滑泽也牵说文云车轴端錠也释文云车轴头金也车不驾则脱轴头之牵将行乃设之又云读诗者但以载脂载牵为以脂膏涂其牵两载字不分明载脂谓未设牵于车之时先以脂膏涂其牵其用在脂故曰载脂也载牵谓涂牵既毕乃设牵于车其用在牵故曰载牵也载脂一事载牵又一事故毛氏云脂牵其车以二事言也还说文云复也吕祖谦云还车犹言回轅不必云嫁时所乘之车也言语辞迈远行也遄往来数也臻至也俱见说文瑕玉病也不瑕有害总上所拟经行曹齐邢卫四国而言言是举也果所行合义而不瑕玷乎抑有害于义乎如谓亲亲关情惟力是视是不瑕也如谓妇人既嫁不踰境踰境非正是有害也究之不敢以不瑕自宽而以有害自克则穆姬亦可谓发乎情止乎礼义者矣】我思肥泉【先韵】兹之永叹【叶先韵他涓翻】思须【丰本作沫】与漕【叶尤韵徂侯翻】我心悠悠【尤韵】驾言出游【先韵丰本作游】以写我忧【尤韵 兴也尔雅云归异出同流为肥释名云所出同所归异曰肥泉水经注云太和泉源水有二源一水出朝歌城西北又东与左水合谓之马沟水水出朝歌城北东流南屈至其城东又东流与美沟合水出朝歌西北大岭下更出迳骆駝谷於中逶迤九十曲故俗有美沟之目矣其水更迳朝歌城北又东南流注马沟水又东南注淇水为肥泉也犍为舍人曰水异出流行合同曰肥今是水异出同归矣博物志谓之澳水诗瞻彼淇澳言澳隈也郑亦不以为津源而张司空专以为水流入于淇非所究也然斯水即诗所谓泉源之水也愚按尔雅及刘熙皆以出同归异为肥而酈道元引犍为舍人乃以出异归同为肥将焉适从考肥泉入淇之後淇水遂分为二其一为旧淇水地理志谓淇水出共东至黎阳入河者是也其一为清河水经谓东北过漂榆邑入于海者是也然则所谓同出异归或以是故未可知矣穆姬卫之自出而以既嫁之後父母已歿谊不得归卫故取兴于肥泉以自况也盖至此而前二章之所云云者已成虚语而穆姬亦且安于许而不果行矣故不禁其思之而永叹也永叹长叹即太息是也人嘅叹则息大而长须漕二地名按大名府志须城在楚丘东南二十八里漕通作曹後为白马县皆今滑县地时戴公庐此故穆姬思之又路史须作虽云黄帝後姑姓国悠说文云忧也具车马曰驾或以为发语词者非苏子瞻有诗云日日出东门寻步东城游城门抱关卒怪我此何求我亦无所求驾言写我忧章惇评之云前步而後驾何其上下纷纷也东坡闻之曰吾以尻为轮以神为马何曾上下乎参寥子谓其文过似孙子荆曰所以枕流欲洗其耳然终是诗病以此知一字之用亦不可苟写毛云除也说文云置物也按置者舍置之义谓舍而除去之也既前所拟议者皆成虚语且欲乘车出游以除我忧也亦无所

聊赖之意】

泉水四章章六句【序谓卫女嫁于诸侯父母终思归宁而不得故作是诗义亦无害但篇中有思须与漕一语明是为戴公庐曹而作今但取载驰竹竿二诗合此诗咏之语气絶类其了然出于一人之手无可疑者子贡传及申培说皆以为宋桓姬闵卫之作要亦依附载驰故事为之揣摩耳乃于河广则又以为桓姬归卫思襄公之作考宋襄即位在鲁僖九年此时卫已迁国渡河而东与宋皆在河南不应有一苇航之之语故旧说疑是诗作於襄为世子时卫尚未迁然则富狄入卫桓姬业已大归于卫又何以有怀于卫靡日不思为哉盖其说之自相矛盾如此】

有狐齐桓公思恤卫也【毛传系此诗与木瓜相属一主施一主报也愚故以为齐桓公之诗焉左传宋桓公立卫戴公以庐于漕齐桓公使公子无亏戍漕归公乘马祭服五称牛羊豕鸡狗皆三百与门材归夫人鱼轩重锦三十两即此诗所云忧之子无裳无带无服者也卫都河北其地在朝歌之东淇水之北自懿公为狄所灭戴公庐曹已渡河而南矣是诗犹以淇入咏者盖亦以兴复旧都之事望之耳】

有狐绥绥【齐诗作久久】在彼淇梁【阳韵】心之忧矣之子无裳【阳韵兴也狐兽名形似黄狗鼻尖口锐尾大性善疑方河水合时狐听水下水无声乃行人每则之皆须狐之已】

【行乃渡易未济称小狐汔济濡其尾亦其尾重善濡溺古语所谓狐欲渡河无如尾何者也绥通作綏冠结之余散而下垂者谓之綏狐尾之垂似之毛传云石絶水曰梁盖造为长岸入水者章潢云狐涉水濡尾则溺观其綏綏于淇梁则其欲济未济可知矣之子指戴公也所以取狐比者古人多以狐为人君之象南山之诗以雄狐比齐襄公而左传卜徒父亦谓狐蛊必其君是也卫新播迁资用乏絶裳者下体所需至贱之物然且无之则其他可知矣齐桓身为霸主兴灭继絶救灾恤患是其本务而使新迁之卫流离穷困莫之省忧其何以临长诸侯乎此所以心忧之子之无裳也】有狐绥绥在彼淇厉【霁韵亦叶泰韵落盖翻丰氏本作砭】心之忧矣之子无带【泰韵亦叶霁韵丁计翻兴也厉说文云旱石也累旱石于水中践之以渡又岸危处亦曰厉带毛传云所以申束衣者首章言裳此言带繇浅而之深自下而向上也无带则不但无裳而已】

有狐绥绥在彼淇侧【职韵丰本作仄】心之忧矣之子无服【叶职韵鼻墨翻兴也侧说文云旁也狐以水深欲济而不敢济始犹在淇梁继但在淇厉则远乎梁矣继且在淇侧则又远乎厉矣卫丁丧败之余痛定思痛惊悸转深瞻望旧都而不敢进步其象何以异此上曰衣下曰裳通言之曰服曰无服则又不但无裳无带而已喻百用皆匱非徒以衣被一事言也故齐桓之归戴公自祭服重锦而外乘马牺牲门材鱼轩累累不一而足焉厥後又为之城楚丘又与之系马三百天下称仁云】

有狐三章章四句【子贡传云国乱民贫君子伤之赋有狐子曰见惻隐之仁焉按国乱民贫於此诗语意亦近似其伪入孔子之言则妄也韩诗外传云昔者不出户而知天下不窥牖而见天道非目能视乎千里之前非耳能闻乎千里之外以己之情量之也已恶饥寒焉则知天

下之欲衣食也已恶劳苦焉则知天下之欲安佚也已恶衰乏焉则知天下之欲富足也知此三者圣王之所以不降席而匡天下故君子之道忠恕而已矣夫处饥渴苦血气困寒暑动肌肤此四者民之大害也害不除未可教御也四体不掩则鲜仁人五藏空虚则无立士故先王之法天子亲耕后妃亲蚕先天下忧衣与食也诗曰父母何尝心之忧矣之子无裳其指与子贡传合亦自可从父母何尝乃鸩羽篇语误入于此序则云刺时也卫之男女失时丧其妃耦焉古者国有凶荒则杀礼而多昏会男女之无夫家者所以育人民也今按诗中全无此意旧说谓裳所以配衣带亦所以束衣犹男女之相依而立而人无室家亦犹之无衣服皆强为之辞者朱子则指狐为妖媚之兽径坐为寡妇见鰥夫而欲嫁之诗既属无谓且云忧其无人缝裳更鄙浅可笑若申培说云君子于寒夜见贫民与狐涉水而伤之则不根甚矣】

清人刺郑文公也高克好利而不顾其君文公恶而欲远之不能使高克将兵而御敌于竟陈其师旅翱翔河上久而不召衆散而归高克奔陈公子素恶高克进之不以礼文公退之不以道危国亡师之本故作是诗也【出序申培说同 左闵二年十二月郑人恶高克使帅师次于河上久而弗召师溃而归高克奔陈郑人为之赋清人子贡传亦谓郑文公使高克御敌于境不召师溃大夫忧之赋清人孔颖达云是有狄侵卫地卫在河北郑在河南恐其渡河侵郑故使高克将兵于河上御之按狄人入卫懿公被杀正在此时高克无将兵之才郑文公徒以恶而欲远之故轻使帅师于外是以国计人命为尝试故序以为危国亡师之本】

清人在彭【叶阳韵逋旁翻】驷介旁旁【阳韵】二矛重英【叶阳韵於良翻】河上乎翱翔【阳韵 赋也清季本云地名按水经注朝歌以南暨清水土地平衍悉牧野矣今淇县界清水合淇水入卫近牧野处即其地也本在河北春秋隐四年公及宋公遇于清杜预以为卫邑云济北东阿县有清亭姜宝亦云在卫南而近于郑郑玄误谓清为高克所帅衆之邑而水经注亦以中牟之清阳亭当之则在河南矣彭说文云鼓声也清人在彭者狄侵卫地清人方在鸣鼓进战之时也驷四马也介之为甲音之近也四马被甲所以驾车者盖高克所乘也旁通作騂说文云马盛也叠言旁旁非一马也矛亦高克车上所建二矛与鲁颂二矛同直是酋矛有二旧说兼夷矛言二非也按考工记云车有六等之数车軫四尺谓之一等戈秘六尺有六寸既建而迤崇于軫四尺谓之二等人长八尺崇于戈四尺谓之三等彘长寻有四尺崇于人四尺谓之四等车戟常崇于彘四尺谓之五等酋矛常有四尺崇于戟四尺谓之六等又云攻国之兵欲短守国之兵欲长酋矛常有四尺夷矛三寻八尺为寻倍寻为常则是酋矛长二丈夷矛长二丈四尺皆长兵也此御敌于境正守国之兵宜有夷矛然非车上所建盖军士手执之以御敌者鲁颂二矛与重弓共文弓无二等只是一弓而重之则知二矛亦一矛而有二所以备折坏也英以羽饰矛也鲁颂谓之朱英盖以朱染之也曰重英者以二矛各有英饰也河上者营军之处翱翔鸟缓飞之貌解见载驱篇高克非将兵之才徒盛其军容聊于河上焉游戏而已自驷介而下皆指高克言後放此】清人在消【萧韵】驷介麋麋【叶萧韵蒲娇翻】二矛重乔【萧韵韩诗丰氏本俱作鷁】河上乎逍遥【释文作消】遥【萧韵释文作摇 赋也消说文云尽也狄已入卫清人逃散正在其消亡之时也麋通作麋说文云行貌乔说文云高而曲也矛在车上为五兵之最高者其制上句故以乔名重乔犹云重英以有二矛故谓之重又郑云乔矛矜近上及室题所以悬毛羽按矜矛柄也室谓矛之銚孔銚者骹也即矛头受刃处题谓头也逍遥解见白驹篇言以河上为远游之地也时卫已新破而高克全无警惧之

心但见其逍遥自乐而已任将如此岂不殆哉季云狄患光及于卫则清人宜当其冲尚未遽能渡河至郑也第遣一旅至河更番伺待有警急而後大发车徒未为晚也今乃尽以其师次于河上使之翱翔逍遥游嬉闲暇岂恤师之道哉】清人在轴【叶宥韵真佑翻】驷介陶陶【叶宥韵徒侯翻】左旋【丰氏本作还】右抽【叶宥韵勅救翻说文丰氏本俱作搯云拔兵刃以习击刺】中军作好【叶宥韵许候翻 赋也轴通作逐说文云追也按郑笺解硕人之轴作逐孔云逐与轴盖古今字异清人在轴言清人正在为狄所追逐之时也左传狄灭卫国人出狄人从之又败之河是其事也陶通作谣说文云喜也左谓御者在将军车左执轡而御马者也旋习回旋其车也右谓勇力之士在将军车右执兵以击刺者也抽说文云引也朱子云拔刃也中军谓将在鼓下居车之中即高克也郑云兵车之法将居鼓下故御者在左孔云左成二年晋伐齐郤克将中军解张御郑丘缓为右郤克伤于矢流血及屨未絕鼓音曰余病矣张侯曰自始合而矢贯余手及肘余折以御左轮朱殷岂敢言病张侯即解张也郤克伤矢言未絕鼓音是郤为将在鼓下也张侯伤手而血染左轮是御者在左也此谓将之所乘车耳兵车之法左人持弓右人持矛中人御御车不在左也至于平常乘车则又不然矣曲礼曰乘君之乘车不敢旷左注谓君有恶空其位则人君平常皆在车左御者在中央故月令说耕籍之义云天子亲载耒耜措之于参保介之御间保介谓车右也置耒耜于车右御者之间御者在中与兵车异也将居鼓下虽人君亲将其礼亦然夏官大仆职云凡军旅田役赞王鼓是天子亲鼓也成二年齐侯伐我北鄙围龙齐侯亲鼓之是为将乃然故云将居鼓下好毛传云容好也郑云高克之为将使其御者习旋车车右抽刃自居中央为军之容好而已愚按卫既为狄所败又为狄所逐距高克将兵之地仅隔一河此时声息既闻当枕戈露刃不遑宁处而尚陶陶然以晏闲无事处之徒习为好容以耀军士假使敌师奄至何以稟之其不为齑粉者幸耳春秋书郑弃其师正讥文公命将不得其人观此诗可见克无将略故不为军士所服至于师溃出奔而旧说但以师久而不召为弃其师公羊传谓逐而不纳弃师之道谷梁传谓恶其长而兼不反其衆则是弃其师皆不明于诗与春秋之意者也胡安国云人君擅一国之名宠杀生予夺惟我所制尔使克不臣之罪已着按而诛之可也情状未明黜而远之可也爱惜其才以礼驭之可也乌有假以兵权委诸境上坐观其失伍离散而莫之恤乎然则弃师者郑伯乃以国称何也二三执政股肱心膂休戚之所同也不能进谋于君協志同力黜逐小人而国事至此是谓危而不持颠而不扶则将焉用彼相矣书曰郑弃其师君臣同责也邹忠胤云夫将者三军之司命古者遣将亲为推轂曰阃以外将军制之权綦重矣即素所爱信犹不容以轻委而况举不祥之器奉之应且憎者郑人使高克帅师以恶之故既已恶之而复委以兵柄岂将假手于狄以剪所忌耶向使克自知罪在不宥拥兵自固或召狄以内寇而为之应或奔狄以输情而为之谋则是反以御狄者饵狄何幸之有即不然而以三军之衆羈勒一夫是投鼠以千金之璧岂不愚哉犹幸师溃且归而克仅束身以奔陈也甚矣文公以己之国侥幸也陈际泰云齐人殲于遂自殲也郑师溃于河上自弃也】

清人三章章四句【邹云清人作于郑文公时传有明证毛诗编在有女同车扶苏擗兮诸篇前皆序所指为刺忽者按昭公忽厉公突皆庄公子而文公即厉公之子也诗犹之史必以世代为次岂宜越次如此故知毛诗之错简多矣朱传谓郑文公恶高克使将清邑之兵御狄于河上久而不召师散而归郑人为之赋此诗按杜预春秋释地云中牟县西有清阳亭水经注云清池水出清阳亭西南平地东北流迳清阳亭西南平地东北流迳清阳亭南东流即故清

人城也其地今属开封府乃郑地郑笺朱传皆谓高克将清邑之兵者本此但诗序左传皆无明文至经言在彭在消在轴据毛传皆以为河上之地孔谓师久不得归故迁移三处今遍考诸书于彭消轴地名絶不经见经文又但以河上总之虽左传亦然则迁移三处之说恐非其寔且高克成师以出不应独将清邑之兵故当以季彭山之解为正】

木瓜美齐桓公也卫国有狄人之败出处于漕齐桓公救而封之遗之车马器服焉卫人思之欲厚报之而作是诗也【出序孔颖达云卫立戴公以庐于漕齐桓公使公子无亏帅车三百乘甲士三千人以戍漕归公乘马祭服五称牛羊豕鸡狗皆三百与门材归夫人鱼轩重锦三十两戴公卒文公立齐桓公又城楚丘以封之与之系马三百按衣单复具曰称重锦锦之熟细者系马系于廐之马盖善马也两公相继皆为齐所遗则桓公之待卫亦不薄矣卫人深德之故设言投报之理以见其意孔子曰吾于木瓜见苞苴之礼行也胡安国云木瓜美桓而夫子録之善卫人之情也曷为善之报者天下之利以德报德则民有所劝矣】

投我以木瓜【叶鱼韵读如居斤於翻】报之以琼琚【鱼韵】匪报【号韵亦叶宥韵敷救翻】也永以为好【叶号韵虚到翻亦叶宥韵许候翻】也【比也投者取物相遗之谓木瓜旧说以为櫛也见尔雅本草云花生于春末深红色其实大者如瓜小者如拳陆佃云木瓜叶似柰实如小瓜味酢善疗筋转陶隐居曰如转筋时但呼其名及书上作木瓜字辄愈盖梅望之而蠲渴櫛书之而缓筋理有相感不可得而详也冯时可云古语曰梨百损一益櫛百益一损投人之道宜有以益之罗愿云鱼复县地多木瓜大者如甌又其木可以为杖故取干之道以木瓜次之今人取木瓜大枝作杖策之云利筋膝根叶煮汤淋足胫可以已蹙又截其木乾之作桶以濯足齐孝昭北伐库莫奚至天池以木瓜灰毒鱼又别木瓜者云木瓜与和园子蔓木土伏子相似其皮薄微赤黄香甘酸不澁穰中子尖一面方者为真木瓜草木子云木瓜一尺一百二十二节琼毛传云玉之美者应劭云玉之华也许叔重以为赤玉然据末章云琼玖乃黑玉则不应与琼并言也琚佩玉名按佩有璜有珩有琚珩者佩之上横者也下垂三道贯以纆珠璜如半璧系于两旁之下端又有组以左右交牵之使得因衡之抑扬以自相冲击而于二组相交之处以物居其间交纳而拘扞之故谓之琚或以大珠或櫛用瑀石贾谊新书所谓佩玉扞珠以纳其间者是也此言琚用琼则佩之美者苏辙云琼琚之于木瓜重矣然犹不敢以为报也永以与之为欢好而已此卫人感齐桓救患之恩故设为瓜琼不等之喻言人遗我以微物犹必有以厚报之况齐桓之赠遗如此其厚则报之当何如永以为好亦是欲其君依附大国时常聘问之意归子慕云谓之投者平居分义无往来之道出于望外者也卫之与国姜为异姓乃存亡之义不出于诸姬而出于姜氏诗人所以感思桓公之德无已时也凌蒙初云齐桓存亡卫而卫忘亡故作此感恩之诗夫子録之于卫风之终王风之前正以见有齐桓霸业而後中国始知有王耳与微管仲吾其被髮左衽同意左昭二年晋韩宣子聘于卫卫侯享之北宫文子赋淇澳宣子赋木瓜思报德也】投我以木桃【叶萧韵读如调田聊翻】报之以琼瑶【萧韵】匪报【见前】也永以为好【见前】也【比也旧说以木桃即桃木李即李徐氏云瓜有瓜瓠桃有羊桃李有雀李此皆枝蔓也故言木瓜木桃木李以别之也又陆佃云江左故老视其实如小瓜而有鼻食之津润不木者谓之木瓜圆而小于木瓜食之酢澁而木者谓之木桃木李大于木桃似木瓜而无鼻其品又下于木桃亦或谓之木梨梨盖声之误也鼻即瓜之脱华处里俗呼之为咪其着华处乃脐也木瓜性脆木李性坚今人以蜂

飴漬之者取木瓜煎之者取木李姚旅云木桃栳子也似木瓜小而酢涩色亦黄木李楔栳也似木瓜大而黄木瓜有重蒂木李单蒂耳按此则木李木桃之实俱与木瓜相似又任昉述异记云杜陵有金李李大者谓之夏李尤小者呼为鼠李桃之大者为木桃诗云投我以木桃是也俱未详孰是一说姚宽云诗之意乃以木为瓜为桃为李俗谓之假果者盖不可食不适用之物也亦犹画饼土饭之义尔投我以不可食不适用之物而我报之以琼玉可贵之物则投我之物虽薄而我报之实厚初学记六帖于果食木瓜门皆引卫风木瓜之诗误矣亦通瑶说文云玉之美者赵颐光云瑶从玉以?意兼声古人佩玉取其美质而易损用以摄心寓戒也故从?愚按此瑶即珩下之螭珠是也陈祥道云戴礼曰玼珠以纳其间韩诗传亦曰螭珠以纳其间螭者蚌也玼即螭也然荀卿赋曰璇玉瑶珠不知佩也谓之瑶珠则以玉为珠非蚌珠也谓之螭珠盖其状若蚌珠然】投我以木李【纸韵】报之以琼玖【叶纸韵荀起翻】匪报【见前】也永以为好【见前】也【比也玖说文云玉之黑色者毛传云石次玉者未详孰是赵颐光云玖从玉以久意兼声玉久土侵失白光似石故从久也陆佃云报人欲其坚久故以琼玖孔云琼是玉之美名非玉名也琚瑶玖三者互也按琚瑶皆佩名玖乃玉名厥後卫文公忘齐人再造之恩于齐桓公既死乘五子之乱而伐其丧夫子作春秋诸侯未有书名者惟卫文公灭邢书名删诗存木瓜恶其不仁也】

木瓜三章章四句【序意甚明朱子改为男女相赠答之辞无稽甚矣又子贡传申培说皆以为朋友相赠赋此其义甚小贾谊新书则云礼者所以恤下也故繇余曰乾肉不腐则左右亲苞苴时有筐篚时至则羣臣附官无蔚藏腌陈时发则戴其上诗曰投我以木瓜报之以琼琚匪报也永以为好也上少投之则下以躯償矣弗敢谓报愿长以为好古之畜其下者其施报如此其说皆似与孔子苞苴之言相合但如此则君臣之间有市心焉未必为圣人所乐道也】

定之方中美卫文公也卫为狄所灭东徙渡河野处漕邑齐桓公攘戎狄而封之文公徙居楚丘始建城市而营宫室得其时制百姓说之国家殷富焉【出序按左闵二年冬狄灭卫宋桓公立宣姜子申以庐于漕是为戴公是年戴公卒复立其弟毁是为文公齐桓公帅诸侯城楚丘而迁卫焉于是戎狄避之不复侵卫时僖公二年也文公大布之衣大帛之冠务材训农通商惠工敬教劝学授方任能元年革车三十乘季年乃三百乘又齐语云翟人攻卫卫人出庐于漕桓公城楚丘以封之其畜散而无育桓公与之系马三百天下诸侯称仁焉按系马与孟子言系马千驷义同韦昭谓良马在闲而不放散也然则此诗言騋牝三千亦齐桓有以贻之与孔颖达云国家殷富在文公末年此诗盖末年所作】

定之方中【东韵】作于楚宫【东韵】揆之以日【质韵】作于楚室【质韵】树之榛栗【质韵丰氏本作?】椅桐梓漆【质韵丰本作栲】爰伐琴瑟【质韵赋也定星名北方之宿尔雅云营室谓之定孙炎云定正也天下作宫室者皆以营室中为正晋天文志云营室二星一曰玄宫一曰清庙又为土功事左传水昏正而栽栽筑墙长板也谓今十月定星昏而中于是植板筑而兴作定在北方水宿也方中者言此时定星正中也孔云定星昏而正中谓小雪时小雪者十月之中气十二月皆有节气有中气十月立冬节小雪中于此时定星昏而正中也刘公瑾云夏正十月建亥春秋时十二月也农事已毕可以兴作而人君居必南面故亥月

昏时见定星当南方之午位因记此星为每岁营作之候又因号为营室此盖成周以後之制上考唐虞之时定星以戌月昏中岁久而差至周时定星始以亥月昏中下逮今日此星又以子月昏中矣又毛传云方中昏正四方也郑玄云其体与东壁连正四方孔云于列宿室与壁相望其体又壁居南则在室东故因名东壁尔雅谓姬觜之口营室东壁也孙炎云姬觜之口营室东壁四方似口故因名云是也亦通按春秋僖二年正月城楚丘周正建子与定中之期正近其稍不相符者或是节气有早晚或是亥月鳩工而子月乃竣役耳孔云左传曰凡土功水昏正而栽日至而毕则冬至以前皆为土功之时以历较之僖二年闰余七七则闰在正月之後正月之初未冬至故为得时也月令仲冬命有司曰土事无作亦与左传同而召诰营洛邑于周之三月起土功不依礼之常时者因欲观衆殷乐之与否故不依常时也楚宫楚丘之宫郑玄云谓宗庙也楚丘在济河间疑在今东郡界孔云卫本河北至懿公乃东徙渡河野处漕邑则在河南矣又此二章升漕墟望楚丘楚丘与漕不甚相远亦河南明矣按郡县志隋置楚丘县属滑州後改卫南本汉濮阳县地通典亦云滑州卫南县卫文公迁楚丘即此城也五代属澶州今为开州杜预以为在济阴成武县西南丰熙以为在兖州府曹州曹县东南五十里又拱州有楚丘在汉为梁国已氏县即今归德府是也皆非卫地不足信揆尔雅云度也考工记匠人建国水地以县置槷以县眡以景为规识日出之景与日入之景昼参诸日中之景夜考之极星以正朝夕按水地以县者谓置水地中以求平而垂绳四隅以合水槷与臬同柱也县垂绳也置槷以县植木为柱以县绳也柱有四角四中垂以八绳绳皆附柱则其柱正矣柱正然後视之以测日景也为规者画地为员规朝识日景其端指西暮识日景其端指东两端长短必与规齐测其端则东西正就其中屈之则南北亦可正也又于昼漏午时参此日中之景可以正南方之位因以正北方之位也古人营作上顺天时下正方面于宫室分言之者互文以见义也楚室楚丘之室郑玄云居室也君子将营宫室宗庙为先廡库为次居室为後孔云明制有先有後别设其文也縣与斯干皆述先作宗庙後营居室也尔雅释宫以宫室为一云宫谓之室室谓之客盖通而言之其对文则异也曲礼注疏云四面穹窿则宫贮物充实则室树植也榛栗二木其实榛小栗大皆可供筵实又罗愿云有一种榛大小枝叶皆如栗其子形如杼子味亦如栗所谓树之榛果者非榛櫟之榛也陆佃云栗味咸北方之果也有菜螬自裹图经云实有房彙若拳中子三五小者如桃李中子惟一二将熟则暴开子出栗房当心一子谓之栗楔治血尤効椅梓属陆佃云旧说椅即是梓梓即是楸盖楸之疏理而白色者为梓梓实桐皮非梓之正非梓而外若同焉有倚之意陶隐居称为椅桐又以白桐为椅桐皆误桐说文云荣也尔雅云荣桐木以其华而不实冬结似子者乃是明年之华房故亦谓之华桐也陆玑云有青桐有白桐有赤桐惟白桐宜为琴瑟此即白桐也青桐冈桐皆不可作琴瑟钱氏云按经典单称桐者多以作琴瑟峯阳孤桐是也本草注云梓似桐而叶小花紫亦有三种为百木王无子者为楸韵会云今人名臙理者梓□白者楸陆佃云今呼牡丹谓之华王梓为木王益木莫良于梓故书以梓材名篇礼以梓人名匠也罗愿云室屋之间有此木则余材皆不复震十道记云越人多种豫章树梓即豫章也漆本作漆木名六月刻取滋汁可以?物本草注云高二三丈皮白叶似椿花似槐子若牛李木心黄今经史通作漆爰於也此四木者他日长大伐之可以成琴瑟也陈阳云桐之为木其质则柔其心则虚椅之为木其实则梓其表则桐古之为琴瑟必以桐其唇必以梓则椅桐梓皆琴瑟良材而漆之为物所以固而饰之者也陆佃云言其宫中所植皆能预备礼乐之用语曰一年之计莫如种谷十年之计莫如种木故文公于初作宫室之时早计如此而立国之规模气象于此亦可观矣】升彼虚【叶阳韵通

旁翻水经注释文俱作墟】矣以望楚矣望楚与堂【阳韵丰本作唐】景山与京【叶阳韵居良翻】降观于桑【阳韵】卜云其吉终焉【古本吕祖谦严粲本俱作然】允臧【阳韵赋也上章已言作宫室矣此章乃追本相土度地之初言之虚说文云大丘也毛传云漕墟也孔云知为漕墟者以文公自漕而徙楚丘故知升漕墟盖地有故墟高可登之以望犹左传称晋侯登有莘之墟也按管子大匡篇云狄人伐卫卫君出致于虚桓公且封之所谓出致于虚者言出于虚地以致其告急之词命于齐然则虚之为卫地名信矣楚谓楚丘按类说地理书云地形自有鲁楚卫晋之名非必属楚地也传寅云堂当是今博州堂邑即今东昌府古之东郡王应麟以为博濮二州连境是也景释诂云大也水经注云河水分济北迳元城县故城西又北迳景山东卫诗所谓景山与京者也又北迳楚丘城西寰宇记云景山在澶州卫南县东南三里九域志云开德府有景山即今大名府开州地也与商颂景山无涉輿地广志云今拱州楚丘非卫之所迁县有景山京冈乃後人附会名之人朱子解景谓测景以正方面亦通京高丘也未详所在先是望楚与堂以审择两地之可否及观景山与京俱近楚丘风气包裹则建国之谋于是决矣降说文云下也自漕邑之墟而下于楚丘之野既领略其大势复细察其土宜也桑蚕所食叶木最宜肥土宜于桑必宜于田故以此验之刘公瑾云卫诗多言桑盖卫地跨冀兖二州据楚丘在冀河之东兖州之境则文公所观所说其桑土之野乎夫升虚而望其高有陵阜可以屏蔽其降观其下有桑土可以宜民人谋定矣于是从而卜之周礼大卜之职所谓国大迁则贞龟如周原之契洛邑之食皆是也云其吉者言兆云告吉也允信臧善也卜既云吉乃建国而居之今其终信善矣如卜所言也即下章民物富盛之意晁错云古之徙远方以实广虚也相其阴阳之和尝其水泉之味审其土地之宜观其草木之饶然後营邑立城此盖古之遗法定之方中及公刘所载是也胡胤嘉云山势胜土脉美神谋从则终焉之善可知此亦创始之时悬断必然之语不然卫後又迁於帝丘矣此言岂可据哉】灵雨既零【叶先韵灵年翻丰本作霤】命彼倌人【真韵亦叶先韵如延翻】星言夙驾说【音税郑玄读如字云辞说也非丰氏本作税】于桑田【先韵亦叶真韵他因翻】匪直也人【韵见上】秉心塞渊【先韵亦叶真韵一均翻丰本作】騋牝三千【先韵亦叶真韵雌人翻说文引此句作騋牝骠牡 赋也上段言城野宫室至此言其政事盖人君辨方正位体国经野然後可以施政事也毛萇云神之精明称灵瑞应图云降而应物谓之灵雨一说郝敬云灵星苍龙之宿主田蚕三月见于东方灵雨灵星见而雨也亦通零说文云余雨也盖雨将阑之时旧解作落非是倌人说文云小臣也毛云主驾者孔云以命之使驾故知主驾者诸侯之礼亡未闻倌人为何官也星毛传云雨止星见言语辞也又韩诗云星言星精也未详夙早也星见而驾所谓戴星而出也说说文云释也尔雅毛传俱云舍也因雨零而命驾桑田之野以劳劝耕蚕之人此为国家根本之虑万民衣食之谋不比粉饰太平苟且目前者匪直犹云不但也人即指农桑之人言秉持也塞充实也渊深也董斯张云卫毁亦是中才不得援刚而塞齐圣广渊例看塞如不变塞之塞有郁而不舒敛而不放之意渊如深渊之渊有兢兢然若临惕然若陨之意盖诗人谓茨泽余烬不絶如綫公能守其俭素战战焉若危亡之踵其後衣大布冠大帛其秉心证佐欵先是戴妨处州吁之难庄姜送之亦曰仲氏任只其心塞渊可以类言矣说文云马七尺为騋周礼庾人职云马八尺以上为龙七尺以上为騋六尺以上为马只此三种今单称騋者举中言之陈祥道云覲礼月令天子所乘皆言龙卫诗诸侯所畜则言騋是天子乘龙诸侯乘騋也陆佃云凡马宗庙用龙戎事用駮田事用騋騋田马也考工记曰国马之辔深四尺有四寸田马之辔深四尺郑注云国马高八尺衡高八尺有七寸除马之高则余七寸为

衡颈之间也田马高七尺衡高七尺有七寸除马之高则余七寸为衡颈之间也国马即种马所谓龙也又按周礼天子马六种曰种马曰戎马曰齐马曰道马曰田马曰驂马其制五良一驂邦国马四种其制三良一驂郑玄以为无种戎陆佃以为无齐道虽无确据然亦可见专言田马为举中之辞也云騋牝者兼言騋马与牝马也按周礼凡马特居四之一所谓特者牡马也三千举其数也记云问国君之富数马以对故及之或以騋牝为马之善者故尔雅曰騋牝弥牡以罕称也夫既以罕见称则三千之咏几于夸而溢矣愚所不取又按周礼天子之马十有二闲凡颁良马而养乘之四马为乘一师四圉掌之三乘为阜计一十二匹一趣马掌之三早为系计三十六匹一驭夫掌之六系为□计二百一十六匹一仆夫掌之郑玄谓自乘至□应乾之策以乾为马其数九揲蓍用四四九三十六谓一爻之数纯乾六爻故二百一十六也六□成较较有左右则为十二□即十二闲也天子之马六种五良一驂每□良马一种二百一十六匹以左右较之数乘之当得四百三十二匹五种合二千一百六十匹驂马一种三良马之数则为千二百九十六匹合之凡三千四百五十六匹此天子马之全数也诸侯邦国六闲四良一驂驂数亦三于良分为三闲与良马三种各一闲每闲皆二百一十六匹以六乘之止于千二百九十六匹考左传言卫文公元年革车三十乘季年乃三百乘以四马为乘计之三百乘计一千二百匹与六闲之制殊合又左成十八年晋悼公使程郑为乘马御六驂属焉则亦六闲之制也此诗云三千者苏辙以为可用者三百乘而其牝牡乃三千严粲以为革车不用牝马今并牝马数之故为三千林氏则云成周以民牧者如丘甸岁取马四匹之类然而在天子之都诸侯之国士大夫之家未尝不自蓄焉如周礼以天子十有二闲先儒论数不过三千余匹卫文公承夷狄所灭之後新造之国末年亦至騋牝三千若以制度论之卫以诸侯之国又当残乱之余其他固未及论安得遽如成周全盛乘马之数盖所谓天子十有二闲是养之於官者卫文公之騋牝三千举官民通数而言之此成周官民通牧之制也罗愿则云左传称元年革车三十乘季年乃三百乘盖马特居四之一騋牝三千则当有牡一千革车不用牝纯用牡马牡马一千为车二百五十乘取成数曰三百乘尔数说并存之诗人言文公勤于治国不特注意于农桑之人而已其操心塞实而渊深虽下至騋牝之微莫非其经营之所及故能致蕃育之盛如此呜呼佚淫俭思于兴废岂不大哉谢枋得云秉心也实故事事朴实不尚高虚之谈秉心也渊故事事深长不为浅近之计富国强兵岂谈高虚务浅近者之所能辨程大昌云凡为人上而存心审当则遇事无不曲至畜牧至末事亦遂赖此心以之孳息故马亦蕃庶也是盖庄周履豨之论也豨豕也豕之一身难肥者莫过於蹄也践踏豕足而见其丰肥则知其通身无有不肥也矣此繇未观本之论也若直曰此心可以感动乎马则是虚谈无实也晋郭展为太仆留心於养生而廐马充多征吴得以济事潘尼为太仆箴叙列其事皆推养生而致之於马即其说有本矣庄子曰百里奚爵禄不入于心故饭牛而牛肥孔子尝为乘田而牛羊茁莠皆一理也】

定之方中三章章七句【子贡传以为鲁僖公城楚丘以备戎史克颂之申培说同丰熙解云楚丘鲁地在今曹县东南五十里地近徐戎戎数侵鲁故僖公筑城以备之因为宫室於其城中其後襄公薨于楚丘即其处也次章堂作唐亦鲁地今兖州府鱼台县有武唐亭在楚丘西南戎之北界故春秋隐桓二公皆盟戎于此景山在曹县东四十里商汤尝合诸侯于此京亦山名在已氏县按丰氏所称引地理俱非确据故不足信至以春秋书襄公薨于楚宫谓即此楚宫则刺谬之甚者按左襄三十一年公作楚宫穆叔曰秦誓云民之所欲天必从之君欲楚

也夫故作其宫若不?适楚必死是宫也六月辛巳公薨于楚宫夫襄之去僖远矣宫固襄所自作非旧宫也惟春秋僖二年书春王正月城楚丘而不言城卫或者疑焉以为楚丘固鲁也鲁自城之耳又有此诗传为之证佐而駮牝三千亦似与駮篇之咏相合则遂断以为非卫文之诗愚初亦惑于其论然三传皆以城楚丘为齐桓公封卫矣吕览亦云桓公更立邢于夷仪更立卫于楚丘彼去古未远而说之相符乃尔且与此诗合亦何可疑之有又左僖十二年传云春诸侯城卫楚丘之郭惧狄难也此条虽无经而杜注以为为明年春狄侵卫传则楚丘之为卫楚丘印据更复明甚】

采苓晋人谏献公信谗之诗【出申培说序云刺晋献公也献公好听谗焉子贡传同朱子云献公好听谗观骊姬譖杀太子及逐羣公子之事可见矣邹忠胤云史苏之占曰挟以衞骨且惧有口苟可以?其入也必甘盖晋献之好谗已尝售于士蒍之譖富子而女戎犹其最着者公固曰何口之有口在寡人寡人弗受谁敢兴之无奈其受逞而不知也唐史有云艳嬖之兴常在中主第稠既交则情与爱迁顔辞媚熟则事为私夺狡谋钳其悟先哀誓捷于宠初夫如是虽欲弗受安得而弗受】

采苓采苓【叶真韵离珍翻】首阳之巔【叶真韵典因翻丰氏本作颠】人之为【定本作伪下同】言苟亦无信【叶真韵息邻翻】舍旃舍旃【先韵】苟亦无然【先韵】人之为言胡得焉【先韵比也苓通作藟尔雅云大苦也即甘草解见简兮篇说文于苓则解曰卷耳于苦则解曰大苦苓也今按卷耳自名苓耳尔雅可据而以大苦为苓则苓之即为藟确矣又月令有苦菜秀之文亦不得以大苦名苦也孔颖达云首阳之山在河东蒲坂县南今在山西蒲州东南三十里亦名雷首山又名首山左传赵宣子田乎首山是也山南曰阳刘公瑾云泛名其山则曰首山主山南而言则又曰首阳巔山顶也苓生于隰故简兮之诗曰隰有苓今见采苓者问其何从得之而曰得于首阳之巔则其所自来者不足信矣正与下文人之为言胡得焉相照苟且舍置旃之也又郑玄云旃之言焉也无然之然蒙上文语也胡得者问其何处得来也凡人言语其为谗与否未可知且勿轻信然则将一?舍置而付之不问乎亦且不可如此惟当有以察之则无如究其言之何所自来耳辅广云谗譖之人不畏人之不听而畏人之能审今虽不聽彼将浸润而入之则异日或不能不听矣惟能审察而真有以见其情伪之所以然则不惟不敢进而亦无自而进矣此止谗之法也严粲云考其言何从而得之推其所自来则虚实尽见谗言之得行繇不问其所繇来而遽信之耳汉昭帝悟燕王上书之诈盖察其书所繇来也张子厚云舍旃则无然为言则求所得所誉必有所试厚之至也苏辙云事盖有似而非者献公好聽谗言不究其实而辄从之申生之死不究其实之故也】采苦采苦【麌韵】首阳之下【叶麌韵後五翻】人之为言苟亦无与【叶麌韵读如羽王矩翻】舍旃舍旃【见前】苟亦无然【见前】人之为言胡得焉【见前比也苦即苦菜也孔云此茶也解见谷风篇陆玕云诗所谓堇茶如饴内则所云濡豚包苦用苦菜是也苦生于田亦非山中之物今日得之首阳之下者谰辞也与说文云党与也言不必遽信而与之党也】采葑采葑【叶束韵敷冯翻】首阳之东【韵】人之为言苟亦无从【叶东韵麤丛翻】舍旃舍旃【见前】苟亦无然【见前】人之为言胡得焉【见前比也葑解见谷风篇葑生于圃亦非山中所有此诗三章语意了无分别惟取譬苓苦葑三者异耳诗人托物起义指即在此陆佃云苓甘者苦苦者言谗人无所不至其害人也必因其似而譖焉采苓则因人之所甘而譖之

况也采苦则因人之所苦而譖之之况也葑有时而甘亦有时而苦采葑则又因人之所甘所苦而并譖之之况也又或云藟甘而苦苦讒者之入人必先甘而後苦而葑则甘苦相半所谓采葑采菲母以下体半以为恶半以为美则讒人之所以尝试其君者无所不用矣皆通从说文云相听也】采苓三章章八句【郝敬云朱子改为听讒之诗谓未见其果作于献公时非也事之可据孰有如晋献公听讒者乎如是犹谓不信则诗必有年月日時作者姓名乃可】

陟岵晋狐偃从公子重耳出亡也【狐偃字子犯狐突之子狐毛之弟公子重耳之舅也亦称舅犯重耳晋献公子为狐突之女狐姬所生後为晋文公按左传国语记骊姬既譖杀太子申生又譖重耳与知共君之事重耳奔蒲公使寺人披伐蒲刺重耳重耳出亡及栢谷卜适齐楚狐偃曰无卜也夫齐楚道远而望大不可以困往道远难通望大难走困往多悔困且多悔不可以走望若以偃之虑其翟乎夫翟近晋而不通愚陋而多怨走之易达不通可以窜恶多怨可以共忧今若休忧于翟以观晋国且以监诸侯之为其无不成乃遂之翟从者狐偃赵衰颠颉魏武子司空季子在翟十二年狐偃曰日吾来此也非以翟为荣可以成事也吾曰奔而易达困而有资休以择利可以戾也今戾久矣戾久将底底箸滯淫谁能兴之尽速行乎遂适齐过卫自卫过曹过宋过郑遂如楚於是怀公自秦逃归秦伯召公子於楚怀公命无从亡人期期而不至无赦狐突之子毛及偃从重耳在秦弗召冬怀公执狐突曰子来则免对曰子之能仕父教之忠古之制也策名委质贰乃辟也今臣之子名在重耳有年数矣若又召之教之贰也父教子贰何以事君刑之不滥君之明也臣之愿也淫刑以逞谁则无罪臣闻命矣乃杀之及秦伯纳公子将济河子犯授公子载璧曰臣从君还軫巡于天下恶其多矣臣犹知之而况君乎不忍其死请繇此亡公子曰所不与舅氏同心者有如河水沈璧以质此狐偃从晋文公出亡以至归国之始末也当文公奔翟时从亡之士仅有五人狐偃与而狐毛不与及文公入秦毛与偃俱在乃不应怀公之召而其父狐突因之以死岂当文公十二年居翟之後周游列国之时毛以舅氏之亲始继偃而至耶此诗辞旨倥偬当是初奔翟时所作以狐突仍仕晋国而狐毛尚未从行故既瞻望父母而又复有瞻望兄之语耳魏诗即晋诗也其为狐偃所赋复何疑】

陟彼岵【寘韵】兮瞻望父【寘韵】兮父曰嗟予子【纸韵】行役夙夜无【石经作母】已【纸韵】上【石经丰氏本俱作尚後同】慎旃哉犹来无止【纸韵 赋也尔雅云山多草木曰岵刘熙释名云岵怙也山有草木人所恃取以为事用也赵颐光云山久则草木生之故从古今按父兮生我又无父何怙此孝子所以升岵而切望父之思也父狐偃之父狐突也称父曰者临别丁宁之言也嗟叹声叹而告之苏辙云孝子登高以望其父而不见则思其将行之戒以自慰行役夙夜无已言既负羈縻从公子以出则当夙兴夜寐尽心所事无有休懈所谓义也故毛传云父尚义狐突谓子之能仕父教之忠正此意也上即行役也严粲云上犹赴也谓赴役也如赴官曰上官赴工曰上工七月上入执宫功以繇田野入都邑为上此以繇家居赴道涂为上今俗谚犹云上路也旃毛传云之也孔颖达云此旃与采苓舍旃之旃皆为足句故训为之所谓慎旃即蒙上文夙夜无已之意从亡在外操心危虑患深诚不可以不慎也犹朱子云尚也庶几拥卫公子归国无止于外而不返也】陟彼屺【纸韵】兮瞻望母【叶纸韵母鄙翻】兮母曰嗟予季【寘韵】行役夙夜无寐【寘韵】上慎旃哉犹【尔雅注作猷】来无弃【寘韵尔雅注作弃 赋也释名云山无草木曰屺屺圯也按秦风有纪有堂毛传

云纪基也孔云集注本作配定本作纪以下文有堂故以为基谓山基也据比则配乃山基其势倾圯因取圯为名升配而瞻望母者父天母地父尊母卑又子姓递传基本于母故以配为母之比也称予季者以行者辈属季故观下章有兄可见矣无寐严云犹今人言醒睡也行役在途存亡戒心故早夜不敢安寝毛传谓母尚恩是也慎旃亦蒙上文夙夜无寐之意无弃者言无为公子所遗弃也】陟彼冈【阳韵】兮瞻望兄【叶阳韵虚王翻】兮兄曰嗟予弟【叶纸韵荡以翻】行役夙夜必偕【叶纸韵苟起翻】上慎旃哉犹来无死【纸韵 赋也释名云山脊曰冈冈亢也在上之言也故以为兄之比兄偃之兄毛也偕毛传云俱也嘱其必与同行者俱也慎旃亦蒙上文夙夜必偕之意犹来无死欲其能避祸害无死地也】

陟岵三章章六句【朱传申培说皆以为魏人行役而思其亲故作此诗序则云孝子行役思念父母也国迫而数侵削役乎大国父母兄弟离散而作是诗也邹忠胤云采薇以公义言故曰我行不来陟岵以私情言故曰犹来无止盖边戈戍鼓则凄惋悲壮而望云瞻木则气结啼枯固诗人之致乎其未及叹于室之妇嗟濶嗟洵如击鼓者此则为未娶之季言也唐人吊古战塲文曰苍苍烝民谁无父母提携捧负畏其不寿谁无兄弟如足如手谁无夫妇如宾如友生也何恩杀之何咎其存其殁家莫闻知人或言将信将疑惛惛心目寢寐见之嗟乎为人上者览此其於得己之役亦可以少寢夫徐士彰云孝子思亲不言己之念亲而反言亲之念己则所以存诸心者益切不言己之自慎而言亲之欲其慎则所以保其身者益至详味之蔼然有天亲惨怛之情焉刘元城谓其末句自微自怨可以见忠孝之心亦善发诗人之意者也曾巩云先王之世上之所以接下惟恐失其养父母之心其劳使臣之辞则然而推至于戍役之人亦劳之以王事靡盬忧我父母则先王之政即人之心莫大于此也及其後世或任使不均或苦于征役而不得养其父母则有北山之感鹄羽之嗟或行役不已而父母兄弟离散则有陟岵之思诗人皆推其意见于国风所谓发乎情止乎礼义者也按数说亦近似并録之子贡传阙文】

葛生刺晋献公也好攻战则国人多丧矣【出序 愚按此死者之妇悼亡之诗采诗者録之以志刺献公名倭诸武公子孔颖达云献公以庄十八年立僖九年卒案左传庄二十八年晋伐骊戎闵元年晋侯作二军以灭耿灭霍灭魏二年使太子申生伐东山臯落氏僖二年晋师灭下阳五年八月晋侯围上阳冬灭虢又执虞公八年冬晋里克败狄于采桑见于传者已如此是其好攻战也又按外传载献公田见翟相之氛归寝不寐遂伐翟相曹氏云二十三年之间凡十一战宜其丧亡者多也兵犹火也弗戢必自焚献公嗜杀而不已反祸其子与秦皇汉武略同可不戒哉】

葛生蒙【丰氏本作冢後同】楚【语韵亦叶御韵创据翻】薺蔓于野【叶语韵余吕翻亦叶御韵常恕翻】予美亡此谁与独处【御韵亦叶语韵敞吕翻赋也葛草名解见葛覃篇蒙通作冢说文云覆也楚木名解见汉广篇薺草名说文云白茎也本草云一名兔茇作藤生根似天门冬陆玕云薺似栝楼叶盛而细其子正黑如燕莫不可食也幽州人谓之乌服其茎叶煮以哺牛除热蔓本草名葛属此则借为抽引枝条之义孔云此二句互文葛言生则薺亦生薺言蔓则葛亦蔓葛言蒙则薺亦蒙言葛生于此延蔓而蒙于楚木薺亦生于此延蔓而蒙于野中也以次章薺蔓于域推之域为莹域乃此妇之夫所葬之地地在野中故光云于野此二

句写出塚上荒凉之景宛然在目旧说以为兴体云蔓草发比蒙彼以兴妇人生于父母当外成于夫家陆佃以为比体云葛生高而蒙楚蕝生卑而蔓于野各系所遇犹之妇人外成于夫荣瘁随焉所以一心乎君子语曰嫁鸡与之飞嫁狗与之走此之谓也取义皆通愚以第三章角枕锦衾之下亦有予美亡此之文三章一例似当作赋体为正予美郑玄云我所美之人谓其君子也亡郑云无也字从入从乚乚者隐也曰此者主闺中而言或以死训亡谓承上文言葛生蕝蔓之地君子身死于此语意似顺然于第三章之文义难通今不从谁与独处妇人自谓也所美之人既无矣寂寞闺中我其谁与乎但茕然独处而已後章破此各以二字为文递转而下与易匪寇婚媾句法正同】

葛生蒙棘【职韵】蕝蔓于域【职韵】予美亡此谁与独息【职韵 赋也棘解见凯风篇域毛传云?域也变野言域知是赋其所见诗翼云读葛生蒙棘蕝蔓于域宛然荒塚累累祭扫悲哀之景息止也】角枕粲【翰韵】兮锦衾烂【翰韵】兮予美亡此谁与独旦【翰韵 赋也枕卧所以荐首者以角为饰犹梁元帝谢宝枕啓所云重安玳瑁者也司马相如美人赋云寝具既设服玩珍奇金炉薰香黼帐高垂茵褥重陈角枕横施粲通作灿说文云灿烂明滯貌衾解见小星篇以锦为之烂光色也范祖禹云角枕之粲锦衾之烂则其嫁未久也苏辙云物存而夫亡是以感物而思之也按世说云袁羊尝诣刘恢恢在内眠未起袁因作诗调之曰角枕粲文茵锦衾烂长庭刘尚晋明帝女主见诗大不平曰袁羊古之遗狂刘孝标亦引小序以见袁以死嘲刘故主不平耳则其为悼亡之诗旧矣郝敬以角枕锦衾为歛衾之具而引周礼大府之职大丧供角枕仪礼歛用衾为证然上章已有蕝蔓于域之文不应先言葬後言歛也独旦严云独宿至旦也犹王仲宣诗言独夜也思者苦夜长而难旦长夜漫漫何时旦与秋天不肯明之意也一说枕衾粲烂将旦方见其然故云谁与独旦亦通】

夏之日冬之夜【叶遇韵元具翻】百岁之後归于其居【叶遇韵读如履俱遇翻丰本作丘赋也夏日冬夜非夏但思于日冬但思于夜也但日因夏而永则日之思比夜之数为多夜因冬而永则夜之思比日之数为多以见无时而不思也居郑玄云坟墓也百岁之後同归于九泉之居矢无他志义之至情之尽也与前三独字相应】

冬之夜夏之日【质韵】百岁之後归于其室【质韵 赋也繇夏日而冬夜复繇冬夜而夏日无岁不思没身焉而已室冢圻也滕公墓铭云佳城郁郁三千年见白日于嗟滕公居此室是也】

葛生五章章四句【申培说云晋献公之时国人久于征役室家念之而作是诗朱子亦以为妇人念夫久从征役而作然验篇中蕝蔓于域及百岁之後归于其居等语其为悼亡之诗无可疑者子贡传阙文】

诗经世本古义卷二十三之下

卷二十四之上

钦定四库全书

诗经世本古义卷二十四之上

明 何楷 撰

周襄王之世诗十五篇

有杕【本名杕杜嫌同小雅以此为别】刺晋惠公也不纳羣公子又欲杀其兄重耳将亡其国焉【惠公名夷吾献公子遭骊姬之赞出亡于外献公卒秦穆公纳之为诸侯初献公立奚齐尽逐羣公子始为令国无公族焉献公卒夷吾得因秦立始即位穆姬使纳羣公子曰公族者君之根本惠公不用又遣寺人披往渭滨杀重耳不克此诗前言不如我同父则刺其杀重耳之事後言不如我同姓则刺其不纳羣公子之事也是以知为刺惠公也】

有杕【顔之推云江南本并木傍施大徐仙民音徒计反说文在木部集韵音次第之第而河北本皆为夷狄之狄读亦如字此大误也】之杜【麋韵然下章不用此韵叶正与郑风将翱将翔彼美孟姜一例】其叶湑湑【叶麋韵读如数爽主翻】独行踽踽【麋韵】岂无他【丰氏本作它後同】人不如我同父【麋韵】嗟行之人胡不比【叶寘韵必至翻】焉人无兄弟胡不攸【寘韵崔灵恩集注作次】焉【兴也杕说文云树貌毛传云特貌盖树之特生者尔雅云杜赤棠白者棠樊光云赤者为杜白者为棠陆玑疏云赤棠与白棠同耳但子有赤白美恶子白色为白棠甘棠也少酢滑美赤棠子澁而酢无味俗语云澁如杜是也一云牡曰棠牝曰杜湑者零露之貌王安石云湑湑润泽也诗诂云犹沃沃也严粲云木无枝叶则日燥其根上之土而其木易枯有杕然特生之杜其叶湑湑然润泽虽无旁木之荫而叶犹足以庇其本根踽说文云疏行貌徐锴云疏谓稀疏也孟子云行何为踽踽凉凉乃独行而无所亲昵之意陆化熙云以独行之杜则甚茂兴独行之人则无所与此反兴也岂无他人以下乃正言以开悟之同父谓兄弟也比并也说文云密也二人为从反从为比相与周密也攸说文云便利也岂无他人乎不如我同父之人言他人不足恃也如荀以他人为可恃嗟彼行道之人何不见与我相比密乎凡世上之人亦有无兄弟者何不见其所行之便利焉两胡不是唤醒之词】有杕之杜其叶菁菁【庚韵释文丰本俱作青青】独行裊裊【庚韵文选注作晃晃陆德明本作莢莢】岂无他人不如我同姓【叶庚韵师庚翻丰本作生】嗟行之人胡不比焉人无兄弟胡不攸焉【兴也菁本韭华之名盖以其色取之裊说文云目惊视也曹氏云独行多惧故裊裊也白虎通云姓生也人所禀以生者也按姓与氏有辨姓者所以系统百世使不别氏者所以别子孙所出故言姓即在上言氏即在下王安石云同姓虽非同父犹愈于他人耳晏子问于子华子曰齐之公室惧卑奈何子华子曰夫人之有欲也天必随之齐将卑是求夫何惧而不获昔者轩辕二十五宗故黄祚衍于天下于今未忘也宗周之王也姬姓之封者凡七十夫指之不能率其臂犹臂之不能运其体也今齐自襄桓以来斩焉朝无公族野无公田带甲横兵挟穀而能战非公士也结綬纚纚位列而籍居非公臣也公族之子若其孙皆

散而之於四方惟童隶是伍公所以与俱者自有肺腸者也於诗有之岂无他人不如我同姓何以是蹢躅而以临于上也齐将卑是求夫何惧而不获】

有杕二章章九句【序云刺时也君不能亲其宗族骨肉离散独居而无兄弟将为沃所并今按晋与沃五世相攻宗族离叛公室孤立然沃实负晋非晋负沃也如刺即当刺沃耳又晋献公患桓庄之族偪尽杀羣公于此诗疑亦足当之但皆於不如我同父一语不合故前二说愚皆无取焉朱子谓此乃无兄弟者自伤其孤特而求助于人之词邹忠齐云夫诗明言岂无他人不如我同父同姓求助于人者立言固若是乎申培说以为君子劝人孝友之诗其意益缓而篇中亦不见有劝孝之语于贡传阙文】

权輿晋惠公与秦穆公战为秦所获舍诸灵台怨秦为德不卒也【按列女传及左传国语载秦穆公之夫人晋献公之女太子申生之同母娣与惠公异母贤而有义献公杀太子申生遂羣公子惠公夷吾奔梁及献公卒得因秦立始即位穆姬使纳羣公子曰公族者君之根本惠公不用又背秦赂秦饥请粟不与秦遂兴兵与晋战获晋君以归秦穆公曰扫除先人之庙寡人将以晋君见穆姬闻之乃与太子瑩公子弘与女简璧衰絰履薪以迎且告穆公曰晋君朝以入婢子夕以死惟君其图之公惧乃舍诸灵台及晋与秦成改馆晋侯馈七牢焉是诗之作当在未改馆之先舍诸灵台时也】

於我乎夏屋渠渠【鱼韵文选注作蘧蘧】今也每食无余【鱼韵】于嗟乎【虞韵】不承权輿【叶虞韵读如雩云俱翻尔雅注不承权輿上有胡字或讹以乎为胡也 赋也於我乎惠公自言於我晋国之所居也夏屋王肃以为大屋杨雄方言云自阙而西秦晋之间凡物之壮大者而爱伟之谓之夏法言云震风凌雨然後知夏屋之帡幪也崔駰七依说宫室之美亦云夏屋渠渠楚词大招篇云夏屋广大沙堂秀只南方小坛观絶溜只曲屋步櫚宜扰畜只皆以室言也又按檀弓云有若覆夏屋者矣注谓夏屋今之门庑其形旁广而卑正又曰殷人以来始屋四何夏虞之屋惟两阿而已无四阿如汉之门庑亦是一说郑玄笺诗因次章有四簋之言虑与下文每食句不属遂易其解曰屋具也夏屋谓设食大具也今考尔雅训具者乃握字非屋字以大具解夏屋于说凿矣杨慎则引字画云夏屋大俎也礼周人房俎鲁颂笾豆大房注大房玉饰俎也其制足间有横下有跗似乎堂後有房然故曰房俎也以夏屋为居以房俎为房室可乎又礼童子幘无屋亦谓童子戴屋而行可乎此其说诚辨然礼未闻号俎为屋者必以大房二字附会夏屋愚终不敢信也渠通作巨说文云规巨也言夏屋之制有规巨也一曰大也今谓今被获也余说文云饶也其字从食正谓食之饶也昔在晋国有夏屋以居今为秦所获而舍于灵台每食无复余饶仅免于饥饿而已盖秦不以诸侯之食礼待之承毛传云继也孔颖达云承其後是继嗣故以承为继权輿尔雅云始也权称锤也輿輶轴之上加板以载物者邢昺云权輿天地之始天圆地方故名又陈氏云造衡自权始造车自輿始盖借字也按大戴礼云孟春冰泮百草权輿淮南子云东风而酒沈溢造化权輿以为东方之气风也逸周书周月解云日月俱起於牵牛之初历舍於十有二辰终则复始是谓日月权輿权輿二字古人盖恒用之不承权輿言不能如其立已为君之始以仇终之也按秦穆公初欲立公子重耳曰重耳仁絜曰君若求置晋君而载之置仁不亦可乎君若求置晋君以成名于天下则不如置不仁以滑其中且可以进退臣闻之仁有置武有置仁置德武置服是故先置公子夷吾

是为惠公及惠公入穆公谓公孙枝曰夷吾其定乎对曰臣闻之惟则定国诗曰不讥不知顺帝之则文王之谓也又曰不僭不贼鲜不为则无好无恶不忌不克之谓也今其言多忌克难哉公曰忌则多怨又焉能克是吾利也穆公之立晋侯惟欲置服而不置德其初意已不善且侦知其多忌以为利故卒有始无终如此夫子録此诗所以示後世凡欲存亡继絶者不可如秦穆以利心行之也】於我乎每食四簋【叶有韵已有翻】今也每食不饱【叶有韵补苟翻】于嗟乎【见前】不承权舆【见前 赋也此言於我乎言昔在於我晋国之所食也簋盛黍稷器考工记云旂人为簋实一觔崇只厚半寸注谓旄捭埴之工作瓦器者孔云豆实三而成觔四升为豆然则簋是瓦器容二升也又易二簋可用享注谓离为日日体圆巽为木木器圆簋象则簋亦以木为之也簋制说各不一周礼舍人注以为圆器孝经注说文皆以为方器陆元朗云内方外圆曰簋外方内圆曰簠孝经钩命决云簠簋上圆下方未详孰是言四簋者朱子云礼食之盛也毛云四簋黍稷稻粱孔云案公食大夫礼云宰夫设黍稷六簋又云宰夫授公粱公设之宰夫膳稻于粱西秋官掌客注云簠稻粱器也簋黍稷器也然则稻粱当在簠而云四簋黍稷稻粱者以公食大夫礼有稻有粱知此四簋之内兼有稻粱公食大夫之礼是王国之君与聘客礼食备设器扬故稻粱在簠此言每食则是平常燕食器物不具故稻粱在簋饱说文云厌也李氏云不饱非特无余矣】

权舆二章章五句【序云刺康公也忘先君之旧臣与贤者有始而无终也申培说亦云与晨风篇同义今按康公忘先君之旧臣於传絶无所据朱子但以秦人刺其君待贤礼意寢衰不能继其始盖亦依序而稍变其说要之无所附丽子贡传阙文】

十亩之间齐姜劝晋公子重耳去齐也【按晋语文公在翟十二年狐偃曰吾不适齐楚避其远也蓄力一纪可以远矣齐侯长矣而欲亲晋管仲没矣多谗在侧谋而无正衷而思始夫必追择前言求善以终厌迹逐远远人入服不为邮矣会其季年可也兹可以亲皆以为然乃行遂适齐齐侯妻之甚善焉有马二十乘将死於齐而已矣曰民生安乐谁知其它桓公卒孝公即位诸侯畔齐子犯知齐之不可以动而知文公之安齐而有终焉之志也欲行而患之与从者谋于桑下蚕妾在焉莫知其在此也妾告姜氏姜氏杀之而言於公子曰从者将以子行其闻之者吾已除之矣子必从之不可以贰贰无成命诗云上帝临女无贰尔心先王其知之矣贰将可乎子去晋难而极于此自子之行晋无宁岁民无成君天未丧晋无异公子有晋国者非子而谁子其勉之上帝临子矣贰必有咎公子曰吾不动矣必死于此姜曰不然周诗曰莘莘征夫每怀靡及夙夜征行不遑啓处犹惧无及况其顺身纵欲怀安将何及矣人不求及其能及乎日月不处人谁怀安西方之画有之曰怀与安寔疚大事齐国之政败矣晋之无道久矣从者之谋忠矣时日及矣公子几矣君国可以济百姓而释之者非人也败不可处时不可久忠不可弃怀不可从子必速行吾闻晋之始封也岁在大火阍伯之星寔纪商人商之飡国三十一王瞽史之记曰唐叔之世将如商数今未半也乱不长世公子惟子子必有晋若何怀安公子弗听姜与子犯谋醉而载之以行今按此诗声口宛似但无限商略只寄之行与子还与子逝二语词不迫而情有余姜之所以善于讽也】

十亩之间【删韵】兮桑者闲闲【删韵释文作间间穆天子传注丰氏本俱作闲闲】兮行与子还【删韵】兮【赋也司马法六尺为步步百为亩礼记疏云径一步长百步为亩折而

方之则东西南北各十步至秦孝公始制三百四十步为亩故程子云古者百步止当今之四十一步今之百亩当古之二百五十亩也此云十亩之间者张子厚云园?在园地其制百亩之间十家区分而衆居者诗人所谓十亩之间之田也十亩场圃所任园地也不独筑塲纳稼亦可毓草木也桑者即齐姜所言蚕妾也闲通作嫺说文云雅也闲闲盖习熟自得之貌行朱子云犹将也子谓重耳也还说文云复也姜氏言十亩之间有蚕妾焉子犯不知其在也与从者谋于桑下行且与子复返晋国矣时不可失从者之意不可孤公子其图之】十亩之外【叶霁韵以计翻】兮桑桑者泄泄【霁韵】兮行与子逝【霁韵】兮【赋也十亩之外则他人采桑之处非前蚕妾所在矣泄通作咄说文云多言也漏泄之义字当从此从者谋于桑下而蚕妾闻之则恐其为他人之采桑者述之而至于漏言也所谓子有四方之志其闻之者杀之矣逝往也今从者行且与子离齐国而偕往他处固无一人知公子可以行矣】

十亩之间二章章三句【序以为刺时也言其国削小民无所居焉路史云今陕西平陆有古魏城在河之东北水经注云古魏国城南西二面并去大河可二十余里北去首山十余里处河山之间土地迫隘故魏风着十亩之诗也张子厚云作诗者以国地侵削外无井受之田徒有近郭园?而已故耕者无所用其力则桑者闲闲而多也十亩之外他人亦然则削小无所容尤为着矣盖皆附会序说云尔苏辙駁之云夫国削则民削矣未有地亡而民存者也且虽小国岂有一夫十亩而尚可以为民者哉朱子云序文殊无理而但以政乱国危贤者不乐仕于其朝思与其友归于农圃故其词如此申培说袭之然据诗云桑者直蚕妇之业耳与农圃何涉乎】

蜉蝣刺曹共公也君怠国危玩细娱而忘远虑好奢而任小人将无所依焉【申培说以为君怠国危曹大夫闵之而作朱子云此诗盖以时人有玩细娱而忘远虑者故以蜉蝣为比而刺之序则云刺奢也昭公国小而迫无法以自守好奢而任小人将无所依焉陆德明云按郑谱云昭公好奢而任小人曹之变风始作又云蜉蝣至下泉四篇共公时作今诸本此序多无昭公字崔集注本有未详其正也愚按此诗咏衣裳楚楚正候人诗所谓三百赤芾者其为刺共公诗无疑序云刺奢乃指朝多幸位冗食者衆耳非如旧说但以好整饰衣服为奢也】

蜉蝣之羽【叶语韵读如与演女翻】衣裳楚楚【语韵说文丰氏本俱作□□】心之忧矣於我归处【叶语韵敝吕翻 兴而比也蜉蝣尔雅云渠略也扬雄方言作□?郭璞云似蛄蜺身狭而长有角黄黑色聚生粪土中猪好啖之陆玕云似甲虫有角大如指长三四寸甲下有翅能飞夏月阴雨时地中出今人烧灸瞰之美如蝉也樊光云是粪中蠋虫随雨而出朝生而夕死陆佃云似天牛而小翕然生覆水上寻死随流丛生郁栖中朝生暮死有浮游之义故曰蜉蝣也夏小正云蜉蝣有殷殷者衆也罗愿云淮南子曰蚕食而不饮二十二日而化蝉饮而不食三十日而蜕蜉蝣不食不饮三日而死又曰鹤壽千岁以极其游蜉蝣朝生而暮死尽其乐盖以旦暮为期远不过三日尔蜉蝣小虫国小之比曰羽曰翼羣臣之比衣裳楚楚指羣臣言楚当依说文通作□云合五采鲜貌所以取兴于蜉蝣之羽者亦以羣臣徒窃衣裳以莘其躬不知死亡之无日正如蜉蝣然耳候人诗言彼其之子不称其服亦此意心之忧矣忧曹君也严粲云见当时在位无一可倚仗者盖惨然以亡国为忧矣归犹言来之我家也处止也徐锴云诗爰居爰处居者定居处者暂处而已辅广云所以欲其於我归处者盖思有以警诲之

耳】蜉蝣之翼【职韵】采采衣服【叶职韵鼻墨翻】心之忧矣於我归息【职韵兴而比也翼说文云翅也采通作彩说文云文章也采采犹□□也衣服即衣裳上曰衣下曰裳通言之皆曰衣亦曰服息亦止也于我归息者交浅不可言深繇处而息则非一朝一夕矣然後可以讽直兼用也徐光啓云朝夕相与从容开谕卵翼孚化令舍其旧而新是图即所谓习与正人居不能不正之意】蜉蝣掘【说文丰本俱作掘】阅【屑韵】麻衣如雪【屑韵】心之忧矣於我归说【屑韵丰本俱作税兴也掘阅毛郑之解俱难通或见管子有掘阅得玉之言遂以掘阅为挑拨之貌又或谓阅义与穴通要于文理未顺当依说文作堀阅为正堀说文云突也突出之义即所云堀起是也赵颐光云凡土旁误手者如埽坼之类并同此谬阅犹阅人阅世之阅言其从土中突出而为人所见也上言楚楚采采则刺其臣此言麻衣如雪则刺其君郑玄云麻衣深衣诸侯之朝服朝夕则深衣也孔颖达云麻衣者白布衣如雪言甚鲜洁衣纯用布而色白者深衣为然故知麻衣是深衣也玉藻说诸侯之礼云夕深衣又襟记云朝服十五升布深衣也是则深衣与朝服升数皆同但彼是大祥之服则纯用布无采饰此诸侯礼服当用十五升布深衣而纯以采也所以言麻衣者蜉蝣朝生暮死君服麻衣则薄寒之时而蜉蝣之生亦不久矣甚危之至也说许慎云释也从言从兑兑者悦也徐锴云说之亦使悦恻也凌蒙初云谓从容开谕之正是上文所以欲其归处归息之意又表記子曰君子不以口誉人则民作忠故君子问人之寒则衣之问人之饥则食之称人之善则爵之国风曰心之忧矣于我归说虽断章取义然设身处地之意亦自恍然】

蜉蝣三章章四句【范晔云葛屨履霜敝繇崇俭楚楚衣服戒在穷賒賒通作奢然诗旨非刺奢也说已见前邹忠胤疑为刺曹羈作羈者庄公射姑之世子春秋鲁庄二十三年冬射姑卒明年冬戎侵曹曹羈出奔陈胡氏以为微弱不能君故为戎所逐盖在位日浅无如羈者想诗人逆知其税驾无所故为之忧心如是而讽以于我归处如楚申亥舍灵王于家之为耶於时羈方在丧故曰麻衣如雪而先之以楚楚采采意羈亦如齐昭公居丧而不哀在戚而有嘉容当不免於童心乎麻衣非即深衣观玉藻童子无缙服听事不麻可见是其说亦近似有理并存之子贡传阙文】

侯人刺曹共公也不用僖负羈而乘轩者三百人【序云刺近小人也共公远君子而好近小人焉按左僖二十八年春晋文公伐曹三月入曹数之以其不用僖负羈而乘轩者三百人也且曰献状与此诗三百赤芾之语相合遂执曹伯襄以畀宋人即共公也又晋语公子重耳还曹曹共公不礼焉僖负羈言于曹伯曰臣闻之爱亲明贤政之干也礼贫矜穷礼之宗也礼以纪政国之常也失常不立君所知也国君无亲国以为亲先君叔振出自文王晋祖唐叔出自武王文武之功实逮诸姬故二王之嗣世不废亲今君弃之是不爱亲也晋公子生十七年而亡卿材三人从之可谓贤矣而君蔑之是不明贤也晋公子之亡不可不怜也此之宾客不可不礼也失此二者是不礼宾不怜穷也守天之聚将施于宜宜而不施聚必有阙玉帛酒食犹粪土也爱粪土以毁三常无乃不可乎公弗听及重耳如楚子玉请止孤偃楚成王曰不可曹诗曰彼已之子不遂其媾邮之也夫邮而效之邮又甚焉效邮非义也据此则此诗兼为刺共公不用僖负羈之言无礼于晋公子而作】

彼侯人兮何戈与祲【泰韵都外翻亦叶质韵都律翻礼记注崔灵恩集注丰氏本俱作缀】

彼其之子三百赤芾【叶泰韵博盖翻亦叶质韵非律翻丰本作市 赋也毛传云候人道路送迎宾客者按周礼候人上士六人下士十有二人史六人徒百有二十人各掌其方之道路与其禁令若有方治则帅而致于朝及归送之于境注谓四方以职来受治者候其来去然彼乃天子之官故徒属广设若侯国必不然也孔颖达云按秋官环人掌送迎邦国之宾客以路节达诸四方又掌讶掌待宾客有宾客至逆于境为前驱而入及归送亦如之若候人主迎宾客而环人掌讶又掌送迎宾客者环人掌执节导引使门阙无禁掌讶以礼送迎诏赞进止侯人则何戈兵防卫奸寇虽复同是送迎而职掌不同故异官也何说文云儻也毛传以为揭也戈解见秦风无衣篇祲说文毛传皆云受也孔云戈受俱是短兵相类且祲字从受故知祲为受也受解见卫风伯兮篇又说文云或说城郭里市高悬羊皮有不当入而欲入者暂下以惊马牛曰祲故从示受会意然他书绝不经见未详是否彼毛云彼曹朝也其语助也之子是子也指下文佩赤芾者芾本作市毛传说文皆云韠也以韦为之即蔽膝也讹作芾篆文作韠严粲云蔽膝之韠以韦黼黻之黻从辵孔云左传衮冕黻珽则芾是配冕之服易困卦困于赤芾利用享祀则知芾祭祀所用也士冠礼陈服皮弁素韠玄端爵韠则韠之所用不施于祭服矣玉藻说韠之制云下广二尺上广一尺长三尺其颈五寸肩革带博二寸书传更不见芾之别制明芾之形制亦同于韠但尊祭服异其名耳言芾韠者以其形制大同故举类以晓人其礼别言之则祭服谓之芾他服谓之韠二者不同也玉藻云一命緼芾黝珩再命赤芾黝珩三命赤芾苍珩注云緼青黄之间色珩佩玉也黑谓之黝青谓之葱毛云大夫以上赤芾乘轩孔云周礼公侯伯之卿三命下大夫再命上士一命然则曹为伯爵大夫再命是大夫以上皆服赤芾于法又得乘轩故连言之诗人言候人虽一职之微然既系籍于公犹当勤率所属以各供其事今曹萇尔彼其之子非有功劳可以称者而君令其佩此赤芾至三百人之多何为也哉晋文公入曹令三百人献状亦谓其无劳窃位故责之自陈功状意正如此所以举侯人者即下章刺维鹈在梁之意旧说谓曹国以贤者为候人非是孔云诸侯之制大夫五人今有三百赤芾爱小人过度也太史公云今寻曹共公之不用僖负羁乃乘轩者三百人知唯德之不建司马贞注谓美女乘轩者彼未参证于诗中赤芾之语故耳】维鹈在梁不濡其翼【职韵】彼其【礼记作记左传後汉书俱作已】之子不称【去声】其服【叶职韵鼻墨翻兴而比也鹈鸟名尔雅云鵙也亦名洿泽郭璞云今之鹈鹕也好羣飞入水食鱼故名洿泽俗呼之为淘河陆玕云鵙水鸟形如鵙而极大喙长尺余直而广口中正赤颌下胡大如数升囊好羣飞若小泽中有鱼便羣共抒水满其胡而弃之令水竭尽鱼在陆地乃共食之故曰淘河陆佃云鵙人足其鸣自呼罗愿云洿抒水也又戽斗亦抒水器也鵙洿戽三字同音其义一也淮南子曰鵙鹕饮水数斗而不足庄子曰鱼不畏网而畏鵙鹕禽经曰淘河在岸则鱼没沸河在岸则鱼出或曰身是水沫惟臆有肉如拳昔人窃肉入河为之故名逃河魏黄初中尝有鵙集灵芝池文帝识之曰此诗人所谓污泽也曹诗刺共公远君子近小人今岂有贤智之士处于下位否则斯鸟胡为而至哉诗既以为贪而无功之物故後人祖而用之梁毛云水中之梁解见邶谷风篇濡瀆也称宜也犹言相等也其服即赤芾是也鵙之于鱼勤矣须出没污泽而後得鱼今乃在鱼梁之上窃人之鱼以食未尝濡湿其翼犹之子无功而居高位以窃禄所谓不称其服也又表記子曰君子耻服其服而无其容耻有其容而无其辞耻有其辞而无其德耻有其德而无其行是故君子衰絰则有哀色端冕则有敬色甲冑则有不可辱之色诗云维鹈在梁不濡其翼彼记之子不称其服左僖二十四年郑子华之弟子臧出奔宋好聚鹈冠郑伯闻而恶之使盗诱之八月盗杀之于陈宋之间君子曰服之不衷身之灾也诗曰彼己之子不称

其服于臧之服不称也夫】

维鹈在梁不濡其喙【叶宥韵陟救翻】彼其【国语作已】之子不遂其媾【宥韵兴而比也喙说文云鸟口也陆佃云鹈性沈水食鱼则濡其喙翼宜矣今从立于梁上非特不濡其翼又且不濡其喙小人无嘉言献替而尸居于位亦犹是也遂礼记疏云谓申也媾毛云厚也说文云重婚也孔云重婚媾者以情必深厚故媾为厚也愚按不遂其媾以楚成王语观之则所谓媾当指僖负羁也僚案共事以负羁之贤当亲之如昏媾然而无如邪正不投凡负羁所言彼必沮之故使其志意不得申遂也当时公子重耳过曹共公不礼焉负羁言于共公曰夫晋公子君之匹也君不亦礼焉共公不听而三百赤芾辈无有同负羁之言者是之谓不遂其媾也】 萑【说文作嬭云女黑色也】兮蔚兮南山朝【丰本作皐】隤【齐韵】婉兮变【说文丰本俱作𠂔】兮季女斯饥【叶齐韵读如鸡坚奚翻兴而比也萑说文云草多貌蔚蔚草木盛貌南山毛云曹南山也邵县志云曹南山在曹州济阴县东二十里按春秋盟于曹南即此山也括地志云有曹南因名为曹朝隤解见螭螭篇邹忠胤云按周礼眡祲掌十煇之法九曰隤隤者虹也虹映日而成朝焉日在东则虹在西而雨辄随之螭螭之诗所谓朝隤于西崇朝其雨是已萑蔚夤缘山岳而虹见于西又当邀雨泽之沾被见君宠方隆而未艾此诗中之画也婉说文云顺也变通作𠂔亦顺也婉变季女之容也君子之持身也如处子然故以少女日之斯饥以喻贫贱季女幽居不妄从人故不免于饥饿此与易女子贞不字之象同言小人虽肆志而趋利于上君子则守道而困穷于下也晋文公所谓不用僖负羁其即此诗所言季女与】

候人四章章四句【此章与左传合严粲所云诗即史也而郝敬疑之以为诗言三百极道其滥耳说诗不以辞害志若云汉则周之民无子遗若候人则曹之大夫有三百诗乌可以辞微也左传袭此诗以属文非重耳真有此言斯亦过于不尽信书者矣申培说第云曹君多任非人国人讽之而不着真世子贡传阙文又叶氏云汉人文章未有引诗序者魏黄初四年诏引曹诗刺远君子近小人盖诗序至此始行】

渭阳秦太子罃之舅晋公子重耳自秦返国为诸侯罃思母穆姬之恩而送其舅氏也【罃秦穆公子後为秦康公按刘向列女传云穆姬者秦穆公之夫人晋献公之女贤而有义穆姬死穆姬之弟重耳入秦秦送之晋是为晋文公太子罃思母之恩而送其舅氏也作诗曰我送舅氏云云君子曰慈母生孝子朱子苏氏说俱同】

我送舅氏曰至渭阳【韵】何以赠之路车乘黄【阳韵 赋也舅氏指重耳也尔雅说文皆云母之昆弟曰舅孙炎云舅之言旧尊长之称孔颖达云谓舅为氏者以舅之与甥氏姓必异故书传通谓为舅氏渭水名山南为阳北为阴水北为阳南为阴地理志云右扶风渭城县故咸阳也其地在渭水之北郑玄云秦是时都雍至渭阳者盖东行送舅氏于咸阳之地孔云雍在渭南替在秦东行必渡渭赠说文云玩好相送也董氏云巾车金路以封同姓象路以封异姓革路以封四卫木路以封蕃国皆诸侯也故人君之车曰路车朱子云乘黄匹马皆黄也重耳君晋实藉秦穆之力太子罃赠以诸侯之仪所以郑重此行而假以定晋也岂徒曰资其行而已哉】 我送舅氏悠悠我思【支韵亦叶灰韵新才翻又叶寘韵相吏翻】何以赠之琼瑰玉佩【叶支韵蒲眉翻亦叶灰韵蒲枚翻又叶寘韵平秘翻丰氏本作佩玉琼瑰 赋也悠悠我思

朱子云序以为时康公之母穆姬已卒故康公送其舅而念母之不见也严粲云送舅而有所思则思母也此诗念母而不言母但言见舅而勤拳不已自有念母之意读之者但觉其味悠然深长也按太祖皇陵碑云外甥见舅如见娘即此意五代齐杨愔幼时其舅源子恭问读诗至渭阳未愔便号泣子恭亦对之歔歔岂亦以思母之故与琮说文云赤玉也瑰孔云美石之名佩玉之制惟天子用纯诸侯以下则玉石杂用玉佩谓珩璜琚瑀之属以琮瑰之玉佩为赠所以象其德也陆化熙云车马之赠蒙送之归国言故取列侯仪卫若赠之以佩不必泥是俟服乃一腔离情所寄耳邓元锡云康公笃母语质而情长秦良风哉亦以置晋君録之文爰以霸也汪克寛云康公始为太子送舅而念母之不见故作渭阳之诗是固良心也後乃纳庶孽而夺嫡甥之位自是兵争不息岂非怨欲害乎良心而然乎】

渭阳二章章四句【序云康公念母也康公之母晋献公之女文公遭丽姬之难未反而秦姬卒穆公纳文公康公时为太子赠送文公于渭之阳念母之不见也我见舅氏如母存焉及其即位思而作是诗也孔氏以即位为康公即位今按左传重耳卒後七年康始即位相去甚远无缘此时复述其事而着之诗岂亦有慨于令狐之役谓秦昔日曾以厚施而晋今日竟以薄报乎然愚详味序意或只谓重耳返国即位後而康公思之耳如此则与列女传所记犹相仿佛孔说误也子贡传申培说皆以为穆公送重耳之诗然于我送舅氏一语竟不可解按古人呼母之兄弟为舅妻之父为外舅未闻呼妻之弟为舅者若诸侯于异姓大夫或亦称舅然非所施于重耳也】

羔裘豹祛晋文公释憾于寺人披也【篇名原只羔裘二字但桧郑亦有羔裘特用起语以别之披一名勃鞞字楚故又称奄楚按左传国语载骊姬谐杀太子申生遂譖二公子曰皆知之重耳奔蒲夷吾奔屈献公使寺人披伐蒲蒲城人欲战重耳不可曰保君父之命而享其生禄於是乎得人有人而较罪莫大焉乃徇曰较者吾讐也踰垣而走披斩其祛遂出奔翟及文公入披请见公使让之且辞焉曰骊姬之谗尔射予于屏内蒲城之役君命一宿女即至斩余衣袂其後余从狄君以田渭滨女为惠公来求杀余命女三宿女中宿至余於伯楚屡困何旧怨也夫祛犹在女其行乎对曰臣谓君之入也其知之矣若犹未也又将及难君命无二古之制也除君之恶惟力是视蒲人狄人余何有焉今君即位其无蒲狄乎齐桓公置射钩而使管仲相君若易之何辱命焉且不见我君其无悔乎於是吕甥冀芮畏偪悔纳公谋作乱将以己丑焚公宫宫出救火而遂杀之伯楚知之故求见公公惧遽见之曰岂不知女言然是吾恶心也吾请去之伯楚以吕郤之谋告公公潜会秦伯于王城告之乱故及己丑公宫火二子求公不获遂如河上秦伯诱而杀之是诗当即于免难後作也】

羔裘【丰氏本作求後同】豹祛【叶遇韵区遇翻】自我人居居【叶遇韵读如句俱遇翻】岂无他【丰本作它後同】人维子之故【遇韵 赋也祛孔颖达云袂口也袂是袖之大名祛是袖头之小称其通皆为袂以深衣云袂之长短反屈之及时是通祛皆为袂也玉藻云锦衣狐裘诸侯之服也君子羔裘豹饰缁衣以裼之注云君子谓大夫士饰谓袖也重耳时尚为公子未敢服诸侯之服故当服此又按申生以十二月缢于都城重耳于是时奔蒲寺人披斩重耳衣祛正奔蒲时事周十二月於夏正为十月天气已寒故服羔裘也自我人居居指斩祛事也自从也我人者我同行出奔之人也自我人者从我等同行之人於蒲城欲求得而杀之

也居通作倨前汉书郅都传云丞相条侯至贵居亦以居为倨也倨之为言傲也曰居居者毛传云怀恶不相亲比之貌盖一往傲狠而无顾惜故至于文公已踰垣而走而披尚斩其衣袂也子指披也故故旧也承上文言披之可憾如此而其後又能以吕卻之谋来告使文公得脱于难故又言岂无他人为我故旧哉而仍当与子结故旧之诅不可解也按披之言曰伊尹放太甲而卒以为明王管仲贼桓公而卒以为侯伯乾时之役申孙之矢集于桓钩钩近于袂而无怨言佐相以终克成令名今君之德宇何不宽裕也披之敷辞明到如此故文公闻之而有动焉同时有豎头须者亦不从公出亡及入求见公辞焉须曰国君而讐匹夫惧者甚衆矣渴者以告公遽见之公之旷度洪量不念旧恶如此宜乎其为霸王之器也】羔裘豹褭【宥韵释文作褭丰本作褭】自我人究究【宥韵】岂无他人维予之好【叶宥韵许侯翻 赋也褭说文云衣袂也袂既被斩而袂尚存故此章变言豹褭也究说文云穷也曰究究者穷极其恶不留余地也此指从渭滨之役而言披所自陈谓除君之恶惟力所及者也好以情言谓懽好也】

羔裘豹褭二章章四句【序云刺时也晋人刺其在位不恤其民也张鼎思云晋昭公有曲沃之逼孤危将亡而其臣又不为保障之谋故国人忧之而作是诗邓元锡云刺昵也昵故与好使私人在位也三说相近要皆无所依据子贡传申培说皆以为晋人美其大夫之辞今按尔雅云居居究究恶也其非赞词明矣愚初亦疑此诗乃晋文公为狐偃而作即投璧于河之意但以格于尔雅诂字之义故主今说朱子第谓此诗不知所谓不敢强解斯齐合阙疑之训矣】

有杕之杜晋文公好贤国人美之【出申培说子贡传同 邹忠胤云尝怪用贤如晋文能得之罪隶之卻缺未免失之负继之介推从亡之赏如投骨于地猜然而争其不言禄者仅一介之推而禄亦弗及矣今玩此诗语意母乃为龙蛇之怨而志过乎繇山饿隐欲授餐而无从此固文公所心惻也朱子亦以为此人好贤而恐不足以致之故作此诗其不敢定其世者阙其所不知也】

有杕之杜生于道左【哿韵】彼君子兮噬【韩诗作逝云及也丰氏本同】肯适我【哿韵】中心好【去声】之【支韵】曷饮食【音嗣】之【好食无叶当取之之相应为韵 兴之比也有杕之杜解见杕杜篇谦言寡弱不足恃赖也按文公以内难得国其同父兄弟如申生奚齐卓子夷吾相继沦丧其为寡特孤露可知道左郑玄云道东也黄佐云凡国面南以南为正此以知左之为东也丘光庭云日中之後树阴过东杜生道左树既寡特而阴更过东无休息之所故人不来也君子指贤人也噬即易噬嗑之噬说文云?也犹言就食也与下文饮食字相应肯反言不肯也适说文云之也我者我所也曷说文云何也犹云何从也言彼君子兮其果以就食之故而肯来我之所乎我中心诚爱好之何但欲饮食之而已按文公未得国之时父事狐偃师事赵衰长事贾它左传郑叔詹所谓有三士足以上人而从之是也厥後反国外传纪其纪善援能官方定物爱亲戚明贤良事耆老礼宾旅友故旧胥籍狐箕等十一族实掌近官诸姬之良赏其中官异姓之能掌其远官大夫食邑士食田以至工商皂隶官宰无不受饬于官其欲善无厌物色多方可知己】有杕之杜生于道周【尤韵韩诗丰本俱作右】彼君子兮噬【丰本作逝】肯来游【尤韵丰氏本作覩】中心好之曷饮食之【兴之比也周

毛传云曲也孔颖达云言道周绕之故为曲也朱公迁云道左则辟道周则迂适与游亦有辨适则将久居于其国游则时一至焉犹之邀游而已愚按此盖自惴其不足以来贤故其辞之谦退如此】

有杕之杜二章章六句【序云刺晋武公也武公寡特兼其宗族而不求贤以自辅焉此但从杕杜生解然细玩诗辞终是好贤求贤意居多】

诗经世本古义卷二十四之上

卷二十四之下

<经部,诗类,诗经世本古义>

钦定四库全书

诗经世本古义卷二十四之下

明 何楷 撰

周襄王之世诗

鳴鳩曹人美晋文公也【按左传晋文公为公子时出亡过曹曹共公不礼焉及即位伐曹执曹伯以畀宋人事在鲁僖公二十九年于是周襄王策命晋侯为侯伯曰王谓叔父敬服王命以绥四国遂盟诸侯于践土又会于温十月晋侯有疾曹伯之豎侯孺货巫史使曰以曹为解齐桓公为会而封异姓今君为会而灭同姓曹叔振铎文之昭也先君唐叔武之穆也且合诸侯而灭兄弟非礼也与卫偕命而不与偕复非信也同罪异罚非刑也礼以行义信以守礼刑以正邪舍此三者君将若之何公悦乃复曹伯此诗之作盖在曹伯复国之後其取兴于鳴鳩者以鳴鳩养子均平颂文公之待曹国与他国无异也尊之为鳴鳩而自居于子者亦犹文王之时大邦畏力小邦怀德皆怙文王如父也曰其仪不忒者则以晋与曹为兄弟之国大学所谓兄弟足法也其曰正是四国则亦惟晋为盟主始足以当之襄王策命中所谓以绥四国者也】

鳩【前汉书後汉书说苑列女传释文丰氏本俱作尸】鳩在桑其子七【质韵】兮淑【丰本作叔後同】人君子其仪【崔灵恩集注作义】一【质韵】兮【礼记淮南子作也下同】其仪一【同上】兮心如【大戴礼作若】结【叶质韵激质翻】兮【淮南子作也兴也】鳴鳩鸟名亦作尸鳩尔雅埤苍皆云鵲鳩也陆机云一名桑鳩郭璞云江东呼为获谷扬雄云自关东西梁楚之间谓之结诰周魏之间谓之击谷自关而西或谓之布谷罗愿云又呼拨谷又呼郭公以此鸟鸣时布种其谷似鵲长尾牝牡飞鸣翼相摩拂取其骨佩之宜夫妇又名鸚陆佃云一名抔黍扬雄又以为戴胜谢氏云案戴胜自生穴中不巢生而方言云戴胜非也毛传云鳴鳩之养其子朝从上下暮从下上平均如一严粲云即郯子所谓鳴鳩氏司空也鳴鳩平均故为司空平水土陆佃云鳴鳩有均一之德盖其哺子朝自上而下暮自下而上者均也其子在梅在棘在榛而已则常在乎桑者一也又云祝鳩鳴鳩皆壹鸟也故有尸祝之号庄子曰庖人虽不治庖尸祝不越樽俎而代之矣尸鳩性壹而慈祝鳩性壹而孝故一名尸一名祝礼赍以慈告祝以孝告是也其子鳴鳩之子也罗云鳩亦子之多者今鳩四时有子鵲每月有子愚按鳴鳩以况晋文公其子以况列国晋文为伯主而列国依之谓之列国之母可也淑通作倬说文云善也淑人君子言此淑人之君子美晋文公也淑人以德言君子以位言仪说文云度也毛传云义也凡举动之合义而有法度者谓之仪其仪一兮孔穎達谓执义均平用心如一是也如文公之待曹国与他国无异是之谓一又礼记子曰言有物而行有格也是以

生则不可夺志死则不可夺名故君子多闻质而守之多志质而亲之精知略而行之君陈曰出入自尔师虞庶言同诗云淑人君子其仪一也亦会意取义结带纽也以组为之玉藻云绅鞶结三齐绅带也鞶蔽膝也绅蔽结三者皆长三尺故曰三齐带之交处合并其纽以约之则带始结束而不可解矣故名为结心如结兮犹拳拳服膺之意古人视不下于带曹人怀文公之恩耿耿在心如束带之结言其不可解刘向云历山之田者善侵畔而舜耕焉雷泽之渔者善争陂而舜渔焉东夷之陶器窳而舜陶焉故耕渔与陶非舜之事而舜为之以救败也民之性皆不胜其欲去其实而归之华是以苦窳之器争鬪之患起争鬪之患起则所以偷也所以然者何也繇离诚就诈弃朴而取伪也追逐其末而无所休止圣人抑其文而抗其质则天下反矣诗云尸鸠在桑其子七兮淑人君子其仪一兮传曰鸣鸠之所以养七子者一心也君子所以理万物者一仪也以一仪理物天心也五者不离合而为一谓之天心在我能因自深结其意于一故一心可以事百君百心不可以事一君是故诚不远也夫诚者一也一者质也君子虽有外文必不离内质矣按向此论于诚一感通之理深有合焉曹人思文公之德亦犹是也又韩婴云夫治气养心之术血气刚强则务之以调和知虑潜深则一之以易谅勇毅强果则辅之以道术齐给便捷则安之以静退卑慑贪利则抗之以高志容衆好散则劫之以师友怠慢褻弃则慰之以祸灾愿婉端慤则合之以礼乐凡治气养心之术莫怪繇礼莫优得师莫慎一好好一则博博则精精则神神则化是以君子务结心乎一也荀子曰无冥冥之志者无昭昭之明无惛惛之事者无赫赫之功行衢道者不至事两君者不容目不两视而明耳不两听而聪螭蛇无足而飞梧鼠五技而穷诗曰鸣鸠在桑其子七兮淑人君子其仪一兮其仪一兮心如结兮故君子结于一也淮南子云贾多端则贫工多技则穷心不一也故木之大者害其条水之大者害其深有百技而无一道理虽得之弗能守故诗曰淑人君子其仪一也其仪一也心如结也君子其结于一乎以上皆断章取义虽非诗本旨而名理自佳故备录之】 鳴【丰本作尸後同】 鳩在桑其子在梅【叶支韵莫悲翻丰本作某】 淑人君子其带伊丝【支韵】 其带伊丝【同上】 其弁伊騂【支韵周礼注大郑引此作綦丰本亦作綦 兴也鳴鳩在桑而其子七兮之中有飞在梅者兴曹伯也子在梅则不得与其母同在桑矣时曹伯既被执不得齿于诸侯之列故云然其带伊丝以下文公所服也带大带也伊惟也助句辞丝素丝也按玉藻说大带之制天子诸侯大夫皆素带广皆四寸素熟绢也大夫而上带皆用素惟辟缘之色不同君朱緑大夫元华其辟缘之制亦不同天子诸侯皆终辟谓终竟此带尽緑之但天子用朱为里诸侯则不朱里耳重言其带伊丝复句以致其讚叹非别有意弁皮弁也礼记注郑云弁名出于盘盘大也所以自寛大郝敬云弁制大于冠古冠止撮发弁下覆额周礼司服职云凡兵事韦弁服眡朝则皮弁服凡甸冠弁服凡凶事服弁服凡吊事弁经服弁师职云王之皮弁会五彩玉璫象邸玉笄王之弁经弁而加环经诸侯及孤卿大夫之冕韦弁皮弁弁经各以其等为之薛氏图云韦弁一名爵弁诗曰韎韐有奭以作六师士冠礼曰爵弁服韎韐则凡兵事韦弁服固爵弁也冠弁服弁亦皮弁也盖上文言眡朝则皮弁服下文言凡吊事弁经服弁经亦皮弁而加环经则冠弁服弁皆为皮弁明矣郊特牲曰皮弁素服而祭素服以送终也此凡凶事冠皮弁服之证也春秋传曰卫献公射鸿于囿二子从之不释皮冠而与之言又曰皮冠以招虞人此凡田事服皮弁服之证也郑氏谓冠弁委貌其服缁布衣亦积素以为裳服弁丧冠也其服斩衰齐衰弁经者如爵弁而加环经皆非是丧服小记曰诸侯吊必皮弁锡衰弁师曰王之弁经弁而加环经此弁经服皮弁而加环经之证也韦弁爵弁也故弁师有韦弁而无爵弁冠弁服弁皆皮弁也故弁师有皮弁而无冠弁服弁陆佃亦同此说且云韦弁以

韎韦为之故曰韦弁一名爵弁其色则象爵故也皮弁以鹿皮为之故曰皮弁一名骐弁其色则象骐故也今按薛氏五弁之说未详是否但据孔云知此是皮弁者以韦弁即戎冠弁从禽弁經又是吊凶之事非诸侯常服也且不得与丝带相配惟皮弁是诸侯视朝之常服又朝天子亦服之作者举其常服故知是皮弁也郝云韦弁去毛熟皮以为弁皮弁以皮为质而饰以采玉非纯用皮也弁制戔起故宜皮骐毛云骐文也说文云马青骊文如博綦也一云苍艾色此谓弁色如骐马之文也周礼注引此作綦书顾命四人綦弁马融本亦作骐然则骐綦古盖通用綦亦帛之苍艾色者解见说文又郑玄云骐当作 以玉为之按周礼王之皮弁会五采玉璫璫又作 郑衆注云会缝中也綦结也皮弁之缝中每贯结五采玉以为饰谓之綦引此诗云其弁伊綦是则骐与綦通而綦又与璫通璫即 说文所谓弁饰也徐云谓缀玉于武冠若綦子之列布也以周礼考之士之服自皮弁而下如大夫之服是尊卑皆得服皮弁所异者耳据弁师之文云诸侯及孤卿大夫之皮弁各以其等为之不言士之皮弁旧说谓天子璫饰十二玉五采侯伯 饰七子男璫饰五玉皆三采孤璫饰四三命之卿 饰三再命之大夫璫饰二玉皆二采士皮弁之会无结饰今如以骐为皮弁之色则无以别于卑者书所谓四人骐弁即士服也故郑笺以骐当作 而孙毓亦以笺义为长更考之尚书周礼古文骐綦 三字通用则郑说为可信矣诗之兴意以鳴鳩于或他适而鳴鳩但在桑不移故以衣服有常象之赞美衣服亦有想望丰采之意】鳴鳩在桑其子在棘【职韵】淑人君子其仪不忒【职韵】其仪

不忒【同上】正是四国【职韵 兴也陆佃云棘卑小于梅愚按始在梅降而在棘时曹地既被分不能成其为国故有在棘之象忒说文云更也毛云疑也人无常德故可疑其仪不忒者明白洞達表里如一不令人有所疑惑也文公灭曹亦曹自有以取之既而复封曹则无利曹之心而其心事亦可与天下共见矣是以谓之不忒也又礼记子曰为上可望而知也可为下可述而志也则君不疑于其臣而臣不惑于其君矣尹吉曰惟尹躬及汤咸有壹德诗云淑人君子其仪不忒亦会意取义正者飭正之谓四国四方之国正是四国言足为四方诸侯盟主也杨倞云正身任物则四国皆化吕覽云昔者圣王成其身而天下成治其身而天下治故善响者不於响於声善影者不於影於形为天下者不於天下於身诗曰淑人君子其仪不忒其仪不忒正是四国言正诸身也荀子曰人皆乱我独治人皆危我独安人皆失丧之我独案起而制之故仁人之用国非特将持其有而已也又将兼人诗曰淑人君子其仪不忒其仪不忒正是四国此之谓也必将修礼以齐朝正法以齐官平政以齐民然後节奏齐于朝百事齐于官衆庶齐于下如是则近者竞亲远方致愿大学引此诗而解之曰其为父子兄弟足法而後民法之也今按曹与晋为兄弟之国文公之所以处曹者得其道是其为兄弟足法也诗取象鳴鳩在桑其子七兮淑人君子其仪一兮则父子足法之道亦在于此矣】 鳴鳩在桑其子在榛【真韵亦叶先韵则前翻】淑人君子正是国人【真韵亦叶先韵如延翻】正是国人【同上】胡不万年【先韵亦叶真韵奴因翻 兴也榛解见简兮篇陆佃云榛卑小于棘愚按既自梅降而棘又自棘降而榛愈降而愈卑矣曹伯失国被执至以畀宋人则几与齐民无异故其象如此又按陆佃云先实者梅後实者棘先实者棘後实者榛故诗以此为序今按曹伯被执于春三月而复国于冬十月则历三树成实之时矣诗所谓详举以兴也正是国人言文公能正我曹国之人无礼而伐之既服而赦之所谓正也胡不万年则祝其寿考之辞也焦氏易林云鵲鵲鳴鳩专一无尤君子是则长受嘉福又韩婴云玉不琢不成器人不学不成行家有千

金之玉不知治犹之贫也良工宰之则富及子孙君子学之则为国用故动则安百姓议则延民命诗曰正是国人胡不万年此断章取义与诗旨无涉】**鵙鵙**四章章六句【朱子谓此诗不知何所指子贡传中培说皆以为曹叔为政有度国人美之而作是诗按曹叔名振铎文王子也武王克殷後始封曹或又以为美僖负羈或又以为美公子臧然于诗人托兴鵙鵙而并及其子之意终无关着愚不敢谓然序则云刺不壹也在位无君子用心之不壹也郑玄诗谱亦系之共公时今按诗中不见有刺意】

羔裘如濡郑人美其大夫之词【出朱传】疑美叔詹也【篇名原只羔裘二字但桧唐亦有羔裘特全用起句以别之 按叔詹郑之公族也厉公季年齐桓始伯时詹为执政用兵伐宋又不朝齐齐人以其贰也将讨之郑乃使詹往谢齐因执之未几詹闻其故逃于鲁遂自鲁复归郑文公十二年齐桓会诸侯盟于甯母大子华以泄氏孔氏于人氏为诉管仲曰郑有叔詹堵叔师叔三良为政未可间也齐桓乃止楚子过郑入享郑夜出文公送于军取郑二姬以归叔詹曰楚王其不没乎为礼卒于无别无别不可谓礼将何以没三十六年晋公子重耳过郑弗礼焉叔詹谏曰臣闻之亲有天用前训礼兄弟资穷困天所福也弃此四者以徼天祸无乃不可乎弗听叔詹曰若不礼焉则请杀之亦弗听重耳反国六年伐郑郑人以名宝行成弗许曰予我詹而师退詹请往公弗许詹固请曰一臣可以赦百姓而重社稷君何爱于臣也郑人以詹予晋人晋人将烹之詹曰臣愿获尽辞而死固所愿也公听其辞詹曰天降郑祸使淫观状弃礼违亲臣曰不可晋公子贤明其佐皆卿才若复其国而得志于诸侯祸无赦矣今祸及矣尊明胜患知也杀身赎国忠也乃就烹据鼎耳而疾号曰自今以往知忠以事君者与詹同乃命弗杀厚为礼而归之郑人以为将军叔詹始终忠于其国故使齐桓闻其名而晋文为之礼临难不避舍命不渝也累建正论邦之司直也郑有三良同时为政则所谓三英粲兮者也是诗在郑风非叔詹无足当此美者而公羊谷梁皆谬以詹为佞人何不据詹之行事本末而观之乎叔詹一作被瞻吕不韦云被瞻忠于其君而君免于晋患也行义于郑而见说于文公也故义之为利博矣】

羔裘【丰氏本作求後同】如濡【虞韵亦叶尤韵而繇翻】洵【韩诗外传作恂】直且侯【尤韵亦叶虞韵洪孤翻】彼其【韩诗外传刘向新序俱作己】之子舍【上声】命不渝【虞韵亦叶尤韵夷周翻韩诗外传作偷 赋而比也羔解见羔羊篇裘说文云皮衣也按羔裘以緇衣为裼则所用者乃黑羔之皮耳陆佃云羔性羣而不党又皆跪乳象礼其德宜施于朝故古者以为朝服陈祥道云羔取其有礼黑取其合道以道合礼以礼成道固先王之所尚也如濡毛传云润泽也孔云如似濡湿谓皮毛光色润泽也洵通作恂说文云信也直说文云正见也左传云正曲为直荀子云是谓是非谓非曰直且说文云荐也侯诸侯也洵直且侯言信哉其正直之德可以荐之于诸侯为人君所任用也下文言舍命不渝正见其直彼其之子谓此服羔裘之大夫也舍通作舍说文云释也命躯命之命渝说文云变汗也舍命不渝虽祸害当前舍置其躯命以殉之而生平之所自守者终不少变如叔詹以尽忠于国之故而见执于齐桓又见执于晋文历险不挫可谓舍命不渝矣刘向云非至仁孰能以身试诗曰舍命不渝此之谓也韩诗外传云崔杼弑庄公合士大夫盟盟者皆脱劔而入言不疾指血至者死所杀者十余人次及晏子奉杯血仰天而叹曰恶乎崔杼将为无道而杀其君于是盟者皆视足崔杼谓晏子曰子与我吾将与子分国子不与我杀子直兵将推之曲兵将鉤之吾愿子之图之

也晏子曰吾闻留以利而倍其君非仁也刳以刃而失其志者非勇也诗曰莫莫葛藟施于条梅恺悌君子求福不回嬰其可回矣直兵推之曲兵鈎之嬰不之革也崔杼曰舍晏子晏子起而出授纓而乘其仆驰晏子抚其手曰麋鹿在山林其命在庖厨命有所悬安在疾驱安行成节然後去之诗曰羔裘如濡洵直且侯彼其之子舍命不渝晏子之谓也愚按所以取羔裘如濡为比者染人之事自一染为纁以至于七入为緇则无可变矣緇黑也羔裘如濡正黑色也故以为舍命不渝之况】羔裘豹饰【职韵】孔武有力【职韵】彼其【左传韩诗外传俱作已】之子邦之司直【职韵赋而比也豹似虎而小圆文毛云豹饰缘以豹皮也孔颖达云唐风羔裘豹祛羔裘豹然则缘以豹皮为祛也礼君用纯物臣下之故饰异皮按玉藻云羔裘豹饰缁衣以裼之孔尔雅云甚也武威也朱子云豹甚武而有力故服其所饰之裘者如之按郑以叔詹为将军亦谓其人之威望足以居之非以勇力为有力也司主也邦之司直能为邦国主持直道也危言危行上足正君下足善俗皆在其中非徒其所自守者不渝而已左襄二十七年子罕谏向戌弭兵求赏君子曰彼已之子邦之司直其乐喜之谓乎】羔裘晏【叶翰韵乌肝翻】兮三英【丰本作瑛云以玉为裘纽其数三也】粲【翰韵亦叶霰韵仓旬翻】兮彼其【韩诗外传作已】之子邦之彦【霰韵亦叶翰韵鱼肝翻】兮【赋而比也晏温淮南子注云三辅人以日出清济为晏晏而温英朱子以为裘饰但三英之制未详范祖禹谓五紵五緇五总皆所以英裘是之谓三矣今按合两为一曰总分其界限以施组紉曰緇组紉之突起曰紵谓紵为英裘之饰是矣谓总与緇皆为英饰则非也愚谓英即英杰之英尔雅疏云德过千人曰英国策注云才出万人曰英未详孰是要之才德出衆之称耳三英即管仲所谓三良叔詹堵叔师叔是也粲通作灿说文云灿烂明滢貌三良同时为政即庙堂之上灿然有光彩也彼其之子专美叔詹也并举三英而独美之子者意作诗之时惟叔詹在抑或叔詹之贤优于堵叔师叔耳彦说文云美士有文也此又承上章而进之言虽其节操劲特足以主张直道然涵养之深不随不激故其见于外者自有文理可观亦如羔裘之晏然温和与人体相适因又美之曰邦之彦也又按吕氏春秋载郑君问于被瞻曰闻先生之义不死君不亡君信有之乎被瞻对曰有之夫言不听道不行则固不事君也若言听道行又何死亡哉故被瞻之不死亡也贤乎其死亡者也据此以观则詹之贤盖传之旧矣】羔裘三章章四句【序云刺朝也言古之君子以风其朝焉今按诗中无刺意必谓称彼所以讥此则凡美诗皆可谓之刺诗矣序疑郑无贤臣足以当此者故但归之思古耳子贡传申培说则云郑子皮卒子产思之追颂焉按左昭十六年郑六卿伐晋韩宣子于郊宣子曰二三子请皆赋起亦以知郑志子产赋郑之羔裘宣子曰起不堪也是则此诗古已有之其非子产所自作明矣】

閼宫颂鲁僖公始郊也诗中所颂之事三焉郊而配后稷一也以天子礼乐祀周公二也美祔庙三也而郊实自僖公始其诸繇季孙行父之请命于周欤颂虽夸然有微辞史克作之【鲁之郊祀与大尝禘不知其所自始明堂位云成王以周公为有勲劳於天下命鲁公世世祀周公以天子之礼乐是以鲁君孟春乘大路载弧韍旗十有二旒日月之章祀帝于郊配以后稷天子之礼也季夏六月以禘礼祀周公于太庙牲用白牡尊用牺象山罍尊用黄目灌用玉瓚大圭荐用玉豆雕篋爵用玉琖仍雕加以璧散璧角俎用梲蕨升歌清庙下管象朱干玉戚冕而舞大武皮弁素积裼而舞大夏昧东夷之乐也任南蛮之乐也纳夷蛮之乐于太庙言广鲁于天下也祭统云昔者周公旦有勲劳于天下周公既没成王康王追念周公之所以勲劳者而欲尊鲁故赐之以重祭外祭则郊社是也内祭则大尝禘是也夫大尝禘升歌清庙而下

象管朱干玉戚以舞大武八佾以舞大夏此天子之乐也康周公故以赐鲁也子孙纂之至于今不废所以明周公之德而又以重其国也礼运篇孔子曰鲁之郊禘非礼也周公其衰矣祀之郊也禹也宋之郊也契也是天子之事守也故天子祭天地诸侯祭社稷祝嘏莫敢易其常古是谓大假李氏云礼记之书如礼运以为鲁不当郊禘如明堂祭统以为鲁当郊禘其异同如此当从礼运之说程子云说者以周公能为人臣所不能为之功故得用人臣不得用之礼夫人臣岂有不能为之功哉使功业过于周公亦人臣所当为之天下之事非人臣为之而谁为之成王之赐伯禽之受皆非也高郢云自天子至于庶人尊卑贵贱待礼而别丰者不可杀杀者不可丰仲尼不臣门人非君也季札不嗣吴爵非长也周公不王而以礼乐王者是以非礼诬周公也设欲诬周公以非礼曾谓昊天上帝亦可诬乎奈何使鲁人郊诗曰尔之教矣人胥効矣鲁侯用王礼其臣亦用侯之礼故季氏舞八佾旅泰山设公庙歌雍彻嗟乎礼之不早辨也如此古者父为天子诸侯子为士祭礼从子不得从其父若享非礼之祭是周公不得为圣也知其不享是成康祇以王者礼乐饒周公于鲁矣安在其广乎且周公之绩孰与伊尹佐商伊尹不过号为保衡至于沃丁太戊亦不加以王礼或谓周公叔父也于伊尹而为亲故尊而异之夫太伯太王之元子三以天下让于王季王季得之以传祚于文武及武王克纣追王太王王季文王而不追王太伯岂武王忘太伯之德而不亲乎盖以等威之礼名分之别为万代之準不为一人私也周公有火勲于周土田附庸以益之则可桓鬯圭瓚以赐之则可若天子礼乐成康所恃以为尊也胡可以假人成康虽欲尊于周公伯禽其忍受之以出僭其君入其父乎若周分躬制礼乐坟土未乾而子孙不克负荷乱王者之度孔子称其衰不亦宜乎张氏云雒诰曰佅来毖殷乃命宁予以桓鬯二卣曰明禋拜手稽首休享予不敢宿则禋于文王武王观此书周公不敢当成王桓鬯之礼则天子之礼乐公其敢当乎马端临云夫所以祀周公以天子之礼乐者如乐用宫悬舞用八佾以天子所以祭其祖者用之于周公之庙谓之尊周公可也至于郊祀后稷以配天禘者禘其祖之所自出而以其始祖配之则非诸侯之所当僭且郊禘所祀未尝及周公则何名为报周公之勲劳而尊之乎以其祖宗之勲劳而许其子孙僭天子之礼乐以祭之已非矣况所祀者乃天子之太祖而本非有勲劳之臣乎不知成王何名而赐之伯禽又何名而受之孔子曰杞之郊也禹也宋之郊也契也是天子之事守也愚尝因是而考论之礼制之陵夷非一朝一夕之故其所繇来者渐矣盖周之封杞宋也以其为二王之後俾之修其礼物作宾于王家以奉禹契之祀而禹契天子之祖也不可以诸侯之太祖祀之故许其用天子之礼然特许其用天子之礼祀禹契之庙未必许其郊天也夷王以下君弱臣强上陵下僭宋因其用天子之礼乐于禹契之庙而禹契则配天之祖也遂并僭行郊祀上帝之礼焉此夫子所以有天子之事守之叹也至于鲁则周公本非配天之祖而稷嘗之祀元未尝废无假于鲁之郊禘也乃因其可以用天子之礼乐于周公之庙而并效杞宋之尤则不类甚矣明堂位首言命鲁世世祀周公以天子之礼乐又云季夏六月以禘礼祀周公于太庙牲用白牡牺象云云即此二言观之可见当时止许其用郊禘之礼乐以祀周公未尝许其遂行郊禘之祀後來乃至于禘嘗郊稷祀天配祖一一用天子之制所谓穿窬不戢遂至斩关作俑不止遂至用人亦始谋之未善有以肇之也左传宋公享晋侯于楚丘请以桑林荀偃辞荀偃士句曰诸侯鲁宋于是观礼鲁有禘乐宾祭用之宋以桑林享君不亦可乎乃知鲁宋不特僭天子之礼乐以祀郊禘虽燕享宾客亦用之矣罗泌云董子之说曰成王之使鲁郊盖报德之礼也然则仲舒亦以为成王之与之矣是不然礼之有天子诸侯自伏羲以来未之改也成王周之显王也盖亦谨于礼矣而且乱之则成王其惑矣此刘原父所以谓使鲁郊者必

周而必非成王盖平王以下固亦未之悉尔始鲁惠公使宰让请郊庙之礼于天子桓王使史角往惠公止之其後在鲁於是有墨翟之学鲁之用郊正亦始于此矣夫鲁惠公之止之则是周不与之矣不与而鲁用郊自用之也昔有荆人请大号者周人不许荆人称之然则鲁之郊禘可知矣两观大辂万舞冕皐有不自於兹乎使成王已与鲁则惠公不请矣陈氏云诸侯之有郊禘东迁之僭礼也故曰秦襄公始称诸侯作西峙祠白帝僭端见矣位在藩臣而胪于郊祀君子惧焉平王以前未之有也记礼者以为成王赐之以康周公按卫祝鮀之言曰周公相王室以尹天下于周为睦分鲁公以大辂大旗夏后氏之璜封父之繁弱殷氏六族以昭周公之德予之土田陪敦祝宗卜史备物典册官司彝器则成王命鲁不过如此隐公考仲子之宫问羽数于衆仲周公阅来聘飨有昌歜白黑彤盐周公以为备物辞不敢受卫甯武子来聘燕之赋湛露及彤弓武子不答赋曰诸侯朝正于王于是赋湛露诸侯故王所恂而献其功於是乎赐之彤弓假如记礼之言得用郊禘兼四代服器官祝鮀不应不及况鲁行天子之礼久矣隐公何以始问羽数阅何以辞备物之享甯武子何以致讥于湛露彤弓于以见鲁僭未久上自天子之宰至于兄弟之国之卿苟有识者皆疑怪逊谢而鲁人并无一语及于成王之赐以自解杨慎云成王命君陈拳拳以遵周公之猷训为言猷训之大无大于上下之分岂其命伯禽而首废之哉且襄王之世衰亦极矣犹不许晋文公之请隧而谓成王不如襄王乎况伯禽之贤虽不及周公然贤于晋文公远矣岂肯受之哉礼又曰成王康王赐鲁重祭成王既赐康王又何加焉此盖不能自掩其伪矣然则鲁之僭礼何始也曰着在春秋与鲁颂春秋桓公五年书大雩雩之僭始于桓也闵二年书曰禘于庄公禘之僭始于闵也僖三十一年书曰四卜郊郊之僭始于僖也鲁颂閟宫三章首言乃命鲁公俾侯于东锡之山川土田附庸无异典也其下乃言周公之孙庄公之子以及于享祀不忒皇皇后帝皇祖后稷盖鲁自伯禽而下十有八世自僖公始有郊祀而诗人颂之则其不出于成王之赐益明矣鲁之君臣恐天下议已乃借名于成王伯禽以掩天下之口鲁之陋儒諂佞遂作明堂位以文其过甚矣其无忌惮也胡安国云杨子曰天子之制诸侯庸节节莫差于僭僭莫重于祭祭莫重于地地莫重于天诸侯而祀天其僭极矣圣人於春秋欲削而不存则无以志其失为後世戒悉书之乎则岁事之常有不胜书者是故因礼之变而书于策或以卜或以时或以望或以牲或以牛於变之中又有变焉者悉书其事又云昔者周公郊祀后稷以配天此成王亮阴之时位冢宰摄国政行天子之事也鲁何以得郊邹忠胤云春秋书郊者凡九胡氏所谓因失礼之中又有失焉则书于策是也相沿至哀公时尚未明郊之说故其问曰寡人闻郊而莫同何也夫子对以冬至之郊主日配月啓蛰之月则又祈谷于上帝鲁无冬至大郊之事降杀于天子是以不同然则鲁虽僭郊而犹未敢全僭鲁史讳之亦略之终春秋之世不书用郊若见为尝事云尔迨其後孟献子曰正月日至可以有事于上帝则将并与冬至之郊僭拟之而明堂位亦言鲁君孟春乘大路载弧韝十有二旒日月之章祀帝於郊配以后稷此於龙旗承祀之义又有加焉世儒诋为妄作不知此正鲁末造僭郊之实录而诡托之成王赐耳愚按平王使史角如鲁谕止郊庙之礼事见竹书在平王四十二年与吕氏春秋言鲁惠公请郊庙之礼於周天子使史角往报之者其事相合然则在平王之世鲁实未尝郊观夫子作春秋始于隐公历桓庄闵三君未有以郊书者及僖三十一年始书夏四月四卜郊不从乃免牲犹三望而鲁颂亦颂僖之郊然则郊之自僖始此其大据也夫自惠隐而下皆未敢用郊而僖何以敢翬为之盖尝思之而得其故駟序云僖公能遵伯禽之法鲁人尊之於是季孙行父请命于周而史克作是颂孔氏但见行父于文六年始见春秋而史克于文十八年始见左传则以为皆文公时人而不知僖文相去甚

近行父之父季支卒于僖之十六年行父为鲁世卿虽幼当即嗣其位且僖在位三十三年而卜郊尚在三十一年意先是行父必曾请命于周而周天子许之故僖于是始郊而史克为之作颂序所谓请命作颂者正指郊而言而左传偶舛其事正赖有此序以补其阙亦一快也又按孔颖达着左传正义於隐元年春王正月传下有云鲁僖公之时周王岁二月东巡守至于岱宗柴季孙行父为之请于周太史克为之作颂孔之此说必有所本今考僖公之时在周则惠王襄王而二王俱未尝东巡惟僖公二十八年襄王有狩于河阳之事而僖公常朝于王所正在春秋书鲁四卜郊之先乃始恍然悟曰行父之请在此时也以僖公数从伯讨遂为望国又谨守臣节再朝王所当亦襄王所心嘉者故攀伯得文请隧之後因缘惠公前朝之请且小变其说曰我不敢当长至之郊以上擬于天子但期得行祈谷之郊略表异于诸国而已宜襄王之重违其意而遂曲徇之也然则谓鲁郊始于僖公信矣若夫马氏谓成王赐鲁以天子礼乐祀周公於周公庙得用禘礼者此其理尤确然禘乃王者之大祭礼大传谓王者禘其祖之所自出以其祖配之则鲁将安禘岂信禘文王乎窃疑祭统所云大尝禘者乃谓于鲁太庙尝祭之时而仿周天子禘祭之礼故名之大尝非谓鲁有大尝又有禘也观祭统升歌清庙等语与明堂位言以禘礼祀周公者一一相合其曰六月者据夏正而言正周之八月而闕宫之颂亦第言尝而不及禘则鲁祭但用禘礼而非实有禘祭可知已若春秋书闵二年五月吉禘于庄公亦是僭祀庄公以王者大禘之礼庄公自立庙未丧毕而吉祭故春秋以为讥此诗末章所言新庙即此庙也庄于僖为祢因言郊而及大尝矣又附及祢庙虽似节节侈言其盛而皆有深刺之意存焉曰是飨是宜隐然讥其不宜也曰周公皇祖亦其福女隐然讥其未必福也曰万民是若隐然讥其不为万民所若也不以颂而以规抑亦可谓良史乎】

闕宫有恤实实枚枚【灰韵亦叶支韵谟悲翻】赫赫姜嫄其德不回【灰韵亦叶支韵乎为翻】上帝是依【叶支韵鱼羈翻亦叶灰韵鸟回翻】无灾【陆德明本作灾云又作菑】无害弥月不迟【支韵亦叶灰韵陈回翻】是生后稷【职韵】降之百福【叶职韵笔力翻苏辙本自章首至此为第一章】黍稷重【说文作種陆本作种】穆【叶职韵録直翻陆本说文俱作稊】植穉菽【说文丰氏本俱作尗】麦【叶职韵乞力翻】奄有下国【职韵】俾【陆本作卑】民稼穡【职韵】有稷有黍【语韵】有稻有秬【语韵】奄有下土缙禹之绪【语韵苏本自黍稷起至此为第二章 赋也孔颖达云作者将美僖公追迹远祖上陈姜嫄后稷至于太王文武爰及成王封建之辞鲁公受赐之命言其所以有鲁之繇也闕说文云闭门也朱子以为深闕也宫亦庙之称闕宫孟仲子曰是祿宫也祿义见生民篇按春秋元命苞云姜嫄游闕宫其地扶桑履大人迹生稷然则此闕宫乃帝嘗时之祿宫禋祀之处也恤说文云静也当未郊禘之时则无人至其处故其宫门常闭而清静也实华而不实之实谓草木之实也枚伐其条枚之枚说文云干也徐锴云自条而出也闕宫在郊其地林木蓊鬱故有实有枚纬书所谓其地扶桑是也重言之者见其非一树也赫赫郑元云显着也姜嫄解见生民篇其德不回者郑云其德贞正不回邪也依朱子云犹眷顾也上帝是依者严粲云天用是凭依其身使之有于也无灾无害义同生民篇弥月即诞弥厥月之义孔云家语执轡篇大戴礼本命篇皆云人十月而生此云弥月不迟故知终人道十月而生子美其不迟晚也后稷解亦见生民篇降说文云下也曰百福者稷以种植封是降之百谷即降之百福也先言黍稷后言菽麦者立言之序与七月篇同种稷植穉则诸谷皆有故括之其中也重本作种穆亦作稊解见七月篇植说文云早种也穉说文云幼禾也贾思勰云二月三月种者为植禾四月五月种者

为稗禾重谓熟之迟者穆谓熟之疾者植谓種之早者穉谓種之晚者奄说文云覆也奄有下国朱子云言封之郤也俾说文云使也種曰稼斂曰穡俾民稼穡者谓教天下之人皆知稼穡也古人五谷特重黍稷然上文先言黍此先言稷彼以所属五行相生之次为序此则以種植先後之次为序稷为首種尚书考灵耀有云日中星鸟可以种稷是一岁之初所先種者惟稷也稻解见鸛羽七月篇秬解见生民篇稻秬乃谷之嘉者承上文言俾民稼穡者不特有稷有黍而已又有嘉蔬之稻黑黍之秬皆使人徧种之也奄有下土者辅广云指教民稼穡之事而言也使天下之民皆得以稼穡于其土地则是后稷奄有其土也周礼职方氏掌天下之国辨其九谷之数扬州荆州其谷宜稻青州其谷宜稻麦雍州冀州其谷宜黍稷幽州其谷宜三种注黍稷稻也兖州其谷宜四种注黍稷稻麦也豫州并州其谷宜五种注黍稷菽麦稻也所谓奄有下土也缙说文云继也禹与稷同时为舜臣绪本丝端之名事业之有端可寻者亦谓之绪禹平水土後有稷播百谷而後民得粒食若无稷则禹虽平水土何益于民是禹未竟之绪赖稷而缙也】后稷之孙实维大【音泰後同】王【阳韵】居岐之阳【韵】实始翦【说文作戡】商【阳韵】至于文武缙大王之绪【语韵】致天之届于牧之野【叶语韵上与翻】无贰无虞上帝临女【音汝後同语韵】敦商之旅【语韵丰本此句在克咸厥功下】克咸厥功【毛郑本自后稷至此为第二章苏本作第三章】王曰【礼记注作谓】叔父【虞韵】建尔元子俾侯于鲁【虞韵】大启尔宇【虞韵】为周室辅【虞韵朱传自后稷至此为第二章】乃命鲁公【东韵】俾侯于东【韵】锡之山川土田附庸【叶东韵读如融余中翻苏本自王曰至此为第四章赋也大王距后稷不知几代其世次莫能详也翦通作揃说文作戡其义皆训灭也朱子云大王自幽徙居岐阳四方之民咸归往之於是而王迹始着盖有翦商之渐矣陆化熙云兴隆在周则凌替在商故云实始翦商言其势非言其志也胡廷芳云愚读诗至大王实始翦商未尝不慨後之论者皆不能不以辞害意也何以言之大王盖当祖甲之时去高宗中宗未远也後二百有六年商始亡且武王十三年以前尚臣事商则翦商之云太王不但不出于口亦决不萌之於心特以其有贤子圣孙有传立之志於以望其国祚之緜洪岂有一毫觊觎之心哉议者乃谓大王有是心太伯不从遂逃荆蛮是大王固已形之言矣夫以唐高祖尚能骇世民之言曾谓大王之贤反不逮之乎曾巩云大王去邠居岐盖诸侯之能兴邦者本不必云肇王迹也武王既有天下推其寢盛之由故曰肇王迹所谓实始翦商者殆因肇王迹之语言之过耳至于文武缙大王之绪即书所称文考文王克成厥勲予小子其成厥志之谓也致说文云送诣也届说文云极也致天之届以商家之天命言天命穷极于商故武王有牧野之举所以致天絕商之意于彼牧野也徐光啓云紂恶苟有丝毫未稔天命苟有丝毫未絕则武王无丝毫变节之意惟到天命穷极则牧野之师不得不兴矣即此二字形容武王顺天应人之意已尽无贰二句武王誓师之辞也无通作毋戒之也贰者不一其心之谓虞通作虑忧疑之意临犹云眷顾也女指凡在行间之羣臣及诸侯也乱臣十人诸侯八百皆一意伐商者然苟有成败利钝之虞则未免贰其心矣赫赫帝天临之在上必眷顾于汝师至必克勿复有他虑也敦说文云怒也商之旅即大明篇所云殷商之旅其会如林者克能也咸说文云皆也悉也以劳定国曰功言此怒商旅之来迎敌者既闻誓辞之後人人鼓鋭而能皆有其功时周公亦从征曰克咸厥功所以为受封张本也王成王也尔雅云父之舅弟後生为叔父白虎通云不名叔父者亲与己父有敌体之义也建郑云立也元毛云首也元子谓伯禽也汉书云王曰叔父建尔元子子父俱延拜而受之俾侯于鲁命为鲁侯也啓通作启说文云开也宇毛云居也爵之为侯则伯子男出其下矣大开其居非七十里五十里可

等伦矣为周室辅见与国咸休之意白虎通云诸侯始封爵土相随者何君子重德薄刑赏宜从重郑晓云魏庄渠尝言鲁始封乃伯禽非周公也盖据鲁颂王曰叔父建尔元子俾侯于鲁故云此直述鲁之有侯自伯禽始耳周公以来以功封鲁侯留王朝不曾至鲁故伯禽嗣侯于鲁岂有武王大封功臣兄弟之国十四人康叔少弟尚已封卫周公四弟又开国元勲乃不封直至成王始封乎王曰叔父是成王称周公也必武王时伯禽尚少留侍世子至世子即位後而遣之之国伯禽决非始封之君按史记鲁世家云武王既克殷封周公于少皞之墟是封鲁在武王世书大传云周公封以鲁身未尝居鲁也公羊传云封鲁公以为周公也周公拜乎前鲁公拜乎後曰生以养周公死以为周公主然则周公之鲁乎曰不之鲁也封鲁公以为周公主然则周公何为不之鲁欲天下之一乎周也白虎通云周公不之鲁何为周公继武王之业也乃命鲁公即建尔元子事上示其意此则实以命也东郑云东藩鲁国也既告周公以封伯禽之意乃策命伯禽使为君于东锡通作赐说文云予也山川谓境内之山川也方一里为一井地方百里者积田万井自是而上可以类推所谓锡之土田者也孟子云不能五十里不達于天子附於诸侯曰附庸陈祥道云民功曰庸谓之附庸以其有所附然後有功于民也严云赐之以小国之附庸使四邻小国附属之李氏云顓臾鲁之附庸也春秋之时有邾国亦鲁之附庸也愚按须句亦附庸徐云山水使主其祭土田使有其赋附庸使广其封邑左定四年衺宏曰昔武王克商成王定之选建明德以藩屏周故周公相王室以君天下於周为睦分鲁公以大路大旗夏后氏之璜封父之繁弱殷氏六族条民徐氏萧氏索氏长勺氏尾勺氏使帅其宗氏辑其分族将其丑类以法则周公用即命于周是使之职事於鲁以昭周公之明德分之土田陪敦祝宗卜史备物典策官司彝器因商奄之民命以伯禽封于少皞之墟】周公之孙庄公之子【纸韵】龙旗承祀【纸韵】六轡耳耳【纸韵】春秋匪解【音懈】享祀不忒【职韵】皇皇【丰本作天】后帝皇祖【丰本作王】后稷【职韵】享以騂牺【支韵亦叶歌韵桑何翻】是飧【路史作享】是宜【支韵亦叶歌韵牛何翻】降福既多【歌韵亦叶支韵章移翻苏本自周公至此为第五章】周公皇祖【叶语韵读如咀在吕翻】亦其福女【语韵朱传自乃命至此为第三章 赋也庄公名同桓公子在位三十二年朱子云庄公子其一闵公其一僖公知此是僖公者闵公在位不久未有可颂此必是僖公也按序以此诗为颂僖公而鲁郊以僖三十一年始见春秋则其为指僖公明矣僖公名申闵公庶兄也为周公十世孙龙旗四句乃下文郊尝二事之总冒龙旗承祀鲁公备仪卫以往祭所也孔云承者奉持之义郑云承祀谓亲祭事也祀说文云祭无已也有春郊又有秋尝是无已也曹氏云司常言日月为常王建之交龙为旗诸侯建之僖公虽僭郊天之礼而犹以龙旗承祀不建太常犹不敢全僭天子礼也而明堂位乃曰鲁公乘大路载弧韍旗十有二旒日月之常祀帝于郊则又过矣按徐干中论亦云鲁以龙旗九旒祀帝于郊郑云四马故六轡也耳耳朱子云柔从也春以郊言於夏正为正月於周正为三月秋以尝言於夏正为六月於周正为八月郊则配以后稷尝则祀周公庙以天子之礼乐此二者皆鲁祭之盛礼故特举之也按左传孟献子曰啓蛰而郊郊而後耕明堂位言鲁君孟春乘大路祀帝于郊而家语载孔子谓鲁无冬至大郊之事降杀于天子是以不同然则鲁郊固在夏之孟春矣匪通作非解通作懈说文云怠也谓勤行其事而不敢怠也夫鲁以僭礼为荣固宜其勤行之也享说文云献也忒说文云更也其仪其物各有一定之礼不更变也皇说文云大也李氏云皇皇大之至也孔云后君也以天者尊神故谓之君也左文二年引此诗曰皇皇后帝皇祖后稷君子曰礼谓其后稷亲而先帝也李氏云先天而後稷固足以为礼然不知诸侯而用郊禘果可以为礼乎万尚烈云僖与齐桓

同时皆有功周室恃功而僭礼王室其衰方赖诸侯以仅存无敢问其非礼此夫子所以叹之也黄震云自伯禽至庄公十七世未闻有郊天者僖公三十一年始卜郊而卜不从继此若宣若成若定欲郊则牛辄伤礼之不可僭神之不歆其祀如此诸儒论辨俱详在本篇小引下騂赤色牺毛云纯也谓赤色之纯者董仲舒云周色土赤鲁以天子命郊故以騂孔云地官牧人云阳祀用騂牲毛之是天子祭天南郊用赤牛纯色今鲁亦享騂牺是与天子同也飧犹向也祭义云飧者乡也宜说文云安也罗泌云非天子而郊天抑何典耶曰是享是宜则鲁顾以享帝为宜而不知其非矣赵士会云鲁以诸侯僭天子之祭似觉不宜曰宜者诗人之微词也皇祖郑云谓伯禽也孔云以周公皇祖之下即云白牡騂犗騂犗是鲁公之牲故知谓伯禽也此皇祖之文在周公之下故以为二人上文皇祖在后稷之上且上与皇皇后帝连文则是配天之人故知上文皇祖即后稷也言非徒天与后稷降之多福周公与伯禽亦将福汝僖公矣愚按言此以起下章秋尝之事季本云郊后帝而配以后稷用騂牺之享恐天恶其礼之忒而不以为宜也则必无福故言天亦降福以见未厌鲁德之意天既以鲁郊为宜而飧之则周公皇祖又安得而不畀之福哉此则诗人之微词也】秋而载尝【阳韵】夏而福衡【叶阳韵户郎翻说文作设共福衡】白牡騂刚【阳韵公阳传作犗】牺尊将将【叶阳韵资良翻】毛炰膾羹【叶阳韵虚当翻丰本作鬻】笾豆大房【阳韵】万舞洋洋【阳韵丰本此句上有钟鼓喤喤一句盖因朱子有疑脱一句之语而伪益之】孝孙有庆【叶阳韵虚阳翻】俾尔炽而昌【阳韵】俾尔寿而臧【阳韵】保彼东方【阳韵】鲁邦是常【阳韵光庙讳】不亏不崩【蒸韵】不震不腾【蒸韵】三寿作朋【蒸韵】如冈如陵【蒸韵毛郑本自王曰起至此为第三章朱传自秋而起至此为第四章

本自周公皇祖起至此为第六章今按崩腾冈与下文乘滕俱是一韵於此断章非也】公车千乘【蒸韵】朱英緑滕【蒸韵】二矛重弓【叶蒸韵姑宏翻】公徒三万贝冑朱紱【叶蒸韵息陵翻】烝徒增增【蒸韵】戎狄是膺【蒸韵史记作应】荆舒【史记作荼】是惩【蒸韵史记作徵】则莫我敢承【蒸韵】俾尔昌而炽【寘韵】俾尔寿而富【叶寘韵香义翻】黄发台背寿胥与试【寘韵】俾尔昌而大【泰韵】俾尔耆而艾【泰韵】万有千岁【叶泰韵与艾翻】眉寿无有害【泰韵毛郑本自公车至此为第四章朱传作第五章苏本作第七章 赋也载毛以为则也郑云始也秋尝而言始者秋物新成尚之也二义皆通时祭之名自殷以上春日禴夏日禘秋曰尝冬日烝至周公去夏禘之名以春禴当之更名春为祠以禘为大祭据礼记言鲁有郊亦有禘今读此诗惟曰秋而载尝而已可知明堂位所云季夏六月以禘礼祀周公者谓於尝祭之时行天子禘祭之礼故亦以禘为名而先儒或言鲁禘文王为周公之所自出者误矣赵汭云明堂位言以禘礼祀周公于太庙而已初不言成王之赐有禘其所自出之礼也详见本篇小引下夏正季夏六月於周为仲秋八月然考春秋凡书禘者二闵二年夏五月乙酉吉禘於庄公此谓僭用禘祭以为即吉之礼非祀周公之禘也僖八年秋七月禘于太庙用致夫人则正僖公之禘夫何以不用八月而用七月盖徵诸襍记云孟献子曰正月日至可以有事于上帝七月日至可以有事于祖七月之禘献子为之也献子之意以天子用冬至郊天则夏至可以祀祖盖欲尊祖与天相对然禘期虽改而终不敢改啓蟄之郊于冬至行之者僭窃已甚其心亦有所不安故也又按献子虽与季文子同时而在僖公朝计其年尚幼则僖之改八月为七月未必因献子之说特其後献子曾有此论鲁人繇此遂一仍僖公之旧终不改正故记以为七月而禘献子为之耳福陆元朗云逼也说文云以本有所畐束也衡说文云牛触横大木徐锴云谓牛好抵触以木阑制之也郑云秋将尝祭于夏则

养牲楅衡其牛角为其触觝人也按周礼封人职云凡祭祀饰其牛牲设其楅衡郑司农但云楅衡所以楅持牛也郑元则谓楅设于角衡设于鼻如椳状据此则楅衡是二物然以字义求之衡从角於鼻无涉则所云楅衡者但谓以衡楅牛使不得触耳前义为允陈祥道云楅衡以木为之横设于角楅之幅其角犹射之楅幅其矢也康成於诗合楅衡为一於礼离楅衡为二是自惑也愚按所楅之牛即下文白牡騂刚是也周礼充人掌系祭祀之牲祀五帝则系于牢刍之三月享先王亦如之公羊传云鲁祭周公何以牲周公用白牡鲁公用騂犗羣公不毛春秋繁露云张汤问董仲舒鲁祀周公用白牡非礼对曰礼也祭周公用白牡色白贵纯也武王崩成王立而在襁褓之中周公继文武之业成二圣之功德渐天地泽被四海故成王贤而贵之诗曰无德不报故成王使祭周公以白牡上不得与天子同色下有异于诸侯汉书武帝制曰康叔亲属有十而独尊者褒有德也周公祭天命郊故鲁有白牡騂刚之牲羣公不毛贤不肖差也杨慎云周公既用天子礼乐胡为而白其牲乎白者殷之色也宋之郊用之宜也鲁人用之不宜也既不宜矣用之何义噫我知之矣鲁之君臣见宋之郊必私相谓曰宋无助于周而且郊可以鲁而不郊乎于是郊宋之郊亦白其牲使後世有王者起以僭分讨鲁则以宋为解若其果受成王之赐则遂用周之赤色矣愚按鲁郊或始于僖公之世以禘礼祀周公旧以为成王所赐事容有之观其不用騂而用白则明微防渐之意当时未尝不存也而後之请郊其源亦滥觞于此用修之说不无滌文然其论正矣刚当依公羊传通作犗说文云特牛也特者牡特牛父也孔云白牡谓白特騂刚谓赤特也陈祥道云郊特牲之騂犗閼宫之騂牺此祀天之用騂者也旱麓信南山之騂牲閼宫之騂刚雒诰之騂牛此宗庙之用騂者也何休云周公死有王礼谦不敢与文武同也鲁公诸侯不嫌故从周制黄泽云此可见鲁公以下皆合食於太庙而礼秩初未尝敢同于周公亦非有祭文王为所自出之礼也其禘于羣公之庙则後世始僭之牺尊之制未详明堂位云牺象周尊也阮谿礼图云牺尊饰以牛象尊饰以象於尊腹之上画为牛象之形王肃云大和中鲁郡于地中得齐大夫子尾送女器有牺尊以牺牛为尊然则象尊尊为象形也二说未知孰是乃周礼既以牺为献而汉儒又读牺为娑故毛传解牺尊云有沙饰也陆元朗亦云刻凤皇于尊其羽形娑娑然而郑司农则谓牺尊饰以翡翠象尊以象凤皇或曰以象骨饰尊愚按如此解牺去之更远顾起元云古者牺通为戏以其字音之相同戏或为献以其字文之相近娑沙同音牺之为娑亦如皮之为婆仪之为莪牺尊将将之上文享以騂牺叶降福孔多一诗之中具有显证騂牺尚且音娑则牺尊之牺非缘酒尊而异其音也知牺尊所以音娑则尊当为牛而凤羽娑娑之说非也又可知象尊为象而象骨饰尊之说非也蔡绦云徽宗崇尚古器遂尽见三代典礼文章而读先儒解说殆有可哂者其牺象二尊正如王肃所言全作牛象形康成阮谿之说尽臆度耳将者奉持之义重言将将者见其非一尊也按明堂位言以禘礼祀周公尊用牺象此独举牺尊者牺文在象之上则牺当贵于象故言牺以该之也無说文云毛炙肉也孔云烂去其毛而炙之也周礼封人职云祭祀有毛炙之豚馐说文云大脔也孔云切肉也羹毛云大羹鉶羹也孔云以特牲士之祭祀尚有大羹鉶羹故以此羹兼二羹也大羹谓大古之羹煮肉汁不和贵其质也鉶羹肉味之有菜和者也鉶羹盛之鉶器其大羹则盛之于登以大为名故不举所盛之器也尔雅云木豆谓之豆竹豆谓之笱陈祥道云笱有滕缘其实乾实豆若脰然其实菹醢大房所以载牲体者郑云玉饰俎也其制足间有横其下有跗似乎堂後有房然孔云知大房玉饰者以俎豆相类之物明堂位说祀周公之礼云荐用玉豆豆既玉饰明俎亦玉饰也按明堂位云俎有虞氏以梡夏后氏以嶷殷以楬周以房俎又云以禘礼祀周公于太庙俎用梡嶷此言大房者旧说谓断木为

梲横距为巖虞氏之俎断木四足而已夏则加横木于足中央为横距之形棋枝多曲商于俎之足间横木为曲挠之形若棋然房之制有户闼周又设下跗于两端若房然商之曲其足与三代异周之直其足与虞夏同故兼称梲巖者所以着大房之象明其同梲巖之制其实本名大房非谓用梲又用巖也房既以取象得名而毛传乃解为半体之俎盖本于周语谓禘郊之事则有全烝王公立饫则有房烝亲戚燕享则有殽烝彼文次全烝谓全载牲体殽烝谓体解节折则房烝是半体可知然既明言禘郊之事有全烝矣此固禘祭之礼也何得仅用半体乎毛氏之义於是踈矣万者兼文武二舞之总名详见简兮篇即明堂位所云朱干玉戚冕而舞大武皮弁素积裼而舞大夏者武王以征诛得天下其乐名大武则其舞武舞也禹以揖让得天下其乐名大夏则其舞文舞也洋洋水流盛大之貌故毛训为衆多也言舞者衆多也左昭二十五年昭公告子家驹曰季氏为无道僭于公室久矣子家驹曰诸侯僭于天子大夫僭于诸侯久矣昭公曰吾何僭矣哉子家驹曰设两观乘大路朱干玉戚以舞大夏八佾以舞大武此皆天子之礼也陈阳云於礼言牺尊筯豆则罍黄目雕簋之类举矣於乐言万舞则笙歌下管蜚夷之乐举矣孝孙指僖公也庆说文云行贺人也故郑训为赐也言周公将于孝孙有所赐也其赐维何自俾尔炽而昌至眉寿无有害皆其所赐之实也孔云作者喜其德当神明故设辞庆之俾尔炽二句是冒语炽说文云盛也月令注以为炊也愚按字从火盖谓如炊气之盛也昌说文云日光也炽以势言昌以象言下文保彼东方六句言内安之福公车千乘九句言外攘之福所谓炽而昌也寿说文云久也以历年多言臧说文云善也以攸好德言下文俾尔昌而炽四句结言好德之福俾尔昌而大四句结言多年之福所谓寿而臧也保郑云安也鲁国在东方故称东方所谓俾侯于东者也内治克修外侮无虞是能保安彼东方则可以长有此鲁国也亏本气损之义尔雅以为毁也崩说文云山坏也不亏不崩言土地无侵削也震为雷人闻雷则惊惧故尔雅训为惧也腾者马超跃之貌故毛训为乘也不震不腾言人心无动摇也曹氏云不亏如月之常盛不崩如山之常固不震如地之常静不腾如水之常平三寿谓鲁邦与下文冈陵相并而为三也先儒或以为三卿然僖公之时三家未立此大误矣公车者侯国之兵车也诸侯於其国称公千乘之制鲜有能明之者先儒皆据司马法及汉书言地方十里为井井十为通通十为成成十为终终十为同同方百里提封万井除山川沈斥城池邑居园囿术路三千六百井定出赋六千四百井戎马四百匹车百乘此卿大夫采地之大者是谓百乘之家同十为封一封三百一十六里提封十万井定出赋六万四千井戎马四千匹车千乘此诸侯之大者谓之千乘之国然左传子产言天子之地一圻列国一同及王制孟子皆言公侯大国其田地不过以方百里为限何从而有十同之广三百一十六里之数耶又考周礼地官大司徒及夏官职方氏之文皆言诸公之地方五百里诸侯之地方四百里诸伯之地方三百里诸子之地方二百里诸男之地方百里则又与左孟王制诸书往往不合因再四寻绎而始悟其说王制所言本是夏制以五等爵三等受地至殷蛮爵为三等合子男从伯其地亦三等不变则白虎通详言之武王克商复增子男爵其受地与夏殷同武成篇所谓列爵惟五分土惟三是也齐鲁之封皆在武王之世孟子所谓地非不足而俭于百里者大都据初制而言贾公彦谓其时九州之界尚狭至武王崩成王幼周公摄政致太平制礼成武王之意迁大九州於是五等之爵以五等受地则周礼所云是也愚谓此说可信周礼一书乃周公所作使无其事不应笔之于书使非周公更定武王制度不应与左孟礼记诸书乖刺若此更以此诗公车千乘之制求之然後知周礼之果不谬而诸儒凡解千乘曾未有拈出者何也按大司徒职云凡建邦国以土圭土其地而制其域诸公之地封疆方五百里其食者半诸侯之地

封疆方四百里其食者参之一诸伯之地封疆方三百里其食者参之一诸子之地封疆方二百里其食者四之一诸男之地封疆方百里其食者四之一郑贾谓公受地广税物多但留半即足其国俗丧纪及畜积之用以半为余贡入天子其侯伯受地差少则其税亦少故三分之二留自用以一分为余贡入天子子男受地又少其税转少故留四分之三亦以一分为余贡入天子大国贡重正之也小国贡轻字之也据此说则所谓其食者谓王食其土之入耳今即依此法以诸侯之地推算计封疆方四百里为田当十六万井除山林园囿城郭沟涂之类大率三分去一实当存十万六千六百六十六井又三分之而贡其一于王尚余二分应六万六千一百零五井则留供本国之用者也以邱甸法合之四井为邑四邑为邱邱十六井也出戎马一匹牛三头四邱为甸甸六十四井也出长毂一乘戎马四匹牛十二头甲士三人步卒七十二人繇此积之则六百四十井出十乘六千四百井出百乘至六万四千井即当出千乘矣此外所余二千一百余井尚当出车三十余乘而经传但以千乘之国为言者举成数耳司马法汉书求其说不得於是增同十为封一条以求合于千乘之数而其实无此制也若明堂位谓成王封周公于曲阜地方七百里革车千乘乃鲁儒夸诞之辞果有之亦孟子所谓有王者起必在所损者至包氏注论语则直谓古者井田方里为井十井为乘百里之国适千乘也夫鲁成公作丘甲而春秋讥之邱者十六井也以十六井出一甸之赋然且不可今乃使十井出一乘其虐又过于成公矣而谓古有此制乎石介云三代以前爵有五等天子之田方千里公侯百里伯七十里子男五十里地小易治也力弱易使也周公始斥大土寓广其封公侯五百里伯三百里子男百里周之诸侯矜大而不服非诸侯之罪也失在周公也陈道祥云五百乘三乡之所出也千乘闾境之所出也汪克宽云兵制之变始环於齐之内政而家一人焉继环於晋之州兵而家五人焉长勺之战桓公自谓带甲十万车五千乘楚薳啓疆谓晋十家九县长毂九百其余四十县遗守四千叔向亦谓寡君有甲车四千乘则兵制之增益于古可知矣循袭效尤遂至鲁以秉礼之国亦增丘甲而不以为嫌也朱英郑云矛饰也孔云清人云二矛重英故知朱英为矛饰盖丝纆而朱染之以为矛之英饰也滕说文云鍼也鍼者束缚之义即小戎所谓竹闭纆滕者盖纳弓於闭以束之也孔云此朱英緑滕与二矛重弓两句自相充配朱英是二矛饰之以朱染緑滕是重弓束之以緑绳所异者二矛各自有英饰二弓共束以緑绳耳二矛之矛指酋矛也矛有二等曰酋矛曰夷矛酋矛建于车夷矛则否此蒙上公车之文故知指酋矛也解见清人篇孔云考工记云酋矛常有四尺夷矛三寻又云攻国之兵用短守国之兵用长此美其当戎狄惩荆舒则是往伐之明是酋矛而有二也弓亦载之车上者重弓毛云重于中也按小戎云交二弓义正同此郑云二矛重弓备折坏也兵车之法左人持弓右人持矛中人御孔云宣十二年左传云楚许伯御乐伯摄叔为右以致晋师乐伯曰吾闻致师者左射以鼓乐伯在左而云左射是左人持弓也成十六年晋侯与楚战于鄢陵左传称栾鍼为右使人告楚令尹子重曰寡君乏使使鍼御持矛焉哀二年鍼之战左传称邰无恤御简子卫太子为右禱云蒯聩不敢自佚备持矛焉是右人持矛也甘誓曰左不攻于左汝不共命右不攻于右汝不共命御非其马之正汝不共命既云左右又别云御是御在中央也公徒兵车所统之步卒也三万三军之数也按公车千乘是全举一国之赋而言至行师之时所用不过五百乘则三军之衆尽是矣大国三郊三遂计其衆可备六军而要以备更番迭休之用故军制惟至三军而止万二千五百人为军大国三军合甲士与步卒共三万七千五百人此诗惟言公徒则除甲士不在数内每车一乘步卒七十二人五百乘当三万六千人今举成数而言故但云三万也苏辙云大国之赋适满千乘苟尽用之是举国而行也故其用之也大国三

军次国三军而已李氏云天子之国不啻有六军所用者惟六军而已大国不啻有三万公徒所用者惟三万而已使举国之人而尽用之则但可以一役苟不幸而败则安得有人而复用之哉此天子之国所以止用六军大国所以止用三军也自伯禽以来已有三军襄公所以作三军者则以三卿专鲁国之权分三军以为己之赋故作三军非是自襄公以来方有三军也胡安国云车而谓之公车则臣下无私乘也徒而谓之公徒则臣下无私民也若有侵伐诸卿更师以出事毕则将归于朝车後于甸甲散于邱卒还于邑将皆公家之臣兵皆公家之衆不相系也胄毛云贝饰也孔云贝者水虫甲有文章也胄谓兜鍪贝非为胄之物故知以贝为饰綬说文云綬也孔云朱綬直谓赤綬耳文在胄下则是甲之所谓以朱綬连缀甲也烝者火气上行之义故尔雅训为进也增说文云益也进发步行之衆又有增益于公徒三万之外者则重车之卒是也邱法每一兵车必配一重车兵车以战重车以载輜重既有五百兵车则有五百重车矣特驾兵车者以甲马四匹故称乘而驾重车者用牛十二头故不得称乘重车之卒炊家子十人固守衣装五人廐养五人樵汲五人共二十五人计重车五百复应得一万二千五百人皆随兵车而进故曰增增也膺通作应说文云当也荆荆州楚所封地舒孔云羣舒也楚之与国按左文十一年羣舒叛楚宣八年楚灭舒蓼成十七年灭舒庸襄十五年灭舒鸠路史云舒庸在舒城地理考云舒鸠今巢县舒蓼在安丰县今凤阳府壽州境皆偃姓又路史有舒龙舒鲍舒龚所谓羣舒也烝说文云?也周昌年云因其来而遏之曰膺谓当其强也声其罪而讨之曰烝谓其恶也承说文云受也莫我敢承者我之兵威赫奕非敌我者所能胜受也此皆祝愿将来之语或指齐桓北伐山戎庄与其谋南伐荆楚僖列于会以为膺烝之实此全不得诗意戎在西狄在北荆楚在南独不及东者鲁东方之国下章始专言荒大东之事故於此略之耳又按孟子两引此诗一则曰周公方且膺之一则曰是周公所膺也因篇中有周公福汝之言则膺戎狄烝荆舒亦周公冥冥中之灵有以使之故云然非谓周公有是事也俾尔昌而炽者象日以昌期而势日以炽盛也昌从炽而见今日固大异于前炽踵昌而来後日固有不如今日而已者此先既言炽而昌而後复进言昌而炽也然此特过渡之语盖结上内安外攘为下文祝寿臧二事发端後段言昌而大义亦仿此富说文云备也观下文黄髮二语则此富为富有老成人也国无老成人以调元赞化则内必失民心外必开边衅君虽寿其何能臧故光以信用老成祝焉黄发老人发白复黄也台背解见行苇篇寿胥之寿指老成人言上文黄髮台背是也胥犹皆也试说文云用也王安石云寿考者相与为公用也黄佐云老成之足为国久矣僖公相季友任文仲而治业冠诸国然则此诗之颂其季友也夫其文仲也夫刘向新序云昔者楚丘先生行年七十披裘带索往见孟尝君欲趋而不进孟尝君曰先生老矣春秋高矣何以教之楚丘先生曰噫将我而老乎噫将我追车而赴马乎投石而超距乎逐麋鹿而搏虎豹乎吾已死矣何暇老哉噫将使我出正辞而当诸侯乎决嫌疑而定犹豫乎吾始壮矣何老之有孟尝君逡巡避席面有愧色书曰黄髮之言则无所愆诗曰寿胥与试美用老人之言以安国也大者炽之极也耆刘熙云指事使人也艾尔雅云养也方言云汝颍梁宋之间谓养为艾言使尔得其所使又得其所养也得所使则安佚得所养则强固所以寿也万有千岁严云犹曰千岁万岁也眉寿解见南山有台篇害说文云伤也无有害者言虽至千万岁之久而其眉寿之容犹如一日不至有伤损也又徐干中论云夫形体者人之精魄也德义令闻者精魄之荣华也君子爱其形体故以成其德义也夫形体固自朽弊消亡之物寿与不寿不过数十岁德义立与不立差千岁岂可同日言也哉顏渊时有百年之人今宁复知其姓名耶诗云万有千岁眉寿无有害人岂有万寿千岁者皆令德之谓也此虽非诗义然其理

自正】泰【陆本作大说苑韩诗外传俱作太】山岩岩【叶覃韵五甘翻亦叶盐韵疑坎翻】鲁邦【说苑作侯】所【说苑作是】詹【盐韵亦叶覃韵多甘翻说苑风俗通韩诗外传丰本俱作瞻】奄有龟蒙【束韵】遂荒【尔雅作怵】大东【韵】至于海邦【叶东韵悲工翻】淮夷来同【东韵】莫不率从【叶东韵麤丛翻】鲁侯之功【东韵毛郑自泰山起至此为第五章朱传作第六章】保有【水经注作其】鳧绎【陌韵陆本作峰】遂荒徐宅【陌韵亦叶药韵他各翻】至于海邦淮夷蛮貊【陌韵亦叶药韵末各翻丰本作貉】及彼南夷莫不率从【丰本率从作来格】莫敢不诺【药韵】鲁侯是若【药韵毛郑自保有起至此为第六章朱传作第七章】天锡公纯嘏【叶麋韵果五翻】眉寿保鲁【麋韵】居常【郑玄云或作尝丰本作尝】与许【叶麋韵火五翻】复周公之宇【麋韵】鲁侯燕喜【纸韵】令妻寿母【有韵亦叶纸韵姆鄙翻又叶麋韵满补翻】宜大夫庶士【纸韵】邦国是有【叶纸韵羽轨翻】既多受祉【纸韵】黄髮儿【字书作鬣】齿【纸韵苏本作第八章毛郑自天锡起至此为第七章朱传作第八章 赋也鲁之封虽以周公而始至鲁者伯禽则伯禽固开基之祖也此章述伯禽造鲁之功欲僖公追美于伯禽也苏云泰山齐鲁之望也龟蒙鳧绎鲁之四山也其余则其东南势相联属可以服从之国也史记云泰山之阳则鲁其阴则齐一曰岱宗周礼职方氏兗州山镇曰岱山是也在今山东济南府泰安州北五里岩高貌古以殿旁高庑为岩廊亦谓其高也詹通作瞻广韵云仰视曰瞻民具尔瞻人民所瞻皆此义也奄说文云覆也大有余也龟蒙二山名一统志云龟山在兗州府泗水县东北五十里春秋龟阴之田在其北今属泰安州蒙山在兗州府沂州费县西北七十里居鲁之东一名东山孟子所谓孔子登东山而小鲁是也地理志云颛臾国在蒙山下孔云龟蒙在鲁地故言奄有泰山则在齐鲁之界故言所詹见其不全属鲁也愚按奄有龟蒙语意当连下看龟是鲁山蒙虽在邦域之中然颛臾主之自龟而蒙以渐及于大东化愈推而愈远也遂者继事之辞荒说文云草淹地也尔雅以为奄也愚按犹言延亘及之也大东犹云极东也孔云大者广远之言地之最东至海而已大东之下即云至于海邦言其极尽地之东偏也季本云极东近海之国如莱牟之类是也莱牟与淮夷相近莱牟服则淮夷同而诸夷莫不率从矣陆化熙云荒字中有绥怀戡定在内故下文曰鲁侯之功来同言同心而归无携贰也率相率也当通作𠂔从者变桀骜而效顺也鲁侯指伯禽也後放此伯禽初受封之国者故以鲁侯称旧说皆以为指僖公今按下文言天锡公纯嘏而又曰鲁侯燕喜明公与鲁侯非一人也彼公则指僖公也功以服远言鳧绎二山名绎通作峰一统志云鳧山在兗州府邹县西南五十里连鱼台县界峰山在邹县东南二十五里按鳧绎皆邹地邹古邾国峰山亦名邹山左传邾文公迁于绎宣十年伐邾取绎即此峰也京相璠云绎邑依峰山为名水经注云山东西二十里高秀独出积石相临殆无土壤石间多孔穴洞逵相通往往有如数间屋处其俗谓之峰孔邾本鲁附庸国至孟子时鲁穆公改曰邹此诗言保有鳧绎者谓能保有附庸之国不为强大所吞并不独奄及束蒙而已徐宅谓宅于徐州之地者即徐戎也伯禽于成王元年始就封于鲁於时徐州之戎淮浦之夷并起为寇伯禽率诸侯征之故书有费誓之篇此诗所咏即其事也李见罗先生云鲁侯封於曲阜其时土田陪敦与徐淮实壤接世为封境忧故伯禽至不避三年之丧衽兵革以开东郊之难後之子若孙世仰其功故为臣子者亦以此致君之祝孔云东方曰夷西方曰戎谓在九州之外此徐州淮浦中夏之地而得有戎夷者戎夷帝王之所羈縻不以中国之法齐其风俗故得错襟居九州之内汉时内地无戎夷者秦始皇逐出之也至于海邦与前至于海邦义同特彼即以荒大东为至海邦此则先繇荒徐宅而後至海邦徐宅在内海邦在外也蛮貊南

夷又自淮夷而推言之两曰莫不率从其所包者濶矣淮夷在东貉在东北方蛮及南夷在南皆与鲁相近者诺说文云膺也遵号令听约束之意若顺也远人来服则鲁侯於是从而顺其情以抚安之也或以此两段皆是咏僖公考春秋凡僖公自主兵者不过伐邾败莒之类皆小国也伐楚伐郑则齐桓主兵僖公特从之耳今所言荒大东荒徐宅淮夷蛮貉率从凿凿可听如是僖公曾有是事否乎或又谓春秋僖三十一年书卜郊不从免牲犹三望郑玄谓三望者海岱淮也此诗言泰山言海邦言淮夷疑即据三望而言也夫三望之礼在郊祭之後今此文乃在尝祭之後则其非三望明矣天锡以下祝愿僖公之词也锡通作赐说文云予也纯之为全音之近也嘏徐锴云大远之福也无福不有乃称纯嘏下文眉寿以下皆是也眉寿承上章而言人惟寿可以享福故以寿始终之保鲁者保守先世之土地不使其有所失也居谓据而有之无游移而他属也毛云常许鲁南鄙西鄙孔云常为南鄙许为西鄙或当有所依据不知出何书也郑云常当作尝在薛之旁春秋庄三十一年筑台于薛是与曹氏云汉地理志鲁有薛县而齐孟尝君食邑于薛则尝先当属鲁今按尝不知何时为齐所并经传无文莫能详也愚按管子小匡篇云桓公曰吾欲南伐何主管子对曰以鲁为主反其侵地常潜常潜二地名当即此常也常先为齐所并故欲僖公复之正不必破常为尝耳然常齐语又作堂而其地不知所在定是通作棠春秋隐公观鱼于棠会戎于潜其为此二地明矣许郑云许田也许田近许之田括地志云在许昌县南四十里有鲁城周公庙在其中左传隐八年郑伯请以泰山之祊易许田桓无年郑伯以璧假许田杜预云成王营王城有迁都之志故赐周公许田以为朝宿之邑後世因而立周公别庙孔云春秋之时鲁不朝周邑无所用而许田近于郑国郑有祊田地势之便与郑易之朱子云常许皆鲁之故地见侵于诸侯而未复者故鲁人以是愿僖公也殷大白云愿其如此亦以讽也复说文云往来也已去而又还之谓宇即大啓尔宇之宇燕通作宴说文云安也僖公能光复周公所啓之宇则伯禽造鲁之功于斯不坠其在天之灵必燕安而喜乐也令郑云善也令妻者使其妻有令问谓声姜也寿母者使其母享高年谓成风也按春秋僖八年秋七月禘于太庙用致夫人左传以为致哀姜邹忠胤非之谓哀姜淫恶义与庙絶见杀于齐桓至是且九年何为其复致汉人於既庙食之吕雉犹不难以义黜之而配薄太后於高庙曾谓鲁人之见顾不及此乎谷梁以为成风其说与刘向同而孙明复从之盖成风为妾母初年未经庙见故于禘庙而因以致之为後日祊庙张本其称致夫人犹後世之上尊号也然则成风位号已素定于生前所谓母以子贵故春秋异日薨之于其葬也而小君之不诬耳或谓此夫人乃僖公妻姜氏即後之会齐侯于阳谷者公羊传僖二十年西宫灾何休注云僖公为齐侯所胁以齐媵为嫡楚女废居西宫而不见恤悲愁怨旷所生则窃意夫人即声姜而前此不书纳币逆女者以原非正配也赵子常疑声姜是僖为公子时所娶故婚礼不见于经今观何休以齐媵为嫡之说或僖公先是所娶元妃已卒於未为君之日声姜乃其继室如惠公之声子或僖公未有伉俪先畜嬪御声姜抑如庄公之孟任或声姜与楚女本俱媵妾而後之升坠异或僖为公子时已娶楚女及即位後见胁于齐不敢正其夫人之号又不欲遽以声姜为嫡故迁延至是而後致欵盖自屈完受盟齐已帖楚一栖固莫能两雄矣春秋时诸侯以妾为妻者比比齐桓特为申此禁然伯者假之且不能自守其禁纵未尝胁鲁安能使鲁之不犯哉禘而致者昔未庙见今乃庙见也其後哀公欲立公子荆之母为夫人宗人衅夏对无其礼盖不欲引僖之禘致以逢君耳至所谓自桓以下娶于齐亦止言其大槩若昭公则娶吴矣襄定哀之元妃经亦不着其何氏安在所娶之尽齐姜则安必声姜之为正娶也者故以致夫人属声姜二说皆是也以閼宫之诗证之诗传曰僖公八年始用郊禘史克赋閼宫

夫此正春秋禘太庙致夫人之年也今观闕宫之八章云令妻寿母以妻与母叠称当时妇姑必同与庙祭兼致崇号春秋若止书用致夫人风氏则遗其妇若止书用致夫人姜氏则遗其姑若并书用致夫人风氏姜氏则并妻于母尤觉不伦况成风及声姜前此素未尝为夫人安得遽称夫人某氏若书致某氏为夫人则某氏之上又无书母书妾之法故第槩之曰用致夫人初若不知为谁氏也者於是益知春秋书法之精融也然则致夫人礼欤曰其致成风不失为母以子贵所谓礼以义起变之正也其致声姜以媵于中宫之位则断非礼也一言而曲直交寓孰谓春秋可以例测哉愚按邹氏之说辨矣所引诗传虽未足尽信而诗人之颂不但及母而且首举其妻则当时僖公之致意于成风与声姜者可知已成风薨于文四年声姜薨于文十六年距僖公三十一年卜郊时两人尚无恙也故诗人及之朱子云闵公八岁被弑必是未娶其母叔姜亦应未老此言令妻寿母又可见公为僖公无疑也宜即所谓惠干朋友不得罪于巨室者大夫兼卿而言庶士谓上士中士下士乐记云武王克殷庶士倍禄说苑伊尹云列云所以参大夫也邦国是有即所谓自今以始岁其有者以僖公闵农重本故云然以上复故地慰先灵自家庭而庙庭以至于邦国无不迓休袭庆者僖公之受福如此则可谓已多矣而始终所最重者欲公永年以享之为黄发为儿齿与眉寿同显其奇是为快耳儿齿陆无朗云齿落更生细者郑云亦寿徵也黄佐云或问此诗之颂祷僖公拳拳于寿考不一而足何也曰可以见诗人之情也入春秋以来隐及干鍾巫桓乘于彭生般贼于圉犂閼戕于卜齮弑逆踵继其来甚矣国人饮恨尚未舒也故此诗拳拳以寿考为言其所以望于僖公者无非欲其以覆车为戒云耳或者乃谓鲁欲夸诩专以谀辞溢美例之抑孰知其忠君爱国之意溢于言表耶厥後僖公在位三十年而春秋书曰乙巳公薨于小寝则诗未为无所助也】徂【水经注作朮】来【水经注作嵎又作徕】之松新甫之栢【陌韵亦叶药韵卜各翻】是断是度【叶陌韵直格翻亦叶药韵達各翻】是寻是尺【陌韵亦叶药韵勅略翻】松栢有舄【陌韵亦叶药韵他各翻徐邈读】路寝孔硕【陌韵亦叶药韵】新【独断礼书俱作寢】庙奕奕【陌韵亦叶药韵弋灼翻周礼注作绎绎】奚斯所作【药韵】孔曼且硕【见上】万民是若【药韵毛郑以为第八章朱传作第九章 赋也前颂僖公郊天禘祖之事已毕此则备言其祔庙也祔庙者庄公之庙何以知其为庄公之庙以新庙奕奕奚斯所作二语知之郡县志云徂来山亦曰尤来山水经注云徂来山今犹有美松亦曰龙竦之山赤眉樊崇保此山自号尤来三老一统志云在济南府泰安州东南四十里後魏志云鲁郡汶阳县有新甫山按通典汉汶阳故城在兖州泗水县东南林兆珂云史记松栢为百木长也而守宫阙故斯干美宣王考室曰如松茂矣闕宫美修庙曰徂徕之松新甫之栢殷武祀高宗曰松栢丸丸陆燧云松栢就已取者言山特指产之地耳断者以刀锯截于所生之处度者以绳墨量其所用之宜小尔雅云四尺谓之仞倍仞谓之寻寻舒两肱也前汉书云一黍之广为一分十分为寸十寸为尺寻取其长者尺取其短者桷说文云榱也秦谓之榱周谓之椽鲁谓之桷刘熙云桷确也其形细而疏确也或谓之椽椽传也相传次而布列也或谓之榱在櫨旁下列衰衰然垂也舄通作写说文云置物也按置者舍置之义谓舍而去之也礼记器之溉者不写其余皆写注训写谓倒传之是也或加水作泻考工记以浚泻水义与此同然说文无泻字但当作写耳屋之有桷其形斜长首高而末低所以写雨水故曰有写也路寝毛云正寝也孔云路正也大也以君之正寝故以大言之愚按此即指庙之正室言非庙後之寝也孔甚硕大也举路寝之大则庙規制之大可知矣新庙新作之庙也举全庙而言路寝亦在其内按春秋成三年新宫灾谷梁谓新宫者祔宫也与此新庙同义奕说文云大也重言之者太庙大矣新庙与之并大是奕奕也

此以着新庙之踰制也奚斯公子鱼也曰作者郑云教护属功课章程也孔云谓教令工匠监护其事属付工役课其章程而已非亲执斧斤而为之也按左闵二年共仲使卜齋贼公于五闻成季以僖公适邾共仲奔莒乃入立之以赂求共仲于莒莒人归之及密使公子鱼请不许哭而往共仲曰奚斯之声也乃縊公羊传亦云公子庆父弑闵公走而之莒莒人逐之将繇乎齐齐人不纳却反舍于汶水之上使公子奚斯入请季子曰公子不可以入入则杀矣奚斯不忍反命于庆父自南渚北面而哭庆父闻之曰嘻此奚斯之声也诺已曰吾不得入矣於是抗輶经而死据此二传则奚斯乃庆父用事之人故及其事败而乞怜求生他人不使而独使奚斯为之请奚斯知鲁之必杀庆父也哭于南渚不忍反命有狐兔之感焉不知庆父死後鲁何以处奚斯虽于传无所见然成季当国其必不用庆父用事之人可知也而谓奚斯作庙乃在僖公之时乎愚深疑之且作宗庙国之大事也春秋无不书之理如谓是修旧庙故不书则诗宫新庙又言奚斯所作其非修旧庙可知也惟闵二年书夏五月乙酉吉禘于庄公杜预谓三年丧毕致新死者之主于庙庙之远主当迁入祧因是大祭以审昭穆谓之禘庄公服制未阕时别立庙庙成而吉祭又不于太庙故详书以示讥愚读此乃始恍然悟曰此奚斯所作者即庄公之庙也庄公薨庆父贼子肸而立闵公此时庆父实主鲁国故以作庙任奚斯而必极其壮丽以自解其弑逆之恶庄公既自立庙故行禘礼不于太庙春秋书曰禘于庄公则明着庄公之新有庙矣庄公者闵公之父亦僖公之父也僖公见奕奕之美徒谓典祀可丰于昵而不顾其出于庆父乱人之制也仍旧贯而不改故诗人于此侈言之正所以深累僖公耳此义不明而新庙之说纷纷错出郑以为新姜嫄庙也夫然则不当泛及大王以下毛以为新闵公庙也夫然则不当泛及周公以上朱子初说但以以为鲁之羣庙而已则於诗辞益无关涉而或泥篇首宫之一字以谏其说谓公羊传有曰周公称太庙鲁公称世室羣公称宫閼宫正羣庙也岂知閼宫乃帝尝时之祿宫有纬书及孟仲子之说足据且诗人唱首第从姜嫄故事叙述其语意了然明晰殆无复可疑者或文以为修周公庙谓春秋中凡用民力於所不当为必书独不録閼宫之作则谓此为当作耳夫春秋一书有褒有贬果谨于修庙当亟褒之不宜没其善也或更谬指为僖公庙今观诗中满篇皆祝颂之语则僖公尚未薨也岂真僖公自立庙预为後日烝尝地如汉文帝顾成庙之为乎亦无稽甚矣至于庙为奚斯所作第谓董其工役而班固两都赋序云奚斯颂鲁采于孔氏王延寿鲁灵光殿赋序云奚斯颂僖歌其路寝後汉书曹褒传云奚斯颂鲁考甫咏殷注引韩诗薛君传云是诗公子奚斯所作即扬雄法言亦曰正考甫常曦尹吉甫矣公子奚斯常曦正考甫矣皆主作颂为言耳食如此大足怪讶曼说文云引也毛云长也路寝孔硕奚斯剏之今僖公一仍其旧不复变革自此引之世世此孔硕者当与太庙相为悠久故曰孔曼且硕盖刺之也万民是若言万民皆心顺其所行以为合理也然鲁国之大岂无一二知礼者盖不满之微辞】

閼宫六章一章十七句一章二十一句一章十三句一章三十三句一章二十六句一章十句
【子贡传申培说皆列之鲁风今按左传孟子引此诗俱以为鲁颂则鲁颂之名旧矣而谓鲁第有风无颂可乎惟诸儒分章颇有不同毛郑作八章第一第四章章十七句第二章十二句第三章三十八句第五第六章章八句第七第八章章十句朱传作九章前五章章十七句谓内第四章脱一句第六第七章章八句第八第九章章十句苏氏则分为九章第一第四章章九句第二章八句第三章十二句第五章十一句第六章十八句第七章十七句第八章二十六句第九章十句今更定章句如右虽长短不齐庶几于经文语脉有合焉耳三百五篇之中

以一百二十句成篇者仅见于此又吴澄云公车千乘至则莫我敢承考其意为周公鲁公说简编错乱当与土田附庸为连文盖成王命周公建元子于鲁锡之以山川土田附庸有千乘之赋有三军之衆使之膺戎狄惩荆舒也不然孟子引此诗何以云周公膺之乎金履祥因之谓此诗有错简当以孟子为正第一节说姜嫄后稷第二节说大王文武第三节当说周公之功而今诗但言封周公之子疑下文公车千乘戎狄是膺荆舒是惩则莫我敢承当是第三节言周公四征不庭伐淮践奄之功周无徐州故淮夷为荆州之界而舒今在淮西也第四节始及王曰叔父至乃命鲁公第五节方说周公之孙庄公之子方颂僖公第六节说享祀降神而俾尔之祝以类相从皆祝颂之辞如此则孟子之时诗未错简而孟子所引正周公事也黄光昇着读诗蠡测据此说遂易置经文次序今按吴意以周公封鲁有公车千乘公徒三万足为他日膺戎狄惩荆舒之用以合于孟子之说犹为近之金直以此当周公伐淮践奄之事则公车公徒非周公当日所用不可通也经文虽长篇繁辞而细按之实井井有条无庸更置若丰坊鲁诗世学本则谬托之石经于笱豆大房下增钟鼓喤喤一句以公车千乘至莫我敢承接孝孙有庆之下以泰山岩岩至黄发儿齿接莫我敢承之下以俾尔炽而昌至如冈如陵接黄发儿齿之下以俾尔昌而炽至眉寿无有害接如冈如陵之下以徂来之松一章接眉寿无有害之下盖参用朱吴金三子之说变乱经文大是解事序云颂僖公能复周公之宇也朱子谓此诗所谓居常与许复周公之宇者人之所以愿之而其实则未能也又云所谓复周公之宇者祝其能复周公之土宇耳非谓其能修周公之屋宇也序文之谬如此子贡传以为僖公八年始用郊禘史克颂之盖因春秋有八年禘太庙之文遂欲以此诗合之然果鲁郊大典始于此时春秋不并书之何也若申培说则更异矣谓鲁僖公新作后稷文王之庙于太庙世室及孝惠桓庄四亲庙之上而史克作诗以颂之非孔子所录也夫祀帝于郊以后稷配则作庙以藏后稷之主事容有之若鲁禘之说但谓祀周公用禘祭之礼云尔而必依仿赵伯循之论以文王为周公之所自出既行禘礼必立其庙此特剿袭旧闻以意揣摩果何据耶且周公曰太庙鲁公曰世室孝惠桓庄曰四亲庙又立后稷文王之二庙以加于其上则已过于天子之七庙何鲁庙如此之多而作是诗者居之不疑刺刺不休直如亲见其事者然即自觉其不伦则谓此诗非孔子所录夫孔子既不录则何以载之于经乱道甚矣朱子但以以为僖公修庙诗人歌咏其事以为颂祷之辞虽于诗意无所明然犹不失君子阙疑之义】

有駉鲁僖公大饮烝也礼十月农功毕诸侯与羣臣饮酒于太学以正齿位谓之大饮僖公行此礼其臣美之【序以为颂僖公君臣之有道也盖君以礼燕臣臣以礼祝君谓之有道按豳风七月之诗曰十月涤场朋酒斯飧曰杀羔羊跻彼公堂称彼兕觥万寿无疆此诸侯之诗也其礼举于十月与月令孟冬大饮烝之礼合故郑玄以为颂大饮之诗谓十月农功毕天子诸侯与其羣臣饮酒于太学以正齿位而引党正职曰国索鬼神而祭祀则以礼属民而饮酒于序以正齿位亦谓此时也孔颖达云知大饮在太学亦正齿位者以国君大饮与党正饮酒皆农隙而为俱教孝弟之道党正於序学知国君於太学党正饮酒为正齿位知国君饮酒亦正齿位也黄子道周云孟夏之酎则序爵于朝孟冬之烝则序爵于学所以正功德奠天地之义也其奠天地之义何也孟夏巳月乾卦也君子以自强不息迨暇饮醕所以示羣臣功能之等也尊尊而卑卑则天为政于上孟冬亥月坤卦也君子以厚德载物同位以齿同齿以位所以示羣臣同体之义也长长而弟弟则地为政于下故天者所以教敬也地者所以教让也敬让立而民不爭按古者凡养老皆在太学太学在郊天子曰辟雍诸侯曰泮宫所以知此诗为饮

酒太学者以振振鹭之语意之鲁固有顿宫也所以知此诗言饮酒为孟冬大饮烝者以自今以始岁其有之语意之岁其有者有谷也所以知为颂僖公者以春秋于僖公三书不雨意之谷梁传云不雨者勤雨也一时而言不雨者闵雨也既而书六月雨谷梁云喜雨也喜雨者有志乎民者也胡安国云闵雨与民同其忧喜雨与民同其乐此君国子民之道也又何休谓僖公饰过求已循省百官放佞臣郭都等理冤狱而百余公精意感天不云而得澍雨是则僖公之重农事如此此诗所以颂也子贡传中间阙文但上有僖公二字下有克颂之三字则亦主为史克颂僖公之诗矣陈际泰云颂中多言僖公之事春秋十二公鲁僖公贤焉春秋之义有因褒以见贬者前乎僖为代几何也後乎僖为代几何也独举僖公僖公贤也鲁亡乎人之辞也按左文二年有事于太庙跻僖公夏父弗忌曰跻圣贤明也然则鲁人之称僖公为圣贤旧矣】

有駉有駉彼乘黄【阳韵】夙夜在公在公明明【叶阳韵谟郎翻】振振鹭鹭于下【叶麋韵後五翻】鼓咽咽【陆德明本作渊渊後同】醉言舞【麋韵】于胥乐【音络後同】兮【结句三章同文不用韵 赋而兴也駉说文云马饱也毛传云马肥强也重言有駉者非一马也观下文乘字可见四马为乘黄即駉篇有骠有黄之黄盖以色为名僖公所乘也黄者马色之最贵故周书诸侯初见康王亦皆布乘黄也夙夜以行礼之日言自旦至暮也或疑厌厌夜饮於礼有之不应兼夙然观燕礼未饮酒之前尚有乐人县射人告具及请宾命宾纳宾等事自非夙兴不办岂谓旦即饮酒乎在公与七月篇跻彼公堂公字同义谓大学也燕飧齿让之礼必於大学蒙上文乘黄而言则此在公指僖公在之也次章放此明明者明而又明赞美之辞若就燕饮之事赞之则礼教修明亦明明也振谓振羽也鹭解见宛丘振鹭篇毛云鹭白鸟也以兴洁白之士按鹭居水泽中故辟雍及泮宫皆有之观周颂言振鹭于飞于彼西雝则此鲁颂之言振鹭其为泮水所有可知矣诗人即所见以起兴以与燕者非一人故重言振振鹭也鹭之下而就水犹宾及卿大夫之至而就席也下文自鼓咽咽至醉言舞乃合全礼之始终而言或以鹭下象舞亦通絶非如朱子持鹭羽以舞之说或又言鹭乃鼓精故汉有朱鹭之曲而隋乐志谓古之君子悲周道之衰颂声之辍饰鼓以鹭存其风流抑荒唐甚矣八音中独举鼓者大昕鼓徵所以警衆大学之礼也衆至然後饮酒也咽通作鼙说文云鼓声也醉说文云卒也从酉从卒酉者酒也卒者各卒其度量不至于乱也言者语辞礼天子养老则舞大武诸侯燕宾则舞勺此言舞之文在醉之後当非如前所谓舞故郑孔皆云至於无箚爵而醉则为君起舞以尽其欢是也于尔雅说文皆云於也本作亏象口气之舒也胥通作疏疏者通也通者皆也故尔雅训为皆也乐兼君臣而言有明明之君在上能尽礼以感其臣则臣乐之有醉舞之臣在下能尽情以欢其君则君乐之信乎其皆乐也】有駉有駉彼乘牡【有韵】夙夜在公在公饮酒【有韵】振振鹭鹭于飞【微韵】鼓咽咽醉言归【微韵】于胥乐兮【赋而兴也乘牡即乘黄也黄以言其色牡以言其体在公饮酒者申上章之意言此日鲁侯乘黄牡马来在公所非有他事特为与羣臣举行饮酒之礼也鹭于飞者郑元云喻羣臣饮酒醉欲退也此鼓咽咽与上章不同盖奏陔时也按燕礼无箚爵无箚乐之後宵则庶子执烛於阼阶上司宫执烛於西阶上甸人执大烛於庭閭人为大烛於门外宾醉北面坐取其荐脯以降奏陔遂出卿大夫皆出陔者陔夏也九夏之一凡夏以钟鼓奏之钟在先鼓在後故将归复又闻奏鼓也归者自太学公所而归也时已入夜穷日之力不独宾归而君亦还宫矣不醉无归欲尽欢也醉而即归以礼节之也酒以行礼不继以淫此之谓能乐】有駉有駉彼乘駟

【叶霰韵黄绢翻】夙夜在公在公载燕【霰韵】自今以始【纸韵】岁其有【叶纸韵羽轨翻】君子有谷诒【列女传诒下有厥字】孙子【纸韵陆德明云岁其有或作岁其有矣又作岁其年者矣皆衍字也诒孙子或作诒厥孙子诒干孙子皆是妄加也】于胥乐兮【赋也前二章上四句主君言下四句则纪燕臣之事此章上四句主臣言下四句则述祝君之语駟尔雅说文皆云青骊马也孙炎云色青黑之间郭璞云今之铁骢也按汉乐府云君马黄臣马苍苍者浅青也此诗特以黄骢相对为言其分属君臣所乘可知矣然乘駟未必凡与燕者皆尔当是但据宾一人而言燕礼射入请宾公曰命其为宾与卿燕则大夫为宾与大夫燕亦大夫为宾燕义解之云不以公卿为宾而以大夫为宾为疑也明嫌之义也宾定而後行燕礼下文自今以始等语自是宾所致辞故知乘駟者宾乘也夙夜在公臣尽其敬也在公载燕表其遭遇之隆也自从也今今岁也孔云上言在公载燕因即据燕为今与将来为始非以作诗为始也岁其有者毛云丰年也孔云春秋书有年者谓五谷大熟丰有之年也君子指僖公也谷尔雅云禄也国以民为本民以食为天使岁岁丰登家给人足是即君子之享有天禄也诒通作贻说文云赠遗也曰孙子者世数无穷之辞本固邦宁则君子之有谷其余庆足以及乎後人矣因是月农功毕行饮烝之礼而致其祝愿如此皆就农事言也君以有谷为乐臣亦以君之有谷为乐是胥乐也一说谷善也谓以善道贻其子孙如礼下爱民皆是亦通】

有駟三章章九句【朱传但以为燕饮而颂祷之词而不着其世盖疑僖公之不足以当此也申培说与朱传同而其篇次亦系之僖公之世然总之皆不能知其为何事而燕】

駟【说文作驍又作駟】思鲁伯禽之富也伯禽俭以足用寬以爱民务农重谷牧于坰野僖公思遵其法故命史克为之颂【礼问国君之富数马以对季本云此诗非伯禽不足以当之愚按序以为颂僖公也僖公能遵伯禽之法俭以足用寬以爱民务农重谷牧于坰野鲁人遵之於是季孙行父请命于周而史克作是颂说者多疑僖公在春秋时未为贤君不应有颂今观序中首以僖公能遵伯禽之法为言则所谓俭以足用等语必是伯禽实迹名虽颂僖公实颂伯禽耳又按春秋书庄二十九年春新延廐言新者明先世设有延廐兹特取而重新之庄公者僖公父也意修举伯禽牧政自庄公时已然至僖公时而马遂盛故经传皆不以多马美僖公然则此诗之为颂伯禽而非颂僖公又明矣左文十八年莒太子仆以宝玉来奔宣公命与之邑季文子使太史克对宣公必出诸境文子名行父正与史克同时然序所谓请命于周而史克作颂者当在僖公之世说见閼宫篇小引下】

駟駟牡【毛郑孔本俱作牧後同至定本始改作牡】马【韵】在坰【说文作駟】之野【马韵】薄言駟者【马韵以上三句後章俱放此】有騶有皇【阳韵尔雅作騶】有骊【尔雅翼作丽】有黄【阳韵】以车彭彭【叶阳韵蒲先翻】思无疆【阳韵】思马斯臧【阳韵赋也駟说文云牧马苑也重言駟駟者一苑又一苑也按周礼较人职云天子十有二闲马六种邦国六闲马四种牡说文云畜父也专言牡者较人职云凡马特居四之一谓一牡可配三牝言牡之盛则其牝之盛尤可知也刘公瑾云騶牝三千駟牡十六种盖各极其盛而言皆以见其国之殷富也坰地名郡县志云坰泽俗名连泉泽在兖州曲阜县东九里鲁僖公物马之地按毛传以坰为远野考说文邑外谓之郊郊外谓之野野外谓之林林外谓之坰是坰尚在野之外今日在坰之野则於文理欠顺当从郡县志为长左传曰凡马日中而出日中而入

注疏谓日中者春秋分也春分百草始繁则牧于圉野放日中而出秋分农功始藏水寒草枯则马还廐故日中而入此言离駟而就圉野当是在春分时也郑元云必牧于圉野者避民居与良田也孔云以序云务农重谷牧于圉野故知有避民田之义薄言者举大略之辞言略举駟中所有之马也毛传云诸侯马四种有良马有戎马有田马有弩马孔云作者因马有四种故每章各言其一首章言良马朝祀所乘故云彭彭见其有力有容也二章言戎马齐力尚强故云伾伾见其有力也三章言田马田猎齐足尚疾故云绎绎见其善走也卒章言弩马主给襍使贵其肥壮故云祛祛见其强健也马有异种名色又多故每章各举四色以充之按周礼较人掌王马之政辨六马之属种马一物戎马一物齐马一物道马一物田马一物弩马一物除弩而外五马皆称良马其邦国四种之马周礼无文郑元谓诸侯无种戎而有齐道田弩今毛传言诸侯之马戎田弩三者与王同其一但称良马未知於种齐道三者之中当居何等莫能详也以愚意度之当是齐戎田弩四者盖种马驾王路非诸侯所用道马驾象路於同姓非宜鲁为宗国当有齐马以驾金路至于戎路用戎马则兵车所乘田路用田马则田猎所乘下而弩马以给官中之役此皆可与王同者又按夏官马质职云掌质马马量三物一曰戎马二曰田马三曰弩马皆有物贾然则种齐道三者养马所生有种而戎田弩三者第买以给官府之使原无种也买马以佐种马盖古者畜马之多端如此驪尔雅说文毛传皆云驪马白跨者郭璞云跨髀间也苍颉篇云两股间也尔雅毛传云黄白曰皇孔云谓黄而襍白者驪说文云马深黑色毛传云纯黑曰驪孔云月令孟冬驾铁驪象时之色檀弓曰夏后氏尚黑戎事乘驪故知纯黑曰驪也黄者中央之正色旧说皆本毛传谓黄驂曰黄以为黄色而又襍赤似不必从经但言黄而已无事益之以驂也此章言驪皇驪黄虽有四种其意乃专主驪黄二色而言驪黄皆马之上色驪全身皆驪特跨间襍白皇大体是黄而微兼白色要之不失其为驪黄也牡马尤以驪黄为贵尔雅所云騊牼驪牡以罕称也有駉言乘黄矣而後乃实之以乘牡见牡马之贵黄也然列子有云牝而黄牡而驪马至果天下之马也郑玄注檀弓又云牝者色驪牡者色玄则牝马固亦贵驪黄矣以车者以驾金路之车也诸侯之车当以金路为首然则上文所举四色之马正周礼所谓齐马耳彭通作騊说文云马盛也盛者壮盛之盛孔谓有力有容是也以非一马故重言之後放此又扬雄太仆箴云诗好牡马牧放圉野犂车就牧而诗人兴鲁按犂车就牧之说恐未必然诗之言意祇谓其足以备驾车之用耳思无疆者承上文言伯禽舆卫之盛壮观如此繇其经国有方规模广大故欲後世子孙不为近小之谋思虑无疆亦如伯禽也臧尔雅说文皆以为善也称驥以德所谓臧也思马斯臧者思其马如此之善则当思其所以致是者也後放此辅广云夫人立心既远则其所成必厚大凡富贵之事率非轻易浮浅者之所能致按伯禽收事有成虽无所考而大略见于费誓篇曰今惟淫舍牯牛马杜乃攫斂乃弇无敢伤牯牯之伤汝则有常刑马牛其风勿敢越逐祗复之我商賚汝乃越逐不复汝则有常刑无敢寇攘踰垣墙窃马牛汝则有常刑凡此皆国马而非公马然当临敌之先其惓惓爱惜保护若此则其留意于牧事可知矣】駟駟牡马在圉之野薄言駟者有雅有駟【支韵陆氏本作?字林作 騊】有騊有騊【支韵陆本作騊】以车伾伾【支韵字林作駟】思无期【支韵】思马斯才【叶支韵读如啗抽迟翻 赋也雅说文以为苍黑色襍毛尔雅以为苍白襍毛苍者浅青也未详孰是陆佃云雅取騊之色今騊色在青黑之间亦在青白之间尔雅云黄白襍毛曰駟郭璞云今之桃花马也孔云二者皆云襍毛是体有二种之色相间襍与上云黄白曰皇止一毛色之中自有浅深者异也騊说文云马赤色也毛传以为赤黄曰騊按周尚赤牲用騊是騊为纯赤当从说文为正騊说文云马青驪文如博棊也毛云苍騊曰騊孔

云祺者黑色之名苍祺谓青而微黑今之驄马也此四色马以序推之当是戎马项羽垓下歌云时不利兮骓不逝是骓为戎马之证也秦风小戎篇云驾我騶驎小雅采芣篇云乘其四騶是騶为戎马之证也檀弓云周人尚赤戎事乘驪驪者浅赤也浅赤犹用纯赤可知是騶无周人戎事所尚也惟駟无考以车者以驾戎路之车也仝说文毛传皆云有力也孔云此章言戎马戎马贵多力思无期者言所思无期限也国虽安忘战必危绸缪一不至而祸患及之矣可有不思之时乎上章曰无疆言其思无一处之不到故马政亦其经营之所及此曰无期言其思无一息之不周则所谓畜戎马以备不虞者自有所不能已矣才通作材说文云木挺也徐锴云木劲直堪入於用者人之有才义出于此张文潜云斯臧良马也斯才戎马也臧者言其德才者言其用陈於礼者尚德用於战者尚才故也】駟駟牡马在圉之野薄言駟者有驪有騶【药韵】有驪有騶【药韵孔云定本集注及徐音并作騶俗本多作駟】以车绎绎【叶药韵读如药弋灼翻崔灵恩集注作騶騶】思无斃【叶药韵弋灼翻】思马斯作【药韵 赋也驪说文云青驪白鳞文如鼉鱼尔雅毛传皆云青驪驪曰驪郭璞云色有深浅班驳隐赭今之连钱驄也騶尔雅以为白马黑鬣说文云马白色黑鬣尾也韩诗及字林以为黑髦髦者鬣尾之谓广雅又以为白马朱鬣陆佃云今呼黄马尾鬣一道通黑如界者为騶盖马无分於黄白皆谓之騶若今衣脊络缝故曰騶也明堂位曰夏后氏騶马黑鬣此以别白马朱鬣之騶也月令曰孟春驾白騶此以别黄马黑鬣之騶也详见四牡篇驪本作騶毛传云赤身黑鬣曰驪说文云赤马黑毛尾也罗愿云月令五时驾马而驪处其二春苍龙秋白騶冬铁驪夏用赤驪中央用黄驪中央寓於季夏故所用物同而以色之浅深为之别也古者驪非所贵故淮南子曰驪駟不入牲以其犂也牲而犂且不可用而况天子法天象地为车服以顺时而授民者而顾取之何也月令乃吕不幸所作秦人自其旧时固自言以水德王故冬之铁驪以纯黑应其德而苍乃自其旧时水德所生又近於黑故不以为嫌至於夏之宜用騶中央之宜用黄秋之宜用翰皆与其服色违远两者不可兼也故以马体应时令而选其鬣与所尚之德合者以厌之此其为秦说昭昭矣毛云黑身白鬣曰騶孔谓此义未知所出愚按騶乃鸟名即鸛也疑马之色似之故以为名此章以车以序推之则驾田路之车也绎者抽丝相联接之义毛以为善走也孔云此章言田马田猎尚疾故言善走今按四色马之中旧说以騶马为善奈劳苦则其三可例观也斃说文云解也思无斃者言当思如伯禽之随事励精不可有厌倦作即易震卦为作足之作谓奋迅而动作也】駟駟牡马在圉之野薄言駟者有驪有騶有驪有鱼【韵字书作騶字林作?】以车祛祛【鱼韵】思无邪【叶鱼韵祥余翻】思马斯徂【叶鱼韵读如诸专於翻 赋也尔雅毛传皆谓陰白襍毛曰驪郭璞云陰浅黑今之泥驄或云目下白或云白陰皆非也陆佃云诗曰我马维騶我马维騶我马维驪其先後与駟之序合则驪不如騶騶不如騶矣然是诗乃卒言驪者以明马虽弥劣所以御之滋善尔雅毛传又谓彤白襍毛曰騶彤者赤也说文亦谓赤白襍毛也字右施段旧说谓色似鰕鱼徐锴谓色似霞郭云即今之赭白马也按此马前五代宋时顔延之尝为之赋则亦良马矣驪说文即以为驪马黄脊毛传原本则云豪髡曰驪孔释毛传於豪髡下文增一白字谓髡者膝下之名传言豪髡白者豪毛在髡而白长也按说文於驪字曰马豪髡而无白字尔雅於驪马黄脊者名之为驪不名驪也毛传以说文之驪为驪尔雅以说文之驪为驪何二马之相混若是俟博览者正之毛传云二目白曰鱼郭云似鱼目也罗云相马之说曰马目欲得黄又欲光而有紫艳若目小而多白则惊畏惊畏马之大病故其序尤在後始者牧夫驪黄之色纯也侵至騶駟之间色以及於驪騶之不纯不得已而及於驪鱼之惊畏驪鱼犹养之则其德之俭可知矣此有以见僖公之善牧马

也陆云言有骊有黄於前言有驪有鱼於後每章愈下则以言至诚成物有加而无已庄子曰百里奚爵禄不入於心故饭牛而牛肥殆此之谓也愚按首章四马惟骊黄二色次章则主青赤二色居多三章四马皆是裸色四章则主白色居多说文无祛字当通作驱郑玄云策马谓之驱以车祛祛者以驾给使之车可以策逐而行也思无邪者范我驰驱之谓徂说文云往也御之有道习之有法故能变驽为良而使之利往如此是诚可思也郑云思遵伯禽之法专心无复邪意牧马使可走行也又论语子曰诗三百一言以蔽之曰思无邪按今诗三百五篇然当正考甫未得商颂之时惟有国风及小大二雅周鲁二颂而已除今商颂五篇恰足三百之数足知诗三百之云非兼商颂言也故王通有曰诗三百始终于周正谓此也其举思无邪一言以蔽三百者孔子自表其删诗之意赞凡作诗之人皆以无邪之思为之而为诗故其所美者足以感人之善心其所刺者足以惩创人之逸志虽似好色而不淫虽似怨诽而不怒是皆孔子所亟录也故他日曰小子何莫学夫诗诗可以兴可以观可以羣可以怨迹之事父远之事君若使其思或邪则其言必邪当摈弃之不暇而又何赘列之于经以误後学乎明乎此则凡在三百之内者皆至正至严可法可戒之篇而朱子以为有淫奔自作之辞者谬矣圣人引此虽是断章取义若合之騶颂本意则人心之有思其奔逸难制犹之马也以无邪二字为之銜勒自有所范而不得骋矣圣人即执御可以见道独区区使马云乎哉】

騶四章章八句【子贡传惟有僖公二字申培说以为史克美僖公考牧之诗朱传亦云此诗言僖公牧马之盛繇其立心之远皆祖述序语而误者今按僖公虽颇能勤民然城项伐邾取须句取訾娄取济西以楚伐齐及夫人姜氏会齐侯于阳谷种种皆讥而始卜郊又僭之大者仅一从齐桓而老死牖下谓立心之远者固如是乎且庄公之世新延廐则书而僖公畜牧之盛如此经传皆轶而不载是岂可信哉序特以此诗作于史克与閟宫之诗同作遂繫归之僖公耳明達君子必有然予言者】

晨风秦穆公悔过也【此诗与秦誓相表里秦穆公信子潜师袭郑之言而不听蹇叔百里奚之谏果为晋师所败获其三帅百里孟明视西乞术白乙丙於殽以归乃作誓以自悔其曰尚猷询兹黄发则罔所愆番番良士旅力既愆我尚有之又曰昧昧我思之如有一个臣断断兮无他技其心休休焉其如有容人之有技若已有之人之彦圣其心好之不啻如自其口出寔能容之以能保我子孙黎民尚亦有利哉即此诗思见君子之意】

□【释文作鵒】彼晨【说文作鵒】风【叶侵韵孚金翻】郁【周礼注作宛】彼北林【侵韵】未见君子忧心钦钦【侵韵】如何如何【歌韵】忘我实【丰氏本作寔後同】多【歌韵兴也】□毛传云疾飞貌尔雅云晨风鵒陆玕云鵒似鵒青黄色燕颌钩喙向风摇翅乃因风飞急疾击鵒】

【燕雀食之列子云鵒之为鵒鵒之为布谷布谷久复为鵒也陆佃云禽经曰□好风□恶雨然则谓之晨风可知也已鬱说文云木丛生者北林林名孔穎達云北林繇鬱茂之故故晨风飞疾而入之程子云以晨风兴君子者取其去来之疾人君好贤待士有道则贤者归之礼貌不至则浩然去矣愚按晨风鵒鸟盖以拟三帅也钦说文云欠貌悚栗不安之状见于欠伸故其字久欠三帅自晋初归穆公倾心信用故自述其思而未得见之时则忧心钦钦然而又私

自慮之曰不知此時君子之用情于我如何乎如何乎恐多是不復念我矣夫北林也尚為晨風所集寧謂我朝廷之士可遂北林之不若哉其輸誠也至矣左傳穀之役晉人既歸秦帥秦伯素服郊次鄉師而哭曰孤違蹇叔以辱二三子孤之罪也不替孟明孤之過也大夫何罪且吾不以一眚掩大德秦大夫及左右皆言于秦伯曰是敗也孟明之罪也必殺之秦伯曰是孤之罪也周芮良夫之詩曰大風有隧貪人敗類聽言則對誦言如醉匪用其良覆俾我悖是貪故也孤之謂矣孤寔貪以禍夫子夫子何罪復使為政正與此詩同意及彭衙之敗秦伯猶用孟明孟明增修國政重施于民趙宣子言于諸大夫曰秦師又至將必辟之懼而增德不可當也後復伐晉取王官及郊封穀尸而還遂霸西戎用孟明也君子是以知秦穆公之為君也舉人之周也與人之壹也孟明之臣也其不解也能懼思也】山有苞【爾雅注作枹】栝【叶藥韻歷各翻】隰有六駁【叶藥韻讀如體伯各翻朱子本作駁丰本六駁作梓?】未見君子忧心靡樂【叶藥韻歷各翻】如何如何【見前】忘我實多【見前與也苞爾雅云槲也孫炎云木丛生曰苞齊人名曰槲爾雅云栝其實棗邢昺云栝似櫟之木也棗盛實之房也陸玑云秦人謂枹栝為栝河內人謂木蓼為栝椒櫟之屬也其子房生為棗木蓼子亦房生故說者或曰枹栝或曰木蓼也玑以為此秦詩也宜從其方土之言枹栝是也詳玑所言則此所謂栝即唐風鴛鴦篇所謂栝其有以木蓼名栝者非此詩之栝也林兆珂云東海及徐州謂之木蓮其葉始生食之味辛其棗子八月中成捩以為燭明如胡麻燭研以為羹肥如胡麻羹羅愿云管子五粟之土其柘其栝條直以長淮南時則訓十二月其木栝栝可以為車轂木不出火惟栝為然亦應陰氣也余詳唐風六駁木名崔豹云山中有木葉似豫章皮多癬駁毛傳以駁為獸名乃倨牙食虎豹者陸玑非之云駁馬梓榆也其樹皮青白駁華遙視似駁馬故謂之駁馬下章苞棗樹槿皆山隰之木相配不宜云魯云此木兼駁馬之名又曰馬梓今之檀木皮正青而澤與莢迷及此木相似故里語曰斫檀不諦得莢迷莢迷尚可得駁馬夫鳥獸草木之類特為難窮其形之相似者雖山澤之人朝夕從事有不能別其名之相亂者雖博物君子習于風雅有不能周故野人伐檀而得駁先儒訓駁而為獸其去本遠矣蘇子云言六未詳王肅云言六據所見而言愚按崔豹古今注以六駁為名意即所云華駁也以音同故通華為六耳嚴云山隰有草木可以大國而無賢人乎愚按苞栝六駁以況剛健篤實之士似指蹇叔也忱之反為樂曰靡樂者言其忱之真也】山有苞棗【叶寘韻徒四翻】隰有樹槿【寘韻說文作□】未見君子憂心如醉【寘韻】如何如何【見前】忘我實多【見前 興也棗常棗也陸玑云白棗也如李而小子如櫻桃正白今官園種之又有赤棗樹亦似白棗葉如刺榆葉而微圓子正赤如郁李而小五月始熟自關西天水隴西多有之按爾雅云唐棗移常棗棗是棗之名惟常棗得專之毛傳以為唐棗非是小雅云常棗之華鄂不韡韡秦子云作人當如常棗灼然光?樹槿謂成樹之槿爾雅云槿羅毛傳云赤羅也陸佃云其文細密如羅故曰羅也又有白者赤羅文棘白羅文緩皆所謂文木然而赤羅為上郭璞云今楊槿也實似梨而小酢可食陸玑云一名山梨一名鹿梨一名鼠梨今人亦種之極有脆美者亦如梨之美者愚按苞栝樹槿以況禮樂文章之士似擬百里奚也公谷二傳載穀之役百里奚與蹇叔皆諫穆公怒曰若爾之年者塚上之木拱矣又皆送其子而哭之既而果匹馬只輪無返者穆公以訑訑之聲音顏色拒人及敗而後悔之恐奚與叔之終結舌以自遠也故望之之切如此朱子云如醉則忱又甚矣】

晨風三章章六句【序以為刺康公也忘穆公之業始棄其賢臣焉今按康公之棄舊臣事无

所载申培说则云秦君遇贤始勤终怠贤人讥之盖缘篇中有忘我实多之语然而不能定其世则亦臆说耳若朱子直以为妇人念其君子之辞而引屢屢歌为证且谓秦俗固尔鄙诞殊甚】

交交黄鸟【本名黄鸟以小雅亦有黄鸟故加交交二字以为别】哀三良也【出序】秦穆公卒以子车氏之三子为殉皆秦之良也国人哀之【出左传】刺穆公以人从死而作是诗也【出序左文六年秦伯任好卒以奄息仲行鍼虎为殉君子曰秦穆之不为盟主也宜哉死而弃民先王违世犹诒之法而况夺之善人乎诗曰人之云亡邦国殄瘁无善人之谓若之何夺之古之王者知命之不长是以并建圣哲树之风声分之采物着之话言为之律度陈之艺极引之表仪予之法制告之训典教之防利委之常秩道之以礼则使毋失其土宜衆隶赖之而後即命圣王同之今纵无法以遗後嗣而又收其良以死难以在上矣君子是以知秦之不复东征也按杀人以葬旋环其左右曰殉应劭云秦穆公与羣臣饮酒酣言曰生共此乐死共此哀于是奄息仲行鍼虎许诺及公薨皆从死匡衡谓秦穆贵信而士多从死即其事也史记秦本纪云穆公卒葬于雍从死者百七十七人秦之良臣子舆氏三人亦在从死之中秦人哀之为作歌黄鸟之诗孔颖达云从死者多矣主伤善人故言哀三良也】

交交黄鸟止于棘【职韵】谁从穆公子车【史记作舆】奄息【职韵】维此奄息【同上】百夫之特【职韵】临其穴【叶质韵户橘翻】惴惴其栗【质韵丰氏本作□後同】彼苍者天【叶真韵汀因翻】殲我良人【真韵】如可赎兮人百其身【真韵兴也交交羣飞往来之貌黄鸟解见葛覃曹氏云黄鸟声音顔色之美人所爱悦犹三良为人之所爱也愚按罗愿尔雅翼称荆州每至冬月於田亩中得土坚圆如卵者辄取以卖破之则鷖在其中无复毛羽盖以土自裹伏而土坚劲候春始生羽破土而出鷖即黄鸟也诗意以三子埋在土中无繇得出故以寄慨又黄鸟一名鹇性好匹飞故其字从丽亦三子同从穆公之比也棘树低而多刺非安集之所陆佃云于文重束为枣并束为棘盖枣性重乔棘则低矣故其制字如此亦或墓上有棘故指所见言之陶潜诗所谓荆棘笼高坟黄鸟声正悲是也後放此又季本云黄鸟善鸣者也当时三良於穆公必知无不言言无不尽交相往来亦如黄鸟之善鸣而交交也止于棘桑楚人所共见之地也若止于丘隅则人所不见而可以免矣此见三良虽忠而未免伤于直也彼止于棘此从穆公亦相呼应从穆公者从之于地下谓从死也此事後之言观穆公称谥可见子车服?云秦大夫氏也奄息其名以次章仲行推之则序当居伯矣时朱子云杰出之称孔云言此人在百夫之中乃孤特秀立临其穴谓登临子车圻穴之上括地志云秦穆公塚在岐州雍县东南二里三良塚在雍县一里故城内然则二塚迴不相及盖从死而非同葬也惴说文云忧惧也说文无栗字但当作栗栗至罍?之时将坠不坠有战栗之象故状人之惧曰栗也此诗人自道若谓不意此人而所遭之不幸若此既悲善人之云亡亦虑邦国之殄瘁故忧惧交集也彼苍者天呼天而愬之殲尔雅云尽也春秋齐人殲于遂之殲通子车氏三子言之故下二章皆同文也良善也良人谓奄息也赎说文云贸也严粲云言此奄息之死若可以他人赎代之则当以百人之身赎之言百人不如一贤也奄息为百夫之特故愿以百身赎之後皆仿此又朱子云三人者不食其言以死从君而诗人不以为美者死不为义不足美也苏轼和陶渊明三良诗云此生泰山重忽作鸿毛遗三子死一言所死良已微贤者晏平仲事君不以私我岂犬马哉从君求盖帷杀身固有道大节要不亏君为社稷死我则同其归顾

命有治乱臣子得从违魏颗真孝爱三良安足希仕宦岂不荣有时纒忧悲所以靖节翁服此黔娄衣李德裕云臣道莫显于咎繇孝友莫尽于周公咎繇尚不殉于舜禹二后周公尚不殉于文武二王三良诎可许之死乎如三良者所谓殉荣乐也非所谓殉仁义也可与梁邱据安陵君同讥矣焉得谓之百夫特哉昔荀息许晋献以言继之以死君子犹歎斯言之玷不可磨也岂得以生同荣乐歿共埃尘以为忠乎晏平仲言君为社稷死则死之斯言得之矣按此责备三良亦是正论】交交黄鸟止于桑【阳韵】谁从穆公子车仲【左传注作中】行【叶阳韵户郎翻】维此仲行【同上】百夫之防【阳韵】临其穴【见前】惴惴其栗【见前】彼苍者天【见前】殲我良人【见前】如可赎兮人百其身【见前兴也陆佃云黄鸟常萐熟时来在桑间黄佐云桑人所尝采鸟性见人则骇与棘相似仲行名也防说文云堤也礼记疏云防以蓄水亦以障水盖言其行有坊表足为百夫之闲制如水之有堤防也】交交黄鸟止于楚【语韵】谁从穆公子车鍼虎【叶语韵读如许喜与翻】维此鍼虎【同上】百夫之御【语韵】临其穴【见前】惴惴其栗【见前】彼苍者天【见前】殲我良人【见前】如可赎兮人百其身【见前兴也黄佐云楚人所尝刈亦与前相似鍼虎亦名盖子车氏之季也御犹敌也言其才德出衆虽一人足以敌百夫也按史记秦武公卒葬雍平阳初以人从死从死者六十六人四传至穆公遂用百七十七人而三良与焉又十五传至献公元年始止从死刘公瑾云古之葬者有明器但备物而不可用如刍灵亦其类也不幸流俗之弊而至于作俑又不幸而至于用人然作俑者夫子且以为不仁而谓其无後先秦武公既用殉传至穆公而又用殉夫子之言似乎无验孰知穆公之後二十一传至庄襄王而以吕易嬴遂絶嬴氏之统继之始皇不知所监骊山葬後未三年而吕氏之祀又絶呜呼不仁之祸及子孙如此】

交交黄鸟三章章十二句【子贡传申培说皆以三良之殉归咎于穆】

诗经世本古义卷二十四之下

卷二十五

<经部,诗类,诗经世本古义>

钦定四库全书

诗经世本古义卷二十五

明 何楷 撰

周顷王之世诗一篇

硕鼠晋谲也士会奔秦晋欲复之使魏寿余伪以魏叛而自归于秦因与之俱还晋焉【左文十三年晋人患秦之用士会也夏六卿相见於诸浮赵宣子曰随会在秦贾季在狄难日至矣若之何中行桓子曰请复贾季能外事且繇旧勲郤成子曰贾季乱且罪大不如随会能贱而有耻柔而不犯其智足使也且无罪乃使魏寿余伪以魏叛者以诱士会执其帑于晋使夜逸请自归于秦秦伯许之履士会之足于朝秦伯师于河西魏人在东寿余曰请东人之能与夫二三有司言者吾与之先使士会士会辞曰晋人虎狼也若背其言身死妻子为戮无益于君不可悔也秦伯曰若背其言所不归尔帑者有如河乃行绕朝赠之以策曰子无谓秦无人吾谋适不用也既济魏人噪而还秦人归其帑其处者为刘氏按晋用谲计以复士会而托之魏叛以诱秦故此诗系之魏风其曰三岁贯女逝将去女适彼乐土者皆假设之辞也魏之遗事见于史传者絶少惟芮伯被逐并此而两而皆有一诗足为证佐云】

硕鼠硕鼠无【石经作毋】食我黍【叶麋韵读如竖上主翻】三岁贯【石经作官】女【音汝後同】莫我肯【石经丰氏本俱作冃】顾【叶麋韵果五翻】逝将去女【音汝後同外传作汝】适彼乐【音络後同】土【麋韵】乐土乐土【同上】爰得我所【叶麋韵读如数爽主翻比而赋也硕大也硕鼠樊光谓即鼯鼠也郭璞云形大如鼠头似兔尾有毛青黄色好在田中食粟豆关西呼为句鼠许慎云鼯鼠五伎鼠也能飞不能上屋能游不能渡谷能缘不能穷木能走不能先人能穴不能覆身此之谓五伎陆玕云今河东有大鼠能人立交前两脚于颈上跳舞善鸣食人禾苗人逐则走入树空中亦有五伎或谓之雀鼠其形大故云硕鼠也魏今河东河北县也诗言其方物宜谓此鼠非今大鼠又不食禾苗本草又谓蝼蛄为石鼠亦五伎物异名同孔颖达云此经作硕鼠不作鼯鼠之字其义或如陆言也愚按五伎之鼠亦名鼯鼠荀子曰鼯鼠五伎而穷是也此食禾苗者一名雀鼠陆佃以为即广雅所云?鼠也硕?雀音皆相近宜可信借为呼硕鼠而告之以当呼聚斂之臣而斥之首言黍者黍五谷之长古人酒食皆用黍其字以禾入水三字合孔子曰黍可以为酒禾入水也仪礼特牲佐食转黍注云独用黍者食之主又诗颂其饌伊黍汪云丰年之时虽贱者犹食黍明黍是贵也贯通作撰说文云习也三岁贯女言女习聚斂以为常至今已三岁矣又按石经作三岁官女盖以服官三载乃考绩之期故刺之亦通顾还视也犹念也三岁遭虐不为不久而絶不肯一顾念其苦此其所以恨也逝往也将去女者与之诀别之词适说文云之也乐土指邻国也连称乐土者

喜谈乐道彼土之可乐以见其厌苦于此也爰曰也所之言处音之近也得我所犹言得其所安处也】硕鼠硕鼠无食我麦【叶职韵纪力翻】三岁贯女莫我肯德【职韵】

逝将去女适彼乐国【职韵】乐国乐国【同上】爰得我直【职韵比而赋也罗愿云麦者接絶续之乏谷夏之时旧谷已絶新谷未登民于此时乏食而麦最先熟故以为重董仲舒曰春秋于他谷不书至无麦禾则书之以此见圣人于五谷最重麦与禾也因说武帝劝关中种麦而明堂月令亦有仲秋劝种麦之文其有失时行罪无疑凡以接续所赖惧民不以为意耳今皆为硕鼠所食则民之困甚矣德惠也莫我肯德谓不肯施惠于我也乐国者可乐之国其君及有司皆以百姓为念也爰得我直者范祖禹云欲适彼有道之国而赴愬之得其直严粲云直犹伸也受抑于此而欲求伸于彼也】硕鼠硕鼠无食我苗【叶豪韵谟袍翻】三岁贯女莫我肯劳【豪韵】逝将去女适彼乐郊【叶豪韵居劳翻】乐郊乐郊【同上】谁之永号【释文作咏】号【叶豪韵乎刀翻丰氏本作号比而赋也苗说文云草生于田者字从草从田会意谢枋得云食黍不足而食麦食麦不足而食苗苗者禾方树而未秀也食至于此以比其贪之甚也劳犹慰也杜预云劳者叙其勤以答也按顾存诸心德施诸政劳发诸言至慰人以言而犹不肯真可谓之憯毒矣国外曰郊繇郊以入其国也永号长呼也苏辙云欲适乐郊而不可得故曰谁为乐郊可长号而求之者哉愚按若以此为魏壽余之诗则不惟挟魏人以往秦而已且先播之声诗以鸣其愁苦不得已之意秦人之闻而信之固其宜矣】

硕鼠三章章八句【王符云履亩税而硕鼠作不知何据序以为刺重斂也国人刺其君重斂蚕食于民不修其政贪而畏人若大鼠也朱子谓此亦托于硕鼠以刺其有司之词未必直以硕鼠比其君也严粲亦云硕鼠指聚斂之臣此辈奉承其君以重斂于民国史题其事于篇端但曰刺重斂耳其後说诗者乃以为刺其君若大鼠程子谓序有失诗之意者此类是也臣之奉行繇君政使然谓刺其君重斂可也便以硕鼠为称其君不可也申培说但谓大夫贪戾魏人怨之而作是诗或谓此见魏并于晋之繇要之依文生解义亦无害若吕氏春秋载甯戚饭牛居车下望桓公而悲击牛疾歌高诱注以为歌硕鼠考甯戚卫人当是以卫魏同音之故讹而指为此诗耳未足信也】

诗经世本古义卷二十五

卷二十六

钦定四库全书

诗经世本古义卷二十六

明 何楷 撰

周定王之世诗八篇

汾沮洳晋人刺其大夫也【出子贡传申培说同】初设公路公行公族之官而用非其人故刺之【晋自成公即位始有公族余子公行之官解见此诗首章下官初设于晋足证此诗乃晋诗而非魏诗也魏?于晋献公成为献孙知与魏无涉也其时赵括为公族大夫赵盾为旄车之族先是赵衰从公子重耳奔狄狄人获叔隗季隗纳诸公子公子取季隗以叔隗妻赵衰生盾及反国又以己女妻衰生赵同赵括赵婴赵姬请逆盾与其母叔隗来以盾为才固请于公以为适子而使其三子下之以叔隗为内子而已下之盾本庶子故以公族让括耳然同乃括兄同宜为公族而以与括亦不可晓同食邑于原括食邑于屏故晋人呼同括为原屏又呼括为屏季也盾虽为旄车之族而是时盾方执政必不自为之为此者必其子赵朔矣朔以宣十二年罹下车之难而武方且畜于公宫继朔职者不知谁代为之其後赵婴通于庄姬庄姬者朔妻也原屏放诸齐庄姬为是故譖原屏将为乱而晋景遂尸同括邹忠胤云此诗所刺意者其即讥朔括之徒乎夫事虽不可以成败论然屠岸贾治灵公之贼请诛其子徧告诸将惟韩厥尝畜于赵氏故婉词解之而诸将无异议贾盖有所侮而动也侮朔之无能为也直如後世之尚主者耳姜嬴与庄姬通罪固当讨然同括不请于君而擅放之岂得为无罪观邲之役与救郑之役二人勇而锐于战几再败晋师斯不亦妄庸监子哉何以堪公族之任故愚意诗人所讥即以为朔与括亦可盖成公初设此官而诸人不称其职是以貽讥按春秋鲁宣公二年秋九月晋人弑灵公而立成公十月周匡王崩定王即位故系此诗于定王之首详玩诗意深刺君疎远公室而信任卿族且所用者又皆不得其人故因汾水之间有贤人隐居而不得位者借以相拟其起兴于采莫采桑采蕢犹曰人才无地不生耳】

彼汾沮洳【叶遇韵读如孺儒遇翻】言采其莫【叶遇韵莫故翻】彼其之子美无度【遇韵】美无度【同上】殊异乎公路【遇韵 兴也山海经云管涔之山汾水出焉在今山西太原府静乐县地理志云西南至汾阴入河在今平阳府荣河县苏辙云汾水出于晋其流及魏晋语宰孔曰晋景霍以为城汾河涑浚以为渊沮与王制沮泽之沮同义方氏云小而水所止曰沮大而水所止曰泽洳说文云渐湿也朱子云沮洳水浸处下湿之地莫毛传云蕢也陆玑云莫茎大如箸赤节节一叶似柳叶厚而长有毛刺今人纍以取茧绪其味酢而滑始生可以为羹又可生食五方通谓之酸迷冀州人谓之乾绦河汾之间谓之莫陆佃云其子如楮实而红谓之乾绦盖以此也今吴越之俗呼为茂子彼其之子指贤人也郑玄云是子之德美无有度言不可尺寸孔云不可以尺寸量也重言美无度有怪而惜之之意後放此殊即异也公路官名孔云以其主君路车谓之公路按左传宣二年初骊姬之乱沮无畜羣公子自是晋无公

族及成公即位乃官卿之适子而为之田以为公族又官其余子亦为余子其庶子为公行晋于是有公族余子公行赵盾请以括为公族盾为旄车之族据此则公族以适子为之公行以庶子为之其称余子者杜预以为适子之母弟也盾辞公族而为旄车之族乃余子之职意即所为公路者耳旄车亦作輶车服?以为戎车之倅倅者副也公行以主君兵车之行列得名而旄车为之副然则公路小于公行而公行又小于公族故三章先後之序云尔诗意言汾水之旁渐湿所及之地有莫生焉采之可以供食用之需以兴彼其之子其德不可涯涘亦犹汾水之旁浸者然据今所见其备员公路之官者皆莫之能拟也然乃贤者不用而所用者皆不贤何与後放此】彼汾一方【阳韵】言采其桑【阳韵】彼其【韩诗外传作已下章同】之子美如英【叶阳韵於良翻】美如英【同上】殊异乎公行【叶阳韵寒刚翻 兴也一方朱子云彼一方也上章沮洳乃广指汾旁所浸之地此则就近水之处而言比前为差狭矣采桑所以供蚕事英者草木之华也如英如玉皆摹拟之辞于彼汾一方想见之犹秦风云所谓伊人在水一方者韩诗外传云君子有主善之心而无胜人之色德足以君天下而无骄肆之容行足以及後世而不以一言非人之不善故曰君子盛德而卑虚已以受人旁行不流应物而不穷虽在下位民愿戴之虽欲无尊得乎哉诗曰彼己之子美如英美如英殊异乎公行】彼汾一曲【沃韵】言采其蕒【沃韵】彼其之子美如玉【沃韵】美如玉【同上】殊异乎公族【叶沃韵读如濯直角翻 兴也一曲朱子云谓水曲流处比一方又狭矣班固地理志云魏国亦姬姓也在晋之南河曲故诗曰彼汾一曲寘之河之侧尔雅释草云蕒牛唇李巡云别二名郭璞云水蓐也如续断寸寸有节拔之可复陆玕云今泽泻也叶如车前而大味亦相似徐州广陵人食之本草云一名水泻及泻芒芋鹄泻陶隐居云叶狭长藂生诸浅水中仙经服食断谷皆用之亦云身轻能步行水上图经云春生苗多在浅水中叶似牛舌独茎而长秋开白花作藂似谷精草采蕒所以治疾公族郑云主君同姓昭穆者晋以卿大夫之适子为之不必君之同姓左传晋悼公时荀蒙荀裯栾黶韩无忌为公族大夫使训卿之子弟是也悼公曰荀蒙惇惠荀裯文敏黶也果敢无忌镇静夫膏粱之性难正也使惇惠者教之则徧而不倦使文敏者道之则婉而入使果敢者谏之则过不隐使镇静者修之则壹味悼公此言则公族之选可识矣韩诗外传云君子易和而难狎也易惧而不可劫也畏患而不避义死好利而不为所非交亲而不比言辨而不乱荡荡乎其义不可大也嗟乎其廉不可刳也温乎其仁厚之寛大也超乎其有以殊于世也诗曰美如玉美如玉殊异乎公族】

汾沮洳三章章六句【子贡传申培说篇名皆作彼汾 序以为刺俭也其君俭以能勤刺不得礼也今按篇中絶不见有所云俭以能勤者郑玄即以采莫采桑采蕒当之然以国君而躬行采菜有是事否或曰此影语也人主而亲细民之事为勤俭则有并耕而治数米而炊如沮洳采莫之为者矣果尔则篇中曰彼其之子又曰殊异乎公路何以称焉崔灵恩集注于此序其君俭以能勤句君下有子字王肃孙毓皆以为大夫也朱子从之而第不取其采菜之说但以章首二句为兴体愚不知其所谓兴意安在为美为刺皆不可解且以殊异乎公路等语谓刺其俭嗇徧急之态外不似贵人是矣然上文曰美无度美如英美如玉不应极其赞美若此如英如玉政自其气象见之彼俭嗇徧急者果能有此气象否乎既已如英如玉矣奈何云不似贵人乎似亦难为下转语矣诸儒所以相沿总之为篇次所误见此诗系于葛屨之下于是附会牵连而为之说曰女手缝裳采桑采莫正与公仪休拔园葵去织妇者相反以贵族而与细民争利其国之困穷可知噫说诚辨矣只恐诗人失笑于千载之上也读韩诗外传二则无贬

辞愚故窃于此得诗义焉又按晋卿族太盛其後三卿卒以分晋诗人倘亦有慨于中故于公路公行公族之官深致其不满之意与】

株林刺陈国君臣淫于夏姬也【何以知为刺陈国君臣也以乘马乘驹之语知之乘马者灵公乘驹者孔宁仪行父】

胡为乎株林【侵韵】从夏南【叶侵韵女今翻】匪适株林【见上】从夏南【见上赋也胡之言何盖音近也株林王氏以为株邑也按邑外曰郊郊外曰牧牧外曰野野外曰林据诗中曰株】

【林又曰株野又曰株王氏之言是也郡国志陈县注云陈有株邑盖朱襄之地郡县志云宋州柘城县本陈之株邑在宁远县南七十里寰宇记云陈州南顿县西南三十里有夏亭城城北五里有株林夏南夏徵舒也孔颖达云楚语昔陈宣公公子公子夏为御叔娶于郑穆公女生子南徵舒祖字子夏故为夏氏徵舒字子南以氏配字谓之夏南楚杀徵舒左传谓之戮夏南是知夏南即徵舒也实从夏南之母言从夏南者妇人夫死从子夏南为其家主故以夏南言之朱子云淫乎夏姬不可言也故以从其子言之诗人之忠厚如此按礼寡妇之子非有见焉弗与为友远嫌也况从其子而淫于寡妇乎国人不欲斥言之故相与语曰我国君大夫何故偕往株林乎或对之曰从夏南耳闻者又微其辞而为之隐曰是必无君臣同往从夏南之理恐非适彼以从夏南也严粲云依违言之而讥之最切矣】驾我乘马【韵】说【音税丰氏本作税】于株野【马韵】乘【平声】我乘【去声】驹【虞韵释文作骄旧音驹沈云或作驹字是後人改之皇皇者华篇内同】朝【丰氏本作鼂】食于株【虞韵 赋也具车马曰驾孟子乘舆已驾是也陆佃云诸侯乘马驾四我弋君自我下文我则代大夫自我也说文云释也犹舍止也株野说见上章乘我之乘与驾义同乘驹四驹与乘马同郑云马六尺以下曰驹毛传云大夫乘驹孔云皇皇者华说大夫出徒经谓我马维驹是大夫之制礼当乘驹也陆云马二岁曰驹大夫乘驹盖驹血气未定则有蹄啮之虞故大夫乘之又从句字音拘则以血气未定宜拘执之焉耳曰朝食于株则在株越宿可知此章答上匪适株林二语曰尔谓彼适株林者非从夏南也然则彼驾乘马者方且说于株野彼乘乘驹者方且朝食于株此非从夏南而何曰株林则其地尚泛繇株林而株野繇株野而食于株明明在夏南之所居矣於乘马者言税野於乘驹者言朝食互相备也抑又若甚大夫之恶以为君讳者然所刺之大夫则孔宁仪行父是也吕祖谦云驾言乘马则舍于株野矣乘我乘驹则又食于株矣虽欲为之隐亦不可得也周语单襄公曰先王之令有之曰天道赏善而罚淫故凡我造国无从非彝无即滔淫各守尔典以承天休今陈侯不念胤续之常弃其伉俪妃嫔而帅其卿佐以淫于夏氏不亦渎姓矣乎即此诗所咏也按徵舒父御叔於灵公为从祖父故曰渎姓朱善云卫之乱至于墙有茨而极于是有狄入卫之祸陈之乱至于株林而极于是有楚入陈之祸然则狄非能入卫也宣姜实召之也楚非能入陈也夏姬实召之也此所谓女戎也比事以观可以为淫乱者之戒矣】

株林二章章四句【序云刺灵公也淫乎夏姬驱驰而往朝夕不休息焉申培说云陈灵公通乎夏姬国人刺之子贡传亦同然则言乘马又言乘驹当作何解岂灵公忽而乘马又忽而乘

驹乎】

东门之杨刺陈灵公淫于夏姬也【周语定王六年单襄公假道于陈以聘於楚大朝覲矣道弗可行也司空不视涂场功未毕民将筑台于夏氏及陈陈灵公与孔宁仪行父南冠以如夏氏留宾弗见今按此诗言杨叶牂牂肺肺皆赤色也霜降後则杨叶色赤正心星晨见之时而辞又近淫奔之语是以知为刺淫于夏姬也】

东门之杨【阳韵】其叶牂牂【阳韵】昏以为期明星煌煌【阳韵赋也杨木有黄白青赤四种以下文牂牂推之此杨正谓赤杨耳其叶牂牂纪时也牂羊名说文以为牡羊毛传以为牝羊言牝近之愚博求其义则牂乃赤色羊也按前汉书天文志云牂云如狗赤色又太岁在午曰敦牂午亦火德其色赤则牂之为赤色也明矣曰牂牂者明其叶叶俱赤如牂羊之色然也陆佃云赤杨霜降则叶赤材理亦赤昏本作昏说文云日冥也期说文云会也谓订其相见之期会也明星解见鸡鸣篇煌煌说文云辉也輝者火光也曰煌煌者光之盛也灵公经东门而适株邑以淫于夏姬其相订约皆以昏为期及至啓明之星煌煌然而犹盘桓不忍去也此诗当与月出株林二篇合看日月出皎兮佼人僚兮则昏以为期可知矣曰乘我乘驹朝食于株则何但明星煌煌而已哉】东门之杨【此章杨字不用韵】其叶肺肺【叶霁韵读如嘽呼惠翻】昏以为期明星皙皙【叶霁韵征例翻易明辨皙也之皙与皙不同彼从析此从折赋也肺五臟之一周礼以肺石达穷民注云肺石赤石也疏云肺属南方火火色赤肺亦赤曰其叶肺肺者言叶之色似之亦明其非一叶也又肺之色比牂为更赤然则杨叶之色肺肺然为深于霜降之时矣此以见公之淫于夏氏不一而足株林之序所谓驱驰而往朝夕不休息者也皙说文云昭晰明也从日折声引礼记晰明行事之晰徐锴云今礼记作质明假借也明星皙皙盖天将晓而东方明之时小星已不见惟明星尚了了可辨也】

东门之杨二章章四句【序云刺时也昏姻失时男女多违亲迎女犹有不至者也今按经文有昏字礼娶妇以昏而霜降亦昏姻之时荀卿谓霜降逆女冰泮杀止家语谓霜降而妇功成嫁娶者行焉是也从其说亦自可通特以亲迎不至虽曰失礼然亦猥事必如此一一尽录之经恐里巷歌謡不胜録矣朱子又改为男女期会而负约之辞郝敬非之云暮夜郊外林莽相期惟恐人知又自诗以传乎非情也子贡传有朋友二字而下文阙不知其意云何章潢以为刺失信义也托言黄昏为期而至于明星煌煌皙皙则失其为约矣语意近似而要无稽据申培说阙文】

东门之池刺陈夏姬也淫于一君二卿焉【按左传陈灵公与孔宁仪行父通于夏姬皆衷其相服以戏于朝泄冶諫曰公卿宣淫民无效焉谷梁传亦云陈灵公通于夏徵舒之家公孙寧仪行父亦通其家或衣其衣或衷其襦以相戏于朝即此诗所咏也篇中曰彼美淑姬故知为刺夏姬也】

东门之池可以沤麻【叶歌韵眉波翻】彼美淑【陆德明本丰氏本俱作叔後同】姬可与晤歌【韵兴也池毛传云城池也孔安国云停水曰池孔颖达云以池系门言之则此池近在门外诸诗言东门皆是城门故以池为城池郡县志云东门池在陈州城东门内道南水经注

云陈城故陈国也东门内有池池水东西七十步南北八十许步水至清洁而不耗竭不生鱼草水中有故台处诗所谓东门之池也沕说文云久渍也毛云柔也孔云谓渐渍之使之柔韧也东门之外有池水可以沕柔麻草使可缉绩愚按诗之兴意以东门之池乃公共之所人人可往无禁止也沕者渐渍之辞犹云可以浸淫而无害也麻解见丘中有麻篇春秋说题辞云麻之为言微也阴精寢密女作纖微也麻生于夏夏衣物成礼仪故麻可以为衣阳成于三物以化故三变缕布也宋均曰麻枝叶成谓之衣三变生成形一变也沕取皮二变也积成为缕三变也彼美淑姬指夏姬郑穆公之女姬姓云美淑者反言之也又陆德明本淑作叔按姬为郑灵公之妹以长幼序之故云叔姬谓之彼美正美其色耳晤说文云明也字从日刘熙云人声曰歌柯也以声吟咏如草木之有柯叶徐锴云长引其声以诵之也谓之晤歌者言相与和歌于白昼之下非幽隐无人之地也下仿此殷大白云池也而沕麻淑姬也而晤歌其为用亦鄙矣】东门之池可以沕紵【语韵陆本丰本俱作苧】彼美淑姬可与晤语【韵兴也紵说文云繻属细者为紵粗者为紵陆玕云紵亦麻也科生数十茎宿根在地中至春自生不岁种也荆扬之间一岁三收今官园种之岁再割割便生剥之以鋏若竹刮其表厚皮自脱但得其里韧如筋者煮之用缉谓之徽紵今南越紵布皆用此麻语说文云论也徐锴云论难曰语语者午也言交午也】东门之池可以沕菅【叶先韵居贤翻】彼美淑姬【列女传作孟姜】可以晤【列女传作寤】言【叶先韵倪坚翻兴也尔雅云白华野菅陆玕云菅似茅而滑泽无毛其根如渣芹而甜根下五寸中有白粉者柔韧宜为索沕及曝尤善也邢昺云白华亦茅类也沕之柔韧异其名谓之菅因谓在野未沕者为野菅耳濮一之云左传虽有丝麻无弃菅蒯蒯与菅皆谓苕也黄华者俗名黄芒即蒯也白华者俗名白芒即菅也范祖禹云菅可为屨许慎云直言曰言论难曰语徐云凡直言者无所指引借譬也又周礼注云发端曰言答述曰语愚按此诗三章语意相类非徒取变文叶韵已也诚见一姬耳而有与之歌者又有与之语者又有与之言者其秽德彰闻为已甚矣直书其事而丑自见犹之一东门之池而麻沕焉紵沕焉菅亦沕焉尚复有清池哉姬淫于陈灵公孔宁仪行父适符三人数又古人贵麻与丝并言故说文曰衣锦繻衣曹风曰麻衣如雪所谓虽有丝麻不弃菅蒯是也然则麻以比灵公而紵与菅则孔仪二人之况耳诗之属辞精切而浑厚不露如此】

东门之池三章章四句【子贡传申培说俱阙文朱子以为男女会遇之辞盖因其会遇之地所见之物以起兴然则夫子何以录之于经乎序云刺时也疾其君之淫昏而思贤女以配君子也旧说遂以淑姬为所思之贤女欲藉其晤歌晤言为成德之助言陈君荒淫无度不可告语其君子无可奈何但因其好色思得淑女为其配耦日夜处而无间与之对歌以相切化庶几优柔而渐入之如池之沕麻渐渍而不自知也于义迂甚】

月出陈灵公淫于夏姬姬子徵舒将弑公国人作此诗以讽【灵公名平国春秋宣十年五月癸巳陈夏徵舒弑其君平国据周语实定王之八年也左传云陈灵公与孔宁仪行父饮酒于夏氏公谓行父曰徵舒似女对曰亦似君徵舒病之公出自其廄射而杀之史记亦云灵公十五年与二子饮于夏氏罢酒出徵舒?弩廄门射杀灵公此诗篇中三言舒字指夏徵舒也杀机已动而公犹不知止故国人作此诗以讽告之谚云奸近杀可畏哉三复此诗为之毛悚汪克宽云礼称诸侯非问疾吊丧而入诸臣之家是谓君臣为谗注者谓陈灵公数如夏氏以取弑焉夫人君之举动尚谨于嫌疑之际而不可轻也况可紊男女之别恣鸟兽之行其不为朱温

之万段者几希矣张洽云古人以礼为防闲而人君之尊有妃偶嫔御之侍有居处出入之奉有廉耻羞恶之限所以养其尊贵者至矣何至驱驰於株林以为乐哉考之外传单子如楚过陈归而告王以陈侯帅其卿佐南冠以淫于夏氏陈侯不有大咎国必亡已见之于三年之前矣能无及乎观春秋所书弑君如陈平国齐光蔡固以千乘之主而自倖于闾巷小人所不为者心术之惑可不戒哉】

月出皎【筱韵陆德明本丰氏本俱作皦】兮佼【石经陆本丰本俱作姣後同】人僚【筱韵陆本作疗丰本作辽】兮舒【丰本作纾後同】窈纠【叶筱韵举天翻】兮劳心悄【筱韵】兮【赋也郝敬云月主阴司昏俾夜作昼比女色也皎说文云月之白也佼说文云交也从人从交佼人交乎夏姬之人指灵公也僚说文云好貌当月出之时而见此交夏姬之人僚然姣好与皎月相映也舒夏徵舒也举名以告诗人之辞亦显矣窈说文云深远也以处心积虑言纠说文云?三合也取以象徵舒意中愤恨绞急之状曰劳心者国人自谓也国人忧其君之将见弑故忧思之甚而至于心劳也後仿此悄徐锴云忧思低小也钱氏以为默忧是也此第一章摹写公初见夏姬而其子徵舒邑邑不自得之容如此】月出皓【韵丰本作皜】兮佼人憯【叶皓韵胡老翻埤苍作嫪云妖也陆本羣经音辨俱作刘丰本作藐】兮舒慆受【叶皓韵时倒翻】兮劳心慆【叶皓韵采蚤翻】兮【赋也皓本作顛说文云白貌憯字说文不载当作刘杀也忧灵公交乎夏姬将见杀也如是诗人之辞抑又显矣慆字说文亦不载当即?字愁也楚辞云伤余心之慆慆是也受说文云相付也徐锴云上下相受也盖不胜其伤心之痛而私有所授意于人将以图公也慆说文云动也王安石云言不安而骚动也】月出照【啸韵丰本作燎】兮佼人燎【叶啸韵力照翻丰本作宵】兮舒夭绍【叶啸韵时照翻】兮劳心惨【叶啸韵读如隋七肖翻朱子云当作燥五经文字作燥丰氏本作慄】兮【赋也照增韵云明所烛也燎说文云放火也舒弑计已成公将遇害如火之燎于原不可向尔也夭说文云屈也徐云夭矫其头颈也绍说文云紧纠也不反顾无二虑之意惨毒也犹痛也君父遭难其可毒痛孰如之夫既明斥舒名以告君矣而公终不悟愚哉其後宣十一年冬楚庄王为陈夏氏乱故伐陈谓陈人无动将讨于少西氏遂入陈杀夏徵舒轘诸栗门少西者徵舒祖子夏之名楚语蔡声子曰昔陈公子夏为御叔娶于郑穆公生子南子南之母乱陈而亡之使子南戮于诸侯】

月出三章章四句【子贡传阙文但存朋友二字申培说以为朋友相期不至而作即如所言相期不至亦是常事而永夜怫郁若此近于溺矣序云刺好色也在位不好德而说美焉意亦近之而於义甚泛朱子改为男女相悦相念之辞不独理味索然抑且有害风教圣人何为而不删之乎】

泽陂代为夏姬思陈灵公仪行父孔宁而作盖以丑之【序云刺时也言灵公君臣淫于其国男女相说忧思感伤焉钱天锡云盖女思男之辞观硕大且卷硕大且俨可见如涕泗滂沱辗转?枕宛是妇人的光景愚按此必夏姬之作或国人代为之言以志刺其在灵公被弑孔宁仪行父奔楚之後乎序所谓男女相说男则一君二卿是也女即夏姬是也】

彼泽之陂有蒲【读诗记丰氏本俱作□风俗通作薺】与荷【歌韵樊光尔雅注作茄】有

美一人伤【鲁诗作阳云予也】如之何【歌韵】寤寐无为涕泗滂沱【歌韵兴也泽国语云水之鍾也应劭引传云水草交厝名之为泽泽者言其润泽万物以阜民用也陂毛传云泽】

【障也孔穎达云谓泽畔障水之岸蒲说文云似莞而褊有脊滑柔而温陆佃云水草也生于水厓可以为席故礼男执蒲璧言有安人之道也严粲云按斯干下莞笈云小蒲则莞精蒲粗矣左传云泽之莞蒲舟蛟守之名物解云蒲香草也生于春盛于夏与荷同其荣枯荷尔雅云芙蕖其茎茄其叶蓊其本蓂其华菡萏其实莲其根藕其中的的中薏陆佃云荷总名也叶华等名具衆义故以不知为问谓之荷也昔人正名百物有是哉郭璞云今江东人呼荷华为芙蓉北方人便以藕为荷亦以莲为荷蜀人以藕为茄或用其母为叶名或用根子为母叶号此皆名相错习俗传误失其正体者也罗愿引周书云鱼龙成则薏泽竭薏泽竭则莲藕掘孔云以陂内有此二物故举言之非生于陂上也郝敬云淫义生于水故以泽比蒲荷菡萏皆柔弱浸淫之物水草相依比男女相狎荀子云与时屈伸柔从若蒲苇陆佃云荷善倾欹蒲无骨干而柔从愚按三章皆言蒲盖蒲所以为席故姬取以自况荷与菡萏别言之则公与孔宁仪行父三人之况也首言荷兴灵公也有美一人正指灵公伤痛也曲礼云知生者吊知死者伤公既被弑故云伤如之何也说文云寐觉而有言曰寤无为言他无所事也涕说文云泣也毛云自目曰涕自鼻曰泗孔云经传言陨涕出涕皆谓泪出于目泗既非涕亦涕之类明其泗出于鼻也又素问云涕之与泣譬人兄弟急则俱死生则俱生据此则泣为泪涕为鼻液今俗谓鼻液为涕是也愚按增韵涕自兼目涪鼻液二义泗本水名以其源有四故从水从四此言涕泗亦以目鼻四窍俱出涕故谓之泗今文中有云涕之泗者深得其义非以涕与泗并言也滂说文云沛也沱流貌易出涕沱若是也皆哀死之辞】彼泽之陂有蒲与萏【叶先韵居贤翻郑玄改作莲非】有美一人硕大且卷【叶先韵逵员翻陆德明本作睠丰本作倦】寤寐无为中心悁悁【先韵兴也萏解见溱洧篇按谷梁传列女传孔宁皆作公孙宁则宁是陈同姓之卿仪行父乃异姓之卿此诗首言荷终言萏萏萏者荷华也取以为同姓之比萏与荷非一族盖比仪行父也有美一人正指行父硕大以形体言卷曲也舒卷之卷言其形体硕大而举动且又能委曲也悁说文云愤也悁悁者悁而又悁毛云犹悒悒也公如夏氏戏谓行父曰微舒似汝行父对曰亦似君微舒闻其言而病之公遂不免而二子皆奔生离死别皆胎祸于行父之一言故虽思之而又恨之】彼泽之陂有蒲萏【说文丰本俱作萏陆本作荇又作□】萏【叶琰韵待捡翻说文作萏陆本作□】有美一人硕大且俨【琰韵说文韩诗太平御览俱作?薛君云重顺也杨慎云言美人丰艳体外有余或训为含怒非诗注一作□】寤寐无为辗【陆本文选注丰本俱作展】转伏枕【叶琰韵知捡翻兴也萏萏荷华之未舒者徐锴云萏犹含也未吐之意陆佃云萏萏实若偈随昏听闾辟焉陆玕云未发为萏萏已发为芙蕖通曰芙蓉荷之茎叶华实等名甚多萏萏特荷中之一物耳公孙宁亦公族中之一人故以为比又或以其年少云然有美一人正指宁也俨毛云矜庄貌言其形体硕大而且能为矜庄之容以副之也旧说以此为称妇人之美俨然可敬爱如车牵之硕女云者然谓之曰俨则非淫佚之妇所称明矣辗车辘物也转运也皆形容卧而不周之意解见关雎篇伏偃也偃卧而以首据枕谓之伏枕朱子云辗转伏枕卧而不寐思之深且久也以其出奔在楚无相见期故思之春秋宣十一年楚子入陈纳公孙宁仪行父于陈胡安国云此二臣者从君于昏宣淫于朝诛杀谏臣使其君见弑盖致乱之臣也肆诸市朝与衆同弃然後快于人心今乃诡辞奔楚

托于讨贼复讐以自脱其罪而楚庄不能察其反覆又使陈人用之是犹人有饮毒而死者幸而复生又强以毒饮之可乎故圣人外此二人于陈而特书曰纳纳者不受而强纳之者也为楚庄者宜奈何潞黻舒之宫封泄冶之墓尸孔宁仪行父于朝谋于陈衆定其君而去其庶几乎列女传云夏姬状美好无匹内挟伎术盖老而复壮者三为王后七为夫人公侯争之莫不迷惑失意左传楚庄王讨夏氏遂杀黻舒而灭陈欲纳夏姬以申公巫臣谏而止子反欲取之巫臣曰是不祥人也是天子蚩杀御叔弑灵侯戮夏南出孔仪丧郑国何不祥若是人生实难其有不获死乎天下多美妇人何必是子反乃止王以予连尹襄老襄老死于邲其子黑要烝焉巫臣遂自娶之而奔晋叔向之母论夏姬曰子灵之妻杀三夫一君一子而亡一国两卿矣可无惩乎吾闻之甚美必有甚恶是郑穆少妃姚子之子子貉之妹也子貉早死无後而天鍾美于是将必以是大有败也子灵巫臣字子蚩子貉皆郑灵公字姚寛云黻舒行恶逆姬当四十余岁乃鲁宣公十一年历宣公成公申公巫臣窃以逃晋又相去十余年矣後又生女嫁叔向计其年六十余矣而能有孕或云夏姬凡九为寡妇当之者辄死左氏所载当之者已八人矣宇文士及妆台记序云春秋之初有晋楚之谚曰夏姬得道鸡皮三少】

泽陂三章章六句【旧说皆以为男女相悦而相念之诗朱子亦然生繇未深玩诗词而得其指耳子贡传申培说皆以为泄冶谏而死君子伤之则每章首二句当作何取义不足信也】

旄丘责卫不恤邻也狄迫逐黎侯黎侯求救于卫卫不能救黎之臣子怨之而作是诗也【左宣十五年潞子婴儿之夫人晋景公之姊也酆舒为政而杀之又伤潞子之目晋侯欲伐之诸大夫皆曰不可酆舒有三隼才不如待後之人伯宗曰必伐之狄有五罪隼才虽多何补焉不德一也嗜酒二也弃仲章而夺黎氏地三也虐我伯姬四也伤其君目五也怙其隼才而不以茂德滋益罪也夫恃才与衆亡之道也商纣繇之故灭天反时为灾地反物为妖民反德为乱乱则妖灾生故文反正为乏尽在狄矣晋侯从之六月癸卯晋荀林父败赤狄于曲梁辛亥灭潞酆舒奔卫卫人归诸晋晋人杀之七月壬午晋侯治兵于稷以略狄土立黎侯而还今按晋灭潞而酆舒遂奔卫则卫与狄之素相好可知宜乎其不肯救黎也其归酆舒于晋直是畏晋威之故耳黎虽已灭于狄犹幸复封于晋故知王灵不纲则霸主自不可少】

旄【陆德明云字林作莠】丘之葛【曷韵】兮何诞之节【叶曷韵才达翻】兮叔兮伯【叶质韵必益翻】兮何多日【质韵】也【兴也尔雅云前高旄丘李巡云谓前高後卑下也又王雪山云丘之多草木者也星名旄头言光芒多冠名旄头言羽毛多亦通寰宇记云在澶州临河县东诞毛传云濶也按说文诞词诞也徐锴云妄为大言也故诞转训大又因训大转为濶也节本竹约之名葛亦有节郑玄云土气缓则葛生濶节黎臣子之初至卫见旄丘之上葛长大而节疎濶因追述之以起兴曰旄丘之葛何其节之濶也以兴诸侯以国相连属忧思相及亦当如葛之濶节蔓延相连及也陆佃云瓜葛皆延蔓相及故属之绵远者取譬瓜葛一说郝云前高後下曰旄丘丘之不断截者葛亦不断之物毛遂曰从之利害两言而决日出而言日中不决即此意也亦通季父曰叔父之兄曰伯凡兄亦曰伯皆等称卫臣之辞先叔後伯者取其叶韵范景文云卫兄弟之国也其臣亦兄弟也而呼以叔伯式微之臣固应如是耳何多日者言何其多日而不见救也观後章有狐裘蒙戎之语则自暑历寒其久可知鍾惺云多日二字立言甚妙不作絶望之语深于责人者也朱子云此诗本责卫君而但斥其臣可见其

优柔而不迫也】何其处【叶语韵敞吕翻】也必有与【语韵】也何其久【叶纸韵苟起翻】也必有以【纸韵】也【吕氏春秋此二句在何其处也二句之上赋也处止也与犹偕也春秋帅师例能左右之曰以因上章何多日也而言我黎君求救于卫何其止于彼而不来其必有与吾君相偕而俱来者耶何其为时之久而未来其必有能扶持左右之而后来耶盖凝望之切如此】狐裘【丰氏本作求】蒙戎【东韵丰本作茸】匪车不东【韵】叔兮伯兮靡所与同【东韵 赋也狐裘黎君所衣之裘也蒙戎通彪茸说文云彪犬之多毛者茸草生茸茸貌左传士蒞赋诗云狐裘彪茸杜预云乱貌吕祖谦云狐裘之貌是也匪通作非车谓黎君所乘之车东指卫也郑玄云黎国在卫西此章因卫不来故而为怅恨之辞言我君自夏适卫至今已服狐裘之服矣非不亲乘车而往东也其如卫之叔兮伯兮漠不关念竟无有与我君同来者我亦奈之何哉】琐【陆德明本作璫】兮尾兮流【尔雅注作留陆本作鸛】离之子【纸韵】叔兮伯兮褻【释文一作衰】如充耳【纸韵 比而赋也琐通作?说文以为贝声也字从小因借为细小之义尾说文云微也流离尔雅作鸛鸛陆玕云泉也自关西谓泉为流离其子适长大还食其母故张奐云鸛鸛食母许慎云泉不孝鸟是也苏辙云卫人以狄之微而不忌譬如流离之养其子不知其将为己患也褻说文云衣袂也严粲云凡盛服则有瑱名为充耳非真塞其耳也褻如充耳盖象其褻衣博带之容?如充耳之下垂不一引手拯救也正与奋臂攘袂相反李氏云卫不救黎非唯失睦乃四隣之道抑亦唇亡齿寒矣陈际泰云戎伐凡伯于楚邱以归责卫不救王臣也式微旄丘之葛责卫不救寄公也】

旄丘四章章四句【子贡传以为黎侯出奔卫穆公不礼焉黎人怨之然卫实以不救黎致怨非不礼也申培说以为狄逐黎侯黎侯寓于卫卫穆公不克纳黎大夫怨之而作是诗然黎侯特往卫求救尚未失国非不克纳也序则云责卫伯也狄人迫逐黎侯黎侯寓于卫卫不能修方伯连率之职黎之臣子以责于卫也按史记卫自康叔而后至贞伯七世皆称伯至顷侯始称侯或谓卫先世皆任方伯之职其说似与序合至顷侯乃失其职始夷而为侯然孔颖达谓康叔之后为时王所黜故但称伯不称侯及顷侯始赂夷王而复之则又与前说相左要之赤狄夺黎氏地其事载在左传甚明吾但从其有据者耳】

式微黎侯寓于卫其臣劝以归也【出序 子贡传云黎大夫劝其君以归国赋式微孔颖达云上党壶关县有黎亭罗泌路史谓黎子姓侯爵文王所戡者与纣都接今潞城东十八里有故黎侯城而吕氏春秋则谓武王封帝尧后于黎城晋灼曰黎山在其南河水迳其东按此诗及旄丘皆黎臣所作旄丘则作于居守者此诗则作于从行者黎侯名阳见水经注】

式微式微【韵】胡不归【微韵】微君之躬【遇韵】胡为乎中路【遇韵列女传作路 赋也尔雅云式微式微者微乎微者也式郑玄云发声也孔云以君被逐既微又见卑贱是至微也下文微君之微训如式微之微皆谓细也李氏云以微视之若无有也故犹事也中路露中犹林中谷倒其辞也言有沾濡之辱而不见芘覆如人之失国者言越在草莽也严云君何不归乎彼以微视吾君之事如无有矣失国大故也卫人以微视之不以吾君之事为事也无望其救患矣君何为处此露中乎旧说于微君之微云犹非也则不应一篇之中而上下文用字顿异且主忧臣辱主辱臣死而谓我若非君之故何为处此亦岂臣子所宜言哉左襄二十九年公自楚还闻季武子取卞欲无入荣成伯赋式微乃归】式微式微【韵】胡不归【微

韵】微君之躬【东韵】胡为乎泥中【东韵 赋也躬身也胡安国云以事求人而人不有其事是谓微君之故以身下人而人不有其事是谓微君之躬泥中言有溺之难而不见拯救如人之卑贱者言辱在泥涂也严云卫人不惟轻视吾君之事且轻视吾君之身矣何为处此泥中乎又毛传以中露泥中皆卫邑名郑玄谓黎侯为狄人所逐弃其国而寄于卫卫处之以二邑水经注云黎阳在魏郡世谓黎侯城昔黎侯阳寓于卫诗所谓胡为乎泥中疑此城也土地污下城居小阜魏濮阳郡治也黄震辨之云以中露泥中为二邑恐无一身处二邑之理郑晓云上言中露下言泥中犹云侧身天地耳】式微二章章四句【申培说谓黎侯失国寓于卫其臣劝之归今按黎侯若既失国当何国可归曰胡不归则是作诗之时国犹未失也其後因卫不往救黎始失国卒赖晋景公复立之耳又刘向列女传云黎庄夫人者卫侯之女黎庄公之夫人也既往而不同欲所务者异未尝得见甚不得意其传母闵夫人贤公反不纳怜其失意又恐其已见遗而不以时去谓夫人曰夫妇之道有义则合无义则去今不得意胡不去乎乃作诗曰式微式微胡不归夫人曰妇人之道一而已矣彼虽不吾以吾何可以离于妇道乎乃作诗曰微君之躬胡为乎中路终执贞一不违妇道以俟君命然则此诗乃二人所作其问答宛肖宜若可从者惟合旌丘诗观之乃始见其为一时主忧臣辱之言小序所传必非无本且因此而见录于诗亦以其有关系于国家存亡之故耳至若列女传言黎庄夫人乃卫侯之女则卫不徒与国实为婚姻黎之望援者以此而亦可见此诗之出于黎矣】

诗经世本古义卷二十六

卷二十七

钦定四库全书

诗经世本古义卷二十七

明 何楷 撰

周景王之世诗二篇

子衿郑子产不毁乡校也【序云刺学校废也乱世则学校不修焉意亦近之而特未明此诗立言之旨按左襄三十有一年郑人游于乡校以论执政然明谓子产曰毁乡校如何子产曰何为夫人朝夕退而游焉以议执政之善否其所善者吾则行之其所恶者吾则改之是吾师也若之何毁之我闻忠善以损怨不闻作威以防怨岂不遽止然犹防川大决所犯伤人必多吾不克救也不如小决使道不如吾闻而药之也然明曰蔑也今而後知吾子之信可事也小人实不才若果行此其郑国实赖之岂惟二三臣仲尼闻是语也曰以是观之人谓子产不仁吾不信也王应麟云春秋二百四十二年之间诸侯筑宗庙宫室台榭门廡莫不书而以学校见于六经者鲁之頤宫郑之乡校而已愚按郑时有毁乡校之议故至乡校者颇少子产意在使夫人游焉论学之余因之议论国政而知其所行之得失所以通篇皆属望生徒来游之语】

青青子衿【侵韵子贡传申培说丰氏本俱作?】悠悠我心【侵韵】纵我不往子宁不嗣【韩诗作诒】音【侵韵 赋也青者生徒所服衣衿之色重言青青者不一青也以生徒之衆而言子指生徒也衿与襟同古作?尔雅云衣眦谓之襟孙炎云交领也说文云交衽也古者斜领下连于衽名衿衿是领之别名故传云青衿青领也顔之推家训云孙炎郭璞注尔雅曹大家注列女传并云衿交领也邶下诗本既无也字羣儒因?说云青衿青领是衣两处之名皆以青为饰用释青青二字其失大矣毛传以青衿为学子之所服其说必有所本盖古制若尔悠说文云忧也纵之为言缓也推开而缓言之故以为假设之辞我子产自谓也往往之乡校也宁犹岂也嗣继也音德音之音谓言论也言汝生徒辈服儒者之服不一其人而踪迹无常不知曾一至乡校否有深足系我之忧思者虽我身亲国政不能时时至彼以相省视而尔辈藏修息游于斯独无议论绪余继续而入吾之耳者乎子甚望之也学记称古之王者建国君民教学为先是故家有塾党有庠术有序国有学比年入学中年考校一年视离经辨志三年视敬业乐羣五年视博习亲师七年视论学取友谓之小成九年知类通达强立而不返谓之大成盖不独学者为学之勤而为人上者视学之勤至于如此尝怪子产为政都鄙有章上下有服兴忠信毙汰侈国人诵之曰我有子弟子产诲之其论用人谓宜学而後为政不以政学则似亦明乎教学之理者然孔子但称之为衆人之母以为能食之不能教也及观此诗曰纵我不往子宁不嗣音其所为不毁乡校者不过意在风听胥言以知所行政事之善否而已而于身亲临视劳来匡直之化无闻焉此孔子之所以深许其仁而终不许其能教也又中说载房玄龄谓薛收曰道之不行也必矣夫子何营营乎薛收曰子非夫子之徒与天子失道则诸侯修

之诸侯失道则大夫修之大夫失道则士修之士失道则庶人修之修之之道从师无常悔而不倦穷而不滥死而後已得时则行失时则蟠先王之道所以续而不坠也古者谓之继时纵我不往子宁不嗣音如之何以不行而废也此解义自可通但非诗意】青青子佩【叶支韵蒲眉翻亦叶灰韵蒲枚翻】悠悠我思【支韵亦叶灰韵新才翻】纵我不往子宁不来【灰韵亦叶支韵陵之翻赋也佩说文云大带饰也从人从几从巾佩必有巾巾谓之饰毛传以为士佩璫珉而青组纁案玉藻士佩璫玼而緼组纁緼乃赤黄之间色孔谓毛读礼记作青字夫緼如何读为青此附会不足信也佩用青色亦古者学子之佩宜尔今无考来来之乡校也即未望其嗣音独不可来而一涉足乎词愈浅而意愈挚矣】挑【说文石经丰氏本俱作?】兮达兮在城阙【月韵】兮一日不见如三月【韵】兮【赋也挑通作詵说文云相呼诱也徐锴云按项籍欲与汉高祖詵战今文作桃达博雅云逃也又说文云行不相遇也盖言其互相呼诱而逃不能使人遇之也阙说文云门观也徐云中央阙而为道故谓之阙城阙城楼也在城阙者郑玄云以侯望为乐按记曰燕辟废其学即此是也一日不见生徒之在乡校则思念之深有如三月不见之久子产之属意于听言可谓切矣抑子产诚欲听言即何人不可下问而独切切于乡校是求者岂非谓其未登仕籍率意而谈罔识忌讳且士被服礼义诵述先王其是非或不大乎虽于教化未臻而政治自是称美孔子赞为古之遗爱有以也】

子衿三章章四句【子贡传云东迁学废君子伤之赋子?申培说云王室下衰学政废弛弟子多倍其师君子伤之而作是诗所谓弟子多倍其师者味诗意盖近之然属之王风则无所考证当是以一日三月同于王风采葛篇语辄移置之耳其浅陋如此至朱子谓此诗猥薄不可施之学校乃以淫奔之辞目之然其作白鹿洞赋中有云广青衿之疑问则仍用序说何也】

丰美贞女也郑徐吾犯之妹许聘公孙楚矣公孙黑又欲娶之女不可竟适楚此诗疑即其事【左昭元年郑徐吾犯之妹美公孙楚聘之矣公孙黑又使强委禽焉犯惧告子产子产曰是国无政非子之患也惟所欲与犯请于二子请使女择焉皆许之子皙盛饰入布币而出子南戎服入左右射超乘而出女自房观之曰子皙信美矣抑子南夫也夫夫妇妇所谓顺也适子南氏子皙黑字子南楚字按皙欲强娶徐妹诚为非礼妹能以义自持不畏强御此女之贞者也圣人以其有裨风化故录之】

子之丰【叶送韵芳用翻陆德明云说文作娃】兮俟我乎巷【叶送韵胡贡翻丰氏本作巷】兮悔予不送【韵】兮【赋也子指公孙楚也字子南丰通作丰郑玄云面貌丰丰然丰满也俟通作俟待也巷里中道也悔恨也俱见说文我予皆女子自谓也送谓随去也徐吾犯既请命于子南子皙听女自择所与故子南来女家而女所居在巷必先繇巷而後适堂子南始之至巷以待此女女骤见之已有委身从一之意特以礼在别嫌故不敢送也不当送而不送姑托为追悔之辞以自解非真恨其不送也何者此女明于礼者也】子之昌【阳韵】兮俟我乎堂【阳韵】兮悔予不将【叶阳韵资良翻】兮【赋也昌说文云美言也上曰丰赞其容貌之美此曰昌赞其言辞之美俟我乎堂则左传所谓戎服而入之时也将者携持之谓悔予不将犹云恨不与之相见也未成为妇自无相见之礼左传亦曰女自房观之】

衣锦褻衣裳锦褻裳【阳韵】叔【丰氏本作未後同】兮伯兮驾予与行【叶阳韵寒刚翻赋也士昏礼云女次纯衣纁衽次首饰也纯衣丝衣也衽缘也是则嫁时宜服纯衣而此云衣

锦者据郑玄解卫诗云国君夫人翟衣而嫁今衣锦者在涂之所服以此推之则纯衣纁袖乃新妇之礼衣而衣锦褕衣则嫁时在途之衣也又亲迎之礼婿御妇车授绥姆为加景衣乃驱景衣即褕衣也解见硕人篇亦谓之明衣所以必用褕衣者不独恶其文之着礼注谓为行道御尘令衣鲜明是也孔云妇人之服不殊裳而经衣裳异文者以其衣裳别名诗须韵句故别言之耳其实妇人之服衣裳连俱用锦皆有褕叔少也幼者称也伯长也此从嫁者之人各就其长幼而呼之非必谓父与己之昆弟也礼舅飧送者以一献之礼酬以束锦姑飧妇人送者酬以束锦若女自他邦来嫁妇人送者不踰境丈夫送者赠之如前礼此叔伯即所谓送者也驾命驾也女以初盟既定义不二适故观见子南之後异日即盛治服饰呼叔伯之送者而告之曰汝速为我命驾吾将与女偕行以适子南之家矣时子南以子皙为梗故不敢行亲迎之礼以致女身自往就之虽曰非礼亦变之正也】

裳锦褕裳衣锦褕衣【微韵】叔兮伯兮驾予与归【微韵 赋也先裳後衣变文叶韵妇人谓嫁曰归行犹在道归则至夫家矣按女之言曰子南夫也夫夫妇妇所谓顺也说者皆谓女美子南戎服超乘足为丈夫非也女意正以己既先受子南之聘则子南有夫道矣故决意归之其明理如此】

丰四章二章章三句二章章四句【序云刺乱也婚姻之道缺阳唱而阴不和男行而女不随孔颖达云郑国衰乱婚姻礼废有男亲迎而女不从後乃追悔此陈其辞也按坊记子云昏礼婿亲迎见于舅姑舅姑承子以授婿恐事之违也以此坊民妇犹有不至者事亦与此相类但如此则不过闾巷敝俗虽复追悔亦自不异人意何必遂録之经乎若子贡传申培说则皆以为公子小白适莒齐人慕之而作是诗此但见齐诗中亦有子之昌兮及俟我于堂等语遂因而附会之耳然衣锦褕衣二句当作何解岂小白亦妇人耶朱子改为妇人与男子失期既乃悔之而作则是奔也岂有奔其人而乃具礼服以待车马者乎且堂上非所私之地既称伯又称叔何所私之衆哉】

诗经世本古义卷二十七

卷二十八

钦定四库全书

诗经世本古义卷二十八

明 何楷 撰

周敬王之世诗一篇

下泉曹人美晋荀跖纳周敬王也【焦贛易林蛊之归妹其繇云下泉苞稂十年无王荀伯遇时忧念周京今考诗与春秋事相符合焦氏所传确矣当从之按左传国语及杜预韦昭注昭二十二年周景王崩先是太子壽卒王立子猛後复欲立子朝而未定至是单穆公旗刘文公狄奉子猛立之子朝因旧官百工之丧职秩者与灵王景王之子孙以作乱单子刘子奉子猛出奔冬十月晋籍谈荀跖帅九州之戎及焦瑕温原之师将以纳王于王城已而子猛卒周人谥曰悼王者是也猛母弟王子匄立是为敬王晋师王师伐京围郊子朝败王使人告闲晋师还未几子朝入于尹单子刘子伐尹败召伯奭南宫极以成周人戍尹王如刘王子朝入于王城尹辛败刘师尹文公圉遂立王子朝时昭二十三年六月也于是子朝称西王天王居于狄泉称东王狄泉者成周之城周墓所在杜预云今雒阳城内大仓西南池水也时召简公盈南宫嚭及甘桓公俱从子朝晋侯使人蒞问周故问于介衆皆以子朝为曲乃辞子朝不纳其使二十五年夏晋人为黄父之会谋王室也令诸侯之大夫输王粟具戍人曹人与焉其君则悼公午也期以明年纳王越明年刘师与子朝之师战又败王出奔次于滑七月晋荀跖赵鞅帅师纳王使女寛守关塞十一月晋师克巩尹氏召伯毛伯以王子朝奔楚天王入于成周晋师使成公般戍周而还二十七年秋复会于扈令戍周也曹人亦与焉时子朝余党儋扁之徒多在王城王畏之昭三十二年刘文公与苾弘欲城成周距子朝作乱之时十年矣按王城在瀍水西周公所营以朝会诸侯之地谓之东都今河南是也成周在瀍水东周公所营以处顽民之地谓之下都今雒阳是也天子使告于晋曰天降祸于周俾我兄弟并有乱心以为伯父忧我一二亲昵甥舅不遑啓处于今十年勤戍五年余一人无日忘之昔成王合诸侯城成周崇文德焉今我欲徼福假灵于成王修成周之城俾戍人无勤诸侯用寧蝥贼远屏晋之力也其委诸伯父冬十一月晋魏舒韩不信如京师合诸侯之大夫于狄泉寻盟且城成周曹人又与焉其君则隐公通也至次年春竣事谷梁传云天子微诸侯不享覲天子之在者惟祭与号故诸侯之大夫相率以城之此变之正也赵汧云周室东迁而後下陵上替已久郑庄公言天既厌周德晋女叔寛以苾弘谋王室为违天邪说诬民非一日矣然天子一命城成周而诸侯大夫奔走恐後则人心犹不忘周也夫人心在周则天命未絶于周矣此圣人为东周之微意愚按自是而後列国不复知有王矣故夫子之删诗终于此】

洌彼下泉浸【陆德明本丰氏本俱作寢後同】彼苞稂【阳韵】忼我寤叹念彼周京【叶阳韵居良翻 比而赋也洌洌字易混从水者说文云水青也易井洌寒泉食是也从𣶒者说文云寒也诗有洌汎泉是也此洌字从水当同易解下泉毛传云泉下流也孔穎达云尔雅沃泉

县出李巡谓水泉从上溜下出此谓泉下流是尔雅之沃泉也愚按下泉即指狄泉也浸渍也淫也苞尔雅云稂也孙炎云物丛生曰苞齐人名曰稂郭璞云今人呼丛致者为稂尔雅云童梁也说文作蔞云禾粟之采生而不成者谓之蔞蔞陆玑亦云禾秀为穗而不成则蔞然谓之童梁今人谓之宿田翁或谓守田也又郭璞以为莠类罗愿云稂恶草也与禾相襍故诗人恶之古者以饲马鲁仲孙它马飢不过稂莠谓此也按诗称稼之茂美继之以不稂不莠莠既别是一物则稂亦当是一物故郭璞云莠类盖未能的知其物故称其类耳而许叔重陆玑以为禾之不成者则是亦禾而已何至与莠并称乎按本草有狼尾草子作黍食之令人不饥似茅作穗生泽地然则此物似是稂耳稂既有实如黍故能乱苗又莠今谓之狗尾草稂名狼尾则亦相类毛传云稂非溉草得水而病愚按苞稂以比王子朝及其党灵景之族以其皆周同姓亦如稂之于苗也王所居有下泉焉能浸苞稂使之病死胡子朝之党盛行而莫之能制乎诗人之所以怆叹而念周京也怆博雅云满也敌王所怆之怆其字从心配气怒蓄于心而气满也说文以为太息也叹本作叹说文云吟也徐锴云此悲叹也云寤叹者悲愤在中惟寐则稍忘耳一寤则怆然发叹矣一说黄光昇云人昼间应接多则不暇思至于夜而寤百虑丛集凡愤懣无聊皆于此时思之亦通周京谓周室之京师指洛邑也子朝周之同姓主子朝而言故先言周而後言京】洌彼下泉浸彼苞萧【叶尤韵疎鳩翻】怆我寤叹念彼京周【尤韵比而赋也萧解见采葛篇苞萧以比王城之百工党于子朝同恶相济者所谓萧墙之内之人也罗云周人尚臭以郁合鬯灌以圭璋而使臭阴达于渊泉既奠然後炳萧合黍稷羶芻蕘之而使臭阳达于墙屋墙内乃蕘萧之地故孔子曰吾恐季孙之忧不在顓臾而在萧墙之内也京周谓京师之周室主百工言之故先言京而後言周】

洌彼下泉浸彼苞蓍【支韵】怆我寤叹念彼京师【支韵 赋而比也蓍蒿属陆玑云似籊籊青色科生说文及博物志皆谓生千岁三百茎而五行传以为百年一本生百茎史记以为千岁一本生百茎论衡以为七十年生一茎七百年生十茎未之详也龟策传云上有蓍蓍下有神龟蓍生满百茎者其下必有神龟守之其上常有青云覆之又云蓍百茎共一根其所生兽无虎狼草无毒螫白虎通云蓍之言耆也阳之老也罗云蓍之为字从耆耆者六十岁也王充论衡云孔子曰蓍之为言耆也老人历年多而更事久似能前知然何独六十龟策传曰天下和平王道得而蓍茎长丈其丛生满百茎方今世取蓍者不能中古法度不能得满百茎长丈者取八十茎已上长八尺即难得也人民好用卦者取满六十茎以上长满六尺者即可用矣然则自其可用者言之广为六十茎从为六十寸故应耆耳陆佃云蓍草之耆者也卦之别六十有四蓍数穷于此故谓六十曰耆愚按罗之说近迂陆为近之苞蓍以比王城之中亦有老成人而从子朝为逆者如尹文公召伯奭南宮极之类也京师与周京京周同笃公刘诗云京师之野董氏云所谓京师者盖起于此其後世因以所都曰京师曰嫔于京依其在京则岐周之京也王配于京则镐京也春秋所书京师则洛邑也皆仍其本号而称之犹晋之言新绛故绛也而公羊传则云京师者何天子之居也京者大也师者衆也天子之居必以大衆言之上二章皆言周此但言京师者以言周则嫌同于列国隐然有尊共主以号令天下之意】芄芄黍苗阴雨膏【叶号韵居号翻】之四国有王郇【易林路史俱作荀】伯劳【叶号韵郎到翻】之【比而赋也芄说文云艸盛也徐锴云言泛泛然若风之起苗说文云艸生于田者其字从艸从田会意罗云黍之秀特舒散故说者以其象火为南方之谷诗亦云芄芄黍苗以此也膏润也凡以脂膏润物曰膏此借用耳陆佃云方黍之苗也暑雨暴息无阴云以覆之日随蒸焉则苗稿矣将以润之乃以害之也故诗正以阴雨为善今俗五月谓之分龙雨曰隔辙言

夏雨多暴至龙各有分域雨阳往往隔一辙而异也国语赵衰谓秦穆公曰重耳之印君也若黍苗之印阴雨也若君实庇荫膏泽之使能成嘉谷荐在宗庙君之力也正与此诗意同晋以盟主纠合四国効力成周所谓阴雨也四国四方诸侯之国王指周天子四国有王者言四国共戴一王皆以王之事为事也郇伯晋荀跖也徐鉉云按今人姓荀氏本郇侯之後宜用郇字後人去邑为荀今按郇侯本文王子左传富辰谓毕原酆郇文之昭是也水经注云涑水西迤郇城故郇国也今解故城东北二十四里有故城在猗氏故城西北俗名为郇城服?云郇国在解县东郇瑕氏之墟也左传成六年晋人谋去故绛诸大夫皆曰必居郇瑕氏之地沃饶而近盐韩献子曰不可郇瑕氏土薄水浅其恶易覲易覲则民愁民愁则垫隘于是乎有沈溺重膑之疾不如新田土厚水深乃迁新田是则郇地本为晋所灭其子孙仕于晋宜矣荀跖称伯者左传昭三十一年晋侯使荀跖唁公季孙从知伯如乾侯所谓知伯即荀跖也诸荀在晋别为知与中行二氏故又称知伯劳犹勉也劳来奔走与四国相慰藉也又按此诗固美晋荀跖然亦有讥晋顷公之意焉诸儒于春秋论之详矣昭二十三年经书晋人围郊胡安国云按左氏晋籍谈荀跖帅师军于侯氏箕遗乐徵济师军其东南正月二师围郊郊子朝邑也既不书大夫之名氏又不称师而曰晋人微之也所谓以其事而微之者也当是时天子蒙尘晋为方伯不奔问宫守省视器具徐遣大夫往焉勤王尊主之义若是乎书晋人围郊而罪自见矣又按围郊之後王使人告闲暇于晋晋师遂还郝敬云向使晋人尽忠王室无怀二图周惟恐晋师不留何告闲之有告闲则晋之师可知也二十五年经书会于黄父高氏云自二十二年景王崩王室乱天王播越诸侯皆莫奔救四年之後晋始为此会而诸侯不至但合诸大夫以谋之曰明年将纳王夫王室之急如此岂可坐待明年哉有霸者作如齐桓公盟首止以定王世子郑晋文公诛叔带以逆襄王岂不美哉桓文不作猛朝相竞王室世臣不能明先王一定之制顺非而废适使顷公而为桓文果至是乎是以圣人伤王室之乱而又于此着诸侯之无霸也二十六年经书天王入于成周按左传晋荀跖赵鞅帅师纳王晋师克巩子朝奔楚王入于成周季瑾云晋人纳王之善无一言及之何也罪晋不臣而哀周之衰也晋为同姓大国爵为侯伯主盟于时不能即逐子朝之党而安定之二十三年一围郊而亟还坐视成败五年然後兴师纳王原情责实不忠不臣之甚者也若以纳王之功而善之则藏奸观衅不忠不臣者胜矣沈长卿云按传晋师克巩乃荀跖赵鞅帅师纳王而子朝之告诸侯亦曰晋为不道是摄是赞则晋有功于周明矣经顾没之但书十月天王入于成周盖罪晋之慢也桓文定王室之难在俄顷间而克巩之师迟至六年必待其告急而後勤王功不掩罪可谓盟主乎是时意亦同此在荀跖之勤王固可美然天子有难阅至五年之久而後始遣荀跖合四国以勤王在晋顷则可刺也黍苗之仰阴雨深矣晋之泄泄如此其何以为盟主此诗人言外之微意周室虽衰而是诗之忠诚激发如此文武成康之德泽有深入于人心者也夫子录此为变风之殿亦所云伤天下之无霸者乎胡安国云夫以王猛之无宠单旗刘虺之屡败敬王初立子朝之衆召伯奭南宫嚭甘桓公之党疑若多助之在朝也然会于黄父凡十国而诸侯之大夫无异议焉是知邪不胜正久矣】

下泉四章章四句【孔丛子载子曰于下泉见乱世之思明君也序则以为思治也曹人疾共公侵刻下民不得其所而思明王贤霸也申培说谓东迁之初曹人闵周而作朱子谓王室凌夷而小国困弊故以寒泉下流而苞稂见伤为比皆附会揣摩之语至郇伯有劳四国之功他经传絶无所载毛传解为诸侯有事二伯述职郑玄改以为州伯孔云以经传考之武王成王

之时东西大伯唯有周公召公太公毕公为之无郇侯者知为牧下二伯也凿亦甚矣唯竹书
载昭王六年王锡郇伯命然不知其何所表见子贡传阙文】

诗经世本古义卷二十八

卷后

钦定四库全书

诗经世本古义卷後

明 何楷 撰

属引

何子曰美哉周易之有序卦也越数千年卷帙粲然序卦之烈也予既论次诗世着之小引以为定本异时陵谷迁贸倘?厥传不其怙而爰仿序卦作属引一篇其辞曰

维予宅闽漳之浦厥有名山谥曰九侯胤于少康从会稽来游余论其世以诵其诗爰有公刘始迁于豳居其高丘诗表殊尤曰笃不忘是三百五篇之权輿而敕皐奚汭之箕裘也

维豳有风士农女桑公刘笃之以啓灵长故次之以七月

当夏省耘吁嗟求雨于社于方又御田祖故次之以甫田

及秋省敛报祭于方厥有黍稷兼用牺羊故次之以大田

三时不害庆此年丰孟冬息老八蜡咸通故次之以丰年

岂惟祭蜡亦复祠社以续禾稼故次之以良耜

既蜡而腊先祖五祀属民饮酒正位以齿故次之以载芟

有飴其香酒醴维醕速族人以序族夏是取故次之以行苇 夏道既湮杞不足徵赖周祖公刘

存此八篇岂惟杞微繫宋亦然及正考父如周商颂以传十二存五圣人忝焉试寻厥世自盘

庚先故次之以长发

长发大禘上溯高辛越高宗祭成汤用乐娱神尚鬼尚声于兹可论故次之以那

高宗彤日越有雉雊黜于祭祀傅氏以谋故次之以烈祖

鼎耳告异责躬思道重译来朝景员是保追报上甲殷邦肇造故次之以玄鸟

维王大仁靖殷乃雍既其歿也庙号高宗故次之以殷武 殷武之後殷道复衰组紃初兴亶父

迁岐舍伯立季将传昌为洽阳作合武乙之时故次之以关雎

淑女充媵御以百两九鸟成鸠九女是仿故次之以鹊巢

关雎鹊巢太姒之德宜室宜家国人攸则故次之以桃夭

维太姒有徽音方兆多男故次之以螽斯

宜尔子孙贵在惜福衣锦尚絅毋忘中谷故次之以葛覃

泊武乙震死文丁嗣之翳徒不道公季靡之三大夫是获九命作伯故次之以采芣

白华笙歌取此常华功高召忌塞库困季泊西伯昌受命思积贤自惊故次之以卷耳 卷耳怀

人寘彼周行周行可示旨酒筐将故次之以鹿鸣非徒尊贤尤善养老合语乞言敬祝壽考故

次之以

南山有台 亦越季冬命国人合三族君子以悦小人胥乐故次之以伐木 时昆夷玁狁并起跳

梁命南仲城朔方又复西行臣忠妇义独居感伤故次之以^𧈧虫^𧈧虫既过采薇南山是曰南
陔南仲方还奏凯迟迟

诗以劳之故次之以出车 维此出车又名华黍更代仲歌来谗将母故次之以四牡
既劳还师亦劳还役何以异歌赐不同格故次之以杕杜
是师之行在帝乙三年六月周地震西伯怵然遣使四出交邻礼贤故次之以皇皇者华
自西土光四方遂进爵为公维太姒亲蚕夙夜有事于公宫故次之以采芣
内有贤助外有武夫无成代终公侯以娱故次之以兔置 公侯作牧典治南国曰维下济譬彼
樛木故次之以樛木樛木嘉鱼南方之美来朝式燕主宾咸喜故次之以南有嘉鱼
既化有邦风及在位节俭正直维召南诸大夫之治故次之以羔羊
羔羊大夫小星衆妾阳治阴教于斯毕泆故次之以小星
衆妾与嫡俱或归以须而不孥其孚则安能有其家故次之以江有汜 当斯时也内无怨女求
我庶士六礼斯举故次之以摽有梅迨吉迨今匪礼不行汉神可望不可即言刈其薪欲

得荆故次之以汉广 一醺不复改而敢以疾倍故次之以芣苢
芣苢亦已恶不害我自芳麋鹿虽云健不令彼得狂故次之以野有死麋 是维文王德刑寡妻
母仪克正以范中闺先姜後任克与之齐周室三母麟兮麟兮故次之以麟之趾 繫公子振振
长子发中子旦皆圣人阎虎譖之牖里遭屯用史巫纷若妇勗其臣故次之以殷其雷 奇怪物
既献辛乃释怒赐弓矢鉄钺遂伐密须得其路与鼓爰以大蒐式彰我武故次之以驹虞
伐密复灭崇始作邑于酆酆邑本崇地而有强暴戎召伯听厥讼女不强暴从故次之以行露
都酆既三载乃始作辟雍誉髦喜既见由仪自春容故次之以菁菁者莪
自作辟雍後殷辛甲出奔周下至畿内民惟文王之求故次之以汝坟
汝坟鱼頰尾於虢生靡乐文能咸和民台沼相继作于以燕嘉宾翫彼物鱼跃故次之以鱼丽
厥享国五十年大统未集武王嗣西伯曰予乱臣十有妇人焉维齐邑姜追其教成妇顺克明
故次之以采芣 惟彼芣藻女子之祭诸侯五庙岁事是继夫人荐豆君则羞济燔炙殽脯绎祓
靡替故次之以鳧鷖
鳧鷖享公尸武犹在诸侯及母野归来革殷为周前歌後舞饮至优游故次之以鱼藻
溯自古公实始戡商周原筑室蹶生文王天下初定尊号未遑故次之以绵
追王三后上及亶父邦甸侯卫咸骏奔走故次之以旱麓
爰述先德森森有条追王匪私仰契层霄故次之以皇矣
乃望祭岐山大告武成子孙当保此有夷之行故次之以天作
越及次年荐殷太庙礼成受厘有俶是诏故次之以既醉
朝臣已内和万国已外驩四方皆来彻歌以繁又名昭夏文庙是观故次之以雝
维此文考能刑文母在宫如在庙实太任有造故次之以思齐
是名齐夏又有章夏推教子作人久道以成化文武具章相圣贤之流亚故次之以棫朴 问作
人伊何精意在辟雍辟雍有鼓钟论伦与神通纵有台囿沼至乐孰此同故次之以灵台文德
已究矣复次武王事耕藉教公侯欲使勤地利故次之以臣工
亦有不为臣公侯靡足羈访道道已传母拙高节为故次之以白驹
天下大封建孟侯在妹邦勿若殷王受而以迷乱终故次之以小宛 维小宛忧伤自叹我日迈

胡丁不造倏忽云逝隋祔皇祖是为既葬卒哭之祭故次之以闵予小子 哀哉武王崩羣叔流言?人刺管谓不念厥舅故次之以匏有苦叶伊孺子摇摇周公闵斯维音晓晓故次之以鸛鵒公避居东都充盈厥肤王未得金縢书但未敢诮诸故次之以狼跋于後天大雷电以风王感悟将迎公于东故次之以伐柯周公归只使者歆只故次之以九罍公居东二年归灭武庚先四年王免丧初朝武王庙

中扬令德之纪之纲故次之以假乐 率是辟公以见昭考竣事劳之纯嘏是禱故次之以载见辟公陞辞勅遣迟迟交相警戒维前王思故次之以烈文春正月朝庙初夏尝麦延访羣臣欲昭考攸则故次之以访落多难未堪重以集蓼惟羣臣助予予毖无小故次之以小毖 王求助匪懈羣臣咸慝维昭考陟降厥家实陟降厥士王曰敬哉畴将予就冀显德是示故次之以敬之 先是公灭武庚遂伐奄灭蒲姑既又伐淮夷迁奄君于蒲姑庚党无逋至是师来旋首尾三年故次之以东山东山劳从军从军答公勤故次之以破斧时禽父宅曲阜淮夷亦犯鲁惟禽父类公允文允武

献馘泮宫莫予敢侮故次之以泮水公既平多难闵管辟蔡囚作诗聯宗族共藩屏周故次之以常棣於是公为师述祖祢之德用告孺子王厥鉴维殷适故次之以大明大明追挺生文武相继勦鸿业今王为孙子烝烝庶能愜故次之以文王有声公具大圣才作师而兼相制礼作乐颁度量郊祀后稷以配天尊祖无以尚故次之以思文思文郊迎长日祈谷郊在启蛰美稷功与帝匹故次之以生民 既尊祖又严父季秋大享五帝咸聚宗祀明堂文王为主故次之以我将敬天事已备蜡祭及灵星亦以后稷配皮弁素服见仪刑故次之以丝衣 惟后稷周始祖秋祫尝修饔俎祔祭後礼具举乐章名祴夏送尸戒钟鼓亦或名采荠用以节步武故次之以楚茨四时之祭尝与烝为备尝详饗熟後烝详朝践前古文良奇幻合之成一篇故次之以信南山又有季冬月寝庙荐厥鱼先尝而後荐敬与秋尝如故次之以潜是为宗庙礼次及于朝廷诸侯来朝飨礼命宁亦名鷩夏列于礼经故次之以桑扈飨训共俭燕示慈惠孔燕岂弟以宠嗣世故次之以蓼萧嗣世有燕朝正有飨飨毕而燕其仪不爽故次之以湛【先君诒】露诸侯朝正或时献功献功之飨赐彤玪弓飨礼无异受赐不同故次之以彤弓献功而外又有贡士载以後车达于天子取名崇丘升高之比故次之以縣蛮 洪范八政宾继以师爰有军礼当举行之维岐阳大田在成王六年被之笙歌由庚是传故次之以吉日亦越九年有事太庙我客助祭白马来朝习射泽宫鹭羽斯肖故次之以振鹭维兹太庙始行大祫乐则用勺於古不袭故次之以有瞽 大武六成勺居其次始而北出我武斯试亦名为遏遏刘取义在九夏中纳夏是已故次之以武 武後有勺是为再成勺诗晚出舞曲始盈以其养晦名武宿夜舞莫重焉谓灭商也故次之以酌三成而南封建诸侯命之大賚绎思时周故次之以賚四成巡守南国是疆告祭省方故次之以般告祭省方允王维后式序在位周左召右是为五成肆夏金奏故次之以时迈保有厥土于以四方六成复缀以崇我王周召之治武乱攸彰故次之以桓

我客观成毕事将归王燕饯之信宿依依故次之以有客 有客为谁曰维微子天命靡常观兹殷士念祖修德令闻不已王夏之奏有取于此故次之以文王 明年王与弟叔虞戏削桐叶以封史佚谓天子无戏言遂国之汾河东录古诗蟋蟀以见唐风故次之以蟋蟀 昔陶唐有冀方後世失道乱纪纲乃灭而亡惟周召交营土中以敬德诰王欲至万年保受王明故次之以天保 雒邑既成周公作明堂以明堂太庙宗祀文王季秋大飨及兹而两礼以义起严父无已故次之以清庙 文德丕显无射于人秉以对天於虞维纯故次之以维天之命 下管象武干戚以舞表文之功伐崇肇禋德馨升闻式宜配天故次之以维清乃落新宫用被下管是兆休祥君子晏衍故次之以斯干 厥既命庶殷处之于下都母忿疾其顽利岂弟以需故次之以洞酌 诗有洞酌书有召诰君奭纳约与旦同道旦逝奭衰冯翼者谁卷阿从游以矢其诗故次之以卷阿 飘风自南当得贤士凯风自南当得孝子康公辅周康叔化?正君善俗赖二康在故次之以凯风

成王新陟康涖应门召毕率诸侯繇左右入执奠稽首言王义嗣德赐予有繁故次之以采芣三年吉禘更定乐章无声之乐以颂成王故次之以昊天有成命

及其受厘因而陈戒昭哉嗣服惟德是励堂下奏武庶几勿坏故次之以下武

在成王庙申戒农官卜郊于祢宫祈谷不遑安故次之以噫嘻

及康末年召康公始薨享寿百龄德洽黎烝故次之以甘棠 成康相连刑措不用昭举日祭斤斤作颂故次之以执竞胡昭南游中流胶舟宴乐淮上乐极生愁故次之以鼓钟

继昭为穆於诗靡载有密康公在共之世絜者来奔自弋厥戾故次之以绸?

密康色荒齐哀禽荒懿王信譖哀遂遭烹故次之以还

历孝而夷王室逾衰卫顷赂周复命为侯顷实不道仁贤用忧故次之以栢舟

仁贤用忧仕不得志居既见愠出亦遇?故次之以北门

?不可为?手去之尔狐尔乌与尔长辞故次之以北风

携手同行跋涉不顾亦有将士跋涉为苦是维厉王暴虐之故故次之以渐渐之石 王虐用其民民不堪命芮良夫作诗讥切执政故次之以桑柔乱生不夷覃及于鬼方荆楚之间鞠为战塲孝子从

役思祭旁徨故次之以四月

四月建巳维六之日徂岁暑兴役及今兹未毕闺中忧危局发首疾故次之以采芣

昔者圣王人情为田民劳不休怨旷骚然实小子阶厉使国有残故次之以民劳

蹢蹢小子不恤念?非徒好兵重以好利天心判离大难将至故次之以板 维王防口以谏为妖凡伯赋板召穆公赋民劳罔敢斥王但斥同僚穆又廋厥辞托刺前朝故次之以荡荡之与汤古字相通皆取水流莫知其穷荡荡上帝

畏其疾威子之荡兮游荡是讥故次之以宛丘

陈幽唱巫风民多淫祀市也婆娑子仲之子故次之以东门之枌

谁谓陈小犹可为善国厘公继幽懦不能自力衡门之贤栖迟太息故次之以衡门 幽末厘初厉王已?彘有共伯和实间王位後乃还共山以厉王为崇周人怀之犹盱其至故次之以都人士 当共伯摄位时天下苦大旱穷民多离散及宣始来归随阳如鸿雁故次之以鸿雁

王既怀穷民尤欲怀诸侯四年命蹶父谕韩使来朝故次之以韩奕 韩侯受命为北国伯俾追

其貊乃有獫狁北狄之一五年盛夏忽内侵王命薄伐属尹吉贼从高邑来驱从太原出故次之以六月从征者方叔已盛着威名先使教大閱因使伐蛮荆

屈指三月间二丑相继平故次之以采芑

淮徐尚未靖明年王自将伐徐皇父休父从王师赫赫雷霆如故次之以常武

命召穆公往伐淮夷与王师为犄角俾贼党披离王归自伐徐乃锡命之故次之以江汉 自北而南以及于东天戈所指无有不僵忼彼西戎杀我西垂大夫与厥子兵七千使报父仇故次之以无衣四方既平封申伯于谢匪元舅是私惟藩宣彼藉故次之以崧高

王命召伯为申伯定宅召伯劳厥士士因以不貳故次之以黍苗

亦既城谢又复城齐孰能补王阙而出遣仲山甫兮吉甫作诵用当耳提故次之以烝民

城谢城齐皆七年事明年考室考牧附此敬小慎微中兴之理故次之以无羊

岂惟物畜盛更侈车马修九季会东都圃田狩优游故次之以车攻 攻车欲得好造舟欲得坚车好可田猎舟坚可济川孰如卫共妇节比栢舟坚故次之以汎彼栢舟

处变赋栢舟处常赋鸡鸣况于后夫人夙夜谨寢兴姜后待永巷脱簪间未央故次之以庭燎 庭燎作讽王复勤政忧旱侧身以励庶正故次之以云汉

云胡末年不藉千亩戎至千亩师不能拒诸侯不勤王爪士责祈父故次之以祈父

异类扰边陲飞隼盈朝绅祈父念寡母沔水忧其亲故次之以沔水

忧亲者伊谁杜伯子隰叔父死遭周难反其旧唐族故次之以黄鸟 黄鸟集于桑檀园遍树谷桑穀共生朝诗人为?药故次之以鹤鸣宣王诗止此更理幽王篇王昏不若以丑为妍譬将

牛车自取尘昏故次之以无将大车 小人在位君子在野高原之物而生隰下故次之以隰桑 用舍既乖方聚斂以为务元年命皇父二年初增赋故次之以大东

既增赋又失刑巷伯行厥譖孟子共掖庭杨园倚亩丘牵引恐不停故次之以巷伯

即位及三年宠爱彼褒姒谗色货具备西周将亡矣诗人咏鸳鸯追其大昏始故次之以鸳鸯 宠嬖立为后中宫遂见废鸳鸯戢左翼之子胡不类故次之以白华

高冈析柞薪恶其叶之湑硕女可尊之为辰卑人不可以为主故次之以车韉

王尊宠卑人爰私其亲岂谓兄弟不如昏姻故次之以角弓

昏姻日以昵兄弟日以疎何当与宴得厠玉除言所欲言岂为酒欬故次之以頍弁

旨嘉不敢望但望分瓠叶微薄不废礼亦曰被延接故次之以瓠叶

幽王为褒嬖遂阙亲亲恩秦虽号戎翟犹知念厥昆故次之以小戎

五檠梁輶何历录母弃尔辅顾尔仆弃辅及仆不可行局高蹠厚凜繁霜故次之以正月 四年四月陨繁霜赫赫宗周灭不久厉阶自褒姒蠹贼实繁有胡不自我先胡不自我後故次之以瞻卬 此赋瞻卬者昔亦曾赋板偕召穆公为厉王大简感穆同志怀其祖先人维求旧岂曰无

贤故次之以召旻 召旻痛疾威回遹夷我邦小旻痛疾威谋犹回遹从故次之以小旻 以上凡四诗疑皆凡伯作内斥褒姒閤外斥皇父號辞意互出入惊心梟鸱恶内外相表里太子乃遭

铄故次之以青蝇 青蝇污白不可得理太子奔申为逃其死故次之以我行其野

奔申无聊在幽五年傳欲悟君作诗以传故次之以小弁 小弁亲亲读者称仁更作蓼莪痛呼昊天故次之以蓼莪幽王竟不悟惟听艳妻嬖羣党盛分布四方皆有美宜曰方奔申皇父乃

都向日食在阳月谪见犹梦梦故次之以十月之交

都向既离居三事亶多藏独有?御俦日瘁反得谤故次之以雨无正
居者有?御行者有士子从事独贤劳孔哀彼嗃嗃故次之以北山
士子驰驱劳及征夫率彼幽^々畏不能趋故次之以何^々不黄
行役已苦过期不代念彼共人亦孔之僇故次之以小明 更有郃贤能明周道孝治天下仁亲
为宝子生三年乃免怀抱用刺短丧古礼是考故次之以素冠
郃仲骄傲好洁衣服服不式礼其何能国故次之以逍遥
羔裘逍遥失其伉俪叔姩外通留子私诣故次之以丘中有麻
诔郑称留寄孥为媒室既被窃国亦殆哉故次之以隰有萋楚
女德无极于何其臻郃以姩亡周以姩泯故次之以菀柳 幽欲悦褒举烽为戏诸侯极焉後亦
不至乃盟太室将谋伐申大夫忧乱俾忖他人故次之以巧言
十年伐申戎遂入寇谁为此甌牝羊牡首故次之以苕之华 幽死骊山下平遂即位者东迁在
斯时掘突作六师故次之以瞻彼雒矣掘突从王迁寓居彼客舍平王深倚重临视靡休暇

故次之以缁衣 又有秦襄公以兵送平王王命为秦伯车马何焜煌故次之以车邻 及平之三年
锡司徒郑伯命父子继其职象贤斯为盛故次之以裳裳者华六年郑迁于溱洧溱洧有土
风三月桃花水下时士

女秉兰以徜徉故次之以溱洧 昔言郑诗淫於此始一见更有女思奔在彼东门墀故次之以
东门之墀虽讥溱洧亦有鸡鸣女曰士曰相戒勤生民劳则思何淫不贞故次之以女曰鸡鸣
虽讥东门之墀亦有出其东门勿用取女匪我思存以礼为坊其流不浑故次之以出其东门
繫郑风骀荡不如秦雄壮溱洧汧渭何悬殊思女媚公各异尚故次之以驪驪
舍拔以从禽?的以祈爵较猎虽见奇肆礼自足乐故次之以宾之初筵
卫武宾筵僴僴自怪及其耄年犹作懿戒故次之以抑
卫人颂武諡为睿圣切磋琢磨没身斯竟故次之以淇奥 河淇故殷墟终南周所都殷墟为卫
有周都忽奏区览兹兴废迹凭吊重嗟吁故次之以终南维秦文公有此岐丰二后今邈矣孰
为遯洄从故次

之以蒹葭 秦赋蒹葭周咏禾黍岂无兴复一成一旅故次之以黍离
平王无志弃地不顾念彼旧民谁堪依怙故次之以中谷有蓷
昏姻礼废夫妇道苦永终知敝以礼自处故次之以硕人
卫姜感傅言操行不衰惰秉礼自修持失意成轆轳故次之以绿衣
絺綌来风静思其故何当回君心倏解气而悟故次之以终风 望夫君兮不来覩日月兮增怀
故次之以日月硕人何其硕宠嬖及厥子合舞忘教胄不讲养正理故次之以简兮
硕人虽侯侯居身亦太寬无别将生乱贤者岂能安故次之以考盘
独寐非忘君不见如三月遇合古所难此意谁为曰故次之以采葛
郑庄怨谗言寓意于采葛东迁郑焉依迟君幸未?故次之以遵大路
大路何皎皎白石何齿齿擘手以传心不使外人指故次之以白石
素衣朱襮进之于沃子有衣裳云何不着故次之以山有枢
白石山枢微辞讽之危彼晋昭力寡难支故次之以椒聊 成师为椒聊晋昭比扬水岂惟晋昭

公平王亦如此故次之以戍申远戍何时归御轻事已非鸡栖牛羊下室家自彘歆故次之以君子于役 于役为谁维申之知公族罔念不及葛藟故次之以葛藟
人惟孝乎友于兄弟莫如郑庄公?段不以礼故次之以叔于田
段出倾巷洵美且武逞技公前袒裼暴虎故次之以大叔于田 段封大叔百雉都城仲足请图暗与公迎故次之以将仲子仲本祭封人而以疎间亲立谈投契卿材是甄故次

之以野有蔓^廿 乐莫乐兮新相知悲莫悲兮生别离邂逅乐清扬远送悲颀顽故次之以燕燕戴劬方归陈卫师从子仲不戢忘自焚州吁乃会宋故次之以击鼓 宋会师伐郑以郑欲纳冯及曲沃伐翼郑又以师从桓王初即位不问厥臯助少陵长俾民心瘁故次之以节南山 王不胜伎求伐翼又伐沃卫宣亦伎求郑郕戴鲁相继被其毒曾谓在位百君子不及妇人能忠告故次之以雄雉

雄雉当求雌未闻雌雉乃从牡为问新台台上人籋篠戚施形亦苦故次之以新台
台下水何深深朝隰雨何淫淫水深不足洮雨淫不终朝故次之以蟋蟀
卫宣大无信齐姜不知命偕不如妣兮老不如死兮故次之以君子偕老 冶容能海淫云何不自匿亦有静女姝城隅焉是即故次之以静女貽彤管不堪携上父妾下子妻宣姜死夷姜缢胡施顔鼠不啻故次之以相鼠 夫妇失道国俗伤败弃旧淫新不知所届故次之以谷风
谷风妇之良更有妇而淫奔人人贱之饮恨自伤心故次之以氓

维夫妇暨朋友其合皆以人夫妇犹相弃暴苏安足论故次之以何人斯

逝我陈俟我着友不友女不女彼为何人而居我处故次之以着

鲁桓迎齐子先得见于瀿齐子犹魴鱼从者犹魴鰈故次之以敝笱

笱敝当补裳敝当缝补笱属夫道缝裳尽妇功故次之以葛屨

纠屨缝裳以事良人不似墓棘使鴉得亲故次之以墓门 深言或不顾颠倒乃思予恐惧或不去安乐转弃予人情何常哉思来独自语故次之以习习谷风

周东郑是依周郑乃交恶忘德以兴师先驱至郑路郑固失臣节周亦太不裕故次之以伯兮
伯兮出无功不支而先奔王卒遂大乱郑聃射王肩故次之以兔爰 自是郑称强雄长于一时
明年戎伐齐齐侯使乞师郑忽获戎帅齐僖请妻之故次之以有女同车 舜华不足慕羨彼苞栩集国尔虽忘家忠孝固并急故次之以鸛羽翎棘与桑在野黍稷稻粱在田荷华游龙在隰扶苏乔松在山不忧靡盬之王事但期比肩有多贤故次之以山有扶苏

有如郑祭仲是名狂狡童私从邻国谋出公复立公故次之以狡童

郑人恶仲播于有衆谁能唱义者蠢蠢欲俱动故次之以蘧兮

俱动苦绵力思正于大国故次之以褰裳

褰裳与乘舟所遇深浅异褰裳可速涉乘舟须防坠故次之以二子乘舟

汲壽争死诚可哀卫朔得位从譖来骄而无礼安恃哉故次之以芄兰

朔也幼蘧蘧安能定姿猪故次之以墙有茨

牆阴之会明日有传牀第之言娣妾能宣故次之以鶉之奔奔

淫风下滔尽丧其曹窃妻以逃故次之以桑中

桑中叶有幽相从似穿窬折柳以樊圃犹可息狂夫故次之以东方未明

未明而求衣求衣成何事齐襄政无常每作从禽戏故次之以卢令 猎有功狗亦有功人岂其谋国而无与亲故次之以扬之水篇名扬之水于今凡三见桓王崩之年郑昭始言返安得君

子臣同心节不变故次之以风雨 风雨听鸡鸣牝鸡或无晨鲁桓狗齐子爰以丧其身故次之以南山南山见雄狐东日映姝子鸟兽同羣尔故次之以东

方之日 齐鲁共东方庄不报桓仇春秋书狩禘诗亦刺射侯故次之以猗嗟
庄非桓之子文姜实庄母齐人呼庄甥又譬之苗莠故次之以无田 鲁庄亦已弁恣其母宣淫行人口似碑何独无人心故次之以载驱宣淫未已再主齐昏齐侯之子平王之孙故次之以

何彼穠矣 齐桓娶于周又有如夫人卫姬不听乐鸡鸣诗以陈故次之以鸡鸣 当庄王之末桓霸未成春秋始书荆执蔡侯献舞又虜息君妻其夫人夫人生子不言以死为殉故次之以大车 荆子服毳衣曲沃篡侯服七命荆固蛮兮沃亦夷僖王宠沃斯失正故次之以无衣七兮 僖传庄及惠子颓作乱入王城歌舞享宾乐祸以倾故次之以君子阳阳
乐兮阳阳俯兮怲怲当忧而乐死不可逃故次之以防有鹊巢
鹊巢鸠居以夫为天河水清涟思予美人故次之以伐檀
魏国困行役申生乘其隙克敌谗言兴嬖子方夺嫡故次之以园有桃
申生能慕父宋襄能念母母出不可归两地思依依故次之以河广
宋在河南卫在河北卫有狄人难求救婚姻国渡河以庐曹先赖宋之力故次之以干旄
竿旄已入浚竿竹可钓淇淇浚不相及空劳卫女思故次之以竹竿
卫女维何许穆夫人因卫大夫告难感往事怀辛故次之以载驰 自伤力小不能救卫思控大邦维齐亦壻亦有曹邢可与共济拯焚溺孰如其鋭故次之以泉水
齐桓公新霸恤难扶危戍漕遣无亏归祭服重锦乘马门材使卫不颓故次之以有狐
卫警未谥郑亦戒严高克次河上而儿戏以淹公子素忧弃师直指无嫌故次之以清人
清人方在逐存亡未可卜有伯主畏简书国絶而复续图报百不足故次之以木瓜 桓城楚丘封卫又与之系马三百卫文新造邦衣大布兮冠大帛季年騷牝有三千消杀倏然生羽翮故次之以定之方中 作室揆以日听言揆以理信谗不灼理采苓山巔似故次之以采苓晋献惑骀姬信谗杀其子重耳乃出亡狐偃与终始

故次之以陟岵 狐偃服父训委质不二心譬彼中闺妇百岁共枕衾故次之以葛生 晋献嗜攻战国人多死亡天道好还骨肉相伤夷吾得晋国时在周襄王既不纳羣公子又欲杀其兄祚以不长故次之以有杕嗤夷吾无亲踽踽矍矍卒见获于秦灵台未改馆七年孰为陈故次之以权舆 重耳避惠久居于外怀安齐姜狐偃用怱谋于桑下醉以车载故次之以十亩之间遂行适曹乃覩蜉蝣故次之以蜉蝣 维共公为蜉

蝣蕞尔曹而三百人乘轩安能久存故次之以候人候人主送迎重耳返自秦罍也身自送舅氏路车乘马列佩珍故次之以渭阳 重耳因秦得入国是为晋文公寺人披求见告以吕卻将焚宫遂释斩祛怨等之于飘风故次之以羔裘豹祛
怨可释劳当报介推禄弗及贤者将高蹈表兹礼贤心将永以为好故次之以有杕之杜 杕杜道左行者失庇晋文过曹莫为饮食遂诛无礼以曹为首已复封曹乃颂德厚故次之以鳴鳩 过曹适郑郑亦不礼叔詹进谏当念兄弟及文定霸

问罪郑疆詹纣国难时号忠良故次之以羔裘
晋礼詹归在鲁僖三十年次年鲁始郊史克颂以传故次之以閼宫
僖行郊禘周公衰矣惟大饮烝为得古礼故次之以有駟
駟有駟马政大修齐戎田弩四种旁述故次之以駟
良马驰逸足不借翰晨风爱马良马至亦与好士同故次之以晨风 秦穆贱晨风固亦称好士
如何轻用人子车殉三子故次之以交交黄鸟黄鸟集于桑哀死断人肠硕鼠食我黍何不徙
远方此诗亦假托诡计招贤良叙在顷王世仅存此三章□次之以硕鼠 下此有定王其世诗
八篇晋人重卿族始立卿子田族行何累累紈袴或非贤试亦拟硕鼠奚以解嘲焉故次之以
汾沮洳
如陈夏徵舒亦陈之公族母氏为君淫二卿并不速朝夕在株林株林触人目故次之以株林
朝从东门来夕从东门去仰慙啓明星俯慙赤杨树故次之以东门之杨
东门有杨抑又有池麻紵与菅何拣择为故次之以东门之池 姬身有如池下流之所归姬貌
有如月深夜相因依徵舒窃纠杀机动何不知机早自屏故次之以月出
灵公死矣孔仪徙矣夏姬?矣故次之以泽陂 泽蒲体恒柔丘葛节恒濶求人恒如蒲待求恒
如葛故次之以旄丘处者赋旄丘出者赋式微卫不恤黎难黎君胡不归故次之以式微
繇来国势微大率教化坠所以子产乡校不毁蔚为郑名卿显於景王世故次之以子衿 侨重
子衿教化以行载诵丰诗得女之贞勿谓事微式关大闲圣人录闰节维此及泛彼栢舟两篇
故次之以丰删诗将终矣乃及敬王代孔子生斯时知命怀?慄

狄泉古下都非天子所诣荀跖虽纳王徘徊功亦细特录下泉诗以表王灵替弃置不复续世
衰无足系因之作春秋获麟而掩袂 孟子叹诗亡学者须论世四始其一端陋彼推五际维予
生也晚乐道窃有志次第诗篇章窃取大贤义托始于少康属望中兴意况复笃公刘亦言迁
都事周初迁日荣周末迁日頽东迁已卑陋矧此东迁媿 抑余殿下泉别又有取尔晋韩皆武
穆何从韩受氏荀伯晋之臣余祖晋兄弟今幸遇明主达政乃可仕自公退食暇编摩不辍晷
九侯山前余所居元孙末裔族所起论世首少康序篇下泉止圣人立教不忘先鲁商有颂意
如此千载而下有知诗经世本古义为承学一家之言者余心亦快矣

诗经世本古义卷後